

ax. lib.

Jan — 67  
— 128



fu

ac











R. P.  
PAVLI LAYMANN,  
SOCIETATIS IESV  
THEOLOGIA  
MORALIS.  
IN QVINQVE LIBROS  
DISTRIBVTA

*Corrigiote con comission de los II. Inquisidores segun el indice  
de 1703. fe. Ant.º Blancaff*



R. P.  
PAULI LAYMANI  
SOCIETATIS IESV.  
THEOLOGIA  
MORALIS  
IN QVINGVE LIBROS  
DISTRIBVTA

*Handwritten notes in cursive script, likely a library or ownership mark.*



THEOLOGIA.  
**MORALIS**

IN V. LIB. PARTITA.

**QVIBVS MATERIÆ OMNES**

PRACTICÆ, CVM AD EXTERNVM

ECCLESIASTICVM, TVM INTERNVM

Conscientiæ forum spectantes, noua  
Methodo explicantur.

**A V C T O R E**

**PAVLO LAYMANN**

**SOCIET. IESV THEOLOGO.**



**LVTETIÆ PARISIORVM,**

Sumptibus PETRI BILLAINE, viâ Iacobæâ, sub  
signo bonæ Fidei.

**M. DC XXVII.**







REVERENDISSIMO,

ET

ILLVSTRISSIMO DOMINO, D.

P A R I D I,

ARCHIEPISCOPO SALISBVR-

GENSI, APOSTOLICÆ SEDIS LEGATO

nato, S. R. I. Principi,

*Domino meo clementissimo.*



VBITANDVM non est, Reuerendissime, & Illustrissime Princeps, plurimum ad Ecclesiæ Catholicæ splendorem atque augmentum referre, si Parochi, aliique Ministri non tantum vitæ probitate, sed etiam scientijs instructi sint. *Labia enim Sacerdotis custodient scientiam, & legem requirent ex ore eius*, Malach. 2. Quomodo autem alios docebunt, si ipsi non didicerint? quomodo veritatis lumen reliquis præbebunt, si ipsi in ignorantia tenebris versentur? Eruditum quidem hoc seculum esse, nemo ambigit: Nam variæ hæreses in Europa exortæ, ac propagatæ multorum ingenia excitârunt: ferme enim accidit, vt cum Ecclesia pace fruitur, ignauia plerique se dedant, etiam Sacerdotes: sed cum Fidei aduersarij ingruunt, tum etiam Ecclesiæ defensores ad bellum exercentur. Quare hæreses esse oportere, dixit Christus Dominus; quia hæc Dei Optimi sapientia est, vt ex ijs, quæ mala sunt, bona eliciat, propter electos. Quanta in omni scientiarum genere doctissimorum virorum volumina præterito seculo edita sunt? longè plura, quàm trecentis antea lustris in toto Christiano orbe. Nam librorum in quauis facultate catalogus fieri poterat: sed eos, qui post exortas in Europa hæreses editi sunt, libros in numerum redigere possibile haut erit.

Veruntamen quod in conuiuio accubantibus accidere solet, vt epulorum copia, atque varietas oculos quidem oblectet, sed stomachum grauet potius, quàm releuet; ita librorum ingens copia bibliothecas ornat, legentium verò ingenia non rarò perturbat. Quàm multos audiuius, qui dicerent, in vastis Scriptorum voluminibus contineri doctrinas optimas; sed quis eas seligat, quæ ad cuiusque captum accommodatæ sunt? quis discernat à subtilibus quibusdam quæstionibus, quales in Academicis scholis disputari solent; sed ad mores hominum formandos, populûmque instruendum parum vtilis videntur? Sin verò moralis doctrinæ compendia ipsis offerantur, iterum querimoniam existunt; aliud non esse, quam innumeram legum, canonum, ac censurarum congeriem; non rationibus, sed meris allegationibus nixam, quæ legentis ingenium fatigent, memoriâque confundant. Id nimirum non pauci ex Clero desiderant; quibus vel non sumptus ad libros multos emendos; vel non tempus, ingeniumque ad legendos suppetit; vt, quæ ad conscientiam, totûmque Christiani hominis officium, atque Ecclesiasticos ritus spectant, secundum communem Doctorum sententiam, & Ecclesiarum consuetudinem facili methodo, aptisque rationibus collecta, non magno opere proponantur.

Hunc laborem vt pro bono publico susciperem, multi hortabantur, & instabant frequenter, quod viderent me pluribus annis in moralis Theologiæ publicis prælectionibus versatum fuisse. Sed nimirum mearum agnoscens virium tenuitatem, molem huius negotij aggredi ausus non sum: quædam tamen postea concinnare cœpi, non certo in lucem edendi proposito; sed potius vt tentarem, quidnam in hoc scribendi genere præstare pos-



sem. Donec tandem Superiorum meorum voluntas, imperiūque accessit: tum verò dubitare non potui, Dei mihi auxilium affuturum, cui placet plerūque per infirma instrumenta operari, si per obedientiæ virtutem Prælatorum suorum ductui se accommodent, in Deo omnis boni auctore, atque humanæ infirmitatis vnico adiutore, spe magna collocata.

Vt autem Reuerendiss. & Illustriss. Celsitudini Vestræ hoc opus dedicarem, causæ non exiguæ postulabant. Cum enim Ecclesiasticum sit, ad Clericorum maximè instructionem conscriptum; cui potius offerri debeat, quàm Ecclesiarum nostrarum Antistiti Metropolitano? cuius auctoritate, & fauore munitum, tutius, vberiorēque fructu in multorum manus deuenire queat. Etenim notissimum est, quanta diligentia, & cura Celsitudo Vestra rei Ecclesiasticæ conseruandæ, augendæque inuigilet, vt non satis esse arbitretur, Ecclesijs curatores, aliisque officijs idoneos ministros præfecisse; nisi etiam eorum acta frequenter inspiciat, de iudicet, Ecclesias visitet, quæ emendanda sunt, corrigat, Clerumque omnem in disciplina conseruet. Scit enim inter Ecclesiæ Ministros reperiri aliquos posse, non pastores, sed mercenarios, quæ sua sunt quærentes, non quæ IESV Christi, non animarum, sed pecuniarum lucris inhiantes. Quod si oues Christi ab ijs negligantur, aut perdantur, profectò Episcopi ignorantie excusatione culpam à se amouere non possunt: cum ad ipsorum spectet officium, attendere ouibus suæ nimirum curæ à Christo summo Pastore commissis.

Cum Reuerendiss. & Illustriss. Celsitudinem Vestram ante annos sex ad Salisburgensem Episcopatum euectam esse intellexi, prælagijt animus, Ecclesiæ vtilem electionem fore; vt sæpius cum gaudio dicerem, eam esse optimi Præsulis prudentiam, solertiam, vitæque integritatem, vt sub ipso Episcopatus Salisburgensis haud dubiè felicitatem consecuturus; atque inde etiam in alias Ecclesias fructus promanaturus sit. Recordabar enim adolescentiæ Celsitudinis Vestræ, quæ olim tanquam in semine omnibus ostendebat, quàm vberes fructus in ætate matura nascituri essent.

Ante annos viginti Ingolstadij ferme eodem tēpore & Præfectum Sodalitatis B. Mariæ Virginis Academicæ agebat; & in Acadamia publicā disputationem de scientiarum varietate conscribebat, ac proponebat, vtrumque magna omnium laude, & admiratione. Non assentandi causa hæc dico, multi alij sunt, qui etiam hodie id recordatur, ac testificantur. Atque ego quidem Professor, ac proinde Præsides disputationis illius constitutus eram: sed præsidio nullo opus fuit. Quin audiui aliquos, cum dicerent, se doctorem alium non desiderasse: tanto iudicij acumine ad singula reddebatur responsio, vt etiam qui ex altioribus scholis adessent, non pauca se hoc Respondente didicisse gloriarentur. Hæc quidem minutiora, seu potius præludia quædam sunt, ex quibus maiora postea consecuta conspiciamus. Sed ego magis delector illis recensendis, quibus etiam Societas nostra subsidium aliquod attulisse videatur.

Accedit insuper singularis beneuolentia, & fauor, quem Reuerendiss. & Illustriss. Celsitudo Vestra erga Societatem nostram clarissimis beneficentiæ signis declarauit: vt ingratitude vitio notari possemus, nisi nostra etiam seruitia & obsequia deferremus. Quare ego quidem hunc meum laborem, post Deum Optimum Maximum, Reuerendiss. & Illustriss. Celsitudini Vestræ, Ecclesiæ eius Metropolitanæ, aliisque addictis Ecclesijs humillimè offero, ac dedico, maximi beneficij loco ducturus, si intellexero, hoc munus, vt ab animo obseruantia, ac studij plenissimo profectum est, ita etiam serena fronte acceptum fuisse. Deum Optimum Maximum ex animo precor, vt Reuerendiss. & Illustriss. Celsitudini Vestræ ad Ecclesiæ Catholicæ vtilitatem, in multos annos prosperum rerum successum, ac deniq; bona cœlestia largiatur. Monachij, ex Collegio Societatis IESV, die 29. Iunij, Anno Christi M. DC. XXV.

*Reuerendiss. & Illustriss. Celsitudinis Vestræ*

Humillimus in Christo seruus

PAVLVS LAYMANN.





# PRÆFATIO AD LECTOREM.

**N**UNC tandem, Lector beneuole, desiderio tuo satisfactum vides, quando tractatus omnes morales, quos oeties percurrando, in Electorali hoc Societatis I E S V Gymnasio tradidi, & plerisque publicis disputationibus preposui, in vnum volumen collectos, edo. Copiosius quidem, quam in scholis dictabam, adiectisque pluribus particularibus casibus, quos antè mittebam, partim ob temporis breuitatem, partim quòd magis ad externum, quam internum conscientie forum pertinerent. Magno mihi hæc scriptio labore constat, quòd prudens Lector ipsemet iudicabit. Ego autem Dei bonitatem prædico, qui mihi continuis auxilijs adsuit, vt quod cæpi opus ob gloriam eius, etiam ad finem perducerem. Atque hoc ipso laboris fructu contentus sum, neque alium expetò; nisi vt multis legentibus ad animæ salutem, ad Ecclesiæ Catholicæ augmentum, ac diuini nominis exaltationem cedat.

Inprimis autem opto, hos libros probari personis Ecclesiasticis; maximè animarum Pastoribus. Cum tantopere necessarium sit ad splendorem, & incrementum Catholicæ Ecclesiæ, vt, qui aliorum animos doctrina, & moribus bonis informare debent, ipsimet in vtroque genere exculti sint: ob quam obligationem Deo iusto iudici in extremo iudicij die rationem reddere debebunt. Magnum profectò laboris mei fructum, animique consolationem reportabo, si intelligam, Parochos, aliòsque Ecclesiæ Ministros Theologiam hanc moralem sibi vtilem arbitrari, cuius lectioni cum voluptate inhæreant, ad quotidianum praxin, ad prædicationem, rudiumque hominum instructionem quedam interdum colligere studeant.

Ordinem tractationum eum ferme imitatus sum, quem S. Thomas de Aquino in Theologica summa tenuit, omisis ijs, quæ ad theoriam propriè spectant. At verò capita doctrinæ Christianæ, quæ sunt de conscientia, libero arbitrio; de Fide, Spe, Charitate; de oratione, iuramento; voto, Religionis statu; de Sanctorum cultu, festorum ac ieiuniorum obseruationibus, secundum proprias rationes enucleatius pertractaui: appositis etiam antiquorum Conciliorum canonibus, & sanctorum Patrum sententijs: quia hæc res magnam vim habet ad ostendendum traditionis Catholicæ antiquitatem populum pro concione, & in catechismo erudiendum, atque in vera Fide confirmandum: denique ad Ecclesiæ aduersarios, ac nouatores coarguendum.

In tractatibus iuridicis de legibus, ac censuris, de iurisdictione, præsertim Ecclesiasticorum Prelatorum, de possessione, vsucapionibus, iniustis damnorum illationibus, ac restitutione; item de contractibus, vltimis voluntatibus, publicis denuntiationibus, atque iudicijs, præsertim matrimonialibus causis; de Ecclesiasticis beneficijs, pensionibus, decimis, alijsque prouentibus, & immunitatibus, quæstiones præcipuas proposui, ac decidi; in omnibus, cum breuitatem sectatus, tum claritatem: vt animum legentis non confunderem, sed magis afficerem, ac detinerem. Profectò id agere mihi propositum fuit; an verò affecutus sim, alij indicabunt.

Quòd si, amice Lector in his libris aliquid bonum, & vtile repperis, D E V M lauda, omnis boni auctorem: sin quid erratum fuerit, mihi adscribe; sed ignosce: homo enim sum, & quidem infirmus, qui errare potui; præsertim in tanta rerum varietate, ac multitudine.

Omnia porro asserta Superiorum meorum, inprimis Romanæ Apostolicæ sedis iudicio lubens submitto: sed neque aliorum censorum examen detractò, paratus etiam ab ijs corrigi, & quæ scripsi, retractare, si quid à veritate, aut Ecclesiasticis canonibus, alienum demonstrauerint. Non enim propria sensa retinere; aut singulares sententias alijs obtrudere; sed quæ apud Doctores, & in Catholica Ecclesia communiter tradita, ac recepta sunt, dilucidè explicare mihi animus fuit. Moneo tamen priuatos quoslibet; vt prius singula diligenter examinent, quam, ob præiudicatas proprias sententias, quippiam damnare in animum inducant.





# FACULTAS R. P. PROVINCIALIS.



Vm Moralem Theologiam, quam quin-  
que complexus est libris P. PAVLVS  
LAYMANN, nostræ Societatis Theo-  
logus, quatuor Patres Theologi ad id de-  
putati, dignam censeant, quæ typis in pu-  
blicum proferatur : Ego Gualterus Mundbrot So-  
cietatis IESV per Superiorem Germaniam Præ-  
positus Prouincialis, facta mihi potestate ab Admo-  
dum R. P. N. Mutio Vitellesco Præposito Genera-  
li, eius imprimendæ facultatem concedo.

In cuius rei fidem Auctori hoc chirographum Of-  
ficij sigillo munitum dedi. Monachij XV. Aprilis.  
Anno M. DC. XXV.

ELENCHVS





# ELENCHVS TRACTATVVM.

ET

## CAPITVM.

QVÆ IN QVINQVE MORALIS THEOLOGIÆ  
LIBRIS CONTINENTVR.

### LIBER PRIMVS.

*De generalibus moralis Theologiæ principijs:*

*Continet tractatus quinque: quorum primus de CONSCIEN-  
TIA sex capita habet.*

- Cap. I. De Synteresi.  
Cap. II. De Conscientia, quid sit.  
Cap. III. Quotuplex sit Conscientia.  
Cap. IV. Quanta sit obligatio conscientia præcipientis.  
Cap. V. De Conscientia dubia, & opinatiua. Habet §§. 4.  
§. I. De dubio Iuris propriè, seu practicè pratico.  
§. II. De dubio, seu quæstione practicè vniuersali,  
quæ est inter diuersas Doctorum probabiles opi-  
niones.  
§. III. De dubio Iuris merè speculatiuo.  
De Medico, & Chirurgo.  
De Iudice.  
De Aduocato.  
De Iure proprietatis.  
De valore Matrimonij.  
De Iure belli.  
§. IV. De dubio & quæstione facti.  
Cap. VI. De Conscientia scrupulosa.

### TRACTATVS SECVNDVS.

*De Actibus humanis voluntarijs, & inuoluntarijs: Continet  
capita decem.*

- Cap. I. De spontaneo & voluntario.  
Cap. II. De libero.  
Cap. III. Quotuplex sit voluntarium, seu liberum.  
Cap. IV. De ignorantia, an & quomodo voluntarium  
tollat?  
Cap. V. De concupiscentia, vtrum voluntarium tollat,  
aut minuat?  
Cap. VI. De coactione & metu, vtrum inuoluntarium  
efficiant?  
Cap. VII. Vtrum actus morales speciem & essentiam  
suam accipiant ab obiecto?  
Cap. VIII. De humanarum actionum circumstantijs in  
communi.  
Cap. IX. De circumstantijs in particulari.

Cap. X. Quænam peccatorum circumstantiæ in Con-  
fessione necessario explicandæ sint?

### TRACTATVS TERTIVS.

*De Peccatis in communi: septem capita complectitur.*

- Cap. I. Quid sit peccatum?  
Cap. II. De specifica vnitæte, ac distinctione peccatorum.  
Cap. III. De numerica distinctione peccatorum.  
Cap. IV. De diuisionibus peccati accidentalibus.  
Cap. V. De peccato mortali, & veniali.  
Cap. VI. De delectatione morosa.  
Cap. VII. De peccatis ex ignorantia, ex infirmitate, &  
ex certa malitia

### TRACTATVS QVARTVS.

*De humanis Legibus: diuisus in capita quatuor & viginti.*

- Cap. I. Quid sit lex.  
Cap. II. De promulgatione legis.  
Cap. III. De acceptatione legis.  
Cap. IV. De materia legis humanæ.  
Cap. V. De iurisdictione.  
Cap. VI. De lege, ac legislatore Ecclesiastico vniuersali:  
habet §§. 3.  
§. I. De Summo Pontifice.  
§. II. De generalibus Concilijs.  
§. III. De iure communi canonico.  
Cap. VII. De particularibus Ecclesiasticis legislatoribus,  
eorumque iurisdictione: habet §§. 8.  
§. I. De Concilijs non œcumenicis.  
§. II. De Episcoporum iurisdictione.  
§. III. De iurisdictione Metropolitanæ, & Ar-  
chiepiscopi.  
§. IV. De iurisdictione, & potestate Capituli.  
§. V. De iurisdictione Vicarij generalis.  
§. VI. De iurisdictione Legati Apostolici.  
§. VII. De iurisdictione Cardinalium Ecclesiæ  
Romanæ.  
§. VIII. De potestate Religionum, & Prælato-  
rum regularium.  
Cap. VIII. De lege, & legislatiua potestate civili, siue po-  
litica.  
§. vn. De lege civili.



## ELENCHVS

- Cap. IX. Vtrum legislator propria lege obligetur?  
 Cap. X. Vtrum infantes, & amentes legibus obligentur?  
 Cap. XI. Vtrum ciues, vel diocesani obligentur legibus territorij proprii, dum absentes sunt?  
 Cap. XII. Vtrum aduenæ & peregrini teneantur legibus locorum, in quibus pro tempore versantur; quamuis in proprio ipsorum territorio non obligentur?  
 Cap. XIII. An, & qua ratione Clerici ciuilibus legibus obligentur?  
 Cap. XIV. De effectu legis, ac præcepti humani, quæ est obligatio.  
 Cap. XV. De lege pœnali.  
 Cap. XVI. De lege prohibente, vel infirmante pacta, contractus, testamenta, &c.  
 Cap. XVII. De lege Cæsarea, infirmante vltimas defunctorum voluntates non solemnes.  
 Cap. XVIII. De interpretatione legum.  
 Cap. XIX. De restrictione legis secundum æquum, & bonum.  
 Cap. XX. De excusatione ob ignorantiam.  
 Cap. XXI. De mutatione, derogatione, abrogatione legis.  
 Cap. XXII. De dispensatione in lege.  
 Cap. XXIII. De priuilegijs.  
 Cap. XXIV. De consuetudine.

### TRACTATVS QVINTVS,

*De Ecclesiasticis censuris, & irregularitate: diuisus in quinque partes.*

#### PARS PRIMA.

*De censuris in communi: habet septem capita.*

- Cap. I. Quid sit censura Ecclesiastica?  
 Cap. II. Quotuplex sit censura?  
 Cap. III. Quis censuram ferre possit?  
 Cap. IV. In quos censura ferri possit?  
 Cap. V. Ob quam causam censura iniusta ferri possit?  
 Cap. VI. Quibus casibus censura iniusta; & quibus etiam inualida sit?  
 Cap. VII. De absolutione à censura.

#### PARS SECUNDA.

*De censura excommunicationis: habet capita sex.*

- Cap. I. Quid sit excommunicatio, & quotuplex.  
 Cap. II. De effectibus excommunicationis.  
 Cap. III. De pœnis, siue censuris, quæ incurruntur ob communicationem cum excommunicato; & speciatim de excommunicatione minore.  
 Cap. IV. Quinam excommunicati sint vitandi, seu non tolerati; & qui tolerat seu non vitandi?  
 Cap. V. De excommunicationibus iuris; & speciatim de ea, quæ ob Clerici percussione decreta est.  
 Cap. VI. De absolutione ab excommunicatione.

#### PARS TERTIA.

*De suspensione: quinque capita habet.*

- Cap. I. Quid, & quotuplex sit suspensio.  
 Cap. II. Quis possit censuram suspensionis ferre, & in quos.  
 Cap. III. Ob quam causam suspensio ferri possit.  
 Cap. IV. Quibus modis suspensio tollitur.  
 Cap. V. De depositione, ac degradatione.

#### PARS QUARTA.

*De interdicto: sex capita habet.*

- Cap. I. Quid, & quotuplex sit interdictum.  
 Cap. II. De effectibus interdicti.  
 Cap. III. De violatione interdicti, & decretis pœnis.  
 Cap. IV. Quis possit interdictum ferre, in quos, & ob quam causam.  
 Cap. V. Quibus modis interdictum tollatur, vel relaxetur.  
 Cap. VI. De cessatione à diuinis.

## PARS QVINTA.

*De Irregularitate: nouem capita continet.*

- Cap. I. Quid, & quotuplex sit irregularitas.  
 Cap. II. De irregularitatibus, quæ incurruntur occasione Sacramenti Baptismatis.  
 Cap. III. De irregularitatibus ex ordinis abusu.  
 Cap. IV. De irregularitatibus ex infamia.  
 Cap. V. De irregularitate ex natalium defectu.  
 Cap. VI. De irregularitate ex bigamia.  
 Cap. VII. De irregularitate ex corporis vitio.  
 Cap. VIII. De irregularitate ex obligatione seruili, &c.  
 Cap. IX. De dispensatione super irregularitatibus.

## LIBER SECVNDVS.

*De Theologicis virtutibus, Fide, Spe, & Charitate.*

*Complectitur tractatus tres: quorum primus de Theologica Fide continet capita septendecim.*

- Cap. I. De nomine, definitione, ac diuisione Fidei.  
 Cap. II. De obiecto, seu subiecto Fidei.  
 Cap. III. De rationibus, seu motiuis Fidei diuinæ.  
 Cap. IV. Vtrum Fides diuina discursiua sit.  
 Cap. V. De resolutione Fidei.  
 Cap. VI. De ordine rerum credendarum.  
 Cap. VII. De proponente Fidem.  
 Cap. VIII. An, & quatenus Fides diuina, ac supernaturalis viatoribus necessaria sit, necessitate medijs ad salutem.  
 Cap. IX. Quæ Fides, aut rerum diuinarum cognitio necessaria sit, necessitate præcepti.  
 Cap. X. Quo tempore præceptum Fidei diuinæ obliget.  
 Cap. XI. De præcepto, siue obligatione externæ Fidei confessionis.  
 Cap. XII. De infidelitate, eiusque speciebus.  
 Cap. XIII. De hæresi.  
 Cap. XIV. De excommunicatione lata in hæreticos, eorumque credentes, fautores, &c.  
 Cap. XV. De excommunicatione Bullæ lata in eos, qui libros hæreticos legunt, &c.  
 Cap. XVI. De apostatis, eorumque, & hæreticorum pœnis.  
 Cap. XVII. De communicatione Christianorum cum infidelibus, puta Iudæis, ac Paganis.

### TRACTATVS SECVNDVS.

*De virtute Spei, & oppositis vitijs: habet duo capita.*

- Cap. I. Quid sit Spes virtus Theologica.  
 Cap. II. De peccatis contra Spem.

### TRACTATVS TERTIVS.

*De Charitate, Misericordia, atque oppositis vitijs: continet tredecim capita.*



## TRACTATVVM ET CAPITVVM.

- Cap. I. Quid sit Charitas.  
 Cap. II. De præceptis Charitatis.  
 Cap. III. De ordine Charitatis.  
 Cap. IV. De dilectione peccatorum, atque inimicorum.  
 Cap. V. De actibus Charitatis.  
 Cap. VI. De Misericordia, & eleemosyna corporali.  
 Cap. VII. De correctione fraterna.  
 Cap. VIII. De odio Dei, ac proximi.  
 Cap. IX. De peccato acedia.  
 Cap. X. De peccato inuidia.  
 Cap. XI. De discordia, contentione, ac schismate.  
 Cap. XII. De bello.  
 Cap. XIII. De scandalo.

### LIBER TERTIVS.

#### *De Iustitia & Iure, cæterisque Cardinalibus virtutibus:*

*Continet sectiones quinque.*

- Seçtio I. De virtute morali generatim.  
 Seçtio II. De Prudentia.  
 Seçtio III. De Fortitudine, & oppositis vitijs.  
 Seçtio IV. De Temperantia, & vitijs oppositis.  
 Seçtio V. *Qua est de Iustitia, & Iure, sex tractatus in se cõplectitur: quorum primus de generalibus principijs iuris & iustitiæ, continet novem capita.*

- Cap. I. De obiecto iustitiæ, quod est ius, seu iustum.  
 Cap. II. De iustitia generali, seu legali.  
 Cap. III. De iustitia particulari.  
 Cap. IV. De speciebus iustitiæ particularis.  
 Cap. V. De iure domini, & rerum diuisione.  
 Cap. VI. De usufructu, usu & habitatione.  
 Cap. VII. De possessione.  
 Cap. VIII. De exceptione, præscriptione, ac vſucapione.  
 Cap. IX. De seruitutibus, earumque præscriptione.

### TRACTATVS SECVNDVS.

*De restitutione: habet duodecim capita.*

- Cap. I. Quid sit restitutio.  
 Cap. II. Vtrum restituere ablata necessarium sit ad salutem.  
 Cap. III. De possessore bonæ fidei, quatenus restituere teneatur.  
 Cap. IV. De possessore malæ fidei, quatenus restituere teneatur.  
 Cap. V. Quinam restituere debeant damnum iniuste datum.  
 Cap. VI. Quantum singuli damnificantes restituere debeant, & quo ordine.  
 Cap. VII. Vtrum restituere debeat, qui aliquem à consecutione alicuius boni impediuit.  
 Cap. VIII. Vtrum restituere teneatur, qui aliquem ad peccatum induxit, vel à Religione abduxit.  
 Cap. IX. Cui restitutio fieri debeat.  
 Cap. X. Quo tempore, & loco restitutio fieri debeat.  
 Cap. XI. Quo ordine restituendum sit.  
 Cap. XII. De restituendi impotentia.

### TRACTATVS TERTIVS.

*De delictis: Continet partes tres; quarum PRIMA est de obligationibus contractis ex iniusto fortunarum damno: habet sex capita.*

- Cap. I. De furto.  
 Cap. II. De rapina.  
 Cap. III. De tributis, & vectigalibus, eorundemque de fraudatione.  
 §. vnicus. De subsidio charitativo.  
 Cap. IV. De crimine falsi.  
 Cap. V. De monetæ falsatione, ac mutatione.  
 Cap. VI. De damno iniuste dato.

### PARS ALTERA.

*De obligationibus contractis ex iniusta laesione famæ, & honoris, diuisa in septem capita.*

- Cap. I. Quid sit fama, quid honor, laus, gloria?  
 Cap. II. De temeratio iudicio, suspicione, dubitatione.  
 Cap. III. De detractio.  
 Cap. IV. De denuntiatione fraterna.  
 Cap. V. De obligatione secreti.  
 Cap. VI. De contumelia.  
 Cap. VII. De restitutione famæ & honoris.

### PARS TERTIA.

*De obligationibus contractis ex iniusta laesione corporis; habet capita quatuordecim.*

- Cap. I. De occisione & mutilatione sui ipsius.  
 Cap. II. De homicidio, quod publica auctoritate fit.  
 Cap. III. De homicidio, ob defensionem.  
 Cap. IV. De homicidio voluntario, & casuali.  
 Cap. V. De duello.  
 Cap. VI. De obligatione compensandi damnum ex homicidio, vel mutilatione.  
 Cap. VII. De irregularitate orta ex homicidio, vel mutilatione publica auctoritate facta.  
 Cap. VIII. De irregularitate ex homicidio contingente in bello offensiuo.  
 Cap. IX. De irregularitate ex homicidio ob defensionem.  
 Cap. X. De irregularitate, ex homicidio voluntario, & casuali.  
 Cap. XI. De irregularitate ex mutilatione.  
 Cap. XII. De dispensatione super irregularitate ex homicidio, & mutilatione.  
 Cap. XIII. De strupo.  
 Cap. XIV. De adulterio.

### TRACTATVS QVARTVS.

*De pactis & contractibus: Est dispersitius in capita vnum & triginta.*

- Cap. I. Quid sit pactum.  
 Cap. II. De pacto nudo, & vestito.  
 Cap. III. Quid sit contractus, & quotuplex.  
 Cap. IV. De qualitatibus contractuum.  
 Cap. V. De contractibus ob errorem, aut dolum initis.  
 Cap. VI. De contractibus ob metum initis.  
 Cap. VII. Si res post contractum pereat, vel deterior fiat, cuius damno id accidat.  
 Cap. VIII. Vtrum filius familias contractus instituere possit.  
 Cap. IX. Vtrum pupillus, & minor XXV. annis contrahere possint.  
 Cap. X. De alienatione bonorum Ecclesiasticorum.  
 Cap. XI. De in integrum restitutione Minorum, Ecclesiæ, &c.  
 Cap. XII. De donatione.



## TRACTATVVM ET CAPITVVM

- Cap. XIII. De dote, paraphernis, donatione propter nuptias, & sponſalitia largitate.  
 Cap. XIV. De commodato, & precario.  
 Cap. XV. De mutuo.  
 Cap. XVI. De ſura.  
 Cap. XVII. De emptione, ac venditione.  
     §. 1. De pretio rerum venalium.  
     §. 2. De re vendita, ſive merce.  
     §. 3. De venditione rei alienæ, cuiusque emptione.  
     §. 4. De merce duobus in ſolidum vendita.  
     §. 5. Quæ res vendi poſſint, vel non poſſint, vel vendi debeant.  
     §. 6. De retractu gentilitio.  
     §. 7. De negotiatione & monopolij.  
 Cap. XVIII. De cenſibus.  
 Cap. XIX. De cambio.  
 Cap. XX. De contractu ſocietatis.  
 Cap. XXI. De ludo, & ſponſionibus.  
 Cap. XXII. De contractu locationis, & conductionis.  
 Cap. XXIII. De emphyteuſi.  
 Cap. XXIV. De feudo.  
 Cap. XXV. De deposito.  
 Cap. XXVI. De mandato, procuratore, ſyndico.  
 Cap. XXVII. De actione ex iuſſu, & de in rem verſo.  
 Cap. XXVIII. De negotiorum geſtore.  
 Cap. XXIX. De fide iuſſoribus.  
 Cap. XXX. De pignore, & hypotheca.  
 Cap. XXXI. De tranſactione.

### TRACTATVS QVINTVS.

*De Teſtamento, aliſque vltimis voluntatibus complectitur duodecim capita.*

- Cap. I. Quid ſit teſtamentum, & quotuplex.  
 Cap. II. De teſtamentis priuilegiatis.  
 Cap. III. Quis de bonis ſuis teſtari poſſit, vel non poſſit; & an teſtandi aliqua obligatio incumbat.  
 Cap. IV. De reuocatione teſtamenti.  
 Cap. V. De hæredibus inſtituendis.  
 Cap. VI. De hæredibus ab inſtato venientibus.  
 Cap. VII. De renuntiationibus hæreditatum.  
 Cap. VIII. De codicillis.  
 Cap. IX. De ſubſtitutione, & fidei commiſſo.  
 Cap. X. De legatis, & fidei commiſſis particularibus.  
 Cap. XI. De executione teſtamenti, aliarumque vltimarum voluntatum.  
 Cap. XII. De ſepultura, & portione canonica.

### TRACTATVS SEXTVS.

*De Iudicijs: abſoluitur ſex capitibus.*

- Cap. I. De iudicio.  
 Cap. II. De iudice.  
 Cap. III. De actore & accusatore.  
 Cap. IV. De probationibus.  
 Cap. V. De iure.  
 Cap. VI. De appellatione.

## LIBER QVARTVS.

*De virtute & ſtatu Religionis.*

*Diuiditur vniuerſim in decem tractatus: Primus de oratione, & horis canonicis continet capita ſex.*

- Cap. I. De oratione vniuerſim.

- Cap. II. De horis Canonicis, quæ & quot ſint.  
 Cap. III. In quam diei, vel noctis partem ſingule horæ, ſive preces canonicæ propriæ cadant.  
 Cap. IV. Quæ perſonæ ad officium Eccleſiaſticum obligatæ ſint.  
 Cap. V. De modo, & circumſtantijs recitandi Eccleſiaſticum officium.  
 Cap. VI. De cauſis excuſantibus ab officio.

### TRACTATVS SECVNDVS.

*De Eccleſiaſticis beneficijs: habet octodecim capita.*

- Cap. I. De notione & definitione Eccleſiaſtici beneficij.  
 Cap. II. De origine & inſtitutione Eccleſiaſticorum beneficiorum.  
 Cap. III. Vtrum beneficiati ſint veri & abſoluti domini Eccleſiaſticorum reddituum.  
 Cap. IV. Quotuplex ſit beneficium Eccleſiaſticum.  
 Cap. V. De obligatione annexa beneficio Eccleſiaſtico recitandi officij Canonici.  
 Cap. VI. De reſidentia.  
 Cap. VII. De diſtributionibus quotidianis.  
 Cap. VIII. De pluritate beneficiorum.  
 Cap. IX. De vnione beneficiorum.  
 Cap. X. De inſtitutione, & collatione Eccleſiaſticorum beneficiorum.  
 Cap. XI. De beneficiorum reſeruationibus ac deuolutionibus.  
 Cap. XII. De beneficijs electiuis.  
 Cap. XIII. De beneficijs patronatis.  
 Cap. XIV. De requiſitis qualitatibus eorum, quibus Eccleſiaſtica beneficia conferuntur.  
 Cap. XV. De peccato, aliſque incommodis oriri ſolit ex prouiſione indigni.  
 Cap. XVI. De numero Canonicorum, aliorumve Conuentualium augendo, vel minuendo.  
 Cap. XVII. Quibus modis beneficia amittantur, & vacent.  
 Cap. XVIII. De penſionibus.

### TRACTATVS TERTIVS.

*De iuramento, & periurio, in quatuordecim capitibus ſectus.*

- Cap. I. De notione ac definitione iuramenti.  
 Cap. II. De quibuſdam iurandi formulis.  
 Cap. III. Vtrum licitum ſit iurare.  
 Cap. IV. De diuiſionibus iuramenti.  
 Cap. V. De iuramento iudiciali.  
 Cap. VI. De materia, & obligatione promiſſorij iuramenti.  
 Cap. VII. De obligatione iuramenti promiſſorij ob alterius iniuriam præſtiti.  
 Cap. VIII. Vtrum pacta, & contractus alioquin irriti acceſſione iuramenti confirmentur.  
 Cap. IX. De iuramenti interpretatione, & tacite ſubintellectis conditionibus.  
 Cap. X. Vtrum obligatio iuramenti perſonalis ſit; & num actio inde oriatur; atque ad hæredes tranſcat.  
 Cap. XI. De promiſſorij iuramenti irritatione, diſpenſatione, relaxatione, commutatione.  
 Cap. XII. Quæ perſonæ iurare poſſint.  
 Cap. XIII. De mendacio.  
 Cap. XIV. De periurio, ſeu iuramento falſo.

### TRACTATVS QVARTVS.

*De voto, & voti relaxatione: octo capitibus abſoluitur.*

- Cap. I. De nomine, ac definitione voti.



## ELENCHVS

- Cap. II. De materia voti.
- Cap. III. De obligatione voti.
- Cap. IV. Vtrum melius, magisque meritorum sit opus ex voto, quam sine voto.
- Cap. V. De voto pœnali.
- Cap. VI. De voto conditionali.
- Cap. VII. Quenam personæ vouere possint.
- Cap. VIII. Quibus modis votum extinguatur, aut relaxetur per dispensationem, commutationem.

### TRACTATVS QVINTVS.

*De statu Religionis: diuiditur in tredecim capita.*

- Cap. I. De essentia status religiosi.
- Cap. II. De origine, & varietate Religionum.
- Cap. III. De comparatione Religionum inter se.
- Cap. IV. De ingredientibus Religiohem.
- Cap. V. Quæ conditiones requirantur, vt professio in Religione valida sit.
- Cap. VI. De varijs votis Religionem ingrediendi, aut profitendi.
- Cap. VII. De voto paupertatis in Religione approbata edito.
- Cap. VIII. De voto Religiosæ castitatis.
- Cap. IX. De voto religiosæ obedientiæ.
- Cap. X. De prærogatijs religiosi status.
- Cap. XI. Vtrum Religiosus in iudicio stare possit.
- Cap. XII. De clausura Monialium, & prohibito ingressu intra claustra Monasteriorum, tum mulierum, tum virorum.
- Cap. XIII. De Religiosis eiectis, & fugitiuis.

### TRACTATVS SEXTVS.

*De decimis, primitijs, alijsque oblationibus: continet septem capita.*

- Cap. I. De notione, definitione, ac diuisione decimarum.
- Cap. II. Quo iure decimæ Ministris Ecclesiæ pendantur.
- Cap. III. Quæ personæ ad decimas obligentur.
- Cap. IV. Quibus decimæ pendendæ sint.
- Cap. V. Quando, & vbi decimæ pendendæ sint.
- Cap. VI. De varijs modis acquirendi ius decimarum.
- Cap. VII. De primitijs, & oblationibus.

### TRACTATVS SEPTIMVS.

*De festorum obseruatione: continet quinque capita.*

- Cap. I. De diei Dominicæ, & aliorum festorum institutione.
- Cap. II. De prohibitione operum seruilium in diebus festis.
- Cap. III. De præcepto audiendi Missam festis diebus.
- Cap. IV. De grauitate huius præcepti quoad vtramque sui partem; & causis excusantibus ab obligatione illius.
- Cap. V. De Sanctorum canonizatione, imaginum, & reliquiarum sacrarum veneratione.

### TRACTATVS OCTAVVS.

*De obseruatione ieiuniorum: absoluitur tribus capitibus.*

- Cap. I. Quid sit Ecclesiasticum ieiunium.

- Cap. II. Quibus temporibus ieiunium ab Ecclesia præceptum sit.

- Cap. III. De causis liberantibus à ieiunio.

### TRACTATVS NONVS.

*De Ecclesiastica immunitate: habet capita decem.*

- Cap. I. Quid sit Ecclesiastica immunitas.
- Cap. II. De causis, & negotijs Ecclesiasticis à ciuili potestate omnino exemptis.
- Cap. III. De asylo, seu iure immunitatis constituto Ecclesijs.
- Cap. IV. De exceptione Clericorū in causis criminalib⁹.
- Cap. V. De immunitate, seu exemptione Clericorum in ciuilibus causis.
- Cap. VI. De immunitate, & exemptione Ecclesiasticorum bonorum.
- Cap. VII. Quenam personæ Ecclesiasticæ exemptione gaudeant.
- Cap. VIII. Quo iure fundata sit Ecclesiastica immunitas; non positiuo tantum, an etiam diuino, ac naturali.
- Cap. IX. Quibus modis immunitas Ecclesiastica violari soleat.
- Cap. X. Vtrum Ecclesiastica immunitas per contrariā consuetudinem tolli, aut minui possit.

### TRACTATVS DECIMVS.

*De vitijs oppositis virtuti Religionis: continet octo capita.*

- Cap. I. De superstitione, eiusque speciebus.
- Cap. II. De idololatria.
- Cap. III. De diuinatione.
- Cap. IV. De Magia.
- Cap. V. De tentatione Dei.
- Cap. VI. De blasphemia.
- Cap. VII. De sacrilegio.
- Cap. VIII. De simonia: habet §§. 9.
  - §. 1. Quid sit simonia.
  - §. 2. Quale pretium in simonia requiratur.
  - §. 3. De diuisione pretij simoniaci.
  - §. 4. De re spiritali, quæ est materia simoniæ.
  - §. 5. De simonia, quæ committitur in beneficijs Ecclesiasticis.
  - §. 6. Quotuplex sit simonia.
  - §. 7. De pœnis simoniæ.
  - §. 8. De simonia confidentiæ.
  - §. 9. De restituendi obligatione, propter simoniacè accepta.

## LIBER QVINTVS.

*De Sacramentis, & Sacrificio nouæ legis.*

*Continet decem tractatus: quorum primus de Sacramentis in communi distinguitur in octo capita.*

- Cap. I. De notione, ac definitione Sacramenti.
- Cap. II. De definitione Sacramenti.
- Cap. III. De discrimine Sacramentorum.
- Cap. IV. De materia, & forma Sacramentorum nouæ legis.
- Cap. V. De causa efficiente Sacramentorū nouæ legis.
- Cap. VI. De subiecto Sacramentorum, eorundemque effectibus.
- Cap. VII. De caractere.
- Cap. VIII. De numero Sacramentorum.

### TRACTATVS SECVNDVS.

*De Sacramento Baptismi, in nouem capita distributum.*



## ELENCHVS

- Cap. I. De nomine, ac definitione Baptismi.
- Cap. II. Quo tempore Sacramentum Baptismi à Christo institutum fuerit.
- Cap. III. De materia Baptismi.
- Cap. IV. De forma Baptismi.
- Cap. V. De unitate Baptismi.
- Cap. VI. De suscipientibus Baptismi.
- Cap. VII. De Ministro Baptismi.
- Cap. VIII. De caeremonijs sacris, & in specie de ritibus circa Baptismum.
- Cap. IX. De patrinis.

- Cap. VII. De publica, non Sacramentali confessione peccatorum.
- Cap. VIII. De integritate confessionis.
- Cap. IX. De confessione inualida, ob defectum pœnitentis, vel Confessarij.
- Cap. X. De Ministro Sacramenti pœnitentiæ, atque in eo requisita iurisdictione.
- Cap. XI. De approbatione Confessariorum.
- Cap. XII. De casuum reservatione.
- Cap. XIII. De officio, & obligatione Confessarij.
- Cap. XIV. De sigillo confessionis.
- Cap. XV. De satisfactione.

## TRACTATVS TERTIVS.

*De Sacramento Confirmationis: diuiditur in septem capita.*

- Cap. I. De natura, & institutione huius Sacramenti.
- Cap. II. De materia huius Sacramenti.
- Cap. III. De forma huius Sacramenti.
- Cap. IV. De effectibus huius Sacramenti.
- Cap. V. De subiecto, siue suscipiente huius Sacramenti.
- Cap. VI. De Ministro huius Sacramenti.
- Cap. VII. De caeremonijs huius Sacramenti.

## TRACTATVS QVARTVS.

*De venerabili Sacramento Eucharistiæ: habet septem capita.*

- Cap. I. De natura huius Sacramenti.
- Cap. II. De materia S. Eucharistiæ.
- Cap. III. De forma S. Eucharistiæ.
- Cap. IV. De subiecto, seu personis suscipientibus huius Sacramenti.
- Cap. V. De necessitate, & obligatione huius Sacramenti suscipiendi.
- Cap. VI. De requisita animi, ac corporis dispositione ad susceptionem S. Eucharistiæ.
- Cap. VII. De Ministro S. Eucharistiæ.

## TRACTATVS QVINTVS.

*De sacrificio Missæ: habet septem capita.*

- Cap. I. De natura, proprietate, & effectû Sacrificij nouæ legis.
- Cap. II. Pro quibus Sacrificium offerre liceat, & quis fructus ipsis inde proueniat.
- Cap. III. De obligatione sacrificandi.
- Cap. IV. De tempore quo sacrificare licet, vel nō licet.
- Cap. V. Quo in loco Sacrificium celebrandum sit.
- Cap. VI. De ara, sacris vasis, & vestibus.
- Cap. VII. An, & quibus casibus Missæ Sacrificium interrompere, vel imperfectum relinquere licitum sit.

## TRACTATVS SEXTVS.

*De Sacramento Pœnitentiæ: completitur capita quindecim.*

- Cap. I. De nomine, & natura pœnitentiæ, quatenus ea virtus est.
- Cap. II. De necessitate pœnitentiæ, quatenus est actus virtutis.
- Cap. III. De pœnitentia, quatenus est Sacramentum.
- Cap. IV. De contritione.
- Cap. V. De confessione.
- Cap. VI. Vtrum sacramentalis confessio debeat secreto fieri.

## TRACTATVS SEPTIMVS.

*De Indulgentijs: habet octo capita.*

- Cap. I. Quid sit indulgentia.
- Cap. II. De antiquitate indulgentiarum.
- Cap. III. De diuisionibus indulgentiæ.
- Cap. IV. Quinam Ecclesiæ Pastores, & quo iure indulgentias concedere possint.
- Cap. V. An, & qualis causa ad concedendum indulgentias requiratur.
- Cap. VI. Quanam conditiones requirantur in eo, qui indulgentias lucraturus est.
- Cap. VII. De indulgentijs, quæ defunctis à Summo Pontifice applicantur.
- Cap. VIII. De Iubileo.

## TRACTATVS OCTAVVS.

*De Sacramento extremae Vnctionis: octo capita.*

- Cap. I. De natura & institutione huius Sacramenti.
- Cap. II. De materia huius Sacramenti.
- Cap. III. De forma huius Sacramenti.
- Cap. IV. De subiecto, siue suscipiente huius Sacramenti.
- Cap. V. De effectû huius Sacramenti.
- Cap. VI. De Ministro huius Sacramenti.
- Cap. VII. De obligatione suscipiendi, ac ministrandi hoc Sacramentum.
- Cap. VIII. De caeremonijs, seu ritibus ministrandi hoc Sacramentum.

## TRACTATVS NONVS.

*De sacramenta ordinis: in quatuordecim capita dispersus.*

- Cap. I. Quid sit Ordo.
- Cap. II. Vtrum sacra Ordinatio sit Sacramentum.
- Cap. III. Quod sint ordines.
- Cap. IV. Quorum ordinum collatio sit verè, ac propriè Sacramentum.
- Cap. V. De materia, & forma singularum ordinationum.
- Cap. VI. De subiecto ordinum, seu de ordinandis.
- Cap. VII. De ætate, & qualitate ordinandorum.
- Cap. VIII. De temporibus ordinationum.
- Cap. IX. De Ministro ordinationis.
- Cap. X. De suspensionibus iure laris propter illegitimam ordinationem, vel ordinis executionem.
- Cap. XI. De cœlibatu sacrorum Ministrorum.
- Cap. XII. De Tonsura Clericorum, & Sacerdotum vocatione.
- Cap. XIII. De sacris benedictionibus.  
§. vn. De Abbatibus, eorūque benedictione.
- Cap. XIV. De exorcismis.



# TRACTATVVM ET CAPITVVM.

## TRACTATVS DECIMVS.

*De Matrimonij sacramento, quodripartito diuisus.*

### PARS PRIMA.

*De sponsalibus: habet duo capita.*

- Cap. I. De constitutione sponsaliorum.
- Cap. II. De dissolutione sponsaliorum.

### PARS SECVND A.

*De Matrimonio secundum se: habet septem capita.*

- Cap. I. Quid, & quotuplex sit matrimonium.
- Cap. II. De matrimonio, quatenus est sacramentum.
- Cap. III. De matrimonio infidelium, quorum vnus, vel vterque ad fidem conuertitur.
- Cap. IV. De matrimonio clandestino.
- Cap. V. De matrimonio coacto.
- Cap. VI. De matrimonio simulato.
- Cap. VII. De matrimonio conditionali.

### PARS TERTIA.

*De bono matrimonij: habet septem capita.*

- Cap. I. De debiti coniugalis redditione.

- Cap. II. De mutua coniugum cohabitatione.
- Cap. III. De fidei tori seruanda.
- Cap. IV. De bono proli.
- Cap. V. De filiis illegitimis, eorumque legitimatione.
- Cap. VI. De bono sacramenti.
- Cap. VII. De diuortio.

### PARS QVARTA.

*De matrimonij impedimentis tum dirimentibus, tum impedientibus tantum, quindecim capitibus pertractatur.*


- Cap. I. De impedimentis matrimonij in genere.
- Cap. II. De impedimento erroris.
- Cap. III. De impedimento voti.
- Cap. IV. De impedimento consanguinitatis.
- Cap. V. De impedimento affinitatis.
- Cap. VI. Quousque Summus Pontifex dispensare possit in impedimentis consanguinitatis, & affinitatis.
- Cap. VII. De impedimento cognationis legalis.
- Cap. VIII. De impedimento cognationis spiritualis.
- Cap. IX. De impedimento publicæ honestatis.
- Cap. X. De impedimento criminis.
- Cap. XI. De impedimento impotentiae.
- Cap. XII. De impedimento ætatis.
- Cap. XIII. De impedimento raptus.
- Cap. XIV. De impedimento ex cultus, siue religionis disparitate.
- Cap. XV. De impedimentis non dirimentibus.







# IN NOMINE CHRISTI SALVATORIS.

PEM A DEO FERENTIBVS, BEATISSIMA VIRGINE  
DEIPARA, SS. ARCHANGELO MICHAELE ET ANGELO  
CVSTODE, SS. MARTYRIBVS COSMA ET DAMIANO,  
SS. ECCLESIAE DOCTORIBVS AVGVSTINO ET THOMA  
AQVINATE, SS. CONFESSORIBVS IGNATIO ET FRANCISCO  
XAVERIO, SS. VIRGINIBVS AGATHA ET LVCIA. ET OMNIBVS  
SANCTIS, INCIPIT:

LIBRI





LIBRI PRIMI  
TRACTATUS  
PRIMVS  
DE CONSCIENTIA.

CAP. I.

DE SYNTERESI.

SVMMARIVM.

- 1 Synteresis est habitus principiorum practiorum.
- 2 Practica principia sunt vniuersales, ac per se nota humanarum actionum regula.



**S**YNTHERESIS est habitus, siue conseruatio principiorum practiorum, secundum S. Tho. 1. p. q. 79. a. 12. De ea agens S. Hieron. in c. 1. Ezech. super illa verba, Quatuor facies uni, &c. vocat scintillam conscientiae, quae in Cain quoque pectore, postquam eiectus est de paradiso, non exstinguitur. S. Basiliius hom. 12. ad populum circa medium, quae est in principium prouerborum Salom. Apud nos ipsos iudicium quoddam naturale habemus, per quod ab iniquis bona facile discernimus.

Practica, siue moralia principia sunt vniuersales, ac per se notae humanarum actionum regula & quasi quaedam lumina virtutum, vera, & incommutabilia, ait S. August. lib. 1. de libero arbitrio, cap. 10. Cuiusmodi sunt, Bonum honestum amplectendum esse; malum peccati fugiendum: non plus minusve irascendum, comedendum, quam oportet: item iuste esse viuendum: propria suis quibusque esse reddenda, &c. nonne fateberis esse verissimum, inquit ille, & iam mihi, quam tibi, atque omnibus id videntibus praesto esse communiter.

- 2 Igitur recte ait S. Thom. 1. c. Sicuti naturaliter nobis indita sunt principia speculabilium; ita & principia agibilium. Verum principia speculabilium; v. g. Quicquid est, substantia, vel accidens est: Omne totum maius sua parte est pertinent ad specialem habitum, qui ab Aristot. 6. Ethic. c. 6. dicitur Intellectus: principia autem agibilium eorum, quae ad honeste viuendum pertinent, ad specialem habitum spectant, quem vocamus Synteresin. Vide Scotum in 2. d. 39. §. Ad quaestiones. Duran. ca d. q. 5. a. 1. Gabrielem Biel q. vn. a. 3. S. Thom. in quaestio. disputatis, q. 16. a. 1. vbi recte colligunt, quod circa Synteresin error non contingit; quia versatur circa vniuersalissima principia agendorum, quae per se nota sunt, non minus quam principia speculabilia.

CAP. II.

De Conscientia, quid sit.

SVMMARIVM.

- 1 Conscientia est actus intellectus practici, indicantis quid agendum, vel non agendum.
- 2 Conscientia partim se extendit ad opera nostra praeterita, partim ad instantia & futura.
- 3 Conscientia de agendis est actus elicitus à virtute prudentia.

**C**ONSCIENTIA definitur, Actus intellectus practici indicantis aliquid huc, & nunc agendum esse vel fuisse tanquam bonum honestum; vel fugiendum esse, aut fuisse tanquam turpe & inhonestum. Vel sic, Conscientia est iudicium rationis practicae circa particularia per ratiocinationem deductum ex principiis vniuersalibus contentis in synteresi, V. g. Omne malum peccati est detestandum: Periurium est malum peccati (quippe à Deo prohibitum; cum virtuti Veritatis, ac Religionis, adeoque rectae rationi aduersetur.) Ergo etiam periurium illud, quod heri feci, malum peccati est, supplicioque dignum: vel periurium hoc, de quo nunc delibero, malum peccati est, ac detestandum. Lege S. Tho. cit. q. 79. a. 13. S. Anton. p. 1. t. 3. c. 9. & 10. Gabr. cit. q. vn. a. 2. concl. 5.

Pro intellectu horum nota, quod conscientia partim se extendit ad opera nostra praeterita, ea vel accusando tanquam male facta; qui dicitur remorsus conscientiae; vel commendando tanquam recte facta: quod dicitur testimonium conscientiae nostrae ab Apost. 2. ad Corinth. 1. Et ad Rom. cap. 2. Ostendunt (Gentiles) opus legis scriptum in cordibus suis, testimonium reddente illis conscientia eorum, & inter se inuicem cogitationibus accusantibus, aut etiam defendentibus. Quomodo etiam accepit Ecclesiastes cap 7. Scit conscientia tua, quia & tu crebro maledixisti alijs. Et S. August. lib. contra Secundinum Manichaeum cap. 1. Senti de Augustino quicquid libet; sola me in oculis Dei conscientia non accuset. Partim vero se extendit conscientia ad opera instantia, & futura; dictando quae agenda sint tanquam honesta; quae vero omittenda tanquam turpia seu inhonesta: qua de re S. Basiliius loco supra cit. ita inquit, Quoniam ex ipsius Salomonis sententia, cogitationes iustorum iudicia sunt viro sapienti, omnino satagendum erit intra cordis arcana tribunal constituere, rectaque facere iudicia; mentem quoque velut in trusina suspendere ad ea quae conueniunt, & ad quodlibet agendum, aqua lance librare. Atque hoc iudicium circa agenda proprie practicum est, Ideo-



que conscientia secundum hanc acceptionem, quatenus de agendis iudicat, quam maxime ad propositum nostrum spectat.

- 3 Corollarium conscientia est actus elicitus à virtute prudentiæ, circa particularia: Synteresis autem continet vniuersalissima principia prudentiæ. Inter Synteresin verò ac prudentiam particularem media est moralis scientia, iurisque prudentiæ; quippe cuius pronunciata, v. g. *In malis promissis fides non est seruanda. omne iuramentum seruari debet, quod sine dispendio salutis aeternæ seruari potest;* comparata ad synteresin conclusionum locum obtinent; comparata verò ad particularem prudentiam, sunt & ipsa moralia quædam axiomata, recteque viuendi regulæ. Ita Durandus cit. q. 5. a. 1. Vide quæ de virtute prudentiæ dicam lib. 3. sect. 2.

## CAP. III.

## Quotuplex sit Conscientia.

## S V M M A R I V M.

- 1 Conscientia alia est vera, recta; & alia falsa, errans, quæ improprie conscientia nomen meretur.
- 2 Conscientia erronea interdum est inuincibilis, interdum vincibilis.
- 3 Conscientia alia est consulens, seu suadens; alia verò precipiens agendum, aut prohibens omittendum.
- 4 Scrupulus non est conscientia appellanda.

**P**RIMA diuissio. Conscientia alia est vera, recta; alia est falsa, errans. Quam diuisionem patet esse in membra analogia; cum errans conscientia nomen conscientia simpliciter non mereatur. Conscientia recta, seu vera est, quæ ex practiciis principiis secundum omnes circumstantias rectè applicatis, colligitur de agendo, vel non agendo. Porro applicatio illa principiorum interdum recta & vera est tam speculatiua, quam practica veritate: & tunc emergit conscientia omnimodè recta, vera. Exemplum: Ius suum cuique tribuere honestum est; coniugi autem ius competit ad coniugij actum: ergo ipsi suus coniux rectè & honestè coniugij debitum reddit: hæc autem est mea legitima coniux, uti verè ac probè perspectum habeo: ergo honestum, debitumque est ad ipsam accedere, si congruentes loci, temporis, &c. circumstantiæ adsint. Interdum verò applicatio illa principij practici vera non est speculatiuè, seu ratione obiecti particularis absolute spectati, sed solum practicè, siue in ordine ad practicam conclusionem seu conscientiam rectè formandam. Exemplum habemus Gen. 29. cum Patriarcha Iacob bona fide, id est, conscientia recta ad Liam accessit, ita secum ratiocinans, Honestum est accedere ad propriam vxorem: hæc autem est mea vxor uti prudenter arbitrari debeo: Ergo honestum est ad hanc accedere. Vbi vides applicationem principij, seu assumptionem speculatiuè falsam esse; veram tamen practicè, id est, in ordine ad inferendam conclusionem practicè veram. Etenim accessus ille verè honestus erat, & prudentiæ actus: cum Iacob non nisi temere de mala Labani fide suspicari potuisset; ideoque quiuis vir bonus ac prudens, spectatis omnibus circumstantiis tunc occurrentibus, ita practicè iudicasset, & secundum tale iudicium siue conscientiam operatus fuisset.

Si quæras: Vnde cognoscere possis, quòd conscientia quæ speculatiuè, seu ratione obiecti absolute spectati, falsitatem habet; practicè tamen, seu moraliter vera sit, & proxima regula humanæ operationis honesta: Respondeo. Tunc talem censendam esse, quotiescunque ea ex duobus practiciis principiis indubiè veris per intellectus reflexionem colligi potest. Exempli causa: Honestum est accedere ad eam mulierem, quæ hic, & nunc merito, ac prudenter existimatur propria vxor: hæc autem mulier hic, & nunc merito, ac prudenter à me existima-

tur propria vxor; ergo honestum est ad eam accedere.

Corollarium. Licet eiusmodi iudicium siue rationis conclusio secundum quid falsa dici possit, videlicet secundum obiectum præcisè spectatum; absolute tamen loquendo, est vera & recta conscientia; idque dupliciter probatur: I. Quia, ut vidimus, per bonam ratiocinationem ex principiis practiciis absolute veris, concludi potest: ex veris autem semper verum inferitur. II. Quia talis conscientia est regula proxima honestæ operationis; ideoque propriè ac directè actus prudentiæ, virtutis semper ad verum inclinantis. Quamuis aliter sentiat Maior in 4. d. 15. q. 9. §. dubitatur.

Conscientia falsa siue erronea dicitur, quæ ex falso, siue erroneo practico principio colligitur: v. g. cultus religiosus est honestus Deoque gratus: sed mentiri pro religionis augmento est cultus religiosus: ergo mentiri pro religionis augmento honestum est, Deoque gratum: atqui hoc inendacium in religionis augmentum cedit: ergo licitum & honestum est nunc mentiri. Quæ practica rationis conclusio seu conscientia, per se & simpliciter loquendo, falsa & erronea est; deducta ex falso & erroneo illo principio practico, quòd mentiri pro Religionis augmento sit cultus religiosus, honestus.

Conscientia erronea subdiuiditur in inuincibilem, & vincibilem. Inuincibilis est, cuius error moraliter vitari non potuit; ideoque nec voluntarius est, nec ad culpam imputatur. Vincibilis autem est, cuius error vitari potuit, ac debuit, ac proinde indirectè voluntarius, atque culpabilis existit. Consequenter voluntas sequendo hanc conscientiam peccat, sequendo autem conscientiam inuincibiliter errantem à peccato excusatur. Sed difficultas est, utrum opus moraliter bonum faciat, qui, v. g. religionis causa ob inuincibilem errorem mentitur? Ex vna parte videtur affirmandum: cum omnis actus humanus in indiuiduo vel moraliter bonus sit, vel malus. Ex altera verò parte negandum videtur; quia omnis actus honestus secundum prudentiam elicitus est: sed conscientia errans, ex falso principio practico deducta, non potest esse actus virtutis prudentiæ. Ergo, &c. Respondeo, Talem actum voluntatis, propter inuincibilem errorem, v. g. mentiri volentis, esse aliquo modo bonum, ac honestum; videlicet secundum affectum, & intentionem finis: quamuis deficiat à rectitudine honestatis secundum applicationem mediij: quandoquidem mendacium idoneum non est ad religionis honestatem: qui tamen defectus, cum incognitus, & inuoluntarius sit, ad culpam non imputatur. Quare dicendum, quòd conscientia inuincibiliter errans actus prudentiæ sit non simpliciter; sed secundum quid, quatenus in eo seruatur recta intentio finis honesti: consequenter voluntas sequendo talem conscientiam aliquo modo bonè agit, videlicet secundum affectum finis; licet deficiat secundum applicationem ad opus: qui tamen defectus, propter ignorantiam excusatur, ut dixi.

Altera diuissio. Conscientia alia est consulens, siue suadens aliquid agendum, vel omittendum esse, non tanquam necessarium, sed ut magis conueniens ad morum honestatem, animæ salutem, v. g. virginitatem seruandam, diuitias pauperibus erogandas, ut expeditior sit ad salutis viam. Alia verò conscientia est precipiens aliquid ut agendum, vel prohibens ut omittendum: quia ita necessarium sit ad morum honestatem, animæ salutem: v. g. non mentiendum, non peierandum, parentes honorandos esse. Discrimen est, quòd hæc hominem ligat, siue obligat: illa non item.

Præter has asserri solet conscientia dubia, & conscientia scrupulosa: Verum hæc vmbra potius, siue similitudines conscientia sunt, quam ut propriè id nomen mereantur. Nam conscientia debet esse practicum rationis iudicium siue assensus: at neque dubians, neque scrupulosus definitè indicat agendum aliquid, vel omittendum esse: sed ille ambiguus hæret: hic angitur tantum, ac veretur



tur: de quibus tamen in frā dicam.

## CAP. IV.

## Quanta sit obligatio Conscientiæ præcipientis.

## SUMMARIVM.

1. Conscientia recta præciendo, vel prohibendo voluntatem obligat, ut peccet nisi illam sequatur.
2. Voluntas peccat, quotiescunq; agit contra conscientiam erroneam præcipientem, vel prohibentem. Operans contra conscientiam errantem, ea specie peccati, & contra eam virtutem delinquit, sicuti intellectus iudicat.
3. Conscientia errans inuincibiliter obligat voluntatem ad sequendum: errans autem vincibiliter obligat tantum ad non repugnandum; dum illa perseverat.
4. Errans vincibiliter non est simpliciter perplexus, aut constitutus in absoluta peccandi necessitate: cum possit, ac debeat deponere errorem.

**A**SSERTIO I. Conscientia recta, seu vera præciendo, vel prohibendo obligat voluntatem, ut peccet, nisi illam in operando sequatur. Probatur, Voluntas peccat si in operatione non sequitur suam regulam: atqui conscientia intellectus rectè præcipiens, aut prohibens, est proxima regula voluntatis operantis, mouentisque alias potentias ad operandum, sicuti docet S. Thom. 1. 2. q. 19. a. 3. & 4. Ergo peccat voluntas, ipseque homo, nisi conscientiam rectè præcipientem, vel prohibentem in operando sequatur. Nota hic, quod dixi, conscientiam rationis (ductam ex synteresi) esse proximam regulam, ac legem humanæ voluntatis, moraliumque actionum: nam regula remota, attamen prima & principalis est lex æterna, & diuina: vnde humana ratio veluti quidam radius descendit, Dauide teste Psal. 4. *Signatum est super nos lumen vultus tui, Domine.* Vide S. Th. cit. a. 4.

2. Assertio II. Voluntas peccat, quotiescunq; agit contra conscientiam erroneam præcipientem, vel prohibentem. Ita docet S. Thom. cit. q. 19. a. 5. & probat ex Apost. ad Rom. cap. 14. *Scio, & confido in Domino IESU, quia nihil commune per ipsum, nisi ei qui existimat quid commune esse, illi commune est.* Sensus verborum est: Scio, fretus gratia IESU Christi, qui nos à iugo legis Mosaicæ liberavit, nullo cibo veluti immundo nos inquinari: præterquam, si quis existimet aliquam escam (v. g. carnem suillam) etiam nunc immundam & vetitam esse: talis enim esca illi immunda & illicita erit, propter errantem suam conscientiam. Et paulò post, *Qui autem discernit (inter cibos, ratus aliquos secundum legem Moysis immundos, ac prohibitos esse) si manducauerit, damnatus est. Quia non ex fide:* id est, quia non agit secundum conscientiam: *Omne autem, quod non est ex fide (id est, quod non fit secundum, sed contra dictamen conscientiæ) peccatum est.*

Rationem huius doctrinæ dat idem S. Thom. & Richar. in 4. d. 39. a. 2. q. 3. Ioan. Gerson p. 2. operum, de natura & qualitate conscientiæ, ubi de conscientia indiffereta. Cum obiectum voluntatis sit bonum, ac malum non quomodocunq; sed prout est in apprehensione rationis: ideo si ratio apprehendat aliquid, ac voluntati proponat tanquam bonum morale necessarium, ac præceptum: esto re ipsa bonum non sit, sed malum: voluntas illud respuendo consentit in transgressionem legis. Iterum, si ratio apprehendat aliquid & voluntati proponat tanquam moraliter malum, ac prohibitum; esto re ipsa malum non sit, sed bonum, ac honestum; voluntas illud amplectendo consentit in obiectum malum, & prohibutum; adeoque peccat.

Corollarium, Operans contra conscientiam erroneam

vincibilem, vel inuincibilem, ea ipsa specie peccati, atque contra eam virtutem delinquit, sicuti intellectus falsò iudicat: v. g. qui arbitratur ex lege misericordiæ se obligari ad mentiendum, quia ita necesse est ad vitam hominis liberandam; is contra misericordiæ virtutem peccat non mentiundo; vel moraliter, si æstimet obligationem mentiendi grauem esse, vel venialiter, si æstimet obligationem leuem esse, sicuti bene aduertit Durand. in 2. d. 39. q. 5. a. 3. num. 9. Item qui falsò arbitratus in Vigilia Epiphaniæ ieiunium præceptum esse non ieiunat, is contra temperantiam peccat. Ita S. Thom. q. 19. a. 5. ad 3. Nauar. in man. prælud. 9. n. 9. Vasq. 1. 2. disp. 59. cap. 3. num. 11. Martinus Beccanus in 1. 2. tract. 1. cap. 4. q. 7. Sanchez lib. 1. moral. cap. 11. n. 5. Qui tamen rectè monet n. 3. ut aliquis cōtra erroneam conscientiam agendo peccet, necessarium esse, ut actio ipsius liberat sit: Quare si in carcere v. g. conclusus, existimet se peccare Missam non audiendo, non ideo peccat: Neque scrupulosus, cum inuoluntarias suas passiones aut in oratione distractiones peccata esse arbitratur.

Assertio III. Hoc interest inter conscientiam errantem inuincibiliter, & errantem vincibiliter; quòd illa voluntatem obligat, adeo, ut nisi eam sequatur, peccet: ad hanc autem sequendam voluntas non obligatur; sed tantum ad non repugnandum ei, quamdiu perseverat. Ita S. Thom. a. 6. Prior pars probatur: Nam præceptum, siue lex falsò existimata, errore qui deponi non possit, ratione eius deceptionis, siue falsæ existimationis, adeoque per accidens, non minùs obligat, quàm præceptum, siue lex vera: adeoque quidem, ut qui secundum tale existimatum præceptum operatur, moraliter non malè seu cum peccato; sed potius bene operetur, ut dixi cap. præced. Altera pars explicatur: Qui per vincibilem, siue culpata ignorantiam existimat, v. g. mentiendum esse, ut vita hominis liberetur, is duo virtualiter iudicia format: Vnum, *Oportet mentiri*, ad quod iudicium sequendum, siue secundum illud operandum voluntas non obligatur: Nam contradictio-nem inuoluit voluntatem obligari ad peccandum: atqui voluntas sequendo, siue operando secundum conscientiam errantem vincibiliter, peccat: ergo non obligatur ad eam sequendum. Alterum iudicium; *Malum peccati est non mentiri*: secundum quod iudicium si voluntas nolit mentiri, itidem peccat: quia conformat se malo peccati existimati, sicut constat ex secunda assertione.

Obijcies: Hinc sequitur hominem perplexum fore, ut quicquid agat, peccaturus sit: si enim sequendo conscientiam vincibiliter erroneam consentiat in mendacium, peccabit contra veritatis virtutem, si autem resistendo conscientiæ, mentiri nolit, peccabit contra misericordiæ virtutem. Respondeo ex doctrina S. Bonau. in 2. d. 39. a. 1. q. 3. Richar. ibid. a. 1. q. 3. Gabr. q. vn. a. 3. dub. 2. S. Anton. p. 1. tit. 3. cap. 10. §. 4. Ioan. Gerson tract. de natura & qualitate conscientiæ, circa tertiam questionem, Non esse hominem simpliciter perplexum, aut constitutum in absoluta peccandi necessitate. Potest enim, ut supponimus, ac debet deponere errorem: quo deposito cessabit conscientia, quippe quæ ex solo errore nata est. Dum autem conscientia non deponitur, sed perseverat, fateor adesse peccandi necessitatem; non tamen absolutam, & antecedentem; sed ex hypothesi, ac consequentem: id est, si nolis errorem deponere quem potes, ac debes deponere, ideoque tibi indirectè voluntarius existit.

Nota autem, tunc errorem vincibilem, atque culpabilem esse, cum intellectus aliquid agendum, vel omitendum esse iudicat non sine dubio, sine formidine oppositi; expressè vel implicite distans rem magis considerandam vel explorandam esse. Enimvero in hoc casu voluntas nec velle debet quod intellectus proponit, nec nolle: quia datur medium inter hæc, videl. applicare intellectum ad rem certius intelligendam.

Quòd si autem aliquis cō perplexitatis deueniat, ut



utrumque oppositorum videatur ipsi esse peccatum, mentiri, inquam, contra veritatis virtutem; & non mentiri contra misericordiam, & se tali errore ipsemet explicare non possit, neminemque habeat quem consulat; tunc eligendum erit quod minus malum apparet; v. g. in casu proposito mentiendum, ut culpa, quæ grauior videtur, contra misericordiam euitetur. Cum enim peccatum omne non necessitate, sed libertate admittatur; ideo tali casu, quo homo perplexus ex inuincibili errore, necessitatem sibi impositam arbitratur ex duobus, quæ alioquin peccata esse putat, alterum admittendi; formare potest ac debet practicum iudicium; non fore sibi hæc, & nunc imputandum, si quod minus malum sibi videtur; elegerit, sicuti rectè præter alios docuit Abb. in cap. non magnopere, n. ult. de immunit. Eccles.

Quod si demum adeo homo perplexus sit, ut neque hoc ipsum arbitrari possit, utrum ex propositis malis minus existat; tunc non peccabit; quicquid egerit; quia nemo necessitate peccat. Ita Henric. lib. 12. c. 6. n. 7. Becanus q. 8. conclus. 4. Aliud exemplum, Parochus ad Ecclesiam festo die veniens, sacrificaturus pro populo, recordatur se ieiunum non esse: nec alius tunc Sacerdos accersiri potest, neque populus edoceri, ut sine Missa quietus abscedat. Tali casu Parochus perplexus videtur: si enim celebrem (cogitat ipse) peccabo aduersus reuerentiam Sacramenti, propter legem Ecclesiæ: si autem non celebrem, peccabo contra legem charitatis, propter graue populi scandalum. Profecto in hoc casu, si (ut ponimus) scandalum euitari non possit, Parochus celebrare deberet: cum lex Ecclesiastica cedat maiori legi naturalis charitatis. Si tamen hanc ipse veritatem perspicere nequeat, & alium non habeat à quo edoceatur; non peccabit Parochus; licet sacrificio abstineat cum populi scandalo: seu quia id minus malum esse arbitratur, quam non ieiunum celebrare: seu quia utrum horum duorum maius malum sit, determinare propter ignorantiam non potest.

## CAP. V.

## De Conscientia dubia &amp; opinatiua.

## SUMMARIUM.

1. *Dubium differt ab opinione; & opinio à sententia.*
  2. *Dubium (sicuti & opinio, sententia) aliud est iuris, & aliud facti.*
- Dubium iuris aliud est speculatiuum, aliud practicum: & hoc vel generale seu abstractum: vel propriè seu proximè practicum.*

1. **N**OTANDUM est primò: Si propriè loquendum sit, aliud est dubium, aliud opinio, & aliud sententia, siue iudicium animi certum. Nam dubium est cum mens anceps hæret, ut neutri parti contradictionis assentiatur. Opinio est assensus incertus & non carens, saltem virtuali, formidine oppositi: quare opinio aliquid de dubio participare censetur. Iudicium, seu animi sententia certa omnem penitus dubitationem, ac formidinem partis oppositæ excludit; idque vel propter euidentiā obiecti, vel propter contestantis auctoritatem.

2. Notandum secundo: Dubium aliud est iuris, & aliud facti. Dubium iuris dicitur, quod est de obligatione, aut facultate legitima agendi; vel de legitimo actus valore &c. Diuiditur in merè speculatiuum, ac practicum. Dubium iuris merè speculatiuum censetur, in quo directè nō queritur de praxi, id est, humana actione, utrum ea licita sit nec ne, sed de quodam alio legitimo: v. g. utrum baptizatus in nomine Christi, sine expressa inuocatione SS. Trinitatis, valeat? utrum testamentum sit legitimum? utrum matrimonium, quod contraxi, validum? utrum bellum, in quo milito, iustum? utrum equus, quē possideo, meus sit, nec ne? Dubium iuris practicum est, in quo directè queritur de praxi, seu actione morali, num ea licita sit: Hoc iterum duplex est, auctore Caiet. to. 1.

tract. 17. opusc. 17. responsionum, resp. 13. dub. 7. Couar. reg. possessor. p. 2. §. 7. num. 5. Nau. in sum. prælud. 9. num. 9. Sanchez lib. 2. de matrimonio, disp. 41. num. 4. & lib. 1. moral. c. 9. num. 3. Becano q. 8. n. 1. Vnum generale, & abstractum; ut cum dubitatur, v. g. num contractus census germanici usurarius sit? Vtrum liceat die festo bellare, piscari, pingere? cuiusmodi quæstiones iuris in scholis controuersæ esse solent. Alterum est dubium propriè practicum, seu practicè practicum, cum in particulari dubitatur, utrum hæc & nunc mihi liceat die festo pingere, bellare, contractum talem instituire? Merito autem hoc dubium appellatur propriè, seu practicè practicum: quia propinquè est de praxi, seu actione morali, spectatis singulis eius circumstantiis. Dubium verò illud generale, & abstractum magis remotum à praxi, & idcirco à quibusdam speculatiuum vocari solet, comparatione videlicet alterius magis practici dubij, sicuti Sanchez notauit cit. disp. 41. num. 4. Denique dubium facti dicitur, in quo ambigitur, utrum aliquid factum sit, nec ne, v. g. utrum votum editum: utrum ætas septennij completa: utrum Baptizatus homini collatus: utrum horæ canonicæ persolutæ nec ne? Ceterum ex dubio facti plerumque oritur dubium iuris: v. g. dubitans utrum votum religionis ediderit, mox dubitare incipit, an eo obligetur. Similiter ex dubio iuris merè speculatiuo sepe oritur dubium practicum: v. g. dubitans utrum Baptizatus fuerit validus, mox dubitare incipit, an repeti debeat, nec ne: & dubitans utrum matrimonium fuerit validum, mox dubitare incipit, num eius usus licitus sit, nec ne: dubitans denique utrum res sua sit, postea dubitare incipit, an eam retinere, alienare iure possit.

Porro sicuti dubium, ita similiter & opinio aut sententia diuidi debet: quod alia sit de iure, & alia de facto: & illa vel merè speculatiua, vel practica; eaque vel generali, & abstracto ideoque sententia potius speculatiua, vel in particulari, & propriè ac proximè practica, seu praxeos directiua.

## §. I.

## De dubio iuris propriè seu practicè practico.

## SUMMARIUM.

3. *Agere vel omittere aliquid cum dubio propriè practico, semper est peccatum.*
4. *Ad rectè operandum requiritur iudicium practicum moraliter certum: quia est conscientia lege, prudentia actus.*

3. **A**SSERTIO hæc sit. Agere vel omittere aliquid cum dubio propriè practico, semper est peccatum. Est communis sententia, quæ probatur ex Apostolo ad Rom. 14. *Quod non est ex fide, peccatum est*, id est, quod non fit cum determinato iudicio intellectus, siue conscientia, licitum esse quod hæc & nunc agitur, vel omittitur, id peccatum est. Ratio est I. Nam omnis actus humanus rectus & honestus debet esse prudens: prudentia autem consistit in iudicio mentis definitis quid hæc & nunc licite fiat, vel non fiat II. Exponens se peccandi periculo peccat eodem genere peccati, qui se exponit, sicuti docet S. Thom. quod lib. 8. a. 13. Nau. c. qualitas. num. 18. d. 5. de pœnit. Qui autem agit, vel omittit cum dubio practico, id est, dubitans utrum agendo, vel omittendo peccet, is committit se peccandi periculo. Ergo, &c.

Atque in hac quidem assertionem Doctores omnes consentiunt; sed disputant, utrum ad rectè seu honestè operandum requiratur iudicium practicum, moraliter certum, quo excludatur omnis formido oppositi? Negant Vasq. 1. 2. disp. 62. c. 1. Sanchez lib. 1. moral. c. 9. num. 19. existimantes sufficere assensum probabiliter dictantem, quamuis



quamvis non sine formidine oppositi, hoc vel illud honeste agi. Sed contraria sententia est vera, quam præter Caiet. ver. opinionis usus, Armillam ver. opinio, num. 2 docent Nau. c. si quis autem, n. 63. d. 7. de poenit. Suarez to. 5. disp. 40. s. 5. num. 14. & s. 6. nu. 6. Benedict. Iustinianus in paraphrasi c. 13. ad Rom. in fin. Less. lib. 1. c. 1. dub. 1. de prudentia. Nam prima regula humanarum actionum debet esse firma, & constans; videlicet conscientia recta, quæ est actus prudentiæ, vnius ex intellectualibus virtutibus, quæ semper ad verum, & numquam ad falsum inclinant, teste Arist. 6. Eth. c. 3. Opinione autem nos falli interdum contingit: Deinde iterum sic argumentor; Quicumque deliberatè committit se periculo peccandi, is peccat; sed quicumque operans practice certus non est, vtrum rectè ac honestè operetur, is committit se periculo practice errandi, seu peccandi: Igitur talis operans peccat. Oportet tamen hæc intelligere de incertitudine ac formidine intellectus iudicantis, non de scrupulo, quæ est inani ratione nixa apprehensio, & inde ortus apprehensiuus timor peccatum alicubi esse vbi non est. Nam cum tali irrationabili formidine consistere potest ac debet certum dictamen seu iudicium intellectus, rectè atque honeste aliquid agi, non obstante vana illa apprehensione peccati. Deinde ab hac doctrina excipienda est perplexitas, per quam intellectus iudicat vtrumque oppositorum puta facere & omittere, esse peccatum, eoque errore se expedire nequit, hoc casu si quod minus peccatum apparet, homo elegerit, non peccatum supra ostendi. Etenim doctrina ista, hominem semper peccare, si quod agit quod peccatum esse existimet, aut dubitet; locum quidè habet si liberè actionem malā amplectatur; non autem si necessario, vti accidit in casu nostro, cum vtrumque & agere & omittere per inuincibilem ignorantiam peccatum esse videtur.

## §. II.

De dubio seu quæstione practice vniuersali, quæ est inter diuersas Doctorum probabiles opiniones.

## S V M M A R I V M.

1. Qui vni parti quæstionis opinatiue assentitur, potest alteram probabilem iudicare: sed non vt vera assentiri.
2. Non potest intellectus assentiri propositioni, dum ipsi minus probabilis apparet quàm opposita.
3. Probabilis sententia dicitur, quæ certitudinem non habens, tamen graui autoritate, vel non modici momenti ratione nititur.
4. Ex duabus contradicentibus opinionibus, versantibus circa actionem humanam, an ea licita sit: quisque in praxi sequi potest, veram maluerit.
5. In dubio proprie practice quisque obligatur ad partem tutiorem: non item in dubio abstracto, aut speculatiuo.
6. Vir doctus alteri consulenti suadere potest secundum probabilem aliorum sententiam, etsi eam ipsemet falsam iudicet.
7. Penitentem, qui secundum probabilem Doctorum opinionem operari vult, tenetur Confessorius absolueret: licet ipsemet certo sibi persuaideat, doctrinam illam falsam esse.
8. Superiori precipienti secundum opinionem probabilem subditus obedire tenetur, etiam contra propriam probabiliorem.
9. In dubio an Prelatus iuste precipiat, tenetur subditus obedire: nisi exinde graue incommodum timeatur: non item si præceptum negligatur.

**N**OTANDUM est primò: Cum opinio sit animi sententia incerta & non carens formidine oppositi, fieri potest, vt licet vni parti quæstionis opinatiue assentiaris; mihi ominus alteram contradicentem probabilem iudices: Non dico veram, hoc enim impossibile est, vt intellectus duabus propositionibus contradicentibus directè assentiat, siue vtramque veram iudicet: sed hoc ipso, quod vni quæstionis parti, quamvis opinatiue & debi-

liter assentitur, veramque iudicat, eius contradicenti dissentit, falsamque iudicat: cum quo tamen, vt dixi consistere potest, vt eandem probabilem censeat. Imò nihil frequentius videre est apud Doctores, quàm vt sententiam aliquam, adductis rationibus, falsitatis arguant, cum interim eandem probabilem esse fateantur. Cæterum cuius pars quæstionis vel per rationem euident, vel per fidem certa apparet; ei pars opposita siue contradicens nullo modo probabilis videri potest, sicuti notauit Valent. t. 2. dis. 2. q. 12. p. 3. q. 1.

Notandum secundò: Licet omnis pars quæstionis, si probabilis sit, opinatiuum assensum gignere possit, absolute loquendo; non tamen id potest in omni intellectu. Si enim tibi pars opposita quæstionis probabilior videatur, seu maiora rationum momenta in illam partem perspicias; licet assensum omnem collibere tunc possis, tamen ex hypothesi quod alteri parti assentiri velis, necesse est vt probabiliori assentiaris; alteri autem, quæ minus probabilis tibi apparet, assentiri tunc non potes. Si enim minus probabilis assentiaris, seu veram iudices, hoc ipso oppositam falsam æstimas: quod fieri non potest dum ea tibi probabilior seu verisimilior apparet: propterea quod intellectus iudicatiuus secundum specificationem non omnino liber sit, sed à rationibus & motiuis propositi obiecti determinetur. Neque responderi hic potest, propositionem vnâ quidem ratione veram, alterâ verò falsam esse: quia veritas & falsitas, cum inter contradictorios terminos versentur, latitudinem non habent; quin potius, si vna pars quæstionis vera est, tunc eius opposita simpliciter & omnimodè falsa est. Quare videtur mihi ille loquendi modus improprius & minus philosophicus, quo aliqui dicunt, *Propositio hæc verior est, quàm eius opposita*. cum dicere oporteret, probabiliorem seu verisimiliorem esse; oppositam verò minus probabilem, quamvis non aperte falsam. Neque huic doctrinæ aduersatur S. Tho. 1. 2. q. 17. a. 6. vbi ait, in ijs apprehensis quæ intellectum non conuincunt in potestate nostra esse assentiri, vel dissentire. Id enim absolute verum est: quia potest intellectus imperio voluntatis moueri, vt omnia consideratione rationum pro vna quæstionis parte, consideret & æstimet rationes pro opposita occurrentes. Sed stante hypothesi siue in sensu composito; dum, inquam, vna pars contradictionis verisimilior apparet, quàm pars opposita, non potest intellectus illi dissentire, & huic assentiri: quia id fieret sine ratione, imò contra rationem.

Notandum tertio: Probabilis sententia, vt communiter accipitur, ita definiri potest, quæ certitudinem non habens, tamen vel graui auctoritate, vel non modici momenti ratione nititur. Autoritas grauis hoc loco censeri debet, quæ est saltem vnius viri docti & probi: qui tamen talem doctrinam non inconsideratè ac temerè; sed post perspecta rationum pondera, quæ in oppositum afferri possunt, amplexus est: quod quidem ab ipso factum fuisse alij plerumque præsumere possunt præsertim qui indocti sunt. Ea verò sententia probabilis censeri alteri non debet, quæ vnus pluresve Doctores contra communem inuenerunt; alij verò postea examinantes, communi calculo, tanquam improbabilem ac singularem, reiecerunt, adductis rationibus, vel Principum decretis, ad quæ priores illi vel non attenderunt, vel solidè respondere nequiverunt. Videri potest S. Thom. quodl. 3. a. 10. Syl. ver. opinio, q. 1. Nauar. c. 27. n. 288. Sa ver. dubium, num. 3. Vasq. disp. 62. c. 4. num. 17. & 18. Sanchez lib. 1. moral. cap. 9. num. 72. & 11.

Secundò dixi, probabilem sententiam esse, quam non modici momenti ratio alicui confirmat, veritatisque consonam persuadet. Quod intelligi debet de viro docto & rerum perito, qui fundamenta contrariæ sententiæ, licet alioquin communis, perspexerit, ac dissoluerit, sicuti docet Vasq. cit. c. 4. in princ. Sanchez cit. cap. 9. num. 9. Azor. tom. 1. l. 2. c. 17. q. 6. Id tamen limitandum arbitror, nisi



singularem viri docti sententiam alij postea examirantes, tanquam improbabilem & erroneam dānent: tunc enim non potest illi sua persuasio non valde suspecta esse de falsitate, licet ob intellectus tenuitatem, vel potius ob affectus prauitatem, non agnoscat.

7 **Affertio I.** Ex duabus contradicentibus probabilibus opinionibus, quæ versantur circa actionem humanam, an ea licita sit nec ne; quisque in praxi, siue operatione sequi potest quam maluerit; etsi ipsi operanti speculatiue minus probabilis videatur. Ita Natar. in cit. c. si quis autem, d. 7. de pœnit. Medina 1. 2. q. 16. a. 6. dub. penult. Arzag 2. 2. q. 63. a. 4. ibi. Salon. contr. 2. Lopez p. 1. instr. c. 126. Suar. t. 5. disp. 40. §. 3. Azor to. 1. lib. 2. cap. 16 q. 2. & 4. Gutierrez lib. 1. can. qq. c. 13. num. 23. Sanchez lib. 2. de matrim. disp. 41. n. 9. & l. 1. moral. c. 9. n. 14. Hen. l. 14. c. 3. n. 3. contra Gl. in c. Capellan. de feriis. Cai. ver. opinionis vsus Angelū & Armil. ver. opinio, Syl. eod. ver. q. 1. Ioan. Maiorē in prologo 4. sentent. q. 2. conc. 3. & 4. Conradū q. ult. de contract. conclus. 1. arbitantes, sequendam esse opinionem probabiliorē vel quam operans veram esse iudicat. Probatur assertio: Opinione, quæ non est aliena à recta ratione, potest aliquis prudenter sequi: probabilis autem opinio non est aliena à recta ratione: ergo potest eam aliquis prudenter sequi. Maior est clara. Minor declaratur ex definitione opinionis probabilis, quam dixi esse eam, quæ vel graui autoritate, vel non modici momenti ratione nititur. Confirmatur: Cum in moralibus non facile reperire sit exactam veritatis certitudinem, sed ferme solā verisimilitudinem sufficit sequi quod est probabile. Et enim valde difficili, & propē impossibilis obligatio foret, si quisque examinare semper debeat, vtrā duarum probabilium opinionum efficaciorē ratione, vel plurimā aut peritiorum Doctorum autoritate fulta sit.

Et hæc quidem absolute ostendunt, licet eam esse probabilem sententiam in operando sequi. Quod autem id fieri possit, tamen ipsi operanti speculatiue minus probabilis, & opposita probabilior appareat: inde ostendi debet: quia speculatiua illa opinio, eo ipso quod incerta & fortasse falsa, non potest esse regula operationis: consequenter operans aliam regulam, eamque certam sectari debet; videlicet quod in dubijs quæstionibus circa mores quisque operari potest secundum sententiam, quam viri docti probabilem & in praxi tutam defendunt. Neque verò tunc agit contra propriam conscientiam: cum conscientia non sit speculatiua aliqua opinio; sed practicum certum iudicium de agendo, quod in tali casu per reflexionem formari potest, vt dicam num. seq.

**Affertio II.** Ex duabus eiusmodi probabilibus partibus quæstionis licitum est etiam eam sequi, quæ minus tuta est, id est minus quam eius opposita, remota videtur ab omni peccati specie. Ita Doctores suprà citati. cuius oppositum videntur docuisse Caiet. ver. opinionis vsus Syl. ver. dubium. q. 2. Corduba in quæstion. libr. 2. qu. 3. prop. 3. & apertius Ioan. maior cit. q. 2. concl. 3. Probatur assertio: In moralibus operationibus necesse non est sequi quod optimum ac tutissimum est: sed sufficit sequi bonum ac tutum. Quod autem probabilis opinio tradit, id bonum ac tutum est. Ergo licitum est eam sequi; quāuis opposita opinio tutior id est, magis adhuc remota sit ab omni peccati specie seu similitudine. Minor constat ex suprà dictis. Maior verò inde probatur: tum quia aliquin consilium non differret à præcepto: tum quia nimis grauis obligatio homini operanti incumberet. Exemplū huius doctrinæ adfert S. Anton. p. 1. tit. 3. c. 10. §. 10. ex S. Thom. in 4. d. 17. q. 1. a. 3. q. 1. qui probabiliter docet, quod lapsus in peccatum mortale ordinari non sit obligatus ad confitendum statim, habita cōfessōis: cum tamen contrarium doceat A. enlis p. 4. q. 77. mem. 4. a. 2. S. Bonau. cit. d. 17. p. 2. a. 2. q. 2. quorum sententiam quis neget tutiorem & consultiorem esse? nihilominus licitum est in praxi sequi probabilem sententiam S. Thomæ.

Sed obi citur, quod in dubijs tutior via eligenda est iuxta c. iuenis, de sponsal. & c. si quis autem. d. 7. de pœnit. tene certum, & dimise incertum. Ad hoc respondet S. Anton. l. c. & Nau. cit. c. si quis autem, n. 34. & in man. c. 27. num. 281. Regulam illam potius consilium, quàm præceptum continere. Respondeo secundò, distinguendum esse inter incertitudinem seu dubium propriæ & simpliciter practicum: & dubium abstractum, quod etiam speculatiuum appellatur. Nam in illo quisque obligatus est sequi partem tutiorem: veluti si dubito, siue incertus sum vtrum mihi hîc & nunc licitum sit contractum census germanici instituere, peccabo, nisi abstineam: quia cōmitterem me peccandi periculo. In dubio autem abstracto & speculatiuo, v. g. vtrum census germanicus secundum se, & suapte natura iustus sit, necesse non est sequi partem tutiorem: quia sequendo partem minus tutam, tamen probabilem, formare possum conscientiam, siue iudicium moraliter certum: licitum esse mihi hîc & nunc operari secundum sententiam speculatiue probabilem: quamuis adhuc certior, magisque à peccandi periculo, vel potius specie periculi remotus essem, sequendo alteram sententiam oppositam. Verum hîc locum habet iuris reg. 1. in 6. Qui certus est, certiorari ulterius non oportet.

Quæres, Qua ratione in operando certus esse possit, qui incertam & dubiam sententiam sequitur: cum ex incerto non possit colligi certum? Responso patet ex suprà dictis; Certitudinem conscientiæ, quam operans habere debet, non esse speculatiuum ex principis intrinsicis rei petitam; sed esse practicam, ex practicis & rei extrinsecis principis desumptam: v. g. sententiæ Doctorum probabiliter docenti aliquid esse licitum agere, possum me in praxi conformare: atqui Doctores aut qui probabiliter docent, contractum v. g. census germanici celebrare licitum esse: ergo possum me huic opinioni in praxi conformare: vbi vides, vtramque huius practicæ ratiocinationis propositionem certam esse: ex certis autem non sequitur nisi certum.

Sed contra instat aliquis, Non deesse Doctores, qui negant maiorem huius ratiocinationis propositionem veram esse: ergo ea non habet certam & indubiam veritatem. Secundò ponamus esse Doctores, qui negent sententiam, v. g. quæ iustitiam contractus germanici defendit, probabilem esse; existimantes se manifestam demonstrationem de opposito habere. quo casu minor quoque propositio certa & indubia non erit. Respondeo, hac obiectione non plus probari, quàm quod hi ipsi, qui ita persuasi sunt, conscientiam practice certam formare haud possint: interim tamen tales non prohibent, quò minus alij Doctores tam maiorem, quàm minorem propositionem pro certis habentes, ex ijs certum iudicium practicum concludant. Prohibere item non possunt, quò minus alij, rem ipsam secundum se non ita penetrantes, horum Doctorum autoritatem secuti, certo sibi persuadeant, quod isti docti ac probi viri agunt, vel ab alijs agi posse fatentur, se bona conscientia sequi, quantumuis alijs reclamantibus.

Ex dictis aliqua corollaria existunt: Primum, Doctor alteri consulenti consilium dare potest non solum ex propria, sed etiam ex opposita probabiliorum sententia, si fortè hæc illi fauorabilior seu exoptatior sit. Quæ de re Vasq. disp. 62. cap. 9. nu. 47. Sanchez cit. c. 9. num. 20. Sairus lib. 1. clauis regis, c. 6. n. 11. Lopez p. 1. instr. cap. 120. Imò arbitror, nihil à ratione alienum fore, si Doctor consultus significet consulenti, opinionem à quibusdam viris doctis tanquam probabilem defendi, quam proinde sequi ipsi liceat: quamuis idem Doctor eiusmodi sententiam speculatiue falsam esse certò sibi persuaudeat vt proinde ipsemet in praxi eam sequi non possit. Cum enim consulens in re dubia ius habeat se conformandi opinioni quæ à quibusdam viris doctis defenditur; nihil obistente, quòd aliqui alij contradicant, & speculatiue senten-



sententiam improbabilem iudicent; hoc ipsum ius confu-  
lenti Doctor indicare non prohibetur. Atque hinc existit,  
quod vir doctus diuersis, secundum oppositas probabiles  
sententias, opposita consilia dare possit; seruata tamen dis-  
cretione ac prudentia.

- 10 Secundum corollarium. Si pœnitens in praxi bona fi-  
de sequatur sententiam, quæ à quibusdam Doctoribus  
tanquam probabilis ac tuta defenditur; Confessarius ve-  
rò seu ordinarius, seu delegatus eandem speculatiuè im-  
probabilem censeat, nihil obstante sua persuasione, tene-  
tur absolutionem conferre. Ita docet Sotus in 4. d. 18. q.  
2. a. 5. ad 1. Victoria in summa. de confess. num. 177. Nau.  
in man. c. 26. num. 4. & c. si quis autem d. 7. de pœni-  
tent. numer. 54. & seqq. & lib. 1. consil. 1. de constit.  
q. 12. edit. 2. Medina in Instruct. Confessar. lib. 1. c. 8. & 1.  
2. q. 19. a. 6. §. est alia quæstio, concl. 3. Sanchez num. 27.  
Vasq. l. c. cap. 7. & ali. Probatur: Confessarius, audita  
confessione, non potest absolutionem negare pœnitenti  
rectè disposito, nullumque peccati obicem ponenti. At-  
qui sequendo probabilem opinionem pœnitens non pec-  
cat, ac proinde, quatenus est ex hoc capite, rectè disposi-  
tus est. Ergo non potest illi absolutio negari. Igitur re-  
prehendenda est ea Confessariorum consuetudo, qui ve-  
riti contentem contra propriam sententiam absoluerunt,  
eundem ad alium Confessarium ablegant, qui oppositam  
probabilem opinionem tenet. Si enim ille alter absolueret  
possit, cur non & tu possis? At cur tua speculatiua per-  
suasio pœnitenti obesse debeat?

Obijcies Confessarius est pœnitentis superior: ergo  
pœnitens, deposita propriâ opinione, Confessarij præci-  
pientis opinionem amplecti tenetur. Respondeo. Non es-  
se superiorem simpliciter; neque ius præcipiendi habere  
in omnibus; sed solum in ordine ad peccata, quæ ad tribu-  
nal pœnitentiæ adferuntur: Verum, vt supra dixi, pœni-  
tens non peccat adherendo opinioni, quæ à Doctoribus  
probabiliter defenditur: ergo nihil illi Confessarius in  
hac causa, tanquam subdito, præcipere potest.

- 11 Tertium corollarium. Superiori præcipienti secundum  
opinionem probabilem, subditus tenetur obedire, etiam  
contra propriam probabiliorum, magisque tutam. Ita  
Corduba lib. 3. Quæstionarij, q. 4. Vasq. disp. 62. cap. 6.  
Manuale Prælatorum Ludouici Miranda t. 1. q. 26. a. 5. Si  
enim subditus aliquid licitè agere potest, præcipiente su-  
periore etiam debet. Quisque autem licitè agere potest  
secundum sententiam probabilem, etiam contra propriam  
probabiliorem, ac tutiorem, vt supra dixi: ergo subditus,  
præcipiente superiore, etiam debet. Confirmatur: In du-  
bio inter Superiorem & subditum præsumptio est pro  
Superiore, arg. c. quid culpatur, 23. q. 1.

- 12 Sed quid? si dubitetur de potestate præcipiendi, vtrum  
eius limites non excedantur, vtrum iusta causa sublit, & c.  
Respondeo cum Lessio lib. 2. c. 4. num. 77. Miranda l. c.  
a. 6. In tali etiam dubio pro superiore præsumptionem  
faciendam esse, arg. cit. c. quid culpatur, excepto, si ex hac  
parte graue incommodum in persona, rebus, aut honore  
timeatur obedienti, alteriue personæ. Tunc enim subdi-  
tus partem benigniorem amplecti poterit, vt obedire cum  
tanto discrimine non teneatur, quamdiu non constet,  
præceptum iustum esse, sicuti præter citatos etiam docet  
Adrianus quodl. 2. p. 1. ad 3. Arrag. 2. 2. q. 63. a. 2. ad 2. arg.  
Medina 1. 2. q. 19. a. 6. §. ex his principijs.

## §. III.

## De dubio iuris merè speculatiuo.

## S V M M A R I V M.

- 13 Regula illa, quod liceat quamuis probabilem sententiam in  
agendo sequi, accommodanda non est ad quæstiones merè spe-  
culatiuas.  
Si quæstio sit de valore Baptismi, alteriusve Sacramenti, plu-  
rumque non licet administrare secundum probabilem, tamen  
incertam sententiam.

- 14 Non tamen requiritur exacta certitudo, sed sufficit magna pro-  
babilitas: quo modo aiunt Doctores, licitum esse sacramen-  
tum Pœnitentiæ accipere cum sola attritione, etiam cognita  
conformando se probabilissimæ sententiæ, quod talis dolor in  
sacramento sufficiat.

**N**on placet quorundam Doctorum sententia, qui  
supra traditam regulam, quod quamlibet senten-  
tiam probabilem in oderatione sequi licet; etiam ad quæ-  
stiones ac sententias de iure merè speculatiuas transferunt.  
Talis merè speculatiua & non practica quæstio est de va-  
lore Baptismi, v. g. si ministretur in materia, vel forma  
dubia & incerta. Si enim probabilis sit aliquorum Docto-  
rum sententia, affirmans talem materiam aut formam va-  
lidè adhiberi; putant aliqui etiam licitè adhiberi posse,  
conformando se huic probabilis sententiæ; licet opposita  
probabilior etiam sit; dummodo nec Ecclesiæ conon, nec  
lex charitatis repugnet. Ita docet Vasq. 1. 2. disp. 63. c. 2. &  
3. Solon 2. 2. q. 63. a. 4. controu. 2. Saurus in clauis regia li.  
1. c. 7. num. 4. Sanchez 1. moral. c. 9. num. 35. Sed non  
placet hæc sententia, cum infirmo fundamento nixa sit.  
Tamen si enim sententia affirmans, materiam atque for-  
mam ad valorem sacramenti sufficientem esse, in scholis  
probabilis censeatur; tamen, cum ea probabilitas merè  
speculatiua sit, nihil omnino dicat de operando. vel nõ  
operando: sed restat adhuc quæstio practica, vtrum li-  
ceat in tali probabili, aut incerta materia vel forma sacra-  
mentum administrare: quæ quæstio ex proprijs principijs  
in negatiuam partem satis clarè resoluitur, ita vt opposi-  
ta pars quæstionis falsa, imò & improbabilis iudicari pos-  
sit: cum sit quædam irreuerentia contra sacramentum,  
exponere illud periculo, ne inualidè ministretur: eiusmodi  
verò periculum imminet, si existente quæstione, vtrum  
talis materia, aut forma sufficiens sit, pars affirmans solu  
probabilis, idè quæ dubia censeatur. Quæ de re videri po-  
test Suarez tom. 4. disp. 26. l. 6. num. 5. Excipiendus ta-  
men est casus necessitatis, in quo rectè administratur sa-  
cramentum, præsertim vnum ex necessarijs, cum dubio  
valoris, saltem sub conditione. Ita enim v. g. proles ba-  
ptizatur, exerta ex vtero sola manu, si periculum in mo-  
ra sit. Cum enim ratio dicat ex duobus incommodis, id  
quod minus est eligendum esse, in tali casu necessitatis  
cessat periculum irreuerentiæ formalis. Vide petr. de So-  
to tr. de sacram. Euchar. lect. 2. Suarez t. 3. l. 4. in fine, &  
t. 4. disp. 26. l. 6.

Præterea addo, quod neque in quæstionibus de valo-  
re sacramenti semper requiratur exacta certitudo, sed suf-  
ficiat magna probabilitas, & quasi moralis certitudo:  
ita vt opposita sententia negans, talem v. g. materiam  
esse sufficientem, quasi nihil probabilitatis habere videat-  
ur. Nam sic docent multi Doctores, licitum esse sacra-  
mentum Pœnitentiæ accipere cum sola attritione, etiam  
cognita: quia opposita sententia, negans eam sufficientem,  
valde improbabilis est: quia sequeretur hominem nun-  
quam iustificari per ipsam susceptionem sacramenti Pœ-  
nitentiæ, cum iam ante per contritionem eum iustificatum  
esse oporteret: quod tanquam improbabile communiter  
iam rejicitur.

## De Medico &amp; Chirurgo.

## S V M M A R I V M.

- 15 Medicus in curando infirmo sequi debet sententias certas &  
securas, relictis incertis ac dubijs.  
Si moriturus homo sit, nisi ei adhibeatur medicamentum non  
vacans periculo acceleranda mortis, tamen cum pro-  
babili spe conferenda sanitatis, adhiberi potest.

**S**PECULATIVA etiam, non practica quæstiones  
sunt de medicamentis, & curationibus. Est enim pro-  
babilis opinio sit, medicamentum infirmo profuturum  
esse; non ideo sequitur probabile esse, quod liceat Me-  
dico tale medicamentum dubium adhibere. Quin potius



cum agatur de periculo corporis, securior via eligenda est. Quare Medici & Chirurghi sequi debent sententias certas & securas, reiectis incertis, ac dubijs: grauiusque peccat Medicus, si experiendi tantum causa inexplorata medicamenta infirmo adhibeat. Quod si certa curatio non occurrat, tenetur sectari ea, quæ probabiliora iudicat, posthabitis opinionibus minus probabilibus. Ita docent Syl. ver. Medicus, q. 4. Nau. c. 25. num. 61. & in cap. si quis autem, d. 7. de pœnit. num. 74. Sotus de iustitia lib. 3. q. 6. a. 5. ad 4. Sanchez num. 40. Valsq. 1. 2. disp. 64. ca. 4. contra Azor to. 1. lib. 2. c. 17. q. 11. in fine. Ratio est; Quia Medici officium, & lex charitatis ita postulat, ut adhibeantur remedia, quæ ad propositum sanitatis finem magis idonea, id est profutura iudicantur.

Sed quæstio est, si nulla medicamenta suppetant, nisi dubia & periculosa, vtrum infirmo applicari possint? Respondeo, prudenter examinandum esse, hinc quidem vim & periculum morbi; illinc verò tam spem sanandi, quam timorem ac periculum nocendi. Quare, si Medicus intelligat, certò moriturum infirmum, nisi medicamentum adhibeatur, non carens quidem periculo accelerandæ mortis; iunctum tamen cum probabilis spe conferendæ sanitatis, adhibere poterit, sicuti ex Galeno refert Adrianus de sacram. Confess. q. de correct. fraterna, Corduba lib. 3. q. 5. prop. 2. reg. 2. Sanchez num. 39. Valent. t. 3. disp. 3. q. 10. p. 2. Valsq. cit. disp. 64. cap. 4. num. 22.

### De iudice in causa dubia.

#### S V M M A R I V M.

- 16 *Iudex sententiam ferre debet secundum opinionem de iure probabiliorē.*  
*Probabilior causa censi debet: I. cui lex assistit. II. quam loci consuetudo tueretur. III. quam Doctores communiter sequuntur.*  
*IV. quam firmiores rationes stabiliunt V. si reliqua paria sint, preferenda est opinio benignior.*

<sup>16</sup> **S**PECVLATIVA item & non practica quæstio est de iure partium litigantium, in qua licet probabilis videatur esse causa vnius, non tamen sequitur, esse etiam probabile quod liceat Iudici tali parti victoriam adiudicare. Nam hæc quæstio practica ex proprijs principijs satis manifestè resolvitur: videlicet, quod Iudex iudicare tenetur secundum sententiam, quæ inspectis allegationibus & probationibus, probabilior iurique conformior est. Ita docet Syl. ver. opinio, q. 2. Sotus lib. 3. de iust. q. 6. a. 5. ad 4. Valsq. disp. 64. c. 2. Bannes 2. 2. q. 63. a. 2. dub. 1. solut. ad 2. Nam Iudicis officium est partibus litigantibus sententiam dicere, secundum merita causæ: est autem per se notum, eam litigantium partem, quæ causam suam in iudicio secundum leges & rationes probabilius defendit, potiore iure mereri. Ergo, &c.

Canenda igitur est doctrina Arrag. 2. 2. q. 63. a. 4. & Salonis ibid. controu. 2. conclus. 4. Med. 1. 2. q. 19. a. 6. dub. penult. ad ult. Si circa propositam controuersiam contrariæ sint opiniones probabiles de iure, posse Iudicem relicta probabiliori, iudicare secundum alteram probabilem.

Neque etiam placet sententia Valentia t. 3. disp. 5. q. 7. p. 4. dub. 3. Sairi lib. 1. cap. 11. propos. 2. Sanchez lib. 1. moral. c. 9. numer. 45. Si oppositæ opiniones æquæ probabiles videantur, in Iudicis arbitratu positum esse, causam adiudicare vtri parti maluerit, v. g. benevolentia causâ amico. Quis verò non videat ab æquitate alienum esse, si duo æquale ius habeant, Iudicem, quem oportet esse iuris interpretem, iustitiæque administrum, vni eorum totum adiudicare, alteri abiudicare? Accedit & iuris regula 12. in 6. *In iudiciis non est acceptio personarum habenda.*

Quæres, quid ergo agendum hoc casu Iudici erit? Respondeo, si post causæ diutius dilata accuratam discussionem, neutra litigantium pars, inspectis allegatis, de facto aut de iure, superare videantur; vel ad superiorem Iudicem causam ablegandam esse: vel arbitros partium con-

sensu statuendos: vel compositionem suadendam, imò etiam imperandam in tali casu nimis intricato, sicuti notauit Abb. in cap. ult. not. 4. de maior. & obed. vel denique vni dimidium, alteri alterum dimidium iuris aut rei, de qualis est, adiudicandum.

Porrò probabilior causa censi debet I. cui lex eo loco recepta assistit. Nam *Iudex in mandatis habet*, ut secundum leges iudicet, l. nemo, C. de sentent. & interloc. c. 1. de constitut. & c. in istis, d. 4. Adde, si à litigatoribus, eorumve aduocatis minus dictum fuerit, Iudicem supplere ac proferre posse, quod sciat legibus ac iuri publico conuenire, iuxta tit. C. Vt quæ defunt Aduocatis, & c. iuncta. Glos. & annotauit Ab. in c. Raynuitius, num. 11. de testam. Vbi ait, *Vbi quæ aliquod ius ex deductis in iudicium competat parti, licet pars ignoret, potest & debet Iudex ex officio supplere, cum ipsi notorium sit*: quicquid hac in re repugnet Valsq. cit. c. 2. Illa tamen, quæ ad factum pertinent, proferre Iudex non debet, nisi quorum publicam noticiam ex actis vel instrumentis, accepit, qua de re vide eundem Ab. in c. bonæ, num. 9. de postul. Prælat.

II. Quam loci consuetudo tueretur, iuxta l. 1. C. quæ sit longa consuetudo: Nam in dubio, *Optima est legum interpret consuetudo*, l. si de interpretatione, ff. de legibus & notat. Abb. in cit. c. 1. n. 14. de constit.

III. Quam Doctores eo causarum genere periti communiter sequuntur. Porrò communis opinio non ex opinantium numero æstimanda est: cum fieri soleat, ut vnius ductum plures eodem tramite, nulla noua ratione moti, velut aues aues, oues ouem sequantur; nisi etiam alij in nullius verba iurati, & ex professo quæstionem tractantes, bonis rationibus eandem sententiam confirmant, sicuti notauit Nau. c. 27. n. 286 & seqq.

IV. Quam firmiorum rationum momenta stabiliunt: imò si ratio efficax sententiam minus communem stabiliat, interdum communiore licet præfertur, iuxta dictum Nau. c. 12. n. 10. Quod à communi sententia recedendum non est, nisi in contrarium textus sit expressus, vel ratio efficax.

### De Aduocato.

#### S V M M A R I V M.

- 17 *Aduocatus causa probabilis patrocinium licite suscipit, et si contrariam probabiliorē suadet.*  
 18 *Aduocatus contra iniustitiam peccat, obligationemque damni compensandi contrahit, si causa iniusta patrocinium suscipiat: Vel si a patrocinando non desistat, cum primum iniustitiam esse deprehendit.*  
 19 *Aduocatus, qui probabilis ignorantia facti laborans, causa iniusta patrocinium suscipit: postea errore detecto, salarium nihilominus petere potest. Sed partis aduersaria patrocinium in eadem causa præstare non expedit: & plerumque licitum non est.*  
 20 *Aduocatus, itemque Iudex & Consiliarij, si intellexerint quod pars altera litigantium iniquam causam foueat, non possunt esse autores transactionis.*

**Q**UÆRITUR, an quod supra de iudice dictum est, si milititer de Aduocato sentiendum sit? Respondeo, Nequaquam: Quia Aduocati officium non est definire, seu ius dicere inter partes contententes; sed parti vni litigantium assistere, & patrocinium adferre: consequenter, si Aduocatus causam clientuli non manifestè iniquam, sed probabilem iudicet; licite eius patrocinium suscipit, et si causam aduersariam probabiliorē, & facilius obtinendam arbitretur. Ita Sotus lib. 5. de iust. q. 8. a. 3. Syl. ver. Aduocatus, q. 10. Nau. c. 25. num. 28. Sa ver. Aduocatus, num. 7. Sairus lib. 1. c. 11. num. 17. Valsq. disp. 64. c. 1. Sanchez num. 51. 52. Less. lib. 2. cap. 31. dub. 9. num. 52. Nam quotiescunque causa dubia seu controuersa est, permittitur parti litem cum aduersario contestari; atque propositis iuribus ac rationibus suis, Iudicis dirimentis sententiam postulare. *Potest autem quis per alium, quod potest facere per seipsum*, reg. 68 in 6. Nam ideo iura Aduocatum permittunt, ut sit veluti vicarius partis litigantis.

Ceterum



- 20 Adde III. Quòd peccet Aduocatus, sicut & Iudex vel  
 Consiliarii, si intellecto quòd pars vna litigantium causam  
 iniquam habeat, auctores sunt transactionis faciende, cum  
 alterius partis damno: quando quidem transactio solum  
 in causa dubia interuenire debet: idque colligitur ex S.  
 Tho. cit. q. 71. a. 3. ad 2. & docet Less. cit. dub. 8. n. 49.

SUMMARY.

- 21 **P**RÆTEREA speculatiua, non practica quæstio cen-  
seri debet, quæ est de iure proprietatis, videlicet vtrum  
res mea sit, siue ad me pertinens, nec ne. Nam esto proba-  
bilis sit opinio ad me pertinentem esse; non ideo statim  
consequens est, quod liceat eam à possessore auferre, vel  
possessam absumere. Sed hæc quæstiones practicae ex pro-  
prijs principijs moralibus resolui debent, vt mox explica-  
bo. I. Si bona fide rem aliquam possidenti superueniat  
dubium, vtrum aliena sit & restitutioni obnoxia; tenetur  
is veritatem diligenter inquirere, atque interea rem con-  
seruare, sin verò diligenter inquirendo veritatem depre-  
hendere, atque speculatiuum dubium deponere non pos-

II. Si quis ab initio mala fide possedit, quia rem à per-  
sona de furtis suspecta emit, vel dono accepit : & post  
diligentem veritatis inquisitionem cognoscere non potest  
vtrum aliena sit, debet restitutionem facere, secundum  
proportionem dubij iuris, quod alius in re habere videtur.  
Ita docet Salon 2. 2. q. 61. tract. de dominio, in fine. Molina  
t. 3. tr. 2. disp. 723. num. 3. Rebellus p. 1. de obligat. iust.  
lib. 2. q. 5. num. 7. Sanchez cit. disp. 41. num. 24. Qui enim  
rem aliquam accipit, dubitans vtrum accipiendi ius ha-  
beat, is non bonæ, sed malæ fidei possessor est : igitur per-  
seuerante hoc dubio, possessio illi suffragari non debet.  
Quia tamen certus non est, rem ad alterum pertinere, &  
consequenter dubium in ea ius habet, ex titulo v. g. em-  
ptionis, vel donationis comparatum : ideo non obligatus  
ad restituendum, nisi secundum dubij proportionem.  
Cæterum interdum fieri potest, vt tamen aliquis dubitet,  
num venditor rei venditæ dominus sit, nihilominus iuste  
illius possessionem capere, ac retinere possit : Primum, si  
intelligat venditorem bona fide rem alienasse, quia post  
diligentem inquisitionem non poterat deprehendere esse  
alienam, sicuti notauit Mol. to. 1. tr. 2. disp. 36. conclus. 1.  
& 3. Sanchez cit. disp. 41. n. 28. Etenim in hoc casu em-  
tor succedit in iure pristini possessoris. Secundo, si quis re,  
quam suspicatur furtiuam esse, emit, vel dono accipit, cum  
proposito eam domino reddendi, tanquam eius negotium  
utiliter gesturus, sicuti notat Couar. reg. peccatum, p.  
3. princ. n. 4. Med. C. de restitut. q. 10. §. aliter tamen vide-  
tur. Sanchez num. 29. Quare, si postea rei dominus ap-  
pareat, non debet possessor plus restituere, quam possi-



det, aut loculetiore factus est, sicuti docet Molin. to. 3. tract. 2. disput. 723. num. 4.

### De dubio valoris Matrimonij.

#### S V M M A R I V M.

23. *Dubitans de matrimonij contrahendi valore, quia v. g. certum nuntium de morte coniugis non accepit, abstinere cogitur: si autem contrahat stante tali dubio, coniugij debitum petere non potest: sed alteri bona fide contrahenti reddere tenetur.*  
 24. *Si post matrimonium bona fide contractum supervenit dubium de illius valore: idque post diligentem veritatis indagacionem depelli non potest, licitum est debitum petere, reddere autem necessarium.*  
*Qui defectum matrimonij, quamvis bona fide contracti, manifeste deprehendit, omnino abstinere cogitur à reddendo & petendo.*

23. **S**IMILI ratione dicendum est; Si dubium de matrimonij valore, ob latentis impedimenti suspicionem, antecedit, omnino ab eo contrahendo abstinendum esse sicuti docet Vera crux 3. p. speculi, a. 13. in fine, Sanchez lib. 2. de matrim. disp. 42. Henricus lib. 11. c. 15. num. 13. Idque partim ob favorem sacramenti, ne inualide administraretur: partim ob illud principium; Mala fide contractum iniuri, possessionemque inchoari ab eo, qui initio dubitat, num. contrahendi, possessionem capiendi ius habeat. Quare qui ita mala ac dubia fide contraxit, dum dubium perseverat, debitum coniugij petere non potest; licet alteri bona fide petenti reddere teneatur: qui est casus c. Dominus, de secundis nuptijs, & docet Sanchez l. c. concl. 1. Syl. ver. matrimon. 4. qu. 9. in fine, Vera crux. 3. p. spec. art. 18. concl. 6.

24. Sin verò post matrimonium bona fide contractum, superveniat dubium de illius valore, licitum est coniugij debitum petere. Nam dubium superveniens bona fidei possessori obesse non debet. Ita ex communiore Sanchez lib. 2. disp. 41. q. 4. num. 45. & colligitur ex S. August. lib. de fide & operibus c. 7. quod refertur causa 34. q. 1. c. si virgo. & c. 1. Ut lite pendente, ubi habetur, quod accusatus (de matrimonij defectu) ante probatam accusationem, iure quod habet in altero, privari non potest.

Imò stante tali dubio theorico, coniugi debitum petenticoniunx reddere tenetur: quia nemo priuatus alterum sui iuris possessione priuare potest, ob dubias, etiam probabiles; non tamen certas rationes, sicut notat Sanchez disp. 44. num. 1. & habetur in c. inquisitioni, de sent. excom. & apud S. Th. in 4. d. 41. q. vn. 2. 5. question. 1. ad 3. Quare neque hic periculum est fornicationis formalis seu peccaminosa: cum, esto matrimonium re ipsa irritum sit, tamen probabilis ignorantia in bonæ fidei possessore à peccato excuset. Si tamen matrimonij defectus manifestò alicui exploratus sit, potius excommunicationis sententiam sustinere deberet, quam fornicationis peccatum, seu petendo seu reddendo putatitæ vxori, admittere, sicuti constat ex cit. c. inquisitioni, & videri potest Sanchez l. 2. disp. 39. conclus. 1. Quod verò in eod. illo c. dicitur, si credulitas probabilis, & discreta, quamvis non manifesta, animum pulsat, debitum quidem reddi posse; sed non postulari, id non eodem modo. Doctores intelligunt. Nā S. Th. l. c. S. Anton. p. 3. tit. 1. cap. 3. §. 2. Syl. ver. matrim. 8. quæst. 3. dicto. 5. Pet. Ledesma de matrim. q. 45. a. 7. dub. 2. ad 3. arg. 1. sent. aiunt, quod dubitans de iure suo, si post diligentem inquisitionem, magis propendat in eam partem, sibi ius non assistere; desinat esse bonæ fidei possessor: quam sententiam cum pluribus à se citatis tenuit Sanchez l. 2. de matrim. disp. 41. n. 19. Sed Vera crux p. 3. specul. a. 13. in fine, Sanchez l. 1. moral. c. 10. num. 9. priorem sententiam suam retractans, docent, bonæ fidei possessorem iure suo nequaquam excidere, priusquam certò vel quasi certò deprehendat, sibi ius non competere. Iuxta quam sententiam, quam supra ipse secutus sum, duobus modis responderi debet ac c. inquisitioni: Primò dubitantem in casu eius capit. non adhibuisse diligentiam

cognoscendæ veritatis: constat autem, dum dubitans veritatem inquit, iure possessionis suæ uti non posse: excepto vnico casu, si usus matrimonij dubi, ad experimentum capiendum necessarius sit, iuxta decisionem c. laudabilem, de frigid. & malefic. in quo dicitur, si suspicio incidat inter coniuges de naturali perpetua impotentia, eaque probari non possit; trienni spatio cohabitandum ipsis esse, experiendi causâ. Secundo & facilius responderi potest; Eum, cui Papa in illo capit. respondit, ab initio mala fide contraxisse matrimonium; quia videlicet dubitabat, vel dubitare debebat de eius valore: ut proinde casus similis sit c. Dominus, de secundis nuptijs; ubi responderetur, Dubitantem de valore matrimonij, quod contraxerat, nondum habita certitudine coniugis prioris præmortuæ, debitum interim à coniuge sua exigere non posse.

### De iure belli in causa dubia.

#### S V M M A R I V M.

25. *Exorto inter Principes dubio de iure proprietatis, potior est causa possessoris bona fidei. Sin longè probabilis iudicetur ad alterum rem pertinere, tunc possessor in transactionem, vel bonorum virorum arbitrium consentire debet: alioquin bellum consentire debet: alioquin bellum contra eum geri potest, si partes contendentes iudicem superiorem non habeant.*  
 26. *Si neuter contententium rem bona fide possideat, tunc alter alterum cogere potest, ut per arbitros, vel iustam diuisionem, transactionem, controuersiam componi patiatur.*  
 27. *Per accidens, videlicet ob ignoracionem, fieri potest, ut bellum ex vtraque parte formaliter iustum sit.*  
 28. *Qui in ali quo regno subditi sunt, si de aliqua re contendant, debent stare sententia Regis, vel Procerum regni: idcoque ordinariè inter tales iustum bellum geri non potest.*

**D**E NIQUE doctrina supra tradita etiam in materia belli ostendi solet, ut videre est apud Victor. relect. 25. de iure belli à nu. 27. Molinam to. 1. tract. 2. disp. 103. Becanum 2. 2. c. 25. q. 8. Vasq. disp. 64. cap. 3. Atque in primis supponendum, exortâ controuersia inter principes, vel Reipubl. quæ superiorem nullum agnoscunt, de iure regni, prouinciarum ciuitatis, & c. oportere ante omnia rationes, seposito affectu, diligenter ac prudenter expendi, & vtrinque audiri; instituto conuentu, v. g. in consimilijs regnorum, & missis eò viris rerum peritis: Neque fas esse bellum instituire, si res aliter discuti, ac iuste componi possit. Nam bellare necessitatis, non voluntatis esse debet, ait S. August. Epist. 207. relatus in c. noli, 23. q. 1. ob ingentia damna & incommoda, quæ coniuncta, vel inde prouenientia esse solept. Ea verò discussione facta, si dubium maneat de iure siue proprietate; refert, vtrum altera pars rem bona fide hætenus possederit, nec ne. Nam superveniens dubium non nocet bonæ fidei possessori: neque cogi potest ad rem restituendam, priusquam manifestum fiat alienam esse. Quare hoc casu bello locus non est: vel si instituat, possessor tanquam vim passus se defendere; imò etiam illatam iniuriam vindicare poterit, sicuti rectè ostendit Victoria relect. de Indis num. 27. Monent tamen hoc loco Molina & Becanus ll. cc. Si vna pars absq; prauo affectu iudicet rem ad se pertinere; possessor verò dubitet quidem, attamen etiam eò propendat, quod res alieni iuris sit; tunc in conscientia obligatum esse, ( si id sine grauiore incommodo fieri possit ) ut saltem in transactionem, vel bonorum virorum arbitrium consentiat: sin verò id facere detrectet, posse contra eum bellum moueri. Cum enim neuter litigantium, ut suppono, superiorem agnoscat; ideoque vterque in propria causa iudex esse debeat; si actor existimet rem ad se pertinere, idq; ius suum alia via consequi non possit; restat, ut bello exigendi potestatem habeat, nisi aliter alter satisfacere velit. Alia verò ratio est, si possessor dubius de iure proprietatis, superiorem iudicem habeat; tunc enim restituere nihil tenetur, antequam à iudice suo condemnetur dummodo actor impeditus non sit, quo minus, si velit, iudicio



cio contendere possit; possessor etiam iustæ sententiæ Superioris sui stare paratus sit.

26 Sin autem neuter contententium rem bona fide possideat; tunc unus alterum cogere potest, ut vel mutuo consensu arbitri constituentur, vel res inter partes per transactionem diuidatur, proportionem ubi iuris, quod cuique competere videtur. Quod si iustæ huic petitioni alter satisfacere renuat, iam iniustus esse incipit, ideoque bello peti potest.

27 Accidit tamen interdum, ut artes post exactam causæ discussionem, iudicio discrepent: & una quidem arbitretur, certò aliquid rem sibi debitam esse: altera verò vel contrarium sibi persuaheat, videl. nihil omnino iuris aduersario competere; vel saltem ius dubium esse, ut non integra res aduersario debeat; quam tamen sibi debere existimat. Quo casu alteram quidem partem necesse est decipi: si tamen error inuincibilis sit, & non ex prauo affectu ortus; quandoque fieri poterit, ut bellum ex utraque parte formaliter iustum existat, nimirum per acciens, siue propter ignoracionem.

28 Porro, si duo contententes de re aliqua Superiorem agnoscant, ordinariè bello locus non erit, cum iudicio lis definiti possit, ut dicam in materia de bello. Similiter si, mortuo Rege, plures ex eodem regno, vel Repub. de iure regni disceptent, ad ipsam Remp. (quippe quæ singulis suis membris superior est) spectabit, licet dirimere, sicuti notantur Vasq. Mol. Becanus ll. cc. Quemadmodum etiam schismatis tempore, ad Ecclesiam, siue Prælatos Ecclesiarum Episcopos pertinet iudicare, an & quis contententium legitimus Pontifex existat. Et hæc locum habent, siue personaliter aliquis regni subditus sit, siue ratione territorij, quod in regno iam possidet: orta enim controuersia de iure talis territorij, debet possessor stare iudicio Regis aut regni: nisi vel lata sententia manifestò iniqua sit; vel ab initio rationem iustam afferat, cur iudices ipsi suspecti sint; ideoque arbitros dari postulet. Si tamen Princeps externus, & nullo modo subditus regno putet debere sibi possessionem alicuius territorij, illudque iniuste à Rege vel regno negari, non video, qua ratione vel Rex, vel proceres regni possint esse iudices in hac controuersia; ita, ut aliter qui nullo modo adhuc subditus est, eorum iudicio stare teneatur; licet contrarium doceat Vasq. l. c.

## §. IV.

## De dubio &amp; quæstione facti.

## S V M M A R I V M.

29 Dubium facti potius est speculatiuum; & non propriè practicum.

30 Factum in dubio ordinariè non presumitur.

31 In dubio an aliquis votum ediderit, aut homini promiserit, non debet censei obligatus. Sin verò constet promissionem factam esse: sed dubitetur, an eis satisfactum, fiat presumptio pro obligatione.

32 Si probabilis sit, ideoque opinetur aliquis, se votum excecum esse, aut canonica orationis pensum persoluisse: videtur esse immunis obligatione.

33 In dubio non presumitur aliquid actum: sin utem constet actum esse, presumptio est pro valore eius.

34 Qui dubitat, utrum annum XXI. ætatis compleuerit, non tenetur ieiunare.

35 Si dubium sit, utrum pubes fuerit adolescens cum votum edidit, à patre vel tutore cassari potest.

36 Dubitans utrum XXV. ætatis annum attigerit, à sacro Presbyteratus ordine interim abstinere debet.

37 Dubitans an dies ieiunij transacta, seu noctis medium sit, non potest carnibus vesci. Dubitans verò, utrum sequens ieiunij dies capta sit, pergere potest vesciendo, donec certior fiat. Et quod talis non obstante illo dubio, postera die licite sacrificet aut communice, non est improbabile.

38 Qui dubitat, utrum peccatum mortale confessus fuerit, debet illud confiteri. Dubitans an peccauerit mortaliter, debet sub

dubio confiteri.

38 In dubio, utram excommunicatio aliaue censura contracta sit benignior pars preferenda. Sin verò constet censuram contractam esse, in dubio non presumitur absolutionem datam fuisse.

39 In dubio iuris nemo censei debet irregularis: sed neque in dubio facti, excepta irregularitate ex homicidio iniusto.

40 Qui rationabiliter opinatur, quamuis non sine formidine oppositi, se hominem non occidisse, mortaliter non peccasse, aut peccatum confessum esse, practice securus esse potest.

41 Puer Baptismum petens, de quo dubitatur, an usum rationis habeat, baptizari debet reluctantibus parentibus infidelibus, si periculum in mora sit: Sed & vice versa, si parens talem puerum Baptismo offerat, ipse verò reluctetur.

42 Interdum ex diuersis principiis pro utraque quæstione parte rationes probabiles occurrunt, & discerni non possit, quarum maius momentum sit.

**D**VBI V M aut quæstio facti dicitur, quæ est circa facti aut cuiuscunque operis naturam, conditionem, aut modum. Ut cum dubitatur, aut quæritur, an puer rationis usum adeptus sit: utrum ætatem septennii compleuerit, ubi imprimis diligenter notandum; talem quæstionem de facto speculatiuam potius esse, quam practicam: quia per eam directè non quæritur, utrum operatio aliqua licita & honesta sit nec ne: quare tametsi probabile sit, v. g. quod aliquis XXI. annos compleuerit non ideo statim sequitur, quod liceat illi Presbyteratum accipere: sed eiusmodi quæstiones circa factum, aut qualitatem facti ex propriis principiis resolui debent.

Secundò, obseruanda est regula apud omnes recepta, quod factum in dubio non presumitur, sed demonstrari debet, sicut colligitur ex l. in bello, §. facta, ff. de caprinis, & postliminio reuersis. Cui affine est, quod dicitur in l. 2. ff. de probat. Et incumbit probatio qui dicit, seu affirmat aliquid factum: non qui negat. Quamquam hoc ipsum limitationem patitur: Nisi præsumptio potius sit pro affirmante, factum aliquid fuisse. Quò pertinet altera regula apud Mascardum volum. 2. de probationibus, concl. 734. Gloss. in citato libro 2. ff. de probat. & alteram Gl. l. in contrahenda, ff. de regul. iuris: Factum in dubio presumitur, si illud de iure faciendum erat. Quia magis est, ut existimemus aliquem munus suum recte obiisse; atque in eo quod egit nihil necessarium omisisse. Delictum autem & defectus non presumitur, sed demonstrare debet. Exempli causa; si constet alienationem aliquam factam esse, in dubio præsumendum omnem necessariam solemnitatem adhibitam fuisse. Simili ratione, si constet hominem quippiam egisse, v. g. Deo vouisse, præsumitur de liberationem sufficientem adhibuisse: quia id naturæ inest, ut homo deliberatè agat.

Exinde varij casus resolui possunt: I. In dubio, num votum Deo edideris: vel homini aliquid promiseris, non debes censei obligatus. Si autem constet de voto edito, vel promissione, aut donatione facta: dubitetur autem, num promissio aut votum impletum sit, v. g. votium ieiunij persolutum: vel utrum donatio remissa, aut qualicunque debito satisfactum sit, præsumptio stat pro obligatione. Priorem partem, quod votum in dubio non obliget, docet Sotus lib. 7. de iust. q. 3. a. 2. Lopez p. 1. instruct. c. 45. Suar. lib. 4. de voto, c. 5. & de censur. disp. 40. l. 5. num. 15. & l. 6. num. 15. Sanchez lib. 2. de matrim. disp. 42. q. 3. & lib. 10. moral. cap. 1. num. 36. Barthol. Medina in Instruct. Confessoriorum, lib. 1. c. 14. §. 7. contra Sa ver. votum num. 2. Azor to. 1. lib. 2. c. 19. q. 10. Vasq. disp. 65. c. 3. Nam factum in dubio non presumitur: sed demonstrari debet: & speciatim in hoc casu vinculum, siue obligatio voti, iuramenti, promissionis astruenda non est, nisi liquido cognoscatur, arg. l. quicquid: ff. de verb. obligat. Quare regula illa, quæ in externo foro usurpatur, quod nemo solvere cogitur, antequam monstretur esse debitor, etiam in hoc ipso animæ iudicio locum habere debet: si videlicet mens dubia sit an promiseris, eoque dubio se expedire non possit, ut libera tunc



pronuntietur. Neque est omnino improbable, quod docet Sanchez cit. numero 6. contra Rebelleum p. 2. de oblig. iust. l. 1. q. 2. f. 2. num. 10. Etiam si magis aliquis inclinaret in eam partem, quod vouisset dum tamen incertus manet, non obligari voto. Quemadmodum nec bona fidei possessor, rem de qua dubitat num sua sit, restituere cogitur, priusquam morali certitudine cognoscat alienam esse, ut supra dictum. Posterior verò pars assertionis est communis, & probatur ex supra tradita regula. Nam executio voti, alteriusve obligationis, sicut & remissio donationis, &c. est aliquid facti, quod in dubio non præsumitur, sicut ex communi docet Sanchez cit. lib. 1. c. 10. num. 12. Vasq. l. 2. disp. 66. c. 7. in fine. Cæterum si quis probabilius esse arbitretur, adeoque opinetur se votum executum fuisse, aut canonicæ orationis pensum absoluisse, arbitror eum obligatione immunem esse: eo quod in moralibus sæpe certitudo haberi non possit: neque in talibus conscientias nimis grauare oportet.

32 II. In dubio non præsumitur actum aliquem, v. g. donationis, legati interuenisse: si autem constet tale aliquid actum, potius est ut validum, quam ut irritum pronuntietur, secundum Gl. receptam l. in contrahenda, ff. de regul. iuris.

33 III. Qui post accuratam inquisitionem dubitat, utrum expleuerit ætatis annum vicessimum primum, non est possessione l. b. ætatis spoliandus, & ieiunij necessitate adstringendus, teste Sanchez lib. 2. de matrim. disp. 4. num. 38.

34 IV. Si dubium sit, num pubes fuerit adolescens, id est, XIV. ætatis annum complerit, cum religionem vouit, à patre vel tutore votum irritari potest. Nam hæc ætatis mutatio est quid facti quod non præsumitur, nisi probeatur. Accedit, quod in dubio superior spoliandus non sit iure & auctoritate sua. Ita Sanchez num. 39.

35 V. Dubitans, ut in neutram partem assentiendo inclinet, num XXV. ætatis annum complerit, à sacro Presbyteratus ordine interim abstinere debet: partim quia factum in dubio non præsumitur: partim propter reuerentiam sacramenti, ne contingat hominem, cum legitimæ ætatis defectu, contra sacros canones ordinari: Quam ob rem Ordinarij ab ordinandis certum ætatis testimonium exigere solent. Et ita docet Sanchez numero 41.

36 VI. Dubitans in die ieiunij, num ea transacta sit, & hora duodecima, in qua noctis mediū, sonuerit, carnibus vesci non potest, donec certior fiat. Sin autem sequente die ieiunium erit, pergere licet carnibus vescendo, dum rationaliter aliquis dubitat, num hora duodecima noctis sit, ut docet Sanchez cit. disp. 41. num. 40. Sed numquid Sacerdos dubitans, an noctis medium cœnando excesserit, altera die sacrificare poterit? Negat Sanchez lo. cit. quia in tali dubio seu incertitudine tutior pars eligenda videtur, propter reuerentiam sacramenti. Sed existimo, non improbabiler permissi posse Sacerdoti, ut in tali casu sacrificet, etiam propter deuotionem, ac nulla cogente necessitate. Quia lex Ecclesiastica de ieiunio communicaturis seruando, non videtur tam arctè constringere conscientias in casu dubio. Cessante autem obligatione legis Ecclesiasticæ, iam nulla est irreuerentia cum tali dubio communicare. Alia verò ratio est, si dubitatur de eo, quod ad substantiam sacramenti pertinet, ab Ecclesiæ voluntate non dependet. Simili modo respondetur: Si dentibus quippiam masticans dubitet an deglutiuerit, ut in neutram partem inclinare possit, quod à sacra communionē abstinere non teneatur. Quia in eiusmodi casibus fauorabilia præsumere licet, ne conscientia nimis astringantur.

37 VII. Si quis recordetur se peccatum mortale commississe, dubitet verò utrum confessus sit: ita ut nec probabiliter iudicare seu opinari possit, se præcepto, ac debito confessionis satisfecisse, is tenetur peccatum confiteri,

sicuti ex communi Nau. c. 9. num. 14. Suarez t. 4. disp. 22. f. 9. num. 7. Illud verò difficilius est dicere, si quis post diligenter animi discussionem dubius maneat, utrum mortaliter peccauerit, ita ut in neutram partem assentiendo inclinare possit: an teneatur peccatum sub dubio confiteri. Communiter Doctores affirmant: inter quos Alensis p. 4. q. 77. mem. 2. a. 5. in corp. S. Bonau. in 4. d. 17. p. 3. a. 2. q. 1. & d. 21. p. 2. a. 1. q. 2. in fine. S. Thom. ead. d. q. 2. a. 2. ad 3. Adrian. in 4. de confess. q. 4. a. 3. ver. ad tertiam confirmat. Syl. ver. confessio, num. 3. Nau. c. 9. num. 14. Suarez t. 4. disp. 22. sect. 9. num. 7. Sanchez lib. 1. moral. c. 10. num. 66. & 67. Contrarium tamen reperi apud Ægidium Coninck t. 2. de Sacram. disp. 7. dub. 8. concl. 2. *Ad hoc, ut peccatum* (loquitur de mortalibus) *teneatur confiteri, requiritur, ut saltem probabiliter possim iudicare, me peccasse.* Idque probari posse videtur ex Trident. sess. 14. c. 5. Vbi ad seruandam confessionis integritatem tantum exigit, à penitentibus omnia peccata mortalia, quorum post diligentem sui discussionem conscientiam habent, recenseri. Accedit & ratio: Quia in dubio delictum præsumi non debet: & in nullo foro aliquis accusari debet de delicto, quod eum commississe ita ostendi non potest, ut data indicia & coniecturæ assensum generent. Verum non libenter recedo à communi sententia, praxi etiam ac persuasione fidelium recepta. Nam sacramentum penitentia est vindicta salutaris, sess. 14. cap. 8. Trident. id est, non tantum in punitionem criminum, sed magis etiam ad animarum salutem institutum: atqui in hoc dubio, quo de salute animæ agitur, tutior pars amplectenda est, ut, si forte homo spiritualiter per peccatum mortuus sit, necessaria illi medicina quaeratur, quæ est contritio, & in lege noua sacramentum penitentia. Quare responderi debet ad oppositam rationem: Axiomata illa locum habere in odiosis; non item in ijs, quæ adeo fauorabilia & animæ salutaria sunt. Tridentinum verò Concilium ideo de peccatis dubijs mentionem nullam fecit, quia propositum illi erat ea tantum definire, quæ certiora sunt: reliqua scholasticis disputationibus re inuens. Sed nota hic primò: Quod resolutio ista non data sit pro scrupulosis: quippe quorum dubia rationabilia esse non solent, uti dicam cap. seq. Nota secundò: Quod resolutio ista maximè locum habet, si homo de contritione sua incertus, vita excessurus sit: tunc enim committit se periculo damnationis, nisi sacramentalem Confessionem instituat, ideoque ad eam obligatur naturali charitatis lege. Sin verò seu appropinquante periculo mortis, seu in decursu vitæ alia peccata sua, quorum conscientiam habet, confiteatur tacito illo, de quo post diligentem inquisitionem dubitat an commiserit, vel an fuerit mortale; tunc probabile apparet, non incumbere eius confitendi obligationem. Non enim ex lege positua Christi, & Ecclesiæ: quia esset nimis seuera obligatio accusandi se de ijs, quæ commississe se ignorat. Neque ex lege naturali charitatis, propter periculum animæ: quandoquidem confitendo bona fide peccata reliqua, per accidens remittuntur etiam ea, quæ ignorantur. Verum in hac re nihil determino, sed aliorum iudicio committo.

VIII. Dubitans; an homo ille clericus fuerit, quem percussisti, quamuis temerè percusserim, non sine suspitione aliqua esse clericum; si tamen postea veritatem deprehendere non possim, non debeo me excommunicatum reputare. Eademque ratio est de alijs censuris; puta, si aliquis temerè & mala fide sacrum ordinem suscepit, dubitans utrum legitimam ætatem habeat; si tamen veritatem deprehendere non possit, censendus non est suspensionis censuram incurrisse: veruntamen, si necessitas nulla cogat, sacro ministerio abstinere debet, usque dum certus sit de ætate legitima. Ratio doctrinæ est: Quia delictum opere & euentu consummatum esse, atque exinde consequens pœna in dubio præsumi non debent, sed demon-



strari: cum sint quiddam odiosum, & homo existat in possessione immunitatis. Quare omnia iura clamant, reum dubium esse absolendum: vt reg. 167. ff. *Fauorabiliores rei potius quam actores habentur*. Reg. 15. in 6. *Odia restringi, fauores conuenit ampliari*. Quare si Iudex in externo foro neminem punire debet, sed absolvere; si delictum, ob quod iuris pœna decreta est, sufficienter cognitum non sit: multo minus in conscientie foro aliquis se ipsum condemnare, & pœnam legis in se exequi cogitur, abstinendo v. g. à sacris tanquam excommunicatus, aut suspensus, donec delictum & contracta censura in conscientia perspecta & explorata sit: licet Doctores aliqui contrarium sentiant inter quos Molina tr. 3. disp. 67. num. 7. Ceterum, si constet quempiam excommunicatum fuisse, dubitetur verò vtrum absolutus sit; id ipsum probari debet, non præsumi, sicuti notat Sanchez lib. 1. moral. c. 10. num. 57. & Abb. in cap. proposuit, num. 4. de cleric. excom. vbi ait: *Semel excommunicatus semper presumatur esse excommunicatus. Nam qualitas semel posita, quæ ex solo cursu temporis non tollitur, presumitur existere, donec probetur sublata*. argum. reg. 8. in 6. *Semel malus semper presumitur esse malus*.

Sed difficilis quæstio est, an quod hætenus dixi de censuris, similiter etiam locum habeat in dubio contractæ irregularitatis: De qua re diuersæ sunt Doctorum sententia. Nam Henric. l. 14. c. 3. n. 3. & 4. & c. 14. n. 3. vniuersim negat, aliquem in dubio æquali siue iuris, siue facti, irregularem censendum esse in conscientie foro, quauis aliter in foro externo præsumatur. Idque probabile esse fatetur Suarez cit. disp. 40. f. 6. n. 10. Rebellus p. 2. l. 1. q. 2. f. 2.

Alter sententia omnino opposita est Syl. ver. homicidium 3. q. 1. reg. 1. Maioli l. 1. de irreg. c. 2. reg. 7. Nau. c. 27. n. 193. Abbatis c. audientiam, n. 3. de homic. qui distinguunt inter forum externum & internum: in illo putant non esse irregularitatem decernendam. Nam vbi dubitatur de culpa, non est inferenda pœna: *Satius enim est impunitum reliqui facinus nocentis, quam innocentem condemnare*, dicitur in l. absentem, ff. de pœnis. In foro autem interno censent dubitantem irregularem esse: quia in dubio tutior pars eligenda est, iuxta c. significasti, 2. de homic.

Tertia sententia est Cou in Clem. p. 1. n. 3. in princ. Mol. tr. 3. disp. 33. mem. 7. & disp. 67. n. 6. & 7. qui nihil distinguunt inter forum externum & internum, distinguunt tamen inter dubium iuris, & dubium facti: in illo negant aliquem irregularem esse censendum: in hoc vniuersim affirmant.

Quarta sententia est Vasq. disp. 65. c. 3. & disp. 66. cap. 1. Azorij t. 1. l. 2. c. 19. q. 10. qui arbitrantur in vtroque foro siue dubium facti sit, siue iuris irregularitatem præsumendam esse.

39. Mihi placet sequi sententiam Suarezij cit. disp. 40. f. 5. & 6. Sanchez. l. 1. moral. c. 10. n. 42. & seqq. Auilæ p. 7. de cens. disp. 2. dub. 5. quæ in his pronuntiatis consistit. I. In dubio iuris, tam in foro externo quam interno, nemo irregularis censendus est. Probatur ex c. is qui, de sent. excom. in 6. vbi ad irregularitatem ob aliquod crimen incurrendam requiritur, vt in iure expressum sit: cum autem ius dubium & controuersum est satis expressum non est: ergo in dubio iuris non incurritur irregularitas; nec alia pœna, vel obligatio.

II. In dubio commissi homicidij dubitans irregularis censeri debet, tam in foro externo, quam interno. Ita habetur in c. ad audientiam, c. significasti, & c. penult. de homic. Estque communis Doctorum sententia, quæ fundari debet in constitutione Pontificum, qui ob periculum specialis indecentiæ, si fortè postea innotescat, homicidæ ad sacrum altaris ministerium accessisse, in tali dubio abstinendum esse decreuerunt: quod significatum videtur in cit. c. significasti: *Si discerni non possit, ex cuius ictu percussus interijt, in hoc dubio tanquam homicida debet haberi: cū in hoc casu cessare sit tutius, quam temere celebrare*. Nota,

quod ait, *In hoc dubio, in hoc casu*.

III. In alijs dubijs facti, præter homicidium, nemo, seu in externo seu interno foro, irregularis censendus est: v. g. qui dubitat vtrum legitime natus sit nec ne, potest legitime censeri & sacros ordines accipere. Qui dubitat vtrum vxor vnica accesserit virgo, potest ita præsumere, & clericus fieri. Probatur: Non est statuenda irregularitas, præterquam in casibus à iure expressis, c. is qui, de sent. excom. in 6. Sed vt in dubio facti aliquis irregularis censeatur, de solo casu homicidij voluntarij expressum est; ob specialem eius, vt dixi, deformitatem in ordine ad sacrum altaris ministerium. Ergo non debet extendi ad alios casus iure non expressos: Sed standum est iure comuni tam canonico, quam ciuili; *In dubio neminem condemnandum, in pœnis benigniorem interpretationem faciendum, &c.* Quapropter specialis illa decisio, vt in dubio homicidij irregularitas præsumatur, extendenda etiam non est ad dubium mutilationis: quia mutilatio propriè non est homicidium. Et ita docet San. ci. c. 10. n. 49. Deinde extendi non debet ad dubium homicidij iusti, v. g. in bello commissi; quia Pontifices loquuntur de casu homicidij prohibiti: odia autem & pœnæ restringendæ potiùs, quam extendendæ sunt. Quæ est doctrina Henric. l. 14. c. 3. n. 4. lit. x. Sanch. n. 50.

Fateor tamen, contrariam sententiam, quæ in ordine tertia erat, non carere etià probabilitate; eò quod in alijs quoque dubijs contractarum irregularitatum, irreuerentiæ periculum subesse videatur; ne contingat, v. g. illegitimum, bigamum, mutilatorem, &c. sacros ordines suscipere, & altari ministrare. Nihilominus opinio, quam defendi in praxi tutæ est. Quare respondetur ad hanc obiectionem: irregularitatem, & indignitatem ad sacros ordines & altaris ministerium esse solum ex lege ecclesiastica & positua: hæc autem, cum odiosa & pœnalis sit, non obligat in casu dubio: quare cessat tunc omnis irreuerentiæ periculum.

Ad extremum pro pleniori intellectu, duo obseruanda<sup>40</sup> esse duxi: Primum, quod resolutiones huius §. quàm maxime procedant, si propriè dictum dubium existat, vt in neutram partem inclinando intellectus opinari possit. Quod si verò aliquis probabiliter opinetur, verumque iudicet (quamuis non sine formidine aliqua oppositi) se, v. g. ad ordines suscipiendos requisitam ætatem habere; poterit practicè iudiciū prudenter formare; In tali casu, quo ob humanæ naturæ imbecillitatem maior certitudo haberi non potest, satis esse sequi verissimilia. Idemque dicendum est in alijs casibus; puta si probabiliter opineris te hominem non occidisse; te mortaliter non peccasse, vel peccatū confessū fuisse; sicuti docet Suarez cit. disp. 22. f. 9. Quamuis si agatur de valore sacramenti, præsertim necessarii, vel de periculo impudiciæ, vt in dubio de impotentiæ mulieris: maior probabilitas, vel saltem maior operandi necessitas requiritur ad hoc, vt cum rationabili formidine partis oppositæ operari liceat.

Alterum, quod non infrequenter accidat, vt ob diuersas<sup>41</sup> factorum circūstantias, diuersæ & quasi oppositæ morales regulæ occurrant: vt tunc exactè considerandum sit, cuius maior præ alijs ratio haberi debeat. Exemplū est: Si puer, de quo, examinatis indicijis, dubitatur: vtrum vsu rationis adeptus sit, sacramentum baptismatis petat, reluctatibus parentibus infidelibus, tali casu baptizandū non esse, existimat Henr. l. 2. c. 25. n. 3. Quia in dubio potior sit conditio patris hætenus habentis filiū in potestate sua. Sed contrariū magis placet, baptizandū puerū esse, si cōmodè expectari non possit, donec certius appareat de rationis vsu. Quia in dubio inclinandū est in fauorē fidei, religionis, & animæ salutis: cū maior sit hæc iniuria, maiusque detrimentū: si puer, qui fortè cū rationis discretionē sacramentū petat, illud denegetur, quàm æstimari debeat iniuria & damnū patris si puer fortè necdū rationis discretionē consecutus, ab eius voluntate ac potestate abstrahatur. Atque ita docent Sor. in 4. d. 5. a. 10. §. sed alterum dubium est. Suar. in 3. p. disp. 25. de baptismo f. 3. Vasq. in 3. p. t. 2. disp. 155.



Similis difficultas est, si parentes puerum baptismo spōte offerant; ille autem reluctetur, & consideratis indicij dubium maneat de discretionē rationis. Nam ex vna parte videtur non baptizandus; propter reuerentiam sacramenti, ne fortē inualidē administretur, quod docuit Suarez cit. f. 3. in fine. Ex altera verò parte videtur baptizandus: quia in dubio pro salute animæ pronuntiandum. Et hæc pars præualere debet, si periculum in mora sit, sicuti bene tradunt Sotus & Vasq. ll. cc. Quia minùs estimari debet periculum illud, ne baptismus puero reluctanti inualidē conferatur; saltem sub conditione. Si capax es, &c. ut euitetur maius periculum damnationis æternæ, quod puero imminere supponimus, nisi tunc baptizetur. Cum sacramentum, inquit Vasq. institutum sit in hominum salutem, maior habenda est ratio spiritualis necessitatis fratris, quam reuerentiæ sacramenti.

42. Interdum verò in vtramque partem quæstionis ex diuersis principijs probabiles rationes occurrunt, ut discernere aliquis non possit quarum rationum maius momentum censerī debeat. Exempli causa, si in vtramque partem æquale rationabile dubium sit; vtrum pecuniarum debitor illas soluerit nec ne; quæstio est, an hoc casu ad integram solutionem teneatur? Ita probabiliter affirmat Sanch. l. 1. moral. c. 10. n. 12. Tū quia factum in dubio nō præsumitur: tū quia creditor iure & actione sua, quāsemel eum habuisse constat, in dubio priuari nō debet. In oppositā verò partem offert se ratio itidem probabilis; quòd debitor non teneatur ad solutionem integram; sed tantum ad partem debiti, secundum dubij proportionem: Quia æquitas non patitur, ut debitor sine culpa sua magno periculo subijciatur bis soluendi integrum debitum; creditor autem, qui & ipse, ut pono, tale dubium non diffidet, nullo periculo expositus sit. Profectò in hoc casu neque creditorem condemnare, si integram solutionem reciperet; neque debitorem, si integram solutionem facere omitteret: idque ob diuersas probabiles, quibus vtraque pars nititur, rationes.

## CAP. VI.

## De Conscientia scrupulosa.

## S V M M A R I V M.

1. *Scrupulus est vana apprehensio, & hinc ortus timor, peccatum alicubi esse ubi non est.*

2. *Contra scrupulos operari licitum: atque consultum est. Scrupulorum plura remedia sunt.*

SCRUPULI definitio hæc est, quòd sit inani ratione nixa apprehensio, & hinc ortus timor, peccatum alicubi esse ubi non est. Dicitur *scrupulus*, quia animo insidens, molestiam & anxietatem parit. Originem plerumque trahit ex naturæ infirmitate, pusillanimitate, ac melancholia: interdum ex Dæmonis tentatione, teste S. Anton. p. 1. tit. 3. c. 10. §. 9. Nauar. c. 27. man. n. 282.

Indicium hominis scrupulis impliciti est, si contra sapientium, imò etiam proprium iudicium, tale quippiam agere peccatum non esse; nihilominus inquietus sit, timens ne fortē peccet, aut peccarit. Quamobrem scrupulosi plerumque in aliena causā iudicare solent sine formidine, hominemque absolvere à peccato: at verò si idem casus ipsis eueniat, statim formidare incipiunt peccatum inesse.

Remedia contra scrupulos à Doctoribus afferuntur:

1. *Scrupulosus contra vanas apprehensiones, ac timores peccati audacter operetur: ex certa conscientia, licitum consultum, & quandoque necessarium esse contra scrupulum operari.* Ita Gerson operum p. 2. tr. de præp. ad Missam, confid. 6. S. Ant. p. 1. c. 3. c. 10. §. 10. Cord. l. Quæst. q. 5. prop. 4. Syl. ver. scrupulus, q. 3. Nau. l. c. Nam scrupulus non est conscientia, vel dictamen intellectus iudicantis,

contra quod agere numquam licitum est: sed vana ut dixi, apprehensio, cui intellectus iudicatus ipsaque voluntas resistere potest, ac debet, sicuti notat Nau. in man. c. 27. n. 279. & lib. 5. confil. 10. num. 8. de pœnit. & remiss. edit. 2. ubi ait, quòd scrupulus sit apparentia quædam, quæ haberi potest contra iudicium seu credulitatem de aliqua re.

II. Numquam iudicet esse peccatum mortale, vel se consensisse in peccatum mortale, nisi id certò deprehendat. Ita Vasq. disp. 67. c. 2. Azor to. 1. l. 2. c. 20. q. ult. Sanch. l. 1. moral. c. 10. n. 82.

III. Ea solum confiteatur, quæ manifestò peccata esse cognouerit: non dubia, aut scrupulos. Ita docent Azor, Vasq. Sanch. ll. cc.

IV. Confessarium non de quibuscunque dubijs consultat; sed sæpe proprijs rationibus, ac regulis, à Confessario præscriptis, utatur ad pellendos scrupulos. Ita Vasq. l. c. & Mol. tr. 4. disp. 13. in fine, ubi ait, quòd Confessarius scrupuloso interdum præcipere debeat, ut de eiusmodi re neque cum ipso, neque cum alio unquam loquatur; sed tanquam inane ac futile quid omnino contēnat: Interdum verò, si aliam materiam præter scrupulos ad confessionem non afferat, sine absolutione eum ad S. Eucharistiam dimittere, consultum erit.

V. Cum primò animo scrupulus exoritur, prudēte aliqua ratione reijciat, nec cogitatione foueat. Cum enim in apprehensione consistat, quantò diutius in vtramque partem adhibitis rationibus vertitur; tantò magis animo imprimitur & confirmatur, ut maiore deinde opera opus sit ad repellendum. Quamobrem expedit scrupulosum negotijs insistere, ne scrupulis vacandi tempus suppetat. Ita Caiet. ver. scrupulorum medicina.

VI. Confessiones non repetat: sed postquam semel, vel Confessarii iudicio, vel suo saltem probabili, integrè confessus fuisse visus est, acquiescat. Ita Nau. in c. fratres, n. 30. d. 5. de pœn. & in man. c. 21. n. 42. Med. q. 19. a. 6. in fine. Sanch. ver. dubium, n. 5. Henr. l. 5. c. 3. n. 4. Neque verò propterea exponit se periculo: tum quia dubium in conscientia scrupuloso, apud alios esset moralis certitudo: tum quia, esto aliqua confessus non fuisset, non teneretur cum tanto suo damno, & periculo hærendi perpetuò in tali anxietate, omnimodam Confessionis integritatem procurare; cum ab ea minores interdum difficultates excusent, sicut bene notat Ægydius Coninck 2. 2. p. 2. disp. 7. n. 68.

VII. Persuadeat sibi, quòd vnusquisque iudicio vel consilio Confessarii, alteriusve viri docti ac probi tutò acquiescere possit; & verò scrupulosus debeat: videl. ob damna quæ scrupuloso impendent, si remedia & consilia respuat. Ita 8. Ant. cit. §. 10. reg. 5. Cord. cit. prop. 4. Valent. to. 2. dif. 2. q. 14. p. 4. in fine. Nau. l. 5. confil. 2. de pœnit. & remiss. edit. 2. ubi monet n. 4. Postquam vnus eiusmodi viri responsum accepit scrupulosus, quòd alios consulere nō debeat; ne animum assuescat ad anxietates inutiles diutius fouendas.

VIII. Quòd aliorum bonorum virorum vita & consuetudo alijs possit esse viuendi regula: Quare quod illi absque peccati formidine agunt, vel agi posse arbitrantur, scrupulosus sequi potest, imò etiam interdum debet. Ita S. Ant. reg. 7. doct. 4. Syl. q. 4. Conradus de contract. q. ult. circa 1. obiecit.

IX. Nolle, quòd præcepta, præsertim affirmatiua & positiua, v. g. de ieiunijs, horis canonicis, excommunicationibus, irregularitatibus, &c. non secundum rigorem, sed secundum Epixieian intelligenda sint. Ita Syl. Ant. & alij ll. cc.

X. *Sentire de Domino in bonitate, & simplicitate cordis.* Sap. 1. Neque existimare, legis latorem tam rigidum ac durū, ut bonæ voluntatis hominibus peccata adscribat pœnamve decernat: Neque Deum aut Ecclesiam suis præceptis efficere velle, ut homo in stultitiam cadat, quod scrupulosò denique contingit. Ita S. Ant. Syl. ll. cc.

Ob.



Obijcere solent scrupulosi primò illud S. Gregorij ad Augustinum Anglorum Episc. quod refertur c. 4. d. 5. Bonarum mentium est ibi etiam culpas agnoscere, ubi culpa nō est. Nauar. ex Ioan. Gersono respondet n. 284. esse quidem hoc signum animi ad bonitatem propensi, per se tamen bonum non esse, sed scientiæ atque iudici defectum. Respondet secundo, S. Gregorium nomen culpæ latiùs accipere, pro quouis defectu, quem in se ipso homo agnoscere ac deplorare potest. Proposita enim ibi erat quæstio; vtrum mulier, dum menstrua patitur, ad Ecclesiam & S. Communionis mysterium accedere possit? Ad quod respondet: Si ex veneratione magna

percipere non presumit, laudanda est: sed se percipiat, non indicanda. Bonarum quippe mentium est, ibi etiam aliquo modo culpas suas agnoscere, ubi culpa non est: quia saepe sine culpa agitur, quod venit ex culpa. Vnde etiam cum esurimus sine culpa comedimus: quibus ex culpa primi hominis factū est, vt esuriremus.

Secundo: Si nunc morti proximus essem, non auderem cum hoc scrupulo excedere. Respondet Syl. quæst. 3. In illo articulo multa faceret homo, quæ tamen necesse non est, nec expedit facere in vita: quia homo tandem desperaret, vel factus fieret. Secundo respondet Sanchez num. 81. Etiam in illo articulo consultius scrupuloso fore, vt scrupulos contemnat. Vtraque responsio vera est.

## TRACTATVS SECVNDVS.

DE

ACTIBVS HVMANIS  
VOLVNTARIIS, ET

## INVOLVNTARIIS.

## CAP. I.

## De Spontaneo &amp; Voluntario.

## S V M M A R I V M.

1. Ad operationem spontaneam requiritur, vt ab intrinseco principio procedat, & agens cognoscat quod agitur. Spontaneum definitur, cuius principium est in agente, cognoscens se singula.
2. Spontaneo contradictoriè opponitur non spontaneum: contrariè inuitum: quare omne inuitum est non voluntarium: sed non vice versa.



Operationem spontaneam, quæ in agente intellectuali voluntaria dicitur, duo requiruntur: I. Vt ab intrinseco principio procedat; non ab extrinseco. Quare si ab extrinseco mouearis, traharis; tu autem per intrinsecum animæ principium ad mo-

tionem, tractionem nihil conferas: non erit hæc motio tibi voluntaria & spontanea, de quo vide S. Thom. 1. 2. q. 6. a. 4. II. Vt quod agitur ab agente cognoscatur. Nā cognitio est præuium quid siue prærequisitum, quippe proponens obiectum, in quod omnis appetitio siue voluntas feratur, teste S. Thom. q. 9. a. 1. Quare dici solet; quod voluntas non fertur in incognitum. Ideo, licet lapis à principio intrinseco, videl. congenita gravitate, deorsum feratur, quia tamen lationem suam non cognoscit, ea lapidi voluntaria non est; sed tantum naturalis.

Ex quo intelligitur definitio spontanei tradita ab Arist. 3. Ethic. c. 1. & explicata à S. Damasc. l. 2. de fide, cap. 24. S. Thom. q. 6. a. 1. & 2. Spontaneum est, cuius principium est in agente cognoscente singula. Nomine singulorum (græcè *ἰσχυρά*) intelliguntur ea omnia, ex quibus substantia actionis, tanquam obiecto suo, dependet; Exempli causa, si Titius patrem suum ense occidit; vt homicidium istud spontaneum, seu voluntarium ei sit, imprimis necesse est, vt manus eius non ab alio impellatur, ipso nihil conferente, deinde requiritur, vt sciat esse hominem & non inuincibiliter arbitretur esse feram; sciat quoque esse enssem, quo vitur, eumque idoneum ad cædendum; & nō inculpatè existimet esse arundinem. Porro, vt homicidium hoc, etiam quā patricidium, voluntarium existat, necesse insuper est, vt patrem suum esse cognoscat, quem cædit, & non inuincibiliter, atque inculpatè existimet es-

se alium hominem. Cum enim actio patricidii suapte natura versetur circa parentem, tanquam proprium substantiale obiectum, cognitione propositum; ideo si hoc obiectum non cognoscat, seu nullam de patre cogitationem suscipiat, impossibile est, vt patricidium operanti voluntarium existat. Lege S. Thomam 1. 2. quæstione 76. artic. 3. Vsq. 1. 2. disp. 30. cap. 2. Cou. c. alma. p. 1. §. 10. n. 12. & seqq.

Spontaneo contradictoriè opponitur non spontaneum; & voluntario nō voluntarium: contrariè verò spontaneo opponitur inuitum; & voluntario inuoluntarium. Differt autem inuitum à non spontaneo; & inuoluntarium à non voluntario, imprimis subiecto: quia inuitum, sicut & spontaneum, solis cognoscentibus substantijs tribuitur; inuoluntarium autem, sicuti & voluntarium, si propriè loquendum sit, solis substantijs intellectualibus: quia contraria circa idem subiectum versantur. At verò non spontaneum, & non voluntarium, rebus non cognoscentibus maximè competunt.

Secundo, differunt latitudine prædicationis: Omne enim inuitum est non spontaneum; sicut & omne inuoluntarium est non voluntarium; sed non vice versa: siquidem ex contrario rectè infertur contradictorium, Est nigrum, ergo non album. Non item ex contradictorio infertur contrarium, Est non album, ergo nigrum. Confirmatur declaratur ampliùs; sola & nuda ignorantia facit actionem esse non voluntariam: veluti si hominem occidisti inuincibiliter ratus esse feram, sponte siue volens homicidium non comissisti. Non tamen sola ignorantia facit actionem esse inuoluntariam: sed requiritur etiam repugnātia voluntatis, vt dicaris inuoluntariè & inuitus agere, teste Arist. l. c. Quapropter infra dicam, si inimicum, quem maximè occisum à te esse cupis, per inuincibilem errorem in veneratione occidas pro ferā, homicidium nec voluntarium, nec inuoluntarium tibi esse.

## CAP. II.

## De Libero.

## S V M M A R I V M.

1. Intentio est motus rationalis appetitus in finem, per media appetendum.
2. Deliberatio rationis oritur ex indifferētia rerum intellectuum hac viua propositarum;



- 1 *Voluntas libere eligit, & el respicit id, quod intellectus, facta consultatione, iudicauit.*
- 4 *Duplex est libertas: Vna secundum exercitium: altera secundum specificationem.*
- 3 *Libero contradictoriè opponitur non liberum: contrariè autem necessarium natura.*
- 6 *Sola voluntas formaliter libera est à necessitate natura, intellectus autem est radix libertatis.*
- 7 *Illa hominis actiones propriè humana dicuntur, quæ propter finem sunt ex deliberatione rationis.*
- 8 *Actus humani partim sunt elicit à voluntate: partim imperati.*
- 9 *Intellectus, per se, & secluso actu voluntatis, non est capax peccati, aut meriti: similiter nec appetitus sensitivus.*
- 10 *Primus actus intellectus in quouis negotio non est propriè humanus seu moralis: sed naturalis: adeoque peccati aut meriti incapax.*
- 11 *Actus intellectus & actus voluntatis sunt inter se partim priores: partim posteriores.*
- 12 *Licet intellectus in actibus suis per se liber non sit: multum tamen pendet à libera motione voluntatis.*

**P** L V R E S definitiones liberi, seu actiones liberæ afferri solent: Prima, Libera actio dicitur, quæ post intentionem finis, & deliberationem rationis ex electione est. Explicatur secundum singulas particulas. Intentio est motus rationalis appetitus in finem per media assequendum, cuiusmodi actio inter animalia soli homini competit. Nam solus ipse in bono cognito percipit ordinem, ac proportionem ad media; bonum, inquam, acquiri posse per media: in qua proportionem formalis ratio finis consistit. Bonum enim & finis idem sunt, teste Aristot. in 2. phys. Sed bonum absolutè dicitur; finis cum relatione ad media. Nam finis est, qui propter se appetitur, & cuius gratia cætera, velut media, appetuntur. Bruta autem animalia, etsi bonum suum, adeoque finem materialiter cognoscunt; non tamen formaliter. Cum enim intellectu & discursu careant non possunt percipere proportionem siue ordinem vnius, tanquam viæ, medijs; ad alterum tanquam terminum & finem: quare neque actionibus suis finem intendunt. Exempli causa: Aranea non prius intendit siue proponit naturam conservare, famem sedare, ob id muscas capere, atque idcirco telam texere; sed naturæ à Deo inditæ æstimatione, ac instinctu ad texendum, velut impetu, impellitur: quare non ipsa, propriè loquendo propter finem agit, sed potius à Deo agitur in finem ab ipso constitutum. Quare S. Th. 1. 2. q. 12. a. 5. & q. 13. a. 2.

- 2 *Deliberatio rationis oritur ex rerum huius mundi indifferentia, in eo consistente, quod nullum particulare obiectum homini in hac vita appareat omni ex parte bonum atque conueniens, hic & nunc necessariò appetendum, si felix esse velit: sed in quavis re particulari, tamen intellectus reperiatur aliquam rationem bonitatis & conuenientiae, propter quam expetenda videatur: videl. in obiectis virtutum honestatem; in obiectis vitiorum voluptatem, vel aliquam vtilitatem: in eisdem tamen reperitur quoque rationem inconuenientiae: in illis quidem difficultatem ac molestiam: in his turpitudinem ac reatum. Quamobrem humana ratio inter se confert, hinc apparentes rationes conuenientiae: illinc oppositas rationes inconuenientiae, & sic deliberat: ac denique concludit siue iudicat: diciturque talis processus intellectus, deliberatio & consilium: quare dicere solemus, hominem deliberat, consulto egisse. At brutorum animalium æstimatiua facultas vnā solam conuenientiam boni sensibilis, videl. delectabile, siue commodum naturæ; nullam autem rationem honestatis percipit: quare in ipsis nulla deliberatio atque consilium locum habet: sed necessarius impulsus, siue determinatio potentiae ad id prosequendum, quod delectabile vel naturæ commodum apparet: & refugendum id, quod molestum vel incommodum apparet. Vide S. Damasc. lib. 2. de fide orthodoxa, cap. 22. & S. Th. q. 13. cit. a. 2.*

3 Postquam verò intellectus facta consultatione, concludit; siue practicè iudicauit aliquid agendum esse, tanquam magis conueniens ad propositum finem, in potestate siue

arbitrio voluntatis est, id ipsum velle & acceptare, adeoque intellectui per electionem consentire, imò etiam contrarium velle: si tamen prius voluntas intellectum applicet ad oppositas rationes ponderandum &, secundum eas contrarium illud iudicandum. Quamdiu autem intellectus vnum ex propositis melius, aptiusque ad finem intentum iudicat: arbitror impossibile esse, ut rationalis voluntas oppositum eius eligat: esset enim talis electio sine rationis iudicio, quod fieri nequit.

Altera est definitio, non absimilis priori: Libera actio dicitur, quæ positis omnibus ad agendum requisitis, ita sit, ut possit non fieri, vel eius oppositum fieri, siue: Liberum arbitrium est, intellectualis substantiæ potestas, positis omnibus ad agendum requisitis, agendi & non agendi, vel oppositum agendi.

Duplex enim libertas est voluntatis: Vna secundum exercitium, quæ dici solet libertas contradictionis: & est potestas siue indifferentia ad agendum, & non agendum. Qualem libertatem homo in hac vita circa omnia obiecta habet: quandoquidem nullum obiectum est, cuius prosecutio adeo necessariò videri debet ad obtinendam felicitatem (quæ est meta siue finis omnis humanæ appetitionis) ut omisso actus circa idem obiectum, non etiam aliquam rationem boni habere possit. Nam ipsam quoque beatitudinem tum in communi, tum in re particulari constitutam, nec libet, nec expedit omni tempore expetere. De hac vita loquor: nam in altera beati continuò & necessariò amant Deum: quia nulla ratio se offerre potest cui Deus clarè visus, & voluntati tanquam summum bonum indefinenter propositus, non ametur.

Altera est libertas, quæ dici solet specificationis, siue contrarietatis: & est potestas siue indifferentia tum hanc, tum contrariam actionem circa idem obiectum exercendi: v. g. circa fidei diuinæ propositionem, assensum ac dissensum: circa Deum; amorem & odium. Cuiusmodi libertatem homo in hac vita circa omnia bona particularia habet: non item circa bonum & malum siue felicitatem ac miseriam in communi, sicuti docet S. Th. 1. 2. q. 10. a. 2. Prior pars probatur: Quia nullum est particulare obiectum, quod intellectui in hac vita adeo bonum appareat, ut non etiam in eo reperire possit aliquam rationem malitiæ siue inconuenientiae, comparatione ipsius appetentis hoc loco, tempore, &c. Siquidem ipsum quoque Deum optimum homo apprehendere potest, tanquam punitorem sui: eaque ratione ipsum odisse: neque vllum obiectum adeo vndequeque malum apparet, ut non etiam in eo reperire possit aliquam rationem bonitatis siue conuenientiae. Nam omne malum fundatum est in aliquo ente, quod suapte natura bonum est, ut alicui conueniens videri possit. Quin & ipsa priuatio siue carentia boni particularis, v. g. mors propria vel aliena, ob certam causam, puta quia à maiore malo liberat, quia inimicum hominem tollit: bona & appetenda iudicari potest, non quidem per se, sed per accidens. Posterior pars probatur. Adequatum siue totale obiectum voluntatis volentis est bonum: Nemo enim ad malum intendens operatur, teste S. Dionysio capite 4. de diuinis nominibus. Et nemo sponte est miser. Adequatum verò obiectum voluntatis nolentis est malum. Atqui in bono siue felicitate vniuersim abstractèue considerata, non reperitur aliqua ratio mali: neque in malo siue miseria vniuersim abstractèue considerata, reperitur aliqua ratio boni. Ergo voluntas odisse non potest felicitatem: neque amare miseriam in communi.

Libero contradictoriè opponitur non liberum: contrariè necessarium. Sed aduerte, sicut duplex est necessitas: vna legis præcipientis, siue prohibentis, quæ non est simpliciter dicta necessitas: sed ex hypothesi, si culpæ reatum ac pœnam declinare velis. Altera est necessitas naturæ, & propriè dicta: sic homo sumpto v. g. cibo non potest non nutrir: si oculi aperiuntur, non potest non videre pro,



propositum obiectum. Ita duplex etiam libertas est; vna ab obligatione siue necessitate legis: qua ratione libera opera dicuntur, quæ sub præceptum non cadunt, vt Cælibatus, Religionis professio: de quibus hîc non agimus. Altera est libertas à necessitate naturæ: qua ratione libera opera dicuntur ea omnia, quæ non naturæ impetu, sed ex deliberatione rationis, & electione voluntatis fiunt: aliòqueno nomine appellantur *actiones morales*: quia pertinent ad mores, quibus laudem vel vituperationem meremur: præmio vel pœna digni sumus: Atque de his ex instituto agimus.

6 Nunc aliquæ doctrinæ subiiciendæ sunt. Prima: Sola voluntas formaliter est libera à necessitate naturæ, iuxta illud Apost. 1. ad Corinth. 7. *Non habens necessitatem, sed potestatem suæ voluntatis.* Et Eccles. c. 15. *Deus ab initio constituit hominem, & reliquit illum in manu consilij sui: adiecit mandata & præcepta: si volueris mandata seruare, conseruabunt te, &c. Ante hominem vita & mors, bonum & malum: quod placuerit ei, dabitur illi.* Intellectus autem est radix, seu scaturigo libertatis, quando voluntati obiectum proponit cum variarum rationum oppositione, & quadam indifferentia, vt supra explicatum. Intellectus autem ipse formaliter non est liber à necessitate: quin potius necessario immutatur, ac determinatur ab obiecto apprehenso. Idque tum quoad exercitium; (quia sicuti potentia visiva, positis omnibus ad videndum requisitis, non potest cohibere visionem; ita & intellectus, positis omnibus requisitis ad apprehendendum, vel iudicandum, non potest non apprehendere, aut non iudicare) tum etiâ quoad specificationem actus. Nam imprimis intellectus apprehensiuus tales res apprehendit, quales ipsi à sensibus proponuntur: intellectus autem iudicatiuus ita propositionibus assentitur certò, aut opinatiuè; vel dissentit; vel denique nec assentit, nec dissentit, sed dubius manet; sicuti ipsi illarum veritas, aut falsitas per argumenta proponitur, vel non proponitur. Quamuis in ijs, quæ per se ipsi eidentia non sunt, pendeat à liberæ voluntatis pondere ac motione vt infra dicam in 4. coroll.

7 Altera doctrina: Illæ solum hominis actiones propriè humanæ, siue hominis propriæ dicuntur, quæ propter finem ex deliberatione rationis fiunt, seu quarum homo per liberam electionem dominus est, vt docet S. Thom. 1. 2. q. 1. a. 1. & 3. p. q. 18. a. 4. Aliæ verò operationes, quas homo ex naturæ necessitate exercet, non propriè humanæ, sed naturales appellantur; & earundem comparatione homo agens naturale, non morale dicitur, puta cum dormit, nutritur, crescit; vel proposito sibi obiecto, videt, cogitat; aut sine præcedente deliberatione, expuit, cutem fricat.

8 Tertia doctrina: Actus propriè humani seu liberi diuiduntur in elicitos, ac imperatos. Actus elicti dicuntur, qui à libera voluntate immediatè eliciuntur: quorum alij versantur circa finem; & sunt tres, secundum S. Th. 1. 2. q. 8. videlicet Simplex voluntas seu complacentia boni, intentio seu propositum boni acquirendi, & fruitio seu gaudium in bono acquisito. Alij verò versantur circa media; videlicet consensus, electio, & vsus: Vbi nota, eundem actum voluntatis esse consensum & electionem: sed dicitur *electio* in ordine ad medium, quod voluntas præ alijs, quæ in consultatione intellectus fuerunt, eligit: & *consensus*, in ordine ad intellectum, quatenus voluntas id ipsum vult, quod intellectus agendum iudicat: quamuis, si vnum tantum medium ab intellectu propositum sit ad finis consecutionem, tunc illius approbatio consensus est, sed electio dici non potest. Vsus verò est actus, quo voluntas applicat alias potentias ad executionem medij ab ipsa acceptati. Etenim cum opus, quod intellectus, conformiter ad propositum finem, agendum iudicauit, & voluntas acceptauit, executioni mandandum est, tunc voluntas, reliquarum sibi subiectarum potentiarum domina ac motrix, aliam operationem elicit, per quam executrix

potentia, siue ea interior sit, vt intellectus, memoria: siue exterior, vt oculus, manus, pes, &c. ad operandum applicetur: qui voluntatis actus applicans & mouens aliam potentiam ad operandum; dicitur *vsus actiuus*. Vide S. Th. q. 9. a. 1. & q. 16. a. 1. Quare etiam intelligitur quoniam dicantur actus à voluntate imperati: sunt enim actus aliarum potentiarum, videlicet intellectus, appetitus sensitui, & externorum membrorum, quæ voluntatis motionem suscipere solent. Adde: Ipsam etiam voluntatem quodam modo sibi ipsi in actibus suis imperare posse: quæ ratione dicunt Theologi, quod vna virtus, v. g. charitas, vel pœnitentia imperet actus aliarum virtutum: quando voluntas ex motiuo vnius virtutis, elicit actum alterius virtutis, v. g. ex amore Dei pauperis miseretur.

Corollarium I. Intellectus per se, & secluso actu voluntatis, non est capax peccati, aut meriti. Nam ad peccandum (sicuti & ad merendum) requiritur libertas à necessitate naturæ: atqui intellectus per se, & secluso actu voluntatis mouentis, non est liber à necessitate naturæ. Ergo in actus intellectus, secluso actu voluntatis, non cadit ratio peccati. Et quod dico de actibus intellectus, dicendum etiam est de actibus appetitus sensitui: eos liberos non esse: ideoque peccata esse non posse, nisi fiant ex liberæ voluntatis motione.

Corollarium II. Primus actus intellectus, seu prima cogitatio in quouis negotio non est propriè humana ac moralis, sed naturalis. Nam libertas, seu moralitas non est sine actu voluntatis: sed primus actus intellectus, seu prima cogitatio in quouis negotio est sine omni actu voluntatis: cum enim voluntas non possit ferri in incognitum & consequenter omnem actum voluntatis necessario præcedat actus intellectus; ne in infinitum abeamus, necesse est fateri, aliquem esse actum intellectus, qui volitus non sit, ideoque nec liber aut moralis, sed planè naturalis. peccati & meriti incapax. Ad eiusmodi autem primam cogitationem homo à Deo immediatè potest moueri; ordinariè tamen vel per sensus exteriores excitatur; quia visui, auditui; &c. aliquid subito occurrit: vel sine exteriorum sensuum actuali operatione, imaginatio naturaliter constitatur, & species intellectui proponit: interdum verò ab Angelo bono: vel malo species imaginatiuæ commouentur. Vide S. August. lib. 3. de lib. arbitrio c. 25. S. Th. 1. p. q. 27. a. 4. Vasq. 1. 2. disp. 3. c. 3.

Corollarium III. Actus intellectus, & actus voluntatis sunt inter se partim priores, partim posteriores. Primus enim omnium est apprehensio finis, seu actus intellectus proponentis obiectum voluntati, vt bonum hominis sequitur amor, & intentio voluntatis exinde mouetur intellectus ad inquirendum media, & consultandum de ijs, ac denique iudicandum, quodnam conuenientius sit ad obtinendum finem: succedit his liber consensus, seu electio voluntatis amplectentis medium: post consensum in tempore executionis faciendæ, intellectus practice iudicat medium à voluntate approbatum, membris exterioribus exequendum esse, qui actus imperium dici solet, procedens elictiuè ab intellectu, ex electione voluntatis; cum sit intimatio quædam, facta inferiori membro de executione voluntatis. Denique cum hoc ipso practice pratico iudicio, seu imperio intellectus consentiens voluntas, re ipsa mouet & applicat potentiam ad executionem: quæ applicatio vsus appellatur, siue passiuè accipitur.

Corollarium IV. Licet intellectus in actibus suis per se ipsum liber non sit; tamen multum pender à libera motione voluntatis: tum quia voluntas intellectum applicat ad hoc vel aliud obiectum, has vel alias oppositas rationes seu argumenta consideranda: tum etiam propter sympathiam, quæ est inter voluntatem & intellectum, vt ad quod obiectum affectus voluntatis inclinatur illud ipsum etiam melius magisque appetendum intellectui appareat.



## CAP. III.

## Quotuplex sit voluntarium seu liberum.

## SUMMARIUM.

1. *Voluntarium substantie intellectualis vel est necessarium, vel liberum. Voluntarium liberum diuiditur primo in elicatum & imperatum.*
2. *Secundo diuiditur in id, quod est a voluntate propria: & quod est voluntarium voluntate aliena.*
3. *Tertio diuiditur in voluntarium expressum, ac tacitum. Qui tacet consentire videtur: si agitur de eius commodo: secus si de incommodo. Tacens consentire censetur, si consentire nolens contradicere deberet. Scientia & patientia Prælati consensum iudicat.*
4. *Quarto diuiditur in voluntarium actus, & voluntarium virtute. Dormiens vel phreneticus valide baptizatur, si ante Baptismum desiderauit. non item valide baptizatur.*
5. *Quinto diuiditur in id, quod directe ac per se voluntarium est, & quod indirecte siue in alio. Si homo voluntarie exerceat actionem, ex qua prouidet securum effectum, etsi eum directe non intendat: tamen indirecte voluntarius censetur. Homicidium in ebrietate commissum non est peccatum secundum se: sed interdum antecedentis peccati effectus.*
6. *Qui ex inueterata consuetudine, quasi necessario impetu natura, blasphemias &c. effundit: licet tunc non peccet, peccauit tamen ante, cum animaduertit sibi per frequentes blasphemias consuetudinem ingenerari: quam proinde amouere tenetur, quatenus potest: alioquin materiales ille blasphemias impunitur.*
7. *Si quis securum effectum impedire non velit, quem potest ac debet impedire, indirecte voluntarius ei censetur.*
8. *Talis qui consulto prætermittit, contra eam virtutem peccat, ex cuius præcepto impedire obligatus est.*

1. **I**MPRIMIS notandum; Voluntarium tripliciter accipi; Primo latissime, vt idem sit quod spontaneum, & omnibus substantijs cognoscentibus, etiam brutis animalibus competat, iuxta ea, quæ docet S. Thom. q. 6. a. 2. Vsq. disp. 23. c. 2. Secundo, magis proprie & vltatiu, pro eo quod a voluntate seu intellectualis substantie appetitu est: Cuius voluntarij duo sunt modi: vel enim est voluntarium necessarium, vel liberum. Primo modo beati in cælo voluntarie, sed necessario amant Deum: infantes, item ebrii & amētes voluntates sua necessario feruntur in obiectum sub ratione alicuius boni propositum: imò etiam in alijs hominibus voluntas necessario appetit obiectum quod intellectus non indifferenter; sed cum determinatione seu vni sola ratione boni ostensum proponit, vt infra dicam. Posteriori vero modo, seu liberè voluntarium dicitur, quod est ex deliberatione rationis. eaque est tertia & strictissima acceptio voluntarij, valde vltata apud Patres, & scriptores Theologos. Ita enim S. Augustinus, lib. de vera relig. c. 14. *Vsq. adeo peccatum voluntarium est malum, vt nullo modo sit peccatum si non sit voluntarium.* Et in lib. de duabus animabus, cap. 11. *Si liberum non sit, non est voluntas: quo sensu etiam nos deinceps vocem voluntatis ac voluntarij accipiemus, videlicet pro libero.*

Igitur voluntarium ita acceptum diuiditur primo, Quod aliud est voluntarium formaliter & elicitiue; videlicet actus ipsius voluntatis cum rationis deliberatione elicti; aliud vero est voluntarium imperatum; videlicet actus intellectus & aliarum potentiarum, quæ voluntatis motioni parent.

2. Secundo diuiditur in id, quod voluntarium est voluntate propria; & quod voluntarium voluntate aliena. Hoc posteriore modo voluntas patris censetur voluntas filij impuberis: voluntas tutoris censetur voluntas pupilli: Prælati voluntas, Religiosi, voluntas primi parentis Adam, posterorum.

Tertio, Diuiditur voluntarium in expressum ac tacitum. Expressum dicitur, quod verborum, aut alijs signis expressis constituto significatur: Tacitum verò, quod sine verbis, &c. facto aliquo aut omissione facti; vnde, consideratis circumstantijs, consensus voluntatis merito colligi possit. Ad hoc spectat iuris reg. 43. in 6. *Qui tacet consentire videtur.* Quæ tamen regula vniuersim vera non est: quia taciturnitas secundum se neque consensum, neque dissensum significat: nisi alijs adminiculis seu coniecturis adiuuetur, sicuti optimè declarantur in reg. 44. in 6. *Qui tacet non fateatur: sed nec vtiq. negare videtur* siquidem taciturnitas medium quid est inter asseuerationem ac negationem. Ideo Gl. in reg. 44. Abb. c. nonne. num. 1. de præsumpt. Syl. ver. consensus, q. 1. & 3. Ioseph Mascardus vol. 1. de probat. conclus. 417. Sanchez lib. 1. de matrim. disput. 5. num. 5. & disp. 6. num. 11. ex varijs circumstantijs coniecturas tradere conantur, quibus tacentis consensus, vel dissensus cognosci aut præsumi possit, secundum prudentis viri arbitrium. Prima: Tacens consentire censetur, si agatur de eius fauore, aut commodo: non item si agatur de eius incommodo seu præiudicio. Corollarium. Si aliquo tibi promittente, donante, &c. taceas, nec contradicas: censeris acceptare. Item si aliquis pro te præsentem, nec contradicente fide iubeat: censeris mandare & ratum habere iuxta l. si remunerandi, §. si passus, ff. mandati, vbi rubrica Bartoli: *Qui patitur aliquid fieri, quod ad sui commodum spectat, mandare censetur.* Contrà verò, si quis re sibi ab altero donari: vel puellam ad matrimonium contrahendam obligare cupiat: illa verò taceat, non censetur hoc ipso consensum præbere: quia agitur de eius obligatione, nisi consensum facto aliquo vel positiuo nutu significet: vt si post rogationem, vel tractatum sponsaliorum, anulum a spondente, vel manum ipsius accipiat: censetur ipso facto consentire, & sponsonem illius acceptare, sicuti notant Syl. & Rosella ver. sponsalia, Abb. cit. c. nonne, n. 1. §. fallit hoc. Sanch. lib. 1. de matrim. disp. 22. Egid. Coninck 2. 2. tom. 2. disp. 21. dub. 3. num. 28.

Secunda: Tacens consentire videtur: si consentire nolens negare vel contradicere deberet: non item si respondere, aut contradicere non teneatur. Corollarium. Reus a Iudice legitimè iussus ad ea, quæ obijciuntur respondere si taceat, fateri præsumitur, c. si post, de confess. in 6. Itē, sedens in concilio, capitulum, si iniquæ constitutionis, electioni non reclamet: vbi vtiliter potest: consentire iudicatur, sicuti docent Innoc. c. 1. de his quæ fiunt a maiore parte capituli, Abb. ibid. num. 3. & in c. 2. num. 9. de Simon. Quod verum est in ordine ad incurrendum peccatum & pœnam, vt ait Innoc. cit. c. 1. Non item quod attinet ad valorem electionis: quia in re graui & communitati præiudicante taciturnitas non debet haberi pro consensu, teste Abb. c. in causis, c. Cumana, de elect. Syl. ver. electio, 2. q. 12.

Tertia: Principis vel Prælati scientia & patientia consensus æstimatur, si contradicendo, absque scandalo, alteri vtiue mali periculo impedire possit: non item si facile impedire non possit. Exemplum habes in Prælato dispensandi facultate prædito, si sciat subditum suspensum vel irregularem confessiones audire, neque prohibeat: censetur interdum hoc ipso dispensare velle; quia de re Sanchez lib. 3. de matrim. disp. 35. num. 20. Suar. lib. 6. de legib. c. 10. num. 19. & 22. vbi monent, vt subditus rectè in hoc casu operetur, v.g. confessiones audiat, necessarium esse, vt ex iusta causa rationabiliter præsumat, Prælatus non tantum scire quod agitur, sed etiam actu velle, seu contentum esse vt id agatur. Est enim generalis regula, quod *vbi requiritur licentia ad valorem ipsius actus, sufficit tacita & præsumpta de rati habitatione præsumptio: non autem futura.* At verò vbi licentia non requiritur ad valorem actus, sed tantum ad debitum ordinem, tunc sufficit probabilis spes & præsumptio rati habitationis futura. Vide Sanchez cit.



cit. disp. 35. & quæ dicam hoc libro, tr. 4. c. 22. num. 8.

His adde, quod Canonistæ docent in c. nonne, de præsumpt. si quis ex duobus sibi obiectis vnum negat, alterum tacite fateri: si vnum fateatur, alterum tacite negare. Idque in cit. c. probatur auctoritate Gregor. I. hom. 18. super Euang. *Duo Christo illata fuerunt* (Ioan. 8. & quod Dæmonium haberet, & quod Samaritanus esset) *unum negauit, alterum tacendo consensit*. Verum cum hæc vera tantum sint secundum præsumptionem, ideo diligenter considerandæ sunt circumstantiæ, quæ tales esse possunt vt huic præsumptioni nullus locus sit.

4. Quartò diuiditur in voluntarium actu; & voluntarium virtute. de quo S. Thom. 3. p. q. 64. a. 8. ad 3. Vt actio virtute voluntaria dicatur, debet initio imperata fuisse ab interno actu liberæ voluntatis, eiusque imperij & motionis vi hucusque durare: quemadmodum videre est in eo, qui proposito orandi, aut sacrificandi, domo egreditur, os ad loquendum aperit; atque in his exteriorum membrorum imperatis actionibus, virtute primi propositi, contraria voluntate non reuocati, hætenus persistit. Necesse tamen est, operantem in ea animi dispositione permanere, secundum quam operatio eius sub arbitrij potestatem cadere possit. Nam si sacerdos v. g. domo egressus sacramenti conferendi causa, postea in somnum, ebrietatem, vel amentiam incidat; & in ea dispositione verborum solemnem formulam proferat; non erit talis operatio virtute voluntaria: cum moralis non sit, id est, non subiecta humanæ rationis potestati, sed omnino naturalis ac necessaria. De actione loquor; non de passione siue susceptione. Est enim discrimen in proposito casu, quod in ministrante sacramentum requiritur voluntas siue propositum perseverans saltem virtute, videlicet in exercitio siue vsu membrorum, tanquam effectu eius morali, sed in suscipiente sacramentum, etiam si adultus sit, non requiritur voluntas siue propositum re ipsa permanens actu vel virtute, siue in effectu morali: sufficit enim, si antecesserit, & contrario actu nunquam reuocata sit: tunc enim secundum benignam interpretationem permanere censetur. Quare dormiens, v. g. vel phreneticus validè baptizatur, si antè Baptismum desiderauit: non item validè baptizat, vt supra dictum est.

5. Quintò, diuiditur in id, quod directè ac per se voluntarium est; & quod indirectè, siue in alio. Ita S. Thom. 1. 2. quæst. 77. a. 7. Voluntarium indirectum duobus potissimum modis accidit: Primò, si homo voluntariè exerceat actionem, ex qua scit vel suspicatur consecuturum aliquem effectum; etsi eum per se ac directè non intendat, indirectè tamen ipsi voluntarius efficitur. Exemplum: si sciens te in ebrietate rixari, verberare solitum, nihilominus te inebries; percussio vel homicidium in ebrietate commissum, indirectè voluntarium censetur. Item, si tali cibo, tali corporis situ scias te pollui solitum; pollutio inde orta indirectè voluntaria indicatur.

Circa hanc doctrinam tria aduertenda sunt: 1. vt effectus ex operatione, tanquam causâ, secutus, voluntarius censetur, necesse est, operantem aduertisse ad periculum seu probabilitatem secuturi effectus: nam si nullam de effectu cogitationem suscepit, neque in se ipso, neque in sua causa voluntarius censebitur; quippe nullo modo præuisus; sed ex naturali inaduertentia proueniens, sicut docet Vasq. disput. 127. c. 3. & 4. Sanchez lib. 1. moral. c. 1. 6. num. 42. II. Non raro accidit, vt effectus inordinatus ex libera actione naturaliter ac necessariò secutus, si præuisus fuerat, voluntarius operanti censetur; sed ad culpam ei non imputetur, quamuis imputaretur, si eiusmodi effectum voluntas directè intenderet. Exemplum est: Si intelligas ex actione honesta, quam exercere vtile aut necessarium est, delectationem carnalem in appetitu, aut pollutionem in somnis secuturam, ea tibi ad peccatum non imputatur; sed

nihilominus indirectè voluntaria est: quia qui causam vult, è qua effectum naturaliter ac necessariò secuturum non ignorat, is indirectè & per accidens vult etiam effectum; quantumvis per se non intendat. III. Cum homicidium v. g. in ebrietate, pollutio in somnis, nullo modo sit actio voluntaria & moralis in se; sed solum in sua causa liberè volita, ex qua postea effectus ille naturaliter ac necessariò prouenit, neque amplius sub arbitrij potestatem cadit; consequens est, homicidium in ebrietate, pollutionem in somno, &c. nunquam esse peccatum secundum se; sed interdum antecedentis peccati effectum. Volo dicere, hominem non eo tempore peccare, quo ebrius occidit; cum in ea animi dispositione moralis peccati incapax fuerit: sed prius peccasse, etiam contra iustitiam, cum præuiso periculo secuturi homicidij, nihilominus se inebriauit. Eademque ratio est, si quis voluntaria actione sua causam præbeat peccato omissionis; v. g. festo die summo mane se inebriet, vel somno committat, cum periculo negligendi Missam; ommissio hæc erit quidem effectus peccati antecedentis; sed in se nullam malitiam, ne participatam quidem, habebit; cum non sit moralis, sub arbitrij potestatem cadens: in quo differt talis effectus, ita naturaliter ex causa, voluntariè posita, eueniens, ab actione, quam supra in 4. diuisi dixi virtute voluntarium; quod hæc, dum agitur, sub potestatem arbitrij cadere possit, ideoque moralitatis, seu peccati ac meriti aliquo modo capax sit; non item actio, quæ in somnis, ebrietate, aut quacunque alia ratione naturaliter ac necessariò euenit. Atque hæc est doctrina Halensis p. 2. quæst. 113. membr. 5. & 7. Henrici de Gandauo in Quodlibeto 3. quæst. 26. Hadriani in quæst. 3. Vterius videndum est, de sacrament. Eucharist. ad 7. Azor tom. 1. lib. 1. c. 7. Vasq. disput. 73. c. 9. num. 47. & disput. 94. c. 2. & 3. Suarez tom. 2. de relig. lib. 3. de iuram. c. 7. etsi aliter Valent. tom. 2. disput. 6. quæst. 1. p. 4. §. tertio quæti solet, Becanus cap. 3. quæst. 6. conclus. 2. Angles in flor. 2. dist. 37. quæst. 2. diffic. 5. & 6. quibus fauet S. Thom. quæst. 79. a. 3. ad 3. Quamuis fortasse inter Doctores solum sit quæstio de modo loquendi.

Hinc colligunt Suarez & Vasquez II. cc. per se loquendo, satis esse, si in confessione dicas, te regulam v. g. è recto proiecisse, perspecto manifesto, vel probabili periculo hominis occidendi; neque opus esse explicare vtrum mors secuta sit nec ne: quandoquidem tunc solum peccasti, cum causam mortis præbuissti; non item cum in potestate tua amplius non est, tametsi maxime velis, effectum impedire; ideoque in se, & coram Deo neque maius, neque minus peccatum est, siue effectus sequatur siue non. Quæ doctrina vera est, et que in praxi locus esse potest, si aliquis post datam causam homicidij v. g. sed ante eius euentum rite confessus est, se mortis causam præbuisse, quod postea non teneatur iterum confiteri Sacerdoti homicidium euenisse, cum effectus iste in voluntatis arbitrio non erat, sicut bene docet Azor to. 1. lib. 1. c. 7. ad fin. Fateor tamen plerumque necessarium esse, vt Sacerdoti explicetur an effectus peccati, puta homicidium secutum sit: partim vt intelligi possit, quam probabile fuerit periculum cui se operans exposuit: partim propter contractam obligationem compensandi damni, ecclesiasticæ censuræ, aut irregularitatis, &c.

Porro quæ dicta sunt de voluntario indirecto, similiter locum etiam habent in voluntario directo & expresso: Puta, si quis regulam è recto projiciat directè intentione hominis occidendi; aut venenum homini ex proposito propinet; tunc solum peccat interno & externo peccato, cum causam mortis præbet; non item peccat, cum mors re ipsa sequitur, independentem iam ab arbitrij potestate: quodeo etiam signo colligitur, quia fieri potest, vt eo tempore de peccato penituerit, & in Dei



gratia constitutus sit : impossibile autem est hominem peccare mortaliter in gratia constitutum : quamvis nihil obstat , talem hominem excommunicationem tunc incurrere propter peccatum antecedens , cuius effectus postea sequitur , sicuti notauit Vasq. disp. 73. c. 9. prope fin. Idque verum est , esto ante secutum effectum , v. g. Presbytericidij hominem pœniterit peccati : licet enim mors postea secuta non imputetur amplius ad peccatum ; est tamen effectus peccati , per quem pœna iuris consummatur , sicuti notat Sanch. lib. 1. moral. c. 16. n. 17. & lib. 9. de matr. disp. 45. n. 30.

6 Ex dictis etiam colligitur , eum qui ex inueterata consuetudine , velut quodam necessario impetu , rem malam agit , v. g. materiales blasphemias vel periuria effundit , tunc non peccare , nec propriè blasphemare , peierare : quia nullum peccatum sine rationis deliberatione committitur ; sed antea aggravatè , & quasi dupliciter peccasse , cum blasphemias vel periuria deliberatè frequentans , simul etiam animaduertit prauam consuetudinem sibi ingenerari ; quæ causa futura sit sequentium iuramentorum , blasphemiarum saltem materialium. Ita docet Scot. in 3. d. 39. q. vn. a. 1. q. 3. Anton. p. 2. t. 10. c. 7. §. 1. Sanch. lib. 3. moral. c. 5. n. 28. Suar. to. 1. de relig. lib. 1. de irreligios. cap. 6. n. 2. & to. 2. de relig. lib. 3. de iurament. c. 7. n. 3. Quamobrem talis in Confessione non tantum dicere debet , se circiter trigies deliberatè blasphemasse sed dicere etiam debet , se ita continuo frequentasse blasphemias , vt consuetudinem blasphemandi sibi quasi naturalem induxerit.

Præterea homo ille , qui voluntariè sibi blasphemandi , aut peierandi consuetudinem induxit , sub peccato mortali obligatus est operam dare , vt eam deponat. Probat , Qui causam prauam futuri euentus , aut nocuenti à se voluntariè positam , cum possit tollere , intermittit , is continuo peccat peccato omissionis , ideoque in statu peccati versatur ; sicuti qui ignem excitauit , ex quo incendium oriturum prouidet , nisi extinguat. Sed mala consuetudo blasphemandi , peierandi , vel ad quodlibet dictum , nihil aut parum examinando , num verum , an falsum sit , iurando ; collocat hominem in maximo probabili periculo falsorum iuramentorum , aut blasphemiarum , saltem materialium : quæ licet propriè periuria aut blasphemie non sint , vt suo loco dicam ; sunt tamen graues deformitates aduersus Religionis virtutem. Ergo continuo peccat homo mortali omissionis peccato , adeoque versatur in statu peccati : peius ac concubinariis , si concubinam non eiiciat , vel rei alienæ detentor , nisi restituat. Qua de re vide Suarez cit. lib. 3. c. 6.

Quapropter plerumque etiam non sufficit talem hominem de præteritis periurijs aut blasphemijs dolere , & concipere propositum impotenter abstinendi , sicuti docuisse videtur Saurus lib. 5. clauis regie , c. 5. n. 10. Valent. to. 3. disp. 6. q. 7. p. 3. Nisi id propositum efficax sit , extendens se ad propinquas occasiones , siue pericula tollenda , si fieri possit sine magno incommodo. Igitur Confessarius hominem quandoque compellere poterit ad lusum & potationes fugiendas , quibus blasphemandi vel peierandi consuetudinem retinet , aut confirmat : non item ad deieciendam mercaturam , officium aurigandi : qua de re Suar. cit. lib. 3. c. 8. n. 7. Sanchez cit. c. 5. n. 16. Posteaquam vero penitens prauam consuetudinem efficaci proposito retractauit , tum consequentia falsa iuramenta & verba blasphemie ex eadem consuetudine quasi naturali & necessario impetu prouenientia , non imputabuntur ad peccatum : cum neque sint voluntaria in se , sicut suppono ; neque in sua causa , puta consuetudine , quippe quæ ab ipso per propositum retractata , non amplius voluntaria censi debet.

7 Secundo , accidit voluntarium indirectè , si homo effe-

ctum aliquem actione sua impedire vel tollere posset , ac deberet ; sed scienter intermittit : tunc effectus illi moraliter & interpretatiuè voluntarius est , atque ad culpam imputatur. Ita docet S. Th. q. 6. a. 5. Vbi nota primò ; Homini in tali casu agere intermittenti , effectum imputari tanquam causæ morali , non physice ; quia mera actionis intermissio , per quam effectus permittitur , in ipsum effectum realiter non influit , vt per se pater.

Nota secundo ; Hæc duo , posse impedire effectum , & non impedire velle , minimè sufficere , vt idcirco effectus indirectè voluntarius censeatur ; aut alicui tanquam causæ morali imputetur. Nam alioquin absurdum sequeretur , quod omnia Angelorum , hominumque peccata Deo voluntaria essent : cum is haud dubiè omnia impedire possit , & consultò impedire nolit. Sed insuper requiritur ad voluntarium indirectum & imputatum , vt aliquis etiam debeat seu obligatus sit impedire effectum , quem potest & non vult impedire.

Tertiò nota ; in hoc casu inspicendum esse , ex cuiusnam virtutis præcepto homo teneatur effectum impedire : nam contra eandem & non aliam virtutem peccare censendus est , si impedire deliberatè intermittat. Exempli causa , si imminente periculo naufragij , præter nauetam alij quoque adsint , qui nauem liberare possent , & sine iusta ratione scienter negligant : solus nauta , cui ratione officij sui incumbit nauem liberare , contra iustitiam peccabit , atque ad damni restitutionem obligabitur : alij autem solum contra charitatem peccabunt , unde restituendi obligatio non oritur. Alia verò ratio est in casu , de quo S. Ambrosius loquitur apud Gratianum c. pasce , d. 86. & S. Th. 2. 2. q. 32. a. 5. *Pasce sane morientem , si non pauperis , occidisti*. Probabiliter enim dicitur , talem non solum aduersus charitatem , sed etiam iustitiam delinquere : ideoque homicidium ipsi tanquam causæ morali imputari , quia famelicus in extrema necessitate ius habet ad panem petendum : quem etiam , saltem virtualiter , petit à diuite : consequenter hic iniuriam illi infert , si neget. Quare discrimen est inter eos , qui sine obligatione iustitiæ nauem perire sinunt : & hunc diuitem , qui ratione rei possessæ , ad quam pauper in extrema necessitate constitutus ius aliquod habet , subuenire ex iustitiæ lege obligatus est.

Præterea si Titius solo malo exemplo alterum moueat ad furandum , seu damnum iniustum tertie personæ inferendum , tale damnum Titio indirectè voluntarium censeatur : quia illud impedire poterat , & debebat , abstinendo ab illa actione , ex qua animaduertit , alterum peruersa sua voluntate occasionem furandi accepturum : tamen ad restitutionem damni non obligatur ; cum non peccauerit aduersus iustitiam , sed solum aduersus charitatem , peccato scandali , vt dicam lib. 2. tract. 3. cap. ult. n. 6. obseruan. 3.

Obijciat aliquis contra dicta : qui malum aliquod vel peccatum impedire potest , & consultò intermittit , eo ipso vult permittere : ergo ipsi est voluntarium , quamuis impedire obligatus non sit. Resp. Tantum sequi , quod permissio sit illi voluntaria : non autem quod effectus permissus : cum fieri interim possit , vt ab eo secundum se abhorreat : consequenter non potest illi voluntarius censi : nisi habeat obligationem impediendi : vt proinde , si non impediatur , cum deberet impedire , moraliter ipsi vt voluntarius imputetur : quæ moralis imputatio locum non habet , ubi non est obligatio impediendi. Aliud verò dicendum de effectu , qui ex libera actione physice & necessario prouenit : quem licet operans non intendat , sed solum permittat , voluntarius tamen aliquo modo censeatur : quia qui vult causam , is saltem consequenter , indirectè , & per accidens vult etiam effectum necessariò secuturum , vt supra dixi hoc cap. circa 5. diuis.

Ad extremum circa voluntarium indirectum obseruari



uari debet, minus propriè ac perfectè voluntarium esse; consequenter si circa obiectum malum versetur, minus esse culpabile, quàm si formaliter, directè ac per se voluntum esset, teste S. Thom. q. 76. a. 4. Quare minus peccat leuiusque puniendus est, qui in ebrietate hominem occidit, quàm si prudens, sui que compos. Et minus peccat nauta, qui nauem naufragio eripere negligit, quàm si adhibita opera eam submergat.

## CAP. IV.

## De ignorantia, an &amp; quomodo voluntarium tollat?

## SUMMARIUM.

- 1 Ignorantia diuiditur primò, quòd alia est priuationis: alia praua dispositionis.
- 2 Secundo. Est alia ignorantia iuris, & alia ignorantia facti.
- 3 Tertiò diuiditur in eam, quæ est causa operis: & in eam, quæ est tantum concomitans.
- 4 Quarto diuiditur. Quòd alia est ignorantia antecedens, quæ est involuntaria, seu inuincibilis dicitur: & alia consequens, quæ est voluntaria ac vincibilis ignorantia appellatur.
- 5 Vincibilis ignorantia subdividitur in affectatam & non affectatam. Et hæc vel est crassa, supina; vel lenis, seu non crassa.
- 6 Ignorantia inuincibilis, siue iuris sit, siue facti, omnino à culpa excusat.
- Ut operatio moraliter mala sit, necesse est, operantem actu aliquo modo advertere ad illius malitiam, vel periculum malitiae.
- 7 Si operans indistinctè iudicauit esse peccatum, quòd re ipsa nullum, aut veniale tantum est, non est presumendus mortaliter peccasse, nisi venerit illi in mentem dubitare, vel suspicari de malitia mortali.
- 8 Etiam concomitans ignorantia, si inuincibilis sit, à culpa excusat.
- Deus non imputat peccata, quæ aliquis faceret, si hoc vel illud in mentem ei veniret.
- 9 Ignorantia vincibilis non excusat opus à culpa: facit tamen esse leuiorem, quàm si scienter patratum fuisset.
- 10 Ignorantia vincibilis earum rerum, quarum cognitio per se in precepto, est peccatum speciale: non item, si cognitio rerum per accidens tantum requiritur.
- 11 Ignorantia, & cognoscendi voluntaria omisso, unum peccatum faciunt in genere moris.

**I**gnorantia quædam purè negationis est, in subiecto ad sciendum non apto; vel simpliciter, vt in lapide: vel pro eo tempore, statu, &c. videlicet in infante aut amente, cuiusmodi S. Thom. 1. 2. q. 76. a. 2. non propriè ignorantiam, sed nescientiam appellandam esse censet.

- 1 Ignorantia autem propriè dicta diuiditur primò, quòd alia sit ignorantia priuationis, quæ est carentia scientiæ in subiecto apto ad sciendum, pro eo tempore, statu, &c. veluti si homo adultus & rationis compos nesciat ea, quæ scire potest. Alia verò ignorantia prauæ dispositionis, quæ est positua deceptio, & contrarius veritati error, existens v. g. in Iudæis, hæreticis, aliisque errantibus. Vide Henricum à Gandauo quodlib. 12. q. 25.
- 2 Secundo diuiditur in ignorantiam iuris, & ignorantiam facti, apud Iureconsult. tit. ff. de iuris & facti ignorant. Ignorantia iuris dicitur, si quis ignorat, quod lege vel consuetudine vim legis obtinente constitutum: nesciat v. g. carniū comestionem die Veneris Ecclesiastica lege prohibitam esse. Ignorantia facti est, si quis ignorat rem particularem, ex qua actio moralis veluti obiecto dependet, conuenienter Arist. 3. Eth. c. 1. Vt si quis nesciat carnem esse quam comedit, vel non cogitet esse diem Veneris. Nam obliuio, & inconsideratio nomine ignorantia etiam comprehenduntur.
- 3 Tertiò, diuiditur ignorantia in eam, quæ est causa operis: quia si abesset, opus non fieret: & in eam, quæ non est causa operis, sed concomitans. Exemplum: si amicum tuum occidisti, ratus esse feram; ex ignorantia (tanquam causa) occidisti: qui, si abfuisset, id est, nisi ignorasses, minime occidisses. Idque eo signo ostendit Arist. l. c. Quia

facti te pœnitet, postquam ignorantia remota fuit. Si autem inimicum, quem maxime à te occisum cupiebas, pro fera occidisti, non tam ob ignorantiam, sed magis cum ignorantia; siue (vt Arist. ait) ignoranter occidisti: quia tamen si non ignorasses, nihilominus occidisses: quare nec pœnitet te facti, postquam cognouisti; sed potius gaudes.

Quarto, diuiditur ignorantia in antecedentem & consequentem secundum S. Th. 1. 2. q. 6. a. 8. Antecedens ignorantia dicitur, quæ nec directè, nec indirectè voluntaria est, nam ideo antecedens appellatur, quia omnem voluntatis actum antecedit, ideoque prorsus inculcata est: aliàs dici solet ignorantia iusta, probabilis, inuincibilis, quia morali diligentia superari ac tolli non potest; vel quòd nunquam in mentem venerit dubitare, aut cogitare de opposito; vel etsi in mentem venit, tamen adhibita diligente inquisitione, ignorantia depelli, & veritatis cognitio acquiri non potuit. Consequens ignorantia dicitur, quæ aliquo modo voluntaria est, ideoque consequitur voluntatem directam, vel indirectam; quàm ob rem culpabilis est, si versatur circa rem cognitu necessariam: alias vocari solet ignorantia iniusta, improbabilis, vincibilis; quia superari ac tolli, & opposita scientia acquiri potuisset, ac debuisset.

Porro vincibilis ignorantia subdividitur in affectatam, & non affectatam: quæ inter se differunt, quòd illa directè voluntaria sit; hæc indirectè, sicut notauit S. Th. q. 76. a. 3. Ioan. Gerson. p. 2. tr. de natura & qualit. conscientia, §. est præterea, ad finem: & videri potest Alph. à Castro lib. 2. de lege pœnali, c. 14. Igitur affectata ignorantia est, cum quis data opera vult ignorare, & non inquirere veritatem; siue ob discendi tardium ac pigritiam; siue vt legis obligatione ignorata, vel excusationem aliquam mereatur, vel liberius peccare possit. Estque hæc ignorantia interdum concomitans, & non causa operis; quando ignorans ita animo comparatus est, vt etiam sciret se lege obligatum, non tamen pareret: interdum verò est causa operis, si illà sublatà, faceret quod lex iubet.

Ignorantia verò non affectata, siue indirectè tantum volita, alia est crassa, lata supina: ad quam tollendam nulla vel modica cura adhibetur: qualis ignorantia earum rerum plerumque esse solet, quæ communiter ab eiusdem conditionis ac status hominibus cognoscuntur. Alia non crassa, non supina ignorantia, quæ non tam facile superari potuit, vel ad quam vincendam diligentia adhibita est, licet non sufficiens.

Arbitratur autem Suarez de censuris disp. 4. §. 10. n. 10. Omnem ignorantiam mortalem esse etiam crassam. Cui repugnat Sanchez lib. 1. moral. cap. 16. n. 7. etiam non crassam ignorantiam interdum sufficere ad mortale peccatum. Sed videtur esse quæstio de nomine. Videbis tamen Doctores communiter loqui ad mentem Suarezij: vt omnis ignorantia, quæ mortalis est, dicatur crassa: lata: quæ autem venialis ignorantia, dicatur non crassa, & leuis. Hoc fateor, inter ignorantias crassas latitudinem quandam esse: alia nimirum valde crassa, & prorsus supina; alia minus crassa: quæ tamen omnes mortales esse possunt.

Assertio I. Ignorantia inuincibilis tam iuris, quàm facti omnino à culpa excusat. Ita S. August. lib. 3. de lib. arbitr. c. 18. & lib. de duabus animab. c. 10. & 11. S. Th. q. 76. a. 3. S. Bonau. in 2. d. 22. a. 2. q. 3. Richar. ibid. a. 2. q. 3. Castro cit. c. 14. in propositionibus. Nam vbi non est voluntarium, ibi nulla est culpa: sed ignorantia facti reddit actum simpliciter non voluntarium; quippe non aduertente animo ad id quod agitur: legis autem siue iuris ignorantia reddit actum non voluntarium quàm malus siue prohibitus est; quippe non aduertente animo ad legis prohibitionem, operisue malitiam: v. g. inposito exemplo, si nescio esse diem Veneris, tunc actus lege prohibitus (videlicet comestio carniū in die Veneris)



absolutè mihi voluntarius non est: sin verò nescio legem prohibentem positam esse, tunc licet mihi comestio carni in die Veneris re ipsa voluntaria sit; non tamen secundum formalem rationem mali, seu peccati, quam accipit ex positivæ legis prohibitione. Ita notavit Suarez de censuris disp. 4. f. 8. n. 18. Sanchez lib. 1. moral. c. 16. n. 9. & 21. Vasq. disp. 107. c. 3. & disp. 123. c. 2. Qui rectè monent, ut opus malum, & aliqua lege prohibitum homini ad culpam imputetur, necesse esse, ut operans actu aduertat, vel aduenterit ad eius malitiam, vel periculum malitiæ. Si enim nunquam in mentem veniat cogitare, aut suspicari de operis malitia, vel dubitare de eius honestate, tum homo non operatur malum deliberatè: cum fieri non possit, ut voluntas in malum peccati consentiat, nisi intellectus illud cognoscat. Dicit aliquis: qui non cogitat de malitia operis prohibiti, deberet tamen cogitare: igitur operatio eius temeritati & imprudentiæ imputatur. Respondeo, Quod omissio siue negligentia considerationis non imputatur ad peccatum, nisi voluntaria sit: non autem voluntaria est, nisi in mentem veniat cogitare de obligatione examinandi, qua examinatione prætermittitur, si homo nihilominus operetur, fatemur vltro illum peccaturum esse.

7 Adde, si intellectus per inuincibilem errorem, iudicet esse tantum veniale, quod alioquin mortale est: voluntatem consentientem non peccaturam plus quam venialiter. Si tamen intellectus simpliciter & indistinctè iudicat peccatum esse, quod re ipsa mortale est: voluntas illud acceptando mortaliter peccabit, teste Vasq. disp. 107. c. 3. in fine. Sanch. lib. 1. mor. c. 1. n. 9.

Sed quid, si intellectus simpliciter & indistinctè iudicet peccatum esse, quod à parte rei vel nullum, vel veniale tantum est; peccabitur ne mortaliter, an venialiter? Nau. in prælud. 9. man. n. 9. putat venialiter tantum peccari: cuius doctrinam examinat Lopez p. 1. instruct. cap. 3. §. A hæc doctrina. Sed Vasq. disp. 59. c. 3. n. 10. Azor to. 1. lib. 2. c. 8. q. 6. Sairus lib. 1. clavis reg. c. 4. n. 17. sentire videntur, mortale peccatum committi. Nam cum voluntas consentit in peccatum genericè, & cum indifferencia propositum, committit se periculo peccandi mortaliter: quandoquidem peccatum æquè potest esse mortale ac veniale. Quorum sententiam saltem tunc veram arbitror, si intellectus dubitet, sitne peccatum mortale, an veniale; adeoque aduertat ad periculum peccandi mortaliter. Sin autem de peccato mortali, eiusque periculo nihil omnino cogitavit, non condemnare hominem peccati mortalis, sed præsumerem ex qualitate obiecti, virtualiter iudicasse esse peccatum tantum veniale: quia præsumendum est, hominem apprehendentem obiectum ut peccaminosum; ita saltem virtualiter & implicite de eo iudicare, sicut illud re ipsa se habet; vel saltem non nimis ab eius qualitate aberrare: licet distinctè non satis cognoscere videatur: alioquin hominibus simplicibus & indoctis scrupulorum materiam ministrabimus.

8 Assertio II. Etiam concomitans ignorantia, si inuincibilis sit, à culpa excusat. Ita docet Corduba lib. 2. q. 19. Suar. de cens. disp. 4. f. 8. Vasq. disp. 125. c. 2. Sanch. lib. 1. c. 16. n. 13. Azor lib. 1. c. 14. q. 4. contra Caiet. 1. 2. q. 76. a. 3. Couar. c. alma, p. 1. §. 10. n. 15. ver. decimo, Sairum in clavi reg. lib. 2. c. 9. n. 35. Probatur eadem ratione, qua præcedens assertio vniuersim probata fuit: Vbi non est scientia eius quod agitur, ibi non est voluntarium: vbi autem voluntarium non est, ibi nulla culpa est: ergo qui inuincibiliter ignorat hominem (inimicum) esse, quem occidit, is non vult ea actione homicidium committere: quare nec peccat homicidij peccato.

Neque obstat, quod homo ita affectus sit, ut si animu aduenteret, homicidium velleret, & approbaret. Deus enim non imputat homini peccata, quæ faceret, si hoc vel illud in mentem ei veniret: sed diuinæ gratiæ adscribendum est, quod id animo non incidat, sicut ex S. Aug-

ust. docet Suar. to. 2. de relig. lib. 3. de iuram. cap. 7. n. 6. Sanch. lib. 3. moral. cap. 5. vbi rectè refutant Caiet. 2. q. 98. a. 3. Nau. cap. 12. man. n. 6. Lopez 1. instruct. cap. 42. Tolet. lib. 4. c. 13. arbitantes, periuria indeliberata ex consuetudine prouenientia esse peccata mortalia, si consuetus, licet deliberaret, animumque aduertet, nihilominus peieraret.

Duo tamen peculiaria habet ignorantia inuincibilis concomitans: Vnum, quod opus non facit inuoluntarium, etsi faciat non esse voluntarium, sicut ex Arist. 3. Eth. c. 1. notavit S. Tho. q. 76. a. 3. Ioan. Gerson p. 2. operum, tr. de natura & qualit. conscientiæ, §. est præterea. Qui nesciens v. g. inimicum suum esse, quem occidit; sed etsi sciret, nihilominus occideret; is nihil agit contra voluntatis inclinationem actualem, aut virtua-lem; ergo non agit inuitus, siue inuoluntarius. Alterum, Quod ignorantia concomitans prauum animi affectum, interdum per accidens operi coniunctum, neque tollit, neque auget, neque minuit. Ita intelligendus videtur S. Th. cit. a. 3. cum ait, ignorantiam concomitantem non excusare à peccato. Et a. 4. eam peccatum nec minuire, nec augere: intellige, quod per accidens operi ignorato coniunctum est. Probatur & explicatur: Cum ignorantia concomitante consistere potest prauus actualis affectus, v. g. *Vtinam hæc fera (existimata) esset inimicus meus. Gaudio, quam existimaueram feram, fuisse inimicum.* Ad quem affectum ignorantia per accidens se habet, ut proinde eius prauitatem neque tollat, neque minuat, neque augeat. Quod optimè tradidit P. Sotus tr. de ratione mendendi peccatis, lect. 2. §. tertia demum, Ignorantia concomitans nec accusat, nec excusat: cum nec voluntaria sit, nec inuoluntaria. Itaque occisio inimici dum putatur occidi feram, non fuit tunc peccatum: quia non est voluntaria: erit tamen peccatum, quando opus placuerit. Idem sentit Durandus in 2. d. 22. q. 4.

Assertio III. Ignorantia vincibilis (siue sit causa operis, siue concomitans) non excusat opus à culpa; facit tamen culpam leuiorem, quam si scienter patratum esset. Ita cum S. Tho. q. 76. a. 4. D D. communiter. Nam obiectum malum eatenus culpæ imputatur, quatenus est voluntarium. Ignorantia autem vincibilis voluntarium non tollit quidem; minuit tamen, sicut dixi supra eod. tr. c. 3. in fine. Ergo etiam culpam non tollit ex toto, sed ex parte. Excipitur tamen à S. Th. ignorantia affectata, de qua David ps. 35. *Noluit intelligere, ut bene ageret.* Hæc enim, interdum profecta ex magna voluntatis inclinatione ad malè agendum, peccatum potius auget, quam minuit. Quod tunc accidit, si aliquis cognitionem præcepti & obligationis ideo respuat, ut ablatu eo quasi rationis frano, siue conscientiæ remorsu, liberius peccet. Quæ ratione impij dixerunt apud S. Iob. c. 21. *Recede à nobis, & scientiam viarum tuarum nolumus,* sicut ibid. notavit S. Greg. lib. 25. moral. c. 11. & docent Corduba lib. 2. q. 20. Nau. c. sciendum, n. 4. d. 2. de pœnit. Sanch. lib. 1. c. 17. n. 5. moral. Castro lib. 2. de lege pœnali, c. 14.

Restat quæstio; Vtrū vincibilis ignorantia sit peccatum per se, ac speciale? Resp. cum Vasq. disp. 126. c. 3. & d. 119. c. 2. & 3. Ignorantia atque sciendi negligentia earum rerum, quarum cognitio per se siue ratione sui præcipitur; est speciale peccatum, oppositum ei virtuti, quæ in talium rerum cognitione versatur. Videl. negligentia in cognoscendis fidei mysterijs, ad credendum necessarijs, est peccatum fidei oppositum. Ignorantia autem, atque cognoscendi negligentia earum rerum, quarum cognitio non per se præcipitur, sed per accidens, videl. in ordine ad opus, quod præcipitur vel prohibetur, non est speciale peccatum: sed accipit speciem suam à legis transgressione, cuius causam, vel periculum præbet, iuxta ea, quæ superiore cap. dicta sunt: v. g. vincibilis ignorantia vtrum ieiunij dies sit, quo carnem comedis, pertinet ad pecca-



peccatum intemperantiæ; vincibilis ignorantia vtrum Sacerdos sit, quem percusit, ad peccatum sacrilegij. Neque tunc refert ad formalem peccati malitiam, vtrum re vera dies ille ieiunij sit; vel vtrum Sacerdos, qui percuitur: sufficit, si suborto dubio, & non discusso, commisisti te periculo taliter peccandi.

- II Denique hoc moneo; negligentiam cognoscendi: ipsamque vincibilem & culpam ignorantiam, non constituere duo peccata: sed vnicum: ad eum modum, sicut actus internus, & actus externus vnum peccatum in genere moris constituunt, vt infra dicam, & docet Valent. t. 2. disp. 6. q. 6. p. 2. Sanch. lib. 1. moral. c. 17. n. 13. Ratio est, quia ignorantia, cum in intellectu existat, non est peccatum, nisi quatenus volita: non autem volita est, nisi quia eam aliquis posset, ac deberet tollere, & negligit. Quare de re S. Bonau. in 2. d. 22. a. 2. q. 2. ad 4. Castro lib. 2. de lege pœnali, c. 14.

## CAP. V.

## De Concupiscentia, vtrum voluntarium tollat, aut minuat?

## S V M M A R I V M.

- 1 Passio concupiscentia alia est antecedens voluntatem, alia consequens.
- 2 Passio consequens non minuit voluntarium: sed potius signum est vehementis voluntarij.
- 3 Passio antecedens non facit quidem actum inuoluntarium: minuit tamen eius voluntarium seu libertatem: imò interdum penitus tollit.

Nomine concupiscentiæ intelligimus passionem appetitus sensitiui, prosequenti bonum delectabile: cuiusmodi sunt amor, desiderium, spes, gaudium siue voluptas, ira, vti videre licet apud S. Th. 1. 2. q. 77. & videri potest Vasq. 1. 2. disp. 28. c. 1.

- 1 Talis passio concupiscentiæ diuiditur à S. Th. a. 6. in antecedentem, ac consequentem. Antecedens passio est, quæ naturaliter exurgens, omnem voluntatis deliberationem præuenit: ac proinde secundum se nec peccati, nec meriti capax est. Passio consequens est, quæ voluntatis arbitrio excitatur, vt ad promptiorem seu expeditiorem operationem inferniat. Sunt enim animi passionēs, amor, spes, ira, audacia, oblectatio veluti cotes, quibus humanæ operationes concitatur, cum ad bonum, tum ad malum vigent magis ac feruent, sicuti contra Stoicos docent Peripatetici, & explicat Medin. 1. 2. q. 6. a. 7.

- 2 Assertio I. Passio concupiscentiæ consequens non minuit, sed potius augeat voluntarium: consequenter & moralem malitiam, vel bonitatem actionis: siue magis propriè loquendo, signum est magnitudinis peccati ait S. Th. cit. a. 6. quia demonstrat intentionem voluntatis ad actum peccati: quo sensu verum est, quod quanto quis maiore libidine, vel concupiscentia peccat, tanto magis peccet. Puta, si aliquis in se excitet magnum desiderium vini, vt intemperantiùs bibere possit. Et similis est ratio, si passio excitetur ad exercendam operationem virtutis: puta, si in te excites magnum misericordiæ affectum, quo impellaris ad succurrendum pauperi.

- 3 Assertio II. Passio concupiscentiæ antecedens non facit quidem actum, ad quem impellit, inuoluntarium; minuit tamen eius voluntarium, seu libertatem; consequenter etiam virtutis meritum, aut culpæ reatum; imò interdum omnino tollit. Ita S. Th. cit. q. 77. a. 6. & 7. Assertio tres partes habet: Prima probatur: Inuoluntarium est, quod agitur cum tristitia siue auersione appetitus: quod verò sit ex amore, cupiditate, voluptate, id non agitur tristitia, siue auersione appetitus: quin potius eiusmodi passionēs superant, & absorbent auersionem ac maiorem, qui alioquin cum opere arduo coniunctus

esse solet. Sic enim milites v. g. spe victoriæ, vel amore vindictæ; & amatores ex turpi libidine quæque molestissima iucunde perferunt, sicut notauit Vasq. 1. 2. disp. 28. c. 4. Ergo passio concupiscentiæ non efficit actum inuoluntarium.

Altera pars probatur: Voluntarium humanum siue liberum oritur ex intellectu, proponente obiectum cum indifferentia: sed passio concupiscentiæ facit, vt intellectus magis æstimet, ac nimis ponderet rationes siue motiua occurrentia pro ea parte, ad quam sensitiuus appetitus inclinatur: idque ob naturalem sympathiam siue consensionem, quæ est inter potentias sensitiuas inferiores, & potentias rationales superiores. Hinc dici solet, *Quemuis iudicare de rebus sicut affectus est.* Et, *hominem amoris, desiderio, ira, similibusque affectibus obnoxium, minus idoneum esse ad consultandum, iudicandum.* Ergo passio minuit voluntarium humanum, per consequens etiam peccatum, aut virtutis meritum. Confirmatur ex communi hominum persuasione; minus liberè egisse, ac proinde venia aliqua dignum esse, qui aliorum precibus, blanditijs, aut vehemente libidine ac tentatione victus, in malum consensit.

Tertia pars probatur: Libertas voluntatis descendit ex potestate intellectus, proponentis obiectum cum indifferentia: sed in vehementissima passione, v. g. ira, tristitiæ fieri potest, intellectum adeò perturbatum esse, vt obiectum non proponat cum omnibus circumstantijs, neque rationibus in vtramque partem indifferenter ostensis; sed cum determinatione ad id quod passio inclinatur; exhibitis solum rationibus, quæ in eam partem tendunt: hoc casu voluntas non agit liberè, sed naturaliter ac necessarid; adeoque non peccat. Confirmatur: Amentes, & ebrii ideò liberè non agunt, quia sensus internos perturbatos habent, quæ perturbatio per accidens redundat in intellectum, quippe in hac vita dependentem ab internis sensibus. Sed in vehementissima passione ira, tristitiæ sensus interni valde perturbari possunt: quæ perturbatio similiter in intellectum redundat. Ergo, &c.

## CAP. VI.

## De coactione &amp; metu, vtrum inuoluntarium efficiant.

## S V M M A R I V M.

- 1 Vis, coactio, & inuoluntarium inter se differunt.
- 2 Metu fieri dicitur, quod quis mali declinandi causa facit, alioquin non facturus.
- 3 Metus alius est, qui ab intrinseco proficisci dicitur, alius qui ab extrinseco.
- 4 Metus item alius est cadens in virum constantem, alius vero leuius, & vanus.
- 5 Metus grauis mali, puta mortis intentata, sufficit ad infirmandum actum; esto aliquis agendo peccet: Et si matrimonium tali metu adactus contrahat, & consummet.
- 6 Vis & coactio propriè dicta, si membrum exterioribus inferatur, tollit omne voluntarium.
- 7 Quod metu fit, est simpliciter voluntarium. & inuoluntarium secundum quid, ideoque mixtum ex voluntario & inuoluntario.
- 8 Contractus, qui fiunt ob metum ab extrinseco iniuste illatum ordinariè validi sunt, licet rescindi debeant.
- 9 Metus gehenna, si sit causa finalis obseruationis legum, malus & seruilis est; bonus autem, si sit causa solum impulsiva.

Hæc tria inter se differunt; vis, coactio, inuitum siue inuoluntarium. Nam inuoluntarium ex parte latius patet, quàm coactum. Quia ad coactum duo requiruntur; & vt motio ab extrinseco agente proveniat, & vt contra appetitus inclinationem actualem, vel virtutalem fiat. Ad inuoluntarium verò sufficit hoc posterius: neque necesse est, vt motio ab extrinseco proficiat.



scatur: quare quod propter ignorantiam sit, inuoluntarium est; sed non coactum: motus item primò primi, qui repugnante voluntate in membris oriuntur, inuoluntarij sunt; sed non coacti. Ex parte verò latius patet coactum, quàm inuoluntarium: nam inuoluntarium, (si propriè loquendum sit) dicitur tantum de agentibus per voluntatem; coactum verò etiam brutis competit: quamvis si inuoluntarium latè accipiatur, ut idem sit quod innitum, tunc omne coactum etiam inuoluntarium dici debet.

Deinde violentum, si propriè accipiatur, latius patet quàm coactum. Etsi enim omne coactum sit etiam violentum; non tamen vice versa. Quia coactum de solis animalibus dicitur; violentum de rebus etiam inanimatis: v. g. lapis contra naturalem inclinationem sursum proiectus, violentiam patitur; sed non coactionem. Animalia verò, ipsèque homo aduersus voluntatis inclinationem tam violentiam, quàm coactionem pati potest; non quidem secundum actus voluntatis elicitos, amorem, inquam, desiderium, odium, &c. (Nam eo ipso quòd à voluntate tanquam intrinseco principio procedunt, non inferuntur ab extrinseco contra voluntatem) sed violentia & coactio locum habet in actibus imperatis exteriorum membrorum, quæ voluntatis imperium suscipere solent. Cum enim eiusmodi membra ab extrinseco moventur contra voluntatis inclinationem, tunc homo violentiam & coactionem patitur. Veluti si tibi oculi per vim aperiantur ad videndum turpia; si genua curuentur coram idolo: si puellæ stuprum inferatur non tantum non consentienti, sed etiam resistenti, quatenus potest ac debet, erit hæc propriè dicta vis & coactio. Quam doctrinam habes apud S. Th. 1. 2. q. 6. 2. 4. & 5. sumptam ex Aristot. 3. Eth. c. 1. & videri potest Durandus in 4. d. 29. q. 1.

3 Metus definitur ex Vlpiano in l. 1. ff. de eo quod metus causa, *Instantis, vel futuri periculi causa, mentis trepidatio*; & metu fieri id dicitur, quod aliquis mali declinandi causa facit, alioquin non facturus.

Diuiditur primò: Metus alius est, qui ab intrinseco proficisci dicitur: cum ad auertendum malum, seu ex causis naturalibus, seu ex quocunque alio infortunio extortum, ultro aliquis medium eligit, quod alioquin nollet: ut si metu naufragij pecunias abijcias, castitatis votum edas. Item, si quis supplicio afficiendus, matrimonium puellæ spondeat, ut mortem euadat; vel pecuniam offerat, ut iudicem sibi conciliet. Alius verò metus est, qui ab extrinseca persona directè incutitur ad extorquendum alicuius rei consensum. Quod dupliciter fieri potest: Vel iuste; si exempli causa aliquis, qui sponsalia contraxit, ab Ecclesiastico magistratu adigatur ad matrimonium ineundum, intentata excommunicationis pœna: Vel iniuste; si exempli causa maritus deprehendens adulterum cum vxore, mortem minetur, nisi pecunias det, filiam suam vxorem ducat; erit hic metus iniuste incussus; cum ius occidendi ille non habeat. Quapropter accepta pecunia restitutioni obnoxia erit; & matrimonium eo metu extortum ipso iure irritum, teste Sanch. lib. 4. de matrim. disp. 9. num. 9. Etenim de tali metu, qui directè atque iniuste incutitur, intelligenda sunt iura ciuilia & canonica, De eo quod metus causa; De ijs quæ vi. cum aiunt promissiones & contractus graui metu infirmari, aut infirmandos esse. Qua de re mox dicam.

4 Secundò diuiditur metus, præsertim qui ab extrinseco iniuste incussus est: Quod alius est *cadens in virum constantem*, qui etiam dici solet metus *grauis: probabilis, iustus*: de eo sermo est in l. 6. ff. Quod metus causa, & c. consultationi, c. veniens, 2. de sponsalib. c. cum dilectus, De his quæ vi, c. ult. de appellationib. Alius verò metus est *cadens in virum inconstantem*, qui etiam metus levis, vanus, iniustus dici solet: In cit. l. 6. appellatur *vani hominis metus*.

Notandum verò est, quòd metus cadens in virum

constantem aliter explicari debet in ordine ad euitandam culpam: aliter verò in ordine ad euitandam obligationem ex promissione, aut contractu. Nam ut metus factum alioquin illicitum, cuius causa existit, à culpa excuset necesse est, ut sit *maioris mali quàm sit illud, quod metus causa suscipitur*, iuxta definitionem S. Thom. in 4. d. 29. q. vii. a 2. quam tenet Sotus ibid. Syl. ver. metus, q. 1. Couar. 4. decret. p. 1. c. 4. §. 1. nu. 16. & p. 2. c. 3. §. 4. num. 6. Secundum quam acceptionem, metus etiam grauissimi mali, v. g. tormentorum & mortis, non censetur iustus, si ob eum aliquis in peccatum quamvis minitum consentiat. Nam *qualibet mala potius tolerare vir fortis debet, quàm in peccatum consentire*: cum peccatum etiam minimum omnibus alijs malis maius sit, teste S. Aug. lib. 1. de ciuit. c. 18. & refertur in c. itane, 32. q. 5. Quare idem S. Aug. neque pro tuenda vita propria, vel aliena mentiri fas esse, testatur super Psal. 5. & refertur in c. ne quis, 22. q. 2.

5 Ut verò metus infirmet promissiones & contractus, qui eius causa instituuntur, alioquin non instituendi: sufficit, si sit grauis mali metus, atque vim & iniuriam atrocem contineat, ut humanam voluntatem plerumque concutiat & inclinet in rem, à qua alioquin abhorret, arg. c. cum locum de sponsal. & ita docent Nau. cap. 22. num. 51. Pet. de Ledesma q. 47. de matrim. a. 3. diff. 5. Henriq. lib. 11. de matrim. c. 9. num. 3. Sanch. lib. 4. de matrim. disp. 2. Agid. Coninck 3. p. t. 2. disp. 20. dub. 2. Quare si quis ex metu graui, v. g. iniuste mortis sustinendæ matrimonium contrahat, imò etiam consummet, irritum censi debet: dummodo præsens, & nondum depositus metus sit causa consensus in matrimonio & copulam: consequenter mortaliter peccat, qui ob talem metum in copulam: quippe hoc casu fornicariam consentit, nisi ignorantia excusetur. Quæ est communior DD. sententia Nau. & Pet. de Ledesma l. cc. Philiar. to. 1. p. 2. lib. 2. c. 8. Sanchez lib. 4. disput. 18. num. 15. Henriq. lib. 11. c. 9. num. 7. Coninck cit. disput. 28. dub. 4. num. 42. Valent. to. 4. de matrim. q. 3. p. 2. Suar. lib. 3. de legibus c. 30. num. 13. contra Palud. in 4. d. 29. quaest. 1. a. 4. conclus. 3. Couar. in epit. p. 1. c. 4. §. 1. num. 16.

Porro, licet à iure & Doctoribus atrocita quædam mala numerentur, quorum metus iustus ac probabilis censi debet: videl. mortis, mutilationis, corporis cruciatus, seruitutis, exilij, captiuitatis, diuturni carceris, grauis infamiæ, stupri, iniuste excommunicationis, amissionis omnium bonorum, aut magnæ partis: si talia vel propriæ personæ, vel alteri sibi valde coniunctæ, puta vxori, liberis, parentibus, &c. inferenda sint, vti videre est apud Syl. ver. metus, q. 1. Couar. in epit. p. 2. c. 3. §. 4. Sanch. lib. 4. disp. 4. & 5. Azor to. 1. lib. 1. cap. 10. Coninck l. c. Iudicis tamen arbitrio definiendum est, vtrum in particulari alia mala sint, quorum metus grauis censendus sit: diligenter consideratis circumstantijs, & imprimis personæ qualitate, vid. sexu, ætate, &c. sicuti monet Gl. in c. cum locum, de sponsal. verbo metus, & in c. cum dilectus, ver. metum mortis, De his quæ vi. Nau. lib. 1. consil. 10. num. 3. eod. tit. in 2. edit. & in man. c. 22. num. 51. §. sextum. Sanch. lib. 4. disp. 3. Rebel. p. 2. de oblig. iust. lib. 2. de matrim. q. 11. f. 1.

6 Assertio I. Vis & coactio propriè ac simpliciter dicta, si membris exterioribus inferatur, tollit omne voluntarium, omnemque culpam. Est communis, quam Gratianus confirmat causa 32. q. 5. testimonijs Patrum asserentium, violentia stupri animum nequaquam maculari. Quod enim sit voluntate repugnante, in id certum est voluntatem non consentire: consequenter nec peccare.

7 Assertio II. Vis & coactio impropriè dicta & secundum quid, inferens metum alicuius mali, ob quem actio fit, quæ alioquin non fieret, non tollit voluntarium simpliciter: facit tamen inuoluntarium secundum quid: adeoque efficit, ut actio sit veluti mixta ex voluntario & inuolun-



inuoluntario. Ita S. Tho. q. 6. a. 6. ex Arist. 3. Ethic. cap. 1. Prior pars probatur: Voluntarium est quod consilio fit ab agente cognoscente singula; circa quæ est actio: qui autem metu mortis v.g. pecunias latroni dat; vel metu naufragij merces in mare abijcit, is, consideratis omnibus ac singulis, consilio eligit, tanquam hic & nunc bonum sibi, pecunias dare, vel merces abijcere. Ergo voluntaria ei est datio, & voluntarius iactus, simpliciter loquendo.

Posterior pars probatur: Inuoluntarium est, quod fit cum auersione voluntatis actuali aut habituali: ab eo autem, quod quis metu causâ agit, alioquin non acturus, abhorret voluntas, quatenus illud secundum se, & præcis circumstantijs spectatur. Experientia enim constat, eum, qui naufragij metu merces proijcit, vel mortis metu latroni pecuniam dat; dolere interim atque auersari mercium, vel pecuniæ iacturam, si eam præcisè consideret.

Corollarium. Quod metu fit magis voluntarium est, quam inuoluntarium. Est enim voluntarium simpliciter & absolute; inuoluntarium verò conditionatè; si videl. metus mali adjacentis, siue tales obiecti circumstantiæ abessent. Quæ planè est mens Iureconsulti in l. si mulier, ff. de eo quod metus causa: Si metu coactus ad hæreditatem, puto me heredem effici: quia quamuis, si liberum esset, nolisset: tamen coactus volui. Quare Gl. in reg. 4. ff. de regulis ait, Quod coacta voluntas, tamen voluntas est. Ideoque quod dicitur in illa regula, velle non creditur, qui obsequitur obsequio parentis vel domini; intelligendum ait ad hoc, vt pœna delinquenti minuatur, sicuti etiam notauit Sanchez lib. 4. disp. 6. q. 1. ad 1. Nam metus minuit ex parte voluntarium; consequenter etiam culpam ac pœnam, sicuti habetur in c. sacris, n. 1. de ijs quæ vi, &c. vbi id annotauit Abb. n. 1.

8. Neque in hac re distinguere opus est; vtrum metus ab intrinseco proficiscatur; an ab extrinseco, & per vim iniuriam: nam nullus metus voluntarium simpliciter tollit. Eò tamen differunt; quia fit causa metus ab intrinseco, vel sine iniuria, omni iure validum ac firmum est, v. g. metu naufragij votum conceptum, eleemosyna pauperi promissa, aut data. Quod verò causa metus ab extrinseco iniuste incussi promittitur, aut datur, id aliqui existimant ipso iure, seu ipso facto nullius roboris & obligationis esse. Ego verò puto, promissionem aut contractum mero iure validum esse (cum ei consensus contrahentium non desit) quamuis secundum æquitatem rescindi debeat, arbitrio metum passi, vt dicam l. 3. tr. 4. de iustit. c. 6. num. 2. & docet Nau. in man. prælud. 6. nu. 5. cum Gl. recepta in cap. Abbas, de his quæ vi, &c. Idque probatur tum ex Instit. de except. princip. Si metu coactus, aut dolo inductus, &c. stipulantis Titio promissisti, quod non debueras promittere, palam est, iure ciuili te obligatum esse: inspecto iuris ciuilis rigore, ait Gl. ibi: ex qua tamen obligatione non oritur actio efficax, quoad executionem, quia secundum æquitatem elidi potest exceptione, Quod metus causa, aut, doli mali. Quare & in l. vlt. Cod. de his quæ vi, ita legimus: Venditiones, donationes, transactiones, quæ per potentiam extortæ sunt, præcipimus infirmari. Et c. 2. De ijs quæ vi metu sive causa, Quæ metu & vi sunt, de iure debent in irritum reuocari. Aliqui tamen sunt contractus, vt matrimonium & sponsalia; qui ob grauem & iniustum metum ipso iure Ecclesiastico irriti sunt, vt suo loco dicam.

9. Ad extremum, circa speciem metus ab intrinseco prouenientis, quæri potest: vtrum is peccet, qui metu pœnæ æternæ legem Dei seruat? Resp. ex Vasq. 1. 2. disp. 27. c. 2. num. 9. Vel inuoluntarium mixtum, siue displicentia operis præcepti secundum se, habet vim propositi efficacis, quo aliquis secum statuit opus præceptum non facturum esse, nisi periculum pœnæ æternæ vrgeret: talis metus seruilis malus est. Vel inuoluntarium siue displicentia operis præcepti habet vim simplicis tantum affectionis, qua aliquis abhorret ab opere, tanquam difficili ac molesto; cuiusmodi tamen affectionem, carnis sive tentationem supe-

rat, quam alioquin fortasse non superaret, nisi metus gehennæ esset: & tunc nihil peccati subest, sed quandoque maioris meriti occasio. Breuius dicere potes cum Ioan. Gersono p. 2. operum in regulis moral. si diligere potest Deus: Metum gehennæ malum esse, si sit propriæ ac principaliter finalis causa obseruationis legum: siquidem hoc casu homo reatum pœnæ timet super omne malum; consequenter suam impunitatem ac proprium commodum amat super omne bonum: quod diuinæ charitati repugnat. At verò bonum & honestum esse timorem gehennæ, si sit causa tantum impulsiva, seu finalis secundaria: Talis enim timor prouenire videtur ex habitu Spei Theologicæ: quod quidem eiusdem virtutis est bonum suum prosequi, & oppositum eius refugere. Simili ratione si homo nolit seruire Deo, nisi dona & beneficia accipiat, talis eius affectio mala est: quia seipsum & propriam commoditatem plus quam Deum diligit. Sin verò homo considerans, quod Deus cultores ac seruos suos varijs beneficijs remunerat, exinde moueatur ad præcepta eius obseruanda, bonum & honestum actum Spei exercet: qui etiam à Charitatis virtute imperari potest; quandoquidem Deo gratum est, ipsique ea re placemus, si bona tum naturalia, tum supernaturalia ab ipso, vt auctore omnis boni, speremus, & petamus. Videri potest Suarez de virtut. Theolog. tract. 2. dif. 1. l. 4. Nauar. c. inter verba, l. 1. q. 3. conclus. 5. numero 23. & 34.

## CAP. II.

Vtrum actus morales speciem & essentiam suam accipiant ab obiecto?

## S V M M A R I V M.

1. Morale per se primò conuenit actibus humanis ex deliberatione rationis procedentibus.
2. Diuiditur in bonum morale, seu honestum: & malum morale seu inhonestum. Bonum honestum dicitur, quod substantia rationali libera per se decens est: inhonestum vero, quod eandem dedecet.
3. Actus morales bonitatis, vel malitiæ speciem accipiunt à reali obiecto suo: consequenter bonitas, vel malitia in obiecto reperiuntur fundamentaliter, in actione formaliter.
4. Actus alij per se & præcisè ex obiecto mali sunt, alij vero propter legis positivam prohibitionem.
5. Actus morales alij interne consummantur, alij vero in externam operationem transeunt. Externa moralis operatio obiectivè quidem prior est actu interno: sed sit exercita ab actu interno posterior: tanquam participant bonitatem, vel malitiam ab interno actu.
6. Actus internus & actus externus in genere moris non faciunt numerum.
7. Actus internus voluntatis efficax, si opere non completur, quia deest operandi facultas: habet quidem omnem substantialem bonitatem vel malitiam: sed non accidentalem: quando quidem externa executione materialiter perficitur.

Notandū est primò: Morale (pro vt opponitur naturali) dicitur illud, quod ordinem habet ad substantiā rationalem liberā. Per se primò ac formaliter conuenit actibus humanis internis, ex rationis deliberatione procedentibus; secundum analogiā verò tribuitur tum actibus externis, qui rationis ac voluntatis imperio subduntur; tum alijs etiam rebus. Nam & scientia moralis dicitur, quæ de moribus disserit; virtus moralis, quæ mores hominis moderatur: ad eum modum, quo sanitas primò, ac formaliter dicitur bona animalis constitutio: secundum analogiam verò & denominationem extrinsecam alijs rebus, v.g. cibo, vrinæ tribuitur.

Notandum est secundò: Morale per se, diuiditur in bonū morale: quod aliàs honestum dicitur: & malū morale, quod aliàs inhonestum ac prauum vocatur. Bonum morale siue honestum est, quod substantiæ rationali per se consentaneum, ac decens est: adeoque moralis bonitas consistit in ratione siue ordine conuenientiæ cum sub-



stantia rationali libera. Malum verò morale siue inhonestum est, quod per se repugnat ac dedecet rationalem liberam substantiam: ideoque moralis malitia formaliter consistit in ratione repugnantie cum rationali libera substantia. Etenim bonum idem est, quod alicui conueniens: & malum, quod inconueniens. Quare sicuti bonum naturale dicimus, quod conuenit substantiæ naturali, quatenus talis est: v.g. corporis bonum est sanitas: animæ scientia, virtus: ignis, calor: aquæ, frigus: mala verò naturalia, quæ eisdem contraria sunt: ita etiam bonum morale seu honestum appellatur, quod conuenit substantiæ morali, id est, arbitrij libertate præditæ, quatenus talis est: malum verò morale quod eandem dedecet. Vide S. Th. q. 18. a. 4. & 5.

Et si verò moralem bonitatem ac malitiam plerumque explicemus cum ordine ad dictamen rationis, quando dicere solemus: honestum esse, quod recta ratio siue conscientia agendum dicit: similiter moraliter malum seu inhonestum esse, cui recta ratio siue conscientia repugnat, tamē hæc explicatio à posteriore, nobisque notiore signo petita est, sicuti notauit Suarez in Metaph. disp. 10. s. 2. nu. 12. Nam ideo recta ratio iudicat amare Deum, misereri pauperis honestum esse; quia id re ipsa bonum honestum est: tale autem est, quatenus rationalem liberam naturam condecet. Similiter, ideo recta ratio iudicat mentiri, blasphemare inhonestum esse; quia re ipsa tale est: tale autem est, quatenus rationalem liberam naturam dedecet.

3 Assertio. Actus morales bonitatis vel malitiæ speciem atque essentiam accipiunt ab obiecto suo. Si enim obiectum bonum ac decens sit, certa quadam habitudine conformitatis ad substantiam rationalem liberam, etiam actio circa tale obiectum bona & honesta erit, certa specie virtutis. Contrà, si obiectum indecens sit, certa quadam ratione difformitatis ad substantiam rationalem liberam, etiam actio circa tale obiectum mala & inhonesta erit, in certa specie vitij, iuxta illud Osee cap. 9. *Facti sunt abominabiles, sicut ea quæ dilexerunt.* Ita docet S. Th. q. 18. a. 2. 4. & 8. Exemplum, Amare Deum ideo bonum ac honestum est, secundum speciem virtutis charitatis Theologicæ: quia Deus optimus peculiari quadam ratione humanæ voluntati congruit: & opus eleemosynæ ideo bonum est, sub specie virtutis misericordiæ; quia miseria proximi, quatenus subleuabilis, peculiari ratione hominem decet. Furtum verò ideo opus malum est sub peccato iniustitiæ; quia rationalem substantiam peculiari modo dedecet, rem alienam à domino inuito auferre.

Corollarium I. Bonitas vel malitia moralis, quam obiectum actioni tribuit, est in ipso obiecto fundamentaliter atque causaliter; in actione verò formaliter: ad eum modum proportionalem, sicut veritas & falsitas formaliter sunt in actu intellectus; quippe intrinsecè representante rem; ex qua tanquam obiecto species ac differentia sub genere cognitionis, veri ac falsi accipiuntur. Nam ideo cognitio vera est, quia res cognita ita se habet, sicut cognitio significat: & ideo cognitio falsa est, quia res cognita aliter se habet, quàm cognitio significat.

4 Pro pleniori autem intellectu tria obseruanda sunt: I. Discrimen est inter actus malos, qui per se & natura sua mali sunt, vt fornicari, Deum, ac proximum odisse; & qui mali sunt ex prohibitione legis, vt festo die laborare, Misericordiam non audire. Qui enim prioris generis sunt, speciem malitiæ accipiunt ab obiecto secundum se: at verò qui posterioris generis actus aut omissiones actuum malæ sunt, malitiam suam non habent ab obiecto præcisè, & secundum se: sed cum ordine ad legem præcipientem, aut prohibentem, vt magis patebit tract. sequent. capite & 2.

5 II. Discrimen etiam est inter actus morales, qui interne consummantur, vt charitas Dei, heresis; & qui in exteriorem actionem produnt; vt eleemosynam dare, furari. Nam actus prioris generis vnicum obiectum habet

à quo suam speciem accipiunt: actus verò posterioris generis feruntur in obiectum, interueniente aliqua actione externa; quæ proinde proximum & immediatum veluti obiectum est interni actus siue propositi: quare supra dixi, obiectum misericordiæ esse misericordiam proximi *subleuabilem*; obiectum iniustitiæ furti, esse rem alienam inuito domino *contractabilem*.

III. Actus externus liberæ voluntatis, v.g. eleemosynæ datio, rei alienæ acceptio, duobus modis considerari potest: Primò, vt obiectum, circa quod actus internus, videlicet voluntas dandi aut furandi, proximè versatur: Secundò, vt executio & effectus eiusdem actus interni. Priore consideratione habet actus externus bonitatem aut malitiam non formalem, sed fundamentalem: quia formalis bonitas aut malitia actus internæ voluntatis desumitur ab actu externo, tanquam proximo obiecto suo. Posteriore verò consideratione, habet actus externus formalem bonitatem & malitiam; quamvis non vt intrinsecè ipsi inhærentem; sed tributam duntaxat per extrinsecam denominationem liberæ voluntatis, à qua imperatur. Quia, vt initio huius c. dixi, Actus humani interni per se primò ac formaliter boni sunt ac mali in genere moris, externi autem secundum analogiam seu attributionem extrinsecam. Videri potest Gabr. in 3. d. 23. q. 1. a. 1.

Corollarium II. Malitia fundamentalis actus exterioris prior est malitiæ actus interioris: sed malitia formalis eiusdem actus exterioris, posterior est malitiæ actus interioris: non quasi sint duæ malitiæ formales; sed vnica, quæ est in actu interno tanquam forma intrinsecè denominans, seu inhærens; in externo autem vt denominans extrinsecè. Et similia dici possunt de bonitate actus, v.g. dandi eleemosynam.

Corollarium III. Actus internus & actus externus in genere moris non faciunt numerum: Vnicum, v.g. est peccatum furti, cuius formale atque essentiale est furandi propositum atque voluntas; materiale est externa actio. Quare sufficit in Confessione explicare actum externum, v.g. te furatum esse mille: quo ipso etiam indicatur internum propositum siue voluntas, à qua malitia siue ratio peccati in actum externum, tanquam forma in subiectu, deriuatur. Non autem sufficit ei, qui actum internum, siue propositum peccandi opere externo compleuit, solum internum actum explicare. Et si enim is omnem formale atque essentialem seu bonitatem seu malitiam in se ipso contineat; tamen per actum externum materialiter perficitur, ac velut extenditur: vt proinde actus internus sine externo quodammodo imperfectus existat, quippe proximum finem suum non assecutus. Vide Durand. 2. d. 42. q. 1. S. Bonau. ibid. a. 1. q. 1. & 2. Nau. in c. magna, d. 1. de pœnit. n. 11. & seqq. Medinam 1. 2. q. 18. a. 2. Becanum tr. 2. c. 5. q. 7.

Corollarium IV. Et si actus internus efficax voluntatis bene vel malè agendi, opere non completus, quia deerat opportunitas vel facultas perficiendi, alio quin certissimò perficiendus; æqualem bonitatem vel malitiam essentialē habet; & perinde laudem vel vituperationem, præmium vel pœnam essentialē coram Deo meretur, ac si opere completus esset; (Nam voluntas profecto reputatur, ubi factum excludit necessitas, ait S. Bern. Epist. 77. ad Hugonē de sancto Victore) quia tamen internus actus externo perficitur & consumatur, ideo eius bonitas vel malitia extensiuè ac materialiter augetur: qua de re Gabr. in 2. d. 42. q. vn. Nau. in cit. c. magna, d. 18. & c. si cui. §. item, n. 2. ead. d. 1. Quæ ipsa causa est, cur, v.g. Martyrium in voluntatis proposito efficaci, parem quidem apud Deum laudem gloriamque essentialē mereatur, ac si re ipsa consummaretur: non tamen accidentalē gloriæ laureolam, Martyribus propriam, consequatur. Qua de re S. Th. in 4. d. 49. q. 5. a. 1. & 4. S. Bonau. in 2. d. 40. a. 2. q. 1. & d. 42. a. 2. q. 2. Rich. ead. q. 40. a. 1. q. 3. & 4.

CAP.



## CAP. VIII.

De humanarum actionum circumstantijs  
in communi.

## SVMMARIVM.

1. *Circumstantie sunt particulares humanarum actionum in genere moris accidentales conditiones. Earum duo sunt genera: quaedam accidentaliter tantum aggrauantes, vel minuentes: quaedam vero nouam speciem afferentes.*
2. *Circumstantia afferentes nouam speciem subdiuiduntur, quod quaedam actioni retinenti propriam speciem ex obiecto, alteram adiungunt: quaedam speciem actionis mutant, sine ad aliam transferunt.*
3. *Omnis actio moralis ac libera in individuo vel bona, vel mala est, & nulla indifferens.*

1. **C**ircumstantias vocat S. Th. q. 7. a. 1. particulares humanarum actionum in genere moris conditiones, siue accidentales affectiones. Earum duo sunt genera, auctore eod. S. Th. q. 18. a. 11. Quedam enim actionis bonitatem vel malitiam intra eandem specie augent vel minuunt: quamobrem dici solent aggrauantes, vel minuentes: Huius generis est, v. g. actionis vehementia vel remissio; mora longa, aut brevis. Melior enim est dolor de peccatis intentus, quam remissus; qui horam durat, quam qui horę quadrantem. Alię vero circumstantię peculiarem bonitatis vel malitię speciem actioni adferunt, ob specialem quam agerunt habitudinem conformitatis vel diffinitatis ad rationalem naturam. Vt si quis in loco sacro fureretur vel coniugij opus exerceat.

2. Porro alterum hoc circumstantiarum genus, nouam speciem afferentium, siue, vt alij loquuntur actionem ad nouam speciem transferentium, subdiuidi debet. Nam alię sunt, quę nouam bonitatis vel malitię speciem adferunt actioni, retinenti propriam speciem, quam habet essentialem ex obiecto: veluti, si eleemosynam des, Deo satisfaciendi causa pro peccatis tuis, erit hæc actio in duplici specie virtutis, videl. misericordię, ac pœnitentię. Item, si fureris in loco sacro, spectabit hæc actio & ad speciem peccati iniustitię, & sacrilegij. Alię vero circumstantię sunt, quę mutant speciem actionis moralis, propriam ipsius bonitatem destruendo, & ad speciem malitię transferendo: v. g. si eleemosynam pauperi des, vanę glorię causā; mutatur opus virtutis misericordię in opus vitiosum inanis glorię. Item, si coniugi in loco sacro debitum reddas, mutatur opus iustitię in sacrilegium. Vide Med. q. 18. a. 3.

Obijcies: Circumstantia, cum sit quoddam accidens, supponit actionem in propria specie persistentem, non destructam. Nam accidens est quod abest & adest sine subiecti euerfione. Resp. ex doctrina, quam indicat S. Th. 1. 2. q. 18. a. 9. in corp. & a. 10. ad 1. & 2. & tradit Alex. Alensis in p. 4. q. 77. memb. 3. a. 2. §. 2. Nau. c. consideret. n. 3. d. 5. de pœnitentia: Actio moralis dupliciter considerari potest: vel secundum absolutam & specificam rationem, quam ex obiecto habet, præcisè circumstantijs: vel secundum rationem indiuidualem, quam re ipsa habet, spectatis omnibus circumstantijs, tanquam indiuiduantibus conditionibus. Dico igitur: Licet locus sacer, v. g. sit proprię dictę circumstantiæ actus coniugalıs, quatenus is spectatur secundum obiectum præcisè specificans: non tamen est proprię circumstantiæ, sed transit in rationem obiecti, tribuentis actioni internę (consequenter etiam externę) primam & vnicam essentialem speciem malitię: quatenus actio spectatur secundum rationem indiuidualem, quā non ex obiecto præcisè, sed etiam annexis circumstantijs accipit. Eodemque recidit responsio Medinę q. 18. a. 6. in fine. Quod dici solet, circumstantiam, v. g. loci sacri, mu-

tare actum de bono in malum, non ita intelligendum esse, quasi actus antè bonus fuerit & in specie virtutis: per circumstantiam verò transmutatus in speciem vitij: sed quod esset bonus & in specie virtutis, nisi prauā illā circumstantiā inficeretur.

Ad extremum notanda est doctrina S. Aug. l. 2. de peccatorum meritis & remiss. c. 18. quam sequitur S. Th. 1. 2. q. 18. a. 9. Rich. in 2. d. 40. a. 2. q. 3. Dur. q. 1. Capreol. q. 1. a. 1. conclus. 2. Albert. Magnus a. 4. contra Alensem 3. p. q. 35. mem. 3. Scot. in 2. d. 41. q. vnic. Gabr. q. 1. a. 2. Vasq. 1. 2. dis. 52. Omnes actiones humanas, quę secundum speciem ex obiecto præcisè considerato, indifferentes sunt, per circumstantias, præsertim finem, moraliter bonas, vel malas existere: ac proinde nullam esse actionem moralem ac liberam, quę in individuo indifferens sit. Probatur. Omnis actio ex obiecto indifferens, v. g. festucam humo leuare, si humano modo ac deliberatè fiat, ob finem aliquę necessariò fit: quę relatio ad finem, si recta atque rationi conformis, puta si festucam tollas; vt cubiculi mundities, corporis atque animę munditiem tibi conciliet: bona & honesta est talis actio. Sin autem relatio ad finem rationi conformis non sit: vel quia ad finem malum refertur, vel quia ad nullum finem bonum refertur: sed festucam, v. g. humo tollis, solum vt imaginationi, vel libertatis exercendę appetitui satisfacias: tunc non minus otiosam ac vanam (quippe sine debito destitutam) actio nem exerceas, quā si otiosum verbum proferas, id est tale, quod & ratione iuste necessitatis, & intentione pie utilitatis caret, sicut post Origen homil. 1. in Psalm. 38. Basil. in reg. breuioribus, interrog. 23. Hieronym. in c. Matt. 12. definit S. Grego. 7. moral. c. 25. & 3. p. pastoralis, admonit. 15. & homil. 6. in Euang. Vel vt S. Bernard. sermon. de triplici custodia ait, *Otiosum verbum est, quod nullam rationabilem causam habet.* Verbum autem otiosum peccatum esse, significat Dominus apud S. Matth. c. 12. *Disco autem vobis, quoniam omne verbum otiosum, quod locutus fuerint homines, reddent de eo rationem in nouissimo die.* Ergo similiter peccatum est, aliam quamuis otiosam, nullòque rationabili fine cohonestatam actionem exercere.

Pro solutione argumentorum contrarię sententię, quę proponit Vasq. l. c. duo aduertenda sunt: I. Cum dicitur, quasdam actiones, secundum speciem ab obiecto, indifferentes esse: negatiuè explicari debet, vt sensus sit: Ex obiecto, secundum se ac præcisè spectato, nec bonitatem nec malitiam moralem habere: sed solum ex circumstantijs, præsertim fine: quomodo etiam Dialectici dicere solent, Naturam humanam præcisè spectatam, indifferentem seu communem esse: quia secundum se non est determinata: sed per indiuiduantes conditiones. Ita notat Durandus in 2. d. 40. quęst. 1. II. Ad hominis officium spectat corpus suum, eiusque commoda referre ad virtutis studium, animę salutem, Deique honorem: quod vbi homo præstiterit, quę deinde agit corporis causa, (v. g. cum frigoris pellendi causa manus confricat) moraliter bona & honesta censentur: si vel actu vel virtute ad dictum finem honestum referantur: cum corporis conseruatio sit fundamentum exercitij virtutum. Ita respondet S. Th. q. 18. a. 9. ad 3.

Cæterum tract. seq. in fine cap. 5. dicturus sum, hominem sæpe multas actiones exercere, solum ex motiuo temporali alicuius commoditatis, vel utilitatis: nihil omnino aduertentem, aut cogitantem de alio superiore fine honestatis: ad quem naturalem vel temporalem actionem referre debeat. Tunc autem accidit, vt actio moraliter nec bona nec mala sit: quia non fit secundum deliberationem rationis superioris, attendentis ad honestatem, vel inhonestatem: sine qua deliberatione moralis bonitas vel malitia non consistit.



## CAP. IX.

## De circumstantijs in particulari.

## S V M M A R I V M.

- 1 Circumstantia humanarum actionum septem numerantur.
- 2 Peccata tanto grauiora sunt, quanto sanctior aut sublimior persona, quae peccat, si cum plena deliberatione agat. Grauior est iniuria, quae fit homini innocenti, sancto.
- 3 Peccata externa in loco sacro commissa continent peccatum irreverentiae, plerumque veniale: tunc autem mortale, si actus valde turpis sit, vel ab Ecclesia specialiter prohibitus ob reverentiam loci sacri: ut fornicatio, furtum.
- 4 Finis extrinsecus, licet respectu operantis principale obiectum sit, est tamen accidentalis circumstantia operis, quod ob eum finem exercetur: puta, si quis furetur causa fornicandi: vel ieiunet causa satisfaciendi pro peccatis suis.
- 5 Septem potissimum modis contingit, ut actio ex operantis arbitrio ad finem extrinsecum referatur.
- 6 Quotiescunque intentio prava, etiam electio prava est.
- 7 Quotiescunque electio prava, etiam intentio prava est.
- 8 Qui pravam medium eligit ob pravam finem duo peccata committit: Veruntamen actus impudicos, qui ordinariè coniuncti esse solent, non est necesse in Confessione explicare explicatum principali actu fornicationis.
- 9 Peccata commissa in die festo non continent speciem irreverentiae, nisi fiant ex directa intentione inhonorandi sacrum tempus.

1 Septem circumstantias numerat S. Tho. q. 7. a. 3. ex Cicerone in Rhetoricis: Quis, quid, ubi, quibus auxilijs, cur, quomodo, quando.

Circumstantia *Quis*, significat conditionem siue qualitatem personae operantis: & actui malo saepe novam malitiae speciem confert: veluti si coniugatus fornicetur, non solum contra temperantiam, sed etiam contra iustitiam peccat: si verò persona voto castitatis obstricta, etiam contra virtutem religionis peccato sacrilegij; si persona publica v.g. Praelatus, Parochus subditis indigentibus operare negligat, non solum contra misericordiam, sed etiam iustitiam delinquit.

2 Interdum verò circumstantia haec intra eandem speciem operis malitiam auget: quod pertinet personae sanctitas, sublimitas. Nam grauius, ceteris paribus, est peccatum hominis fidelis, quam infidelis: Deo accepti, quam non accepti: docti, quam indocti: Episc. Religiosi, Clerici, quam secularis, aut laici: eius qui singularibus beneficijs à Deo donatus est, quam alterius. Quare S. Greg. ait hom. 9. in Euang. Cum, augentur dona, rationes etiam crescunt donorum. Et Isidorus l. 2. de summo bono, c. 19. Tanto maius cognoscitur peccatum esse, quanto maior, qui peccat, habetur. Hinc Sapiens c. 6. dixit: Potentes potenter tormenta patientur. Vide S. Tho. 1. 2. q. 73. a. 1. Vbi rectè admonet, id intelligendum esse de peccatis, quae cum deliberatione perfecta committuntur; non item de peccatis ex fragilitate, aut subreptione: haec enim in viris sanctis (qui desiderium ac media peccatorum vitandorum adhibent) minus deliberata, adeoque leuiora esse solent. Vide eundem in 2. 2. q. 186. a. 10. Nau. in c. consideret. §. ingratus, d. 5. de poenit. Grauior quoque est relapsus in peccatum mortale, quod saepius eius remissionem homo à Deo consecutus fuerat, convenienter S. Petro Epist. 2. c. 2. Est enim haec circumstantia ingratitude intra eandem speciem peccatum aggrauans, non novam malitiam conferens; nisi quis formali & expressa intentione vilipendendi beneficium, vel benefactorem delinquat, sicuti explicat S. Thom. 3. p. q. 88. art. 3.

Eadem circumstantia personae interdum actui bono abiicit novam speciem: siue virtutis iustitiae: veluti si Parochus ex officio populum erudiat, sacramenta administret; siue virtutis religionis, si voto obstrictus ieiunium, vel continentiam seruet. Interdum intra eandem speciem actionis bonitatem auget: ut si vir doctrinā excellens alijs

se ob humilitatem postponat, vel subijciat: si pauper elemosynam det, &c.

Circumstantia *Quid*, aliàs *circa quid*, significat conditionem aut qualitatem materiae siue obiecti, circa quod actio versatur. Sepe actui malo confert novam malitiae speciem; ut in genere iniustitiae, si accedas ad uxorem alienam: vel in genere impietatis contra parentes, aliosque consanguineos, affines, ut videre est in incestu, parricidio, fratricidio; vel in genere sacrilegij, ut in furto rei sacrae, fornicatione cum persona religiosa; percussione Clerici. Interdum intra eandem speciem actionis malitiam auget: ut si iniuriam inferas homini innocenti, sancto, iuxta illud. Zac. 2. Qui vos tetigerit, tanget pupillam oculi mei: & prosequitur S. Thomam cit. quaest. 73. art. 9. Eadem circumstantia interdum actui bono novam speciem addit: ut si pauperi sacerdoti elemosynam largiaris, erit is actus in duplici specie virtutis, nempe misericordiae & religionis: dummodo utriusque virtutis honestatem animo intendas. Interdum verò intra eandem speciem actionis bonitatem auget: ut si viduis, pupillis, peregrinis; &c. humanitatis, ac liberalitatis officia praestas.

Circumstantia *Ubi* raro intra eandem speciem notabiliter peccatum aggrauat: nisi fortè in materia iniustitiae, si coram pluribus alicuius famae detrahas: vel contumeliam inferas: saepius verò novam malitiae speciem adfert; ut videre est in furto, fornicatione admissa in loco sacro. Quae tamen in re dubitari solet, utrum id ex iure naturali & diuino; an solum ecclesiastica prohibitionem proveniat; Placet mihi sententia Medinae Cod. de confess. tr. 2. q. 9. Suar. to. 1. de relig. lib. 3. de reuerentia debita locis sacris, c. 7. Peccata externa ex natura sua inferre aliquam irreuerentiam locis, quae ab Ecclesia ad sacros tantum usus destinata sunt; & quidem tantò maiorem, quanto magis, secundum prudentis viri iudicium; actus malus sapienter loci repugnare videtur: ita tamen, ut (seclusa Ecclesiastica prohibitionem, qualis interuenit, v. g. in furto sacrilego) ratio sit censenda irreuerentia & culpa mortalis contra religionis virtutem, peccatum in loco sacro committere, etiam externum v. g. detractionis, turpilis: praeterquam si actus valde foedus ac turpis sit: exempli causa impudicos tactus in partibus verendis exercere, quavis sine pollutione: eiusmodi non videtur posse excusari à sacrilegio mortali, contra ius naturale: Ideoque in tali casu circumstantia loci sacri in sacra Confessione explicanda est, sicuti docet etiam Rodriq. t. 1. sum. c. 270. concl. 1. Licet contrarium sentiant Caiet. t. 1. opus. tr. 31. resp. 12. dub. 2. Nau. c. consideret, n. 20. d. 5. de poen. Sanch. l. 9. disp. 15. ubi aiunt, Peccata in templo admissa non habere circumstantiam sacrilegij in Confessione necessario explicandam, nisi directè repugnent vrbibus illis, ad quos locus sanctificatus est. Denique interdum peccatum in loco publico, vel in praesentia aliorum commissum, peculiarem scandalisationem continet.

Circumstantia *Quibus auxilijs*, partim significat propria dicta instrumenta, quorum adminiculo homo ad peccandum utitur. Ut si armorum genere ad laedendum vel cruciandum exquisito, aut speciali lege prohibito alterum aggrediatur. Partim significat alios homines, iussu vel consilio ad criminis societatem sollicitatos: unde peculiaris species malitiae contrahitur vel scandali, vel eius peccati ad quod socius pellicitur: de qua re suo loco. Videri potest Suarez t. 4. disp. 22. §. 4. Azor t. 1. l. 2. c. 4. circumst. 4.

Sequitur circumstantia *propter quid*, siue finis, quam circumstantiarum praecipuam esse, testatur S. Th. q. 7. art. 4. Nam finis est praecipuum motuum voluntatis; quare obrem dixit Arist. §. Eth. c. 2. consentiente S. Th. q. 18. a. 6. Eum qui furatus adulterandi causa; magis adulterum quam furem esse. Nam id magis tale est, propter quod unumquodque tale est, ait Arist. 1. poster. c. 2. Furtum autem huic homini voluntarium est propter adulterium: ergo adulterium magis voluntarium. Ceterum idem finis, licet



licet in operantis intentione principale obiectum sit, ideoque actui interno speciem malitiae conferens; est tamen accidens siue circumstantia ipsius peccati furti, quod propriam substantialem malitiam ab obiecto suo, videl. rei alien. contrectatione, accipiens, ad adulterium accidentaliter, quippe operantis arbitratu, non suapte natura refertur.

Vbi notandum, quod duplex est finis actionis: Vnus ipsiusmet operis, qui finis obiecto intrinsecus ac veluti imbibitus est; ideoque operi seu actioni moralem speciem siue essentiam tribuit: veluti si pauperi eleemosynam des corporalis miseriae subleuandae causa; finis iste actioni propriam speciem confert, vt sit opus virtutis corporalis misericordiae. Alter est finis operantis, qui & extrinsecus dicitur; quem nimirum operans suo arbitratu praestitit: veluti, si eleemosynam des causa vanam gloriam captandi; vel pro peccatis satisfaciendi. Atque hunc posteriorem finem dico esse, accidentalem circumstantiam, afferentem actui (qui ex obiecto suo, siue intrinseco bonus vel malus est) nouam bonitatis vel malitiae speciem. Vide Medin. q. 18. a. 4. ad 4. & a. 11. reg. 3.

5 Porro septem potissimum modis contingere potest, vt actio ex operantis arbitratu, ad finem extrinsecum, tanquam circumstantiam moraliter afficientem, referatur. Vel enim actus ex obiecto bonus, refertur ad finem extrinsecum bonum: vt dare eleemosynam, gratia satisfaciendi pro peccatis. Vel actus ex obiecto bonus, refertur ad finem malum: vt dare eleemosynam ob vanam gloriam. Vel actus ex obiecto bonus, refertur ad finem indifferentein; vt si ieiunes solum gratia parcendi sumptibus. Vel actus ex obiecto indifferens refertur ad finem bonum: vt iter facere religionis causa. Vel actus ex obiecto indifferens refertur ad finem malum: vt ambulare ad fornicandum. Vel actus ex obiecto malus, refertur ad finem bonum: v. g. furari vt eleemosynam dare possis. Vel actus ex obiecto malus, refertur ad finem malum; vt furari fornicandi causa.

Primo casu, circumstantia finis boni nouam bonitatis speciem addit actioni ex obiecto bonae. Quare duarum virtutum, poenitentiae scil. ac misericordiae, opus exercet, qui eleemosynam dat, vt Deo pro peccatis satisficiat: quarum illa actio a Theologis dicitur imperata; haec imperans, vt supra dixi cap. 2. n. 8. & videri potest libellus, qui inscribitur praxis bonarum intentionum, §. 2. Ad hoc tamen, vt actus tam ex obiecto, quam ex fine extrinseco bonus, in duplici specie virtutis ac honestatis existat; requiritur, vt voluntas etiam ipsam bonitatem seu honestatem proximi obiecti per se eligat: Quod fieri solet, quando ea etiam secundum se conducentis est ad bonitatem seu honestatem finis; principaliter intenti, sicut in supra posito exemplo videre est, & notauit Becanus 1. 2. tr. 1. c. 4. q. 3. concl. 2. q. 1.

6 Secundo casu, circumstantia finis mali omnino destruit & efficit actum, qui ex obiecto bonus esset, simpliciter malum. Quare non tam habet rationem circumstantiae, quam obiecti, tribuentis actui morali primam & vnicam malitiae speciem: v. g. si eleemosynam des ob vanam gloriam, non actum virtutis misericordiae; sed vitiosum actum vanae gloriae exerces. Hinc dici solet: *Quotiescunque intentio praua est, etiam electio praua est: siue, prauitas intentionis deprauat etiam electionem.* Qua de re S. Gregor. lib. 28. moral. c. 6. S. Tho. q. 18. a. 6. ad 2. & q. 19. a. 2. ad 2. S. Bonau. in 2. d. 40. a. 1. q. 1. Gab. q. vn. a. 2. Azor to. 1. l. 2. c. 5. q. 6.

Tertio casu, totus actus ex obiecto indifferens est; quippe cum finis, in quo actus in moralibus dependet, indifferens sit, vti notauit Sanch. l. 4. moral. c. 7. n. 25.

Quarto casu, circumstantia finis boni tribuit actui ex obiecto indifferenti primam & vnicam essentialem bonitatis speciem; ideoque in genere moris non circumstantiae proprietatem, sed obiecti rationem habet. Quare pe-

regnativov, g. religionis causa, opus est virtutis religionis. Vide S. Greg. cit. c. 6. non longe à fine, vbi explicat locum Matt. 6. *Si oculus tuus fuerit simplex, totum corpus lucidum erit.* Medinam 1. 2. q. 19. in fine a. 3. Vasq. d. 53. c. 2. n. 9. Becanum 1. 2. tr. 1. c. 4. q. 3.

Quinto casu, circumstantia finis mali confert actui ex obiecto indifferenti primam & vnicam essentialem speciem malitiae; ideoque in genere moris amittit proprietatem circumstantiae, & solius obiecti rationem acquirit. Hinc ambulatio fornicandi causa opus intemperantiae est. Vide S. Th. q. 18. a. 5. ad 4. Ioan. Gerson. p. 2. operum, vbi de intentione & fine actionis.

Sexto casu, circumstantia finis boni nihil confert actui ex obiecto malo; sed relinquit simpliciter & vndequeque malum: v. g. qui furatur vt det eleemosynam, is actum sub genere iniustitiae malum: non item sub genere misericordiae bonum exercet. Nam species quaedam furti est, ex alieno liberalem esse: quare Eccles. c. 34. *Immolantis ex iniquo oblatio est maculata.* Et S. Aug. in Enchir. c. 22. exinde ostendit, mentiri vt alicui prodis, esse peccatum; sicut & furari à diuite, vt pauperi possis dare. Item docet l. contra mendacium, c. 7. vbi etiam generatim ait; *Ea, quae constat esse peccata, nullo bona causa obtentu, nullo quasi bono siue, nulla veluti bona intentione facienda sunt.* Et Apostolus ipse rejicit illam sententiam, ad Rom. 3. *Faciamus mala, vt eueniamus bona.* Hinc dici solet: *Quotiescunque electio praua, etiam intentio praua est: Siue Prauitas electionis deprauat quoque intentionem.* Ratio peti debet ex discrimine inter bonum ac malum morale; quia, vt S. Dion. ait c. 4. de diuinis nominibus, *Bonum ex integra causa est: malum ex quouis defectu.* Sensus, est: Vt actio moraliter bona existat, necesse est tum obiectum, tum finem, & ceteras circumstantias bona esse, & rationi consentanea: v. g. vt corporis resectio opus virtutis temperantiae sit, necesse est & mediocrem cibi, potusve sumptionem existere, ac debito fine, loco, tempore modo fieri. Quod si eorum vnum solum deficiat, v. g. si comedas medio foro, aut in templo: vel vt alacrior fias ad iniuriam: etsi alia omnia adhibeas, quae secundum rationis praescriptum resectioni moderata necessaria sunt, non erit opus bonum virtutis, sed vitiosum ac malum. Ita S. Th. q. 18. a. 1. 3. & 11. videri etiam potest Durand. n. 2. d. 38. q. 1. n. 8.

Septimo casu, circumstantia finis mali confert actui ex obiecto malo nouam malitiam: eamque vel specie distinctam, si finis ille prauus ordinem repugnantiae cum recta ratione specificiter diuersum habeat: vt videre est in futo fornicationis causa: vel solo numero distinctam, si prauitas finis eiusdem rationis sit cum prauo medio, sicut videre est in furante instrumenta, quibus vti possit ad furandas pecunias: hic enim duo peccata contra iustitiam solo numero distincta committit. Excipe, nisi media eiusdem speciei malitiam continentia, cum malo fine per se ac ordinarie coniuncta esse soleant: tunc vnà cum fine eandem numero malitiam contrahunt. Exemplum habes in impudicis actibus, qui per se ad fornicationem referuntur: eaque ordinariè praecedunt, tanquam dispositiones, inchoationes, vt proinde explicato in Confessione actu principali fornicationis, necesse non sit explicare antecedentes actus accessorios, qui fuerint veluti viae, ac media, teste Suar. 3. p. t. 4. disp. 22. §. 5. n. 26. Imò Nauar. c. 6. man. n. 17. & in c. consideret, n. 48. d. 5. de poenit. idem censet de impudicis actibus fornicationem consequentibus. Nam licet haec secundum se mortalia peccata sint, numero distincta ab antecedente fornicatione; quippe ad quam referri amplius non possunt, tanquam media & via; (sicut rectè lo. cit. Suarez notauit), moraliter tamen illi coherent, tanquam accessoria, vt facile intelligi soleant: profecto difficile, & vix decenter explicari, aut à Confessario inquiri possint.

Sequitur circumstantia quomodo, quae modum actionis significat, & interdum actui malo nouam malitiae speciem confert: vt videre est in rapina siue furto violento:



item in stupro violento; homicidio cum sauitia, aut sauitate: vt si in cadauer hominis à te occisi sauias, in frustra feces. de quo S. Th. 2. 2. q. 159. a. 2. denique in omni peccato, facto ex formali legis contemptu, siue directa non obediendi intentione, de quo tract. seq. Interdum verò intra eandem speciem operis malitiam augeat, vel minuit. Huc pertinet, vtrum peccatum commissum sit ex scientia ac mera malitia; an ex passione; an ex culpabili ignorantia: num voluntate plenè determinata; an verò ex metu, suasionem, precibus.

2. Circumstantia *Quando*, si sumatur pro temporis mora, qua actio durat, eius bonitatem vel malitiam accidentaliter augeat. Alioquin verò temporis circumstantia, vt quòd Dominico, vel festo die eleemosynam dederis, ebrius fueris, vel fornicatus; non reddit actionem moraliter meliorem, deterioreme; multo minùs nouam speciem addit, per se loquendo, iuxta probabiliorem sententiam Syl. ver. confessio, 1. q. 10. Caiet. to. 1. opusc. tract. 18. q. 3. Nau. in man. c. 6. n. 11. & in c. consideret, n. 22. d. 5. de pœnit. Suar. to. 4. disp. 22. f. 4. n. 21. contra Adrianum in 4. de confess. q. 4. §. Venio nunc. S. Anton. 3. p. tit. 17. c. 17. §. 5. Medin. Cod. de confess. tract. 2. q. 9. Lessium lib. 2. cap. 45. dub. 4. Nisi actio fiat cum directa intentione honorandi vel inhonorandi sacrum tempus. Siquidem hoc discrimen est inter locum sacrum, & tempus sacrum; quòd locus, tanquam res permanens, consecrationis moralis sanctitatis capax sit: cui proinde exterioris ac sensibilis prauis operis exercitium secundum rectam rationem repugnat: tempus autem, res transiens, non ita secundum se capax est consecrationis, moralis sanctitatis: sed dicitur sanctum per accidens, ratione sanctarum operationum, quæ in eo fieri solent, ac debent.

## CAP. X.

## Quænam peccatorum circumstantiæ in confessione necessario explicandæ sint?

## S V M M A R I V M.

1. Circumstantia omnes mortales, quæ speciem mutant, vel nouam speciem adferunt, in confessione explicari debent.
2. Circumstantias, quæ intra eandem speciem, peccati grauitatem notabiliter augent, explicandas non esse, est communior DD. sententia.

Excipienda tamen hinc est circumstantia quid, seu circa quid, si attingat quantitatem, ac veluti integritatem obiecti substantialis: v. g. quòd decem millia furatus sis; quòd incestum in primo consanguinitatis gradu commiseris; quòd totam domum familiam, tanto hominum numero constantem, occidere proposueris.

4. Circumstantia relapsus non est necessario explicanda. Neque circumstantia duplicis precepti; si v. g. Violasti ieiunium vigilia cadentis in quatuor tempora.

Neque circumstantia Violati duplicis voti castitatis; puta si religiosus idemque sacerdos fornicatus sit, debet dicere se Religiosum esse: sed non est necesse explicare circumstantiam sacri ordinis.

3. Circumstantia peccati minuentes ea tantum explicare debent, quæ peccati malitiam vel omnino tollunt, vel ex mortali faciunt veniale.

1. **C**onsentiunt Doctores, circumstantias omnes mortales, quæ speciem peccati mutant, vel nouam speciem adferunt, in confessione explicandas esse: v. g. quòd calicem sacrum furatus sis; cum persona sacra fornicatus: idque expresse definit Trident. Concil. sess. 14. cap. 5. & can. 7. Cum enim ad integritatem confessionis pertineat omnem mortalem malitiam explicare; sequitur etiam circumstantias quæ propriam in se malitiam, siue speciem peccati mortalem continent, Sacerdoti explicandas esse.

2. De circumstantiis verò, quæ intra eandem speciem, peccati mortalis grauitatem notabiliter augent, dissentiunt Doctores, vtrum non solum ex consilio, sed etiam ex præ-

cepti necessitate explicandæ sint? Communior sententia negat, S. Th. in 4. d. 16. q. 3. a. 2. q. 5. Durandus q. 4. Palud. q. 3. a. 3. S. Bonau. d. 17. p. 3. a. 2. q. 3. Richar. ibid. a. 3. q. 5. S. Anton. p. 3. tit. 14. c. 19. §. 7. & tit. 17. c. 17. §. 5. Adrian. in 4. q. 4. de confess. a. 2. Syl. ver. confessio, 1. q. 9. Nau. cap. 6. man. n. 6. & c. consideret, n. 6. d. 5. de pœnit. Couar. in 4. decr. p. 1. cap. 1. n. 18. Med. C. de confess. tr. 2. q. 7. Philarchus to. 1. lib. 2. cap. 22. Valent. q. 11. p. 1. Quibus fauere videtur Trident. Concil. cit. cap. 5. vbi enumerare instituens ea omnia, quæ ad integritatem confessionis requiruntur, opus esse inquit, circumstantias confiteri quæ speciem peccati mutant: vnde contrarius sensus colligi posse videtur, circumstantias, quæ peccati speciem non mutant, sed eandem tantum aggrauant, necessario confitendas non esse. Accedit ratio: Cum enim difficile sit discernere, quænam peccatorum mortalium circumstantiæ intra eandem speciem, multum, & quæ parum aggrauent; non modicam difficultatem, scrupulorumque materiam tam Confessario, quam pœnitenti ingerimus, si dicamus, circumstantias multum aggrauantes ad sacræ Confessionis integritatem pertinere, sicuti notauit Nau. ll. cc.

Contraria tamen sententia affirmans, circumstantias multum grauantibus explicandas esse, est Barthol. Medinæ in instruct. Confessar. lib. 1. c. 9. §. 1. Soti in 4. d. 18. q. 2. a. 4. Lopez p. 1. cap. 29. Cani relect. de pœnit. p. 5. Henriq. lib. 5. cap. 7. n. 6. Suar. to. 4. disp. 22. sect. 3. Fundamentum est; Peccata eo modo Sacerdoti per Confessionem explicanda sunt, vt is de illorum qualitate, ac grauitate iudicare, conuenientemque cum pœnam, tum medicinam præscribere possit, sicuti significatur in Concil. Trident. cit. cap. 5. & in Concilio Vormaciensi tempore Adriani II. & Ludouici Imper. II. can. 25. & in Concilio Trullano habito post VI. œcumenicum, can. ult. Id autem fieri non potest, nisi notabiliter aggrauantes peccatorum circumstantiæ exprimantur.

Circa hanc difficilem quæstionem dicendum mihi videtur primò, cum Henriq. lib. 5. cap. 7. n. 6. Ex circumstantiis intra eandem peccati speciem notabiliter aggrauantibus, necessario in Confessione explicanda est circumstantia *Quid*, siue *circa quid*, si attingat quantitatem, ac veluti integritatem substantialis obiecti. Declaratur exemplis: I. In quantitate furti: neque enim satis est confiteri notabilem pecunie summam te furatum esse; siue mortale peccatum furti commisisse: sed necesse est definire dicere, quantum furatus sis: num aureos mille, an centies mille sicuti bene docet P. Sotus de Confess. lect. 9. Valentia to. 2. disp. 6. q. 18. p. 2. licet contradicat Lucas Pinellus lib. 2. de pœnit. cap. 3. dub. 3. II. Qui malignum propositum habet plures homines, siue totam familiam domus supposito v. g. igne occidendi, is vnum numero peccatum committere videtur, teste Suar. disp. 22. f. 5. n. 34. Nau. cap. 6. n. 18. repugnante Azorio lib. 2. cap. 4. q. 2. §. Secunda circumstantia: tenetur tamen multitudinem hominum, quam occidere proposuit, in Confessione explicare. III. Si hominem graui vulnere affecisti, vel etiam mutilasti: si viro Principi, vel homini magnæ auctoritatis coram pluribus contumeliam intulisti: vt iniuria non leuis, sed atrox censeatur: Item si ab homine paupere pecuniam furatus es: arbitraris tales circumstantias in Confessione exprimendas esse: quia pertingunt ad notabilem grauitatem obiecti formalis, quod est iniustum damnum proximi. IV. Explicandum est in Confessione, vtrum ieiuniū violaris carnes comedendo: an sepius in die comedendo alios cibos: qui vtraque abstinencia ab Ecclesia præcipitur: & prior illi obseruari potest, non obseruata posteriore, vt sit tunc quasi semiieiunium: Ita docet Henriq. lib. 5. c. 5. n. 6. lit. l. Suar. cit. disp. 22. f. 3. n. 12. V. In peccato incestus necessario explicanda est circumstantia personæ, siue in primo, secundo, an tertio gradu consanguinitatis: tamen diuersitas eiusmodi circum-



circumstantiarum non adferat diuersitatem peccati specificam, sicuti testatur Caiet. 2. 2. q. 154. a. 9. Suar. tom. 4. disp. 22. sess. 3. num. 12. contra Nau. cap. 7. n. 4. & c. 16. n. 3. Ratio horum est. Quia circumstantia pertinet ad integritatem siue extensionem malitię substantialis est explicanda: cum alioquin non tota substantia peccati mortalis explicaretur: Sed gradus primus consanguinitatis, quantitas duorum millium furto oblatorum multitudo hominum occidendorum, & cetera, quę supra dixi, pertinent ad integritatem siue extensionem substantialis malitię horum peccatorum: Si quidem formalis ac specifica malitia incestus consistit in irreuerentia & impietate erga sanguine vel affinitate iunctos, iuxta illud Leuit. 18. *Mater tua est, non reuelabis turpitudinem eius.* Maior autem reuerentia debetur matri, v. g. quàm consobrinę: ergo formaliter siue substantialiter maius peccatum est incestus cum matre, quàm cum consobrina. Item formalis & substantialis malitia furti consistit in iniusto damno, & c. maius autem damnum per iniuriam infertur, si mille fureris, quàm si decem: item si ab homine paupere, quàm si a diuite. Confirmatur tradita doctrina ex S. Thom. cit. q. 7. a. 4. ubi ait, post circumstantiam finis, eam quę est *Quid*, seu *circa quid*, esse alijs principaliorē, quia attingit ipsam substantiam actus.

4 Dicendum est II. De reliquis aggrauantibus circumstantijs valde probabilis, & tuta est sententia, eas omitti posse: quamuis tunc certum non sit, vtrum notabiliter aggrauantes sint, quippe alijs Doctoribus id affirmantibus, alijs negantibus. Declaratur exemplis. I. Qui frequenter a Deo alicuius peccati remissionem consecutus, denuo lapsus est, non tenetur hanc relapsus circumstantiam confiteri, vti docet S. Th. in 4. d. 22. q. 1. a. 4. S. Bon. ibid. a. 1. q. 2. Adrianus in 4. de confess. ubi de remiss. peccatorum. q. vlt. Canus relect. 5. de pœnit. contra Alensem p. 4. q. 77. mem. 5. a. 4. Valent. to. 4. de sacram. pœnit. q. 5. p. 2. Henric. l. 5. c. 8. n. 1. quibus praxis Confessoriorum ferme repugnat. Ceterum et si circumstantia relapsus aggrauet, ob maiorem erga Deum ingratitudinem, vti colligitur ex S. Th. 3. p. q. 88. a. 3. & 4. non tamen certum est, vtrum notabiliter aggrauet: id enim negat Suar. l. c. Videri etiam possunt S. Thomas, & S. Bonau. cit. d. 22. vbi disputant contra eos, qui arbitrati sunt, ideo relapsus, imò etiam antecedentia dimissa peccata in confessione iteratò explicanda esse, quia eorum reatus redeat: quod falsum est.

II. Qui in vigilia Apostoli incidente in quadragesimam vel quatuor tempora, binam Ecclesiastici ieiunij legem violat: aut qui festo die, in Dominicam incidente, Missam negligit, is vnicam malitiam, (quamuis grauiorem) committit: quia vtraque lex sub eadem ratione seu motiuo Temperantię vel Religionis lata fuit. Quare communior est sententia, hanc circumstantiam duplicis violati præcepti in Confessione explicandam non esse. Eam tenet Henric. lib. 5. c. 5. n. 6. lit. f. Vasq. disp. 98. cap. 3. nu. 8. Azor. t. 1. lib. 4. c. 2. q. 6. Sanch. lib. 9. de matrim. disp.

15. n. 6. contra Nau. cap. 11. n. 4. & lib. 5. conf. 15. de Cler. excom. minist. edit. 2. Lopez p. 1. instruct. c. 29. §. tertio dico.

III. Si Religionem professus, idemque Sacerdos castitatis publicum votum violat, non duo sacrilegij peccata sed vnum (tamen si grauius) committit: eò quod duplicis voti obligatio ex eodem motiuo Religionis erga Deum concepta fuerit, sicuti notauit Azor cit. q. 6. Quare satisfacit, si in Confessione dicat, se Religionem professum esse, tacita circumstantia sacerdotij: secundum communiorē sentent. Lopez l. 1. instruct. cap. 29. (qui tamen negat illam circumstantiam esse multum aggrauantem) Henric. lib. 5. c. 5. n. 6. in comment. lit. g. Sanch. lib. 7. de matrim. disp. 27. q. vlt. n. 22. Medina in instruct. Confess. li. 1. cap. 14. §. 18. contra Egidium Coninck 2. 2. t. 2. disp. 20. dub. 13. n. 131. Non arbitror tamen talem satisfactorum si confiteatur se Sacerdotem esse, vel Diaconum, tacita circumstantia professionis. Cum enim professio in Religionē, propter Ecclesię constitutiones, sit solemnē & irrevocabilis traditio, ac veluti mors spiritualis, per quam ipsum etiam matrimonium ratum dissoluitur; apparet grauiorem obligationem erga Deum in se continere: qualem qui violat, is peccatum sacrilegij & infidelitatis erga Deum quasi substantialiter maius, (vtpote spirituale quoddam adulterium) committit; quàm si aliud castitatis votum violaret, sicuti bene notauit Henric. lo. cit. Barthol. Medina cit. §. 18. et si aliter Lopez, & Sanchez qui tamen n. 28. fatetur esse probabile, si Professus fornicetur, circumstantiam professionis explicandum esse: licet Sacerdos fornicans satisfaciat, si dicat se contra votum castitatis fornicatum, tacito sacro ordine. Quia *Monachi fornicatio multo grauior videtur*, inquit Sanchez, quàm Sacerdotis: siquidem Sacerdotis fornicatio extrinsecè tantum aggrauatur, propter sanctitatem & sublimitatem personę: at verò fornicatio Religiosi intrinsecè aggrauatur in ratione præuaricationis voti castitatis, quod in Religioso maius & arctius esse constat, quàm in Sacerdote. Quin imò arbitror contra Sanchez n. 34. quòd neque Religiosus Societatis Iesu, simplicia vota habens, in tali casu satisfaceret, si tantum fateretur se voto castitatis obstrictum: cum per illa vota fiat vera traditio: ideoque arctiorem obligationem contineant, quàm alia simplicia vota extra Religionem.

Denique quod attinet ad circumstantias minuentes, consentiunt DD. apud S. Bonau. in 4. d. 17. p. 3. a. 2. q. 3. Nau. c. 6. man. n. 5. illas solum necessariò in Confessione explicandas esse, quę peccati malitiam vel omnino tollunt, vel ex mortali faciunt veniale; v. g. si ignoranter quod malum est egisti: si ob tui defensionem hominem occidisti. Supposito enim, quòd tale homicidium Sacerdoti confiteri velis, nisi circumstantiam adicias, grauius illum decipies, existimantem te mortaliter peccasse occidendo, &c.



# TRACTATUS TERTIVS. DE PECCATIS IN COMMUNI.

## CAP. I. QVID SI PECCATVM.

### SUMMARIUM.

- 1 Peccatum aliud habituale dicitur: & aliud actuale.
- 2 Peccatum definitur: *dictum, factum, vel concupitum contra legem Dei eternam.*
- 3 Peccatum commissionis aliud non est, quam actus humanus malus.  
Malus autem actus est, quia non est conformis sue regulae, quae est lex Dei eterna, homini per lumen rationis manifesta.
- 4 Afirmatio & negatio reducuntur ad idem genus.  
Peccatum omissionis in eo consistit, quod homo non operans est, cum secundum legis praescriptum operari deberet.
- 5 Quaedam prohibita sunt, quia mala: quaedam vero mala sunt, quia prohibita.



Suppono, peccatum aliud esse actuale, & aliud habituale. Habituale dicitur, quod post actuale, per modum habitualis defectus, permanet, donec deleatur, & mūdetur. Verum de eo nobis sermo non est; sed solum de actuale.

- 2 S. Ioan. Ep. 1. c. 3. ait, quod peccatum sit *ἀνομία*, id est, transgressio siue prauiatio legis diuinæ. Et S. Ambr. in l. de Paradiso. c. 8. *Quid est enim peccatum, nisi prauiatio legis diuinæ, & celestium inobedientia praecceptorum?* S. August. vero lib. 22. contra Faustum, c. 27. eumque sequutus S. Thom. 1. 2. quæst. 71. art. 6. ita definiunt actuale peccatum; *dictum, factum, vel concupitum, contra legem Dei eternam.*

- 3 Circa hanc definitionem tria aduertenda sunt: Primum ex S. Th. in corp. cit. a. 6. Peccatum commissionis aliud non est, quam actus humanus malus: est autem actus humanus, quia voluntarius, & liber: malus vero est, quia caret debita commensuratione. Porro omnis commensuratio cuiusque rei s. ectatur per comparisonem ad suam regulam, a qua si res discedat, erit incommensurata. Regula autem humanæ voluntatis propinqua est ratio hominis; remoti vero, sed principalis, Dei mens ac voluntas, quæ est lex æterna homini per naturale lumen rationis manifesta, teste Apost. ad Rom. 2. *Opus legis scriptum in cordibus*, &c. Atque ideo S. August. in definitione peccati primo posuit, quod pertinet ad substantiam humani actus; & est quasi materiale in peccato commissionis, *dictum, factum, vel concupitum*: Secundo, quod pertinet ad rationem mali, & defectus; atque est quasi formale in peccato, *contra legem Dei eternam*. Etenim malitia peccati formaliter non est aliquid reale & positum; (quia alioquin Deus esset causa peccati, seu malitiæ moralis) sed est priuatio, seu defectus honestatis, quam homo operans seruare deberet ex legis praescripto; ut recte dictum sit à Davide psal. 4: *Et quid diligitis vanitatem (impij) & queritis mendacium?* Vide P. Sorum de instruct. sacr. p. 2. de peccatorum discret. lect. 6.

- 4 Alterum ex eo q. S. Th. resp. ad. 1. nihil obstat huic defini-

tionem, quod videatur comprehendere sola peccata commissionis & non omissionis: qualia sunt si omittas dicere, facere, &c. quæ oportebat. Nā affirmatio & negatio reducuntur ad idem genus, sicut constat etiam ex l. si mora, iun. Gl. ver. factum, ff. soluto matr. Quare per dictum in definitione S. Aug. intellige etiam, non dictum, per factum etiam non factum. Et sicut paulo ante dixi de peccato commissionis, esse actum liberè volitum & malum; ita de peccato omissionis dicendum est, esse omissionem actus liberam & malam: atque hanc malitiam formaliter consistere in dicta priuatione actus seu operationis, quam homo ex legis praescripto exercere deberet. Breuiter dici potest, Peccatum omissionis in eo consistere, quod homo non operans sit, cum secundum legis praecceptum operari deberet, peccatum autem commissionis in eo, quod homo operans sit, non sicuti ex legis praescripto operari deberet.

Tertium; Nihil obstat; sed magis fauet huic definitioni, quod D. D. aiunt cum Gl. in c. ex parte. 1. de offic. de leg. Quaedam esse prohibita, quia mala sunt: quaedam vero mala, quia prohibita sunt. Nam ex hoc dicto habetur, quod omne peccatum sit contra legem, seu praecceptum: quamuis cum discrimine. Quaedam enim per se & suapte natura mala, & inhonesta sunt, atque idcirco praecceptis diuinis, & interdum etiam humanis prohibita, ut perjurium, blasphemia. Quaedam vero per se mala, ac inhonesta non sunt: sed talia sunt per positivæ legis prohibitionem, ut festo die laborare: quamuis autem talis lex ab humano Magistratu posita sit, tamen eius transgressio etiam diuinæ æternæ legi consequenter repugnat. Qui enim resistit potestati, Dei ordinationi resistit, ad Rom. 13. siquidem Deus iubet, & ratio naturalis dicat legitimis superioribus, seu Potestatibus humanis obediendum esse: cum talis potestas à Deo sit. Vide S. Th. l. c. ad 4. Navar. prælud. 7. man. n. 12. Victoriam relect. de potestate ciuili, n. 15.

## CAP. II.

### De specifica vnitate ac distinctione peccatorum.

#### SUMMARIUM.

- 1 Vnitas & diuersitas peccatorum, quatenus praecceptis positivis repugnant, optime desumitur penes Vnitatem & diuersitatem formalem praecceptorum.
- 2 Vnitas & diuersitas specifica peccatorum, quæ & quatenus naturali lege aduersantur, proxime ac formaliter sumitur ex rectitudine virtutis oppositæ: remote ac fundamentaliter ex obiecto.
- 3 Plura sunt peccatorum, quam virtutum species: siue, Sive virtutis plura peccata opponi solent.
- 4 Inter peccata species diuersa, quod cui grauius sit, ex obiecto praecipue cognoscendum.  
Maiori virtutis maius vitium opponitur.

**A**sertio I. Vnitas & diuersitas specifica peccatorum, quatenus praecceptis positivis repugnant, optime desumitur penes vnitatem aut diuersitatem specificam praecceptorum.



ceptorum. Ita ex communi Vasq. disp. 98 cap. 2. Sanch. lib. 9. de matrim. disp. 15. num. 5. Porro specifica unitas & diuersitas præceptorum non debet attendi penes præcipientes: fieri enim potest, vt tam Dei, quàm humani Magistratus præcepto eadem res sub eadem ratione præcipiatur: aut prohibeatur: in quo casu transgressio horum præceptorum materialiter tantùm diuersorum, est vnum peccatum: non tantùm specie, sed etiam numero: v. g. furari, quod humana lege tanquam iniustum, prohibetur sub eadem ratione, qua etiam naturali & diuino iure: Sed considerari debet unitas aut diuersitas præceptorum formaliter: penes motiua honestatis; ita, vt si præcepta posita sint ex motiua diuersarum virtutum, vel saltem diuersarum rectitudinum eiusdem virtutis, tunc etiam transgressio seu peccatum in diuersa specie existat. Sic v. g. iniusta percussio clerici, quæ lege Ecclesiastica sub excommunicationis pœna prohibetur, non tantùm est peccatum contra iustitiam; sed etiam contra virtutem religionis, cuius intuitu lex illa Ecclesiastica posita est. Eademque ratio est de furto, quod fit in loco sacro; & speciali motiua religionis ab Ecclesia interdictum est. Sin verò ponamus, blasphemias in Deum in aliqua diocesi prohibitas esse sub excommunicationis pœna; transgressor præcepti vnum simplex peccatum committit contra religionis virtutem: quando quidem illud non alia ratione seu motiua ab Ecclesia prohibitum est, quàm iure naturali ac diuino antè prohibitum erat. Præterea, fornicatio in loco sacro duplicem malitiam mortalem habet; vnam contra castitatem ex naturali & diuino iure; alteram contra virtutem religionis: quia seminis voluntaria & illicita effusio seuerissimè ab Ecclesia prohibetur, ne in loco sacro fiat; adeo vt per eam pollui censeatur, si factum innotescat. de qua re vide Sanch. lib. 9. disp. 15. quæst. 1. Sin verò actus coniugalis extra necessitatis casum in Ecclesia exerceatur, vnicam culpam mortalem habebit, contra religionis virtutem. Ratio autem huius doctrinæ est; Quia legis latrix potestas hanc vim habet, vt id, quod iusta de causa præcipit, aut prohibet, materiam necessariam seu obligatoriam constituat sub ea virtute, cuius intuitu lex lata est.

2. Assertio II. Unitas & diuersitas specifica peccatorum, quæ & quatenus naturali legi aduersantur, proximè ac formaliter desumitur ex rectitudine seu honestate virtutis, cui opponuntur; remotè autem & fundamentaliter ex obiecto. Hæc est mens S. Thom. 1. p. q. 48. a. 1. & 1. 2. q. 72. a. 1. Assertio quoad posteriorem partem declarata fuit tract. præced. cap. 7. Prior autem pars probatur. Nam priuatio accipit speciem à forma, cui opponitur: peccatum autem seu malum morale formaliter est priuatio boni honesti, seu virtutis, teste S. Dionys. c. 4. de diu. nominibus, S. Aug. in enchirid. c. 11. & seqq. ergo peccatum suam speciem accipit penes bonum honestum virtutis, cui opponitur. Videri potest Duran. in 4. d. 16. q. 3.

Corollarium I. Illa peccata specificè diuersa sunt, quæ vel diuersis virtutibus aduersantur, vt furtum & blasphemia; vel quæ eidem virtuti, sed diuersa ratione diffinitatis repugnant, vt periurium & præuaricatio voti; item iudisse Deum, & Deum non amare, cum oportet: quorum illud est peccatum commissionis, hoc omissionis; atque haud dubiè specie differunt; cum diuersis modis contra virtutem charitatis erga Deum tendant, sicuti etiam indicat S. Thom. 2. 2. q. 79. a. 2. ad 3. Quamuis interdum omisso & commissio ad eandem speciem pertinere possunt, vt rapere alienum, & non restituere, quod voluit S. Th. 1. 2. q. 72. a. 6. & dicam lib. 3. tract. 2. de iustit. c. 2. n. 2.

3. Corollarium II. Plures sunt species peccatorum, quàm virtutum; siue, vt alijs verbis dicam, vni virtuti plures peccatorum species opponuntur; v. g. liberalitati auaritia, & prodigalitas. Ratio est, Quia bonum ex integra

causa est: malum ex quolibet defectu: v. g. vt actus, quo voluntas in Deum vel proximum fertur, charitatis existat, debet esse ex omni parte bonus: vt proinde bonitas mortalis aliud non sit, quàm perfectio, & integritas honestatis. Contra hanc autem honestatis perfectionem, seu virtutis integritatem varij repugnantes defectus committi possunt; v. g. Deum vel proximum odiendo, huic inuidendo.

Assertio III. Inter peccata specie diuersa, quæ quibus grauiora sint, ex obiecto etiam præcipuè cognoscendum est, vt docet S. Thom. q. 73. a. 4. Quare peccata, quæ in Deum directè tendunt, vt Dei odium, blasphemia, &c. omnium deterrima sunt. Inter peccata contra proximum, grauius est homicidium detractio, & furto: quia maius est bonum vitæ, quàm bona hominis externa. Addit verò idem S. Thom. cit. a. 4. Cum virtus & vitium circa idem obiectum versentur; (nam contraria circa idem sunt) consequens esse, quod maiori virtuti maius vitium opponatur: quamobrem odium Dei grauissimum peccatum est: & detractio peccatum grauius quàm ebrietatis: nam illud iustitiæ opponitur, hoc temperantiæ: maior autem & dignior est iustitiæ, quàm temperantiæ virtus. Interim tamen negari non potest, quin peccata, quæ sub genere intemperantiæ maxima sunt, vt sodomia, &c. grauiora sint peccatis, quæ sub genere iniustitiæ ex minoribus sunt, vt furtum, &c. Vide, si placeat, Maiorem in 4. d. 15. quæst. 24. concl. 5.

Porro, contra secundam assertionem obijcitur primò: Vnius formæ est vna priuatio opposita: ergo etiam vni virtuti vnum peccatum priuatiuè opponitur. Respondeo: Antecedens non esse verum in moralibus, quorum essentia consistit in conformitate & diffinitione cum substantia rationali: conformitas enim quamuis vna sit, tamen oppositæ diffinitiones ac discessus plures esse possunt: sic v. g. secundum artem conformiter agendi non tot modi sunt, quot agendi difformiter, atque errandi: vt viator sæpe vnicam viam habet ad propositam metam perueniendi: plures verò excedendi, seu errandi.

Obijcitur secundò: Si peccatum formaliter consistit in priuatione boni honesti, non rectè dictum videtur super. tractat. cap. 7. Quod malitia moralis siue peccatum formaliter sit indecentia, seu repugnantia cum natura rationali libera. Respondeo, hæc duo rectè coherere: Cum enim decentia, seu honestas virtutis formaliter non sit aliud, quàm congruentia cum rationali libera substantia; sequitur, quod eius priuatio, id est, indecentia, inhonestas, quæ est malitia moralis, aliud non sit, quàm repugnantia cum rationali libera substantia, vt ibi dictum fuit.

Obijcitur tertio: S. Ambros. & alij super. cap. allegati, definiunt peccatum esse transgressionem legis. Ergo hæc potius est formalis ratio peccatorum; & non quam hic assignamus, quod consistat in priuatione boni honesti, seu repugnantia cum rationali libera substantia. Respondeo; Has duas designationes inter se non pugnare. Verissimum enim est, quod omne peccatum sit transgressio legis, seu præcepti, vt sup. cap. explicauimus. Imò addi potest, specificam peccatorum, etiam eorum, quæ naturali iuri aduersantur, diuersitatem desumi posse ex diuersitate specifica præceptorum, sicuti docet Vasq. disp. 98. c. 2. Verùm hæc ratio definiendi ac distinguendi est potius à posteriore, quod attinet ad peccata contra legem naturalem: nam sicuti hæc non ideo peccata sunt, quia lege prohibentur; ita etiam non ideo specie differunt, quia diuersis legibus seu præceptis prohibentur: sed potius ideo verantur, & quidem præceptis specie diuersis, quia diuersam inhonestatem, indecentiam, seu repugnantiam cum rationali libera substantia gerunt. Maluit autem S. Aug. definire peccatum secundum aliquid nobis notius, quatenus est offensa contra Deum; quia talis consideratio quàm maxime etiam ad Theologum spectat, ait S. Thom. q. 71. a. 6. ad 5. Et hanc esse com-



munem Theologorum doctrinam, testatur Valsq. 1. 2. disp. 98. c. 3.

## CAP. III.

## De numerica distinctione peccatorum.

## S V M M A R I V M.

- 1 Peccata non ideo præcisè multiplicantur, quia sunt contra plura præcepta.
- 2 Si numerica distinctio obiecti materialis tantum sit, non facit plura numero peccata.
- 3 Peccata, quæ animo perficiuntur, ut hæresis, odium Dei vel proximi, sola interruptione ac repetitione multiplicantur. Sæpe tamen impossibile est, horum interiorum peccatorum numerum in Confessione explicare: quare sufficit moram temporis dicere, quo in tali peccato persististi.
- 4 Peccata, quæ externo opere perficiuntur, non censentur multiplicari per repetitionem propositi circa idem obiectum, quamdiu efficacitas propositi in libero aliquo affectu perdurat.
- 5 Qui eodem commotionis impetu alterum sapius percussit, vel repetita contumelia affecit, semel tantum peccasse censetur: secus, si per intervalla ad verberandum, vel conuiciandum accessit: aut si in eadem contentione diuersa rationis contumelias irrogauit.

1 **A**SSERTIO I. Peccata non ideo præcisè multiplicantur numero, quia sunt contra plura præcepta. Fieri enim potest, ut sub eadem formali ratione de eodem obiecto posita sunt, ut videre est in præceptis ieiunij incidentis in eundem diem quatuor temporum, & Vigiliæ Apostolorum, aut Quadragesimæ, sicut dixi super. tract. cap. vlt. Sin verò præcepta diuersis rationibus aut motiuis de eodem materiali obiecto posita sint, tunc eorum transgressiones erunt diuersæ speciei, consequenter etiam numero.

2 **A**SSERTIO II. Numerica distinctio obiecti, si tantum materialis sit, ut si vnico actu plures homines occidere intendas; non facit plura numero peccata, sicut dixi cit. cap. vlt. Secus, si obiecti multiplicatio sit formalis, siue in ordine ad actum; quia voluntas quasi pluribus actibus in obiectum tendit: ut si proponas hodie furaturum decem, & cras viginti; vel proponas nunc furari clauas, ut postea fureris pecunias. Cum enim actus internus essentialem ordinem gerat ad actum externum; ideo si externus siue obiectiuus vnitatem non habet, etiam actus internus virtualiter in genere moris multiplicatus censetur. Exinde etiam colligitur; si peccata externi operis circa materias paruas, v. g. parua furta maneant plura venialia; & non transeant in mortale, tunc etiam propositum circa talia peccata frequentanda, per se loquendo, non fore mortale; sed veniale virtute multiplex. Cuius regulæ ratio est; quia propositum internum peccandi accipit malitiam ab opere externo, tanquam proximo obiecto suo: ergo si actus externi repetiti circa materias paruas manent plura venialia, etiam propositum illorum erit veniale, virtualiter multiplex. Quando autem hoc ipsum accidat, ut transgressiones repetitæ circa materias paruas transeant in mortale, vel non, dicam infra hoc tract. cap. 5. n. 6. & seqq.

3 **A**SSERTIO III. Peccata, quæ animo perficiuntur, ut hæresis, Dei ac proximi odium, &c. sola interruptione ac repetitione multiplicantur; ut proinde fieri possit eundem hominem mille peccata odij, internæ infidelitatis, vno die committere. Quæ est communis sententia apud Nauar. c. 6. num. 16. Azor. tom. 1. lib. 4. c. 4. q. 4. Suar. p. 3. t. 4. disp. 22. s. 5. qui tamen rectè aduertit num. 17. plerumque impossibile esse, interiorum horum peccatorum numerum inire; ideoque satis esse in Confessione moram temporis explicare; v. g. integro anno in inimicitia persisti; & sæpe, cum inimici memoria occurrit, actus odij exercui, ferme in singulos dies, vel singulas hebdomadas. Similiter & meretricis confiteri potest, se duos vel tres annos in sta-

tu meretricio persistisse, & quibusvis generis viris, etiam coniugatis, sacratis, religiosi corporis sui copiam fecisse.

**A**SSERTIO IV. Peccata, quæ in externa operatione perficiuntur, ut homicidium, furtum, fornicatio, &c. non censentur multiplicari per repetitionem propositi circa idem obiectum, quamdiu efficacitas primi propositi in libero aliquo affectu perdurat. Ita Caiet. to. 1. tr. 31. qui est 17. respon. resp. 15. Nau. cit. num. 16. & in c. consideret, n. 48. d. 1. de pœnit. Azor quæst. 6. Suar. l. c. n. 20. Exempli causa, qui animo furandi domo egreditur, vnum numero peccatum internum committit, etsi in via malum furandi propositum, quod moraliter nunquam interruptum est, actualiter aliquoties repetat: Sin verò summo oppressus, in ea iam dispositione sit, ut externa actio vel omissio non subdatur voluntatis libertati: & post somnum pristini propositi memor illud approbet, seu renouet; nouum quidem peccatum committit, sicuti docent Nau. cit. c. 6. num. 18. in fine Valsq. 1. 2. disp. 75. c. 3. & in moral. de restit. c. 5. §. 1. dub. 3. contra P. Nauar. lib. 4. c. 4. num. 16. plerumque tamen necesse non est, eiusmodi interiorum peccatorum numerum in Confessione edicere; cum id moraliter impossibile sit: sed sufficit temporis moram exprimere; v. g. integro mense persisti in proposito, & quæsiui occasionem furandi, fornicandi. Inde enim prudens Confessarius facile iudicium formare poterit de peccatoris statu.

Idem porro Nau. c. 6. man. num. 18. & Azor quæst. 5. ita resoluunt: Qui eodem commotionis impetu, eademque pugna, vel contentione, alterum sapius percussit, vel contumelia repetita affecit, semel tantum peccasse censetur, saltem in ordine ad sacramentalem Confessionem. Sin verò per intervalla ad verberandum, vel conuiciandum aggressus est; aut in eadem pugna, vel contentione diuersæ rationis contumelias irrogauit, v. g. compellendo furem, latronem, adulterum; tria peccata commisisse censeatur. Ratio discriminis est, quod in priore casu verbera, aut contumeliæ maiorem ordinem moralis unitatis habeant, quam in posteriore.

## CAP. IV.

## De diuisionibus peccati accidentalibus.

## S V M M A R I V M.

- 1 Peccatum aliud est commissionis, & aliud omissionis.
- 2 Si actio cum implerione præcepti impossibilis, causa omissionis culpabilis existat, tunc ipsa etiam actio peccaminosa redditur.
- 3 Si actio, alioquin impossibilis, tantum concomitanter & per accidens se habeat ad omissionem culpabilem, ab ea non inficitur.
- 4 Sed etsi actio sit causa omissionis culpabilis, ideoque peccatum; non tamen est distinctum ab omissionis peccato. Excipitur, si ad talem actionem, v. g. venationem, cuius causa Missam festo die negligis, tam inordinatum affectum geris, ut propter eam, quamuis Dei legem transgredi paratus sis.
- 5 Peccatum aliud est specialiter contra Deum, aliud contra ipsum peccantem, aliud contra proximum.
- 6 Peccata alia spiritualia, & alia carnalia dicuntur.
- 7 Peccatum aliud est cordis, aliud oris, & aliud operis.

**D**E essentiali & specifica peccatorum diuersitate dixi cap. 2. Deinceps verò afferam diuisiones peccatorum secundum differentias accidentales; quippe desumptas ab accidentalibus peccatorum conditionibus.

Prima est: Peccatum aliud est commissionis, ut furtum, vsus armorum prohibitorum. Aliud verò est peccatum omissionis; ut parentes non honorare, Missam die festo non audire.

Peccatum commissionis opponitur præcepto negativo, quod pertinet ad declinandum à malo: v. g. ne Deum oderis, ne in parentes contumeliosus sis, ne furtum facias. Cuiusmodi præceptorum negatiuorum (præsertim si sint iuris naturalis) ea conditio est, ut omni tempore obliget: quam-



quamobrem Deum odisse, parentes contumelia afficere, furtum facere, nunquam licitum est. Peccatum verò omissionis opponitur præcepto affirmatiuo, quod pertinet ad faciendū bonum: v. g. Deum amare, parentes colere, pauperes miserere. Quorum præceptorum affirmatiuorum ea conditio est, vt non omni tempore obligent: sed certis temporibus, seu concurrentibus certis circumstantiis: non enim semper Deum actualiter amare, parentes honorare, aut omnibus pauperibus largiri possumus, vel debemus. Ita docet S. Thom. 2. 2. q. 33. a. 2. & q. 79. a. 3. ad 3. Abb. c. nouit. n. 39. de iudic.

2 Dubitari solet hoc loco: Vtrum actio coniuncta omissioni culpabili sit peccatum, & quale: v. g. si dum Missam die festo audire debes, ores, studeas, aues capias; vtrū tales actiones à neglectu seu omissione Missæ inficiantur, & culpabiles fiant. Respondeo ex communiore doctrina Azor lib. 4. c. 3. q. 5. Angles in 2. d. 37. q. 2. diff. 4. Medin. 6. r. 2. q. 71. a. 5. Becani tract. 2. c. 3. q. 3. & Dico I. Quando actio impossibilis cum impletione præcepti, est causa omissionis culpabilis; tunc inficitur, & fit opus malum, propter circumstantiam mali effectus. Duobus autem modis actio impossibilis potest esse causa omissionis culpabilis: Primò formaliter tantum & priuatiuè; Si enim velis Missam omittere v. g. ex contemptu, vel orandi tædio, solum istud propositum non sufficit ad exequendum peccatum: sed necessariò debes opus aliquod (latè sumpto nomine operis) deligere, quod sit impossibile cum auditione Missæ: v. g. interim domi manendo, vel foras spatiando: tunc dico, hanc mansionem, vel ambulationem esse peccatum: quia causa est peccati quippe per se impediens præceptam Missæ auditionem. Secundò fieri potest, vt actio impossibiliter iuncta cum obseruatione præcepti, sit etiam causa omissionis in genere finali: v. g. si quis Missam negligat, vt domi studere, vel cum socio officium canonicum orare possit; talis oratio, licet ex obiecto bona sit, per quam etiam Ecclesiæ præcepto satisfat, tamen per circumstantiam mali effectus, videlicet culpabilis omissionis, inficitur, vt absolute mala actio existat.

3 Dico II. Si actio, alioquin impossibilis cum obseruatione præcepti, non sit causa omissionis culpabilis: sed omnino concomitanter atque per accidens se habeat, tunc non inficitur ab omissione, sed manet actio bona vel indifferens, qualis secundum se est. Exemplum: Si Missam die festo negligere decreuisti, atque idcirco domi manere elegisti: interim verò, ne tempus otiosè transigas, ægrum inuisis, vtilia legis; erit illud opus virtutis misericordiae: hoc studio sitatis. Item si Missam negligere proposuisti, atque idcirco foras spatiari decreuisti; postea verò socium piscantem casu reperias, cui te adiungis: piscatio hæc non sit actus malus, sed manet indifferens: cum non sit causa operis; quia etsi non piscareris, nihilominus foris maneres, Missamque negligeres. Est tamen hæc assertio contra Capreol. 2. d. 35. q. vn. solut. argum. contra 2. conclus. Valentiam tom. 2. disp. 6. quæst. 1. p. 4. & alios.

4 Dico III. Licet actio si causa omissionis culpabilis, iuxta primum dicendum; ideoque peccaminosa; non tamen est peccatum distinctum ab ipso omissionis peccato. Ratio est: Si Missam negligis, vt domi studeas, vel aues capias: studium istud, vel aucupium non est peccatum secundum se absolute: sed relatè, quatenus causa est peccati omissionis. Tota igitur malitia per se primò consistit in voluntaria omissione Missæ, & hinc redundat in actionem, quæ eius causa existit. Quemadmodum si quis hominem occisurus bene comedat, hastam præparet, domo excurrat: actiones istæ secundum se indifferentes, malitiam non habent nisi homicidij, cuius causa existunt. Quamobrem satis est in Confessione ipsum homicidium, aut propositum homicidij: ita & Missæ culpabilem neglectum explicare: nec opus est causam adiungere, v. g.

ideo Missam neglectam, vt poetam legeres, aues caperes. Excipe, nisi quis tam inordinatum gerat affectum erga venationem, v. g. vt ob eam paratus sit quamlibet legem Dei transgredi, eiusque gratia & amicitia priuari: talis in venatione vltimum finem suum constituit, quod charitati erga Deum repugnat: quare hunc affectum mortaliter malum, & suo pte pondere in mortalia peccata inducentem, tenetur homo in Confessione aperire, sicuti docet Suar. 3. p. t. 4. disp. 22. l. 4. num. 11. Sanchez lib. 1. moral. cap. 5. num. 15. Angles in 2. d. 37. q. 2. diff. 4. Quia explicatò peccato omissionis, v. g. Missam vel partem Missæ neglectam fuisse: non explicatur tota malitia causæ, videlicet prauæ affectionis, quæ ad plura peccata mortalia suo pte pondere inclinat. Eademque ratione docet S. Thom. 1. 2. quæst. 88. a. 5. iuncto Caiet. ibid. peccatum, quod alioquin veniale est, v. g. otiosam confabulationem, mortale fieri, si in eo finis vltimus constitutur. Et Sanch. l. c. num. 4. inquit, affectum mortaliter peccandi, non determinata specie peccati, aduersari charitati erga Deum.

Deinde, si quis concepto proposito negligendi præceptum, postea etiam ad eiusdem præcepti executionem, in longum temporis spatium impotentem se reddat, nouum peccatum admittere videtur: si v. g. in sacris constitutus matrimonium contrahat, vel in diurna navigatione breuiarium abijciat, sicut notat Medina 1. 2. q. 71. a. 5. §. ad primum & secundum.

Altera diuisio: Peccatum aliud peculiari ratione contra Deum committitur, videl. quod Fidei, Spei, Charitati Dei, Religioni aduersatur: vt hæresis, desperatio, Dei odium, blasphemia, periurium, sacrilegium, &c. Aliud verò contra ipsum peccantem; videl. quod temperantiæ vel fortitudini aduersatur: vt ebrietas, luxuria, timiditas, &c. Aliud contra proximum: videl. quod Iustitiæ vel Charitati erga proximum repugnat: vt furtum, homicidium, odium, inuidia, &c. Ratio diuisionis est: Quia aliæ virtutes Deum pro obiecto habent: vt Fides, Spes, Charitas, Religio: aliæ verò proximum; vt Iustitia, Misericordia, &c. aliæ solum ordinant hominem in seipso: vt Temperantia, & fortitudo. Vide S. Thom. 1. 2. q. 72. a. 4.

Tertia diuisio: Peccata alia sunt spiritualia, & alia carnalia, sicuti docet S. Thom. 1. 2. quæst. 72. a. 2. Et sumitur ex Apostolo 2. ad Corinth. 7. *Mundemus nos ab omni inquinamento carnis, & spiritus.* S. quoque Gregorius lib. 31. moral. c. 31. docet, ex septem vitijs capitalibus quinque spiritualia esse: *Inanem gloriam, inuidiam, iram, tristitiam, (sive acediam) & auaritiā.* Duo verò carnalia: *Veneris ingluuiem, & luxuriā.* Dicuntur autem illa peccata spiritualia, quia consistunt in concupiscentia vel inordinata delectatione spirituali, seu animali, ortā ex sola apprehensione rationis: hæc autem peccata carnalia, quia consistunt in concupiscentia & inordinata delectatione carnali. Nam gula, inquit S. Thom. cit. a. 2. perficitur in delectatione ciborum: luxuria in delectatione Venereorum. Vide eundem q. 31. a. 3.

Quarta diuisio: Peccatum aliud est cordis, aliud oris, & aliud operis, sicuti docet Cyrillus Hierosolym. catech. mystagog. 5. & S. Hieronym. super Ezechiel. c. 43. cum ait: *Aut enim cogitationibus, aut sermone, aut opere peccamus.* Quæ diuisio duobus modis intelligi potest, sicuti notauit Medina 1. 2. quæst. 72. a. 7. Azor tom. 1. lib. 4. c. 4. quæst. 1. Primò, vt sit tanquam generis in species peccatorum completas, sensusque sit: Quædam peccata cordis cogitatione, vel affectione consummantur, vt hæresis, odium Dei, inuidia, &c. (quædam oris sermone complentur, vt detractio, contumelia erga hominem, &c. quædam opere perficiuntur, vt furtum, homicidium, &c.

Secundò, accipi potest diuisio tanquam in gradus peccatorum, vt sensus sit: Aliqua peccata inchoari cordis



cogitatione & affectione: incrementum verò capere oris sermone: denique perfici ac consummari opere, iuxta mentem S. Th. q. 72. a. 7. Exemplum dat Medina l. c. Si quis fornicationem meditatur ac proponit, postea verbis mulierem prouocat; denique opus perficit: hoc casu mortale peccatum committitur concupiscendo: sed noui peccatum non admittitur alloquendo; commissum verò magis perficitur: nec denique aliud peccatum admittitur fornicando; sed iam admissum consummatur. Id verò hoc loco aduertendum est; Etiam ea peccata, quæ interno animo perficiuntur, vt hæresis, apostasia, blasphemia &c. interno peccandi proposito inchoari posse: vt si quis hodie proponat, ad Hæreticos, vel Turcas crastino die deficere, aut Diabolo se deuouere, causâ consequendi temporales commoditates, is nondum consummatè peccauit, neque hæreticus aut apostata adhuc est; cum solum deficiendi propositum habeat, yti dicam iterum lib. 2. tract. 1. c. 41. ante n. 2.

## CAP. V.

## De peccato mortali &amp; veniali.

## SUMMARIUM.

1. Diuisio maxime celebris est peccati in mortale, ac veniale.
2. Etsi peccata venialia sint contra legem Dei; non tamen sunt contra finem legis; quæ est charitas & amicitia cum Deo. Vel dici potest: Venialia non esse contra legem Dei præcipuam, & quæ simpliciter necessaria sit ad salutem.
3. Peccata mortalia ac venialis differentia accidentales sunt. Peccatum mortale & veniale quasi infinite distat: quare ex venialibus, quantumcunque multiplicatis, nunquam efficitur mortale.
4. Peccata venialia sunt vel ex genere suo, vel ex materia leuitate, vel ex imperfectione actus.
5. Cum aliquid per se malum non est, sed indifferens, excessus in eius appetitione, & siue est tantum peccatum veniale.
6. In peccatis quibusdam aduersus Deum, qualia sunt odium, infidelitas, periurium assertorium: non reperitur veniale ob materia paruitatem. Si plurius transgressionum parua materia neque secundum se, neque secundum effectum moraliter coalescant, nunquam efficitur mortale peccatum: Sin verò coalescant, tunc ultima transgressionis, & g. ultimi furti materia, licet secundum se parua sit, tamen propter connexionem tum antecedentibus, grandis reputatur, & sufficiens obiectum peccati mortalis.
7. Qui vult, se quotidie recitaturum Pater & Ave, ita vt oratio cuiusque diei annus sit: etsi toto anno intermittat, peccat multis venialiter: sed nunquam mortaliter.
8. In voto reali, puta quotidie dandi parua elemosynam pauperibus, censetur vouens se obligare, si vno aut pluribus diebus intermittat, postea compensaturum: quare in talis voti obligatione mortaliter peccari potest.
9. Si quis violat partem præcepti, ea non omnino absolute, sed etiam cum comparatione ad totum cuius pars est, prudentis viri iudicio spectanda est: vt intelligatur, siue sufficiens obiectum peccati mortalis.
10. Motus appetitus sensitui circa malum, interdum ante omnem deliberationem rationis excutitur, ideòque dicuntur primo primi, & omni culpa vacant.
11. Motus appetitus sensitui, qui dicuntur secundo primi, sequuntur deliberationem rationis imperfectam, ideòque culpam venialem continent.
12. Vt consensus voluntatis moraliter bonus vel malus sit, debet esse rationis superioris, seu mentis, attendentis rationibus æternis.

**H**æc est quinta maxime celebris, diuisio peccati in mortale ac veniale. Mortale peccatum est, quod ob grauitatem sui, gratiam & amicitiam cum Deo soluit, pœnamque æternam meretur. Ex quo apparet ratio nuncupationis: dicitur enim mortale, quia spiritualis vitæ principium, videlicet gratiam sanctificantem tollit, mortemque animæ adfert. Nam homo per malitiam occidit animam, ait Sapiens cap. 16. & Apost. ad Roman. 6. Stipendium peccati mors. Roman. 8. Si secundum carnem vixeris, morieris. Quæ autem talia sint, partim ex Scripturæ testimonijs colligitur: v. g. ad Gal. 5. Qui talia agunt, regnum

Dei non consequentur. Eph. 5. Omnis fornicator, aut immundus non habet hereditatem in regno Dei: partim verò ex præstantia aut necessitate virtutis oppositæ: vel, quod eodem redit, ex obiecto, circa quod peccata versantur; æstimari debet. Mortalia enim ex obiecto, siue ex genere sunt, quæ in Dei iniuriam directè tendunt; vel cum proximi iniuria, damno: vel ipsius operantis graui incommodo, contra naturæ ordinem, iuncta sunt: videlicet peccata contra Theologicas virtutes, contra Religionem, Iustitiam, proximi Charitatem; denique quæ ad luxuriam pertinent, sicut docet Sanchez 1. moral. c. 1. num. 4. Verum quæ ex genere siue obiecto mortalia sunt, per accidens fieri venialia possunt, vt postea dicam.

Veniale peccatum est, quod ob leuitatem, gratiam & amicitiam cum Deo non tollit, quamuis feruorem charitatis minuat: neque æternam, sed temporalem pœnam meretur. Et idcirco veniale nuncupatur, quia saluo principio (nimirum gratiâ) languorem & infirmitatem facile curabilem animæ infert, veniamque facile consequitur. De his loquitur Sapiens, Prouerb. 24. Septies in die cecidit iustus Iacob. c. 3. In multis offendimus omnes. Vide S. Thom. 1. 2. q. 72. a. 5.

Corollarium I. Licet omnia peccata, etiam venialia, sint contra legem Dei, sicut constat ex definitione peccati, cap. 1. tradita; non tamen omnia peccata absolute sunt contra finem legis, quæ est charitas & amicitia cum Deo; sed sola mortalia. Addi etiam potest, quod venialia non sint contra legem Dei præcipuam, seu quæ simpliciter necessaria sit ad salutem. Vide auctorem Compendij Theologiæ apud Gersonem. p. 2. operum vbi de veniali peccato. Vasq. disp. 143. c. 3. & 4. Becan. tr. 2. c. 2. q. 7. P. Sotum de peccatorum discrimine, c. 10.

Corollarium II. Licet diuisio peccati in mortale ac veniale, per se loquendo, sit secundum differentias accidentales, vt patet in furto magnæ, & furto parvæ quantitatis, quæ essentialiter non differunt, sicut bene docent Richard. in 4. d. 16. a. 2. quæst. 2. Valent. tom. 2. disput. 6. quæst. 18. p. 2. contra Nau. c. 9. præclud. man. num. 6. tamen dubium non est, quin peccatum quæ mortale est, a veniali essentialiter differat. Sicut etiam animal accidentaliter diuiditur in bipes & quadrupes: sed bipes formaliter, vt bipes est, a quadrupede essentialiter discrepat. Etenim peccatum mortale auertit hominem ab ultimo fine & infinito bono: peccatum autem veniale continet deordinationem circa ea, quæ sunt ad finem illum, ideòque peccatum mortale, & veniale quasi infinite distat, sicut edocet S. Th. 1. 2. q. 72. a. 5. ad 1. & q. 87. a. 5. ad 1. Quæ etiam causa est, cur ex venialibus quantumuis multiplicatis nunquam fieri possit mortale; quia ex finitis nunquam efficitur infinitum, ait Nau. in c. tres sunt, num. 5. d. 1. de pœnit.

Peccatum veniale triplex est: Vnum ex natura & genere suo: Alterum ex materia leuitate: Tertium ex imperfectione actus. Quæ de re agit P. Sotus de peccat. discret. lect. 7. Azort. 1. lib. 4. c. 9. quæst. 7. Sanchi. lib. 1. moral. cap. 1.

Quod attinet AD PRIMUM; Veniale ex genere dicitur, quod per se & absolute spectatum secundum proprium obiectum, non habet grauem cum recta ratione, & lege Dei repugnantiam; vtpote nec in Dei iniuriam directè tendens; neque cum proximi iniuria, damno; aut ipsius operantis graui incommodo, contra naturæ ordinem, coniunctum: v. g. cogitatio vana, verbum otiosum, mendacium iocolum. Huc spectat omnis excessus & defectus in passionibus animi secundum se indifferentibus: quæ de re generalem regulam tradit Less. lib. 4. c. dub. 14. num. 110. Cum aliquid per se malum non est, sed indifferens, tunc excessus eius in appetitione, vbi ve peccatum est duntaxat veniale, per se loquendo, & secluso graui nocumento, aliæve malitia extrinseca: tales sunt excessus in cibo, potu, coniugij vsu, ira, timore, tristitia, appetitu pecuniæ



pecuniae, honoris, laudis, excellentiae. Nam in his mediocritatem attingere difficile est. Quod autem ebrietas peccatum mortale sit, dicam l. 3. f. 4. n. 4.

6 Ad alterum quod attinet peccatum, quod ex genere suo mortale est, ut furtum, detractio, &c. veniale efficitur, si materia siue obiectum exiguum sit, v. g. furtum vnius crucigeri. Nam ubi est parua materia, non nisi parua culpa oriri potest. Sed aduerte, quaedam peccata esse, quorum obiectum et si materialiter paruum videatur, formaliter tamen graue est; quia integra ratio ac veluti tota quantitas deformitatis in eo reperitur: sicuti videre est in peccatis quae directe contra Deum committuntur, videlicet Dei odio, infidelitate, &c. Quicquid enim in Deo oderis, infinitam eius bonitatem odio habes: & quacumque ab eo reuelatam propositionem negaris, infinitam eius veracitatem negas. Idem accidit in periurio assertorio, in quo non sine grandi irreuerentia, etiam ad rei minimam confirmationem, falsus testis Deus adducitur, sicuti dicam lib. 4. tr. 3. cap. 14. n. 2. Vide Sanch. lib. 1. moral. cap. 4. num. 1.

7 Dubitatur hic primo: Vtrum transgressiones repetitae circa materias paruas efficiant denique peccatum mortale? Respondeo & Dico I. Si plurium transgressionum materiae paruae, neque secundum se ipsas, neque secundum effectum ab ipsis productum moraliter coalescunt, sed diuise manent: tunc omnes ac singulae transgressiones veniales sunt, quae nunquam mortale peccatum efficere possunt, iuxta doctrinam S. Th. 1. 2. q. 88. a. 4. Exempla sunt: Si quis quotidie in quadragesima bolum panis extra statuta tempora comedat: si opifex omnibus diebus festis horae quadrantem operi serui insistant, secluso scandalo, contemptu. Si Clericus quotidie aliqua verba in officio recitando per negligentiam omittat. Ita docet Vasquez disp. 146. c. 2. num. 3. Sanch. cit. cap. 4. numero 9. & seqq. Suar. t. 2. de Relig. li. 5. de voto. c. 5. numero 9. & seqq.

Dico II. Si plurium transgressionum paruae materiae ob aliquem ordinem inter se moraliter vniantur, & coalescant, siue secundum se ipsas, siue secundum effectum ab ipsis productum, tunc denique completur malitia mortalis in vltima transgressione, cuius materia siue obiectum, licet praecise spectatum, paruum sit: tamen propter ordinem & moralem connexionem cum antecedentibus, grāde reputatur. Exempla sunt: Si ab eodem repetitis vicibus modicam quantitatem fureris, neque restituas; denique eo peruenies, ut non modicam rem alienam iniuste detineas; & magnum damnum proximo inferas. Qua de re dicam in materia de furto l. 3. tr. 3. de iust. c. 1. n. 5.

Similis ratio est: si interruptis vicibus plures Psalmos in eodem officio canonico omittas: si operi serui eodem die festo saepius, quamuis per modica tempora, insistas: aut eodem die ieiunij saepius modicum quid extra statuta tempora comedas; denique fieri potest, ut mortaliter pecces. Praeterea, licet in comedendo temperantiae limites excedere, cum modico corporis detrimento, veniale duntaxat peccatum sit; si tamen frequentius, eodem, aut diuersis diebus comedendo, valetudinem denique grauiter te ledere animaduertas, mortaliter peccabis, ratione notabilis effectus siue damni, ex peccato gulae provenientis. Vide Vasq. l. c. num. 6. Sanchez num. 11. Suarez numero 8. & 9.

8 Porro, ex tradita hactenus doctrina DD. citati resolunt cum Soto l. 7. de iust. q. 2. a. 1. col. 1. contra Val. t. 3. dif. 6. q. 6. p. 4. q. 2. Eman. Rod. t. 2. sum. c. 99. n. 1. Siquis vouit, quot diebus Sabbathinis daturum se eleemosynam paruam in honorem B. Virginis; vel vouit quotidie recitaturum orationem Dominicam: ita ut quaelibet oratio, vel eleemosyna cuiusque diei onus sit, eaque finita extinguatur obligatio: tunc etsi toto anno votum violet, nunquam mortaliter, sed semper venialiter peccaturus. Imò addit Suar. n. 16. Sanch. n. 15. idemque videtur sensisse Sotus cit.

10. propositum tale votum longo tempore violandi non esse mortale; sicut nec mortale peccatum, si proponas omnibus ac singulis diebus festis modicum laborare; vel diebus ieiunij modicum comedere: vel quotiescumque occasio se offeret, venialiter mentiri, proximo detrahere. Quod verum est per se loquendo: per accidens tamen, ratione adiuncti periculi labendi in peccatum mortale, timendum est, ne eiusmodi propositum mortali peccato non vacet, sicuti notauit Suar. cit. c. 5. in fine, Sanch. l. 1. mor. c. 5. n. 4. & tradidit S. Bon. in 4. d. 16. p. 2. a. 3. q. 1. S. Th. 1. 2. q. 88. a. 4. ad 1. explicans dictum S. Aug. hom. vlt. ex 50. c. 3. & tr. 12. super Ioan. *Minuta plura peccata occidunt*: dispositiue intelligendum esse ait, quia ex neglectu multorum venialium facilis sit lapsus in mortale, de quo videri potest P. Sotus de peccatorum discr. lect. 7. Ceterum, si vouentis intentio fuit, dies voto suo definire non ad obligationem finiendam: sed ut insequentibus diebus quamprimum praestetur, quod suis diebus omissum erat: tunc extra controuersiam esse debet, mortaliter peccari, quando longo tempore materia obligationis aucta, votum intermittitur ac violatur: vel ita violandi propositum concipitur.

Sed quares. Vtrum in dubio vouens censendus sit obligare se voluisse ad supplendum diebus posterioribus, quod prioribus, neglexerit; idemque mortaliter peccare, si longo tempore sine iusta causa intermittat, vel intermittendi propositum concipiat. Respondeo. Si, ut ponimus, vouens dubius sit qualem intentionem habuerit, neque de ea ex circumstantiis coniectura capi possit, non displicet doctrina Dominici Soti cit. a. 1. Realia vota plerumque ita concipi, ut mens sit ea supplendi si vno die praetermittantur: v. g. si vouisti te singulis diebus crucigerum pauperibus largiturum, videris te obligare voluisse ad supplendum, si aliquibus diebus omisisti: Personalalia autem vota ferme non concipi cum tali onere: ut si quis voueat singulis diebus rosarium recitaturum, vel singulis septimanis ieiunaturum: frequentius esse solet vouentis intentio, ut oratio, ieiunium cuiusque diei aut hebdomadae onus sit: quia alioquin obligatio homini nimis difficilis accumularetur. Quamuis neque in hac re vniuersalis regula dari potest: cum non raro vouentes quotidianam orationem, si quod vno die praetermiserunt altero compensent, voto suo utcumque satisfecisse se arbitrentur.

Dubitatur secundo: Vtrum quantitas materiae, quae sufficiat ad mortale peccatum absolute spectanda sit; an vero comparatione totius. Nam tres aurei, v. g. si absolute spectentur, magna quantitas sunt: si autem comparatione totius alicuius summae, v. g. trium millium, exiguae partis proportionem habent. Ponamus igitur, aliquem voluisse in pia causa se erogaturum ter mille aureos; & omnes soluisse praeter tres, quos non soluere proponat; vtrum mortaliter peccare censendus sit? Nau. de orat. c. 10. a. 43. Azor t. 1. l. 10. c. 7. q. 3. cum S. Ant. aiunt, partem notabilem alicuius totius censendam esse tertiam: ex quo inferunt, cum mortaliter peccare, qui in recitatione paruae horae canonicae totum principium cum vno psalmo praetermittit. Addit vero Azor, negari non posse, partem etiam minorem tertiam notabilem censendam esse, si totum valde magnus sit: v. g. dies festus continet viginti quatuor horas, & pars quarta sex horas habet; nemo autem a peccato mortali excusat eum, qui die festo sex horis serui operi insistit. Sed miror Azorium non attendisse eadem ratione, si totum non valde magnus sit, saepe tertiam eius partem non censerit, ut mortalis peccati capax obiectum sit: Exempli causa, si quis partem tertiam rosarii, vel vnius argentei floreni voto promissi, exoluere neglexerit, non statim mortalis peccati damnari poterit: Eadem ratio est de tertia parte vnius horae ex minoribus; praeterquam quod horae singulae non tam alicuius totius, quam partis officij canonici rationem habeant, sicut notauit Sua. t. 2. de rel. 4. de horis can. c. 25. n. 16. Quare respondeo ad q. cum Suar. ib. & Sanchez lib. 1. c. 4. n. 17. Et si regula vna generalis assignari non possit, tamen magnum & paruum non omnino absolute,



sed etiam cum comparatione ad totum, cuius pars est, prudentis viri morali iudicio, æstimandum esse; ut intelligatur, sitne sufficiens mortalis peccati materia. Quemadmodum enim orbis terræ absolutè quidem magnus est, comparatione tamen totius mundi valde exiguus, & vix æstimandus: ita etiam in alijs rebus, quod absolutè magnū est, comparatione totius, à quo multoties superatur, paruum quandoque censetur, & moraliter non valde æstimabile. Quam sententiam Suarez tradit to. 1. de relig. l. 2. de festis, c. 31. n. 2. ubi disputans, quantum tempus operis feruile in die festo constituat peccatum mortale, ita loquitur; *Alii dicunt, si attingat horam integram, iam esse materiam grauem: sed nimia est & rigoresa restrictio, quia respectu totius diei, pars vigesima quarta non apparet nimia.* Quare ad propositum casum probabiliter responderi potest; Talem voti præuaricationem non esse mortalem; cum non censetur notabilis: quia qui totum votum reale exoluit, præter partem eius millesimam, is ferme expleuisse existimatur: quemadmodum etiam homo, cui, liberaliter promissum donaturum ter mille, si omnes soluas præter tres, non censetur valde ægrè laturus, aut ut magnam iniuriam æstimaturus: Ita & Deus; cum non sit seuerior exactor liberalis promissi, quam homo.

Obijcies. Exinde secuturum esse, ut neque is mortaliter delinquat, qui furatus ter mille aureos, aliquos ex ipsis retinet, reliquos restituit. Resp. negando consequ. Discrimen enim est; quod iste rem alienam auferat; hic verò suam non dat, cum dare deberet, & quidem promissario non admodum iniurioso; si tota ferme gratuita promissio expleta fuit. Quæ est probabilis & benigna decisio: quia in rigore contrarium dici potest; eo quod vouens, seu promittens, post factam & acceptatam promissionem, totius rei promissæ ex iustitia debitor factus sit.

**II** Ad tertium quod attinet peccatum, quod & ex genere suo, & obiecto grauiter mortale esset, sæpenumero veniale fit ob imperfectionem actus. Pro qua re aduertendum: Motus appetitus sensitui, ipsiusque voluntatis alij sunt, qui plenam & perfectam rationis deliberationem sequuntur, ideòque ab obiecto, quod mortaliter malum est, etiam mortalem malitiam accipere solent. Alij varò sūt, qui ante omnem rationis deliberationem, naturaliter excitantur: quare vocati solent motus *primò primi*, id est, maximè primi. Iniecta enim animo cogitatione obiecti mali, siue à malo Dæmone per suggestionem; siue ab extrinseco per visum, auditum, &c. siue ex naturali dispositione ac infirmitate, exinde interdum naturaliter & necessario appetitus, ipsaque voluntas in propositum obiectum mouetur; ut in hominis potestate non sit eiusmodi subitotus motus cohibere, vel prorsus impedire: quamobrem omni culpa carent, teste S. Aug. l. 3. de lib. arbit. cap. 25. & lib. 1. de ciuit. cap. 25. conuenienter Apost. ad Rom. 7. *Sentio aliam legem in membris meis, repugnantem legimentis meæ, & captiuantem me in lege peccati:* Et infra: *Non quod volo bonum, id ago: sed quod nolo malum, id facio:* quem locum explicat S. Hier. epist. ad Eustoch. de custodia virginitatis, relatus in c. si Paulus, 34. q. 5. Nau. in c. super tribus, d. 1. de pœn. n. 4.

Obijcies. Et si homo cogitatione mali obiecti exorta, appetitum omnino cohibere non possit: potest tamen impedire, ne talis cogitatio in animo oriatur, occupando se alijs cogitationibus bonis & honestis: ergo tunc motus in obiectum malum indirectè voluntarius existit, adeòque peccatum: quando homo negligit amouere eius causam, quæ est eiusdem obiecti cogitatio, sicuti ratiocinatur P. Sotus de peccat. discrimine. cap. 8. Resp. cum Vasq. disp. 106. c. 3. Azor li. 4. c. 5. q. 2. Cogitationem primam in quouis negato voluntariam non esse, sed naturalem, ut dixi præced. tract. cap. 2. n. Tali autem orta cogitatione, v. g. circa obiectum secundum se inhonestum, sed apprehensum duntaxat sub ratione vtilis, vel delectantis; appetitus ipsaque hominis voluntas naturaliter commouetur con-

sequenter peccatum nullum continet. Loquimur autem de motu seu appetitione mali, quam ratio aduertens, si possit, impedire & repellere debet. Infra verò dicam, tamen si homo cogitationem, ex qua prauus appetitus sensituius exurgit, tollere possit, abstinendo, v. g. ab audientis confessionibus, à lectione, scripture, consideratione peccatorum, v. g. carnalium, tamen ad id non obligari, si absit periculum consensus.

Alij denique motus sunt secundò primi, qui licet antecedant perfectam rationis deliberationem; sequuntur tamen considerationem ac deliberationem imperfectam; adeòque sunt cum consensu semiplenè deliberato, qualis consensus esse solet in semiebrijs, semidormientibus: similique modo in sobrijs ac vigilantibus: sed animum passione iræ, timoris, &c. perturbatum, vel alienis cogitationibus adeo implicatum habentibus, ut ad id, quod agunt, vel saltem ad actionis malitiam, eiusque periculum plenè non aduertant, adeòque non nisi imperfectè ac leuiter delinquant, sicuti docent Nau. prælud. 9. man. n. 10. & cit. c. super tribus, Medina 1. 2. q. 74. a. 6. Caiet. ver. delectatio, post princip. Vasq. disp. 107. cap. 3. & 4. Atque ita intelligendus S. Th. 1. 2. q. 74. a. 3. ad 3. *Motus sensualitatis, qui præuenit rationem (perfectam) esse peccatum veniale.*

Enimverò supra monuit. 2. c. 3. *Hominem numquā peccare, nisi actualiter aduertat ad mortalem malitiam operis aut omissionis.* Quare si die ab Ecclesia interdicto appositis carnibus, comestio tibi vtilis ac comoda videatur, fieri potest ut deliberatè comedas, & nihil pecces; si de Ecclesiæ prohibitione, & consequenter de operis malitia nihil cogites: imò fieri potest, ut tunc opus virtutis temperantiæ exerceas, si moderatè comedas. Idemque, quamuis rariùs, etiam in ijs locum habere potest, quæ per se mala sunt, ut animas in vehemente passione iræ, vel tristitiæ adeo absorbeatur cogitatione commoditatis vel utilitatis, ut vel nihil omnino, vel valde tenuiter attendat ad operis malitiam seu inhonestatem: quo casu vel nullum, vel duntaxat imperfectum ac veniale peccatum erit; quod arbitrator interdum euenire ijs, qui nimia tristitia absorpti sibi ipsis necem inferunt. Ratio huius rei peti debet ex doctrina, quam tradit S. Aug. l. 12. de Trinit. c. 12. & l. 2. de Gen. contra Manich. c. 14. S. Th. 1. 2. q. 74. a. 7. Ut consensus voluntatis moraliter bonus vel malus sit, debet esse rationis superioris; (quæ à S. Aug. viro comparatur) & non tantum inferioris, quæ mulieri assimilatur. Ratio inferior dicitur, quæ humanis ac temporalibus tantum motibus commoditatis, ac delectationis attendit, v. g. commodum atque vtile esse comedere, inimicum è medio tollere. Ratio superior est, quæ rationibus æternis honestatis, vel inhonestatis secundum Dei legem attendit: v. g. quod carnum comestio die interdicto, vel hominis occisio illicita sit, seu legi repugnans; quod moderatè suo loco, tempore comedere honestum sit. Dico igitur, voluntatis consensum nunquam moraliter honestari, nisi moueatur, & eliciatur secundum rationes æternas & nunquam inhonestari, siue ad culpam imputari, nisi eliciatur præter, aut contra antecedentem considerationem rationum æternarum; dum videl. voluntas magis patitur se moueri rationibus delectabilis, aut vtilis, quam honesti. Quæ doctrina ab eodem S. Th. 1. 2. q. 15. a. 4. ita probatur: Finalis sententia pertinet ad supremum iudicem: sed ratio superior, attendens rationibus æternis diuinæ legis, supremus in homine iudex est: Ad hanc enim, puta mentem, pertinet iudicare de rationibus humanis ac temporalibus, ab inferiore parte propositis. Cum igitur consensus deliberatus, ob quem homo culpandus sit, debeat esse sententia vltima: (si enim aliud superius examen in homine superesset, excusare se posset & dicere, causam non esse omnino discussam, neque iudiciū finitū) sequitur hinc, quod consensus in peccatum debeat esse rationis superioris. Neque obstat, quod Caiet. 1. 1. q. 74. a. 3. & 4. P. Sotus. 2. 2. iii-



2. instit. sacerdot. de discrim. peccatorum, cap. 8. & alij apud Vasq. disp. 106. c. 2. & 3. existimant, secundum S. August. l. 5. contra Iulian. Pelagian. c. 3. fatendum esse, quod motus appetitus inclinatus in malum, peccatum sit (veniale) licet omnem rationis deliberationem praeueniat. Nam haec doctrina alienissima est à mente S. Augustini, quippe qui tum ibi, tum aliàs saepe secutus Apostolum ad Roman. 7. concupiscentiam vocat peccatum, non quod propriè & in se peccatum sit; sed quia à peccato primorum parentum orta est; & quia in peccatum trahit, illudque facit, si reginam Mentem superet, sicuti clare explicat l. r. de nupt. & concupisc. cap. 23. & subiungit: *Vocatur peccatum, quia peccato facta est, concupiscentia, cum iam in regenerationis non sit ipsa peccatum: sicuti vocatur lingua locutio, quam facit lingua: & manus vocatur scriptura, quam facit manus.* Itemque sic vocatur peccatum, quia peccatum si vincit, facit; sicut vocatur frigus pigrum, non quod à pigris fiat: sed quod pigris facit. Eadem habet lib. 1. contra 2. epist. Pelag. c. 13. lib. 1. retract. c. 15. & lib. 6. contra Iulian. Pelag. c. 9. & 10. ubi ait, desideria carnis appellari peccatum, non eo modo quo facit reum: sed quod sit reatu primi hominis factum, & quod rebellando, nos trahere nititur ad reatum. Et paulò post: *Quantum ad nos attinet, sine peccato semper essemus, donec sanaretur hoc malum, si ei nunquam consentiremus ad malum. Sed in quibus ab ipso rebellante, eisi non lehaliter, sed venialiter tamen vincimur: in his contrahimus unde quotidie discamus, dimitte nobis debita nostra.* Vide eundem de verbis Apost. ferm. 5. & 6. Henricum de Gandauo quodlibet 6. quaestione 32.

## CAP. VI.

## De delectatione morosa.

## SUMMARIUM.

1. Duplex est voluntatis affectus: unus efficax, qui dicitur propositum: alter simplex complacentia, sine exequendi voluntate.
2. Aliud est delectari de re cogitata, aliud verò delectari de ipsa suscepta cogitatione: haec enim per se mala non est: licet circa rem secundum se malam, & g. fornicationem occupetur.
3. Aliud est delectari de opere malo: & aliud delectari de modo operandi male.
4. Omnis delectatio directè voluntaria de opere secundum se malo, similiter mala est.
5. Delectatio voluntaria circa malum, morosa vocari solet: non quod moram temporis requirat: sed quia, post rationis animadversionem, voluntas in ea acceptanda persistit: quod instante fieri potest.
6. Si quis sine causa, aut necessitate actionem exercet, ex qua intelligit delectationem carnis naturaliter orituram: tamen sine directà intentione, & sine periculo consentiendi, si peccat tantum venialiter: Sin verò causam iustam habet talem actionem exercendi, nihil peccat, permittendo carnis motionem exinde oriri.
7. Si homo turpis obiecti cogitationem, & hinc ortam sensitivam delectationem repellere intermitat: quod placeat illi res cogitata, & hinc ortus motus in parte sensitiva: committit peccatum mortale delectationis morosa. Sin verò ideo expellere negligat, quia confidat de constantia partis superioris, non inclinatus ad consensum, probabile est non peccare mortaliter.
8. Ut tamen dicta sententia etiam practice probabilis sit, requiritur ut voluntas omittens carnalem delectationem, animum ad alia convertendo, depellere, interim formalis displicentia actum exerceat.
9. Oblectarijs absolutis & secundum se, quia ideo tantum mala: quia lege positiva aut voluntario voto prohibita, non est mortale peccatum delectationis morosa.
10. Non est mortale peccatum opus prohibitum desiderare, vel in eo delectari, sub conditione si prohibitum non esset: modo appositae conditio auferat operis malitiam.
11. Sin appositae conatio operis malitiam non auferat, mortale peccatum est, opus ex se mortale sub eiusmodi conditione desiderare, aut eo voluntarie oblectari: v.g. Nisi infamiam timerem vellem adulterari.

12. Coniunx mortaliter non peccat, si de maritali copula coniuge absente cogitans, in re cogitata delectetur.
13. Vidua mortaliter peccat, si voluntarie consentiat in motum delectationis sensitivam, quae ex recordatione praeeteritae copulae maritali exurgit.
14. Coniunx probabiliter excusatur à peccato mortali, si voluntarie delectetur in commotione sensitiva, orta ex imaginatione coniugis absentis.
15. Qui simpliciter ac precise se oblectat cogitatione mulieris, etsi illa consanguinea sit, vel Deo sacrata: committit unum simplex peccatum mortale contra temperantiam: secus, si desideret vel proponat cum tali fornicari: quare tunc circumstantiam persona in Confessione explicare debet.

**N**otandum primò. Duplex est voluntatis affectus: 1. Vnus efficax, qui dicitur voluntas, propositum, intentio exequendi quod cogitatum est: Alter inefficax, quæ est simplex complacentia, amor, siue delectatio in obiecto cogitato, sine exequendi voluntate. Hic loquimur de simplici delectatione:

Notandum secundò. Aliud est delectari de re cogitata, 2. v.g. fornicatione; ita ut formalis ratio delectandi ex ipsa re sit; cogitatio verò sit tantum conditio proponens & applicans rem cogitatam. Aliud verò est delectari de cogitatione, v.g. fornicationis, ita ut formalis ratio delectandi sit ex ipsa cogitatione, tanquam obiecto pulchro & iucundo. Nos hinc loquimur de delectatione, quæ capitur ex re ipsa. Cum enim cogitatio rei malæ per se mala non sit, sed interdum bona; veluti, si de rebus turpibus cogites docendi, vel admonendi causa: interdum autem venialiter mala, ut si ex curiositate de eisdem cogites: sequitur, delectationem quoque de eiusmodi cogitatione tanquam obiecto per se malam non esse; sed interdum bonam, interdum venialiter malam. Ita docet S. Th. 1. 2. q. 74. a. 8. & amplectitur S. Ant. p. 2. tit. 5. c. 1. §. 5. Caiet. ver. delectatio morosa, P. Sotus de peccat. discrimine, c. 9. ad finem, Dur. in 2. d. 24. q. 6. Adr. in 4. de Euch. in q. Quia dictum est quod somnus. Vasq. disp. 15. c. 5. n. 25. Lopez p. 1. instru. cap. 2. §. Tandem animadversione. San. l. 1. mor. c. 2. n. 3.

Notandum tertio. Aliud est delectari de opere malo, & aliud delectari de modo operandi male. Si enim tibi in otio varia cogitanti, aut legenti, vel comœdiam spectanti, represententur mirabiles modi furandi, alienam sponsam rapiendi; fieri solet, ut absque peccato placeat tibi non furtum, raptus secundum se; sed furandi, vel rapiendi modus arte, ingenio excogitatus, sicuti notat Caiet. l. ca. Azor. lib. 4. c. 6. q. 1. quialio etiam exemplo rem declarat: si v.g. videas hominem ex equo ridiculè cadentem lædi, sine peccato rides, & te oblectas, non ob illati vulneris damnum, sed ob cadendi & lædendi modum. Nos hinc loquimur duntaxat de oblectatione, quæ ex opere malo capitur.

**A**ssertio I. Omnis delectatio directè & expressa voluntaria, de opere secundum se malo, similiter mala est: ita, ut si opus existat peccatum veniale, v.g. officiosum mendacium, immoderata comestio, etiam delectatio de eo venialiter mala sit: Si autem opus mortale peccatum existat, v.g. fornicatio, ebrietas, homicidium etiam delectatio de eo mortaliter mala sit. Quæ est Sententia S. Th. q. 74. a. 8. ad 5. Caiet. ibi & in sum. ver. delectatio, Ioan. Gerson. p. 2. operum, in compend. Theol. ubi de consensu in delectationem, Nau. c. 11. man. n. 13. Syl. ver. delectatio, q. 1. Med. q. 74. a. 6. docum. 1. Azor. l. 4. c. 6. q. 1. Less. l. 4. de iust. c. 3. dub. 15. Sanch. l. 1. moral. c. 2. n. 9. Probatur: Nam delectatio est quædam inclinatio appetitus in obiectum cognitum: Abhorret autem à recta ratione, appetitum rationalem inclinatum esse in obiectum turpe siue inhonestum. Ergo. &c. Confirmatur: Deliberatè delectari de opere fornicationis, omnium sententia, est peccatum mortale: ergo etiam delectari de alio quouis opere quod secundum se mortaliter malum est. Neque enim ratio discriminis afferri potest, sicuti notavit Armij. ver. cogitatio, n. 4. Quamvis aliter discurrat Vas. disp. 11. c. 3. & 4.



Locutus sum autem de delectatione voluntaria, quæ à D.D. morosa dicitur, non quòd moram temporis requirat; sed quia post plenam rationis animaduersionem, voluntas in ea acceptanda, siue consentiendo persistat, quod temporis instante fieri potest sicut notauit S. Th. 2. q. 74. a. 6. ad 3. S. Ant. p. 2. t. 5. c. 1. §. 5. Syl. l. c. dicto 4. Nau. c. 11. man. n. 13. Excludo igitur delectationem non voluntariā, seu non liberam: Cùm enim subita apprehensione obiecti turpis ante rationis animaduersionem excitata, appetitus naturaliter commouetur; talis motus est primò primus, & omni culpa carens. Sed etsi ratio aduertat motum sensitiuum oblectationis ex apprehensione mali obiecti concitatum; tamen facultas sensitiua, (phantasia inquam, & inde consequens appetitus) non est rationi subiecta despotice: sicuti seruus domino; (quomodo rationi pareret facultas loco motiua, v.g. manus, pes) sed politice, sicut ciuis consuli, cui etiam nonnumquam repugnat, testè Arist. 1. polit. c. 3 & 3. Eth. c. vlt. Experimur namque, non sicuti manus aduertente ratione, ac prohibente voluntate exercere se nunquam potest; ita etiam phantasiam, & appetitum sensitiuum: sed apprehensiones, & cogitationes identidem repulsas, velut muscas recurrere, inferioris appetitionis motus, repugnante rationali voluntate, excitari, sicuti in seipso expertus deplorat Apost. ad Rom. 7. *Sentio aliam legem in membris meis*, &c. Hinc itaque existit, quòd sepe, etiam post rationis animaduersionem, perseueret motus delectationis de obiecto prauo, sine villo voluntatis libero consensu, & absque culpa, sicuti notauit Caiet. ver. delectatio, §. circa morosas, San. l. 1. cap. 1. nu. 19. Hadr. de Euchar. q. 4. vbi ait, *Quamdiu ratio resistit, eius superare non potest, nulla culpa est, sed materia exercenda virtutis, & res magni meriti.*

- 6 Deinde locutus sum hætenus tantum de voluntario expresse ac directo, quod consistit in positio voluntatis consensu liberè acceptantis delectationem ex cogitatione mali obiecti ortam. Delectatio autem indirectè voluntaria duobus modis contingit: Primò, si homo voluntaria actione, v.g. aspectu, locutione, lectione causam præbet delectationi carnis, sciens aut probabiliter suspicans eam natura' iter inde oriuram. Tunc distinguendum est: Vel enim talis actio exercetur ob causam aliquam secundum se honestam, eamque vii em, vel necessariam, v.g. discendi, docendi, exhortandi gratia: tunc nulla culpa erit, sicuti ex communi docet Nau. in c. cogitationis, d. 1. de pœnit. Vel est actio vana, inuti is, v.g. aspectus, collocutio, lectio curiosa, sine directa intentione capiendi delectationem, & sine periculo consentiendi in delectatione, aut prauis operis executionem, tunc erit culpa venialis, sicuti docet Vasq. disp. 108. cap. 3. Corduba libro 1. quæst. 23. dub. 9. Sanchez lib. 9. de matr. disp. 49. n. 39. & 45.

- 7 Secundò id accidit, si homo seu à Diabolo iniectam, seu naturaliter exurgentem obiecti mali cogitationem, & hinc ortam delectationem sensitiuam plenè aduertens, eandè repellere, ad alia animū conuertendo, &c. negligat. Quod quidem si fiat, quia placeat res cogitata, & hinc ortus motus delectationis, erit positius voluntatis consensus in delectationem, siue morosa delectatio. Si autem ideo negligat, quia confusus de constantia voluntatis, cōtemnat delectationem partis inferioris naturaliter exortam, veluti passionem non voluntariam, & tentationem insufficientem ad incinandam voluntatem; tunc multo- rum est D.D. sententia, esse hoc peccatum duntaxat veniale. Ita enim docet S. Th. de verit. q. 15. a. 4. ad 10. Hadr. cit. q. 4. Caiet. l. c. Angelus, & Armilla ver. cogitatio. Na. in man. c. 11. n. 12. Angles 2. d. 37. q. 5. diffic. 4. concl. 2. pag. 265. Lopez. p. 1. instr. c. 2. §. quinto modo, Tolet. l. 5. c. 14. §. aduerte autem, Grassi p. 1. l. 2. c. 78. n. 3. Corduba cit. q. 23. dub. 10. ad 7. Sanch. l. 1. moral. c. 2. n. 13. Fundamen- tum huius sententiæ est: Quia licet inferior mali obiecti appetitus inordinatio ac deformitas quædam sit, non tamè magna & grauis, quando præter voluntatem ex naturæ

infirmirate oritur: quare eam sine rationabili causa per- mittere, cùm impediri possit, est sanè peccatum aliquod, sed non magnum ac graue, per se loquendo, & cessante periculo liberi consensus in delectationis motum. Quam doctrinam latè examinat Medina q. 74. a. 6. reijciunt verò D. Ant. p. 2. tit. 5. c. 1. §. 5. Azor l. 4. c. 6. q. 5. Less. l. 4. c. 3. dub. 15. n. 117. Valent. t. 2. disp. 6. q. 4. p. 3. Vasq. disp. 108. cap. 2. Becanus 1. 2. tr. 2. c. 5. q. 5. Fundamentum est: Quia consensus voluntatis indirectus & interpretatiuus æqui- ualet consensui directo & expresse: iste autem est consē- sus indirectus & interpretatiuus, quando, exorta delecta- tione sensitiua circa obiectum mortaliter malum, volun- tas post plenam rationis animaduersionem, potest ac de- bet malam appetitionem excutere, & tamen intermittit; ergo tunc delectatio sensitiua censetur voluntaria & mo- rosa; ideòq; mortaliter mala, perinde ac si directo volun- tatis consensu approbata esset.

Vtraque sententia probabilis est: neque assentior Vas- dicenti priorem improbabilem. Resp. enim ad fundamē- tum posterioris, consensum directum & consensum inter- pretatiuum non æquivalere in grauitate culpæ, maxime si loquamur de peccatis internæ appetitionis. Nam per- missio voluntatis eatenus ad culpam imputatur, quate- nus est alicuius mali seu incommodi, quod impediri po- test ac debet: quare si malum seu incommodum graue non sit, eius voluntaria permissio non potest ad culpam grauem imputari. Quòd autem inordinata commotio appetitus sensitiui, si naturaliter oriatur, graue malum censendum non sit, vel inde colligi potest, quia ob causā aliquam honestam, etiam non valde grauem, permitti potest, non auertendo animum à cogitatione vel actione vtili, cum qua homo scit carnis appetitionem coniunctam esse, modò absit periculum consensus Confirmatur ex cō- muni D.D. sententia, quam supra tradidi n. 6. Actione ali- qua vana causa præbere motui delectationis sensitiuæ, esse tantum peccatum veniale, eò quòd talis commotio, sup- posito hominis originali lapsu & naturæ infirmitate, non censetur graue malum. Ergo eadem ratione peccatum duntaxat, veniale est, motum delectationis sensitiuæ na- turaliter exortum sine iusta causa permittere, seu nō tollere applicatione animi ad alia cogitanda, agenda. Quia vtrumque est voluntarium indirectum & interpretatiuum: imò voluntario in causa affectus magis adscribendus vi- detur; cū ad eum agēs voluntariū etiam physicè concurrat.

Veruntamen, vt hæc sententia etiam practicè proba- bilis sit, requiritur, vt voluntas omittens carnalem dele- ctationem depellere, animum ad alia conuertendo, inte- rim exerceat actum formalis displicentiæ. Nam esto talis actus displicentiæ inefficax sit ad depellendum appetitum sensitiuum, est tamen efficax ad tollendum voluntatis cō- sensum; quippe cui actus displicentiæ formaliter & dire- ctè opponitur. Alioquin verò, si homo aduertens motū appetitus sensitiui in malū, actū displicentiæ in voluntate non eliciat, exponitur manifesto periculo volutarie ap- probationis seu consensus. Etsi enim simpliciter possibile sit voluntatem proposito sibi obiecto suspendere omnem actū, vt illud nec approbet, nec improbet, sed negatiuè se habeat: tamè id, præsertim in obiecto vehemèter alliciente est valde difficile, & moraliter ferme impossibile: vt proin- de homo proximo & probabili periculo cōsensus se expo- nat. Nā *mus in pera, ignis in sinu, serpens in gremio male suos remunerat hospites*, c. etsi Iudæos, de Iudæis, & causa 13. q. 1. post c. Ecclesiæ. Igitur concludo, & dico: Si homo orta delectatione sensitiua circa obiectum mortaliter malum, post plenā rationis animaduersionē, non eliciat actū displi- centiæ seu improbationis, talem delectationem censeri morosam & mortalem, quæ in Confessione necessariò ex- plicanda sit: Sin verò delectatio displiceat homini; ita vt simplici affectu cupiat eā abesse; licet non efficaciter, quia animū ad alia cogitanda, agenda negligit conuertere, cū facile possit, & speret etiā tali modo se commotionē sensi- titi-



sitiam depulsurum esse; tunc valde probabile est, tantum venialiter peccari: quamvis consultum, & omnibus conscientiarum securitatem amantibus consuetum sit, se accusare sine pravis cogitationibus tali etiam modo expellendis fuerint negligentes. Lege Nau. cit. c. 11. n. 14.

Affertio II. Oblectari iis absolute & secundum se, quae ideo tantum mala sunt, quia vel lege positiva, vel voluntario voto prohibita, non est mortale peccatum delectationis morosa. Ita Adrianus quodlib. 10 a. 2. Gabr. in 4. d. 15. q. 13. a. 3. dub. 3. Corduba lib. 2. q. 30. dub. 1. Sanch. l. 1. c. 2. n. 10. Ratio peti debet ex discrimine, quod est inter voluntatem efficacem, & simplicem affectionem delectationemve; quod illa tendit in obiectum cum omnibus suis adiunctis, siue circumstantiis: simplex autem affectio, quia sequitur simplicem obiecti cogitationem apprehensionemve, cuius proprium est prescindere, siue vnum siue altero ei adiuncto cogitare; tendere potest in obiectum praecisum a reliquis adiunctis siue circumstantiis. Hinc igitur fit, quod, si substantia obiecti secundum se mala non sit, sed tantum propter extrinsecam siue adiunctam positivae legis prohibitionem; tam apprehensivus intellectus, quam inde consequens motus appetitionis ac delectationis ferri possit in substantiam obiecti secundum se, absque omni culpa. Exemplum: Si cognita Ecclesiae prohibitione habeas voluntatem, seu propositum comedendi carnes die Veneris, habes quoque voluntatem praeviaricandi legem, ideoque peccas. Sin autem cognita lege Ecclesiastica, eadem die cogites atque oblectes te carniem esu absolute & praecise, non praeviaricaris ieiunii legem: quia lex prohibens carniem esum, non prohibet etiam cogitationem & animi oblectationem de carniem esu. Confirmatur: Saepe quis sine culpa tristatur de ieiunii praeccepto, vel edito voto, quod tamen observare proponit: Et poenitenti saepe displicet poenitentia a Confessario iniuncta, quam tamen perficere vult: Ergo similiter sine culpa potest aliquis oblectari in opere lege positiva prohibito, retinens interim efficax propositum opus non faciendi. Ceterum delectari de opere, v. g. carniem esu, quatenus legitimo praeccepto repugnat, semper est peccatum; cum pro obiecto habeat formalem inobedientiam, iuri naturali repugnantem.

Corollarium. Iactare se siue gloriari de opere, quod & quatenus secundum se malum est, v. g. de mendacio, fornicatione, homicidio secundum se; semper est peccatum mortale, vel veniale, iuxta operis qualitatem. Continet enim in se complacentiam, & comprobationem peccati. Quare id reprehenditur psal. 51. *Quid gloriaris in malitia, qui potens es in iniquitate.* At vero iactare se vel gloriari in opere, quod & quatenus secundum se malum non est; non continet peccatum eiusmodi approbationis: v. g. si gloriaris de corporis viribus, quia proximo die Veneris quatuor pondo carnis aude comediti, vel inimicum vno pugno prostravisti. Vide hac de re Sanch. l. 1. moral. cap. 3.

10 Restat aliquae quaestiones: Prima utrum sit mortale peccatum, ex re aliqua prohibita desiderium vel delectationem capere sub conditione, si prohibita non esse: Res. & dico I. Si appositae conditione verè aufert malitiam operis, non est mortale peccatum illud sub tali conditione desiderare, vel in eo delectari. Idque accidere solet tum in iis, quae solo iure positivo prohibita sunt; v. g. *Velle comedere carnes, nisi dies Veneris esset:* siue *Velle hunc non subiacere Ecclesiasticae interdicto, quo carnes comedere possent:* tum in iis, quae iure naturali prohibita; sed non ita quin per oppositam circumstantiam cohonestari possint: v. g. *Vt nā iudex esset, ut malefactorē istū occidere possent:* Si a Deo mihi potestas daretur, pradari vellē &c. Ita docet Adr. quodlib. 10. a. 2. con. 1. Ca. ver. cogitationum peccata, Azor l. 4. c. 6. q. 10. Sanch. l. 1. moral. c. 2. n. 23. Val. dis. 116. c. 2. Quapropter neque peccatum mortale est, per se loquendo coniugatus cupiat uxorem ducere sub conditione, si a sua liber esset: vel Religiosus si a professione liber esset: quod aliud non est, quam optare non esse religiosum, quod possit uxorem ducere & coniugio uti.

Atque ita etiam docet Na in c. si cui, d. 1. de poen. n. 1. Sunt tamen haec fatuae, & Diabolicae tentationes, inquit Caiet. quae ad peccatum ducere solent.

Dico II. Si appositae conditione malitiam operis verè non aufert, mortale peccatum est, opus ex se mortale sub tali conditione desiderare, vel in eo delectari. Ita Cai. Sanch. l. 1. c. c. exempla sunt: *Si volare possent occiderē hūc hominē: Nisi infamiam timerent vellē adulterari: Nisi sacerdos esset, vellē fornicari,* quo tamen casu aufertur malitia sacrilegij, manente malitia simplicis fornicationis.

Ceterum, quod Cai. Arm. ver. cogitatio, Sa ver. peccatum, n. 2. Val. dis. 116. c. 2. talē quoque actum mortali peccato liberat: *vellē fornicari, nisi peccatum esset: nisi Deus prohibuisset: vellē ulcisci, si licitum esset:* distinctione indiget. Si enim voluntas deliberatē feratur sub tali conditione in obiectum per se & suapte natura malum, committitur culpa mortalis, sicuti recte docet Adr. Azor Sanch. l. 1. c. c. Tum quia talis conditione impossibilis non aufert malitiam obiecti intrinsicē & substantialiter mali: ergo voluntas desiderando fertur in malum. Tum quia desiderium istud non est, quā optare, ut ordo & lex naturae immutetur: quod peius est quā, v. g. fornicari velle. Si autē alia dicentis intentio non sit, quā ostendere voluntatis suae, vel appetitus sensitivi malā propensionē, quae in consensum circa tale obiectum traheret, nisi Dei lex arceret: tunc nihil peccatur, sed propensio in malum recordatione diuinæ legis reprimitur: Et simile est, si Religiosus, v. g. dicat, *Nisi religiosus esset, hunc percutere:* significans se animi commotionē superaturum non esse, nisi religiosus esset. Peccat autē, si imaginando secularem se esse, oblectetur cogitata percussione hominis vindictae causa, sicuti bene explicat Sanch. cit. c. 2. n. 25. Similia dixi tract. superiore c. 6. num. 9.

Quaestio Secunda. An sit mortale peccatum morosa delectationis: si coniunx absente coniuge oblectet se cogitatione copulae maritalis? Eademque quaestio proponi solet de vidua, oblectante se recordatione copulae praeteritae: Itē de sponso desiderante, vel oblectante se in copula futura. Res. & dico I. Coniunx mortaliter non peccat, si de maritali copula, absente coniuge, cogitans rem cogitatam voluntate approbet, siue de ea gaudeat. Ita docet D. Ant. p. 2. tit. 5. c. 1. §. 6. Pal. in 4. d. 9. q. 1. a. 1. Cai. ver. delectatio morosa §. 3. est, Med. q. 74. a. 8. Val. dis. 113. c. 2. Sanch. l. 9. de matr. disp. 44. Et si contrarium sensisse videatur Syl. ver. delectatio, q. 2. Na. c. 16. num. 10. Azor t. 1. l. 4. c. 6. q. 8. Probatur: Mortalis malitia delectationis morosa sumenda est ex malitia obiecti siue rei cogitatae: copula autē maritalis malitiam non habet: ergo de ea cum voluntatis approbatione & gaudio cogitare, non est mortale peccatum morosa delectationis. Est tamen peccatum veniale, inquit Caiet. Cum nec necessitas, nec pietas talem mentis occupationem suadeat.

Ceterum tamen si, per se loquendo, idem quod de coniuge dictum fuit, de vidua quoque dici posset: nimirum mortaliter non peccare, si oborta cogitatione copulae carnalis cum marito defuncto, eam voluntate approbet: sicuti videre est apud Val. dis. 114. c. 2. Philiar. t. 1. de offic. sacerdotis, p. 2. l. 4. c. 18. Similiter de sponso, si oborta cogitatione copulae coniugalī futurae, eam vel desideret, vel simplici voluntatis affectione approbet, quae de re Cai. t. 1. opusc. tr. 14. dub. 2. Sanch. l. 9. de matr. disp. 47. n. 1. Quod idē Sanch. l. 1. moral. c. 2. n. 33. & Philiar. l. c. extendunt ad omnem voluntatis affectionem, etiam simplicis complacentiae conceptae ex cogitatione concubitus cum muliere, si vxor esset. Nā complacentia voluntatis inquit, cuius obiectum apprehensum bonum est, non est mortale peccatum; concubitus autem cum muliere apprehensa sub conditione & statu coniugij, non est malum, sed bonum obiectum: ergo etiam simplex voluntatis complacentia (& non solum desiderium, sicut Cai. existimat dub. 1.) de tali obiecto apprehensio a mortali peccato excusatur. Quamvis, inquam, haec speculatiue vera esse ponamus, tamen in praxi vix locum habet: sed ferme praesumendum est, cum eiusmodi voluntariis oblectationibus mortale peccatum concurrere: non solum propter periculum eli-



ciendi consensus in fornicationem abso'ute : sed multo etiam magis propter motum carnalem & sensitivum, qui naturaliter ex cogitatione coortus, si voluntate acceptetur, mortali peccato in innuptis non caret, uti notavit Nau. l. c. & mox dicam

Dico igitur II. Mortaliter peccat vidua, si voluntarie consentiat in motum delectationis sensitivum, qui ex recordatione copulæ maritalis naturaliter oritur. Quæ est omnium Doctorum sententia nominatim Caiet. cit. dub. 2. Nau. c. 16. man. n. 9. & 10. & in cit. c. si cui, n. 2. Syl. ver. de delectatio, q. 1. Sanch. cit. disp. 47. conclus. ult. Sa. ver. luxuria. num. 12. Idemque sentiendum de sponso si in sensitivam delectationem, vel carnis commotionem ex cogitatione futuri actus conjugalis exortam, de iberatè consentiat. Quæ dere Sanch. l. c. concl.

Porro licet Nau. c. 16. n. 10. Philarch. l. c. Azor. cit. c. 6. q. 8. existiment, etiam conjugatum mortaliter peccare, si voluntarie delectetur commotione sensitiva ac venerea, orta ex conjugis absentis apprehensione; eo quod talis commotio tunc ordinari non possit ad actum conjugalem seu potius ordinetur ad pollutionem. Opposita tamen sententia Caietan. ver. delectatio, Sanch. l. 9. de matrin. disp. 44. num. 3. Vasq. dif. 113. cap. 2. n. 4. probabilitate non caret. Cum enim matrimonium à mortali peccato excuset tactus impudicos inter coniuges non copulandi, sed solius voluptatis gratia inlicitos, iuxta communio rem sententiam apud eundem Sanchez. l. c. n. 11. & seqq. consequens est, similiter etiam sensitivam commotionem ex absentis mariti cogitatione ortam, & voluntarie acceptam à culpa mortali excusari. Ratio est, quia hæc omnia in conjugibus, per se loquendo, tendunt ad opus conjugale: per accidens autem est, quod ob absentiam, vel simile impedimentum opus non exerceatur. Suppono autem in his casibus abesse probabile pollutionis periculum: alioquin certum est peccaturum coniugem, si animadvertat ex apprehensione illa pollutionem prouenturam esse.

Quæstio tertia. Vtrum delectatio morosa speciem peccati accipiat à circumstantia personæ circa quam; ita ut qui se oblectat cogitatione copulæ cum moniali v. g. internum etiam sacrilegium committat, ac circumstantiam personæ necessariò in Confessione explicare debeat? Res. cum Vasq. disp. 11. cap. 2. Azor. cit. cap. 6. q. 3. Sanch. lib. 1. moral. cap. 2. num. 11. Qui simpliciter ac præcisè oblectat se cognitione concubitus cum muliere, quatenus v. g. pulchra est, & Veneret delectationis obiectum; non item quatenus est conjugata, Deo sacra vel consanguinea. is vnum simplex mortale peccatum internæ delectationis morosæ, contra virtutem temperantiæ, committit. Alia verò ratio est, si desideret vel proponat fornicari cum ea, quam monialem, consanguineam vel alienam vxorem esse non ignorat. Ratio discriminis est; quia, ut supra dixi, propositum fertur in obiectum cum omnibus circumstantiis consideratum: simplex autem complacentia, cum sequatur simplicem & præcisivam intellectus operationem, potest ferri in vnum, ita ut non simul feratur in alterum ei adiunctum. Præterea, si quis voluntarie oblectet se tactu vel amplexu mulieris conjugatæ, aut consanguineæ, quavis sine proposito fornicandi, debet circumstantiam personæ in sacra Confessione explicare, sicuti ex communi docet Sanch. de matrin. l. 9. disp. 46. num. 18. Cum enim tactus libidinosi suapte natura referantur ad copulam, ideo ex ea speciem malitiæ accipiunt, sicuti dicam lib. 3. sect. 4. num. 13.

## CAP. VII.

De peccatis ex ignorantia: ex infirmitate:  
& ex certa malitia.

## SUMMARIUM.

Peccata alia sunt ex ignorantia; alia ex natura infirmitate: &

alia ex malitia.

1. Peccare ex contemptu est, ideo legem aut præceptum violare, quod nolis ei esse subiectus.
2. Contemptus continet peccatum specialis inobedientia: quare qui legem aut præceptum ita transgreditur, debet circumstantiam contemptus in Confessione explicare.
3. Si Carthusianus ex contemptu regula carnes comedat, triplicis speciei peccatum committit.
4. Omnis inobedientia ex formali contemptu, est peccatum mortale.
5. Etiam ea, quæ solum in consilio sunt, ut Sacramentum extremae unctionis, aqua benedicta asperersionem, &c. ex formali contemptu negligere, est peccatum mortale.
6. Contemptus materialis, siue ipsius operis, puta si quis regulam aut præceptum transgreditur, quia parvi momenti aestimati, est tantum venialis culpa.
7. Frequens relapsus seu consuetudo peccandi propriè non continet contemptum: sed solum interpretariue, secundum præsumptionem fore externi.

Hæc est alia peccati divisio, sumpta ex S. Aug. l. 8. q. 26. S. Th. q. 76. & seqq. Quod aliud est peccatum commissum ex ignorantia: intellige eam quæ est causa operis, vincibilis; sed non affectata. At verò ignorantia affectata, seu directè volita, quæ voluntarium non minuit, potius peccatum malitiæ quàm ignorantia constituitur censetur: quia nescit ignorantia est, nolle autem siue superbia, ait S. Greg. l. 2. moral. c. 11. & videri potest S. Bern. ep. 77. ad Hugonem Victorinum. Aliud verò est peccatum ex naturæ infirmitate, siue passione animi, quæ si abesset peccatum non fieret; ut si hominem ex vehemēte passione iræ occidas. Merito autem passio à recta ratione exorbitans, naturæ infirmitas & agritudo appellatur: quandoquidem homini, quæ homo id est, anima rationali seu mente præditus est, adversatur. Quare dixit S. Th. q. 71. a. 1. ex S. Aug. l. 3. de arb. tr. c. 13. Vitium esse contra hominis naturam, virtutem secundum naturam. Loquimur autem de passione antecedente & voluntarium minuyente: non autem consequente: cum enim homo videret in se excitat passionem seu concupiscentiam, ut eo ferventiùs peccare possit, talis passio non minuit libertatem voluntatis, & malitiam peccati: cum ipsa non sit prima radix peccati: sed sola voluntas excitans passionem: quare id censetur peccatum ex malitia. Idque tertium membrum divisionis est peccatum inquam ex certa malitia: cum quis neque ignorantia vel errore inductus, neque propter passionem inclinationem, sed ob solam voluntatis perversionem, temporale commodum bono honesto hæc & nunc deliberatè preferens, peccat, sicuti docet S. Th. q. 78. a. 1. Azor l. 4. c. 2. q. 8.

Inter hæc tria peccatorum genera gravissimum est, quod fit ex malitia: quia est cum plena libertate. Etenim libertas duobus modis in homine minui, vel tolli potest; vel ex parte intellectus, & id facit ignorantia: vel ex parte appetitus sensitivi, & id facit passio: si ergo tam ignorantia quàm passio absit, dicitur peccatum ex mera voluntatis malitia, quod nullam omnino excusationem meretur. Inter alia verò duo genera, peccatum ex passione gravius est peccato ex ignorantia: quia hoc magis directè minuit voluntarium seu liberum: cum impediatur radicem eius: ideoque etiam difficilius vincitur. Vide S. Bonau. in 4. d. 22. a. 2. q. 3. Nau. in c. sciendum n. 3. d. 2. de penit. & Petr. Sotum p. 2. instit. sacerdot. de ratione medendi peccatis, lect. 3.

Porro his tribus peccatorum membris addi solet quartum, quod est peccatum ex contemptu. Peccare ex contemptu est ideo legem vel præceptum transgredi quod nolis esse subiectus legi, ex affectu indignationis erga legem vel legis latricem potestatem, quasi vilis & abiecta esset: Et eadem ratio est de præcepto. Ita hanc rem explicat S. Th. 2. 2. q. 186. a. 9. ad 3. Syl. ver. contemptus, Caiet. cod. Nau. c. 21. man. n. 42. Vasq. dif. 158. c. 4. n. 34. Val. t. 2. dif. 7. q. 5. p. 6. casus. San. l. 1. moral. c. 5. n. 8. Suarez. de le. l. 3. c. 28. Corollarium I. Qui legem vel præceptum Superioris ex contemptu violat, dupliciter peccat: & quia præceptum siue legem, v. g. ieiunij transgreditur: & quia præceptum pote-



potestatemve præcipientem vilipendit. Estque hoc posterius grauius peccatum, & causa prioris, sicuti notant Caiet. & Valent. ll. cc. Sanch. num. 9. Suar. num. 25. Quapropter in sacra Confessione explicanda est circumstantia contemptus; tanquam propriam peccati speciem continens: cum tamen explicandum non sit, si ex alia causa, v. g. passione iræ, amoris ad peccandum motus sis; nisi talis circumstantia peccatum adeo minuat; ut ex mortali veniale fiat.

Corollarium II. Peccatum ex contemptu continet in se tumorem superbiæ, vel saltem inde originem trahit: quando homo indignum & alienum à se arbitrat. Superioris præcepto vel legi subiectum esse. Ita indicat S. Bern. lib. de præcept. & dispens. c. 12. *Vbiq; & culpabilis negligentia, & contemptus damnabilis est: Differunt autem, quod neglectus quidem languor inertie est, contemptus vero superbiæ tumor.*

3 Corollarium III. Peccatum ex contemptu propriè in se continet speciale peccatum inobedientiæ, quæ dici solet formalis & directa inobedientia, sicuti docet S. Thom. 2. 2. q. 105. a. 1. & sequitur Nau. c. 23. num. 32. Vasq. num. 37. Sanch. num. 9. Est enim notandum ex doctrina S. Thom. 2. 2. q. 104. a. 2. ad 1. quam explicat Vasq. 2. 2. disp. 98. c. 3. Sicut obedientia omnium virtutum, quarum actus in præcepto sunt, generalis conditio est; sed specialis virtus efficitur, cum aliquis opus præceptum exequitur formali intentione ac motu obediendi: Ita etiam inobedientia omnium quidem peccatorum generalis conditio est; (quia omne peccatum *aliquo* est, siue transgressio legis vel præcepti, adeoque materialis inobedientia) fit autem peccatum speciale, si formali ac directa intentione legem vel præceptum violes, quia non vis ei esse subiectus; ob affectum superbiæ, vel abiectam estimationem, contemptumque præcepti, aut Superioris præcipientis.

4 Corollarium IV. Si Carthusianus ex contemptu regulæ suæ carnes comedat, triplicis speciei peccatum committere videtur: vnum contra virtutem specialis obedientiæ; alterum contra virtutem temperantiæ; cuius intuitu statuta est abstinentia; tertium contra virtutem religionis, quia viola. votum suum, quod in professione præstitit obediendi secundum regulam, ut docet Vasq. 162. c. 3. num. 6. Sanchez lib. 4. moral. c. 11. num. 25. iuncto lib. 6. c. 1. num. 6. Contra verò, si Carthusianus v. g. abstinentiam in regula præscriptam obseruet, triplicis virtutis actus exercere potest: I. Si id agat ex motu virtutis obedientiæ, ut satisfaciatur voluntati Fundatoris & Prælatorum. II. Si id agat ex motu virtutis religionis, ut satisfaciatur voto suo, quod secundum regulam edidit. III. Si id agat ex motu virtutis temperantiæ.

Corollarium V. Omnis inobedientia, seu transgressio præcepti (etiam circa rem minimam) ex formali contemptu, est peccatum mortale. Quod clarè docet S. Bernar. lo. cit. *Contemptus in omni specie mandatorum pari pondere grauis, & communiter damnabilis est: & consentit Syl. q. 2. Less. lib. 2. c. 46. num. 45. Suarez lo. cit. num. 24. Sanchez lib. 1. moral. cap. 5. num. 11. Ratio est, quia tam paruum quam magnum præceptum à legitima potestate descendit, quam vilipendere intolerabilis quædam superbia, atque in Deum redundans veluti blasphemiam est, conuenienter verbis Christi apud S. Lucam*

cap. 10. *Qui vos audit me audit: & qui vos spernit me spernit.* Et Apost. ad Rom. 13. *Qui resistit potestati, Dei ordinationi resistit.* Cuius rationem antè dederat: *Non est enim potestas nisi à Deo.* Et Salomon Proverb. 8. *Per me reges regnant, & legum conditores iusta decernunt.* Quibus consentit dictum S. Bern. *Siue Deus, siue homo; Vicarius Dei, mandatum quodcumque tradiderit, pari profecto obsequendum est cura, pari reuerentia deferendum; ubi tamen Deo contraria non præcepit homo.*

Adde I. Etiam ea, quæ non in præcepto, sed solum in consilio sunt, v. g. Religionis statum, extremæ vnctionis Sacramentum, aquæ benedictæ asperersionem, & his similia ex formali contemptu, aut vilipensione negligere crimen mortale esse, teste Caiet. ver. contemptus, Nau. c. 23. num. 41. cum Glos. in c. quis autem, d. 10. ubi ait; *Aliud est contemnere, aliud non parere: nam consilio sine culpa non paretur; sed non sine culpa contemnitur.* Eandem doctrinam Glos. q. 3. accommodat ad Superioris admonitionem.

Adde II. ex S. Thom. 2. 2. q. 186. a. 9. ad 1. Et si regulæ siue ordinationes Ordinis Prædicatorum (eademque est ratio de regulis Societatis Iesv) non obligent sub culpa; sed tantum ad sustinendam pœnam, si imponatur; nihilominus earum transgressionem contemptu formali esse peccatum mortale.

Loquimur enim de formali contemptu legis, præcepti, regulæ, consilij, qui redundat in eorum auctoritatem Prælatum, legis latorem, cuius auctoritas & potestas eo ipso vilipenditur, quod eius præceptum, ordinatio, statutum vilipenditur. Alius autem est contemptus rei præceptæ, ipsiusve operis, qui dicitur solet materialis: cum quis legem, regulam, aut præceptum ideo transgreditur, quia videtur esse exigui momenti: Tunc autem non legislatoris, aut Prælati auctoritas; sed legis, vel præcepti materia vilipenditur, ac proinde venialem culpam non excedit, sicuti notarunt Less. Sanch. ll. cc. Suar. n. 21. & ita intelligendus Caiet. ver. contemptus, §. aduertehic.

Simili ratione distinguere possumus contemptum Legislatoris, aut Prælati, quod aliis sit formalis, per quem ipsa potestas secundum se vilipenditur, alius verò materialis, per quem contemnitur Prælatus, quæ talis homo est, defectibus prudentiæ, eruditionis, &c. obnoxius: vel erga quem indignationem geris, & ideo eius præceptum implere non vis; tunc fieri potest, ut ob materiæ leuitatem, solum venialiter pecces: sed plerumque periculosè, sicut notauit Less. n. 45. Suar. n. 24. Quare bonum consilium est, erga Superiores suos bene affectum esse. Vide Caiet. l. c. Alph. de Castro lib. 1. de lege pœnali, c. 5. docum. 6. in conclusionibus.

Denique in externo foro est quidam contemptus interpretatiuus. Si enim aliquis frequenter, siue ex consuetudine in aliquo genere delinquat, præsertim post admonitionem, punitionemve, præsumitur legem, vel Magistratum contemnere, sicuti notauit Syl. q. 1. Nau. c. 23. num. 42. Reipsa tamen relapsus, vel peccandi consuetudo non includit contemptum: quamuis ad eum disponat, atque inducat, iuxta illud Proverb. 18. *Impius, cum in profundum venerit peccatorum, contemnit, & docet* S. Thom. cit. q. 186. a. 9. ad 3. Castro cit. docum. 6.



## TRACTATUS QVARTVS.

DE

HVMANIS LEX-  
GIBVS.

## CAP. I.

## QVID SIT LEX.

## SUMMARIUM.

- 1 Lex dicta videtur, quod sit lecta vincendi regula.
- 2 Lex est recta agendorum ratio, à publica potestate communitati denunciata, cum voluntate eam perpetuo obligandi.
- 3 Ad constitutionem legis tria concurrunt: Iudicium practicum de agendo; voluntas obligandi, imperij denuntiatio.
- 4 Lex debet esse honesta, iusta, possibilis, etilis, pro communis utilitate lata, denique constans ac perpetua.
- 5 Lex differt à privilegio, item à præcepto seu mandato.



EXEM à ligando dictam esse arbitratur S. Thom. 1. 2. quæst. 90. a. 1. quod ad sui obligationem subditos liget, iuxta illud Hierem. 2. *Constituisti iugum meum, rupisti vincula mea.* Isidorus verò lib. 5. Etymol. cap. 3.

à legendo deriuat: quod lex scribi & publicè proponi soleat, ut ab omnibus legatur.

- 1 Rectius fortasse Cicero lib. 1. de Legibus à delectu deducit, quasi lex sit lecta viuendi regula & norma. Quam derivationem secutus fuit auctor quæstion. noui testamenti quæst. 15. apud S. August. tom. 4. vbi ait: *Lex à legendo dicta est, ut de multis quid eligas, scias.*

Duplex est lex; naturalis, & positua. Lex naturalis aliud non est, quam recta hominis conscientia; quam tract. 1. cap. 2. dixi esse participationem quandam legis æternæ in creatura rationali, & docet S. Thom. 1. 2. quæst. 91. a. 2. ad 1. Positua lex est, quæ ex rerum natura necessariò non prouenit, sed magistratus libera positione, aut determinatione. Diuiditur in diuinam legem, ac humanam. Leges diuinæ posituæ aliæ iam nullæ sunt, nisi circa fidem, sacramenta, & sacrificium, de quibus omnibus proprijs locis agendum. Quare ex instituto ferme tantum dicimus hîc de legibus humanis, tum Ecclesiasticis, tum civilibus.

- 2 Lex definiri potest ex S. Thom. 1. 2. quæst. 90. præsertim a. 4. *Recta agendorum ratio, à publica potestate communitati denunciata, cum voluntate eam perpetuo obligandi.*
- 3 Hinc collige, ad constitutionem legis (posituæ, quippe cui magis propriè tradita definitio competit) tria necessariò concurrere. I. est iudicium siue conclusio practica rerum à Communitate agendarum, in Principe vel Magistratu residens. Recte tamen monet Molina tract. 5. de iustit. disput. 46. conclusiones practicas de rebus agendis Iureconsultorum, seu Consiliariorum prudentia fabricatas accedente Principis voluntate, & auctoritate vim legum sortiti: *Omnia enim nostra facimus*, inquit Iustinianus in l. 1. Cod. de iure vet. enucl. *quibus auctoritatem nostram impertimus.* II. est Principis vel Magistratus voluntas Communitati aliquid præcipiendi, vel prohibendi. Tamen enim subditi sciunt Superiorem indicare consuetum fore, ut aliquid ab ipsis agatur, idemque optare; si tamen ille voluntatem non habeat eos obligandi, non oritur lex seu præceptum, sicuti notauit Ca-

stro lib. 1. de lege pæn. c. 1. in fine, Gabr. in 3. d. 37. quæst. vnic. III. & præcipuum est, actus externus intellectualis prudentiæ, qui dicitur imperium: & est oratio, per quam voluntas Superioris obligare volentis subditis denunciatur: *Facite hoc: volo ut fiat.* Ita S. Thom. quæst. 17. a. 1. & quæst. 90. a. 1. & 4. ex Aristot. 10. Ethic. cap. vltim. cum ait: *Lex vim habet cogentem, qua quidem est sermo ab aliqua prudentia siue mente profectus.* Et in epist. ad Alexandrum ante libros Rhetoricæ: *Lex est oratio, quedam, qua communis ciuitatis consensu definita, iubet quo pacto unumquodque agendum sit.*

Confirmatur I. Nam ob primum eorum, quæ ad legis constitutionem necessaria esse dixi, leges Dei in sacra Scriptura appellantur iudicia Dei, Psalm. 18. & 118. ob secundum, voluntates Dei Psalm. 32. & 142. ob tertium, sermones & eloquia Dei, Psalm. 11. & 118.

Confirmatur II. In Principum quoque constitutionibus ferme hæ voces ingeminantur: *Decernimus, volumus, præcipimus*: Porro ex his rectè colligit Ludouic. Miranda in manuali Prælat. tom. 1. quæst. 26. a. 4. Syl. ver. obedientia, quæst. 1. cum S. Thom. de verit. quæst. 23. a. vltim. Quod Regulares, ratione voti obedientiæ, non teneantur exequi ea, quæ sciunt Prælatos velle, nisi accedat externum præceptum, quo ipsis Prælati voluntas & obligandi intentio intimetur. Quamuis consultum sit, & ad laudem atque excellentiam regularis obedientiæ spectet, quodcunque signum iustæ voluntatis Prælati instar præcepti habere, suamque voluntatem conformare.

Legis condiciones siue proprietates Isidorus nobis tradit lib. 1. Etymol. c. 21. relatus in d. 4. c. 2. I. Lex debet esse honesta: quæ conditio respicit materiam legis, secundum dictum eiusdem Isidori lib. 5. c. 3. & refertur c. consuetudo, d. 1. *Lex erit, quod ratione constituerit, religioni conueniat, disciplina congruat.* Et consentit S. Aug. lib. de vera religione cap. 31. *Conditor legum temporalium, si vir bonus est & sapiens, illam ipsam consulit æternam legem, &c. ut secundum eius immutabiles regulas, quid sit pro tempore vitandum, iubendumque discernat.* Et lib. 19. de ciuit. c. 21. *Non enim iura dicenda sunt, vel putanda iniqua hominum constituta; cum illud etiam ipsi ius esse dicant, quod de iustitia fonte manauerit.* Vide S. Thom. q. 96. a. 4. vbi ait, *tales leges non obligare in conscientia: imò neque seruari posse, si legi superioris Dei repugnent: Nam obedire oportet Deo magis, quam hominibus*, Act. 5. Quemadmodum etiam Proconsuli non obtemperatur contra mandatum Imperatoris, sicut argumentatur S. Aug. de verbis Domini, serm. 6. c. 8.

II. Lex debet esse iusta. Hæc conditio respicit formam legis, quæ seruata æqualitate proportionis, subditis secundum eorum vires & facultates, proposita esse debet, sicuti explicat S. Thom. cit. a. 4. Syl. ver. lex, quæst. 5. Carbo lib. 6. de legibus: disput. 10. Suar. lib. 1. de legibus, cap. 9. num. 14. Quare si lege taxetur pretium frumenti, ita ut vna pars ciuitatis taxationem seruare debeat, altera non debeat; iniqua est lex: nisi causa aliqua eiusmodi discrimen postulet. Qua de re Valsq. disput.



155. cap. 1. Item, si lege lata subditis imponatur tributum, quod æquè pauperes ac diuites pendere debeant, v. g. singuli 10. aureos, iniusta est lex. Similiterque, si aliquibus immunitas à soluendis tributis à Principe concedatur, ea conditione, ut alij subditi plus grauari debeant, iniusta est dispositio, uti annotauit Abb. in c. 2. de immunit. Eccles. num. 16. Vide Alph. de Castro cit. cap. 1. non longè post princip. & c. 5. docum. 2.

III. Lex debet esse *possibilis*, secundum naturam, patriæ consuetudinem, loco temporique conueniens. Talis non esset lex quadragesimalis ieiunij in solo pane & aqua; vel quæ ciuibus omnia conuiuia prohiberet, ait Vasq. l. c. Verùm de hac conditione plura infra.

IV. Lex debet esse *necessaria vel utilis*. Nam alioquin, tanquam sine ratione lata superuacanea censetur.

V. Nullo priuato commodo, sed pro communi ciuium utilitate conscripta. Quæ conditio duas in se partes continere videtur: I. Quòd legem oporteat ad communitatem latam esse. Nam lex est commune præceptum; communis Reipubl. sponsio. l. 1. ff. de legib. Et l. 2. ff. eod. Lex est communis sponsio ciuitatis, ad cuius præscriptum omnes, qui in ea Reipubl. sunt, vitam instituere debent. Et l. 8. Iura non in singulas personas, sed generaliter constituuntur. In quo differt à priuilegio, quæ est lex priuata siue personalis, sicuti dicitur in l. 1. ff. de Constit. Princ. & notauit Gl. in c. 2. d. 4. consentiente Cicer. lib. 3. de legib. Maiores nostri in personas priuatas leges ferri noluerunt: id est enim priuilegium. Quamquam, si priuilegium alicui personatum generi concessum, consideretur ratione aliorum, qui immunitatem personis priuilegiatis seruare tenentur, eatenus legis rationem habere censetur, uti Suarez notauit lib. 1. c. 14. n. 8. II. Quòd legem oporteat in commune, siue Reipubl. commodum cedere, sicuti notauit Gl. in cit. l. 1. ff. de legib. S. Thom. q. 90. a. 2. Et docet Arist. lib. 1. Rhet. c. 4. ubi ait, *Salutem ciuitatis in legibus positam esse*. Neque obstat, quòd obijcit Castro lib. 1. de lege pœn. c. 1. iustas esse leges tributorum, cum tamen non ad communem ciuium, sed solius Principis utilitatem referantur. Rectè enim ipsemet respondet; Tributaita ad Principem spectare, ut simul etiam in Reip. commodum redundent: quandoquidem eo fine ac pacto Principi penduntur, ut is Remp. tueatur ac gubernet. Simili ratione plures aliæ leges sunt, quæ proximè commodum certi generis personarum, puta pupillorum, militum spectant, remotè tamen ad Reipublicæ salutem redundare debent, sicuti notauit Suarez lib. 1. c. 7. num. 6.

Hinc verò oritur VI. legis conditio. Quòd eius obligatio constans & perpetua sit: quia ad communitatem fertur Reipublicæ causâ. In quo differt à præcepto siue mandato, tenente ad personas singulares, cum quibus plerumque extinguitur; imò etiam per mortem mandantis siue præcipientis. Qua de re Syl. ver. mandatum, q. 3. Vasq. disput. 151. c. 3. Suar. lib. 1. de legib. cap. 10. num. 9. Lex autem perpetuò manet ob continuam successionem communitatis: neque extinguitur, nisi vel à legislatore eiusve successore reuocetur, vel consuetudine abrogetur; vel ob rerum mutationem inutilis fiat, & Reip. incommoda, de quibus infra.

Sunt autem dictæ conditiones adeò necessariæ, ut, si aliqua earum desit, lex non sit. Quemadmodum de vna eius præcipua conditione S. August. dixit lib. 1. de lib. arbit. c. 5. *Mibi lex esse non videtur, quæ iusta non fuerit*. Porro aliam legis conditionem adfert Isidorus l. c. quæ tamè non ita, sicut reliquæ, ad legis essentiã pertinet; ut sit manifesta, ne aliquid per obscuritatem in captionem contineat.

## De Promulgatione Legis.

### SUMMARIUM.

1 Lex publicè in curia Principis promulgata, quatenus est suar-

te, statim habet essentialem vim obligandi omnes subditos licet secundum actum non astringat inuincibiliter ignorant.

- 2 Ad substantiam legis non requiritur scriptura: sed sufficit eam voce vel alio signo denuntiata esse.
- 3 Si legislator tempus adiciat, ex quo lex sua obligare debeat: incipit eius obligatio secundum voluntatem ita statuentis.
- 4 Si legislator nullum tempus adiciat; discrimen est inter legem Imperatoriam & Pontificiam: illa enim antè obliganda vim non acquirit, quàm elapso tempore bimestri, post factam promulgationem in singulis prouinciis: Pontificia autem, simul ac in curia Romana promulgata est, in toto orbe Christiano obligandi vim habet, quatenus est ex parte legis.
- 5 Cur diæcesanos absentes lex Roma promulgata non statim obliget, id non prouenit ex defectu legis: sed alicuius conditionis accidentalis, puta quia eam ignorant.
- 6 Elapsis duobus mensibus, post promulgationem legum Cæsarearum factam in metropoli prouincia, ignorantia probabilis non præsumitur, sed ab allegante probari debet.
- 7 Lex etiam Ecclesiastica, si sit irritans alicuius actus iure naturali & diuino alioquin subsistentis, plerumque censi non debet effectum sortiri, priusquam in diæcesi promulgata sit.

CONSTAT ex præcedenti cap. & docet S. Thom. quæst. 90. a. 4. ad legis essentiã requiri, ut promulgata siue Communitati denuntiata sit. Cum enim lex sit communis viuendi regula, dux, index; publicari debet, ut omnes secundum eam suas actiones instituere possint; sicuti indicatur in l. 9. C. de legibus: *Lebes sacratissima, quæ constringunt hominum vitas, intelligi ab omnibus debent*.

Verùm necesse non est, legem omnibus ac singulis à Communitate denuntiari, vel innotescere; sed cum primum publicè, v. g. in curia, proposita fuit, ut ab vna Communitatis parte ad alios eiusdem Communitatis notitia legis deferri possit; censetur lex, quatenus est ex sua parte, consecuta essentialem vim obligandi omnes. Quamquam quoad actum secundum, id est, ut reipsa aliquem obligatione præcepti cōstringat, requiritur eam inuincibiliter non ignorari. Qua de re S. Thom. cit. a. 4. ad 2. Nau. lib. 1. consil. 1. de constit. q. 4. & in man. cap. 23. n. 44. & 45. Mol. tr. 5. disp. 70. Sotus lib. 1. de iust. q. 1. a. 4. Rodriq. lib. 1. regul. 99. q. 6. a. 4. Vasq. 1. 2. disp. 56. cap. 2. Et sumitur ex c. 1. de concess. præben. in 6. ibi, *quòd lex seu constitutio, & mandatum nullos astringunt, (actu secundo) nisi postquam ad notitiam peruenerint eorumdem; aut nisi post tempus, infra quod ignorare minimè debuissent*. Etenim sicut ignis habet quidem naturalem potestatem vrendi omnes; sed neminem vrit, nisi quem propinquum comprehenderit; ita etiam lex promulgatione acquirit velut essentialem omnes obligandi potestatem; sed actu ipso obligat illos tantùm sub peccato vel pœna, qui eius notitiam acceperunt, vel accipere culpa sua neglexerunt. paulò aliter circa hanc rem discurrit Suarez lib. 3. de legib. c. 17. num. 3. & seqq.

Quæstio Prima. Vtrum lex in scripto promulgari debeat? Resp. ex c. institutionis, 25. q. 2. Scripturam ad legis substantiam non requiri; sed voce etiam, aliòve signo Communitati denuntiari posse. In qua sententia Aristoteles fuit, ita inquires lib. 10. Ethic. c. 9. *Scriptæ sint leges, an non scriptæ, nihil referre videtur*. Neque obstat, quòd Isidor. ait lib. 5. Etymol. c. 3. *Lex est constitutio scripta*. Et lib. 1. c. 10. *Inter legem & morem hoc interest, quòd lex scripta sit, mos vetustate probata consuetudo*. Et iustinianus in Instit. de iure naturali, gentium & ciuili. *Ius aliud est scriptum, aliud non scriptum: scriptum ius est lex, &c. Non scriptum ius est, quod usus comprobauit*. Non enim hæc ideo dicuntur, quòd ad legis substantiam scriptura requiratur; sed quòd lex plerumque in scriptum redigatur, ut perpetuatâ memoriã, inuoluta perseueret.

Quæstio secunda. Vtrum lex statim ac scripto vel voce publicata est, obliget subditos, qui inculpate ignorant non sunt? Et vtrum satis sit eam in Principis curia publicari; an verò in singulis etiam prouincijs promulgari debeat? Respond. & dico I. Si legislator tempus adiciat,



ex quo legem suam obligare velit; v. g. statim ac in curia, in metropoli, in singulis ciuitatibus, parochijs promulgata est; vel elapso vno, altero ve mense post promulgationem: (quo pacto Concilium Trident. sess. 24. c. 1. reform. matrim. voluit, vt post. 30. dies à publicato decreto in quauis parochia, matrimonia clandestina irrita essent) tum lex vim obligandi sortitur secundum voluntatem legislatoris, sicuti docent Abb. c. 2. de constit. n. 7. Nau. cit. q. 4. Mol. cit. disp. 70. n. 4. Azor. t. 1. lib. 5. c. 3. q. 2.

4. Dico II. Si legislator nullum tempus adijciat, distinguere oportet inter legem Imperatoriam; & Pontificiam, vel generalis Concilij. Nam illa ex ipsius Imperatoris voluntate (quam rubrica Authentice 66. collat. 5. tit. 16. *Vt facta noue constitutiones*, &c. indicat, & communis vsus, Doctorumque consensus confirmat) obligandi vim non anteacquirat, quàm elapso bimestri spatium post publicationem in singulis prouincijs; vt omnis imparitas, confusio, & querimonia populorum latè diffusorum euitetur. Ad quam procul dubio constitutionem respexit Pius IV. in sua Bulla super declaratione temporis ad obseruanda decreta Oecumenici Trident. Concil. verbis illis; *Quia tamen iure etiam communi Cæsareo sancitum est, vt constitutiones noue vim non nisi post certum tempus obtineant*. Vide Doctores apud Suar. lib. 3. deleg. c. 16. n. 10. à quibus discessit Vasq. disp. 156. cap. 2.

Cæterum Imperatoria illa constitutio locum non habet in statutis inferiorum Principum vel ciuitatum, quippe quorum iurisdictio angustior est, sicut notauit Abb. cit. n. 7. Armilla. ver. lex, n. 11. San. 8. Azor cit. q. 2. Neque locum habet in legibus Principum ac Regum Romano imperio non subiectorum; quibus Authentica illa nihil præscribere potest, sicut notauit Vasq. l. c. n. 10. Suarez n. 14. Quare inspiciendum est, quid vel propria lege, vel consuetudine singulorum Regnorum, Ducatum, municipalium ciuitatum, &c. in hac re receptum sit.

Lex autem Pontificia, simul ac in Romana curia promulgata est, omnem in toto Christiano orbe obligandi vim acquirit, quatenus est ex sua parte. Quæ est communior DD. sententia Syl. ver. lex q. 6. Azorij, Suarez, Vasq. ll. ce. Gregorij de Valentia to. 2. disp. 7. q. 5. p. 5. §. Controuersia autem. Rodriq. lib. 1. canon. qq. q. 6. a. 4. contra Abb. c. 2. de constit. n. 7. Armillam cit. n. 11. Nau. c. 23. n. 44. man. Sotum lib. 1. de iust. q. 1. a. 4. Molin. to. 2. disp. 395. arbitantes, eandem rationem esse Pontificiæ legis, quæ est Imperatoriæ; quia vbi canonico iure nihil dispositum reperitur, secundum civiles leges procedi debeat, iuxta c. 1. de noui operis nuntiatione, &c. si in adiutorium, d. 10. Sed communior sententia probatur: Quia lex ad sui valorē suapte natura plus nõ postulat, quàm vt semel v. g. in curia principis publicetur, vnde deinde in aliorum subditorum notitiam deuenire potest: Neque etiam Ecclesiastica aliqua constitutio extat, quæ maiorem publicationem, aut temporis aliquod interuallum, post primam in curia promulgationem, requirat: Ciuilibus autem illa authentica nullum modum aut formam Pontificijs vel Ecclesiasticis legibus præscribere potuit. Quare hanc sententiam stylus etiam Curie confirmat, teste Nauar. cons. 1. de constitut. n. 19. edit. 2. Allegati autem supra canones tantum loquuntur de causis iudicialibus, quæ in foro Ecclesiastico secundum Imperatorias leges deciduntur, vbi canonico iure nihil constitutum reperitur.

5. Hinc discrimen nascitur inter vtramque legem: quod licet Imperatoria intra duorum mensium spatium post promulgationem à maiore Prouincialium parte recipiatur, & in vsum deducatur, nullam tamen re ipsa obligationem adfert: sed à quouis subdito sine culpa intra illud tempus negligi potest. Lex autem Pontificia simul ac Romæ publicata est, omnem obligandi vim habet: cur

autem Diocesanos non statim omnes obliget, non prouenit ex defectu legis aut promulgationis: sed ex defectu alicuius accidentalis conditionis, v. g. quia eam ignorant. Quare nihil contra communem sententiam censendus est dixisse Caiet. 1. 2. q. 90 a. 4. *Si Romæ noua lex promulgatur & nec curia ipsa procurat, vt promulgatio ad Ecclesias Cathedralis denemiat: neque Prælatis qui ibi sunt, insinuant suis Ecclesijs: accusari nec apud Deum, nec apud homines possunt absentes nescire*. Ex quibus verbis non rectè Medina eod. a. 4. Nau. cit. q. 1. n. 18. colligunt, Caietani sententiam fuisse, leges Pontificias vim obligandi prius non habere, quàm in diæcesibus promulgatae fuerint.

6. Porro, quanto tempore, post legis in curia promulgationem, ignorantia præsumenda sit, vt eam alleganti in externo foro onus probandi imponi non debeat; ex locorum distantia alijque circumstantijs iudex arbitrat, sicuti docent Abb. in cit. c. 2. n. 8. de constit. Lælius Zecchus lib. 1. de legib. c. 14. Medina cit. a. 4. concl. 5. Circa leges autem Imperiales, duobus elapsis mensibus post earum in prouinciæ metropoli promulgationem, ignorantiam eleganti onus probandi incumbit, sicuti ex communi notat Sanch. lib. 9. de matrim. disp. 32. n. 4. Vide etiam Molin. tr. 5. disp. 71.

7. Dico III. Lex non tantum civilis, sed etiam Pontificia, quæ infirmat contractus alioquin iure naturali subsistentes; vel aufert iurisditionem, v. g. in ordine ad sacramentum Pœnitentiæ, benigna interpretatione censi debet non ante effectum suum sortiri, quàm in diæcesibus promulgata sit. Ita docet Sotus lib. 1. de iust. q. 1. a. 4. Molin. t. 2. disp. 395. Suarez lib. 5. c. 33. n. 8. contra Vasq. disp. 156. c. 3. n. 17. Exemplum habes in Concilio Trident. sess. 23. c. 15. de reform. vbi requirit approbationem Episcopi ad exponendos Sacerdotes. Et in Bulla Pij V. infirmantis contractus censuales apud Molin. l. c. quamuis ea Bulla apud nos recepta non sit. Ratio est, quod alioquin eiusmodi leges in multorum detrimentum cessuræ essent, qui inuincibili earum ignorantia laborantes tales contractus celebrarent, vel à Sacerdotibus non approbatis sacramentalem absolutionem postularent, sicut antea consueuerant. Siquidem hoc proprium est legum irritantium actum, non in odium agentium, sed ob defectum solemnitatis: quod postquam eiusmodi leges vim obligandi consecutæ sunt, effectum irritationis consequantur etiam erga ignorantes, sicuti docent DD. in c. 2. de Constit. Nau. lib. 5. consil. 21. n. 5 de Priuil. edit. 2. Sanchez lib. 3. disp. 17. & lib. 9. disp. 32. n. 2. Exempli causa: Si quis ob inuincibilem ignorantiam clandestinum matrimonium contrahat: vel cum consanguinea, aut affine sua, à culpa quidè excusatur: sed contractus non subsistit.

Porro Suarez cit. cap. 33. n. 7. rectè excipit Pontificias leges, quæ sunt circa eas res vel actiones, in quibus Papa liberam disponendi vel dispensandi facultatem habet, vt sunt beneficia Ecclesiastica, professio Religionis, &c. Tales enim constitutiones, quamuis irritantes sint, statim post promulgationem in curia, vim suam vbique sortiri videntur.

### CAP. III.

### De acceptione legis.

### SVM MARIVM.

1. Lex substantiam suam promulgatione accipit, neque intrinsece pendet à populi acceptione: quamuis per eam accidentaliter perficitur.
2. Episcopis, præsertim Metropolitanis, ex officio incumbit nonas Pontificias constitutiones in diæcesibus promulgare, atque in vsum deducere: saltem postquam ex curia Romana authentice ipsis transmissæ fuerint.
3. Diæcesanus nec de peccato damnari, nec puniri potest, si legem Pontificiam in diæcesi non promulgatam, neque sibi receptam, ipse quoque non seruet.



- 4 Si lex legitime promulgata à maiore populi parte sub rationabilis causa prætextu non recipiatur, currit contra eam præscriptio, quæ saltem decem annorum spatio absoluitur.  
 5 Lex temporis diuturnitate non recepta nullam obligationem habet.  
 6 In legum obseruatione quilibet confirmari debet illi Communitati, cuius ipse proxima pars est.  
 7 In dubio num lex recepta sit, pro ipsa præsumendum est.  
 8 Si noua constitutio prouincia non conueniat, legislatori supplendi potest: atque interim dum responsum expectatur, eius executio differri.

**N**ON paucorum sententia est, vim & substantiam legis à populi acceptatione dependere. Ita enim docent Canonistæ in c. de treuga & pace, Iulianus Iureconf. in l. 32. ff. de libi; Cum ipsæ leges nulla alia ex causa nos teneant, quàm quod iudicio populi receptæ sunt. Item Nau. c. 23. n. 41. & conf. 1. de constit. q. 5. edit. 2. Driedo lib. 1. de libert. Christiana c. 9. confid. 2. Armilla ver. lex. n. 11. Maior in 4. d. 14. q. 4. contra 2. conclus. Azor t. 1. lib. 5. cap. 4. Rodriq. to. 1. reg. qq. q. 6. a. 6. Fundamentum huius sententiæ est, quod ea tacita conditione leges ad populum ferri censeantur, si ab ipso acceptatæ fuerint, alioquin vim nullam obligandi habituræ. Altera est opposita, & absolute ac per se loquendo, vera aliorum Theologorum sententia: leges Principis vel Magistratus absoluti minimè dependere à populi acceptatione & consensu: sed mox, ut legitime promulgatæ sunt, obligari populum ad acceptationem. Ita docet Io. Med. c. de restit. q. 36. ad 5. Gregorius de Valentia t. 2. disp. 7. q. 5. q. 4. Barthol. Med. 1. 2. q. 9. ar. 3. ad finem, Castro l. 1. de lege pæn. c. 1. Vasq. dis. 156. c. 5. Mol. t. 1. tr. 2. disp. 23. Suar. de legib. lib. 3. cap. 19. n. 4. Ratio est: Quia postquam populus omnem suam potestatem in vnum Regem, vel paucos Optimates absolute contulit, possunt hi, & nisi aliud significant, censebunt etiam velle, iustis suis legibus obligare subditos ad recipiendum & parendum: cum alioquin vltima & suprema potestas gubernandi non penes Regem, vel Optimates, sed penes populum foret; ideoque non esset forma Reip. monarchicæ, vel aristocraticæ: sed potius democraticæ. Quod verò attinet ad legem Pontificiam, ea multò minùs à populi acceptatione dependet: quandoquidem S. Pontifex supremam in Ecclesia potestatem non à populo per electionem: sed immediate à Christo accipit, ex vi primæ institutionis ac promissionis S. Petro factæ, Matt. 16. Ioan. 21.

Conclusio verò nostra sit ista: Licet lex cum Pontificia, tum Imperatoria, substantiam suam, & intrinsecam vim subditos obligandi promulgatione acquirat; accidē taliter tamen perficitur, & confirmatur per populi acceptationem & vsum. Hæc procul dubio fuit mens Gratiani dist. 4. *Leges instituuntur cum promulgatur: firmantur, cum moribus vtiuntur comprobantur.* Ecce quod ait, leges promulgatione institui, ac condi; firmari verò, perfectionemque acquirere, (ut nimirum omnes ac singulos à Communitate, totamque posteritatem constriquant) posteaquam à maiore, vel potiore siue digniore populi parte acceptatæ, & vsum comprobatae fuerint.

2 Pro cuius rei pleniori intellectu, quedam aduerte ad praxim vtilia Primum. Episcopis, præsertim Metropolitanis, ex officio incumbit, nouas Pontificias Constitutiones in diocesis promulgare, atque in vsum deducere; saltem postquam ex Romana curia authenticè ipsis transmissæ fuerunt, cum mandato expresso vel tacito, ut eas publicari, & obseruari curent: quæ de re vide Nau. conf. 1. de constit. q. 8. edit. 2. Idemq; dicendum de lege Imperatoria vel Regia, postquam prouincialibus Ducibus, vel Gubernatoribus transmissa fuit.

3 Secundum: Si lex in curia Principis publicata, in distictibus prouincijs non promulgetur, constat ex supra dictis, subditos prouinciales non obligari, si sit Imperatoria: Et si verò de lege Pontificia, spectata eius natura, contrarium sentiendum sit; tamen quod attinet ad praxim,

arbitror peccati damnandos non esse, neque puniendos singulos à Communitate, si legem Pontificiam in sua diocesi neque promulgatam, neque vsum receptam, ipsi quoque non obseruent. Primo, quia contraria non paucorum DD. (quos præced. cap. n. 4. §. lex autem) allegauit sententia. Quod non minùs ad Pontificiam, quàm Imperatoriam legem opus sit promulgatio in prouincijs; probabilis ipsis videri potest, cui proinde se conformare liceat. Deinde, quia præsumendum non est, mentem legislatoris esse, ut lex, præsertim in diocesi non promulgata, à diocesano vno, altero, vel paucis obseruetur, si maior Communitatis pars non recepit, neque breui tempore receptura vel obseruatura existimatur: Siquidem legem, cum sit commune mandatum, communiter obseruari oportet, sicut notauit Nau. conf. 1. q. 5. de constit. Med. 1. 2. q. 90. a. 3. in fine.

Tertium. Si lex in prouincijs vel diocesis promulgata sit, sed à maiore populi parte non recipiatur & obseruetur: refert vtrum legislator populi repugnantiam sciat & conuiueat: an verò ignoret: an denique sciat, & ad legis obseruationem per executores compellat. Primo casu censetur legem reuocare, tanquam subditis difficilem & incommodam, sicuti docet Abb. in c. quia circa, n. 8. de cōsang. & affinit. Nau. cit. conf. 1. q. 5. Secundo casu, legis obligatio durat, donec legitime præscriptionis tempus decurratur. Arbitror tamen, si tu legem promulgatam recipere paratus sis, & data occasione etiam obserues; sed alij plerique à Communitate non recipiant, neque recepturi existimantur: per epikeian excusatum te fore à legis obligatione, etiam ante expletum tempus præscriptionis: Quod ratio & æquitas permittere non videatur, ut tu solus, vel cum alijs paucis legem communiter non receptam longo tempore obseruare debeas: præsertim cum te tunc conformare possis sententiæ Nauarri, & aliorum DD. princip. huius cap. citatorum. Tertio casu, si legislator promulgatæ obseruationem compellat, transgressusque puniat, tunc singuli eam obseruare tenentur, si iusta sit, etiam si maior Communitatis pars resistat. Quia ratio naturalis postulat, ut in schismate vel dissensione, quodlibet membrum sui capitis potius, quàm reliquorum membrorum ductum atque imperium sequatur.

4 Quartum. Si lex seu Pontificia, seu Imperatoria legitime promulgata, à maiore populi parte, prætextu rationabilis causæ, non recipiatur, currit contra eam præscriptio, legislatoris ignorante, quæ saltem 10. annorum spatio absoluitur. Ita Nau. in conf. 1. de constit. q. 5. Azor l. 5. c. 4. q. 4. Suar. l. 4. c. 16. de legib. n. 11. Cum enim lex iam recepta & vsum confirmata per contrariam consuetudinē abrogari possit, iuxta c. vlt. de consuetudine, multò magis ab initio per non vsum ei derogari poterit. Quare mirandum etiam non est, plus temporis (videlicet 40. annorum spatium) requiri ad abolendam viam præscriptionis legem Ecclesiasticam receptam, quàm non receptam; quia illa plus, quàm hæc roboris & firmitatis obtinet. Sed etsi fortasse primi, quibus lex data fuit, præsertim Metropolitanis, Episcopis, &c. peccarint, eam non recipiendo, & in vsum deducendo: horum tamen successores, si Pontificiæ v.g. constitutionem post longam temporis moram nunquam in diocesi receptam vel obseruatam videant, per non vsum titulo præscriptionis sublatam credere possunt sicuti loco cit. notauit Suar. & Ioan. Maior in 4. d. 15. q. 5. Ex quo inferre licet, eas (v.g. Trident. Concil.) constitutiones, quæ hactenus in diocesis receptæ aut in praxin deductæ non sunt, vim obligandi non habere: ut neque Doctores ex Cathedra quæstiones decidere, multò minùs Iudices in foro externo, vel interno causas definire debeant, secundum leges non receptas, ait Nau. cit. conf. 1. q. 7. & 8. & docet Salas de leg. disp. 13. §. 3. in fine. Quamuis optimum consilium sit, ut Episcopi saluberrima illa reformationum decreta, quæ hactenus in suis diocesis recepta non sunt, vltro in obseruationem deducere conentur.



Quintum. In legum obseruatione oportet quemlibet conformari cum ea Communitate, cuius ipse proxima pars est, sicuti docet Azor cit. cap. 4. q. 3. & indicat Syl. ver. lex, q. 6. in fine, Nau. q. 3. §. Sexto. Quare si lex in alijs regnis, prouincijs, vel diocesis recepta sit, in tua recepta non sit, eius obligatione non astringeris. Adde fieri posse, vt lex secundum vnam sui partem, vel secundum vnum genus hominum in vfu posita sit; secundum alterum non sit: v. g. vt soli clerici, & non laici; vel soli regulares: non autem seculares legem seruent. Quo casu iuris regula 37. in 6. locum habebit, *utile per inutile non vitiatur*. Exemplum habemus in ieiunio Feriæ VI. & Sabbathi, quod olim in Ecclesia occidentali plenè & integrè seruatum videtur; nunc verò abolitum est quoad vnam partem; & remansit quoad alteram partem, videl. abstinentiam à carnibus.

6 Porro in dubio non lex recepta sit nec ne, pro ipsa præsumendum est: vt qui eam in fauorem suæ causæ allegat, intentionem fundatam habeat, onusque probandi in aduersarium reijciat, qui legem receptam negat, sicut notauit Rodriq. t. 1. q. 6. reg. qq. a. 11. Ratio verò est, quam suprà tradidi tr. 1. c. 5. §. 4. n. 1. Quia factum in dubio præsumitur, si de iure faciendum erat.

7 Vltimum. Si Metropolitanus, aut Communitas arbitretur, nouam constitutionem prouinciæ moribus commodius non conuenire, poterit Papæ, Regi, &c. alatis rationibus supplicare; atque interim, dum responsum expectatur; legis executionem suspendere. Si verò Princeps, cognitis rationibus, in sententia persistat, obedientia præstanda erit: nisi liquidò constet legem iniquam esse. Quæ de re lege Castrum lib. 1. de lege pæn. c. 1. Mol. tr. 5. disp. 69. Suar. lib. 4. c. 16. n. 7. contra Rodriq. cit. q. 6. a. 8. Vasq. cit. cap. 5. in fine. Nicol. Garcian tr. de beneficijs, p. 11. c. 3. n. 272. qui negant, per eiusmodi supplicationem, interim dum responsum datur, suspendi legis obligationem. Verumtamen est, eiusmodi supplicationes & decretorum dilationes longè frequentius accidere posse in specialibus Principum decretis ac rescriptis, iuxta c. si quando, de rescriptis: quippe in quibus, circa particularia negotia versantibus, facilius error ob malam informationem irrepit, quàm in generalibus constitutionibus, quæ, post diuturnam cum viris prudentibus consultationem ex certa scientia procedunt: Quamuis nihilominus aliquando accidere possit, vt lex generatim utilis, certe tamen prouinciæ ob speciales rationes nimis difficilis, aut ab eorum moribus abhorrens videatur.

## CAP. IV.

## De materia legis humanæ.

## S V M M A R I V M.

- 1 *Lex humana, etiam ciuili, præcipi possunt non tantum opera iustitia; sed etiam aliarum moralium virtutum, ijsque contraria prohiberi.*
- 2 *Non omnes virtutum actiones præcipi possunt; neque omnia peccata, etiam externa, ab humano magistratu prohiberi: sed quadam interdum permitti debent, vt grauiora vitentur.*
- 3 *Quadam præcepta secundum substantiam sunt iuris naturalis, aut diuini; secundum determinationem verò iuris humani.*
- 4 *Legislator, iuxta legitimam suam intentionem seu motuum, efficere potest, vt opus aliquod sit medium sine materia alicuius virtutis conueniens, aut necessaria.*
- 5 *Lex, aut præceptum humano per se præcipi aut prohiberi non possunt actus merè interni.*  
*Crimen quod est per accidens occultum, Ecclesiastica lege puniri potest.*
- 6 *Qui opus præceptum, quatenus ex obiecto bonum est, implet, quamuis mala intentione id legem humanam non violat.*  
*Intentio ac finis præcepti non cadit sub præceptum.*
- 7 *Qui opus præceptum secundum substantiam præstat, etsi tunc nolit præceptum implere, reuera tamen satisfacit.*  
*Obligatum voto recitandi rosarij, si recitat animo tunc non sa-*

*tisfaciendi, tenetur iterum recitare: Sin autem immemor voti sui rosarium dicat, re vera liberatur.*

- 8 *Actus interni ab humana potestate præcipi vel prohiberi possunt concomitanter, quatenus requiruntur ad moralem substantiam actuum externorum.*
- 9 *Si ebrius, dormiens, aut mentis impos dicat, horas canonicas, non satisfacit præcepto: sed debet iterum recitare, si ad mentem redeat: eademque ratio est, si simpliciter inuitus, seu coactus Missæ sacrificio in festo die interfit.*
- 10 *Si aliquis in somno, mentis impotentia, vel per vim adactus dicimas. Parocho soluat, materialiter & in effectu satisfactum est legi: Et non opus sit alias decimas dare.*
- 11 *Qui opus sub censura Ecclesiastica prohibitum omnino inuitus intermitte, penam tamen legis aut præcepti euitat: qui autem opus sub censura præceptum coactus facit, tunc penam contrahit, si, spectata Ecclesiæ intentione, ad eius executionem actio voluntaria intrinsecè requiritur.*
- 12 *Qui ob metum opus præceptum exequitur, satisfacit: v. g. puer, qui à pedagogo verborum metu adactus Missam attendit.*  
*Licet talis expressam intentionem habeat non audiendi sed pedagogus abesse, nihilominus implet opus præceptum, vt aliam missam audire non teneatur: peccat tamen secundum affectum internum peccato commissionis.*
- 13 *Cum lex Ecclesiastica præcipit opus aliquod pium, v. g. vocalem orationem, sacramentalem Confessionem, consequenter etiam præcipit actum interna mentis, quem opus illud essentialiter includit.*  
*Non potest Prelatus, nisi regularis sit, subditum sub peccato obligare ad habendam certam intentionem in opere.*
- 14 *In ijs, quæ pertinent ad naturam corporis conservandam & propagandam, homo sui iuris esse debet, ac solis Deo subiectus.*

**A**sertio I. Lege humana, etiam ciuili, præcipi possunt non solum iustitiæ; sed etiam aliarum virtutum opera aliqua; ijsque contraria prohiberi. Ita S. Th. q. 96. a. 3. ex Aristot. 5. Eth. c. 1. Ipse autem leges, inquit, de omnibus dicant, consuetudines communem utilitatem; adde & felicitatem, quæ in honesta ciuium vita, communique virtutum studio præcipuè consistit. Quare idem Aristot. 2. Eth. c. 1. & Vlpianus in l. 1. ff. de iust. & iure dixit, Legislatori propositum esse homines bonos efficere.

Dixi autem aliquas (non omnes) actiones virtutum humana lege imperari posse. Quædam enim nimis arduæ ac difficiles sunt, vt in consilio esse debeant, non in præcepto: v. g. Euangelica paupertas, castitas, &c. sed neque omnia peccata, etiam externa, ab humano Magistratu prohiberi possunt; sed multa permitti debent, vt grauiora vitentur. Qui lex humana ponitur multitudini siue communitati, in qua maior pars est hominum virtute non perfectorum. Quare ferme non nisi peccata grauiora legibus prohiberi solent, à quibus moraliter possibile est maiorem partem multitudinis abstinere, præsertim quæ alijs noxia sunt, & humanæ societati incommo-  
dant. Ita S. Th. a. 2. & Richar. in 3. d. 37. a. 3. q. 3.

Aliqua huic assertioni adiungo: Primò, Interdum etià peccata grauiora à publico Magistratu permitti possunt, si necessarium videatur ad maius Reip. malum impediendum: qua ratione in quibusdam ciuitatibus publicæ meretrices tolerantur, sicuti annotauit S. Aug. lib. 2. de ordine, c. 4. Item publicæ detractiones & infamationes, vt ciues earum timore in officio contineantur, de qua re Io. Faber §. in summa. Instit. de iniur. Item Iudæorum vsuræ, de quibus Nau. lib. 5. consil. 33. de vsur. edit. 2.

Secundum. Lege humana præcipi aut prohiberi possunt etiam ea, quæ alioquin sub naturale, aut diuinum præceptum cadunt: v. g. si dem Catholicam profiteri, alienum restituere, à furto, latrocinio, blasphemijs abstinere: Quia nihil prohibet, aliquem pluribus titulis seu causis obligari ad idem præstandum, vel omittendum.

Tertium. Quod lege naturali aut diuina præceptum est absolutè & secundum substantiam, interdum humana lege determinatur ad certum tempus, modum: v. g. lege Euangelica præcipitur sacramentum Pœnitentiæ, & sacra Eucharistiæ: lege autem Ecclesiastica determinatur, vt illud semel in anno: istud quouis Paschali tempore suscipiatur. Itē beneficiatice clericali naturali ac diuino iure



iure obligantur ad orandum pro fidelibus: Ecclesia verò prescribit certam orandi formam, tempus: de quibus suo loco.

4 Quartum. Cùm legislatrix potestas præsit humanis actibus subditorum: eosque dirigat ad felicitatem publicam, sicuti suprà dixi; inde fit, vt & actiones, quæ ex obiecto bonæ sunt, atque conueniens alicuius virtutis medium ac materia, constituere possit eiusdem virtutis materiam necessariam; sicuti videre est in Ecclesiasticis præceptis ieiunij, Missæ, &c. Insuper actiones, quæ ex obiecto indifferentes sunt, constituere lex potest medium ac materiam alicuius virtutis tum conuenientem, tam necessariam: v.g. vt publicæ preces Paschali tempore stādo perficiantur: Itēque actiones ex obiecto indifferentes prohibere potest, tanquam minùs conuenientes alicui virtuti, v.g. ne festo die mercatura exerceatur, ob reuerentiam & cultum Religionis. Ex quo efficitur, vt qui ieiunium præceptum non seruat, contra temperantiam delinquat, cuius intuitu ac sine lex Ecclesiastica lata fuit: qui verò preces stans non persoluit, aut mercaturam tali die exercet, contra religionis virtutem peccet, cuius intentione ac motu Ecclesiastica illæ leges positæ fuerunt, sicuti docet Caiet. 1. 2. q. 96. a. 4. in fine. Sotus lib. 1. de iust. q. 6. a. 4. Azor to. 1. lib. 5. c. 5. q. 2. Suar. t. 1. de relig. tr. 2. l. 3. de reuerentia debita rebus sacris, c. 4. & tr. 3. l. 4. de Simon. c. 7.

5 Assertio II. Nulla lex, vel præceptum humanum extendere se potest ad actus merè internos per se præcipiendos. Hæc est communior DD. sententia S. T. 1. 2. q. 91. a. 4. & q. 100. a. 9. & 2. 2. q. 104. a. 5. Ioan. Gerson p. 2. operum in regulis moral. §. solus Deus. Caiet. tract. de potest. Papæ & Concil. cap. 19. Castro. lib. 2. de iusta hæret. punit. c. 18. Nau. c. 13. man. n. 38. & cap. 17. n. 58. & c. cogitationis, d. 1. de pœnit. Vasq. disp. 60. c. 2. Couar. reg. peccatum. p. 2. princip. n. 7. Ludouici Mirandæ in man. Prælatorum t. 1. q. 29. art. 2. Suar. de censuris disp. 4. f. 2. & lib. 4. de le. cap. 12. Salas disp. 11. f. 1. contra Gl. in c. cogitationis, d. 1. de pœnit. Adrian. quodl. 8. a. 1. lit. h. & 1. Albertum Pighiū lib. 6. de Ecclef. Hierarchia cap. 16. Iulium Clarum lib. 5. sentent. §. ult. q. 91. Med. C. de orat. q. 15. Rosellam ver. absolutio, 1. n. 28. quibus fauet Lessl. 2. c. 37. dub. 11. n. 66. Probatur I. ex iure canonico: Nam ob hanc causam dicitur c. 1. 15. q. 6. *Quod non possit humano iudicari examine, quem Dominus suo reseruauit iudicio.* Et in c. sicut, de Simonia, *Ecclesiam non indicare de occultis, &c. tua nos eod. tit. Innoc. III. ait, Nobis datum est de manifestis solummodo iudicare:* & l. 18. ff. de pœnis, quæ allegatur apud Gratianum d. 1. de pœnit. *Cogitationes pœnam nemo patitur;* vbi Glossa rectè monet, verum id esse, si stetur intra fines cogitationis; non item, si exequendi propositum externo signo, siue conatu manifestetur, quamuis sine successu. Nam solum etiam conatum in criminibus prohiberi, ac puniri posse, saltem pœna extraordinaria seu arbitraria, iuxta criminis & facti qualitatem, docent Glossa & DD. communiter in l. quisquis, C. ad l. Iuliam Maiestatis, Na. si quis non dicam, de pœnit. d. 1. n. 4. Probatur secundo rationibus: quarum primam indicat S. Th. q. 100. in corp. a. 9. ac bene explicat Nau. in cit. c. cogitationis. Quia frustra ferme & ineffaciter lex ad Communitatem fertur, si legislator cognoscere non possit, vtrum obseruetur; neque ad eius obseruationem compellere: Quare leges ferre, & secundum leges indicare ad eadem potestatem pertinet: eundemque ordinariè oportet esse legislatorem & Iudicē legumque vindicem; Atqui de actibus internis, suapte natura latentibus, humanus legislator iudicare non potest: Nam secretorum solus Deus cognitor & index est, c. erubescant, d. 32. & constat ex. 1. Regum 16. *Homines vident ea quæ patent. Deus autem intuetur cor.* Secunda ratio ex eodem sancto Thoma 2. 2. quæstione 104. articulo 5. Vasquez loco suprà cit. Suarez libro 3. de legib. cap. 13. & l. 4. c. 12. numero 7. Cùm omnis humana potestas siue iur-

isdictio in hominum societate fundetur; hæc autem materialis atque sensibilis; fit (nam subordinatio & gubernatio secundum operationes internas Angelicæ immaterialis societatis propria est) conueniens videtur, vt humana potestas siue iurisdictio solum se extendat ad actiones humanas, quatenus in exteriorem materiam trāseunt, & signo aliquo produntur. Quod etiam Seneca notauit libro 3. de beneficijs: *Errat, si quis putet, seruitutem in totum hominem descendere: pars enim melior excepta est: corpora obnoxia sunt & ad scripta dominis, mens sui iuris est.* Et ideo, inquit S. Thomam cit. art. 5. in his, quæ pertinent ad interiorem motum voluntatis, homo non tenetur homini obedire, sed soli Deo: tenetur autem homo homini obedire, in his quæ exterius per corpus agenda sunt. Tamen quandoque huiusmodi æternæ actiones occultæ manent per accidens, quia à nemine videntur, ac testibus destituuntur. Sic enim Ecclesia vniuersali lege prohibet, & lata excommunicatione punit, v.g. quamuis hæresim externo signo licet occultè proditam, vt notauit Nau. c. 27. man. n. 56. & in cit. capite cogitationis, n. 7. & in rubrica de iudicijs, n. 76. vbi ait, *Occultum esse duplex; vnum per se occultum, quod suapte natura non est probabile: quales sunt omnes interiores hominis actus, quorum cognitor solus Deus est: alterum est occultum per accidens, quod exterius expressum est, vt suapte natura deprehendi possit, licet à nemine deprehendatur.*

Corollarium I. Qui præstat opus præceptum, quatenus ex obiecto siue secundum speciem bonum est legem humanam non violat, etsi finem siue intentionem legislatoris non intendat, nec assequatur; sed re ipsa & in individuo opus malum, v.g. ob prauam circumstantiam finis exerceat. Ita docet S. Thomas quæst. 100. artic. 9. ibid. Caiet. Medina, & alij. Exemplum; Ecclesia præcipit ieiunium, id est, vnicam in die refectioem absque carnibus: Finis autem huius præcepti est, vt gula frānetur & caro spiritui subiiciatur. Si iam aliquis ieiunet, vanæ gloriæ causa, aut gulam piscibus & mero oblectet, adeoque intentioni legis repugnet, is Ecclesiasticum ieiunij præceptum non violat; quamuis contra legem naturalem ac diuinam peccet, saltem venialiter. Ratio est, quia intentio, ac finis præcepti non cadit sub præceptum: imò nec cadere potest: cum modus agendi ex virtute & proposito honestatis omnino intrinsecus & non apparens sit. Duo autem hic obiter aduerte: I. Legislator humanus præcipiēdo rem aliquam efficere quidem potest, vt qui legem transgreditur, contra eam virtutem peccet, cuius intuitu lex lata est: non ita verò efficere potest, vt qui legem obseruat, actum talis virtutis exerceat: cum hoc pendeat ex speciali interna intentione operantis. II. Interdum accidit, vt Ecclesiasticus legislator (præsertim censuram statuens) aliquid prohibeat, adiuncta conditione actus interni; quomodo excommunicantur in Clem. 1. §. verum, de hæret. qui ex odio, gratia, vel auaritia omittunt contra aliquem procedere in causa fidei: talis enim conditio solum restringit pœnam seu censuram iuris, vt in conscientia aliter non incurratur propter opus prohibitum, nisi ex tali affectu procedat, sicuti notauit Suarez l. 3. de leg. capite 29. numero 10. & libro 4. c. 13. num. 3. & 2. o. & de censuris disp. 4. f. 2.

Corollarium II. Qui opus præceptum secundum substantiam præstat, etsi non habeat voluntatem implendi præceptum, imò contrariam habeat, re vera tamen satisfacit. Ita docet Suarez libro 2. de relig. libro 4. de horis, cap. 26. & 3. p. tom. 3. disp. 88. f. 3. Lessl. lib. 2. capite 7. dubium 10. Valent. to. 3. disp. 6. q. 10. in fine. Sanchez libro 1. moral. cap. 13. num. 9. & 12. contra Nauar. de orat. c. 16. n. 73. Azor. t. 1. lib. 7. c. 2. q. 6. Medinam C. de orat. qu. 16. qui posteriorem partem huius corollarij negant. Exemplum: Si aliquis die festo Missam decenter audiat, non recordatus esse diem festum, is satisfacit ex



communi sententia: Sed etsi Missam aliquis festo die sciēter, atque attentē audiat, habeat verō expressam intentionem tunc non satisfaciendi Ecclesię præcepto, sed aliā postea Missam audiendi, is re vera satisfacit, vt non teneatur aliam audire; quamuis id non pauci negent. Eadēque ratio est de horis canonicis: quod scrupulosi notandum est, qui cū videntur sibi inter orandum dum distracti, officium vel partem officij recitant, cum proposito postea repetendi: qui tamen repetere non tenentur, quando distractio eorum inuoluntaria fuit. Ratio est, quia lex tantū præcipit voluntariam operis executionem: non autem quasi reflexam implendi præcepti intentionem: imō eam præcipere non potest, cū omnino intrinseca & occulta sit. Quare cū opus quod præcipitur impleas; etsi per ignorantiam, vel errorem te non implere existimes, aut etiam nolis implere; non potes tamen efficere quo minū impleas: Siquidem protestatio contraria facta vim nullam habet. Id tamen fatendum est, si quis in tali falsa persuasionē maneat, quasi præcepto non satisfecerit, peccaturum esse, nisi vel errorem deponat, vel aliam Missam audiat, horas canonicas repetat, &c.

Obijciatur: Qui obligatus est voto recitandi rosarij, si recitet animo tunc non implendi votum, debet denuo recitare, ad satisfaciendum voto: Item obstrictus debito pecuniario, si dum pecuniam soluit, creditori significet, nolle se debito exolui, sed gratis donare, debet iterum soluere: Ergo idem dicendum videtur de obseruatione legum. Ad hæc respondeo; Discrimen esse inter debitum seu obligationem ex voto, aut promissione; & inter debitum seu obligationem ex lege aut præcepto Superioris: Nam obligatio voti, & cuiuscunque promissionis provenit ex voluntate vouentis, promittentis, qui sicut ab initio arbitratus suo debitorem se constituere potuit, sic etiam in eo debito siue obligatione arbitratus suo perseuerare potest: Debitum autem siue obligatio ex lege vel præcepto provenit ex voluntate legislatoris vel præcipientis; ideoque extendi non potest vltra eius intentionem aut voluntatem: quamobrem cū legislator hoc solum præceperit, vt opus humano modo impleatur, eo opere præstito, extinguetur obligatio.

Cæterum, si quis immemor, rosarium se Deo vouisse, illud ore, voto soluitur: sicuti & is, qui homini promissit rem donaturum, si postea donet immemor promissionis suę, obligatione liberatur. Alia ratio est, si ex titulo oneroso debitor sis, v.g. ex empto, permutato: & immemor huius debiti tantundem liberaliter dones, non videaris obligatione solutus, sicuti docet Lud. Lopez lib. 2. de contract. c. ult. §. superest nunc, Sanch. cit. c. 13. num. 11. Siquidem hæc duo inter se pugnant; gratis dare, & ex tali debito dare. Quo etiam genere argumentationis, licet alio proposito, vsus est Apost. ad Rom. 11. *Si autem gratia* (loquitur de gratia primę iustificationis, interprete Trident. sess. 6. c. 8.) *iam non ex operibus* (siue ex operum merito) *alioquin gratia iam non est gratia*; sed debiti retributio.

Affertio III. Actus interni ab humana potestate præcipi vel prohiberi possunt concomitanter, quatenus requiruntur ad moralem substantiam actuum externorum. Ita docet Medina cit. q. 100. a. 9. §. ad vltimum argumentum. Sotus lib. 10. de iust. q. 5. a. 5. Miranda supra cit. a. 2. Syl. ver. obedientia, q. 1. Suar. l. 3. de legib. c. 13. num. 2. & seqq. Ratio est: Cū homines, qui sunt membra Reipub. partim interno animo, partim externo ac materiali corpore constent: sit, vt & interiores hominis actiones non aliter sub Reipub. gubernationem cadere possint, nisi quatenus ad externas actiones diriguntur, easque aliquo modo informant: & ipsę actiones externę ac materiales non aliter præcipi aut prohiberi possint, quā vti ab internis proficiuntur, & ijs secundum esse morale informantur, ac constituuntur.

Corollarium I. Si ebrius, dormiens, aut mentis impos

horas canonicas recitet: vel Missam festo die audiat, non satisfacit præcepto: quare debet postea, vbi ad mentem redijt, iterum recitare, aliam Missam audire. Ita Sotus libro 2. de iust. questione 3. art. 9. Medina cit. art. 9. Sanchez numero 2. Suarez libro 4. de horis canonicis, capite 26. & alij. Rationem afferunt, quia leges & præcepta homini imponuntur, vt ea humano modo impleat, non brutorum more: quare sicuti opus præceptum violari non potest, nisi per actum vel omissionem humanam, ac liberam; ita neque impleri. Eadēque aiunt esse rationem de simpliciter inuito seu coacto: vt si aliquis vi retentus Missę, vel concioni interfuit, quod legem aut superioris præceptum non impleat, sicuti etiam docet Azor t. 1. li. 7. c. 2. q. 6. Quia coactio tollit voluntarium ac liberum, sine quo lex aut præceptum nec impleri, nec violari potest.

Hæc doctrina vniuersim verā est, si loquamur de formali impletionē legis aut præcepti, ad quam omnino requiritur voluntarium; sicuti & ad formalem transgressionem. Sin verò loquamur de materiali executione legis aut præcepti, per illam sæpe satisfieri solet absque actione proprię humane seu liberę: vt si dormiens ex sola imaginatione decimas ad horreum Parochi sui deferat, vel adactus ad altare primitias ponat, materialiter, & in effectu satisfactum est legi decimarum, aut primitiarum, vt alias decimas vel primitias dare necesse non sit. Etenim sicuti homo sine culpa legem materialiter violare potest, v.g. rem alienam ob inculpatam ignorantiam auferendo; ita etiam sine laude legem materialiter implere potest; vt in exemplis propositis; item in ieiunio cernere est, si quis à carnis esu, vel altera refectione abstineat, quia ad eam accedere per vim prohibetur. Veruntamen quædam præcepta versantur circa actiones, quę in sui executione intrinsecè includunt voluntarium seu liberum: vt mirum non sit à dormiente, ebrio, coacto præstari non posse, neque legi satisfieri: & huc spectant exempla supra posita de auditione Missę, canonicarum horarum præce; quippe quę voluntariam animi attentionem necessariò requirere videntur.

Ex his facile est resolvere quæstionem: Si præceptum sub excommunicatione, aliãve iuris pœna impositum sit, an qui omnino inuitus seu coactus implet, eam euitet? Respondeo & dico I. Si opus, quod ab Ecclesia ita præcipitur, in executione reali, spectatā intentione legislatoris, non requirit concursum actionis voluntarię, qui illud coactus exequitur, euitat pœnam ac censuram; vt si decimarum solutio sub excommunicationis pœna præcipiatur, & aliquis vi adactus soluat. Ita Sanch. lib. 1. moral. cap. 13. num. 6. Dico II. Si opus ab Ecclesia præceptū, spectatā eius intentione, in executione intrinsecè requirit concursum actionis voluntarię, vti accidit, v.g. in Missę auditione, tunc qui simpliciter inuitus seu coactus Missę interest, videtur pœnam statutam incurrere. Ita Sanchez loco cit. Salas disput. 9. sect. 2. num. 34. contra Sotum cit. art. 9. Dico III. Qui opus qualecunque sub censura prohibitum omnino inuitus intermitte, pœnam statutam non incurrit. Vt si in diœcesi sub excommunicatione prohibitum sit carnes comedere in quadragesima, & Titius per violentiam ab amicis arceatur, ne eas comedat. Ita docet Sotus loco citato Suarez citato capite 26. num. 6. contra Medinam cit. quæst. 100. a. 9. Ratio harum responsionum est: Nam leges pœnales intelliguntur secundum effectum realem & consummatum: qui autem omnino inuitus atque reluctans cōtinetur in loco vbi sacrificatur, is re ipsa & in effectu non exequitur opus præceptum auditionis Missę: sed legem omnimode violat. Qui verò coactus decimas Parocho suo soluit; & qui inuitus continetur, quo minū die interdicto carnes comedat, alioquin comesturus; hi licet secundum internum affectum transgrediantur Ecclesiasticam legem, aut præceptum; non tamen secundum effectum externum, seu



seu consummationem: ergo censuram legis aut præcepti non incurrunt.

Locuti autem sumus de simpliciter inuito, seu coacto.  
 12 At verò qui metu, quamvis graui, adactus opus quod in præcepto est, sequitur, is satisfacere, imò etiam formaliter implere censendus est; quia metus non tollit voluntarium ac liberum simpliciter; sed tantum secundum quid. Ita Sotus cit. lib. 2. quæst. 3. a. 9. Sanchez cit. c. 13. nume. 7. Azor tom. 1. lib. 10. c. 12. quæst. 9. Suarez p. 3. tom. 3. disp. 88. sect. 3. Salas cit. sect. 2. §. De eo verò, contra S. Anto. p. 2. tit. 9. c. 10. §. 2. Exemplum est, si puer à pedagogo metu pœnæ commotus Missam die festo attentè audiat. Sed quid dicendum est, si metus verberum sit pueri causa principalis audiendi Missam die festo, ita vt expressam intentionem habeat non audiendi, si pedagogus abesset: Et similis ratio est, si oblectatio piscium sit causa principalis ieiunandi, ita vt si tam boni pisces non haberentur, nollet quis ieiunium seruare. Respondeo, Talem nihilominus implere totum opus, quod ab Ecclesia præcipitur; vt proinde puer, v. g. Missam aliam audire non teneatur, si priorem attentè audiuit: Nihilominus interno affectu peccat, peccato cõmissionis, aduersus eandem Ecclesiasticam legem; & contra religionis, vel temperantiæ virtutem, cuius intuitu lex lata fuit. Probatur & explicatur: Quia lex Ecclesiæ directè tantum præcipit attentam Missæ auditionem, quam si puer adhibuit, opus totum ab Ecclesia præceptum impleuit. Verum eadem lex, dum præcipit Missam audiri, indirectè & per consequentiam efficit, vt propositum tum absolutum, tum conditionatum; imò etiam simplex affectus non audiendi Missam, si non aufert obiecti malitiam, prohibitus, & prauus sit. Qui autem tale propositum habet, si abesset pedagogus vellem negligere Missam: Nisi tam bonos pisces haberem, vellem die prohibito carnes comedere, is interno affectu versatur circa obiectum prauum ac lege prohibitum; neque aufert malitiā obiecti: ergo committit peccatum internum aduersus Ecclesiasticam legem, & contra religionis aut temperantiæ virtutem. Qua simili ratione etiam is peccat, quem postea sine iusta causa pœnitet, quod Missam festo die audierit. Hæc est doctrina Suar. lib. 5. de leg. c. 13. n. 9. & lib. 4. c. 13. num. 1. & sumitur ex cap. nulli, dist. ij Nullus est vel velle, vel posse transgredi Apostolicæ Sedis præcepta.

Corollarium II. Cùm lex Ecclesiastica præcipit orationem externam, consequenter etiam præcipit internam animi attentionem, seu in Deum eleuationem: Item cū præcipit sacramentalem Confessionem, præcipit quoque animi contritionem, attritionemve: quandoquidem neque essentia orationis sine animi attentione; neque essentia sacramenti Pœnitentiæ sine interno animi dolore consistere potest. Item cū Superior Sacerdoti præcipit vt sacrificet, sacramenta ministret; consequenter etiam præcipit, vt habeat internam intentionem sacrificandi, baptizandi, à peccatis absoluendi. Ita docent Caiet. in sum. ver. hora, §. ad tertium. Gerson loco supra cit. Sotus lib. 10. de iust. quæst. 5. a. 5. ante 7. conclus. Suar. tom. 2. de relig. libro 4. de horis, cap. 16. & lib. 3. capite 13. de legibus. num. 10. Lessius lib. 2. de iust. c. 37. dub. 11. num. 67. Azor tom. 1. lib. 10. c. 8. quæst. 7. & c. 12. quæst. 9. Sanch. lib. 1. moral. c. 13. numero 3. Quis enim neget, quin lege vel præcepto Ecclesiastico, vtpote animarum salutem spectante, præcipi possit; vt Ecclesiæ ministri verè & non simulatoriè orent, sacramenta ministrent; item fidelibus omnibus, vt sacramenta verè & non per actionem suscipiant? Qui autem sine interna attentione orant, sine villo animi dolore peccata consentunt, &c. ij non verè sed simulatoriè orant: nec verè, sed fictè Pœnitentiæ sacramentum postulant: ergo non satisfaciunt Ecclesiæ præcepto. Vide quæ dicam libro 4. tractatus 1. capite 5. numero 10.

Non poterit tamen facillè Legislator, aut Prælatus sub

peccato obligare subditos ad habendam intentionem, aliāque internam dispositionem accidentalem, seu non pertinentem ad substantiam moralem operis præcepti: v. g. vt ieiunia & orationes fiant in statu gratiæ; vel vt orationes, & sacrificia Deo offerantur ad particularem aliquā intentionem, sicuti notauit Suarez lib. 4. de legib. c. 13. n. 16. & disput. 6. de cens. sect. 3. num. 20. Prælati tamen regularibus paulò maior potestas in suos competit, ratione voti religiosi obediendi Prælato in omnibus, quæ secundum regulam vel Ordinis consuetudinem præcipiuntur. Qua de re Suarez lib. 4. de legib. c. 12. in fine, vbi monet, discrimen esse inter obligationem Regularium ex voto obedientiæ; & obligationem aliorum ex lege ciuili vel Ecclesiastica: Nam lex fundatur in iurisdictione, quæ solum data est, quantum expedit ad bonum Communitatis: præceptum autem Prælati regularis fundatur in voluntate vouentis, & pacto seu promissione eius: quæ quia principaliter fit Deo, de actu etiam merè interno fieri potest. Item, materia voti latius patet quàm legis: nam votum maximè est de consilijs, de quibus non est lex. Hæc ille.

Affertio IV. In his, quæ ad naturam corporis conseruandam & propagandam spectant, homo sui iuris esse debet, & alteri homini non subiectus, sed soli Deo. Ita S. Thom. 2. 2. quæst. 105. art. 5. in corp. Quia omnes homines natura sunt pares, in his quæ pertinent ad corporis conseruationem, & prolis generationem. Vnde non tenentur nec serui dominis, nec filij parentibus obedire in matrimonio contrahendo, vel virginitate seruanda, aut aliquo eiusmodi: sed in his quæ pertinent ad dispositionem actuum & rerum humanarum, tenetur subditus suo Superiori obedire, secundum rationem superioritatis: sicut miles duci exercitus in his quæ pertinent ad bellum; seruus domino in his, quæ pertinent ad opera seruilia: filius patri in his quæ pertinent ad disciplinam vitæ, & curam domesticam.

## CAP. V.

## De iurisdictione.

## SUMMARIUM.

- 1 Iurisdictio est facultas alicuius habentis publicam autoritatem & eminentiam super alios, ad eorum regimen & gubernationem.
- 2 Iurisdictio alia est ordinaria, & alia delegata.
- 3 Item alia est iurisdictio contentiosa, & alia voluntaria.
- 4 Voluntaria iurisdictio (ita dicta, quia non nisi volentibus fit) extra proprium territorium erga subditos exerceri potest: non autem contentiosa.
- 5 Parochus in aliena parochia suorum subditorum nuptias benedicere non debet, neque Episcopus in aliena diœcesi ordines, aut sacramentum Confirmationis conferre: sed in Pontificalibus extra diœcesim sacrificare non prohibetur.
- 6 Diuiditur item iurisdictio, quod alia sit Ecclesiastica, & alia ciuilis.
- 7 Iurisdictionis tum Ecclesiasticæ, tum ciuilis diuiditur in imperium ac simplicem iurisdictionem.
- 8 Imperium aliud est merum, aliud mixtum.
- 9 Imperij tum meri, tum mixti plures gradus distingui solent.
- 10 In generali meri aut mixti imperij concessione à Principe alicuius facta, non censentur ea comprehensa, quæ primi gradus, adeoque propria suprema potestatis esse solent.
- 11 Generalibus Sedis Apostolicæ legatis, item Episcopis & Prælati similem Episcopali iurisdictionem habentibus, competunt ea omnia, quæ sunt meri aut mixti imperij Ecclesiastici, dempto primo gradu.

**H**Actenus de ijs ferme egimus, quæ ad legis essentiā spectant. Nunc ordo postulare videtur, vt de Legislatore agamus. Sed quia legis ferendæ potestas species quædam iurisdictionis est: ideo prius vniuersim de iurisdictione quædam dicemus.

Iurisdictionis à iure dicendo, siue sententia secundum æquitatem, iurisque regulas ferenda, tanquam præcipuo publicæ potestatis officio, dicta fuit.

Definitur apud Molin. tract. 5. de iust. disp. 2. Facultas



*alicuius, habentis publicam auctoritatem, & eminentiam super alios, ad eorum regimen & gubernationem. Quare omnis ille actus iurisdictionis est, quem Superior ex publico munere ac potestate in subditos exercet: cuiusmodi sunt leges condere, in ijs dispensare, præcipere, iudicare, punire, ministros publicos creare, pupillis tutores dare, Minores atque ecclesias læsas in integrum restituere; item sacramenta ministrare, &c. Est autem iurdictio interdum libera & expedita; interdum verò impedita per censuram, v. g. excommunicationis, suspensionis ab officio; quò minus iurisdictionis facultas in actum secundum, siue exercitium validè, aut licitè prodire possit.*

2 Iurdictio diuiditur primò in ordinariam & delegatam. Ordinarius Iudex est, qui ex proprio munere seu officio iurisdictionem exercet. Delegatus Iudex est, qui non ex officio, sed ex commissione sibi facta iurisdictionem exercet.

3 Diuiditur secundo in contentiosam & voluntariam. Ad illam pertinet leges condere, præcipere, punire, causas siue controuersias eùm civiles, tum criminales definire: quamobrem proprium tribunal postulat, quò contentiosum dicitur, à partium contentione. Voluntaria verò iurdictio versatur circa alia publicæ potestatis exercitia: qualia sunt legitimare, dispensare, beneficium conferre Sacramenta ministrare, matrimonio assistere, quamuis hic actus non nisi latè loquendo à iurisdictione, prouenire dicatur, sicuti docet Sanch. lib. 8. disp. 21. de matrim.

4 Differunt I. Quòd illa etiam in inuitos exerceri possit; hæc non nisi in volentes, unde etiam nomen accepta. II. Quòd illa à Iudice extra proprium territorium exerceri non possit, siue expresse vel tacito consensu Iudicis proprii, ipsarumque partium ligantium: *cum extra territorium dicentis impune non pareatur*, c. 2. de Constit. in 6. Voluntaria autem iurdictio extra proprium territorium validè & plerumque licitè exercetur, dispensando, v. g. cum subditis in eorum votis, iuramentis: assistendo eorum matrimonijs; absolviendo à censuris, peccatis. Ratio est: Cùm voluntaria iurdictio nullum ordinarium iuris processum, neque iudicem pro tribunali sedentem requirat: ideo nulla iniuria Iudici infertur, in cuius diocesi eiusmodi actus exercentur, sicuti docent Doctores in l. 2. ff. de offic. Proconsulis, & in c. nouit, de officio legati, Syl. ver. confessor, l. qu. 14. Cou. 3. resol. c. 20. num. 8. Sanch. lib. 3. de matrim. disp. 19. num. 7. Suar. 3. p. t. 4. disp. 25. sect. 1. Quanquam ad vitandum scandalum & confusionem, voluntariæ iurisdictionis actus non publicè, quasi alienam iurisdictionem inuadendo, sed ferme tantum priuatim exercere oportet, sicuti notauit Sanc. l. c.

5 Hinc colligitur, quòd Parochus in aliena parochia suorum subditorum nuptias benedicere non debet: Neque Episcopo permissum est sine Ordinarij licentia Episcopales actus exercere, cuiusmodi sunt ordines, vel sacramentum Confirmationis conferre, quòd etiam erga proprios subditos in aliena diocesi concessum non est, sicuti colligitur ex Trident. sess. 6. c. 5. de reform. adiuncta Cardin. declaratione, & docet Henric. l. 3. c. 6. n. 6. in com. lit. a. b. Couar. cit. c. 20. n. 9.

Permissum tamen est Episcopo (nisi consuetudo repugnet) in aliena diocesi, absque proprii licentia, sacrificare in Pontificalibus, arg. Clem. ult. de priuileg. vbi id obseruat Glossa, & consentiunt Couarruias loc. cit. n. 9. Abb. in c. ult. num. 4. de translat. Episc. Sanch. l. c. num. 13. Licet Archiepiscopus in aliena diocesi pallio uti non possit: quia *strictior est usus pallii, quàm Pontificalium*, ait Glossa cit.

6 Diuiditur tertio iurdictio in Ecclesiasticam & civilem. Illa ad causas Ecclesiasticas, (id est, quæ spirituales animarum gubernationem attinent) se extendit; hæc ad politicas, quæ temporalem Reip. gubernationem proximè spectant. Ecclesiastica sub diuiditur in eam, quæ in foro externo exercetur: & in eam quæ foro interno sacramen-

7 Iurdictio fori externi cùm Ecclesiastica, tum civilis diuiditur à Bartolo in l. 1. & l. imperium, ff. de iurisdictione omnium Iudicum, Abb. in c. quòd sedes, de officio ordinarij, in imperiū & simplicè iurisdictione. Imperiū dicitur iurdictio, quæ nobili Iudicis officio exercetur. Vbi iudicis nomine intelligere oportet quamcunque publicæ potestatem, siue omnem personam, cui iurdictio supra definita competit. Nobile autem Iudicis officium vocatur, quòd per se stat, non deferuiens, aut alligatum actioni. Etenim Iudex motu proprio siue ex officio, non adactus à partibus, procedere potest ad crimina puniendā, beneficia, priuilegia conferenda, &c. iuxta c. qualiter, 2. de accusat.

Simplex iurdictio dicitur, quæ exercetur Iudicis officio mercenario. Mercenarium Iudicis officium vocamus, quòd deferuit actioni merè civili. Civilis actio est, per quam pars litigans intendit consequi ius proprium, siue quòd sua interest; Legistæ *interesse* vocant. Igitur simplicis iurisdictionis officium ideo mercenarium, & actioni deferuiens appellatur, quòd Iudex motu proprio siue ex officio procedere non possit ad causas & lites civiles: sed solum ad instantiam actoris: quare partibus actione desistentibus, vel transactione compositis, Iudex cessare cogitur: Illis autem instantibus, & iudicium postulanti-  
bus, debet sententiam ferre; neque potest partes ad compositionem compellere; nisi in raro casu, si lis nimis diuturna & intricata sit, vt expediri faciliè non possit, sicut annotauit Abb. in capite cùm pridem, numero 6. de patetis.

8 Imperium diuiditur apud eundem Barth. & Abb. II. c. in merum, & mixtum. Merum imperium est iurdictio, quæ exercetur Iudicis officio nobili, publicam vtilitatem respiciente: Eius actus sunt leges cōdere, malefactorum punire, &c. Mixtum imperium est, quòd exercetur Iudicis officio nobili, priuatam vtilitatem respiciente: Eius actus sūt dispensare, priuilegiū dare, ætatis veniā tribuere, tutores statuere, in integrū restituere, contra malefactorē procedere ad alterius instantiam, Iudicis officiū implorantis.

9 Merum imperium quibuldam veluti gradibus distinguui solet: Primus gradus *maximi imperij est*: quò pertinet potestas bellum inferendi, vniuersales leges condendi, in eisque dispensandi. vniuersalia Concilia vel Comitia cogendi, cognoscendi de causis & litibus absque remedio appellationis: Item potestas monetam cudendi, tributa imperandi, vectigalia imponendi, &c. quæ *Regalia* dici solent, quia propria Regis, siue Principis, ac supremæ potestatis existunt; licet quædam eorum inferioribus Ducibus in feudum ab Imperatore concedi soleant. Alter gradus *maioris imperij est*: quò pertinet potestas facinorosis hominibus mortis, mutilationis, vel perpetui carceris supplicium decernendi. Et vulgò quidem iste gradus nomen meri imperij absolute sibi vendicat, ex l. cit. imperium, vbi dicitur: *Merum imperium est habere gladii potestatem in facinorosos homines*. Huc etiam spectat potestas maximæ capitis diminutionis inferendæ, quæ veluti mors quædam civilis æstimabatur: quippe per quam pœnam non solum ius ciuitatis, sed etiam libertatis amittebatur, iuxta tit. Institut. de cap. diminut. nunc verò apud Christianos in vsu esse desijt. Secundum ius Canonicum ad hunc gradum pertinet potestas Clericum degradandi, & laicæ potestati tradendi; Item excommunicandi, non ad instantiam partis læsæ, sed motu proprio: Quæ de re Molina tract. 5. de iustit. disp. 6. Tertius gradus *imperij magni est*: quò pertinet potestas igni & aquâ interdicens, (quæ etiam pœna hodie in vsu esse desijt) in insulam deportandi. diciturque hæc media, siue minor capitis diminutio, per quam ius ciuitatis amittitur; sed libertas retinetur, sicut videre est tit. Institut. de capitis diminutione. Quartus gradus est *parui imperij*: quò pertinet potestas relegandi, torture subiiciendi: in corpore acriter, sed citra mortem, vel mutilationem, v. g. flagellis puniendi;



niendi: cuiusmodi pœnam etiam in Ecclesiastico foro loco in habere, testantur Abb. & Molina l. cc. Quintus gradus est *imperij minoris*: quò pertinet modica coercitio in corpore. Sextus gradus est *imperij minimi*: quò pertinet exigua multa pecuniaria. Qui duo postremi gradus cuilibet Magistratui, tam civili, quàm Ecclesiastico competunt, cum alioquin iurisdictio imperij quasi inutilis esset, nisi vim cogentem haberet per coercionem, vel multam, saltem modicam. Adde, ex l. r. ff. de officio eius, cui mandata est iurisdictio: hos duos gradus, qui iure Magistratus competunt (id est, cuius, quia Magistratum aliquem gerit) etiam alteri delegare permissum esse.

Imperium mixtum pari ferme modo in suos gradus distingui posset. Est enim vnus gradus maximi imperij, Principi referuatus; v.g. illegitimum, vel communi iure infamem integro statui, vel famæ restituere: Reo condonare veniam delicti, si nulla pars læsa adsit, quæ suam suorumve iniuriam prosequatur: reuocare sententiam, quæ transiit in rem iudicatam, &c. Et sic deinceps ad alios gradus, qui inferioribus etiam potestatibus competunt, descendendi potest.

<sup>10</sup> Sed quia non optis est ea hîc profèqui, duo tantum annotare libet. Primum: in generali meri aut mixti imperij concessione à Principe alicui facta, non censentur ea comprehensa, quæ primi gradus, adeoque propria supremæ potestatis esse solent, nisi speciatim exprimantur, iuxta regulam 81. in 6. *In generali concessione non veniunt ea, quæ quis non esset verosimiliter in specie concessurus.* Vide hac de re. Couar. in pract. qq. c. 4.

<sup>11</sup> Alterum: Non tantum generalibus Sedis Apostolicæ Legatis, sed etiam Episcopis, aliisque Prælati, similem Episcopali iurisditionem obtinentibus: quin etiam Regularium supremis Prouincialibus, vel Generalibus ab Episcoporum iurisditione exemptis ordinario iure competunt ea omnia, quæ sunt meri vel mixti imperij Ecclesiastici, dempto primo gradu, sicuti colligitur ex cap. 1. de officio ordinari. & videri potest Molina tractat. 5. disp. 6. & 7.

## CAP. VI.

## De lege, ac legislatore Ecclesiastico vniuersali.

## S V M M A R I V M.

<sup>1</sup> Lex & legis latrix potestas alia est Ecclesiastica, alia civilis: differunt inter se tum ratione originis: tum ratione finis.

<sup>2</sup> Civilis potestas subordinata esse debet Ecclesiastica potestati, ratione finis.

Potestas Ecclesiasticorum Præfulum ad aliorum regnorum iura, & causas civiles directæ & ordinariæ via se non extendit.

<sup>1</sup> **D** Vplex est lex, & legislatrix potestas, Ecclesiastica & Civilis. Differunt inter se tum ratione originis: quia Ecclesiastica potestas proximè ac immediatè à Deo instituta est: civilis verò ab hominibus immediatè prouenit, vt infra dicam, atque ex communi docet Couar. c. 1. pract. qq. n. 6. Sotus. l. 4. de iust. q. 4. r. 1. concl. 2. Tol. super c. 13. Epist. ad Roman. Nau. c. nouit, de iudicijs, notab. 3. n. 82. tum ratione obiecti ac finis: quia Ecclesiastica per se ac directè versatur circa res spirituales ad salutem animarum, & vitam æternam ordinatas, sicut constat ex verbis Christi Matt. 16. *Tibi dabo clauis regni cælorum.* & Ioan. 21. *Posce oues meas.* Et ex Apostolo Paulo c. 2. A&or. *Posuit vos Spiritus sanctus Episcopos regere Ecclesiam Dei, quam acquisiuit sanguine suo.* Quare, cum Christus sanguinem suum fuderit, vt acquireret ac fundaret Ecclesiam sanctam, & ad vitam æternam ordinatam; idcirco etiam Episcopos siue Pastores ei constituit, qui ad eundem

æternæ vitæ finem Ecclesiam dirigerent ac gubernarent. Civilis verò potestas se ac directè temporalem tantum commoditatem ac pacem spectat, sicut colligitur ex Apo. 1. ad Timoth. 2. vbi orare iubet *pro Regibus, & omnibus, qui in sublimitate sunt, & quietam & tranquillam vitam agamus.* Quare bene Hosius Episcopus apud S. Athanasium in ep. ad solitariam vitam agentes, ita Constantium Imperatorem allocutus est: *Tibi Deus imperium commisit: nobis quæ sunt Ecclesia, concedit: & quemadmodum, qui tuum imperium malignis oculis carpit, contradicit ordinationis diuinæ: ita & tu caue, ne quæ sunt Ecclesia ad te irabens, magno crimini obnoxius fias.* Et pulchrè S. Ignatius in Epistol. 6. ad Philadelphenses: *Principes obediant Cæsari: milites Principibus: Presbyteri, Diaconi, & reliqui clerici vna cum populo vniuerso, militibus, Principibus, atque Cæsare, ipsi Episcopo pareant.*

Corollarium. Sicut corpus animæ naturalia supernaturalibus, temporalia æternis, veluti mediâ finî subordinata sunt: ita civilis potestas Ecclesiasticæ potestati Ecclesiasticæ potestati subordinata esse debet. Quâ similitudine vtitur S. Nazianzen. orat. 17. S. Chrysostom. homil. 4. & 5. in Esa. & lib. 3. de Sacerdot. & clarè Innocentius III. ca. solitæ, de maior. & obed. ait: *Pontifex in spiritualibus antecellit, quæ tantò sunt temporalibus digniora, quantò anima præfertur corpori.* Ex quo infert Bonifacius Papa VIII. extravagant. vnâ sanctam, eodem tit. *Oportet gladium esse sub gladio, & temporalem auctoritatem spirituali subicere potestati: cum dicat Apostolus, Non est potestas nisi à Deo: quæ autem sunt à Deo, ordinata sunt: non autè ordinata essent, nisi gladius esset sub gladio, & tanquam inferior reduceretur per alium ad supremam.* Vide etiam Gelasium Papam epistol. 10. ad Anastasium in cap. duo sunt, d. 96. & Symmachum Papam in Apologia aduersus eundem Anastasium. & in Synodo Romana 3. cuius verba referuntur cap. bene quidem, ead. d. Nicol. 1. in Epistol. ad Michaelem Imperatorem, Innocent. III. in c. nouit, de iudicijs, ibidem Naua. notab. 3. & 6.

Cæterum, cum hæ duæ potestates, civilis & Ecclesiastica, proprijs officijs ac dignitatibus discretæ sint: & vtræque in suo genere perfecta, & per se sufficiens esse debeat; sequitur, quòd potestas Ecclesiasticorum Præfulum, etiâ summi Pontificis, ad alienorum regnorum iura & causas civiles directæ & ordinariæ via se non extendat, sicuti docet Nicolaus Lin epist. ad Michaelem Imperat. quæ incipit *Proposueramus quidem, prope finem,* & Alexander III. c. si duobus, §. denique de appellat. vbi habetur, quòd à civili Iudice ad Sedem Apostolicam, extra temporalem Papæ iurisditionem, appellari non potest: præterquam in perfectum Iudicis secularis, si is iustitiam administrare nolit tunc denique etiam in causis temporalibus inter Christianos Ecclesiasticus Iudex adiri posset, sicuti colligitur ex c. licet, 1. de foro compet. & tradit Abb. cit. c. si duobus, num. 5. Henricus de Gandauo in quodlibeto 6. qu. 23. Præterea si civiles leges hominum peccata foueant, & animarum saluti repugnent, ad Ecclesiasticam potestatem pertinet prohibere: quandoquidem Pontifices etiam proprijs Regibus hominum, in diuino sunt reddituri examine rationem, ait Gelasius Papa ep. ad Imper. Anastasium, quæ incipit, *Famuli vestre pietati,* & refertur in capite duo sunt, dist. 69. Et in cap. 11. d. 96. Ioan. Papa VIII. *Si Imperator Catholicus est, filius est, non præsul Ecclesia: quòd ad religionem competit, discere ei conuenit, non docere.*

## §. I.

## De summo pontifice.

## S V M M A R I V M.

<sup>1</sup> Romanus Pontifex est totius Christiani populi pastor. omnino  
E iij



*Ecclesiarum caput, & Episcopus Episcoporum.*

- 4 *S. Petrus etiam ipsis reliquis Apostolis à Christo prapositus fuit.*
- 5 *Potestas S. Petro collata super Ecclesiam Christi, non fuit tantum perfecte vniuersalis: sed etiam ordinaria: siue perpetuo in successoribus duratura.*
- 6 *Suprema iurisdictio Papa non confertur à Cardinalibus: per electionem: sed à Christo prouenit: & promissionis facta. Sancto Petro.*
- 7 *Summus Pontifex ab Ecclesia iudicari non potest, nisi in causa hæresis.*
- 8 *Sedes Romana per antonomasiam Apostolica appellatur.*

3 **I**nter Ecclesiasticos legislatores primum ac præcipuum locum tenet Romanus Pontifex tanquam totius populi Christiani Pastor, omniumque Ecclesiarum Caput, sicuti passim omnia Concilia & Patres profitentur, certaque fide tenendum est. Et sumitur ex voluntate atque institutione Christi Domini, qui apud S. Matth. c. 16. specialem promissionem fecerat S. Petro: *Et ego dico tibi, quia tu es Petrus, & super hanc petram ædificabo Ecclesiam meam.* Nam sicuti fundamento totum reliquum ædificium imponitur, sic S. Petro tanquam Capiti tota Ecclesiæ gubernatio à Christo committenda erat. Et tibi dabo claves regni cælorum: quo clauium nomine spirituales iurisdictionem ac potestatem significari, constat ex cap. 12. Isa. Apocal. 3. *Et quodcumque ligaueris super terram, erit ligatum & in cælis: & quodcumque solueris super terram, erit solutum & in cælis.* Quibus verbis vniuersalis plenitudo potestatis significatur, quam S. Petrus eiusque successores, Christi in cælis regnantis visibiles Vicarii, habituri erant. Hanc verò promissionem S. Petro factam postea Christus impleuit cap. 21. Ioan. ubi ipsum publicè interrogans: *Simon Ioannis diligis me plus his?* haud dubiè significans plus eum quam Apostolos cæteros accepturum: mox subiungit, *Pasce agnos meos: & iterum, Pasce agnos meos: Tertio, Pasce oues meas.* Vbi primò notandum est verbum *pasce*, quod regendi atque imperandi potestatem significat, iuxta illud Domini Dei ad regem Cyrum Isaia cap. 44. *Pastor meus es.* Et ad Dauidem 2. Regum 5. *Tu pasces populum meum Israel.*

Secundò notandum est vocabulum *oues meas*, quod omnes fideles ad Christi ouile, pertinentes, adeoque ipsos quoque reliquos Apostolos, Episcopos, Reges ac Principes Christianos, S. Petro, eiusque successori, tanquam Pastori & Capiti suo, subiectos esse significat, sicut egregiè annotauit Bonifacius VIII. in extrauagant. vnam sanctā, de maiorit. & obed. *Ecclesiæ vnius, & vnice vnum corpus vnum caput, &c.* dicente Domino ipsi Petro, *Pasce oues meas: meas quidem, & generaliter non singulariter has vel illas: per quod commissæ intelligitur vniuersas.* Similia habet S. Bern. lib. 2. de Consider. ad Eugenium: *Non modo omnium, sed & pastorum, in vnum omnium pastor. Vnde id probem quæris? Ex verbo Domini: Cui enim non dico Episcoporum: sed etiam Apostolorum, sic absolute & indiscretè totæ commissæ sunt oues? Si me amas Petre, Pasce oues meas. Quas: illius, vel illius populos ciuitatis, aut regionis, aut certè regni? Oves meas, inquit; Cui non planum, non designasse aliquas, sed adsignasse omnes? Nihil excipitur, ubi distinguitur nihil.*

4 Neque mysterio vacare aliqui arbitrantur, quòd Christus agnos suos Petro geminim commendauit pascendos, ad significandum geminum populum, & qui ex Iudeis, & qui ex gentibus crediturus erat. Denique verò subiūxit, *Pasce oues meas;* quia etiā agnorū matres, id est, reliquorum fidelium genitores, puta Apostolos, omnesque Episcopos eius curæ & gubernationi committebat, adeoque Episcoporum Episcopum S. Petrum constituēbat. Etenim licet Apostoli omnes, ac singuli à Christo ipso vniuersalem iurisdictionem super fideles acceperint, sicuti patet apud S. Matth. c. 18. *Quodcumque ligaueritis super terram, erunt ligata & in cælo,* Ioan. 20. *Sicut misit me Pater, & ego mitto vos,* Matth. vlt. *Euntes docete omnes gentes:* Tamen vñ Ecclesiæ unitas sub vno capite & pastore conseruaretur

vnum etiam reliquis Apostolis Christus præposuit Petrum. Quod S. Hier. annotauit lib. 11. in Iouinianum, *Licet super omnes Apostolos ex æquo Ecclesiæ fortitudo solideretur: tamen propterea inter duodecim vnus eligitur, ut capite constituto, schismatis tolleretur occasio.* Et Leo I. Epist. 84. ad Anastas. Episc. *Inter Apostolos in similitudine honoris fuit quadam discretio potestatis: & cum omnium par esset electio, vni tamen datum est, ut cæteris præmineret.* Vide eundem in Natali Apostolorum Petri & Pauli, & serm. 3. suæ assumpt. & ep. 59. ad Episc. Vienneses, S. Cypr. in l. de vnit. Ecclesiæ, & l. 4. epist. 2. & 8. S. Chrysost. 55. in S. Matth. S. Greg. l. 4. Ep. 32. ad Mauritium Aug. Gratianum d. 21. c. in nouo, & seq. Caiet. de auctor. Papæ & Concil. cap. 3. Suar. lib. 3. defens. Cathol. cap. 10. Ioan. Turrecrematam lib. 2. sum. de Ecclesiæ.

Tertiò notandum est, quòd Petro collata potestas super Ecclesiam Christi non fuerit tantum perfecte vniuersalis, sed etiam ordinaria, & perpetuò duratura. Id enim significant verba illa, *Super hanc petram ædificabo Ecclesiam meam, & porta inferi non præualebunt aduersus eam.* Sicuti enim visibilis Ecclesia Christi perpetuò duratura est; ita & eius fundamentum, atque pastor: quod cum in persona S. Petri fieri non possit, in eius successoribus fieri debet, sicuti benè expressit Leo 1. ser. 2. de assumptione sui ad Episcopatum: *Sicuti permanet, quod in Christo Petrus credidit, ita permanet, quod in Petro Christus instituit.* Et Innoc. IV. in c. 1. de homic. in 6. *Iesus Christus, ne gregem sui pretio sanguinis gloriosi redemptum, ascensurus post resurrectionem ad Patrem, absque pastore desereret, ipsius curam B. Petro Apostolo commisit:* quod non solum pro tempore primitiue Ecclesiæ, sed etiam deinceps locum ac robur suum habet.

6 Ex quo colligitur, Papalem potestatem ac iurisdictionem non conferri à clero Romano, vel Cardinalibus per electionem: quomodo enim conferant talem potestatem, qua ipsimet carent? Quandoquidem *nemo potest plus iuris transferre in alium, quam sibi competere dignoscatur.* Reg. 79. in 9. Tantum igitur illi designant personam: cui ex vi promissionis, institutionisque à Christo factæ Petro, eiusque successoribus suprema iurisdictione confertur: vt rectè Inno. III. dixerit in c. nouit, de iudicijs, *Potestas nostra non est ex homine, sed ex Deo.*

7 Quamobrem etiam illud obseruatum semper fuit, vt summus Pontifex à nemine iudicari, aut deponi posset, neque ab Augusto, neque ab omni clero, neque à Regibus, neque à populo Index indicabitur, c. vlt. Concil. Rom. sub Syluestro I. Similia habet Ennodius Diaconus in Concil. Romano sub Symoncho Papa, & plura videri possunt apud Simancam de Cathol. inst. tit. 12. n. 1. Cum enim potestatem suam nō ab Ecclesia, sed à Christo acceperit; consequens est, vt eadem excidere non possit, nisi Christo permittente, vel auferente. Quòd accidit I. si in hæresin notoriam labatur, saltem postquam ab Ecclesia declarata est, sicuti docet Suar. lib. 3. defens. fidei Cathol. c. 18. & l. 4. de leg. c. 7. II. Si Papa Episcopatum resignet, Ecclesia resignationem acceptante. III. Si exterius se gerat vt hæreticum, ideòque Ecclesia alium eligat: qua ratione submoto Liberio Pontifice, Felicem 11. substituisse existimat Bellarm. lib. 4. de Pontif. c. 9. IV. Tempore schismatis, si Ecclesia cognoscere non possit, quis verus Pontifex sit, potest alium eligere, sicuti docet Suar. lib. 3. defens. Cathol. cap. 18. & indicat. Bellarm. de Concil. libro 2. capite 19. ad 3. argum.

Atque hanc causam esse arbitror eius, quod passim legimus; Romanorum Pontificum fidei & morum decreta, B. Petri autoritate sanciri: quia eadem & Ecclesiæ potestatis plenitudo, & infallibilis autoritas, quæ à Christo B. Petro data est, in successoribus permanet. Ita enim legimus in Concil. Calcedon. Act. 2. *Petrus, per Leonem locutus est.* Et Act. 3. in epistol. Patrum ad Leonem I. *Vocis B. Petri omnibus constitutus interpret, eius fidei beatus.*



beatificationem super omnes inducens. Petrus Chrysologus in epist. ad Euthychetem, quæ habetur t. 2. Concil. ante Conc. Chalced. B. Petrus, qui in propria sede vixit, & præfides, præstat quærentibus fides veritatem. Et in Conc. VI. generali Act. VIII. Domitius Episcopus dixit: *Suggestiones directas à Patre nostro Agathone, sanctissimo Archiepiscopo Apostolica & principalis Sedis antiqua Roma, &c. tanquam à Spiritu sancto dictatas, per os sancti & beatissimi Principis Apostolorum Petri, prædico.* Similia habet Gelasius epist. ad Episcopos Dardaniæ, Agatho Papa in c. 2. d. 19. *Sic omnes Apostolica Sedis sanctiones accipiendæ sunt, tanquam ipsius diuini Petri voce firmata.*

8 Deinde obiter hic notandum est, Sedem Romanorum Pontificum per antonomasiam passim in Concilijs, & antiquorum scriptis *Apostolicam* appellari, non tantum quia in ea Principi Apostolorum Petro succeditur; sed etiam quia cum simili auctoritate Apostolica & vniuersalis gubernationis, succeditur, quod nulli alteri Episcoporum concessum est: ij enim Apostolis successerunt in Episcopatu Ecclesiæ particularis; sed non in Apostolatu seu vniuersali iurisdictione erga fideles omnes. Quamobrem Patres VI. Concilij generalis Act. 18. Agathonem Papam vocant, *summum Apostolorum veritatem*. Patres. IV. Concilij generalis, quod est Chalcedonense, Actione 1. Leonem Papam vocant *Apostolicam sanctitatem*. In Ephesino Concil. generali, Act. 1. Celestinus Papa *vir Apostolicus*; & in subscriptione, *Papa Apostolicus* appellatur.

Nota autem hoc loco, quod Romani Pontifices abhorrere soliti sunt à nomine Oecumenici, seu Episcopi vniuersalis; partim propter Constantinopolitanos Patriarchas, qui hoc nomen superbe sibi arrogare ausi sunt, vti videre est in epist. Pelagij II. ad vniuersos Episcopos, quæ incipit *Manifesto*. Greg. I. lib. 4. indict. 13. epist. 38. ad Ioannem Constantinopolitanum: tum quia nomen illud ambiguum sensum habere potest; quasi verò qui se vniuersalem seu vniuersum Episcopum appellat, solus Episcopus esse velit, vti aperte significat Pelagius in cit. epist. & Greg. I. lib. 4. indict. 13. epist. 32. ad Mauritium Imperat. & lib. 7. epist. 30. ad Eulogium Episcopum: *Sic enim vniuersalem me Papam vestra Sanctitas dicit, negat se hoc esse, quod me fateatur vniuersum. Sed absit hoc.* At verò titulus, quo Romani Pontifices insigniri voluerunt, est *vniuersalis*, seu *vniuersæ Ecclesiæ Episcopus*, aut *Pastor*. Ita enim ipsemet Gregor. in cit. epist. ad Mauritium: S. Petro cura totius Ecclesiæ & principatus committitur, & tamen *vniuersalis Apostolus non vocatur*. Et epist. ad Abbatem Gairaldum to. 2. edit. Lugdun. fol. 269. col. 1. *Hæc sedes Romana speculationem suam toti orbi indicit, & nouas constitutiones omnibus mittit.* Quare licet Chalcedonense Concil. Leoni Papæ vniuersalis Episcopi titulum detulerit; ipse tamen Leo non ita se appellare solitus est, sed *vniuersalis Ecclesiæ Episcopus*, vti videre est epist. 52. ad Maritianum Imperat. Et in Concil. Chalcedonensi Paschasius Episcopus subscripsit, *vice beatissimi & Apostolici, vniuersalis Ecclesiæ Papæ urbis Romæ Leonis, sanctæ Synodo præsidens.*

## §. II.

## De generalibus concilijs.

## SVM MARIVM.

9 Concilia generalia dicuntur, quæ summi Pontificis auctoritate congregata sunt. Vniuersi orbis Christiani Episcopis conuenientibus. Ea potestatem habent vniuersales leges in Ecclesia condendi, & fidei controuersias decidendi. Papa Concilio generali extra Urbem in propria persona interesse nunquam solet: quamobrem necesse est, ut quæ in Concilio acta sunt ad Romanum Pontificem transmittantur, approbationi & confirmationis causa.

10 Soli Episcopi in Concilijs sententiam decisivam dicunt, iure proprio ac ordinario: sed ex privilegio, aut consuetudine etiam

alijs Ecclesiasticis, non item laicis personis competere solet.

9 Concilia item Oecumenica potestatem habent vniuersales Ecclesiasticas leges siue canones qui totam Ecclesiam obligent, condendi; sicuti & fidei controuersias decidendi. Etenim in Concilijs non nouæ definitiones seu articuli fidei conduntur, sed quæ antea in Ecclesia Christi receptæ erant, declarantur, confirmantur, vti testatur Vincent. Lirinensis cap. 32. aduersus hæreses. Oecumenica seu generalia Concilia dicuntur, quæ summi Pontificis auctoritate congregata sunt, vniuersi Christiani orbis Episcopis conuenientibus. Vbi duo declaranda & ostendenda sunt: I. Concilium generale censi non posse, nisi cum consensu & auctoritate Episcopi Romani congregatum sit, quam partem commodius tractabo lib. 2. tr. 1. c. 7. n. 5. Quod verò ad alteram partem attinet, non ita accipi debet, quasi necesse sit omnes Episcopos Concilio Generali interesse; sed quod omnes interesse possint, ac nemo excludendus sit. Consuetum autem ferme erat, ut si in Oriente Concilia celebrarentur, pauci admodum ex Occidente, nomine aliorum missi, eo accederent: & vice versa, si in Occidente generale Concilium celebraretur, ut pauci ex Oriente aduenerent. Interdum verò accidit, ut seorsim in Oriente conuenirent Episcopi: quæ verò in Oriente decreta erant, in Occidente à Summo Pontifice postea examinari & approbari debuerunt: cuius rei exemplum habes. Concilio Constanti-nopolitano contra Macedonium, apud Theodoretum lib. 5. c. 10. hist. Gregor. I. lib. 6. indict. 15. epist. 195. ad Eulogium, vbi monet, canones eius Concilij ab Occidentalibus, ipsaque imprimis sede Apostolica receptos non esse, sed solum quod in fide contra Macedonium statutum erat. Præterea cum Sum. Pontifex generalibus Concilijs, si extra urbem habeantur, in propria persona interesse nunquam soleat, teste Leone I. epist. 13. & 17. ad Theodosium Imper. ideo non sufficit Occidentales Episcopos, aut legatos ex Vrbe Concilijs interesse, nisi etiam postea decreta Romam transmissa, à Romano Pontifice, tanquam Ecclesiæ totius capite, approbentur & confirmantur, vti docet Caiet. in opusc. de auctor. Papæ & Concilij, c. 6. Nau. consil. 1. de Constit. q. 1. n. 4. Suar. lib. 4. de legibus, c. 6. & constat ex traditione: nam Episcopi seu Patres Conciliorum oecumenicorum gesta ad Romanum Pontificem transcribere, confirmationemque petere consueverunt, vti videre licet in epist. Synodica Conc. 1. Niceni ad Syluest. Papam, *Quidquid constitutum in Concilio Nicano, precamur vestri oris consortio confirmetur.* Et in Ephesino Concil. to. 1. c. 29. Chalcedonensi Concil. in epist. Synodica ad Leonem I. quæ est post aet. 16. Etenim, nisi fateamur, Conciliorum auctoritatem à summi Pontificis consensu & approbatione dependere, causa reddi non potest, cur quædam Concilia interdum maioris numeri Episcoporum, & Archiepiscoporum reprobata; quædam verò licet non reprobata, tamen non ut generalia & infallibilem auctoritatem habentia, recepta sint; quædam denique etiam interdum minoris numeri Episcoporum, ex diuersis provinciis iussu Romani Pontificis congregatorum, decretis eiusdem Pontificis auctoritas & approbatio demum accessit. Ex quo bene colligit Gelasius Papa in epist. 13. ad Dardaniæ Episcopos, to. 2. Concil. *Vniuersusque Synodi constitutum, quod vniuersalis Ecclesiæ probauit assensus, non aliquam magis exequi Sedem præ cæteris oportere, quam primam, quæ & vniuersamque Synodum sua auctoritate confirmat, & continuata moderatione custodit.* Quamobrem etiam hodie Tridentini Concilij canones, pro horum temporum disciplina Ecclesiastica salubriter constituti, diligenter obseruari solent ac debent; excepta tamen plenitudine potestatis Papalis, si causa recedendi videatur. Alioquin verò si causa nulla adsit recedendi, aut dispensandi, etiam Summum Pontificem secundum vim directiuam Eccle-



lis, quasi Rex in regno: Episcopi vero assumuntur in partem sollicitudinis, quasi Indices singulis civitatibus prepositi.

- 4 Id imprimis vetustissima traditio confirmat. Tres enim tantum in primitiva Ecclesia habebantur Sedes Patriarchales, quæ à S. Petro, tanquam summo Ecclesiæ capite, & communi omnium Patre fundatæ, & institutæ erant; Romana, Alexandrina, Antiochena. Quod egregie magnus Gregorius observavit lib. 6. indictione 15. Ep. 37. ad Eulog. Episc. Alexandr. Cum multi sint Apostoli, pro ipso tamen principatu sola Apostolorum Principis Sedes in auctoritate conualuit, quæ in tribus locis unius est: Ipse enim subleuavit Sedem, in qua & quiescere, & presentem vitam finire dignatus est. Ipse decorauit sedem (Alexandrinam) in quam Euangelistam discipulum misit: Ipse firmavit Sedem (Antiochenam) in qua septem annis, quamuis discessurus, sedet.

Quam ob rem Romani Pontifices Græcis constanter se semper opposuerunt, volentibus Sedem Constantinopolitanam, propter Imperatoriæ sedis dignitatem, inter Patriarchales alteram post Romam recensere, sicuti constat ex epist. 53. Leonis Papæ ad Anatolium. Ep. 54. ad Martianum Augustum Ep. 55. ad Pulcheriam Augustam. Item Gelasij I. epist. 4. ad Faustum Magistrum, & epist. 13. ad Episc. Dardaniam. Donec Iustinianus Imperator post annum Christi 500. non secundum canones (vt ipse ait Constitut. Nouel. 131. c. 2.) sed propria potentia fretus, Constantinopolitanam Ecclesiam inter Patriarchales secundo loco numerari præcepit: Cui deinde Græcorum, Orientaliumque Imperatorum voluntati Romani Pontifices cesserunt, vt tum Constantinopolitana, tum etiam Hierosolymitana Ecclesiæ Patriarchalibus annumerarentur, sicuti manifestum est ex can. 21. Concil. vniuers. Oecumen. & cap. 5. Concil. 4. Lateranensis sub Innoc. III. Vide c. antiqua de Priuil. & Seuerinum Binium in notis Conc. Nic. can. 7. §. Quia consuetudo. Bellarm. lib. 1. de Pontif. cap. 24.

Porro, cum sedium Patriarchalium institutio atque diuisio à S. Petro manauerit, cum subiectione erga ipsum, eiusque successores Summos Pontifices; Patriarchalibus autem sedibus reliquæ inferiores Ecclesiæ subordinatæ fuerint, sicuti constat ex can. 6. Nicæni Concilij; apparet hinc recta Ecclesiastici regiminis à Summo capite per reliquas partes diffusio & subordinatio. Quod respexisse videtur Damasus Papa, cum in Epist. Synodali ad Episcopos Africæ, & Innoc. I. epist. 2. ad Victorium dixerunt; Per Apostolum Petrum & Apostolatus, & Episcopatus in Christo capisse exordium. Et idem Innoc. Epist. 26. ad Concil. Mileuitanum, Quoties ratio fidei ventilatur, arbitror omnes fratres & Coepiscopos nostros non nisi ad Petrum, id est, sui nominis & honoris auctorem, referre debere (veluti nunc retulit vestra dilectio) quod per totum mundum possit Ecclesiis omnibus in commune prodesse. Hinc egregie etiam S. Irenæus scripsit lib. 3. contra hæreses, c. 3. Ad hanc enim Ecclesiam, (Romanam) propter potentioris eius principalitatem, necesse est omnem conuenire Ecclesiam, hoc est, eos qui sunt undique fideles.

- 5 Profecto perpetua Ecclesiæ praxis atque traditio declarat, ad Romanum Pontificem pertinere electos Episcopos confirmare, eosdem exigentibus causis deponere; eorum iurisdictionem cum locorum spatijs, tum causarum qualitate definire; ab ipsorum iurisdictione aliquos eximere; subiectorum vero appellationem admittere. Quæ omnia arguunt, iurisdictionem non à Christo diuino iure, sed proximè à Papa humano iure ipsis comperere. Lege S. Bern. epist. 131. ad Mediolanenses, & Nauar. cōment. de Spolijs clericorum, §. 3. qui ex tradita doctrina resoluit: Si Summus Pontifex sine iusta causa ab Episcopis, aliisque beneficiatis beneficia auferat, licet peccet: tamen beneficia vacare, & ab altero impetrari ac retineri posse, sine restituendi obligatione.

Obijci verò potest primò, Dictum illud Anacleti Papæ epist. 2. decret. Episcopos in Apostolorum locum succe-

sisse. Quod & Florentinum Conc. in instruct. Armenorum. & Tridentinum sess. 23. c. 4. asserit. Ergo sicuti Apostoli, ita & Episcopi à Christo iurisdictionem accipiunt. Respondeo, Dictum illud non posse intelligi secundum proprietatem: Neque enim Episcopi nunc sunt Apostoli: alioquin fateri deberemus, eorum iurisdictionem toto terrarum orbe se extendere; habere etiam eos potestatem Ecclesias fundandi, & alia Apostolica munera obeundi. Sed intelligi debet primò, secundum similitudinem ac proportionem: quod sicuti primi sub Christo in terris viuenti fuerunt Apostoli duodecim, deinde septuaginta duo discipuli: ita nunc primi sub Romano Papa sint Episcopi: postea Presbyteri ac Diaconi. Secundò, succedunt Episcopi Apostolis ratione Episcopalis Ordinis: quanquam non solis Apostolis, sed etiam Timotheo, Tito, aliisque primis Ecclesiarum Episcopis, qui Apostoli non fuerunt. Tertio, Aliqui Episcopi, v. g. Hierosolymitanus, Ephesus successerunt Apostolis Ioanni, Iacobo in particularibus Ecclesijs, ad quas illi primitus ordinati fuerunt: non item in Apostolatu & iurisdictione vniuersali, quo pacto soli Petro ex Christi institutione succeditur. Quod egregie indicauit Leo Papa I. epist. 87. ad Viennenses; Muneri huius (Euangelicæ prædicationis) sacramentum ita Dominus ad omnium Apostolorum officium pertinere voluit, vt in beatissimo Petro Apostolo omnium summo principaliter collocaret: vt ab ipso quasi quodam capite, dona sua velut in corpus omne diffunderet. refertur in c. ita Dominus, d. 19.

Obijci potest secundò, Quod ordinatio Episcoporum, secundum antiquos canones, non à Romano Pontifice; sed ad testimonium, populi electionem Cleri: à Prouinciæ Episcopis, cum auctoritate Metropolitanis sue Primatis, fieri debebat, sicut constat ex c. 6. Nicæni Concilij, Arelat. 2. c. 6. Carthag. 2. c. 12. Carthag. 4. c. 1. ex ep. Synodali Romani Concilij sub Siricio Papa, c. 1, & Concil. Tauritanensi sub eodem Siricio, cap. 1. & pluribus, quæ congerit Gratianus d. 63. Respondet Suar. cap. 4. n. 25. consensisse Romanos Pontifices, vt in Asia, aliisque remotioribus regionibus, à Comprouincialibus, ipsosque præsertim Primates, singularum Ecclesiarum Episcopi crearentur. Addere non possumus cum Baronio tom. 6. An. Christi 482. nihilominus morem antiquissimū fuisse, vt ad Romanum Pontificem referretur, quinam etiam in Orientalibus regionis Episcopi, præsertim Patriarchæ, canonicè electi essent: cuius rei luculentus testis est Simplicius Papa in epist. 14. ad Acacium, & epist. 17. ad eundem: Alexandrina Sedes ad nos ex more relatio missa perrexit, sanctæ memoriæ fratrem quondam & Coepiscopum nostrum obisse Timotheum; inque eius vicem, consona fidelium voluntate, Ioannem, cui ad Sacerdotium constare crederentur omnia subrogatum: & nihil omnino restare videbatur, nisi vt Deo gratias agentibus nobis, atque gaudentibus, vt sine strepitu, quod Catholicus in defuncti ministerium successisset Antistes, Apostolica quoque moderationis assensu votiuam sumeretur firmitatem. Cum ecce secundum consuetudinem mihi talia disponenti, tranquillissimi Principis (Zenonis) scripta sunt reddita, quibus memoratum tanquam periurij reū, sacerdotio perhibere indignum, illic retraxi pedem, & meam renocavi super eius confirmatione sententiam. Vide plura de Episcoporum confirmatione apud Gregor. I. in c. quanto, d. 63. ex lib. 2. indict. 11. epist. 30. Quando Apostolica Sedes, Deo auctore, cunctis prælatis constat Ecclesijs; tantò inter multiplices curas & illanos valde sollicitat: ubi ad cōsecrandū Antistitem nostrum expectatur arbitrium. Et infra: Tunc enim (Constantium à Clero Mediolanensi electum) à proprijs Episcopis, sicut antiquitatis mos exigit, cum nostra auctoritate assensu, solatiante & auxiliante Domino facias consecrari: quatenus huiusmodi seruata consuetudine, & Apostolica Sedes proprium vigorem retineat, & à se concessa alijs suauiter non minuat. Vide etiam c. Salonitanæ, eod. d. & cap. auctorialis, 7. q. 1.



Ex his omnibus colligo, dictum Canonist. *Quod potest Papa in tota Ecclesia, id etiam potest Episcopus in sua diocesi*, intelligendum esse I. cum dependentia & subordinatione ad Papam, tanquam Superiorem, iuxta cap. qui se fecit, & seqq. 2. q. 6. II. De communi & ordinaria gubernatione, exclusis causis maioribus, & ad primum gradum meri imperij pertinentibus, quæ summæ Sedi in signum specialis privilegij reseruata sunt, iuxta c. 1. & 2. de translatione, c. translationem, de offic. Legati, c. maiores, de Baptismo, c. quamuis, 3. quæst. 6. & testantur Damasus Papa in epist. 4. Zosimus in epist. 5. ad Episc. Galliarum, & Aegyptij Episcopi in epist. ad Felicem II. Huc pertinet v. g. dispensatio in impedimento matrimonij: dispositio vel translatio Episcopi: diocesum diuisio, mutatio. III. Vt nihil contra vniuersales Ecclesiæ leges vel consuetudines Episcopus decernat: quamuis secularibus Ducibus saepe concessum sit contra legem Imperatoriam statuere, cuius discriminis rationem videre potes apud Abb. c. vlt. de consuet. num. 9. Anton. de Butrio in c. 1. num. 3. de translatione Episc. IV. Episcopi, atque alij Papæ inferiores non possunt statuere, aut privilegia dare cum præiudicio aut diminutione iuris aliorum: Quia solius supremi principis est, per plenitudinem potestatis, postulante causa publica, vni auferre, & alteri dare, ait Glos. in ca. constitutus, ver. à quocunque, de relig. domibus. Et Abb. in c. vestra, not. 1. de locato, ait, Quod Episcopus non possit facere statutum in præiudicium iuris inferiorum Ecclesiarum, causa maxima non urgente: Nam tali casu cum consentire, boni publici causa, teneantur, etiam ipsis nolentibus procedi poterit. Plura de potestate Episcopi vide apud Syl. ver. Episcopus, §. 7. & 10. Henric. lib. 10. capite vlt.

Tertio obijci potest, Quod in Concilio Carthag. VI. cui etiam S. Augustinus interfuit, Romano Pontifici ius appellationis ex Africa suscipiendæ in dubium reuocatum, aut omnino negatum fuisse videtur, Respondeo: Quod Episcopi Africani Romani Pontificis supremati, & vniuersalem super alias Ecclesias iurisdictionem agnouerint, constat primo ex epist. Synodica trium Conciliorum Africanæ prouinciæ, sub Stephano Carthaginensi Archiepiscopo, scripta ad Damasum Papam, vbi Illum summum omnium Præsulum Pontificem, Apostolico culmine sublimatum, appellant. Notum vestra facimus beatitudini, quod quidam fratres in consilio nostro positi, quosdam fratres nostros, venerabiles videlicet Episcopos, vobis inconsultis, à proprio deiciunt gradu, vel deicere moliantur: cum vestra Sedi Episcoporum iudicia & summorum finem Ecclesiasticorum negotiorum, in honorem Beatissimi Petri, Patrum decreta omnium cunctam reseruauere sententiam. Et paulo post: Antiquis enim regulis sancitum est, ut quidquid horum, quamuis in longinquo positis ageretur prouinciis: non prius tractandum, vel accipiendum sit, nisi ad notitiam alme Sedi vestra fuisset deductum, ut eius auctoritate, iuxta quod fuisset pronuntiatum firmaretur. Secundo, Ex causa Pelagij & Cælestij hereticorum, liberum hominis arbitrium nimis, extollentium, quam Episcopi Africani non nisi Sedi Apostolicæ auctoritate iudicandam ac damnandam censuerunt, vti constat ex S. Aug. l. 2. aduersus Pelagium, cap. 7. epist. 106. ad Bonifacium Pap. epist. 2. de verbis Apostoli in fine, De hac causa duo Consilia missa sunt ad Sedem Apostolicam: inde etiam rescripta venerunt. Causa finita est: error vniuersam aliquando finiatur. Item ex epist. Synodica Carthaginensi ad Innocent. I. quæ est apud August. 90. & Synodica Mileuitana, quæ est apud August. 92. Vbi rogant Innocentium Papam, vt in Magnis periculis infirmorum membrorum pastoralis diligentiam adhibere dignetur. Tertio, Ex commonitorio prolato à Legatis Sedi Apostolicæ in eadem Synodo Carthaginensi, vbi præter causam appellationis, alia puncta continebantur: puta Ne ad comitatum Cæsaris Episcopi impetunè nauigent: quod ante etiam ab Innocent. I. scriptum & mandatum erat Africanis: idque illi acce-

ptarunt & obtemperarunt, vt non Episcopus, sed duo Clerici ad aulam Imperatoriam mitterentur, in Concil. Africano sub Stilicone & Arsenio Consulibus. Et iterum in Concil. Africano sub Zosimo Papæ statutum fuit, vt pergentes Episcopi ad comitatum, causam suam vel Carthaginensem, vel Romano Pontifici insinuare procurent. Item de Urbano Episcopo excommunicando, Veleiam Romam vocando, nifeca, quæ videbantur corrigenda, corrigeret: ad quod Patres Africani rescripserunt in epistola ad Bonifacium: Coepiscopus noster Urbanus, quod in eo corrigendum visum est, correxit.

Quod verò ad appellationem attinet, eam absolute non negarunt Africani Patres Sedi Apostolicæ; sed tantum modum procedendi, & exequendi, missis à latere Presbyteris cum militari manu, ex quo multa incommoda sequebantur, sicuti conqueritur S. Aug. epist. 162. ad Cælestium, scribens in causa Antonij Episcopi à Concilio Africano Romam appellantis: Subueni hominibus operam in Christi misericordia multo auidius, quam ille Antonius, poscentibus, à cuius iniquitudine liberari desiderant. Iudicia quippe illis, & publicas potestates, & militares impetus, tanquam executuros Apostolicæ Sedis sententiam, siue ipse, siue rumores creberrimi minantur. Similia indicant vniuersi Episcopi Africani in epistol. Synodica ad Bonif. Pap. & in altera epist. ad Cælest. Pap. vbi deprecantur; ne Episcopos in Africa excommunicatos, Romanus Pontifex facilius, præpropere, indebitè recipere, & communioni restituere velit. Interim verò, propter incommoda quæ consequi solent, si iudicium in causa Episcopi Romam aduocetur; si propterea quod multæ personæ tanquam testes necessario adesse debeant, quæ tamen ob sexus ætatis infirmitatem, aliæque impedimenta Romam nauigare non possint) putarunt consultius fore, vt iudicia vbi cœpta fuerunt, ibi etiam finiantur. quod etiam S. Cyprianus ob eadem incommoda fieri optabat, scribens ad Cornelium Papam in causa Fortunati & Felicissimi, vt vniuersiusque causa illic audiat ubi est crimen admissum: quia ita statutum legimus in Concil. Nicæno, can. 5. Sed hunc canonem bene explicarunt Fabianus Papa in epist. 3. Peregrina iudicia, salua in omnibus Apostolica auctoritate, generali sententia prohibemus, quia indignum est ab exteris vt iudicetur, qui prouinciales, & à se electos debet habere iudices: nisi fuerit appellatum, videlicet ad Sedem Apostolicam. Et Stephanus Papa epist. 2. Ultra prouinciæ terminos accusandi licentia non progrediatur: sed omnis accusatio intra prouinciæ audiat, & à Comprovincialibus terminetur, nisi ad Apostolicam Sedem fuerit appellatum. Quamuis autem de appellatione Episcoporum ad Sedem Rom. in XX. qui nunc extant, capitulis Nicæni Concilij nihil expressè reperitur; tamen constat, multò plures canones, qui temporum iniurijs perierunt, editos fuisse, vti apparet ex scriptis ab Eusebio lib. 3. de vita Constantini, Ambros. lib. 10. epistol. 82. S. Hieron. præfat. in Iudith, S. Athanas. Apol. 2. de fuga sua, Concil. Carthag. 3. cap. 48. Arelaten. 2. c. 24. S. August. epist. 110. vbi ait, Adhuc in corpore posito B. memorie Patre Episcopo in eo sese Valerio, Episcopus ordinatus sum, & sedi cum illo, quod Concilio Nicæno prohibitum fuisse nesciebam, nec ipse sciebat: id verò decretum in Nicæno, quod hodie extat, Concilio non reperitur. Etenim Concilij Nicæni magnum codicem fuisse, ab Orientalibus se intellexisse, testatur Isidorus præfat. in collect. canonum. Atque illum ipsum canonem in magna Nicæno Synodo concorditer roboratum esse à Patribus, ne quisquam Episcoporum absque Rom. Pontificis auctoritate damnaretur, testantur Episcopi Aegyptij in epist. ad Felicem II. Eiusdemque canonis meminit Theodor. lib. 2. c. 4. Ille Iulius Papa Ecclesiæ canonem secutus, eos Eusebianos Athanasij accusatores & damnatores: iussit Romam venire: & diuinum Athanasium, quod pro se in iudicio ipse responderet, vocauit. Et Sozomenus lib. 3.



c. 7. Quod idem Iulius, cum propter Sedis dignitatem cura ad eum pertineret, Athanasio Alexandrino, Paulo Constantinopolitano, Marcello Ancyrano suas Ecclesias restituit. Similis fuit causa S. Chrysost. ab Innoc. I. defensi. de qua re videri potest epist. Honorij Imper. ad Arcadium, post epist. 31. Innoc. t. 1. Concil. Bini. Et Theodoret ad Leonem I. appellantis, vti apparet ex epist. Theodoret ad eund. Ego Apostolica vestra Sedis expecto sententiam: & supplico, & obsecro vestram sanctitatem, ut mihi opem ferat iustum vestrum & rectum appellanti iudicium, & iubeat ad vos occurrere, & ostendere meam doctrinam, vestigia Apostolica sequentem. Sed esto, in Nicæna Synodo nullum de hac re canonem editum fuisse; extat tamen Canon 4. & 5. Concilij Sardienensis œcumenici de appellatione Episcoporum ad Sedem Romanam permittenda. Et valde credibile est, hunc ipsum canonem Sardicensem Romanos legatos ex suo commonitorio in Concil. VI. Carthag. recitasse: quod autem Nicænum appellârint, mirum videri non debet: cum concilium illud, ad eundem finem refutandæ hæresis Ariæ institutum, cum Nicæno veluti vnum in Ecclesijs habitum fuerit.

Non rectè autem Patres Africani inferunt in epist. ad Cælestinum: Si in Concilio generali decretum fuit expedire, ut Clerici inferiores Episcopo, ipsique laici quærelas suas & appellationes deferant ad Metropolitanum, vel Concilium Prouinciale, (sicuti re vera ita statutum legimus in can. 14. Concil. Sardicensis: idque non immerito, ut de bita in Ecclesia Christi subordinatio seruaretur) non rectè, inquam, hinc inferunt, etiam expedire ut causæ Episcoporum apud Metropolitanum deciderent. Quandoquidem Episcopi condemnatio ex grauioribus causis est, quæ semper Sedi Apostolicæ reservatæ sunt, vti bene notauit Steph. Pap. in cit. epist. 2. & testantur Ægyptij in cit. epist. Canonibus inuentibus, inquit, absque Romano nos de maioribus causis nihil debere decernere Pontifice. Cæterum tametsi aliquando ita visum fuit Patribus, ut causæ quædam, v.g. minorum clericorum, extra prouinciam ordinariè non pertrahantur; nihil tamen ea re Sedis Apostolicæ supremæ iurisdictioni derogatum fuisse constat. Quæ admodum nec Imperiali potestati supremæ quidquam derogatum censetur. quod Duces v.g. Imperij priuilegium habent, ut in causis criminalibus ab eorum sententiis nulla appellatio recipi possit. Quandoquidem expedit in hoc appellandi genere modum constitui, ne quibuslibet perditis hominibus iudiciorum processum effugere liceat.

Non possum autem hoc loco prætermittere insignem calumniam, qua Patres Africanos, de hac ipsa re disputans Iacob. Hailprunner, Prædicans Lutheranus, affecit tom. 1. refutat. Papatus Catholici, c. 1. fol. 51. col. 2. Quod dicti Patres in Synodica sua epistola ad Bonifacium Papam, antecessorem eius Zosimum malo encomio, & titulo non beatæ memoriæ *Vnseeliger Sedachtmus*; prosequi sit: quod signum esse debeat, erga Sedem Apostolicam benè affectos non fuisse. Verba Concilij sunt hæc: *Quoniam Domino placuit, ut de his qua nobiscum egerunt sancti fratres nostri, Coepiscopus Faustinus, & compresbyteri Philippus & Asellus, non beatæ memoriæ Episcopo Zosimo, à quo ad nos mandata & litteras attulerunt: sed tuæ venerationi, qua in loci eius successit, humilitas nostra rescriberet: ea breuiter insinuare debemus, qua virorumque concordia terminata sunt.* Quæso te, attende, quantopere Pseudoeuangelici isti ministri Romani Pontificis concepto odio, se suosque deludi ac dementari patiantur. Si aliquis Doctor Catholicus tale crimen falsi publicaret, quantæ apud Aduersarios querimonie in omnibus pulpitis personarent? nunc verò quando ipsi falsationibus se defendunt, nemo miratur: quia quæ rara sunt mirari solemus, non quæ frequenter.

## §. III.

## De iurisdictione metropolitani &amp; Archiepiscopi.

## S V M M A R I V M.

- 7 Metropolitani est ordinarius Superior Coepiscoporum prouinciae: tamen in causis criminalibus, qua depositionem merentur, contra aliquem eorum procedere non debet, sine Sedis Apostolica autoritate.
  - 8 Metropolitani in subditos Coepiscoporum nullam ordinariè iurisdictionem obtinet, nisi ad ipsum ab Episcopo suo appellârint.
- Metropolitani, antequam pallium à Sede Apostolica accipit, quæ sunt ordinis Episcopalis, exercere ipsemet non debet.

**Q**uod ad Metropolitanum atinet, (qui & Archiepiscopus dicitur, postquam à Sede Apostolica pallium accepit, cap. nisi de autoritate & vsu pallij) is ordinarius Superior est Suffraganeorum, siue Coepiscoporum prouinciæ, ut ijs præcipere, eisdemque negligentes ad officium compellere possit, sicut colligitur ex cap. sollicitudinem, de appellat. c. 1. 2. & seqq. causa 9. q. 3. c. cognouimus, 10. quæst. 3. & docet Glossa in c. pastoralis, ibid. Abb. num. 1. de officio Ordin. In causis tamen criminalibus maioribus ac depositionem merentibus, re cum prouincialibus Episcopis cognita, ad sententiam definitiuam aduersus Episcopum procedi non potest, sine Sedis Apostolicæ autoritate, sicuti constat ex cap. 2. de translat. Ep. & cap. 5. & seqq. 3. quæst. 6. & tradit Abb. in cit. c. 2. Imo Nauar. libro 2. consil. 2. de foro compet. edit. 2. obseruat, iure nouo non solum condemnationem contra Episcopum; sed etiam cognitionem ac processum in criminibus, quæ dispositionem vel priuationem merentur, soli Papæ reservatum esse, & inferioribus interdictum, arg. c. inquisitores, de hæret. in 6. iunct. Gl. ver. Apostolicæ. Quod & Trident. Concilium clarè exprimit sess. 24. c. 5. de reform. vbi in fine adiicit: *Minores vero criminales causæ Episcoporum in Concilio tantum prouinciali cognoscantur & terminentur, vel à deputatis per Concilium prouinciale.*

Cæterum in Coepiscoporum subditos Archiepiscopus iurisdictionem non obtinet, sicut constat ex cap. nullus Primas, c. conquestus. 9. quæst. 3. & cap. 1. de offic. Legati, c. duo simul, de officio Ordinarij. Quare ait Abb. in c. cum ad quorundam, num. 4. de excess. Prelatorum, quod Archiepiscopus seu Metropolitanus nihil possit in diocesi Suffraganeorum, nisi in casibus iure expressis. Casus autem hi sunt: Primus, si ab Episcopo ad ipsum appellatum sit, iuxta cit. c. conquestus, iuncta Gl. & capite peruenit, 11. q. 1. & cit. c. duo simul, & c. 1. de offic. Legati. Non tamen ob solam negligentiam Episcopi, nulla interposita à partibus appellatione, ad Episcopum deuoluitur iurdictio, secundum Abb. in cit. c. duo simul, & ca. pastoralis, de offic. Ordin. & in c. nullus, num. 2. de iure patron. vbi rectè ait; Si Episcopus requisitus in aliqua re consensum sine rationabili causa denegat, posse adiri Archiepiscopum; non ut ipse consensum suppleat, sed ut Episcopum compellat ad consentiendum.

Secundò, dum prouinciam visitat (quod liberè facere potest communi iure, etsi nulla Episcopi negligentia intercedat: sed cum limitatione Trident. Concil. sess. 24. c. 3. de reform.) Prouincialium confessiones audire potest, iuxta c. ult. de cens. in 6. Iubere item crucem ante se ferri, & populo benedicere, etiam in locis prouinciæ aliquin exceptis, iuxta Clement. Archiepiscopo, de Prinileg. Tertiò, Indulgentias intra suam prouinciam concedere, iuxta limitationem Concilij Lateranensis, Archiepiscopo absolute permissum est in c. nostro, de penit.

8 Porro;



8 Porro, si Archiepiscopus Prouincialia statuta condere velit, Episcoporum Synodum eius rei causa cogere debet, in eaque presidere tanquam Decanus in Capitulo; sicut constat ex c. nullus Primas, & aliis 9. q. 3. Quod verò in Prouinciali Synodo decretum fuerit, reuocare, immutare, in eòve dispensare nequit: cum sit inferior Synodo, siue Concilio Episcoporum, à quibus & iudicari potest, sicuti resoluit Nau. lib. 1. conl. 6. de maior. & obed. edit. 2. Sanch. lib. 8. de matrim. disp. 17. n. 36. Suar. l. 6. deleg. c. 15.

Illud ad extremum monere volo: Metropolitanus, quamprimùm confirmatus est, ea, quæ ad administrationem & ordinariam iurisdictionem pertinent, expedire potest, iuxta c. transmissam, & c. Suffraganeis, vbi id notat Gl. in casu, not. 2. de elect. At verò quæ ordinis Episcopalis sunt, exercere prius non debet: neque Concilium cogere, donec à Sede Apostolica pallium acceperit: quippe quo plenitudo officii Episcopalis significatur, c. nifi, de auct. or. & vsu pallij, iuncto c. quod sicut, §. præterea, de elect. & videri potest Nicol. I. resp. 92. ad Bulgaros. Verum alteri v. g. Suffraganeo suo ordinandi facultatem cōcedere posse videtur: cum talis demandatio iurisdictionis actus sit: quicquid contradicat Gl. in cit. §. præterea. Porro pallium, quasi singulare priuilegium, personæ conceditur; vt eo in certis festis diebus (de quibus Gl. in c. ad honorem, de auct. or. & vsu pallij) ipsemet vtatur in Ecclesijs suæ prouinciæ, iuxta cit. c. ad honorem; neque alteri Archiepiscopo commodari possit, sed cum eo mortuus sepeliri debeat, c. ad hoc, eod. tit.

## §. IV.

## De iurisdictione &amp; potestate Capituli.

## S V M M A R I V M.

- 9 Episcopus sine consilio Capituli statuere non debet, quod alicuius momenti sit.
- Episcopus & Canonici faciunt vnum corpus.
- Si consilium alicuius de iure requirendum sit, non idcirco etiam consensus requiritur.
- 10 Capitulum sine consensu Episcopi statuere potest in rebus exiguis, & ad ipsum propriè spectantibus.
- 11 Capitulum, ipsique Decanus communi iure nullam iurisdictionem habet in singulos Canonicos, & Ecclesia sua Ministros: sed ipse Episcopus est Ordinarius Iudex, & Pastor totius diocesis.
- 12 Sede Episcopali vacante, Capitulum exercet omnem iurisdictionem tam voluntariam, quam contentiosam.
- 13 Beneficia, quæ patronata non sunt: Capitulum sede vacante conferre non potest.
- 14 Capitulum non succedit in iurisdictione Episcopo delegata: quia censetur electa industria persona.
- 15 Bona immobilia Ecclesia Cathedralis, & mobilia pretiosa, si seruando seruari possunt vacante sede Episcopali, absque auctoritate Romani Pontificis alienari non possunt: quamuis Episcopus, vel similis Prælati postea electus & confirmatus alienationem ita factam approbare queat.
- 16 Intra annum à die vacationis Capitulum, iure nouo Concilij Tridentini, ordinandi licentiam, vel dimissorias communi iure dare non potest.
- 17 Capitulum sede vacante non potest fructus & commoda Episcopatus distrabere.

9 **S**I Episcopum cum Capitulo conferamus, neque ille communi iure, & seclusa contraria consuetudine, si ne Capituli consilio statuere aliquid debet, saltem quod maioris momenti sit, iuxta c. nouit, c. quanto, de his quæ fiunt à Prælati, vbi id docent Canonistæ, nominatim Abb. in c. edoceri, n. 6. & seqq. de rescript. & c. 2. de Instit. num. 3. Efficiunt enim Episcopus & Canonici vnum corpus, cuius ille caput est, hi membra. Si tamen Capitulum sine iusta causa consensum neget, firmum nihilominus erit, quod Episcopus statuerit: cum non tam

consensus, quàm consilium Capituli iura requirant, sicuti notauit Abb. cit. c. nouit, num. 4. c. quanto, n. 4. & in cit. c. cum consuetudinis, n. 5. de Consuet. arg. c. cum olim, de arbit. vbi Glos. ver, siue discordet, annotauit; Si consilium alicuius de iure requirendum sit, non idcirco etiam consensus exigi. Vide, si placet, Ioachim. Mynsing. cent. 6. obser. 46. Sanch. l. 5. moral. c. 4. n. 64.

Excipiuntur tamen causæ, quæ ad Capitulum quoque attinent, vel in eius damnum cedere possunt; in his enim etiam consensus Capituli tanquam collegarum, seu consortium in tali causa exigitur, teste eod. Abb. in cit. c. nouit, & cit. c. cum consuetudinis, de consuet. Suar. l. 4. c. 5. num. 2.

Multò minùs Capitulum, Episcopo viuente & iurisdictionem tenente, quicquam statuere & iurisdictionem tenente, quicquam statuere vel nouare potest, absque eius voluntate & approbatione; iuxta cit. c. cum consuetudinis, & ex communi tradit Abb. in c. cum omnes, n. 3. de Constit. Si tamen Episcopus, aliisque Rector Ecclesiæ seu Prælati malè administret, Capitulum vel Conuentus potest agere contra illum, & res malè alienatas reuocare, qua de re Abb. in c. edoceri, de rescript. Deinde Capitulum sine Prælati consensu statuere potest in causis exiguis, & ad ipsum propriè spectantibus; puta qua ratione Capitulum congregandum sit, distributiones vel redditus diuidendi, arg. cit. c. cum omnes, & docet Innoc. c. cum consuetudinis, Abb. ibid. n. 4. & in c. 1. n. 14. de his quæ fiunt à maiore parte Capituli, & in c. ult. eod. tit. vbi admonet, ad eiusmodi statuta sufficere consensum maioris partis, etiam si statuatur de redditib. spectantibus ad singulos, iure tamen Collegij siue Capituli: dummodo in hoc casu ratio necessitatis vel magnæ utilitatis vrgeat: Nā alioquin quod omnes tangit, ab omnib. approbati debet, reg. 29. in 6. Idq; etiam in Eccles. Collegiatis locū habet, sicuti monet Tir. tr. de iudicijs in rebus exiguis, n. 40. Abb. in cit. c. cum consuetudinis, & in c. cum omnes, n. 4. vbi respondet. Ecclesiam inferiorem posse statuere sine Episcopo in rebus exiguis; non in grauib. cum Episcopus sit generalis sponsus Ecclesiarum suæ diocesis.

Hinc collige I. In statutis diocesalibus condendis plùs autoritatis Episcopum habere, quàm Capitulum. Nam ille propriè est legislator; licet Capitulares adhibendi sint tanquam Consiliarij, vel consortes; nisi consuetudine aliud receptum sit.

Collige II. Quod Capitulum, ipsèque Decanus communi iure nullam iurisdictionem in ciuilibus, aut criminalibus causis obrineat in singulos Canonicos, & Ecclesiæ ministros; sed interdū consuetudine, aut præscriptione comparatā, sicuti notat Ab. c. 2. de his, quæ fiunt à maiore parte Capituli, n. 3. & c. cum contingat, de foro cōper. nu. 12. Iban. Selua de benef. p. 3. q. 1. n. 13. Staphileus de gratijs expectat. n. 14. De modo & forma impetradi. Ratio autem huius est: Quia cum Episcopus ordinarius Iudex & Pastor sit totius diocesis, procedere potest, spectato communi iure, cōtra omnes clericos, quamuis inferiori Prælati non exēpto subiecti sint, sicuti notat Ab. in c. conquerente, n. 2. §. septimò, de foro cōper. & in c. pastoralis, n. 6. & 7. eod. tit.

Cæterum, sede vacante, Capitulum exercet omnem iurisdictionem Episcopalem tam voluntariam quàm contentiosam, iuxta c. his quæ, & c. cum olim, de maior. & ob. c. vn. eod. in 6. c. si Episc. de suppl. negl. Prælat. in 6. iunct. Gl. ver. spiritualiū, & docet Nau. l. 1. con. 44. de tē. or. edit. 2. Sua. t. 5. dif. 50. l. 6. n. 6. Mol. tr. 5. dif. 12. Garcias de benef. p. 5. c. 7. p. 2. Quamobrem solet interdū Capitulum, sede vacante, communi consensu condere statuta pro Ecclesiæ reformatione, quas recapitulationes vocant, & vim legis obtinent, si sacris canonibus non repugnent.

Porro exceptiones aliquæ sunt: I. quod beneficia, quæ patronata non sunt, Capitulum, sede vacante, conferre non potest, iuxta c. 2. Ne sede vacante, & c. vn. eod. in 6. c. 1. de Instit. in 6. Potest tamen Capitulum beneficia concedere



in commendam ad sex menses; & si interim Episcopus non eligatur & confirmetur, tempus prorogare, teste Rebuffo in praxi beneficiorum, p. 1. tit. de reuolut. n. 77. Petr. Tolos. l. 17. c. 15. n. 37. Syntag. Præterea, si libera collatio beneficiorum ad Episcopum & Capitulum communiter pertinet, possunt ea sede vacante à Capitulo conferri, iuxta c. vn. Ne sede vacante, in 6.

II. Quod Capitulum vacante sede non succedit in iurisdictione Episcopo delegata: quia censetur electa industria personarum, sicuti ex communi docet Abb. c. cum olim, dub. 5. de maior. & obed. Garc. p. 5. c. 7. n. 42. Sanch. lib. 8. de matr. disp. 2. n. 10. vbi aiunt, idem dicendum, si delegatio à iure seu canone fiat Episcopo tanquam delegato Sedis Apostolicæ, ratione dignitatis suæ, quæ non transit ad capitulum: & in c. verum, n. 9. de foro compet. & cap. at si clerici, §. de adult. n. 7. generalem regulam tradit idem Panor. Quod Capitulum sede vacante succedit in iurisdictione, quæ competit Episcopo iure communi & ordinario; non item in ea, quæ speciali iure, & in ca. his quæ, num. 3. de maior. Quotiescunque potestas Prælato competit ratione Prælatuæ, eo mortuo transit ad Capitulum, ijs exceptis, quæ sede vacante expediri non possunt.

III. Bona immobilia Ecclesiæ Cathedralis; item mobilia, quæ seruanda seruari possunt, sine sedis Apostolicæ autoritate, alienari nequeunt, iuxta c. hæc huius. 12. q. 2. & tradunt Abb. & DD. alij in c. 1. Ne sede vacante, arg. c. vlt. de suppl. negl. Prælat. Nam Ecclesia tunc defensor suo carere censetur, sicuti constat ex c. 1. & vlt. Ne sede vacante. Quapropter neque causa iudicialis agitari, neque præscriptio contra Ecclesiam, vacante sede, procedere solet, sicuti docet Abb. in c. 1. n. 4. de præscript. Molin. tr. 2. disp. 78. & tr. 5. disp. 11. de iust. Eritque postea in arbitrio electi confirmatique Episcopi positum, contractus & alienationes à Capitulo, extra necessitatis casum, & sine Papæ autoritate institutas, vel infirmare, vel si in Ecclesiæ suæ vtilitatem credere videantur, confirmare, sicuti colligitur ex c. si qua de rebus, 12. q. 1. & ex communi docet Abb. cit. c. 1. Ne sede vacante, & in c. edoceri, n. 12. de rescriptis, vbi generaliter ait; Quod Prælatus alienationem à Capitulo sine sua autoritate, ideoque illegitimè factam, postea ratam habere possit, si Ecclesiæ vtilem intelligat, sicuti & vice versa, Capitulum alienationem à Prælato sine suo consensu factam, postea approbare & ratificare, sicuti docet idem Abb. in c. 1. n. 6. de his, quæ fiunt à Prælato, & c. Potest tamen Capitulum, vacante sede, alienationes ab inferiore Ecclesia faciendas confirmare, teste Abb. c. cum olim, dub. 3. de maior.

IV. Infra annum à die vacationis, Capitulum ordinandi licentiam, aut dimissorias literas dare non potest: præterquam ei, qui ecclesiastici beneficii recepti, aut recipiendi occasione arctatus est: Et Capitulum, si contraueniat, Ecclesiastico subiacerit interdicto, vbi Trident. constitutio sess. 7. c. 10. de reform. recepta est: Iure autem antiquo Capitulum vacante sede concedere poterat ordinandi licentiam, c. cum nullus, de temp. ordin. in 6.

Denique ad Capitulum non pertinet, vacante sede, merè voluntarias gratias, siue donationes sine debito necessitatis conferre, aut fructus & commoda Episcopatus distrahere, sicut notat Gl. recepta in c. 1. de instit.

## §. V.

## De iurisdictione vicarij generalis.

## S V M M A R I V M.

Generalis Vicarius Episcopi ex eodem, cuius vicem gerit, tribunalis iurisdictionem ordinariam exercet in diocesanos. Ageneralis Vicario ad Episcopum appellari non potest: quia appellatio est ad iudicem diuersum.

19 Mortuo, vel deposito Episcopo, iurisdictionis Vicarij generalis expirat.

Per Episcopi autem excommunicationem, suspenditur etiam iurisdictionis Vicarij.

20 Officium Viceprioris, Vicequardiani: quin & quorundam Vicariorum forensium, mortuo vel deposito principali, non expirat.

Generalis Vicarius Episcopi, alteriusve Prælati Episcopi copalem iurisdictionem habentis, ex iuris dispositione constituendus est in subsidium Episcopi: quare nisi ab Episcopo constituatur, ad Archiepiscopum pertinet providere, sicuti colligitur ex c. cum simus, 9. q. 3. & docet Abb. in c. quoniam, num. 3. de offic. Ordinarij. Est autem talis Vicarius iudex Ordinarius subditorum Diocesis; sed ex eodem, cuius vicem gerit, tribunalis iurisdictionem exercens, sicuti constat ex c. Romana, de appell. in 6. & c. 2. de consuetud. in 6.

Hinc infertur primò, Quod Diocesanorum omnium confessiones audire, eorumque matrimonijs validè assistere, atque eiusmodi facultates etiam alijs Sacerdotibus delegare possit, vti docet Sanchez lib. 3. de matrim. disp. 29. item in foro externo contentiosas causas cognoscere, præcipere, iudicare, atque etiam excommunicare, teste Suar. de censuris disp. 20. sect. Sanchez l. c. est enim Ordinarius, & parochorum Superior, Episcopi personam repræsentans, c. 2. de Consuet. in 6. Quare parum mihi hodie eius officium differre videtur ab officio Archidiaconi, qui sub Episcopo constitutus tanquā manus & oculus eius, totius clericuram gerere debet, vt ei etiam Archipresbyteri siue Presbyterorum Decani subesse cogantur, sicut constat ex l. 1. decret. de offic. Archidiaconi.

Infertur secundo, Quod nulla consuetudine obtineri possit, vt à generali Vicario ad Episcopum appelletur, cit. c. 2. iunct. Glossa ver. Officiali. Quia appellatio esse non potest ab eodem ad eundem, ait Gl. in cit. c. Roman. Alia verò ratio est de Vicarijs non generalibus, & ab Episcopo delegatam iurisdictionem obtinentibus in certa parte diocesis: qui in Clem. 2. de rescriptis, iunct. Gloss. foranei, & Decani rurales appellantur: ab his enim ad Ordinarium appellari potest, sicuti notauit Sanchez libro capite numero 9. Nicolaus Garcia parte 5. de benefic. capite 8. numero 26.

Tertiò infertur, Quod mortuo vel deposito Episcopo Generalis Vicarij iurisdictionis statim expirat, licet causa cœpta sit, sicuti docet Couar. in pract. quest. cap. 4. num. 4. Sanch. lib. 3. de matrim. disp. 30. Molina tract. 2. disp. 10. n. 2. cum Gl. communiter recepta in Cle. vlt. de Procurator ver. cōtestatā. In eoque differt à delegato, cuius potestas ob mortem delegantis non expirat, quoad negotia cœpta: c. gratum, de offic. delegati. Ratio est: Quia, vt supra dixi, Vicarij Generalis idem est cum Episcopo tribunal; delegati autem diuersum, & inferius.

Quartò sequitur, Post mortem Episcopi, Vicarium generalem denuo confirmandum esse à Capitulo, vt deinceps iurisdictionem exercere possit, sicuti ex communi docet Sanchez cit. disp. 30. num. 2. Differt autem extinctio iurisdictionis Vicarij, quæ fit per mortem, ab ea, quæ per reuocationem facultatis, seu mandati; quod reuocatio posterior non habeat effectum, nisi fuerit ipsi Vicario legitime intimata, nomine ipsius Episcopi: Expiratio autem iurisdictionis, quæ fit per mortem, aut depositionem Episcopi, ipso iure nititur, ideoque etiam ignorante Vicario: nisi publicus error seu ignorantia comitetur, iuxta l. Barbarius, ff. de offic. Prætor. & ita docet Sanch. cit. disp. 30. Nicol. Garcias p. 5. de benefic. c. 8. n. 176.

Quintò, per Episcopi excommunicationem, aut suspensionem suspenditur etiam, non omnino amittitur, iurisdictionis Generalis Vicarij, sicuti docent Autores citati, arg. c. 1. de offic. Vicarij in 6. Quare retinet quidem hoc casu officium suum Vicarius; sed ea, quæ iurisdictionis sunt exercere non potest, tametsi causa cœpta fuerit, sicuti ex



ex communi docet Sanchez eadem disp. num. 6. in quo iterum differt à delegato, cuius iurisdicção non cessat ob excommunicationem delegantis, si causa integra non sit. Qua de re vide Abbas in cap. licet vndique, numero 8. de officio delegati, Auilam de censur. p. 2. cap. 6. disput. 6. dub. 4.

Porro iurisdicção Vicarij generalis communi iure non extendit se ad meras & voluntarias gratias, cuiusmodi sunt collatio beneficiorum, dispensatio in irregularitatibus ex occulto delicto, denuntiationibus matrimonij, &c. sicuti pluribus allegatis, docet Garç. p. 5. c. 8. n. 46. Verum tamen si iura decernant, quantum iurisdicção generali Vicarijs tam in foro interno, quàm externo, contentioso ac voluntario, maiorem iurisdicçãoem tribuere, quàm iure ordinario ipsis competere debeat; sicuti & praxis declarat, ac docet Garcias l. c. n. 62. Sanchez lib. 3. dif. 7. quæst. 3.

- 20 Notandum verò est ex Nau. comment. 3. de Regul. c. nullam, 18. q. 2. n. 22. §. ad prius, Molina to. 5. disp. 10. nu. 14. Saver. Religio, n. 69. Præter propriè dictos Episcoporum, Prælatorum, aliorumque Præsidum, ac Rectorum Vicarios, qui ab illis constituuntur, ut ipsorum loci iurisdicçãoem exercent, ab eisdemque omnino pendent, & plerumque pro arbitrio deponuntur, sicuti notant DD. in l. solent, §. sicuti, ff. de offic. Proconsulis. Ab. in Clem. 2. n. 7. de rescript. Rodr. t. 3. Reg. qq. q. 77. a. 2. alios esse minùs propriè dictos Vicarios, qui in subsidium Principalis Prælati, Abbatis, Prioris, Rectoris, ex Ordinis constitutione, vel consuetudine, constituuntur, ut proprium atque ordinarium munus exercent, & appellari solent, v. g. Suppiores, Vicerectores, Vicequardiani: quorum iurisdicção & officium. mortuo, vel deposito principali, non expirat: Quin & Vicarij foranei, seu rurales ita quibusdam locis ab Episcopis constitui solent, ut eorum dignitas, seu beneficium perpetuum sit, & quasi ordinariam iurisdicçãoem obtineant; ideòque priuari seu deponi non possint, nisi propter delictum graue ac depositione dignum, sicuti notauit Hoieda de incompatib. benef. p. 2. cap. 10. num. 18. & Petr. Gregor. Tholos. lib. 15. Syntag. capite 37. numero 5.

## §. VI.

## De iurisdicçãoe Legati Apostoli.

## SUMMARIUM.

- 21 Legatus Apostolicæ Sedis est Ordinarius Iudex & quasi Præses provincie, ad quam destinatus est.
- 22 Triplex est legatus sedis Apostolicæ, Vnus à latere, qui à die discessus ab Vrbe, vsque ad diem reditus, absolueret potest omnes percussores clericorum.
- Alius est legatus non à latere, qui solos Provinciales, dum in Provincia moratur, à censura canonis absoluit. Alius denique Legatus natus dicitur, curatione particularis Ecclesiæ tale munus competit.
- 23 Delegatus Papa in causa sibi commissâ maior est alijs Ordinarijs locorum.
- Dum delegatus Papa visitat, non potest Ordinarius loci id munus obire.
- 21 Legatus Sedis Apostolicæ Romanæ in provincia, ad quam destinatus est, ordinarius Iudex & quasi Præses est: sicuti olim Proconsul apud Romanos, quamobrem etiam delegandi potestate præditus est: ipsiusque potestas morte Papæ legantis non expirat, sicuti habetur in cap. 2. de Offic. Legati in 6. Quin imò Legatus aliquantò maiorem in provincia, quàm ipse Episcopus, aut Archiepiscopus potestatem habet: quippe cum ordinarius etiam eorum Iudex sit, teste Abb. c. 1. n. 2. de Offic. Legati, Molina t. 1. tr. 2. disp. 9. num. 5. Causæ tamen Episcoporum grauiore, & quæ depositionem merentur, Summo

Pontifici specialiter reseruantur, sicut notat Gl. in cap. si quis autem, d. 94. Præterea subditorum causas Legatus suscipere & cognoscere non debet, post Trident. Concilij constit. sess. 24. c. 20. de reform. Nisi vel per appellationem ad ipsum deuoluantur: vel Episcopus eas intra biennium à die motæ litis, definire negligat.

Triplex est Legatus, uti monet Gl. in c. 1. de offic. Legati, in 6. Abb. in c. ex communicatis, extra, eod. ti. Syl. ver. delegatus q. 11. Vnus à Latere Summi Pontificis, siue R. E. Cardinalis: cui æquiparandus est ille, qui etsi à Latere, siue Cardinalis non sit; cum potestate tamen Legati à latere missus est. Eius propria quædam privilegia sunt: I. Quod à die discessus ab Vrbe, vsque ad diem reditus sui, absolueret potest percussores Clericorum, tam eos, qui de provincia sunt, quàm qui aliunde accedunt, arg. cit. c. excommunicatis, vbi Gl. & Abb. num. 2. II. Quod beneficia Ecclesiastica provincie ad quam mittitur conferre possit: quod alijs Legatis siue Nuntijs concessum non est, ut dicam in materia de beneficijs. III. Quod etiam in exemptos provincie iurisdicçãoem exercere possit, sicuti colligitur ex c. 1. de ver. signif. in 6. & ex c. si Abbatem, de elem. in 6. in quo dicitur, quod Legatus à latere Episcoporum, & Abbatum exemptorum electionem confirmare possit; & his in Episcopos electis deferendi monasterium suum licentiam dare: quod alijs Legatis communi iure non conuenit. Qua de re Abb. incit. c. 1. de offic. Legati. Syl. ver. delegatus, q. 13. Mol. tr. 5. disp. 9. Cæterum, quæ ad primum gradum imperij pertinent, siue quæ Papæ specialiter reseruata esse solent, uti est Episcoporum translatio, diæcesum vnio vel diuisio, dispensationes in matrimonij impedimentis; &c. ea neque Legatis à latere iure communi competunt, sicut constat ex cap. nisi, & cap. quod translationem, de offic. Legati: quare si eiusmodi potestatem sibi à Summo Pontifice specialiter concessam asserant, eius rei fidem per litteras authenticas facere debebunt, uti notat Molina tr. 5. dif. 6. n. 4. Abb. in cit. c. quod translationem, n. vlt.

Alij à sede Apostolica ad provinciam destinati, cum ordinario officio legati, non à latere: solos Provinciales à censura canonis absolueret possunt, & solum dum in provincia morantur, sicuti habetur in supra cit. c. excommunicatis, vbi videri potest Abb. n. 4. Eò etiam iurisdicçãoe inferiorem sunt, quod si Legatus à latere in provinciam superueniat, eorum interim officium & iurisdicção suspensa sit, iuxta c. volentes, de offic. Legati, vbi Gl. ver. de latere nostro.

Deinde iidem Nuntij Apostolici, & quicquid alijs delegati Papæ, in causa illa particulari ipsis commissâ maiores sunt, & superiores omnibus Ordinarijs, infra Papam: cum repræsentent personam Papæ. Quare in ea causa Ordinarij præcipere possunt, & censuris cohibere, si causam delegationis impedire velint, arg. c. sanè, de offic. Iudic. delegati, & notat Host. ib. Ab. in c. significasti, n. 5. eod. tit. Enim verò, sicuti Episcopus, seu per ipsum, seu per alium à se delegatum causas diæcesanorum cognoscere, loca & personas sibi subditas visitare potest, locorum Parochis etiam in requisitis, ita similiter & Papa, seu per se, seu per alium à se delegatum, causas Christianorum cognoscere, loca & personas omnium diæcesum visitare potest, Episcopis antè nõ requisitis: Neque enim potestas superioris dependere debet ab inferiore. Addendū his est, quod dum delegatus Papæ suo munere visitandi, v. g. Monasteria fungitur, non possint Episcopi alijsve ordinarij visitationem instituire: quia per delegationem censetur ablata iurisdicção Ordinario, ut non possit procedere in causa alteri commissâ, sicuti ex communi docet Emman. Rod. t. 2. reg. qq. q. 22. a. 8. §. Supradicta. Nisi appareat delegatum contra ordinem iuris ac commissionis sue procedere: tunc enim ipsi resisti potest per modum defensionis: sicut & cuius alteri priuato.

Denique sunt aliqui legati nati, quibus ratione particularium suarum Ecclesiarum, nomen, munus ac



dignitas Apostolicorum Legatorum perpetuo competit; de quibus mentio fit in capite 1. de offic. Legati, in 6. iun. Gloss.

## §. VII.

## De iurisdictione cardinalium Ecclesiæ Romanæ.

## S V M M A R I V M.

- 24 *Cardinales E. R. quasi Episcopalem iurisdictionem obtinent in Ecclesia sui tituli.*  
 25 *Cardinales sede vacante non exercent iurisdictionem in Ecclesia vniuersalem.*  
 26 *Cardinales ex Papa commissione emergentia dubia circa morum reformationem, atque iudicarias lites decidunt.*  
 27 **R**omana Ecclesiæ Cardinales ordinariam & quasi Episcopalem iurisdictionem obtinent in Ecclesia sui tituli, sicuti constat ex cap. querelam, de elect. c. his quæ, de maior. & obed. vbi id notat Abb. num. 1. Ex præscripta item consuetudine ordinariam iurisdictionem exercent in suos familiares: vt proinde hi de licentia Cardinalis sui cuiusque Confessario exposito confiteri possint, sicuti docet Caiet. ver. absolutio, c. 2. in fine, Henric. l. 10. c. 27. n. 3. lit. y.

- 28 Verum in Ecclesiam vniuersalem iurisdictionem nullam habent Cardinales; etiam vacante sede Papali, sicuti habetur in Clement. ne Romani, de elect. & cap. vbi periculum, de elect. in 6. vbi præcipitur, vt Cardinales, mortuo Summo Pontifice, post decem dies exactos, quæ primùm omni conatu & sollicitudine Ecclesiæ pastorem eligant: & se nequaquam de alio negotio intromittant, nisi viuens necessitas incidat, ob quam Ecclesiam ab imminenti grandi periculo defendere necesse sit.

Ex Papæ verò cõmissione, emergentibus dubijs circa morum reformationem, & in iudicialibus litibus Concilia, & Pontificia iura interpretantur R. E. Cardinales. Sed vtrum eorum interpretationes siue declarationes vim legis, an solum sententiæ doctrinalis, vel iudicialis obtineant, pendet quæstio ex mente Summi Pontificis, potestatem ipsis tribuentis. Interim præsumendum non est habere vim legis; præsertim cum authenticè non promulgentur. Qua de re Sanch. l. 8. de matrim. disp. 2. n. 10. Rodriq. to. 1. qq. regul. q. 11. a. 2.

## §. VIII.

## De potestate religionum, &amp; Prælatorum regularium.

## S V M M A R I V M.

- 27 *In quavis Religione approbata est potestas condendi statuta perpetua, quæ Ordini ac regula conformia sunt.*  
 28 *Prælati Ordinum aliqui exempti sunt à iurisdictione Episcoporum: alii non exempti, qui tamen & ipsi Iudices ordinarij suorum Regularium sunt, saltem in causis pertinentibus ad regularem disciplinam.*  
 29 *In causis criminalibus, præsertim maioribus & dispositionem merentibus, Regularium non exemptorum iudex ordinarius est Episcopus: quæ tamen in re consuetudo locorum attendenda est.*  
 30 *Ecclesias vnitas Monasterij Regularium exemptorum, si populum habeant in spiritualibus Episcopo subiectum, idem Episcopus visitare potest: non item alias Ecclesias, quæ propriè Regulari spectant.*

- 29 **I**n Religionibus à sede Apostolica approbatis est potestas condendi statuta perpetua, quæ Ordini ac regulæ conformia sunt, sicut docet S. Th. 2. 2. q. 104. a. 5. & q. 186. 2. 9. vel quæ ad Ordinis ac regulæ conseruationem, aut reformationem temporis progressu necessaria videntur;

etiam si in regula, quam Regulares promiserunt, expressè non comprehendantur. Est autem talis potestas statuta condendi vel penes supremum Ordinis Prælatum: vel penes Congregationem, vel Capitulum generale, aut Prouinciale, secundum cuiusque Ordinis regulam, vel consuetudinem. Qua de re Innoc. III. c. in singulis, de statu Monach. Suar. l. 4. de leg. c. 6. n. 21.

Prælati Ordinum alij exempti sunt à iurisdictione Episcoporum: v. g. Prælati Mendicantium, qui proinde summo Pontifici immediatè subiecti, quasi Episcopalem in suos Regulares iurisdictionem habent. Alij sunt Prælati non exempti, qui nihilominus ordinarij Iudices suorum Regularium existunt, saltem in causis pertinentibus ad regularia statuta & disciplinam, arg. c. quantò, de offic. Ordinarij, vbi id notat Abb. n. 5. S. Tho. in 2. d. 44. q. 2. a. 3. Nauar. in commentar. 2. de Regul. n. 63. quam obrem illos punire, incarcerare, excommunicare possunt, iuxta. c. cum in Ecclesijs, de maior. & obed. & docet Abb. in c. cum ab Ecclesijs, n. 10. de offic. Ordin. & cap. cum contingat, n. 21. de foro competente. Gl. & Innocent. in cit. c. quantò, Couar. c. alma p. 1. §. 12. n. 3. Et intellige id priuatim, vt Episcopus in tali causa se immiscere non debeat, nisi ob negligentiam Prælati regularis; vel si Regularis à Prælato suo multum distet, sicuti notat Abb. in cit. c. cum contingat. n. 24.

Sed vtrum in causis criminalibus, puta furti, adulterij, homicidij, &c. Regulares non exempti à Prælato sui Ordinis, ab Episcopo iudicare debeant; non ita constat. Veritati autem consonum est, quod docet Nau. cit. loco, & lib. 2. de foro compet. consil. 6. edit. 2. Gl. in cit. c. quantò, ver. si Prælati; De iure communi, cognitionem iudicalem eiusmodi criminum ad solum Episcopum pertinere: & consentire videtur Trid. sess. 24. cap. 20. de reform. vbi ait, causas criminales Episcopi tantum cognitioni & examini relinquendas. De iure communi, inquam: Nam de consuetudine testatur idem Nau. se nullum vidisse Monasterium, in quo non Abbas de criminibus suorum Regularium cognoscat, & puniat; etiam in forma iudicij, ait Abbas repetit. c. si quis contra, num. 50. de foro compet. & in c. cum contingat, num. 33. eod. tit. Exceptis ijs, quæ depositione digna sunt, præsertim notoria & scandalosa: horum enim cognitio Episcopo reseruata esse solet, vt notauit idem Abb. in c. licet, num. 2. de offic. Ordin. & c. cum contingat, cit. num. 21. de foro compet. Anton. Corneus de absolut. iuram. promissorij, p. 2. q. 4. num. 9. De alijs verò, vt dixi, criminibus iudicare Prælati Ordinum permissum est, non priuatim sed cumulatim, ait Nau. l. cc. & consil. 2. de foro compet. in 1. edit. id est, vt læsus etiam ius habeat, Regularè, si velit, coram Episcopo accusandi. Quin & Episcopus, proprio motu, inquirere non prohibetur; præsertim si Prælati Ordinis negligat, sicuti constat ex cit. c. quantò, vbi Abb. & in c. ult. num. 1. de statu Monach. ait, Quod correctio Monachorum primo loco ad Abbatem spectat: defectum verò Abbatis ad Episcopum. Tamen in his consuetudo attendenda est, quæ iurisdictione dat & aufert, iuxta. c. duo simul, de offic. Ordin. & c. cum contingat, iun. Gl. ver. consuetudo, & notauit altera Gl. in cit. quantò, ver. si Prælati. Profectò constat, Episcopis in Germania maiorem potestatem competere in Monasteria Ordinum non mendicantium, quàm in Italia, Hispania, &c. vbi ferme ab omni Episcoporum iurisdictione exempta sunt.

Restat quæstio. Vtrum Episcopus in sua diocesi visitare possit Ecclesiam, quæ subest Regularibus exemptis? Respon. & Dico 1. Ecclesias vnitas Monasterijs, quæ populum habent in spiritualibus Episcopo subiectum, idem Episcopus visitare potest, sicut constat ex Trident. sess. 7. c. 7. de reform. & sess. 25. c. 11. de reform. & docet Felicianus Comensis in manuali visitatorum lib. 1. tit. 11. §. ite beneficia curata. Ratio est: Quia tales vniones fieri solent saluo.



saluo tamen iure Episcopali.

Dico II. Alias Ecclesias, quæ propriè regulares, seu Regularium exemptorum sunt, non potest visitare Episcopus, vt latè ostendit Emanuel Rodriq. t. i. regul. qq. q. 36. art. 3. & Felicianus l. c. tit. 12. Nam visitare est actus iurisdictionis, Superiori competens sicut constat ex cap. r. de cens. in 6. Ordinarius autem non habet iurisdictionem in exemptos; neque in eorum loca: Sunt enim hæc inter se connexa, & accessorium sequitur Principale. Neque obstat, quod Ecclesia sit posita in diocesi Episcopi; nam locus exemptus censetur veluti extra diocesim. Accedit, quod si loquamur de Religiosis exemptis, qui in congregationes redacti, Generales Ordinum habent; ab his, eorumque delegatis ipsorum Ecclesiæ visitari solent ac debent, iuxta Trid. sess. 25. cap. 1. 8. & 20. de Regular. vt proinde ab Episcopis visitari non possint. Siquidem Generalis Ordinis exempti habet in suos Regulares, & loca siue Ecclesias Regularium, iurisdictionem similem Episcopali: iurdictio autem Ecclesiastica indiuidua est, vt non possit duobus simul competere (Episcopo videl. & Generali) quando vnus alteri subordinatus non est. Quapropter idem Trid. sess. 7. c. 8. de reform. generatim præcipit, vt locorum Ordinarij Ecclesias quasunque, quomodolibet exemptas, singulis annis visitent: atqui eiusmodi locorum & Ecclesiarum Ordinum exemptorum Prælati. Nisi dicere malis, Tridentinum ibi loqui de Ecclesijs secularibus, quibus priuilegium obtendebatur, quod visitari non deberent; visitandos nihilominus esse ab ordinario loci, nihil obstante tali priuilegio. Vide Rodriquez l. c.

## CAP. VIII.

## De lege, &amp; legislatiua potestate ciuili, siue politica.

## S V M M A R I V M.

- 1 Legum ferendarum potestas hominum natura conuenit: Deumque autorem habet.
- 2 Triplex est forma Reipub. *Democratia*, *Aristocratia*, *Monarchia*.
- 3 Leges ferre possunt imprimis Respublica libera, deinde cuiusque Respublica supremum caput, Imperator, Rex, & qui ab istis potestatem acceperunt.
- 4 Licet ordinariè nobilitas & dignitas uxoris in maritum non redundet: secus tamen est, si dignitas uxoris maxima sit, puta regnum, vel ducatum possidentis.
- 5 Rex non potest, in præiudicium regni, iurisdictionem, aliæque bona eius alienare.
- 6 Communitates in Republica approbata, v.g. Mechanicorum statuta intra limites suos condere possunt: qua tamen à proprietate publicarum legum non nihil deficiunt, sicuti & statuta domestica à Patrefam. posita.

**C**Vm homo inter omnia animalia maximè infirmus nascatur, pluribus eum corporis tum animi sibi debitis ornamentis destitutus; ideo suapte natura sociale animal est: ipsa, inquam, natura & ratio naturalis eum adigit ad vitæ societatem, & Respublicas constituendas, sicuti prosequitur Aristot. toto lib. 1. Polit. Auctor l. de amicitia apud S. August. in to. 4. S. Chrys. hom. 34. in Ep. 1. ad Corinth. Porro eadem quoque ratio naturalis dicat, hominum Societatem siue Rempublicam diu consistere non posse, nisi publica potestate gubernetur: Nam *Ubi non est gubernator, populus corrumpitur*, ait Sapiens Prouerb. 17. & Arist. 1. Polit. c. 2. Sicuti perfectione suscepta optimum omnium animalium est homo: ita si alienus fiat à lege, à iudiciis, pessimum omnium animalium est homo. Ex quo sequitur, potestatem gubernatricem ac legislatricem in quantis Rep. non solum valde conuenientem ac necessariam esse, sed etiam

Deum primum autorem habere, teste eod. Salomone Prouerb. 8. *Per me Reges regnant, & legum conditores iustæ decernunt*. Et Apost. ad Rom. 13. *Non est potestas nisi à Deo*. Nam qui dat formam, dat etiam ea, quæ necessariò formam consequuntur: Sed, vt dixi, potestas gubernatiua est veluti necessaria proprietas naturæ humanæ, naturali dictamine in vnum coeuntis: Ergo Deus, qui est autor humanæ naturæ, est quoque autor gubernatiuæ siue legislatiuæ inter homines potestatis. Vide Ciceronem in l. de amicitia, Victor. relect. de potestate ciuili, Rodriq. to. 1. regul. qq. q. 17. a. 1. Suar. lib. 3. de leg. c. 1. & seqq. Mol. t. r. tr. 2. de iust. disp. 27.

Potestas legislatiua, si penes populum communiter maneat, dicitur ea forma Reipub. *Democratia*, quasi multitudinis regimen; eiusque iura siue leges, *Plebiscita*. Verum quia, crescente multitudine, plebs siue populus difficilè conuenire cœpit, legis sancientiæ, vel controuersiæ definiendæ causa, sicuti obseruauit Pomponius in l. 2. ff. de orig. iuris, & Iustinianus Instit. de naturali, gentium, & ciuili, §. constat autem: ideo plebs suam potestatem iurisdictionemque, quam communiter possidebat, in paucos prudentes, siue Optimates reiecit: quæ forma Reipub. *Aristocratia* dicitur, quasi Optimorum regimen: eiusque iura siue leges *Senatusconsulta*, & *Prætoria edicta* appellantur. Sæpe etiam populus omnè suum imperium ac potestatem in vnum aliquem Regem, siue Imperatorem contulit: quæ Reipub. forma *Monarchia* appellatur; eiusque iura siue leges, *Principum constitutiones* dicuntur, sicuti constat ex libr. 1. ff. de constit. Principum.

Quapropter ciuilem legem condere potest in primis quæuis Respublica libera, & superiorem non agnoscens, v.g. Respub. Veneta, Genuensis, Heluetiorum; siue aristocraticè, siue populariter gubernetur. Ita docent omnes, & colligitur ex l. omnes populi, ff. de iustit. & iure.

Secundò cuiusque monarchicæ Reipub. supremum caput, Imperator, Rex, &c. sicut colligitur ex cit. l. 1. ff. de constit. Princip. & docet S. Aug. tr. 6. in Ioan. cap. 1. quod refertur cap. 1. d. 8. Sunt autem duo hîc obseruanda: Primum, Regna & Prouincias, quæ Romano Imperatori subiecta non sunt, Cæsareis legibus minimè adstringi, sicuti obseruauit Honorius III. c. super specula, de Priuilegijs. Quare falsa, & iam pridem reiecta est sententia Bartoli in l. hostes, ff. de Captiuis, Imperatorem esse totius mundi dominum. A quo enim tale dominium in aliena regna, etiam Christianorum, accepisset? Cùm Summus Pontifex, à quo dignitas & nomen Imperatorium in Occidente à Græcis ad Francos, & Germanos translatum est, non possit pro arbitrio mutare regna; aut subijcere quæ antè libera erant, ait Suarez l. 3. c. 7. Quibusdam tamen terris, legis Cæsareæ, vbi propria iura deficiunt, vltro approbatæ & receptæ sunt, ob earum sapientiam & æquitatem. Qua de re vide Suar. eod. lib. 3. cap. 8. Vasq. disp. 153. cap. 2. Alterum. Vtrum Reges & supremi Principes propria ac libera voluntate; an solum in comitijs regni, & cum consilio procerum, leges ferre possint; id pendet ferme ex prima institutione regni, quàm amplam vel restrictam potestatem populus in Regem contulerit: hos enim limites ille transgredi non potest. Quæ de re Molina t. 1. de iust. tr. 2. disp. 23.

Tertiò, Romani Imperij Duces, Marchiones, & Comites quidam; item Imperiales ciuitates prouincialia vel municipalia statuta condere possunt per potestatem ipsis ab imperatore communicatam: imò verò Duces Imperij, Marchiones, &c. in quibusdam rebus etiam contra commune ius Cæsarium statuere solent. Quæ in re quid cuique permissum sit. & Imperatoris priuilegia, & legitimè præscripta consuetudo spectanda erunt. Vide Abb. cap. quod clericis, num. 45. de foro Compet. Syl. ver. lex, quest. 4. Rebel. parte 1. de obl.



iust. lib. 1. quæst. 6. sect. 1. Porro, vtrum aliorum regnorū sub Rege constituti Duces, gubernatores ciuitates, &c. leges condere possint, ex ordinationibus regni, singulorum priuilegijs, & longa consuetudine cognoscendum erit.

- 4 Dubitatur autem primò de Regina, ad quam iure hæreditario ius regni deuolutum, posteaquam matrimonio collocata est; vtrum iurisdictio vel administratio regni, legumque ferendarum potestas competat ipsi femina, an marito eius? Qua in re dicendum est primò; Mulierem iurisditionis etiam regie, capacem esse; puta per hæreditariam successionem, sicuti colligitur ex c. dilecti, de arbitris, & ibi. notat Abb. Vide etiam Petrum Tholosanum l. 45. Syntag. c. 4.

Secundò dicendum: Quamuis ordinariè dignitas & nobilitas mariti in vxorem redundet: at non vice versa maritus ignobilis ex vxoris nobilitate nobilitetur, sicuti fuisse ostendit Andreas Tiraquel. de nobilit. cap. 18. Cum enim vir & mulier, ob indiuiduam coniunctionem, sint veluti vna caro: vir autem caput mulieris existat, secundū Apostol. ad Ephes. cap. 5. conueniens est, vt mulier viri, tanquam dignioris, statum & conditionem sequatur. Quod & in liberis obseruatur, vt à patre potius, quam à matre iura nobilitatis trahant, sicuti docet idem Tiraquel. num. 20. ex leg. mulieres. Cod. de dignitat. lib. 12. Nihilominus id peculiare esse volunt Bald. in cap. significauit, de rescript. Tiraquel. num. 39. & hos secuti Vasq. disp. 153. cap. 3. Suarez lib. 3. de legib. cap. 9. num. 14. Vt maxima dignitas vxoris, videl. regnum vel ducatum hæreditario iure possidentis, in maritum alioquin inferiore gradu positum, v. g. militem quodammodo deriuetur, & Regis vel Ducis nomen ipse quoque, vxoris participatione, sortiri possit.

- 5 Dicendum tertio: In hoc ipso tamen casu regni seu ducatus administrationem penes Reginam, vel Ducissam manere, neque ad maritum deuolui: nisi & femina, & ipsum regnum vel provincia sponte consentiant. Ita docent Doctores citati. Cuius ratio est, Quia regnum & regia iurisdictio alienari non potest; neque in dotem dari: sed ex primæua sui origine, vel per electionem, vel hæreditariam successionem obuenire debet: & omnino nihil circa regnum vel successionis modum absque Reipubl. consensu mutari, neque bona coronæ regni, quæ alicuius momenti sunt, cum Reipubl. præiudicio alienari posse, ex communi docet Maior in 4. d. 1. quæst. 10. Abb. in cap. intellecto, de iureiur. Mol. t. 1. de iust. tr. 2. dis. 25. Ratio est: Quia bona regni sunt potius dignitatis, quam propria Regis; quæ causa est, quòd mortuo Rege non diuiditur regnum, vel comitatus inter filios defuncti, ait Abb. ibid. num. 1.

Quapropter, si Regina priuato alicui, v. g. militi in matrimonium iungatur, ad maritum quidem pertinebit priuata siue domestica gubernatio erga familiam, liberorū educationem, ipsiusque vxoris custodiam. Contrà verò ipsa vxor, quatenus Regina est, superior erit marito suo, quòd attinet ad publicam siue politicam gubernationem: cuius proinde legibus ipsemet quoque maritus parere debet. Qua de re Suarez libro tertio capite 9. numero 15.

- 6 Dubitatur secundò; Vtrum communitates in Repub. approbata, v. g. Mechanicorum, *die Bunnfien*, item Magistrorum in academia; statuta, eisque annexas pœnas ponere possint, tamen intra limites facultatis suæ? Suarez lib. 4. de legibus, cap. 6. num. 13. negat tales esse propriè leges seu statuta. Nam legem condere actus iurisditionis est, pertinens ad totam multitudinem; vel personam publicam, quæ totius multitudinis curam gerit, ait S. Th. 1. 2. q. 90. a. 3. Atqui communitas, v. g. factorum, sutorum non facit talem publicam multitudinem, in qua potestas iurisditionis resideat ad præcipiendum, ac puniendum singulos. Nihilominus, ait Suarez, ex vi pacti mutui, aut

præstiti iuramenti, membra eiusmodi communitatis obligari posse ad seruandas iustas ordinationes, & ad pœnas quasi conuentionales. Sed alij Doctores communiter affirmant, Abbas in cap. quæ in Ecclesiis, num. 7. de Constit. Syl. ver. lex, quæst. 4. Ioan. Faber tit. Instit. de iure naturali, gentium, & ciuili, §. sed quod Principi; Quòd communitates approbatæ statuta considerare possint, argumento l. ult. Cod. de iurisdict. omnium iudiciū, & leg. 1. §. ult. Cod. de constituta pecunia. Ad rationem in contrarium respondent; Maiorem veram esse, si sermo sit de iure ferendi leges ordinario ac proprio, non item de iure commissionis, aut approbationis. Communitates autem illæ non iure ordinario ac proprio, sed ipsis à publica potestate commissio aut approbatio statuta inter suos ferunt; cum dependentia à publico Magistratu. Addo, quòd sicuti Communitates illæ imperfectæ sunt ita & gubernatio, ac qualis iurisdictio imperfecta, multumque dependens est: consequenter etiam statuta eorum à proprietate legum non parum deficiunt: vt proinde quæstio hæc de nomine potius esse videatur, quam de re.

Simili ferme ratione decidi debet: Vtrum Paterfamilias domesticis sui, statuta ponere possit? Respondetur enim, Quòd familia domus non est perfecta communitas: quare nec Paterfamilias, seu qui domui præest, iurisditionem in suos habere censetur; sed modum quendam iurisditionis, seu potius gubernationis, secundum limites ipsi à publica potestate definitos, vt explicabo li. 5. tract. ult. p. 3. cap. 2. num. 7. Ex quo sequitur, quòd & leges eius seu statuta à proprietate publicarum legum valde deficiunt: nihilominus vim aliquam obligandi habent non tantum sub pœna, saltem leui: sed etiam sub culpa, si statutum ferens id intendat. Enimvero quòd parentes, præceptores, & qui simili potestate gaudent intra limites facultatis suæ, ijs quos subiectos sibi habent, iusta præcipere possint, etiam sub peccato mortali, si materia huius obligationis capax est, ex communi docet Syl. ver. filij, quæst. 22. Nau. cap. 14. num. 12. & cap. 23. num. 36. & colligitur ex Exod. c. 20. Apost. ad Ephes. 6. Et quidem frequentius existimandum est, præcepta parentum sub culpa obligare, quam statuta domestica, quæ plerumque tantum sub pœna obligare censentur.

§. Vnicus.

## De lege Ciuili.

### SUMMARIVM.

- 7 *Leges naturales immutabiles sunt: positivæ autem arbitrariæ* | *ideoque varia apud varias gentes.*
- Discrimen est inter ius naturale, ac ius gentium.*
- 8 *Si lex canonica contraria sit legi ciuili circa materiam Ecclesiasticam: ciuili sublata censetur: Sin verò circa aliam materiam, utraque in suo foro seruanda est.*
- 9 *Mira est conspiratio inter ius ciuile & canonicum.*

**D**E ciuili lege subiiciendum est, latius eam ab Aristotele accipi lib. 5. Ethic. cap. 7. quam à Iureconsultis tit. ff. de iustitia & iure. Nam Aristoteles ius siue legem ciuilem diuidit in naturalem, & positivam siue arbitrariam; quia vt Caius Iureconsult. ait in l. 9. ff. eod. tit. *Omnes populi, qui legibus & moribus viuunt, partim suo proprio, partim communi omnium hominum iure viuunt.* Legem naturalem definit Aristot. *quæ ubique* (id est, apud omnes gentes) *eandem vim habet; non quia ita visum fuit, vel non fuit.* Quamobrem immutabilis est, per se loquendo: per accidens autem mutari potest; ob mutationem obiecti: v. g. suum cuique repetenti restituendum esse naturalis iuris est; cuius tamen obligatio cessat, si furiosus depositum enssem repetat. Qua de re lege Suarez l. 2. de de leg. cap. 13. Lex, siue ius positivum & arbitrarium ab eodem



eodem definitur, quod ab initio (id est antequam lata sit lex) nihil refert, sic an aliter fiat: cum verò positum fuerit, refert, v. g. capram Ioni immolare, & non duas oves. Ex quo fit, ut eiusmodi leges positivæ variæ sint apud varias gentes: item, ut pro temporum varietate in eadem Repub. variari soleant: quia sicuti Principis, vel populi arbitratu positæ fuerunt; ita etiam tolli, vel abrogari possunt, cum ita visum fuerit.

Iureconsulti autem magis propriè & strictè civilem legem usurpant, quando ita loquitur Caius cit. l. 9. *Quod quisque populus ipse sibi ius constituit, id ipsum proprium civitatis est: vocaturque ius civile, quasi ius proprium ipsius civitatis.* Et Ulpianus l. 6. eod. tit. *Ius civile est, quod neque in totum à naturali vel gentium (iure) recedit, nec per omnia ei servit.* Itaque cum aliquid addimus, vel detrahimus iuri communi, (omnium gentium) ius proprium, id est, civile efficitur.

Observare etiam licet, paulò aliter Iureconsultos ius naturale, & ius gentium accepisse, quàm Theologi nostri solent. Nam illi ius naturale vocant, quod natura omnia animalia docuit: ut maris atque semine coniunctio, liberorum procreatio, educatio, l. 1. ff. de iust. & iure. Dixerunt igitur ius naturale, instinctum siue propensionem naturæ sentientis, quæ homini cum brutis animantibus communis est. Theologi autem ius naturale vocant, quod hominis menti, Deo auctore, naturaliter inditum est, secundum Apost. ad Rom. 2. *Cum enim gentes, quæ legem (scriptam) non habent, naturaliter ea, quæ legis (Decalogi) sunt, faciunt: eiusmodi legem (scriptam) non habentes, ipsi sibi sunt lex: qui ostendunt opus legis scriptum in cordibus suis, testimonium reddente illis conscientia eorum.* Ex quibus Apostoli verbis colligi videtur, legem naturalem aliud non esse, quàm hominis conscientiam ipso naturali lumine recta præcipientem, & prava prohibentem. de qua tr. 1. dictum fuit.

Ius gentium Iureconsultus appellat, quo gentes humane utuntur: veluti erga Deum Religio: ut parentibus patriæ pareamus; ut vim atque iniuriam propulsemus. Manumissiones quoque iuris gentium sunt, l. 1. & seqq. ff. de iust. & iure. Ex quibus verbis intelligitur, eos sub gentium iure comprehendisse partim id, quod ab Aristot. 5. Ethic. cap. 7. Cicer. lib. 2. de inuent. nostrisque Theologis ius naturale nuncupatur. & Decalogi præcepta cõplectitur; partim id, de quo sermo est in cap. 9. d. 1. *Ius gentium est sedum occupatio, edificatio, munus, bella, captivitates, servitutes, postliminia, fœdera, paces, inducia, legatorum non violandorum religio, connubia inter alienigenas prohibita.* Hoc inde ius gentium appellatur, quia eo iure omnes servè gentes utuntur. Supposita enim humana societate, ratio naturalis suadet, quàm maximè hæc esse hominum vitæ consentanea, ut pleræque gentes ad ea per legem positivam stabilienda, & populo præcipienda, ipso rationis ductu, impellerentur. Vide S. Thom. 1. 2. q. 95. a. 4. in corp. & ad 1. Suar. lib. 2. c. 18. Io. Salas disp. 2. de legib. sect. 3.

Ex parte tamen assentior Vasquezio disp. 157. cap. 3. Quædam à Iureconsultis, & Isidoro sub gentium iure comprehendendi, non quatenus significat legem aliquid præcipientem, aut vetantem; sed potestatem, siue facultatem quippiam agendi, quod more seu consuetudine omnium, vel pene omnium gentium permixtum esse solet, tanquam salutare hominibus in communi societate viventibus: cuiusmodi sunt v. g. agrorum diuisionem instituere, vim vi repellere, iniurias hostium vlcisci, ac bello prosequi, eos captos sub captivorum potestate servare, &c. Quapropter à quibusdam appellari solent iura non præceptiva, sed permissiva; iura non necessitatis, sed utilitatis.

Restat Quæstio. Civilibusne potiùs, an canonicis legibus standum sit? Respondeo ex doctrina Abb. in c. clerici, num. 2. de iudicijs. Vel iure canonico aliquid contrarium statutum est legibus civilibus, vel non: Si pri-

um, vel contraria decreta versantur, circa materiam Ecclesiasticam; tunc correctæ & sublata censebuntur debet lex civilis: v. g. ea quæ prohibet mulieri, ne intra annum viduitatis nubat. Vel versantur circa materiam non Ecclesiasticam; tunc utraque servari debent in proprio foro. Sin verò iure canonico nihil diuersum à civili lege statutum reperitur, tunc ea in utroque foro tam Ecclesiastico, quàm civili servari debet, iuxta c. 1. de novi operis notatione.

Miram profectò inter ius civile & canonicum consensionem esse, & multa summorum Pontificum decreta ex civilibus legibus pene ad verbum desumpta, norunt omnes, qui in iuridico studio vel parùm versati sunt. Ut proinde nemo se Canonistam, vel Casistam profiteri possit, nisi civilium legum aliqualem cognitionem habeat; non tantum ob eam dixi causam; sed etiam quia leges civiles, si iustæ & sacris canonibus repugnantes non sunt, in conscientia obligant, secundum communem DD. sententiam. Quamobrem licet in c. non magnopere, & in c. super specula, Ne Clerici vel Monachi, &c. severè prohibitum sit Religiosis, ne ex claustris suis exeant ad audiendū leges, vel physicam seu medicinam & chirurgiam, sub pœna excommunicationis ipso facto incurrendæ; nisi intra duos menses ad claustrum redeant: non tamen ijs prohibitum, sed laudabile, intra claustrum leges civiles inspicere, & eorum intellectum addiscere, quatenus id necessarium videtur ad sacros canones rite intelligendos, ac docendos, & occurrentes conscientie casus dissolvendos, sicuti annotavit Abb. in c. ult. Ne Clerici vel Monachi, in fine Nau. c. 1. §. caueat, num. 9. d. 6. de pœnit.

## CAP. IX.

## Vtrum legislator propria lege obligetur

## SUMMARIUM.

1. Legislator alius est absolutus: alius verò dependens.
2. Princeps suis legibus non obligatur si coactus.
3. Obligatur tamen Princeps legibus suis, si directiva: quæ obligatio radicaliter ex naturali iure: proxime autem ex ipsa positivâ lege descendit.

Quæstio hæc intelligi debet de Legislatore singulari & absoluto, id est, qui solus Communitati legem ferre potest: qualis est Papa, Imperator, Rex, Episcopi, Duces imperij, &c. quamvis horum aliqui inferendis legibus certarum personarum consilium adhibere debent; ut Rex Arragoniæ, & Rex Poloniæ procerum regni in comitijs. De eo verò Legislatore, qui solus legem condere non potest, sed cum alijs, inter quos ipse primas tenet: ut Dux Venetus inter Senatores: Metropolitanus inter Coepiscopos: Prælatus in Capitulo: dubium nullum est, quin communibus legibus in Synedrio latis astringatur: Multò verò magis si tota communitas legem ferat, singuli eorum obligabuntur, argum. c. cum omnes, de constitut.

Secundò, intelligi debet quæstio de ijs legibus, quarum observatio & usus æquè Principem decet, ac subditos: cuiusmodi est v. g. lex, quæ taxat pretium frumenti: quæ præcipit Ecclesiasticum ieiunium, abstinentiam, Confessionem annuam. Aliæ verò leges sunt, quæ ad subditos propriè feruntur: & in Principem, siue caput Reipub. non ita cadunt: Exempli causa, Ne quis in civitate arma ferat: Ne aliquis vestibus holoseris induatur. Neque enim in his & similibus eadem ratio Principis est: quæ subditorum: sed decet quandòque caput Reipublicæ quippiam præcipuum habere: neque eandem cum reliquis membris conditionem subire: quando nec paterfamilias quibusvis legibus, seu potiùs præceptis, quæ familiaribus ab ipso imposita sunt, adstringitur. Quæ de re vide Solum lib. 1. de iust. quæst. 6. a. 7.



Tertio consentiunt Doctores, cum S. Thom. quæst. 96. a. 5. ad 3. Principem proprijs legibus non obligari vi coactiva: hoc est, etiam si legem non obseruet, puniri tamen non posse humana potestate. Quia pœna imponi debet per iudicis sententiam, etiam iniuncto: Princeps autem superiorem, vel iudicem nullum habet, à quo cogi, vel puniri possit: A seipso autem nemo propriè cogitur, ait S. Thom. l. c. Neque quisquam in proprio facto iudex est.

Igitur quæstio solùm est de vi directiva, Nempe vtrum Princeps legislator, non minùs quàm subditi, in conscientia & sub peccato obligatus sit ad seruandam legem, quæ communiter lata est? v. g. Vtrum Papa mortaliter peccaturus sit, si nulla iusta causa impeditus, Paschali tempore S. Eucharistiam non sumat: quod intellige, per se loquendo, & ratione ipsius Ecclesiasticæ legis; etiam cessante omni scandalo, quippe quod extrinsecum & per accidens est. Circa quam quæstionem pauci Doctores in negatiuam partem descendunt, Abbas in c. magnæ, de voto, Azor tom. 1. lib. 3. c. 11. quæst. 1. Salas disput. 14. sect. 2. num. 18. Probatur primò: Quia hæc videtur fuisse mens Iureconsultorum, Vlpiani in l. 31. ff. de legibus: *Princeps legibus solutus est: Augusta autem licet legibus soluta non est, Principes tamen eadem illi priuilegia tribuunt, quæ ipsi habent.* Et Pauli in l. 23. ff. de legatis, 3. *Ex imperfecto testamento legata vel fideicommissa Imperatorem vindicare inuerecundum est: decet enim tanta Maiestati eas seruare leges, quibus ipse solutus esse videtur.* Consentit Imper. Alexander in l. 3. Cod. de testamentis; Antonius item & Senerus, qui, (vt dicitur in Institut. Quibus modis testamenta infirmantur) *sapissimè rescripserunt: licet legibus soluti simus, attamen legibus viuimus.* Eò quod rationi valde consentaneum, & bono Principi imprimis decens sit, vt vltro ac sponte se legibus subiiciat, perindèquæ eas obseruet, ac si necessitate adstringatur. Quò sensu dictum videtur à Theodosio & Valentiniano Imp. in leg. 4. Cod. de legibus, interprete Gloss. ibid. *Digna vox est maiestate regnantis, legibus alligatum se Principem profiteri.* & paulò post: *Reuera maius imperio est, submittere legibus Principatum.* Item illud Isidori in cap. iustum, d. 9. *Iustum est Principem legibus obtemperare suis: Tunc enim iura sua ab omnibus custodienda existimet, quando & ipse illis reuerentiam præbet.*

Probatur secundò; Si enim Papæ, v. g. ante legem Ecclesiasticam, à se latam de obseruantia alicuius ieiunij, carnes comedere tali die licitum fuerat; posteaquam verò legem tulit, illicitum esse incipit, per se loquendo, & ex vi legis; sequitur quòd idem homo seipsum per legem vel præceptum obligare possit, idèmq; sibi ipsi obedire teneatur. Consequens autem est falsum, teste Iureconsulto in l. penultima. ff. de receptis, qui arbitrium, &c. *Nemo imperare sibi, neque se prohibere quisquam potest: vbi Gloss. adijcit, ideo verbum in imperatuo non habet primam personam.* Ratio est: Quia lex & præceptum superioris est erga inferiorem siue subditum, iuxta cap. cùm inferior, de maior. & obed. Nemo autem se ipso inferior, sibi que subditus esse potest. Ob eandemque rationem dicitur in cap. inno. uit. de electione, quòd *par in parem non habet imperium: ergo neque idem in se ipsum.* Cui doctrinæ ad stipulatur S. Thom. 1. 2. quæst. 93. in corp. art. 5. *Lex hominis non se extendit nisi ad creaturas rationales, quæ homini subijciuntur.* Cuius ratio est, quia lex est directiua actuum, qui conueniunt subiectis gubernationi alicuius: unde nullus propriè loquendo suis actibus legem imponit.

Contraria nihilominus sententia communis est, à qua non facile recedendum. Eam docet S. Thom. quæst. 96. a. 5. ad 3. Caiet. Medina ibid. Victoria de potestate civili, num. 21. Syl. ver. lex, quæst. 14. Sotus 1. de iust. quæst. 6. a. 7. Couarr. c. alma. p. 1. §. 1. num. 5. Vasq. disput. 167. cap. 3. Suar. lib. 3. cap. 35. de legib. eandemque tradidit S. Ambros. lib. 5. Epist. 32. ad Valentinianum Imp.

*Quod cùm præscripsisti alijs, præscripsisti etiam tibi: leges enim Imperator fert, quas primus ipse custodiat.* Probari autem solet aliquibus argumentis, quæ non omnino conuincere videntur: Primum ducitur ex verbis Christi apud S. Matth. cap. 23. reprehendentis Phariseos; *Dicunt enim, & non faciunt: Alligant enim onera grauià & importabilia, & imponunt in humeros hominum: digito autem suo nolunt ea mouere.* Verùm Christus duntaxat loquitur de traditionibus, & varijs Phariseorum interpretationibus, ac commentis, ad legem Moysis adiectis, quibus populum grauabant, & tamen nulla in re subleuabant.

Secundum sumitur ex Apost. ad Rom. c. 2. *Inexcusabilis es, ô homo, omnis qui iudicas. In quo enim iudicas alterum, te ipsum condemnas: eadem enim agis quæ iudicas.* Verùm S. Paul. ibi loquitur de peccatis contra legem naturæ, quæ dum Iudæi in Gentilib. damnabant, & eadem tamen ipsimet perpetrabant, simili pœna dignos se ostendebant. *Tribulatio enim ait ver. 9. & angustia in omnem animam hominis operantis malum, Iudæi primum, & Græci, &c. Non enim est acceptio personarum apud Deum.* Et clariùs ver. 21. *Qui ergo alium docet, te ipsum non docet; qui prædicat non furandum, furatur.*

Tertium ex edicto Prætoris lib. 2. tit. 2. ff. *Quod quisque Magistratus noui iuris in aliquè statuerit, vel si alius apud Magistratum aliquid noui iuris obtinuerit, ipsemet quoque, aduersario postulante, eodè iure uti debet. Quod edictum, ait Vlpianus, summam habet aequitatem. Quis enim aspernabitur, idem ius sibi dici, quod ipse alijs dixit, vel dici effectum?* Verùm nullus hîc prorsus sermo est de iusta lege Principis, boni publici causâ ad communitatem lata; sed de nouo aliquo grauamine, quod vel Magistratus proprii commodi causâ in aliquem decreuit; vel alius à Magistratu decerni postulauit, & impetrauit. Exemplum adfert Glossa: Si Magistratus Bononiensis (cùm fortè debitis oneratus esset) statutum fecisset, vt debitores suis creditoribus ante quinquennium soluere non tenerentur, tum etiam qui Magistratui aliquid debet, eodem contra ipsum iure uti poterit, vt antè soluere non cogatur. Simili ratione in c. cùm omnes, de constit. reprehendit Papa Innoc. III. Canonicos Trecentenses, quòd contra Ecclesiæ suæ consuetudinem, constitutum fecissent, vt ipsi quidem tam in absentia, quàm præsentia redditus perciperent; qui autem post illam constitutionem Canonici instituti fuerint, redditus non in absentia, sed solùm dum resident, percipere possent; mandâtque Archiepiscopo Senonensi, & Episcopo Trecentensi, vt iuniores Canonicos antiquioribus in reddituum perceptione coæquent: *Quia quod quisque iuris in alterum statuit, eodem ipse uti debeat; & sapienter Canonis dicat autoritas: patere legem, quam tu ipse tuleris.*

Quare, vt proprium huius sententiæ fundamentum aperiat, sciendum est; Principem siue Magistratum leges ferre tanquam ministrum Dei per potestatem ab ipso deriuatam, sicut expressè testatur Apost. Paulus ad Rom. 13. & S. Petrus Epist. 1. c. 2. *Quæ ipsa causa est, cur leges Principi, etiam secularium, in conscientia obligent; sed aliter subditos, & aliter ipsum Legislatorem, sicuti notauit Caiet. cit. q. 96. a. 5. Nam subditi ideo peccant legem iustam transgrediendo, quia Deus præcipit Superiorib. obediendum esse. Ipsemet verò Superior siue Legislator ideo peccat legem communem non obseruando, quia Deus per lumen naturæ nobis inditum, testantibus pleriq; sapientibus, præcipit, ac iubet, legem Principi seruandam esse, quam ipsemet Communitati tulit: Nam iustus est omnis pars suo vniuerso non congruens, ait S. August. lib. 3. Confess. c. 8. & refertur in c. quæ contra, d. 8. Multo magis pars præcipua, siue caput Reipub. cum reliquis partibus congruere debet: quòd id planè necessarium esse videatur, vt inferiores legem sponte, libenter, ac faciliè obseruent, si eius autorem proptio exemplo præire conspiciant. Porro, quamuis obligatio legis humane radicaliter, vt dixi, descen-*



descendat ex voluntate Dei, & dictamine rationis naturalis: proximè tamen & immediatè provenit ab ipsa lege, quæ iustè ac legitimè lata, constituit materiam suam in certa specie virtutis, tanquam necessarium eius medium: ut proinde tam Papa, v. g. quàm reliqui fideles contra temperantiæ virtutem peccent, si Ecclesiasticum ieiunium violent. Fateor tamen, quod legis obligatio minùs directè in Legislatorem quàm in subditos cadat, uti colligitur ex ijs, quæ dicam infra cap. 13. n. 6. Quare faciliùs etiam à mortali peccato excusari poterit Legislator, si legem propriam violet, scandalo cessante, uti docet Sotus lib. 10. de iust. q. vlt. a. vit. Sanchez lib. 6. moral. c. 6. n. 19.

Ad 1. argum. contrariæ sententiæ communis est responsio Syl. cit. q. 14. Vasq. eit. c. 3. num. 22. Suar. lib. 3. c. 35. num. 15. cum. S. Thom. cit. a. 5. ad 3. Principem proprijs legibus solutum esse, quod attinet ad vim cogentem & pœnam; non item quod attinet ad vim dirigentem: sic enim se legibus obligatum ultro fatetur. Deinde responderi posset, quosdam Iureconsultos, ac Imperatores eam sententiam non omnino improbabilem, & quæ adhuc hodie à quibusdam defenditur, secutos fuisse; Principi legem propriam servandam esse ex quadam rationis honestate, ac decetia; non propriè dictæ obligationis necessitate.

Ad 2. respondetur; Legem per se primò ad subditos ferri; eosque obligare; secundariò autem, & ex quadam consecutione ipsum quoque Legislatorem constringere: Non quod ipsemet sibi obedire, aut subiectus esse debeat, sed potius legi, quæ posteaquam legitimè lata & stabilita est, in Repub. dominatur, teste Aristot. 3. polit. c. 7. circa finem; & obligationis necessitatem ipsi etià Principi adfert, ob rationem suprà datam.

## CAP. XI.

## Vtrum infantes &amp; amentes legibus obligentur.

## S V M M A R I V M.

- 1 Infantes; dum ad rationis usum non pervenerunt, nullis legibus obligantur.  
Perpetuò amentes infantes infantibus aequiparantur.
- 2 Qui verè infantes, aut amentes sunt, propter excessus puniri propriè non possunt.
- 3 Pueris ante usum rationis. & perpetuò amentibus fas est diebus interdictis carnes ad comedendum præbere.  
Sed ebrijs præbere non licet: Idemque sentiendum de amentibus ad tempus: nisi quod his, tanquam gravissimo morbo laborantibus, carnes dari possint, tanquam cibi magis convenientes.
- 4 Pueri, cum primum rationis usum consecuti sunt, communibus legibus obligantur.
- 5 Pueri, post septennium ætatis, si doli capaces sunt, Ecclesiasticam censuram incurrere possunt.  
Probabile tamen est censuram non ligari, si infantiæ propinqui sint.
- 6 Pœnis gravissimis excommunicationis, prohibitionis sepulture, interdicti Ecclesiæ, &c. plerumque non censentur comprehensæ delinquentes impuberes.
- 7 Impubes, qui post septennium doli capax voluntarium homicidium committit, irregularis efficitur.  
Non item infans ante septennium exactum, licet doli capax sit, & mortaliter peccare possit.

**A**ssertio I. Infantes, nondum affecti usum rationis, nullis legibus obligantur. Est communis & certa doctrina, quam tradit Palud. in 4. d. 15. q. 4. a. 2. Sotus lib. 2. de iust. q. 3. a. 9. Sanch. lib. 1. moral. cap. 12. Azor tom. 1. lib. 5. c. 11. quæst. 4. Eademque est ratio de perpetuò amentibus, qui infantibus aequiparantur, uti notavit Sanch. num. 16. Cum enim lex sit præceptum rationale, eius vinculi siue obligationis capaces non sunt, qui ratione carent: quare his leges positæ non censentur.

**Corollarium I.** Qui verè infantes aut amentes sunt, propter excessus puniri propriè non possunt: cum pœna omnis culpam supponat. Loquor de pœna propriè dicta. Alioquin enim amentes, si alios v. g. verberent, vel absurda loquantur, castigari possunt, ac debent, ut eo modo sapiùs perterriti, perinde ac bestię, à talibus nocu- mentis arceantur; sicuti notavit Mol. tract. 3. de iust. disp. 38. num. 3. qui addit num. seq. Si crimen commissum fuerat dum delinquens sanæ mentis erat, sed postea in amentiam incidit, procedi posse contra eum ad pœnam pecuniariam; non item ad pœnam mortis vel mutilationis, dum in statu amentię versatur; tamen si sententia condemnatoria antea contra ipsum lata fuerit.

**Corollarium II.** Pueris ante usum rationis, & perpetuò amentibus fas est diebus interdictis carnes ad comedendum præbere. Ita docet de infantibus Caiet. 2. 2. q. 147. a. 8. dub. 1. Azor tom. 1. lib. 7. c. 28. quæst. 3. Sa- ver. ieiunium in fine. Sanchez l. c. num. 9. contra Palud. cit. a. 2. De amentibus idem docet Sanch. num. 16. Angles in floribus p. 2. quæst. 6. de ieiun. diffic. 6. in fine. Cum enim leges Ecclesiasticæ talibus personis positæ non sint, causa existere possum, ut id faciant; quod nulli legi aduersatur. Quare idem eadem ratione dicendum arbitror de operibus servilibus, quæ festis diebus ab Ecclesiis interdiciuntur, non infantibus & perpetuò amentibus; sed ijs qui rationis usum consecuti, eiusmodi præceptum modo humano & utiliter exequi possunt: idè quæ nihil obstat, quò minùs ijs servilia onera die festo imponantur; modò id fiat sine ope aliorum, qui lege Ecclesiastica obligati sunt. Errabit verò aliquis, si ex hac doctrina inferat, licitum esse perpetuò amentes ad iram concitare, ut blasphement, alios verberent, &c. Quia talia, quæ suapte natura deformitatem habent, tribuuntur principali libero agenti, qui amentis opera veluti instrumento utitur.

Porro in ebrijs tradita doctrina locum non habet. Hi enim Ecclesiasticis legibus subiecti sunt; etsi per accidens excusentur pro eo tempore, statu. Quare licet ipsi non peccent in ebrietate carnes comedendo; peccant tamen qui ad comedendum alliciunt, vel impellunt, sicuti notavit Sanchez cit. num. 16. in fine. Idemque dicendum esset de amentibus ad tempus: verum, cum amentię morbus gravissimus sit, poterunt carnes illis præberi tanquam cibi magis utiles ac necessarij ad morbi curationem, ut Sanchez notavit.

**Assertio II.** Pueri, cum primum rationis usum adepti sunt, quod ferme circa septennium accidit, non solum naturalibus & divinis; sed etiam Ecclesiasticis, alijsque humanis legibus obligantur, si earum materia puerili ætati consentanea sit. Declaratur: Nam pueri, cum rationis usum adipiscuntur, legalis vinculi, ac præcepti capaces fiunt: ergo cum lex generale mandatum sit, quod à tota communitate observari debet, etiam pueros comprehendet. Exemplum habemus in Confessione annua, auditione Missæ, abstinentia à carnibus. Quædam verò leges sunt, ut ieiunij, Communionis annuæ; quæ non ita puerili ætati congruunt, de quibus suo loco.

**Assertio III.** Pueri, post septennium, si doli capaces sunt, quandoque etiam Ecclesiasticam censuram incurrunt. Probat ex c. vltim. de sentent. excommun. in quo supponitur, pueros, ante pubertatem, ob Clerici percussione canonis excommunicationem incurrere posse: idque de omnibus pueris exacti septennij ætatem & rationis usum consecutis intelligendum esse testatur Henricq. lib. 8. c. 42. in fine comment. Navar. c. 27. man. num. 76. Sanchez l. c. num. 8. licet Sa ver. censura, num. 2. probabiliter dicat, censuram nunquam incurri ante annum ætatis decimum, cum impubes pubertati proximus esse incipit. Quemadmodum etiam in civili foro pueri non puniuntur ob delicta, quæ in ætate proxima infantie commiserunt, sicuti constat ex §. pupillus, In-



stit. de inut. stipul. & §. penult. Instit. de obligat. ex delicto, & l. pupillum, ff. de regal. iur. Ex quibus iuribus habetur, quod puer pubertati proximus ex furto, homicidio, & omni delicto teneatur; excepto tamen adulterio, quod in impuberem non cadit, ut notauit Gl. in cit. l. pupillum. Et quod dixi teneri, intellige ad pœnam luendam; quamvis mitiorem, iuxta reg. 108. ff. *Fei de in omnibus penalibus iudicys & aetati, & imprudentia succurritur.* At verò ad damni restitutionem pueri ex delicto per dolum commissio integrè obligantur, appareat eam rationis discretionem effecutos esse, ut doli capaces sint, iuxta l. impuberem, ff. de furtis. Quare quod dicitur in §. summa, Instit. de obligationibus, quæ ex delicto, tum demum ex furto obligari impuberem si pubertati proximus sit: id intellige secundum præsumptionem, quasi antè non plenè intelligat se deliquisse: sin verò constet, quod doli capacitas ætatem suppleat, haud dubiè tenebitur.

Porro in cit. c. vlt. Pontifex concedit Ordinario, ut absolutionis beneficium talibus impertiatur, etiam pubertatem iam adeptis, qui antè pubertatem canonis sententiam incurrerunt: quod propter defectum ætatis, in qua fuit commissus excessus, rigor sit mansuetudine temperandus. Idque etiam in civili foro obseruari solet, ut impubes ob delictum puniatur quidem (si doli capax & pubertati proximus sit) sed mitiùs, teste Claro in pract. crim. q. 60. num. 2. Molin. tr. 3. de iust. disp. 36.

6 Interim plerumque verum est, quod docet Sotus in 4. d. 18. quæst. 1. art. 3. prope finem, Vasq. de sacram. pœnit. q. 90. a. 2. dub. 4. Cum in sacris canonibus pœnæ grauissimæ excommunicationis, prohibitionis sepulturæ, ingressus in Ecclesiam decernuntur; non censeri comprehensos pueros, arg. c. 1. de delictis puerorum, vbi Pont. ait; Quod peccata in pueris, non ita ut in maioribus natu, punienda videntur. Et Vgolinus obseruat tab. 1. de censur. c. 17. §. 3. num. 5. impuberes neque ab homine excommunicari solere: quod eiusmodi ætas non censeatur sufficiens ad ordinem iudicarium intelligendum, argum. c. vlt. de iudic. in 6. Vide Suar. disp. 5. de cens. sect. 1. num. 19.

7 Præterea irregularitatem incurrit impubes, qui septennij ætatem consecutus, & doli capax voluntarium homicidium committit, sicuti colligitur ex Clemen. si furiosus, de homic. & docet Syl. ver. homicidium, 3. q. 2. dicto 3. Sanch. cit. c. 12. num. 8. Auila p. 7. de censuris, disp. 6. f. 1. dub. 13. Dixi autem qui septennij ætatem consecutus, contra Abb. in c. 1. de delictis puerorum, Couar. p. 3. Clem. n. 5. §. de infante, Eman. Rodriq. p. 1. summa. de irregul. cap. 176. concl. 1. arbitantes, etiam ante septennium irregularitatem incurri, si malitia ætatem suppleat, ut puer mortaliter peccare possit. Sed contrarium videtur verum, quod docet Henric. lib. 14. c. 3. num. 4. lit. Z. Auila l. c. conclus. 1. Nam in Clementina expressè excipitur infans: quod cum sit beneficium siue fauor legis absque præiudicio tertij, latè interpretari debet: ut omnem comprehendat infantem, id est, hominem, qui necdum septennij ætatem exegit, licet rationis vsum consecutus sit: propterea quod non solus rationis defectus, sed etiam ipsa ætatis teneritudo & imperfectio ad eiusmodi exceptionis beneficium infantibus tribuendum, legislatorem impellere potuerit. Accedit, quod irregularitas non incurritur, nisi iure expresso: quod autem infans, si doli capax homicidium committat, irregularis fiat, nullo iure expressum est.

## CAP. XI.

Ytrum ciues, vel Diocesani obligentur legibus territorij proprii, dum absentes sunt?

## SUMMARIUM.

- 1 Leges territorij non obligant ciues absentes, seu peregrinantes. Preceptum & sententia proximè in personam tendit: lex verò locum seu territorium afficit.
- 2 Prelati Regularium, cum iurisdictionem in suos habeant non ratione territorij, sed ratione obligationis personalis: illos tum preceptis, tum statutis vbiq; terrarum obligare possunt.
- 3 Statutum obligare potest subditos absentes, si principaliter latum sit in causa pertinente ad ipsum territorium statuentis.
- 4 Peregrini, dum per regnum Castella transeunt, possunt incolatum more intestinis animalium vesci in die sabbathi.
- 5 Locus intra diœcesin exemptus aequiparatur loco sito extra diœcesin.
- 6 Incola ciuitatis, in qua dies festus celebratur, si manè egressurus & peruenturus sit ad oppidum, vbi non celebratur, debeq; tamen prius Missam audire.
- 7 Discessurus ex loco, vbi ieiunium non seruatur, potest ibidem vesci, etiam carnibus; etsi eodem die peruenturus sit ad proprium territorium, vbi lex ieiunij obligat: Et potest domisterum comedere: quamuis à carnibus abstinere teneatur. Qui noctu peruenit ad locum, vbi non ieiunatur, potest ibi carnibus vesci, etsi in proprio territorio, unde illo die exierat, lex ieiunij obliget: Quare antequam talis manè exiit, poterat prandere: sed non carnes comedere. Verum in his videtur esse habenda ratio temporis posterioris, secundum quod ex loco in locum proficiscens, commoraturus est.
- 8 Qui ex Episcopatu, in quo vetus Calendarium obseruatur, quadagesima tempore venit ad aliam diœcesin, quando ieiunium ferme absolutum est: non tenetur amplius, quam illi quibus cum viuit, ieiunium prorogare.
- 9 Operarij ex locis Catholicis egredi non possunt ad loca hæreticorum, in quibus ob diuersitatem Calendarij festa non seruantur.
- 10 Si sponsi sine iusta causa, adeoque in fraudem legis, egrediantur ad contrahendum matrimonium sine Parocho & testibus, in loco vbi Tridentina constitutio recepta non est: peccant quidem, sed matrimonium validum esse videtur.

Q Væstio hæc locum habet, si leges proprii territorij non obligent in alieno territorio, in quo peregrinus pro tempore versatur. Nam si leges vtroque loco vigeant, certum est peregrinum ijs obligari: quod nulla tunc causa adsit ipsum excusans, sicut notauit Suarez tom. 1. de relig. lib. 2. de festis, cap. 14. num. 15. Sanchez lib. 1. moral. c. 12. num. 20. qui tamen rectè excipit cum Lessio lib. 4. de iust. c. 2. dub. 7. num. 52. Nisi quis legem vtriq; loco communem, v. g. quadagesimalis ieiunij, aliquis festi, aut Vigiliæ in vno territorio suo, vel alieno expleuisset; & postea ad aliud territorium perueniat, in quo ob Calendarij diuersitatem, quadagesima nondum peracta, Vigilia vel festum necdum celebratum est, hic non tenetur iterum ieiunare aut festum obseruare: quando quidem præcepto, quod semel tantum obligat, iam satisfecit.

Assertio. Leges territorij non obligant ciues absentes, seu peregrinantes. Hæc est communior Doctorum sententia, Abbatis in cap. à nobis, 1. num. 11. de sentent. excommunicat. Nauar. c. 23. num. 120. Syl. ver. excommunication. 2. num. 7. Couar. c. alma. p. 1. §. 10. num. 3. Lopes p. 1. instruct. c. 52. §. nec peccant, Lessij l. c. dub. 3. Rebell. p. 2. lib. 2. quæst. 7. sect. 3. Suar. cit. lib. 2. c. 13. & lib. 3. de legib. c. 32. Sanchez lib. 3. de matrim. disp. 18. contra Palud. in 4. q. 15. quæst. 4. a. 3. S. Anton. p. 2. tit. 6. c. 2. §. 2. Sumitur ex c. 2. de Constitut. in 6. vbi dicitur, Statuto Episcopi, quo in omnes qui furtum commiserint, excommunicationis sententia promulgatur; subditi eius, furtum extra diœcesin committentes, minime ligari noscuntur. Ratio est, quia statutum, siue lex, cum stabilem ac perpetuam obligationem habere debeat, immediatè afficere censetur locum seu territorium legis latoris, atque hinc in subditos ibi existentes transire: ad eum modum proportionalem, sicuti infra de locali priuilegio dicturus sum. Quapropter, cum legislator extra proprium territorium iurisdictionem extendere non possit; sequitur, quod eius legibus siue statutis subditi extra territorium existentes, non



non comprehendantur argum. l. ultim. ff. de iurisdictione omnium iudicum, allegata in cit. c. 2. *Extra territorium ius dicenti impunè non paretur, idemque est, si supra iurisdictionem suam velitis dicere.* In eoque differt lex à sententia & præcepto: quia hæc proximè in personas subditas tendunt, earumque offibus coherent, quocunque territorium discesserint, sicuti docet Vgolinus de censur. tab. 1. c. 9. §. 4. Suárez tom. 5. de censur. disput. 5. sect. 5. num. 14.

2 Corollarium. prælati Ordinum regularium, quibus iurisdictione in suos competit, non ratione territorij, sed per se, ratione, personalis obligationis ex obedientiæ voto, eos tum præceptis ac sententijs, tum statutis, vbiunque territorium existentes obligare possunt: quin etiam eosdem in alieno territorio citare, excommunicare, fugitivos propria autoritate capere. Ita docet Sylvest. verb. excommunicat. 2. numer. 15. rationem afferens, *quia totus mundus est eis* (Prælati regularibus) *pro territorio.*

3 Porro assertio suprà posita imprimis limitari debet. Nisi statutum præcipue respiciat rem in territorio sitam: vel ipsius territorij commodum: tunc obligare etiam potest subditos absentes, sicuti constat ex c. ex turæ, de Clericis non residentibus, & docet Abb. c. postulasti, num. 9. de foro compet. Syl. l. cit. num. 8. casu tertio, Covarruu. cit. num. 3. Nauar. c. 27. num. 6. Auila de censur. p. 3. c. 3. disput. 2. dub. 2. Suar. disput. 5. sect. 4. num. 8. Sairus lib. 1. thesauri, c. 6. num. 41. Veluti, si statutum sit, vt omnes Clerici certo anni tempore veniant ad Synodum: vel Canonici ad Capitulum: *Qui enim absenti non facit, quod facere deberet, videtur facere aduersus eam, quam non facit,* argum. regul. 163. ff. Sic etiam valet statutum: iusta de causa prohibens incolis, ne adeant prouinciam peste infectam: ne extra proprium territorium mercaturam exercent.

4 Præterea assertio extendi debet primò: Vt locum habeat non tantum in legibus alicuius territorij proprijs, sed etiam communibus: si ea in loco, vbi aliquis peregrinatur vel hospitatur, non vigeant, sicuti docet Suar. lib. 2. de festis, c. 14. in fine, Sanchez lib. 1. moral. c. 12. num. 28. Est enim tunc quasi priuilegium locale, quo omnes frui possunt, qui in eo loco versantur. Exemplum habes: Si in aliqua diocesi contra communem Ecclesiæ legem non ieiunetur in Vigilia alicuius Apostoli: vel quatuor primis diebus Quadragesimæ, (qualis consuetudo Mediolani est) poterit peregrinus se conformare, teste Lessio cit. c. 2. dub. 8. num. 59. & consentit S. August. epist. 118. ad Ianuar. & refertur. in c. illa, de 12. Similiter peregrinos, dum v. g. per regionem Castellæ transeunt, posse incolarum more diebus Sabbathinis extima & intestina animalium comedere: etsi id communi Ecclesiastica lege prohibitum sit, docet Nau. c. 23. n. 120. Less. n. 55. Sanch. l. 3. de matrim. disp. 18. n. 19. Covar. 4. resol. c. 20. n. 8. Itemque Hispanos, apud quos ius commune Tridentini Concilij viget, posse in alia regione vbi id receptum non est, inire matrimonium sine Parocho & testibus, docet Petrus de Ledesma de matrim. q. 45. a. 5. dub. vlt. Rebell. p. 2. lib. 2. de matrim. q. 7. l. 3. num. 15. Sanch. cit. disp. 18. num. 7. & cit. cap. 12. num. 28.

Secundò extendi debet assertio; Vt locum etiam habeat, si in duabus eiusdem ciuitatis Parochijs non eadem lex siue consuetudo vigeat: Tunc enim Parochianus ex sua parochia, in qua ieiunium v. g. aut festum obseruatur, conferens se in alteram parochiam, vbi id non seruatur, ibi ieiunare, vel operibus seruilibus abstinere non cogitur, sicuti docet Suárez cit. cap. 13. num. 6. Less. cit. num. 55. Sanchez cit. c. 12. num. 24.

5 Tertiò extenditur: Vt statutum diocesani non tantum cesset obligare subditos commorantes extra diocesim: sed etiam intra diocesim in loco exempto. Quia locus

exemptus, in ordine ad iurisdictionem Episcopi, à quo exemptus est, æquiparatur loco sito extra diocesim, sicuti ex communi docet Syl. ver. excommun. 2. num. 12. Armilla eod. ver. num. 30. Auila p. 2. cap. 3. disput. 2. dub. 5. argum. c. cum Episcopus, de offic. ordin. in 6. & c. 1. de priuilegiis in 6. iunct. Glos. ver. nunquid ergo. Quare si Episcopus statutum ferat, sub excommunicationis pœna, aliæ censuræ, ne quis Clericorum aleis ludat: non ea ligantur Clerici ludentes in loco exempto, teste Syl. ibid. Idem Suar. docet tom. 5. disput. 5. sect. 4. num. 6. sed excipit Monasteria Regularium exempta: intra quæ, si Episcoporum, subditi Episcopalia statuta violent, absque dubio eorum censuram incurrere arbitrat. Sed hæc exceptionem apud alios non legi: Contrarium verò docet Henriquez lib. 13. cap. 26. §. 2. & indicat. Syl. num. 13. quando proposita questione: Si Episcopus generale statutum ferat sub excommunicationis pœna, ne aliquis virorum ingrediatur monasteria monialium: vtrum hæc censuram incurrat, qui ingreditur monasterium exemptum? Respondet non incurrere: Si tamen Episcopus in utilitatem subditorum, adeoque ex causa pertinente ad Ecclesiam, cui Clerici subiiciuntur, expressè prohibeat, ne quis monasterium exemptum ingrediatur, valere ait statutum eoque ligari subditos: non minus, quam si ciuilis Magistratus statutum condant in ciuitatis commodum, ne quis ciuium in alienam terram ingrediatur, iuxta doctrinam Abb. in c. postulasti, num. 10. de foro compet. Covar. supra cit. n. 3.

Præterea, pro eadem illa assertione quadam obseruanda sunt: Primum, Communior est DD. sententia, Nau. cap. 13. num. 5. Lopez p. 1. c. 52. Sa ver. festum, num. 8. Suar. lib. 2. de festis, cap. 15. n. 9. Incolam ciuitatis, in qua festus dies est, si manè egressurus & peruenturus sit ad oppidum, in quo festum non celebratur, ideoque ibi opera seruilia exercere licitè possit; tamen obligatum esse ad Missam audiendam, antequam egrediatur. Ratio est, quia præceptum affirmatiuum audiendæ Missæ tenetur aliquis quam primum implere, si postea impleturus non sit; sicuti qui præuidet, se postea ab audienda Missa impeditum iri, statim audire debet, si possit. Oppositum tamen docet Sanchez lib. 3. de matrim. 18. num. 21. & lib. 1. moral. c. 12. n. 31. & valde probabile iudicat Less. cit. dubio. 8. n. 56. Talem incolam non obligari ad Missam manè audiendam, si ante meridiem peruenturus sit ad locum, vbi festum non celebratur. Quia in proprio oppido poterat Missæ auditionem differre vsque ad horam diei quartam vel quintam, quo tempore, vt supponimus, in altero oppido existens à præcepto Missæ audiendæ liber est. Ad rationem contrariæ sententiæ respondet Sanchez, aliam rationem esse, si quis præuideat, se ab executione præcepti (quo obligatus manet) ob aliquam causam postea impeditum & excusatum iri; aliam verò, si quis præuideat se præcepti obligatione penitus exoluendum fore. Si enim debitor sit mille aureorum, præfixa ipsi mora vnius anni ad soluendum; qui intelligat, se post primum anni mensem soluere deinceps nunquam posse, quia v. g. in longinquas terras discessurus & non reuersurus est, is tenetur anticipare, & primo statim mense soluere: Si autem debitor iste intelligeret, se postea intra præfixum anni spatium debito omnino liberatum iri non teneretur statim primo mense soluere. Sed defendendo communem, magisque tutam sententiam, respondeo hanc esse mentem Ecclesiasticorum Legislatorum: quod incola die festo Missam audire teneatur, si per tale temporis spatium in oppido existant, vt commodè audire possint: quare ad id etiam ab Episcopis & Parochijs iure optimò compelluntur.

Alterum. Manè discessurus ex loco vbi ieiunium non seruatur, potest (secundum doctrinam Sanchez lib. 3. de matrim. disp. 18. num. 22. & lib. 1. moral. c. 12. n. 55. Less.



lib. 4. cap. 2. dub. 8. n. 57.) ibidem vesci etiam carnibus; etsi eo die peruenturus sit in proprium territorium, vbi ieiunium seruatur: & potest domi iterum comedere; quamuis à carnibus abstinere teneatur. Iterum; Qui noctu peruenit ad locum vbi non ieiunatur, potest ibidem carnibus vesci; etsi in proprio territorio, vnde illo die exierat, lex ieiunij obliget: Quamobrem antequam manè exeat ex proprio territorio, in quo ieiunatur, si certus sit se eo die peruenturum ad locum, vbi ieiunium non seruatur, poterit ibi ientare, vel prandere; sed non carnes comedere. Ratio discriminis est: Quia præceptum siue obligatio carnibus abstinendi diuidua est; adeò vt, tametsi vna diei parte, iusta, vel iniusta de causa, abstinentioniam non serues, nihilominus alia diei parte seruare debes, vbi præceptum obligat. Quemadmodum etiam videre est in obseruatione festi abstinendo ab operibus seruilibus: Si enim in oppido tuo festum celebratur, laborare non potes, dum ibi moraris, cum primùm verò egressus es ad locum, vbi eius diei festum non celebratur, seruilibus operibus insistere potes. At verò præceptum & obligatio ieiunij indiuidua est, vt qui his in die reficitur iusta vel iniusta de causa, is ieiunij lege soluat, propterea quòd formam Ecclesiastici ieiunij tali modo seruare non possit. Cum igitur incola ille (de quo supra dictum fuit) ex suo oppido abiturus, præuideat noctu sibi licitam fore carnibus vesci, & quidem non semel tantum, sed iteratò, non tenebitur manè ad ieiunium seruandum: cum tali modo seruare non possit. Hæc omnia Sanchez & Less. ll. cc. non omnino improbabiler. Ego verò existimo in hoc casu habendam esse rationem temporis potioris, vt secundum illud incola, existens in loco suo vbi ieiunatur, vel in alio vbi non ieiunatur, & ipse obligatus, vel liberatus censeatur: quando quidem in moralibus receptum est, vt quod maius ac potius est, trahat ad se id quod minus est. Exempli causa: Si manè hora prima diei egressurus es ex oppido, vbi ieiunium non seruatur, & altera vel tertia hora peruenturus ad oppidum tuum, vbi ieiunium seruatur; puto, malè te fecisse, si circa auroram ientaculum sumpisti, præsertim cum carnibus. Alia verò ratio est, si post meridiem egressurus es; potes enim ibi & ientaculum sumere, & prandere; consequenter ieiunio solutus es: quamuis à carnibus in tuo oppido noctu nihilominus abstinere debeas. Similiter si in proprio tuo territorio, vbi lex ieiunij obligat, maiore diei parte commoraturus es, non arbitror tibi licitum esse ientaculum sumere, aut repetita refectioe ieiunium violare, propterea solùm, quòd noctu peruenturus sis ad locum vbi non ieiunatur; quia potior ratio habenda est principalis, quàm secundarij. Secus autem est, si manè ex oppido egressus vbi ieiunium seruatur, statim peruenies ad locum vbi eo die non ieiunatur; tunc potes ientaculum manè accipere; sed sine carnibus.

Tertium, Ex eo quòd calendarium notum, iussu Gregorij XIII. editum, in quibusdam Catholicorum diocæsisibus adhuc hodie receptum non est, fieri posse videtur, vt aliquis iustam proficiscendi causam habens, communibus etiam Ecclesiasticis legibus festorum, ieiuniorum &c. liberetur, sicuti docet Sanchez lib. 1. moral. cap. 12. num. 30. Less. lib. 4. cap. 2. dub. 8. num. 59. Exempli causa; Si aliquis ex Vallesia, vbi antiquum calendarium retinetur, circa Bacchanalia proficiscatur Constantiam, fieri potest, vt ieiunio quadragesimæ maiore ex parte ibi transacto, non nisi duas v. g. hebdomadas ieiunare teneatur. Itémque fieri potest, vt aliquis ex Vallesia profectus, antequam obseruatio ieiunij, aut festi alicuius secundum vetus calendarium incidit, Constantiam perueniat, posteaquam festum illud, vel ieiunium transactum est. Sed contra id esse videtur, quòd lex communis Ecclesiastica, quæ in omnibus particularibus Ecclesiis obseruatur (cuiusmodi imprimis est quadragesimale ieiunium) videatur afficere personas hoc ipso, quòd sint mēbra Ecclesiæ vniuersalis: quare Lessius lib. 4. cap. 2. dub.

8. num. 59. quæstionem hanc vtrinque disputat; ac denique concludit, in praxi præferendam esse sententiam, quæ ait, saltem quadragesimale ieiunium complendum esse in loco, vbi propter diuersitatem Calendarij iam expletum est; Existimo tamen, sententiam Sanchez probabilem esse ac tutam: cum non videatur esse mens Ecclesiæ) aliquem obligare ad ieiunandum in loco, vbi fideles alij non ieiunant: siquidem id commodè plerumque fieri non potest, & valde expedit, Ecclesiæ cuiusque morem vniformiter à fidelibus obseruari.

Loquor autem solùm de Ecclesijs ac diocæsisibus Catholicorum. Nam alia ratio est, si peregrinus Catholicus in terras hæreticorum veniat: Huic enim arbitror ieiunia, & festa obseruanda esse secundum Calendarium nouum, atque suæ diocæsis, Romanæque Ecclesiæ consuetudinem, si commodè ita seruare possit. Ratio est, quòd in contemptum Ecclesiæ Catholicæ cedere videatur, atque scandali occasionem præbeat, si peregrinus Catholicus, posthabito propriæ Ecclesiæ legitimo more, in obseruationibus Ecclesiasticis se conformet illegitimæ consuetudini, ab hæreticis pertinaciter retentæ ac defensæ, sicuti bene notat Rebel. lib. 1. de præludijs iustitiæ, quæst. 5. num. 14. Incolas tamen Catholicos, qui in hæreticorum terris v. g. Vlmæ, aut Colmarie versantur, arbitror posse ex quadam æquitate, & præsumpto consensu Catholicorum Præsulum, ad communem pacem seruandam, festa & ieiunia celebrare secundum calendarium vetus: quibus deinde etiam peregrini Catholici, dum inter eos morantur, se conformare poterunt.

Corollarium. Mechanici & operarij ex locis Catholicis egredi non possunt diebus festis ad laborandum in locis vicinis hæreticorum, vbi ob diuersitatem calendarij festa non seruantur: nisi Episcopus hac in re expressè vel tacitè cum ipsis dispenset; dummodo causa dispensandi adsit, & scandalum cesset.

Secundò, dixi necesse esse, vt aliquis iustam causam proficiscendi abeat in locum, vbi lex non obseruatur, sicuti docet Saitus in clani regia lib. 7. cap. 3. num. 12. Petrus de Ledesma de matrim. quæst. 45. a 5. dub. vlt. Rebel. p. 2. lib. 2. de matrim. quæst. 7. f. 3. qui agentes de matrimonio aiunt, illud inualidum fore, si sponsi in fraudem Trident. Concilij, requirentis Parochum, & testes, adeant hæreticorum, vel etiam Catholicorum loca, in quibus Tridentinum Concilium non est receptum. Contrariam sententiam tueretur Sanch. lib. 3. de matrim. disp. 18. num. 29. & lib. 1. moral. cap. 12. num. 35. Suarez lib. 2. de festis, cap. 13. num. 6. Nam nullus videtur doloscere qui iure suo vitatur, reg. 55. ff. Incola autem non cogitur consistere in suo territorio; sed habet ius egrediendi: postquam autem egressus est in locum, vbi lex non obligat, absoluitur eius vinculo. Sed responderi potest, leges Ecclesiasticas, quæ in diocæsisibus ad subditorum spirituales utilitates promulgantur, talem conditionem annexam habere, quam fidelium persuasio & Ordinariorum praxis ostendit, vt subditis, sine iusta causa, earum obligationem subterfugere non sit licitum: quamobrem tales puniri solent, qui festis diebus ex suo oppido ob eam solùm causam discedunt, ne festa obseruare cogantur. Sicut etiam communis est Doctorum sententia apud Sanch. lib. 1. moral. cap. 15. illos qui festo, aut ieiunij die absque causa iusta iter instituunt, non liberari aut excusari à præcepto ieiunandi, vel Missam audiendi, quamuis excusarentur, si iustam proficiscendi causam haberent.

Quòd tamen ad matrimonium attinet, probabile est subditos egredientes ad celebrandum in loco alieno, vbi Trident. Constitutio recepta non est, tametsi fortasse peccent, nihilominus valide contrahere absque Parocho & testibus, vti Sanchez docet cit. num. 29. Est enim hoc speciale in matrimonio, quòd sit ex numero contractuum, quibus id proprium est, vt regulari debeant secundum leges



leges ac consuetudines locorum vbi celebrantur, sicuti DD. docent in cap. vlt. de foro compet. & notat in hoc casu Ioan. Chapeauille de modo ministrandi sacramenta tempore pestis, cap. vlt. quæst. 16.

## CAP. XII.

Vtrum aduenæ & peregrini teneantur legibus locorum, in quibus pro tempore versantur; quamuis in proprio ipsorum territorio non obligentur?

## S V M M A R I V M.

1. *Aduena, si causa inhabitandi ad tempus longum venerint, vel quasi domicilium figant in oppido alieno, omnibus eius legibus obligantur.*
2. *Princeps non obligatur statutis municipalibus ciuitatis aut prouincie ad quam aduenit, quamuis longo tempore moraturus, sicuti nec Legatus in prouincia diocesalibus legibus astringitur.*
3. *Aduena & peregrini, licet in loco diu moraturum non sint obligantur tamen legibus communibus, quæ in ipsorum patria specialis privilegio, vel consuetudine non obseruantur.*
4. *Aduena, dum in aliena terra hospitatur, non obligantur legibus & consuetudinibus eius loci proprii.*
5. *Contractus, & testamenta interpretationem & Valorem accipiunt secundum leges loci, in quo fiunt.*
6. *Sacerdos græcus transiens per Ecclesiam latinam potest in azy-mo consecrare, vel in fermentato, sicuti maluerit.*
7. *Probabile est quod neque vagabundi obligantur legibus & consuetudinibus proprijs locorum, in quibus hospitantur. Nemo sortitur forum, nisi ratione domicilij, aut habitationis vel ratione delicti, vel ratione contractus, vel ratione rei seu possessionis sita in territorio: vel denique interdum ratione originis.*

**V**ariæ sunt de hac quæstione DD. sententiæ, sicuti videre est apud Sanch. lib. 3. de matrim. disp. 18. quæ. 1. Suar. lib. 2. de festis, cap. 14. Nostra sit assertio prima. Aduenæ qui non solum transeunt, neque tantum hospitandi gratia adsunt; sed animo inhabitandi ad tempus longum, idcircoque quasi domicilium figunt in alieno oppido, omnibus eius legibus & consuetudinibus obligantur. Est communis sententia Palud. in 4. d. 15. quæst. 4. a. 3. S. Anton. par. 2. tit. 6. cap. 2. §. 2. Syl. ver. ieiunium, q. 2. dicto 2. Rosellæ eod. num. 16. Medina 1. 2. n. 96. a. 5. Suar. l. c. n. 5. & lib. 3. de legibus, cap. 33. num. 3. Sanchez l. c. num. 9. contra Glossam in c. quæ contra, d. 8. ver. aut peregrini. Ratio est; Quia tales eius loci forum sortiuntur, id est, iurisdictioni subiiciuntur tum Ecclesiasticæ, tum ciuili, sicuti dicam. 5. de sacram. Pœn. c. 10. n. 3. Ergo etiam astringuntur legibus.

Quæres. Quanto tempore in oppido manendi propositum requiratur, ut aliquis non hospes, sed loci habitator censeatur? Sanchez cit. num. 9. cum Syl. ver. domicilium, num. 2. arbitratur, opus esse ut maiore anni parte inhabitare velit. Sed magis placet doctrina Nauar. tract. de iubilæo, notabili 32. ver. incolæ, numero 43. non tantum eos, qui tempore, quod prudentis viri arbitrio magnum secundum se videri potest, videl. amplius medium annum in oppido moraturi sunt, (v.g. scholares in academijs) incolas censeret & iurisdictioni subiectos; sed etiam eos, qui licet aliquantulum breuiore tempore, certo permanendi proposito, alicuius negotij, vel negotiationis causa in eo loco domicilium, officinam, vel tabernam fixerunt, aut saltem conduxerunt, arg. l. hæres absens, §. proinde. ff. de iudicijs.

Porro à tradita assertione Tiraquellus de vtroque tract. libro 1. Glossa 1. §. 3. numero 38. Suarez libro 3. de legibus cap. 35. num. 14. & alij, excipiunt legislato-

rem Principem, qui non obligatur statutis municipalibus locorum, vel Prouinciarum, dum in ijs etiam longiore tempore moratur. Ratio est: Quia eiusmodi leges ab inferiore potestate latæ sunt, ut vix nullam habeant erga superiorem Principem. Quam ob causam etiam Canonistæ dicunt, Legatum in prouincia non obligari legibus Episcoporum diocesalibus. Neque refert, etsi municipales illæ leges à Principe confirmatæ sint: censetur enim eas tantum approbare pro determinato loco, eiusque subditis; non pro tota Republ. cuius ipse caput est: nisi in eodem loco fixam sedem habeat.

Assertio II. Aduenæ & peregrini, licet in loco moraturi non sint, sed tantum hospitaturi, vel transitori, obligantur tamen communibus legibus & consuetudinibus, quæ in ipsorum patria non obseruantur. Hæc videtur esse communis sententia, quæ expressè docet Med. 1. 2. q. 96. ar. 5. §. dubitatur præterea, Henriquez libro 7. c. 13. n. 8. Suar. citato capite 14. numero 27. Exemplum, Cuius Mediolanensis profectus ad limina Apostolorum, peccat si Romæ primis quatuor diebus quadragesimæ carnes comedat; etsi in patria sua id ipsi licitum sit. Item Castellanus peccat, si, dum per alienas regiones peregrinatur, diebus sabbathi extremitates, vel intestina pecudum comedat, sicuti etiam docet Nauar. cap. 23. numero 120. Nam leges istæ Ecclesiasticæ omnes Christianos obligant, nisi speciali privilegio aut iure eximantur: Specialis autem illa consuetudo Mediolani v.g. vescendi carnibus primis quadragesimæ diebus, est veluti privilegium locale: quo proinde ciues Mediolanenses frui non possunt, dum absentes sunt. Cumque tales consuetudines à iure communi exorbitent; non debent facile extendi: sed potius tanquam odiosæ restringi. Quamuis contrarium non omnino improbabiler doceat Sanchez citato quæstione 1. numero 7. quia ciues, inquit; dum absentes sunt, sed mox in patriam redituri, per fictionem iuris pro præsentibus habentur.

Assertio III. Aduenæ & peregrini, dum in aliena terra non inhabitandi, sed tantum hospitandi causa adsunt, non obligantur legibus & consuetudinibus eius loci proprijs, ac specialibus; v.g. peregrinus veniens Augustam die 5. Valsicri, qui eo loco festus est, non tenetur (per se loquendo, & scandalo cessante) Missam audire, & à seruilibus operibus abstinere, licet totum diem ibi mansurus sit. Hæc assertio est ad mentem Glossæ in cap. illa d. 12. ver. veneris, Palud. Antonini, Syluestri, Rosell. Bartol. Medina 1. c. Ioannis Medina Cod. de ieiunio quæstione 10. Quando necesse est ieiunare. Angles in florib. de ieiunio, quæst. 4. post princ. diff. c. 2. Azor. 1. libro 5. cap. 11. quæst. 3. §. Est tamen aduertendum, Sanchez cit. disputat. 18. n. 6. & libro 1. moral. cap. 12. num. 8. Agid. Conink 3. p. tom. 1. quæst. 74. art. 4. dubium 2. Sairi in clauis regia libro 3. cap. 4. numero 15. Auilæ parte 2. de censur. cap. 3. disputatione 2. dubium 3. concl. 3. §. circa corollarium. Ratio est: Quia ad obligandum aliquem legibus requiritur iurisdictionis: sed peregrini ob breuem hospitij moram non subiiciuntur iurisdictioni, seu non acquirunt forum, sicuti constat ex lib. hæres autem, supra citata. Ergo non obligantur eius loci legibus.

Contrariam sententiam defendunt Nau. c. 13. n. 5. & ca. 23. n. 120. Couar. var. resol. c. 20. n. 8. Abbas in c. consiliu, de obseruat. ieiunij, Rodrig. 1. 1. Sum. c. 122. concl. 1. Philarch. 1. 1. de off. sacer. p. 2. l. 3. c. 23. notando tertio, Less. lib. 4. c. 2. dub. 7. n. 50. Sa ver. ieiunium, n. 1. Salas disp. 14. de legib. sess. 4. n. 41. §. alia opinio, Suarez lib. 2. de festis, c. 14. & lib. 3. de legib. cap. 33. Plerique tamen monent, doctrinam suam intelligendam non esse de solo transitu; sed si hospes ad breue tempus, saltem vnus diei mansurus sit, legibus loci proprijs obligari: idque probant primò autoritate S. Ambr. apud S. Augustinum in Ep. 18 ad Ianuarium, & refertur in c. illa, d. 20. Cum Romam venio, Sabbathum ieiuno: cum Mediolanum, non ieiuno: sic & 14. ad



quamcumque Ecclesiam veneris, eius morem serua: si cuiquā non vis esse scandalo, nec quemquam tibi. Similia habet S. August. Ep. 119. & lib. 2. confess. c. 8. & refertur d. 8. cap. quæ contra, item in libro 3. de doctrina Christiana. ca. 12. & refertur c. quisquis, d. 41. vbi Glossa ait ver. viuit nota, quod quilibet conformabit se socijs suis in cibis, & in moribus: & altera Gl. in cit. c. alla, hinc verum ortum esse inquit.

*Sifueris Roma, Romano viuito more:*

*Et si sis alibi: viuito sicut ibi.*

Probant II. Nam gentium iure, ac Christiani populi, maximè Prelatorum consensu introductum, vsuque firmatum esse videtur, ad pacem cuiusque territorij tuendam, vt Magistratus suis legibus etiā aduenas & peregrinos constringere, & eorum transgressiones punire possit.

III. Leges cuiusque territorij locales sunt, quæ immediatè locum afficiunt, & inde transeunt in personas ibi existentes: ergo etiam afficiunt peregrinos, dum ibi manent.

IV. Qui sentit commodū, sentire debet & onus, iuxta reg. 55. in 6. Peregrinus autē, dum absens est, quamuis modico tempore, soluitur legibus & consuetudinibus patriæ: ergo æquum est eundem legibus & consuetudinibus alienæ terræ ligari.

V. Certum est, peregrinos obligari quibusdā legibus, & consuetudinibus ciuitatum, aut locorū, in quibus hospitatur, vel transeunt: cuiusmodi sunt, v. g. Ne quis nocturna arma ferat: Ne triticum efferat: Ne viator amplius triduum in oppido commoretur. Item in contractibus cuiusque loci leges & consuetudines seruandæ sunt etiam à peregrinis, sicut constat ex l. 6. ff. de euictionibus, &c. vlt. de foro compet. in quo dicitur, quemuis forum sortiri ratione contractus, docentque DD. communiter apud Sanchez cit. disp. 18. n. 10.

Exinde inferunt Syl. ver. contractus, q. 8. Molina to. 2. tr. 2. disp. 260. in princ. contractum absolute initum, interpretandum esse secundum consuetudinem & statuta loci, in quo institutus fuit. Secundò infert Andr. Gaill. lib. 2. obseruat. 123. Nicol. Euer. lib. 2. conf. 28. num. 76. cum Bartolo in l. 1. C. d. sum Trinit. & communi DD. sententia; Testamentum conditum, etiam à peregrino, in loco vbi minor iuris solemnitas requiritur, validum pronuntiandum esse quo ad omnia bona, etsi sita sint in locis, quibus maior testamenti solemnitas exigitur. Et Vasq. in moral. de testament. §. 2. dub. 1. cum Antonio Gomez ait: Quòd condens testamentum teneatur obseruare solemnitates loci, in quo tunc versatur: si statutum absolute & vniuersim talem testandi formam requirat, & non solum à subditis seu incolis. Quamuis his contrarium sentiat Adr. Fachinæus lib. 5. controuer. iuris, cap. 90. & 91. Excipiendus verò hinc est contractus dotis, qui celebrandus est secundum leges loci, vbi vir domicilium habet, sicuti constat ex leg. exigere, ff. de iudijs. Denique ex his apparet ratio constitut. Innoc. IV. in cap. volentes, de priuileg. in 6. confirmatæ in Trident. sess. 7. cap. 7. de reformat. Quòd Ordinarius contra exemptos procedere possit ratione delicti, vel contractus extra loca exempta factorum, vel ratione rei extra illa sitæ. Quamuis rectè notat Nau. comment. 2. de regul. num. 63. rarò hodie huic constitutioni locum esse in ordine ad Religiosos exemptos, propter specialia eorum priuilegia.

Ad I. respondeo: Vel Ambrosium & Augustinum consilium asserre, non præceptum, vel obligationem eos præcepti agnoscere ob periculum scandali: non enim omnes, qui vident hominem non seruantem ieiunia, sciunt peregrinum esse: hoc verò scandalum sæpe vitari potest: vel eos loqui de peregrinis, qui non mox abituri sunt: sed habitandi gratia accesserunt: vel denique loqui de legibus communibus, non proprijs alicuius loci.

Ad II. Resp. Totum id quòd assumitur negari posse: Non enim iure gentium, & populorum consensu introductum censeretur debet, quod à multis Doctoribus non agnoscitur: quorum proinde sententiam quisque sequi potest. Neque refert si dicas, quosdam Episcopos & Prælatos punire solitos peregrinum non obseruantem festa vel ieiunia suæ diocesis propria: Vel enim id faciunt, quia sequuntur sententiam probabilem; imò quæ à Suarezio & alijs tanquam certa asseritur: vel quia peregrini re vera interdum in ea re delinquant ratione scandali; ideòque forum sortiuntur, seu iurisdictioni subijciuntur ratione delicti ibi commissi, iuxta capite 1. de Raptor. iun. Glor.

Ad III. resp. leges locales esse, id est, locum afficere, indeque transire in habitantes, qui iurisdictioni eius loci subiecti sunt, non autem in alienigenas ac peregrinos.

Ad IV. Regulam illam locum habere, cum onus ex propria institutione annexum est commodo, sicuti videre est in Ecclesiasticis beneficijs, institutione heredis, &c. Non item, cum onus & commodum connexa non sunt, sed disparata, sicuti in proposito euenit. Nam, exempli causa, ipsemet Suarez fatebitur, si Vallesianus circa quinquagesimam veteris calendarij Romam veniat, vbi quadragesima maiore sui parte peracta sit, posse illum se incolis accommodare, & in Paschate carnibus vesci: Contrà verò, si Romanus, expleto ferme quadragesimalis ieiunij tempore, in Vallesiam veniat, vbi quadragesima paulò antè capta sit, non tenetur se incolis conformare, cessante scandalo; sed potest in Paschate secundum nouum calendarium carnes comedere: Ergo locum non habet regula, Qui sentit commodum, sentire debet & onus.

Ad V. resp. A tertia nostra assertionè excipiendas esse eas leges, quæ specialiter ferantur ob bonum & vtilitatem talis Reipubl. vel ob pacificam communicationē cū incolis. Eiusmodi enim leges peregrini quoque seruare tenentur, sicuti ex Legistarum doctrina bene admonet Sanc. cit. disp. 18. n. 14. Quò etiam pertinent leges contractuū, de quibus obiectio facta est. Porro allegatum cap. vlt. prorsus confirmat nostram sententiam: dicitur enim ibi, quemuis sortiri forum vel ratione domicilij; vel ratione contractus: Vnde à contrario sensu inferre licet, si peregrinus neque domicilium, habitationemue fixit: neque in loco deliquit: neque ibi contraxit: non sortiri forū, adeoque legibus & iurisdictioni subiectum non esse.

Corrollarium ex Suar. p. 3. t. 3. disp. 44. sect. 3. Sanc. cit. disp. 18. n. 20. Sacerdos græcus, transiens per Ecclesiā latinā, huic se conformare potest, & in azymo consecrare; vel, si mālīt, propriæ Ecclesiæ morem retinere. Similiter Sacerdos latinus, transiens per Ecclesiā græcam, vel illi se conformare, & in fermentato sacrificare potest, vel Romanæ Ecclesiæ morem seruare. Ratio est, quia peregrinus legibus & consuetudinibus suæ patriæ proprijs liberatur, dum absens est: verum noque adstringitur alienis eorum locorum, per quæ tantum transit, aut in quibus hospitatur. Cæterum, si inter Latinos existat Ecclesiā græca vt Romæ; tunc latinus Sacerdos in ea consecraturus, Romanæ Ecclesiæ ritus obseruare cogitur; quia Græcis, veluti priuilegium personale concessum est, vt in fermentato ibi sacrificare liceat.

Restat Quæstio de vagis, id est, qui nullibi fixū domiciliū habent, vtrū obligentur legibus & consuetudinibus locorū, per quæ transeunt, vel in quibus hospitantur? Afirmat Sotus in 4. d. 18. q. 4. a. 2. §. Est hinc tamen aduertendum, Sanc. l. 1. moral. c. 12. n. 23. Suar. ci. c. 14. n. 19. Probant ex eo, quia vagabundi à loci Magistratu capi, atque puniri possunt, ob delicta etiam alibi commissā, sicut testatur Julius Clarus l. 5. sent. in practica criminali, q. 39. n. 7. San. l. 3. de matr. disp. 25. n. 5. Ex quo colligi videtur, eos in quouis loco presentia suæ sortiri forū: atq; iurisdictioni ac legibus



gibus subijci tùm secularibus, tùm Ecclesiasticis.

Nihilominus Lessius lib. 4. cap. 2. dub. 7. numero 49. arbitrat, eandem esse rationem vagorum, quæ peregrinorum: vt non obligentur legibus proprijs locorum, in quibus hospitantur, vel transeunt: quia generalis doctrina ex cap. vlt. de foro compet. neminem sortiri forum, nisi vel ratione domicilij, siue habitationis; vel ratione delicti; vel ratione contractus: adde tu, vel ratione rei fide possessionis sitæ in territorio: vel denique interdum ratione originis siue patriæ; de quibus Gl. in cit. l. hæres, ad finem. Vagi autem nullo horum modorum subiecti sunt, vt ponimus: Ergo non sortiuntur forum. Hæc Lessij sententia mihi placet: quare respondeo ad fundamentum prioris sententiæ; per consuetudinem introductum esse, vt etiam vagabundi, cùm proprium iudicem non habeant, puniri possint, vbique reperiuntur: ne eorum crimina omnino impunita maneant. Ex quo tamen non sequitur, eos simpliciter & in omnibus sortiri forum siue iurisdictionem loci, in quo existunt.

## CAP. XIII.

## An, &amp; qua ratione clerici, ciuilibus legibus obligentur.

## SUMMARIVM.

- 1 Clerici obligantur communibus secularium Principum legibus, quæ ad Reipubl. bonam gubernationem pertinent, neque sacris canonibus, aut clericorum statui repugnant.
- 2 Ecclesia reprobatur ea secularium statuta, quibus de rebus, vel personis Ecclesiasticis directe decernitur, præcipiendo & etando, licet Ecclesia fauorem seu patrociniū continere videatur.
- 3 Neque de bonis patrimonialibus Clericorum speciatim aliquid ciuili lege præcipiente, vel prohibente statui potest: secus est, si dispositio ciuilis præceptum non sit: sed permissiua, & priuilegiatiua.
- 4 Clerici delinquentes aduersus ciuilem legem, penam merentur ab Ecclesiastico Magistratu inferendam: siue eandem qua ciuili lege decreta est, siue aliam arbitrariam.
- 5 Leges ciuiles prohibentes, aut infirmantes contractum, obligant Clericos, si penales non sint: secus vero, si penales.
- 6 Clerici ciuilibus legibus nunquam videntur obligari directe & ex virtute ipsarum legum: sed solum indirecte.
- 7 Si in aliqua causa canones nihil decernant, tunc secundum leges proprias regni in foro Ecclesiastico iudicari debet: nisi alia sit Consistorij consuetudo.

**C**ommunis est Doctorum assertio; Quod Clerici secundum vim directiuam obligentur communibus secularium Principum legibus, quæ ad Reipubl. bonam gubernationem ac quietem pertinent; neque sacris canonibus, vel Clericorum statui repugnant: cuiusmodi sunt leges, quibus taxatur pretium frumenti, prohibetur aliquod genus armorum, præscribitur modus ædificandi, testandi, contrahendi. Sic docent Canonistæ in c. Ecclesia, de constitut. & c. 1. de noui operis nuntiatione, legistæ in l. cunctos populos, c. de Sum. Trinit. Summistæ ver. lex, Angelus n. 5. Syl. q. 15. San. 11. Victoria relect. 1. de potest. Eccles. q. vlt. prop. 4. Sotus libro 1. de iust. q. 6. a. 7. Barth. Medina 1. 2. q. 96. a. 5. dub. vlt. Nau. c. 23. n. 88. Bellar. lib. 1. de clericis, c. 28. Vasq. 1. 2. disp. 176. cap. 4. Suarez lib. 3. de leg. cap. 34. & lib. 4. defens. fidei c. 16. Ioan. Salas disp. 14. f. 8. licet contrarium respondisse videatur Nau. lib. 1. consil. 3. de constit. n. 4. §. tertio, edit. Sumitur ex c. 1. c. quoniam, cap. de capitulis, d. 10. c. cùm ad verum, d. 96. & c. 1. de noui operis nuntiat. Ratio est: Quia Clerici in communi vitæ societate degentes, sunt etiam ciues, ac membra Reipubl. Ergo naturali ratione æquum est, eos etiam præstare quæ ad communem Reipubl. gubernationem necessaria sunt. Turpis enim omnis pars est suo vniuerso non congruens, ait S. Aug. 3. confess. c. 8. Confirmatur. Qui

sentit commodum, idem & onus sentire debet, iuxta leg. 55. in 6. Clerici autem communibus Reipubl. commodis ac priuilegijs fruuntur: Ergo par est eos etiam communem cum alijs obligationem suscipere, quæ ipsorum statui, libertati, ac canonicis priuilegijs non repugnat.

Verùm aliqua verba, in communi illa Doctorum assertione posita, explicari debent: Primò enim dixi; Clericos obligari *communibus legibus*, id est, quæ ad totam Communitatem feruntur; boni publici causa: Enimvero Ecclesia non recipit, sed reprobatur eas secularium Principum leges, quæ de Ecclesiasticis bonis, aut personis speciatim decernunt præcipiendo, vetando; tametsi Ecclesiæ fauorem aut patrociniū continere videantur, sicuti habetur expressè in c. 1. d. 96. & c. Ecclesia, de Constitut. Ratio est: Quia eiusmodi legibus prætenditur directe laicorum Principum iurisdicção super Ecclesiastica: ( siquidem leges ferre iurisdictionis actus est ) talis autem vsurpatio potestatis immunitati Ecclesiasticæ repugnat: quare maius Ecclesiasticæ repugnat: quare maius Ecclesiæ præiudicium inferitur, quàm commodum afferri possit, sicuti notauit Angelus ver. lex, n. 5. Suar. cit. c. 34. n. 13. & cit. capite 16. numero 7. & traditur apertè in cit. c. Ecclesia. Ex quo rectè colligit Abb. ibi n. 10. & in c. præsentia, numero 28. de probat. Leges Imperatorias, quales extant v. g. in tit. Cod. de sacrosanctis Ecclesijs, & Auth. eod. tit. nisi canonico iure receptæ & approbatæ sint, nullius roboris esse; tanquam profectas à non habente potestatem.

Deinde colligit idem Abb. in cit. c. Ecclesia, n. 21. dictam doctrinam similiter locum habere in bonis Clericorum patrimonialibus seu proprijs: idque clarè probat Suarez cit. c. 16. n. 12. in hanc sententiam: Non potest lex ciuilis aliquid disponere de bonis Clericorum, nisi obligando Clericos ad eiusdem legis obseruationem: quia bona adherent personæ, ideòque lex disponens circa bona à personis obseruari debet: At verò lex ciuilis non potest speciatim obligare personas Clericorum: Ergo nec de illorum bonis speciatim aliquid disponere, siue præcipere. Vel ita: Lex non fertur sine iurisdictione: nemo autem habet iurisdictionem, siue potestatem disponendi de bonis alicuius, nisi etiam super personam iurisdictione præditus sit: quare cùm laicis potestatibus in personas Ecclesiasticas iurisdicção nulla competat: sequitur neque iurisdictionem & facultatem de illorum bonis disponendi competere posse. Sed limitari id debet: I. Nisi bona seu Clericorum proprio merè reali onere Principi seculari obligata fuerint, antequam ad Ecclesiasticos transirent, sicuti notauit Abb. cit. c. Ecclesia, n. 23. Nam res transit cum onere suo, c. ex litteris, de pignoribus. Item, si cpm tali pacto, vel conditione Ecclesijs, aut Ecclesiasticis personis data sint, vt tamen secularium iurisdictioni, vel exactioni alicui subsint, arg. capite verum, de condit. appo. suis, & dicam de hac re fusius in libro 4. tract. 9. cap. 6. numero 2. II. limitari debet: Si dispositio ciuilis de bonis, vel etiam personis Clericorum non sit præceptiua; sed solum permissiua & priuilegiatiua: vt si statuto caueatur, Clericos primogenitos admittendos esse ad feuda, maioratus; valebit statutum, teste eod. Abb. numero. 26. Cuius rei ratio est, Quia dare priuilegium non est signum superioritatis; cùm etiam non subdito dari possit.

Secundò generatim dixi in assertione; Clericos obligari legibus secularium Principum, in quorū videlicet regnis vel prouincijs degunt. Enimverò, licet summorum Pontificū supra citati canones ferme tantum loquantur de legibus Romanorum Imperatorum; eodem tamen rationes cogunt nos affirmare, etiam aliorum regnorum leges communes ac iustas à Clericis obseruandas esse, quod & consuetudo confirmat, scientibus & approbantibus Ecclesiasticis Prelatis, introducta.

Tertiò dictum fuit; Clericos obligari secundum vim directiuam; non coactiuam. Neque enim incurrunt penam



legibus civilibus decretam, neque à civili Magistratu puniri possunt: sed querela delata ad proprium Ecclesiasticum Iudicem, ab eo Clerici, contra civilem legem delinquentes, pœna condigna affici debent, siue eadem quæ civili lege in laicos constituta est, siue alia arbitraria mitiore, sicuti benedocet Couar. in pract. qq. c. 33. Rodriq. tom. 1. regul. q. 66 a. 2. reg. 8. & 9. Vasquez cit. disp. 176. c. 4. Suarez cit. cap. 34. numero 18. & cit. cap. 16. numero 20.

Corollarium. Leges civiles, quæ infirmant contractum testamentum; vel reddunt personas inhabiles ad contrahendum, testandum, in pœnam commissi criminis ab ipsis, vel maioribus earum: non comprehendunt Clericos, sicuti ex communi notauit Nauar. consil. 43. de constitut. numero 5. edit. 2. Suarez citat. cap. 16. num. 21. Ratio est manifesta: Quia talis lex pœnalis est, & vim coactiuam continet, quæ ad personas Ecclesiasticas se extendere non potest. Alia verò ratio est, si bona fuerint antè commissæ, seu realiter aliquo modo obligata fisco ob crimen, quàm persona Ecclesiastica fieret, sicuti dicam lib. 4. tract. 9. c. 5. numero 2. Et verò leges infirmantes, quæ pœnales nō sunt, sed certam formam siue solennitatem contrahendi, testandi præscribunt, vt aliter actus irritus sit, comprehendunt etiam Clericos, ex generali iuris canonici consensu & approbatione; nisi in illo speciatim aliquid contrarium statutum esse reperiatur, sicuti notauit Suarez cit. c. 16. num. 24.

Denique ex dictis facile est respondere ad quæstionem illam, Vtrum obligatio Clericorum ad seruandas leges civiles, quæ sunt communes ciuium, & sacris canonibus ac statui Ecclesiastico non repugnant, directè proueniat ex potestate legislatrice ciuili; an solùm indirectè? Directam esse obligationem contendunt Victoria, Sotus, Medina, Salas, & alij plures: Quia neque alienum est à ratione naturali, neque iuri diuino aut sacris canonibus repugnat, si summi Pontifices, aliique Ecclesiastici Prælati permittant & consentiant, vt Clerici in temporalibus, vnà cum alijs ciuibus, secularem Magistratum, aut Dominum agnoscant: eiusque legibus, secundum vim directiuam, & quatenus eorum priuilegijs ac statui nihil aduersantur, subiecti sint.

6 Nihilominus contraria sententia longè expeditior ac probabilior est Azorij tom. 1. lib. 5. cap. 12. quæst. 3. Vasq. cit. c. 4. Suar. cit. c. 34. numero 12. & cit. c. 16. numero 14. Bellarmini in Apolog. contra Regem Angliæ, Adami Tanner in disp. de legib. & priuileg. assert. 45. Clericos ciuilibus legibus non obligari directè, seu præcisè ex virtute ipsarum legum, aut potestatis legislatricis ciuilibus: quippe à qua omni iure prorsus exempti sunt, iuxta Lateran. Concil. sub Leone X. sess. 9. in Bulla, quæ incipit, *superna dispositionis*: Cum à iure tam diuino, quàm humano laicis nulla potestas in Ecclesiasticas personas attributa sit. Et Innoc. III. in c. Ecclesia, de constitut. Quod laicis super Ecclesiasticis personis & Ecclesiis nulla sit attributa facultas imperandi. Sed obligari Clericos ciuilibus legibus solùm indirectè: quia id naturalis æquitas postulare videtur, vt initio dixi: cum alioquin communis pax inter ciues difficilè seruari posset: quæ ratio mouit summos Pontifices, aliisque Ecclesiasticos Prælatos, vt eiusmodi iustas Principum leges approbarent, & Clericis omnibus obseruandas præciperent: imò verò etiam vellent secundum eas in foro Ecclesiastico iudicari, vbi canones deficerent, sicuti constat ex c. innotuit, de arbitris, & c. 1. de noui operis nuntiatione: Sicut leges nō dedignantur sacros canones imitari: ita & sacrorum statuta canonum. Principum constitutionibus adiunguntur. vbi id etiam Glossa annotat ver. adiunguntur.

## CAP. XIV.

## De effectu legis, ac præcepti humani, quæ quæ est obligatio.

## S V M M A R I V M.

- 1 *Legislator tum civilis, tum Ecclesiasticus obligare potest subditos in conscientia, siue sub peccato.*
- 2 *Vt lex sub peccato mortali obliget, requiritur & intentio legislatoris: & materia grauitas seu capacitas.*  
*Legislator circa materiam alioquin grauem, potest imponere obligationem leuem, siue sub culpa tantum veniali.*
- 3 *Interdum materia: quæ secundum se leuis, relata ad communitatem & publicam pacem grauis est, atque capax obligationis sub culpa mortali.*
- 4 *Ex verbis, quibus legislator & sui est, colligi debet, qualem obligandi intentionem habuerit.*  
*Inspicienda etiam consuetudo & proborum hominum persuasio, quæ est optima legum interpretis.*
- 5 *Leges positivæ ordinariæ non obligant cum periculo mortis, mutilationis, grauis infamiae, aut bonorum magna iactura.*
- 6 *Interdum etiam humana potestas præcipere, vel prohibere aliquid potest cum periculo mortis, &c. si videlicet ex obseruatione legis, aut præcepti maius Reipubl. commodum speratur: vel ex neglectu maius in commodum timeretur, quàm æstimari debeat priuatum periculum mortis, &c.*
- 7 *Si legis positivæ transgressio censure est in contemptum legislatricis potestatis: aut Fidei, ac Religionis Christiane detrimentum, tunc ipsa etiam naturalis lex obligat ad obseruationem, quamuis cum sit a dispendio.*
- 8 *Censura Ecclesiastica non obligat cum grauisimo periculo.*
- 9 *Sacrificare sine sacris vestibus licitum est ad grauisimum periculum mortis, &c. vitandum: modo id non cedat in contemptum Religionis.*
- 10 *Matrimonium cum impedimento dirimente licite contrahitur ob metum grauem: sed non licite consummatur.*
- 11 *Lex Carthusianorum de carniuum abstinencia semper obligat, excepto casu, si nullo alio cibo, præter carnes, suppetente, lex naturalis dicat, vitam præsentem alimento seruandam esse.*
- 12 *Lex non extendit se ad præterita: sed ad futura.*

**A**SSERTIO I. Legislator tum civilis, tum Ecclesiasticus obligare potest subditos sub culpa mortali, si ita velit, & materie grauitas permittat: etiam in rebus, quæ alioquin iure naturali aut diuino præceptæ, vel prohibita non sunt. Est recepta sententia S. Thomas. 1. 2. quæstione 96. articulo 4. quam explicat Victoria relect. de potest. ciuili, numero 15. Alphons. à Castro libro primo de lege pœnali, capite 4. Valentia tom. 2. disputatione 7. parte 6. contra Gersonem de vita spirituali animæ, libro 4. parte. 3. operum. Ratio est: Quia legitimus Magistratus vtitur potestate à Deo tradita, tanquam minister Dei: ergo non minùs ipsi iusta præcipienti obediri debet, quàm si Deus per se ipsum præcipiat, iuxta illud Sapient. 6. *Andite Reges, &c. quoniam data est à Domino potestas vobis.* Et 1. Regum 8. *Non te abiecerunt (ait Dominus ad Samuelem) sed me.* Quam etiam rationem Apostolus indicauit scribens ad Romanos 13. v. 1. *Omnis anima potestatibus sublimioribus subdita sit: non est enim potestas nisi à Deo. Quæ autem sunt (potestates siue dominia gubernationis) à Deo ordinata sunt.* Itaque qui resistit potestati Dei ordinationi resistit; qui autem resistunt (ordinationi ac voluntati diuinæ) ipsi sibi damnationem acquirunt. Et ver. 4. & 5. *Des enim minister est (qui gladium portat) vindex iram ei, qui malè agit. Ideo necessitate subditi estote, non solùm propter iram: sed etiam propter conscientiam: id est, non solùm timore pœnæ humane, sed etiam peccati evitandi causa.* Et sanctus Petrus Epist. 1. capite 2. *Subiecti igitur estote omni humane creaturæ (supple quæ in auctoritate constituta est) siue Regi, &c. quia sic est voluntas Dei.*

Ex his etiam intelligitur dictum S. Thom. quæst. 96. a. 4. *Leges hominum iustas habere vim obligandi in foro con-*



conscientiæ, à lege æterna, à qua deriuantur, iuxta ea, quæ supra dixit tractat. de peccatis, cap. 1. Neque tamen hinc inferas, leges ab humano magistratu latas, non esse appellandas humanas; sed potiùs diuinas, quippe à Deo principaliter profectas, ac dependentes: Recte enim respondet Suarez lib. 3. de legib. c. 21. num. 7. *Effectum, qui proximè est à causa secunda, ita ut à causa prima non procederet, nisi per illam, simpliciter attribui causæ secundæ*: quo modo v. g. effectus generationis humanæ simpliciter tribuitur causæ secundæ, à qua proximè procedit, ac determinatur.

2 Dixi autem in assertionem; *Si legislator velit, & materia permittat*: Duo enim necessaria sunt, vt lex humana sub culpa mortali obliget, sicuti bene docet Ioan. Medina C. de ieiunio, quæst. 7. §. superest tamen. Primum est; Materia grauis, & tantæ obligationis capax: quare, etsi maximè vellent legislator suæ legi, circa leuem materiam versanti, grauem obligationem adiungere, non potest id efficere, sicuti omnes DD. fatentur. Alterum est: Intentio legislatoris tanquam causâ effectrix: Quare si legislator suæ legi, quamvis circa grauem materiam versanti, non nisi obligationem leuem, videlicet sub veniali tantû culpa imponere velit, non plus obligabit. Quia *actus agentium non operantur ultra eorum intentionem*, arg. l. non omnis ff. si certum petatur, & c. ult. de præb. & docet Castro lib. 1. de lege pœnali, c. 5. docum. 4. Nam. c. 2. num. 49. Suar. lib. 3. de legib. c. 27. n. 6. Salas disp. 10. sect. 7. etsi contrarium teneat Barthol. Medina q. 96. a. 4. regula prima, Vasq. disp. 158. c. 4. n. 32. Bellarm. lib. 3. de membris Ecclesiæ, c. 11. ad 7. arbitantes non esse in potestate legislatoris obligare sub culpa leui, si materia, quæ præcipitur, grauis sit. sententia probabilis etiam est. Et quæ hîc dixi de lege, eadem intelligi debent de præcepto Superioris; in eius potestate esse, an sub culpa, eaque leui, an graui (si materia permittat) obligare velit.

Porro circa materiam vltiùs obseruandum: Quòd Alph. à Castro cit. c. 5. docum. 2. reprehendit eos Regularium Prælatos, qui rem leuem, puta silentium, tardum accessum ad chorum, vnius lactuco sine licentia comestitionem præcipiunt, vel prohibent sub excommunicationis pœna, vel alio modo grauem obligationem significante; & aiunt DD. eiusmodi leges siue præcepta, si quando imponantur, comminatoria tantû censenda esse. Enimvero, tamen si lex siue Superioris præceptum primû de re leui sit; fieri tamen potest, vt grauis obligatio oriatur, quando post iudicis, vel Prælati admonitionem, præsertim repetitam contumacia ac veluti contemptus accesserit Cuius rei exemplum habemus in c. si quis, de vita & honest. Clericorum, in quo Clericus excommunicari iubetur, qui comam nutruerit: haud dubiè præcedente monitione & accedente contumacia. Quamvis de hac re non sit eadem DD. sententia, vt videre licet apud Sanch. l. 6. mor. c. 4. n. 49. & seqq.

3 Præterea, ne quis circa materiæ qualitatem fallatur, oportet eam spectare non nudè; sed cum omnibus circumstantiis, potissimum in fine, sicuti optimè præter alios notauit Medina q. 96. a. 4. ad 2. obiect. Valent. t. 2. disp. 7. q. 5. p. 6. q. 3. Salas disp. 10. l. 6. Suar. t. 5. de cens. disp. 4. l. 6. n. 11. Nam interdum accidit, vt quod præcipitur, vel prohibetur, secundum se quidem leue sit: relatum verò ad Communitatis pacem, disciplinam, bonam famam seruandam, scandala cauenda, graue sit, tantæque obligationis capax. Ex quo capite ab iniuria vindicabis Ducum belli consuetudinem, milites ob furta exigua; sed ob militarem disciplinam grauius prohibita, mortis supplicio afficientium: Item multorum Magistratuum seuerissime eos punientium, qui arma prohibita in ciuitatibus deferunt: ferarum venationem in syluis instituunt, quod non aduertit Nauar. c. 23. man. n. 58. & seqq. Et simile quiddam dici potest de diuino præcepto, quod Adamo & Eue impositum fuit; atque ex obiecto, nudè ac materialiter spe-

ctato, exiguum videri poterat, grauissimam tamen obligationem attulit ob circumstantiam finis; cuius gratia Deus præceptum illud, sub mortis comminatione imposuerat: videl. in signum ac recognitionem obedientiæ Deo rerum omnium auctori debitæ, & quasi in tributum humanæ subiectionis erga diuinam maiestatem, sicuti notauit Suar. l. 3. de leg. c. 25. n. 5.

Circa intentionem verò Legislatoris notat Nau. c. 23. num. 50. Alphonsus de Castro cit. loco docum. 4. Sanch. lib. 6. moral. c. 4. num. 32. Vasq. disp. 158. c. 3. consideranda esse verba legislatoris. Hæc enim monemus, hortamur. consilium magis, siue directionis, vel dispositionis formam; quam præceptum significant: At verò *Præcipimus, mandamus, prohibemus, teneamur, Nemo possit*, & his æquiualentia præceptum continere videntur, sub culpa mortali obligans, si materiæ grauitas subsit, arg. Clement. exiui, de verbor. signif. Quod si expressius in canonica constitutione dicatur, *Præcipimus in virtute S. Obedientiæ: sub comminatione extremi iudicij, Gehenna*, Multò minùs de obligationis grauitate dubitari debet. Denique verba communia, siue ambigua; consiliumne tantû, aut simplicem viuendi regulam, ordinationem; an verò præceptum contineant, hæc censentur: *Caveant, oportet, volumus ordinare, statuimus, hoc faciât*. In cuiusmodi ambiguitate spectanda est materia legis, adiectio pœnæ, aliæque circumstantiæ, præcipuè finis: Imprimis etiâ inspiciendâ consuetudo, ac proborum hominum communis persuasio, quæ est optima legum interpret, iuxta reg. 4. in 6. quæ sumpta est ex l. in obscuris, ff. de reg. iuris, *Inspicimus in obscuris, quod verisimilius est, aut quod plerumque fieri consuevit*. Quare cum prudentes ac probi omnes obligationem legis de ieiunio, vel abstinentia Ecclesiastica, de audienda Missa, grauem & sub mortali culpa agnoscant, non potest id ab aliquo sine temeritate in dubiû reuocari. Vide etiam de hac materia Abb. in c. Clerici, n. 1. de vita & honest. Clericorum, Syl. ver. præceptum, quæst. 2. Medina Cod. de ieiunio supra cit. q. 7. Mich. Salon. 2. 2. qu. 77. a. 1. contr. 8. Gutierrez lib. 1. can. qq. c. 7. num. 21. Azor. t. 1. lib. 5. cap. 6. quæst. 5.

Assertio II. Lex humana ordinariè non obligat cum periculo mortis, mutilationis, grauis infamiæ, aut bonorum magnæ iacturæ. Est communis DD. sententia contra Caiet. t. 2. qu. 96. a. 4. & sumitur ex c. consilium, de obseruatione ieiunij, ibi, *cum non subiaceat legi necessitas*. & reg. 6. in 6. *Nemo potest ad impossibile obligari*: quod autè valde difficile est, moraliter impossibile censetur. Quare Ilidorus cap. 1. huius tract. allegatus, ait, legem humanam oportere esse possibilem, secundum hominum naturam; ac consuetudinem Quare neque alia censi debet mens legislatoris, quam vt legis suæ obligatio in tali casu cesset: cum alioquin lex iniusta, & intolerabilis esset, seque ipsam euerteret.

Atque hîc discrimen obserua inter legislatorum Deum humanæ vitæ autorem, ipsûmque Christum, & inter Legislatorem humanum; quòd iste legum ferendarum potestatem limitatam habet, quam vltra extendere non potest: Deus autem ipseque Christus potestatem absolutam & illimitatam, iuxta illud Matth. 28. *Data est mihi omnis potestas in cælo & in terra*. Quare absolute nos ad legum suarum obseruationem, cum quouis periculo, adstringere potest: quamvis ordinariè non tanta seueritate diuinæ leges positæ sint; ne in veteri quidem testamento, de Sabbatho, abstinentia à sanguine, carne suilla, & c. teste S. Th. 1. 2. q. 100. a. 8. Soto lib. 1. de iust. quæst. 6. a. 4. Victor. relect. de temper. num. 6. & 10. Vasq. 1. 2. disp. 161. c. 2. Suar. lib. 3. de legib. c. 30. assert. 3. Less. lib. 4. c. 3. dub. 2. num. 101. & colligitur ex lib. 1. Machabæorum, cap. 2. v. 38. 1. Reg. c. 21. Multòque minùs in nouo testamento de suscipiendis sacramentis, per se loquendo: Nam per accidens aliter euenire potest, vel ratione scandali: vel proprii spiritalis detrimenti vitandi, si in speciali casu susceptio



sacramenti ad salutem alicui necessaria esse videatur. Quade re Suar. in 3. p. t. 1. dif. 31. f.

- 6 Dixi autem in assertione, *ordinariè*. Nam quotiescumque ex legis, aut præcepti humani obseruatione maius Reipub. commodum speratur; aut ex illius neglectu maius incommodum timetur, quam æstimari debeat priuatum periculum vitæ, famæ, bonorum amittendorum; tunc lex, aut præceptum etiam cum tanto periculo obligare potest, sicuti notauit Carbolib. 7. de leg. disp. 6. posuit. 2. Sotus supra cit. quæst. 6. a. 4. & in 4. d. 22. quæst. 1. a. 4. Medina 1. 2. quæst. 96. a. 4. §. sequitur grauissimum dubium, Vasq. cit. c. 2. Sic enim belli dux militi præcipit, vt stationem seruet cum vitæ discrimine; & summus Pontifex Sacerdoti, vt cum simili periculo Christi fidem paganis prædicet. Deinde, si legis positivæ transgressio cessura videatur in contemptum legislatricis potestatis: aut Fidei, ac Religionis Christianæ detrimentum; tunc ipsa etiam naturæ lex obligat ad obseruationem, quauis cū propriæ vitæ dispendio, sicuti notarunt Sotus cit. q. 6. a. 4. Medina l. c. Vasq. in fine disp. 161. Suarez de censur. disp. 6. sect. 3. & cit. cap. 30. num. 7. Egid. Coninck 3. p. t. 2. disp. 13. dub. 12. in fine. Cuius rei exemplum habes in Eleazaro 2. Machab. 6 Et in eandem sententiam S. Aug. dixit libro de bono coniugij cap. 16. *Satius est fame mori, quam idolothytis vesci*: puta cum scandalo, vel Religionis contemptu, secundum Apostolum 1. Corinth. 10.

- 8 Corollarium I. Ecclesiastica censura ligatus non tenetur cum periculo vitæ infamiae, alteriusve grauis iacturæ, abstinere à communione fidelium, seu in factis, seu politicis negotiis, sicuti docent Sotus in 4. d. 22. q. 1. art. 4. Sanch. l. 1. moral. c. 12. num. 8. Vasq. disp. 161. c. 4. Aulap. 2. de censur. c. 6. disp. 11. concl. 4. & 5. Suar. lib. 3. de leg. cap. 30. num. 16. Alijs quoque, ob simile periculum, permillum est cum excommunicato vitando communicare; secluso contemptu Ecclesiasticæ potestatis. Quade re refutius tract. sequenti p. 2. c. 2. & seqq.

- 9 Corollarium II. Si Tyrannus, morte intentata, cogat Sacerdotem sine sacris vestibus, altari lapideo, aliisque Ecclesiastico iure requisitis sacrificare; inspiciendum est, vtrum id tendat in Religionis, vel tremendi Sacrificij contemptum, necne. Nam primo casu mors appetenda potius est, sicuti rectè docuit Caiet. cit. a. 4. Altero vero casu sacrificari ita potest, teste Medina eadem q. 96. art. 4. §. sequitur grauissimum dubium, conclus. 3. Egid. cit. disp. 13. dub. 12. n. 103. Suar. dif. 6. de censur. sect. 3. n. 4. Vasq. c. 3.

- 10 Corollarium III. Mortis, aliòve graui metu adactus matrimonium licitè contrahit cum consanguinea; tacita intentione, quantum in me est, si nihil aliud impediatur. Nō tamen licitè consummat ante impetratam à Papa dispensationem: quia esset copula fornicaria, & incestus. Ita docent Sanch. lib. 7. disp. 5. de matrim. num. 4. Suar. cit. c. 30. num. 13. Vasq. cit. disp. 161. c. 3. & videntur idem sentire Sotus & Medina l. l. supra citatis, contra Caiet. 1. 2. q. 96. a. 4. Nauar. c. 27. num. 14. in fine, qui priorem partem huius corollarij negant.

- I Corollarium IV. Lex Carthusianorum de carniū perpetua abstinencia, non comprehendit eum casum, cū nullo alio cibo suppetente, lex naturalis dicat vitam alimento seruandam: quare in tali casu mortifere peccabit Carthusianus, si abtineat, sicuti benè probat Ioannes maior in 4. d. 38. quæst. 24. Vasq. disput. 162. cap. 4. licet contrarium doceat Lessius lib. 4. c. 3. dub. 2. num. 12. Quādiu verò alij cibi suppetunt, laudabilis eiusdem Ordinis consuetudo ita regulā interpretatur, vt fas ipsis non sit, cuiuscunque æguitudinis occasione, carnibus vesci. Quia si alij cibi haberi possint, carniū esus non est medium absolute necessarium ad vitam seruandam: diutius autem vitam prorogare delicatiore viuendi modo nemo tenetur, si id à viæ instituto alienum sit, maiusque & publicum bonum, virtutis, ac regularis obseruantiae impediatur,

vel imminuat: tunc sanè paruam longioris vitæ iacturam perpeti seu permittere à ratione naturali alienum non est, sed temperantiæ ac fortitudinis opus, Deo naturæ auorigentium, ad quod proinde Carthusiani iuxta regulam suam se obligare possunt. Vide etiam Ioannem Gersonē, p. 2. operum, tract. de abstinencia Carthusiensium, Victoriam rel. de temperant. n. 8. & seqq.

Assertio III. Obligatio legis non se extendit ad actus, præteritos, sed solum ad futuros. Hæc est certa assertio, quod attinet ad effectum legis, qui est obligatio sub culpa. Nam causa prior est effectui suo: & ad præteritum non datur potentia consequenter lex superueniens non potest regulam, vel obligationem imponere actibus factis, sed solum faciendis, sicut bene explicat Suar. l. 3. c. 14. num. 8. Quod verò attinet ad alios effectus legis; cuiusmodi sunt declarare, pœnam delicto statuere, formam actui præscribere, & aliter factum infirmare, & c. nihil obstat, legem ad præterita etiam extendi, sicuti DD. docent in c. ult. de constit. Nam lex quatenus solum declaratoria est; v. g. matrimonium tali modo contractum pro inualido habendum esse: etiam ad præterita se extendit, sicuti docent Canonistæ, præsertim Abb. num. 11. cit. c. ult. Suar. cit. ca. 14. num. 2. Quatenus verò lex nouam pœnam delictis statuit, ordinariè intelligenda est de peccatis committendis, attamen nihil obstat, si legislator velit, & mentem suam exprimat, vt noua pœna decernatur etiam ijs, qui antè contra naturalem, aut positivam legem deliquerunt. Similitérque dicendum de lege præscribente formam actui, aut infirmante actum, nisi taliter fiat: *non ad præterita, sed ad futura tantum ordinariè extendi*: Cum leges & constitutiones futuris certum sit dare formam negotijs, non ad præterita facta trahi: nisi nominatim in eis de præteritis caueatur, cit. c. ult. de Constit.

## CAP. XV.

## De lege pœnali.

## S V M M A R I V M.

- 1 Lex vel est absolute obligatoria sine adiectione pœnae: Vel est merè pœnalis sine obligatione sub culpa: Vel denique est mixta, quatum sub culpa, cum sub pœna obligat.
- 2 Culpa interdum stricte accipitur pro defectu coram Deo culpabili, interdum vero late, pro quocunque defectu moris, saltem politice culpabili.
- 3 Ex grauitate adiecta pœna mortis, mutilationis, exilij, & c. coniectura sumitur de mente legislatoris sub mortali culpa obligantis.
- 4 Leges pœnales non ita interpretanda sunt, quasi earum transgressores in conscientia obligentur ad pœnam per se ipsos soluendam, seu actiue exequendam.
- 5 Qui commisit crimen laesæ maiestatis, hæresis, & c. ante iudicis sententiam licitè ac valide bona sua alienat, ea tamen conditione, vt si deinde sententia feratur, quamuis post mortem criminosis omnia bona, à die commissi criminis alienata, fisco renouare possit.
- 6 Debet tamen fiscus emptori pretium restituere, si extet: Vel quatenus criminosis, cui fiscus succedit, distior exinde factus est.
- 7 Leges pœnales interdum ipso facto, & ante iudicis sententiam efficiunt criminisum inhabilem ad acquirendum, vtendum, sicuti videre est in Ecclesiasticis censuræ, irregularitate, canonico impedimento matrimonij, & c.
- 8 Non facile tamen reperietur lex tanta seueritate obligans, vt criminosis ante iudicis sententiam teneatur positivam pœnalem actionem exercere, abdicando se dominio ac titulo acquisito.
- 9 Et si lex pœnalis ipso facto decernat priuationem rei suæ: non tamen criminosis ad executionem obligatur ante sententiam iudicis.
- 10 Reus tenetur per se ipsum exequi pœnam honestam, & non nimis acerbam, postquam per iudicis sententiam ad id condemnatus est.
- 11 Iudex interdum condemnat Reum ad agendum, videlicet in maioribus pœnis, & multam soluat, & in ceteram ear. Inter-



dum vero ad patiendum, videlicet pœnas grauiorē mortis, mutilationis, verberationis publicæ & infamie.

- 8 Damnatuſ Et venenum ebibat, parere non tenetur; imò nec poſſe videtur.
- 9 Damnatuſ ad mortem mediā perferendam, non tenetur cibum clam ſibi ſubminiſtratum recuſare: quamuiſ poſſit, ob iuſtiſia amorem.
- 10 Ante iudiciſ ſententiam ſemper licitum eſt reo fugere: niſi promiſerit vel iurariſ ſe permanſurum. Etiam poſt latam ſententiam de pœna grauiſſima mortis, mutilationis, &c. ſuſtinenda, Reuſ fugere poteſt: Quin & in eum ſinem vincula & compedeſ rumpere.
- 11 Reuſ mortis eſi fugere poſſit, non tenetur: quin & Iudiciſ ſe ipſum ſiſtere, ad iuſtam pœnam patiendum, non prohibetur.

**L** Ex alia eſt abſolutè obligatoria, ſine adiectione pœnæ: quæ proinde, ſi à iure definita non ſit, Iudiciſ arbitratu tranſgreſſori imponi debet. Alia verò eſt pœnalis lex aliquid præcipiens, vel prohibens, certa pœna conſtituta. Et hæc iterum duplex: Vna merè pœnalis; altera mixta, ſicuti docet Henricuſ quodlib. 3. q. 22. Angel. ver. inobedientia, Caſtro lib. 1. de lege pœnali c. 8. & 9. Salon 2. 2. q. 77. a. 1. contr. 7. Philarchuſ t. 1. p. 2. lib. 3. c. 2. concl. 1. Suar. 1. lib. 5. de leg. c. 4. num. 2.

Lex purè pœnalis eſt, cum Legiſlator ad culpam obligare non intendit; ſed ad ſolam pœnam. Nam ſæpe ad animarum pericula cauenda, expedit in communitate conſcientiaſ non obligari ſub culpa; & nihilominuſ quaſdam conſtitutioneſ fieri boni publici cauſa, eum obligatione ad pœnā qua ratione quarundā Religionum legeſ poſitæ ſunt, iuxta Clement. exiui, de verb. ſignif. Eſi verò, ſi rectè attendimus, eiufmodi cōſtitutioneſ ſeu ordinationeſ non ſint propriè legeſ, in ordine ad id, quod ordinatur: nam omniſ lex iuſta eſt Superioriſ præceptum, conſequenter obligans in conſcientia, ſicuti bene aduertit Syl. ver. inobedientia, in fine. Sanchez lib. 6. moral. c. 4. n. 12. habent tamen ſimilitudinē cum legibuſ propriè dictiſ: quia modo ſimili feruntur propter bonum publicum, à Superiore autoritate habente; circa actioneſ ſubditorum, ad quaſ iuriſdictio ſe extendit: imò in eo etiam ſimileſ ſunt, quia ſaltem remotè continent aliquam obligationem in conſcientia, videlicet ad pœnam acceptandam, ſi ſententia ac præcepto Superioriſ, ſubdito legem pœnalem tranſgredienti imponatur. Quare obſeruarunt Sotuſ lib. 1. de iuſt. q. 6. a. 5. in fine. Caſtro lib. 8. de legib. c. 5. Suarez tom. 2. de relig. lib. 4. de voto, c. 4. num. 14. eiufmodi legeſ pœnales ſub conditione ac veluti diſiunctione lateſ cenſeri; Nemo ciuium in nemore ligna cadat; aut ſi ceciderit, paratuſ eſto pœnam ſoluere. Nemo Regularium tali tempore loquatur; alioquin pœnam luere paratuſ eſto: dummodo ea per præceptum inferatur, vti dicam latiuſ lib. 4. tr. 5. c. 9. q. 1. dicto 3.

Obijcies. Nemo puniri debet qui non peccauit: Nam pœna definitur à Iureconſulto in l. 131. de verb. ſignif. peccati uſio, & noxa vindicta. Et S. Auguſt. in lib. 1. retract. c. 9. dixit; Omniſ pœna ſi iuſta eſt, peccati pœna eſt, & ſupplicium nominatur. Ergo repugnat dari legeſ merè pœnales, ſeu obliganteſ ad pœnam, non præcedente culpa. Reſpondeo cum Soto, Carbone, Sanchez, ll. cc. Suarez cit. c. 4. Pœna interdum propriè & ſtriçtè accipitur quatenuſ eſt correlatiuum peccati, ſeu culpæ propriè dictæ, cui ſecundum proportionem pœna reſpondere debet, iuxta illud Deuteronom. 25. Pro meſura delicti erit & plagarum moduſ: & notauit Gerſon de vita ſpirituali, lect. 1. ante primum corollariuſ, Caſtro lib. 1. de lege pœnali, cap. 3. Interdum verò recipitur late pro quocunq; incommodo, quod alicui iuſtè infligitur, quamuiſ nulla præcedente eiuf culpa, ſiue peccato, ſicuti notauit Gl. in c. 2. de Conſtitut. & adſtipulatur reg. 23. in 6. Sine culpa, niſi cauſa ſuſcit, nemo eſt puniendus.

**2** Similiter diſtinguere poſſumus nomen culpæ, quod interdum ſtriçtè ac propriè accipitur pro defectu coram Deo culpabili; interdum verò late pro quouis defectu moriſ; ſeu Theologicè & coram Deo; ſeu ſaltem politi-

cè, coram hominibuſ culpabili. Quā ratione certum eſt, Magiſtratuſ ciuibuſ; Prælatuſ regularibuſ: patrem famili. domeſticis ſuiſ, ob defectuſ & culpaſ ciuileſ, regulares, domeſticas; quamuiſ coram Deo innoxiiſ, pœnam irrogare poſſe, communis diſciplinæ gratia.

Lex pœnalis mixta eſt, quæ tam ſub culpa, quàm ſub pœna obligat. Quod autem Nau. c. 23. n. 55. & 66. eſtimat, rariores eſſe eiufmodi legeſ, præſertim ciuileſ: eò quòd legiſlator ſuæ legi-pœnam adijciens, ea contentuſ eſſe cenſeri debeat, neque ſub culpa obligare velle, niſi aliud exprimat: id communiter à reliquiſ DD. reiſcitur. Nam pœna legi adiecta culpam non deſtruit: ſed magiſ ſupponit, ac requirit. Profecto n. non tantum in legib. Eccleſiaſticis, cenſuram excommunicationiſ, ſuſpenſionis, &c. continentibuſ: ſed etiam in ciuilibuſ, ſepe ex annexa grauitate pœnæ: puta mortis, mutilationiſ, exiliij, magnæ amiſſionis honorum, &c. tertia coniectura capi poteſt, de mente legiſlatoriſ ſub graui ſeu mortali culpa obligare volentiſ, modò materia ſeu obiectum legiſ tanta obligationiſ capax ſit. Ita notauit Sotuſ lib. 4. de iuſt. q. 6. a. 5. Caſtro lib. 1. de lege pœnali, cap. vlt. Sanchez lib. 6. moral. c. 4. num. 64. Exemplum habes in decretiſ Principum, ſub pœna exiliij aut corporali ferarum venationem prohibentiuſ. qua de re Medina C. de reſtit. q. 12. Quòd ſi ſimplex pecuniaria multa legi adiuncta ſit, partim ex materia, & ſine, aliſque circumſtantiſ; partim ex verbis legiſ de mente legiſlatoriſ coniectura capienda eſt: Sic v. g. ex materia & ſine legiſ de tributis Principi præſtandiſ, concludit Suarez lib. 5. c. 14. num. 12. eam præceptiuam cenſeri, atque ob tranſgreſſionem præcepti, pœnam adiectam eſſe. Contra verò ex materia, ſine, ipſaque verborum formula colligi poteſt, taleſ legeſ merè pœnales eſſe; Si quiſ deprehenuſ fuerit frumentum ex prouincia euehere, in tali publico loco venari, ligna cadere, &c. hanc pœnam pecuniariam ſoluat.

Hiſ poſitiſ, eſt aſſertio I. Legeſ pœnales non ita interpretandæ ſunt, quaſi earum tranſgreſſoreſ in conſcientia obligentur ad pœnam per ſe ipſoſ ſoluendam, ſeu actiue exequendam. Hæc eſt communior DD. ſententia Caiet. 2. 2. q. 61. a. 3. & in ſum. ver. pœna, Soti lib. 2. q. 6. a. 6. de iuſt. Syl. ver. pœna, q. 25. Nau. c. 23. n. 66. & lib. 3. conſil. 8. de donat. edit. 2. Cordubæ lib. 1. quaſtionarij, q. 36. Gouar. in 4. decret. p. 2. c. 6. §. 8. n. 12. Azor. to. 1. lib. 5. c. 7. q. 1. Sanch lib. 2. moral. c. 22. n. 7. Leſſ. lib. 2. c. 29. n. 63. contra Abb. in c. dilecti, de arbitriſ. Caſtrum lib. 2. de lege pœnali, c. 8. & 9. Nam legem humanam oportet eſſe hominum moribuſ ac naturæ congruam: Eſt autem valde alienum à natura & moribuſ hominum, quod idem cogatur eſſe reuſ, ac iudex, vel iuſtitiæ executor: non raro occulti ſui criminis proditor & accuſator. Quapropter aduertit Medina 1. 2. q. 96. a. 4. Eiufmodi legeſ pœnales, quatenuſ præceptum continent, ad ſubditoſ dirigi, vt eaſ obſeruent; quatenuſ verò pœnam ſiue multam adiungunt, præcipue ad Iudiceſ reſerri, vt eam tranſgreſſoribuſ imperent, exigant: quamuiſ etiam ſecundariò ad ſubditoſ, vt iuſta executione obtemperent, ſicut ſuprà dixi.

Corollariuſ: Pœna confiscationiſ bonorum, quæ ipſo iure incurritur, v. g. ob crimen hæreſiſ, iuxta c. cum ſecundum legeſ, de hæret. in 6. ob crimen læſæ Maieſt. iuxta l. 5. & vlt. C. ad l. Iuliam maieſtatiſ; non eo ſenſu intelligi debet, quaſi criminuſ à lege condemnatuſ, bonorum ſuorum dominio, aut poſſeſſione, ante Iudiciſ ſententiam priuatuſ ſit; vt ea retinere aut validè alienare nequeat, ſed ſiſco deferre debeat ſui ipſiuſ accuſator, iudex, aut vindex. Sed ſenſu eſt, à die commiſſi criminis, ante omniem Iudiciſ ſententiam, bona criminuſi reali obligatione; veluti vinculo, adſtringi ſiſco: vrad quemcunq; poſſeſſorem quocunq; titulo ſeu contractuſ, ſeu hæreditatiſ, aut legati perueniant: tali onere obligati maneant, quòd poſt Iudiciſ ſententiam condemnato-



riam, vel declaratoriam criminis, rescisso contractu, testamento, &c. vindicari ac fisco applicari possunt: vñ cum fructibus extantibus, vel quatenus possessor inde ditior factus est. Quæ est communior sententia Caiet. Soti, Couar. Azorij, Cordubæ, Sanchez, Lessij ll. cc. Victor. relect. de Indis, n. 8. Medina C. de eleemosyna, q. 4. in princ. Syl. ver. hæresis, l. q. 6. & 8. Nau. c. 28. man. n. 66. Iacobi Simancæ de Cathol. instit. tit. 9. n. 17. Antonij Gomez 3. resol. c. vlt. Vasq. disp. 170. c. 3. Bannes 2. 2. q. 12. a. 2. Suar. lib. 5. de leg. c. 5. n. 9. Mol. tr. 2. disp. 95. contra Abb. in c. 1. de constit. & in c. dilecti, de arbitris, Castro lib. 2. de lege pœnali, c. 10. & 11. Quamobrem licet in his grauissimis criminibus sententia feratur etiam in defunctum, iuxta l. vlt. C. ad l. Iulian Maiestatis, &c. 2. de præscript. in 6. iunct. Gl. ver. hæretici, Abb. in c. vlt. de hæret. in fine, Couar. in 4. decret. p. 2. c. 6. §. 8. n. 7. tamen iuris fictione retrò trahitur ad diem commissi criminis, sitque executio confiscationis perinde ac si tunc sententia lata fuisset. Illud verò hîc moneo, quòd fiscus bonæ fidei possessori, v. g. emptori, in quem post commissum crimen à defuncto res alienata fuerat, pretium restituere teneatur, si extet; vel quatenus inde defunctus, cui fiscus succedit, ditior factus fuit, sicuti ex communi docent Simanca de Cathol. instit. tit. 9. n. 29. & seqq. Gomez 3. resol. c. 2. n. 2. Vasq. disp. 172. c. 2. n. 7. Sanch. cit. c. 22. n. 68. Vide etiam Nau. lib. 3. consil. 8. num. 3. de donat. vbi resoluit; Tamen aliquis sciens pœnam confiscationis ipso iure ob admissum crimen, incursum esse, donationem à criminoso accipiat, non esse obligatum ad bona fisco reddenda, nisi à Iudice repetantur. Vide Vasq. disp. 171. c. 3.

5. Assertio II. Leges pœnales, præsertim ecclesiasticæ, interdum ipso facto siue criminis commissione, ante omnem Iudicis sententiam, efficiunt criminosum inhabilem ad acquirendum, vel acquisito vtendum; ita vt abstinere in conscientia obligatus sit. Quæ est communis DD. sententia Caiet. 2. 2. quæst. 62. a. 3. Sa ver. pœna, num. 1. Suar. lib. 5. de legib. cap. 8. Nau. c. 23. man. num. 67. Rodrig. t. 1. regul. qq. q. 6. a. 16. Castro lib. 2. de lege pœn. cap. 5. Molina to. 1. tr. 2. disp. 96. Exemplum habemus I. In censuris Ecclesiasticis, quæ dicuntur lata sententiæ. II. In irregularitate ob crimen. III. In canonicis impedimentis matrimonij ex crimine contractis. IV. In inhabilitate ad suffragium seu actiuum, seu passiuum, quæ interdum ipso facto incurritur, sicuti videre est apud Suar. lib. 5. de leg. cap. 9. Quamuis Sotus lib. 1. de iust. quæst. 6. a. 6. ad 4. Sanch. lib. 9. de matrim. disp. 30. n. 2. Mol. cit. disp. 96. negent, inhabilitatem ad ferendum suffragium ipso facto impositam ob crimen, incurri ante Iudicis sententiam. V. In inhabilitate acquirendi redditus beneficij, ob neglectum officium canonicum, iuxta verba Concilij Lateranensis sub Leone X. Beneficiorum suorū fructus non faciat suos. Et iterum, tanquam iniuste perceptos erogare teneatur: Vel ob intermissam residentiam, iuxta Trident. sess. 24. cap. 1. de reform. Eum pro rata temporis absentia, fructus suos non facere: nec intus conscientia, alia etiam declaratione non secuto, illos sibi detinere posse. Talis etiam pœna videri potest, quæ in Trident. Conc. sess. 24. c. 12. de reform. prouisis de beneficio curato, vel canonicatu, aut dignitate Ecclesiæ Cathedralis decernitur; vt nisi intra duos menses, post diem possessionis adeptæ, fidei professionem edant, fructus suos non faciant: atque ita docet Azor tom. 2. lib. 7. c. 2. q. 1. Quamuis Thom. Sanchez lib. 2. moral. cap. 6. num. 11. existimet, opus esse Iudicis sententia, & condemnatione, vt beneficiatus ita perceptos fructus restituere cogatur. VI. In inhabilitate acquirendi dominium bonorum incertorum, quæ ex furto, rapina, vsura possidentur, & proprijs dominis restitui non possunt, ea enim pauperibus erogari debent ante omnem Iudicis sententiam: iuxta c. cum tu, de vsuris.

6. Cæterum, etsi dubium esse non debeat, quin supre-

mus Princeps, ex plenitudine potestatis, subditos ob crimen graue aut perniciosum, ipsa lege lata, absolute spoliare possit dominio, vel iure iam acquisito; ita, vt ante Iudicis sententiam, teneatur reus positum pœnalem actionem exercere, abdicando se dominio, ac titulo acquisito, sicuti fasè ostendit Suar. cit. lib. 5. cap. 5. & seqq. non tamen satis constat, tales leges seu Imperatorias, seu etiam Pontificias hætenus tanta seueritate latas, etiam vsu receptas esse. Esto enim interdum exprimatur, v. g. vt pœna priuationis, vacationis officij, aut beneficij ipso iure ac facto incuratur; plerumque tamen benignior interpretatio adhiberi potest, criminosum non statim excludere dominio, siue iure retinendi officium, aut beneficium; modò illud per se, vel per alium administret: sed latam postea à Iudice sententiam idem operari ob iuris dispositionem, ac si tempore commissi criminis lata fuisset, sicuti supra dixi de pœna confiscationis bonorum. Atque ita docet Caiet. l. c. Couar. 4. decret. p. 2. cap. 6. §. 8. num. 8. Nau. in comment. de datis & promissis, not. 31. num. 44. Auilap. 1. de censur. dub. 7. Sanch. lib. 2. moral. c. 26. Less. c. 35. dub. 26. in princip. Sa. ver. pœna, n. 1. Suar. t. 1. de Relig. tr. 3. lib. 4. de Simon. c. 43. n. 13. vbi regulam generalem & communiter receptam tradit: *Quando aliquis per pœnam priuatur re sua, non obligatur ad executionem ante sententiam.* Et licet addatur verbum, *ipso iure vel ipso facto*, accommodatur tamen pœna secundum capacitatem eius.

7. Assertio III. Reus debet per se ipsum exequi pœnam honestam, & non nimis acerbam, posteaquam per Iudicis sententiam ad id condemnatus est. Ita docet. S. Tho. iuncto Caiet. 2. 2. quæst. 62. a. 3. idem Caiet. q. 69. a. 3. & 4. Nau. comment. 4. de Regul. num. 63. Driedo lib. 2. de liber. Christ. cap. 6. Castro lib. 2. de lege pœnali, c. 3. Suar. lib. 5. de leg. cap. 10. num. 15. Salas disp. 15. s. 7. Nam quisque subditus Superiori suo, iusta & moraliter possibilia præcipienti obedire debet. Exemplum habes primò; Si condemnatus sis in carcerem, vel in exilium: debes eò te conferre, ibique manere. Secundò: Damnatu ad multam pecuniariam, debet eam soluere: quamuis expectare possit, donec exigatur, teste Nau. cap. 23. num. 66. Salas num. 82. Nisi Iudex expressè iubeat, vt reus, sine alia admonitione pecuniam per se adferat. Idemque obseruari solet in pœna conuentionali, vt licet vna contrahentium pars eius obligationem contraxerit; non tamen soluere cogatur, priusquam altera postularit: nisi aliter conuentum sit: Quæ de re Couar. in 4. decret. p. 2. c. 6. §. 8. num. 14. Nauar. num. 68. Suar. lib. 5. cap. 6. num. 7. Vasq. disput. 173. c. 1. num. 3. qui etiam Iudicis sententiam siue coactionem requirit: sed hoc non placet. Quod enim aliquis ex libera conuentione debet, id in conscientia soluere cogitur, etiamsi Iudex non iubeat. Tertio; Reus per sententiam Ecclesiastici Iudicis obligari potest v. g. ad abstinentiam, sui ipsius flagellationem moderatam, & non infamem, qualis consuetudo viget in quibusdam Religionibus, & officio sanctæ inquisitionis, sicuti docent Sotus lib. 1. de iust. quæst. 6. art. 6. ante resp. ad argument. Suarez lib. 5. cap. 10. num. 17. Vasq. disput. 173. cap. 3.

Assertio IV. Reus, postquam per Iudicis sententiam condemnatus est ad pœnam mortis, mutilationis, flagellationis publicæ & infamis, debet indirectè & per accidens cooperari, quatenus id conueniens aut necessarium est ad publicæ iustitiæ pœnam perferendam, ne legitimæ potestati resistere videatur. Ita DD. citati. Quare ad furcam damnatus scalas conscendere; ad gladium damnatus iugulum præbere debet. Dixi *indirectè & per accidens*: Nam directè in se ipsum pœnam tam acerbam aut ignominiosam exequi non tenetur: vt v. g. se ipsum publico foro flagellet: cum id nimis à natura hominis alienum sit, adeoque præceptum moraliter impossibile. Quapropter obseruat S. Thom. 2. 2. quæst. 95. art. ad 1. Ioan.



Ioan. Driedo cit. a. 6. Castro lib. 2. de lege pœn. cap. 3. Sotus lib. 5. quæst. 6. art. 4. in fine, Reum à iudice interdum condemnari ad agendum: nempe in mitioribus pœnis, vt pecuniam soluat, in carcerem eat: interdum verò condemnari ad patiendum, videlicet pœnas grauiorẽs, mortis, mutilationis, captiuitatis perpetuæ, &c.

8 Sed dubitant primò: An damnatus ad venenum bibendum, parere possit? Affirmat Victor. relect. de homic. num. 30. Arrag. 2. 2. quæst. 69. a. 4. Sa ver. iudicialis actus, in reo, num. 12. Corduba lib. 1. quæst. 36. Sed re-ctius alij negant, Caiet. cit. quæst. 69. a. 4. ad 7. quæst. Couar. 1. resol. c. 14. n. 8. in fine. Sotus lib. 5. quæst. 6. a. 4. Salon cit. quæst. 96. a. 4. Sairus lib. 7. cap. 9. num. 26. Nam directæ & positivæ sui ipsius occisio neque iuste imperari, neque iuste executioni mandari potest. Qui autem venenum sciens epotat, non minùs directè ac positivè ad sui occisionem concurrit, quàm si liquidum & feruens plumbum ebibat, aut ense se confodiat: Ergo, &c. Veruntamen cum hæc res inter Doctores controuersa sit, conformare se poterit reus probabili sententiæ Iudicis, ita præcipientis: non tamen ad id obligatur; cum sit præceptum inhumanum, & faciliè aliud supplicium decerni possit.

9 Dubitant secundò: Vtrum damnatus ad mortem inedia perferendam, possit, aut etiam debeat recusare cibum, clanculum sibi, contra Iudicis voluntatem, subministratum? Resp. & dico I. Posse recusare: quia acti-ue non cõcurrit ad mortem suam; sed iustitiæ amore eam fortiter perfert ac patitur, sicuti docent Sotus, Sairus ll. cc. Maior in 4. d. 15. quæst. 2. 2. Tolet. lib. 5. c. 6. P. Nau. lib. 2. de rest. c. 3. num. 72. contra Caiet. Arrag. Castro locis suprà cit. Couar. num. 10. Vasq. disp. 174. c. 4.

Dico II. posse etiam acceptare & comedere, sicuti docent Henricus à Gandauo in quodlibeto 9. q. 26. S. Thomas cit. a. 4. Salon ibid. Sotus loco suprà cit. Sa l. c. n. 11. contra Driedon. lib. 2. de libertate Christ. c. 6. dub. 1. Quia nimis difficile est mortem oppetere, si se aliquis facile liberare possit.

10 Dubitant tertio; Vtrum licitum sit reo capto fuga sibi consulere? Resp. & dico I. Ante Iudicis sententiam, semper licitum est Reo fugere; nisi promiserit, vel iuravit se permanfurum. Est communis doctrina Couar. 1. resol. cap. 2. num. 11. & seqq. Nauar. comment. 4. de regul. n. 63. ad 4. Arrag. 2. 2. q. 69. a. 4. contr. 2. concl. 1. Dried. cit. cap. 6. Less. lib. 2. c. 31. dub. 5. Vasq. disp. 174. c. 2. Quia antelatham sententiam nullum Reo præceptum manendi impositum est; ideoque carcer in hoc casu non se habet per modum pœnæ: sed solum per modum custodiæ: quare si negligenter custodiatur, custodum hæc culpa est: reus autem iure ac libertate sua utitur.

Dico II. Etiam post latam sententiam mortis vel mutilationis Reus fugere potest, proprii grauiissimi periculi declinandi causa. Ita Henricus l. c. S. Thom. quæst. 96. a. 4. ad 2. ibid. Caiet. Arrag. Driedo, Tolet. Couar. ll. suprà cit. Syluest. ver. fugere. Atque in eum finem vincula & carceres perfingere, sicuti docent, Caiet. & Driedo ll. cc. Nau. c. 17. num. 102. Sotus lib. 5. quæst. 6. a. 4. Sa num. 9. Less. l. c. num. 36. contra Henricum Gandauensem cit. q. 26. Maiorem in 4. d. 15. q. 22. Couar. l. c. num. 14. Cui enim concessus est finis, huic etiam media ad finem necessaria concessa sunt.

Neque desunt, qui hanc fugiendi licentiam ad perpetuos carceres, ad trirèmes, ad seruitutem extendunt: Salon l. c. concl. 4. Suar. lib. 5. de legibus cap. 10. num. 16. Less. num. 39. Quia nimis etiam dura, & à naturali inclinatione aliena videtur esse obligatio persistendi in perpetua, aut durissima captiuitate, seruitute; si faciliè se Reus liberare possit. Recte tamen id limitat Suarez, nisi quis iuramenti aut voti religione; vel speciali promissione ad

permanendum obligatus sit: qua ratione concludit, Regularem iuste ob crimen damnatum ad carcerem perpetuum fugere nõ posse, quia ratione voti obedientiæ tenetur Prælato obedire in omnibus, quæ sunt secundum, regulam, & accessoria ad regulam. Quod etiam respondit Nau. cit. comment. 4. de regul. num. 64. qui tamen ibi vniuersim negat, Reo post latam sententiam licitum esse ex captiuitate fugere: quæ sententia probabilis est, eamque etiam tenent Sotus lib. 5. quæst. 6. a. 4. Vasq. disput. 174. c. 1. in fine, & videri potest Sanchez lib. 6. moral. c. 8. num. 12.

Dico III. Quibus casibus Reo fugere, eiusque rei causa compedes vel carceres effringere permissum est; alijs quoque ad id consilium, vel instrumenta illi subministrare licet; non tamen ad violandum custodiam principaliter cooperari. Ita Caiet. cit. art. 4. ad quæst. 5. Ibid. Salon contr. 3. Driedo cit. cap. 6. Sa num. 6. Less. dub. 6. Vasq. disp. 174. c. 3. contra Sotum lib. 5. q. 6. a. 4. Ratio prioris est: Quia ordinariè alteri opem ferre licet ad id, quod ab ipso rectè fieri potest: Interdum verò obstat lex specialis id prohibens; item specialis obligatio, ratione officij, impedit Iudicem, Custodem, aliosque iustitiæ ministros, quò minùs Reum in hac re adiuuare possint. Ratio posterioris est: Quia publicam custodiam effringere, ac violare, res per se grauis est, ac proinde soli Reo, ratione grauiissimæ necessitatis suæ declinandæ, concessa; non item alijs, si id agant vt causæ principales: sin verò, spectatis circumstantijs, aliquis agat vt instrumentum alterius; v. g. famulus intra custodiam, iussu heri captiui, muros perforans; puto consequenter dicendum, in conscientia non esse illicitum. Quia quod aliquis per se ipsum, idem etiam per alium, tanquam instrumentum suum, efficere potest.

Neque obstat, quòd fuga illa in detrimentum Custodis cessura sit: hoc enim Reus permittere potest, quando iure suo utitur, reg. ff. 55. Nullus videtur dolofacere, qui iure suo utitur. Nec obstat secundò, quòd Iureconsultus in l. 1. ff. de effractoribus dixit; *supplicium sumendum de ijs, qui de carcere, foribus effractis, vel conspiratione facta, erumpunt.* Nam resp. I. Eum secutum fuisse sententiam non improbabilem, quæ etiam est Henrici, Couar. ll. cc. Simancæ de Cathol. instit. tit. 16. n. 28. & fauet Syl. ver. fugere & ver. accusatio, n. 12. peccare Reos, cum è carcere erumpunt. Resp. II. Rei fugam carcerisue effractionem, grauem præsumptionem, ac veluti confessionem criminis præbere, ob quam iure puniri posse videatur; prætetquam quòd Reipub. interfit, tales quamuis minùs noxios, aliquantò grauius puniri, vt publica custodia inuiolata sit.

Cætèrùm; etsi Reo ad grauiissimam pœnam damnato, ià secundum probabilem sententiam, fugere licitum sit; certum tamen est, posse etiam non fugere, sed amore iustitiæ Iudicis se sententiæ conformare. Qua de re vide Ang. & Sylu. v. fugere, Caiet. cit. a. 4. q. 6. Sot. cit. q. 6. a. 4. Couar. cit. c. 2. n. 9. Vasq. cit. disp. 174. cap. 4. Quin imò mortem commertus vltro se Iudici sistere, & occasionem iustitiæ exercendæ afferre non prohibetur, vt rectè docet P. Nauar. lib. 2. cap. 3. num. 75. Less. lib. 2. c. 9. dub. 6. num. 28. Nam sicuti alius Iudici suadere potest, vt publica auctoritate Rex iustam mortem decernat; ita & reus idem suadere, seu petere non prohibetur.

## CAP. XVI.

De lege prohibente, vel infirmante pacta, contractus testamenta, &c.

## SUMMARIUM.

Legislator supremus potestatem habet, ex iusta causa, personarum aliquas ad contrahendum, secundum inhábiles reddere: item



*contractus: vel testamento certam formam præscribere, quæ ad eorum substantiam pertinere debeat.*

2 *Interdum lex contractui nec resistit, nec assistit: uti videre est in pacto nudo, ex quo civili iure actio non conceditur.*

3 *Interdum lex contractum prohibet, sed non infirmat, nec à Iudice infirmandum decernit.*

*Si lex Ecclesiastica simpliciter aliquid prohibeat nulla facta mentione infirmandi, non censetur infirmare: secus est dicendum de lege imperiali.*

4 *Interdum lex contractum aliūmve actum, licet per ipsam non infirmet, tamen à Iudice infirmandum decernit.*

5 *Interdum lex contractum, testamentum &c. ipso facto, & ante omnem aliam sententiam irritum reddit: consequenter Iudici iubet, ut per sententiam ita declaret.*

*Talis infirmatio contractus, alteriusve actus, suapte natura subsistentis, plerumque intelligitur tantum civiliter: & interim maneat obligatio naturalis, per se sufficiens ad transferendum dominium, aliosque effectus.*

6 *Interdum lex plenissime infirmat actum. & g. matrimonium clandestinum: & nullus inde effectus aut obligatio, ne in conscientia quidam foro, oriatur.*

7 *Si legislator, cum actum instituit, vel eius exercendi potestatem primitus confert, formam vel conditionem apponat, cum qua exerceri debeat, censetur forma substantialis.*

*Sin vero legislator formam aliquam procedendi præcipiat observari ab ijs, qui iam ante actus secundum substantiam exercendi potestatem habuerunt, forma accidentalis censeri debet.*

8 *Sed etsi legislator exprimat, & tali forma non observata, actus inutilis sit; plerumque tamen id intelligitur, & requiratur Iudicis sententia, cassantis actum.*

9 *Si actus aliquis (puta electio, alienatio rei ad Ecclesiam pertinentis) sine fraude, & iniuria illa celebratus est, prætermissa iuris solemnitate, in conscientia tutus est electus, rei Ecclesiastica emptor, &c. donec Iudicis rescindentis auctoritas accedat.*

1 **N**otandum est I. Nullum oportere esse dubium, quin supremus Legislator, cum Ecclesiasticus, tum secularis ob iustam causam ad bonum publicum pertinentem, possit personas quasdam ad contrahendum inhabiles reddere, quæ, seclula tali constitutione, adeoque naturali iure præcisè spectato, habiles essent: sicuti evenit in impedimentis matrimonij, contractu pupilli, &c. Potest etiam Legislator contractibus & testamentis certam formam & solemnitatem præscribere; quæ adeo ad eorum substantiam pertineat, ut absque ea contractus, & testamentum omni robore careant; etsi iure naturali præcisè spectato, firma ac valida forent: sicuti videre est in matrimonio clandestino. Denique potest Legislator contractum aliquem, iure alioquin naturali subsistentem, iusta de causa penitus prohibere; vel etiam, si ita velit, cassare, & infirmare: sicuti videre est in contractu censuali ex parte emptoris redimibili, qui licet à quibusdam Doctoribus tanquam immunis ab usura defendatur; tamen utroque iure prohibitus & cassatus est; de quibus proprijs locis plura dicuntur.

2 Notandum est II. Quinque ferme modis accidere posse, ut lex humana contractum vel quemvis alium actum improbet: Primò. Si lex contractum nec prohibeat, nec infirmet, eive resistat; sed solum non assistat, atque in foro externo nullam actionem tribuat, ob litium multitudinem declinandam: qua ratione pacto nudo leges nec assistunt, nec resistunt, sicut notavit Abb. c. quia plerique, de immunit. Eccles.

3 Secundò. Si lex prohibeat contractum, sed non infirmet, neque à Iudice infirmandum decernat. Nam multa fieri prohibentur, quæ, si fuerint facta, obtinent firmitatem, ait Papa Innoc. III. cap. ad Apostolicam, de Regul. Diciturque tunc contractus validus: sed non licitus, qua ratione Clericis negotiatio prohibita est: & matrimonium tempore interdicto, vel ante publicas denuntiationes; item post votum continentiae, aut contra fidem priorum sponsaliorum celebratum, illicitum est; sed validum. Quæ de re Gl. in reg. 64. in 6.

Quærit autem Doctores, si lex simpliciter prohibeat, nulla facta mentione infirmandi, utrum nihilominus infirmare seu irritare censetur? Communior & pro-

babilior est sententia negans apud Suar. lib. 5. de legib. cap. 25. & 29. Glof. margin. in l. pacta C. de pactis. Nam actum prohibere, eumque infirmare diuersa sunt; & inter se separabilia: ergo vnum ex altero colligi non debet, præsertim in materia odiosa, (qualis hæc est) non extendenda ultra proprietatem verborum. Et accommodari huc potest iuris regula 30. in 6. ex Vlp. ff. de reg. iuris. Semper in obscuris, quod minimum est sequimur.

Sed obijcitur. I. expressa constitutio Theodosij Imper. in leg. non dubium, Cod. de leg. Nullum pactum, nullam conventionem, nullum contractum inter eos videri volumus subsistentem, qui contrahunt lege contrahere prohibente. Et paulò est: Quæ lege fieri prohibentur, post si fuerint facta, non solum inutilia, sed pro infectis etiam habentur: licet legislator fieri prohibuerit tantum; nec specialiter dixerit inutile esse debere, quod factum est, Consentit. leg. iubemus 2. Cod. de sacro sanctis Eccles. §. sanè, eandemque Theodosij legem citat. Gregor. I. lib. 7. indict. 2. Ep. 7. & refertur causa 13. quæst. 2. cap. 13. Imperiali constitutione aperit sancitum est, ut quæ contra leges sunt, non solum inutilia, sed etiam pro infectis habenda sint. II. Obijcitur similis constitutio Antonini Imper. quæ refertur, leg. 6. C. pactis, Pacta, quæ contra leges, constitutionesque, vel contra bonos mores sunt, nullam vim habere indubitati iuris est. III. Obijcitur regul. 64. in 6. Quæ contrarius sunt, debent utique pro infectis haberi.

Ad I. Resp. objectionem illam convincere, ita observandum esse in legibus Imperialibus simpliciter prohibentibus, ob specialem illam Theodosij constitutionem: quam tamen Gregor. Papa ad canonicas sanctiones, aut aliorum regnorum leges non transtulit; sed solum epistola illa explicavit, qualem vim Imperiales constitutiones habere debeant, sicuti notavit Suar. lib. 5. de legib. cap. 29. num. 4.

Ad II. Non desunt, qui existiment idem ab Antonino, quod postea à Theodosio Imper. de Imperialibus legibus decretum fuisse: sed placet magis explicatio Glossæ in cap. ult. de pactis, Antoninum Imper. loquutum fuisse de pactis siue promissionibus aliquid agendi contra leges, vel bonos mores, seu civiles, seu naturales. Quod clarè indicat Greg. IX. in cit. cap. ult. Nam etiam secundum legitimas sanctiones pactum turpe vel rei turpis, aut impossibile, de iure, vel de facto nullam obligationem inducit. Veluti, si quis promittat testamentum non reuocatum, hominem necaturum, &c.

Ad III. Resp. Quod regula illa nimis generalis sit; sit, multasque intelligentias & limitationes admittat, sicuti videre est in Gl. adiuncta, & apud Suarez cit. cap. 29. num. 5. Qui rectè aduertit, dictam regulam Iudici præscribi: cuius proinde officium est inspicere, contra quale lus, & qua ratione contra illud actum sit: ut intelligat, validumne, an invalidum pronuntiare debeat.

Tertiò accidere potest, ut lex actum vel contractum aliquem per seipsam non infirmet, sed per sententiam Iudicis infirmandum decernat. Idque ordinariè ita censendum erit, si lex utatur verbis ad Iudicem propriè spectantibus: rescindatur, infirmetur, annulletur: neque aliud adiungat, ex quo maior vis legis intelligi possit. Puto autem in corpore iuris civilis raras reperiri huiusmodi leges: sed pleræque esse sententiæ latae, non tantum ferendæ, propter supra cit. Constitutionem Theodosij.

Quartò igitur accidere solet, ut lex contractum, testamentum, aliūmve actum ipso facto, & ante omnem Iudicis sententiam irritum reddat: consequenter verò iubeat Iudici, ut talem etiam per sententiam declaret. Neque tunc ad propositum nostrum refert, utrum actus ille etiam prohibitus sit, ideoque in pœnam criminis rescissus: an non prohibitus, ideoque non ob culpam, sed ob aliam causam infirmatus, seu irritatus.

Huiusmodi leges illæ censeri debent: quæ vel expressè decernunt, contractum ipso iure, ipso facto, ante omnem Iudicis



Iudicis sententiam, &c. irritum esse: vel aliud quipiam adiungunt, ex quo non minus id intelligi possit: v. g. nullam ex eo obligationem nasci: nullam actionem competere, sed datum restituendum esse: dominium non transferri, &c.

Est autem diligenter hic aduertendum, legem contractui, &c. duobus modis resistere, eumque infirmare posse: nimirum vel tantum civiliter: vel etiam naturaliter. Tunc lex contractum ipso facto infirmare dicitur civiliter tantum, si relicta eius obligatione naturali, neque impedita dominij translatione, actionem tamen in externo foro non tribuit: imò per Iudicis sententiam contractum, iuris quadam fictione, adeò infirmandum iubet, (omni eius effectu, fructu, quem contrahens inde perceperat, rescisso) ac si ab initio nullus, siue infectus fuisset: ad eum modum quo supra de bonorum confiscatione dictum fuit. Atque hoc sensu arbitror cit. l. Non dubium à Theodosio latam fuisse, sicut etiam notauit ibi Gl. margin. ver. pro infectis, & Suarez lib. 5. cap. 28. Exempla verò specialia multa afferri possunt. Sic enim ludus alearum infirmatur: sic contractus cum pupillo celebratus: sic testamentum minus solemne: sic vltima voluntas mulieris secundas nuptias sortitæ, & bona ex primo matrimonio obuenientia, non eiusdem matrimonij liberis suis, sed alijs relinquentis, iuxta l. 3. Cod. de secundis nuptijs. Sic alienatio prædij dotalis, etiam consentiente vxore à marito facta, Institut. Quibus modis alienare licet. Sic pœna sponsalibus adiecta, teste Sanch. lib. 1. de matrim. disp. 31. Sic donatio ultra 500. solidos facta sine insinuatione apud Iudicem: sic contractus graui metu initus, &c. per iudicem cassari debent, modo explicato. De quibus omnibus proprijs locis.

Alter verò, isque in ordine nostro quintus, atque plenissimus infirmandi modus est: si lex seu civilis, seu Ecclesiastica contractum, vel quemuis alium actum, ipso facto & ante omnem Iudicis sententiam, tam civiliter quam naturaliter irritum reddat: vt nullus inde effectus, vel obligatio, de in conscientia quidem foro, oriatur. Sic leges canonicæ infirmant matrimonium clandestinum: vel initum ex metu graui: vel cum impedimento dirimentis. Item professionem in Religione factam ante xvi. annis annu e ompletum; vel ante exactum annum probationis, per Trid. Constitut. sess. 25. c. 15. de regul. Lex civilis verò pari modo infirmat v. g. contractum pupilli cum tutore celebratum, vt neque naturalis obligatio inde oriatur, iuxta Glos. communiter receptam in l. 1. Cod. de inutil. stipulat. & colligitur ex l. pupillus, ff. de auctor. tutorum, & docet Sanchez lib. 6. de matrim. disput. 38. num. 25. Molin. tr. 2. disput. 224.

Quæri solet hic: Quibus indicijs aut regulis cognosci debeat, vt forma seu conditio, quam lex præscribit, substantialis sit; ita, vt nisi illa obseruetur actus irritus existat: an verò tantum accidentalis? Mihi placet doctrina Suarezij lib. 5. c. 31. num. 8. Si Legislatores, cum actum instituit, vel eius exercendi potestatem primitus confert, conditionem vel formam apponat, cum qua exerceri debeat: censetur forma substantialis. Exempla habemus: I. in formis Sacramentorum, ex Christi Domini institutione, requisitis. II. In formis sacramentalium, puta benedictionum, consecrationum, ex Ecclesiæ institutione requisitis, de quare idem Suar. cap. 32. num. 6. III. In iurisdictione alicui sub certa forma vel procedendi modo delegata: nam tunc forma non datur Iudici, potestatem iam habenti; sed ipsi iurisdictioni veluti limitatio adiungitur, quam si commissarius seu delegatus prætermittat, excedit limites commissæ potestatis, nihilque efficit: quare de re videri potest Gl. in Clem. 1. ver. inhibemus, de iure patronatus, Nau. c. 27. num. 37. Suar. cap. 31. num. 9. Quare, si Papa tibi committat, vt hominem post trinam monitionem excommunices, censetur forma & conditio substantialis: Quamuis in Iudice ordinariam potesta-

tem habente accidentalis tantum sit, cuius prætermissio excommunicationem illicitam, non inuvalidam reddit, arg. ducto per sensum contrarium ex cap. Romana, de sent. excomm. in 6. iun. Glos. ver. iniustas, & docet Couar. in cap. alma, p. 2. §. 9. num. 7. & 8. Auila p. 2. c. 5. disput. 1. dub. 9.

Sin verò legislator formam aliquam vel modum præcipiat obseruari ab ijs, qui iam antea actus, secundum substantiam, exercendi potestatem habuerunt, forma accidentalis tantum censeri debet: Nisi exprimat, velle se, vt tali modo seu forma non obseruata, actus inutilis sit, pro infecto habeatur, vel aliquid simile adijciat, ex quo eius mens cognosci possit.

Hoc ipso tamen casu dubitari potest, Vtrum id intelligendum sit etiam in conscientia foro, & ante omnem Iudicis sententiam; an, posteaquam Iudex contractum, aliumue actum, vnâ cum effectu eius, penitus iuxta legem cassauit? Respondendū videtur, Si neque ex materia legis, neque ex verbis, quibus legislator usus fuit, satis appareat, mentē eius fuisse, actum etiā in conscientia foro irritum reddere, adeoque perseverante dubio, posteriorem, tanquam benigniorem legis sensum, præferendum esse. Atque ex hoc principio facilius defenditur doctrina Abb. cap. quia plerique num. 31. de immunit. Eccles. Innoc. ibidem, Syluest. ver. alienatio, quaest. 13. Nauar. de spol. cleric. §. 2. num. 6. Rodriq. tom. 1. regul. quaest. 27. art. 10. Sa ver. contractus (puta electio, alienatio rei ad Ecclesiam, ad minorem pertinentis) sine cuiusquam fraude, iniuria, celebratus sit, prætermittit iuris solemnitate; in conscientia tutum esse, qui electus est; vel qui rem, Ecclesiæ, minoris emit, donec iudicis rescindentis auctoritas accedat.

## CAP. XVII.

## De lege Cæsarea, infirmante vltimas defunctorum voluntates non solemnes.

## S V M M A R I V M.

1. *Ciuium Legislatorum, vltimas minus solemnes voluntates cassantium, intentio fuisse videtur, illis resistere civiliter tantum, relicta interim obligatione naturali, quamuis inefficaci, quippe quæ per exceptionem ciuili constitutionis elidit possit.*
2. *Iudex in externo foro hereditatem adiudicari debet heredi ab intestato, eumque liberum pronunciare à soluendis legatis ex testamento minus solemnibus: licet cerium sit, aliam fuisse testatoris voluntatem.*
3. *Neque in conscientia foro heres ab intestato solvere tenetur legata ex testamento imperfecto: ijs semper exceptis, quæ ad pias causas sunt.*
4. *Si heres in testamento non solemnibus institutus, vel legatarius rem sibi relictam sine vi, fraude nactus est, ius retinendi habet, donec ciuili conditione indebiti ab ipso repetatur.*
5. *Si heredis fides defunctus commiserat, & aliquam rem alteri tradat, absque alia solemnitate, obligationem contrahit.*
6. *Idem homo vnus testamenti tanquam minus solemnibus cassationem petere: & postea ex alio minus solemnibus hereditatem, vel legatum capere non prohibetur, si nihil contra ipsum opponatur.*
7. *Heres institutus in testamento minus solemnibus, non potest occultâ compositione &c. si hereditas in externo foro heredi ab intestato adiudicata est.*
8. *Forum externum, si iustum est, non repugnat foro conscientia.*

Quæ super. cap. summam dicta sunt, pleraque longiorem, propriamque discussionem requirunt, alibi faciendam: hoc autem loco animus est, traditæ doctrinæ praxim in vltimis voluntatibus, veluti in paradigmate, ostendere. Quæstio celebris est; Si certò constet, heredem vel legatarium à defuncto institutum fuisse in testamento minus solemnibus, id est, destitutum ea forma siue



solemnitate, quam ciuilia iura requirunt; vtrum nihilominus hereditatem, vel legatum accipere, aut petere possit; & vtrum hæres ab intestato illi dare, vel relinquere debeat?

Prima sententia est Abb. cit. cap. quia plerique, num. 43. & in repetit. cap. cum esses, num. 8. & 15. de testament. Med. in fine quæst. 33. de reitut. Leges ciuiles cassantes testamenta minùs solemnia, fundari in præsumptione cõmissæ fraudis: quare si constet, eam fuisse testatoris voluntatem, nullamque interuenisse fraudem, tunc hereditatem sine legatum omni iure tam ciuili, quam naturali debitum esse; ob generalem regulam, *Leges in præsumptione fundatas vim suam amittere, si de contraria veritate constet.*

Alter sententia est Molina tom. 1. tr. 2. disput. 81. Canisij in regulam 13. in 6. & aliorum: Ciuiliū legislatorum mentem non fuisse, testamentis minùs solemnibus resistere: sed solum non assiltere, siue in externo foro actionem denegare, ad eum modum, quo super. c. d. promissione simplici, seu pacto nudo dictum fuit. Quare dicendum est, ait Molina, hæredem ab intestato, qui sibi persuadet, vel merito persuadere debet, voluntatem testatoris fuisse illam, quæ in testamento minùs solemniter explicatur; mortaliter peccare, si vel petat sibi adiudicari hereditatem alteri relictam, vel non soluat legata alijs relictæ, probatque ex l. ult. Cod. de Fideicom.

Tertia sententia est Couar. in cap. cum esses, num. 7. de testament. Vsq. in moral. tr. de testament. cap. 3. num. 4. Salas disp. 16. sect. ult. num. 52. Ciuiliū legislatorum mentem fuisse, ad euitandas fraudes; quæ sæpe in vltimis voluntatibus contingere solent, penitus auferre ab hominibus potestatem testandi, præter formam sine solemnitate ciuilibus legibus præscriptam: vt proinde testamenta, vel codicilli non solemnnes, omni iure, etiam naturali, pro infectis haberi debeant; ex quibus nemo relictam sibi hereditatem, legatumque, seu in externo, seu in conscientia foro exigere, vel accipere possit, illis exceptis, quæ ad pias causas pertinent, quippe quibus lex ciuilis nihil præiudicij afferre potest.

Quarta sententia est Soril. lib. 4. de iust. quæst. 5. art. 3. Bannes 2. 2. præambulo ad quæst. 62. Sa ver. contractus num. 1. ver. hereditas, num. 32. ver. testamentum, num. 3. Victor. apud Molin. l. c. & aliorum apud Couar. l. c. num. 10. Ciuiliū Legislatorum mentem fuisse, testamentis alijsque vltimis voluntatibus minùs solemnibus resistere tantum ciuilitè, tollendo actionem obligationemque ciuilem, relictæ tamen obligatione naturali, licet aliquantulum inefficaci; quippe quæ exceptione ciuilis constitutionis elidi potest.

Hanc ego quartam sententiam probabilem, & in praxi expeditam ac tutam esse iudico; & secundum eam tria assero: I. Si controuersia hæc ad forum ciuile deferatur, Iudex debet hereditatem adiudicare hæredi ab intestato; eumque liberum pronuntiare à soluendis legatis ex testamento imperfecto: etiamsi constet contrariam fuisse testatoris voluntatem. Est contra 1. & 2. sententiam; sed probatur. Iudex non de legibus, sed secundum leges iudicare debet, iuxta cap. 3. d. 4. ex August. cap. 31. de vera relig. Imperfectum autem testamentum secundum leges nullum est, §. ex eo Instit. Quibus modis testam. infirmetur, & C. de testam. *Ex imperfecto testamento voluntatem tenere defuncti nolumus*, & l. hac consultissima, C. cod. non subscriptum à testibus, & non signatum testamentum pro infecto haberi conuenit. Ergo iudex ita iudicare debet.

Dico II. neque in conscientia foro hæres ab intestato tenetur relinquere hereditatem; vel soluere legata ex testamento minùs solemniter, ijs exceptis, quæ ad pias causas sunt. Est itidem contra 1. & 2. sententiam; sed præter alios traditur à Suarezio lib. 3. de legibus, c. 32. num. 7. & sequitur ex priore assertione. Nam Iudicis sententia, vt iusta sit, non debet repugnare iuri naturali: repugna-

ret autem iuri naturali ea Iudicis sententia, per quam hæres in conscientia legata v. g. soluere efficaciter obligatus, ita vt nulla exceptione se tueri posset, à solutione liber pronuntiaretur: Ergo hæres non est in conscientia obligatus. Quare esto hæc generalis regula: *Qui in foro externo iusta & recepta legis beneficio se tueri potest, quo minùs soluat: is neque in conscientia foro de ea re conuenitus, soluere ex iustitia obligatus est.*

Dico III. Si hæres in testamento minùs solemniter institutus; vel legatarius rem sibi relictam absque vi, fraude nactus fuit; ius retinendi habet, donec ciuili condictione indebiti (id est, tanquam ciuilitè non debitum) ab ipso repetatur. Est contra tertiam sententiam; sed præter alios traditur à Soto, Sa l. cc. Nauar. lib. 3. consil. 1. de testam. edit. 2. & videri potest Syl. ver. hereditas, 3. quæst. 7. Ratio autem est, quia manet obligatio naturalis, quæ per se sufficiens est ad dominium transferendum. Cui doctrinæ consentit Gl. in l. cum quis, C. de iuris & fact. ignorantia, & Legistæ Instit. de actionib. §. de constituta, cum aiunt, legatum ex testamento imperfecto, cum naturaliter debitum sit, per constituti simplicem promissionem firmari, vt actionem pariat, etiam in ciuili foro.

Ad 1. sentent. fundamentum respondeo; Legem, quæ ex generali præsumptione fraudis interdum interuenientis tanquam causa impulsiva, aliquid decernit, non cessare, etsi in casu particulari omnis suspicio fraudis absit: sed eam tantum legem in præsumptione fundatam esse, & cognita veritate cessare, quæ statuit ac iubet Iudici, vt secundum fraudis præsumptionem à iure factam, in quouis particulari casu sententiam ferat, vt infra iterum dicam. Lex autem Cæsarea infirmans testamentum minùs solemnne prioris, non posterioris generis est.

Ad 2. sentent. fundamentum Resp. Lege illa vltim. Cod. de fideicom. hoc specialiter constitutum esse, si hæres fateatur suæ fidei commissum à defuncto, vt hereditatem vel legatum alteri restituat, ciuili quoque iure ad id cogendum esse: Eademque ratio est, si id per duos testes probari possit, sicuti notauit Sa ver. testamentum, num. 14.

Ad 3. demum sententiæ fundamentum patet responsio ex dictis: Leges Cæsareas testamentis minùs solemnibus resistere ciuilitè tantum, & non naturaliter.

Corollarium I. Idem homo modò vnus testamenti, 6 tanquam minùs solemniter, cassationem petere potest; vt ipsemet ab intestato succedat: Alias verò, si ipse institutus sit, vel ei quippiam relictum in testamento minùs solemniter, hereditatem vel legatum capere & retinere potest, si nihil contra eum excipiat. Hæc enim duo, licet ex diuersis, tamen non oppositis principiis oriuntur. Nam prius illud testamentum oppugnauit, & cassari fecit, ob beneficium legis ciuilis, quæ talia testamenta à iudice infirmanda esse decreuit. Ex altero autem minùs solemniter testamento hereditatem, aut legatum cepit, secutus voluntatem defuncti, secundum iuris naturalis æquitatem, si hæres non opposuit beneficium legis rescindentis; quippe quod ijs tantum prodesse debet, qui eo vtuntur. Confirmatur à simili; Si minor XXV. annis absque tutoris auctoritate contraxit, potest excipere, & opponere beneficium legis ciuilis, quo minùs contractum seruare teneatur: Porro, si idem homo temporis progressu, cum a tate maior factus est, similiter contractum ineat cum minore, non prohibetur ab ipso petere & accipere solutionem, si is nulla se exceptione legis defendat. Ratio horum est: Quia leges ciuiles infirmantes contractum pupilli, vel minùs solemniter testamentum, non omnino auferunt obligationem naturalem; quamuis reddant minùs efficacem, dum beneficium exceptionis tribuunt: Sin verò pars vna nihil excipiat, aut opponat, altera iure naturali vt non prohibetur: quæ doctrina plenius intelligitur lib. 3. tractat. 4. c. 9. num. 5.

Corol.



- 7 Corollarium II. Non arbitror probabilem sententiam, quam defendere videtur Molina tom. 1. tract. 2. disput. 81. §. quod si hæc fuit: Hæredem in minùs solemnè testamento institutum: legatarios item ac fideicommissarios in eo nominatos: posse occultam compensationem accipere, si hæreditas in exteriori foro hæredi ab intestato adiudicetur. Si enim iusta fuit Iudicis sententia hæreditatem hæredi ab intestato adiudicantis, sequitur quod hæres ab intestato ius habeat eam accipiendi, possidendi que. Si autem hæres ab intestato hæreditatem iustè possidet, sequitur, quod hæres minùs solènter institutus, ac legatarius iniuriam illi inferant, siue iure acquisito spolient, quando hæreditatem, aut partem hæreditatis illi clam auferunt. Quod autem Iudex iustè iudicet, infirmando testamentum non solemnè, supra probatum est. Et confirmatur: Quia iudex in quæstione inter Doctores controuersa debet consuetudinem seu stylum curiæ sequi: cum consuetudo sit optima legum interpres; imò verò stylus curiæ ius faciat: Est autem communis praxis tribunalium, saltem in Imperio, vt testamenta non solemnè cassentur, & hæreditas adiudicetur hæredi ab intestato: ergo id iustè fit, consequenter hæredi ius acquiri. Interim fateor, si stylus alicuius curiæ esset, vt hæreditas conferretur secundum voluntatem defuncti, etiam ex testamento non solemnè: tunc, cessante scandalo, posse institutum hæredè, vel legatarium clanculum accipere, quod sibi defuncti voluntate relictum esse, indubitè persuasum habet: esto, in externo foro id probari non possit. Quia quando in externo foro alicui causa abiudicatur solum propter defectum probationis, tunc pars litigans, si veritatè perspecta habeat, non tenetur se in conscientia conformare sententiæ, nisi propter scandalum vitandum. Alioquin verò, si causa aperta sit, nullaque probatione indigens: tunc Iudicis sententia, si iusta sit, iuri naturali ac conscientiæ repugnare non potest, vt per se patet. Quamobrem hanc regulam dare possumus, Quod forum externum, si iustum est, non repugnat foro interno conscientiæ, nisi propter defectum probationis, adeoque per accidens ob ignorantiam. Id etiam tradidit Sanchez libro 1. moral. cap. 10. num. 18. & lib. 7. c. 25. numero 8.

## CAP. XVIII.

## De interpretatione Legum.

## SUMMARIUM.

- Legis interpretatio alia est necessaria: alia doctrinalis tantum. Illa vel est generalis, siue erga omnes subditos, cuiusmodi interpretatio ad Legislatorem siue Principem pertinet: vel est particularis, quæ ad inferiorem iudicem spectat.
- 1 In dubio præsumptio esse debet pro lege communis: quod verò à communi iure deficit, aut exorbitat strictè interpretandum.
- 2 Correctio legum, quantum fieri potest, vitari debet. Excepti à regula firmat regulam in alijs.
- 3 Leges penales, & alia, quæcunque odiosa sunt, strictam interpretationem postulant.
- 4 Verba legum penalis intelligenda sunt cum effectu.
- 5 In legum interpretatione potius adhaerendum est menti, quam verbis legislatoris.
- 6 In dubio verba legis, alteriusve dispositionis accipi debent secundum communem acceptionem, quæ etiam proprietati præferenda est.
- 7 Propria verborum interpretatio eligenda potius est, quam impropria: nisi ad hanc recurrere necessitas cogat.
- 8 Lex generaliter, vel indefinitè loquens omnia significata propria comprehendere censetur.
- 9 Enunciatio indefinita in communi locatione æquiualeat vniuersali.
- 10 In materia fauorabili ac nemini præiudicante, nisi quid obstat, ultra communem & usitatam verbi acceptionem interpretatio fieri potest.
- 11 Interdum lex ultra verborum significationem, ob rationis identitatem, extenditur ad alios casus & personas: si præsumi possit, Legislatoris mentem fuisse egs. etiam comprehendere.
- 12 Talis extensio ob similitudinem rationis fieri non debet in legibus odiosis: nisi necessitas cogat, ad seruandam iustitiam legis.
- 13 Statutum de vno correlatorum: censetur etiam statutum de altero.
- 14 Quando duo in iure æquiparantur, quod de vno constituitur, de altero etiam constitutum censetur.
- 15 Lex interpretans non minùs obligat, quàm interpretata.
- 16 Si Iudex casum controuersum in iure decusum non habeat, à similibus argumentum ducere, & ita ius dicere debet.

Notandum est primò: Lex alia est communis, alia limitans, alia exorbitans, alia corrigens. Iterum alia lex est fauorabilis, alia odiosa & interdum pœnalis.

Lex communis dicitur, quæ vti verbis, ita & sensu vniuersa complectitur, & vniuersorum respectu. Lex limitans, per quam à communi lege exceptio fit, vt in certo casu locum non habeat. Exorbitans, quæ à communi lege, ob fauorem causæ, vel personæ, aliquos eximit: diciturque ius speciale ac priuilegium. Differunt igitur lex limitans, & exorbitans: quod illa à communi iure certum casum excipiat comparatione omnium, hæc verò certum duntaxat personarum genus à lege communi simpliciter eximat.

Correctoria autem lex dicitur, per quam ius commune, vel in totum, vel ex parte simpliciter aboletur. Nam lex noua veteri derogat, si simul stare non possint.

Lex fauorabilis vocatur, quæ in personæ, vel Communitatis fauorem lata est: Lex odiosa, quæ in detrimentum personæ, vel personarum generis lata est. Lex pœnalis, quæ pœnam transgressori decernit. Etsi autem omnis lex pœnalis odiosa sit: saltem formaliter, quæ talis: (nam sæpe lex pœnalis quatenus vergit in vtilitatem animæ, in fauorem Ecclesiæ, vel boni publici, inter fauorabiles: numerari potest, teste Syl. ver. lex, quæst. 19.) Non autem vice versa, omnis lex odiosa etiam pœnalis est. Præterea, an lex fauorabilis sit necne, estimari debet ex principali intentione legislatoris, vtrum ea fuerit, vt alicui gratiam & fauorem præstaret, licet secundariò in alicuius damnum cederet. Nam ex primario siue considerata est dispositio.

Notandum secundò: Interpretatio est Verbi, vel sententiæ obscuræ per aliud declaratio, teste Carbone lib. 11. de leg. disp. 1. Legis autem interpretatio alia necessaria est; alia non necessaria: illa iterum vel generalis, vel particularis est. Generalis ac necessaria interpretatio legis ad ipsum Legislatorem, eiusve successorem pertinet: habet enim & ipsa legis vim: Quare eiusdem est legem authentice interpretari, cuius & condere, sicuti constat ex l. 9. & seq. C. de leg. c. per venerabilem, Qui filij sint legitimi, &c. inter alia, de sent. ex com. ibi, vt vnæ ius prædit, etiam interpretatio procedat. Quamobrem in l. 1. ff. de constit. Principum, inter modos ferendi leges numeratur, quod Princeps cognoscens decreuit, videl. dando definitinam sententiã, ait. Gl. Et in l. ult. de leg. Si Imperator partibus sententiã dixerit omnes omnino Iudices sciunt, hanc esse legem non solum illi causæ, per quam producta est, sed & omnibus similibus. Particularis & necessaria legis interpretatio ad iudicem etiã inferiorè spectat. Nā Iudex est iuris interpres in causâ dubia: Nisi ardua sit, vt eã ad Principem remittere necesse sit. Dicitur autè hæc iudicialis interpretatio necessaria: quia iuxta eã Iudex sententiã fert, cui parere oportet tanquã vim habenti particularis legitimi præcepti. Interpretatio non necessaria, sed doctrinalis siue scholastica propria DD. est, quæ coniecturam adfert, non necessitatem: nisi omnium DD. consensus.

His consentit doctrina Abbatis in c. 1. n. 18. de post. Prælat. vbi ponit quatuor species interpretationis. Vna est à Principe, & hæc necessaria ac generalis. Altera à consuetudine habente vim legis, quæ itidem necessaria &



generi illis est comparatione eorum, apud quos consuetudo viget. Tertia à iudice, necessaria quidem, sed particularis id est, tantum in ordine ad partes, nam alij non tenentur interpretationem sequi. Quarta est doctrinalis, non necessaria. Vide etiam Suarez lib. 6. capite 1. de legibus.

- 2 His ita positis, variae regulæ ex Doctoribus subijciendæ sunt: Primo. In dubio fauor & præsumptio esse debet pro lege communi: neque sine necessitate ab ea recedendum est. Quod verò à communi iure deficit, vel exorbitat, strictæ interpretationis esse oportet: neque producendum ad consequentias, iuxta l. 14. ff. de leg. & l. 1. ff. de Constit. Princip & reg. 28. in 6. iunct. Gl. Correctio quoque legum non facile præsumenda est, sicuti indicatur in c. Ecclesia, 2. de elect. & in l. præceptum, c. de appellat. Quicquid in posteriore lege specialiter non fuerit expressum, id veterum legum, constitutionumque regulis relictum esse, intelligendum est. Quapropter si constitutio Principis posterior prioribus contraria, iisque derogare videatur: videndum est, utrum per casuum diuisionem, aliamve interpretationem conciliari possint. Nam in iuris concordantia debent, eorumque correctio, quatenus fieri potest, vitanda, c. cum expedit, de elect. in 6. Lex limitatoria verò, si certum casum à communi lege excipiat, confirmat potius eandem in reliquis, iuxta dictum Gl. in l. 5. ff. de legibus exceptio à regula firmat regulam in aliis. Lex quoque poenalis, & omnis alia odiosa in dubio strictè interpretanda est, nec facile extendenda ultra casum, vel personas expressas, sicut constat ex l. 42. ff. de poenis: Interpretatione legum poenæ mollienda potius, quam exasperanda. Consentit reg. 49. in 6. In poenis benignior est interpretatio facienda. Et reg. 15. in 6. Odia restringi & fauores conuenit ampliari. Vide Nau. in c. interpretatione, d. 1. de poenit.

Ea propter verba legis poenalis intelligi debent cum effectu, teste Gl. in c. hæc autem verba, d. 1. de poenit. v. g. si censura canonica, vel irregularitas homicidæ decreta sit, eam non incurrer, qui occidendi proposito facinus aggressus est: nisi etiam effectus mortis sequatur: Item, qui actum, v. g. contractum inualidè celebrat, non videtur incurrere poenam decretam contrahenti: nisi verba legis prohibentis aliud expressè significant: qua de re videri potest cit. Gl. c. hæc autem verba, ibi. Nau. & in c. interpretatione, ead. d. 1.

Secundo: In legem interpretatione potius sequenda est mens Legislatoris, quam verba, iuxta l. 17. ff. de legibus Scire leges non est earum verba tenere: sed vim ac potestatem, Et l. scire, §. aliud, ff. de excusat. Sed etsi maxime verba legis hunc habeant intellectum: tamen mens legislatoris aliud vult. Ratio est: quia mens & voluntas legislatoris est veluti spiritus & anima legis, vnde omnis vis obligandi per verba, tanquam instrumentalia signa, prouenit. Hinc Papa Celestinus in c. humane aures, 22. quæst. 5. Non debet aliquis verba considerare, (nudè & simpliciter) sed intentionem ac voluntatem: quia non debet intentio verbis deservire: sed verba intentioni. Idem habetur in c. in his, de verb. signif. Vlpian. quoque in l. 30. ff. de legibus ait: Erans legi sit, ubi quod fieri noluit, fieri autem (expressè) non vetuit, id sit: & quod distat πῆτορ ἀπὸ διαφοράς, (id est, verbis expressum à mentis conceptu) hoc distat fraus ab eo, quod contra legem sit. Consentit l. non dubium, C. de legibus. Non dubium est in legem committere eum, qui verba legis amplexus, contra legis nititur voluntatem. Porro mens & voluntas legislatoris partim ex materia legis: partim ex circumstantijs, præcipue verò fine, causa, sine ratione legis ferendæ intelligi poterit. Quod pertinet iuris regula 68. ff. Quoties idem sermo duas sententias exprimit, ea potissimum accipietur, quæ reigerenda aprior est: Et illud S. Hilarij lib. 4. de Trinit. quod refertur in c. intelligentia, de verborum significatione. Intelligentia dictorum ex causis est assumenda dicendi: quia non sermone res, sed sermo est rei subiectus, siue inferuiens. Sic Apostolus 1. Cor. 9. in illo Deute-

ron dicto. Non alligabis os boui trituranti. considerato fine ac proposito Legislatoris: Nunquid de bobus cura est Deo? Spreta proprietate literæ, intelligentiam, ac veluti spiritum legis antetulit. Finis autem ac intentio Legislatoris plerumque in præmio præponitur: in Principum verò rescriptis ex postulatione cognoscitur: nam interrogationi responsio consentit. Adde quod dicitur in libro 24. ff. de leg. Incivile essent si tota lege perspecta, una eius particula proposita, indicare, vel respondere. Sed textus ipse sermonis à præcedentibus & consequentibus consulendus est, ut videamus, cuius sententia ex pluribus quæ se ostendant ferat suffragium, ait S. August. libro 3. de doctrina Christiana, c. 2. Vide Nau. lib. 5. conf. 6. numero 9. de hæret. edit. 2. Syl. ver. lex, quæstione 16. & 17. Azor tom. 1. libro 5. capite 16. quæstione 9. Rebel. in Prælud. iust. quæst. 6.

Tertio: In dubio, si aliud nil obstat, verba legis, alteriusve dispositionis intelligenda sunt secundum communem usum, & acceptionem, quæ etiam proprietati præferenda est, sicuti docent Legistæ in cit. lib. non dubium, Bartolus in l. Labeo, ff. de suppl. legata, Canonistæ in præmio decret. vbi Abb. Panorm. & in c. inter corporalia, num. 17. de translat. Episc. Alph. à Castro l. 1. de lege poenali, c. 7. docum. 1. Suar. l. 6. de leg. c. 1. n. 9. Sa verb. interpretatio, n. 15.

Deinde verò propria verborum significatio antepone- 6 da est impropiæ, iuxta l. non aliter, ff. de legatis 3. & tradit Nau. in Gl. c. hæc inter verba, d. 1. de poenit. num. 10. Et verba ad improprios sensus trahi non debent, nisi ratio vel necessitas cogat. Qua de re Abb. in c. ad audientiam, num. 2. de decim. Quatuor autem potissimum causæ sūt, quæ vel à communi & visitatā, vel à propria verborum acceptione recedere cogunt: I. est, quam supra dixi, si de mente Legislatoris aliunde certior coniectura accipi possit, argum. cit. l. 69. de legat. 3. Non aliter à significatione verborum recedi oportet, quam cum manifestum est, aliud sensisse testatorem. II. Si significatio verbi visitata, vel propria absurditatem contineat: Nam, ut dicitur in l. 18. ff. de legibus, Benignius leges interpretanda sunt, quo voluntas earum conseruetur. Et in l. seq. In ambigua voce legis ea potius accipienda est significatio, quæ vitio caret: præsertim cum etiam voluntas legis ex hoc colligi possit. Vid. Syl. quæst. 20. III. Si lex secundum propriam verborum acceptionem repugnaret, ac derogaret antiquioribus iuribus, trahenda potius est ad significationem impropiam, sicuti docet Abb. c. causam quæ, num. 1. de rescript. Gutierrez, lib. 3. præct. 99. q. 13. num. 34. Sanch. lib. de matrim. disp. 17. num. 6. Quia correctio iurium inuehenda non est, nisi necessitas cogat, arg. l. præcipimus, in fine, C. de appellat. Hanc tamen doctrinam bene explicat Suarez lib. 6. c. 27. num. 11. tunc veram esse, si significatio impropria sit etiam in communi, vel saltem iuridica usurpatione: cuius exemplum, habes inc. cum olim, iunct. Gl. vlt. Abb. n. vlt. de sent. & rei iudic. Alioquin verò à propria & communi significatione verbi recedendum non videtur, nisi ex legis abrogatione aliud absurdum seu incomodum sequatur. IV. Si recepta consuetudo aliter legem interpreteretur, ea interpretatio præferenda erit, iuxta l. 23. ff. de leg. Minime sunt mutanda, quæ interpretationem certam semper habuerunt, & l. 37. ff. eod. Si de interpretatione legis queratur, in primis inspicendum est, quo iure civitas retrò in eiusmodi casibus usa sit. Optima enim legum interpretatio consuetudo: cōsentit c. cum dilectus, de consuetudine. Eademque ferme, quæ diximus, in testamenti dubij interpretatione locum habere debent uti videre licet apud Clarum lib. 3. recept. q. 76. vbi ait, in primis considerandum, quanam fuerit mens & voluntas testatoris, deinde mos regionis, in qua versatus est, præterea qualitas personarum, charitas & necessitudo. Itē ex præcedentibus & consequentibus verbis coniciendum, quid testator senserit: & si vna parte testamenti reperiatur verbum ambiguum, interpretandum est eo sensu, quo clarè positum repe-



reperitur in altera testamēti parte. Denique in dubio præsumi debet mentem testatoris conformem fuisse dispositioni iuris, præsertim particularis loci, cuius iurisdictioni testator subiectus erat.

Quarto, lex generaliter, vel indefinitè loquens omnia significata propria comprehendere censetur. Nam *verba generalia generaliter accipienda sunt*, aiunt D D. in l. 1. ff. de legatis præstandis, & in l. prospexit, qui & à quibus manumissi. Et, *ubi ius non distinguit nec nos distinguere debemus*, ait Bart. in l. de pretio. ff. de Publ. & c. Quare rectè notat Suarez libro 6. c. 2. num. 3. Enunciationem legis indefinitā, ob sui indifferentiam, & communem loquendi modum, æquivalere uniuersali: quod non tantum de affirmatiua, sed multò magis de lege negatiua ac prohibente accipiendum est: quandoquidem *negatio quicquid post se reperit, tollit, eiusque oppositum adstruit*: quamobrem à Dialecticis *malignantis nature* esse dicitur.

8 Cæterum, cum duplex sit significatio propria; vna naturalis siue communis; altera civilis, & quali propria arti iuridicæ: v. g. vocabulum *mors* apud Iureconsultos non tantum naturalem, sed etiam civilem mortem significare solet: & nomen *filij* interdum etiam adoptiuum: nomen *legitimi*, etiam legitimatum quandoque comprehendit: hæc distinctio obseruari debet: quod in materia fauorabilis, ac nemini præiudicante amplior interpretatio fieri possit, si aliud nihil obstat: adeo, vt lex fauorabilis, aut Principis privilegium de filij absolute statuens, comprehendat etiam nepotes; item filios adoptiuos, ac legitimatos qua de re vide Suarez cit. cap. 2. In alijs verò legibus, quæ specialiter fauorabiles non sunt, ordinariè verba ultra communem & vsitatam acceptionem ad civilem extendi non debent, teste eodem Suar. num. 3. Exempli causa. Statutum de filijs comprehendit quidem etiam filias: quia vox filiorum communi etiam & vulgari vsurpatione pro vtroque sexu accipitur; non tamen comprehendit nepotes, neque filios adoptatos. Cæterum, si lex odiosa sit, vel iuris antiqui correctoria, aut exorbitans: & verba secundum communem loquendi proprietatem, tam amplam, quam restrictam acceptionem patiantur; v. g. nomen filiorum, quod interdum masculinum sexum duntaxat, interdum vtrumque comprehendit; tunc stricta interpretatio præferenda erit. Nisi identitas rationis persuadeat, eandem de omnibus fuisse Legislatoris voluntatem, vt mox dicam.

9 Quinto. Ultra omnem verborum significationem quandoque lex per interpretationem extendenda est ad eos etiam casus personas, &c. quos ob identitatē rationis adæquatè credibile est legislatores etiam comprehendere voluisse. Quæ est communis Doctorum sententia, consentiens ijs, quæ supra dicta sunt num. 2. Dixi autem imprimis, Ad talem extensionem faciendam necesse esse, vt ratio, quæ Legislatorem mouit ad id quod in lege sua expressit, statuendum, adæquatè siue per omnia etiam locum habeat in alijs casibus per verba non expressis: nam si aliqua ratio disparitatis assignari possit, cur Legislator vnum casum, vel personarum genus sua lege comprehendere voluerit, atque idcirco etiam verbis expresserit: non autem alios casus vel personas: tunc interpretatio merè extensiva fieret non tantum ultra verborum proprietatem sed etiam probabiliter ultra mentem Legislatoris, per verba expressam, ac limitatam. Id autem nunquam permisum est: eò quod mens ac voluntas Legislatoris sit veluti anima legis, per verba, tanquam sensibilem materiam, indicata: à quibus proinde sine necessitate recedendum non est iuxta l. non aliter, ff. de legatis, 3. & libro 1. §. si is qui ff. de exercitoria actione, ibi, *in re dubia melius est verbis edictis seruire*. Et accommodati huc potest, quod dixit Innocent. III. capite 2. de translationis. Episcopi si (canon) *idem fieri voluisset, poterat expressisse*. Et quod Glossa ibidem ait ver. non inueniunt: *Intelliguntur concessa, quæ expresse non sunt prohibita*. Vide Suarezium libro 6.

capite Tiraquel. in libro si vnquam, ver. libertis, Cod. de reuocat. donat. Rodriquez tom. 1. regul. quæstione 67. articulo 1. & 2. Accedit magno argumento esse debere, quia legislator vnum specialiter expressit, alia excludere voluisse. Quare modus ille argumētandi in moralibus valde frequens & efficax esse solet, qui dicitur à *speciali*, vel *ad sensum legis contrarium*. Quod enim de vno specificè affirmatur, de contrario siue opposito negari videtur: & quod de vno negatur, de contrario affirmari, sicuti docent Doctores in capite nonne, de præsumpt. & Glossa vltima capite de multa, de præbend. Sa. per. interpretatio-  
ne n. 13.

Deinde dixi, *credibile sit Legislatorem alios quoque casus &c. comprehendere voluisse*. Tali enim præsumptione non existente, neque ob eandem, vel parem, neque ob maiorem rationem extensio legis à priuato homine fieri potest. Quia, vt supra dixi, in dubio recedendum non est à verborum proprietate; quippe quæ internæ Legislatoris voluntatis interpretis est. Licet autem eadem, par, vel maior ratio legislatores merito mouere potuisset ad idem, de alijs quoque casibus aut personis statuendum; potuit tamen etiam eum non mouisse, sed pro sua libertate non de omnibus, sed de vno aut quibusdam duntaxat statuere voluisse: atque hanc eius fuisse mentem in dubio præsumi debet, quam ipsa verborum proprietas exprimit. Exempla habes: I. Si opus aliquod sub canonica censura v. g. excommunicationis prohibitum sit; adiecta causa, quæ pariter, vel magis etiam locum habet in alio delicti genere; non tamen inde sequitur, in alio illo genere delinquentes eandem censuram incurrere. II. Si Papa vni v. g. Mendicantium Ordini quippiam prohibuit, addita causa, quæ equè eum mouere potuisset, ad idem etiam alijs Mendicantium, Ordinibus prohibendum: non ideo tamen talis extensiva interpretatio facienda est, teste Rodriquez citato, articulo secundo, conclus. 2. argumen. capite non solum, iuncto c. sequent. de Regul. in 6. vbi id notat. Gloss. ver. prorogamus. III. Habemus eam in c. 1. de tempor. ordinatione vbi præceptum Italiae Episcopis imponitur de non ordinandis Clericis Ultramontanis, absque dimissorijs suorum Episcoporum. Vbi Glossa resoluit eam constitutionem (intelligente ante Tridentinum concilio) extendendam non esse ad Episcopos Germaniae, quasi & ipsis Italos peregrinos suo arbitrio ordinare permillum non sit. Nam potuit esse ratio, quæ sæpe nos latet, cur legislator vnum genus causarum, personarum, &c. non item aliud simile sua lege comprehendere voluerit, sicuti expendit Suar. cit. c. 3. n. 1. idque indicat Iulianus l. 20. ff. de leg. Non omnium, quæ à maioribus constituta sunt, ratio reddi potest.

Cæterum, si ob identitatem rationis, præsertim expressa in lege, considerata materia eius, coniectura fieri possit de mente Legislatoris, voluisse eum etiam illa comprehendere, quæ eiusdem generis siue similia sunt: ac certam illam personarum, aut casuum qualitatem vel exempli causa, vel occasione obata, &c. designasse, tunc interpretatio ad casus similes non expressos non tam videri debet extensiva, quam comprehensiva, sicuti notat Abbas in c. super quæstionum n. 7. de officio Iudicis delegati, & in c. quia in insulis, de Regul. Syluest. ver. lex, q. 18. Suar. cit. c. 3. n. 9. 17. 22. Rodriquez cit. art. 2. antè primam conclusionem. Atque hæc quidem coniectura siue præsumptio facilius fieri potest, si lex fauorabilis sit, vel saltem non odiosa. At verò in lege pœnali, correctoria exorbitante, alijsque odiosis interpretatio ultra verborum proprietatem ob rationis identitatem fieri non debet, nisi necessitas cogat: vt quia alioquin iniquitas, iurium contradictio, aliudve absurdum secuturum est, si cut ex communi docet Suarez cit. l. 6. cap. 4. num. 3. & sequentibus. Alphonsus de Castro libro 1. de lege pœnali, capite 7. docum. 5.

Nunc exempla aliqua afferamus, in quibus ob identitatem  
H ij



citatem rationis extensio fieri debet ad casus, vel personas non expressas: sed secundum probabilem aut necessariam præsumptionem mente legislatoris comprehensas.

I. In correlatiuis, in quibus statutum de vno, censetur etiam de altero statutum. Vt si pœna aliqua canonica, vel ciuilis vxoricio de creta sit, eā etiam vxor incurret, si maritum occiderit. Item si lex disponat, vt maritus succedat, vel non succedat in bonis vxoris; idem quoque interpretandum de vxore, vt succedat, vel non succedat in bonis defuncti mariti, teste Rebell. lib. i. de prælud. q. 6. sect. 4. n. 22.

II. In iis, quæ secundum iuris regulam æquiparantur, seu parificantur: Nam constitutum de vno, quatenus æquiparatum est, censetur etiam de altero constitutum sicuti notant Doctores in l. si quis seruo, Cod. de furtis, Glof. & Canonistæ in c. si postquam, de elect. in 6. Abb. c. de multa, num. 18. de præbend. Syl. ver. pœna, quæst. 4. Rodriguez cit. a. 2. post 1. conclus. Suar. cit. cap. 4. num. 9. Sic v. g. excommunicationem canonis, latam contra Clericorum percussores, incurrit etiam mandans, iuxta c. mulieres, §. illi verò, de sentent. excommunicat. ob iuris æquiparationem, Cum quis per alium facit, perinde esse ac si ipsemet faciat. Extenditur item ad eum, qui Clerici percussorem, suo, quamuis nescientis, nomine factam, postea ratam habet, sicuti definitur in cap. penultimo de sentent. excommunicat. in 6. Eiusque ratio datur, quia rati habitio æquiparatur mandato, iuxta iuris regul. 10. in 6. Rati habitionem retro trahit, & mandato non est dubium comparari. Item si alicui concessum sit in quadragesima comedere oua, potest is etiam lacticiniis vesci: quia vtrique ob eandem causam prohibita sunt, quodd se mentinam carnis originem trahant, teste Sanc. l. 8. disp. 1. in fine.

III. In iis, quæ inter se subordinata sunt, tanquam perfectum & imperfectum, vel tanquam totum & pars. Huc spectant iuris regulæ; Cui licet quod est plus, licet vtrique quod est minus, regul. 53. in 6. & regul. 80. eod. In toto partem non est dubium contineri. Quare cui testamentum facere concessum est, multo magis codicillum: est enim codicillus testamentum imperfectum. Contrā: cui codicillum facere prohibitum est, multo magis testamentum, Præterea, cui tempore quadragesimæ esus carniū permissus est, ouorum quoque & lacticiniorum permissus esse censetur: nam concessio principali, conceduntur etiam accessoria.

Ad extremum notandum est, nos hæcenus locutos fuisse de interpretatione priuata, & secundum obligationem legis in conscientia foro. Longè autem alia ratio est de interpretatione legis authentica, & iudiciali: nam vtrique maiore facilitate, & libertate fieri potest. Quia licet Princeps interpretando legem anteriorem, eius sensum non assequatur: tamen auctoritas interpretantis defectum supplet: siquidem lex interpretans non minus obligat, quam interpretata. Iudex verò quilibet à publica potestate, ipsoque Principe in mandatis habet, vt quàm fieri potest, conformiter legibus sententiam proferat. Quapropter, si lex suppetat, per quam controuersia exprimitur, ac deciditur, secundum illam iudicare tenetur: Sin lex talis non suppetat, à similibus ad similia procedere debebit, iuxta l. 12. ff. de legibus. Non possunt omnes articuli singillatim aut legibus aut senatusconsultis comprehendi: sed cum in aliqua causa sententia eorum manifesta est, is qui iurisdictioni præest, ad similia procedere, & ita ius dicere debet. Consentit lex seq. iunct. Gloss.

## CAP. XIX.

## De restrictione legis secundum æquum &amp; bonum.

## SUMMARIUM.

1. *Æquum & bonum opponitur iuri stricto, verborum proprietati tenaciter adhaerenti.*
2. *Æquum & bonum, siue epikeia est emanatio iusti legitimi: dicitur enim aliquam casum à lege propter equitatem excipiendum esse qui alioquin verbis vniuersalibus legis comprehenderetur. In legibus obligantibus potius, quàm infirmantibus epikeia locus est.*
3. *Si manifestum sit, casum aliquem, ob speciales circumstantias, à lege generali excipi oportere, interpretatio talis à quouis fieri potest. Si concurrant duo præcepta, quæ simul seruari non possunt, posthaberi debet minus.*
4. *Indubio, &rum lex in particulari casu per epikeiam cesset, Princeps consuli debet.*
5. *Qui excusatur ab eo, quod in præcepto accidentale est, debet tamen obseruare principale, si possit.*
6. *Si præceptum sit de re diuisiua, qui excusatur à parte eius substantiali, excusatur à toto: nisi pars præcepti, quæ seruari non potest, exigua sit.*
7. *Si præceptum sit de re diuisiua, qui excusatur ab vna eius parte, debet tamen seruare alteram.*

**Æ**quum & bonum opponitur iuri stricto, verborum proprietati tenaciter adhaerenti: de quo sermo C. de iudicijs, l. 8. Placuit in omnibus rebus præcipuam esse iustitiam & equitatis, quàm stricti iuris rationem. Et reg. 90. ff. In omnibus, maxime tamen in iure, equitas spectanda est. Hinc illud enatum; Summum ius, summa iniuria. Vide Ioan. Fabrum in cit. reg. 90, & Gl. receptam in c. tale pactum, §. ult. ff. de pactis, vbi regulam tradit: Id iure seruandum, licet statutum non sit, quod verisimile est statuendum fuisse, si quaesitum fuisset. Duplex est restrictio secundum æquum & bonum: I. Per quam iudicatur, lege, voluntate testatoris, &c. quamuis generalibus verbis posita, certum genus rerum, personarum omnino non comprehendi: quia materia legis, alterius sue dispositionis: vel ratio eius adæquata & intrinseca ad illud se minimè extendit. Exemplū habes primò in l. adigere, §. quamuis, ff. de iure patronatus: vbi, cum prohibitum esset patrono, iuramento libertos adigere, ne matrimonium contrahant, subiicit Iureconsult. Quāuis nulla persona lege excipiat, (si verba spectemus) tamen intelligendum est de his legem sentire, qui liberos tollere possunt: itaque si castratum libertum iuramento quis adegerit, dicendum est non punire patronum hac lege. Cū enim is ad matrimonium inhabilis sit, statim apparet non cadere sub materiam legis. Secundò in l. eum pater, §. dulcissimis, ff. de legat. 2. vbi cū mater filium hæredem instituisse, hæc verba adiunxit: Dulcissimis fratribus meis, anuniculis autem tuis, quæcunque mihi supersunt in Phamphilia, Lycia, vel vbiunque de maternis bonis, concedi volo: ne quam cum his controuersiam habeas; explicat Iureconsultus atq; restringit, non esse intelligendum de omnibus bonis maternis, quasi etiam ea legata sint, quæ diuisionis iure matri propria facta erant: sed tantum, quæ ipsi cum fratribus communia fuerant: cū discordijs propinquorum sed dandis prospexerit, quas materia communionis solet excitare. Adde interdum aliunde coniecturam capi posse, contrā verba generalia, ex mente Legislatoris, alterius sue dispositionis restrictionē faciendam esse: quo pertinet iuris regula 81. in 6. In generali concessione non veniunt ea, quæ quis non esse in specie verisimiliter concessurus. Videri potest. Suar. l. 6. c. 5. prope finem.

Alterā restrictio secundum æquū & bonū dicitur epikeia, quæ definiri solet: Benigna interpretatio, casū aliquē particularē, ob suas circumstantias, lege vniuersaliter lata non esse cōprehensū. De ea Arist. 5. Eth. c. 10. ita loquitur: *Æquū & bonū, siue epikeia est emendatio iusti legitimi: nā lex quidē vniuersalis est, ferri autē non potest, vt de quibusdā vniuersaliter rectē dicatur. Sed lex id accipit, quod sit plerūq; nō ignorās quādoq; deficere. Et est nihilominus lex recta: defectus autē non est in lege, nec in legislatore: sed in ipsa rei natura. Continud enim rerū earū, quæ sub actione cadunt, materia talis est. Cū igitur lex quidē vniuersaliter loquitur, in his autem præ-*



ter vniuersale quippiā accidit: tum recte sese habet, ut ea parte, qua Legislator omisit, atque peccauit, absolute locutus, emendetur defectus: Quod & ipse Legislator si adesset, hoc modo dixisset. Sensus est: Cum ob rerum particularium multiplicem varietatem, ex materia mutabilitate ortam, omnes euentus lege generali comprehendendi non possint: ideo necesse est leges constitui in his, quæ vt plurimum accidunt, non quæ vno aliquo casu euenire possunt, sicuti Iureconsulti monent in l. 3. & seqq. ff. de legib. Quare æquitatis ratio interdum dictat, concurrente aliqua circumstantia, contra verba legis agendum esse; quamuis non contra mentem Legislatoris: quippe Legislator, si interrogatus fuisset, vtrum ad hunc quoque euentum legis suæ obligationem extendi vellet, vtique negasset: vel nunc quoque, si adesset, idem diceret. Consentit S. Thom. 1. 2. quæst. 96. a. 6. & 2. 2. quæst. 120. a. 1. Caiet. ibid. definiens, quod epikeia siue æquitas sit, *directio legis, vbi deficit propter vniuersale*. Nauar. in rubr. de iudicijs, n. 71. Sot. libro 1. de iust. quæst. 6. ar. 8. Vasq. disp. 176. cap. 3. Suar. lib. 6. de legib. cap. 6. & seqq. Exempli causa: Si lege civili cautum sit, ne ciuitatis portæ aperiantur: aperiri tamen possunt ac debent, eo casu quo ciues, hostium impetum fugientes, ad ciuitatem se recipere cupiunt. Et lex Ecclesiastica ieiunij, omnibus Christianis adultis vniuersaliter posita, non obligat, neque obligare potest eos, qui mortis aut grauis infirmitatis periculum incurrerent, si ieiunarent. Interdum verò, etsi potuisset Legislator, si omni sua potestate vti voluisset, etiam particularem casum comprehendere: nonnunquam tamen benignius interpretari licet, noluisse comprehendere. Qua de re Suarez c. 7. n. 11.

Porro epikeia maximè locum habet in legibus obligantibus; non ita in infirmantibus; nisi de voluntate legislatoris aliquo signo constet. Sic enim v. g. testamentum non valet factum coram testibus tribus, vel quatuor, etsi in aliquo casu, lege aut voluntate Principis non excepto, plures haberi non potuerunt: nec valet matrimonium sine Paracho ac testibus celebratum pestis tempore, etsi ij interesse non potuerint, sicuti docet Chapeauille de modo ministrandi sacramenta tēpore pestis, cap. 6. quæst. 26. Quia eiusmodi leges præscribunt formam substantialem: sine substantia autem actus subsistere non potest. Deinde ad vitandas fraudes interest Reipubl. ita obseruari, posthabito particulari incommodo per accidens aliquando interueniente. Vide Suar. lib. 5. de legib. cap. 23. num. 2. Agid. Coninc K t. 2. disput. 30. dub. 2. concl. 2. vbi rectè ait: Quamuis Ecclesia sua prohibitione efficere non possit, vt omnino ignorantes, aut iusto metu coacti contra eam agentes peccent: posse tamē efficere, vt quod ab ijs agitur, sine effectu atq; irritū sit.

3. Quæritur autem primò. Ad quem pertineat legem secundum epikeian interpretari? Resp. & dico I. Si manifestum sit, particularem casum generali legis sententiā non comprehendendi: sed æquitatis ratione excipi debere: interpretationem hanc à quouis etiam priuato, secundum prudentiā legem, fieri posse. Ita S. Thom. 2. 2. quæ 174. art. 3. Caiet. ibid. aliique communiter. Erit autem id manifestum primò: Si lex seruari non possit, nisi violando aliā grauiorem legem, puta naturalem, aut diuinam: de quo regula traditur, *Si concurrant duo præcepta, quæ simul seruari non possint, post haberi debet, quod minus est*. Secundò: si legis obseruatio à maiore bono altioris virtutis impediatur: sic v. g. Missa festo die omitti potest, vt proximo egrotanti subuenias. Tertiò, si obseruatio legis, v. g. de ieiunio, in aliquo casu nimis difficilis sit: vt certo constet Legislatorem non potuisse, vel saltem noluisse tanta seueritate obligare: quò pertinent ea, quæ supra dicta sunt c. 14.

4. Dico II. Si dubium sit, vtrum lex in casu particulari per epikeian cesset, ad Principem recurrendum erit, iuxta l. 1. C. de leg. vbi Imper. ait. *Inter æquitatē, usque interpretatam interpretatione, nobis solis, & oportet, & licet inspicere.*

Vide Medin. c. de ieiunio q. 9. §. quæret hīc quispiam, & quæ dixi suprā tr. 1. c. 7. assert. 3.

Quæritur secundo. Vtrum ob iustam causam excusatus à parte præcepti, excusetur quoque ab altera parte? Resp. pòdeo ex doctrina San. l. 1. mor. c. 19. & dico I. Qui excusatur ab eo, quod in præcepto accidentale est, debet tamen seruare principale, si possit. Ratio est, quia *principale non trahitur ab accessorio*. Exemplum habes in eo, qui ob professionem, negotium vel infirmitatem, in die ieiunij cogitur prandium anticipare, debet is deinde nihilominus ieiunium seruare, si possit. Quia determinatio temporis, secundum consuetudinem, qua hodie vtimur, prandendi circa meridiem, vel hora ante meridiem, videtur esse tantum accidentale, vel saltem secundarium requisitum ad ieiunij formam, vt suo loco dicam. Aliud exemplum habes in eo, qui die festo ad vnicam eius loci Missam accessit, cum iam præfatio capta est, debetis quod reliquum est Missæ, audire: nam quæ à consecratione vsque ad Sacerdotis communionem peraguntur, propriè & substantialiter ad Missæ sacrificium pertinent: reliqua verò quasi accidentariè annexa sunt, sicuti docet Suar. p. 3. dis. 88. §. 2. Si autē circa præfationem v. g. discedere debeas, & quod principale Sacrificij est negligere: non peccabis, etsi totam Missam intermittas: quia destructo principali, destruitur etiam accessorium.

Dico II. Si præceptum sit de re indiuidua: qui excusatur à parte eius substantiali, excusatur à toto. Eam autem voco rem indiuiduam, in cuius parte substantia præcepti seruari non potest: consequenter si vnam partem substantialem præcepti auferas totum corrumpit. Exemplum habes in eo, qui prauidet se debere in die ieiunij, post meridiem, binam refectionem capere, is etiam mane ientaculum accipere non prohibetur. Deinde, qui vouit se rosarium, vel vespas oraturū, & non potest orare totum, excusatur etiam à parte. Sed limitanda est assertio: Nisi pars præcepti, quæ seruari non potest, exigua sit: vt qui reliquum obseruat, censeatur moraliter implere præceptum, quoad substantiam. Tunc autem exigua & non notabilis videri debet in præceptis sub culpa mortali obligatibus: si partē illā culpā omittendo, & reliquum seruando mortaliter aliquis peccaturus non sit. Exemplum habes in eo, qui ieiunij legem perferre nō potest, nisi manē vnicum panis frustum vel ossam comedat; is de cætero, si certus sit se ieiunare posse, tenebitur: nā frustillū panis v. g. comedere, exiguam ieiunij violationem esse, inde colligo; quod qui sine causa ita violat, & de cætero ieiunat, mortalis peccati damnari non posse videatur. Simile est, si qui breuiarium suum amisit, in matutinis aliquis feriarū omnes psalmos memoriter sciat: sed tres lectiones cum responsorijs nesciat: obligatur ad psalmos recitandos: quia tunc pars, quæ omittitur, notabilis non est. Aliud verò dicendum de matutinis nouem lectionū: quarum omissio notabilis censeatur: quare qui eam partem recitare nequit, à toto excusatus esse videtur.

Dico III. Si præceptū sit de re diuidua, qui excusatur ab vna ei⁹ parte, debet tamē seruare alterā: quippe in qua præcepti substantia consistere potest: v. g. Sacerdos, qui ob aliquā causā impeditur à recitandis matutinis, tenetur nihilominus recitare horas paruas, & vespas, si possit. Itē qui ob corporis labores, aut infirmitatē, vna refectione in die ieiunij cōtentus esse non potest, debet tamen à carnibus abstinere, si possit: quia hæc duæ partes constitutiue ieiunij inter se diuiduæ sunt. Multo que magis qui ob aliquā causā maiore quadragesimæ tempore à ieiunij lege excusatus est, tenetur nihilominus ijs diebus ieiunare, quibus ratio excusationis manifestò cessat. Nā præceptū quadragesimæ, itē canonici officij habet partes inter se diuiduas, in quibus singulis ratio Ecclesiastici ieiunij, abstinentie, vel orationis canonice seruari potest. Quare habet hīc locū iuris reg. 37. in 6. *Vt si nō debet per mutue vitari: quā regulā intelligendā monent DD. si vtile ab inuisibili separari possit*. Nā alioquin,



vitiato vno, vitiabitur totum. Dixi autem *Si manifesto cesset*: Nam si certus aliquis sit adesse impedimentum excusans à maiore parte canonici; aut quadragesimalis ieiunij; dubitet verò, quoties in hebdomade ieiunare; aut quantam officij partem sine corporis lésione persolvere possit; tunc epikeia dictabit, quòd pars cetra trahat ad se partem minorem incertam; hominemque omnino exsoluat obligatione legis; cum alioquin propter dubium, scrupulorum & anxietatis materiam oriri per facile esset, sicuti notavit Rodriq. in sum. p. i. c. 145. Suar. t. 2. de relig. lib. 4. de horis canon. c. 27. n. 28.

## CAP. XX.

## De excusatione ob Ignorantiam.

## SUMMARIUM.

1. Probabilis ignorantia legis excusat non solum à culpa: sed etiam à pena.
2. Ignorantia crassa, seu supina non excusat à pena legis etiam gravi, cum nequa à mortali peccato excuset. Si tamen pena decreta sit scienter, aut temere peccantibus, non comprehenduntur delinquentes ex ignorantia, nisi affectata sit.
3. Ignorantia vincibilis non excusat à pena ordinaria gravi; quare Iudex in tali casu vel veniam delicti dare, vel aliam mitiorem penam imponere debet.
4. Qui post diligentem inquisitionem speculative dubitat, utrum lex vel præceptum impositum sit, necne: interim obligatione immunis est.
5. Si constet de lege lata: dubium verò sit, utrum abrogata, vel obligatio eius cesset, tutior pars eligenda est.
6. Qui prævaricatur legem, quam latam esse non ignorat, licet ignoret annexam penam: nihilominus efficitur reus pena. Censuram nemo incurrit ob delictum, cui ignorat annexam esse: nisi ignorantia crassa sit.
7. Ignorantia facti excusat, non iuris.

**A**ssertio I. Probabilis ignorantia legis excusat non solum à culpa; sed etiam à Pœna Prior assertionis pars ostensa fuit supra tr. 2. cap. 4. Posterior verò sequitur ex prior, iuxta c. 2. de const. t. Rem, quæ culpa caret, in damnum vocari non convenit. Nam pœna decernitur ob culpam: ergo cessante culpa, tanquam causa; cessare etiam debet effectus, siue reatus pœnæ, arg. c. cum cessante, de appellat.

2. Duo addenda sunt: Primum, Legis ignorantia crassa, aut supina, sicuti non excusat à mortali peccato; ita neque à pœna legis, licet ea gravis sit. Sumitur ex cap. 2. de const. in 6. & l. 1. ff. de legibus: & docet Syl. ver. ignorantia, quæstione 5. Excipe, nisi pœna decreta sit scienter ac temere peccantibus: hac enim voce non comprehenduntur delinquentes ex ignorantia, sicuti ex communi docent Sylvest. ver. ignorantia, num. 18. Nau. c. 27. numero 141. Auila p. 2. cap. 5. disp. 5. dub. 9. Suarez libro 5. de legib. cap. 12. num. 14. Præterquam si ignorantia affectata sit: hæc enim scientiæ æquipollet, nullamque peccantibus excusationem affert, sicut colligitur ex c. eos, qui iun. Gloss. ver. affectata, de tempor. ordinat. in 6.

3. Alterum. Legis ignorantia vincibilis, sed levis sicuti culpæ gravitatem minuit, & venialem efficit; ita etiam æquum est, ut pœnam minuat, sicuti docet Sotus libro 5. de iust. q. 11. a. 9. ad finem, Suarez l. c. n. 19. Quare si legis transgressori certa pœna decreta est: in tali casu Iudex vel veniam delicti dare, vel mitiorem arbitriam imponere debet.

4. Assertio II. Qui post diligentem inquisitionem speculative dubitat, utrum lex, aut præceptum divinum, vel humanum impositum sit, necne: interim obligatione immunis est: v. g. Si quis in dyblis constitutus dubitet, utrum lex Ecclesiastica extet de alicuius diei ieiunio, & neminem habeat, ex quo intelligere possit, is ieiunare non est

obligatus. Ita docet Suar. t. 5. disputatione 40. sessione 5. numero 15. Sa ver. dubium, numero 2. Henriquez libro 8. cap. 45. numero 3. in comment. littera p. Sanchez libro 2. de matrimonio disputatione 41. numero 36. & libro 1. moral. capite 10. numero 32. Ratio est: Nulla lex aliquem ad sui observationem obligat, si sufficienter ipsi proposita & cognita non est; atque per ipsum non stat, quo minus cognoscatur: Nam tali casu adest inuincibilis ignorantia iuris, quæ omnium sententia à peccato excusat. At, quando aliquis post diligentem inquisitionem, de lege aut præcepto dubius manet, tunc legem siue præceptum sufficienter sibi propositum & cognitum non habet: ideòque inculpate ignorat: Ergo licet abstractè & speculative dubius hæreat de lege siue præcepto: in particulari tamen ac practice certus est, se eo non obligari. Confirmatur: In dubio melior videri debet conditio possidentis: quamdiu autem inuincibiliter ignoras, utrum lex lata sit, manes in naturali possessione liberæ voluntatis tuæ: Ergo in dubio non es astringendus legis necessitate. Atque his consentiunt ea, quæ tr. 1. capite 5. numero 7. dicta sunt: Si quæstio adeòque dubium sit inter Doctores, utrum aliqua hominis actio, v. g. contractus licitus sit, necne, alijs affirmantibus, alijs verò negantibus; posse me talem actionem exercere, quamdiu speculative certus non sum; sed dubius de eius prohibitione, aut malitia.

**A**ssertio III. Si constet de lege lata: dubium autem sit, utrum abrogata, vel ob circumstantias eius obligatio cesset, tunc tutior pars eligenda est, & secundum legem operandum. Ita S. Thom. 1. 2. quæstione 96. art. 6. ad 2. & 2. 2. q. 110. art. 1. ad 3. Caiet. citat. art. 6. & Medina ibidem propos. 3. Ioan. Medina. Cod. de ieiun. quæstione de his qui ieiunare tenentur, ubi docent: si aliquis dubitet, utrum obligatione ieiunij ob aliquam causam liberatus sit, superioris iudicio acquiescendum: si autem superiorem adire nolit, vel non possit, legem seruandam. Ratio est: Cum enim semel constet legem positam fuisse, præsumptio ac veluti possessio stat pro lege: ut si quis contra eam excipere velit, probandæ exceptionis necessitas ipsi incumbat. Similiter se res habet in obligationibus ex contractu, vel delicto: Si enim certus sim, debitorem me fuisse, dubitem verò de causa excusante à solutione, nihilominus soluere cogor, teste Sanch. cit. c. 10. num. 340.

Arbitror tamen, si quis re diligenter consideratâ, non omnino ambigat: sed probabilius arbitretur, quamvis non sine formidine oppositi se ob aliquam causam à legis observatione excusatum, adeòque mentem legislatoris non fuisse, talem causam particularem comprehendere, tum locum fore epikeiæ, ut practice iudicare possit, se legis obligatione tali casu absolutum esse, sicut docet S. Anton. p. 1. t. 3. cap. 10. §. 10. §. pro cuius enodatione, Gutier. l. 1. canon. qq. c. 31. num. 41. Medina l. c. prop. 4. Corduba in quæstionar. lib. 3. q. 13. Propterea, quòd in moralibus, ubi certitudo haberi non potest, sufficit sequi iudicium probabile.

**A**ssertio IV. Qui legem latam non ignorat, quamvis inoret annexam pœnam: si illam prævaricetur non culpæ solum, sed etiam pœnæ reus efficitur. Ita ex communi docet Molina tr. 5. de iust. disputatione 71. numero 9. Sanc. l. 9. de matrim. disp. 32. q. 4. n. 11. Suar. l. c. n. 11. contra Nau. c. 23. n. 47. Excipe primò censuram Ecclesiasticam, quam nemo incurrit ob delictum, cui ignorat annexam eiusmodi pœnam; nisi ignorantia crassa sit. Qua de re dicam tr. seq. p. 1. cap. 5. num. 7. Excipe secundò: Nisi pœna sit admodum gravis, & plusquam delictum absolute spectatum mereatur. Exemplum habes: Si peregrinis transeat per regionem, in qua sub pœna gravissima prohibita est venatio ferarum: non videtur afficiendus tanta pœna, si legem violet: sciens quidem venationem prohibitam esse, sed inculpate ignorans gravitatem pœnæ: cum in sua regione



regione, & spectata ipsa natura rei, non ita grauiter venatores puniri soleant.

7 Porro contra primam nostram assertionem obijci potest iuris regula 13. in 6. *Ignorantia facti excusat, non iuris.* Cuius ratio assertur in l. 2. ff. de iuris & facti ignorantia: Quia ius finitum est, quod comprehendere potest: facta autem varia, & infinita, quæ proinde etiam prudentissimos fallant. Respondetur autem, Id accipiendum esse secundum forum externum, ubi ignorantia iuris communis ac publici ferme non præsumitur; sed ab allegante probari debet, *propria scientia instructum se non fuisse, neque Iureconsulti consilium secutum fuisse*, iuxta l. regula, §. sed iuris, ff. de iuris & facti ignorantia: cuiusmodi probatio admodum rara & difficilis esse solet. Cessat verò præsumptio, probandique obligatio, si de veritate constet. Deinde excipi debent nonnullæ personæ; imprimis miles, iuxta l. 1. Cod. de iuris & facti ignorantia; quippe de quo facile præsumitur probabilis ignorantia iuris: arma enim magis, quam iura scire milites legislator existimat, l. vlt. Cod. de iure deliber. Deinde minor xxv. annis, cui ob iudicii imbecillitatem venia datur, iuxta cit. l. regula, & l. quamuis in lucro, C. eod.

Facti autem ignorantia (puta alieni) præsumitur, ubi scientia non probabitur, reg. 47. in 6. Nisi vel publicum, siue notorium factum sit, iuxta cit. l. regula, & cap. 1. de postul. Prælatorum: vel eius scientia ex officio alicui incumbat, argument. cap. innotuit, de elect. & cap. quamuis, de reg. iuris ubi S. Gregorius ait: *Non potest esse pastoris excusatio, si lupus oves comedit, & pastor nescit.* Quæ doctrinam reperies apud Abb. in cap. ab excommunicato, num. 18. de rescript. & c. innotuit, n. 9. de elect.

Debet præterea dicta regula ita intelligi, quod ignorantia etiam iuris excusat in damnis, & suum petenti nihil nocet: non autem excusat in commodis, & acquirere volentem nihil adiuvat. Facti autem ignorantia, nisi crassa & supina sit, tam in commodis, quam damnis excusat. Ita habetur in l. 7. & seqq. ff. de iuris & facti ignorantia. Idque etiam in conscientie foro locum habere, monet Abbas in c. quia plerique n. 17. de immunitate ecclesiarum. Exemplum huius rei nobis proponitur in l. 10. Cod. de iuris & facti ignorantia: *Cum quis ius ignorans indebitam* (ciuilitate, debitam autem naturaliter) *pecuniam soluerit, cessat repetitio.* Veluti, si hæres per iuris ignorantiam legata soluit ex testamento imperfecto: vel non detracta Falcidia: ordinariè dignus non censetur, cui iuris beneficium prodesse debeat, sicuti constat ex l. regula, §. si quis ius, ff. de iuris & facti ignorantia, & l. error, Cod. ad l. Falcidiam: Quicumque autem ex facti ignorantia (non supina) indebitum ciuilitate soluit: quia ignorauit v. g. testamentum imperfectum esse, solum repetere potest, sicuti constat ex cit. l. 10. & tit. ff. & Cod. de condict. indebiti, Cæterum si aliquis ob ignorantiam siue iuris, siue facti, soluiſſet, quod suum erat, nullòque iure alteri debitum, illud haud dubiè, tanquam indebitè solutum, condicere poterit: nam locupletari non debet aliquis cum alterius iniuria, vel iactura, reg. 48. in 6. Quam doctrinam leges in Gl. cap. vlt. de solut. ver. indebitam, Abb. ibid. num. 11.

## CAP. XXI.

## De mutatione derogatione, abrogatione Legis.

## SUMMARIUM.

- 1 Lex perpetuo durat, quamdiu legitima auctoritate non tollitur.
- 2 Posterior Principis constitutio derogat priori, quatenus ei contraria est.
- 3 Cessante vniuersim totali causa legis, per se ipsam cessat lex.
- 4 Lex in præsumptione fundata, cessat obligare, si de contraria veritate constet.
- 5 Præsumptio cedit veritati.

**D**Vplici ex capite lex mutari, vel tolli potest: Primo ex parte efficientis. Licet enim lex in conseruatione non pendeat ab autore suo: sed eo etiam extincto perseueret, sicuti cap. 1. dictum fuit: nihilominus autor legis, eiusque successor, vel superior legi derogare, eamve abrogare potest. Quare, quod dicitur legem esse perpetuam, intelligi debet, donec legitima auctoritate tollatur: nam res omnis per quasunque causas nascitur, per easdem dissoluitur, c. 1. de regul. iuris. Porro legi derogatur, cum pars eius detrahitur: abrogatur verò, cum prorsus tollitur, iuxta l. derogatur, ff. de verb. signif. Illud verò hîc obseruandum ex doctrina Bartoli in l. omnes populi, ff. de iustitia & iure. Abb. in c. cum accessissent, n. 2. de constit. Si statutum concernens fauorem aliorum, aut publicum, à Superiore confirmatum sit, non posse deinde ab inferioribus, qui illud statuerunt, infringi, aut mutari: quia Superior illud confirmando, fecit quasi proprium. Sin verò statutum à Superiore confirmatum est in gratiam & fauorem ipsorum statuentium, tunc possunt hi recedere, illique perinde atque alteri gratia seu priuilegio renuntiare, argum. c. per illorum, de præbendis. Secundo cessat lex ob mutationem obiecti seu causæ, propter quam lata est: Eaque mutatio vel fieri potest in casu particulari, propter epiceia, de qua supra: vel in vniuersali; idque vel totaliter, vel partialiter, sicut postea explicabo.

Assertio I. Posterior Principis constitutio derogat, vel abrogat priorem, quatenus ei contraria est; licet verbis expressis nulla eius mentio fiat. Ita habetur in c. 1. de Constit. in 6. Excipiuntur tamen decreta Concilij generalis, quibus posteriore contraria lege, aut priuilegio derogatum non censetur: nisi clausula derogatoria expressè adijciatur, sicut colligitur ex c. ex parte, cap. vlt. de capellis Monachorum, & docet Felinus in c. nonnulli, de rescript. Nau. c. 27. num. 265. Couar. in epit. p. 2. cap. 8. §. 9. num. 7. Sanchez lib. 3. de matrimon. disp. 26. n. 6.

Assertio II. Cessante vniuersim totali causa legis, per se ipsam cessat lex omnisque eius obligatio. Ita ex communi, Castro libr. 1. de lege pœnali, cap. 5. docum. 3. Medina q. 90. art. 2. ad 4. Syluest. ver. lex. q. 9. §. octauo, Suares lib. 6. de legib. capite 9. num. 5. Sumitur ex c. cum cessante, de appellat. ubi dicitur *cessante causa cessat effectus.* Et confirmatur ampliùs: Quia sicuti lex ab initio non subsistit, si sine ratione lata sit; ita etiam postea definit, deficiente ratione eius: quandoquidem tunc eius obseruatio inutilis atque superuacanea esse incipit. Hac ratione Apostolus ad Hebr. 7. ait: *Reprobatio sit præcedentis mandati* (legis Moisaicæ) *propter infirmitatem eius & inutilitatem.* Quia vt idem Apostolus ad Rom. 10. ait: *Finis legis. Christus.* Et ad Galat. 3. *Propter transgressionem posita est, donec venerit semen.* Et infra eod. cap. *Lex paedagogus noster fuit;* ad Christum venturum nos dirigens. *At ubi venit fides* (Christi) *iam non sumus sub paedago.* Item in Ecclesia primitiua Apostoli Actor. 15. lege constituat, gentibus præceperunt, vt abstinerent se ab immolatis simulachrorum, sanguine, & suffocato, ob eam causam, vt cum Israelitis ad Christum conuersis, qui ex antiquissima consuetudine maximè ab his abhorrebant, faciliùs in Christo, lapide angulari, tanquam duo parietes vniri possent, sicuti docet S. Aug. lib. 32. contra Faustum, cap. 13. Nicolaus I. in responsis ad Bulgaros, cap. 90. S. Thom. 1. 2. quæst. 103. art. 4. ad 3. ubi addit: *procedente autem tempore, cessante causa, cessat effectus,* siue obligatio legis illius Apostolicæ: idemque docet Victor. de temper. num. 2. §. ad aliud, Sur. lib. 9. de legib. c. 10. n. 13. Turrianus in constitut. Apostol. pag. 230.

Dixi autem in assertionem, Cessante causa totali: Nam si partialis tantum causa siue finis legis cesser, fieri potest vt perseueret altera causa, siue finis legis, qui sufficiens sit ad conseruandam eius obligationem, sicuti bene annotauit Abb. in cap. cum cessante, num. 2. de appellat. & in c. vlt. de immunit. Ecclesiarum, num. 8. exempli causa: Lex tri-



buti ciuibus indicta, cum hostes ciuitatem oppugnarunt, non penitus cessat, etsi hostes adesse desinant, dum periculum ab hostibus, vel alia iusta causa exigendi tributis permanent. Qua de re Io. Medina q. 13. de restit. P. Nau. lib. 3. de restitut. c. 1. n. 258. Suarez lib. 5. de legib. cap. 15. num. 6.

Secundò dixi, Cessante causa *uniuersim*: Nam cessante causa legis in particulari homine, non ideo eius obligatio definit: Veluti, si Princeps lege lata ciuibus interdixi armorum usum, ad vitandos clamores, ac rixas; fas non erit ciui, qui ob senectutem, vel morum simplicitatem, à pugna alienissimus est, arma prohibita gestare: quia interest boni publici, ut leges communes ab omnibus communiter obseruentur, quamdiu non occurrit aliquod impedimentum contrarium, quod per epikeian excuset, ut rectè notauit Suarez lib. 6. cap. 7. num. 6. Quare breuiter dici potest, ad excusationem à lege non satis esse, si ratio legis cesset in particulari *negatiue*: cum debeat etiam cessare *contrarie*; videl. propter impedimentum, vel moralem impossibilitatem seruandæ legis.

Affertio III. Si lex plures in se partes continet, quarum vna ab altera separari potest; tunc cessante ratione vnus tantum partis, perseverat lex secundum alteram partem. Quæ est communis doctrina tradita à Nauar. c. si quando, except. 11. num. 10. de rescrip. Suares lib. 6. c. 9. in fine. Ratio est: *Quia utile per inutile non debet vitari*, reg. 37. in 6.

4 Affertio IV. Lex in præsumptione fundata, cessat obligare, si de contraria veritate constet. *Cedit enim præsumptio veritati*, argument. cap. super hoc, de renuntiatione: & docet Abb. in cap. quia plerique, num. 18. de immunit. Eccles. Couar. cap. cum esses, num. 9. de testament. Nauar. cap. ita quorundam, de Iudæis, notab. 10. num. 29. Porro ea lex in præsumptione fundari dicitur, cuius formale motiuum, & intrinseca obiecti conditio est præsumptio, alicuius rei: siue per quam Iudici præcipitur, ut in omnibus occurrentibus casibus, ex tali præsumptione, quam ipsamet lex facit, talem sententiam ferat. Exemplum habemus in cap. veniens, 2. cap. is qui fidem, de sponsalibus, ubi dicitur, quod sponsalia de futuro, secuta copula, in matrimonium transisse censeantur: ob iuris præsumptionem, sponso non animo fornicatio, sed coniugali coniunctos fuisse. Quo tamen nihil obstante, si sponsus sciat, falsam esse hanc iuris præsumptionem, animūque sibi non fuisse in matrimonium cōsentire; ideoque aliam postea uxorem duxerit, priore sponsa quamuis per iniuriam sprete, hoc casu non prius falsa præsumptione nixum; sed posterius matrimonium constabit. Quod adhuc hodie obseruari debet ijs locis, quibus Tridentina Constitutio sess. 24. c. 1. de reform. matrimon. Parochi ac testium præsentiam ad valorem matrimonij requirens, recepta non est. Vide Couar. p. 1. epit. decret. cap. 4. §. 1.

Aliud exemplum affert Nauarrus cit. loco. Licet in cit. cap. ita quorundam, excommunicentur ij Christiani, qui Sarracenis: & in Bulla Cœnæ Domini, qui alijs etiam Christi nominis inimicis deferunt arma, ferrum quibus Christianos impugnant: & verò præsumptio iuris esse so- leat, talia ipsis subministrari cum nocumeto Christianis inferendo: si tamen certò constet ministranti, Sarracenum vel Turcam non ad bellicos vsus, sed v. g. ad ædes priuatas fabricandas petere: contra legem Ecclesiasticam non peccat, ideoque nec excommunicationem incurrit.

## CAP. XXII.

## De dispensatione in lege.

## S V M M A R I V M.

1. *Dispensatio est relaxatio legis, publica auctoritate facta.*

2. *Dispensandi potestas alia est ordinaria, & alia delegata.*
3. *Papa in omni Ecclesiastico iura tum vniuersalis; tum particulari dispensare potest.*
4. *Episcopus in lege vniuersali Ecclesia iure ordinario dispensare nequit.*  
*Facultas dispensandi, qua specialiter conceditur.*  
*Episcopis ratione dignitatis suæ, transit in ordinariam.*
5. *Super votis ac iuramentis, Episcopi iure ordinario cum subditis suis dispensant: non item Parochi.*
6. *Delegata dispensandi potestas alia est à iure: & alia ab homine.*  
*Qua ab homine est, vel datur per modum pura commissionis, seu mandati, vel per modum gratiæ. Et hæc, si absolute collata fuit, non expirat morte concedentis.*
7. *Dispensatio interdum expresse fit per verba: interdum tacite per factum, quo dispensandi voluntas significatur.*
8. *Rati habitio de præterito non sufficit ad valorem dispensationis vel collatæ iurisdictionis.*
9. *Error communis cum titulo præsumptio ius facit, iurisdictionemque tribuit: etsi impedimentum occultum subsit, ex proprio iure proveniens.*
10. *Dispensatio iusta est, qua cum causa cognitione fit: & hæc interdum debita: interdum permixta ob misericordiam, pietatem.*

**D**ispensatio est legis relaxatio, publica auctoritate facta. Ex quo colligitur, dispensationem esse iurisdictionis actum: cum autè omne exercitiū iurisdictionis, præsertim voluntariæ, dispensatio quædam publicæ potestatis sit, iuxta illud Luc. 12. *Quis putat est fidelis dispensator ac prudens*; inde accidisse videtur, ut nomen commune dispensationis vsu Ecclesiastico vnus rei proprium factum sit sicuti notauit Suar. lib. 6. de legib. cap. 10. num. 5. & 6.

Cum dispensatio definitur, *legis relaxatio*, distinguitur primò ab absolute, quæ fit v. g. à censuris: nam per hanc non relaxatur vinculum legis, sed alterius obligationis: quare absolutio non est contra communem legem: sed secundum legem, si persona absolutionem mereatur.

Secundò, distinguitur dispensatio ab interpretatione secundum epikeian: quia per hanc obligatio legis non tollitur, aut relaxatur: sed declaratur, per se ipsam cessare: dispensatione autem relaxatur lex, alioquin obligatura, sicuti notauit Couar. in 4. decret. p. 2. cap. 6. §. 9. num. 2. Suares lib. 6. de voto, cap. 9. num. 2. Ex quo sequitur I. quòd ad dispensandum minore causa opus est, quàm ad epikeian: quia per epikeian declaratur, tantum causam adesse, ut aliquis per se legis obligatione eximatur: ad dispensandum autem requiritur causa, ob quam aliquis per auctoritatem Superioris eximi possit. Sequitur II. Quòd in legem diuinam non cadat dispensatio: quia inferior, videlicet homo, non potest tollere, vel relaxare legem Superioris, Dei, teste S. Thom. 1. 2. quæst. 97. a. 4. ad 3. Interdum tamen locum habet interpretatio, legem diuinam ob certas circumstantias per se ipsam cessare: qua de re Couar. cit. §. 9. num. 11. Suar. lib. 10. de leg. c. 6.

Tertiò, distinguitur à licentia data: Nam Superior licentiam dans non tam efficit, ut aliquis lege solvatur; sed magis ut nunquam obligetur. Siquidem ea interdum conditione leges late sunt, ut omnes comprehendant, ac obligent; nisi Superior, vel alius quispiam licentiam præbuerit aliter agendi. v. g. *Nemo sine Consulis licentia frumentum ex ciuitate efferat*: tunc Consul licentiam dans, non dispensat in lege, aut relaxat legem; sed affert conditionem, qua posita, lex non obligat; licet, ea sublata, obligaret. Quæ etiam ratione Prælati Religiosi licentiam dare potest aliquid accipiendi, vel donandi, licet in voto paupertatis dispensare nequeat. Præterea quamuis lex sigilli sacramentalis indispensabilis sit; peccata tamen Confessario licentiā dare non prohibetur peccata sua, iusta de causa, alteri reuelandi: siquidem hoc casu non dispensatur in lege sigilli, sed apposita conditione, immutatur obiectum legis; ut ea per se ipsam cesset.

Quartò, distinguitur dispensatio à legis abrogatione, & derogatione; quippe per quam lex vel tota, vel pars eius absolute & vniuersim tollitur, & aboletur; dispensatione vero



verò vinculum siue obligatio legis solum relaxatur respectu certæ personæ, temporis; &c.

2 Potestas dispensandi diuiditur in ordinariam, & delegatam. Illa imprimis Legislatori competit: nam *eiusdem est ligare & soluere*, c. inferior, d. 21. c. cum inferior, de maior. & obed. Secundo eius successor: Nam *par in parem non habet imperium*, c. innotuit, de elect. Successor autem non minore, quam antecessor: sed pari potestate præditus est: Ergo ab illo prohiberi non potuit, quò minus legem positam abrogaret, vel in ea dispensaret. Tertio Legislatoris, eiusque successoris superiori, cui illi in iurisdictione & legum ferendarum potestate subordinati sunt, v. g. Episcopi summo Pontifici.

3 Corollarium I. Papa dispensare potest in omni iure Ecclesiastico tam vniuersali, quam particulari, sicuti ex communi Couar. cit. §. 9. num. 13. Quin & in Apostolicis canonibus: ijs nimirum, quos tanquam Ecclesiæ præfides, potestate à Christo accepta, condiderunt: v. g. de ieiunio quadragesimæ, obseruatione Dominicæ, non ordinandis bigamis: Non item in ijs canonibus, quos à Christo auctore acceptos, veluti ministri, Ecclesiæ promulgarunt, ac tradiderunt, v. g. de paruulorum baptismo, confirmandis baptizatis, matrimonij indissolubili vinculo, mortuorum suffragijs. Qua de re Durand. in 4. d. 27. quæst. 4. num. 9. Azor tom. 1. lib. 5. c. 15. quæst. 4. Suar. lib. 6. c. 14. num. 2.

4 Corollarium II. Episcopus in legibus Pontificijs, vel Conciliorum vniuersalium iure ordinario dispensare nequit, iuxta c. dilectus, iunct. Gloss. ver. permissa, de tempor. ordinat. & videri potest Abb. c. at si Clerici, §. de adulterijs, num. 4. de iudicijs, & c. cum dilectus, de elect. num. 10. Suarez lib. 6. c. 14. de legib. num. 4. Sanch. lib. 7. de matrimon. disp. 7. num. 6. Ratio est: Quia inferior non dispensat in lege Superioris. Attamen in dubio, vtrum res egeat dispensatione, Episcopus declarare potest, non egere, sicut notat Sa ver. dispensatio, num. 1. Deinde exceptiones aliquæ sunt: I. Nisi dispensandi facultas aliqua Episcopis generali legi concessa sit, iuxta cit. c. dilectus. Talis enim concessa potestas transit in ordinariam: cum non personis, sed officio & dignitati conferatur. Exemplum habes in Trid. sess. 24. c. 6. de re-form.

II. Nisi Episcopus legitimè præscriptâ consuetudine dispensandi facultatem aliquam compararit.

III. Si in casu necessitatis ad Sum. Pontificem non sit facilis recursus, qua de re Nau. c. 22. num. 85. Sanch. lib. 2. disput. 40. num. 3. Egid. Coninx tom. 2. disput. 33. dub. 3. conclus. 3. vbi aiunt, Episcopum ex præsumpta facultate summi Pontificis, dispensare posse super impedimento matrimonij, alioquin dispensabili, si matrimonium cum defectu occulto palam in facie Ecclesiæ, saltem cum alterius bona fide, celebratum fuit; separatio autem sine maximo incommodo fieri nequit: ad Papam verò, vel Legatum, aliūve priuilegiatum facilis accessus esse non potest: Et similiter in votis continentie, ac Religionis, quæ alioquin Papæ reseruata sunt, dispensare posse Episcopum propter graue incontinentie periculum, si ad summum Pontificem, vel eius delegatum accessus non sit, tradunt Syl. ver. votum. 4. q. 4. Nau. c. 12. num. 76. Less. lib. 2. c. 40. dub. 13. num. 106. Suar. lib. 6. de voto, c. 26. num. 9. Sanch. lib. 8. disp. 9. num. 21. Verum in impedimento dirimente matrimonij, nondum in facie Ecclesiæ contracti, Episcopus nunquam dispensat: nisi quòd Sanchez, nullius tamen Doctoris auctoritatenixus, cit. disp. 40. q. 1. num. 7. cunctabundus permittere videtur, vt in vrgentissima necessitate dispensare possit.

IV. In materia leui, aut frequenter occurrente, v. g. circa festa, ieiunia: cum vero simile non sit, Principem velle, vt in rebus parui momenti, aut quæ ob frequentiam ad iurisdictionem ordinariam necessariae sunt, mul-

toties ad ipsum recurratur. Qua de re S. Thom. in 4. d. 15. quæst. 3. a. 2. Sotus lib. 1. de iust. quæst. 7. a. 3. Caiet. i. 2. quæst. 97. a. 4. Syluest. verb. dispensatio, quæst. 9. Sa eod. ver. num. 9. Suarez lib. 6. de legibus, c. 14. num. 9. Salas de legibus, disput. 20. sect. 3. Denique quotiescunque in lege Pontificia, v. g. latæ irregularitatis, dicitur in ea dispensari posse, intelligitur talis potestas Episcopis concessa, iuxta Gloss. receptam in cap. in quibusdam, de pœnis, ver. dispensatum: quia alioquin eiusmodi verba frustra posita essent: cum omnibus notum sit, Papam in tali lege dispensare posse, sicuti notauit Syl. cit. q. 9. Suar. cit. c. 14. num. 8.

Loquimur autem de dispensatione in legibus: At verò dispar ratio est de dispensationibus super voto, ac iuramento: in quibus ordinario iure Episcopi cum subditis suis dispensare, eosque à peccatis omnibus & censuris absolui possunt, nisi Papæ specialiter reseruata sint. Quia talis absoluendi ac dispensandi facultas, ob frequentem eius necessitatem, omnino Ordinarijs conuenit, ad rectam gubernationem & salutem animarum, sicuti constat ex cap. 1. de voto. Parochis verò iure ordinario non conceditur dispensandi potestas, sicuti ex communi notauit Nauar. c. 12. num. 75. & 79. Suarez lib. 6. de voto, c. 10. Sed interdum ex speciali priuilegio, vel consuetudine, introductâ ratione necessitatis, in casibus frequenter occurrentibus, quod facillè accidere potest in Germania nostra, vbi Parochi sæpe ab Episcopo suo remotiores sunt. Qua de re Caietan. verb. ieiunium, Gabr. in 4. d. 38. quæst. 1. in fine, Nauar. cap. 21. num. 21. Suarez cit. lib. 6. de legibus, c. 14. in fine.

Delegata dispensandi potestas alia est à iure, quæ si in perpetuum concedatur non annexa personæ, sed officio aut dignitati, æquiparatur ordinariæ, vt suprà dixi, & constat ex l. 1. ff. de officio eius, cui commissâ est iurisdictione, & cap. quoniam, Abbas, de officio delegati. Alia est dispensatio ab homine, quæ dupliciter prouenit: I. per modum puræ commissionis, vel mandati, in fauorem certæ causæ, personæ: cuius dispensationis ea natura est, vt delegante mortuo, aut deposito, expiret commissio, si res integrâ est, siue causa executioni nondum mandari coëpta, iuxta cap. relatum, de officio delegati in 6. Præterquam, si delegatio à dignitate potius, quam particulari persona delegantis profecta videatur, tali verborum formula, *Sedes Apostolica tibi committit*. Nam *Sedes ipsa non moritur*: sed in successore continuatur, cap. si gratiose, de rescriptis, in 6. & ex communi docet Sanch. lib. 8. de matrimon. disput. 28. num. 44. II. Per modum gratiæ in fauorem delegati; quæ si absolutè conferatur, non expirat morte concedentis, iuxta cap. si tibi absenti, de præbendis, in 6. Debet enim concessum à Principe beneficium esse mansurum, regul. 16. in 6. Quare etiam hoc discrimen est, quòd facultas seu priuilegium dispensandi alicui generatim seu indefinitè concessum; cum sit gratia & beneficium, latè interpretari debet, sicuti docent Doctores in cap. at si Clerici, §. de adulterijs, de iudic. & cap. vltim. de Simon. Couarruu. in epitom. p. 2. cap. 8. §. 8. num. 26. At verò commissâ alicui facultas dispensandi cum persona particulari, strictæ interpretationis est, sicuti & ipsa dispensatio: cum Commissarius sit solum quæsi executor dispensationis factæ à Superiore, sicuti ex Felino annotauit Suarez lib. 6. de legibus, cap. 17. num. 10.

Dispensatio diuiditur I. in expressam & tacitam. Illa verbis fieri solet: (quamuis certam verborum formam non requirat, teste Suar. lib. 6. cap. 13. de legibus) hæc facto aliquo, ex quo voluntas dispensantis percipi possit. Nam in his, quæ certam verborum formam non postulant, tantumdenoperatur voluntas re aut facto significata, quam si verbis explicata sit: quia *taciti & expressi eadem virtus est*, argum. l. 32. ff. de legibus, & l. qui ad certum, ff. locati. Quæ quidem doctrina difficultatem nullam habet, si Princeps in propria lege dispense; v. g.



Pontifex matrimonio iungat quos Ecclesiastica lege inhabiles esse non ignorat: vel Rex Iudicem constituat, quem seruum suum effecit, tacite ei libertatem conferre censeatur, iuxta l. Barbarius, ff. de officio Prætorum. Sed idem quoque de inferiore, puta Episcopo vel Ordinis Prælato, dispensandi facultate prædito in iure Pontificio, dicendum; ut si v. g. subdito irregulari literas dimissorias det ad ordines suscipiendos, vel confessionibus audiendis exponat, tacite cum ipso dispensare censeatur, sicut ex communione docet Syluest. verb. dispensatio, num. 21. & verb. irregularitas, in fine, Sa verb. dispensatio, num. 8. Sanch. lib. 8. disp. 4. num. 15. Suar. de censuris. disp. 41. sect. 3. num. 4.

- 8 Porro aduerte, ad tacitum consensum omnino necessariam esse scientiam eius, quod agitur: qui enim nescit, utique non consentit. Quare rati habitio, quæ dicitur de præterito, nullo modo sufficit ad conferendam potestatem, aut valorem illi actui, ad quem actualis voluntas conferentis requiritur: Cuiusmodi esse solet v. g. dispensatio ad ordines, collatio iurisdictionis, approbatio Confessarij. Quare illegitimè natus, etsi certissimè persuasus Papam dispensaturum si causam cognitam haberet, ordines suscipiat, censuram suspensionis nihilominus incurrerit. Item si Sacerdos iurisdictione carens à peccatis absoluat, eo necessitatis casu, quem si Ordinarius sciret, haud dubiè iurisdictionem conferret, absolutio irrita est, neque subsequente ratificatione conualescit, sicuti dicam lib. 5. tractat. 6. cap. 10. num. 12.

Exinde resolve: Cùm hodierno iure iurisdictione seu potestas audiendi confessiones Sacerdoti committi non possit, nisi prius ab Episcopo approbatus sit; consequens hinc esse, si Parochus audiendis confessionibus exponat Sacerdotem ab Episcopo non approbatum, prætextu rati habitio, vel approbationis postea conferendæ, nihil effici. Qua de re videri potest Suarez 3. p. tom. 4. disput. 26. sect. 1. & disput. 28. sect. 4. num. 11. Excipe, nisi hoc

- 9 postremo casu communis probabilis error, in loco, ubi res gesta est, accedat: Nam *error communis, cum titulo præsumpto, ius facit, iurisdictionemque tribuit, etsi occultum subsit impedimentum ex iure positivo proveniens* argum. 1. Barbarius, ff. de officio Prætorum, & tradit Gratianus in cap. 1. causæ 3. quæst. 7. Gloss. in l. 3. ff. de suppellectili legata, verb. *error ius facit*, & Gloss. in cap. ad probandum, de sentent. & re iudicata, ver. innotatus, Richar. in 4. d. 18. a. 7. quæst. 1. Palud. in 4. d. 17. quæst. 6. a. 2. Abbas in cap. sciscitatus, num. 11. de rescript. Mascardus de probationib. conclus. 648. Vgolin. de censuris, tabul. 1. cap. 13. §. 3. & 4. Petrus Sotus lect. 6. de Confess. §. quod verò, Castro lib. 2. de lege pœnali, c. ult. concl. 2. Henric. lib. 6. c. 7. num. 2. & lib. 13. c. 7. num. 6. Sanchez lib. 3. disp. 22. de matrim. Less. lib. 2. c. 29. dub. 8. num. 67. Sensus illius regulæ est: Si à legitimo Superiore, videl. Papa, Rege, Episcopo, Parocho, commissa sit alicui iurisdictione, bona vel mala fide, in foro externo, vel interno; qui ob impedimentum publicè ignoratum iurisdictionis incapax est, omnia illius acta valent, etiam paucorum respectu, qui impedimentum cognitum habent. Ratio est, quod tali casu, ad vitanda scandala & gravia Reipubl. incòmoda. Princeps vniuersali iure ac voluntate, non obstante tali defectu occulto, agendi potestatem conferre censeatur, sicuti bene explicat Suarez de censuris disp. 2. sect. 4. num. 2.

Corollarium. Si Sacerdos excommunicatus, atque denuntiatus, ex eo loco in alium remotum se transferat, ubi eius impedimentum ignoratur, ibique parochiale beneficium, Episcopi auctoritate, accipiat, absolutiones eius validæ erunt, sicuti tradit Abb. in c. veritatis, num. 33. de dolo & contumac. Suar. de cens. disp. 11. sect. 2. num. 14. Item si alicuius ad Episcopatum electionem, aut confirmationem ob occultum defectum irritam fuisse postea innotescat, gesta eius retractari non debent, sicuti docet

Abb. in c. nihil, num. 12. de elect. Idemque dicendum in casu, quo iurisdictione ordinaria, vel delegata alicui ablata, aut reuocata est; seu ipso iure, seu per sententiam, aut mortem delegantis: si tamen talis adeptio vel reuocatio publicè ignoretur, & reuocatus vel priuatus officium vel iurisdictionem, quamvis mala fide, administret, acta eius valida erunt: in tali casu ipso iure supplente defectu, sicuti ex communi docet Syl. verb. Confessor 1. quæst. 19 §. tertio verò, Less. lib. 2. cap. 29. num. 66.

Dictum est autem in regula I. Si *error communis* sit: nam paucorum error non sufficit. Nihil autem refert, utrum error facti sit an iuris, dummodo iustus: ut si probabilis sit Doctorum sententia, iurisdictionem ob talem causam non amitti, etsi in veritate aliter se res habeat, existimandum est, quod ius suppleat defectum. Vel si populus dubitet, utrum iurisdictione in aliquo casu amissa sit, & rei veritatem cognoscere non possit: cùm in dubio Iudex vel Pastor non sit priuandus Possessione iuris sui, meritò populus interim ab eo administrationem officij petit, ac recipit; ideoque ius supplet defectum, si quis re ipsa subsit, uti docent Less. num. 68. Sanchez lib. 3. disp. 20. num. 4. II. *Cum titulo præsumpto*. Quare si Sacerdos absque consensu Ordinarij, vel parochi, se alicubi intrudens, Confessiones audiat, nihil efficiet, quamvis impedimentum publicè ignoretur: idque notauit Abb. in c. 2. num. 4. de restit. in integrum, vbi ait, quod *gesta ab intruso non valent, quantumcumque, si toleratus*. III. *In loco ubi res gesta est*: Quia non obstat, impedimentum Sacerdotis, in Hispania v. g. excommunicati ac denuntiati, notorium esse; si in Germania, ubi ad Ordinario cum titulo præsumpto parochiam consecutus, vel à Parocho tanquam Cooperator expositus est, publicè ignoretur: quod extra controuersiam esse oportere, ait Abb. in c. sciscitatus, num. 13. de rescript. IV. dictum est, si impedimentum ex *iure positivo* proveniat: Nam aliud sentiendū, si ex iure naturali vel diuino descēdat: quippe quod humana voluntate tolli non potest. Exempli causa: Si Parochus Diaconum, qui publicè existimatur Sacerdos, mittat ad assistendum matrimonio, benedicendum aquam, vel nuptias, valida erunt acta eius; non item, si eundem audiendis Confessionibus exponat, sicuti benè notant Vgol. tab. 2. c. 13. §. 4. Caiet. ver. confessio iteranda ex parte Confessoris, Abb. in c. 2. de Presbytero non baptizato, Richar. in 4. d. 17. a. 3. q. 4.

Aliter diuiditur dispensatio apud Syl. ver. dispensatio 10 in princip. in licitam, & illicitam. Licita est, quæ cum iustæ causæ cognitione fit: eaque interdum etiam debita est; cùm vel legis, aut Superioris præceptum; vel publica vtilitas, aut priuata hominis necessitas eam conferri postulat: Interdum verò non debita, tamen permixta ob misericordiam, pietatem. Qua de re Suar. lib. 6. de legib. c. 18. num. 19. Illicita verò dispensatio est, quæ temere ac imprudenter fit, iusta causa non cognita: Quare non tam dispensatio, quam dissipatio dici debet.

## Q V A E S T I O N E S D E D I S P E N S A T I O N E .

### S V M M A R I V M .

- 11 Si inferior sine iusta causa in lege superioris dispense, irrita est dispensatio.
- 12 Peccatum est, ex genere suo mortale, temere dispensare in lege superioris, vel talem dispensationem petere, aut concessa esse.
- 13 Si superior in lege propria dispense, absque iusta causa: valet dispensatio: quamvis ipse, & qui talem dispensationem petit, eaque data esset, saltem venialiter peccent.

11 Q V A E S T I O P R I M O . Vtrum dispensatio illicita sit etiam inualida? Resp. & dico I. Si inferior



sine iusta causa dispense in lege Superioris, v. g. Episcopus in lege Pontificia, irrita est dispensatio. Quæ est omnium Doctorum sententia, teste Suar. lib. 6. c. 19. num. 1. Sanch. lib. 8. de matrimon. disput. 17. quæst. 1. num. 4. Ratio est: Quia delegatus, si excedat limites commissæ potestatis, nihil efficit. Cum autem Papa v. g. Episcopis committit dispensandi potestatem in lege vniuersali, non præsumitur dare facultatem temere & iniquè dispensandi. Ergo si ita dispense, non valet dispensatio. Ex quo etiam colligitur, dispensationem in voto vel iuramento siue iusta causa factam à Papa, aliòve Ecclesiastico Prælato irritam esse, sicuti ex communi docet Sanch. cit. quæst. 1. num. 3. Suar. lib. 6. de voto, cap. 17. num. 2. Nam talis dispensatio est in iure superioris Dei: non est autem credibile Deum commississe suo in terris Vicario, aliisque ab eo constitutis pastoribus potestatem temere & sine causa relaxandi vota, vel iuramenta sibi facta. Esset enim hæc potestas non dispensandi, sed dissipandi; non ad ædificationem, sed destructionem. Quare neque Oeconomus, cum contra domini sui voluntatem bona vel iura eius dissipat, quidquam efficit, aut dominium transfert.

12. **Corollarium.** Qui sine iusta causa ac temere dispense in lege Superioris, modo explicato; item qui talem dispensationem petit, eave utitur, is mortaliter peccat, si lex, in qua ita dispense, sub mortali peccato obliget. Quæ de re Caietan. in summa, verb. dispensatio. Verum ne ea res hominibus anxietates pariat, moderationes aliquas Doctores adhibent: I. Et si Prælatus iustam causam non agnoscat, ideoque temere & non sine culpa dispense; si tamen re vera causa iusta suberat, valida est dispensatio, sicuti præter alios notauit Armilla verb. dispensatio §. 14. II. Si Prælatus probabiliter arbitretur, iustam adesse dispensandi causam, quamuis eum errare contingat, valet tamen dispensatio, ob præsumptam voluntatem Superioris, in cuius iure dispense, sicuti obseruat Sanch. cit. disput. 17. quæst. 1. num. 8. Idque intelligi debet, etiamsi dispensatio fiat in iure Dei, ex commissione Vicario suo facta; puta in votis, ac iuramentis: item in concessione indulgentiarum, si legitima pastoralis potestate prædictis rationabiliter existimet, causam iustam subesse, sicuti docet Henriquez lib. 7. c. 14. num. 3. lit. y. III. Si subditus bona fide dispensationem petat, allatis rationibus, quas Superioris examini committit, impetrata dispensatione, securus esse potest, & præsumere, legitimè collatam fuisse, (saltem in conscientie foro) donec contraria veritas appareat, teste Soto in 4. d. 21. quæst. a. 2. & lib. 7. de iust. quæst. 4. a. 3. Nauar. prælud. 9. man. num. 13. Suar. lib. 6. de voto, c. 17. num. Lopez p. 1. instruct. c. 4. arg. c. in præsentia, de renunt. & c. quid culpatur, 23. quæst. 1. In foro autem externo interesse videtur, utrum dispensatio proprio motu Superioris data sit; an verò ad instantiam partis. Nam illa fauorabilior est, habens præsumptionem iuris, & de iure, affuisse idoneam causam: hæc verò odiosa magis est: quare in dubio per importunitatem extorta præsumitur, onusque probandi contrarium ei incumbit, quo cum dispensandum fuit, sicuti ex communi docent Suarez tom. 5. de censuris, disput. 41. in fine, Sanch. l. c. num. 14.

13. **Dico II.** Si Superior in propria lege sine iusta causa ac temere dispense; valet dispensatio: quamuis peccet non solum ipse; sed etiam qui talè dispensationem postulat. Est communis sententia Doctorum cum S. Tom. 1. 2. q. 97. a. 4. & 5. Prima pars probatur: Nam legis obligatio necessariò dependet à voluntate Legislatoris. Ergo si is, vnus, aut plures à Communitate obligari nolit, cessabit obligatio legis, eorum respectu. Vbi nota, licet ad legem statuendam non sufficiat voluntas Legislatoris; sed requiratur etiam causa rationalis, Communitati utilis; tamen ad eam abolendam ex toto, vel ex parte, sufficit ita velle Legislatorem, eiusve successorem. Nam vniuersim loquendo, ut effectus ponatur, requiritur cau-

sa integra; ut autem collatur, sufficit partialem causam, ex qua intrinsecè pendet, deficere.

Quod ad alteram partem attinet, Nauar. prælud. 9. num. 14. Soto lib. 1. de iust. q. 7. a. 3. prope finem, Salas de legib. disput. 20. num. 54. Lopez p. 1. instruct. c. 4. §. sexto superaddimus, Sanch. lib. 1. moral. c. 20. existimant, per se loquendo, & cessante scandalo, esse id tantum veniale peccatum: Vtitur enim Legislator iure suo; perinde ac si quis pecuniam suam prodigat. Suarez verò lib. 6. de legib. cap. 18. num. 9. Valent. to. 2. disp. 7. quæst. 5. p. 9. Couar. in 4. p. 2. c. 6. §. 9. num. 15. putant, dispensantem sine causa iusta peccare contra iustitiam tum legalem, tum distributiuam, adeoque ex genere suo mortaliter; consequenter etiam eum, qui dispensationem petendo ad tale peccatum cooperatur. Sed responderi potest, violationem iustitiæ legalis aut distributiue mortalem non esse; nisi graue damnum Communitati inferatur: atqui per se loquendo, non inferitur graue damnum Communitati, si aliquis sine causa à communi lege absoluitur: dummodo talis gratia dispensationis sit, per quam alijs nihil adimitur; v. g. ne aliquis in quadragesima ieiunare cogatur. Ceterum, si aliquibus à communi v. g. tributo vel obsequio sine iusta causa exemptis, alijs plus grauarentur; certum est, mortale peccatum fore. Probabiliter igitur teneri potest prior sententia; per se loquendo, esse peccatum duntaxat veniale: quatenus deformitas quædam est, partem à toto sine causa discrepare. Quare similiter etiam peccabit, qui dispensatione, absque legitima causa impetrata utitur: peccabit, inquam, non quidem directè contra legem positiuam, cuius obligatione re vera solutus est; sed contra legem naturæ peccato singularitatis & insolentiæ, ex genere suo veniali: turpis enim est omnis pars suo vniuerso non congruens, sicut ex communi docet Caietan. 1. 2. quæst. 96. a. 5. prope finem, Conarruu. in 4. decretal. p. 2. cap. 6. §. 9. num. 16. Sanchez lib. 8. de matrimon. disput. 18. num. 12. 13. quamuis Azor tom. 1. lib. 5. c. 15. quæst. 3. & Suarez lib. 6. c. 16. num. 4. in vlt. talis dispensationis nullum omnino peccatum agnoscant.

## SUMMARIUM.

14. Si causa dispensandi tempore datarum literarum adfuit; non item, cum à Commissario dispensatio facienda est, non potest eam executioni mandare. Cessante finali causa mandati, effectus mandati expirat, si nondum consummatum fuit. Etsi tempore exequenda dispensationis causa subsistat, si tamen non subsistit tempore datarum, quia postulatio subreptitia erat, non potest dispensationem exequi Commissarius.
15. Si causa dispensandi subsistat, cum dispensatio facta ab Ordinario vel Commissario intrinsecum effectum consecuta est, nihil interest, etsi postea causa cesset.
16. Privilegia & dispensationes, quæ tractum successuum habent, cessant causa finali, pariter cessant. Si cum aliquo in voto continentia absolute & illimitate dispensatum fuit: intelligitur ad omne legitimum matrimonium.

**Q**uestio secunda. Si tempore dispensationis in voto, iuramento matrimonij, &c. iusta dispensandi causa adfuit, postea verò penitus cesset, utrum dispensatio quoque vim suam amittat? Pro solutione notandum est ex Suar. libro 6. de legibus capite 20. numero 2. Triplex tempus seu statum rei spectari posse: I. Cum indultum dispensandi est concessum; sed dispensatio nondum collata. II. Cum dispensatio alicui impetrata, sed effectus eius & utilitas nondum executioni mandata est. III. Postquam dispensationis vltimus effectus & utilitas secuta est. Hoc posito, resp. & dico I. Si tempore impetrationis, vel datarum literarum (potest enim dispensatio, & privilegium vel viua voce, vel in scripto concedi) causa subsistat dispensandi; non item, cum ex dantis commissione, precum veritate inspecta, dispensatio conferenda est; non potest eam Commissarius executioni man-



dare. Exemplum habes: Caia, allegata paupertate ac dotis defectu, susceptione item prolis ex sanguine suo, postulavit à Papa dispensationem super impedimento consanguinitatis: Papa commisit Ordinario, vel Officiali eius, ut precum veritate inspecta, cum Caia, eiusque consanguineo dispenseret: sed priusquam id Officialis exequitur, proles moritur, & Caia hæres ab extraneo constituitur: non potest tunc Ordinarius cum ipsis dispensare, sicuti docet Gutierrez lib. 1. can. quæst. c. 15. num. 22. & lib. 2. c. 15. num. 3. Suarez lib. 6. de legibus, c. 20. num. 13. Sanchez lib. 8. de matrimon. disp. 30. num. 12. Coninck in 3. p. tom. 2. disput. 33. sect. 6. num. 94. Ratio, est: Quia cessante causa finali mandati, cessat mandatum, si res integra sit, cap. si pauper, de præbendis, in 6. Siue, ut alijs verbis idem dicam, Cessante causa mandati, effectus mandati exspirat, si nondum consummatus est. Dispensatio autem Ordinario commissa, effectum suum (qui est absolutio à lege, vel impedimento) non fortitur, priusquam is mandatum exequitur: ergo si tunc, tempore inquam executionis, causa mandati cesset, non poterit executioni mandari. Loquor autem in casu, quo causa dispensationis finalis ac principalis totaliter, aut ferme totaliter cessat: secus enim est, si cesset tantum causa impulsiva, item si pars causæ finalis desinat, altera adhuc manente; ita ut executor benignè interpretari possit, concedentis mentem esse, ut dispensatio executioni mandetur, sicuti notavit Sanch. n. 7. & 8. Imò posteaquam gratia dispensationis faciendæ à Papa emanavit, præsumendum est, facilius permittere, ut executioni mandetur, quam ut ab initio concedatur, sicuti notavit Coninck cit. dub. 6. in fine. Quamobrem, quod Gutierrez ait lib. 1. n. 25. non posse Officialem Ordinarium ravalidè dispensationem Papalè exequi, si interea temporis aliquid innouatum est, quod dispensationem difficiliorem redderet; id intelligo, si tale sit ut iuxta stylum curiæ præsumi debeat, non esse mentem Pontificis, ut dispensatio tali mutatione superueniente executioni mandetur: v. g. si copula incestuosa interceserat, sicuti ex communiore docet etiam Sanchez lib. 8. disp. 35. n. 8. secus, si aliud quippiam interueniat, quod etsi tale sit, ut eo cognito Papa talem dispensationem non concessisset; posito tamen quod concesserit, præsumi facile non debet, velle ut eius executio, vel usus impediatur.

15 Dico II. Si viceversa accidat, ut tempore quidem conferendæ seu exequendæ dispensationis, causa subsistat; sed non constiterit tempore impetrationis seu concessionis, ac datarum literarum; quia postulatio fraudulosa & subreptitia fuerat, non potest dispensatio fieri à Commissario, vel executore, sicuti constat ex c. si eo, de rescript. in 6. & docet Suar. n. 14. Idque, probatur tum ex iuris reg. 18. *Non firmatur tractu temporis, quod de iure ab initio non subsistit*: tum ex verbis quibus commissio fieri solet, *precum veritate inspecta*.

Dico III. Si causa dispensandi eo tempore subsistat, cum dispensatio ab Ordinario, aut Commissario absolute facta, intrinsecum effectum consecuta est, etsi postea desinat subsistere, non tamen reuiuiscit obligatio, quæ semel per dispensationem ablata fuit. Ita docet Gutierrez ll. cc. Suarez lib. 6. de legib. c. 20. num. 15. Covar. 1. resolut. c. 10. num. 5. Abb. c. post translationem, n. 17. de renuntiati. contra Sanch. lib. 8. de matr. disp. 30. n. 14. Exemplum sunt. Si cum aliquo dispensatum sit super irregularitate, ob penuriam ministrorum Ecclesiæ; etsi hæc ratio post collatam dispensationem cesset, non reuiuiscit irregularitas. Item, si cum aliquo dispensatum sit super voto continentiae, vel super impedimento matrimonii causa legitimandæ prolis; etsi post factam dispensationem proles moriatur, non reuiuiscit impedimentum, aut voti obligatio. Ratio est: Quo per dispensationem, causa iusta subsistente, extinguatur obligatio legis aut voti: ergo postea reuiuiscere non potest, nisi per aliquam causam moraliter efficientem: quæ in proposito casu nulla assignari potest.

Confirmatur primò: Sicuti, si Princeps debitum sibi tributum absolute alicui remittat, quia pauper est; etsi ille cras, præter opinionem, thesauro reperto, diues factus fuerit, non corrumpit tamen donatio siue remissio heri facta: Ita etiam si Princeps aliquos consanguineos absolute liberauit impedimento matrimonij, quia causa iusta adeerat, v. g. legitimandæ prolis, etsi postea præter opinionem causa cesset, proles v. g. ante nuptias moriatur: nihilominus consanguinei illi dispensatione uti poterunt. Confirmatur secundò ex regul. 73. in 6. *Factum legitime retractari non debet, licet casus postea eueniat, à quo non potuit inchoari*.

Hanc tamen regulam Doctores limitant I. Si factum consummatum, & non tantum inchoatum sit: Nam etià privilegia & dispensationes, quæ tractum successuum habent, cessante causa finali, pariter cessant, sicuti rectè docet Sanchez loc. cit. & Suarez num. 18. Quare, si Papa cum infirmo, cuius valetudo desperata videtur, absolute dispenseret in lege ieiunij; ille autem præter opinionem vires integrè recuperet, tenebitur postea legem cum alijs obseruare. Nam sicuti obligatio Ecclesiasticorum ieiuniorum successiuo tempore oritur: ita etiam decens est, ut dispensatio liberationem à ieiuniorum lege successiuè operetur, dum causa subsistit. Neque verò aliam Pontificis dispensantis mentem fuisse existimari debet. Quia nunquam præsumendum est peccatum: peccasset autem dispensando Pontifex, si aliquem ab obseruatione legis communis exemptum voluisset, etiam eo euentu, quo omnis causa exemptionis penitus cessauit. Vide Suarez lib. 8. de legib. c. 30.

Limitant II. Nisi effectus actus legitimi per rerum mutationem ad impossibile redigatur, sicuti præter alios notavit Henricus Canisius super eadem regul. 73. Exemplum sunt: I. in lege Principis, cuius ratione & utilitate penitus cessante, desinit obligare: quia fieri non potest, ut lex obliget ad actum inutilem. II. In sponsalibus, quæ superueniente v. g. impedimento affinitatis, ipso iure solvantur: quia fieri non potest ut obligent ad nuptias incestas. III. In voto & iuramento, si eius obiectum per rerum mutationem iniquum, vel inutile efficiatur: qui fieri non potest, ut aliquis ex religionis virtute obligetur ad rem malam, vel inutilem præstandam.

His affine dubium est. Si quis nuptias contracturus cum 16 Caia, petat & impetret dispensationem super voto continentiae; utrum impeditis postea his nuptijs, aliud matrimonium contrahere possit? Respondeo, Inspiciendam esse causam, & formam factæ dispensationis: Nam interdum dispensatio, v. g. in voto continentiae, confertur limitatè, ac respectuè; puta in ordine ad certum matrimonium, cuius contrahendi causa atque necessitas incumbit, v. g. ne mulier decepta insaniam incurrat: tunc enim talibus nuptijs impeditis, non erit licitum aliud matrimonium contrahere, sine noua dispensatione. Secus est, si dispensatio super voto continentiae in ordine ad matrimonium contrahendum alicui absolute data sit, propter difficultatem continendi à supplicante allegatam: tunc enim, etsi nuptiæ, quarum contrahendarum causa dispensatio petita fuit, post dispensationem impediantur, poterit aliud matrimonium contrahere.

#### S V M M A R I U M.

- 17 Rescripta Principum alia sunt gratia: alia iustitia, sine ad lites,
- 18 Taciturnitas qualitatis, cuius expressionem ius, vel stylus curia specialiter requirit, gratia rescriptum subreptitium reddit: esse Princeps etiam expressa illa gratia concessurus fuisse.
- 19 Rescripta gratia subreptitia censentur, quæ per taciturnitatem veri, per se & intrinsecè ad rem pertinentis, obtenta sunt: si Princeps, ea veritate expressa, non concessisset. Vel saltem tali modo non concessisset. Idque variorum casuum exemplis illustratur.
- 20 Dissimulatio veritatis, quamvis intrinsecè pertinet ad rem postula-



*postulatam, non vitiat dispensationem aliamve gratiam, si presumptio esse possit, etiam intellecta tali veritate Superioris dispensatum fuisse.*

- 21 *Si qualitas dissimulata in postulatione extrinsece tantum se habet ad rem postulatam, non ideo dispensatio vel alia gratia subreptitia censetur: tamen si Princeps, ea circumstantia cognita, non dispensasset.*

17 **Q**UESTIO TERTIA. Quibus in casibus dispensatio subreptitia censetur, ob taciturnitatem veri? Imprimis nota; Rescriptum Principis aliud esse gratiæ, siue beneficii: aliud verò iustitiæ, siue ad lites, quod ad decisionem controuersiarum ex Principis curia prodit: de quibus multa Rebuffus in praxi beneficiorum, tit. de differentia inter rescripta gratiæ & iustitiæ. Præcipuum inter ea discrimen est, quod rescriptum gratiæ (cuius species quædam est dispensatio) obtentum per subreptionem ipso iure irritum sit, sicuti constat ex c. ad aures, c. constitutus, de rescriptis, c. ult. de filiis presbyt. in 6. Rescriptum verò ad lites non antè irritum censetur, quàm ab aduersario per acceptionem allegatæ subreptionis elidatur, arg. cap. si autem, c. plerumque, de rescriptis & docet Sanch. l. 8. disput. 21. num. 3. & Nicolaus Garcias de beneficijs, p. 8. c. 3. num. 1. Ratio esse videtur: Quia tamen rescriptum iustitiæ ex errore promanet; cum tamen versetur tantum circa media, siue modum litis terminandæ; potest nihilominus causam iuste terminari. At verò rescriptum gratiæ, cum versetur circa finem, videlicet gratiam obtinendam: si ex errore promanet, euertitur omnino principalis intentionis, sicuti notauit Coninck. 3. p. t. 2. disp. 3. dub. 6. tit. n. 56.

18 Nunc resp. & dico I. Taciturnitas qualitatis, cuius expressionem iura, vel stylus curiæ specialiter requirunt, reddit dispensationem, & quoduis gratiæ rescriptum, quod ob petitionem conceditur subreptitum, etsi constet Principem etiam expressa illa qualitate, similiter concessurum fuisse. Ita docet Couar. 1. resol. cap. 20. numero 5. §. verum, Gutierrez lib. 1. c. 15. num. 12. & lib. 2. c. 15. num. 38. Mascardus de probat. concl. 846. num. 2. Sanch. cit. disput. 21. num. 13. & seqq. Ratio est, quia expressio talis qualitatis requiritur tanquam forma postulationis. Quapropter vitabitur etiam dispensatio, licet qualitas, de iure simpliciter exprimenda, ignoranter omissa sit: cum enim omittitur forma, vel conditio sine qua non, corrumpitur actus: etsi ignorans talem conditionem requiri à culpa excusetur, sicuti docet Sanch. lib. 8. disp. 21. nu. 19. Exempla sunt: I. in c. cum adeo, & c. penult. de rescriptis. c. si motu proprio, eod. tit. in 6. ubi definitur, ex beneficii antè obtenti quantumvis modici taciturnitate, alterius impetrationem subreptitiam esse. II. In Auth. Quibus modis naturales effice. legitimi, §. si igitur, ubi rescriptum legitimisationis irritum dicitur, si in petitione expressum non est, quod filius naturalis sine dedecore parentis legitimari posset per subsequens matrimonium. III. Impetratio dispensationis super impedimento matrimonij intra gradum prohibitum, nulla facta mentione antecedentis copulæ incestuosæ, subreptitia est iuxta probabilior sententiam Sanchez libro 3. de matrimonio disp. 14. num. 3. & libro 8. disp. 25. Rebelli lib. 3. de matrim. q. 5. §. 4. n. 24. Gutier. li. 1. can. 99. cap. 15. n. 13. 16. Garcia l. c. n. 32. & aliorum. Quia stylus curiæ, qui ius facit, iuxta c. quàm graui, de crim. falsi, ita obseruat, & Cardinalium congregatio declarauit, apud Garcia n. 66. etsi contrarium docuerit Henric. lib. 12. c. 2. §. 4. & 7. Nau. lib. 4. consil. 5. de consang. & affinit. edit. 1. & consil. 8. & sequuntur edit. 2. Rodriguez tom. 1. summ. cap. 23. & concl. 5. Si tamen incestus occultus sit, poterit à sacra pœnitentiaria (quippe quæ super occultis eiusmodi casibus potestatem habet) dispensatio impetrari, facta interim mentione, quod super publico consanguinitatis aut affinitatis impedimento dispensauit, aut dispensaturus sit Summus Pontifex: idque ob vitandam infamiam, quia dispensatio impetrata à Summo Pontifi-

ce in foro externo publicari debet, sicut notauit Sanchez lib. 8. disput. 25. num. 11. Coninck disput. 33. dubio 6. num. 81.

Deinde ampliari debet assertio: Vt idem sentiendum sit, si iura speciatim prohibeant, ne aliquo casu vel circumstantia concurrente dispensatio concedatur: talis enim circumstantiæ taciturnitas dispensationem vitabit. Exempli causa, qui dispensationem petit super impedimento intra gradum prohibitum, posteaquam matrimonium ita inualide contrahere, vel etiam consummare presumpsit, tenetur circumstantiam istam temerè contracti, vel etiam consummati matrimonij intra gradum prohibitum, explicare: quia Trident. Concilium sess. 24. cap. 5. de reform. cum talibus specialiter vetat dispensari, de quo Henric. l. 12. capite 3. numero 8. Coninck tom. 2. disputatione 27. dubio 9. numero 81. & disputatione 33. dubio 6. numero 83. Sanchez libro 3. disputatione 45. numero 3. Adde, explicandum quoque esse, si matrimonium contractum vel etiam consummatum fuit sub hac temeraria spe dispensationis impetrandæ: quia Tridentinum ad hanc ipsam spem reprimendam vetuit dispensari. Hæc tamen intelligi debent, si vterque mala fide contraxit: sin verò alter culpa caruit, non debet spe dispensationis carere: ne innocens ob culpam nocentis plectatur.

Dico II. Extra dictos casus, dispensationes & rescripta gratiæ subreptitia etiam censentur, quæcunque per taciturnitatem veri per se & intrinsecè ad rem pertinentis impetrata fuerunt: si Princeps veritate expressa atque intellecta, probabiliter non concessisset dispensationem vel gratiam: vel cerè tali forma & modo non concessisset, sed cum adiuncta conditione, onere, ut infra explicabo quæst. seqq. Ita docet Couar. 1. resol. ca. 20. Abba. in ca. dudum, numero 1. de Presumptione. Vasquez tractatu de beneficijs capite 3. §. 4. dubio 3. Sa verb. gratia, numero 10. Sanchez citat. disputatione 21. numero 17. Garcias libro supra citat. numero 25. Coninck citat. dubio 6. Et sumitur ex cap. postulasti, & c. super literis, de rescriptis in 6. Ratio vero est manifesta: Quia concessio gratiæ pendet à voluntate concedentis: ergo quando præsumi potest, si totum vinculum seu difficultas dispensandi ad rem intrinsecè pertinens ostensa esset, quod Pontifex tali modo dispensandi animum non habuisset: consequenter etiam præsumi debet, tali veritate suppressa, irritam esse dispensationem, quippe inuoluntariè concessam, propter errorem. Exempla sunt: I. Si concurrant duo impedimenta, quæ se inuicem augent, in ordine ad obtinendam dispensationem: v.g. impedimentum duplicis consanguinitatis ex parte vtriusque parentis: vel impedimentum tam consanguinitatis, quàm affinitatis: non valet dispensatio super vno impetrata cum taciturnitate alterius, teste Couar. in 4. p. 2. cap. 6. §. 4. n. 11. Henric. li. 12. cap. 10. §. 3. Suarez l. 6. c. 24. n. 3. Sanch. lib. 8. disput. 25. num. 2. Per. Ledesma quæst. 56. de matrim. art. 2. dub. 1. ad 2. Garcias l. c. num. 54. quamuis contrarium doceat Nau. lib. 4. consil. 7. de consang. edit. 2. Sa ver. dispensatio, num. 16. & alij apud Sanch. l. c. n. 1. Atque ex hac communiore sententia sequitur, si aliquis tam consanguineus quàm affinis mulieris, primò petat dispensationem super affinitate: postea super consanguinitate, vtramque dispensationem subreptitiam fore: quia in odiosis, cuiusmodi est dispensatio, sub simplici mixtum non comprehenditur; secus esse videtur in facultate dispensandi v.g. super impedimenti consanguinitatis & affinitatis: adulterij & incestus: ea enim tanquam fauorabilis extendi potest ad dispensandum cum ijs, qui vtroque impedimento laborant: v.g. qui ex incestuoso adulterio natus est: vel qui vtroque impedimento consanguinitatis & affinitatis tenetur de qua re vide Sanch. lib. 8. disp. 2. num. 30. & disp. 24. numero 9.

II. Qui petit dispensationem super impedimento matrimonij in gradu inæquali, tenetur inæqualitatem



exprimere, si aliter contrahentium à communi stipite distet in primo gradu: v.g. si quis velit ducere filiam fratris sui. Nam hoc casu difficulter dispensare solet Summus Pontifex: sicuti dicam lib. 5. tr. ult. c. 6. num. 9. Idem dicendum, si consanguinitas vel affinitas ex duplici capite contracta sit: quare qui v.g. fornicatus fuit cum duabus sororibus eius feminæ, quæ cum matrimonium contrahere cupit; debet duplicem impedimenti causam siue radicem explicare: quia alioquin Pontifex non totum impedimentum cognoscit: sicuti docet Coninck disput. 33. dub. 6. num. 81. Sanch. lib. 8. disput. 24. n. 5. Garcias n. 88. contra Henric. l. c. Ob eandemque rationem, qui duo homicidia committit, is debet in postulatione dispensationis super irregularitate exprimere numerum homicidiorum, uti docet Suarez libro 6. de leg. capite 24. numero 12.

III. Si illegitimus à Papa dispensatus ad ordines, & beneficium etiam curatum, postea petat ab eodem dispensationem super beneficiorum pluralitate, debet impedimentum natalium iterum exprimere; quia alioquin non proponitur Papæ totum impedimentum, seu difficultas dispensandi, sicuti habetur in cap. 2. de filiis Præb. in 6. Secus est, si legitimationem à Papa absolute impetrasset: cum enim tunc defectum natalium abolutum habeat, non minus quam alij legitimi, pluralitatis beneficiorum curatorum cum dispensatione Papæ capax esse potest, sicuti notavit Molin. tom. 1. tr. 2. disp. 173. §. Item legitimatus. Cou. in ep. p. 2. c. 8. §. 8. n. 25. contra Sylu. ver. beneficium qu. 13.

IV. Qui à Principe legitimationis rescriptum petit explicare debet, sitne naturalis an ipurius: si spurius, in quo genere aut gradu fœditatis, sicuti docet Couar. in epit. p. 2. cap. 8. §. 9. Syluest. ver. legitimus, n. 8. Vasq. de testam. c. 1. num. 56. Præterea, si legitimationem petat, ut in bonis paternis succedere possit: explicandum, si pater legitimos liberos habet, in quorum præiudicium legitimationis cessura est: cum ob eam legitima ipsorum portio minuenda sit, sicuti docet Molina disp. 173. §. item si legitimatio.

V. Si aliquis à Papa impetravit dispensationem super impedimenta criminis v.g. vxoriciij: & postea simili crimine commissio aliam dispensationem, nulla facta mentione prius obtentæ, posterior subreptitia erit, argum. l. 3. Cod. de Episc. audientia, ibi, *ut remissionem venia, crimina nisi semel commissæ, non habeant*; & ex communi docet Sanchez lib. 8. disput. 22. num. 2. Suar. lib. 6. de legib. cap. 23. num. 12. ubi etiam generalem regulam tradit: In secunda dispensatione faciendam esse mentionem dispensationis antè obtentæ, quando exinde moraliter valde augetur gravitas vinculi, aut impedimenti, & consequenter dispensationis impetrandæ, arg. c. 2. de filiis Præb. in 6. Sic v.g. dispensatus super residentia ad quinquennium, si eo elapso, mox similem non residendi facultatem tacita priore dispensatione impetret, posterior subreptitia erit: Sic etiam privilegium amplioris exemptionis censetur subreptitium, si in eius impetratione non fiat mentio prioris exemptionis cum aliqua restrictione concessæ: qui est casus cap. penult. de præscript. ubi Abb. n. 14. Ex quo regula generalis colligi potest; Quod dispensatio vel privilegium absolutum inualidè impetratur, si non fiat mentio privilegij seu dispensationis prioris, datæ sub conditione cedente in alterius commodum: propterea quod Pontifex non censetur velle alteri ius suum auferre, nisi id exprimat, sicuti notavit Coninck disp. 33. dubio 6. Alioquin verò non videtur necessarium, si quis impetravit dispensationem cum aliqua restrictione, vel conditione, non in utilitatem alterius concepta: ac postea iterum absolute similem dispensationem petat, ut prioris mentionem faciat: sicuti docet Abb. in cit. capite penult. numero 13. Coninck cit. dub. 6. n. 90. afferens exemplum de eo, quo cum dispensatum fuerat super voto continen-

tia, cum obligatione ut quotidie recitet v. g. rosarium: cum nec iuris textus, nec ratio cogit, ut propterea secundam impetrationem, tacita priore, subreptitiam dicamus: quia sæpe Princeps, etsi memor sit prioris gratia cum restrictione concessæ, potest ac solet aliam super eadem re sine tali restrictione concedere; dummodo per eiusmodi mutationem non præiudicetur iuri alterius.

VI. Qui petit à Papa dispensationem super voto castitatis, habens etiam votum ingrediendi Religionem, debet utrumque votum explicare, sicuti docet Suarez lib. 6. de legib. c. 24. n. 8. Eademque ratio esse videtur, si quis dispensationem petat contrahendi matrimonium intra gradum prohibitum, qui iam antè voto castitatis, vel promissione sponsaliorum alteri feminæ obligatus est: nisi talis obligatio alia ratione tolli possit, v.g. per irritationem, sponsæ remissionem, sicuti docet Sanch. disp. 23. num. 4. licet aliter Garcias numero 62. Excipietiam debet eum Sanchez ead. disp. 23. num. 7. Coninck t. 2. disp. 33. dub. 6. n. 78. Nisi alterum impedimentum sit occultum, quod proinde in publicis litteris Papalibus exprimi aliquis non immerito reformidet; tunc potest petere dispensationem super vno impedimento, quod notorium est, videlicet super impedimento consanguinitatis; atque interim aliam dispensationem petere super affinitate contracta ex occulta fornicatione cum sorore eius cognatæ, quam ducere cupit, explicans summum Pontificem dispensasse, vel dispensaturum esse super impedimento consanguinitatis.

Dico III. Neque item dissimulatio veritatis, quamvis intus in se pertinet ad rem postulatam, dispensationem, aliamve gratiam vitiat: si præsumptio sit, etiam intellecta illa veritate, Superiorem eodem modo concessurum fuisse. Quemadmodum in contractibus quoque & donatione evenit, ut si dolus non præbeat propriè causam contrahendi, vel donandi; quia etiam perspecta veritate, alter contraxisse, donasset: non infirmetur contractus vel donatio; quamvis fortasse dolus impulerit donatorem, vel emptorem, ut facilius & citius donaret. emeret. Verum, stante dubio æquali, præsumendumne sit, errorem seu ignorationem fuisse causam finalem dispensandi, an verò tantum impulsivam; & vno verbo, utrum dispensatio in dubio valida & executioni mandanda, an verò irrita censi debeat? Doctores non consentiunt: Nam pro irrita habendam esse, docet Mol. t. 1. tr. 2. disp. 173. §. hinc colligitur, in fine. Coninck cit. dub. 6. num. 93. Cum enim impedimentum v.g. matrimonij, super quo dispensatio petitur, certum sit, dispensatio autem dubia; stat possessio pro impedimento. Sed contrarium non minus probabiliter tradit Sanch. cum alijs quibusdam l. 8. disp. 21. n. 29. Quia in dubio potius est, ut existimemus dispensationem (sicuti & alias dispositiones) à Principe sine alterius præiudicio promanantem, validam esse, quam ut irritam arg. c. Abb. de verb. significat. & l. quotiens, 2. ff. de rebus dubijs.

Dico IV. Si qualitas vel circumstantia, in postulatione dissimulata, extrinsecè tantum se habet ad rem postulatam, non ideo dispensatio subreptitia redditur; etsi ea circumstantia cognita Superior non dispensasset, sicuti ex communi docet Sanchez disp. 23. num. 18. Exempla habes: I. In eo, qui beneficium Ecclesiasticum, aliamve gratiam postulat, dissimulatis criminibus, quæ si Episcopus cognita haberet, non concederet: sicuti & pauper, qui vita improbus est, non censetur eleemosynam per errorem seu subreptitiè obtinuisse; quamvis dansei non dedisset, si hominis improbitatem agnouisset.

II. In eo, qui petit dispensationem super vna irregularitate, v.g. ex homicidio casuali, tacita altera irregularitate omnino separata, & priorem per se non aggravante, puta ex natalium defectu, sicuti docet Suar. cit. c. 24. n. 10. Idemque sentiendum de omnibus penis ac censuris.

III. In



III. In eo, qui petit dispensationem super voto continentiae; eaque impetrata, aliam dispensationem super impedimento matrimonij ad ducendam consanguineam vel affinem, sicuti docet Sanchez libro 8. disputatione 23. n. 4. Suar. cit. c. 24. num. 5. Coninck. t. 2. disp. 33. dub. 6. num. 74.

IV. In eo, qui impetrauit dispensationem de contrahendo matrimonio cum consanguinea, eaque ducta, ac mortua, aliam consanguineam ducere postulat, nulla facta mentione prioris dispensationis, sicut docet Suarez cit. libro 6. cap. 23. num. 19. Sanchez disp. 22. num. 13. Qui valde probabiliter addit, idem sentiendum esse, si quis impetrarat dispensationem, ut ducere posset consanguineam vnam; postea vero mutata voluntate petat dispensationem super impedimento consanguinitatis ad ducendam consanguineam alteram, nulla facta mentione prioris dispensationis: licet contrariam sentiat Suarez cit. c. 23. n. 21. Ratio vero pro sententia Sanchezij est: Quia haec duae dispensationes super diuersis sunt, non habentes inter se dependentiam: ideoque circumstantia prius obtenta dispensationis non censetur intrinsece pertinens ad causam dispensationis posterius obtinendam. Obiter autem hic nota: In dicto casu obtenta priore dispensatione, corrumpi prius impetratam, ut licitum deinde non sit priorem consanguineam ducere. Nam *tacita renuntiatio fieri censetur per factum contrarium*: Posterior autem dispensatio voluntarie impetrata, est contraria priori secundum executionem: Ergo impetrans censetur tacite priori renunciasse: *gratia autem semel repudiata, non potest amplius acceptari*. Ita docet Sanchez libro octauo disputatione 22. numero 15.

V. Qui petit dispensationem super irregularitate ex homicidio, non tenetur exprimere, quod Clericum occiderit: cum haec circumstantia ad canonicum impedimentum irregularitatis extrinseca & accidentaria sit, sicuti docet Molin. tr. 3. disp. 79. numero 9. contra Natur. consil. 18. de rescript. edit. 2. Suarez libro 6. capite 25. num. 12.

VI. Qui dispensationem acceperat super ordine sacro subdiaconatus, ut posset uxorem ducere: si postea velit consanguineam ducere, non videtur obligatus; ut in altera dispensatione mentionem faciat prioris, sicuti probabiliter docet Rodriq. t. 1. sum. cap. 238. concl. 4. Sanchez libro 8. disp. 22. num. 5. ubi generalem regulam tradit: si dispensationes sint super diuersis, & vna non habeat repugnantiam cum altera, non vitari posteriorem ob taciturnitatem prioris.

## S V M M A R I V M.

22 *Expressio falsi, si fuit causa finalis concedendi, dispensationes aliasque gratias vitiat. non item si fuit causa tantum impulsiva.*

23 *Si vna tantum causa obtinenda dispensationis, eaque falsa a supplicante allata fuit, collata dispensatio subreptitia censeri debet: similiterque si duae narratae fuerunt, quarum altera tantum vera erat, sed insufficiens ad ipsam dispensationem.*

24 *Expressio falsi vitiat dispensationem, si Principi causa finalis fuit dispensandi tali modo.*

25 *Vna parte rescripti ob subreptionem vitiat, altera pars, cuius causa vere subsistebat, ipso iure non vitatur: si partes separatae, & inuicem independentes sint.*

22 **Q**VAESTIO QUARTA Quibus casibus dispensatio subreptitia censeatur ob expressionem falsam Resp. & dico I. Expressio falsi tunc vitiat dispensationes, ac reliquas gratias, quando prudentis viri iudicio, Principi fuit causa finalis concedendi, non item, si fuit tantum causa impulsiva. Prior pars assertionis est communis apud Sanchez libro 8. de matrimonio, disputatione 21. questione 2. Suarez libro 6. de voto, capite 27. numero 12. Couarruias 1. resol. capite 20. numero 5. Nam causa finalis ea dicitur,

propter quam Princeps concedere vult, & qua non existente, concedere non vult. ideoque talis causa resoluitur in conditionem sine qua non: quae conditio plerumque in rescripto exprimitur: *Si ita est, vel si preces veritate nituntur*: sed etiam si non exprimitur, tamen subintelligitur, iuxta cap. 2. de rescriptis, ubi id notat Abb. num. 3. Vnde is colligit, si supplicanti opponatur, narrata non esse vera, onus probandi ipsi incumbere. Posterior vero pars licet non sit communis, est tamen probabilis & in praxi tuta sententia DD. quos citavi. Ratio est: Quia causa impulsiva dicitur, quae non absolute mouet ad concedendum: sed ad facilius concedendum: & sine qua non absolute nolisset concedere, quamuis difficiliter concessisset: consequenter in proposito expressio falsi, seu dolus, si tantum sit causa impulsiva, non resoluitur in conditionem sine qua non, neque comprehendi censetur illa clausula, *si preces veritate nituntur*: id enim intelligi debet de veritate principali, propter quam, & sine qua non Princeps gratiam concedere voluit. Neque obstat quod Princeps, si fraudem & mendacium postulantis cognitum habuisset, fortasse gratiam, in odium fraudulentum derogasset: si enim posita tali ignorance, concessit absolute & principaliter propter causam vere subsistentem, rata censeri debet concessio.

Porro ex his ad praxim deducitur primum: Quotiescunque in dispensatione super voto, matrimonij impedimento, vnica tantum causa affertur, quae propter malam informationem falsa est, irritam esse dispensationem, sicuti notauit Sanch. cit. disp. 21. n. 41. Suar. cit. cap. 27. numero 9. Ratio est: Quia Princeps, v.g. Summus Pontifex vel non potest dispensare sine vera causa, videlicet in votis & iuramentis; vel etsi absolute possit, tamen non vult dispensationem valere, uti constat ex clausula consueta, *si preces veritate nituntur*.

Deducitur secundum: Idem prorsus dicendum, si duae causae dispensandi narratae fuerunt, vna vera, altera falsa: sed quae vera erat, per se solam insufficiens est, ut ob eam Princeps, v.g. Papa licite possit, vel saltem soleat dispensare: tunc causa falsa censetur fuisse finalis, ideoque dispensatio corrumpitur, sicut Suar. notauit n. 10.

Deducitur tertium, Si duae causae dispensandi in rescripto gratiae, seu dispensationis sunt expressae, vna vera, & altera falsa, quarum vtraque per se sola sufficiens esse possit ad dispensandum: v.g. si voto continentiae obstrictus petat dispensationem tum allegato incontinentiae periculo, tum etiam quod ex motu, vel indeliberatione aliqua vouerit, quorum primum verum sit, alterum falsum: tunc attendendum erit non tam ad intentionem postulantis, quam illarum causarum potissimum Papae proponere intendit: sed potius ad intentionem concedentis, vtrum earum causarum potissimum nitatur, siue propter quam principaliter & absolute gratiam concedere voluerit: quatenus haec eius mens cum ex verbis rescripti, tum ex conditione & meritis causae colligi potest: in dubio autem aequali potius praesumendum est, ut actus valeat, quam, ut pereat, arg. c. Abbate, de verbor. signific. & notat Sanch. cit. disp. 21. n. 25.

Dico II. Tunc etiam expressio falsi vitiat dispensationem, quando sine ea Princeps, videlicet Papa voluisset quidem dispensare: non tamen tali modo, sed adiunctis commutationibus, aliisue conditionibus. Ita valde probabiliter docent Couar. l. c. Suar. c. 27. n. 10. Sanch. cit. disp. 21. n. 32. arg. c. si postulasti, de rescript. Exemplum est: Si aliquis petat dispensationem super voto Hierosolymitano, allegata corporis debilitate, ac paupertate, quarum prior causa vera sit, posterior falsa: tunc dispensatio Papae ei collata absque onere seu commutatione reali censeri debet subreptitia. Quia hanc numero dispensationem in tali forma & modo noluit concedere, nisi sub hac causa paupertatis: ergo est causa finalis huius numero rescripti, seu dispensationis: qua causa corrumpente, corrumpit



etiam dispensatio huius rescripti.

- 25 Dico III. Si gratia concessa duas partes inter se diuifibiles continet, vnâ per subreptionem vitiata, non idcirco ipso iure corrumpitur altera, si eius causa verè subsistat. Nam *utile non debet per inutile vitari*, reg. 37. in 6. si utile ab inutili separari possit. Exemplum est: Si quis petat dispensationem in voto castitatis, propter periculum lapsus ex grauibustentationibus: & simul dispensationem super impedimento affinitatis, vt possit ducere affinem, quæ alioquin maritum sibi similem acquirere non posset: si prima causa postulationis vera sit, altera verò falsa, distinguendum est iuxta c. super literis, de rescriptis: Vtrum ex simplicitate vel ignorantia, falsa causa allegata sit. hoc enim casu, si ea finalis fuit, vitiatur rescriptum quoad partem posteriorem, non priorem: vt proinde talis vxorem ducere possit, sed non affinem illam. An verò scienter & non per fraudem falsitas in altera petitione proposita fuerit: tunc totum rescriptum in pœnam criminis rescindi debet: saltem per Iudicis sententiam, sicuti hunc textum explicant Sanchez libro 8. cit. disput. 21. quæst. ult. Coniunct. t. 2. disp. 33. dub. 6. n. 67. & conducit ad hoc doctrina Abb in c. sedes, n. 4. de rescript. Quod expressio falsi magis odiosa sit, quàm taciturnitas veri: quia hæc frequentius ex ignorantia & simplicitate fieri solet.

### SUMMARIUM.

- 26 Error qualitatis adiectæ per modum demonstrationis, dispositionem vel rescriptum inutile non reddit: secus, si adiciatur per modum taxationis, ita vt rei substantiam designet.
- 27 Verba rescripti ad alium casum extendenda non sunt, nisi de intentione mandantis sufficienter constet.

**Q**uestio quinta. Vtrum vitietur rescriptum gratiæ, vt à Commissario executioni mandari non possit, si error aliquis incuria, v. g. scriptoris manu irrepsit? Casus sit talis. Titius & Caia in tertio affinitatis gradu coniuncti, cupientes matrimonium contrahere, à Papa super dicto affinitatis gradu, re tota sincere & perspicuis verbis proposita, dispensationem petiuerunt: Papa commisit Officiali, vt, si preces veritate niti cognouerit, cum eisdem Titio & Caia Apostolica autoritate dispenset: sed erratum fuit in Bulla Pontificia, quod pro tertio gradu affinitatis positus sit tertius gradus consanguinitatis. Quæritur, vtrum Officialis nihilominus dispensare possit, vt dictæ personæ matrimonio iungantur? Pro parte negante est; Quod licet error qualitatis, adiectæ per modum demonstrationis, non faciat inutilem dispensationem, vel rescriptum, quando de corpore siue rei substantia constat: v. g. *confero tibi beneficium simplex, quod vacat in tali Ecclesia, & talem fundatorem seu patronum habeat*, cum tamen alium fundatorem habeat: Attamen error qualitatis adiectæ per modum taxationis, ita, vt rei substantiam designet & contineat, omnino vitiat dispositionem vel rescriptum. Sanchez libro 8. de matrimon. disp. 21. numero 36. At verò error iste haud dubiè est circa qualitatem pertinentem ad rei substantiam, ideòque adiectam per modum taxationis, siue definitionis, vti in simili docet Sanch. cit. loco. Inutilem esse dispensationem, si erretur in gradu, asserendo esse secundum, cum tamen sit tertius: vel asserendo esse beneficium curatum, cum tamen sit simplex. Accedit, quod habetur in l. diligenter, ff. mandati, & notat Gl. in c. susceptum, de rescript. in 6. ver. per mortem, formam rescripti diligenter seruandam: esse: idque ipsum expressius dicitur in capite cui de non, de præbendis in 6. ibi, *Huiusmodi mandata, quorum fines diligenter seruari oportet, non debent ad casus alios, quàm expressos extendi.*

- 27 His tamen non obstantibus, Respondeo: Si Titius & Caia sufficientibus testimoniis Officiali ostendant, errorem ab ipsis commissum non fuisse; sed se sincere &

perspicuis verbis dispensationem super tertio affinitatis gradu petiuisse, quod Officialis commissionem sibi à sede Apostolica factam exequi possit. Idque probò, ex citato capite susceptum, de rescriptis, in 6. in quo habetur, verba rescripti esse strictè accipienda, & ad alium casum non extendenda: *nisi de intentione mandantis aliud appareret expressè*. Quæ exceptio omnino in isto casu locum habet: Si quidem dubitari nulla ratione potest, quin summus Pontifex voluerit dispensare super eo ipso matrimonij impedimento, quod sibi propositum fuerat: Propositum autem erat impedimentum affinitatis: Ergo in illo voluit summus Pontifex dispensare, siue eius dispensationem Officiali committere. Quare manifestum est, errorem illum, præter mandantis intentionem, incuria executorum, vel scriptoris irrepsisse: ideòque omnino materiale censendum esse, cuius nulla ratio habenda sit, sicuti in simili docet Sanch. cit. disput. 21. num. 38. Et si erretur in nomine, quocum dispensatur, v. g. *dispenso cum Ioanne Sanchez*, cum tamen sit *Ioannes Lopez*; validam esse nihilominus dispensationem: quia intentio potius, quàm verba in quouis rescripto attendenda est: neque enim decet, vt eiusmodi inuoluntarius error veritatis intentioni aliquid deroget. Accedit denique, hoc rescriptum subreptitium censi non posse: quia subreptio non fit sine aliqua callida veritatis suppressione, vel simili circumuentione ac dolo: cuiusmodi nihil in hoc casu interuenit.

### SUMMARIUM.

- 28 Prælati in lege propria dispensans, commutationem aliquam adiungere potest.
- 29 Episcopus lege vniuersali, & g. ieiuniorum cum aliquo dispensans eleemosynam imperare potest in opus pietatis: non per modum compensationis aut stipendij sibi obuenientis.

**Q**uestio sexta. Vtrum superior in lege dispensans aliquam commutationem admiscere possit, sicuti fieri solet in dispensationibus super votis & iuramentis? Responso est affirmatiua, apud Sanchez libro 8. disp. 14. num. 1. Suarez lib. 6. de legib. cap. 16. num. 2. & constat ex praxi curiæ Romane, vbi frequenter dispensatur in legibus canonicis, imperata aliqua multa siue eleemosyna: cuius exemplum habes in c. licet de feriis. Eundemque morem imitari posse Episcopos dispensantes in legibus diocesalibus, fatentur omnes.

Sed dubitant: Vtrum etiam Episcopus, vel simili potestate præditus, quibus casibus ipsi in legibus Pontificiis dispensare concessum est, v. g. in ieiunio, festorum obseruatione, commutationem aliquam in aliud pium opus, v. g. eleemosynam admiscere possit? Negant Nau. l. 5. cõf. 18. de pœnit. & remiss. num. 3. & 4. edit. 2. Sanchez l. c. n. 2. & lib. 3. disp. 10. q. 2. Sed probabilius affirmant Doctores in c. licet, de pœnis, Henricus quodlib. 12. q. 15. Suarez n. 4. Quia nulla lex prohibet Episcopos talem commutationem facere, puta in opus aliquod pietatis; non item per modum compensationis, vel etiam stipendij sibi aduenientis: sic enim intelligenda constitutio Trident. sess. 25. c. 18. de reform. qua vniuersim præcipitur, vt dispensatio gratis fiat. Confirmatur. Minor est potestas commutandi quàm dispensandi: Qui enim commutat, non omnino tollit obligationem, sed in aliam conuertit: quare, si cui concessa est potestas dispensandi, magis etiam videtur competere potestas commutandi: sicuti si dominus Oeconomus det potestatem debita remittendi, censetur etiam multò magis dedisse potestatem debita commutandi. Notandum tamen est, quod talis commutatio ab Episcopis maxime fieri possit in relaxatione earum legum, quibus subditi ad onus alicuius virtutis obligantur, v. g. ad ieiunium, festi obseruationem; vt eius loco aliquam eleemosynam facere teneantur, Non autem ita decens est impe-



imperare eleemosynæ opus in relaxatione aliarum legum, quæ ob alium finem institutæ sunt: v. g. cum Episcopus dispensando remittit denuntiationes matrimonij, imperitineus est, inquit Suar. l. c. num. 10. imponere multam pecuniariam etiam in opus pietatis: quia hoc nihil deferuit ad finem legis Ecclesiasticæ.

## SUMMARIUM.

- 30 Si Prælati &c. in lege ieiunii dispenset cum communitate, cuius caput existit, indirectè se ipsum etiam obligatione soluit.
- 31 Si Prælati sine iusta causa secum ipse dispenset, dispensatio nulla est.
- 32 In casu, quo Prælati cum subditis in lege dispensare possent: se ipsum etiam liberum censere potest.
- 33 Prælati dispensandi potestate præditi, Confessario suo committere potest, & secum, causa cognita, dispenset.

**Q**uestio septima: Vtrum Superior secum ipse dispensare possit? Hæc quæstio locum habet non tantum in supremo Principe v. g. Papa: sed etiam in inferioribus, puta Episcopo, ordinis Prælati, &c. vtrum secum dispensare possint tum in legibus proprijs diocesis, Ordinis; tum etiam in communibus, eo casu, quo cum subditis dispensare illis permissum est? Resp. & dico I. Si Superior, puta Papa, Episcopus, Ordinis Prælati iusta de causa cum subditis dispenset v. g. in lege ieiunii, observatione festi, se ipsum quoque legis vinculo indirectè soluit æquissima interpretatione, si alij omnes à communitate, cuius ipse caput est, legis obligatione liberati sunt, se quoque liberum esse oportere. Ita Sotus in 4. d. 21. q. 1. a. 4. Sanchez lib. 8. disp. 3. n. 2. de matrim. & alij communiter.

31 Dico II. Si Prælati absque iusta causa secum directè dispenset, quamvis in propria lege, dispensatio nulla est. Ita ex communi docet Suarez lib. 6. de legibus c. 2. numero 17. Probatur. Si enim Princeps propriæ legis vinculum sibi ad libitum, etiam nulla exigente causa, validè relaxare potest: sequitur eum legis vinculo, siue necessitate nunquam astrictum fuisse: quod manifestam contradictionem inuoluit. Probatur sequela. Non enim ea necessitas vel obligatio dici potest, quam, cum volueris, abicias.

Dico III. Vtrum Prælati, præditi potestate dispensandi cum subditis, etiam secum, iusta de causa, per se ac directè dispensare possint, non est extra controuersiam positum: Nam quo minus id efficere queat, obstare videtur, quia nemo in seipsum iurisdictionem exercere, vel in proprio facto auctoritatem præstare potest, sicuti constat ex l. ff. de auctor. tutorum, & ita docet S. Tho. in 4. d. 20. quæst. 1. a. 5. quæst. 4. ad 1. & alij apud Sanch. cit. disp. 3. num. 4. Plerisque tamen Doctoribus contrarium asserentibus posse videl. Prælatum ob iustam causam secum ipso dispensare: quam communem sententiam refert, & sequitur idem Sanchez n. 6. & seqq. & ex parte Suarez libro 6. de voto, c. 11. & 3. p. tom. 4. disp. 52. sect. 1. nu. 20. & libro 6. de legibus c. 12. num. 8. atque ad contrariæ sententiæ fundamentum respondent, non in omni actu iurisdictionis distinctionem personarum requiri: sed solum in coactione iudicii per sententiam. Iudicem enim haud dubiè personam distinctam esse oportet à partibus, quibus ius dicit.

Sin verò hæc responsio alicui non satisfacit: sed incredibile apparet, posse aliquem seipsum directè & auctoritatè obligatione aliqua soluere: cum etiam plerique Doctores in 4. d. 20. vbi Richar. a. 4. quæst. 3. Palud. quæst. 4. a. 3. concl. 5. ob eandem rationem negent, Prælatum sibi ipsi per se ac directè indulgentias concedere posse; (quævis contrarium defendat Suar. ll. cc. Henric. lib. 6. c. 8. & l. 7. c. 32. num. 3. Sanchez num. 12. resp. ad confirm. 4. argu.) tunc paulò aliter responderi potest; Si iusta causa adsit: ob quam in tali euentu Prælati etiam cum subdito dispensare possint: tunc naturalem æquitatem dictare Præ-

latum quoque legis obligatione se immunem reputare posse: ne videlicet ipse deterioris conditionis existat, quam subditi: vt proinde hæc non tam propriè dicta dispensatio, quam interpretatio sit.

Denique in praxi seculissimus modus est, si Prælati dispensandi facultate præditi, Confessori suo committat, vt secum causa cognita dispenset, sicut contra Suarez cit. c. 11. num. 3. docet Sanchez l. c. & lib. 4. moral. c. 37. n. 4. idemque tenet Palud. in 4. d. 38. quæst. 4. a. 2. conclusio 4. Syl. verb. confessor. 1. quæst. 9. Sa eod. ver. num. 15. vbi ait: Confessor Episcopi, vel Superioris exempti, potest in ipsum absolueno & dispensando, quidquid ille potest in subditos. Nihil enim prohibet, quo minus alter alteri iurisdictionem committere possit erga se ipsum exercendam: Sic enim Papa v. g. dat Confessario suo iurisdictionem à peccatis absolueno ipsummet Papam, vt docet S. Bonaventura in 4. d. 19. ar. 3. quæst. 2.

## CAP. XXIII.

## DE PRIVILEGIIS.

## SUMMARIUM.

- 1 Privilegium est privata lex, in alicuius fauorem data.
- 2 Privilegium aliud est reale, & aliud personale.
- 3 Privilegium personale triplex est: singulariter personale: communiter personale: ac mixtum.
- 4 Privilegium personale personam sequitur: sed reale privilegium adhæret rei, cuius respectu datum est.
- 5 Privilegium aliud est contra ius, idèque strictæ interpretationis aliud ultra ius, quod cum sit gratia seu beneficium, latam interpretationem meretur.
- 6 Si beneficium Principis in alterius preiudicium tendat vel scandalis occasionem præbeat, eatenus odiosum est, & strictè interpretandum.
- 7 Privilegia ordinariè non plus operantur, quam verbis expriment.
- Exempti cum Prælati sui consensu possunt se subicere Ordinario petendo dispensationem in votis, iuramentis, absolutionem a censuris, &c.
- 8 Privilegium aliud est, quod motu proprio confertur: & aliud, quod ad instantiam partis: idque magis odiosum censetur.
- 9 Privilegium motu proprio concessum non ante suum effectum sortitur, quam privilegiato innotuit.
- Privilegium ante acceptationem renocari potest, si ex mera liberalitate promanauit: secus si ex debito officio conferentis.
- 10 Privilegium, quod in gratiam petentis per literas, vel Procuratorem conceditur, statim suum effectum sortitur, quamvis ignorante eo, qui postulauit.
- 11 Privilegia partim sunt affirmatiua, partim negatiua.
- 12 Quædam privilegia absolutè a gratia sunt, quædam verò respectiua, & in alterius grauamen cedentia.
- 13 Item quædam privilegia ex mera gratia dantur: quædam verò ob antecedentia merita, vel cum imposito futuro onere.

**P**rivilegium est veluti privata lex, in alicuius fauorem data, iuxta capite privilegia, distinctione tercia. Quæ causa est, cur privilegium ad alias personas, loca, &c. præterquam quibus ex speciali causa concessum est, extendi non possit: legis autem communis dispositio ad omnes communiter pertinere debet: idèque in ea particularis personæ, aut loci mentio fiat, causa exempli id factum censetur, sicuti annotauit Abb. in cap. sanè, de privileg.

Diuiditur privilegium I. in reale ac personale, sicut colligitur ex regul. 68. & 156. ff. de regulis iuris. Privilegium reale est, quod proximè ac directè alicui conceditur, respectu rei, loci, muneris, dignitatis: puta prædij, Monasterij, Ecclesiæ, Episcopatus: cui proinde rei, siue causæ concessionis privilegium immediate cohæret: in personas autem, ad quas res illa siue causa pertinet;



accidens redundat: v.g. si immunitas aliqua Monasterio vel Ecclesiæ concedatur, ea gaudere poterunt omnes, qui temporis successu Monasterium vel Ecclesiā possidebunt; donec omnino destructa sint, sine spe refectionis: nam si spes refectionis sit, perdurat privilegiū, & cēsetur adhærere sibi, arg. l. æde sacra, ff. de contrahend. emptio. & arg. c. & hoc diximus, 16. quæst. 7. iunct. Gl. & Gl. vlt. in c. Abbate, de verbor. significat. Gloss. in c. pastoralis, 7. quæst. 1. & alia Gloss. reg. 7. in 6. Item, si Episcopo Frisingensi, quatenus talis loci Episcopus est, privilegium aliquod concessum sit; censetur reale. & proximè collatum ipsi Sedi, ac dignitati, argum. ducto ex c. quoniam Abbas, de offic. delegati: ubi habetur, quod delegatio facta dignitati, (non expresso nomine proprio) v.g. Episcopo Frisingensi committitur, ad successorem transeat; nisi vel ex materia subiecta, vel ex circumstantiis aliud colligi debeat, qua de re fusè Abbas in cit. cap. quoniam, num. 7. & sequentibus & in cap. quanto, num. 3. de translat. Episc. ubi monet; in discernendo, utrum privilegium personæ, an dignitati datum sit, potius ad naturam & conditionem rei datæ, quam verborum expressionem attendendum esse: quare concessum sub nomine proprio, in materia quæ talis naturæ est, ut transire debeat ad successorem, censetur, esse reale, non personale.

3 Privilegium personale est, quod proximè ac directè ob favorem personæ confertur. Idque triplex est, teste Sylvest. verb. privilegium, quæst. 2. Vnum propriè ac singulariter personale, quod vni tantum per se conceditur. Per se, inquam: nam per accidens, siue propter illum, interdum etiam familia siue domestici eo participant: ut si alicui personæ generalis interdicti tempore concessum sit privilegium celebrandi, vel audiendi Missam: familiares quoque siue domestici interesse poterunt, sicut habetur in c. licet, de privilegiis in 6. Alterum est privilegium communiter personale, quod certo personarum generi conceditur, puta minoribus XXV. annis privilegium restitutionis in integrum, si ex contractu læsi sint: Mulieribus privilegium Senatusconsulti Velleiani, ne ex fideiussione obligentur. Huc etiam spectant privilegia militum, de quibus Tholosanus l. 19. syntagm. c. 16. num. 1. Tertium est privilegium corporale, quod corpori siue Communitati confertur; vel ea conditione, ut singuli Communitate privilegio frui possint: vel ut communiter tantum & collectivè.

4 Discrimen est inter privilegium personale & reale; quod Privilegium personale personam sequitur; & cum eadem extinguitur. reg. 7. in 6. Privilegium autem reale coheret rei, & cum eadem expirat. Consentit reg. 68. ff. In omnibus causis id observatur, ut ubi persona conditio locum facit beneficio, ibi deficiente ea beneficium quoque deficiat. & reg. 156. cod. Privilegia quædam cause sunt, quædam personæ: & ideo quædam ad heredem transmittuntur, quæ cause sunt: (siue realia) quæ personæ sunt, ad heredem non transiunt. Ex quo inferas; Privilegia, quæ suprà dixi communiter personalia, & corporalia censenda esse mixta: & multum participantia de natura realium. Nam quæ certo personarum generi privilegia data sunt, ad hæredes etiam transmittuntur, v.g. beneficium restitutionis in integrum, iuxta l. 6. ff. de in integrum restitutione: cuius ratio est, quia non merè respectu personæ: sed etiam ratione rei, videl. intervenientis læsionis, concessa sunt, sicuti notavit Gloss. vlt. in cit. reg. 7. in 6. & videri de hac re potest Ioachim, Mynsinger cent. 4. observat. 19. Privilegia item, quæ Communitati concessa sunt, non extinguuntur cum personis singularibus, sed continuantur in personis perpetuò succedentibus: quare multum etiam recedunt à proprietate privilegiorum personalium. Nihilominus multum refert, utrum privilegia, quæ v.g. Ordini Regularium conceduntur, ad personas proximè dirigantur; an verò absolute ad rem, v.g. eorum Ecclesiam, aut prædium. Exemplum habes in privilegio immunitatis à decimis præstandis, in quo

considerandum est, an talis immunitas prædio, aut horto absolute concessa sit, ut eam retineat, etsi alteri locetur: an verò cum ordine ad personas privilegiatas, ut ipsæ met hortum vel prædium colant, sicuti videre est in privilegio Regularibus concessio in cap. ex parte, 10. de decimis, & notavit Abb. ibid. n. 4. Henricus Canisius tract. de decimis, c. 6. n. 10. Suar. t. 1. de relig. tract. 2. l. 1. c. 19. numero 14.

Aliud exemplum habes in privilegio Missam celebrandi in loco privato; vel in Ecclesia de speciali aliquo Sancto, aut Beato: considerandum enim est, utrum verba privilegi ad personas privilegiatas tantum: an verò directè ac principaliter ad locum dirigantur. Nam in priore casu soli Clerici, vel Religiosi talis Ecclesiæ eo uti poterunt: posteriore autem casu etiam alij Sacerdotes incolæ & advenæ, si eo loco celebrent, sicuti observavit Suarez p. 3. to. 3. dist. 81. sect. 3. in fine, & libro 8. de legibus, c. 3. num. 10. Interdum verò conceditur tale privilegium tum contemplatione loci, tum etiam favore personarum: puta quia Sanctus in Ecclesia sepultus est, vel eius reliquiæ ibi asservantur & honorantur, ita ut eiusdem Ecclesiæ beneficia, tunc aut possessoribus instar patroni sit: hoc casu exteri quoque Sacerdotes in ea Ecclesia de eodem Sancto sacrificare poterunt, ipsi verò incolæ in hac Ecclesia, tunc etiam alibi, tanquam de patrono suo, de quo etiam canonicum officium dicunt.

5 Altera est divisio privilegii. Quod aliud sit contra ius, cuius generis sunt multæ dispensationes in cōmuni lege. Quævis non omnino idem sit privilegium contra ius, & dispensatio in iure: Nam monopolium v.g. privilegiū quoddam est, & tamen dispensatio dici nequit: quia per illud ius commune non relaxatur, sed potius restringitur. Deinde dispensatio facta ad unum actum, vel brevè tempus, v.g. ut hodie carnibus vesci, ruri laborare liceat, privilegium propriè non est: hoc enim magis constans esse debet: cum sit quasi lex privata, & ius singulare: sicut notavit Salas disp. 10. l. 1. in fine. Suarez libro 8. de legibus cap. 20. numero 10. Quare nec dispensationes in irregularitate, aut matrimonio impedimento, privilegia dici possunt: quia effectum suum statim consequuntur, & tractum successuum non habent, qualis ad legem tam communem, quam privatam requiri videtur.

Aliud verò privilegium est præter ius: siue, ut alij loquuntur, ultra ius, v.g. potestas absoluendi, vel dispensandi, & aliæ multæ gratiæ siue beneficia Principis, ijs concessa, quibus lege communi & ordinaria non competunt. Differentia inter hæc duo prævilegiorum genera est: quod illa, quæ iuri communi derogant, plerumque strictæ interpretationis esse debent, iuxta c. porro, c. sanè, de privilegiis, & docent Innoc. Abb. in c. quod dilectio, de consang. & affinit. Navar. c. 12. num. 79. Syl. ver. privileg. quæst. 3. Sanchez l. 8. de matrim. disp. 1. num. 1. Suar. cit. lib. 8. disp. 27. numero 5. Licet enim privilegia hæc favorabilia sint, quatenus ad privilegiatum referuntur: tamen quatenus à iure communi exorbitant, odiosa censeri debent: cum igitur favor iuris communis meritò præferendus sit favori privato, ideo rectè dicitur, privilegia à iure communi exorbitantia strictæ potius interpretationis esse oportere.

Dixi autem plerumque. Quia excipiendum est primò, Nisi privilegium datum sit in favorem causæ, publicæ piæ, religiosæ, alteriusve favorabilis. Qua de re Syl. cit. quæst. 3. Andr. Tiraquel. de privilegiis piæ causæ, privi. 162. Sua. c. 27. n. 7. ubi ait, privilegium exemptionis Clericorum à iurisdictione Principum temporalium; vel Religiosorum à iurisdictione Ordinariorum, amplè interpretandum esse in religionis favorem: Summa enim ratio est, quæ pro religione facit, dicitur in libro sunt personæ, ff. de religios. & sumptibus funerum. Accedit, quod eiusmodi privilegia vel dispensationes non vni personæ, sed toti communitati in



in perpetuum concessa, æquenter legibus publico iuris corpori insertis, quæ latam interpretationem habent, sicuti notauit Sanch. lib. 8. disp. 1. num. 3. Henr. lib. 7. c. 22. num. 3. Coninck 3. p. to. 2. disp. 33. dub. 2. n. 16. Secundò; Si priuilegium, quamuis contra ius commune, motu proprio Principis concessum sit, tunc amplam potius interpretationem meretur; veluti quod proprium Principis beneficium est, & ex certa scientia datum censetur, arg. c. si motu, de præb. in 6. & docet Abb. in c. vlt. num. vlt. de translat. Episc. Suar. cit. c. 27. num. 8.

Aliavero priuilegia, quæ ultra ius commune concessa, meræ gratiæ siue beneficia Principis sunt, latè interpretari debent. Ita habetur in c. quia circa, de priuileg. & c. olim, de verb. signif. l. 3. ff. de constit. Principum, ubi dicitur, *beneficium Principis quàm plenissimè interpretari oportere*. Quare facultatem concessam v. g. Episcopis in Trident. sess. 24. c. 6. de reform. dispensandi super omnibus irregularitatibus ex delicto occulto (excepto homicidio) item absolendi ab omnibus casibus occultis, Sedi Apostolicæ alioquin reseruatis; latè interpretari possumus, vt competat etiam Episcopo confirmato, etsi necdum consecrato. Secundò, vt i. s. etiam comperat, qui Episcopo in iurisdictione æquiparantur: videl. Capitulo sede vacante, sicuti docet Sanchez lib. 8. disp. 2. num. 10. Rodriq. t. 1. regul. q. 6. a. 9. cōtra Suarez de censuris disp. 41. sect. 2. n. 13. Item Prælati exemptis ab Episcopi iurisdictione, teste Sanch. l. c. num. 12. Henr. lib. 14. c. 18. num. 2. lit. p. & indicat Nauar. c. 12. num. 75. contra Suarez l. c. num. 7. Nam Capitulum, vacante sede, omnem ordinariam Episcopi iurisdictionem exercere potest, sicuti videre est apud Abb. in c. verum, num. 9. de foro compet. Rodriq. l. c. hæc autem dispensandi, & absolendi facultas Episcopis ratione suæ dignitatis perpetuo iure concessa, ordinaria censi debet. Ergo, & c. Prælati vero exempti iurisdictionem Episcopaliæ qualem in territorio suo obtinent: Quare & Confessarios approbare possunt, teste Suarez 3. p. tom. 4. disput. 28. sect. 5.

Verum etiam hæc doctrina limitanda est: Nisi beneficium Principis in alterius præiudicium cedat: cuiusmodi est v. g. exemptio à soluendis decimis à iurisdictione Ordinarij: id enim stricte interpretandū est, seruata tamen verborum proprietate, argū. c. super eo, ubi Abb. num. 2. de offic. deleg. & c. cum capella, & c. dudum, de priuileg. c. directi, de decimis, ex quo colligitur, priuilegium de decimis non soluendis ex prædictis suis, non esse extendendum ad prædia ab alijs conducta, vel in emphyteusim accepta. Item argum. c. ex tua, de auctorit. & usu pallij, ubi id Gl. notauit ver. permittit, Abb. in c. vlt. n. vlt. de translat. Episc. Suar. cit. c. 27. n. 9. & to. 1. de relig. tract. 2. lib. 1. c. 18. & 19. Henr. Canis. tr. de decimis, c. 6. num. 12. Azor to. 1. lib. 5. c. 23. q. 2. Etenim non facillè præsumendum est, Principem velle alicui gratiam conferre cū alterius damno, sicuti Abb. notauit in c. cum ad hoc, n. 8. de Cler. non resid. Eademque ratio est, si beneficium scādali, aut litium occasionem præbeat: nam eatenus odiosum censi debet, arg. c. quod dilectio, de consan. & affinit. in fine. Denique addendum est, quod Princeps conferens priuilegium non censeatur velle derogare speciali conventioni siue pacto, quod antè inter priuilegiatum, & alteram personam intercesserat, sicuti habetur in c. ex multiplici, de decimis, ubi Abb. n. 5. hanc regulam tradit, quod *priuilegium non tollit specialem conventionem inter partes, nisi de ea specialis mentio fiat*.

Porro quæ cap. 18. num. 4. & seqq. dicta sunt de interpretatione, ea ferme etiam obseruanda sunt in interpretatione priuilegij: Vt ante omnia mens atque intentio concedentis inspiciatur, & colligatur tum ex postulatione & procemio; tum ex materia priuilegij, & circumstantiis omnibus, præsertim personæ conferentis, cuiusque cui confertur. Nam secundum qualitatem personæ, si Episcopo v. g. priuilegium concessum sit, interdicti tempore

Missam celebrandi, intelligi debet in Pontificalibus, teste Angelo verb. priuileg. §. 4. Item iuxta qualitatem tum materiam, tum personæ priuilegiatæ interdum extensio fieri potest, per illam regulam: *Concesso uno, censetur etiam concessa alia, sine quibus illud commodè obtineri, vel exerceri non potest*, argum. c. præterea, de offic. delegati. Ex quo probabiliter resolui posse ait Suar. cit. lib. 8. c. 11. num. 7. Si cui ob senectutem vel labores, priuilegium à Papa concessum sit orandi matutinum vna vel altera hora post meridiem, posse etiam socium per se non priuilegiatum adhibere: tum quia talis cum socio orandi modus canonicæ institutioni conformior est: tum quia alioquin priuilegium parum subleuaret si altero commodo siue lenamine adhibendi socium spoliaret.

Sin verò adhuc dubium maneat de voluntate priuilegiantis, interpretatio facienda est secundum communem & visitatam: vel propriam verborum acceptionem. Nam priuilegia non plus operantur, quàm verbis exprimunt, iuxta c. priuilegia, d. 3. & c. porro, de priuilegijs. Neque vnquam priuilegium, etsi odiosum sit, ultra verborum proprietatem communemque acceptionem restringere oportet: nisi necessitas cogat, quia alioquin iniquitas, vel absurdum aliquod sequeretur, sicuti docet Suar. lib. 8. de legib. c. 28. num. 9. Contra etiam, nec priuilegium, quod fauorabile est, ultra verborum vim & acceptionem, tam communem quàm iuridicā, ad alias personas, vel actus, ob solam similitudinis rationem, extendere oportet; tamen si motu proprio Principis concessum sit, sicuti tradit Gl. in Clement. per literas, de præbend. verbo directas, Suarez l. c. num. 11. 15. Sanchez lib. 8. disp. 1. num. 5. & disp. 24. num. 19. Coninck to. 2. disp. 33. dub. 2. ubi exemplū afferūt de eo, cui concessa est facultas dispensandi in gradibus cognationis, non posse vi huius facultatis in gradibus dispensare affirmatis, quia diuersa sunt. Excipe I. Nisi æquiparatio iuris talem extensionem exigit, sicuti supra dixi de Capitulo sede vacante, & Prælati exemptis, participantibus iurisdictionem Episcopalem.

II. Nisi extensio fiat ad ea, quæ secundum consuetum morem vtendi priuilegio, per se & ordinariè accessoria sunt: sic v. g. habens priuilegium tempore interdicti celebrandi Missam, potest ministrum quemlibet specialiter non interdictum adhibere: quare hæc non est tam priuilegij extensio, quàm iuridica interpretatio. Qui enim concedit facultatem alicuius rei, censetur etiam concedere ea omnia, quæ requiruntur ad vsum talis potestatis, argum. l. 2. ff. de iurisdic. omnium iudicum: *Cui iurisdic. data est, ea quoque concessa esse censetur, sine quibus iurisdic. explicari non potest*. Quare Abbas in c. quia tantum, num. 5. de Clericis non resid. regulā tradit: *Quod dispensatio, seu priuilegium contra ius extenditur ad necessariam consequentia*: vt si cum aliquo dispensatum sit super beneficiorum pluralitate: videtur etiam dispensatum quo minus in eorum altero residere teneatur.

III. Nisi necesse sit extensionem facere, vt priuilegium aliquid operetur: & non omnino inutile, seu superuacaneum sit. Nam priuilegium ita interpretari oportet, vt aliquid tribuat, quod iure communi concessum non est, iuxta l. 1. ff. Ad municipalem, cap. in his, de priuilegijs, ubi id notat Abb. num. 2. Gloss. in c. 1. ver. vt liberè, de rescript. Quamuis interdum, quod iure alioquin communi Regularibus v. g. concessum est, impetrari solet ad maiorem securitatem, omnemque tollendam dubitationem: siue ad impetum aduersariorum coercendum, sicut notauit Nauar. lib. 3. consil. 5. num. 5. de statu Monach. edit. 2. Rodriq. tom. 1. regul. quæst. 7. a. 1. Suar. lib. 8. c. 1. num. 7. argum. c. innouamus, de treuga & pace. Nam *plus valet specialis cautio, quam generalis*, ait Goss. in cap. quamquam, d. 23.

Denique interpretandum est priuilegium, vt non sit onerosum priuilegiato: siue, vt potius illi aliquid tribuat, quam vtraherat, iuxta reg. 61. in 6. *Quod ob gratiam ali-*



*cuius conceditur, non est in eius dispendium retorquendum.* Quapropter probabiliter dicitur, quod privilegium exemptionis, g. concessum Regularibus, non impediat, quominus, cum Prælati consensu, subijcere se possint Episcopo, ut ab eo absoluantur à peccatis, ac censuris; vel dispensetur cum eis in voto; iuramento, irregularitate; si accidat Episcopum, non autem Prælatus Ordinis tali facultate ex privilegio præditum esse. Ita præter alios docet Henricus lib. 7. c. 25. num. 2. & lib. 14. c. ult. in fine, Auzila p. 2. de censur. c. 7. disp. 1. dub. 6. concl. 2. Molina tract. 3. disp. 6. ubi ait, idem sentiendum, si manifestò appareat, quod Prælatus Ordinis consensum irrationabiliter neget: cum non videatur esse mens summi Pontificis, exemptionis privilegium ad talem casum extendere, quo in perniciem animæ cedere possit.

3 Tertia diuisio privilegij; Quod aliud proprio motu Principis confertur, aliud verò in gratiam petentis. Discrimina inter ea sunt: I. Quod illud, si cetera paria sint, favorabilius esse soleat; hoc verò magis odiosum, præsertim si gratia ambitiosa & insolita sit: v.g. si illegitimè natus amplum beneficium vel dignitatem à Papa impetret.

II. Privilegium, quod motu proprio conceditur, excludit præsumptionem subreptionis; secus, si ad instantiam petentis, sicuti constat ex c. si motu, de præb. in 6. ubi dicitur, quod taciturnitas beneficii antè habiti, non vitiat rescriptum motus proprii de altero beneficio: Et additur ibidem, tunc solum censeri gratiam motu proprio conferri à Papa, si id in literis exprimat; tunc verò nihil obstat, etsi adversarius probare vellet, petitionem gratiæ antecessisse, sicuti notat Gloss. ult. ibid. Et simili ratione, si Papa alicui iussit conferri beneficium primò vacaturum, isque tempore datarum literarum non habuit ætatem requisitam; si tamen habeat tempore vacationis, debetur ei beneficium, si ei prouideri mandatū fuit motu proprio; secus, si ad instantiam, quia præsumitur vitium subreptionis, c. si pro eo, de præb. in 6. & notat Abb. c. dilectus, 2. num. 9. extra eod. Quæ simili ratione docent Doctores apud Ioach. Mynfingerum cent. 4. obseru. 8. & cent. 5. obser. 97. Si Princeps contra ius commune aliquid statuat vel rescribat motu proprio, præsumendum esse, quod iusta causa moueatur; secus, si ad postulationem alterius, quia tunc concessum videtur propter importunitatem petentis.

9 III. Privilegium, quod proprio motu confertur, ordinariè suum effectum non antè consequitur, quàm privilegiato innotuit, sicut ex communi docent Syl. v. privilegium, q. ult. Sanch. lib. 1. de matr. disp. 6. n. 29. & lib. 3. disp. 36. Azor t. 1. lib. 5. c. 3. q. 5. & c. 23. q. ult. Suar. lib. 8. c. 25. n. 10. & seqq. & sumitur ex c. si tibi absenti, de præb. in 6. in quo dicitur, si Episcopus beneficium absenti conferat ius ei in beneficio non acquirit: & consentit l. qui absenti, ff. de acquir. possess. Nam hic est ordinarius modus donandi, beneficia conferendi, & c. scienti, inquam, & acceptanti. Quare etiam reuocari poterunt ante acceptationem, si ex mera concedentis liberalitate proficiantur, sicuti docet Couar. 3. resol. c. 16. n. 7. Sanch. ll. cc. secus est si Prælatus ex officio conferre cogatur, v. g. beneficia Ecclesiastica: ubi enim semel contulit, non potest reuocare; sed expectare tenetur, num absens re cognita acceptare velit, iuxta cit. c. si tibi absenti.

Dixi autem privilegium motus proprii ordinariè non habere effectum, antequam privilegiato innotuit. Nam primò excipienda videntur privilegia, quæ non per modum specialis rescripti; sed generali lege seu statuto conduntur, ad remunerandum aliquos de Republ. bene meritos, sicut ex communiore notauit Sanch. lib. 3. de matr. disp. 36. n. 3. Ratio est. Quia lex, boni publici causâ lata, publicatione omnè vim suapte natura acquirit; nisi quòd inuincibiliter ignorantibus nullam obligationem culpæ aut pænæ inferat, sicuti dixi supra c. 2. huius tract. Hic autem non agitur de obligatione & pænâ; sed de còmodo

privilegiati. Ergo, &c.

Præterea, sicut nihil prohibet speciali lege Principis decerni, ut ius alicui v. g. ex donatione, etiam anteacceptationem acquiratur, sicuti multi dicunt de donatione facta Ecclesiæ; ita etiam nihil obstat, Principem alicui beneficium, siue privilegium conferre, eo animo, ut statim suum effectum consequatur, etiam priusquam ad notitiam privilegiati perueniat, sicuti docet Suar. cap. 25. num. 11. & indicat Syl. cit. q. ult. Quod maximè verum est in ordine ad alios, quibus virtute talis privilegij obligatio imponitur præstandi immunitatem privilegiato, sicuti habetur in c. 1. de concess. præb. in 6. ubi dicitur, si cui à Papa privilegium datum sit, ut excommunicari non possit, non ligari sententia Episcopi, quamvis ignorantis privilegium. Adde fieri posse, præsertim si ratio boni communis ita exigit, ut exemptio à lege v. g. ieiunij, etià inuito & reluctanti tribuatur; adiecto præcepto ut non ieiunet: quapropter regula illa ff. 69. *Inuito beneficium non datur*, ordinariè tantum, & non sine omni exceptione vera est. Vide etiam Salas disp. 16. sect. 3. num. 5.

Privilegium autem, quod in gratiam petentis v. g. per Procuratorem conceditur, statim suum effectum sortitur, cum conferens annuit, vel voluntatem suam significauit, etiam adhuc ignorante eo, qui postulauit, sicuti docet Angelus verb. renuntiatio num. 5. in fine Syl. est. verb. privilegium, quæst. ult. Sotus in 4. d. 29. q. 2. a. 1. ad finem, Veracrux in speculo p. 1. dub. 19. appendicis, §. ac si post dispensationem, Sanchez lib. 3. de matrim. disp. 36. num. 6. etsi contrarium doceat Vasq. 1. 2. disp. 56. c. 4. num. 3. Suar. c. 25. num. 26. ubi proposita quæstione, si Titius à Papa per Procuratorem postulauit gratiam vel dispensationem aliquam & elapsotemporis intervallo, quo Procurator responsum accepisse existimatur, ex probabili præsumptione gratiæ iam concessæ, dispensatus ea utatur, v. g. matrimonium contrahat, utrum valitum sit? Ad quod neganter respondent: Quia dispensatio siue privilegium datur propter usum: usus autem dispensationis, ante acceptam eius notitiam illicitus ac temerarius est: ergò non videtur esse voluntas Papæ dispensantis, ut valeat dispensatio ante eius notitiam: ne occasionem prauo usus ministrare videatur. Sed respondeo. Imprimis còsiderandum esse stylum Curie Romanæ: Si enim summus Pontifex dispensationem ipsemet non exequatur, sed iubeat ab Ordinario, vel Officiali expediri post acceptas literas, tunc certum est, matrimonium sub præsumptione dispensationis à Papa concessæ, ante acceptas literas, validum non fore. Sin verò summus Pontifex dispensationem per se ipsum absolute conferret, omnino putarem validum: & in casu etiam necessitatis licitum eius usum fore, si moraliter præsumi possit, gratiam tunc concessam fuisse: quandoquidem ad omnem concessionem, donationem pactum, & contractum sufficit duorum mutuum consensum super eadem re haberi & explicari. Quæ simili ratione, si quis ab Ordinario petiuit facultatem, ut alienus Sacerdos matrimonio assistere, posset; atque ex probabili præsumptione, facultatem modò datam esse, coram tali Sacerdote matrimonium postea celebretur, validum censeri debet, si eo tempore re vera licentia data fuerat, sicuti docet Sanchez cit. disp. 36. numero 8.

Ad rationem in contrarium respondetur, potius credendum esse, quòd summus Pontifex, nisi aliud exprimat, in dispensationibus intendat quòd est per se, & ex natura rei; quàm quòd per accidens & raro contingens. Per se autem, & ex natura rei dispensatio robur suum habet post mutuum petentis & concedentis consensum: ergò id ipsum etiam intendere censetur Pontifex, esto per accidens propter defectum certæ cognitionis, aliquid interdum imprudenter vel temerariè attentari possit. Nota autem hic, cum primò summus Pontifex petitioni annuit, licet literæ expeditæ non sint, privilegium datum censeri; exceptis,



exceptis prouisionibus beneficiorū, de quibus iure nouo Pontificio aliter statutum est, vt videre licet apud Azor tom 1. lib. 5. c. 2. quæst. 5.

IV. discrimen. Licet priuilegia, quæ in gratiam petentis conceduntur, subreptitia sint, si in petitione non exprimantur ea, quæ ius & stylus gratiæ exprimi iubent; secus tamen est in priuilegijs seu rescriptis gratiæ, nemini præiudicantibus, si motu proprio fiant: talem enim gratiam Princeps causa tota plenè perspecta concedere censetur, vt proinde nulla reticentia veri obesse debeat, sicuti constat ex c. si motu, de præbend. in 6. vbi dicitur, per motum proprium validè conferri alicui beneficium, qui aliud habet: etsi huius nulla mentio in rescripto fiat. Expressio tamen falsi, si videatur fuisse causa principalis & sine qua non, perinde vitiat rescripta motus proprii, sicuti alia, vti ex Abb. c. quia circa, de priuilegijs. notat Rosella ver. rescriptum in fine.

11 Quarta diuisio priuilegij est in affirmatiuum, & negatiuum. Affirmatiuum est, quod datur ad aliquid faciendum, v. g. ad sacrificandum, carnes diebus interdictis comedendum. Negatiuum, quod datur ad non faciendum quale est priuilegium exemptionis à tributis, à decimis. Discrimen duplex est: I. Quod negatiuum semper sit contra ius commune, fieri aliquid præcipiens à cuius obseruatione aliquis per priuilegium eximatur. Affirmatiuum verò quandoque est ultra ius commune; quandoque verò contra ius prohibens fieri aliquid, cuius agendi facultas per priuilegium conceditur. Alterum discrimen est, quod affirmatiuum interdum per non vsum tollitur: negatiuum verò per non vsum contrarium, vt infra explicabo.

12 Quinta diuisio. Priuilegia quædam sunt absolutæ gratiæ (siue ultra ius, siue contra ius data sint) in nullius grauiam redundantes: cuiusmodi est v. g. priuilegium dispensandi, ante iuroram sacrificandi: item non ieiunandi, interdictum non seruandi. Alia verò priuilegia sunt gratiæ respectiue, & in alterius grauiam redundantes: cuiusmodi est priuilegium exemptionis à soluendis decimis, à iurisdictione Ordinarij, &c.

13 Sexta diuisio. Quædam priuilegia sunt mere gratiosa, quæ consistunt in sola facultate siue licentia aliquid præter aut contra ius commune operandi, tacita conditione, quamdiu Principi & successoribus eius placuerit: alia verò sunt non merè gratiosa, sed vel ob merita in præmium data: quæ dici solent remuneratiua; vel cum imposito onere, siue grauiamine data, quæ dici solent conuentionalia: Quorum omnium id commune est, vt per ea ius acquiratur priuilegiato, quo minùs à conferente ordinariè, & sine vrgentiissima causa ad bonum publicum pertinente, reuocari possint. Qua de re Suarez lib. 8. c. 37. num. 5.

## QVÆSTIONES DE

### PRIVILEGIIS.

### SVMMARIVM.

- 14 Quicumque legem condere, etiam priuilegium dare potest, & vice versa.
- 15 Priuilegia dari possunt non tantum ijs, qui absolute subditi sunt: sed etiam alijs.
- 16 Is cui Ordinarius concessit priuilegium legendi libros prohibitos, &c. eo potest. extra diocesim concedentis. Priuilegia duobus modis confirmari possunt: forma in communis & ex certa scientia.
- 17 Priuilegium finitur elapso tempore, cessante causa finali, vel conditione sub qua concessum fuit.
- 18 Gratia per mortem concedentis, etiam re integra, non extinguitur: quod intelligendum est, si sit gratia facta; secus si sit faciendâ.
- 19 Priuilegium extinguitur, si per rerum mutationem iniquum fiat: vel si in ipsum priuilegiatum maius detrimentum cedere incipiat.
- 20 Priuilegium item extinguitur per renuntiationem priuilegiati, si in eius solius fauorem concessum fuerat: secus si in gra-

riam Ecclesiæ vel Communitatis.

- 21 Priuilegia, quæ alijs onerosa sunt, amittuntur per non vsum spatio decennij inter presentes: viginti verò annis inter absentes: si tamen vtendi occasio sit.
- 22 Quæ absoluta gratia sunt in nullius grauiam cedentes, v. g. sacrificandi ante auroram, absoluedi à casibus reservatis: per solum non vsum non videntur amitti.
- 23 Priuilegia negatiua, quæ alijs onerosa sunt, per contrauentionem duobus modis amitti possunt: vel viâ prescriptionis, vel viâ tacite renuntiationis.
- 24 Qui dato sibi priuilegio abutitur, eo priuari meretur.
- 25 Priuilegia quæ ad operandum aliquid præter ius commune subditis merè gratiose data sunt, à concedente eiusve successore reuocari possunt. Quæ non subditis concessa sunt priuilegia, post acceptationem reuocari non possunt: Neque quæ subditis data sunt in remunerationem meritorum, vel cum grauiamine in futurum: vel si cum absoluta donatione, aut translatione alicuius iuris, absquâ vrgente causa reuocari possunt.
- 26 Renuotio priuilegij aliu est expressa, & alia tacita. Expressa vel fit in specie: vel per clausulam generalem, non obstantibus, &c. quæ tamen non censentur reuocata priuilegia contenta in corpore iuris.
- 27 Tacita priuilegij reuotio fit per actum principis contrarium: si præsumi possit, eum scire aut recordari antè concessum priuilegij. Generi per speciem derogatur, siue ea antecedit siue sequatur.
- 28 Reuotio priuilegij, alteriusve facultatis non ante vim suam habet, quam priuilegiato innotuit.

PRIMA QVÆSTIO. Quis priuilegium concedere potest? Omnis & solus ille, qui legem condere; etiam priuilegium conferre potest. Ita ex communi S. Anton. p. 1. tit. 19. cap. 1. in princ. Syluest. ver. priuilegium quæst. 2. Ratio est: Tum quia priuilegium lex quædam priuata est: tum quia priuilegium non cuiusvis hominis beneficium dicitur; sed quod publica potestate alicui confertur, ad faciendum aliquid, vel omittendum. Ex quo inferas, publicas potestates cum ciuiles, tum Ecclesiasticas in ijs tantum rebus priuilegia dare posse, de quibus disponendi ius habent: v. g. Imperator in temporalibus tantum; Papa verò per se ac directè in spiritualibus: vel ijs, quæ annexa sunt spiritualibus, vt decimæ, contractus matrimonij, &c.

QVÆSTIO SECVNDA. quibus priuilegium conferri possit? Respondeo: Non ijs tantum conferri posse, qui verè & absolute subditi sunt; sed etiam ijs, qui respectiue inferiores, vel inæquales sunt, secundum ordinem ad rem, in qua priuilegium confertur. Sic enim constat, Imperatorem v. g. extraneis priuilegium concedere posse, in terris Imperij militem conscribendi, merces auerendi, vectigal non soluendi. Item Ecclesiasticis Iudicibus; vt de laicis in causis temporalibus directè iudicare possint, quod communi iure ipsis concessum non est. Quale priuilegium est Theodosij Imperatoris, quod refertur c. quicumque, causa 11. quæst. 1. Vide etiam Baronium An. 398. num. 69. & An. 401. num. 60 Suarez lib. 8. de legib. cap. 9.

QVÆSTIO TERTIA. Vtrum habens ab Ordinario suo priuilegium legendi v. g. libros prohibitos, eo uti possit extra territorium concedentis? Negat Commencator Nau. consil. 6. de priuilegijs. & Suar. lib. 8. de legib. cap. 26. num. 8. Primò, quia Iudex non potest iurisdictionem extendere extra territorium: conferre autem priuilegium actus iurisdictionis est. Secundò, quia peregrinus tenetur obseruare leges loci, in quo moratur, & lectio v. g. talium librorum prohibetur. Sed contrarium probabilius affirmare videtur ipsemet Nau. cit. consil. 6. edit. 2. quem sequitur Azor. t. 1. lib. 5. c. 23. quæst. 6. Ratio est: quia priuilegium personale coheret personæ, & idcirco eam comitatur, quocumque terrarum discesserit. Quapropter licet alicui priuilegium personale contra ius commune ab Episcopo datum sit, v. g. non ieiunandi, cibos prohibitos comedendi; vbique terrarum eo uti poterit, per se loquendo, vt fatetur ipsemet Suar. num. 15. & docet Sanches lib. 8. disp. 31. quæst. 2. Aliud verò



dicendum videtur, si dispensatio in lege communi facta sit pro tota diœcesi, ob peculiarem aliquam causam, v. g. ut in quadragesima caseo & lacticiis vesci liceat, non poterit incola peragere profectus eo uti in aliena diœcesi, ubi lex communis Ecclesiastica observatur: quia tale privilegium censetur adherere loco, iuxta ea, quæ supra dixi cap. 12. n. 5. Ad I. argumentum contrariæ sententiæ respondetur: Iurisdictionem non coactivam, sed voluntariam, præsertim carentem publica to'emnitate, effectum suum habere posse etiam extra territorium exercentis, sicut supra dixi c. 5. n. 4. Ad II. respon. Peregrinum, quo cum dispensatum est, non obligari lege vetante libros prohibitos, quatenus diœcesis propria est: quia iurisdictioni diœcesanæ non subijcitur: Neque quatenus lex communis Ecclesiastica est: nam suppono Episcopum, ex delegata ipsi potestate à Papa, cum illo dispensasse.

QVÆSTIO QVARTA. Quibus modis privilegia data confirmari soleant? Respondeo duobus modis: *In forma communi, & ex certa scientia*, sicuti notant DD. in c. quia diuersitatem, de concess. præbendæ. Confirmatio ex certa scientia dicitur, si Princeps confirmans privilegium significet, se plenam eius cognitionem habuisse: cuius proinde confirmationes tanta vis est, ut etsi privilegium aliquando legitime collatum, postea per non usum, vel abusum, vel superioris reuocationem cassatum fuisset, iam de nouo confirmaretur, sicuti docet Gl. communiter recepta in cit. c. quia diuersitatem, ver. forma communi. Suarez lib. 8. c. 18. num. 12. qui monet num. 6. necessarium non esse, ut hæc verba *ex certa scientia* in confirmatione exprimantur: modò ponantur alia, quæ secundum stylum curiæ æquipolleant, v. g. *ex plenitudine potestatis*. Interdum tamen in confirmatione eiusmodi privilegiorum additur limitatio, v. g. *pro ut nec sunt in usu*, ut excludatur confirmatio privilegiorum, quæ in defuetudinem abierunt. Item, *Dummodo Concilio Tridentino contraria non sint*: cuiusmodi clausula intelligitur de ijs privilegiis, quæ per Tridentinum reuocata fuerunt, ut docet Rodriq. tom. 1. Regul. qq. quæst. 8. art. 6. Suar. num. 18. Verum, etiam si talis clausula exceptoria non adderetur, nihilominus subintelligi deberet, sicuti docet Rodriq. cit. quæst. 8. art. 10. Suarez lib. 8. disput. 19. num. 5. Quod in generali derogatione, nunquam censetur derogatum Concilio generali: quia id, quod tanta auctoritate corroboratum est, non nisi speciali & expressa reuocatione tolli debet.

Existimat verò Rodriq. cit. art. 10. in fine, per hoc quod in confirmatione excipiantur ea, quæ sunt contraria Tridentino, tacite confirmari ea, quæ in aliis generalibus conciliis reuocata fuerunt: quia exceptio firmat regulam in aliis. Sed de hoc dicto non immeritò dubitat Suarez cit. cap. 10. num. 7. Nam exceptio firmat quidem regulam in aliis, quæ alioquin excepta non sunt, non autem firmat in iis, quæ per alias regulas æqualiter excepta reperiuntur: Nam alioquin exceptio appositæ esset potius ampliatio quædam. Quare cum generalis regula sit, quod in concessione confirmatoria privilegiorum excepta censeantur privilegia illa, quæ per generalia Concilia reuocata fuerunt: sequitur, clausulam illam, *Dummodo Tridentino Concilio contraria non sint*, additam fuisse duntaxat, ut certior esset exceptio Concilij Trident. & non tantum generalibus DD. regulis subnixæ.

Alius verò modus est confirmandi privilegia *in forma Communi*: cuiusmodi confirmatione nulla nova sit concessio: sed pura prius existentis privilegij approbatio, vel confirmatio: ita ut per eam non reuolvetur privilegium, si propter præcedentem abusum, reuocationem, &c. inualidum fuerat, sicuti colligitur ex cap. 1. & 2. de confirmat. vtili.

17 QVÆSTIO V. Quibus modis privilegium finiatur? Resp. His ferme modis. I. Flap. o. tempore, cessante causa finali, vel conditione sub, qua concessum fuit. Qua de

re vide Molin. tom. 2. tractat. 2. disput. 298. Suarez cap. 29. & 30. Quare si privilegium concessum sit ad vnicum actum, vel ob professionem, muneris occupationem, &c. ijs transactis, extinguatur. Quod si Princeps tali verborum forma concesserit, *donec voluero*: quo ad beneplacitum meum, eo mortuo expirat. Non item, si dixerit, *donec reuocauero, dum aliud deinceps*. Ita docet Nauar. lib. 5. de priuil. consil. 3. edit. 2. Couar. 3. resol. cap. 15. num. 2. Molin. l. c. Suarez lib. 8. cap. 5. num. 1. Sanchez lib. 8. de matrimon. disput. 28. quæst. 3. num. 51. Ratio discriminis est: Quia actus reuocationis positivus, & affirmatiuus est: quare si à concedente, dum viueret, non fuit exercitus, manet privilegium. Verba autem *donec voluero*, significant perseverantiam voluntatis, quæ morte interruptitur, argument. l. 4. ff. de locato. Si autem dicatur: *Quamdiu placuerit*, non exinguitur morte conferentis: quia potestas Sedis non moritur, sed transit ad successorem, sicut habetur in c. si gratiosè, de rescript. in 6.

Corollarium. Qui iuravit se non lusurum, vel celibem vitam ducturum, quamdiu pater volet: eo mortuo, ludere, vxorem ducere non prohibetur. Sin autem iuravit, se non lusurum, castitatem seruaturum, nisi pater aliter statuerit, iusserit: non soluitur voto per mortem patris. Et ita intelligendus videtur Sanchez l. c. num. 55.

Sed ut ad propositum reuertatur, generalis est Docto-  
rum regula, quod gratia per mortem concedentis, etiam re integra, non extinguatur, uti videre est apud Nauar. consil. 2. de offic. delegati edit. 2. Sa v. g. num. 1. Nicol. Garciam p. 6. de benef. cap. 2. Molin. tractat. 5. de iust. disput. 19. ex c. si super, de offic. deleg. in 6. si cui nulla, de præbend. in 6. Sed intelligi hæc regula debet de gratia facta, & non de facienda. Gratia facta dicitur, quotiescunque facultas seu licentia alicui in ipsiusmet fauorem à Superiore concessa est, quamuis mera executio interdum ab alia adhuc persona dependeat. Exempla sunt: Si alicui à Papa detur gratia expectatiua ad beneficium vacatum: vel si impetret aliquis literas à Papa, quibus mandet Episcopo, ut ipsi beneficium provideat, vel ut cum eo super impedimento matrimonij, precum veritate inspecta, dispenset: aut si impetret aliquis à Papa vel Episcopo licentiam eligendi Confessarium. Eiusmodi enim concessiones seu gratiæ, postquam à publica potestate processerunt, censentur ex parte concedentis factæ, seu perfectæ, ut morte ipsius non expirent; nihil obstante, et si realis executio gratiæ nondum facta sit: qua de re videri potest Henriq. lib. 7. cap. 21. num. 1. & seqq. Sanchez lib. 8. cap. 38. quæst. 2. Suarez lib. 8. de legib. cap. 31. Nicol. Garcias de benef. p. 6. cap. 2. Gratia autem facienda dicitur, cum ipsi, in cuius fauorem gratia tendit, nihil directè datum aut concessum est à Principali; sed alteri mandatum, ut talem gratiam illi conferat: tunc enim nondum est gratia facta, sed mera commissio & mandatum faciendi. Exempla sunt: Si Papa, vel Episcopus directè ipsi Sacerdoti committat, vel mandet, ut cum quadam persona, causa cognita, dispenset, vel ipsi beneficium Ecclesiasticum conferat; mortuo committente, Commissarius mandatum exequi non potest, re integra: nisi talis conferendi, aut dispensandi facultas Commissario principaliter in ipsiusmet fauorem, data fuisset: tunc enim haberet rationem gratiæ factæ, quæ per mortem facientis non expirat. Quod notandum est pro ijs, quibus à Papa, vel Episcopo delegata est licentia audiendi confessiones, vel absolvendi à reservatis, morte delegantis non expirare; cum talis licentia inter gratias, non inter rescripta iustitiæ, seu delegatæ iurisdictionis contentiosæ numerari debeat, sicut ex probabiliore docet San. h. cit. quæst. 2. num. 72. Henriq. lib. 6. cap. 6. num. 7. Sa v. g. num. 4. Suarez t. 4. disp. 26. num. 6. & 9. Garcias cit. c. 2. n. 39.

Dubitant verò, an idem sentiendum de licentia à Parocho concessa alicui Sacerdoti; ut illo mortuo non expiret? Placet mihi responsio Garciz num. 325. Si Parochus facul-



facultatem habeat alicui delegandi talem facultatem in certa parte parochiæ; non expirare; cum sit gratia. Secus si Cooperatori suo seu Vicario tribuat facultatem: cum enim mortuo Principali cesset alter esse illius vicarius seu cooperator, expirat etiam huius potestas; quamuis in hacre consuetudo diœcesis attendenda est, vti Suarez l. c. notauit.

19 II. Extinguitur priuilegium, si cedere incipiat in graue detrimentum aliorum, vel Communitatis, adeoque per rerum mutationem fiat iniquum, vt vel per seipsum cesset, vel certè à priuilegiante reuocari possit, sicuti colligitur ex c. suggestum, de decimis, vbi notant Doctores; Reuocari priuilegium exemptionis decimarum, si postea in Ecclesiæ notabile detrimentum vergere incipiat. Item ex c. cum ad hoc, de clericis non residentibus, vbi habetur: si Ecclesia patiatur defectum ministrorum, quod priuilegiati, super non residentia, ad redeundum compelli possunt, fructuum subtractione.

III. Si cedere incipiat in maius detrimentum ipsius priuilegiati: nam quod in gratiam alicuius conceditur, non est in eius dispendium retorquendum, reg. 61. in 6.

20 IV. Per renuntiationem priuilegiati. si priuilegium in eius solius fauorem concessum sit. Nam liberum unicuique est suo iuri renunciare, dicitur in cap. si de terra, de priuileg. Porro priuilegijs, quæ principa liter in fauorem Ecclesiæ vel Communitatis concessa sunt, personæ priuatae, ne iuramento quidem, renuntiare possunt: v. g. Clerici priuilegio canonis, iuxta c. contingit, de sent. excom. vel priuilegio fori, iuxta c. si diligenti, de foro competente, vbi Abb. n. 4. & in c. cum accessissent, num. 2 de constit. Quinimò Innoc. in c. accedentibus, de priuilegijs, ibidem Alexander de Neuo super Abb. lit. c. generalem regulam tradunt: Quod Capitulum siue Conuentus non possit renunciare iuri acquisito per consuetudinem, statutum, aut priuilegium, si tale ius Ecclesiæ vtile aut honorificum sit, v. g. vt in Canonicos non assumantur nisi qui sunt in sacris ordinibus constituti: quod si Capitulum contra talem constitutionem, consuetudinem, aut priuilegium faceret, vnus solus posset se opponere imò si omnes contra facerent, Superior puta Episcopus posset & deberet impedire, quatenus id in damnum Ecclesiæ, cedit Qua eadem ratione Suarez ait t. 1. de relig. tr. 2. lib. 1. cap. 20. num. 3: quod priuilegio immunitatis à decimis Ordinis Religiosorum concessio, à Prælato & Conuentu renuntiare non possit. Quare tantum ea priuilegia per renuntiationem expressam, vel tacitam (puta per actum priuilegia directè contrarium scienter ac liberè exercitum) tolli possunt à Capitulo vel Prælato, quæ Ecclesiæ utilia non sunt, vel saltem indifferentia, iuxta c. cum accessissent, de constitut. c. pro illorum, de præben. His adde, quod exempti priuilegio exemptionis renuntiare non possunt: quia id cederet in præiudicium Principis, v. g. Papæ, qui eos ab aliorum Ordinarij iurisdictione liberos, suæ gubernationi & protectioni immediate subiecit, sicuti colligitur ex c. cum tempore, vbi id notat Abb. n. 2. de arbitris. Veruntamen, id publicæ utilitatis causa receptum est, vt propter negligentiam Prælati, contra Ecclesiam currat præscriptio 40. annorum, iuxta c. 4. & 5. de præscript. c. accedentib. de priuileg. Vt litium aliquis finis sit, atque iura & dominia non diutius in incerto maneant.

21 V. Priuilegia affirmatiua, quæ alijs onerosa sunt, amittuntur per non vsum spatio decenni inter præsentis; viginti verò annorum, inter absentes, modo vtendi occasio fuerit. Sumitur ex l. 1. ff. de nundinis, iun. Gl. & tradit. Suar. lib. 8. de legib. cap. 34. Ratio est: Quia omnes obligationes, ac seruitutes tam reales, quam personales ita extinguuntur; si altero iure suo, pro temporum occasione, nunquam vtente, res obligata, legitimi temporis decursu, vt libera possideatur, ac denique vsucapiatur: v. g. si ius habeas seruitia imperandi Vasallo, & lon-

go tempore, cum occasio se offert, imperare cesses: Vel ius habeas curram agendi per prædium meum, & longo tempore agere intermittas. Ita etiam se res habet in priuilegijs alteri onerosis: veluti, si habeas priuilegium exigendi decimas; visitandi Monasteria exempta; ac talibus priuilegijs, si vtendi occasio sit, longo tempore non vtaris, ea amittis, partim per viam præscriptionis: partim verò per viam tacitæ renuntiationis; ex iuris dispositione. Dico autem: si vtendi occasio sit: Alioquin priuilegia affirmatiua non amittuntur: vt si habeas priuilegium iurisdictionis sanguinis, eoque longo tempore non vtaris, quia nullum malefactorem cepisti. Qua de re vide Andr. Gail. lib. 2. obseruat. 60. num. 6. Neque vassalli contra Principem præscribere possunt, quod eorum obsequijs longissimo tempore vsus non sit, si casus, seu occasio non occurrat, teste Abb. c. ad audientiam, in fine, de præscript. Suarez lib. 8. c. 34. n. 3.

Reliqua autem priuilegia, quæ absolutæ gratiæ sunt, in nullius grauamen cedentes; v. g. celebrandi ante auroram dispensandi in irregularitate, absoluedi à casibus reſeruatis, comedendi carnes in quadragesima; per merum non vsum nunquam amitti videntur, quæ est sententia Glos. penult. in c. vt priuilegia, de priuileg. Suarez l. c. num. 7. etsi contrarium doceat Abb. in cit. c. vt priuilegia, & c. cum accessissent, num. 6. de constit. Salas de legib. disput. 17. sect. 13. num. 64. argument. l. 1. ff. de nundinis: Nundinis impetratis à Principe, non vtendo qui merui, decennij tempore amittit. Sed probatur. Non enim amittuntur via præscriptionis: cum nemo sit, qui contra eiusmodi priuilegia non onerosa præscribere possit. Neque via tacitæ renuntiationis: quia quisque liberam facultatem habet priuilegio vtendi, vel etiam non vtendi. Hanc enim regulam tradit Abbas in c. Ioannes, de clerico coniug. in fine: Cum lex non necessitat ad agendum, sed solum dat facultatem ad agendum, non tollitur per non vsum. Eadem verò ratio est de priuilegio, quod etiam liberum vsum habet. Ab. l. 1. ff. de nundinis, responderi Glos. supra citata, illud inter onerosa priuilegia numerandum esse. Aliter etiam responderi posse ait Suarez num. 7. Speciale id esse in illo priuilegio nundinarum, quod tali conditione à Principe concessum videtur, vt per non vsum, decennij spatio amittatur; ideoque extendendum non esse ad alia, quibus talis conditio neque ex iure scripto, neque ex consuetudine annexa est.

VI. Priuilegia negatiua, quæ alijs onerosa sunt, v. g. exemptionis à decimis, iurisdictione Ordinarij, per actum contrarium duobus modis amitti possunt: Primò per præscriptionem, si post actum contrarium seu contrauentionem priuilegij sine protestatione factam, elabatur tempus legitimum, ad præscribendum sufficiens: puta si aliquis exemptus, iudicio Ordinarij se sistat, ex eo tempore incipit Ordinarius esse in quasi possessione iurisdictionis, quæ possessio decennij spatio cū bona fide continuata præscriptionem absoluit: qua de re Suarez lib. 8. de legib. cap. 34. num. 20. Alter modus est per tacitam renuntiationem: Nam in externo foro præsumitur iuri ac priuilegio suo renuntiare, qui sine necessitate cogente actum ei contrarium exercet: vt si exemptus Ordinarij iudicio sponte se sistat. Quæ est communis doctrina Glos. & Abbatis in cit. cum accessissent, num. 7. & Glos. in c. gratum de offic. delegati, Syluest. ver. priuileg. quæst. 11. argument. cit. cap. cum accessissent, & cap. ex ore, de his, quæ fiunt à Prælatis.

Ceterum quia hæc decisio in præsumptione renuntiationis fundatur, ideo si priuilegiatus, actum contrarium exercens non habuit animum priuilegio simpliciter renuntiandi, sed solum quoad illum actum, in conscientie foro priuilegium non amittit. Imò neque in externo foro amittere debet, si constet, vel ex iudicij colligi possit animum simpliciter renuntiandi abfuisse: nisi insuper etiam legitimæ præscriptionis tempus, cum priuilegiati taci-



turnitate, decurreret. Quæ est sententia Suarezij cap. 35. & probatur ex l. voluntaria, Cod. de excusat. tutorum, in qua secundum interpretationem Salyceti definitur; Si aliquis privilegium obtinuit, ne ad tutelam suscipiendam cogi possit, et si vnam sponte susceperit, non ideo ad alias suscipiendas compellendum esse. Vnde regula rubricæ est *Per unum actum contrarium non perdit aliquis privilegium, habens effectum reiterabilem & successivum.* Deinde privilegia concessa principaliter in fauorem Ecclesiæ, alteriusve Communitatis, non possunt tolli per renuntiationem particularium personarum, v. g. Prælati, Clerici: nisi superueniat tempus præscriptionis legitimum, sicuti notat Abb. in c. cum accessissent, num. 8. de constitut.

Id quoque certum esse debet, privilegia absoluta, & nulli præiudicantia, v. g. non ieiunandi, per actum contrarium non tolli. Quia privilegium minimè obstat, quò minus aliquis ex libera voluntate oret, ieiunet, &c. sine privilegij præiudicio, sicut supra dictum est.

24 VII. Amittitur privilegium per abusum: cum quis ex privilegio peccandi occasionem sumit: aut fini, ob quem privilegium concessum est, directè repugnat. Quæ dicit Suarez lib. 8. de leg. cap. 36. num. 3. Plerumque tamen non amittitur ex ipsa rei natura: sed vel iuris constitutione, quo pacto v. g. in cap. ult. de immunit. Ecclesiæ statuitur, eos, qui in Ecclesia vel cimiterio delinquant, Ecclesiastica immunitate non gaudere. Vel per Iudicis sententiam, quo sensu dixit Simplicius Papa epist. 2. ad Episc. Rauennatis, & refertur d. 74. cap. vbi, *Privilegium meretur amittere, qui concessa sibi abutitur potestate* & videri potest Glos. reg. 16. in 6. Interdum tamen amisso privilegij per se & ex natura rei consequitur, cum ratio & fundamentum privilegij per abusum tollitur: si v. g. alicui beneficiato seruitium Ecclesiæ commutatum sit in studium literarum: ipse autem in Academia nullo modo studeat, sed alijs actionibus inutilibus se occupet, non faciet fructus suos: quia fructus in absentia dantur ratione studij: cessante autem causa finali, cessat effectus. Ita docet Suar. l. c.

25 Denique per reuocationem concedentis, eiusve successoris, extinguuntur privilegia, quæ merè gratiosè ad operandum aliquid præter ius commune subditis data sunt. Quæ est communis Doctorem sententia in cap. nouit, de iudicijs, Glos. in cit. regulam 16. Syluest. ver. privilegium, quæst. 10. dicto 7. Si tamen Superior concedentis privilegium sua autoritate confirmarit, non potest deinde ab inferiore reuocari: dummodo satis colligatur ex confirmatione, quòd superioris mens fuerit, privilegium ad suam potestatem reuocandi; non autem privilegium ad inferiore validè datum sua autoritate accidentaliter tantum, siue ad melius esse (v. t. aiunt) approbandi, ne ab aduersarijs oppugnari possit, sicut docet Suarez lib. 6. de legib. cap. 26. & lib. 8. cap. 37. num. 13.

Dixi autem primò, reuocari posse privilegia subditis data: Quæ verò non subditis concessa sunt privilegia, reuocari postea non possunt, sicuti docent Glos. cit. Innoc. in cit. nouit, ibid. Abb. num. 23. & in c. suggestum, de decimis, in fine. Quia postquam acceptata sunt, transeunt in pacta, quibus propriè dictum ius acquiritur: talia sunt privilegia, quæ Imperatores, aliq; principes Ecclesiæ concesserunt. Secundo dixi reuocari posse quæ gratiosè data sunt: Quæ enim etià subditis data sunt in præmium seu remunerationem meritorum aut cum adiuncto onere, talia non nisi ex graui causa ad bonum publicum pertinente reuocari possunt; & quidem cum aliqua compensatione iuris ablati, sicuti docent DD. in c. quæ in Ecclesiarum de constitut. Nauar. c. quando, de rescript. except. 20. n. 10. Tertiò dixi reuocari posse privilegium præter ius commune datum: Rectè enim notat Nauar. lib. 8. c. 37. n. 7. Aliud esse privilegium consistens in mera facultate aliqui præter ius commune o. erandi, sine iuris translatione: & tale subditis per reuocationem auferri posse. Aliud verò

esse privilegium consistens in absoluta donatione seu translatione alicuius iuri: vt cum alicui conceditur castrum, ius vectigalis, iurisdictio in prima instantia: & talè privilegium cum transeat in pactum, absque grauiore causa Princeps reuocare non potest. Vide etiam Abb. in cit. c. nouit, num. 26.

Porro, reuocatio privilegij duplex est: vna expressa, & 26 altera tacita. Expressa vel fit in specie: vel per clausulam, generalè *Non obstantibus quibuscumq; privilegijs.* Per quam tamen clausulam non censentur reuocari privilegia, quæ in corpore iuris continentur; nisi eorū quoq; clausula derogatoria exprimat, sicuti notauit Glos. in Authet. Quæ in prouincia, C. de criminibus, &c. verbo *illis omni privilegio.* Cum enim correctio iuris vitanda, & non facilè præsumenda sit, ideo ius generale posterius nō tollit prius speciale, si ob specialem aliquam rationem exceptum videri possit, vt Nauar. & Rodriq. ll. cc. notant. Accedit, quòd Princeps iura omnia etià specialia, quæ in corpore iuris continentur, nosse credatur, cap. 1. de constit. in 6. Quare credendum est, si eiusmodi ius speciale per generalem derogationem tollere vellet, eius specialem mentionem facturum. Sic Cistercienses Monachi ex c. cū ordinem, de rescript. id ius obtinent, vt nullo rescripto Papali, contra eorū privilegia impetrato, teneantur, nisi in eo specialis mentio Ordinis fiat.

Deinde neque privilegia in corpore iuris non contenta per clausulam illam generalem reuocantur, quibus insertum est, quòd sublata censi non debeant, nisi specialis eorum mentio fiat. Reuocata tamen etiam ista censentur, si plenissima derogatio fiat, per quam voluntas derogantis sufficienter significetur, v. g. *Non obstantibus quibuscumque privilegijs, suis quascumque verborum forma conceptis.* Vel, etiam si de verbo ad verbum debeat de illis mentio fieri, sicut docet Abb. c. cum instantia, de censib. num. 5. Syluest. ver. privilegium, quæst. 10. dicto 6. Suarez lib. 8. cap. 38. num. 2.

Tacita privilegij reuocatio fit per actum Principis cō- 27 trarium: dum modo præsumi possit, eum scire & recordari anè concessi privilegij, argument. l. idem Vlpianus, §. sunt & alij, ff. de excusationibus. Quod ad privilegiorum tacitam renuntiationem attinet, hæ regulæ traduntur: Prima: Per legem vniuersalem non derogatur privilegijs, in corpore iuris non contentis, nisi eorū specialis mentio fiat. Sumitur ex cap. 1. de constit. in 6. vbi dicitur, constitutionem Romani Pontificis derogare priori, cui contraria est, quamuis de ipsa mentio non fiat; non verò derogare specialibus legibus & consuetudinibus. Ratio ibi affertur; Quia iura omnia in pectore suo Pontifex habere censetur; iura autem specialia probabiliter ignorare potest.

Altera regula. Privilegium prius concessum, non tollitur per rescriptum, vel privilegium posterius, quod videtur contrarium, nisi illius specialis mentio fiat. Sumitur ex c. veniens, de præscription. vbi id notat Glos. ver. nullam, & alia Glos. in c. quoniam, d. 18. Abb. & alij Canonistæ in cap. 1. & c. cum ordinem, de rescriptis. Ratio est; Tum quia posterius rescriptum, aut privilegium censetur processisse ex ignorantia prioris, sicuti habetur in cap. ex parte, 1. de offic. delegati. Tum quia posterius privilegium impetratum cum taciturnitate prioris, cui contrarium est, subreptitium iudicatur, teste Gl. ult. in cap. 1. de rescript.

Limita hanc regulam I. Nisi prius privilegium in corpore iuris contentum sit, ac proinde Principi cognitum censeatur. Limita II. Nisi prius privilegium generale sit; posterius verò speciale: tunc probabilius est, priori ex parte derogari, iuxta regulam 34. in 6. *Generi per speciem derogatur*; siue ea antecedit, siue sequatur, ait Glos. ibid. Quæ regula sumpta est ex reg. 90. ff. *In toto iure generi per speciem derogatur: & illud potissimum habetur, quod ad speciem directum est.* Atque ita docet Syluest. cit. quæst. 10. dicto 6. Suarez



6. Suarez c. 39. num. 7. & rubrica in cap. 1. de rescript. & videtur expresse decisum in c. dudum, §. nos igitur, & c. quamvis tibi, de præb. in 6. in quibus habetur: Si Papa alicui facultatem dedit vacantia beneficia in aliqua Ecclesia suo nomine conferendi: & postea specialiter beneficiū in eadem Ecclesia primò vacaturum conferri certæ personæ rescriptit: posterius rescriptum executioni mandandum esse. Nam primæ generali gratiæ, ait Papa in cit. c. quamvis, derogat posterior specialis, licet de illa non fecerit mentionem. Ratio est, quia Princeps gratiam generalem eo animo ac voluntate concedere censetur, ut semper sibi integrum maneat, occurrente casu illi derogare per gratiam specialem. Id verò sublimitandum: Nisi virtute primi privilegij generalis, tertius personæ ius acquisitum fuerit: ut si Papa alicui concesserat omnes decimas alicuius Parochiæ: tunc enim præsumendum non est, Principem per posterius speciale privilegium, sine maiore examinatione causæ, præiudicium adferre voluisse, teste eodem Abb. in cap. 1. num. 10. de rescript. & c. veniens, num. 12. de præscript. argumēt. c. ex tua, de filiis presbyt. vbi Papa fecerat potestatem Archiepiscopo Eboracensi dispensandi cum filiis Presbyterorum, ut liceret eis retinere beneficia, quæ ipsis contra canonum præcepta immediatè post suos parentes collata fuissent: postea verò aliquibus supplicantibus concessum fuerat, ut dictis Presbyterorum filiis eiectionis, ipsi in Ecclesiis instituercntur: causa ista ad Papam relata respondit Archiepiscopo: Si per priores literas cum aliquibus Clericis dispensasti, dispensationem tuam posterorum literarum intuitu nolumus irritari.

- 28 Porro reuocatio privilegij, sicuti & indulgentiarum personæ, loco, aut rei alicui concessarum, item delegati iurisdictionis, alteriusve facultatis, non antè vim suam obtinet, quam privilegiato aut delegato reuocatio innotuit: cum alioquin plurima incommoda oriri possint, sicuti ex communi docent Henricus libro 7. cap. 20. numero 1. Salas de legib. disput. 12. sect. 2. Sanchez lib. 3. de matrim. disput. 30. qui addit num. 12. non sufficere casualem aliquam notitiam reuocationis, sed opus esse ut ad privilegiatum, vel delegatum aliquo modo destinata sit. Nam per quas causas aliquid nascitur, per easdem etiam dissolvitur: Privilegium autem vim suam erga absentem obtinere incipit per destinationem nuntij, epistolæ, & c. ergo simili etiam modo reuocari & tolli debet. Quod tamen improbat Suarez libro 8. cap. 40. Quia facilius res destruitur, quam acquiritur: & ad reuocationem non requiritur consensus & acceptatio privilegiati, sicuti ad acquisitionem requiritur. Illud verò certum est, ad indulgentiæ, alteriusve privilegij reuocationem, quæ per legem communem fit, haud opus esse, ut ea privilegiatis singulis innotescat: satis est, si legitima promulgatio facta sit, ut in publicam notitiam deuenire possit, sicuti supra etiam dixi cap. 2. huius tract. & notauit Salas lib. cap. Sa. ver. gratia, num. 17. Tunc enim si aliqui adhuc ignorent, per accidens id censei debeat, sicuti etiam docuit Suarez numero 4.

## CAP. XXIV.

## De consuetudine.

## SUMMARIUM.

- 1 Consuetudo est ius quoddam moribus constitutum.
- 2 Ad ius consuetudinis introducendum quatuor requiruntur: I. actus liberè à populo frequentatus. II. Temporis diuturnitas. III. Scientia & tacitus consensus potentis legem condere. IV. Ut frequenter actus tanquam ex obligatione.
- 3 Triplex est consuetudo: Vna secundum legem: altera præter legem, quæ & iuris constitutiva dicitur, tertia contra legem.

- 4 Consuetudo contra legem, quæ & desuetudo dicitur, & legem vincat & abroget, rationalis esse debet, & legitime præscripta.
- 5 Qui legem condere non possunt, interdum tamen legem per diuturnam contrariam consuetudinem abolere, seu aduersus eam præscribere possunt.
- 6 Ad præscribendum contra legem civilem ordinariè decennium requiritur: aduersus Ecclesiasticam verò 40. annorum spatium.
- 7 Si lex resistat consuetudini introducenda, non potest ea prævalere: nisi immemorialis sit.
- 8 Si lex non prohibeat tantum, sed etiam reprobet consuetudinem, tanquam irrationabilem, intelligitur quoque immemorialis.
- 9 Regula illa, quæ sibi illa privilegia sunt etiam, quæ sibi illa per consuetudinem, saltem immemoriam locum non habet, si consuetudo sit irrationabilis damnata sit.
- 10 Consuetudo aduersus legem procedere potest, legistatorem ignorante.
- 11 Ad præscribendum contra legem seu introducendam consuetudinem aduersus legem, bona fides requiritur.
- 12 Consuetudo etiam in sacramentalibus aduersus ius commune introducitur potest: si in sacris canonibus reprobata non sit.
- 13 Impedimentum matrimonij dirimens per se desuetudinem tolli potest: non autem novum impedimentum per consuetudinem introduci, ignorante Summo Pontifice.
- 14 Consuetudo capta, & nondum consummata in ioco actu contrario interruptitur.
- 15 Consuetudo abrogativa legis species quadam est præscriptionis.

Consuetudo definitur ab Isidoro lib. 5. Etymol. cap. 3. relato in c. 5. d. 1. Ius quoddam, moribus institutum, quod pro lege suscipitur, cum deficit lex. Circa quam definitionem notandum est primò, quod duplex est consuetudo: Vna facti, & altera iuris. De consuetudine facti loquitur idem Isidorus cit. c. 3. Vocata est consuetudo, quia in communi usu est. Et clariùs S. Thom. in 3. d. 23. quæst. 1. a. 4. ad quæst. 2. quod consuetudo sit frequentia operandi libere eodem modo. Consuetudo autem iuris, quam initio definiui, est quasi altera lex, parem obligandi potestatem obtinens, sicuti habetur in l. de quibus, 32. ff. de legib. Inueterata consuetudo pro lege non immerito custoditur: & hoc est ius, quod dicitur moribus constitutum. Et in libro seq. Diuturna consuetudo pro iure & lege in his, quæ non ex scripto descendunt, observari solet.

Notandum secundò. Consuetudo, quatenus pro iure accipitur, ortum & constitutionem suam accipit à consuetudine facti quatenus idem est, quod mos populi, id est, actus publicitus frequentatus.

Notandum tertio. Non ex omni populi more, consuetudine, seu actuum libera frequentatione oritur ius: sed imprimis requiritur, ut mos ille rationalis sit, & Reipublicæ utilis, Fidei ac Religionis congruens; deinde ut non fiat ex legis antecedentis obligatione: cum potius tendat ad novi iuris introductionem. Atque hoc est, quod Isidorus ait: Ius ex moribus populi ortum, pro lege suscipi, cum deficit lex. Consentit libro 30. citato De quibus causis scriptis legibus non vimur, id custodire oportet, quod moribus & consuetudine inductum est. Et Tertulianus in lib. de coronamilitis: cap. 4. Consuetudo in civilibus rebus pro lege suscipitur, cum deficit lex.

Igitur ad ius consuetudinis introducendum quatuor requiruntur: I. est, Actus liberè frequentatus: requiruntur autem tot actus, & ita notorii seu manifesti, ut probabiliter in populi notitiam deueniant, sicuti docet Abbas in capite ultimo de consuetudine numero 17. & 19. vbi notat, si actus perpetuitatem habeat, vnicuique sufficere posse: ut cum pons publico loco ædificatus à populo toleratur. Vide de hac re Ioann. Fabrum titulo Iustit. de iure natur. gent. & civili, §. ex non scripto, Mynfingerum cent. 6. obseru. 41. Syluest. verb. consuetudo, quæstione 4. Ioann. Salas de legibus. disput. 19. sect. 8.

II. est Temporis diuturnitas seu longitudo, sicuti hæc



betur in l. 35. ff. de legib. Sed & ea, quæ longa consuetudine approbata sunt, & per annos plurimos observata, veluti tacita civium conventio: non minus, quam ea, quæ scripta sunt iura, servantur. Est autem longum tempus civili iure decennium, iuxta tit. C. de præscript. longi temporis.

III. est, Scientia & tacitus consensus potentis legem condere, sicuti constat ex cit. l. 35. & ex communi docet Abb. cit. c. ult. Suarez lib. 7. de legib. c. 2. Nam in eo differunt lex seu statutum, & consuetudo: quod in illo expressus consensus, in hac tacitus interueniat. Quapropter, si ipsemet populus legem siue statutum condere possit, tacitus ipsius videntis, & non contradicentis consensus auctoritatem consuetudini præstabit; dummodo tamen, si non consentire vellet, contradicere posset. Quid enim interest, dicitur in cit. l. 32. ff. de legibus suffragiis populus suam voluntatem declaret, an rebus ipsis & factis? Sin autem populus legem condere non possit, tunc neque ius consuetudinis propria auctoritate introducere potest; quia consuetudo est species iuris seu legis: à quo autem remouetur genus, ab eodem & species. Quare hoc casu requiritur tacitus consensus siue approbatio Principis seu Superioris, à quo populus dependet: Tacite autem consentire & approbare Princeps censetur, si sciens populi morem, cum posset prohibere, longo tempore toleret, sicuti docet S. Th. 1. 2. q. 97. a. 3. ad 3. Medina ibid. Syl. ver. consuetudo, q. 3. Ioan. Salas tr. de legib. disp. 19. §. 11. Ex quo colligitur: Neque Provinciales Bauaros v. g. sine consensu saltem tacito Ducis sui in rebus politicis; neque Duxes sanos sine consensu Episcopi circa festa, ieiunia, & c. consuetudinem vim legis obtinentem introducere posse. Obiter autem hinc aduerte, licet ad introducendam legem per consuetudinem populi, cum tacito consensu Principis, requiratur tempus decennij, minus tamen tempus requiri ad abolendam legem per consensum Principis tacite approbantis consuetudinem contrariam: quia in priore casu agitur de obligatione imponenda, quod magis odiosum est.

IV. est, Vt actus à populo, vel maiore parte populi frequentetur quasi ex obligatione, seu potius animo introducendæ obligationis, sicuti ex communi notauit Gl. in cit. c. ult. de consuet. ib. Ab. n. 17. Syl. lib. 7. de leg. c. 14. n. 5. Mol. t. 1. tr. 2. de iust. disp. 77. Nam si populus temporis diuturnitate opus aliquod frequenter, v. g. in Capite quadragesimæ cinerem benedictum accipiat, ad campanæ pulsus salutationem Angelicam ter recitet, ex libera pietate ac deuotione; non ideo nascitur iuris necessitas sub peccato obligantis: esto aliqui sint, qui tali obligatione se teneri falso sibi persuadeant. Quæ de rebus cit. l. 7. c. 14. n. 5. Ioan. Salas tr. de leg. dist. 19. sect. 11. n. 92. Bellar. l. 4. de pontif. c. 18. §. ad id, quod.

Porro cum triplex sit consuetudo, sicuti notauit Abb. in cit. c. ult. de consuet. n. 20. in fine: Secundum legem, præter legem, & contra legem: Sciendum est, supra traditam ex Isidoro definitionem, & assignatas condiciones propriè tantum conuenire consuetudini, quæ est præter legem: quia hæc sola iuris constitutiuæ est, per tacitum consensum, ubi lex scripta, seu per expressam voluntatem promulgata, deficit. Nam quod attinet ad consuetudinem secundum legem, (de qua sermo est Lucæ 2. *Vt facerent secundum consuetudinem legis pro eo*) illa supponit legem scripto, vel verbo præexistentem, quam consuetudo approbat, confirmat, interpretatur, teste Gratiano super c. in istis, dist. 4. *Leges instituuntur cum promulgantur: firmantur, cum moribus ventium approbantur.* Et l. 37. ff. de legib. si de interpretatione legis queratur, imprimis inspicendum est: quo iure ciuitas retro in eiusmodi casibus usa sit. Optima enim est legum interpretatio consuetudo. Quare dictum Gl. & Doctorum in c. sopita, de censibus, Quod duplici iure fultur is, cui lex & consuetudo assistit: non ita accipiendum est, quasi legis per consuetudinem confirmatæ duo vincula, vel distincta iura sint: sed vnum, id verò firmitus, ac magis indubitatum, quippe virtualiter quasi ex duplici iure compositum sicuti no-

tauit Suarez cit. l. 7. c. 4. n. 15. & colligitur ex doctrina Gl. communiter receptæ in c. 1. de constit. in 6. apud Abbatem in cit. c. ult. num. 21. Quod sublato iure communi, tollitur etiam statutum particulari: utemque consuetudo introducta secundum idem ius.

Insuper hinc duo addenda sunt: Primum ex Suarez cit. l. 7. c. 17. num. 3. Legem, cuius intellectus dubius est, quandoque interpretationem accipere à consuetudine, tanquam ius nouum constituyente. Quemadmodum enim authentica interpretatio legis quasi noua lex est: ideoque ad eundem pertinet legem ferre, & legem dubiam interpretari, iuxta l. 1. C. de legibus. Ita etiam de consuetudine dici debet, sicut habetur in l. 38. ff. eod. *In ambiguitatibus, quæ ex legibus proficiuntur, consuetudinem aut rerum perpetuo similiter iudicatarum auctoritatem, vim legis obtinere.* Quibus posterioribus verbis indigitatur *Stylus curiæ* (ut vocant) id est, ius non scriptum, ex actibus iudicialibus ortum, quod sub iure consuetudinis continetur, tanquam species sub genere, sicuti colligitur ex l. ult. in fine C. de iniuriis. Quare necesse etiam est, ut in tribunali sapientius ita iudicatum sit, tanquam ex obligatione, siue animo introducendæ obligationis, sicuti notauit Vasq. 1. 2. disp. 177. in fine.

Alterum. Consuetudinem non esse tantum comprobatricem & confirmatricem legis scriptæ: sed etiam non scriptæ, & verbo tantum traditæ, sicuti expressè docet Tertul. in lib. de corona militis, c. 3. *Hanc* (traditionem) *si nulla scriptura determinauit* (potest enim traditio tam scripto, quam sermone fieri, sicut apertè ait S. Paulus 2. ad Thessal. 2.) *certè consuetudo corroborauit, quæ sine dubio de traditione manauit.* Et c. 4. *Traditio tibi præstenditur auctrix consuetudo confirmatrix.* Istud tamen rectè addit Suarez cit. l. 7. c. 4. n. 11. Quasdam esse consuetudines Ecclesiasticas, etiam vniuersales, v. g. sacramentales ceremonias, quæ à nulla expressa lege, scripta aut tradita, Diuina, aut Apostolica seu Ecclesiastica promanarunt; sed solo tacito Ecclesiæ Pastorum consensu introductæ & continuatæ fuerunt; quarum ipsarum si nullum omnino initium reperiatur, sed semper in Ecclesia retentæ legantur, Apostolorum tempore incepisse, rectè creditur, secundum regulam S. Aug. l. 4. de baptismo paruulorum, c. 24.

Quod verò attinet ad consuetudinem contra legem: per illam proprie non constituitur ius, sed tollitur: quare non tam ius consuetudinis dici debet: quam ius defunctudinis. De ea mentio fit in c. ult. de consuetud. *Licet longæva consuetudinis non sit vilis auctoritas: non tamen est usque adeo valitura, ut vel iuri postremo debeat præiudicium generare: nisi fuerit rationalis, & legitime sit præscripta.* Ex quibus verbis colligitur, duò esse necessaria, ut contraria consuetudo legem vincat & abroget: Videlicet, ut sit rationalis: & legitime præscripta: neque præter hæc aliud requiritur; cum neque intra plus requirant, sicuti benè notauit Abbas cit. c. ult. num. 7. & Rosell. verb. consuetudo n. 5.

Quod ad primum horum attinet, valde dissentiunt Doctores apud Abb. cit. c. ult. quænam dicenda sit consuetudo rationalis, & quæ irrationabilis, seu corruptela, sicuti appellatur in c. de consuetud. in 6. Mihi placet doctrina Ro chi in c. ult. de consuetud. num. 26 Suarez cit. l. 7. cap. 6. num. 10. & 13. & cap. 18. num. 10. Azor. t. 1. l. 5. c. 17. q. 5. in fine, neque repugnare videntur Nauar. in comment. de spoliis Clericorum, §. 14. num. 7. Iacob. Menoch. de arbitrariis quæstion. lib. 2. casu 82. Eam consuetudinem irrationabilem esse, quæ vel iuri naturali aut diuino aduersatur, vel iure canonico reprobat: vel peccandi licentiam aut occasionem præbet: vel alia ratione communi utilitati perniciofa est, alia autem omnes consuetudines rationabiles esse possunt. Probatur autem hæc doctrina primò generatim: Nam talia, quæ nec diuino iuri aduersantur, neque legibus reprobata sunt, neque publico bono incommo-  
S. Au-



S. August. epist. 118. c. 1. ad Ianuarium, & epist. 119. ca. 18. Ergo sicuti occurrente aliqua ratione & causa, per humanam legem vel consuetudinem introduci & statui possunt ita etiam, & quidem facilius occurrente alia aliqua ratione, per contrariam legem aut consuetudinem iterum tolli seu abrogari possunt. Dixi autem *facilius*; Quia, vt Suar. notauit cit. c. 18. num. 9. ad iuris introductionem requiritur positio, vt ad publicam vtilitatem conferat; ad eisdem vero abrogationem sufficit, vt publica vtilitati non aduersetur.

Secundò speciatim probatur: Imprimis consuetudinem contra ius naturæ introduci non posse, ex eo constat: quia ius naturale immutabile est. Deinde, nec contra ius posituum diuinum consuetudinem præualere posse; ex eo patet: quia homines, cum inferiores sint, non possunt tollere legem Superioris Dei. Quare passim reprehenduntur consuetudines, seu traditiones legi diuinæ repugnantes, Matth. 15. *Quare & vos transgredimini præceptum Dei, propter traditionem vestram?* Item Marci 7. Ad Coloss. 2. Præterea, quod consuetudo, quæ iure præsertim canonico, reprobata est tanquam irrationabilis, aduersus legem dominari non possit, constat ex c. cum venerabilis, de cons. in fine, & c. 1. eod. in 6. quibus locis talis consuetudo corruptela appellatur, quæ sacris canonibus est inimica. Denique, quod consuetudines, quæ peccandi occasionem; vel periculum præbent, vel alia ratione bono communi incommodant, irrationabiles cenferi debeant, colligitur ex c. 1. & c. ex parte, de consuet. vbi regulam tradunt Doctores: *Non valere consuetudinem, quæ aliquis inducit ad peccandum, vel bona propria dissipandum.* Huiusmodi etiam consuetudines essent, vt liberi spurii æque ac legitimi heredes instituantur: vt homicidæ pœnitentium pecuniaria puniantur, &c. Tametsi enim talia quandoque licitè & sine Reipubl. detrimento fieri possint: obligatio tamen, vt ita necessariò fiant, non potest esse Reipubl. non perniciosa, sicuti notauit Suar. l. 7. c. 6. n. 10.

Corollarium. Non videtur consuetudine introduci posse, vt pater nullam omnino hæreditatis portionem filiis relinquere cogatur: quia talis consuetudo i a vniuersim introducta, irrationabilis esset, bono publico incommodans, argum. l. cum ratio, ff. de bonis damnatorum. Dico ita vniuersim: at verò ob certam causam introduci, aut lege statui poterit, vt v. g. pater liberis diuitibus nihil relinquere teneatur: item vt in nobilibus familijs omnia primogenito relinquuntur, ad quem deinde spectet fratribus ac sororibus providere, ne egeant. Vide Cou. p. 2. ep. c. 8. §. 6. n. 5. Gail. l. 2. obsert. 122. n. 12.

Quod ad alterum attinet; videlicet præscriptionem consuetudinis; est **QVÆSTIO PRIMA.** Quo sensu dicantur consuetudo præscripta. Respondeo ex doctrina Ab. in cit. c. vlt. num. 7. Rocho Curtio sect. 3. num. 2. Ideo sic appellari, vt distinguatur à consuetudine facti, quæ imperfecta est, ac veluti via ad præscribendum aduersus legem. Etenim consuetudo iuris, quæ legem tollit & abrogat, debet esse perfecta & completa; vt proinde aliud non sit consuetudinem legitimè præscriptam, quàm eius præscriptionem aduersus legem legitimè perfectam esse. Rectè autem notat Abbas, discrimen esse inter populum qui leges condere, & abrogare potest, (qualis olim erat populus Romanus) & populum qui tali potestate præditus non est: sicuti nunc clerus, aut populus Christianus contra canones statuere nihil potest. Nam illi præscriptione aduersus legem non indigent: cum eam directè tollere possint, vel expressè contra eam statuendo, vel tacitè abrogando per diuturnam consuetudinem, iuxta l. de quibus, ff. de legibus. Quid inter est suffragio populi voluntatem suam declarare, an rebus ipsis & factis? Quare rectissime etiam illud receptum est, vt leges non solum suffragio legislatoris, sed etiam sacro consensu omnium per consuetudinem abrogentur. Quin verò legem v. g. canonicam directè per consensum suum tollere non possunt: ijs necessaria est præscriptio aduersus

legem, ex ipsius legislatoris seu Principis voluntate vim & auctoritatem capiens. Sic v. g. Inferiores Papæ, licet contra iura canonica statuere prohibeantur; interdum tamen per consuetudinem ius canonicum tollere possunt: Exempli causa, Vt canonici in sui receptione aliquid dent ad fabricam Ecclesiæ applicandum, repugnat quidem cap. ex multis, 3. quæst. 1. sed nihilominus ex iusta causa per priuilegium Papæ permitti, idèoque etiam per consuetudinem legitimè præscriptam introduci potest, sicuti annotauit Alex. de Neuo super Abb. in c. Iacobus, de simon. li. h.

**QVÆSTIO SECUNDA.** Quanto tempore opus sit ad complendam præscriptionem aduersus legem? Respondeo ex communi doctrina Glossæ Abb. Rochi, & aliorum in cit. c. vlt. Syl. ver. consuetudo, quæst. 2. & 4. Angel. §. 8. Armillæ num. 5. Molin. tom. 1. tract. 2. disp. 77. Azor cit. libro 5. c. 4. quæst. 4. Cordubæ lib. 1. quæstionarii, q. 122. a 4. Suar. l. 7. c. 8. num. 7. Ordinariè requiri decennium ad præscribendum contra legem civilem: quadraginta verò annos aduersus Ecclesiasticam. Ratio est: Quia ad præscribendum aduersus legem requiritur tempus longum: tale autem civili iure censetur esse decennium. Sed aduersus iura Ecclesiastica ordinariè præscriptionis tempus censetur esse annorum 40. arg. c. de quarta, & c. ad aures, de præscript. Et hanc esse communem doctrinam fatetur Menochius de arbitrar. q. 1. 2. casu 85.

Dixi autem ordinariè: Quia tempus etiam longissimum sine titulo non sufficit ad præscribendum aduersus legem, si lex præscriptioni seu contrariæ consuetudini resistat; arg. c. 1. de consuet. in 6. & c. 1. de præscript. eod. Nam vt infra dicam, præscriptio ex legislatoris seu Principis voluntate vim suam accipit: ergo eo resistente procedere non potest. Quare hanc regulam tradunt Innoc. & Abb. num. 5. in cit. c. vlt. *Consuetudo contra legem non valet, si lex resistat.* Etenim cogitandum est, quod consuetudo facti contra legem, sit quasi possessio iuris tendentis ad abolendam legem viâ præscriptionis: licet autem legum latores ordinariè talem consuetudinis præscriptionem aduersus legem præualere permittant temporis diuturnitate: interdum tamen non permittunt, sed expressè prohibent aduersus legem, aliquam consuetudinem introduci posse.

Tunc verò restat quæstio, an saltem consuetudo immemorialis, id est, cuius initium nulla memoria extat, contra ealem legem præualere possit? Respondeo, & dico I. Si lex derogatoria consuetudinis vtatur clausula illa generali, *consuetudine qualibet contrario non obstante*, & nihil aliud exprimat, aut significet, videtur tantum tollere consuetudines existentes: non item se extendere ad futuras: idèoque nihil obstat, aduersus talem legem, etiam receptam, postea præscribi. Exemplum huius habemus in Clem. statutum, de elect. vbi id notat Gl. ver. consuetudine, Suar. lib. 7. c. 7. nec dissentire videtur Syl. vel consuetudo, numero 10.

Dico II. Si lex generali clausula prohibeat quamcunque consuetudinem contra legem introduci: & nihil aliud exprimat aut significet, non censetur tali prohibitione comprehensa consuetudo immemorialis. Ita docet Ab. in c. vlt. n. 35. de præscript. Cou. 3. resol. c. 13. n. 5. Mascardus de probat. concl. 1371. n. 45. Nam talis consuetudo maiorem vim & auctoritatem habet, quàm alia consuetudines, arg. l. hoc iure, §. aqua ductus, ff. de aqua quotidiana & æstiuæ. Ergo necesse est, vt ei specialiter & expressè per legem derogetur.

Imò verò plus docent Nau. in comment. de spoliis, §. 14. num. 8. Valq. l. 2. disp. 177. c. 8. Suar. lib. 7. c. 19. num. 21. Azor t. 1. lib. 5. c. 17. quæst. 10. Si lex simpliciter prohibeat consuetudinem introduci, sed tanquam irrationabilem, non damnet: nihilominus contra eam ordinariè cursu præscribi possit: idèoque fateri coguntur hi Doctores, huiusmodi clausulam prohibitoriam consuetudinis futuræ tantummodo ad Iudices dirigi, vt ne patiantur talem



consuetudinem aduersus legem introduci. Hæc tamen sententia non placet, si loquamur de præscriptione propriè dicta, quæ Principe etiam nesciente aduersus legem perficitur. Certum enim est, quod Princeps seu Legislatoresalem præscriptionem inhibere eique resistere possit: velle autem ei resistere, satis declarat cum ait, *nolumus aduersus hanc legem ullam contrariam consuetudinem procedere; aut ullam præscriptionem praualeare possi.* Cæterum nemo negat, quin talis etiam lex, sicut alia quæcunque per contrariam consuetudinem tolli queat, in duobus casibus: I. Ob rerum mutationem seu superuenientem nouam causam à legislatore non præuiliam, argum. l. per hominem ff. mandati. Vnde colligit ibidem Bartolus & Abb. in cit. c. ult. num. 24. Syl. ver. consuetudo, q. 10. Rodriq. t. 1. regul. qq. q. 69. 2. 4. *Ex causa nona urgente, & non præuiliata à canonis autore, posse fieri statutum contra canonem.* Quia licet tale statutum sit contra verba canonis; non tamen contra mentem auctoris eius. Item delegatum generalem, occurrente casu non præuiliato à delegante, posse prohibere delegato specialiter in commissio sibi negotio procedat: licet alioquin delegatus specialis in negotio suo speciali vincat generalem c. studij, de offic. delegati.

II. Si Princeps consuetudinis conscius eam non prohibeat, cum prohibere possit: censetur tacite abrogare legem suam. Verum hæc non est propriè dicta præscriptio aduersus legem: sed tacita reuocatio legis.

8 Dico III. Si lex, præsertim canonica, non prohibeat tantum, sed reprobet ac damnet consuetudinem, tanquam irrationabilem: intelligitur etiam de immemoriali. Ita ex communi docet Couarruu. 3. resol. c. 12. num. 1. Abb. cit. c. ult. num. 15. Rochus Curtius ibid. sect. 4. num. 29. Tirraquell. lib. 1. de retract. §. 2. Gloss. 2. num. 25. & alij supra citati. Sumitur apertè ex c. 1. de consuetud. in 6. vbi corruptela appellatur consuetudo etiam immemorialis, quod aliquis sine Sedis Apostolicæ dispensatione duos personatus, dignitates, vel officia perpetua, vnà cum canonica seu præbenda, in eadem Ecclesia obtineat. Ratio est, quia præscriptio aduersus legem consuetudine perfici debet; cum consuetudo facti sit quasi via ad præscriptionem, siue consuetudinem iuris præscriptam. Ex quo sequitur, si consuetudo irrationabilis & iniqua iudicata fuit, non posse ex ea præscriptionem, siue consuetudinem iuris præscriptam oriri.

Excipiunt verò alicui, sicut videre est apud Rochum loc. cit. Nisi consuetudo aduersus legem introducatur cum scientia & patientia Principis. Quod licet verissimum sit, tamen non puto esse propriè dictam exceptionem à tradita doctrina. Nam si Princeps sciens, permittat consuetudinem aduersus legem introduci, cum illam, si vellet, prohibere posset, tunc lex non propriè per præscriptionem, sed per tacitam Principis reuocationem abrogatur; ut proinde mirum non sit, neque legi imi temporis diuturnitatem, neque item bonam fidem requiri, ut paulò antè dixi, & postea iterum dicendum erit.

Sed hoc loco obiectio soluenda est: Nam quicquid per priuilegiū aut dispensationem Principis obtineri potest: id etiam per consuetudinem temporis immemorialis introduci posse videtur: quia tanti temporis possessio, vel consuetudo facit præsumptionem tituli, seu priuilegi, sicut colligunt Doctores ex capite 1. de præscriptionibus in 6. Ergo si versemur in casu, seu facto aliquo, quod non ita iuri naturali aut diuino repugnat, quo minùs saltem per summi Pontificis consensum ac priuilegium cohonestari possit, v. g. ut laici clericales decimas possideant, ut iurisdictionem aliquam in personas ecclesiasticas exercent, vel ista aliquam collectam imponant, ut in eadem Ecclesia duæ dignitates vnà cum canonica obtineantur: sequitur in eiusmodi casibus etiam consuetudinem immemorialem introduci posse.

9 Respondeo: Id nullo modo concedendum; atque re-

gulam illam, *Acquisibilia priuilegio sunt etiam acquisibilia consuetudine, aut prescriptione*, necessariò limitandam esse: nisi lex consuetudinem tanquam abusum & corruptelam improbet ac damnet, sicut ex communi notauit Felinus in cap. accedentes, num. 15. de præscript. ibidem Abbas numero 3. & in cap. quanto, de consuetud. num. 2. & in c. vltim. eod. num. 15. Rochus sect. 4. num. 33. Aymon. Crauetta de antiq. tempor. p. 4. §. materia ista, num. 94. Suarez lib. 4. defens. fidei Cathol. c. 32. num. 12. Henricus canisius tract. de decimis, c. 13. num. 3. Mascardus conclus. 1371. num. 32. & colligitur apertè ex cit. c. 1. de consuetud. in 6. Nam præscriptio locum habere non potest, si ius aliquem faciat in capacem possessionis, & inde consequentis præscriptionis: sicuti videre est in iure decimarum, quod cum ex propria institutione sua Ecclesiasticum sit, in laicum cadere non potest, nisi ex speciali & legitima Ecclesiastici Prælati concessione, aut priuilegio, capite prohibemus, capite dudum, de decimis, capite causam quæ, de præscript. capite decimas 1. 16. quæstione 7. Ergo nisi aliquis cum præscriptione talis tituli possideat, nunquam potest præscribere: quia *incapax possidendi est etiam incapax præscribendi*, sicuti docent Gloss. Abb. Felinus, & alij communiter in cit. cap. causam. Sed hæc ratio similiter locum habet, quociescunque iura aliquam consuetudinem, tanquam irrationabilem, damnant: nam hoc ipso reddunt eam inefficacem ad præscriptionem inducendam: vel quod eodem redit, vtentes tali damnata consuetudine reddunt iura inhabiles ad præscribendum aduersus legem: quandoquidem consuetudo, per quam præscriptio introducit, rationabilis esse debet, ca. vltim. de consuetud.

Id tamen limitandum est primò: Nisi talis consuetudo scientia & libera patientia seu permissione Principis adiuetur, sicut notauit Rochus loc. cit. & Abb. in cit. cap. accedentes, num. 3. Secundò: Nisi talis consuetudo præsumpto aliquo titulo iuuetur, v. g. constante fama priuilegi concessi, quod temporis diuturnitate amissum sit. Nam fama dat iustam causam credendi, ait Abb. cap. de quarta, num. 10. de præscript. Tunc enim præscribens nõ fundatur in mera possessione, aut consuetudine: sed in titulo, ex quo capax fiat possessionis, consuetudinis, ac denique præscriptionis cum bona fide, sicuti præter alios notauit Crauetta l. c. & Mascardus conclus. 1371. nu. 32. vbi ait: *Data incapacitate præscribentis, solus cursus temporis nihil potest operari, ut reddat capacem eum, qui incapax est: quare tunc opus est, ut allegetur titulus priuilegi, aut exemptionis: Et ad probationem talis tituli sufficit probare lapsum temporis, cuius initij memoria non extet.* Si nimirum testes adfuerint, qui dicant, semper fuisse constantem famam, & opinionem, tale ius alicui competere ex speciali concessione feudi, vel Pontificij priuilegi, eaque ratione & præscriptione iuris aliquem poss. disse a tempore, cuius initij etiam ex auditu seu relatione maiorum, nulla sit memoria, quod etiam docet Felinus in cit. c. causam, Syluest. verb. decima, quæst. 10. dicto 2. Suarez tom. 1. de relig. tract. 2. lib. 1. de decimis, c. 27. M. Anton. Peregrinus de iure Fisci, libro 4. tit. 8. Antonius Gabrielus lib. 5. de præscript. concl. 1. num. 18. Corollarium, *Si sit incapax personæ ex iure positio pro-neniens fortius est priuilegium, quàm consuetudo: Contra verò, si non adsit incapax personæ, fortior est consuetudo, quàm priuilegium: quia illa etiam iuri tertii derogare potest.* Ita Crauetta l. c. n. 95.

QVÆSTIO TERTIA. Vtrum ad præscribendum aduersus legem Superioris, requiratur eius scientia & tacitus consensus? Respondeo, Nequaquam requiri: quæ est verissima & communis sententia Gloss. c. in istis, d. 4. Ab. cit. c. vlt. num. 13. & in c. 1. de Treuga & pace num. 4. Rochi cit. sect. 4. num. 14. S. Anton. p. 1. tit. 16. §. 2. Ioan. Maioris in 4. d. 15. quæst. 5. Ioan. Fabri tit. Instit. de iure natur. gent. & ciuili, §. ex non scripto, num. 8. Syl. verb. consuetudo, quæst. 7. Azor. cit. lib. 5. ca. 18. quæst. 7. Sanchez de matrim.



rim. lib. 7. disp. 4. num. 12. & 14. Ioan. Salas de legib. disp. 19. sect. 4. numero 37. Suarez libro 7. capite 13. num. 7. & capite 18. numero 15. Nam vniuersim hac vis præscriptionis esse solet, vt currat etiam contra ignorantem; alioquin vix vlla particularium Ecclesiarum consuetudines aduersus iura Pontificia introductæ censerī poterunt legitimæ; cum Papa particulares locorum consuetudines seignorare fateatur, cap. 1. de constitut. in 6. Licet autem particulatim ignoret; ideoque ex eius speciali consensu consuetudo vim suam non obtineat: consentit tamen generatim, quando rationabili & diuturnæ consuetudini contra iura sua generali lege auctoritatem tribuit, cap. ult. de consuet. Quamuis huic doctrinæ contradicat Vasq. 1. 2. disp. 177. c. 2. n. 19.

**II. QVÆSTIO QVARTA.** Vtrum ad præscribendum aduersus legem bona fides requiratur? Negant Caiet. 1. 2. q. 97. a. 3. ad 2. Sanch. lib. 7. de matrim. disp. 4. num. 14. Ioan. Salas cit. disp. 19. l. 4. Vasq. cit. disp. 177. c. 7. num. 64. vbi aiunt, consuetudinem ex malis & illicitis actibus conualecere, & legem abrogare posse. Quæ sententia haud dubiè vera est, si Princeps sciat, toleret, ideoque tacitè abrogationi consentire censeatur. Sin verò loquamur de præscriptione aduersus legem Principe ignorante, dicendum est cum Gloss. in c. non est, de consuetudine, verbo canonicè, Suarez lib. 4. defens. fidei Cathol. c. 32. num. 20. Azor cit. lib. 5. c. 17. quæst. 6. Sicuti ad omnem aliam præscriptionem; ita etiam ad eam, quæ aduersus legem tendit, bonam fidem requiri, sine qua impossibile est consuetudinem præscriptiuam inchoare: cum ea iusta & rationabilis esse debeat. Ex quo ipso consequens est, in eiusmodi præscriptione semper interuenire probabilem ignorantiam præscribentium. Veruntamen, tamen si primi temere & non sine culpa legem Reipublicæ vtilem transgredientes, præscriptionem re ipsa inchoate non putuerint: horum tamen successores, videntes legem ab antecessoribus suis non obseruatam, existimare possunt, & in dubio præsumere, illos habuisse iustam legis non seruandæ causam; & ita illorum vestigijs insistentes præscriptionem inchoare, vel quasi bona fide ab antecessoribus inchoata fuisset, tandem perficere; sicuti optimè explicat Sotus l. 1. de iust. quæst. 7. a. 2. ad 2. *Vt lex pristina antiquetur, consuetudo etiā illa, quæ illicitum habet ortum, potest, licet non apud eosdem homines, tamen apud posteros vim obtinere.* Idemque tradidit Abb. in c. 1. num. 4. de treuga & pace, Syl. ver. consuetudo, q. 7. & esse hanc communem sententiam testatur Rochus l. c.

**II. QVÆSTIO QVINTA.** Vtrum sint aliquæ leges humanæ, præsertim ecclesiasticæ, quæ contraria consuetudine tolli non possunt Respondeo cum Nauar. libro 1. consil. 1. numero 3. de maior. edit. 2. Suarez lib. 3. de legib. c. 19. n. 27. Nullā exceptionem hîc admittendā esse: sed regulam illam sumptam ex c. ult. de consuetudine, vniuersim veram esse: Si consuetudo rationabilis sit, & legitimè præscripta, aduersus quodcunque ius positium præuallere. Ex quo inferitur primò, Consuetudinem etiam in sacramentalibus, & alijs ad sacramentorum substantiam non pertinentibus, contra ius commune introduci posse, si in sacris canonibus reprobata non reperiatur, v.g. vt secundæ nuptiæ benedicantur, sicuti contra Gloss. & Abb. in c. vir autem, de secundis nuptijs, probabiliter docet Rochus cit. c. ult. sect. 4. num. 27. Couar. in epit. 4. p. 2. c. 6. §. 10. num. 35. Suarez num. 26. Sanch. l. 7. de matrim. disp. 82. n. 20. Nau. c. 22. man. n. 83. qui id probant tum ex c. de trina. d. 4. d. consecr. quod est Gregor. I. lib. 1. Ep. 41. ad Leandrū Episc. vbi habetur: Nihil referre, seu vna, seu trina merione baptismus conferatur, pro cuiusque Ecclesiæ consuetudine: qui in vna fide nihil officii sanctæ Ecclesiæ consuetudo diuersa. tum ex c. 2. de tempor. ordinationum, vbi dicitur, penitus improbandam esse consuetudinem illam, quæ in Scotia inualuerat, vt in dedicationibus Ecclesiarum, extra ieiunia 4. temporum Clerici ad sacros ordines pro-

mouerentur: quia tamen consuetudo eius regionis antiqua erat; neque ordinantes, neque ordinatos alicui censuræ obnoxios esse oportere. Ex quo textu colligi videtur, licet valde decens sit, vt in Sacramentorum administratione vniuersalis Ecclesiæ canones ac ritus vniiformiter seruentur: ideoque omnino deceat Ecclesiæ pastores particulares à sacris canonibus abhorrentes ritus improbare, ac tollere: dum tamen à Prælati, & ipso summo Pontifice tolerantur: (sicuti Orientalium præcipuè Ecclesiarum peculiare ritus ad Sacramentorum substantiā non pertinentes tolerari solent) non esse aliqua culpa damnandos, qui antiquæ & nondum improbatæ consuetudini se conformant.

Inferitur secundò: Leges item, quæ pœnas, v. g. censuras Ecclesiasticas, etiam latæ sententiæ, annexas habent consuetudine abrogari posse: idque vel simpliciter: vel secundum quid, quatenus nimirum pœnales, manente interim obligatione quoad culpam, sicuti docet Abb. in c. 1. de treuga & pace, Gl. in c. den. que. d. 4. Nau. commet. 3. de Regular. num. 52. Suarez cit. cap. 19. num. 1. qui rectè notat num. 11. è contratio etiam fieri posse, vt obligatione legis quoad culpam per desuetudinem abrogata, maneat tamen obligatio ad pœnam; ideoque ex lege mixta fiat purè pœnalis; *Etsi fortasse, inquit, multa leges civiles imponentes exactiones, vel prohibentes venari, ligna scindere, vel aliquid ex regno extrahere, licet in principio directiue fuerint, potuerunt vsu fieri merè pœnales, & quasi naturam mutare: quia non aliter sunt obseruata.* Excipi tamen debent pœnæ illæ, quæ suapte natura culpam supponunt: ab eaque inseparabiles sunt: v. g. censura Ecclesiastica, quia propter inobedientiam & contumaciam infligi debent.

Tertio inferitur: Etiam legem infirmantem, puta quæ formam seu solemnitatem substantialem actibus præscribit, vel certas personas ad contrahendum, eligendum, & c. incapaces reddit per consuetudinem abrogari posse. Quæ est sententia Gl. in c. frustra, d. 8. ver. consuetudine m. Inn. c. 1. de cognat. spiritali, Suar. cit. c. 19. n. 14. Ioannes Salas cit. disp. 19. l. 10. Sanch. lib. 7. de matrim. disp. 4. q. 2. Agid. 13. Coninck in 3. p. t. 2. disp. 30. dub. 1. concl. c. Qui speciatim loquuntur de canonicis impedimentis matrimoni, s. eaper diuturnam consuetudinem tolli posse, quamuis multi contrarium sentiant; ex quibus Abb. in c. quod super, de consang. & affinit. Couar. in 4. p. 2. cap. 6. §. 10. num. 35. & alij apud Sanch. numero 13. qui præcipuè mouentur responso Innoc. III. in cit. c. quod super, ibi. *Ne in fragi adus prohibitos matrimonium contrahatur, debes publice inhibere, & præsumptores Ecclesiastica distinctione punire, non obstante consuetudine, quæ dicenda est potius corruptela.* Ad id respondet Sanchez num. 15. Etsi Pontifex reprobauit consuetudinē, non tamen prohibuisse, quin ex iusta superueniente causa de nouo introduceretur. Sed hæc responsio difficultatem habet: Si enim consuetudo aliqua tanquam irrationabilis iure damnata sit, præsumptio semper est contra illam: nisi ostendatur, quod propter mutationem rerum consuetudinis conditio mutata fuerit, sicuti bene notat Suar. n. 24. & videri etiam potest Rochus l. 7. num. 24. Id verò in canonicis matrimonii impedimentis difficilè ostendi poterit, si, vt ponimus, ea communiter in Ecclesia obseruentur: non item in vna aliqua regione aut Prouincia: quia vix afferri poterit grauis aliqua obseruandi difficultas, quæ non similiter etiam in alijs locis habeat locum: qua tamen non obstante, expedit magis legem vniiformiter in Ecclesia obseruari. Quare magis mihi placet responsio Agid. cit. concl. 4. num. 14. Consuetudinem illam non fuisse generalem & antiquam, sed aliquorum tantum, qui eam contra canones introducere præsumebant, vt in tertio etiam gradu coniungerentur: quare meritò talis consuetudo, tanquam canonum corruptela, ab Episcopo inhibenda erat.

Controuersia etiam est; Vtrum aliquando nouum impedimentum dirimens matrimonij diuturna con-



consuetudine diocesis introduci possit? Ita affirmant Abb. & & plures alij in c. 1. & c. super eo, consang. & affinit. & alij apud Sanchez cit. disp. 4. qu. 1. Mihi verò placet sententia Hostiensis in c. quod super, de cons. c. super eo, de cognat. spirituali, Rosellæ ver. impedimentum. 1. n. 7. Syl. ver. matrim. 2. q. 3. Non posse introduci, nisi sciente ac tacite consentiente Papa. Ratio est; *Quia consuetudo non acquiritur vim legis, nisi ex voluntate potentis in ea legem condere, qui in proposito est solus Papa* ait Syl. 1. c. in fine: Siquidem matrimonij impedimenta, & dispensationes in eisdem summus Pontifex sibi reservauit, sicuti dicam l. 5. tr. ult. p. 4. c. 1. Adc. 1. & c. super eo, de cognat. spirit. quibus absolute probari videtur, per consuetudinem, (concurrente scandalo nisi ea obsetur) introduci posse impedimentum dirimens matrimonij; duobus modis respondetur: I. Casum illum esse specialem de duorum compatrium liberis matrimonio iungendis, qua de re diuersi canones antiqui habentur. Prior est Pascalis II. causa 30. quæst. 3. ubi definitur, coniungi non posse, si post compaternitatem nati fuerunt. Posterior est Urbani in c. super quibusdam, ead. quæst. qui priorem canonem corrigens ait, tales coniungi posse. Quamobrem rectè respondit Alexander III. in cit. tit. de cognat. spirit. posteriorem Urbani constitutionem seruandam esse, nisi diocesis alicuius consuetudo, quæ sine scandalo tolli non possit, nondum recepta ibi consuetudine Urbani, antiquam constitutionem seruet II. Vniuersim dici potest de matrimonio impedimentis, si eorum aliquod consuetudine, præsertim immemoriali, introductum sit, & sine scandalo tolli non possit, obseruandum esse: quia in tali casu Sū. Pontifex non resistit consuetudini, sed obseruandam permittit, secundum communem DD. interpretationem. Alioquin verò valde expedit, vt impedimenta matrimonij in tota Ecclesia vniuersim seruentur. ideoque consuetudines speciales contrariæ nullo modo introduci debent, aut postquam introductæ sunt, tollere eas oportet, modò sine scandalo id fieri possit, vt dixi.

**QVÆSTIO SEXTA.** Quomodo consuetudo cæpta, & nondum consummata interrumpatur? Respondeo ex communi doctrina: Tam ea consuetudo, quæ præter legem tendit ad statuendum ius: quàm ea, quæ contra legem tendit ad ipsam abolendam, vno actu contrario interrumpitur. Illa quidem propterea quòd Princeps, vel populus legem condere potens, aperte significet, non habere se voluntatem consuetudinem instar legis introducendi, quando contra eam operatur. Hæc autem ideo interrumpitur, quia vniuersim ad præscriptionem, præter bonam fidem, etiam temporis longitudo requiritur: quare si ante tempus legitimum, puta annos decem, vel quadraginta completos, legislator civilis, vel Ecclesiasticus transgressores puniat, vel in tribunali suo pro lege contra consuetudinem iudicet, præscriptio interrumpitur: quare de nouo postea inchoari debet, vt legem temporis progressu vincere possit. Quòd si verò, elapso tempore legitimo consuetudo completa sit, non tolleretur vno actu contrario, sed vel Principis lege consuetudinis abrogatoria, vel contraria noua consuetudine, cum temporis diuturnitate, &c. Hoc adde, vt lex contraria consuetudi-

ne tollatur, non sufficere merum eius non vsum, & legem ideo non seruari, quia casus siue occasio seruandi non incidit: v.g. si centum annis hermaphroditus nullus natus sit: & ob id populus civili constitutione l. quæritur, ff. de statu hominum, (quòd secundum sexum prævalentem mas vel fæmina existimandus sit) nunquam vsum fuerit: non ideo lex Cæsarea abolita censi debet: sed requiritur casum legis aliquoties accidisse, & contra legem publicè factitatum fuisse: qui dicitur non vsum legis contrarius: prior verò negatiuus, sicuti bene explicat Abb. in capite Ioannes, numero 9. de Clericis coniug. Syl. ver. consuetudo. q. 8.

**QVÆSTIO SEPTIMA.** Quodnam discrimen sit inter consuetudinem, & præscriptionem? Hanc quæstionem tractant Gl. & Abb. n. 20. Rochus q. 5. n. 3. ca. ult. de consuet. Aym. Crauetta de antiq. temporum, p. 4. in prin. Syl. ver. cons. q. ult. Balbus præscript. p. 1. q. 10. Suar. cit. l. 7. c. 1. n. 10. Ergo puto distinguendum esse inter consuetudinem, quæ est præter legem, & eam, quæ est contra legem. Nam illa, quæ est præter legem, nihil re ipsa commune habet cum præscriptione, seu vsucapione, sed sola conuenire videntur vocis communionem: quia vtraque est acquisitiua iuris, sed secundum significationem diuersam. Nam diuturna consuetudine per tacitum populi consensum, introducitur ius quatenus idem est quod lex: at verò præscriptione, seu vsucapione acquiritur ius, quatenus idem est quod dominium aut alia facultas vtendi, agendi, &c. Altera autem consuetudo, quæ est abrogatiua legis, videtur esse propriè dicta species præscriptionis generatim acceptæ: est enim acquisitiua iuris, videlicet immunitatis ac libertatis à lege: requirit etiam temporis legitimi decursum: item bonam fidem, & quandoque titulum præsumptum, si lex alioquin consuetudinis introductioni resistat.

Duo tamen hic aduertenda duxi: Primum est, Præscriptionis nomen à Doctoribus interdum generatim accipitur: quomodo comprehendit etiam populi consuetudinem abrogatoriæ legis, per temporis diuturnitatem, & bonam fidem, sicuti supra dixi, & colligitur aperte ex c. ult. de consuetudine. Interdum verò strictius accipitur, vt non comprehendat specialem illam præscriptionem communitatis aduersus legem communem: (propterea quòd eiusmodi præscriptio peculiare nomen habere soleat *consuetudinis legitime præscriptæ*) comprehendat verò cæteras omnes bonæ fidei vsucapiones, quæ vel sunt particularium personarum ad acquirendum sibi ius aliquod: vel etiam communitatis, quatenus ea in acquirendis iuribus, v.g. alicuius rei dominio, quasi particularis personæ vicem subit.

Alterum, Interdum accidere solet, vt duplex præscriptio simul concurrat: v.g. Communitas laicorum, à tempore immemoriali, non exigentibus Clericis decimas, cū bona fide præscripserunt ius immunitatis, duplex hinc cernitur præscriptio: Vna, per quam excluditur obligatio legis vniuersalis canonice de decimis realibus ac personalibus præstandis: altera, per quam excluditur ius & actio clericorum, quæ ipsis ex eadem illa lege, sine canone aduersus laicos competit.



## TRACTATUS QUINTVS.

DE

## ECCLESIASTICIS CENSURIS, ET IRREGVLARITATE.

**S** VBI CIO hunc tractatum, partim quia affinitatem habet cum materia de legibus: partim quia in sequentibus sæpe de censuris merito facienda erit, ideoque earum explicatio præmittenda videtur. Diuido autem tractatum in quinque partes: in prima agitur de Censuris in communi. In secunda, de præcipua specie censuræ, quæ est Excommunicatio. In tertia de Suspensione, & Depositione. In quarta de Interdicto & Cessatione à diuinis. In quinta de Irregularitatibus.

## PARS PRIMA.

## DE CENSURIS IN COMMUNI.

## CAPVT I.

## QVID SIT CENSURA ECCLESIASTICA.

## SUMMARIUM.

- Censura est pœna merè Ecclesiastica, ac spiritualis.*  
*Bona spiritualia quædam sunt propria, quibus nemo inuitus spoliari potest: quædam verò sunt communia, quibus homo in pœnam priuari potest, quoad vsum tantum.*  
*Censura est pœna medicinalis: quare per absolutionem tolli debet, cum primum peccator emendatus est.*  
*Nunquam fertur censura propriè dicta propter peccatum merè præteritum.*



ENSURA Romanis significabat sententiam Censoris mores corrigentis, aut pœnam decernentis. Hinc censuræ vox ab Ecclesiasticis scriptoribus translata est ad significandam spirituales pœnam, quam Ecclesiæ Prælati contumacibus

infigunt.

- Definitur: Pœna spiritualis, per quam homini baptizato delinquenti, ac contumaci per Ecclesiasticam potestatem quorundam spiritualium bonorum usus aufertur, donec à contumacia recedat. Ita ferme Suarez de Censuris disp. 1. c. 1. Salsus l. 1. c. 1. Auila p. 1. dub. 4.*

Hæc definitio partim ex capitibus sequentibus intelligitur; partim verò hinc explicanda est: cur videlicet dicatur, pœna spiritualis, priuans usum spiritualium bonorum. Pro cuius intellectu nota primò, Censuram esse pœnam merè Ecclesiasticam, siue quam solus Ecclesiasticus Magistratus infligere potest: quia per se primò ac principaliter versari debet circa rem spirituales, vel potius priuationem rei spiritualis: circa res verò temporales secundariò & quatenus referuntur ad spiritualia. Siquidem pœnas absolute temporales, ut carcerem, exilium, multam pecuniariam, &c. etiam secularis potestates infligere possunt. Ita notauit Egid. Coninck. 3. p. 1. 2. disp. 13. dub. 1. c. 2. Auila cit. dub. 4.

Nota secundò; Bona spiritualia quædam sunt propria, seu priuata: ut dona gratiæ, Fides, Spes, Charitas, aliæque virtutes, earumque bona opera, tum secundum vim merendi, tum etiam impetrandi, & satisfaciendi; iuxta propriam operantis intentionem vel applicationem. Cuiusmodi bonis spiritualibus Ecclesiæ neminem spoliare, eorumque usum interdiceret potest. Alia porrò bona spiritualia sunt publica seu communia cuiusmodi sunt publica Ecclesiæ suffragia, & satisfactiones: itè spiritualis iurisdictio, Sacrificiū & Sacramenta: Ecclesiastica beneficia: quorum omnium dispensatio Ecclesiæ commissa est, ut proinde eorum usum actiuum & passiuum alicui ob culpam & contumaciam, interdiceret possit. Namque omnis bene constituta Respubl. potestatem habet subditos suos ob culpam eorum, priuandi bonis communibus, Ecclesiæ autem est spiritualis à Christo optimè constituta Respubl. Ergo potestatem habet subditos suos ita meritis priuandi bonis iis spiritualibus, quæ diximus esse publica, eiusque dispensationis commissa.

Nota tertio: Communibus spiritualibus bonis, v. g. spirituali officio, aut beneficio duobus modis aliquem priuari posse. Primò, quoad vsum tantum: & hoc propriè est censura, sicuti ex definitione constat. Secundò, quoad ipsam quoque facultatem, seu potestatem: quod præstant irregularitas, depositio, degradatio, cessatio à diuinis: quæ propriè censuræ non sunt, sicuti DD. communiter docent contra Sotum in 4. d. 22. qu. 3. ar. 1. Nam censura debet esse pœna medicinalis, cap. 1. de sententia excom in 6. c. ex literis, de const. ideoque infligi per modum vinculi facilè solubilis, cum primum reus à contumacia recesserit: quapropter ipsam spirituales potestatem siue ius radicale non aufert: sed tantum ligat, seu vsum & exercitium impedit. Secus est in irregularitate, depositione, degradatione: quæ ipsam potestatem spirituales quatenus id fieri potest, homini simpliciter & sine spe ordinariæ recuperationis adimunt.

Ex quo alia rursus discrimina emergunt: I. Censuræ propriè dictæ tolli debent per absolutionem Rei, quamprimum is emendatus est: quia per eas non tam incenditur punitio siue vindicta peccati, quam emendatio peccantis: quapropter non faciliè ad censuram deueniunt.



dum est, quæ peccatori profutura non putatur; nisi bonum publicum manifestò exigat: tunc enim per accidens censeri debet, si censura, quæ suapte natura & institutionis medicinalis est, ei, cui adhibetur, ob indispositionem suam minus utilis, & fortasse noxia futura est, quæ de re Couar. c. alma mater, p. 1. initio, num. 12. At verò irregularitas, depositio, &c. tolli debent per dispensationem seu relaxationem legis, aut sententiæ: quippe quæ simpliciter, & irrevocabiler lata est.

II. Depositio, & degradatio: cum sit pura pœna, ferri potest ob peccatum merè præteritum, imò etiam emendatum. At verò censura propriè dicta, cum sit potius medicina, non decernitur ob peccatum merè præteritum; sed quod tractum successuum habet, & in quo peccator adhuc contumaciter persistit.

III. Depositio, degradatio, & cessatio à divinis non incurruntur ante Iudicis sententiam: quia sunt pœnæ gravissimæ, & quæ non statim auferuntur, tamen si delinquens emendatus sit. Censuræ verò propriè dictæ, ipso interdum iure contrahuntur ob delictum, ante omnem Iudicis declarationem: quod meritò ita ab Ecclesia statutum est, quia sunt pœnæ medicinales, & plerumque occultæ, à quibus facilis absolutio post emendationem conceditur. Ita notavit Caiet. ver. pœna statutorum, Auila p. 1. dub. 7. prope finem, Sa ver. pœna, n. 1. Vide in præcedenti tractatu c. 18. num. 5. ubi idem dixi de irregularitate, eam ante Iudicis sententiā ipso facto incurrere ob reuerentiam Sacramenti: quandoquidem irregularitas non tam pœna est, quàm inhabilitas quædam ad sacrum altaris ministerium.

## CAP. II.

## Quotuplex sit censura.

## S V M M A R I V M.

1. Tantum tres sunt censurae; Excommunicatio, Suspendio, Interdictum.  
Concessa alicui facultas absolventi à censuris, non extenditur ad irregularitates, quæ per dispensationem tolluntur.
2. Censura alia est à iure lata, & alia ab homine: inter quas discrimen est, quod hac extinguitur morte, aut depositione ferentis, illa non item.  
Censura ab homine aut fertur per sententiam generalem: aut per specialem in certam personam.
3. Censura alia est lata sententia à iure, vel ab homine: alia est sententia ferenda per Iudicem.

**S**OTUS in 4. d. 22. quæst. 3. a. 1. In princip. quinque censuras munerat Excommunicationem, suspensionem, interdictum, cessationem à divinis & irregularitatem, quæ ob culpam contrahitur, & idcirco pœnæ rationem habere videtur. Aliqui verò etiam depositionem ac degradationem annumerant; idcircoque septem censuras colligunt. Sed communis & vera sententia est, quam docent Doctores in 4. d. 18. Sylvest. verb. interdictum, 1. num. 3. Nauar. c. 27. num. 1. 151. 88. & 194. Suarez disput. 1. sect. 3. Auila p. 1. dub. 5. Eg. d. cit. disput. 13. dub. 1. tantum tres esse species censuræ: Excommunicationem, Suspensionem, Interdictum. Colligitur ex dictis cap. præced. & confirmatur primò: Quia in iure canonico, cum de censuris mentio fit in c. 1. c. statutum. his qui, de sent. excom. in 6. tantum tres illæ species nominantur. Quare Innoc. III. in c. quærenti, de signis verborum: *Quærenti, quid per censuram Ecclesiasticam debet intelligi, cum eiusmodi clausulam in lueris nostris apponimus: respondemus, quod per eam non solum interdictum: sed & suspensionis, & excommunicationis sententia valeat intelligi.* Secundò: Quia concessa alicui potestas absolventi à censuris non extenditur ad irregularitates, &c. quippe quæ non per absolutionem, sed per dispensationem tolli debent, sicut ex communi stylo cu-

ria annotavit Nau. num. 254. Tertio: Qui violando censuram celebrat, aut sacramenta ministrat, incurrit irregularitatem: qui verò cessationem à divinis transgreditur non fit irregularis, teste Syl. ver. cessatio à divinis, q. 5. Nauar. cit. num. 188. Neque etiam irregularis celebrans novam irregularitatem incurrit, sicuti notavit idem Nau. num. 193. Auila cit. dub. 5. Ergo irregularitas & cessatio à divinis non sunt censure.

Porro, vnaquæque ex dictis censuræ speciebus diuidi solet, quòd alia sit à iure, videlicet quæ lege seu statuto lata est, contra omnes subditos, qui tale crimen commiserint. Alia verò est censura ab homine, quæ per Iudicis sententiā infligitur. Inter quas hoc præcipuum discriminè est, quòd censura lata per sententiā vim suam amittit post mortem vel depositionem ferentis: ut nemo eam deinceps incurrere possit: quamvis si ante incurrerat, et ligatus maneat, donec absoluat. Ex quo colligitur, si Iudex sententiā excommunicationis in aliquem ferat sub conditione, nisi intra mensem restituerit: & nondum elapso mense Iudex moriatur, non contrahi excommunicationem, sicuti rectè docet Gloss. c. à nobis 1. de sent. excommunicat. Abb. c. cum ad hoc, num. 9. de cler. non resident. Vgolinus de censur. tab. 1. c. 2. §. 2. num. 3. At verò censura iuris seu statuti perpetuò durat, sicuti & ipsum statutum, donec reuocetur.

Censura, quæ ab homine est, subdividitur in eam, quæ alicui ob contumaciam nominatim infligitur: & in eam, quæ per generalem sententiā fertur, v. g. *Si quis tale facinus commiserit, si rem ablatam non restituerit, excommunicatus esto.* Sed adverte hinc, quòd v. g. excommunicatio per sententiā generalem interdum fertur ex causa generali & indeterminata, v. g. *Qui sursum sacrilegum commiserit, excommunicatus esto.* Interdum autem fertur talis excommunicatio ex causa, seu facto particulari: v. g. *Qui orio nuper incendio quippiam abstulit, & intra triiduum non restituerit: Vel qui talem incendiarium, aut civitatis proditorem sciens, non indicaverit: is excommunicatus esto.* Inter quos excommunicandi modos hoc discrimen est: quòd prior ille magis ad naturam statuti accedit: quare valde probabilis est sententia Eg. d. cit. disput. 13. dub. 7. conclus. 4. eiusmodi sententia generali non tantum obligari eos, qui tempore promulgationis subditi sunt: sed etiam eos, qui postea subditi fiunt: propterea quòd ita generatim lata pertinere videatur ad omnes quocunque tempore inhabitatores: atque in eo tantum differre a lege, siue statuto propriè dicto, quòd talis sententia, quamvis generatim lata pro futuro delicto, morte latoris expiret: statutum verò siue lex permaneat, donec reuocetur: quam differentiam notavit Abb. in cap. irrefragabili, §. ceterum, n. 2. de offic. Ordin. Verum hinc immorari non oportet: quia talis excommunicandi modus pro delicto futuro, sine causa vel delicto impræsentiarum existente, vltatus non est, imò prohibitus in cap. Romani, §. caveant, de sentent. excommunicat. in 6. interprete Abb. in cap. à nobis, 1. num. 8. de sentent. excommunicat. Vgolin. tab. 1. c. 5. §. 5. num. 3. Couarru. cap. alma, p. 1. §. 10. num. 1. At verò excommunicatio, lata per Iudicis sententiā posteriore modo, magis accedit ad naturam præcepti: cuius ea vis est ut statim operetur & afficiat personas, ad quas impræsentiarum fertur, non autem transeat ad personas, quæ postea iurisdictioni subiiciuntur, sicut docet Abb. c. à nobis, 1. de sentent. excommunicat. num. 7. Vgolinus tab. 1. c. 9. §. 2. num. Couarru. loc. cit. num. 3. Sylvest. verb. excommunicatio, 2. num. 10. Auila de censuris p. 2. cap. 3. disput. 2. dub. 3. conclus. 3. Eg. d. l. c. conclus. 5. Suar. disp. 5. de censuris, c. 5. num. 10.

Secundò diuiditur censura quælibet in eam, quæ est lata sententia; & in eam, quæ est sententia ferenda, uti aperte de excommunicatione loquens, significat Gregorius I. lib. 2. dialog. c. 23. Censura lata sententiæ dicitur, quam Reus, sine alia Iudicis sententia, ipso facto vel criminis admif-



admissione incurrit: quare dicitur in cap. pastoralis, §. verum, de appellat. quod excommunicatio lata sententia executionem secum trahit. Censura sententia ferenda dicitur, quae non ipso facto seu delicto; sed sicuti aliae poenae, per Iudicis sententiam infligi debent.

Ceterum quibus loquendi formulis significari solet censura sententia lata; & quibus sententia ferenda, passim apud Doctores reperies, Sylvest. verb. excommunicatio, i. num. 22. Auilam p. 2. c. 2. disput. vn. Castrum lib. 2. de lege poenali, c. 1. & 6. Aegid. disput. 13. dub. 2. Censuram lata sententia iudicant eiusmodi verba, Excommunicamus, anathematizamus, suspendimus: Qui hoc fecerit, sciat se excommunicatum, suspensum, &c. excommunicationis subiaceat, prohibemus sub excommunicatione, suspensione ipso iure ipso facto incurrenda. Excommunicatio autem sententia ferenda eiusmodi verbis significatur: Qui hoc fecerit, excommunicetur, ab officio suspendatur: Prohibemus sub interminatione excommunicationis, sub poena suspensionis, &c. Quod si verba ambigua videantur, potius iudicari debet censura sententia ferenda, quam lata; iuxta iuris regulam 49. in 6. In poenis benignior facienda est interpretatio. Eiusmodi dubia verba censet Nauar. c. 27. num. 12. Sanch. lib. 7. de matrim. disput. 12. num. 2. esse ista, excommunicatus sit, anathema sit, ideoque explicanda esse, quasi praecipitur Iudici, ut ab ipso criminolus excommunicatus fiat; nisi istud dubium resoluitur ex alijs iuribus excommunicationem sententia lata expressè decernentibus. Qua ratione respondet Sanchez lib. 2. moral. c. 38. num. 91. Dipinatores, ac veneficos, eorumque consultores non esse ipso iure excommunicatos; sed excommunicando, iuxta c. non oportet, c. aliquanti, 26. quæst. 5. Non obitante, quod in c. 1. ead. q. dicatur; Si quis ariolos, aruspices, aut incantatores obseruauerit, anathema sit.

## CAP. III.

## Quis censuram ferre possit?

## SUMMARIUM.

1. Omnis & solus Prælatus Ecclesiasticus censuras ferre potest in subditos: quam facultatem alteri Clerico delegare non prohibetur.
2. Laicis, & clericis coniugatis, dum in coniugio viuunt: itemque bigamis committi non potest facultas ferendi censuras: nisi ex plenitudine potestatis Papalis.
3. Femina, quamuis sanctimonialis sint, & abbatissa censuras propriè ferre non possunt. Non videtur tamen femina huius potestatis omnino incapax ex iure Diuino, sed solam Ecclesiasticam.
4. Abbatissa licet spirituales iurisdictionem propriè non habeat: usus tamen cuiusdam iurisdictionis ei committi potest.

1. **A**SSERTIO I. Omnis & solus Prælatus Ecclesiasticus, id est, Clericus in foro externo iurisdictionem obtinens, ordinario iure censuram ferre potest in subditos sibi contumaces. Sumitur ex c. ab Ecclesiis, de offic. Ordinarij, & docet S. Thom. in 4. d. 18. quæst. 2. a. 2. q. 2. Richar. ibid. 2. 4. q. 1. Palud. q. 2. art. 2. Abb. in c. sacerdos, de offic. Ordinarij, num. 10. aliique communiter. Nam potestas Ecclesiastica fori externi ordinatur ad Christianam disciplinam seruandam per leges, præcepta, sententias; hæc autem potestas infirma & inermis foret, nisi contumaces propositis poenis ac censuris coercere, & ad obedientiam compellere posset.
2. **A**SSERTIO II. Qui ordinariam potestatem habet censuras ferendi, eam cuius Clerico clericalibus priuilegijs gaudenti committere seu delegare potest. Sumitur ex c. præterea, de officio delegati, & ex communi docet Couar. c. alma, p. 1. §. 11. ti. num. 1. Suar. de censuris disp. 2. sect. 3.

**A**SSERTIO III. A potestate tum ordinaria, tum delegata censuras ferendi excluduntur laici: Nam laici Ecclesi-

astica negotia tractare non debent, c. decernimus, de iudicijs, c. indicatum, d. 89. Censura autem ad Ecclesiasticam & spirituales clauium potestatem pertinent. Quare rectè notauit Palud. in 4. d. 19. quæst. 2. a. 1. Quod Episcopus, vel Ordinis Prælatus non possit committere laico religioso potestatem absolendi ab excommunicatione minore; possit tamen committere Clerico nouitio.

Secundò excluditur Clericus coniugatus: quia neque hic ad Ecclesiastica negotia admitti debet; præterquam si vnicam, eamque virginem duxit, ab eaque se separauit, edito vtrique castitatis voto, iuxta cap. sanè, i. iunct. Gloss. de Clericis coniugatis. Porro, tamen Clerici qui cum uicis & virginibus contraxerunt, si cum vxoribus in coniugio permanentes, alicui Ecclesiæ seruiant, atque habitum & tonsuram clericalem deferant, priuilegio tum Canonis, tum fori Ecclesiastici gaudere debeant, c. vn. de Clericis coniugatis, in 6. iuncta Tridentin. sess. 23. cap. 6. de reform. attamen ad beneficia, sacros ordines, & administrationes Ecclesiasticas admitti non debent, sicuti habetur in cit. cap. sanè, i. de Clericis coniugatis. Quare neq; Ecclesiasticæ iurisdictionis capaces sunt sicut docet Gloss. cōmuniter recepta in cit. c. vn. Abb. in cit. c. sanè. Couarruu. c. alma, p. 1. §. 11. num. 3. Auila p. 1. dub. 6. Suarez disput. 2. sect. 3. num. 11. Aegid. dub. 4. num. 32. ubi notant cum Palud. in cit. quæst. 2. a. 1. Quod Episcopus nec coniugatum, nec bigamum, tamen quatuor minores ordines habeat, Officiale vel Vicarium suum constituit. Quia vniuersalis Ecclesiæ canones & consuetudines Episcopus mutare nequit; sed solus Papa ex plenitudine potestatis.

Tertio excluduntur feminae omnes, etiam Abbatissæ, arg. c. de monialib. de sent. excommun. iunct. Gloss. &c. noua, de poenit. & remiss. & expressè in c. dilecta, de maiestate & obedientia, ubi dicitur: quod Abbatissa moniales & clericos suæ iurisdictioni subiectos excommunicare non possit: sed Prælatus Ordinis, vel Episcopus. Neque refert, quod ibidem significatur, ad Abbatissam pertinere dictas personas propter inobedientias & culpas officio, beneficioque suspendere. Rectè enim respondet Abb. ibidem num. 5. Sylvest. verb. Abbatissa num. 6. Auila p. 1. dub. 6. Suar. cit. sect. 3. num. 6. Nomen suspensionis eo loco non accipi pro censura Ecclesiastica, cuius violator irregularitatem incurrit: sed latè & improprie pro præcepto siue sententia, per quam Abbatissa Clerico, v. g. iurisdictioni suæ per accidens subiecto, ratione alicuius capellæ, ad ipsam pleno iure ex priuilegio aut præscriptione pertinentis, prohibet celebrationem Missarum, donec satisfecerit: atque interea eidem redditus subtrahit.

Controuersia autem est inter Doctores: Vtrum mulier iure diuino incapax sit huius potestatis censuram ferendi: ideoque neq; summus Pontifex talem ipsi facultatem committere possit? An verò mulier, perinde ac masculus laicus, aut bigamus, iure tantum Ecclesiastico (in quo Papa ex suæ potestatis plenitudine dispensare potest) ab eiusmodi spirituali iurisdictione arceatur? Priorem partem tenet Auila cit. dub. 6. Aegid. cit. dub. 4. & alij apud Palud. cit. quæst. 2. a. 1. Quia excommunicatio, & alia censura pertinent ad potestatem clauium: hæc autè à Christo solis Apostolis data est, iisq; quia iqua ratione Apostolis succedunt: cuiusmodi non possunt esse feminae. Cōfirmatur ex c. noua, de poenit. & remiss. ubi Innoc. III. notauit, *Licet beatissima Virgo Maria dignior & excelior fuerit Apostolis vniuersis non tamen illi, si d' istis omnibus Dominus clauis regni celorum commisit.* Quare ibidè prohibet, ne Abbatissæ suas moniales benedicere, Euangelij legere, aut prædicare præsumant, conuenienter Apostolo 1. ad Cor. 14. *Mulieres in Ecclesia taceant.* Quod cum non pugnat, quin mulieres sanctimoniales priuatim suas exhortari, & tanquam filiabus benedicere: item in matutinis suis Euangelium legere possint, sicuti notauit Syl. ver. Abbatissa,



4 Alteram quæstionis partem tenet Palud. cit. a. 1. Nau. lib. 5. consil. 1. de sent. excom. edit. 1. Suarez disp. 2. de censur. l. 3. num. 7. in eandemque inclinatur Sotus in 4. d. 20. q. 1. art. 4. circa quartum argum. Et mihi quoque non displicet. quia negari non potest, mulieribus, puta Abbatissis committi solitum usum aliquem spiritualis iurisdictionis, sicuti expressè docet S. Thom. in 4. d. 19. q. 1. a. 1. q. 3. ad 4. *Mulier nec ordinis, nec iurisdictionis clauem habet committitur autem ei aliquis clauis usus.* Et d. 25. q. 2. a. 1. q. 1. ad 2. *Abbatissa non habent Prælationem ordinariam: sed quasi ex commissione propter periculum cohabitationis virorum.* Quare licet Abbatissa per se ac directè non nisi temporalem potestatem habeant Moniales gubernandi, ac præcipiendi, ea quæ ad bonam Monasterij quietem pertinent, videl. vt regulæ Ordinis seruentur: quo modo etiam paterfamilias quæ iusta ac debita sunt domesticis præcipere potest. Nimilominus sum Pontifex, imo etiam Prouincialis Ordinis, aut Episcopus, sub cuius obedientia viuunt, aliquem usum iurisdictionis, saltem indirectè committere potest Abbatissa: Vt si Prouincialis cum Moniali dispense in lege ieiunij sub conditione relata in arbitrium Abbatissæ, quoties ipsi visum fuerit causam non ieiunandi adesse: vel si Monialibus præceptum imponatur obediendi Abbatissæ, præcipienti aliquid in tali causa, ad spirituales finem pertinente. Qua de re Sotus in 4. d. 20. q. 1. a. 4. Rodriq. tom. 1. regul. q. 12. a. 2. & q. 15. a. 1. Sanchez 6. Moral. c. 1. num. 17. Accedit, quod Abbatissæ non quidem iure ordinario, sed ex Apostolicæ Sedis priuilegio, cum Capituli sui consensu conferre possint beneficia, & instituere clericos in Ecclesijs ad Monasterium suum pertinentibus, dando illis possessionem, ac titulum: non item iurisdictionem ad ligandum & soluendum: quia nemo dat, quod non habet, sicuti post Abb. in cit. c. dilecta, num. 5. de maior. & Obed. docet Sylu. ver. Abbatissa, q. 2. Garcia de benefic. 1. p. cap. 2. num. 33. & p. 5. c. 1. num. 622. Victoria relect. 2. de potest. Ecclesiæ, q. 2. n. 5. in fine.

Ad fundamentum prioris sententiæ resp. cum S. Th. in 4. d. 18. q. 2. art. 2. q. 2. Abb. & Syl. ll. cc. Duplicem esse clauem; Ordinis & iurisdictionis. Illius incapax omnino est mulier secundum Christi institutionem: huius autem capax esse potest, saltem ex commissione, & quoad exercitium: sicuti & merè laicus capax est: cum tamen Apostolorum successor censeretur non debeat, quamdiu extra clerum constitutus est. Interim fatemur, neque Christum, neque Ecclesiam vnquam eiusmodi potestatem per cenuram homines ligandi mulieri concessisse: cum id neque expediens, neque decens sit. Idque solum probari potest ex supra cit. c. noua: non autem quod iuri diuino absolutè repugnet.

## CAP. IV.

## In quos Censura ferri possit?

## S V M M A R I V M.

- 1 Censura ligari potest homo baptizatus, doli capax, qui Superiorem Ecclesiasticum habet.
- 2 Mortuus proprie, ac directè excommunicari non potest.
- 3 Furiosus, qui ante furorē contumaciter peccauit, potest incurrere excommunicationem iuris: sed ab homine excommunicari non debet.
- 4 Summus Pontifex censuram nullam incurrere potest.
- 5 Peregrini non obligantur censuris locorum, generali sententia aut statuto decretis.
- 6 Subditus contra proprium statutum diæcesis suæ agens extra diæc. sin. vel in loco diæcesis exempto, non incurrit censuram.
- 7 Subditus extra diæcesin existens ligari potest censura per sententiam partem partem Prelati sui.
- 8 Cur Prelatus subditis suis extra territorium ins dicere non possit, causa est, ne alienam iurisdictionem inuadere censetur: quare hac causa cessante, puta si iudicarius processus necessarius non sit, nihil obstat iurisdictioni aliquam exerceri.

ASERTIO, Omnes & soli homines baptizati, viatores, rationis & doli capaces, qui in Ecclesia superiorem habent, censuris ligari possunt. Est communis, quam leges apud Nau. c. 27. num. 13. Suarez disp. 5. l. 1. Aegid. Coninck disp. 13. dub. 6. Prima pars, quod debeat esse homo baptizatus, seu fidem in Ecclesia professus: non Paganus, Iudæus, aut Catechumenus, probatur ex Apost. 1. ad Corinth. 5. *Quid enim mihi de ijs, qui foris sunt, iudicare & ex c. gaudeamus, de diuortijs. c. de Iudæis, d. 45. Verum Hæretici, Apostatae atque Schismatici, quia fide Christi in baptismo suscepta, Ecclesiæ associati fuerunt ab eadē recedentes, ac fugitiui, Ecclesiasticis pœnis ac censuris ad fidem vel obedientiam compelli possunt, sicuti praxis Ecclesiæ demonstrat, & significatur in cit. c. de Iudæis.*

2 Altera pars, quod debeat esse homo viator, seu interris existens, non mortuus, ex verbis Domini monstratur, ait Gratianus causa 24. q. 2. Matth. 16. *Quodcumque ligaueris super terram, &c. super terram, inquit, non sub terram, ostendens, quod viuentes, pro varietate suorum meritorum, solvere possumus, vel ligare, de mortuis autem sententiam ferre non possumus: Sed horum causa Dei iudicio reservanda est* inquit, Leo 1. ad Rusticum Episc. Narbonensem, l. pist. 90. aliàs 92. cap. 7. Et Gelasius Papa in Epistola ad Episcopos Dardaniæ: *De eo, qui in diuino iudicio est constitutus, nobis fac non est aliud decernere, præter id, in quo cum dies supremus inuenit.* Idemque docent DD. communiter, Couar. c. alma p. 1. §. 11. n. 8. Syl. ver. excommunicatio 1. §. 7. Castro lib. 2. de hæretic. punitione, c. 19. & 20. Aniea p. 2. c. 4. disp. vn. dub. 8. Suar. & Aegid. ll. cc. Ex quo colligitur, si homo nondum completo crimine, vel conditione, sub qua censura lata est, moriatur: licet, postea crimen vel conditio perficiatur: non incurri censuram à mortuo: v. g. si in aliquem excommunicatio lata sit, nisi intra mensem satisfecerit: ille autem ante elapsam mensem sine satisfaciendū proposito moriatur. Vel si aliquis mandatum dedit Tirio, vt clericum occideret: is autem post mortem mandantis mandatum executus est: neutro casu criminofus mortuus pro excommunicato haberi debet.

Neque his obstant testimonia congesta à Gratiano in c. vlt. 24. q. 2. ex V. Synodo Generali, quibus ostenditur hæreticos etiam post mortem anathematizari posse. Nam respondetur, anathema interdum accipi pro execratione, seu detestatione, sicuti colligitur ex Apost. ad Galat. 1. *Licet nos, aut Angelus de celo Euangelizet vobis, præter quam quod Euangelizamus vobis, anathema sit.* Quo sensu etiam ij, qui excommunicandi potestate præditi non sunt, dicere possunt, se hæreticos anathematizare: id est, tanquam impios & alienos ab Ecclesia, execrari. Interdum verò ab ijs, qui tali potestate præditi sunt, anathematizentur hæretici post mortem: id est, publicè declaratur, eos à fide & Ecclesiæ communione alienos decessisse: ideoque eorum nomina ex sacris diptychis (id est, albo defunctorum Episcoporum) auferri, & nullam in Sacrificijs illorum commemorationē fieri oportere, quæ de re vide Gl. Gregorianam super cit. c. vlt.

Denique potest aliquis post mortem excommunicari improprie ac indirectè: si, ita exigente eius crimine, in quo decessit, ad aliorum terrorem præcipiatur fidelibus, vt abstineant ab Ecclesiastica eius sepultura. publicis precibus, ac sacrificijs: quomodo intelligo, quod Nicephorus refert. lib. 4. histor. c. 34. de Innoc. I. Papa Arfacium pseudoepiscopum post eius mortem excommunicatē, in Epist. ad Arcadium Imperator. *Arfacium, quem pro magno Ioanne Chrysostomo in thronum Episcopalem introduxisti, etiam post obitum exanathematizamus, vnde cum omnibus, qui consilio cum eo communicarunt, Episcopi: cuius etiam nomē sacro Episcoporum albo non inscribatur.* Quia simili ratione, licet Ecclesia proprie ac directè nō possit absolvere eum, qui in excommunicatione, tamen editis pœnitentiæ signis, mortuus fuit: tamen alijs facultatem dare potest, vt illum in loco sacro sepeliant, publicas preces & sacrificia pro



pro ipso offerant. Quomodo explicari debet c. à nobis, 2. de sent. excommun. & docet Sotus d. 22. q. 2. a. 2. prope finem, Couar. cit. §. 11. n. 8.

3 Tertia pars, quod debeat esse *rationis deli capax*, ideòque infans, & furiosus excommunicari non possint; constat tum generali ratione; quia huiusmodi personæ legibus ac præceptis obligari nequeunt: tum etiam speciali, quia censura fertur propter delinquentis contumaciam, quæ in amentes & infantes haud cadit. Cæterum, si aliquis contumaciter capto, sed nondum consummato crimine, in furorem lapsus est, v. g. Titio in mandatis dederat, ut Clericum occideret; postea verò, durante furore, crimen à mandatario perficitur: tali casu etiam furiosus iuris excommunicationem incurrit, sicuti rectè notavit Suarez disp. 5. l. 1. n. 20. Quia etiam furiosi subiecti sunt Ecclesiæ; ab eaq; puniri possunt; si ob præcedentem contumaciam ita meruerunt. Ab homine tamen seu Iudice tales excommunicari non debent; præsertim si eorum amentia perpetua iudicetur: quin potius absolui eos convenit, si censuram aliquam contraxerunt. Cum enim censura, præsertim excommunicatio, pœna medicinalis sit; non debet ei infligi, qui medicinæ spiritualis incapax est.

Quarta pars, quod debeat esse *subditus* Ecclesiasticæ potestati, à qua censura emanat; constat ex eo, quod par in parem, aut superiorem non habeat imperium: neque potestatem cogendi, aut puniendi. Deinde, sicuti in ferente censuras requiritur dominium iurisdictionis in foro externo: ita in eo, ad quem fertur, requiritur subiectio: hæc enim duo correlata sunt, uti notavit Suarez disp. 5. l. 1. num. 26.

4 Corollarium I. summus Pontifex censura ligari non potest: Neque enim à seipso: quia nemo sibi ipsi præcipere, aut seipsum iudicare & condemnare potest: Non item ab alio: quia neminem in terris superiorem habet. Vide, quæ dixi tract. super. cap. 9.

5 Corollarium II. Si Episcopus, aliùsue Prælatus Papæ inferior generalem censuram ferat: v. g. Si quis tale crimen admiserit, excommunicatus esto: talis censura non extendit se ad aduenas, & peregrinos breui tempore ibi, non constituta habitatione, commorantes. Constat ex ijs, quæ dixi eod. tract. cap. 12. concl. 3. & traditur aperte in c. nobis 2. de sent. excommun. ubi quæsitum erat; *Utrum, si quis ita pronunciauerit: Quisquis furtum fecerit, excommunicatus sit: hæc generalis clausula ad ipsius excommunicatoris subditos referatur, an generaliter extendatur ad omnes, qui non sunt de iurisdictione illius?* Respondetur, quod hæc sententia non nisi subditi obligentur. Vide ibi Gl. marginalem ex Hostiens. Quamvis autem Abb. in cit. c. à nobis, n. 7. putet, distinguendum esse inter sententiam generalem & statutum: & illa quidem non ligari peregrinos: hoc verò obligari. Mihi tamen hæc distinctio nullo modo probatur: quia responsio Pontificis ea ratione nititur, quod potestas iurisdictionis tantum ad subditos se extendat: atqui non minus statutum, quam generalis sententia proficiscitur à potestate iurisdictionis: ergo tantum comprehendit subditos: non item aduenas & peregrinos. Neque satisfaciunt Gl. in cit. c. à nobis, & Abb. cit. n. 7. Vgol. tab. 1. cap. 9. §. 2. n. 4. in fine, cum aiunt, extraneos delinquentes contra statutum fieri subditos ratione delicti: ideòque censuram incurere posse. Frustra enim allumunt, quod probare debent: videlicet, peregrinos delinquere contra statutum proprium eius diocesis, in qua pro tempore morantur. Nos autem contra ostendimus, eos non delinquere contra statutum: quia non sunt subditi statuentis: prius enim requiritur, ut aliquis sit subditus, quam ut statuto obligetur, & contra illud delinquat, sicuti rectè notavit Suarez disp. 5. l. 5. n. 10. Quamvis ipsemet quoque num. 14. distinguat inter sententiam & statutum; propterea quod statuto, cum territorio inhæreat, affici debeant etiam peregrini, dum ibi existunt: quam senten-

tiam refutavi cit. cap. 12. conclus. 3.

Dices. Negari non posse, eum, qui furtum sacrilegum in aliena diocesi sub excommunicatione prohibitum committit, peccare; ideòque forum sortiri ratione delicti, sicuti constat ex c. vlt. de foro compet. Respondeo, peccare quidem contra legem; quatenus ea communis omnium gentium, ipsiusque naturæ est; & ratione huius peccati subditum fieri, ideòque citari posse atq; Ecclesiasticis censuris compelli ad satisfaciendum: non peccare tamen contra legem, quatenus propria est huius diocesis, censuram in se continens: cum non sit subiectus huic legi, & legis latrici potestati. Vide Auilam p. 3. c. 3. disp. 2. dub. 3. concl. 1. & concl. 4. §. circa corollarium.

Exinde resolues hunc casum. Cum Ordinarius alicuius loci intellexisset, aliquod in diocesi sua crimen patrari, decretum ad Ecclesiæ valvas affixit, ut quicumque tale facinus imposterum committere præsumperit, ipso iure excommunicatus sit. Postea verò cum cognouisset hominem advenam, spreto suo decreto, in eo ipso deliquisse, eundem hominem tanquam excommunicatum publice promulgari iussit. Respondetur ex dictis, Ordinarium non rectè processisse: Quia decretum eius, sub excommunicationis sententia latum, tantum ad subditos se extendebat: advena autem ille non erat subditus, priusquam deliquit; postea verò ratione delicti subditus factus est: quare citari potuit, dum in territorio manebat, atque ad satisfactionem compelli; & tunc demum, si contumax esset, excommunicari.

Corollarium III. Subditus non incurrit excommunicationem, latam per statutum propriæ diocesis, si contra illud agat extra diocesin, vel intra diocesin in loco exempto existens. Ita habetur expressè in c. 2. de constit. in 6. ubi Geminianus, aliique Doctores, Abb. in c. vlt. de foro compet. n. 4. Couar. c. alma. p. 1. §. 10. n. 12. Propria huius rei ratio est, Quia, ut habetur in l. vlt. ff. de iurisdic. omnium iudicum: *Si quis supra iurisdictionem suam iudicat, impunè ei non paretur*: Atqui, si legislator velit sua lege aut statuto subditos, etiam extra territorium obligare, tunc supra iurisdictionem suam ius dicit: eò quod statutum, ex propria natura, territorium afficiat, & intra eius limites se contineat, uti dixi tract. super. c. 11. n. 1. in assert. Ergo impunè ei non paretur. Ex quo rectè infert Suarez disp. 5. l. 5. n. 9. Si quis delictum, v. g. homicidium statuto proprio diocesis suæ sub censura prohibitum, inchoavit intra diocesin hominem persequendo, aut vulnerando: consummavit verò extra diocesin, eundem occidendo, non incurere censuram in homicidas latam: licet aliter puniri possit ab utroque iudice tunc delicti inchoati, tum consummati, iuxta l. 1. C. ubi crimine agi oportet.

Porro de censura lata per sententiam, specialis difficultas est: Videlicet, si subditus contra sententiam superioris, puta Episcopi sui, sub excommunicationis vel suspensionis pœna aliquid præcipientis, aut prohibentis agat extra diocesin, vel in loco exempto, utrum censuram incurrat? Puta si Episcopus clerico peregrinaturus sub pœna suspensionis præcipiat, ne aleis ludat, ne arma prohibita ferat, vel ut singulis septimanis sacrificet? Negant expressè Egid. disp. 13. dub. 7. concl. 61. Auila d. 2. c. 3. disp. 2. dub. 2. concl. 1. Henriq. lib. 13. c. 26. n. 1. Sairus lib. 1. thesauri cap. 6. n. 40. arg. cit. c. 2. & l. vlt. ff. de iurisd. omnium iudicum *Extra territorium ius dicenti non paretur impunè*: Si autem Episcopus aliquid sub censura prohibeat, aut præcipiat agendum extra diocesin suam, ius dicit extra territorium: Ergo ipsi impunè non paretur.

Verum hæc sententia solido fundamento non nititur: quare contraria magis placet, quæ & communior est Ab. in cit. c. vlt. n. 24. Geminiani in c. 2. de constit. in 6. n. 12. Vgol. tab. 1. c. 9. §. 3. n. 4. Sa ver. iudex de sentent. & citatione n. 8. Suarez disp. 5. in fine. Probatur primò: Ex delicto crimine, quod est inter statutum; & præceptum, siue sententiam. Statutum enim immediate tendit ad territorium,



alique cohæret: atque idcirco neminem ligat extra territorium existentem. Præceptum verò & sententia immediatè tendit ad personas subiectas; earumque offibus cohæret, quocunque terrarum discesserint. Probatum secundò: Superior subdito discessuro aliquid præcipiens aut prohibens sub censura: non fert sententiam extra, sed intra territorium suum: licet autem sententia, commissio crimine, incurratur extra territorium: id tamen fit sine cognitione causæ, & strepitu iudiciario: quia excommunicationis, & quævis censura lata sententiæ, tacitam, ac veluti insensibilem executionem secum trahit, c. pastoralis, in fine, de appellat. Confirmatur I. si alicui per sententiam, vel etiam per statutum, sub pœna excommunicationis ipso facto incurrendæ, homicidium prohibitum sit ille autem hominem lethaliter vulnerato, fugiat, & vulneratus postea moriatur: quis neget homicidam excommunicationis sententiam extra territorium incurrere; Ergo nihil obstat excommunicationem incurrere à subdito extra territorium statuentis. Vide Syl. ver. excommunicationis, 2. n. 8. Confirmatur II. Si subditus ratione domicilij, commissio delicto, fugiat, etiam absens per nuntium vel literas citari potest, isque comparere debet, & si contumax sit, excommunicari poterit, sicuti colligitur ex c. ex tua, de clericis non resident. Cuius rei rationem dat Abb. n. 41. *Quia citatio decernitur in proprio territorio ipsius iudicis, licet nuntius exequatur extra territorium: sed illa executio nuntij iudicialis non est.* Idemque dicendum, si subditus ratione domicilij alibi deliquit, & à Iudice delicti præventus non est: potest Iudex domicilij reum citare, & contumacem excommunicare, per ea, quæ ex communiore docent Abb. cit. c. cum contingat, n. 7. & c. ult. n. 13. de foro compet. Vgol. tab. 1. c. 2. §. 12. & c. 9. §. 3. in fine. Couar. in præct. qq. c. 11. n. 6. Iulius Clarus lib. 5. sent. §. præct. crimen. quæst. 39. Confirmatur III. Notum est ex c. postulasti, & c. ult. de foro compet. peregrinum in alieno territorio delinquentem, ratione delicti subditum fieri, in ordine ad forum externum: nisi delinquens sit Superior, vel Papali privilegio personaliter exemptus, sicuti docent Canonistæ II. cc. & Vgol. tab. 1. cap. 2. §. 15. Clarus lib. 5. sent. §. practica crim. q. 38. & 39. Quod si verò ille peregrinus, post commissum delictum citatus, adeoque iudicio præoccupatus, fugiat: vel si à Iudice loci Ordinario postulatus, atque sistere se iussus non compareat, tum etiam absens excommunicari potest, sicuti ex cōmuni docet Abb. cit. c. ult. n. 7. Egid. cit. dub. 7. concl. 3. Henriq. lib. 13. c. 26. §. 2. Sairus lib. 1. thesauri. cap. 6. n. 42. & 43. arg. Clemēt. pastoralis, de re iudic. 8. Quæ omnia idcirco adduxi, ut intelligeretur, quod Ordinarius extra suum territorium, siue diœcesin, sententiam ferre non possit (sicuti docet Gl. & DD. in c. Romana, §. contrahentes, de foro compet. in 6.) causam huius non esse, quia extra territorium non habeat subditos: Constat enim eos, qui ratione domicilij aut beneficii Ordinario subditi sunt, licet extra diœcesin abeant, semper tamen iurisdictioni subiectos manere, ut ipsis proinde imperari, & sententia in eos ferri possit, sicuti optimè notavit Abb. c. cit. cum contingat, n. 7. Sed vera causa, cur in aliena diœcesi Episcopus sententiam censure ferre nequeat, ea sola est, ne alienum territorium inuadere, atque violare videatur: qua ratione cessante, nihil omnino obstat, quominus Episcopus, aliūve superior in alieno territorio iurisdictionem in suos exerceat: seu cum ijs dispensando, aliāve voluntariam iurisdictionem exercendo: siue ijs imperando, sub pœna censuræ, ipso facto & sine alia sententia incurrendæ, ut supra dixi: siue particularem sententiam in eos pronuntiando, ob delictum notorium, quod nullam causæ cognitionem postulat: vel denique si alter Episcopus, in cuius diœcesi res agitur, facultatem det iudicium processum instituendi, sicuti docet Abb. c. nouit. n. 3. de offic. legati. Nau. c. 27. n. 6. Sairus lib. 1. thes. c. 6. prope finem.

## CAP. V.

## Ob quam causam censura fieri possit.

## S V M M A R I V M.

1. *Censura ferri non potest ob peccatū merè internum; nec ob quodvis externum, licet graue sit, nisi etiam contumaciam adsumptam habeat.*
2. *Censura non incurritur ob peccatum, quod iure tantum naturaliter aut diuino repugnat: sed requiritur Ecclesiæ præceptum.*
3. *Censura nunquam incurritur ob peccatum merè præteritum, seu quod penitus transactum est.*
4. *Censura infligenda non est, nisi precedente canonica monitione.*
5. *Si ipso iure decreta sit censura sententia lata, alia monitio non requiritur: sed reus, antequam declaratur, aut denuntietur, à Iudice citari & audiri debet.*
6. *Si à iure decreta est censura sententia ferenda, infligi non debet reo, etiam conuicto, aut manifesto, nisi precedente monitione.*
7. *Ignorantia (si crassa non sit, nec affectata) tum sursum, tum facti etiam concomitans, à censura excusat.*
8. *Qui scit opus prohibitum esse, nescit tamen annexam censuram, eam haud incurrat: secus est in irregularitate.*
9. *Qui ex graui metu Ecclesiæ legem aut præceptum transgreditur, censuram euitat: licet quandoque à culpa mortali non excusetur, ut si quis ob mortis metum cum consanguinea matrimonio contra hat, & consumer.*

**A**ssertio I. Nulla Ecclesiastica censure ferri potest ob peccatum merè internum. Est communis doctrina. Quia Ecclesiæ non iudicat de occultis, c. sicut tuis, de Simonia. Vide tract. præced. cap. 4. assert. 2.

Assertio II. Excommunicatio maior, & ferme etiam aliæ censuræ ferri non possunt, nisi ob peccatum mortale. Hæc assertio, quod attinet ad excommunicationem traditur à Caietano in sum. ver. præcepti transgressio, §. pœna præceptorum. Palud. in 4. d. 8. q. 1. a. 2. Nau. c. 27. n. 9. Gabr. in 4. d. 18. q. 2. corol. 2. Soto d. 22. q. 1. a. 2. concl. 1. Couar. c. alma, p. 1. §. 9. Auila p. 2. c. 5. disp. 1. dub. 2. aliisque communiter, & sumitur ex c. nemo Episcoporum, c. nullus sacerdotum 11. q. 3. Trident. sess. 25. c. 3. de reformat. Nam pœna debet esse commensurata culpæ, c. Felices, de pœnis, in 6. Index pœnam metietur ex culpa. Sed excommunicatio maior grauissima pœna est gladius spiritualis, ac neruus Ecclesiasticæ disciplinæ, teste Trident. cit. c. 3. Ergo grauem siue mortalem culpam exigit. Alteram partem docet Egid. disp. 13. dub. 8. num. 68. Quia etiam reliquæ censuræ, sicuti communiter ferri solent, magnis commodis spiritualibus priuant, ut infra patebit. quare ut graues pœnæ, graue peccatum requirunt, sicuti ratiocinatur Suarez disp. 4. l. 4. Vasq. 1. 2. dis. 158. c. 5. n. 48. Sanchez lib. 6. moral. c. 41. num. 54.

Corollarium. Quotiescumque aliquis, ob ignorantiam, vel animi passionem, à grauitate culpæ mortalis excusatur, à censura etiam excommunicationis, graui suspensione, vel personali, eoque totali interdicto excusari debet, ut mox iterum dicam.

Assertio III. Non ob quoduis peccatum mortale ferri potest excommunicatio maior, aut alia propriè dicta censura: sed debet esse peccatum inobedientiæ, & contumaciæ, per quam reus Ecclesiæ monentis, ac præcipitis auctoritatem spernere censetur. Ita de excommunicatione docet Abb. c. qua fronte, n. 10. de appellat. Sotus cit. a. 2. concl. 4. Petrus Sotus lect. 3. de excommuni. Nau. c. 27. n. 9. Auila cit. c. 5. disp. 1. dub. 10. Sairus lib. 1. c. 9. n. 28. aliisque communiter, & sumitur ex cap. 18. S. Matth. Si Ecclesiam non audieris, id est, obediens ei non fueris, sit tibi sicut Ethicus & publicanus; id est, tanquam non sit intra gremium Ecclesiæ, siue in numero fratrum: Loqui enim Christum de potestate Apostolis, eorumque successoribus tradita ad ligandum & compescendum eiusmodi inobedientes ac contumaces, colligitur etiam ex verbis



ex verbis statim adiectis: *Amen dico vobis quatenus alligaueritis super terram, erunt ligata & in celo.* De reliquis vero censuris id docet Suarez disp. 5. §. 5. num. 6. Aegid. cit. dub. 8. conclus. 6. & colligitur ex c. ex parte, 1. de verborum signif. vbi causa, ob quam excommunicationis vel interdicti sententia in aliquem proferri possit, dicitur esse contumacia. Et c. 1. de sent. excomm. in 6. postquam dictum fuit, quomodo excommunicatio sit *pœna medicinalis, non mortalis, &c.* subiungitur: *Et hæc eadem in suspensionis & interdicti sententiis volumus observari: vbi G. ita ista tria paria sunt.*

Nota tamen cum Auila p. 2. c. 5. disp. 1. dub. 11. ad censuram non requiri inobedientiam directam, seu contemptum formalem: ne fateri cogamur, eum duplex peccatum committere, qui opus sub censura prohibitum exercet: Sed sufficit inobedientia generalis, & contemptus interpretatiuus. Nam ob Ecclesiæ tam seuerè præcipientis, ac comminantis auctoritatem, atque ob spiritualium bonorum præstantiam, quibus aliquis priuandus est, quàm maximè abstinere quisque deberet à peccato habente annexam: quare si non abstineat, censetur minoris quàm oportet, facere Ecclesiæ auctoritatem.

Exinde plura corollaria inferuntur, quæ licet plerique Doctores peculiariter de excommunicatione tanquam præcipua censuræ specie tradere solent, tamen simili modo etiam in alijs censuris locum habent. Primum est. Excommunicatio, & quæuis alia censura nunquam incurritur propter peccatum soli naturali, aut diuino iuri repugnans, sed omnino requiritur præceptum Ecclesiæ, quod reus contumaciter spernat. Ita ex communi Suar. disp. 4. §. 5. n. 6. Aegid. cit. loco.

Secundum. Excommunicatio, aut quæuis alia propriè dicta censura nunquam infligenda est propter peccatum merè præteritum, id est, quod penitus cessauit, nullamque præsentem contumaciam siue inobedientiam coniunctam habet: tamen si alioquin grauissimum sit, vt blasphemia, Sodomia, &c. Est communis doctrina, & habetur in c. ex parte, vbi duæ tantum causæ afferuntur, ob quas excommunicationis, aut interdicti sententia in aliquem ferri possit: vel quia citatus ac monitus à peccato abstinere, siue (vt ibi dicitur) iuri parere non vult: vel quia pro commisso peccato satisfacere iussus, recusat. Confirmatur ex cit. ca. 1. de sent. excomm. in 6. vbi habetur, quod excommunicatio (idèq; postea dicitur de suspensione & interdicto) nō sit pura pœna, siue vindicta: sed *pœna medicinalis, disciplinans, non eradicans: quare caute prouideat Ecclesiasticus Iudex, vt in ea ferenda ostendat se prosequi, quod corrigentis, atque medentis est.* Quod verò attinet ad censuras, quæ à iure, vel per sententiam generalem statuuntur ipso facto incurrendæ, ita vt alia deinde Iudicis condemnatione opus non sit, eas manifestum est pro culpis merè præteritis, aut emendatis ferri non posse; sed in hunc modum: *Qui tale crimen admisit: vel qui pro tali admissio crimine intra mensem non satisfecerit, excommunicatus esto.*

Tertium corollarium. Excommunicatio, & quæuis alia censura nunquam infligenda est, nisi præcedente monitione, & comminatione. De excommunicatione ita docent Sotus cit. articulo 2. conclusione 4. Auila citato capite 5. disp. 1. dub. 10. Nau. c. 27. numero 11. Sairus libro 1. capite 12. numero, alijsque communiter, & colligitur ex Apost. ad Titum cap. 3. *Hæreticum hominem post unam & secundam correptionem, denota.* Et traditur apertè in cap. sacro, de sentent. excommunicat. & capite Romana eodem titulo in 6. De alijs verò censuris id docet Sanchez libro 9. de matrimonio. disputatione 32. numero 15. 17. & 21. Suarez disputatione 3. sessione 8. Aegid. disputatione 13. dub. 9. & habetur in capite reprehensibilis, de appellat. capite statutum, de sent. excommunicat. in 6. Ratio est, quia censura non fertur nisi in eos, qui contra Ecclesiam contumaces sunt: tales autem non sunt, nisi qui præce-

dente monitione, & comminatione censuræ, obedire recusant. Quæ ratio ostendit, censuram non solum iniustam, sed etiam irritam esse, si sine vlla omnino præcedente monitione seu comminatione, in aliquem ob peccatum merè præteritum feratur, sicuti notauit Suarez disp. 1. §. 12. numero tertio, & disputatione 18. sessione 3. numero 29. Sotus in 4. distinctione 22. questione 1. articulo 2. conclus. 3.

His addendum est ex cap. constitutionem, de sent. excomm. in 6. iunct. Gl. & Doctores ibidem, Canonice monitionem ex iuris præcepto, vt iuste censura inferatur, oportere esse trinam, interposito aliquorum, saltem duorum vel trium dierum, intervallo. Potest tamen etiam vnica monitio fieri pro trina, præfixo eo temporis spatio, quod pro trina sufficiat, iuxta l. contumacia, ff. de re iudic. Quamuis si criminis, aut mali impendentis periculum, factive necessitas interdum aliud suadeat, dilationemque non patiat, tunc Iudex statim rem aggredi, excommunicationem comminari, & contra inobedientem proferre possit. Debet autem huiusmodi canonice monitio ad reum personaliter fieri, nisi is malitiosè latitet: tunc enim satis est citationem cum comminatione fieri ad eius domum, Ecclesiæ valuas, aliumve locum publicum, vt ad ipsius notitiam deuenire possit: sin autem per contumaciam non compareat, etiam absens excommunicari potest. Vide capite quoniam frequenter, §. porro, iunct. Glossam vt lite præcedente, &c. & Clement. causam, de elect. Couarruias capite alma part. 1. §. 9. numero 4. Suarez disp. 3. §. 11.

Est porro diligenter hæc obseruandum, canonicam istam monitionem solum requiri ad censuram, quæ ab homine infligenda est, pro culpa præterita aut præsentem, in qua reus contumaciter persistit, vel pro ea satisfacere iussus recusat, sicut optimè notauit Suarez disputatione 3. sessione 8. numero 5. & colligitur ex citat. capite ex parte, & citat. capite Romana, ibi, *nec in specie, nec in genere pro culpis & offensis præteritis, vel præsentibus excommunicationum sententias absque competente monitione præmissa promulgent.* Ratio est: Quia si culpa antecedit Ecclesiæ præceptum aut sententiam, quando ob illam nulla adhuc censura lata est: tunc reus v. g. qui innocentes vexat, vel bona eorum possidet, nondum contumax censeri potest, priusquam ab Ecclesia monitus, vt ab iniuria desistat, vel illatum damnum resarciat, parere renuit: At verò ad incurrendam censuram iuris, aut sententiæ cuiuscunque pro culpa futura: v. g. *Si hoc fecerit, vel: Quicumque hoc fecerit, ipso facto excommunicatus, suspensus, &c.* alia insuper monitio necessaria non est, sicuti habetur in capite reprehensibilis, de appellat. iun. Gloss. verb. ipso genere: siquidem ipsa lex, aut Iudicis præceptum generale, vel speciale, sub tali comminatione latum, continuo admonet: vt meritò inobediens ac contumax censeatur, qui obedire recusat. Idque maximè verum est, si aliquid fieri sub excommunicationis, vel suspensionis pœna prohibeatur: nam si aliquid fieri præcipiatur, tunc ordinariè requiretur monitio, vt appareat, an fuerit pertinaciter in mora, & nullo legitimo impedimento excusatus, iuxta ea, quæ docet Innoc. in ca. extirpanda, §. qui verò, de præbend. & videri potest Alexander de Neuo super Abb. in c. excommunicationi, de rapitor.

Nihilominus verò, etsi aliquis ipso facto, seu criminis admissione excommunicationem aliamve censuram contraxerit: si tamen à Iudice declarandus vel denuntiandus sit, necesse est eum prius citari, data illi copia sui defensionis, quippe quæ naturali iure debetur, iuxta Clement. pastoralis, §. ceterum, de re iudicata. Et ita docet Gloss. in capite præsentem, verb. constiterit, de censibus Couarruias parte 1. §. 9. numero 5. Auila parte 2. capite 5. disputatione 1. dubio



5. Suar. disp. 3. l. 10. n. 15. Nau. lib. 5. conf. 2. num. 2. & conf. 7. n. 4. & 8. de sent. excommun. edit. 2. vbi ait, sine citatione, nisi causa omnino notoria sit, declarationem fore nullam.

Dubium verò est, si à iure decreta sit excommunicatio, aliæue censura, non latæ, sed ferendæ sententiæ, v.g. *Qui tale crimen commiserit, excommunicetur*: vtrum Iudex statim contra reū de crimine conuictum procedere possit ad censuram ei inferendam, sine alia monitione? Ita affirmat Abb. c. cum sit Romana, n. 28. de appellat. Sanch. lib. 2. de matrim. disp. 2. 4. in fine. Auila cit. dub. 5. licet addat, melius facturum, si vnam saltem monitionem præmittat. Sed contrarium benignius & probabilius est, quod docet Suarez disp. 3. l. 10. num. 19. & indicat Couar. l. cit. Caiet. ver. præcepti transgressio, §. pœnas, & colligitur apertè ex cit. c. reprehensibilis: *Nec Prælatus, (nisi canonica communione præmissa) suspensionis, vel excommunicationis sententiam proferat in subiectos: nisi forte talis sit culpa, quæ ipso suo genere (idest ex se, seu ipso facto, ait Gl. ibidem) suspensionis vel excommunicationis pœnam inducat.* Cùm igitur exceptio firmet regulam in aliis, sequitur ad omnem omnino censuram, quæ non ipso facto seu criminis admissione incurritur, sed à Iudice actualiter infligenda est, canonicam monitionem, (eâmque trinam per s. loquendo) necessario præmittendam esse. Ratio est; Quia ob crimen merè præteritum aut emendatum, neque excommunicatio, neque alia propriè dicta censura infligi potest, vt suprà dictum: Si autem Iudex excommunicationem, aliâue censuram sententiæ ferendæ exequi posset contra criminofum, nulla præcedente monitione: tunc sæpe accideret, censuram infligi propter crimen merè præteritum, aut emendatum. Quid enim? si Reus citatus, & crimen confessus, ab eo abstinere velit, & Ecclesiæ satisfacere; profectò excommunicari non poterit: cùm potius tunc absoluti deberet, si antea excommunicatione incurrisset, iuxta c. quæ fronte de appell. Confirmatur ex eo, quod censura hæc actualiter non à lege feratur, sed ab homine, idèque legis monitio sufficere non videatur, nisi etiam hominis monitio præcedat: saltem ordinariè, & nisi aliud causæ grauitas, seu necessitas requirat. Atque exinde rectè colligit Suar. num. 21. Delictum, quod tractu successuum non habet, neque satisfaciendi obligationem parit, v.g. blasphemiam, non posse prohiberi cum comminatione censuræ ferendæ.

Et hæc adeo vera sunt, inquit Couar. l. c. num. 6. vt etiã in notoriis, excommunicationis v.g. sententia ferenda non sit, nisi præmissa citatione, & canonica monitione: cùm enim censura ob contumaciam feratur, apparere non potest, verum reus contumax sit, nisi moneatur. Secus est, si censura ipso facto contracta duntaxat à Iudice declaranda, aut denuntianda sit: tunc enim, si factum, seu crimen adeo notorium exitat, vt manifestò constet, nullam defensionem, aut excusationem reo competere, citationem à Iudice intermitteri posse, docet Abb. c. nostram, 3. de iure iur. Nauar. lib. 5. conf. 20. de hæret. num. 5. edit. 2. Andræas Gaill. lib. 1. obseruat. 77. num. 9. Auila loco suprà cit. conclus. 2. Suar. n. 18. a. gum. c. de manifesta, 2. q. 1. c. enidentia, de accusat. c. bonæ, 1. de elect. vbi dicitur, quod *excessus notorius examinatione non inuiget.*

7. Quartum corollarium. Qui cum ignorantia non crassa seu supina agit contra id, quod sub comminatione censuræ præceptum, vel prohibitum est, censuram non incurrit. Est cõmunis doctrina, sumpta ex c. 2. de const. in 6. *Vt animarū periculis obuietur, sententijs, per statuta quorūcūq; Ordinariorum prolatis, ligari nolumus igno. antes: dū tamen eorū ignorantia crassa non sit, aut supina.* Ratio est: Quia ad incurrendam censuram requiritur contumacia, & virtualis quidam contemptus; in eo consistens, quod aliquis monitioni legis aut præcepti, cum comminatione tantæ pœnæ siue censuræ, parere recusat; Qui autem huiusmodi Ecclesiasticæ legis aut præcepti comminationem siue cen-

suram ignorat, is contumax, vel clauium contemptor cenferi non potest. *Non enim contemnit disciplinam, qui ignorauit*, lib. si ignorans, 50. ff. locati. Ergo, &c. Ex quo inferitur, cit. cap. *vt animarum*, non nouum aliquod ius posituum conditum fuisse: sed id quod ipsa natura & institutio censurarum exigit, declaratum: sunt enim illæ institutæ ad medendum, & disciplinandum, non ad periculum animis creandum. Quapropter idem eadem ratione dici debet de Pontificijs censuris: quamuis in dicto capite 2. solùm Episcoporum mentio fieri videatur.

Porro, tradita doctrina extendi debet primò, vt etiam intelligatur de inconsideratione siue obliuione legis aut præcepti Ecclesiastici non crassa, seu supina, vt aduertit Suarez disputatione 4. sect. 8. numero 11. Quia ignorantia & inconsideratio æquiparantur: siquidem fieri etiam non potest, vt aduersus legem vel præceptum Ecclesiæ contumax, aut contemptor existat, qui ad illud non attendit.

Secundò extendi debet, vt non solùm locum habeat in ignorantia iuris, sed etiam in ignorantia facti; puta, non tantùm si nescias percussorem Clerici sub excommunicationis pœna prohibitam esse: sed etiam si nescias Clericum esse illum, quem percussis; vtroque casu censuram effugies, sicuti definitur in c. si verò 2. de sent. excommun. & docet Gloss. in cit. l. si ignorans, ver. contemnit. Grassi 1. p. decif. lib. 4. c. 9. num. 42. Couar. p. 1. §. 10. num. 15. Suarez cit. sect. 8. num. 12. qui rectè addit, num. 13. contra Syluest. ver. excommun. 6. §. sciendo 4. nihil referre, vtrum ignorans dederit operam rei alioquin licitæ, an illicitæ: qui enim manus violentas in Clericum iniicit, nesciens esse Clericum, is operam dat rei illicitæ: attamen censuram excommunicationis non incurrere dicitur in cit. c. si verò. Cuius ratio est, quia ignorantia tollit voluntarium circa obiectum illud quod ignoratur: ac proinde talis non peccat contra legem siue censuram Ecclesiæ de non percussione Clerici. Quod si autem eiusmodi v.g. percussores Clericorum nihilominus à censura excommunicationis absoluantur, id fieri solet *ad cautelam, & in quantum indigent.*

Tertiò extendi debet, vt locum etiam habeat, tametsi ignorantia concomitans sit: v.g. Rusticus clericum cædens si nesciat esse Clericum, excommunicationem non incurrit; quamuis ita animo comparatus sit, vt, tametsi sciret, nihilominus cæderet, vel etiã si optet Clericum esse, quem laicum arbitrat. Ita docet Vasq. q. 2. disput. 126. num. 9. Henricq. lib. 11. c. 10. in princip. in comment. lit. a. Sanchez lib. 9. de matrim. disput. 32. num. 26. Suarez cit. sect. 8. num. 7. contra Couarru. cit. n. 15. illat. 10. Grassi cit. num. 42. Vgolin. tab. 1. cap. 9. §. 8. n. 8. Ratio est; Quia censura Ecclesiastica nunquam fertur propter internam prauam operantis dispositionem habitualement vel actualement: sed propter externam Ecclesiastici mandati contumacem transgressionem: Qui verò actualiter ignorat, opus quod operatur Ecclesiastica lege sub censura prohibitum esse, is contra Ecclesiæ præceptum nihil delinquit: idèque nec actualiter contumax est: quãuis ponamus interno affectu delinquere, eum tamen Ecclesia non punit. Ex quo rectè colligit Sanchez l. c. idem sentiendum de irregularitate, & restituendi obligatione quippe quæ non contrahitur ob prauum animi affectum: sed ob externi operis prauitatem, vel illati damni iniuriã; cùm igitur ignorantia obiecti, circa quod externa operatio versatur, tollat voluntarium, puta si inimicum tuum occidas, ratus esse feram, sequitur etiam tolli iniuriam, omnemque prauitatem ab opere externo: neque infici ab interno prauo affectu concomitanter adiuncto, & non existente causâ illius operis.

Quartò extendi debet, vt tametsi aliquis sciat opus prohibitum esse, etiam Ecclesiastica lege, si tamen ignoret, annexam illi censuram, eam haud incurrat. Quæ cit



est sententia Syluest. verb. excommun. 10. quæst. 3. Nau. c. 27. num. 274. & lib. 3. consil. 10. num. 4. de sepult. edit. 2. Sanch. num. 13. Suar. sect. 9. num. 19. Egid. disp. 13. dub. 10. contra Gl. c. à nobis, de sent. excommun. Couarruu. c. alma, p. 1. §. 10. num. 9. Cordub. in quæstionario libro 2. quæst. 25. Probatur ex cap. proposuisti, d. 82. & supra cit. c. 2. de constitut. in 6. vbi generatim definitur, *sententiis per statuta Ordinariorum prolati, non ligari ignorantes*. quod dictum, cum sit fauorabile, retenta verborum proprietate rectè intelligitur, vt tamen aliquis statutum sciat, si tamen adiunctam sententiam seu censuram ignoret, ea non ligetur. Confirmatur ex ratione ibi adiuncta: *Vt animarum periculis obuietur*. Oportet enim censuram pœnam medicinalem esse: at non esset medicina, sed tantum obesset, si etiam ignorata incurreretur. Denique, vt supra dixi, nemo censuram incurrit, nisi aduersus Ecclesiæ potestatem, cum tantæ pœnæ comminatione, aliquid præcipientis, aut prohibentis contumacem se præbeat, non potest autem aliquis contumax censeri, si Ecclesiasticam pœnam siue censuram ignoret. Ex quo etiam colligitur, id esse proprium censurarum: aliisque pœnis non competere, sicuti dixi super tractat. c. 20. assert. 2. Quin & irregularitatem ex delicto arbitror re ipsa incurri, tamen si delinquens eiusmodi canonici impedimenti inuincibili ignorantia laboret: quamuis contrarium defendat Sanch. lib. 9. disput. 32. num. 17. Sed quod dixi est ex communitate sententia, eo quod talis irregularitas non contrahatur propter contumaciam: sed propter turpitudinem seu maculam culpæ, qua criminofus, secundum Ecclesiæ canonem inhabilis redditur ad altaris ministerium.

Porrò à tradita supra doctrina, quod *censura non liget ignorantes*, excipi debet, *nisi sit ignorantia crassa, seu supina*. cit. c. 2. Crassa autem ignorantia est, quæ ex magna cognoscendi negligentia oritur, siue quam faciliè aliquis, cum posset ac deberet deponere, negligit: qua de re Sotus in 4. d. 28. q. 1. a. 2. §. ex his primum, Sanchez num. 32. & sequentib. Egid. disput. 13. dub. 11. & docui supra tract. 2. c. 4. Omnino tamen hic requiritur, vt aliquis susceperit cogitationem aut suspicionem impositæ censure: sed nulla aut pene nulla adhibita veritatis indagatione, opus prohibitum exequatur, non sine virtuali contumacia & interpretatiuo contemptu, sicuti explicat Suarez disp. 4. sect. 10. n. 4.

Multo verò minus à censura excusat ignorantia eius affectata, seu directe volita: hæc enim voluntarium culpæ non minuit: quin potius malitiam directam, siue ex proposito, & dolum formalem in se includit. Quapropter notant Doctores apud Sanchez num. 40. Henriq. lib. 13. c. 23. num. 3. Suarez disp. 4. sect. 10. num. 2. Si censura lata sit contra eos, qui *scienter, consulto, temerario ausu, presumptione* quippiam peccauerint: contrahi etiam ab iis, qui cum affectata ignorantia deliquerunt: secus, si cum non affectata, quamuis crassa aut supina: quia hæc directam malitiam ac dolum formalem non continet. Quamobrem regulam tradit Nauar. comment. 4. de reg. num. 62. *Lex imponens pœnam presumens aliquid facere, non includit facientem per obliuionem, incogitantiam, vel simplicitatem sine dolo*. Quamuis ignorantia si nimis crassa videatur, in externo foro interdum dolo æquiparatur.

9 **Quintum Corollarium.** Qui ex graui metu mortis, infamiae, &c. transgreditur legem aut præceptum Ecclesiæ, is non incurrit annexam censuram: tamen quandoque à culpa, etiam mortali, non excusetur, si videlicet legem violet, quæ naturaliter etiam obligat. Exemplum affert Suarez libro 3. de legibus, capite 30. numero 14. Si quis graui metu adactus matrimonium contrahat, & consummet cum consanguinea, non incurrere excommunicationem ipso iure latam in Clement. vn. de consanguin. & affinit. Tum quia ad censuram requiritur contumacia, & interpretatiuus contemptus: qui autem ex graui metu

peccat, alioquin non peccaturus, non censetur contumax, neque delinquere ex contemptu Ecclesiasticæ potestatis; sed ex mera infirmitate naturæ. Ergo, &c. Tum quia in ordine ad forum externum, & leges positiuas Ecclesiæ, grauis metus censetur *instus, probabilis*: tamen interdum à peccato non excuset, spectato naturali iure: sicuti dixi tractat. 2. c. 6. numero 5. & ex communiore docet Nauar. c. 27. man. numero 63. §. septima, & in capite ita quorundam, notab. 11. numero 18. de Iudæis. Suarez disputatione 4. sect. 3. numero 14. contra Sanchez libro 9. disputatione 31. numero 4. Ratio verò est: Quia Ecclesiasticæ leges ordinariè non obligant cum tanta seueritate.

Sed obiicitur c. sacris, de iis, quæ vi, metu seu causa sunt, vbi habetur, quod qui communicat cum excommunicato per vim seu coactionem, is censuram excommunicationis effugiat: qui verò ob metum, non effugiat: quia pro nullo metu culpam mortalem incurrere quis debeat. Huius capitis variæ sunt interpretationes, sicuti videre est apud Abb. ibidem, Vasquez 1. 2. disputatione 161. cap. 4. Mihi placet explicatio Suarezii disputatione 6. sect. 3. Egid. disput. 13. dub. 12. numero 97. Propositum fuisse Pontifici, discrimen tradere inter coactionem & metum: quod coactio seu vis semper à censura excuset: quia simpliciter aufert voluntarium: ideòque omnem culpam, ac pœnam in culpa fundatam. At verò metus, cum relinquat voluntarium simpliciter, ideòque culpam non omnino auferat, non habet hanc vim, vt semper à censura excommunicationis excuset. Porro quibus casibus excommunicatio incurritur non obstante metu, etiam graui, Pontifex non explicat: videtur autem tali regula explicari posse. Quotiescunque actio per censuram prohibita, ratione talis prohibitionis, ac circumstantiæ, intrinsecè mala redditur, tunc eam, quamuis ob grauem metum exercens, contra Ecclesiasticam etiam legem delinquit, & pœnam eius, puta censuram, vel irregularitatem incurrit. Exemplum habes si Sacerdos excommunicatus, ac publicè denuntiatus, graui metu adactus confessiones audire & absoluerè præsumat, non sine irreuerentia Sacramenti, quod tali casu inualidè administratur: Vel si quispiam ab excommunicatis, graui metu intentato, adigatur, vt cum ipsis communicet in contemptum Ecclesiasticæ potestatis, aut cum Christianæ fidei detrimento: nam his casibus Ecclesiastica etiam lex obligare videtur, vt non obstante quouis priuato incommodo, bonum publicum Fidei ac Religionis, aut Sacramenti reuerentia & honor defendatur.

## CAP. VI.

Quibus casibus censura iniusta: & quibus etiam inualida sit.

## SUMMARIUM.

- 1 Censura interdum iniuste fitur, tamen validè.
- 2 Censura lata post appellationem legitimam, vel cum alio defectu substantiali, irrita est: quare nec timenda, per se loquendo.
- 3 Si causa ferendi censuram re ipsa non subsistat, quamuis in externo foro secundum allegationes appareat, non obligat in conscientia: debet tamen obseruari talis censura, quatenus necesse est ad publicam disciplinam & Iudicis auctoritatem tuendam.
- 4 Qui talem censuram violat, quamuis peccet, tamen irregularitatem non incurrit.
- 5 Ad substantiam censura requiritur antecedens monitio: non tamen trina, nisi in casibus iure expressis.

Suppono, quædam interdum illicitè, seu iniuste fieri: quæ tamen facta, rata & valida existunt. Sic etià censure  
L ij



interdum iniuste (id est, contra legalem iustitiam) feruntur: quæ tamen ita latæ obligant, quia accidentali tantum defectu laborant. Puta, si forma iudicii in censura ferenda à Iudice non obseruetur, quæ in c. sacro, de sent. excommun. & c. i. c. Romana, c. constitutionem, eod. in 6. præscribitur: Vt canonica, id est trina, interpositis interuallis, admonitio antecedit, & vt sententia proferatur coram testibus, ex scripto, inserta causa, & exemplum scripturæ tradatur Reo. Quod si Iudex talem iudicii formam in excommunicatione, aliæve censura ferenda, temere, & sine iusta causa prætermiserit, vno mense ab ingressu Ecclesiæ & diuinis officiis suspensus manet, vt habetur in cit. c. sacro, & cit. c. i. Hæc tamen potest non comprehendit Episcopos, propter c. quia periculosum: eod. tit. in 6. in quo cauetur, vt Episcopi generaliter sententia suspensionis aut interdicti non comprehendantur, nisi de ipsis expressa mentio fiat. Vide etiam Trident. sess. 25. cap. 3. de reform. & Nauarr. capite 27. numero 10.

- 2 Censura non tantum iniusta: sed etiam inualida ex triplici capite existit: Primò ob defectum ferentis, si iurisdictione vel simpliciter careat: vel impeditam habeat per censuram excommunicationis, suspensionis, &c. vel suspensionem per legitimam appellationem, quæ interposita fuit ante sententiam absolutè à Iudice latam, c. i. c. præterea, 2. de appellat. c. solet, de sent. excommun. in 6. Neque refert, vtum ea verbis expressis facta sit, an facto: puta quia Reus Superioris protectioni se subiecit, vel ad ipsum iter atripuit, c. ad audientiam, c. dilecti, 2. de appellat. & docet Syl. ver. appellatio, questio. 15. Notant verò Gabr. in 4. d. 18. quest. 2. Nau. cit. c. cum contingat, de re scriptis, remedio 2. Cum sententia excommunicationis, vel alia censura lata post appellationem legitimam, vel cum alio defectu substantiali, ipso iure irrita sit: sententia autem inualida non censetur sententia, ideo neque timenda, neque obseruanda esse per se loquendo, & nisi scandalum vitandi ratio aliud exigat. Quare inquit Gabr. Si aliquis publicè excommunicatur, & denuntiatur nulliter, ex aduerso publicè ipse sufficienter causam, propter quam sententia est irrita, eoque facto non pareat sententia, (quod intelligo dummodo nullitas sententiæ manifestò atque indubiè demonstretur) & si aliquis tunc scandalizatur, non est scandalum pusillorum: sed Phariseorum. Neque tenetur eam renouare occultè ante scandalum sedationem: sed neque in occulto, neque in publico coram sapientibus: quibus nota est nullitas sententiæ.

Verum, posteaquam sententia censuræ validè in aliquè lata est, eius effectus per sequentem appellationem non suspenditur, sicuti habetur in c. is cui, de sent. excommun. in 6. & c. adhuc, c. pastoralis, §. verum, eod. tit. cuius ratio ibidem assertur, Quia excommunicatio, sicut & quæuis alia censura, executionem secum trahit. Quare talis, non obstante appellatione, denuntiari potest, iuxta cit. c. pastoralis, §. verum. Excepto, si appellatum est à sententia Iudicis delegati & Ordinarius appellationem admisit: tunc enim iurisdictionem in tali casu à delegato suo renouare censetur, iuxta c. pastoralis, §. præterea, de offic. iud. delegat. Vide plura apud Nau. c. cum contingat, de re scriptis, remedio 6. n. 7. Suar. disp. 3. sect. 15. Syl. ver. excommun. 2. n. 16.

Quæres. quid si aliquis ante latam sententiam appellauit: Iudex autem existimans appellationem illegitimam ac nullam, nihilominus procedat ad sententiam excommunicationis: excommunicatus verò, in appellatione sua confusus, bona fide celebret, vtum irregularitatem incurrisse censendus sit, si postea Superior, ad quem appellatum fuit, pronuntiet appellationem nullam fuisse, & Iudicis prioris iurisdictionem non suspendisse: Responsio est negatiua, secundum Gloss. receptam c. solet, ver. in officiis, de sent. excom. in 6. Nau. c. 23. man. n. 104. §. succedit tamen questio, Auilam p. 2. c. 5. disp. 5. dub. 12. ex c. ad præ-

sentiam, de appellat. Ratio est: Quia ad irregularitatem ex hoc capite incurrendam requiritur temeritas, aut saltem mala fides & culpa mortalis. Quare secus dicendum, si mala fide appellationem prosecutus, post latam sententiam celebravit, vt Auila ibi. notauit.

Secundò redditur sententia censuræ nulla seu inualida ad defectum iustæ causæ; si videlicet ob nullam, vel ob leuem & non commensuratam culpam feratur. Qua de re vide Leonem I. Epist. 89. aliàs 93. ad Episcopos Vienneſes. S. Augustinum epist. 75. ad Auxilium Episcopum. Porro tribus modis iustitia causæ deficere potest: Primò, si à parte rei causa siue crimen subsistat: sed non in ordine ad iudicium; quia illud Reus nec confitetur, nec de eo legitimè conuincitur. Secundò, si à parte rei causa, siue crimen non subsistat: licet iuridicè contra Reum demonstretur, ideoque titulum siue causam præsumptam ferendi censuram Iudex habeat. Tertiò, si nec re ipsa, nec secundum allegationes, & externi, fori præsumptionem causa subsistat: vt si Episcopus excommunicet eos, qui Paschali tempore extra parochias Regularibus priuilegiatis confitentur. Quo postremo modo lata censura haud dubiè irrita est, quia tunc maxime intolerabilem errorem continet, vt iura loquuntur, c. solet, c. venerabilibus, §. potest, de sent. excommun. in 6. iuncto c. irritam, c. cui est, 11. qu. 3. Sed & primo modo lata sententia, videlicet causa subsistente secundum rem, sed non secundum publicam notitiam iudicii, irrita censeri debet: nihil obstante, quòd Iudex crimen occultum priuata notitia perspectum habeat: quandoquidem is publicam personam gerens, secundum publicam non priuatam notitiam iudicare debet. Qua de re Nau. cit. c. cum contingat, causa puilitatis. 8.

De secundo vero modo diuersimodè loquuntur DD. 3 Mihi placeat resolutio Suar. disp. 4. sect. 7. n. 8. Auilæ p. 2. c. 6. disp. 1. dub. 2. & 3. Egid. disp. 13. dub. 13. quæ talis est. Censura lata contra innocentem, qui secundum allegata & probata in iudicio censetur nocens, re ipsa & in conscientia foro non priuat eum Ecclesiæ suffragiis, aliisque spiritualibus commodis, aut facultatibus. cuiusmodi est v. g. iurisdictione in foro interno & externo, potestas conferendi, aut accipiendi Ecclesiastica beneficia, vsus Sacramentorum actiuus & passiuus. Nihilominus eiusmodi sententia, secundum legitimas probationes lata non omnino irrita est, aut omni effectui caret: quin potius necessitatem imponit existimato Reo, vt in facie Ecclesiæ, saltem coram iis qui censuram latam sciunt, innocentiam autem nesciunt, abstineat à Sacramentorum vsu, fidelium communione, aliisque rebus, quæ per censuram prohibentur, donec vel ab ea absolutus sit, vel innocentia ipsius, atque error censuræ publicè innotuerit. Prior pars assertionis est etià Cai. 2. 2. q. 70. a. 4. ad 2. & t. 1. opusc. tract. 19. ad 2. Soti in 4. d. 22. q. 1. a. 3. corol. 3. Cou. c. alma. p. 1. §. 7. n. 5. Tolet. l. 1. c. 10. §. ex parte verò excommunicati. neque dissentit Nau. c. 9. n. 4. & c. 23. n. 3. Ratio est, quia Ecclesia neque vult, neque potest excedere limites datæ sibi potestatis: at qui potestas per censuras ligandi per se tantum data est Ecclesiæ aduersus inobedientes & contumaces: non etiam aduersus innocentes: Ergo nec potest, nec vult hos ligare, nisi quatenus id per accidens quandoque necessarium est ad publicam disciplinam & Ecclesiæ auctoritatem tuendam: consequenter, si hæc ratio cesseret, quia res occultè agitur, vel coram iis, qui hominis innocentiam perspectam habent, non est is censura ligatus: cum neque coram Deo ligatus sit: quia æterni tribunal Iudicis illum reum non habet, quem iniuste Iudex condemnat, c. 1. de sent. & re iudic. in 6. Hæc autem sententia re ipsa, & secundum condemnati conscientiam iniusta est: licet in ordine ad forum externum iusta censetur: ergo non amplius etiam obligat, nisi in ordine ad forum publicum seu faciem Ecclesiæ, ne legitimè condemnatus publicè potestati resistere videatur. Vide quæ dicam l. 3. tract. 6. de iust. c. 2. n. 6.

Alteri pars assertionis est ex mente S. Thomæ in 4. d. 18. q.



18. quæst. 2. a. 1. quæst. 4. S. Anton. 3. p. tit. 24. c. 73. Couarr. cap. alma, p. 1. §. 11. num. 14. eandemque docent Nauar. & Tolet. ll. cc. & videtur tradita à S. Greg. hom. 26. in Evangel. quem refert Gratianus, c. 1. & c. non solum, 11. quæ. 3. quod *sententia pastoris seu iusta, seu iniusta sit, gregi timenda est*. Ratio est: Quia Iudex ex officio suo, pertinente ad publicam utilitatem ac disciplinam, cui merito commoda priuata posthaberi debent, obligatus est, vt in iudicio secundum publica allegata & probata sententiam ferat, & Reo præcipiat: tamen si priuata notitia eundem innocentem cognoscat: sed innocentiam eius publicè ac legitime ostendere non possit: consequenter in tali casu Reus condemnatus iustæ Iudicis sententiæ, ac præcepto parere obligatus est, quatenus præcisè necessarium est ad publicam disciplinam, & Iudicis auctoritatem tuendam, vti rectè indicat Gratianus super c. si Episcopus, 11. q. 3. vbi explicans verba S. Greg. ait: *Non dicit sententiam iniuste latam esse seruandam, sed timendam: timenda est ergo, id est, non ex superbia contemnenda.*

Corollarium I. Si Clericus innocens secundum publicas probationes à Iudice excommunicatus, actum sui Ordinis postea exerceat, non contrahit irregularitatem, sicuti notauit Sua. n. 20. Auila ci. du. 3. con. 4. contra Cou. §. 7. nu. 7. Quia talis non merè, ac simpliciter, sed tantum apparenter, & in ordine ad forum externum censura ligatus est: Cum autem canones irregularitatem decernunt violatori censuræ, intelligi debent de vera & simpliciter dicta censura: quia odia & pœnæ restringenda sunt.

Duo tamen hic addo: I. Si talis innocens, secundum publicas probationes, excommunicatus v. g. sacerdos, occultè vel coram ijs, qui eius innocentiam cognitam habent, sacrificet, nihil quidem delinquit: si tamen in iudicio de hac re accusetur & conuincatur, tanquam irregularis à Iudice condemnari potest. Cum enim in foro externo excommunicatus censeatur, consequenter etiam irregularis declarari debet, si in tali excommunicatione celebrasse demonstraretur. II. Si talis re ipsa innocens, sed publicè condemnatus cum scandalo, & apparente contemptu Ecclesiasticæ potestatis celebret, & monitus desistere nolit, tunc de nouo verè excommunicari poterit, propter contumaciam.

Corollarium II. Si eiusmodi excommunicato propter falsas allegationes, Ecclesiasticum beneficium conferatur, videtur collatio in se valida, & prouisus in conscientia tutus; licet in externo foro à Iudice rescindi, vel irrita declarari possit. Ita docet Suarez cit. sect. 7. num. 27. & 29. Agid. conclus. 3. Ratio est: Quia talis excommunicatio materialiter iniusta non reddit hominem verè & simpliciter inhabilem; sed solum in ordine ad forum externum, & publicam existimationem, quatenus ita necesse est ratione communis boni, ac disciplinæ.

4. Tertiò demum redditur censura nulla, & inualida, si substantialis ordo iudicii prætermittatur; puta si Reus nō citetur, & ad sui defensionem admittatur: quanquam, si factum notorium sit, non ita iuris ordinem necessarium esse supra monui. Semper tamen antequam censura in aliquem feratur, requiritur monitio: quam spernendo Reus in crimine persistere, & contumax esse incipit. Quāuis, vt supra etiam dictum, ad valorem censuræ non requiratur monitio trina: præterquam si Episcopus vel similis Prælati maioris excommunicationis sententiam ferat in eos, qui cum excommunicatis participant, ea participatione, quæ communi iure solum minorem excommunicationem inducit: talis enim sententia, non præmissa canonica, id est, trina monitione, irrita decernitur in c. constitutione, de sent. excommun. in 6. Quod ipsum quoque extensum postea fuit ad sententiam suspensionis, & interdicti, in c. statutum, cod. tit. & lib.

## CAP. VII.

## De absolute à Censura.

## SUMMARIUM.

1. *Censura proprie dicta alio modo non tollitur, quam legitima absolute.*
2. *A censura lata per sententiam particularem is tantum absoluitur, qui eam tulit, vel eius superior, successor, aut delegatus.*
3. *Quicumque iure ordinario, vel ex privilegio potest absolute à censura iuris, is etiam potest absolute à censura per sententiam generalem lata.*
4. *Præsentis à Iudice, forum ipsius in eadem causa declinare non potest.*
5. *Potestas absoluendi à censuris interdum delegatur personæ particulari, & quandoque etiam respectu certæ causæ, interdum vero vniuersim Episcopis, Ordinis regularium, &c.*
6. *Si potestas absoluendi à censuris absolute concedatur, intelligitur etiam in ordine ad forum externum, nisi ex adiunctis aliud colligi debeat.*
7. *Absolutio data in foro conscientie tantum, non prodest in foro externo, nisi Iudex eam ultro acceptare velit.*
8. *Absolutio à censura interdum confertur ad cautelam, interdum ad reincidentiam.*

**A**sertio I. Censura nullo alio modo tolli potest, quam legitimi Iudicis absolute, vt nimirum eadem publica potestate, qua contracta est, etiam dissoluatur. Non enim tollitur per mortem ferentis, sicuti colligitur ex c. si Episcopus, 11. q. 3. quia pœna per legitimam Iudicis sententiam inflicta, transit in rem iudicatam: idèoque non finitur morte aut depositione Iudicis imponentis: multò minus quæ à iure imposita pœna est, ab eius auctore dependet, licuti neque ipsum ius siue statutum; sed neque per mortem eius, in quem censura v. g. excommunicationis lata est, ea omnino extincta censetur, cum etiam mortuus Ecclesia suffragiis, & sepultura sacra carere debeat, iuxta c. à nobis, 2. de sent. excommun. c. is cui, eod. in 6.

Denique licet censura, vt valide feratur necessariò requirat antecedentem contumaciam, posteaquam tamen contracta est, per se ipsam non cessat, deposita contumacia, sicuti colligitur ex c. cum desideres, de sent. excommun. Sed à Iudice per absolute tolli debet, c. quaparte de appel. Quod tamen intelligendum est de censura absolute ac indefinitè lata: potest enim censura, saltem validè, in aliquem ferri sub tali conditione, vt cum primum à contumacia recesserit, vel satisfecerit, ipso facto liber & absolutus existat, sicuti probabiliò docet Couar. c. alma. p. 1. §. 11. n. 5. Suar. disp. 7. l. 1. n. 11. Agid. disp. 14. dub. 16. q. 5. concl. 1. contra Syl. ver. absolutio, 3. in pr. Nam sicuti valor cuiusunque liberæ concessionis immediatè pendet à voluntatē concedentis: ita & valor absolute à voluntate absoluentis: consequenter, si is velit, hoc vel illo eueniente, concessionem vel absolute ratam esse, statim ita erit. Alia verò ratio est de Sacramentis, quæ (excepto matrimonio) inualidè conferuntur v. g. *absolue re si resistueris*: propterea quod ministratio Sacramentorum non dependeat ex libera voluntate seu intentione ministri nisi ea actu concurrat cum exhibitione materiæ, & formæ, secundum Christi institutionem, sicuti bene inter alios notauit Agid. tom. 1. quæstione 64. art. 8. dub. 2. concl. 4.

Neque his obstat reg. 50. in 6. *Actus legijimi conditionem non recipiunt, neque diem*. Censura autem, eiusque absolute est actus legitimus, quippe Ecclesiasticis legibus & canonibus introductus: Ergo non recipit conditionem, & diem. Respondetur. Dictam regulam sumptam esse ex re. 77. ff. vbi apertè declaratur, eā nō esse vniuersim de legitimis act. intelligendā: sed de ijs tantum, quibus ex propria natura



tura vel institutione repugnat diei aut conditionis adiecto: licet autē repugnet censurā propriē dictā ferri ad certum diem, vel tempus, v.g. *excommunicatus esto usque ad triduum*: propterea quod censura non sit pœna merē afflictiva, sed contumaciæ correctiva: non tamen repugnat censuram ferri sub hac ipsa conditione, ut duret donec in contumacia perseveratur. Quamvis haud consuetum est tali modo censuram decernere, ut præstita v.g. satisfactione, per se ipsam expiret: sed potius ut à Iudice per legitimam absolutionem auferatur, sicuti videre est in c. quanquam, de censibus, in 6.

2. Assertio II. A censura lata per sententiam particularem is solum absolvere potest, qui eam tulit, vel eius superior, successor, aut delegatus. Sumitur ex c. pastoralis. §. præterea, ubi id notat Abb. num. 1. de off. ordin. & ex Can. 47. Concil. Nicœni Arabici, *Nullus Episcopus solvat, quem alius Episcopus ligavit, quamdiu ille, qui ligavit, vixerit*. Consentit Can. 5. græcan. & Can. 16. Concil. Carthag. 6. De auctore, siue qui censuram tulit, certum est ex regula recepta: *Eiusdem esse solvere & ligare, & ut dicitur in c. verbum. d. 1. de pœnit. Par est ius solvendi & ligandi*. Quod verum est, dummodo iurisdicctio in illo duret: secus, si extincta sit per depositionem: vel impedita per censuram excommunicationis, suspensionis, &c. vel in Iudice delegato, si tempus delegationis finitum sit, iuxta c. quærenti, de officio delegati. & videri potest Nau. in cit. c. verbum, resp. ad 2. Suar. disp. 7. f. 2. n. 7. Vel si certâ ipsi causâ delegatâ, definitivam sententiam tulit, quamvis etiam tunc ad eius executionē totius anni spatium concedatur: ut proinde, si Reus à Iudice delegato ante, vel post sententiam definitivam excommunicatus sit, atque intra annum à definitiva sententia numerandum, deposita contumacia, sententiæ parere velit, adhuc ab illo absolui possit: post annum verò ad delegatē remitti debeat, sicuti habetur in cit. c. quærenti, de offic. deleg. & explicat ibid. Gl. & Abb. n. 7. Nau. c. 27. nu. 40. Agid. Coninck. dub. 16. q. 14. n. 256. Denique si Superior censuram ferentis, ex certa scientia, expressè vel tacitè (puta per illius confirmationem) ad se reuocet, si bique propriam faciat, consequenter & absolutionē eius sibi referuet: tunc inferior, qui eam tulit, auferre deinde nō potest, sicuti docent DD. in c. ex frequentib. de Instit. Syl. ver. absol. 2. q. 4. Nau. l. c. Suar. disp. 7. f. 2. n. 14. Exemplum eiusmodi generalis auocationis habes in c. tua nos, de sent. excom. ubi providetur, ut incendiarij, si nominatim excommunicati & publicè denuntiati sint, pro absolutionis beneficio ad Sedem Apostolicam mittantur. Vide Gl. ibi. verbo publicati, in fine.

De Superiore, (quod à censura Iudicis inferioris absolvere possit) intelligi debet, non quolibet; sed eo duntaxat, qui plenam & ipsē iurisdictionem obtinet in eos, qui censura ligati sunt: qualem habet sum. Pontifex in omnes excommunicatos; & Prælatus Ordinis superior in omnes subditos Prælati inferioris: quare Prouincialis v. g. absolvere potest, quem Prior aut Guardianus excommunicavit: sicuti & causam ab inferiore Prælato inchoatam ad se auocare non prohibetur, teste Suar. cit. f. n. 18. Syl. ver. absol. 2. in princ. Auila p. 2. c. 7. disp. 1. dub. 11. At verò ligatos censura Episcopi Archiepiscopus siue Metropolitanus absolvere non potest, nisi ad ipsum appellatum sit; & tunc vocatis partibus ac cognita causa appellandi, si ea in dubium reuocetur, sicuti habetur in c. Romana, §. cum autem, & seqq. de appellat. in 6. Idemque dicendum de Legato Sedis Apostolicæ; qui licet aliquo modo Superior sit Episcopi, non tamen in ordine ad causas subditorum, quippe quæ in prima instantia coram Episcopo terminari debent, sicuti dixi tractatu præced. capite septimo. numero 21. Episcopus quoque excommunicatos Regulares à proprio Prælato ex causa pertinente ad regularem disciplinam absolvere non potest: quia *correctio Monachis primo loco ad Abbatem spectat*, ait Gl. in cap. quantò, ver. si Prælati, de offic. Ordinarij, & colligitur ex cap. re-

prehensibilis, de appellat. Quamvis, si Regulares exempti non sint, ab iniusta sententia Prælati ad Episcopum appellare non prohibeantur, sicuti notauit Abb. in cit. c. reprehensibilis, n. 11. & per sensum contrarium colligitur ex cap. ad nostram, de appellat. Vide quæ dixi citat. capite 7. §. 8.

Deinde limitari debet tradita doctrina, nisi alicubi consuetudo obtineat, ut causâ à Prælato inferiore capta & præuenta, superior intromittere se non debeat, si ad ipsum appellatum non sit, sicuti notauit Gloss. in citato capite quantò, Syl. & Suarez ll. cc. Denique statutum est in capite cum ab Ecclesiastis, de offic. Ordinarij; ut Prælatus superior, puta Episcopus, inferioris Prælati, v. g. Archidiaconi, vel Archipresbyteri (cui ratione beneficij sui iurisdicctio competit) sententiam non relaxet, nisi cum conscientia eiusdem, & congrua satisfactione Reo impositâ. Veruntamen si relaxatio, seu absolutio aliter fiat, rata censeri debet, tametsi illicita, secundum sententiam Gloss. ibidem quam communiter receptam testatur Couarruias capite aima, parte 1. §. 12. numero 3. Syl. libro suprâ citato & videri potest Rich. in 4. d. 18. articulo 9. q. 1.

De successore, quod absolvere possit à censura, quam antecessor tulit, dubium esse non potest, & habetur aperte in capite si Episcopus, n. quæstione 3. & capite 1. de maior. & obed. in 6. *Episcopus si sede vacante, potest Capitulum, seu is, ad quem Episcopalis iurisdicctio tunc temporis noscitur pertinere, is quibus posset Episcopus, si viveret, ab excommunicationis sententia, sine iuris, siue hominis fuerit, absolutionis beneficium impartiri*. Ratio est, quia potestas per censuram ligandi & soluendi competit Prælato ratione beneficij muneris aut dignitatis suæ, quæ cum illius morte, aut depositione non exinguuntur: sed ad successorem transeunt. Adde, idem quoque locum habere in Iudicibus delegatis, si vnus alteri in delegatione succedat, iuxta capite pastoralis, §. præterea, de officio Ordin. ubi habetur: Si delegatus Papæ, qui Reum contumacem excommunicauerat, mortuus sit, non posse excommunicatum, extra mortis articulum vel ab Ordinario loci (cū delegatus quantum ad illud sit maior Ordinario) vel ab alio quouis, præter Romanum Pontificem, absolui: nisi foris delegatus talis extiterit, cui alius succedat in opere & honore.

Denique de delegato, quod possit absolvere à censuris, si qui eas tulit Iudex ordinarius, aut delegatus subdelegandi potestate præditus. talem illi absoluendi facultatem committat, nemo dubitare potest. Solum hinc nota; si Papa, aliusue Ordinarius alicui mandet, ut certum hominem excommunicet, sine alia commissione causæ: non posse eum deinde absolvere: eo quod non iudex delegatus, sed merus executor censeatur, sicuti notauit Na. c. 27. n. 44. Auila p. 2. c. 7. disp. 1. dub. 9. casu 4. Suarez cit. f. 2. n. 8.

Porro, quod præter hos, qui numerati sunt, nemo alius à censura per sententiam particularem latâ absolvere possit, inde probari debet: Quia iudicialis causa, per Rei citationem, quæ necessariò sententiam censuræ antecedere debet, coram proprio iudice capta est: ergo si alius Iudex quicumque præter superiorem, successorem, vel delegatum se intromittat, & Reum absolvere tentet, manifestò eius iurisdictionem violat, & inturbat. Veruntamen, si ligatus excommunicatione seu ab homine, seu à iure inflicta, satisfacere paratus sit: sed longissimè distet ab auctore, cui absolutio reservatur: potest interdum ab inferiore absolui, præstita cautione, quod quamprimum poterit, conspectui eius, ad quem iure ordinario absolutio spectat, se præsentare velit, sicuti colligitur ex capite qua fronte, de appellat. & tradit Nauar. libro 5. consil. 45. num. 2. & consil. 49. nu. 6. de sent. excommuni. edit. 2.

Assertio III. A censura lata ab homine per sententiam gene-



generalem omnis ille absolvere potest, cui vel iure ordinario, vel ex privilegio concessum est absolvere à censuris iure, seu statuto impositis. Quæ est probabilior, & in praxi tutâ sententia, quam post Imolam in c. graue. de præb. & c. ex frequentibus, de Instit. docent Nau. ci. n. 44. & in c. ita quorundam, Gl. vlt. de Iudæis, Couar. p. 1. §. 12. n. 4. Tol. lib. 1. c. 16. n. 7. Henric. lib. 13. c. 28. n. 5. lit. y. Auila p. 2. c. 7. disp. 1. dub. 9. Ægid. disp. 14 dub. 16 concl. 15. argum. cit. c. ex frequentibus, de Instit. quamvis Gl. & Hostiensis ibid. Vgol. tab. 1. c. 3. §. 4. n. 4. contrariū sentiant. Ratio est: Quia censura generatim lata non continet propriè sententiam Iudicis, quam rescindere alius non possit sine violatione iurisdictionis, ut suprà dixi: sed potius continet præceptum, sub tali pœna siue censura impositū, ideòque æquiparatur in hac parte censuræ iuris, siue statuti, sumpto argumento ex c. nuper, de sent. excommun. vbi sententia excommunicationis bimembris tantum traditur: Vna iudicis, & altera iuris: & ab illa absolvere debere Iudicem, qui eam tulit; ab hac verò quemcunque Ordinarium absolvere posse; nisi auctor eam sibi referuârît.

4 Corollarium. Qui alicui Episcopo subditus seu ratione solius delicti, ab illo propter crimen & contumaciam excommunicatus fuit, tamen si postea aliò proficiscatur, domicilium mutet, vel Religionem ingrediatur: non potest tamen ab altero Episcopo, vel Prælato absolutionem consequi: eò quod prior Episcopus, qui excommunicauit, propter causam in Consistorio suo cœptam & nondum absolutam, ius in excommunicatum adhuc retineat, sicuti colligitur ex c. proposuisti, de foro competente, vnde generalis hæc regula sumitur: *Quod præuenit à Iudice, forum ipsius in ea causa declinare non potest.* At verò si quis in propria diocesi Frisingensi excommunicationem iuris, aut sententiæ generalis contraxit, ac postea domicilium Ratisbonam transferat, potestis tunc à Ratisbonensi Episcopo absolui: imò etiam à Parocho, si talis excommunicatio ibi referuata non sit, sicuti colligitur ex cit. c. nuper. Eadèque ratio est, si cuius Monacensis, aut Frisingensis, dum negotij causa Ratisbonæ maiorem anni partem moratus, censuram excommunicationis ibi generatim latæ contraxit, ac postea in patriam redijt: potest enim tunc ab Episcopo Frisingensi, aut proprio Parocho absolui, sicuti notauit Ægid. disp. 14. dub. 16. q. 15. n. 258.

Assert. IV. A censura iuris, vel sententiæ generalis, quam auctor sibi referuauit, nemo absolvere potest, præter ipsum, eiusue superiorem, successorem, vel delegatum. Sumitur hæc assertio ex cit. c. nuper, & pari modo intelligenda est, quo assertio secunda.

5 Porro, quod ad delegatum attinet, notandum est: Potestatem absoluedi à censuris referuatis varijs modis delagari posse: Vel enim delegatio particularis est facta determinatæ personæ, & interdum in ordine ad certam causam: v. g. *committo tibi, ut causa cognita, hunc ab excommunicatione absoluas.* Interdum verò generalis delegatio est: quæ fit v. g. omnibus Episcopis, aut omnibus Confessarijs, aut certo Confessariorum Ordini: idque vel ad certum tempus, ob publicam aliquam causam, sicut fieri solet in Iubilæo, Bulla cruciatæ, &c. Vel per modum priuilegij perpetui: quale est priuilegium Religiosis mendicantibus concessum absoluedi à quibuscunque censuris iuris, ijs exceptis, quæ in Bulla Cænæ Domini continentur. Cuiusmodi generali concessione, (qualis etiam in Iubilæis fieri solet) haud dubiè comprehenduntur quoque censuræ, quas Episcopi diocelano statuto, vel generali sententia sibi referuant. Quandoquidem talis referuatio fit respectu inferiorum tantum, & nequaquam summi Pontificis: ideòque certum est, eum ab omnibus casibus & censuris Episcopalibus absolvere: consequenter etiam alijs absoluedi facultatem committere posse: velle autem per dictas Bullas & priuilegia tam am-

plam potestatem delegare, tum verba ita generatim prolata significant, tum praxis etiam confirmat, sicuti ex communi testatur Suarez disp. 7. §. n. 14.

Præterea, interdum delegatur absolutio à censuris: vt valeat in foro conscientie tantum: cuiusmodi est priuilegium Regularium, de quo paulò ante dixi: Interdum verò vt valeat in vtroque foro tam externo, quam interno. Quòd si in Bulla nihil exprimat, sed absolute cōcedatur facultas absoluedi à censuris, in dubio accipi debet de vtroque foro: quia gratia siue beneficium Principis latissimè interpretandum est, l. beneficium, ff. de constitut. Principum. Verum interdum ex circumstantijs, & materia subiecta coniectura capi potest, non fuisse mentem Pontificis delegare potestatem absoluedi à censuris cum præiudicio fori externi: sed tantum in fauorem animæ: puta cum in Bullis Iubilæi, aut Cruciatæ datur potestas Confessarijs absoluedi ab omnibus peccatis, & censuris, intelligi debet in ordine ad forum conscientie tantum, sicuti docet Couar. c. alma part. 1. §. 11. num. 16 Gutierrez lib. 1. canon. qq. cap. 2. num. 10. Auila part. 2. cap. 7. disp. 3. dub. 12. contra Medinam in summa, lib. 2. cap. 12. in fine. Suarez disp. 7. §. 5. num. 21. Nam sicuti virtute Bullæ absolutus à peccatis enormibus: nihilominus in foro exteriori accusari & puniri potest, sicuti docet Gl. in c. de his, de accusat. Couar. 2. resol. cap. 10. num. 3. ita etiam si quis virtute eiusdem Bullæ à censura absolutus est, tale beneficium ad forum contentiosum non porrigitur. Quia forum conscientie & forum externum iudicij valde distincta sunt: siquidem in illo præcipuè spectatur animæ salus, & diuinæ offensæ compensatio: in hoc verò ad publicam etiam vindictam, & Reipublicæ satisfactionem attendi debet, sicuti præter alios docet Lud. Miranda to. 1. man. Prælat. q. 46. a. 7. vbi, Absolutionem in foro conscientie dici, non quòd fieri debeat in secreta confessione; sed quòd fiat sine strepitu iudicij, & sine derogatione iuris alterius, ac denique duntaxat ut anima, quæ excommunicationis vel alterius censura vinculo ligata erat, absoluta maneat coram Deo.

Sed addendum hîc est, an & quatenus absolutio à censura in foro conscientie data, pro foro etiam externo prodesset possit. De hac re dico 1. Qui in foro Conscientie per Bullam, Iubilæum, aut priuilegium ab excommunicatione v. g. absolutus fuit, is in facie Ecclesiæ, si excommunicatio eius notoria fuit, perinde à sacris, & alijs rebus, quæ excommunicato interduntur, abstinere debet ac si absolutus non esset: quamdiu de legitima eius absolutione publicè non constat. Quare si interea publicè celebrare præsumat, ab Ecclesiastico Iudice, perinde ac irregularis puniri poterit: Quamvis, si velit Iudex, eiusmodi absolutionem in foro conscientie datam, etiam pro externo foro acceptare possit, atque accusationem Fiscalis, quòd Reus in excommunicatione celebrârît, repellere. Ita docet Henric. lib. 13. cap. 27. num. 5. lit. v. Auila. p. 2. cap. 7. disp. 3. dub. 12. §. ex dictis sequitur. Et hæc eadem locum etiam habere in dispensationibus concessis pro foro conscientie tantum, monet Nauar. lib. 2. consil. vlt. de iudic. num. 7. edit. 2.

Dico II. Si excommunicationis v. g. censura occulta fuit, tunc non prohibetur, qui ab ea in foro conscientie absolutus est, etiam publicè celebrare. Quòd si verò accidat eius excommunicationem postea innotescere, & causam ad forum externum deferri, puniri quidem propter crimen, cuius causa censuram incurerat, atque satisfactio ei imperari potest: sed nequaquam tanquam irregularis propter celebrationem condemnari debet: dummodo de absolutione fidem facere possit, per Confessarij testimonium, vel testes: quæ de re Nauar. lib. 2. consil. 3. de fide instrument. edit. 2. Suarez disp. 7. §. 5. num. 26. Eadèque ratio esse videtur, etsi excommunicatio notoria fuit: absolutus tamen in foro conscientie occultè & sine villo scandalo celebravit. Quamvis hîc cautius



agendum est, præsertim si causa ad forum iudiciale deducta fuerat: tunc enim absolutio, & multò magis celebratio cedit aliquo modo in præiudicium externi fori: vt proinde Iudex talem absolutionem non admittere cogatur; sed celebrantem, tanquam irregularem, punire possit: quare privilegiatus sine consensu Ordinarij absolueret facile non debet à censuris notorijs, si ex ad forum iudiciale deductæ sunt, vel probabiliter deducendæ putantur, sicuti docet Henricus lib. 13. c. 28. n. 2. Egid. disp. 14. dub. 16. n. 207. Quia, vt infra dicam, absolutio danda non est, priusquam parti læsæ, & consequenter si Ecclesia, aut status clericalis v. g. notoria clerici percussione læsus fuit, priusquam Ecclesiæ satisfactum sit: propterea quòd Reus, postea quam absolutionem à censura v. g. excommunicationis re ipsa consecutus fuit, non ita efficaciter ad præstandam satisfactionem siue emendationem virgeri possit.

Ad extremum dicendum est, absolutionem à censura varijs modis ferri: Primò purè & simpliciter; v. g. *Absoluo te à vinculo excommunicationis, quam incurristi ob talem causam.* Secundò sub conditione pendente in futurum: quem tamen modum vltimum non esse supra dixi n. 1. Tertiò ad cautelam, si nimirum suspicio, vel dubium subsit, num aliquis censuram incurrerit, tunc absolui solet sub conditione, v. g. *Absoluo te à censura excommunicationis, si indiges; vel si eam incurristi, ob tale crimen.* Interdum verò, et si nulla suspicio censuræ contractæ adsit, præmitti solet absolutio à censuris ante sacramentum poenitentiae, *Absoluo te à vinculo excommunicationis, suspensionis, & interdicti, in quantum possum & indiges, ad vitandam irreuerentiam, si forte poenitens in occulta censura sit: vel ante collationem ordinum, ad vitandam irregularitatem ordinati: vel ante electionem, aut collationem ecclesiastici beneficii, aut alicuius privilegiij, ad vitandam eius inualiditatem.* Qua de re Couar. c. alma, p. 1. §. 12. n. 7. Vgolinus tab. 1. c. 22. §. 1. n. 9. Suarez disp. 7. l. 8. n. 12. Quartò dari solet quandoque abso-

lutio ad reincidentiam, idque duobus modis: 1. Ad certum effectum, v. g. vt excommunicatus testari possit, vel vt facta ipsi collatio valeat: quæ tamen re vera non est propriè absolutio ad reincidentiam; sed potiùs dispensatio quædam vt actus subsistat, non obstante impedimento censuræ, à qua tamen dispensatus simpliciter non liberatur; ideòque nec propriè reincidentit.

Porro frequenter talis absolutio tribuitur tantum ad cautelam: *Si forè censura ligatus es, ad effectum talem consequendum duntaxat, te absoluiimus,* iuxta c. Apostolicæ, de exception. & c. veniens, 2. de testibus, in quo notant DD. & Vgol. tab. 1. c. 4. §. 5. n. 18. Suar. cit. l. 8. n. 20. quòd Iudex ecclesiasticus, etià delegatus, licet alioquin à censuris abso- uendi potestate præditus non sit: nihilo minus absolueret potest, si ita necesse sit, vt testimonium alicuius recipiatur, ad præsentem causam decidendam, quando aliorum testimonia haberi nequeunt: Quamquàm id speciale sit in testis receptione; & ad alios fines, puta collationem beneficii, & c. transferri haud possit.

Secundò datur absolutio, eaque propriè dicta ad reincidentiam, cum certa conditione, quam nisi absolutus intra præfixum tempus, vel quamprimum commodè potest adimpleat, v. g. Ordinario se sistat, aut parti læsæ realiter satisfaciatur, in eandem, vel potiùs similem censuram denuò incidat. Dixi, *Vel potiùs similem* Nam si propriè loquendum sit, censura illa, in quam quis recidit, nõ est eadem numero cum illa, quæ per veram, absolutionem priùs sublata fuerat: quamuis similis, æquivalens, vt moraliter eadem iudicetur, sicuti annotauit Sanchez lib. 2. moral. c. 13. n. 28. Quamobrem nouum etiam contumaciæ peccatum requirit; nouam item Iudicis, aut legislatoris sententiam latam sub conditione, nisi tale quid absolutus præstitit, ad quod iure obligatur: quasi id ipsum absque sua culpa intermiserit, aut distulerit re ipsa in excommunicationem non recidit, sicuti docet Auila p. 2. c. 7. disp. 3. dub. 14. Henricus lib. 13. cap. 29. n. 2. in comment. lit. u.

## PARS SECVNDA.

### DE CENSURA EXCOMMUNICATIONIS.

#### CAPVT. I.

#### QVID SIT EXCOMMUNICATIO, & quod duplex.

##### S V M M A R I V M.

- 1 Excommunicationis nomen, si absolute proferatur, accipi solet pro maiore: quæ aliquis propter contumaciam ab Ecclesia communione separatur.
- 2 Triplex est communicatio inter fideles, merè interna, merè externa, & mixta.
- 3 Ecclesia neminem priuare potest communione fidelium merè interna, quæ est per fidem ac charitatem.
- 4 Pro excommunicatione tunc est orare priuata intentione: etiam in memento Missæ.
- 5 Ecclesia per excommunicationem priuat hominem communibus suffragijs, & sacramento, & fidelium consuetudine.
- 6 Excommunicatio est pena, quæ nulla maior in Ecclesia est. Communitas collectiue excommunicari non potest.
- 7 Anathema ab excommunicatione essentialiter non differt.



EXCOMMUNICATIO est censura, per quã aliquis ab Ecclesiæ communione separatur. Diuidi solet in maiorem ac minorem. Maior est, quæ à communione fidelium simpliciter separat. Minor, quæ à communione fidelium separat secundum quid,

videlicet secundum vsum passiuum, seu perceptionem sacramentorum tantum, sicuti habetur in c. si quem, de excommun. Ex quo colligitur, nomen excommunicationis esse analogum attributionis; ideòque, si absolute ponatur, accipiendum esse pro principali, seu maiore excommunicatione, sicuti expresse dicitur in cit. c. si quem. Præterquam, si ex adiunctis aliud colligi debeat, videlicet ea solum prohiberi vsum sacramentorum passiuum, sicuti videre est c. cum excommunicatio 11. q. 3. & c. Sacerdos e. d. 1. de consecrat. vel solum perceptionem sacræ Eucharistiæ, vt in c. qui verò, 11. q. c. de presbyterorum, 17. q. 4. Vide Suar. disp. 8. l. 3.

Omissa autem excommunicatione minore, de qua postea dicam; Maior excommunicatio fundamentum habet in verbis Christi apud S. Matth. c. 18. *Si Ecclesiam non audieris, &c. quorum sensum tradidi parte præced. cap. 5. n. 1. Et in facto Apostoli, qui ad Corinth. 5. 1. ad Timoth. 1. quosdam Satana tradidisse se ait, quando eos excommunicauit, siue ex consortio fidelium tanquã exules eiecit, sicuti colligitur ex verbis cit. cap. 5. Cur non magis luctum habuisti, vt tollatur de medio vestri, qui hoc opus fecit? Siquidem, vt apud Gratianum legimus causa 11. q. 3. Omnis Christianus, qui à Sacerdotibus excommunicatur, Satana traditur: quia extra Ecclesiam Diabolus est, sicuti*



sicuti in Ecclesia Christus. Vide plura apud Sotum in 4. d. 22. q. 1. a. 1. Bellar. lib. 3. de Ecclesia militante, c. 6. & Gratianum cit. q. 3. illud imprimis quod can. 17. ex Arausicano concilio refert: *Canonica instituta, & SS. Patrum exempla sequentes, Ecclesiarum Dei violatores, auctoritate Dei, & iudicio S. Spiritus, à gremio S. Matris Ecclesiae, & à consortio totius Christianitatis eliminamus, quoadusque resipiscant, & Ecclesiae Dei satisfaciant.* Et S. Augustinus ex verbis Christi Matth. 16. excommunicandi potestatem ostendit in epist. 75. ad Auxiliu: *Spiritualis* (non politica, ut haeretici nostri putant) *pœna est anathema, quæ sit quod scriptum. Quæ ligaueris in terra, ligata erunt in cælis, animas obligat.*

Sed ut plenè intelligatur, in quo ista excommunicatio siue eiectio extra communionem Ecclesiae consistat; imprimis aduertendum est ex doctrina S. Bonau. in 4. d. 18. q. 1. Couar. c. alma in princ. n. 3. Auila p. 1. de censur. dub. 2. concl. 3. Suar. cit. disp. 8. l. 1. n. 6. Triplicem esse fideliu communicationem; purè internam, purè externam, & mediam siue mixtam. Purè interna fidelium communicatio consistit in Fide ac Charitate, per quam fideles inter se, & cum Christo mystice copulantur, sicuti docet Apostolus ad Rom. 12. 1. ad Corinth. 12. ad Ephes. 4. Ratione cuius vnionis vnus fidelis alteri ex congruo impetrare à Deo potest specialia beneficia; atque satisfactiones, si alter capax est, applicare. Quapropter Dauid dixisse videtur Psal. 118. *Particeps ego sum omnium timentium te.* Et Dominus Abrahamo cap. 18. Gen. promisit, se nō deleturum Sodomitas, propter decem iustos, si inuenti fuerint in ciuitate. Purè externa communicatio politica est, consistens in fidelium conuictu, colloquio, commercijs. Media siue mixta communicatio est, quæ in exterioribus actionibus vel ceremonijs existens, interiorē ac spirituale fructū ex propria institutione continet. Huc spectat imprimis vsus tum actiuus, tum passiuus Sacramentorum: deinde Ecclesiae suffragia, quæ in Sacrificio, alijsue publicis officijs ad Deum pro vniuersa Ecclesia funduntur: Item satisfactiones Christi & Sanctorum, quæ excommuni Ecclesiae thesauro per indulgentias fidelibus iustis applicantur. Cū enim Ecclesia visibilis sit, ideo communicatio ista seu applicatio communium orationum & satisfactionum per sensibilem actionem fieri debet.

Hoc posito certum est primò; Quòd Ecclesia nec vult nec potest quempiam priuare communicatione bonorum merè internā, quæ est per Fidem ac Charitatem; quippe quibus nemo inuitus spoliatur. Adde nihil obstare, quo minùs vera Fides ac Spes excommunicato, aliāue censura irretito permaneat. Neque charitatem excommunicatio homini adimit, sed potius supponit ademptā per mortalem contumaciæ culpam, postea verò fieri potest, ut homo priusquam ab excommunicatione absolua-  
3 tur, in gratiam & amicitiam cum Deo per contritionem redeat.

Certum est secundò; quòd Ecclesia excommunicatum non priuet fructu orationum & satisfactionum, quas alij fideles proprio nomine, & priuata intentione ipsi applicant. Cū enim huiusmodi actiones siue opera pia cuiusque operantis propria sint, ideo ad ipsius liberam applicationem, & non ad Ecclesiae dispensationem spectant. Eapropter nemo prohibetur pro excommunicatis, etiam non toleratis, priuatim Deum orare. Et, quamvis Sacerdoti non liceat sacrificium Missæ, vel Ecclesiasticum aliquod officium, quatenus id publicum est, facere pro excommunicatis non toleratis; potest tamen pro eisdem, sicuti & pro alijs hominibus, priuata intentione Deo offerre actionem sacrificandi, vel horas canonicas recitandi, quatenus est opus proprium operantis, & ea ratione satisfactorium, vel etiam ex congruo impetratorium, sicuti optimè notauit Nau. c. 27. n. 36. §. ad quintum. Couar. c. alma, p. 1. §. 6. n. 4. concl. 6. Syl. ver.

excommun. 1. n. 2. Auila. p. 2. c. 6. disp. 4. dub. 1. concl. 2. Item potest Sacerdos pro excommunicatis, etiam non toleratis, orare in *Memento*, & offerre Sacrificium, tanquam persona priuata: sicuti & alij circumstantes, vel cooperantes priuata intentione pro eisdem orare, & Sacrificium offerre possunt, sicuti docent Syl. Sotus & alij cit. locis, & dicam lib. 5. tract. 4. c. 2. assert. ult.

Tertiò certum est; Quòd Ecclesia, ob iustam causam, hominem inobedientem ac contumacem, per excommunicationis censuram priuare possit communibus suffragijs & satisfactionibus; item interdicare vltimum actiuo, tum passiuo Sacramentorum, & Sacrificij, quatenus ea ministeria publica; ideoque Ecclesiae dispensationis à Christo demandata sunt; ut proinde ea indignis prohibere possit, quamuis illorum vim ac valorē, ex Christi institutione pendente, impedire nequeat, sicuti dicam cap. seq. & lib. 5. cit. tract. 4. c. 2. n. 5. ver. 4.

Quartò certum est; quòd Ecclesia per excommunicationem criminoso interdicare etiam possit externam societatem & conuictum fidelium. Nam quauis Respubl. potestatem habet subditum rebellem à reliquorum ciuiu consortio excludendi: Ergo etiam ad Ecclesiam pertinet, quæ perfectissima & ad supernaturalem finem ordinata Respublica est, ut subditos sibi in obediētes à reliquorum fidelium consortio separet: tum ne alios morbi contagione inficiant, uti S. August. aduertit lib. de corrept. & gratia, c. 15. tum ut ipsi tanto magis pūdefacti, citius resipiscant, & curentur, iuxta e. cū non ab homine, de sent. excommun. & videri potest S. Bonauent. in 4. d. 18. q. 1. Ex quibus denique intelligitur, quomodo intelligendum sit, quòd Patres & Concilia passim dicunt, hominem per excommunicationē à corpore Christi mystico separari (*ἀποχριστοῦ*) atque extra Ecclesiam eiici: videlicet non secundum internam & fundamentalem excommunicationem, quæ est per Fidem ac Charitatem: sed secundum externam. sensibilem, eamque, quæ est communium spiritualium bonorum, ex Ecclesiae voluntate ac dispensatione pendentium, communicationē: ut proinde rectè definita sit excommunicatio à dicto lib. 1. c. 4. *Separatio à communione Ecclesiae, quo ad Sacramenta, & publica suffragia, atque fidelium conuictum.*

Ex hac definitione colligitur: Excommunicationem esse pœnam, qua nulla maior in Ecclesia est, ait S. August. cit. c. 15. relatus in c. corripantur, 24. q. 3. Quare ad eam deueniendum non esse, nisi posteaquam monitionibus, ac plerumque alijs leuioribus pœnis & censuris nihil obtineri potuit, iuxta c. tam Sacerdotes. c. ecce autem, ead. q. & Trident. sess. 25. de reformat. c. 3. dummodò etiam tunc spes aliqua fructus affulgeat ad reum emendandum, vel saltem bonum publicum promouendum. Nam alioquin omni censura abstinendum erit: cū sit pœna medicinalis, ideoque finis ejus esse debeat salus delinquentis: vel certè communicatis, ut supra dictum.

Quæ ipsa etiam ratio est: Cur Collegium, Capitulum, & quoduis aliud corpus politicū simul ac collectivè excommunicari non possit. c. Romana, de excommun. in 6. Vbi ita legimus. *In vniuersitatem vel Collegium proferri excommunicationis sententiam penitus prohibemus, volentes animarum periculum vitare, quod exinde sequi posset: cū nonnunquam contingeret, innoxios huiusmodi sententiam irretiri: sed in illos duntaxat de Collegio, vel vniuersitate, quos culpabiles esse contigerit, promulgetur.* Cū enim excommunicationis pœna hominē priuet spiritualibus maximis bonis, quæ ad animum propriè pertinent: infligi ea non debet, nisi ob propriam grauem culpam, ac in obediētiā. Quare neque Papa propter vnus, vel plurium contumaciam, totam Communitatem excommunicationi subiicere potest. Si tamen, præmisso examine, exploratum fuerit, omnes ac singulos à Communitate delicti participes, & in eo contumaciter persistentes esse: tunc in



omnes sigillatim ac determinatè, præmissa canonica monitione, excommunicationis sententia proferri haud dubiè poterit, vti colligitur ex cit. cap. Romana, in fine, & docet Nauar. lib. 5. consil. 20. de sent. excom. dicto 4. edit. 1. Auila p. 2. c. 4. d. vn. dub. 5. Suar. disp. 18. f. 2.

Ad extremum quæret aliquis, quid sit anathema, & quomodo à maiore excommunicatione differat? Respōdeo cum Syl. ver. excommun. 1. in fine, Suarez disp. 8. f. 2. num. 4. Egidio disp. 14. dub. 1. Anathema ab excommunicatione maiore essentialiter nō differt: quare interdum pro eodem accipiuntur, sicuti videre est in Trident. sess. 25. cap. 3. de reformat. Dicitur enim *ἀναθεμα* quasi suspensio, seiunctio, seu separatio alicuius ab Ecclesia, tanquam maledicti & execrandi. Cuiusmodi separatio excommunicationis propria est. Videri potest S. Thom. in cap. 1. ad Galat. Frequenter tamen vox anathematis in sacris canonibus peculiariter vlturpari solet, partim ad exaggerandam sententiæ seueritatem in excommunicandis hæreticis, qui omnino à Christi corpore & Ecclesia auulsi declarantur: partim ad significandas accidentales solēnitates, vt excommunicatio fiat cum publica denuntiatione, & condemnatione, adhibitis ceremonijs terrorem & culpæ exaggerationē inducentibus: videlicet, vt duodecim Presbyteri Episcopum circumstant, qui lucernas ardentes in manibus teneant, easque, in detestationem excommunicati, in terram proiciant, ac pedibus conculcent, sicuti habetur in c. debent. 11. q. 3. Qua ratione etiā explicari potest c. cum non ab homine, de iudicijs. Alijs verò canonibus, puta c. Engeltrudam, 3. q. 4. c. nemo Episcoporum, 11. q. in quibus apertius distinguitur excommunicatio ab anathemate, videtur sermo esse non de excommunicatione maiore, sed minore, vel patriali. Vide Gl in cit. c. Engeltrudam, Nau. in comment. de datis & promissis pro iuiticia not. 4. & 5. Suarez f. 2. n. 9.

## CAP. II.

## De effectibus excommunicationis.

## S V M M A R I V M.

- 1 Excommunicato Sacramenta suscipere non licet: Validè tamen ea suscipit, excepto sacramento Pœnitentiæ.
- 2 Excommunicatus priuatur communibus Ecclesiæ suffragijs, & satisfactionibus.
- 3 Excommunicatus, per quem stat quò minus absoluat, videtur peccare contra Ecclesiasticum præceptum, quando in Pœnitentiæ, atque Eucharistiæ.
- 4 Excommunicatus, licet emendatus sit quamdiu tamen absolutionem non accepit, non videtur gaudere Ecclesiæ suffragijs.
- 5 Excommunicato interdictus est usus altarium, seu administratio Sacramentorum: Valet tamen Sacramentum, si ab excommunicato ministratur: excepto Pœnitentiæ, quippe ad quod iurisdictio requiritur, quæ excommunicatus non toleratus caret.
- 6 Excommunicato prohibitum est diuina officia celebrare.
- 7 Excommunicatus inhabilis est ad beneficia Ecclesiastica, quare electio eius, aut presentatio, itēque institutio irrita est: quāuis electus, institutus suam excommunicationem ignoret.
- 8 Excommunicatus incapax etiam est pensionis Ecclesiasticæ.
- 9 Si excommunicatus in contumacia, vel mora petenda absolutionis persistens, officium suum nec per se, nec per alium obeat, fructus beneficij percipere non potest: Sin verò officium præstet: quāuis peccet, tamen probabile est, quod fructus in conscientia foro retinere possit.
- 10 Si excommunicatus à contumacia recessit, neque per eum stat quo minus absoluat, fructus beneficij percipere potest, licet officium suum non præstet, quia non potest: sicuti & beneficiarius infirmus percipit fructus, esto culpa sua causam infirmitatis præbuerit.
- 11 Ad beneficium legitime electus, si postea in excommunicationem lapsus est, non potest illud durante excommunicatione acceptare.
- 12 Rescriptum Sedis Apostolicæ ab excommunicato impetratum non valet.

- 13 Excommunicatus non toleratus omni exercitio Ecclesiasticæ iurisdictionis priuatus est: quare nec eligere potest, nec presentare.
- 14 Excommunicatio hominem priuat communicatione forensi: Si tamen Actor, Aduocatus, & Testis in iudicio, neque à Iudice, neque per aduersarij exceptionem repellantur, acta eorum valent: secus est de Iudice non tolerato, cum iurisdictio ne priuatus sit.
- 15 Neque Tabellionis excommunicati ac citandi instrumentum authenticum censeri potest.
- 16 Excommunicato prohibita est omnis politica fidelium communicatio; præterquam in casibus, iure aut necessitatis ratione exceptis.
- 17 Excommunicatio nihil obstat, quò minus contracta debita solui, aut exigi possint.
- 18 Si excommunicatus anno integro in excommunicatione contumaciter perseueret, de hæresi suspectus redditur.
- 19 Si excommunicatus ante absolutionem moriatur, sepultura Ecclesiastica priuatur.

**P**rimus effectus est. Excommunicato interdicta est susceptio, siue vsus passiuus Sacramentorum, c. cum illorum. c. si quam, de sent. excommun. Excusat tamen grauis necessitas ob euitandum periculum mortis, mutilationis, infamiae, iacturæ bonorum, scandali: quia lex & censura Ecclesiastica non obligat cum tanta seueritate.

Sed etsi aliquis sine tali necessitate, ideò q; mala fide atque illicitè Sacramenta suscipiat sciens se excōm. esse, nihilominus vaide ea suscipit: quia natura & virtus Sacramentorū, ex Christi institutione dependens, iure Ecclesiastico impediri non potest. Excipitur verò sacramentū Pœnitentiæ, quod saltem indirectè inualidum redditur, propter indispositionem pœnitentis: si is cenuram excōm. communicationis suæ non ignorans, nullaque necessitate cōstrictus, ideòque sacrilege Sacramentum petat, sicuti benè notauit Nauar. in man. cap. 9. num. 5. quamuis contrarium videatur sentire Caiet. ver. absolutionis impedimenta. At verò si ponamus excommunicatum bona fide peccatorum confessionē instituere, videlicet in casu necessitatis, aut probabilis ignorantiae: tunc nihil obstat, quò minus verè & sacramentaliter absoluat a peccatis, remanente censura excommunicationis: si vel ea Superiori referuata sit: vel si referuata non sit, Confessarius absoluendi potestate præditus per obliuionem, aut inscitiam, à peccatis prius, quàm à censura absoluat. Quæ est sententia Caiet. l. c. Nau. c. 29. man. num. 4. & c. fratres, num. 40. & seqq. d. 5. de pœnit. Medina in summa. lib. 1. c. 11. §. 3. Auila p. 2. c. 6. disp. 3. dub. 4. Egid. disp. 14. dub. 5. contra Sotum 4. d. 22 quæst. 1. a. 1. prope finē Vide quæ dicam lib. 5. de sacrament. pœnit. c. 12. num. 10.

His adde, quod Clerici, qui scientes & sponte aliquem à Papa nominatim excommunicatum, aut saltem denuntiatum ad diuina admittunt, participando cum eo in diuinis officijs, aut Sacramentis, ipso iure excommunicationem maiorem incurrunt Papæ referuatam, c. significauit, de sentent. excommun. & Clem. 3. eod. tit. Cuius censuræ interpretationem vide apud Caiet. in summa, ver. excommun. c. 58.

Secundus effectus est. Excommunicatus priuatur communibus Ecclesiæ suffragijs, quæ ex publicis ministrorum officijs & Sacrificijs, fidelibus provenire solent; item fructu satisfactionum, qui excommuni Ecclesiæ thesauro per indulgentias, Prælatorum auctoritate, applicatur. Ita docuit S. Gregor. I. lib. 2. dialog. c. 23. & Scholastici in 4. d. 18. & sumitur ex c. à nobis, 2. c. sacris, de sent. excommun. Nam horum spiritualium bonorum Ecclesia vel domina est, vel saltem dispensatrix, vt proinde ea indignis ac contumacibus denegare possit, ob maius bonum tum publicum, tum etiam ipsorummet, qui tanto malo perculsi, ad mentem meritò redire deberent, promouendum. Nihil enim inquit S. August. tract. 27. super Ioan. cap. 6. relatus in c. nihil, 11. quæst. 3. sic debet formidare Christianus, quam separari à Corpore Christi: tunc enim non vegetatur spiritus eius. At verò excommunicatus ea vel maximè ratione à corpore Christi mystico separatur quatenus



quatenus communibus orationum & satisfactionum auxilijs, seu suffragijs priuatus, ac derelictus, quasi Sathanæ traditur magis infestandus, sicuti significat Apostolus 1. Corinth. 5. & explicat Suar. disp. 9. sect. 2. num. 2.

Quæri autem hic solet. Vtrum excommunicatus, si in procuranda absolutione negligens sit, peccet etiam contra Ecclesiasticum præceptum de audienda Missa, annua confessione, & paschali communione? Ad quod probabiliter respondetur primò cum Man. c. 21. num. 3. Suar. 3. p. to. 3. disp. 88. sect. 6. Non peccare contra præceptum audiendæ Missæ. Quia quamdiu in excommunicatione est, Missam audire non debet. Sed neque ratione præcepti obligatus videtur, vt se disponat & impedimentum tollat; cum ea dispositio valde remota sit: quemadmodum nec is, qui sua culpa in vinculis detinetur, contra præceptum de Missa audienda festo die delinquit.

3 Respon. secundò, Excommunicatum, voluntariè in excommunicatione persistentem, peccare contra præcepta, etiam quatenus Ecclesiastica sunt, suscipiendi sacramenta Pœnitentiæ & Eucharistiæ, sicuti indicat Nau. c. 21. num. 34. & docet Suarez l. c. Agid. disp. 14. dub. 7 num. 57. contra Auilam p. 2. c. 6. disp. 4. dub. 7. Quia illa præcepta per se obligant ad mundandam animam, & consequenter ad tollenda vincula tum mortalium peccatorum, etiam excommunicationis.

Altera quæstio est. Vtrum excommunicatus, cum primùm à culpa & contumacia recessit, & per contritionem vel confessionem iustificatus est, communium suffragiorum & satisfactionum particeps fiat: præsertim si per ipsum non stet, quominus per Iudicis sententiam absolua-  
4 tur? Ita affirmant Anton. 3. p. tit. 24. c. 76. Richar. in 4. d. 18. a. 7. quæst. 2. Couarruu. c. alma, p. 1 §. 6. conclus. 9. Nau. c. 21. num. 18. Auila p. 2. c. 6. disp. 4. dub. 2. Fundamentum est: Quia videtur esse alienum à pietate Ecclesiæ, velle eum priuare spiritualibus communibus auxilijs, & Sathanæ insidijs obijcere, qui à culpa & inobedientia, cuius causa tanta ipsi pœna inflicta est, penitus recessit. Confirmatur ex eo: Quia talis est viuum membrum Christi & Ecclesiæ, ideòque vegetari debet communi spiritu, & influxu; non minùs quàm alia membra.

Contraria sententia est probabilior, quam docet Sotus in 4. d. 22. quæst. 1. a. 1. §. attamen dubium, Alanus lib. 2. de sacram. Euchar. c. 31. Suarez disp. 9. f. 3. Agid. disp. 14. dub. 7. difficult. 2. & sumitur apertè ex c. à nobis, 2. c. sacris, de sent. excommun. vbi Innoc. III. respondit, pro excommunicato, qui ante absolutionem mortuus est, tamen si manifesta pœnitentiæ signa dederit, & per eum non steterit quo minùs absolueretur, neque elemosynas, seu oblationes recipiendas, neque publicas orationes instituendas esse: quia licet vinculum culpæ, quo peccator ligatus est apud Deum, per pœnitentiam solua-  
4 tur: vinculum tamen censuræ, quo per Ecclesiæ sententiam ligatus est sine eiusdem Ecclesiæ iudicio & absolutione non relaxatur. Ex qua responsione imprimis habemus, quòd excommunicatus, licet emendatus sit, priuquam tamen absolua-  
4 tur, verè censura ligatus maneat; & tum alios omnes eius effectus sustineat, tum verò speciatim hunc ipsum, quòd publicis Ecclesiæ suffragijs priuatus sit: quandoquidem non aliunde scimus, excommunicatum, inter alia, etiam his communibus Ecclesiæ suffragijs, &c. priuatum esse, quàm quia Ecclesia, ex cuius voluntate & dispensatione dependet, non vult ac prohibet ea pro excommunicatis fieri: cum igitur expresse interdicit, etiam pro emendato, sed nondum absoluto offerri, & orari: rectè inde colligimus, eum fructu suffragiorum communium interim priuatum esse.

Deinde ex eadem responsione Innocentij satisfit fundamento contrariæ sententiæ: Videlicet, quòd censura excommunicationis non sit culpa: sed pœna, quæ ablata etiam culpa, permanet: donec à Iudice remittatur. Quàmuis autem, deposita culpa & contumacia, censura remit-

ti debeat: non tamen priuato, sed publico iudicio & absolutione. Ad confirmationem respondeo: Excommunicatum, si contritus & emendatus sit, participare internum influxum Fidei viuæ seu Charitatis, atque in illa fundatam communionem seu societatem Sanctorum, propter quàm quilibet fidelis iustus respectuè gratior Deo est, vt ipsius orationes faciliùs exaudiat, maioreque prouidentia eum tueatur propter consortium aliorum, quibuscum Fide & Charitate coniunctus & vnitus est: non tamen participare influxum eius spiritualis auxilij, qui ex publicis, atque ab Ecclesiæ intentione dependentibus suffragijs prouenit: cum eorum priuatio sit pars quædam censuræ, qua homo ille, vt ponimus, nondum liberatus est.

Tertius effectus Excommunicato prohibita est administratio, siue vsus actiuus Sacramentorum, sicuti colligitur ex c. vlt. de clerico excommunicato, &c. Nam ministratio Sacramentorum, cum sit ministerium publicum, Ecclesiæ à Christo commissæ est: vt proinde eam indignis ac contumacibus interdicare iure possit. Excipitur tamen casus necessitatis, qualis, vt supra dictum est, censura Ecclesiastica haud comprehenditur. Quapropter minister excommunicatus, non tantum sacramenta Baptismi & Pœnitentiæ administrare poterit, si alius non adsit, qui in extrema necessitate ministret: sed etiam accidere potest casus, in quo Sacerdoti etiam non tolerato, S. Eucharistiam vel Extremam unctionem morituris, qui aliud Sacramentum suscipere nequeunt, ministrare liceat, vt notauit Nau. c. 22. n. 4. Suar. disp. 11. f. 1. n. 17. Auila p. 2. c. 6. disp. 3. dub. 3. concl. 4. Idemque multò magis sentiendum de specialiter interdicto, ac denunciato.

Porro, licet excommunicatus, sine necessitatis causa, adeoque temere ac mala fide, nihilominus validè administrat Sacramenta: quippe quorum substantia, vis, & valor propria materia, forma atque intentione ministri secundum Christi institutionem perficitur: neque illa Ecclesia mutare potest: sed solum ordinare, quæ ad accidentalem & magis conuenientem Sacramentorum administrationem spectant.

Veruntamen à tradita doctrina excipi debet sacramentum Pœnitentiæ. Cum enim ad eius administrationem non tantum potestas ordinis requiratur: sed etià iurisdictio, quæ ab Ecclesiæ Prælati inferioribus ministris confertur, & propter censuram excommunicationis eisdem aufertur, sicuti infra dicam; sequitur, absolutionem irritam esse, quæ fit à Sacerdote excommunicato non tolerato, quippe cui omnis iurisdictio per censuram adempta est: præterquam si publicus error facti cum titulo præsumpto interueniat, sicuti constat ex ijs, quæ dixi tract. præc. c. 22. n. 9. Hinc verò generalem regulam tradunt Nau. c. 27. n. 36. in fin. Auila p. 2. c. 6. disp. 6. dub. 3. in fin. Suar. disp. 11. f. 2. n. 9. Agid. Coninex disp. 14. dub. 10. in fin. Quotiescunque excommunicatus non toleratus exercet actum prouenientem, aut pendentem à potestate iurisdictionis, irritus censendus est: puta si Episcopus, Confessarios approbet, vel ipse aut Parochus alicui deleget facultatem confessiones audiendi, aut quoduis Sacramentum ministrandi, item matrimonio assistendi. Sin verò actus non requiratur iurisdictionem, sed solam ordinis potestatem: cuiusmodi est non tantum Sacramentorum administratio: sed etiam variæ benedictiones, & consecrationes: talia valida sunt, tamen si fiant à ministro excommunicato: quia licet Ecclesia posset ad horum sacramentalium valorem requirere, vt minister toleratus sit, re ipsa tamen non requirit, sed solum vt licitè ministrentur.

6 Quartus effectus Excommunicato prohibitum est diuina officia celebrare, siue interesse, sicuti colligitur ex c. significauit, c. nuper, c. responso, de sent. excom. c. alma, eod. in 6. Nomine diuinorum officiorum intelliguntur sacræ functiones, quæ ab Ecclesiâ publicè ac solemniter fiunt: Cuiusmodi in primis est Missæ sacrificium,



cui si excommunicatus non toleratus interesse præsumat, monendus est ut discedat, sicuti colligitur ex Clem. grauis, de sent. excom. ubi noua etiam excommunicatio Papæ reservata decernitur: si exire iussus non paruerit. Tunc verò, si id commodè fieri possit, expellendus est opera laicorum, tametsi Regularis: vel Sacerdos sit, qui ei ieiatur: Si laici non adsint, neque vocari possint, etiam Clerici eum expe lere debent, arg. c. veniens, de sent. excom. Quod si expelli non possit, Sacerdotem ab altari recedere oportet, nisi canonem Missæ cœperit, secundum Syl. ver. excom. 5. n. 3. secundum alios vero apud Auil. p. 2. c. 6. §. 9. dub. 8. Suar. disp. 12. f. 1. n. 11. tametsi canon cœptus sit, sed nondum consecratio paracta. Sed existimo, si verba illa proximè antecedentia consecrationem, *Qui pridie, quàm pateretur*, dici cœpta, non posse discedere Sacerdotem: at verò alij omnes, præter altaris ministrum, recedere coguntur: quia cum excommunicato non tolerato communicare in sacris officiis non licet. Sacerdos a sacrificium perficere debet usque ad calicis sumptionem: tum iterum monito excommunicato, ut recedat; si nolit, ipse quoque abire debet, & quæ reliqua sunt Missæ, in sacrificia peragere; vel si talis locus non sit, omnino intermittere. Debent tamen hæc intelligi de sacrificio Missæ, comparatione eius duntaxat altaris. cui excommunicatus assistere præsumit: nam interim nihil obstat, quo minus in alijs altarib. Missa peragatur, præsentib. etiam fidelib. sicuti notauit Suar. disp. 12. f. 1. in fi.

Alia diuina officia sunt canonicarum horarum preces, omnis publica oratio, processio, item benedictio, consecratio, vel similis ceremonia, quæ ex Ecclesiæ vel Christi institutione à ministris ad id ordinatis solemniter fit. Porro priuatim orare, etiam in Ecclesia, vel concionem ibi audire, dum in ea nullum diuinum officium celebratur excommunicatis prohibitum non est, sicuti docet Henriq. lib. 13. c. 7. n. 2. Suar. disp. 12. f. 2. & colligitur ex c. responso, de sent. excom. Quare si alias ratione ordinis, aut beneficij obligationem officij canonici recitandi aliquis habuit, ea propter excommunicationem haud liberatur: ne ex propria iniquitate commodum ferat, sicuti ex communi notauit Abb. in c. 2. n. 8. de Clerico excommunicato ministrante, Syl. ver. horæ, n. 4. Nau. c. 25. n. 102. & de horis canon. c. 7. n. 18. Couar. 3. resol. c. 13. n. 8. §. duodecimo, Auila p. 2. c. 6. disp. 4. dub. 6. Suar. disp. 12. f. 2. n. 13. & disp. 14. dub. 7. Qui addunt, idem dicendum esse: tametsi beneficiatus propterea, quod in excommunicatione officium præstare non possit, fructibus interim priuetur: quia ipsius culpa id accidit, siue per eum stat, quo minus fructus percipiat. *Dammum autem, quod quis sua culpa sentit, sibi debet, non alijs imputare*, regul. 86. in 6. Et Pomponius reg. 203. ff. *Quod quis ex sua culpa damnum sentit non intelligitur damnum sentire*.

Notant verò Doctores communiter, excommunicatum horas canonicas recitantem non posse dicere, *Dominus vobiscum*; cum hæc verba significant publicæ persone videlicet Sacerdotis, vel Diaconi sacram cum populo communicationem, excommunicato interdiktam: quare loco illius dicendum esse, *Domine exaudi orationem meam*. Cæterum si priuatim recitetur officium, non videtur hæc esse obligatio sub mortali: quia materia grauis non est. Alioquin dicere deberemus etiam Clericum non excommunicatum, Diacono inferiorem, si in priuata recitatione dicat, *Dominus vobiscum*, mortaliter peccare, & irregularem fieri, usurpando actum alieni Ordinis, quod falsum videtur. Imò Auila cit. dub. 6. conclus. 3. cum alijs quibusdam nullum omnino peccatum esse putat, si excommunicatus priuatim recitans dicat *Dominus vobiscum*; sed contra communem, ut dixit.

8 Quintus effectus. Excommunicatus inhabilis est ad quoduis Ecclesiasticum beneficium accipiendum: quare præsentatio, vel electio illius: item institutio ac confirmatio ipso iure irrita est, sicuti colligitur ex c. postulastis, & c.

ult. de Clerico excommunicato, &c. Idque verum est, tametsi excommunicatus, etiam toleratus, suam excommunicationem ignoret, sicuti docet Gloss. communiter. recepta in c. penal. de Cler. excommun. Couar. c. alma, p. 1. §. 7. num. 3. Henriq. lib. 13. c. 3. num. 3. Garcias p. 7. de benef. c. 13. num. 9. Suarez disp. 13. sect. 1. num. 3. Aegid. dub. 9. Auila p. 2. c. 6. disp. 5. dub. 2. Less. lib. 2. 34. num. 117. contra Nauar. in c. fratres, d. 5. de pœnit. num. 45. Quia licet ignorantia obligationis aut præcepti reddat aliquem immunem à culpa, & inde resultante pœna vel censura, c. Apostolica, de Clerico excommun. non tamē ignorantia contracti impedimenti, siue inhabilitatis, aliquem habilem reddere potest. Cæterum, qui bona fide beneficiū accepit, ei que deseruiuit, licet postea, impedimento cognito, teneatur illud derelinquere, fructus tamen suæ congruæ sustentationi debitos, vel quos bona fide absumpsit; neque inde ditior factus est, restituere non cogitur, sicuti latius dicam lib. 4. tract. de benef. Ecclesiast. cap. 15. num. 3.

Monet verò Suarez disp. 13. sect. 1. num. 7. Henriq. lib. 13. c. 14. num. 1. dictam inhabilitatem extendendam esse ad quoduis munus vel dignitatem Ecclesiasticam, præter Papalem: v. g. ad munus Legati Apostolici, Inquisitoris. Episcopalis administratoris, Prælati Ordinis: Item ab munus eligendi, beneficia conferendi, &c. arg. c. postulatis, de Clerico excommun. ubi ratio affertur, cur excommunicatis beneficia Ecclesiastica conferri non possint; quod cum *ipsis communicari non debeat*: assumptio autem ad quoduis Ecclesiasticum munus, vel dignitatem, magna quædam, eaque Ecclesiastica communicatio est. Alia eaque firmitior ratio sumi potest ex regula, quam tradit Abbas in c. ult. de Clerico excommun. num. 3. *Prohibet a exercitio actus, censetur prohibitum illud omne, per quod peruenitur ad illum actum*. Atqui excommunicato prohibitum est exercitium ecclesiastici muneris vel dignitatis: Ergo etiam institutio siue collatio illius, quippe quæ per se ordinatur ad exercitium. Probabile tamen est, si facta collatione excommunicato, suspensio, &c. antequam is acceptet, à censura absoluator, acceptionem validam fore, dummodo interea collator conferendi voluntatem non mutarit, sicut docet Less. lib. 2. c. 34. num. 119.

Hinc Quæstio resolui potest: Vtū pensio cōferri possit excommunicato? Negat absolute Gigas de pensio. quæst. 14. Couar. c. alma, p. 1. §. 7. num. 2. Suar. disp. 13. sect. 1. num. 7. Sed rectius, ut puto, distinguit Auila p. 2. c. 6. disp. 5. dub. 5. Est enim triplex pensio, sicuti videre etiam est apud Tolet. lib. 6. c. 82. & dicam infra lib. 4. tract. de beneficijs, c. lt. num. 2. Vna spiritualis, quæ in spirituali titulo fundatur; siue ob spirituale ministerium conferitur, v. g. Concionatori, Episcopi Coadiutori, Parochi Cooperatori: Cuiusmodi pensionis omnino incapax esse videtur excommunicatus, aut irregularis: quia sicuti beneficium; ita & pensio hæc propter spirituale officium datur: quare cum excommunicatus & irregularis officium præstare non possint, non minus inualide huiusmodi pensio illis conferitur, quàm beneficium.

Altera est pensio temporalis seu laica, quæ in temporalis titulo fundata, siue propter temporale aliquod obsequium designata, laicis etiam personis competere potest: Cuiusmodi pensionem probabilissimum est excommunicato & irregulari conferri posse: quia à spiritualis beneficij natura plurimum recedit; ac potius temporalis stipendij rationem obtinet. Tertia denique est pensio mixta, quæ licet ob spirituale ministerium non conferatur, tamē statum clericalem requirit, & plerumque loco beneficij datur Clerico v. g. resignanti, permutanti, lite cedenti, sustentationem sufficientem non habenti: quare non nihil affinitatis cum Ecclesiastico beneficio gerit, atque eisdem ferme modis, quibus beneficium amitti solet, teste Flamin. Paris. de resignat. benef. lib. 3. quæst. 1. num. 31.



Garcia de beneficijs, p. 1. c. 5. num. 106. Nihilominus probabile est, huiusmodi etiam pensionis excommunicatum & irregularem capaces esse posse, propter declarationem Cardinalium super sess. 14. Trident. Concilij, c. 7. *Incapacitatem homicida ad beneficia extendendam non esse ad pensiones*: Quæ verba intelligi non posse videntur de pensione merè spirituali, quæ ob spirituale officium, cuius irregularis incapax est, confertur; sed de omni alia pensione, quæ ob aliam causam seu laico, seu Clerico designatur. Vide Garciam l. c. n. 137. & Suarez de censuris prope finem, dis. 44. n. 34.

**ALTERA. QVÆSTIO.** Vtrum excommunicatus fructus sui beneficii interim percipere possit: an potius Ecclesiæ, vel pauperibus restituere in conscientia cogatur? In qua questione imprimis supponendum est. Clericum per excommunicationis censuram ipso facto non excidere titulo ac possessione beneficii antè acquisiti: quavis, si excommunicatus per annum in excommunicatione infordescat, beneficijs suis privari possit, secundum Gl. & Innocent. in c. cum bonæ, de arate & qualitat. ver. spoliare, Sylvest. ver. excommunicatio, 3. n. 1. dicto 9. ducto argum. ex c. rursus, 11. qu. 3. ex quo tamen nihil conuinci potest: quare ad Ordinarium spectabit examinare, vtrum crimen, iunctâ contumaciâ tam diuturnâ, beneficii priuationem mereatur, nec ne.

Verum, quod ad fructus beneficii attinet, ijs excommunicatum ipso iure priuatum esse, vt ante Iudicis condemnationem restituere teneatur, docent Sylvest. l. c. Couar. 3. resolut. c. 13. num. 8. Gutierrez l. can. q. c. 1. n. 92. Suar. dis. 13. sect. 2. Garcias p. 7. de beneficijs, c. 13. nu. 92. Abb & alij Canonistæ in c. pastoralis, §. verum, de appellat. ducto argumento ex ijs verbis: *illi prouentus Ecclesiastici merito subtrahuntur, cui Ecclesia communio denegatur*. Quæ tamen si rectè perpendantur, solum significant, excommunicatum per Iudicis sententiam fructibus spoliandum esse, quos tempore contumaciæ percepit, sicuti docet Gloss. in cit. §. Verum, verb. subtrahuntur, Henric. lib. 13. cap. 14. num. 4. in comment. lit. m. Auila p. 2. c. 6. disp. 6. dub. 1. §. ad argumenta, & latè Egid. Coninck disp. 14. dub. 9. numero 82.

Ad quæstionem autem respondeo & dico I. Si excommunicatus, vel ab officio suspensus in contumacia vel mora petendæ absolutionis persistens, officium neque per se, neque per alium præstet, tunc ex naturali iustitiæ lege obligatus est ad fructuum restitutionem: quippe qui non dantur nisi propter officium, c. vltim. de rescriptis in 6. Ita omnes, & nominatim Couar. 3. resolut. c. 13. nu. 8. P. Nauar. libro 2. de restit. c. 2. num. 238. Auila p. 2. dis. 6. dub. 1. conclus. 1. Sed limitant primo; Nisi excommunicatio iniusta sit: tunc enim beneficiatus non tantum fructus, sed etiam distributiones lucrari debet: cum legitime impeditus sit, quo minus intersit & officium præstet. Secundò limitat Auila conclus. 3. & indicat Sylvest. verb. Clericus, 4. quæst. 25. Quod excommunicatus; vel ab officio suspensus, licet negligens sit in procuranda absolutione: nihilominus, si pauper sit, & aliunde non habeat unde viuat, fructus beneficii, quatenus ad moderatam sustentationem necessarij sunt, per modum elemosynæ sibi in conscientiæ foro applicare possit. Non enim is deterioris conditionis esse debet, quàm alij pauperes: quod autem fructus beneficii, si id à beneficiario propter censuram excommunicationis, vel suspensionis, non administratur, fabricæ Ecclesiæ, vel pauperibus dari debent, ex cōmuni docet Nau. c. 25. n. 123. Henr. l. 7. c. 36. n. 3. Auila ci. dis. 6. du. 2. Dixi autem in conscientiæ foro: quia in externo foro, Ecclesiæ inobediens, ac contumax dignus non censetur, vt ex bonis illius alatur, sicuti notauit Nau. n. 124. Couar. cit. n. 8. illat. 11. Gutierrez cit. c. 1. n. 96. Garcias ci. c. 13. n. 98. Auila ci. conclus. 3.

Dico II. Si excommunicatus, vel ab officio suspensus, nihilominus per se, vel per alium officium præstet, fructus sui

beneficii retinere potest: secundum probabilem sententiam P. Nau. l. 2. c. 2. n. 237. Auila l. c. conclus. 2. Egid. disp. 14. dub. 9. difficult. 3. conclus. 2. Sanch. l. 3. de matr. disp. 51. n. 12. Fundamentum huius sententiæ est; Quia excommunicatus, vel ab officio suspensus, ratione censure formaliter ac præcisè fructibus priuatus non est: cum id nullo iure expressum reperiatur: igitur poena tam grauis, quod beneficiatus ante Iudicis condemnationem fructibus beneficii se ipsum spoliare debeat, facile astruenda non est. Verum, vt supra dixi, excommunicatus, vel ab officio suspensus, si officium suum culpabiliter omittat, ex naturali iustitiæ lege ad fructuum restitutionem obligatur: consequenter, si officium præstet, v. g. Canonicus in occulta vel tolerata censura existens choro intersit, Capellanus Missas persoluat, vel Parochus Sacramenta administret: non est ratio, cur eum in conscientiæ foro ad fructuum restitutionem obligemus. Quia licet peccet, si seipsum diuinis ingerat: validè tamen officium implet, & fidelibus utilis est: ideoque fructus, propter impletum officium ipsi dari solitos, retinere poterit.

Corollarium, quod probabiliter colligit P. Nau. n. 138. & indicat Caiet. ver. excommunicatio, cap. 82. §. scito. Si excommunicatus à contumacia recessit, & per eum non stat, quo minus absoluitur: tamen officium non præstet, quia non potest, (ne per substitutum quidem, vt ponimus) nihilominus fructus in conscientiæ foro recipere eum posse. Quia iam legitime impeditus est, nihil obstantē, quod propria culpa in tale impedimentum inciderit. Quemadmodum etiam beneficiarius infirmus tamen sua culpa causam infirmitati præbuit, tamen fructus beneficii interim lucratur, sicuti Couar. docet cit. c. 13. n. 8. illat. 5.

**TERTIA QVÆSTIO.** Si aliquis ad beneficium legitime electus fuit, postea verò in excommunicationem lapsus, vtrum validè illud acceptet? Quam quæstionem tractat Couar. 3. resolut. c. 16. & c. alma, p. 1. §. 7. n. 4. Auila p. 2. c. 6. dis. 5. du. 6. Suarez disp. sess. 1. num. 15. Egid. disputatione 14. dub. 9. Mihi videtur talē acceptationem, dum excommunicatio durat, validam non esse. Quia excommunicatus nullum ius in Ecclesiasticis beneficijs acquirere potest: Si autem acceptatio valida esset, acquireret ius in beneficio, sicuti constat manifestò ex c. si tibi absenti de præbend. in 6. Quod etiam inde confirmatur: Quia si talis ante absolutionem moriatur, beneficium non censetur vacare per mortem eius, vt fatetur Couar. c. 16. n. 3. Sua. n. 17. Quamuis ob DD. auctoritatem contraria sententiâ probabilis est, vt notauit Less. l. 2. c. 34. du. 22. n. 118.

Sextus effectus. Rescriptum Sedis Apostolicæ ab excommunicato impetratum, ipso iure irritum est. c. 1. de rescriptis, in 6. Quapropter eiusmodi rescriptis inseri solet absolutio ad cautelam, duntaxat ad rescripti effectum consequendum. Aliorum verò inferiorum Prælatorum gratiæ & concessiones non videntur ipso iure infirmari, si excommunicato fiant: quia nomen rescripti, præsertim in materia pœnali, strictè accipi debet, sicuti etiam communiter accipi solet, pro Principis responso, vt notauit Na. l. 5. conf. 23. de sent. exc. ad 1. q. edit. 2: Vide etiam regulam Cancellariæ de infordescantibus, apud Nau. in c. ita quorundam, Gl. vlt. de Iudæis; Quod clausula illa absolutionis ad effectum gratiæ, & c. emanans ex curia Romana non prodest ijs, qui in censura aliqua per continuum annum: & certis casibus in sententia excommunicationis per quatuor menses, perseverarunt.

Septimus effectus. Excommunicatus priuatur omni usu, siue exercitio iurisdictionis spiritualis: vt proinde omnia eius acta inualida sint. Quapropter dicitur in c. adiuvimus, 24. q. 1. quod excommunicatus excommunicare non possit. Et in c. si is cui de offic. delegati, in 6. Si delegatus Papæ alicui causam subdelegauit, delegato postea excommunicato, non ad ipsum, quippe iurisdictione priuatū, sed ad primum delegantem appellandum esse. Et in c. 1. de offic. Vicarij, in 6. Substitutum ab Officiali, eo ex-



communicato, non posse iurisdictionem exercere, quam ab ipso acceperat. Et in c.vn. Ne sede vacante, in 6. significatur eos, qui in maiore excommunicatione positi sunt, à beneficiorum collatione suspensos esse. Idemque dicendum de electione, eam irritam esse, si fiat ab excommunicato, sicuti docent DD. communiter arg. c. cum dilectus, de consuetud. & c. cum in'er, 1. de elect. ubi significatur, electionem factam à suspensis inuálidam esse: omnis autem excommunicatus ab officio, & iurisdictione suspensus est. Idem quoque sentiendum de presentatione: tum quia presentatio per presentationem aliquod ius ad beneficium acquiritur, quod ipsi excommunicatus dare non potest: tum quia excommunicato omnis communicatio fidelium interdicta; presentatio autem magna quedam, eaque Ecclesiastica communicatio est. Ergo, &c.

Verum hoc loco aliqua aduertenda. I. Quæ circa hunc effectum dicta sunt, solum intelligi debent de excommunicatis non toleratis: nam acta excommunicati tolerati, puta excommunicatio & quævis iudicia is sententia: item iurisdictionis delegatio, Ecclesiastici beneficii collatio, electio, presentatio, &c. valida sunt: nisi opposita exceptione repellantur, sicuti docent Nau. c. 17. n. 21. Gutierrez libro 1. can. c. 1. n. 82. Aulap. 2. c. 6. dis. 6. dub. 3. Less. l. 2. de iust. c. 19. dub. 7. n. 57. Egid. dis. 14. du. 10. Suar. disp. 14. l. 2. & sumitur ex c. exceptionem, de except. & c. 1. eod. in 6. quibus locis habetur, publicè siue notoriè excommunicatum iudicis officio ab actibus legitimis repellendum esse: occultè verò excommunicatum non repelli, nisi à parte aduersa contra eum, tanquam minus idoneum excipiat. Sed, vt cap. seq. dicam, quicumque excommunicati nec nominati denuntiati sunt, neq; notorii Clerici percussores, in hodierno iure perinde se habent, & ab Ecclesia tolerantur, sicuti olim occulti excommunicati. Ratio verò est: Quia ex vna parte multa incommoda, & inconuenientia oriri necesse est, si acta eorum, qui ab Ecclesia publicè tolerantur, tanquam irrita rescindi debeant. Ex altera verò parte, cum iura non intendunt ipsis excommunicatis fauorem aliquem præstare, ideòque nemo inuitus cum illis communicare teneatur, meritò illis, quorum id interest, contra excommunicatum, quamuis toleratum, excipere concessum est.

II. Quòd ad electionem attinet, imprimis excipienda est electio summi Pontificis, quæ ob nullam Cardinalium excommunicationem, suspensionem, vel interdictum infirmari potest, Clem. ne Romani, §. cæterum, de elect. in 6. Deinde, si plures electores sint tametsi aliqui excommunicationis impedimentum habeant, nihilominus aliorum suffragia valebunt & electio ius tribuent: si ipsorum numerus sufficiat ad electionem complendam: quia *utile per inutile non debet vitari*; regul. 37. in 6. & arg. ca. vn. Ne sede vacante in 6. vbi idem decernitur in casu, quo plures conferendus habent, puta Episcopus, & Capitulum: atque omnes Capitulares excommunicati sunt, quòd eo non obstante, Episcopus conferre possit. Quanquam si electores reliqui excommunicatos non toleratos ad electionem scienter admitterunt, eorum electio à confirmatione infirmari potest, argum. cap. ult. de procur. & docet Egid. cit. dub. 10. num. 93. Imò ali. apud Suarez num. 13. & sequent. existimant, talem electionem ipso iure irritam esse.

III. Quòd ad presentationem attinet: Si patronus excommunicatus etiam vitandus, aliquem præsentet Episcopo, isque presentationem suscipiat, & secundum patroni voluntatem præsentatum instituat, peccat quidem saltem venialiter, si sine causa necessitatis cum excommunicato patrono ita communicet: nihilominus institutio iusta & valida est: dummodo Episcopus vitium presentationis non ignorat. Si enim presentationem legitimam esse intulit, ideòque præsentatum instituit, potest deinde cognita veritate, illam rescindere, quia error siue dolus causam præbuit instituendi. Quæ de re vide Suar. ci. dis. 14.

sect. 2. n. 14. Egid. Coninex et. dub. 10. difficult. 4.

IV. Si actus proprius personæ Ecclesiasticæ, iurisdictionis non sit, vt est matrimonio assistere, aliquem ad Religionis professionem admittere, &c. eiusmodi irrita censi non debent, etsi fiant ab excommunicato, aut suspensio non tolerato quæ de re Sanchez l. 3. de matrim. disp. 21. & l. 5. moral. c. 4. n. 78.

Octauus effectus. Excommunicatio priuat communem cationem forensi: siue impedit, quominus excommunicatus esse possit Iudex, Tabellio, Aduocatus, Actor, Testis, etiam in civilibus causis. Ita de Iudice habetur in c. decernimus, de sent. excommun. in 6. De alijs verò in c. ad probandum, de sent. & re iudicata, vbi dicitur, quòd Iudex excommunicatos ab agendo, patrocinando, & testificando repellere teneatur. Quamquam id duntaxat de non toleratis intelligendum est, sicuti ex communi notat Aulap. ci. c. 6. disp. 7. dub. 1. conclus. 2. dub. 3. conclus. 1. dub. 4. conclus. 2. Sin verò tolerati sint, potest quidem eos Iudex repellere, si excommunicatio publicè nota sit, non tamén ad hoc obligatur, nisi pars aduersa de excommunicatione excipiat; eamque, si notoria non sit, intra octo dies apertissimis documentis demonstret, vt habetur in c. 1. de excep. in 6.

Cæterum, si Actor, Aduocatus, vel Testis excommunicatus, quamuis vitandus, in iudicio neque à Iudice ex officio, neque per aduersarij exceptionem repellatur, valida erunt omnia, quæ in tali iudicio acta fuerunt, sicuti colligitur ex cit. c. 1. ibi, *Si post rem iudicatam talis exceptio proponatur, executionem (sententiæ) impedit: sed sententia, quæ præcessit, non minus robur debitum obtinebit*, quàm si ille tempore sententiæ excommunicatus non fuisset, supplet Gl. ibi. ver. obtinebit.

Alia verò ratio est de Iudice non tolerato, qui licet ab officio remotus non sit, omnia tamen eius acta irrita censentur, sicuti docent Doctores communiter in c. ad probandum, de sent. & re iudicata. Ratio est: Quia substantia iudicii vitatur, si defectus sit in iurisdictione: Iudex autè per excommunicationem priuatur, siue suspenditur à iurisdictione, sicut de Iudice Ecclesiastico apertè traditur in cit. c. ad probandum, &c. tanta, de excessibus Prælatorum. De civili verò Iudice colligi potest ex can. nos. Sanctorum. 15. quæst. 6. accedente communi Doctorum sententia. Addit Aulap. 2. c. 6. disp. 6. dub. 7. prope finem, cum Gl. à pluribus recepta in c. venerabilem ver. electus, de elect. Si excommunicato (non tolerato) civilis dignitas, cui iurdictio annexa est, per electionem, confirmationem, &c. conferatur, talem electionem, aut collationem ipso iure irritam esse. Suarez verò disp. 16. l. 2. n. 3. probabilis arbitrat, non esse ipso iure irritam: sed rescindi posse, vt colligitur ex cit. ca. venerabilem.

De Tabellione similiter docent Canonistæ in cit. c. ad probandum, publica eius acta, ratione publici muneris, ipso iure irrita esse: quod tunc saltem verum esse videtur, si actus publici Tabellionis, videl. authenticum instrumentum ad substantiam & valorè testamenti vel contractus alicuius ex iuris dispositione requiratur. Nam instrumentum confectum ab excommunicato non tolerato non censetur authenticum; cum is à publicis actibus tum iure ipso, tum Iudicis officio repellatur. Imò tametsi tale instrumentum à tolerato confectum sit, nihilominus in foro externo infirmari poterit, si opponens excommunicationem sufficienter probare queat Vide Henr. l. 13. c. 9. n. 2. Aulap. 2. c. 6. dis. 6. dub. 5. Suar. dis. 16. du. 5. Egid. dub. 11. q. 3. conc. 4.

Denique verò nihil obstat, quo minus excommunicatus in causa tunc civilis, tunc criminali tanquàm Reus conueniri possit: ne ex propria malicia commodum reportet. Debet tamén tunc non per se ipsū, sed per Aduocatū respondere, si idoneū reperire possit, & causa ardua sit, sicuti colligunt DD. ex c. intellexim⁹, de iudicijs. Syl. ver. exc. 3. n. 1. effectus 12. Aulap. c. 6. dis. 7. du. 2. Gl. tamen in ci. c. intelleximus, verbo debet



debet, Ab. n. 5. Egid. du. ir. qu. 4. probabiliter docent, excommunicatum compelli non posse, ut per alium respondeat, si ipsemet se defendere paratus sit: quia melius se id praestitutum confidit: quandoquidem in tali causa agentes cum excommunicato nullam censuram incurunt.

- 16 Nonus effectus. Excommunicatio prohibita est omnis civilis seu politica excommunicatio fidelium, sicut colligitur ex c. 2. de except. c. nuper, c. si aliquando, c. si quem de sent. excommun. & c. sicuti Apostoli & seqq. c. ad mēsam, 11. q. 3. Nomine *fidelium* comprehenduntur hoc loco omnes baptizati, etiam excommunicati, ipsique haeretici quod ex communi sententia tradit Suarez disp. 15. s. 2. n. 12. contra Gl. in ca. deuotum. 27. q. 1. Tametsi enim illi, praesertim, qui fidem, quam in Baptismo professi sunt, abiecerunt, non sint vera, & simpliciter dicta Ecclesiae membra: tamen quod attinet ad obligationem ac subiectionem, non minus quam alij ad Ecclesiam spectant: neque enim conuenit, ut Ecclesia propter ipsorum delictum, iurisdictionem in eos amittat, ne ex propria iniquitate commodum ferant: quamobrem, cum Ecclesiastici canones absolute vetant, ne quisquam cum excommunicatis communicet, ad omnes omnino Ecclesiae subditos talis prohibitio se extendere debet.

Nomine autem *civilis communicationis* comprehenditur quauis humana societas per verba, nutus, literas, nuntium, munera: Item per contractus, & commercia, cohabitationem, communem mensam, iter: quae tamen intelligi debent, si conueniant ut socij formaliter: secus, si praeter intentionem in eandem viam, domum, balneum vel hospitium incidant, quae de re legi potest S. Anton. p. 3. tit. 25. c. 2. Syl. ver. excommunicatio, 5. n. 3. Nauar. c. 27. n. 20. Suarez disp. 15. s. 1. n. 6. Sairus libro 2. c. 13. n. 8. Auila p. 2. c. 6. disp. 9. dub. 9. Comprehenditur item quoduis amicitiae signum; videlicet osculum, amplexus, salutatio, &c. conuenienter Apost. 1. ad Corinth. 5. Cum huiusmodi nec cibum sumere. Et S. Ioan. Epist. 2. cap. 1. Nec auec ei dixeritis. Vide Bedam relatum in c. omnis qui, 24. quaest. 1. Quamuis autem Angelus ver. excommunicatio 8. n. 4. Sotus in 4. d. 22. q. 1. a. 4. circa tertiam conclus. Sairus li. 2. c. 13. n. 7. & alij id restringant ad eam salutationem, quae verbis fit, existimantes licitum esse honoris causa excommunicato assurgere, caput detegere: contrarium tamen probabilius docent. Syl. ver. excommunicatio 5. n. 3. Suar. cit. s. 1. n. 3. Nau. c. 27. n. 20. Cum revera haec sit communicatio aliqua in externis actibus, vel signis reuerentiae consistens. Vide Auilam part. 2. capite 6. disputatione 9. dubio 9.

Est porro obligatio ista non communicandi reciproca, ut non tantum excommunicatum afficiat, ne in aliorum fidelium societatem se ingerat; sed etiam ipsos fideles, ne excommunicati hominis societatem admittant, sicut colligitur ex c. illud dominus; §. illud autem, de clerico excommunicato ministr. Excusat tamen probabilis ignorantia: item causa pietatis, necessitatis, vel utilitatis. Quapropter D. D. ex responsio Greg. VII in c. quoniam multos 11. q. 3. causas iustas communicandi cum excommunicato hoc versu comprehendere solent, uti videre est in Gl. cap. cum desideres, de sent. excom. & apud S. Bonau. in 4. d. 18. q. 5.

*Utile, lex, humilis, res ignorata, necesse.*

Itaque primo excusat *utile*, id est, notabilis utilitas corporalis, aut spiritualis; tum nostra, tum etiam ipsius excommunicati. Quapropter licitum est excommunicato indigenti subministrare subditum coporale: multoq; magis spirituale per consilium, vel exhortationem, sicut colligitur ex c. cum voluntate, de sent. excommun. ubi dicitur, cum excommunicationis sententia non incurtere, qui excommunicato in his, quae ad absolutionem, vel alias ad salutem animae pertinent, in locutione participat: licet etiam alia verba incidenter, ( ut apud eum magis proficiat ) in-

serponat. Et simili ratione permittitur in c. responso, cod. tit. ut coram excommunicatis verbum Dei in Ecclesia publice praedicetur, quod ipsum Sotus in 4. d. 22. q. 1. art. 4. circa tertiam conclus. ad lectionem sacrae Theologiae extendit: cui tamen alij repugnant, sicuti videre est apud Auila p. 2. c. 6. disp. 11. dub. 3. concl. 8. Egid. disp. 14. dub. 12. n. 122. quod talis lectio plerumque non ita, ut sacra concio, ad spirituales emendationem ac salutem tendat. Vice versa concessum etiam est fidelibus ab excommunicato non tolerato consilium vel subsidium seu corporale, seu spirituale petere, si eo indigeant: quia alius non adest, a quo ita commodè adiuuari possint, sicuti docet Syl. ver. excomm. 5. n. 4. Auila cit. disp. 11. dub. 2. in fine. Ut verò publice in Ecclesia concionetur, permittendum non est: cum ea sit grauis, eaque Ecclesiastica communicatio, a qua merito excommunicatus repellitur: excepta necessitate admodum graui, sicuti docent Sotus, Auila, & alij locis cit.

Secundo excusat *lex*, puta matrimonialis: si enim vel vnus, vel vterque coniunx excommunicatus sit nihilominus coniugii debitum tum petere, tum reddere ipsis licitum erit; quin etiam in rebus aliis omnibus inter se communicare, videlicet in domus gubernatione, mensa, colloquio familiari, sicuti docet Caiet. ver. excommunicatio cap. 81. §. illicita autem cum excommunicatis, Sanchez lib. 9. de matrim. disp. 14. n. 4. & colligitur ex cit. c. quoniam, ubi vxori simpliciter permittitur, ut cum marito excommunicato communicare possit. Et si verò Syl. ver. excommunicatio, 5. n. 4. Armilla n. 45. aliud sentiendum putent de marito comparatione vxoris excommunicatae: contrarium tamen est verum, quod docet Adrianus in 4. tr. de clauib. q. 3. except. 6. Angelus ver. excomm. 8. §. 8. Nau. c. 27. n. 27. Auila p. 2. c. 6. disp. 9. dub. 5. Egid. l. c. n. 123. Sanchez n. 16. Quia in correlatis quod statuitur de vno, censetur etiam de altero statutum, quando vtriusque eadem ratio est, ut in proposito euenit. Nam ius exceptit vxorem ad euitandum periculum animarum: quod idem similiter locum habet in viro respectu vxoris. Tametsi verò maritus, cum sit caput vxoris, teneatur excommunicatam corrigere, & ad emendationem perducere, denegando illi etiam societatem, quatenus ad hunc finem expedire iudicauerit: si tamen id negligat, peccabit quidem contra legem naturalem Charitatis: non item contra Ecclesiasticam de vitandis excommunicatis: quare neque excommunicationem minorem incurret, sicuti Auila notauit resp. ad 2.

Tertio excusat *humile*, id est, humilitas subiectionis, quam habent liberi erga parentes: serui, famuli, villici erga dominum, Religiosi erga Praelatum, vel Clerici erga Episcopum excommunicatum non toleratum, sicuti constat ex c. quoniam, ubi huiusmodi personis communicatio absolute permittitur, ut animarum periculum euitetur: quapropter talis concessio reciproce intelligenda est, ut etiam pater cum filijs, & dominus cum seruis excommunicatis non toleratis, sine Ecclesiasticae legis violatione, communicare possit, sicuti ex probabiliori docent Nau. cit. n. 27. Auila l. c. dub. 6.

Deinde intelligenda est concessio generatim, adeo ut etiam communicatio in diuinis, quam personae subiectae alioquin praestare solent, ob excommunicationis censuram non impediatur, sicuti docet Henric. lib. 13. c. 22. n. 2. in comment. lit. l. Auila cit. dub. 6. §. vtrum verò, Sanchez li. 9. de matrim. disp. 14. n. 5. Sa ver. excommunicatio, nu. 45. Egid. Coninex cit. disp. 14. dub. 12. n. 132. Quare famuli, ( sicuti & vxor, ac liberi ) dominum excommunicatum ad Missam audiendam comitari, & Sacellanus cum Episcopo horas canonicas recitare non prohibentur. Excipitur autem communicatio in scelere, propter quod excommunicatio contracta fuit: talis enim societas omnibus personis prohibita est, sicuti colligitur ex c. c. quoniam, & c. inter alia, de sent. exc. Quapropter, si aliquis ex communicatione ideo incur-



rit, quod cum probabili impedimento irritum reddente matrimonium contraxerit, alter coniunx non tantum contra legem naturalem peccabit, si durante dubio de matrimonij valore debitum reddat: sed etiam censuram incurret, quia communicat in scelere, ob quod alter excommunicatus fuit.

Quarto excusat *res ignorata*, siue ignorantia, vel inconsideratio tam iuris, quam facti: modò non sit affectata, aut crassa, iuxta ea, quæ dixi suprâ hoc tract. p. i. cap. 5. n. 7. Ceterum dum dubius sum, num aliquis excommunicationem contraxerit, v.g. ob clerici percussorem: non teneor, imò nec possum illum, tanquam excommunicatū, vitare, sicuti docet Na. c. n. 27. 27. Auila ci. c. 6. dis. 11. dub. 11. ante 6. conclus. Si autem certò constitit, aliquem in excommunicationem incidisse, in dubio præsumi non debet ab illa liberatum esse: ad eum finem vt cum ipso communicare liceat, præsertim in rebus sacris: sed necesse est, saltem probabilem existimationem haberi de eius absolutione, sicuti notauit Auila concl. 6. Syl. verb. excommun. 5. n. 26. ex regula 8. in 6. *Semel malus semper præsumitur esse malus*. Cuius ratio est: quia mutatio est facti: factū autem non præsumitur, sed probationibus vel coniecturis ostendi debet: quia videlicet est vir Deum timens, & longum tempus ab incurta excommunicatione elapsum est, vt credibile sit absolutionem interea impetrasse.

Ultimò, excusat *necessitas* omnes eas personas, quæ ratione alicuius contractus obligatæ sunt personæ excommunicatæ, sicuti colligitur ex c. inter alia, de sent. excommun. in quo habetur, familiare obsequium, aliudve debitum iuxta conuentionem contractum, per superuenientē creditoris excommunicationem minime solui: sed nihilominus reddendum, & per consequens ipsi communicandum esse: idemque ex communiore sententia docet Paul. in 4. d. 18. q. 6. a. 2. conclus. 5. Couar. reg. peccatum, p. 1. §. vlt. P. Nau. lib. 4. c. 4. n. 85. Auila disput. 11. dub. 4. Suarez disp. 15. §. 8. n. 5. Sanchez lib. 2. moral. c. 24. n. 8. Becanus 2. 2. c. 16. q. 2. Mol. to. 3. tr. 2. disp. 759. contra Abb. in cit. ca. inter alia, in fine, & Gl. in c. nos sanctorum, 15. qu. 6. ver. constricti sunt, vbi ait: *Probabiliter dici posse, quòd excommunicato debita soluenda non sint*. Quam sententiam nihil adiuuat dictum c. nos sanctorum, vbi Gregor. VII. absoluit eos, qui excommunicatis fidelitate, aut sacramento constricti sunt: nam ideo subditi ab obedientia Principi excommunicato præstanda absoluuntur, quia excommunicatio hominem priuat vsu iurisdictionis: non item iure domini, aut debiti petendi ex legitimo contractu, sicuti notauit Auila ci. d. 4. §. sed arguitur.

Multò verò magis, si debitor meus excommunicatus est, possum ab eo debitum exigere, & consequenter, quatenus necesse est, cum eo communicare, sicuti habetur in c. si verè, eod. tit. vbi etiam generatim significatur, licitam esse communicationem cum excommunicato, quotiescunque ea sine graui incommodo vitari non potest: nam videtur ait Papa iure permissum esse, *si quisquam per terram hæreticorum aut quosvisque excommunicatorum transierit, necessaria emere, ac recipere ab eisdem*. Eademque ratione fas erit fidelibus pauperibus, si aliàs commodè sustentari non possint, elemosynam petere ab excommunicatis non toleratis, atque ad illorum mensas accumbere.

Porro controuersia est inter DD. si aliquis operam suā locauit, vel alia ratione se obligauit homini tunc exiitenti in excommunicatione; vt rum nihilominus ei communicare possit: In qua quæstione imprimis supponendum est, Contractus cum excommunicato etiam non tolerato omni iure validos esse, sicuti contra Hostiensem in c. veritatis de dolo & contumacia, docet ib. Abb. n. 35. & colligitur ex c. cum illorum, de sent. excommun. vbi Abb. aliique DD. idem notant de professione Religionis, validam esse, sed illicitam, quæ fit ab excommunicato: quippe cui communicatio cum fidelibus prohibita est. Quod etiam sen-

tiendum est de testamento, sicuti ex communi docet Auila p. 2. c. 6. disp. 6. dub. 6. Agid. cit. disp. 14. dub. 13. q. 3. vbi notant, excommunicatos quandoque etiam licitè testamentum condere: si apptopinquante morte non habeant copiam sacerdotis, à quo absoluantur, tunc enim necessitas illos excusat.

Deinde distinguendum est; vt rum aliquis per ignorantiam, adeòque bona fide cum excommunicato contraxerit: an verò sciens, & in mala fide, atque illicitè: Si enim bona fide contraxit, nihil ipsi obesse debet, quo minùs contractum prosequi & cum contrahente communicare possit, perinde ac si excommunicatione postea superuenisset: secus si mala fide, & sciens: tunc enim à contractu resilire debet, si sine graui incommodo possit, sicuti ex communi docet Syl. ver. excommun. 5. nu. 4. Auila cit. disp. 11. dub. 6. Suar. disp. 15. §. 5. num. 13. & 17. Quamuis aliqui apud eundem absolutè affirmant, quòd tamen si v.g. famuli scienter ac mala fide cum excommunicato contraxerint, suam ipsi operam locando: postea tamen in famulatu perseverare, & promissa obsequia præstare possint: quia in cit. c. quoniam multos, personis huiusmodi subiectis, ac obligatis communicatio sine distinctione permittitur: ergo neque nos distinguere oportet. Quomodo etiam Sanchez arg. l. 9. de matrim. disp. 14. n. 4. loquens de vxore excommunicato scienter nubente. Verum de vxore minore est difficultas: cum ea viro excommunicato, cui illicitè nupsit, adhærere tamen cogatur; famuli autem à domino excommunicato, cui operam suam locarunt, sæpe sine graui suo damno discedere possint: adeòque ad hoc obligari videantur. Idque colligi videtur ex c. inter alia, §. vt igitur, de sent. excommun. Quamuis in negatiuam partem inclinatur etiam Agid. disp. 14. dub. 12. n. 129.

Decimus effectus excommunicationis est. Quòd si excommunicatus toto anno contumaciter in excommunicatione persistat, & vt iura loquuntur, inordescat, contra ipsum, tanquam de hæresi suspectum, procedi possit, sicuti patet ex Tridentino, sessione 25. capite 3. de reformatione.

Vndecimus effectus. Si excommunicatus ante absolutionem moriatur, priuandus est Ecclesiastica sepultura, sicuti & funebri Ecclesiastico officio: quia hæc censetur quædam cum mortuo communicatio: *Sacris autem canonibus institutum est, vt quibus in communicamus viuus, neque mortuis communicemus*, c. sacris, de sepult. vbi Abb. notat. n. 3. Quòd isti, quibus Ecclesiastica sepultura interdicta est, sepeliri non debent prope cimiterium, sed procul: saltem tanta distantia, vt Clericorum cantantium ibi exaudiri non possint. Si tamen excommunicatus ante mortem poenitentia signa edidit, nec pœ eum stetit, quo minùs absolutionem consequeretur, etiam post mortem ab excommunicatione absolui debet, ad eum finem, vt Ecclesiæ suffragiis & sacra sepultura fruatur, c. à nobis, 28. & c. sacris, de sent. excommun.

Porro qui propria temeritatis audacia, non sine contemptu canonum Ecclesiæ, defunctorum corpora interdicti tempore: vel excommunicatos, aut nominatim interdictos: vel vsurarios manifestos in loco sacro sepeliri præsumunt, ipso facto excommunicationem incurrunt. Clem. 1. de sepult. Adde ex c. quicunque, de hæret. in 6. eos, qui hæreticos, vel eorum fautores scienter Ecclesiastica sepultura tradere præsumperint, non antè ab excommunicatione absoluendos esse, quam huiusmodi damnatorum corpora publicè extumulent atque abiiciant: modò eorum corpora à reliquorum fidelium corporibus discerni possint, sicuti habetur c. sacris, de sepult. iuncto c. consuluit, de consecrat. Ecclesiæ, vel altaris. Sed hæc locum tantum habere in non toleratis, dicam capite sequenti, numero 9.

Ultimus effectus est, quòd qui cum excommunicato non tolerato extra casus iure concessos, communicat, ipse quoque censuram minoris, & interdum maioris



maioris excommunicationis incurrat, de quo dicam cap. sequenti.

## CAP. III.

De pœnis, siue censuris, quæ incurruntur ob communicationem cum excommunicato: & speciatim de excommunicatione minore.

## SUMMARIUM.

1. Qui excommunicato communicat in crimine criminoso, similiter excommunicationem incurrit.
2. Cum excommunicato communicare in rebus sacris est peccatum mortale: nisi materia paruitas excuset.
3. Communicare cum excommunicato in rebus politicis, plerumque est peccatum tantum veniale.
4. Qui cum excommunicato communicat in rebus sacris, aut politicis, minorem excommunicationem incurrit.  
*Excommunicatio minor per se solum priuat & su passivo Sacramentorum: peccat tamen saltem venialiter, qui in excommunicatione sine necessitatis ratione Sacramentum ministrat.*
5. Si in minore excommunicatione constitutus ad Ecclesiasticum beneficium, scienter se eligi patiatur, electio infirmata est.
6. A minore excommunicatione quis prius vel expositus Sacerdos absolvere potest.

**I**mprimis supponenda est celebris distinctio triplicis communicationis cum excommunicato. Prima est communicatio seu cooperatio in crimine cõtumaciæ, ob quod alter excommunicationem contrahit: v.g. si Titius excommunicatus, denuntiatusque fuit, quia rem alienam detinet: & tu illum postea adiuvas, quo minùs secundùm iustam Iudicis sententiam ac præceptum restituat, communicas in crimine, ut iura ajunt, criminoso, atque similiter maiorem excommunicationem incurrit, sicuti constat ex c. si concubinæ, de sent. excomm. Requiritur autem ad hanc pœnam siue censuram contrahendam, ut quis scienter communicet in eo ipso crimine, propter quod alter excommunicationem talem incurrit, ab quâ non toleratus, siue vitandus existit, sicuti latius videre potes apud Nau. c. 27. n. 112. Syl. ver. excomm. 8. n. 10. Auilam p. 2. c. 6. disp. 10. dub. 3. Qui rectè observant, excommunicationem hanc diuersam esse ab ea, quæ interdum consulenti vel cooperanti, v.g. ad homicidium, discernitur: nam ad incurrendam excommunicationem, de qua hic agimus, necesse est, ut principalis priùs incurrit excommunicationem: postea alter cooperetur, & propter eam cooperationem excommunicetur. In altero vero casu cooperatio antecedit criminis consummationem & principalis criminosi excommunicationem. Demum hic nota, absolutionem ab excommunicatione hac accessoria pertinere ad eum, ad quem de iure pertinet absolvere ab excommunicatione principali, sicuti habetur in cit. c. nuper, & explicant Syl. l. c. Auila cit. dub. 3. in fine.

Altera est communicatio Ecclesiastica, quæ Christianis conuenit, quatenus Christiani sunt: adeoque ipsis propria existit. Quamuis & hæc duplex est, auctore Caiet. ver. excomm. c. 81. §. vbi scito. Auila c. 6. disp. 8. dub. 3. Syl. disp. 13. f. 2. n. 8. Vna quæ propriè dicitur communicatio in diuinis, siue in sacris, videlicet in Sacramentis ac sacrificio Missæ aliisque diuinis officiis, ac precationibus, Ecclesiæque suffragiis. Altera verò retinet communem nomen Ecclesiasticæ communicationis: quia consistit in Ecclesiasticis quibusdam actionibus, quæ propriè etiam ad Christianos spectant, quamuis secundario: videlicet, conferre

beneficium Ecclesiasticum, eligere ad illud, exercere officium Iudicis Ecclesiastici, publici item Concionatoris, &c.

Quod attinet ad priorem illam communicationem in diuinis, consentiunt Doctores, eam sub peccato mortali prohibitam esse excommunicatis: quia valde repugnat tum etiam dignitati rerum sacrarum, si ad has, quæ maxime propriæ sunt filiorum Ecclesiæ, admittantur qui ab Ecclesiâ præcisi sunt. Nisi materiæ paruitas à culpæ grauitate excuset; puta, si excommunicatus per templum transiens, tamdiu hæreat, & attendat, dum vnus brevis psalmus decantatur: vel si aliquis cum excommunicato non tolerato assistat Missæ vsque ad Euangelium, uti notauit Auila cit. c. 6. disp. 8. dub. 3. concl. 1. & post 2. concl. §. primò ergo dico, Agid. disp. 14. numero 146. Præterea si aliquis cum excommunicato non tolerato priuatim oret officium aliquod diuinum, non plùs quàm venialiter peccare videtur, secluso scandalo & contemptu, sicuti docent Couar. c. alma. p. 1. §. 3. n. 9. & 10. Suar. disp. 12. f. 2. n. 18. Auila & Agid. ll. cc. Quia hæc priuata communicatio in oratione non continet tantam deformitatem, considerato fine Ecclesiasticæ legis & censuræ, quantam communicatio, quæ in solemnibus officio fit.

De altera verò Ecclesiastica communicatione, utrù ea sub peccato mortali prohibita sit, necne, non consentiunt DD. Nam Caiet. l. supra cit. Nau. c. 27. n. 28. & 29. & alij putant, prohibitionem hanc esse tantum sub peccato veniali, per se loquendo. Quæ sententia ita generatim pronuntiata non immeritò displicet Agid. Coninck. cit. disp. 14. dub. 14. n. 147. Nam collatio, electio, vel præsentatio ad Ecclesiasticum beneficium tam actiua, quàm passiuæ est grauis Ecclesiastica functio, valde honorifica conferenti, & prouiso: eligenti & electo: ideoque valde indecens est, eam ab excommunicato, & præciso membro, contra Ecclesiæ prohibitionem ac censuram, exerceri. Idemque sentiendum videtur, si excommunicatus publicum Ecclesiasten agat, vel Iudicem, præsertim in Ecclesiasticis causis, sicuti notauit etiam Less. lib. 2. c. 29. n. 59. Henriq. l. 13. c. 7. n. 6. Siquidem & hæc functiones valde honorificæ sunt, hominèque supra reliquos fideles in Ecclesia extollunt. Secùs verò est de aliis iudicialibus actibus, inquit Agid. n. 148. puta Aduocati, Procuratoris, Actoris, Testis: quia non continent tantam in se dignitatem, aut repugnantiam cum fine Ecclesiasticis censuris proposito. Fatetur tamen Less. contrariam sententiam esse probabilem, quòd v.g. Iudex toleratus, cuius acta valent, peccet tantum venialiter iudicando.

Tertia est communicatio merè ciuili seu politica, quæ proinde Christianis cum infidelibus communis esse potest. De qua communiter sentiunt DD. eam sub veniali tantum peccato excommunicatis prohibitam esse. Ratio est: Quia huiusmodi communicatio in actionibus pertinentibus ad conuictum, atque commercia humana, & secundum se leuis ac vulgata est: & non admodum repugnans fini excommunicationis: quippe cum per eam per se primò ac directè tantum prohibeatur vsus & communicatio rerum spiritualium & Ecclesiasticarum, indirectè verò & secundario tantum politicarum, sicuti notauit Cai. ci. §. vbi scito, Suar. disp. 15. f. 2. n. 2. alijque cõmuniter. Caterum si vir grauis hominè excommunicatum, non toleratum, in societatem suam diu duraturam ascisceret, vel Iudex ad munus Aduocati sapius admitteret, ex quo ipsius excommunicati existimatio non parum aueretur, Ecclesiasticæ verò censuræ minueretur, tunc mortale peccatum committi, notauit Agid. n. 149.

Porro hoc commune est communicationi cum excommunicato, tum in sacris, tum in politicis negotiis, ut qui eam, iusta causa non excusatus, adeoque non sine culpa mortalit, aut veniali exercet, excommunicationem minorem incurrat, sicut habetur in c. statuius de sent. excomm. in 6. Videri possunt quæ Gratianus congerit, c. placuit, & pluribus seqq. 11. q. 3. ex quibus colligi videtur, olim communicationem cum excommunicato maiore



cenfura prohibitam fuiſſe, can. 10. Apoſt. Carthag. 4. can. 73.

Eſt autem minor excommunicatio *cenſura*, per ſolū primas uſu paſſiuo, ſine ſuſceptione ſacramentorum, c. penul. de ſent. excommunicatio, c. vlt. de clerico excommunicato miniſtrante. Et quia materia huius prohibitionis grauis eſt, ideo grauitur ſeu mortaliter peccat, qui tali cenſura ligatus abſque iuſta neceſſitate ſacramentum Confirmationis, Pœnitentiæ, Eucharistiæ, Ordinis, Matrimonij, uel extremæ Vnctionis ſuſcipit: licet ob id nullam irregularitatis notam contrahat, ſicuti habetur expreſſe in c. vlt.

Atque hîc, ut dixi, vnicus eſt minoris excommunicationis effectus proximus, per ſe, ac directus. Alij verò duo ſunt indirecti, remoti, & per conſequentiam; Quorū primus eſt, quòd minore excommunicatione irretitus peccet (ſaltem venialiter) ſi ſine neceſſitatis ratione Sacramenta miniſtret, ſicut docent Barthol. Medina in inſtruct. Confessar. lib. 1. c. 11. §. 6. Couar. c. alma, p. 1. §. 8. n. 2. Auila cit. c. 6. diſp. 12. Agid. dub. 17. Suar. diſp. 24. §. 2. n. 11. Idque propter quandam irreuerentiam: quia indecens eſſe videtur, excommunicatum adminiſtrare Sacramentum aliquod, cum ipſi ſuſceptio Sacramentorum tanquam indigno prohibita ſit. Imò Syl. ver. excommunicatio, 4. n. 1. Armilla n. 21. exiſtimant, eſſe hanc culpam mortalem. Contra verò Nau. c. 27. n. 24. Henriq. lib. 13. c. 3. num. 2. nullum omnino peccatum in ea re agnoſcunt, ſi alioquin Sacramenta in dicta excommunicatione miniſtrans à mortali culpa immunis ſit. Quibus tamen repugnat textus cit. c. vlt. *Peccat autem conferendo ſacramenta: ſed ab eo collata virtutis non carent effectus: cum non videatur à collatione, ſed participatione ſacramentorum* (per ſe ac directe) remotus.

Corollarium I. Si Episcopuſ in minore excommunicatione ſacros ordines conferat, dupliciter peccat: primò venialiter, quatenus Ordinis ſacramentum miniſtrat, ſecundò mortaliter, quatenus S. Eucharistiæ ſacramentum ſuſcipit. Ita Auila l. c. dub. 3.

Corollarium II. Si duo Sacerdotes in minore excommunicatione conſtituti ſint: prius debent ſe viciffim abſoluere à cenſura, (hæc enim abſolutio ſacramentalis non eſt) quàm vnus alteri abſolutionem à peccatis conferat. Ita Auila l. c.

Alter porrò effectus minoris excommunicationis in directus & per conſequentiam eſt; quòd ea ligatus ad beneficium Eccleſiaſticum eligi non debeat: ſed electio inſirmanda ſit, iuxta cit. c. vlt. *Si ſcienter talis electus fuerit, eius electio eſt irritanda*: & ratio adiungitur, quòd ad eorum ſuſceptionem eliguntur, à quorum perceptione à SS. Patribus eſt primatus, id eſt: Quia beneficium Eccleſiaſticum ſuapte inſtitutione ordinatur ad ſacros ordines ſuſcipiendos, vel Miſſam celebrandam, &c. à quibus tamen minore excommunicatione affectus repellitur. Quare idem eadem ratione dicendum de præſentatione & collatione beneficij, ſicuti docent DD. ferme communiter apud Richar. in 4. d. 18. a. 7. q. 4. Couar. c. alma, p. 1. §. 7. n. 1. Sanchez diſp. 24. §. 2. num. 22. Agid. cit. diſp. 14. dub. 17. nu. 262. Auila citat. diſp. 12. dub. 4. Et cenſeri debet peccatum mortale, ita excommunicatum atque inhabilem ſcienter ad beneficium eligere, vel præſentare: quia eſt res grauis, ſicuti etiam teſtatur Auila ci. du. 4. con. 1.

Dubitant verò Doctores, propter verba cit. *Si tamen ſcienter talis electus fuerit, eius electio eſt irritanda*: Vtrum etiam irritanda ſit, tamenſi electores ignorauerint excommunicationem electi? Canoniſtæ communiter affirmant, uti videre eſt apud Abb. n. 8. Couar. cit. §. 8. n. 3. quos ſequitur Suarez diſp. 24. §. 2. n. 18. Agid. n. 263. Quia talis electio reprobata eſt non ob culpam eligentium: ſed ob incapacitatem electi, ſicuti ex adiuncta, & ſuprà explicata ratione colligitur. Contrarium tamen expreſſe docent Syl. ver. excommunicatio, 4. nu. 4. Auila cit. dub. 5. con. 4.

Nam vocula illa *ſcienter* ita explicari debet, ut non ſit ſuperflua: eſt autem omnino ſuperflua, niſi dicamus electionem talis excommunicati caſſandam non eſſe, niſi ſcienter facta ſit ab electoribus. Sed neque hæc ſententia ſatisfacere videtur: ſiquidem in hac electionis caſſatione non tam electores puniuntur, ſed potiùs electus: ergo non ad illorum, ſed huius potiùs culpam attendendum eſt. Quare placet mihi ſolutio Gl. in cit. c. vlt. ver. *ſcienter*: Senſum illorum verborum eſſe, *ſi tamen ſcienter talis*; id eſt, ſciens minorem ſuam excommunicationem, atque inhabilitatem electus fuerit, irritandam eſſe: ſiue ſciuerint electores ſiue ignorarint. Ad fundamentum verò primæ ſententiæ reſp. Cenſuram ſeu inhabilitatem perſonæ affectæ minori excommunicationem, non eſſe adæquatā cauſam, cur talis eligi non debeat: (nam alioquin conſequens foret, talem electionem ipſo facto irritam eſſe, quòd tamen communiter negant DD. contra Syl. l. c. Cou. cit. n. 3.) ſed quia canones ſtatuerunt, talem electionem faciendam non eſſe, imò etiam caſſandam in pœnam electi, ſi huiusmodi electionem ſciens acceptauit.

Porrò excommunicatio minor iuris decreto incurritur propter culpabilem communicationem cum excommunicato non tolerato, ut ſuprà. Quamuis verò abſolutè nihil obſtet, quo minùs ea etiam ab homine decernatur; ut videlicet in pœnam alicuius delicti, præſertim accedente contumacia, nominatim alicui interdicitur uſus Sacramentorum, vel ſaltem vnus præcipui S. Eucharistiæ (quæ antonomatiçè communio dicitur. ait Viſtor. in ſum. de excommun. nu. 1.) atque olim ita in uſu erat, ut alicui ſeu ob hoc ipſum vetitæ communicationis, ſeu ob aliud peccatum præteritum, partialis excommunicatio à ſacta Synaxi, vel etiam oratione imponeretur, uti frequenter legere poteſ in regula S. Benedicti. Nunc autem talis excommunicandi modus ferme deſit. Vide Viſtoriam ibidem, Suar. ci. diſ. 24. §. 3. n. 7. Tol. l. 1. c. 17. n. 5. & quæ dicam infra hoc tract. p. 4. c. 1. & l. 5. tr. 6. c. 7. n. 3.

Denique à minore excommunicatione in externo foro quiuſ Ordinarius Eccleſiaſticus Iudex abſoluere poteſt: In foro autem interno, non tantum Episcopuſ, ſed etiam Parochuſ, & quiuſ proprius ſacerdos, ſicuti habetur in c. nuper, de ſent. excommun. & docent ex communi Sotus in 4. d. 22. q. 2. a. 3. concl. 1. Syl. ver. abſolutio, 1. n. 3. Couar. c. alma, p. 1. §. 12. n. 6. Auila p. 2. cap. 7. diſp. 2. dub. 1. dub. 1. Suarez l. 4. Agid. cit. dub. 17. in fine. Imò non deſunt DD. inter quos Nau. c. 27. n. 39. & in c. placuit d. 6. de pœnit. n. 25. Tolet. cit. c. 17. in fine, exiſtimantes, quemuis ſimplicem Sacerdotem abſoluere poſſe ab excommunicatione minore, quæ ob venialem culpam contracta fuit. Sed alij rectiùs id negant. Richar. in 4. d. 18. a. 9. q. 3. Medina ci. §. 6. Caiet. t. 1. opuſc. tr. 7. q. vn. Quia abſolutio ſacramentalis à peccatis, & abſolutio à cenſuris valde diuerſæ ſunt: & illa quidem ad forum internum pœnitentiæ pertinens: hæc verò ad forum externum ac contentioſum, quæ proinde nemini competere poteſt, niſi vel in externo foro iuriſdictionem obtineat, vel ipſi à iure, aut ab homine talis poteſtas commiſſa ſit; Non legimus autem à iure commiſſam cuiuſ etiam ſimplici Sacerdoti: ſed ſolū proprio Sacerdoti: quo nomine in hac materia intelligitur non tantum qui ordinariam iuriſdictionem habet ad abſolvendum à mortalibus peccatis: ſed etiam qui delegatam, ſicuti colligitur ex cap. omnis vtriuſque de pœnitent. & remiſſ.

## CAP. V.

Quinam excommunicati ſint vitandi non tolerati: & qui tolerati, ſed non



## S V M M A R I V M.

1. *Hodie excommunicati, nisi denunciati sint, aut notorii clericorum percussores, à fidelibus vitandi non sunt, seu in sacris, seu politicis negotijs.*
2. *Ad hoc, ut percussor clericus vitandus sit, requiritur notorium facti adeo in publico manifesti, ut nulla tergiversatione celari aut excusari possit.*
3. *Qui in uno loco ob excommunicationem denunciatus est, alibi ubi eius excommunicatio ignota, vitandus est occulte: non publice: sed clericus percussor in loco, ubi id ignotum, neque in occulto vitari debet.*
4. *Fideles, si velint abstinere possunt à communione excommunicati non vitandi, si excommunicatio publice nota sit, vel sufficienter probari possit.*
5. *Communis est doctrina, quòd fideles peccent, si sine vlla causa necessitatis, aut maioris utilitatis excommunicatum, quamvis emendatum, inducant ad sacrificandum vel sacramenta ministranda, si alius minister facile haberi possit: contraria tamen sententia non est improbabilis.*
6. *Et si ipsi excommunicati tolerati se ingerere non debeant communioni fidelium, praesertim in sacris: tamen licetè requisiti aut rogati parere possunt.*
7. *Excommunicatus non vitandus valide absoluit à peccatis, & exercet actus iurisdictionis voluntaria: non item coactiva.*
8. *Probabile est, quòd liceat hodie publice orare & sacrificare pro excommunicatis toleratis, etiam haereticis: modò horum nomina in Missa non exprimantur contra Ecclesiae morem, aut cum scandalo.*
9. *Excommunicatis toleratis, praesertim ob censuram, sacra sepultura negari non debet. Sin verò constet, vel praesumi possit, eos in mortali peccato secessisse, v.g. in haeresi, sepelire tales non licet in loco sacro: si tamen sepeliantur, locus non violatur.*

**C** V M præcipuus excommunicationis effectus sit, exclusio à communione, siue consortio aliorum fidelium seu baptizatorum; vt & <sup>hic</sup> excommunicato prohibitum sit cum reliquis fidelibus <sup>et</sup> sacris, seu prophanis negotijs communicare; & <sup>si</sup> quoque eundem evitare teneantur, ideo necesse <sup>est</sup> explicare, quousque se prohibitio ista extendat.

Notandum igitur est: Antiquo iure omnes omnino excommunicatos vitandos fuisse, eo tamen discrimine, vt si excommunicatio publice nota fuisset, publice etiam vitarentur: sin verò publice nota non esset, priuatim tantum vitarentur ab ijs, qui eam cognitam haberent, sicuti constat ex c. cum non ab homine, de sent. excomm.

**I** n Concilio verò Constantiæ circa Annum Domini 1414. celebrato, ad schisma inter tres Pontifices tollendum, Ecclesiaeque pacem reddendam: ac postea confirmato à Martino V. Pontifice, edita est constitutio, *Ad evitanda*, quæ licet in tomis Conciliorum non extet, refertur tamen à S. Anton. (qui eodem illo tempore vixit) 3. p. tit. 26. c. 3. Soto in 4. d. 22. quæst. 1. a. 4. Gutierrez lib. 1. canon. qq. c. 1. num. 1. Nau. c. 27. num. 35. & confirmata fuit à Leone X. in Concilio Lateranensi. Summa hæc est: Ad evitanda animarum pericula statuit S. Synodus, vt nemo deinceps quemquam ratione alicuius sententiæ, aut censuræ Ecclesiasticæ à iure, vel ab homine generaliter promulgatæ, in Sacramentorum administratione, receptione, aut alijs quibuscunque rebus diuinis, vel externis vitare, aut interdictum observare teneatur, nisi sententia vel censura huiusmodi contra certam personam, Collegium, Ecclesiam, &c. specialiter à Iudice publicata, vel denunciata fuerit: eo excepto, qui ob sacrilegam manuum iniectionem in Clericum, excommunicationem canonis notorie incurrit, vt factum eius nulla tergiversatione celari, & nullo iuris suffragio excusari possit: nam ab huiusmodi, etiam non denunciati communione abstinendum. Postea verò subiungitur: *Per hæc autem non intendimus ipsos excommunicatos suspensos, & interdictos in aliquo subleuare, vel quomodolibet eis suffragari.*

Porro hæc constitutio in Basileæ postea habito Concilio, Anno Domini 1435. correctæ, videtur; vt non solum Clericorum percussores, sed quicumque etiam alij noto-

riè excommunicati à fidelibus vitari debeant, sicuti videtur est sess. 20. dicti Concilij Basileensis. Quare dubitant DD. Vtrum Basileensis, an Constantiensis Concilij decreto hodie standum sit: Pro Basileensi stat Syl. ver. excomm. 5 num. 9. Nau. in c. 1. §. labore, d. 6. de poenit. Couar. c. alma, p. 1. §. 2. num. 7. Sed alij ferme communiter pro Constantiensi, sicuti videri potest apud Sotum cit. 2. 4. Nauar. in manuali c. 27. num. 35. Victor. de excomm. num. 10. Henriq. lib. 13. c. 5. num. Auila p. 2. c. 6. disp. 2. dub. 1. Suarez disp. 9. f. 2. num. 5. Egid. disp. 13. dub. 2. Tum quia Concilium Basileense ab Eugenio IV. Pontifice reuocatum, atque autoritate Apostolica confirmatum non est; exceptis paucis quibusdam constitutionibus circa causas beneficiales à Nicolao V. receptis: inter quas non erat ea de vitandis excommunicatis. Tum quia consuetudo, (quæ est optima legum interpretis; imò per se ipsam sufficiens ad legem nouandam) iam obtinuit, praesertim in nostris septentrionalibus partibus, vt haeretici aliisque excommunicati haud euitentur, nisi vel nominatim denunciati, vel notorii Clericorum percussores sint. Quod etiam in Concordatis Galliae cum Leone X. receptum legimus.

Quare pro pleno intellectu, & praxi dictæ extrauagantis *Ad evitanda* quædam ex communi Doctorum sententia, notanda sunt: Primum, Non sufficit aliquem esse nominatim excommunicatum, vt evitare debeat: sed insuper requiritur, vt à Iudice siue Superiore suo publicè denunciatus sit. Ita colligitur ex verbis extrauagantis, & docent Nauar. cit. num. 35. Couar. p. 1. §. 2. num. 7. ver. quarto, Gutierrez cit. c. 1. num. 29. Auila p. 2. c. 6. disp. 2. dub. 3. Egid. disp. 13. dub. 1. aliique ferme communiter. Ex quo colligitur primò; Si alicui in scripto tradita sit sententia excommunicationis, vt eam contra aliquem denuntiet, quòd denuntiaturus non teneatur hominem evitare, nisi posteaquam sententia contra illum denunciata siue promulgata est. Secundò colligitur cum Nauar. lib. 5. consil. 6. num. 2. & consil. 9. n. 5. de sentent. excomm. edit. 2. & Gloss. communiter recepta in c. cupientes, §. quòd si per viginti, verb. priuatus, de elect. in 6. Licet appellatio ipsam excommunicationis sententiam absolute latam suspendere non possit: cum ea executionem secum trahat, cap. pastoralis, §. verum, de appellat. nihilominus suspendit effectum denuntiationis: vt appellans, pendente appellatione, vitandus non sit. Quasi simili ratione tamen aliquis in facto notorio appellare non possit, cap. cum sit Romana, eod. tit. tamen à sententia Iudicis declarantis factum notorium esse, appellare potest: cum is iniuste iudicare potuerit, sicuti notauit Abbas p. 1. consil. 100. Denique, licet à poena iuris non appelletur, cap. quia nos, de appellat. appellari tamen potest à sententia Iudicis declarantis aliquem incidisse in poenam iuris.

Secundum. Cum duplex sit notorium: *iuris & facti*, sicuti dicam lib. 3. tractat. 3. de iust. p. 2. c. 3. num. 7. quæst. 3. sciendum est, vt Clerici percussor dicatur notorius, & ante denuntiationem vitandus, hodie non sufficere notorium iuris: sed requiri notorium facti, quod nulla tergiversatione celari possit, sicuti docet Couarr. c. alma, p. 1. cap. 2. num. 9. in fine, Auila cit. disp. 2. dub. 4. & colligitur ex verbis extrauagantis. Porro notorium facti debet esse publicum: quare etsi aliquid tribus aut quatuor personis praesentibus factum sit, vt sufficienter in iudicio probari possit, non ideo statim factum notorium censetur: consequenter, si quis Clericum, te, aliisque tribus aut quatuor testibus praesentibus, in domo priuata percussit, non erit ille tibi, aliisque tribus ne priuatim quidem evitandus: quia licet factum his notorium sit, non tamen absolute notorium, siue publicum existit, vt nulla tergiversatione celari possit, sicuti docet Nauar. c. 25. num. 73. Gomez 3. resol. c. 1. num. 42. Arrag. 2. 2. quæst. 10. 2. 9. Auila cit. dub. 4. §. secundò sequitur: licet contrarium.



sentiat Suarez disput. 7. sect. 2. num. 2. de censur.

Hoc adde, tametsi factum notorium sit, ut in publicā communitalis notitiam deueniret, vel mox deuenire necesse sit; si dubium tamen iuris subsit, quia percussor aliqua probabilitatis ratione se defendere potest, quo minus excommunicationem contraxisse videatur; puta quod percussio facta sit causa defensionis, vel ex vehemēte passionē irā: hoc casu vitandus non est: propter verba Concilii. *Aut aliquo iuris suffragio excusari possit.* Quare tunc solum Clerici percussorem euitare debeo, quando morali certitudine mihi constat seu per proprium visum, seu per confessionem Rei, seu per plurimum testimonium, seu per publicam & constantem famam, quod percussio notoriē facta sit, ut nulla tergiversatione celari possit: atque ita malitiose, ut nulla ratione probabili à peccato mortali, & annexa censura canonis excusari queat, sicuti explicat Auila cit. c. 6. disp. 11. dub. 11. & 12.

3 Quares. Si sciam, Titium in vna ciuitate vel diœcesi publicè denuntiatum, vel notorium Clerici percussorem fuisse: ac nondum absolutum præsumere possim: utrum debeam eum vitare etiam in alia ciuitate, vel diœcesi, ubi eius excommunicatio, vel denuntiatio publicè ignoratur? Ad hoc respondent Syluest. ver. excommun. 5. num. 26. Armilla eodem ver. num. 61. Auila c. 6. disput. 11. dub. 12. Sanchez lib. 2. moral. cap. 11. num. 20. Talem in publico vitandum non esse: sed in occulto. Ratio est: Quia à lege antiqua recedendum non est, nisi quatenus in lege noua exprimitur, l. præterea in fine. Cod. de appellat. Cum igitur in extrauagante Constantiensis nihil decretum sit circa modum excommunicatum vitandi, publicè an occultò, sed solum circa qualitatem excommunicatorum, utrum denuntiati sint, nec ne: ideo standum est iure antiquo c. cum non ab homine, de sent. excommun. ut excommunicati (intellige nunc denuntiatos) publicè vitentur, si eorum excommunicatio publicè nota sit: occultè verò, si publicè ignota sit.

Addo tamen huic doctrinæ; Si vera sit sententia non paucorum Doctorum, de qua dicam lib. 3. de iust. tr. 3. p. 2. c. 3. n. 10. Crimen, quod per Iudicis sententiam publicatum est, alijs etiam locis sine iniuria euulgari posse; consequens esse, talem etiam in publico euitari posse ab ijs, qui illius denuntiationem alibi factam esse nōrunt licet fortasse non teneatur eum euitare: quia canones Ecclesiasticos, vetantes communicationem cum excommunicato, benignius interpretari conuenit, ut non obligent cum noua infamia excommunicati. quamquam ex suprā cit. cap. cum non ab homine, parum probari posse videtur, cum illud expressè loquatur de eo, qui per Iudicis sententiam denuntiatus non est. Alia verò ratio est de percussore Clerici alicubi notorio: is enim alibi, ubi eius crimen incognitum est, publicè euitari non potest; occultè verò euitari non debet, secundum probabilem sententiam apud Auilam lo. cit. §. Vir quidam doctus. Ratio diuersitatis est: Quia sententia Iudicis denuntiatoria, sicuti & ipsamet excommunicatio, afficit personam, quæ proinde illam secum fert, quocunque vadat; accedente etiam iuris communis dispositione. At verò publica notitia facti, seu criminis commissi circumscripta est loco: ponimus enim alibi crimen occultum esse.

4 Tertium notandum. Quod attinet ad reliquos excommunicatos toleratos; qui videlicet neque denuntiati, neque notorii Clericorum percussores sunt; cum his fideles tam in sacris, quam prophanis actionibus communicare quidem possunt: ad id tamen minimè obligantur: sed sine iniuria etiam abstinere, cum priuatim, tum etiam publicè: dummodo eorum excommunicatio vel publicè nota sit, vel sufficienter ab ipsis probari possit. Quare licitum est Iudici, aut parti litiganti exceptione repellere Auctorem, Aduocatū, Testem excommunicatum; Regularibus item & Clericis recusare imperium seu iurisdictionem Episcopi, Abbatis excommunicati, si-

cuti de iure etiam antiquo testatur Doctores in 4. distinct. 18. vbi Richar. 2. 11. quæst. 2. Neque cogi possunt subditi, ut à Parocho excommunicato Sacramenta suscipiant, eius Missæ intersint, vel ut excommunicati Iudicis seu in spiritualibus, seu temporalibus legi, sententiæ, aut mandato pareant. Ratio est: Quia Concilium Constantiense non ipsis excommunicatis: sed solum reliquis fidelibus fauorem & gratiam conferre voluit. Quod autem ob gratiam alicuius conceditur, non est in eius dispendium retorquendum, regul. 61. in 6. Et, Nemo beneficio inuitus uti cogitur, argum. reg. 69. ff. Hæc tamen doctrina limitanda est primo: Nisi vel consuetudo, vel specialia fœdera alicuius regionis aliud postulent, qua ratione in Imperio Lutherani Confessionistæ à publicis contractibus, iudicijs, dignitatibus, ciuilibus repelli non possunt. Secundo; Interdum lex naturalis charitatis, pietatis, aut obseruantia postulat, ut subditi Prælato suo: & liberi: etiam emancipati, parentibus suis excommunicatis, si iure possint, subsidium, aut obedientiam præstare non intermittant.

Quantum notandum. Tametsi fideles communicando cum excommunicatis toleratis nunquam peccent contra legem, seu censuram Ecclesiasticam: quare neque minorem excommunicationem ob id vnquam contrahant, sicuti rectè notatit Auila part. 2. cap. 6. disput. 8. dub. 1. conclus. 4. Suarez disput. 11. sect. 4. num. 3. Aegid. disp. 13. dub. 3. conclus. 6. nihilominus interdum peccare possunt contra legem naturalem charitatis, si absque necessitatis ratione cum tolerato communicent. Primo: Si intelligam excommunicatum ob meam communicationē in contumacia sua confirmatum iri; sin verò ab ipso abstineam, ad emendationem eius provocandum fore.

Secundò, si intelligam excommunicatum in peccato suo corrum desit persistentem, non nisi sacrilegè Sacramenta administraturum, non possum ab eo petere, vel ipsi me offerre, sine causa necessitatis, vel utilitatis, sicuti constabit ex ijs, quæ dicam lib. 2. tract. 1. cap. ult. num. 4.

Tertiò, tametsi aliquis existimet, Ministrum excommunicatum à peccato recessisse, paratūque absolutionem à censura petere, communiter tamen docent DD. apud Auilam cit. dub. 1. Suar. cit. sect. 4. num. 10. Coninck to. 1. quæst. 64. a. 6. dub. 2. & tom. 2. disp. 13. dub. 2. non esse licitum fidelibus sine causa necessitatis, aut maioris utilitatis, ab eo Sacramenta petere: si videlicet alius non excommunicatus præstō sit, qui æquè vtiliter ministrare possit. Ratio est, quod excommunicatus peccet ministrando Sacramenta sine vlla necessitate, si alius æquè idoneus adsit: cum per se indecens videatur, ut præcisus ab Ecclesia publica ministeria Ecclesiæ sine vlla necessitatis ratione obeat: consequenter etiam is peccat, qui tale quippiam ab eo petit. Quæ doctrina multò magis locum habet in celebratione: cum indecens sit, eum sacrificium Missæ offerre, atque legatione fungi apud Deum pro Ecclesia, à qua præcisus est: quare excommunicatus id præstare non potest, sine grāui causa; cōsequenter neque fideles ab eo petere, sicuti notauit Auila disp. 8. dub. 2. ad 2. Aegid. cit. dub. 3. conclus. 4. vbi ait, grauem eiusmodi causam censerī, si alioquin aliquis sine viatico mori deberet; vel integra Parochia, festo die, Missa carere.

His adde, minorem causam requiri, ut fideles à Parocho suo excommunicato tolerato administrationem alicuius sacramenti, vel sacrificium Missæ iure suo petere possint, quàm ab alio Sacerdote, qui ipsis nullo iure obligatus est, sicuti ex communi notauit Auila cit. disp. 8. dub. 2. opin. 5. Aegid. tom. 1. quæst. 64. a. 6. dub. 2. conclus. 3. §. nota tamen, Suarez cit. sect. 4. num. 17. Minor item causa requiritur, ut Sacramenta fideles recipiant ab eo, qui per se paratus, vel expositus est, quàm à non parato: quia minùs illi, quàm huic existunt causa siue occasio



casio eiusmodi actionis. Denique verò excommunicati tolerati Sacerdotis sacrificio, vel alteri diuino officio solum interesse, sine vlla petitione aut inductione, fideles non prohibentur, per se loquendo, sicuti constat ex decreto Constantiensi, & docet Aegid. tom. 2. disp. 14. dub. 3. conclus. 2.

Hæc diuina ex communi doctrina. Interim verò improbabile non est, quod tradunt Sotus in 4. d. 22. quæst. 1. a. 4. conclus. 1. Sanchez lib. 7. de matrim. disp. 9. num. 8. Nullam esse culpam, petere Sacramentorum administrationem ab eiusmodi excommunicatis toleratis; propterea quod Constantiense Concilium fidelibus absolute concessit facultatem communicandi cum talibus, tam in sacris quam politicis: consequenter neque ipsos excommunicatos præcisè ob censuram peccare, si rogati Sacramenta ministrant: modò se non ingerant.

Quintum notandum. Quamuis ipsis excommunicatis toleratis in dicta extrauagante nulla gratia directe facta sit, ideoque ipsi peccent, si spectato communi iure, fidelium communioni seu in sacris, seu politicis negotijs, extracausa concessos, se ingerant: indirectè tamen & per consequentiam etiam ipsi commodum ex Constantiensi illo decreto reportant. Primò enim, ne gratia seu licentia alijs fidelibus facta cum excommunicato tolerato communicandi inutilis, aut noxia sit: necesse est dicere, etiam ipsi excommunicato ad excommunicationem legitime provocato, permissum esse communicare: imò interdum obligari: vt si Parochiani à Parocho administrationem Sacramenti: vel ciues à Iudice excommunicato administrationem iustitiæ exigant: modò per eos non stet, quo minus, si id fieri possit, ab excommunicationis censura, ante præstitum officium, absoluantur. Secundò, cum ius indulgeat subditis, vt à Iudice excommunicato tolerato iustitiæ, à Pastore ordinario absolutionem à peccatis, & c. petere possint: ne frustranea sit hæc concessio siue indulgentia, fateri debemus, eiusmodi toleratis exercitium iurisdictionis suæ nequaquam ademptum esse, sicuti notauit Couar. c. alia. p. 1. §. 7. num. 9. Suar. disp. 11. sect. 4. num. 9. Auila p. 2. c. 6. disp. 3. dub. 2. conclus. 3. & Nau. lib. 5. consil. 15. de hæret. q. 2. vbi bene resolui, licitum esse à Parochis in hæresin aut schisma notoriè lapsis, antequam denunciati sint, Sacramenta omnia suscipere. Quod non rectè refutat Azor tom. 1. lib. 8. c. 11. quæst. 7. ex S. Thom. 2. 2. q. 39. a. 3 vbi ait, eiusmodi hæreticos iurisdictione priuatos esse, quia hoc verum est, spectato iure antiquo, non nouo.

Eademque ratione valida etiam est præsentatio, electio, vel collatio, alicuius muneris, dignitatis, beneficii facta ab excommunicato tolerato, nisi per oppositam prius exceptionem infirmata sit. Idemque dicendum de dispensatione in voto, iuramento; item de absolutione à censura, & alijs eiusmodi actibus iurisdictionis externæ quæ ob fauorem, vel petitionem alicuius exerceri potest, aut debet, sicuti ex communi docet Suarez disp. 14. sect. 2. Aegid. disp. 14. dub. 10. Auila disp. 6. dub. 3. Quin etiam ex officio Iudicem excommunicatum toleratum actus iurisdictionis directiæ, & coactiæ validè exercere posse v. g. inobedientem excommunicando, existimat Aegid. ibid. num. 91. idemque sentire videtur Gutierrez lib. 1. canon. qq. c. 1. num. 82. in fine. tum quia Iudex, quamdiu ab Ecclesia toleratur, exercitium iurisdictionis retinet: tum quia ad bonum publicum pertinere videtur, vt Iudicis tolerati acta publica rata existant, argum. c. ad probandum, iunct. Gloss. de sent. & re iudicata.

Sed contrarium probabilius docet Suarez cit. sect. 2. num. 15. Non esse validam excommunicationis sententiam, latam à Iudice notoriè excommunicato tolerato, seu non vitando. Quia in extrauagante Constantiensi nullum ius, fauor, aut licentia data est ipsis excommunicatis, nisi quatenus cedit in gratiam, commodum, aut petitionem reliquorum fidelium. Ergo actus iurisdictionis coactiæ, quos Iudex ex officio exercet erga subditum in-

uitum, non minùs nunc inefficaces seu irriti sunt, quam olim fuerunt. Ex quo patet responsio ad primum: Ad alterum respondeo, Ad bonum publicum pertinere, si impedimentum eius, qui publicum officium gerit, occultum sit, vt eius acta valeant, sicuti notauit Gl. in cit. c. ad probandum; non item, si impedimentum publicum seu notorium existat.

Restant duæ **QVÆSTIONES**: **PRIMA**. Vtrum licitum sit hodie pro excommunicatis toleratis, v. g. hæreticis, publicè orare, & sacrificare? Multi DD. negant, Guilelmus Alauus lib. 2. de sacram. Euchar. c. 31. Dominicus Sotus in 4. d. 22. quæst. 1. a. 4. conclus. 2. §. hoc supposito, Couar. p. 1. §. 6. num. 4. Bellarm. lib. 2. de Missa, c. 6. Suarez disp. 9. sect. 2. num. 16. Auila p. 2. c. 6. disp. 9. dub. 3. Ioan. Bapt. Scortia lib. 2. de sacrificio Missæ, c. 2. num. 4. Probatur primò: Quia concilium Constantiense non intendit vllum fauorem præstare ipsis excommunicatis: id autem totum cederet in ipsorum fauorem, si pro eis publicè orare, & sacrificare licitum esset.

Secundò: Quia Concilium solum permittit fidelibus externam communicationem cum excommunicatis toleratis: talis autem non est applicatio communium Ecclesiæ suffragiorum: cum ea fiat per internam mentis intentionem. Tertiò: Cum excommunicationis vis præcipua in eo consistat, quod hominem priuet communibus Ecclesiæ suffragijs, ideoque tanquam ab Ecclesia præcisum Sathanæ tradat: non est credibile, hunc effectum à Concilio sublatum, aut imminutum fuisse.

Contrariam tamen sententiam docuit Nauar. cap. 27. 8 man. num. 36. & expressius Henric. lib. 13. c. 11. num. 2. Aegid. tom. 2. disp. 14. dub. 6. num. 40. Eaque sententia probatur primò: Quia Concilium Constantiense decreuit, quod deinceps nullum excommunicatum, præter denunciatos, & notorios Clerici percussores: in quibuscunque etiam diuinis rebus vitare debeamus: sed liberè communicare liceat. Publicè autem pro aliquo orare, vel sacrificare est quædam communicatio in diuinis, sicuti colligitur ex c. à nobis, & c. sacris, de sent. excommun. Imò verò Ecclesia excommunicatos communium suffragiorum, aliarumque rerum spiritualium participatione priuare videtur non primaria intentione: (cum potius eorum emendationem intendat, quam vt in peccato sine spiritualibus auxilijs desertos vellet) sed tantum secundaria: quatenus id necessarium est ad illorum societatem perfectè vitandam: vt ea ratione grauitatem sui peccati agnoscentes, à contumacia faciliùs recedant: Consequenter, si hæc ratio cesseret, quia Ecclesia permittit fidelibus communicationem cum excommunicato tolerato, videtur etiam permittere, vt pro eis publica suffragia fiant.

Secundò probatur ex ratione, quæ mouit Concilium, vt cum excommunicatis toleratis licentiam daret communicandi: vide licet *ad euitanda animarum pericula*: hæc autem ratio similiter vrget in publicis suffragijs, atque Missæ sacrificio: Ponamus enim Regem, vel Episcopum, qui in sacrificio Missæ nominari solet, videri ob aliquod factum notorium excommunicationem incurrisse multis Sacerdotibus graue accidere, imò etiam litis acurbationis publicæ occasionem præbere potest, si antedenuciationem ipsius nomen in Missæ sacrificio omittere debeant. Similiter, si excommunicatus toleratus elemosynam tibi offerat, vt pro ipso sacrifices, non erit tibi licitum accipere: consequenter eum vitare debebis, non sine tuo aliquo incommodo: cum tamen Concilium expresse statuerit, vt nemo huiusmodi excommunicatos in diuinis, vel externis rebus vitare teneatur.

Tertiò: Iure antiquo, si quis priuatim scivit aliquem excommunicatum esse, non debuit ipsi publicè denegare Ecclesiæ suffragia, sicuti fateetur Suarez in cit. sect. 2. num. 19. in fine. Ergo iure nouo, neque notoriè excommunicato, ac nondum denunciato (Clerici percussores semper excipimus) suffragia necessariò deneganda sunt: Quia sicuti olim occulu excommunicati: ita hodie notoriè ex-



communicati ante eorum denuntiationem tolerati censentur.

Quartò: Vltimatissimum est apud viros pios & doctos, vt Missæ sacrificium offerant pro conuersione hæreticorum: eamque consuetudinem reprehendi non posse, fatetur Belarmin. lib. 2. de Missa, cap. 6. in fine. Neque enim pugnat cum institutione sacrificij: quia cum sacrificium crucis pro omnibus oblatum fuerit, cur non possit etiam sacrificium Missæ pro omnibus offerri? Atque olim moris fuisse, vt Sacerdotes publicè orarent pro infidelibus, hæreticis, Iudæis, &c. ex antiquis Liturgiis & Patribus ostendit Belarmin. ibid. Neque pugnat cum succedentis Ecclesiæ canonibus: siquidem hi per extrauagant. Constantiensem, vel saltem per consuetudinem, moderationem acceperunt, vti supra dictum.

Quamuis autem Auila cit. dub. 3. probat. 4. citat. Si aliqua Religione præcipiatur, vt pro conuersione hæreticorum Missæ legantur: non esse sensum, quod pro ipsis hæreticis directè offerendum sit: sed potius pro augmento ac pace Catholicorum, qui inter hæreticos viuunt eorumque conuersioni incumbunt: Multi tamen, vt supra dictum, proximè ac directè pro ipsorum hæreticorum salute, ac conuersione, ex motiuo charitatis, Deo supplicant & offerunt; licet principaliter propter Ecclesiæ pacem; imprimis verò ipsius Dei honorem augendum. Dummodo interim hæretici in Missa non exprimantur, contra Ecclesiæ morem, aut cum scandalo.

Quapropter hæc posterior sententia non displicet. quam qui lequi volet, respondeat ad primùm prioris sententiæ argumentum. Directè quidem nullum fauorem excommunicatis præstari; attamen indirectè, vt supra dictum est. Ad secundum negari debet; Oblationem sacrificij, & alia publica officia, quæ visibiliter fiunt pro aliorum, sæpenumero etiam petentium, cooperantium, salute; non esse communicationem quandam. Ad tertium responderetur: Effectus excommunicationis mutabiles ac dispensabiles esse: quippe pendentes ab Ecclesiæ voluntate. Quare licet fateamur, simpliciter loquendo, excommunicatos omnes communibus Ecclesiæ suffragijs priuatos esse: tamen interdum iustis de causis permittit Ecclesia, vt pro ijs talia suffragia fiant: sic enim olim concessum erat, vt pro excommunicatis occultis publicè orare licitum esset: nunc verò, secundum hanc nostram sententiam, vt pro omnibus toleratis, cessante tamen scandalo, vel contraria consuetudine.

Altera Quæstio est de sacra sepultura, vtrum excommunicatis, præsertim hæreticis notorijs, sed nondum denuntiatis concedi possit? Respond. & dico I. Qui tales excommunicatos etiam hæreticos in loco sacro sepeliunt, non incurrunt excommunicationem Clement. 1. de sepulturis, latam aduersus eos, qui excommunicatum scienter sepeliunt: neque incurrunt excommunicationem cap. quicumque, de hæret. in 6. latam contra eos, qui hæreticos, eorumque fautores, &c. scienter in loco sacro sepeliunt: denique neque locus sacer sepultura excommunicati aut hæretici, nondum denuntiati, violatur. Hæc est communior, quam leges apud Nauar. cap. 27. man. num. 137. Henriq. lib. 13. cap. 11. §. 3. Agid. tom. 2. disput. 14. in fine, dub. 10. Auilam part. 2. cap. 6. disput. 10. dub. 6. Nam eo ipso, quod tales vitandi non sunt, sed tolerati: nulla ex ipsorum communicatione à fidelibus, aut sacris locis censura incurriri potest, sicuti indicat Nauar. lib. 5. consil. 10. numer. 4. de hæreticis, edit. 2.

Dico II. Probabile est, quod excommunicatis, etiam notorijs, sed nondum denuntiatis, si piè mortuos fuisse præsumi possit, sacram sepulturam concedere fas sit. Ita expressè docet Nauar. cit. c. 27. nu. 36. ad 2. Henriq. cit. §. 3. contra Auilam part. 2. cap. 6. disput. 9. dub. 6. & disput. 10. dub. 1. conclus. 3. casu 4. Probatur primò: Quia sacra sepultura eadem ratio est, quæ diuinorum officio-

rum ac suffragiorum: quandoquidem ob hanc causam fideles in sacro loco sepeliuntur, vt participes fiant suffragiorum sicuti bene notauit Henriquez loc. cit. & Suarez de censuris disp. 12. sect. 4. num. 2. in fine. Sed probabile est, pro excommunicatis non vitandis licitum esse publicatis orationes & sacrificia offerre, vt supra dixi: Ergo, &c. Secundò: Causa, cur excommunicatis sacra sepultura negetur, ea est, quæ affertur cap. sacris de sepultura. Vt, quibus viuus non communicamus, neque mortuis communicemus: Ergo à sensu contrario, quibus vitis communicare potuimus, quando in viuis tolerati fuerunt, etiam mortuis per sacram sepulturam communicare non prohibemur.

Corollarium. Si hæreticus ante mortem manifesta signa dedit conuersionis, licet ab hæresi absolutus non sit, potest in sacro loco sepeliri, quamuis ad vitandum scandalum & alia incommoda, oporteat prius de hac re Episcopum admonere: qui si velit, etiam post mortem absolutionem ab excommunicatione impendere potest.

Nota etiam quod dixi in 2. respons. Si piè mortuos fuisse præsumi possit: Cum enim excommunicatio non nisi ob crimen mortale incurratur; ideo si quis in tali crimine, notorio, v. g. in hæresi decedat, sacra sepultura prohiberi debet, non ob censuram præcisè, sed ob peccatum mortale, in quo notoriè decessit, & ob id orationum ac suffragiorum Ecclesiæ incapax est, iuxta ea, quæ dicam lib. 3. tractat. 5. c. 12. num. 4. ver. Quartò. Verum est, quod in quibusdam Germaniæ locis, quibus cum Catholicis Lutherani permixti viuunt, diuturna consuetudine permittitur, vt hi in locis sacris sepeliantur à Ministris suis: si tamen possibile esset, talis consuetudo tolli deberet, atque curandum, vt Catholici separatim ab hæreticis sepultura locum sacrum retinerent.

Id verò minùs dubitationis continet, quod eiusmodi hominum funera cognati & amici Catholici comitari solent: tum quia talis cooperatio ad sepulturam valde remota & materialis est: ideoque eiusmodi comitantes nomine sepelientium non comprehenduntur, sicuti docet Gloss. in Clemen. 1. verb. sepelire, de sepultur. Nau. c. 27. num. 137. & lib. 5. consil. 12. de hæret. tum quia talis comitatus cognationis, aut necessitudinis causa præstitus, potius ad politicam communicationem spectat.

## CAP. V.

### De Excommunicationibus speciatim de ea, quæ ob Clerici percussio- nem decreta est.

#### SUMMARIVM.

- 1 Ab excommunicatione iuris non reseruata quinis expositus Sacerdos absolvere potest.
  - 2 Casus Bulla Cane Domini specialiter Summo Pontifici reseruantur.
  - 3 Excommunicationem Canon si quis suadente, incurrunt, quicumque Clericum, quamuis minoribus tantum aut prima tonsura iniunctum, percusserint, nisi quod in quibusdam casibus Clerici priuilegio canonis priuati sint.
  - 4 Omnes Religiosi & trinusque sexus, eorumque Conuersi ac Conuersæ canonis priuilegio gaudent.
  - 5 Ad excommunicationem canonis incurrendam requiritur iniuria grauis, cum violentia illata Clerico, vel Religioso.
  - 6 Excommunicatio ista speciali constitutione extenditur etiam ad mandantem, consulentem: vel non impediendum, si ex officio impedire debebat.
  - 7 Qui mandatum Clericierberandi, occidendi, ante operis executionem, reuocauit, immunis est à pena excommunicationis, & irregularitatis; licet mandatus nihilominus exequatur.
- De consulente, licet dispar ratio esse videatur: tamen probabiliter dici potest, si consilium datum reuocauit, & alia omnia egit, quæ potuit ad effectum impediendum: eo nihilominus secuto,



- secuto, penas iuris euadere.*
8. *Certi casus sunt, quibus Clericum, vel monachum percutiens, canonis censuram euadat.*
9. *Pater laico non videtur permissum castigare Clericum in manibus constitutum.*
- Episcopus non per se, sed per alium Clericum: vel, ubi consuetudo permittit, per laicum Clericos castigare potest.*
10. *Ab excommunicatione, contracta ob leuem Clerici vel Monachi percussione, Episcopi ordinario iure absolvere possunt: Sed, si grauis fuerit percussio, dummodo non enormis, in quibusdam casibus Episcopo, vel Ordinis Praelato communis iura absoluendi potestas competit.*

**E**Xcommunicationes iuris aliae sunt, quarum absolutionem sibi reseruat auctor, siue is sit Papa, siue Episcopus, &c. Aliae sunt excommunicationes non reseruatae, à quibus proinde etiam Parochus, & quiuis alius expositus Sacerdos, ex tacita commissione auctoris, absolvere potest, sicuti habetur in cap. nuper, de sentent. excomm. ibi, *Quia conditor canonis eius absolutionem specialiter sibi non retinuit, eo ipso concessisse videtur facultatem alijs relaxandi.* Et sic tradit Nauar. c. 27. num. 39. Syluest. verb. absolutio, l. num. 4. Henric. lib. 13. cap. 28. num. 5. Auila p. 2. c. 7. disp. 1. dub. 4. Suarez disp. 7. num. 9. Sa verb. excomm. ubi de absolut. num. 15.

Excommunicationes reseruatae (loquor de Pontificijs tantum) aliae sunt Bullae Cœnæ Domini, ideo sic dictae, quia quotannis in die Cœnæ Domini renouari solent. Circa quas excommunicationes Bullae hæc obiter notanda sunt: I. Excommunicationes Bullares habent se per modum sententiae latae ab homine: quia non feruntur, vt perpetuò durent per modum statuti: cum quotannis renouari soleant. Quamobrem mortuo Pontifice earum vis expiraret: nisi, vt nunc fieri solet, specialiter caueretur, processus Bullares robur suum obtinere etiam vacante Sede, vsque ad tempus, quo à futuro Pontifice de nouo edantur, ait Tolet. lib. 1. c. 18. in fine.

II. A casibus Bullae Cœnæ, & annexa excommunicatione nemo quamuis Episcopali, aut maiore dignitate Ecclesiastica praeditus absolvere potest: praeter Summum Pontificem, eiusve specialiter delegatum. Vtrum autem hac Bullae reseruazione derogatum sit priuilegio in Tridentino Concilio sess. 24. cap. 6. de reform. Episcopis concessio, vt in foro conscientiae absolvere possint subditos suos à quibuscunque casibus occultis, etiam si Sedi Apostolicae reseruati sint, dissentiant Doctores. Nam derogatum esse existimat Tolet. lib. 1. c. 41. Suarez p. 3. tom. 4. disp. 30. sect. 2. & tom. 5. disput. 21. sect. 3. num. 5. & plures alij. Contrarium sentit Henric. lib. 6. c. 14. num. 7. Bannes 2.2. quaest. 11. a. 4. post 2. concl. Auila l. c. dub. 6. Rodriq. tom. 1. regul. quaest. quaest. 20. a. 10. Sanch. lib. 2. moral. c. 11. n. 27. Quorum sententiam tutius in praxi amplecti possunt Episcopi in regionibus ab Vrbe remotioribus: sicuti speciatim de absolutione ab hæresi occulta annotauit Nau. lib. 5. conf. 11. de privileg. edit. 2. ubi etiam admonet, q. 3. Quod Trident. Synodus cit. c. 6. facultatem absoluendi ab hæresi occulta Episcopis tantum, non etiam eorum Vicarijs generalibus committit: intelligendum esse de iure ordinario ac veluti ex officio: Interim verò nihil obstat, quo minus Episcopus Vicario suo, vel alteri idoneae personae talem facultatem specialiter committat, arg. c. ult. de offic. Ordinarij, iun. Gl. Si cui ex officio vel priuilegio dignitatis suae competit absolvere aliumve iurisdictionis actum exercere, potest id etiam per alium facere. Correctio autem iuris antiqui absque necessitate inducenda non est. Quam eandem sententiam cum alijs secutus est Eman. Rodriq. cit. q. 20. a. 11. Sanch. cit. c. 11. n. 23. Henric. lib. 6. c. 14. n. 7. contra Gutierrez lib. 1. can. qq. c. 13. n. 29. Suarez in 3. p. t. 4. disp. 30. f. 2. num. 9. & 15. His addo, Episcopos quasdam in partibus septentrionalibus ob casuum frequentiam, & difficultatem adeundi Romam per se, vel Vicarium suum absoluerunt consueuisse subditos suos ab hæresi etiam manifesta, de quo iterum dicam cap. seq. Accedit, quod Martinus

Becanus testetur, 2.2. cap. 15. q. 2. n. 6. Bullam Cœnæ Domini in multis Germaniae provincijs non esse usum receptam: Saltem non quo ad omnia apud nos receptam esse, satis constare videtur.

III. Quicumque absque legitima potestate, aut probabili excusatione à censura Bullae quempiam absolvere praesumpserit, excommunicationis sententiam (non tamen reseruata Papae) ipsemet incurret.

IV. In priuilegio seu facultate absoluendi ab omnibus censuris non censentur comprehensae excommunicationes Bullares, nisi exprimantur. Deinde, licet generatim concedatur potestas absoluendi à censuris Bullae, non censetur comprehensa absolutio ab hæresi, nisi speciatim explicetur. Nam in generali concessione non veniunt ea, quae quis non esset verisimiliter in specie concessurus, reg. 81. in 6. Censurae autem Bullae; & inter eas excommunicatio ob hæresim, peculiarem reseruationem habere solent, sicuti praxis & stylus Curiae ostendunt, & ex communi docet Sanchez lib. 2. moral. c. 12. Suar. de censur. disp. 21. f. 3. n. 3.

Intermitto autem excommunicationes tum eas, quae in Bulla Cœnæ Domini: tum eas, quae in Corpore iuris continentur, particulatim recensere: quia in progressu pleraque locis proprijs referam, interim legi possunt S. Anton. p. 3. tit. 24. Caiet. Armilla & alij Summistae ver. excommunicatio. Nau. c. 27. n. 49. & seqq. Suar. de censuris disp. 21. & seqq. Sairus lib. 3. thesauri casuum conscientiae.

Hoc verò loco vnam solum excommunicationem valde frequentem, can. si quis suadente, 27. q. 4. explicabo. Si quis suadente Diabolo, in Clericum, vel Monachum manus violentas iniecerit, anathematis vinculo subiaceat: Et nullus Episcoporum praesumat illum absolvere, nisi mortis urgente periculo: donec Apostolicae conspectui praesentetur, & eius mandatum suscipiat.

Vocula, si quis comprehendit omnes vtriusque sexus, ordinis, ac dignitatis personas, quae excommunicationis capaces sunt: adeo, vt etiam ipsi Praelati Ecclesiastici, si clericos sibi non subditos: vel subditos per personas, quibus id non competit, percutiant, excommunicationis censuram incurrant, sicuti videre est apud Mol. tr. 3. disput. 31.

Nomine Clerici intelliguntur, quicumque saltem primam tonsuram ab Episcopo acceperunt, sicuti colligitur ex c. cum contingat, de aetate & qualitate ordinandorum. Quamuis aliqui ex his canonis priuilegio priuati sunt: Primò, Bigami, qui omni priuilegio clericali nudati esse dicuntur in c. vn. de bigamisimò. Quod tamen de ijs solum intelligendum videtur, (interprete Gl. ibid. ver. bigamus,) qui prima tonsura, vel minoribus tantum initiati, cum duabus, vel cum vna vidua, aut ab altero corrupta matrimonium contraxerunt & consummârunt: non item de ijs Clericis, qui in sacris ordinibus constituti, inualidè contrahere, aut contractum consummare praesumpserunt: quia tales verè bigami esse non possunt, sicuti habetur in c. nuper, c. à nobis, extra, eodem tit. Accedit, quod in dicto c. vn. sub anathematis poena prohibetur bigamis, ne habitum vel tonsuram clericalem deferant: quod non est credibile statutum fuisse de Sacerdotibus. Diaconis, aut Subdiaconis similitudinariam bigamiam contrahentibus: cum potius tales, praesertim post actam poenitentiam, ad clerum redire, & clericalem habitum denuo induere oporteat, sicuti notauit Aegid. disp. 14. dub. 15. n. 157.

Secundò: Clerici in coniugio viuientes: praeterquam si tonsuram & habitum clericalem gestantes, alicui Ecclesiae ministrent, c. vn. de clericis coniugatis, iunct. sess. 23. Concilij Trident. cap. 6. de reformat.

Tertiò: Probabiliter docent Bannes 2.2. q. 12. a. 1. circa finem, Suar. disp. 22. f. 1. n. 11. Aegid. disp. 14. dub. 15. n. 163. Nullum prima tonsura initiatum, aut in minoribus ordinibus constitutum gaudere priuilegio canonis: nisi vel Ecclesiasticum beneficium habeat, aut clerica-



Item habitum, & tonsuram deferre solitus, alicui Ecclesie ex mandato Episcopi deferuiat: aut in aliqua schola vel vniuersitate, cum licentia Episcopi, quasi in via ad maiores ordines versetur. Tametsi enim Synodus Tridentina solum loqui videatur de privilegio fori: inde tamen necessario colligitur, idem sensisse de privilegio canonis: quia illud primum maiore difficultate amittitur, quam hoc secundum, ait Abb. in c. 1. de Apostati, n. 6. & notat Angelus ver. excommunicatio, s. n. 23. Syl. eod. verbo, 6. n. 4. Suarez lib. 4. defensionis fidei Catholicae c. 27. n. 24. Additio Abb. in c. perpendimus, de sent. excommun. ubi rationem etiam afferunt: Quia privilegium canonis ex humano iure provenit: privilegium fori ex diuino. Accedit, quod Concilium allegat c. vn. de clericis coniugatis in 6. in quo manifesta mentio fit de privilegio canonis ab Innocentio Papa II. editi in fauorem ordinis clericalis. Contrarium nihilominus docent Nau. lib. 5. consil. 24. de priuil. edit. 2. Mol. tr. 3. de iustitia disp. 54. n. 9. Auila p. 2. c. 1. disp. 2. dub. 9. concl. 3. Vide etiam Clarum lib. 5. sent. §. fin. q. 36. num. 19. ubi testatur, diuersas esse in hac re consuetudines.

Quarto: Clerici, etiam in maioribus constituti, qui dimisso habitu & tonsura negotijs secularibus se immiscerent, si tertio ab Episcopo suo moniti emendare se contempserint, amittunt privilegium canonis, iuxta c. in audientia, c. coniugit, 2. de sent. excommun. Adde ex c. cum non ab homine. & cit. c. perpendimus eod. tit. Clericos, qui dimisso habitu clericali *tyrannidi & enormitati* (id est seditioni, vel latrocinijs, & iniquis bellis) se immiscerent, etiam ante Episcopi monitionem canonis privilegio priuari.

Sed nunquid talis etiam fori privilegium amittit, vt à Iudice seculari capi, & puniri possit? Negandum est cum Abb. in cit. c. 1. de apostat. & in cit. c. perpendimus, n. 5. Nauar. lib. 5. consil. ult. de priuil. edit. 2. Couar. in pract. qq. c. 31. D. Marthatri. de iurisdic. part. 4. casu 135. Aegid. cit. dub. 15. num. 160. Quare monet Abb. in cit. cap. 1. n. 4. Quod clericus occisus, qui sine habitu & tonsura in enormi crimine à seculari Iudice deprehensus est: allegando se clericum, petere possit se remitti ad Iudicem Ecclesiasticum, audiendumque sit. Quæ doctrina sumitur ex responsione Cælestini Papæ III. in c. cum non ab homine, de iudic. Quod si clericus in quocunque ordine constitutus, in furto, vel homicidio, vel periurio, seu alio crimine fuerit deprehensus legitime, atque conuictus, ab Ecclesiastico Iudice deponendus est. Quis si depositus incorrigibilis fuerit, excommunicari debet: deinde contumacia crescente, anatematis munerone feriri; postmodum vero, si in profundum malorum veniens, contempserit, cum Ecclesia non habeat ultra quid faciat, ne possit esse perditio plurimorum, per secularem comprimendus est potestatem, ita, quod ei deputetur exilium, vel alia legitima pœna inferatur. Consentit. c. vt fama, de sentent. excommun. ubi dicitur, quod laici clericos incorrigibiles capere, & ad iudicia trahere possint; sed mandato & auctoritate Prælatorum, quorum iurisdictioni clerici illi subiecti sunt. Quare Abb. in cap. 1. numer. 4. notat: Quantumcunque aliquis seculariter vixerit, vt nefama sit, ipsum clericum esse; si tamen deprehensus in maleficio, allegat se clericum, & petit se remitti ad Iudicem Ecclesiasticum, est audiendus.

Sed quid si Clericus in sacris ter monitus ab Episcopo suo, arma iniqua deponere, & habitum clericalem assumere nolit, vtrum ipso iure privilegio etiam fori priuatus sit, vt à seculari Iudice puniri possit? Negant Ioan. Lupus tr. de libert. Eccles. part. 2. quæst. 5. numer. 5. & 9. & quæst. 8. numer. vn. quem sequi videtur Suarez lib. 4. defens. cap. 27. numer. 24. ubi generalem regulam tradunt; Clericum in sacris non amittere privilegium fori, nisi per sententiam degradationis realem, aut fictam, quæ in absentem à Iudice ferti solet; excepto vnico casu c. 1. de homicidio, in 6. quem explicat Couar. 2. resol.

cap. 20. numer. 10. Clarus §. fin. quæst. 36. numer. 30. Syl. ver. assassini, quæst. 3. & 4. Sed affirmantem sententiam alij plerique amplexi sunt, Couar. in pract. qq. cap. 31. numer. 2. §. secundo est annotandum, Clarus l. c. numero 23. Gl. in cap. 1. de Apostatis, ver. liberari, D. Marthatri. de iurisdic. casu 135. Quia trina monitio facta Clerico apostata in sacris, ob quam ille incorrigibilis appareat, instar sententiæ & degradationis esse soleat, per iuris adminiculum, c. in audientia, de sentent. excommun. Quæ sententia ob DD. auctoritatem probabilis est; sed prior tutior, & supra allegatis iuribus conformior.

Quinto: Clerici exercentes publice officium lanionis, aut cauponis, si coniugati sint, vel habitum clericalem dimiserint, atque ter moniti ab Episcopo suo non destiterint: vel postquam destiterunt, idem officium resumant, priuantur omni clericali privilegio. Si autem coniugati non sint, & habitum clericalem retineant, amittunt privilegium quoad restantum, ita vt instar laicorum tributa & vectigalia soluere cogantur: non item quoad personas, adeoque gaudent privilegio fori ac canonis. Ita habetur in Clement. 1. de vita & honestate cleric.

Sexto: Clericus, qui per annum exercet artem ignominiosam ludionis, mimi, aut parasiti, ipso iure perdit omnia privilegia clericalia: quin etiam ante annum, si post trinam Episcopi admonitionem non respiscat, c. vn. de vita & honest. Clericorum in 6. Quamquam hos canones aliqui solum intelligunt de clericis in minoribus, qui clericatui renuntiare possunt: non item de clericis in sacris, quos ante Iudicis Ecclesiastici sententiam seu degradationem fori privilegium non amittere, aiunt Lupus & Suarez ll. cc. Ioan. Monachus in addit. Glossæ ad cap. 1. de vita & honestate Clericorum; Sed alij Doctores dicta iura indistinctè de omnibus clericis intelligunt. Vide Molin. tract. 3. de iustitia, disp. 49. & 54.

Nomine *Monachi* comprehenduntur omnes vtriusque sexus Religiosi, quin & eorum Conuersi, ac Conuersæ, quamuis in aliquibus Religionibus propriè dictâ professionem non emittant, c. non dubium, iun. Glossa ver. conuersos, & c. ex tenore, c. de monialibus, de sentent. excommun. Item Nouitij, cum sint in via ad Religionis susceptionem, c. Religioso, eod. in 6. Quamobrem in fauorabilibus nomine Religiosorum comprehenduntur, eorumque gratijs & privilegijs participant: vt etiam ob delicta, quamuis enormia, ab Ecclesiastico, non seculari iudice iudicari & puniri debeant, sicuti docet Nau. lib. 1. consil. 5. de foro compet. edit. 2.

Dubitatur autem primò: De Tertiarijs, id est, qui tertiam regulam & habitum Ordinis sancti Francisci, vel sancti Dominici susceperunt, vtrum Ecclesiasticæ personæ censeantur, adeoque earum privilegijs gaudere debeant? Negat Caiet. ver. excommunicatio, cap. 10. not. 7. Affirmat Nau. c. 27. n. 29. Sed imprimis aduerte, dubitari non posse de ijs Tertiarijs, qui editis tribus votis essentialibus, verè religiosi sunt, sub regula & iurisdictione Ordinis mendicantium viuentes ex concessione Sixti IV. apud Rodriq. t. 3. reg. 99. q. 72. a. 1. concl. 3. Lud. Mirandum in man. Prælatorum t. 1. q. 36. Deinde quod ad alios tertiarios attinet, qui religiosi propriè non sunt, sed solum addicti religioni, cui vel bona sua offerunt, vel etiam habitum & regulam suscipiunt; etsi hi omnes videri possunt canonis privilegio gaudere, arg. c. duo sunt, 12. q. 1. & c. quisquis, 17. q. 4. & ita sentit Gl. in cit. c. non dubium, Ioan. Capistranus tract. de excommun. qui habetur to. 14. tractatum diuersorum iuris, Mol. tr. 3. disp. 50. n. 4. Syl. verbo Ecclesia, 1. q. 5. Auila p. 2. c. 5. disp. 2. dub. 11. Suar. disp. 21. s. 1. n. 10. tamen dubitationem istam sustulit Leo X. apud Rodriq. t. 2. regul.



t. 2. regulam. qq. quæstione 65. articulo 5. Quod fratres & sorores qui dicuntur tertij Ordinis, si in proprijs domibus habitent, secularibus omnino personis annumerari debent: Sin autem collegialiter viuunt sub habitu & voto aliquo expresso, gaudere eos oportet priuilegijs, quibus fratres Ordinis, cuius tertij regulæ habitum gestant, potiuntur & gaudent.

Similia habet Miranda in manuali tom. 1. quæstione 29. ubi monet distinguendum esse: Quod alij sint fratres *laici*, qui communem cum alijs Religiosis regulam profitentur: eosque verè non minùs, quàm ceteros, religiosos esse nemo dubitat. Alij verò sunt fratres *conuersi*, qui mutato seculari habitu, & assumpto regulari, quamuis distincto à cæterorum Religiosorum habitu, alicui Ecclesiæ vel Religioni se deuouerunt, emisso voto simplici saltem continentia: interdum etiam obedientia, & paupertatis: Et hi haud dubiè personæ Ecclesiasticæ sunt, atque Ecclesiastica immunitate gaudent; quamuis non sint propriè religiosi: Propterea quod non profitentur regulam & obseruantias Ordinis: neque illa vota sua emittunt tali conditione, vt per ea constituentur sub regula Religionis à summo Pontifice approbatæ, sicuti resoluit etiam Nauarr. libro 3. consil. 7. 12. & 81. de regul. edit. 1. Quare tales conuersi validè matrimonium contrahunt, quamuis non licitè propter votum continentia simplex. Denique alij sunt *oblatis*, seu *donati*, qui nulla facta mutatione habitus, neque emisso voto continentia, aut obedientia in domibus suis manent, quamuis ad maioris meriti cumulum, sua bona Religioni dicarint: Et hi non sunt propriè personæ Ecclesiasticæ, neque Ecclesiastica immunitate gaudent.

Secundò dubitatur de Eremitis: Vtrum dicto priuilegio canonis gaudere debeant? Negat Abb. in capite 2. de foro compet. numero 10. Angelus ver. Eremita, numero 3. Affirmat Gloss in cap. qui verè, 16. quæst. 1. Nau. citat. cap. 79. Syl. verb. Eremita, n. 2. Verùm in hac etiam quæstione imprimis aduerto: Dubitari non posse de ijs Eremitis, qui verè Religiosi sunt, vt videre est apud Rodriguez tom. 3. regul. quæst. 49. articulo 4. De alijs verò, qui religiosi non sunt, distinguendum: Vtrum edito voto paupertatis, vel alia suscepta obligatione, apud Prælatum Ecclesiasticum Ordini vel Ecclesiæ alicui speciatim addicti sint: an verò nullam talem obligationem professi: Illi enim priores inter Ecclesiasticas personas numerari, earumque priuilegijs gaudere debent: posteriores non item, sicuti resoluit idem Rodriguez tom. 2. regul. qq. quæst. 63. art. 4. Agid. disp. 14. dub. 15. num. 164. Mol. tra. 3. disp. 58. num. 4. Suar. cit. disp. 22. f. 1. num. 22. Idemque sentire videtur Gloss. in cit. c. non dubium, Syl. & Nauar. ll. cc.

5 *Suadente Diaboli.* Hæc verba significant, ad incurrendam canonis huius censuram requiri grauem iniuriam, adeoque mortale peccatum etiam in ratione sacrilegij: cum hoc sit proprium obiectum Ecclesiasticæ huius pœnæ, sicuti docet Caiet. ver. excommunicatio, cap. 10. notando 6. dicto 4. Angelus eod. ver. casu 1. n. 27. Molina tra. 3. disp. 51. n. 6. Et notandum hoc loco est, vtrumque requiri ad excommunicationem canonis contrahendam, & vt animi affectus seu internum lædendi peccatum mortale sit, & vt externa iniusta violentia grauis sit, vel in corporis, vel saltem honoris læsione. Sin verò intentio lædendi mortalis quidem est, sed læsio exigua, non contrahitur excommunicatio: quia verba legis pœnalis intelligenda sunt cum effectu, vti notauit Angelus loc. cit. Henriq. lib. 23. c. 17. num. 2. Suarez de censur. disp. 2. n. 23. Sanchez lib. 2. moral. c. 8. n. 7. Et vice versa, licet exterior læsio grauis sit: si tamen intentio lædendi à mortali peccato excusari possit, excommunicatio non incurritur. Ratio verò est, quia Ecclesiastico canone punitur externum mortale peccatum grauis ac violentæ inuasionis clerici: tale autem non est, nisi internum peccatum mortale, & exte-

rior violentia, aut læsio grauis existat.

*Manus violentas inieceris:* Significatur his verbis quauis iniuriola, seu contumeliosa actio exterior ac corporalis, circa personam, vel res ei adhaerentes: cuiusmodi sunt Clericum, vel Regularem occidere, mutilare, vulnerare, percutere manu, ense, fuste, &c. Eum violenter detinere in publica, aut priuata custodia: Eripere aliquid per vim, & iniuriam de manibus, vel corpore eius; puta librum, pileum, aut vestem: (secus verò est, si nulla vi adhibita, clam & per fraudem marsupium clerico præscindatur, aut vestes in lecto iacentis, sine directa eum in loco concludendi intentione, auferantur: non incurritur excommunicatio canonis, teste Caiet. notan. secundo, Agid. cit. dub. 15. n. 166. Mol. tr. 3. disp. 51. Suarez disp. 22. sect. 1. n. 32. contra S. Antoninum 3. part. titul. 24. cap. 1. §. 1.) Item conspergere aqua, puluere, lapillis: Persequi eum, vt in fluuium aut fossam incidat, equo decidat, &c. Injicere manus violentas in equum, cui clericus insidet, illum occidendo, vulnerando, percutiendo: aut retento freno, sistendo. Tamen si enim huiusmodi violentia, clerico illata, graues non sint comparatione corporis: attamen graues atque mortales sunt comparatione honoris, qui contumeliosè læditur, sicuti notauit Innoc. III. in c. nuper, de sent. excommun. & consentit l. Item apud Labeonem, ff. de iniurijs: Si quis pulsatus quidem non est: verum manus aduersus eum leuata, & saepe terribus quasi vapulaturus, non tamen percussus: vtili iniuriarum actione tenetur. lege etiam Syl. ver. excommunicatio. 6. n. 5. Nauar. cap. 15. num. 11. & cap. 27. num. 77. Auilam p. 2. ca. 5. disp. 3. dub. 12.

His adde I. Licet clericus in sui percussione consentiat, si tamen ea ordini clericali ignominiosa existat, excommunicationem non enitari: cum canon iste non tam in fauorem clerici ordinati, quàm in fauorem Ordinis clericalis promulgatus sit. Ita habetur in capite contingit 1. de sent. excommun. Imò Nau. c. 27. n. 78. Mol. cit. disp. 51. aliique communiter notant, eandem excommunicationem à Clerico incurri, si seipsum per malitiam occidat, aut vulneret.

Adde II. Et si alioquin excommunicatio lata contra facientes, extendenda non sit ad mandantes, vel consulentes: nisi exprimatur, sicut ex communiore docet Clarus libro 5. sentent. §. finali quæstione 89. numero 2. Caiet. ver. excommunicatio in princ. Nau. cap. 27. numero 51. Molina disputatione 52. Auila citat. disputatione 7. dubio 2. conclusio. 1. Sanchez libro 3. de matrimonio disputatione 49. Quia tamen in capite mulieres, §. vltim. & cap. quantæ, de sentent. excommun. expressè habetur, non solum criminis executorem, sed etiam mandantem, consulentem, aut alio modo incitantem: item consentientem: imò & non impediens (modò ex officio impedire deberet secundum probabiliorem Nauar. numero 78. Auilæ dubio 8. Agid. numero 174.) secuto postea effectu, excommunicationis incurrit sententiam: quin & eum; qui clerici percussione suo nomine factam, deinde ratam habet, iuxta cap. cum quis eod. titulo in 6. Ideo dicere cogimur, canone illo si quis suadente omnes eiusmodi concausas comprehendendi, quod & Ecclesiæ consuetudo, & communis Doctorum sententia confirmat.

7 Sed quæstio est. Si mandans vel suadens alicui Clerici percussione, ante opus patratum, mandatum vel consilium suum reuocet, verum nihilominus excommunicationem incurrat, si alter vim clerico inferat? In qua quæstione certum esse debet, quod Innoc. c. ad audientiam, de homic. aliique communiter docent: Non ideo præcisè excommunicationis pœnam euitari, quod mandans aut suadens ante operis executionem pœnitentia ducatur, vel etiam in Dei gratiam se restituat: quia quantum est ex sua parte, operis prohibiti malitiam iam compleuit; quamuis ex parte effectus, consummatio



siue executio expectetur, tanquam conditio sine qua iuris poena non incurritur: perinde ac si quis lapidem è tecto Clerici necandi causa proiciat, & statim post iactum poeniteat: atque si posset, reuocaret, is nihilominus excommunicationem, & irregularitatem incurret, si Clericus occidatur. Vide Aegidium cit. dub. 15. num. 183. ubi rectè notat: Si mandans clerici occisionem postea reuocet mandatum, sed reuocatio ad mandatarium non perueniat, nihilominus excommunicationem incursum, quod etiam Auila docet parte. 2. capite 5. disputatione 3. dub. 7. conclus. 2.

Deinde, quamuis Less. de iust. capite 13. dub. 3. numer. 17. Aegid. cit. dub. 15. num. 176. putent, eodem modo in hac quaestione ratiocinandum esse de poena excommunicationis. sicuti Doctores solent de irregularitate & damni restituendi obligatione: mihi tamen contrarium dici posse videtur. Quia obligatio restituendi & ferme etiam irregularitas ex delicto non sunt proprie dictæ poenæ; sed præcisè sequuntur ex maligno effectû, puta homicidii, cuius aliquis causa extitit. Quare valde probabiliter dicunt multi, nominatim Nauar. cap. 27. num. 33. Mol. tr. 2. tom. 3. post. disp. 731. Gomez lib. 3. resol. cap. 3. num. 40. & 44. Tolet lib. 1. c. 85. post princip. Less. l. c. Si aliquis suaserit Titio, vt hominem occideret: postea vero reuocet consilium, serio affirmans rationes suas esse falsas, ineptas: tamen Titius dissuaderi sibi amplius non sinat, idèoque homicidium committat, suasorem irregularem fore, atque in defectum Titij executoris ad damni restitutionem obligatum: Quia verè causa, vel potiùs conclusa cædis extitit, si Titius motus rationibus, quas suaserat, facinus patrauit. Nota autem quod dico, *si rationibus motus*: Nam si consilium petens sola consulentis autoritate motus sit, ac postea consiliarius suum dictum serio retractet & se errasse profiteatur, non potest ille amplius consulentis autoritate moueri ad opus exequendum.

De mandante verò dicunt citati Doctores cum Innoc. & Abb. in cit. c. ad audientiam, & Syl. ver. homicidium. 1. numero 11. & ver. mandatum n. 5. aliam rationem esse: Quia mandatum, nomine ac gratia mandantis fit: quare, reuocato mandato, si mandatus post cognitam reuocationem verè ac serio factam, nihilominus occidat, censeri non potest hæc executio mandati; sed proprio nomine commissum homicidium. Consilium autem fit gratia accipientis: quare, si semel persuasisti Titio, vt occideret, qui absque consilio tuo non occidisset, etsi postea consilium reuoces, nihilominus secuti homicidii causa censeberis. Sicuti qui sagittam, inquit, semel emisit, etsi postea poenitentia ductus reuocare vellet, nihil efficit & ad vitiationem poenæ aut censuræ.

At verò excommunicatio habet se per modum propriè dictæ poenæ: certum autem est, eum mitius puniri solitum, qui cum consilium alicui dedisset de homine occidendo: postea serio retractauit, & nihil omnino intermisit: quo homicidium impedire posset: quia si alter postea nihilominus facinus exequatur, potiùs sua malitia siue proprijs rationibus motus in externo foro præsumitur: quare non est credendum, talem suasorem in hoc casu ordinariam excommunicationis poenam Clerici percussorem suadenti decretam, incurere. Quæ est sententia Auila cit. disputatione 3. dubio 7. conclusione 3. Imò non pauci neque obscuri Doctores Innoc. in citat. capite ad audientiam, Sanctus Antoninus in 3. parte titulo 28. capite 2. §. 2. Syl. ver. homicidium 1. numero 11. §. 3. & numero 12. in fine, P. Nauar. libro 3. capite 4. numero 27. & alij negant etiam irregularitatem à consulente contrahi, postquam is consilium serio reuocauit, & nihil eorum, quæ ad impediendum homicidium opportuna & necessaria videbantur, prætermisit, v. g. monendo alterum hominem, vt sibi caueat. Quæ sententia valde probabilis est, propterea quod etiam irregularitas ea,

quæ propter culpam canonico iure decernitur. poenarationem, vel certè similitudinem aliquam gerat; idèoque extendenda non sit vltra casus iure expressos, sed potiùs restringenda. Alia verò ratio est de restituendi obligatione, quippe quæ naturaliter oritur ex damno iniuste illato: consequenter, si constet homicidam re vera motum fuisse ex maligno consilio consulentis, quantumuis suum consilium postea reuocantis: videtur consulens ex iustitia obligatus ad damni illati compensationem, in defectum principalis: licet contrarium sentire videatur Salon. 2. 2. quaestione 62. articulo 7. contr. 6. & expressius P. Nauar. l. c. Sa ver. c. restitutio, numero 11, qui tamen ver. consilium numero 3. dubius est. Et profecto hæc etiam sententia improbabilis non est, sicuti fatetur Less. cit. capite 13. numero 18. Responderi enim potest ad contrariæ fundamentum: Disparem esse rationem de sagitta: quia ea semel emissa naturaliter ac necessariò operatur: at verò persuasus, contrarijs rationibus à sententia dimoueri potest: quare si dissuasionem non suscipiat, effectus postea secutus malitiæ illius, non suaseris adscribi debet.

Resolutio igitur fit. Qui alteri propositis rationibus, homicidium iniustum persuasit, si eas postea serio, & quatenus potest, efficaciter retractauit; secuto nihilominus homicidio, excommunicationem non incurrit: Quin & probabiliter ab irregularitate, & damni compensandi obligatione immunis est: quamuis opposita sententia, quod attinet ad irregularitatem, & damni compensationem, æquè probabilis, aut probabilior existat.

Porro ab huius canonis censura aliqua excusationes in iure reperiuntur: Prima est propter ignorantiam: Vt si clericum percussit, arbitratus est esse laicum: quia habitum & tonsuram non gestauit. Alioquin, si allegatio ignorantia dubia sit, allegans eam iuramento in foro externo confirmare cogitur, cap. si verò, 2. de sentent. excommun. Cæterum, si quis existimet esse Ioannem clericum; quem percutit, cum sit clericus Iacobus, censuram excommunicationis non effugiet, sicuti rectè annotauit Couar. in c. alma, part. 1. §. 10. numero 15. argum. lib. cum qui, §. si iniuria, ff. de iniurijs, ubi dicitur: Si iniuria mihi fiat ab eo, cui sum ignotus, aut quis putet me esse Lucium cum sim Caius, iniuriarum mihi actionem competere, quæ de re videri potest Molina. tract. 3. disput. 30. Contra verò dicendum, si quis volens percutere hunc clericum, ab eo aberrerit, & casu siue præter intentionem percutiat alterum clericum proximè astantem: talis enim excommunicationem non incurrit, sicuti rectè docet Suarez disp. 22. l. 1. n. 54. Aegid. cit. dub. 15. num. 197. Ratio discriminis est: Quia in priore casu voluntariè percutit hominem, quem scit clericum, in quo tota ratio consistit, ob quam canonis excommunicatio lata est: in posteriore autem casu voluntariè non percutit hominem, quem scit esse clericum: siquidem, vt ponimus, à Clerici intenta percussione aberrauit: alium autem hominem, qui fortè adstabat, & Clericus erat, præter intentionem ac inuoluntariè percussit.

Altera excusatio est. Imperfectio actus non pertingentis ad culpam mortalem: puta ob subitam passionem iræ, animo non plenè aduertente ad id quod agitur: vel ob circumstantias personarum, &c. minuentes culpam. Qua ratione, ait Sotus in quarto dubio 22. quaestione prima, articulo secundo, casu secundo excusat. Si pueri clerici rixantes, etiam in Ecclesia, se pugno percusserint mutuo, vt sanguinem è naribus, vel è capite in parua copia emittant, nulla innodantur censura. Quod verum est, si considerata rei qualitate, seu circumstantijs, iniuria percussoris ad grauitatem peccati mortalis non pertingat.

Tertia. Qui in defensionem sui, vel alieni corporis, famæ,



famæ, bonorum pudicitia, clericum aggressorem detinet, vel percutit, excommunicationem non incurrit, ca. si verò, 1. capite ex tenore, de sentent. excommunicatio. Dummodo modus defensionis notabiliter non excedatur, & ea incontinenti aggressionem subsequatur, sicuti habetur in cit. c. si verò. Ex quo resolues I. Licet mulier excommunicationem non incurrat, si clericum pudicitiam suam ipso facto tentantem percutiat: secus tamen esse, si eam clericus solis verbis aggrediatur; tunc enim sufficit etiam verbis repellere: nisi valde molestus sit, ut mulier se aliter ab eo liberare non possit, quam fuste aut verberare, sicuti ex communi docent Auila part. 2. cap. 5. disput. 3. dub. 13. casu 18. Suarez l. c. num. 33. Agid. num. 194. II. Posteaquam clericus rem à se iniuste ablatam ad locum destinatum detulit, & in pacifica eius possessione existit, non amplius licitum est vim illi propria autoritate inferre, si res per viam iudicii recuperari possit, sicut notauit Mol. l. c. Si tamen Clericus iniuriam inferens, vel in flagranti gravi crimine deprehensus, de fuga suspectus sit, poterit interim à laico capi, vel detineri, ut Iudici suo Ecclesiastico tempestiuè præsentetur, sicuti ex communi docet Nauar. capite 27. numero 81. & 85. Auila l. c. casu 12. Clarus libro 3. sentent. §. fin. quæstione 28. numero 6. Suarez disp. 22. sectione 1. numero 37. in fine, Mol. tract. 3. disputatione 56. n. 2.

Quarta. Qui in Clericum cum vxore, matre, sorore, vel propria filia turpiter inuentum manus violentas incontinenti iniecerit, licet peccet, canonis tamen excommunicationem non incurrit, cit. c. si verò, 1. quia iustum talem dolorem compescere difficillimum est, ait Gl. ibid. ver. turpiter. Turpiter autem inuentus dicitur, qui actum quemcumque impudicum cum eiusmodi persona exercet. Imò satis esse, ut solus cum sola reperiatur in loco suspecto, accedentibus etiam alijs circumstantijs suspicionem mouentibus, docet Syl. ver. excommun. 6. num. 5. casu 10. Nauar. cap. 27. num. 84. Suarez cit. num. 37. Agid. numero 196. Porro excusatio hæc ab excommunicationis censura locum non habet, si maritus adulterum non mox, ut in crimine deprehensus est: sed interiecto temporis intervallo, quo dolor iustus sedari potuerit, occidat: item si data opera in loco occulto se absconderat, ut deprehensum occidere posset, sicuti docet Nauar. lib. 5. cons. de sentent. excommun. edit. 2. Deinde dictam excusationem locum non habere in alijs consanguineis, quæ percutientem in prima consanguinitatis linea non contingunt, puta quia, vel nepte, significatur in cit. c. si verò, §. cæterum, iun. Gl. ver. matre, & tradit Mol. tr. 3. disp. 55. numero 5.

Quinta. Prælati, Præceptor, Pater, si disciplinæ suæ correctionis causa clericum percutiat, à censura canonis immunis est. De Prælato Ecclesiastico, & Magistro seu Præceptore habetur id expressè in c. 1. & c. ex tenore, de sententia excommun. In quo posteriore textu sermo est de subdiacono: quare rectè docet Nauar. cap. 27. numero 81. Suarez disp. 22. l. 1. numero 48. & alij communiter: Magistrum quoque, & non tantum Ecclesiasticum Prælatum (de quo dubitari non potest) ius habere castigandi Clericos, etiam in maioribus Ordinibus constitutos: modò castigatio moderata sit, habita ratione culpæ, & personæ tum percutientis tum eius quæ percutitur: alioquin si percussio valde indecens sit, aut excessus notabilis censura excommunicationis non euitabitur, teste Nauar. l. cc. & colligitur ex c. cum voluntate. eod. tit. iun. Gl. ver. Prælationis, & ver. Magisterij.

De patre maius dubium est; Vtrum filium in sacris constitutum, sine nota excommunicationis castigare possit; Negat Gl. in cit. c. cum voluntate. verb. inferiorum graduum: quia sacerdo, inquit, liberat à patria potestate intellige quod attinet ad effectum castigationis: nam ab alijs effectibus patris potestatis sacerdo non eximit; sed solum Episcopalis, vel Cardinalitia dignitas, sicuti

docet Abb. in cit. c. cum voluntate, Angelus ver. excommun. §. 10. Eandemque sententiam Glossæ sequitur Abb. ibid. Mol. tom. 1. tract. 2. disp. 228. in 6. effectū, & tract. 3. disp. 59. & alij apud eundem: Quia indecens esse videtur, Clericum in sacris constitutum à patre laico verberari: ut proinde præsumendum non sit, iura huic rei patrocinarī velle.

Contrariam tamen sententiam defendit S. Anton. 3. p. tit. 24. c. 1. §. 2. casu 12. Syl. ver. excommun. 6. casu 8. Nauar. citat. numero 82. Auila part. 2. ca. 5. disp. 3. dub. 13. casu 1. Suarez citat. sect. 1. numero 19. Ratio eorum est: Quia pater non minorem, sed potius maiorem in filium potestatem habet, quam Magister in discipulum: Atqui in cap. 1. & cap. ex tenore absolute & sine restrictione significatur, Magistrum ab excommunicatione immunem esse, si discipulum correctionis causa percutiat; Ergo idem de patre sentiendum est erga filium. Hæc sententia probabilis est. Sed mihi magis placet illa prior, quam etiam communior esse testatur Mol. in cit. disp. 228. in eandemque inclinat Angelus ver. excommunicatio, §. 10. Sotus lib. 5. de iust. quæst. 2. a. 2. Cum enim canon siue ius commune prohibens Clerici percussorem, fauorabile sit Ecclesiastico ordini: restringi non debet, nisi expressam in iure exceptionem reperiāmus. Nullibi autem expressum est; quod pater quoscunque filios Clericos, etiam in sacris, absque nota excommunicationis castigare possit, sed solum, quod patrifamilias concessum sit, Clericos adolescentes in inferioribus gradibus siue ordinibus constitutos qui de familia eius, vel propinqui sunt, disciplinæ causâ corrigere, citat. capite cum voluntate, de sentent. excommun.

Ad fundamentum verò posterioris sententiæ responderi potest: Ideo iura Magistro absolute permittere, ut Clericum disciplinæ causâ percutiat; quia fieri potest, ut Magister in maiore gradu siue ordine constitutus sit, quàm eius discipuli: si enim esset laicus, vel in minore ordine positus, non videtur ipsi iure concessum, ut Clericum in maiore ordine verberibus puniat, argum. c. vniuersitatis, de sent. excommun. Aduerto tamen, si pater filium, vel Magister laicus discipulum in sacris constitutum correctionis causa percutiat, facilius à peccato mortali, & consequenter à censura excommunicationis excusari posse: propterea quod ius aliquod correctionis ille habens, difficile interdum se cohibet, quin grauius aut facilius delinquentem, etiam verberare castiget: ipsa quoque circumstantia superioritatis deformitatem non parum imminuit.

Porro in cit. c. vniuersitatis decernitur, ut Abbas per seipsum, non per alium regularis disciplinæ causâ, Monachum percutiat: vel, si necessitas postulet, per Clericum, vel Monachum (non per laicum) id fieri iubeat: alioquin, tam qui tales verberari præcipit, quàm illi, qui verberant, quamuis ob delictum, excommunicationis sententiam incurrunt. Alia ratio est de Episcopo, à cuius dignitate alienum est aliquem proprijs manibus verberare, c. non licet, d. 86. Quare Clericos delinquentes per alium Clericum, non laicum corrigere debet: Quamuis Clerici facinorosi (idè quod de monachis sentiendum) ex mandato Prælati Ecclesiastici etiam à laicis capi possint, c. ut famæ, de sent. excommun. c. si Clericos, eod. tit. 6. Quin per consuetudinem in Gallijs, & alijs locis approbatum esse, ut Clerici si ita commerti sint, per laicos torqueantur, aut verberentur, testantur Clarus §. sent. §. vlt. quæst. 77. num. 3. Molin. disp. 51. Suar. disp. 2. sect. 1. n. 44. Agid. n. 191. Auila p. 2. c. 5. disp. 3. dub. 12, & ipsemet Nauar. in cōmentar. 3. de regularibus circa finem, & l. 5. consil. 28. de sentent. excommunicat. edit. 2. quamuis aliter in manuali, cap. 27. n. 86. dixerat, talem consuetudinem excusare à censura non item à culpa. Adde, quod simili ratione excusatur Præfectus nauis, aut qui ab illo potestatem habet, si Clericū verbaliter degradatū & ad triremes damnatū perinde alios remigantes percutiat, sicuti docet Auila de cēs.



p. 4. disp. vn. dub. 1. Præterea partim consuetudine, partim etiam privilegii obtentum est, ut Prælati Ordinum Regularium suos delinquentes non per se, sed per aliam Religiosum, etiam non Clericum, sed conuersum, corrigant. Quod de Nau. cit. consil. 28. Suarez. Auila, Mol. Egidi. II. cc. Si tamen ætate minores, & quasi pueri sint præsertim Nouitii, ij possunt ex commissione Prælati Ordinis, etiam à seculari laico, v.g. Ludimagistro, disciplinæ causa verberari: sicuti hoc ipsum eadem ratione de Clericis minoribus quod per laicum corrigi possint, tradit Mol. tr. 3. dis. 56. n. 8.

Sequitur in eam. si quis suadente: *Ut nullus Episcoporum ipsum absolueret*. Circa quæ verba notandum est. A iure & DD. in c. peruenit de sent. excomm. & apud Nau. c. 27. n. 91. Mol. disp. 57. duplicem Clerici percussione distingui; Modicam siue legem: & grauem siue enormem: quæ inter se viri prudentis, etiam Confessarii, iudicio discerni debent, non ex sola percussione, læsionēve, sed etiam ex circumstantiis personarum, percutientis ac percussi, loci temporis, secuti scandali, &c. sicuti videre est in extrauagante, quæ incipit *percellis*, apud Na. & Mol. II. cc. Cou. c. alma, p. 1. §. 9. n. 2. & colligitur ex cap. cum illorum, de sent. excomm.

10 Ab excommunicatione canonis contracta ob Clerici percussione leuem (quæ videlicet nullam maculam, aut lacerationem carnis, nec membri mutilationem, dentiū euulsionem, multorum capillorum extractionem, nec sanguinis immodicam effusionem attulit, neque ex circumstantiis aggravata est) Episcopo absolueri permixtum est in cit. c. peruenit, secundum communiorē DD. sententiam, contra quosdam existimantes illo Pontificis responso non ius commune, sed speciale privilegium datum esse.

Altera verò percussio, quæ grauis dicitur, subdiuidi debet in eam, quæ speciatim in iure enormis siue atrox iudicatur; & in eam, quæ non specialiter enormis, sed mediocris, & quasi media inter leuem & enormem censetur. Absolutio ab excommunicatione contracta ob percussione Clerici enormem semper Sedi Apostolicæ reservatur, cōmuni iure: quin etiam si percussio solum mediocris, siue plus quam modica fuerit: exceptis tamen tribus casibus: I. est in cit. ca. si verò 1. de sent. excomm. si Ostiarius prætextu officij sui Clericum percusserit, ut idcirco excommunicationem incurrisse existimetur, ab Episcopo absolui potest, nisi percussio grauis seu enormis sit. At verò, si Officialis, Iudex seu Apparitor secularis potestatis, in Clericum iurisdictionem sibi usurpando, eundem percusserit, sine mandato summi Pontificis absolui non potest: cum hæc grauis iniuria sit, quippe Ecclesiasticæ libertati repugnans, cit. c. si verò.

II. Si Clerici in communi societate viuentes se mutuo percutiant, ab Episcopo suo absolui possunt: nisi facti atrocitas aliud exigat, c. quoniam, de vita & honestate Clericorum.

III. Regularis Regularem eiusdem claustrij percutiēs non enormiter, à Prælato suo absolui potest. Sin verò Abbatidis discretio ad delinquentis correctionem non sufficiat adhibendus est Episcopus, c. Monachi, c. cum illorum, c. canonica, de sent. excomm. Si autem Regularis percutiat Regularem sub alio Prælato constitutum, absolui etiam potest à proprio Prælato (si percussio enormis non fuit) præsertim tamen Prælato percussi; vi iniuriam condonet, ac pœnam in satisfactionem definiat, sicuti colligitur ex cit. c. cum illorum, & explicat Hostiensis & Abb. ibid. Molin. tract. 3. dis. 60. n. 5. vbi rectè monet, Prælatum offensi committere posse Prælato absolui, ut sine ipso eum absoluat, iuxta suum arbitrium ac discretionem. Denique si commendatarij Ordinis S. Ioannis se inuicem percutiant, absolui possunt à presbytero Priore Conuentus, vel habetur in cit. c. canonica de sentent. excomm.

Ceterum in c. cum illorum, aliqua adduntur annotanda; Primum, si quis ante Religionis ingressum excommunicationis sententiam ob Clerici vel Monachi percussione incurrit, is postea Nouitius vel Religiosus factus à Prælato suo absolui potest, nisi excessus siue percussio enormis fuerit: quamuis rectè notet Molin. disp. 60. in fine: multos Regularium Ordines privilegij Papalibus obtinuisse, ut etiam si enormis sit læsio, absolutio à Prælato suis conferri possit. Secundum. Si Religiosus aliquis Clericum secularem percussit, non nisi à Sede Apostolica absolui potest: ut scandalum euitetur. Id tamen ne vniuersim de omni percussione intelligatur, declaratum postea fuit in cap. religioso, eodem in 6. Religiosum manus violentas in Clericum secularem iniicientem ab Episcopo absolui posse eo in casu, quo secularis Clericus posset, si alium Clericum percussisset; videlicet, si percussio lenis fuit, iuxta cap. peruenit, extra eodem; & annotauit Gloss. in cit. cap. religioso. Idque spectato communi iure, & seclis specialibus privilegijs, ac consuetudine: propter quæ interdum Episcopi, atque Ordinum Prælati maiorem absoluiendi ab excommunicatione canonis potestatem habent, sicuti in specie testatur Molina citat. disputatione 60. in fine, quod omnes ferme Ordinum Prælati hodie suos absolueri possint, etiam si percussio enormis fuerit.

## CAP. VI.

## De absolute ab excommunicatione.

## SUMMARIUM.

- 1 Parochi potestatem absoluiendi ab excommunicatione non habent ex officio, tanquam ordinariam, & eam directè delegare possunt; sed solum indirectè, quatenus alicui Sacerdoti approbato committunt facultatem audiendi confessiones.
  - 2 In mortis articulo quicunque Sacerdos ab excommunicatione, quantumcunque reservata sit, etiam extra Sacramentalem confessionem absolueri potest.
  - 3 Inferioribus Clericis commissum non est potestas absoluiendi ab excommunicatione in articulo mortis.
  - 4 Casus Papa reservatus, superueniente impedimento legitimo fit Episcopalis.
  - 5 Si impedimentum adeundi Summi Pontificem temporale sit, absolutus, eo cessante, Apostolico consensu se præsentare tenetur: alioquin in eadem excommunicationem reincident.
  - 6 In articulo mortis Sacerdos expositus absolueri potest a casu Papali, licet Episcopus adiri posset: excepto si specialis commissio Episcopi facta reperiat, v.g. absolueri percussores Clericorum.
  - 7 Probabile est, impeditum ire Romam absolui posse ab Episcopo, licet ad Legatum Papa se conferre posset.
  - 8 Ad essentiam absolutionis ab excommunicatione pertinet, ut aliquo externe signo manifestetur.
  - 9 Ante absolutionem ab excommunicatione exigenda est satisfactio partis læsæ, & iuramentum parendi Ecclesiæ, si crimen commissum enorme sit: si tamen hæc, &c. debent, non exigantur à Reo. Valer nihilominus absolutio.
  - 10 Absolutio ab excommunicatione, aliæve censura etiam absenti dari potest.
- Excommunicatus ex alia causa iterum excommunicari potest: consequenter etiam absolutus ab una excommunicatione, alia remanente.

QUESTIO PRIMA. Quinam à maiore excommunicatione absolueri possint? Respondeo & dico I. Ab excommunicatione iuris non reservata non tantum Episcopus, vel Episcopalem iurisdictionem obtinens: sed quicunque etiam Parochus seu Sacerdos proprius absolueri potest, sicuti dixi c. præced. in princ. & est communis Doctorum sententia, quam etiam praxis confirmat: licet contrarium visum fuerit Couar. c. alma, p. 1. §. 12. num. 5. sumpto arg. ex extrauag. 1. de privilegijs. cum tamen ea nullam mentionem de Parochis faciat: quin etiam reuocata sit per Clementinam 2. de sepulturis. Nota tamen ex Syl. 1.



Syl. l. c. Suar. disp. 7. sect. 4. num. 15. & Aegid. disp. 14. dub. 16. num. 231. discrimen esse inter Episcopum & Parochum quod, cum absolutio ab excommunicatione ad forum externum propriè pertineat, Episcopus talem absoluendi potestatem quasi ordinariam habet, quippe officio ac dignitati suæ communi iure annexam: quamobrem eam alij cuicumque Clerico, quamvis non Sacerdoti, per se ac directè delegare potest. Parochi verò, alijque curati, qui in foro externo nullam iurisdictionem obtinent, potestatem absoluendi ab excommunicatione tam maiore, quam minore non habent ratione officii sui tanquam ordinariam: sed solum ex commissione, quatenus talis potestas sæpe necessaria est ad Sacramentalem à peccatis absolutionem rite conferendam. Quapropter hanc ab excommunicatione absoluendi facultatem non potest Parochus alteri Clerico propriè ac directè delegare: sed solum indirectè conferre: dum enim alicui Sacerdoti, v. g. Cooperatori suo delegat potestatem confessiones audiendi, eo ipso efficit, ut eidem à iure committatur potestas ab excommunicationibus non reservatis absoluendi.

Dico II. Ab excommunicatione iuris, quam auctor sibi reservavit: item ab ea, quæ alicui nominatim, siue per particularem Iudicis sententiam inflicta est, nullus inferior absolvere potest. Est communis assertio, quam satis explicavi supra p. 2. cap. 7. & traditur à S. Bonau. in 4. d. 18. q. 6. & alijs Scholasticis ead. d. Abb. in c. ex frequentibus, num. 7. de instit. Excipitur autem mortis articulus, in quo quivis Sacerdos, etiam excommunicatus non toleratus, ab omnibus censuris, tam ab homine, quam à iure latis, absolvere potest, si accessus non sit ad eum, cui de iure absolutio competit, quo modo intelligendum Concil. Trid. sess. 14. cap. 7. Idque verum est, tamen si constitutum in mortis periculo à peccatis sacramentaliter non absolvat; quia absolutio ab excommunicatione alijsque censuris minimè dependens est ab absolutione à peccatis, sicuti ex communi docet Nau. c. 27. num. 272. dicto 6. Suar. disp. 7. sect. 6. num. 7. Licet enim causa siue occasio fuerit, cur talis à censuris absoluendi potestas Sacerdotibus omnibus in mortis articulo commissa sit, quia ea sæpe necessaria est ad Sacramentalem absolutionem conferendam: nihilominus per se & simpliciter, atque sine necessaria connexionione ad sacramentum Pœnitentiæ, concessa videtur, sicuti verba Tridentini Concilij significat: cum enim talis concessio gratiam & favorem contineat, latè interpretanda est. Quod similiter de Parochis alijsque Confessarijs dicendum, eos ex concessione cit. c. nuper, ab excommunicationibus non reservatis etiam extra sacramentum Pœnitentiæ absolvere posse, sicuti docet Suarez disp. 7. sect. 4. num. 19. Sa ver. excommunicatio, ubi de absolut. n. 1. & dicam. l. 5. tr. 6. c. 10. n. 17.

Potè, licet non desint DD. videlicet Gl. & Abb. in c. à nobis, 2. de sent. excommun. Syl. ver. absolutio, 1. num. 8. Armilla num. 39. existimantes, in defectum Sacerdotis, etiam alium inferiorem Clericum, imò & laicum à censura excommunicationis, & c. in mortis articulo absolvere posse. Contraria tamen sententia magis recepta, & probabilior est, quam docet Palud. in 4. d. 20. quæst. 1. a. 2. Sotus d. 18. q. 4. a. 4. Nau. c. 26. man. num. 26. & in ca. 1. princ. num. 84. d. 6. de pœnit. Couar. c. alma, p. 1. §. 11. nu. 9. Suarez disp. 7. sect. 6. num. 6. Aegid. disp. 14. dub. 16. n. 236. Quia licet Ecclesia talem potestatem cuique Clerico, imò & fidei laico committere possit; tamen re ipsa commisisse nullo iure, aut consuetudine Ecclesiastica ostendi potest. Adde, hoc etiam pertinere ad maiorem æstimationem censuræ, si eius absolutio non ab alio, quam Presbytero, sine speciali commissione, conferatur: præsertim cum raro accidat, ut nullus Presbyter haberi possit, qui excommunicatum absoluat. sed etsi talis casus accidat, mortuus tamen per contritionem à peccatis suis liberari, atque post mortem absolui poterit.

Neque obstat c. sanctum, d. 4. de consecrat. proprio

sententiæ allegatum à Gloss. in c. pastoralis; §. præterea, de officio Ordinarii, in quo ex S. August. refertur: Cum fidelis aliquis, qui tamen ex numero pœnitentium erat, cum infidelibus naui veheretur: accidisse, ut unus illorum à pœnitente Baptismum peteret; quo ipsi collato, pœnitentem vicissim à recens baptizato reconciliationem petiisse, & accepisse. Respondetur, si vera est hystoria hæc, (nam S. August. tanquam incertam narrat: licet addat veram esse posse) reconciliationem illam non fuisse veram absolutionem à censura; multòque minùs Sacramentalem à peccatis: sed fuisse deprecatoriam orationem hominis iam membrum Ecclesiæ per baptismum effecti, ut Deus pensans animum ac desiderium pœnitentis, etiam sine Sacerdotis ministerio, reconciliationem tribuat. Quod idem clarè explicat Auctor de vera & falsa pœnit. cap. 10. relatus in c. quem pœnitet, d. 1. de pœnitent. Qui confitetur vult peccata, ut inveniat gratiam, querat Sacerdotem scientem ligare & solvere. Et paulò post: Tanta est vis confessionis, ut si deest Sacerdos, confiteatur proximo: sæpe enim contingit, quòd pœnitens non potest confiteri coram Sacerdote, quem desideranti nec locus nec tempus offert. Et si ille cui confitebitur, potestatem soluendi non habet: fit tamen dignus venia ex Sacerdotis desiderio, qui socio confiteatur turpitudinem criminis.

Deinde, quod attinet ad censuras Papæ reservatas. ea referuatio non tam stricta est, quin ob plures causas relaxetur, & ad Episcopalem iurisdictionem deolvatur: quæ causæ in iure canonico circa Clerici percussione expriuntur, uti videre est in c. de cætero, c. ea noscitur, de sent. excommun. Prima causa impedimenti est ætatis infirmitas: si nimirum impuberes excommunicationem incurrant, hi etiam post pubertatem ab Episcopo absolui possunt, c. pueris, de sent. excom.

Secunda est sexus infirmitas. Mulieres videlicet in excommunicationem lapsæ à Dicoelano absolui possunt, c. mulieres, c. quamvis, eod. tit.

Tertia est, quodvis canonicum seu legitimum impedimentum ad Sedem Apostolicam accedendi: qua ratione excusantur pauperes, qui tanto itinere mendicandi consuetudinem non habent; senes, valetudinarii, membris capti, c. ea noscitur, c. quamvis, de sent. excommun. Item qui capitales inimicitias gerunt, ut sine vitæ periculo viæ se committere non possint, c. de cætero, eod. tit. Et qui sui iuris non sunt, puta servi, & filij familias, si eorum domini vel parentes profectioni resistent, cit. c. mulieres. Et qui ob curam administrandi familiam, gerendi officium publicum: vel ob periculum infamiæ, scandali, vel aliam similem causam impediti sunt, quo minùs Romam, absolutionis accipiendæ causâ, proficiscantur, iuxta ca. de cætero, c. quamvis, eod. tit. Et qui magnæ potentiæ sunt aut ita delicati, ut laborem accedendi ad Summum Pontificem sustinere nequeant: hos enim Episcopus, si periculum mortis urgere arbitretur, absolvere statim potest: alioquin verò status personæ prius, & veritas negotij est intemanda Sum. Pontifici, & secundum consilium eius tales (potentes) de commisso scelere corrigendi erunt, cit. c. mulieres, Atque ita explicat Na. c. 27. n. 88. licet paulò aliter Gl. ver. laborem veniendi.

Verum, circa huiusmodi canonica impedimenta distinquendū est, utrum perpetua sint, an temporalia. Si perpetuum impedimentū sit, Episcopus absolute & sine onere se præsentandi Apostolicæ Sedi absolvere potest impeditū: Sin verò impedimentū temporale sit, (excipio hinc puerilem ætatem) tunc iurare debet absoluendus quòd, cessante impedimēto, Apostolico conspectui se præsentare velit: non ut iterum ab excommunicatione absolvatur, sed ut mandatum accipiat de satisfactione præstanda Ecclesiæ, ac parti læsæ, sicuti docet Na. c. 26. n. 26. Sanch. l. 2. moral. c. 13. n. 27. Sairus l. 3. c. 28. n. 36. & habetur in c. de cætero, c. ea noscitur, & c. quavis, de sent. exc. Si autē absolutus se præsetare, seu personaliter seu per procuratorem, intra



tempus à Iudice præfixum, vel cum primùm commodè potest, intermiserit, in eandem excommunicationem reincident, eos qui, de sent. excommun. in 6. & explicat Nauar. c. 27. num. 89. & num. 113. Henric. libro 13. capite 29. numero 3. Et habent hæc locum in omni absolutione ab excommunicatione reservata, quæ datur ob impedimentum seu causam necessitatis, quod absolutus sub pœnar. incidentiæ, teneatur se postea præsentare Superiori, ad quem de iure absolutio spectat, iuxta citatum caput eos qui.

Sed limitant Henriquez cit. num. 3. lit. Z. Sa verb. excommunicatio, vbi de absolut. num. 8. Nisi, priusquam terminus elapsus est, plenè satisfaciatur parti læsæ, aut cum ea concordet: quia tunc cesset ratio, ob quam Superiori se sistere debeat. Sed non placet hæc limitatio: quia iuri conformis non est, sicut colligitur ex cap. quamvis, de sentent. excommunicat. Neque enim ut parti læsæ satisfiat, causa est adæquata huius obligationis sistendi: sed ut debita Ecclesiæ etiam læsæ obedientia & satisfactio præstetur. Quamobrem tamen si nulla pars aduersaria læsa sit, vel ipsi ante absolutionem satisfactum fuerit, nihilominus hoc onus comparendi imoni debet, sicut docet Suarez tom. 4. disputatione 30. sessione 3. numero 6. Sanchez lib. 2. moral. c. 13. num. 29. contra Nau. cap. 26. n. 26. Henriquez l. c.

Dubatur autem hic primò: Quod de Clerici percussore dicitur in c. de cætero, c. ea noscitur, de sent. excommun. Si ad Sedem Apostolicam accedere legitime impeditus sit, ab Episcopo absoluendum esse, vtrum id in alijs quoque casibus Papalibus locum habeat? Ita affirmant Canonistæ communiter Innocent. in c. 2. De eo qui furtivè, Abb. & Felinus in c. Monachi de sentent. excommun. Sylvest. verb. absolutio. 3. in fine, & 4. num. 5. Couar. cap. alma p. 1. §. 11. num. 15. Nauar. c. 27. num. 89. & 112. Henric. lib. 9. c. 11. num. 5. & c. 16. in princip. Suar. de censur. disp. 22. sect. 1. num. 64. Quare hæc regula communiter recepta statuenda est: Quod casus Papalis, superueniente impedimento adeundi Papam, sit Episcopalis: quia id congrua subordinatio inter Prælatos Ecclesiæ requirere videtur. Sed excipiunt aliqui valde probabiliter articulum mortis, in quo omnes Sacerdotes expositi, nullo observato ordine, à casibus Papalibus absoluendi ius habent: præterquam si in iure specialis commissio Episcopis facta reperiatur, puta in casu percussoris Clerici, iuxta c. si quis suadente, 19. quæst. 4. & c. ea noscitur, de sent. excommun. & docet Suar. disp. 22. sect. 1. num. 62. de censur. Couar. c. alma, p. 1. §. 11. num. 8. Sanchez l. 2. moral. c. 13. num. 9. modò eo casu ad Episcopum accessus sit. In alijs verò casibus Papalibus penitus cessat omnis reservatio in mortis articulo: ideòque quivis iurisdictione præditus Sacerdos absolvere potest. Ita Syl. ver. absolutio, l. n. 8. Suar. t. 4. dis. 30. f. 3. num. 4. Sanchez l. c. licet contrarium sentiat Zambrana c. 4. dub. 4. numero 14.

Dubatur secundò. Si impeditus Romam ire pro absolutione casus Papalis, possit tamen adire Legatum Papæ, vel alium specialiter privilegiatum, vtrum nihilominus ab Episcopo absolui possit? Affirmant Henriquez li. 6. cap. 10. num. 1. Auila part. 2. cap. 7. disp. 1. dub. 6. post. 3. conclus. notan. 4. Suarez tom. 4. disput. 30. sect. 3. numero 5. Quia iura in signum specialis reverentiæ ac privilegij requirunt, v pro absolutione Papa adeatur: si ergo is adiri non possit, cessat reservatio Papalis, & devolvitur casus ad proprium Ordinarium. Accedit, quod reservatio casuum Papalium stricte interpretationis esse debeat; cum iuri Episcopali deroget.

Contrarium tamen docet Nauar. c. 27. num. 89. & 90. §. ad quartam, Sanchez libro 2. moralium capite 13. nu. 11. Quia casus reservatus Superiori devolvitur ad inferiorem ratione necessitatis: non est autem necessitas, si adsit aliquis, qui iure seu ordinario, seu spe-

ciali absolvere possit. Assertur etiam ab Ægid. cit. disput. 16. n. 242. in confirmationem huius sententiæ cap. quamvis, de sentent. excommunicat. In quo tamen (sicut & in cap. ea noscitur) nil aliud habetur, quàm Clericorum percussores non ab alio quàm Romano Pontifice, vel eius Legato absolutionis beneficium obtinere posse: præterquam, si canonico impedimento retrahantur, quo minùs Romanum Pontificem adire possint: vbi cum nulla mentio fiat Legati Apostolici; canon iste potius priori sententiæ favere videtur: quam proinde probabilem censeo, sed alteram tutiorem. Addo ex doctrina Nau. l. 1. consil. 1. quæst. 14. de constit. edit. 2. locorum etiam consuetudinem spectandam esse. Nam Episcop. in regionibus Romæ remotioribus, in quibus nullus adest Legatus Sedis Apostolicæ, præscripsisse possunt iurisdictionem absoluendi à quibusdam casibus Papalibus, frequenter contingentibus, v. g. à notoria Clerici percussione, hæresi, &c. sine onere, quod Reo imponi debeat comparendi coram Romano Pontifice, eiusve Legato; præsertim, si Reus Ecclesiæ & parti læsæ sufficienter satisfaciatur, vel satisfacere paratus sit. Ut verò Episcopi ad alios privilegiatos, puta Regulares mendicantes, eiusmodi excommunicatos pro absolutione mittant: (licet hoc tutius sit, vt dixi) difficile tamen aliquibus videri potest, si in huiusmodi frequentibus casibus proprios subditos ad alios à diocesi, vel extra diocesim mittere debeant, tanquam qui maiorem ipsis absoluendi potestatem habeant, sicut notavit Nau. l. 5. consil. 11. de priuil. edit. 27.

QVÆSTIO SECUNDA. Qua forma utendum sit in absolutione ab excommunicatione: Respondeo & dico I. Ad essentiam absolutionis pertinet, vt aliquo externo signo manifestetur: cum sit actus iurisdictionis, atque etiam restitutionis ad pristinam Ecclesiæ communionem. Dico II. Quamvis ad essentiam absolutionis absolute non requirantur verba, multo minùs certa formula verborum; consuetum tamen est, vt absolutio, quæ præsentibus confertur, talibus verbis fiat: *Absolvo te à vinculo excommunicationis, quam incurristi propter crimen v. g. percussoris sacrilegi, & restituote Sacramentis Ecclesiæ, & fidelium communioni, in nomine Patris, & Filij, & Spiritus sancti, Amen.* In publica ac solemni absolutione præmittitur Psalmus 50. vel alius ex pœnitentialibus: & ad quævis versum pœnitentis humeri denudati virga leuiter percutiuntur. (nisi ob iustam causam v. g. in fœminis talis ceremonia prætermittenda videatur) postea adiectis precibus consuetis absolutio datur, & absolutus in Ecclesiâ introducitur, qui modus absoluendi quadantenus etiam servatur, si mortuus ab excommunicatione absoluitur, ita vt præmissis precibus sepulchrum virga percuti debeat, iuxta c. à nobis, 2. iunct. Gloss. ver. forma servetur, de sent. excommunicatio Nauar. in cap. 1. p. n. 55. d. 6. de pœnit. In foro autem interno eiusmodi solennitates omitti possunt, teste Na. l. c. n. 59. Hen. l. 13. c. 29. n. 4. Saver. absolutio ab excom. n. 20. Auila p. 2. c. 7. dis. 3. du. 2. & 3. Ægid. disp. 14. dub. 16. n. 203.

Dico III. Ante absolutionem ab excommunicatione, contracta ob crimen enorme, aut valde perniciosum, exigendum est iuramentum à Reo, quod Ecclesiæ parere, id est, ab eiusmodi crimine imposterum abstinere velit, sicuti docent & explicant DD. communiter S. Bonau. in 4. d. 18. quæst. 6. Rich. ibid. 10. q. 2. Nau. in c. 1. princ. n. 53. d. 6. de pœnit. Syl. ver. absolutio. 3. num. 3. Auila cit. dis. 3. du. 2. Henric. lib. 13. c. 28. num. 4. Sa l. c. num. 19. & 20. Ægid. n. 104. Sanch. lib. 2. moral. c. 13. n. 17. vbi ex communi notat num. 19 à delinquentibus in impubertate, licet adeptam pubertate absolutionem accipiant, non esse iuramentum exigendum.

Dico IV. Absolutio ab excommunicatione neque in foro externo, neque interno conferenda est, nisi parti læsæ prius satisfactum, vel cum ea transactum sit, sicut colligitur



ligitur ex c. 2. de sentent. excommun. Quod si verò absoluendus realem satisfactionem exhibere statim non possit, tunc cautionem præstare cogitur pignoratitiam, aut fideiussoriam: Sin verò nihil horum efficere queat, sufficit iuratoria, vti ex communi docet Abb. c. quæstio ne, in fine, & c. qua fronte num. 17. de appellat. Syluest. verb. absolutio, 3. num. 3. Nau. c. 26. man. num. 7. Auila part. 2. c. 7. disp. 3. dub. 6. & 8. Henr. 1. cit. cap. 28. n. 1. Sa loc. cit. num. 3. Egid. num. 206. Sanchez suprà cit. cap. 13. num. 23. & lib. 10. de matrimon. disp. 18. num. 38. & 42. vbi generalem regulam tradit: Si iura cautionem sufficientem requirant, & aliquis, quia pauper vel peregrinus est, aliam præstare non possit, sufficere iuramentum eius, iuxta Auth. generaliter, Cod. de Episc. & Clericis: Quia nemo ad impossibile obligari potest. Et vero hic specialis ratio est: Quia Iudex ex officio obligatur, ideòque etiam compelli potest, vt Reum emendatum, atque quatenus ipsi possibile est satisfacere paratū à censura absoluat, sicuti colligitur ex c. qua fronte, de appel. dummodo Reus de violatione iuramenti suspectus non sit, sicuti Abbas notat cit. cap. qua fronte, num. vlt. His adde, quod in foro interno, spect. ta qualitate personæ, simplex promissio, seu fidei interpositio instar iuramenti esse possit.

Duo insuper hoc loco annotanda sunt: Primum, si quis post præstitam cautionem seu iuramentum de satisfaciendo, postea satisfacere negligat, non reincidit in excommunicationem, cum id iure expressum non sit: quāvis ab homine iterum excommunicari possit. Alterum. Tamen illicita, valida tamen est absolutio, quæ antequam parti læsæ satisfactum sit, vel antequam iuramentum præstitum de parendo impolterum mandatis Ecclesiæ, confertur ab habente ordinariam absoluendi potestatem, iuxta cap. venerabilibus, §. sanè, in fine, de sentent. excommun. in 6. Quin etiam si aliquis solum delegatam facultatem habeat, modo delegatio ipsi absolute facta fuerit: Secus, si cum limitatione expressa, aliàs absolutio sit nulla: vel aliter non absoluat, nisi satisfacta parte, aut præstito prius iuramento.

Quod si verò in delegatione, aut privilegio dicatur: *Committimus facultatem absoluendi, satisfacta prius parte, aut præstito iuramento*, non consentiunt Doctores, vtrū sit censenda limitatio potestatis, ita vt absolutio irrita existat, nisi talis conditio siue forma obseruata sit? Affirmant Caietan. verb. absolutio, & Armilla eodem verb. num. 48. Suarez disp. 7. sect. 5. num. 42. Egid. disp. 14. dub. 16. num. 210. & plerique alij. Sed contrarium valde probabiliter docet Auila plures alios allegans part. 2. cap. 7. disp. 3. num. 9. Est enim recepta regula Gloss. in Clem. 1. de offic. delegat. verb. reperit, Couarruu. part. 1. c. alma, §. 9. num. 8. & §. 11. num. 7. Nauar. c. 27. man. n. 37. Sanchez lib. 3. de matrimon. disp. 33. num. 3. Quod in commissione seu delegatione expressio rei, quæ iure communi inest, non inducit nouam formam seu conditionem sine qua non: sed solum admonetur commissarius seu delegatus, quid eum facere oporteat: Quare si requisita conditio secundum ius ordinarium ad formam seu substantiam actus non pertineat, tunc illicita quidem erit executio delegantis, non obseruata tali conditione; sed nihilominus valida. Ita autem in proposito res se habet; nam, spectato iure communi atque ordinario, ante absolutionem præmittenda est satisfactio, aut cautio satisfaciendi parti læsæ: si tamen Iudex non sine culpa, eam exigere prætermittat, valebit nihilominus absolutio. Ergo idem dicendum est, si quis ex delegata potestate absoluat, non exacta satisfactione: præsertim si delegatio facta fuit per modum gratiæ, quæ latè interpretari debet, vti fit in bulla, privilegio, aut iubilæo.

Dico V. Absolutio ab excommunicatione, vel alia censura, non requirit præsentiam eius, qui absoluitur, sed etiam absenti conferri potest per literas, nuntium: vel

etiam sine his per sola verba, aut factum, quo exprimitur intentio absoluendi: Idemque sentiendum de dispensatione super irregularitate. Ita ex communi Richar. in 4. distinct. 18. a. 10. quæst. 2. Nauar. cap. 26. num. 14. Sotus in 4. distinct. 22. quæst. 2. art. 3. in fine, Henric. lib. 13. cap. 29. num. 1. Sanchez lib. 2. moralium, cap. 11. n. 14. Auila part. 2. cap. 7. disp. 2. dub. 1. Suarez disp. 7. sect. 7. num. 4. & sect. 9. in fine. Nam excommunicatio est pœna Ecclesiastica, quæ sicuti absenti & ignorant (cuius tamen contumacia nota sit) infligi potest; ita multo magis eidem remitti potest, sola voluntate potestatem absoluendi habentis, dummodo ea humano modo significata & expressa sit.

Exinde infert Auila; Rectè facere Prælatos Ordinum cum in Capitulis generalibus dantes absolutionem à censuris, eam etiam ad absentes extendunt. Secundò, inferunt Nauar. Henriquez & Auila; Si confessorius, facultate absoluendi præditus, oblitus sit aliquem à censura absolueri, vel si aliquem absolutum à censura, à qua non poterat, quia erat Superiori reservata: postea impetrata facultate, posse absolutionem etiam absenti conferre, si eum ad se accersere non possit. Secus dicendum est de absolutione à reservato peccato: cum hæc sacramentalis sit, ideòque præsentiam Rei omnino requirat, quamvis contrarium sibi persuasisse videatur. Nau. l. c.

Dico VI. Absolutio ab excommunicatione, aliave censura etiam inuito & nondum emendato conferri potest, saltem validè: & interdum etiam licet, sicuti docet Rich. cit. a. 10. q. 1. Abb. c. ab excommunicato, n. 10. de rescript. & alij communiter. Quæ assertio eodem modo, sicuti antecedens probari debet: Quia censura est pœna, inuito inferri, atque etiam auferri potest. Excipe: Nisi qui absolutioni reluctatur, contumaciter persistat in crimine, v. g. hæresis, cui excommunicatio ipso iure continue annexa est. Nam talem hominem nemo absolueri potest, nisi canonis auctor, siue qui in canone dispensandi potestatem habet. Vide Suar. disp. 7. l. 7. n. 8.

Dico VII. In absolvente tamen omnino requiritur libera intentio siue voluntas absolvente. Quamobrem irrita est absolutio, quæ fictione dolosa, errorem atque inuoluntarium efficiente, impetratur, sicuti docet Suar. de censur. disp. 7. l. 6. n. 12. Sanchez lib. 2. moral. c. 12. n. 9. Item, quæ per vim ac metum iniustum extorquetur. Insuper ita directè absolutionem extorquens excommunicationis sententiæ de nouo subijcitur, c. vn. de ijs, quæ vi metusve causa, in 6.

Etenim, quod extremo loco annotare libet, nihil obstat, quo minùs excommunicatus iterum excommunicetur: siue ob diuersas culpas, & contumacias ab eodem etiam Iudice: siue ob eandem culpam & contumaciam à diuersis Iudicibus: qua de re legi potest Nauar. in c. ita quorundam, Gl. vlt. de Iudicis, Palud. in 4. d. 18. q. 3. & Suarez disp. 5. l. 2. Consequenter fieri potest, vt quis Reum pluribus excommunicationibus ligatum ab vna earum absoluat: ab altera non absoluat: vel quia potestate absoluendi præditus non est: vel tamen potestatem habeat, non tamen voluntatem. Cæterum, si aliquis facultate præditus, v. g. Confessorius à Papa privilegiatus, indefinite ac generatim absoluat pœnitentem suum à vinculo excommunicationis, aliisue censuris: (cuiusmodi absolutio sacramentali absolutioni ad cautelam præmitti solet) tunc credendum est, absolutionem verè & efficaciter conferri ab omnibus excommunicationibus, aliisque censuris, à quibus Confessorius pro eo tempore rectè & conuenienter absolueri potest: tamen si forte pœnitens, per obliuionem non crassam omittat confiteri peccata, quibus censura annexa sunt: vel etsi confiteatur, nesciat tamen modo vel ipse, vel etiam Confessorius, huiusmodi peccatis censuram adiunctam esse. Ex quo sequitur, si postea pœnitens recorderetur peccati summo Pontifici reservati, quod apud confessorium dicta pote-



state præditum bona fide confiteri intermisit; posse illud deinde cuius exposito Sacerdoti confiteri: quippe cum Papalis reservatio censuræ ablata fuerit. Quæ est doctrina Palud. in 4. d. 18. q. 5. Hadriani q. 4. de confess. §. si pietas circa prædicta, Nau. in man. c. 26. n. 13. & in c. consideret, §. cautus, n. 30. Sanchez lib. 2. moral. c. 12. n.

9. Secus verò dicendum est, si sint peccata specialiter reservata Episcopo, qua Episcopi non tantum censuras, sed etiam ipsamet peccata secundum se absolutioni suæ reservare: & Parochis eorumque Cooperatoribus denegare solent. Vide Suarez disput. 7. sect. 5. num. 16. & seqq. Ægid. cit. dub. 16. quest. 9. num. 225.

## P A R S T E R T I A.

### De Suspensione.

#### C A P. I.

### QVID, ET QUOTVPLEX SIT Suspensio.

#### SUMMARIVM.

1. *Suspensio est censura, per quam persona Ecclesiastica impeditur iure seu potestate Ecclesiastica &c.*
2. *Suspensio vel est totalis, vel partialis.*
3. *Suspensus ab officio non ideo etiam à beneficio suspensus est: neque vice versa.*
4. *Suspensus à beneficio non potest fructus percipere, nisi quatenus indiget: modo tamen officium per se, vel per alium præstet. Suspensus à beneficio non propterea amittit ius eligendi, aut conferendi, quod ratione beneficii competit.*
5. *Suspensus ab ordine exercere potest actus iurisdictionis: qui ordinis actualem usum non requirunt: & vice versa, suspensus à iurisdictione exercere potest actus ordinis, qui sine iurisdictione sunt.*
6. *Suspensio ab ordine Episcopali, vel Sacerdotali intelligitur tantum de actibus propriis eius ordinis.*
7. *Censura ligatus in uno loco, ubique ligatus manet, donec absolvetur.*



Vsuspensio est censura, per quam persona Ecclesiastica impeditur aliqua potestate, aut iure Ecclesiastico &c. Vide Summistas ver. suspensio, Navar. cap. 27. num. 151. Suarez de censuris, l. 1. Avilam de censuris p. 3. disp. 1. dub. 1. Sairum lib. 4. thesauri, cap. 1. Henriq. lib. 13. c. 31. num. 2. Ægid. Coninck t. 2. disp. 15. dub. 1. Dixi esse censuram; vt intelligas, neque eum cui Confessarius, vel Abbatissa, qui censuram ferre non possunt, iusta de causa interdixerunt, ne celebret: Neque eum, cui propter culpam mortalem divino iure illicitum est sacrificare, &c. propriè suspensos dici, sed prohibitos: quare neque irregularitatem contrahent, si officio suo illicitè fungantur. vt notavit Navar. & Coninck ll. cc. Sa ver. suspensio, num. 4. Per quam persona Ecclesiastica: vt intelligas censuram hanc non in laicis, sed solis clericis locum habere, quamvis Henriq. loc. cit. fateatur, etiam Abbatissam censuram suspensionis ab officio incurrere posse: quia licet non sit clericus: est tamen regularis, & quasi Ecclesiastica persona, capax spiritualis officij, cuiusdam iurisdictionis, saltem ex commissione, vt docet Syl. ver. Abbatissa, & dixi supra p. 1. cap. 3. num. 4. Impeditur vis potestate; vt intelligas, per censuram suspensionis non auferri ipsum officium seu potestatem Ordinis, iurisdictionis, aut ius beneficii Ecclesiastici; sed suspendi eius usum, siue exercitium.

2. *Suspensio dividitur in totalem & partialem. Totalis iterum duplex est: Vel simpliciter totalis, quæ simul est ab officio & beneficio: cuiusmodi suspensio duobus modis ferri potest primo cum expressione, vt sit tam ab officio, quam à beneficio: cuius exemplum habes in c. tuarum, de privileg. & Clement. 1. de decimis: Secundo, si absolute, & sine limitatione suspensio imponatur, neque ex*

adiunctis limitatio aliqua colligi possit: censenda est simpliciter totalis: Nam ex sermonis usu propositio infinita ob suam indifferentiam æquivaleret vniuersali, sicuti notat Henriq. lib. 13. cap. 32. numer. 1. Ægid. Coninck. dub. 1. numer. 4. Exemplum huius habes in extrauag. diuina, de priuil. vbi excommunicationis, suspensionis, & interdicti sententia ipso iure ijs infligitur, qui conferunt, vel recipiunt beneficia pro suis negotijs ad Curiam Romanam proficiscentium, aut aliquod in illa officium exercenti. Vel est suspensio totalis secundum quid, seu in certo genere: videlicet officij, vel beneficii Ecclesiastici.

Suspensio totalis ab officio dicitur, per quam aliquis ab omni spirituali officio tum ordinis; tum iurisdictionis, & Ecclesiasticæ administrationis impeditur: quamvis interim taliter suspensus sacris officiis interesse possit, cum alijs orare, cohabitare, sacrificanti ministrare, in necessitate baptizare, mortuos sepelire, quatenus talia officia etiam laicis competere possunt. sicut notavit Sairus num. 2. Auila part. 3. disp. 2. dub. 1. conclus. 6. Ægid. Coninck dub. 2. conclus. 1. Totalis verò suspensio à beneficio est, per quam aliquis ab omni Ecclesiastico beneficio; quod attinet ad eius administrationem & fructuum perceptionem, ad tempus suspenditur.

Tamen verò suspensio strictæ interpretationis esse debeat, sicuti & alia pœnæ, quæ extendendæ non sunt ultra verborum proprietatem; tamen cum absolutè & indistinctè fertur suspensio ab officio, vel à beneficio, intelligi debet de omnibus: cum nulla adsit ratio limitandi, si ex verbis canonis nulla limitatio colligi possit.

Partialis suspensio, vel est ab ordine tantum, aut aliquo actu ordinis, v. g. à celebratione Missarum, vel actu ordinandi: vel à iurisdictione tantum, aut certo actu iurisdictionis, aut quasi iurisdictionis, v. g. collatione beneficii, voce suffragij: vel denique à certo beneficio, aut parte beneficii, puta lucrandis distributionibus; vel ad tempus.

Corollarium I. Suspensus ab officio non ideo etiam à beneficio suspensus est. Quæ est sententia Navar. lib. 5. consil. 51. de homic. edit. 2. & cap. 27. man. num. 160. Sanchez lib. 3. de matrim. disp. 51. num. 12. Vgol. tab. 4. de censuris cap. 6. §. 3. Henriq. lib. 13. cap. 32. §. 3. Sairus lib. 4. thesauri, cap. 5. num. 16. Sa ver. suspensio num. 1. Auila disp. 2. dub. 1. conclus. 6. Coninck dub. 2. conc. 2. licet aliter sentiat Palud. in 4. d. 18. quest. 7. art. 3. conclus. 3. & alij apud Sanchez loc. cit. Sed probatur ex eo: Quia diuersæ pœnæ sunt suspensio ab officio, & suspensio à beneficio; & potest vna executioni mandari sine altera: si videlicet suspensus ab officio interim beneficii temporalem administrationem gerat, & fructus percipiat; officio verò, quatenus ei concessum est, satisfacere paratus sit, videlicet horas canonicas recitando, & ad alia munia Ecclesiastica Vicarium constituendo. Si tamen suspensio ab officio ob delictum graue perpetuò duratura sit, beneficio priuari debet, sicuti docent Vgol. & Coninck ll. cc. Sanchez num. 13. Sairus lib. 4. cap. 6. n. 17. arg. c. ex tuarum, de purgat. canon.

His



His adde, suspensio ab officio totaliter illicitè conferri beneficium, sicut constat ex c. cum dilectus, de consuet. Cum enim beneficium detur propter officiū, non rectè confertur ei, qui officium præstare non potest, c. vlt. de Clerico excommunicato ministr. Putant tamen Abb. c. vel non est, n. 4. de tempor. ordinat. Suarez disp. 26. l. 3. num. 8. Coninck concl. 3. collationem irritam non esse. sed potius infirmam: neque enim plus ex cit. c. cum dilectus colligi potest, licet Gl. ibid. aliter sentiat. Similiter docet idem Suarez disp. 27. l. 1. num. 26. suspensio à beneficijs nouum beneficium validè conferri, quamuis collatio infirmam sit: quæ sententia saltem in foro conscientiae locum habere poterit.

Corollarium II. Suspensio à beneficio, non ideo etiā ab officio suspensus censetur. Quare potest, imò etiam debet officio suo satisfacere, & iurisdictionem, vel administrationem ratione officij competentem exercere. Quæ est communis sententia DD. cum Gl. in c. cum Vintoniensis, de elect. Abb. in c. cum dilectus n. 20. de elect. Igitur suspensus à beneficio intelligitur tantum à perceptione fructuum, ac temporali administratione beneficij. Quare illi Oeconomus constituendus est: si autem se ingerat beneficij interdictæ sibi administrationi, ipso iure eo priuatur, c. cupientes, §. cæterum, de elect. in 6. & ex communi docet Sairus cit. c. 6. n. 5.

Notant verò DD. inter quos Abbas in c. Apostolicæ, num. 7. de exception. & c. pastoralis, §. verum, n. 16. de appellat. Nauar. c. 25. man. n. 124. Suarez disp. 27. l. 2. n. 3. Coninck cit. dub. 2. concl. 6. Sairus cit. c. 6. n. 12. cum Gl. recepta in c. cum Vintoniensis, ver. admiserant, de elect. suspensum à beneficio, si egeat, posse fructus percipere, quatenus necessarii sunt ad se & suos alendos; modò per ipsum non stet quo minus à suspensione liberetur: quamuis alij quidam maiorem etiam licentiam tribuant, Auila p. 2. c. 6. disp. 6. dub. 1. concl. 1. & 2. & p. 3. disp. 2. dub. 2. concl. 6. P. Nau. lib. 1. de restit. c. 2. n. 237. Quòd excommunicatus, vel suspensus à beneficio, si tamen præstet officium, lucretur omnes fructus, præterquam si fructus copiosissimi sint.

Illud porro dubitatur. Vtrum suspensus à beneficio amittat ius conferendi, aut eligendi, quod ipsi ratione beneficij competit? Ita affirmat Nau. c. 27. man. n. 193. §. Henr. l. 13. c. 32. §. 4. Sairus l. 4. c. 6. n. 7. Sed contrariū est probabilius. quod docent Abb. in cit. c. cum Vintoniensis n. 10. cum Gl. ibid. ver. admiserant, & idem Abb. in c. Apostolicæ n. 8. de except. Suarez disp. 27. n. 34. Coninck concl. 5. & alij plures: Quia collatio & electio non propriè numerantur inter beneficij fructus, quorum perceptio suspensio interdicta est: cum potius sint actus officij, & quasi iurisdictionis, ratione beneficij, competentis. Quamobrè canonis auctor, cum ab utroque tam beneficio, quam iure eligendi suspendere vult, id ipsum exprimit, ut videre est in c. cum in cunctis, §. vlt. de elect. Si ergo in canone non exprimitur, non est cur extensionem faciamus in materia pœnali.

Corollarium III. Suspensio ab ordine exercere potest omnes actus iurisdictionis, qui ordinis actualem vsum nõ requirunt, sicut docet Caiet. ver. suspensio, Henriq. c. 32. n. 4. Sairus lib. 4. c. 6. n. 6. Auila cit. disp. 2. dub. 1. concl. 3. Nau. c. 27. n. 160. Vgol. tab. 4. c. 6. §. 5. contra Abb. c. cum dilectus, n. 20. de consuet. Syl. ver. suspensio, n. 5. Quare Episcopus suspensus ab ordine, licet confessiones audire non possit: alteri tamen absoluendi potestatem delegare non prohibetur, ut Henriq. notauit.

Corollarium IV. Suspensio à iurisdictione exercere potest omnes eos ordinis, aut officij spiritualis actus, qui iurisdictionem non requirunt: cuiusmodi est sacrificare, in choro officiatorem agere, officium custodis, vel administratoris Ecclesiastici exercere, sicuti docent Caiet. Nau. Sairus & alij ll. cc. Suarez disp. 26. l. 4. n. 16. Gl. in c. transmissam, de elect. Auila. cit. dub. 1. concl. 8. At

verò eos actus ordinis, ad quorum substantiam requiritur iurdictio, uti est absolutio à peccatis, ne validè quidem exercere potest: Sed neque eos actus ordinis aut sacra officia, quæ sine iurisdictione licitè non sunt, suspensus à iurisdictione exercere debet. Quare peccat Parochus ita suspensus, inquit Suarez, si Sacramenta ministret ouibus suis, ut pastor ordinarius: & Episcopus, si subditis suis ordines conferat: quemadmodum etiam peccat, si alteri ordinandi licentiam tribuat. Quæ tamen doctrina limitanda est, nisi ex circumstantiis colligi possit, non fuisse mentem suspensionem ferentis, eiusmodi etiam sacra ministeria interdicere.

Corollarium V. Suspensio ab ordine Episcopali extendit se ad eos tantum actus Ordinis, qui Episcopo proprij sunt, & Sacerdoti iure ordinario competere non possunt. Cui affinis est suspensio à Pontificalibus, per quam per se ac directè prohibetur vsus insignium Episcopaliū, videl. mitræ, baculi, pallij: per accidens verò & consecutiue omnia Episcopalia solemnia officia, quæ sine eiusmodi insignibus exerceri non debent: qualia sunt ordines conferre, confirmare, Ecclesias, altaria, virgines consecrare, &c. secundum Gl. in extrau. suscepti regiminis, ver. à Pontificalibus, Sairus lib. 4. c. 4. n. 14. Interim tamen concessum est Episcopo ita suspenso, Missam priuatam sine Pontificalibus celebrare, confessiones audire, iurisdictionem forensam exercere.

Corollarium VI. Suspensio ab officio Sacerdotis, qualis habetur in c. literas, de tempor. ordinat. extendit se ad omnem actum proprium Sacerdotis: cuiusmodi est Missam celebrare, Sacramentum Pœnitentiæ, Eucharistiæ, Extremæ vntionis ministrare, solemniter baptizare, vel benedicere. Non verò se extendit hæc suspensio ad actus ordinis inferioris: quare non prohibetur Presbyter suspensus ab officio Sacerdotis, Epistolam, vel Evangelium solemniter canere.

Sed dubium est, verum suspensus ab ordine inferiore, v. g. Episcopus ab officio Sacerdotis, possit exercere actus ordinis superioris, videlicet Episcopales? Doctores plerique negant apud Suarez disp. 26. l. 4. talem regulam tradentes *Suspensus ab ordine inferiore, censetur etiā suspensus à superiore, non vice versa. Nam cui non licet quod minus est, non debet licere quod est maius*, arg. l. relegatorium, §. vlt. ff. de interdictis, ibi: *Est enim perquam ridiculum, cum quis minoribus honoribus, pœna causa prohibitus est, ad maiores aspirare: maiores tamen prohibitus, minores petere non prohibetur.* Verum hanc regulam Sairus lib. 4. c. 3. reg. 1. Sa ver. suspensio, n. 8. Coninck dub. 2. n. 10. Suarez cit. loco. n. 14. probabiliter restringunt ad actus inter se connexos, ita ut in exercitio ordinis superioris contineatur exercitium ordinis inferioris, à quo aliquis suspensus est: sic v. g. Presbyter suspensus ab officio Diaconi, consequenter etiam suspensus censetur à sacrificando: cum sacrificium non fiat sine Evangelio: idque ob iuris regulam 84. in. 6. *Cum quid una via prohibetur alicui, ad id alia non debet admitti.* Alia autem Sacerdotis munia, ut confessiones audire, solemniter baptizare, benedicere, &c. taliter suspensus Presbyter præstare possit, licet non decenter: attamen ut irregularitatem non contraheret. Eademque ratio est, si suspensus ab exercitio actus inferioris, suscipiat ordinem superiorem, peccat quidem propter indecentiam: sed irregularis fieri non videtur: cum non propriè exerceat actum ordinis, à quo suspensus est.

Illud verò adhuc probabilius est, quod docent Suarez & Coninck. ll. cc. contra Henriq. c. 32. n. 2. Syl. ver. suspensio quæst. 5. Auilam p. 3. disp. 2. dub. 2. concl. 11. Sairus lib. 4. c. 4. n. 19. Vgol. tab. 4. c. 6. §. 6. n. 3. Episcopum suspensum à collatione ordinum minorum, posse tamen conferre ordines maiores: quia horum collatio necessariò connexa non est cum collatione minorum, aut primæ tonsuræ: cum nihil obstat, in aliqua Ec-



clesia sacros ordines conferri ijs, qui minoribus iam initiati sunt. Accedit in arbitrio Superioris positum esse, prohibere alicui quod minus est, non prohibito eo, quod maius est: præsertim si in usu minoris, & non maioris delictum commissum fuit; ut in eo quis puniatur, in quo deliquit, c. literas, de tempor. ordinat. Qua simili ratione Episcopus suspensus ab officio confirmandi, non ideo suspensus censetur ab officio consecrandi, & ordinandi: quamvis hæc maiora sint, sed non connexa.

Ad extremum duo nota: I. Quod suspensus ab officio, ordine, aut iurisdictione, actus eiusmodi Ecclesiasticos in omni loco exercere prohibeatur, vti notant Gl. Abb. & alij in c. pastoralis, §. verum, de appellat. Sairus lib. 4. c. 5. n. 7. Vgol. tab. 4. cap. 6. §. 2. num. 4. Cum enim censura immediate personam afficiat, ideo comitatur eam etiam extra territorium ferentis; ita, ut suspensus vel excommunicatus in vno loco, vbique ligatus sit, donec legitime absolatur: *Excommunicatio*, inquit idem Abb. inc. ad reprimendam, n. 2. de offic. Ordin. afficit personam, eamque sequitur, sicuti lepra leprosum. Eademque ratio est de alijs censuris.

Alterum. Ex vi censuræ suspensionis non tenentur fideles vitare suspensum, etiam denuntiatum: cum id nullo iure cautum sit. Quamvis lex charitatis postulat, ut Clericum ab officio suspensum sine causa non inducam v. g. ad celebrandum, quando sine peccato & irregularitatis nota celebrare non potest. Sin verò iusta causa adsit à suspensio non denunciato sacrificium petendi, tunc is licite parere potest, post extrauag. Concilij Constantiensis, indulgentis fidelibus, ut suspensos, antequam denunciati sint, vitare non tenentur, sicuti notauit Coninck citat. dub. 2. in fine.

## CAP. II.

Quis possit censuram suspensionis ferre,  
& in quos?

## SUMMARIUM.

1. Qui excommunicare, si etiam suspendere potest: ac vice versa.
2. Omnes & soli clerici, præter Papam, capaces sunt censura suspensionis. Episcopi tamen generali sententia interdicti, ac suspensionis non censentur comprehendendi.
3. Non tantum singulares personæ, sed etiam Communitas suspensione, vel interdicto ligari potest.

**A**ssertio I. Quicumque excommunicationis censuram ferre potest, idem & suspensionis; ac vice versa. Ita ex communi S. Anton. 3. part. tit. 28. cap. 4. not. vlt. Syluest. ver. suspensio quæst. 2. Nauar. cap. 2. num. 159. Suarez disp. 28. sect. 1.

**A**ssertio II. Omnes & soli clerici, præter Papam, suspensionis censuram incurrere possunt. Ita Caietan. ver. suspensio, Suarez l. 2. & alij plerique: quamvis Henric. ut supra notauit, non improbabiler existimet, etiam in Abbatissam suspensionis censuram cadere posse. Illud verò privilegio speciali Episcopis concessum est c. quia periculosum, de sentent. excommun. in 6. ut generali statuto vel sententia interdicti, aut suspensionis non comprehendantur, nisi eorum expressa mentio fiat: idque propter executionem Pontificalis officii, quod frequenter incumbit. Dicendum tamen est, hanc causam impulsuam quidem esse; sed non principalem & adequatam, quæ potius videtur esse Episcopalis dignitas, sicuti colligitur aperte ex c. compromissarius, §. huiusmodi, de elect. in 6. Vbi Bonifac. ex eod. illo canone concludit; Episcopos non incurrere censuram suspensionis à beneficio, nisi eorum expressa mentio habeatur.

Hinc rectè inferri Suarez cit. l. 2. num. 6. dictum pri-

uilegium competere Episcopo electo & confirmato, etiam ante consecrationem; quia episcopali iam dignitate præditus est: quemadmodum & alia similia privilegia, ut illud de eligendo confessore c. vlt. de poenit. & remissionib. Item de usu altaris portatilis, c. vlt. de privilegijs in 6. confirmatis & necdum consecratis Episcopis competunt. Nam privilegia à Principe concessa, si nemini sint præiudicantia, amplè interpretari conuenit, quatenus verborum proprietas permittit. Addit Henric. cap. 44. n. 2. lit. x. supra dictum privilegium etiam ad R. E. Cardinales pertinere: quod est probabile, attenta praxi Ecclesiæ, per quam privilegia Episcopis propter status dignitatem concessa, ad Cardinales ferme extendi solent, propter maiorem eorum dignitatem.

**A**ssertio III. Non solum personæ singulares, sed etiam tota Clericorum Communitas, v. g. Capitulum, suspensionis, (sicut & interdicti) censuram incurrere potest, vti constat ex c. quia sæpe, de elect. in 6. Ex quo colligitur, generalibus statuti, aut sententiæ verbis, *Quicumque id fecerit*, etiam Capitulum; tanquam personam fictam, comprehendendi. Dupliciter autem censura in communitatem ferri potest: Primò collectivè, ut ipsum v. g. corpus Capituli, obtinens ius alicuius beneficii, iurisdictionis, administrationis; ab eo suspendatur. Secundò, distributivè, ut singuli è Capitulo dummodo noxij sint, eandem poenam incurrant. Qui duo modi interdum coniunguntur, ut videre est in cit. c. quia sæpe, in quo tum Capituli corpus, tum singuli è corpore, bona Prælati defuncti occupantes vel diripientes, ab officijs & beneficijs suspenduntur, donec restituant. Verum suspensio lata in Capitulum, si nihil aliud exprimitur, neque ex adiunctis colligatur, extendi non debet ad personas particulares: quia vox capituli collectionem significat, non personas, sicuti notauit Suarez disp. 28. sect. 3. num. 5.

## CAP. III.

Ob quam causam suspensio ferri possit.

## SUMMARIUM.

1. Censura suspensionis non incurritur sine propria culpa.
2. Plerumque requiritur culpam mortalem: quamvis nihil obstat leuem suspensionem propter venialem culpam alicui imponi.
3. Suspensio interdum fertur ob culpam merè præteritam: licet talis propriè censura non sit: quamobrem neque per absolutionem tollitur: sed alijs modis.

**A**ssertio I. Nemo suspensionis censura ligari potest, nisi qui peccauit: siue, ut alijs verbis dicam, censura suspensionis propriè dicta non incurritur, nisi ob culpam propriam. Ita Caiet. ver. suspensio. Nau. c. 27. n. 151. & 165. Suarez disp. 28. l. 4. Coninck cit. disp. 15. d. 3. concl. 1. Avila p. 3. disp. 3. dub. 2. concl. 2. Ratio est: Quia suspensio est propriè dicta poena, quippe directè alicui adimens usum Ecclesiasticæ potestatis: Poena autem requirit culpam in eo qui punitur, arg. c. 2. de Constit. Ergo, &c.

**A**ssertio II. Ad incurrendam suspensionis censuram, qualis in sacris canonibus decreta est, & communiter etiam ab homine imponi solet, requiritur culpa mortalis. Ita intelligendus est Henric. c. 34. n. 4. Avila p. 3. disp. 3. dub. 3. concl. 2. Coninck cit. dub. 3. concl. 2. Ratio est: Quia poena debet esse commensurata culpæ: suspensiones autem ab officio, à beneficio, ab ordine, à iure eligendi, beneficia conferendi, &c. sunt poenæ graues. Ergo requirunt culpam grauem seu mortalem. Interim nihil prohibet, quin propter leuem siue venialem culpam, levis suspensio imponatur, puta ab vno electionis actu, à lucrandis vna altera vice distributionibus, Missa celebranda ad tempus breue, sicuti docet Caiet. ver. suspensio. Nau. c.



Nau. c. 27. n. 151. 159. Henriq. l. c. Suarez disp. 28. l. 4. Auila concl. 1.

3. Assertio III. Suspendio interdum fertur ob culpam merè præteritam; & quidem varijs modis: I. in perpetuum, & sine spæ relaxationis. quo casu, si suspendio totalis est ab officio, beneficio, vel ordine, habet vim depositionis, irregularitatis, aut priuationis beneficii. II. ad certum tempus, v. g. triennium, quo transacto, suspendio per se ipsam expirat. III. Donec Reus satisfecerit, restituerit: quare exhibita satisfactione, suspendio ipso iure absque alia sententia tollitur, iuxta c. quia sæpe, iun. ver. donec, de elect. in 6. IV. ad beneplacitum Superioris, cuius proinde declarata voluntate remittendi seu reuocandi suspensionem, sine alia absolutione expirat; Imò etiam mortuo vel deposito Superiore suspendio cessat, nisi sit posita ad beneplacitum Sedis, quæ non moritur. Quamquam hi omnes suspensionis modi non sunt propriè dictæ censure, sed merè spirituales pænæ, sicuti Abb. annotauit in c. sæpe contingit, n. 16. de appellat. & constat ex dictis par. 1. c. 2. & 3.

Alia igitur est propriè dicta censura suspensionis, quæ Iudicis canonicam monitionem, & rei contumaciam requirit: ideòque absolutione indiget, posteaquam contumacia deposita est. Vide Nau. c. 27. n. 151. & 159. Syl. ver. suspendio q. 4. Suarez disp. 25. l. 1. Coninck dub. 2. n. 16. & dub. 4.

Porro quibus in casibus iure communi suspensio lata sit, dicam proprijs locis. Interim videri potest S. Anton. 3. p. tit. 27. Angelus ver. suspensio, 1. S. l. q. 6. Palud. in 4. d. 18. q. 7. a. 2. Nau. c. 27. n. 154. Tolet. lib. 1. c. 48. & 49. Henriq. lib. 13. c. 6. & seqq. Sairus in thesauro lib. 4. c. 12. & seqq. Suar. de censuris disp. 31. Coninck c. 2. disp. 15. dub. 5.

## CAP. IV.

## Quibus modis suspensio tollitur.

## SUMMARIUM.

1. Suspendio lata ad certum tempus, eo elapso, per se cessat.
2. Suspendio, quæ propriè censura est, ob contumaciam lata, absolutione indiget.
3. Parochi communi iure à suspensionibus absolueri non possunt.
4. Suspendio, quæ propter peccatum præteritum sit pura pœna imposita est, vel in perpetuum, vel ad tempus certum, si relaxanda sit, remedio dispensationis indiget, quam inferior Prælati iure proprio & ordinario facere non potest.
5. Qui tamen priuilegium, vel generalem commissionem habent absolueri à suspensionibus, etiam tales tollere possunt.

1. Suspendio tribus modis tolli potest: Primò, si ob delictum præteritum imposita est ad certum tempus, v. g. ad triennium, vel sub conditione, donec restitueris; elapso tempore, vel impleta conditione, per se ipsam cessat, sine alia Superioris declaratione. Ita Gl. recepta in Clem. 1. ver. donec, de decimis, Couar. in 4. decret. p. 2. c. 6. in princ. n. 18. & 19. Nau. cap. 27. n. 161. Henriq. lib. 13. c. 35. n. 2. Auila p. 3. disp. 6. dub. 1. Suarez disp. 29. l. 1. n. 1.
2. Secundò; Per absolutionem tollitur ea suspensio, quæ propriè dicta censura est, propter contumaciam inflicta, cum expressa vel tacita lege, vt tunc & non antè absolutio danda sit, quàm si à contumacia seu inobedientia recedatur, sicuti explicat Suarez disp. 29. l. 2. n. 1. Atque à tali suspensione iuris dicendū est, Episcopum, vel alium quasi Episcopali iurisdictione præditum absolueri posse, si sedi Apostolicæ specialiter reseruata non sit, arg. c. nuper, de sent. excommun. & c. ex literis, de constit. & tradit Innoc. in c. 2. de Solut. ibid. Abb. n. 5. Syl. ver. suspensio, q. 8. S. Anton. p. 3. tit. 27. c. 4. §. sed quaritur, Couar. p. 2. decret. c. 6. princ. num. 17. Nauar. c. 27. n. 162. Auila p. 3. disp. 6. concl. 3. Suarez disp. 29. l. 2. num. 6. Quamuis

Sairus in thesauro lib. 4. c. 17. num. 8. & alij apud Suarez l. c. arbitrentur, suspensionem propter contumaciam latam, per se ipsam cessare, si Reus à contumacia recessit, vt nulla absolutione opus sit: sed sententia, quam dixi, vsu recepta est.

Porro Parochi, alijque expositi Confessarij non possunt absolueri à talibus suspensionibus etiam iure communi non reseruatis: nisi speciale priuilegium, vel delegatam potestatem acceperint ab eo, ad quem iure ordinario talis absolutio spectat. Ita notauit Henriq. cit. c. 35. n. 2. Auila p. 3. disp. 6. conclus. 2. Alia verò ratio est de excommunicatione, quippe cuius absolutio ordinariè antecedere debet absolutionem à peccatis, sicuti dixi hoc tract. p. 2. cap. 6. num. 1. & 2. Non item absolutio à suspensione & interdicto. Si tamen Episcopus alicui Parocho v. g. committat potestatem absoluendi à casibus Episcopalibus, poterit ille etiam ab eiusmodi suspensionibus absolueri: cum talis delegandi facultas nullibi reperiatur Episcopis interdicta.

Tertiò tollitur suspensio per relaxationem seu dispensationem, si videlicet lata fuit propter peccatum commissum seu præteritum, tanquam pura pœna. Quod duobus modis fieri potest: Primò ad certum tempus, v. g. Quia feceris, per triennium ab officio, aut beneficijs suspensus maneat: ante cuius terminum si pœna relaxanda sit, per dispensationem id fieri debet ab auctore canonis, aut eius successore, delegato, &c. non item ab inferiore v. g. Episcopo: quia sicut legem Superioris, ita & annexam ei pœnam inferior soluere non potest, sicuti notat Gl. recepta n. c. cupientes, §. ceterum, ver. suspensos, de elect. in 6. S. Anton. p. 3. tit. 28. cap. 4. Couar. in 4. decret. p. 2. c. 6. princ. n. 18. Sanchez lib. 3. de matrim. disp. 52. Addit verò Suarez disp. 29. l. 1. num. 20. idem dicendum esse, si lex canonica præcipiat ob tale delictum imponi suspensionem v. g. triennem, non posse talem pœnam ab inferiore, puta Episcopo, iure proprio & ordinario coarctari, aut in ea dispensari, quia facti questio, ait Papinianus l. 1. ff. ad S. C. Turpill. est in arbitrio iudicantis: pœna verò profectio non eius voluntati mandatur, sed legis auctoritati reseruatur. Secundò, suspensio ob delictum commissum seu præteritum, vt pura pœna ferri potest in perpetuum, sine spæ relaxationis ordinariæ. Et tunc certum est, inferiorem, puta Episcopum, in tali canonis suspensione dispensare non posse, nisi in casibus specialiter concessis, sicuti docet S. Anton. p. 3. tit. 27. c. 4. §. sed quaritur, Abb. in cit. c. 2. de Solut. n. 5. Syl. ver. suspensio, q. 8. Nauar. c. 27. n. 162. Quia auctor canonis, dum talem suspensionem perpetuam & irremissibilem imponit, eo ipso sibi reseruare censetur.

Dubium verò est, si suspensio ob delictum commissum lata sit absolute, sine temporis determinatione, atque sine expressione vt perpetuò duret, aut non relaxetur: vtrum censuris suspensionum annumerari debeat, quas dixi absolutione tolli, etià ab Episcopo, si expressè reseruatae non sint; an potius puris pœnis annumeranda, quas solus is qui tulit, vel eius successor, delegatus, &c. per dispensationem relaxare potest. Atque hanc posteriorem partem tenent Abb. in cit. c. tam literis, de testibus, & attestat. N. c. 27. num. 162. vbi negant: Episcopum dispensare posse in suspensionibus iure communi indefinitè latis propter delictum præteritum: quia talis suspensio habet rationem pœnæ; pœna autem absolute lata censetur esse perpetua, & irremissibilis à iudice inferiore, iuxta l. seruus, C. de pœnis.

Verumtamen contraria sententia probabilis est, quam tenet Gl. in Clem. 1. de hæreticis, §. penult. ver. excommunicationis, & ipsemet Abb. in c. quàm sit, de excess. Prælatorum, in fine. Auila p. 3. disp. 6. conclus. 4. Suarez cit. lect. 1. num. 19. Si talem suspensionem Papa sibi non reseruauit, ab Episcopo, aut alio similem iurisdictionem habente, post peractam penitentiam & satisfactam



tionem, tolli posse. Ratio est, quia cum indefinitè fer-  
tur suspensio propter commissum delictum, ordinariè  
benignior interpretatio haberi potest, ac debet, non esse  
impositam ut pœnam merè vindictiuam, sed potiùs  
medicinalem, & cum ordine ad duraturam contuma-  
ciam, seu inobedientiam qua cessante, seu secuta emen-  
datione, per absolutionem, instar aliarum censurarum.  
quæ pœnæ nō absolutæ, sed medicinales sunt, tolli possit,  
ducto etiam argum. ex c. ex literis. de constitut. Accedit,  
quod si auctor suspensionis voluisset esse perpetuam & ir-  
remissibilem, id expressisset, sicuti sæpe exprimere solet.  
Atque ex hoc principio rectè docuit Gl. in c. 1. d. 71.  
quam sequitur Less. lib. 2. c. 34. dub. 19. num. 93. Si  
quis ab alieno Episcopo ordines accepit Episcoporum  
propriam dispensatiuè permittere posse, ut in susceptis  
ministret, atque ad altiores ascendat, arg. c. Salomitanæ,  
d. 63.

Porro sciendum est, iure nouo Trident. Concilij sess.  
24. c. 6. de reform. Episcopos aboluere posse ab omni  
suspensione etiam Papæ reservata, quamvis ut pura  
pœna seu in perpetuum, seu ad certum tempus decreta  
sit: dummodo proueniat ex delicto occulto non deducto  
ad forum contentiosam. Ita notarunt Henrici lib. 13. c.  
35. num. 2. lit. s. in comment. Auila cit. disp. 6. dub. 1.  
conclus. 7. Et si verò eiusmodi dispensationes, quæ ut pu-  
ræ pœnæ feruntur, potiùs per dispensationem tolli de-  
beant, ut supra dixi: Doctores tamen aliqui, nullo ob-  
seruato discrimine, omnem suspensionem propter deli-  
ctum seu in perpetuum, seu ad certum tempus imposi-  
tam, absolutione auferri aiunt: quod verbum & in for-  
mula relaxationis indistinctè usurpari solet: *Absoluo te à  
vinculo suspensionis, quod incurristi propter tale crimen, &  
restituo te ad executionem tui muneris ordinis; vel ad benefi-  
cium tuum, ut videre est apud Syl. ver. absolutio, 6. dub.  
2. Nau. c. 27. num. 161. Auila in fine, p. 3. Suarez disp.  
29. sect. 3. in princ. Eademque ratione priuilegium à Se-  
de Apostolica Confessariis Societatis Iesu concessum,  
quoddam fidelium confessionibus auditis, eos in foro con-  
scientiæ aboluere possint à quibuscunq; sententijs, cen-  
suris, ac pœnis Ecclesiasticis ex peccatis resultantibus, ad  
suspensiones iuris indistinctè se extendit, sicuti significat  
Auila part. 3. disp. 6. dub. 2.*

Ad extremum moneo, ante absolutionem à censura  
suspensionis, si opus sit, exigendam esse satisfactionem,  
vel cautionem satisfaciendi parti læsæ: & in criminibus  
enormibus exigendum iuramentum parendi Ecclesiæ, uti  
notat Nau. c. 27. num. 161. §. sexto, Auila p. 3. disp. 6. in  
fine. Henrici lib. cit. c. 35. num. 3.

## CAP. V.

## De Depositione ac degradatione.

## SUMMARIUM.

1. Depositio, quatenus pœna canonica, est perpetua & irremissibi-  
lis Ecclesiastica persona ob enorme crimen remotio ab ordi-  
ne, iurisdictione, aut beneficio.
2. Depositio auferit ipsum ius radicale seu titulum beneficij, aut  
iurisdictionis: in quo differt à pœna suspensionis.  
Crimen Sodomia exercentes ipso iure incurrunt priuationem à b  
officio & beneficio.
3. Per simplicem seu absolutam depositionem non auferuntur priui-  
legia fori & canonis, sicuti per degradationem.
4. Degradatio alia est verbalis, seu sententialis: & alia realis,  
seu actualis.
5. Realis degradatio non nisi ab Episcopo consecrato fieri debet.
6. Crimen, ob quod Clericus degradatur & seculari iudici tradi-  
tur, debet esse grauissimum.

**D**epositio latè sumpta est, Remotio alicuius personæ  
à munere, aut dignitate, ob crimen, senium, aliūm-  
ue defectum; strictè autem, & sicuti hîc sumitur, est; Ec-

clesiastica pœna, per quam persona Ecclesiastica ob enor-  
me crimen remouetur ab ordine, iurisdictione, vel bene-  
ficio, in perpetuum & sine spe remissionis. Quæ deposi-  
tionis pœna cum suspensione magnam similitudinem ge-  
rit: quia utraque est ab Ecclesiastico ordine: officio, aut  
beneficio: quare in solas Ecclesiasticas personas cadere  
potest. Quæ causa est, quod in sacris canonibus hæc duæ  
pœnæ interdum promiscuè usurpantur, sicuti notat Suar.  
disp. 30. l. 1. n. 10. Si tamen propriè loquendum sit, inter  
se differunt, quod depositio, ut ipsum vocabulum signi-  
ficat, sit perpetua & irremissibilis remotio ab ordine,  
officio, aut beneficio: non item suspensio, sicuti clarè col-  
ligitur ex c. at si Clerici, de iudic. & docet Nau. c. 27. n.  
152. Auila p. 3. disp. 1. Suar. cit. sect. 1. Quod quidem dis-  
crimen manifestum est, si loquamur de suspensionibus,  
quæ positæ sunt seu à iure seu ab homine, ad certum tē-  
pus, aut sub conditione, vel indefinitè, adeoque sub ta-  
cita concitione donec emendatio secuta fuerit: nam hæc  
omnes simpliciter ac posituè perpetuæ non sunt, sicuti  
est pœna depositionis. At verò difficile est ostendere, quo  
modo ea suspensio, quæ tanquam pura pœna seu vindi-  
cta in perpetuum lata est, à depositione differat. Quæ in  
re dicunt Abb. in c. inquisitionis, num. 6. de accusat. Nau.  
cit. num. 152. Auila cit. disp. 1. dub. 2. Si suspensio in per-  
petuum, & sine spe restitutionis sit totalis, videlicet ab  
omni officio, ac beneficio: cēsendā esse quasi depositionē.

Secundò ait Suar. cit. l. 1. n. 11. Quod suspensio ab or-  
dine posituè perpetua vix differat à depositione: quia ut-  
traque relinquit characterem indelebilem, atque initera-  
bilem; & priuat tantum legitimo usu ordinis, sine spe re-  
stitutionis, saltem ordinariæ, nam extraordinariè nihil  
prohibet à Papa, vel etiam in casibus specialiter concessis  
ab Episcopo restitutionem fieri. At verò realiter degra-  
datus restitui non solet per gratiam dispensationis, sicuti  
annotauit Abb. c. ex tua, nū. vlt. de Clericis non residēt.

Tertiò ait Suarez num. 4. Quod suspensio à beneficio  
posituè perpetua differat à depositione: quia depositio  
auferit ipsum titulum siue ius beneficij, & consequenter  
eius administrationem, ac fructuum perceptionem: in-  
super reddit personam inhabilem ad idem beneficium,  
vel ad omne beneficium consequendum, si depositio ab-  
solutè à beneficijs illata fuit. Hæc autem non ita se ha-  
bent in suspensione, quippe quæ tantum intelligitur esse  
à fructibus, manente interim radicali iure, seu titulo ip-  
sius beneficij, ut supra cap. 1. num. 1. dictum fuit. Simili-  
ter deposito à dignitate aut iurisdictione ipso iure & qua-  
si dominio muneris priuat: quamvis executio per ipsum  
Reum facienda non sit: quia esset nimis difficile, si Reus  
se ipsum condemnare deberet, (præsertim de crimine  
occulto) sed cum postea Reus conuictus condemnatur  
de crimine, cui ipso iure depositio à beneficio, vel offi-  
cio annexa est, iuris fictione beneficium vel officium cer-  
setur vacasse à die commissi criminis, uti explicauimus præc.  
tract. c. 15. num. 7. & in specie notauit Auila p. 1. dub. 7.  
concl. vii.

Quartò ait idem Suar. Quod suspensio ab officio for-  
maliter non includat, nec secum trahat depositionem à  
beneficio, nec vice versa: quare si in iure reperiatur lata  
depositio ab officio, etsi eam aliquis ob crimen incurrat,  
non ideo ipso iure beneficium etiam vacare censi debet:  
quamvis Reus à Iudice postea priuandus sit. Cum enim  
beneficium detur propter officium, haud dubiè indignus  
beneficio est, cui officij administratio perpetuè interdi-  
cta est, & ita colligitur ex c. eos etiā, dist. 81. & notauit Gl.  
super c. 1. causa 1. quæst. 3. princ. verb. annexa, & Suarez  
disput. 30. sect. 1. num. 14. Quanquam pœnæ depositio-  
nis, quæ in iure canonico ipso facto lata reperiuntur,  
semper aut ferme semper continent utramque priuatio-  
nem, ab officio, inquam, & ab annexo beneficio, sicuti  
notauit Coninck tom. 2. disp. 16. num. 5. & videre est in cit.  
c. eos etiā, & c. 1. de homic. in 6. & in Bulla 70. Pij V. contra  
Sodom.



Sodomitas edita, in qua omnes Clerici, *seculares & regulares*, cuiuscumque gradus & dignitatis. (adeoque etiam Episcopi ac Cardinales *tam diu nescientes, omni privilegio clericali, omniq. officio, dignitate, & beneficio ecclesiastico eiusdem canonis autoritate priuantur.* Requiritur tamen ad huius ipsius poenae executionem sententia Iudicis, ut supra dixi: & in hoc ipso casu notarunt Henr. libro 14. c. 5. num. 1. in comment. lit. f. Auila part. 7. disp. 4. dub. 7. conclus. 8. Suar. disp. 31. sect. 4. num. 22. Qui omnes etiam aduertunt cum Nauar. cap. 27. numer. 250. ad hanc admodum grauem poenam depositionis incurrendam non satis esse semel, aut iterum Sodomitæ scelus commisisse: sed requiri frequentiam actus, ut quasi per consuetudinem exerceri censeatur.

Crimina, quæ depositione digna sint, siue ob quæ poena depositionis à Iudice imponenda sit, numerant Doctores plerique: Furtum, homicidium, peritrium, adulterium, & omnia eo maiora, ut virginis stuprum violentum, incestum, sicuti videre est apud Canonist. in ca. at si Clerici, &c. cum non ab homine, ubi Abb. num. 4. de iudic. Syl. ver. crimen, & ver. degradatio, quæst. 4. Na. c. 27. num. 248. Henr. lib. 13. c. 55. num. 3. Auilam. p. 4. dub. 3. Sa. ver. depositio, num. 2. Sed placet mihi maximè resolutio Abb. in cit. c. at si Clerici, num. 33. & seqq. Debere esse crimen enorme, siue vnum ex maximis: quale autem hoc sit, non ex antiquis semper canonibus cognosci posse: (quia olim cum seuerior disciplina vigeret, facilius imponebatur depositio, ut colligi potest ex c. presbyter, & seqq. dist. 81.) sed Iudicis arbitrio relinqui, videlicet, utrum sit enorme, seu vnum ex grauioribus secundum se, siue ex obiecto: siue ratione circumstantiæ aut adiunctæ qualitatibus, ut qui habet annexam irregularitatem indispensabilem, v.g. homicidium, vel iuris infamiam, aut publicum scandalum, aut diuturnam contumaciam, vel incorrigibilitatem. Ex quo rectè idem Abbas resoluit, sicuti & Auila, Sa. l. cc. Notorium concubinatum seu fornicationem, si post monitiones continue, esse sufficientem causam depositionis, idque apertè constat ex c. si autem Clerici, de cohabit. Cler. & mulier. & Trident. sess. 25. c. 14. de reform. Atque in sess. 22. in decreto de obseruandis & euitandis in celebratione Missæ, præcipitur Episcopis, *ut neminem, qui publicè & notoriè criminofus sit, sacro altari ministrare permittant*: quod si autem eiusmodi criminofus post monitiones, & minores suspensionis poenas, se non emendat, haud dubiè deponendus erit. Vide Ab. l. c.

Dixi hæc de depositione simplici & absoluta, cuius hoc proprium est, si per sententiam à Iudice alicui inferatur, quod per eam depositus non amittat privilegia clericalia fori & canonis. Quæ etiam causa est, cur ita depositus, sicuti & à beneficijs suspensus, Ecclesia alere teneatur, ne cum opprobrio cleri mendicare cogatur, sicuti docet Abb. cap. pastoralis, §. verum, num. 16. de appellat. Auila p. 4. dub. 1. conclus. 3. cum Gloss. in cap. studuit, ver. & fui, distinct. 50. Sed bene excipiunt Abb. loco cit. & Suar. disput. 27. n. 5. sect. 2. nisi in crimine; ob quod suspensus est, contumaciter adhuc persistat: tunc omnis prouiso ab Ecclesia ipsi subtrahi potest, ut ita magis percussus respiciat.

Cæterum si Clericus ob crimen simpliciter depositus senon corrigat: sed in eodem vel simili crimine perseueret, tunc excommunicari debet: postea crescente contumacia solemniter anathematizari, ad terrorem maiorem incutiendum, iuxta c. debeat, n. quæst. 3. & notauit Abb. cit. cap. cum non ab homine, num. 23. Quod si ne ita quidem se correxerit, per secularem potestatem comprimendus, ut vel exilium, vel alia legitima poena ei inferatur: atque ita habetur in cit. c. cum non ab homine, de Iudicijs.

Dubium verò est, an Iudex secularis contra Clericum simpliciter depositum, & post monitiones excommuni-

catum, & anathematizatum, si incorrigibilis reperiatur statim sine actuali Ecclesiæ traditione, aut etiam incorrigibilitatis declaratione, procedere possit? Quam questionem proponit Abb. in cit. c. cum non ab homine, num. 28. de iudicijs, & argum. eius textus cum Ioan. Andr. & Anton. de Butrio affirmat, si incorrigibilitas manifesta sit, puta si Clericus, post excommunicationem, & anathematis promulgationem, se Ecclesiæ ad agenda poenitentiam in carcere, vel Monasterio (iuxta ca. tuæ, de poenis, c. vt tam, de sent. excommun. & cap. nouimus, §. vt. de verb. signif.) subijcere pertinaciter recuset, vel exinde effugiat, nec reduci possit: & multò magis si in crimine enormi iterum deprehendatur: cum tunc Ecclesia non habeat amplius quod in talem Clericum statuere possit, seculari Iudici relictus videtur, quam sententiam docuit etiam Syl. ver. degradatio, quæst. 6. Auila part. 4. dub. 1. D. Martha tract. de iurisdic. cent. 2. casu 13. num. 14. Si Clericus, inquit, depositus verbaliter iterat delictum, ex hac incorrigibilitate subest Iudici seculari, alique alia degradatione actuali, & traditione, si tamen incorrigibilitas surgat ex trina monitione. Quamuis contrariam sententiam, quod requiratur traditio actualis, ut Iudex secularis contra depositum procedere possit, indicat Gl. cit. ca. cum non ab homine, ver. postmodum, & clarè docent Töl. libro 1. c. 50. §. aduerte, Suarez disp. 30. sect. 2. num. 7. & 8. Quæ sententia tutior ac praxi Ecclesiarum conformior est: excepto, si necessitas in hoc casu aliud postulare videatur.

Venio nunc ad degradationem, quæ est poena Ecclesiastica qua Clericus ab omni officio, ac beneficio Ecclesiastico depositus, Clericorum insuper privilegijs per solemnem sententiam in perpetuū, & sine spe restitutionis exuitur. Dicitur itaq. degradatio, quia per eam Clericus, quatenus fieri potest, extra gradum & statum Clericorum eiicitur: consequenter recidit sub iurisdictionem secularis Magistratus; à quo, perinde ac laicus, capi, incarcerari, & iuxta leges civiles de commissis criminibus puniri potest: eiusdemque inuasor aut petcussor, quamuis iniustus, canonis excommunicationem non incurrit, secundum communem Doctorum sententiam. In quo ipso maximè differt à depositione simplici, quippe per quam privilegia canonis & fori non auferuntur. Idque discrimen notauit Gl. communiter recepta in c. 2. de poenis, in 6. ver. privilegio clericali, Abb. c. cum non ab homine, num. 5. de iudic. Iulius Clarus cum addit. lib. 5. sent. §. practica criminalis, q. 74. num. 1. Syl. ver. degradatio, q. 6.

Porro duplex est degradatio, sicuti colligitur ex c. 2. de poenis, in 6. Vna verbalis, seu sententialis, quæ aliquando etiam *verbalis depositio* appellatur: sed respectiua, quia ordinata est ad Rem postea cum actuali & solemnem ceremoniam degradandum, & Iudici seculari tradendum, quæ est altera & posterior degradatio, *actualis*, inquam, *realis* sine *solemnis*, uti appellatur à Trident. sess. 13. c. 4. de reform.

Verbalis degradationis requisita solemnitas describitur in cit. c. 2. de poenis. Ut proprius Episcopus, assistentibus sibi alij sex Episcopis, in condemnatione Presbyteri: tribus autem in condemnatione Diaconi vel Subdiaconi iuxta c. felix, & seq. 15. quæst. 7. coram his tanquam assessoribus, & iustitiam causæ cognoscentibus, sententiam in criminofum pronuntiet. Verum Concilium Trid. ci. c. 4. de ref. satis esse decreuit, si loco Episc. totidem infulati Abb. vel si tales commode interesse non possint, alij in Ecclesiastica dignitate constituti Clerici adhibeantur. Ad degradationem verò verbalem Clerici in minoribus tantum constituti, sufficit proprii Episcopi autoritas, eū presentia quorundam Clero, Capituli repræsentantiū, sicuti docet Gl. communiter recepta. c. 2. ver. presentia, ex c. 1. de excess. Prælatorum: Idq. seruandū, nisi aliud consuetudine receptū sit.

Facta autem degradatione verbali, seu sententiali, postea accedit Episcopus ad realem seu actuale de-



gradationem, etiam sine alijs Episcopis, aut Prælati, sicuti apertè colligitur ex cit. c. 2. & ex communi docet Abb. in c. qualiter, 2. de accusat. num. 11. Suarez sect. 2. nu. 6. Atque criminofum iam antè per sententiam omni ordine, beneficio, & privilegio clericali legitimè priuatum, actuali etiam adhibita ceremonia, vestibus & ornamentis clericalibus, quasi spiritualis militiæ insignibus, spoliatur, vel potius antea spoliatum solemniter declarat: adiuncta ea ipsa, vel simili verborum formula, qualis in ci. c. 2. præscribitur.

**3** Quare hoc etiam discrimen est inter degradationem verbalem, & actualem seu realem: quòd ista sit actus Episcopali ordini ex Ecclesiæ institutione annexus, qui proinde à solo Episcopo consecrato exerceri potest, sicut notauit Gl. communiter recepta in c. transmissam, ver. de talibus, Abb. num. 4. de elect. Tol. lib. 1. c. 50. §. secunda est, Suarez disp. 31. sect. 1. num. 18. & colligitur ex Trid. in suprà cit. cap. 4. vbi significat, verbalem depositionem seu degradationem (nam pro eodem accipit) etiam Vicario generali committi posse: cuius causa est, quia ad eam non requiritur potestas ordinis, sed solius iurisdictionis; quamobrem etiam Episcopus confirmatus per se, vel per alium eiusmodi actum exercere potest. Sed ad actualem ac solemnem degradationem non nisi consecratus Episcopus procedere potest, sicuti colligitur ex c. transmissam vbi id notat Gl. ver. de talibus, de elect. Abb. in c. non potest, num. 3. de sent. & re iudic. Quamuis nihil obstat, quominus id etiam alteri Episcopo consecrato delegari queat, sicuti Suarez notat cit. num. 18. non item alteri non Episcopo, puta Vicario Generali: quia ea, quæ sunt ordinis committi non possunt nisi ijs, qui eundem ordinem habent, sicuti habetur in c. aqua, vbi id notat Abb. num. 3. de consecrat. Ecclesiæ: Excepta tamen plenitudine potestatis Papalis, si loquamur de exercitijs ordinis ab Ecclesiâ institutis, & annexis.

Debet autem hæc sollemnis & realis degradatio fieri præsentè Iudice seculari, cui denuntiatur, vt Reum tanquam exutum iam Ecclesiasticis privilegijs, in suum forum seu iurisdictionem recipiat: cum intercessione tamè, seu deprecatione efficaci, id est, serò & ex animo facta, vt citra mortis periculum sententiam circa eum moderari velit: ne videlicet Ecclesia cuiusquam hominis necem desiderare, aut procurare censeatur. Ita habetur in c. nouimus de verb. signif.

**6** Crimen ob quod Clericus degradandus, & consequenter Iudici seculari tradendus est, debet esse vnum ex grauissimis: quorum aliqua iure expressa sunt: I. Crimen hæresis manifestum, si in eo Reus pertinaciter perseueret,

iuxta c. ad abolendam, c. excommunicamus, de hæreticis, & c. 1. eod. in 6. Si autem se corrigere paratus sit, recipitur: licet in perpetuum carcerem tradi possit, secundum Gl. in cit. c. 1. Mol. tract. 3. disp. 49. num. 15. Sin verò postea relapsus fuerit, non iterum recipiendus, sed degradandus est, cit. c. ad abolendam, §. illos autem, & c. super eo, eod. in 6. II. Falsatio literarum Papalium, c. ad falsarium, de crimine falsi. Nisi Papa hanc pœnam in aliam, v. g. carcerem perpetuum, commutet, c. nouimus, §. pro illo, de verbor. signif. III. Sodomia frequentata, sicuti apertè colligitur ex Constit. Pij V. verb. privilegio clericali. de quo suprà dixi num. 2. ver. quarto: IV. Calumnia proprio Episcopo irrogata, c. si quis Sacerdotem, 11. quæst. 1. Quod tamen Gl. communiter recepta in c. cum non ab homine, de iudicijs, Abb. c. at si Clerici, n. 37. eod. tit. Syl. verb. degradatio, quæst. 2. Tol. lib. 1. ca. 50. Auila p. 4. dub. 3. & alij rectè intelligunt ac moderantur, incorrigibilitas accefferit. Idque commune est omni crimini enormi, atque mortis pœna digno in laicis, v. g. homicidio simplici, vt ob tale crimen iteratò commissum Clericus seculari Magistratui tradi, seu relinqui possit, si si alijs pœnis ab Ecclesiâ infligi solitis corrigi non poterat, sicuti notarunt Abb. Tol. & Auila ll. cc. & colligitur ex cit. c. cum non ab homine. Denique seu de iure, seu de consuetudine ob aliud crimen nimis enorme, atque Rei: publ. valde perniciosum, Clericum degradari & seculari Magistratui tradi posse, docent Abb. in c. at si Clerici, num. 39. & c. cum non ab homine, nu. 6. de iudicijs, Syl. ver. degradatio, q. 2. Tol. ci. c. 50. §. tertia est, Auila cit. du. 3. Mol. tr. 3. disp. 49. num. 19. Exempli causa ob homicidiũ non simplex (sicuti constat ex cit. c. cum non ab homine) sed qualificatum videlicet parricidium, vel simile: item ob furtum non simplex, sed valde qualificatum ac sacrilegũ. Cum enim pro eiusmodi criminibus qualificatis ac valde enormibus Ecclesia non habeat condignam pœnam, meritò Reus Iudici seculari relinquitur. Vide hac de re disputantem Cou. 2. resol. c. 20. n. 7. Clarum li. 5. sentent. recept. §. fin. q. 36. n. 36. qui tandem in Iudicis atrocitatem facti cum omnibus circumstantijs attendentis arbitrio committit.

Ad extremũ nota, quòd Magistratus secularis in causa hæresis, vel alterius merè Ecclesiastici criminis cognoscere nõ possit: sed solũ exequi secundũ latam declaratoriã sententiã à Iudice Ecclesiastico, iuxta c. Vt inquisitionis, §. prohibemus, de hæret. in 6. At verò in crimine non merè, Ecclesiastico potest petere à Iudice Ecclesiastico processũ, vt eius iustitiã cognoscat, & postea Reũ sibi traditũ, suiq; fori effectũ puniat, sicuti notat Ab. in c. 1. n. 12. de off. ord.

## P A R S Q V A R T A.

### D E I N T E R D I C T O.

#### C A P. I.

### Q V I D E T Q V O T V P L E X sit interdictum

#### S V M M A R I V M.

- c** Interdictum est censura priuans participatione Sacramentorum diuinorum officiorum, & Ecclesiastica sepultura.
- a** Interdictum diuiditur in locale, ac personale. Vtrumque subdiuiditur generale ac parziale.
- 3** Interdictum locale grauius est quàm personale.
- 4** Alia est diuisio interdicti in totale, & parziale cuius species quatuor est, quæ aliquis ingressu Ecclesiæ prohibetur.



Interdictum definitur: Ecclesiastica censura, per quam participatio certorũ Sacramentorum, omnium diuinorum officiorum, & Ecclesiasticæ sepulture prohibetur. Ita sumitur ex c. non est vobis, de sponsal. c. quod in te, de pœnit. & remiss. & viderelicet apud Palud. in 4. dist. 18. q. 8. S. Ant. p. 3. tit. 26. c. 1. Syl. ver. interdictum, n. 2. Armillam eod. ver. num. 4. Nau. c. 27. n. 164. Sotum in 4. d. 22. qu. 3. art. 1. Tol. lib. 1. c. 51. Henriq. lib. 13. c. 41. Couar. c. alma, p. 2. §. 1. num. 2. Sarrum in chelauto lib. 5. c. 1. num. 7. Auilam p. 5. de cens. dist. 1. Suarez disp. 32. Coninck. tom. 2. dist. 17. dist. 1. Pro eius intellectu notandum: Licet interdictum cum alijs censuris materialiter nonnihil conuenire videtur: quia



quia omnes censuræ spiritualibus quibusdam bonis priuant: formaliter tamen distinguitur. Nam excommunicatio priuat diuinis officijs, Sacramentis, &c. quatenus continent sacram communicationem cum fidelibus. Suspendio priuat spiritualibus bonis, quatenus proueniunt ex potestate clericali, quæ per censuram impedita est. At verò interdictum priuat dictis spiritualibus bonis, quatenus habent rationem dispensationis, ac participationis, quam Ecclesia iustis de causis per interdictum subtrahere intendit.

**Interdictum diuiditur in locale & personale.** Locale est, quod immediatè locum afficit, prohibendo ne in eo sacræ illæ functiones fiant. Personale est, quod immediatè afficit personas, prohibendo eis participationem sacram illarum functionum. Differunt etiam inter se, quòd interdictum locali consequenter etiam prohibeatur tum indigenis, tum alienigenis participatio sacrorum officiorum: non absolutè tamen, sed in loco interdicto. Interdictum autem personali certis personis, aut toti Communitati prohibetur illa participatio absolutè, atque in omni loco. Interdum verò coniunguntur duo ista interdicta: vt & locus, v.g. ciuitas, & ipsa etiam Communitas seu incolæ ciuitatis secundum se interdicantur: quod à quibusdam appellari solet interdictum mixtum.

Porro interdictum locale subdividitur in generale, ac particulare. Generale est, quod fertur in locum generalem, id est, qui à Communitate, vt Communitas est, adeoque diuisis habitationibus occupatur: vt regnum, prouincia, ciuitas, parochia, villa, iuxta c. cum in partibus, de verborum significat. Particulare est, quo interdictitur certus locus sacer, vnus, vel plures, v.g. parochialis Ecclesia, quo nomine comprehenduntur etiam capella, & cæmeteria contigua: Quemadmodum & nomine ciuitatis etiam suburbia comprehenduntur, licet ad alterius iurisdictionem pertineant, c. si ciuitas, de sent. excommun. in 6. Accessorium enim sequitur conditionem principalis: & alioquin parui penderetur interdictum, si populus ad suburbia sacrorum officiorum causa confluere posset. Differunt autem inter se interdictum loci generale ac particulare: quia si ciuitas v.g. in interdicto, neque intra, neque extra ciuitatis Ecclesias diuina officia celebrare licitum est: Si autem ciuitatis Ecclesia, vna, plures, vel omnes in interdicto sint, licitum est extra has Ecclesias, v.g. in priuatis oratorijs diuina officia celebrare.

Interdictum personale similiter diuiditur in generale ac particulare. Generale est, quod fertur in Communitatē vt est corpus politicum, v.g. totam aliquam gentem, populum alicuius ciuitatis, pagitem in Collegium, Capitulum, Academiam: cuiusmodi interdictum constringit omnia membra seu partes Communitatis, etiam innocentes, nisi speciali priuilegio eximantur. Particulare autem interdictum est, quod fertur in personam particularem vnam, vel plures: v.g. in Episcopum, Consulem ciuitatis: vel in omnes ac singulos tale facinus patrarunt, vel auxilium attulerunt, tamen si ignoti sint: nam etiam tali interdicto afficiuntur personæ, vt particulares sunt, & non vt membra alicuius Communitatis: vt proinde in hoc casu sint, quasi plura particularia interdicta, vna generali sententia comprehensa.

**Quòd si inter se comparare velimus interdictum locale & personale: illud absolutè grauius censeri debet: quia in interdicto locali virtualiter etiam includitur personale non vice versa.** Nam locus nunquam interdicitur, nisi propter culpam vnus, vel plurium personarum, quæ proinde personaliter ac speciatim interdictæ censentur, vt nullo loco eis liceat sacris participare, iuxta c. si sententia, de sent. excommunicat. in 6. In interdicto autem personali Communitatis non prohibentur alij, qui ciues seu membra Communitatis non sunt, sed negotij v.g. vel studiorum causa commorantur, in loco Communitatis sacra

officia audire, sicut notat Syl. ver. interdictum 2. n. 13. Sua disp. 32. sect. 2. num. 15. Coninck disp. 17. num. 12. Ex quo colligitur, etsi totus populus, seu tota Communitas ciuitatis interdicta sit: posse tamen in Ecclesijs sacra officia celebrari sanis apertis, campanis pulsatis, &c. Excepto, si perturbatio oritura sit, & interdicti aditu prohiberi, vel excludi non possint, sicuti Coninck l. c. notauit. Deinde, si, interdicta Communitate, aliquis desinat esse membrum Communitatis, v.g. per domicilij mutationem, liberatur interdicto, cui ipse culpa sua causam non præbuit: contra verò alij interdicto ligari incipiunt, qui in Communitatem interdictam de nouo recipiuntur, sicuti ex communi docet Auila p. 5. disp. 1. du. 4. concl. 4. Henr. l. 13. c. 42. n. 2.

**Obijcies contra dicta.** Censuræ interdicti habet aliquam rationem pænæ spiritualis. Qui autem culpa carent, seu innocentes sunt, nullam pœnam merentur: Ergo interdicto ligari non debent. Resp. Innocentes, seu qui culpa sua interdicto causam non præbuerunt, per se ac propriè censura interdicti non ligari, sed tantum per accidens: quia sunt in loco, vel è Communitate interdicta; quòd si inde transeant, cessat omne eorum impedimentum. Ex quo habemus, innocentes per interdictum propriè non puniri, quamuis damnum sentiant per accidens: quatenus id necessarium est ad noxios puniendos, absterrendos, & emendandos, nec non Ecclesiæ honorem defendendum ac stabiliendum.

**Alia diuisio interdicti est, in totale ac parziale.** Totale dicitur, quod omnes interdicti effectus habet: Partiale, quod non omnes: ad eum modum, quo supra de suspensione dictum fuit. Etenim in hoc differunt suspensio & interdictum ab excommunicatione propriè dicta: quòd huius effectus connexi sint & separari non possint: non ita verò se res habeat in suspensione atque interdicto.

Partialis interdicti species quædam est, qua prohibetur ingressus in Ecclesiam, cuiusmodi reperitur in c. sacro, de sent. excommun. & c. neod. in 6. contra Iudicem Ecclesiasticum, non seruātem iuris ordinem in ferendis censuris Et in c. Episcoporum, de priuilegiis in 6. contra exemptos à iurisdictione Episcopi, si in loco interdicto celebrent, vel celebrari faciant, vel excommunicatos aut interdictos ad sacra officia; Sacramenta, vel Ecclesiasticam sepulturam extra casus iure concessos admittant. Vide Nau. ca. 25. n. 94. Henr. l. 13. c. 43. §. 3. lit. b. Et in c. exigit, de censibus in 6. contra Episcopos, in visitatione aliquid recipientes, contra c. p. Romana, eod. tit. nisi intra mensem restituant, quod acceperunt. Et in c. præsentis, de offic. Ordinarij in 6. & extrauag. Ne sede vacante, &c. contra Episcopos Ecclesiarum vacantium bona vsurpantes. Et in extrauag. de rebus Ecclesiæ non alienandis, contra Prælatos, qui bona Ecclesiæ non legitimè alienant.

Per hoc autem parziale interdictum prohibetur aliquis intra Ecclesiam officia diuina tum celebrare, tum audire; & si in tali interdicto sine pœnitentia moriatur, corpus eius in nullo loco sacro sepeliri potest, c. is cui de sent. excommun. in 6. & explicat Gl. ibid. Nau. c. 27. num. 170. Couar. c. alma, p. 2. §. 1. num. 3. Henriq. lib. 13. c. 32. num. 2. Auila p. 5. disp. 4. sect. 3. dub. 5. concl. 5. Suarez disp. 35. sect. 4. Nomine autem Ecclesiæ intelligitur omnis locus ab Episcopo deputatus ad publicum Missæ sacrificium, vel alia officia: in priuatis autem oratorijs talis interdictus celebrare: & audire Missam non prohibetur: atque intra ipsam quoque Ecclesiam priuatas orationes persolvere, sicuti ex communiore docent Nauar. Couar. Auila, Henr. Quamuis Suarezio n. 22. contrarium placeat, propter calatorem 33. q. 2. Denique secundum Henr. & Auilam l. cc. non prohibetur talis interdictus intra Ecclesiam sacramenta recipere, quod tamen verum non videtur, cum alij indubitanter contrarium doceant, Syl. ver. suspensio, q. 5. prope finem. Suar. disp. 35. sect. 4. n. 5. Gl. in c. præsentis. §. q. 2. vbi regulam tradit: *Cuius interdicta est Ecclesia,*



etiam sacramenta Ecclesia interdicta esse censentur. Id verò intelligo intra Ecclesiam: nam extra potest recipere Sacramenta, cum & celebrare possit. Denique, si Clericus, cui ingressus Ecclesie interdictus est, tale interdictum violet, exercendo actum ordinis intra Ecclesiam, efficitur irregularis, c. c. is cui, & docet Gl. in c. præsentis, ver. Ecclesie, de offic. Ordinarii, in 6.

Exempla veteris Ecclesie de interdicto Ecclesie habes apud Theodoret. lib. 5. histor. c. 17. & S. Ambros. epist. 28. qui Imperatorem Theodosium ob Thessalonicensium eadem, Ecclesie ingressu interdixit. Et apud Innocent. I. epist. ad Arcadium apud Niceph. lib. 13. c. 34. & habetur tom. 1. epist. Pontif. epist. 17. in causa S. Chrysostomi post mortem eius, data: *Vox sanguinis fratris mei, Ioannis, clamat ad Deum contra te, ô Imperator; Et paulo post. Eiecisti e throno suo, re non iudicata, magnum totius orbis Doctorem, & videntem eum Christum persecutus es.* Et postea. *Itaque ego minimus, & peccator, cui thronus magni Apostoli Petri creditus est, segrego te, & illam (coniugem Eudoxiam) à perceptione immaculatum mysterium Christi Dei nostri. Nisi malis dicere, fuisse hanc speciem quandam excommunicationis partialis, ob culpam merè præteritam inferri solitam, donec digna pœnitentia & satisfactio acta esset, ut dixi supra p. 2. c. 3. n. 5. in fine. & dicam lib. 5. tr. 6. c. 7. n. 3.* Quid autem Arcadius Imperator Innoc. Papæ rescripserit, reperies apud Glycam in annalibus, p. 4. Videlicet, sibi quidem ea, quæ Chrysostomo gesta erant, ignota fuisse: *Eudoxie autem, filie tuæ, scito me parum moderatè pro ratione delicti mercedem reualisse: quo sanctè factum est, ut ex eo morore & angustia difficilis, gravissimèque correpta agitudine decumbat. Igitur, quod superest, enixe obsecro, ut nos à segregatione liberes, nec multipliciter punias, non enim ipse Dominus idem ob delictum bis hominem percutit.*

## CAP. II.

## De effectibus interdicti.

## SUMMARIUM.

1. Quadam sacramenta, videlicet necessaria, in interdicto conceduntur.
2. Divina officia omnia in interdicto prohibentur, sed hodie secundum limitationem c. alma.
3. In loco interdicto nulli fideles sepeliri possunt, exceptis clericis, seu Ecclesiasticis personis, si personaliter interdicta non fuerunt, neque interdictum illicita divini officij celebratione violantur.
4. Personaliter interdictus in loco sacro sepelire licet, si denunciatus non fuerit.

**T**res sunt effectus interdicti totalis: I. Vñs actiuus & passiuus Sacramentorum prohibitus est, c. quod in te, de pœnit. & remiss. c. si sententia, & c. ult. de sent. excomm. in 6. quibus locis absolute dicitur, in interdicto vñs Sacramentorum non concedi, præterquam in casibus iure exceptis.

Sunt autem exceptiones istæ: Primò tempore interdicti, atque in Ecclesia interdicta ministrari potest Sacramentum Baptismi, c. responso, de sent. excomm. c. quoniam, eod. in 6. præmissis etiam ijs, quæ sunt veluti dispositiones ad Baptismum, catechismo, fontis benedictione, &c. quamvis hanc fieri oporteat, sicuti & alia officia divina, cum moderatione c. alma, ut postea dicam.

Secundò, Sacramentum Confirmationis in Ecclesia interdicta solemniter ministrari potest, atque in eum finè sacrum chrisma in die Cœnæ Domini consecrari, sicut colligitur ex citatis iuribus. Neque prohibentur tum clericis, tum laici administrationi horum Sacramentorum interesse. Vide Suarez disp. 33. l. 1. n. 3.

Tertiò, Sacramentum Pœnitentiæ tempore interdicti omnibus ministrari potest; præterquam ijs, propter quorum culpam, dolum, aut fraudem sententia interdicti lata est, vel qui ad perpetrandum delictum consilium, vel auxilium præbuerunt: nisi delicto satisfecerint, vel satisfaciendo idoneam cautionem (pignoratitiam, fideiussoriam, vel si talem non possint, saltem iuratoriam) præstiterint, citat. cap. alma mater, de sent. excomm. in 6.

Quartò, Sacramentum Sancti Eucharistiæ mortis per modum viatici in interdicto ministrari potest propter canonicam regulam: *Quibus morientibus Pœnitentiæ sacramentum non negatur, neque Viaticum negari debet.* Adde I. Vñ S. Eucharistia in mortis periculo existentibus ministrari possit, concessum est eam semel in quavis hebdomade renouare, celebrato sacrificio Missæ cum moderatione c. alma, ita habetur in c. permittimus, de sent. excomm. II. S. Eucharistia ad ægrotos cum lumine, campanula, & fidelium comitatu solemniter deportari potest, sicut notavit Nauar. c. 27. num. 179. Sa ver. interdictum, num. 17. Coninc K dub. 2. n. 44. Suar. disp. 33. l. 1. n. 27.

Porro, extra mortis periculum, prohibitum est sacra Communionem fidelibus in interdicto ministrare: ijs exceptis, qui speciale privilegium habent, quales nunc communiter sunt Religiosi ac Moniales, inquit Suarez, disputatione 33. sess. 1. n. 33. & videri potest Sa cita. n. 17.

Est autem hoc loco diligenter aduertendum: Vñs horum Sacramentorum tum actiuum, tum passiuum ab Ecclesia concedi in omni interdicto generali, & probabiliter etiam in locali speciali, sicuti docet Syl. ver. interdictum 5. q. 7. nu. 9. Suarez disp. 33. sess. 1. & num. 3. colligitur ex cit. c. alma, ijs verbis: *ubi civitas, vel locus alius, vel universitas interdicta existunt.* At verò non conceditur ijs personis, quæ in speciali interdicto sunt, seu directè, seu virtualiter quia videlicet culpa sua interdicto loci aut communitatis causam præbuerunt: hi enim perinde atque excommunicati, neque ad susceptionem Sacramentorum Confirmationis, Pœnitentiæ, & Eucharistiæ admittendi sunt, priusquam Ecclesie satisfecerint, sicut colligitur ex cit. c. alma, & c. Episcoporum, de priuilegiis in 6. Neque item Ecclesie ministri, si in speciali interdicto sunt, ante eius relaxationem, absolutionemve, vñius sacramenti administrationem, extra necessitatis casum, usurpare debent, sicuti docet Suarez disp. 33. sess. 1. Quia non minus sacramentorum administratio, quàm diuinorum officiorum celebratio est prohibita interdictis: præter casus iure exceptos c. si sententia, de sent. excomm. in 6. Iste autem casus nuspiam excipitur, neque rationabiliter excipi potest, ut personaliter interdicti Sacramenta ministrent, extra necessitatem. Quamobrem Parochus, si in speciali interdicto est, vel interdicti loci aut communitatis causam præbuit, interim sacrum Viaticum & alia Sacramenta non per se ministrare debet, si alius Sacerdos specialiter non interdictus haberi possit, cui vices suas deleget: cum enim per censuram interdicti iurisdictione priuatus non sit, utiq; delegandi facultatem habet.

De Sacrameto extremæ vñctionis certum est, interdicti tempore ministrari non posse, iuxta c. quod in te, de pœnit. & remiss. Et debet hæc prohibitio generatim accipi, ut nec laicis, nec Clericis vel Religiosis, si speciali privilegio muniti non sint, hoc sacramentum ministrare, vel suscipere liceat tamet si specialiter interdicti non existant: quæ est communis sent. contra Pal. ci. d. 18. q. 8. o. 2. con. 5. Illud tamè non est improbabile, quod docet Ioan. Chapeauille de modo ministrandi sacramenta tempore pestis c. 4. q. 3. In casu necessitatis, si infirmus aliud sacramentum recipere non possit, licitum esse extremam vñctionem ministrare propter ea quod Ecclesia sacramento, quatenus ad salutem necessaria, adeoq; etiã in præcepto sunt, denegare interdicti tempore non intèdat.

De sacramento Ordinis similiter certum est, tempore inter-



interdicti conferri non posse: Cum sit generalis regula c. si sententia, de sent. excomm. in 6. In interdicto non esse licitum percipere sacramenta, nisi in casibus iure exceptis sacra autem ordinario nullibi excipitur. Ergo & ipsa simpliciter ac vniuersim interdicta censei debet. Nam ubi aliquid generaliter prohibetur, quod expresse non conceditur, intelligitur denegatum, Clem. exiui, §. porro, de verb. signif. Quare non recte sensit Innoc. c. non est vobis, de sponsal. Clericos antè ordinatos, posse tempore interdicti ad superiorem ordinem ascendere: Sed contraria sententia est communis, Abb. ibid. n. 8. Syl. ver. interdictum §. q. 7. ad finem, Couar. c. alma, p. 2. §. 3. n. 4. Suarez disp. 33. l. 1. n. 45. Veruntamen in casu necessitatis atque penuriae ministrorum, retinenda est doctrina Innoc. sacros ordines conferri posse, præsertim ijs, qui antè in clerum adscripti fuerunt, sicut etiam Abbas & Syluius ll. cc. notarunt.

De matrimonio dubitat DD. Vtrū interdicti tempore iteq; tempore cessationis à diuinis, sine nuptiarū benedictione, licite celebrari possit? Suar. cit. l. 1. n. 50. putat esse negandum, propter generalem regulam: Quod in interdicto (eademque ratio est de cessatione à diuinis) licitum non sit percipere sacramenta; præterquam in casibus iure exceptis: matrimonium autem exceptum non legimus: Ergo censei debet interdicto comprehensum. Confirmatur. Excommunicatio minor facit illicitam matrimonij celebrationem: ergo multò magis interdictum.

Sed contraria sententia est communis & vera, Abb. in c. non est, de sponsal. n. 8. Syl. ver. interdictum, §. n. 9. Nau. c. 27. n. 179. Henriq. lib. 13. c. 45. n. 3. Auila p. 5. disputatione 4. Coninc disp. 17. dub. 2. n. 48. Sanc. de matr. l. 7. disput. 8. Nam per interdictum aut cessationem solum prohibetur participatio sacramentorum, quæ sunt ex Ecclesiæ dispensatione, seu ministratione: tale autem non est matrimonij sacramentum, cuius Ministri sunt ipsi contrahentes. Et verò, cum matrimonium in substantia sua sit contractus naturalis, humano generi adeo necessarius: eius usus non conuenienter prohiberetur alicui Communitati, vt per se patet. Ex quo sequitur, vt supra citati Doctores notarunt, neq; in speciali interdicto personarum, matrimonij prohibitionem contineri. Cum enim canones absolute & indistinctè pronuntiant, in interdicto illicitam esse perceptionem Sacramentorū: si hac prohibitione etiam matrimonij comprehenderetur, consequens foret, vt in interdicto tam generali, quàm speciali matrimonij prohibitum esset; quod cum dici non possit, sequitur matrimonium in interdicto penitus non comprehendi. Ex quo etiam patet resp. ad confirmationem: Est enim disparitas, tum quia excommunicatio secundum propriam rationem priuat communicationem cum alijs fidelibus, qualis etiam est matrimonij contractus: Interdictum verò non priuat hominem commercio, & contractibus; tum quia excommunicatio, præsertim minor, facile tolli potest per pœnitentiam & absolutionem, interdictum autem, quod etiam ab innocentibus contrahi solet, non potest ad arbitrium ipsorum amoueri.

Alter effectus interdicti est. Quod celebratio & auditio diuinorum officiorum prohibetur, c. si sententia, c. vlt. de sent. excomm. in 6. Nomine diuinorum officiorum comprehenditur imprimis sacrificium Missæ: deinde omnis publica ac solemnis oratio, seu deprecatio, quæ ab Ecclesia instituta est, vt à clericis ad Dei laudem celebretur; cuiusmodi sunt omnia sacramentalia, seu benedictiones, quæ nomine & autoritate Ecclesiæ à Sacerdotibus fiunt: nonitem priuata benedictio mensæ, personæ, itineris, &c. Horas quoque canonicas nomine diuini officij comprehendendi, dubitari non debet: cum canonicæ preces propriè institutæ sint, vt nomine Ecclesiæ à Ministris seu clericis peragantur. Tamen si verò alijs quibusdam concedatur, vt in Ecclesia solemniter officium hoc peragant, videlicet

Monialibus, & cantoribus laicis, id censei debet per accidens, vt nihilominus censeatur retinere nomen diuini officij interdicto comprehensi. Loquimur autem de publica horarij officij recitatione: nam priuatim clerici in interdicto locali vel personali officium recitare etiam obligantur, si beneficiati vel in maioribus constituti sunt: & possunt id agere bini, vel terni intra Ecclesiam: si ita instituantur, vt modus priuatæ orationis seruetur, atque excommunicati & interdicti audire non possint, c. quod in te, de pœn. & remiss. Vide Suarez disp. 34. l. 3. n. 10. & seqq. vbi monet extra Ecclesiam posse etiam plures quàm duos aut tres conuenire ad orandum priuatim, vt tamen à prohibitis non audiantur.

Porrò hæc cita ampla officiorum diuinorum prohibitio postea limitata fuit in c. alma de sent. excomm. in 6. vt tempore interdicti singulis diebus in Ecclesiis ac Monasterijs Missæ celebrentur, & alia officia diuina fiant, sicuti prius antè interdictum, submissa tamen voce ianuæ clausis, excommunicatis & interdictis exclusis, & campanis etiam non pulsatis. Circa quam concessionem quædam annotanda sunt: I. Hæc limitatio intelligi tantum debet de interdicto loci generali: si autem ecclesia specialiter interdicta sit, non est concessum Clericis sacra officia dicto modo celebrare, sicuti excommuni docet Couar. c. alma, p. 2. §. 4. n. 1. Nau. n. 173. Sanc. l. 7. dis. 8. n. 18. Auila p. 5. disp. 4. l. 2. dub. 3. Suarez disp. 34. sess. 3. num. 33. cum Gl. in cit. c. alma, ver. Ecclesijs.

II. Nomen ecclesiæ in materia fauorabili latè accipiendum est, vt comprehendat omnia sacra loca, etiam hospitalia, & priuata oratoria, quæ ab Episcopo deputata sunt ad Missæ sacrificium, vel alia officia peragenda: Nam intentio Pontificis erat statuere, vt diuina officia tempore generalis interdicti peragerentur, sicuti si interdictum non esset, seruatis tamen illis conditionibus, quæ est sententia Nau. n. 175. Suarez disp. 34. l. 1. n. 9. Auilæ cit. dis. 4. l. 2. dubio 3. Henriq. lib. 13. ca. 46. n. 1. ConincK citat. dubio. 2. numero 29.

III. Non tantum sacrificia, sed etiam alia diuina officia Clerici in ecclesijs suis tempore interdicti celebrare possunt: imò debent, si beneficiati sint: alioquin distributio: nibus priuantur, cit. c. alma.

IV. Nomen clericorum, quibus relaxationem interdicti factam esse dixi, latè accipi debet, vt comprehendat omnes personas Ecclesiasticas tum incolas, tum alienigenas, etiam Religiosos vtriusque sexus, eorūque Nouitios: Clericos item prima tonsura initiati, si beneficium habeant, aut ex mandato Episcopi Ecclesiæ alicui seruiant, vel in literarum studio, tanquam ad maiores ordines accipiendos versentur, iuxta Trident. sess. 23. c. 6. de reform. denique & clericos coniugatos cum virgine vnica, si & ipsi ex Episcopi mandato alicui Ecclesiæ inseruiant, sicuti docet Sotus in 4. d. 22. q. 3. a. 1. post concl. 4. Auila cit. l. 2. dub. 4. concl. 4. ConincK dub. 2. n. 30. contra Cou. c. alma, p. 2. §. 4. n. 4. ver. decimo. Ratio est; Quia intentio Bonif. VIII. in cit. c. alma fuit, providere, vt tempore interdicti officia diuina in Ecclesijs peragantur, sicuti prius: ergo qui clerici prius solebant, vel etiam debebant in ecclesia officia celebrare, id etiam possunt, vel debent præstare tempore interdicti.

V. Hæc relaxatio, siue indultum intelligitur tantum in ordine ad clericos, vt per se, vel per vicarios suos, diuina officia in Ecclesijs peragere possint ac debeant, sicuti prius solebant: dummodo non sint excommunicati, suspensi, neque specialiter interdicti: nonitem intelligitur respectu laicorum, quibus ad audienda, seu percipienda diuina officia nihil omnino indultum est, tamen si clericorum, vel canonicorum domestici sint: idque apertè colligitur ex cit. c. alma, iun. Gl. ver. interdictis, & c. licet, de priuil. in 6. vbi id notat Gl. ver. exclusis, Couar. c. alma, p. 2. §. 4. n. 4. Nau. n. 174. Auila cit. dub. 4. Suar. dis. 34. l. 1. n. 22.

VI. Missa, aliæque diuina officia non cantu solemniter



sed voce ita submissa celebrari debent, vt ab ijs qui foris sunt, & à participatione officiorum excluduntur, percipi non possit. Sonus autem campanarum is tantum prohibetur, quo populus ad diuina officia conuocari solet: non autem quo ad concionem, vel ad Angelicam salutationem, &c. Addunt tamen Doctores plerique, etiam tintinnabuli vsus ad sacram eleuationem prohibitam censeri.

VII. Si laici personaliter interdicti ac denunciati sacrificio Missæ, aliisque diuinis officijs in loco interdicto presentes esse velint, atque expelli non possint, clerici cessare cebeant, modò canon cæptus non sit. Ita colligitur ex cit. c. alma, ver. exclusis, & docet Auila part. 5. disp. 1. dub. 1. concl. 3. Suarez disp. 34. s. 2. n. 9, qui tamen numer. 10. non idem sentiendum arbitratur, si locus interdictus non sit, sed solum persona interdicta & denunciata: multò verò minùs alij à sacrificio Missæ discedere debebunt, si personaliter interdictus, ac denunciatus interesse præsumat, sicuti docet etiam Caiet. ver. interdictum.

Sequuntur nunc aliquæ limitationes seu exceptiones in ordine ad laicos? Prima prouenit ex incapacitate: qua ratione infantes à diuinis officijs non arcentur; cum tenore capaces non sint, & eorum præsentia moralis non censeatur, sicut docet Cou. c. alma, p. 2. §. 4. n. 5. Suar. disp. 34. s. 1. n. 34. & dis. 36. s. 2. n. 7. Auila p. 5. disp. 4. sess. 2. dub. 5. contra Nau. n. 168.

Altera exceptio ex necessitate prouenit: Si v. g. sacrificaturus habere non possit Ministrum clericum, adhiberi tunc potest laicus, specialiter non interdictus. Ita Henriquez lib. 13. c. 48. nu. 5. in fine, Sa ver. interdictum, n. 21.

Tertia est ex priuilegio; Cum enim singulari personæ conceditur, vt tempore interdicti celebrare possit, vel audire diuina: tunc admittuntur etiam familiares domestici, siue qui personam priuilegiatam tanquam famuli vel officiales comitari solent, sicuti habetur in c. licet, de priuileg. in 6. & explicat Henriq. l. c. Auila p. 5. disp. 4. s. 2. dub. 7. Probabile autem est, quòd docet idem Auila cit. s. 2. du. 6. Coninck cit. dub. 2. n. 27. contra Nau. c. 21. n. 3. Medina lib. 1. sum. c. 11. §. 13. Henriq. cit. n. 5. specialiter priuilegiatos non obligari ad audiendam Missam die festo: quia nemo priuilegio, specialiter sibi contra commune præceptum dato, vt cogitur, argum. reg. 69. ff. & reg. 61. in 6. *Quod ob gratiam alicuius conceditur, non est in eius dispendium retorquendum*: cederet autem in grauamen priuilegiati, si, dum alij laici liberi sunt obligatione missæ audiendæ, ille obligatus esset. Alia verò ratio est de clericis, quibus iure communi & ordinario concessum, ac præceptum est diuinis officijs interesse, horas canonicas in Ecclesia persolvere, iuxta cit. c. alma. Alia item ratio esse videtur de communione Paschali, quam vt mox dicam, omnibus specialiter non interdictis ordinario iure accipere concessum est, consequenter etiam sub præceptum cadere videtur, sicuti docet Suar. disp. 33. s. 1. n. 37.

Quarta exceptio traditur in cit. c. alma: Vt in quatuor præcipuis anni festiuitatibus, videlicet Natiuitatis Domini, Paschæ, Pentecostes, & Assumptione B. Virginis (quibus ex concessione Martini V. accessit festum Corporis Christi cum octaua) licitum sit sacrificium Missæ, & alia diuina officia sine ulla alia limitatione celebrare: nisi ve qui in speciali interdicto sunt, vel propria culpa generali interdicto causam dederunt, ad altare non appropinquent, intellige vel oblationis accipiendæ, vel S. Eucharistiæ sumendæ causa, sicuti explicat Suarez disp. 34. s. 1. n. 33. Coninck disp. 17. dub. 2. nu. 35. argum. cap. quia in omnibus, de vsuris. Alijs verò laicis omnibus in dictis festiuitatibus: clericis verò quotidie: sub Missa sacram Communionem accipere concessum esse videtur, ob generalem regulam, Si cui sacrificio vel assistere, vel interuire absolutè permittitur, etiam de eo participare, seu communicare permissum censetur: cum sacra communio

sit præcipua pars seu participatio sacrificij, sicuti notauit Suarez disp. 33. s. 1. n. 36. contra S. Anton. 3. p. tit. 26. c. 4. col. 3. Syl. ver. interdictum, §. q. 2. Alia verò sacramenta, videlicet Extremæ vnctionis & Ordinationis his festiuitatibus ministrari nequaquam possunt, excepto vnico necessitatis casu, si in prouincia v. g. pestis tempore non essent Sacerdotes ad renouandam S. Eucharistiæ pro morituris, sicuti probabiliter notat Abb. in c. non est vobis, de sponsal. Angelus ver. interdictum 6. n. 38. Auila p. 5. disp. 4. s. 1. dubio 8. contra Couar. c. alma, p. 2. §. 3. num. 4. verb. quintò.

Computari autem festiuitas debet secundum morem Ecclesiasticum, à primis vesperis vsque ad secundas, adiuncto etiam Completorio, sicut probabilissimè docent Palu. in 4. d. 18. q. 8. a. 2. Co. p. 2. §. 5. n. 5. Ang. ver. interdictum, 6. §. 18. Sua. disp. 34. s. 1. n. 39. arg. c. 2. de ferijs. Imò Sotus in 4. d. 22. q. 3. a. 1. concl. 4. Auila p. 5. disp. 4. s. 2. dub. 9. & 10. existimant, festiuitate Natiuitatis, Paschatis, & Pentecostes non vnum, sed tres vel quatuor dies festos comprehendere: ipsamque festiuitatem Resurrectionis & Pentecostes inchoari à Missa vigiliæ, quæ per anticipationem in Sabbatho cantatur, sicuti etiam Palud. annotauit ci. q. 8. a. 3. con. 7.

Tertius effectus est, priuatio Ecclesiasticæ sepulture; id est, vt in loco sacro fideles non sepeliantur, c. quod in te, de pœnit. & remiss. Quæ prohibitio adeo generalis est, vt etiam defunctorum infantium, & amentium corpora comprehendat: cum ea equè vt adultorum corpora huius priuationis capacia esse possint, nullibi tamen statutum legimus, corpora defunctorum non personaliter interdictorum, & denunciatorum, si in loco interdicto illegitimè sepulta sint, exhumanda esse: sed vice versa, corpora, quæ tempore localis interdicti in loco non sacro sepulta fuerunt, sublato interdicto, exhumanda & ad sacrum locum transferenda sunt, sicuti excommuni docet Nauar. n. 176. Henriq. c. 44. n. 5. Auila p. 5. disp. 4. s. 3. dub. 2. Veruntamen nihil obstat in locali interdicto, quo minùs ij, qui specialiter interdicti non sunt, neque interdicto culpa sua causam dederunt, in quocunque loco sacro non interdicto sepeliantur, sicuti notauit Suarez disp. 55. s. 1. nu. 3. Auila cit. disp. 4. s. 3. dub. 1. concl. 2. Ratio est. Quia in locali interdicto personæ non sunt interdictæ, nisi comparatione loci interdicti.

Porrò in cit. c. quòd in te, concessum est, vt in interdicto locali corpora clericorum siue Ecclesiasticarum personarum, quæ personaliter interdictæ non sunt, (modò interdictum illicita diuini officij celebratione non violârint) in locis sacris etiam interdictis sepeliri possint, sine campanarum pulsu, in silentio, &c. Quamquam iure nouo c. alma, excipiendæ sunt quatuor festiuitates, in quibus sicuti alia officia, ita & clericorum exequiæ solemniter celebrari possunt. Non oportet tamen clericos in loco specialiter interdicto sepelire, si ad aliam non interdictam Ecclesiam commodè deferri possint, vt notat Syl. ver. interdictum, §. q. vlt. Suar. disp. 35. s. 2. n. 4.

Sed quid sentiendum de sepultura in interdicto personali? Respondeo, tum clericos, tum laicos, non obstante censura interdicti personalis (nisi aliud, videl. finalis eorum impœnitentia obstat) in Ecclesia non interdicta sepeliri posse, si denunciati non sint, arg. c. sanè, 24. quæst. 2. *Quibus vniis communicamus, etiam mortuis communicare possumus*: interdictos autem personaliter non tenemur à sacris Officijs, quæ in loco non interdicto celebrantur, repellere, antequam denuntientur, post extrauag. Concil. Constantiensis aduentanda: ergo neque eorum corpora ab eiusmodi sacro loco excludere. Ceterum in interdicto personali generali sufficit Communitatem denuntiari, vt singula eius membra in sacris officijs, & sepultura, &c. vitare teneamur: cum moraliter impossibile sit, omnes particulatim vt interdictos promulgare, sicuti notauit Suarez disputatione 37. sess. 2. num. 3. Coninck dub. 2. numer. 56. &



§ 6. & 62. Auila p. 5. disp. 5. dub. 1. §. sed est aduertendum, et si contrarium significet Sa ver. interdictum, n. 3.

## CAP. III.

De violatione Interdicti, & decretis  
pœnis.

## SUMMARIUM.

- 1 Clericus Violans interdictum personale, aut locale, mortaliter peccat.
- 2 Laici non seruantes interdictum locale, saltem venialiter peccant: nisi vis, aut fraus interueniat: vel si personaliter interdicti sint: his vero casibus mortaliter delinquant, interdictum violando.
- 3 Pœna contra interdicti Violatores communi iure decret a.

**A**ssertio I. Clerici, qui interdictum personale, vel locale contra iuris præscriptum violant, peccant mortaliter. Quæ est communis sententia, quæ solus Caiet. ver. interdicti violatio in dubium reuocare audet. Ratio est. Quia lex interdicti potissimum ac directè in Clericos tendit: quare cum materia grauis sit, obligat sub culpa mortali.

Interdictum personale violatur à clericis primò: Si personaliter ac specialiter interdicti actum proprium sui ordinis exercere præsumant: quo casu irregularitatem contrahunt. Secundò: Si personaliter ac specialiter interdicti sacris intersint, vel sacramenta sibi prohibita accipiant. Tertio: Si aliquem personaliter interdictum post interdicti denuntiationem diuinis interesse, vel diuina celebrare permittant. Quod intelligitur de ijs, quibus Ecclesiæ regimen commissum est, vti ex communi notauit Auila disp. 5. dub. 1. conclus. 3. Henric. lib. 13. cap. 46. num. 3.

Interdictum verò locale violatur à Clericis & Religiosis primò: Si celebrent diuina officia non obseruata moderatione c. alma; puta cum pulsu campanarum, voce elata, vt à laicis foris exaudiri possint, vel ianuis apertis, aut excommunicatis & interdictis non exclusis. Secundò: Si ijs, quibus regimen Ecclesiæ commissum est, alios sine dicta moderatione, diuina officia in loco interdicto celebrare permittant, sicut colligitur ex c. non est vobis, de sponsalib. ibi: *Ne celebretis, nec alium celebrare permittatis.*

**A**ssertio II. Etiam laici peccant mortaliter, si interdictum personale generale violent. Quæ est communis sententia, propterea quòd tale interdictum eos directè afficit. Ita Sotus cit. q. 3. a. 1. conclus. 6. Nau. n. 187. Suarez disp. 34. l. 6. & alij communiter.

De locali verò interdicto dubitant, vtrum laici personaliter non interdicti peccent, si illud non obseruent? Respondeo, & dico I. Certum esse debet, quibusdā casibus qualificatis, eos mortaliter peccare: Videlicet, si per violentiam se officijs diuinis in loco interdicto ingerant, vel clericis iubentibus exire obtemperare recusent. Idemque dicendum videtur, si fraudibus ac mendacijs ingressum impetrent, v. g. fingendo se clericos, aut priuilegiatos: nam etiam talis fraus, non minùs ferme, quàm violentia, iniuriā erga Ministros Ecclesiæ in re graui continet. Præterea, si clericos inducant, vt coram ipsis officia diuina celebrent: multo que magis, si ipsi laici more clericorum officium v. g. canonicum in loco interdicto peragant. Quos casus videre potes apud Sotum l. c. Nauar. c. 27. n. 187. Auilam p. 5. disp. 5. dub. 2. Coninck dub. 3. n. 66. Henric. lib. 13. c. 46. n. 3. qui tamen indulgentiùs quàm alij loquitur.

**D**ico II. Si laicus, etiam sine vi, fraude, sacramentum v. g. sacre Eucharistiæ, vel aliud in loco interdicto administrari prohibitum accipit, videtur peccare mor-

taliter. Ita Coninck l. c. Suarez disp. 33. l. 2. n. 6. & disp. 34. l. 5. n. 9. Quia saltem inducit, vel cooperatur Clerico ad id, quod ipse sine peccato mortali agere non potest.

**D**ico III. Si laicus personaliter non interdictus, sine vi, fraude, scandalo, diuinis officijs solum intersit, videtur peccare saltem venialiter. Quæ est communior sententia, contra Caiet. ver. interdicti violatio, Nau. n. 187. §. 18. & colligitur ex c. si sententia, de sent. excom. in 6. vbi dicitur, laicos tempore interdicti licetè audire diuina extra ciuitatem interdictam: vnde à sensu contrario colligitur, in loco interdicto licetè non audire. Ratio verò est. Quia et si lex interdicti principaliter feratur ad clericos, ne laicos ad diuina officia in loco interdicto admittant, c. responso, de sent. excomm. c. non est, nobis, de sponsal. c. licet, de priuil. in 6. tamen pertinet etiam consequenter ad laicos: vt ipsi loco interdicto post promulgationem se non ingerant: Sicuti sententia excommunicationis principaliter afficit excommunicatum, vt cum alijs non communicet: secundariò autem & consequenter etiam alios, vt ab eius communicatione, post denuntiationem, abstineant. Quòd verò talis violatio interdicti localis in laico sit peccatum duntaxat veniale, probabiliter docent Syl. ver. interdictum, 6. n. 7. Sotus cit. dist. 22. q. 3. a. 1. conclus. 6. Henric. cit. n. 3. Auila cit. dub. 2. Ratio est. Cum lex interdicti localis ad laicos directè ac principaliter non tendat; non videtur eius obligatio tam grauis respectu laicorum: quàmuis Suarez disp. 34. l. 5. n. 9. excipiat sacrificium Missæ: cui assistere laicum putat esse mortale: quod tamen citati Doctores negant.

Pœnæ, quæ ob interdicti violationem ipso iure incurruntur, hæc sunt: Prima: Clerici non seruantes interdictum priuatur priuilegio, quod alioquin haberent, vt in loco sacro sepeliri possent, c. quod in te, de pœnit. & remiss. c. is cui, de sent. excomm. in 6.

Secunda: Si clericus personale aut locale interdictum violet, exercendo actum sacri ordinis, vel celebrando officia diuina, fit ineligibilis tam actiue, quàm passiuè. Ita colligitur ex c. 1. de postul. Prælat. & c. is qui, §. is verò, de sent. excom. in 6. & docet Syl. ver. interdictum, 6. q. 2. §. secundum, Sotus cit. a. 1. conclus. 5. Suarez disp. 34. l. 4. n. 28. Henric. cit. n. 3. Auila cit. disp. 5. dub. 4. conclus. 3. Coninck disp. 17. dub. 4.

Tertia: Clericus interdicti violator, videtur incurrere suspensionem ab officio, & consequenter à iurisdictione, sicut colligitur ex c. vlt. de excess. Prælator, vbi id notat Gl. ver. irritas, Sotus loco cit. Syl. q. 3. Couar. c. alma p. 2. §. 2. n. 2. Auila cit. dub. 4. conclus. 2. Suarez disp. 34. l. 4. n. 16. quamuis repugnet Coninck dub. 4. n. 71.

Quarta: Religiosi tum exempti, tum non exempti excommunicationem ipso facto incurrunt, si enim aduertentes Ecclesiam Cathedralem matricem, vel Parochialem loci interdictum seruare, ipsi non obseruent, Clem. 1. de sent. excom. Vbi additur, id etiam accipiendum de cessatione à diuinis, indicta à Concilio Prouinciali. Vide Abb. c. num inter, n. 3. de consuet. Nau. c. 27. n. 146. Henric. c. 46. n. 4. Auila p. 5. disp. 5. dub. 3.

Quinta: Qui excommunicatum, aut interdictum denuntiatum, in loco sacro: vel alios contra iuris permissionem in loco interdicto sepelire scienter præsumperit excommunicationis sententiam ipso iure incurrat, Clem. 1. de sepult.

Sexta: Dominus temporalis, qui compellit clericum in loco interdicto publicè ac solemniter celebrare diuina vel pulsu campanæ, aut voce præconis faciens populum conuocari ad audienda diuina: vel impediens, ne excommunicati vel interdicti ab Ecclesia exeant, dum in ea Missarum solemnia celebrantur, posteaquam à celebrantibus moniti fuerunt: & ipsi denique excommunicati aut inter-



dicti, si iussi exire, remanere præsumperint, excommunicationem Papæ reservatam incurrunt, Clem. 2. de sent. excom.

## CAP. IV.

### Quis possit interdictum ferre, in quos & ob quam causam?

## S V M M A R I V M.

1. *Qui excommunicationem vel suspensionem, idem etiam interdicti censuram ferre possunt.*
2. *Qui locale interdictum ponit, eodem ipse per accidens ligatur.*
3. *Interdicto Clero, non censetur interdictus populus: neque vice versa.*  
*Neque interdicto clero, censentur comprehensi Religiosi, nisi ex materia, causa ferendi, aliisque circumstantiis contrarium appareat.*
4. *Ut interdictum totale in determinatam personam ferri possit, videtur requiri culpa mortalis. Ut autem interdictum locale, vel generale in Communitatem feratur, requiritur peccatum valde graue, contumaciter commissum à capite, vel membris præcipuis alicuius Communitatis.*

**A**ssertio I. Qui excommunicare, vel suspensionis pœnam ordinario iure imponere possunt; iidem etiam interdictum personale, aut locale in personas, vel locum iurisdictioni suæ subiectum. Notant tamen Doctores, non esse in usu, neque expedire, ut Prælati Ordinum locale interdictum ferant; nisi tales sint, qui etiam in plebem iurisdictionem habeant. Vide Suar. disp. 36. sect. 1.

**A**ssertio II. Si Ecclesiæ Pastor interdictum personale ferat in Communitatem, cuius caput est, ipsemet interdicto non ligatur: Secus est, si locale interdictum ponat. Ita ex communi Auila p. 5. disp. 2. dub. 4. Ratio discriminis est. Quia nemo à se ipso per se ac directè vinculo censuræ, quippe quod pœnale est, obligari potest; quamuis per accidens possit: Personale autem interdictum per se, ac directè afficit personas: locale autem ipsum locum, ex quo per accidens redundat in personas.

**A**ssertio III. Si sententia interdicti proferatur in clerum, non censetur comprehensus populus: & vice versa, si interdicatur populus, non censetur etiam interdictus clerus, nisi exprimat. Ita habetur expressè in c. si sententia, de sent. excommun. in 6. Ratio est. Quia in sententia pœnali mitior sensus preferri debet: quare, cum sæpe populus ita accipiat, ut à clero distinguatur, hæc acceptio eligenda est, si aliud non exprimat.

Dubitant verò Doctores: Si clerus interdicatur, utrū hoc nomine censeatur etiam comprehensi Religiosi utriusque sexus? Ita affirmat Nau. c. 27. n. 167. Couar. c. alma, p. 2. §. 1. n. 8. §. quintò his addendum, & aiunt esse communem. Sed contrarium docet Syl. ver. interdictum, 2. num. 17. Armilla n. 10. Henriq. c. 42. n. 3. Auila p. 5. disp. 1. dub. 7. Quia licet nomine clericorum in materia fauorabili comprehendantur Episcopi, & Religiosi utriusque sexus, eorumque Nouitij: non tamen in materia odiosa, sicuti notant Syl. ver. clericus, 1. §. 1. Armilla & Sa ibid. Et hæc posterior sententia vera est, nisi considerata interdicti materia, causa ferendi, aliisque circumstantiis, aliud intelligi possit, sicuti obseruauit Suarez disp. 32. l. 2. n. 17. Adde, interdicta localia etiam ab Ordinarijs locorum promulgata, à Regularibus in eorum Ecclesijs publicanda & seruanda esse, ut superiore cap. dictum est: & decreuit Conc. Trid. sess. 25. c. 12. de regular.

**A**ssertio IV. Probabilis est, requiri culpam mortalem, ut interdictum totale in certam personam delinquentem ferri possit. Ita Suar. disp. 36. l. 3. licet contrarium sentiat Sa ver. interdictum n. 7. Henriq. c. 50. n. 2. Auila disp. 3. dub. 2. Ratio est: Quia pœna tam grauis culpam

grauem requirit. Loquor autem primò, de interdicto totali: nam partiale, videl. ab ingressu Ecclesiæ, vel à sacra Communione ad tempus breue, cum sit pœna leuior, ob culpam leuiorem, seu venialem imponi nihil prohibet. Vide quæ dixi suprà de suspens. c. 3. n. 2. Secundò loquor de interdicto, quod ob propriam culpam alicui imponitur: nam si ob culpam alienam, secundum omnes requiritur, ut mortalis sit. Quapropter, ut interdictum locale vel generale in Communitatem feratur, requiritur peccatum valde graue, imò grauius, quàm ad excommunicationem: idque contumaciter admissum seu à Capite, seu à pluribus aut præcipuis membris alicuius Communitatis, uti ex communi docent Sotus cit. q. 3. a. 1. concl. 3. Couar. p. 2. §. 1. num. 4. Henriq. cit. c. 50. n. 2. & 3. Auila cit. disp. 3. dub. 2. Suarez disp. 36. sect. 3. Quia haud dubiè grauissima causa adesse debet, ut multi etiam innocentes, per subtractionem rerum spiritualium, affligantur.

Porro in extrauag. providè, de sent. excommun. inter communes decretum est, ut propter pecuniarium debitum sine speciali & expressa licentia Papæ, nulla provincia, ciuitas, castrum, villa, locus, territorium interdicto supponatur. Quamuis autem iste textus loqui videatur de interdicto locali, eoque generali tantum, sicuti eum intelligit Gl. ibid. Abb. in c. cum in partibus, de verbor. signif. Nau. num. 168. Suarez disp. 36. sect. 3. num. 8. aliqui tamen, ut Couar. p. 2. §. 1. num. 5. Auila p. 5. disp. 3. dub. 3. intelligunt etiam de speciali interdicto loci: Imò Auila dictam prohibitionem, ob rationis similitudinem, etiam ad interdictum personale generale extendit.

## CAP. V.

### Quibus modis interdictum tollatur, vel relaxetur.

## S V M M A R I V M.

1. *Interdictum, sicuti & suspensio interdum fertur ut pura pœna, propter peccatum merè præteritum: interdum ut propriè dicta censura, ob præsentem contumaciam.*
2. *Per privilegium absoluentis ab omnibus censuris, intelligitur etiam concessa potestas absoluentis ab interdicto personali speciali: non item tollendi interdictum locale, aut personale communitatis.*
3. *Etiam Parochi, & alij expositi Confessarij absoluerè possunt ab interdicto personali speciali, si reservatum non est.*
4. *Destituta Ecclesia, aut ciuitate interdicta, non tollitur interdictum: sed adhæret solo.*

**N**otandum est: Quòd interdictum, sicut suspensio, duobus modis fertur. Vel ut pura pœna, propter delictum merè præteritum: vel ut propriè dicta censura, propter præsentem contumaciam. Quapropter interdictum partim per se cessat, elapso tempore, vel conditione sub qua lata est: partim verò absolutione indiget, ab eo qui potestatem habet. Quamuis aliqui apud Suar. disp. 38. sect. 1. num. 4. existiment, cessante contumacia per se tolli interdictum, sine absolutione. Sed oppositum est probabilius, & Ecclesiæ praxi magis conforme, ut de suspensione super. parte c. 4. num. 2. dixi.

Hic verò breuiter aliqua dicenda sunt: I. Interdicta localia, & personalia generalia, quæ iure communi imposita & non reservata sunt, possunt tolli auctoritate Episcopi, vel alterius iurisdictionem habentis in Communitatem interdictam. Ita colligitur ex c. nuper, de sent. excommun. Porro ait Auila p. 5. disp. 6. dub. 1. conclus. 8. Nullum in iure reperiri locale interdictum, quòd Papa sibi reservauit: Interdicta autem personalia Communitatis interdum tacitè reservantur, quando ad certum tempus, vel sub certa conditione imponuntur, ante



ante cuius impletionem Episcopus dispensare non potest, nisi interdictum proueniat ex delicto occulto, non deducto ad forum contentiosum.

II. Regulares, aliique, quibus priuilegium concessum est absoluendi à censuris iuris in foro conscientie tantum, non possunt tollere interdictum locale, aut personale Communitatis: cum locus & Communitas penitentia foro non subijciatur, vt per se notum est.

III. Ab omni interdicto iuris personali, ac speciali absolutio dari potest, per priuilegium, quo conceditur potestas absoluendi ab omnibus censuris iuris. Ita ex communi Henrici lib. 13. c. 55. num. 3. Auila cit. disput. 6. dub. 2.

Sed dubium est. Vtrum eiusmodi interdictum personale particulare, si absolute & sine reservatione latum sit à Parochò, aut alio quouis exposito Confessario post satisfactionem vel satisfaciendi cautionem tolli possit? Negant Henrici c. 55. num. 2. Auila part. 5. disp. 6. dub. 1. conclus. 2. Sed probabilius affirmat Suarez disp. 38. sect. 2. num. 8. Coninck dub. 6. conclus. 3. Quia interdictum personale speciale non minus quam excommunicatio, prohibet à perceptione Sacramentorum, vt supra dictum c. 2. num. 1. Ergo sicuti excommunicationem, si reservata non sit, ante absolutionem à peccatis, quouis expositus Confessarius tollere potest, arg. c. nuper, de sent. excommuni. Ita & interdictum hoc personale.

IV. Quibus casibus interdictum ad Episcopo absolute tolli, seu relaxari: ipsdem etiam ad tempus suspendi potest, v. g. interdictum loci, vel Communitati, propter incidentem festiuitatem, Principis aduentum, &c. Item interdictum speciale personarum, vt certo casu officium diuinum celebrare, vel celebrationi interesse possit: Tali autem tempore, vel actu transacto, redit ius interdicti: Quia de re Henrici cap. 51. num. 4. Auila part. 5. disp. 6. dub. 1. In eo que differt interdictum à censura excommunicationis, quò hæc suspendi non potest, sicuti docent Doctores argum. c. cum desideres, de sentent. excommuni. contra Nauar. num. 165. Porro, si interdictum totaliter suspensum est, eius executio interposita appellatione impeditur: secus, si suspensio interdicti fuit tantum ex parte. Ita colligunt Doctores ex cap. dilectis, de appellat. & videri potest Syl. ver. interdictum, 3. quest. 8. Suarez disp. 38. l. 3. n. 8. Auila dis. 6. dub. 4. conclus. 6.

V. Interdictum personale Communitatis eo ipso expirat, quòd Communitas dissoluitur. Locale autem interdictum non extinguitur, etsi locus, v. g. ciuitas, aut Ecclesia diruatur: quia ipsum solum censuram interdicti retinet, vt in eo diuina officia celebrari non debeant. Vide Suarez cit. disp. 38. l. 1.

## CAP. VI.

## De cessatione à diuinis.

## S V M M A R I V M.

- 1 Cessatio à diuinis non est censura, nec propriè pœna: sed simplex prohibitio diuinorum officiorum, in signum mœoris, propter grauissimam iniuriam Ecclesie illatam.
- 2 Clericus violans cessationem à diuinis per exercitium ordinis, non efficitur irregularis.
- 3 Quatuor festiuitatibus, exceptis in c. alma, de sent. excommuni. in 6 locus etiam esse videtur tempore cessationis, sicuti in interdicto.
- 4 Tempore cessationis pura videtur omnibus cum Clericis, tum laicis concessa sepultura in loco sacro, modò fiat sine officio funebri.
- 5 Qui Episcopalem iurisdictionem obtinet: & Sede vacante Capitulum, cessationem à diuinis ponere potest, sicuti & interdictum.

**C**essatio à diuinis, quæ & suspensio organorum dicitur est, Ecclesiastica prohibitio, ob quam Clerici

cessare debent in certo aliquo loco, à diuinis officiis, & Sacramentorum administratione, nisi quatenus eam necessitas postulat. Quamuis cum interdicto loci similitudinem gerat: re ipsa tamen differt: quia cessatio hæc non est censura, imò nec propriè dicta pœna: sed simplex prohibitio diuinorum, in signum grauissimi mœoris ab Ecclesia concepti, propter grauissimam iniuriam sibi, aut honori diuino illatam: vt hac ratione iniuriosus desistere & Ecclesie læsæ satisfacere cogatur, sicuti colligitur ex Clem. 1. de sent. excommuni. & explicat Suarez disp. 39. l. 1. num. 13. & seqq.

Vide alia discrimina nascuntur inter interdictum & cessationem à diuinis: I. Interdictum semper aliquam personam, quæ culpa sua causam præbuit, specialiter afficit, & censura ligat: non verò cessatio à diuinis, vt infra dicam.

II. Clericus violans interdictum per ordinis sui exercitium, irregularis efficitur: non item agens contra positam cessationem à diuinis, licet grauitur peccet.

III. Priuilegia tum specialia, tum etiam generalia, concessa circa interdictum, v. g. vt Clerici quotidie diuina officia celebrare possint cum moderatione cap. alma, de sentent. excommuni. in 6 non habent locum in cessatione, sicuti ex communi docet. Nauar. cap. 27. num. 188. Henriquez lib. 13. c. 53. num. 2. Auila part. 6. disput. 1. dub. 3. Suarez disput. 39. sect. 2. num. 11. Coninck disput. 17. dub. 7. contra quosdam Canonistas apud Couarruiam part. 2. c. 4. §. 7. verb. hinc patet. Ratio est: est Quia à diuersis ad diuersa non fit bona illatio, seu extensio. Imò Auila dub. 4. cum Doctoribus Academiae Salmanticensis existimat, Clericis tempore cessationis licitum non esse, vt bini vel terni in Ecclesia horarium officium persoluant: quia in cap. non est, de sponsalib. dicitur: Nulla diuina officia permittatis aliquatenus celebrari. Deinde in c. quod in te, de pœnit. & remiss. talis facultas peculiariter conceditur tempore interdicti, ideòque transferri non debet ad cessationem à diuinis. Sed contraria sententia valde probabilis est Couarrui. loc. cit. Suarez disput. 39. sect. 2. num. 14. & aliorum apud Henrici c. 53. num. 1. Quia cessatio est tantum ab officiis publicis, quatinus & organorum suspensio appellatur: recitatio autem cum socio vno, vel duobus non excedit modum orationis priuatæ. Deinde, si extra Ecclesiam Clericis binis aut ternis suis horas orare permissum est, sicuti contra Salmanticenses sentit. Henrici num. 2. Auila dub. 4. cur non etiam in Ecclesia? Dictum autem cap. quod in te, non videtur nouam aliquam concessionem fecisse; sed quod per se licitum erat explicuisse, sicut notauit Suarez disput. 34. sect. 3. num. 12. & 13.

Quamuis verò, inspecto iuris rigore, neque in quatuor festiuitatibus exceptis in cit. c. alma, licitum esse videatur officia diuina celebrare tempore cessationis: cum dicta exceptio solum facta sit de interdicto, sicut late disputat Couarrui. cit. num. 7. Tamen secundum æquitatem, & Doctorum quorundam, præsertim Salmanticensium, auctoritatem apud Henrici c. 53. num. 3. Auila dub. 6. Suarez disput. 39. sect. 2. num. 12. Sanchez lib. 7. disput. 8. num. 18. probabiliter dicitur, in quatuor illis præcipuis anni festiuitatibus, & Octaua Corporis Christi, diuina officia solemniter celebrari posse, non obstante quacunque generali prohibitione: quia talis facultas in cit. c. alma absolute concessa videtur ob reuerentiam cictarum festiuitatum. Similiter licet, spectato iuris rigore, Sacramentorum administratio cessationis tempore non tam amplè, vt in interdicto concessa videatur, sed solum propter grauem necessitatem, sicuti colligitur ex c. non est, de sponsal. Nulla diuina officia, præter Baptismum paruulorum: & Penitentiam morientium, adiuncto etiam viatico, celebretur: tamen secundum quorundam Doctorum, præsertim Salmanticensium, sententiam, benignius inter-



pretantium Ecclesie mentem, probabiliter dici potest: Sacramenta iisdem casibus tempore cessationis ministrari posse, sicuti tempore generalis interdicti, omnibus qui specialiter interdicti non sunt: quare quæ supra dicta sunt cap. 2. huc etiam transferri debent. Et ita docent Henrig. Auila, Suarez ll. cc. Couar. num. 7. ver. utunque autem sit.

Denique, quod attinet ad sacram sepulturam, iisdem Salmantienfes Doctores, Henrig. c. 53. num. 4. Auila dub. 10. docent, eam in pura cessatione à diuinis, proinde vt tempore interdicti, prohibitam esse omnibus laicis: concessam verò omnibus Clericis seu Ecclesiasticis personis, vt in silentio, seu sine officio funebri in sacro loco sepeliantur. Aliqui verò apud Auil. l. c. & Suarez disp. 39. §. 2. num. 28. Coninck dub. 7. num. 84. non male annotarunt, ex nullo iure ostendi posse, quod sacra sepultura (si sine funebri officio fiat) tempore cessationis pura, seu ab interdicto seiuncta, vllis seu Clericis prohibita sit. Nam de effectibus cessationis habemus tantum cit. c. non est, de sponsal. vt diuina officia non celebrentur: quo nomine Sacramenta etiam comprehenduntur ex verbis adiunctis colligitur: non autem comprehenditur sepultura in loco sacro; cum hæc diuinum officium dici non soleat. Extensionem autem facere ab interdicto ab

cessationem, ob similitudinem rationis, concessum non est (præsertim in materia odiosa) cum interdictum & cessatio diuersa sint, vt supra dictum.

Quicumque interdictum ponere potest, is etiam cessationem à diuinis, videlicet qui Episcopalem, aut similem Episcopali in foro externo iurisdictionem obtinet, & Sede vacante Capitulum, sicuti docent Summistæ ver. cessatio, Gl. in c. si canonici ver. cessare, de offic. ordinarij, in 6. Sotus d. 22. q. 3. a. 2. Couar. c. alma p. 2. §. 2. num. 6. Suarez disp. 39. sect. 3. & alij communiter. Notandum verò est; Cessationem à diuinis interdum indici præcedente interdicto: vt accedat tunc noua & ætior prohibitio cessationis, cuius proinde effectus coniunguntur cum censura interdicti. Interdum verò ponitur cessatio purè, & sine interdicto.

Causa, propter quam cessatio indici potest, debet esse delictum grauissimum, publicum, & contumaciter perseuerans aduersus commune bonum Ecclesie, v.g. immunitatem eius. Forma autem, & conditiones, quæ in cessatione ponenda seruari debent, præscribuntur in cit. c. si Canonici, & cap. quamuis, de offic. ordinarij eod. in 6. quæ ibi legi possunt, iunct. Glossis, & apud Suarez cit. disp. 39. sect. 3. num. 7.

## P A R S Q V I N T A,

### DE IRREGULARITATE.

#### C A P. I.

### QVID, ET QVOTVPLEX sit irregularitas.

#### S U M M A R I V M.

- 1 Irregularitas non est censura: sed canonicum impedimentum, quo minus aliquis ordines suscipere, aut susceptis vsi possit. Non solum in Clericos, sed etiam in laicos cadit.
- 2 Irregularis alia omnia agere potest, quæ ordinis vsus non requirunt.
- 3 Probabile est quod collatio beneficii facta irregulari non sit ipso iure irrita; sed infirmenda.
- 4 Irregularitas diuiditur in eam, quæ ob culpam, puta propriam ac mortalem contrahitur, & in eam, quæ ob alium defectum.
- 5 Irregularitas solo iure Ecclesiastico, eoque non particulari, sed vniuersali decerni potest.
- 6 Irregularitas non agnoscitur, nisi de eius expressum, vel generalis Ecclesiarum consuetudo habeatur.
- 7 Irregularitas alia est totalis, & alia partialis.

**I**rregularitas ita definiri potest: Impedimentum canonicum, per se primò impediens suspensionem Ecclesiastico rum ordinum; secundariò verò & consequenter eorundem vsam. Cum dicitur impedimentum, distinguitur irregularitas à censuris, quæ ex propria ratione sua ob culpam infliguntur, tanquam pænæ medicinales. Irregularitas verò est moralis inhabilitas personæ ad ordinem Ecclesiasticum consequendum; vel (si iam consecuta fuit) exequendum, propter aliquem illius defectum, maculam: quandoquidem decet eos, qui ad altaris ministerium assumuntur, tam corpore, quam animo integros, puros, immaculatos esse.

Specialiter autem tradita definitio explicat differentiam irregularitatis à suspensione, ac depositione, cum quibus similitudinem aliquam gerere videtur. Nam suspensio, sicuti & depositio, per se ac directè non impedit ordinis suspensionem; sed potius vsus ordinis suscepti:

quamobrem Clericorum propria est. At verò irregularitas tam in laicos, quam in Clericos; imò magis in laicos cadit: quippe cum in ijs primarium effectum suum exercere possit, vt ipsos inhabiles reddat ad Ecclesiasticum ordinem, seu statum: in Clericis autem puta Episcopo, Presbitero, &c. cum primarium effectum suum non consequatur, vt eos penitus extra clericalem ordinem abiciat, seu laicos efficiat; operatur saltem effectum secundarium, vt eos inhabiles reddat ad exercitium ordinis suscepit, nec non ordinis superioris susceptionem.

Corollarium I. Quæcunque sacra munera laico competere possunt, vti sunt Sacramenta suscipere (excepta ordinatione) in Ecclesia canere, sacrificanti ministrare, &c. ea etiam Clericus irregularis licet obire potest. Ita ex communi Auila p. 7. disp. 2. dub. 6. conclus. 5. Suar. disp. 48. sect. 2. num. 8.

Corollarium II. Irregularitas non priuat Clericum iurisdictione: quare validè, per se loquendo, exercet omnes actus iurisdictionis Ecclesiasticæ, sicuti ante contrahit irregularitatem: quamuis illos non licet, qui actum ordinis requirunt, vti est absolutio à peccatis, realis degradatio. Ita Coninck disp. 18. dub. 1. num. 7. Suar. disp. 40. sect. 2. num. 25. 44. & 46. vbi monent, idem dicendum esse de suspensio ab ordine, & interdicto personaliter, eos validè à peccatis absolueri bona fide contentes, licet contrarium doceat Nauar. c. 9. num. 8. Auila dub. 6. conclus. 7.

Corollarium III. Irregularitas ipso iure non priuat Clericum beneficii fructibus & administratione, dummodo officium saltem per Vicarium administret. Ita Innoc. alijque Doctores communiter in c. cum nostris, de concess. præb. Nauar. c. 27. num. 251. Suarez num. 15. Auila dub. 6. conclus. 4. Henrig. lib. 14. c. 2. num. 5. Debet tamen beneficio priuari iuxta c. ex literis, de excess. Prælat. imò sponte illud resignare, si dispensatio breui tempore impetranda non sit, & beneficium requirat officium, cui beneficiatus per se ipsum satisfacere debeat. quæ de re Suar. sect. 2. num. 18. Coninck disp. 18. dub. 1. num. 5. & videri



videri potest Gl. in c. studeat, ver. vt tale, d. 50.

Sed dubium est: Vtrum collatio beneficii facta irregulari ipso iure irrita sit, vt prouisus in conscientia illud resignare teneatur? Ita affirmant Nau. c. 27. num. 251. Couar. c. alma, p. 1. §. 7. num. 1. Henriq. l. c. Auila dub. 6. conclus. 3. & alij ferè communiter. Nam beneficium datur propter officium, c. vlt. de rescript. in 6. Ergo inhabilis ad officium, est etiam inhabilis ad acquirendum beneficium, iuxta c. vlt. de Cler. excomm. ministrante. Verùm hæc ratio eo loco assignatur de irretito minore excommunicatione, cuius electio dicitur infirmata, tanquam illegitimè facta: ergo non plus etiam probat de irregulari. Præterquam quod non omnia beneficia requirant officiū, cui irregularis satisfacere nequeat: quid enim, si sit beneficium solum requirens officium precum canonicarum, vel aliud, quod per Vicarium administrari possit.

3 Quapropter Syl. ver. excommunicatio, 4. §. 4. & alij apud Suarez disput. 40. sect. 2. num. 29. existimant, beneficij collationem factam irregulari esse quidem illicitam, & contra canones, ideòque infirmam; non tamen ipso iure irritam: quam sententiam Suarez l. c. & Coninck cit. dub. 1. num. 6. probabilem censent: quia nunquam collatio beneficii censeri debet ipso facto irrita, sine iure expresso, argum. c. si soli, de concess. præb. in 6. hic autem nullum ius expressum afferri potest. Addunt tamen, priorem sententiam securiorem & practicè probabiliorem esse; tum quia communiter recepta, tum quia valde conformis est naturæ irregularitatis, quippe quæ hominem omnino inhabilem reddere videtur ad iura clericalia de nouo acquirenda. Denique ait Suarez, si collator beneficii sciuit irregularitatem, eo ipso censetur dispensare, si dispensandi potestate præditus est: sin verò nesciuit, quia erat ipsi occultata, plerumque censetur inuoluntaria, ac subreptitia concessio: nisi ponamus, etiam ipsum prouisum suam irregularitatem ignorare: vel proprio motu facta ipsi collatione, non obligari ad occultam irregularitatem statim manifestandam, quo casu arbitror collationem subsistere, arg. c. vlt. de Cler. excomm. ministr. ver. scienter: ac proinde prouisum, post impetratam dispensationem super irregularitatem, in conscientia tutum fore.

4 Irregularitas diuiditur primò: In eam, quæ ob culpam propriam: & in eam, quæ propter alium defectum, seu maculam contrahitur. Data opera dico, propter alium: Nam etià ea irregularitas, quæ ex delicto, eoque externo oritur, macula quædam atque defectus est, ob quem homo canonici iuris constitutione, inhabilis censetur ad sacrum altaris ministerium.

Exinde colligitur primò: Propter culpam tantum venialem, non incurri irregularitatem, sicuti ex communi docet Sotus lib. 5. de iust. quæst. 1. a. 9. Nau. c. 27. num. 252. in fine, Suarez disp. 40. sect. 3. num. 17. contra Caiet. ver. irregularitas, §. scito tamen, Armil. num. 14. Cum enim grauissimum sit irregularitatis incommodum, non nisi ob grauem defectum imponi debet, qualis non est venialis culpa.

Colligitur II. Non rectè dixisse Sotum in 4. d. 22. q. 3. a. 1. Saltem eam irregularitatis speciem, quæ ex delicto contrahitur, censuris annumerandam esse: eò quod rationem pœnæ habet. Sed respondetur: Irregularitatem, quæ ex delicto contrahitur, per se ac principaliter institutam non esse ad punitionem, emendationemve delinquentis; sed ob honorem sacri ministerij, ad quod indignus censetur, qui talem peccati maculam contraxit. Quæ cum ita sint, generali appellatione censura non venit irregularitas, etiam ea, quæ ex culpa oritur, & aliquam pœnæ rationem partecipat, sicuti Suarez notauit disp. 40. sect. 3. num. 7.

5 Colligitur III. Irregularitatem non ab homine per sententiam: sed solo iure, eoque non particulari, seu

Episcopali: sed tantum vniuersali Pontificio imponi posse, sicut docet Couarruu. Clem. si furiosus, init. num. 3. Suarez cit. disput. 40. sect. 4. num. 7. & seqq. & sumitur ex cap. is, qui de sentent. excommunicat. in 6. vbi significatur, irregularitatem non incurri, nisi id iure (videlicet Pontificio) expressum sit. Ratio est: Quia irregularitas principaliter non imponitur per modum pœnæ, sed potius per modum canonici impedimenti, ob decentiam ac reuerentiam sacro altaris ministerio debitam: Valde autem decens est, vt talis perpetua impedimenta eadem sint in tota Ecclesia: sicuti & altaris ministerium, honor quoque eius ac reuerentia vniuersæ Ecclesiæ communis est. Exinde regula annotanda est: Quotiescunque in canone præcipitur, vt pœna alicui per Iudicis sententiam imponatur, non est irregularitas: sed v. g. suspensio, vel depositio.

His adde, quod defectus, ob quem irregularitas incurritur, debet esse specificè nominatus in iure: neque ab vno ad aliū casum, ob similem, vel maiorem rationem extensio fieri debet, sicut ex communi docet Nau. c. 27. n. 194. in fine, Suar. disp. 40. sect. 5. & 6. Quævis negari non posse videtur, quasdam irregularitates sine iure expresso, per Doctorum ita opinantium auctoritatem introductas, atque diuturna Ecclesiæ consuetudine firmatas fuisse, quæ non minus, quam aliæ censurae vim obtinere debent, tum quia consensus Doctorum, & Ecclesiarum consuetudo optima est sacrorum canonum, & antiquæ observationis interpret: tum quia vniuersum verum est, quod consuetudo per tacitum consensum sit constitutiuia iuris: etsi lex scripta desideretur. Et quod dico de irregularitate, idè sentiendum de quibusdam censuris, v. g. suspensio: ne propter susceptionem ordinis per saltum: quæ suspensio nullo iure satis expressa censetur, sed per consuetudinem stabilita: ideòque obiter approbata per Trident. sess. 23. c. 14. de reform.

Secundo diuiditur irregularitas in totalem, ac partialem. Totalis ac propriè dicta irregularitas est, quæ omni ordine suscipiendo, & suscepti exercitio priuat, vt homicidij, bigamiae, &c. Partialis verò dicitur, quæ Clericum ordinatum non omni ordinis ministerio priuat; sed aliquo tantum, vel solum ascensu ad ordinem superiorem; v. g. Diaconus, cui sinister oculus erutus est, inhabilis fit ad sacerdotium, licet in suo ordine ministrare non prohibeatur, sicuti colligitur ex c. vlt. d. 55. Et Sacerdos: cui pollex vel medietas palmæ cum duobus minoribus digitis abscissa est, inhabilis fit ad sacrificandum; non item ad alia Sacerdotis munera, v. g. confessiones audiendas, c. 2. de Cler. ægrotante, & notat Nau. c. 27. num. 200. Suarez disp. 51. sect. 2. n. 13. Mol. tr. 3. disp. 70. n. 14. Abb. in cit. c. 2. num. 2. vbi bonam regulam tradit: Quod deformitas vel debilitas superueniens Clerico, reddit eum inhabilem tantum respectu illius officij, quod ob talem infirmitatem ritè exercere nequit.

Aliam appellare possumus partialem, sed impropriè dictam irregularitatem, quæ non est in perpetuum, sed ad tempus: v. g. pro tempore durantis infantia, morbi infamiae facti.

## CAP. II.

## De irregularitatibus, quæ incurruntur occasione Sacramenti baptismatis.

## S V M M A R I V M.

- 1 Qui alterum absolute rebaptizat: & qui ita baptizanti ministrat, irregularis efficitur, si culpa notoria sit, neque ob ignorantiam a mortali excusata.  
Est tamen hac irregularitas tantum partialis, vt impediatur, quæ minus Clericus ad aliorum ordinem ascendere possit.



1. *Qui se absolute rebaptizari finit, omnino irregularis efficitur: dummodo in eare mortaliter peccarit.*
3. *Qui ab hæretico se baptizari finit, irregularis fit: nisi ignorantia, vel necessitas excuset.*
4. *Qui in ægitudine ob mortis periculum baptizatus est, ordinari non debet.*
5. *Neophytos seu recens ad fidem conuersos citò ordinare non oportet.*
6. *Propter iteratam susceptionem sacramenti Confirmationis, vel Ordinis non incurritur irregularitas.*

**A**SSERTIO I. Qui alterum rebaptizat, & qui ita baptizari ministrat, irregularis efficitur, saltem quo minus ad superiores ordines ascendere possit. Est communis sententia; & quod ministrantem expressa in c. 1. de Apostatis. Ex quo colligunt Doctores, idem multò magis de rebaptizante sentiendum esse: quibus & consuetudo, quæ est optima legum interpret, consentit. Vide Nau. c. 27. n. 246. Henriq. lib. 2. c. 31. n. 1. & lib. 14. c. 4. n. 4. Auila p. 7. disp. 7. dub. 1. Suarez 3. p. t. 3. disp. 31. f. 6. Coninck disp. 18. dub. 4. num. 35.

Sunt verò aliqua aduertenda: I. Irregularitas hæc non incurritur ab Acolytho seu ministrante, nisi delictum eius publicum seu notorium sit, sicuti expressè dicitur in cit. c. 2. ubi id notauit Abb. notab. 2. Sed verum idem etiam sentiendum sit de ipso rebaptizante, non satis constat. Nam quodis irregularis fiat, tamen si crimen eius occultum maneat. DD. plerique existimant, Hostiensis super cit. c. 2. Scotus in 4. d. 6. q. 8. Auila cit. dub. 1. sed nullo iure probant: quamobrem Suarez cit. f. 6. §. tertium tamen, dubius manet. Palud. verò in 4. d. 6. q. 4. a. 1. concl. 2. & Tol. lib. 1. c. 70. §. quarto, expressè docent: Rebaptizantem non fieri irregularem, nisi crimen publicum sit.

II. Irregularitas hæc Acolytho imposita, qui rebaptizanti ministravit, non est perfecta & totalis: sed tantum partialis, vt ad superiores ordines ascendere non possit: & arbitratur Suarez §. sed ad explicandam, neque de ipso rebaptizante maiorem penam afferendam esse: cum ius non exprimat.

III. Ad hanc irregularitatem, sicut & ad alias, quæ ex delicto oriuntur, requiritur dolus vel culpa lata: ideòque ignorantia quæcunque, si crassa non sit, excusat.

IV. Si rebaptizatio fiat sub conditione, quamuis temere, & non præmissa inquisitione, vt baptismus antea acceptus sit, non contrahitur irregularitas. Nam leges penales intelligi debent cum effectu: qui autem baptizatum sub conditione baptizat, si baptizatus non est, &c. is re vera non baptizat: quia appositæ conditio, si subsit, suspendit, & impedit actum. Ob eandemque causam, qui metu v. g. adactus, animo simulato exterius rebaptizat, non fit irregularis: cum non habeat animum baptizandi.

**A**SSERTIO II. Qui se ita absolute rebaptizari finit, irregularis simpliciter efficitur: Ita habetur in c. Afros. d. 98. & c. qui in qualibet, l. q. 7. c. eos quos, de consecrat. d. 4. Solùm dubitatur, vtum ad hanc irregularitatem requiratur baptizati dolus, vel culpa crassa: an verò in iure statutum sit in detestationem solius facti, ob honorem & reuerentiam sacramenti: vt proinde hæc irregularitas etiam ab ignorantibus contrahatur? Quam posteriorem partem docuit Anton. 3. p. tit. 14. c. 13. §. 12. Palud. in 4. d. 6. q. 4. a. 1. concl. 2. Simon Maiolus lib. 3. de irregul. c. 14. Et probari potest ex cit. can. *Qui in qualibet ætate alibi, quam in Ecclesia Catholica, aut baptizati, aut rebaptizati sunt, ad Ecclesiasticam militiam prorsus non permittantur accedere.* Ex quo colligi videtur, etiam infantes ab hæreticis baptizatos, vel rebaptizatos irregularitatem contrahere. Accedit quod in c. qui bis, d. 4. de consecr. expressè dicitur: *Qui bis ignoranter baptizati sunt, non indigent pro eo penitere: nisi quod secundum canones ordinari non possunt; nisi si magna aliqua necessitas cogat.*

Nihilominus contraria sententia est probabilior &

communior Scoti in 4. d. 6. q. 8. Soti in 4. d. 3. q. vn. a. 9. §. vnum hîc, Couar. Clem. si furiosus. p. 1. princ. n. 8. Nau. c. 27. n. 246. Tol. lib. 1. c. 70. §. secundo, Henriq. cit. c. 4. num. 3. lit. K. Auila cit. disp. 7. dub. 2. Suarez cit. disp. 31. sect. 6. §. solet autem, & de censuris disp. 42. f. 1. Sa ver. irregularitas ex iterato baptismo, num. 1. Fundamentum est: Quia canones citati nihil probant: Nam Felix III. in c. qui in qualibet, explicandus est de qualibet ætate doli capace, sicuti Gl. ibidem explicat, & colligitur tum ex verbis subsequenter: *quibus satis esse debet (considerata eorum culpa) quod in Catholicorum numero sunt recepti:* tum ex cap. placuit, & c. qui apud l. q. 4. quibus expressè decernitur, paruulos ab hæreticis baptizatos cum ad Ecclesiam Dei reuerisi fuerint, ordinari posse. Ad can. qui bis, respondetur cum Couar. esse sumptum ex Pœnitentiario Theodori, ideòque non habere auctoritatem legis.

**A**SSERTIO III. Qui ab hæretico se baptizari finit, irregularis efficitur. Ita habetur in cit. c. Afros, & c. Qui in qualibet. Sed limitari debet, vt supra, nisi ignorantia vel necessitas à culpa excuset. Est enim hæc etiam irregularitas ex ijs, quæ propter peccatum introductæ sunt, quasi quædam penæ, sicuti colligitur ex cit. c. placuit, & c. qui apud, l. q. 4.

**A**SSERTIO IV. Qui in ægitudine propter mortis periculum baptizatus est, Presbyter ordinari non debet, sicuti constat ex Concilio Neocæsariensi cap. 12 & c. refertur in cap. vn. distinct. 57. Ratio ibidem assertur: Quia suspicio est, quod fides ab ipso non tam voluntariè, quam ex necessitate suscepta sit. Subijciuntur tamen duæ limitationes. I. Si postea ipsius studium & fides probabilis reddatur. II. Si hominù in sacerdotium promouendorum raritas sit: modò ille, qui in ægitudine baptizatus, post superatum morbum, ex alijs causis non indignus ordinatione appareat, sicuti explicat Suarez disp. 42. sect. 1. num. 5. Porro hanc irregularitatem multò antè in Romana Ecclesia obseruatam fuisse, vt ad sacerdotium, & omnino in clerum non assumeretur, qui in lecto propter morbum baptizatus erat, testatur Cornel. Papa apud Eusebium, lib. 6. histor. cap. 35. memorans Nauarianum ita baptizatum, & postea Episcopum ordinatum fuisse: ideòque vniuersum clerum, multosque laicos ab eo abstinuissè. Existimat verò Maiolus lib. 3. cap. 10. irregularitatem hæc propter identitatem rationis, ad eos quoque extendendam esse, qui ob vim, metum, vel similem necessitatem Baptismatus sacramentum acceperunt: quam extensionem valde probabilem iudicat Suarez n. 7.

**A**SSERTIO V. Simili ratione Neophytus, id est, in fide Baptismo suscepta adhuc nouitius, ordinari non debet, sicut constat ex Apost. 1. ad Timoth. 3. ratione afferente: *Ne in superbiam elatus, in iudicium incidat Diaboli* Et canon. Apost. 79. *Eum, qui ex vita gentili accesserit, & baptizatus fuerit, vel ex improba vinendi ratione, non est æquum protinus Episcopum fieri. Iniquum est enim, vt qui sui nondum experientiam ostenderit, sit aliorum magister, nisi forte hoc diuina gratia (seu speciali vocatione) fiat, sicuti postea S. Ambrosio contigit. Qua de causa ipsemet se excusans epistola 82. ad Vercellenses ait: Si dilatio ordinationi defuit, vis cogentis est. Addit tamen, quod ordinationem suam Occidentales Episcopi iudicio: Orientales etiam exemplo, in Ordinatione Nectarij Constantinopoli, probauerunt.*

Comprehenditur autem Episcopi nomine etiam Presbyter, sicuti intellexit Laodic. Concil. cap. 3. & Nicænū I. Oecum. can. 2. *Ne accedentes nuper ad fidem, simul rebaptizati sunt, ad episcopatum, vel presbyteratum promouantur: nam & tempore opus est ei, qui catechizatur, & post Baptisma probatione quam plurimam manifesta est enim Apostolica Scriptura. Quinimò Concilium Sardicense Oecum. præeunte Osio Episcopo, hanc prohibitionem latius etiam intellexit can. 13. *Conueniens non est, nec ratio, nec disciplina patitur, vt temere ordinentur aut Episcopi, aut Presbyteri, aut**



ter, aut Diaconus, qui Neophytus est. Et vniuersim de sacris Ordinibus, & vno verbo de clericali statu intellexit Gregor. l. lib. 4. Epist. 50. ad Virgil. Episc. Arelaten. Cum ad sacros ordines Apostolus Neophytum venire prohibeat, &c. quandoquidem recenter conuersus ad fidem, nec in doctrina fidei potest esse satis instructus, nec in Ecclesiasticis rebus expertus, imò nec in constantia fidei satis probatus, ait Suarez disp. 43. l. 3. n. 6. Qui rectè admonet, ad prudentem Episcopum pertinere, vt declaret, considerata personæ qualitate, & temporis interuallo, transactum esse statum neophyti, vt sine alia dispensatione Ordinari possit: durante verò adhuc conditione Neophyti, non posse Episcopum ordinationem facere sine cōsensu summi Pontificis, quippe ad quem solum pertinet in vniuersalis Ecclesiæ canonibus dispensare: idque clarè colligitur ex cit. c. 2. Nicæni Concilij, vbi hoc ipsum culpatur, quòd Neophyti ex necessitate, vel urgentibus hominibus, præter Ecclesiasticum canonem ordinati fuerunt.

Denique verò S. Anton. 3. p. tit. 28. cap. 6. §. 3. Rich. 4. sent. d. 7. a. 6. q. 1. Nauar. n. 247. Maiol. lib. 3. cap. 15. existimant, irregularitatem etiam contrahi propter iteratam susceptionem aliorum Sacramentorum, quæ characterem imprimunt: videlicet Confirmationis, & Ordinationis. Fatetur tamen ipsemet Nau. contrariam sententiam Scoti in 4. n. 7. q. vlt. esse communem: eo quòd dictæ irregularitates iure scripto expressæ non sint, eandemque amplexus est Alph. à Castro lib. 1. de lege pœnali c. 7. docum. 3. Couar. clem. si furiosus, p. 1. princ. n. 8. §. sed & illud, Suarez disputatione 42. sess. 2. num. 2. & sess. 3. numero 6. Henriquez libro 14. cap. 4. num. 5. Auila parte. 7. disputatione 7. dub. 5. Sa verb. irregularitas ex iterato baptismo, num. 2.

## CAP. III.

## De irregularitatibus ex ordinis abusu.

## S V M M A R I V M.

1. Qui furtiue ordinatus est, irregularis efficitur.
2. Clericus solemniter ministrans in ordine, quem non habet, irregularitatem contrahit.
3. Si laicus solemniter exerceat actum ordinis clericalis proprium, irregularitatem non incurrit, quamuis grauiter peccet.
4. Clericus irregularis efficitur, si exercendo actum sui ordinis censuram violat.
5. Clericus suspensus ab ordine, si ad superiorem ordinem ascendat, non videtur irregularitatem incurere.

**A**ssertio I. Qui furtiue ordinatur, id est, ignorante Episcopo, se per dolum ordinandis ingerens; irregularis efficitur, saltem quo minùs ad superiorem ordinem promoueri possit. Potest tamen Episcopus cum taliter ordinato dispensare, nisi, vt iam in Ecclesijs consuetum est, eiusmodi accessum furtiuum sub excommunicatione interdixerit: tunc dispensare non potest: excepto, si reus postea Religionem ingressus sit, & aliquamdiu in ea laudabiliter vixerit. Ita habetur c. 1. de eo qui furtiue, &c. Si tamen crimen occultum maneat, absolutè concedit Trident. Concilium, vt Episcopus dispense.

Assertio II. Clericus ministrans in ordine, quem non habet, irregularis efficitur: si v. g. Diaconus Missam celebret, aquam vel nuptias solemniter benedicat, absque sacerdotis commissione solemniter baptizet. Ita habetur in c. 1. & 2. de clerico non ordinato ministrante. Notant verò Doctores communiter ad hanc pœnam requiri primò, Vt quis in ea re mortaliter peccet, non excusatus probabili ignorantia, &c. Secundò, Vt solemniter & tanquam ex officio exerceat actum ordinis, quem se-

cundùm Ecclesiæ institutionem, aut consuetudinem non liceat exercere ijs, qui tali ordine carent, sicuti docent Paludanus in 4. d. 24. q. 4. §. Quartus. S. Anton. p. 3. tit. 28. c. 1. §. 1. Syl. ver. irregularitas, num. 14. Angelus cod. ver. 1. n. 38. Nau. n. 242. Henric. lib. 14. c. 6. n. 1. Auila p. 7. disp. 9. l. 2. dub. 13. Sa ver. irregularitas ex abusu ordinis, n. 5. Sairus lib. 7. c. 10. Tol. lib. 1. c. 72. Quare inferunt, talem non fieri irregularem, si in officio solemnì Epistolam vel Euangelium canat, etiam dalmatica indutus: modò manipulum vel stola non deferat: quia proprium insigne Diaconi est stola: Subdiaconi verò manipulus.

Quæres. Vtrum id etiam licitè fieri possit, videlicet vt clerici in minoribus constituti tanquam cantores adhibeantur, superpelliceo, vel dalmatica induti ad cantandam Epistolam, vel Euangelium, aut Passionem Domini? Respon. Id ex consuetudine petendum esse. Nam in aliquibus Ecclesijs Cathedralibus & Collegiatis id non permittitur, quibusdam verò Ecclesijs, præsertim Regularium, consuetum est id fieri, in defectum Subdiaconi, & Diaconi, sicuti notauit S. Anton. cit. c. 1. Nau. lib. 5. consil. 5. de cler. non ordinat. edit. 2. Tol. l. c. Sa ver. clericus, n. 32. Imò Nauar. c. 27. n. 242. Auila cit. dub. 13. ex Villa diego testantur, consuetudinem esse apud Fratres Minores, vt clericus inferior Subdiacono, etiam cum manipulo Epistolam solemniter canat: idè què talem irregularem haud fieri.

Monent verò S. Anton. & Syluest. ll. cc. Quamuis concessum sit Clerico inferiori epistolam in solemnì officio canere, vt suprà dictum: non tamen concessum esse sacrum calicem ad altare porrigere: aliàs irregularem fore. Sed melius sentire videntur Henriquez cit. c. lit. m. Auila in fine dub. 13. licet talis peccet, tamen irregularem non fieri: cum non exerceat actum ordinis solemniter: quandoquidem solemniter ministrare est cum proprijs ornamentis ministrare: proprium autem ornamentum Subdiaconi est manipulus.

De laico non legi apud DD. vtrum sine solemnibus vestibus, indutus v. g. superpelliceo, Epistolam in solemnì officio canere possit; quare videntur supponere, id non esse licitum: & re vera non est decens, si clericus haberi queat. Sin verò nequeat, fortasse ob causam permitti posset: præsertim si Religiosus sit. Quia talis non exerceat actum ordinis, sed simplicis cantor: quare cur laico hoc officium in solemnì Missa competere non possit, solum obstat consuetudo, quæ tamen in varijs locis varia est.

Tertiò requiritur: Vt quis serio, & ex animo, non per locum, ludum vsurpet exercitium proprium ordinis, quò caret, sicuti monent Doctores suprà citati. Non puto tamen aliam intentionem requiri, quàm vt clericus v. g. in minoribus, sponte ac scienter in solemnì officio canat Epistolam, dalmatica & manipulo indutus. Neque satis intelligo, quod aiunt Nauar. cit. numer. 242. & consil. 7. de sacrament. non item iterandis, & Auila cit. du. 13. opus esse, vt habeat intentionem id faciendi tanquam Subdiaconus: præterquam si aliquis per ignorantiam non crassam existimaret tale officium etiam suo ordini, quem habet, competentem esse: vt si Diaconus existimaret solemniter baptizare in Ecclesia iure ordinario annexum esse ordini suo: non fieret irregularis, etsi sine Sacerdotis commissione baptizaret: quia non habet intentionem baptizandi vt Sacerdos; sicut docet idem Nauar. consil. tert. de clericis non ordinandis edit. secund.

His adde ex Abbate in capite 1. de clerico non ordinato, &c. Quòd non ordinatus temere exercens officium ordinis quem non habet, v. g. celebrans, vel confessiones audiens, tenetur etiam pœnâ falsi: sicuti qui non habens dignitatem, proficitur se habere, vel vtitur insignibus; L. eos, ff. ad L. Cornelius de falso.



Porro circa dictam irregularitatem dubitatur primò: Vtrum sit totalis, quamvis ex vna parte dispensabilis ab Episcopo: videlicet, vt post biennium vel triennium in ordine antè suscepto ministrare permittatur? An verò sit irregularitas partialis, impediens tantum ab ascensu ad ordinem superiorem: iuncta tamen suspensione ad tempus biennij aut triennij ab ordine supremo antè suscepto. Nam vtrumq; sensum admittere videtur c. 2. de clerico non ordinato ministrante. Et posteriolem amplexus est Suarez disp. 4.2. s. 4. n. 4. Coninck. disp. 18. dub. 6. con. 1. Sed prior sensus est probabilior, & communiter receptus, vt videre est apud Syl. ver. dispensatio, q. 10. dicto 6. Nau. Henr. q. 1. Auilam, Sairum ll. cc. & consentit Abbas in c. 1. eod. tit. vbi ait canonem illum, *Si quis baptizauerit (solemniter) vel aliud diuinum officium exercuerit non ordinatus, propter temeritatem abiciatur ab Ecclesia*, intelligi de abiectione à clero, seu depositione, propter incursum irregularitatem: Sed in can. 2. hunc rigorem laxatum fuisse.

Secundò dubitatur; Vtrum laicus exercens actum proprium ordinis, v.g. solemniter baptizans, dictam irregularitatem contrahat? Ita affirmant Anton. cit. cap. 1. Syl. ver. irregularitas q. 12. dicto 2. Sotus in 4. d. 18. q. 4. a. 1. Nau. cit. n. 242. ver. septimò, Suarez 3. p. t. 3. disp. 31. s. 4. in fine, Auila dub. 14. & 15. Valentia t. 4. disp. 7. q. 10. par. 1. Probant tum ex supra cit. ca. 1. vbi generatim dicitur: *Si quis baptizauerit, &c.* tum ex paritate, vel potius maiori tate rationis: cum tanto indecentius sit actum ordinis aliquem solemniter exercere, quanto magis ab eo remotus est.

Sed contrariam sententiam significat Couar. in Clem. p. 1. §. 1. n. 1. Sa loco supra cit. & expressè docent Angelus ver. irregularitas, 1. n. 38. Rosel. n. 2. princ. Sairus l. c. Henr. q. lib. 2. c. 29. n. 1. lit. h. Armilla ver. irregularitas, nu. 65. vbi ait, hanc sententiam sequendam esse tanquam benigniorem in materia odiosa. Et mihi idem videtur: propterea quòd hæc irregularitas de laico ministrante expressa nō sit, si sequamur probabilem intellectum cap. 1. quem rubrica & titulus indicat, & tradunt ibi Abb. Syl. & Sairus ll. supra citatis: Quòd ministrans solemniter in ordine, quem non habet, sit deponendus, & numquam ordinandus: depositio autem propria Clericorum est. Cur autem in iure Clerico vsurpanti alieni ordinis ministerium irregularitas decreta sit, non item laico: causa ea esse potest, quia talis vsurpatio frequentior esse solet in clericis, quàm in laicis. Quare ipse etiam S. Anton. 3. p. tit. 17. c. 1. §. 1. Syl. ver. confessor, §. n. 1. rejiciunt sententiam eorum, qui dicunt, laicum irregularem fieri, si fingens se sacerdotem, à peccatis absolueret præsumat: licet hanc opinionem sequatur Sotus & Valentia ll. cc. allegantes Palud. in 4. d. 17. q. 3. qui tamen in contrarium magis propendit.

Multò verò minùs seu laicus, seu clericus irregularitatem contrahet, si tanquam Diaconus sit, cum manipulo & stola prædicare in Ecclesia præsumat: cum non exerceat actum ordinis, quæ est communis sententia contra Nauar. cap. 27. num. 163. ver. octauò. Peccat nihilominus talis, quando actum Ecclesiasticum prædicandi stola indutus exercet tanquam Diaconus, cum non sit. Alioquin verò ait idem Nauar. libr. 1. consil. 7. de offic. delegati: Consuetudine pene totius orbis Christiani obseruari, vt Parochi non tantum Diaconos: sed inferiores etiam clericos in Theologia eruditos, ad prædicandum in ecclesia interdum constituent. Quibusdam tamen diocesis apud nos adhuc viget consuetudo, vt Parochis non liceat ad prædicandum exponere nisi Diaconos. Imò Trident. sess. 5. cap. 2. & sess. 24. c. 4. de reformat. significat tales substitutos in munere prædicandi prius ab Episcopo examinari & approbati oportere: quod etiam docet Simanca de Cathol. instit. 49. numero 1. ex c. excommunicamus, §. quia verò, de hæret. & Concil. Lateran. sub

Leone X. sess. 11. Sed in his cuiusque diocesis receptam consuetudinem sequere.

Affertio III. Clericus violans censuram maioris excommunicationis: suspensionis ab ordine, interdicti personalis aut localis, exercendo actum proprium ordinis, irregularitatem contrahit, sicuti constat ex tit. decret. de cler. excommun. ministrante, c. 1. de sent. & re iudic. in 6. c. is cui, de sent. excommun. in 6. Requiritur autem ad hanc irregularitatem primò, vt clericus vsurpando tale ordinis ministerium mortaliter peccet. quamobrem ignorantia, si crassa non sit, illum liberat, vt habetur expressè in c. Apostolica, de cler. excommun. ministrante. Secundò requiritur: Vt ministerium, quod clericus in censura exercet, sit proprium ordinis: seu ab alio, qui talem ordinem non habet, exerceri non possit.

Ex quo infertur primò: Clericos in minoribus vix posse ex hac causa irregularitatem contrahere: quando consuetudo ferme obtinuit, vt eorum ministeria à laicis etiā solemniter obeantur, sicuti notauit Ant. cit. c. t. in princ. Henr. l. 14. c. 7. n. 1. lit. f. Sotus in 4. d. 22. q. 3. art. 1. concl. 5. Sairus l. 7. c. 9. n. 4. Auila p. 7. disp. 9. s. 2. du. 13. contra Syl. & alios ab ipso citatos ver. irregularitas, n. 15. Nau. cap. 25. n. 76.

Infertur secundò: Clericos excommunicatos, vel suspensos non fieri irregulares, si præstent ea, quamvis illicitè, quæ solius iurisdictionis, non ordinis officia sunt: videl. si Episcopus in tali censura excommunicet, vel ab excommunicatione absoluat, ommissa tamen solemnitate stola, precum. Si Parochus matrimonio assistat; sed non benedicat nuptias. Ita notauit Henr. q. ci. n. 7. Auila cit. s. 2. dub. 2.

Infertur tertio: Non fieri irregularem clericum, si censura ligatus in Ecclesia lectiones, & responsoria canat, dummodo officiatorem non agat, dicendo collectam præmissa *Dominus vobiscum*, sicuti notat Abb. in c. ult. n. 5. de excess. Prælati. Rich. in 4. d. 18. art. 7. qu. ult. Item, si in loco sacro mortuum sepeliat, intermisso officio diuino. Ita Nauar. lib. 5. consil. 9. de clerico excommun. ministr. edit. 2. & in man. c. 27. n. 244. Henr. & Auila ll. cc.

Tertio requiritur: Vt exercitium ordinis sit ipsi secundum substantiam prohibitum, & non secundum modum duntaxat accidentalem. Quamobrem docet Syl. ver. suspensio, q. 5. Couar. in Clem. p. 1. §. 1. n. 1. Auila cit. dub. 2. §. sed notandum, Episcopum suspensum à Pontificali- bus non incurrere irregularitatem, si Missam celebret cū apparatu Episcopali: quia ab actu celebrandi secundum substantiam suspensus non est; sed tantum secundum solemnitatem accidentalem: licet contrarium senserit Angelus ver. suspensio, 3. n. 3.

Obijciat aliquis, quòd Doctores communiter dicant, Syl. ver. interdictum §. q. 5. Couar. c. alma, p. 2. §. 4. num. 6. Henr. q. l. 14. c. 7. n. 4. Auila p. 7. disp. 2. dub. 8. Clericum in interdicto generali loci celebrantem officium diuinum, ordini clericali proprium, non obseruata moderatione c. alma, irregularem fieri: cum tamen hoc casu celebratio officij secundum substantiam actus ipsi concessa sit. Respondeo. Esse hunc casum disparem & specialem: propterea quòd iure antiquo simpliciter decretum erat, vt clericus celebrans tempore interdicti irregularis fieret: hoc autem ius postea mutatum non est simpliciter, sed cum conditionibus seu moderationibus c. alma, sicuti indicatur in c. is qui, §. is verò, de sent. excom. in 6. Is verò, qui sciens in loco celebrat supposito interdicto (nisi super hoc privilegiatus existat, aut à iure sit concessum eidem) irregularitatem incurrit.

Illud porro plerique Doctores affirmant Abb. in c. illud, n. 8. de cler. excommun. Syl. ver. irregularitas, n. 15. dicto 4. Henr. q. c. 7. n. 5. Nau. ci. n. 244. & l. 5. consil. 1. de cler. excom. ministrante, edit. 2. Cou. c. alma, p. 1. §. 6. n. 9. Auila



Auila dub. 6. Episcopum excommunicatum, interdictum, vel ab officio suspensum irregularem fieri, si coram se celebrari auctoritate iubeat, argum. c. illud, de cler. excommun. ministr. vbi tamen id non exprimitur: quare hæc irregularitas potius auctoritate Doctorum, quam scripto iure nititur, sicuti notauit Coninck dubio 6. in fine.

Denique dubitari solet: Vtrum clericus suspensus à suo ordine, irregularis fiat, si ad superiorem ordinem ascendat? Affirmat Couar. c. alma, p. 2. §. 3. nu. 5. Nau. lib. 1. consil. 26. num. 2. de tempor. ordinat. & alij apud Henric. lib. 14. c. 6. n. 4. lit. c. Primò: Quia ascensus ad ordinem superiorem est veluti exercitium ordinis inferioris, à quo clericus suspensus est. Secundò: Si Diaconus ab ordine suspensus presbyteratum accipiat, exercet ministerium presbyteri sacrificando cum Episcopo; item Subdiaconus cantando solemniter Euangelium: Ergo his actibus irregulares efficiuntur.

Sed contraria sententia probabilior est Suar. disp. 42. l. 3. n. 2. Sairi lib. 4. c. 16. n. 22. Eò quòd hæc irregularitas nec iure expressa sit, sicuti Henric. etiam notauit: nec rationes pro ea allatæ conuincant. Ad primam enim respondetur: Susceptionem ordinis superioris non nisi improprie & abusive dici posse exercitium ordinis inferioris, ut dixi supra hoc tract. part. 3. c. 1. corol. 6. consequenter irregularitatem decretam ob ordinis illicitum exercitium, non esse extendendam ad illicitam ordinis superioris susceptionem: cum pœnæ non extendendæ, sed potius restringendæ sint.

Ad alteram resp. Primum sacrificium, seu Sacerdotis primitias non æstimari actum illum concelebrationis: cum neque certum sit, vtrum re ipsa consecret, an solus Episcopus. Quæ est sententia Med. in sum. lib. 1. c. 11. §. 8. Sairi num. 23. Auila p. 3. disp. 5. dub. 7. assert. 3. Henric. l. 14. c. 3. num. 6. vbi respondent, Non fieri irregulatè Presbyterum, qui in sui ordinatione contracta suspensione ob immaturam ætatem, cum Episcopo verba consecrationis profert: sed cum postea, non obtenta prius dispensatione, primum sacrum celebrat: licet contrarium sentiat Couar. l. c. Nauar. lib. 5. consil. 8. de cler. excom. ministr. edit. 2. Adde, quòd nec omnes ordinati Diaconi sub officio Euangelium canunt; sin verò præter opinionem accadat, ut hoc officium illi deferatur, qui se ab ordine suspensum nouit, isque deprecando declinare non possit absque sui diffamatione, vel aliorum scandalo, tunc, nihil impediende censura occulta, parere poterit.

## CAP. IV.

## De irregularitatibus ex infamia.

## SUMMARIUM.

1. Infamia est duplex: Vna iuris, & altera facti. Illa interdum oritur ex delicto proprio, cui iuris constitutione infamia pœna constituta est, seu ipso facto incurrenda; seu à iudice decernenda. Interdum oritur ex delicto parentum: aut ex vili conditione, seu statu personæ.
  2. Qui civili iure infames habentur, etiam canonico tales censentur, nisi infamia civili iure introducta, per canonicum sublata sit.
  3. Infamiam iuris auctoritate abolere ad Principem spectat, comparatione subditorum suorum.
  4. Infamia facti oritur non tantum ex euidencia criminis infamantis, sed etiam ex vulgata opinione de commisso tali crimine: dummodo rumor seu fama non ex leuiculis hominibus originem traxerit.
  5. Infamia tum iuris, tum facti à dignitatibus & honoribus repellit: imò infamia facti priuat etiam dignitate acquisitam: sed requiritur Iudicis sententia.
  6. Electio, vel collatio beneficii facta infami, ipso iure irrita est.
- Si tamen infamia est tantum facti, electus vel prouisus benefi-

cium in foro conscientia retinere potest, si per vitam emendationem, infamiam abolere velit.

7. Infamia tum iuris, tum facti ab actibus legitimis repellit.
8. Infamia tum iuris, tum facti irregularitatem homini inducit.
9. Ob nullum crimen occultum, excepto homicidio, & Violatione censura, irregularitas incurratur.
10. Infamia iuris non tollitur per penitentiam: sed infamia facti.
11. Sacerdos publicus concubinaris, post vitam emendationem publice notam, celebrare non prohibetur. Fideles non prohibentur audire Missam publici concubinarij, si denunciatus non sit tanquam in sacris vitandus.
12. Hæresis & apostasia, si notoria sit, facit irregularem, & talis etiam emendatus & absolutus ordinari non debeat. Quibusdam tamen regionibus, quibus hæretici infames non censentur, si ad fidem Catholicam reuersi sint, ab Episcopis ordinantur.

**I**nfamia bonæ famæ priuationem significat. Fama autem seu bona existimatio est dignitatis illa se status, legibus ac moribus comprobatus, l. cognitionem, ff. de varijs & extraordinarijs cognition. Quare infamia aliud non est, quàm diminutio eiusmodi status, sicuti notauit P. Greg. Tholos. lib. 31. Syntag. c. 29. n. 7. Suarez disp. 48. l. 1. n. 1.

Duplex est infamia, vna iuris, quæ etiam legalis dicitur: & altera facti. Infamia iuris iterum duplex est: vel enim oritur ex delicto proprio, cui ex iuris constitutione infamia annexa est: idque duobus modis. Nam aliqua atrocia crimina sunt, quæ si notorie committantur, ante Iudicis sententiam, infamiam Reo inferunt, sicuti præter alios notauit Alph. de Castro lib. 2. de lege pœnali c. vlt. circa finem. Couar. 3. resol. c. 3. n. 2. Auila p. 7. disp. 4. du. 5. Eiusmodi est primò, Crimen lenocinij l. athletas, §. ait Prætor, ff. de his, qui notantur infamia, & l. palam, §. lenocinium, ff. de ritu nuptiarum: ex quibus tamen textibus colligi videtur, opus esse ad hanc infamiam incurrendam: ut quis lenocinium, id est, prostitutionem viri aut fœminæ quasi per consuetudinem exerceat. II. Crimen sponsaliorum vel matrimonij cum duabus, lib. 1. & l. quid ergo, ff. de his qui notantur infamia, & c. nuper, de bigamis. III. Crimen publici vsurarij l. improbum fœnus, c. ex quibus causis infamia irrogetur. IV. Crimen læsæ Maiestatis, cui assimilatur hostilis persecutio Rom. Ecclesiæ Cardinalium, vel præstitum auxilium, c. felix, de pœnis, in 6. V. Crimen periurij permissori, l. si quis maior, c. de tractat. l. quotiens, c. de dignit. l. 12. VI. Ignominiosa exauكتورatio militis, ob crimen commissum, l. 1. & 2. ff. de his, qui notantur infamia. VII. Qui operas suas, ut cum beatijs pugnaret, locauit, l. 1. §. item senatus cōsulto, ff. de postulando. VIII. Qui quæstus causa, seu pretio accepto incertamen cum homine descendit, l. 2. §. vlt. ff. de his, qui notantur infamia, iuncta interpretatione Molina tra. 4. disp. 8. §. 9. Pugiles tamen seu athletæ, qui proposito sibi præmio, fortitudinis exercendæ causa decertant, hoc numero non comprehenduntur, sicuti notauit Gl. in l. 1. c. de athletis, li. 10. IX. Crimen hæresis, de quo infra dicam. X. Et si non iure expresso, tamen per consuetudinem & DD. consensum infames sunt Sodomitæ voluntarij, non vim passi. Denique in Trid. sess. 24. c. 6. de ref. matrim. infamia decreta est mulieris raptori, isque qui consilium, vel auxilium præbent: & sess. 25. c. 19. de reform. in duellum descendentibus, eorumque patrinis.

Alia verò crimina sunt, de quibus Reus per Iudicis sententiam infamiam incurrit: talia imprimis sunt, quæ crimina publica dicuntur, quòd in ijs cuilibet è populo accusare concessum sit, ut crimen homicidij, adulterij, prodicionis, falsi, rapinæ, Institut. de publicis iudicijs, l. 1. & l. infamem, ff. eod. Adde etiam quædam crimina priuata: ut furti, iniuriarum, doli mali, l. 1. athletas, §. vlt. ff. de his, qui notantur infamia, & cit. l. infamem: Et non solum qui de his proprio nomine condemnatus est, sed



etiam qui pactus, ne de tali crimine accusaretur, citat. l. athletas, §. vlt. quoniam intelligitur confiteri crimen qui paciscitur, l. seq. ff. eod. Arbitror tamen hoc casu requiri iudicis sententiam condemnantis de turpi pactione. Item qui actione directa pro socio, tutela, mandati, depositi ob interuenientem dolum damnati sunt, infamiam incurrunt, de quibus Mol. tr. 4. disp. 8. n. 12. Præterea, qui de calumniis per iniquam accusationem illata, vel de præuicatione condemnatus est, cit. l. athletas, §. calumniator, & §. item præuicator. Dicitur autem præuicator *quasi uariator, qui diuersam, vel potius aduersam causam adiunxit, producta causam suam.*

Requiritur autem ad infamiam ex hoc capite incurrendam, ut antecesserit processus ordinarius per viam accusationis; vel saltem inuocato, & audito Reo ad sui defensionem, si Iudex ex officio procedat. sicuti ex communi docet Clarus lib. 5. sent. §. practica criminalis, quæ. 72. num. 3. Insuper, ut sequatur sententia condemnatoria: quia sola iudicialis probatio, aut confessio criminis, non habentis ipso iure annexam infamiam, non inducit infamiam iuris, sed facti, sicuti docet Bartol. in cit. l. infamem, Angelus vlt. infamia num. 6. Auila cit. dub. §. pro quo. Veruntamen, si causa subsit, cur ordinarius iuris processus & sententia condemnatoria non præmittatur: & Reus crimen confessus, aut in eo deprehensus, verberum vel simili publica, & crimini competente poena afficiatur hoc ipso iuris infamiam incurreret, sicuti constat ex l. iustus furtium, ff. de his, qui notantur infamia, & l. furtibus, C. ex quibus causis infamia irrogatur, & docet Gl. in l. nullam §. quæstione, C. eod. Molin. cit. disput. 8. num. 19. Tortura tamen cum non sit ad condemnationem, sed veritatis indagacionem, non reddit hominem infamem, iuxta cit. l. nullam, iuncta Gl. Deinde requiritur, ut sententia iudicis condemnatoria transferat in rem iudicatam, & ab ea intra tempus à iure definitum appellatum non fuerit: nam sicuti interposita appellatio suspendit sententiam, ita etiam infamiam ex tali sententia oriundam, sicuti notat Mol. tr. 3. dist. 9. n. 4.

Altera iuris infamia non ex proprio delicto contrahitur: sed vel ex delicto parentum, qui crimen læsæ Maiestatis, ac perduellionis admiserunt, l. quisquis, §. filijs, C. ad l. Iuliam Maiest. Et similis est infamia, quæ iure canonico c. felicitis, de poenis in 6. irrogatur filijs ac nepotibus eorum, qui Rom. Ecclesiæ Cardinalem hostiliter persequuntur. Vel ex vili conditione personæ, qua ratione infames ipso iure censentur histriones, id est, qui in publicis obscenis spectaculis agunt, lib. 2. §. vlt. ff. de ijs, qui notantur infamia, c. aliquantos, dist. 51. & cap. 1. causa 4. quæstione 1. Et qui cum muliere publicis eiusmodi spectaculis mancipata matrimonium contraxit, cap. si quis viduam, ( qui est canon 18. Apost. ) dist. 34. Illegitimi quoque quasi infames, seu ignominia notati censentur: quamobrem natalium defectus dicitur, sicuti Abb. notauit in c. per venerabilem, num. 3. Qui filij sunt legitimi. Quamuis illegitimi non propriè & simpliciter infames censeri debent: sed solum in ordine ad effectus iure expressos: cum interim, si iura non prohibeant, ad actus legitimos & munera publica admitti debeant, v. g. ad munus tabellionis: item ad ius hereditatis ex testamento, si aliquis carens ascendentibus ac descendentibus, illegitimum instituit, ut à fratre testatoris per querelam testamenti inofficiosi, quasi vilis & infamis persona instituta esset, repelli non possit, sicuti tradit Molina tract. 4. disp. 7. num. 5. Denique in Germania Carnificum, & quorundam lictorum filij infames censentur, adeo ut non solum à publicis dignitatibus: seu etiam à mechanicis officijs repellantur.

Has autem iure civili constitutas infamias ideo enumerari, quia omnes etiam à iure canonico receptæ & approbatæ sunt, generali regula Hadriani Papæ causa 6. quæst. 1. *Omnes infames esse dicimus, quos leges seculi in-*

*fames appellant: Nisi infamiam à iure civili introductam canones speciatim abstulerint: sicuti in ca. vlt. de secundis nuptijs ablata est infamia, decreta mulieri intra annum viduitatis ad secundas nuptias transeunti, Authent. C. de secun. nuptijs.*

Infamiam iuris autoritatiuè tollere seu abolere ad Principem spectat, comparatione subditorum suorum. Ex quo sequitur, ad sum. Pontificem pertinere Ecclesiasticas personas quascunque in quavis Republica degentes, ex quacunque causa infamiam iuris contraxerunt pristinae famæ restituere, uti notat Molin. tract. 4. disp. 10. numero 4. Quin & laicos ex plenitudine potestatis suæ restituere poterit, si videlicet eos in clericalem statum per sacram ordinationem recipiendos ex causa censuerit, sicuti docet Syluest. ver. infamia, quæst. 12. Molina ibid.

Infamia facti ( quam Suarez cit. si. num. 3. populari ac vulgarem appellat ) est, publica notitia vel opinio commissi criminis, per quod fama, & existimatio hominis, spectata personæ qualitate & statu, apud viros prudentes grauiter læditur, sicuti colligitur ex l. ea, quæ pater C. ex quibus causis infamia, & c. vltim. de tempor. ordinat.

Sunt autem hic aliqua aduertenda; I. Non tantum publica commissi criminis euidentia: sed etiam communiter vulgata opinione infamiam contrahi: cum infamia aliud non sit, quam publicæ famæ, seu existimationis diminutio. Verum etsi de crimine infami aliquis accusatus sit, non tamen ideo infamiscenseri debet, nisi apud viros honestos, & probos famam eius læsam esse sciatur, sicuti docet Hostiensis in c. meminimus, de accusat. Nau. libro 5. consil. 7. de accusat. edit. 2. Quo in casu, & quotiescunque clericus non ex vanis, sed probabilibus coniecturis infamatus est de crimine, quod tamen plenè probari non potest, indicanda est ei purgatio canonica, ut iuret se delictum non commisisse: & compurgatores viros honestos adducat, qui iurent credere se purgatorem verè iurasse, iuxta c. quotiens, de purgat. canonica, & videri potest Simanca de cast. instit. cap. 56. Quod si crimen, de quo aliquis infamatus est, graue sit, & cum scandalo iunctum, tunc superior illum interim suspendere debet, donec se purgauerit, sicuti colligitur ex c. cum P. & c. inter, eod. tit.

II. Ut aliquis de crimine infamatus dicatur, necesse est viros graues ac prudentes talem de homine existimationem habere: si autem constet, ab hominibus tantum leuibus & imprudentibus rumorem criminis profectum esse, non ideo infamia contracta censeri debet, sicuti notat Abb. in c. quæsiisti, n. 4. de accusat. & in cap. qualiter, 2. numero 29. eodem titulo, Qui vanæ voces hominum non sunt audiendæ, l. decurionum, C. de poenis.

III. Crimen, de quo quis infamatur, debet esse tale, quod eum, attento statu personæ, & communitatis intra quam viuit, meritò abiecit & vilis existimationis reddit: Quamobrem, inquit Mol. disput. 7. numer. 6. *Si homo secularis in simplices fornicationes incidat, vel immoderate iuret, vel similia alia crimina habeat, non contrahit infamiam facti: quod ego intelligo ad contrahendos ciuiles effectus infamiæ: sed ad Ecclesiasticos ordines talis inhabilis est, sicuti constat ex can. 17. Apost. & mox iterum dicam.*

IV. Etiam infamia facti seu popularis aliquo modo ex iuris dispositione pedit, videlicet quod attinet ad effectus seu impedimenta legalia. Quare facilius incurritur hæc infamia, spectato iure canonico, videlicet propter quoduis peccatum mortale, in quo aliquis notoriè perseuerat; quia ita significatur in c. testimonium, de testibus, c. constitutus, 3. q. 5. c. alieni, & seqq. 2. q. 7. c. infames, c. illi, q. 1. Ciuili autem iure infames censentur imprimis, quos ipsæ leges apud viros probos, sinistra opinione specia-

tim



tim notatos significant, v.g. filij quos pater in testamēto seribū increpauit, vbi habetur in cit. l. ea quæ pater. Sin verò leges non expresseuerunt, tunc Iudicis id arbitrio commissum videtur, considerata tum criminis nondum emendati grauitate: tum etiam conditione, seu dignitate muneris, à quo criminofus repelli debet. Quod ferè etiā locum habet in infamia canonica: siquidem vt Molin. tract. 4. disp. 8. in fine annotauit, antiquis canonum rigor, vt propter quoduis peccatum mortale infamia incurrat, hodie non tam strictè obseruatur; saltem in ordine ad aliquos infamiæ effectus: quamuis maximè obseruari deberet, vt talis persona, antequam emendata sit, ad Ecclesiasticos ordines & beneficia non admittatur, atque testimonio eius tanto minor fides habeatur.

Venio nunc ad effectus seu impedimenta, quæ ex iuris s. tum ciuili, tum canonici iuris dispositione per infamiam inducuntur. Quorum primus est, Quod infames ad dignitates admitti non possint, sicuti habetur in l. vn. C. de infamis lib. 10. & l. 2. C. de dignit. lib. 12. *Neque famosi, & notati, & quos scelus & vitæ turpitudine inquinat & quos infamia ab honestorum cœtu segregat, dignitatis portæ patebunt.* Quibus verbis admonet ibi Gl. omnem infamiam comprehendere, siue iuris sit, siue per sententiam, siue per improbam & vulgò reprehensam vitam. Idque totū multò magis canonico iure locum habet in ordine ad dignitates Ecclesiasticas, sicuti habetur in c. inter dilectos, de excessib. Prælat. ibi: *Cum personæ vilibus & indignis portæ dignitatis patere non debeant, iuxta legitimas sanctiones & reg. 87. in 6. Infamis portæ non pateant dignitatum.* Et debet id intelligi de quibusvis Ecclesiasticis beneficiis, quod ab infami acquiri non possint, sicuti docet Abb. in c. querelam, de iureiur. Couarr. 3. resol. cap. 3. num. 3.

Est tamen discrimen inter infamiam iuris, & infamiam facti seu popularem, quod illa non tantum repellit à dignitatibus & beneficiis acquirendis: sed priuat etiam quæsitis, sicuti colligitur ex cit. l. vn. C. de infamis lib. 10. & ex communi docet Couar. in pract. qq. c. 19. nu. 5. Syl. ver. infamia, num. 15. Mol. tract. 4. disp. 11. Armilla ver. infamia, num. 4. Quia sicut miles per contractam infamiam priuatur iure militari, vti habetur in l. 2. §. miles, ff. de his qui notantur infamia: ita multò magis miles spiritalis per infamiam priuatur iure Ecclesiastico, sicuti Gl. ibi argumentatur. Requiritur tamen sententia Iudicis ad executionem, sicuti Mol. ibid. notat nu. 3. Deinde debet id solum intelligi de dignitatibus: non de aliis minoribus beneficiis, quorum priuatio ipso iure non incurritur, admissione criminis infamis: cum id iure expressum non reperiatur: sed post Iudicis sententiam, sicuti docent Molina & Syl. ll. cc. Garcias par. 7. de benef. cap. 8. num. 37. & in simili Gloss. cap. vlt. verb. ex vi, de iure patron.

At verò infamia facti, quæ & popularis dici potest, repellit quidem ipso iure à dignitatibus & beneficiis acquirendis: non tamen priuat ante quæsitis: cum id nullo iure expressum sit: quare priuatio dignitatis à legitimo Superiore inferenda est, si crimen depositione dignum existat, sicuti ex communi docet Mol. l. c. Garcias, num. 35. Henr. q. lib. 14. c. 5. num. 3. lit. o. Auila p. 7. disp. 4. dub. 5. concl. 2. Vide etiam Abb. in c. omnipotens, de accusat. vbi tractat, vtrum accusatus de crimine eligi possit? Et respondet negatiuè, si infamia præcessit: sin minus, eligi quidem posse, nemalitosè accusatio pretendatur: sed interim promouendum seu instituendum non esse.

Sed nunquid electio vel collatio beneficii facta infami ipso iure irrita est? Respondeo si loquamur de infamia iuris, non est dubium collationem irritam esse: cum hic vnus sit ex effectibus sententiæ, seu à canone, seu ab homine inflictæ. Sin verò loquamur de infamia facti, vtrū videlicet electio, seu collatio beneficii facta cuicunque alii criminofus, seu moribus improbo, ipso iure nulla sit?

Negat Garcias p. 7. c. 8. n. 47. etiam si crimen sit depositione dignum. Alij verò affirmant Abb. cit. c. inter dilectos, num. 8. Ioan. Selua p. 3. de benef. q. 5. num. 31. Nau. c. 27. num. 204. & 251. Mol. cit. disp. 11. num. 3. Auila p. 7. disp. 4. d. 1. b. 7. §. ex dictis sequitur. Ratio est: Nam omnis irregularitas præcedens collationem beneficii, reddit ipsam subsequenter irritam, ait Nau. l. c. Atqui omnis infamia non solum iuris, sed etiam facti irregularitatem inducit, vt infra dicam. Ergo non tantum iuris, sed & facti infamia reddit subsequenter electionem, aut collationem beneficii irritam. Ergo respondeo, hanc posteriorem sententiam haud dubiè veram esse in foro externo: ita, vt Iudex electionem vel collationem factam moribus infami perinde cessare debeat; ac si à principio irrita fuisset: at verò in conscientie foro electum, vel prouisum, si vitæ emendatione infamiam, & consequenter irregularitatem amovere velit, non obligari ad resignandum beneficium. Cum enim talis criminofus nec à iure, nec ab homine condemnatus sit; non videtur illi tanta obligatio imponenda, si se ad beneficium habilem reddere velit. Idque colligitur ex eo, quod supra dictum est hac p. c. 5. n. 4. in fine, prouisum in irregularitate beneficium retinere posse, si se super sola irregularitate dispensationem impetraturum speret: ergò multò magis in proposito casu, si hanc minus propriè dictam irregularitatem ex vitæ improbitate ortam, vnà cum notoria pœnitentia abolere paratus sit.

Secundus effectus infamiæ est, quod ea seu iuris, seu facti sit, repellat hominem ab actibus legitimis, & publicis muneribus: cuiusmodi sunt Iudicis, assessoris, causarum patroni, accusatoris, testis, sicuti videre est causa 3. q. 7. ca. licet, ca. testimonium, de testibus, & alia iura apud Syl. ver. infamia, q. 8. P. Greg. Tholos. l. 31. syntag. c. 29. n. 7. & seqq. Mol. ci. disp. 11.

Tertius, & maximè huc pertinens infamiæ effectus est, quod ea seu iuris, seu facti sit, irregularitatem inducit. Quæ est communis sententia Doctorum, ex c. infames, 6. q. 1. c. qui in aliquo, d. 51. c. omnipotens, de accusat. Puros enim & immaculatos: non infamatos in clerum seu sortem Domini, & sacrum eius ministerium adoptari conuenit. Vide Scholasticos in 4. d. 25. vbi Richard. a. 6.

Restant duæ quæstiones: Prima. Vtrum infamia iuris & quæ inde nascitur irregularitas, contrahatur ob solam criminis admissionem, tamen si occultum maneat, seu in publicam notitiam non deueniat. Ità affirmat S. Ant. p. 3. ti. 28. c. 6. §. 7. Syl. ver. irregularitas q. 14. Suar. dif. 48. l. 1. n. 17. cum ait, quod talis qui occultè commisit crimen, cui infamia ipso iure annexa est, teneatur ab ordinibus tanquam irregularis, si cesset periculum se infamandi, & c. Contraria, eaque probabilior sententia est Glo. in c. inquisitionis, de accus. Abb. in c. ex tenore, de tempor. ordin. Cou. 3. resol. c. 3. n. 2. Nau. c. 27. n. 248. Coninex dif. 18. du. 7. n. 56. Henr. l. 13. c. 36. & l. 14. c. 5. n. 2. Auila p. 7. dif. 4. du. 7. concl. 1. qui etiam regulam tradunt ex cap. vlt. de tempor. ordin. Quod per nullum crimen occultum, excepto homicidio, adde tu violationem censuræ Ecclesiasticæ, irregularitas contrahitur.

Mihi verò ita respondendum videtur: Patratione criminis occulti, quod iure ipso vt infame dñatum est, infamia & quæ inde oriuntur impedimēta legalia contrahuntur fundamētaliter, & in radice; accedente verò publicatione, extra vel intra iudiciū, efficitur infamia formaliter. Prior pars inde cōstat: Quia hæc est virtus latæ sententiæ ipso iure, quod per eā ipsum factum damnatur. Posterior pars inde: Quia infamia essentialiter consistit in diminutione famæ: ergo pœna infamiæ, cū suis effectibus, cōpletur non potest incurri ante criminis publicationem. Publicato verò, seu euulgato crimine statim sine omni Iudicis sententia, infamia indelebilis, & propriè dicta irregularitas contrahitur, vt mox iterum dicam.

QVÆSTIO SECUNDA. Vtrum criminis infamia, &



que inde sequitur irregularitas, tollatur per pœnitentiam? Respondeo & dico I. Si crimen, quod ut infame à iure damnatum est, occultum fuit, & publicandum non putatur, criminofus, post actam pœnitentiam, sacros ordines accipere non prohibetur. Hanc suprà dixi esse probabiliorem, & benigniorem sententiam, sicuti etiam fatetur Garcias p. 7. c. 8. num. 19. Caterum, si quis existimet crimen infame, à se occultè commissum, in publicâ notitiam deuenturum esse, haud dubiè abstinere debet à susceptione ordinum, aut Ecclesiastici beneficij: nam alioquin ordinatus à Iudice deponetur, & collatio beneficij rescindetur, perinde atque si ab initio irrita fuisset, sicuti docet Suar. cit. sect. 1. n. 16.

Dico II. Infamia ipso iure, vel per Iudicis sententiam contracta, ob crimen notorium, non tollitur per pœnitentiam: sed per dispensationem Principis, cuius auctoritate infamia decreta fuit. Est communis sententia, quam explicat Gratianus super c. Euphemium, 2. quæst. 3. & probat ex Calixto Papa epist. 2. Ratio est: Qua talis infamia habet rationem pœnæ sententialis, quæ à legitimo Magistratu in perpetuum illata est: ergo tolli non potest, nisi ab eodem Magistratu. Nam eiusdem iurisdictionis est ligare & absoluerè: pœnam imponere & in integrum restituere. Ex quo sequitur, quod nec Magistratus Ecclesiasticus via ordinaria, & directâ possit iure civili infamem restituere in ordine ad effectus civiles, ut videlicet ad dignitates & actus legitimos admitti debeat: Neque vice versâ, Magistratus civilis possit infamem iure canonico, v. g. hæreticum, vel contrahentem cum duabus restituere in ordine ad effectus canonicos, ut videlicet ad ordines promoueri possit. Quod tamen limitat Suarez disp. 48. sect. 2. num. 10. Si infamia iure canonico directè ac speciatim decreta non sit: sed solum indirectè, quatenus omnes iure civili infames, etiam canonicè infames & irregulares censentur, (quod non deceat eos, qui à civilibus officijs repelluntur ad Ecclesiasticos ordines vel beneficia assumi) tunc ablata infamia civili per secularis Principis restitutionem, videtur etiam consequenter tolli inhabilitas seu irregularitas canonica.

Dico III. infamia facti, licet orta sit ex crimine enormi, & digno depositione, penitus tollitur per factum contrarium, id est, per publicam & constantem vitæ emendationem: sublata autem infamia, consequenter etiam cessat omnis inhabilitas, tum civilis, tum canonica. Sumitur ex c. testimonium, de testibus & attestat. vbi id docet Gl. & Innoc. & ex c. ferrum, d. 50. *Non debet deesse in eo, quod fuit, qui iam incipit esse, quod non fuit*, quæ sunt verba S. Greg. lib. 18. moral. c. 16. Ex c. nunquam, d. 56. vbi S. Chrysost. ait. *Ad meliora conuersum nequaquam prior vita commaculat*. Ex c. si duo, 35. q. 6. ibi, *infames effecti, donec ab incesti crimine desinant*. Eandemque sententiam docent Abb. in c. inquisitionis, num. 2. de accusat. & c. ex diligenti, num. 6. de simon. Syl. ver. infamia nu. 11. Sa numero 1. 10 Mol. tr. 4. disp. 7. in fine, & disp. 10. in princ. Auila p. 7. disp. 4. dub. 5. Henriq. lib. 14. c. 5. num. 3. Suarez disp. 48. sect. 2. num. 6. & 8. Nicol. Garcias p. 7. de benef. c. 8. num. 64. Co. minck disp. 18. dub. 7. concl. 3. Iulius Clarus lib. 5. sent. 5. vlt. q. 21. in fine n. 1. vbi cum Saliceto ait: Infamiam istam plenè purgari emendatione vitæ per triennium. Ratio huius doctrinæ est: *Quia cessante causa cessat effectus*, cap. cum cessante, de appellat. & *Per quas causas aliquid nascitur, per easdem dissoluitur*, c. 1. de regul. iuris.

Hinc colligitur primò, cum Garcia l. c. Ex infamia facti non oriri propriè & simpliciter dictam irregularitatem. Nam irregularitas est perpetua inhabilitas ad ordines accipiendos, donec dispensatione tollatur. Quamobrem regula generalis sit: *Impedimentum, quod absque dispensatione tollitur, seu ipso facto cessare potest, non est propriè irregularitas*, v. g. defectus ætatis, scientiæ, morum, &c.

Colligitur secundò; Sacerdotem publicum concubinarium, vel adulterum, post peractam pœnitentiam &

vitæ emendationem publicam, interposito saltem aliquo temporis spatio, sine dispensatione celebrare posse: quamuis contrarium senserit Nauar. cap. 25. numer. 73. & 77. quia existimauit, ex omni crimine notorio & depositione digno nasci irregularitatem simpliciter dictam, & indelebilem, sicuti idem docet cap. 27. numero 154. & 248.

Neque refert, quod S. Anton. part. 3. tit. 27. cap. 3. Syl. uestr. verb. concubiniarius, quæst. 5. Couarruu. Clem. si furiosus part. 1. §. 1. num. 5. existimant, Clericos concubinarios notorios suspensionem ab officio contrahere, quia ita significatur in cap. præter, distinct. 32. c. si qui sunt, distinct. 81. & c. vlt. de cohabit. Clericorum & mulierum. Nam suspensionem istam consuetudine sublatam esse, restantur Ioan. Gerson tract. de cognit. peccat. venial. & mortal. consider. 23. Medinalibro 1. instruct. cap. 11. §. 8. Sotus in 4. distinct. 1. quæst. 5. a. 6. circa 2. argum. Sairus lib. 4. c. 15. num. 24. Henriq. lib. 13. c. 36. Suarez de censur. disp. 31. sect. 4. Finellius casu referuato 11. num. 13. 15. & colligitur ex Trident. sess. 24. c. 14. de reform. vbi dicitur quod tales, postquam & alteram admonitionem, à beneficijs suspendi; & si adhuc se non emendauerint, omnino priuari debent: quamuis post manifestam vitæ emendationem cum eisdem dispensari possit, sicuti etiam habetur in c. at si Clerici, §. de adulteriis, de iudicijs. His adde: Licet iure antiquo fidelibus prohibitum fuerit, ne publici concubinarij Missam audiant, sicuti videre est in cit. c. si qui sunt, & c. nullus, c. præter, d. 32. vbi id Gratian. docet, & S. Th. 3. p. q. 82. a. 9. ad 3. & quodlib. 11. a. 8. Nau. c. 25. n. 80. hæc tamen prohibitio hodie post Extragagantem *Ad euitanda*, locum non habet, priusquam tales tanquam in sacris vitandis publicè denuntientur, sicuti annotauit Sotus loc. cit. Henr. lib. 9. cap. 25. n. 12. Suar. p. 3. r. 3. disp. 18. sect. 1. §. secundo est obseruandum, & colligitur ex c. vera, de cohabit. Clericorum, in fine, verb. quamdiu tolerantur.

Denique ex his facile colligitur, quid sentiendum sit de hæreticis, & apostatis, vtrum post pœnitentiam & absolutionem ad sacros ordines admitti possint? Dico enim primò: Si hæresis, vel apostasia occulta fuit: nihil ob stare videtur, quo minùs conuersi ordinentur. Ita probabiliter docent Sairus l. 7. c. 12. n. 16. Philarchus tom. 1. de offic. sacerdot. p. 1. lib. 4. c. 15. Henriq. lib. 14. c. 4. n. 6. Auila p. 7. disp. 4. dub. 2. Ratio est: Quia non propter hæresim & apostasiam secundum se: sed quatenus iuris infamiam annexam habent, irregularitas decreta videtur; quamuis contrarium significant Syl. ver. hæresis, quæst. 5. Nau. c. 27. n. 205. quando absolute aiunt, per hæresim irregularitatem incurri.

Dico II. Si hæresis vel apostasia notoria sit, impedit à susceptione ordinum, etiam post pœnitentiam & absolutionem. Est communis sententia ex c. Presbyteros, d. 50. c. 1. c. qui in qualibet, c. saluberrimum, l. q. 7. c. 2. §. hæretici, de hæreticis in 6. in quo decernitur, hæreticos eorumque fautores, & in hæresi decedentium filios, ac nepotes ad nullum Ecclesiasticum beneficium, vel publicum officiū admittendos esse: sunt igitur ipso iure infames consequentes etiam irregulares. Quod tamen non pauci Doctores intelligunt solum de liberis postea natis, quæ patens in hæresim lapsus est: qui enim ante nati hi ex infecta radice non procedunt: licet alij aliter sentiant, ut videlicet apud Cou. 2. resol. c. 18. n. 5. Iacob. Simancam de Cathol. institut. tit. 29. n. 22.

Notat verò Henriq. l. 14. c. 5. n. 4. hæreticorum liberos irregulares non esse ijs regionibus, in quibus nulla ipsis ob crimen paternum infamia aspersa est. Quare eadem ratione probabiliter defenditur consuetudo septentrionalium quarundam regionum, in quibus Episcopi ordinare solent ex hæresi ad Fidem Catholicam conuersos & absolutos: eo quod tales neque in civili foro à publicis dignitatibus & officijs repellantur: qua de re vide etiam Nau. l. 1. c. 1.



consil. 1. de constitut. q. 14. edit. 2. Illud verò certum esse debet, cum talibus ad Fidem Catholicam his regionibus reuerfis, dispensari posse per privilegium dispensandi super omnibus irregularitatibus, præter eas, quæ ex voluntario homicidio, mutilatione, bigamia, & natali defectu contractæ sunt.

## CAP. V.

## De irregularitate ex natalium defectu.

## SUMMARIUM.

1. *Illegitimè nati omnes irregulares sunt, etiam si defectus occultus sit.*
2. *Probabile est quòd Episcopus dispensare possit cum illegitimo occulto: oppositum tamen iuri conformius est.*
3. *Natus ex coniugato, post legitimam eius in sacris ordinationem, vel in Religione professionem, sine dispensatione ordinari non debet.*
4. *Cum expositis, quorum parentes ignorantur, Episcopus dispensare potest, & in sacris ordinatur.*

**F**ilij illegitimi omnes tum naturales, tum spurij irregulares sunt, canonici iuris constitutione c. 1. & 2. de filiis Presbyt. c. 1. eod. in 6. Quod introductum est partim in detestationem sceleris paterni: partim ob turpitudinis notam, quam filius ex tali natiuitate moraliter contrahere censetur: partim quia timetur, ne filius paternæ incontinentiæ imitator existat, teste Gl. in c. 2. de filiis Presbyt. in 6. ver. defectu, & videri potest Richard. in 4. d. 25. a. 5. quæst. 3. Nauar. c. 27. num. 69.

Sed dubitatur primò: An qui occultè se illegitimum esse nouit, ut tamen id probari nequeat, neque de ea re fama vulgata sit, sacros ordines sine dispensatione accipere possit? Ita affirmat Alph. à Castro lib. 2. de legè pœnali, c. ult. conclus. 3. Quia putat ex nullo facto aut crimine, etiam homicidio, si omnino occultum sit, ut probari non possit, suspensionis, aut irregularitatis pœnam contrahi. quod etiam tenuit Vincentius apud Angelum ver. homicidium, §. quæst. 1. arg. c. ex terrore, de tempor. ordinat. in quo tamen nihil aliud habetur, nisi quòd criminosus notorius propter infamiam ordinari nō possit: sin verò crimen occultum sit, post pœnitentiam repelli non debeat. Secundò argumentatur Castro: Si in casu homicidij, aut natalium defectus omnino occulti irregularitas incurreretur, nunc infamandus esset ille, aut parentes eius, pro quo dispensatio peteretur. Contraria verò sententia est communis, Nauar. c. 27. num. 201. Vgolin. de irregul. c. 44. §. 1. Gutierrez lib. 1. canon. qq. c. 13. num. 20. Auila part. 7. disp. 3. dub. 6. concl. 1. Couar. verò Clem. si furiosus, p. 2. §. 3. num. 4. in hac quæstione dubius mansit.

Mihi respondendum videtur primò: Quòd mater sciens occultè filiū esse illegitimum, non solum permittere, sed etiam suadere ipsi possit, ut ordines suscipiat. Quia suadet filio, quod per se & suapte natura malum nō est, quodque ab ipso, laborante inuincibili impedimenti ignorantia, absque peccato fieri potest. Secundò: Si filius sciat, aut credat se illegitimum esse, atque ex vna parte grauis causa urgeat, cur sacros ordines suscipiat: ex altera verò parte, si dispensationem peteret, grauiter se infamaret, saltem apud Papam vel Episcopum, tunc sine dispensatione ordinari potest: idque probare videtur ratio Caltri. Exemplum habes: Si primogenitus Regis occultè sciens se legitimum non esse, hæreditatem fratri legitimè nato, & ad regnum idoneo non possit aliter relinquere quàm si fiat Cardinalis, Diaconus, aut Presbyter: non teneretur se infamare apud Summum Pontificem.

Tertio: Si nulla necessitas cogat sacrum ordinem suscipere: tunc illegitimus occultus abstinere cogitur, si super impedimēto suo dispensationem petere nolit. Quæ

est communis doctrina: Quia iura absolutè significant illegitimos irregulares esse, nihil distinguendo inter occultum & notorium: vbi autem ius non distinguit, neque nos distinguere debemus. Vide quæ dicam lib. 3. tract. 3. de iustit. p. 3. c. 14. q. 1.

Dubitatur secundò: Vtrum Episcopus super irregularitate ex occulto natalium defectu dispensare possit, etiam ad ordines sacros, & beneficium curatum? Ita affirmat Auila part. 7. disput. 3. dub. 7. Quia hæc irregularitas prouenit ex crimine parentum: quod cum occultum est, sæpe non expedit ad Sedem Apostolicam referri: quæ causa esse videtur, cur dispensatio in inhabilitatibus ex occulto crimine, præter homicidium, Episcopis commissa fuerit. Accedit, quòd licet dispensatio in casu particulari facienda strictæ interpretationis esse debeat: tamen dispensandi facultas, cum sit gratia & beneficium Principis, latè interpretanda est, argum. c. ult. de simonia, iuncta Gl. ver. Abbates.

Hæc sententia probabilis est: sed contraria de iure probabilior, quam docuit Nauar. c. 27. num. 194. in fine, Suarez disput. 50. sect. 5. num. 5. Vgolin. tract. de irregul. cap. 44. §. 2. Nam hæc irregularitas proximè ac formaliter non est ex crimine; sed ex mortali macula & nota ipsius personæ. Accedit, quòd etiam sine vlla culpa parentum contrahi possit, ut si proles suscepta sit ex personis in amentia copulatis, sicuti notauit Coninck tom. 2. disp. 18. dub. 14. concl. 5. Si tamen bona fide aliquis ordinatus fuerat, cognito deinde natalium defectu, haud dubiè Episcopus dispensare potest, ut in susceptis ministret, sicuti notauit Henric. lib. 14. c. 8. num. 16. lit. h. Auila part. 7. disput. 3. dub. 6. notab. 6. Imò fortasse, etiam si mala fide ordines accepit, occultum natalium defectum subicendo, sicuti colligi videtur ex cap. nisi cum pridem, §. personæ de renunt. *Licet irregularitatem non potueris subicere: si tamen & culpa latet, & causa, cum eo qui laudabiliter suum impleuit officium (iniuncta sibi pœnitentia salutari) potest non minus utiliter, quàm misericorditer dispensari.*

Tertio dubitatur de susceptis ex vero coniugio, sed parentibus illegitimè coeuntibus, videlicet post editum castitatis votum? Respondeo: Tali modo susceptos legitimis habendos esse: nisi certa aliqua lege aut canone constet, eos in ordine ad aliquem effectum pro illegitimis reputari. Huiusmodi autem canon vnicus extare videtur in cap. literas, de filiis Presbyt. Quod natus ex coniugato, post legitimam eius in sacris ordinationem, vel in religione professionem, ad sacros ordines sine Papæ dispensatione admitti non debeat, sicut ex communiore docet Suarez disput. 50. sect. 3. num. 5. Henriquez lib. 11. cap. 20. num. 1. quamuis contrarium visum sit Sanchez lib. 9. disp. 38. num. 7.

Quartò dubitatur de expositis, quorum parentes ignorantur, vtrum illegitimi & consequenter irregulares censendi sint? Aliqui affirmant apud Suarez tom. 5. disp. 50. sect. 4. num. 4. Couar. in Clem. si furiosus, p. 1. initio, num. 9. Alii verò apud eosdem negant: Quia in dubijs benigniora præferenda sunt, reg. 26. in 6. Et, Qui non demonstratur malus indignus, interim præsumendus est bonus ac dignus, iuxta c. ult. de præsumpt. Contingere autem interdum, ut propter paupertatem, vel similem causam filii legitimi exponantur, præter alia ostendit exemplo Moylis cap. 2. Exodi.

Respondeo & dico I. Expositi filij, quorum parentes ignorantur, ad ordines sine dispensatione promoueri non solent, nec facile debent: cum vehemens suspicio sit, eos ex illegitimo toro natos esse. Neque negari potest, aliquam exinde ipsis maculam aspergi, ob quam meritò ab ordinibus repelluntur. Hæc est communis apud Couar. l. c. Hugol. cit. c. 44. §. 7.

Dico II. Episcopus tamen cum expositis dispensare potest, ut ad ordines etiam sacros, & beneficia curata



promouéantur. Ita Couar. & Suárez II. cc. Henriq. lib. 11. c. 20. num. 2. lit. l. & lib. 14. c. 8. num. 10. lit. L. Auila p. 7. disp. 3. dub. 9. Quia licet Episcopis iure ordinario concessum non sit dispensare in irregularitate, præsertim notoria: potest tamen dispensare in casu dubio, qualis iste est.

Dico III. Si expositus ad sacros ordines sine dispensatione admissus fuit, securè in susceptis ministrare potest. Ita Suárez & Auila II. cc. Cum enim ordinibus initiatus habeat ius quæsitum, melior dubio est conditio possidentis.

## CAP. VI.

## De irregularitate ex bigamia.

## S V M M A R I V M.

- 1 Irregularitas bigamia est ob defectum Sacramenti.
- 2 Bigamia vera & propriè dicta est, si quis cum duobus legitimis uxoribus matrimonium consummauit.
- 3 Qui viduam, vel ab altero corruptam in matrimonium accepit, interpretatiue bigamus est.
- 4 Qui accessit ad uxorem suam, postquam ab altero cognita est, bigamus censetur: ideoque ordinari non potest.
- 5 Clericus in sacris, qui antea fuerat coniugatus, si in Clericatu uxorem inualide ducat, & cognoscat, efficitur irregularis, tanquam sit bigamus.
- 6 Si religiosus professus, vel Clericus in sacris uxorem ducat, irregularitatem contrahit: quamuis dispensabilem ab Episcopo.
- 7 Episcopus cum bigamo vero, aut interpretatiue dispensare non potest, ad ordines seu maiores, seu minores accipiendos.
- 8 Bigamia non tollitur per baptismum.
- 9 Neque infamia civilis per Baptismum aboletur: sed infamia facti, etiam ea, quæ ex iniusto homicidio, videtur auferri.

**H**æc irregularitas dici solet ex defectu Sacramenti, c. debitum, de bigamis, c. acutiùs d. 26. Nam matrimonium consummatum in lege noua significat coniunctionem Christicum Ecclesia per carnis assumptionem, teste Apost. ad Ephes. 5. Hæc autem significatio plenior ac perfectior est in matrimonio cum vna sola, eaque virgine: cum etiam Filius Dei copularet sibi Ecclesiam vnâ, ab alio non assumptam. Non ita perfecta, sed quodammodo deficiens huius mysterij significatio cernitur in matrimonio cum uxore secunda, vel cum vidua, aut corrupta, sicuti interpretatur etiam S. Augustinus lib. de bono coniugali, cap. 18.

Gl. in c. 2. de bigamis, Syl. ver. bigamia, q. 2. Nau. c. 27. num. 195. Suárez disp. 49. sect. 1. princ. Auila p. 7. disput. 8. dub. 1. notab. 2. & alij communiter tres afferunt species bigamiæ irregularitatem inducentis: I. est vera & propriè dicta, si vir cum duabus legitimis uxoribus matrimonium consummauit: quam ob causam irregularem fieri, & ad ordines assumendum non esse, constat ex Apostolica traditione, quam S. Paulus expressit, 1. ad Timoth. 3. Oportet Episcopum vnus uxoris virum esse: Diaconi sint vnus uxoris viri. Quibus verbis vetat Apostolus, ne is qui plusquam vnâ uxorem habuit, Episcopus, Presbyter, aut Diaconus ordinetur: quomodo hunc locum Patres omnes, & vniuersa semper Ecclesia intellexit, vti videre est canon. Apost. 16. & apud Tertullian. lib. 2. ad uxorem, Concil. Roman. sub Siricio, cap. 9. Concil. 4. Carthagin. canon. 69. S. Ambrosium Epist. 82. ad Ecclesiam Vercellensem, vbi addit; Patres Concilij Nicæni statuissè, Neque Clericum quemquam debere esse, qui secunda coniugia sortitus sit. S. Epiphani. hæres. 59. contra Catharos, Innocentium Papam Epistol. 22. ad Episcopum Macedon. c. 1. Cælestin. 1. Epistol. ad Episcopum Galat. c. 6. Concil. Roman. sub Hilario, cap. 2. Gelasium Papam Epistol. 1. cap. 24. Lucium III. in cap. 2. & Cælestin. III. in c. 3. de bigamis

non ordinandis. Porro si quis cum vna sola consummauit, cum altera verò priore, aut posteriore verè contraxit, sed non consummauit, bigamiæ aut irregularis haud efficitur. Ratio est, quæ traditur ab Innocentio III. in cap. debitum, eodem tit. quia coniugium illud, quod non est commixtione corporum consummatum, non pertinet ad illud coniugium designandum, quod inter Christum & Ecclesiam per carnis mysterium est contractum. Quare id vniuersim in hac materia notari debet, matrimonium seu viri, seu fœminæ, nunquam afferre causam bigamiæ, aut irregularitatis, nisi consummatum sit: quod semel annotasse sufficiat.

Altera est bigamia interpretatiua, quæ secundum iuris interpretationem, fictionemve, bigamia censetur, ab ordinibus repellens. Eius tres modi afferri solent, quorum duo priores extra controuersiam sunt: I. Qui viduam, vel ab altero corruptam duxit, censetur bigamus & irregularis, sicuti de vidua habetur canon. Apost. 17. aliàs 18. cap. si quis viduam, distinct. 50. c. præcipimus, distinct. 34. quod est Gregor. I. lib. 2. Epistol. 25. ad Scyllacinum, aliàs Squilatinum Episcopum, c. debitum, & c. vlt. de bigamis. In c. verò curandum, d. 34. quod est. Hilarij Papæ in concil. Rom. generatim cauetur, ne ad sacros ordines quisquam, qui uxorem non virginem duxit, aspiret. Et apud Innoc. I. epist. 22. ad Episc. Macedoniæ, c. 1. Nos omnesque per Orientem, & Occidentem Ecclesias nouerit vestra dilectio, nec ad vltimum Ecclesiastici ordinis locum tales (qui viduam, vel eiectam duxerunt) assumere, & si reperi fuerint, submouere. Et Concil. Carthag. 4. can. 69. sub Anastasio: Simili sententia (suspensionis ab officio ordinandi) subiacebit Episcopus, si sciens ordinauerit Clericum, cum qui viduam, aut repudiatam uxorem habuit, aut secundam. Ratio peti debet ex defectu sacramenti, sicuti indicat Innoc. III. in cit. c. debitum: quia tale matrimonium non perfectam gerit similitudinem Christi copulantis sibi Ecclesiam soli desponsatam, & ab altero nom assumptam.

Exinde colligitur primò: Nihil referre, siue mulier volens corrupta fuerit, siue per vim: Item siue vir sciuerit esse viduam, vel aliter corruptam; siue ignorarit: quæ est communis sententia, contra Sa verb. irregularitas ex bigamia, num. 2. & alios apud Sanchez lib. 7. disput. 84. num. 15. Quia hæc irregularitas non oritur ex culpa, aut aliqua infamia personæ: sed ex defectu sacramenti. Vide S. Tom. in 4. distinct. 27. quæst. 1. a. 3. quæst. 1. Syluest. verb. bigamia, num. 2. Couar. Clem. si furiosus, p. 1. c. 2. §. 3. Sanchez num. 9.

Secundò intelligitur ratio, cur vir bigamiam interpretatiuam non incurrat, etsi ante matrimonium cum vna sæpius fornicatus sit, aut plures concubinas habuerit, sicuti docent Doctores in cap. quia circa, de bigamis. Quia tale matrimonium non patitur defectum sacramenti, quippe quod erga mulierem tendit, postulans vt ea pluribus viris cognita seu assumpta non sit: quare vbi reperitur maritalis coniunctio viri cum vnica ab alio carnaliter non cognita, consistit perfecta significatio Sacramenti.

Tertiò intelligitur; multò minùs fieri irregularem virum, si duxit mulierem non ab alio, quàm à se ipso ante matrimonium cognitam.

Alter modus bigamiæ interpretatiuæ est, si quis accessit ad uxorem propriam, posteaquam ab altero tempore matrimonij cognita fuit, cap. si cuius uxorem, cap. si laici, distinct. 34. Ratio est defectus Sacramenti: quia talis maritalis coniunctio desinit habere perfectam similitudinem Christi cum Ecclesia. Quare nihil refert, seu mulier volens, seu per vim cognita sit: item siue vir adulterium uxoris sciuerit, siue ignorauerit, sicuti docent Couarruu. Clem. si furiosus, part. 1. §. 2. num. 3. Nauar. cap. 27. num. 195. Syluest. ver. bigamia, q. 3. Auila part. 7. disput. 8. dub. 1. §. tertio modo, Suárez disp. 49. sect. 3. num. 16.



num. 16. Simon Maiolus lib. 1. c. 33. & colligitur ex c. si cuius uxorem, dist. 34.

Tertius modus bigamiae interpretatiua à Doctoribus communiter affertur: Si quis post vnam legitimam uxorem carnaliter cognitam: aliam, priore viuente aut mortua, maritali affectu cognoscat, cum qua inualidè propter impedimentum nuptias contraxerat, censi bigamum & irregularem: idque sumunt ex cap. nuper. de bigamis: vbi habetur: Eum qui mortua uxore sacrum ordinem accepit, & postea in Clericatu secundam mulierem sibi matrimonialiter coniunxit, licet in veritate bigamus non sit, tamen quasi talis sit, pro irregulari habendum: non propter Sacramenti defectum: sed propter affectum intentionis, cum opere subsecuto. Existimant autem Doctores, hanc responsionem tantum exemplariter datam de Clerico in sacris constituto: esse autem intelligendam de omnibus etiam laicis: si cum vna validè & postea cum altera inualidè matrimonium contrahant, consumunt, tanquam bigamos à sacris ordinibus repelli.

Porò dubitant Doctores primò: Si priùs aliquis inualidè cum vna contraxit, postea cum altera validè: vtrum contrahatur bigamia interpretatiua & irregularitas? Negat Henriquez lib. 11. cap. 6. num. 9. in comment. lit. y. Sed affirmat Auila cit. dub. 1. notan. 2. Sanch. lib. 7. de matrim. disp. 84. n. 5. & alij plerique.

Secundò dubitant: Si vtrumque matrimonium inualidè contractum fuit, vtrum irregularitas oriatur? Negat Henriquez Auila ll. cc. Affirmant verò Nauar. num. 195. Suarez disp. 49. sect. 2. num. 11. Sanchez num. 3. & alij apud eundem.

Tertiò dubitant: Si quis contrahat cum altera simulate vtrum bigamia interpretatiua, & c. contrahatur? Negat Henriq. cit. num. 9. lit. y. & alij apud Suarez cit. sect. 2. n. 3. Sed affirmat Suar. ibid. n. 10. & alij plerique.

Quartò dubitant: Si quis bona fide, nescius impedimenti cum altera contraxit, vtrum tanquam bigamus, & irregularis fiat? Negat cum alijs quibusdam Sanchez cit. dist. 84. num. 6. ratus hanc interpretatiuam bigamiam ratione culpæ introductam esse. Sed alij communiter affirmant apud eundem Sanchez & Suarez sect. 2. n. 8.

Quintò dubitant: Vtrum contrahens (& consummans id enim suprà monui semper subintelligendum) inualidè cum vidua, vel corrupta, bigamiam interpretatiuam, & irregularitatem incurrat? Negat Nauar. cit. num. 195. Quia id nullo iure expressum est: irregularitas autem non incurritur, nisi in casibus iure expressis: quare ita in sacra pœnitentiaria conclusum fuisse, ait Nauar. quem sequitur Henriquez cit. num. 9. in fine, Auila dub. 2. Sanchez num. 11. Sed contrarium docet Couar. Clem. si fariosus, part. 1. §. 2. num. 2. Suarez sect. 3. num. 3. qui aiunt esse communem sententiam.

Mihi in hac sententiarum varietate duo dicenda videntur: Primum. Nullam harum irregularitatum ex iure canonico satis ostendi posse, sicuti expresse docent Aegidius Coninck disp. 18. dub. 11. num. 100. Henriquez lib. 12. cap. 6. num. 9. in comment. lit. y. vbi alios citat, sicuti & Suarez disp. 49. sect. 2. n. 4. Nam c. nuper, & c. vlt. de bigamis (ex quibus hæ irregularitates desumuntur) agunt de clerico in sacris constituto, ducente in clericatu uxorem, cum ante clericatum coniugatus fuisset: talis ijs iuribus dicitur indispensabilis tanquam bigamus sit, licet in veritate non sit bigamus: cum in eo non defectu sacramenti cernatur, sed intentio cum opere subsecuto. De laicis autem inualidè contrahentibus, quod tanquam bigami repellendi sint, nusquam exprimitur. Neque licet nobis ad eos extensionem facere: cum versetur in materia strictæ interpretationis: & valde credibile sit, Innoc. III. dictis responsionibus specialiter punire voluisse clericorum temeritatem: cum dicat, non esse irregulares propter defectum sacramenti, sed propter prauam

intentionem cum opere secuto: sicuti etiam infamia notatur, qui duas simul uxores habet, & Presbyter punitur qui non legalibus nuptijs detinetur. Quare satis ex textu intelligitur, non fuisse propositum Innocentio Papa, nouum aliquod ius introducere: sed quod antiquis canonibus cõforme esset, decernere. Quod autem matrimonium inualidè contractum, siue cum altera uxore, siue cum vtraque, siue cum vidua, irregularitatem tanquam ex bigamia inducat, id iuri conforme non est: quia non præstat impedimentum, quod de iure non sortitur effectum, reg. 52. num. 6.

Alterum. Cum Doctores communiter consentiant, irregularitatem contrahi, tanquam bigamiae, si laicus post primum matrimonium aliam, seu priore viuente seu mortua, seriò & non simulate ducat, conscius impedimenti: hæc sententia in praxi sequenda est, iuxta ea, quæ dixi suprà cap. 1. n. 6. censuras & irregularitates, licet iure satis expresse non sint, posse tamen per generalem Ecclesiæ consuetudinem, consensu Doctorum introductam, vim obtinere. In alijs verò casibus, qui inter Doctores dubij & controuersi sunt, non arbitror irregularitatem in praxi timendam esse.

Tertia afferri solet bigamia similitudinaria: Si quis post professionem in religione matrimonium contrahat & consummet, quamuis cum virgine: is enim priorem fidem Christo datam irritam faciens, & cum muliere matrimonialiter se coniungens, quasi bigamus, ideoque irregularis censetur. Ita colligunt Doctores apud Sanchez lib. 7. disp. 85. n. 8. ex c. quotquot, 27. q. 2. quod est Concil. Ancyran c. 18. aliàs 19. Quamuis, vt Henriq. notauit lib. 12. c. 6. n. 10. in comment. lit. h. ibi sermo esse videatur de virginibus Deo sacratis, quæ si post Christum, cui se spiritualiter desponsarunt, alteri viro carnali nubant quasi *Hyænos*, & adulteræ habentur: de irregularitate autem nulla prorsus ibi mentio fit. Nihilominus communis Doctorum sententia, & praxis ac traditio Ecclesiæ, quæ est optima canonum antiquorum interpres, Religiosos, ob matrimonium illegitimè contractum, & cõsummatum, irregularitatem incurrere; quamuis, dispensabilem ab Episcopo, vel Prælato Ordinis exempto, sicuti docet Suarez disp. 49. c. 6. n. 7. & in fine, Auila p. 7. disp. 8. dub. 4. & alij.

Sed quid de clericis in sacris? De his enim maius dubium est inter Doctores, vtrum similitudinariæ bigamiae irregularitatem contrahant. Ad quod respondeo & dico I. Si clericus in sacris uxorem viduam, vel si ante clericatum coniugatus fuerat, quamcunque alteram in clericatu ducat, tanquam bigamus irregularitatem contrahit. Ita habetur in c. nuper, & c. vlt. de bigamis, vbi Gl. marginalis in cit. c. nuper, ver. *tanquam* dictam bigamiam inter similitudinarias numerat. Hoc tanquam inquit, non est expressum veritatis: sed similitudinarium.

Dico II. clericus in sacris, qui antea uxorem non habuerat, contrahat matrimonium cum virgine, irregularitatem contrahit: licet non bigamiae similitudinariæ. Prior pars est communis, & aperte sumitur ex c. 1. Qui clerici, vel vouentes, & c. sanè Sacerdotes, de cler. coniugatis. Quibus tamen locis adiungitur, Episcopum cõtali, si post longam pœnitentiam, & laudabilem vitam continens fuerit, dispensare posse, vt officio restituatur: imò etiam ad superiorem ordinem ascendat, quod etiam vt suprà dixi, de Religioso intelligi debet: nam hæ duæ irregularitates ex contracto matrimonio à clerico in sacris, & Religioso à DD. æquiparantur. Posterior autem pars inde colligi videtur, quod in titulis decretalium, quibus de matrimonio à clericis illegitimè contracto agitur, nulla vnquam bigamiae mentio fiat. Accedit, quod Innoc. III. in cit. c. nuper, & cit. vlt. agens de bigamia, in qua nullus etiam est sacramenti defectus: ait tamen, in ea dispensari non esse licitum, cum ergo in irregularitate contracti matrimonij à clerico in sacris, qui antea coniu-



gatus non fuerat, Episcopo dispensare liceat: sequitur non esse hanc irregularitatem bigamiæ similitudinariæ.

7 Existimatur etiam S. Th. in 4. d. 27. q. 3. a. 3. Syluest. ver. bigamia, q. 7. Auila cit. dub. 4. Episcopum cum bigamo quocunque dispensare posse ad ordines accipiendos. Id tamen Nauar. c. 27. n. 197. probabilius negat: cum id facri canones prohibeant, sicuti constat ex Innocentio I. epist. 22. & alijs locis supra citatis, & ex c. 1. de bigamis, in 6. & c. nuper, c. ult. extra eod. Ait verò Nauar. dispensari posse cum bigamo, vt in ordinibus minoribus, ante bigamiam susceptis, ministrare possit; quod verum est, si loquamur de nuda ministerij executione: Imò tunc dispensatione opus non est: cum consuetudo Ecclesiarum obtinuerit, vt ad ministeria ordinum minorum quoscunque etiam laicos adhibere liceat. Verum, vt bigamo conferatur officium, vel beneficium Ecclesiasticum, cui ordinum minorum ministerium per se annexum sit, ideòque clericalibus priuilegijs gaudeat: id iure communi licitum non est, sicuti constat ex cit. c. 1. & Trident. s. 23. cap. 17. de reform. & notauit Suarez disp. 49. s. 5. n. 4. & s. 6. n. 5. qui tamen monet, sententiam S. Thomæ seruari posse, vbi vsu recepta est.

8 Denique dicendum est, bigamum, etsi postea Baptismum accipiat, ordinari non posse. Ratio est, quam S. August. affert lib. de bono coniugij, cap. 8. relatus in c. acutiùs. d. 26. Quia de sacramento agitur non de peccato: *In baptismo autem culpa dimitti potest, lex aboleri non potest*, ait S. Ambros. l. 1. de offic. c. ult. relatus in c. vna, ead. d. Debet autem hæc doctrina intelligi non tantum, si quis ante baptismum vnam, & post baptismum alteram vxorem duxit, bigamum & irregularem fieri, sicuti docet S. August. & Innocent. locis citatis: sed etiam si quis ante baptismum vtramque, vel vnam viduam duxerat, sicuti expresse docent Episcopi in Concil. Valentino sub Damaso, cap. 1. Innoc. I. Epist. ad victricium Rhotomag. Episc. cap. 5. relatus à Gratiano d. 34. *Si quis viduam, licet laicus, duxit uxorem, siue ante baptismum, siue post baptismum, non admittatur ad clerum. In baptismo enim crimina dimittuntur, non acceptæ uxoris consortium relaxatur. Et cap. 6. Ne is, qui secundam duxit uxorem, clericus fiat: Quia in baptismo peccata remittuntur, non acceptatum uxorum numerus aboletur.* Et S. Ambros. in cit. c. ult. cum dixisset: *Plerisque mirum videtur, cur etiam ante baptismum iterato coniugio ad electionem muneris, & prerogatiuam ordinationis impedimenta generentur*; duas rationes subiungit: Prima, *Quod culpa est, in baptismo relaxatur: quod legis est, in coniugio non soluitur.* Ecce prima ratio, quia matrimonium, (abstrahendo etiam à baptismo) secundum primæuam institutionem, sacram significationem gerit Christi cum Ecclesia, vt dicam lib. 5. tr. ult. p. 2. c. 1. n. 2. & p. 3. c. 6. n. 2. à qua significatione aliquo modo deficit bigamia. Altera ratio Ambrosij est: *Quomodo potest hortator esse viduitatis, qui ipse coniugia frequentauerit: Quamuis contrarium senserit S. Hieron. epist. 83. ad Oceanum, cuius sententiam defendit Maior in 4. d. 27. q. 6. Eum, qui ante baptismum duas uxores, vel viduam duxerat, clericum ordinari posse. quod etiam indicat Gennadius de Eccles. dogmat. c. 72. relatus in c. 2. d. 33. Idemque colligi videtur ex can. 16. alias 17. Apostol. Qui post baptismum duobus coniugijs fuerit implicatus, &c. Quare aliqui existimant, in primitiua Ecclesia tales bigamos fuisse ordinatos, sed postea irregularitatem bigamiæ extensam fuisse. Vide Suar. s. 6. n. 15.*

9 Porro, exinde eadem ratione colligitur; Infamiam civilem in baptismo non aboleri. Quare, si Iudæus v. g. furci crimen condemnatus, & virgis cæsus, baptismum suscipiat, clericus ordinari non potest, nisi à Principe prius famæ restituatur, sicuti notat Suarez disp. 48. s. 2. num. 12. Eademque est ratio de natalium defectu, vt docet Syl. ver. baptismus, 6. n. 2. Sairus lib. 7. c. 13. n. 2. Infamia autem facti, orta v. g. ex iniustis homicidijs,

adulterijs, per baptismum aufertur. Atque ita intelligenda est Gl. c. sine pœnitentia, d. 4. de consecrat. quam sequitur Abb. gaudemus, num. 16. de diuortijs, Syl. 1. c. Henric. lib. 14. cap. 17. §. 2. Sairus loc. cit. Ratio est, Quia baptismo non solum tolluntur peccata; sed etiam morales maculæ seu deformitates, quæ præcisè ex peccato contractæ sunt, vt etiam Innocent. annotauit in cit. c. gaudemus. Quamquam, si delicto ante baptismum contracto, persona aliqua vel Communitas læsa fuerat, obligatio satisfaciendi per baptismum non extinguitur; adeo quidem, vt Iudæus v. g. propter furta, vel homicidia ante baptismum commissa, post baptismum accusari, atque puniri possit, sicuti docent Innocent. & Hostiensis in cit. c. gaudemus, Henricus Gandauensis quodlib. 14. quæst. 15. Sin verò peccatum ante baptismum commissum duntaxat in Dei iniuriam cedat: Videlicet Iudæus sacram hostiam cultro sacrilegè conscidit; exinde mox sanguis profluxit: quo ille miraculo commotus, Fidem Christianam atque baptismum sponte petiuit, ac impetrauit: talem hominem non esse propter commissum facinus pœna aliqua afficiendum, valde probabiliter resoluit Henricus cit. q. 15. & significant Hostiensis & Innocentius cit. loco.

Sed & istud plerique Doctores affirmant, Henricus quodlib. 6. quæst. 20. Abbas, Syluester, Henric. Sairus ll. cc. Auila part. 7. disp. 10. dub. 2. Defectum lenitatis, contractum ex homicidio iusto à milite, Iudice & c. per susceptionem baptismi deleri. vt talis ex hoc capite à clericali non impediatur, sicuti colligitur ex c. si quis viduam, distinct. 50. licet contrarium sentiat Innocent. in cit. c. gaudemus, & alij apud Gl. in cit. c. si quis viduam. Ratio autem probabilioris doctrinæ est: Quia homo per baptismum quasi in alterum virum mutari, Christi que tanquam agni mansuetudinem induere censetur.

## CAP. VII.

## De irregularitate ex corporis vitio.

## S V M M A R I V M.

- 1 *Omni defectus corporis, qui vel congruum ordinis exercitium impedit, vel notabilem deformitatem adfert, irregularitatem inducit.*
- 2 *Vnius oculi, etiam sinistri, priuatio, sine notabili deformitate, irregularem non efficit.*
- 3 *Cum Lunaticus, arreptus, &c. si plenè conualuisse videantur, Episcopus dispensare potest.*
- 4 *Claudus irregularis non est, nisi magna sit gressus deformitas.*
- 5 *Qui sibi ipsi membrum, vel partem membri per iniquitatem amputat, vel amputari iubet, irregularis efficitur.*
- 6 *In dubio, an defectus corporis sit, notabilis & irregularitatem inducens, ad Ordinarium pertinet indicare.*

**O**Mnis defectus corporis, qui vel congruum exercitium ordinis impedit, vel notabilem deformitatem aut horrorem adfert, irregularitatem inducit, sicuti constat ex tit. decr. de corpore vitiat, c. presbyterum, de clerico ægrotante. Ex priore capite impediti congrui exercitij, irregularis est, cui brachium vel manus deest, aut manca est, c. exposuisti, de corp. vitiat: vel cui digitus abest ad frangendam & eleuandam hostiam necessarius, videlicet pollex, aut index, c. ult. eod. tit. Deinde cæcus, surdus, vel gradiendi, aut standi facultate destitutus, sicut habetur can. 77. Apost. Et de surdo videri potest Nauar. lib. 1. consil. 7. & 8. de corp. vitiat, edit. 2. vbi ait: Eum, qui post legitimam ordinationem omnino surdus factus est, secretò sine ministro respondente celebrare posse. Præterea manus, qui ita statura paruus est, vt brachia attollere non possit, quatenus necesse est ad altaris ministerium.

Expo-



Ex posteriore capite notabilis deformitatis, irregularis est, cui aures vel nares abscissæ sunt, sicuti ex communi Nau. c. 27. n. 223. Nisi aurium deformitas capillatura tegi possit, sicuti notat Auila p. 7. disp. 3. dub. 1. §. sequitur secundò Coninck disp. 38. dub. 13. n. 108. Præterea vnipes, vel qui faciem vstulatam, maculatam, vel gibbum valde deformem habet, sicuti tradit Nau. n. 199. Mol. tr. 3. disp. 70. Auila cit. dub. 1. ex c. 1. d. 36. Item Hermaphroditus ad sexum virilem magis inclinans, cum sit monstrum, sicut docet Nau. n. 203. Suar. disp. 51. f. 2. n. 2. Si autem ad sexum fœmineum magis accedat, characteris etiam incapax est, argum. l. quæritur, ff. de statu hominum. Idemque simili ratione dicendum de professione Religionis, nullius valoris esse, si inter viros fiat ab hermaphrodito, in quo potentia muliebris præualet, sicuti docet Nauar. lib. 3. consil. 47. de regul. edit. 2. arg. l. quæritur, ff. de statu hominum.

- 2 Irregularis quoque est, qui oculi dextri vel sinistri facultate cum notabili deformitate priuatus est, sicuti constat ex c. vlt. d. 55. Sed etsi notabilis deformitas non appareat, oratio tamen oculi sinistri, quem & canonicum appellant, irregularitatem conciliat: nisi oculus dexter tali polleat virtute, vt sine deformi faciei conuersione, canon legi possit: ad quam rem inseruire etiam potest libri accommodatio: qua de re Nauar. cit. n. 199. Auila cit. dub. 1. §. hinc sequitur primò, Mol. tr. 3. disp. 70. Sa ver. irregul. ex corporis defectu, n. 3. Suarez disp. 51. f. 2. num. 15.

Ex utroque verò capite irregulares sunt leprosus, paraliticus, phreneticus, amens, arreptitius, morbo caducolaborans. Imò qui in veram, stabilem, seu habitualementiam incidit, etsi conualuisse videatur, ordinari non solet, sicuti notat Gratianus in c. vlt. 15. q. 1. Nau. c. 203. Suarez disp. 51. f. 1. n. 4. Idemque sentiendum de Epileptico, seu morbum caducum passio, sicuti constat ex c. maritum, & tota d. 33. Ratio est, quia tales nunquam perfectè sani creduntur.

- 3 Veruntamen, si integrè conualuisse videantur, (quod Prælatus iudicio relinquitur) qui antè ordinati erant ad celebrationem admitti possunt, sicuti ex communi docet S. Anton. p. 3. tit. 28. cap. 5. in fine, Syl. ver. corpore vitiatus, q. 8. Nau. n. 203. Suar. f. 1. num. 5. Henriq. lib. 14. c. 8. n. 9. Sacerdos quoque, si in lepram incidit, vbi sine scâdalo priuatim potest celebrare, non est prohibendus, sicuti colligitur ex c. de rectoribus, & c. tua, de clerico ægrot. & notat Syl. q. 7. Sa n. 3. De epileptico quoque tradit S. Anton. l. c. Syl. q. 8. Nauar. num. 203. Mol. cit. disp. 70. n. 12. Henriq. c. 8. n. 8. & in Gl. lit. o. Auila dub. 4. conclus. 1. Si rarò cadat, & spumas ore non euomat, priuatim celebrare posse, adiuncto ei socio sacerdote, qui missam prosequi posset, si alter deficeret, iuxta c. illud, & sequet. 7. q. 1. c. ex literis, 7. q. 2. Idemque videntur sentire de furioso, aut Lunatico, si non ex omni parte curatus, constantia tamen lucis interualla habeat. Arreptitius verò seu à dæmone possessus ad celebrationem admitti non debet: quamuis Episcopus, postquam is plenè à dæmone liberatus videtur, dispensare potest, secundum Syl. q. 8. Henriq. cit. n. 8. in comment. lit. f. Auila l. c. Quin imò existimat Mol. cit. disp. 70. n. 11. & consentire videtur c. communiter, d. 33. Equum esse, vt Episcopus cum Lunaticis aut dæmoniis in sacro aliquo ordine constitutis, si plenè conualuisse videantur, dispenseret, quò ad altiorem ordinem ascendere possint. Quod etiam dicendum de Religiosis, etsi nullos adhuc ordines acceperint: cum quibus dispensari quoque potest virtute privilegij dispensandi in omnibus irregularitatibus, excepto homicidio voluntario, bigamia, &c. quamuis alioquin in irregularitate ex notabili corporis vitio solius sum. Pontificis sit dispensare, sicuti ex communi notat Couar. p. 1. princ. n. 7. Nau. 200. Mol. in fine disp. 70.

Porro irregularis non est, qui sex digitos in manu habet,

neque qui vno digito ex minoribus caret, modò sine notabili deformitate cruces formare possit: Neque claudus nisi magna sit gressus deformitas: vel nisi baculo, vel pede ligneo niti debeat, quò indecorum est in altaris ministerio, sicuti docet Gl. c. si quis in infirmitate, d. 55. & c. nullus Episcopus, d. 1. de consecrat. Vide Syl. ver. corp. vitiatus. q. 3. & 5. Molin. cit. disp. 70.

Multò minùs irregularis est, qui membro aliquo occulto, v. g. generalibus sine propria culpa, priuatus est, sicuti constat ex c. si quis à medicis, & seqq. d. 55. c. ex parte, 2. de corp. vitiatis, & ex communi tradit Couar. clem. si furiosus, p. 1. principio n. 5. Vulgi error est, inquit Nau. n. 200. membrum alicui abscissum in pulueres reductum deferendum esse, ad irregularitatem vitandam. Sin verò aliquis causam culpabilem præbuit, vt membrum occultum sibi abscinderetur, v. g. adulter in adulterio deprehensus à marito adulteræ: irregularitatem incurrere videtur, si vera mutilatio ipsi accidit, sicuti notauit Nau. n. 198. Mol. n. 18. Suar. disp. 51. f. 2. n. 8. Auila cit. disp. 3. dub. 1. §. sequitur tertio, Denique, si quis sibi ipsi membrum, vel partem membri voluntariè & illicitè abscindat, vel ab altero abscindi iubeat, licet defectus occultus sit, incurrit irregularitatem ex deformitate illicita. Verum de irregularitatibus quæ ex mutilatione aut homicidio oriuntur, commodius agam lib. 3. tract. 3. de iustit. p. 3. cap. 7. & seqq.

Ad extremum nota. In dubio, num corporis aliquis defectus notabilis sit, vt irregularitatem inducat, ad Ordinarium Prælatum pertinet arbitrari, arg. c. 2. de corp. vitiatis. Quòd si is sit Prælatus v. g. Ordinarius ab Episcopo exemptus, qui dimissorias dare potest, ipsi hoc arbitrium ferre licebit, sicuti contra Syl. q. Nau. n. 200. docent Angelus. ver. corpore vitiatus n. 5. Auila cit. disp. 3. dub. 2. Armilla n. 3. Suarez disp. 51. f. 2. n. 16. qui tamen rectè addit; Episcopum ordines conferentem posse tale arbitrium vel admittere, vel reijcere.

## CAP. VIII.

## De Irregularitate ex obligatione seruili, &amp;c.

## SUMMARIUM.

- 1 Seruus seu mancipium, sine domini consensu, ordinari non potest.
- 2 Neque coloni originarij, qui non tantum ratione personarum, sed personaliter etiam obligati sunt, ordinari debent, priusquam à domino suo liberi existant.
- 3 Sed & quicumque secularis muneris obligatione astricti sunt, prius se expedire debent, redditis etiam rationibus, quam in clerum ordinentur.
- 4 Clerici in sacris, & beneficiati officio tabellionis fungi non possunt: ne quidem in causis Ecclesiasticis, & Episcoporum consistorijs, nisi pauperes sint, vel nisi consuetudine diocesis aliter receptum.
- 5 Clerici non prohibentur in curijs Principum secularium fungi officio Cancellarij, Consiliarij, imò etiam iudicis in civilibus causis: quamuis id plerumque non expediat.
- 6 Olim vstitutissimum erat, vt Episcopi in civilibus fidelium controuersis iudicium ferrent.

Seruus, seu mancipium, cum sui iuris non sit, sed in domino potestate constitutus, in clerum assumi seu ordinari non potest, sine expresso vel tacito consensu domini sui, vti habetur can. 81. Apost. & tota d. 54. & lib. 1. decret. de seruis non ordinandis, vbi vide Gl. c. 2. ver. depōnatur, & Scholasticos in 4. d. 25. vbi S. Bonau. a. 2. q. 4. Rich. a. 5. q. 1. Idque etiam in libertis particularium, præsertim secularium personarum, olim locum habebat, vt dominis eorum viuentibus, & inuitis, non ordinarentur, sicuti constat ex c. quicumque, & c. vlt. d. 54. Quia liberti gratitudinis vinculo obnoxij manebant dominis suis, adeo, vt si contra eos agerent, seu delinquerent, in seruitutem



iterum redigi possent, l. ult. C. de bonis libertorum, l. 2. C. de in ius vocando. Si autem seruus, sciente & non contradicente domino, in clerum fuit ordinatus, ex hoc ipso liber & ingenuus est, Constitut. si seruus sciente, ead. d. Quod si domino nesciente, aut contradicente in minoribus tantum seruus ordinatus fuit, potest eum sibi vindicare ac repetere, argument. cap. 2. de seruis non ordinandis, & cap. 2. d. 54. Sin verò sacro ordine seruorum Episcopus scienter ordinauit, duplicatum domino pretium soluere cogitur, c. si seruus absente, iun. Gl. de 54. Quandoquidem & dominus hoc casu grauatur, vt seruum ita ordinatum venundare cogatur. Quod si Episcopus bona fide ordinauit, tunc alij qui seruum ad ordines accipiendos induxerant, similem satisfactionem dupli prestare coguntur. c. si absente, ead. d. Sin verò à nullo inductus fuit seruus, ex proprio peculio oblato pretio, vel simili seruo, se ipsum redimere cogendus est, c. ex antiquis, ead. d. si autem offerre non possit, in seruitutem à domino intra anni spatium vendicari potest: nisi Sacerdos ordinatus sit: quamuis etiam tunc in spiritualibus officijs domino ministrare tenetur, si exigit, c. frequens, ead. d. Ceterum si dominus, posteaquam seruum ordinatum esse intellexit integro anno dissimulet, censetur ei omnem libertatem dedisse, cit. c. si seruus sciente. Potest etiam Dominus tali conditione libertatem dare, & facultatem ad ordines accipiendos, vt ipsi in spiritualibus officijs ministrare teneatur, c. nullus, de seruis non ordinandis.

His adde: Simili ratione seruum domino suo ignorante, aut contradicente Religionem ingredi non posse: alioquin à domino intra tempus iure definitum repeti potest sicuti docet Nau. in comment. 1. de Regul. n. 7. ex c. 1. d. 54. c. si quis incognitus, 17. q. 2. Vide Gl. ibid. & Less. lib. 2. c. 41. num. 31. Azor to. 1. lib. 12. c. 1. q. 3.

Nota autem, quæ de seruis dicta sunt, ferme etiam locum habere in ijs, qui serui originarij, vel ascripti dicuntur, si dominis suis non tantum ratione possessionum, sed etiam personaliter obligati sunt: vt nisi pretio persoluto, vel gratis à domino manumissi, discere non possint: quales serui, *Seibaigne* adhuc hodie multi in Germania reperiuntur: Videri potest c. admittuntur, ead. d. 54. quod est Leon. I. Ep. 1. ad omnes Episcopos.

Sed & alij coloni, qui rationi possessionis, vel administrationis suæ domino obligati antè ordinari non debent, quam eiusmodi obligationibus liberi sint, atque administrationis suæ rationem reddiderint, sicuti apertè habetur in cit. c. admittuntur, & c. generalis, ead. d. quod est Gelasij Epist. 1. ad Episc. Lucanæ, c. 16. & colligitur ex c. 1. de obligatis ad ratiocinia, & c. 3 d. 54. Etsi enim ibi in specie solum dicatur de procuratoribus, actoribus, curatoribus seu tutoribus pupillorum, (nisi sint constituti causa pietatis. vel miserabilium personarum, secundum Gl. receptam in cit. c. 1. ijsque qui publicis officijs, puta tabellionis, & c. deputati sunt, vt ad ordinationem nisi deposito munere non admittantur: tamen eadem omnino ratione id ipsum sentiendum est de quibuscunq; personis obligatis aliquo munere, quod ipsas minus expeditas reddat ad seruiendum Deo in officijs spiritualibus iuxta illud Apost. 2. ad Timoth. 2. *Nemo militans Deo implicatus se negotijs secularibus.* idque obseruauit Suarez dis. 51. f. 3. Verum, neque deposito tali munere ordinari antè debent, quam redditis rationibus ad eiusmodi curis se expediuerunt: Sin verò post redditas rationes debito pecuniario obstricti permaneant, non videntur ab ordinibus excludendi: præsertim, si de solutione debiti cautionem prestare possint, sicuti Suarez notauit cit. sect. 3. num. 23.

Ob eandem causam, ne videl. clerici secularibus negotijs dediti, spiritualium officiorum administratione impediatur: præcipitur in c. sicut, Ne clerici vel Monachi, vt qui in sacris ordinibus constituti sunt, per subtractionem beneficiorum compellantur officium tabel-

lionatus relinquere. Idemque sentiendum esse de alijs clericis, si beneficiati sint; valde probabiliter docet Syl. ver. Tabellio, q. 3. §. tertium, post Panorm. in cit. c. sicut, num. 7. Accedit etiam alia ratio huius prohibitionis, quia officium tabellionis vile est, ideòque indecens personis ecclesiasticis, arg. l. non aliter, ff. de adoptione.

Verum, an in causis Ecclesiasticis v.g. consistorio Episcopi, clericus beneficiatus tabellionis munus exercere possit, Doctores non consentiunt. Plerique autem negant id extra curiam Papæ licitum esse clerico in sacris, non indigenti, sed sufficiens beneficium vel sustentationem habenti: quia vniuersim & sine distinctione prohibetur in cit. c. sicut. Ita Gloss. ibid. ver. clericis, Abb. in 6. Syl. cit. q. 3. Rosella eod. ver. §. 4. Attendenda tamen est diæcesium consuetudo, per quam contrarium introduci potest; cum officium tabellionis in Ecclesiasticis causis absolutè non dedecet Ecclesiasticas personas.

Neque item in specie prohibitum reperitur, sed potius per Ecclesiæ consuetudinem concessum, vt personæ Ecclesiasticæ in Principum, etiam secularium, curijs fungi possint officio Consiliarij, Cancellarij, imò etiam Iudicis in causis civilibus, vt monet Abb. in c. clericis, n. 10. Ne Clerici vel Monachi, & in c. non est, n. 4. de voto. Non autem in causis criminalibus, quamuis citra mortis vel mutilationis sententiam, vt colligitur ex c. sed nec, & cit. c. clericis, Ne clerici vel Monachi, & l. si qui, C. de Episc. audientia. Excepto tamen casu, si Fidei defendendæ causa, aut bonum spirituale animarum id exigit, vt notauit Mol. tract. 3. disp. 8. n. 10. arg. c. in Archiepiscop. de raptoribus.

His adde, olim vñtatissimum fuisse, & pro æquissimo ac pene necessario habitum, vt fideles in litibus civilibus, maxime si grauatos se sentirent, Episcopi, tanquam Christianorum, maxime oppressarum & miserabilium personarum defensoris, officium atque iudicium postulerent; eiusque sententia tanquam vltima & irrefragabili standum fore, dicunt Impp. Constantinus in rescripto ad Ablauium, l. 1. Cod. Theodos. de Episcop. iudicio: Arcadius & Honorius in l. 9. Cod. Iustinian. de Episcop. audientia: Episcopale iudicium ratum sit omnibus qui se audiri à Sacerdotibus elegerint: eamque illorum iudicationi adhibendam esse reuerentiam iubemus, quam vestris deferri necesse est potestatibus, à quibus non licet prouocare. Atque in eiusmodi causis S. August. valde occupatum fuisse, testis est Posidonius cap. 19. vitæ eius: & ipsemet S. August. scribens de opere Monach. cap. 29. *Multò mallem per singulos dies certis horis, quantum in bene moderatis Monasterijs constitutum est, aliquid manibus operari, & ceteras horas habere ad legendum & orandum, quam tumultuosissimas perplexitates causarum alienarum paci de negotijs secularibus vel iudicando dirimendis, vel interueniendo præcidendis: quibus nos molestijs affixit Apostolus (1. ad Corinth. 6.) non vti que suo, sed eius, qui in eo loquebatur, arbitrio.*

## CAP. IX.

## De dispensatione super irregularitatibus.

## S V M M A R I V M.

1. Solus Papa proprio & ordinario iure in irregularitatibus dispensat.
2. Quamuis in omnibus irregularitatibus Papa dispensare possit, in aliquibus tamen raro solet, videlicet in bigamia, præsertim vera; in homicidio voluntario, si notorium sit: in corporis defectu, si valde deformis sit.
3. Ad arbitrium Episcopi pertinet iudicare, strum vitij deformitas graui sit, & irregularitatem inducens. Facilius autem permittet, si aliquis in ordine iam suscepto minisset, quam vt de nouo ordinetur.
4. Episcopi dispensare possunt in irregularitatibus proueniensibus ex crimine



*ex crimine occulto, id est, non notorio aut famoso.*

5 *Non possunt dispensari, quamdiu crimen sub foro contentioso versatur: finito autem iudicio, si vel Reus absolutus sit, vel occulte punitus ac toleratus, videntur posse dispensare.*

6 *Per professionem in Religione non tolluntur irregularitates, præter eam, quæ est ex defectu natalium.*

7 *Praelati Ordinum mendicantium amplam potestatem habent dispensandi cum suis super irregularitatibus.*

*Non possunt tamen cum suis dispensare super bigamia vera: homicidio voluntario, si notorium sit: & super corporis defectu valde graui, ita ut in tali nec sum. Pontifex dispensare facile soleat.*

1 **A**sertio. Solus Papa in irregularitatibus iure ordinario dispensare potest. Est communis doctrina. Quia irregularitates iure vniuersali canonico constitutæ sunt, in quo nemo inferior sum. Pontifice dispensat. Quamuis autem is absolute possit dispensare in omnibus, tamen in quibusdam raro solet, videlicet in irregularitate bigamiæ, præsertim veræ ac propriæ dictæ; cum illa ex Apostolica traditione descendat: qua de re S. Thom. in 4. dist. 27. quæst. 3. art. 3. Durand. ibidem q. 4. Maior q. 6.

2 Secundò in irregularitate ex homicidio voluntario & illicito non facile Papa dispensat ad ordines accipiendos, sicuti tradit Syl. ver. homicidium, 3. q. 8. Couar. in clem. p. 2. §. 3. n. 3. Auila p. 7. disp. 6. §. 5. dub. 3. Nisi crimen occultum sit, ita ut iudicialiter probari non possit: Imò tunc etiam Episcopum dispensare posse, saltem ut in susceptis ordinibus ministretur, docent DD. aliqui apud Couar. l. c. num. 4. Sed contrarium est verum, & satis indicatum in Trident. sess. 14. c. 7. & sess. 24. c. 6. de reform. Excepto tamen casu necessitatis, si ad Papam non sit facilis recursus, uti notauit Auila l. 3. dub. 3. Vide etiam Nau. ca. 27. n. 240.

3 Tertiò in irregularitate ex corporis defectu, si nimis magna deformitas appareat, ut in populo Christiano scandalum generare possit, si talis ad altaris ministerium accedat, non dispensat Papa, teste Auila p. 7. disp. 3. dub. 3. secus si non magna deformitas: qualis est v. g. macula albuginis in oculo, iuxta c. 2. de corp. vitatis: cum quo tamen si Religiosus fieri velit, dispensari posse, significat Sylu. ver. corpore vitatus, q. 4. §. 6. Angelus, nu. 2. Sed melius sentit Simon Maiolus lib. 18. c. 20. Si magna sit deformitas oculi, esse casum Papæ reservatum. Ad arbitrium verò Episcopi pertinet iudicare, num magna videatur: qui etiam facilius admittere ad ordines potest eum, qui Religiosus fieri vult. Deinde si talis deformitas, v. g. oculi cæci, aut maculosi, superueniat clerico post sacerdotii susceptionem sine culpa eius, ait Maiolus lib. 1. cap. 18. §. quæ omnia, & in fine cap. celebrare eum posse, donec ipsi ab Episcopo interdicatur: sed tutius est, ut petatur Episcopii arbitrium, qui considerata causa, licentiam plerumque dare poterit, saltem ut priuatim celebretur: vel etiam publice, si non tanta magna deformitas sit, ut scandalum generare possit: idèque similiter dicendum de claudicatione, gibbo, &c. Nam longè maior deformitas requiritur, ob quam aliquis, postquam ordinatus est, à ministerio repelli debeat: quàm ad ordinationem non admittere.

4 Dixi autem in assertione: Iure ordinario ac proprio Episcopos, & similes Praelatos in irregularitatibus non dispensare. Nam ex commissione ipso iure facta ipsorum dignitati, in quibusdam dispensare possunt, qualis facultas est illa Trid. sess. 24. c. 6. dispensandi super omni irregularitate proveniente ex delicto occulto, excepto homicidio voluntario, exceptis aliis delictis deductis ad forum contentiosum. Circa quam concessionem notandum est primò: Occultum hoc loco censeri delictum, quodcunque non est notorium aut famosum, quamuis à tribus, aut quatuor in occulto sciatur, ita ut iudicialiter per testes probari possit, iuxta ea, quæ dixi supra p. 2. c. 4. n. 2. &

tradit Nau. c. 27. n. 254. §. vndecimò, Auila p. 7. dist. 10. du. 6. circa secundam conditionem; qui addit, etsi factum notorium sit, quia multi præsentibus erant, si tamen nescierant id esse prohibitum, ideoque crimen occultum mansit, dispensare Episcopum posse: v. g. si Diaconus solemniter infantem baptizauit, coram plebe nesciente Diaconum commissionem legitimam non habuisse, aut sine commissione tale ipsi ministerium seuerè prohibitum esse, sicuti etiam docet Rodriq. part. 1. summ. capite 166. concl. 3.

Secundò notandum: Episcopum super irregularitate orta ex crimine, dispensare non posse, quamdiu illud sub foro contentioso versatur, etsi videatur plenè probari non posse, sicuti docet Henriq. lib. 14. c. 7. n. 5. At verò dispensare poterit, postquam iudicium finitum est: siue quia Reus absolutus (esto iniquis, & falsis remedijs absolutionem obtinuerit, sicuti docet Rodriq. c. 167. conclus. 4. Henriq. lib. 14. ca. 4. n. 5. Auila p. 7. disp. 10. dub. 6. in fine: quia crimen manet occultum, ut pono, & cessat ratio deducti ad forum contentiosum) siue quia Reus cum sufficiente satisfactione punitus est: nam etiam hoc casu Episcopum dispensare posse, si crimen publicum aut famosum non sit, tanquam indubitatum docet Auila dub. 7. & alij graues Theologi apud Gutierrez lib. 1. canon. qq. c. 3. in fine: licet ipse, eumque secutus Rodriq. cap. 168. conclus. 16. contrarium sentiant. Ratio vero probabilis illius sententiæ est: Quia concilium ideo vetat dispensari super delicto ad forum contentiosum deducto, ne iudiciarius processus impediatur, aut imminuatur: hæc autem ratio cessat, si iudicio finito, reus punitus in Ecclesia toleretur, adeoque crimen occultum maneat. De ordinum Praelatis dubitatur, qualia priuilegia habeant dispensandi super irregularitatibus, seu cum suis Regularibus, seu cum alijs personis: Imprimis Sotus in 4. d. 25. q. 1. art. 3. post 1. concl. sic scribit: *Mox nunc in Religionibus seruatur, siue iure communi, siue consuetudine, siue priuilegio obtentus sit, ut per professionem omnis irregularitas, quantum ad ordinis susceptionem, aboleatur, præter illam, quæ ex homicidio voluntario vel ex bigamia contrahitur, non autem quantum ad praelationem.* Verum de hoc more nihil certi constat, eumque improbant Henriq. lib. 14. c. 8. n. 10. lit. x. Auila dist. 10. dub. 3. & solam irregularitatem, quæ ex natalium defectu est, per vota in Religione approbatâ edita tolli testantur, quod & Medina tradidit in instruct. ca. 11. §. 12. paulò post princip. & sumitur ex c. 1. de filiis Presbyt. vbi dicitur, ut filij illegitimè nati ad sacros ordines non promoueantur: nisi aut monachi sint, vel in congregatione canonica regulariter viuentes: praelationem verò nullatenus habeant.

Interim Praelati Ordinum Mendicantium ex priuilegijs suis magnam potestatem habent dispensandi cum suis super omnibus irregularitatibus: excepta ea, quæ ex voluntario homicidio, aut bigamia vera, vel interpretatiua provenit, sicuti videre est apud Rodriq. t. 1. Regul. q. 24. a. 2. & seqq. Quamuis Henriq. lib. 12. cap. 6. num. 11. & Auila disp. 8. dub. 4. concl. 8. existiment, etiam in bigamia ipsos per priuilegia dispensare posse: quin & in homicidio, citra celebrationem Missæ. Non pato tamen his priuilegijs locum esse posse: cum hæc dispensationes à Papa vix fieri, & secundum Romanæ curæ stylum excipi, vel tanquam exceptæ intelligi soleant, sicuti tradit Nau. cap. 27. num. 197. & lib. 5. consil. 1. de homic. edit. 1. Rodriq. cit. art. 2. & in sum. cap. 158. concl. 5. Simon Maiolus l. 5. de irregul. c. 48.

Illud addo: si in priuilegio dispensandi super irregularitatibus excipitur bigamia, non esse intelligendum de similitudinaria: cum ea indispensabilis non censeatur, ut supra dixi c. 6. num. 6. Si excipitur homicidium voluntarium, intelligi debet de directè volito, atque iniusto: etiam si occultum sit. Veruntamen Mendicantes speciale priuilegium habent à Martino V. concessum, dispensandi cum suis super irregularitate ex homicidio non notorio, apud Rodriq. cit. quæst. 24. art. 12. Si excipiat in



Priuilegio natalium defectus, intelligitur etiam de oculo, vt dixi supra.

Denique, quod attinet ad corporis vitium : Si valde magna deformitas sit, vt Papa dispensatione facere non soleat, tunc Prælatus priuilegiatus non potest dispensare ad ordinem suscipiendum, vel susceptis vtendum. Si verò deformitas tanta non sit, quin Papa dispensare soleat, puta si sit oculi deformitas, claudicatio seu priuatio pedis, vt cum ligneo pede ad altare accedere oporteat: cum eiusmodi Prælati dispensare possunt :

saltem vti susceptionis ordinibus vti, & sacerdoti celebrare liceat, sicuti docet Rosella verb. vitiatus, numero primo: Maiolus libro 1. de irregul. capite 18. Auila parte. 7. disputatione 3. dubio 3. Qui eandem facultatem in hoc claudicationis casu cum Sacerdote religioso dispensandi Episcopo concedunt, cum Sylu. verb. corpore vitiatus, quæstione vltim. Angel. eod. verb. numero 1. Cauenda tamen est in vsu harum dispensationum Ordinariorum offensio: tum populi admiratio, aut scandalum.

*Atque hic primi libri finis esto. Deo optimo sit sempiterna laus, & gloria, Amen.*





THEOLOGIÆ  
MORALIS

LIBER SECVNDVS.

DE  
THEOLOGICIS VIRTVTIBVS:  
FIDE. SPE. ET  
CHARITATE.

AVCTORE  
PAVLO LAYMANN,  
Societatis Iesu Theologo.



LVTETIÆ PARISIORVM,  
Sumptibus PETRI BILLAINE, viâ Iacobæa,  
sub signo Bonæ Fidei.

---

M. DC. XXVII.









LIBRI SECUNDI  
TRACTATUS  
PRIMVS  
DE  
THEOLOGICA FIDE,  
ET  
OPPOSITIS VITIIS.

CAP. I.

DE NOMINE, DEFINITIONE, ac diuisione Fidei.

SUMMARIUM.

1. Fides dicta est, quia fit, quod dicitur.
2. Fidem habere est assentiri alicuius dicto, propter auctoritatem dicentis.
3. Fides alia humana est: & alia diuina.
4. Sola Fides diuina infallibilem certitudinem habere potest.
5. Duplex Fides diuina, habitualis, & actualis.
6. Credimus Deum, credimus Deo, & credimus in Deum.



**F**IDES à Latinis appellata est, quia fit, quod dicitur, teste Cicerone lib. 1. de officiis. Primæua acceptione significat virtutem eam, de qua Cicero ibidem: *Fundamentum autem iustitiæ est fides, id est, dictorum, conuentorum, que constantia, & veritas.* Quomodo & Apostolus accepit ad Rom. 3. *Nunquid incredulitas eorum fidem, id est, veritatē promittentis Dei, euacuauit?* Hinc verò translata est vox fidei: I. vt significet ipsam promissionē, quam fidelitas implet: sic enim dicimur fidem seruare, violare: & Apostolus 1. ad Tim. 5. de viduis post continentiam votum nubere volentibus ait, quod *damnationem habent, quia primam fidem irritam fecerunt.* II. Vt significet existimationem de alterius constantia in promissis: sic enim bonæ fidei homo dicitur, cui tutò aliquid credendum iudicamus, quo sensu Ecclesiasticus dixit c. 27. *Qui denodat arcana amici, fidem perdit.* III. Vt significet idem, quod conscientia: quippe quæ dicat in promissis fidem seruandā esse, quo sensu Terentius dixit: *O Iupiter, ubinam est fides?* id est, conscientia. Et Apostol. ad Rom. 14. *Quod non est ex fide, peccatum est.* IV. Vt significet assensum intellectus, quē præbemus cuiuspiam asserenti, propter auctoritatem eius: sic enim dicimur fidem

alicui habere, id est, credere; Quomodo etiam intelligi potest illud Apost. Iacob. c. 1. *Postulet in fide, nihil habens* id est, certò & indubitatè credens, eaque ratione bene sperans, se à Deo accepturum, sicut Christus dixit Marc. 11. *Quidquid orantes petitis, credite, quia accipietis, & fiet vobis.* V. V. significet ipsum obiectū, quod fide certa credimus: sic enim accepit Apostolus ad Rom. 10. *Verbum fidei, quod prædicamus* Ad Gal. 3. *Ex operibus legis Spiritum accepistis, an ex auditu Fidei?* id est, doctrinæ Christianæ.

Ex his acceptionibus ea, quæ penultima est, ad propositū nostrū spectat: secundum quā fides est assensus firmus, quem animus præbet alicuius dicto, ob auctoritatem dicentis. Dicitur assensus, id est, determinatio, siue adhæsiō intellectus ad alteram partem contradictionis, in quo differt à dubitatione, quæ est veluti suspensio animi, neutri parti propositæ quæstionis assentientis. Quem animus præbet alicuius dicto. Omnis enim assensus fidei ordinem, seu respectū habet ad personā dicentem, asseueratē, testantem: nam alteri dicenti credimus, seu fidē habemus, iuxta illud Gen. 15. *Credidit Abraham Deo.* Ob auctoritatē dicentis. Auctoritas aliud nō est, quā personæ excellētia, & dignitas, ob quā in dicēdo verax, seu eius dictū ac testimoniū verū censetur. Videri potest Durand. in 1. 3. d. 24. q. n. 5.

Duplex est fides; humana, ac diuina. Humana dupliciter dicitur: vel ratione principij tantum, vt si à Deo reuelatis aliquis credat per humana tantū motiua, & fide acquiritur: vel ratione obiecti, puta si credam aliquid ob hominis testantis auctoritatē. Fides autē diuina tū ex parte principij, etiā obiecti, supernaturalis esse debet, vt infra dicā. Inter fidē diuinā & humanā, eā maximè, quæ ratione obiecti talis, hoc maximū discrimen est, quod humana nō sēper certū, ac firmū, sed sæpe opinatiū tantū assensum contineat: at verò diuina Fides certissimā, atque firmissimā animi adhæsiōne habet: quāuis obscurā, seu non apparentē, in quo differt diuina Fides à scientia; siquidē assensus scientiæ ideo firmus, ac certus, quia euidentis est, atque ortus ex clara apprehensione connexionis terminorum, ac veluti intuitu veritatis, vt in hac demonstratione: *Summū bonum est amandum: Deus est summū bonum: ergo Deus est*



*amandus.* Fides autem diuina obscura est, neque intuetur veritatem obiecti: sed vnica ratio, ac motiuum credendi, seu per Fidem firmissimè assentiendi, est summæ Veritatis testimonium, (seu quod idem est) autoritas Dei reuelantis.

4 Pro pleniori intellectu aduerte: Tantò certiore esse fidei assensum, quantò maior autoritas dicentis, seu cōtestantis, quā tanquā ratione nititur: inter intellectuales autem substantias, quæ dicere, ac testari aliquid possunt, solus Deus perfectissimæ veracitatis auctoritatem habet: quippe qui suapte natura nec falli, possit; ob illimitatā rerū omnium scientiā; neq; alios fallere, ob infinitā bonitatem. Quamobrē Deus *veritatis dicitur*, Psal. 39. *Spiritus veritatis*, Ioan. 14. *Qui non mentitur Deus*, ad Tit. 1. *Non est Deus quasi homo, ut mentiatur: nec ut filius hominis, ut mutetur*. Num. 23. *Est Deus verax, omnis autem homo mendax*, ad Rom. 3. Ex quo sequitur, solum Dei verbum, ac testimonium certissimæ veritatis esse, solamque Fidē diuinā, id est, quæ circa verbū, ac testimoniū Dei versatur, maximè certam, & infallibilē esse, vt rectè dictū sit ad Eph. 1. & Iacobi 1. *Verbū veritatis*. Pl. 118. *Lex tua veritas*. 1. Io. 3. *Si testimonium hominum accipimus, testimonium Dei maius est*. Ideo q; dixit S. Basil. in mora. reg. 8. c. 2. *Maiorem auctoritatem debere verbis Domini, quā tolli quantumuis certissima animi nostri expletioni*.

Duplex est Fides diuina: Vna habitualis, & altera actualis. Illa definitur virtus supernaturalis, inclinans intellectū ad assentiendū firmiter & obscurē omnibus à Deo reuelatis, quatenus ita reuelata sunt. Fides autem actualis est exercitiū fidei: siue assensus firmus, quo intellectus fertur in veritatē diuino testimonio obscurē reuelatā. Apostolus virtutē Fidei Theologicæ definiuit ad Heb. 11. quod sit *Substantia rerū sperandarum, augmentum non apparentium*. quā definitionem commendant, & explicant Scholastici cum Magistro in 3. d. 23. Sensus verò est: Quod Fides inclinet intellectum ad assentiendum firmiter ijs, quæ nobis in ordine ad finem supernaturalem obscurē reuelata sunt à Deo. Vbi nota, quod Fides diuina triplicem ordinem ad Deum habet: credimus enim Deū; credimus Deo, & credimus in Deum, vt ex doctrina S. Aug. referunt Magister loc. cit. S. Th. 2. 2. q. 2. a. 2. Quorū primū, obiectū primariū Fidei significat: alterum formalem rationē Fidei: siquidem primæ Veritati dicenti credimus: tertium autē finē Fidei denotat: quia Fides in intellectu sita, obscurē nobis exhibet Deū, ad quē per Spem & Charitatē accedere debemus: quāobrē hypostasis, seu fundamentū vitæ Christianæ censetur. Videri potest Dur. in 3. d. 23. q. 7. n. 5. & 6

## CAP. II.

## De obiecto, seu subiecto Fidei.

## S V M M A R I V M.

1. *Materiale obiectum Fidei, quod terminationis appellari potest, est verbum Dei obscure propositum: subiectum attributionis est Deus.*
2. *Deus interdum per seipsum aliquid reuelat, interdum per aliam personam.*
3. *Verbum Dei aliud scriptum est, & aliud traditum.*
4. *Ecclesia definitiones Verbum Dei appellari possunt.*

1. **S**uppono ex communi Scholasticorum doctrina, quod intellectualis assensus obiectum debeat esse aliquid complexum, videlicet propositio, seu enuntiatio: v. g. Deus trinus & vnus est. Subiectum autem, siue de quo aliquid dicitur, est quid incomplexum.

**A**ssertio I. Materiale obiectum Fidei diuinæ est verbū Dei, seu quidquid diuinitus viatoribus obscurē reuelatum est: v. g. Deus est, Deus trinus & vnus est, Filius Dei homo factus est. Ita S. Th. 2. 2. q. 1. a. 1. & 2.

**A**ssertio II. Subiectum Fidei primarium, quod attributionis appellatur, id est, ad quod reliqua omnia in Fide

referuntur, est Deus. Ita S. Th. in corp. cit. a. 1. Durandus in 3. dist. 24. q. 1. n. 7. & alij communiter. Nam inter reuelata maximè simplex, absolutum, & præcipuum est Deus, à quo reliqua pendunt tanquam principio: ad quem referuntur, tanquam ad finem: vt rectè dixerit S. Aug. 1. 4. de ciuit. Dei, c. 20. *Fides maximum & præcipuum officium est, in Deum credere*.

Porro verbum Dei, quod Fidei obiectum esse dixi, 2 tripliciter diuiditur. I. Verbum Dei aliud est, quod Deus per seipsum, nullo alio, tanquam nuntio aut legato interueniente, reuelat. Tale erat verbum, quod factum est à Domino ad Hieremiam, ad Michazam, & c. Talis erat vox de cœlo lapsa, Matth. 3. 2. Petri 1. *Tu es Filius dilectus*. Eiusmodi etiam erat verbum ad Angelos factum, post primam eorum creationem: siquidem & hi, non minùs, quàm homines reuelatæ veritati per Fidem assentiendo, beatitudinem mereri debebant. Aliud autem est, verbum Dei, quod Deus per alium, tanquam legatum suū, loquitur, ac reuelat. Sic in veteri Testamento locutus erat Deus Patriarchis, & Prophetis; & per hos deinde populo vniuerso, sicuti indicat S. Petrus Ep. 2. c. 1. *Non enim voluntate humana allata est aliquando Prophetia: Sed Spiritu sancto inspirati, locuti sunt sancti Dei homines*. Item per Angelum locutus est Deus Tobiz, c. 12. B. Virgini, Zachariæ, Luc. 1. *Sed & multifariam, multisque modis olim Deus loquens Patribus in Prophetis; nouissimè locutus est in Filio: Hebr. 1. Et S. Ioan. c. 1. Vnigenitus Dei, qui est in sinu Patris, ipse enarrauit*. Postea verò locutus est nobis Deus per Apostolos, & Euangelistas, iuxta illud Apost. 1. ad Thes. salonic. c. 2. *Cum accepissetis à nobis verbum auditus Dei, accepistis illud non ut verbum hominum, sed (sicut est verum) verbum Dei, qui operatur in vobis, qui credidistis*. Vbi notandum est: Sicuti montes solis lumen primò excipiunt, deinde in subiectas valles demittunt; ita congruū, Deoque omnia suauiter operanti consuetum est, Maiores Ecclesiæ, Prophetas ac Doctores primò illuminare, & per hos deinceps populos: quod S. Aug. tr. 1. in S. Ioan. Dauidem indicasse autumat, Pl. 71. *Suscipiant montes pacem populo, & colles iustitiam*.

Altera diuisio. Verbum Dei aliud est scriptum: & aliud 3 non scriptum, seu traditum. Nam verbum, quod Deus ad Adamum & Patriarchas locutus erat, non statim literis mandatum fuit: sed per traditionem profectum vsque ad Moysen, qui Pentateuchum scripsit. Neque nouum testamentum, quod Christus condidit, statim scriptum fuit: sed annis aliquot post eius ascensum, quando se scribendi vel occasio, vel necessitas obtulit. Veruntamen nec omnia scripta sunt, quæ Christus docuit, & Apostoli Ecclesijs tradiderunt: cum Christus ipse dixerit Ioan. 16. *Adhuc multa habeo vobis dicere: sed non potestis portare modo: ea verò haud dubiè post resurrectionē suam dixit, præsertim quæ ad Ecclesiæ constitutionem, Sacramentorum ministrationem, & seculi finem pertinent, sicuti Actorum 1. indicatur: Præbuit seipsum vniuersum post passionem suam in multis argumentis, per dies quadraginta, apprensus eis, & loquens de regno Dei: cum tamen de gestis, & dictis Christi post eius resurrectionem pauca Apostoli, & Euangelistæ scripserint: ea videlicet, quæ ad fidem de resurrectione stabiliendam pertinere videbantur: reliqua, quæ ad mysteria spectabant, & arcana seruari oportebat, viua voce in Ecclesijs tradentes. quare S. Epiph. hæc. 61. Oportet autem & traditione vti: non enim omnia à diuina Scriptura accipi possunt. Quapropter ex aliqua in Scripturis, aliqua in traditione per vocem. Apostoli tradiderunt, quemadmodum dicit S. Apostolus, sicut tradidi vobis: & alibi, sic doceo, & sic tradidi in Ecclesijs. Et S. Chrys. 2. ad Thessal. 2. Hinc patet, quod non omnia per epistolam tradiderunt: sed multa etiam sine literis: eadem verò fidē digna sunt tam illa, quàm ista: itaque traditionem quoque Ecclesiæ fidē dignam putamus. Traditio est, nihil quærās ampliùs. Eadem habet Theophyl. ibidem.*

Confir.



Confirmatur ex eo: Quod omnis rite instituta Respublica partim scripto, partim non scripto iure utatur; ergo decet etiam Deum humanum genus sermone, ac mandatis partim scriptis, partim non scriptis, sed aliter traditis gubernare. Cum enim inter signa, quibus hominibus aliquid reuelari, vel quod reuelatum est, propagari potest, non sit sola Scriptura: ea quae ipsa per se non sufficiens, quandoquidem libri scripti vetustate deprauari, absumi, igne, aliisque modis penitus perire possunt (quod de sacris libris deplorat S. Chrysostomus. 9. in Mat.) facile hinc apparet, vocis etiam traditione continuo per Ecclesias deriuata, in Fidei mysterijs credendis adiuuari non oportere.

Tertia diuisio. Verbum Dei aliud est, quod publicam auctoritatem habet, ut ab omnibus fidelibus recipi debeat: cuiusmodi est Testamentum vetus, ac nouum: ite Traditiones tum diuinae, tum Apostolicae: ac denique Ecclesiae definitiones, seu canones. Alterum est, quod publicam auctoritatem non habet: sed priuatim alicui a Deo reuelatum, ac nondum Ecclesiae satis contestatum est.

Nota autem, quod sub verbo Dei publicam auctoritatem habente, etiam Ecclesiae definitiones comprehendendo, cum S. Th. q. 5. a. 3. in corp. Nicol. Serario in prolego. bibliacis, ca. 7. qu. 12. Quia enim *Ecclesia Dei viui columna est, & firmamentum veritatis*. 1. ad Timoth. 3. ex Christi promissione, Matth. 16. *Tu es Petrus, & super hanc Petram aedificabo Ecclesiam meam, & porta inferi non praeualebunt aduersus eam.* Et Matt. 18. *Si quis Ecclesiam non audierit, sit tibi sicut Ethnicus & publicanus*: consequens est, quaeunque Ecclesia tanquam ad fidem, vel mores generatim spectantia, Christiano populo decernit, ac proponit, pro eiusmodi habenda esse, quibus deceptio, seu falsitas subesse non possit; quandoquidem Spiritus sanctus, quem Christus Ecclesiae se missurum promisit, ut doceat eam omnem veritatem, Ioan. 16. & maneat nobiscum in aeternum, Ioan. 14. eidem Ecclesiae assistit, instruens, atque gubernans. Quod etiam Apostoli in primo Hierosolymitano Concilio congregati testati sunt. Act. 15. *visum est Spiritui sancto, & nobis*. Quare ita argumentari licet: Omnis sermo procedens ex infallibili assistentia Spiritus sancti, est verbum Dei reuelatum: sed definitio Ecclesiae est sermo procedens ex infallibili assistentia Spiritus sancti. Ergo, &c. Idque planè expressit S. Athanasius. t. 1. Epist. ad Africanum Episc. *Verbum Domini per Oecumenicam Nicænam Synodum in aeternum stat.* S. Amb. l. 5. Ep. 32. ad Valentinianum: *Sequitur tractatum Concilij Nicæni, a quo me nec mors, nec gladius poterit separare.* Magnus Constantinus Imper. apud Socratem l. 1. c. 6. in ep. ad Alexandrinam Ecclesiam: *Quod trecentis Episcopis Nicæae visum est, non est aliud putandum, quam Dei sententia: cum in talium, & tam praclarorum virorum mentibus sacer insideret Spiritus, qui illis diuinam voluntatem aperuerit.* Leo I. Papa ep. 78. ad Leonem Imper. *De rebus & apud Nicæam, & apud Chalcedonem (sicut Deo placuit) definitis nullum audemus inire tractatum, tanquam dubia, vel infirma sint, quae tanta per Spiritum sanctum fixa auctoritas.* S. Greg. l. 1. ep. 24. *Sancti Euangelij quatuor libros, sic quatuor Concilia (Nicænum, Constantinopolitanum, Ephesinum, & Chalcedonenſe) venerari me, ac fuisse ipse fecer.*

Sunt tamen aliqua discrimina inter Ecclesiae definitiones, ac reliquum verbum Dei, quod in Canonicis libris continetur: 1. Ecclesia de nouis Fidei mysterijs reuelationes iam non accipit, uti olim Prophetæ, & Apostoli, sicut bene explicant Alph. de Castro l. 1. aduersus haereses, c. 8. Gabr. in 3. d. 25. q. vn. a. 3. du. 3. Sed assistente, & dirigente Spiritu sancto docet, quodnam sit verum, ac legitimum Dei verbum scriptum, vel traditum: & quod supposititiū. Deinde quis verus, & legitimus verbi Dei sensus, ac interpretatio: quæ autem illegitima, atq; heretica: denique quædam ex verbo Dei scripto, aut non scripto per bonam consequentiam deducantur. Quæ de revideri potest Vin-

centius Lirinensis l. contra haereses, 32. Quamobrè ut Baronius testis est super Anno Christi 325. & 431. in Concilijs semper visitatum erat, ut sacer Euangeliorum Codex proponeretur: quo admoneretur congregati Episcopi, quod secundum sacra scripturæ normam, iunctis Patrum traditionibus, definitiones suas cõdere debeant, uti videre est apud Cyril. Alex. Apol. 4. In Ep. Concilio t. 4. c. 10. quæ est Ep. Synodica ad Theodot. & Valentinian. Augustos: & in generali Concilio quinto, collat. 1. Interim tamen fateri possumus, hodie aliqua explicitè credi, quæ ante Ecclesiae definitionem implicitè credebantur, v. g. Concilium Nicænum canonicum esse: ite quæ Ecclesia ex vna reuelata, & altera naturali lumine nota propositione deducit, & fidelibus credenda proponit.

II. Canonici Scriptores plerumque clariorem Dei loquentis, ac reuelantis cognitionem habuerunt, atque sibi reuelatas veritates minore labore scripserunt, sicuti de se ipso testatur Dauid Ps. 43. *Lingua mea calamus scribae velociter scribentis*: insuper doctrinam populo tradita miraculis cõfirmarunt. Marci ult. ad Hebr. 2. Nunc verò Patres Ecclesiae assistentiæ, & directiones spiritus sancti obscura fide credunt; deinde in definiendis cõtrouersijs, atque decretis Fidei, morumque faciendis multum operæ, ac laboris ponere debet, perscrutando Scripturas, exquirendo Apostolorum traditiones, interpretationes Patrum Ecclesiarum consensum; siquidè Deus, cessante iam miraculorum ac signorum tanta frequentia, secundum communem legem, ordinarijs medijs Ecclesiam suam gubernat. Idque mirum videri non debet, quædo etiã olim Apostoli act. 15. vbi cõtrouersia inter credentes orta; Vtrum Circumcisio, & lex Moysis seruanda esset ab ijs, qui ex gentibus ad Christi Fidem cõuerſi fuerat, in primo Hierosolymitano Concilio, primam sententiã dicente Petro, magna inter Apostolos cõquisitio facta est.

III. Quidquid ad sacra Scripturam spectat, singula verba, & sententiæ, siue ex sint de generali dogmate Fidei, aut morum: siue de particulari facto præterito, aut futuro, ad Fidem spectat, cui falsum subesse non possit: quia tota Scriptura a sancto Spiritu inspirata est, sicuti indicat Apost. 2. ad Tim. 3. At verò in decretis Ecclesiae, solū sententiæ absolute definitiuæ alicuius dogmatistamquã ad Fidem, vel mores generatim spectatis, infallibilè veritatē habet: non ite disputationes, siue inquisitiones præmitti solitæ: neque rationes, quibus definitio probari, hec verba singula, quibus definitio exprimitur, ad Fidem spectant: præterquam si decretum de ipso verbo directè fiat, ut in Concilio Nicæno de voce *ὁμολογῶν*: in Ephesino de voce *θεοῦ πατρὸς*. Denique nec iudicia, siue responsa de particulari facto infallibilè veritatē habent. Videri potest Bellarm. l. 2. de Concil. c. 12.

## CAP. III.

## De ratione, seu motiuis Fidei diuinæ.

## SUMMARIUM.

1. Ratio formalis fidei est auctoritas Dei obscurè reuelantis.
2. Fides consistere potest cum euidentiā attestantis, seu reuelantis: non item cum euidentiā rei reuelatae.
3. Fides diuina assensus in nobis, secundum ordinariam Dei legem, extrinsecis adminiculo indiget, quæ vera Fidei nota dici solent.
4. Intellectus Viatoris in eliciendo assensu Fidei diuinæ, quàm maxime pender ab auxilio Spiritus sancti.
5. Interuallum sancti Spiritus illustratio ordinariè non est nobis sufficiens argumentum cognoscendi, aut probandi veram Fidem.

Assertio I. Ratio formalis, sub qua Fidei, siue formalis principium, quo fidei diuinæ assensus nititur, est prima Veritas, & auctoritas Dei obscurè reuelantis. Ita S. Thom. iuncta interpretat. Caietan. 2. 2. quæ. 1. ar. 1.



& de verit. quæst. 14. art. 8. ad 16. S. Bonau. in 3. d. 23. a. 1. q. 1. n. 13. ibidem Duran. quæst. 7. num. 6. Richar. d. 24. a. 1. q. 1. & alij.

Notat verò excommuni doctrina Valætia q. 1. p. 1. assert. 2. Veracitatem Dei dicentis duobus modis considerari posse: vel in actu primo, vti intra Deum est, quasi quædam proprietates eius: vel in actu secundo, quatenus ex ea nobis externo signo quippiam reuelatur: atque hoc posteriore modo accipiendum est, quod prima Veritas in dicendo, ac reuelando exterius, sit ratio formalis Fidei. Idque Doctores communiter exprimunt, cum aiunt: Obiectum fidei diuinæ esse verbum Dei, quatenus abscurè reuelatum: vt sensus sit, propositionibus Fidei non alia ratione nos assensum præbere: nisi quatenus à summa Veritate nobis obscurè reuelatæ sunt. Quæ doctrina confirmatur ex verbis illis 1. Ioan. 5. *Si testimonium hominum accipimus testimonium Dei maius est: id est, si hominibus credimus, quando nobis aliquid testantur, multò magis Deo veracissimo, cum nobis testimonium perhibet, credere debemus.*

Corollarium. Cum in formali obiecto Fidei duo contineantur: Dei veritas, & externa reuelatio; prius illud est principale, quippe valor exterioris reuelationis: nam ideo quæ diuinitus reuelantur, certam fidem habent, quia Deus, qui reuelat, verax est.

Assertio II. Si Deus Fidei veritatis rationali creaturæ reuelet cum euidencia sui reuelantis, tunc creatura nullo alio adminiculo indiget ad certissimum Fidei diuinæ assensum eliciendum. Est communis assertio. Circa quam duo aduerte: I. Sermonem esse de euidencia Dei reuelantis non absolute, & secundum essentiam (sic enim creatura beata foret, si cognosceret Deum, sicuti est; ideoque fidem non haberet, sed claram agnitionem) sed quatenus Deus reuelans siue loquens est: ita vt hoc solum creatura euidenter cognoscat, Deum esse, qui ipsi loquitur, aut reuelat: cuiusmodi euidentem Dei loquentis cognitionem habuerunt viatores Angeli, & Propheta.

II. Sermonem non esse de euidencia rei reuelatæ: sed solius Dei reuelantis. Si enim Deus rem reuelatam clarè, euidenter, ac intuitiue intellectui viatoris exhibeat, oritur scientia, & non fides: Fides autem est argumentum rerum non apparentium, id est, inclinans intellectum ad assentiendum rebus obscuris, non visis. Quare etiam S. August. tr. 40. in Euang. Ioan. *Quid est Fides, nisi credere quod non vises?* Et S. Gregor. hom. 26. in Euang. *Fides illarum rerum est, quæ apparere non possunt: quæ enim apparet, tam fidem non habent, sed agnitionem.* Sic quoque Athanas. de salutari Christi aduentu aduersus Apollinarem, post medium. *Neque enim fides de re euidenti concepta, fides dici poterit.* Ratio vero est, quod frustra aliquis testimonio, aliòve motiuo nitatur ad veritatem sibi persuadendam, quæ vltro apparet, & liquidò nota est.

Non pauci tamen Doctores apud Coninck de actibus supernatur. disp. 11. dub. 1. num. 55. Valent. disp. 1. q. 1. p. 4. existimant, fidem cum scientia de eodem obiecto, v. g. quod Deus sit, quod omnipotens, in dicendo verax sit, simul consistere posse: & ad Patrum auctoritates respondent, fidem per se nunquam versari circa rem visam, seu clarè apparentem: licet nihil obstat aliunde notam seu euidentem esse, videl. per scientiam. Quæ doctrina vera est, si loquamur de scientia humana, quæ longè inferiori, infirmiorique mentis certitudinem parit, quàm Fides: quare quæ per humanam scientiam cognoscuntur, ea Fidei argumento omnimodè confirmari possunt. Sin verò loquamur de scientia supernaturali, qua Deus viatori rem clarè, & intuitiue exhibet: vel si loquamur de visione beatifica, cum ipsa fides consistere nullo modo potest: quia fides est argumentum rei non apparentis: quod autem manifestissimè, & certissimè apparet, eius argumentum nullum persuasionis esse potest: quomodo enim per lucernam diem clarissimum alicui ostendere queas?

Nota tamen hoc loco: Licet Propheta interdum aperit, ac intuitiue videant, quæ ipsis à Deo reuelantur, unde & *videntes* dicuntur: id tamen perpetuum non est: nam aliquando solius Dei reuelantis euidenciam habent: non item rerum reuelatarum secundum proprias rationes: tunc autem Fides simul locum habet: sicut & in intellectu Angeli viatoris, secundum S. Th. 2.2. q. 5. art. 1. Vide Suarez p. 3. to. 1. dis. 21. s. 1.

Obijcies. Propheta, cui v. g. Messias reuelatus fuit, ita ratiocinari potuit: Quidquid Deus reuelat, id verum est, atqui Messiam venturum ad liberandum populum, Deus mihi reuelat: ergo verum est Messiam venturum. Maior, & minor euidentes sunt intellectui Propheta: igitur pariunt ei scientiam absolutam, non fidem. Respondeo cum Caiet. cit. q. 5. a. 1. Duplex est rei reuelatæ euidencia: Vna absoluta, quæ oritur ex connexionione terminorum, vel intuitionem ipsius obiecti & talis excludit fidem. Altera est respectiua, & extrinseca rei reuelatæ: si videlicet res cognoscatur in ordine ad reuelantem. & talis euidencia simpliciter non parit scientiam rei reuelatæ, sed cū obscura fide consistere potest. *Habere euidenciam*, inquit Caiet. *de veritate aliquorum, contingit dupliciter, primo quod intellectus videat, seu sciat ipsa enunciata in seipsis esse vera: & sic excludit rationem fidei: Secundo, quod videat, seu sciat in testificante esse vera: & sic non excludit fidem: & ita est in proposito.*

Assertio III. Licet verbum Dei tum scriptum, tum non scriptum, in ordine ad se, infallibilem certitudinem habeat, ob solam auctoritatem Dei attestantis: tamen in ordine ad nos, siue vt à nobis certum & indubitatum Fidei assensum mereatur, secundum ordinariam Dei legem pluribus extrinsecis adminiculis indiget, quotiescunque Dei reuelantis euidenciam non habemus. Hæc est communis assertio, quæ alijs etiam verbis tradi solet: duplicem esse Fidei certitudinem, Vna est obiectiua, seu tenens se ex parte obiecti. & hæc sufficienter sumitur ex auctoritate diuina. Altera est ex parte subiecti, videlicet intellectus: & aliud non est, quàm firmissima mentis adhesio; atque hanc dico plerumque alijs etiam adminiculis indigere.

Eiusmodi Fidei persuadendæ adminicula sunt: Imprimis ministerium hominis prædicantis fidem: Pauci enim sunt *theodidactoi*, quos Deus Fidei mysteria per se ipsum edocet, cum edocentis euidencia. Quandoquidem ipse Apostolus, qui ad tertium cælum raptus erat, tamen ad Ananiam mittitur instruendus, Act. 9. & obseruauit S. August. præfat. libr. de doctr. Christ. Et Eunuchus Act. 8. à Philippo edoceri debuit: Cornelius à S. Petro Act. 10. Quare S. Paulus ad Rom. 10. vniuersim ait: *Quomodo credent ei, quem non audierunt? Quomodo autem audient sine prædicante?* Deinde verò, præter ministerium hominis proponentis fidem, requiruntur alia argumenta, & incitamenta acceptandæ Fidei. Si enim Christianus Doctor infidelibus prædicet Deum trinum, & vnum: Dei filium substantialem, hominem factum, mortuum, resurgentem, &c. atque tales propositiones certissima fide tenendas asseueret, quia à Deo hominibus reuelatæ sunt: nisi assertionis suæ, & factæ à Deo reuelationis indicia ac motiua afferat quibus ea prudenter credibilis, & acceptabilis reddatur, nemo ex illis habebit fidem, quin neque habere poterit: Nam *Fides obsequium rationabile est*, Rom. 12. 2. ad Corinth. 10. Philip. 2. *Et, qui cito credit, leuis est corde.* Eccles. 19.

Tales sunt, quæ à Doctoribus dici solent notæ veræ Ecclesiæ, seu signa Catholica Fidei: videlicet miracula, quæ in contestationem propositæ Fidei à Christo, Apostolis, aliisque Sanctis patrata sunt, sicuti legimus Marci 16. *Prædicauerunt ubique Domino cooperante, & sermonem confirmante, sequentibus signis.* Et Christus apud S. Ioan. 6. 15. *Si opera non fecissem in eis, quæ nemo alius fecit, peccati infidelitatis non haberent.* Item vniuersis consensus plurimorum



morum hominum, vitæ innocentia, sapientia præstantium, qui tot continuis seculis, toto terrarum orbe, eandem Fidei doctrinam ab omni eo, quod mundus & caro amare solet, alienam indubitæ amplexi sunt, & contra tantos aduersarios, inuolatè defenderunt, ac propagarunt: sapissime cum sanguinis sui effusione; ut meritò dictum sit à Davide Psal. 92. *Testimonia tua credibilia facta sunt nimis: domum tuam, id est, Ecclesiam, decet sanctitudo Domine, in longitudinem dierum.* Ita seipsum in fide S. August. confirmavit contra Epist. fundam. c. 4. *Multa sunt, quæ me in eius Catholicæ Ecclesiæ gremio iustissimè teneant. Tenet consensus populorum, atque gentium: tenet auctoritas miraculis inchoata, spe nutrita, charitate aucta, firmata: tenet ab ipsa Sede Petri Apostoli, cui pascendas oues suas post resurrectionem Dominus commendauit, usque ad præsentem Episcopatum, successio Sacerdotum.*

Obijcies. Absurdum videri, quod verbum Dei, & diuina infallibilis Fides ab humanis & absolutè infallibilibus argumentis, siue indiciis dependeat. Respondeo: Non pendere per se, & suapte natura: sed per accidens, & respectu nostri: neque tanquam ex formalibus credendi principiis, sed extrinsecis tantum conditionibus, & adiumentis: neque talibus, quæ propositiones Fidei veras esse intrinseca euidencia ostendant: sed quæ easdem credibiles, seu ut diuinitus reuelatas, prudenter acceptandas esse euidenter demonstrent: id est, ut licet Fidei propositionum veritas per terminorum apprehensionem non appareat: extrinsecis tamen illis argumentis ac motiuis adeo corroborentur, ut homo imprudentiæ, ac temeritatis manifestò conuincatur, sit, apprehensus Fidei motiuis, nihilominus contradicere, & assensum negare audeat.

Etenim ratiocinari licet: Ad Dei bonitatem, & providentiam spectat, veram Fidem, ac Religionem maioribus, & vrgentioribus argumentis ac signis ornare, & confirmare, quam vlla falsa religio, aut secta ornata apparet. Nulla autem est religio tam grauib, vrgentibusque argumentis, ac signis ornata, quam Fides Christiana Catholica: Ergo hæc ipsa est vera Fides. Maior est certa. Si enim Deus veram Fidem, ac Religionem non redderet persuasibilem argumentis, ac signis, nemo eam acceptare teneretur, nec prudenter posset: Si autem Deum falsam religionem externis argumentis, ac signis permetteret esse magis ornatam, ac persuasibilem, nemo hominum reprehendi posset, qui derelicta vera Fide, tanquam minus in speciem verisimili, falsæ verosimiliori fidei adhereret: quod euidenter diuinæ bonitati, ac providentiæ repugnat. Si denique tum vera, tum falsa Fides æqualibus argumentis, ac signis persuasibiles existant, tunc homines meritò dubij & ancipites manebunt, ac neutri certum assensum prudenter præbere poterunt: quod itidem diuinæ bonitati, ac providentiæ aduersatur. Minor etiam certa apparet rem seriò & secluso omni affectu examinantibus, quod Fides nostra Catholica & per se consentanea sit rectæ rationi, ac bonis moribus; & innumerabiles per continuata annorum secula testes dignissimos habuerit, qui vitæ innocentia, ac sapientia præcelluerunt: plurimi diuinitus accepta potestate per signa mirabilia eandem doctrinam confirmarunt, & varias persecutiones, ipsamque mortem pro ea oppetere non dubitarunt: cum interim Religio, seu Fides Catholica inter tot grauissimas persecutiones non solum immota consisteret, sed magis ac magis cresceret. Quamobrem rectè collegit Richardus de S. Victore, lib. 1. de Trinit. c. 2. ita Deum alloquens: *Si error est, quem credimus, à te decepti sumus: is enim signis doctrina hæc confirmata est, quæ nisi à te fieri non potuissent.*

Quæ sanè causa est, quod hæretici (ut de Gentilibus, ac Iudæis tot sæculis à Deo derelictis, ac spretis taceam) nihil magis oderunt audire, quam de veræ Fidei, ac Ecclesiæ notis, siue indiciis, more suo prouocantes ad Scripturam, sed imperitè: cum de Scriptura ipsa ferme om-

nis lis, & controuersia sit; num illi, annos veram Scripturæ intelligentiam, ac interpretationem habeamus. Quare S. August. tr. 18. in Ioan. *Neque enim nata sunt hæreses, & quadam dogmata peruersitatis illaqueantia animum, nisi dum Scripturæ bona non bene intelliguntur; & quod in eis non bene intelligitur, etiam temerè & audacter asseritur.* Vide etiam Tertull. lib. de præscript. c. 15. & Vincentium Lirinensem aduersus hæreses, cap. 35. & seqq.

Sed obijciat aliquis: Dictam ratiocinationem, cuius maior, & minor propositio certa, imò euidenter videtur, esse demonstrationem, qua paritur scientia de veritate propositionum Fidei; quod supra negatum est. Respondeo: In homine, qui atheus non est, sed certam Dei persuasionem habet, ratiocinatione illa exactè apprehensa, generari posse assensum de veritate Fidei Catholicæ moraliter certum; sed non propriè euidentem, ac scientificum: quippe cum talis euidencia, per quam excluditur Fides, nasci debeat non ex principiis extrinsecis, sed intrinsecis ipsius rei cognitæ, ut supra ex Caiet. dixi. Ad eum modum, sicuti hæc ratiocinatio: *Quod innumeri homines à pluribus seculis tanquam oculati testes constanter asseruerunt, id verum est: sed innumeri homines à pluribus seculis tanquam oculati testes constanter asseruerunt, Romam esse, vel fuisse.* Ergo id verum est. Assensus iste, licet moraliter certus, ac indubitatus, tamen est Fidei, non scientificus, quatenus habetur de veritate Romæ aliquando existentis, & non præcisè de credibilitate.

Assertio IV. intellectus viatoris ad Fidei diuinæ assensum eliciendum, in genere causæ efficientis, quam maximè pendet à concursu & speciali auxilio Spiritus sancti, illustrantis intellectum, ac mouentis voluntatem. Est communis, tradita à S. August. lib. de Spiritu & litera, & probatur primò ex Scriptura sacra: *Nemo potest venire ad me, nisi Pater meus celestis traxerit illum,* Ioan. 16. *Credo Domine, adiuuam incredulitatem meam,* Marci 9. *Nemo potest dicere Dominus Iesus, nisi in Spiritu sancto,* 1. Corinth. 12. *Gratia estis saluati per Fidem; & hoc non ex vobis: Dei enim donum est,* Ephes. 2. *Dominus aperuit cor intendere his, quæ dicebantur à Paulo,* Act. 16. *Prædicatio mea non in persuasibilibus humana sapientia verbis; sed in ostensione Spiritus, & virtutis: ut Fides vestra non sit in sapientia hominum, sed in virtute Dei,* Rom. 1.

Secundò probatur ratione: Diuinæ Fidei assensus maximam, & infallibilem adhesionis certitudinem requirit: quam secundum ordinariam Dei legem, homo habere sufficienter non potest ex principio formali obiecti, quæ est reuelatio Dei, propterea quod hæc ipsa hominibus plerumque obscura, & incognita sit. Si enim Gentili v. g. dicas Verbum, quod S. Matthæi nomine circumfertur, diuinitus reuelatum esse, id ipsi non apparet, ut certissimum mentis assensum mereatur. Sed neque maxima illa certitudo assensus Fidei sufficienter nasci potest ab extrinsecis motiuis, seu adminiculis: cum enim ea humana, & absolutè fallibilia sint, non possunt ex se sufficienter parere diuinæ Fidei assensum, qui omni humana certitudine firmior & omnimodè infallibilis esse debet, conuenienter S. Petro Epist. 2. cap. 1. vbi postquam dixisset, se oculis conspexisse claritatem Christi in monte Thabor, subiunxit: *Et habemus firmiorem propheticum sermonem, cui benefactis attendentes, quasi lucerna lucens in caliginoso loco.* Consentit S. August. lib. 7. Confes. c. 10. *Non erat prorsus, unde dubitarem: faciliusque dubitarem me viuere, quam non esse veritatem.* Talis certissima Fidei adhesio, cum aliunde prouenire non possit, restat, ut Spiritus sancti gratia, in genere causæ efficientis humanam imbecillitatem in credendis sublimibus, & obscuris Fidei mysterijs adiuet, & intellectui nostro cooperans, firmitudinem adhesionis conferat.

Corollarium I. Licet Fides sit virtus intellectualis: ta-



men necessariò requirit piàm affectionem liberæ voluntatis, mouentis intellectum ad assentiendum obscuris Fidei propositionibus, iuxta illud Apost. 2. Corinth. 10. *In captiuitatem redigentes omnem intellectum in obsequium Christi.* Nam maior illa, imò maxima, quæ in Fide est certitudo adhesionis, non prouenit ex speculatione obiecti; sed ex determinatione liberi arbitrii, Spiritus sancti gratia adiuti: quæ etiam causa est, quòd licet Fides maiorem, quàm scientia, adhesionis certitudinem seu firmitatem habeat: faciliùs tamen abijci aut in dubitationem verti possit: cum ex libera voluntate dependeat. Vide de hac re S. Bonau. in 3. d. 23. a. 1. q. 4. Rich. a. 7. q. 1.

**Corollarium II.** Qui in hæreticorum conuersionem incumbunt, operam dare debent imprimis, vt illos ad pœnitentiam, & dolorem de peccatis suis inducant: ad quod efficiendum imprimis necessarium est, vt ipsimet vitæ probitate, ac virtutibus fulgeant: hæc enim res maximam vim habet ad hæreticorum, vel infidelium conuersionem. Contrà verò parum fructus sperari potest, si Catholicæ Fidei Prædicatores, dum bene docendo nouas plantulas in agrum veritatis inferunt, malæ fidei exemplo iterum eradicent scandalizando. Deinde ostendere oportet, non in quauis religionis persuasionem, aut secta salutem nos consequi posse: sed persuasum habeant, vnā esse veram Fidem, in qua salui fieri debeant: ad quam cognoscendam Spiritus sancti illustrationem, ac directionem syncerè postulent, parati omnino, nullis humanis impedimentis obstantibus, diuinā voluntatem, ac ductum sequi: interim proponantur illis hinc quidem orthodoxæ Fidei, atque Catholicæ Ecclesiæ notæ: illinc verò sectæ eius quam hæcenus professi fuerant, nouitas, absurditas, contradictiones. Quòd si eiusmodi adminiculis persuasi sint, vt Fidem nostram inter omnes religiones maximè credibilem esse agnoscant, ideòque eam amplecti velint: iterum moneantur credere summiter atque infallibiliter esse opus Dei, naturales liberi arbitrii vires superans: quare diuinū auxilium sedulo implorandum esse.

**Corollarium III.** Extrinseca illa motiua, respectu Fidei diuinæ, sunt tantum conditiones sine quibus non, secundum ordinariam Dei legem: respectu autem Fidei humanæ, & acquisitæ, sunt formalia media, ac principia. Quamobrem fieri solet, vt aliquis humanis tantum illis & extrinsecis motiuis permotus, arcana Fidei mysteria credat, destitutus tamen Fide diuina supernaturali iustificante, quam vel nunquam à Deo syncerè postulauit, & impetrauit: aut diuinitus sibi concessam perdidit. Ex quo numero hæretici sunt, qui multas Fidei veritates credunt, fide solum acquisita, & naturali: non diuina, supernaturali, infusa, sicuti bene præter alios annotauit Richar. in 3. d. 23. art. 7. quæst. 2. ibidem Scotus quæst. 1. §. In ista quæstione. Cum enim Fides diuina inclinet ad omnes articulos explicitè, vel implicitè propter diuinam reuelationem credendos: sequitur, quòd, qui aliquos articulos Fidei credit, alios credere pertinaciter recusat, id faciat principaliter ex propriæ libertatis nutu, sicuti notauit S. Bonauent. in 3. d. 23. a. 2. quæst. 1. num. 47. & magis intelligetur infra cap. 5. in fine. Veruntamen naturalis est hæc fides humanis argumentis, & propriæ voluntatis arbitrio nixa, pro humanarum virium inconstantia, instabilis est: vt nimis facile mutetur, vel omnino abijciatur, sicuti nimis ostendit hæreticorum nostrorum in rebus ad Fidem spectantibus inconstantia, & inter ipsosmet disceptatio. Quod tamen optimo consilio Deus permittit, quia, vt S. Hilarius annotauit lib. 7. de Trinit. *DisSENSIO hæreticorum confirmat Ecclesiæ veritatem.* Vide etiam Gabr. in 3. d. 23. quæst. 2. a. 3. Bellarm. lib. 6. de gratia, cap. 3. vbi ad quintum argument. ait: *Res credibiles sine alia Dei gratia credi posse, sed humana fide, non diuina: argumenta enim, quæ articulos Fidei nostræ credibiles faciunt, talia non sunt, vt fidem omnino indubitam reddant* (loquitur de omnimoda infallibilitate, qualem diuina Fides requirit) *nisi mens*

diuinitus adiuuatur.

**Corollarium IV.** Et si ad supernaturalis Fidei assensum omnino requiratur interna sancti Spiritus illustratio, ac persuasio: non tamè ea ordinariè est adstruenda, aut probanda Fidei sufficiens argumentum: vt malitiosè traditum sit à Caluino lib. 1. instit. cap. 7. Omnino certum, ac indubium esse Spiritus sancti testimonium. Cum enim apud omnes in confesso sit, quòd sæpe Sathanas transfigurer se in Angelum lucis, plerique dubitare possunt, vtrum testimonium fidei suæ, quod in se experiri putant, ex bono, an malo Spiritu proueniat, nisi alijs externis indicijs probetur; inter quæ haud dubiè primum ac præcipuum est Ecclesiæ consensus, atque traditio. Idque S. Ioan. indicauit epist. 1. cap. 4. *Nolite omni Spiritui credere: sed probate spiritus, si ex Deo sint.* Quòd si autem internum spiritus testimonium vltèriùs probandum est, sequitur non esse illud ordinariè sufficiens adstruenda veræ Fidei argumentum. Dico autem ordinariè: fateor enim aliquos præsertim, qui olim primitias Spiritus acceperant: sed & hodie quasdam singulares Dei amicos in se quandoque experiri, & clarissimè intelligere Sancti Spiritus constantis auctoritatem. Sed id nec generale, nec perpetuum est: quia non omnibus, sed paucis: & his ipsis non omni tempore tribuitur. Denique si alijs te ad veram Fidem Christi conuertendi sint, quam ipsi negant, vel de ea dubitant, frustra ipsis sancti Spiritus testimonium, quod sentire te gloriaris, tanquam certum veritatis argumentum adduces: cum id arcanum, tuòque corde inclusum sit: argumentum autem notius esse eo debet, ad quod ostendendum adhibetur. Quomodo enim alicui tenebras depellere possis, per lucem, quæ ipsi non luceat?

#### CAP. IV.

### Vtrum Fides diuina discursiua sit?

#### SUMMARIVM.

1. Vtrum Fides diuina discursiua sit, Doctores non consentiunt.
2. Fides discursiua non est circa omnia obiecta sua.
3. Fides omnibus obiectis, seu propositionibus suis absque discursu assentiri potest.
4. Probabile est, quòd Fides diuina discursiuos assensus elicere possit circa pleraque obiecta sua, quæ mediata dici possunt, seu quæ in aliud, tanquam medium & principium formale resolui possunt.
5. Conclusio, quæ ex duabus propositionibus Fidei infertur, videtur esse de Fide: secus, si vna sit tantum naturaliter ens.
6. Omnes Fidei actus eiusdem speciei siue essentia sunt.

**Q**uòd Fides diuina discursiua esse non possit, docent Capreolus in 3. d. 34. q. 1. a. 3. ad 3. Bannes 2. 2. q. 2. q. 1. 2. 1. dub. 4. concl. 5. Valentia to. 3. disp. 1. q. 1. p. 2. Melchior Canus lib. 12. de locis Theolog. c. 3. Turrianus de Fidei, disp. 6. dub. 1. Suarez de Fide, disp. 6. c. 4. Coninck de actibus supernaturalibus, disp. 9. dub. 7. Probant primò: Quia Fides diuina, cum infallibilis sit, alia re niti non debet, præter auctoritatem Dei reuelantis: si autem Fides discursiua esset, niteretur illatione, seu consequentia naturali lumine cognita: ergo Fides non est discursiua. Secundò: Si non per eundem Fidei actum intellectus assentitur veritati reuelatæ propter Dei reuelantis auctoritatem: sed alio priore actu assentimur reuelationem à Deo factam esse, & exinde mouemur ad alium actum circa propositionem reuelatam: sequitur, quòd Fides diuina partim sit habitus absolutus exercens actus immediatos; partim verò sit habitus respectiuus seu discursiuus, exercens actus mediatos: consequens autem dici non potest; cum absolutum & discursiuum, immediatum & mediatum sint essentialiter differentia habituum, vt apparet in habitu principiorum, & scientia discursiua.

Opposita



Opposita sententia est Durandi in 3. d. 24. quæst. 1. num. 16. Marsilij quæst. 14. a. 1. part. 3. conclus. 1. Gabr. in 3. d. 13. q. 2. a. 1. Vasq. p. 1. disp. 5. cap. 3. num. 5. Martini Becani 2. 2. c. 8. quæst. 3. conclus. 2. & videtur esse S. Th. de veritate, q. 14. a. 8. ad 16. ubi ait, quod testimonium Veritatis primæ, seu auctoritas Dei reuelantis ita se habet in Fide, sicuti se habent principia in scientijs demonstratiuis. Et 2. 2. quæst. 1. art. 1. in corp. quod Veritati primæ aliquid reuelanti Fides innititur tanquam medio. Nam v. g. Deum trinum & vnum esse, ideo per Fidem credimus, quia Deus veracissimus id reuelauit: quare priore actu credimus reuelationem Dei, tanquam principium: & exinde mouemur ad assentiendum rei reuelatæ.

Assertio I. Fides diuina discursiua esse non potest circa omnia obiecta sua. Probat: Quia alioquin sequeretur processus in infinitum. Esto enim, quod SS. Trinitatem esse, discursiue credam, quia diuinitus id reuelatum est: ipsam verò reuelationem non propter aliud credere possum, sed propter seipsam, adeoque immediatè & sine discursu, vti bene docet Caiet. 2. 2. quæst. 1. art. 1. ad dub. 4. & conuincit argumentum Scoti in 3. d. 23. quæst. 1. §. Quæro igitur à te, Palud. ibid. quæst. 3. §. de fide tamen infusa.

Obijcies. Si infallibilis reuelatio Dei per aliud tanquam medium in Fide ostendi non potest, sequitur esse per se notum, ac euidens, quod dici nequit. Respondeo, negando sequelā. Etsi enim in scientijs demonstratiuis principium, quod vltius probari non potest, per se, siue ex terminis notum, ac euidens sit: non tamen ita se habet principium in obscura Fide. Id enim cum per aliud prius ostendi non possit, debet esse per se, non quidem notum ac euidens, sed acceptatum, certum, indubium, infallibile. In hoc tamen similitudo, seu potius proportio cernitur: quod sicuti scientia principium suum, per se loquendo, non probat, seu à priore non demonstrat: sed aliàs declaratum acceptat, & supponit: cum alioquin processus esset in infinitum: Simili modo in Fide diuina, principium credendum, quod est veracissimi Dei reuelatio per se loquendo, ostendi non debet per aliquid prius: cum alioquin processus in infinitum foret: sed supponitur, seu ut acceptatum habetur.

Acceptat autem intellectus primæ Veritatis testimonium, seu reuelationem primò: Per prophetiam, aut aliam scientiam infusam, qua intellectus eleuatus euidenter perspicit reuelationem à prima Veritate fieri; licet veritatem rei reuelatæ non videat, sed per Fidem assentiat, vti supra dixi cap. 3. num. 2. Secundò: Per actum Fidei immediatum, ad quem eliciendum, id est, acceptandum, seu credendum reuelationem à prima veritate esse, extrinsecè prærequiruntur humana motiua, quibus acquisita fides innititur, intrinsecè verò, & in genere causæ efficientis requiritur Spiritus sancti gratia, supplet quod humanæ infirmitati ad supernaturalem infallibilem Fidei assensum eliciendum deest, sicuti supra explicatum.

Dixi autem *per se loquendo*, principium in Fide, quod est summæ veritatis testimonium, seu reuelatio per aliquid tanquam medium seu motiuum probari, aut ostendi non posse: nam per accidens, & respectu nostri interdum id fieri potest: vt si credas Euangelium S. Matthæi esse Dei verbum, quia Ecclesia, quatenus regitur infallibili assistentia Spiritus, id definit.

Pro pleniori intellectu obseruandum. In primo illo principio Fidei, quod dixi esse summæ veritatis testimonium, seu infallibilem reuelationem Dei, tria omnino continentur: videlicet, Quod Deus est: Quod prima & summā veritas est, quæ nec fallere, nec falli potest: Quod Deus aliquid obscure reuelauit, v. g. sacrosanctam Trinitatem. Hæc omnia & singula in Fide supponuntur, & acceptantur; non per aliud prius, veluti medium ostenduntur. Si enim crederem Deum esse, & in dicendo ve-

racem esse eo argumento, quia Deus veracissimus id reuelauit, tunc in argumento seu medio supponeretur id, seu tanquam medium assumeretur, quod ostendendum foret. Accedit, quod medium assentiendi prius, ac simplicius esse debet, quam id, quod ostenditur: prius autem ac simplicius est, Deum esse, & summam Veritatem esse; posterius autem, quod hæc creaturis de se reuelauit, vti bene notauit Marsilius de Inghen loc. supra cit. Ergo dici non posse videtur, Deum esse, & summam veritatem esse propter reuelationem diuinam, tanquam medium & argumentum credi; sed esse hæc in Fide, vt principia.

Assertio II. Valde credibile est, quod etiam alijs omnibus obiectis materialibus humanus intellectus per Fidem assentiri possit absque discursu. Sicuti enim possibile est, vt vni obiecto materiali, eique primario, puta, Quod Deus est, propter diuinam reuelationem absque discursu assentiamur: simili modo fieri posse videtur, vt alios Fidei articulos v. g. SS. Trinitatem propter eandem reuelationem diuinam sine discursu credamus: Credo Deum trinum esse in personis, vnum in substantia, quatenus id reuelatum, seu quia id reuelatum diuinitus est. Imò arbitror, hoc ipsum sæpius accidere in fide humana, vt si hominis veracitatem perspectissimam habemus, ei assentiamur credamus, quatenus nobis enuntiat: non interueniente discursu, saltem formali & explicito: Quemadmodum pari ratione cum horologium aspiciamus, iudicamus, esse horam v. g. diei tertiam, quatenus, seu quia id in horologio denuntiatur, nullo plerumque habito formali discursu.

Assertio III. Probabilissimè dicitur, quod fides discursiua esse possit circa pleraque materialia obiecta, quæ proinde mediata appellare licet: quia in aliud prius, tanquam medium assentiendi, resolui possunt. Talia obiecta sunt, quod Deus trinus, & vnus est: quod Filius Dei incarnatus est, &c. Si enim aliquis ex me quærat: Cur credis Verbum Dei incarnatum esse? aptè respondeo rationem à priore afferens: Ideo credo, quia à prima veritate id reuelatum est. Sin autem vltius quærat: Cur certa fide credis, talem à prima veritate reuelationem factam esse? tum rationem aliam, per quam intellectus meus ad credendum Fide diuina moueatur, afferre haud possum: sed respondere debeo, Talia signa externa mihi proposita esse, vt secundum regulas prudentiæ Fidem hanc libera voluntate cum Dei auxilio acceptārim: & verò Spiritus sancti illuminantis, ac confirmantis gratia certissimè, atque infallibiliter me credere, vt pro hac Fide mortem optere paratus sim.

Vltius probatur assertio: Nam discursus hominis in eo consistit, quod humanus intellectus assentitur vni propositioni: & exinde propter perspectam connexionem medijs cum consequente, mouetur ad assentiendum alteri propositioni. Id autem fieri potest in assensu Fidei circa SS. Trinitatem v. g. vt prius intellectus assentiat, seu credat, quod prima Veritas hoc reuelauit: & exinde moueatur ad alterum posteriorem assensum, seu Fidei actum quod Deus trinus est. Aptissimè enim rationem à priore reddo: Deus, qui veracissimus est, dixit se Trinum esse in personis: Ergo Deus trinus est personaliter.

Confirmatur primò. Doctores communiter docent, eiusmodi propositiones, quas mediatas dixi, in Fide resolui posse in diuinam reuelationem, tanquam formale principium; at verò principium resolutionis debet esse aliquid prius, ex quo tanquam medio alterum deducitur, quod sine discursu fieri non potest. Confirmatur secundò. Idem simili modo accidit in humana fide, vt considerantes hominis loquentis auctoritatem ita discurremus: Quod homo iste auctoritate plenus dicit, id verum est: ait autem, prælium cum Turcis commissum esse: ergo id verum est.

Corollarium. Si homo fidelis ita ratiocinetur: Quid-



quid Deus veracissimus reuelauit, id verum est: Sed Deus veracissimus reuelauit se trinum esse in personis, vnum in essentia: Ergo Deus vnus & trinus est. In hoc discursu tum maior, tum minor propositio: adeoque etiam conclusio Fidei diuina creduntur, vt docuit inter alios Andr. Vega super Trident. lib. 9. c. 36. Marfil. in 4. q. 12. a. 1. p. 3. Gabr. d. 23. q. 2. a. 1. & alij Scholastici super prologo sententiarum. Quia licet maior propositio lumine etiam naturali euidenter sit, assensus tamen Fidei non nititur eius veritate, quatenus naturaliter cognita; sed quatenus Fidei certum, seu diuinitus reuelatum est, Deum in dicendo veracem esse. Quamobrem cum omnes propositiones, ipsaque tota ratiocinatio vnico formali principio, videl. diuina reuelatione, tanquam formali ratione, sub qua assensus nitatur: consequens est à Fidei diuinæ habitu prouenire.

Cæterum si ex vna propositione Fidei, & altera propositione naturaliter tantum euidente conclusio infertur: ea non ad Fidem infusam, sed ad naturalem, & acquisitum habitum Theologiæ spectat: v. g. *Omnis verus homo est risibilis: Christus est verus homo. Ergo Christus est risibilis.* Hæc conclusio per se ipsam de Fide non est: cum non ex sola Fidei propositione, sed altera etiam naturaliter tantum notat intrinsecè dependeat. Quod si autem eiusmodi aliqua conclusio Ecclesiæ auctoritate definita, & Christiano populo credenda proposita sit: videl. Quod Christus duas voluntates habet, diuinam, & humanam: tunc videtur propositio esse de Fide, quatenus per os Ecclesiæ à Deo reuelatur, iuxta ea, quæ dixi supra.

Restat, vt respondeamus ad 1. sentent. argumenta, quatenus nostræ repugnant. Ad primum, Fidem diuinam suis conclusionibus assentiri propter solam Dei reuelantis auctoritatem. Nam habitus discursiuus assentitur suæ conclusioni propter medium, seu argumentum ritè apprehensum, seu propositum: tale autem medium, seu argumentum in Fide, est Dei reuelantis auctoritas, siue Dei reuelatio infallibilis: Ergo, &c.

Pro pleniori intellectu nota, Quod in discursu duo sunt, quibus assensus illatiuus nititur: I. est connexio medijs cum extremis ritè apprehensa. II. Assensus præmissarum, quo veluti manu ducitur, ac mouetur intellectus ad assensum conclusionis. His duobus etiam assensus Fidei circa reuelata innititur, vel ab ijs dependet: Primo quidem innititur primæ Veritatis reuelationi, tanquam formali principio, ac medio assentiendi: quamuis autem necesse sit, vt hoc principium, mediumque ritè apprehensum, & cum extremis connexum sit, id tamen habet se tantum vt conditio proponens obiectum. In qua quidem connexionem, apprehensionem terminorum si error contingat, profectò non elicietur Fidei diuinæ actus: & consequenter periculum non erit, ne Fidei diuinæ error sublit. Quemadmodum & contrariæ sententiæ defensores dicere coguntur, ad fidei assensum necessarium esse, vt intellectus apprehendat connexionem rationis formalis cum materiali: videlicet Deum trinum esse, quia à prima Veritate reuelatum est: in qua ipsa apprehensione error contingere potest, vt videlicet intellectus humanus connexionem illam non rectè apprehendat. Id verò nihil obstat Fidei infallibilitati: quia talis falsa apprehensio non erit obiectum Fidei, sed erroris. Secundo supra dictum fuit, quod assensus Fidei discursiuus circa reuelatum dependeat à priore assensu principij: sed hæc dependetia nihil officit: cum assensus principij non minus supernaturalis, certus, & infallibilis esse debeat.

Dicit aliquis. Præter ea, quæ numeravi, ad assensum illatiuum requiri, vt intellectus bonitatem consequentiæ cognoscat. Respondeo ad hoc: Si sermo sit de reflexa, & artificiali cognitione, nego: sin sermo sit de directa & naturali cognitione, concedo. Verum etiam ipsi fateri seu apprehendere debeat connexionem formalis rationis cum materiali, vt assensum elicere possit.

Ad secundum respondeo. Absurdum non esse, quod

habitus Fidei infusæ partim absolutus sit seu immediatus, respectu principij: partim mediatus, adeoque discursiuus comparatione aliorum, quibus vt conclusionibus assentitur. Nam etiam contrariæ sententiæ Auctores fatentur, primæ veritatis reuelationem, quæ homini obscurè sit, per Fidei habitum immediatè, & absolutè credi: ipsa verò reuelata eodem Fidei habitu credi non ita immediatè, sed per diuinam reuelationem, tanquam motiuum, seu vt S. Thom. ait q. 1. a. 1. tanquam medium assentiendi.

Qua simili ratione idem habitus charitatis infusæ tū in Deum fertur secundum se & absolutè: tum etiam in creaturas rationales propter Deum, seu quatenus capaces Dei: adeoque non absolutè, sed respectiue: atque Fidei habitum rectè comparari cum Charitate, significat S. Tho. 2. 2. q. 1. a. 1. ad 3. Quod vero in naturalibus & acquisitis habitibus intellectus non accadat, vt idem habitus diuersorum actuum respectu, absolutus & respectiuus sit causa est, quia habitus illi ab actibus generantur: cum itaque actus similem, aut potius proportionatum sibi habitum producant, sequitur, quod pro diuersitate essentiali actuum, etiam habitus essentialiter distinguantur, vt docet Aristot. 2. Ethic. cap. 1. & videri potest Scot. in prologo sentent. quæst. 3. Arimin. ibid. q. 3. a. 1. Gabr. q. 8. & 9. Durand. q. 4. Suar. in Metaph. disp. 44. s. 11. qui eo argumento colligunt, quod scientia totalis, v. g. Physica non simplex qualitas sit, sed aggregatum ex pluribus habitibus. Quis autem neget, quia Deus humano intellectui infundere possit habitum scientificum, quo habilitetur ad actus omnes circa subiectū attributionis promptè, ac faciliè eliciendos: cum nihil omnino repugnet ab vno principio elicitui diuersæ speciei actus produci. Pari itaque ratione nihil repugnabit, per vnum habitum Fidei infusæ intellectum habilitari ad omnes, quamuis diuersæ essentia actus, circa subiectum attributionis, quod Deus est, eliciendos.

Secundò responderi potest facilius, & clariùs: Actus Fidei omnes eiusdem speciei esse; & diuersitatem esse tantum materiale, prouenientem ex diuerso modo tendendi in obiectum, tamen sub eadem ratione formali. Quemadmodum enim actus Charitatis circa Deum, circa nos, & circa proximum eiusdem speciei sunt, propter vnicam formalem diligendi rationem, quæ est diuina bonitas: quamuis modus tendendi in Deum, & in alia obiecta diuersus sit; quia Deum immediatè amamus ex Charitate propter se ipsum: nos autem & proximum propter Deum, seu in ordine ad Deum: Ita etiam dicendum, actus Fidei omnes eiusdem speciei esse, propter vnicam rationem assentiendi formalem: quæ est prima Veritas reuelans: quamuis modus assentiendi diuersus sit: nam ipsam veracissimi Dei reuelationem per se ipsam, aut propter se ipsam credimus: rem autem reuelatam, puta SS. Trinitatem, Christi incarnationem, &c. mediatè, ac propter diuinam reuelationem credimus. Ex quo etiam apparet discrimen, cur alius in naturalibus statuatur habitus principiorum: alius verò habitus scientificus conclusionum: quia sub diuersa ratione formali, seu motiuo tendunt in obiecta sua: nam principijs naturaliter euidentibus assentitur intellectus propter terminorum incomplexorum perspectam habitudinem: conclusionibus verò assentitur propter principia, seu propositiones præmissas. At verò in Fide diuina eadem est ratio assentiendi obiectis omnibus, videlicet diuina relatio. Ita annotauit Becanus cit. c. 8. conclus. 4. & consentit his doctrina Scoti in 3. d. 28.



## CAP. V.

## DE RESOLUTIONE FIDEI.

## SUMMARIVM.

1. *Resolutio Fidei, si proprie loquendum, fit in formale principium, tanquam medium assentiendi.*
2. *Fides diuina, per se loquendo, resolucenda non est in auctoritatem Ecclesie, quatenus ea Spiritu sancto regitur, sed in veracitatem Dei reuelantis.*
3. *Ecclesia definitiones fidelibus esse debent, ut norma discernendi credenda à non credendis.*
4. *Fides acquisita per humana motiua, secundum ordinariam Dei legem, est praequisitum quoddam ad Fidem diuinam assensum.*

**S**ermo est de assensu Fidei circa reuelata, in quidnam tanquam formale assentiendi principium reducatur, ex quo per se, & necessariò dependeat?

Prima sententia circa Fidei resolutionem est Aureoli apud Capreolum in 3. d. 2. q. 4. a. 2. quòd Fides diuina resolucenda sit in Deitatem. Verù hæc doctrina ad propositum nostrum non est: quia loquitur de principio essendi: nos autem quærimus de principio assentiendi. Volo dicere: Tamen quærenti, cur Deus Trinus sit: cur prima veritas sit, &c. rectè respondeatur, Quia Deus est. At tamen quærenti, cur credis Deum trinum esse, non rectè respondeo: Quia Deus est; sed, Credo Deum trinum esse, quia id à prima veritate reuelatum est. Videri potest Caiet. 2. 2. quæstione 1. art. 1. dub. 1. Bannes cod. a. 1. §. His suppositis.

Altera sententia est Melchioris Cani lib. 2. de locis Theologicis, cap. 8. resolutionem Fidei faciendam esse in auxilium gratiæ diuinæ. Verùm etiam iste auctor, etsi re ipsa rectè sentire videatur, tamen ad propositam quæstionem non aptè respondet. Assignat enim principium in genere causæ efficientis: in resolutione autem Fidei inquirimus principium assentiendi formale, vt dixi.

2. Tertia sententia est Durandi in 3. d. 2. q. 1. Mich. Medina lib. 5. de recta in Deum fide, c. 11. Fidem diuinam resolucendam esse in auctoritatem Ecclesie, quatenus est organum Spiritus sancti assistentis, ac dirigentis; atque domus Dei, quæ est columna, & firmamentum veritatis, 1. ad Timoth. 3. Videlicet, cur credis Filium Dei incarnatum esse? propterea, quia Ecclesia Catholica, quæ Spiritu sancto regitur, ita testatur, ac proponit. Sed non placet hæc resolutio: cum neque omnibus communis, neque secundum se sufficiens sit. Prior pars ex eo probatur: Quia fieri sæpe solet, vt alii articuli Fidei nostræ, puta quæ sunt de Deo vno, & trino, explicitè credantur, ante hunc, qui est de infallibili Ecclesie auctoritate. Quinimò hæc Ecclesie infallibilitas Spiritus sancti promissione nititur: ergò prius oportet credere Spiritum sanctum, ad eoque Trinitatem in diuinis esse. Præterea constat, Beatissimam Virginem, Apostolos, primosque Christianos Fide diuinam credidisse: non ob auctoritatem Ecclesie, quæ vel fundata non erat (v. g. cum S. Petrus credidit Christum esse Filium Dei viui, Matthæi 16.) vel nondum Fidei dogmata definierat. Posterior pars probatur: Quia, vt supra dictum, resolueret Fidem diuinam aliud non est, quam eam ad formale assentiendi principium, seu motiuum reducere: Tale autem non est Ecclesie auctoritas. Si enim ex te quæram: cur credat Deum esse incarnatum? respondeasque, Quia Ecclesia Catholica, quæ errare non potest, ob S. Spiritus assistentiam, ita testatur: Iterum ex te quæram: Vnde id scias, vel cur credas, Ecclesiam errare non posse, vel sanctum Spiritum ei assistere? Quare rectè dixit Canus cit. cap. 8. post medium: Si generaliter quæritur, vnde fidei constet, ea quæ fide tenet, esse à Deo reuelata non poterit infallibilem Ecclesie auctoritatem adducere: quia vnum ex reue-

latis est, quòd Ecclesia errare non possit.

Interim non negamus, quin resolutio Fidei in auctoritatem Ecclesie, quatenus Spiritu sancto regitur, fieri possit, & communiter soleat à fidelibus ipsis, qui infallibilem Spiritus sancti assistentiam, ac directionem Ecclesie promissam, certa fide tenent: his enim eius testimonium, ac definitio certa regula est ad alios articulos amplectendos, testante S. Thom. qu. 5. a. 3. Qui inhæret doctrinæ Ecclesie, tanquam infallibili regulæ, omnibus assentit, quæ Ecclesia docet. Imò talis regula, seu norma, exurgentibus circa Fidem dubijs, omnino nobis necessaria est, puta ad discernendum Scripturam canonicam ab apocrypha: traditiones veras à falsis: denique credenda à non credendis, sicuti bene docet Bannes q. 1. a. 1. du. 4. & videri potest Caiet. in fine eiusdem a. 1.

Quarta sententia est Scoti in 3. distinct. 23. ibid. Gabrielis q. 2. a. 1. & 2. qui in resolutione recurrere videntur ad finem acquisitam, propter auctoritatem Ecclesie, quatenus ea est illustris congregatio tot hominum excellentiū. Exempli causa, Credo Deum esse incarnatum, quia diuinitus id reuelatum est: reuelatum autem hoc esse diuinitus, seu reuelationem hanc à Deo profectam esse, ideo accepto, seu credo (fide acquisita) quia ita scriptum est in Euangelio S. Ioannis, cui omnis Ecclesia, seu congregatio hominum vitæ innocentia, sapientia illustrium, testimonium & assensum præbet.

Hæc sententia, si rectè explicetur, à vero aliena non est. Non enim mens est Doctorum illorum, quòd Fidei diuinæ assensus in fidem acquisitam propter auctoritatem Ecclesie resoluitur, tanquam in principium: sed tanquam in extrinsecum adiumentum, & conditionem sine qua non. Etenim auctoritas illa Ecclesie, non quatenus consideratur vt organum Spiritus sancti: sed vt illustris congregatio hominum prudentum, &c. est quidem formale principium credendi fide humana: sed non Fide diuina. Quia Fides diuina est, qua Deo dicenti credimus ob auctoritatem & veracitatem eius: consequenter qui credit propter auctoritatem hominum, vel simile motiuum humanum, is fide solum humana credit. Accedit, quòd (sicut ipsemet Scotus, & Gabriel argumentantur) assensus cognoscitiuus non possit excedere certitudinem principij, quo nititur: assensus autem Fidei diuinæ certitudinem infallibilem habet: ergo fieri non potest, vt assensus Fidei diuinæ, tanquam principio nitatur auctoritate hominum, vel simili motiuo humano, quippe quod secundum se absolutè fallibile est. Solum igitur volunt citati Doctores, fidem acquisitam per humana motiua, esse secundum ordinariam Dei legem, praequisitum quoddam ad Fidem diuinam, ac supernaturalem, quod etiam annotauit Durand. dist. 25. q. 3.

Maior autem, imò maxima, & certissima animi adhesio quam Fides diuina continet, non ex viribus naturæ, aut humanis persuasionibus prouenit, sed ab auxilio Spiritus sancti succurrentis intellectui, & liberæ voluntati nostræ, sicut ille in Euangelio S. Marci c. 9. expressisse videtur: Credo Domine, adiuua incredulitatem meam. Quid est, credo, & incredulus sum? Credo ob præsentiam, & maiestatem, ob miracula, quæ video, &c. Sed hæc non sufficiunt ad omnino certissimam fidem, quæ diuina est: ideoque eam habere non possum, nisi tu interius per gratiā me adiuues. Quæ obrem S. Aug. 1. de spiritu & litera fusè disputat, & contendit: animam per liberum arbitrium credere non posse, nisi diuina adsit vocatio, suasio auxilium. Et 1. 6. Confess. c. 5. significat, quæst. illam: Vnde scis illos libros vnus veri, & veracissimi Dei spiritus esse humano generi demonstratos & ingenij sui inquisitione satis discuti non potuisse: sed paulatim Dominum manu mitissima, & misericordissima pertractasse, & composuisse cor suum ad credendum firmiter.

Verùm de causa illa diuinitus efficiente super c. dictum est. Quòd verò ad formalem, de qua nunc agimus, Fidei resolutionem attinet, expeditus ac verus dicendi modus est



iste apud Caietan. 2. 2. quæst. 1. a. 1. Quod Fides diuina ex parte obiecti, ac motiui formalis resoluitur in autoritatem Dei reuelantis: Credo Deum esse incarnatum: Ecclesiæ item definitæ autoritatem infallibilem esse: quia prima, & summa Veritas id nobis reuelauit. Deum autem veracem talia nobis reuelasse, vltius resolui, vel per Fidem probari non potest, nec debet: quandoquidem principia resolutionis non probantur, sed supponuntur. Verum in ordine ad nos, reuelatio diuina credibilis, & acceptabilis sit per extrinseca motiua, inter quæ vna ex præcipuis merito censetur autoritas, & consensus Ecclesiæ, tot sæculis, tanto numero hominem clarissimorum, florentis: quamuis id non vnicum, neque simpliciter necessarium motiuum est: quandoquidem non omnes eodem modo: sed alij aliter ad Fidem Christi amplectendam mouentur, vti notauit S. August. de vtil. credendi, c. 14. contra Epist. fundamenti, cap. 4. & lib. 1. ad Simplicianum, q. 2. Nam alios mouet constantia Martyrū: alios specialiter sanctitas & innocentia prædicantium Fidem: alios operatio signorum, alios pœna Ecclesiæ persecutoribus diminuta, vti apparebat, inscripta. Sic exempli causa cæcus ille apud S. Ioan. c. 9. Filium Dei credidit, & adorauit, quia ipsemet, qui ei loquebatur, Messias reuelauit, & confessus est: Ad hanc autem reuelationem, ac testimonium acceptandum miraculo motus fuerat: Quia à sæculo non est auditum, quod quis aperuit oculos cæci nati.

His adde, non tantum varijs motiuis homines ad Fidem amplectendam moueri, sed etiam alios alijs facilius, partim propter maiorem internam Spiritus sancti illustrationem, & impulsione, sicuti notauit Valentia q. 1. p. 4. arg. 18. partim propter animi sui simplicitatem, quia de opposito errore persuasionem nullam conceperunt. Quia ratione pueri apud Catholicos cum ad vsum rationis peruenerunt, acceptant Fidei mysteria, tanquam diuinitus reuelata, quia natu maiores & prudentes, quos ipsi norunt, ita credere animaduertunt.

## CAP. VI.

## De ordine rerum credendarum.

## S V M M A R I V M.

- 1 Inter credenda absolute primum, ac præcipuum est, Quod Deus sit.
- 2 Inter Fidei articulos, quos discursiue, & vt conclusiones credimus, non est aliquis ordo per se necessarius.
- 3 Hæretici ex eorum concessis convincendi sunt, maxime autem per traditiones, & consensum Ecclesiæ.

**A**ssertio I. Inter credenda absolute primum, ac præcipuum est, Quod Deus sit, sicuti indicauit Apostolus ad Hebr. 11. Credere oportet accedentem ad Deum quia est. Obiciet aliquis. Quod Deus sit, lumine naturali per discursum esse enter cognosci potest, & à Philosophis huius mundi cognitum est, sicuti testatur Apostolus ad Roman. 1. Ergo non est necessaria Fides, imò ea cum tali scientia consistere non potest. Ad hoc respondeo, & dico I. Lumine naturali ex his, quæ facta sunt, cognosci potest Deus vnus, vt est auctor naturæ, & effector huius mundi: hæc tamen cognitio non sufficit ad salutem. Sed requiritur, vt agnoscamus Deum esse auctorem gratiæ, & gloriæ, quod lumine naturali non assequimur, sed per Fidem supernaturalem.

Dico II. Si loquamur de habitu scientiæ naturalis, & habitu Fidei infusæ, nemo negat, simul in eodem intellectu consistere posse etiam in ordine ad idem materiale obiectum, videlicet quod Deus est. Sin verò loquamur de actibus, est, quidem probabilis sententia S. Thom. 2. 2. q. 2. 4. & 5. Dum euident cognitio obiecti intellectui in promptu est, vel in memoria hæret, non posse simul ob-

scure Fidei actum circa tale obiectum elici. Quia Fides est argumentum rerum non apparentium: si autem res per se appareat, atque conspicua sit, non est locus extrinseco argumento, seu motiui ad persuadendam veritatem. verum licet intellectus humanus interdum ita bene dispositus esse possit, vt euidentem demonstrationem de Deo, quatenus naturæ auctor est, consequatur, tamen ob naturalem imbecillitatem, eiusmodi scientia de re adeo à sensibus nostris remota, non semper in promptu est, sed facile dilabatur; tunc verò necessarium est, vt Fides succurrat, certam & infallibilem de Deo, quamuis scientificè tunc non apparente, persuasionem menti ingenerans, per Spiritus sancti gratiam: subseruientibus etiā motiuis extrinsecis: puta, omnium populorum perpetua persuasionem, venerationem, concepta ex ordinata huius mundi fabrica, mirabilibus & naturæ ordinem excedentibus effectibus, &c. Adde, quod certitudo assensus Fidei maior, ac perfectior est, quàm demonstrationis humanæ, vt supra dixi ca. 3. num. 2. verb. Non pauci: Igitur qui demonstrationem, seu scientiam acquisitam de Deo habet, is nihilominus piè intellectum inclinare poterit, cum Dei auxilio, vt Fide etiam diuina credat, Deum esse auctorem naturæ, &c. idque certius iam teneat, quàm seipsum viuere, vti locutus est S. August. libro 7. Confess. cap. 10.

**A**ssertio II. Inter speciales Fidei propositiones, seu articulos, qui discursiue creduntur vt conclusiones, non aliquis ordo simpliciter necessarius. Ita Nicolaus Serrarius in prolegom. Bibliac. c. 7. q. 7. prop. 2. Ratio est: Quia vnus articulus ab altero non dependet tanquam formali principio, ac mortuo: sed omnes peræque dependent à veracissimi Dei reuelatione.

**A**ssertio III. Conuenientior tamen ordo proponendi, & credendi Fidei articulos ille est, qui in Symbolo Apostolico continetur: vt primum locum obineat mysterium Sacro sanctæ Trinitatis: deinde Incarnatio Verbi: Missio Spiritus sancti: tum Ecclesiæ Catholicæ sanctitas & infallibilis auctoritas: deinde septem Sacramenta, hominisque iustificatio, & glorificatio. Quapropter hunc ordinem plerumque obseruamus in pueris primo Cathenchismo instruendis, atque infidelibus ad Christi Fidem conuertendis.

**A**ssertio IV. Si agatur de conuersione Hæreticorum: illæ Fidei propositiones, sacræ Scripturæ testimonia, quæ ab ipsis bono sensu recipiuntur, argumenti loco assumi possunt ad ostendenda alia Fidei dogmata, quæ ab eisdem negantur. Quamuis enim hæc argumentandi ratio non sit ex notiore secundum se: est tamen ad hominem accommodata, nihilque frequentius est, quàm ex confessis contra aliquem argumentari, ad adstruenda ea, quæ ipse negat.

Porro hæretici quàm maxime per traditionem à Patribus acceptam, conuincendi sunt. Etenim autoritatem Scripturæ ipsi imprimis vigeant, nullum tamen ex ea argumentum firmum ducere possunt sine Ecclesiæ traditione. Vnde enim ipsis constare satis potest, S. Matthæi Euangelium, v. g. non item, quod Nicodemi nomine circumfertur, canonicum esse, nisi ex Ecclesiæ autoritate: Quare S. August. dixit contra Ep. fundam. c. 5. Euangelio non crederem, nisi me Ecclesiæ moueret autoritas. & l. 28. contra Faustum, c. 2. quod de S. Matt. Euangelio ait: Non esse dubitandum de eius autoritate, quam ex illo tempore, quo Matthæus ipse in carne vixit, non interrupta serie temporū, Ecclesiæ certa connexionis successione, usque ad tempora ista perduxit: idē suo modo de alijs sacræ Scripturæ libris, & Fidei dogmatibus semper in Ecclesia receptis dici potest. Accedit, quod tametsi satis constaret, S. Matt. v. g. Euangelium esse canonicum: verè tamen possent hæretici, ne pluribus sententiarū locis, malitia infidelium, alijve de causis deprauatū sit: si Ecclesiæ definitionē, ac traditionē respuant. Quare notandum est hoc loco, hæreticos conuinciposse, quod



quod articulos de SS. Trinitate, Christi incarnatione, &c. non Fide diuina infallibili, sed solam humana persuasione credant; Si enim articulos illos Fide diuina crederent, propter Dei reuelationem crederent: consequenter eadem, diuina, & infallibili Fide credere deberent articuloꝝ reuelationem à Deo factam esse. At verò ipsi respicientes traditiones, atque aperte profitentes, nihil Fide diuina credendum, quod scriptum non sit, libros Euangelistarum, v.g. tanquam Dei infallibile verbum Fide diuina acceptare non possunt: cum scriptum in Euangelio non sit, à Spiritu sancto reuelatos, aut dictatos esse.

## CAP. VII.

## De proponente Fidem.

## S V M M A R I V M.

1. Singuli Ecclesie Ministri & Doctores, ob humanam imbecillitatem, in rebus Fidei errare possunt: etiam Summus Pontifex secundum propriam personam.
2. Summus Pontifex, ut publica persona proponens Ecclesie vniuersalia Fidei, aut morum decreta, ob Dei prouidentiam, errare non potest, secundum probabiliorem sententiam.
3. Summus Pontifex, etiam ut publica persona, errare potest in particularibus questionibus facti.
4. Quod in generali Concilio, tanquam ad Fidem, vel bonos mores pertinens, definitum est, nulli errori subiectum esse posse, certa fide constat.
5. Ad Summum Pontificem proprie pertinet Concilia generalia indicere, ac congregare.
6. Imperator, seu Princeps laicus in Conciliis, aliisque Ecclesiasticis negotiis nihil cum autoritate praeferre potest.
7. Ad Pontificem pertinet libros canonicos à non canonicis, seu apocryphis discernere: & Scripturas canonicas in puritate conservare.
8. Ad eundem Pontificem spectat Symbolum Fidei ordinare, aut de nouo edere.  
Quatuor in Ecclesia symbola extant: Apostolicum, Nicanum Constantinopolitanum, & Athanasii.
9. Symbolum Fidei articulis suis, usque quatuordecim constat.
10. Hæreses emergentes cognoscere, & condemnare Summi Pontificis officium est.

**I**mprimis notandum est, quod Fides alicui proponi potest vel ab ipsa Ecclesia, vel saltem capite Ecclesie, seu summo eius Magistratu: vel ab Ecclesie Ministris supremam autoritatem non obtinentibus.

**A**ssertio I. Ecclesie Ministri, v.g. Parochi, & Episcopi singuli (excepto Summo Pontifice) non tantum ipsimet in rebus Fidei errare possunt, ac falli: sed etiam errores suos aliis proponere. Hæc est communis. Quia nullum vel ex Scriptura, vel ex Patrum traditione priuilegium scimus concessum singulis Ecclesie Ministris, (excipio Apostolos, & Apostolorum Principis in vniuersali potestate successorem) quo minus, secundum humanam imbecillitatem, in rebus Fidei & falli, & alios fallere possint. Dixi autem singulos errare posse. Nam ut omnes Doctores, & Pastores in rebus Fidei errent, fieri non posse videtur: quandoquidem populus Doctoribus, & Pastoribus suis adhærebit; ideoque tota Ecclesia in errorem inducetur, quod fieri non potest, sicuti ratiocinatur Bannes 2. 2. q. 1. a. 10. du. 1. concl. 3.

**A**ssertio II. Probabilius est, quod Summus Pontifex, quo ad suam personam in hæresin etiam notoriam incidere possit, ob quam dignus sit, ut ab Ecclesia deponatur, vel potius ut præcisus declaretur. Ita Caiet. opusc. de auctor. Papæ, c. 18. & seqq. Turrecrem. l. 2. Sum. de Ecclesia, n. 2. ad 6. Canus l. 6. de locis, c. vlt. ad 11. Azor t. 2. l. 5. cap. 5. Valent. ci. q. 1. p. 7. & q. 6. §. 39. Bannes ci. a. 10. du. 2. contra Albert. Pighium l. 4. de Eccles. hierarch. c. 8. cui fauet Bellarm. l. 2. de Pontif. c. 30. & l. 4. c. 2. & 6. Probatur assertio:

Quia eiusmodi Priuilegium à Christo summis Pontificibus concessum nec ex Scriptura sacra, nec ex Patrum traditione colligitur: Ergo asserendum non est. Prior pars ex eo ostenditur, quod promissiones à Christo factæ S. Petro non possunt ad alios summos Pontifices transferri, quatenus priuatae personæ sunt, sed ut successores Petri in pastoralis potestate docendi, &c. Posterior pars probatur: Quia ex Patrum scriptis & decretis potius contrarium colligitur: non quidem, quod Romani Pontifices de facto aliquando hæretici fuerint: (id enim haud facile ostendi potest) sed quod persuasio fuerit, fieri posse ut in hæresin labantur; ideoque, si tale quid accidisse videatur, ad reliquos Episcopos pertinere, ut rem examinent, iudicent, sicuti videre est in sexta Synodo. Actiō. 15. Secunda Synodo, act. vlt. Octaua Synodo, act. 7. in epist. Hadriani: & Concil. 5. Romano sub Symmacho Papa, multis antecessoribus nostris synodali ter decretum: atque firmatum est, ut oues Pastorem suum nec reprehendere, nisi à Fide exorbitauerit, præsumant. Et c. si Papa, d. 40. ex Bonifacio Archiepiscopo refertur: Cunctos ipse indicaturus à nemine est indicandus, nisi forte deprehendatur à Fide denique. Et ipsemet Bellarm. l. 2. c. 30. ita scribit: Non possumus negare, quin Hadrianus cum Concilio Romano, imò & tota Synodus Generalis VIII. senserit, in causa hæresis posse Rom. Pontificem iudicari. videri potest Melchior Canus li. 6. de locis Theologicis, c. vlt.

Nota autem, licet ponamus, summum Pontificem, ut priuata persona est, hæreticum fieri, ideoque desinere esse verum Ecclesie membrum: (cum Ecclesia sit fidelium congregatio: hæretici autem quilibet, eo ipso quod veram Christi fidem abiecerunt, neque fideles, neque veri Christiani existant, teste S. Augustino in enchirid. cap. 5.) tamen quoad Papa ab Ecclesia toleratur, & ut Pastor vniuersalis publicè agnoscitur, tamdiu etiā Pontifici potestate re ipsa præditus est, ut omnia eius decreta non minore vim & autoritatem habeant, quam si verus fidelis esset, sicuti bene notat Dom. Bann. q. 1. a. 10. du. 2. ad 3. Suar. l. 4. de l. c. 7. Ratio est: Quia id pertinet ad convenientem gubernationem Ecclesie: sicuti etiam in alia bene constituta Republica tamdiu acta publici Magistratus valent, quamdiu in tali munere relinquitur, & publicè toleratur, iuxta l. Barbarius. ff. de officio Prætorum.

**A**ssertio III. Summus Pontifex ob Dei prouidentiam errare non potest in decretis Fidei vniuersalibus seu, quæ toti Ecclesie proponit, quamuis sine Episcoporum Concilio: neque in præceptis morum, versantibus circa res ad salutem necessarias, vel quæ per se bonæ, aut malæ sunt. Ita D. D. Communiter apud Cai. opusc. de auctor. Papæ. Bann. ci. q. 1. a. 10. du. 2. Bellar. l. 4. c. 2. Probatur primò ratione: Si Summus Pontifex in vniuersalibus Fidei, aut morum decretis erraret, tunc tota Ecclesia in errorem contra Fidem, aut doctrinam Christianam induci posset: consequens est impossibile: ergo & antecedens. Minor est certa ex promissione Christi Matth. 16. Porta inferi non preualebunt aduersus eam. Et verbis Apostoli 1. ad Timoth. 3. vbi Ecclesiam appellat columnam & firmamentum veritatis. Maior probatur: Quia Ecclesia reliquo Summo Pontifici, tanquam membra capiti, tanquam oues pastori suo adherere tenetur: ergo si ille falsum aliquid contra Fidem, aut doctrinam Christianam proponeret, aut credi iuberet, Ecclesia tota in errorem induceretur.

Probatur secundò ex testimoniis Patrum: S. Cyprian. lib. 1. epist. 3. ad Cornelium, Petri Cathedram vocat Ecclesiam principalem, unde unitas sacerdotalis exorta est: atque eos esse Romanos, quorum Fides Apostolo predicante laudata est, ad quos perfidia non possit habere accessum. Similia habet S. Hieron. lib. 3. Apol. aduersus Rufinum: Et ipse Rufinus in expositione symboli, quæ habetur apud Hieron. to. 2. rationem reddit, cur in Ecclesia Romana nulla vnquam verborum adiecto Symbolo Apostolorum facta fuerit, quia nulla hæresis ipsi sumpsit exordium. Idemque Hier.



in Epist. ad Damasum ita scripsit: *Beatitudini tue, id est, Cathedra Petri, communionem confocior: super illam petram edificatam Ecclesiam scio: Quicumque extra hanc domum Agnum comederit, prophanus est: si quis in arca Noë non fuerit, peribit regnante diluvio.* Petrus Chrysologus Epist. ad Eutychen. *Mortamur te, frater, ut his, quæ à beatisimo Papa Romana civitatis scripta sunt, obedienter attendas: quoniam B. Petrus, qui in propria Sede vivit, & præsidet, præstat querentibus Fidei veritatem.* Gelasius in Epist. 10. ad Anastas. Augustum, *Hoc est, quod sede Apostolica magnopere canet, ut quia mundi radix est Apostolice gloriosa confessio, nullarum pravitatis, nulla prorsus contagione maculetur. Nam si (quod Deus avertat, quod fieri non posse confidimus) tale aliquid proveniret, unde cuiquam resistere audeamus errori? S. Ber. ep. 190. ad Inn. II. Oportet ad vestrum referri Apostolatum pericula, quæque & scandala emergentia in regno Dei, ea præsertim, quæ de Fide contingunt. Dignum namque arbitror, ibi potissimum resarcire damna Fidei, ubi non possit Fides sentire defectum. Hæc quippe huius prærogativa Sedis: Cui enim alteri aliquando dictum est, Ego pro te rogavi Petre, ut non deficiat fides tua?*

Porrò notandum est primò: Licet dicta assertio non ita certa sit, ut contraria sit error in fide, quandoquidē non defuerunt Doctores, ut Adrianus in 4. q. ult. de Confirmatione. Gerson part. 1. tract. de examin. doctrin. & alij Parisienses, qui in solo Concilio generali constituerunt infallibilitatem iudicii de rebus Fidei: tamen si quis generalem definitionem Papæ circa Fidem, aut mores falsitatis argueret, aut ei se opposeret, contra eum meritò, tanquam suspectum de hæresi, aut schismate introducendo, procedi posset. Excepto, si Summus Pontifex manifestum errorem contra Fidem Ecclesiæ proponere, seu obtrudere conaretur. Nam id nihil repugnare graues Doctores docent, inter quos Gerson confid. 1. Turrecremata lib. 2. de Ecclesiâ, cap. 112. ad 7. & lib. 4. part. 2. cap. 16. modo 17. & indicat Syl. ver. opinio, in fine. Corduba cit. qu. 1. prop. 10. limit. 2. Valent. qu. 1. p. 7. qu. 6. §. 39. Qui etiam rationem afferunt: Quia tunc Ecclesiâ, non versabitur in periculo: cum non teneatur Pontificem, docentem aliquid contra Fidem receptam in Ecclesiâ, ut pastorem sequi: sed potius tanquam lupum apertè grassantem avertari. Quare etiam Bellarm. l. 4. c. 2. non sine causa ex communi Catholicorum sententia ita loquitur: *Pontificem in re dubia statuentem ab omnibus fidelibus obedienter audiendum esse.*

Deinde accidere potest casus, ut licet summus Pontifex re ipsa verum doceret, tamen aliquis per inuincibilem ignorantiam sibi persuaderet, doctrinam Ecclesiæ propositam manifestò esse contra sacram Scripturam, & Fidem Christianam: quo modo credibile est S. Cyprian. cum LXXX. Episcopis Africanis deceptum fuisse in questione de rebaptizandis hæreticis: antequam dogma, quod Stephanus Papa Ecclesiæ tradidit, & imperavit observandum (ut videlicet hæretici in forma SS. Trinitatis ritè baptizati, sine alio baptismo ad Ecclesiam reciperentur) generali Concilio confirmatum esset. Qua de re videri potest S. August. lib. 2. contra Donatistas, cap. 4. & l. 4. ca. 6. Caterum postquam doctrina, aut definitio Summi Pontificis, etiam sine generali Concilio tradita, ab Ecclesijs communiter recepta fuit tunc apertè hæreticus censeri debet, qui ei pertinaciter contradicere, aut in dubium revocare audeat: cum certa Fide constet, Ecclesiam uniuersam errare non posse.

Secundò notandum est, quod in assertione dixi: Pontificem errare non posse in decretis morum circa ea, quæ ad salutem necessaria, vel per se bona, aut mala sunt: v. g. ut doceat usuram esse licitam, iniustè ablata non esse restituenda. Nam interim nihil obstat, quin Pontifex leges condant, aliæve statuatur, quæ per se quidem siue ex obiecto mala non sunt: tamen propter adiunctas circumstantias minus Ecclesiæ expediunt: ut si in censuris, alijsve

pœnis ferendis nimis securus: vel contra in indulgentijs, aut dispensationibus concedendis nimis facilis sit: propterea eiusmodi decreta Pontificum, si Ecclesiæ minus vtilia appareant, à successoribus eorum quandoque reuocantur.

Assertio IV. Summus Pontifex, etiam ut publica persona, errare potest in diiudicandis particularibus questionibus, quæ plerumque de facto sunt. Ita ex communi Corduba lib. 4. questionar. q. 1. prop. 10. limit. 3. Ban. cit. questione. 1. dub. 6. conclusione 4. Bellarm. libro 4. de Pontifice, cap. 2. Ratio est, quia assistentia, & directio sancti Spiritus promissa est Petro, & successoribus eius in ordine ad Ecclesiam, ne eam in errorem inducant: cuius rei periculum nullum est in decretis particularibus, seu non ad uniuersam Ecclesiam attinentibus.

Assertio V. Certa Fide apud Catholicos constat, quod in generali Episcoporum Concilio, tanquam ad Fidem, vel bonos mores pertinens, definitum fuerit, errori, aut falsitati subiectum esse non posse. Probatur ex eo: Quia Ecclesiâ uniuersa errare non potest, sicuti constat ex ca. 16. & 18. Matth. 1. Timoth. 3. Episcopi autem ex uniuerso orbe, quatenus commodè fieri potest, congregati, cum capite suo, qui est summus Pontifex, uniuersam Ecclesiam repræsentant: Quandoquidem, ut S. Syprianus ait lib. 4. Epist. 9. *Ecclesiâ est in Episcopo.* Et Euseb. libro 3. de vita Constantini, Concilium Episcoporum Nicææ habitum vocat, *Conuentum orbis terrarum.* Et S. August. lib. 1. de Baptis. cap. 18. *totius Ecclesiæ consensum.* Ergo quæ in tali Concilio, circa Fidem aut mores (modo supra explicato) decreta fuerint, errori obnoxia non sunt. Vide quæ dixi l. præced. c. 7. §. 2.

Corollarium I. Ad Summum Pontificem propriè pertinet generalia Concilia congregare. Probatur imprimis ratione: Ad eum pertinet Concilium generale indicare, qui omnium nationum Episcopis cum autoritate imperare potest: Hic autem est solus Romanus Pontifex, tanquam aliorum Episcoporum, totiusque Ecclesiæ caput, sicuti appellatum reperies in Concilio Ephesino Generali tom. 2. cap. 15. & in Chalcedonenſi Act. 1. & in eodem Act. 3. in Epistola Synodica ad Leonem I. Probatur secundò ex traditione, & praxi Ecclesiæ: Sic enim testatus est, euicitque Iulius Papa Romanum apud Athanasium Apol. 2. Socratem lib. 2. cap. 13. Sozomen. libro 3. capite 7. & 9. Nicephorum libro 9. cap. 10. Extare canonem Ecclesiæ, quo autoritas omnis derogetur, quæ præter Romani Antistitis sententiam, decreta essent. Et Damasus Papa Epist. 4. ad Episc. Africanos cap. 1. *Ut noſtis, Synodum sine eius (Romani Pontificis) autoritate fieri non est Catholicum: nec Episcopus, nisi in legitima Synodo, & suo tempore Apostolica vocatione, congregata, definitè damnari potest: neque ulla unquam Concilia rata leguntur, quæ non sunt iuxta Apostolicam autoritatem.* Et Lucencius Legatus Romanus in Chalcedonenſi Concil. Act. 1. *Synodum ausus est facere, Dioscorus Alexandrinus Archiepiscopus, siue autoritate Apostolica sedis, quod nunquam licuit, nunquam factum est.* Egypti Episcopi in epist. ad Felicem II. *canonibus inuentibus, absque Romano de maioribus causis nos nihil debere decernere Episcopo.* Et infra: *Scimus in Nicæna magna Synodo communiter ab omnibus esse roboratum, non debere absque Romano Pontifice Concilia celebrari, nec Episcopos damnari.* His adde Leon. I. epistol. 15. ad Ephesin. pleu. dosynodum, & epistol. 24. ad Theodos. Augustum. Actionem I. Concilij Chalcedon. aduersus Nestorii audaciam, Episcopos Ephesum conuocantis. Pelag. 11. epist. quæ incipit *manifesto*, ad Episcopos, qui conuocatione Ioannis Episcopi Constantinopolin conuenerant. Pulcheriam Augustam in epistol. ad Leonem I. ante Concil. Chalcedonenſe. Denique in Concil. VI. Oecumenico Act. 18. testantur Patres, omnia etiam



etiam antecedentia Concilia Oecumenica Romani Pontificis autoritate habita & conclusa fuisse.

Sed ut sigillatim ostendamus, Concil. I. Nicænum à Sylvestro indictum, & congregatum fuisse, præter Patres Concil. VI. testantur Episcopi Romani II. sub Damaso apud Sozom. lib. 6. c. 23. Theodor. lib. 2. ca. 22. Gelasius Cyzicenus lib. 2. act. Concilij Nicæni c. 12. *Sancta & magna, & generalis Synodus sanctorum Patrum Nicæa congregatorum, per B. Hosium, Episcopum civitatis Cordabæ in Hispania, tenentem locum Episcopi Romani, cum eiusdem Sedis Presbyteris.*

De Concil. Constantinopolitano, præter Patres Concil. VI. satis indicant ipsimet Episcopi Orientales in ep. ad Damasum apud Niceph. lib. 12. c. 16. quæ verba mox referam n. seq.

De Concil. Ephesino generali testantur literæ Cælestini Papæ ad Theodosium, & Valentinianum Imperatores, quæ habentur in actis Concil. Ephes. t. 2. c. 17. & meminit Euagrius libro 1. cap. 4. quod Cælestinus Cyrillo Alexandrino Archiepiscopo vices suas congregandi & disponendi in Oriente Synodum commiserit, donec Legati ex Vrbe advenirent. Postea verò quàm Legati Apostolici advenissent, quo modo omnia eorum autoritate acta fuerint, atque Nestorius damnatus, videre licet in eiusdem Concil. actis tom. 2. cap. 15. edit. Commelin.

De Chalcedonensi Concil. Generali constat ex Epist. Valentiniani & Martiani Imperator. ad omnes ubique reuerendissimos Episcopos, & alia Epist. quam suprà allegavi, scripta ad Anatolium: & qua ratione omnia autoritate Legatorum peracta sint, & Dioscorus iudicatus, appareat ex Actione I. *Beatissimi, & Apostolici viri Papa Urbis Romæ, quæ est caput omnium Ecclesiarum, præcepta habemus præ manibus.* Et postea contra Dioscorum: *Synodum ausus est facere, &c.* quæ verba suprà allegavi.

De Cornelio V. Oecumenico videri potest Baron. Anno 553. n. 219. & 225.

De VI. Oecumenico quæ scripta sunt Act. eius 18. & in epist. ad Agathonem. Plura de Concilijs apud Gratianum d. 16. cap. sancta, & seqq. Eius tamen error cauendus est, cum Antiochenum I. Concilium ab Eusebianis celebratum inter legitimas Catholicorum Synodos recenset. Vide de hoc S. Athanas. apolog. 2. & Innoc. I. in epist. ad Clericos Constantinopol. in causa Chrysothomi.

6 Nihil autem dictis obstat, quod in Concil. VI. generalit. Act. 18. Imperatorum quoque mentio fiat; *Constantinus semper Augustus, & Sylvester landabilis magnam, atque insignem in Nicæa Synodum congregabant.* Non enim Imperator, ut auctor Concilij, illud congregabat: sed prius à Romano Pontifice monitus, atque rogatus, ut tanquàm Ecclesiæ vniuersæ patronus, suam quoque ad Synodi locum euocandi ac deducendi Episcopos, opem præstidiaque conferret, uti videre est in ep. Synodali ad Damasum apud Niceph. l. 12. c. 16. *Sed enim cum fraternam vestram erga nos pietatem conseruantes, & dilectionem exhibentes, indicto Romæ de voluntate Dei Concilio, nos quoque ut membra vestra propria ed conuocaueritis.* Et paulò post: *Conuenimus Constantinopolin, literis proximis adducti, quas Reuerentia vestra post Synodum Aquileiensem, ad Dei amantissimum Imperatorem Theodosium dedit.* Eiusdemque consuetudinis mentionem facit. Martianus Imperator in epist. ad Leonem Papam, valentinianus & Martianus in epist. ad Anatolium, quæ habentur t. 2. Conciliorum, Denique Patres Concilij VI. Oecumenici in epist. ad Agathonem Papam: *Acquiescentes veræ confessionis literis, à vestra paternæ beatitudinis adpiissimum Imperatorem missis: quas ut à summo Apostolorum vertice diuinitus perscriptas agnosceremus.* Plura leges apud Bellarm. l. 1. de Concil. ca. 12. & 13. Videri etiam potest Baron. Anno Christi 314. de tractoria siue annonæ promissione, quam Imperator Episcopis ad

Concilium vocatis facere solebat.

Neque Imperator, eiusve Legatus, ut Iudex, aut cum potestate sententiam suam in Ecclesiasticis negotiis dicendi, intererat, sed ut præsentia, & autoritate sua cohonestaret, ac defenderet Synodum: atque si opus esset, auxilia externa præstaret, sicut S. Ambros. testatur lib. 5. Epist. 32. ad Valentinianum Imper. *Si conferendum de Fide, Sacerdotum (id est, Episcoporum, tanquam Ecclesiæ Principum) debet ista esse collatio, sicut factum est sub Constantino Augusta memoria Principe, qui nullas leges ante præmisit, sed liberum iudicium dedit Sacerdotibus.* S. Athanas. in Apol. 2. *Præclari Eusebiani, quo veritatem, scriptaque sua obliterent, nomen Synodi suis actis prætexunt: cum res ipsa negotium Imperatorum, non Synodale haberi debeat, quippe ubi Comes præsideat, &c.* Et in epist. ad solitariam vitam agentes: *Quando à condito ano auditum est, quando iudicium Ecclesiæ autoritatem suam ab Imperatore accepit? aut quando vsquam hoc pro iudicio agnitum est? Plurima antehac Synodi fuere, multa iudicia Ecclesiæ sunt: sed neque Patres istiusmodi res Principi persuadere conati sunt, ne Princeps se in rebus Ecclesiasticis curiosum præbuit.* Et Hosius Episc. apud eundem Athanas. in eadem epist. ita Constantinum alloquitur. *Desine, queso, & memineris te mortalem esse, reformida diem iudicii, serua te in illum diem purum, nec te misceas Ecclesiasticis, neque nobis in hoc genere præcipe: sed potius ea à nobis disce.* Idque planè etiam agnouerunt atque professi fuerunt Catholici Imperatores: ut Constantinus Magnus apud Rufinum lib. 1. c. 1. ubi ita alloquitur Patres Nicæa congregatos: *Dens vos constituit Sacerdotes, & potestatem vobis dedit de nobis quoque iudicandi, & ideo nos à vobis rectè iudicamur.* Similia habet Honorius Imper. in in Epist. ad Arcadium, & Gratianus Imperator in epist. lecta Aquileæ, quarum verba retuli lib. 1. tr. 4. c. 7. num. 10. Theodosius item & Valentinianus in Epist. ad Synodum Ephesinam, quæ habetur in ea t. 1. c. 32. *Candidianum præclarissimum religiosorum domesticorum Comitum ad sacram vestram Synodum abire iussimus: sed ea lege & conditione, ut cum questionibus & controuersijs, quæ circa Fidei dogmata incidunt, nihil commune habeat. Nefas est enim, qui sanctissimorum Episcoporum Concilio inscriptus non est, illum Ecclesiasticis negotijs & consultationibus se immiscere.* Simile testimonium Valentiniani Imperatoris legere potes apud Sozom. l. 6. c. 7.

7 Corollarium II. Ad summum Pontificem pertinet etiam definire, quinam libri sacræ Scripturæ tanquam veri & canonici in Ecclesia recipiendi sint: qui verò pro apocryphis habendi. Est communis doctrina, quæ fermè etiam ex ex suprà dictis intelligitur. Pro pleniore autem intellectu nota primò, quod non infrequens sit acceptio canonis pro eo, quod certo numero, aut limite definitum est. Sic enim lib. 10. Cod. tit. 23. certa numero definita pètio, canon appellatur: Et qui in album Sanctorum, vel defunctorum Episcoporum referuntur, in canone poni dicuntur. Eodem igitur sensu libri canonici dici solent, qui in sacrarum Scripturarum numero censentur, per autoritatem, & definitionem Ecclesiæ, cuius caput est Romanus Pontifex: ita ut sine ipso nulla talis definitio fieri possit. Hoc sensu dixit Toletanus I. Concilium in exposit. Fidei: *Si quis dixerit vel crediderit, alias Scripturas esse canonicas præter eas, quas Catholica Ecclesia recipit, anathema sit.* Et S. Hieronymus præfat. in librum Iudith, *Quia hunc librum Synodus Nicæna in numero sanctarum Scripturarum legitur computasse acquiri.* Et S. Augustinus l. 2. contra Crescent. c. 31. *Salubri vigilantiæ canon Ecclesiasticus constitutus est, ad quem certi Prophetarum, & Apostolorum libri pertineant, quos omnes iudicare non audemus: & secundum quos de cæteris fidelium, vel infidelium libris liberè iudicemus.* Inuenies autem Canonem sanctorum librorum apud Gelasium Papam in Concil. 70. Episcoporum, Innocent. I. Epistol. 3. ad Exuperium, & in Concil. Carthaginensi VI. cui etiam S. August. interfuit,



vbi Episcopi testantur, se canonem hunc Scripturarum à Patribus accepisse, vt in Ecclesia legerentur, to. i. Cōcil. Seuerini Bini, in fine dicti Concil. Quamuis fateri debemus, ante ea tempora de quibusdam libris dubitatum fuisse, vt apparet ex Concilio Laodicensi, cap. vlt. Verum sicuti Nicænum Concil. statuit, vt liber Iudith pro canonico & indubitato haberetur, teste S. Hieronymo præfat. in Iudith, ita postea in Ecclesia statutum, vt alij dubitati, v.g. liber Sapientie, liber Tobie pro indubitatis agnoscerentur, vt videre licet in Trident. sess. 4. vbi additur; *Si quis autem libros ipsos integros, qui enumerati sunt, cum omnibus suis partibus, id est, capitibus, seu sectionibus, prout in Ecclesia Catholica legi consueverunt, & in veteri vulgata Latina editione habentur, pro sacris & canonicis non susceperit, &c. anathema sit.*

Libri vero Apocryphi dicuntur, qui quod eorum origo, & autoritas obscura sit, ab Ecclesia approbari, & in canonem diuinarum Scripturarum relati non sunt; imò plerumque saltem quoad aliqua, reprobati. Sic enim S. Augustinus lib. 15. de ciuit. cap. 23. *Omittamus earum scripturarum fabulas, quæ apocryphæ dicuntur, eo quod occulta eorum origo non claruit Patribus, à quibus usque ad nos autoritas veracium Scripturarum certissima, & notissima peruenit.* Lege Nicol. Serarium cap. 8. Proleg. Bibliac. q. 12.

His adde, ad Summum quoque Pontificem, cū aliorum Ecclesiæ Pastorum auxilio, pertinere, vt aduigilet, quod canonice Scripturæ ab omni, quatenus fieri potest, mendo liberæ conferuentur, & posteritati tradantur. Eam enim ob causam Patres, vt S. Irenæus lib. 3. contra hæres. cap. 3. S. Cyprianus in lib. de vnitæ Ecclesiæ, S. August. l. de vit. credendi cap. 17. & 18. monuerunt, necesse esse ad vnitatem Fidei seruandam, vt Ecclesiæ aliæ, atque fideles omnes principalioris Ecclesiæ Romanæ doctrinis se conforment, & adhærescant: quandoquidem illa ab Apostolis Petro & Paulo instructa, traditiones illibatas conseruauit, iuxta Domini promissionem, *Tu es Petrus, & super hanc petram ædificabo Ecclesiam meam*, Matth. 16. Ea propter post Trident. Concilium, plurium Summorum Pontificum vigilantia, sacræ Scripturæ editio Latina, multis antè seculis vsitata, ac vulgata, adhibitis viris doctissimis, & inspectis antiquissimis exemplaribus, quæ vndecunque in Urbem illata fuerunt, nec non Sanctorum Patrum commentarijs, &c. accuratissime emendata, ac denique Anno Domini M.D.XCIII. à Clemente VIII. in lucem data est, vt deinceps tanquam alij Latinis editionibus correctior, in scholis prælegeretur, commentarijs illustraretur. Non quod hæc editio omnibus etiam leuissimis mendis careat, quæ vel librorum incuria, vel alia de causa irreperunt: sed quod nullum errorem contineat aduersus Fidem, vel bonos mores. Videri potest Vega libro 15. in Tridentinum capite 9. Canus libro 2. de locis, cap. 13. Serarius in proleg. Bibliac. cap. 19. qu. 11.

8 Corollarium III. Symbolum Fidei ordinare, aut de nouo edere ad Summum Pontificem spectat. Ita S. Th. 2. 2. q. 1. a. 10. & probat: *Quia noua editio Symboli necessaria est ad vitandum errores. Ad illius ergo autoritatem pertinet editio Symboli, ad cuius autoritatem pertinet finaliter determinare ea, quæ sunt Fidei, vt ab omnibus inconcussa Fide teneantur; hoc autem pertinet ad autoritatem Summi Pontificis, ad quem maiores & difficiliore Ecclesiæ quæstiones referuntur.* Et paulo post; *Vna Fides debet esse totius Ecclesiæ secundum illud 1. ad Corinth. 1. Idipsum dicatis omnes, & non sint in vobis schismata, quod seruari non potest, nisi quæstio Fidei de Fide exorta determinetur per eum, qui toti Ecclesiæ præest: vt sic eius sententia à tota Ecclesia firmiter teneatur: & ideo ad solam autoritatem Summi Pontificis pertinet noua editio Symboli: sicut & omnia alia, quæ pertinent ad totam Ecclesiam, vt congregare Synodum generalem, & alia huiusmodi.* Confirmatur ex praxi Ecclesiæ: siquidem illa Symbola

Fidei, quæ in Concilijs à Summo Pontifice non approbata sunt, v.g. in Synodo Sirmienti, Ariminensi, vbi DC. Episcopi conuenerant, nullam in Ecclesia autoritatem obtinuerunt.

Pro cuius doctrinæ pleniori intellectu nota primò: Symbolum Fidei dictum videri, quasi quædam militaris tessera sit, siue professionis nota, per quam Christiani ab infidelibus discernantur, sicuti explicat Ruffinus præfat. in exposit. Symboli, & Isidor. lib. 9. Originum, capite 19.

Secundò: Quadruplex in Ecclesia Symbolum haberi: I. Apostolicum. II. Nicænum. III. Constantinopolitanum. IV. Athanasianum. Illud, quod Apostoli composuerunt, Fidei Christianæ capita præcipua simplicius, ac breuius proponit. Alia verò eandem Apostolicæ Fidei doctrinam contra hæreticorum postea exortos errores, vberius explicant, sicuti S. Th. notauit ref. ad I. In doctrina Christi, & Apostolorum veritas Fidei est sufficienter explicata: sed quia peruersi homines Apostolicam, & ceteras Scripturas, & doctrinas peruertunt ad suam ipsorum perditionem, sicuti dicitur 2. Petri vlt. ideo necessaria fuit temporibus præcedentibus explicatio Fidei contra insurgentes errores. Et a. 9. ad 6. ratione reddit, cur Symbolum Patrum (videlicet Constantinopolitanum, quo Nicæna fides explicata erat) publice in Missis cantari soleat: Apostolicum verò submissè tantum dici in prima, & Completorio: Quia Symbolum Patrum est declaratiuum Symboli Apostolorum, & quia conditum Fide iam manifestata, & Ecclesia pacem habente: at verò Symbolum Apostolorum, tanquam feruente persecutione conditum, iuxta primam suam originem, quasi occultatur.

9 Tertiò. Symbolum Fidei articulis suis constat: Dicitur enim articulus, sectio & quasi membrum quoddam totius Symboli, continens in se peculiarem, & distinctam reuelationem à Deo Ecclesiæ factam, ad vitæ æternæ consecutionem. Quare tria requiruntur ad articulum Fidei strictè & propriè sumptum: I. Vt contineat Dei verbum Ecclesiæ publicitus propositum. II. Vt contineat distinctam, & propriam credendi difficultatem, quæ per reuelantis Dei autoritatem superanda sit, auctore S. Th. 2. 6. vbi rationem adfert, cur diuersi sint articuli Passionis, & Resurrectionis Dominicæ, quia diuersam credendi difficultatem habent: Vnicus autem articulus Christi passi, crucifixi, mortui, ac sepulti: quia hæc vnicam credendi difficultatem habent, vt vno eorum per Fidem suscepto, non sit difficile alia suscipere. III. Vt contineat veritatem Fidei per se & non per accidens reuelatam. Cū enim finis reuelatæ à Deo Fidei sit viatorum salus, ac vita æterna (siquidem Fides est *hypostasis*, siue fundamentum rerū, speranda in Heb. 11. Et quæcūq; scripta sunt, ad nostrā doctrinam scripta sunt, vt per patientiam, & consolationem Scripturarum, spem habeamus, Rom. 14.) ideo rectè Symbolum Fidei distinguitur per capita, siue articulos, quibus per se, ac directè ordinamur ad consecutionem vitæ æternæ, ideoque omnibus ad credendum proponi debent: v.g. quod Deus sit vnus & trinus: Filius Dei homo factus: quod in Ecclesia sit peccatorum remissio, per Sacramenta, &c. Alia verò, quæ indirectè tantum, ac per accidens, videl. ob aliorum intelligentiam, reuelata sunt v.g. quod Abraham duos filios habuit: quod ad tactum ossium Elisæ suscitatus est mortuus, &c. strictè, ac propriè loquendo non censentur articuli, quamuis ad Fidei articulos reducantur, testante S. Th. cit. art. 6. ad 1. Quia tamen certissima etiam fide credi debent, vt hæreticus sit, qui ea pertinaciter negat, ideo latè loquendo, articuli (id est, propositiones) Fidei non malè dicuntur.

Quartò: Licet pro numero Apostolorum, per quorum ministerium Fidem accepimus, duodecim Fidei articuli vulgò numerentur: tamen secundum numerum rerum credendarum, quatuordecim à Doctoribus distin-



guuntur, ut videre est apud S. Th. 2. 8. Septem ad divinitatem pertinent: I. ad unitatem divinæ naturæ, *Credo in unum Deum*: tres sequentes ad Trinitatem personarum, *Credo in Deum Patrem, Et in Iesum Christum, & in Spiritum sanctum*: tres alij ad triplicem operationem Dei, tribuentis creaturis rationalibus esse naturæ per creationem: *Creatorem calis & terræ*: esse gratiæ per iustificationem, *Sanctam Ecclesiam Catholicam, Sanctorum communionem, remissionem peccatorum*: esse gloriæ per glorificationem, *Carnis resurrectionem, & vitam eternam*. Alij septem articuli Christi incarnati opera explicant: 1. *Conceptus est de Spiritu sancto*, 2. *Natus ex Maria virgine*, 3. *Passus sub Pontio Pilato crucifixus, mortuus, & sepultus*, 4. *Descendit ad inferos*, 5. *Resurrexit à mortuis*, 6. *Ascendit ad calos*, 7. *Venturus est iudicare vivos & mortuos*.

Porro quædam reuelatæ Fidei veritates sunt ad salutem nobis necessaria, quæ dictis articulis implicitè continentur; v.g. animæ immortalitas eo articulo, *Credo vitam eternam*; Item Sacramenta eo articulo, *Sanctam Ecclesiam Catholicam, Sanctorum communionem, remissionem peccatorum*.

Corollarium IV. Ad summum Pontificem etiam pertinet, de hæresibus in Ecclesia surgentibus cognoscere, easdemque condemnare. Constat assertio ex supra dictis, & traditur à Ruperto Thuitiensi lib. 2. de divinis offic. c. 22. *Romana Ecclesia super Apostolica Fidei petram altius fundata firmiter stetit, & tam Græcia, quàm totius orbis hæreticos semper confutavit, & de excessu Fidei tribunali datâ sententiâ iudicavit*. Et Platina in vita Bonifacii III. *Merito Sedes Romana ceteris antefertur: cuius integritate & constantia cunctæ hæreses confutata sunt, & explosæ*. Rectè tamen notat Bellarm. lib. 1. de Concil. cap. 9. hæreses noviter ortas ordinariè cognitâs, & damnatas fuisse in Concilio generali, Romani Pontificis autoritate, ob eam causam coactò.

## CAP. VIII.

An, & quatenus Fides diuina, ac supernaturalis viatoribus necessaria, sit necessitate mediij ad salutem.

## S V M M A R I V M.

*Fides diuina alia est habitualis, alia actualis: & hæc vel explicita, vel implicita.*

1. *Alia est necessitas mediij, & alia necessitas præcepti.*

2. *Explicita supernaturalis cognitio Dei vniuersalis, est medium ad salutem necessarium omnibus adultis.*

3. *Post lapsum humani generis Fides actualis in Christum redemptionem, saltem implicita, adultis necessarium medium ad salutem fuit.*

4. *Post Euangelij promulgationem explicita Fides in Christum, & Sanctorum Trinitatem necessaria est, saltem necessitate præcepti.*

**S**upponendum I. quod etiam cap. 1. dixi. Duplex est Fides diuina, supernaturalis, ac Theologica: Vna habitualis, ac permanens: altera actualis & transiens. Illa à Deo infusa, inest omnibus fidelibus, non solum iustis, sed etiam peccatoribus: itemque infantibus, ac amentibus, qui baptizati sunt. Fines autem actualis solis ratione utentibus competit.

Supponendum II. Fides actualis Theologica iterum duplex est: Vna explicita, siue expressa, per quam Fidei aliqua propositio in se ipsa speciatim creditur, v.g. Quod Deus trinus: Anima rationalis est. Altera verò est implicita, per quam Fidei propositio non in se ipsa speciatim, sed in aliqua alia, in qua implicitè continetur, generatim

creditur: v.g. Qui credit verum esse, quidquid Ecclesia Catholica credendum tradit, is mysterium SS. Trinitatis, Incarnationis, & alias Fidei veritates implicitè credit. Ita Gabr. in 3. d. 25. quæst. vn. art. 1. notab. 2. Azor. to. 1. libro 8. ca. 6. in fine, Tolet. libro 4. capite 2. Sanchez lib. 2. moral. cap. 2. número 2. Valentia tom. 3. disput. 1. q. 2. part. 3.

Supponendum III. Duobus modis dicitur aliquid necessarium ad salutem: Necessitate mediij, & necessitate præcepti. Necessitas mediij est, quo destitutus homo, quamvis sine vlla culpa sua, secundum ordinariam Dei legem saluari non potest. Quomodo Baptismus, v.g. re ipsa susceptus necessarium medium est infantibus ad salutem: Et poenitentia adultis necessaria est in peccatum mortale lapsis, ut suis locis dicam.

Necessitas verò præcepti est, sine cuius executione homo saluari non potest, si exequendi facultas & occasio suppetat: secus, si propter ignorantiam, vel aliam impotentiam à præcepto, & consequenter à culpa excusetur.

Assertio I. Fides habitualis à Deo infusa, omni tempore, ac hominum statu, tam paruulis, quàm adultis necessarium medium fuit ad salutem. Est communis doctrina: quæ traditur in Trident. sess. 6. cap. 7. Ratio est, quam Gabriel assert. art. 2. conclus. 1. Anima non est accepta Deo, supernaturalium bonorum largitori, nisi supra naturæ vires eleuata, secundum intellectum ornata sit habitu supernaturalis cognitionis, aut Fidei: secundum voluntatem verò habitu supernaturalis amoris, seu Charitatis.

Assertio II. Actualis, & explicita vniuersalis Dei Fides supernaturalis, omni tempore, ac hominum statu, necessarium medium ad salutem fuit adultis, ac ratione utentibus. Ita Trident. sess. 6. c. 7. & S. August. serm. 38. de tempore. S. Th. cit. d. 25. q. 2. art. 1. quæstion. 1. Gabr. cit. q. vn. a. 2. Sotus lib. 2. de natura & gratia, c. 11. & alij communiter apud Sanchez libro 2. moral. c. 2. n. 3. Ratio est, quam Apostolus dat ad Hebr. 11. Quia *Fides est sperandarum rerum substantia*: id est, sperandæ salutis fundamentum. Quare, *sine fide impossibile est placere Deo: Credere enim oportet accedentem ad Deum, quia est, & quia inquirentibus se remunerator est*. Quæ ratio aliter etiam formari potest: Deus homines adultos saluare non vult, nisi cum eorum cooperatione: atqui cooperatio hominis ad salutem utilis non est, sine Fide supernaturali: cum sine ea operatio nullam proportionem, aut eleuationem habeat ad finem beatitudinis supernaturalis: Ergo secundum ordinatissimam Dei dispositionem, Fides supernaturalis actibus est necessarium medium adultis ad salutem. Vide S. Thom. 2. 2. q. 2. a. 3.

Vfus autem sum in hac probatione vocabulo *cooperationis*, & non meriti. Etsi enim regulariter homines adulti sine proprijs meritis non saluentur, fingi tamen potest casus, in quo homo adultus absque vllò merito ex condigno, salutem æternam consequatur: ut si Catechumenus, ac credens, qui de peccatis suis imperfectum duntaxat dolorem habuerat, in phrenesi postea baptizetur, & moriatur, salutem æternam consequetur sine meritis ex condigno: sed non sine supernaturali fide, spe, poenitentia.

Secundò in assertione dixi, necessariam esse Fidem *supernaturalem*: quod intellige non tantum ex parte principij, seu auxilij diuini, quo potentia nostræ adiuuantur: Non enim sufficientes sumus aliquid cogitare à nobis tanquàm ex nobis, sed sufficientia nostra ex Deo est, ait Apost. 2. ad Cor. 3. sed etiam ex parte obiecti: quia non satis est Deum cognoscere auctore naturæ, & largitore naturalium bonorum, sed necesse est cognoscere, ac credere, quòd Deus auctor sit supernaturalium rerum, gratiæ, & vitæ eternæ largitor: cū talis cognitio sit fundamentum accessus nostri ad Deum. Ita docet S. Th. 2. 2. q. 2. a. 3. Med. l. 4. de recta fide, c. 8. Val. ci. q. 2. p.



2. & p. 3. assert. 1. Bannes q. 2. a. 8. du. 1. San. ci. c. 2. con. 1. & 3. & colligitur ex Apostolo cit. cap. 11. ad Hebræos, ubi Fidem vocat *argumentum rerum non apparentium*. Ratio est, quia Fides hominem viatorem dirigere debet ad finem non naturalem: sed supernaturalem beatitudinis æternæ.

4. Assertio III. Post lapsum humani generis peccatum, tam sub lege naturæ, quam sub lege Moysis, fides actualis in Christum redemptorem, saltem implicita, necessarium medium fuit ad salutem omnibus adultis, ratione videntibus. Ita docet S. Bernard. Epist. 77. ad Hugonem de S. Victore, Magister in 3. d. 25. S. Bonau. ibid. a. 1. q. 2. Rich. a. 3. q. 2. S. Thom. 2. 2. q. 2. a. 7. ad 3. Sotus in 4. d. 5. a. 2. §. hic primum omnium. Valentia cit. q. 2. p. 4. Sanchez conclus. 4. Probatur ex sacra Scriptura, Act. 4. dicitur: *Non est aliud nomen sub celo datum hominibus, sub quo oporteat nos saluos fieri*. Ioan. 14. *Ego sum via, veritas, & vita: nemo venit ad Patrem, nisi per me*. Ad Galat. 2. *Sciētes, quod non iustificetur homo ex operibus legis, nisi per Fidem IESU Christi*. Vult dicere, Neminem hominem ex operibus secundum vires naturæ, aut legem Moysis iustificari posse: sed necessariam esse Fidem in Christum.

Secundo ratione: Sicuti in statu naturæ integræ adulti saluari non potuissent sine cognitione Dei creatoris, & sanctificatoris: ita in statu naturæ lapsæ saluari non possunt sine aliqua saltē confusa cognitione Christi redemptoris, ac restauratoris. Vult enim Deus, ut homines cooperando ad salutem suam, desiderant, ac quærant animarum suarum Medicum: sed non possunt desiderare, ac quærere nisi illum aliquo modo cognoscant: videlicet per Fidem in vita præsentē.

Dixi autem, Necessariam fuisse, necessitate mediij, Fidē supernaturalem saltem implicitam, quæ tunc habetur, cum homines suæ naturæ infirmitatem, atque ad peccandum pronitatem agnoscentes, credunt Deum esse auctorem supernaturalium donorum, in remedium animarū. Sin verò loquamur de obligatione præcepti, debebant habere explicitam, saltem confusam, Fidem de Christo redemptore, secundum modum reuelationis, ac prædicationis ipsis factæ, uti dicam cap. seqq. assert. 2.

Assertio IV. Incertum est, an post sufficientem Euangelij promulgationem explicita Fides in SS. Trinitatem & Christi incarnationem necessarium medium ad salutē sit adultis & ratione videntibus. Affirmatiuam partem probabiliter defendunt Gabr. cit. quæst. vnic. a. 2. concl. 2. Valent. 2. 2. quæst. 2. p. 4. & 5. Ludou. Molina p. 1. quæst. 1. a. 1. disp. 2. Ioan. Malderus 2. 2. quæst. 2. a. 8. Becanus c. 12. quæst. 2. conclus. 3. Sanchez cit. c. 2. conclus. 6. & alij apud Victoriam relect. de Indis Insulanis, num. 33. Probari solet tum ex Scriptura sacra, Ioan. c. 3. *Misit Deus filium suum, &c. ut saluetur mundus per ipsum: Qui credit in eum, non iudicatur: Qui autem non credit, iam iudicatus est*. Et apud S. Matth. c. 28. *Docete omnes gentes, baptizantes eos in nomine Patris, & Filij, & Spiritus sancti*. Marci 16. *Euntes in mundum vniuersum, predicate Euangelium (de Christo Dei Filio Salvatore, &c.) omni creatura: Qui crediderit (Euangelio) & baptizatus fuerit, saluus erit: qui verò non crediderit, condemnabitur*. Tum verò ratione: Sicuti in Lege veteri, cum mysterium humanæ redemptionis implicitè & obscurè propositum erat, Fides in Christum saltem implicita necessarium medium ad salutem fuit: ita in Lege gratiæ, cum Euangelium sufficienter promulgatum, & mysteria redemptionis humanæ, ac sacrosanctæ Trinitatis explicata sunt, Fides explicita in Christum, & SS. Trinitatem, necessarium medium ad salutem existit.

Si obijciatur: Multi Gentiles sunt, & fuerunt, quibus cum Euangelium enuntiatur non esset, inuincibili Fidei ignorantia laborarunt: cur igitur ad ignem æternum propter defectum Fidei explicitæ in Christum damnatur? Respondent ex doctrina S. Thom. q. 10. a. 1. Non dam-

nari eos propter infidelitatis peccatum, sicuti obiectio conuincit: sed propter alia peccata contra naturæ legem. Cum enim Deus facienti, cum gratiæ diuinæ auxilio, quod in se est, vltiorem gratiam non denegeret: Fides autem actualis, & explicita in Christum supernaturale donum gratiæ sit, absolutè necessarium homini adulto: sequitur, si infideles auxilio diuinæ gratiæ, quod omnibus hominibus sufficienter præstō est, rectè vtantur; & sicuti ratio naturalis eis dictat, iustè viuēdo, ad maiora dona gratiæ se disponant, benignissimū Deū illis porro lumen Fidei explicitæ in Christum Deum & hominem communicaturum esse. Ex quo colligi posse aiunt, eos, qui inter Gentiles in inuincibili infidelitate, seu ignorantia Christianæ Fidei decesserunt, gratia Dei non rectè vfos fuisse; sed contra Dei legem grauiter peccasse: ob quæ ipsorum peccata Deus Fidei lumen in iustam pœnam ipsis negauit, atque in damnationem labi permisit.

Contraria tamen sententia, quod explicita Fides de SS. Trinitate, & incarnatione Christi, neque post factam Euangelij promulgationem, necessaria sit necessitate mediij, seu ad veram iustitiam, seu ad gloriam æternam consequendam, non minùs probabilis, & facilè defendi posse videtur. Eam tenent Richard. cit. d. 25. a. 4. q. 1. Sotus in 4. d. 5. q. 1. & lib. 2. de natura & gratia, cap. 12. licet ibi dubius sit: Barthol. Medina lic. 1. instruct. c. 14. §. 2. ver. sextò, Michael Medina lib. 4. de recta in Deum fide c. 10.

Vega lib. 6. super Trident. c. 17. & 20. Sa verb. fides, n. 1. Lufius Turrianus in 2. 2. disp. 27. dub. 4. & 8. quia necessitas illa mediij, post factam Euangelij promulgationē, neque ex rei natura, neque ex sacra Scriptura, aut Patrū traditione ostendi potest. Non ex rei natura: nam Gentiles inuincibili ignorantia mysteriorum Fidei Christianæ laborantes, quia ipsis Euangelium prædicatum nunquam est, possunt tamen cum diuinæ gratiæ auxilio, vnum Deū auctorem supernaturalium donorum credere, in eum spē suam collocare, & super omnia diligere; atque ita iustitiam coram Deo, & consequenter ius gloriæ æternæ consequi; quamuis non sine implicita Fide in Christum, quæ *Deus proposuit propitiationem per Fidem*, Rom. 3. *Vt sicut in Adam omnes moriuntur, ita in Christo omnes viuificentur*. 1. Cor. 15. Loca autem Scripturæ, sicuti & Patrum testimonia, quæ adduci solent, plus ostendere non videntur, quā necessitatem præcepti, post factam Euangelij promulgationem omnibus communiter incumbētis, ut explicitè credant Christianæ Fidei mysteria, postquam ipsis sufficienter proposita sunt: alioquin, propter hoc ipsum infidelitatis suæ peccatum, damnationem æternam mereantur.

Confirmatur hæc sententia primò: Quia etiam inter Christianos reperiuntur homines adeo rudes, ut mysteria Incarnationis, ac sacrosanctæ Trinitatis vero conceptu non apprehendant, consequenter non credant explicitè, sicuti inter alios notauit Medina lib. 1. instruct. c. 14. §. 2. Sa ver. fides, num. 1. Secundò: Quid dicemus de ijs, qui à natiuitate surdi, ac muti sunt? quos inter fideles numeramus, illique baptizatis, si rationis compotes sint, ac desiderant, sacramenta reliqua ministramus, uti dicam lib. 4. c. 4. num. 4. Et tamen mysteria SS. Trinitatis, & incarnationis Christi, ab ijs vero conceptu apprehendi, ac credi, vix credibile est, nisi ad speciale miraculum confugere velimus.

Qui hanc sententiam defendere volet, respondere debet ad loca Scripturæ; ex ijs rectè ostendi, non quidem necessitate mediij absolutè, sed præcepti ijs incumbētis, quibus Euangelium annuntiatur est. Ad rationem respondetur: Si loquamur de necessitate mediij, sub omni lege suffecisse Fidem in Christum implicitam, sicuti docet Richard. cit. a. 4. quæst. 3. & 4. Sin verò loquamur de necessitate præcepti, tunc locum habet distinctio, quod in Lege veteri fidei populo communiter sufficiebat Fides confusa de Christo, seu Messia venturo, ut supra ex



præ explicatum: In noua autem Lege requiritur explicita, & distincta, videlicet esse hunc Dei Filium, vnum in natura cum Patre, & Spiritu sancto, discretum personaliter.

Alia porro sententia est de hac re minus probabilis Cानी relect. de sacrament. in genere, p. 2. quæst. 2. Bannes 2. 2. quæst. 2. a. 8. quæst. ult. Quod Fides explicita in Christum hodie necessarium medium sit non quidem ad iustificationem; sed ad vitam æternam. Quæ distinctio frustra, & sine fundamento assertur: cum iustis omnibus vita æterna, tanquam præmium ac merces, debita sit,

## CAP. IX.

Quæ fides, aut rerum diuinarum cognitio necessaria sit, necessitate præcepti.

## S V M M A R I V M.

1. *Hominibus præceptum diuinum impositum est, supernaturali Fide credendi vnum Deum, & Christum Salvatorem, idque secundum modum ac mensuram reuelationis, aut prædicationis ipsis facta.*
2. *In lege Euangelij omnibus adultis ex præcepto necessaria est explicita Fides articulorum, qui in vulgato Symbolo continentur, saltem secundum ipsorum substantiam.*
3. *In omni hominum statu necessitate præcepti ea cognosci, & credi debent, quæ vel Fidei exercendæ, vel pie viuendæ causa ad salutem requiruntur.*
4. *Exstat Ecclesiasticum præceptum, obligans saltem sub veniali, discendi orationem Dominicam, salutationem Angelicam, & Symbolum Apostolorum.*

**A**ssertio I. Certum est, hominibus impositum esse à Deo præceptum de actu Fidei supernaturalis. Incumbit enim ipsis naturalis lex, & obligatio tendendi ad finem suum, in quem à Deo creati sunt: Initium autem huius viæ, qua tendimus ad finem, qui est Deus & beatitudo æterna) Fides existit, teste Apost. ad Hebr. 11. *Accedentem ad Deum oportet credere, &c.* Quapropter sanct. Thom. obseruauit 2. 2. quæst. 16. a. 1. Præceptum de habenda Fide, siue credendo in vnum verum Deum, non esse in Decalogo comprehensum; sed tanquam fundamentum ac principium præsupponiante decem legis præcepta, sicuti videre est Exodi cap. 20. Deuter. cap. 5.

Assertio II. Certum etiam est, hominibus impositum esse à Deo præceptum de credendo Mediatore, & propitiatore Christo, secundum modum ac mensuram reuelationis, aut prædicationis, pro temporum aut personarum varietate, factæ. Cum enim Christus à Deo Patre hominibus constitutus sit Caput, Dux, Via, Medium ad vitam æternam: conueniens est, vt hoc Caput, hunc Ducem, Viam, ac Mediatorem suum agnoscant, & per hanc Fidei agnitionem Corpori eius mystico, siue Ecclesiæ militanti inserantur. Verum rectè monet S. Th. cit. quæst. 2. a. 7. Quotò homines remotiores fuerunt à tempore Christi, tantò difficilius, & obscurius mysteria Fidei Christianæ communiter credidisse, videlicet secundum modum reuelationis ipsis factæ. Etenim, dum mysteria redemptionis humanæ ante Christi aduentum figurarum velamine occultata manebant, satis erat fidelibus generatim & confusè credere, affuturum aliquem (seu Deum, seu Angelum, seu purum hominem) qui humanum genus peccati seruitute liberatum, cælorum sedibus restitueret: neque opus erat speciatim credere, fore hunc Dei Filium, hominemque moriturum, resurrecturum, &c. ijs exceptis, quibus Deus incarnationis, ac redemptionis mysterium explicitè, & distinctè reuelasse putatur, videlicet Adamo in Paradiso: itè Henoch, Iobo, & alijs gentilibus, teste S. Thom. cit. a. 7. S. Bonau. d. 25. a. 2. q. 1. Rich. art. 3. q. 1. & 2. Gabr. q. vn. a. 2. concl.

3. Imò valde credibile est, nullo vnquam tempore defuisse viros præclaros, Deoque familiares, Patriarchas videlicet, & Prophetas, vnòque verbo Maiores Ecclesiæ, qui explicitè, ac speciatim Christum Dei Filium pro humani generis salute moriturum, adeoque SS. Trinitatis, & Incarnationis Verbi mysteria, secundum reuelationis suæ mensuram, crediderint, sacrificijs figurarint, & populo sub vmbris & velaminibus, Deo iubente, annunciarint: nam exinde constans semper fama, & persuasio de futuro mundi redemptore emanauit. Quod respexit S. Greg. 1. 2. moral. c. 17. explicans illud Iob. cap. 1. *Boues arabant, & asini pascebantur iuxta illos: id est, Ex Sapientum hominum illustratione ac meditatione rudè vulgus pabula sumpsit. Et videri potest Hugo de S. Victore lib. 1. de sacrament. part. 10. c. 5. & 6.*

At verò post Christi aduentum omnes tum Maiores, tum Minores, ad quos Euangelicæ veritatis promulgatio sufficienter peruenit, Christianæ Fidei mysteria explicitè credere obligati sunt, vt mox dicam.

Assertio III. in noua lege adultis omnibus & ratione vtentibus ad salutem necessaria est, necessitate præcepti, actualis & explicita Fides articulorum, qui in vulgato Symbolo continentur, saltem secundum ipsorum substantiam, vt vero conceptu, quamuis imperfecto, & confuso, apprehendantur & credantur. Ita Theologi in 3. distinct. 25. S. Thom. 2. 2. quæst. 2. ar. 5. *Ar nulla verb. credere, num. 2. Nauar. c. 11. man. num. 2. 2. §. sexto peccat. Azor lib. 8. cap. 6. q. 2. & cap. 7. q. 3. Tolet. lib. 4. c. 2. Valent. cit. q. 2. p. 3. assert. 2. Becanus super 2. 2. c. 12. conclus. 2. Sanchez lib. 2. moral. c. 3. num. 6. Vasquez 1. 2. diff. 121. c. 2. Sumitur ex cap. 28. Matth. & 16. Marci locis citatis supra. Et confirmatur primò ratione: Quia status, & professio hominis Christiani haud dubiè exigit, vt summa, ac præcipua Christianæ Fidei capita, siue articulos cognoscat, & credat. Secundò ex perpetua Ecclesiæ praxi, ad Baptisimum, in quo Fidei professio editur, neminem adultum admittentis, nisi Symboli articulos calleat, & credat, sicuti constat ex Catechesibus Patrum, Ambrosij, Cyrilli Hierosolym. Augustini, & ex c. symboli, c. baptizando, c. non liceat, d. 4. de consecrat. Vide Suar. 3. p. q. 71. in comment. a. 2. Sanchez lib. 2. c. 3. in fine Quare erronea est sententia Rosellæ ver. fides, num. 1. & quorundam Canonistarum, apud Syl. eod. ver. q. 3. Nau. c. 11. num. 22. & Sanchez cit. cap. 3. num. 3. Hominibus rudibus satis esse, si Fidei nostræ articulos, siue præcipua capita credant implicitè, credendo nimirum quidquid credit sancta mater Ecclesia. De qua re præter citatos, vide Valent. vbi supra. Azor lib. 8. c. 6. quæst. 1. Bannes 3. 2. quæst. 2. a. 8. dub. 8. §. superest. Martinum Becanum cit. c. 12. num. 14.*

Aduertendum tamen: Quandoquidem Ecclesia articulos & mysteria Fidei Christianæ partim verbo coram publica concione, partim solemnī ceremoniā quot annis fidelibus proponere solet: raro accidit, Christianum inter Christianos degentē, adeo ingenio hebetem esse, vt, (nisi rerum ad Fidem pertinentium negligentissimus, adeoque à culpa non immunis sit) eorum cognitionem, quatenus ipsi necessaria est, non faciliè assequatur. Si tamen aliqui Christiani vel ob instructorum penuriam, vel ob nimiam ruditatem, inuincibili ignorantia mysteriorum laborant, eos à culpa excusatos saluari posse, improbabile non esse supra dixi. Quamobrem etiam S. Thom. q. 2. a. 7. & 3. agēs de necessitate credendi eiusmodi fundamentalia mysteria solum loquitur de obligatione præcepti.

Porro Maiores Ecclesiæ Prælati, Doctores, Presbyteri, qui ratione officij, dignitatis, aut status sui quouis tempore parati esse debent ad rationem Fidei reddendam poscenti, 1. S. Petri cap. 3. ij maiorem Fidei, ac rerum ad Ecclesiæ statum pertinentium cognitionem habere debet, vt rudem populum docere, & Fidem orthodoxam contra Aduersarios defendere possint. Quare de re S. Thom. q. 2. a. 6. Dur. in 3. d. 25. q. 1. Rich. a. 5. q. 1. Gabr. cit. q. 1. con-



cluf. 4. Sotus in 4. d. 25. q. 1. a. 4. Azor lib. 8. c. 6. q. 10. Eman. Rodriq. p. 1. sum. c. 88. n. 2.

3 Assertio IV. In omni hominum statu, necessitate præcepti, cognosci, vel credi ea omnia debent, quæ vel Fidei exercendæ, vel honestè viuendi causa, ad salutem requiruntur. Quæ ratione semper necessariū erat credere, Animam hominis esse immortalem, arbitrij libertate præditam, æternæ beatitudinis capacem. Post lapsum verò hominis in peccatum credere oportebat, quod omnes à prima natiuitate indigeant gratia Dei, & iustitia, quod pro ea impetranda ante legem Moysis debuerint parentes suis paruulis aliquem cultum externum erga Deum adhibere. Sub lege Moysis pari modo necessaria erat cognitio Circumcisionis, Phasæ, &c. In lege verò noua, quæ ad sacrificium Missæ, & septem Sacramenta pertinent, vt religiosè colantur, ac dignè suscipiantur, cum ea suscipere, vel necessitas salutis, vel libera pia voluntas suadet. De qua re Valent. cit. q. 2. p. 5.

Eademque ratione fideles obligati sunt ad cognoscendas petitiones orationes Dominicæ: item præcepta Decalogi, & Ecclesiæ: consequenter tenentur ea addiscere: si non verbo tenus, saltem secundum eorum substantiam docet Angelus & Syl. ver. scientia, Sa ver. fides, num. 2. Michaël Medina lib. 4. de recta in Deum fide; cap. 6. Nau. c. 11. num. 22. Valentia cit. q. 2. p. 4. in fine, Sanchez lib. 2. cap. 3. num. 16. Idemque sentiendum de alijs legibus, & obligationibus, quorum notitia ad cuiusvis Christiani hominis statum, vel officium requiritur. Adde, quod attinet ad orationem Dominicam, salutationem Angelicā, & Symbolum Apostolorum: esse Ecclesiasticum præceptū longa consuetudine firmatum, vt ea memoriter edificantur, sicuti colligitur ex c. vos ante omnia, distinct. 4. de consecrat. & docet Palud in 4. distinct. 15. quæst. 5. a. 1. Nau. l. c. §. septimò. Lopez cit. cap. 3. num. 19. vbi tamen admonent, huiusmodi obligationem memoriæ mandandi esse solum sub peccato veniali.

Corollarium, Parentes obligati sunt, vt liberos suos talia edoceant, multòque magis Parochi, aliique Curati vt plebem sibi commissam in doctrina Christiana erudiāt, sicuti notauit Nauar. cit. num. 22. Sa ver. fides, num. 2. Atque ab Ecclesiasticis Prælati etiam censuris compelli posse, testantur Eman. Rodriq. cit. cap. 88. nu. 3. Sanc. cap. num. 15.

## CAP. X.

## Quo tempore præceptum Fidei diuinæ obliget?

## S V M M A R I V M.

1. Præceptum negatiuum non dissentendi Fidei mysterijs, postquam sufficienter proposita sunt, omni tempore obligat.
2. Assertiuum præceptum exercendo Fidei actualis non semper obligat, sed in certis casibus.
3. Si homini post accuratam considerationem, Christiana Catholica Religio credibilior, quàm alia secta: appareat, ob notas, quibus eam Deus ornauit, tenetur eam acceptare.

**D**Vo sunt præcepta Fidei, secundum actum internum, de quo hic loquitur. Vnum assertiuum, vt credamus mysteria Fidei à Deo reuelata: Alterum negatiuum, vt non dissentiamus Fidei mysterijs, nec de eorum veritate dubitemus.

1 Assertio I. Negatiuum præceptum non dissentendi de articulis Fidei, postquam sufficienter nobis propositi sūt, tanquam à Deo reuelati, omni tempore & respectu omnium obiectorum Fidei nos obligat, ita vt si vel minimū Fidei Christianæ dogma pertinaciter aliquis inficietur, aut in dubium reuocet, etiam si alia omnia credere se dicat, infidelis & hæreticus sit, vt iterum dicam c. 13. n. 6.

Assertio II. Assertiuum præceptum exercendi Fidei 2 internum actum non omni tempore obligat; sed in certis tantum casibus: Cum primū alicui Fidei mysteria ad credendum sufficienter proposita sunt, non debet is longiorem moram trahere, quin propositis veritatibus assentiatur. Ita Valentia cit. q. 2. num. 5. Azor to. 1. lib. 8. c. 27. q. 8. Sanchez lib. 2. moral. c. 1. num. 3. Et probatur inde; Quia naturali, ac diuino iure ad statum & officium viatoris pertinet attendere, dum in via est, vt ad propositum sibi finem tendat, atque ab eo non aberret. Id autē præstare non potest, nisi finem suum, qui Deus est, ac beatitudo, & quæ adhuc finem consequendum necessaria ipsi proponuntur, cognoscat & credat. Ergo postquam ea homini rationis vsum adepto sufficienter proposita sūt non debet is diu assensum differre, ita vt in re tanti momenti, arbitrio viri prudentis, notabilis mora censatur, ait Sanchez l. c. Vbi bene ait, pueros plerumque excusari à præcepti huius transgressione, quia accidit, vt diu rationis vsum habeant, Fidei tamen mysteria ipsis non proponantur tanquam diuinitus reuelata, cum credendi obligatione.

Tunc autem mysteria siue articuli Fidei homini sufficienter propositi censi debent, cum argumenta, ac notæ eidem propositæ sunt, ex quibus mysteriorum credibilitas adeo appareat, vt secundum regulas prudentiæ moueri debeat ad Fidem acceptandam, seu credendum. Ita colligitur ex S. Th. 2. 2. q. 1. a. 4. ad 2. iun. Caiet. §. dicendū est igitur; & docet Victoria relect. de Indis insularis, n. 34. Vasq. 1. 2. disp. 120. c. 5. Azor cit. lib. 8. c. 7. q. 6. Sanchez cit. c. 1. num. 4.

Quæres. Quando existimandum sit, Fidei credibilitatem adeo alicui apparere, vt secundum regulas prudentiæ credere teneatur? Respondeo primò. Quod attinet ad fundamentalem Fidei articulum: *Deum esse, & largitorem nostram esse, &c.* Homines ratione præditi credere tenentur, cum & vniuersitatis machinam tam admirabili ordine, & relatione cuiusque rei ad finem suum, tum suæ naturæ ab aliquo superiore adiutore dependentiam: imò etiam omnium gentium perpetuam de Deo, mundi gubernatore, hominumque saluatore Fidei persuasionem animaduertunt. Huic enim communi persuasioni, nixæ tam solida credibilitatis ratione, nemo hominum sine temeritate contradicere potest. Accedit, longè securius esse fidem hanc, quod Deus sit, & inquirentibus se remunerator sit, acceptare: nec si non acceptetur, nihil muneris, sed pœnam potius ab eo homo consequatur.

Secundò, quod attinet ad eos, qui athei non sunt, sed aliquem fidei persuasionem habent de diuinitate: animæ rationalis immortalitate: verum alijs orthodoxæ Fidei propositionibus contradicunt: vt sunt Hæretici, Turcæ &c. imprimis certum est, quamdiu eorum secta, quam profitentur, credibilior, vel æquè credibilis, seu probabilis ipsis apparet: non debere eos, imò nec posse, sine nota imprudentiæ, atque inconstantia, sua deserta, nostrā Religionem amplecti. Nam *qui estis credis, leuis corde estis*, ait Ecclesiast. cap. 19. Verum interim tales sectarij, cum de nostra ipsis opposita Religione, eiusque argumentis audiunt, formidare sæpe incipiunt, atque etiam dubitare, num fortè in errore ipsi versentur, & nostra vera doctrina sit: tunc sanè obligati sunt, rem diligenter inquirere, vtrinque facta collatione argumentorum. Quod si facta diligente inquisitione, Religio nostra ob notas suas, siue argumenta, quibus eam Deus ornauit: (puta signa, ac miracula: consensionem tot hominum per tot secula vitæ sanctitate, & sapientia præstantium, &c.) credibilior, seu probabilior, quàm aliæ omnes sectæ, ipsis manifestò appareat: tunc existimo obligatos fore ad sectam suam deserendam, nostramque Fidem amplectendam. Quia ratione naturali manifestum est, & ferme ex terminis notum, illam religionem præ alijs acceptandam, seu credendam esse, quæ præ alijs verisimilior est. Accedit, quod



quod secundum rectam philosophiam impossibile videtur inter duo opposita hominem assentiri illi parti, quæ ipsi minus verisimilis apparet; vel eligere id, quod ipsi minus bonum apparet. Aut igitur sine vlla omnino religione tales vivere debent: aut illam amplecti, quæ ipsis, post diligentem perquisitionem, probabilior apparet. Atque ita etiam docet Bannes 2. 2. q. 10. a. 1. dub. 3. concl. 3. & 4.

Nihilominus hanc sententiam rejciunt Sanchez lib. 2. c. 1. num. 6. & Ioan. Malderus 2. 2. quæst. 2. a. 7. in fine, existimantes, hominem extra mortis necessitatem (quo tempore ob animæ periculum partem tutiorem amplecti oportet) non esse obligatum; vt sectam suam cum nostra orthodoxa Religione commutet, etiam si huius maiorem probabilitatem, seu credibilitatem cognoscat: Tum quia talis adhuc prudenter iudicat, persistere se posse in sua secta, quæ probabilis ipsi apparet; licet altera probabilior: tum quia tempus magis cognoscendæ veritatis opportunum expectare potest.

Sed hæc non obstant: Ad I. Respondeo cum Bannes loco supra cit. Licet tali homini sua religio speculatiue probabilis adhuc appareat: practice tamen, seu in ordine ad operationem, vt eam retinere, aut sectari licitum sit: non posse videri probabilem, dum altera probabilior, ac credibilior iudicatur: quin potius in ordine ad praxin, vt eam sectari, aut retinere possit, nihil probabilitatis habet: cum euident sit, illam religionem præ alijs acceptandam esse, quam esse, Deus maioribus notis, seu argumentis adornauit. Accedit, quod impossibile, intellectum iudicatum retinere fidem, quæ ipsi post diligentem inquisitionem minus verisimilis apparet, quam eius opposita. Quia fides, præsertim diuina, ratione, ac prudentia niti debet: nulla autem est ratio inter duas contradicentes assentiendi parti, quæ minus probabilis videtur. Lege quæ dixi lib. 1. tract. 1. c. 5. num. 5. Ad alterum non nego; hominem posse ac debere rem diligenter considerare: sed, si omnibus diligenter consideratis, Religio nostra ipsi probabilior & verisimilior, ob extrinsecas notas, siue argumenta liquida appareat: tunc dico, prudentiam euidenter dicere, talem religionem intellectu acceptandam esse per piæ voluntatis inclinationem, adiutam supernaturali lumine, ac cooperatione Spiritus sancti: per quam Fidei actus firmissimus, & omnimodè indubitatus fiat, vt supra dixi cap. 3. Quare licet fortasse talis homo formidet, aut dubitet de veritate Fidei nostræ, antequam eam acceptauit: at verò quando eam voluntariè acceptauit: cooperante Spiritus sancti gratia, tunc nullo modo dubitat, cum Fidei assensus firmissima mentis adhesio sit.

Alter casus, quo Fidei exercendæ præceptum obligat: Cum grauis contra Fidem tentatio incidit, quam superare non posse videaris, nisi contrarium actum Fidei eliciendo: cuiusmodi præceptum maximè obligat in mortis articulo, cum molestiores Dæmonis infestationes ingruunt, sicuti bene docet Valent. q. 2. p. 5. §. superest secunda quæstio.

Tertius casus est, cum præcepti necessitas homini incumbit ad eliciendos actus Spei, Charitatis, Religionis, Pœnitentiæ: propterea quod Fides fundamentum sit reliquarum virtutum, quæ suis actibus Deum aliquo modo attingunt. Verum hæc obligatio exercendi actum Fidei solum est per accidens, siue propter aliud: quare neque transgressio eius peccatum est contra Fidem: sed contra illam virtutem, cuius actus exercendi medium necessarium intermittebat.

## CAP. III.

## De præcepto, siue obligatione externæ Fidei confessionis.

## SUMMARIUM.

1. Nullo casu licitum est externa voce, aliòve signo Veram Fidem negare: aut falsam profiteri.
2. Fidem Veram exterius profiteri non semper obligati sumus: sed interdum tacere: aut dissimulare licitum est.
3. Primatum hominem sciscitantem ex mo, num Christianus, aut Catholicus sim, repellere possum dicendo: Quid tua interest. Ecce. Sed non possum ficto animo negare, me Christianum, aut Catholicum esse.
4. Ob grauem necessitatis causam licitum est fideles se vestire Iudæico, aut Gentiliū more. Et incognitis lateant, & periculum effugiat.
5. Licitum est inter Hæreticos carnem comedere die interdicto: ne, si Catholicus agnoscat, graue periculum sit a fortunatum. Et incurrat: cum lex Ecclesiastica tali casu non obliget.
6. Magistratus hæretico, in odium religionis Catholice, præcipiens vt subditi Catholici conuentus seu conciones hæreticus accedant, obedire nefas est.
7. Ante prouisionem beneficii curati, vel canonicatus in Ecclesia Cathedrali, Fidei professionem facere oportet.

**A**SSERTIO I. Nullo casu licitum est externa voce, aliòve signo veram Fidem negare, aut falsam profiteri. Ita S. Thom. 2. 2. quæst. 3. a. 2. & latè Valent. quæst. 3. p. 2. Sanchez cit. lib. 2. cap. 4. Ioan. Molanus de fide hæreticis seruanda, lib. 4. c. 9. Et sumitur ex verbis Christi apud S. Matth. cap. 10. Qui negauerit me coram hominibus, negabo & ego eum coram Patre meo. Et ex Apostolo ad Roman. 10. Si confitearis in ore tuo Dominum IESUM, & in corde tuo credideris, quia Deus suscitauit illum a mortuis, saluus eris: Corde etiam creditur ad iustitiam: ore autem confessio fit ad salutem. Quibus verbis indicat Apostolus, interpretæ S. August. lib. de fide, & symbolo, cap. 1. non tantum fidem internam: sed etiam externam eius confessionem adultis necessarium esse ad salutem, & vitam æternam consequendam: illam quidem necessitate medijs, iuxta ea, quæ cap. 8. dicta sunt: hanc verò necessitate præcepti, quod quatenus negatiuum est, Ne Fidem veram abneget, Ne falsam profiteri, semper obligat: cum hæc sit conditio præceptorum negatiuorum, quæ iuris naturalis sunt, vt ibid. S. Thom. notauit. En confirmatur exinde: Vel enim aliquis serid, siue ex animo Fidem orthodoxam abnegat, falsam ve proficitur, & tunc verè ac propriè in peccatum infidelitatis, exterius quoque contummatum, labitur, Fidemque amittit. Vel ficto animo simulat se à vera Religione alienum, aut alterius falsæ religionis sectatorem esse; & tunc licet fidem internam non amittat, neque verè hæreticus, aut apostata fiat, sicuti ex communi docet Sanchez lib. 2. c. 7. num. 8 & 10. mentitur tamen in re grauissima: quippe contra veritatem diuinitus nobis reuelatam & datam: quare Christus Luc. 9. dixit: Qui me erubuerit, & sermones meos huc Filius hominis erubescet. cuiusmodi peccatum S. Petrus commisit, Christum ex timore negando, de quo vide Sanctus Augustinus tract. 66. in Ioan.

**A**SSERTIO II. Fidem veram exterius confiteri non est semper necessarium: sed interdum tacere, aut dissimulare licitum. Ita S. Thom. loc. cit. quod probat: quia præceptum de confessione Fidei est ex numero affirmatiuorum, quæ non obligant secundum omne tempus: sed in certis tantum casibus, seu concurrentibus debitis circumstantijs.

Casus autem in quibus præceptum veræ Fidei palam profitendæ obligat, numerantur ab eodem S. Thom. Si nimirum ita necesse videatur ad Dei honorem, ac cultum vel ad spirituales proximi vtilitatem: vel denique (vt alij adiungunt) ad ipsius confitentis propriam salutem tuendam. Siquidem hoc commune est omni virtuti, vt eius actus in præcepto sit, cum necessarius esse incipit ad finem charitatis erga Deum, erga seipsum, vel erga proximum. Nam finis præcepti est charitas, ait Apost. 1. ad Timoth. 1. Quapropter si ex taciturnitate, dissimulatione, fuga tua, Religionis Catholice contemptus, proximorum scanda-



lum, seu spiritualis ruina secutura putetur, Fidem palam profiteri debes, sicuti ex communi docet Becanus 2. 2. c. 9. q. 4. num. 9. Tol. lib. 4. c. 2. Similiterque, si ex publica professione tua magnū augmentum Religionis, aut cultus diuini secuturum sit, cui salus corporalis merito postponenda secundum charitatis ordinem: denique etiam, si tibi ipsi periculum imminet, ne Fidem abneges, nisi eam oblata occasione palam profitearis.

Ceterum si in ratione necessitatis, aut securitatis utilitatis fidem suam apud hæreticos, aliosve infideles, cum eorum perturbatione profiteri, temerarium potius, quam laude dignum est, teste S. Th. cit. a. 2. ad 3. Tol. cit. c. 2. Armilla ver. fides, n. 7. Sanchez cit. c. 4. n. 2. Vide quæ dicam lib. seqq. tract. 3. de iustit. part. 3. cap. primo. num. 6.

Porro supponenda hic est communis doctrina, quam latius explicabo lib. 4. tract. 3. de iuram. c. 13. Simulare quod non est, siue falsitatem, nunquam licitum esse: cum id sit mendacium intrinsecè malum, teste S. Th. 2. 2. q. 111. a. 1. in corp. & ad 4. Dissimulare verò quod est, siue veritatem: & ob id verbis, aliisve signis ambiguis ac indifferentibus uti, quandoque licitum esse; si videlicet interroganti aut rem cognoscere volenti manifestare non tenearis, sed iustam celandi, siue dissimulandi causam habeas.

Exinde sequitur I. Si priuatus & vilis homuncio ex me Fidei rationem exposcat, sciscitando, num sim Christianus Catholicus, aut Pontificius: grauer me peccatum contra externam Fidei confessionem, si negem me Christianum, vel Catholicum esse: Attamen à peccato immunis ero, si taceam: vel interroganti respondeam, *Quid tua interest?* aut, *Cur metalia rogas?* Vel denique, si sermonis ambiguitate fidem meam ob iustam causam dissimulem, quando nulla eam profitendi necessitas cogit, sicuti docet Nau. comment. c. humane aures, q. 3. in fine. Azor. to. 1. lib. 8. c. 27. q. 1. Valent. cit. q. 3. p. 2. dub. 3. & 4. Sanchez cit. c. 4. n. 6. in fine, Becanus cap. 9. q. 4. Alia verò ratio est, si persona publica, siue Magistratus, quantumvis iniqua intentione, de Fide, ac Religione examinet; tunc fas non est fidem dissimulare, aut interrogantem sermonis ambiguitate deludere: quia talis dissimulatio cum aliorum scandalo, & Christianæ orthodoxæ Religionis detrimento esse solet, sicuti notarunt Lopez, Azor, Valentia, Sanchez, Becanus, Ioan. Molanus locis supra citatis.

Sequitur II. Contra externam Fidei confessionem mortaliter peccari, si vel ficto animo dicat quispiam se Turcæ, Calvinistam, vel alterius falsæ religionis sectatorem esse, vel quocunque alio signo alienam religionem simulet, v. g. idolo genua flectat, thus adoleat. Quæ est communis doctrina, contra Adrianum in 4. de Baptismo q. 1. a. 1. ad 5. Nam sicuti virtus veritatis obligat nos affirmatiuè, vt, cum opus est, vel circumstantiæ ita requirunt, veritatem non celemus, sed sincerè aperiamus: negatiuè verò, vt nullo vnquam tempore oppositam falsitatem, seu verbo, seu facto mentiamur, aut simulemus. Ita virtus Fidei diuinæ multò adhuc strictius & grauius obligat, affirmatiuè quidem, vt veritates diuinitus nobis reuelatas, cum opus est, & circumstantiæ ita exigunt, palam profiteamur: negatiuè verò, vt oppositam Fidei falsitatem nullo vnquam tempore, seu verbo, seu facto mentiamur, aut simulemus.

Neque obstat locus scripturæ 4. Regum, cap. 5. Non enim Elifæus permisit Naaman Siro: vt idolum adoraret, sed vt adorante Domino suo, atque inniti volente super Naaman, ipse quoque procumberet: non idoli, sed Domini honorandi causa, sicut Liranus, & Abulensis ibid. explicant, Azor quoque lib. 8. c. 27. q. 7 Sanchez lib. 1. c. 7. n. 21. Rodriq. p. 1. sum. c. 119. concl. 5. Multò minùs obstat locus 4. Regum. c. 10. vbi Rex Israël Iehu, vt sacerdotes Baal, occidere posset, simulauit se idolum cole-

re velle. Nam licet simulationem hanc commendet S. Hieron. cap. 2. ad Galat. rectius tamen reprehendit S. Aug. lib. contra mendacium, c. 2. S. Th. 2. 2. q. 111. a. 1. ad 2. vbi addit: *Commendatur tamen Iehu, & remuneratur à Deo non pro simulatione, sed pro Zelo, quo destruxit cultum Baal.*

Porrò propter hæc multi Doctores, nominatim Caiet. 2. 2. q. 3. a. 2. Nau. c. 11. n. 27. Philarchus to. 1. p. 2. lib. 3. c. 9. Tol. lib. 4. c. 2. Becanus 2. 2. c. 9. q. 5. dub. 6. n. 35. existimant, esse mortale peccatum contra Fidei confessionem gestare in publico vestimenta, quibus soli infideles uti, & ab alijs hominibus discerni solent: puta, si quispiam in terris Turcarum vtatur pileo, & ligamine Turcico, vt securus pertranseat: vel Romæ, more Iudæorum, gestet signum flauum in pileo, vt dum ad necem quæritur, incognitus effugiat. Nunquam enim licitum est, falsam sectam simulare, vt supra dictum: talis autem eo vestimenti genere, quod Turcarum, vel Iudæorum proprium est, simulat se Iudæum, aut Turcam esse, &c.

Contraria tamen sententia probabilior est, quam docet Angelus ver. infidelitas, num. 9. Azor cit. cap. 27. quæst. 4. Bannes 2. 2. quæst. 3. a. 2. dub. 2. Lopez cit. cap. 41. §. peccat mortaliter, Sa ver. fides, num. 5. Sanchez lib. 2. cap. 4. num. 11. & 19. Rodriq. to. 1. Sum. cap. 119. concl. 5. Ob grauem causam, v. g. mortem euitandam, aut iustā ab hoste victoriam reportandam, id licitum esse. Ratio est: Quia huiusmodi vestes per se propriæ, ac directè non sunt signa potestatiuæ falsæ religionis: (alioquin peccarent etiam Iudæi v. g. talem pileum gestantes, quin & Magistratus Catholicus eosdem ad talem habitum compellens) sed sunt res secundum se indifferentes, qualibus uti per se malum, aut veræ Fidei confessioni oppositum non est.

Sed neque id simulationem aliquam continet, siue mendacium: si talem vestitum gerens non intendat se fingere, aut simulare Iudæum, Turcam; sed solū intendat dissimulare se Christianum esse eo loco, ac tempore, quo fidem, ac statum suum profiteri non tenetur. Eodem prorsus modo, quo Sacerdos, vel Religiosus iter faciens per terras hæreticorum, induit se vestibus hominis laici, aut secularis: non ea intentione, vt se laicum esse simulet (id enim mendacium foret) sed vt sacerdotem, aut Religiosum esse celet, ac dissimulet. Cum enim obligatus non sit suum statum vestimento prodere, sed occultandi ius habeat: ideo ad hunc finem consequendum alieno vestimento se induere iure potest, permittendo interim, vt alij fallantur, existimantes esse ipsum ex illorum hominum genere, qui tale vestimentum communiter gerunt.

Atque hic discrimen obseruandum est inter signa verborum, & vestes: Nam verba hunc solum, finemque habent, quod sint subordinata conceptibus ad rem aliquam significandam secundum determinationem institutionis humanæ. Quare si quis dicat se religionem Mahometanum esse, cum Christianus sit; vel laicum se esse, cum Sacerdos sit: aliud exterius significat, quam re ipsa esse cognoscit, ideoque vterque mentitur, ac peccat: & prior quidem etiam contra Fidei confessionem mortaliter; posterior verò simplici mendacio, uti notauit Caiet. in sum. verbo habitus, in fine, Azor cit. cap. 27. quæst. 2. Sanchez cit. cap. 4. num. 10.

Eademque ratione supra dixi, non esse licitum coram idolo thus adolere, vel genu flectere: quia huiusmodi actio, per circumstantias loci, temporis, personarum determinata, vnā solam moralem significationem cultus idololatriæ habet: quam proinde actionem ita vsurpans, exterius proficitur, ac simulat falsi Dei. At verò vestimenti genus, tametsi lege aliqua, aut consuetudine significet gentem Iudaicam, aut laicorum statum, interim tamen non amittit vsum, ac commoditatem, quam suapte natura habet, tegendi, vel ornandi corpus: vt proinde as-

sumit



sumi possit ab eo, qui proprium habitum, sui status occultandi causa, iure mutare potest.

Simili modo Sanchez num. 22. & 23. defendit Christianos, qui in mari nauigantes signis Turcarum vtuntur, ne tanquam hostes à Turcis inuadantur, aut captiui abducantur: item Christianos milites, si vexillis, habitu, ac sermone Turcarum, vel Gentilium proprio vtantur, vt ea ratione incogniti hostem incautum inuadere, atque opprimere possint. Excipit tamen cum Azorio cit. cap. 27. quæst. 6. Bannes cit. dub. 2. conclus. 2. nisi in vestibus, aut vexillis imago Mahometis, Martis item, aut Mercurij depicta sit: eiusmodi enim symbolo professio fieri videtur religionis falsæ, quod per se malum; ac nunquam licitum est. Verum hanc professionem, generatim loquendo, non cogimur agnoscere: quandoquidem etiam apud Christianos eiusmodi signa, puta Mercurij, Veneris, &c. tanquam fabulosa, ornatus gratia adhibentur. Igitur non damnare milites nostros, sijs tanquam indifferentibus, insidiarum causa in bello vterentur.

Præterea ex communi Doctorum sententia respondendum: Fas non esse occultis Catholicis inter hæreticos ipsorum cœnam, ob metum pœnarum sumere: Quia licet talis cœna, si absolute & præcisè spectetur, res indifferens sit, cum etiam naturalem vsum famis, sitisve sedandæ habeat; tamen per circumstantias personarum, loci, temporis, adiutorum verborum, &c. determinatur ad significandum cultum, ac professionem religionis hæreticæ: vt proinde fideles eam sumere non possint, absque simulatione falsæ fidei.

5 Vtèrius resoluit Sanchez num. 25. Azor cit. cap. 27. quæst. 3. & cap. 29. quæst. 7. in fine. Martinus Becanus cap. 9. quæst. 5. dub. 5. Non peccare Catholicum, si inter hæreticos die interdicto carnes comedat, cognita Religionis suæ professione, periculum vitæ, vel bonorum incurrat. Neque enim delinquit contra Ecclesiasticam ieiunij legem, quippe quæ in tali necessitate non obligat; neque contra legem diuinam non abnegandi veram Fidem, & non profitendi alienam: Quia carniū esus die interdicto secundum se non est nota, aut professio hæresis: neque huiusmodi interdictum ab Ecclesia propter talem finem institutum est, vt Catholicæ Fidei professio, aut Orthodoxorū ab alijs internotio fiat: Quare inter Catholicos etiam reperiuntur, qui die interdicto carnes comedunt, vel iusta causa excusati, vel interdum cupiditate ac intemperantia superati. Neque obstat, quod hæretici ex hoc signo colligere soleant, aliquem suæ fidei sectatorem, aut à Romana Religione alienum esse: quia hanc ipsorum deceptionem, ob grauem causam, interdum permittere fas est: dummodo absit scandalum, & Religionis orthodoxæ contemptus.

Dixi autem comestionem carniū die interdicto secundum se rem indifferentem esse: quia non nego per circumstantias personarum, loci, temporis, verborum, &c. determinari posse, vt sit hæreticæ sectæ professio. Quo modo intelligi potest Valent. t. 2. disp. 7. quæst. 5. part. 6. casu. 4. Exemplum habes, si hæretici in hospitio tempore quadragesimæ eadem mensa cum Catholico confidentes, ad explorandam huius fidem dicant: *Qui Euangelicus est, & Papæ inimicus, ex hoc carniū ferculo sumat, & comedat*: peccabit Catholicus grauiter contra Fidei professionem, si cum ipsis comedat, nulla vtens protestatione contraria: videlicet, hoc non oportere esse signum explorandæ religionis, cum multi etiam Romanæ Fidei sectatores ob iustas causas in quadragesima carnes comedant. Deinde rectè monet Beccanus loc. cit. Si Catholicus sit apud Lutheranos, à quibus plerumque non graue periculum, sed solum irrisio aliqua timeri potest, si quis inter eos à carniibus abstineat; tali casu abstinendum esse, legemque Ecclesiasticam obseruandam.

Denique eadem ratione dicendum est: Non peccare

Catholicum, si hæreticorum concionem adeat, ex iusta causa: v.g. vt dominum suum comitetur, sicuti Naaman Sirus, de quo supra dictum: vel hæretici Ministri errores notet ad confutationem, permittendo interim falsam persuasionem, quæ in aliquorum animis oriri potest, talem accedentem hæreticum esse: dummodo scandalum absit. Ita docent Azor cit. c. 27. q. 5. Becanus c. 9. q. 5. du. 2. & 3. Vide etiam Valent. cit. dub. 4. §. & per hoc, Sanchez num. 26.

6 Sed quæstio est, si publico hæretici Magistratus edicto, sub grauissima pœna, præcipiatur omnibus subditis, vt ad hæreticos conuentus accedant: vtum Catholicis parere possint? Negandum id est, sicuti constat ex bina responsione Pauli V. Pontif. ad Anglos Catholicos, apud Sanchez cit. cap. 4. numer. 27. Cum enim tale edictum directe atque ex proposito tendat ad hæreticæ religionis augmentum, atque cogendos Catholicos, vt à Fide vera desciscant, vel saltem inter eos, & hæreticæ prauitatis sectatores internotio appareat, manifestum est, Catholicos subditos tali edicto obedire non posse sine animi mutatione, falsæ religionis professione exterius apparente: ex quo multorum etiam scandalum, & nostræ Religionis vilipensio consequitur.

Quamuis verò aliquis apud Azor cit. c. 27. q. 5. existimet, hoc malum scandalum atque peccati euitari posse, si aliquis publice protestetur, se ad hæreticorum templum & conuentus accedere, non vt hæreticam sectam profiteatur, sed solum, vt Magistratui ita iubenti satisfaciatur: at tamen talis protestatio vel inutilis erit ad pœnam euadendam, vel saltem non omne scandalum, aut propriæ salutis periculum auferet, sicuti fusè declarat Sanchez l. c. n. 27. idemque notauit Luissus Turrianus 2. 2. disp. 35. du. 7. in fine. Atque simili modo, licet Catholicus cœnā hæreticorum sumere non prohibeatur cum protestatione publica, facta non coram solo Ministro, seu Prædicante, sed toto populo: se tantum sumere vt prophanum & communem panem, &c. tamen talis protestatio plerumque nihil proderit ad intentum finem, videlicet pacem cum incolis retinendam, edicti pœnam fugiendam.

7 Ad extremum notandum est, quod in Trident. Synodo sess. 24. c. 12. de reformat. decernitur: *Vt prouisi de beneficijs quibuscunque curam animarum habentibus, teneantur 2 die adeptæ possessionis, ad minus intra duos menses, in manibus ipsius Episcopi, vel eo impedito, coram generali eius Vicario, seu Officiali, orthodoxæ suæ Fidei publicam facere professionem: & in Romana Ecclesia obedientia se permansuros spondeant, ac iurent. Prouisi autem de canonicatibus & dignitatibus in Ecclesijs Cathedralibus, non solum coram Episcopo, seu eius Officiali: sed etiam in Capitulo idem facere teneantur, alioquin prædicti omnes prouisi fructus non faciant suos, nec illis possessio suffragetur, puta ad præscribendum spatium triennij, sicuti explicat Sanchez lib. 2. c. 5. n. 11. & 12. Verumtamen si aliquis ob decreti huius inculpatam ignorantiam, vel inconsiderationem, Fidei professionem facere intermiserit, in conscientie foro à dicta pœna immunis censeri debet: quippe cum pœnæ locus non sit, vbi nulla culpa est: sed in externo foro excusatio iuris adeo clari non admittetur. Ita Nau. lib. 1. consil. 2. & 3. de Sum. Trinit. edit. 1. & lib. 2. consil. 11. & 12. de iure iur. edit. 2. Sanchez n. 13. Rodriq. t. 2. Regul. qq. q. 72. a. 3. & t. 1. Sum. c. 119. concl. 2. Azor t. 1. l. 7. ca. 2. q. 2. Porro decretum hoc Concilii Trident. Pius IV. in quadam constitutione, quæ incipit *In iunctum* apud Nau. consil. 10. de iure iurando. edit. 2. extendit ad Regularium Prælatos: illam tamen non in omnibus Religionibus receptam esse, monet Sanc. ci. c. 5. n. 4.*

Insuper Pius V. in motu proprio, qui incipit *In sacrosancta*, apud Rodriq. ci. q. 72. a. 2. decreuit, vt eandem Fidei professionem facere teneantur Doctores, Magistri, Regentes, & alij cuiuscunque artis, aut facultatis Professores, clerici, tum laici. Vbi etiam continetur excommunicatio lata sententia, & priuatio omnium beneficiorum in eos,



qui aliquem ad eiusmodi gradum, vel Cathedram, non praeuia Fidei professione promouent.

## CAP. XII.

## De infidelitate, eiusque speciebus.

## SUMMARIUM.

- 1 Infidelitas alia est materialis tantum, & alia formalis.
- 2 Infidelitatis peccatum grauius est, quam alia, quae ad mores pertinent.
- 3 Inter infidelitatem merè negatiuam, ideoque omnino inculpam: & infidelitatem formalem, ac propriè dictam, media est infidelitas, quae Fidei primatui opponitur. Videlicet culpabilis ignorantia, & error in rebus Fidei, sed sine pertinacia.

**D**Vplex est infidelitas, auctore S. Th. 2. 2. q. 10. art. 1. Vna materialis, & secundum puram negationem, quae peccatum non est, sed magis poena peccati. Etenim infidelitas materialis dicitur, quae inuincibilis est, id est, nulla adhibita diligentia tolli potest, vel certè tolli non debet: aut quia de fide Christiana nihil vnquam aliquis audiuit: quod spectat illud Apost. ad Rom. 10. *Quomodo credent ei, quem non audierunt? Aut quomodo audient sine praedicante?* Et illud Domini apud S. Ioan. c. 15. *Si non venissem, & locutus eis fuisset, peccatum non haberent: Nunc autem excusationem non habent de peccato.* Aut tamen si aliquis audierit, tamen post diligentem considerationem (quam quisque infidelis adhibere tenetur, cum de veritate sectae suae, quam profitetur, prudenter dubitare incipit) non deprehenderit sufficientia argumenta, quibus ad Fidei acceptionem, & assensum prudenter moueatur, sicuti supra dixi cap. 10. num. 3. & docet S. Th. 2. 2. q. 1. art. 4. ad 2. ibid. Caiet. Victor. relect. de Indis Insularis, n. 34. & seqq. Bannes 2. 2. q. 10. art. 1. dub. 1. Azor to. 1. l. 8. ca. 7. q. 6. Becanus cap. 13. q. 1. Vasq. 1. 2. disp. 120. cap. 3. Sanc. lib. 2. moral. cap. 1. num. 4. Qui rectè notat num. 7. ex Caiet. cit. art. 4. §. *Discendum est igitur, saepenumero fieri, ut si eadem Fidei nostrae expositio pluribus fiat, vnus eam acceptione teneatur, alius non: propterea quod credibilitas propositionum Fidei non sit praecise ex parte rei: sed quatenus ea ab intellectu videtur, siue apprehenditur.* Est tamen, ut dixi, haec materialis infidelitas poena peccati, iuxta ea, quae dicta sunt supra cap. 8. num. 5. ver. si obiciatur, & colligitur ex Apost. ad Rom. 1. *Reuelatur ira Dei de caelo super omnem impietatem, & iniustitiam hominum eorum, qui veritatem Dei (quod vnus sit creator, & sanctificator, &c.) in iniustitia deiciunt: cum peccatis suis Deum impediunt, quo minus veritatis lumen hominibus ad salutem necessarium ipsis ostendat.* Et ad Ephes. 5. *Surge qui dormis, & exurge à mortuis, & illuminabit te Christus.*

Altera est infidelitas formalis, & secundum contrarietatem adeoque peccatum formaliter ac contrariè Fidei diuinæ oppositum. Cuius tres species sunt, auctore eod. S. Th. q. 10. a. 5. Aut enim infidelitas aduersatur Fidei prius susceptae, aut non susceptae: Si primum, vel aduersatur Fidei susceptae solum in typo, seu figura: & est Iudaismus: Vel denique aduersatur Fidei cum veritate susceptae & est Apostasia, ac Haeresis: quae inter se ea ratione differunt, quod illa diuinæ Fidei veritates vniuersim; haec ex parte abiiciat.

Comparando infidelitatem cum aliis peccatis, ait S. Th. q. 10. a. 3. *Eam grauitate superare omnia peccata, quae ad mores pertinent.* Nam peccati ratio consistit in auersione mentis à Deo: infidelis autem maximè remotus à Deo est, cum nec veram eius cognitionem assecutus sit. Confirmatur ex eo, quia peccatum infidelitatis directe impedit remissionem aliorum peccatorum, iuxta verbum Christi, Ioan. 8. *Si non credideritis quia ego sum, moriemini in peccato vestro:* propter quod Fides sit fundamentum, & radix iustificationis, sine qua nemo Deo placet.

cere, & ad filiorum eius consortium peruenire possit, sicuti ait Trident. sess. 6. c. 8. Interim notat idem S. Th. ad 2. quod ignorantia Fidei (ea nimirum, quae cum pertinacia iuncta non est) excusationem aliquam meretur, teste Apost. 1. ad Timoth. 3. *Misericordiam consecutus sum, quia ignorans feci in incredulitate.*

Porro inter infidelitatem merè negatiuam, & omnino inculpam: atque infidelitatem formalem ac propriè dictam, statuenda est media infidelitas, quam dicere possumus Fidei priuatiue oppositam. Ea quae aliud non est, quam ignorantia, vel error in rebus Fidei, culpabilis quidem, sed sine pertinacia: Puta, si Catholicus aliquis, siue Romam orthodoxam Religionem professus, ex vincibili ignorantia opinionem aliquam verè Fidei repugnantem teneat, paratus tamen eam mutare, si contra Ecclesiae sensum, aut definitionem esse sciret.

Videri autem posset alicui, eandem esse rationem de eo, qui inter haereticos natus, & educatus, postquam de religionis suae falsitate suspicari coepit, ideo tamen eam non deserit, quia orthodoxae Religionis argumenta, & credibilitatem cognoscere culpabiliter intermittit. Sed non ita est: quin potius discrimen istud, quod prior ille simpliciter & absolute fidelis, atque Catholicus censeri debet: tum quia Fidem habitualement retinet, tum quia reliquas Fidei propositiones, ac veritates Fidei diuinæ credit, quippe retinens regulam, per quam credenda à non credendis certò deprehendere possit: quae est infallibilis Ecclesiae autoritas. At verò posterior, qui à communione orthodoxae Ecclesiae alienus, in falsae religionis professione, per culpabilem crassam ignorantiam perstitit, infidelibus atque haereticis formalibus annumerandus videtur. Qui enim Ecclesiae auctoritati se opponit per ignorantiam crassam, is contumax, seu pertinax censetur esse, arg. c. 2. de Constit. in 6. consequenter eius infidelitas est formalis, & propriè dicta, per quam Fidei habitum in Baptismo infusum demeritoriè perdit, & dum in tali dispositione versatur, dignus non est diuinæ supernaturali Spiritus sancti motione ad actum supernaturalem Fidei eliciendum: ideoque reliqua etiam dogmata, quae ipsi cum Catholicis communia sunt, v. g. de SS. Trinitate. Verbo incarnato, propria tantum libertate, ac humana persuasione, non Fide supernatuli credere conuincitur. Quam doctrinam ex S. August. accepi lib. 4. de Bapt. contra Donatistas cap. 16. vbi hoc discrimen clarè constituit his verbis: *Constituiamus duos isto modo; vnum eorum v. g. sentire id de Christo, quod Photinus opinatus est, & in eius haeresi baptizari extra Ecclesiam Catholicam communionem: alium verò hoc idem sentire: sed in Catholica baptizari, existimantem ipsam esse Catholicam Fidem: Istum nondum haereticum dico: nisi manifestata sibi doctrina, Catholica Fidei resistere maluerit, & illud, quod tenebat, elegerit: quod antequam fiat, manifestum est, illum quiforis baptizatus est, esse peiorem. Itaque in hoc sola falsa opinio: in illo autem etiam ipsa diuisio corrigenda est: sed in neutro ipsorum Sacramenti veritas repetenda.*

Ceterum, si qui seu à Catholico, seu ab haeretico Ministro ritè baptizati, postea inter infideles, aut etiam haereticos educantur, apud quos de Fide & Religione Romana Catholica, vel omnino nihil, vel non nisi obscura quaedam, nefaria & abominanda audiant: Papam esse Antichristum, bestiam: quae sicuti Deus colitur, &c. fieri potest, & interdum solet, ut tales inuincibili Catholicae veritatis ignorantia laborantes, Fidei in Baptismo infusum habitum retineant: quippe qui non nisi per actum Fidei supernaturali formaliter oppositum excluditur. Deinde eas Fidei veritates, quas nobiscum communes retinent, v. g. de sancta Trinitate, Verbi incarnatione, Fide diuinæ & supernaturali credere possunt, cum Dei auxilio, & extrinsecorum motiuorum adminiculo: quare tales homines saluari nihil prohibet. Vide Sanchez libro 2. capite 1. numero 8. & S. Augustinus Epist.



Epist. 162. relatum in suprâ citato c. dixit Apostolus, 24. quæst. 3. *Qui sententiam suam quamvis falsam, atque peruersam nulla pertinaci animositate defendunt: præsertim quam non audacia sua præsumptionis pepererunt: sed à seductis, atque in errorem lapsis parentibus acceperunt, querunt autem cauta sollicitudine veritatem, corrigi parati, cum inuenerint, nequaquam sunt inter hæreticos deputandi.*

## CAP. XIII.

## DE HÆRESI.

## SUMMARIUM.

- 1 *Hæresis est error contra Veritatem Fidei diuinæ, iunctus cum pertinacia in eo, qui Fidem suscepit.*
- 2 *Qui ignorat, quamvis crassa ignorantia, opinionem suam Ecclesia Catholica repugnare, is pertinax non est, adeoque nec hæreticus.*
- 3 *Omnes hæretici Ecclesia vniuersali, cuius caput Romanus Pontifex est, se opponunt: illiusque infallibilem auctoritatem in proponendis Fidei dogmatibus negant.*
- 4 *Qui à secta Lutheri, Caluini, &c. quam professi sunt, recedere cupiunt, si examinati, probabili, vel saltem moraliter non culpabili ignorantia laborasse videantur, à locorum Parochis absolui possunt, nisi consuetudo diocesis aliud exigat.*
- 5 *Qui circa Fidei articulum seu propositionem deliberatè dubitat, is hæreticus est.*
- 6 *Qui diuinæ reuelationi priuatim sibi facta pertinaciter dissentit, essentialiter ab hæretico non differt.*
- 7 *Qui agnoscit & g. Christum verum hominem esse, negat tamen propositionem Theologicam, & g. quod Christus ridendi naturalem facultatem habet, is hæreticus non est.*

**H**æresis est secta, siue sententia in rebus Fidei, quam aliquis, contra Ecclesiæ sensum, propria persuasione elegit. Clariùs sic definitur. *Error contra aliquam Fidei veritatem, cum pertinacia iunctus, in eo, qui Fidem suscepit.* Nomine eius, qui Fidem suscepit, aliqui etiam Catechumenos comprehendunt, ut & ipsi hæretici dicendi sint, si postquam credentes facti, Fidem abiciant. Ita Bannes 2.2. q. 11. a. 2. §. vltima particula: *Suar. de censuris, diff. 2. l. 2.* Becanus c. 14. q. 2. Alij verò negant Catechumenū propriè dictum hæreticum fieri, si Fidem abiciat: cum nunquam Ecclesiæ membrum fuerit. Ita Arrag. 2.2. q. 11. a. 2. du. 3. Tolet. lib. 4. c. 3. §. adhuc opus est. Sanchez libro 2. cap. 7. num. 3. Respondeo & dico I. *Esse hanc quæstionem de nomine.* Nam hæreticus propriè dicitur, qui ab Ecclesia, cuius membrum erat, diuersum pertinaciter sentiendo, se segregat: Catechumenus autem, licet per Fidem inchoatiue membrum Ecclesiæ factus sit, non tamen formaliter & completiue, cum Fidem in Baptismo professus non sit: Ecclesia enim spectabilis Christi & publica, est congregatio fidelium solemniter professorum. Interim fateri debemus, quod Catechumenus à Fide Christi recedens, essentialiter non differt ab hæreticis: sicuti etiam rectè dicimus, quod Æthiops essentialiter non differt ab alijs hominibus, qui Æthiopes non sunt.

2 Dico II. *Id certum esse, quod Catechumenus à fide recedens, Ecclesiasticis hæreticorum pœnis minimè obligatur.*

Denique quod ad hæresin requiratur pertinacia, habetur apud S. August. epist. 162. relatum in c. dixit Dominus, 24. q. 3. & lib. 18. de ciuit. c. 5. relatum in can. 31. ead. q. 3. *Qui in Ecclesia Christi morbidum aliquid, prauumque sentiunt, si correpti, ut sanum, rectumque sapiant, resistunt contumaciter, suæque pestifera, & morifera dogmata emendare nolunt, sed defensare persistunt, hæretici fiunt.* Item docetur in Clem. vn. de S. Trinit. & Clem. vn. §. si quis, de usuris, & à S. Thom. quæst. 11. art. 2. ad 3. aliisque communiter: *qui etiam aiunt, pertinaciam in eo consistere,*

quod quis sciens, suam sententiam esse contra Ecclesiæ vniuersalis auctoritatem, ac definitionem, nihilominus eam teneat: idque culpabiliter. Sin verò aliquis ignoret, suam opinionem Ecclesiæ Catholicæ aduersari, quantum crassa sit ignorantia, & à peccato mortali aduersus Fidem non excuset: propriè tamen hæreticum non esse, neque Ecclesiasticis hæreticorum pœnis subiectum. Ita docet Turrecrem. libro 4. Sum. part. 2. cap. 13. Canus lib. 12. de locis, cap. 9. Castro lib. 1. de iusta hæretic. punit. cap. 9. Nau c. 11. num. 22. §. octauo, Azor t. 1. lib. 8. cap. 9. quæst. 7. Corduba lib. 1. quæstion. 17. §. 7. Sairus lib. 2. cap. 9. num. 34. P. Nau. lib. 2. de restit. cap. 4. num. 2. Rod. t. 1. cap. 130. conclus. 1. Sanchez libro 2. c. 7. num. 20. Vasq. 1.2. disp. 126. cap. 2. Becanus cap. 14. quæst. 2. num. 15. contra Sorum in 4. d. 22. quæst. 2. art. 3. post. §. conclus. Addunt Vasq. & Sanchez II. cc. etiam ignorantiam affectatam, ob discendi tardum, vel similem causam, ab hæresi excusare: secus si ideo quis res Fidei ab Ecclesia propositas ignorare affectet, quia proponentis auctoritatem minoris æstimat. Ratio tradita doctrinæ est: *Quia quamdiu aliquis erga Catholicam Ecclesiam rectè affectus est, agnoscens in ea infallibilem auctoritatem res Fidei proponendi, paratus ab ea corrigi: tamdiu non est pertinax, seu Ecclesiæ se opponens, aut ab ea se separans: Qui autem ex ignorantia crassa, vel etiam affectata, propter inquirendi tardum, &c. errorem aliquem contra Fidem tenet, cum statim derelicturus, si intelliget Catholicæ Ecclesiæ repugnantem esse, talis erga Ecclesiæ auctoritatem bene affectus est, consequenter non est pertinax, neque hæreticus. Secus, si ideo Fidei veritates ab Ecclesia propositas ignorare velit, aut inquirere prætermittat, quia auctoritatem Ecclesiæ minoris æstimat: ideoque minùs rectè erga eam affectus est.*

Verum hîc aduertendum est, Doctores suprâ citatos, cum dicunt, errantes contra Fidem ex ignorantia etiam crassa, aut affectata, hæreticos non esse, tantummodo loqui de ijs, qui Fidem Catholicam Romanam profitentur adeoque in ea infallibilem auctoritatem agnoscunt. Verum, si loquamur de his, qui alienam ab orthodoxa Ecclesia, puta Lutheri, Caluini, Zvinglij sectam profitentur, ex crassa, ut sepe fieri solet, ignorantia credulitatis tum aliorum Catholicorum dogmatum, tum etiam huius ipsius, quod est de infallibili auctoritate Ecclesiæ, discernentis credenda à non credendis: hos, inquam, hæreticos annumerandos, eorundemque censuris obligatos esse censeo. Nam quicumque veram Christi Ecclesiam, in cuius Fide baptizatus fuit, oppugnat, eius auctoritatem culpabiliter negans, is contra Ecclesiam inobediens, contumax, ac proinde ab ea separatus, & vno verbo, hæreticus censeri debet.

Corollarium I. *Omnes hæretici vniuersali Ecclesiæ, cuius caput Romanus Pontifex est, se opponunt, illiusque infallibilem in proponendis Fidei dogmatibus auctoritatem contumaciter negant. Si enim eam agnoscerent, aut ab Ecclesia corrigi parati essent, si fortè à veritate deflecterent, hæretici non forent.* Ita Gab. in 3. d. 25. q. vn. a. 2. corrol. 1. Ioan. Lopez tract. de hæresi, §. 4. n. 6.

Corollarium II. *Qui à secta Lutheri, Caluini, &c. quam professi sunt, recedere volunt, si examinati, inuincibili, vel saltem mortaliter non culpabili ignorantia laborasse videantur, post sufficientem instructionem, editam quoque, si id fieri possit, coram testibus Fidei professionem à locorum Parochis absolui possunt: Nisi quod aliquarum Ecclesiarum consuetudo exigat, ut tales etiam materiales hæretici ad eos mittantur, qui ab hæresi absoluedi potestatem habent: vel Episcopi, aut Vicarij eius examini atq; iudicio relinquuntur. Deniq; verò in absolutione horum hominū non oportet hac forma uti: Absolue ab excommunicatione, quam incurristi propter hæresin: tamen ad cautelam ita dici potest ab eo, qui potestatem habet: Absolue à vinculo excommunicationis, & speciatim ob hæresin.*



*si incurristi, in quantum possum, & indige.*

Nota autem, quod dixi de sufficiente instructione præmittenda: Ea enim omnino requiritur, antequam eiusmodi reuertentes (siue formales, siue materiales tantum sectarij fuerint) ad sacram Confessionem admittantur. Alioquin multi fidei accedent, ob timorem Magistratus, aliamve causam: ex quo multa incommoda orientur, quod multi inconstantes ac dubitantes in fide Catholica diuturno tempore permanebunt, vel apertè etiam ad pristinos errores reuertentur. Quare ante omnia Confessarius quærat ex eiusmodi conuersis, & primò ipsi confidentibus: Vtrum ex animo firma Fide credant ea, quæ Catholica Romana Ecclesia credenda proponit: & vtrum in hac Fide semper perseuerare & mori parati sint? Si affirmare nolint, vltèrius non procedat ad peccatorum narrationem faciendam: sed dimittat eos, denegato testimonio factæ Confessionis: ne si schedam testimonij accipiant, tanquam veri fideles habeantur, & ad sacram Eucharistiam admittantur. Neque enim hic periculum est violandi sigilli sacramentalis: cum enim tales homines veram Fidem Catholicam profiteri nolint, ideòque sacramentalem Sacerdotis absolutionem parui facientes: non ex animo expectant, illorum accessus Sacramentalis non est, sed ficticius & simulatus. Quæ omnia incommoda magna ex parte vitabuntur, si antea bene instructi, & catechizati, prius etiam Fidei professionem coram testibus facere compellantur, quam ad Sacramenta nostra admittantur.

**QVÆSTIO PRIMA.** Vtrum verè ac formaliter hæreticus sit, qui de articulo aliquo fidei, quem scit ab vniuersali Ecclesia propositum, aut definitum esse, deliberatè dubitat? Negat Canus lib. 12. de locis c. 9. Sanch. lib. 2. c. 7. n. 12. Ioan. Malderus in 2. 2. qu. 12. a. 1. mem. 2. Nam hæresis est error, adeòque assensus falsus contra Fidem, cum pertinacia iunctus. Dubitans autè nec assensum, nec dissensum habet: Ergo qui in Fide dubitat, hæreticus non est. Sed contraria sententia communis est: quam docent Caiet. 2. 2. q. 1. art. 2. Turrecrem. lib. 4. Sum. part. 2. capite 12. Sa ver. hæresis num. 1. Azor cit. lid 8. c. 9. quæst. 5. Tol. 1. 4. c. 4. Nā vt dicitur in c. 1. de hæreticis: *Dubius in Fide infidelis est*: & consequenter hæreticus, si homo baptizatus sit, & de articulo ab Ecclesia proposito dubitet. Ratio est: Quicumque aliquem Fidei orthodoxæ articulum, quem ab Ecclesia receptum & fidelibus propositum scit, incertum esse iudicat, is verè ac formaliter hæreticus est: sed quicūq; de eiusmodi Fide articulo deliberatè dubitat, is seu explicite iudicat eū incertū esse. Ergo verè & formaliter, seu implicite hæreticus est. Ex quo patet responsio ad fundamentum prioris sententiæ: Intellectum verè & propriè dubitantem non merè negatiuè se habere: quia ideo proposito sibi obiecto assensum negat, quod ipsi incertum appareat: ideòque seu expresse, seu implicite de eius incertitudine iudicat.

Excipiendi tamen hinc sunt ij, qui inter hæreticos nati & educati, orthodoxam Religionem ignorant: his enim dubitare interim licet, donec instruantur, & argumenta siue credibilitatem nostræ Fidei rectè apprehendant, sicuti supra dixi, & colligitur ex verbis S. Aug. cit. Ep. 162. & docet Valent. t. 3. dif. 1. q. 10. p. 4. Sanc. l. 2. c. 1. n. 8. Ratio huius exceptionis est, quia dubitatio, & virtuale iudicium de incertitudine, in talibus cum pertinacia iunctum non est. Porro simili modo docent Hent 1. 13. c. 17. nu. 3. lit. Z. Sanch. lib. 2. c. 7. num. 30. verè hæreticum esse, qui falso existimans aliquid ab Ecclesia definitum esse, contrarium pertinaciter defendit.

Id obiter hic annotare placuit, eximendum esse scriptulum ijs, qui de Fide Catholica dubitare se arbitrantur, eo quod hæreticæ aut blasphemæ cogitationes ipsis occurrere solent. Cum enim eas ferè detestentur, & nunquam in animam venire exoptent, insuper protestationē faciunt nunquam eis consensum præbituros, non possunt

culpe imputari: sed magis merendi apud Deum materiam præbent. Quare præstat plerumque tales cogitationes seu tentationes contemnere, tanquam inefficaces ad consensum impetrandum apud eos, qui Dei gratia muniti sunt. Verum in quibusdam hominibus eiusmodi tentationes à Deo permittuntur propter vitam eorum sceleratam, præsertim impuritatis vitium: quibus proinde suadendum, vt se corrigant, tum fidem eorum atque fiduciam in Deum constantiorem fore.

**QVÆSTIO SECUNDA.** Vtrum hæreticus sit, qui diuinæ reuelationi priuatim sibi factæ pertinaciter dissentit, habens sufficientia iudicia reuelationem à Deo esse? Aliqui negant apud Sanch. l. 2. c. 7. n. 13. Alij autem affirmant, ex quibus Vega super Trident. l. 9. c. 3. & Sanch. l. c. idque probant: Qui negat Fidei articulum ab Ecclesia omnibus propositum, is vere ac formaliter hæreticus est: qui autem reuelationi diuinæ priuatim sibi factæ pertinaciter dissentit, is, saltem virtualiter, negat præcipuum Fidei Catholicæ articulum, videlicet Deum in dicendo veracem esse. Confirmatur: Secundum communem doctrinam tres tantum sunt infidelitatis species, de quibus præced. c. dixi: Cum igitur talis homo, qui Fidem in Baptismo susceptam totaliter non abiicit, sed solum reuelationi à Deo specialiter factæ dissentit, infidelis sit, non apparet, quam aliam infidelitatis speciem incurrat, nisi hæresin.

Ad q. respondeo, & dico I. Talem verè ac formaliter infidelem esse. Ita omnes. Nam sicuti omnis ille, qui ob auctoritatem Dei reuelantis, tanquam vnicum formale credendi motiuum, reuelatam sibi propositionem prudenter ac piè credit, Fidei diuinæ actum elicit: ita huic formaliter oppositum actum infidelitatis exercet, quicumque reuelationi sibi à Deo factæ imprudenter ac pertinaciter dissentit.

Dico II. Talis infidelis essentialiter non differt ad hæretico. Hæc videtur esse mens Vegæ l. c. Azor t. 2. l. 8. c. 9. q. 4. Ratio est, quia reuelationem à Deo publicè, aut priuatim fieri non ad essentielles (vti Sotus arbitratus est li. 3. de natura & gratia, c. 11. in 3. argu.) sed ad accidentales tantum Fidei, & consequenter infidelitatis, differentias pertinere videtur.

Dico III. Si propriè & vlitatè loquendum, ita dissensionis reuelationi speciali nec hæreticus appellari, nec hæreticorū pœnis subiectus censeretur. Ita docet Cord. li. 1. q. 17. §. 1. du. 2. Nā hæresis est error contra Fidē Catholicā: siue hæreticus propriè dicitur, qui in sententijs siue dogmatibus Fidei ab Ecclesia contumaciter recedit. Ad fundamentū contrariæ sententiæ, quo nititur San. respondetur: Eū, qui dissentit reuelationi sibi à Deo obscure factæ ita, vt neq; rei reuelatæ, neq; ipsius reuelantis clarā & intuitiua notitiā habeat, non ideo negare Deū in reuelando veracem esse: (sic enim atheus omnino, & apostata esset, quippe ipsā formalem rationē, ac fundamentū fidei abiiciens) sed negare reuelationē sibi factā, verā, aut certā esse, quā tamē sufficientibus indicijs cognoscere posset à Deo profectā esse. Ad confirmationē verò respondetur: Ea rectè probari, eiusmodi infidelitatem ab hæresi essentialiter non differre: ideòque ad eandem speciem reducendam esse.

**QVÆSTIO TERTIA.** Vtrū hæreticus censendus sit, qui negat propositionē Theologicā, quæ ex vna propositione naturaliter nota, & altera de Fide, per euidentē illationē sequitur: Vt si aliquis agnoscat, quod Christus verus homo est, neget tamē, quod risibilis. Affirmat Canus l. 12. de locis c. 9. Valent. q. 1. p. 1. diff. 3. Talē saltē indiciū: Et & redactiue hæreticu esse. Sed nō placet hæc sententia: Quia vel agnoscit veritatem præmissarū, nec non illationis euidentē: & tūc impossibile est, vt conclusioni dissentiat. Vel non agnoscit propositionis, siue principij naturalis veritatem: videlicet? *Quod omnis homo necessario risibilis est*: aut si agnoscat, tamen ingenio tam habes, vt illationis necessitatem non percipiat: tunc hæreticus minime



mè cenferi debet: cùm non fit pertinax circa aliquã Fidei propositionem: sed paratus corrigi, si conclusionem ex Fidei articulis necessariò colligi intellexerit. Ita Bannes 2. 2. q. 11. a. 2. §. circa hoc. Corduba ci. q. 17. dub. 3. notab. 3. §. id etiam, Sanchez citatoc. 7. num. 33.

## CAP. XIV.

## De excommunicatione lata in hæreticos, eorumque credentes, fautores, &amp;c.

## S V M M A R I V M.

1. *Hæretici formales, si hæresin externo actu prodant, excommunicationem Papæ reservatam incurrunt.*
2. *Qui hæresin, quam animo conceptam gerit, in somno, vel ebrietate profert, excommunicationem propterea non contrahit.*
3. *Neque qui consilij, aut instructionis capiendæ causa hæresin suam alteri manifestat: cùm talis manifestatio mortaliter mala non sit.*
4. *Si hæreticus opere, vel omissione operis, spectatis circumstantiis suam hæresin sufficienter profertur censetur, excommunicationem incurrit.*
5. *Hæreticorum credentes, fautores, ac receptatores eandem excommunicationem Bullæ Cænæ Domini contrahunt. Fautores tamen, aut receptatores excommunicationem incurtere non videntur: nisi exinde malus effectus consequatur, videlicet si hæreticus iudicis manus euadat, hæresis eius magis diffundatur, &c.*

**A**SSERTIO I. Hæretici formales, qui hæresin animo conceptam externa voce, aliãve actione mortaliter mala asserunt, aut profitentur, excommunicationem incurrunt, Papæ hodie reservatam. Habetur in prima excommunicatione Bullæ cænæ Domini, quam explicat Nau. cap. 27. n. 55. Tol. lib. 1. c. 19. Suar. de censuris, dis. 21. f. 2. Sanchez lib. 2. moral. c. 9. Vivald. in explanat. Bullæ, casu. 1.

Circa quam assertionem nota: Quatuor condiciones requiri ad hanc excommunicationem incurrendam. Primò, Vt aliquis sit verus & formalis hæreticus: non materialis, & obiectivè tantùm, id est, qui propositionem Catholicæ doctrinæ aduersantem ex inuincibili ignorantia defendat: vel etiam vincibiliter, sed non pertinaciter quippe animo paratus illam deponere, cùm primum Catholicæ Ecclesiæ, cuius infallibilem auctoritatem agnoscit, aduersari intellexerit. Talis enim, sicuti verè hæreticus non est, ita neque excommunicatus, vt supra dictum.

Secundò requiritur; Vt aliquis hæresin animo conceptam exterius significet; Nam hæretici purè mentales, id est, qui hæresin nulla externa actione sufficienter significante exprimunt, excommunicati non sunt: quare à quouis exposito Confessario absolui possunt. Et nota, quod dico *sufficienter*: id enim omnino requiritur ad excommunicationem incurrendam, vt verba, aliãve signa vel suapte natura aut institutione, vel consideratis circumstantiis personarum, loci, temporis, &c. sufficienter manifestatiua sint internæ hæresis. Vide quæ dixi lib. 1. tr. 4. de legibus, c. 4. assert. 2.

Ex quo colligitur primò: Si quispiam, dum mente hanc hæresin fouet: *Christus non est verus Deus*, exterius talia verba proferat: *Non est verè Deus*: purè mentale hæreticum, & non excommunicatum censendum esse. Quia verba illa non sufficienter hæresin indicant, vt Ecclesia de ea cognoscere & iudicare possit: quandoquidè, qui talia verba profert, non exprimit de quo subiecto loquatur, nisi ex adiunctis colligi possit, sicuti notauit Castro lib. 2. de hæret. punit. c. 18. Vasq. tract. de benef. c. 4. num. 90. Sanchez libro 2. c. 8. num. 8. & 10. vbi addit,

idem eadem cautione dicendum esse, si quis hæresin mente assertam scribat caracteribus, qui à nemine, præter ipsum, intelligi possunt: ideòque, qui scripsit, ex tali Scriptura ab Ecclesia conuinci, aut iudicari nequeat.

Colligitur secundo: Si internus hæreticus exterius dicat, se hæresin Lutheri aliquando se datum esse: vel habere propositum amplectendi, non idcirco excommunicationem incurrere: quamvis iustè puniri possit. Ita docet Simanca de Cathol. instit. tit. 4. 2. nu. 9. & 10. Azor tom. 1. lib. 8. c. 10. quæst. 6. Sanchez cit. c. 8. num. 21 & 22. Sairus de censuris lib. 3. cap. 4. num. 31. Ratio est: Quia talis, vt ponimus, præsentem hæresin non indicat, aut profitetur: sed præteritam, aut propositum futuræ: quo cum consistere posset, vt, qui ita loquitur, veram tunc Fidem retineret, vt Sanchez cit. num. 22. notauit.

Colligitur tertio: Neque eum excommunicationem incurrere, qui hæresin, quam animo conceptam gerit, in somno vel ebrietate profert. Discrimen enim est inter homicidium & similia peccata, quæ opere externo consummantur: & hæresin, cuius malitia animo perficitur: Quòd qui in ebrietate hominem occidit, cùm sciret se rixari & verberare solitum, & ob id à vino temperandum sibi esse: irregularitatem, & excommunicationem incurtere possit: non item qui in ebrietate hæresin profert, licet sciuerit, se, cùm vino repletur, de Fide disputare, & hæreticas suas sententias effutire solitum esse. Ratio discriminis est: Quia hæresis in intellectu consistit & essentialiter perficitur: per verba autem exteriora tantùm manifestatur: Consequenter prolatio hæretici dogmatis non est peccatum externum hæresis, nisi ab interna intellectus hæresi procedat, & exprimat; At verò in ebrio non procedit ab hæresi mentali sed ex imaginatione & consuetudine. Homicidiū autem in externo opere consistit, ac perficitur: ideòque verum est peccatum externum homicidij, tametsi fiat ab ebrio, qui tunc nihil aduertit, siue intelligit: modò prius aduertit: cùm causam præbuit ob quam indirectè atque imputatiuè ipsi voluntariū cõfetur.

Tertio requiritur, vt actio externa per quã hæresis interna significatur & proditur, mortaliter mala sit, sicuti notauit Sa ver. hæresis, n. 2. Sanc. l. 2. c. 8. n. 7. Becanus c. 15. q. 1. n. 8. Quapropter excommunicatus non est, qui hæresin animo conceptam alteri manifestat consilij, vel instructionis capiendæ causa. Quia huiusmodi manifestatio non malus, sed bonus actus est, qui ab Ecclesia puniri non potest. Atque ita docet Simanca nu. 9. Azor qu. 5. Sanch. n. 20. Corduba l. 4. q. 13. circa 3. opin. §. tertio corollariè, contra Bannes q. 11. a. 2. du. 2. concl. 2. arg. 5.

Quarto requiritur, vt aliquis hæresin suam exterius manifestet animo eam asserendi, vel profitèdi, sicuti rectè notauit Azor ci. l. 8. c. 10. q. 7. Corduba loco supra citat. Sanch. n. 7. & 17. Ratio est: Quia dicta excommunicatio lata est propter externum hæresis peccatum: non est autem peccatum externum hæresis, nisi quod ad externa hæresi informatur, dum eam aliquis exterius asserere, asserere, vel profiteri intendit.

Ex quo resoluitur quæstio: Vtrum excommunicationem incurrat, qui Lutheri hæresin animo occultè fouens, idcirco à Missæ sacrificio, vel sacra Synaxi abstinet: aut coram venerabili Sacramento genu non flectit, caput non denudat? Respondeo ex doctrina Cai. 2. 2. q. 11. a. 4. Azor ca. 9. vlt. q. vlt. Sanch. n. 16. Tol. l. 1. c. 19. §. tertium est: Si attentis circumstantiis personæ, loci, temporis, &c. talis omisio cenferi possit virtualis professio sectæ hæreticæ, excommunicationem incurrit: Secus, si tales circumstantiæ adsint, vt huiusmodi omisio obliuioni, aut alteri iustæ excusationi probabiliter adscribi possit: licet re ipsa ex hæretico animo proficiatur. Ita intelligendus Azor. lo. ci.

Simili ratione resolui potest: Vtrum excommunicationem contrahat, qui lapsus in hæresin Lutheri, die ab



Ecclesia interdicto carnes comedit, quippe existimans huiusmodi interdictionem illegitimam, & Christianæ libertati repugnantem esse. Respondetur enim: Carnis comestionem in die interdicto, secundum se rem indifferentem esse, & non protestatuiam hereticæ fidei, sicuti dixi supra cap. 11. num. 5. attamen per circumstantias loci, temporis, &c. determinari posse ad hæreticæ sectæ professionem.

Limitat verò Sanchez num. 17. *Si quis motus hæresi in- zerna, qua putat licere esum carnum diebus prohibitis, tantil- lum carnum ederet, ut esus ratione paruitatis materia ve- nialis esset, non fore hæreticæ externæ, & excommunicationis*: Si- cuti neque excommunicationem incurrit Clerici percus- sor, si percussio legis & venialis tantum sit: esto mortalis existat sola relatione ad malignum effectum, seu propo- situm percipientis. Sed hæc limitatio non vniuersim & omni casu vera est: siquidem nihil prohibet tales circum- stantias concurrere, ut etiam exigua carnis comestio suf- ficiens sit protestatio hæresis, puta si hac expressa inten- tione inter alios cibos etiam carnis ferculum propona- tur, ut qui Lutherani sunt à Catholicis discernantur: nā casu occultus hereticus, si sine contraria protestatione vel modicum ex eo comedat, peccat quidem venialiter contra Ecclesiasticam legem, ex temperantiæ motiuo la- tam: at verò mortaliter delinquit, & excommunicationē in currit, quatenus hæresin suam sufficienter manifestat, ac profitetur. Quare discrimen advertere licet inter ex- ternum peccatum percussoris & peccatum exter- num heresis: quod illud in maligni propositi executio- ne: hoc verò in externæ animo completæ hæresis mani- festatione consistat, sicuti notauit Viualdus in explan. Bullæ, casu 1. num. 3. Quare sicuti excommunicationem incurrit, qui propositum percipiendi Clericum sufficiē- ter exequitur: ita etiam incurrit, qui hæresin animo con- summam sufficienter significat & profitetur: secus, si in- sufficienter, & imperfecte.

Secundo loco, in eadem Bulla cænæ Domini excom- municantur hæreticorum credentes, id est, qui hæresin im- plicitè profitentur, dicendo v.g. vera esse dogmata, quæ Lutherus, aut Calvinus contra Romanam Ecclesiam do- cuit, se pro ijs mori paratos: licet in particulari nesciant, quænam ea dogmata sint. Etsi verò huiusmodi credentes verè ac formaliter heretici sint; sicuti etiam Catholici censeri debent, qui Fidei articulos implicitè credunt, cre- dendo quicquid Ecclesia Catholica credit) tamen, ne quis de horum excommunicatione dubitare posset, corū etiam specifica mentio in Bulla facta est. Videri potest Palud. in 4. d. 13. quæst. 3. a. 1. Iac. Simanca de Cathol. in- sit. c. 15. num. 2. Nauar. c. 27. num. 55. Tol. lib. 1. c. 19. §. se- cundum genus. Suar. t. 5. dis. 21. sect. 2. n. 6. Sanc. l. 2. c. 10. n. 2. Sa. ver. hæresis, n. 11.

Tertio loco excommunicantur hæreticorum recepta- tores, fautores, & quilibet defensores, conuenienter c. sicut, 1. &c. excommunicamus, §. credentes, de hæreti- cis. Debent autem illa verba formaliter accipi, ut eos so- lum comprehendant, qui fauorem vel auxilium hæreti- copræbent, quatenus hæreticus est: siue, ut hæresin suam facilius docere, defendere, aut latius diffundere possit, si- cuti explicat Sotus in 4. dist. 22. quæst. 2. a. 3. post 5. con- clus. Nau. cit. num. 5. in fine, Suarez cit. sect. 2. nu. 8. Ro- driq. tom. 1. regul. qq. quæst. 30. a. 9. Quamuis ad hoc non requiratur formalis, atque directa intentio propagandi hæresin: sed sufficiat indirecta seu imputatiua: puta, si iu- dex, cum ipsi ex officio incumbit, non capiat, aut non puniat hæreticos, siue ex affectu amicitiae, aut consan- guinitatis erga illos, siue ex tædio laboris, &c. sicuti do- cet Syluest. verb. hæresis, 1. quæst. 7. §. fautores, Viualdus in explanat. Bullæ casu 1. num. 4. Castro lib. 1. de hæretic. punit. cap. 9. Item, si quis hæreticum, propter amicitiam vel consanguinitatem, recipiens in domum suam, causa sit, quo minus à Magistratu capiatur, & puniatur, sicuti

ex communi docet Syluest. ibid. Viualdus num. 7. Tol. ci. cap. 19. §. tertium est, Vgolin. de censuris Papæ referuatis, parte. 2. cap. 1. ver. receptatores, §. 1. num. 3. Iacob. Si- manca cit. c. 15. num. 20. Sairus in thesauro libro 3. cap. 5. numero 3. contra Caiet. ver. excommunicatio, capite 1. Sanchez libro 2. cap. 10. numero 5. qui requirunt in rece- ptatore, vel fautore hæretici, formale motiuum siue in- tentionem fauendi, aut promouendi hæresin, ut excom- municationem incurrat. Quo modo vix vlli essent hære- ticorum receptatores, vel auxiliares, nisi simul etiam hæretici: cuius contrarium communiter DD. docent. Accedit, re ipsa & in effectu aliquem tali receptione ad conseruandam, vel promouendam hæresin concurrere posse, ideò que verè ac propriè hæretici receptatorem es- se: quamuis id non faciat ex formali seu directa intentio- ne. Confirmatur ex l. 2. ff. de Receptor. vbi dicitur: Re- ceptatorem latronis, causâ affinitatis, vel consanguini- tatis, puniendum esse, tametsi mitius: ex quo colligitur, huiusmodi verè ac propriè inter receptatores numeran- dos esse. Quod verò ibi dicitur de pœna mitiganda, id ad Ecclesiasticam excommunicationem, simpliciter in hæ- reticorum receptatores latam, transferri non debet: præ- terquam quod aliqui valde probabiliter docent: Rece- ptatorem personæ coniunctissimæ, puta patris, filij, vxor- is, vel etiam fratris, ne in manus Inquisitorum v.g. deue- niat: licet aliquando peccet, excommunicationem tamē non contrahere. Quia persona tam coniuncta alicui, qua- si eadem cum ipso reputatur, quam non defendere valde difficile sit. Ita Simanca numero 21. Viualdus numero 8. §. ex quibus, Azor tom. 1. libro 8. capite 15. quæst. 4.

Id verò magis probabiliter dicit Sanchez cit. c. 10. nu- mero 9. Censuram excommunicationis non incurri ab hæretici receptatore, auxiliatore, defensore, nisi malus effectus sequatur: ut videlicet hæreticus, ob tale ipsi au- xilium præstitum, manus Iudicis euadat, aut hæresin ma- gis diffundat. Cum enim in Canonibus Ecclesiasticis fa- ciens alicuius rei principaliter excommunicatur: accesso- riè autem mandans consulens, aut fauens: tunc hi excom- municationem non contrahunt, nisi secuto effectu, secundum receptam DD. sententiam; Atqui hac prima Bullæ ex- communicatione principaliter excommunicantur hære- tici; accessoriè verò, & secundum quandam extensionem ipsorum receptatores, fautores, & defensores, vti etiam Suarez docuit cit. sect. 2. num. 8. Ergo isti non incurrunt excommunicationem, nisi ex fauore siue auxilio malus effectus sequatur. Licet contraria sententia probabilior visa sit Sairo ci. l. 3. c. 5. n. 4. §. dubium autem est, Grassis p. 1. decisi. l. 4. c. 18. n. 14.

## CAP. XV.

De excommunicatione Bullæ lata in eos, qui libros hæreticorum le- gunt, &c.

## S V M M A R I V M.

- 1 Excommunicationem Bullæ incurrit, qui librum hæreticis legi- de Religione tractantem.
- 2 Libro Catholicorum, quibus scholia quadam hæreticorum inser- ta sunt, hac censura non comprehenduntur.
- 3 Quisnam hæretici epistolam, vel canticum de Religionis ma- teria scriptam scienter legit, videtur excommunicatus, licet aliqui negent.
- 4 Libri hæreticorum historici, poetici iuridici, medici, etsi obiter hæresin permixtam habeant, his regionibus non prohibentur.
- 5 Paruitas materia, puta si quis paucos versus in libro hæretico le- gat, a censura excusat.
- 6 Qui alteri, & famulo suo librum hæreticum legendum tradit, ut ex illius ore audiat, excommunicationem Bullæ incur- rit.



- 7 Qui librum hæreticum retinent, imprimunt, aut quomodolibet defendunt, simili excommunicatione ligantur.  
 8 Index librorum prohibitorum duas classes continet.  
 9 Hæreticorum libros comburendi antiquissimus mos est in Ecclesia Catholica.

1 **A**sertio. Excommunicationem Sum. Pontifici reservatam incurrunt, qui hæretici librum hæresin continentem, vel de Religione tractantem, sine Apostolicæ Sedis auctoritate, scienter legunt, retinent, imprimunt, vel quomodolibet defendunt. Ita habetur in prima excommunicatione Bullæ cœnæ Domini: unde colligitur, quatuor condiciones requiri, vt excommunicatio ex hoc capite contrahatur: I. Vt liber ab hæretico scriptus sit, siue vno ex recentioribus, siue ex veteribus ab Ecclesia damnatis: nisi quod scripta Tertulliani & Origenis, licet errores contra Fidem contineant, propter eruditionem, & quia nullum iam ab illis periculum in Fide timetur, ab Ecclesia permittuntur. Qua de re vide Azor lib. 8. c. 16. q. 16. Deinde nihil refert, vtrum liber sit typis excusus necne; dummodo ab hæretico scriptus. Non autem excommunicatio incurritur, si quis hæreses Scriptoris hæretici in libro Auctoris Catholici ad verbum insertas, quamuis praua intentione hæresin discendi, legat, sicuti ex communi docet Nau. c. 27. n. 56. Sanch. lib. 2. c. 10. n. 23. Sairus cit. c. 5. n. 13. Azor cit. lib. 8. c. 16. q. 2. Quia lege canonica non punitur affectus, sed factum legentis librum hæretici: iste autem non legit librum hæretici.

2 Idemque dicendum, si in Catholici Scriptoris libro, vel quouis alio, hac Bullæ excommunicatione non comprehenso, legas adiecta scholia, seu annotationes Auctoris hæretici: Quia talis liber non censetur esse commentantis hæretici: sed Catholici, à quo scriptus est. Ita ex communi Nau. l. c. Graffis p. 1. decisionum, lib. 4. c. 18. n. 43. Sanchez n. 25. Suarez to. 5. disp. 21. s. 2. n. 11. qui tamen non improbabiler limitat: *Nisi tales, vel tam copiose essent commentarii, vt iam censeretur liber potius ex eis, quam ex textu constare.* Denique, licet in libro Catholici Scriptoris, vel qui publicè Catholicus existimatur, manifestæ hæreses contineantur: tamen excommunicatione hanc non incurrer, qui illum legit, aut imprimit, teste Vgolino, & Graffis ll. cc. Sanch. n. 24.

Sed dubium est: vtrum excommunicationem Bullæ contrahat, qui epistolam ab hæretico de causa, Religionis scriptam, vel hereses continentem scienter legit, imprimit, retinet? Ita affirmat Vgol. de casibus Papæ reservatis, p. 2. ver. ac eorundem libros, in princ. num. 2.

3 Quia Bulla idcirco mentionem facere libri videtur, quia hæreses frequentius libris comprehendit, ac propagari solent: cum autem legislator vnus ex pluribus mentionem facit propter frequentiore eius vsum, non ideo alia exclusisse putandus est: sed speciem præcipuam pro genere posuisse, quæ sententia valde verisimilis est: licet contrariū doceat Sanch. cit. c. 10. n. 29. Non incurrere excommunicationem, qui vnâ hæretici hominis epistolam, aut concionem in formam tractatus non redactam legit, vel imprimit: tum quia hæc nomine libri propriè & visitatè comprehendit non solent; verba autem legis pœnalis strictè ac propriè accipienda sunt: tum quia ratio disparitatis afferri potest, quod tractatus siue liber latius diffundi, ac diutius conservari soleat, quam vna sola epistola.

Altera conditio est: Vt liber vel hæresin in se contineat, vel de Religione tractet, puta sacram Scripturam interpretando, Theologicas quaestiones decidendo, de cultu Dei & Sanctorum, statu Clericorum vel Monachorum disputando. Circa quam conditionem duo extra controuersiam esse debent: Primum, Non esse prohibitos hæreticorum libros philosophicos, medicos, iuridicos, historicos, poeticos, si nullam hæresin contineant. Alterum Prohibitos esse hæreticorum libros, qui ex professo de Religione tractant; etsi certum sit, nullum errorem con-

tra Fidem orthodoxam in ijs contineri.

Sed dubium est de illis hæreticorum libris, quibus ex instituto non de Religione tractantibus obiter aliqua hæresis inserta est, vtrum hac Bullæ censura comprehendantur? Negant Sairus cit. c. 5. n. 12. Graffis n. 40. & 42. Contrarium verò docent Suar. p. 3. t. 5. disp. 21. s. 2. n. 10. Sanchez cit. c. 10. n. 34. quorum sententia verbis Bullæ conformior est: siquidem in ea diserte distinguitur: si aut liber hæresin contineat, aut de Religione tractet. In alternatiuis autem sufficit alterutrum verificari. Veruntamen in partibus nostris Septentrionalibus Bullaris hæc constitutio secundum talem rigorem recepta non est. Multi enim frequenter prodeunt hæreticorum libri iuridici, medici, historici, quibus plerumque reperias vnâ vel plures hæreses obiter admixtas: & tamen passim in Catholicorum bibliothecis asseruantur, leguntur. Dummodo hinc excipias eorum hæreticorum historias, v.g. Ioannis Auentini, Ioan. Sleidani, Sebast. Münsteri, quibus satis apparet præcipuum institutū fuisse, Romanam Ecclesiâ, Clericorum & Monachorum statum conuellere ac denigrare: quorum proinde nomina in indice librorum prohibitorum diserte posita sunt. Quamobrem horum etiâ historicorum libri in diœcesi hac meritò prohibentur. De alijs verò præsertim remotioribus diœcesibus non satis mihi constat. Ait autem Mert. Becan. 2. 2. c. 15. q. 8. v. 5. *Vbi Bulla Cœnæ Domini, vel index librorum prohibitorum receptus non est, Catholicos in Germania non excommunicari, qui legunt libros hæreticos.*

Præterea, licet in Regula VIII. Indicis librorum prohibitorum præcipiatur, vt libri, quorum principale argumentum bonū est, in quibus tamen obiter aliqua inserta sunt, quæ ad hæresin, seu impietatem, diuinationem, seu superstitionem spectant, à Catholicis Theologis Inquisitionis generalis auctoritate expurgentur: quia tamē in Germania nostra Inquisitores non sunt, ideo hoc præceptum in obseruationem non deducitur: quamuis consultum sit obseruare, & eiusmodi libros viris Theologis expurgandos tradere.

Tertia conditio est: Vt aliquis eiusmodi librum scienter legat, imprimat, &c. Quare ab ista censura immunes sunt, qui ignorant, quamuis crassa ignorantia, librum hæretici esse, aut de Religione tractare. Nam quotiescunque lex pœnalis scientiam requirit, excusat ignorantia, etiam crassa, Qua de re videri potest Sanchez lib. 2. moral. c. 10. n. 38. & lib. 9. de matrim. disp. 32. n. 36. & 39. Porro hand requiritur ad censuram hanc praua legentis intentio, seu affectus hæresin concipiendi: sed sufficit etiam sola curiositas.

Quarta conditio est: Vt id, quod legitur, materia notabilis sit, atque sufficiens ad peccatum mortale, sicuti præter alios docet Azor cap. 16. q. 3. Sairus cit. c. 5. n. 12. Sanchez lib. 2. cap. 10. n. 31. Cum enim in alijs rebus paruitas materiæ à mortali excuset: cur non item in hac præsertim cum hæc lex Ecclesiastica sit, grauissimam excommunicationis pœnam inferens. Quare audiendus non est. Toletus, cum ait n. 4. etiam vnâ vel alteram lineam sufficere ad excommunicationis censuram: eò quod perfecta hæresis etiam vnico versu contineri possit. Sed respondetur: In lege, præsertim pœnali, spectari id, quod plerumque, non quod raro vñ venit: plerumque autem non imminet graue periculum ex tam modica hæretici libri lectione. Quare Sanch. post Viualdum in explan. Bullæ Cœnæ, casu 1. n. 11. Rodriq. addit. ad Bullam cruciatæ, §. 6. n. 68. Sa veteris edition. ver. excommunicationis Bullæ, num. 2. ausi sunt dicere: vnâ paginam, tamen si liber sit ex maioribus voluminibus, non esse sufficientem materiam contrahendæ excommunicationis. Quæ nimis magna quidem Bullaris excommunicationis limitatio esse videtur: Nihilominus inferuire poterit hæc sententia Confessario, vt secundum eam interdum presumere possit, legentem bono aliquo fine: vel etiam ex curio-



sitate, vnam solam paginam non peccasse mortaliter, ideoque Bullæ excommunicationem haud incurrisse, sicuti Sairus loc. cit. notauit. Vt taceam casum accidere posse, quo aliquis vir prudens ac doctus in Germania nihil peccabit, si locum aliquem contradictionis in hæretico auctore quærat, certò sperans, eo exhibito, alterum ad Fidem Catholicam se perducturum esse: tunc enim lex naturalis charitatis erga proximum vincere debet legem Ecclesiasticam. Quam causam esse arbitror, cur in aliquibus prouincijs lectio librorum hæreticorum non tanta seueritate prohibita censeatur, vt suprà ex Becano audiuius: quia ad confines hæreticos conuincendos necessarium putatur, eorum libros legisse.

Denique rectè monent Vgol. cit. num. 1. Sanch. cit. c. 10. num. 30. Incurri excommunicationem, etsi quis proæmium duntaxat, vel epistolam ad Lectorem, vel annexum Indicem, sufficiente quantitate legat. Sunt enim hæ partes libri: & proæmium quidem, atque epistola ad Lectorem, mentem Auctoris, eaque, quæ in toto libro tractanda sunt, explanant, index verò summam rerum in libro contentarum complectitur.

Sed controuersia est inter Doctores, an excommunicationem incurrat, qui librum hæretici non ipsemet legit: sed alteri legendum tradit, mandat. Negant Sanch. num. 48. Vgolin. §. 1. num. 4. Quia censura lata contra facientes non comprehendit mandantes, nisi exprimantur: cum lex pœnalis strictè interpretanda sit. Sed placet magis sententia Azorij c. 16. q. 4. Sairi n. 14. Grassis num. 45. quæ in duabus assertionibus consistit: Prima est contra Sanchez: Qui famulo v.g. librum hæreticum legendum tradit, vt ex eius ore audiat, excommunicationem Bullæ incurrit. Quia talis, moraliter rem æstimando, librum legit, quamuis per alterius ministerium: Quod enim quis per alium facit, perinde est, ac si ipsemet faciat. Neque dubito mentem SS. Pontificum esse, vt etiam talis comprehendatur: nam alioquin cuilibet in fraudem legis agere, & excommunicationem effugere perquam facile esset. Non est autem ad strictam verborum interpretationem confugiendum, cum de mente legislatoris rationabiliter dubitari non potest. Quare in hoc casu tum legens (modo intelligat, quæ legit) tum is cui legitur, non item alij auscultantes excommunicationem contrahent, sicuti Azor notauit. Ad fundamentum Sanch. respondetur, quòd talis, qui legentem sibi audit, non incurrat excommunicationem tanquam mandans, sed tanquam legens, moraliter rem æstimando, vt dixi.

Secunda. Qui alteri librum hæreticorum tradit, vel eius lectionem suadet, mandat, non vt ipsi auscultet, & quasi per ipsum legat, excommunicationem non incurrit. Ratio est, quam Sanchez suprà attulit; Quia censura lata in facientes non censetur comprehendere suadentes, ac mandantes, nisi exprimantur. Verum, si ex eiusmodi suasionem, vel mandato malignus effectus hæresis sequeretur, tunc excommunicatio contraheretur, quatenus ea in hæreticorum fautores decreta est.

7 Vltèrius, quod attinet ad retinentes librorum hæreticorum, quædam addenda sunt: I. Nihil referre, & vtrum quis in sua, an aliena domo: item num suo, an alieno nomine: denique vtrum causa legendi, necne, talem librum retineat, siue afferuet. quia Pontifex simpliciter prohibet libros afferuari, volens eos penitus exterminari. Ita ex communi Grassis. n. 48. Sanch. n. 52. Sairus n. 16. Vgol. ver. aut retinentes, vbi monet cauendum esse bibliopolis ac bibliopægis, ne retinendo libros hæreticos ad vendendum, vel compingendum excommunicationem contrahant. II. Requirit temporis spatium notabile, quo aliquis librum hæreticum retineat. Non. n. incurrit excommunicationem, qui breui tempore retinet, tametsi in eo occasionem habuerit tradendi Inquisitori, aut Theologo, adeoque non sine aliqua negligentia, sed non mortali, librum interim retinuerit. Ita Sanch. n. 55. III. Si quis etiã

longiore tempore librum apud se retineat, donec opportunum tempus tradendi offeratur, excommunicationem non incurrit, neque peccabit, si scandalum absit. Ita Grassis n. 47. Sairus n. 16. Sanch. cit. n. 55.

Quod attinet ad *Imprimentes*, sciendum est, hoc nomine omnes comprehendendi, qui ad libri impressionem propinquè cooperantur: Videl. Qui librum imprimendum tradit, Typographus qui suscipit, qui typos ordinat, denique qui imprimunt. Ita Sanch. n. 57. Sairus n. 17. Grassis. n. 50. Vgol. ver. imprimentes.

Denique quod attinet ad *quomodolibet defendentes*, eo nomine comprehenduntur ijs, qui librum hæretici, quatenus hæretici opus est, commendant, sicuti explicat Tol. cit. c. 19. n. 9. Sair. n. 17. Sanch. n. 58. Vgol. ver. quomodolibet defendentes. Atque hæc dicta sufficiant de prima excommunicatione Bullæ Cœnæ.

8 Quibus ad extremum subiiciam annotanda quædam ex Indice librorum prohibitorum auctoritate Pij IV. Sixti V. & Clementis VIII. edito. I. Duplicem esse librorum prohibitorum classem: In prima ponuntur auctores omnes hæretici, vel de hæresi publicè suspecti: quorum omnes libri de Religione tractantes, vel hæresin continentes, tum editi, tum impostèrum edendi prohibentur. Additur verò in regula 1. Hæresiarcharum, id est, qui hæreticorum Capita, aut Duces sunt, omnes omnino libros, cuiuscunque nominis, tituli, vel argumenti sint, penitus interdictos esse. De quo tamen parùm solliciti esse debemus: cum vix aliquis liber extet ab Hæresiarcha nostri temporis scriptus, nisi de materia Religionis. Ad alteram verò classem pertinent libri, qui doctrinam non sanam, suspectam, vel moribus fidelium repugnantem continere iudicantur; tametsi à Catholicis Auctoribus prodierunt.

Inter has duas librorum classes, duo discrimina sunt: Primum. Quòd primæ classis prohibitio sit propter Auctores hæreticos, quorum proinde omnes libri scripti de materia Religionis prohibentur; tametsi eorum aliqui fortasse nullum manifestum errorem contineant. Quia damnato auctore in certo genere, puta Religionis, damnata censentur omnia eius scripta de Religione, arg. c. fraternitatis, de hæreticis, vbi hanc regulam Abb. tradit. Alterius autem classis prohibitio est propter errores, siue doctrinas falsas, quæ in quibusdam libris etiam Catholicorum auctorum, deprehensæ fuerunt: cuiusmodi tamen libri non antè prohibiti censentur, quàm speciatim in Indicem relati fuerunt. Alterum discrimen est. Quòd libri primæ classis prohibentur sub excommunicatione Papæ reservata, per Bullam Cœnæ Domini: Libri autem secundæ classis sub excommunicatione non reservata. Quamuis, quod attinet ad prohibitionem librorum secundæ classis, Index Romanus apud nos in Germania receptus non sit: quia nemo est, qui in obseruationem cum auctoritate deducat.

II. Libri cuiuscunque Auctoris, res obscenas, seu lasciuas ex professo tractantes, penitus prohibentur regula 7. indicis: ijs exceptis, qui ab Ethnicis, v. g. Poëtis, conscripti sunt, atque ob sermonis elegantiam, ac proprietatem permittuntur: sed pueris prælegendi non sunt, nisi expurgati.

III. Libri omnes & scripta magica planè reijciuntur, reg. 8. indicis. Verum, ob lectionem librorum magicorum, sicuti & obscenorum, vel similibum, excommunicationis censura non contrahitur; sed solum peccatum mortale, si materiæ grauitas adsit. Vide regulam 10. in fine.

IV. Regula quarta Indicis prohibetur, ne fideles sacra biblia vulgari idiomate, sine Episcopi aut inquisitoris licentia, legant, aut habeant. Quæ tamen prohibitio his nostris regionibus recepta non est. Non puniuntur, inquit Nicol. Serarius in prolegom. bibliac. c. 20. q. 3. sed laudantur, qui in Germania nostra: nulla diserte perita facultate, biblia



*Biblia Vulgata & vernacula Ecceij, vel Dietemburgij legunt.* Versio autem Germanica Lutheri, & aliorum hæreticorum prorsus interdicta est: imò etiam versiones hæreticorum Latinæ, præsertim noui testamenti, cuiusmodi sunt Sebastiani Munsteri, Oecolampadij, Tigurina Leonis Iudæ, Vatabli nomine inscripta, Castalionis Basileæ inscripta, Tremelli Genevæ edita, &c.

Ad extremum annotare libet: Immeritò conqueri de nobis huius temporis hæreticos, quòd eorum libros populo prohibeamus, quin & igni tradamus. Cùm id in antiqua etiam Ecclesia vstitutissimū fuerit, vti testatur Clemens lib. 1. Apost. Constitut. c. 7. Alexander Episc. Alexandrinus in epist. ad Alexandrum Episc. Constantinopolitanum, apud Theodor. lib. 1. hist. c. 4. & to. 1. Concil. Senerini Bini fol. 281. Constantinus Imperator in Epistola ad Episcopos, & populum, apud Socratem lib. 1. histor. c. 6. Porphyrij *impia scripta deleta penitus, & extincta fuisse: atque similiter vsum, si quid opus ab Ario conscriptum reperitur, illud cremandum esse.* Et addit pœnam: *Vt si quis librum ab Ario compositum occultasse deprehensus fuerit, & eum non statim in medium adductum igne combusserit, morte mulctetur.* Fuerat autem hoc de Arii libris igne absumendis decretum in Concil. Nicæno apud Niceph. lib. 8. histor. c. 18. Atque olim in more positum fuisse, vt si hæreticus ad Fidem Catholicam rediret, libros à se hæreticè scriptos comburendos traderet, colligitur ex Socrate lib. 1. cap. 24.

Theodosius quoque & Valentinianus Impp. in l. 3. Cod. de S. Trinit. iubemus, *facta huiusmodi scripta (quæ Nicænæ & Ephesinæ Synodis non conueniunt) potissimū, autem, quæ Notorii sunt, comburi, & perfectissimo interitui mancipari: ita vt in nullius cognitionem venire possint. his, qui talia scripta, aut tales libros habere, aut legere sustinuerint, vltimum supplicium experturis, de cætero nulli patente licentia.* Idemque Impp. in epist. ad Leontium, l. vlt. de hæreticis, Cod. Theodof. *Nec impios libros nefands sacrilegij Nestorij aduersus venerabilem orthodoxorum sectam, decretaque sanctissime cœtus Anstistitum Ephesi habere scriptos, aut legere, aut describere quisquam audeat. Quos diligentis studio requiri, & publicè comburi decernimus.*

Verumtamen tempore necessitatis permissum fuit Episcopis, vt hæreticorum libros legerent, ad eorum errores refutandos: vti constat ex Concil. Carthag. IV. can. 16. & Hormisdæ Papa in epist. 56. ad Possessorem Episcopū Eodemque modo intelligenda, quæ de Dionysio Alexandrino Episcopo, libros hæreticos legente, scribit Euseb. lib. 7. histor. c. 6.

Denique fuisse antiquissimam consuetudinem libros vanos, aut noxios publicè comburendi, testis est S. Lucas Act. 19. *Multi ex eis, qui fuerant aut curiosa sectari, contulerunt libros, & combusserunt coram omnibus.* Fuerunt enim hi libri magici, quos igni tradendos esse, legimus apud Vlpiani. l. 4. §. tantundem, ff. famil. hercisc. & plura videre potes apud Baron. Anno 56. n. 40. & Anno 302. n. 20. vbi ex Arnobio refert: Christum & eius sectatores, ob miracula, quæ faciebant, à Gentilibus magos existimatos esse; ideòque iussu, vt libri eorum igne cremarentur; & qui eos detinerent, vltimo supplicio afficerentur. Hinc traditores sacrorum librorum dicti, qui cruciatuum metu, eos Magistratui tradebant. Quamuis multi etiam eos occultabant, vti in Romano Martyrol. 2. Ianuar. legitur: *Roma commemoratio plurimorum SS. Martyrum, qui spreto Diocletiani Imperat. edicto, quo traditi sacri codices subebantur potius corpora Carnificibus, quàm sancta dare canibus maluerunt.*

## CAP. XVI.

De Apostatis, eorumque, hæreticorum pœnis.

## SUMMARIUM.

1. Triplex est apostasia: à Fide, ab obedientia, ab ordine sacro & religione.
2. Apostasia à Fide differt ab hæresi, sicuti maius à minore, extensus à minus extenso.
3. Pœna Apostatis decreta etiam ab hæreticis contrahuntur: sed non vice versa.
4. Pœna variæ hæreticos iure canonico decreta reperitur.

**T**riplex est Apostasia: secundum S. Th. 2. 2. q. 12. a. 1. Gl. in c. 7. de Apostatis. Prima est à Fide, altera ab obedientia, tertia ab ordine sacro, vel Religione. Apostasia à Religione est criminosa & mortifera recessio à religioso Ordinis instituto, sine reuertendi proposito. Ita Caiet. super cit. art. 1. Rodriq. to. 1. regul. qq. q. 30. a. 1. Dicitur criminosa & mortifera: nam apostata non est, qui cum licentia Prælati egreditur, vel Ordinis obseruantia liberatur; aut secundum canones ad Episcopalem dignitatem transfertur, iuxta Clem. 1. de elect. A religioso Ordinis instituto: quod intelligi debet vniuersim siue ab omni instituto: Enimvero qui ab Ordine, quem professus est, sine licentia Prælati, ad alium laxiorem religionis Ordinem transit, quamuis peccet, & excommunicationem incurrat extrauag. 1. de Regular. atque ad priorem Ordinem redire debeat: c. intelleximus, de ætat. & qualit. tamen apostata non est, sicuti notauit. Gl. in c. vlt. de apost. ibid. Abb. in fine Caiet. in cit. a. 1. §. In eodem. Syl. ver. Apostata, q. 4. Rodriq. cit. q. 30. Sanchez lib. 6. mor. c. 8. Sine reuelandi proposito. Si enim reuertendi animum retineat, vagaturus ad tempus, fugitiuus censendus est, atque etiam excommunicatus, si habitum penitus abiecit, c. 2. Ne Clerici, vel Monachi in 6. & videri potest Abb. in c. Deus qui, de vita & honestate Cleric. n. 4. non item propriè apostata, sicuti notauit Caiet. cit. a. 1. Lud. Miranda in man. Prælat. t. 1. q. 11. n. 1. concl. 1. Syl. cit. q. 4.

Porrò ad apostasiæ crimen hoc nihil refert, vtrum quis habitum religiosum abiciat necne, teste Caiet. & Miranda ll. cc. Valent. to. 3. disp. 1. q. 12. p. 1. Quare, si quis Religiosus sine Prælati legitima facultate, & absque reuertendi proposito, in seculo vegetetur, habitum religiosum retinens, verus apostata censetur; ita, vt qui eum recipit, occultat, aut defendit, excommunicationem latæ sententiæ incurrat, iuxta priuilegia Ordinum Regular. de quibus Miranda c. 2. & videri potest Sanchez lib. 6. moral. cap. 8. q. 3.

Apostasia à sacro ordine est: Cùm quis à perfectiore statu clericali, quem in manu Episcopi, edito etiam continentie voto, assumpserat, ad statum coniugij, vel laicæ conuersationis, dimisso suo habitu, propria temeritate se transfert, c. vlt. de vita & honestate Clericorum. Talis ipso iure infamis est, c. beatus, 3. q. 4. Et, si monitus se non correxerit, deponendus, c. præcipimus, 21. q. 4. & docet Syl. q. 8. Porrò qui minoribus tantum ordinibus initiati sunt, liberam ad nuptias, vel statum laicorum transcendendi facultatem habent: dummodo, si quæ obtinent Ecclesiastica beneficia, derelinquent, sicuti colligitur ex c. Ioannes, de cleric. coniugatis. Vide Caiet. ver. Apostasia.

Apostasia ab obedientia, si latè accipiat, in omni peccato mortali reperitur, teste S. Th. cit. a. 1. Syl. n. 3. Strictius verò, cùm quis iustis præceptis Prælatorum suorum se opponit, obedire penitus recusans: cuius præcipua species est schisma, de quo infra tra. 3. c. 11.

Apostasia à Fide, (quæ omnium grauissima) dupliciter considerari potest: Primò, secundum ordinem ad terminum à quo; quatenus est discessus à vera Fide: Et sic differt ad hæresi tanquam maius à minore, extensus à minus extenso. Nam apostata dicitur, qui Christum & Fidem Christianam, quam suscepit, penitus abnegat, hæreticus verò non omnino, sed secundum vnum aut aliquos



articulos. Quamobrem omnes pœnæ, quæ in iure hæreticis decretæ reperiuntur, etiam ab apostatis contrahuntur non autem vice versa, sicuti docent Canonistæ in c. 1. de Apostat. Syl. ver. Apostasia, n. 2. Caiet. eod. ver. Azor t. 1. lib. 8. c. 2. q. 7. Valent. to. 3. disp. 1. q. 12. p. 1. Sanchez lib. 2. moral. c. 7. n. 8. qui rectè monet. n. præced. licet peccatum Apostasiæ videatur non specificè, sed tantùm accidentaliter differre ab hæresi; tamen hanc circumstantiam, siue qualitatem in sacra Confessione necessariò explicandam esse, cui consentiunt ea, quæ dixi lib. 1. tract. 2. c. 10. num. 3.

Secundò considerari potest apostasia secundùm ordinem ad terminum ad quem, quæ ratione spectat vel ad Iudaismum, vel Paganismum, vel Atheismum: quæ specie differentes infidelitates sunt; ideò que haud dubiè à redeuntibus ad Ecclesiam in sacramentali Confessione explicantur.

Pœnæ apostatis, & hæreticis canonico iure decretæ sunt hæ. I. est excommunicatio maior, quæ habetur in c. ad abolendam, c. excommunicamus 1. de hæreticis, c. quicumque, eod. in 6. Eaque nunc Summo Pontifici reservatur in Bulla Cœnæ Domini, ut supra dictum fuit. Vide Sanchez lib. 2. moral. cap. 9.

II. Pœna est irregularitas, sicuti colligitur ex c. saluberrimum, c. conuenientibus, 1. q. 7. Quæ de re vide quæ dixi lib. 1. tract. 5. de censuris p. 5. c. 4. n. 12.

III. Pœna est iuris infamia, sicuti colligitur ex c. 2. §. hæretici, & c. vt commissi, §. priuandi, de hæreticis in 6. Quæ pœna extenditur ad eorum filios vsque ad secundam generationem ex linea paterna: & vsque ad primam ex linea materna, c. statutum, 15. eod. in 6. Item ad hæreticorum fautores, cit. §. hæretici. Vide Azor t. 1. lib. 8. cap. 13. §. pœna septima. Sanchez lib. 2. c. 26. n. 1. qui putant, ad hanc pœnam requiri Iudicis sententiam, saltem declaratoriam criminis.

IV. Confiscatio omnium bonorum à die commissi criminis, c. cum secundum, de hæreticis in 6. Bona hæreticorum ipso iure decernimus confiscata. Quæ de re Syl. ver. hæresis, 1. n. 14. Sanch. lib. 2. moral. cap. 4. & seqq. Iac. Simanca de Cathol. instit. tit. 9. n. 7. Valsq. 1. 2. disp. 169. Azor. tom. 1. lib. 5. cap. 7. quæst. 8. Valent. quæst. 11. p. 3. Becanus c. 15. q. 5.

V. Hæretici, eorumque fautores, si per annum excommunicatione persistant, fiunt intestabiles: vt neque testandi liberam facultatem habeant, neque ad hæreditatis successionem admittantur, sicuti habetur in c. excommunicamus, §. credentes, de hæreticis. Cuiusmodi etiam pœna percussori Cardinalis S. Ecclesiæ Romanæ decreta est in c. felix, de pœnis in 6. Requiritur tamen sententia criminis declaratoria: ante quam, si testamentum ab hæretico factum fuerat, valet: licet superueniente postea sententia infirmetur: ad eum modum, sicuti etiam donationes, & aliæ alienationes factæ ab hæreticis, & similibus criminosis, quorum bona ipso iure confiscationi subiaccēt ante condemnationem de hæresi valent, licet postea rescindantur ac reuocentur. Ita Sanchez lib. 2. moral. c. 24. n. 3. Becanus cit. q. 5. & c. 16. q. 2. concl. 3. Mol. to. 1. tr. 2. de iust. disp. 95. licet contrarium sentiat Couar. Clem. si furiosus, p. 1. §. 1. n. 6. vbi tanquam probabilius defendit; Sodomitam, cum infamis sit, & omnium bonorum domino priuatus, etiam ante condemnationem testari non posse.

VI. Est priuatio patriæ potestatis in liberos, etiam ante sententiam Iudici declaratoriam criminis, iuxta c. 2. §. vlt. de hæret. in 6. iun. Glos. ver. deserint. Quæ ratione etiam serui, aliique subditi personali obligatione soluuntur, sicuti docet Sanch. cit. cap. 24. & habetur expresse in c. vlt. de hæreticis: Absolutos se nouerint à debito fidelitatis dominij, & totius obsequij, quicunque lapsi manifeste in hæresin aliquo pacto, quacunque firmitate vallata, tenebantur. Sed hæc & aliæ eiusmodi pœnæ locum non habent in Luth-

ranis Confessionistis, qui licet ab Ecclesia Romana recesserint, tamen ob fœdus cum illis initum, summo Pontifice permittente, & tacitè consentiente, liberos suos in potestate retinent, aliisque iuribus & immunitatibus ciuilibus, non item Ecclesiasticis, vnà cum Catholicis pacificè gaudent.

VII. Priuatio Ecclesiasticorum beneficiorum, ac dignitatum; item publicorum officiorum, c. vt commissi, §. priuandi, de hæret. in 6. Quæ pœna priuationis ipso iure incurritur secundùm communiorum sententiam, quam docet Nau. lib. 5. consil. 6. de hæreticis, edit. 2. Flaminius de resignat. benefic. lib. 3. q. 1. n. 32. Rodriq. t. 1. Sum. c. 130. n. 3. Azor to. 1. lib. 8. c. 13. q. 8. Sanchez lib. 2. c. 26. n. 6. Quamuis contrarium non improbabili-ter doceat Iac. Simanca de Cathol. instit. tit. 46. n. 72. Castro lib. 2. de hæretic. punitione, c. 9. Valsq. 1. 2. disp. 172. c. 2. n. 11. arg. cit. c. vt commissi.

Ciuilis autem pœna in hæreticos & hæresin abiurare nolentes aut relapsos instè decerni solita, est mortis supplicium, vt videlicet in Cod. Theodosiano, l. 56. de hæret. & testantur DD. apud Iulium Clarum lib. 5. sent. §. hæresis, n. 7. Quia hæresis est crimen perturbans Reipublicæ pacem & tranquillitatem, non minùs, quàm furtum & homicidium, sicuti fusè ostendit Becanus cap. 15. quæst. 6.

## C A P. XVII.

### De communicatione Christianorum cum infidelibus, puta Iudæis, ac Paganis.

#### S V M M A R I V M.

1. Communicatio familiaris cum infidelibus, præsertim Iudæis, canonico iure prohibita est.
2. Pagani & Iudæi ad Fidem Christi amplectendam cogi non possunt: alia Verò ratio est de apostatis, & hæreticis.
3. Fas non est Gentiles externos bello persequi propter idololatriam, vel similia peccata, quæ ipsis Christianis, vel alijs innocentibus iniuriosa non sunt. Qui autem Christiano Magistratui subditi sunt infideles, ij cogi possunt ad naturalem legem seruandam.
4. Ritus Gentilium, sicut & hæreticorum exercitia in terris Catholicorum toleranda non sunt; nisi ita neceße videatur ad maius malum vitandum.
5. Iudæi in Christianorum terris habitatio, & rituum Iudaicorum exercitium permitti potest.
6. Permitti non debet, vt Pagani, vel Iudæi de nouo acquirant ius dominij vel iurisdictionis in fideles: quod autem antè acquisierunt dominij, non amittunt, si eorū subditi Christiani fiant: Nisi quod infideles subiecti Christiano Principi priuari possunt dominio in seruos suos: si hi ad Fidem Christianam trāsceant.

**Q**uæstio Prima. An, & quatenus Ecclesia prohibeat Christianis politicam communicationem cum infidelibus, præsertim Iudæis? Respondeo ex doctrina S. Th. 2. 2. q. 10. a. 9. Communicationem cum infidelibus ex duplici causâ ab Ecclesia fidelibus prohiberi posse: Primò in pœnam spiritualem: quæ ratione excommunicantur hæretici & apostatæ, cum sint subditi Ecclesiæ, qui modus erga Paganos & Iudæos locum habere non potest. Quid enim mihi est, inquit Apostolus 1. ad Corinth. 5. de ijs qui foris, id est, nullo modo ad Ecclesiam pertinentes sunt, iudicare? Nam eos dominus iudicabit. Monet tamen S. Th. in respon. ad. 2. Infideles, qui Christianorum Principum iurisdictioni subiecti sunt, posse interdum propter speciales eorum culpas, hac tanquam temporali pœna affici, vt ipsis communicatio cum fidelibus prohibeatur, sicuti constat ex c. postulasti, de Iudæis. &c. post miserabilem, de vsuris, vbi Papa vult, Iudæis à seculari Magistratu omne commercium cum Christianis interdici, donec vsuras restituant.

Alter



Altera verò causa eiusmodi prohibitionis esse potest peruersionis: qua ratione Ecclesia præcipuè interdicat fidelibus assiduam conuersationem, seu familiaritatem cum Iudæis; quippe qui difficilius conuertuntur ad peruertendum autem paratiores sunt, quàm gentiles, ait Syl. ver. Iudæus, q. 3. Quare prohibitum est in c. nullus, & c. omnes 28. q. 1. Ne quis seu clericus, seu laicus cum Iudæis habitet: eorum aliquem ad curandam infirmitatem accersat, aut medicinam ab eo accipiat, aut eorum azyma comedat, vel eodem balneo, aut conuiuio cū eis utatur. quod intellige, si formaliter ut socij conueniant; secus, si per accidens, & præter intentionem, sicuti notauit Sanch. lib. 2. moral. c. 31. n. 17.

Item in c. multorum, Iudæi, 2. c. adhæc, de Iudæis, Ne quisquam Christianorum Iudæo seruiat, aut famuletur: Operas tamen Iudæo locare fas est, si assidua conuersatio non accedat, uti sumitur ex citatis iuribus, & docet Syl. q. 2. dicto 2. Angelus n. 2. Azor t. 1. lib. 8. c. 22. q. 7. & 8. Sanch. lib. 2. moral. c. 31. n. 21. Quare permissum esse Iudæo habere Christianum colonum adscriptitium, vel originarium: non autem seruum, uti habetur cit. c. multorum, & notat Abb. aliique communiter.

Præterea in cit. c. etsi Iudæis, de Iudæis, seuerè nutribus prohibetur, ne infantes Iudæorum in ipsorum domibus nutrire præsumant: Imò nec extra domum Iudæi talem nutritionem concessam esse, existimant Syl. ver. Iudæus q. 2. dicto 3. Angelus n. 4. Armilla n. 3. Sanchez n. 19. Azor cit. c. 22. q. 9. Quod tamen plerique limitant; Nisi munus hoc ita obiri possit, ut interim familiaritas cum Iudæis euitetur: præsertim in aliqualis necessitatis casu. Vide Abb. in cit. c. adhæc.

Duo hoc loco annotanda sunt: Primum, Cùm finis harum prohibitionū sit, partim ut dignitas Religionis Christianæ conseruetur, partim ut peruersionis periculum caueatur: ideo si finis iste ab Ecclesia intentus grauius lædatur, mortale peccatum committitur: Ut si cum Iudæo intra eandem domum Christianus habitet: aut Paschali tempore cum ipso azyma comedat: vel idolothyta cum Pagano: Item si Iudæus ad publicum officium, aut dignitatem inter Christianos assumatur, quod seuerè etiam prohibetur, l. 17. C. de Iudæis. Veniale autem peccatum cenferi debet, si finis non nisi leuiter lædatur; contemptus verò atque contumacia absit: ut si Christianus semel comedat cum Iudæo cibos non discretos. Ita docet Caiet. ver. Iudæorum conuersatio. Armilla ver. Iudæus, n. 3. Sanch. num. 26.

Alterum est. Sicut in alijs Ecclesiasticis legibus excusat grauis necessitas corporalis, aut spiritualis, ita etiam in his: dummodo absit contemptus, siue vilipensio Religionis Christianæ. Quare culpa vacat, cum Iudæo cibum sumere, si alius grauius esurienti non suppetat: Vel Iudæum medicum adhibere, alius medendo morbo idoneus haberi non possit. Similiter fas est Christianis in Fide confirmatis, qui in conuersionem Iudæorum incumbunt, cum ipsis familiariter agere: atque cibum capere, sicuti colligitur ex c. quàm sit, de Iudæis S. Th. q. 10. a. 9. ad 3. & docet Sanch. n. 16.

Porro de excommunicatione ijs decreta, qui arma aliæue subsidia infidelibus, vel hæreticis ad impugnandos fideles deferunt, videri potest c. ita quorundam, c. significauit, c. quod olim, de Iudæis excom. septima. Et dixi aliquid libro præced. tractatus 4. capite 22. in fine.

**QVÆSTIO SECUNDA.** Vtrum Iudæi ac Pagani eorumque peccata à Christianis toleranda sint? Respondeo & dico I. Fas non est Christianis civilem Magistratū gerentibus Paganos, ac Iudæos ad Christi Fidem amplectendam directè cogere, instituto v. g. contra eos bello; vel proposita pœna mortis, carceris, bonorum spoliatio- nis, &c. Ita habetur in c. sicut, de Iudæis, & docet S. Th. quæst. 10. a. 8. aliique communiter. Ratio est, quia

potestas & iurisdictio secularium Principum ad finem tantum temporalem se extendit: non autem ad ea, quæ supernaturalis ordinis sunt: cuiusmodi est Christiana Fides & susceptio Baptismi. Quare etiam praxis Ecclesiæ ostendit, Dei voluntatem non esse, ut homines ad Fidē Christi audiendam, vel amplectendam directè compellantur: quandoquidem ad diuinum honorem & suauem Euangelij propagationem, Ecclesiæ quæ ædificationem valde interest, ut Christi Fides liberè suscipiatur, eoque constantius retineatur.

Addidi autem in assertionē voculam *directè*: Quia indirectè permissum est Principibus Christianis, infideles ad Fidem Christianam compellere: idque duobus modis, sicuti annotauit Becanus cap. 13. quæst. 4. num. 4. Primò: Negando illis ius habitationis in regione Christiani Principis, nisi Euangelij prædicationem audire velint: quandoquidem habitandi ius illis non debetur, sed absolute negari posset. Secundò: Imponendo illis maiora, quam alijs subditis tributa (modò intra iustitiæ limites) donec Christiani fiant: idque sumitur ex c. iam verò, 23. q. 6. & docet S. Anton. p. 2. tit. 13. c. 2. §. 1.

Dico II. Neque Ecclesiasticis Prælati concessum est, infideles illos, qui Fidem Christianam nunquam professi ideoque Ecclesiasticæ iurisdictiōi subiecti non sunt, spiritualibus pœnis ad Fidem compellere, sicuti ex Apost. colligitur 1. ad Corinth. 5. Alia verò ratio est de hæreticis & Apostatis: hi enim, cū Christi Fidem in Baptismo professi, & per hanc veluti ianuam in Ecclesiam ingressi, eiusdem iurisdictiōi se subdiderint: ab eadem postea impiè recedentes, ad obsequium Fidei, & obedientiam Ecclesiæ meritò compelluntur, sicuti habetur in c. de Iudæis, d. 45. c. excommunicamus, de hæreticis. Aded quidem, ut qui relapsi, vel incorrigibiles repertiuntur, seculari Magistratui traditi, pœna mortis afficiantur, iuxta c. ad abolendam, §. illos, & cit. c. excommunicamus §. 1. de hæreticis, & docet S. August. lib. 2. retract. c. 5. tract. 11. in Ioan. c. 3. lib. 1. contra Epist. Parmen. c. 7. Epist. 48. ad Bonifacium: etsi aliquando aliter senserat.

Dico III. Fas non est Christianis Principibus invadere aut bello persequi Paganos externos, suæque iurisdictiōi non subiectos, propter infidelitatem, idololatriam, & similia illorum peccata, Christianis aut alijs innocentibus non iniuriōsa. Ita excommunicare docet Victoria relect. d. Indis Insularis, p. 1. num. 39. 40. Couar. reg. peccatum part. 2. §. 10. num. 4. Valent. t. 3. disp. 1. quæst. 10. pun. 7. Becanus cap. 13. quæst. 6. Molin. to. 1. tr. 2. disp. 106. contra Castrum de iusta heretic. punit. lib. 1. cap. 14. S. Anton. 3. p. tit. 22. c. 5. §. 8. Ratio est: Quia ad omnem punitionem aut vindictam iustam requiritur vel iurisdictiō, vel illata iniuria. Ergo vbi vtraque deest, iusta punitiō seu offensio inferri non potest.

Cæterum, propter peccata, quæ iniuriam continent, licitum est quandoque infideles bello prosequi. Primò, Si impijs suis ritibus innocentes iniquo damno afficiant, v. g. rapiendo infantes: atque moniti à Christianis desistere nolint. Quæ de re Molin. cit. disp. 106. Secundò, si Christianam Fidem contumelijs, atque blasphemijs proscindant, aut Christianos peruertere conentur: idque colligitur ex c. in nonnullis, de Iudæis & Saracenis. Tertiò, Si Christianis Euangelij Prædicatoribus, cū ex Dei voluntate atque imperio mittuntur, (ut in omnem terrā exeat sonus Euangelicæ doctrinæ, secundum Christi promissionem Matth. 24. v. 14. & cap. 28. v. 19.) aditum in regiones suas patefacere, vel suis subditis Fidem ex Prædicatoribus audiendi, & amplectendi liberam potestatem concedere recusēt; iuxta hæc erunt causæ bellos illos persequendi, sicuti docet S. Tho. q. 10. a. 8. Victoria relect. de Indis part. 2. num. 15. Becanus cap. 13. q. 4. conclus. 3. vbi rectè ait: Ecclesiam posse concedere alicui Principi Christiano curam & potestatem introducendi, & conseruandi idoneos Prædicatores in provincijs infidelium, & vlciscendi iniurias hu-



*iusmodi Predicatoribus ab infidelibus illatas: imò etiam ritu-  
lo belli occupandi infidelium prouincias, in quibus non permit-  
titur libera Euangelij predicatio.*

Locutus sum autem in assertione de infidelibus exteris & iurisdictioni non subiectis. Qui enim subditi sunt Magistratui Christiano, ij compelli possunt, vt naturæ legem obseruent, ideòque abstineant à falforum Deorum cultu: & omni impietate sacrilega, sicuti constat ex l. nemo. C. de Paganis, Clemen. 1. de Iudæis & Saracenis; S. August. Epist. 48. ad Vincentium, atque docet S. Thom. quæst. 10. a. 11. Molina cit. disp. 106. conclus. 2. Valent. to. 3. dif. 1. q. 10. puncto 6. ad 4. Item fas est Christiano Principi Paganos, atque Iudæos, propter similia peccata, contra legem naturæ, & ne Christiani damna ab illis patiantur, ter-  
ris suis omnino expellere.

4 Quæstio Tertia. Vtrum ritus infidelium in regionibus fidelium tolerandi sint? Respondeo & dico I. Ritus Gentilium (sicut & hæreticorum exercitia) in terris Christianorum toleranda non sunt, nisi, prudenter consideratis omnibus, id omnino necessarium iudicetur vel ad maius malum, puta diffidij aut perturbationis Reipub. impediendum; vel ad maius bonum, puta ipsorum infidelium certum conuersionem, promouendum. Ita expressè S. Th. cit. a. 11. quod ibid. explicat Caiet. & Valent. cit. quæst. 10. pun. 7. in principio, Becanus 2.2. cap. 16. quæst. 4. Ioannes Molanus de fide hæreticis seruanda, lib. 1. lac. Simanca de Cathol. instit. tit. 11. quid id de hæreticis inter Catholicos non tolerandis probant veterum Patrum, & Christianorum Imperatorum testimonijs: & confirmari potest ex Apostolo ad Tit. 3. *Hæreticum hominem, post unam & secundam correptionem, denota.* Et 2. ad Timoth. 2. *Sermo eorum vt cancer serpit:* quandoquidem sub specie pietatis ad alios subuertendos mirè idonei sunt. Quamobrem libertas religionis hæreticis permilla, multòque magis promissa, adeò pernitiōsa est salutis animarum, atque cuius Reipublicæ, quippe quæ sine consensione fidei ac religionis diu in pace consistere ac conseruari non poterit, vt talis fidei libertas inter mala maxima Reipublicæ numerari debeat: ideòque Catholicis Principibus, rectè omnia considerantibus, & in Deum consentientibus, non facile malum aliquod grauius videri possit, cuius vitandi causa hæreticis subditis suis libertatem exercitij religionis promittere, aut iuramenta confirmare liceat: præsertim, cum eiusmodi pactio cum hæreticis semel inita, postea omnino seruanda sit, sicuti infra dicam tract. 3. c. 12. n. 15. ver. Ex dictis.

5 Dico II. Christiani Principes Iudæis permittere possunt, vt in ipsorum terris habitent, veteres suas synagogas restaurent: non autem nouas ædificent, iuxta c. consuluit, de Iudæis. Item, vt Iudaicos ritus Testamentum exponitur: non autem quibus Christiana Fides oppugnatur. Ita S. Thom. cit. a. 11. iuncto Caiet. & habetur in c. qui sincera, d. 45. & apud S. August. lib. 18. de ciuit. cap. 46. Tali enim immunitate Iudæos gaudere conuenit: quia ritus Iudaici Euangelicam veritatem figuradumbrant, eidemque testimonium præbent. Quæ causa est, cur Deus gentem Iudaicam non penitus deleri voluerit; sed tan-

quam veritatis, ac iustitiæ exemplum toto orbe dispergi. Quamobrem à S. August. in Psal. 58. in fine concio, 1. Iudæi vocantur *Christianorum librarij*, & lib. 12. contra Faustum c. 23. ait: *Quid est aliud hodie gens ista, nisi quadam scriniaria? banians legem & propheas, ad testimonium assertionis Ecclesiæ, vt nos honoremus per sacramentum, quod nuntiat illa per litteram.* Et Psal. 40. ad finem: *Capitulum no-  
stri studentibus nobis codices portant.*

Corollarium. Iudæorum causæ seu controuersie ciuiles decidi debent apud Iudicem Christianum, secundum legem ipsorum Mosaicam, v.g. vt filius excludat filiam ab hæreditate patris, vt colligitur ex c. 27. Numer. iun. Gl. ordinaria. Sin verb casus lege Mosaica determinatus non est: vel si Iudæus cum Christiano litigat, tum controuersia dirimi debet secundum ius Cæsareū, seu commune regni, l. Iudæi. C. de Iudæis.

Quæstio Quarta. Vtrum infidelibus Iudæis, ac Paganis competere possit ius dominiij aut prælationis super fideles? Respondeo & dico I. Permitti non debet, vt infideles de nouo acquirant aliquod dominium aut iurisdictionem in fideles. Ita S. Th. q. 10. a. 10. & habetur in c. um sit, c. ex speciali, de Iudæis, c. constituit, 17. q. 4. & l. vlt. C. de Iudæis. Quia id cederet in scandalum, & periculum Fidei: quamobrem etiam Apostolus 1. Corinth. 6. vetuit, ne fideles coram Iudice infideli in iudicio contenderent.

Dico II. Infideles dominio iurisdictionis in subditos non ideo priuantur, quòd subditi fidem Christi amplexi sunt. Sumitur ex S. Petro Ep. 1. c. 2. S. Paulo 2. ad Titum, c. 3. vbi iubent Christianos obedire dominis ac Magistratibus, qui eo tempore infideles erant. Idemque docet S. Thomam & probat: quia dominium, & prælatio introducta sunt iure humano & gentium: distinctio autem fidelium & infidelium prouenit ex iure diuino. Ius autem diuinum, quòd est ex gratia, non tollit ius humanum, quòd est ex naturali ratione: Ideo distinctio fidelium & infidelium non tollit dominium, & prælationem infidelium super fideles. Ita etiam Duran. in 2. d. 44. q. 3. & alij.

Dico III. Ecclesia, & Principes Christiani possunt infideles sibi subditos priuare dominio in seruos suos, si hi Christiani fiant. Ita S. Th. l. c. & probatur ex praxi Ecclesiæ, quæ dudum statuit in c. fraternitatem, d. 54. & c. 1. & 2. de Iudæis, vt serui Iudæorum tum vernaculi, tum empti ad seruitutē, liberi fiant eo ipso, quòd fidem Christi suscipiunt: Sin autem empti sint ad mercationem, teneatur dominus eos intra tres menses venum exponere, vt à Christianis emi possint. Ratio est: Quia princeps Reipub. potest subditos suos priuare dominio non tantum rerum, sed & personarum, si id ad bonum publicum necessarium esse videatur. Adde, si serui infidelium, etiam non subiectorum Christianis Principibus, periculum peruersionis patiantur, posse à dominio suorum dominorum Ecclesiastica potestate absolui: Tunc enim directè tantum exercetur iurisdictione in ipsos fideles: indirectè autem & per accidens in ipsos infideles, quatenus id necessarium est ad tuendum finem Ecclesiasticæ potestatis à Deo concessæ.



## TRACTATUS SECVNDVS.

DE

## VIRTUTE SPEI, ET OPPOSITIS VITIIS.

## CAP. I.

QVID SIT SPES VIRTUS  
Theologica.

## SUMMARIUM.

1. *Spes Theologica, sicuti & Fides, in viatore tantum locum habet, non in comprehensore.*
2. *Spes Theologica, quatenus consideratur in ordine ad omnes eius actus, pro materiali obiecto habet omne bonum, quod supernaturali lumine nobis diuinitus prouenire cognoscimus. Pro formali vero obiecto habet summam Dei erga nos bonitatem ac benignitatem.*
3. *Inter Fidem, & Spem Theologicam magna analogia seu proportio est.*
4. *Quatenus Spes Theologica stricte accipitur, in ordine ad actum sperandi proprie dictum, formale illius obiectum sub quo, est summa Dei promittentis fidelitas.*
5. *Recte docuit S. Thom. obiectum formale spei stricte sumpta, esse auxilium diuinum nobis promissum ad beatitudinem consequendam.*
6. *Spes definitur: Expectatio certa beatitudinis, ex Dei gratia, & nostris meritis.*
7. *Gratia Dei principalior causa sperandi est, quam nostra merita: cum ea ipsa sint ex Dei gratia.*
8. *Certitudo spei, siue infallibilis expectatio beatitudinis non est absoluta: sed condicionalis, si iussu certo, & usque ad finem perseuerauero, quod cum Dei mihi promisso auxilio praestare possim.*
9. *Datur tamen in hominibus pijs moralis certitudo spei, anxietatem excludens.*

**N**OTANDUM est primò: Cum duæ hominis potentie sint, quæ supernaturalibus donis ac virtutibus ornari ac perfici debent, ut Deo homo gratus & acceptus fiat: inter Theologicas virtutes vnica Fides intellectum ornat ac perficit: duæ reliquæ Spes, & Caritas voluntatem. Ratio est, quia viator absoluta cognitione non potest complecti Deum sicuti est: sed solum cognoscere cum analogia ad creaturas, testante Apostolo 1. ad Corinth. 13. *Videmus nunc per speculum in enigmate.* Amore autem voluntatis in Deum tendere possumus non tantum cum ordine ad nos quatenus nobis bona promittit, ac largitur: (qui est amor concupiscentiæ suapte natura imperfectus) sed insuper etiam Deum absolute amare possumus: quatenus in se bonus atque perfectus est, qui est amor amicitiae. Quod S. Apostolus cit. loco expressit: *Caritas nunquam excidit:* quia eadem manet in via, & in patria: propterea quod amor Charitatis cum imperfectam in hac vita, tum perfectam in altera vita cognitionem sequi possit. Quemadmodum etiam inter homines non tantum eos amore amicitiae prosequi possumus, quorum virtutes perspeximus: sed etiam de quibus audiuius, etiam nunquam eos viderimus, siue secundum faciem agnouerimus: Cum autem venerit, subiungit Apostolus; *quod perfectum est, videlicet clara & absoluta Dei visio, euacuabitur, quod ex parte est, id est, imperfecta & obscura Fidei cognitio defi-*

net. Et paulò post: *Nunc cognosco ex parte, puta per Fidem imperfectam: tunc autem in vita beata cognoscam sicuti & cognitus sum à Deo clare:* Quia, ut S. Ioan. Epist. 1. cap. 3. ait, *cum apparuerit, similes ei erimus.* Quare concludit S. Paulus: *Nunc manent tria hæc, Fides, Spes, Caritas: maior autem horum est Caritas: quia, ut dixi, perfecta est, ut etiam in vita æterna permanere possit: non item Fides: sed nec Spes, saltem secundum primarium actum suum, quæ est expectatio beatitudinis, ut infra dicam.*

Notandum secundo: Quod habitus Spei Theologicæ duobus modis considerari potest: Primò adæquatè in ordine ad omnes actus ab ipso procedentes: sic pro materiali obiecto habet omne bonum, quod supernaturali lumine nobis diuinitus prouenire cognoscimus: cuiusmodi imprimis est ipse Deus, tanquam supernaturalis finis & beatitudo nostra: tum verò media supernaturalia ad hunc finem conducentia: ac denique bona naturalia seu temporalia. Horum enim auctorem Deum esse supernaturali Fide credimus: ergo etiam ab eo per supernaturalem spei actum desideramus, expectamus, & tanquam à Deo prouenientibus delectamur. Etenim actus Spei virtutis Theologicæ, iuxta hanc considerationem, plures sunt videlicet amor boni nobis à Deo prouenientis, eiusdem desiderium, & expectatio, si nondum acceptum est: gaudium siue delectatio de eo, si acceptum, & possessum, ut ostendit Suarez de virtut. Theolog. tractat. 2. disput. 1. §. 1.

Secundo considerari potest habitus spei in ordine ad vnum tantum eius primarium actum, qui est expectatio certa beatitudinis æternæ, per media diuinitus ordinata, quomodo communiter à Scholasticis accipi & definiri solet in 3. d. 26. Eodemque sensu ait S. Th. 2. 2. q. 18. art. 2. Quod Spes, sicuti & Fides, euacuatur in patria, & in beatis esse non potest: cum interim valde probabiliter dicatur, habitum Spei secundum substantiam manere in altera vita, & quosdam actus exercere posse: videlicet amorem, ac delectationem de beatitudine, quatenus bonum ipsorum est: item desiderium & expectationem corporis gloriosi, ut docet idem Suar. ci. dist. 1. §. 8.

Notandum tertio: Inter Fidem & Spem Theologicam magna analogia seu proportio est: I. Quia ambæ, si secundum se præcisè spectentur, carent perfectione simpliciter dicta: cum non exerceant actus potentie optimos: quandoquidem feruntur in Deum non secundum se, sed cum ordine ad creaturam, sicuti docet S. Th. 2. 2. q. 23. a. 6. *Semper id quod est per se, maius est eo, quod est per aliud.* Fides autem, & Spes attingunt Deum secundum quod ex ipso prouenit nobis vel cognitio veri, vel adeptio boni: Sed Caritas attingit ipsum Deum, ut in ipso sistat, non ut ex eo aliquid nobis proueniat: & ideo Caritas est excellentior Fide, & Spe. Quæ ipsa causa est, quod actibus Fidei, ac Spei æternam gloriam apud Deum non mereamur sine charitatis imperio, ut infra dicam tract. seq. c. 1. n. 2.

II. Sicuti Fides in viatore tantum locum habet, ita ferme etiam Spes, saltem secundum primarium actum suum, à quo & nomē accepit: quare utraq; tum Fides, tum Spes, circa obiectum nō apparēs versatur, sicuti docet Magister



in cit. d. 26. & sumitur ex Apost. ad Roman. 8. *Spes quæ videtur* (sumit nomen spei pro re sperata) *non est spes: nã quod videt quis*, tanquam præsens sibi, *quid sperat? si autem quod non videmus, speramus, per patientiam expectamus.* Quibus verbis apparet, Spem ab Apostolo considerari, propterea est boni absentis, & nondum possessi, videlicet æternæ beatitudinis expectatio.

III. Quemadmodum Fides Theologica duplex obiectum habet: materiale, & formale. Materiale obiectum continet omnia reuelata à Deo, quorum primum ac præcipuum est Deus ipse, auctor omnis gratiæ, ac gloriæ, conuenienter illi Ioann. cap. 17. *Manifestaui nomen tuum hominibus.* Alterum locum tenent, quæ nobis reuelata sunt diuinitus, tanquam media per se ordinata ad finem beatitudinis consequendum, videlicet qui in symbolo Fidei articuli continentur: vltimum verò locum tenet, quæ per accidens, seu ad aliorum declarationem reuelata sūt: vt quod *Abraham duos filios habuit, quod ad tactum ossium Elisæ suscitatus est mortuus*, ait S. Th. 2. 2. quæst. 1. a. 6. Formale autem Fidei obiectum est summa Dei in dicendo seu reuelando veracitas. Ita secundum proportionē Spes Theologica duplex obiectum habet; materiale, & formale. Materiale continet bona omnia, quæ nobis à Deo proueniunt, quorum primum ac præcipuum est Deus ipse, secundum illud Gen. 15. *Ego merces tuā magnā animis.* Et S. Ioan. cap. 17. *Hæc est vita æterna, seu felicitas, vt cognoscant te solum verum Deum.* Ad hoc porro præcipuum obiectum Spei reliqua referuntur, seu tanquam media per se ordinata, videlicet gratia Dei per Christum: item propria merita, aliorum hominum ac beatorum preces, quatenus tamen & hæc in Dei gratia ac misericordia, Christi-que meritis fundantur: seu tanquam media per accidens, iuxta Dei prouidentiam ac dispositionem, subseruientia cuiusmodi sunt temporalia bona, quæ à Deo ad animæ nostræ salutem desideramus, ac petimus: & accepturos nos speramus, atque acceptis delectamur. Formale autem obiectum Spei secundum generalitatem suam, seu in ordine ad omnes actus spectatæ, est summa Dei erga nos bonitas, seu benignitas.

IV. Si Spem consideramus, vti communiter à Scholasticis strictè accipitur, quatenus est expectatio certa beatitudinis ex Dei gratia, & c. maior adhuc analogia inter eam, & Theologicam Fidem cernitur. Nam sicuti Fidei obiectum materiale adæquatum sunt omnia à Deo reuelata cum ordine ad ipsum Deum, qui est præcipuum reuelatum: ita Spei obiectum materiale adæquatum sūt omnia à Deo nobis promissa, cum ordine ad ipsum Deum, tanquam præcipuum promissum. Deinde sicuti Fidei obiectum formale, siue ratio ac motiuum credendi est summa Dei in reuelando veracitas, qui nec falli potest, cum sit sapientissimus; nec fallere potest, cum sit verissimus: ob quam causam Fides Theologica infallibilem credendorum certitudinem obtinet, quippe innixa primæ & certissimæ regulæ veritatis. Simili modo Spei obiectum formale, siue ratio & motiuum sperandi, est summa Dei promittentis fidelitas: qui, quod promissit, certò nobis præstaturus est: cum & possit præstare, quia omnipotens & velit præstare, quia benignissimus, ac fidelissimus: cuiusque rei causa Spes Theologica constantem, & infallibilem certitudinem obtinet, quippe innixa diuinæ promissioni, tanquam certæ & infallibili regulæ, vti docet Trident. sess. 6. c. 13. *In Dei auxilio firmissimam spem collocare omnes debent.* Et Apost. ad Hebr. 6. *Volens Deus ostendere pollicitationis hæreditatis immobilitatem consiliis suis, interposuit iuramentum: vt per duas res immobiles, quibus impossibile est mentiri Deum, fortissimum solatium habeamus, qui confugimus ad tenendam prepositam spem, quam sicut anchoram habemus animæ salutem ac firmam.* Et ad Titum cap. 1. *In spem vitæ æternæ, quam promissit, quam non mentitur Deus.*

Notandum quartò: Ex dictis facile esse conciliare do-

ctrinas S. Tho. de obiecto formali Spei Theologicæ. Quatenus enim ea consideratur in ordine ad omnes actus suos, apertè indicat 2. 2. qu. 23. art. 6. in corp. quod *Spes attingit Deum, quatenus ex ipso nobis prouenit adeptio boni*, sentit itaque Deum, quæ bonum nobis, seu benignum, esse obiectum formale Spei. Et q. 17. a. 8. *Perfectus amor est, quo aliquis secundum se amatur: puta cum aliquis secundum se vult alicui bonum, sicut homo amat amicum.* Imperfectus amor est, quo quis amat alicui non secundum seipsum, sed vt bonum illud sibi proueniat, sicut homo amat rem, quam concupiscit. Primus autem amor pertinet ad Charitatem, qua inhaeret Deo secundum seipsum: sed Spes pertinet ad secundum amorem: quia ille qui sperat, aliquid sibi obtinere intendit: vbi vides S. Doctorem formale obiectum Spei statuere bonum diuinum amabile amore concupiscentiæ.

At verò si Spes consideretur secundum primum actum in viatore, quæ est expectatio certa beatitudinis æternæ, sic idem S. Th. ait, formale obiectum Spei esse auxilium diuinum nobis promissum ad beatitudinem consequendam: seu quod eodem recidit, obiectum formale esse fidelitatem Dei omnipotentis in promisso nobis auxilio. Ita enim apertè sentit in qq. disputatis, q. de Spe, a. 1. in corp. *Spes adipiscendi vitam æternam habet duo obiecta: scilicet vitam æternam, quam quis sperat: & auxilium diuinum, vel potius Deum auxiliantem, à quo quis sperat.* Et paulò post: *Sicut formale obiectum Fidei est veritas prima, per quā, sicuti per quoddam medium assentit his, quæ creduntur, & sunt materiale obiectum Fidei: ita etiam formale obiectum Spei est auxilium diuinæ potestatis, propter quod tendit motus Spei in bona sperata, quæ sunt materiale obiectum Spei.* Similia habet in summa 2. 2. q. 17. a. 2. 5. 6. Nam in 6. art. ad 3. ait: *Spes facit tendere in Deum, sicuti in quoddam bonum finale adipiscendum, & sicut in quoddam adiutorium efficax ad subueniendum, quam ponit vt vltimam formalem rationem Spei.* Et art. 5. ad 4. *Quod Spes respicit arduum, alterius auxilio assequendum.* Et a. 1. ad 3. & in corp. a. 2. indicat, quod Spes virtutis perfectionem aliquam & constantiam habet, quia attingit Deum, tanquam propriam regulam: cuius promisso auxilio nititur ad vitam æternam obtinendam: sicuti etiam Fides virtutis perfectionem aliquam & certitudinem obtinet, quia innititur primæ veritati, tanquam propriæ regulæ instructionis nostræ ad vitam æternam.

Quo loco alia analogia seu proportio inter Fidem, & Spem obseruari potest: Quod sicuti Deum, & æternam beatitudinem nobis reuelatam credimus propter reuelationem, ipsam autem reuelationem Fide diuinā credimus quatenus à prima veritate procedit: ita simili modo Deum & æternam beatitudinem expectamus ac speramus ob auxilium tanquam formale expectandi seu sperandi motiuum, vti locis citatis expressè S. Thom. tradidit, & sequitur Durand in 4. d. 16. art. 2. quæst. 2. ad 2. Vsq. 1. p. q. 84. c. 1. disp. 235. Turrianus 2. 2. disp. 60. dub. 2. Ipsum verò diuinum auxilium expectamus & speramus, quatenus à Deo fidelissimo promissore nobis proueniet.

Sed cōtra hanc sententiā non pauci Doctores sentiunt, auxilium diuinum seu Deum vt auxilium, non posse esse formale obiectum Spei Theologicæ, vti videre licet apud Suar. de virtutibus Theol. tr. 2. dif. 1. f. 3. sent. 2. Coninck de actibus supernatur. dif. 19. du. 4. Nam auxilium diuinum, cum sit medium à Deo ordinatum ad beatitudinem æternam à nobis consequendam: non potest esse ratio formalis amandi, appetendi, consequenter nec sperandi beatitudinem: quandoquidem finis prior est intentione, quā media; imò ratio formalis, propter quam media appetuntur.

Respondeo. Bonum absolute amare, illud desiderare, & expectare seu sperare, esse actus diuersos, propter formalem rationem diuersam tendendi in obiectum. Nam bonum amamus amore concupiscentiæ, quatenus nobis absolute conueniens: desideramus verò, quatenus hoc idem nobis conueniens bonum, absens est, vbi vides, absentiam non posse



posse esse rationem formalem amoris absoluti, quamvis sit ratio formalis desiderij, quod fertur in bonum, quatenus absens est. Expectamus autem seu speramus bonum, quod arduum est, affecuturos nos, propter mediorum efficacitatem; quamvis enim media non sint ratio amandi, & appetendi absolute, imò nec intendendi finem: sunt tamen formalis ratio, propter quam finem seu bonum arduum nos affecuturos speramus. Sic etiam in humanis amamus rem absolute, quia nobis conveniens est: desideramus eam, quia absens est: intendimus, quia possibilis est acquisitu per media: expectamus autem & speramus eam, quatenus arduum bonum est, attamen superabile & re ipsa acquirendum, propter mediorum efficacitatem, siue operandi facultatem propriam, vel alienam. Etenim rationes istae formales actuum voluntatis proveniunt ab antecedente iudicio intellectus; Is autem iudicat aliquid absolute amandum esse, quia bonum seu conveniens est: iudicat desiderandum esse, quia nondum habitum, seu absens est: iudicat per media intendendum esse, quia per ea acquisitu possibile est: denique iudicat expectandum seu sperandum esse, quia arduum quidem ac difficile, sed ob mediorum efficacitatem, seu ob vires proprias, vel alienas, acquirendum est. Quamvis igitur voluntas rem bonam propter media non intendat, nec simpliciter appetat vel desideret: tamen propter eorum aptitudinem, seu virium facultatem, rem desideratam sperat: Quemadmodum, ut supra dixi, propter absentiam voluntas rem bonam non amat absolute: tamen propter absentiam rem amatam desiderat.

Aduerte tamen, quod nomen amoris, vel appetitionis, interdum late accipitur, ut sit veluti genus comprehendens sub se amorem absolutum, desiderium, spem, &c. Hac vero acceptione negandum est, quod auxilium divinum non possit esse ratio amandi, appetendi: si sensus sit, eiusmodi rationem repugnare amoris, seu appetitioni quandoquidem ratio speciei non debet repugnare generi.

Quæres. Vtrum actus Spei Theologicæ, quos dixi esse amorem concupiscentiæ boni divini, eiusdem desiderium expectationem seu spem, & delectationem, essentialiter differant? Respondeo, sicuti supra de actibus Fidei tr. 1. cap. 4. respondi ad 2. Fortasse absurdum non esse, fateri, quod ab eodem habitu infusodiuerse speciei actus prodeant. Verum facilius, & probabilius dicitur; diuersitatem esse tantum accidentalem. Tamen enim actus spei seu expectationis, quæ talis est, essentialiter differat à simplici v.g. desiderio, sicuti ex eorundem definitionibus apparet: tamen secundum substantiam actus videntur convenire, propter eandem communem formalem rationem sub qua, quæ est fidelitas Dei, promittentis nobis beatitudinem æternam.

Supereft, ut explicemus definitionem Spei Theologicæ, iuxta strictiorem eius acceptionem, traditam à Scholasticis cum Magistro in 3. d. 26. *Expectatio certa beatitudinis, ex Dei gratia, & nostris meritis.* Cum dicitur *expectatio*, nota, hos voluntatis actus subordinatos esse, qui sunt amor, desiderium, intentio, expectatio. Nam amor latius patet, quàm desiderium: amamus enim eum absentia, tum præsentia: desideramus tantum absentia, desiderium latius patet intentione & expectatione: quia desiderium boni absentis aliud est simplex, quod desideramus etiam ea, quæ valde difficilia, aut impossibilia acquisitu iudicamus, ideò que desperamus, nec consequi intendimus: quo modo reus supplicio afficiendus vitam longiorem desiderat, quam tamen desperat, & interdum obtinere non intendit. Aliud verò est desiderium efficax boni absentis: seu nondum possessi, quod, quatenus per media acquisitu possibile iudicatur, dicitur intentio: quatenus verò arduum, tamen re ipsa acquirendum iudicatur propter mediorum efficacitatem, seu propter facultatem propriam, aut alterius adiutoris, dicitur expectatio. Ex

quo apparet, quod actus expectationis, seu spei modum quandam firmitatis superaddat actui intentionis, propter perspectam obtinendi facultatem.

*Beatitudinis*, in Dei clara visione consistentis: quandoquidem hoc est primum materiale obiectum Spei, ad quod reliqua sperata referuntur, ut supra explicavi, & docet S. Th. 2. 2. q. 17. a. 2. ad 2. Nota hic, perinde esse, siue dicas, Deum esse obiectum Spei, ut à nobis comprehendendum: siue dicas, obiectum Spei esse comprehensionem fruitionemque Dei. Nam Deus est obiectum quod, comprehensio obiectum quo: quandoquidem amor concupiscentiæ, in quo Spes veluti in subiecto fundatur, non fertur in obiectum, nisi cum ordine ad comprehensionem, adaptionemve: v.g. miles desiderat, & sperat pecunias ad apprehendendum seu prædandum.

*Certa*, seu infallibilis: quia fundatur in infallibili Dei promissione, quam per divinam, idem infallibilem, Fidem accepimus. Ad quem modum Apostolus ad Rom. 4. de Patriarcha Abraham dixit: *In re promissione Dei non habuit dissidentia*: eiusque rationem mox adiunxit: *sed confortatus est fide, dans gloriam Deo: plenissime sciens, quia quaecunque promittit, potens est & facere.*

Nota autem hoc loco; quod certitudo & infallibilitas, si proprie loquendum, ad intellectum pertinet: ideòque Fidei propria affectio est: voluntati autem, & actui eius, quæ est expectatio, convenit secundum quandam participationem, ut loquitur Dur. cit. q. 26. q. 3. a. 1. Richard. 2. 4. qu. 2. in corp. Et aliud non est, quàm firmitas & constantia voluntatis adherentis, & prosequentis bonum, iuxta illud Psalmi 72. *Mibi autem adhaerere Deo bonum est, ponere in Domino spem meam.* Et Apost. ad Hebr. 6. vocat spem *anchoram animæ firmam*, propter voluntatis adhesionem seu determinationem; & *certam*, quia, ut dicitur ad Rom. 5. *Spes non confundit.* Porro eiusmodi certitudinem, seu potius firmitatem in humani auxilii promissione, quippe suapte natura incerta & fallibili, collocare non possumus. Id enim esset confidere in mendacio, ac vanitate: atque maledictioni Dei se subicere: quia *maledictus homo, qui confidit in homine*, Hier. c. 17. Et David Psal. 145. *Nolite confidere in Principibus, in filiis hominum, in quibus non est salus*: id est, à quibus certa salus non provenit: cum ob inopiam suam non possint nos adiuuare: & ob inconstantiam, aut malitiam, interdum nolint adiuuare. Similiter neque in propriis viribus, neque in vlla alia re creata tanquam ex se sufficiente ad beatitudinem nobis conferendam; spes collocari sine gravi præsumptionis scelere potest: sed in solo Dei omnipotentis ac fidelis promisso auxilio.

Denique additur, *Ex Dei gratia, & propriis meritis.* Circa quæ verba aliqua doctrinæ explicandæ sunt: Prima. Spes omnis circa bonum arduum versatur, ut docet S. Th. 1. 2. q. 40. a. 1. & 2. 2. q. 17. a. 1. & 5. Richard. ci. d. 26. a. 4. q. 1. Duran. q. 1. n. 5. Id est, circa tale bonum, quod difficultatē obtinendi habet, & tamen obtinendum iudicatur, propter promptitudinem seu facultatem propriam, vel alienam, uti expresse docet S. Th. 1. 2. q. 42. a. 3. ad 2. licet contrariū placuerit: Vasq. 1. 2. disp. 40. c. 2. Turriano 2. 2. q. 60. dub. 1. At verò spes Theologica, cum circa beatitudinem æternam ac supernaturalem versetur, respicit arduum, ut alterius, videlicet Dei, auxilio assequendum, ait S. Th. ci. a. 5. ad 4. Beatitudinem inquam, obuenturam nobis speramus non naturæ nostræ viribus, aut facultate: sed Dei potentia, gratia, ac misericordia: convenienter illi Osee 9. *Perditio tua ex te, Israel, tantummodo in me auxilium tuum.*

Altera. Licet hæc duo, *gratia Dei, & propria merita*, coniunctim adultis necessaria sint, veluti media à Deo ordinata ad æternam beatitudinem assequendam: tamen principalior est gratia Dei, quæ per merita Christi nobis communicatur: quandoquidem ab ea merita nostra depēdēt, vim & efficaciam accipiūt. Deus est enim, inquit Apost. ad Philip. 2. *qui operatur in nobis & velle, & perficere, pro bonæ voluntate,*



seu beneplacito. Et Christus apud S. Ioan. c. 15. *Ego sum vitis vera, & Pater meus agricola est. Et postea: Vos palmites, &c. quia sine me nihil potestis facere*, quod vel ad iustitiam coram Deo, vel ad vitam æternam consequendam utile sit. Item Apostolus in Epist. ad Roman. & ad Galat. sæpe inculcat, hominem nec iustificari, nec saluari posse sine fide in Christum, & gratia Dei per Christum.

Exinde etiam intelligitur, quomodo in nostris operibus sperare seu confidere possimus: videlicet non quatenus præcisè ex nobis, aut viribus naturæ sunt: sed credere aliquo modo possumus in nostris bonis operibus, quatenus ea ex Dei gratia proficiuntur, ideoque & ipsa Dei dona sunt, ac media misericorditer ordinata ad vitam æternam, sicuti docet S. August. lib. de gratia & libero arbitrio, c. 6. & de ver. Apost. serm. 13, & Trident. Concil. sess. 6. c. 16. *Licet bonis operibus in sacris literis tanta tribuatur, absit tamen, ut Christianus homo in seipso vel confidat, vel gloriatur, & non in Domino, cuius tanta est erga omnes homines bonitas, ut eorum velit esse merita, quæ sunt ipsius dona*: siquidem id magis exaltat Dei misericordiam, & Christi merita, quod eorum virtute consequamur, ut & ipsi salutem nostram ministerialiter operemur. Quæ simili ratione egregiè notavit S. Thom. 2. 2. q. 25. a. 1. ad 3. in homine iusto aut beato sperare nos posse, *non sicuti in principali autore salutis: sed sicuti in adiuvante ministerialiter sub Deo*. Qui enim ita confidit in creatura, quatenus est instrumentum siue medium salutis nostræ à Deo assumptum is in Deo potius confidit: sicuti qui homines amat propter Deum, & in eorum salute lætatur propter gloriam Dei, is Deum ipsum potius amat.

8 Tertia: Cùm Deus hominis adulti cooperationem ac merita exigit, ut vita æterna non sit tantum gratia, sed etiam merces & corona iustitiæ: Nam & qui certat in agone, non coronatur, nisi legitimè certauerit, ait Apostolus 2. ad Timoth. 2. hinc consequens est, quod certitudo Spei, seu infallibilis expectatio beatitudinis non sit absoluta: Nemo, inquit Trident. Concil. sess. 6. cap. 13. *sibi certi aliquid absoluta certitudine polliceatur*. Quia Spes & expectatio nostra tanquam fundamento nititur promissione Dei, quæ nobis facta non est absolute, sed conditionatè: Si vis ad vitam ingredi, serua mandata, Matth. 19. Item: qui perseveraverit usque in finem, hic saluus erit, Matth. 10. Luc. 24. At verò nemo, sine speciali reuelatione, certus est se in gratia Dei constitutum, legis mandata observare, & nullo etiam occulto peccato mortali teneri: Nescis homo inquit Ecclesiastes cap. 9. *utrum amore, an odio dignus sis: sed omnia in futurum servantur incerta*. Et David Ps 18. *Delicta quis intelligit? ab occultis meis munda me, domine, & ab alienis parce seruo tuo*. Et Paulus Apostolus 1. ad Corinth. 4. *Neque me ipsum iudico: nihil enim mihi conscius sum, sed non in hoc iustificatus sum*. Quia sæpe evenit, ut etiam ignorantes peccemus, ait Theodor. ibidem, & S. Hieronym. lib. 2. dialog. aduersus Pelag. Similiter de perseverantiæ dono nemo hominum sine peculiari reuelatione certus esse potest, teste S. August. lib. 11. de ciuit. capite 12. Nam qui se existimat stare, inquit Apost. 1. Corinth. 10. *videat ne cadat*; & consequenter nemo, sine speciali reuelatione, absolute certus est, se vitam æternam consecuturum, sicuti docet Trident. sess. 6. c. 9. 13. & can. 13. & seqq. Quæ obrem monet Apost. ad Philipenses cap. 2. *Cum metu & tremore salutem vestram operamini*. Quod sapienter Deus instituit: quia utilis timor iste humilitatem continuè seruat, uti notavit B. Prosper l. 2. de vocat. gentium; nec non sollicitudinem parit, ac cautionem, maioremque diligentiam seruiendi Deo, uti notavit S. Hieronymus in S. Ioan. c. 3. Et in epist. ad Gelasium, quod quamdiu in vitæ huius agone veriamur, nec peccator desperare debet: cùm vno die se iustum efficere possit: nec sanctus, id est, qui nullus culpæ sibi conscius est, securus esse debet, ne de præterita iusticia confidens, requiescat efficiatur; sed exem-

plo Apostoli ad Philip. 3. Quæ retro sunt obliuiscens, ad ea, quæ priora sunt se extendat. Et S. August. l. de corrept. & gratia c. 23. *Propter huius utilitatem secreti, (ne forte quis extollatur, sed omnes etiam qui bene currunt, timeant dum occultum est, qui perueniant) credendum est quosdam de filiis perditionis, non accepto dono perseverandi usque ad finem: in fide, quæ per dilectionem operatur, incipere vivere, & aliquandiu fideliter ac iuste vivere, & postea cadere*.

Ex quibus denique consequens est, absolutum iudicium hoc: *Certa & infallibili fide credo, me vitam æternam consequuturum, non esse actum fidei Theologicæ: sed falsam hæreticorum nostrorum persuasionem: in qua non Theologica virtus Spei, sed inanis præsumptio fundatur, Fides autem diuina, in qua veluti basi ac fundamento Spes fundatur, hæc esse debet: Credo Deum promississe, & re ipsa præstiturum beatitudinis coronam legitimè certantibus usque in finem, cum eiusdem Dei auxilio, quod omnibus sufficienter præstet*.

Quamvis autem nemo, sine speciali reuelatione, omnimodè certus sit, se vel legitimè certare, vel usque in finem certaturum esse: tamen tantò firmiorem persuasione, & interdum quasi moralem certitudinem, & quæ inde nascitur maiorem spem ac consolationem quisque fidelium habere potest, quantò tum Dei singularem circa ipsum providentiam, gubernationem, ac spiritualia beneficia, tanquam signa prædestinationis animaduertit: tum verò nullius mortalis peccati, in quo animus hæreat, sibi conscius, firmius Deo etiam impofterum seruiendi propositum in se experitur. Quare S. Bernard. serm. 1. in Septuag. *Quis potest dicere, Ego de electis sum: Ego de prædestinatis ad vitam: ego de numero filiorum? reclamante Scriptura: Nescis homo si sis dignus amore, an odio. Certitudinem usque non habemus: sed Spei fiducia consolatur nos, ne dubitationis huius anxietate penitus cruciemur*. Vide etiam S. Bonavent. in 3. distinctione 26. art. 1. quæst. 5. S. Antoninus p. 4. tit. 9. cap. 4. §. 4. Nauar. in ca. si quis, num. 34: dist. 7. de penit.

## CAP. II.

## De peccatis contra Spem.

## SUMMARIUM.

- 1 Præceptum sperandi certis casibus obligat, sicuti & præceptum fides exercenda.
- 2 Spes secundum excessum aduersantur peccata præsumptionis.
- 3 Præsumptio est una ex speciebus peccatorum in Spiritum sanctum, quæ irreversibilia dicuntur. Virtuti Spei secundum defectum opponitur desperatio.
- 4 Amissa fide per apostasiam vel hæresim, amittitur etiam spes: non autem amissa spe semper perditur fides.
- 5 Peccata contra spem non possunt esse venialia ex obiecto, siue materia paruitate.

Peccata contra virtutem Spei alia in commissione consistunt, & alia in omissione. Illa repugnant præcepto affirmatiuo sperandi in Deum, cuiusmodi præceptum hominibus impositum esse docet S. August. tract. 83. & faciliè probatur hac ratione. Nam omnis actus, qui ad æternam salutem necessarius est necessitate mediæ, est etiam necessarius necessitate præcepti diuini: sed actus Spei supernaturalis ac Theologicæ est necessarius hominibus adultis necessitate mediæ ad salutem æternam. Ergo, &c. Maior est clara. Minor sumitur ex Apost. ad Hebræos 10. & 11. & eodem modo probari debet, sicuti tract. 1. capite 8. assertio 2. ostensum est, supernaturalem actum Fidei in vnum Deum adultis necessarium medium esse ad salutem æternam. Nam Deus homines adultos saluare non vult sine eorum voluntate, ac cooperatione supernaturali: hæc autem cooperatio, supposita fide non



non fit sine actu Spei: siquidem per spem voluntas viatoris incipit accedere, & appropinquare Deo.

Notandum verò hoc loco est; Fieri posse, vt puer in infantia baptizatus, circa temporalia, & quæ sensui obuia sunt, rationis discursum obtineat; & ob id contra naturæ legem peccet venialiter, v. g. mentiendo; & tamē nondum intellectum instructum habeat, vt Deum vnum, tanquam supernaturalium rerum auctorem credat, & in eum sperare possit, talis puer, si in hoc statu moriatur, haud dubiè saluabitur: quippe constitutus in Dei gratia, quam in Baptismo accepit, & nunquam amisit: cum mortaliter non peccauerit, vt ponimus. Quare talem puerum non inter adultos, sed inter paruulos numerare debemus quibus habitualis iustitia ad salutem æternam sufficit: cum ad actualiter cōoperandum salutis suæ incapaces sint.

Præceptum Spei affirmatiuum ferme iisdem casibus obligare videtur, sicuti de Fide dictum fuit tract. præced. c. 10. num. 2. Primus est: Cum primum homini rationis vsum assecuto, Deus & beatitudo tanquam finis, ad quē bonis actibus tendere debet, sufficienter propositus est: tunc longiorem moram trahere non debet, quin ad hunc finem per actum spei feratur. Cum alioquin nec iustitiā consequi: nec, si in infantia per sacramentum Baptismi iustificatus fuit, in accepta iustitia, sine fidei, spei, & charitatis actu, diu persistere neque vllum omnino actum meritorium gloriæ æternæ exercere possit. Quare hunc primum casum obligationis affert Ban. 2. 2. q. 12. a. 1. dub. 2. & alii Thomistæ apud Sanchez lib. 2. moral. c. 33. n. 3. quāuis ipse contradicat cum Valentia tom. 3. disput. 2. quæ. 4. p. 1.

Secundus casus: Cum quis in periculo desperandi versatur, à quo eripi non posse videatur, nisi animum contrario actu spei Theologicæ confirmet. Quo casu idem præceptum spei obligans hominem ad non desperandum, obligat etiam ad sperandum, tanquam medium necessarium ad desperationis barathrum vitandum. consequenter ad idem numero peccatum pertinebit non sperare, ac desperare: qua de re Valentia & Sanchez il. cc. Aliquando verò præceptum spei per accidens obligat; cum vel actus charitatis, orationis, pœnitentiæ, & c. in præcepto sunt, qui sine præuio actu spei exerceri non possunt: Vel cum tentatio contra aliam virtutem, v. g. castitatem incidit, quā te superare non posse existimes, nisi in animo spem suscites, diuinum auxilium tibi præstare. Quāuis in his casibus ommissio spei actus non est peccatum diuersum ab eo, cuius causa est: ideoque in sacra Confessione speciatim non explicandum, sicuti in simili dixi tract. præced. de Fide c. 10. in fine.

Circa peccata commissionis contra Spem aduerte: Sicuti in moralibus virtutibus accidit, vt vni virtuti duo vitia opponantur, vnum secundum excessum, & alterum secundum defectum, v. g. liberalitati prodigalitas & auaritia: sic etiam Spei Theologicæ secundum excessum aduersatur peccatum præsumptionis: quod duplex est, auctore S. Thom. q. 21. a. 1. Vnum, si quis confidat se Dei gratiam, iustitiā, aut beatitudinem æternam consecuturum ex seipso, aut naturæ suæ viribus: cum tamen id creaturæ facultatem excedat. Contra quod peccatum, Deo valde displicens, dicitur Iudith cap. 6. *Presumentes de se humilias*. Et prouer. 12. *Qui confidit in cogitationibus suis, impiè agit*. Et cap. 28. *Qui confidit in corde suo, stultus est*. Alterum est, si quis confidat ex Dei misericordia consecuturum se remissionem peccatorum sine operibus pœnitentiæ: aut cœlestem gloriam sine propriis meritis ex Dei gratia factis. Atque hæc præsumptio, inquit S. Th. cit. a. 1. propriè est species peccati in Spiritum sanctum: de quo peccato Christus Matth. 12. ait: non remitti neque in hoc seculo, neque in futuro. Ratio est: Quia Deus iustus & misericors, secundum ordinatissimum decretum suum, in sacris literis passim non promulgatum, non remittit

peccata hominibus adultis, nisi pœnitentibus: neque dat mercedem gloriæ, nisi operantibus. Huic autem diuinæ iustitiæ ordinationi homo se opponit, cum pœnitentiā vel bonorum operum meritum excludit: ideoque impedit Deum, quo minùs per Spiritum sanctum ipsi peccata remittat, vel gloriam æternam tribuat. Quare in Apostol. constitut. libro 2. capite 27. legitur: *Si quis ex acie (instructa a Iuero Deum) peccet, tentans Deum, quasi non insequatur pœnis improboris veniam quidem non merebitur*.

Eademque dici possunt de priore præsumptionis specie, excludente gratiæ diuinæ auxilium, sine quo tamen nihil seu ad iustitiā, seu ad vitam æternam vtile homo præstare potest: Imò verò commune hoc est omnibus peccatis in Spiritum sanctum: quæ ideo etiam sic appellantur, quia Spiritui sancto aditum præcludunt: dum media, aut dispositiones, puta spem, timorem, dolorem à se remouent, sine quibus secundum ordinariam legem Spiritus sanctus peccatores non iustificat: quam obrem eiusmodi peccata irremissibilia dicuntur, quòd difficilis & rara sit eorum remissio, licet non absolute impossibilis, sicuti docet S. Th. 2. 2. q. 14. a. 3. in corp. ad finem, S. Bonau. in 2. d. 43. a. 2. q. 2. S. Anton. p. 2. tit. 8. §. 3. in fine. Nau. c. 23. man. in fine, Suar. 3. p. t. 4. disp. 8. l. 1. n. 19. Ex quo etiam intelliguntur verba Christi superius citata. Cum enim Iudæi diuina & supernaturalia opera, quæ Spiritus sanctus speciali prouidentia ad Fidem conferuandam, & peccatores conuertendos in Christo operabatur, malo Spiritui adscriberent: contestatus est Christus, eorum peccatum difficile remitti posse: Sicuti si medicus ægroto medicinā abominanti diceret, sanari eum non posse, quia respuit medium, per quod sanari deberet, vti bene explicat Dur. in 2. d. 43. q. 2.

Secundum defectum virtuti Spei opponitur desperatio: cum quis desperat, se remissionem peccatorum, & gloriam æternam consecuturum esse: ideoque omnem conatum intermittit. Quod proinde peccatum plenissime repugnat Spei: quippe tum à fine seu scopo illius, quæ est cœlestis beatitudo, hominē auertens: tum etiam media omnia, puta diuinæ gratiæ auxilium, & propriam cooperationem abiiciens; quare inter alia peccata maxime periculosum est, teste S. Th. q. 20. a. 3. & Ilidoro l. 2. de sũ. bono, c. 14. vbi ait: *Perpetrare flagitium mors animæ est: desperare autem descendere in infernum*.

Ad extremum tria aduertenda sunt: Primum. Licet Magister in 2. d. 43. eum que secutus S. Th. in ci. q. 14. a. 2. Sex tantum peccata in Spiritum sanctum numerent: *Desperationem, præsumptionem, impœnitentiā, obstinationem, impugnationem veritatis agnitæ, & fraternalis charitatis inuidiam*. Tamen negari non potest, quin præter hæc odium Dei sit grauissimum peccatum in Spiritum sanctum: quia directè opponitur Charitati Dei, per quam peccatorum remissio fit, sicuti notauit Valent. dis. 3. q. 11. p. 2. §. atque hinc. Sed ideo reliquis annumerandum non fuit, quia odium Dei grauissimum scelus est quasi mensura aliorum peccatorum, vt in specificam aliorum communicationem venire non soleat, sicuti indicat S. Thom. 2. 2. quæst. 34. a. 2. ad 1.

Secundum. Cum Fides ordine generationis antecedit Spem, tanquam hypostasis siue fundamentum: hinc est, quòd, amissa Fide per Apostasiam, vel hæresin, simul etiam necesse est amitti Spem: Contra verò, amissa Spe per actum ipsi directè, per se, ac perfectè oppositum, ( cuiusmodi est actus desperationis ) non semper etiam amittitur Fides. Fieri enim potest, vt tamen aliquis in vniuersali, ac veluti speculatiue credat, quod certa fide credendum est, omnibus hominibus ex Christi meritis, & auxilio Dei sufficiente, remissionem suorum peccatorum, & vitæ æternæ consecutionem absolute possibilem esse: attamen in particulari, propter adiunctas circumstantias,




& corruptam æstimationem ex passione acedia, luxuriæ, &c. liberatio à peccatis, & beatitudinis consecutio admodum difficilis alicui appareat: atque ut existimet, se de facto saluandum non fore, ideòque animum despondere omnemque conatum intermittere velit. Quæ est doctrina S. Th. suprà cit. q. 20. a. 2. Tol. lib. 4. cap. 7. §. desperatio Sanch. lib. 2. c. 33. n. 6. Becani 2. 2. c. 17. q. 9. in fine, Valentia 2. 3. disp. 2. q. 3. p. 2.

Interim verò negari non debet, desperationem si non ex infidelitate, saltem ex aliqua fidei infirmitate proficisci: ut rectè monet Gabr. in 3. d. 26. q. vn. a. 1. animum hominis, qui in desperationis barathro versatur, ante omnia in fide confirmandum, erigendumque esse ad considerandam misericordiam & dilectionem Dei, qui nos, cum peccatores essemus, prior dilexit, & proprio Filio non pepercit, sed pro nobis omnibus tradidit illum, ad Roman. 8.

Tertium. Peccata tum præsumptionis, tum desperationis, licet venialia esse possint ob defectum deliberationis, sicuti & alia omnia: semper tamen mortalia sunt ex par-

te materiæ: sicuti & odium Dei, blasphemia, & similia, quæ alicui Dei attributo, puta veritati, bonitati, misericordie, aut iustitiæ directè aduersantur, saltem secundum præcæ voluntatis affectionem: & interdum etiam secundum erroneum intellectus iudicium. Nam, ut rectè notauit Tolet. lib. 4. c. 7. n. 5. ad finem, Becanus 17. q. 12. n. 2. Sanc. lib. 2. c. 33. n. 8. aliquando huiusmodi peccata cum errore & hæresi intellectus iuncta sunt, v. g. fiducia Lutheranorum, qui sine cooperatione ac meritis se saluari posse existimant: & Pelagianorum, qui iustitiam, & præmium æternum solis etiam naturæ viribus à Deo obtineri posse iudicant. Aliquando verò dicta peccata sine hæresi sunt: cum intellectus nullum quidem de Deo erroneum iudicium speculatiue format; nihilominus practice iudicat, utile, aut delectabile esse homini, si ita voluntate erga Deum, cuiusve attributa affectus sit, eum odiendo, blasphemando, de eius misericordia nimis præsumendo, &c. perinde ac si odio, seu contumelia dignus, aut non iustus peccatorum punitor esset.



## TRACTATUS TERTIVS.

DE

# CHARITATE, MISERICORDIA, ATQVE OPPOSITIS VITIIS.

### CAP. I.

## QVID SIT CHARITAS.

### SUMMARIUM.

- 1 Charitas est virtus perfectissima, ac veluti forma aliarum, & regina.
- 2 Ut aliarum virtutum opera in homine iusto meritoria sint augenti gratia & gloria æterna, requiritur prauus actus seu imperium Charitatis.
- 3 Gratia sanctificans, & habitus Charitatis infusa, secundum probabilem sententiam sunt una qualitas realiter.
- 4 Dantur actus in individuo indifferentes, secundum rationem meriti ac demeriti.
- 5 Ad meritum singulorum operum bonorum non sufficit, si homo iustus in isto die omnia generatim Deo offerat.



CHARITAS non est aliud, quam excellentissimus amor: quare cum amoris obiectum sit bonum, siue finis, sequitur, quod obiectum primum Charitatis sit summum & excellentissimum bonum, atque ultimus finis supernaturalis, Deus, qui

secundum se, & propter se diligendus est: & propter quem, siue in ordine ad quem, reliqua diligenda sunt.

Corollarium I. Charitas inter omnes virtutes excellentissima est, teste S. Th. q. 23. a. 9. & Apost. 1. ad Corinth. 13. ad Colos. 3. Quia circa perfectissimum obiectum versatur: & quidem perfectiore modo, quam aliæ virtutes, quæ suis actibus Deum etiam attingunt, uti constat ex præced. tract.

Corollarium II. Charitas est forma reliquarum virtu-

tum, puta Fidei, Spei, Temperantiæ, Iustitiæ: aded ut sine Charitate non sint simpliciter dictæ virtutes hominis, quatenus is consideratur (sicuti à Theologo considerari debet) cum ordine ad supernaturalem beatitudinis finem, sicuti docet S. Th. 2. 2. q. 23. a. 7. & 8. & in 3. d. 30. q. 1. a. 5. in qq. disputatis, q. 6. quæ est de miraculis Dei, a. 9. & alij Scholastici in 3. d. 36. vbi S. Bonau. a. 1. q. 6. Gabr. q. 1. a. 2. p. 3. & 4. & sumitur ex S. Aug. lib. 1. de moribus Ecclesiæ c. 15. & lib. 4. contra Iulianum, c. 3. Nam virtus hominis est, quæ operationes eius ordinat ac dirigit, ut conuenienter fiant ad finem suum, uti tradit S. Th. 1. 2. q. 55. Finis autem ultimus hominis, considerati non præcise secundum vires naturæ, sed secundum dona gratiæ, est æterna beatitudo & coniunctio cum Deo: ad hanc autem promerendam, & consequendam viatores opera congruentem proportionem non habent sine Charitate, per quam solam uniuntur Deo. Idque ex sapientissima Dei ordinatione, passim in sacris literis declarata; quod meritum vitæ æternæ ex Charitate tanquam radice dependeat: ut sicuti finis hominis summus & excellentissimus est, ita etiam acquiri non possit sine præstantissima virtute, quæ est Charitas. Quia simili ratione S. Th. 1. p. q. 62. a. 4. ad 2. dixit; quod Angeli sola naturali conuersione ad Deum, beatitudinem mereri non potuerunt; sed conuersione charitatis, quæ est per gratiam.

Quamvis verò Doctores omnes in eo consentiant, reliquarum opera sine Charitate meritoria non esse gloriæ æternæ: disceptant tamen, qualenam sit hoc subsidium seu influxus Charitatis, ad meritum ex condigno necessarius.

Prima sententia est: Quod quibuscunque bonis operibus homo ex condigno mereatur gratiæ augmentum, & vitam æternam, modo in gratia Dei constitutus, & habitu Charitatis præditus sit. Vasq. 1. 1. dif. 127. c. 4. Sed est contra communem ferme Theologorum doctrinam: quia ut actus merito-



meritorius sit vitæ æternæ, debet habere habitudinem ad finem supernaturalem; vt sit proportio inter meritum ac præmium: atqui actus moralium virtutum, v. g. Misericordiæ, Iustitiæ, non habent habitudinem ac proportionem cum supernaturali fine: quandoquidem secundum se spectati non superant naturæ vires; neque suapte natura referuntur ad Deum, vt supernaturalem hominis finem. Ipsa verò habitualis Iustitia, siue Charitas moralium virtutum actibus talem proportionem seu habitudinem conferre non potest; cum non sit relatiua operum in Deum, tanquam finem supernaturalem, nisi in actum seu operationem transeat. Confirmatur: Ex hac sententia sequitur, si puer baptizatus, cum primum rationis vsum adeptus est, opus moraliter bonum, v. g. obedientiæ erga parentes, aut misericordiæ erga pauperem exerceat, quod augmentum gratiæ, ac gloriæ mereatur, licet adhuc nullum supernaturalem Fidei actum elicuerit: id autem absurdum videtur, quod Deus eius hominis opera ad supernaturalem gloriam acceptet, qui nondum de ipso cognitionem aliquam consecutus est.

Altera sententia est: Quod homo iustus quibuscunque bonis operibus ex condigno mereatur gratiæ, & gloriæ augmentum: modo procedant ex motiuo aliquo supernaturali, v. g. Fidei, aut Spei Theologicæ; quamuis nullus Charitatis actus antecesserit. Ita docet Suarez de gratia diuina, lib. 12. c. 8. & 9. & de Fide, disp. 6. c. 7. num. 16. Hæc sententia longè probabilior est, quàm prior. Sed mihi non placet: Primò, quia repugnare videtur Apostolo ad Galat. 5. *In Christo Iesu neque circumcisio aliquid valet, neque preputium, sed Fides, quæ per Charitatem operatur.* quibus verbis significat, neque ipsam Fidem vtilem esse ad vitam æternam promerendam, nisi ex Charitate tanquam radice pullulet: qua similitudine radice vitæ S. August. lib. 1. de gratia Christi, cap. 18. S. Th. 2.2. q. 23. a. 8. ad 2. & 1.2. q. 114. a. 4. ait, opera Fidei, Patientiæ, &c. non esse meritoria vitæ æternæ, nisi ex Charitate procedant: id autem actualem aliquem Charitatis influxum significare manifestum est. Etr. ad Corinth. 13. postquam dixisset Apostolus; Quod neque prophetia, nec Fides, nec opera misericordiæ quicquam absque Charitate profint, intellige ad vitam æternam: statim subiungit, quomodo per Charitatis imperium, adeoque præuiam actualem operationem, vtilia fiant. *Charitas patiens est, benigna est, &c.*

Secundò: Constat ex sacra Scriptura, & est communis Theologorum sententia, vt opus bonum hominis meritorium sit vitæ æternæ, fundatum esse debere in Charitate & amicitia cum Deo; ita vt fiat propter Deum; siue, quod eodem recidit, ad implendam gloriam Dei, amplificandum nomen Dei: Atqui hoc ipso, quod opus bonum ita exercetur propter Deum seu ob amicitiam cum Deo, ex imperio & actuali motione Charitatis prouenit: vt si quis pauperi panem porrigat propter Christum, seu quia Christi discipulus est: sicuti si quis filio donet propter patrem, seu intuitu patris, & in gratiam patris.

Tertiò: Homo iustus si bonis operibus meretur gloriam æternam, quibus meretur gratiæ, & Charitatis augmentum: sed non videtur conueniens, Charitatem habitualem augeri, nisi per actus aliquo modo ab ea procedentes: cum neque alij habitus aliter augeantur. Loquor autem de actibus virtutum non dependentium aut connexarum: quemadmodum si quis actum Temperantiæ exerceat, tunc habitus Iustitiæ non augetur: & simili ratione si quis actum Fidei exerceat, augmentum virtutis Spei à Deo non impetrat: quia Fidei actus Spem connexionem non habet. At verò neque Fides, neque Spes à Charitate pendent: sed illarum actus sine Charitate exerceri possunt: ergo tunc non est credibile, Charitatem augeri. Alia verò ratio est de ipsa Charitate, quæ cum sit regina virtutum, ac vinculum perfectionis, cum eius augmento aliarum etiam supernaturalium virtutum augmentum

merito coniunctum est.

Tertia sententia est: Quod primus, & vnicus actus Charitatis, quo homo se, & omnia sua, etiam cōsequentia opera, in Deum refert; tanquam summum bonum, & vltimum supernaturalem finem suum, sufficiens sit, vt sequentibus bonis operibus in gratia Dei factis, vim merendi tribuat, tametsi ab eo nullo modo nec elicitive procedant. Ita docent Sotus lib. 3. de natura & gratia, c. 4. Valentia to. 2. disp. 8. q. 6. p. 3. Barthol. Medina. 2. q. 114. a. 4. Est probabilis sententia: quia rectè intelligi potest, quod clementissimus Deus opera bona hominis iusti, qui se, & omnia sua in Deum, vt vltimum supernaturalem finem, retulit, talémque voluntatem nunquam mutauit ad iustitiæ augmentum, & gloriam æternam conferendam acceptet, propter interpretatiuam operum reuelationem ad Deum: quandoquidem talis operans ita dispositus est vt si ei in mentem veniret, opera virtutum actualiter in Deum per Charitatem referret. Sed non sequitur hanc sententiam, quia, vt mox amplius patebit, sacra literæ, & Doctores actualem Charitatis operationem siue imperiū requirunt, vt opera aliarum virtutum meritoria vitæ æternæ fiant, quamobrem non sufficit relatio interpretatiua.

Quarta sententia quam veram iudico, est S. Th. 1.2. q. 114. a. 4. & 2.2. q. 23. a. 8. ad 3. & in qq. disputatis, q. de miraculis. a. 9. & in 4. d. 30. q. 1. a. 5. Durand. in 2. d. 40. q. 2. S. Bonau. d. 41. a. 1. q. 3. Scoti ibid. q. 1. Gabr. a. 3. d. 2. Richar. in 3. d. 30. a. 1. q. 4. Palud. in 3. d. 23. q. 4. a. 3. Bellarmini lib. 5. de iustific. c. 15. vbi eandem communiori appellat: Quod nullum opus hominis iusti meritorium sit gloriæ æternæ, & augmenti iustitiæ in hac vita, nisi vel eliciatur à Charitate, vel ab eadem imperetur, atque in Deum vt finem vltimum supernaturalem referatur; siue id fiat per præsentem Charitatis actum, (quod est actualiter referri) siue per præteritum Charitatis actum, quod est virtute referri: v. g. si proposuisti summam pecuniæ pauperibus propter Deum erogare: & postea oblata occasione vi illius propositi eroges, tametsi tunc nihil amplius de Deo cogitans; opus hoc elemosinæ virtute in Deum refertur, atque à Charitate imperatur. Probatur hæc sententia ratione S. Th. ci. a. 4. Nā ita sapientissimus Deus ordinauit, vt finem vitæ æternæ, quæ in comprehensione ac fruitione summi boni cōsistit, homo viator non mereatur, nisi per motum liberæ voluntatis proportionatum; videlicet quo fertur in vltimum finem summumque bonum per modum vniōis & amicitiae: atqui iste motus proprius est actus Charitatis: ergo meritum vitæ æternæ, inquit S. Doctor, *primò pertinet ad Charitatem: ad alias autem virtutes secundariò, secundum quod earum actus à Charitate imperantur.* Et in cit. a. 9. ait, quod omnes alie virtutes habent efficiaciam merendi à Charitate, quæ nos vnit Deo, à quo meremur.

Huc etiam spectat, quod ex communi Theologorum sententia supra dictum est, Charitatem esse formam reliquarum virtutum omnium; non quòd alie virtutes sine Charitate veram in suo genere virtutis rationem non habeant: quandoquidem etiam in infidelibus reperiuntur; teste S. Th. 1.2. q. 65. a. 2. Durando in 3. d. 36. q. 1. S. Bonauent. ibid. q. 6. n. 46. sed quia ad promerendam vitam æternam inutiles, ac steriles sunt: à Charitatis autem motione & imperio vim, valorem, dignitatemque apud Deum obtinent. Eodemque recidit, si dicas cum S. Th. reliquas virtutes hominis sine Charitate perfectas non esse, sed perfectionem à Charitate accipere, quando eius imperio ad supernaturalem finem diriguntur: quo sensu etiam Apostolus dixit ad Colos. 3. *Super omnia Charitatē habere, quod est vinculum perfectionis.* Exempli causa, qui per virtutem Spei circa Deum versatur, præcisè vt remuneratorem bonorum, is eo actu per se ac directè non Dei honorem, gloriam; sed propriam vtilitatem, oblectationemque querit: quare dignus non est æternæ cum Deo



coniunctionis remuneratione. Nisi actus Spei ex motione siue imperio Charitatis procedat: vt beatitudinem, & alia Dei dona spiritualia desideremus, & expectemus propter Dei amorem, gloriam: quippe cum beatitudinis expectatio, & consecutio nostra Deo placeat, & ab ipso præcipiatur.

Rectissime etiam secundum traditam sententiam explicantur varia Scripturæ loca: Videlicet, cur Christus Matth. cap. 10. & 19. atque alijs sæpe mercedem gloriæ operibus bonis non simpliciter promittat, sed si fiant propter nomen eius, vel si exerceantur erga iustum in nomine iusti: id est, quia Dei seruus, Christi discipulus, à Deo dilectus est. Item cur Apostolus Iacobus in epist. c. 1. dixit, quod coronam vitam promissit Deus non quibuscunque, sed diligentibus se. Et cur Apostolus Paulus 2. ad Corinth. 10. tam sollicitè monet. *Sive ergo manducatis, siue bibitis, siue aliud quid facitis, omnia in gloriam Dei facite.* Et ad Colos. 3. *Omne quodcumque facitis in verbo, aut in opere, omnia in nomine Domini Iesu Christi, gratias agentes Deo, seu glorificantes Deum.* Denique cur ab eodem Apost. ad Roman. 6. vita æterna gratia Dei appelletur, quia vt S. August. ait in lib. de correptione & gratia, cap. 13. *redditur meritis, quæ contulit gratia.* Et epist. 105. ad Sixtum, *omne meritum in nobis non facit nisi gratia, & cum coronat Deus merita nostra, nihil aliud coronat, nisi munera sua.* Quod verò S. August. nomine gratiæ intelligat sanctificantem, quod tanquam principio homo inclinatur ad actus meritorios exercendos, patet ex eodem S. August. in lib. de Prædestinatione Sanctorum, cap. 5. vbi explicans illud Apostolin. ad Corinth. *Si autem accepisti, quid gloriaris quasi non acceperis?* ita inquit: *Nihil huic sensui tam contrarium est, quam de suis meritis sic quemquam gloriarì, tanquam ipse sibi ea fecerit, non gratia Dei: sed gratia, quæ bonos disceruit à malis: non gratia, quæ communis est bonis & malis.*

3 Neque refert hoc loco, siue existimes, gratiam sanctificantem realiter eandem esse cum habitu Charitatis infusæ: quamuis differat ratione: dicitur enim gratia in ordine ad subiectum, quod sanctificat: Charitas autem in ordine ad operationes, ad quas animam & voluntatem promptam, expeditamque reddit, quæ est valde probabilis sententia Magistri in 2. d. 26. ibid. Richar. a. 1. q. 1. Duran. q. 1. Scoti. q. 1. §. Hic quaeritur: Henric. quodlib. 4. q. 10. Bellarm. lib. 1. de gratia, & lib. arbit. cap. 6. Salmeronisto. 15. in epist. ad Galat. c. 3. Siue existimes cum S. Th. 1. 2. q. 110. a. 3. esse qualitates distinctas: quia gratia bene afficiat animam secundum se; Charitas verò afficiat voluntatem ad operationem. Nam etiam secundum hanc sententiam, gratia & Charitas inuicem subordinatæ sunt in ratione meriti: quia, vt S. Th. ait in 3. d. 30. q. 1. a. 5. ad 1. *gratia facit meritum sicut principium remotionem, constituens nos in esse spirituali, sine suo non possumus mereri: sed Charitas est sicut proximum merendi principium.*

4 Corollarium I. Licet nullus actus plene rationalis ac deliberatus in indiuiduo indifferens sit, secundum rationem bonitatis ac malitiæ moralis, sicuti dixi lib. 1. tr. 2. c. 8. n. 3. Sunt tamen in homine tum peccatore, tum etiam iusto actiones indifferentes secundum meritum ac demeritum vitæ æternæ, vti bene distinguit Durandus cit. d. 40. q. 1. & 2. Si videlicet homo opera bona virtutum exerceat, sine vlla seu actualiter præsentē, seu præterita & virtualiter manente Charitatis relatione in Deum. Aduerte tamē cum S. Th. cit. q. 6. quæ est de miraculis, a. 9. Durando in 4. d. 15. q. 3. Adriano in 4. de Sacram. Pœnitentiæ, vbi de satisfactione, q. Discussio an vnum mortale: Quod opera virtutum etiam moralium, atque ex motiuo moralis tantum honestatis præstita, ob quandam congruitatem secundum beneplacitum Dei mereri possint temporalem aliquam prosperitatem: quo modo legimus Deum in veteri Testamento sæpe remunerasse opera virtutum, etiam à peccatoribus præstita.

5 Corollarium II. Non sufficit homini iusto ad prome-

rendum singulis actionibus bonis augmentum gratiæ, ac gloriæ æternæ, quod principio anni, mensis, hebdomadis diei, v. g. manè postquam è lecto surrexit, totum se Deo ex charitate offerat, cum proposito omnia ad ipsius gloriæ operandi: sed necesse est, vt propositum hoc efficax sit, id est, verè causa operum subsequentiū existat. Tamen enim homo principio diei omnia agere proponat ob amorem Dei; fieri tamen solet, vt postea multa agat non vi eius propositi: sed ex motiuo merè humano, aut etiam moralis solum honestatis: vt si parentibus obtemperet, ne ab illis verberetur: vel quia id secundum morum honestatem decens est. Signum autem erit, tales actiones non prouenire ex motiuo & proposito Charitatis antecedente; si facta hypothesi, quod tale propositum non antecesserit, nihilominus actiones illæ eodem modo exercitæ fuissent: quia aliud sufficiens agendi motiuum habuerunt, vti dixi. Sin verò propositum operandi propter Deum quamuis aliquo modo generale, verè causa existat subsequentiū operum, adeò quidem, vt absque præcedente Charitatis intentione exercita non fuissent: tum rectè dicitur, ea ex præuia motione & imperio Charitatis, virtualiter adhuc manente, prouenire, ideòque in homine iusto meritoria esse vitæ æternæ. Ita præter alios docet S. Bonau. in 2. d. 41. a. 1. q. 3. Bellarm. lib. 5. de iustific. c. 19. & optimè explicat Ioan. Busæus in viridario virtutum vbi de intentione recta, c. 4. Ad meritum boni operis requiritur, vt vel tunc cum sit, actui imperetur à Charitate, atque in Deum vt finem supernaturalem ac vltimum referatur, vel cerè nascatur ab actu imperato à Charitate, atque in Deum ante relato, quod est virtute referri. Tunc enim dicitur opus aliquod virtute in Deum relatam, cum intentio antegressa verè est causa illius, vt fiat. Quare si quis generalis tantum intentione initio anni, mensis, vel diei omnia futura opera ad gloriæ Dei offerat, vt quidam laudabiliter faciunt, non ideo dicitur virtuali intentione obtulisse, singulisque bonis operibus, licet in gratia sit constitutus, vitam æternam promeruisse.

Dicere itaque debemus, quod propositum initio hebdomadis, aut diei conceptum, ob Dei amorem omnia opera in gloriæ eius agendi, secundum se actus Charitatis, ac Religionis sit, tantò præstantior, magisque meritorius, quantò extensius obiectum habet. At verò, vt opera sequentia ex tali actu meritoria fiant supernaturalis iustitiæ, aut gloriæ, necesse est, vn sint effectus illius. Exempli causa: Aliquis ob amorem Dei, & ad gloriæ eius, constituit peregrinationem instituere: quascunque deinde in via actiones exercet, aut labores perfert, meritoria ipsi sunt apud Deum, si fiant ex vi ac necessitate propositi illius, nunquam reuocati.

Eodemque modo de Religioso ratiocinandum est, si ob amorem Dei per Obedientiæ reliqua voluntaria vota veluti holocaustum se Deo obtulit: omnia quæ ex necessitate illius obligationis, in qua voluntariè perficit, seu opera exercentur, seu labores perferuntur, apud Deum meritoria fieri: tamen intentio ob Dei gloriæ aut amorem operandi, perferendi, non repetatur aut renouetur. Quemadmodum etiam in humanis, si quis opus aggrediat in principis viri obsequium ac honorem: quæcunque in illo opere proficiendo veluti necessaria agit, Princeps remunerare debet, tanquam quæ sui gratia facta sint.

Veruntamen etiam Religiosi (& non tantum personæ seculares, quæ non ita Deo obligatæ sunt) interdum actiones aliquas liberas exercent, ad quas vi status aut professionis suæ non obligantur: ideo tum ob hanc causam, tum etiam quia specialis & actualis intentio, seu relatio operis in Deum, certior, & aptior est ad promerendum, quam generalis, aut virtualis: ideo omnibus tum Religiosis, tum secularibus suadendum est, vt initio actionis cuiusque mentem in Deum eleuent, cuius amore, & ad cuius gloriæ operaturi sunt: vel quod magis consultum, ad imitationem veterum Christianorum dicant versiculum Davidis; *Deus in adiutorium meum intende: Domine ad adiuuandum me festina: Gloria Patri, & Filio, & Spiritui sancto, &c. &c.*



&c. vt eadem opera & Dei sibi necessarium auxilium petant, & ob ipsius amorem ac gloriam operi decernant.

## CAP. II.

## De Præceptis charitatis.

## SUMMARIUM.

- 1 Duo sunt præcepta charitatis: de Deo diligendo, ac proximo.
- 2 Præceptum dilectionis Dei primum ac maximum est.
- 3 Iubemur Deum super omnia diligere, secundum maiorem estimationem, non actus intensiorem.
- 4 Nefas est Deum diligere propter mercedem vitæ æternæ, tanquam finem principale: sed causa adminiculans & impellens ad diligendum potest esse spes præmij, sicuti & timor pœnæ.
- 5 Præceptum dilectionis Dei, licet à nobis secundum omnem perfectionem impleri non possit: potest tamen eomodo, sicuti ad viatorem pertinet.
- 6 Præceptum negatiuum de non odiendo Deo, semper obligat; sed affirmatiuum diligendi certis tantum casibus.
- 7 Præceptum de proximo diligendo dicitur secundum, & affine primo.
- 8 Præcepta charitatis in Decalogo non expresse; sed virtualiter continentur, tanquam principia in conclusionibus.

**D**uo sunt præcepta Charitatis: Primum de Deo: alterum de proximo diligendo. Præceptum de diligendo Deo super omne bonum traditur in Deuter. c. 6. apud S. Matth. c. 22. Luc. 10. *Diliges Dominum Deum tuum ex toto corde tuo, & ex tota mente tua, & ex tota anima tua, & ex totis viribus tuis.* Sensus verborum est: Quod homo diligere Deum debet ex omnibus facultatibus suis, quarum quatuor præcipue sunt: Vna intelligendi, altera appetendi, tertia sentiendi, quarta loco mouendi: vt proinde nihil sit in intellectu, nihil involuntate ac desiderio, neque in sensu, neque in externa operatione, quod non Deo subijciatur, siue in Deum referatur. Ita enim interpretatur S. Aug. lib. 1. de doctr. Christiana c. 22. *Cum ait, toto corde, tota mente, &c. nullam vitam nostram partem reliquit, que vacare debeat, & quasi locum præbere, vt re alia fruatur: sed quicquid aliud venerit in mentem, illuc rapiatur, quod totus dilectionis impetus currit.* Vide etiam S. Th. 2. 2. q. 44. a. 5. Gabr. in 3. d. 27. q. 1. a. 1. notan. 5.

2 Præceptum hoc de diligendo Deo primum ac maximum dicitur Matth. c. 22. quia est de excellentissimæ virtutis primario actu, eoque imprimis necessario ad salutem. Nam *Charitas est*, inquit S. August. in ep. S. Ioan. tr. 5. c. 3. *sine qua nihil prodest, quodcumque habuerit: quam si solum habeat, sufficit tibi.* Et Apost. ad Colos. 3. *Super omnia Charitatem habete: quod est vinculum perfectionis:* Siquidem Charitas facultatibus atque virtutibus alijs imperans, earum actiones ad Deum refert, tanquam finem vltimum summumque bonum: vt proinde, qui præceptum Charitatis erga Deum obseruat, facile etiam & consequenter non solum proximos propter Deum diligit, sed etiam reliquas Christianas virtutes acquirat, legemque vniuersam impleat: quare dixit Apost. ad Rom. 13. *Plenitudo legis est dilectio.* Et 1. ad Cor. 13. *Quid diligit me, sermonem meum seruabit.* Et S. Ioan. epist. 1. cap. 2. *Quid seruat verbum eius, vere in hoc Charitas Dei perfecta est.*

Alio modo hoc ipsum ostendit S. Th. q. 44. a. 1. *Eatenus aliquid est in præcepto, quatenus debiti rationem habet: In vnoquoque autem genere magis debitus est finis, quam media, quæ sunt ad finem: (quia illud quod est per se, potius est eo, quod est per accidens, siue propter aliud) v. g. Medico per se primo requiritur vt sanet: per accidens & secundario, vt medicinam tribuat: At qui finis virtutis spiritualis, ad quem homo tanquam ad propriam perfectionem tendere debet, est, vt vniatur Deo, quod fit per Charitatem. Reliquæ autem virtutes cum Theologicæ, tum morales sunt de operationibus, quibus homo ad*

Charitatis perfectionem disponitur, testante Apost. 1. ad Timoth. 1. *Finis præcepti est Charitas:* quia nimirum ad Charitatis perfectionem reliquæ virtutes ordinantur. Ergo cum de alijs virtutibus præcepta extent, multo magis de Charitate.

Porro pro pleniori huius præcepti intellectu tria notanda sunt: Primum. Quod iubemur Deum super omnia, id est, magis quam esse omnes creatas, diligere, id intelligi debet secundum maiorem estimationem (siue vt alij dicunt appretiationem) Dei, diuiniq. amoris & amicitia: non autem intelligi debet secundum maiorem amoris intentionem. Etenim licet decens sit, & ad maiorem Charitatis perfectionem spectet, vt summum bonum intensiore ac vehementiore amore: quam alia bona creata, amemus, id tamen in præcepto de dilectione Dei super omnia non continetur, sicuti ex communi docet Gabr. cit. d. 27. q. 1. a. 1. notan. 6. & a. 2. conclus. 7. Nau. c. 11. n. 19. Suar. 3. p. t. 4. disp. 4. s. 4. n. 7. Tol. lib. 4. c. 9. §. Deus. Gregor. Valent. to. 3. disp. 3. q. 4. p. 1. & 2. Sanchez 2. moral. cap. 35. num. 2. contra Scotum in 3. d. 27. q. 1. art. 3. §. de primo dico. Etenim sicuti fieri solet, vt aliquis catulum v. g. feruentius ac tenerius amet, quam proprium filium, non tamen firmitus, aut magis æstimator: quod inde cognoscitur, quia si vel catulus, vel filius amittendus foret, vtique canis relinqueretur, & filio posthaberetur; ita etiam fieri potest, vt aliquis sine culpa tenerius, atque intensius amet creaturam; puta uxorem, liberos, vel amicum, quam creatorem: non item firmitus, & magis æstimator, si animo paratus sit creaturam deferere, eiusque amicitiam dissolvere potius, quam vt amicitia cum Deo soluat. Quare, quod Dominus ait apud S. Matth. c. 10. *Qui amat patrem, vel matrem plus quam me, non est me dignus:* id secundum maiorem appretiationem siue æstimationem intelligi debet.

Alterum. Etsi nefas sit Deum diligere propter mercedem vitæ æternæ, tanquam finem principalem, & causam propriè finalem; nam hic amor mercenarius est, cuius ratio finalis ac principalis est, vt merces acquiratur: quare qui ita Deum diligit, plus se, quam Deum diligit: Fas tamen est diligere Deum propter mercedem vitæ æternæ tanquam finem minus principalem, & causam impellentem, teste David. Psal. 118. *Inclinavi cor meum ad faciendas iustificationes tuas in æternum, propter retributionem.* Rectè inquam, ac meritorie agit, qui spe vitæ æternæ, vel timore inferni excitatus ac commotus, in Deum diligendum fertur: non propter aliud, v. g. proprium: commodum: sed propter ipsum Deum, sicuti tradit S. Th. 2. 2. q. 27. a. 3. vbi ait: *Pari ratione nos ex beneficijs ab amico acceptis, vel accipiendis disponi ac moueri ad eundem diligendum: quem tamen non propter beneficia, (nam talis amor concupiscentiæ esset) sed propter virtutem amoris amicitia diligitur.* Consentit Gabr. in 3. d. 26. q. 1. a. 3. dub. 6. Syl. ver. charitas. q. 7. Nauar. cit. cap. 11. n. 20. Sanchez cit. c. 35. n. 3. Tolet. lib. 4. cap. 9. §. cum igitur.

Quod verò Sanchez l. c. ait; *Tunc dilectionem mercenariam ac prauam esse, quando, nisi capramij spes adesset, non diligeremus;* id dupliciter intelligi potest: Vel de actuali voluntatis affectione, secundum quam homo, instar mercenarij, operam vel obsequium suum domino exhibentis nollet Deum diligere, eiusque mandata implere, seclusa mercede: & sic rectè loquitur Sanchez. Vel intelligi potest de habituali voluntatis dispositione, ac infirmitate; secundum quam homo agnoscit, ac dolet, ita comparatum se esse, vt, nisi vel spe præmij æterni, vel timore inferni ad Deum diligendum, & mandata eius seruanda incitaretur, nequaquam ea præstiturus esset: & in hoc nihil culpæ committitur, sicuti etiam dixi lib. 1. tr. 2. c. 6. num. 9.

Tertium. Etsi præceptum de diligendo Deo ex toto corde, tota mente, &c. secundum perfectionem simpliciter dictam in hac vita impleri nequeat; potest tamen ita per-



fectè impleri, sicuti ad viatorem pertinet. Ita S. Aug. lib. de perfect. iustitiæ, resp. ad 16. S. Th. q. 44. a. 6. S. Bon. in 2. d. 27. a. 2. q. 6. Richar. ibid. a. 8. q. 2. Gabr. q. vn. a. 3. Valent. tom. 3. disp. 3. q. 19. p. 1. Mol. tract. 5. de iust. disp. 59. in fine, & alij communiter. Prior pars explicatur: Nam diligendi perfectio simpliciter dicta consistit in actuali continua voluntatis vnione cum Deo, & relatione omnium actionum in ipsum: huiusmodi autem dilectio non in via vitæ huius mortalis, sed in salutis termino haberi potest, testante Apost. ad Philip. 3. *Non quod iam acceperim, aut perfectus sim: sequor autem, si quomodo comprehendam.* Ratio est, quia Beati in cælo Deum summum bonum suum, per claram eius visionem, continuò sibi propositum habent: ut nulla vnquam ratio adsit, cur voluntas eorum non continuè in Dei amorem rapiatur. At verò in hac vita, præsertim post lapsum humani generis in peccatum, propter insitam naturæ infirmitatem, mentis ignorantiam: effugere non possumus, quo minus ab actuali Dei consideratione & amore sæpe abistamus, & ad creaturas amandas descendamus: interdum verò eas amemus, ac desideremus non cum ordine ad Deum, adeòque actum otiosum, aliudve veniale peccatum cōmittamus: quod licet diuinæ Charitati & amicitiae non animo repugnet, sed cum eadem consistere possit: tamen imperfectiorem aliquam voluntatis & amoris secum adfert. Et hoc est, quod aiunt Doctores, peccatum veniale non esse contra Deum, cum eius amicitia non dissoluatur, sed præter Deum, & ob hanc ipsam causam peccatum, ac malum: quandoquidem nihil vnquam hominem deliberatè agere oportet, quod nō in Deum aliquo modo referatur. Vide quæ dixi lib. 1. tr. 3. cap. 5.

Posterior verò pars probatur ex epist. 1. S. Ioan. c. 2. *Qui seruat verbum eius, verè in hoc Charitas Dei perfecta est.* Et c. 5. *Hæc est Charitas Dei, ut mandata eius custodiamus & mandata eius gratia non sunt:* igitur nec impossibilia. Et Matth. 11. ait Christus, *Iugum meum suauis est, & onus meū leue.* In hoc autem consistit impletio præcepti Charitatis in via: vt viator finem suum cognoscat, ad quem tendere debeat, eumque rebus alijs omnibus appetitiuè anteponat: deinde impedimenta salutis, quæ sunt peccata, à se remouere studeat: & nunquam se satis perfectum agnoscat, sed in dies magis ad Charitatis perfectiorem peruenire contendat, secundum Apostolum ad Phil. cit. cap. 3. Videri potest S. August. in lib. de perfect. iustitiæ.

6 Quæritur nunc, quibus temporibus præceptum dilectionis Dei obliget? Respondeo & dico I. Præceptum negatiuum de non odiendo Deo, nihilque agendo, quod eius dilectioni & amicitiae contrarium sit, semper obligat.

Dico II. Præceptum affirmatiuum de Deo super omnia diligendo certis tantum temporibus obligat. Ita omnes. Sed quænam sint illa obligationis tempora, difficile est definire. Valentia disp. 3. q. 19. p. 1. in fine septem recēset ex Soto lib. 1. de natura & gratia, cap. 22. & lib. 2. de iust. q. 3. a. 10. Sanchez verò lib. 2. c. 35. ex iisdem, & alijs Auctoribus nouem enumerat: sed pleraque reiicit, quia incerta ac dubia sint. Quatuor tamen mihi certiora videntur, quorum duo priora continent obligationem per se alia per accidens. Primum est: Cum primum homo vsum, rationis adeptus, Deum tanquam vltimum finem supernaturalem per lumen Fidei sufficienter propositum sibi habet, tunc obligatus esse videtur, vt longam moram non trahat, quin eum voluntate acceptet, & sua omnia opera in eum referat, sicuti docent Doctores apud S. Th. in qq. disp. q. 28. a. 3. ad 4. & ipsemet S. Th. 1. 2. q. 89. a. 6. Bannes 2. 2. q. 10. a. 1. dub. 2. Sotus & Valentia locis citatis. Nau. c. 11. man. num. 8. & sumitur ex ijs, quæ dixi suprâ tract. 1. c. 10. & tract. 2. c. 2. num. 1. Quia ad statum & officium viatoris pertinet, vt ad finem suum, qui Deus est, se conuertat, eum rebus omnibus creatis præferendo cum alioquin neque iustitiam consequi, aut in Baptismo

acceptam longo tempore retinere, neque per bona operaiustitiæ augmentum, & gloriam æternam promereri possit. Confirmatur ex doctrina S. Thom. 1. 2. q. 100. a. 3. ad 1. Quod præceptum de diligendo Deo prærequiritur tanquam necessarium principium ad seruandas leges naturæ in Decalogo contentas: ergo non debet homo diu morari, quin principium hoc ponat.

Intelligitur autem quod dixi, vt longam moram non trahat morali rerum æstimatione: posteaquam præceptum hoc diligendi, tanquam ad salutem necessarium, homini propositum fuit. Quod fieri deberet à Parentibus, Parochis, Confessarijs, vt pueros, ac rudes admoneant, cogitare à quo creati, & cur in hoc mundo positi sint: nimirum, vt Deo rerum omnium Auctori ac Domino seruiant, ad ipsum tanquam finem suum actionibus tendant, qui in perpetuum vniti esse debent. Addit verò Suarez de Charitate disp. 5. sect. 3. in fine: quod homo sapius etiam in vitæ decursu, actum eiusmodi Charitatis erga Deum elicere obligatus sit.

Secundum tempus. Cum ingruente graui tentatione, periculum homini impendit, ne in odium Dei labatur, nisi contrarium diuinæ Charitatis actum eliciat.

Tertium. Cum quis actum contritionis exercere tenetur, v. g. moriturus, aut sacrificaturus, vel sacramentum ministraturus, si conscius peccati mortalis, Confessarij copiam non habeat. Nam actus contritionis, cum sit dolor de offensa Dei super omnia dilecti (sicuti dicam lib. 5. tract. 6. c. 1. num. 6.) actum Charitatis necessariò includit.

Quartum. Si quis existimet grauem tentationem, præsertim mortis tempore, se non superaturum, nisi per amorem in Deum conuertatur. Verum rectè obseruat Valentia cit. q. 19. p. 1. §. dico secundò, & Sanch. cit. c. 35. num. 4. Interdum satisfieri præcepto Charitatis, si Deus super omnia diligatur amore naturali, seu vt est auctor naturæ lapsæ, lumine naturali cognoscibilis, quando v. g. tentatio peccati tali dilectione sufficienter superari potest: quamuis neque hic ipse actus Charitatis sine actuali auxilio diuinæ gratiæ exerceri queat, teste Valētia ibid. Vide etiam Suarez de Charitate, disp. 5. sect. 3.

Secundum atque simile primo Charitatis præceptum 7 est: *Diliges proximum tuum, sicuti te ipsum*, Matth. 22. Luc. 10. Appellatur secundum, quia est de secundario & minus principali Charitatis obiecto. Appellatur simile, siue affine primo, quia ex eo consecutione quadam oritur, iuxta illud S. Ioan. ep. 1. c. 4. *Hoc mandatum habemus à Deo, vt qui diligit Deum, diligat & fratrem suum.* Siquidem diuina bonitas ratio & causa est, cur homo ex Charitate diligere possit, ac debeat imprimis ipsū Deum, deinde proximum propter Deum. Nomine autem *proximi* oportet intelligere eum, quem per lumen Fidei cognoscimus diuinorum bonorum, gratiæ inquam & amicitiae, atque cælestis gloriæ nobiscum participem: videlicet Angelos, homines beatos, viatores, etiam animas in purgatorio detentas: non item malos dæmones, homines damnatos creaturas irracionales, sicuti docent DD. in 3. d. 28. S. Bonauent. 2. 1. q. 1. & 2. & d. 29. a. 1. q. 3. S. Thom. 2. 2. q. 25. & q. 44. a. 7. vbi monent: Quod iubemur proximum, diligere sicuti nos ipsos, non esse intelligendum secundum æqualitatem (quia ordo Charitatis postulat, vt quisque se ipsum potius diligat, quàm proximum suum, sicut dicam cap. seq.) sed secundum similitudinem, quæ in eo consistit, vt sicuti nobis ipsis, ita & proximis nostris amemus ac desideremus ea omnia, quæ ad amicitiam vnionemque cum Deo, ac beatitudinem æternam pertinent, vel conducunt.

Denique aduerte cum S. Thom. 1. 2. quæst. 100. a. 3. 8 in corpore, & ad 1. Duo præcepta de Deo, ac proximo diligendo, idcirco in Decalogo non fuisse numerata: quia sunt prima practica principia, quæ omnibus statim innotescunt, seu per naturalem considerationem, seu per Fi-



dem: vt proinde necesse non fuerit ea foris scribi, & populo Israelitico in tabulis proponi. Quamuis præcepta dilectionis in decem præceptis virtute continentur, tanquam principia in conclusionibus siquidem, vt supra dixi omnia aliarum virtutum præcepta ordinantur ad Charitatem tanquam ad finem. Ita docet idem S. Thom. cit. q. 44. a. 1. ad. 3.

## C A P. XII.

## De ordine charitatis.

## S V M M A R I V M.

- 1 Non omnia, quæ ex Charitate diligenda sunt, æque diligenda, sed cum ordine.
- 2 Propria anima salus nulli alteri bono creato posthaberi potest.
- 3 Proximo in extrema necessitate spirituali versanti succurrendum est, cum certo periculo propria vita.
- 4 Pastores autem animarum etiam in graui spirituali periculo constituti succurrere tenentur, posthabito proprio periculo corporali.
- 4 Propriam vitam pro aliena vita exponere ordinariè non est licitum.
- 5 Vitam hominis innocentis præferre oportet vitæ nocentis, si cetera paria sint.
- 6 Qui nobis consuetiores sunt, magis diligendi, ac iuuandi, quam alij.

**S**uppono primò: Non omnia, quæ ex Charitate diligenda sunt, pariter siue æqualiter diligenda esse; sed Charitatis ordinem seruandum. Ita docent Scholastici in 3. d. 29. vbi S. Bonau. a. 1. q. 2. & 3. Richar. a. 1. S. Thom. 2. 2. q. 26. allegans illud Cant. 2. *Introduxit me Rex in cellam vinariam, ordinauit in me Charitatem.*

Suppono secundò: Cùm diligere aliud non sit, quàm alicui bonum velle, ideo ad duo nobis attendendum esse, vt Charitatis ordinem reperire possimus: videlicet ad personam, quæ diligitur, & ad rem, quæ in illa diligitur, vel illi desideratur. Quod ad primum horum attinet; Quatuor ex Charitate nobis diligenda sunt, hoc ordine. Primum est supra nos, *D a v s*: Alterum sumus, nos ipsi: Tercium est iuxta nos, proximus: Quartum est infra nos, corpus hominis. Ita docent Scholastici in 3. d. 28. vbi Richard. a. 1. Gabr. quæst. vnic. S. Thom. 2. 2. q. 25. a. 12. ex S. August. lib. 1. de doctrina Christiana, c. 23. 26. 27.

Prouenit autem ordo iste diligendorum ex diuerso modo sortiendi formalem dilectionis rationem, quæ est diuina bonitas. Cùm enim ea in Deo perse primò, & secundum essentiam insit; ideo Deus primò, præcipuè, ac maximè diligendus est, tanquam fons omnis boni, atque fundamentum & causa omnis bonæ ac ordinatæ dilectionis, sicuti docet idem S. Thom. quæst. 26. a. 3. Postremum locum obtinet corpus hominis, quippe quod diuinorum bonorum, gloriæ, ac beatitudinis cœlestis per accidens tantùm capax est, videlicet secundum beatitudinis fructum, ac veluti dotem ex anima beata redundantem, sicuti docet S. Thom. quæst. 25. a. 5. ad 2. & quæst. 26. a. 5. Gabr. cit. distinct. 28. quæst. vnic. a. 2. conclus. 8. Quæ verò intermedia sunt intellectuales creatæ substantiæ, beatitudinis per se capaces, ex ex vno capite tantò magis diligendæ sunt, quantò magis ad similitudinem ac participationem bonitatis ac perfectionis diuinæ accedunt: Ex altero vero capite potior ac vicinior est ratio diligendi seipsum, quàm alterum: sicuti prior est vnitas siue identitas, quàm coniunctio seu societas. Seipsum enim quisque ex Charitate diligit, quia diuinorum bonorum particeps esse potest: proximum verò, quia eorundem comparticeps & socius: vt proinde hic locum habeat doctrina Aristot. lib. 9. Ethic. cap. 8. & 9. quòd appetibilia alijs sunt ex appetibilibus sibi. Ex quo eodem capite prouenit, quòd eos qui nobis coniunctio-

res sunt, potius quàm alios diligere debeamus, vt infra dicam. Videri potest S. Bonau. in 3. d. 29. q. 3. Rich. 2. r. q. 3. Gabr. q. vn. 2. 2. conclus. 4.

Quod ad alterum attinet: Tria sunt bonorum genera; quæ vel nobis ipsis, vel alteri velle possumus: Primum continet spiritualia bona, gloriæ, gratiam, & virtutes: Alterum bona corporalia: vitam & ianitatem corporis: Tercium bona externa, famam, honorem, ac diuitias.

Conclusio. Ordo diligendi ex Charitate ita obseruandus est, vt quisque primò omnium ac maximè diligit Deum: secundò, seipsum secundum bona spiritualia: tertio, proximum secundum bona spiritualia: quarto, seipsum secundum bona corporis, quinto, proximum secundum bona corporis: deinceps se ipsum, ac proximum secundum externa bona. Intelligitur hæc assertio ex dictis.

Corollarium I. Nunquàm licitum est, cuiuscunque boni assequendi causâ, Charitatem Dei abijcere, vel spiritualem propriæ animæ iacturam per peccatum, quantumvis exiguum, sibi velle aut optare. Quid enim prodest homini, si vniuersum mundum lucretur, anima verò sua detrimentum patitur? ait Christus apud S. Matth. cap. 18. Et Matth. 22. dilectio sui ipsius ponitur tanquam regula & norma dilectionis erga proximum, *Diliges proximum tuum sicut teipsum.* Regula autem prior & potior est, quæ regulatum, teste S. Thom. q. 26. a. 4. Quo sensu intelligi debet illud vulgatum, *Charitas incipit à se ipsa.* Et *Proximus sum egomet mihi.* Item, *Qui sibi nequam cui bonus erit?* Eccles. 14.

Neque obstat illud Moyfis cap. 32. Exod. *Dimitte illis hanc noxam, aut dele me de libro vite.* Nec illud S. Pauli ad Rom. 9. *Optabam (ὡχόμην) ego ipse anathema, idest, separatus seu maledictus, à Christo esse pro fratribus meis.* Nam responderetur: Hæc dicta esse per exaggerationem, ex magna confidentia erga Deum: quomodo amico dicere solemus, *potius me occidas, quàm ut facias, quod proposuisti.* Vel dic, quòd voluntas Moyfis & Apostoli non fuit absoluta, spoliandi se æternæ beatitudinis consecutione: sed tantùm velleitas quædam: vellem & optarem, nisi Dei voluntati atque ordinationi repugnaret, in perpetuum excidere atque separari à Christo; cœlestique gloria, si ita opus foret ad fratrum meorum salutem; qui est actus perfectissimæ Charitatis, quem ipsum Sancti illi suscepunt primò ac principaliter non propter aliorum hominum salutem, sed propter diuinæ gloriæ augmentum. Vide S. Chrysost. Theodoretū, & inter recentiores Cornelium de Lapide in cap. 9. ad Rom. Greg. Nazianzen. orat. 44. de Pentecoste; Cassian. collat. 23. c. 6. Adde, locum illum S. Pauli referri à quibusdam ad tempora Iudaismi, quando ex zelo & amore erga Iudæos & ceremonias Iudaicas, Christum persequabatur, vt videre licet apud Vasq. 1. p. quæst. 24. a. 3. Suarez de Charitate, disp. 9. l. 5. num. 4.

Corollarium II. Proximo versanti in extrema & mortaliter insuperabili necessitate spirituali, succurrendum est cum certo periculo propriæ vitæ: dummodo spes æquæ certa proximum iuuandi affulgeat, nullumque grauius damnum inde securum putetur. Ita S. August. lib. de mendacio ad Consentium! cap. 6. S. Th. q. 44. a. vlt. ad 2. Adrianus in 4. q. de correct. fraterna. Nau. c. 24. ad finem, conuenienter S. Ioan. epist. 1. c. 3. *Et nos debemus pro fratribus animas ponere.* Quare si infans absque Baptismo moriturus sit, nisi à me ministretur: teneor illum baptizare, etiam cum vitæ meæ periculo: idque colligitur ex S. August. 1. c. & docent Nauar. in man. cap. 24. n. 9. Valent. disp. 3. q. 4. p. 3. assert. 5. & alij contra Sotum lib. de teger. secreto, mem. 2. q. 2. concl. 6. Item si populus in infidelitatis errore versetur, aut pestis contagione laboret, omni Sacerdote destitutus: multo que magis, si hæreticæ prauitatis minister hæresin alicubi diffundat, debebo cum propriæ vitæ periculo remedium adhibere, si pos-



sim. Vide plura apud Valent. l. c.

His adde, quod iij, qui ratione officij ex iustitia obligati sunt ad prospiciendum spirituali aliorum salutem, non tantum in extrema, sed etiam graui spirituali necessitate constitutis auxilium ferre debent, cum propria vitæ corporalis discrimine. Quapropter tempore pestis Parochus fugere non potest, ac populum deserere: Nam, *bonus pastor animam suam dat pro omnibus*, Ioan. 3. Excepto, si alteri æquè idoneo officij suum cum Ordinarij consensu committat, aut resignet, sicuti ex communi docent Valent. cit. p. 3. Ioan. Chapeauille de modo ministrandi sacramenta tempore pestis c. 1. q. 4. vbi rectè tamen monet, dum Pastor beneficium curatū, altero substituto, retinet, licet corpore absens sit, animo tamen & prouidentia præsentem esse debere, vt nihil necessarij ad salutem ouibus suis desit.

Cauere etiam Parochus debet, ne dum pestis tempore vnus non grauius indigentis spirituali vtilitati consulere intendit, plures alij ex ipsius occubitu grauiorem iacturam spirituales patiantur. Quare, si solus sit, non facilè ministrare debet cum vitæ suæ periculo Sacramenta, quæ non admodum necessaria sunt, vel secundum se, vt extrema vinctio, vel respectu personarum, quarum bonum statum Confessarius probabiliter cognitum habet, quia nuper earum confessiones exceperat. Denique quotiescunque ab aliqua persona, quam verisimilibus coniecturis Sacerdos credit non habere conscientiam peccati mortalis, vel per contritionem rectè ad moriendum dispositam esse, probabilissimè timetur periculum contagionis: in tali casu maius bonum publicæ necessitatis præferendum priuatæ alicuius vtilitati, qua de re Suarez 3. p. t. 4. de extr. vinctio in fine, Chapeauille cap. 3. q. 2. & 18. Ioan. Maior in 4. dub. 23. q. 1.

Præterea, quod dixi de obligatis ratione officij, similiter dicendum de obligatis ex delicto, vt & ipsi damnum spirituale alicui illatum, si graue sit, cum mortis suæ periculo refarcire teneantur: Exempli causa, si obstetrix infantem inualidè baptizauit. Quo loco occurrit casus, qui in praxi difficultatem habet: Obstetrix quædam, pauper mulier, confitetur Sacerdoti, se 40. circiter infantes baptizasse in nomine Zabulon: quibus postea à Parocho, sine alio baptismate, ceremoniæ tantum adhibita fuerunt. Personæ autem illæ non rectè baptizatae partim mortuæ sunt, partim adhuc viuunt: sed ferme per varia oppida, vel etiam regiones dispersæ: vt, consideratis omnibus, nullus modus excogitari possit, quo illis defectus Baptismi significetur, nisi mulier Magistratui se prodatur, & extremum supplicium subire debeat. Quæritur, quid Confessario hic agendum?

Respondendum videtur: quod Confessarius imprimis mulieri explicare debet grauitatē peccati sui, & spirituale damnum, quod hominibus à se perperam baptizatis accidit: inducere etiam ad renuntiandum Diabolo, si cum eo (quod verisimile est) pactum habeat: Quod si eam semel, iterum, vel sæpius, si opus sit, instructam & catechizatam, rectè dispositam existimet, & verum propositum concepisse non solum abstinendi imposterum ab eiusmodi sacrilegijs: sed etiam satisfaciendi, & præstandi ea, ad quæ Confessarius eam obligatam esse iudicauerit: tunc si hæc promiserit mulier, à peccatis absoluenta est.

Deinde verò seu in ipsa Confessione, seu postea, tempore magis opportuno, Confessarius ope iam dare debet vt in muliere excitet desiderium plenè satisfaciendi pro peccatis suis, & reparandi spirituale magnum damnum, quod innocentibus intulit, & eapropter extremum supplicium corporis libenter sustinendi ad salutem animæ suæ & aliorum, sequæ ipsam ad hoc offerendi. Quod si autem Confessarius ab isto tam heroico facto mulierem suapte natura infirmam, planè abhorrentem conspiciat, non illam virgendam multum arbitror, dicendo v. g. aliter saluam fieri non posse; ne omnino in desperationem agatur, & in retia Diaboli recidat: sed contentus esse debet,

si mulier imposterum à peccatis & sacrilegijs eiusmodi abstinere firmiter proponat. Licet enim, casum istum speculatiuè considerando, probabilissimū videatur, quod hæc mulier teneatur seipsam Magistratui prodere: quia salus corporis ex lege Charitatis postponenda est salutem animæ, præsertim non vnus, sed plurium personarum: Imò hæc obligatio ex iustitia esse videtur: quandoquidē ipsamet mulier homines illos innocentes in salutis suæ discrimen per summam iniuriam coniecit: Tamen hic ipse discursus fortasse non tam certus est, vt à nemine in dubiū reuocari possit: propterea quod licet maius in genere suo absolutè consideratum sit spirituale in hoc casu maximū & certissimum est, non item spirituale; cum homines illi per contritionem saluari possint. Sed quidquid sit de hac responsione: saltem mulier, vt ponimus, obligationem hanc seipsam prodendi & ad mortem offerendi non agnoscit: edocere autem illam probabiliter ignorantem in re non omnino euidente, consultum non est, si Confessarius arbitretur, se non persuasurum, sed magis obfuturum, vt dicam lib. 5. tract. 6. c. 13. num. 5.

Corollarium III. Ordinariè licitum non est, vitam propriam postponere vitæ alienæ. Quia, cæteris paribus, quisque, secundum Charitatis ordinem, magis propensus esse debet ad diligendum se, quàm alterum. Nihilominus multi docent, nominatim Victor. relect. de homicidio, num. 26. & sequentibus. Sotus lib. 5. de iust. quæst. 1. art. 6. Bannes 2. 2. quæst. 26. art. 4. dub. 2. Saurus in clauis regia lib. 7. cap. 9. dub. 5. & 6. Lessius lib. 2. cap. 9. dub. 6. num. 29. & sequentibus. Molin. tract. 3. de iust. disp. 14. & 18. Becanus 2. 2. cap. 19. quæst. 1. num. 18. §. tertio, ex Aristotele lib. 9. Ethic. cap. 8. Licitum, atque laudabile esse, vitam suam certo periculo exponere, pro seruando amico, ex motiuo honestatis & amicitiae: quandoquidem honestas virtutis maius bonum est, quàm vita propria corporalis. Quare licitum esse aiunt, amico peste laboranti inferuire cum æquè certo mortis periculo: & in communi naufragio tabulam socio cedere.

Hæc sententia propter Doctorum auctoritatem, & bonorum virorum persuasionem, valde probabilis est. Eam tamen non malè impugnat P. Nauar. lib. 2. de restit. cap. 3. num. 4. 1. & sequentibus. Si enim virtus Charitatis, & ordo dilectionis præcipit, vt propriam quisque vitam præferat aliene: sequitur, nullam honestatis laudem esse, si quis occumbere velit, vt vitam alienam seruet. Quare secum ipse pugnat, qui fatetur, secundum Charitatis ordinem, vitam propriam præferendam esse vitæ proximi, & nihilominus in eo honestatis laudem quærit, si vitam propriam alienam posthabeat. Alia verò ratio est de bonis fortunæ ac famæ: cum enim horum dominus sit, facultatēque habeat de ijs arbitrato suo disponendi: potest ea ex rationabili causa, videlicet proximi iuuandi, negligere, aut dimittere, non autem propriam vitam. Quare S. August. lib. de mendacio ad Consentium, cap. 6. ait: *Si quis pro alterius temporali vita suam ipsam temporalem perdat: non est iam diligere illum sicuti seipsum, sed plus quàm seipsum, quod sana regula repugnat.*

Dixi autem in Corollario, Ordinariè id licitum non esse. Nam pro salute & incolumitate personæ publicæ, ex qua multum pendent Reipub. commodi: quemadmodum & pro ipsa Republica: multoque magis pro Fide, ac Religione Catholica, bona temporalia relinquere: quin & propriam vitam periculo exponere, non tantum laudabile, sed interdum necessarium est. Nam bonum quantum vniuersalius est, tantò maius ac dignius: quare sicut in naturalibus pars vna corporis periculo se exponit pro seruando toto corpore: ita & in politicis particulare Reip. membrum pro seruanda tota Republica, sicuti docet S. Thom. quæst. 26. a. 4. ad 3. Deinde ad impediendam spirituales æternam damnationem iniusti aggressoris, cum illum occidere iure possis, potius permittere ac tolerare mortem



re iure possis, potius permittere ac tolerare mortē propriam corporalem, abundantioris Charitatis opus est, sicuti bene docent Cai. 2. 2. q. 64. art. 7. P. Nauar. l. 2. c. 3. num. 16. Victoria numero 24. relect. de homicidio. Sairus cit. dub. 6.

5 Corollarium IV. Vitam hominis innocentis præferre debemus vitæ nocentis. Quare probabilior est sententia Victor. de homicidio, num. 15. Nauar. in cap. non inferenda, 23. quæst. 3. num. 10. Molin. tract. 3. disp. 18. Occidendum esse latronem v. g. vt ex manibus eius homo innocens liberetur: cui consentire videtur Sapiens Proverb. 24. *Erue eos, qui ducuntur ad mortem: & qui trahuntur ad interitum, liberare ne cesses.* Et Ecclesiast. 17. *Vnicuique mandauit Deus de proximo suo.* Sed excipe primò: Si vitam innocentis liberare non possis, absque propriæ vitæ, aliòve graui discrimine, sicuti notat P. Nauar. lib. 2. cap. 3. num. 424. Secundò; Si latronis aggressio, vel occisio tibi homini imbelli, ac pugnis non assueto valde difficilis accadat. Tertio; Si Martyr malit pro Christi Fide mortem oppetere, quàm liberari, sicuti notauit Sa ver. Martyrium, numero 2. Mol. tractatu 3. disp. 18. numero 6.

Corollarium V. Ea dilectione, quam comitatur complitum seu gaudium in bono alieno possesso: item honor, cultus, reuerentia: ij magis diligendi sunt, qui meliores, Deoque similiores existunt, teste S. Thom. eadem quæst. 26. a. 7. 8. & 9. Ob eandemque rationem parentes magis, quàm filij & vxor: magisque benefactores, quàm ij, quibus benefecimus: quia maiorem illi cum Deo communi omnium parente ac benefactore similitudinem gerunt. Ea verò dilectione, qua desideramus alteri bonum nondum possessum, & quam comitatur misericordia & beneficentia, ij magis diligendi sunt, qui nobis coniunctiores existunt. Quare S. Augustinus libro 5. de doctrina Christiana, cap. 28. *Cum omnibus prodesse non possit, his potius consulendum est, qui pro locorum ac temporum, vel quarumlibet rerum opportunitas, strictius sibi quasi quadam sorte inunguntur.*

6 Corollarium VI. Qui nobis coniunctiores sunt, alijs præferri debent secundum ea bona, in quibus coniunctio vel amicitia fundatur: quia communicatio bonorum est fundamentum amicitiae ac Charitatis. Quare in bonis pertinentibus ad naturam & vitam corporis, illi præ alijs diligendi, qui nobis sanguine sociati sunt. Et quidem, si cæteraparia sunt, in his primò omnium quisque opitulari debet vxori suæ, cum quæ est veluti vna caro: Secundò filijs; quibus naturali iure plùs parentes obligati sunt ad prouidendum, quàm vice versa: *Non enim debent filij parentibus thesaurizare, sed parentes filijs,* ait Apostolus 2. ad Corinth. 12. & docet S. Thom. a. 9. Tertio parentibus; magis patri, quàm matri: quia ille excellentiorem principij rationem obtinet, sicuti notauit S. Hieronym. in c. 44. Ezech. S. Thom. quæst. 26. art. 10. Richard. dist. 29. a. 1. quæst. 8. Imò in casu extremæ necessitatis, parentibus ante omnes alios, etiam vxorem ac proprios filios, succurrendum esse, existimat S. Thom. a. 9. & a. 11. ad 2. Quia debitum erga illos tum antiquius, tum nobilius est: siquidem ipsi nobis existendi causa & principium fuerunt; quare æquitas postulat, vt in extrema necessitate ab interitu eos liberando, tantundem rependamus. Idque etiam reuerentia postulat, quam præ alijs omnibus debemus parentibus, vt in extrema necessitate constitutos alijs non posthabeamus. Vide etiam Richard. in 3. d. 37. a. 3. quæst. 1. Henricum quodlib. 11. quæst. 16. vbi resoluit; Patri infideli potius succurrendum esse, quàm extraneo fidei. Quarto fratribus, sororibus, aliisque cõ. sanguineis, domesticis ac familiaribus, conuenienter Apost. 1. ad Timoth. 5. *Si quis suorum, maxime domesticorum, curam non habet, fidem negauit.* Adde, quod Bannes q. 26. a. 8. docet insigni amico aut benefactori potius ex Charitatis lege subueniendum esse, quàm consanguineo

non valde propinquo, vel de nobis non bene merito. Similitérque fratribus spiritualibus magis, etiam in temporalibus bonis, subueniendum videtur, quàm cognatis non valde propinquis: quandoquidem bona spiritualia, in quibus spiritualis societas fundatur, aliquo modo dependent à temporalibus, tanquam subseruentibus.

Corollarium VII. In rebus pertinentibus ad civilem communicationem, conciuēs nostri: in rebus bellicis commilitones alijs præferri debent: In spiritualibus verò auxilijs eorum maior habenda est ratio, qui nobis secundum spiritum filij, patres, aut fratres censentur. Bannes tamen cit. loco non improbabiler docet, parentes carnales etiam in spiritualibus rebus præferendos esse: partim quia eorum nobiscum coniunctio etiam in his fundata est: partim quia coniunctio carnalis, aliarum coniunctionum fundamentum ac basis, suapte natura prior ac stabilius est, sicuti monet S. Thom. in corp. a. 8. Richard. cit. a. 1. q. 9. Gratia autem Charitatis inclinationem naturæ non destruit: sed perficit, & ad finem supernaturalem dirigit, teste eod. S. Th. a. 7. Et quod dictum est de parentibus, eadem ratione dici debet de filiis, ac fratribus carnalibus, comparatione filiorum, vel fratrum spiritualium.

Corollarium VIII. Secundum ea bona, quæ in præcepto non sunt, nihil alienum à ratione est, proximum sibi ipsi antepone: v. g. beneficium dignitatem, aliudve temporale bonum à se rejicere, vt alteri obueniat: item Religionis ingressum differre, vel intermittere, ob alterius seu spirituale seu temporale vtilitatem, qua de re Valentia quæst. 4. p. 3. asserti. 1. Quin etiam beatitudinis dilationem optare, vt pluribus prois, exemplo S. Martini: *Domine, si adhuc populo tuo sum necessarius, non recuso laborem.* Et Apostolus ad Philippen. 1. *Coarctor è duobus: desiderium habens dissolui, & esse cum Christo, multò magis melius: permanere autem in carne, necessarium propter vos.*

## CAP. IV.

## De dilectione peccatorum, atque inimicorum.

## SUMMARIUM.

- 1 Inimici, quatenus proximi nostri sunt, ex Charitate diligendi debent: quamuis et peccatores detestari eos conuenit.
- 2 Inimicis nostris prestare tenemur beneficia, & signa dilectionis generalia: non item specialia, per se loquendo.
- 3 Opus Christiana virtutis in consilio positum est, specialibus beneficiis inimicum sibi conciliare.
- 4 Superior subditum peccantem, correctionis causa, etiam communibus signis amore priuare potest.

ASsertio I. Peccatores atque inimici ex Charitate diligendi sunt, quatenus proximi nostri, id est, eiusdem naturæ consortes, & beatitudinis æternæ capaces sunt. Ita S. Thom. q. 25. ar. 6. & 8. & quæ. 83. ar. 8. & alij Scholastici in 3. distinct. 28. vbi S. Bonauent. art. 1. quæst. 3. & in d. 30. vbi Gabr. quæst. vnic. art. 2. Sumitur, ex ca. 1. 3. Matth. *Ego autem dico vobis, diligite inimicos vestros: benefacite his, qui oderunt vos.* Verùtamen, quod in illis est malum peccati, odisse ac detestari conuenit, ( exemplo Davidis Psalm. 118. *Iniquos odio habui* ) idque per emendationem tollere, si ipsi meri iure possimus: vel optare vt à Deo, aliòve legitimo Magistratu puniatur: Quin & in eiusmodi punitione letari possumus, nostra, vel aliorum causa: è contrario verò tristari, si peccatoribus conatus suos feliciter succedere videamus. Quare Psalmista inquit Psalmus 103. *Deficiant peccatores à terra, ita vt non sint.* Et Apostolus ad Galat. 5. *Vni-*



Nam & absceindantur, qui vos conturbant. Et S. Gregor. l. 22. moral. c. 11. Euenire plerumque soler, ut non amissa Charitate, & inimici nos ruina lætificet: & rursus eius gloria, sine inuidia culpa, contristet: cum & ruerit eo quosdam bene erigimus, & proficiente eo, quosdam iniuste opprimi formidamus. Siquidem Reipublicæ interest, ut mali affligantur atque à Communitate tollantur. Neque refert, etsi interdum spiritualis eorum ruina timeatur: ne v. g. relegatus ad hæreticos transeat; siquidem malum eiusmodi permitti debet maioris mali vitandi causa. Accedit, quod ipsis quoque peccatoribus plerumque prodest, ut paupertate, infirmitate, aliisque calamitatibus afflicti & exercitati, ad saniolem mentem redeant: vel morte præueni, suam ipsorum damnationem peccando augere definant.

2 Assertio II. Ex Charitate obligati sumus præstare inimicis nostris beneficia & signa dilectionis generalia, (id est, quæ communiter omnibus eiusdem status ac conditionis hominibus præstare solemus) non item specialia. Ita S. Thom. quæst. 25. art. 8. & 9. iuncto Caiet. Richardus in 3. distinct. 30. art. 1. quæst. 1. Gabr. quæst. 7. n. art. 2. Nauar. c. 14. num. 25. Prior pars assertionis declaratur exemplis: Si pro tota aliqua Communitate oves, vel elemosynam in omnes ciuitatis pauperes distribuas, cognatos omnes ad cenam inuites, omnes in vicinia; Collegio, Monasterio obuiam tibi factos salutare soleas, nefas est solum inimicum ab eiusmodi beneficio, vel dilectionis signo excludere. Ratio est: Quia talis exclusio vindictæ cupiditatem indicat, quæ priuatis personis interdicta est, iuxta illud Leuit. 19. *Non quæres ultionem, neque eris memor iniuriæ ciuium tuorum.* Loquor de priuatis, siue ijs qui vindicandi, puniendiue ius nullum habent. Alia verò ratio est de Parente, Prælato, &c. qui subditos in se peccantes à communibus beneficijs, vel amoris indicijs excludere possunt, correctionis causa.

Posterior pars declaratur etiam exemplis: Inimicum ægrotum inuifere, mortuum solari, hospitio accipere, obuiam factum salutare, per se loquendo, non teneris: nisi is in necessitate aliqua positus sit, id est, eiusmodi beneuolentia vel auxilio specialiter indigeat, sicuti docent S. Thom. cit. a. 9. S. Bonau. in 3. d. 30. a. 1. q. 5. Richard. ibid. a. 1. q. 1. Ratio est: Quia præceptum affirmatiuum de exhibenda speciali dilectione aut beneficentia non obligat semper, sed in casu necessitatis, iuxta illud Proverb. 23. ad Roman. 12. *Si furierit inimicus tuus, ciba illum.* Quamuis interim quisque semper animo paratus esse debet speciatim subuenire inimico, cum is indigerit.

Dixi autem per se loquendo: At verò ob accidentarias circumstantias aliter euenire potest: Primò, ratione scâdali vitandi, si negando specialia signa amoris, quæ antea præstare solitus eras, maius erga te hominis odium, vel iram concites. Secundò, si salutatione, vel simili beneuolentiæ signo animum inimici tibi ac Deo facile conciliaturum arbitreris, sicuti notauit Azor to. 2. lib. 11. c. 3. q. 3. Tertio, si ad depellendum odium, quod aduersus hominem geris, necessarium esse existimes, specialia amoris effecta ipsi præstare, sicuti præter alios monet Nau. l. 5. consil. 3. n. 6. de poenit. edit. 2. Denique inimicum salutantem vicissim salutare necesse est, veniam petenti tribuere, & alia tunc amoris indicia exhibere, quæ declarent similitudinem depositam, & amicitiam redintegratam esse, sicuti docet S. Th. 2. 2. q. 83. a. 8. Nau. ca. 14. man. nu. 9. Quod limitari debet, sicut supra: Nisi Superior, iustæ correctionis aut vindictæ causa, reconciliationem differendam esse arbitretur.

3 Atque hæc intelligenda sunt de obligatione præcepti. Interim verò magnæ Christianæ perfectionis opus & eximie Charitatis indicium est, quod Apostolus monet ad Rom. 12. *Non solum non vinci à malo: sed vincere in bono malum:* id est, non tantum non moueri odio hominis; ad

reddendum ipsi odium, ac vindictam: quod illicitum est: sed contrà, exhibendo amoris ac beneuolentiæ signa, extinguere malum hominis odium, & congerere carbones ignis charitatis super caput inimici, quibus emollitus odium deponat. Quamquam interdum, si inimicus ita animo ac moribus comparatus esse videatur, ut singulari beneuolentia affectus deterior fiat, intermittenda sunt specialia amicitiae signa, ac beneficentiæ opera.

Assertio III. Qui ab inimico iniuria affectus est, nullum odium inimicitiae concipere, sed offensam ex animo condonare tenetur, ut vindicare ipsemet nolit. Sumitur ex c. 6. S. Matth. *Si non dimiseritis hominibus, nec Pater cælestis dimittet vobis peccata vestra.* Ratio est, quod odiū personæ, seu odium inimicitiae per se malum, & nunquā licitum sit. Dixi autem ex animo condonandum esse iniuriam: Nam ex phantasia, ac memoria eandem pellerē valde difficile, & quibusdam impossibile est, uti notauit Syl. ver. charitas, q. 6.

Deinde actionem iniuriarum tam ciuilem, quàm criminalem, qui iniuriam passus est aduersus inimicum instituere iure potest, non ex odio: sed illam quidem, ut illatum damnum compensetur, vel pro iniuria parti læsæ satisfiat: hanc verò publicæ iustitiæ amore, ne crimina impunita maneant, cum Reipub. incommodo, sicuti præter alios docet Rich. in 3. d. 30. a. 1. q. 2. Abb. in c. 1. n. 6. de Maledicis. Gabr. in canon. Missæ, lect. 73. propof. 3. Couar. in lib. 2. resol. cap. 10. n. 7. Martin. Nauarrus lib. 5. consil. 1. de accusat. & consil. 3. de poenit. & remiss. num. 2. edit. 2. cum Gl. recepta in cap. si quis contristatus, d. 90. Quamuis ferme periculo non vacat, actionem criminalem aduersus inimicum instituere: quod pauci reperiantur, qui ea in re iustitiam & commune bonum sincero animo spectent, & non etiam propriæ vindictæ cupiditatem expleri velint. Vide etiam Gabr. in can. Missæ lect. 76.

Ex dictis resolui potest iste casus. Iuuenis contra parentum voluntatem indigno matrimonio se copulauit, & non paruo dedecore familiam affecit: eapropter parentes & fratres hominem ad colloquium suum admittere, ei que veniam petenti ignoscere constanter recusant; quæritur an à Confessario absolui possint? Resp. Quod pater, offensus à filio, in locum poenæ, reconciliationem ipsi ad tempus negare possit: & idcirco reliquis suis liberis totique familiæ præcipere, ut hominem, qui ita deliquerat, ad domum vel consortium suum non admittant, quovsque delicto conuenientes poenas luisse censeatur: & familia hac in re præcipienti parere potest, veluti ministri, & executores iustæ vindictæ paternæ.

Quare Confessarius in hoc casu duo exquirere atque perpendere debet: I. Vtrum pater, vel fratres ex animi odio procedant; an solum iustam vindictam spectent ad ipsius delinquentis emendationem, familiæ honorem, & anorum maiorem cautelam procurandam. II. Vt vindicta siue poena, quæ delinquenti irrogatur, non excedat mensuram delicti: quare in perpetuum non poterunt illi reconciliationem denegare: sed tantum ad tempus differre: quovsque videbitur conueniens ad punitionem, & fines bonos, qui propositi sunt, consequendos.

## CAP. V.

## De actibus charitatis.

## S V M M A R I V M.

1 Actus Charitatis sunt dilectio, gaudium, pax.

2 Gaudium, & pax in hac vita perfecte observari non possunt.

Primus ac præcipuus Charitatis actus internus est dilectio, per quam alteri bonum volumus, secundum affe-



affectum amoris ac communicationis eius boni (videlicet beatitudinis, vel alterius conducentis ad illam) in quo amicitia, seu amor Charitatis fundatur. Quare S. Th. q. 27. a. 2. ex Arist. 9. Ethic. cap. 4. aduertit, propter affectum vnionis, amatum reputari, quasi eundem cum amante, vel ad ipsum pertinentem. Vide etiam S. Dionys. c. 4. de diuinis nominibus.

Porro, huic interno actui charitatis, quatenus ad proximum tendit, respondet externus actus, ac veluti executio illius, quæ dicitur *beneficentia*. De utroque actu extat præceptum epi. 1. Ioan. c. 3. *Non diligamus verbo, neque lingua, sed opere & veritate* id est, tum animo, tum externa exhibitione.

Præter actum dilectionis alios inde consequentes numerat S. Paulus ad Galat. 5. *Fruitus autem Spiritus sunt, Charitas* (id est actus dilectionis) *gaudium, pax* Gaudium est quies animi in bono præsentem, ac possessio: quæ de re S. Th. q. 28. a. 1. Dupliciter autem de Deo, tanquam bonorum optimo, & præcipuo Charitatis obiecto gaudere possumus: Primo, cum lætamur de diuinis bonis, quatenus secundum immutabilem, & infinitam perfectionem in Deo sunt. Secundo, cum lætamur de Deo ipso, veluti amico nobis præsentem, ac vnito, secundum nobilissimum eius effectum, gratiæ videlicet ac Charitatis donum: de quo Christus apud S. Ioan. c. 14. *Pater meus diligit eum, & ad eum veniemus, & mansionem apud eum faciemus*. Et epi. 1. Ioan. c. 4. *Qui manet in Charitate in Deo manet*.

Verum rectè monet S. Thom. a. 3. gaudium huius vitæ non nisi imperfectum esse: siquidem viator finem suum, ac beatitudinis bonum nondum possidet: sed motu Spei ac desiderij ad illud tendit, conuenienter Apostolo ad Roman. 12. *Spe gaudentes*. Accedit, peccata, quibus vel nos ipsi infestamur, vel proximi nostri obnoxij fiunt, sepe nobis iustam tristandi causam præbere: tristitia autem repugnat gaudio. Ita notauit Sanctus Thomas articulo 2.

Porro gaudium, quatenus ad proximum tendit, versatur circa bona ipsius, quibus ad cœlestem beatitudinem promoueri potest: vel eadem iam fruitur, si beatus sit.

Pax definitur à S. Thom. quæst. 29. art. 2. ex S. August. lib. 13. de ciuit. cap. 13. *Tranquillitas ordinis*. Consistit autem in eo, vt voluntas nostra diuinæ voluntati adhæreat, ad eamque reliquas interiores appetitiones, tanquam regina & motrix aliarum facultatum, accommodet: vt rectè dictum sit Psal. 118. *Pax multa diligentibus legem tuam*: Deinde verò vt eadem voluntas cum proximi voluntate consentiat in ijs, quæ ad communem beatitudinis finem pertinent.

Rectè tamen monet S. Thom. pacem in hac vita non nisi imperfectam esse: plenam autem ac perfectam in patria expectari, secundum illud Davidis de cœlesti Hierusalem loquentis Psal. 147. *Qui posuit (Deus) fines suos pacem*. Nam in hac vitâ multa necessariò occurrunt, quæ rectè voluntati aduersantur; tum in ipso homine, *Caro enim concupiscit aduersus spiritum*; ad Gal. 5. tum extra hominem: quia ob multarum rerum ignorantiam, sæpenu-mero inter homines opinionum diuersitas oritur, & exinde non rarò diuersitas in electione voluntatis, vt diuersis diuersa placeant, quod licet salua pace accidere possit: quia, vt Arist. ait lib. 9. Ethic. c. 6. ad amicitiam non pertinet concordia in opinionibus intellectus speculatiui; (nam amici sæpe inter se dissentiunt v. g. in Scholasticis quæstionibus) sed magis concordia voluntatis in diligendis bonis conferentibus ad vitam, Christianus addet, *æternam*: dissentire autem in electione bonorum paruorum, ac indifferentium, seu quæ in præcepto posita non sunt, quasi non videtur esse dissensus: tamen negari non potest, talibus mutuis dissensionibus pacem nostram aliquo modo imperfectam reddi. Vide S. Th. 2. 3. ad 2.

## CAP. VII.

## De misericordia &amp; Eleemosyna corporali.

## SUMMARIUM.

1. Misericordia virtus est charitati affinis.
2. Misericordia est de aliena miseria, aliquo modo inuoluntaria, quæ vt propria æstimatur. patienti autem indecens.
3. Eleemosyna duplex est: spiritus ualis, & corporalis.
4. Eleemosyna præceptum oritur vel ex parte dantis habentis bona superflua: vel ex parte accipientis: si in necessitate extrema, aut graui positus sit.
5. Probabilius est, quod ex superfluis bonis eleemosyna danda sit communem inopiam patientibus: quamuis hac obligatio censenda non sit sub mortali.
6. Qui mutuo, aut venditione succurrere potest necessitati proximi, non tenetur donare.
7. Illicite acquisita, si proprio domino restitui debent, aliis in eleemosynam dari non possunt: secus est, si qua malè aut turpiter acquisita, tamen in acquirentis dominium transferunt.

**M**isericordiæ virtus Charitati valde affinis est, quippe ex qua proximè nascitur, teste S. Ioan. Epist. 1. c. 7. *Qui habuerit substantiam huius mundi, & viderit fratrem suum necesse habere, & clausit viscera sua ab eo, quomodo Charitas Dei manet in eo?* Definitur à S. August. lib. de ciuit. c. 5. *Aliena miseria in corde nostro compassio, quæ vtique si possumus, subuenire compellimur*. Illi secundum excessum opponitur nimia cordis molities siue indulgentia; secundum defectum verò cordis durities atque crudelitas.

Ad actum misericordiæ tria requirit Aristot. 2. Rhet. c. 8. I. Vt sit de aliena miseria, æstimata quasi propria: quod duobus modis accidit, teste S. Thom. q. 30. a. 2. Primo, Propter vnionem affectuum, quam amor amicitiae parit: amicus enim, vt supra dixi, æstimat amicum tanquam alterum se, & ideo malum eius quasi proprium: quare idem Arist. 9. Eth. c. 4. inter amici officia numerat, amico dolenti condolere. Et Apost. ad Ro. 12. *Gaudere cum gaudentibus, & flere cum flentibus*. Secundum, Propter realem communicationem miseriæ seu actualæ, seu potentialem: siquidem homo misericors, ob naturæ societatem, eadem sibi accidere posse arbitratur, quæ in misero homine videt, ideoque ipsius miseretur ac con- dolet.

Hinc existit primo, Quod infirmi, senes, ac sapientes cum propriam naturæ imbecillitatē cognoscant, ad miserendum propensiores sunt; quàm insipientes, potentes, & qui se felices, fortes, & à miseriis immunes iudicant. Existit secundo, quod Apostolus ad Hebr. 2. de Christo annotauit: *Debut per omnia (excepto peccato & ignorantia) fratribus assimilari, vt misericors fieret, & fidelis Pontifex ad Deum*: id est, vt miseriis nostras in se ipso expertus, pronior fieret ad miserendum, & pro nobis apud Deum Patrem intercedendum.

II. Requisitum est: Vt miseria patienti aliquo modo inuoluntaria, ac necessaria sit. Qui enim sponte miser est, misericordia dignus non æstimatur, v. g. diues, qui ob auaritiam, vel robustus qui ob pigritiam miserè vicitat. Veruntamen Christo Domino & Martyribus eius meritò compatimur, quia licet passionis fructum sponte ac libenter amplexi sint: tamen repugnantiam & tristitiam propter dolores experti, sicut Dominus de se in horro testatus est: *Tristis est anima mea usque ad mortem*. Matth. c. 26. Nam miseriam, quatenus miseria & malum quoddam est, vnusquisque naturaliter abhorret.

III. Requisitum est, Vt malum seu miseria æstimetur







præstiturus est, non tantum si ille in extrema necessitate constitutus sit: sed etiam si in graui: vt si putetur iniuste damnandus ad trirèmes, ad publicam flagellationem, &c. nisi in iudicio defendatur. Similia habet Suar. de Charitate, dif. 7. s. 4. n. 5.

Controuersum autem est inter Doctores: Vtrum ex superfluis naturæ, ac personæ largiendum sit commune inopiam patientibus? Negant Alex. de Hales in 4. p. q. 113. mem. 1. S. Anton. p. 2. tit. 1. c. 24. §. vlt. Gabr. in 4. d. 16. q. 4. art. 2. conclus. 5. Maior l. c. Summa Confessorum lib. 3. tit. 8. q. 4. Vasq. tract. de elemos. cap. 1. dub. 3. & 4. Sed contraria sententia est S. Thom. 2. 2. q. 66. ar. 7. & cit. qu. 32. a. 5. vbi concludit: *Dare Eleemosynam de superfluo est in precepto: & dare eleemosynam ei, qui est in extrema necessitate: quæ verba non copulatiue, sed copulatiue accipienda sunt, vt duobus casibus præceptum elemosynæ obliget, sicuti clarè indicat idem S. Thom. 2. 2. q. 118. art. 4. ad 2. & de malo, quæst. 13. art. 2. ad 4. & in 4. d. 15. q. 2. a. 1. q. 4. Primo, Si quis habeat superflua: quo casu nunquam deesse solent pauperes, si non extrema, aut graui, saltem communi seu ordinaria penuria laborantes, quibus subueniri possit. Secundò, Si proximus in extrema necessitate constitutus sit: quo casu ex bonis etiam non superfluis, quæ tamen absolutè necessaria non sunt, subueniendum est. Ita S. Thom. explicat Caiet. in ci. a. 5. & to. 2. opusc. tract. 5. de præcepto Eleemosynæ, eandemque sententiam tenent Richar. in 4. p. 15. art. 2. q. 2. & 5. Paludanus ib. q. 3. a. 2. Sotus lib. 5. de iust. q. 3. a. 4. Cou. 3. ref. c. 14. n. 5. Valent. ci. p. 4. §. quæ sint controuersa, Bellarm. l. 3. de bonis operibus c. 7. Ban. 2. 2. q. 32. a. 6. du. 1. & 2. Azor t. 2. lib. 12. c. 7. qu. 4.*

Nunc probatur responsio; Quia Charitas quemlibet obligat ad subueniendum proximo in quavis miseria constituto, si facile tolli aut subleuari possit: Debet enim quilibet diligere proximum, sicuti seipsum. Et, *Cuius Deus mandauit de proximo suo*, Eccles. 17. Sed qui diuites sunt, & bona superflua habent, facile atque sine æstimatione incommodo suo, multorum pauperum communem inopiam ac miseriam subleuare possunt: Ergo ad id obligantur. Accedit, hanc esse Dei providentiam ac voluntatem, terrenas diuitias inæqualiter distribuentis, vt qui eis abundant, per opera misericordiæ: qui autem carent, per patientiam æternæ gloriæ mercedem sibi comparent vt proinde tam paupertas, quam diuitiæ dona Dei sint, de quibus & pauperes & diuites rationem ipsi reddituri, an illis secundum diuinum propositum ac voluntatem vsi fuerint.

Quæres: Vtrum ista obligatio sit sub culpa mortali, an veniali? Respondeo. Cum pauperum communis miseria leuis ac tolerabilis esse soleat, auxilium aliquod denegare si comòde afferri possit, & nulla negandi ratio adsit, videtur esse culpa tantum venialis. Porro hæc ipse rogantibus pauperibus elemosynam iusta negandi causa esse solet, si diues propositum habeat aliud tantum, loco aut tempore commodiore, vel in agis indigentibus, vel si superflua quæ habet, ad alium pium vsum conferre velit, vt Medina notauit q. 3. de Eleemosyna, §. videtur secundò. At verò, si abundans diuitiis nulla rationabili excusatione motus, omnes à se mendicos & pauperes inhumaniter repellat: is nimis inordinato diuitiarum amore affectus, & Dei ac proximi charitate exutus, idèoque in malo statu versari videtur, iuxta verbum Christi Matth. 6. *Non potestis Deo seruire & Mammonæ*. Quamuis Confessarius absolutionem à peccatis diuiti non facile negare debeat, quòd communes pauperum miseras per elemosynam subleuare monitus recuset: tum quia de obligatione hac, an & qualis sit, Doctores non consentiunt: tum quia moraliter vix accidit, diuitem nullam, saltem in speciem, causam afferre posse, cur elemosynas dare non soleat; Et ita notauit Medina quæstione 3. in fine, Sanum. 2. Luisius Tur-

rianus 2. 2. disp. 82. du. 2. in fine. Vide etiam Suar. de Charitate, s. 3. dicto 3. & 4.

Deinde notandum est cum Bellarmino l. c. Vasq. tr. de elemosyna c. 1. dub. 6. Si proximi egestas, qualiscunque ea sit: alia ratione, v. g. mutuo, venditione tolli possit: quia egens alio loco pecunias depositas habet, vel paulò post artificio acquisiturus est: tali casu non obligatur diues ad donandum, præsertim quantitatè notabilem. Quod ostenditur exemplo Tobie c. 5. qui pecunias Gabelo non donauit, sed mutuo dedit. Et Iosephi c. 41. Gen. qui frumentum Egyptiis non donauit, sed vendidit: vterque tamen misericordiæ officium præstitit. Incundus enim homo qui misetur & commodat, ait Dauid Psal. 111. Et Ecclesiastic. c. 19. iubet proximo scenerari, id est mutuo dare, in tempore necessitatis illius.

Accidit etiam interdum, vt proximus indigeat tantum vsu alicuius rei, non ipsa re: tunc satis erit illam commodare postea restituendam: vt si ei, quem hostes spoliarunt, vestes commodem, donec domum suam reuersus sit. Quæ de re Nau. c. 17. n. 61. Med. qu. 5. de elemos. Becanus c. 21. du. 5. Turrianus disp. 82. du. 6. §. pro explanatione, Vasq. h. c. P. Nau. lib. 3. c. 1. n. 366. Suar. de Charitate, dif. 7. s. 5.

Denique quæritur; Vtrum de illicitè acquisitis elemosyna danda? Resp. cum Alesi 4. p. q. 110. me. 3. S. Thom. q. 32. a. 7. S. Bonau. in 4. d. 15. a. 2. q. 1. Richar. ibid. a. 2. q. 5. & Dico I. Si illicitè acquisita obnoxia sunt restitutioni faciendæ certæ personæ, aut Ecclesiæ, tunc pauperibus erogari non possunt: quia ex alieno liberalem esse species furti est.

Dico II. Si illicitè acquisita obnoxia sint restitutioni ipsis pauperibus faciendæ, v. g. cum dominus illorum ignoratur, tunc erogari quidem debent; Sed hoc non est propriè opus elemosynæ, cum ex iustitia debitum sit, sicuti notauit S. August. Ep. 54. ad Macedonium, relatus in c. vlt. 14. q. 5. Vide testimonia plura, quæ ad utramque assertionem confirmandam congerit Gratianus ead. q. 5. & Bellarm. cit. lib. 3. c. 9. Rectè autem monet Pet. Naua. lib. 4. c. 2. n. 60. Etiam in hac distributione bonorum incertorum, quæ ex iuris positui dispositione, sicuti & legatorum, quæ ex testatoris iussu pauperibus fieri debet, seruandum esse ordinem Charitatis: ita, vt si qui sint in extrema, vel graui necessitate constituti, his præ aliis pauperibus tribuatur: quia in re consultum est prudentis Parochi, vel Confessarii consilium adhibere.

Dico III. Si illicitè acquisita restitutioni obnoxia non sint, eò quòd non ipsa acquisitio, siue acceptatio illicita fuit, sed opus propter quod acquisita, cuiusmodi sunt turpia sordida lucra lenonum, meretricum, histionum: ex his elemosyna pauperibus rectè fieri potest. Attamen Ecclesia talium oblationes ad altare, vel pro Missæ sacrificio non acceptat: partim ob seruandam reuerentiam rerum sacrarum: partim ob scandalum vitandum; ne partelucris ex his operibus recipièdo, approbare videatur partim ad imitationem legis veteris, quæ prohibitum erat Deuter. 23. ne offerretur merces prostibuli in domo Domini, quia abominatio est apud Deum. Plura de elemosyna videl. à quibus personis fieri possit, vide lib. seq. tr. 4. c. 12. n. 6.

## CAP. VII.

## De correctione fraterna.

## S V M M A R I V M.

1 Fraterna correctio actus quidam est misericordia virtutis.

2 Deo extat præceptum Christi, Si peccaueris in te frater tuus corripue eum. Matth. 18.

3 Obligatio hac suapte genere est sub mortali, sed septenumera



*tantum venialis efficitur, vel propter indispotionem eius qui corripere debet, vel propter materia seu peccati emendandi paruitatem.*

**C**orrectio fraterna est actus misericordiae spiritualis, quo per convenientem sermonem, proximum a malo peccati ad bonum honestatis convertere nitimur, secundum illud Psal. 140. *Corripiet me iustus in misericordia, & increpabit me.* Tamen enim peccatum libera voluntate suscipitur; poenae tamen reatu, quae peccator refugit, necessario adiunctum habet. Deinde propter naturae infirmitatem, passionem, vehementiam, intellectus caecitatem, inueteratam peccandi consuetudinem, plerumque peccator quodam veluti peccati vinculo constringitur, quo illum exolvere seu admonendo ne in peccatum, cuius periculum ipsi impendit, consentiat, seu admonendo, ut ex peccato, in quo positus est, exurgat: magnum spiritualis misericordiae opus est.

De correctione fraterna habemus praeceptum Christi apud S. Matt. c. 18. *Si peccaverit in te frater tuus, corripe eum.* In te, idem est, quod contra te: siue id fiat directe, siue indirecte. Nam etiam qui in se ipsum, vel contra Deum peccat, vidente aut sciente te, is scandalum tibi, vel saltem iustam indignandi causam praebet. Quare S. August. serm. 16. de verbis Domini, dictum praeceptum de omni peccato proximi, quod in alterius notitiam devenit, accipiendum esse docet. Idemque sentiunt S. Bonau. in c. 17. Lucæ Gl. in c. si peccaverit, 2. quæst. 1. Valentia t. 3. dif. 3. q. 10. p. 2. & alij.

*Frater tuus.* Quo nomine comprehenduntur omnes Christiani, siue qui Ecclesiae membra sunt, ut colligitur ex verbis sequentibus, *Si te non audierit, dic Ecclesiae.* Eodemque sensu hoc nomen accipitur Matth. 13. *Omnes vos fratres estis.* Notat verò Gabr. super canon. Missæ lect. 74. aliter corripiendum esse inferiorem, aliter æqualem, & aliter superiorem. Nam inferior plerumque prius increpandus, postea mansuete hortandus est: ut vulnus correctionis asperæ homini inflatum, mox mansuetudinis veluti emplastro sanetur, monente Apost. ad Gal. 6. *Si preoccupatus fueris homo in delicto, vos qui spirituales estis, huiusmodi instruere in spiritu lenitatis.* Aequalis verò amice commonendus, secundum eandem Apost. 2. ad Thessal. 2. *Nolite quasi inimicum aestimare: sed corripite ut fratrem.* Superior denique humiliter rogandus est, teste eod. Apo. 1. ad Timoth. 3. *Seniorem ne increpaveris: sed obsecra ut patrem.* Quod limita: Nisi Superior, vel Prelatus infirmorum laqueus & scandalum in rebus Fidei existat: tunc publice à subdito redarguendus erit. Vide S. Th. q. 33. a. 4. Ga. cit. lect. 74.

*Corripe eum.* Quod verbum praeceptum continet, quavis non omni tempore obligans, sed certis circumstantiis concurrentibus, ut videre licet apud S. Th. q. 33. a. 2. Rich. in 4. d. 19. a. 2. q. 1. Gabr. l. c. Ioan. Gersonem. p. 2. operum, opusc. de corrept. proximi, Adrianum in 4. de confess. q. de correct. fraterna, §. Sed quia principaliter. Prima circumstantia est: Si scias peccatum fratris: at verò inquirere in aliorum vitam, nemo, et si superior, debet. Secunda: Si non credas fratrem iam emendasse, vel mox per se emendaturum esse delictum, vel saltem non repetiturum, quæ verba ideo addo, quia valde probabilis est sententia Gl. in c. si quis peccaverit, 24. q. 1. Syl. ver. correctio, q. 1. in fine, Turrianus 2. 2. disp. 86. dub. 2. peccatum merè prateritum, si non subsit periculum recidendi, non cadere sub obligationem praecepti correctionis: quando quidem neque ipsimet peccanti obligatio incumbit, peccatum prateritum per poenitentiam statim delendi, sicuti ex communi dicā l. 5. tr. 6. c. 2. n. 5. Quare recte dixit Ecclesiasticus c. 19. *Corripe proximum, ne forte iteret.* Tertia est, Si nemo alius aditæ quæ idoneus, qui emendaturus existimetur. Quarta, Si spes fructus ex correptione affulget: Nam finis est proximi emendatio, quæ si desperetur, medium

correctionis frustra adhibetur: At vero frustraniti, & nil aliud laborando, quam odium querere, extrema dementia est: Et Salom. Prouerb. 6. *Noli arguere derisorem, ne oderit te.* videri potest Palud. in 4. d. 38. q. 6. in fine. Quinta, Si locus, tempus, aliæque circumstantiæ ad corrigendum opportune sint. Quæ de re vide differentem S. August. libro 1. de ciuit. Dei, capite 9. S. Thomam Adrianum & alios supra citatos, Caiet. verb. correctio fraterna. Nau. cap. 24. man. numer. 12. *Inter te & ipsum solum.* Hæc & sequentia verba explicata reperies lib. 3. tract. 3. de iustit. p. 3. cap. 4.

Dubitatur: Quanta sit præcepti huius obligatio? Respondeo, & dico I. Qui commodè ac faciliè impedire, vel tollere potest grauem spiritualemente miseriam proximi, videlicet peccatum mortale, quamuis ex malitia patrandum, sed ob mali temporalis timorem, vel boni temporalis cupiditatem, quæ in eius animo fraternæ Charitati præponderat, id facere negligit, mortaliter peccat: sicut constat ex dictis c. 2. & 5. & videri potest S. Aug. & D. Thom. II. cc. Abbas in capite nouit, numero 37. de iudicijs.

Dico II. Qui propter passionem timoris, verecundiae, pusillanimitatis tam stricte se ad hoc obligatum esse non aduertit: vel in eiusmodi affectione constitutum minus idoneum se existimat ad fratris delictum emendandum, quamuis huiusmodi timor & existimatio inanis sit: plerumque tamen corripiendi negligentia culpam venialem non excedit. Ita S. Thomam quæstione 33. articulo 2. ad 3.

Dico III. Probabilior mihi videtur sententia Caiet. ver. correctio, in fine primi c. Valen. d. 3. q. 10. p. 10. p. 2. in fine, contra Syl. ver. correctio, q. 1. Bannes 2. 2. q. 33. art. 2. du. 2. Turrianum 2. 2. dif. 86. dub. 2. quamuis sub veniali peccato obligatum esse ad corrigenda leuia siue venialia proximi peccata, si facillimè possit. Id enim lex Charitatis postulat, ut quoduis proximi malum, quantumuis in suo genere exiguum, impediamus vel tollamus, si facillimè & sine villo incommodo nostro possimus.

Quod ipsum fortasse Christus mysticè representauit, cum Ioan. 13. discipulorum pedes lauit, id est, venialium peccatorum sordes, illorum affectibus adhærescentes, ante Venerabilis Sacramenti institutionem ac communicationem, abstergit: & protinus adiecit: *Et vos debetis alter alterius lauare pedes:* id est, inordinatos affectus, & veniales noxas tollere. Nam qui locutus est, siue à mortalibus peccatis mundus, non indiget nisi ut pedes lauet, id est, leuiorum affectuum maculas abstergat, sicuti explicant S. Aug. tra. 56. in Ioan. Beda in ci. c. 13. Ioan.

Cæterum, quia plerumque impedimentum aliquod interuenit, siue ex parte corripiendi, ne iniquo animo correptionem accipiens, deterior fiat: siue ex parte corripientis, quem sæpe naturalis verecundia constringit, ut difficile in animum inducat proximum arguere, aut monere, nisi admodum familiaris sit: ideo rarior est hæc obligatio emendandi peccata venialia proximorum, quibus cum viuimus. Excipio eos, qui ratione officij, aut gubernationis peculiarem aliorum curam gerere debent, v. g. Religionum Prælati. Imò fieri potest, ut hi sub mortali peccato veniales subditorum culpas impedire, ac tollere teneantur, si exinde religiosæ disciplinæ vigor minuatur, & impunitas venialiter peccandi passim inualescere incipiat, cum magno Religionis detrimento. Atque eadem ferme ratio est de patrefamilias, præsertim erga liberos suos.

Ad extremum notandum est; Licet is, qui in simili, aut maiore peccato constitutus est, minus idoneus ad corripiendum alterum existat: quamobrem minus corripiendi iustorum magis proprium esse significatur Psal. 140. *Corripies me iustus.* Peccatori verò dicitur illud Luc. 4. *Alcedice, cura te ipsum.* Attamen neque iste omnino ab obligatione huius præcepti liber est: quanquam non super-



perbè obiurgando, sed congemiscendo, propriamque culpā fatendo, id agere debeat: quò pertinet illud Matth. cap. 7. *Quid vides festucam in oculo fratris tui, trabem autē in oculo tuo non vides?* Et mox: *Hypocrita, ecce primum trabem de oculo tuo.* Tunc enim peccator trabem, id est, maius peccatum suum ex oculo eiecit siue deponit, cum illud non tanquā hypocrita tegit ac dissimulat; sed agnoscit, palam fatetur, & ante oculos ponit. Nonnunquam verò, si peccator fratrem, correptione sua grauissimè indigentem, sine scandalo aliter corripere & emendare non possit, nisi prius peccatum proprium per poenitentiam ac vitæ emendationem abiciat: ad hoc ipsum ex misericordiæ ac charitatis lege obligatus esse videtur. Quæ de re Valent. cit. quæst. 10. p. 3. §. vnde verè, Nau. cit. c. 24. num. 12. Verum hanc obligationem raram esse, rectè docet Suarez de Charit. disp. sect. 4. num. 7.

## CAP. VIII.

## De odio Dei ac Proximi.

## SUMMARIUM.

- 1 Duplex est odium: Vnum persona, quod & odium inimicitia dicitur: alterum qualitatibus; aliàs odium abominationis vocatur.
- 2 Odium inimicitia tum erga Deum, tum erga proximum, est peccatum mortale ex genere suo: quippe Charitatis virtutis directè oppositum.
- 3 Odium inimicitia erga Deum est omnium peccatorum grauissimum.
- 4 Odium Dei in omni peccato mortali virtualiter continetur.
- 5 Odij peccatum inter capitalia non numeratur: cum sit potius complementum peruersionis.
- 6 Odium abominationis erga Deum semper malum est: non item odium abominationis erga hominem.
- 7 Maledictio est actus odij imperatus.
- 8 Hominibus malis maledicere ex odio abominationis: quandoque licitum est.
- 9 Sine iusta causa proximo maledicere, Charitati repugnat: inter ceterum vero, si contumeliam contineat, virtuti iustitiæ aduersatur.

**O**diū directè oppositur amorī, seu Charitati. quare, sicut duplex est amor: Vnus beneuolentiæ: siue amicitia; alter concupiscentiæ: ita duplex quoque est odiū. Vnum dicitur odium personæ, aliàs odium inimicitia, quo personæ alicui, quæ nobis displicet, malum volumus, quatenus absolutè ipsi malum est. Alterum dicitur odium qualitatibus, aliàs odium abominationis, quo personam auersamur, non secundum seipsam, sed secundum malum ipsi adiacens, quatenus id vel nobis, vel alteri, vel Communitati repugnat.

Assertio I. Fieri potest, vt homo in hac vita Deum odio habeat, Ita S. Thom. q. 34. a. 1. Probat & explicatur: Et si in Deo summo ac infinito bono, secundum se atque intrinsecè, apprehendi non possit malum, ratione cuius alicui displiceat, & ob id aliquid aduersitatis ipsi accidere velit: extrinsecè tamen in effectibus ab eo procedentibus quatenus vel difficilia iubet, vel legum suarum transgressores punit, apprehendi potest in Deo malum, ratione cuius alicui displiceat, & ob id saltem simplici affectu ac voluntate optet, vt Deo aliqua aduersitas eueniat, v. g. vt dispereat. Neque refert, quòd ratio ac veluti occasio huius odij inimicitia aliunde accepta sit, videlicet ex molestia proueniente à Deo, quem homo odit: Sicut nihil refert ad amicitia amorem, quo personam secundum se, siue propter se prosequimur, rationem ac veluti occasionem nos accepisse ex beneficijs ab eadem persona profectis. Similiter etiam euenit, vt homo ex molestijs, quas à proximo passus fuit, moueatur, vt ipsum secundum se, & absolutè odio prosequatur.

Dixi autem simplici affectu hominem velle & optare

posse, vt Deo aliqua aduersitas accidat: ad eum modum sicuti optare aliquis potest per aëra volare, manibus cœlū tangere. Nam voluntas efficax: siue desiderium haberi non potest eius rei, quam impossibile iudicamus, teste Arist. 3. Eth. c. 2. Qui autem Dei summi boni veram cognitionem habet, is possibile esse scit, vt ipsi malum siue aduersitas aliqua eueniat: ergo odisse eum efficaci voluntate non potest.

Assertio II. Odium inimicitia tum erga Deum, tum erga proximum per se & intrinsecè malum, & ex genere suo mortale peccatum est. Sumitur ex Psal. 73. *Superbia eorum, qui te oderunt, ascendit semper.* Et lib. Numer. cap. 10. *Dispersentur inimici tui: & fugiant, qui oderunt te.* Et 1. Ioan. 2. *Qui odit fratrem suum, in tenebris est.* Probat & ex eo, quia odium inimicitia directè opponitur maximæ virtutis Charitati, de qua præcipuum mandatum habemus. Etenim, sicuti per Charitatem volumus Deo ac proximo bona, & de eisdem gaudemus; proximo autem maiora etiam desideramus; dolemus verò de malis proximi: Ita è contrario per odium inimicitia tristamur de bonis Dei ac proximi: volumus autem vel desideramus eis mala: insuper gaudemus, cum proximo malum accidisse cognoscimus.

Assertio III. Odium inimicitia erga Deum est omnium peccatorum grauissimum. Ita S. Thom. a. 2. S. Anton. p. 2. tit. 8. c. 3. §. 4. aliq̃ue communiter. Probat & Optimo opponitur pessimū: Sed odium inimicitia erga Deū directè opponitur amicitia & dilectioni diuinæ, in qua maxima hominis viatoris perfectio consistit, sicuti cap. 1. dictum est: Ergo odium inimicitia erga Deum est pessimum scelus, viatorem maximè dedecens. Confirmatur: Quod est per se, potius est eo, quod est per aliud, aut per participationem: Ratio autem peccati, quæ est voluntaria auersio à Deo, per se primò reperitur in odio Dei, cū sit actus quo voluntas à Deo per se auertitur: sicuti per amorem Deo per se adhæret: In alijs vero mortalibus peccatis auersio voluntatis à Deo non directè, formaliter ac per se reperitur: sed indirectè, virtualiter seu interpretatiuè. Nam in peccatis mortalibus contra virtutes morales puta fornicatione, iniustitia, &c. dum homo ad creaturam voluntariè conuertitur contra legem & voluntatē Dei, indirectè etiam ac consequenter auertitur à Deo legislatore, cuius mandatum, gratiam, & amicitiam creaturæ postponit. In peccatis verò contra Fidem ac Spem maior quidem à Deo auersio cernitur: quia per infidelitatem auertitur homo à diuinis reuelatis veritatibus: per desperationem auertitur à supernaturalibus donis & auxilijs Dei: attamen neque his ipsis aut similibus peccatis voluntas Deum directè ac per se refugit aut detestatur, sicuti per odium: sed tantum indirectè atque imputatiuè.

Ex quibus colligitur primò, quod docet Caietanus super quæst. 34. a. 2. Odium Dei virtualiter ac participatiuè reperiri in omni peccato mortali: siue, vt alij dicunt, omne mortale peccatum esse contra Charitatem & amicitiam Dei. Quia, vt supra explicauī, in omni peccato mortali continetur aliquo modo auersio à Deo, summo & infinito bono; propter quam diuinæ gratiæ & charitatis amissionem, poenamque infinitam meretur. Cuiusmodi tamen auersio per se primò cernitur in odio Dei, quippe quod Charitati Dei formaliter ac directè contrarium est: reliqua verò tantum indirectè, ac virtualiter aduersantur. Quæ simili ratione ostendit sanct. Thom. a. 4. odium proximi esse grauissimum inter peccata, quæ erga proximum committuntur: si illud consideretur ex parte operantis, cuius voluntatem, quæ est radix peccati erga proximum directè aduersatur. Quamuis peccata quædam exteriora contra proximum, si considerentur ex parte nocuenti, grauiora sint, vt adulterium, homicidium.

Colligitur secundò; Cur odium Dei ac proximi inter peccata capitalia non numeretur, sicuti videre est apud



4 S. Gregor. lib. 31. moral. c. 31. Quia non est tale, ex quo tanquam fonte seu capite reliqua oriuntur: sed potius in quod reliqua terminantur. Nam in ijs, quæ contra naturam fiunt, paulatim fit processus à minore ad maius, ait S. Thom. a. 5. Odium autem, quod Charitati opponitur, cum ipsum amorem boni, qui maximè homini naturalis, destruat: est maximè contra naturam hominis, quatenus rationalis est: Ergo odium Dei & proximi non capitale, sed vltimum potius peccatum est. quæ doctrina principaliter locum habet in odio Dei, summi & infiniti boni: secundariò verò in odio proximi, participatam bonitatem seu perfectionem habentis. Siquidem homo ob amorem creaturarum legem Dei frequenter transgrediendo: ipsi postea Deum, quatenus legislator & peccatorum vindex est, odisse & auersari incipit, quod est abominationis odiù: denique verò eò peruersitatis peruenit, vt ipsum Deum secundum se & absolutè excretur, & odio habeat, quod est odium inimicitie altero multò deterius, ac simpliciter pessimum. Simili ferme modo, postquam homo erga proximum, respectiue seu propter accidentalitatem eius malè affectus fuit irà, inuidià, &c. denique ad odium inimicitie peruenit, vt ipsum secundum se, odio prosequatur, absolutè illi malum optando, sicuti notat S. Thom. art. 6. ad 3.

Est verò discrimen etiam inter odium inimicitie erga proximum; quòd illud, si deliberatè fiat, semper est peccatum mortale, cum qualecunque malum etiam leuissimum, quod Deo optatur, destruat eius infinitam bonitatem. At verò odium erga proximum ex leuitate materie fit veniale; puta si ex displicentia aliqua personæ exiguum malum illi optes, sicuti notauit Turrianus 2.2. dis. 21. dub. 1.

Assertio IV. Odium abominationis erga Deum per se & intrinsecè malum, & ex genere suo peccatum mortale est: At verò odium abominationis erga proximum interdum culpa vacat, & laude dignum est. Prior pars assertionis sumitur ex S. Matth. cap. 19. *Quis enim bonus nisi solus Deus?* Ipse enim infinitè bonus est, vt in eum nulla malitia siue defectus intrinsecè, vel extrinsecè cadere possit, ob quem abominatione atque odio dignus sit. Quod alijs verbis dici potest, Deum & in seipso omnimodè bonum esse: & omnia, quæ ab ipso procedunt, bona esse: quare ex omni parte reperiri causam cur ametur, honorificetur; nullam autem omnino, cur odio haberi, vel abominatione esse meritò possit.

Posterior pars probatur: Quia odium abominationis erga proximum non semper Charitati aduersatur: sed interdum fundatur in amore beneuolentie seu Charitatis erga Deum, vel nos ipsos, vel ipsum; quem odimus, aut alterum proximum: vt proinde eiusmodi odium, si debito ordine instituatur, ex virtute Charitatis proueniat. Consistit autem ordo in eo, vt minus malum proximo euenire (saltem simplici & inefficaci voluntate) optemus quòd malum maius siue nostrum, siue alienum eiretur. Contrà verò, si maius malum v. g. corporis mortem proximo, quamuis simplici affectione desideremus, vt nos ipsi vel alius minore malo, v. g. particulari damno fortunarum liberetur: odium hoc malum erit, quippe ordini Charitatis repugnans, iuxta ea, quæ dixi suprà cap. 2. & 3.

6 Restat questio: Vtrum maledictio, qua alicui homini malum imprecamur, sit actus odij, & an semper peccatum? Respondeo & dico I. Maledictio siue imprecatio mali non est actus odij elicitus, sed impetratus. Nam, vt S. August. docet lib. 1. de serm. Domini in monte, cap. S. Thom. 2.2. q. 76. a. 1. Maledicere est malum alicui dicere: quod elicitiue ad intellectum pertinet: non ad voluntatem. Veruntamen, cum maledictio fiat per modum imprecandi, v. g. fulmine, laqueo pereas: aliud non est quàm expressio voluntatis auersæ ab altero: ideoque ab odio imperatur.

7 Dico II. Homini bus malis seu peccatoribus interdum

licitum est maledicere ex odio abominationis: v. g. furi, vel latroni, qui Reipub. noxius est, vt laqueo suspendatur: non quidem id optando, quatenus malum ipsius absolutè est; (sic enim ad odium personæ pertineret) sed quatenus boni rationem habet, quia per illud maiora mala impediuntur, sicuti docet S. Thom. cit. a. 1. Loquor autem de maledictione simplici & inefficaci: nam maledicere peccatoribus per modum causatitatis, seu imperij efficacis, eisdemque malum inferre, ad eos solùm pertinet, qui ius habent noxios puniendi, sicuti notauit Mol. tract. 4. de iust. disp. 22. num. 7. Multò verò magis hominibus, & spiritibus damnatis maledicere possumus, quatenus Dei inimici sunt, ab eoque maledicti. Ad illud verò Ecclesiastici 21. *Deum maledixit impius Diabolum, maledixit ipse animam suam*, respondet S. Thom. ad 4. Cum Diabolo maledicendum sit non secundum naturam eius, sed secundum culpam, ideo dum impius Diabolo maledicit, seipsum quoque maledictione dignum iudicat: quo sensu etiam Apostolus dixit ad Roman. 2. *In quo iudicas alterum, te ipsum condemnas: eadem enim agis, quæ iudicas.*

Dico III. Proximo, sine iusta causa, maledicere, Charitati repugnat, & ad peccatum odij pertinet; interdum verò iustitiæ aduersatur, & ad contumeliam spectat. Quas rationes siue species peccatorum exactè in sacra Cōfessione perpendere oportet. Nam interdum ambæ reperiuntur in maledictione; vt si quis ex animo, adeoque ex odio alicui homini maledicat in faciē, non sine cōtumelia, siue honoris iniusta læsione: hic duplex peccatū cōmissi; vnū contra Charitatem, & alterum contra Iustitiam, quorum vtrumque ex genere suo mortale est; licet vel ex considerationis imperfectione, vel ex materie leuitate veniale fiat, vt Caiet. docet cit. q. 76. Interdum verò peccatur contra Charitatem sine contumelia: si quis alicui serio & ex animo maledicat: tan. en. absenti, & sine vlla honoris aut bonæ apud alios existimationis detractio. Interdum vice versa, committitur peccatum contumeliæ contra Iustitiam, vel Pietatem: non item peccatum odij contra Charitatem: videlicet, si quis alicui in faciem maledicat, sed non ex animo, quasi id euenire optet. Et est tantò grauior contumelia, vel impietas (si fiat erga parentes, vel eos, quos parentum loco habere oportet) quantò excellentior persona est, vel à nobis magis reuerenda: quare legimus Exod. 21. *Qui maledixerit patri suo, vel matri, morte moriatur.*

Denique interdum accidit, vt verba maledictionis erga hominem, v. g. subditum sibi, neque Charitati, neque Iustitiæ notabiliter repugnent: sed ferme solùm Mansuetudinis virtuti, ac Patientiæ, ideoque culpam venialem non excedant, sicuti docet Nauar. c. 23. num. 17. Mol. l. c. Puta, si parens filio, hera ancillæ malum imprecetur non ex animo vt ita eueniat, atque etiam sine notabili honoris imminutione: Imò arbitratur Molina, tamen si aliquis ex ira, vel obiurgationis causa, grauem aliòquin maledictionem in alterum effundat, v. g. vt diabolus illum rapiat: sed sine animo ac voluntate, vt id eueniat, atque sine notabili contumelia, spectata personæ qualitate, aliisque circumstantijs: non fore peccatum mortale: verum, si seipsum aliquis ex ira Dæmoni deuoueat, quamuis sine animo vt ita eueniat, à mortali excusandum non esse, ob fœditatem, horrorem, ac peruersitatem rei.

## CAP. IX.

### De peccato accediæ.

#### S V M M A R I V M.

1 Accediæ est tristitia de bono diuino à nobis participando cum la-bore & difficultate.

2. est



2. *Est ex genere peccatorum mortalium, quippe repugnans Charitati & amicitia Dei.*

3. *Acedia est unum ex vitij capitalibus.*

4. *Expellitur acedia non cedendo: sed resistendo.*

1. **A**Cedia definitur ex S. Thom. quæst. 35. Tristitia de bono diuino, à nobis participando, quod propter obtinendi, vel conseruandi difficultatem, nobis malum videtur: & idcirco animus in teporem & ignauiam cadit. Pro cuius intellectu, repetendum quod supra dixi cap. 5. num. 2. De Deo duplex gaudium à nobis concipi posse: vel cum lætamur de diuinis bonis, quatenus in Deo insunt: vel cum lætamur de Deo nobis secundum gratiæ effectus præsentis: Ita duplex est tristitia gaudio opposita: Vna de diuino bono; quatenus in Deo est: cuiusmodi tristitia longè pessima ad Dei odium pertinet. Altera de bono diuino (puta gratia & gloria) quatenus à nobis participari debet. Et si enim tristitia concipi non possit de bono spirituali secundum se, siue ut est animæ perfectio; quia nemo bonum, quatenus bonum: odisse aut de eo tristari potest: tamen concipi potest tristitia per accidens, quatenus eius acquisitio aut conseruatio cum corporis labore iuncta est, carnisque oblectationes impedit, eamque ob causam malum nobis quoddam videri potest.

Quapropter peccatum acediæ aliud non est, quam tristitia animi de gratia Dei acquirenda, conseruanda: seu de gloria cœlesti obtinenda per actiones nostras cum labore ac difficultate iunctas. Est ex genere suo peccatum mortale, quia Charitati & amicitia Dei repugnat, teste S. Thom. art. 3. S. Anton. part. 2. tit. 9. cap. 1. princ. Quamquam, si tristitia siue horror diuinorum bonorum in appetitu tantum sensitui hæreat, cui ratio & voluntas resistat, nullum peccatum est, sicut colligitur ex Apostolo ad Galat. 5. *Spiritu ambulate, & desideria carnis non persequeris. Caro enim concupiscit aduersus spiritum; & spiritus aduersus carnem: hæc enim sibi inuicem aduersantur.* Sin verò spiritus, siue ratio hominis superior languide resistat, committitur peccatum veniale, sicut notauit S. Thom. cit. a. 3.

Quamuis acedia ferme oriatur ex nimio rerum temporalium affectu, & seculi huius amore, atque oblectamenti; nihilominus inter vitia capitalia numeratur. Cum enim homo in tristitia, sine vlla delectatione, diu permanere non possit, fit, ut qui rerum spiritualium horrorem ac tedium concepit, mox ad noxium creaturarum amorem, & illicitas cupiditates atque delicias animum conuertat: quibuscum spiritualia bona, & quæ ex his percipiuntur, sincera oblectationes consistere haud possunt. Ita notauit S. Thom. art. 4. ad 2. ex Aristot. 10. Ethic. cap. 6.

Porro præter acediam Charitati oppositam, de qua hætenus dixi, sunt etiam aliæ tristitiæ noxiæ, quæ virtutibus singulis aduersantur: videlicet, si quis tristetur, quod orare debeat, quod eleemosynam dare, debitum reddere, &c. Quamquam huiusmodi acediæ diuersa peccata non sunt ab ijs, quæ opponuntur virtutibus, de quarum bono aliquis tristatur, sicut docet Caiet. in summa ver. Acedia, Nauar. c. 23. num. 124. Quamobrem tali genere acediæ nunquam peccatur, nisi cum actio virtutis sub præceptum cadens, ob sui difficultatem omittitur; vel negligentius, quam par est, exercetur, sicut notârunt Caietan. & Nauar. ll. cc. Tolet. de peccatis mortal. c. 68. & indicat S. Thom. a. 3. ad 2.

4. Expellitur autem acedia non fugiendo, sed resistendo, atque opus salutis fortiter aggrediendo: partim, quia difficultates in opere seu exercitio virtutum non tam vehementes sunt, quam falsa apprehensione ac timore ab ineptis estimantur: partim quia rerum spiritualium studium, quanto magis exercetur, tanto auidius retinetur, secundum illud Sapientis de sapientia loquentis cap. 8. *Non habet amaritudinem conuersatio illius, neque sadium*

*conuictus illius: sed letitiam & gaudium: Delectatio autem retinet operantem in opere.*

## CAP. X.

## De Peccato inuidiæ.

## SUMMARIUM.

1. *Inuidia est tristitia de bono alieno, quatenus inuidens malum aestimatur. Videlicet ipsius excellentiam innuens.*
2. *Affectiones quadam similes inuidiæ, interdum bona sunt: ut zelus, indignatio, &c.*
3. *De prosperitate proximi tristari licet, non quatenus ipsi commoda est, sed quatenus nobis noxia: Item de infortunio hominis, v. g. parentis morte, gaudere aliqua ratione malum non est, & g. quatenus filio hereditatem adfert.*
4. *Christus moriturus habuit duas voluntates: Vnam de vita seruanda inefficacem, & virtute conditionalem: alteram de morte obeunda absolutam & efficacem.*

**I**nuidia dicta est à nimie videndo siue intuendo in prosperitatem alterius. Definitur ex Arist. 2. Rhet. c. 9. & 10. S. Thom. q. 36. a. 1. Tristitia de bono alieno, quatenus id malum inuidens aestimatur, tanquam propriam ipsius excellentiam immuniens. Peculiare vitium pusillanimatorum, quibus aliena omnia grandia videntur, quia se facile superari posse formidant: quare in lib. Iob. c. 5. legimus, *Paruum occidit inuidia.* Est ex genere suo peccatum mortale: quia opponitur virtuti Charitatis, cuius actio est gaudere de bono ac prosperitate proximi. Porro licet inuidia ex superbia, & inanis gloriæ cupiditate ortum ducat: est tamen etiam ipsa fons siue origo aliorum scelerum, quæ recenset S. Anton. p. 2. tit. 8. c. 1. §. 4. Valent. q. 13. p. 2. Tolet. cap. 67. Vt proinde inter vitia capitalia merito numeretur.

Sciendum autem, tres alias tristitiæ affectiones esse, quæ cum inuidia similitudinem genere videntur, de quibus S. Thom. a. 2. ex Arist. 2. Rhet. c. 9. & 11. Prima est indignatio, siue Nemesis, per quam bona temporalia impij atque indignis obuenire tristamur. Cuiusmodi tristitia vitiosa est, si considerentur ea bona vel prout absolute proximi sunt, quem ex Charitate amare, & de cuius bonis gaudere potius debem: vel quatenus ex ordinatissima Dei dispositione ob certum finem indignis etiam proueniunt: Siquidem voluntas nostra voluntati diuinæ in valito formali nunquam repugnare debet, ut postea dicam. Quare contra hanc tristitiā David ait Ps. 36. *Noli emulari in eo, qui perperatur in via sua, in homine faciente iniustitias.* Laudabilis autem est hæc tristitia, si bona illa considerentur, prout indigno humana voluntate ac potestate, aduersus distributiuam, aut vindictiuam iustitiam, obueniunt: vel prout eis indignus ad peccandum abutitur. Vide S. Anton. cit. c. 1. in princip. Caiet. cit. a. 2. & in summa ver. Nemesis, Nauar. c. 23. num. 118.

Alterā est Emulatio siue zelus, per quam tristamur de bono alterius, non quia ipsius est, sed quia nos eo caremus. Cuiusmodi tristitia si versetur circa bona animi, scientias ac virtutes, laudabilis est: quippe, dicendi, ac proficiendi studium excitās, conuenienter illi Apost. 1. ad Corinth. 12. *Emulamini charismata meliora.* Et S. Hieronym. Epist. ad Latam: *Habeat socias, cum quibus discat, quibus inuideat, quarum laudibus est emulatio, si ea emulanti conuenientia sint: ut si opifex tristeretur, cum videt alios sui similes ex opificio familiam alere: se non alere. Non item bona est emulatio, si rusticus tristeretur, cum videt nobiles emere ac possidere pagos & castra, sibi talia deesse.* Multum re ipsa differt emulatio ab inuidia: nam per inuidiam tristatur homo de bonis proximi: quamuis non absolute, (id enim ad odium pertinet) sed cum ordine ad inuidentem, qui ea re superari se existimat. Per emu-



lationem vefo homo non triftatur de bonis proximi: fed de fua penuria, quam comparando cum alterius abundantia magis animaduertit.

Tertia affectio fimilis inuidia: cum triftamur de bono proximi, quia ex eo occafionem accepturus putatur nobis, vel alteri nocendi. Quæ triftitia bona eft, fi non temere, fed prudenter timeamus, ne ille ex felicitate an- fam accipiat affligendi innoxios: Vitiofa autem eft, fi temere ac imprudenter finiftram talem fufpicionem, aut iudicium de proximo concipiamus. Bona item hæc affectio eft, quando non temere & fine caufa timemus, ne proximus collatam fibi poteflatem, vel officium malè adminiftraret: Vitiofa verò, fi ideo collatam ipfi poteflatem vel munus dolemus, quia nobis vel alijs malè agentibus debitas pœnas irrogabit. Eft autem manifefta ratio, cur hæc affectio interdum bona: inuidia verò femper mala fit: quia iufta caufa eft triftandi de proximi felicitate, quòd is inde peccandi occafionem accipiat. Nunquam autem iufta eft caufa triftandi de profperitate proximi, quòd ea tuæ excellentiæ obefle, eamque quafi obumbrare videatur: cum ex proximi felicitate tibi propter Charitatis & amicitia: vnionem, potiùs aliquid excellentiæ accedat.

3 Pro pleniori intellectu eorum, quæ dicta funt; aduer- te, velle, & nolle; amare, & odiffe; lætari, ac triftari non efle actus contrarios, nifi circa idem obiectum, fub eadem formali ratione; verfantur. Quare imprimis fieri poteft, vt quamuis voluntas hominis de aliqua re fub vna ratione licitè triftari non poffit, fed potiùs gaudere debeat tamè fub alia ratione de eadem re iure ac meritò triftetur: v. g. Cæpo, cum videt plurimos hofpites ad vicinum fuum diuertere, triftari licitè non poteft de concurfu ifto, quatenus proximo commodus eft; fed quatenus in fuum detrimentum cedit. Præterea, de morbo tuo, vel parentis tui meritò triftaris, quatenus malum quoddam perfonæ eft, quam amas: Triftari autem non licet de morbo fecundum eam rationem, qua Deus homini eum accidere vult videlicet vt corrigatur, & peccatum eius puniatur, emendetur. Hoc enim eft, quod Theologi dicunt in 1.2. quæft. 19. a. 10. Voluntate hominis cum diuina voluntate femper debere conformari in voluto formali, ita vt nunquam rem, quâ Deus vult, homo nolit fub ea ratione qua Deus vult: licet fub alia ratione eadem rem homo nolle poffit, faltem fimplici & inefficaci affectu: quomodo filius rectè triftatur patrem fibi charum & vtilem mori, tametsi fciat Dei prouidentia ac voluntate, quæ nunquam ipfi difplicere debet, mortem euenire.

Optimum verò huius rei exemplum habemus in Chri- fto Domino, qui imminente paffione ac morte, duas voluntates habuit. Vna erat voluntas efficax, per quâ maximè defiderabat pro falute humani generis mori, ficut ipfe- met expreffit Luc. 12. *Baptifmo habeo baptizari, & quomodo coarctor, ufque dum perficiatur*: Eandemque voluntatem fciebat voluntati diuinæ conformè efle, ideoque vocauit eam Patris voluntatem. Altera autem in Chriſto erat vo- luntas fimplicis affectionis, per quam viuere cupiebat, & à morte abhorrebat, tanquam malâ humanæ naturæ, quâ veraciter gerebat & ostendebat: atque idcirco vocauit hanc fuam voluntatem, quia ipfi vt homini naturalis erat. Matth. 26. *Pater mi, fi poffibile eft, tranfeat à me calix ifte, verumtamen, non ficut ego volo, fed ficut tu*, Luc. 12. *Non mea voluntas, fed iua fiat*.

Notandum etiam ex Vafq. 1.2. difp. 7. 2. c. 4. & 3. p. t. 1. difp. 7. 3. c. 3. Quod voluntas fimplicis affectionis virtu- te in fe contineat efficacem voluntatem conditionalem; quæ in Chriſto talis erat: velle mortem declinare, nifi eâ, fecundum Dei Patris voluntatem, redemptio humani generis expofceret. Cuiusmodi quoque voluntatem re- cte habet filius mortuo parente: Vellem patrem meum diutius viuere, fi Dei voluntas eflet: cui tamen repugna- renon debeo.

Hanc ipfam pugnâ duarum in Chriſto voluntatum,

quarum vnâ dixi inefficacem & virtute conditionalem de feruanda vita: alteram verò abfolutam, & priori do- minantem de morte, fecundum voluntatem Dei Patris, appetenda, expreffit etiam Dominus Ioan. cap. 12. *Nunc anima mea turbata eft, ancipiti cogitatione, & affectione hinc vitæ feruandæ: illinc mortis vltro appetendæ. Et quid dicam? Verba hæc funt deliberantis & confilium inquire- tis: Pater faluifica me ex hac hora: id eft, volòne dicere, vt Pater cœleftis me ex huius horæ anguftijs, & morte im- minente liberet? Sed propterea veni in hanc horam: Pater clarifica nomen tuum*. Quibus verbis priorem voluntatem reijcit, & inefficacem oftendit: quia ideo in mundum ve- nerat, vt hanc mortis horam pro hominum falute fuf- teneret, & ea in re Patris voluntati obfecundaret, nomen- que eius clarificaret.

Deinde verò fieri etiam poteft, vt quamuis voluntas hominis de aliquo obiecto fub vna ratione gaudere iure non poffit, fed potiùs triftari debeat: tamen fub alia ratio- ne meritò gaudeat. Exemplicaufa: De morte parentis gau- dere non eft licitum, quatenus ea malum perfonæ eft: nam id ad hominis odium fpectat: attamen fas eft gaude- re de morte parentis, quatenus ea tibi cōmoda eft, pro- pter hæreditatem, ficuti bene docet Nauar. in man. c. 15. num. 10. & c. 20 num. 22. Id enim non eft præferre pro- prium temporale commodum vitæ patris corporali, ficuti imaginatus eft P. Nau. lib. 2. c. 3. num. 214. quin potiùs hæc duo inter fe comparando, mallet filius patrem adhuc viuere, quàm hæreditatem eius habere: nihilominus quā- do mors euenit, de qua alijs rationibus dolet, hac tamen ratione licitè gaudere poteft, quatenus ipfi hæreditatem parit: cum, vt fic fpectata, bonum quoddam illius fit per accidens.

Multò magis gaudere licet de morte parentis, quate- nus cogitas, illam ex Dei voluntate: atque prouidentia eueniffe: Siquidem omnis complacentia, & vno verbo, omnis voluntatis noſtræ actus bonus & conformis ratio- ni eft, qui verfatur circa obiectum diuinæ voluntatis fub eadem ratione, qua illud Deus vult, vel non vult. Quin hæc erit bona pars felicitatis in cœlo, quando voluntas noſtra in omnibus voluntatem diuinam fequetur: quod etiam in hac vita, quatenus id poffibile eft, euenire præ- camur: *Fiat voluntas tua, ficuti in cœlo, & in terra*. Atque fecundum hæc explicandus S. Auguſt. in Enchiridio, c. 101.

## CAP. XI.

## De difcordia, contentione, ac ſchiſmate.

## S V M M A R I V M.

- 1 Difcordia eft diffenfio voluntatum circa bonum, quod ex Cha- ritate velle debemus.
  - 2 Contentio eft impugnatio veritatis, cum confidentia clamoris.
  - 3 Oppugnatio falſitatis, puta difputatio de rebus Fidei cū hereti- cis, propter circumſtantias interdum vitioſa, aut noxia red- ditur.
  - 4 Schiſmatis peccatum eft, ſi quis ab Eccleſiæ vnitatem ſe ſegregat.
  - 5 Schiſma vel eſt purum, Charitati & Paci oppoſitum: Vel etiam cum hæreſi iunctum.
- Omnis hæreticus ſchiſmaticus etiam eſt: ſed non vice verſa:
- 6 Schiſma eſt vnum ex peccatis, quæ opere externo perficiuntur: in quo differt ab hæreſi, quæ in mente conſummatur: ideoque hæretici occultis verè ab Eccleſiâ ſegregati ſunt: licet exterius Eccleſiæ membra eſſe videantur.
  - 7 Schiſmatici non ſunt verè Eccleſiæ membra.
- Schiſmatici in Bulla Cænæ Domini excommunicati ſunt.

**D**ifcordia definitur ex S. Thom. q. 37. a. 1. Diffenfio voluntatum circa bonum, quod ex Charitate velle debemus. Dicitur *diffenfio*: quia ſicuti concordia & pax in voluntatum conſenſione conſiſtit, Circa bonum: Nam difcor-



discordia circa malum non vitiosa, sed laudabilis est: quo sensu dixit Christus Matth. 10. cap. *Non veni pacem mittere, sed gladium: veni enim separare hominem aduersus patrem suum, &c.* vt doceret, ne parentibus quidem aut cognatis obediendum esse, cum à bono honestatis impedire voluit. *Quod ex Charitate velle debemus:* Non enim discordiæ peccatum est dissentire ac discordare in bono, si in eo concordare obligati non sumus: vt si socio rogante v. g. vt cum ipso peregrineris, aut Religionem ingrediaris, sequi eum recuses, sicuti notant S. Th. l. c. Caiet. ver. discordia. Nauar. cap. 23. man. n. 33. Vel si nobis consentire, vt proximus bonum aliquod, ipsi non debitum consequatur; non quia ipsi bonum non cupis, sed quia propriam, vel alterius hominis commoditatem præfers. Adde, interdum ex ignorantia etiã inculcata dissensionē voluntatū oriri: dū ynus hoc, alius aliud medium ad Dei honorem, vel proximi salutem conuenientius probabili ratione iudicat: qualis erat dissensio inter Paulum & Barnabam, de qua Act. 15. & notauit S. Antoninus part. 2. tit. 4. cap. 8. princip.

Contentio definitur à S. Thom. q. 38. a. 1. *Impugnatio veritatis cum confidentia clamoris.* Veritas dupliciter impugnari potest secundum Caiet. cit. a. 1. Vel intentione formali, si quis agnitam veritatem impugnet: Vel intentione virtuali, si quis doctrinam oppugnet, non curans siue ea vera sit, siue falsa. Eadēque ratio est de eo, qui veritatem oppugnat; per culpabilem ignorantiam existimās esse falsitatem: quo modo plerique hæretici fidei Catholice dogmata oppugnare solent, sicuti Valentia notauit q. 14. p. 2. Loquimur autem de veritatis oppugnatione, quæ feridū sit; nam si exercitij causa, vel ad explorandam alterius doctrinam cum debitis circumstantijs instituatur laudabilis esse solet.

Porro contentio seu veritatis 'oppugnatio', siue directe, siue indirecte voluntaria sit, est ex genere suo peccatum mortale: quippe oppositum Paci ac Charitati per quam debemus cum proximo consentire in bonis ipsi necessarijs: Veritas autem sæpe proximis, tum ijs quibuscū contendimus: tum alijs, qui audiunt, necessaria est ad animæ salutem, vel corporis incommunitatem, vel bonam ipsorum famam seruandam: Ergo eam impugnare & contentiose tollere velle, peccatum est Paci ac Charitati oppositum. Quod etiam ex Apost. confirmatur ad Gal. 5. Vbi inter opera carnis, spiritui contraria, & à regno cœlesti excludentia: *contentiones* numerat. Et ad Rom. 1. quos Deus in reprobum sensum tradidit, *repletos aut omni iniquitate, contentione, dolo.*

Additur autem in definitione, *cum confidentia clamoris:* quod licet ad essentiam peccati contētionis non pertinet; est tamen circumstantia accidentaliter aggrauans, quæ plerumque cum vitiosa contentione coniuncta esse solet.

Monet verò S. Thom. etiam falsitatis oppugnationē, quæ ex genere siue obiecto bona ac laudabilis est, interdum vitiari inordinato modo clamoris, gestuum: item ex circumstantijs personarum, loci, temporis non congruentibus: vt saltem veniale peccatum sit; imò interdum mortale, ratione scandali, sicut notat etiam S. Anton. p. 2. tit. 4. c. 9. §. 2. Quomodo sæpe accidit, vt contentio, siue disputatio de rebus Fidei illicita sit: Primò ex parte disputantis, si non sit satis doctus, & in scriptura, ac Fidei controuersijs versatus, qualēque Apost. requirit ad Titum cap. 1. *Vt sit potens exhortari in doctrina sana, & eos, qui contradicunt, arguere.* Quamobrem in c. 2. §. inhibemus, de hæret. in 6. sub pœna ferendæ excommunicationis prohibetur laicis, ne publicè, vel priuatim de fide disputent: quod tales plerumque in rebus Theologicis non satis versati sint. Quamuis hæc prohibitio locum non habet in casu necessitatis, vel magnæ utilitatis, si laicus doctus sit, ait Sanch. lib. 2. moral. cap. 6. n. 7. Insuper in regionibus, vbi hæretici inter Catholicos viuunt, consuetudo viget, vt Laici saltem priuatim de Fide cum hæ-

reticis disputent, sicuti notauit Valent. t. 3. disp. 10. p. 4. §. alij etiam. Becanus 2. 2. c. 15. q. 7. n. 6.

Secundò, Illicita sit ex parte eorum, coram quibus disputatio de Fide instituitur, si sint homines simplices & indocti, atque in Fide Catholica inconstantes, vti notauit S. Th. 2. 2. q. 10. a. 7. Quia tales sæpe magis vim obiectionem penetrant, quàm earum solutionem intelligant: vt proinde consultum quoque non sit, in concionibus eiusmodi Fidei controuersias apud populum Catholicum mouere: nisi homo valde doctus ac disertus sit, qui etiam simplicibus auditoribus satisfacere possit, vti monet Caiet. cit. a. 7. Valen. cit. p. 4. §. sin autem, & videri potest Iacob. Simanca de Cathol. institut. c. 20.

Tertiò, Illicita sit ex parte eorum quibuscum disputatur, v. g. hæreticis de sensu Scripturæ, quem illi proprio arbitrio fingunt, & pertinaci animositate defendunt: vt plerumque talis congregatio Scripturarum nihil proficiat, nisi vt aut stomachi quis incat euersionem, aut cerebri, ait Tertulian. lib. de præscript. contra hæret. cap. 17. Et cap. 15. *Scripturas hæretici obediunt, & hac sua audacia statim quosdam mouent: in ipso verò congressu firmos quidem fatigant infirmos capiunt, medios cum scrupulo dimittunt.* Et Syrianius vir doctus ac valde exercitatus apud Sozom. lib. 7. cap. 12. *auctor fuit Catholicis, vt fugerent institutas cum hæreticis disputationes, utpote rixarum atque pugnarum fomites sed ex ipsis quærent, reciperentque eos, qui ante Ecclesiæ distractiones interpretes atque doctores fuissent Scripturæ sacræ. Etenim si horum testimonia reiecerint, inquit, à suis ipsorum consortibus explodentur. Sin verò sufficere eos ad controuersias decidendas arbitrabuntur, producti oportet illorum libros.*

Veruntamen hæreticos non raro, posthabitis & spretis Patribus, propriam sapientiam & Scripturarū intelligentiam iactare solitos, testis est de Arianis Alexander Episcopus Alexandrinus in epist. ad Alexan. Constantinopol. Episc. apud Theodor. lib. 1. histor. cap. 4. Et de Eutychetæ hæretico, quod suffugij causa à Patribus ad Scripturam prouocâr, videri potest apud Baronium Anno Christi 448. num. 31. Quare Vincentius Lirinensis in opusc. suo contra hæreses, cap. 35. *Hæretici nihil unquam pene de suo proferunt, quod non etiam Scriptura verbis adumbrare conentur.* Et cap. 36. *Ideo Saluator clamabat: Attendite vobis à pseudoprophetis, qui veniunt ad vos in vestitu ouium. Quid est vestitus ouium, nisi Prophetarum & Apostolorum eloquiæ.* Et S. August. tract. 18. in Ioan. *Neque enim nati sunt hæreses, & quedam dogmata peruerstatis, illaqueantia animum, nisi dum Scripturæ bonæ intelliguntur, etiam temere & audacter asseritur.*

Cæterum si alicubi auditores ab hæreticis, alijsve infidelibus seducti, aut sollicitati sint, tunc expedit, & interdum necesse est, eos, qui in Fidei controuersijs instructi, atque exercitati sunt, spirituale auxilium adferre, tum in publicis concionibus seductos instruendo, titubantes confirmando: tum etiam eorum seductores hæreticos publico congressu redarguendo; quod cum fructu plerumque fiet, si doctrinæ illorum inconstantiâ, contrarietates, mendacia, falsationes ostendantur: & tanquam rei conuincantur. Vide Becanum cit. c. 15. q. 7.

Denique addo ex doctrina S. Thom. cit. q. 38. a. 1. Cum bonum ex integra causa, malum autem ex quouis defectu existat: consequens esse, vt bonæ ac laudabilis contentionis talis descriptio sit: *Impugnatio falsitatis, cum debito acrimoniæ modo, congruo loco, tempore, &c. in scriptura.*

Schismatis peccatum committitur, cum aliquis se segregat ab vnitate Ecclesiæ, provt ea est corpus mysticū, ex diuersorum statuum fidelibus tanquam membris inter se, & cum vno capite Christo, eiusque in terris Vicario connexis. De quo corpore Apost. ad Roman. 12. *Sicut in vno corpore multa membra habemus: omnia autem membra non eundem actum habent: ita multi vnum corpus sumus in Christo: aliter autem alterius membra.* Vide eundem 1. ad Corinth. 12. ad Eph. 4. ad Coloss. 2.



Duplex est modus schismatis, teste S. Th. q. 39. a. 1. iun. Caiet. §. aduerte: Primus, Cum aliquis se separat ad Ecclesiam visibili capite, seu summo Pontifice, debitam ei obedientiam ac subiectionem, quā talis est, denegando. Dico *quā talis*, id est, fungens vniuersali potestate Ecclesiam gubernandi, à Christo concessa. Sin verb aliquis Pontifici obedire recusat ratione rei præceptæ, quòd ea difficilis ac molesta appareat; in alijs obedire paratus: vel ratione offensionis, quam ob specialem causam aduersus hunc Pontificem gerit, alioquin contra ipsam Sedem siue potestatem Pontificiam non rebellis: denique si ideo subesse quis renuat, quia probabiliter existimat, non esse hunc verum Pontificem, vel saltem rationabiliter dubitat: tales pro Schismaticis habendi non sunt, sicuti docent S. Anton. p. 2. tit. 3. cap. 11. §. 6. & 10. Syluest. ver. Schisma in principio, Caiet. eod. ver. in fine: Azor. t. 1. lib. 8. cap. 20. quæst. 4. Vgol. de censuris Papæ reservatis, p. 2. c. 1. ver. nec non Schismatici, n. 4. Iac. Simanca de Cath. instit. tit. 58. n. 9. Valent. q. 15. p. 12 Sanchez lib. 2. cap. 36. n. 3.

Alter schismatis modus est: cum quis se separat à reliquis Ecclesie membris, siue fidelibus in Religionis cultu, oratione, Sacramentis, aliisque spiritualibus functionibus, atque seorsim per se, vel cum alijs agit, tanquam Ecclesie membrum non sit. Quamuis rectè aduertit Valent. cit. p. 1. colum. 6. Cum caput & reliqua Ecclesie membra inter se connexa ac subordinata sint: eos, qui à membris Ecclesie expressa voluntate se separant, virtualiter etiam à Capite se separare: & vice versa: vt etiam S. Cyprianus docuit lib. 4. epist. 9. ad Florentium Puppianum, relatus in c. scire debes, 7. quæstion. 1.

Iterum diuiditur schisma in purum, & iunctum cum hæresi. Purum schisma, charitati solum atque paci oppositum, in ijs est, qui cum credant vnam esse sanctam Ecclesiam, sub visibili capite, Summo Pontifice constitutam: tamen ex malicia voluntatis nolunt Pontifici subiecti, vel reliquis Ecclesie membris vniti esse: idque vel sola intentione, quod est schisma merè internum; vel operis etiam executione, cum quis exterius se gerit, ac si non esset Ecclesie membrum, vel in spiritualibus Pontifici non subiectus: quod est schisma externum, & opere consummatum. Ita Caiet. & Valentia ll. cc. Neque tamen ad schisma requiritur directa siue expressa intentio se subtrahendi à Pontificis obedientia, vel aliorum membrorum communione: sed sufficit indirecta & interpretatiua: Si nimirum aliquis externum opus schismatis exercet, licet non ex formali intentione separandi se ab Ecclesia, aut membris eius: Puta, si Episcopi generalem Synodum, absque Summi Pontificis auctoritate, congregare præsumant, sicuti Caiet. loc. cit. notauit. Vel si Catholici v.g. in Anglia Regi suo in spiritualibus, tanquam Ecclesie capiti, obedientiam iurent, aut præstent: sicuti docet Suarez t. 5. disp. 21. s. 2. num. 13. Sanchez cit. c. 36. num. 14.

Ex quo obiter intelligitur discrimen inter peccatum hæresis & schismatis: quod illud in mente interna perficitur, & exterius solum significatur, ideoque requirit actualem intellectus, eumque pertinacem errorem contra fidem, sicuti explicauimus supra hoc lib. tract. 1. cap. 14. num. 2. At verò schisma externo opere consummatur: ideoque sufficit ad id voluntarium indirectum, & imputatiuum: sicut & ad homicidium, & alia eiusmodi peccata.

Schisma cum hæresi iunctum est, si aliquis pertinaci animo negat Summum Pontificem totius Ecclesie Caput & Pastorem esse: vel Ecclesie sanctæ communionem atque ob eam causam se segregat.

Corollarium I. Sicuti ruente Fide, ruit etiam Charitas, non vice versa: ita hæresis secum ducit schisma, non vice versa. Igitur omnis hæreticus verus ac formalis schi-

smaticus est, teste S. August. in lib. 2. contra Cresconium Gramaticum, vbi hæresin vocat *Schisma inueteratum*. Non item omnis verus schismaticus etiam hæreticus est: versatur tamen in via ad dispositionem ad hæresin: quandoquidem Schismatici non diu puri manent: sed, nisi resipiscant in hæresin etiam cadere solent, sicuti notauit S. Hier. relatus in c. inter hæresin, 24. q. 3. S. Thom. cit. a. 1. ad 3. S. Anton. p. 2. tit. 3. c. 11. ante §. 1. Eiusque rei exempla habemus in Nouatianis, Græcis, & pluribus alijs.

Corollarium II. Schisma merè internum, præsertim si purum sit, & in sola voluntate consistens, non est propriè dictum schisma; neque eo infectus propriè schismaticus: cum & secundum fidem internam Ecclesie membrum existat, & externa specie ab ea non segregatus. Alia verò ratio est de occultis hæreticis: hi enim amissa fide verè præcisi sunt ab Ecclesia; licet exteriori specie membra Ecclesie videantur. Cum enim Ecclesia sit fidelium visibilis congregatio, sequitur duo necessaria esse, vt aliquis Ecclesie membrum sit: fidem, ac communionem. Defectu primi in Ecclesia non sunt hæretici: defectu autem secundi in Ecclesia non sunt excommunicati, & schismatici externi: quandoquidem à communione Ecclesie segregati sunt.

Dubitari autem solet; Vtrum schismaticus sit, qui ab Episcopo suo, vel particulari aliqua Ecclesia se segregat: interim volens esse subiectus summo Pontifici, & cum alijs membris Ecclesie vniuersalis communicare? Affirmant Bellarm. lib. 3. de Ecclesia, cap. 5. in fine, Valentia cit. p. 1. post. 3. proposit. Sed placet magis sententia Vgolini de censuris Papæ reservatis, p. 2. c. 1. ver. nec non schismatici, n. 3. Sanch. l. c. n. 6. Tales esse schismaticos secundum quid, & impropriè: ideoque schismaticorum canonicis pœnis non subiectos, sicuti etiam sentit Azor. c. 20. q. 4. Nam schisma propriè ac simpliciter significat separationem ab Ecclesia vniuersa, eiusve visibili in teris capite, siue Pastore: Certum autem videtur, posse aliquem ex maligno affectu separare se ab Ecclesia sua particulari, eiusve pastore: interim intendens, ac palam protestans, se manere in communione Ecclesie vniuersalis, & sub obedientia Summi Pontificis: Igitur talis non erit propriè ac simpliciter schismaticus: cum etiam Ecclesie vniuersalis membrum permaneat.

Pœnæ Schismaticorum sunt: *Excommunicatio Bullæ*, quæ tamen non extenditur ad eorundem fautores, receptatores, &c. sicuti ea, quæ contra hæreticos decreta est. Itè inhabilitas ad Ecclesiastica beneficia: quin etiam post schismatis abiurationem, actamque pœnitentiam, sine dispensatione admitti non posse, colligitur ex c. quia diligentia, de elect. & docet ibid. Abb. n. 7. Azor cit. c. 20. q. 8. Sanch. in 18.

## CAP. XII.

## De bello.

## S V M M A R I V M.

1. Differunt bellum, seditio, ac rixa, quod bellum sit multitudinis contra extraneos: Seditio multitudinis contra multitudinem eiusdem communis: Rixa paucorum, vel singulorum contra paucos aut singulos.
2. Bellum aliud est iustum, & aliud iniustum: Bellum iustum duplex est: defensiuum, & offensiuum.
3. Ad bellum offensiuum honestatem tres condiciones requiruntur: Legitima auctoritas, causa iusta, recta intentio.
4. Bellum offensiuum propria auctoritate gerere ad eum duntaxat Magistratum pertinet, qui superiorem nullum agnoscit.
5. Causa iusta belli semper est iniuria accepta, eaque grauius, quam vel pro ea satis facere pars aduersa recuset. Bellare non voluntatis, sed necessitatis est.
6. Infideles in bello societatem adsciscere contra Christianos plerumque illicitum est.



nem à Tyranno postulat. Ad eum modum, sicuti si aliquis bonis suis à latrone spoliatus, eandem rogaret, ut si nollet restitutionem facere, saltem partem aliquam pauperibus erogaret: tunc pauper non male, ageret, qui à latrone eleemosynam ex eiusmodi bonis peteret. Ex quo sequitur primò: Acta & sententias eiusmodi Tyranni, si aliam iniquitatem non continent, validas esse; quippe ex tacito populi consensu profectas. Sequitur secundò: Inferiores à Tyranno constitutos Iudices nihil peccare, si iurisdictionem exerceant cui præsunt; cum in eorum potestate non sit, ut tyrannis deponatur: posito autem quod tyrannis dominetur, populus consentit, ut iustitia administretur, sicuti notauit idem Less. num. 73.

Verum posteriori sententiæ, quam veram esse cenfeo, exceptio adhibenda est: Quod licitum sit suadere minus peccatum, si id sit pars formaliter, vel virtualiter inclusa in maiore peccato, quod alter perpetrare certò decreuit. Tunc enim suadens non inducit hominem ad peccatum, sed abducit à parte peccati, cum à toto auertere non possit: Et suadet malum minus, non quia malum, sed quia minus, seu diminutio mali, quæ bona est; quia formaliter, & non comparatiuè, opposita malo. Exempla sunt: Si quis animo decreuit adulterium committere; suaderi potest ei, ut potius eum soluta fornicetur; quia malicia fornicationis formaliter in adulterio continetur, tanquam pars in toto. Simili ratione volenti Titium bonis omnibus per iniuriam spoliare, suaderi potest, ut minore aliqua rapina contentus discedat. Præterea volenti me, vel alium innocentem occidere, suadere possum, ut pugnis cedat, vel fuste, aut manum amputet: quia huiusmodi læsio corporis virtualiter continetur in hominis occisione. Vide Azor. 3. 17. q.

Debet tamen in his cautio adhiberi, ut tali suasionem nullum damnum seu corporale, seu spirituale tertiæ personæ inferatur. Exempli causa, volenti adulterium committere, suadere non licet, ut cum certa persona fornicetur. Neque volenti à Titio furari 100. aureos, suadere licitum est, ut furetur 50. à Caio: nisi in hoc casu suafor damnum Caio inferendum rescire proponat. Alioquin verò perinde esset, ac si Caio bona eriperes ut indigentiori tribuere posses, quod nefas est: nam de alieno liberalem esse furti species censetur. Et ita docent DD. communiter, licet contrarium senserit Vasq. cit. a. 7. dub. 2. in fine.

Denique verò rectè inquit Valentia cit. q. 21. p. 4. §. & hoc ipsum, Commissuro maius peccatum, si inde abduci alia ratione non possit, licitum esse offerre materiam siue occasionem minoris peccati: non suadendo, sed permittendo, iuxta ea, quæ supra dixi assert. 2.

8 Assertio III. Scandalum merè passiuum seu acceptum ex nostra operatione, quæ neque in se, neque specie externa illicita est, interdum permitti non potest: interdum permitti potest: interdum permitti etiam debet. Ratio est: Quia permissio scandali passiuo repugnat præcepto affirmatiuo virtutis misericordiæ, ut spirituales proximi ruinam impediamus, vel tollamus: id autem non semper obligat, sed concurrentibus certis circumstantiis. Verum cum assertio tres partes habet, per singulas declaratur: Primò, permitti non potest scandalum passiuum, sed impediri debet, quotiescunque nulla ratio necessitatis, aut utilitatis propriæ vel aliene cogit nos agere vel omittere aliquid, ex quo alterum occasionem ruinæ spiritualis accepturum putamus, seu ex ignorantia, vel infirmitate: seu ex malitia. Quia charitatis & misericordiæ lege obligamur sicut ad alia proximi incommoda, ita & ad peccata eius impedienda vel tollenda, si facillè possumus. Quapropter licitum non est, à Sacerdote excommunicato etiam tolerato, vel concubinario petere, ut sacrificet, sacramenta ministret, si nulla ratio necessitatis vel utilitatis cogat, quia alius Sacerdos haberi potest, qui decenter & sine

peccato id peracturus sit. Similiter fas non est nulla possente necessitate, aut utilitatis ratione, ab usurario petere ut mutuo det: aut ab infideli, ut iuret: quia sipe iusta causa materiam peccandi offero.

Secundò; fas est talia, quæ enumeravi, ob causam necessitatis vel utilitatis ab altero petere, quæ rectè & sine peccato præstari possunt, tametsi is, qui petit alterum male & non sine peccato præstaturum existimet: v. g. usurarium cum usura mutuaturum esse, qui tamen sine ea mutuo dare posset: infidelem per Deum falsam iuraturam qui tamen aliter iurare posset; Parochum concubinarium non præmissa confessione & contritione, quam tamen præmittere posset, sacrificaturum; vel excommunicatum toleratum, non petita prius absolutione, vel si petere tunc non possit, etiam sine contritione & proposito postea petendi, sacramenta subditis ministraturum. Talia enim eorum peccata permitti possunt, quando iusta causa adest cur opus aliquod petatur, quod sine eiusmodi peccatis præstari posset, sicuti colligitur ex doctrina S. Th. 1. 2. q. 78. a. 4. & docent Richard. in 4. d. 38. a. 10. q. 1. Nav. c. 14. man. n. 39. & in c. 1. §. Sacerdos, num. 5. d. 6. de penit. Sanch. lib. 7. de matrim. disp. 9. n. 8.

Est verò hic aduertendum, maiorem aliquam causam vrgentis necessitatis requiri, ut permitti possit scandalum passiuum proximi, quod prouenit ex ignorantia aut infirmitate eius, cui plerumque condescendendum & ignoscendum est: minorem verò aliquam causam sufficere, ut permittatur scandalum ex mera malitia. Notant verò S. Thom. q. 41. a. 7. Ioan. Gerson p. 1. operum, in reg. moral. §. ille dicitur; Scandalum ex ignorantia, post debitam admonitionem & instructionem veritatis, fieri Pharisæum, cuius nulla plerumque ratio habenda est.

Tertiò: Interdum obligari etiā sumus ad operandum, tametsi sciamus, proximum inde ansum peccati, quamuis ex propria infirmitate vel ignorantia, accepturum esse si videlicet ex operis nostri intermissione vel propriæ salutis detrimentum, vel aliud graue damnum, quod impedire debemus, præsertim Communitati, euenturum putatur: quia ratione in bene constituta Repub. hæretici, alique peccatores obstinati, sprete eorum spirituali ruina, ac damnatione, ob maius Communitatis bonum, morte afficiuntur. Huc spectat etiam illud S. Greg. hom. 7. in Ezechielem: Si de veritate scandalum accipitur, vtilius permittitur, quam ut veritas relinquantur, quando ad augmentum Fidei interest, ut veritas propaleatur.

Quamobrem in hac scandali passiuo materia diligenter consideranda, atque inter se conferenda sunt: hinc grauitas damni, quod ex operis intermissione proueniet: illinc verò grauitas peccati siue scandali passiuo. Si enim damnum graue sit, quod necessitate quadam sustinendum putatur, nisi peccatum, libera alterius voluntate patrandum, permittatur, tunc merito permittitur. Sin verò peccatum, quod à proximo committendum timetur, multum in genere suo superet quantitatem damni nostri, tunc lex Charitatis postulat, ut opus intermittamus, & proprium damnum temporale maiori spirituali damno proximorum post habemus: dummodo scandalum non ex mera malitia proueniat.

Extradita doctrina resoluitur primò: Quod Abrahami Patriarchæ peccato exculpandus sit, qui vitam propriam, impendendi periculo eriperet, Saræ uxori suæ dixerat, Genes. 12. Dic obsecro, quod soror mea sis. Nam Sara alias Iesca, non solum vxor fuit, sed & neptis ex fratre Aran, ut docet S. August. lib. 16. de ciuit. c. 12. & lib. 22. contra Faustum, c. 35. Quamuis solo paterno, etiam materno sanguine iuncti, uti significatur Gen. c. 10. Coniunctum autem erat Iudæis, & consanguineos suos appellarent fratres & sorores, uti ostendit August. locis citatis, & constat ex Evangelio de fratribus & sororibus Dominique sicut Abram Lothum nepotem suum ex Arâ, fratrem suum Vocauit Genes. 13. fratres enim sumus: eo-



dem iure, absque mendacio, dissimulando uxorem esse Saram, sororem appellari iussit: Idque cogente necessitate, *ut bene sit mihi propterea, & uiuat anima mea, ob gratiam tuam*: Interim permittens, ut Egyptij occasionem caperet mulierem rapiendi, quippe cuius pudicitia ille confidebat, quod in adulterium consensura non esse: multo que magis Dei prouidentia, qui eam ex periculo liberare posset, sicut & euentus ostendit. Quam doctrinam leges apud S. August. cit. lib. 16. de ciuit. c. 19. *Vxorem abram tacuit, non negauit, coniugis tuendam pudicitiam committens Deo, & humanas insidias cauens, ut homo: quoniam si periculum, quantum cauere poterat, non caueret: magis tentaret Deum, quam speraret in Deo. Et infra: Absit, ut credamus, alieno concubitu fuisse pollutam: quia multo est credibilis, hoc Pharaonem facere afflictionibus magnis non fuisse permittum. Vide eundem lib. 22. contra Faustum cap. 36 & Rupertum Tuitiensem lib. 5. in Gen. cap. 7. accedit, quod etiam S. August. ex Hieronymo annotauit tom. 4. q. 26. super Genes. Non esse consequens, ut cum aliquos dies apud Regem Egypti Sara fueris, etiam eius concubitu credatur esse polluta: quoniam mos erat regius, vicibus ad se admittere mulieres suas, & nifisomentis & unguentis diu prius accurato corpore, nulla intrabat ad Regem. Qua dum fierent, afflictus est Pharaon manu Dei.*

Resoluitur secundo ex doctrina S. Thom. 2. 2. q. 43. a. 7. Palud. in 4. d. 38. q. 6. a. 3. conclus. 2. Duran. q. 4. S. Anton. p. 2. tit. 7. c. 4. §. 5. Quamuis propositum Religionis ingrediende, propter scandalum ex parentum aliorumve consanguineorum infirmitate, aut ignorantia profectum, omnino intermitteri non debeat; quia hæc grauis iactura spiritualis censetur, spe tamen differendum est, donec illi propositis rationibus instruantur. Postea vero, si resistere pergant, incipit esse scandalum Pharisæicum, quod minus curandum, quam scandalum infirmorum.

Resoluitur tertio cum eod. S. Thom. a. 8. & in 4. d. 38. q. 2. a. 4. q. 3. Palud. conclus. 3. S. Anton. p. 2. tit. 8. c. 4. §. 6. Prælati non solum potest, sed interdum etiam debet iurium & bonorum Ecclesiæ vel Monasterio debitorum exactionem differre, ob scandalum ignorantium, & infirmorum euitandum; quo ad ij. edoceantur, & scandalum non amplius ex infirmitate, vel ignorantia, sed ex malitia prouenire videatur: cuius vitandi causa temporalium bonorum repetitio, quæ alicuius momenti sunt, intermitteri non debet: & vero ab Ecclesiæ Prælato intermitteri non potest: cum non sit absolutus dominus illorum, ut arbitrari suo remittere aut donare possit: sed administrator tantum, curator & custos. Quare idem sentiendum est de pupillorum tutoribus: & quoniam alio bonorum alienorum administratore. Verum, quod ad Ecclesiæ Prælatum attinet, monent S. Anton. l.c. Caiet. cit. a. 8. Valent. q. 18. p. 4. Si animaduertat, rem ita comparatam esse, ut tamen si populo rationem reddiderit, nihilominus scandalum oriturum, & spiritualis fructus iacturam; tum gratius Deo obsequium facturum, si Ecclesiæ consensum procuret: ut debitum condonetur: quæ si exactionem faciat cum spirituali iactura populi, cuius ratio est (inquit Caietanus) quia temporalia propter spiritualia instituta sunt: contra, spiritualia propter temporalia. Qua tamen in re nihil generatim definiri potest, sed in particulari attendi debet: hinc quidem quam graue scandalum oriturum sit, & num ex infirmitate aut ignorantia; an vero ex mera malitia, quæ sæpe magis exasperatur & augetur, si quis cedat, connueat. Quare S. Th. a. 8. ait: *Propter scandalum Pharisæicum non sunt temporalia dimittenda: quia hoc & noceret bono Communitatis: darent enim malis occasio rapiendi, & noceret rapientibus, qui retinendo aliena in peccato remanerent.* Illinc vero attendi debet, quanta sint bona temporalia, quorum exactio ob scandalum intermitteri debeat, & quam necessaria Ecclesiæ. Vide etiam Gandauensem quodlibeto, 4. quæst. 29.

Resoluitur quarto cum S. Anton. p. 2. tit. 7. c. 4. §. 4. Nauar. c. 14. num. 30. Medina 1. 2. q. 74. a. 6. ad 3. Azort. 2. lib. 12. c. ult. q. 12. Less. lib. 4. c. 4. dub. 14. nu. 113. Quod mulier semel aut iterum, non tamen longo tempore & cum magna difficultate sua, domi se continere debeat, si sciat ex suo foras prodeuntis aspectu adolescentem ob infirmitatem vel ignorantiam scandalum passurum: quod intellige, si alicui particulari personæ, ob specialem eius dispositionem, ruina spiritualis timeatur. Nam alioquin propter timorem scandali absolute fore videlicet vnum aut plures de Communitate, qui ea occasione lapsi patientur, non sunt omittenda opera alioquin utilia, si nec in se mala sint, neque speciem mali habeant: quomodo intelligi potest Caietan. 2. 2. q. 154. ad. 4. in fine, & q. 169. a. 2. dub. 5. Armilla ver. ornatus, num. 3. & expresse notant Less. l. c. Vasq. de scandalo, in q. 43. a. 8. dub. 2. Becanus c. 27. q. 6. Esset enim id nimis difficile, & scrupulorum materiam præberet, si mulier honesta, quæ nullius ruinam intendit, proprio iure ac libertate priuari deberet, quo minus ex iuxta causa ad fenestram accedere, honesto vestitu foras egredi eiceret, ne ex eius aspectu vel aliqui de populo scandalum patientur.

Deinde limitat Vasq. cit. a. 8. dub. 1. eumque secutus Becanus cit. c. 27. q. 5. Nisi præcepti alicuius necessitas urgeat, v. g. ut mulier festo die Missam audiat. Putant enim, nullum vnquam etiam posituum præceptum omittendum esse, propter vitandum scandalum passuum, quamuis ex infirmitate vel ignorantia prouenturum; & probant auctoritate Innocentij in c. 2. de noui operis nuntiatione, S. Th. q. 43. a. 7. Maioris in 4. d. 38. q. ult. conclus. 3. Syluest. ver. scandalum, q. 3. Armilla num. 5. & aliorum dicentium: Quæ sunt de necessitate salutis nunquam omittenda esse propter scandalum: Atqui præcepta etiam positiua, v. g. de Missa audienda, ieiunio seruando, sunt de necessitate salutis: Ergo, &c.

Verum hæc sententia ita vniuersim prolata est contra communem aliorum, qui docent: Quod scemina v. g. omittere debet confessionem eius peccati, ex quo intelligit Confessarium (si alteri confiteri non liceat) graue scandalum ob infirmitatem vel ignorantiam passurum esse, sicuti docet Adrianus in 4. de confess. q. 4. Maior in 4. d. 7. q. 5. Nauar. c. 7. num. 4. & alij citandi lib. 4. tract. 6. c. 8. casu 5. Item, quod coniugata possit intermittere ieiunium præceptum, si intelligat maritum ægre laturum, & occasionem grauis dissidij ex ignorantia vel infirmitate accepturum; sicuti docent Doctores, quos referam lib. 4. tract. 8. c. 7. n. 4. Ratio est; Quia concurrente duplici præcepto, vno legis naturalis de impedienda spirituali ruina proximi; altero positiuo de ieiunando, aut confessionis integritate seruanda: maius & fortius est naturale.

Ad probationem autem Vasquezij respondetur; In ea id assumi, quod probandum erat: videlicet in tali casu præceptum ieiunii, vel audiendæ Missæ obligatorium; & de necessitate salutis esse. Quamobrem neque auctoritate Innocentij, aut S. Thomæ & aliorum Doctorum aliquid ostendi potest, quin potius contrarium. Fatentur enim communiter, bona spiritualia, quæ non sunt necessaria ad salutem, tantisper occultanda; vel etiam differenda esse, dum durat periculum scandali passui, ex alterius infirmitate vel ignorantia: idque haud dubie dictante iure naturali propter charitatem proximi. Quare huic iuri naturali aduersaretur lex Ecclesiastica de audienda Missa in die festo, vel ieiunando in quadragesima; si tali rigore lata esset, ut non obstante quocunque scandalo passiuo Missa audiretur, ieiunium seruaretur. Quare accidere potest casus, licet raro, ut mulier debeat etiam festo die auditionem Missæ intermittere, si propter circumstantias breui tempore mutandas, intelligat infirmum adolescentem lapsurum esse in aspectu ipsius. Et simili ratione domi die festo continere se debes, si propter circumstantias



- 7 Bello iusto captis vitam condonare aequum est: nisi de crimine v.g. perduellionis specialiter conuicti sint.
- 8 Subditi in dubio de iustitia belli pro principe ad bellum eos vocante, presumere, eique parere possunt: sed extranei ac voluntarii milites iustitiam causa magis examinare tenentur.
- 9 Milites hosti damna inferre possunt, secundum iustam Ducis supremam voluntatem, expressam vel tacitam.
- 10 In bello iusto insidii vti licitum est, modo mendacium absit.
- 11 Innocentes per se ex intentione occidere nunquam licet: sed interdum per accidens eorum mors permittitur, si ita necessarium sit ad victoriam & pacem obtinendam.
- 12 Innocentes, si sint membra Reipublice nocentes, bonis aut libertate spoliare concessum est.
- 13 Milites in terra hostili etiam innocentes subditos spoliant, si id necessarium sit ad finem belli.  
Represalia sine necessitate concedenda non sunt: & qui contra Ecclesiasticas personas represalias concedunt, excommunicationem incurrunt.
- 14 Mobilia ab hostibus accepta, gentium iure militum capientium sunt: immobilia si occupentur, ad supremum belli Ducem spectant: quatenus iustam compensationem, aut pro illata iniuria satisfactionem non excedunt.
- 15 Fides data quibuscunque hostibus publicis, etiam infidelibus atque haereticis, omnimodo seruanda est.
- 16 Capti, etiam in bello iusto ex parte capientium, cessante scādalo, & speciali manendi pollicitatione, fugere possunt: capti autem in bello iniusto ex parte capientium, non solum fugere, sed etiam bona hostium secum auferre in compensationem damni, aut iniuria illata.
- 17 Peregrini Christiani, dum inter Turcas versantur, non possunt eorum bonis suis spoliare.
- 18 In bello plurima ingentia peccata committi solent.
- 19 Clerici iure Ecclesiastico prohibentur propria manu pugnare: excipiuntur autem qui in minoribus tantum sunt, & Ecclesiasticum beneficium non habent.
- 20 Clerici, qui spiritualis auxilii causa bello interfunt, spoliolum iure non minus, quam alii milites, gaudent.

**B**ellum, seditio, ac rixa inter se differunt, auctore S. Th. q. 42. a. 1. Anton. p. 2. tit. 4. c. 8. §. 1. Quia bellum est multitudinis contra extraneos: Seditio est multitudinis contra multitudinem in eadem Republica, siue Communitate: Rixa est paucorum vel singulorum, contra paucos vel singulos. Præterea differt seditio à bello & rixa: quod hæc actualem pugnam seu conflictum proprie significant: seditio verò non solum pugnam, siue bellum ciuile ac intestinum, sed etiam præparationem animorum ad pugnandum: est enim seditio tumultus populi concitati ad pugnam.

Rixa verò definitur ex S. Th. q. 41. Verborum contradictio, orta plerumque ex ira, & procedens vsque ad verbera, iuxta illud Prouerb. 17. Vir iracundus prouocat rixas. Quapropter rixa priuatum quoddam bellum est, ex genere suo peccatum mortale, quippe Charitati ac Paci oppositum: vt rectè ab Apostolo ad Gal. 5. inter ea numeretur, quæ à regno celorum excludunt. Dixi autem ex genere suo: Fit enim interdum veniale, vel ob passionis vehementiam, & animi præcipationem: vel ob materiæ leuitatem: v.g. cum pueri leuiter inter se rixantur, sicuti notauit Valentia q. 12. p. 1. Molina to. 3. poster. tr. 3. disp. 51. in fine, vbi rectè monet, pueros leuiter secundum personarum circumstantias inter se rixantes non incurrere canonis excommunicationem.

Seditio verò, si plerumque accidit, iusta ratione subnixæ non sit, tantò grauius est peccatum quam rixa, quãtò maius est bonum publicæ quietis, & politicæ concordie, quæ per seditionem violatur, quam concordie & pacis paucorum, quam rixa violat.

**B**ellum denique aliud est iustum, aliud iniustum. Bellum iniustum est graue peccatum, tum Charitati ac Paci, tum etiam Iustitiæ oppositum. Iustum verò bellum Charitati & Paci potius inseruit, quia finis belli est pax, & securitas, teste S. August. Epistol. 207. ad Bonif. Non pax quaritur, vt bellum excusetur: sed bellum geritur, vt pax acquiratur. Est ergo etiam bellando pacificus, vt eos, quos expugnas, ad pacis utilitatem bellando perducas.

Duplex est bellum iustum; Vnum defensiuum, & alterum offensiuum. Bellum defensiuum est, quo vis per iniuriam illata repellitur, quod non solum publica, sed etiam priuata autoritate cuius omni iure permissum est, vti habetur in l. 3. ff. de iustit. & iure. Bellum offensiuum est, in quo vis inferitur, iniuræ vindicandæ causa: quapropter vindicatiuæ iustitiæ actus est. Ad eius honestatem tres conditiones requiruntur: Legitima autoritas, causa iusta, & recta intentio, vt videlicet amore iustitiæ, aut iustæ indemnitate, non ex odio, aut priuata vindictæ cupiditate suscipiatur, sicuti inter alios docet P. Nau. l. 2. c. 3. n. 268.

**A**ssertio I. Bellum offensiuum non nisi publica autoritate Principis, vel Magistratus superiorem nullum agnoscens geri debet. Est communis doctrina apud S. Th. q. 40. a. 1. Gabr. i. 4. dist. 15. quæst. 4. a. 1. Victoriam de iure belli, num. 2. ex S. August. libro 22. contra Faustum, numero 75. Ordo naturalis mortalium paci accommodatus hoc poscit, vt suscipiendi belli autoritas penes Principes sit. Probatur & explicatur: Discrimen est inter Magistratus, quod alij superiorem nullum agnoscant (vt Imperator, Reges, & Respublica libera, qualis est Venetorum, Genuensium, Helueticorum) hi non tantum pericula repellendi, præsentisque iniurias arcendi potestatem habent: sed etiam præteritas vindicandi, puniendique. Oportet enim quamuis Rempublicam ita comparatam esse, vt sibi sufficiat ad publicum statum ac quietem seruandam; quam tamen seruare non potest, nisi externorum etiam infestationes, atque iniurias vindicare bello persequi liceat. Alij verò Magistratus non supremi sunt, sed superiorem aliquem agnoscens: (v.g. Duces, ac Ciuitates Imperij) hi licet durante necessitate seu periculo, vim atque iniurias aliorum repellere possint, cum moderamine inculpatæ tutelæ: cessante tamen necessitate ac periculo, mox & ipsi cessare debent, & vindicandæ iniuræ iustitiam, ac sententiam, eiusdemque executionem à Principe, vel supremo Magistratu suo petere. Nam iste secundum Apostolum ad Roman. 13. gladius importat: Dei enim minister est, vindex in iram. Quapropter in l. hostes, ff. de captiuis, & postliminio reuerfis, & in l. hostes, ff. de verb. signif. prædones atque latrunculi appellantur, qui in Imperio, sine consensu & autoritate Imperatoris, bellum offensiuum suscipiunt. Monet tamen Victor. numero 9. Molanus tom. 1. tractat. 2. 2. de iustitia, disputatione 100. Becanus 2. 2. capite 25. quæstione 4. numero 3. Si supremus Princeps, seu Magistratus negligat, vel non audeat illatas iniurias vindicare: quod in tali casu necessitas licentiam tribuat bellum inferendi hostibus, eosque pro meritis puniendi: ne improbitas impunita maiores animos faciat.

Adde, prohibita quoque esse conuenticula & confederationes, quæ sine Principis, seu Imperatoris autoritate fiunt, l. denuntiamus, C. de his qui ad Ecclesiam, &c. præterquam ad necessariam defensionem contra iniquos aduersarios. qua de re Mynsing. cent. 6. obser. 2.

**A**ssertio II. Vnica, eaque generalis causa iusta belli offensiu est accepta iniuria. Ita S. Augustinus in libro qq. super Iosue quæstione 10. relatus in capite Dominus; 23. quæstione 2. Iusta bella defini solent, quæ ulciscuntur iniurias, si quæ gens, vel ciuitas, quæ bello petenda est, vel vindicare neglexerit, quod à suis improbe factum: vel reddere, quod per iniurias acceptum est. Et videri potest Victoria relect. de iure belli, numero 13. Cum enim Respublica vel Princeps, contra quem bellum offensiuum geritur, superiorem Iudicem non habeat, à quo ad iniuriæ satisfactionem damni que compensationem compellatur, ideo in defectum proprii iudicis, ac vicis, ipsamet Respubl. vel Princeps, qui, cuius subditi iniuriam passi sunt, iudicandi, vindicandique



sceleris potestatem naturali, ac gentium iure consequuntur.

Quod si non ipsemet Princeps, vel Respublica aliena, sed eius subditi dñum vel iniuriam intulerunt, tunc qui ex altera Repub. iniuriam passi sunt, non prius bellum inferre, ac de malefactoribus vindictam sumere debent, quam Principem vel Rempublicam monuerint, ut à suis subditis pœnam exigat, eosque ad damni compensationem cogat. Si autem Princeps, seu Magistratus id facere negligat, tunc contra ipsum quoque bellum moveri potest ab eo, qui in Republica, quæ iniuriam passa fuit, auctoritatem habet.

Oportet autem iniuriam gravem, ac magni momenti esse, ob quod publicum bellum instituere fas sit: quippe in quo tot hominum, etiam innocentium, cades fiunt, regiones vastantur: & ipsamet, quæ bellum infert, Respublica periculum adit: nam *belli exitus incertus sunt*. Quare Princeps, eiusque Consiliarii, si sine graui causa bellum decernant, mortali iniuria non solum alienam, sed etiam propriam Rempub. afficiunt: quando eam periculis exponunt, tributis grauant, publicum ærarium exhauriunt. Et verò maximè Catholicus Princeps animaduertere debet, utrum occasione belli, quod secundum se iustum est, Ecclesia & Fides Catholica incrementum, an verò detrimentum passura sit. Si enim spes amplificandæ Ecclesiæ affulgeat, aggredi debet bellum iustum, etsi alioquin intermitteret. Si autem periculum sit scandalum, seu spiritualis ruinæ multorum, intermittere debet bellum, quod alioquin iure instituere posset, sicuti notauit Viñ. n. 33. Mol. to. 1. de iust. tr. 2. dis. 107. Et videri potest Ioan. Maior in 4. d. 15. q. 20. ad finem.

Assertio III. Particulares iustæ causæ belli suscipiendi sunt hæc: I. Ut subditi rebelles ad obedientiam redigantur.

II. Ut recuperetur provincia, aut ciuitas Principi aut Reipubl. alicui iure debita, quam recuperare boni communis multum interfit.

III. Ad vindicandam gravem contumeliam Principi, vel Reipub. illatam: cuius rei exemplum habes 2. Regum, c. 10.

IV. Ut ultio sumatur de gente, vel Principe, qui hosti iniustum bellum gerenti auxilium præbet: quo iure Romani multas provincias sibi subegerunt: & in veteri Testamento exemplum habes 2. Reg. 8.

V. Ut repellantur ij, qui iniuste prohibent ne nocentes puniantur, quos puniri Reipublicæ multum interest: exemplum habes c. 20. Iudic.

VI. Ut animaduertatur in eos, qui cum Principe, vel Republica initum fœdus violarunt, non sine graui damno, iniuria, aut dedecore illius: cuius rei exemplum habetur 4. Reg. 3.

VII. Ut impetrentur ea, quæ iure gentium permixta sunt, & per iniuriam denegantur: cuiusmodi est v.g. transitus sine mora & sine nocumento ex vna regione in alteram, sicuti habetur in c. ult. 23. q. 2. Eoque sensu Cæsar dixit, *Armatæ genti omnia dat, qui iusta negat*.

VIII. Ut socijs auxilium iustum afferatur, quod si vero ab hostibus infestentur auxiliarij, tunc & ipsius acquiritur per se bellum inferendi aduersarijs: quæ item ratione à Romanis imperium amplificatum fuisse, testatur Victor. n. 17. Eiusdemque rei exemplum habemus Gen. 14.

IX. Si populi subiecti idololatram sint, iusta erit causa eos bello persequendi, iuxta ea quæ dixi tr. 1. c. 17. num. 3. Vel si in hæresim aut infidelitatem lapsi, alios secum trahant: atque ita dissensionem in regno vel prouincia excitent. Idemque dici debet, si Rex, vel subditi vnius regni à vera Fide deficientes, subditos vicini regni ad eandem defectionem pertrahere conentur, iustam causam habet Rex vicinus bello se defendendi & illatam iniuriam vindicandi, sicut docet Becanus c. 25. q. 5.

Denique rectè addit S. August. in suprâ cit. c. Dominus: *Etiâ hoc genus belli sine dubitatione licitum est, quod Deus imperat, apud quem non est iniquitas, & nouit, quid cuique fieri debeat*.

Monet verò Becanus 2. 2. c. 25. q. 7. Bellum interdum formaliter iustum esse respectu Principis, non item respectu Consiliariorum, aut eorum, qui Principem, vel Consiliarios informant de varijs circumstantijs causæ. Si enim informatio re ipsa falsa, vel consilium erroneum sit, tamen Princeps rationabilem causam non habeat suspicandi de fallitate, aut deceptione: practicè conformare iudicium suum poterit informantium allegationibus, & consilijs virorum doctorem minime suspectorum.

Assertio IV. Postquam iusta belli causa perspecta est, debet ea parti aduersæ proponi, priusquam bellum instituat. Quod si illa competentem satisfactionem offerre parata sit, acceptari debet, bellumque intermittere, aut coeptum reuocari, sicuti dixi lib. 1. tr. 1. cap. 5. §. 3. n. 25. 26. & ex communi docet Cajet. ver. bellum, §. fac ergo Confessor, Mol. t. 1. tr. 2. disp. 103. atque contentit illud Deuteron. cap. 20. *Si quando accesseris ad ciuitatem oppugnandam, offeres ei primam pacem*. Ratio est: Quia bellare non voluntatis, sed necessitatis est, c. noli, 23. q. 1. propter ingentia mala, quæ cum bello coniuncta esse solent.

Dubitant verò Doctores, an etiam post mutuam aggressionem & conflictum, quando iam aliqui ceciderunt ex parte eius, qui iustum bellum gerit; si aduersarius condignam satisfactionem offerat, acceptari debeat, & bellum intermittere? Responso debet esse affirmatiua, ex hypothesi, si condigna satisfactio offeratur. Quia verò id in bello vindicatio ferme impossibile est: nã totus exercitus, qui bellum iustum gerenti se iniuste opposuerat, in mortem tradi deberet, quod nunquam facere consentiret: ideo rectè negant Doctores apud Molinam disp. 103. §. dubium est: Bello actualiter coepto, Principem iuste pugnantem ex iustitia obligari, ut bello abstat, & oblatam sibi satisfactionem acceptet. Plerumque tamen ex charitate acceptare obligabitur, etsi in ipso met conflictu, aut post conflictum, pars aduersaria offerat satisfactionem, quam moraliter exhibere potest ac debet: videlicet, ut iniuste ablata restituat: belli expensas, & æstimationem periculi, illatæ iniuriæ Principi iustum bellum gerenti refundat, auctores etiam iniuriæ, qui specialiter digni morte sunt, tradat. Quæ item in re naturalis æquitas, & lex charitatis postulat, ut Princeps Christianus multum de summo iustitiæ rigore remittat.

His adde primò: Etsi, negata ab initio satisfactione competentem, possit Princeps, bellum iustum gesturus, quoscunque, etiam infideles in belli societatem vocare, per se loquendo, sicuti rectè docet Bannes q. 40. a. 1. dub. 3. Tamen per accidens ratione scandalum, & secuturi nocementi publici, plerumque illicitum erit, Iudæos vel Turcas in belli societatem contra Christianos adsciscere: de qua re videri potest Becanus c. 25. q. 6.

Adde secundò: Etsi bello iusto captos vel sponte deditos, si culpabiliter antè pugnando, mortem meruerant, omnes occidi possint, spectato iustitiæ rigore; præterquam, si ante deditionem de securitate pacti sint: æquitas tamen & lex charitatis postulat: ut Dux belli, habita ratione boni communis, in clementiam potius declinet, & multitudini parcat: cum consueti more, & quasi gentium iure post partam victoriam & redditam securitatem captiuis etiam nocentibus vita condonetur. Excepto, si de peculiari crimine, puta perduellionis, læsæ Maiestatis, &c. conuicti aut damnati sint, qua de re Victor. de iure belli, n. 49.

Quinimò id ordinariū esse solet, ut si Communitas vel multitudo hominum deliquit, mitius puniantur, exceptis ijs, qui commissi delicti auctores, vel executores fuerunt, sicuti notauit Abbas in capite latores, num. 3.



numero 3. de cleric. excommunic. Clarus lib. 5. sent. §. pract. criminal. quæst. 60. num. 30. Mol. tr. 3. de iust. disp. 34.

Accedit hic specialiter, quod tota nocentium Communitas plerumque occidi non possit sine multorum etiam innocentium cæde, aut damno, quod iniquum est, sicut colligitur ex S. Ambros. epist. 28. ad Theodol. Imper. de Thessalonicensium cæde, præterquam, si id opus esse videatur ad stabiliendam securitatem contra valde pertinaces ac desperatos hostes: tunc enim id malum occisionis innocentium, &c. si à Duce belli omnino impediri non possit, ut minus malum permittitur, sicuti notauit Victoria de iure belli, num. 48. Becanus cap. 25. q. 10.

**Assertio V.** Subditi, qui de belli iustitia dubitant, Principi aut Magistratui ita iubenti merito parent; ac militant. Ita Victoria de iure belli, num. 31. Caiet. ver. bellum, Gabr. in 4. d. 15. quæst. 4. art. 2. Maior. ibid. q. 20. Nauar. rubr. de iudic. num. 106. Molina disp. 123. Ratio est: quia in dubio quisque obedire debet Principi vel superiori suo, sicut notauit Gloss. inc. quid culpatur 23. q. 1. Quare idem quoque dicendum de conductio milite, si illi postea bellum imperetur, de cuius iustitia dubitat. Quamobrem S. August. lib. 22. contra Faustum cap. 75. relatus in cit. c. quid culpatur, ita loquitur: *Vir iustus, si forte sub Rege, homine etiam sacrilego, milites, recte potest illo iubente bellare, si quod sibi iubetur, vel non esse contra Dei præceptum certum est: vel utrum sit, certum non est: ita ut fortasse reum faciat Regem iniquitas imperandi: innocentem autem militem ostendat ordo seruiendi.* Etenim simili ratione Carnifex mercede conductus ad iustitiæ officium exequendum, latam à Iudice sententiam iuste exequitur: etsi de eius iustitia dubitet; quandoquidem ad ipsum non pertinet discurre.

**Assertio VI.** Milites extranei, atque voluntarii vocati ad bellum, de cuius iustitia dubitant, ut in neutram partem prudenter assentiantur, militare plerumque non possunt. Ita Caiet. l. c. Gabr. concl. 4. Maior §. istis notatis, Syl. ver. bellum, l. q. 9. prope finem, Molina disp. 114. Valent. quæst. 16. p. 2. alique communiter, contra Suar. de Charit. disp. 13. l. 6. Pet. Nau. lib. 2. c. 3. n. 288. Ratio est, quia nulla cogente & excusante obediendi necessitate, exponunt se periculo grauissimæ iniuriæ inferendæ. Addidi tamen voculam *plerumque*: limitari enim assertio debet: Nisi causa bellandi speculatiuè quidem dubia videatur; præsumptio tamen sit; Principem cum Consiliarijs suis examinata prius diligenter causa, ideoque bona fide, & probabili opinione ductum ad bellum procedere, sicuti annotauit Adamus Tanner in disp. de bello, assert. 32. Ex quo sequitur, si pro vtraque parte præsumi possit, quod bona fide & iure practicè probabili ad bellandum procedant: damnari non posse milites, si de iustitia belli dubitantes, seu huic, seu alteri parti pro stipendio militent.

Quare inter milites Principi aut Magistratui subiectos, & extraneos hoc discrimen est: Quod illi iustitiam belli examinare non tenentur, quamdiu nulla probabilis ratio in contrarium occurrit, quæ ipsos positiuè dubitantes reddit: tunc enim eo ipso, quod subditi sunt, pro Principe præsumere possunt. At verò extranei seu voluntarij milites inquirere debent de iustitia belli: & facta inquisitione, saltem probabile iudiciū ferre, Principem, cui bellaturi sunt, bellum formaliter iustum gerere. Neque valet argumentatio P. Nauar. numero 277. In dubio de iustitia belli Principem, etiam non superiorem, peccati damnare non deo: ergo bellantem sequi, ac iuuare possum. Nam sicuti ad hominem iudicandum, damnandum requiruntur indicia ac præsumptio iniustitiæ: ita etiam ad hominem iuuandū, cum aliorum præsertim tam graui præiudicio, requiri debent indicia, vel præsumptio, illum ius agendi habere.

Illud verò apud omnes in confesso est: Milites paratos sequi quemcunque ad bellum vocantem, seu iustum sit, seu iniustum; dummodo stipendium præbeat: in malo statu versari, ut nisi propositum corrigant, à Confessario absolui non possint.

Dixi hætenus de ijs, quæ pertinent ad intelligendam causam & iustitiam belli. Eâ verò intellectâ, videndum nunc est, quæ sint obligationes militantium in bello; & consequenter quæ, & qualia peccata ab ijs committi soleant.

**Quæstio prima** Quanta damna hostibus milites inferre iure possint? Respondeo & dico; quicumque in bello iusto pugnant, progredi possunt, secundum iustum mandatum aut voluntatem Ducis sui expressam vel tacitam, ad agrorum vastationem; pagorum euersionem, hostiū spoliationem, nocentium cædem, uti docet Mol. tom. 1. tract. 2. disp. 101. Cum enim milites omnes ac singuli veluti ministri sint, seu executores iustæ sententiæ ac vindictæ, quam supremus Princeps vel Respublica in hostes decernit; satis liquet; omnem potestatem, quam milites siue exercitus in hostes exercet, à supremi Ducis voluntate pendere, atque inde conueniente ordine, per subordinatos belli ductores, singulos gregales milites deriuari, ut proinde peccent, si præter Ducis voluntatem aliquid in hostes moliantur.

Verum considerare milites debent, ob quam causam belli Dux, seu Princeps hostibus damnum inferri nolit, aut prohibeat. An quia eis consulto parcere vult? Tunc contra iustitiam peccant milites, si damna inferant, ad eorumque restitutionem obligantur. An solum, ut militaris disciplina seruetur, & exercitus ab hoste tutus sit? Tunc peccabunt quidem non obediendo iusto mandato Ducis; ferme tamen non mortaliter: nisi vel se ipsos, vel exercitum in graue periculum temerè conijciant.

Ut verò intelligant, quousque supremi Principis potestas ac voluntas hostibus nocendi, eorumque ciuitates occupandi, vastandi, incendendi iure se extendat; attendere oportet, cur bellum contra hostes instituatur: An solum defensionis causa, seu ut periculum arceatur? Tunc ea solum agere fas est, quæ ad præstandam pacem & securitatem ab hostibus necessaria sunt qua de re Victoria de iure belli num. 55. An ad persequendam iniuriā tantum materiale & culpa carentem? v. g. ad recuperandam ciuitatem, quæ iure Principis debetur, sed ab altero per inuincibilem ignorantiam alieni iuris possidetur. Tunc ea duntaxat agere licitum est, quæ ad occupandam ciuitatem necessaria videntur: & quidem, quatenus fieri potest, cum minimo hostiū & incolarum damno. Neque belli expensæ tunc exigi debent: multò minus vindictæ loco aliquid contra hostes decerni: quandoquidem nec in iudicio pars, quæ causa cadit, ad expensas alteri parti præstandas condemnari solet, nisi litigando in dolo vel culpa fuerit, sicuti notauit Mol. disp. 102. §. in hoc secundo. An denique ad vindicandā iniuriā formale, ac propriè dictam? Tunc iustitiæ vindictiue modū seruare oportet, ut iniuriæ quantitatē poena seu vindicta non excedat. Quare, si Galli, inquit Victoria, n. 56. irruentes in terrā Hispanorum, iussu Regis sui, pagum incendissent, non ideo fas erit Hispanis integrum regnū Galliarum occupare; sed solum quatenus iustitia & æquitas permittit Gallorū illam iniuriā vindicare, adductis etiam belli expensis, & æstimatis damnis, quæ Hispani passi sunt: non laboribus, ac periculis, quibus se exposuerunt, quæ omnia eò usque interdū accrescere possunt, ut, si bellū iustè cœptum, hostibus resistentibus, & satisfacere recusantibus, diu continuauerunt, totā illorum prouinciā, aut etiam regnū occupare liceat, quamuis ex nō admodum magna iniuria bellum originem sumplerit, sicuti notauit Mol. disp. 117.

**Quæstio secunda.** Vtrum licitum sit in bello insidijis uti? Responso est affirmatiua cum S. Thom. q. 40. a. 3. S. August. tom. 4. lib. 99. super Iosue, quæst. 10. Cuius



*iustum quis bellum susceperit, utrum aperta pugna, an insidiis vincat, nihil ad iustitiam interest.* Cum enim in bello iusto fas sit hostibus nocere: fas etiam erit occultando ipsis consilia, efficere, ut decepti nocumentum patiantur; modò absit mendacium, quod neque in bello licitum est. Exemplum habemus Iosue cap. 8. ubi legimus, Iosue collocato exercitu in insidijs contra civitatem Hai cum suis fugiendo, metum simulasse, quod intelligi debet secundum communem loquendi modum: licet non fuerit propriè dicta simulatio, quæ est falsi, ac species mendacij, iuxta S. Thom. 2. 2. quæst. 111. a. 1. Cum enim fugere siue recessus sit operatio homini naturalis, non determinata ad metum seu terrorem animi significandū: quandoquidem etiam ob alias causas institui potest: ideo Iosue propriè non simulabat falsum: sed naturalem actū recessus exercendo data opera permisit, ut hostes decepti falsam metus opinionem conciperent.

Porro, tametsi simulare aliquid verbo vel facto, quod non est, causa fallendi hostes, nunquam licet: cum id mendacium existat: si tamen talis simulatio extra fœdera & promissiones fiat erga hostem, cui nocendi ius habeas, nō est peccatum graue & mortale. Sic enim sæpe exploratores & alij milites, mentiuntur v.g. socios, aut amicos se esse: cum nocendi animò veniant: & plura talia stragemata in militia commendantur, quæ tamen propter mendacium aut simulationem falsi omni culpa non carent: quamvis propter inuincibilem ignorantiam quia rectè se agere tales homines existimant, excusari possint. At verò in promissionibus seu pactis initis cum hoste quo cunque per simulationem aliquid dicere aut facere, aliud in animo gerendo, & aliud verbis promittendo, est mendacium iniuriosum, ideoque ex genere suo peccatum mortale, sicuti bene docet Ioan. Molanus de fide hæreticis seruanda lib. 1. c. 15. Becanus 2. 2. c. 16. qu. 1. num. 9.

11 **QVÆSTIO TERTIA.** Vtrum liceat in bello innocentes occidere? Respondeo & dico I. Innocentes per se atque ex intentione in bello occidere nunquam licitum est. Quia potestas gladij Magistratibus à Deo data est aduersus eos, qui malè agunt: non contra innocentes. Quare Exodi 23. dicitur; *In fontem & iustum non occides.* Et Deuteronom. 20. *Percuties omne, quod in eis est, masculini generis, præter infantes.* Cum autem innocentes vnà cum nocentibus ab Israelitis occidi debuerant, id ex speciali mandato Dei provenit, ut Iosue 6. 1. Reg. 15. Porro innocentium numero censentur imprimis infantes, etià Turcarum, hæreticorum, &c. Deinde peregrini, Clerici, Religiosi, homines simplices ac rustici, iuxta c. inno-uamus, de treuga & pace: Idque secundum iuris præsumptionem, donec contrarium de illis ostendatur. Per accidens verò, si bellum geri, & victoria ab hostibus obtineri non possit, nisi vnà cum nocentibus etiam innocentium mors permittatur, euersione urbium, conflagratione ædium, &c. licitum id est, quando ratio communis boni ita exigit, teste Vict. numer. 34. Syl. & Caiet. verbo bellum. Cou. regula peccatum, p. 2. §. 3. n. 4. Mol. dif. 119. Becano q. 11.

12 Dico II. Quod attinet ad bonorum spoliationem: interest, utrum innocentes sint partes Reipub. contra quam iustum bellum geritur: tunc enim, quia tota Reipub. seu Communitas, quæ deliquit, hostis censetur, fas est per se, atque ex intentione omnia eius membra in bonis fortunæ punire: v.g. bonorum spoliatione, imposito generali ac perpetuo tributo, vel abductis in captiuitatem mulieribus, ac infantibus, sicuti constat ex l. si quid bello, & l. hostes, ff. de captiuis. Quamvis quod ad captiuitatem spectat, ea solū locum habet in infidelibus: At verò Christiani à Christianis capti, serui eorum non efficiuntur: ob diuturnam consuetudinem, vim legis obtinentem: sed interdum pecunia, tanquam in præmium victori oblata, redimi solent, sicuti notauit Mol. dif. 117. concl. 4.

Porro ad hoc, quòd tota Communitas deliquisse censeatur, ac puniri possit: necesse est, ut maior seu potior eius pars, quæ alioquin ad decernendam aliquid Communitati sufficeret, delictum aliquod fieri collegialiter decreuerint, vel impedire per traditam sibi potestatem neglexerint: tunc si delictum valde graue sit, v.g. prodicionis, apostasiæ à Fide, propter quale peccatum à parentibus commissum etiam filij puniri solent, multò magis quicunque ex Communitate illa sunt, quamuis innocentes, puniri possunt bonorum spoliatione, libertatis, vel ciuitatis amissione, imposito tributo, &c. qua de re Mol. tr. 3. disp. 35.

Loquor autem de punishmente, quæ per se ac directè propter crimen commissum infertur Communitati, plerumque post partam victoriam. Sin autem aliquis quærat de spoliatione, & vexationibus, quas milites in terra hostili incolis inferre solent, licet sciant eos innocentes esse: quia solus eorum Princeps deliquit, aut iniuriam intulit; Respondendum est: Posito, quòd eiusmodi spoliationes fiant cum expresso, vel tacito consensu Ducis bellum iustum gerentis, à peccato tunc excusari, si necessaria esse videantur ad finem belli consequendum: seu quia hoc modo vires partis aduersæ diminuendæ erunt: seu quia alio modo iusta vindicta sumi, aut debita satisfactio impetrari non poterit à Capite Reipub. contra quod bellum institutum est: nisi innadendo, & spoliando subditos eius: præsertim si etiam ipsis subditis expedire videatur, ut à iurisdictione Principis sui, puta infidelis, aut hæretici Calumnistæ, iusto bello extrahantur. Veruntamen in tali casu Princeps ille, qui causam damni inferendi subditis suis dedit, ad eius compensationem in conscientia obligatus est.

Atque huc spectant literæ, quas vocant represalia, quibus Princeps, vel Reipublica subditis, aut militibus suis damnum iniustum passis potestatem facit inuadendi terram eorum, qui damnum intulerunt; & occupandi bona incolarum, etiam innocentium, donec iusta damni compensatio fiat: dummodò prius Communitas, vel is, qui Communitati præest admonitus, compensationem facere, aut imperare neglexerit: *Vt si Galli, inquit Victor. de iure belli, num. 41. fecerint pradas in agrum Hispanorum: & Rex Francorum nolit cogere illos ad restitutionem, cum possit, possunt Hispani auctoritate Principis spoliare mercatores Gallos, aut agricolas quantumcunque innocentes: quia licet forte à principio Reipub. aut Princeps Gallorum non fuerit in culpa: iam est in culpa, quia negligit vindicare.*

Sunt autem represaliæ species quædam belli, ideoque sine necessitate non concedendæ: cum sint periculosa & occasionem præbeant rapinarum, ait Victor. ib. Insuper ne contra personas Ecclesiasticas, vel bona earum represaliæ concedantur, aut extendantur, prohibitum est sub pœna excommunicationis ipso iure lata in personas singulares, interdicti verò in Communitatem, nisi talem præsumptam licentiam intra mensem post diē concessionis, aut extensionis reuocent, c. vn. de iniurijs in 6. Vide etiam Sylu. Caiet. Sa verbo represalia, Ioach. Mynsing. cent. 6. obser. 1. qui casus numerat, in quibus represaliæ iure peti possint.

Dico III. Quod attinet ad eos, qui non censentur partes Reipublicæ nocentis: quales sunt peregrini, Clerici, ac Religiosi: eos non nisi per accidens bonis spoliare licitum est, si alia ratione finis, qui est victoria, pax, & securitas, commodè obtineri nequeat. Quamobrem fas est eiusmodi innocentibus auferre naues, arma, equos, frumentum, pecunias, si probabilis suspicio sit, quòd alioquin iniusti hostes talibus ad bellum sustinendum vsuri sint. Verum transacto bello, quæcunque ab Ecclesijs, Clericis, ac peregrinis abstracta sunt, eisdem restitui debent, nisi bona fide in belli usum absorpta.



absumpta fuerunt. Alia verò ratio est de innocentibus subditis; ij enim, vt supra dictum, bonis quandoque spoliantur in odium aut vindictam Principis sui, contra quem bellum geritur: quare ad ipsum pertinet compensationem damni facere. Modò hinc etiam excipias illos subditos Principis, aut Reipub. delinquentis, qui quatenus in ipsis erat, ausis restiterunt, atque Principi bellum iustum gerenti adhaerunt; nam hos quoque ab omni damno per se atque ex intentione inferendo, immunes esse oportet.

QVÆSTIO QVARTA. De spoliis, ac prædis, quatenus iuste sint, & ad quos pertinere debeant? Respondeo & dico I. Non tantum fas est eos, contra quos bellum iustum geritur, bonis spoliare, sicuti supra dixi: sed etiam interdum, si culpa & iniuria hostium id mereatur, totam eorum ciuitatem militi in prædam ac direptionem dare, sicuti docet Syl. ver. bellum l. q. 10. Victor. de iure belli, num. 52. Mol. disp. 122. Cæterum quia cum tali deprædatione grauissima crimina coniuncta esse solent: puta innocentium cædes, virginum & matronarum stupra, templorum spoliationes, &c. quæ licet à Duce prohiberi & impediri debeant: quia tamen propter imperium militum, in talicasu sæuientium, omnino impedire non possunt: ideo per accidens peccat Dux belli, si eiusmodi generalem vrbs direptionem permittat sine causa necessitatis, aut magnæ utilitatis: cuiusmodi est v. g. vt hostes pertinaces ac desperati tandem frangantur, vt militum alioquin languentium ardor exciteatur, vt bellum denique expediri, & pax iusta siue securitas obtineri possit.

Dico II. Mobilia ab hostibus accepta gentium iure militum capientium sunt. Ita docet Nauar. lib. 1. consil. 3. de restitut. spoliat. edit. 2. Victor num. 53. Couar. regula peccatum, p. 2. §. 11. Mol. disp. 117. conclus. 4. & constat ex l. si quid bello, ff. de Captiuis, & §. item ea, Instit. de rerum diuisione: *Quæ ex hostibus capimus, iure gentium statim nostra sunt: adeo quidem, vt & liberi homines* (non Christiani) *in seruitutem nostram deducantur.* Idque hodie etiam seruari solet: præterquam si alicubi consuetudo, vel lex vigeat, vt spolia omnia seu prædæ ad Ducem afferantur, à quo pro cuiusque meritis, ac dignitate distribuuntur, iuxta c. militare, dist. 1. Illud etiam monet Victoria l. c. cum Syl. ver. bellum, r. q. 9. Eiusmodi prædas siue spolia rerum mobilium, cum gentium iure capientium fiant, non esse computanda in compensationem debiti principalis, quod iustum bellum gerens ab aduersa parte iure exigere potest.

Dico III. Si ab hostibus, contra quos bellum iustum geritur, abstrahantur mobilia, quæ ipsi ab aliis antè, quamuis iniuste, ceperant: ea similiter secundum ius Cæsareum capientium sunt, neque pristinis dominis restituenda sunt, posteaquam in locum tutum deportata fuerunt. Ita docent Innoc. & sicut, 3. de iure iur. Couar. reg. peccatum, p. 2. §. 11. Nau. supra cit. consil. 4. Mol. disp. 118. §. his ita explicatis, Becanus c. 25. q. 14. §. quæres secundò: Puta, si hostes iniquum bellum gerentes, spolia à nostris abegerunt, eaque postea à militibus nostræ partis recuperantur, cum primum ad locum tutum spolia deportata pacifice possidere incipiunt, eorum domini efficiuntur. Ratio est, quia id ad similitudinem iuris Romani cit. l. si quid bello consuetudinem introduci potuit, boni communis causa: tum ad militum animos excitandos, tum ad innumeras lites tollendas, quæ alioquin oriri possent. Sed excipi debent, quæ postliminij iure gaudet, vt currus, & naues onerariæ, quibus com meatus & similia pro vsu belli aduehantur, ea pristinis dominis restituenda, posteaquam ab hostibus liberata, post limen ipsorum reducta sunt, l. nauibus, ff. de Captiuis, & postliminio reuerfis.

Dico IV. Immobilia, quæ occupantur, quatenus iustam damni compensationem, vel pro iniuria satisfactio-

nem non excedunt, pertinent ad Principem seu supremum Ducem belli, l. si captiuis, §. 1. ff. de Captiuis. Si verò ab hoste, cui erepta sunt, iniuste possessa fuerant, pristinis dominis restituenda erunt, sicuti ex communi Cou. p. 2. §. 11. Valentia p. 3.

QVÆSTIO QVINTA. Vtrum hosti, quamuis iniuste vexanti, seu iniustum bellum gerenti fide publica seruanda sit? Responso est affirmatiua S. Thom. qu. 40. a. 3. Couarin 4. decret. p. 2. §. 4. num. 22. Ioan. Molani de fide hæreticis seruanda, lib. 1. cap. 16: & aliorum, ex S. August. epist. 205. ad Bonifacium Comitem, qui refertur in c. noli, 23. quæst. 1. *Fides quando promittitur, etiam hosti seruanda est, contra quem bellum geritur.* S. Ambros. lib. 1. offic. cap. 29. *Quanta iustitia sit, ex hoc intelligi potest, quod nec locis, nec personis, nec temporibus excipitur, quæ etiam hosti seruatur.* Et paulò post: *Liquet igitur etiam in bello fidem, & iustitiam seruari oportere: nec ullum decorem esse posse, si violetur fides.* Loquimur autè de fide publica: id est, quæ à publico Magistratu, vel Communitate datur. Ratio assertionis est, quia fœdera publica gentium iure introducta sunt, quod omni generi humano commune est, c. ius gentium, d. 1. iuncto, §. ius gentium, Instit. de iure naturali, gentium, & ciuili. Idque propter necessitatem: quia nisi fœdera publica seu inter diuersos Principes, aut Respublicas, seu inter Principem aut Magistratum, & subditos eius, v. g. rebelantes, inita, omnimodè seruanda essent, nulla pax aut societas inter humanum genus consistere posset. Intelligitur tamen hæc, dummodo fœdus ex obiecto malum non sit: consequenter nec obligatorium.

Neque verò tergiuersationi locus est: quod pars altera ad fœdus ineundum per vim iniustam adacta sit: quod in bellis, quippe quæ ex altera parte ferme iniusta sunt, plerumque accidit. Cum enim paciscentes superiorem Iudicem non habeant, qui causa cognita ipsis ius dicat: pars quælibet paciscentis postea causari posset, ac dicere, sibi vim iniustam illatam esse: ideòque fœdus à se rescindi posse. At verò si priuatus aliquis alteri priuato, vim iniustam inferenti, promissionem faciat metu adactus: licet eiusmodi pactio siue fœdus mero iure valeat, tamen propter æquitatem rescindi potest, iuxta Prætoris edictum; *Quod metus causa gestum erit, ratum non habebit.* l. 4. ff. tit. 2. Idque locum habet, si paciscentes Magistratui alicui subsunt: præsertim ille, qui vim iniustam intulit: potest enim, ac debet à suo Iudice compelli, vt promissionem iniquè extortam, quamuis iurata fuerat, remittat & non exigat.

Deinde tergiuersationi locus non est, etiam si postea appareat, fœdus publica autoritate initum, Principi, aut Reip. paciscenti perniciosum esse; dummodo, vt dixi, ex obiecto malum, seu iniquum non sit. Alia verò ratio est de fœdere priuato, seu quod priuati pepigerunt eum altero priuato, vel alia Republica aut Principe; si enim tale fœdus cedere videatur in proprij Principis, aut Reipublicæ perniciem, rescindi poterit: quandoquidè in omni promissione intelligi debet exceptum ius Superioris: quippe cui subditus præjudicatum non potest, c. venientes, de iure iur. Sin verò fœdus aut promissio alieno Principi, aut Reip. facta in publicam perniciem non cedat: vt si quis Tyranno reditum, vel redèptionis pretium iuratus promissit, fides seruanda est, sicuti docet Cou. l. c. Ioan. Mol. l. c. 17. & 29. eiusque rei exemplum habemus apud Cicer. l. 1. de Officijs de M. Attilio Regulo, quem laudat S. Aug. l. 1. de ciu. c. 15. & 24.

Ex dictis iudiciū ferri potest de doctrina Ioan. Mol. l. 3. de fide hæreticis seruanda, c. 14. Respondeo, inquit, *Romani Pontificis auctoritatem nullam esse ad destructionem, sed ad adificationem.* Quia autè absque magna destructione non posset dispensare, ut fides publica à Concilio, aut Principe data violetur, ideo dispensationis eius auctoritas & potestas eo se non excedit. Neque ullum habetenus extitit, aut unquam extabit huius rei exemplum. Nā si Romanus Pontifex semel in fide publicæ transgressionem dispensaret,



quod hac non foret legitima dispensatio, sed potius dissipatio, probatur: Quia deinceps nemo posset esse securus habito à Rege, aut alterius tituli Principe salvo conductu, aut solemnium iuramento: quod semper periculum foret, ne regia potestas in via dispensationis extorqueatur, quod semel concessum esse non solet.

Mihi in hac re dicendum videtur primò: Fœdus publicum, quod v.g. duo Reges Catholici inter se pepigerunt, non potest vlla potestate, ne Ecclesiastica quidem directè dissolui per dispensationem, aut iuramenti relaxationem. Nam soluendi potestas Prælati Ecclesiasticis data est in edificationem, non in destructionem: at verò talis relaxatio fidei aut fœderis publici tenderet contra ius gentium, adeoque cederet in magnum detrimentum societatis humanæ, & grauissimum alterius partis præiudicium. Ergo, &c.

Dico II. Si fœdus publicum inter partes Catholicorum quamuis legitima potestate initum, successu temporis cedat in magnum Ecclesiæ Christianæ detrimentum, tunc Summus Pontifex ex plenitudine potestatis suæ fœdus indirectè rescindere posset, cogendo alteram partem, vt remittat obligationem fœderis in publicum Ecclesiæ detrimentum cedentis: vel eo recusante, propria autoritate relaxando. Probatur: tum quia id postulat bonum regimen Reipub. Christianæ, vt supremus eius Pastor tollere possit ea, quæ in perniciem grauem Ecclesiæ Christi cedunt: tum quia ipsi Catholici Reges ac Principes, cum sint Ecclesiæ filij, non alia conditione sua fœdera constituere censentur, nisi vt salua interim sit Ecclesiæ Christi incolumitas.

Dico III. Si à Christiano v.g. Rege cum infidelibus, seu non baptizatis publicum fœdus fiat, nulla vnquam ratione seu directè, seu indirectè Summus Pontifex relaxare potest. Ratio est: Quia cederet in maximum detrimentum ac contemptum ipsiusmet etiam Ecclesiæ: si quidem nihil tam indecorum Christianæ Catholicæ Religionis, & nihil ipsis Catholicis Regibus, ac populis adeo noxium esse potest, quàm si fidem publicè datam non seruare, seu fœdera violare censeantur. Profecto fidem fallere, & multis modis decipere proprium est insigne, seu nota infidelium, præsertim hæreticorum: cum enim hi fidem Deo in baptismo datam abiecerint, quid mirum, si neque hominibus fidem seruent? Quamobrem si quando fœdus à Catholico Rege cum infidelibus legitima potestate constitutum, cedere postea videatur in Ecclesiæ Catholicæ detrimentum, à Christo, supremo eius Rectore & defensore auxilium sperandum, petendumq; & nunquam alicuius perfidiæ remedium adhibendum est.

Dico IV. Si Catholici cum hæreticis publicum fœdus ineant, non potest per auctoritatem Pontificiam solui, aut relaxari. Hæc est doctrina à Ioanne Molano præcipue intentata. Probatur: Licet enim, si quædam præcisè spectetur, videlicet quod hæretici, propter Baptismum, Ecclesiasticæ iurisdictioni subiecti sunt: ob odium ac pœnam ipsorum, iure compellantur ad remissionem fœderis in Ecclesiæ detrimentum cedentis: aut, si recusent, ipsis etiam inuitis, relaxatio fieri queat per supremam Ecclesiasticam potestatem: attamen, spectatis omnibus, adeoque absolute negari debet, id à summo Pontifice fieri posse. Quandoquidem is non habet potestatem dispensandi aut relaxandi in detrimentum Ecclesiæ: talis autem relaxatio cederet in grauissimum Ecclesiæ detrimentum: quia cum hæretici Catholicæ Fidei hostes, in omni fœdere cum Catholicis inito exclusam velint Papalem relaxandi potestatem: ideo apud ipsos, & omnes nationes infideles blasphemabitur nomen Domini, & Religio Catholica in contemptum veniet, & plura mala indigentia sequentur, si dicatur, nos cum Pontificis nostri consensu, fœdera publica, contra ius gentium, erga hostes nostros violare. Hoc autem tam graue malum est, vt nullum incommo-

dum seu detrimentum Ecclesiæ Catholicæ, ex fœderi obseruatione inferendum, ita magnum videri debeat, sperantibus in Deo, & Christo summo Ecclesiæ defensore, qui auxilium fert in tempore opportuno.

Verum hæretici huius temporis Calvinistæ egregiè astuti sunt. Vt enim impudè ipsis liceat pacta cum Catholicis inita violare, causam prætexunt, quod Iesuitæ, & alij Catholici doceant, fidem hæreticis (quales se esse conscientia ipsis dicat) seruandam non esse: talibus autè, qui fidem violare parati sunt, fidem seruari non oportere: cum tamen interim fidem publicam à Catholicis violatam fuisse, nullo exemplo ostendere possint: multò minùs quod Catholici Doctores in ea, quam dicunt, sententia sint: *Fidem hæreticis seruandam non esse*. Ecce enim tam Iesuitæ, quàm alij Doctores Catholici contrarium apertè profitentur ac docent: Fidem publicam hæreticis datam, inuiolabiliter, & sine vilo dispensationis, aut absolutionis remedio seruandam esse, quamdiu ipsi seruare parati sint.

Obijciunt nobis Concilium Constantiense, in quo saluum conductum Ioanni Hussio datum, violatum esse aiunt; sed probare non possunt. Nam Patres Hussio saluum conductum dedisse non legimus: Sigismundus autem Imperator dedit saluum conductum: at non violauit. Primò: Quia dedit in forma iuris communis, id est, salua executione iustitiæ, quo ipso modo Patres sess. 6. Hieronymo Pragenfi dederunt *omnem saluum conductum à violentia, iniuria semper saluū*. Secundò: Quia Hussius post datum saluum conductum fugam arripuit, quæ ipsi sub pœna capitis ab Imperatore prohibita erat, vt ostendit Martinus Becanus in opusculo de fide hæreticis seruanda. Tertiò: Ipsamet Synodus Constantiensis sess. 19. optime demonstrat, à seculari, ipsaque Imperatoria potestate per saluum conductum alicui datum, Ecclesiasticæ (quippe omnino distinctæ, atque superiori iurisdictioni) nullum præiudicium generari posse, quo minùs de personarum erroribus inquirere, & contra pertinaces ad punitionem procedere possit.

Q VÆSTIO SEXTA. Vtrum in bello captis fugere licitum sit: & res hostium asportare? Respondeo, & dico I. Non est improbabile, quod capti in bello, etià iusto ex parte capientium, iniusto autem ex parte aduersariorum, ad suos fugere possint, absque peccato: modò scandalum, & specialis permanendi pollicitatio absit. Ita docent Sotus l. 4. de iust. q. 1. 2. 2. concl. 3. Cou. 1. ref. c. 2. n. 10. & regula peccatum part. 2. §. 11. n. 6. Vasq. 1. 2. t. 2. dis. 174. c. 1. num. 8. P. Nau. l. 3. de restit. c. 1. num. 200. Ioan. Malderus in 2. 2. q. 40. art. 1. dub. 7. contra Gloss. in c. ius gentium, dist. 1. S. Anton. p. 3. tit. 3. c. 6. §. 4. Nauar. c. 17. num. 103. Molin. tom. 1. tract. 2. disput. 37. Nam iure gentium introductum esse videtur, vt capti iustè ab hostibus, si fugiendo ad suos perueniant, libertatem consequantur. Id enim ius postliminii est, l. in bello, l. nihil interest, ff. de Captiuis, & §. item ea, quæ ex hostibus, Instit. de rerum diuis. Accedit, quod hæc pœna perpetuæ seruitutis naturali propensione admodum repugnet, vt eam sustinere, si effugere quis possit, valde difficile sit, vt dixi l. 1. tract. 4. cap. 15. numero 10. & tradit Petrus Nauar. lib. 3. c. 1. num. 201. vbi consequenter ait, quod bello captus fugere possit non tantum in patriam, sed etiam in aliud regnum distinctum: neque domino suo restitui debeat.

Non obstat his, quod tales fugitiui, si ex fuga reducuntur, priusquam ad suos peruenerunt, puniri solent, sicut colligitur ex l. 3. C. de seruis fugitiuis: Quia etiam damnati ad mortem, si ex captiuitate fugiant, grauius puniuntur: licet secundum probabilissimam Theologorum sententiam fugiendo nihil peccarint; vt dictum est cri. 17. 10.

Dico II. Capti bello iniusto ex parte capientium, v.g. Christiani à Turcis, non tantum licitè fugere possunt (secula



(seclusa speciali permanendi promissione, iuramento firmata) sed etiam in compensationem damni illati, vel debite mercedis propter præstata servitia, res illorum, qui iniuriam intulerunt, propria auctoritate auferre. Ita docet Molin. tract. 2. tom. 3. poster. disput. 693. conclus. 1. Ratio est: Quia, si nemo adfit, qui iustitiam administraturus est, potest quilibet, si scandalum cesset, per se ipsum clam vel palam accipere, quæ sibi liquido debentur. Neque refert, tametsi inter Turcas v. g. & Christianos induciæ, vel pax constituta sit: Ea enim ad id solum se extendit, ut à neutra parte Reipublicæ damnum alteri inferatur: non verò, ut qui hæcenus iniuste oppressi fuerunt, ius suum ac debitum recuperare non possint.

Dico III. Cum Christiani inter Turcas versari, vel peregrinari permittuntur ex pacto cum ipsis inito, si quid palam, vel clam ab illis auferant, furti vel rapinæ crimine committunt, cum restituendi obligatione. Ita Molin. loc. cit. conclus. 4. Ratio est: Quia Turcæ veri domini sunt mobilium bonorum suorum: ergo illis spoliari non possunt: nisi vel iure belli in iustam vindictam, vel in iustam compensationem liquidi debiti naturalis. Hic autem ponimus utramque causam cessare: Nam imprimis, licet ponamus, bellum eo tempore cum Turcis esse: peregrinantes tamen non possunt ipsis damnum inferre: tum quia prohibentur pacto seu fide ipsis data, quæ etiam hosti seruanda est: tum quia præsumere non possunt esse voluntatem Principis Christiani contra Turcas bellum gerentis, ut à peregrinantibus hostile damnum inferatur. Quod verò ad alterum attinet, si Turcæ à Christianis inter ipsos commorantibus per iniustitiam aliquid extorserunt, v. g. pretium redemptionis suæ, vel tributum ob permissam ipsis peregrinationem, tunc fatetur Molina, licite tantundem à Turcis auferri, si id clam sine ullo scandalo fieri possit.

Dico IV. Si Turcæ per terras Christianorum peregrinentur cum consensu Principum, ut fieri solet tempore induciarum, aut pacis, nefas est quidquam damni eis inferre. At verò tempore belli, nullaque ipsis promissa securitate, possunt haud dubie bonis spoliari, in captiuitatem trahi, &c. non solum à Principe, bellum contra eos gerente, sed etiam à quouis eius subdito, ex præsumpta Principis voluntate. Ita docet P. Natat. lib. 4. c. 1. n. 54. & colligitur ex doctrina Molin. loc. cit.

QVÆSTIO SEPTIMA. Quibus modis in bello peccari soleat? Plurima & ingētia peccata sunt, quæ bello, quamvis alioquin iusto gerendo, committi solent. Imprimis Dux supremus seu Magistratus, cuius auctoritate bellum geritur, grauiter peccat, si iusta stipendia militibus non provideat: ex quo ipsi ad iniustas rapinas, aliæque damna innocentibus inferenda stimulantur, ad quorum proinde restitutionem Princeps obligatur. Deinde peccat, si disciplinam militarem seruare intermitat, milites ab iniustis incursionibus, rapinis, stupris, &c. propositis pœnis non coerceat: atque etiam exinde restituendi obligationem contrahit: cum ex iustitia obligatus sit ad eiusmodi damna, quatenus potest, impedienda.

Nota autem, quod dico quatenus potest: Imprimis enim considerandum hic est, utrum Princeps ultro ad bellum iustum gerendum accedat, v. g. occupandæ ciuitatis, aut provinciae causâ, quæ ipsi iure debita denegatur: tunc persuadere sibi debet, quod bello rectè sustinendo idoneus futurus sit: videlicet diuitijs tam potens, ut militibus, quamdiu bellum geritur, stipendia soluere: & tam potēs auctoritate, ut eisdem per subordinatos Duces in officio continere possit: alioquin bellum plerumque intermittere debet. At verò necessitate coactus ad bellum, præsertim defensuum, v. g. contra incursus infidelium, aut hæreticorum aggrediatur: tunc accidere potest, ut sine culpa Ducis aut Principis diuturnum bellum gerentis, stipendia militibus tardius aut tenuius proueniant, quam ipsi mereantur: quo in casu necessitas (si sumptus

quamvis omni possibili studio quæsit & collecti non sufficiant) partim ipsos milites, partim verò incolas, boni publici causâ, aliqua incommoda tolerare necesse est. Contingere etiam potest, ut etsi maxime belli Dux supremus disciplinam militarem seruare cupiat, non tamen possit: quia milites, eorumque Capitanei secessionem ad aduersarios apertè cogitant, si cum supplicij seueritate à prædis omnino arceantur: quo casu interdum minora eiusmodi, mala permitti, & ab incolis æquanimiter perferri debent, ut grauiora incommoda vitentur: modo alia pericula re vera subsint, & non vana excusatione prætendantur.

Accedit: quod ad stipendij solutionem attinet, etiam consuetudinem spectandam esse: Nam quibusdam regionibus mos est, ut milites in partem stipendij sui pannum accipere cogantur, eo pretio auctiore, quo mercatores fœneratores Principi vendiderunt. Plerisque verò locis consuetum est, ut trium, vel quatuor plerumque mensium stipendia militibus seruentur: fortasse ob eam causam, ut dum hanc debitam sibi pecuniam apud Ducem quasi depositam habent, à fuga, & secessionem retrahantur: quod si autem ex militibus aliqui moriantur, hæredibus eius nihil soluitur. Sin autem dimissio militum fiat, aliquid debiti ipsis stipendij detrahitur, tanquam in pœnam, quia multas contra Ducis voluntatem rapinas abegerint: esto, multi eorum in hac re innocentes sint. Hæc & similia interdum probabiliter excusantur: ut scilicet à Confessarijs, tanquam manifestò iniusta damnari non possint: partim ob necessitatis rationem, quia pecuniæ non sufficiunt ad bellum necessarium gerendum, vel continuandum: quare priuata militum iactura posthabetur bono publico: partim quia milites, dum militiæ nomen dant, scientes eiusmodi consuetudinem, sponte in eam consentire videntur.

Peccata Ducum supremo subordinatorum, præter alia, quæ ex supra dictis colliguntur, hæc esse solent: I. Si milites suos absque necessitatis causa temerè exponant certæ interneccioni. II. Si nulla cogente necessitate in locis palustribus, & valde insalubribus castra figant, cum periculo morbi, seu contagionis. III. Si in solutione stipendiorum iniustis, & usurarijs cambijs, seu permutationibus pecuniarum vtantur. IV. Si pecunias accipientes pro maiore militum numero, eum non complent, cum ingenti interdum Reipublicæ damno. V. Si dimissis veteranis, & exercitatis, in eorum locum novos inexpertos minore stipendio substituunt. VI. Si stipendium militibus subtrahentes, permittant eos à rusticis & alijs innocentibus extorquere, quæ sibi necessaria sunt. VII. Si dum per provinciam exercitum ducunt, à pagis & ciuitatibus pecuniam accipiant, ad redimendam vexationem: ut videlicet exercitus non ad ipsos, qui pecunias obtulerunt: sed ad alios adducatur. Hæc enim omnia cedunt in iustum damnum subditorum. Vide Molin. disp. 117. Becanum q. 15. Nau. lib. 2. c. 3. n. 285.

Alij porro Officiales in exercitu peccant: I. Si victualia exercitui necessaria conuehi negligant: aut per auaritiæ vel negligentiam militi cibum, potumve corruptum præbeant, ex quo morbi oriantur. II. Si pulueri tormentario alienam materiam admisceant, lucris sui gratia. III. Si pro cibo, potu, & similibus plus, quam debeant, à militibus accipiant. IV. Si à domibus pro redempta vexatione, seu subleuato onere, quod in eas nullos milites hospitij causa mittant, pecuniam accipiant: præsertim si propterea alios incolas plùs grauari accidat.

Denique milites omnes, ratione stipendij, quod accipiunt, ex iustitia, adeoque sub culpa mortali obligati sunt. I. ut Duci, ac Præsidi militiæ obtemperent, in acie, & pugna consistent, & non facile fugiant, aliisque timorē iniiciant iuxta l. omne delictum. ff. de re militari. II. Ut stationem seruent, arcem sibi commissam defendant, etiâ cum vitæ periculo, quamdiu spes defendendi indi superest:



alioquin capite plectuntur, iuxta l. 3. ff. ad l. Iuliam Majest. III. Vt sine Ducis sui consensu à castris, vel exercitu non discedant: quandoquidem tali pacto à belli Duce milites conducti censentur, vt illi liberum sit, eos cum voluerit, persoluto stipendio dimittere: ijs vero liberum non sit, cum voluerint, discedere. Quia in re aduertere etiā debet miles, quantum damnum ex discessione, aut fuga sua sequatur, seu quod alius miles non nisi longo tempore, magnisque expensis adduci possit: seu quod periculum sit, ne paucorum exemplum alij plures secuti, castra, vel etiam aciem aduersus impetus hostiles non satis instructā deferant: vt merito eiusmodi delicto capitis supplicium decretum sit in l. omne, §. qui in facie, ff. de re militari & l. 3. ff. ad l. Iuliam Majest. IV. Milites suis stipendiis contenti esse debent, vt S. Ioan. Baptista illis praecepit Luca 3. ideoque homines innocentes, per quorum terras non hostiles transeunt, vel apud quos hospitantur, insolitis atque indebitis exactionibus non grauare.

Sed etsi milites in solutione stipendij iniustam imminutionem aut dilationem patiantur: non ideo ipsi licitū est subditos, aut accolae innocentes spoliare: quia bona aliena non sunt oppignerata militibus pro stipendio, ait Caiet. ver. bellum, prope finem. Neque dissimulatio, vel auctoritas Ducis sui ipsos excusat: nisi id fiat in poenā iuste indigendam nocentibus, aut membris Reipub nocentis. Alioquin verò Princeps stipendia militibus dare debet ex prouentibus totius prouinciæ, aut regni secundum proportionem facultatum singulorum: & non particulares personas, puta agricolas, &c. prae alijs grauare. Excipitur tamen primò, si consuetudo loci obtineat, vt hospites militibus habitationem, ligna, paleas, & si nilia gratis dent: tunc enim per accidens & quasi fortuito accidit, vt vna pars prouinciæ plus, quam altera oneretur. Excipitur secundò, si grauissima necessitas cogat milites ad spoliandum innocentes: quo tamen casu belli Princeps in conscientia obligatus erit ad damnum, quatenus moraliter potest, refarciendum, si iniusta stipendiorum detentione causa eius extitit: Sin verò sine culpa extitit, non amplius obligatur, quam inde locupletior redditus est, sicuti in materia de restitut. apparebit lib. seq. tract. 2. de iustit. c. 3.

Quis verò modus seruandus sit in restitutione faciendā alicui Communitati, tradit Less. lib. 2. c. 14. num. 31. Vt didelicet totus valor rerum restituendarum, si magni momenti sit, loci Magistratui mittatur: à quo per edictū conuocari omnes debeant, qui spoliati fuerant: vt examinentur, vbi, quando, quibus & qualibus rebus iniuste spoliati sint.

Quæstio Octaua. Vtrum Clericis licitum sit pugnare? 19 Respondeo: Clericis iure Ecclesiastico prohibitum est extra necessitatis casum propria manu pugnare. Constat ex c. clericum, c. de his clericis, c. eos qui, 20. q. 3. c. quicumque clericus, c. clerici. c. quicumque ex clero, 23. q. 8. c. ex multa, §. vlt. de voto, & docet S. Th. q. 40. a. 2. Quia indecens est, vt qui spirituali militia se tradiderunt, arma vel negotia secularia tractent, iuxta Apost. 2. ad Timoth. 2. Nemo militans Deo implicat se negotijs secularibus. Accedit, quod ordines Clericorum ordinantur ad ministeriū altaris, in quo repræsentatur passio & mors Christi: ergo non oportet Clericos alienum sanguinem fundere: sed potius paratos esse ad sanguinis sui pro Christo effusionem, vt imitentur opere, quod gerunt ministerio. Quā obrem ab Ecclesia institutum est, vt quicumque hominem, extra necessitatis casum, occidunt vel mutilant, irregulares fiant: quamuis cum discrimine, quod laici hanc irregularitatem, quæ dicitur ob defectum lenitatis, sine peccato contrahant, sed Clerici cum peccato.

Dixi autem iure Ecclesiastico, non naturali prohibitū esse Clericis pugnare, sicuti rectè docent Bannes cit. q. 40. a. 2. Mol. disp. 108. contra Valentiam to. 3. disp. 3. q. 16. p. 4. controu. 1. §. contrariam. Quandoquidem Papa in hac

re dispensare potest cum Clerico, ipsique facultatem dare manu propria pugnandi in bello iusto: qua quidem licentia concessa omne etiam irregularitatis incurrendæ periculum à tali Clerico auferre præsumitur, teste Syl. ver. homicidium, 3. q. 6. Couar. in clem. p. 2. §. 3. nu. 2. Gutierrez lib. 2. canon. qq. c. 6. n. 65. Mol. l. c. & tr. 3. disp. 8. n. 1. Auila p. 7. de censur. disp. 6. l. 3. dub. 2. conclus. 2. Confirmatur ex veteri Testamento, Exod. 32. vbi Leuitæ laudantur à Moysè, quod contra Idololatrias pugnant Machabæi summi Pontifices simul & supremi belli duces erant, propria manu pugnantes, sicuti constat ex Machab. libris.

Secundò dixi, *propria manu*: Quia interim Clerici cum consensu Superioris sui expresso vel rationabiliter præsumpto, absque peccato & irregularitatis nota, interesse possunt iusto bello, vt pugnantibus spirituale consilium auxilium afferant, sicuti docet S. Th. cit. a. 2. & Gratianus super cit. c. quicumque ex clero, Gl. in c. quod in dubijs, de pœnis, vbi monet: cum ibi Innocentius III. sub pœna depositionis Sacerdotibus prohibet, ne alios ad pugnandum incitent; intelligendum esse in bello iniusto: Si enim bellum iustum sit, licitum est Clerico milites hortari ad pugnandum fortiter pro patria, pro iustitia, Religione: dum modo non dicant *occide, macta*, sicuti movent Nau. c. 27. n. 215. Mol. cit. disp. 108. §. his non obstantibus; Becanus c. 25. q. 25. n. 5.

Quinimò probabiliter docent Henriq. lib. 14. c. 12. n. 4. lit. r. Auila cit. dubio 2. & videtur idem sentire Nau. in man. cap. 27. n. 215. iuncto consilio 4. & 6. de homic. posse Clericum sine irregularitatis periculo, milites in bello iusto hortari generatim ad percutiendum & occidendum hostes: modò in particulari neminem occidi suadeant, aut iubeant, cum talis concursus ad homicidium directus & valde propinquus existat.

Deinde, licet Clerici propria manu pugnare non debeant, possunt tamen alijs bellum iustum suadere, teste S. Th. cit. a. 2. ad 3. & colligitur ex c. omni tempore, & seq. 23. q. 8. II. Possunt Principem secularem in subsidium inuocare ad bellandum contra infideles in defensionem Ecclesiæ, exemplo Maximiani Episcopi apud S. Aug. Epist. 50. ad Bonifac. & refertur c. Maximianus, 23. q. 3. III. Clerici, qui temporalem iurisdictionem obtinent, quales sunt Episcopi Germaniæ, bellum legitimum cum auctoritate indicare, exercitum conscribere, Ducem belli præficere, arma ad pugnandum militibus dare non prohibentur, sicuti constat ex c. Episcopus, Ne clerici vel Monachi, &c. in 6. Quamuis exercitus Doctores ipsi esse non debeant, propria præsentia ius & auctoritatem bellandi militibus præstantes, sine Pontificia dispensatione, aut necessitatis ratione, sicuti constat ex c. sententiam, extra, eod. tit. vbi id Abb. notat.

Tertiò dixi, *Extra necessitatis casum*: Nam in quibusdam casibus, quos ipsum ius naturale dicit, Clerici propria manu pugnare possunt, etiam non obtenta prius dispensatione, quos numerat Mol. cit. disp. 108. §. sunt verò aliqui, Becanus cit. q. 25. concl. 3. Ioan. Malderus 2. 2. q. 40. a. 2. I. Si id necessarium sit ad defensionem proximi innocentis, præsertim qui Reipublicæ valde utilis aut necessarius est, teste Caiet. quæst. 40. art. 2. III. Si necessarium sit ad defensionem patriæ, aut ciuitatis contra iniustos inuasores, argum. cap. 2. de immunit. Eccles. IV. Si necessarium sit ad consecutionem iustæ victoriæ, ex qua salus Ecclesiæ, vel Reipublicæ Christianæ multum pender. Ordinariè autem talis necessitas in bello præsertim offensiuo non occurrit: cum plerumque milites laici adhiberi possint.

Restant duo dubia: I. An omnibus Clericis in bello pugnare prohibitum sit; Ad hoc Molina, eumque secuti Malderus 2. 2. quæst. 40. a. 2. Becanus cit. quæst. 25. n. 9. ita respondent: Vel sunt Clerici in maioribus constituti, & hi pugnando mortaliter peccant. Vel sunt Clerici in



in minoribus, non gaudentes priuilegio fori; & hi nihil peccat, consuetudine id eis permittente. Vel sunt Clerici in minoribus, gaudentes priuilegio fori & canonis, iuxta decretum Trident. Concilij sess. 25. c. 6. de reform. & hi pugnando peccant venialiter. Vel denique tales etiam beneficium Ecclesiasticum obtinent; & timendum est, ne mortaliter delinquant, sicuti etiam docet Nauar. lib. 3. conf. 3. n. 3. de vita & honest. clericorum edit. 1.

Ex his quatuor dictis, duo priora extra controuersiam esse videntur. De duobus vero posterioribus dubitari potest: Quandoquidem Couar. Clem. si furiosus, p. 2. §. 3. n. 2. Val. q. 16. p. 4. paulo post princip. vniuersim dicunt, Clericos in minoribus non prohiberi, quo minus propria manu pugnent. Quamuis autem hinc excipi debeant beneficiati: non tamen peccati mortalis semper dampnandi sunt, si eorum beneficia residentiam non postulent, & nihil obligationis, quod beneficijs eorum incumbit, negligatur; maxime si bellum contra infideles, aut hereticos institutum sit. Quod ideo assero, quia hoc in quibusdam Germania diocesibus vsitatum est, vt Canonicis nondum Capitularibus, neque redditus Capitularium habentibus interim permittatur, quocunque ipsis lubitum est, etiam ad bellum proficisci. Si tamen accadat beneficiariū propria manu in bello aliquem occidere, vel mutilare; beneficium resignare debet, vel dispensationem super irregularitate impetrare.

20 Alterum dubium est; Vtrum Clerici, qui non pugnandi, sed spiritualiter adiuuandi causa bello interfunt, spolia hostium non minus, quam alij milites accipere & retinere possint: Affirmandum est cum Molina cit. disp. 108. prope finem: Nisi de contraria supremi Ducis voluntate constet. Quia tales Clerici sunt exercitui vtiles, imò & pars exercitus; ideoque gaudere debent commodis belli, sicuti etiam periculis expositi sunt.

## CAP. XIII.

## De scandalo.

## SUMMARIUM.

- 1 Scandalum est dictum, vel sanctum minus rectum, praebens alteri occasionem ruinae spiritualis.
- 2 Duplex est scandalum: Vnum per se, siue datum: alterum per accidens, siue merè acceptum. Illud vel est proprie actiuum, siue inductiuum ad peccatum consilio, iussu: Alterum improprie inductiuum, videlicet obiectiue tantum, vel materialiter.
- 3 Nullo casu licitum est alterum iussu, vel consilio inducere ad id, quod ab eo sine peccato fieri nequit.
- 4 Ad peccatum materialiter tantum cooperari licitum est, si certa conditiones adsint.
- 5 Cooperatio materialis ad peccatum, quanto remotior est, tanto facilius ob rationabilem permittitur.
- 6 Qui exemplo suo alios v.g. ad furandum mouet, duplici peccato se obstringit: quare talis circumstantia scandali seu inductionis in Confessione explicanda est.
- 7 Minus peccatum suadere non licet, ut vitetur maius: nisi illud minus sit pars formaliter, aut virtualiter contenta in maiore peccato.
- 8 Scandalum passiuum, seu merè acceptum ex nostra operatione permittere possumus, si rationabilem operandi causam habeamus.  
Scandalum ex vialitia minus curandum est, quam si ex infirmitate, vel ignorantia proueniat.
- 9 Praelatus Ecclesia interdum debet occasionem debitorum differre ob scandalum infirmorum: non ita vero propter scandalum ex malitia.
- 10 Mulier aliquando tempore domi se continere debet, & die etiam festo semel aut iterum à Missa auditione abstinere. si sciat, ex aspectu sui adolescentem aliquem, ob infirmitatem scandalum passurum esse.
- 11 Excessus in corporis ornatu, per se loquendo, est peccatum tantum veniale: per accidens autem frequenter mortale.

**M** Κατάλοι; quod periculum, seu pedis impactionem vertit S. Hieron. in c. 15. Matth. definitur à S. Th.

q. 43. a. 1. Alensi in 2. p. quaest. 189. mem. 2. & alijs Scholasticis in 4. d. 38. Dictum, vel factum minus rectum, praebens alteri occasionem spiritualis ruinae. Dicitur dictum, vel factum, quia externa tantum, & non interna occulta hominis operatio alterum ad peccandum mouere seu inducere potest. Nomine autem dicti vel facti, seu externae operationis, intelligi etiam debet omissio externa, sicuti notat ex cōmuni Azor t. 2. l. 12. c. 16. q. 1. Additur minus rectum: quia necesse non est, operationem vel omissionem secundum se, siue ex obiecto malam aut prohibitam esse; sed sufficit speciem mali habere, & idcirco ea saltem habitudine siue circumstantia minus rectam, ideoque malam fieri, quia alteri occasionem peccandi praebitura est. Exemplum habes in clerico, qui domi suae alit mulierem populo suspectam: quamuis ponamus nihil subesse peccati, neque etiam periculum peccandi; tamen ad amouendum publicum scandalum & malum detractioni, &c. obligatus est Clericus sub culpa mortali, mulierem deponere, sicuti colligitur ex Trident. sess. 25. c. 14. de reform. & docet Pet. Sotus de vita Sacerdotum, Lect. 4. Sa ver. Clericus n. 27. & alij, conuenienter Apostolo 1. ad Thessal. 5. Ab omni specie mali abstinere vos.

Duo insuper obseruanda; I. Operatio secundum se venialiter tantum mala, sit tamen mortalis per circumstantiam siue habitudinem ad alterum, cui occasio praebetur peccandi mortaliter, sicut notauit Becanus c. 27. q. 2. in fine: Vt si Religiosus verbum iocosum proferat coram foeminis, talibus circumstantijs, quibus occasione accipere possint peccandi mortaliter: Vel adolescens verbum amatorium insinuet mulieri, audiente eius marito valde Zelotypo, ex quo probabiliter secutura putatur magna dissensio inter coniuges.

II. Licet operatio, vel omissio in se non mala, speciem mali gerat, vt alicui occasio lapsus esse possit: tamen si eam, quantum in te est, remoueas, edocendo, cur iustā agendi, vel omittendi causam habeas: aliquando cessat esse scandalum datum, & sit merè acceptum. Sic Parochus v.g. qui die festo legitime impeditus est sacrificare, atque alium substituere non potest: debet populum edocere, cur Missa intermittatur: quod si scandalum nihilominus sequatur, ipse extra culpam erit. Vide Richar. in 4. d. 38. a. 10. q. 2. in corp. Maior ead. d. ult. q. 5. Contra secundam partem.

Duplex est scandalum, sicuti colligitur ex doctrina S. Th. cit. a. 1. ad 4. Vnum per se, quod dicitur datum, & supra definitum est: alterum per accidens, quod dicitur acceptum, siue merè passiuum. Scandalum datum iterum duplex: Vel enita est proprie in genere moris actiuum, seu inductiuum in peccatum consilio, iussu: Vel est improprie actiuum seu inductiuum; si quis eiusmodi operationem exerceat, quae suapte naturā apta est alteri occasionem peccati praebere; idque vel obiectiue tantum vt si coram alijs die interdicto carnes comedas: vel in genere causae materialis, vt si Principi bellum iniustum gesturo pecunias mutuo des, sine expresso aut tacito consilio, iussione. Neque verò opus est ad peccatum scandali vt ruina proximi re ipsa sequatur: sed sufficit, quod suapte natura ex opere cum circumstantijs considerato sequi possit, teste S. Th. a. 2. Vt in proposito exemplo, si die interdicto coram alijs carnes comedas, quamuis ob aliquam causam occultam excusatus sis, peccas tamen scandalum peccato, si qui praesentes sunt occasionem inde accipere possunt vel legem Ecclesiae violandi, vel Fidei iacturam faciendi; esto, re ipsa nihil tale accadat.

Scandalum per accidens, siue merè passiuum, merè acceptum est, cum & praeter operantis intentionem, & praeter naturam seu conditionem operis, alter ex eo peccandi occasionem accipit. Diuidi potest in scandalum pusillorum, quod ex hominis ignorantia, vel infirmitate prouenit: & in scandalum Phariseorum, quod ex mera malitia ortum habet.



**Assertio I.** Nullo casu licitum est aliquem inducere iussione, aut consilio, expressè vel tacitè ad agendum id, quod ab eo sine peccato fieri non potest. Est communis doctrina, quam tradit S. Anton. p. 2. lit. 1. c. 9. §. 14. Na. c. 17. man. n. 26. Suar. 3. p. to. 3. disp. 18. f. 1. Aegid. Coninck in 3. p. D. Th. q. 64. a. 6. dub. 2. conclus. 4. Sumitur ex illo apud S. Matth. c. 18. *Va homini illi, per quem scandalum venit*: Hoc autem, de quo in assertione dixi, est scandalum per se, propriè datum & actuum. Ratio est: Quia repugnat præcepto negatio iuris naturæ. Ne proximum in peccatum inducas: Quare talis inductio semper mala, & speciale peccatum scandali est, virtuti Charitatis ac misericordiæ oppositum.

Exinde resolves, non esse licitum à malefico petere, ut maleficium maleficio soluat: nec ab usurario, ut cum usura mutuet: nec ab infideli, ut per falsum Deum iuret: nec à Sacerdote qui iurisdictione caret ut à peccatis absoluat: nec licitum esse alterum invitare ad bibendum usque ad ebrietatem. Quia hæc omnia opera sine peccato fieri non possunt. Neque refert, tametsi huiusmodi homines per se ipsos ad peccandum parati sint: nam licet tunc minus graviter contra charitatis legem delinquas: tamen à peccato (eoque mortali, si ad mortale inducas: veniali autem, si ad veniale) immunis es, quia licet causa non sis interni mali propositi, quod est peccati principium; causa tamen es peccati secundum executionem, vel continuationem: sicuti notavit Maior. in 4. d. 15. q. 4. prope finem, Caiet. 2. 2. q. 78. a. 4. Nau. c. 21. n. 26. Mol. t. 2. to. 2. d. 335. Sanc. l. 1. mo. c. 6. n. 14.

**Assertio II.** Ad peccatum concurrere seu cooperari materialiter tantum exhibendo obiectum, vel ministrando materiam ac facultatem peccandi, non semper malum, ac prohibitum: sed interdum licitum est, si tres conditiones adsint: I. Ut cooperatio secundum se mortaliter bona, vel saltem indifferens sit. II. Ut bona intentione, siue ex motu alicuius virtutis fiat: & nequaquam intentione movendi alterum ad peccatum. Quare rectè à quibusdam dicitur: nefas esse cooperari alterius peccato formaliter, ut peccatum est: fas tamen esse interdum materialiter cooperari operi, quod peccatum est. III. Ut proximi peccatum impedire nequeas, vel saltem impedire non debeas; sed ob aliquam causam permittere possis. Vide de hac assertione Maiorem in 4. d. 15. q. 35. Adrian. quodlib. 3. a. 2. Caiet. 2. 2. q. 147. a. 4. Nau. cap. 21. num. 24. Azor. t. 2. lib. 12. c. 18. q. 4. & 8.

Nunc probatur & declaratur exemplis: Imprimis, licet Deus Opt. Max. ad opus peccati nec physice, nec moraliter quemvis inducat: *Deus enim intentator malorum est* ait Apost. Iacob. cap. 1. Nam alioquin auctor peccati existeret, quod dicere nefas est: Nihilominus, secundum generalem & quodammodo debitam dispositionis ac providentiæ suæ legem, in genere causæ efficientis concurrat, non præveniando, sed concomitando, ad omne opus materiale peccati, quod ab homine exercetur: cum sit prima causa influens in omnem effectum causæ secundæ: quare S. Th. lib. 2. sentent. d. 37. q. 2. a. 1. & 2. Nau. in ma. prælud. 7. n. 14. Sic etiam coniunx coniugi voto castitatis obstricto coniugij debitum ex iustitia reddere cogitur, si eum exigentem à proposito auocare non possit. Attamen peccavit mulier, si sciens viri votum castitatis cum eo contraxit: quia talis desponsatio, ad quam mulier actiue concurrat promissionem acceptando, Deo iniuriosæ est, iuxta c. nos novimus, 17. q. 2. vbi ad notat Gl. ver. sciēs, Nau. c. 22. man. n. 73. Sanch. lib. 7. de matrim. disp. 11. n. 11. Et Parochus Eucharistiæ sacramentum ministrare debet peccatori, etiam excommunicato, vel hæretico occulto, si publicè petat. Imò Confessarius etiam priuatim petenti sacram communionem præbere debet, si eius indispositionem ex sola sacramentali confessione cognitam habet, sicuti dicam lib. 5. tract. 4. c. 6. n. 6.

Deinde in casu, quo matrimonium Catholici cum hæ-

retico, vel ob consuetudinem loci, vel ob summi Pontificis consensum ac dispensationem, ob rationabilem causam concessum est, sponso Catholicus licet ministrabit sacramentum Matrimonij sponso hæretico, etiam notorio. Licet enim minister publicus seu Sacerdos, cui ex ordinatione & officio suo incumbit sancta custodire, & non projicere canibus, sacramenta publicè ac notoriè indignis ministrare non debeat: alia tamen ratio esse videtur de priuato ministrante in sacramento Matrimonij: præsertim cum vtatur iure naturali contractus celebrandi, cui sacramenti ratio accessoriè coniuncta est.

Præterea in ciuitatibus, quibus id permissum est maioris mali vitandi causa, fas est meretricibus domos locare ad habitandum: interim permitendo, ut opus meretricium exercent: quam verò periculosa sit eiusmodi permissio, ideò que dissuadenda, videri potest apud Nau. c. 17. n. 195. Mol. to. 2. disp. 500. Fas item est amicum, qui violandi ieiunij causa ad cauponam diuertere cogitur, domum tecum abducere, & cœnam ministrare hospitalitatis causa, sicuti probabiliter docent Caiet. 2. 2. q. 147. a. 4. Nau. c. 21. n. 24. Angles de ieiunio q. 7. diffic. 4. quamvis cōtrarium sentiat Vasq. de scandalo a. 1. dub. 3. Fas etiam est in ciuitate, quæ Catholici cum hæreticis permixti viuunt, die interdicto carnes in caupona apponere postulanti: Fas est Iudæorum Synagogas, hæreticorum templa, permittente legitimo magistratu, restaurare, aut ædificare: de quibus videri potest Nauar. lib. 5. consil. 1. de Iudæi, edit. 2.

Hæc omnia tunc maximè locum habent, si tametsi tu materiam seu facultatem peccandi non ministras, nihilominus tamen peccatum committeretur; quia alij non deerunt, qui ministraturi sunt, videlicet ædes locaturi, cibos, carnes vel pocula præbituri, murarij hæreticorum templa ædificaturi: Si autem materiam seu facultatem te non ministrante, peccatum non committeretur, sed impediretur; tunc grauior & vrgentior causa siue necessitas requiritur, ob quam peccatum impedire non tenearis, sed permittere possis.

Maior item causa & vrgentior necessitas requiritur, si peccatum, ad quod materialiter cooperaris, aduersus iustitiam siue perniciosum sit: quamvis etiam tunc cooperari liceat, si grauissima necessitas cogat, v. g. furi scalam applicare, ensẽ homini irato vel furioso præbere, si alioquin te occisurus sit, iniustum bellum gesturo pecunias mutuo dare, si sine maiore periculo tuo negare non possis. Et similis ratio est in causa Fidei, seu Religionis, Puta, si Catholicus oppidum, vel pagum vendat homini hæretico, à quo subditi peruerterentur, & ad hæresim transire cogentur. Talis enim venditio, siue alienatio à peccato scandali excusari non poterit, nisi grauissima necessitas vrgeat: cum maior habenda sit ratio spiritualis salutis proximorum, præsertim eorum, qui in alicuius subiectione & obedientia hætenus perstiterunt: quam temporalium commoditatum.

Denique tantò grauior causa, cæteris paribus, requiritur, quantò cooperatio materialis ad peccatum magis per se, siue propinquior est: minor autem causa requiritur, si cooperatio sit tantum per accidens, siue remota: v. g. fundere cāpanā, aut characteres æneos, facili cuius concessum est, et si his aliqui abufuri sint ad hæresim propagandā: longè autè grauior causa atq; necessitas requiritur, ut liceat alicui pulsare campanam, quæ hæreticorum concio congregetur: vel ordinare characteres ad hæreticorum librorum impressionem: quia tale opus valde propinquè, ac per se ad hæresim ordinatur. In necessitate tamen admodum graui, si etiam alia scandala & Catholice Religionis contemptus absint, tale quippiam ab breue tempus præstari posset: v. g. si filius typographi hæretici ad Fidem Catholicam conuertantur, qui tunc grauissimo suo detrimento patrem tam citò deserere non possit. Si quidem hæreticū scriptum typis ordinare, sicuti & transcribere,



scribere, per se malum non est, si malo fine non fiat, neque lex Ecclesiastica id prohibens in tam graui necessitate obligat.

Simili ratione si *Ædituus*, qui hactenus in Ecclesia ab hæreticis occupata seruiuit, ad Fidem Catholicam conuertatur, sed graui necessitate pressus seruitio suo statim abscedere non possit: puto cogendum non esse, sed absolendum, si promittat, quod seruitium suum deferet, cum primum rerum statu immutato, potuerit: modo absit scandalum, atque falsæ religionis virtualis professio: si nimirum vel ex aperta *Æditui* coram populo protestatione, vel alijs rationibus manifestum sit, quod ab illo ministeria pulandi, ecclesiam aperiendi, claudendi, panem & vinum afferendi, &c. solum fiant materialiter, & ut actus secundum se indifferentes sunt: & nequaquam fiant, quatenus ordinantur ad exercitia hæretica: quippe quæ hominem illum detestari, palam constat.

Uterius ex supra dictis resolues primò: Quod Christianis captiuis concessum esse videtur in Turcarum, vel hæreticorum triremibus contra Catholicos remigare, vel propugnacula ædificare: item sarcinas, machinas, & arma ad bellum necessaria afferre. Nam ex vna parte magna necessitas & metus verberum ac mortis ipsos cogit: ex altera verò parte licet peccatum, ad quod materialiter cooperantur, valde perniciosum sit, tamen & cooperatio illorum non admodum propinqua est: & sine illa dānum ac iniuria nihilominus inferretur: quia illis detrectatibus, alij non deessent, qui hunc laborem obirent. At verò si eo loco constituta res esset, ut captiui auxilium denegantes, magno periculo Christianos eriperent, vel victoriam ipsis conferrent; tunc fateor, lege charitatis eos obligari ad bonum Reipublicæ Christianæ anteponendū propriæ vitæ. Ita probabiliter docent P. Nau. lib. 3. c. 4. n. 62. Less. li. 2. c. 9. n. 122. Lopez p. 1. instruct. c. 60. Mol. to. 1. tr. 2. disp. 155. conclus. 3. Vasq. de scandalo, a. 8. d. 7. Sanch. lib. 1. moral. c. 7. n. 18. contra Nau. c. ita quorundam, notab. 11. n. 10. de Iudeis, & in man. c. 27. n. 63. in fine, Tol. lib. 1. c. 24. in fine.

Secundò resolues: Incolas prouinciæ, quam Tyrannus expulso legitimo Principe iniuste occupauit, posse inter iniquos possessores manere, eosque, cogente imperio, fossione, excubijs, & contributione aliqua iuuare: non quidem intentione bellandi contra legitimum Magistratum: sed quatenus opera illa secundum se indifferentia sunt, quæ si ab incolis recusentur, maiora pericula & incommoda imminet: ut videlicet bonis suis omnibus spoliati, prouincia eiiciantur, & alij ad nocendum promptiores substituuntur: quamobrem existimandum etiam est, legitimum Principem consentire, ut eiusmodi obsequia à subditis interim exhibeantur: vel etiam iuramento promittantur, quatenus ita opus est, & ipsi etiam vtile ad grauiora mala cauenda. Quæ autem in maius legitimi Principis & Reipub. damnum, aut Catholicæ Religionis oppressionem cessura sunt, ea subditi à Tyranno adacti præstare non possunt: multò minùs se iuramento obligare: quæ de re Ioan. Molanus lib. de fide & iuramento, qui est vltimus opusculorum.

Tertiò resolues; Fas esse Patrifamilias, famulo, vel filio, quem de furtis suspectum habet, pecuniam apponere, ut eum deprehensum efficaciter emendet, vel grauiori malo occurrat, sicuti docet Pet. Nau. lib. 3. restit. c. 4. n. 127. licet contrarium sentiant Sa ver. peccatum, n. Sanch. lib. 10. disp. 12. n. 53. Probatur autem ex eo, quia id non est formaliter cooperari ad peccatum; sed materiā & occasionem peccati ministrando, illud permittere: non quod permittens intendat malum peccati fieri: sed potius graue aliquod malum impedire: quæ ratione Deus plurima peccata permittit, etiam materiā eorum supeditando: quo maiora inde bona resultent. Quamuis rectè aduertit Pet. Nau. id homini ordinariè concessum non esse: cum ipse non sit dominus rerum absolutus & vniuersalis.

Quartò resolues; Fas non esse Patrifamilias die ieiunij cœnam familiæ ministrare, si constet, vel valde credibile sit, eos lege ieiunij obligari, sicuti notauit Gabr. in 4. d. 16. q. 3. a. 3. dub. 6. Maior in 4. d. 15. q. 4. §. dubitatur. Nau. c. 27. n. 26. Nam & cooperatio hæc satis propinqua est: & sine ea, ut ponimus, peccatum probabiliter intermitteretur. Ob eandemque rationem licitum non est famulo, aut cauponi in ciuitate Catholica carnes die interdicto coquere hæretico postulanti: nisi grauis necessitas minarum v. g. urgeat, & absit scandalum, atque periculum alterius maioris mali.

Quintò resolues: Fas non esse Pharmacopola venenum vendere quibusuis postulantibus: sed ijs tantum, quos verosimile est ad alium humanum vsum, v. g. medicinæ aut colorum confectionem vsuros esse. Sin verò tale venenum sit, quod alijs vsibus quàm hominis occisioni deservire non potest, eius venditio interdicta est, 1. quod sæpe, §. veneni, ff. de contrah. empt. & ita docent Ioan. Maior in 4. d. 15. q. 15. §. contra ista, Mol. to. 2. disp. 340. in fine, Sanchez cit. cap. 7. num. 17. lib. 1. moral.

Sextò resolues; Fas esse famulo scæminam, cum qua herus peccaturus est, per ianuam intrmittere, facem præferre, lectum sternere, sicuti docent Sanch. cit. c. 7. n. 14. Nau. Rodriq. Azor ll. mox citandis. Quia huiusmodi materialis cooperatio satis remota est, & sine ea peccatū nihilominus committeretur. At verò ut meretricem, quauis per se paratam, vel etiam conductam, famulus è domo eius euocet, & per plateas ad herum deducat: vel literas ad turpia concitantes ab hero ad mulierem deferat, permittendum non videtur: cum hæc vix fieri posse videantur sine aliqua inductione mulieris ad peccatum: ideòque speciem quandam lenocinij contineant, sicuti rectè docet Angles in tract. de ieiunio, q. 7. in fine, contra Nau. lib. 5. consil. 5. de pœnit. edit. 2. qui huiusmodi etiam famulorum obsequia, si ob iussum heri absque prauo affectu fiant à mortali peccato excusari posse, ait: eumque ex parte secutus est Rodriq. t. 1. sum. c. 205. concl. 3. Azor t. 2. lib. 12. c. vlt. q. 8.

Porrò circa scandalum datum (de quo hactenus egi) prima quæstio est: Vtrum qui alterum iussu, consilio, malòve exemplo ad peccandum mouet, licet ruinam eius directè non intendat, peccet tamen speciali peccato scandalii, aduersus charitatem, ac misericordiam: Ita affirmant Ioan. Maior in 4. d. 38. q. vlt. §. Tertiò principaliter Nauar. in man. cap. 6. n. 19. & in c. consideret, §. animaduertere, d. 5. de pœnit. Syl. ver. scandalum, q. 3. S. Anton. p. 2. tit. 7. c. 4. §. 4. P. Sotus lect. 9. de confes. prope finem, Valent. tom. 3. disp. 3. q. 18. p. 2. Suar. de Charitate, disp. 10. f. 2. Nam etiam in alijs omnibus peccatis, quæ ex damno proximi malitiam accipiunt, voluntarium indirectum, siue implicitum ac virtuale æquiparatur explicito seu directo. Præterea, si quis sine necessitate exerceat actionem secundum se non malam, sed ideo tantum quia alter exinde scandalum accipiet: talis, licet non habeat intentionem pertrahendi ad peccatum, tamen peccat, non à iō peccato nisi scandalii dati.

Contrariam tamen sententiam docere videtur S. Th. q. 34. a. 3. Palud. in 4. d. 38. q. 6. a. 2. concl. 2. Duran. q. 3. a. 3. Vasq. t. 2. disp. 102. c. 4. Azor lib. 4. c. 7. q. 1. Sanch. lib. 1. c. 6. n. 3. Becan. 1. 2. c. 27. q. 2. existimantes, eum, qui suo exemplo, aut consilio alterum ad peccandum commouet, non ea directâ intentione, ut in spirituales ruinam præcipitet, sed alio fine: non committere peccatum speciale scandalii, sed delinquere eo genere peccati, in quod alter labitur: quare aiunt, si quis coram alijs furâdo, illum quoque exemplo suo ad furandum pertrahat, duplici peccato furti obstringere: vno proprio, & altero alieno. Secundum quam sententiam peccatum speciale scandalii rarissimè committitur: quia hæc affectio alterum in spirituales ruinam præcipitandi Damonum propria est, & rarò in hominibus expresse ac formaliter



repetitur, sicuti notauit Valentia cit. part. 2. §. accedit quarto.

Tametsi verò prior sententia probabilior videatur, tamen quod ad praxin attinet, vix quicquam inter utrâque interest, si hæc obseruentur, quæ ab omnibus ferme probantur: I. In sacra Confessione necessariò exprimenda est species peccati mortalis, ad quod exemplo, suasionem, aut iussu alterum induxeras: insuper etiam exprimendus numerus personarum, quas ad tale peccatum traxisti, vel probabiliter trahere potuisti, sicut ex communi docet Nau. cit. n. 19. Azor t. 2. lib. 12. c. 16. q. 2. & 4. Sanch. cit. c. 6. & seqq.

II. Non semper peccatum scandali committitur, si quis coram alijs peccet: sed tunc solum, quando probabile periculum est alterum quoque ad peccandum commouendi; sæpe autem euenire solet, peccantem coram alijs tam prauis moribus & mala fama laborare vel aspicientes tam prudentes & in virtute constantes esse, vt nemo eorum prauo peccantis exemplo moueatur. Itè fieri solet, vt præsentibus per se ipsos maximè ad peccandum parati & instructi sint: ideòque exemplum alterius ad aliorum peccatum nihil conferat, sicuti Nauar. notauit in cit. c. consideret, §. animaduertere, n. 9. d. 5. de pœnit. Sanch. n. 7. Denique interdum circumstantia scandali, inductionis ad peccatum ideo in Confessione explicanda non est, quia eam Confessarius facillè intelligit: vt si aliquis confiteatur se cum fœmina fornicatum esse: quamquam, si eam non paratam precibus vel suasionem induxerat, talis circumstantia aperienda: quia est notabiliter augens essentialem malitiam scandali siue inductionis in peccatum: cum aliquis non tantum causa existit alieni peccati secundum executionem, sed etiam secundum internum propositum, sicuti supra dixi n. 3. & videri potest Azor t. 2. lib. 12. c. 16. q. 5. Sanchez cit. c. 6. num. 14.

III. Qui alterum exemplo suo induxit ad furandum, aliudve damnum iniustum inferendum, non obligatur ad eius compensationem: sicuti nec irregularitatem incurrit, qui exemplo suo alterum pertrahit ad rixam, & inde consequentem hominis cædem. Secus verò dicendum, si iussio aut suasio efficax antecessit: item si quispiam materialiter tantum, præsertim propinquè, ad iniustum damnum cooperatus fuit, v. g. ense, pecunias suppeditando nisi grauis ac iusta necessitas excuset: qua de re videri potest Less. lib. 2. c. 13. dub. 3. num. 31. Ratio dati discriminis est, quod qui suo exemplo alterum pertrahit ad peccatum furti, homicidij, &c. solum peccat propriè contra Charitatem: Qui verò iubet, suadet, vel materialiter cooperatur alteri ad furandum, alioquin non furaturo, is non solum contra Charitatem peccat peccato scandali aduersus eum, cui iubet, suadet, cooperatur, vt i supra ex probabiliori dixi: sed etiam contra Iustitiam aduersus eum, cui furto damnum inferitur. Atque ita docet Valent. disp. 5. q. 21. p. 4. col. penult. Sanch. c. 7. n. 19. Vasq. de scandalo. super a. 8. dub. 6.

Simile quiddam est, si quis, dum hominem occultè occidit, suspicetur fore, vt alteri innocenti mors planè per accidens imputetur; comparatione eius videtur tantum peccare contra Charitatem, occasionem illam & quasi materiam iniustæ vexationis præbendo: Sin verò homicidium illud vel ex intentione operantis, vel saltem ex natura & conditione operis, (si v. g. ense alterius vsus fuit) per se eò ordinaretur ac tenderet, vt alteri imputandum esset: tunc malefactor etiam comparatione huius innocentis peccaret contra Iustitiam, ideòque omnia damna ei prouenientia resarcire deberet. de quo videri potest Mol. tract. 3. disp. 86.

7 Altera questio celebris est circa scandalum propriè actiui: Vtrum habenti certum propositum committendi peccati grauioris, si aliter à proposito aduci non possit, quam suggerendo ac suadendo illi peccatum aliquod minus, suadere id licitum sit? Affirmant Abb. in c. super

eo, num. 4. de vsuris, Adrianus quodlib. 1. a. 3. & quodlib. 9. a. 3. Nau. c. 14. n. 40. & c. 17. n. 26; Sotus lib. 6. de iust. q. 1. a. 5. Bartol. Medina 1. 2. q. 76. a. 4. in fine, Rodriq. t. 1. sum c. 12. concl. 9. Mol. tom. 2. disp. 35. Sanch. lib. 7. de matrim. disp. 11. n. 15. Becanus c. 27. q. 4. Vasq. opusc. de scandalo super q. 4. a. 1. dub. 1. Fundamentum huius sententiæ est, quia suafor absolute non suadet malam siue peccatum: sed sub conditione: Si omnino peccare decreuisti, suadeo tibi, vt, derelicto peccato maiore, v. g. vxoricidio, aliud minus peccatum committas, videlicet aliã vxorem superinducas. Ergo absolute suadetur quod bonum est: siquidem ex duobus malis, si alterum eligendū sit, bonum est eligere minus. Confirmatur primò auctoritate S. Augustini lib. 2. de adult. coniugi, c. 15. & refertur in c. si quod verius, 33. q. 2. *Si facturus est quod non licet iam faciat adulterium, & non faciat homicidium: vt viuente vxore alteram ducat, & non humanum sanguinem (vxoris) fundat.* Confirmatur secundò ex eo, quod omnes DD. fassentur, licitum esse à Tyranno petere iustitiæ administrationem: quia licet is peccet sententiam dicendo, cum legitimæ iurisdictione careat: præstat tamen, siue minus hoc malum est, quàm si tyrannidem deferere nolens, interim iustitiam iacere & innocentes opprimi sinat, sicuti docent Caiet. Armilla, Sa ver. Tyrannus, Nauar. c. 14. num. 41 Less. lib. 2. c. 29. dub. 9.

Contrariam verò sententiam tenent Caiet. 2. 2. q. 78. a. 4. notab. 3. Gabr. in 4. d. 15. q. 11. a. 3. dub. 14. Azor supra cit. c. 16. q. 8. Couar. in 4. decret. p. 1. c. 4. in princ. num. ult. Valent. t. 3. disp. 5. q. 21. p. 4. Sa ver. peccatum, n. 8. Ratio est; Quia inducere aliquem ad peccatum iussu vel suasionem per se malum & nunquam licitum est, sicuti dixi in 1. assert. Si autem alicui habenti determinatum propositum faciendi maius peccatum, v. g. vxoricidium, vt ab eo aduertatur, suades facere minus peccatum, puta adulterium, inducis hominem, quantum in te est, in peccatū, ideòque auctor huius peccati existis. Ex quo patet responsio ad fundamentum prioris sententiæ: Negari enim debet si homo commissurus sit maius peccatum, bonum ipsi esse committere minus: nam minus peccatum etiam peccatum & malum quoddam est: consequenter illicitum illud suadere, vel eius auctorem existere. Quod verò additur, Ex duobus malis, quod minus est, eligendum esse, id locum non habet in peccatis, quæ voluntariè ac liberè acceptantur: sed in ijs tantum malis, quorum vnum sustinendi necessitas incumbit.

Ad auctoritatem S. August. rectè respondet Gl. ver. adulterium: Non fuisse id consilium S. Augustini, sed comparatiuam permissionem: si alterutrum peccatum committendum sit, potius se permissurum adulterium: quamuis neutrum suadeat: quam obrem statim subiungit: *Quod si est vitiumque nefarium (videl. vxorem occidere, & ea viuente alteram ducere) non debet alterum pro alio perpe-trare: sed utrumque vitare.*

Eadem ratione explicari possunt verba Loth, quæ c. 19. Gen. locutus est ad Sodomitas, vt eos à grauissimo scelere auerteret: *Habeo duas filias, quæ necdum cognouerunt virum, educam eas ad vos, & abutimini eis: dummodo viris istis nihil mali faciatis:* fuisse hoc non consilium, aut seriam inductionem ad peccandum: sed comparatiuam permissionem: *potius filias meas vobis prostituere:* quàm vt id fieri videam: quo sensu etiam dicere solemus: *potius me occide, quàm vt agas quod meditaris.* Ita hunc locum explicant Caiet. Delrius, & Sa in cit. c. 19. Valent. l. supra cit. Sanch. cit. disp. 11. n. 28. Mol. cit. disp. 335. Quamuis S. August. Abulensis & Lyranus existimarint peccasse in ea re Loth: sed minus grauitè, ob animi perturbationem.

Ad alteram confirmationem respondeo; Interim dum Tyrannus tyrannidem deferere recusat, Communitatem velle & consentire, vt iustitiam ab eo contra malefactorum administraretur: consequenter rectè illum agere, qui iustæ populi voluntati se conformans, iustitiæ executionem à



stantias breui mutandas, intelligas ex aspectu tui inimicum graue scandalum ex ignorantia vel infirmitate passurum esse.

Simili exemplum affert Angelus ver. ornatu, num. 10. Excessum in ornatu muliebri, si probabiliter credatur, aliquos ad libidinem prouocatum iri, non excusari à mortali. Verum huic sententiæ alij Doctores repugnant: Pro cuius intellectu notandum; Ornatum corporis secundum se rem indifferentem esse, ideoque ex fine aliisque circumstantiis bonis cohonestari posse: puta quia conditio status talem vestium ornatum postulat, secundum patriæ consuetudinem. Deinde mulieres coniugata ornare se possunt, etiam ad pulchritudinem conciliandam, ut placeant viris suis, sicuti testatur S. Th. 2. 2. q. 169. a. 2. ad 4. Atque similiter innuptæ, sed nubiles, ut commodius matrimonium consequantur. Quapropter S. augustinus. Ep. 73. ad Possidium ait: *Nolo de ornamentis auri vel vestis prapropiam habere subibendo sententiam: nisi in eos, qui nec coniugati, nec coniugari cupientes, cogitare debent quomodo placeant Deo.*

II. Excessus verò in corporis ornatu, considerata qualitate personæ, loci, & c. ad insolentiam & luxum pertinet: quod tamen, per se loquendo, veniale tantum peccatum est, sicuti & excessus in apparatu conuiuiorum, ædificiorum, & similibus, ut docent S. Th. cit. a. 2. in corp. S. Anton. p. 2. tit. 4. c. 5. §. 7. & 8. Caiet. 2. 2. q. 169. a. 1. Nau. c. 23. man. num. 18. & sumitur ex generali regula, quam tradit Less. lib. 4. c. 4. n. 110. *Quando aliquid non est per se malum, sed indifferens, excessus in appetitu, vel usu illius (seposita omni malitia extrinseca) non est nisi peccatum veniale.*

Extrinscus autem finis, aliæve circumstantiæ prauæ, ex quibus corporis ornatus malitiam accipere potest, variæ sunt: I. Ex cupiditate vanæ gloriæ, si aliqua persona se ornet, solum ut formosa alijs appareat.

II. Si ex ea re corporis delicias sectetur, nam cultus corporis ad utrumque deferuire potest; videlicet ut ornamentum ad vanam gloriam, & ut fomentum ad delicias. Vtraque tamen deordinatio venialis tantum est, sicuti ex dictis colligitur.

III. Negari non potest, quin corporis cultus luxuriæ etiam incitamentum esse soleat: quare dissuaderi debet, præsertim adolescentibus, qui ea re emolliuntur & effeminantur; à bonis artibus ac virtutibus retrahuntur, ut non raro exinde periculum mortalis peccati imminet.

IV. Circumstantia est damnum extrinsecum, si aliquis superfluos sumptus in vestes, & c. se, & suos honestè alere non possit, quod charitati repugnat, sicuti præter alios annotauit Nau. l. c.

V. Est circumstantia simulationis ac mendacii, si mu-

lier fucis ac pigmentis utatur: ad pulchritudinem mentiendam: quod esse peccatum tantum veniale (cum non sit mendacium perniciosum) docet S. Th. cit. a. 2. ad 2. & Caiet. ibid. ad 3. dub. Nau. c. 23. n. 20. Nullum autem peccatum est, si alienus fucus, seu ornatus adhibeatur ad dissimulandum corporis defectum, v. g. capillatura ad caluitiem celandam. Deinde rectè monet Less. n. 111. plerumque mulieres à mendacio excusari posse, quæ ascitijs facis, & capillaturis utuntur, ad maiorem pulchritudinem conciliandam: quia non faciunt animo simulandi: cum plerique sciant, non esse colorem patium, aut capillaturam naturalem.

VI. Est circumstantia scandalii: cultus enim muliebris viros ad lasciuiam prouocat, ait. S. Th. cit. a. 2. in corp. ex cap. 7. Prouerbiorum. Verum, si mulieres non intendunt alicuius turpem amorem seu lasciuiam prouocare, scandalum huiusmodi non imputari ipsis ad peccatum mortale, docent DD. communiter, S. Anton. cit. §. 8. Caiet. 2. 2. q. 169. a. 2. & ver. ornatus, Armilla eod. ver. n. 5. Sa n. 1. Azor t. 1. lib. 12. c. vlt. q. 12. Nau. c. 14. n. 37. Sanch. lib. 1. moral. c. 6. n. 17. Less. cit. c. 4. n. 113. Quia est scandalum potius acceptum, quam datum: quando quidem corporis ornatus, sicuti & naturalis eius pulchritudo, per se ac directè non prouocat ad luxuriam. Excipe primò cum Nau. n. 30. Sanchez, Less. ll. cc. Si in speciali & raro casu probabile periculum sit, ne particularis persona spiritualiter ruat, quando mulier ita ornata comparet; tunc ex lege charitatis abstinere cogitur, si sine difficultate possit. Secundò, si ornatus seu habitus corporis sit admodum turpis, & per se ac directè ad libidinem prouocatiuus: puta qui membra verenda non tegat, aut nimis tenuiter tegat, sicuti notauit Nau. c. 23. n. 19. Less. n. 112. Tertio, si quis consuetudinem introducat alicuius vestimenti, cuius occasione probabile sit, multos scandalum passuros esse: v. g. ut pectora nuda, vel non nisi tenuiter tecta aspiciantur. Licet enim Doctores communiter, Caiet. Nauar. Azor, Lessius & alij cit. locis, fœminas ita incedentes in locis, ubi talis consuetudo viget, à peccato mortali excusant: tamen de nouo introducere talem non laudabilem consuetudinem, graue peccatum est, ait Less. cit. n. 112.

Denique verò virum vestimento muliebri uti, aut fœminam virili, per se non est peccatum: sed causa iusta cohonestari potest, v. g. in comœdijs, vel ad sui occultationem: si autem ex leuitate fiat, est peccatum, sed veniale tantum, sicuti indicat S. Th. cit. q. 169. a. 3. ad 3. & docet ibid. Caiet. ad 2. dubium, in fine, Nauar. n. 22. quævis ob circumstantiam mortale fieri possit. Hæc de Theologicis virtutibus, ad gloriam SS. & indiuiduæ Trinitatis. Amen.



1871

Received of the  
Hon. Secy of the Navy  
the sum of \$100.00

for the purchase of  
the sum of \$100.00  
for the purchase of  
the sum of \$100.00

for the purchase of  
the sum of \$100.00  
for the purchase of  
the sum of \$100.00

for the purchase of  
the sum of \$100.00  
for the purchase of  
the sum of \$100.00

1871



THEOLOGIÆ  
MORALIS

LIBER TERTIVS.

DE

IVSTITIA ET IVRE,

CÆTERISQVE

CARDINALIBVS

VIRTVTIBVS.

AUCTORE

PAVLO LAYMANN, SOCIETATIS IESV  
THEOLOGO.



LVTETIÆ PARISIORVM,  
Sumptibus PETRI BILLAINE, viâ Iacobæâ,  
sub signo Bonæ Fidei.

---

M. DCXXVII.



2111A-M

3470-1-1

5





## LIBRI TERTII PARTITIO.

Liber iste quinque sectiones continet. **PRIMA** est de Virtute morali generatim. **SECUNDA** de Prudentia, quæ inter Cardinales virtutes prima est. **TERTIA** de Fortitudine, & oppositis vitijs. **QUARTA** de Temperantia, & vitijs oppositis. **QUINTA** de Iustitia, & iure: quæ pars alijs copiosior, in plures tractatus distinguetur.

### SECTIO PRIMA.

De virtute morali generatim.

#### SUMMARIVM.

1. *Virtus hominis dicitur ea dispositio, qua & ipse bonus, & propria eius operatio bona efficitur.*
2. *Virtutes alia intellectuales sunt, & alie morales.*
3. *Virtus moralis est habitus electivus secundum mediocritatem, quatenus prudens definitur.*
4. *Virtus in medio consistit, vitia autem ad extrema tendunt. Maior est vitiorum, quam virtutum multitudo.*

**V**IRTUS vniuersim significat cuiusque rei vigorem, bonamue dispositionem, quæ subiectum, cui inest, in suo genere bonum, perfectumue; eiusque operationem aliquam excellentem reddit. Ita enim Aristot. 2. Ethic. c. 6. definit:

*Virtus est, qua bonum facit habentem, & opus eius bonum reddit. Sic oculi v. g. virtus est bona videndi acies: Equi virtus est promptitudo currendi, portandi: nam ob ista commendantur; & bonus oculus appellatur, qui videndi acie; bonus equus, qui currendi, portandi facultate pollet.*

2. Igitur humana virtus, siue hominis virtus dicenda est ea dispositio seu habitus, quo homo ipse bonus efficitur, ipsiusque propria operatio bona & excellens redditur. Cum autem homo, quæ homo, id est, secundum rationalem animam, duplici operandi facultate præditus sit: Vna intelligendi, quæ dicitur *mens*, siue *intellectus*; & altera volendi, quæ dicitur *voluntas*, ideo virtutes aliæ mentis sunt, seu intellectuales, perficientes hominem in cognitione veri: videlicet ars, scientia, prudentia, sapientia, & intellectus, de quibus Aristot. lib. 6. Ethic. cap. 3. Aliæ verò virtutes sunt voluntatis, seu morales, perficientes hominem in affectione ad bonum honestum; videlicet Iustitia, Fortitudo, Temperantia: sub quibus aliæ continentur, vel ad illas reuocantur.

Inter virtutes morales, id est, morum siue huma-

narum actionum institutrices; & virtutes illas intellectuales, quæ ad formandos mores non pertinent, hoc discrimen tradit S. Th. 1. 2. q. 56. a. 3. & 2. 2. q. 47. a. 4. quòd illa nomen virtutis magis propriè, ac simpliciter merentur, hæ verò secundum quid, & imperfectè. Nam virtus est, quæ hominem bonum facit, & opus eius bonum reddit: A morali autem virtute; prudentia, iustitia, &c. homo simpliciter bonus est, ac dicitur: Idem enim homo bonus, qui & prudens, iustus. Non item à virtute intellectuali homo simpliciter bonus est, ac dicitur; sed cum addito, bonus Rhetor, bonus Philosophus; qui tamen malus homo esse potest. Accedit, quòd, vt S. Th. monuit cit. a. 3. Virtus intellectualis, v. g. ars, præbet quidem bene operandi facultatem, vt Rhetorica bene dicendi; non tamen præstat boni operis usum, id est, non inclinat voluntatem, vt arte utatur, siue secundum artem operetur: cum fieri possit, bonum artificem, v. g. Rhetorem, data opera malè perorare, non secundum regulas artis: tunc verò non reprehenditur vt malus artifex, nec vitium eius arti imputatur, sed potius voluntati. Quamobrem dixit Arist. lib. 6. Eth. c. 5. Eum, qui sua sponte peccat in arte, excusationem mereri; non verò eum, qui contra moralem virtutem, puta imprudenter, iniuste agit. Cuius ratio est: Quia virtus moralis, ipsaque prudentia non solam facultatem bene operandi præstat; sed rectificans rationalem appetitum, eo ipso efficit, vt facultate bene utatur, siue secundum virtutem operetur. Quare homo iniustus v. g. magis etiam culpandus est, si data opera iniuriam interat.

Ea propter idem Aristot. in cit. cap. 5. aliud discrimen inter artem ac prudentiam assignat; quòd artis sit virtus, prudentiæ non sit. Cum enim ars, v. g. Rhetorica non dirigat, neque applicet voluntatem ad usum seu exercitium artis; ideo prudentia ac morali virtute opus est ad hoc, vt Rhetor non tantum sciat ac possit bene dicere; sed etiam velit, quando & vbi oportet. Pru-



4  
dentia autem, & alia virtutes morales, cum non tantum bene operandi facultatem praestent; sed etiam dirigant & moueant voluntatem ad honeste operandum, non indigent alterius virtutis subsidio.

Huc pertinet, quod Doctores aiunt: Virtute neminem abuti posse; sed arte quemuis abuti posse: vt proinde morali virtute homo indigeat, partim vt utatur arte, quando, & vbi oportet; partim ne abutatur. Denique huc spectat illud Arist. in 2. Eth. c. 4. Ad scientias & artes praecipuum requisitum esse, ipsum scire: ad virtutes autem scire parum conducere: sed magis velle agere, quod agendum intelligitur: quam obrem virtutes non tam per doctrinam, sicuti artes & scientiae: quam per assuetudinem acquiruntur: non inquam, vir bonus est, qui bene viuendi regulas scit, aliosque edocere potest, sed qui bene viuere consuevit.

3  
Virtus moralis in voluntate tanquam subiecto posita, definitur ex Aristotele 2. Ethic. cap. 6. *Habitus electivus, in mediocritate consistens, quatenus prudens definitur.* Dicitur *habitus*, id est, primae speciei qualitas acquisita, inclinans potentiam constanter ad operandum. Nam virtus non est naturalis potentia, sicuti visus, intellectus, &c. Quandoquidem has qualitates, quas Philosophi in secunda specie ponunt, prius assequimur, quippe a natura inditas: postea is operamur. Virtutes autem, sicuti & artes, naturam non suscipimus, sed idonei sumus ad suscipiendum: operandi autem assuetudine postea acquirimus, quando saepe citharam pulsantes citharædi efficiuntur: & saepe iusta agentes, iusti: fortia agentes, fortes, ait Arist. 2. Ethic. cap. 4. Quod etiam inde confirmatur: Quia fieri non potest, vt contra potentiam naturalem assuetudo gignatur: neque enim si lapis, cui sua natura competit deorsum ferri, millies assuefaciendi causa sursum iaciatur, euehi vnquam assuescet. Homo autem frequenter operando ea, quae virtutis honestati contraria sunt, veluti iniuste, timide agendo, contrarias vitiosas assuetudines, siue habitus acquirit: Ergo virtutis non est naturalis potentia.

Neque etiam virtus dici potest tertiae speciei qualitas, videlicet mentis affectio, aut motio: cuiusmodi est amor, timor, &c. Non enim ob timorem, aut iram v.g. aliquis simpliciter laudatur, aut vituperatur; cum bene, & male fieri possint: ob virtutem autem, aut vitium quisque per se dignus est laude, aut vituperio. Deinde affectio & actio in motu actuali consistit: virtus autem non est actualis motio; sed permanens dispositio mentis: quandoquidem dormiens & nihil agens, dispositus tamen ad agendum iusta, fortia, iustus, fortis appellatur.

*Electivus*: Quia loquimur de virtutibus in voluntate sitis, quibus homo assuefactus est ea eligere & agere, quae conuenientia indicantur ad morum honestatem: quam veluti propositam suarum actionum metam homo virtute praeditus spectat, testante Arist. 3. Ethic. cap. 7. quod honestas sit finis virtutis. Id verò vt plenius intelligatur, quaedam aduertenda sunt: I. Virtus quaelibet moralis, & ipsa prudentia, veluti principij loco requirit synteresin, vniuersim dictantem ea, quae ad hominis actiuam felicitatem pertinent; videlicet, bonum honestum esse amplectendum, inhonestum verò fugiendum, sicuti dixi lib. 1. tract. 1. cap. 1. Praeterea requirit, vt appetitus rationalis recte affectus sit ad virtutis honestatem, omnibus numeris absolutam; desideret, inquam, & proponat iuste, fortiter, temperate viuere, iuxta doctrinam eiusdem Arist. 6. Eth. cap. 12. & S. Thom. 2. 2. quaest. 47. a. 6.

II. Quemadmodum corporis sanitatem, bonamve dispositionem laedunt & multum, & parum, vt si plus iusto exercearis, comedas, &c. aut si minus iusto: Mediocritas verò in his sanitatem conseruat. Quae autem sit mediocritas corporalis exercitationis, aut ci-

bi, vir sapiens decernere debet. Sed & in artefactis vituperari solet & quod nimium, & quod parum; mediocritas verò commendatur. Ita enim dicere solemus, orationem tanto artificio compositam esse, vt neque addere ei quicquam possis, quod desideretur; neque demere, quod super sit, sicuti notauit Arist. 2. Eth. c. 6. 4  
Simili modo virtus moralis, quae omni arte exactior est, contraria sibi habet; videlicet, quod in affectibus, actionibusque nimium; & quod parum: quae proinde vituperantur. Quare vitia ad extrema tendunt, excessum inquam, & defectum: amat verò & consecretur virtus, quod inter vtrumque extremum, medium est, siue mediocre; ideoque laudati solitum. Exempli causa: Qui facile omnia metuit, vbi & quando non oportet, nihilque aggredi audet, tanquam timidus reprehenditur. Qui autem quauis aggredi audet, etiam vbi, & quando non oportet, neminemque timet, is vt audax culpatur. Inter quos medius est vir fortis, qui confidit ac metuit, quando & vbi oportet. Similiter, qui omni voluptati indulget, nullam excipit, intemperans est: qui autem omnem voluptatem fugit, nullam admittit, agrestis: Temperans autem ab vtroque extremo declinans, medium tenet.

Exinde colligit Arist. in cit. loco; Maiorem vitiorum, quam virtutum esse multitudinem: Qui a medio tanquam scopo aberrare variis modis contingit; recte agere, mediumque attingere, vnicò modo; quare illud quidem facile est, hoc autem difficile. Sicuti etiam in corpore humano plures sunt agitudinum, quam sanitatis species, siue modi: siquidem vno modo harmonia siue mediocritas humorum continetur; multis autem modis inde absceditur. qua similitudine vsus est S. Th. 1. 2. q. 73. a. 2. & 3.

III. Etiam appetitus rationalis recte affectus sit erga honestatem, virtutisque mediocritatem; velit, inquam, ac desideret secundum rectam rationem agere, ac proinde non plus irasci, non plus voluptate affici, non plus minusve dolere, & angere, quam oportet; tamen prudentiae vitute opus est, quae in singulis affectionibus, & operationibus; spectatis omnibus circumstantiis, mediocritatem honestatemque definiat: haec circa, iste usus, haec tristitia mediocris est, nec maior, nec minor, quam oportet, comparatione mei, operantis hoc loco, tempore, &c. Vide S. Thom. 2. 2. q. 47. a. 7. Atque ex his intelliguntur vltima verba definitionis: *In mediocritate consistens, sicut prudens definitur.*

## SECTIO SECVNDA.

### De Prudentia, & vitiis ei oppositis.

#### S V M M A R I V M.

- 1 Quatuor sunt Cardinales virtutes; Prudentia, Fortitudo, Temperantia, Iustitia.
- 2 Prudentia est virtus intellectus; ideoque moralium actionum non electiva, sed directiva.
- 3 Prudentia tres sunt actus: Bene consultare, recte iudicare, & praecipere executionem.
- 4 Prudentia alia est monastica, & alia gubernatrix.
- 5 Iterum; Alia est prudentia perfecta ac simpliciter directa, alia verò imperfecta & secundum quid.
- 6 Est etiam prudentia falsa: cuius species quaedam, astutia: cuiusque executio est dolus, & fraus.
- 7 Species imprudentiae moralis peccati rationem sortiuntur, quatenus efficacem causam, vel saltem periculum praebent male electionis, operationisve.

S Thom. 1. 2. q. 61. art. 2. Magister & alij Doctores in lib. 3. sent. dist. 33. ex S. August. lib. 33. qq. q. 31. & S. Gregorio lib. 2. moral. quatuor praecipuas virtutes morales numerant; Prudentiam, Fortitudinem, Tem-



## DE PROVIDENTIA, ET OPPOSITIS VITIIS.

perantiam, Iustitiam, quæ etiam *Cardinales* dicuntur, quod his, veluti cardinibus, totius humanæ vitæ honesta institutio vertitur, ac vniuersa boni operis structura nititur.

2. Tametsi verò Prudentia non sit moralium actionum elicitiua; cum non in voluntate, sed intellectu consistat. quod & vocabuli etymon ostendit: dicitur enim prudens quasi providens, seu procul videns, quod opus intellectionis est, uti notauit S. Thom. 2.2. q. 47. art. 1. Est tamen moralium actionum directiua: quippe circa quas versatur, ut proximam materiam ac finem, dictans & præscribens, quid in quauis particulari actione honestum & amplectendum; quid verò turpe & aspernandum sit, sicuti prosequitur Arist. 6. Eth. c. 5. & breuiter definit S. Basil. hom. 12. ad populum, quæ est in princip. Prouerb. Salom. *Prudentia vera est eorum, quæ agenda & non agenda sunt, cognitio.*

Corollarium. Licet prudentia essentialiter non sit moralis, sed intellectualis virtus; est tamen dux & regina omnium moralium virtutum, sine qua nulla earum consistere potest. Si quidem voluntas per se ipsam, quod honestum est, seu virtutis medium prosequi non potest, nisi ratio ostendat: hæc autem ratio ostendens prudentia est. Quibus planè consentit S. Bernardus serm. 4.9. super cantica: *Est ergo discretio (seu prudentia) non tam virtus (moralis) quam quedam moderatrix, & auriga virtutum, ordinatrix affectionum; & morum doctrix.* Ob eamque causam prudentia inter virtutes morales non raro numerari solet, uti annotauit S. Thom. 1.2. quæst. 5. a. 3. ad 1.

3. Prudentiæ tres actus veluti integrantes sunt, auctore S. Thom. 2.2. q. 47. a. 8. in corp. Beue consultare, rectè iudicare, & præcipere executionem. Bona consultatio est, quando mens proposito honestatis fine, accuratè examinat secundum omnes circumstantias, quæ actiones ad finem illum, tanquam media, magis, minusve inferuiant. Huic opponitur inconsideratio, præcipitatio: quando mens absque sufficiente negotij totius consideratione, deliberationeque, ad sententiam seu iudicium de agendis festinat. Videri potest S. Anton. p. 2. tit. 5. c. 10.

Rectum iudicium est mentis conclusio, siue sententia de particulari opere honesto agendo, aut turpi fugiendo: sequitur bonam consultationem, & antecedit voluntatis electionem, sicuti constat ex iis quæ dixi lib. 1. tract. 2. c. Huic parti aduersari videtur mentis inconstantia, per quam homo ob passionum impetum, aut leues rationes, à recta mentis sententia semel concepta dimoueri se finit, sicuti docet Lessius lib. 1. cap. 2. dub. 4. n. 19. et si S. Thom. 2.2. q. 53. art. 5. & S. Anton. p. 2. tit. 5. cap. 12. velint, inconstantiam esse defectum vltimi actus prudentiæ, de quo iam dicam.

Præcipere executionem præcipuus prudentiæ actus est, voluntatis exercitium dirigens: per quem actum intellectus à voluntate antea motus, practice iudicat, ac veluti imperat, hinc & nunc executioni mandandum esse, quod in consilio mentis decretum, & à voluntate acceptatum fuerat. Huic actui specialiter aduersatur negligentia: quando id, quod à ratione & voluntatis consensu decretum est, quod ob passionum repugnantiam, operandi tædium, homo exequi intermittit: contra quod est prudentum consilium apud Arist. 6. Eth. c. 9. *Deliberandum diu, sed quod deliberatione conclusum, incunctanter exequendum esse.* Vide Richard. in 3. d. 33. a. 2. q. 6.

4. Prudentia diuiditur primò in monasticam, & gubernatiuam. Monastica est, qua quisque sibi prospicit, quid in actionibus singulis decens ac honestum sit. Gubernatiua subiungitur in Oeconomicam, quæ totius familiæ honestam institutionem tuetur: Civilem, seu Iurispru-

dentiam, quæ bonum commune ciuitatis, seu Reipubl. spectat. Hæc iterum duplex est, auctore Arist. 6. Ethic. cap. 8. Vna veluti architectonica, seu principatum gerens, per quam leges cum auctoritate decernuntur ab iis, qui Reipubl. præfunt. Altera ministerialis, quæ in particularibus negotiis ac litibus publicis, quod rectam & iustum est, ob Reipublicæ commodum definit: estque propria eorum, qui Rempublicam administrant: quare & administrans vocari solet.

Secundò diuiditur prudentia in perfectam ac simpliciter dictam; & imperfectam ac secundum quid, auctore S. Thom. 2.2. q. 47. a. 13. Vera, perfecta, & simpliciter dicta prudentia est, quæ proposito vero fine totius vitæ humanæ deliberat, iudicat, & præcipit, quid ad eum finem accommodatè agendum sit. Prudentia imperfecta ac secundum quid est, quæ, proposito fine speciali, consentaneè ad illum finem deliberat, iudicat, & præcipit: quo modo dicitur prudens medicus, prudens nauta, prudens mercator; qui tamen potest esse malus homo: Qui autem simpliciter prudens, idem & bonus homo est.

Est etiam prudentia falsa seu fucata, eaque duplex secundum S. Thom. 2.2. q. 55. a. 3. Vna, quæ proposito fine falso, siue fucato, v. g. carnis commoditate, conuenientia media ad talem finem inquit, ac decernit. Ab Apostolo ad Rom. 8. appellatur hæc *prudentia carnis*: estque peccatum mortale, si incommunitate carnis principalis & vltimus humanæ vitæ finis statuatur, sicuti Apostolum explicans docet idem S. Thom. cit. q. 55. a. 2. ad 1. Altera est, quæ proposito fine vero, aut apparente, excogitat, & decernit media non propriè instituta ad talem finem, sed fallacia & fucata; diciturque Astutia ad decipiendum accommodata: cuius veluti executio siue actus externus est *dolus*, & *fraus*: quæ differunt, secundum S. Th. a. 5. in corp. *quod dolus pertinet vniuersaliter ad executionem astutiae, siue fiat per verba, siue per facta*: cui consentit definitio Iurecons. in l. 1. §. dolum. ff. de dolo malo, quod dolus malus dicitur omnis *calliditas, fallacia, machinatio ad circumueniendum alterum non iure adhibita.* Quare doli mali species sunt mendacium, & illicitæ æquiuocationes, de quibus dicam lib. 4. tract. 3. cap. 13. *Fraus autem?* inquit S. Th. *proprie pertinet ad executionem astutiae, secundum quod fit per facta.* Porro astutiæ vitium alio nomine cordis duplicitas appellatur: quia vir astutus ad finem consequendum non recto ac simplici tramite, per media ordinata, aggreditur; sed veluti per cuniculos, & ambages, ad alterius circumuentionem, sicuti habetur. Ecclesiast. cap. 2. *Va duplici corde, & labiis scelestis, & manibus malefacientibus, & peccatori terram ingrediens duabus vijs.* Salomon Prouerb. c. 28. *Qui ambulat simpliciter, saluus erit: qui peruersis graditur vijs, semel concider.* Eius rei duæ causæ ex diuina providentia reddi possunt: Primò; Quia Deus veritas est, protector eorum, qui in ipso sperantes, veritatem, fidemque sectantur. Astuti autem ac dolosi homines, cum in cogitationibus suis confidunt, impiè agunt, & à Deo deferuntur. Secundò; Quia iusto Dei iudicio accidit, ut dum astuti ac mendaces homines sibi ipsis prodelle alijsque nocere desiderant, contrarium prorsus eueniat, uti David Psalm. 7. annotauit, *Lacum aperuit, & effodit eum: et incidit in foveam, quam fecit.* Ecclesiast. c. 37. *Est vir astutus multorum eruditor, & anima sue inutilis.* Videri potest Caiet. ver. fraus, & ver. astutia. Less. lib. 1. c. 2. dub. 4. num. 24. ubi notant Astutiam ad alterum decipiendum directam, adeoque dolum, fraudem, mendacium, verbiæquiuocationem nulla iusta necessitate mixtam; esse ex genere suo peccatum veniale; sed ratione nocimenti directè, aut indirectè voliti, si id graue sit, mortale effici.



- 7 Ad extremum notandum est ex S. Thom. 2.2.q.53.a.2. Quomodo Prudentia in se quidem atque essentialiter virtus intellectualis est; causa tamen ac veluti ratio siue forma generalis moralium virtutum: sic & imprudentia, licet in se vitium speciale sit intellectus; est tamen causa influens in omnia vitia moralia: quandoquidem nullum peccatum moris committi potest sine iudicio rationis distante agendum, quod agere non oporteret; vel non agendum, quod agere oporteret. Cui consentit. Sap. Prou. 14. *Errant, qui operantur malum.* Et Prou. 13. *Anima dolose errant in peccatis.* Et Arist. 3. Ethic. c.1. *Omnis prauus ignorat, quæ agere oportet.* Videri etiam potest Caiet. 1.2. q.77.a.2. Vasq. disp. 128.

Corollarium. Species imprudentiæ, quæ sunt secundum defectum, videlicet inconsideratio, præcipitatio, negligentia, &c. licet ex parte intellectus diuersæ sint; tamen in genere moris, & vt in Confessione sacramentali explicari debent, eam solum peccati rationem habent, quod efficacem causam, vel saltem periculum malæ electionis, actionisve præbeant. Quapropter, qui hominē pro fera incautē occidit, non duo peccata committit, quorum vnum sit incautæ circumspeditionis, vel negligentia; alterum verò homicidij; sed vnicum homicidij: propterea quod consideratio, & cautio adhibenda sit ea solum de causa, vt homicidium euitetur. Videri potest Caiet. 2.2.q.53.a.2.ad 3. Vasq. 1.2. disp. 119. c.2. Less. lib.1.c.2. num. 26. Neque illæ species imprudentiæ, quæ secundum excessum sunt, videlicet prudentia carnis, astutia; rationem moralis peccati in Confessione explicandi habent, quatenus præcisè sunt vitia intellectus; sed quatenus efficacem causam, aut saltem periculum præbent prauæ electionis, operisve, cum quo velut forma cum materia, vnum numero peccatum in genere moris constituunt.

### SECTIO TERTIA.

#### De Fortitudine, & oppositis ei vitijs.

##### SUMMARIVM.

- 1 Virtus Fortitudinis consistit in mediocritate circa timores & audacias.
- 2 Martyrium est excellentissimus actus Fortitudinis.
- 3 Ad martyrium requiritur, vt mors alicui inferatur odio Fidei Christianæ, & vt voluntariè acceptetur propter Fidei veritatem tuendam.
- 4 Paruuli, tamen Baptismo sanguinis specialis Dei priuilegio saluantur, sine propria voluntate.
- 5 Qui ob motum honestatis moralis mortem subit, martyr non est: sed requiritur causa pia, quæ per Fidem supernaturalem cognita est.
- 6 Martyrium instar Baptismi fluminis delet omnem culpam & penam; sed non absque imperio & motione Charitatis in hominibus adultis.
- 7 Baptismus sanguinis quadam ratione etiam superat Baptismum fluminis.
- 8 Timiditas Fortitudini opposita, est peccatum duntaxat veniale, per se loquendo; per accidens interdum mortale. Idemque de auaritia & alijs oppositis vitijs dici potest.

**F**ortitudinis ac Temperantiæ virtutibus id commune est, quod ambæ occupantur in moderandis passionibus animi, ne mentem ab honesto auocent, iuxta ea quæ dicam infra tract. 1. de iust. cap. 1. num. 2.

Fortitudo duobus modis accipitur, teste S. Thom. 2.2. quæst. 123. art. 2. Primum, pro animi firmitate & constantia adhzrentis honestati virtutis, non obstantibus quibuslibet cōtrariis: quo modo est generalis conditio

cuiusque virtutis, saltem in gradu perfecto, & heribicō consideratæ. Cuiusmodi virtutem qui vnam habet, reliquas omnes faciliè consequitur: quippe cum connexæ sint in generali firmissimo & constantissimo proposito honestatis sectandæ, seu nihil vnquam in quocunque genere agendi, quod ab honestate deficiat.

Secundò accipitur fortitudo pro speciali virtute moderante animi timorem, ac fiduciam. Quamobrem ab Aristot. 3. Ethic. cap. 6. definitur: *Mediocritas circum timores, et fiducias.* Et cap. 7. Quod vir fortis est, qui honestatis causa nunc quidem cum fiducia pericula aggreditur & tolerat, quando, vbi, sicuti ratio dicitur: nunc verò ingruentia mala timet, aut tolerat, quæ, & quando, & gratia cuius tolerare oportet. Valentia verò tom. 3. disp. 8. quæst. 1. p.1. sic describit: *Fortitudo est virtus moralis, per quam animus erga ea, quæ acerbæ & terribilia sunt, recte se habet, vt nec prauè timendo, nec temere audiendo ab officio desiscat.*

Fortitudinis virtus vel maximè ostenditur occurrentibus malis, seu periculis repentinis, iisque maximis, puta quæ mortem inferunt, maximè in bello, testante Aristot. 3. Ethic. cap. 6. Neque enim uero vir fortis absolutè dici debet, qui omnia alia huius vitæ pericula honestatis causa subire paratus est; non item mortem, quæ est terribilium omnium terribilissimum.

Exinde colligit S. Thom. 2.2.q.124.a.2. Martyrium a excellentissimum Fortitudinis actum esse: nam Martyres propter seruandum bonum veritatis Fidei, ipsam vitam profunderè non perhorrescunt. Quare de his dicitur ab Apost. ad Hebr. 11. *Fortes facti sunt in bello, non innuadendo, sed tolerando.* Et S. Cypr. lib. 2. Epist. 6. *Quibus vos laudibus pradicem, fortissimi Martyres? robur pectoris vestri, & persenerantiam fidei quo preconio vocis exornem? Tolerastis usque ad consummationem gloria diuissimam questionem: nec cessistis suppliciis, sed vobis potius supplicia cesserunt.*

Ad martyrium hæ conditiones requiruntur. Prima. Vt mors alicui inferatur odio Fidei, seu doctrinæ Christianæ. Ex quo sequitur primum: Non esse propriè ac perfectè martyres, qui in vincula coniecti multa patiuntur, nisi etiam mortem perferant, teste S. Thom. cit. quæst. 124. art. 4. Quia non satis re ipsa testantur, se omnia temporalia propter Fidem Christi contemnere, nisi vitam ipsam, quæ maximum bonum est, derelinquant, iuxta illud Iobi cap. 2. *Pellam pro pelle, & cuncta quæ habet homo, dabit pro anima sua, id est, vita corpora- li.*

Sequitur secundò. Quod hæretici martyres esse non possint: si enim occidantur propter fidem quam profitentur, cum ea Christi non sit, sed ipsorum propria: ac proinde non supernaturalis, sed humana & acquisita; sequitur, eos neque occidi, neque occisionem acceptare propter Fidei veritatem. Quare S. Augustinus ait conc. 2. in Psal. 24. *Martyrem non pœna, sed causa facit: pœna enim communis est latroni & Martyri, hæretico & Catholico; sed causa dispar.*

Alteræ conditio. Vt mors voluntariè acceptetur propter Fidei veritatem tuendam. Loquor autem de adultis, qui voluntarium testimonium veritati Christianæ dare possunt. At verò in paruulis, qui odio Fidei occiduntur, reperitur testimonium seu martyrium duntaxat materiale: sicuti indicatur in collecta de SS. Innocentibus: *Deus, cuius præconium Innocentes martyres, non loquendo, sed moriendo confessi sunt.* Et auctor sermonis de stella, & Magis, inter opera S. Cypriani: *Testimonium, quod nondum potest*



rant sermone; perhibebant passionem: & sufficit causa testimonio, licet non eloquio distinguatur. Quare ab Origene homil. 3. in varios locos Euang. primitiæ martyrum appellantur. Et S. Augustinus ait lib. 3. de libero arbitrio: Eos in honorem martyrum receptos; veneratur Ecclesia. Quia speciali privilegio, propter causam Fidei occisio est ipsis instar Baptismi. Videri potest S. Thom. cit. quæst. 124. art. 1. ad 1. Richard. in 4. distinct. 4. art. 2. quæst. 3. Suarez 3. p. t. 3. disput. 29. sect. 1.

Quod verò ad adultos attinet, ex dicta conditione sequitur primò: Si quis dormiens occidatur in odium Fidei Christianæ, cum ante nihil cogitaret, ideòque nec consenserit in mortem, martyrem censendum non esse, sicuti docet S. Thom. cit. art. 1. ad 1. Suarez sect. 2. ver. in hac re. Lessius lib. 3. cap. 1. num. 24. Sin verò aliquis in vincula coniectus, statuit apud se mortem potius oppetere, quam Fidem Christi negare, & postea dormiens occidatur, verus martyr erit: sicuti & Baptismi sacramentum suscipit in somnis, quia antea illud desiderarat, uti dicam lib. 5. tract. 2. cap. 6. num. 2. In infantibus autem, cum propriam voluntatem afferre non possint, eam specialis gratiæ privilegium supplet.

Secundò sequitur: Martyres non esse, qui pro Fide contra hæreticos vel infideles pugnando, occiduntur. Quia non voluntate, sed potius necessitate mortem oppetunt: neque Christi patientis similitudinem gerunt, qui cum pateretur non comminabatur, 1. Pet. 2. & tanquam ovis coram tondente se obmutuit, sicuti Isaias prædixit cap. 53.

5 Tertiò sequitur: Quod causa martyrij debet esse pia, quæ per Fidem supernaturalem innotuit. Nam martyr dicitur, qui excellentissimam, quam potest, confessionem ac testimonium, voluntaria morte sua, præbet veritati Fidei Christianæ, secundum verba Christi Matth. 10. *Omnis qui confitebitur me, &c.* Notat autem S. Thom. cit. quæst. 124. art. 5. in corp. eo ipso, quod aliquis patitur pro opere virtutis, cum ordine ad doctrinam Christi: id est, dum opus bonum deferere recusat, quia consentaneum est Fidei Christianæ; aut opus malum patiare non vult, quia contrarium est Fidei Christianæ; & ob id mortem sustinet, verè martyrem esse, quia testimonium, ac confessionem præbet veritati Fidei. cuius rei exemplum habemus in S. Ioanne Baptista, qui pro adulterij reprehensione mortem sustinuit.

6 Tertia conditio Martyrij à Scholasticis antiquis afferri solet; Vt sit opus Charitatis, siue ex Charitatis imperio procedat. Ita enim docet S. Thom. cit. quæst. 124. art. 2. ad 2. *Martyrium est actus Charitatis, ut imperantis: Fortitudinis autem, ut elicientis.* Et mox: *Quod autem sit meritum martyrij, hoc habet ex Charitate, sicuti & quilibet virtutis actus: & ideo sine Charitate non valet ad æternam salutem, iuxta verba Apost. 1. ad Corinth. 13. Si tradidero corpus meum ita ut ardeam, Charitatem autem non habuero, nihil mihi prodest.* Et 3. part. quæst. 66. art. 12. ad 2. *Effusio sanguinis non habet rationem Baptismi, si sit sine Charitate: ex quo patet, quod Baptismus sanguinis includit Baptismus flaminis, & non è conuerso: unde ex hoc ipso probatur perfectior esse, quam Baptismus flaminis, seu contritionis.* Alexander Aletius part. 4. quæst. 21. memb. 5. a. 1. in respons. *Baptismus sanguinis præsupponit Charitatem: aliter nihil valeret ad salutem.* Et paulò post: *Baptismus sanguinis gratiam gratum facientem non tribuit, sed conseruat.* Eadem verba habet S. Bonauent. in 4. distinct. 4. part. 2. art. 1. quæst. 1. num. 51. & infra num. 54. ait: *Quamvis Baptismus sanguinis non auferat culpam, auferit*

tamen communem possibilitatem ad culpam, quod maioris perfectionis est. Durandus eadem distinct. 4. quæst. 8. ad 3. *Martyrium non tantum habet efficaciam à Charitate patientis, licet illa requiratur secundum Apost. 1. ad Corinth. 13. sed ex causa patiendi, & ex conformitate ad passionem Christi, propter quæ virtus passionis Christi æquè plenè, vel plenius communicatur martyrio, quam in Baptismo.* Palud. eadem distinct. 4. quæst. 3. a. 1. conclus. 1. *Baptismus sanguinis deficit in duobus à vero Baptismo: scilicet in charactere, quem Martyr non habet; quia habet rem sacramenti, sine sacramento. Item deficit in alio, scilicet quia ad istum Baptismus sanguinis non sufficit attritio; sed requiritur contritio: ad illum verò Baptismus fluminis sufficit attritio. Et causa est, quia ille iustificat ex opere operato; iste ex opere operante: & ideo nisi sit contritio, non saluat.* Vide etiam S. Bernard. epist. 77. ad Hugonem de S. Victore, Melchiorem relect. de pœnit. p. 3. Vasq. 3. p. tom. 2. disput. 153. c. 1. ubi testatur, hanc esse communem SS. Patrum, & antiquorum Scholasticorum doctrinam.

Contrariam tamen sententiam multi recentiores defendunt, uti videre licet apud Suarez cit. disput. 29. sect. 2. & 3. Lessius cit. lib. 1. cap. 1. dub. 4. Valent. tom. 3. disput. 8. quæst. 2. part. 2. verb. contrà verò: *Quod actus martyrij, siue mors voluntariè acceptata propter veritatem Fidei supernaturalem, habeat vim ex opere operato delendi omnem culpam, & pœnam; ideòque hominem vi sua iustificandi, ex Christi meritis ac promissione.* Probant primò, auctoritate S. August. lib. 13. de ciuit. cap. 7. *Quicumque etiam non suscepto generationis lauacro, pro Christi confessione moriuntur, tantum eis valet ad remittenda peccata, quantum si abluerentur sacro fonte Baptismatis.* Tertullianus in Apologet. *Quis non pati exoptet, ut totam Dei gratiam redimat, ut omnem veniam ab eo, compensatione sui sanguinis expediat? omnia enim huic operi delicta donantur.* S. Thom. 3. part. quæst. 87. art. 1. ad 2. *Passio pro Christo suscepta obtinet vim Baptismi: & ideo purgat ab omni culpa & veniali, & mortali; nisi actualiter peccato inuenerit inherentem.* Secundò ratione: Quia alioquin Baptismus sanguinis non esset distinctus à Baptismo flaminis, seu dilectionis diuinæ; nisi absque ea vim haberet iustificandi ex opere operato: modò homo dispositus sit per actum supernaturalis Fidei, ac pœnitentiæ, saltem imperfectæ, quæ dicitur attritio. Deinde si martyrium non habet vim delendi peccata, nisi propter inclusam dilectionem Dei, sequitur non omnem semper in martyrio pœnam aboleri: cum neque per actum dilectionis seu contritionis penitus deleatur, nisi perfectissimus sit. Consequens autem est contra persuasionem Ecclesiæ, quæ pro nullo Martyre orat, teste Innocentio III. in cap. cum Marthæ, de celeb. Missar. sed omnes pro beatis habet, absque inquisitione, num fuerint iusti, ac Dei dilectione præditi, necne.

In hac quæstione vnum certum est, & alterum controuersum. Certum est, quod martyrium in sua essentiali ratione non includat dilectionem Dei: cum rectè intelligi possit, aliquem veritatem Christianam vsque ad sanguinis profusionem tueri, alio motiuo, quàm Charitatis diuinæ; v.g. propter spem vitæ æternæ, timorem gehennæ. Interim piè credendum est, nunquam hominem voluntariam mortem pro Christi Fide oppetere, nisi ardentis Charitatis actu præcedente: cum enim ista voluntas moriendi pro Fide reuelata, ex obiecto præstantissimus, & suapte natura difficillimus actus sit, quadam congrua necessitate impetrat à Deo vberiore gratiam, per quam disponatur ad Charitatis operationem, sicuti annotauit Durandus cit. quæst. 8. ad 3.



8. num. 10. *Alioquin Deus, inquit, deficeret in necessariis: cum maior gratia sit necessaria ad difficiliorem actum.* Profecto communis est Doctorum, fideliumque omnium persuasio, morituris omnibus valde convenientem & prope necessarium esse dilectionis actum: cur itaque non existimemus, Deum opitulatione gratiæ suæ, (vti S. Augustinus ait lib. 13. de ciuit. cap. 17.) mentem hominis disponere ad hunc actum, si pro veritate Fidei animam suam positurus sit? Idque etiam historiæ testantur, & multorum experientia comprobauit, eos qui in carcere tantum detenti, vel quippiam passi sunt pro Fidei Catholicæ veritate, ardentissima in Deum charitate flagrasse. Vide in hac re bene discurrentem Caiet. 2.2. q. 124. a. 2.

Controversum autem est; Vtrum martyrium potestatem illam abolendi omnem culpam & pœnam, instar Baptismi fluminis, habeat vi propria, ob speciale priuilegium seu promissionem Christi; an verò propter imperium ac motionem antecedentis Charitatis. In qua controversia placet mihi prior sententia: cum sit generalis persuasio Apostoli & SS. Patrum, quod opera virtutum reliquarum absque Charitatis imperio ad hominis salutem, & gloriam æternam non sufficiant. Atque singulare illud martyrii priuilegium, sine Charitatis actu homines iustificantis, nec ex Scriptura, nec ex Patrum traditione colligitur: ideo asserendum non est, vti bene ostendit Vass. cit. disp. 153. c. 5.

Ex Scriptura sacra habemus verba Christi Matth. 10. *Omnis ergo, qui confitebitur me coram hominibus, confitebor et ego eum coram Patre meo.* Sed hoc intelligitur, si confiteatur, sicuti Christi discipulum decet; propter ipsum, seu amore ipsius, vti verbis mox sequentibus explicatur: *Qui perdiderit animam suam propter me, inueniet eam.* Id enim est mori pro Christo, seu propter Christum, ex affectu dilectionis erga ipsum: nam maiorem hac dilectionem nemo habet, nisi ut animam suam ponat pro amicis suis, Ioan. 15. Maximum igitur dilectionis non tantum argumentum, sed etiam actus est, mori propter Christum.

Quod autem ad Patres attinet, illi tribuerunt martyrio parem Baptismo fluminis, imò etiam præstantiorem vim delendi penitus peccata; sed non sine Charitatis actu, quem semper includere debet, vt ad salutem proficiat. Cum enim S. Cyprianus in epistola ad Iubaianum opinionem suam, quod extra Ecclesiam verum Baptisma non conferatur, eo argumento confirmare vellet, quia etiam extra Ecclesiam Martyrium, seu sanguinis Baptismus non est: *Numquid potest vis Baptismi esse maior, aut potior, quam confessio, quam passio? ut quis coram hominibus Christum confiteatur, & sanguine suo baptizetur?* Ad hanc obiectionem responderet S. August. lib. 4. de Baptismo contra Donatistas, c. 17. *Hoc verissimum est: erga Ecclesiam quippe occisus, Charitatem non habuisse conuincitur, de qua Apostolus dicit? Et si tradidero corpus meum ut ardeam, Charitatem autem non habeam, nihil mihi prodest.* Hoc autem Apostoli testimonium de imperio actualis Charitatis accipiendum esse, dixi lib. præced. tract. 3. c. 1.

Ad rationem posterioris sentent. respondetur: Licet Baptismus sanguinis includat in se Baptismum fluminis, siue dilectionis, vti expressè ait S. Thom. 3. p. quæst. 66. art. 12. ad 2. tamen ab eodem distingui solet, propter peculiare excellentias, quas Baptismus sanguinis siue mors voluntaria pro Christo superaddit; ob quas prærogatiuas non solum Baptismum fluminis secundum se spectatum, sed ipsum etiam Baptismum fluminis quibusdam rationibus superare videtur, vti docent Scholastici locis supra citatis.

Nam primò in Baptismo sanguinis valde copiosa gratia sanctificans infunditur, propter excellentissimam charitatis actum: cum homo plus Dei amore præstare non possit, quam vt vitam ipsam profundat, sicuti docet Durand. cit. q. 8. num. 10. Gratia autem sanctificantis correspondet par essentialis beatitudinis præmium in cælo.

Secundò, Baptismus sanguinis in plerisque quidem effectibus conuenit cum Baptismo fluminis: quia & omnem culpam mortalem delet, propter inclusum actum dilectionis; & omnem venialem, propter virtutalem repugnantiam erga peccata, inclusam in actu excellentissimo, quo homo vitam suam, qua nullum temporale bonum charius esse solet, ob Dei amorem contemnendo, etiam aliarum omnium temporalium rerum inordinatam affectionem excludere censetur; excepto, si actualiter peccato inhærescat. Deinde omnem etiam pœnam peccatis debitam Baptismus sanguinis extinguit. Cum enim certum sit, hominem propter Deum patiendi, satisfacere pro peccatis suis, necessariò consequens est, cum plenissimè satisfacere, omnemque pœnam abolere, si tantum patiat, vt plus non possit, siue si totum corpus, & animam suam pro Dei amore impendat.

Superat verò hic Baptismus, quia non tantum peccata penitus tollit, sed etiam omnem possibilitatem peccati, hominemque actualiter introducit in alteram beatam vitam. Præterea superat, quia continet veram ac realem imitationem, representationemque passionis Dominicæ, ex qua omnis vis nostræ salutis promanat: cum Baptismus fluminis tantum contineat representationem figuralem, vti notat S. Thom. cit. art. 12. in corp. idemque reperies apud Clementem Romanum lib. 5. Constitut. Apostolicarum, cap. 6. Denique Baptismo sanguinis non tantum correspondet præmium essentialiale in cælo, propter actum præstantissimæ Charitatis, quæ est radix omnis meriti; sed etiam accidentalis gloria, quæ Martyrum aureola vocatur, propter actum excellentissimæ Fortitudinis: ita tamen, vt sicuti accidentalis illa gloria in cælo supponit essentialiam, in eaque fundatur; ita etiam meritum gloriæ illius accidentalis supponat meritum principale Charitatis, ab eoque dependeat.

Ex dictis etiam apparet, cur fideles pro beatis habeant eos omnes, qui pro Fidei veritate mortem oppetuerunt, quia hoc opus indicium est maximæ dilectionis Dei, quæ sola in adultis peccata mortifera extra Sacramenta extinguit. Quod si tota Ecclesia aliquem Martyrem vt beatum, seu sanctum colat, tunc etiam Fide certum est, in Dei gratia decessisse: cum Ecclesia propter directionem S. Spiritus errare non possit. Ethæc de Martyrio, tanquam excellentissimo Fortitudinis actu.

Vitium Fortitudini oppositum per excessum timoris dicitur *timidus*: quod per se loquendo, veniale tantum peccatum est, quando per libertatem arbitrij non corrigitur, si corrigi possit. Interdum per accidens fit mortale, si ob timorem sinas te moueri in consensum peccati mortalis, qua de re S. Tho. 2.2. q. 125. a. 3. Caiet. in sum. ver. timor, Viguerius in Instit. Theolog. cap. 6. §. 2. ver. 1. Less. lib. 3. c. 1. n. 61.

Vitium oppositum Fortitudini per defectum timoris dicitur *animi stupidius*, nulla mala seu pericula formidantis, quando, vbi formidare, & cauere oportet: estque peccatum hoc graue aut leue, pro grauitate aut leuitate mali, quod declinare aliquis debet, & consultò negligit, sicuti docet S. Thom. q. 126. Caiet. ver. intimiditas. Vitium verò oppositum Fortitudini per excessum fiducia, dicitur



*audacia*, siue temeritas in aggrediendis periculis, quando, ubi, quomodo non oportet. Denique vitium oppositum Fortitudini per defectum fiducia, dicitur *ignavia* animi nihil audentis, quando, ubi aggredi vel sustinere oporteret. Vide S. Thom. q. 127. art. 1. Caiet. ibid. & in sum. ver. audacia, Viguerius c. 6. §. 2. & 3. Less. n. 66.

## De virtutibus annexis Fortitudini; atque earum oppositis vitiis.

### S V M M A R I V M.

- 9 Virtutes Fortitudini annexae sunt; Animi securitas, Magnanimitas, Magnificentia, Patientia, Constantia. Vide etiam n. 15. & 16.  
10 Magnanimitati secundum excessum opponuntur Presumptio, ambitio & Vana gloria.  
11 Ambitio est inordinatus appetitus honorum.  
12 Inanis gloria est inordinatus appetitus humanae laudis.  
13 Honorem, laudem, &c. desiderare, vel acceptare, ob virtutem, seu honestatis causam, est opus bonum Magnanimitatis: secus, si honor vel laus humana propter se appetatur.  
14 Magnanimitati secundum defectum opposita est pusillanimitas.

9 **A**D Fortitudinis virtutem reuocantur:

I. *Securitas*, quae est tranquillitas animi benedictis: Ei opponitur nimia animi sollicitudo, anxietas. Videri potest S. Th. q. 128. iuncta q. 129. a. 7. Valent. t. 3. disp. 8. q. 3. p. 1.

II. *Magnanimitas*, quae magna & excelsa bona spectat, parua & humilia contemnit: Quare cum in hac vita nihil praclarum sit, praeter virtutem; illius proprium munus est ad virtutum opera, eaque non quaelibet, sed quae eximia, magnaeque honore digna sunt, contendere, sicut docet Aristot. 4. Ethic. c. 3. S. Th. q. 129. art. 1. Enimvero, cum res omnes huius mundi, excepta virtute, fluxae & caducae sint: ideo magnanimus eas facile contemnit; ipsum quoque mundanum honorem, & hominum existimationem, si secundum se praestare spectentur: ut proinde neque prosperis huius mundi euentibus multum extollatur, neque aduersis deiiciatur. Vide Less. libro tertio cap. secundo dub. 2.

10 Magnanimitati secundum excessum opponuntur Presumptio, Ambitio, & Vana gloria. *Presumptio* est, qua homo aggreditur opus arduum, facultatem suam excedens, teste S. Th. 1. 2. q. 130. a. 2. ad 1. S. Anton. p. 2. tit. 3. c. 6. Veluti, si imperitus artis medicae corporibus; imperitus rerum ad conscientiam pertinentium, animis hominum mederi praesumat: si Sacerdos iurisdictione carens a peccatis absoluat: Iudex secularis de Ecclesiasticis causis decernat: si in via virtutis incipiens opera perfectorum meditetur; videlicet ante passionem edomitam assiduae meditationi vacare, alios arguere, cum mulieribus confidenter agere audeat. Est autem praesumptionis peccatum per se veniale; sed saepe mortale efficitur, ratione nocimenti, irreuerentiae, &c. Vide Caiet. in sum. ver. praesumptio, Nauar. c. 23. n. 14. Tol. de peccatis mortalibus c. 22. Less. lib. 3. c. 2. dub. 3. Viguer. cit. cap. sexto §. 4. ver. 2.

11 *Ambitio* est inordinatus appetitus honorum. Tribus ferme modis contingit, uti videre est apud S. Anton. p. 2. tit. 3. c. 5. I. Si appetas honorem, qui tibi non conuenit, vel maiorem, quam conuenit: ut si honorari cupias ob doctrinam, generis nobilitatem, quae carere: si aspiras ad dignitatem, officium, quo indignus es vel si dignioribus praeferrere cupias: aut si ob meras diuitias magnos tibi honores deferri velis. II. Si appetas honorem ex re illicita, puta tyrannide, rebellionem, &c. III.

Si honoris acquirendi, vel consequendi causa non verearis malum admittere: ut si diuinos honores ambias: Si Episcopatum per Simoniam; regnum aut prouinciam bello iniusto compares. Etsi vero ambitionis peccatum per se veniale sit, saepe tamen mortale efficitur vel ratione nocimenti, quod alicui infertur; vel materiae mortaliter illicitae, ex qua honor desideratur; vel denique si honor ut summum bonum seu finis ultimus appetatur. Videri potest S. Th. & Caiet. 2. 2. q. 131. a. 1. & 2. Nau. comment. de finibus humanorum actuum, n. 56. 59. Viguer. cit. cap. sexto §. quarto ver. 3. Less. lo. cit. Tol. c. 25.

*Inanis gloria* est inordinatus appetitus humanae existimationis a laudis. Accidit I. Si de fucata aut simulata virtutis vel doctrinae excellentia laudem vel famam quaeras, quae est hypocrisis. II. Si maiorem de te opinionem aut famam desideres, quam merearis; vel ex rebus malis, puta commisso homicidio, stupro: aut ex indifferentibus, puta diuitiis, corporis viribus, pulchritudine, quae claram famam non merentur. & haec est iactantia. III. Si famam, aut laudem quaeras apud eos, qui iudicare nequeunt: ut si de rebus altissimis coram imperita plebe disputes. Est autem inanis gloria peccatum ex se veniale; per accidens saepe mortale, ut supra de ambitione dictum. Legi possunt S. Th. q. 132. a. 3. Caiet. ver. gloriae inanis appetitus, Nau. c. 23. n. 12. Viguer. c. sexto §. quinto Less. cap. secundo. dub. tertio quoniam. 25. rationem adfert, cur vana gloria a S. Gregor. lib. 31. moral. cap. 31. S. Thom. quaest. 132. art. 4. & 5. inter capitalia vitia numeretur: Quia ea vitia, veluti aliorum radices & propagines esse solent, quae circa obiectum valde appetibile versantur, ut circa gloriam, (sub qua etiam honor & fama comprehenditur) diuitias, voluptates gustas & tactus: quorum causa plerique homines parati sunt multa mala facere & pati: Item ea vitia, quae versantur circa obiectum valde molestum saltem in imaginatione, cuius pellendi causa multa etiam contra honestatem homines facere consueverunt: Ex priore enim radice nascuntur vanae gloriae cupiditas, auaritia, gula, & luxuria; ex posteriore vero inuidia, ira, ac tristitia.

Ceterum honorem, gloriam, laudem, & fauorem hominum, quae meritis sis ex virtutis opere, desiderare, & acceptare, non est peccatum; sed potius magnanimitatis opus: dummodo non propter se, in iis sistendo, sed honestatis causa expetantur aut amentur, quatenus honor, gloria, &c. sunt veluti umbræ siue signa virtutis, & saepe incitamenta, teste S. Thom. 1. 2. quaest. 131. art. 1. ad 3. & quaest. 132. art. 1. ad 3. Caiet. in sum. ver. gloriae appetitus. Interdum etiam vtilia ad alia bona externa, puta dignitatis officia, quibus Deo & Reipublicae seruire possumus, consequenda; vel aliorum salutem spiritualem, & inprimis Dei gloriam promouendam, iuxta verbum Domini Matth. quinto: *Luceat lux vestra coram hominibus, ut videant opera vestra bona, & glorificent Patrem*, &c. Videri potest S. Anton. p. 2. tit. 4. c. 1. prope finem, Nau. ca. inter fratres, concl. §. n. 45. & 57. & comment. de finibus humanarum actionum, num. 55. Syl. ver. vana gloria, Viguerius §. quarto ver. 5.

Non placet autem, quod Less. ait cit. cap. 2. dub. tertio num. 22. Si honor appetatur ex re bona, etsi nullus alius finis spectetur, non esse peccatum: cum obiectum indifferens sit. Nam hoc ipso, quod honor & existimatio hominum obiectum indifferens est, eius appetitio est inordinata, si ad nullum finem honestum referatur, sicuti optimè notauit Nauar. in cit. comment. de finibus, numer. 57. & sumitur ex doctrina



S. Thom. quæst. 132. art. 1. in corp. ubi posito principio, quod appetere quodlibet vanum vitiosum sit, iuxta illud Psal. *Vt quid diligitis vanitatem*, &c. subsumit, inter alios modos, quibus gloria vana est, vnum esse ex parte ipsius, qui gloriam appetit, si non referat ad debitum finem, puta ad honorem Dei, vel proximi salutem. Qua simili etiam ratione appetitus pecuniæ in nullum alium finem formaliter aut virtualiter relatus, malus & inordinatus est, sicuti colligitur ex eodem S. Thom. q. 118. in corp. 2.2.

Eidem magnanimitatis virtuti secundum defectum opponitur *Puillanimitas*, qua sibi quis diffidens, bonum aliquod, tanquam superans propriam facultatem, frustra detrectat: vt si idoneus ad docendum populum, curandas animas, delatum vel imperatum sibi munus, quod vtiliter administrare posset, ob animi deiectionem respuat, sicuti videre est apud S. Thom. q. 133. art. 1. & 2. Huc etiam spectat, si delatum tibi honorem, laudem, quem recta ratio ad conseruationem status, augmentum dignitatis, boni publici causa, necessariam vel vtilem iudicat, ex animi deiectione respuas, sicuti docet Less. cit. dub. 3. n. 28. Viguer. cit. c. 6. §. 4. ver. 8. Et est peccatum veniale: nisi mortale fiat vel ratione nocumenti, vel specialis materiæ, circa cuius neglectum versatur.

14. III. *Magnificencia*, quæ est promptitudo animi ad faciendos magnos sumptus: vbi recta ratio expedire iudicat. Continet in se pecuniæ contemptum, seu vilipensionem, vti videre est apud S. Thom. q. 134. Differt à liberalitate, quod hæc circa sumptus mediocres & ordinarios; illa circa maiores occupatur, auctore Aristot. 2. Eth. c. 6. & 4. Eth. cap. 2.

Magnificentiæ secundum excessum, opponitur *pecuniarum profusio*: si maiores expensas facias, quam ratio dicat. Sicuti mercator ille, inquit Less. c. 2. dub. 4. n. 35. qui hyemis tempore ex cinnamomo ignem in camino excitauit, conuiuius tū calefaciendi, tū exhilarandi gratia. Secundum defectum aduersatur, *paruitas*: cū quis, præ animi angustia, cæpto magno operi, v. g. Cœnobij, Ecclesiæ ædificandæ, fundandæ, non pares seu decentes sumptus exhibet. de qua re S. Thom. q. 135. Vtrumque est peccatum veniale, sicuti prodigalitas & auaritia, quæ cum his similitudinem gerunt: per accidens verò mortalia fiunt vel ratione iniusti nocumenti: vel ratione intentionis, puta si ad eam pecunias desideres, vt earum causa paratus sis legem Dei grauer transgredi. Ita de auaritia docent S. Thom. 2. 2. quæst. 118. art. 4. Syluest. Caiet. ver. auaritia, Tol. de peccatis mort. cap. 25. De profusione ac prodigalitate Nauar. c. 23. man. n. 69. Less. lib. 2. c. 47. dub. 8. n. 61. 62.

15. IV. *Patientia*, quæ in rebus aduersis animi mœrorem temperat, ac mala præsentia æquanimiter tolerat, ne quicquam contra honestatis decorem agatur, vti docet S. Thom. quæst. 136. art. 4. Huic per excessum opponitur *impatientia*: & est peccatum veniale, per accidens quandoque mortale ratione euentus, puta scandali, aut mali quod impatientia victus admittit, vel admittere proponit, sicuti docet Viguer. c. 6. §. 6. ver. 4. Per defectum verò opponitur *durities*: si ob animi stuporem nec propriis, nec alienis malis moueare: & est peccatum ex genere suo veniale, teste Less. cit. c. 2. dub. 5. n. 41.

16. V. *Perseuerantia* & *Constantia*, per quam non obstante temporis diuturnitate, difficultate, molestiis, homo persistit in bono opere, quamdiu recta ratio dicat, vti docet S. Thom. quæst. 137. Illi secundum excessum opponitur *peritancia*, quæ est firmitas animi retinentis proprium sensum, vel agendi propositum, quando, vbi non oportet, vel plus, quam oportet, teste Aristot. 7. Ethic. cap. 9. S. Thom. quæst. 138. a. 2. Est peccatum plerumque veniale: interdum morale, si versetur circa

aliquod perniciosum: v. g. quæ sunt contra Fidem, vel quæ grauer nocent proximo, sicuti notat Caiet. ver. peritancia. Secundum defectum verò opponitur *inconstantia*, quæ leuiter aliquis à bono proposito abstitit: Et est peccatum mortale, si graui obligatione tenearis ad propositum exequendum, v. g. votum circa rem magni momenti: veniale, si obligatio leuis sit. Quod si nullo modo obligatus sis, non esse vllum peccatum, ieiunandi, eleemosynæ dandæ, Religionis ingrediendæ, profitendæ bonum propositum mutare: nisi fiat ex inordinata passione, vel cum propinquo peccandi periculo, docet Less. in fine lib. 3. & significat Caiet. ver. inconstantia. Sed ego malo dicere, semper esse peccatum inconstantia ex genere suo veniale, sine causa à proposito bene cæpto desistere: cū hæc sit inordinatio mentis, quod bene consultatum, iudicatum, & acceptatum est, leuiter & sine vlla rationabili causa derelinquere.

## SECTIO QUARTA.

## De temperantia, &amp; oppositis ei vitiis.

## S V M M A R I V M.

1. Temperantia tres species sunt; Abstinencia, Sobrietas, Castitas.
2. Gula est inordinatus appetitus, vel usus ciborum, causa voluptatibus.
3. Per se loquendo, est peccatum veniale; per accidens quandoque mortale.
4. Ebrietas est excessus in potu, causa voluptatis, donec usus rationis adimatur: si deliberatè fiat, est peccatum mortale.
5. Inebriare se non causa voluptatis: sed valetudinis recuperandæ, si in raro aliquo casu necessarium medium censetur, non videtur esse illicitum.
6. Alterum prouocare, seu inducere ad illustam ebrietatem semper est peccatum, ex genere suo mortale.
7. Virginitas est perfectissima species Castitatis.
8. Quæ animo corrupta, sed carne integra est, virginitatem per penitentiam recuperare potest; atque inter sacras virgines velari. Probabile est, etiam eas consecrari posse, quæ voluntaria pollutione fœdæ sunt.
9. Mulier, quæ oculis, vel per vim violata fuit, à sacro virginitatis velo abstinere debet. Quod si sine sui manifestatione abstinere iam non possit, Episcopus eam consecrare potest, usurpando vocem Virginitatis pro voce Castitatis.
10. Simplex fornicatio, & omnis impudicitia inter personas legitime scdere non conuictas, est ex genere suo peccatum mortale.
11. Oscula, amplexus, tactus inter sponsas de futuro videntur excusari à peccato mortali, si absit periculum pollutionis, & consensus in copulam; neque per se siue ex obiecto turpes sint.
12. Tactus inter coniuges, si fiant solum voluptatis causa, & non in ordine ad copulam coniugalem, culpe non vacant: sed non excedunt venientem, per se loquendo.
13. Impudicus tactus pertinet interdum ad peccatum mollicitis, vel adulterij, & a. pro diuersitate personarum, quæ cum exercentur.
14. Delectatio, quæ capitur ex affectu, facilius à peccato excusatur, quam delectatio ex tactu.
15. Directè & efficaciter in se ipso, vel in alio procurare pollutionem semper est mortale peccatum.
16. Quæ causam pollutioni per accidens præbet, non peccat mortaliter; sed neque venialiter, si actio, ex qua pollutio oriatur putatur, per se honesta sit, & finis eius honestus.
17. Pollutionem committere, vel simpliciter affectu desiderare ob causam v. g. sanitatis, non est peccatum.
18. Pollutionis nomine non comprehenditur distillatio, seu fluxus humoris qui semen non est, quamuis similitudinem humani seminis habeat.
19. Voluntaria pollutio etiam inter coniuges est mortale peccatum.

VIRTVS Temperantiæ versatur in moderandis voluptatibus corporis, iis nempe quibus gustus & tactus afficitur, circa esculenta, poculenta, & Venerea, sicuti ostendit Aristot. 3. Ethic. c. 10. & S. Th. 2. 2. q. 141. a. 4. Atque hinc tres eius species existunt; Absti-



mentia, Sobrietas, Castitas ipsaque Virginitas.

Virtus abstinentiæ est, quæ secundum rationis regulam moderatur appetitum, vsumque ciborum oblectantium. Regula autem ac mensura cibi, potus item, ac somni capiendi, continetur corporis ac vitæ humanæ necessitate ac utilitate, teste eod. Aristot. cap. 11. & S. Hieron. in cap. 44. Ezechiel. super illa verba: *Et dices ad exasperantem: Tunc ista circumcidimus, inquit, cum non ad delicias & ad luxuriam, & ad inertiam: sed ad necessitatem naturæ & corporis istius sustentationem cuncta facimus.* S. August. lib. 10. confess. c. 31. & lib. de moribus Ecclesiæ, c. 19. & c. 21. ubi ait: *Habet vir temperans in huiusmodi rebus mortalibus, et fluentibus vitæ regulam utroque Testamento firmatam: ut eorum nihil diligat, nihil per se appetendum putet; sed ad vitæ huius atque officiorum necessitatem, quantum satis est, usurpet, utentis modestia, non amantis affectu.*

Abstinentiæ peculiariter aduersatur Gula, quæ est, Inordinatus appetitus, vel vsum ciborum, voluptatis causa. Gulæ vitium quinque modis exercetur: Si plus iusto comedas, vel ante tempus, vel voraciter; vel cibos nimis exquisitos; vel nimis exquisitè paratos, sicuti ex S. Gregor. lib. 30. moral. c. 27. docet S. Thom. 2. 2. q. 148. a. 4. Syl. ver. Gula, S. Anton. p. 2. tit. 6. cap. 1. §. 4. Nau. c. 23. n. 119. Valent. t. 3. disp. 9. q. 3. p. 1. Addidi autem voluptatis causa: Si enim ob alium finem plus comedas, quam corporis constitutio, seu valetudinis ratio postulat, intemperans non es: neque peccas, si finis intentus eiusmodi sit, ut ob eum corporis aliquod incommodum meritò subeas: v. g. si ad hospitem, vel ægrotum prouocandum comedendo præeas, licet cibi tunc non indigens.

Porro tamen vitium gulæ inter capitalia numeretur quod aliorum origo esse soleat, sicuti docet S. Thom. q. 148. a. 5. per se tamen & absolutè veniale duntaxat peccatum existit, teste Caiet. ver. gula, Nau. c. 23. n. 119. Fit autem mortale primò; Ratione peruersæ intentionis, si homo adeò inhæreat oblectationibus ciborum, &c. ut ob eas paratus sit legem Dei grauitè transgredi; ideòque in cibo, aut potu vltimum suum finem constituat, iuxta Apost. ad Philip. 3. *Quorum Deus venter est, & tradit Th. cit. q. 148. a. 2. S. Anton. p. 2. tit. 6. c. 1. §. 2. Tolet. de peccatis mort. c. 60.* Secundò fit mortale ratione gratis incommodi, si id homo corpori suo aduertenter afferat, sicuti docet Caiet. ibid. Tol. l. c. Tantum autem cibi capere, ut vomitus sequatur, non audeo peccati mortalis damnare: licet non parua, sed venialis deordinatio sit, per se loquendo.

Vesci autem carnibus humanis, ferinæ, & crimen mortale est, secundum S. Thom. cit. q. 142. art. 4. ad 3. & alios communiter. Ratio esse videtur: Quia ordo naturæ postulat; ut aliquis vescatur alimento secundum substantiam inferiore, ac indigniore; quod proinde, tanquam sui alendi causa conditum decerpere, vel occidere possit: videlicet gramina, fructus, iumenta. Repugnat igitur præstantiæ humanæ naturæ corpore humano uti in alimentum. Deinde si persuasio esset occisorum hominum carnibus vesci licitum esse, perinde ac carnibus brutorum, consequens videri posset; vnum hominem propter alterum conditum esse, ut ipsi sit in alimentum: Et rursus, vnum hominem ab altero perinde ut bestiam occidi posse, alimenti causa.

Sed quæstio est: Vtrum saltem in extrema necessitate famis licitum sit humana carne vesci? Negant Victorius relect. de temper. n. 6. Valent. t. 3. disp. 9. q. 3. p. 1. Azor. t. 1. lib. 7. c. 22. q. 4. quod id iuri naturali repugnet, ideòque intrinsecè ac per se malum sit. Contrarium docet Caiet. 2. 2. q. 148. art. 2. ad 2. Abulensis 4. Regum cap. 6. q. 32. Nauar. 23. n. 122. Tol. c. 60. Less. l. 4. c. 3. dub. 2. Sa ver. comedere, n. 1. Sanchez lib. 1. moral. cap. 18. n. 12. Quæ sententia benignior ac probabilior

est. Quare respondeo ad fundamentum prioris: Quædam absolutè spectata, esse quidem à natura hominis aliena, siue naturali iuri repugnantia, quæ tamen in extrema necessitate permixta sunt: v. g. se inebriare, sibi ipsi brachium abscindere, si ita necesse sit ad propriam vitam conseruandam. Quemadmodum enim in his casibus non inhonoratur natura humana, quando leuius nocumentum postponitur maiori nocumento: ita etiam in priore casu non inhonoratur natura humana; sed potius videtur honorari, quando assumitur emortua, ut altera à morte liberetur.

Porro, etiam extra necessitatem extremam, ad morbum depellendum licitum est uti medicamentis ex humana carne confectis, sicuti docent Valent. Sanchez & alij. Eadèque videtur esse ratio effusi humani sanguinis, quem caduco morbo laborantibus prodesse aiunt: Item lacte formineo, quod phthisicis prodesse Medici docent. Mirum autem non est, quod facilius licitum sit sanguine, aut lacte humano vesci, quam carne: quia sanguis & lac humanam animam informata nunquam fuerunt; adeoque humanam naturam non ita participant, sicuti caro. Denique etsi quis iure possit humanis carnibus tempore extremæ necessitatis vesci, ut supra dixi: non tamen ad id tenetur, sed potest etiam emori malle: Tum quia potest se conformare priori sententiæ, tanquam probabili: tum etiam quia nemo tenetur vitam suam conseruare, vel prorogare medio admodum difficili, & à quo natura valde abhorret: Tali autem medio, videlicet humanarum carnum esu vitam conseruare, multis admodum difficile apparebit.

Sobrietas moderatur inordinatum appetitum, vsumque potionis vim inebriandi habentis, auctore S. Tho. q. 149. art. 1. Ei aduersatur ebrietas, quæ est excessus in potu inebriante, causa voluptatis, donec vsum rationis adimatur. Est peccatum mortale secundum Apost. ad Galat. 5. S. Thom. 2. 2. q. 150. art. 2. & alios DD. communiter, contra Abb. inc. à crapula, n. 2. de vita & honestate clericorum. Quia grauis deformitas censetur magnūque malum, abiectæ rationis potestate, qua nihil in homine præstantius, ad brutorum stoliditatem, voluptatis gratia, vltro se abijcere. Qua de re videri potest S. Basilius homil. in ebrietatem.

Dixi autem *Voluptatis causa*, Nam si ob alium finem bonum ac honestum, v. g. sanitatis recuperationem, haustus vini vsque ad ebrietatem, prudentis Medici iudicio, necessarius sit, tunc non absurdum iudicat recta ratio, ad breue tempus vsum rationis destitui, ut recuperata sanitate, manera rationis melius præstentur; quemadmodum etiam dormientibus contingit: quare culpa vacat talis voluntaria ebrietas, teste Syl. ver. ebrietas, q. 3. Caiet. super q. 150. a. 2. & in Sum. ver. ebrietas. Tolet. cap. 61.

Ex quadam doctrina non improbabili Lessius infert cit. cap. 3. dub. 4. Licitum esse inebriari mortis vitandæ causâ, quem tibi aliquis per violentiam minatur, nisi propinanti respondeas, modò scandalum absit, neque cedat in contemptum virtutis temperantiæ à Christianis seruandæ. Probat. Si enim ad redimendam vitam à Tyranno fas est sibi ipsi manum vel pedem amputare; cur non etiam rationis vsum ad breue tempus sibi adimere? Repugnat tamen Caiet. 2. 2. q. 150. art. 2. ad 3. imò & S. Aug. serm. 232. *Etiamsi ad hoc veniretur, inquit, ut tibi diceretur, aut bibas, aut morieris; melius erat, ut carotua sobria occideretur, quam per ebrietatem anima moreretur.* Quamuis Lessius respondeat, S. August. id dixisse propter ea, quæ per accidens coniuncta esse solent.

Deinde addidi, *donec vsum rationis adimatur*. Ex quo colligitur, tunc hominem peccati mortalis damnandum, si pergat bibere posteaquam aduertit periculum probabile securæ priuationis rationis, nisi desistat:



est quoddam mentis spoliatio post unam aut alteram horam, cum in liberum aërem progrediendum erit, proventura sit. Ceterum si homo post vini haustum dilcere possit inter bonum & malum, honestum ac turpe, tamen si phantasia non nihil turbata sit, atque idcirco vel lingua titubet, vel pedes vacillent, vel oculi duplicata aspiciant, vel caput in gyrum agi videatur, imperfecta hæc est ebrietas, & peccatum duntaxat veniale: quavis unum ex grauioribus, si deliberatè committatur, ut innotat Caiet. ver. ebrietas.

6 Porro, si ebrietas voluptatis causâ voluta per se mala est, & peccatum mortale: sequitur, simile peccatum esse ad eiusmodi ebrietatem iussu, aut consilio inuitare, atque inducere: quare Patres, ut S. August. serm. 231. & seq. Ambros. de Elia & ieiunio, cap. 13. & 14. grauius tales reprehendunt, qui ad vini haustum se mutuo prouocant, vero similiter prouidentes in se, vel altero ebrietatem secururam esse. Nota autem, quod dico, inducere & prouocare ad bibendum vsque ad ebrietatem esse peccatum, idque mortale: nam vinum alteri apponere relicta illi libertate quantum bibere velit: etsi putes illum ad ebrietatem vsque bibiturum: non est semper illicitum: cum talis cooperatio materialis tantum sit, sicuti constat ex lib. præced. p. 3. c. ult. n. 4.

Sed quid, si grauius malum; v. g. prodicionis, quod alterum meditari intellexisti, alio modo impedire non possis, quam hominem inductiue inebriando, utrum id licitum sit? Affirmat Less. lib. 4. c. 3. dub. 4. n. 33. Quia licitum est, inquit, suadere, & inducere ad minus malum (peccati) ut impediatur maius: atque hic nihil aliud fit. Ergo, &c. Sed respondeo & dico I. Licitum esse tali homini offerre vinum fortissimum, cuius virtutem ipse cognitam non habet: & ad illud bibendum inuitare, ut sic præter intentionem ac propositum suum inebrietur. Ratio est, quia tali haustu homo ille non est peccaturus: ergo ad eum inuitare non est scandalum actiuum, seu prouocatio ad peccatum. Damnum verò ebrietatis, seu emotæ mentis huic homini inferre, ut malum longè grauius, animo eius propositum, euitetur, non est alienum à recta ratione.

Dico II. Illicitum est talem hominem iussu, vel suasionem inducere seu prouocare ad voluntariam ebrietatem. Probat ex regula communiter recepta: Nunquam licitum esse aliquem inducere ad actionem, quæ ita intrinsecè mala est, ut sine peccato fieri non possit. Sed voluntaria ebrietas, voluptatis causâ suscepta, ita intrinsecè mala est, ut sine peccato fieri non possit: perinde ut mentiri, blasphemare. Ergo, &c. Ad fundamentum Lessij resp. Veram esse illam propositionem: si inductio fiat ad peccatum minus, quâ minus est: ita ut alteri suadeas, non totum peccatum, quod certo animo concepit, committere: sed partem duntaxat formaliter aut virtualiter inclusam in toto, uti videre licet in aliis exemplis, quæ ibidem Lessius congerit. Tunc enim non suades homini, ut malum peccati faciat: sed ut saltem aliquam partem peccati non faciat, si à toto abduci non possit. Falsa autem est propositio, quod liceat inducere hominem ad peccatum minus committendum, quod ille committere nec formaliter, nec virtualiter decreuerat: cum hæc sit vera inductio ad malum peccati, & scandalum actiuum per se intrinsecè malum, quippe repugnans naturali præcepto negatiuo: Ne inducas alterum in peccatum: Siue, ne alteri auctor sis peccati cuiusquam.

Castitas moderatur inordinatum appetitum, vsûque Venereorum. Est duplex: Vna perfecta & simpliciter dicta, quæ omnem cupiditatem, vsûque Venereorum firmo voluntatis proposito in perpetuum excludit. Alia imperfecta, & secundum quid, quæ vel ad certum tempus, videlicet nuptiarum, ab illicitis voluptatibus carnis honestatis gratia abstinere: vel in statu con-

iugij concessis voluptatibus moderatè, & secundum rationis præscriptum vitur. quæ coniugalis castitas dici solet apud S. August. lib. de sancta virginitate cap. 13. Eademque virtus interdum pudicitia appellatur, quatenus se extendit ad cohibendos impudicos aspectus, oscula, tactus.

Virginitas autem est perfectissima castitas, continens 7 firmum propositum integritatis ac puritatis perpetuò conseruandæ, gratia honestatis. Eam definit S. August. cit. c. 13. quod sit *in carne corruptibili incorruptionis perpetua meditatio*. Differt à castitate: quod illa etiam in coniugatis: atque corruptis & poenitentibus locum habere possit: virginitas non item: sed semel amissa per consensum voluntarium, irreparabilis est, sicut docet S. Basil. lib. de vera virginit. S. Hieron. Ep. 22. ad Eustochium de custodia virginit. S. Thom. 2. 2. q. 152. art. 3. ad 3. Maior in 4. d. 30. q. 2. Syl. ver. virginitas, Less. lib. 4. c. 2. dub. 14. Præterea propositum seruandæ integritatis vsque ad tempus nuptiarum non est virtus virginitatis, sed solius castitatis, secundum doctrinam S. Th. cit. q. 152. a. 1. Syl. ver. virginitas, q. 1. contra Maiorem lo. cit.

Duplex autem est virginitatis integritas: vna carnis, ac 8 veluti materialis: altera animi ac propositi, ideòque formalis. Quare virgo alia integra est sola carne, alia integra est sola mente, alia denique tam carne, quam mente, sicuti docet S. Thom. in 4. d. 33. quæst. 3. art. 1. & cit. quæst. 152. art. 1. ibid. Palud. quæst. 2. art. 1. S. Anton. p. 3. tit. 2. cap. 2. §. 1. Syluest. ver. virginitas, quæst. 2. Virgo integra animo & proposito, violata autem per stuprum, virginitatis laudem ac præmium retinet: sed à velo consecrationis, (quod xxv. ætatis anno virgines professæ accipiunt, iuxta c. placuit, 20. q. 1.) humilitatis ac maioris decoris causa, perinde atque aliæ corruptæ, abstinere tenetur, arg. c. si quis non, 15. q. 1. & c. illæ, c. de pudicitia, 32. q. 5. & docent S. Thom. in 4. d. 38. q. 1. a. 5. ad 4. Syl. ver. cōsecratio virginum, q. 1. Palud. lo. cit. Navar. lib. 3. consil. 2. de statu Monach. edit. 2. Armilla ver. virginum consecratio. Ad Prælaturam quoque ascendere, seu velum prælationis, corruptæ, etiam per vim, sine Summi Pontificis dispensatione, accipere non possunt, sicuti docet Rodriq. t. 1. regular. q. 64. art. 4. Vide etiam de quintuplici velo, a. 1. post Palud. in 4. d. 38. a. 3. concl. 2. S. Anton. p. 3. tit. 2. cap. 2. §. 2. Videlicet, Velum professionis: velum ordinationis, quod hodie in vsu non est, ut separatim conferatur: velum consecrationis, quod à solo Episcopo accipitur: velum prælationis: & velum continentie.

Virgo integra carne, violata autem animo, vel proposito, virginitatis decorem ac meritum coram Deo omnino perdit. Duo tamen commoda habet. I. Quia virginitas sola voluntate amissa, non item opere externo per carnalem commixtionem, aut voluntariam pollutionem, acta poenitentia, integrè recuperatur, sicuti docet S. Th. in 4. d. 33. q. 3. a. 1. Syl. ver. Virginitas, q. 2. Caiet. ver. virginum consecratio. II. Quod talis quæ carne integra est, coram Ecclesia virgo habeatur, ideòque inter virgines consecrari atque velari possit.

Sed dubium est, an etiam si voluntaria pollutione, absque viri concubitu, scdada fuit? Respondeo & dico I. Voluntaria pollutione seu seminis emissionem virginitas verè ac simpliciter amittitur, ut per poenitentiam reparari nunquam possit. Ita S. Thom. cit. q. 152. a. 1. ad 4. Caiet. 2. 2. q. 154. a. 6. dub. 3. Less. cit. dub. 6. n. 119. & alij communiter. Ratio est: Quia in hac seminis præter naturæ ordinem effusi, carnali voluntaria dilectione potissimum consistit peccatum externum & consummatum luxuriæ, sicuti indicat S. Thom. ait art. 1. in corp. & a. 3. & bene docet Armilla, ver. virginitas, n. 2.

Dico



Dico I. Probabile est, quod mulier voluntarie polluta post penitentiam inter virgines consecrari, atque velari possit. Ita docet Caiet. ver. virginum consecratio, Armilla eod. n. 3. Sa ver. consecratio n. 6. Less. n. 110. contra Rodriq. t. 1. regul. q. 64. art. 3. Nau. c. 16. mat. n. 3. §. interrogatus. Ratio est: Quia licet coram Deo virgo, seu incorrupta non sit, neque virginitatis laureolam in cælo habitura; quia tamen claustrum virginitatis illæsum seruat, apud homines, censetur virgo: quare licet non sit virgo virtute; retinet tamen virginitatis statum coram Ecclesia; adeo quidem, ut qui talem violaret, virginis stuprator diceretur.

Aliud dubium: Vtrum mulier occultè violata inter virgines consecrari & velari possit? Responsio est negativa S. Thom. in 4. d. 38. q. 1. 25. ad 5. Palud. ibid. q. 5. a. 3. concl. 7. Caiet. ver. virginum consecratio, Syl. ver. consecratio virginum, q. 8. Nau. c. 16. n. 3. Sa ver. consecratio, n. 6. qui dicunt, talem occultè violatam, etiam per vim, peccare si velum consecrationis inter virgines ab Episcopo petat, vel accipiat, corruptione sua dissimulata: quamvis aliqui apud Syl. & Sa oppositum senserint, quibus fauere videtur Sotus in 4. d. 19. art. 5. in fine, & Henriq. l. 10. c. 24. lit. m. Sed cõmunis doctrina probatur: quia non levis irreuerentia est, si in sacramentis vel sacramentalibus falsitas interueniat. Quæ admodum enim sacrilegium esset v. g. salis aut aquæ consecrationi supponere, quod sal aut aqua non est; ita multo magis, si vt virgo consecrari se patiat, quæ virgo non est. Confirmatur. Sicuti qui occultè bigamus est, quia corruptam duxit, ordinari non potest; ita neque quæ per vim, vel in occulto corrupta: cùm in his habeatur ratio sacræ significationis, sicuti habetur in c. acutiùs, d. 26. vbi Gl. quærit verb. consecrari: Cur Episcopus, qui concubinam habuit, consecrari possit; non autem mulier quæ ante, vel post Baptismum corrupta est, inter virgines consecrari: cùm tamen dignior sit consecratio Episcopi. Respondet: Quia sacra virgo significat Ecclesiam triumphantem, in qua non est macula, neque ruga.

Quapropter quod Syl. Nauar. Sa, & alij dicunt; Episcopum dispensare posse, vt occultè fornicata consecraretur, id intelligi non debet per se, ac directè: cùm in sacris vniuersalibus canonibus Episcopi dispensare non possint; præsertim in talibus rebus, quæ ad sacram significationem pertinent, vt nec Papa dispensare soleat: Sed intelligi debet, propter rationem necessitatis: si Sanctimonialis professâ, quæ antea occultè fornicata, aut per vim corrupta fuerat, à velo consecrationis abstinere non possit sine scandalo, vel sui infamatione. hoc casu Episcopum dispensariùs permittere posse, vt talis consecraretur, mutato inter consecrandum nomine *Virginitatis*, in nomen *Castitatis*, vel *continentiæ*. Verùm Nauar. in cit. consil. 2. de statu Monachorum edit. 2. rectè aduertit, non satis hoc modo consultum fore famæ mulieris: cùm semper aliqua personæ interesse soleant, quæ talè vocis mutationè intelligant. Quare ipse præstare putat, *Ut Episcopus hoc casu pronuntiet vba consecrationis, quæ virginem, aut virginitatem sonant, accipiendo illa intra mentem tanquam significantiâ castitatis, vt & scandalum absit, & mendacium*. Cui addo, quod etiam communi sermone virgines sine mendacio appellamus, quas scimus occultè corruptas esse: quare hanc sententiam defendit etiam Henriq. cit. c. 24. lit. m. Rodriq. cit. quæst. 64. a. 3. contra Caiet. ver. virginum consecratio.

Ex dictis colligitur pro praxi; Quod Confessarius mulieri, quæ occultè fornicata, aut vim passa est, si querat, vtrum Monasterium Virginum ingredi possit, veritatem apertè dicere debeat: Posse ingredi & profiteri, ita tamen, vt si Monasterium ingrediatur, in quo consuetudo viget consecrandi virgines, ab eo velo ab-

stinere debeat, contenta velo continentiae, seu obseruantiae. Quia certum est, talem seu occultè, seu notoriè corruptam benedici posse benedictione viduali, mutato nomine *vidua*, in nomen *innupta*, *Deo deuota*, vt tradit Nau. cit. cons. 2. Sin verò mulier solum suū propositum Confessario aperiat, nihil querens & dubitans; tunc interdum dissimulare poterit prudens Confessarius, si ingressum mulieri valde vtilem fore intelligat: quandoquidem ingressus & professio mulieri corruptæ prohibita non sunt: de velo autem consecrationis accipiendo, vel non accipiendo Confessarius Monasterij iudicare poterit. Accedit, quod sententia Henriq. l. c. non improbabilis videri possit; Mulierem occultè corruptam, quæ iam velum professionis accepit, posse consecrationis velum non quidè petere, sed oblatu acceptare; ne alioquin se ipsam infamet. Quare interrogata de carnis integritate respondere potest, secundum hanc sententiam, se virginem esse, intelligendo coram Ecclesia, siue apparenter statum virginitatis seruare, vt supra dictum.

Castitati aduersatur luxuria, quæ est inordinatus appetitus, vel vsus Venereorum. Dupliciter hoc peccatū contingit: Primò secundum substantiâ actus; & sic est mortale, teste Apost. ad Gal. 5. vbi inter opera carnis, luxuriâ numerat, dicens, quod *qui talia agunt, regnum Dei non possidebunt*. Eius sex species numerantur à S. Tho. 2. 2. q. 154. a. 1. ex c. lex illa 36. q. 1. *Simplex fornicatio; adulterij, incestus, stuprum, raptus, vitij contra naturâ*: quibus addi potest septima species; *concubitus sacrilegus*.

Secundò contingit luxuria quò ad modum & circumstantiâ accidentalem: qua ratione in coniugio peccati potest, vt dicam in l. 5. tract. vlt. p. 3. num. 1. De adulterio quoque incestu, stupro, raptu, & fornicatione sacrilega alijs locis dicendum erit. Quare hîc tantum agam de simplici fornicatione, & vitio contra naturam.

Simplex fornicatio est carnalis commixtio soluti cum soluta. Esse peccatū mortale certa fide constat ex Apost. 1. ad Cor. 6. ad Ephes. 5. ad Gal. 5. & docet S. Tho. q. 154. a. 2. Ratio est; Quia valde repugnat naturali instinctui, qui brutis quoque animantibus, quantò magis homini inditus est, opus generationis non exercendi extra coniugale fœdus, ob meliorem prolis conceptionem, natiuitatem, educationemque: quæ naturæ lex, cùm circa materiam grauem versetur, sub culpa mortali obligat ex cõmuni sententia Doctorum in 4. d. 33. vbi videri potest Palud. q. 1. a. 3. contra Durandum q. 2. vbi sentire videtur, fornicationem legibus tantum posituius veteris, ac noui testamenti prohibitam esse.

Quin imò rectè docuit Richard. in ead. d. 33. a. 2. q. 2. quod nec per Dei dispensationem fieri possit, vt fornicatio licita sit: quia fornicatio significat accessum ad mulierem non suam, seu cuius corporis potestatem vir non habet. Si autè Deus vniuersorū dominus alicuius mulieris potestatem faciat viro, tum accedet ad suam, seu cuius potestatem accepit. Quare inquit Richard. ad. 3. *Deus non dispensauit cum Osea, vt fornicaretur: sed mandauit vt acciperet mulierem prius fornicariam, & hoc mandando fecit illam esse Prophetæ uxorem, Prophetæ consentiente*.

Porro ad peccatum fornicationis reuocari debent amplexus, oscula, tactus qui impudici sunt, id est, instituti causa Venereæ delectationis, consurgentis ex commotione spirituum generationi inseruietium circa partes corporis Venereas, sicuti explicat Sanch. lib. 9. de matrim. disp. 46. num. 5. Neque refert, quod ad carnalem copulâ intentione operantis saepe non referantur: quia suapte natura eò spectant ac tendunt, tanquam viæ, dispositiones, inchoationes: idèoque mortalia peccata esse solent inter personas nullo legitimo coniugij, aut sponsaliorum fœdere iunctas, sicuti docet S. Th. 2. 2. q. 154. a. 4. ibid. Caiet. & tom. 1. opusc. tract. 14. de delect. morosa, & in sum. ver. impudicitia; S. Anton. p. 2.



tit. 5. c. 1. §. Armilla eod. ver. num. 1. Nau. c. si cui, d. 1. de pœnit. num. 8. Valent. 10. 3. disp. 9. q. 3. prope finem, Rodriq. t. 1. sum. c. 203. num. 2. Grassi p. 1. de cis. lib. 2. c. 75. num. 10. Sanch. lib. 9. de matrim. disp. 46. concl. 1. Philarchus t. 1. p. 2. lib. 4. c. 18. dub. 3. Sa ver. luxuria, num. 15. Tol. lib. 5. cap. 14. & alij communiter, quibus consentit Apost. ad Gal. 5. & ad Ephes. 5. cum fornicatione pariter iungens *impudicitiam*, & *immunditiam*: adiiciens, quod qui talia agunt, regnum Dei non consequentur. Videri etiam potest Auctor commentar. in Epist. S. Pauli apud Ambrosium super illa verba 1. ad Thessalon. cap. 5. *Salutate fratres in osculo sancto: Sancta oscula sunt*, inquit, *in saluatione Christiana, cetera carnalia sunt. Quia quicquid sine Christo fit, carnale est, ac per hoc & mortale.*

Quædam hic addenda sunt: I. Oscula & amplexus, si fiant non causa delectationis Venereæ; sed vt signa amicitie, aut benevolentie, v. g. secundum patriæ consuetudinem, culpa vacant, vti colligitur ex cit. cap. 5. ad Thessalon. Similiter si placeat tactus, aut visus corporis proprii, vel alieni, ob solam proportionem seu connaturalitatem cum organo tactus, aut visus, per se loquendo, culpa non est: cum tactus rei blandæ, & visus rei pulchræ organa visus, ac tactus naturaliter delectent, ait Sanchez lib. 5. moral. c. 6. num. 13. Denique si oscula, amplexus, &c. proficiantur ex ioco, aut animi leuitate, non causa delectationis Venereæ, culpam tantum venialem habent, per se loquendo. Ita DD. communiter apud Reb. p. 2. de obligat. iust. lib. 3. q. 19. sect. 3. Sanchez num. 3. & 10. qui tamen rectè excipit, nisi tactus, (vel etiam aspectus) valde impudicus sit, videlicet partium verendarum inter personas sexus diuersi, quamuis ex sola curiositate fiat; excusari non posse à mortali: quia & per se sine ex obiecto magnam deformitatem habet, & graui periculo hominem exponit: cum suapte natura ad Veneream delectationem tendat, eamque valde excitet. Sed inter personas eiusdem sexus putat Sanchez num. 12. eiusmodi tactum ex sola curiositate habitum, interdum excusari posse à mortali peccato: quod tamen rariū est, saltem propter adiunctum periculum. Aspectus verò partium verendarum inter personas eiusdem sexus ex sola curiositate facilius à peccato mortali excusatur, idemque sentiendum de aspectu sui ipsius ex curiositate: Quæ sumpta sunt ex eodem Sanchez numero 27. 28.

II. Oscula, amplexus, & tactus inter sponfos de futuro videntur excusari à culpa mortali, licet fiant causa delectationis sensitiuæ: dummodo absit periculum pollutionis, aut consensus in copulam, & non per se atque ex obiecto suo turpes, ac impudici sint. Ita docet Caiet. in sum. ver. sponsalia, & 2. 2. q. 154. 2. 4. Nau. c. 14. man. num. 18. & c. 16. num. 11. Philiar. de officio Sacerdotis, t. 1. p. 2. lib. 4. c. 18. Sa cit. num. 73. Lopez p. 1. instruct. c. 54. §. peccant parentes, & cap. 75. prope finem, §. contra, Sanchez cit. disp. 46. num. 48. Ratio afferri solet: Quia sponsalia sunt initium matrimonij; quibus proinde aliquale ius sponsæ in corpus sponsi acquiritur, non quidem ad ipsam copulam, sed ad dictos corporum tactus: quamuis venialis culpa sit, si fiant ob delectationem; & sæpiissime mortale, propter pollutionis præuium periculum.

III. Tactus turpes inter coniuges, si fiant vt præparationes, seu incitamenta ad copulam conjugalem, vacant culpa: quia cui concessus est finis, concessa etiam sunt media ad finem ordinata, sicuti ex communi docet Sanchez lib. 9. disput. 44. Sin verò fiant solius voluptatis causa, culpabiles sunt; sed non mortaliter: quia cum eiusmodi tactus inter coniuges secundum se indifferentes sint; & non prohibiti; ideo eorum excessus aut inordinatus vsus propter voluptatem, non excedit culpam venialem, vti docent Caiet. & Armilla ver.

impudicitia, Sanch. num. 12. & alij contra Anton. p. 3. tit. 1. c. 20. §. 6. Syluest. ver. debitum, q. 7. Sin verò coniunx ob solam voluptatem Veneream, & non cœundi causa, se ipsum tangat, arbitror esse mortale, etiam cessante pollutionis periculo, sicuti notauit Vasq. 1. 2. disput. 113. num. 4. Armilla ver. impudicitia, num. 3. Quia coniunx non habet ius in proprium corpus ad vsum Venereum, nisi per accidens, vt possit copulari cum coniuge: ergo extra hunc casum tactus Venereus sui ipsius non est indifferens; sed per se illicitus, & ordinatus ad pollutionem, ideoque peccatum mortale: quamuis contrarium sentiat Sanch. cit. disp. 44. num. 16.

IV. Impudici seu Venerei tactus, amplexus, oscula inter personas eiusdem sexus grauiora peccata mortalia sunt, quam inter personas solutas diuersi sexus: quia illa suapte natura tendunt ad peccatum mollicitie, quod grauius est fornicatione simplici, sicut notauit Sanchez num. 18. Præterea, si actus impudici exercentur à persona coniugata, vel cum coniugata, pertinet id ad speciem adulterij. Quare tales circumstantiæ personarum in confessione explicari debent, sicuti rectè monet idem Sanch. num. 19. Addit Ioseph. Mascardus conclus. 46. num. 1. Oscula impudica esse veluti partes adulterij, eiusque in foro externo aliquam presumptionem afferre: præsertim si alia etiam adminicula concurrant. de qua re vide Sanchez l. 10. disp. 8. num. 47. Denique & seipsa contrectare aut confricare causa delectationis Venereæ, si fiat cum plena deliberatione, est peccatum mortale, sicuti ex communi Armilla loc. cit. Nota autem quod dico, *causa Venerea delectationis*. Non enim omnis pruritus, etiam circa membra verenda, Venereus; aut omnis extinctio eius per fricationem luxuriosa delectatio censeri debet, vti notauit Gerson part. 2. operum tractat. de pollut. diurna, notab. 2. Quia sicuti in aliis membris, ita etiam in verendis homo pruritus ex sanguinis affluxu sentire potest. Est autem pruritus ille, si membra genitalia vt pote teneriora inuadat, admodum vehemens, vt à fricatione continere se difficillimum sit. Quamobrem existimat Sanchez l. 9. disp. 45. num. 9. Non esse peccati damnandum, qui eiusmodi molestissimum pruritus fricatione sedare conatur, quamuis cum periculo pollutionis; tamen sine periculo consentiendi in illam.

V. Turpiloquium, turpis cantio, literæ amatoriæ, si Venereæ voluptatis gratia instituantur inter personas omnino solutas, mortalia peccata sunt, sicuti ex communi docet S. Anton. p. 2. tit. 5. c. 1. §. 8. Nauar. c. 16. num. 14. Armilla ver. impudicitia, Sanch. num. 39. Si verò ex animi leuitate, curiositate, venialia tantum sunt, per se loquendo: at verò ratione scandali, vel periculi labendi in mortale, frequenter mortalia esse solent. Idemque sentiendum de turpibus spectaculis, vel comediis. Quamobrem mortaliter etiam peccare censendi sunt, qui turpes libros cantilenas, aut comedias scribunt, vel publicè exhibent; qui turpes imagines pingunt, ac publicè edunt, vel proponunt: cum hæc fieri vix possint sine aliquorum legentium, vel spectantium spirituali iactura. Vide Sanch. l. 9. disp. 46. q. 3.

VI. Discrimen inter tactum, & visum afferre solent Doctores, Caietan. cit. opus. 14. quæst. 3. & ver. impudicitia, ibid. Armilla num. 1. Nau. c. 16. man. num. 11. & in c. si cui, d. 1. de pœnit. num. 11. Medina 1. 2. q. 74. 2. 8. dub. 5. Philarchus cit. dub. 3. Sanchez cit. disp. 46. nu. 22. Quod tactus, puta amplexus, oscula, &c. magis propinquè tendunt ad concubitus; ideoque delectatio sensibilis quæ ex tactu voluntariè percipitur, ordinariè est Venerea ac mortalis. At visio visus, seu aspectus mulieris propinque non tendit ad concubitus: & delectatio, quæ ex aspectu pulchritudinis percipitur, potest & sæpe solet esse non Venerea: vt si quis mulieris pulchritudinem contempletur ob solam curio-



stitem, erit culpa venialis: sin vero ideo contempletur, vt Dei auctoris potentiam admiretur, nullum peccatum erit, per se loquendo. Sæpenumero tamen ex eiusmodi aspectu oritur & commouetur delectatio Venerea, cum spirituum generationi inferuentium commotione: in quam delectationem deliberatè consentire, est peccatum mortale, sicuti rectè docet Anton. p. 3. tit. 16. c. 1. §. 10. Caiet. tom. 1. opusc. tract. 14. dub. 3. Syl. ver. delectatio, q. 4. Nauar. c. 16. num. 11. Armilla ver. impudicitia, num. 1. Graffis supra cit. c. 75. num. 10. Quare Iob. cap. 31. *Pepigi fœdus cum oculis meis, vt necogitarem quidem de virgine.* Sin vero aspectus ex sola curiositate deliberatè captatus, valde impudicus sit; videlicet aspicere concubitum viri cum muliere, vel partes verendas diuersi sexus, non videtur posse excusari à mortali; vt supra etiam dictum est, & notat Sanch. num. 23. & 29. Si tamen aspectus, aut etiam tactus verendarum fiat ex necessitate à Medicis v.g. aut Chirurgis, excusari potest à peccato, de quo Nau. cit. c. si cui, num. 13.

Vitium contra naturam sub genere luxuriæ gravissimum est. Pro cuius intellectu notandum ex doctrina S. Thom. q. 154. a. 11. Actum Venereum eo tantum modo fieri oportere, quem & ipsius actus naturalis conditio requirit, & natura omnia animalia docuit: sin autem alio modo exerceatur, tunc aduersus ordinem naturæ peccatur, quod quatuor modis contingit: Primò, si absque concubitu profusio seminis procuretur, quæ molities dicitur, & peccatum pollutionis. Secundò, si concubitus fiat cum alterius speciei supposito, videlicet cum bestia, quæ proinde dicitur bestialitas: quod etiam reuocatur concubitus cum Dæmone in forma hominis, vel bruti. Tertio, si concubitus fiat cum persona eiusdem speciei ac sexus, maris cum matre, femina cum femina, quæ dicitur sodomia. Quarto, si inter personas eiusdem speciei & diuersi sexus non seruetur naturalis concumbendi modus: quod de re Caiet. cit. q. 154. a. 1. resp. ad 4. §. ad 2. de modo, & cit. a. 11. ad 4. Syl. ver. debitum, q. 4. Sanch. lib. 9. de matrim. disp. 16. vbi ex communiore sententia generalem regulam tradunt: Quocunque modo ac situ coniuges copulentur, seruato tamen legitimo vase, & seculo probabili pollutionis, aut semidis effundendi periculo, non esse culpam mortalem, sed venialem, quamuis grauior; nisi necessitas aliqua excuset: & vero hanc esse sufficientem necessitatem, ait Sanchez, quod coniugi instanter talem inordinatum concumbendi modum exigenti, alter reddere compellitur.

15 Nunc aliis prætermisissis, speciatim tantum dicam de peccato pollutionis, de qua sit ista assertio. Directè, & efficaciter intendere, vel prouocare pollutionem, seu seminis humani effusionem in seipso, vel in alio, semper est mortale peccatum contra naturam; idque non tantum, si Venereæ voluptatis causa fiat; sed et si sanitatis recuperandæ, vitæ conseruandæ, vel alia quacunque causa. Quæ est omnium Doctorum sententia, teste Sanchez lib. 9. disp. 17. conclus. 5. Contra quam ita quispiam obijcere potest. Vitæ liberandæ causa licitum est pedem vel manum sibi refecare: ergo ob similem causam etiam semen effundere. Respondent Doctores apud Less. lib. 4. c. 3. dub. 14. negando consequentiam. Cum enim alia membra ad conseruationem indiuidui pertineant, non est à natura alienum ea negligere vel abijcere, proprii suppositi seruandæ causa: semen autem, cum ad generationem, conseruationemque speciei referatur, natura non permittit, indiuidui seruandæ causa, abijcere, speciemque negligere.

Porro vt hæc ratio efficacior sit, aliam adiungit Sanchez, cur à natura animalis, ipsiusque hominis alienum sit, quocunque etiam necessitatis casu, extra naturalem concubitum, seminis profusionem prouocare. Si

enim animali, ipsique homini inditus esset instinctus, aut dictamen in aliquo casu extra naturalem concubitum semen profundendi; cum in ea ipsa re voluptas sentiat, facile ac prouocum esset eiusmodi facultate abuti, & extendere ad plures alios casus, cum maximo speciei detrimento. Non ita verò euenit, quando animali ipsique homini inditus est instinctus vel dictamen abscindendi membrum aliquod, corporis seruandæ causa: cum enim à membri abscissione, tanquam re secundum se molesta, appetitus animalis horreat, non facile homo tali potestate abuteretur, aut vltra casum necessitatis extenderet. Quæ ipsa etiam ratio dari debet, cur ad conseruandam matrem licitum sit expellere genituram nondum animatam; non ita verò propter eandem vitæ seruandæ causam, liceat seminis effusionem procurare. Confirmatur. Minus à natura abhorret effusio seminis in fornicatione, quam in pollutione procurata: illa autem nullo in casu licita est: Ergo neque hæc.

Dixi autem primò, *directè intendere* pollutionem semper esse peccatum mortale. Nam de indirecta intentione seu voluntate, cum nimirum aliquid agitur, ex quo agens prouidet pollutionem naturaliter secutam, distinctione opus est. Vel enim actio, ex qua, tanquam causa, pollutio sequetur, per se turpis est, atque ordinata ad rem Veneream: cuiusmodi sunt impudicæ cogitationes, amplexus, oscula, quæ propter voluptatem fiunt, tunc mortaliter peccat, qui eiusmodi pollutionis causam sciens ac volens præbet, idèque hanc circumstantiam euentus in confessione explicare debet, sicuti docet Nauar. cap. 16. num. 6. Sanchez l. 9. disput. 45. conclus. 1. & indicat Caietan. in sum. verb. pollutio, & tom. 1. opuscul. 22. de pollut. ex audit. confessionis, Philarcus cit. cap. 18. in fine. Ratio est: Quia perinde esse censetur, siue effectus procedat ex natura ac necessitate operis voluntariè exerciti; siue fiat ex intentione operantis: nam *explicitè*, & *implicitè eadem est vis*. Sicuti qui multum vini bibit, ex quo scit naturaliter sequi ebrietatem, is implicitè censetur velle ebrius fieri; licet explicitè non intendat: Ergo simili ratione, qui actum impudicum exercet, ex quo, spectata corporis sui constitutione, prouidet pollutionem per se ac naturaliter secutam, implicitè censetur velle pollutionem, quamuis eam explicitè non intendat.

Vel causa, seu actio per se & suapte natura non ordinatur ad pollutionem, sed alium finem vtilitatemque habet, etiam ex operantis intentione; quamuis præter intentionem & per accidens pollutio oritura videatur. tunc iterum distinguendum est: Vel enim actio talis secundum se honesta est, & finis eius honestus, v.g. confessiones mulierum audire, vel eas secundum morem patriæ amplecti, quando sine graui offensione intermitteri non potest à laicis secularibus: huiusmodi actiones licitæ sunt, non obstante periculo pollutionis inde naturaliter secuturæ, sicuti tradit S. Anton. part. 2. tit. 6. cap. 5. Caietan. in sum. verb. pollutio, Nauar. cap. 16. man. num. 7. Sanchez cit. disput. 45. num. 8. Idque probatur ex generali regula: Si ius habeas aliquid agendi, ex quo indirectè & per accidens secuturus existimatur effectus, quem directè ac per se intendere non licet; non ideo cogaris abstinere ab actione, quotiescunque ex ea maior vtilitas speratur, quam sit incommodum euentus, qui permittitur: seclusa tamen speciali prohibitione, pacto, &c. Sic enim in bello iusto v.g. fas est arces diruere, etsi innocentium mors secutura sit, quam directè intendere nunquā licet. Atqui pollutio, quæ ex actione tua, aliam vtilitatem finemque habente, per accidens sequitur, exiguum ac pene nullum incommodum affert tum tibi ipsi, tum humanæ speciei, vt ostendit idem Sanchez cit. disp.



45. num. 15. Ergo non teneris talem actionem intermittere. Vide quæ dixi lib. 1. tract. 3. cap. 6.

Vel denique actio, ex qua pollutio secutura putatur, secundum se, vel ratione circumstantiæ illicita, otiosa, vel minus necessaria est, v. g. nimio cibo, aut potu se ingurgitare, inutiliter confabulari, unde pollutionem secuturam existimas, quam tamen minimè intendas: tunc veniale tantum peccatum contra castitatem committitur, etiam si causa, ex qua pollutio sequitur, in se mortalis sit, v. g. ebrietas, sicuti docet idem Sanchez num. 17. Vasquez 1. 2. disput. 115. num. 9. Suarez 3. part. tom. 3. quæst. 8. in comment. art. 7. Nauar. cap. 16. num. 8. Non enim esse mortale peccatum luxuria, inde probatur: Quia ex parte operantis abest affectus Veneræ oblectationis, ut ponimus: ex parte verò operis seu euentus, non adest grauis inordinatio, seu naturæ incommodum, quando pollutio per se intenta aut procurata non est; sed potius ex naturæ impulsu prouenit. Esse autem peccatum saltem veniale, præter Doctorum consensum, etiam ratio ostendit. Habet enim hæc passio aliquam inordinationem, mentem conturbat, ad malum incitat: ut proinde causa illi neque per accidens præberi, sed euitari debeat, si commode possit.

- 17 Secundò dixi in assertionem; pollutionem esse peccatum, si efficaciter intendatur. Vbi notandum est primò: Etsi pollutioni actiue cooperari nūquam fas sit; prouenientem tamen, v. g. in somnis, cum sine corporis detrimento impediri iam non potest, licitum est pati seu permittere, nullo impediendi conatu adhibito: dummodo cohibeatur omnis complacentia & consensus, sicuti ex cōmuni docet Sa ver. luxuria, num. 10. Sanchez lib. 9. disp. 17. num. 17. vbi ait, idem dicendum esse, tamen si pollutio ex culpa orta sit.

Notandum secundò: Ob honestum finem, v. g. sanitatem, vel superandam tentationem, licitum est simplici affectu, & sine vlla procuratione, aut procurandi proposito optare, ut pollutio naturaliter eueniat; itémque gaudere de ea, quatenus ex naturalibus causis orta est, sicuti docet Gerson part. 2. operum, tract. de pollut. diurna, prop. 12. S. Anton. part. 2. tit. 6. cap. 5. Caietan. 2. 2. quæst. 154. art. 5. Less. dub. 14. num. 15. Nauar. cap. 16. num. 7. Neque enim id infrequens est, quòd ob finem honestum, liceat desiderare effectum aliquem per causas naturales euenire, & de eueniente gaudere, quem tamen efficaciter intendere, aut procurare nunquam liceret. Exempli causa: Si legitimus Rex cum multorum ruina Rempublicam administrat, fas est boni communis causa simplici affectu optare, ut moriatur; aut eo mortuo gaudere: cum tamen mortem ipsi procurare haud liceat.

Id tamen rectè admonet Gerson cit. loco; Eiusmodi simplex desiderium aut gaudium de pollutione naturaliter proueniente, quia v. g. ad sanitatem conducere videtur, esse iudicium hominis necdum castitatis perfectionem assecuti. Nam viri perfecti, ob amorem puritatis, atque timorem periculi consentiendi in carnis delectationem, quam maximè abhorrent ab omni, quamuis naturaliter proueniente, carnis impuritate. Porro, pollutionem simplici affectu optare, vel de ea naturaliter orta gaudere, propter voluptatem, est peccatum mortale delectationis morosa, sicuti testatur S. Anton. part. 2. tit. 6. cap. 5. in fine, Adrian. quæst. 4. de Eucharist. Nauar. num. 8. Azor lib. 6. c. 6. quæst. 6.

- 18 Dixi tertio; Pollutionis nomine intelligendam esse humani seminis effusionem. Nam hinc discernenda est distillatio, uti vocant, siue fluxus humoris quasi medij inter vrinam & verum semen, cum isto coloris ac cuiusdam viscositatis similitudinam gerens, licet verum humanum semen non sit, sicuti docet Ioan. Gerson part. 2. operum, tract. de pollut. diurna, notab. 1.

Caietan. tom. 1. opuscul. tractat. 22. de pollut. ex audit. Confess. quo ad secundum, in fine, Sanchez lib. 9. disput. 45. num. 2. Atque hæc distillatio siue fluxus humoris medij interdum prouenit sine commotione & sensu carnis, uti Gerson testatur: & tunc rectè dicit Caietan. non plùs ob talem fluxum anxium esse oportere, quàm de sudore. Interdum verò prouenit cum sensu carnali, & spirituum generationi inferuentium aliquali commotione, excitatà plerumque ex cogitatione, aspectu, colloctione cum persona dilecta. Et tunc de ea sentiendum est, sicuti de aliis carnalibus & Veneris motionibus; illi cooperari, aut causam per se præbere, vel in ea proueniente voluntariè delectari, esse peccatum mortale, sicuti num. 15. de pollutione dixi, & docet Sanchez cit. disput. 45. numero 32.

Sin verò loquamur de cooperatione omnino indirecta, & per accidens, sicuti num. 16. explicauimus: tunc minor eius habenda ratio est, quàm pollutionis: propterea quòd distillatio (aliqui stillicidium appellant) longè minore sensu proueniat, neque tantam deformitatem habeat, quàm pollutio: Longè item facilius, & in quibusdam personis leuissima quaque commotione prouenit, atque multum promouetur imaginatione ac timore, uti annotauit Gerson propos. 8. & Caietanus in citato opusculo. Quare personæ, quæ eiusmodi passioni obnoxie sunt, si exercendo actiones per se honestas, ob finem honestum, eiusmodi carnis commotionem experiantur, dissimulando & contemnendo facilius liberabuntur, quàm estimando. Interim tamen cauere debent ab ijs, quæ per se talia irritare solent, uti sunt lubrici aspectus (inquit Gerson) societas plùs quàm decet amabilis, in segerens delectationem.

Ad extremum quæri potest: Vtrum voluntaria pollutio, & quæcunque seminis effusio extra legitimum vas sit peccatum mortale inter coniuges? Ita affirmandum est cum Caietan. 2. 2. quæst. 154. art. 1. respons. ad 4. S. Anton. part. 3. tit. 1. cap. 20. §. 6. Rodriguez tom. 1. cap. 243. conclus. 20. Sanchez lib. 9. disput. 17. num. 13. Ratio est: Quia talis seminis effusio aduersatur fini generationis: ideòque est peccatum contra naturam. Sed intelligi debet, si seminis extra vas effusio fiat ex proposito; v. g. ad prolem legitimam impediendam: secus si præter intentionem, ex festinatione, aut metu. Item, si fiat ob senium, vel aliam indispositionem alterius coniugis: modò tamen probabilis spes supersit seminandi intra vas: quamuis sæpe, aut plerumque aliter eueniat, tali in casu licitum est coniugibus conari ad copulationem legitimam: etsi præter intentionem accidat, maritum semen foras effundere. qua de re iterum dicam libro 5. tractat. vltim. part. 4. cap. 11. num. 2.

Secundò loquor de pollutione, non de distillatione. Nam licet coniugibus mortale sit pollutioni præiisæ sine vlla necessitatis aut utilitatis ratione, causam præbere per tactus, amplexus, &c. non tamen mortale est, causam ita præbere distillationi, sicuti nec alijs delectationibus & commotionibus carnis, uti Sanchez notauit disput. 45. num. vlt.

Illud denique communiter notant Doctores Paul. in 4. distinct. 31. quæst. 3. art. 2. casu 5. S. Anton. cit. §. 6. Caietan. loc. cit. §. ad 2. verò casum, Sa ver. debitum, num. 17. Armilla num. 9. Sanchez disput. 19. contra Syluest. ver. debitum, quæst. 7. Cessante in utroque coniuge pollutionis periculo, non peccare maritum mortaliter, si cæptam copulam ante seminationem abruptat, ne proles generetur: modò id faciat vxore consentiente, aut non rationabiliter inuita. Imò ait Sanchez num. 3. si iusta causa adsit impediendi seminationem, v. g. ob paupertatem ac multitudinem proles,



& nihilominus concumbendi ad sedandam concupiscentiam: omnem culpam abesse, si mutus consensus accedat; dummodo etiam mulier non seminet; alioquin etiam maritus ordinariè seminare debet, ne alterius semen frustra effundatur, sicuti etiam Paludanus & alij annotarunt.

## De virtutibus annexis Temperantiæ, atque oppositis Vitijs.

### S V M M A R I V M.

- 20 Virtutes Temperantiæ annexe sunt Mansuetudo, Clementia, Humilitas, Studiositas, Modestia, Eutrapelia.  
 21 Mansuetudini secundum excessum opponitur peccatum iracundiæ; secundum defectum ira vacuitas.  
 22 Clementiæ secundum excessum aduersatur crudelitas & seuitia; secundum defectum nimia lenitas.  
 23 Humilitati secundum excessum repugnat superbia; secundum defectum nimia sui abiectio.  
 24 Studiositati secundum excessum curiositas opponitur; secundum defectum verò negligentia.  
 25 Modestiae secundum excessum aduersatur petulantia & insolentia; secundum defectum ruditas morum.  
 26 Eutrapelia est, quæ in ludicris ad animorum corporumque relaxationem institutis decorem conseruat; Excessus verò in his, sicuti et nimius defectus, in vitio sunt.

20 Virtutes Temperantiæ affines hæ sunt præcipuæ:

- I. *Mansuetudo*, quæ moderatur passionem iræ. Ira autem definitur, desiderium vindictæ. Est verò sciendum, iram non esse earum passionum genere, quæ ex obiecto malæ sunt, vt nunquam bonæ esse possint, qualis est v. g. inuidia, odium inimicitiae erga proximum; sed ex earum genere, quæ ex obiecto indifferentes sunt, vt & malè & bene institui possint: puta si irascaris mediocriter vbi, quando, cui oportet, vt iustitia seruetur, vitia corrigantur, sicuti tradit S. Thom. 2.2. q. 158. art. 1. Syluest. Caiet. ver. ira.  
 21 Mansuetudini secundum excessum opponitur peccatum iracundiæ, quod duobus modis euenit: I. ex parte obiecti, si vindictam desideres ei qui non meruit, vel plus, quam meruit, vel inferendam sine legitima auctoritate, vel non ob rectum finem, sed ex odio. Quia ratione ira ex genere suo peccatum mortale est, quippe iustitiæ vel charitati oppositum; sit tamen veniale aut ex imperfectione actus; si ira plenam animi deliberationem præueniat; aut ex materiæ leuitate, si vindicta iniusta modica sit, veluti si puerum nihil committentem ex ira capillis trahas, aureseius vellices. Vide Caietanum loc. cit. II. In modo irascendi, si nimis intra te excandesceas, vel signis externis plus, quam oportet, iram ostendas: qua ratione ex genere suo est veniale peccatum. Fit autem mortale per accidens, ratione euentus, puta scandali; vel si ex iræ commotione grauius in Deum vel proximum delinquas blasphemijs, maledictis, iniurijs. Ita S. Thom. art. 2. & 3. Caietan. ibid. S. Anton. part. 2. tit. 7. cap. 1. §. 2. Ioan. Gerson part. 2. operum, tract. de cognit. peccatorum mortalium & venialium, confid. 8. Lessius lib. 4. c. 4. dub. 4. num. 24. 25.

Secundum defectum eidem virtuti opponitur ira vacuitas. Cum enim ira sit veluti rationis satelles, qui post Principis decretum de vindicando malo, moderari debet ad exequendum, ne mala impunita maneant cum Reipublicæ detrimento; profecto à rectæ rationis ordine alienum est, satellitem isto destitui, vbi quispiam ex iustitiæ vel charitatis lege monendus, increpandus, castigandus est.

- 22 II. *Clementia*, cum mansuetudine affinitatem gerens, per quam homo potestate præditus; ex animi lenitate, propensus est magis ad puniendum citra meri-

tum culpæ, quatenus recta ratio permittit, quam ultra meritum, sicuti docet S. Thom. quæst. 157. a. 2. Sicuti ad benignitatem pertinet, præmia conferre potius ultra, quam citra meritum: quibus nos rationibus Deum clementem, ac benignum dicimus.

Clementiæ secundum excessum, opponitur crudelitas, per quam homo ex animi quasi cruditate seu austeritate, propensus est ad exigendum pœnam ultra culpæ meritum. Crudelitati affinis est seuitia seu feritas: differunt tamen, quod per seuitiam homo in inferendis malis non considerat culpam eius qui affligitur; sed potius suam delectationem. Crudelitas verò in pœna inferenda intendit culpam eius qui punitur, quamuis modum excedat, ideòque deterior est seuitas, quam crudelitas, sicuti tradit S. Thom. quæst. 159. art. 2. Est autem tum crudelitas, tum seuitia contra charitatem, & iustitiam, ideòque ex genere suo peccatum mortale, teste Caietan. ver. crudelitas.

Eidem clementiæ secundum defectum opponitur nimia lenitas: quando pœna remittitur, vel mitigatur, vbi seueritate vtendum recta ratio dicat ad delinquentem emendandum, publicam disciplinam sancientiam. Est peccatum graue, vel leue, proportionem damni, quod ex remissa animaduersione prouenit.

III. *Humilitas*, quæ temperat appetitum tendendi ad excelsa, sicuti docet S. Thom. quæst. 161. art. 1. Ei secundum excessum aduersatur *superbia*, si nominis etymon spectes, quasi super se ire, iuxta illud Psalm. 130. *Non ambulauit in magnis, neque in mirabilibus super me.* Definitur ex S. Augustino lib. 14. de ciuit. cap. 13. Inordinatus appetitus propriæ excellentiæ siue celsitudinis: quando nimirum homo ex maiore, quam par est, consideratione & æstimatione suarum virium inflatus, maiora & altiora se affectat. Videri potest S. Anton. p. 2. tit. 3. c. 1. Less. lib. 4. cap. 4. num. 62.

Superbiæ quatuor species ex S. Gregorio lib. 23. moral. c. 7. numerant S. Th. q. 161. art. 4. S. Anton. cit. tit. 3. c. 2. I. Si bona tua æstimes, quasi ex te ipso habearis, non à Deo acceperis. quod reprehendit Apost. 1. ad Corinth. 4. *Quid autem habes, quod non acceperis? si autem acceperis, quid gloriaris, quasi non acceperis?* II. Si bona à Deo accepta æstimes tanquam propriis meritis debita. III. Si æstimes te bona habere, quæ non habearis; vel maiora, quam habearis. IV. Si contemptis alijs, videri velis singulariter habere, quæ habes.

Notat verò S. Thom. cit. a. 4. ad 1. Necesse non esse ad eas superbiæ species, vt quis reuera iudicet se bona à se ipso habere, aut ob propria merita, non ex Dei gratia acceperisse; (talis enim hæreticus foret) sed quod consideratis bonis suis, sine relatione ad Deum, ex cuius misericordia & amore erga nos omne bonum prouenit; perinde se gerat, & animo se extollat, ac si propria industria acquisiisset: sicuti patet in paupere, inquit Less. cit. c. 4. n. 65. qui alienis opibus affatim fruens, non aliter se effert, ac si essent suæ, vel sua industria & meritis partæ; quia non meminit aut non considerat esse beneficium alterius: quod tamen si expressè interrogaretur, non negaret.

Præterea superbia alia est perfecta, & consummata, per quam homo adeò se extollit, vt Deo eiusque diuinæ voluntati ac legi subiectus esse nolit: quod peccatum grauissimum est ac dæmonibus proprium, quippe formalem ac directam mentis à Deo auersionem continens. de quo S. Thom. a. 6. Syl. ver. superbia q. 4. Alia verò imperfecta, quæ præcisè sistit in nimia æstimatione sui, atque amore propriæ excellentiæ; ideòque si absit iniuria erga Deum vel proximum, censeri debet peccatum veniale, teste Caiet. ver. superbia, ad finem, Tolet. de peccatis mortal. c. 4. Less. cit. c. 4. n. 68. Differunt autem superbia, vana gloria, & ambitio;



quoddam superbia sit inordinatus appetitus excellentiæ propriæ; vana gloria inordinatus appetitus laudis & famæ; ambitio inordinatus appetitus honoris, sicuti notat Syl. q. 7. Nau. c. 23. n. 5.

Eidem humilitati, secundum defectum aduersatur nimia abiectio sui, videlicet cum contemptu aut neglectu proprii muneris, iactura status in quo quis positus est, aut incommodo eorum quibus præest: ut si Episcopus præponat sibi Presbyterum, vel Diaconum: si pater à filio, superior ab inferiore flexis genibus veniam petat, sicuti docet Less. n. 64.

24 IV. *Studiositas*, quæ moderatur naturalem appetitum sciendi, seu cognoscendi. de qua S. Thom. quæst. 166. Ei, secundum excessum opponitur curiositas, quæ est superflua cognoscendi aut discendi cura: qui excessus seu inordinatio vel est ex parte obiecti, si cupias cognoscere ea, quæ ad te non pertinent. quod pertinet monitum Eccles. c. 3. *Altiora tene quaesieris, & fortiora tene scrutatus fueris: sed quæ præcepit tibi Deus, illa cogita semper.* Vel ex parte modi, si rerum ad te pertinentium cognitionem assequi coneris mediis illicitis, aut intempestiuis animæ aut corpori noxiis laboribus: quod & ipsum genus quoddam intemperantiæ est, ex genere suo peccatum veniale; per accidens interdum mortale, uti docet Caiet. ver. curiositas; & videri potest S. Thom. q. 167. S. Anton. p. 2. tit. 3. c. 7. Secundum defectum verò aduersatur negligentia, quæ est voluntaria omissio eorum discendorum, quorum cognitio ad cuiusque statum, officium pertinet. Et est id peccatum graue, vel leue, prout obligatio sciendi ex lege Fidei, Religionis, Iustitiæ, Charitatis descendens, grauis aut leuis fuerit. Vide Nauar. c. 23. n. 23. Lessius cit. c. 4. dub. 11. & quæ dixi lib. 1. tract. 2. c. 4. n. 10.

25 V. *Modestia*, quæ motus & gestus corporis externos, secundum rationis præscriptum, moderatur. Ei secundum excessum opponitur petulantia & info-

lencia: veluti, si puer gestus viriles, adolescens vocem, gressum fœmineum: Religiosus mores aulicos sectetur; secundum defectum verò opponitur morum ruditas. Hæc ex genere suo peccata venialia; per accidens interdum mortalia esse possunt, ratione scandali, nocumenti, uti docet Less. dub. 12. in fine, & videri potest S. Thom. q. 168. a. 1.

Est & alia Modestia in cultu externo, quæ in corporis ornatu, & rerum externarum apparatu mediocritatem obseruat, uti docet S. Thom. quæst. 169. & S. Anton. p. 2. tit. 4. c. 5. §. 1. & seqq. Contra hanc virtutem peccatur secundum excessum dupliciter: I. Per insolentiam, id est, modum inconfuetum, singularem, non competentem in ornatu vestium, apparatu conuiuiorum, suppellectilis. II. Per affectum, externo cultu, & apparatu vtendo libidinosè, ambitiosè: quia ut S. Augustin. ait. lib. 3. de doctr. Christian. c. 12. *In omnibus talibus non usus rerum, sed libido vtentis in culpa est.* Vide quæ dixi lib. præced. tr. 3. c. vlt. in fine.

VI. *Entrapelia*, quæ in dictis & factis ludicris ad animorum recreationem, corporumque relaxatione institutis, decorem seruat. Contra quam virtutem peccatur secundum excessum dupliciter: vel ex parte obiecti, si illiberale, immodestum, petulans, contumeliosum, iniuriosum, flagitiosum, obscenum iocandi aut ludendi genus vsurpetur. Vel ratione circumstantiarum, si genus ludendi, aut iocandi, alioquin honestum ac liberale, exerceatur loco, tempore non debito; vel contra dignitatem personæ ludentis, iocantis, eiusque coram qua ludus exercetur, uti videre est apud S. Thom. quæst. 168. a. 3. Secundum defectum peccatur, cum quis ob animi austeritatem, crudelitatem, morositatem, aut duritiem, tum sibi ipsi omnem ludum ac iocum, ad animi corporisque quietem ac relaxationem honestam interdicit, tum etiam in aliis impedire conatur. Videri potest S. Thom. q. 168. art. 2. & 4. Lessius dub. 13. Ioannes Maior in 4. d. 5. q. 14.







# SECTIO QUINTA. DE IUSTITIA ET IVRE.

HÆC EST PRÆCIPVA ET COPIOSISSIMA HVIVS libri pars, sex tractatus in se complectens. I. De generalibus principiis iuris ac iustitiæ. II. De restitutione, ferme tantum in genere: Nam in specie posterioribus etiam tractatibus agendum erit. III. De delictis. IV. De pactis & contractibus. V. De Testamentis, & alijs ultimis voluntatibus. VI. De iudicijs.

## TRACTATUS PRIMVS.

### DE QVIBVSDAM GENERALIBVS PRINCIPIIS IVRIS, AC IVSTITIÆ.

#### CAP. I.

De obiecto iustitiæ, quod est *ius*, siue *iustum*.

#### SUMMARIVM.

1. *Ius*, siue *iustum* interdum accipitur, ut idem sit quod *legitimum*; interdum, ut idem sit, quod *equalitas* alteri debita: & hoc iustitia particularis ac propriè dictæ obiectum est.
2. *Iustitia* moderatur hominis actiones in ordine ad alterum: sed *Temperantia* & *Fortitudo* in ordine ad ipsum operantem.



**I**USTVM (quod per syncopen *iust* dictum fuisse, arbitratur Sotus lib. 3. de iure & iustitia, q. 1. a. 1. & indicat Isidorus cap. 2. d. 1. *Ius autem est dictum, quia iustum est*) græcè *δίκαιον*, idem est quod *æquum*.

1. *Æquum* autem, quatenus ad mores pertinet, duobus modis accipitur: Primò generatim, ut idem sit quod *legitimum*, id est, conforme, commensuratum, ad æquatum legi, tanquam normæ ac regulæ omnis operationis humanæ. Secundò accipitur speciatim, ut idem sit quod *equalitas alteri debita*: idque est *ius parti-*

cularis iustitiæ obiectum.

Pro cuius intellectu nota primò ex Aristot. 2. Ethic. c. 2. 6. 7. iuncto lib. 5. Ethic. c. 4. Omnis virtus moralis amplectitur medium, siue mediocritatem in operationibus humanis, sicut recta ratio siue prudentia definit: ut neque plus, neque minus fiat, quam oportet. Quare dici solet, *Vitia in extremis consistere, virtutem in medio positam esse*.

Est autem discrimen inter iustitiam, & reliquas morales virtutes, *Temperantiam* ac *Fortitudinem*: quòd hæ occupantur in moderandis animi passionibus ipsiusmet operantis; puta cupiditate, voluptate, ira, timore, audacia, tristitia: Et prosequuntur medium cum habitudine ac proportionem ad operantem. Nam quod v.g. infimo nimium est, medium carnis libram comedisse, duos vini aut aquæ cyathos bibisse; id robusto parum est. *Iustitia* verò occupatur in moderandis actionibus humanis, quatenus ad alterum tendunt: & prosequuntur medium rei sine discrimine personarum: ut videlicet inter partes contrahentes, nullo habito respectu, sintne personæ diuites, an pauperes; probæ, an improbæ, &c. sed ex ipsius rei natura constituatur equalitas dati & accepti, lucri & damni. Quemadmodum enim duæ inæquales lineæ inter se æquantur, cum vni earum demitur quatenus plus æquo habet, idque alteri minus æquo habenti additur: Sic etiam per iusti-



tiam (loquor de propriè dicta, & commutativa) partes inter se æquantur, cum alteri, quatenus plus, quam oportet, lucri vel accepti habet, demitur, idque alteri minus, quam oportet, lucri habenti, adeoque damnum siue defectum patienti, tribuitur. Vide etiam S. Thom. 2.2.q. 57. a. 1. & quæst. 58. a. 10.

Nota secundò: Iustum siue æquum, quod dixi esse obiectum iustitiæ, non est quælibet æqualitas, siue æquatio; sed æquum *debitum*, ortum videlicet habens ex aliqua obligatione voluntaria vel inuoluntaria, ut infra tr. 3. & 4. magis patebit. Quare si duo Mercatores ad nundinas profecti sint, quorum vnus lucrum cepit, alter verò damnum tulit, inæqualitas inter ipsos est, sed non tollenda per iustitiæ æqualitatem: nisi vel societatis pactio, & obligatio præcesserit, vel ille huic causa iniusta damni extiterit. Iterum: Si tu mihi æquum tuum concessisti, ex quo vtilitatem cepi, siue lucrum mihi accessit, tibi contrà aliquid lucri decessit: tunc si pactum reciprocum antecesserat, per iustitiam ad æqualitatem redigendi sumus, compensando tibi defectum ex meo commodo. Eapropter Iudex *dux*, quasi mediator dictus est, quia partes inter se obligatas ad iustitiæ æqualitatem redigit; pronuntiando videlicet quid iustum, id est, æquum sit.

Porro, præter has duas primævas, magisque proprias acceptiones iuris, quarum vna est pro legitimo (de quo iterum dicam cap. seq.) altera pro æquo alteri debito; sunt aliæ magis improprie & à prioribus translata: Accipitur enim frequenter pro facultate aliquid agendi legitimè & inculpate. quo sensu dicimus aliquem habere ius sepulchri, Gen. 23. *Ius cognationis* ad hæreditatem accipiendam, l. ius, ff. de pactis; & vniuersum dici solet, aliquem *iure suo vti*, cum agendi potestatem habet. Item pro Iudicis sententia: nam Iudex est, qui partibus contendentibus ius dicit, sicuti constat ex tit. ff. de iust. & iure, & c. 2. de constit. in 6. *Extra territorium ius dicenti impune non paretur*. Deinde accipitur nomen iuris, ut idem sit quod lex: Denique pro scientia iuris siue legum, quo sensu Vlpianus dixit in l. i. ff. eod. tit. *Iuri* (id est scientiæ legum) *operam daturus, nosse oportet, unde iuris nomen descendat*. Et paulò post: *Ius est ars boni & æqui*. Sicut enim ars medicamentorum Medicina vocatur; ita scientia siue peritia iurium ac legum, Ius appellatur.

## CAP. II.

## De Iustitia generali, seu legati.

## S V M M A R I V M.

1. Iustitia generalis versatur circa omnia virtutum opera, ob Reipublicæ felicitatem.
2. Opera virtutum, quatenus per ea diuina legi ac voluntati conformantur, iustitia in sacris literis appellantur.

**H**omo in humana societate viuens dupliciter comparari potest: vel tanquam pars ad partem; ciuis, inquam, ad ciuem: vel tanquam pars ad totum; ciuis, inquam, ad communitatem. Hinc duplex ius oritur, & consequenter duplex iustitia, auctore Arist. lib. 5. Ethic. cap. 1. Vna generalis, per quam quisque reddit quod iustum est, ac debitum Reipublicæ, cuius ipse pars est. Altera iustitia particularis, per quam quisque reddit, quod iustum est ac debitum compati, siue consorti. de qua dicam cap. seq. & toto libro.

Illa autem Iustitia, *virtus generalis* dicitur ab Arist. loco cit. & S. Thom. 2.2.q. 58. art. 6. quia omnes virtutes morales in se comprehendit, non quidem vni-

uersalitate prædicationis, (qua ratione animal continet species animalium) sed vniuersalitate causæ (qua ratione sol se habet ad alia corpora, quæ ipsius virtute illuminantur, generantur, conseruantur) quatenus reliquis virtutibus ipsa imperans illarum actiones ad Reipublicæ prosperitatem refert.

Quemadmodum enim Charitas, inquit S. Thom. loc. cit. secundum se spectata, peculiaris atque ab aliis distincta virtus est; comparata verò ad virtutes reliquas, quarum operationes dirigit, ut propter Deum exerceantur, quasi omnium virtutum forma est, & virtus vniuersa; ac proinde perfectio & adimpletio totius legis: Sic etiam Iustitia, de qua agimus, secundum se peculiaris, atque ab aliis distincta virtus est, quia peculiarem rationem honestatis ac laudis obtinet, quatenus per eam quisque rectè ac debitè se gerit erga Reipublicam, cuius pars est: Peculiaris etiam difficultas in hac virtute cernitur: siquidem, ut Arist. annotauit 3. polit. cap. 3. *Non eadem est virtus boni viri, & boni ciuis. Complures enim*, ait idem in 5. Ethic. c. 1. *in propriis quidem vii virtute possunt; sed in iis qua sunt ad alium* (præsertim erga Reipublicam) *nequeunt. Et propterea sententia Biantis illa bene se habet: Magistratus virum ostendit. Eadem porro generalis iustitia comparata ad alias virtutes, quarum actiones ad Reipublicæ prosperitatem dirigit: (pertinet enim ad Reipublicam laudem ac felicitatem, ut partes eius rectè se habeant, officiumque præstent, sicuti ad totius corporis decorem & vtilitatem spectat, ut membra singula sanitate vtantur, & functiones rectè obeant) ea, inquam, consideratione dicitur *virtus perfecta*, qua vna in se virtutes continet omnes, ut neque Hesperus isia, neque Lucifer homines admiratione afficiat, inquit Aristor. cit. cap. 1. Quo loco eandem virtutem, quam communem seu generalem appellarat, nouo nomine *legalem* vocat; quia versatur circa legem seu iustum legitimum, interprete S. Thom. quæst. 58. a. 5. Etenim in Republica legibus bene constituta omnia omnium virtutum officia præcipiuntur; & ea quæ ad virum fortem pertinent; ut non deferere locum in acie, non fugere, non arma abijcere. Item quæ sunt temperantis; ut non committere adulterium, non libidine vii: Etiam quæ sunt mansueti: ut non pulsare, non conuicia dicere. Et in ceteris identidem virtutibus, atque vitiis; illa iubens, hac verans:*

Atque in hac significatione nomen *iuris* accepit Iureconsultus in l. Iustitia, ff. de iustit. & iure, cum ait: *Iuris* (id est, iustitiæ legalis) *præcepta sunt honestè viuere, alterum non ledere, suum cuique tribuere*. Etenim Reipublica quauis triplici iure nititur: videlicet naturali æquitate, scripta lege, & consuetudine vetusta, sicuti colligitur ex l. 2. ff. de aqua pluuiæ arcenda. In sacris quoque literis frequentissima est vsurpatione iustitiæ, pro quouis virtutis opere, quatenus per illud diuinæ legi ac voluntati conformamur, Matth. 5. *Beati, qui esuriunt, et sitiunt iustitiam*. Et cap. 6. *Attendite, ne iustitiam vestram faciatis coram hominibus, ut videamini ab eis*. Quemadmodum & è contrario omne peccatum iniustitiæ appellari solet, Ioan. 7. *Iniustitia in illo non est*. Roman. 1. *Reuelatur ira Dei de celo super omnem impietatem, & iniustitiam hominum*.

Ad extremum aduertenda est doctrina S. Thom. cit. quæst. 58. art. 6. Iustitiam legalem seu generalem dupliciter se habere. Nam in principe siue Magistratu leges decernente ob Reipublici commodum, inest quasi architectonicè: in subditis verò acceptantibus, & obseruantibus leges ob eiusdem Reipublicæ commodum, inest ministerialiter, velut executioni mandantibus, quæ per Magistratum decreta sunt. Vide Arist. 3. polit. c. 3.



## CAP. III.

## De Iustitia particulari.

## S V M M A R I V M.

1. Iustitia particularis proprietates sunt; Vt sit ad alterum; Vt versetur circa debitum: Vt reddat ad aequalitatem.
2. Inter Patrem & filium: inter dominum ac seruum: inter Maritum & uxorem non est iustitia simpliciter dicta.
3. Neque religio erga Deum proprie dicta iustitia est: cum non possit reddere ad aequalitatem.
4. Inter patrem & filium: Inter Maritum & uxorem: Inter Dominum & seruum, quod attinet ad bona ipsorum propria, videtur esse iustitia proprie dicta.

**P**articularis iustitia definitur ab Vlpiano in l. 10. ff. de iust. & iure. *Iustitia est constans & perpetua voluntas ius suum cuique tribuendi.* Sensus est; Iustitiam esse habitum, siue bonam affectionem voluntatis, qua firmiter & constanter inclinamur ad tribuendum aliis, quod iustum est, siue debitum ad aequalitatem. Cui consentit definitio S. Thom. q. 58. art. 1. sumpta ex Arist. 5. Ethic. c. 2. *Iustitia est habitus, secundum quem aliquis constanter & perpetua voluntate ius suum unicuique tribuit.*

Porro tum ex hac definitione iustitiæ, tum ex dictis cap. I. colligitur, tria omnino ad proprietatem iustitiæ particularis necessaria esse. I. Vt sit ad alterum simpliciter. II. Vt versetur circa debitum. III. Vt reddat ad aequalitatem, sicut præter alios notauit Rebellus lib. 1. de prælud. iustitiæ, q. 2. s. 5.

Hinc inferit S. Thom. 2. 2. q. 57. a. 4. ex Arist. 5. Ethic. c. 6. Inter patrem ac filium, dominum ac seruum, maritum ac uxorem, non esse iustitiam, ac iustum proprie ac simpliciter; sed secundum quid, & per similitudinem: iustum, inquam, paternum, herile, & Oeconomicum. Nam iustitia particularis tendit ad alterum, id est, diuersum ab operante: & iustum particulare versatur inter partes, quæ ex æquari possunt: Atqui filius non est omnino diuersus à patre; sed aliquid patris, veluti fructus ac portio decisa à patre, sicut colligitur ex Aristot. 8. Ethic. cap. 11. Quamobrem tum commoda, tum incommoda filij in patrem redundant, ac vice versa. Seruus autem siue mancipium est possessio, & veluti instrumentum domini sui: quare quicquid acquirit, domino acquirit. Denique vxor in ijs rebus, quæ ad coniugij societatem, familiæque administrationem spectant, censetur veluti vnum corpus, siue vna caro cum marito, consentiente Apostolo ad Ephes. 5. Deinde filius parenti reddere non potest æquiualens: Nec seruus domino æquari potest: cum, quantus est, domini sui sit. Vxor tamen marito ferme æqualis est, quippe in familiæ administratione eius sociam iure autem coniugij omnino par: quapropter rectè dixit Aristot. 5. Ethic. c. 6. Iustum Oeconomicum magis ad proprietatem iusti accedere, quam herile, ac paternum.

Ad traditam doctrinam tria addenda sunt: I. Licet iustum Paternum v. g. recedat à proprietate iusti, quod attinet ad aequalitatem inter diuersas partes statuendam; non tamen quod attinet ad rationem debiti. Imò maius debitum, actiōque obligatio est Pietatis, siue iustitiæ patris erga filium; & vice versa, quam sit iustitiæ ciuilis, & simpliciter dictæ. Quod inde etiam colligimus, quia grauius censetur deliquisse filius, si in parentem impius & contumeliosus sit, quam si in alium ciuem iniurius, sicut notauit Mol. to. 1. tr. 1. de iust. disp. 7.

Secundum. Quod Aristot. dixit de pietate filij erga parentem, deficere nimirum à proprietate veræ iustitiæ;

idem nos dicere debemus de virtute Religionis erga Deum. Quamuis enim in nobis reperiatur perfectissima ratio debiti erga Deum; non tamen æqualitas, neque perfecta distinctio: Siquidem Dei opus, atque possessio sumus, eique æquiualens reddere haud possumus, sicuti Dauid indicat Psalm. 115. *Quid retribuam Domino pro omnibus, quæ retribuit mihi?* & explicat S. Thom. 2. 2. q. 80. a. 1.

Tertium, ex Soto lib. 3. q. 2. a. 4. Molina cit. disp. 7. 4. Vasq. p. 1. disp. 85. c. 5. Rebel. loc. cit. num. 25. contra Caiet. 2. 2. q. 57. a. 4. Iustum paternum, herile, ac Oeconomicum proprie se tantum extendunt ad ea bona, quæ filius patri; seruus domino; coniunx coniugi debent, quatenus tales personæ sunt: quod ad alia verò attinet bona, quæ inter se debent, v. g. ex aliquo contractu intercedente inter patrem ac filium emancipatum; vel etiam non emancipatum ex bonis eius castrensibus vel quasi castrensibus: item inter dominum ac seruum ex proprio peculio; & inter maritum & uxorem ex bonis paraphernis, &c. consistere potest iustum simpliciter: quandoquidem in istis se habent tanquam concines, & partes distinctæ, quibus status ille patris ac filij; domini ac serui: vel coniugum, accidentarius est. Qua simili ratione, si ciuis cum Republica siue Communitate sua celebret emptionis v. g. contractum, obligantur inter se secundum iustitiam particularem & proprie dictam: quia in eiusmodi contractu Republica non habet se vt totum, sed vt pars ad partem.

Porro exinde colligit Molina, si filius patrem in bonis temporalibus defraudet, peccare illum contra iustitiam simpliciter dictam: & non peccato impietatis, quo ius paternum violatur. Quare, inquit ille, *non tenetur filius confiteri furtum aut defraudationem factam fuisse patri: quoniam peccatum est eiusdem speciei, ac si aduersus alium factum fuisset; et quod defraudatio in bonis temporalibus sit facta patri, non aggrauat, sed extenuat culpam.* Quæ doctrina vt vera, & secum ipsa consentiens sit, duo ei addenda esse putò: Primò. Licet inter patrem & filium, quod attinet ad eiusmodi bona, sit iustum simpliciter: non tamen omnino perfectum, sicuti notauit Bannes 2. 2. q. 17. art. 4. Cum enim bona temporalia patris aliquo saltem modo ad filium pertinere censeantur: & vice versa, bona filij ad patrem, propter arctissimam inter eos tum naturalem, tum legalem coniunctionem: sequitur, cæteris paribus, non esse tam graue & tam perfectum peccatum iniustitiæ, si vnus alterum in bonis temporalibus defraudet: ideoque oriri quidem restituendi obligationem, sed plerumque non tam strictam, quam si defraudatio alteri personæ facta sit. Secundò. Pœnitens interdum debet exprimere, se à patre furatum esse: si nimirum talis circumstantia faciat esse peccatum tantum veniale, quod alioquin esset mortale: Idemque simili ratione dicendum de furtis, quæ inter coniuges fiunt: quamobrem neque in externo foro inter tales personas adeò coniunctas datur actio famosa furti: sed rerum annotarum, vt dicam infra tract. 3. p. 1. c. 1. q. 2.

## CAP. IV.

## De speciebus Iustitiæ particularis.

## S V M M A R I V M.

1. Duæ sunt species iustitiæ particularis: Vna commutativa, quæ proprie est ad alterum, seu personam distinctam. Altera iustitia distributiva, quæ non est omnino ad alterum, sed totius ad partem.



2. *Iustitia commutativa constituit perfectam, seu arithmeticam aequalitatem: distributiva vero aequalitatem geometricam seu proportionalem.*  
 3. *Iustitia vindicativa plurimum recedit a vera iustitiae proprietate.*

**D**uae sunt particularis iustitiae species, testante Aristot. 3. Ethic. c. 2. & S. Thom. q. 61. a. 2. & 3. Iustitia commutativa, & distributiva. Illa constituit iustum inter partes omnino distinctas, secundum aequalitatem rei datae ad rem acceptam: & dicitur commutativa, quia in commutationibus, & potissimum in contractibus occupatur. Haec constituit iustum inter totum & partes, secundum aequalitatem proportionum: & dicitur distributiva, quia occupatur in distributione communium bonorum, puta dignitatum, officiorum, &c. quae in Republica vacantia, vel abundantia, partibus Reipubl. pro cuiusque statu, ac meritis distribui debent.

Haec tamen divisio iustitiae non est in species uniuocas; sed analogas. Siquidem communis ratio ac proprietas iustitiae particularis magis reperitur in commutativa, quam distributiva. Primum, quia illa proprie est ad alterum, siue personam distinctam: haec non omnino ad alterum, sed totius ad partem: Pars autem non adaequat se totaliter a toto suo distinguitur.

Secundum: Illa respicit ius strictum, siue proprie debitum, haec autem ius, ac debitum late acceptum. Strictius enim, & magis proprium ius quisque habet ad petendam rem sibi debitam, v.g. ex contractu emptionis, mutui, alteriusve commutationis; quam habeat aliquis qui in Republica dignior est, ad petendam dignitatem, beneficium. Quare maior quoque & strictior est iniuria illa, per quam commutativa iustitia violatur; quippe quae sola obligationem restituendi annexam habet, ut infra dicam.

2. Tercio: Iustitia commutativa constituit medium simpliciter, videlicet perfectam & arithmeticam aequalitatem inter quantitatem rei acceptae, & rei datae: v.g. si aequum emi, atque accepi 20. fl. aestimatum, totidem dare debeo: & qui 30. furatus est, totidem restituere cogitur. Iustitia vero distributiva non constituit medium simpliciter, perfectam, inquam, & arithmeticam aequalitatem, qualis est inter duas quantitates, puta 20. & 20. Sed medium proportionum, quae est aequalitas geometrica: v.g. sicut se habent 4. ad 2. ita se habent 8. ad 4. Vtraque enim proportio dupla est. Sic enim in distributione communium bonorum aequitas siue iustitia postulat, ut eadem seu aequalis sit proportio inter bona distribuenda, qualis proportio est inter status siue dignitates personarum, quibus distributio facienda est. Veluti, si dignitas vnius personae duplo superet dignitatem personae alterius, duplo plus illi tribui debet, quam alteri. Quare si in distributione hostilium spoliatorum v.g. militi alterum dignitatis vel meritorum gradum obtinenti 10. aurei obuenerunt: necesse est, ut ei qui in 4. dignitatis ac meritorum gradu positus est, 20. aurei obueneant. Vide de hac re Rich. in 3. d. 33. a. 3. q. 1. & 4.

Iustitiae simpliciter dictae ac commutativae duplices sunt commutationes, & inde ortae obligationes, auctore Aristot. lib. 5. Ethic. c. 4. Aliae voluntariae, quae mutuo paciscentium consensu constituuntur. Aliae inuoluntariae, quae oriuntur ex delictis, quibus alteri iniusto damnum iniustum infertur furto, detractione, homicidio, de quibus infra tract. 3. Tamen si vero in hac posteriore specie iustitiae commutativae non semper ita appareat lacrum, sicut apparet damnum: (Nam qui alteri v.g. domum per iniuriam excussit, nihil lucri tulit, sed solum damnum intulit) nihil tamen hoc obstat his quae dicta sunt: quia nihilominus feruari potest aequalitas quasi cuiusdam commutationis; ut quantum

acceptum, aut quantum damni illa tum fuit, tantum dem restituatur, aut refarciatur.

Porro praeter has duas particularis iustitiae species, commutativam, & distributivam; tertia quaedam est iustitia vindicativa, similitudinem gerens cum commutativa: quandoquidem secundum quantitatem delicti, decernit & poenam, iuxta illud Deuteron. 25. *Pro mensura peccati, erit & plagarum modus.* Re ipsa autem plurimum deficit a proprietate, & solum ferme nomen iustitiae commune habet. Nam commutativae iustitiae proprium est, quod acceptum, vel damnum illatum fuit, ad aequalitatem reddere ac compensare: id vero vindicativa non praestat: siquidem poena, quae pro delicto infligitur, proprie non compensat, aut tollit delictum, vel damnum delicti.

## CAP. V.

## De iure Dominij &amp; rerum diuisione.

## S V M M A R I V M.

1. *Ius aliud est in re, ex quo oritur actio realis: aliud est ius ad rem, ex quo actio personalis nascitur.*
2. *Dominium aliud est iurisdictionis, & aliud proprietatis, idque definitur: Ius perfecte disponendi de re, nisi lege quis prohibeatur.*
3. *Sola substantiae intellectuales dominij capaces sunt.*
4. *Homo totius spectabilis mundi proprie dominus dici non potest.*
5. *Divisio rerum gentium iure introducta est: cum iure primario ac naturali communis esset rerum possessio, ac dominium.*
6. *Quod est iuris naturalis praeceptum, mutari non potest: secus si sit iuris naturalis permissum.*
7. *Ad acquisitionem dominij ordinariè duo requiruntur: titulus, & traditio.*  
*Titulus acquirendi dominij alius est verus: & alius bona fide praesumptus.*
8. *Quibusdam casibus solus titulus, sine traditione vel apprehensione, sufficit ad acquirendum dominium: non item ad possessionem.*
9. *Homines dominium tribus modis acquiri, siue seruitus constitui possunt: Vel enim nascuntur serui, vel sunt gentium iure per captiuitatem, aut civili iure per emptionem.*  
*Partus sequitur conditionem matris. Si tamen mater serua seu ancilla non sit, proles legitime nata participat nobilitatem & familiam patris.*
10. *Quod seruus acquirit, domino suo acquirit: nisi ea conditione datum sit, ut eius proprium maneat.*
11. *Serui fugere possunt a dominis suis, si in periculo animae apud ipsos versentur.*
12. *Ferae animantes sub nullius dominio sunt: ideo primo occupanti naturali iure acquiruntur.*
13. *Si Princeps ius venandi in locis publicis, iusto aliquo titulo, proprium sibi vendicat, alius meritis interdictis: sed venatores ob primam decreti praevencionem corporali poena afficere non potest.*
14. *Iniquus venator captarum ferarum dominium sibi acquirit: licet de damno illato in conscientiae foro teneatur.*
15. *Venatio clericis prohibita est, praesertim quae cum armis atque tumultu instituitur.*
16. *Si Princeps lege lata subditis venationem prohibeat, nulla interueniente pactione, aut remuneratione ipsorum, obligatus est ad damna cavenda, & illata ipsis refarcienda: secus, si per liberum populi consensum, vel simili titulo iusto Princeps ius venandi se proprium acquisierit.*
17. *Columbaria licita sunt, si leges & consuetudines loci observentur.*
18. *Cimes, siue in colle in communibus locis ligna cadentes contra Magistratus prohibitionem, obligantur ad poenam, si deprehendantur; non item ad restitutionem aliquam, nisi graue damnum dederint.*
19. *In publicis fluminibus non est licitum absque Principis consensu, molendinum edificare: in privatis autem seu propriis fluminibus id concessum: modo per novum molendinum antiquiori non auferatur commodum naturale, quod est aquae deflexus. Quae tamen iure consuetudo regionis attendenda.*
20. *Quod per alluvionem fundo Titij adiacet, ipsius fit: secus, si per vim fluminis repentina adiectio fiat.*
21. *Rerum dominium acquiritur nobis per specificationem, accessionem, confusionem, commixtionem, adificationem, implantationem, inscriptionem, pactionem.*
22. *Quae in mare iacta ob naufragij periculum, relinquendo crepta sunt, ea proprijs dominis restant debent, postulata laboris, & industriae.*



compensatione.

23. *Theſaurus in proprio fundo, vel in publico loco repertus ad inuentorem ſpectat: ſed in alieno fundo caſu inuentus, partim ad inuentorem partim ad fundi dominum pertinet.*
24. *Res inuentas, quarum dominus ignoratur, inuentor retinere, ac deum alſumere poteſt, ſi ſecundum probabilem ſententiam.*
25. *Bona vacantia ad ſiſtam deuoluntur, & quandoque in cauſas pias erogari debent: ſi videlicet peregrinus ignotus abſque teſtamento decedat.*

**N**otandum inter alias iuris acceptiones, cap. i. alias, vnam eſſe pro *legitima facultate aliquid agendi, obtinendi, diſponendi, vtendi, etc.* in quo ſi alterum abſque iuſta cauſa impediatur, iniuriam ipſi inferre cenſeris. Exempli gratia: Si ego ius habeo ex arbore fructus colligendi, iniuriam mihi inferit, qui abſque iuſta cauſa me impedit.

Ius ſecundum hanc acceptionem duplex eſt: Vnum *ius in re*, & alterum *ius ad rem*. Ius in re dicitur, quod tribuit actionem realem, quæ vocatur rei vindictio, lib. 6. tit. i. ff. Quale ius habet Dominus in mancipio, cane, domo, veſte ſua. Ius ad rem dicitur, ex quo deſcendit obligatio & actio perſonalis. Vocatur autem actio *perſonalis*, quia proximè tendit in perſonam nobis obligatam ex contractu, vel delicto; puta ex mutuo, venditione, furto, &c. Quamuis autem hæc actio ſit in ordine ad aliquid faciendum, & interdum ad rem aliquam tradendam, tamen cohæret perſonæ, ita vt contra alium rei poſſeſſorem inſtitui non poſſit: v. g. ſi mutuum dediſti Titio 100. aureos, quos ille Sempronio donauit & tradidit, hoc caſu actio perſonalis tibi contra Titium; nulla autem contra Sempronium competit, iuxta l. penult. C. de action. & obligat. iunct. §. omniū autem, Inſtit. de actionibus. Præterea emptor ex contractu emptionis ſolum agere poteſt aduerſus venditorem ad tradendam ſibi mercem, precio numerato: non item aduerſus aliam perſonam, in cuius manus ac poſſeſſionem res deuenit; niſi ipſi actio à venditore cedatur.

Actio autem realis dicitur, quia adhæret rei, eamque inſequitur, adeo, vt in cuiuſcunque poſſeſſionem res nobis obligata deuenit, ab eodem reſciſci ſeu vindicari poſſit, l. officium, ff. de rei vindicta. Hæc actio realis variis modis competere poteſt: Primò & potiſſimum ratione dominij directi, l. in rem, ff. de rei vindicta. ſiue illud cum vſufructu coniunctum ſit, ſiue ſeparatum, vt ex mox dicendis conſtabit.

Secundò, ratione dominij vtilis, puta vaſallo, & emphyteutæ competit rei vindictio vtilis, l. i. iunct. Gloſ. ff. Si ager vectigalis, &c.

Tertiò ratione quaſi dominij, Publiciana in rem actio competit illi, qui cum titulo, & bona fide à non domino rem acceptam non omnino vſucepit: is enim Prætoriam æquitatem vindicare eam poteſt ab altero poſſeſſore; niſi exceptione ſe defendat, quòd legitimus rei dominus exiſtat: vel niſi & ipſe cum titulo non vtiſe rem poſſideat, tunc enim melior eſt conditio poſſidentis. Vide tit. ff. de Publiciana in rem actione, & §. ſed iſta quidem, Inſtit. de actionibus.

Quartò ratione ſeruitutis, competit Confeſſoria in rem actio illi, qui conſtitetur ſeu præſtendit ſeruitutem ſibi in re alterius competere, videlicet vt per alium fundum ire, aut curius agere poſſit. Huic eſt diametro opponitur actio negatoria, per quam negamus alteri in re noſtra ſeruitutem debere, niſi eam demonſtret. quare Inſtit. de actionibus, §. æquè, vbi Ioan. Faber annotauit; Confeſſoriam in rem actionem non ſolum pro ſeruitutibus, ſed ſimili ratione pro alijs incorporalibus iuribus competere poſſe: vt ſi quis me impediatur recipere decimas, alioſve mihi debitas redditus ex re alterius; vel vti iuriſdictione, iure præſentationis, iure paſcuorum, quod mihi debetur.

Quintò ratione pignoris ſeu hypothecæ, competit actio Seruiana, per quam locator contra quemuis poſſeſſorem agit ad res, quæ à conductore ſcienter in rem locatam, ita vt perpetuo illic eſſent, inuectæ aut illatæ, ſibi que pro penſione & rei deterioratione tacitè obligatæ ſunt. Cui affinis eſt actio quaſi Seruiana, ſeu hypothecaria, per quam creditores pignora ſua & hypothecas perſequentur, §. Item Seruiana, & quaſi Seruiana, Inſtit. de action. Dicta eſt autem Seruiana actio à Seruio Prætor Romano, qui eius auctor erat; ſicuti Publiciana à Publicio Prætor appellata fuit: cui ſimilis ferme eſt Paulina, ſeu Pauliana actio à Paulo Iureconſulto ita vocata, per quam creditores res in fraudem alienatas à poſſeſſoribus reſciſſione eius quod actum eſt, reuocant: ſiquidem & hæc realis actio eſt reſpectu poſſeſſorum, à quibus res alienatæ reuocantur, §. item ſi quis, Inſtit. eod.

Hæc iuris, & inde ortæ actionis, diuiſio ideo hoc loco à nobis breuiter ob oculos poſita eſt; quia dominium, de quo ex propoſito agemus, eſt ſpecies potiſſimæ iuris in rem; vnde propriè dicta actio realis, ſeu vindictio rei naſcitur.

Dominij vocem plerique à nomine *domus* deriuant: dominus enim dicitur qui familiæ præeſt. Petrus autem Gregor. Tholoſanus lib. i. Syntagm. cap. 12. num. 2. non congruè à verbo *domo* deducit: quia dominus vniuerſim is dicitur, qui aliquid ſibi ſubiectum habet: & dominium latè ſumptum deſignari poteſt, *facultas diſponendi de aliquare, tanquam ſibi ſubiecta*.

Duplex eſt dominium: Vnum *iuriſdictionis*, de quo dixi lib. i. tract. 4. cap. 5. Alterum dominium *propriæ*, quod ſolum huc pertinet: eſt enim, vt dixi, ſpecies præcipua iuris in re. Nam dominus ius habet in mancipio, equo, veſte ſua; vt iis vti, ea alienare, & vno verbo, ſuo arbitratu de ijs agere ac diſponere poſſit, niſi ſpeciali lege prohibeatur. Porro id notum eſt, quòd ius in re latius pateat, quàm dominium. Nam pignoris v. g. aut hypothecæ ius reale eſt, licet dominium rei ad alterum ſpectet.

Bartolus in l. ſi quis vi, §. differentia, ff. de acquir. poſſeſſione, ita deſinit dominium: *Eſt ius perfectè diſponendi de re corporali, niſi lege prohibeatur*. Dicitur *ius*, id eſt, facultas, ſiue poteſtas. *Perfectè diſponendi de re*. Quia Bartolo propoſitum fuit deſcribere dominium plenum, ſiue perfectum: cuius duæ quaſi integrantes partes ſunt; videlicet dominium *directum* ſiue *nuda proprietas*, & dominium *vile* ſiue *uſuſfructus*. Nam rei proprietatem interdum ab vſuſfructu ſeparari, manifeſtum eſt in feudo, emphyteuſi, item in bonis aduentitijs liberorum, &c. de quibus ſuo loco. Eſt verò merus proprietas, id eſt, ad quæ ſola proprietas ſpectat, rei dominus abſolutè appellari ſoleat; Bartolo tamen placuit dominium non niſi plenum ac integrum, quod ex directo & vtili compoſitum eſt, deſignare.

*Corporali*. Nam rerum alix corporales ſunt, alix incorporales, ſicut conſtat ex tit. Inſtit. de rebus corporalibus & incorporalibus. Corporales ſunt, quæ ſuapte natura tangi poſſunt, veluti fundus, homo, veſtis, aurum. Incorporales ſunt, quæ tangi non poſſunt: cuiusmodi ſunt ea, quæ in iure conſiſtunt, vt ius hæreditatis, vſuſfructus, ius eligendi, ius præſentandi. Itaque Bartolus cenſuit rerum incorporaliū, id eſt, iurium, non eſſe propriè dictū dominium, ſed quaſi dominium; ſicut nec propriè poſſeſſionē, ſed quaſi poſſeſſionē. Data opera dixi, *id eſt iurium*. Non enim negaſſet Bartolus, Deo Opt. Maximo, ratione creationis ac conſeruationis, perfectiſſimum & maximè independens dominium in omnes, etiam incorporeas creaturas, competere: verum ad propoſitum illius non pertinebat de diuino dominio agere; ſed ſolum de humano & politico.



*Nisi lege prohibeatur.* Nam interdum lex, etsi ab aliquo non auferat ipsum dominium, seu ius primum ac radicale disponendi de re sua, impedit tamen, ac veluti ligat exercitium siue vsum dominij. Quod aliis verbis dici potest; relinquere actum primum dominij, & auferre actum secundum. Ita enim v.g. pupillus, quamvis bonorum suorum dominus sit, tamen ea arbitrato suo alienare non potest, quamdiu sub tutoribus est, sicuti notauit Apostolus ad Galat. 4. & videri potest Maior in 4. distict. 15. quæst. 11. dub. vltim. Nauar. comment. 1. de Regul. num. 12. Victoria relect. de Indis, part. 1. num. 20. Et bona maioratus seu primogenituræ verum dominium habent; etsi interdum vincula sint, id est, lege aliqua, vel dispositione testatoris prohibita alienari, vt semper ad primum familiæ caput deuoluantur.

3 **QVÆSTIO PRIMA.** Quodnam sit subiectum dominij? Respondeo; Solæ intellectuales substantiæ dominij capaces sunt. Probat. Dominium est facultas de realiqua suo arbitrato disponendi. Talis autem facultas sine intellectu & libertate arbitrij haud consistit. Ergo, &c. Hinc scriptum legimus cap. 1. Genes. *Faciamus hominem ad imaginem & similitudinem nostram, ut præsit piscibus maris, bestijs terræ, &c.* Quibus verbis causa redditur, cur homini dominium in bruta animantia competere possit, quia conditus est ad similitudinem Dei, quæ posita est in intellectu, & voluntatis libertate.

Corollarium. Bruta dominium non habent super terræ gramina, quibus pascuntur: neque qui ea prohibet, iniuriam ipsis infert, sed eorum domino. Vide S. Tho. iuncto Caiet. 2. 2. q. 66. a. 1. Victoriam l. c.

4 **QVÆSTIO SECUNDA.** Virum homo totius huius mundi corporei dominus verè ac propriè dici possit? Respondeo cum Less. lib. 2. cap. 4. dub. 8. Rebello quæst. 7. prælud. sect. 5. Vniuersim ita dici non posse. Nam earum rerum aliquis dominus est, de quibus arbitrato suo disponere potest. Atqui curus cælorum, astrorum, nubium, &c. imperio ac libertati hominis subiectus non est: Ego horum dominus verè dici non potest. Volatilium autem cæli, & piscium maris, ferarumque terrestrium animantium licet homo in statu innocentie dominus extiterit, iuxta verba Gen. cap. 1. *Dominium piscibus maris, et volatilibus cæli, & vniuersis animantibus quæ mouentur super terram;* (quamobrem rectè docet S. Thom. 1. part. quæst. 96. a. 1. ad 3. ea naturaliter instincta homini in illo statu obediunt fuisse; sicuti grænes ducem sequuntur, & apes regi obediunt) post lapsum tamen in peccatum, homini in feras propriè dominium non competit; sed tantum remotè, ac quasi dominium, quatenus ius habet eas capiendi, occidendi. Cum igitur S. Thom. cit. quæst. 96. art. 2. & 2. 2. quæst. 66. art. 1. vniuersim ait, *homini naturale dominium super ceteras creaturas (corporeas) competere;* dominij nomen latè accipit, pro subiectione siue subordinatione rationis finis: omnes enim reliquas corporeas substantias in hominis gratiam, vtilitatèque à Deo conditas esse, ipse rerum conditarum ordo ac dispositio aperte demonstrat. Quare & Aristot. dixit. 2. Phys. tex. 23. *Summum enim & non quodammodo finis, puta rerum aspectuum & corporearum.* Dicit autem quodammodo, quia vniuersam vltimus ac simpliciter dictus est, De v. s.

Porro hoc loco non agimus de Christo, qui quatenus homo, diuinitati hypostaticè vnitus, potestatem & dominium super omnes res creatas, ideòque super vniuersum mundum, & omnia eius regna à Patre cœlesti accepit, iuxta illud Matth. 28. *Da est mihi omnis potestas in cælo, & in terra.* Ioan. 13. *Omnia dedit ei Pater in manus.* Et Apost. 1. ad Corinth. 15. de Christo ait: *Omnia subiecit sub pedibus eius, &c.* sine dubio præter eum, qui subiecit ei omnia. Et ad Hebr. 1. *Quem constituit heredem vni-*

*uersorum.* Quamuis per hoc dominium Christi vniuersale, nihil decedat dominio particulari aliorum hominum. Vide Mol. t. 1. tract. 2. disp. 28.

**QVÆSTIO TERTIA.** Quo iure rerum diuisiones ac proprietates institutæ sint? Respondeo; Gentium iure institutas fuisse. Nam, vt Isidorus testatur in c. ius naturale, d. 1. & S. Thom. 2. 2. q. 66. a. 2. ad 1. iure naturali ac primæuo communis erat rerum possessio, atque dominium: neque etiam credibile est, homines rerum sibi à Deo communiter donatarum diuisionem aliquam institutos fuisse, nisi in peccatum lapsi fuissent. Siquidem in statu innocentie admodum felici, summæque hominum inter se concordia, nulla poterat esse causa siue necessitas diuidendi: atque per se decens, & ad humani generis dignitatem ac magnificentiam magis pertinens est, vt huius mundi bona communiter possideantur. Verum in statu naturæ lapsæ, quando terra spinas & tribulos germinabat, nisi hominum labore coleretur: homines verò ad laborem segnes, & sæpe debiles: insuper pluribus cupiditatibus atque insatiabili rerum desiderio æstuantes erant: omnibus gentibus expedire visum fuit, ad communem egestatem, animorum dissensiones, atque alia cauenda mala, rerum diuisiones ac proprietates instituere. Quare statim Gen. 4. legimus, Abel & Cain propria peculia habuisse, & obtulisse Deo de primogenitis gregis sui. Atque in hunc modum explicari debet, quod refertur tanquam Clementis Romani dictum in c. dilectissimis, 12. q. 1. *Omnis usus omnium, quæ sunt in hoc mundo, omnibus hominibus communis esse debuit: sed per iniquitatem (occasionem præbente iniquitate primorum parentum) alius dixit hoc esse suum, alius illud.* Videri potest Ioan. Maior in 4. d. 15. q. 10.

Corollarium. Cum in quibusdam Regularium Communitatibus partim Prælatorum vigilantia, partim subditorum virtute ac obedientia fieri possit, ac soleat, vt mala omnia declinentur, quæ alioquin ex communi rerum dominio & possessione oriuntur: ideo etiam hodie expedit, atque ad maiorem status perfectionem confert, vt commune inter eos maneat bonorum dominium, sine vlla singulorum proprietate.

Nunc obiectio soluenda est, quæ à multis proponitur. Quæ iuris naturalis sunt, hominum potestate ac iure tolli vel mutari non possunt, sicut constat ex Clem. pastoralis, de re iudic. prope finem, &c. super eo, de vsuris, & docet S. Thom. 1. 2. q. 94. a. 5. Atqui communis rerum possessio & dominium, iuris primæui ac naturalis est, vt dixi. Ergo hominum potestate, seu gentium iure tolli non potuit. Respondeo, cum S. Thom. cit. a. 5. ad 3. & 2. 2. q. 66. a. 2. ad 1. Duobus modis aliquid esse potest de iure naturali: videlicet præceptiuè, & permissiuè. Illud dicitur esse de iure naturali præceptiuè, cuius opposito ius naturale resistit, ideòque humana lege statui non potest. Sic v.g. lex naturalis præcipit, ius suum cuique reddendum, parentes honorandos esse: cuius oppositum nulla lege, vel hominum consuetudine decerni potest. Illud verò dicitur de iure naturali permissiuè, cuius opposito ius naturale non resistit, quamuis etiam illud non statuat: sed permittat hominum voluntate superaddi. Naturam enim lex & ars perficit. Simili quodam modo dici potest, nuditatem esse homini naturalem non præceptiuè, sed permissiuè: quia natura hominem non vestit: nec vetat tamen, sed permittit hominè ab arte vestiri: Ita etiam lignum à natura nudum & informe procreatur, formabile tamen per artem. Eadem proflus ratione rerum communio naturalis iuris est non præceptiuè, sed permissiuè: ideòque rerum diuisio ac proprietas, licet à natura lege non sit, non tamen est contra naturæ legem. Vide etiam Scotum in 4. d. 15. q. 2. art. 1. Nau. in c. ita quæ-



rundam, Gloss. penult. num. 7. de Iudais, Felicianum de Solis lib. 1. de censibus, cap. 1. num. 7.

Sed instabit aliquis: Ante rerum diuisionem, gentium placito introductam, ius naturale præcepit, neminem prohibendum esse ab apprehensione & vsu quarumcunque rerum, quibus indigebat: Post diuisionem autem ius naturale desijt ita præcipere: Ergo ius etiam præceptum lege humana mutatum fuit. Respondeo concedendo antecedens, & distinguendo consequens: Ius naturale mutatum non est, neque vnquam mutari potest per se, ac directè, ita vt nulla facta mutatione in obiecto, eius obligatio immutetur, aut desinat. At verò nihil prohibet ius naturale, eiusque obligationem mutari, ac desinere indirectè, & per accidens; si videlicet appositæ aliqua circumstantia, mutatio fiat in obiecto, sicuti explicat Molin. tom. 1. tract. 2. disput. 20. conclus. 2. Quemadmodum enim visionem, & cuiusque potentia actum suapte natura mutari necesse est, facta mutatione in eius obiecto; ita etiam mirum non est, si lex naturæ, conscientia, siue dictamen rationis nostræ varietur, facta appositione, aut variatione in obiecto illius. Sic v. g. lex naturalis dicitur, bonæ fidei possessori, postquam intellexit rem à se possessam alterius esse, eidem restituendam: desinit tamen ita dictare, accedente lege humana vscapionis, quæ boni publici causa, post certi temporis decursum, dominium rei possessori adiudicat. Item lex naturalis, præcisè spectata, præcipit matrimonium mutuo maris ac fœminæ consensu, licet clam celebratum; & voluntatem defuncti duobus v. g. aut tribus testibus confirmatam, seruari oportere: desinit autem ita præcipere, posteaquam publica potestate eiusmodi contractus, vel testamentum iusta de causa infirmatum fuit. Quare de re vide quæ doctè differit Adrianus in 4. de sacram. matrim. q. 1. §. Ad rationes.

Pariigitur modo, stante ab initio rerum communione, ius naturale dictabat, neminem prohibendum esse ab apprehensione & vsu rerum, quibus indigebat. Introducta autem rerum proprietate, adeoque facta mutatione in obiecto, iam ius naturale contrarium dictat; videlicet furti iniuriam committere eum, qui, extra extremæ necessitatis casum, rem aliquam accipit, inuito illo, ad quem propriè pertinet. Vide Suarez lib. 2. de legibus, cap. 14. Rebel. quæst. 2. prælud. sect. 3. & 4.

Veruntamen à rerum diuisione ac proprietate excipiendus in primis est casus necessitatis extremæ, si aliquis ad vitam sustentandam, seu à morte liberandam re aliqua indigeat. Nam rerum diuisio gentium iure aliter introduci non potuit, nisi excluso hoc casu. Quare dici solet; *In extrema necessitate omnia communia esse.*

Præterea in rerum diuisione gentium iure instituta; quædam omnium consensu ac placito communia manserunt, de quibus tit. Institut. de rerum diuisione: videlicet aer, imber, & littora maris. Nemo igitur ad litus maris accedere prohibetur: Flumina item omnia, ac portus publica siue communia sunt: quare in his nauigandi, piscandi ius ius omnibus commune est. Riparum quoque vsus publicus est, gentium iure: adeoque naues ad eas appellere, funes arboribus religare, onus in his reponere cuiuslibet. Quamuis eiusmodi iura propria fieri per præscriptionem temporis immemorialis, docent DD. l. ult. ff. de vscap. cap.

Vniuersitatis, & non singulorum sunt, quæ in ciuitatibus sunt theatra, stadia & his similia. Denique nullius sunt res sacræ & religiosæ: quod enim *aiunt iuris est, id in nullius hominis bonis est.* Fera item bestia, (vt volucres, ac pisces) nullius sunt: sed simul atque ab aliquo captæ fuerint, iure gentium ipsius esse inci-

piunt. *Quod enim ante nullius est, id naturali ratione occupanti conceditur.*

QUESTIO QUARTA. Quænam ad acquisitionem domini seu pleni, seu non pleni requirantur? Respondeo. Ordinariè duo requiruntur; titulus, ac traditio: quorum neutrum per se solum sufficit, sicut constat ex l. 20. Cod. de pactis: *Traditionibus & vscapionibus dominia rerum; non nudis pactis transferuntur.* Et l. 31. ff. de acquirendo rerum dominio: *Nunquam nuda traditio transfert dominium; sed ita, si venditio, aut aliqua iusta causa præcesserit*, propter quem traditio sequeretur.

Titulus dicitur, quod est velut radix, origo, siue ratio fundandi dominium: v. g. emptio est titulus, id est, iusta causa comparandi dominium mercis: & legitima electio ad regnum, vel beneficium Ecclesiasticum, est titulus, siue iusta causa acquirendi dominium regni, vel quasi dominium beneficii. Cæterum, per titulum ordinariè acquiritur tantum ius ad rem, atque actio personalis: quare, vt etiam acquiratur ius in re, siue dominium, in super requiritur traditio, atque apprehensio rei.

Titulus acquirendi domini alius verus est, cuius exempla supra dedi. Alius præsumptus, qualis est in rei alienæ bonæ fidei emptore, donatario: Possident enim rem ex præsumpto titulo donationis, emptionis: siue, vt iura loquuntur, pro donato, empto, existimantes donatorem, vel venditorem fuisse rei dominum, cui proinde alienandi ius competeret. Porro, qui absque titulo tam vero, quam præsumpto, rem possidet, tanquam suam, is malæ fidei possessor dicitur.

In quibusdam verò casibus solus titulus, sine traditione apprehensioneve, ad transferendum dominium sufficit: I. Sola collatione & acceptatione (quæ inter absentes etiam fieri potest) acquiritur ius in re, & quasi dominium beneficii Ecclesiastici, ante eius apprehensionem, iuxta cap. si tibi absenti, de præbend. in 6. II. Sola aditione, siue acceptatione hæreditatis acquirit hæres dominium bonorum defuncti, ante eorum apprehensionem ac possessionem, l. cum hæres, ff. de acquirend. possessione. Quod si verò aliquid legatum sit in specie indeterminatum, v. g. 100. aurei, vel sex vini plaustra: tunc legatario conceditur actio hypothecaria, ob realem obligationem quam habet in bonis defuncti, vt ex ijs legatum sibi solvatur, ad quemcunque possessorem deveniant, iuxta l. 1. Cod. communia de legatis, & docent Doctores communiter apud Molin. tom. 1. tract. 2. disput. 3. §. quando verò. III. Legatarius alicuius rei determinatæ, cum primùm hæres hæreditatem adiit, rei legatæ dominium acquirit, iuxta l. si tibi homo, §. cum seruus, ff. de legatis 1. & l. à Titio, ff. de furtis. IV. Si alicui donatio facta sit sub modo seu conditione, vt donatori alimenta præstentur: donatarius autem conditionem implere negligat, dominium rei donatæ absque traditione reuertitur ad donatorem, vt à quouis possessore eam vindicare possit, iuxta l. 1. Cod. de donationibus, quæ sub modo. V. Ex titulo donationis, venditionis, aliõve simili, ante traditionem acquiritur dominium ciuitatibus, Ecclesiis, aliisque pijs locis, ob speciale priuilegium l. ult. Cod. de sacrosanctis Ecclesiis. Quare si fundus v. g. Ecclesiæ venditus, vel donatus, postea alteri vendatur, ac tradatur, Ecclesiæ competit rei vindicatio aduersus posteriorem emptorem: quippe cui nullum ius domini in re emptæ, cum præiudicio Ecclesiæ, acquisitum fuit, sicut ex communi docet Couar. lib. 2. resol. c. 19. num. 2.

Denique certum esse debet, Principem donatione, feudi concessione, &c. posse, si velit, in donatarium rei dominium transferre, absque eius traditione, vel



apprehensione: quamuis, si id non exprimat, secundum communes leges donatio facta censeretur debet, sicuti annotauit idem Couar. num. 3. Aduerte tamen, licet in dictis casibus dominium rei acquiratur ante apprehensionem; non tamen acquiri eiusdem possessionem, sicuti constat ex cit. l. cum heredes; ubi generalis regula statuitur, quod *possessio, nisi naturaliter apprehensa sit, ad nos non pertinet*. Nam, ut dicitur in l. naturaliter, ff. de acquirend. poss. *nihil commune habet proprietas cum possessione*. Fieri enim potest, ac saepe solet, hunc quidem esse verum rei dominum; alium verò possessorem: quia dominium iuris est; possessio magis facti, ut infra dicam. Atque hanc doctrinam leges in Gloss. l. ultim. Cod. de sacrosanctis Ecclesijs, ver. in rem, & apud Andream Gall. lib. 2. obser. 152. num. 9.

9 **QVÆSTIO QUINTA.** Quibus modis hominis dominium alteri acquiri, seu seruitus personæ constitui possit? Respondeo ex Institut. tit. de iure personarum, §. penultimo. Tribus potissimum modis: Velenim nascuntur serui; vel fiunt, Nascuntur ex ancillis: Fiunt vel iure gentium per captiuitatem; vel iure civili per emptionem.

Primus igitur titulus comparandi dominium hominis est *conditio natiuitatis*. Pro qua re regula traditur in l. partum, Cod. de rei vindicat. Quod *partus sequitur ventrem*, seu *condiçionem matris*; adeò, ut non considerato statu patris, ex serua seruus, ex libera liber nascatur, sicuti constat ex tit. Institut. de Ingeniis, cap. 1. de seruis non ordinandis, & cap. vnic. de natis ex libero ventre. Idemque indicauit Apostolus ad Galatas 4. Agar, quæ erat ancilla Abraham, in seruitutem generalis, siue filios non liberos Abraham procreasse. Ratio huius gentium constitutionis est, tum quia mater ancilla propter partum subtrahitur seruitio domini, & saepe mortis periculo exponitur; quare æquum est, ut pro hoc damno, vel periculo damni, partus eius ad dominum ancillæ spectet, iuxta iuris regulam §. in 6. *Qui sentit onus sentire debet commodum*, & *contra*. Quamuis ob fauorem libertatis statutum sit, ut siue mater solo tempore conceptionis, siue tempore natiuitatis, siue intermedio, libera aut libertati donata extiterit, proles ingenua ex ea nascatur, Institut. de ingenuis, §. sufficit.

Quod verò attinet ad honores, nobilitatem, & familiam, proles legitimè nata sequitur conditionem patris, l. cum legitimæ, ff. de statu hominum. Dummodo mater serua, siue ancilla non sit: cum enim ex ea natus seruus sit, ut supra dictum; non est capax civilis nobilitatis, aut dignitatis. Quia, quod attinet ad ius civile, *serui pronullis habentur*, regul. 33. ff. Existimat tamen Sanchez lib. 7. disput. 24. num. 4. Natum ex patre nobili, & matre ancilla, postquam libertati redditus est, patris nobilitatem recuperare; quasi nobilitatis status, quem iure sanguinis à patre traxit, per seruitutem non sit omnino extinctus, sed interim sopitus: quod licet probabile ac pium sit, tamen neque lege decretum, nec consuetudine receptum videtur.

Alter titulus *captiuitatis* est. Nam gentium iure mancipia, seu manu capti in bello iusto, capientium *serui* efficiuntur; ideo sic dicti, quod illos, cum occidere domini possent, seruare maluerunt, §. serui, Institut. de iure personarum. Verum per consuetudinem temporis diuturnitate stabilitam inter Christianos receptum est, ut si ipsi inter se bellum gerant, capti capientium serui non efficiantur. Vide etiam quæ dixi libro secundo, tractatu tertio, cap. 12. numero 16.

Tertius titulus est *emptionis ac venditionis*, de quo dicam infra hoc lib. tractat. 4. cap. 17. num. 18. His verò adijci potest alius titulus, quo dominium in hominem

alteri acquiri potest; videlicet, sententia Magistratus, qua aliquis ob delictum, tali pœna dignum, in seruitutem alterius redigitur. De quo vide Molin. tom. 1. tract. 2. disp. 33. §. secundus titulus. & Gabr. in 4. distinct. 15. q. 5. notab. 3.

Porro ius dominij in seruos extendit se ad omnes eorum operas, fructus, & reliqua emolumenta; ut quæcunque seruus acquirit, domino suo acquirat, sicuti constat ex §. 1. Institut. de his qui sui vel alieni iuris sunt. Præterquam, si quid seruo, ea expressa vel tacita conditione donatum aut relictum sit, ut eius proprium maneat: Vel si ipsemet dominus seruo aliquid tali modo donauit, vel aliter cum eo, ut homo quidam, pactus est, id naturali iure, atque in conscientia foro obseruari debet, sicuti docet Molin. disput. 38. in fine, Sanchez libro 7. disput. 24. num. 24. & colligitur ex l. is qui, ff. de manumissionibus. Præterea, licet iure antiquo Gentilium, domini in seruos suos vitæ, necisque potestatem haberent, id tamen meritò correctum, statutumque in l. 1. ff. & Institut. tit. de his qui sui, vel alieni iuris sunt; Ut qui sine iusta causa proprium seruum occiderit, perinde puniatur, ac si alienum occidisset: sed & maior asperitas, seu sœuitia dominorum in seruos impunita non maneret.

Multò verò minùs potestas domini in seruum extendit se ad interiora animæ, vel spirituales eius salutem: quare rectè docuit S. Anton. part. 3. tit. 3. cap. 6. §. 7. Gabr. in 4. distinct. 15. quæst. 3. art. 2. dub. 3. Molin. cit. disp. 38. Seruo licitum esse à domino suo aufugere, si per eius malitiam in periculo mortaliter peccandi constituat; neque obligari ad reuertendum, dum periculum tale perdurat. Et Syluest. ver. furtum, quæst. 6. Nauar. cap. 17. num. 103. Molin. tract. 2. disp. 37. §. ab hac conclusione, annotarunt; licet bello iusto captis, & ob pœnam in seruitutem redactis, secundum multorum sententiam fugere non liceat, excipiendum tamen esse, nisi captiuus, v. g. fidelis, iuste captus ab infidelibus, apud eos de salute periclitaretur: quamuis etiam hoc casu fugiens aliam illis compensationem facere deberet, si posset; præterquam, si ab eis quoque vicissim iniuriam accepisset, ut deficiente legitimo Iudice, qui ipsi ius dicat, ipsemet iniuriam cum iniuria, modò ea æqualis sit, compensare possit. Vide tamen, quæ dixi libro præcedenti, tractat. 3. cap. 12. numero 16.

Porro seruorum nomine hic non comprehenduntur serui originarij, seu ascriptitij, quia licet hi speciem quandam seruitutis gerant; propriè tamen serui non sunt, sed homines liberi, sicuti inter alios notauit Gabr. in 4. distinct. 15. quæst. 5. art. 2. conclus. 5. Quare neque ab actibus legitimis repelluntur: quamuis ad ordines non admittantur, sine consensu domini, uti dixi lib. 1. tract. ult. c. 8. num. 2. Neque à dominis suis vendi possunt: & quæ operis suis lucrantur, sibi, non domino acquirunt.

**QVÆSTIO SEXTA.** Quomodo animantium, præsertim ferarum, dominium acquiratur, & retineatur? Respondeo. Inter animantes quædam suapte natura mansuetæ sunt, ut canes, &c. Et hæc tametsi longius à conspectu abscesserunt, aut fugerunt; emortuarum quoque carnes, pelles, & quidquid ex eis reliquum fuit, ad proprios dominos pertinet, iuxta l. Pomponius, ff. familia herciscundæ, & §. Gallinarum, Institut. de rerum diuisione. Quædam suapte natura feræ sunt: quarum aliquæ assuetudine cicurantur: ut cerui, columbæ, accipitres. Et hæc ad proprium dominum spectant, dum animum & consuetudinem ad ipsum reuertendi retinent, vel custodia eius coercentur. Postea verò quàm reuerti desierint, ad naturalem feritatem, libertatèque rediisse censentur, & fiunt primò occupantis. Eademque ratio est de apum examine, spectato communi



iure. Aliæ autem feræ sunt, quæ cicurari non possunt, vt apri, pisces, & pleraque autum genera: quorum dominium quisque acquirit capiendõ; retinet verò, quamdiu ipsius custodia coërcetur, vt cerui in vinariis, apes in alueariis, pisces in lacubus, aues in cauernis. Postea verò quàm in naturalem libertatem se receperunt, vt earum consecutio difficilis sit, desinunt esse illius, & primò occupanti cedunt, nisi loci consuetudine aliter obseruetur. Videri potest Gloss. in §. singulorum, Institut. de rerum diuisione.

His adde, si custodia, qua feræ conclusæ continentur, magnæ vastitatis sit, & magis natura loci, quàm hominum industria constituta, vt sunt cerui in saltibus, pisces in stagnis, aut riuus, ideòque illorum captura difficilis, & dubia existat, tunc feras manere in naturali libertate, atque ad nullius dominium spectare, vt habetur in l. 3. §. itē. ff. de acquirend. possess. & tradit Couarr. reg. peccatum, part. 2. §. 8. num. 15. Molin. tom. 1. tract. 2. disput. 41. Quare qui feras per iniuriā extrahit, propriè furtum non committit, sed iniustum damnum, ad cuius compensationem obligatur, & in foro externo, inspecta qualitate facti, puniri solet.

Illud dubitatum est, si fera bestia ab vno vulnerata, ab altero capta sit, vter eius dominus existat? Iureconsulto in l. naturalem, §. illud quæsitum, ff. de acquirend. rerum dominio, visum est, pertinere ad capientem, & non ad vulnerantem: quia multa accidere possunt, vt eam, qui vulnerauit, non capiat. Ex qua responsione colligunt DD. Mol. disp. 42. Less. lib. 2. c. 5. dub. 10. Si fera tale vulnus accepisset, vt certò constaret, percussoris manus effugere non posse, eidem tradendam esse: sin autem dubiam sit, inter vtrumque diuidendam, secundum dubij proportionem.

Simile dubium est. Si vnus anilaqueum tetendit, alter extrahit, ad vtrum pertineat? Ad extrahentem respondet Nauar. c. 17. n. 176. Couar. reg. peccatum, p. 2. §. 8. n. 13. Sed rectius Sa ver. venatio. Mol. l. c. restituendam esse ei, qui laqueum posuit, si certò eam capturus fuisset, nisi alter prauenisset. Habet enim ius extrahendi aue, qui proprio eam laqueo irretiuit. Quamuis in externo foro aliter fortasse iudicabitur, propter sententiā Proculi in laqueu, ff. de acquir. reru dominio.

13 Porro ferarum animantium venatio, iure aliquo gentium omnibus concessa, duplici ex capite illicita efficitur: Primò. Si Princeps iusto aliquo titulo, tale ius vt proprium acquisiuit; puta quia populus ab initio liberè consensit, vel quia iusto bello victus, per modum pœnæ iure venandi priuatus est. Secundò, si à temporis vetustate, cuius initij memoria nulla extat, ius venandi in locis publicis Princeps, vel Magistratus sibi proprium vendicauit: tunc alij iniuriam inferunt, & iustè puniri possunt, qui contra ius & decretum Principis venari præsumunt.

Quanam autem pœna in eiusmodi venatores iustè decerni possit, disputant Doctores. Respondeo, & dico primò. Venatores ob primam decreti prauiticationem, pœna corporali affici non possunt, sed alia mitiore. Ita Sotus lib. 4. de iust. q. 6. a. 4. Syl. ver. venatio, in fine, Nau. c. 17. n. 120. Mol. l. c. tr. 2. disp. 46. in fine Andr. Fachin. p. 1. controu. iuris, lib. 1. controu. 1. Ratio est, quia crimen per se tam graue non est, vt tam magnam pœnā mereatur. Nisi fortè iniquus venator Principis insuper venatoribus, aliisue Officialibus mortem minatus, & minas exequi paratus fuerit: nam hoc casu multum eius delictum aggrauatur.

Dico II. Si crimen non semel, sed sæpius commissum, ac frequentatum sit, vt magna temeritas, contumacia, & quasi contemptus legis appareat, pœna corporali affici poterit criminolus. Ita docet Fachin. concl. 4. & indicat Nau. l. c. & confirmat praxis multorum Magistratū. Nam crimina repetita grauius punienda esse, no-

tant Gl. & DD. in l. 3. c. de Episcopaliaudientia.

Dico III. Iniquus tamen venator in conscientia foro 14 non tenetur captas feras, ante Iudicis sententiā. Principi restituere: quandoquidem earum, in locis publicis sub nullius potestate existentium, per captionem dominium acquisiuit. Ita docet ex cōmuni Sotus l. c. Maior in 4. d. 15. q. 10. Si certò circa hanc quæstionem. Medina de rebus restituendis, q. 12. ad 2. Couar. regula peccatum, p. 2. §. 8. n. 11. Mol. disp. 51. Lopez p. 1. instruct. c. 148. cōcl. 3. Pet. Nau. l. 3. de restit. c. 1. num. 283. Vasq. de restit. c. 5. §. 2. dub. 6. Nihilominus tenetur de damno ilato. Quare si nullū aliud damnum iniquus venator intulit, quàm quodd vnicum v. g. ceruum sclopo traiecit, in conscientia foro non obligatur ad integrum corpus, eiusue pretium restituendū. cum valde incertū sit, vtrū Princeps ceruum hunc aliquando capturus fuisset: sed restituere debet, quantum moraliter æstimatur spes, siue ius capiendi huius cerui, quo Principem priuauit, sicut rectè norat Couar. cit. n. 11. §. præterea, Medina cit. q. 12. ad 3. §. vnum tamen; Pet. Nau. cit. c. 1. n. 298. Mol. l. supra cit. Eademque ratio est de captura piscium in fluminibus, vel stagnis, contra ius alterius.

Porro non omni ex parte placet, quod docet Less. l. 2. c. 5. dub. 9. n. 44. Venari in loco publico, venationi Principum iustè assignato, esse peccatum veniale; nisi graue damnum inferatur, capiendõ feras multas, aut pretiosas, vel reddendo eas fugaces, vt difficilis postea capturæ existant. Si enim ius in loco publico venandi soli Principi competit, sequitur venationem alterius esse iniustam, siue peccatum contra iustitiam; ex genere suo mortale: ipsaque iniuria hæc, seu violatio iuris Principi competentis, magni æstimari solet. Vide quæ dixi lib. 1. tr. 4. c. 14. n. 3.

Obijcies contra dicta. Nemo per actionē iniuriosam ius sibi acquirit: Atqui venatio, de qua supra egimus, est iniuriosa Principi. Ergo per eam iniquo venatori nō acquiritur ius in captā feram. Respondeo, maiorem venam esse, si actio, per quam ius acquiri debeat, formaliter & intrinsecè sit iniuriosa: implicat enim contradictionem, vt acquisitione iniusta, quod iustum est, acquiratur, falsam autem esse maiorem, si actio sit extrinsecè tantum iniuriosa, & non quatenus formaliter acquisitiua huius iuris. Exempla plura adduci possunt: Si enim vi aliquē iniusta adigas ad vendendum tibi equum, iniustus est ex parte tua contractus; & tamen validus, si quæ emptioni, & venditioni substantialia, adsint, videlicet mutuus consensus in mercem pro pretio, sicuti ex probabiliori dixi l. 1. tr. 2. c. 6. n. 8. Itē si Princeps iusta de causa prohibeat, ne quisquā frumentum, v. g. pro exercitu aduectū, emat, præter milites, iniusta est emptio frumenti ab alio celebrata, & tamen valida: modò Principi animus non fuerit emptores intrinsecè inhabiles reddere ad emptionē; sed tantū extrinsecè ius ipsi emēdi adimere: quemadmodū etiā in nostro casu Magistratus ita aliis priuatis ius venandi interdicit, vt tamen non velit eos incapaces reddere acquisitionis dominij ferarum.

Secundò prohibita est venatio Ecclesiasticis personis 15 in c. quorundā, d. 34. c. 1. de clerico venat. & Tridēt. sess. 24. c. 12. de reform. Quod præcipuè intelligi debet, si venatio instituat cū armis, tumultu, canū clamore, sicuti notant Abbas, & alij Canonistæ in cit. c. 1. Ratio est: Tū quia talis venatio per se dedecet statum clericalem; tū quia à grauioribus spiritualibus occupationibus auocat, populūq; scandalū præbet, præsertim si frequenter fiat. Aiant verò Caiet. ver. clericorum peccata, Abb. l. c. Mol. disp. 44. Rebell. q. 14. Prælud. f. 2. n. 10. Sa ver. venatio, n. 4. §. clericis; Ex sola causa venationis, & nisi aliud adiunctum sit, non esse facilè clericum damnandum mortalis peccati. Imò, spectatis circumstantiis loci, personarum, fieri potest, vt omni culpa vacet venatio rara, & moderata à clerico



etiam cum canibus instituta; vel necessitatis, vel exercitij causa. de quo vide Abb. in cit. c. 1. de clerico venatore, Syl. ver. venatio, Maiorem in 4. d. 15. q. 14. Medinam cit. q. 12. de restit. Valentiam t. 3. disp. 5. q. 6. p. 1. q. 8. Rebllum, & Sa ll. ec. Lessium dub. 9. n. 40. Porro Religiosos adhuc magis venatio dedecet, eisque prohibita est in Clem. 1. de statu Monach. §. porro.

Quæstio septima. Vtrum Magnates, qui ius venandi feras proprium sibi vendicant, debeant cauere damna, quæ ex ferarum multiplicatione subditorum agris inferuntur, ad eorumque compensationem in conscientia obligentur? Pro solutione notandum, variis titulis ius venandi in locis alioquin communibus alicui vt proprium competere posse. Primus est, Per legem latam iusta de causa, qualis etiam est recreatio Principis: modò prohibitio non sit generalis, seu extendens se ad omnia loca: talis enim lex inhumana esset, & noxia subditis, si eorum consensus & renuntiatio non accedat, sicuti docet Medina C. de restit. q. 12. Rebll. p. 1. lib. 1. q. 14. f. 2. Less. lib. 2. c. 5. n. 35. Azor p. 3. instit. moral. lib. 5. c. 16. q. 1. in fine. Porro talem legem venationis prohibitoriam ferre inter Regalia computatur; id est, inter ea, quæ soli Principi, seu Superiorem non agnoscanti competunt: iisque, quibus Princeps tale ius priuilegij loco concesserit: cui addi debet præscriptio immemorialis, quippe quæ priuilegij instar censetur.

Alter titulus est, Spontaneus consensus populi, ius omne venandi feras Principi concedentis: siue id fiat gratis, ac liberaliter; siue titulo oneroso, quia v. g. Princeps subditis in compensationem huius iuris partem tributis, aut grauaminum remittit, vti annotauit Mol. to. 1. tr. 2. disp. 47. paulò post principium, Medina cit. q. 12. ver. Sed nec negandum.

Tertius titulus est, Belli iusti: Si Princeps, seu Rex prouinciam aliquam iustè occupauit, atque subegit, & expulsis, aut bonorum confiscatione punitis incolis, terras illas inter bene meritos distribuit, vel in feudum, aut emphyteusim concessit, reseruato sibi iure venandi feras in eisdem terris. Quæ de re idem Mol. cit. disp. 47. ver. Item si.

16 Nunc respondeo, & dico. I. Si Princeps lege lata subditis prohibeat, ne in locis communibus, aut ipsorum propriis venentur, nullo interueniente pacto aut renuntiatione subditorum; hoc casu obligatus est ad cauenda damna, vel si quæ inferuntur, ad eorundem compensationem. Hæc est communis sententia, quam docet Caiet in tr. 17. responsionum, resp. 12. dub. 5. vbi ait: *Licet Principes possint prohibere venationes ferarum, non tamen possunt prohibere in damnum aliorum: imò tenentur ad restitutionem de damnis, quæ inferuntur, quia non permittunt alios venari: sicuti habens bouem cornupetam, et non prouidens, tenetur de danis subsecutis. Ex quo patet, inquit, quid debeant facere Confessarij Principum: cum enim iniustitia sit peccatum mortale ex genere suo, & statutum hoc sit iniquum, non debent ipsos absolueri, nisi desistant à peccato.* Et Gabr. in 4. sentent. d. 15. q. 5. a. 2. concl. 5. corol. 2. *Prohibens subditis, ne de possessionibus suis feras, fructus depascentes expellat, fugando, etià occidendo causa defensionis, tenetur ad damnorum illatorum restitutionem. Patet; Quia naturali iure cõpedit cuilibet defensorerum suarum, etià contra homines iniuriantes: ergo magis contra feras; maxime illas, quæ in nullius sunt bonis, & naturali ratione occupanti cõceduntur.* Idem docent Couar. reg. peccatum, p. 2. §. 8. num. 10. Andr. Gaill. lib. 2. obser. 68. n. 10. Molina, Rebllus, Azor, Less. ll. suprà citatis.

Dico II. Si Princeps per liberum populi consensum seu renuntiationem, ius venandi acquisiuit, non tenetur ex iustitia cauere damna, neque illata compensare, quæ ex ferarum multiplicatione proueniunt: multòque minus ad talia obligatur, si ius venandi Princeps habuit,

aut sibi reseruauit, antequàm terras inter suos distribuit, aut in feudum, vel emphyteusim concessit. Ita expressè docet Mol. cit. disp. 47. & Less. cit. c. 5. dub. 7. n. 37. Ratio est: Quia hoc ipso, quòd Principi ex concessione, aut quacunque dispositione ius venandi propriè competit, eo vti, vel non vti potest sine cuiusquam iniuria, iuxta reg. 198. ff. *Nemo damnum facit, nisi qui id fecit, quod facere ius non habet.*

Hanc tamen doctrinam arbitror limitandam esse primò; Nisi fama, præsertim consuetudine, firmata sit, quòd populus ius venandi Principi proprium reliquerit, ea lege, vt damna arceat, vel illata resarciat.

Secundò: Nisi immodica damna subditis passim inferantur; ad quæ sustinenda non est credibile populum consensisse. Accedit, quòd id publicum damnum censi debet, cuius impediendi, vel auertendi obligatio Principiante omnia incumbit.

Tertiò: Nisi appareat, populum subiectum alioquin valde grauari tributis, aliisque oneribus; vt accedentibus eiusmodi damnis, quæ à feris inferuntur, meritò conqueri possint. Ratio est: Quia hæc seruitus, quam populus patitur, vt in locis communibus, vel ipsorum propriis feras capere ipsis non liceat; est veluti pars tributis, quod Principi pendunt: ergo necesse est, vel non nimis eos aliis tributis grauari; vel seruitutem & damnum, quod ex iure venationis Principi concessio patiuntur, eisdem imminui.

Quæres primò. Quid de hac re in terris Imperij sentiendū? Respondeo, & dico I. Valde credibile est, quòd ius venandi maiores feras Imperatori, aliisque Magnatibus, quibus ipse concesserit, à prima Imperij origine pleno iure competat, sine obligatione resarciendi damna, si quæ ex multiplicatione ferarum subditis inferuntur. Quandoquidem nulla est memoria, aut indicium alicuius legis primitus latæ, quæ venatio incolis prohibita fuerit; sed à tempore immemoriali, ac perpetuo hoc ius venandi aliis interdictum inter specialia priuilegia numerabatur. Dummodo limitationes considerentur suprà positæ; videl. vt non immodica damna, & cū boni publici detrimento subditis inferantur, ad quæ auertenda Charitatis lege, imò etiam ex Iustitia obligatur Princeps, tanquàm Communitatis curâ gerens: Et vt subditi aliis oneribus non nimis grauentur; ita, vt si hoc etiam seruitutis genus accedat, onus eis intolerabile fiat.

Quæres secundò: Quodnam immodicū damnum in hoc casu censi debeat? Respondeo: Tunc damnum incolarum immodicū censi, & à Principe tollendū, quando consideratis omnibus circumstantiis, & habita boni publici ratione, non tanti æstimanda est Principis recreatio, quam ex multiplicatione ferarum capit, vt propter eam permittenda sint damna multorum subditorum, quæ ipsis inferuntur; seu quòd feræ arua eorum depascantur, seu quòd pretio custodes alere debeant.

Multò verò magis subditi tutandi sunt, ne damna ab vrsis, lupis, & aliis noxiis animalibus patiantur. Profectò non video, quo iure prohiberi possint, quo minus pecora sua contra incursum noxiarum bestiarum defendant, etiam occidendo, si opus esse videatur. Quamuis id discerni possit, vt non vnus solus agricola ad occidendum egrediatur; sed vnà cum aliis incolis, adhibitis etiam venatoribus Principis: dummodo illi adesse non morerentur; & non (vt interdum fieri solet) de industria differant, cum iniusta vexatione subditorum.

Quæstio octaua. Quid de columbariis sentiendum? 17 Respondent Doctores cõmuniter, Caiet. ver. columbariū, Sa eod. n. 1. Syl. ver. restit. 3. q. 4. Salon 2. 2. q. 62. a. 3. contr. vlt. Nauar. c. 17. n. 126. Mol. disp. 48. Less. c. 5. dub. 6. n. 29. contra Maiorem in 4. d. 15. q. 28. §. Tertiò principaliter; Ea licita esse; quamuis certum sit, colambas tempore iacti seminis, ac messis, granatritici ex agris alienis auferre. Ratio est:



Quia apud omnes ferme gentes, sine vicinorum quere-  
rela, perimuntur: sine ob simplicitatem columba-  
rum, nec ipse erectas decerpentium, nec semina ter-  
re obruta deuorantium; sed quae in propatulo iacent, &  
alioquin peritura sunt: siue quia segetibus etiam com-  
modum adferunt, quando mala semina auferunt, ex  
quibus lolia, & aliae noxiae herbae nascerentur.

Ceterum postquam columbae ad columbarium re-  
cedendi consuetudinem amiserunt, atque in naturalem  
libertatem se receperunt, sunt primo occupantis: Ve-  
luti si alterius columbis se aggregauerunt, & in eiusdem  
columbarium inuolant. Ate autem, vel fraude ad  
se attrahere alienas columbas furti species est, ad restita-  
tionem obligans, sicuti notauit Med. cit. q. 12. Couar.  
reg. peccatum, p. 2. §. 8. n. 14. Sa n. 2. Quamquam in his,  
& similibus imprimis inspicienda est loci consuetudo;  
& quid leges columbariorum exigant, vel permit-  
tant.

18 **Quaestio nona.** Quid dicendum de pascuis, & siluis  
caeduis? Respondeo, cum Soto lib. 4. de iust. q. 6. a. 4.  
Salon cit. q. 62. a. 3. contr. 1. Angles in floribus lib. 4.  
sent. p. 2. q. de cadentibus ligna. Mol. disp. 58. Lessio  
dub. 14. Rebello q. 15. Vel ea ad Communitatem per-  
tinent, vel ad dominum particularem. Si prius, qui-  
cunque e Communitate sunt, iis frui possunt, nisi Ma-  
gistratus iusta de causa prohibeat: Tunc vero, si subdi-  
ti contra legis decretum ligna caedant, vel pascua de-  
pascant, puniri possunt deprehensi: sed ante Iudicis  
sententiam ad nullam restitutionem obligantur: neque  
lethaliter peccare censendi sunt; praeterquam si graue  
damnum dederunt, ut concuiibus debita lignorum  
portio notabiliter minuatur. Eademque ratio est de  
iure venandi, si Communitati competat, sed a Magi-  
stratu certo loco, aut tempore prohibeatur. Qua de  
re vide Rebello q. 14. praelud. 13. Valq. de restit. c. 5. §. 3.  
dub. 1. Alij vero qui ex ea Communitate non sunt, si  
ligna caedant, pascua depascant, furti crimen commit-  
tunt, & restituere debent. Excusari tamen per con-  
suetudinem, & tacitum consensum videntur ij Oppi-  
dani tam a culpa mortali, quam a restituendi onere;  
qui cum oppida, & siluas vicinas habeant, vicissim ce-  
dere solent, cum obligatione soluendae mulctae, si in  
caedendo deprehendantur; dummodo tamen extraor-  
dinarium damnum non inferant, ut supra etiam dixi de  
ciuibus.

Si autem silua, vel pascua priuata sint, vel ad domi-  
num particularem spectantia, tunc nemini alius absque  
furti crimine illis frui potest: Eademque ratione ex lo-  
cis dominorum circumseptis, puta viuariis, piscinis,  
&c. feras extrahere, & capere, furti crimen est, unde  
tantundem restituendi obligatio contrahitur. Notan-  
dum vero est ex Couar. in pract. qq. c. 37. quod in du-  
bio ius pascendi censetur pertinere ad Communitatem;  
non ad dominum ciuitatis, &c. quandoquidem nomi-  
ne iurisdictionis non comprehenditur ius pascendi: po-  
test tamen dominus pascuis publicis uti, sicuti alij e  
Communitate; nisi diuturna consuetudine, aut praes-  
criptione aliud introductum sit.

19 **Quaestio decima.** Quid de molendinis sentiendum,  
an de nouo cuilibet aedificare liceat? Respondeo. In  
publicis fluminibus non est licitum aedificare molendi-  
num, aut aliud aedificium, ne videlicet impediatur usus  
publicus navigationis: sicuti neque in via, aut alio lo-  
co publico aedificare fas est, absque Principis consen-  
su, uti constat ex l. 1. 2. §. si quis a Principe, ff. Ne quid  
in loco publico. In priuatis vero, aut propriis flumi-  
nibus cuilibet permissum est molendinum construere:  
cum quilibet in proprio fundo, etiam cum alterius dam-  
no, aedificare possit; modò id faciat principaliter, ut li-  
bi proficiat, non ut alteri noceat, l. fluminum, §. vlt. iun-  
ct. l. seq. ff. de damno infecto, & explicant Bartolus &

Iason in l. quo minus, ff. de fluminibus.

Sed limitari debet primò; Nisi per nouum molendi-  
num auferatur priori & antiquiori commodum natu-  
rale, ac necessarium molendi, quod est aqua, argum.  
l. si manifestè C. de feruit. & aqua, ubi Bartolus ait:  
quod in aquae ductu antiqua consuetudo seruanda est. Cæ-  
terum in commodum illud, quod ex noui molendini  
constructione sequetur, ut ad antiquiora molendina  
pauciores homines frumenta deferant, in aestimatione  
esse non debet: cum cuilibet liberum sit frumentum  
suum deferre ad quemcunque voluerit: & expedit ple-  
rumque communi bono plura esse molendina, ad vi-  
tandas fraudes, & vexationes hominum malorum.

Limita secundò: Nisi regionis consuetudo probi-  
beat, ne nouum molendinum cum praedicio seu dam-  
no aliorum aedificetur: tunc pristini molitores probi-  
bere poterunt aedificationem, si ostendant exinde sibi  
damnum euenturum, ut docet idem Iason in cit. l. quo  
minus, n. 28. Sebastianus Medices de nouation. in ver.  
molendinū. Verum stante etiam consuetudine non aedi-  
ficandi nouum molendinum, potest tamen quilibet in  
suo solo extruere molendinum pro proprio tantum fru-  
mento molendo: deriuata etiam aqua ex proprio flumi-  
ne: nam ex publico deriuare non potest sine Principis  
licentia. Deinde stante illa consuetudine non aedifican-  
di nouum molendinum cum praedicio alterius, potest  
tamen pristinum transferri in locum commodiorem  
fluminis. Quod tamen iterum limitari potest, nisi no-  
uis riuus deriuatis, cum variis aquarum dilapsibus, mo-  
lendinum extruatur in aliorum magnum praediciū:  
nam hoc casu veluti noua forma molendini censetur.

**Quaestio undecima.** Quomodo per alluionem domi-  
nium acquiri possit? Respondet Gaius in l. adeo, §. 1. ff.  
de acqui. rerum dominio. Quod per alluionem agro no-  
stro flumen adycit, iure gentium nobis acquiritur. Per allu-  
uionem autem id videtur adyci, quod ita paulatim ady-  
citur, ut intelligere non possimus, quantum quoquo momento  
temporis adyciatur.

Alia vero ratio est, si vis fluminis repentina partem ali-  
quam de tuo praedio detraxerit, & meo praedio, attulerit;  
palam est, inquit Gaius, eam tuam permanere. Id tamen  
limitari debet: Si pars adiecta longiore tempore fundo meo  
haeserit; arboresque, quas secum traxerit, in meum fundum  
radices egerint, ex eo tempore videtur meo fundo acquisita  
esse, cit. l. adeo, §. plane, & §. praeterea, Instit. de rerum  
diuisione.

**Quaestio duodecima.** Quomodo dominium rerum  
acquiratur per specificationem seu formationem, per  
accessionem, confusionem, commixtionem, in aedifica-  
tionem, implantationem, scriptionem, pictionem?  
Respondeo ex I. C. Gaio in cit. l. adeo, §. cum quis, &  
seqq. & dico I. Si quis ex aliena materia speciem fece-  
rit, refert, utrum species ad materiam reuerti possit: an  
non possit. Primo casu pertinebit ad dominum mate-  
riae, v. g. ex tuo argento a me fabricatus scyphus, tuus  
erit. Altero casu, ad eum spectabit, qui rem formauit:  
v. g. qui ex lana vestem, ex uuis vinum, ex olitiis oleum  
confecit. Requiritur tamen, ut bona fide alienam rem  
adhibuerit, existimans suam esse: si enim mala fide egit,  
res a pristino domino vindicari poterit, l. de eo, §. si quis,  
ff. ad exhibendum, & videri potest Gl. in §. Cum ex alie-  
na, ver. ab aliquo, Instit. de rerum diuisione.

Dico II. Si quid ornatus causa alteri rei adjiciatur,  
licet pretiosius sit, quam id cui adjicitur, accessionis  
iure acquiritur domino rei, cui adiectio est facta: v. g. si  
purpura vestimenta intextatur, aut margaritae auro inse-  
rantur, etsi non sunt, §. perueniamus, ff. de auro & ar-  
gento legato. Ratio est, quia accessorium sequi congruit  
naturam principalis, reg. 28. in 6. Succurritur tamen do-  
mino gemmae, v. g. concessa illi actione ad exhiben-  
dum anulum, ut excludatur gemma. Alia vero ratio est



de tigno alienis ædibus iuncto; quod eximi non debet, ne publicis ædificiorum deformatur aspectus, §. cum in suo, Instit. de rerum diuis. & l. gemma, ff. ad exhibendum. Videri potest Gl. §. si tamen, ver. pretiosior, Instit. de rerum diuisione.

Dico III. Si duorum dominorum materiæ, vtriusque consensu, aut casu, confusæ fuerunt, totum corpus ipsis commune efficitur, cit. l. adeo, §. voluntas. & Instit. de rerum diuis. §. si duorum. Veluti si qui vina sua confuderint, aut massas argenti, vel auri conflauerint: si ex vino & melle mulsum, ex auro & argento electrum factum sit. Cæterum si, quæ casu confusa sunt, facile separari possunt, v. g. plumbum ab argento, in rem actio dabitur, l. Idem Pomponius, §. sed si plumbum, ff. de rei vindicatione.

Dico IV. Si duorum dominorum corpora commisceantur, v. g. frumenta; refert, vtrum amborum voluntate fiat, tunc communicata censentur; an sine voluntate eorum, tunc singulis competet in rem actio, quatenus apparet, aut Iudex re cognita arbitrari poterit, in illo acervo cuiusque esse, cit. l. Idem Pomponius, princ. Eademque ratio est, si greges ouium permisceantur. Differt autem commixtio à confusione; quod in illa, corpora separata inter se manent secundum substantiam; in hac corpora in vnum coeunt, §. Quod si frumentum, Instit. de rerum diuisione.

Dico V. Si quis in suo solo ex aliena materia ædificauerit, dominus sit ædificij: quia omne, quod solo inædificatur, solo cedit. Veruntamen diruto ædificio, materiæ dominus tam vindicare poterit, nisi antea ipsi pro materia satisfactum fuerat. Ita habetur cit. l. adeo, §. cum in suo, & Instit. de rerum diuis. §. Cum in suo. Contrà verò, si quis in alieno solo suâ materiâ ædificauerit, illius erit ædificium, cuius & solum est. Distinguendum verò hoc casu, vtrum sciens solum alienum esse, in eo ædificauerit, an nesciens. Si primum, nihil repetere in externo foro potest, etsi domus diruatur; quia aut donasse, aut temere ædificasse censetur: excepto, si ea re negotium absentis vtiliter gesserit. Sin autem secundum, bona fides non patitur, vt soli dominus cum alterius inædificantis detrimento locupletetur: quamobrem pretium materiæ, & mercedes fabricum soluere cogetur, cit. l. adeo, §. ex diuerso.

Dico VI. Sicuti ædificia solo cedunt; ita multò magis plantæ, & arbores: cum à terra sustententur, alimentum, vitam, & incrementum trahant. Quare qui alienam plantam in suo solo posuerit, eaque radices egerit, ipsius sit planta, cuius & solum est. E contrario, si quis suam plantam in Titij solum transtulerit, posteaquam ea radices egerit, ad Titij dominium spectabit, l. adeo, §. vlt. ff. de acquir. dominio, & §. si Titius, Instit. de rerum diuis. Estimationem tamen plantæ, atque impensi laboris mercedem repetere potest, qui in alieno agro, v. g. frumenta conseruit; præsertim si bona fide id factum, l. quæ ratione, ff. de acquir. rerum dominio.

Corollarium. Si arbor prope confinium posita, in duorum dominorum fundos radices egerit, communis erit, cit. §. vlt. in fine. Cæterum si arbor in vnius fundo posita, in alterius vicinum fundum radices aliquas miserit, eius erit arbor, in cuius fundo origo, & plantatio est, l. si plures §. vlt. ff. arborum furtim cæsarum. Sed alter, si cognouerit, impendentes ramos arboris alienæ suis ædibus, aut horto officere, denuntiare poterit, vt succidatur; si dominus arboris neglexerit, ipsemet qui damnum ex arbore patitur, totam succidere, & ligna tollere non prohibetur, cit. ff. de arboribus cædendis.

Porro si dubitetur, vtrum arbor, vel planta radices egerit, necne; item vtrum fundo vicino nocumentum afferre censetur; standum erit arbitrio rusticorum,

quippe qui in genere agriculturæ præ aliis peritiam habere censentur. Ita sumitur ex l. septimo, ff. de statu hominum.

Dico VII. Literæ, licet aureæ sint, chartis, vel membranis cedunt; sicuti solo cedere solent ea, quæ inædificantur, vel inseruntur. Quare si in charta Titij historiam scribas, eius corporis Titius dominus fiet. Impensas tamen scripturæ soluere tibi debet, si bona fide scripseras, l. quæ ratione, §. literæ, ff. de acquir. dominio. §. literæ, Instit. de rerum diuisione. Cæterum si quis in aliena tabula pinxerit, tabula picturæ cedit. Quia quod minus principale est, sequi debet id, quod est principalius: pictura autem plerumque pretiosa est, tabula vilis: ergo non picturam tabulæ, sed tabulam picturæ cedere conuenit, l. cit. quæ ratione, §. sed non, & Instit. de rerum diuis. §. si quis in aliena. Quare si accedat tabulam esse pretiosam, v. g. argenteam, auream; pictura præsertim minus pretiosa, in accessionem tabulæ veniet.

Præterea, si picturam cuiusque rei, quamuis viliori, adieceris, eius ornandæ causa; vt si super alicuius mensa Herculem depiixeris, pictura mensæ cedit: quia eius veluti gratiâ adiecta est, vt ornatio fieret. Ita enim colligitur ex doctrina Celsi in l. etsi non sunt, §. perueniamus, ff. de auro, argento, & c. legato. *Semper cum querimus, quid cui cedat, illud spectamus, quid cuius rei ornanda causa adhibetur: vt accessio cedat principali; intellige secundum intentionem operantis. Cedant igitur gemma phialis, vel lancibus, inclusa auro, argenteo: sed & in coronis, mensarum gemma coronis cedens; & ha mensis.*

Corollarium. Cum hodie chartæ, & membranæ vili præcio sint, ideo existimandum est, eas plerumque cedere scripturæ, quæ pluris æstimatur. Neque enim scripturam ornandæ chartæ causa adhibemus: sed vt mur charta tanquam subiecto, scripturæ gratia. Veruntamen qui in aliena charta, aut membrana scripsit, eius pretium soluere debet: alioquin doli exceptione repellatur, si membranam sibi vindicet. Ita annotauit Gl. in cit. l. quæ ratione, §. Aduersus, ff. de acquir. dominio. Quia vt Paulus I. C. ait, l. in rem, §. sed & id, ff. de rei vindicat. *In omnibus istis, in quibus meares per prædialentiam, alienam rem trahit, eademque efficit, si eam rem vindicem, per exceptionem doli mali cogat pretium eius, quod accesserit, dare.*

Quæstio decimatertia. Quomodo acquiratur dominium rerum inuentarum? Respondeo ex doctrina S. Thom. 2. 2. quæst. 66. art. 5. ad 2. & 3. Res inuentæ triplicis generis sunt: Aliquæ, quæ nunquam dominum habuerunt, vt insula mari nata, gemmæ, & lapilli in maris littore: & hæc primò occupantis fiunt. Quod enim antè nullius est, naturali iure occupanti conceditur, l. adeo, §. insula, ff. de acquir. rerum dominio. Porro de alueo derelicto à flumine, cum ad aliam partem fluere cœperit; item de insula in flumine nata, respondit idem Gaius cit. §. Insula, & §. quoddam sitoto, ff. eod. ad eos pertinere, qui prope ripam prædia possident, pro modo latitudinis cuiusque prædij. Venæ tamen metallicæ, & lapidicinæ, quæ in proprio fundo natæ sunt, ad fundi dominum iure gentium, & seclusa speciali consuetudine, aut lege, spectant. Quæ de re vide Gabrielem in 4. d. 15. q. 3. a. 3. dub. 7. Ludou. Molinam t. 1. tr. 2. disp. 54. Less. c. 5. dub. 12.

Aliæ verò res inuentæ sunt, quæ dominum habuerunt, nunc autem domino carent; vel quia pro derelictis habentur, vt Principum missilia, merces in mare iactæ, sine animo & spe recuperandi, iuxta l. falsus, §. si iactum, ff. de furtis. Item thesaurus dudum repositus, cuius dominus, eius hæredes mortui, vel incogniti sunt. Hæc enim omnia, gentium iure, primo occupanti cedunt.



22 Ceterum, quod attinet ad mercium iactum ob naufragij periculum, nisi ex circumstantiis probabilis praesumptio fieri possit, eas pro derelictis habitas; puta, quia dominus longè abscellit, neque reuersurus, iactumque requisitus putatur: vel si praesens, cum facillè recuperare possit, dissimulat, & contemnere videtur: tali, inquam, cessante praesumptione, res omnes à naufragantibus iactae, aut amissae, eisdem restituendae sunt; nihil obstante, quòd eas nunquam recuperatū fuisse, nisi alter singulari industria, cum vitæ etiam periculo, ab interitu vindicasset, sicuti constat ex s. alia sanè, Instit. de rerum diuisione, & docet Abbas c. si dilecti, num. 11. de accusat. Caiet. to. 2. tr. 8. opuscul. de vsuris, quæst. 1. Maior in 4. d. 15. quæst. 28. Pet. Nauar. lib. 4. cap. 1. num. 54. contra Mart. Nau. cap. 17. man. num. 68. Eademque ratio est de iis, quæ incendio eripiuntur, vel hostium direptione liberantur. Ratio vero est manifesta: Quia dominus rei suæ dominium non amittit, nisi consentiat, siue eam pro derelicta habeat, sicuti bene explicat Gabr. cit. loco dub. 6. & 7. Compensationem tamen laboris sui, æstimationemque periculi iure exigere potest, qui domini negotium ita utiliter gessit; & interea, dum offertur, veluti pignoris loco rem retinere. Videri potest Mol. disp. 55. Rebell. q. 15. Præclud. 2. Lessius c. 5. dub. 18.

23 Quod verò attinet ad thesaurum, definitur ex l. vii. C. de thesauris lib. 10 & s. thesauros, de rerum diuis. Vetus depositio pecuniæ, vel similis rei, vt de eius depositione, & dominio nulla cognitio, seu memoria extet. Is inuentus, spectato solo naturali, & gentium iure, ad inuentorem spectat; cum in nullius alterius dominio sit. Verùm secundum ius Cæsareum ita distinguere oportet: Si in proprio fundo thesaurus reperiatur, ad inuentorem spectat; nisi arte magica quaesitus sit; tunc enim in pœnam criminis, fisco adiudicabitur per Iudicis sententiam, vt rectè notat Nau. c. 17. man. n. 175. Si verò in alieno fundo thesaurus casu inuentus sit, (v.g. à mercenario conducto vt in terra tua fodiat, aliâ quâ thesauri querendi causâ) partim ad inuentorē, partim ad fundi dominū pertinet: quæ constitutio, cum pœnalis non sit, sed secundū equitatem naturalem lata, in cōscientia obligare videtur ante Iudicis sententiā, teste Caiet. 2. 2. q. 66. a. 5. ad 2. Nau. l. c. Couar. reg. peccatum, p. 3. §. 2. n. 3. Mol. disp. 56. Less. c. 5. dub. 15. Vasq. de restit. c. 5. §. 4. n. 30. Vel denique de industria, & non sine iniuria aliqua in fundo alieno sine consensu domini inuentus est, & totus ad dominum spectare debet: quamuis hanc partem constitutionis pœnalem esse, ideòque quoad dimidiam thesauri inuenti partem, non obligare, dicant Lessius l. c. Rebell. cit. f. 2. n. 13.

Quòd si sciens in alieno agro thesaurum, reconditum esse, agrum emas perinde, eodémque pretio, ac si nihil in eo reconditum sit, nullam venditori ignoranti iniuriam facies, dominiumque eruti postea thesauri tibi comparabis. Quod colligitur ex verbis Christi apud S. Matth. c. 13. & docet S. Thom. cit. art. 5. ad 2. Sotus lib. 5. quæst. 3. art. 3. ad 2. Nauar. c. 17. n. 175. Molina disp. 56. & alij communiter. Cum enim thesaurus in fundo non natus, sed positus fuerit; ideò pars siue fructus fundi non censetur; neque ad dominum alicuius pertinere, antequam eruat: erutus autem à Domino fundi, eidem mox acquiritur. Cum ergo emptor post traditionem fundi dominus existat; ius habet & erudiendi, & dominium sibi acquirendi latentis in eo thesauri.

Insuper duo annotanda sunt: Primum, ex Nau. cit. n. 175. Nomine thesauri, vt supra dictum, intelligi verterem depositionem, seu potius defossionem pecuniæ, vel similis rei: quare si quis aurum in terræ superficie, vel in angulo aliquo domus reperiatur, quamuis dudum

ibi positum videatur, non est propriè thesaurus; ideòque ad inuentorem spectabit, si dominus, vel hæredes eius ignorentur. Item, si incolæ metu bellinuper defodientes pecuniam, vel similia, ea deserant; eruta non censi debent thesaurus, de quo loquimur: quare vel propriis dominis restitui; vel si iustum contra illos bellum geratur, militi inuentori prædæ instar cedere debent.

Præterea si quis alteri vestem v.g. vendat, in qua aurum repositum latuit, emptor postea reperiens aurum non efficitur eius dominus; sed ei, qui posuit, vel hæredibus restituere debet: cum in venditionis contractum non venerit aurum propter ignoracionem, vt habetur in l. à tutore, ff. de rei vindicat. Sed esto emptor triennio cum bona fide possederit, nesciens aurum absconditum esse; dici nequit, eum præscriptiōe dominium acquisiuisse. Is enim, qui nescit, non possidet aurum, quamuis possideat vestem, in qua est aurum, vt in simili ait Iureconsult. in l. 3. §. Neratius, ff. de acquir. possess. Sine possessione autem nulla est vsucapio.

Alterum ex Couar. cit. §. 2. n. Lessius dub. 16. Valde probabile esse, si thesaurus reperiatur in loco publico, id est, ad nullius speciale dominium pertinente, quamuis pertineat ad dominium iurisdictionis alicuius Principis, aut Magistratus: vel ad administrationem Ecclesiæ: puta, si in loco sacro, seu religioso inuentus sit, totum pertinere ad inuentorem: sicuti de loco sacro habetur in §. thesauros, Instit. de rerum diuisione. Vide tamen, si placet, Legistas in l. 3. §. si in locis, ff. de iure fisci.

Restant aliæ res inuentæ, quæ bona incerta dicuntur, quorum dominus etsi non procul abesse credatur, tamen inculparè ignoratur: v.g. locus plenus a gento publica via repertus. De quibus est communis Doctorum sententia S. Thom. 2. 2. q. 66. a. 5. ad 2. Palud. in 4. dist. 15. q. 2. a. 5. Abb. in c. si dilecti, num. 12. de accusat. Maior. in 4. d. 15. q. 28. Syl. ver. restitutio, 8. q. 2. & ver. inuentum, q. 1. num. 2. Caiet. ver. fuitum, ad finem, Nauar. c. 17. num. 171. Medina de restit. q. 3. casu 10. Couar. reg. peccatum, p. 3. §. 1. num. 2. Mol. tom. 3. poster. tract. 2. disp. 746. Si earum dominus, post diligentem inquisitionem, non compareat, pauperibus erogandas, vel ad alium pium vsum applicandas esse. Ratio est: Cum rerum inuentarum non desinat esse domini, qui eas amisit; ideò si ipsimet restitui non possint, restitui debent, quibus ille vult: Est autem præsumendum, velle eum, vt hoc casu in pauperum, aliumve pium vsum erogentur, in satisfactionem pro peccatis suis.

Contrariam verò sententiam primus defendere conatus est Sotus lib. 5. q. 3. a. 3. ad 2. quem secuti sunt Bartholom. Medina in summa lib. 1. c. 14. §. 34 reg. 5. Arrag. 2. 2. q. 62. a. 5. §. sed dubitabit, Pet. Nau. lib. 4. de restit. c. 2. num. 75. Sa ver. thesaurus, num. 4. & probabilem censuit Less. lib. 2. c. 14. dub. 7. Vel enim bona inuenta, & incerta pauperibus erogari debent præcipiente iure naturali, vel Ecclesiastico. Non Ecclesiastico, quia tale nullum afferri potest. Nam ex c. cum tu, de vsur. & c. cum sit, de iudiciis, solùm colligi potest, si, quæ iniuste acquisita sunt, propriis dominis seu creditoribus restitui non possint, fas non esse ea retinere; (quippe canonica lege prohibente, atque impediēte talium dominium acquiri) sed pauperibus restituenda esse: quibus proinde ius aliquod ex lege, seu canone acquiritur, saltem vt Iudicis Ecclesiastici officium implorari possit. Non item naturali iure: Quia ius naturale est, quod apud omnes gentes obligat: Non autem omnibus gentibus hæc inest persuasio, res inuentas pauperibus largiendas esse: Neque etiam omnes fideles Catholici, (ne dicam de hæreticis, ac infidelibus)



cum rem quampiam amiserunt, talem cogitationem, ac voluntatem suscipiunt, ut ab inuentore pauperibus tribuatur; sed potius, ut in custodia seruetur, sibi que restituatur, si forte eos repetere contingat. Eoque sensu intelligi debet dictum S. August. hom. 9. ex 50. quod refertur causa 14. q. 5. *Si quid inuenisti, et non reddidisti* (domino comparenti) *rapuisti*. Si autem dominus longo tempore non compareret, perinde esse censetur, ac si res inuenta domino careat, & pro derelicta habita sit, sicut supra de thesauro dictum fuit.

Inter has duas sententias prior magis pia, ac tutior est; attamen posterior quoque valde probabilis. Ad praxin verò obserua, Prudentis viri arbitrio ex circumstantiis æstimandum esse, quanto tempore expectare debeat inuentor, donec rem inuentam alienare, vel absumere possit. Quod si verò post alienationem, vel absorptionem bona fide factam, dominus compareat, nihil ipsi restituendum est, nisi quatenus inuentor locupletior inde factus est. Similiter nec pauperes, si in eos rei inuentæ distributio facta fuit, aliquid restituere debent; nisi res in specie extet, vel inde locupletiores facti sint, dominusque repetat. Vide Syluest. ver. restit. 8. q. 4. Molin. cit. disp. 746. in fine.

Denique sunt bona, quæ speciali nomine *vacantia* appellantur; & sunt ea, quorum dominus sine testamento decessit, nullo, vel incognito relicto hærede, qui secundum leges ab intestato succedat: tunc eius bona ad fiscum deuoluuntur, sicuti habetur in l. 1. l. vacantia, C. de bonis vacantibus, lib. 10. Præterquam si peregrinus, seu hospes, cuius hæredes ignorantur, alicubi intestatus moriatur: nam huius bona ita vacantia ab Episcopo loci in pias causas erogari debent, iuxta Authenticam, Omnes peregrini, C. communia de succession.

## CAP. VI.

## De usufructu, usu, &amp; habitatione.

## SVMMARIVM.

1. *Usufructus est ius utendi, ac fruendi re aliena, salva eius substantia.*
2. *Inter usufructum, & usum plura discrimina sunt.*
3. *Usufructus propriè constituitur non potest in rebus usu absumptibilibus.*
4. *Usufructuarius sine consensu domini, rem, in qua usufructum habet, absolute alteri donare, vendere non potest: solam autem utilitatem rei alteri cedere non prohibetur, saltem ad vitam ipsius usufructuarij.*
5. *Usufructus pluribus modis finiri potest.*
6. *Si usufructuarius Religionem profectatur, immobilium bonorum, atque reuerentium capacem, usufructus ad Monasterium deuoluitur. Si autem profectatur Religionem incapacem stabilium redituum, usufructus cum proprietate consolidatur.*
7. *Ius usufructus pendens à domini arbitrio, etiam in rebus quæ usu absumuntur, locum habere potest.*
8. *In usufructu plus aliquid est, quam merus usus & fructus.*

**A**ccidit interdum, ut alicui seu testamento, seu pactione solus rei usufructus, vel merus usus, domusve habitatio concedatur. Quare videndum est, quid tali concessione comprehendatur.

1. *Usufructus est ius utendi ac fruendi re aliena salva eius substantia, l. 1. ff. de usufructu, & Instit. eod. tit.*  
Dicitur *ius utendi, ac fruendi*; Primò, ut distinguatur à iure, quod creditor habet in pignore; depositarius in deposito: his enim, re oppignerata, deposita uti, ac frui concessum non est.

2. *Secundò, ut distinguatur à mero usu. Differt enim usufructuarius ab usuuario, quòd ille fructus omnes ex re fructifera percipere potest, etiam pensiones, ac redditus ex ædificiis, arcibus, l. usufructu legato, ff. de usufructu. Sed & venationum, ac piscationum prouentus ad fructuarium pertinent, l. item si fundi, §. aucu-*

piorum, ff. eod. Item si in fundo sint lapidicinae, vel metallorum fodinae, inquirere, & eruere ad eundem pertinebit, ita tamen, ut agriculturæ nihil obsit, l. item si fundi, l. æquissimum, §. proinde ff. eodem. Sed in Imperio decimas pars metallorum domino proprietatis inferenda est, l. cuncti, Cod. de metallariis, lib. 11. cap. 1. de vñibus feudorum. Usuarius autem talem fructuum percipiendorum facultatem non habet, ut postea dicam. Tertiò, Quòd usufructuarius rem fructigeram alteri locare, aut concedere potest, etiam inuito proprietario, ut postea explicabo; sed non ita usuarius, uti constat ex tit. Instit. de usu & habitatione, & videri potest Ioan. Maior in 4. distinct. 15. quæst. 12.

*Re aliena.* Quia sermo nobis est de usufructu nudo, seu separato à proprietate, qui & *formalis usufructus* appellari solet.

*Salua eius substantia.* Ex quibus verbis intelligitur primò; Vsum fructum propriè constitui non posse in rebus, quæ usu absumuntur: puta in pecunia, frumento, vino. Sed quasi usufructum etiam in his constitui posse, decretum est in l. 1. & 2. ff. de usufructu rerum, quæ usu absumuntur, & §. constituitur, Institut. de usufructu. Ea ratione. Vñ v. g. maritus uxori testamento legatit usufructum omnium suorum bonorum, vel rerum usu absumptibilium: hæ uxori æstimatæ tradi debeant, postulata cautione, quòd tempore usufructus finito, videlicet post mortem uxoris, earundem æstimatione hæredibus mariti restituenda sit. Vide de hoc cap. vlt. iunct. Gloss. ver. pecuniam, de pignoribus.

Secundò intelligitur: Vusufructuarius non posse absolute alteri donare, vendere, & vno verbo alienare rem eam, in qua usufructum habet: imò neque nudum sibi competentem usufructum in alterum, absque domini seu proprietarii consensu, transferre potest, §. fin. Institut. de usufructu, ubi dicitur: Si quis extraneo, id est, alteri quàm proprietario, usufructum cedat, nihil agi, seu irritam esse cessionem: & consentit l. si usufructus, ff. de iure dotium. Veruntamen commoditatem, seu utilitatem rei per donationem, permutationem, locationem, &c. alteri cedere non prohibetur usufructuarius, secundum Gloss. communiter receptam in cit. §. fin. ver. cedendo, & videri potest Couarruias 1. resolut. cap. 8. num. 7. Molin. tom. 1. tractat. 2. disput. 7. Gomez 2. resolut. cap. 15. num. 17. Sanchez lib. 7. moralium, cap. 13. num. 12. & habetur in l. Arboribus, ver. usufructuarius, ff. de usufructu. Vbi notandum est, quòd hoc casu usufructus manet penes usufructuarium, cuius nomine alter fructus ex fundo percipere potest. Ex quo sequitur, commoditatem alteri cedi, aut locari non posse ultra vitam usufructuarij; posse tamen concedi ultra vitam eius, cui relinquitur, ita ut ad hæredes etiam transferatur, dum usufructuarius viuit, iuxta l. necessariò, §. vltim. ff. de periculo & commodo rei venditæ. Quare ita explicari debet, si usufructuarius in instrumēto dicat, se ius utendi, fruendi alteri concedere, quòd loquatur de commoditate sola, seu ad tempus, seu ad vitam usufructuarij percipienda.

Porro impensæ, quæ ratione fructuum percipiendorum fieri debent: collectæ item, tributa & similes reales præstationes, quæ pro re fructuaria debentur, usufructuario incumbunt, l. usufructu legato, ff. de usufructu, l. inter fructuarium, ff. de damno infecto, *Secundum naturam enim est, ut qui sentit commodum, sentiat & onus*, iuxta reg. secundum naturam, ff. de regulis iuris, & reg. Qui sentit, §. in 6.

Usufructus finitur pluribus modis: Primò. Si usufructuarius usufructum proprietario cedat: vel vice versa, si proprietarius proprietatem rei in usufructuarium transferat. Quo casu definit esse usufructus formalis: & dicitur usufructus causalis, quia consolida-



cum sua causa, videlicet cum proprietatis dominio, ex quo suapte natura promanat, cit. §. vltim. Instit. de usufructu.

Secundò; Si res tota pereat, v. g. tota domus incendio absumpta sit: non enim tunc retinetur usufructus in area, l. repeti, §. rei, ff. Quibus modis usufructus.

Tertiò; Si tempus finitum sit, ad quod usufructus alteri legatus, vel aliter concessus est, qua de re videri potest l. ambiguitatem, C. de usufructu.

Quartò, morte ipsius usufructuarij naturali, aut ciuili cessat omnis usufructus: cum sit ius personale, siue, vt Celsus Iureconsultus ait l. 2. ff. de usufructu; *Ususfructus in corpore est, quo sublato, & ipsum tolli necesse est.* Sed etsi testator, vel alius concessor expresserit, vt usufructus ad hæredes quoque pertineat, idque exequendum sit post mortem primi usufructuarij; tamen nouus in persona hæredis usufructus censetur, & idcirco de nouo caueri debet, secundum Gloss. receptam in in cit. l. repeti, ver. hæredibus. Plura vide cit. §. fin. Instit. de usufructu: & add. l. si usufructus, ff. de usufructu, vbi dicitur; Si usufructus ciuitati, alterive Communitati relictus sit, quæ non extinguitur, centum annis duraturum esse: quia *is finis vitæ longani hominis est.*

Id verò hoc loco queri potest. Si usufructuarius Religionem profiteatur, ad quem usufructus deuoluatur? In qua tamen questione non loquor de patre habente usufructum in bonis aduentitijs filij: de hoc enim dicam tractat. 4. cap. 8. num. 2. Sed de alijs usufructuarijs respondeo & dico I. Si usufructuarius profiteatur in Monasterio capaci bonorum immobilium in communi, & perpetuorum reddituum, usufructus deuoluitur ad Monasterium, quod contemplationi Monachi frui poterit, quamdiu is viuit. Sumitur ex Authent. ingressi, vbi id notat Gloss. recepta, ver. dedicant, Cod. de sacrosanctis Ecclesijs, & videri potest Molina tom. 1. tractat. 2. disput. 9. Sanchez lib. 7. moralium, cap. 13. num. 47. qui bene monet, idem esse sentiendum de legato annuo ante professionem relicto, quod transeat ad Monasterium: quia in cit. Auth. Ingressi, & Authent. de Monachis, §. illud quoque absolute, & sine restrictione dicitur, quod bona vnà cum persona, seu tanquam accessoria personæ, Monasterio debeantur.

Corollarium I. Talis Religiosus ante professionem, sicuti de alijs bonis, ita etiam de usufructu testari poterit: vt ab initio factæ professionis, usufructus, seu potius commoditas eius ad hæredem spectet, dependenter à persona Monachi, seu dum Monachus viuit, sicuti docet Rodriq. tom. 3. regul. quæst. 16. a. 5. Sanchez cit. cap. 13. num. 56. Idemque sentiunt de censu annuo, Religioso relicto ante professionem suam.

Corollarium II. Si talis Religiosus ad alium Ordinem, vel Monasterium bonorum stabilium capax transferatur, usufructus vnà transfertur, quia sequitur personam, vt bene docet Sanchez num. 62.

Dico II. Si usufructuarius profiteatur in Religione incapace stabilium bonorum, ac reddituum, videlicet in ordine PP. Minorum de obseruantia, Capuccinorum, & Societatis Iesv, usufructus finitur, & cum proprietate consolidatur. Quæ est communis sententia apud Angelum ver. Religiosus, num. 52. Syl. ver. Religio, 6. q. 1. dicto 2. quam sequitur Azor tom. 2. lib. 2. c. 22. q. 4. Molina tom. 1. tr. 2. disp. 9. ver. ulterius dubium est, Sanchez cit. c. 13. num. 53. contra Rodriq. cit. a. 5. qui ait, ad hæredes ab intestato usufructum pertinere, interim dum Professus viuit. Sed contra est: Quod usufructus est ius personæ: quod cum ea ex-

tinguitur, seu per mortem naturalem, seu per mortem ciuilem, quæ omnino incapax usufructus persona fiat; argum. §. finitur, Instit. de usufructu. At verò per professionem in Ordine incapaci bonorum, & stabilium reddituum persona omnino incapax usufructus efficitur: Non ita verò per professionem in alijs Ordinibus, in quibus usufructus permanere potest in Monasterio, cum ordine ad Professum; ita vt Professus, & Monasterium veluti vna persona censeantur.

Corollarium. Religiosus ante professionem in Ordine incapaci testari non potest de usufructu: cum eius professione, veluti morte quadam, ad proprietarium redire debeat. Neque item testari potest de legato annuo, quod ita ipsi, v. g. alimentorum causa, relictum fuit, vt in annos singulos cedere debeat, iuxta l. si in singulos, & l. in singulos, vbi Gl. ff. de annuis legatis. Potest tamen testari de eo legato, quod initio anni cesserat, siue ei pleno iure acquisitum fuerat, vt bene explicat Rodriq. loc. cit.

Usus est *ius utendi tantum* (non fruendi) *re aliena, saluâ eius substantiâ*, sicuti colligitur ex l. 1. & 2. ff. de usu & habitatione, & Instit. eod. in princ. Dicitur *ius*. Quia non loquimur de usu facti, qualis est equitatio, inhabitatio; sed de iure utendi, v. g. equitandi, inhabitandi. Additur *utendi tantum*. Cui enim nudus usus horti v. g. concessus est, is non potest omnes ex eo fructus percipere, suoque arbitratu absumere, vel alienare, sicuti qui usufructum horti habet; sed tantum in illo deambulare, poma, olera, & reliqua, quæ ibi nascuntur, ad suum, & familiæ suæ, hospitum quoque victum accipere. Item qui nudum usum habet iumentorum, vel gregis ouium, vaccarum, &c. non potest percipere pecorum fœtus, lanam; (hæc enim in fructu magis, quàm in usu numerantur) neque lac, nisi modicum, & quatenus ad victum quotidianum opus est. Potest autem bobus, vel ouibus vt ad agrum iterorandum. Ita habetur in l. plenum, ff. eod. tit.

*Re aliena.* Loquimur enim de usu nudo, ac seiuncto à proprietate. *Saluâ eius substantiâ.* Quapropter usus propriè dictus, ac independens, (adeò, vt quicumque etiam ipse dominus, iniuriam inferat vsuario, si eum ab usu rei prohibeat) in iis tantum rebus locum habere potest, quæ usu non absumuntur: non item in pecunia, esculentis, poculentis. Cum enim harum rerum substantia usu absumatur, consequens est usum, sicut & usufructum, ab earundem proprietate separari non posse, l. si tibi vini, ff. eod. l. Hoc Senatuscons. in fine, ff. de usufructu earum rerum, &c. & docet S. Thom. 2. 2. q. 78. a. 1.

Cæterum usus imperfectus, atque dependens à domini libera voluntate, cui, si ita placuerit, reuocare liceat; etiam in rebus usu absumptibilibus, separatus ab earum dominio, constitui potest. Nam tali ratione laudatissimus Ordo Minorum S. Francisci proficitur, se rerum ad victum necessariarum, quæ à fidelibus offeruntur, nec in communi, nec in particulari dominium acquirere; sed solum usum, imperfectum tamen, ac dependentem à voluntate dominorum, qui datas à se eleemosynas in pecunia, & similibus, sine omni iniuria, quocumque tempore reuocare possint, donec ab illis absumptæ, vel alienatæ sint. Quæ verò comparata, vel donata bona seruari possunt, tum mobilia, vt libri, supellex; tum immobilia, vt domus, horti, &c. horum dominium Sedes Apostolica in se recepit, vt videre est apud Nicol. III. in c. exijt, de verb. significat. in 6. & Clementem V. in Clem. exiui, eod. tit. Licet postea Ioan. XXII. ab Occamo, & alijs offensus, in extrauag. Ad conditorem, eod. tit. de tali Fratrum Minorum usu iuris dependentis, & quasi solius facti, contrarium disputando potius, quàm definiendo statuerit: dominium quo rerum à Sede Apostolica abdicauerit: sed



subsequentes Pontifices denuo receperunt, & ad hunc usque diem retinuerunt. Vide Henricum quodl. 7. qu. 28. & quodl. 8. q. 27. Io. Turrecrem. lib. 2. sum. 112. Suarez 3. p. tom. 2. disp. 28. sect. 2. Bellarm. lib. 4. de Pontif. c. 14. Molinam tom. 1. tract. 2. disp. 6. Less. lib. 2. c. 3. dub. 8. Vasq. tract. de re dit. Ecclesiast. §. 1. dub. 1. num. 7. Sanchez lib. 7. moral. c. 18. num. 5. Rodriq. tom. 2. regu. qu. 125. art. 5. qui admonet, propter Bullas Martini V. & Pauli II. dominium pecuniæ donatæ Fratribus Minoribus nunc non manere penes dantem, sed apud Sedem Apostolicam, vti & aliorum bonorum.

Quin & alij omnes Religiosi, qui paupertatem Evangelicam voverunt, in particulari nullum habent dominium; sed merum vsum librorum, vestium, ciborum, &c. eumque imperfectum, ac dependentem à Prælato, qui absque iniuria, quamcunque eiusmodi rem ab ipsis repetere, & auferre potest, sicuti ex communi docet Nauar. tract. de re dit. Ecclesiast. q. 1. mon. 12. & seqq. & in comment. 1. de regul. num. 13. qui rectè etiam monet num. 15. hoc sensu dissonum non esse, si Monachus vestes, libros, &c. suos, aut proprios dicat; id est, quorum vsum, dependentem tamen, sibi concessum habeat.

- 8 Si habitatio domus alicui legata, vel concessa sit, plus aliquid, quam merus ædium vsus, concessum esse censetur: vt videlicet habitatori ius competat, ædes alteri locandi, pretiumque locationis percipiendi, iuxta l. cum antiquitas, Cod. de usufructu. Quod tamen mero vsuario ædium permissum non est; sed solum, vt ipse cum familia sua inhabitare possit, sicuti habetur in §. item is, & §. sed si cui, Instit. de vsu & habit. & l. 2. ac seqq. ff. eod.

## CAP. VII.

## De Possessione.

## S V M M A R I V M.

- 1 Possessio est detentio rei corporalis, corporis, animi, iurisque adminiculo.
- 2 Possessio acquiritur apprehensione rei vera, vel ficta.
- 3 Possessor rei non censetur, qui non vt suam possidet: sed vt ad alterum pertinentem.
- 4 Ad possessionem acquirendam corpus & animus requiritur: sed ad retinendam plerumque sufficit solo animo, seu civiliter tantum possidere.
- 5 Possessio interdum est solius facti; interdum etiam iuris.
- 6 Indicium aliud est de possessione, & aliud de proprietate rei.
- 7 Possessor intentionem suam fundatam habet: nisi ius commune ipsi resistat.
- 8 Si possessio, cui iura resistunt, titulo adiuuetur, vel tempore immemoriali, presumptionem facit pro possessore.
- 9 Remedia possessoria æquitate Prætoria introducta sunt.
- 10 Qui eisdem rei possessionem retinet, eam ab iniusto inuasore, aut spoliatore, etiam vi adhibita, quatenus necesse est, defendere potest.
- 11 Qui alienam possessionem inuadit, eo ipso in penam priuatur iure, si quod in re habet.

1 Possessionem alij dictam esse putant, quasi pedum positionem, ex Paulò Iureconsulto in l. 1. ff. de acquirenda, vel amittenda possess. & declarat Pet. Greg. Tholosanus lib. 1. syntagm. c. 13. num. 7. Nam præcipuum, & ferme vnicum instrumentum, quo rerum immobilium possessionem capimus, est pedum ingressus, sicuti notauit Celsus in l. quod meo, §. si venditorem, ff. eod. & indicat sacra Scriptura c. 11. Deuter. Omnis locus, quem calcaueris pes vester, vester erit. Et alludit Cicero in 3. Philipp. Hodierno die primum, Patres conscripti, longe intervallo in possessionem libertatis pedem ponimus. Alij verò malunt possessionem dictam esse, quasi positionem sedium, vt Alciatus apud Couar. rubrica

de testam. p. 1. num. 4. Qui enim regionem aliquam occupauit, ac possidet, sedem ibi posuisse dicitur.

Possessio definitur apud Syluest. ver. dominium, q. 2. Molinam tom. 1. tract. 2. de iust. disp. 12. Detentio rei corporalis, corporis, animi, iurisque adminiculo. Eadem definitio alijs verbis proponitur à Couar. regula possessor, p. 2. initio, num. 1. Apprehensio rei corporalis, vera, vel ficta, corporis, animi, iurisque adminiculo. Differt tamen à priore; quòd hæc causalis sit, illa magis essentialis. Nam apprehensione acquiritur possessio, quæ est detentio rei, &c.

Dicitur autem apprehensio (vel detentio) rei corporalis. Nam rerum incorporearum; siue iurium non est propriè possessio, sed quasi possessio, iuxta l. 3. ff. eod. tit. l. seruus, §. incorporales, ff. de acquirend. rerum dominio, & l. sequitur, §. si viam, ff. de vsurpationibus, & vsucapionibus, & consentit c. cum Ecclesia, de causa possess. & propriet. iunct. Gl. ver. quasi possessionem.

Vera, vel ficta. Apprehensio vera manibus fit, si res mobilis sit; pedibus, si immobilis. Necesse tamen non est, fundi possessionem accepturum omnes terræ glebas circumambulare, vel omnia ædium conclauia ingredi: sed satis est, si quamlibet partem ingrediendo, reliquum animo complectatur; sicuti habetur in cit. l. 3. ff. de acquir. & amittenda possessione.

Apprehensio ficta ex iuris dispositione pluribus modis accidit: Primò, per actum ipsius pristini possessoris, eiusve, ad quem pertinet, vacuam rei possessionem, interueniente aliquo titulo, tradere, ostendendo v. g. eminus ædes, Ecclesiam, aut beneficium vacans, cuius possessionem alteri traditurus est, iuxta l. 1. §. si iusserim, & l. quid meo, §. si venditorem, ff. eod. Vel tradendo clauem, anulum, pileum, aut simile signum vacantis possessionis acquirendæ, iuxta l. clauibus, ff. de contrahenda emptione. Notant autem Doctores communiter, requiri etiam conspectum siue præsentiam rei, puta horrei, ædium, Ecclesiæ, cuius clauem traduntur. Nam alioquin sola inuestitura per pileum, ense, clauem, &c. non tribuit possessionem; sed ius possessionis accipiendæ, sicuti notat Gloss. in c. ex ore, ver. et si mandatum, de his quæ sunt à maiore parte Capituli, & in cap. per tuas, ver. in possessione, de donat. & videri potest Abbas in c. ex literis, num. 10. exemplo secundo, de consuet. Couar. 3. resol. c. 16. num. 11. Iosephus Mascardus volum. 3. de probat. conclus. 1184. num. 18. Molina disp. 13. §. tertius est. Vel denique tradendo scripturam siue instrumentum, quo continetur v. g. ius donatoris, donare rem quampiam, eiusque vacuam possessionem tradere volentis, iuxta l. 1. C. de donat. & docet Gloss. in c. sanè ver. reddens, de renuntiat. Neque opus esse conspectu, seu præsentia rei ad eius possessionem tali modo acquirendam, existimat Couar. num. 12. Quamuis alij aliter sentiunt, quibus assentitur Mascard. num. 12.

Secundò transfertur possessio iuris fictione, si pristinus possessor, post contractum donationis, venditionis, &c. significet, se possessorum nomine donatarij, vel emptoris; seu absolutè, seu tanquam usufructuarium, iuxta l. quisquis, Cod. de donat. vel tanquam conductorem, aut depositarium, iuxta l. quædam mulier, ff. de rei vindicat. & docet Gloss. in l. ab emptione, verb. constituentur, ff. de pactis, Abbas cit. cap. ex literis, exemplo quinto, Mascardus conclus. 1185. & 1186. Molin. cit. disput. 13. §. quintus est, & §. nonus.

Tertiò acquiritur possessio iuris fictione, per actum aliquem noui possessoris: puta, si cum pristini possessoris consensu, rem sibi donatam, vel emptam proprio nomine signet, sicut colligitur ex l. quod si



neque, ff. de periculo & commodo rei venditæ; vel si custodes suo nomine apponant, iuxta l. quarundam, ff. de acquir. possess.

Quarto per Iudicis auctoritatem, solo aspectu rei præsentis, tradi potest possessio vacans, si tradens eius custodiam, vel administrationem habeat, vt collator Ecclesiastici beneficii, argum. l. quod meo, §. si venditorem, ff. de acquir. possess. & docet Abbas cap. cum aliquibus, num. 10. de sentent. & re iudic. Vel si ob potentiam aduersarij, realis apprehensio fieri non possit: dummodo in hoc casu sententia contra pristinum possessorem lata sit, sicuti ibid. docet Abb. & in c. ex literis, n. 10. de consuet. Quin & in absentia rei, si ob aduersarij vires, aliudve impedimentum, v.g. propter pestem, accessus ad illam non sit, possessionem à Iudice per sola verba tradi posse, singulariter existimat Couar. 3. resol. c. 16. n. 12. & referunt Vasq. tr. de beneficio. c. 4. Mol. cit. disp. 13. §. De actibus fictis, arg. l. si finita, §. illud, ff. de damno infecto, & c. contingit, de dolo & contumacia.

3. Sequitur in definitione, *corporis, & animi*. Vtrumque enim ad acquirendam possessionem requiritur; vt & corpore rem apprehendas, eive insistas; & vt eam tanquam tuam capias, habeasque, sicuti habetur in l. 3. ff. de acquir. possess. Quare qui rem conductam, commodatam, depositam, vel pignoris loco penes se habet, non est eius possessor: cum non vt suam, sed vt alienam: seu non suo, sed alieno nomine teneat, ideoque nudum ministerium præstet, ait Abb. c. si diligenti, n. 6. de præscript. Quin & usufructuarius, vt emphyteuta, vassallus, rei proprietatem non suo, sed domini loco possidet. Vtile autem dominium, siue usufructum suo nomine quasi possidere usufructuarius, tam ciuiler, quam naturaliter, nihil prohibet nos fateri; cum ea ipsi possessio sufficiat ad præscriptionem, & alia iuris remedia, sicut docet Couar. reg. possessor, p. 2. initio, n. 7. Mol. to. 1. tract. 2. disp. 12. §. dubium tamen.

4. Dixi autem, *ad acquirendam possessionem corpus & animum requiri*. Nam ad eandem conservandam sufficit plerumque solo animo possidere, sicuti constat ex l. 3. §. in amittenda, ff. de acquir. possess. Non tamen sufficit solo corpore insistere, si animum possidendi deposuisti: *amitti enim solo animo possessio potest, licet acquiri non potest*. Consentit l. si quis vi, §. differentia, ff. eodem.

Corollarium. Si Titius à fundo, quem hæcenus possederat, discessit; eoque absente, alius in possessionem fundi inuolat, Titius possessione fundi non antè spoliabitur, quam, re cognita, animum possidendi, vel possessionem recuperandi deposuerit: si videlicet aut metu perculsus, ad recipiendam naturalem possessionem non accesserit; aut accesserit quidem, sed repulsum passus fuerit: tunc ciuiler quoque possidere desinet, sicuti habetur in cit. §. in amittenda, iun. Gl. ver. possides, & l. clam. possidere, §. quia ad nundinas, l. si id quod, §. quod autem, ff. eod. tit.

Quapropter Doctores communiter aiunt; duplicem esse possessionem, vel potius duas partes possessionis: ciuilem, & naturalem siue corporalem. Possessio ciuilis seiuncta à corporali in eo est, qui à possessione absens, nullumque alium, qui suo nomine in possessione sit, relinquens, solo animo eam retinet.

Possessio verò naturalis, siue corporalis, à ciuili seiuncta, in eo est, qui possessionem rei, tanquam sua sit, apprehendit, dum alius absens, ciuilem eiusdem possessionem tenet. Est autem naturalis possessio imperfecta, & magis improprie dicta, quam ciuilis: quæ verò ex vtraque ciuili, & naturali coalescit, ea demum perfecta possessio est.

Denique additur, *iurisque adminiculo*. Quæ verba duobus modis explicari possunt: Primò; Vt appre-

hensio rei, corpore & animo facta, possessionis rationem nanciscatur, necesse esse, quod ius non refragetur. Quibusdam enim casibus resistit, & impedit, ne possessio oriatur: Veluti ne laicus acquirat possessionem loci sacri, iuxta l. quod vniuersas, §. possessionem, ff. de acquir. possess. *Locum religiosum, aut sacrum non possumus possidere, etsi contemnamus religionem, & pro priuato eum teneamus; sicut & hominem liberum*, iuxta l. cum hæredes, §. item quæro, ff. eod. Deinde, ne quis acquirat possessionem rei ad publicum vsum deputatæ, puta fluminum, pontium, viarum; etsi populus his vti desierit, iuxta l. viam, ff. de via publica. Item ne quis acquirat possessionem ciuilem rei immobilis, cuius possessor absens est, sicuti supra dictum. Cæterum, iuxta hanc expositionem prædo, & rei alienæ inuasor, postquam dominus eum persequi destitit, verè possessor est, quamuis iniustus: quod & Iureconsultus approbare videtur in l. 3. §. ex contrario, ff. eod. vbi dicitur: *fructus summa, possessionis non multum interest, iuste quis, an iniuste possideat*.

Alter verò illorum verborum explicandi modus est, quem tradit Syl. ver. dominium, num. 3. Rebellus lib. 1. prælud. q. 8. sect. 1. in fine, vt per eam excludatur possessio rei manifestè iniusta, quippe quæ magis detentio quædam est in solo facto consistens, quam propriè dicta possessio, sicuti notauit etiam Greg. Tholosanus lib. 1. syntagm. c. 13. num. 22. Less. l. 2. c. 3. dub. 9. num. 41. & cap. seq. patebit.

Sciendum autem hic est: Iudicium, siue litem, quæ in externo foro institui solet, interdum esse de possessione. quod dici solet possessorium iudicium: Interdum vero esse de proprietate siue dominio. quod dici solet iudicium petitorium, quia in eo actor petit à possessore rem sibi adiudicari, tanquam domino, vel saltem ius ad rem habenti. Inter quas actiones siue iudicia, illud quod de possessione est, prius institui solet: *Quia & ciuilis, & naturalis ratio facit*, inquit Iustin. §. retinendæ, de interdictis, *vt alius possideat, & alius à possidente petat*. Et quia longè commodius est & potius possidere, quam petere: ideo ferme ingens existit contentio de ipsa possessione. Commodum autem possidendi in eo est, quod etiam si eius res non sit qui possidet: si tamen Actor, non potuerit suam esse probare, remanet in suo loco possessio: propter quam causam cum obscura sunt iura vtriusque, contra petitem indicari solet.

Verum, licet hæc regula ordinariè vera sit, quòd possessio releuat onere probandi titulum; fallit tamen, si aliunde vehemens coniectura vel præsumptio existat, mala fidei atque iniquam possessionem esse: quia v.g. ius commune ei resistit: tunc onus probandi possessori incumbet, argum. l. siue possidetis, Cod. de probat. vbi Gloss. ait, ver. *facti sunt*, quòd Reus probare, & causam siue titulum dicere debet, cum præsumptio est pro actore, & colligitur ex cap. ex insinuatione, iunct. Gl. ver. probare potuerit, de Procurat. atque notauit Ioseph. Mascardus vol. 3. de probat. conclus. 1194. num. 66 Abb. in c. cum Ecclesia, num. 49. de causa possess. & propriet. ex c. 2. de restit. spoliat. vbi dicitur: quòd Ecclesia, spoliata possessione decimarum ex aliena parochia percipiendarum, non restituitur, nisi doceat se legitime possedisse: quia ius commune ei resistit. Si tamen possessio, cui iura communiter resistunt, v.g. vt Ecclesia aliena, vel laicus decimas possideat, titulo etiam adiuetur, tali casu possessio tribuit præsumptionem veritatis ac iustitiæ, licet de eius modo ac qualitate non satis constet, sicuti post Anton. à Butrio & Imolam c. cum venissent, de iustit. docet Mascardus num. 79. Idemq; dicendum, si possessio immemoralis sit, quamuis titulus siue privilegium exhiberi non possit: dummodo fama privilegij siue concessionis decimarum v.g. à summo Pontifice concessarum, concurrat: tunc



enim, ne pereat ius partis propter difficultatem probandi, ob temporis elapsi diuturnitatem, præsumendum est pro privilegio, sicuti docet Felinus c. causam quæ, de præscript. num. 3.

7 Præterea, ne iniqui rerum inuasores, & detentores, qualescunque inde commodum aduersus earum dominum capere possent; prætoria æquitate remedia possessionis introducta fuerunt, quæ *interdicta* dicebantur: quia erant certæ verborum formæ, quas inter duos, de possessione contententes, Prætor proferebat. Sunt autem alia interdicta, siue remedia possessionis adipiscendæ causa comparata; alia verò retinendæ; alia demum recuperandæ. Interdictum siue remedium adipiscendæ possessionis hæredi tribuitur, ut post aditam hæreditatem mittatur in possessionem omnium bonorum, quæ defunctus tempore mortis possidebat, sicuti constat ex ff. & C. quorum bonorum, ff. & C. quorum legatorum. Interdictum siue remedium retinendæ possessionis possessori inseruit, qui litis contestatæ tempore rem siue immobilem, siue mobilem, nec vi, nec clam, nec precario se possedisse probauerit, sicuti constat ex tit. ff. & C. uti possidetis, & §. retinendæ, §. quorum ius, Instit. de interdictis: v.g. Si Titius, te absente & ignorante possessionem tuam clam & furtiue ingressus est; postquam id rescisti, competit tibi remedium, siue interdictum *uti possidentis*, ad retinendam possessionem civilem, expellendumque alterum à naturali, Iudicis vel Prætoris auctoritate. Qua de re Mol. to. 1. tr. 2. disp. 16. §. quando autem, Mascard. vol. 3. concl. 1190. Denique per interdictum recuperandæ possessionis, pristinus possessor restituendus est, si probauerit alterum vel vi illata, vel clam & furtiue, vel precario (i. e. concessione ipsi ad certum tempus, vel vsum facta) possessionem naturalem esse, sicuti constat ex l. 1. & toto tit. ff. de vi, & vi armata l. ff. quod vi aut clam, & l. 2. ff. de precario.

8 His adde, quod tam canonico, quam civili iure cuius permissum est, ut dum civilem rei possessionem retinet, eam ab iniusto inuasore propria auctoritate defendere & propugnare possit cum moderamine inculpatae tutelæ; ac proinde furem fugientem persequi, & rem ablata vi adhibita ab ipso recuperare, quousque res de loco in locum delata, custodiam hominis effugerit, ita ut possessione illius etiam civili priuatus fuerit, iuxta l. 3. §. Neratius, ff. de acquir. posses. Et ita docet Gabr. in 4. d. 15. q. 4. a. r. Syl. ver. bellum 2. n. 3. Less. lib. 2. c. 9. dub. 11. n. 75. Fundi verò siue rei immobilis iniustum occupatorem, re intellecta, etiam armis necessariæ defensionis causa adhibitis, deicere non prohiberis, sicut constat ex l. 1. C. vnde vi, l. 1. & 3. ff. de vi, & vi armata, c. olim. 1. de restit. spoliat. & docet Gabr. l. c. Abbas c. item cum, eod. tit. Mol. t. 1. tr. 2. disp. 16. §. illud etiam.

Præterea docet Abb. in c. 1. de immunit. Eccles. n. 6. hanc violentiæ repulsionem cum moderamine inculpatae tutelæ, non tantum concessam esse possessori ipsius fundi seu loci; sed etiam possessori iuris in tali fundo: ut si iure suo uti, v.g. iter agere, exercitum traducere, pascua depascere, in domo debitum sibi hospitium accipere prohibeatur, non tantum contra personalem resistantiam se tueri possit, sed multò etiam magis contra realia obstacula; puta fores & muros infringendo, sepes perumpendo, &c. Cum enim cuicumque iusto possessori liceat ius possessionis suæ defendere; licebit etiam ea agere, quæ ad defensionem eius iuris necessaria sunt, seruata debita moderatione: Nam cui concessum est principale, eidem etiam præparatoria ad illud permitti debent.

Rectè tamen notat Less. lib. 2. c. 9. dub. 11. n. 69. per accidens interdum, ratione scandali, vel grauioris damni secuturi, in foro conscientie Charitatis legi repugnaturum, qui contra iniquum rerum inuasorem; vel

contra depositarium, conductorem, precario vtentem, aut contra emphyteutam, post pœnam commissi, &c. restituere recusantem, propria auctoritate arma sumpserit, bellum mouerit. Idemque dicendum, si quis ob ius alicuius seruitutis, vel hospitij denegatum, domum vel muros diruere non sine graui damno, vel scandalo aggressus fuerit: cum vel via iudicij, v.g. remedio interdicti possessorij, vel alio mitiore modo in possessionem iuris sui se restituendum speret.

Denique civili iure constitutum est l. si quis in tantam, C. vnde vi: Quod violentus inuasor non solum rei possessione priuandus sit: sed insuper eius dominio excidere debeat, si sua sit: vel æstimationem soluere cogatur, si sua non erat. Quæ tamen lex cum pœnalis sit, non obligat ante sententiam, sicuti notauit Adrianus in 4. de restit. vbi de bello: & videri potest Maior in 4. d. 15. q. 21. Mol. t. 1. tr. 2. disp. 16. §. secundum est, & to. 3. poster. disp. 682. Simili modo statutum est canonico iure in c. eum qui, de præbendis in 6. ut qui beneficium curatum vi occupat, vel scienter se iniuste intrudit, ipso iure priuatus sit simili beneficii curato, quod ante iuste obtinebat. Insuper, ut quicumque dignitatem, personatum, vel quoduis aliud beneficium Ecclesiasticum vi occupat, eo ipso ius, quod habebat, amittat. de quo vide Couar. 3. de resol. c. 16. n. 7. Vasq. tr. de beneficiis, c. 4. §. 4. dub. 5.

## CAP. VIII.

## De Exceptione, Præscriptione, ac vsucapione.

## S V M M A R I V M.

- 1 Exceptio est exclusio, seu potius debilitatio actionis intentate.
- 2 Duplex est exceptio: Vna peremptoria, & altera dilatoria.
- 3 Præscriptio est exceptio peremptoria, ex tempore legibus definito substantiam capiens.
- 4 Bona fides possessor post legitimum temporis decursum, plenum rei dominium omni iure acquirit.
- 5 Ad præscribendum seu vsucapiendum imprimis requiritur possessio, eaque civilis: sola autem naturalis non sufficit.
- 6 Non plus aliquis vsucapione acquirere potest, quam possedit.
- 7 Incapax possidendi, est etiam incapax præscribendi: quamobrem iura Ecclesiastica à laicis nullo etiam immemoriali tempore vsucapi possunt, absque titulo præsumpto facta commissionis, aut accepti privilegij.
- 8 In actibus mera voluntatis præscriptio non procedit.
- 9 Si colonus tempore longissimo canonem non soluit, existens in possessione immunitatis absolute, contra dominum præscribere potest.
- 10 Mala fidei possessor nullo unquam tempore præscribit. Dubium superueniens non obest bonæ fidei possessori.
- 11 Error facti, sed non iuris, quamuis inuincibilis sit, vsucipienti prædest.
- 12 Obligationes quæ sunt non ad agendum, sed ad patiendum, præscriptione temporis legitime extinguuntur, sola actoris negligentia seu cessatione; etsi reus obligationem suam non ignoret.
- 13 Cum titulo, puta præsumpto, facilius præscribitur, quam sine titulo.
- 14 Res immobiles sine titulo vsucipiuntur tempore longissimo: nisi in commune possessori resistat; vel vehemens suspicio sit, possessionem mala fide, vel ex iuris errore acquisitam esse: tunc tempus immemoriale requiritur ad vsucapiendum, modo capacitas sit in vsucapiente.
- 15 Præscriptio immemorialis plura pecuniaria commoda habet.
- 16 Triennio possidens beneficium Ecclesiasticum cum bona fide, ius in eo acquirit.
- 17 Successor in possessione, numerare etiam potest tempus antecessoris sui, si bona fide possedit; secus, si mala fide.
- 18 Mala fides antecessoris nocet successorij vniuersali, siue hæredi, quam minus is vsucapere possit, nisi forte tempore longissimo.
- 19 Vsucapio semel capta interdum currere desinit; postea iterum processura.
- 20 Si res Minorum temporis diuinitate vsucapta sint, conceditur illis beneficium restitutionis in integrum, continuo quadriennio à die quo nati maiores facti sunt.



- 21 *Exemplo Minorum simile restitutionis beneficium competit Ecclesiis aliisque locis ppi.*  
 22 *Maiores aetate legitime impeditis quo minus res vel iura sua petere potuerint, restitutio in integrum conceditur, quod reuocatio continuo à die cessantis impeditur.*  
 23 *Qui rem legitime vſcepit, etſi ob iuris ignorantiam poſtea nihil excipiens, reſtituat; reſpetere poteſt, tanquam omni iure indubitam.*

**V**erbum præſcribere apud latinos interdum ita accipitur, ſicut apud græcos τὸ μὲν γράζω, excipere; vt præſcriptio idem ſit, quod exceptio. Exceptio autem dicitur actionis exclusio, non inſiciendo omnino eius intentionem ſive fundamentum; ſed aliquid opponendo, ob quod ſine vel efficacia ſua priuetur. Exempli cauſa. Si Titius aduerſum te actionem inſtituat abſoluendum, pretium, pro vendito tibi equo, fundamentum ac intentio huius actionis eſt venditio: tunc verò duobus modis contra eum defendere te poteris, primò, ſi neges equum tibi venditum eſſe: per quam deſenſionē intentio aduerſarij, & fundamentum actionis excluditur, & onus probandi aduerſario imponitur. Secundò, ſi fatearis quidem equum tibi venditum eſſe; ſed opponas, pretium te ſoluiſſe; vel tibi à Titio donatum fuiſſe: tunc diceris contra aduerſariū excipere, cuiusque exceptionis probatio tibi incumbit. Porro exceptionem à Reo conuento appoſitam interdū Actor contraria exceptione retundit, quæ dici ſolet replicatio: & hæc iterum Reus exceptione impugnat, quæ duplicatio appellatur: & ſic deinceps triplicationes, quadruplicationes &c. dari poſſunt. Vide l. 2. ff. de except. & tit. inſtit. de replicationibus.

**E**ſt autem duplex exceptio: Vna peremptoria, per quam actio ſimpliciter & perpetuò excluditur, cuius exemplum ſuprà datum eſt. Altera dilatoria, per quam actio non ſimpliciter, ac perpetuò; ſed reſpectu certū loci, vel perſonæ excluditur: vt ſi Reus opponat Indicem non eſſe competentē. tunc enim actio non omnino excluditur; ſed reſpectu huius tribunaliſ; diciturq; exceptio deſinatoria fori, de qua videri poteſt Iulius Clarus lib. 5. recept. ſent. §. ſit. q. 35.

Vt iam propius ad rem accedamus; Romano iure ſtatutum eſt, vt bonæ fidei poſſeſſor, poſt legitimi temporis decurſum dominum rem ſuam priſtinam repetentem, vel priſtino iure ſuo vti volentem, oppoſitione tanti temporis, quantum iura ad id exigunt, &c. repellere poſſit, adeoque contra eum peremptoriè excipere, tunc præſcribere. Qua verbi acceptione Tertullianus egregiū opus de præſcriptione aduerſus hæreticos ſcripſit; in quo oſtendit, ipſos ad nullā de rebus fidei diſceptationem, & controuerſiam à Catholicis admittendos eſſe; ſed compendio præſcriptionis, id eſt, oppoſitione tam diuturni temporis, quo tali modo vbique in Eccleſia creditum fuit, omnem, quæ contrā aſſertur, nouitatem repellendam: Quod ſi omnino aliquis Orthodoxus hæreticum ad diſputationem admittat; proſiteri eum oporteat, nō neceſſitate aut debito ſe id facere; ſed ex abundante, & ne cauſæ ſuæ diſſidere videatur.

**P**ræſcriptio in hac vſurpatione deſinitur apud Couar. reg. poſſeſſor, p. 1. §. vn. n. 4. *Exceptio peremptoria, ex tempore legibus deſinito ſubſtantiam capiens.* Vſucapio verò deſinitur apud Iureconſultum in l. 1. ff. de vſurpationibus & vſucapion. *Adiectio, (id eſt, acquiſitio) domini, per continuationem temporis, lege deſinita.* Vnde colligitur, præſcriptionē plerumque eſſe quaſi fructū ſive effectum vſucapionis. Nam ideo quod aliquis longa & pacifica rei poſſeſſione dominum acquirit, contra priſtinum dominū, rem eandem repetentem, exceptionē opponere poteſt. Dico *plerumque*: Quia præſcriptio aliquando latius patet, quam vſucapio: ut quidem interdum præſcriptione excludimus ac tollimus inſ actionis perſonalis, vel ſeruitutis, quod alter habet, interim nullius rei dominium aut quaſi dominium nobis acquirentes aut vſucapientes, vt inſiſtā patebit.

Multi aliud etiam diſcrimen ſtatuunt inter vſucapionem, & præſcriptionē; quaſi illa rerum mobiliū tantū in ſit, hæc verò immobiliū. Verum hæc diſtinctio nullū in iure fundamentū habet, ſicut legere poteſ apud Couar. l. in c. n. 2. & 3. Nauar. c. 17. man. n. 85. poſt Alciatum in l. vt ſunt, ff. de verb. ſignif.

Beneficium præſcriptionis ob bonum publicum introductum eſt, duabus de cauſis: I. *Ne diu, & ſere ſemper quarundam rerum dominia incerta eſſent*, l. 1. ff. de vſurpat. & vſucapion. Et *vt aliquis litium ſinis eſſet*, l. vlt. ff. pro ſuo. Ac denique ne poſſeſſores propè immortalitatem teneantur, ait Iuſtinus Imperator in l. cum notiſſimi, C. de præſcript. 30. vel 40. annorum.

II. Cauſa: Vt hac ratione ſegnitie, ac deſidia hominum, res ac iura ſua actione proſequi intermittentium, acuatur, iuxta l. vt perfectius, C. de annali except. & c. vigilant. de præſcript. Vide Petrum Tholoſanum lib. 40. Sintag. c. vlt.

Neq; tamen hinc recte colligunt Adrianus in 4. de 4 reſtit. vbi de præſcription. §. Mihi autem ſine præiudicio, Medina C. de reſtitut. q. 18. quod leges de vſucapione in conſcientiæ foro locum non habeant, niſi vbi culpabilis negligentia priſtini poſſeſſoris interuenit. Nā contraria ſententia non ſolum Iure conſultis, ſed ſerme etiā Theologis cōmunis eſt, Bonæ fidei poſſeſſorē, poſt legitimi temporis decurſum, directum ac plenū rei, quam vſucapit, dominū omni iure ſibi comparare, iuxta l. 3. & 23. ff. de vſucap. Vt proinde eam poſtea à quouis poſſeſſore tanquā dominus vindicare poſſit, l. ſi quis emptionis, C. de præſcript. 30. vel 40. annorum: Neq; in conſcientiæ etiā foro reſtituere teneatur, licet priſtini domini inuincibilē ignorantiam planè agnoſcat, ſicuti rectè ex recepta ſententia docent Abb. c. vigilant. n. 6. de præſcript. cum Gl. ibidē; ver. nouerit, Maior in 4. d. 15. q. 11. conſul. 1. & 2. Couar. reg. poſſeſſor p. 3. §. 3. Syl. ver. præſcriptio, l. q. 13. Andr. Fachinæus lib. 1. controuerſ. iuris, c. 64. contra Henricum Gandauſem quod lib. 8. q. 22. Gregor. Tholoſ. lib. 40. Syntag. c. 8. n. 4. & 5.

Ad fundamentum Adriani & aliorum reſponderetur: Non ob ſolam priſtini domini negligentiam; ſed multo magis ob alias cauſas, ad bonum publicum ſpectantes, beneficium vſucapionis publicis legibus conſtitutum eſſe: Nemo autem dubitat, quin Principi ius competat de ſubditorum bonis ita decernendi, ſicuti Reipublicæ utilitas exigit: idque annotauit Scotus in 4. d. 15. q. 2. a. 2. Abb. in c. quæ in Eccleſiarum, n. 11. de conſtitut. Adrianus in cit. loco, §. ſecundò præmitto, Thomas de Argentina in 4. d. 15. in fine, Gabr. ibid. q. 2. a. 1. notab. 2. Ioann. Faber tit. Inſtit. de iure natur. gent. & ciuili, §. ſed naturalia, n. 3. Couar. reg. poſſeſſor, p. 15. vn. num. 5. & p. 3. §. 3. num. 2. Aceceat, quod eum in iure mentio ſit culpæ vel negligentia priſtini poſſeſſoris, ſermo non ſit de propriè dicto peccato; ſed de culpa ſeu negligentia ciuili, quæ ſape ſimplex tantum, aut inuoluta omiſſio eſt, & nihilominus aliquo modo ciuilitè puniri poteſt, ad aliorum induſtriam excitandam; ſicuti dictum fuit lib. 1. tract. de legibus, cap. 15. num. 1.

Conditiones ad legitimam vſucapionem præſcriptionēque quatuor requiruntur, teſte Syl. ver. præſcriptio, l. n. 1. Prima eſt poſſeſſio. Nam *ſine poſſeſſione præſcriptio non procedit*, reg. 3. in 6. & habetur in l. ſine, ff. de vſucap. Debētque ea ſaltem ciuiliſ eſſe: ſola autem naturalis non ſufficit, ſicuti ex communi docet Abb. c. cauſam, n. 6. de præſcript. Couar. reg. poſſeſſor, p. 2. initio, n. 7. Quæſepet neque alienæ poſſeſſionis occupator vſucapionem inchoare poteſt, quamdiu alter v. g. abſens ciuilitè poſſidet, ſicuti notauit Abb. vigilant. n. 4. de præſcript. Neque commodatarius, depositarius, colonus, inquilinus, procurator, qui rem in pignus accepit,



præscribere possunt, sicut colligitur ex l. 2. C. de præscript. 30. vel 40. annorum: eo quod non suo, sed alieno nomine in possessione sint, siue non ut suam; sed ut alienam rem possideant: quamobrem nec propriè possident; sed potius ille, cuius nomine possessionem tenent, c. si diligenti, de præscript. sed neque qui ab eiusmodi personis, quamvis bona fide, rem accepit, præscribere siue usufruere potest, quamdiu dominus civilem rei possessionem retinet. Vassallus tamen, Emphyteuta, & omnino usufructuarius, cum quasi possessionem non tantum naturalem, sed etiam civilem utilis dominij habeant, quippe suo nomine possidentes usufructum, eundem præscribere possunt, teste Couar. l. c. Gomes lib. 2. resol. c. 15. n. 26. Mol. t. 1. tr. 2. disp. 62. Ioann. Fabro lib. 2. institut. tit. Per quas personas nobis acquiritur, §. de his autem, n. 4.

6 Ex hac requisita conditione infertur primò; Quod aliquis via præscriptionis præcisè plus acquirere non potest, quam possedit, arg. c. cum olim, de præscript. Quare si inferior Princeps, temporis diuturnitate, cum bona fide, ex certis rebus vectigalia exegit, non ideo censetur ius vectigalis absolutè & quoad omnia præscripsisse. Dixi *via præscriptionis præcisè*: Nam ob præsumptionem, si iura possessori non resistent, plerumque ex vno iurisdictionis: v. g. actu, colligi poterit ius totius iurisdictionis: v. g. exorto dubio de aliqua parochia, ad cuius Episcopi diocesin pertinere debeat, adiudicabitur illi, qui in illo loco actum Episcopalem exercere solitus fuit, iuxta c. 1. de relig. domibus. Similiter si constet, quod Titius à triginta v. g. annis fuerit in possessione præsentandi clericum ad Ecclesiasticum beneficium, adeoque hoc ius Ecclesiasticum præscripserit; ex vno isto actu præsumptio fiet, totum ius patronatus eidem Titio competere, sicuti notavit Abb. in cit. c. 1. n. 4.

Infertur secundò; Quod subditus, dum se subditum proficitur, præscribere non potest aduersus ea, quæ potestas gubernatiua intrinsecè ac necessariò requirit; puta ut legibus aut præceptis non teneatur; ut à Superiore nunquam iudicetur, puniatur; ut ad Principem ab inferioribus seu subiectis iudiciis non appelletur ut à censibus & tributis ordinariis, quæ in signum supremæ potestatis Principi solvuntur, immunis sit, l. compertit, C. de præscript. 30. vel 40. annorum, Ita docent ex communi Abb. in c. cum contingat, n. 14. de foro competente, c. cum non liceat, n. 13. & c. audientiam n. 18. de præscript. Couar. reg. possessor, p. 2. §. 2. n. 9. & 10. Less. lib. 2. c. 6. dub. 12. Potest tamen aliquis temporis diuturnitate contra Superiorem præscribere immunitatem, qua destinat esse eius subditus, sicut Couar. l. c. annotavit. Potest item subditus partem aliquam iurisdictionis, quæ alioquin communi iure Superiori competit, cum bona fide præscribere, v. g. Capitulum ut in prima instantia suos Canonicos, & Officiales iudicare possit: sed requiritur ad hoc possessio temporis immemorialis, vel 40. annorum, cum titulo colorato: quandoquidem præsumptio iuris suffragatur Principi, Episcopo, sicuti annotavit Couar. reg. possessor, p. 2. §. 3. n. 3.

7 Infertur tertio. Quod qui incapax est possidendi, is etiam præscribendi incapax est. Quamobrem laici res sacras seu Ecclesiasticas nullo vnquam tempore præscribere possunt: cum earum possessionis incapaces sint, uti constat ex cap. præced. n. 4. Tales sunt v. g. decimæ clericales, item iurisdicção in personas, & bona clericorum: quamobrem iura canonica passim reprobant consuetudinem hanc, tanquam irrationabilem, si laici clericales decimas detineant, vel iurisdictionem in Ecclesiasticas personas, aut bona earum usurpent.

Sed aduertendum est hoc loco; Licet laici incapaces sint possessionis eiusmodi iurium, proprio nomine & auctoritate; capaces tamen fieri per titulum privilegij,

aut concessionis, factæ ab eo, qui potestatem habet, v. g. del. à Summo Pontifice. Quare ita ratiocinari licet: Quæ qualitas seu conditio ad possidendum requiritur, eadem & ad præscribendum: sed titulus privilegij, seu factæ commissionis, verus, aut præsumptus in laico requiritur ad possidendum ius decimarum clericalium, vel Ecclesiasticæ iurisdictionis exercendæ in personas, aut res Ecclesiæ. Ergo etiam titulus privilegij seu factæ commissionis requiritur in laico ad præscribendum eiusmodi ius contra Ecclesiasticam v. g. immunitatem.

Corollarium. Immemorialis consuetudo, seu possessio meri facti, quamvis cum bona fide, interdum non sufficit, si sola sit; & absque titulo præsumpto, vel saltem constante fama accepti tituli, seu commissionis, aut privilegij: tunc nimirum, si consuetudo tanquam irrationabilis legibus reprobata est; siue quod eodem redit, si aliquis per leges incapax est possidendi, & consuetudinem introducendi. Quod autem Iuristæ aliqui dicere solent; Ipsam consuetudinem immemoriam loco tituli esse; cum & ius tribuat possidenti ac præscribenti, imò etiam præsumptionem afferat accepti tituli: id verum duntaxat est, si aliquis absque titulo, seu speciali privilegio, aut commissione capax sit possidendi, & præscribendi, alioquin non. Si enim titulus, seu privilegium hominem capax reddere debeat ad possidendum, seu præscriptionem inchoandam, necessariò antecedere oportet titulum: non autem ipsa mera consuetudo, seu meri facti possessio (quippe quæ reprobata à legibus, inutilis censetur) inducere potest titulum, seu præsumptionem tituli, uti optimè post alios annotavit Franc. Suarez lib. 4. defens. Cathol. cap. 34. num. 16. Videri potest Syl. ver. præscriptio, l. q. 2. dicto 4. Couar. 1. resol. cap. 17. num. 6. Sotus lib. 4. de iust. q. 5. a. 4. & quæ dicam lib. 4. tract. 6. c. 6. n. 8. & tract. 9. c. 9. n. 7.

Infertur quarto. Ut intelligatur, quidnam aliquis temporis diuturnitate præscripserit, diligenter considerandum esse, quidnam possederit, vel quasi possederit, si loquamur de præscriptione iurium, de quibus maior difficultas est. Interdum enim possidemus ius agendi contra aliquem tanquam obligatum nobis, v. g. servitia imponendi, annuas præstationes exigendi. Nota quod dico, *tanquam obligatum*: quia iuri siue actioni ex altera parte obligatio correspondet. Alioquin verò recepta est apud Iureconsultos regula: Quod per actus liberos non inducitur præscriptio: id est, dum aliquis liberè, & non tanquam ex obligatione aliquid mihi præstat, non possum præscribere, cum non sim in possessione iuris erga ipsam. Interdum verò possidemus ius immunitatis ab alterius actione, aut exactione. Et ad hanc possessionem requiritur, ut aliquis neget se alteri obligatum esse, vel ipsa re aut facto ita se gerat, ac si obligatus non sit; ab eo tempore incipit esse in possessione immunitatis, v. g. à tributis, angariis, decimis præstandis. Sin verò aliquis se agnoscat obligatum, vel communiter habeatur pro obligato, tunc nihil eum adiuvat, exactionem factam non esse: quia locum habet regula supra tradita. Quod in actibus meræ voluntatis non procedit præscriptio. Quæ ratione Neotherici resoluunt, quos sequitur Andr. Gaill. l. 2. observat. 60. n. 4. quod Vassallus, aut subditus nunquam præscribit contra dominum ius servitorum, v. g. angariarum, nisi interpellatus negaverit ea dare: adde tu, nisi re ipsa pro immuni seu exempto se gerat, aut publicè habeatur. Cum enim in arbitrio seu mera voluntate Principis sit, utrum servitia, v. g. angarias, per angarias exigere velit, necne: non ideo præcisè quia temporis diuturnitate non exiguntur, alter in possessione immunitatis constituitur: Sæpe tamen præsumi potest renuntiatio iuris, si oblata opportunitate exigendi, nulla exactio fiat: & ob



talem prescriptam renuntiationem facile est possessionem immunitatis inchoare: item si, dum ab aliis exactio fit, à quibusdam non fiat, prescriptio esse solet pro exemptione.

9 Ex his aperitur verus sensus l. cum notissimi, §. in his etiam, ubi negat Imperator Iustinianus, propter non exactum, neque solum canone tempore longissimo, ius emphyteuticum extinguere. Id enim verissimum est, si colonus se emphyteuticum, atque ad canone obligatum profiteatur, vel publice pro tali habeatur. Tunc temporis diuturnitate vsucapere quidem potest pensiones singulas: ut si pensio, cuius soluenda dies ante xxx. annos cesserat, hactenus exacta nunquam fuit, ab eius solutione liber existat: non tamen vsucapere potest immunitatem absolute, siue ut etiam subsequentes, & nondum ita prescriptas pensiones soluere obligatus non sit. Ratio est, quæ sumitur ex l. male agitur, innc. Gl. & Bartolo, C. eod. tit. Quia non plus aliquis prescribit, quam possidet: iste autem colonus, ut ponimus, non habetur pro immuni à soluendo canone absolute; sed tantum à canone vno, aut altero, cuius exactio facta non fuit. Cum enim singulis v. g. annis pensio soluenda sit, tot sunt actiones seu exactiones, quot pensiones: & consequenter tot prescriptiones, quot actiones; ita ut ex vna ad alteram argumentari non liceat: id est, non propterea quod contra vnam exactionem prescripisti, etiam contra alias subsequentes pensiones prescripisse censearis. Quo sensu vera est doctrina Mynsing. cent. 3. obseruat. 13. Gaill. lib. 2. obseruat. 73.

At verò si annua pensio siue præstatio petita fuit, & colonus se debitorem absolute negavit, ab eo tempore incipit esse in possessione immunitatis simpliciter; ut si dominus, seu creditor triginta annorum spatio quiescat, omneius annuæ præstationis per prescriptionem extinguere possit. Idemque dicendum, si re ipsa siue facto, præsertim accedente communi persuasione, colonus se immunitatem à pensione soluenda profiteatur. Etenim certissimum est, quod iura immunitatis aduersus annuas exactiones prescribi possint; modò adsint possessio, bona fides, & temporis legitimi decursus. Nam hoc modo contra ius quartæ decimarum Episcopis debita, quadraginta annis prescribi potest, c. de quarta, de prescript. Item ius immunitatis à decimis soluendis vniuersim vsucapi potest XL. annorum spatio, c. ad aures, eod. tit. Denique notum est ex l. sicut in rem, & l. omnes, contra actiones omnes tum reales, tum personales, saltem longissimo tempore prescribi posse.

Porro cum idem ius sit de parte ad partem, quod est de toto ad totum; simili ratione dicendum: Si temporis diuturnitate non integra pensio soluta fuit; sed pars eius; referre, utrum colonus tali protestatione soluerit, quasi plus non deberet: tunc est in possessione iuris immunitatis quoad alteram partem, sicuti manifestè colligitur ex c. olim, de censib. & notat ibi Gl. ver. triginta sex, & Gl. in c. conquerente, ver. duos solidos, de off. Ordinarij. An verò soluerit partem, cum sciret, & profiteretur se plus debere, prescribere non potest quoad futuras pensiones integras: imò verò soluendo partem debiti, contenti in instrumento, totum debitum confiteri censetur, l. cum fidem, C. de non numerata pecunia.

10 Altera conditio est bona fides. Nam *possessor mala fidei villo tempore non prescribit*, reg. 2. in 6. Dicitur autem bona fide, id est, bona conscientia rem possidere, qui prudenter existimat se possidendi ius habere, ratus videlicet rem suam, seu ad se pertinentem esse: vel saltem nesciens alienam esse. Quo sensu nomen fidei, pro conscientie inquam iudicio, Apostolus accepit ad Rom. 14. *Quod non est ex fide, peccatum est*: id est, quicumque contra conscientiam agit, is peccat. Et consentit Innoc.

III. in Concilio Lateran. c. ult. de prescript. *Quoniam omne, quod non est ex fide, peccatum est; Synodali iudicio definimus, ut nulla valeat absque bona fide prescriptio, tam canonica, quam civilis: cum generaliter sit omni constitutioni & consuetudini derogandum; quæ absque mortali peccato non potest observari. Unde oportet, ut qui prescribit in nulla temporis parte habeat rei alienæ conscientiam.* Idipsum verò ordinariè præsumendum est, aliquem bona fide possedisse, præsertim si possidendi titulus aliquis prætendatur: quia non facile præsumi debet peccatum. Idque tradit Gl. recepta in l. super longi, ver. probetur, C. de prescript. longi temporis. Nisi contra ius commune rei possessionem aliquis acquisierit; vel possessionis suæ nuper acquisitæ rationem nullam asferre possit: aut si ipsi denuntiatio facta fuerat rem esse alterius, ille autem veritatem inquirere neglexit. Ita Gl. & Abb. c. si diligenti, n. 14. de prescript. Ioseph. Mascardus de probat. concl. 1213. n. 43. Couar. reg. possessor, p. 2. §. 8. n. 3.

Porro, licet ad inchoandam bonæ fidei possessionem, vsucapionemque non satis sit dubitare, sed oporteat existimare rem suam esse, siue eius accipiendæ, possidendæ ius competere; tamen ad possessionem, vsucapionemque, quæ bona fide cœpta est, continuandam, sufficit nescire alienam esse; licet aliquis dubitet, an sua sit: modò interim moralem diligentiam adhibeat veritatis cognoscendæ. Idque colligitur ex c. ult. de prescript. ibi, *In nulla temporis parte habeat rei alienæ conscientiam.* Et ex S. Aug. lib. de fide & operibus, c. 7. quod refertur in c. 7. quod refertur in c. si virgo, 34. q. 1. *In iure pradiorum tam diu unusquisque bonæ fidei possessor rectissime dicitur, quam diu possidere se ignorat alienum. Cum vero scierit, nec ab aliena possessione recesserit, tunc mala fidei perhibebitur, tunc iuste iniustus vocatur.* Atque hoc est quod docent Gl. recepta in c. ult. ver. nulla temporis, de prescript. Abb. ibid. n. 39. Medina C. de restitut. q. 17. Couar. p. 2. regula possessor, §. 7. n. 3. Syl. ver. prescriptio, l. §. 3. dicto 3. Nau. c. si quis autem, n. 89. d. 7. de pœnit. Mol. disp. 63. Sanchez lib. 2. de matrim. disp. 41. Suarez t. 2. de relig. lib. 4. cap. 5. num. 16. Less. lib. 2. c. 6. dub. 3. contra Hadr. de restit. q. de prescript. §. hoc supposito, Maiorem, in 4. d. 15. q. 11. requisito 2. Sotum lib. 4. de iustit. q. 5. a. 4. *Quod possessionem & vsucapionem bona fide captam dubium superueniens non vitiat, seu interrumpit.* Ratio est: *Quia in dubio melior est conditio possidentis: quomobrem stante tali dubio speculatio, formari potest conscientia certa seu bona fides, tali casu rem retineri; imò & absumi posse.* Ex qua doctrina rectè respondit Gl. in c. cura, ver. legitima, ibid. Abb. n. 1. de iure patr. Etiam si primi, possessionem aliquam contra iura accipientes, prescriptionem inchoare non potuerint; tamen eorum successores vsucapere posse, qui hoc ignorant, ideòque bonam fidem habent, ob presumptionem, quam etiam in dubio habere possunt, interuenisse legitimum titulum, vel priuilegium: Nam qui in alterius locum succedit, iustam habet ignorantia causam, reg. 42. ff. Vide Medinam C. de restit. q. 17. & quæ dixi lib. 1. tr. 1. c. 5. n. 21. & tr. 4. c. 3. n. 3.

Pro pleniore autem intellectu duo aduertenda sunt: Primum ex Couar. reg. possessor, p. 2. §. 6. num. 9. Bonam & malam fidem dupliciter accipi: theologicè, ac civiliter. Priore acceptione aliud non est rem bona fide ut suam possidere, quam sine peccato possidere: quod licet vel maxime ad vsucapiendum requiritur, tamen non sufficit; sed requiritur etiam bona fides civilis consideratione. Cum enim ius seu commodum vsucapiendi legibus civilibus approbante etiam iure canonico, boni publici causa introductum sit: ideò ubi lex vsucapionem inhibet, bona fides theologica vsucipienti nihil prodest, ait Pompon. in l. 24. ff. de vsucap. Hoc etiam sensu dicitur in l. sed etiam, §. si ante, ff. de heredit. peti.



tione: *Post litis contestationem omnes male fidei possessores esse*; intellige ciuili consideratione: propterea quòd leges ab eo tempore vsucapionem procedere ventant.

11 Quare hoc loco quæstio resolui potest: Vtrum cum inuincibili iuris ignorantia vsucapio fieri possit? Affirmat Medina C. de restit. quæst. 17. prope finem, idque non improbabile putat Lessius lib. 2. cap. 6. dub. 5. Fundamentum est: Quia iuris ignorantia, si inuincibilis sit, inculcata est, consequenter bonam fidem inducit, quæ ad vsucapiendum sufficit. Sed contraria sententia est communis, ac vera apud Couar. reg. possessor, part. 2. §. 7. num. 11. Abb. c. cum non liceat, num. 8. de præscript. & traditur aperte in l. 31. ff. de vsucapionibus: *Nunquam in vsucapionibus iuris error possessoribus prodest.* Et l. 4. ff. de iuris & facti ignorantia: *Juris ignorantia in vsucapionibus negatur prodesse: facti vero ignorantiam prodesse constat.* Et l. 2. ff. pro emptore: *Si à pupillo emerò sine tutoris auctoritate, quem puberem esse putem: dicimus vsucapionem sequi, &c.* Quod si scias pupillum esse: putes tamen pupillis licere res suas sine tutoris auctoritate administrare: non capies usu: quia iuris error nulli prodest. Simile est, si emas à Prælato, ratus Capitulum consensisse, cum non consenserit, potes præscribere: Sin verò arbitratus fuisti, Capituli consensum non requiri, præscribere non potes, sicuti docet Abb. in c. de quarta, n. 12. de præscript. &c. dudum, n. 14. de decimis. Ad fundamentum prioris sententiæ respondetur ex dictis; Ad vsucapiendum requiri quidem bonam fidem theologicè, id est, bonam conscientiam; sed eam non sufficere, si ad sit mala fides ciuilitè, id est, quæ vitium aliquod ex lege habet, præscriptionem prohibente: quamobrem legimus in l. quemadmodum, C. de Agriculis & censitis lib. 11. *Mala fidei possessorem esse nullus ambigit, qui aliquid contra legem mercatur, adeo, ut vsucapere non possit.*

Sed limitanda est communis doctrina. I. Nisi sit ignorantia seu error iuris dubij, seu circa quod diuersæ sint Doctorum probabiles opiniones: talis enim ignorantia bonæ fidei possessorem impedire non debet, quo minus vsucapere possit, sicuti docet Abb. c. de quarta, n. 12. de præscript. Syl. ver. præscriptio, l. q. 3. Nau. lib. 1. consil. 9. de officio Iudicis Ordinarij, edit. 2. Couar. regula possessor, p. 2. §. 7. n. 12. Less. lib. 2. c. 6. dub. 5. II. Si Ignorantia iuris ciuilitè inculcata censetur, puta in Milite, Minore viginti quinque annis, vel Rustico non habente copiam consulti, sicuti probabiliter docet Molina lib. 2. de primogenijs, c. 7. n. 69. quem citat & non improbat Less. cit. dub. 5. n. 17. Nam ideo legum ciuiliū latores iuris ignorantiam in commodis acquirendis prodesse nolunt, ut defidia euitetur, & homines ad legum scientiam excitentur: consequenter si in quibusdam personis iuris alicuius ignorantia toleretur, eaque etiam theologicè inculcata sit, tunc bonam fidem inducere poterit, quæ omni iure ad vsucapiendum sufficiat. III. Limitant Nauar. in cit. consil. 9. Less. cit. dub. 5. n. 15. Quòd iuris ignorantia profit ad præscribendum fructus, quos possidens bona fide percepit, existimans videlicet se ius percipiendi habere: Sed hoc verum non videtur, quod attinet ad fructus extantes: illi enim post rescissionem contractus, qui iure ipsi resistente non subsistit, vnà cum ipsa re restituendi veniunt, sicuti ex communi docet Bartolus in l. sed etsi, §. scire, ff. de petit. hæret. Abb. in c. ad nostram, de rebus Eccles. non alienandis, n. vlt. ex l. iubemus, 2. C. de SS. Ecclesiis.

Alterum aduertendum. Obligationes quæ per præscriptionem extinguì possunt, duplicis generis sunt: Quædam enim suapte natura tendunt ad agendum, vel non agendum: v. g. qui rem alienam possidet, obligatur ad eandem suo domino reddendam: & qui

ex mutuo, empto, aliæ pactione debitor, est obligatur ad rem debitam alteri soluendam. Item in seruitutibus vrbani obligatur aliquis v. g. ad ædificium altius non tollendum: fenestram in alterius hortum non aperiendam. Quibus omnibus hoc commune est, vt nulla præscriptione tolli possint, quamdiu earum scientia adest: Dum, inquam, scis, te rem alienam possidere; ex empto, aliæ personali actione debitorem esse; vel ius ædificium tollendi, fenestram aperiendi; item in alieno prædio pascendi, venandi, tibi nullum competere, præscriptionem nec inchoare, nec perficere potes; quia mala fide vteris. Qua de re lege Couar. reg. possessor, p. 2. §. 11. n. 4. §. verum.

Aliæ verò obligationes sunt, quæ suapte natura dumtaxat referuntur ad patiendum, vel onus subeundum, si ab altero agatur, petatur. Eiusmodi obligationes præscriptione extinguuntur ob solam negligentiam siue cessationem actoris seu exactoris; etsi obligatus suæ interim obligationis probè conscius sit. Quæ est doctrina Bartoli in l. item sequitur, §. si viam, ff. de vsucap. Syl. ver. præscriptio, l. nam. 1. Med. cit. quæst. 17. §. de præscriptione, Mol. tom. 1. tract. 2. disput. 66. quam latè examinat Abb. in c. vlt. de præscript. Exempli habes I. In legibus pœnalibus non obligantibus Reum ad soluendam pœnam ante Iudicis sententiam, seu exactionem, sicut cernere est in pœna commissi ob vectigal non solum. Nam fiscus, post elapsum sine litis contestatione quinquennium, res sibi amplius vindicare non potest, iuxta l. 2. C. de vectigalibus & commissis. Talis quoque est actio pœnalis contra furem in duplum vel quadruplum; item actio iniuriarum, aliæque Prætorie, quæ anni spatio extinguuntur, Institut. de perp. & tempor. action.

II. In actionibus quæ ciuili iure inuentæ, certoque temporis spatio definitæ sunt, v. g. aduersus venditorem, rei venditæ vitium, etiam sine dolo reticentem, competit actio *redhibitoria*; vel *quantò minoris*: quarum illa semestri; hæc anni spatio extinguitur: manente nihilominus naturali obligatione, & actione ad damni compensationem, sicut docet Couar. dicta p. 2. §. 11. num. 6. conclus. 7. & dicam infra tract. 4. cap. 17. §. 2. assert. 3. in fine.

III. Seruitutes rusticæ extinguuntur per solum non vsum tempore legibus definito etsi is, qui præscribit, probè sciat alteri tale ius competere; puta itineris, vel actus per fundum alienum. Non enim vi talis seruitutis dominus fundi cogitur admonere alterum, vt iure suo vtatur; sed pati tantummodo, si vtatur, sicuti rectè cum Bartolo docent Mol. l. c. conclus. 4. Med. l. suprà cit. Less. cit. dub. 6. in fine.

IV. Eadem ratione existimo probabiliter dici: Quòd actio hypothecaria, præsertim in generali hypotheca fundata, post lapsum temporis legitimi, institui amplius non possit contra tertium possessorem, puta bonæ fidei, & absque fraude emptorem; etsi tempore currentis præscriptionis probè sciuerit, rem oppigneratam esse; cum neque hic teneatur ad aliquid agendum, sed solum ad patiendum, vt à se vindicetur, si debitor, excussis bonis suis, soluendo idoneus non reperiatur.

Tertia conditio ad vsucapiendum frequenter requisita est titulus; non quidem verus: (nam hic vnà cum traditione, vel possessione rei dominium transfert, vt præscriptione tunc opus non sit) sed rationabiliter præsumptus: puta, quia aliquis rem emit; dono, aut hereditate accepit, probabiliter arbitratus, dominum esse, à quo acceperat. Talis enim dicitur possidere & vsucapere pro emptore, pro herede: pro donato, legato, &



# DE GENERALIBVS PRINCIPIIS IVRIS.

47

omnino profuo, sicuti constat ex lib. 4. tit. 4. & seqq. ff. Interdum tamen opus non est titulum possessionis nosse, aut ostendere posse: cum nihilominus bona fides consistere, vsucapionemque temporis diuturnitate perficere queat, sicuti constat ex c. 1. de præscript. in 6. Ratio est: Quia facile etiam in proprio facto, ex temporis longinquitate, obliuio contingit, vt dicere aliquis non possit, quo titulo rei possessio ad ipsum deuoluta sit, iuxta l. peregrè, ff. de acquiren. possess. Quare in dubio bonæ fidei iurisque præsumptio stat pro possessore, dummodo is capax sit, vt videre licet apud Couar. reg. peccatum, p. 2. §. 8.

Quarta & vltima conditio est continuatio possessionis, tempore legibus definito. Quia in re distinguendum est, vtrum res quæ vsucapienda est, cum titulo possideatur, an sine titulo: Et iterum, vtrum res mobilis sit, an immobilis. Dico igitur I. Res mobiles triennij spatio vsucapiuntur cum titulo & bona fide, sicut constat ex instit. de vsucap. in princip. & l. vn. C. de vsucap. transformanda, & authent. quas actiones, C. de sacrosanctis Ecclesiis, vbi significatur, eandem triennalem præscriptionem procedere aduersus Ecclesiam, quamuis Romana sit. Vide Less. dub. 7. Couar. reg. possessor p. 2. §. 2. num. 5. Excipiendæ verò sunt ab hac assertiones res furtivæ, & iniqua violentia acceptæ, ad quarum vsucapionem, in cuiuscunque manus deueniant, 30. anni requiruntur, §. furtiua, Instit. de vsucap. l. vitia, iunct. Gloss. C. de acquir. possess.

Dico II. Res mobiles sine titulo vsucapiuntur aduersus quemlibet, 30. annorum spatio. Quæ est communis Doctorum sententia apud Molinam disp. 68. Lessium cit. dub. 7. ducto argu. ex l. 3. C. de præscriptio. 30. vel 40. annorum. Quare cum in ea re Ecclesia nullum priuilegium acceperit, fateri debemus, eodem iure in rebus mobilibus contra Ecclesiam, etiam Romanam, præscribi, sicuti contra priuatum.

Dico III. Res immobiles cum titulo vsucapiuntur inter præsentès decennio; inter absentes spatio viginti annorum, sicuti constat ex Instit. de vsucap. l. vltim. & toto tit. Cod. de præscript. longi temporis, & legere potes apud Gratianum super cap. placuit, 16. quæst. 3. sed cautè: quia plures errores suos congerit. Excipitur verò, si res immobilis à malæ fidei possessore ad te pacto aliquo vel contractu translata sit, non potes domino ignorante, ante 30. annos vsucapere, sicuti habetur apertè in Authent. malæ fidei, Cod. de præscript. longi temporis. Porro præsentès dicuntur qui in eadem prouincia, ac sub eodem regimine domicilium habent; licet res quæ vsucapiuntur alibi sitæ sint. Absentes autem dicuntur, qui domicilium sub diuerso regimine habent, l. vlt. iun. Gl. C. eod.

Loquor autem de bonis priuatorum: Nam primò: Bona tum mobilia, tum im mobilia fisci, id est, quæ fisco iam acquisita & incorporata sunt, non nisi tempore longissimo 30. vel 40. annis vsucapiuntur, §. res fisci, iunct. Gloss. Instit. de vsucap. & l. omnes, C. de præscript. 30. vel 40. annorum. Sin verò nondum fisco incorporata, sed vacantis sunt, quia aliquis sine hærede mortuus est; tunc vel non sunt denunciata fisco, & præscribuntur tempore ordinario, l. quamuis, ff. de vsucap. Vel sunt denunciata, & tunc tempus quadriennij sufficit ad præscriptionem, l. 1. C. de quadriennij præscript. Sin autem ob crimen fisco commissa sunt, puta ob venum, tunc aut loquimur de fisco seculari, aut Ecclesiastico: Si de seculari, post lapsum quinquenij omnis actio fisci extinguitur, sicuti docet Bartolus communiter receptus in l. 2. C. de Apostatis. Sin verò loquamur de fisco Ecclesiastico, tunc spectato iure communi, seruanda est constitutio, c. 2. de præscript. in 6. vt bona ob delictum commissæ Ecclesiæ Romanæ non nisi ceterum an-

norum spatio, iuxta speciale eius priuilegium; aduersus inferiorem autem Ecclesiam 40. annis præscribantur; idque etiam in causa hæresis locum habeat, vt filij, si Catholici sint, 40. annorum spatio non tantum contra Ecclesias particulares, sed etiam Romanam præscribere possint, sicuti docet Abb. in cap. cum vobis, num. 8. & seqq. de præscript. licet aliter Bartolus loc. cit. Vide Couar. in epit. p. 2. §. 8. num. 22. & reg. possessor, p. 2. §. 2. num. 10.

Secundò aduersus Romanam Ecclesiam 100. annorum spatio vsucapio perficitur, c. ad audientiam, c. si diligenti, de præscript. c. 2. eod. in 6. Authent. quas actiones, C. de sacrosanctis Ecclesiis.

Tertiò aduersus inferiorem Ecclesiam, Monasterium, Hospitale 40. annis, iuxta c. de quarta, c. ad aures, c. illud, de præscript. & cit. Authent. quas actiones. Idemque locum habere in hæreditatibus, legatis, aut donatis ad pias causas; puta pro pauperibus, pro captiuorum redemptione, &c. habetur expressè in Authent. de Ecclesiast. titulis, c. 3. collat. 9. & docet Abb. in c. 2. num. 10. de præscript. Couar. cit. p. 2. §. 2. num. 3.

Quartò, aduersus Monasteria S. Benedicti, & Ordines eorundem priuilegijs gaudentes 60. annis, sicut constat ex priuilegio Eugenij Papæ apud Mol. disp. 72. Less. lib. 2. c. 4. dub. 8. num. 25.

Quintò, Bona legata, donata, vendita ciuitatibus, & quæ ad coronam regni vel prouinciæ spectant, 100. annis, iuxta l. vt inter, C. de sacrosanct. Eccles. & videri potest Couar. p. 2. §. 2. num. 15.

Sextò, Alienatio feudi sine domini consensu facta alteri, quamuis bona fide accipienti, præscriptione non obstante, renocari potest à domino, lib. 2. feudorum, cap. 40. de Capitul. Cunradi. Quod tamen ibi Gloss. & Doctores intelligunt de præscriptione temporis longi; non tamen longissimi, seu annorum XXX.

Dico IV. Res immobiles sine titulo vsucapiuntur tempore longissimo, videlicet 30. 40. 60. vel 100. annorum, iuxta differentiam eorum, aduersus quos vsucapio procedit. Ita docent Doctores communiter ex l. sicut in rem, & l. si quis emptionis, §. quod si quis, C. de præscript. 30. vel 40. annorum, & c. sanctorum de præscript.

Limita assertionem. Si ius commune resistat, vel aliunde vehemens præsumptio sit, possessionem malæ fidei, vel ex iuris errore acquisitam & vsurpatam fuisse, tunc neque longissimum tempus ad præscribendum sufficit; sed necesse est ostendere vel titulum apparenter iustum, per quem elidatur præsumptio malæ fidei, sicuti explicat Abbas in cap. dudum, num. 10. de decimis; vel ostendere possessionem temporis immemorialis, id est, cuius initij nulla memoria existat. Nam talis immemorialis possessio inducit præsumptionem tituli, vel accepti priuilegij, si capacitas sit in præscribente. Ita habetur in cap. 1. de præscript. in 6. & docet Gloss. communiter recepta in cap. super quibusdam, §. præterea, de verb. signif. M. Antonius Peregrinus de iure Fisci, lib. 6. c. 8. Anton. Gabriellus lib. 5. de præscript. conclus. 1. num. 1. Aymon. de antiquit. temp. p. 4. §. absolutis, num. 48. Abb. in c. de quarta, num. 26. & in c. vigilianti, num. 35. de præscript. Couar. reg. possessor p. 2. §. 10. num. 7. Iof. Mascardus vol. 3. conclus. 1214. Mol. disp. 77. argum. l. vlt. ff. de aqua pluuiæ arcenda; ibi: Quibus auctoritatem vetustas daret, licet ius non probaret. & l. 2. in princ. ff. eod. ibi, vetustus semper pro lege habetur.

Exempla habes: Si Episcopus alienæ diocesis Ecclesias, vel decimas tempore immemoriali possideat. Si Regulares beneficia, tanquam regularia sint; cum Episcopi preiudicio; absque titulo tempore immemoriali teneant. Si laici à soluendis decimis paræ antiquitate immunes sint; vel diocesani ab Ora-



dinarij iurisdictione exempti, iuxta c. cum persona, de priuileg. in 6. & videri potest Couar. 1. resol. c. 17. Si inferior Episcopo Pontificalia insignia ob immemorialis temporis consuetudinem sibi vendicet, de quo Abb. in c. 1. num. 10. Vt lite pendente nihil innouetur. Si inferiores Duces aut Magnates regni, tributa exigant, monetas cudant, vectigalia imponant, cap. super quibusdam, de verb. significat. vel similia faciant, quæ ad merum imperium spectant, & supremo Principi, tanquam specialia eius priuilegia, competunt, quæ de re Abb. in c. vlt. num. 11. de consuet. Crauetta de antiq. tempor. p. 4. §. absolutis, num. 13. Couar. cit. p. 2. §. 3. num. 3. Ioach. Mynfinger. cent. 4. obseru. 24. Si quis in Ecclesia, quæ secundum propriam institutionem libera esse deberet, ius patronatus à tempore immemoriali possideat; vel si fundator seu patronus Ecclesiæ Collegiæ ius præsentandi Prælatum seu Rectorem Ecclesiæ vendicet sibi à tempore, cuius initij nulla memoria extat, quæ de re Couarruu. reg. possessor, p. 2. §. 10. Molin. disp. 75. §. quando Ecclesia. Less. lib. 2. c. 6. dub. 10. Videri etiam potest Trident. sess. 25. c. 9. de reform.

Porro circa præscriptionem temporis immemorialis quædam obseruanda sunt. I. Quod hæc præscriptio non censetur comprehensa statuto aut lege quamuis generalibus verbis prohibente fieri præscriptionem; puta *nulla præscriptione obstante*. Quia hæc specialem fauorem, atque æquitatem continens, specialem derogationem desiderat; quæ tamen fieri non solet, si capacitas sit in præscribente, & res præscriptibilis.

II. Tamen si is, qui possessionem temporis immemorialis ostendere potest, non teneatur titulum allegare; cum ob temporis diuturnitatem id sæpe difficile sit, atque ipsa tanti temporis continuata possessio ius tribuat, si capacitas sit in possidente, sicut innotat Gloss. recepta in c. 1. de præscript. in 6. ver. non extat, Abb. in c. peruenit, n. 3. de censib. Couar. reg. possessor, p. 2. §. 3. n. 8. ver. hinc falsum. Nihil tamen plerumque obest, vna cum tanti temporis possessione titulum allegasse, v. g. accepti priuilegij, factæ compositionis, &c. etsi talis titulus plenè probari non possit: quandoquidem ex adiuncta possessione diuturna præsumptionem ac corroborationem accipit.

III. Præscriptio immemorialis nullum definitum annorum tempus requirit; sed probari debet secundum Gl. & DD. in c. 1. de præscript. in 6. Ioan. Fabr. tit. de iure naturali, gentium, & civili, §. ex non scripto, per testes, quod semper viderunt & audierunt ita esse; neque, vnamquam contrarium: et quod communis est, & fuit semper opinio ac fama de hoc facto, neque extet contrarij vel initij memoria. Monent autem Nau. l. 2. conf. vlt. de præscr. edit. 2. Mol. disp. 76. nihil ob stare huic præscriptioni, etsi constet, possessionem ante 300. vel 200. annos nullam fuisse, sed postea cepisse; dummodo initium illius memoriam senum, qui modò viuunt, etiam ex auditu siue relatione maiorum suorum excedat: neque etiam apertè sciatur, quod initium talis possessionis vitiosum fuerit, sicut annotauit Couar. cit. §. 3. num. 8. Aym. Crauet. cit. p. 4. §. absolutis, num. 60.

Dico V. Quod dixi de rebus immobilibus, pariter intelligi debet de præscriptione rerum incorporalium siue iurium, puta vsusfructus, annuæ præstationis, iuris patronatus, iurisdictionis, &c. Quæ proinde 10. annis inter præsentantes; 20. annis inter abentes, cum titulo colorato, & bona fide absoluitur, 30. verò annis sine titulo. Ita ex communi Mol. disp. 70. in princip. Less. dub. 8. in fine. Est verò hoc loco diligenter distinguendum: Vtrum præscriptio iuris v. g. emphyteutici, vel iuris patronatus tendat contra Ecclesiam, & similiter vtrum præscriptio iurisdictionis tendat contra proprium Superiorem vel Principem: an verò præscriptio

horum tendat aduersus personam priuatam, sicut bene annotauit Couar. in reg. possessor p. 2. §. 10. num. 8. Mol. disp. 70. in princip. & disp. 75. §. porro communis, & sumitur ex doctrina Gloss. vlt. in c. contingit, de dolo & contumacia. Etenim si præscriptio iurium tendit contra Ecclesiam, aut contra Principem; tunc 40. annorum, & interdum temporis immemorialis possessio requiritur, vt ex suprà dictis constat. At verò, si contra aliam personam, puta si non quæratut vtrum Ecclesia patronata sit nec ne: sed vter duorum, patronus eius existat; tunc vnus contra alium præscribit tempore ordinario, vt in assert. dictum est, & esse communem doctrinam ait Less. cit. cap. 6. num. 33.

Vnde aliud etiam discrimen nascitur. Quod in casu, quo iuris præsumptio est contra possidentem, vt si quis ius præsentandi sibi vendicet in Ecclesia Collegiata: literas foundationis, si penes habeat, Episcopo exigenti exhibere teneatur: At verò, si litiget de iure patronatus cum alia persona, non tenetur illi instrumentum exhibere, iuxta l. 4. C. de edendo. Quod etiam in conscientia foro locum habere potest, vt si aliquis à longissimo tempore solus præsentauit ad beneficium Ecclesiasticum cum bona fide; postea inspexit literas foundationis, in quibus continetur ius præsentandi vna cum altero competere, v. g. cum Titio, eiusque hæredibus: his litem mouentibus, non tenetur literas foundationis exhibere: cum diuturna pacifica possessione præscripserit; atque fieri potuerit, vt post factam foundationem Titius eiusve hæredes vel per negligentiam suam, vel per aliquam pactiõem aut commutationem ius præsentandi amiserint.

Dico VI. Hoc speciale est, per regulam Cancellariæ de triennali possess. Quod qui beneficium Ecclesiasticum triennij spatio pacificè possedit, sine ingressu simoniaci, &c. ius in eo acquirit. Idque certum est in ordine ad actorem seu petitem quemcunque, vt eum tali exceptione repellere possit. Sed an etiam locum habeat absolute; vt beneficij Ecclesiastici quasi domus efficiatur, neque alium titulum suæ institutionis exhibere Ecclesiæ teneatur; non consentiunt Doctores. Negant enim Couar. cit. p. 2. §. 10. num. 10. Mol. disp. 70. post. Gl. in c. contingit, de dolo & contumacia, propterea quod *beneficium Ecclesiasticum non potest licitè sine institutione canonica obtineri*, reg. 1. in 6. Sed responderi potest: Hanc regulam veram esse iure ordinario, & secluso extraordinario remedio vsucapionis: Quare contrariam, seu affirmantem partem docent Nau. lib. 3. consil. 30. de præb. & lib. 1. consil. 8. num. 2. de renunt. edit. 2. Sa ver. beneficium, num. 14. Less. c. 6. dub. 10. in fine, & cap. 35. dub. 25. num. 140. Sanchez lib. 7. moral. c. 29. num. 91. Nicolaus Garcias tract. de benef. p. 8. c. 1. num. 15. Rebuffus tract. de pacificis possess. num. 241. qui tres posteriores resoluunt: Si aliquis simoniacè institutus fuit per ignorantiam; quia v. g. pater pro filio ignorante pecuniã numerauit: prodesse regulam triennalem possessori cum bona fide, & eiusmodi titulo colorato: vt alia tituli habilitatione, aut dispensatione opus non sit. Quod porro Nauar. ait in cit. consil. 8. & Sa cit. num. 14. *Triennio possidens beneficium pacificè, etiam simoniacè, sit eius dominus*, non intelligo, quomodo defendi possit: cum certum sit, ad acquirendum ius titulo præscriptionis bonam fidem requiri, saltem in conscientia foro, de quo ipse Nauar. & Sa loquuntur.

Dico VII. Debita omnia aduersus ciuiles actiones, tam reales, quam personales, cum bona fide, saltem longissimo tempore, puta 30. annis præscribuntur. I. sicut in rem, Cod. de præscript. 30. vel 40. annorum. Excipitur verò actio hypothecaria, quæ 40. annorum spatio tollitur, si ipsemet debitor, eiusve hæres possessor sit, l. cum notissimi, C. cod. tit.

Dico VIII. Omnis actio siue accusatio criminis de-



curſu 20. annorum, à die commiſſi criminis, præſcriptione tollitur, l. querela, Cod. de falſis. Adde, idem dicendum de inquisitione ex officio Iudicis. Cùm enim inquisitione ſuccedat loco accuſationis, meritò ſublato iure accuſandi, cenſetur etiam ſublato ius inquirendi, ait Iuſtus Clarus lib. 5. ſentent. §. fin. q. 51. num. 1. & teſtatur eſſe communem ſententiam: eſi aliter ſentiat Eman. Rodericus tom. 2. regul. quæſt. q. 6. a. 11. Quædam tamen crimina ſunt, in quibus quinquenni ſpatio præſcriptio abſoluitur, vt adulterium, l. quinquennium, ff. ad l. Iuliam de adulteriis, l. adulter, C. cod. Item crimen peculatus, l. 7. iunct. Gl. ff. ad l. Iuliam peculatus. Vide Petr. Greg. Tholoſanum lib. 40. ſyntagma. c. 5. num. 26.

Porro aliqua addenda ſunt circa continuationem temporis legitimi: I. Ad probandam poſſeſſionem continuam ſufficit plerumque oſtendere principium poſſeſſionis, ex quo legitimum tempus ad præſcribendum lapſum ſit: nam ex poſſeſſione de præterito, præſumitur poſſeſſio huc uſque continuata, ſi quis adhuc in poſſeſſione permanet, arg. l. ſiue poſſidētis, C. de probation.

17 Alterum. Si poſſeſſor rem bona fide aliquamdiu poſſedit, & poſtea in alterum, bonam item fidem habentem, transferat; poteſt hic numerare etiam tempus antecęſſoris ſui; adeoque, vt aiunt, vt accęſſione temporis in uſucapiendo, iuxta l. doli, §. cum qui, ff. de contrahend. empt. & l. Pomponius, §. cùm quis, ff. de uſucap. Qua ſimilitudine ſucceſſor in beneficio numerare poteſt tempus, quo antecęſſores eius ab aliqua conditione ſeu onere in fundatione requiſito liberi fuerunt: eamque libertatem illos bona fide poſſediſſe in dubio præſumere poteſt, iuxta regul. 14. in 6. *Cum quis in ius ſuccedit alterius, iuſtam ignorantia cauſam cenſetur habere*, & notauit Nauar. l. 2. conſil. 1. de præſcript. edit. 2. & in ſimili Couar. cit. p. 2. §. 11. num. 6. corol. 4.

Tertium. Si mutatio accadat in perſonis contra quas præſcribitur; puta ſi ſiſcus, vel Eccleſia ſuccedat priuato in hereditate bonorum, tunc uſucapienti aliquid ex tali hereditate bonorum, computandum eſt tempus, ſecundum proportionem reſpectiuam: ita vt ſi medietatem uſucapionis compleuerat ante mortem perſonæ priuæ, alteram medietatem complere teneatur iuxta privilegium ſuccedentis: videlicet, ſi uſucapiens quinque annis fundum bona fide poſſederat ante ſucceſſionem Eccleſiæ; poſtea medietate temporis quadragenarij, quo contra Eccleſiam præſcribitur, videlicet 20. annis opus habebit ad uſucapionem complendam, ſicuti ſingulariter notat Abbas in cap. de quarta, num. 20. de præſcript. argum. l. ſiſcus, ff. de iure ſiſci, ubi dicitur: *Quod ſiſcus, cum in priuati ius ſuccedit, priuati iure pro anterioribus ſue ſucceſſionis temporibus uiuitur*. Et in Authent. quod ſi quis, Cod. de præſcript. longi tēporis: *Quod ſi quis quibuſdam annis præſens, quibuſdam abſens; adiſciuntur ei ſuper decennium tot anni, ex decennio fuit abſens*. Vt ſi abſens fuit duobus annis, octo uero præſens, is duodecim annos requirit ad complendam uſucapionem rei immobiliſ.

18 Quartum. Si antecęſſor mala fide poſſedit, eius bonæ fidei ſucceſſor particularis, decurſu temporis legitimi uſucapere poteſt, non numerando tamen tempus quo malæ fidei auctor poſſedit. Dixi particularis: Nam ſucceſſori vniuerſali, ſiue heredi immediato adeo nocet malæ fides defuncti, vt uſucapere nunquam poſſit, iuxta §. diutina, Inſtitut. de uſucap. l. ſi mala fide, Cod. communia de uſucap. Ratio eſt. Quia hæres cum defuncto quaſi vna perſona reputatur, iuxta l. cùm hæres, ff. de diuerſis, & temporal. præſcript. Couar. part. 2. §. 9. Molin. diſp. 65. Quamuis Gloſſ. in reg. 14. in 6. & alij apud Couar. num. 5. Leſſ. lib. 2. c. 6. dub. 13. exiſtiment, etiam vniuerſalem ſucceſſorem bonæ fidei, tempore longiſſi-

mo, id eſt, 30. annis uſucapere poſſe.

Quintum: Uſucapio ſemel cępta interdum currere 19 deſinit; idque duobus modis: Primò. Vt ſopita ſeu ſuſpenſa maneat, ac ueluti dormiat; cęſante uero impedimento denuo currat, & cum lapſu temporis prioris continuetur. Secundò. Vt omnino interrumpatur uſucapio; poſtea uero, cauſa interruptionis cęſante, denuo inchoetur. Quibus caſibus præſcriptio dormiat, tradit Abbas in cap. illud, num. 5. & cap. ex tranſmiſſa, nu. 4. de præſcript. Sylueſt. ver. præſcriptio 1. quæſt. 9. Leſſ. lib. 2. cap. 6. dub. 16. Videlicet tempore belli, aut peſtis, ſi ſus non dicatur, vel homines aliò diffugiant. Si Eccleſia careat Epifcopo, aut Rectore; vel habeat inutilem ad agendum. Si ſi, contra quem præſcribitur, agere non poſſit, puta ſi ſus comparatione bonorum aduentitiorum; vxor comparatione bonorum dotalium, quarum plenam adminiſtrationem & quaſi dominium maritus habet. Quibus uero modis præſcriptio ſeu uſucapio omnino interrumpatur, tradit Abb. in cit. c. illud, Couar. reg. poſſeſſor, p. 2. §. 12. Videlicet ſi poſſeſſio, vel bona fides amittatur: vel poſſeſſori ſis moueatur, & conteſtetur, l. moræ litis, Cod. de rei vindicat. Si tamen actor litem deſerat, vel in ea ſuccumbat, non cenſebitur interrupta uſucapio. Cæterum qua ratione uſucapio ita interrupta, poſtea cęſante impedimento, à bonæ fidei poſſeſſore denuo inchoari poſſit, videbis apud Couar. cit. §. 12. num. 7.

Hiſita de legitima uſucapione explicatis, porro ſciendum eſt: Quibuſdam beneficium reſtitutionis in integrum, ad rem ſuam temporis diuturnitate præſcriptam Iudicis auctoritate recuperandam, concedi. Primò quidem, minoribus 25. annis tribuitur tale beneficium continuo quadriennio, à die quo maiores facti ſunt, adeoque uſque ad expletum annum XXIX. iuxta l. vltim. Cod. de tempor. in integrum reſtitut. Idque locum etiam habet in uſucapione longiſſima; atque ob ſolam læſionem in minore illa ætate interuenientem, tametiſi nulla ignorantia, aliudve impedimentum interceſſerat.

Secundò, exemplo atque æquiparatione Minorum, 21 ſimile beneficium competit Eccleſiis, aliſque pijs locis, vt res ab altero, quamuis longiſſimi temporis, videlicet 40. vel 100. annorum uſucapione amiſſas, recuperare poſſint, continui quadrienni ſpatio: quod numerari debet à die, cùm, re intellēcta, Eccleſiæ integrum fuit reſtitutionem petere, ſicuti colligitur ex c. 1. de reſtit. in integrum in 6. ver. negligenter omiſerit, & docet Syl. ver. præſcriptio, 1. q. 4. Leſſ. l. 2. c. 6. dub. 18. & Doctores in Authent. quas actiones, C. de ſacroſanctis Eccleſiis. Et habet hæc in integrum reſtitutio locum etiam aduerſus alteram Eccleſiam, ſicuti conſtat ex c. auditis, de in integrum reſtit.

Tertiò. Si quis Reipub. cauſa abſens fuit, vel in vinculis hoſtium, & poteſtate conſtitutus, vel alio legitimo 22 impedimento detētus, quo minùs res vel iura ſua, dum contra eum uſucapio currebat, repeteret; Prætoria æquitate in integrum reſtituendus eſt, iuxta l. 1. ff. Ex quibus cauſis maiores, & c. l. vltim. Cod. de temporibus in integrum reſtit. ubi quadrienni continui ſpatium conceditur, numerandum à die cęſantis impedimenti. Vide Gloſſ. ibid. Abb. in c. ex tranſmiſſa, n. 13. de præſcript. Maiorem in 4. diſt. 15. q. 11. Mol. to. 1. tract. 2. diſp. 80.

Idemque reſtitutionis beneficium locum etiam habere, ſi aliquis inuincibilem currētis uſucapionis, adeoque inuincibilem facti ignorantiam probare poſſit, docent Doctores communiter apud Couar. reg. poſſeſſor, p. 3. §. 3. Mol. cit. diſp. 80. Quod uerum eſſe uideretur, ſaltem ſi præſcriptio non ſit longiſſimi temporis, ſicuti uult Andreas Gaill. l. 2. obſeruat. 160. Sed in hac re cuiuſque tribunalis conſuetudo ſpectanda erit. Videri poteſt Aym. Crauetta de antiq. temporum, p. 4. §. materia iſta, n. 49. Andr. Fachinæus lib. 1. controu. c. 69.



Restat soluenda quæstio; Si is, qui rem legitimè vsu-  
cepit, pristino domino postea repente, nihil exci-  
piat; sed restituat ob iuris ignorationem, vtrum rem,  
tquam indebitè datam condicere possit? Negat Gre-  
gor. Tholosan. lib. 40. Syntagm. & cap. 10. num. 2. vbi  
ait; Exceptionem vsucapionis ita demum predesse ei  
qui vsucepit, si obijciatur ab eo: Eò quòd per vsuca-  
pionem civilis tantum obligatio sublata sit; manente  
naturali, quæ sufficiens sit ad ius comparandum Actori,  
si Reus conuentus nulla se exceptione defendat.

23 Sed contrariam sententiam puto veram, quam docet  
Gloss. & Bartolus in l. ult. ff. rem ratam haberi, Abb.  
in cap. ad aures, nu. 4. de præscript. Balbus de præscript.  
part. 1. quæst. 6. Nam iuris ignorantia, etsi non excuset  
cùm agitur de acquirendo; excusat tamen, cùm agitur  
de damno rei iam acq̃uisitæ, iuxta regulam Papiniani in  
l. 7. ff. de iuris & facti ignorantia: *Iuris ignorantia non pro-  
dest acquirere volentibus: suum verò petentibus non nocet.*  
Atqui per vsucapionem dominium rei plenè transfer-  
retur in vsucapientem, sicuti ex communi fatetur ipse-  
met Tholosanus cit. lib. 40. cap. 1. num. 8. & constat.  
ex l. qui fundum, §. fin. ff. pro emptore, sicut traditio-  
ne, ita & vsucapione rem nostram facimus, & l. 27. ff. de  
verb. signif. *Alienationis verbum etiam vsucapionem  
continet: vix est enim, ut non videatur alienare, qui pati-  
tur vsucapi.* Quare in l. omnes, Cod. de præscript. 30.  
vel 40. annorum dicitur; Eum qui vsucepit, plenissima  
munitione securum esse. Sequitur ergo hinc; quòd qui  
rem vsucapione sibi plenè acq̃uisitam, obiuris errorè,  
pristino domino restituit, nihil obesse sibi debeat; sed  
tquam solum tam civiliter, quàm naturaliter inde-  
bitum, condicere siue repetere iure possit, iuxta tit. ff.  
& Cod. de conditione indebiti.

Confirmatur ex doctrina, quam indicat Abbas in cit.  
c. ad aures, num. 5. quæ videtur esse communis, licet  
cum quibusdam repugnet Tholosanus cit. cap. 10.  
Quòd Index ex officio repellere debeat actorem, con-  
tra quem præscriptum est, etsi Reus conuentus nihil  
excipiat. Cui doctrinæ si addamus regulam, quam ex  
Bartolo tradit Balbus loc. cit. quæst. 8. *Quod Index  
ex officio, parte tacente, non repellit Actorem, nisi prorsus  
actione carentem, & solum agentem de facto:* sequitur  
inde, pristinum dominum, aduersus quem præscriptum  
est, omni suo iure & actione cadere. Quare rectè nota-  
uit Couarruu. reg. possessor, part. 1. num. 5. conclus. 8.  
duplicem esse exceptionem: Vna est, per quam submo-  
uetur actio, quæ modò Actori competit, sed ope excep-  
tionis oppositæ excluditur ac retunditur. Altera est, per  
quam aliquid allegatur, quo actio ipso iure ante subla-  
ta erat, & modò Actori non competit. Atque huius  
posterioris generis exceptio est, quæ ex vsucapione na-  
scitur, sicuti ex dictis constat.

## CAP. IX.

De seruitutibus, earumque præ-  
scriptione.

## SUMMARIUM.

- 1 Triplex est seruitus; Personalis, Realis, & Mixta.
- 2 Seruitus realis alia rustica est, & alia urbana; & hac vel affirma-  
tiua, vel negatiua.
- 3 Seruitus cum urbana, tum rustica vel continua est, vel disconti-  
nua.
- 4 Seruitus realis, si continua vel quasi continua sit, præscribitur cum  
bona fide X. annis inter presentes, XX. inter absentes; etsi titu-  
lus non interueniat.
- 5 Seruitus affirmatiua, si discontinua sit, cum titulo præscribitur tem-  
pore ordinario; sine titulo verò tempore immemoriali.

- 6 Ad vsucapionem seruitutis negatiuæ requiritur, ut dominum in re sua  
aliquid agere volentem bona fide repellam: ex eo tempore compa-  
ro seruitutis possessionem, quæ si tempore ordinario cum titulo, im-  
memoriali verò sine titulo continuetur, vsucapio perficitur.
- 7 Vsfuctus, & seruitutes rustice per solum non vsu tolluntur; non  
item seruitutes urbane; sed necesse est, contrarium seruituti actum  
bona fide exerceri.

**T**riplex est seruitus, secundum Gl. tit. Instit. de  
seruitutibus prædiorum rusticorum, & urbano-  
rum. Vna merè personalis, quæ à persona personæ de-  
betur: videlicet ius, quod dominus habet in seruo, seu  
mancipio suo. Cuiusmodi ius seruitutis, nullo tempo-  
re vsucapi potest, sicuti constat ex l. ultim. Cod. de præ-  
script. longi temporis, quæ pro libertate. Ratio est,  
quia æquitas non permittit, ut aliquis propter erro-  
rem, temporis diuturnitate, ex libero seruus efficiat-  
ur. Contrà verò libertas viginti annorum spatio, cum  
bona fide, præscribitur l. 2. C. eod. & docent Gl. & DD.  
ibid. Gomez 2. resol. c. 15. num. 26.

Altera est seruitus mixta, quæ à re personæ debetur.  
Et est triplex hæc seruitus, nimirum vsufuctus, vsus,  
& habitatio: cùm hæc à substantia rei siue proprietate  
separata, legis aut hominis dispositione alicui consti-  
tuuntur. Et talis seruitus præscriptione comparatur  
cum bona fide & titulo 10. annis inter presentes; 20.  
inter absentes: si autem desit titulus, tempore lon-  
gissimo 30. annorum. Ita habetur in l. ult. in fine, C.  
de præscript. longi temporis, & l. penult. C. de  
seruitut.

Tertia est seruitus merè realis, quæ rei à re debetur: 2  
Et est duplex; Urbana, & rustica. Urbane seruitutes  
dicuntur, quæ urbanis prædiis, id est, ædificiis, habi-  
tandi gratia constructis, & annexis hortis, areis, &c.  
inhærent. Subdiuiduntur in affirmatiuas & negatiuas.  
Affirmatiuæ sunt v. g. vt ædium mearum stillicidium in  
ædes vel aream tuam recipiatur, vel tignum in parietem  
tuum mittatur; vel ex domo mea in domum tuam tran-  
situs pateat. Negatiuæ sunt, v. g. Ne altius ædes tuas  
tollendo prospectum ædibus meis adimas: vel ædifi-  
cando luminibus officias, Instit. de seruit. prædiorum,  
&c. Item vt fenestram in muro tuo aperire tibi non li-  
ceat. Enimvero, seclusa tali seruitute, pacto vel per  
præscriptionem constituta, cuius liberum est ædes suas  
altius tollere, & in pariete suo, non alieno, fenestram  
facere, l. altius, Cod. de seruitut. & aqua. Nisi certus  
modus statuto definitus sit, ne ædes altius tollantur vt  
notauit Gloss. l. 1. Cod. de ædificiis priuatis. Vel nisi quis  
ædificare, aut fenestram in muro suo aperire velit so-  
lùm ad æmulationem vel despectum vicini, argum. l.  
opus, ff. de operibus publicis, & l. fluminum, §. ult. ff.  
de damno infecto, vbi Gl. ait, Quòd in dubio existiman-  
dum non sit, aliquem facere nocendi animo, quando iu-  
re suo vitetur.

Rusticæ seruitutes dicuntur, quæ rusticis prædiis in-  
hærent: cuiusmodi sunt agri & prata, item pecorum sta-  
bula à domibus seiuncta: talis seruitus est v. g. vt per  
agrum tuum transire: iumenta vel currus agere liceat:  
quæ dici solent, iter, actus, via. Item vt in prato tuo are-  
nam fodere, calcem coquere licitum sit.

Porro vtraque seruitus, id est, tum urbana, tum ru-  
stica, diuidi solet in continuam, ac discontinuam. Con-  
tinua seruitus dicitur, quæ, quantum est ex se, conti-  
nuum actum siue vsu habet: seu re ipsa, seu animi  
præparatione: vt seruitus aquæ ductus, tigni suscipien-  
di, oneris ferendi, stillicidij admittendi, sicuti bene ex-  
plicat Syluest. ver. præscriptio, l. quæst. 7. dicto vndeci-  
mo. Discontinua verò seruitus est, cuius vsus per inter-  
ualla est, quia ab hominum actione pendet: v. g. iter,  
actus, aquæ haustus, arene fossio. Couarruu. lib. 1. reso-  
lut. cap. 17. num. 11. Ioach. Mynsinger. cent. 4. obser-  
53. annuerant pecorum pastum in agro alieno,



Et Andr. Gaill. lib. 2. obseruat. 66. ius venandi in alieno fundo.

4 His ita positis, quod attinet ad prescriptionem seruitutum realium, dico I. Seruitus realis affirmatiua, tam rustica, quam urbana, si continua, aut quasi continua sit, praescribitur cum bona fide inter praesentes decennio; inter absentes viginti annorum spatio, l. si quis diuturna, ff. si seruitus vindicetur. Neque requiritur titulus; attamen scientia & patientia domini liberè permittentis aliquem tali iure in praedictum eius vi: nam ex eo tempore inchoatur possessio seruitutis, sicuti constat ex l. quotiens, 1. & 2. ff. de seruit. l. 1. & 2. Cod. eod. & docet Gomez n. 27. Abb. in c. cū Ecclesia, n. 21. de causa possess. & proprietat. & in c. de quarta, n. 21. & seqq. de praescript. Couar. reg. possessor in p. 2. initio, n. 8. Mol. t. 1. tr. 2. disp. 14. vbi rectè notant; Necesse esse ad possessionem iuris acquirendam, vt ex circumstantiis appareat, quod alter non ex mera gratia aut liberalitate aliquid fieri patiatur, sed quasi ita debitum sit. Nam per actus meræ facultatis, seu gratuita voluntatis nunquam inducitur possessio iuris; consequenter neque praescriptio: Vt si aliquis te pluribus annis aliqua festiuitate ad cenam inuitet; vel per agrum suum ire aut agere a iuramento tuo patiatur, si appareat idem concedere ex gratia & non vt debitum, nunquam contra eum praescribes, quantumuis actus frequentetur, sicuti docet Innoc. in c. cū Ecclesia sutrina, de causa possess. & proprietat. Aymon. Cranetta de antiq. temporum p. 4. §. materia ista, n. 98. Nauar. lib. 3. consil. 4. de praescript. edit. 2. In dubio tamen, ex diuturna & ordinaria v. g. quotannis recurrente alicuius rei praestatione, potius praesumitur obligatio seu debitum, sicuti notat Ioan. Faber Instit. de rerum diuis. §. reuertendi. Præterquam, quod tamen si aliquid à principio libera voluntate praestabatur; si tamen postea tanquam debitum exigi aut dari coeperit; ex illo tempore acquiritur possessio iuris, in qua si temporis diuturnitate cum bona fide perseueretur, praescriptio absoluitur, vt iam verè & re ipsa debitum sit, sicuti notat Crauetta in fine cit. p. 4.

Præterea notandum hinc est, supra dictam scientiam & patientiam domini requiri, si ab ipsomet quasi traditio iuris seruitutis fiat: sin verò ab alio possessore, cum titulo praesumpto & bona fide tua, seruitus tibi constituatur, non requiri scientiam & patientiam veri domini, aduersus quem possessio & vsucapio procedit, colligitur ex l. ult. C. de praescript. longi temporis, & bene notat Gomez cit. n. 27. Videri etiam potest Couar. reg. possessor, p. 2. initio, n. 8. & 9.

5 Dico II. Seruitus affirmatiua, si discontinua sit, praescribitur cum titulo tempore ordinario, videlicet 10. vel 20. annis, iuxta cit. l. ult. Si autem titulus non interueniat, requiritur possessio temporis immemorialis, cum bona fide, sicut colligitur ex l. seruitutes, ff. de seruitutibus, & ex communi docent Syl. ver. praescriptio, l. q. 7. dicto 11. Gomez cit. c. 15. n. 28. Less. lib. 2. c. 6. n. 28. Neque verò hoc casu scientia & patientia domini necessaria est: quia possessio tanti temporis tribuit praesumptionem tituli, arg. l. hoc iure, §. aquæ ductus, ff. de aqua quotidiana & aestiua. Ductus aquæ, cuius origo memoriam exceperit, iure constituti loco habetur. Vide Couar. reg. possessor, p. 2. §. 10. n. 8. Nicolaum Euerhar. tom. 1. consil. 39 n. 8.

Id verò in questione est: Quod dictum de iuribus realibus seu seruitutibus, habentibus actus discontinuos, ad earum praescriptionem sine titulo tempus immemoriale requiri; an etiam locum habeat in iuribus personalibus; cuiusmodi sunt v. g. confirmandi Prælatus, collectam exigendi ab extraneis? Ita affirmant aliqui apud Crauetta cit. p. 4. §. materia ista, n. 31. Sed contraria sententia est vera, quam tenet idem Crauet-

ta, praescriptione absolui tempore ordinario. Ratio est. Quia cum primum aliquis Prælatus Ecclesiae confirmauit; vel collectam extraneo imposuit, tanquam ius id agendi habens, incipit esse in possessione eiusmodi iuris: quare, nisi iura resistat, vsucapio tempore ordinario perficitur; videlicet contra Ecclesiam 40. annis, contra alium 10. vel 20. annis cum titulo, 30. aut sine titulo.

Dico III. Seruitutes reales negatiua; quarum videlicet possessio in negatione consistit; eodem tempore praescribuntur, quo & affirmatiua: solum hoc peculiare est, quod possessio seruitutis negatiua non ante acquiritur, quam dominus in re sua aliquid agere conatur, & ego illum bona fide impedio: nam ab eo tempore incipit tempus vsucapionis. Veluti si Titius domum suam altius tollere velit: aut fenestram in pariete aperire: & ego illum prohibeam, ratus prohibendi mihi ius competere: illèque acquiescat, comparo tunc possessionem seruitutis urbanae in domo Titij, sicuti notat Gl. magna in l. 1. C. de seruit. & post Gomezium explicat Less. n. 29. Eademque ratio est de aliis iuribus, quorum possessio in negatione consistit: puta vt aliquis ad electionem non admittatur, in tali loco non venetur, piscetur. Exempli causa, vt Capitulum Canonicum aliquem iure suffragij, per viam praescriptionis priuet, necesse est, vt cum ab actu electionis bona fide remoueat: illèque acquiescat: nam ab eo tempore possessio remouendi contra illum currit, & tempore legitimo perficitur, sicuti notauit Mol. cit. disp. 70. Quemadmodum etiam affirmatiua, si aliquis ad electionem, quasi ipsi ius competat, & non ex mera gratia admittatur: ex eo tempore ius suffragij possidere incipit: vt per legitimum tempus praescribere possit: idemque dicendum de iure praesentandi, & similibus iuribus, quorum possessio etiam per vnicum actum, cum alterius scientia & patientia, ac bona fide operantis acquiri potest, sicuti docet Abbas c. cū Ecclesia, n. 22. de causa possess. & proprietatis, Molina to. 1. tract. 2. disp. 14. Mynsinger cent. 1. obseru. 29. vbi resoluit: Per vnum actum praestiti seruitij cum bona fide, & xxx. annorum decursu, fundum liberum vsucapi posse, vt feudalis fiat.

Corollarium. Si tu sciente Titio ac patiente, ad Ecclesiasticum beneficium clericum praesentasti, tanquam tibi ius praesentandi debeatur: in eaque peruatione 30. annis cum bona fide persististi, absoluis praescriptionem contra Titium, vt ipse ius praesentandi sibi amplius vindicare non possit. Sin, verò Titio patrono absente ac nesciente praesentasti, non ideo existis in possessione sufficiente ad inchoandam praescriptionem: eò quod Titius in hoc casu adhuc civiliter possidere censeatur: quare opus tunc est, vt ad tale beneficium, tu & antecessores tui praesentauerint à tempore immemoriali: exinde enim acquiris praesumptionem tituli ac iuris.

Et haecenus quidem dixi, qua ratione aliquis vsucapione comparare sibi possit ius seruitutis in re aliena. Nunc verò dicendum, qua ratione aliquis ius seruitutis in re aliena quaesitum, temporis diuturnitate per non vsum amittat.

Dico igitur IV. V. susfructus & omnes seruitutes reales per non vsum amittuntur decennio inter praesentes, & xx. annorum spatio inter absentes. Ita expressè habetur in l. penult. C. de seruit. Est autem in primis discrimen obseruandum inter seruitutes urbanas, & rusticas, cuiusmodi sunt via, aquæ ductus, pastus, &c. Quod rusticae, sicuti & vsusfructus, per solū non vsum tolluntur, siue à re liberantur. At verò urbanae non tolluntur per merum non vsum eius, qui ius seruitutis habet: sed insuper necesse est, vt dominus, qui aedificij sui libertatem vsucapere vult, aliquem actum seruituti contrarium bona fide exerceat: ab eo enim tempore praescriptionis tempus inchoatur. Veluti, si aedes tuae aedibus meis seruiant ne altius tollantur; etsi ego fenestras meas ob-



struxero, non incipis præscribere aduersus me libertatem: nisi & tualiquid nouifeceris; videlicet ædes altius sustuleris. Item, si ædes tuæ immissi tigni seruitutem debeant; & ego tignum exemero: ita demum amitto ius meum, si tu foramen, vnde tignum exemptum est, obturaueris: & per tempus constitutum ita habueris: alioquin si nihil noui feceris, integrum ius meum permanet, l. hæc autem iura, ff. de seruitutib. urban. prædiorum, & bene explicat Mol. t. 1. tr. 2. disp. 66. §. porro antequam. Ratio autem huius doctrinæ est, Quia, nisi aliquid contrarium alterius iuri fiat, non nascitur possessio libertatis: sine possessione autem non procedit prescriptio. Quo eodem fundamento puto probabiliorem esse sententiam Mynsing. cent. 1. obseru. 16. Gaill. lib. 2. obser. 18. n. 4. Andr. Fachin. lib. 1.

controu. c. 13. contra ius, venditori absolutè & in perpetuum concessum, rem venditam redimendi, xxx. annorum decursu non præscribi; nisi venditor redimere volens bona fide repulsus fuerit: licet multi contrarium sentiant apud Couar. 1. resol. c. 9. Binsfeld. c. in ciuitate, q. 7. concl. 17.

Secundò observandum est, si ius seruitutis tibi constitutum non habeat vsum quotidianum; sed aquam v. g. ex alieno fundo ducere possis: æstate tantum, vel quot mensibus: requiri tempus duplicatum, videlicet 20. annos inter præsentis: vt tali iure per vsum eius via prescriptiois spoliis sicuti habetur in l. si sic, ff. quemadmodum seruitutes amittuntur, & explicat Innoc. in c. de quarta, de præscript. Couar. 1. resol. c. 17. nu. 10. Mol. t. 1. tr. 2. disp. 70. §. reliquæ.

## TRACTATUS SECVNDVS.

D E

### RESTITVTIONE.

#### C A P. I.

#### Quid sit restitutio.

#### S V M M A R I V M.

- 1 Restitutio est damni iniuste dati secundum arithmetica aequalitatem restitutio.
- 2 Dne sunt restituendi radices: Vna ex parte rei acceptæ, possessæ, altera ex parte iniuste acceptionis, seu lesionis.
- 3 Pro sola iniuria, si nullum damnum pretio æstimabile datum sit, restitutio facienda non est.
- 4 Restitutio solius iniustitiæ commutatiue actus est.

**R**estituere, (si vim nominis spectes) est, in pristinum statum reponere, l. restituere, 1. & 2. ff. de verb. signif. Quò etiam S. Thom. respexisse videtur, cum in 2. 2. q. 62. a. 1. dixit, *restituere nihil aliud esse, quàm iteratò aliquem statuere in possessionem, vel dominium rei sue*. Veruntamen hæc verba S. Thom. non adæquatè definiunt restitutionem, quatenus nunc à Doctoribus accipi solet: Quia partim latius patent; cum etiā comprehendat cuiuscunque debiti ex contractu, secundum commutatiuam iustitiam, redditionem. quo sensu dicimur restituere mutuum, commodatum, depositum, &c. Partim verò strictius posita sunt; cum non comprehendant cuiusque damni iniuste dati compensationem: neque enim qui alienam v. g. domum vastauit, iumentum occidit, eandem rem restituere potest, aut debet; sed aliam æquivalentem, vt infra dicam.

- 1 Quare aliter dicere possumus secundum communem Doctorum acceptionem, quòd restitutio aliud non sit, quàm *damni iniuste dati, secundum arithmetica aequalitatem restitutio*. Cum dicitur, *damni iniuste dati*, aduerte duplicem esse iniuriam; materialem, ac formalem. Materialem iniuriam infert, qui v. g. rem alienam accipit, vel detinet, probabiliter arbitratus esse suam, vel certè ius accipiendi, detinendi se habere, cum re ipsa non habeat. Iniuriam autem formalem infert, qui rem alienam accipit, detinet, destruit; cum sciat, vel scire possit ac debeat, id agendi ius sibi non competere.
- 2 Hinc duæ restituendi radices siue causæ oriuntur, quæ in hac materia restitutionis perpetuò ob oculos ha-

benda sunt. Vna est ex parte rei acceptæ & possessæ, quæ domino suo restitui debet, cum primùm possessor scit alienam esse. Altera est ex parte iniuste acceptionis siue lesionis, ob quam res ablata domino restitui, vel potius compensari debet, etsi qui iniuste læsit, nihil ex ea possideat, nullumve emolumentum ceperit, sicuti infra manifestius fiet.

Nunc verò tria breuiter aduerto: Primū. Mensura restitutionis faciendæ ob iniuriam solum materialem, ratione rei acceptæ, possessæ, debet esse quantitas possessionis: id est, vt tantum restituas, quantum ex re aliena possides, vel inde locupletior factus es. Mensura autem restitutionis faciendæ ob iniuriam formalem, ratione iniuste damnificationis, debet esse quantitas alieni damni: vt nimirum, quatenus alter læsus est, restitutio fiat, nihil attendendo vtrum is qui læsit, v. g. segetes destruxit, ædes incendit, aliquid inde habeat, necne, sicuti notauit S. Th. 2. 2. q. 62. a. 6. Caiet. ibid. Mol. tr. 2. to. 3. poster. disp. 723. P. Nau. lib. 3. c. 2. n. 186.

Alterum. Hæ duæ restituendi radices interdum concurrunt, v. g. in fure qui rem alteri iniuste ablatam detinet: apud quem si res furtiua auctior siue melior facta est, debet eam ita auctam domino suo restituere: deductis tamen in foro conscientie expensis, quas fur vtiliter fecit, sicut docet Couar. reg. peccatum, p. 2. §. 9. n. 3. P. Nau. l. 4. c. 1. n. 32. Less. l. 2. c. 12. dub. 16. n. 101. Si autem res furtiua in manu furis deterior facta fuit, quàm si in domini potestate mansisset, tunc cogitur domino estimatione damni præstare, ratione iniuste lesionis: qua de re Syl. ver. restitutio, q. 6. Couar. l. c. n. 2. Medina q. 6. de restit. Interdum verò hæ duæ restituendi radices separantur, sicuti videre est in rei alienæ bonâ fide possidente: is enim solum ex primo restituendi capite obligatur; Item in rei alienæ destructore, qui si nihil inde possideat, solum ex secundo restituendi capite obligatus.

Tertiū. Pro sola iniuria, si nullum damnum illatum sit, restitutio facienda non est. Nam restitutio est actus iustitiæ commutatiue, vt mox explicabo: Sola autem iniuria, quatenus pro ea satisfieri debet, nō est obiectum iustitiæ commutatiue: sed vindicatiue, cuius exercitium ad publicam tantum potestatem pertinet. Ex quo sequitur, ante Iudicis sententiam & coactionem, nullam oriri obligationem satisfaciendi pro iniuria, præcisâ à damno, sicuti colligitur ex S. Th. cit. disp. 62. a. 3. in corp. & tradit. Mol. disp. 715. n. 9. & tr. 3. disput. 100. vbi exemplum ponit de



adulterio, quamuis notorio, si exinde nullum aliud damnum proueniat marito adulteræ, nullam ei restitutionem faciendam esse, in conscientia foro.

Porro, circa alteram definitionis particulam secundum arithmeticam equalitatem, duo obseruanda occurrunt. Primum: Restitutionem esse actum iustitiæ commutatiuæ, non item distributiæ, sicuti cum S. Th. q. 62. a. 1. docent DD. communiter, contra Pet. Nauar. lib. 1. de restit. c. 2. n. 18. Quia restitutio aliud non est, quam damni dati restauratio: hæc autem fieri non potest, nisi quantum ablatum est, tantundem reddatur, quod est proprium commutatiuæ iustitiæ.

Pro responsione ad fundamentum Pet. Nau. existimantis, restitutionem quandoque esse actum iustitiæ distributiæ, v. g. si belli Dux spolia hostium inique inter milites distribuit, non secundum cuiusque merita ac dignitatem; aduertendum est cum Soto lib. 4. q. 6. a. 1. ad 3. Couar. reg. peccatum p. 2. §. 7. n. 6. Less. lib. 2. cap. 34. dub. 15. n. 73. Discrimen esse inter bona communia, quæ ex distributiua iustitia distribui solent: Nam eorum aliqua in commodum Reipublicæ præcipue tendunt, cuiusmodi sunt publica officia, Ecclesiastica beneficia: quæ si, posthabitis dignis, conferantur indignis, propriè non inferitur iniuria ijs qui digni sunt; eò quod nullum ad ea propriè & strictè ius habeant: quãobrem nec restitutio aliqua ipsis facienda est, sed potius Reip. si exinde damnum accepit. Alia verò communia bona sunt, quorū distributio per se fac præcipue tendit in commodum partium: veluti cum Dux belli spolia hostium inter milites, pro singulorum meritis ac dignitate, distribuere debet: tum peccabit quidem contra distributiua iustitiæ, si ea vel in proprios vsus conuertat; vel largiatur ijs, quibus non competit: restitutionem tamen postea facere cogitur, non secundum distributiua, sed commutatiua iustitiæ: vt quantum damnum milites ex iniqua distributione passi sunt, hoc est, quantum minus quam oportebat, singuli acceperunt, tantundem eis Dux belli ex proprijs bonis restituat: in qua proinde restitutione, seu compensatione debitiæ non geometrica, sed arithmetica & omnimoda æqualitas cernitur, sicuti bene explicant Caiet. 2. q. 62. art. 1. Vasq. in moral. de restit. c. 1. dub. vn. Mol. tr. 2. to. 3. post. disp. 714.

Alterum, quod obseruari debet: Res quæ ablatae sunt, restitui debent eadem secundum numerum, seu, vt Iuristæ loquuntur, in specie, si extent; vel saltem secundum idem genus ac qualitatem, si res vsu consumptibiles sint, vt pecunia, triticum &c. In alijs verò rebus, quæ functionem in genere suo non recipiunt, vt vna alterius loco substitui possit, videl. ædibus, vestibus, equis; si quid ablatum absumptumque est, vel damnum iniuste datum, compensatio in pecunia fieri debet: si in ea fieri non possit, in alia re æquivalente, boni viri arbitrio.

## CAP. II.

Vtrum restituere ablata necessarium sit ad salutem.

## S V M M A R I V M.

- 1 Restituere iniuste ablata est necessarium ad salutem, necessitate præcepti.
- 2 Præceptum restituendi, licet externa forma affirmatiuum sit, includit tamen in se negatiuum, non detinendi rem alienam.
- 3 Vnicum est peccatum iniuste detentionis, & non restitutionis.

ASERTIO est affirmatiua, quæ traditur à S. Thom. cit. q. 62. a. 2. Gabriele in 4. d. 15. q. 2. a. 2. Hadriano in 4. vbi de restit. q. 1. & alijs communiter. Pro-

batur primò ex sacra Scriptura: Ad Rom. 14. Apostolus ait; *Reddite omnibus debita.* Tob. cap. 2. *Videte, ne foris furuius sit hædus: Reddite eum dominis suis: quia non licet nobis aut edere ex furto aliquid, aut contingere.* Et Ezechiel cap. 33. ver. 15. palam significat; peccati veniam, & iustitiæ non impetrari, nisi rapina restituatur. Quare S. August. epist. 54. ad Macedonium, & refertur cap. 1. causa 14. quæst. 6. *Si res aliena, propter quam peccatum est, reddi possit, & non reddatur; penitentia non agitur, sed simulatur. Si autem veraciter agitur, non remittitur peccatum, nisi restituatur ablatum, si ut dictum est, restitui possit.*

Secundò ratione S. Thomæ in cit. loco. Extat præceptum naturale, & diuinum, cuius obsecratio ad salutem necessaria est, vt iustitiæ & æqualitatem seruemus; in iustitiæ verò, & iniquitatem effugiamus. Atqui rem alienam domino inuito rapere, detinere, destruere, iniustitiæ & iniquitatem continet, quæ alio modo tolli, & iustitiæ seruari non potest, nisi quod ablatum, vel destructum est, restituendo. Ergo & ad iustitiæ seruandam, & ad salutem consequendam necessarium est ablata restituere.

Dabitur autem DD. vtrum restituendi præceptum affirmatiuum, an negatiuum sit? Negatiuum esse contendit P. Nau. lib. 1. c. 1. n. 17. & lib. 4. cap. 4. n. 4. indicat Adrian. loc. cit. Alij autem, vt S. Thom. 2. 2. q. 62. art. 8. ad 1. Nauar. in man. cap. 17. num. 54 Mol. tr. 2. to. 3. post. disp. 716. ad 1. Rebellus de obligat. iustit. p. 1. lib. 2. de restit. q. 1. dicunt, explicite affirmatiuum esse, quippe quo positius restituendi actus præcipitur; implicite tamen ac virtute contineri in eo præceptum negatiuum, alienam rem, ius, debitum non detinendi. Quæ sententia vera est; modò fateamur, id quod in eo continetur præceptum negatiuum non detinendi, magis principaliter intentum esse; præceptum autem affirmatiuum restituendi esse potius accessorium, ideòque naturam imitari sui principalis, vt statim & semper obliget, iuxta doctrinam S. Th. c. a. 1. vbi ait: *Licet præceptum restituendi secundum formam sit affirmatiuum; tamen includit negatiuum, & ita ad statim obligat, sicuti omnia negatiua præcepta.*

Pro cuius rei pleniori intellectu, aduerte, Septimo Decalogi præcepto, *Nefurtum facias*, non solum prohiberi rei alienæ iniustam ablationem, sed etiam destructionem, detentionem. Quamobrem Innoc. Papa dixit in c. sape, de restit. spoliatorum, quod non multum inter sit, quoad periculum animæ, iniuste detinere, ac inuadere alienum: vbi Gl. iura pro eodem reputant auferre, & detinere iniuste; similiter auferre, & non dare. Porro, vt alienam rem siue debitum domino inuito, adeòque iniuste non detineas, necessarium est restituere: quandoquidem restitutio medium ordinarium est, quo cessatur à retentione. Quamobrem eodem præcepto, quo in Decalogo prohibetur ne rem alteri debitam retineas, consequenter etiam præcipitur, vt restituas: sicuti vniuersim cum præcipitur finis, præcipitur etiam medium, sine quo finis obtineri nequit. Et vice versa, cum præcipitur vt restituas, ideo id præcipitur, quia nefas est retinere dum creditor rationabiliter inuitus est.

Ex quo denique colligitur, vnicum esse peccatum retentionis & non restitutionis; quia opponitur vnico præcepto iniuste non retinendi, & consequenter restituendi: quod quidem præceptum restituendi licet affirmatiuum sit, quia tamen connexum cum negatiuo non retinendi, omni tempore obligat; quo rem retinere nefas est: adeò, vt quanto diutius aliquis rem alienam detinet, tanto magis peccatum continuet; imò & augeat secundum intrinsecam rationem iniustitiæ, si exinde malus creditori damnum vel molestia accadat. qua de re videtur potest Adrian. l. c. Less. lib. 2. c. 12. dub. 3. & 4. Vasq. de restit. c. 5. p. 1. dub. 3.



## CAP. III.

De possessore bonæ fidei,  
quatenus restituere  
teneatur?

## SUMMARIVM.

- 1 Bona fidei possessor, si intelligat rem alienam esse, non plus restituere debet quam possidet.
- 2 Fructus alij sunt rei; & alij mere industrie. Deinde fructus rei vel sunt purè naturales, vel mixti: item vel sunt percipiendi, vel percepti.
- 3 Fructus, vel potius lucra, quæ mere industria sunt, ad bonæ fidei; imò etiam male fidei possessorem omnimode spectant.
- 4 Fructus percipiendi, v. g. segetes solo adherentes, unà cum re domino eius cedunt.
- 5 Fructus rei non solum naturales, sed etiam mixti ex re aliena percepti, si extantes sunt, domino restitui debent, deductis expensis & estimatione laboris.
- 6 Pretium locationis ex re aliena ad eius dominum spectat; licet dominus rem, si penes se habuisset, nunquam locaturus fuisset.
- 7 Si bonæ fidei possessor fructus rei absumpsit, restituere debet, quatenus, ex his locupletior factus est.
- 8 Bona fidei possessor fructus perceptos ex fundo alieno, breviori tempore usufruere potest, quam ipsum fundum.

**A**SSERTIO. Postquam aliquis cognovit rem, quam bona fide hætenus possedit, alienam esse, tenetur eam restituere unà cum eius fructibus; si extant, vel quatenus inde locupletior factus est: præterquam si legitime præscriptionis beneficio dominum sibi comparavit. Hæc assertio est ex mente S. Th. q. 62. a. 6. ibid. Caiet. & in summa v. restitutio, c. 1. Soti lib. 4. de iust. q. 7. a. 2. Couar. 1. resol. c. 3. & reg. peccatum, p. 3. init. n. 3. Nau. c. 17. n. 7. Med. q. 10. de restit. Mol. tr. 2. t. 3. post. disp. 718. Rebelli lib. 2. de restit. q. 3. Tol. lib. 5. cap. 17. Sanchez lib. 2. moral. cap. 23. Dixi autem primò; *Postquam cognovit rem alienam esse*: Nam quamdiu possessor bonæ fidei sibi persuadet, rem suam esse vel ad se pertinentem, probabilis ignorantia eum à restitutione excusat: Sin verò dubitet, quid eum tunc facere oporteat, dictum est hoc lib. tr. cap. 5. num. 21.

Dixi secundò; *Rem ipsam restituendam esse, si extet*: Si autem non extet, sed consumpta sit, vel perierit, non plus restituendum esse, quam possessor inde locupletior factus fuit. Ita docet Abb. in c. grauis, n. 6. de restit. spoliatorum, & alij DD. supra citati, & habetur in l. item veniunt, §. præter hæc, ff. de petitione hæreditatis: *Eos autem, qui in istas causas habuissent, quare bonæ (hæreditatis) ad se pertinere existimassent, usque eo damnari, quò locupletiores ex ea re facti essent, condemnandos*. Vbi Gl. ver. facti essent ait; *hanc esse optimam regulam, quæ nulla verior in iure, ut bonæ fidei possessor ad id tantum, quod ad se peruenit, teneatur*. Cum enim bonæ fidei possessor nullam iniuriam intulerit, non obligatur ex capite iniustæ acceptionis, sed solum ex capite rei acceptæ ac possesse: quare plus restituere non cogitur, quam possidet: siue res ipsa sit extans secundum se; siue aliquid inde acquiritur, adeoque patrimonium auctum fuerit, iuxta l. 72. ff. de legatis 2. *Non absumitur quod in corpore patrimonij retinetur*; siue verè & in se ipso; siue iuris fictione: in altero. Nam quod inde comparatum est, vice permutati domini restituitur, dicitur in l. 71. ff. eod.

Exemplis declaratur: Si vestem holosericam 20. aureis valentem, & à fure tibi donatam, bona fide accepisti, & attrivisti; postea verò dominus comparet; inprimis restituere ipsi debes ipsam vestem attritam, quæ fortè non

amplius, quam 10. aureis valet. Deinde cõpensare debes attritionem vestis, non omnimode; sed quatenus ditior factus es: v. g. si eo anno sex aureos te vestiendo insumpsisses, nisi vestem holosericam dono accepisses, sex tantum, non 10. aureos restituere cogeris. Quod si vestis illa non donata tibi, sed empta fuit, nihil præter ipsam vestem attritam restituere debes quandoquidem nihil ditior factus es, siue patrimonium tuum auctum non fuit.

Item si ad cœnam furtivam inuitatus, cibos & vinum pretiosum, ignorantia te excusante, absumpsisti: re postea intellecta, obligatus eris non quidem integram prandij, bona fide absumpti, æstimationem domino solvere, in furis defectum, sed quantum de tuo domo erogasses, nisi prandio furtivo participasses. Quæ de re Navar. cap. 17. man. num. 9. P. Navar. lib. 3. c. 2. num. 184. Molin. disp. 719. Sanchez cit. cap. 23. num. 34.

Præterea milites quotiescunque in bello materialiter iniusto bona fide pugnârunt, excusante eos probabili opinione, vel Superioris præcepto in causa dubia, iuxta ea quæ dixi in materia de bello lib. 2. tr. 2. cap. 12. n. 8. intellecta postea iniustitia belli, non tenentur refarcire illata damna & rapinas, nisi quatenus inde locupletiores se factos agnoscunt, sicuti docet Sotus lib. 4. de iust. q. 7. a. 2. Victor. de iure belli, num. 33. Molin. to. 1. tr. 2. disp. 113. & to. 3. part. post. disp. 720. Rebell. quæst. 4. Sanchez loc. cit. n. 6. contra Siluest. ver. bellum, 1. q. 9. dicto. 3. Neque refert, etsi aliqua eorum malè absumpserint informando, potitando, negligenter servando: Quia nihil contra iustitiam peccarunt, cum ignorarent res alienas esse: ergo non tenentur ad restitutionem ratione iniustæ acceptionis: Neque etiam ratione rerum acceptarum, cum non extent, sed adsumptæ sint. Ita contra Sotum lib. 4. q. 7. a. 2. Navarrum cap. 17. n. 7. docet Sanchez n. 5. Less. lib. 2. cap. 14. dub. 1. num. 7. Molin. t. 1. tr. 2. disp. 246. §. in priori euentu, P. Nav. lib. 4. c. 1. num. 9.

Denique eadem ratione, qui bona fide, siue per ignorantiam excusantem illum à culpa Theologica, contractum celebravit, quem postea usurarium esse intelligit, non plus restituere tenetur, quam se ditiorẽ redditum, seu patrimonium suum auctum esse animadvertit, sicuti docet Molin. to. 3. post. disp. 720. n. 4. Rebellus q. 4. in fine. Quibus addendum est, etsi aliquis rem, quam bona fide accepit, postea intelligat iniustè (materiali iniustitia) acquisitam esse; sed per ignorantiam Theologicè non culpabilem, restituendi obligationem non animadvertat, ideòq; rem consumat; non amplius deinde restituere obligatum esse, quam exinde patrimonium suum auctum reperit.

Tertiò dixi in assertione de fructibus rei domino restituendis, si extant. Quo loco inprimis observandum est quod fructus alij sunt rei, alij vero industrie. Fructus mere industrie dicuntur, quos ipsa natura ex se nullo modo progignit; sed tantum concurrens ut instrumentum operantis, negotiantis. Quomodo lucrum, quod ex rebus usu consumptibilibus, puta pecunia, vino, frumento &c. negotiando acquiritur, non rerum ipsarum, sed industrie fructus censetur: Et opus, quod aliquo instrumento artifex confecit, non instrumento, sed industrie artificis tribuitur.

Fructus rei alij sunt purè naturales, quos videlicet natura producit, nullo aut vix villo hominũ labore, seu industria concurrente: ut sunt animalium fœtus, arborum poma, herbæ & gramina, iuxta l. fructus 45. ff. de usuris. Alij verò sunt mixti, ad quorum productionem æquè aut magis hominis industria, quam natura operatur: cuiusmodi sunt segetes, & alij fructus, qui serendo gignuntur, iuxta cit. l. fructus. Item caseus, vinum, oleum, lana, sicuti ex communi docet Rebell. cit. quæst. 4. Sanc. cit. c. 23. n. 54. & seq. Huc etiã referuntur pretia domorum,



domorum, iumentorum, &c. locatorum: qui fructus civiles dicuntur; eò quòd non propriè fructus sint, sed ad similitudinem fructuum, iure civili constituti, sicuti annotauit Abb. in c. grauis, n. 3. de restit. spoliat. & habetur in l. pradiorum, ff. de vsuris: *Pradiorum urbanorum pensiones pro fructibus accipiuntur*. Porro differentia est non in re, sed in modo loquendi inter Theologos & Iureconsultos; quòd illi omnes fructus, qui ex re ipsa proueniunt, quamuis concurrente hominis industria, *naturales* appellant, sicuti notauit Molin. cit. to. 3. disp. 719. Rebellus cit. quæst. 4. n. 4. Lessius lib. 2. c. 12. dub. 17. n. 110. Iureconsulti autem eiusmodi fructus *mixtos* vocant; vel simpliciter *industriales*, si magis industria, quàm natura operari videatur, sicuti videre est apud Bartol. in l. & ex diuerso, ff. de rei vindicat. Abb. in cit. c. grauis, n. 3. Arium Pinellum l. 2. C. de rescindenda vendit. p. 2. c. 4. Angelum & Syl. ver. fructus initio. Sanchez l. c. n. 48. Rebel. cit. q. 4. n. 2. Azor t. 3. lib. 4. c. 2.

Ad extremum fructus rei (quos omnes sine discrimine naturales Theologi appellant) alij sunt percipiendi, pendentes alij verò percepti, à solo separati. Vide Gl. cit. l. & ex diuerso, ff. de rei vindic. ver. non habendam.

- 3 His positis, de fructibus dico I. Fructus vel potiùs lucra, quæ sunt meræ industriæ, ad bonæ fidei, imò etiam malæ fidei possessorem pleno iure spectant. Ita ex communi docet Palud. in 4. d. 15. quæst. 2. a. 5. Scotus ibid. Nau. c. 17. n. 25. Mol. cit. disp. 719. & 720. n. 2. Less. n. 111. Nam sicuti fructus rei rem sequitur, eiusque dominum; ita lucrum, ac veluti fructus industriæ ad eum pertinet, qui adhibuit.

Corollarium I. Si quis alieno instrumento opus elaborauit, ad artificem, non ad instrumenti dominum, arte factum pertinet: debet tamen artifex præter instrumentum, æstimationem siue valorem vsus rei domino restituere.

Corollarium II. Si quis alienum frumentum aliò deportatum vendidit, ubi plus valet, lucrum, siue augmentum sibi ipsi, non domino acquirit: & satisfacit restituendo frumentum eiusdem generis ac qualitatis, vel certè quanti interest domini frumentum suum abductum, & alienatum non fuisse. Et simile est, si fur pecuniam furtiuam negotiationi exponat, lucrum inde proueniens ad furem spectat, sicuti docet S. Thom. 2. 2. q. 78. art. 3. Scotus in 4. d. 15. q. 2. a. 2. Gabr. q. 11. a. 2. concl. 5.

- 4 Dico II. Fructus percipiendi, v.g. segetes agro adhaerentes, fœtus in utero adhuc latentes, ad rei dominum pertinent; & non minùs, quàm res ipsa, vindicatione repeti possunt: Quia censentur pars rei frugiferæ, sicuti constat ex l. fructus, iun. Gl. ver. pars, ff. de rei vindicat. l. Iulianus, §. si fructibus, ff. de action. empti. l. si quis sciens, C. de rei vindicat. & §. si Titius, Instit. de rerum diuisione: *Si Titius alienam plantam in solo suo posuerit, ipsius erit. Et ex diuerso, si Titius suam plantam in Manij solo posuerit, Manij planta erit, si utroque casu radices egerit.*

- 5 Dico III. Fructus omnes rei, siue sint merè naturales, siue mixti, qui à bonæ fidei possessore ex realiena percepti & adhuc extantes sunt, domino restitui debent, deductis expensis, & æstimatione laboris. Ita Gl. recepta in cit. l. & ex diuerso, §. non habendam. Maior in 4. d. 15. q. 26. §. si secundum, Syl. ver. fructus n. 2. & ver. furtum q. 16. Couar. 1. resol. c. 3. n. 6. Med. C. de restit. q. 10. concl. 2. Caiet. ver. restitutio, c. 1. in fine, Less. c. 14. dub. 2. Azor p. 3. l. 4. c. 2. §. hæc tamè omnia, Vasq. in moral. tract. de restitut. c. 9. §. 11. dub. 1. Mol. & Rebellus locis suprà citatis. Prior pars sumitur ex l. 22. C. de rei vindicat. *Certum est malæ fidei possessores omnes fructus solere cum ipsa re præstare: bonæ fidei verò, extantes, post litis an-*

*tem contestationem, vniuersos.* Et l. qui scit, §. ult. ubi interprete Accursio dicitur: *Quamuis bonæ fidei emptor fructus perceptos interim sibi acquirat, si tamen postea res euincatur, ad restitutionem eorum, Iudicis implorato officio, compelli.* Ratio est: *Quia res quæuis domino suo fructificat.* Altera verò pars, deducenda esse impendia & æstimationem laboris, habetur in l. si à domino, §. fructus, ff. de petit. hæred. & docent. Gl. & Abb. in c. grauis, de restit. spoliat. Angelus ver. fructus, n. 3. Gabr. in 4. d. 15. q. 3. a. 3. dub. 5. propos. 2. Sanchez n. 79. Mol. l. c. n. 4. Rebel. q. 8. n. 2. Vtriusque verò ratio est: *Quia locupletari non debet aliquis cū alterius iactura, reg. 48. in 6. cōsentit l. nam hoc, ff. de condict. indebiti: Natura æquum est, neminem cum alterius detrimento fieri locupletiorē:* Locupletior autem fieret bonæ fidei possessor, si præter expensas & æstimationem laboris atque industriæ suæ, aliquid ex fructibus rei alienæ sibi retineret. Contrà verò, rei dominus iacturam & detrimentum pateretur, nisi eiusdem rei fructus ipsi restituerentur.

Aduerte autem, in foro externo civili discrimen esse inter fructus rei merè naturales, & fructus rei industriales: Nam horum dominium, posteaquam à solo separati, seu percepti sunt, bonæ fidei possessori acquiruntur, sicuti habetur Instit. de rerum diuis. *Si quis à non domino fundum bona fide emerit, vel ex donatione, aliæve iusta causa, æquè bona fide acceperit, naturali ratione placuit, fructus quos percepit, eius esse pro cultura & cura:* & consentit l. fructus, 45. ff. de vsuris. Quamobrem fructus hi industriales, quamuis extantes sint, à domino repeti non possunt instituta actione reali vindicationis; sed potiùs conditione sine causa, vel Iudicis implorato officio, ob æquitatem, sicuti docet Gl. in cit. l. & ex diuerso, Abb. in cit. c. grauis, num. 9. Mynsingerus & alij in cit. §. si quis à non domino, Sanchez cit. c. 23. num. 73. Couar. cit. c. 3. num. 6. alijque communiter.

Fructus autem merè naturales, tametsi à solo separati perceptiue sint, bonæ fidei possessori non acquiruntur, sed domino rei, sicuti habetur in cit. l. 45. *Fructus percipiendo, vxor vel vir, ex re (aliena) sibi donata, suos facit illos tantum, quos operis acquisierit, veluti serendo: nam si pomum decerpserit, vel ex silua ceciderit, non fit eius: sicuti nec cuiuslibet bonæ fidei possessoris.* Vbi vides, manifestam distinctionem inter fructus rei industriales & naturales; illorumque dominium, summo civili iure, possessori bonæ fidei acquiri; horum non item. Neque his aduersatur l. 48. ff. de acquir. rerum dominio: *Bonæ fidei emptor non dubiè percipiendo fructus etiam ex re aliena suos interim facit: non tantum eos, qui diligentia et operâ eius prouenerunt: sed omnes: quia quoad fructus attinet, loco domini pene est.* Verum enim est, quòd bonæ fidei possessor interim dum illi lis non mouetur, quasi domini loco habeatur; adèò, vt si fructus etiam naturales alienarit, vel consumpserit, ad nihilum teneatur: nisi fortè locupletior inde factus sit, vt postea dicam.

Ex dictis colligitur; minùs rectè respondisse Nau. c. 17. num. 25. Lopez p. 1. instruct. c. 101. ad finem: Eum, qui torqueum aureum à non domino emptum sæpius locauit, locationis pretium domino restituere obligatum non esse. Cuius contrarium bene docet Rodriq. p. 2. sum. c. 42. conclus. 6. P. Nau. l. 4. c. 1. num. 49. Sanchez lib. 2. c. 23. num. 132. Rebel. q. 5. num. 4. Mol. disp. 719. num. 5. Less. lib. 2. c. 12. dub. 17. num. 114. Ratio est: *Quia torques aureus non numeratur inter res vsu absumptibiles: sed eius vsus à dominio separari, alteri concedi, & per se in æstimationem venire potest: quare pretium elocari torquis non est meræ industriæ, sed ipsius rei fructus; quippe cū propter eius vsum pendatur: consequenter ad rei dominum spectat.* Neq; refert, et si fortasse dominus nunquam torqueum



locaturus fuisset; id enim per accidens censeretur debet: quia sæpe fit, ut res apud alienum possessorem plus suo domino fructificet, quam si in eius potestate mansisset. Quod etiam confirmari potest exemplo ædium, quas si iniquus possessor locet, pretium locationis ad dominum spectat, ex omnium sententia; nihil obstante, quod fortasse dominus ipse nunquam elo- casset.

- 7 Dico IV. Si bonæ fidei possessor fructus rei seu natu- rales, seu industriales aut mixtos absumpsit, tenetur restituere, quatenus ex ijs locupletior factus est. Ita docet Bartolus in l. & ex diuerso, ff. de rei vindic. Abb. in c. grauis, de restitut. spoliatorum, Ang. ver. fru- ctus, Syl. eod. q. 1. Valent. tom. 3. disp. 5. q. 6. p. 3. con- clus. 5. Azor cit. lib. 4. c. 2. q. 2. Mol. cit. disp. 719. Tol. lib. 5. c. 17. Rebel. q. 4. Rodriq. in summa p. 2. c. 42. con- clus. 1. Sanchez cit. c. 23. num. 77. Less. cit. c. 14. dub. 2. aliique Theologi communiter, contra Gloss. Mynsin- gerum, aliosque commentatores in cit. §. si quis à non domino, item Gl. in cit. l. & ex diuerso, Arium Pinel- lum in cit. cap. 4. num. 47. 60. 61. Andr. Fachinæum lib. 1. controu. iuris, c. 58. aliisque apud Couar. & Mol. ll. cc. existimantes, bonæ fidei possessorem, qui fructus rei, præsertim industriales, ante litis contestationem consumpsit, ad nullam restitutionem obligari, tametsi ex ijs locupletior factus sit, quorum sententiam proba- bilem censet Less. n. 10. Sanch. cit. n. 77. eandemque in foro iudiciali receptam esse, præter alios testatur Pi- nellus ibid.

Sed nostrum assertum iuri conformius esse, proba- tur ex l. item veniunt, §. præter, l. si & rem, & seq. l. sed et si, §. 1. & 2. ff. de petit. hæreditatis, quibus aperte habetur; Si possessor hæreditatis alienæ, quam ad se pertinere arbitratur, aliquid ex ea bona fide consumat; obligari eum quatenus locupletior factus, vel patrimo- nium auctum est. Ex quo argumentari licet: Si ita se res habet in causa, siue possessione vniuersaliter hære- ditatis; multò etiam magis in causa particulari. Nam verus hæres non habet ius in re respectu hereditatis à se nondum aditæ; sed tantum ius ad rem: & tamen, si quid ex distractione vel consumptione rei ad hæredita- tem pertinentis, ad bonæ fidei possessorem peruenit, hæredi restitui debet: ergo multò magis vero domino restitutio facienda est, si quid ex re eius ad bonæ fidei possessorem, v. g. rei alienæ emptorem, peruenit. Quod planè etiam indicatur in l. si & me, ff. si certum petatur. *Quæ pecunia mea*, (id est, quæ mihi debita erat) *ad te peruenit, eam mihi à te reddi bonum & æquum est.* Equi- tas autem ea est, quam Iureconsult. in l. 14. ff. de condi- ctione indebiti expressit: *Nam hoc natura æquum est, ne- minem cum alterius detrimento fieri locupletiores.*

- Ad extremum, in prima & principali huius cap. asser- tione dixi, Bonæ fidei possessorem debere rem alienam vnà cum fructibus restituere, præterquam si legitima *usucapionis beneficio dominium sibi comparauerit.* Circa quæ verba id solum annotare placet; fieri posse, ut bonæ fidei possessor fructuum dominium usucapione sibi ac- quirit; non item fundi, ex quo percepti sunt. Quia ad usucapionem fructuum, tanquam rerum mobilium, triennij spatium sufficit: Ad usucapionem verò fundi, siue rei immobilis tempus longum requiritur, iuxta ea, quæ dicta sunt tract. 1. huius lib. cap. 8. num. 13. Vide Sanch. cit. cap. 23. num. 87.

## CAP. IV.

De possessore malæ fidei, quatenus re-  
stituere teneatur?

## S V M M A R I V M.

1. *Malæ fidei possessor est, qui iniuste possidet, sciens vel per crassam ne- gligentiam fieri intermittens, ius sibi non competere.*
2. *Si res apud malæ fidei possessorem casu fortuito perijt, alioquin etiam peritura apud dominum, nihil restituere debet. Secus est, si ini- quus possessor eam dolo absumpsit, vel per crassam seu mortalem negligentiam perdidit: nam exinde restituendi obligationem con- trahit, quæ semel contracta, propter accidentalem euentum non extinguatur.*
3. *Inuentor res aliena, si nesciens ad quem pertineat, eam per crassam negligentiam amittat, non obligatur ad restitutionem.*
4. *Malæ fidei possessor restituere debet omnia melioramenta rei intrinse- ca; deductis tamen expensis non tantum necessariis, sed etiam uti- libus.*
5. *Si res intrinsecè aucta siue melior effecta apud malæ fidei possessorem, postea decreuit, restituere debet secundum valorem status optimi: excepto, si etiam apud dominum similiter deterior facta esset, et si ab iniquo possessore in statu optimo restituta fuisset.*
6. *Si res in manu iniqui possessoris extrinseca exiimatione aucta, Et tunc carius v. g. vendita est, satisfat domino, si ipsi res similis re- stituitur, vel pretium eius secundum taxationem temporis, in quo restituitur sit.*
7. *Semper tamen lucrum omne cessans, Et damnum emergens domino iniquus possessor restituere cogitur.*

**A**SSERTIO. Malæ fidei & iniquus possessor, de- bet rem alienam, vel si perijt, æstimationem eius domino restituere; vnà cum eius incremento & fructi- bus, non tantum ijs, quos possessor percepit (deduc- tis tamen expensis) sed etiam quos dominus verisimi- liter percepisset, nisi ipsi ablata vel iniquè detenta fuis- set: insuper omne aliud damnum emergens, & lucrum cessans eidem domino refarcire cogitur. Ita docent DD. communiter in l. bonæ fidei, ff. de acquir. rerum domi- nio, & l. fructus ff. de rei vindic. l. domum, C. eod. & Instit. de rerum diuis. §. ei verò. Et canonistæ super c. grauis, de restit. spoliatorum. Item S. Thom. in 2. 2. q. 62. a. 6. Caiet. ibid. Gab. in 4. d. 15. q. 2. a. 3. Palud. ibid. a. 5. Med. q. 6. de restit. Couar. reg. peccat. p. 2. §. 6. Syluest. ver. restitutio, 3. q. 7. Rebellus cit. lib. 2. q. 5. Mol. tract. 2. tom. 3. postea disput. 723. & seqq. Lessius c. 12. dub. 15. & seqq. Sanch. lib. 2. moral. c. 23. num. 97. & seqq. Azor p. 3. lib. 4. c. 4.

Explicanda est autem assertio per singulas particulas: Primò dixi, *Malæ fidei & iniquus possessor.* Loquor enim de possessore malæ fidei, qui propriè ita dicitur: quia videlicet intelligit, vel per crassam negligentiam intelligere prætermittit, rei possidendæ, vtendæ ius sibi non competere; adeoque alteri iniuriam fieri. Non item in assertione comprehendendo eum, qui impro- priè malæ fidei possessor dicitur, posteaquam causa in iudicium deducta, & lis contestata est, iuxta l. sed et si, §. si ante, ff. de hæred. petit. vbi Iureconsult. ait: *Quoniam post litis contestationem omnes incipiunt malæ fidei posses- sores esse.* Verum hi, cum causam dubiam actori statim cedere obligati non sint, si antea bona fide in possessio- ne fuerunt; non tenentur, si causâ cadant, nisi de fru- ctibus post litis contestationem perceptis, iuxta l. bonæ fidei, ff. de acquir. rerum dominio, l. & ex diuerso, ff. de rei vindic. vel quos negligentia sua percipere intermi- serunt, sicuti docet Sanch. num. 115. Fructus verò perce- ptos ante litis contestationem, restituere debent, qua- tenus extant, iuxta l. certum, C. de rei vindicat.

Secundò dixi: *Rem alienam, vel, si ea perijt, æstimationem eius, domino restituendam esse.* Circa quæ verba grauis



questio occurrit: Si res aliena, quæ apud malæ fidei possessorem perijt, similiter peritura fuisset, etsi in domini potestate permanisset; vtrum nihilominus restitutio domino facienda sit: Circa hanc questionem variè loquuntur Doctores, sicuti videre est apud Palud. in 4. d. 15. q. 2. a. 1. Couar. reg. peccatum, p. 2. §. 6. Syl. ver. restitutio, 7. q. 5. Ioan. Medinam q. 6. Cod. de restit. Pet. Nau. lib. 4. de restit. c. 1. num. 17. & seqq. Mol. cit. t. 3. disp. 725. conclus. 7. Less. lib. 2. c. 12. dub. 15. Barthol. Medinam lib. 1. sum. c. 14. §. 30. reg. 5. Dicendum verò est primò: Si res aliena apud furem, vel alium malæ fidei possessorem fortuito casu, & sine eius culpa perijt, quæ cerò etiam apud dominum perijisset, tunc in conscientia foro ad nullam ille restitutionem obligatur. Non enim ratione rei acceptæ; cum nihil ex ea possideat: Neque ratione iniustæ damnificationis, cum causa damni non extiterit: quando sine vlla furis culpa, v. g. hostium incursione, civitatis defflagratione perijt, nihilominus peritura, etsi fur eam à domino non abstulisset. Hæc est communis sententia, sumpta ex Iureconsult. in l. ult. §. si ea conditione, ff. de l. Rhodia, de iactu, contra Palud. in 4. d. 15. q. 2. a. 1. conclus. 5. & Legistas apud Couar. l. c. Verùm hi loquuntur de foro externo, in quo eiusmodi restitutio in pœnam criminis quandoque imperari solet.

Dico secundo. Si res aliena perijt dolo furis, alteriusve iniqui possessoris; quia eam scienter destruxit, absumpsit, alteri donauit, &c. tunc tenetur æstimationem eius domino præstare, nihil obstante, quòd si ei à fure ablata non fuisset, cerò etiam perijisset. Exemplum. Heri Titius à Caio poculum argenteum furatus est: hodie verò ædes Caij incendio cōflagrant, quod haud dubiè poculum quoque absumpsisset, nisi à fure ablatum fuisset, hoc casu Titius nihilominus obligatur ad restitutionem rei iniquè ablatæ: Sin verò eam non restituat, sed destruat, vel absumat, iniustum domino damnum denuo infert, ad cuius compensationem naturali iure obligatur. Quæ est communis Doctorum sententia tradita à Molin. disp. 726. Quare vides rationem discriminis inter has assertiones: Si enim fur casu fortuito sine culpa sua rem amittat, quæ similiter apud dominum perijisset, non est causa interitus; ideòque non tenetur ex capite iniustæ damnificationis: tantum enim iniuriam intulit auferendo: ablatio autem non erat causa damni, quandoquidem etiam sine ea res perijisset. Sin verò fur rem ablatam dolosè absumat, hîc & nunc est causa interitus: ac proinde restituendi obligationem statim contrahit ratione iniustæ læsionis; licet postea intelligatur, rem etiam absque eo perituram fuisse.

Limitant verò hanc doctrinam Less. cit. dub. 15. num. 93. Vasq. in moral. tract. de restit. c. 2. §. dub. 3. num. 9. & c. 5. dub. 11. §. hæc omnia, & alij apud Pet. Nau. n. 26. Furem ad nullam restitutionem obligari, si eo loco, atque intra illud tempus rem destruat vel absumat, quo alioquin etiam apud dominum peritura fuisset: propterea quòd nullum damnum pretio æstimabile illi inferat. Exempli causa. Si Titius hodie ouem ex grege Caij abegit, statimque absumpsit; cras verò integer ouium grex fulmine pereat: aiunt Titium in conscientia foro restituendi obligatione immunem esse; quando cerò constat, ouem perituram fuisse, etsi fuit to sublata non esset.

Præterea, si quis prospiciens incendium oriturum in domo Titij, quo omnia absumenda erunt, cum sociis præueniat, & vini dolium, cum faciliè tamen incendio liberare posset, statim exhauriat; ad nullam restitutionem obligari. Quia in tali casu res, quæ absumuntur, quasi nullius pretij sunt; ideòque dominus rationabiliter inuitus esse non potest.

Hæc limitatio ita absolutè posita mihi non placet:

Nam in primis refert, vtrum publicè sciatur, an ignoretur, rem incendio, vel hostium incursione perituram esse: Si enim ignoratur, negari debet, rem tunc nullius pretij esse, aut dominum rationabiliter inuitum non esse. Sicuti enim, si eo tempore vini dolium vendidisset, pretium ipsi ab emptore restituendum foret; ita non minùs restitui debet à fure, qui ipso inuito iniustè absumpsit. Cum non minùs fur, quàm emptor, obligationem compensandi ex iusticia contrahat: cui obligationi omnino per accidens coniunctum est, quòd res eodem loco, ac intra illud tempus, quo fur eam absumpsit, peritura fuisset: id enim casui & fortunæ domini adscribi, & non furis commodo cedere debet, quæ est sententia Soti lib. 4. de iust. q. 7. a. 2. At verò, si publicè sciatur, rem periculo incendij, naufragij hostium direptioni subiectam esse; tunc fateor, æstimationem rei plurimum imminui: vt proinde fur, si tali rerum statu rem absumat, minorem restitutionem facere debeat: quin fieri poterit, vt ad nihilum absumptor teneatur, si videlicet res nullo modo ab interitu liberari posse videatur: quia tali casu dominus meritò inuitus non est. Sin verò eripi possit, tunc re vera domino valet: vt qui eam absumit, cum eripere posset, iniustum damnum inferre censendus sit: ideòque ad restitutionem obligandus.

Exinde casus resolui potest. Miles quidam ita confitetur: Cum Commilitones mei in transitu per provinciam non hostilem, spoliarent domum agricolæ: ego eius consilij inscius, casu interueni (alioquin enim iniustè prædari non soleo) & duas vestes abstuli, 15. flor. æstimatas: ea ratione ductus, quòd si ego non auferrem, alij procul dubio ablaturi essent. Quæro nunc an peccâim, & quàm grauitè? Deinde quid restituere debeam, & cui? Resp. Si miles ille vestes accepit animo restituendi per occasionem, nihil peccauit: imò vtiliter negotium domini gessit, & debetur illi merces ob industriam. Si autem accepit animo non restituendi, peccauit procul dubio: quia sicut alij iniuriam intulissent & damnum iniustum, auferentes rem alienam domino inuito, ita & hic, quando eos præuenit, idque egit, quod alij malè acturi erant. Fieri tamen potest, vt ob materis leuitatem, venialiter tantum, non mortaliter peccârit: Quia licet vestes absolutè æstimentur 15. flor. quæ est quantitas sufficiens ad furtum mortale; attamen pretia rerum sumi debent ex morali hominum æstimatione, secundum præsentis circumstantias: quamobrem ob varios casus accrescere & decrescere solent rerum pretia. Certum autem est, cum hostium incursus timetur, præsertim si iam hostes ingruant, mercium pretia valde decrescere: adeò, vt vestes eas in eo periculo constitutas nemo æstimasset 10. pazziis, aut floreno: quamobrem miles (si aliis militibus prædandi nullam causam dederat) non magnum damnum censendus est intulisse, neque multum furatus, sed rem valentem 10. pazziis, vel floreno. Quod attinet ad restitutionem, si accepit animo restituendi domino, adeòque bona fide, ac postea domino restituere non possit, neque pauperibus debet: quia secundum probabilem sententiam, restitutio pauperibus fieri tantum debet, cum res aliena ex delicto acquisita est. Si verò mala fide accepit, debet pauperibus restituere: Nisi ipsemet pauper sit, in necessitate constitutus, vt infra dicam.

Alter casus. Titius vnà cum mercatore naui vectus, frumentum ab eo furatus est, & statim absumpsit: postero diè improvisa tempestas orta nauem submersit, vnà cum mercibus, saluis solis hominibus: Nunquid fur in conscientia foro obligatus est ad faciendam restitutionem mercatori? Less. & Vasq. citatis ll. neganter respondebunt: idque fateor esse probabile: Quia fur in hoc casu alienum frumentum absumendo, licet iniuriam intulerit, nullum tamen re ipsa & in effectu



damnum intulisse videtur: quandoquidem nulla ratione cauere potuit, quo minus frumentum periret. Nihilominus contrarium existimo esse probabilius, quia semel contracta obligatio restituendi mercatori frumentum, iniuste ipsi absumptum, subsequente fortuito euentu non extinguitur.

His addendum: Quod supra de dolosa assumptione dictum fuit, similiter locum habere, etsi sine directo perdendi proposito, sed per crassam siue mortalem seruandi negligentiam res ablata apud furem pereat. Exe mpli causa: Fur poculum argenteum furatus est; sed statim amisit, non sine graui culpa: arbitror eum ad restitutionem teneri, nihil obstante, quod poculum similiter perijisset, etsi domino non ablatum, vel etiam suo tempore restitutum fuisset, sicuti indicant Couar. cit. §. 6. Med. cit. quæst. 6. Mol. disput. 725. conclus. 7. & expressè docet P. Nauar. cit. c. 1. num. 23. Ratio est: Quia aliquis rem alienam furando, ex iustitia obligationem inuoluntariam, ratione delicti sui contrahit; non minus, quam depositarius v. g. voluntariam ex contractu: ergo sicuti depositarius non tantum dolum, sed etiam culpam Theologicam, præsertim latam siue mortalem, præstare debet; ita & fur.

Quæres. Quid in eiusmodi casibus sentiendum sit de bonæ fidei possessore, v. g. qui rem alienam inuenit; & postea iterum perdidit, dolo aut culpa lata? Respondeo. Si talis v. g. inuentor dominum rei inuentæ determinatè sciens, in culpabili mora restituendi existat, iam malæ fidei possessor redditur: ideoque tenetur, si eam dolo, vel lata culpa (quæ in delictis dolo æquiparatur) amittat. Sin verò dominum nesciat, sed adhuc inquirere debeat; refert, utrum rem posituè destruat, absumat, an ab alio auferri patiatur, & negligat. Nam in primo casu iniustum damnum infert, quod domino postea comparenti resarcire tenetur. In secundo verò casu tantum peccat contra charitatis legem; non item contra iustitiam: quare nec ad restitutionem obligatur. Ratio est: Quia nemo censetur causa damni propterea, quod cum facillè illud impedire posset, neglexit, nisi ex iustitia obligatus fuerit ad impediendum, siue rem custodiendam. At verò inuentor in hoc casu ex iustitia obligatus non est ad rem custodiendam. Quia omnis obligatio vel est voluntaria ex pacto, vel inuoluntaria ex delicto. Iste autem neque cum rei domino pactus fuit; neque contra eum deliquit. Ergo ex iustitia non obligatur ad custodiam rei, sed solum ex charitate. Excepi: Si dominus rem suam per se, vel aliam personam recepturus, & seruaturus fuisset; tunc si ego præueniam, & rem accipiam, tacitè me obligare videbor ad tantam custodiam rei præstandam, quantam ei dominus, vel alter ille præstitisset: nam alioquin damnum iniustum domino inferetur, quippe qui merito inuitus est, ut res, nisi sub tali obligatione, auferatur.

Nunc verò redeo ad assertionem principalem. Tertio enim dixi; Restituendum quoque esse rei augmentum, & fructus omnes perceptos, sicuti ex communi docet Syl. ver. restitutio, 3. q. 7. & 9. Nau. c. 17. num. 26. Med. q. 6. de restit. Mol. disp. 725. Sanch. cit. c. 23. num. 117. & seqq. Less. c. 12. dub. 17. Quia augmentum seu melioratio rei intrinseca domino eius cedit: consequenter etiam fructus ex re, eiusque intrinsecis meliorationibus percepti, eidem restituendi sunt: quia res quæuis domino suo fructificat. Quod si hos fructus malæ fidei possessor absumpsit, vel dolo, aut lata culpa perire permisit, eorum æstimationem domino præstare cogitur: quia rem alienam perdendo damnum iniuste intulit. Idque habetur, §. si quis à non domino, §. ei verò, Instit. de rerum diuis.

Neque refert, tametsi dominus, si in sua potestate

rem seruasset, non tantos fructus inde percepisset: nam id eius fortunæ cedere debet, quod res eius plùs in manu furis fructificauit, quàm si ipsemet eam possedisset, sicuti bene docet Mol. cit. disp. 725. num. 4. Less. cit. c. 12. num. 117. contra Couar. reg. peccatum, p. 2. §. 6. num. ult. ver. quartò. Idemque locum habet in creditore, qui fructus omnes ex fundo sibi oppignerato perceptos, deductis expensis, restituere cogitur: nihil obstante, quod dominus eum non tanto studio coluisset, sicuti docet Less. l. c. num. 115. contra Sotum lib. 6. q. 1. a. 2. in fine.

Porrò tria aduertenda sunt: Primum. Quod supra dixi, fructus omnes ex re aliena, eiusque melioramentis, domino restituendos esse; intelligi debet deductis expensis & æstimatione laboris. Quia, ut sæpius dictum est, fructus non intelliguntur nisi deductis impendijs, sicuti constat ex l. fructus, ff. soluto matrimonio, l. fundus, ff. familiæ herciscundæ, ibi: nullus casus interuenire potest, qui hoc genus deductionis (impendorum ex fructibus) impediatur, & docet Gabr. cit. d. 15. q. 2. a. 3. conclus. 2. Couar. 1. resol. c. 3. num. 3. Nau. c. 17. num. 25. Mol. disp. 775. Less. cit. dub. 17. num. 111. Sanchez num. 136. Rebellus l. 2. de restit. q. 8. Idque in conscientia foro, & spectata naturalis iuris æquitate, non tantum locum habet in expensis uecessarijs, quas si malæ fidei possessor non fecisset, negligentia & culpæ eius imputaretur; sed etiam in utilibus, quibus res melior ac pretiosior effecta fuit. Expensæ autem, quæ ad solam voluptatem spectant, repeti non possunt: Si tamen sine damno à re separari queant, permissum quoque est, eas auferre: qua de re Ioach. Mynsing. §. certè, Instit. de rerum diuis. Sánchez num. 139. Mol. cit. disp. 725. in fine.

Alterum. Data opera supra dixi, augmentationem siue meliorationem rei intrinsecam (quæ v. g. fit stercoreatione, plantatione, posteaquam plantæ radices egerunt) rei domino cedere: Quæ enim melioramenta vel ornamenta rei extrinsecus adiuncta sunt, & sine illius incommodo separari possunt: veluti ianux, fenestras, lapides pretiosi, &c. eorum dominium, & correspondens locationis pretium, ad possessorem, etiam malæ fidei spectant, sicuti notauit Sanch. n. 105. & 123.

Tertium. Refert quoque alia ratione, utrum res apud furem v. g. melior effecta sit augmento intrinseco: veluti si pullus equinus furto ablatu adoleuit; an verò extrinseca tantum æstimatione ac valore: veluti, si aliquis frumenti modium, vel equum furatus fuit: quorum pretia in cõmuni foro postea aucta sunt. Nam in primo casu semper restitutio fieri debet rei, spectata secundum optimum statum, quem in manu furis habuit. Quare siue fur equum iam adultum alienauit, siue amiserit, deteriorè me reddiderit, semper restitutionem facere debet, secundum æstimationem rei in optimo statu: licet fortè apud dominum manens, eiusmodi incrementum nunquam nacta fuisset. Quod egregiè tradidit Vlpianus l. in re furtiua, ff. de condict. furtiua: Si ex causa furtiua res condicatur, cuius temporis æstimatio fiat, quaritur? Placeat tamen id tempus spectandum, quo res unquam plurimi fuit: maxime cum deteriorè factam fur dando non liberatur: semper enim moram fur facere videtur. Idemque docet Angel. ver. furtum. §. 44. Syl. ver. restitutio, 3. q. 7. dicto 1. Maior in 4. d. 15. q. 26. ibid. Gabr. q. 2. a. 3. conclus. 3. Nau. c. 17. n. 26. Couar. reg. peccatum, p. 2. §. 6. n. 2. Rebell. q. 5. Sanch. n. 123. Less. dub. 16. n. 105. 108. Ratio est: Quia, ut supra dictum, augmentum intrinsecum ad dominum rei spectat, eique statim una cum re ipsa restituendum est: quare, si à fure non restituatur, sed absumatur, vel longiore morâ deterior reddatur, iniustum damnum domino infert, quod eidem compensari debet. Semper enim fur moram facere videtur, inquit Vlpian.

Sed limitari debet, cum Medina q. 6. de restit. ad 6. Couar. reg. peccatum, p. 2. §. 6. num. 2. P. Nau. l. 4. c. 1.



num. 34. Valsq. de restit. c. 5. §. 1. dub. 12. Nisi ita res comparata sit, ut licet iniquus possessor rem in optimo statu restitueret, à domino tamen non diuendita, &c. sed seruata, similiter deterior facta esset: tunc satisfacit iniquus possessor, restituendo rem in statu deteriore, ad quem, sine culpa tamen sua, peruenit. Ratio est: Quia hoc casu fur per inoram restituendi nullum re ipsa domino damnum intulit, sicuti constat ex suprà dictis.

6 In altero autem casu, si res extrinseca tantum æstimatione aucta, eoque tempore à fure consumpta vel alienata fuit, v.g. scapha frumenti furtiui; postea verò pretium frumenti iterum decreuit: satisfacit fur, si tunc aliam scapham frumenti eiusdem generis ac bonitatis restituat; vel pretium eius, secundum taxationem temporis in quo restituit, sicuti docent Mol. cit. disp. 725. conclus. 3. & 4. Less. dub. 16. P. Nau. n. 37. Ratio est: Quia ille valor extrinsecus non censetur fructus seu augmentum rei, sed potius industriæ; ideo non rei domino, sed possessori etiam malæ fidei cedit. Quapropter de rebus, præsertim ijs, quæ in genere suo functionem recipiunt, generalis hæc regula tradi potest: A debitore tum bonæ, tum malæ fidei, per se loquendo, restituendam esse vel rem ipsam numero, quæ accepta fuit, non deteriore redditam, vel aliam eiusdem generis ac bonitatis; vel denique eiusdem præteritum, siue æstimationem præsentem. Cuius ratio peti debet ex iustitia commutativa, exigente æqualitatem inter rem acceptam & dandam. Neque obstat, quod fur frumenti scapham tempore intermedio carius vendendo lucrum ceperit: nam id ad industriam eius pertinet, postea verò satisfacit restituendo frumentum quale acceperat; vel loco eius pretium, quo tunc frumentum venire solet. Idemque, quamuis non ita certò, tamen probabiliter dici potest de rebus vsu non absumptibilibus; satisfieri creditori, si equus ipsi restituatur omnino talis, qualis ablatus fuerat; etsi vel tunc, cum auferebatur, vel tempore intermedio pluris valuerit.

7 Sed oportet his casibus pretium equi, si fortè aliis locatus fuit, domino restituere: atque insuper omne damnum, & lucrum cessans eidem integre compensare. Exemplum damni emergentis est, si propterea quod equus aut frumentum ablatum, vel tempore debito non restitutum fuit, ipsemet dominus coactus est frumentum aut equum pretio maiore emere: Exemplum lucri cessantis, si dominus frumentum non seruasset, donec decreveret: sed maiore pretio vendidisset: totum hoc eidem refarciri debet: quæ est doctrina Ioan. Medina C. de restitut. cit. q. 6. ad 1. Syl. ver. furtum, q. 16. P. Nau. l. c. num. 37. Valsq. cit. §. 1. num. 79.

Atque hoc ipsum est, quod ultimo loco dixi in principali conclusione: Fructus non tantum eos, quos iniquus possessor ex realia percepit, restituendos esse: sed eos quoque, quos dominus verisimiliter percepisset, nisi ipsi ablata, vel iniquè detenta fuisset. Ratio est: Quia in casu iniustæ damnificationis dominum indemnem omnino seruari oportet, sicut egregie traditur reg. 79. ff. Generaliter, cum de fraude disputatur, non quid habeat actor: sed qui per aduersarium habere non potuit, considerandum est. Et in l. domum, C. de rei vindic. Domum, quam ex matris successione ad te pertinere, et ab aduersaria parte iniuria occupatam esse contendis, Præses Provincie, cum pensionibus, quas percepit, aut percipere poterat, et omni causa damni, restitui iubebis. Et in l. fructus, ff. eod. Fructus non modo percepti, sed qui honestè percipi potuerunt, æstimandi sunt. Consonat l. si nauis, §. ult. ff. eod. Constat animaduerti non debere, an malæ fidei possessor fructus sit; sed an petitor frui potuerit, si ei possidere licuisset. Neque dissentit lex canonica in cap. grauis, de restitut. spoliatorum. Non tantum fructus à nouo & violento possessore perceptos: sed quos possessores vereres percepissent, reddi faciatis eisdem. Qua de re latè disputat Sanchez num. 97. &

seqq. Couar. reg. peccatum, cit. §. 6. num. 4.

## CAP. V.

## Quinam restituere debeant damnum iniuste datum?

## S V M M A R I V M.

- 1 Præter damni iniusti executores, etiam concausæ eius ad restitutionem obligantur.
- 2 Qui expressè, vel tacitè mandat damnum inferri, de eo tenetur.
- 3 Rati habitio damni illati mandato comparatur in ordine ad penas iuris non autem in ordine ad restituendi obligationem.
- 4 Male consulens damnum inferri, damnificato obligatur etiam ex culpa, saltem crassa: Et verò qui consilium sequeitur, non obligatur consulens, nisi dolosum fuerit: excepto, si ratione status vel muneris maiorem, quam alij, peritiam profiteatur, tunc obligabitur etiam ex culpa.
- 5 Qui alterum certo proposito determinatum ad damnum inferendum suo hortatu magis adhuc confirmauit, non obligatur damnificato: nisi causafuerit, ut maius ei damnum inferretur, tunc tenetur de excessu. Qui materialiter tantum, non verè causaliter damno cooperatur, restituere non debet.
- 6 Consentes, fautores, receptatores, si causa vel concausa damni existant, ad restitutionem obligantur.
- 7 Damno non obstantes, non manifestantes, &c. tunc solum ad restitutionem obligantur, si ratione pacti, vel officij, adeoque ex iustitia impedire debeant. Receptor furis, eiusdem criminis reus efficitur.
- 8 Qui donum à fure accipit ne clamet, aut ne indicet, non tenetur ad restitutionem, nisi sua pollicitatione furem animosiores reddiderit.

EX suprà dictis constat, ad contrahendam obligationem restituendi ex capite iniustæ lésionis duo esse necessaria: & ut damnum illatum sit, & ut contra iustitiam, siue per iniuriam illatum sit. Quare si quis, dum in aliena silua contra domini voluntatem arbores cædit, iumentum casu occidat, non tenebitur de damno, quod, ut suppono, omnino inuoluntariè, ideoque sine iniuria illatum est. Præterea, si aliquis famulo suo in mandatis dedit, ut hominem iniquè occideret: ille autem quacunque de causa mandatum executus non fuit, ad nullam restitutionem iniquus mandator ante Iudicis sententiam obligabitur, quando nullum damnum illatum est.

Porro, cum sæpe accidat, ut præter eum, qui damnum iniuste exequitur, alij etiam tanquam concausæ, non sine iniuria, ad damnum inferendum concurrant, & cooperentur: dicendum est ex omnium DD. sententia, non solum ipsum exequentem restituendi obligationem contrahere: sed omnes etiam eius concausas, quæ nouem recensentur, earumque sex priores directè, reliquæ indirectè concurrunt, atque hoc disticho comprehenduntur, apud Scotum in 4. d. 15. q. 2. a. 4. Richard. ibid. a. 5. q. 4.

Iussio, consilium, consensus, palpus, recursus, Participans, mutus, non obstant, non manifestans.

Nomine iussionis intelligitur, qui damnum inferri mandauit, siue expressè: siue tacitè, videlicet facto, vel dicto, ex quo v.g. famulus facillè colligere potuit, gratum fore hero, si nomine eius damnum inferatur. Dubitatur autem primò: Si scias alterum paratum esse nomine tuo damnum inferre, v.g. inimicum tuum occidere, neque prohibeas, cum facillè possis utrum mandasse censearis, & in conscientia foro ad restitutionem obligatus? Affirmat Mol. cit. tom. 3. disp. 729. n. 6. sed rectius distinguit Rebellus p. 1. lib. 2. q. 14. §. 3. num. 13. Vel alter scit, te malignum suum propositum cognitum habere, & non contradicere, aut



impedire; vel nescit. Si primum, taciturnitas tua consensus & approbatio indicatur: per quam si ille moveatur ad facinus patrandum, de damno teneberis. Si secundum, non teneberis ut mandans; sed interdum ut non obstitans, si videlicet ex officio, adeoque ratione iustitiæ, non solius charitatis, obligatus sis ad damnum iniustum impediendum.

Dubitatur secundò: Si filius nomine patris; aut famulus nomine domini sui nescientis, & non consentientis, damnum intulit, quod is, postea re intellecta, ratum habeat, vtrum in conscientie foro ad restitutionem damni obligandus sit? Affirmat Palud. in 4. distinct. 15. quæst. 2. a. 3. Syl. ver. restit. 3. quæst. 6. dicto 2. Angelus ver. furtum, num. 20. Nauar. c. 17. num. 133. Quia talis mandasse censetur, ob iuris regulam 10. in 6. *Rati habitationem retro trahi, & mandato non est dubium equiparari.* Sed rectius alij negant, Med. q. 7. de restit. ad 4. Rebel. cit. f. 3. Mol. disp. 729. n. 3. Less. lib. 2. c. 13. dub. 3. n. 13. Vasq. de restit. c. 9 §. 1. n. 19. Quia talis re vera non est causa efficiens damni: cum ad præteritum non sit potentia. Ad iuris regulam respondetur: Eam intelligendam in primis de contractibus, qui alterius nescientis nomine celebrati, ac proinde à consensu eius pendent, subsequente ratificatione confirmantur. Deinde de pœnis, quæ per Iudicis, vel legis sententiam non minùs incurruntur, postquam aliquis delictum, suo nomine patratum, ratum habuit, quàm si antè patrari iussisset, secundum Gl. communiter receptam in l. 1. §. deieciisse, ff. de vi, & vi armata.

Nomine *consilij* intelligitur qui damnum dari suavit, vel hortatus est, si alter ea ratione motus executus fuit. Et verò sæpe accidit, ut executor ipsemet iuris imperitus, & suorum siue Consiliatorum, Aduocatorum, &c. auctoritatē merito secutus omni culpa vacet, ideoque ad restitutionem ex capite iniustæ læsionis non teneatur; sed soli v.g. Principum Consiliarij, Aduocati clientium; Confessarij pœnitentium, &c. sicuti dixi suprà lib. 2. tr. 3. c. 12. ante 4. assert. & notauit Mol. to. 3. post. disp. 730.

4. Sed dubitatur primò. Vtrum malè consulens ex dolo tantum, an etiam ex culpa obligetur? Vel quæritur hinc, vtrum talis suadens ex consilio suo noxio obligetur illi, qui consilium sequitur: vel quæritur, vtrum obligetur tertiæ personæ, cui ex tali maligno consilio damnum iniustum illatum est. Ad posteriorem hanc quæstionem facilis est responsio; suadentem obligari damnificato (saltem in defectum exequentis) non tantum si dolo, sed etiam si culpa, saltem crassa seu mortali (quippe quæ in delictis dolo æquiparatur) consilium noxium dedit: ut si Confessarius pœnitenti per crassum errorem respondit, restitutionem faciendam non esse, sicuti latius dicam infrà tr. 4. c. 7. n. 5. Circa priorem autem quæstionis sensum, maior est difficultas: Respondeo autem ex doctrina Syuestri ver. consilium, q. 7. Pet. Nauar. lib. 3. c. 4. n. 22. Molinæ l. c. n. 2. Rebel. p. 1. lib. 2. q. 14. f. 4. & dico I. Si consulens talis persona sit, quæ ratione status, vel muneris sui peritiam profiteretur in ea re, quam suadet, ut Doctor, Aduocatus, Consiliarius, Confessarius, tenebitur etiam de culpa, saltem latâ; imò etiam leui, si inde proprium commodum v. g. stipendium capiat.

Dico II. Si malè consulens seu suadens non sit talis persona, quæ ratione muneris aut status sui peritiam præferat, non obligatur ex consilio, nisi dolo; id est, nisi fraude ignorantem circumueniat, iuxta iuris regulam 62. in 6. *Nemo ex consilio, nisi fraudulentum sit, obligatur:* & reg. 47. ff. *Consilij non fraudulentum nulla obligatio est.* Ratio discriminis est: Quia prioris generis personæ, dum peritiam præ se ferunt, qua carent, hoc ipso decipiunt alios, qui ipsorum consilium, & au-

thoritatem per simplicitatem sequuntur. Qui autem talem peritiam non profitentur, horum consilium nemo prudens sequitur, nisi prius explorarit, num expediat, necne, iuxta l. 2. in fine, ff. mandati. Puto autem hoc intelligendum, etiam si culpa Theologica sit; v. g. si homo plebeius inconsideratè, seu per negligentiam etiam crassam, tamen sine fraude alteri consilium noxium det, cum tantum aduersus charitatis legem delinquat, de damno secuto non tenebitur: atque alter, qui datum sibi consilium voluntariè sequitur, suæ id potius temeritati, ac imprudentiæ imputare debet.

Dubitatur secundò. Si aliquem, qui iniustum damnum alteri inferre decreuerat, consilio vel hortatu magis etiam confirmasti, vtrum ad restitutionem damnificato tenearis? Respondeo: Probabiliter negari posse. Quia non fuisti causa efficax, ut damnum absolutè, & secundum substantiam inferretur, quando alter per se ipsum satis incitatus erat ad inferendum, ut etiam absque suavit tuo intulisset: Ergo non teneris de damno. Quæ est doctrina S. Thom. 2. 2. q. 62. a. 7. & in 4. d. 15. q. 1. a. 5. quæstion. ult. ibid. Palud. q. 2. a. 3. S. Anton. p. 2. t. 1. c. 12. §. 12. Adrian. in 4. de restit. vbi de currentibus cum fure, dub. 1. Syl. ver. restit. 3. q. 6. dicto 3. & 4. Nauar. c. 17. n. 17. Less. l. 2. c. 13. dub. 2. n. 6. Sa ver. restitutio, n. 39. contra Caiet. 2. 2. q. 62. art. 7. Medinam q. 7. & 8. de restit. Sotum lib. 4. q. 7. art. 3.

Neque ob stare videtur, etsi hortatu tuo causa fueris, ut citius aut expeditius damnum inferretur: quia, moraliter rem æstimando, parum, imò nihil interest ad damni illationem, primane v. g. an secunda diei hora iniustum homicidium perficiatur, si absque dubio perficiendum sit, sicuti probabiliter docet Less. l. c. contra Medinam cit. q. 8. P. Nauar. l. 3. c. 4. n. 15. 35. 67. Mol. disp. 736. n. 3. Vasq. de restit. c. 9. §. 1. dub. 1. in fine, & dub. 2. n. 32. Quod si verò suasione, vel hortatu causa fuisti, ut maius damnum inferretur, quàm alioquin illatum fuisset, teneris tantum de excessu, sicuti rectè docent S. Anton. l. c. Nauar. n. 20. Less. n. 6. & colligitur ex communiori doctrina Medinæ cit. q. 8. §. sequitur amplius, Maioris in 4. d. 15. q. 26. Couar. reg. peccatum, p. 2. §. 12. ad finem, P. Nauar. lib. 3. c. 4. n. 48. Rebel. cit. lib. 2. q. 14. f. 4. n. 20. Eum, qui fari per se parato furari aureos centum, persuasit, ut furaretur ducentos, secuto effectu, contrahere tantum obligationem restituendi centum: licet contrarium senserit Adrianus loco suprà cit. & Molinæ cit. disp. 7. 6. n. 2.

Multò magis à restitutione immunis erit ea persona, cuius cooperatio tantum materialis fuit, in effectum formaliter non influens; quia sine ea hoc numero damnum ab hoc damnificante nihilominus illatum fuisset. Exempli causa: Si furi furandi gratia ascendentem scalam teneas, quam etsi nemo teneret, tamen ascenderet. Si ancilla domini suæ vocanti obsequium præstet in asportanda cista furtiva, quam sine cuiusquam subsidio, auferret tamen, & furaretur. Cui doctrinæ consentiunt Adriani, Syl. Palud. S. Anton. Nauar. l. c. suprà citatis, eandemque tradit Mol. cit. disp. 736. n. 5. P. Nauar. num. 49. Less. c. 13. dub. 4. n. 35. contra Vasq. cit. dub. 2. In externo tamen foro tales merito puniri solent, ob delictum; præterquam si iustus metus excuset: qua ratione à peccato excusantur rustici, cum à militibus vel prædonibus mortis metu adiguntur ad prædas iniustas auhendas.

Nomine *consensus* intelligitur efficax approbatio vel suffragium ad damnum inferendum: veluti si aliquis è Magistratu ad inferendum bellum iniustum; aliquis ex Concilio, Capitulo ad decernendam legem iniquam & damnosam, eligendum hominem indignum, & Ecclesiæ perniciosum, suffragium & consensum præstet.



Ceterum, si videas maiorem partem Assessorum, Canonicorum iniquum suffragium ante te dedisse; vt licet tu suffragium neges, nihil tamen profecturus sis, neque damnum impediturus, peccabis quidem suffragando; sed ad compensationem damni non teneberis: cum eius causa non fueris: quando quidem sufficiens, & efficax causa posita erat ante tuam suffragationem. Ita ex communi Caiet. in sum. ver. restit. cap. 1. ver. attende ergo, Nau. in man. cap. 17. n. 21. P. Nau. cit. c. 4. n. 33. Mol. tr. 2. to. 3. par. poster. disp. 732. Vasq. de restit. c. 9. §. 1. n. 16. Aduerte tamen quod dixi primò; Si maior pars (secundum quam sententia ferenda est) suffragium iniquum ante te dederunt. Nam si tu prior dedisti, tunc vnà cum alijs causa actiua ferendæ sententiæ fuisse, ideoque ad damnum resarciendum obligaris; nihil obstante, quòd tamen si tu suffragatus non fuisses, eadem tamen sententia lata, idemque damnum secutum esset, sicuti notauit Mol. cit. disp. 732. n. 3. Secundò dixi; Si nihil profecturus sis. At verò si speres, te contradicendo alijs persuadere posse, vt iniquam sententiam reuocet, ex munere & officio obligatus es ad id præstandum: alioquin teneberis de damno secuto, tanquam mutus siue non obstitans, vt ex sequentibus patebit, & notauit Mart. Nauar. cit. n. 21. P. Nauarrus n. 36.

Nomine *palpantis* intelligitur, qui v. g. commemorando hominis iniuria affecti nobilitatem, corporis vires; vel exaggerando acceptam contumeliam, dedecus, &c. eundem ad iniustam vindictam, damni illationem concitat: Modò sit causa efficax, ita vt alter sine tali palpatione damnum non intulisset, sicut suprà dixi de consulente, & tradit S. Th. q. 62. a. 7.

Nomine *receptoris*, intelligitur damnificantis receptor id est, qui facultatem, occasionem, patrocinium damno inferendo, aut illato non compensando præbet; videlicet Aduocatus, vel quiuis alius causæ manifestò iniquæ patrocinium apertè, vel occultè suscipiens. qua de re P. Nau. lib. 3. c. 4. n. 37. Item Caupo filium familias, contra patris voluntatem, domo sua suscipiens, ad prodigendas pecunias profectitias à patre, sicuti docet Molin. disp. 733. Item receptor furis, quatenus formaliter fur est, aut rerum alienarum detentor. Quòd si rem ipsam furtiuam sciens recipiat celandi causa, furti crimen committere, eademque poena dignus censetur, vt habetur in l. 3. §. non tantum, ff. de incendio, ruina, &c. & §. conceptum, Instit. de obligat. ex delicto. Idque notandum est contra eos, qui scientes rem furtiuam esse, à fure emunt ac seruant: cum sint receptatores furti, de quibus dicitur in cit. l. 3. *Receptatores non minus delinquant, quam aggressores.* Et consentit l. eos, C. de furtis.

Nomine *Participantis* intelliguntur, quicunque præstito auxilio, seu subsidio ad damnum inferendum formaliter cooperantur: v. g. usurarij institores seu factores, de quibus Syl. ver. usura, 7. q. 4. Nau. c. 17. n. 267. Tabellio conficiens instrumentum usurarium; & testes illi scienter subscribentes in gratiam mutuatoris, de quibus Syl. q. 7. Molin. disp. 331. Item faber serarius subministrans clauem ad furandum: qui scalam furi applicat ac tenet: qui eundem committatur, eique assistit animi augendi causa: qui vigilem, vel exploratorem agit. Qui proinde etiam poenis furti tenentur, l. in furti, §. ope, l. si pignore, §. qui ferramenta, ff. de furtis, & docet Clarus lib. 5. sent. §. practica criminalis, q. 90. n. 9. Mol. tr. 1. t. 3. poster. disp. 695. n. 44.

Veruntamen, si tales materialiter tantum cooperentur: quia alter per se ipsum satis determinatus est, etiam sine eiusmodi auxilio (quippe quod absolute non necessarium) damnum inferre: tunc probabile est, participantem in conscientia foro à restitutione immunem esse. Exemplum affert Palud. cit. d. 15. q. 2. a. 3.

de usurarij famulo, qui pecunias iussu domini numerando aliud non facit, quam manus suas denigrare; cum etiam secluso auxilio famuli, ab ipso met domino numerarentur: præterquam, quòd famulus numerando pecunias non cooperatur ad pactionem usurariam, sed tantum ad mutationem. Aliud exemplum suprà positum est de ancilla, quæ dominæ suæ furanti subsidium adfert non necessarium: quia sola etiam auferret, & furaretur. Sin autem absque alterius auxilio domina furari non posset, tunc adiutrix obligationem restituendi contraheret; esto, quòd si hæc non subueniret, & iuaret, alius non deesset, à quo illa adiuuaretur, sicuti bene notauit Adrian. cit. q. de currentibus cum fure, §. secundò dubitatur.

Nomine *muti, non obstantis, non manifestantis* comprehenduntur ij, qui cum verbo, scripto, opere damnum impedire possent, & ratione officij, vel antecedentis, pacti ex iustitia impedire deberent, dolo vel negligentia intermittunt: v. g. Princeps in suis terris non impediens damna à feris, à latronibus, de quo videri potest Andr. Gaill. lib. 2. obseruat. 64. Assessor, Consiliarius, Canonicus tacendo, vel se absentando, non impediens iniquam constitutionem, electionem, &c. Tutor, curator, administrator bonorum, non impediens damna pupillis, Minoribus, Ecclesijs prouenientia. Vide S. Thom. 2. 2. q. 62. art. 7. Adrianum cit. q. de currentibus cum fure, §. est dubium apud Doctores, Nau. in comment. super c. non inferenda, 23. q. 3. & in man. c. 14. n. 136. & c. 24. n. 15. & seqq.

Ex quo colliges primò: Si duo eiusdem familiæ famuli fini, quorum vni cura penus custodiendæ demandata est, alteri non est; etsi vtræque ex lege charitatis furta impedire debeat, si facile & sine graui suo incommodo possit; ex iustitia tamen ferme is solùm, qui curam penus gerit: quare solus etiam ad restitutionem obligatur, sicuti docet Nauar. c. 24. man. n. 7. & lib. 3. consil. 3. in fine, de testam. & lib. 5. consil. 7. de iniurijs, edit. 2. Mol. disp. 735. in fine, Less. c. 13. dub. 10. n. 74. P. Nau. l. 3. c. 1. n. 224. Qui tamen id limitat: Nisi extranei fures in domum ingrediantur; tunc putat ex iustitia quemlibet famulum obligari ad reuelandum, si aliter malum impediri non possit: quòd cuicumque famulo, eo ipso quia domesticus est, custodia domus aliquo modo incumbat, vt ab extraneorum iniuria defendatur.

Secundò: Si Iudex in exequenda causa, proferenda sententia negligens, vel iniquus sit, non solùm parti læsæ, officium eius requirenti compensare tenetur, sicuti bene explicat Gab. in 4. d. 15. q. 6. a. 2. sed interdum etiam Communitati siue fisco: si v. g. multam pecuniariam, quam ex consuetudine vel communi lege imponere Reo debebat, sine causa intermisit, sicuti sentire videtur S. Tho. 2. 2. q. 67. art. 4. ad 3. & docet Syl. ver. poena q. 28. & latè Salon 2. 2. q. 62. a. 7. contr. 5. etsi id neget Azor. t. 1. lib. 5. c. 8. q. 5. ad 4.

Tertiò: Eadem ratio est de telonariis, si iustum vectigal exigere negligant: Item de custodibus vinearum &c. si per negligentiam damnum inferri patiantur, vel à deprehensis in furto, secundum loci consuetudinem dominique voluntatem, multam exigere negligant, sicuti docent Salon. l. c. Mol. disp. 739. n. 5. Ioan. Medina q. 12. de restit. prope finem, Barthol. Medina lib. 1. instruct. c. 14. §. 30. P. Nau. lib. 3. c. 4. n. 142. contra Nau. c. 25. n. 34. & lib. 5. consil. 4. de iniurijs n. 4. edit. 2. Syluest. ver. restitutio, 3. q. 5. dicto 7. quorum tamen sententia tunc rectè defenditur, si Iudex crimina inquirere; custos reos deprehendere intermittat; vel Procurator fiscalis causam contra Reum in iudicio negligentia agat, non teneri eos ad restitutionem multarum: eò quòd ipso- rum officium propriè ac directè non sit fisco vel do-



minum mulctis ditare; sed vineam custodire, damna Communitatis auertere: ad quorum proinde compensationem obligantur, si per incuriam eorum causa extiterunt. Alia verò ratio est, si Iudex, vel Custos à Reo deprehenso, aut conuicto negligat exigere mulctam, quam secundum legem, vel consuetudinem loci ex officio suo exigere deberet: quia hoc casu ius magis propinquum domino, vel fisco acquisitum est, idque Officialis ex officio suo exequi tenetur. Videri potest Less. lib. 2. c. 31. dub. 8. n. 1.

Sed neque is, qui ad testandum à Iudice vocatus, fuga, astu, vel tergiuersatione aliqua declinat, obligatus videtur ad restitutionem damni, si quod ex intermissione eiusmodi testimonij alteri innocenti euenit, sicuti probabiliter docent Mol. to. 1. tr. 2. disp. 83. §. de teste constar, Less. lib. 2. c. 30. n. 59. contra Sotum lib. 5. q. 7. a. 3. circa medium, Nau. c. 25. n. 41. cum non ex iustitia, sed solum ex charitate erga Innocentem; obedientiā verò erga Iudicem imperantem; ac denique ex religionis virtute, si etiam iurauit, teneatur ad veritatem, quam nouit, aperiendam. Sin verò testis falsum contra alterum testimonium proferat, certum est obligari ad restitutionem damni, cuius causa iniusta extitit. Certum item est, si quis ad dicendum testimonium pro innocente accedat, & veritatem celans causa sit, quominus innocens alium testem adhibeat, per quem innocentia eius demonstretur, in tali casu veritatem malitiosè celantem, obligari ad restitutionem damni, sicuti Molina monet l. c.

3. Quartò inferunt Sotus lib. 4. q. 7. a. 3. Nau. c. 17. n. 21. Si quis à fure pecunias accipiat, ne clamet, ne indicet, ad nullam restitutionem obligari; nisi ex officio suo furtum impedire debeat: vel nisi res accepta sit pars furti. Cui tamen doctrinæ alia duæ limitationes adhiberi debent: Prima est apud P. Nau. lib. 3. c. 4. n. 132. Less. cit. dub. 10. n. 68. Si accipiens sua pollicitatione expressa, vel tacita furem animosiores reddidit, qui alioquin absterritus fuisset, tenetur de illato damno tanquam participans. Altera apud Mol. disp. 735. n. 3. Rebel. q. 14. §. 8. n. 64. Si pecunia à fure data fuit non animo donandi, sed ex iustitia obligandi accipientem, ut ne indicaret, cum ex lege charitatis teneretur: hoc casu accipiens obligatur ad rescindendum contractum, pretio restituto furi; quippe cum obligatio ad peccandum ipso iure irrita sit. Quamquam, si aliqui propter non denuntiandi pactionem pœnæ periculo se subijciant, ut custodes, ac vigiles, quibus denuntiandi obligatio incumbit: ij peccant quidem pecunias accipiendo cum tali pactione, ut deprehensos è manu dimittant, atque ad damni compensationem obligantur, si quod Communitas exinde patitur; tamen datæ sibi pecuniæ dominium acquirunt, sicut dicam infra tr. 4. c. 4. n. 8.

## CAP. VI.

Quantum singuli damnificantes restituere debeant, & quo ordine?

## SUMMARIUM.

1. Si plures damnificantes sine conspiratione concurrant ad damnum inferendum, singuli non plus obligantur, quam ipsimet intulerunt.
2. Mandans damnum dari, ante alios, etiam ipsum executorem, obligatur ad restitutionem: si nemo damnum inferri mandauit, executor damni ante alias concausas restituere cogitur.
3. Concausa damni dati obligantur tantum in defectum principalis: quare si iste restituat, vel restitutio ipsi condonetur, concausæ penitus liberantur.

Si una ex concausis restitutionem fecit, ius & actionem acquirat aduersus principalem, atque in eiusdem defectum aduersus concausas, pro rata.

4. Inter ipsas concausas prius obligari videntur, quæ positiuè cooperantur v. g. consulendo, quam quæ negatiuè, non obstando, tacendo.
5. Si plures conspirauerint ad damnum inferendum, singuli obligantur in solidum; saltem in defectum aliorum.

**S**upponendum I. Generalis regula statui potest, Quod singule causæ damnificantes restituere debent secundum proportionem influxus, ut quæ potiores ac principales causæ fuerunt, præ aliis restituere teneantur: item quæ totum damnum suæ causalitatis influxu attigerunt, in solidum obligatæ sint; quæ verò non totius damni causæ fuerunt, pro parte teneantur. quæ de re videri potest Vasq. de restit. c. 9. §. 1. dub. 3. n. 48.

Supponendum II. Causæ damnificantes interdum nullam inter se relationem habent, sed singulæ suas partes seorsim agunt. Interdum verò relationem ac ordinem inter se habent, ob consensionem, pactionem; in eoque ordine alia principales esse solent; alia verò accessoria, seu concausæ.

**A**SSERTIO I. Si plures, absque conspiratione & consensu, ideòque omnino casu concurrant ad damnum inferendum, tum singuli duntaxat tenentur de damno ab ipsis illato; non item de eo quod alij, quamuis eodem tempore, loco, & c. intulerunt. Ex quo resoluitur primò: Si tu casu superueniens, ubi plures ex alieno dolio hauriunt, ipse quoque modicum bibas, vel sciens plures à Rege furari solitos, modicum quid fureris: venialiter tantum peccabis, neque plus restituere debes, quam accepisti. Ita Syl. ver. restit. 3. q. 6. Rebel. lib. 2. de restit. q. 2. §. 6. contra Maiorem in 4. d. 15. quæst. 25. §. sed contra & q. seq. Pet. Nau. lib. 3. cap. 1. num. 48. Vasq. de restit. c. 9. §. 1. dub. 5. Ratio est: Quia in tali casu non est aliquis causa influens in totum damnum, sed solum in partem eius.

Resoluitur secundo: Si in rixa subito exorta plures aduersarium impugnent, ille solus de homicidio tenetur, qui vulnus lethale infixit: non item alij qui percusserunt, iuxta l. vlt. ff. Ad l. Cornel. de sicarijs: Si in rixa percussus homo perierit, ictus vniuscuiusque in hoc collectorum contemplari oportet, & docet Couar. p. 2. clem. §. 2. n. 3. Gomez 3. resoluc. c. 3. n. 30. Mol. tr. 3. disp. 33. mem. 7. neque obstat, etsi aduersarius ob tuam præsentiam, vel vulnus à te inflictum non nihil debilitatus, & facilius ab homicida superatus sit. Nam hæc qualis qualis cooperatio ad mortem, licet fortasse ad irregularitatem sufficiat: non tamen ad pœnam ordinariam, neque ad damni compensandi obligationem: si credibile sit, etiam absque tua percussione hominem moriturum fuisse, sicuti dixi cap. præced. n. 5. ver. Neque obstat videretur.

**A**SSERTIO II. In damnificatione microsa, quantum quisque iniuste abstulit, tantundem restituere tenetur. Ita ex communi Couar. reg. peccatum, p. 2. §. 12. n. 3. Syl. cit. q. 6. Pet. Nauar. lib. 3. cap. 4. num. 73. 88. Vasq. de restit. c. 9. §. 1. dub. 3. n. 53. Quia talis obligatur oratione rei acceptæ, possessæ, quæ est prima & potissima restituendi obligatio. Sin verò ponamus, hunc malæ fidei possessorem, cum rem restituere deberet, malè absumere: tunc per se ipsum iniuste damnificat, ideòque restituendi obligationem contrahit ex capite iniustæ lésionis: præterquam si id agat alterius mandatis nomine, qui proinde obligationem indemnem seruandi mandatarius in se suscipere videtur, ut mox dicam.

**A**SSERTIO III. Principalis damnificans censeri debet mandans, qui proinde primo loco, etiam ante ipsum damni executorem, restitutionem facere cogitur.



Ita S. Thom. 2. 2. quæst. 62. art. 7. ad 2. ibid. Caiet. Sotus lib. 4. quæst. 7. a. 3. ad 2. Rebel. quæst. 15. Less. lib. 2. cap. 13. dub. 5. num. 42. Pet. Nau. lib. 3. cap. 4. num. 75. Ratio est: Quia actio magis tribuitur agenti principali, quam exhibenti ministerium: si autem dominus famulo mandet, ut hominem occidat, & is exequatur, famulus est quasi agens ministeriale, quo sicuti instrumento dominus operatur. Ergo, &c. Est tamen intelligenda assertio de eo tantum, qui cum auctoritate præcipit, qualis est, dominus, pater, iudex. Nam si alius iubeat, nulla iubendi auctoritate præditus, non est propriè præceptum; sed magis consilium, uti notavit Pet. Nau. num. 78. Excepto, si vel minas adhibeat, metumque inferat; vel fraude ad facinus patiendum inducat; vel denique si quis alteri præcipiat, aut suadeat, ut in sui gratiam damnum inferat, qui alioquin non inferret: tales enim auctores censentur illati damni, ideòque ante alios, etiam ipsum realem executorem, ad restitutionem obligati.

ASSERTIO IV. Si nemo damnum fieri mandauit, coegit, tunc executor damni, ante alias concausas, puta consulentem, consentientem, participantem, &c. restituere cogitur. Quæ est communis DD. sententia, & videri potest Innocent. in c. sicut dignum, de homic. Molin. tr. 2. to. 3. poster. disp. 737.

3 ASSERTIO V. Causæ secundariæ, qualis est executor comparatione mandantis; & concausæ, siue co-operantes, comparatione executoris, omnino liberantur, posteaquam principalis damnum compensauit. Ratio est: Quia illæ solum obligantur in defectum: id est, si principalis damnificans compensaturus non putetur, quia non potest, vel non vult. Quod si vna ex secundariis eausis damni compensationem fecit, tum ius & actionem acquirit repetendi à principali totum quod expendit, atque ille expendere debuerat: In defectum verò principalis, id est, si ab eo debitum consequi non possit, à reliquis concausis repetet, duntaxat pro rata singularum. Ita S. Thom. a. 6. ad 3. & art. 7. ad 2. Richar. in 4. d. 15. a. 5. quæst. 4. ibid. Scot. quæst. 2. a. 4. Palud. quæst. 2. art. 5. Maior q. 26. Angelus ver. furtum, §. 16. Syluest. ver. restit. 3. quæst. 6. Couar. reg. peccatum, p. 2. §. 12. num. 3. Medina quæst. 8. de restit. Pet. Nauar. lib. 3. c. 4. num. 108. Molin. tr. 2. to. 3. poster. disp. 737. Less. cit. dub. 5. num. 46. ubi rectè hæc confirmat simili iudine fideiussoris, in defectum debitoris principalis obligati.

His adde: Si principali damnificanti restitutionis debitum condonetur, etiam accessorios liberari; non autem vice versa. Ratio est: Quia ruente principali, ruit accessorium; non item ruente accessorio, etiam principale tollitur, sicuti post Innocent. in c. sicut dignum, de homicid. docet S. Anton. p. 2. tit. 1. cap. 12. §. 15. Medina de restit. q. 8. prope finem, quem vide, & Pet. Nau. lib. 3. c. 4. n. 115.

4 ASSERTIO VI. Inter causas secundarias, seu quæ in defectum principalis restituere debent, priore ac potiore obligatione tenentur illæ, quæ potius influunt in effectum, puta consulentes, aliterque cooperantes: postea verò, & in defectum horum obligantur causæ negatiuæ, puta tacentes, non obstantes, &c. Ita docent Vas. cap. 9. de restit. §. 3. dub. vlt. Less. cit. c. 13. dub. 11. assert. 2.

5 ASSERTIO VII. Si damnificantes omnes principales fuerunt, veluti si plures condixerunt ad furandum, iniuste bellandum, latrocinandum, tum singuli ad totius damni compensationem per se primò obligantur, sicuti constat ex l. si plures, ff. de dolo. Ratio est, quia singuli causa sunt totius damni. Cæterum, si vnus sociorum restitutionem fecit in solidum, à reliquis, saltem in conscientie foro, pro rata repetere potest, sicuti docet Caiet. 2. 2. q. 62. a. 6. §. in tertio casu, Medina quæst.

8. §. quòd autem, Couar. reg. peccatum, p. 2. §. 12. n. 4. Less. cit. c. 13. dub. 7. n. 52.

Exinde intelligi potest, verane sit responsio Nauarri cap. 17. n. 20. quam super hac re consultum dedisse se profitetur: Quòd miles, qui in diripienda vrbe, Anno Domini 1527. Ducem Borbonium iuuit, non ampliùs restituere teneatur, quàm ad ipsum peruenit; vel cuius damni ita causa extitit, ut sine eius præsentia & ope illatum non fuisset. Quam sententiam ante Nauarrum tenuit Palud. in 4. d. 15. quæst. 2. art. 5. & secutus est Pet. Nauar. lib. 3. de restit. cap. 4. num. 53. Less. dub. 4. n. 37. Vasq. de restit. cap. 9. §. 1. dub. 2. num. 35. Respondeo autem & dico I. Gregarius quisque miles in primis restituere debet, quod ex iniqua tali direptione, aut bello ad ipsum peruenit; vel si alicuius particularis damni, proprii commodi causa, auctor fuit.

Dico II. Totum reliquum damnum ante alios restituere tenetur dux belli, vel direptionis, cuius iussu, auctoritate, impulsu, ciuitas v.g. spoliata, vel deuastata fuit. Hæc sunt ex communi sententia, & videri potest Rebell. lib. 2. de restit. q. 15.

Dico III. In defectum Ducis, & aliorum, qui auctores, vel executores damnorum fuerunt, reliqui omnes ac singuli milites, qui communi consilio, conspiratione, ac veluti vna manus ad ciuitatis direptionem, deuastationem concurrerunt, in solidum obligantur ad totius damni compensationem: quamuis ob impotentiam, aliasque causas à tali restitutione per accidens excusentur. Hæc est sententia Adriani supra cit. q. dub. 2. Gabr. in 4. d. 15. quæst. 3. a. 3. dub. 4. Caiet. quæst. 62. a. 7. Soti lib. 4. de iust. q. 7. art. 3. Couar. reg. peccatum p. 2. §. 12. num. 2. ver. tertio, Angles in floribus difficult. 10. de restit. ex bello, Mol. cit. to. 3. disp. 734. Est enim communis & recepta doctrina, quòd in defectum causæ principalis, id est, si principalis damnum non compenset, obligetur causa secundaria siue accessoria; modò non materialiter tantum, sed formaliter ac verè in effectum damni dati influxerit: Tunc autem concausa, siue causa adiutrix verè & formaliter influxisse censetur, quòd sine tali cooperatione damnum dari non potuisset. Atqui in proposito casu Dux belli solus, & sine exercitu urbem diripere non potuisset: ergo milites gregarij eum adiuvantes, & cooperantes, fuerunt causæ damni formales & propriè dictæ: consequenter tenentur ad restitutionem, in defectum causæ principalis.

Neque obstat primò, si miles dicat: Etsi ego non interfuissem, nihilominus vrbs ab aliis direpta fuisset: Nam ita omnes & singuli se excusare possent, atque totus exercitus restituendi obligationem effugeret. quod falsum est. Secundò nihil iuuat, si iidem milites se excusare vellent: Etsi nos Duci non militassetimus, & ad iniustam direptionem concurrissetimus, tamen alij non defuisset, à quibus idem damnum illatum fuisset. Nam sicuti illi alij tunc restituendi obligationem contraxissent, ita vos nunc de facto contraxistis, cum iniuste militatis.

Ad extremum notanda est doctrina Molinæ disp. 737. num. 4. Si aliqui ex damnificantibus principales sint, alij minus principales, tunc iuxta proportionem concursus cuiusque eorum tenentur contribuere ad restitutionem: v.g. Si sit societas latronum ita constituta, ut prædam inequaliter inter se diuidant; quia quidam eorum sunt præcipui fortiores, industriores: tunc iuxta proportionem diuisionis prædæ, inter ipsos communi consensu constituta, contribuere etiam debent ad damna. Interim tamen fateri semper oportet, quòd in aliquorum defectum, alij restituere teneantur, sicuti docet etiam Syluest. ver. restitutio. 3. quæst. 6. dicto 4.



## CAP. VII.

Vtrum restituere debeat, qui aliquem à consecutione alicuius boni impediuit?

## S V M M A R I V M.

- 1 *Qui alterum impedit à consecutione rei ex iustitia debite, tenetur ad restitutionem: secus, si ex libera voluntate conferenda erat. In externo foro actio conceditur de dolo, aduersus eum qui ex emulatione agit.*
- 2 *Qui Ecclesiastici beneficij collatorem iam determinatum ad conferendum Titio, precibus aut suasionem abducit, ut sibi, vel alteri, quamuis minus digno, conferatur, non videtur obligatus ad restitutionem faciendam Titio.*
- 3 *Qui per vim, aut fraudem impedit, quo minus alter beneficium legatum, vel donum gratuitum consequatur, ad damni compensationem obligatur.*
- 4 *Reus & testis, si iuridicè interrogati veritatem celantes, causa existant, quo minus multo à iudice imponatur, non sunt ad restitutionem obligati: secus dicendum videtur, si poena ob commissum crimen contracta est ipso iure.*

**A**SSERTIO I. Qui voluntariè aliquem impediuit à consecutione rei, quæ ipsi ex iustitia propriè debita erat, tenetur ad damni illati compensationem. Exempli causa: Si aliquem impediisti, vel remouisti à beneficio Ecclesiastico, ad quod ipsi ius quæsitum erat, siue perfectum per collationem, confirmationem; siue imperfectum per legitimam electionem, præsentationem, &c. iniustum datum intulisti, quod compensare ei debes, sicuti constat ex suprà dictis, & docet S. Th. 2. 2. q. 62. a. 2. ad 4. Couar. reg. peccatum, p. 2. §. 7. n. 8. Tol. lib. 5. c. 19. Nauar. in man. 17. n. 69. P. Nau. lib. 3. c. 5. n. 2. Mol. disp. 727. concl. 2.

**A**SSERTIO II. Si alicui res ex iustitia debita non erat, sed conferenda ex libera voluntate, tunc qui sine vi, fraude, collatorem suasionem, aut precibus mouet, ut officium, legatum, donum gratuitum non conferat ei, cui animo destinatur, sed sibi, vel alteri, vel nulli, is contra iustitiam non peccat, ideòque ad nullam restitutionem obligatur. Ita docet Caiet. q. 62. a. 2. ad 4. Palud. in 4. d. 15. q. 2. a. 2. Syl. ver. restitutio, 3. q. 12. Sotus l. 4. q. 6. a. 4. ad 6. argum. concl. 2. Nau. cit. n. 69. Couar. cit. §. 7. n. 8. Molin. cit. disp. 727. concl. 1. Less. lib. 2. c. 12. dub. 18. P. Nau. lib. 3. c. 5. n. 7. contra Scotum in 4. d. 15. q. 2. resp. de argum. ult. Cum enim alter ex iustitia conferre non sit obligatus, & sine iniuria voluntatem suam, vel testamentum mutare possit; neque ego iniuriam infero, si ei consilio, precibus auctor sum, ut voluntatem mutet. Peccabo quidem, si id ex odio, vel alio malo fine agam; non tamen contra iustitiam, sed contra charitatem, quæ nullam restituendi obligationem parit.

Verum est, quòd in externo foro concedatur actio de dolo, aduersus eum, qui aliquid agit, (cuius alioquin agendi ius haberet) ex emulatione; id est, ut alteri noceat, cum sibi nihil profit, sicuti habetur in l. 1. §. ijdem aiunt, ff. de aqua pluua arcenda, de eo, qui in suo fundo fodiens vicini fontem auertit; animo nocendi vicino, non agrum suum meliorem efficiendi. Sed hoc ad forum tantum externum pertinet, neque ante iudicis sententiam, malignam nocendi intentionem punientis, obligatio refarciendi damni incumbit, sicuti testatur Molin. disp. 709. & 727.

**A**SSERTIO III. Probabile est, quòd neque is contra iustitiam peccet, vel ad restitutionem teneatur, qui Ecclesiastici beneficij collatorem, iam determinatum ad alicui conferendum, suasionem, aut precibus eò per-

ducit, ut sibi, vel alteri etiam minus digno conferatur. Ita docet Adrianus in 4. de restit. §. consequenter quæro, vtrum impediens, Sotus lib. 4. q. 6. a. 3. prope finem, Valent. to. 3. disp. 5. q. 7. p. 2. Nauar. c. 17. n. 72. Couar. reg. peccatum, p. 2. §. 7. n. 6. Tol. cit. c. 19. Sa ver. restit. n. 22. Less. c. 34. dub. 15. in fine, & alij contra Palud. & Syl. ll. cc. Caiet. q. 62. a. 2. P. Nau. l. 3. c. 5. n. 10. Vasq. tr. de beneficiis, c. 2. n. 140. Nicol. Garciam p. 7. de benefic. cap. 16. n. 30. Pèdet autem hæc assertio ex alia probabili opinionem, quam suprà cap. 1. huius tract. declarauimus, eamque optimè explicat Gutieres lib. 2. can. qq. cap. 11. n. 47. Nau. cit. n. 72. Couar. cit. §. 7. n. 6. Collatorem Ecclesiastici beneficij propriè nullam iniuriam digniori inferre, si eo prætermisso, conferat minus digno: consequenter neque ille iniuriam inferit, qui collatorem suasionem, aut precibus ad id faciendum mouet. Quare neuter restitutionem facere tenetur digniori prætermisso; (quippe cui beneficium propriè ac strictè debitum non erat) sed interdum Ecclesiæ, si inde damnum accepit, quòd indignus & non idoneus electus, vel institutus fuit.

Excipiendum tamen est, nisi ex consuetudine, vel statuto alicuius Ecclesiæ beneficia conferenda sint per oppositionem antecedentis examinis: tunc enim iniuriam inferit, atque ad restitutionem obligatur, si quis causa existat, ut illi non conferatur, qui ex concurrentibus dignior est; quippe cui ex lege ius quæsitum est petendi beneficium, sicuti rectè notauit Nau. num. 74. Eman. Rodriq. p. 1. casuum conscientiarum, c. 108. concl. 6. Less. cit. dub. 15. num. 75.

**A**SSERTIO IV. Qui per vim, fraudem, calumniam alicuiusquem impedit, quominus Ecclesiasticum beneficium, officium, legatum donationem, &c. consequatur, is damnum compensare debet, arbitrio viri prudentis, iuxta certitudinem, vel probabilitatem, qua ille tale bonum alioquin assecutus fuisse existimatur. Ita videtur intelligendus S. Thom. 2. 2. q. 62. a. 2. ad 4. & docet Couar. cit. §. 7. num. 8. conclus. 5. Nau. num. 73. Barthol. Medina lib. 1. instruct. c. 14. §. 31. Tolet. cit. c. 19. num. 6. Mol. disp. 727. num. 7. conclus. 3. Sa cit. num. 22. Less. cit. dub. 18. assert. 1. Pet. Nau. cit. lib. 3. c. 5. num. 31. Valent. cit. disp. 5. q. 7. p. 2. Exempla habes: Si molestis & importunis precibus à mortituro obtineas, ut testamentum mutet: Si mendacijs, aut falsis criminationibus Episcopo persuadeas, ut beneficium alij conferat, quam ipse decreuerat. Eademque ratio est, si dolo, mendacijs, aut vi adhibita, impediās aliquem quo minus beneficium sibi conferri supplicet. Nam licet Titio v. g. ius non competat postulandi beneficium, tanquam sibi propriè debitum; competit tamen ei ius accedendi, supplicandi. Quemadmodum pauper, licet ius non habeat eleemosynam, tanquam sibi debitam, flagitandi; habet tamen ius mendicandi, obsecrandi: Quare si eos ab hoc iure impediās, cogeris damnum refarcire, secundum proportionem spei, quam habuerunt consequendi beneficij, & eleemosynæ.

Porro ex eodem fundamento respondit Sotus lib. 1. q. 4. 6. a. 6. Molin. tom. 1. tract. 2. disp. 95. prope finem, Castro de lege poen. lib. 2. c. 12. §. ex his: Quòd reus poenam pecuniariam meritis, si iuridicè interrogatus, crimen à se admissum iniuste neget; ad restitutionem obligetur. Quia tamen si Magistratus ante latam sententiam, ius non habeat exigendi multam à Reo: habet tamen ius inquirendi de crimine ad multam inferendam: quare si Reus, legitime interrogatus, veritatem celet, iniuste impedit Magistratum à multa consequenda, ideòque restituere debet. Sed contrariam sententiam docent Nau. c. 18. num. 49. & lib. 5. consil. 4. de iniur. edit. 2. Salom. q. 62. contr. 2. a. 3. Azor tom. 1. lib. 5. c. 8. q. 5. Vasq. l. 2. disp. 175. c. 12. Less. lib. 2. c. 31. dub. 8. Sanch. lib. 10. de matrim. disp. 8. num. 14. & lib. 2. moral. cap. 22. num. 22.



Fundamentum esse potest: Quia omnis restituendi obligatio propriè oritur ex læsione iustitiæ commutatiuæ: Reus autem veritatem celans, propriè non peccat contra iustitiam commutatiuam, quæ inter partes Reipubl. versari solet: sed potius lædit iustitiam publicam iudicalem, & vindicatiuam: siquidem ius & officium Magistratus cuiusque de criminibus inquirendi, per se ac directè non spectat pecuniariam mulctam seu commodum, sed publicæ pacis ac iustitiæ conseruationem, cuius causa per accidens pecuniaria mulcta imponitur.

Hæc posterior sententia valde probabilis est, si sermo sit de pœna, Iudicis arbitrato, ob commissum crimen imponenda, ac fisco inferenda: sin verò loquamur de pœna ipso facto seu criminis admissione contracta, placet mihi magis prior sententia: quia tunc directè agitur ad pœnam soluendam, cuius iam reus factus est, qui crimen admisit; ac proinde ius Iudicis lædit, si falsis allegationibus siue mendaciis mulctam secundum legis decretum imponendam sibi, effugiat. Eadè que ratio est de falso teste iudicem in tali casu decipiente.

Quare neque istud placet, quod docet Sanchez cit. disp. 8. num. 14. Si vxor legitimè accusata de adulterio, falsis se tueatur testibus, vel vicissim de viro adulteriū falsis allegationibus ostendat, ideò que absoluitur, obligari quidem in conscientia foro ad expensas litis viro soluendas; non item ad dotem reddendam, quam ille alioquin propter mulieris adulterium lucrari deberet.

## CAP. VIII.

Ytrum restituere teneatur, qui aliquem ad peccatum induxit, vel à religione abduxit?

## S V M M A R I V M.

1. Qui alterum exemplo suo, aut suasionem in peccatum induxit, ex iustitia non obligatur ad eius emendationem.
2. Qui suo consilio alterum, licet Nouitium à Religione abduxit, tamen sine vi, fraude, ad nullam restitutionem obligatur.
3. Qui Religiosum à Religionis statu suasionem, aliave cooperatione abstraxit, tenetur Religioso Ordini ad restitutionem, quatenus potest, faciendam: Quare persuadere debet apostata, aut fugitiuum, ut redeat; sin minus, curare tenetur, ut alius eque idoneus ingrediatur: Ipsemet autem ingredi ex iustitia lege nunquam obligatur.

1. AD primum respondeo. Qui alterum suasionem, aut exemplo ad peccandum induxit, non ex iustitia, sed sola charitate obligatus est ad emendationem ei procurandam. Ita Syl. ver. restitutio. 3. q. 1. Sotus lib. 4. q. 6. a. 3. Nau. lib. 3. consil. ult. de Simonia, edit. 2. & in c. noli, d. 1. de pœnit. & in man. c. 4. num. 45. Pet. Nau. lib. 2. c. 2. num. 2. Salon 2. 2. q. 62. a. 2. contr. 2. Mol. tract. 4. disp. 50. conclus. 2. Less. lib. 2. c. 8. dub. 2. contra Scotum in 4. distinct. 15. quæst. 3. a. 1. Richard. ibid. a. 5. quæst. 2. Maior quæst. 15. Adrian. in 4. de restit. §. ex causa differens. Ratio est: Quia volenti ac consentienti non fit iniuria. Omne autem peccatum, sicut libera voluntate admittitur, ita liberè in eo perseveratur. Confirmatur ex l. 2. §. ult. ff. mandati: *Nemo ex consilio obligatur, etiam si non expediat ei cui datur: quia liberum est cuique apud se explorare, an expediat sibi consilium.* Sed excipi debet: Nisi alterum fraude, dolo, vel iniusto metu peccatum induxeris; v.g. laborantem ignorantia crassa in hæresin; falsum alterius crimen denunciando in hominis odium; aut si dominus famulo, pater filio, Magister discipulo eum auctoritate præcipiat, quod malum est.

Siquidem tam metus, quam ignorantia efficiunt, vitale non plena animi voluntate in culpam, & spirituale damnum, te impellente, labatur. Multo que magis, si Magister discipulos suos falsa docuit, ea reuocare tenetur: in qua obligatione in primis considerandum est, quantum in commodi ex falsa illa doctrina sequi possit: deinde verò, vtrum dolo vel culpa, præsertim lata; an verò sine tali causa falsitatem docuerit: tunc enim non ita strictè & cum graui pudore aut infamia sua reuocare tenebitur; nisi incommodum secuturum maioris momenti esse censeatur.

Ad alterum respondeo & dico I. Qui sine vi, fraude, suasionem tantum alterum à Religionis proposito, quamuis iam ingressum, seu nouitium retraxit, ad nullam restitutionem obligatur. Ita Sotus cit. art. 3. in 2. argum. Petrus Nauar. cit. cap. 2. num. 13. Lessius cit. cap. 8. dub. 3. Vasquez tract. de restitut. cap. 7. dub. 2. Valent. tom. 3. disp. 5. quæst. 6. part. 5. & alij supra citati, contra Paludan. in 4. distinct. 15. quæst. 2. art. 2. conclus. 1. Maiorem ibid. quæst. 17. prope finem, Adrian. in 4. citato loco, vbi de restitut. bonorum animæ, S. Anton. part. 2. tit. 2. cap. 2. §. quantum ad 2. Quod enim ipsi nouitio sponte consentienti nulla restitutio fieri debet, constat ex præced. asserto. Quod verò nec Religioni, ex eo manifestum est, quia illi nullum adhuc ius in hominem acquisitum fuit. Quare, sicuti nouitius nullam Ordini iniuriam infert, si recedat; ita & alter, qui illi hoc suadet.

Peccant tamen grauiter v.g. parentes, cognati, amici, si absque rationabili causa homines suasionibus, aut blanditijs ab ingressu sancti religiosi instituti auertant: vel post Religionis ingressum, pretextu probandæ magis constantiæ, reuocent. Qua de re Pet. Nau. num. 16. Mol. tract. 4. disp. 51. qui etiam causas recenset, ob quas aliquibus hominibus Religionis ordo non expediat: ideò que talibus dissuaderi meritò possit. Quod etiam Christus Dominus significauit apud S. Lucam cap. 9. vbi quendam vltro se offerentem, quod non satis expeditum cerneret ad sequendum, reiecit: *Vulpes foveas habent, & volucres celi nidos: Filius autem hominis non habet vbi caput reclinet.* Alium autem non se offerentem tantopere vocauit, vt ne permitteret quidem patrem mortuum prius sepelire. Quid enim ea re Christus aliud indicare voluit? nisi quod non omnes, qui se ad status Religiosi perfectionem offerunt, idonei, aut suscipiendi sint: aliqui verò, etsi se non offerant, speciali Dei gratia præuerti, veluti compellantur: vt hinc etiam impleatur: quod Apost. dixit ad Rom. 9. *Non volentis, neque currentis, sed misericordis est Dei.*

Dico II. Qui Religiosum, vel Professum suasionem, aliave cooperatione à Religione abducit, siue ad apostasian trahit, ex iustitia obligatur Religioni ad restitutionem, quatenus potest, faciendam. Ita docent Scotus, Antoninus, Palud. Maior locis supra citatis, Richard. dist. 15. a. 5. q. 4. ad 8. Nau. c. 12. num. 45. Pet. Nau. l. c. num. 18. contra Sotum l. c. Salonem cit. q. 62. a. 2. controuert. 3. Molin. tract. 4. disp. 51. conclus. 2. Less. cit. c. 8. dub. 3. num. 16. Saver. restitutio, num. 14. Ratio est: Quia Religiosus Ordini suo personaliter obligatus est: cum sui iuris non sit, sed se Ordini per obedientiaæ votum, acceptante Prælato, tradiderit.

Verum quidem est, hinc non propriè dictum dominium oriri: attamen ius in re, quod satis est ad Religiosum fugientem vindicandum, reducendum. Igitur Religiosus apostata iniuriam Religioni infert: & non minus ille, qui eum ad hoc inducit: quare vterque ad restitutionem ex iustitia obligatur: in primis quidem Religiosus ad ordinem redeundo, & quatenus potest, damnum illatum compensando: In defectum autem ius obligatur suator, siue cooperator: non vt ipsemet loco eius ingrediatur, sicuti rectè docent Sotus l. c. conclus. 4. Nau. 12. num. 45. Pet. Nau. l. c. contra Palud.



& Adrianum ll. cc. S. Anton. p. 2. tit. 11. c. 2. ante §. 1. Quia Religionis susceptio non necessitatis, sed libera voluntatis esse debet, iuxta illud apud S. Matth. cap. 19. *Si vis perfectus esse, vade, & vende omnia, &c.* Quare, licet in canonibus reperiatur, vt aliquis in pœnam delicti includatur in Monasterium: nusquam tamen præcipitur, nec præcipi potest, vt Religionem profiteatur, sicuti notauit Salon controu. 3. conclus. 3. Pet. Nauar. num. 17. Sed operam dare debet suus, vt vel eundem, quem abduxit, ordini restituat, vel alterum æquè idoneum: & alia damna, si quæ illata sunt, compenset. Neque obstat, quod Salon obijcit, ista in praxi non obseruari: Causa enim est, vel quia impotentia excusat: vel quia pars læsa non tanto rigore restitutionem postulat: vel denique quia contraria Soti, & aliorum sententia, ab omni restitutione in tali casu liberans, probabilis videtur.

## CAP. IX.

## Cui restitutio fieri debeat?

## SUMMARIVM.

- 1 Debita ex contractu incerta, id est, quorum creditor ignoratur, vel conueniri non potest, à debitore licite retinentur.
- 2 Debita incerta, prouenientia ex delicto, pauperibus vel Ecclesiæ restitui debent.
- 3 Bonorum certorum restitutio ordinariè facienda est possessori iusto, à quo accepta sunt, vel quibus damnum illatum.
- 4 Bona Ecclesiæ non Prelato dissipatori; sed Capitulo restitui debent: Et quæ filiofamilias, vel pupillo accepta, eorum patri, tutori, bonorum administrationem habentibus restituenda sunt; alioquin, qui pupillo soluit, sine tutoris auctoritate, probare debet i. utilitatem pupilli solutionem versam fuisse.
- 5 Spolia, quæ fur, aut prado deposuit, in conscientia foro non ipsis, sed potius eorum domino restitui debent.
- 6 Si restitutio cessat in gratia detrimentum, vel ipsiusmet, cui fieri debet, vel alterius personæ, aut Communitatis, interuenit differenda erit.
- 7 Qui sine iusta causa excusante, alteri iniuste v.g. pugnatorum pecuniam mutuo dat; vel ex contractu debitam sine necessitate restituit, contra iustitiam peccat.
- 8 Soluens creditoris sui creditoris obligatione liberatur.
- 9 Soluisse censetur, qui iusta compensatione utitur.
- 10 In conscientia foro, si quodcumque debitum, modo indubium sit, alio modo consequi non liceat, proficere mihi possum per compensationem, vel saltem retentionem alius cuiusque à me debiti, donec mihi satisfactum sit.
- 11 Si chirographum seu instrumentum debiti penes debitorem reperiatur, presumptio est factæ solutionis.

**N**otandum est, in hoc & sequentibus capitibus restitutionis nomen ferme nos latè accepturos, vti significat omnem redditionem debiti, seu ex delicto, seu ex contractu descendens.

- 1 Assertio I. Debita incerta, id est, quorum creditor ignoratur, vel conueniri non potest, quia v.g. nimis distat, si proueniant ex contractu iusto, possessor sibi retinere potest, neque tenetur pauperibus erogare. Ita docet Pet. Nau. lib. 4. c. 2. num. 46. & probabilem censerit Less. lib. 2. c. 14. num. 38. quamuis contrarium senserit S. Thom. 2. 2. q. 62. a. 5. ad 3. & plerique alij. Exemplum est: Si à Mercatore per errorem duas panni vlnas pro vna accepisti; sed ei restituere non potes, quia nescis, quò discesserit, sine iniuria retines; neque pauperibus ex præcepti necessitate restituere cogeris. Ratio est: Quia incertorum bonorum restitutio facienda non est iure naturali aut diuino; sed tantum iure positivo c. cum tu, de vsuris, sicuti fatentur Sotus lib. 4. q. 7. a. 1. Couar. reg. peccatum, p. 2. init. num. 6. Med. q. 3. de restit. causa 11. Lessius l. c. Atqui lex illa canonica solum præcipit, vt quæ iniuste acquisita sunt; puta per usuram, &c. si domino non possint, in pauperes, vel

alias pias causas erogentur: quia ius Ecclesiasticum iniustum possessorem eiusmodi incertorum bonorum incapacem reddit, in pœnam criminis. De bonis autem incertis à bonæ fidei possessore in pauperes erogandis, canonico iure nulla mentio habetur. Quare regula hinc locum habet, quam à multis DD. approbatam testatur Pet. Nau. cit. c. 2. num. 145. Quotiescunque certæ personæ vel Communitati restitutio non est facienda, nulli omnino ex præcepto debetur, nisi iusta lex positiua imperet.

Assertio II. Debita eiusmodi incerta, quæ per iniustitiam contracta sunt, videlicet ex furto, vsura, &c. pauperibus, vel Ecclesiæ restitui debent, Ecclesiastici iuris constitutione, c. cum tu, de vsuris, c. cum sit, de iudiciis: quibus accedit communis Doctorum consensus atque Ecclesiæ praxis. Verum his seclusis, & spectato solo naturali iure, si res aliena iniuste rapta proprio domino restitui non possit; probabile est, quòd possessori eam retinere liceat, tanquam pro derelicta habitam, iuxta regulam Petri Nauatri suprà allegatam.

Obijcies contra 2. assertionem. Lex illa Ecclesiastica pœnalis est: Ergo non obligat ante Iudicis sententiam. Respondeo neg. conseq. Quia, vt dixi lib. 1. tract. 4. c. 15. num. 5. leges pœnales, quæ aliquem ob crimen inhabilem reddunt ad acquiendum, sæpe obligant ante sententiam Iudicis: talis autem est lex ista, impediens, ne quisquam rerum per ipsum iniusto furto, vsura, &c. acquisitarum dominium absolute acquirere possit, sed vt in defectum veri domini, pauperibus, ob canonis constitutionem, tribuere obligatus sit.

Sed aduertendum est hoc loco: Bona incerta, iniuste acquisita, duplicis generis esse. Nam quædam simpliciter incerta sunt, quorum dominus omnino ignoratur; vel saltem adiri non potest, vt ipsi restitutio fiat: & hæc ordinariè pauperibus eroganda sunt. Quædam verò sunt incerta secundum quid, quia dominus eorum confusè cognoscitur: puta si sciatur, ad vnum, vel aliquos ex certo hominum genere, aut numero rem spectare; sed nesciatur determinatè ad quem, vel ad quos, vel secundum quam partem: tunc inter eos diuisio, vel transactio fieri debet, sicut explicat Caietan. q. 62. a. 5. resp. ad 3. Mol. tom. 3. poster. disp. 745. Huc etiam spectat, quod docet idem Caiet. cit. loco, P. Nau. lib. 4. c. 2. num. 66. Si à multis eiusdem Communitatis incolis bona ablata sunt, incumbere obligationem restitutionis, si ea ita institui possit industria Magistratus, vt particularibus personis, quæ damnum passæ fuerunt, saltem secundum notabilem partem, satisfiat; ideòque talem restitutionem velle censeantur.

Assertio III. Bona certa restitutioni obnoxia, ordinariè restitui debent possessori iusto à quo res accepta, vel cui damnum illatum est. Ita S. Thom. q. 62. a. 5. iunct. Caiet. Palud. in 4. d. 15. q. 2. a. 4. Syl. ver. restitut. 4. q. 1. Nauar. c. 17. num. 28. Ioan. Medina de restit. q. 2. §. de eo quod secundo loco, Barthol. Med. lib. 1. sum. c. 14. §. 30. Pet. Nau. lib. 4. c. 2. num. 5. Mol. tom. 3. poster. disp. 741. Rebel. p. 1. lib. 2. q. 11. Ratio peti debet ex iustitia commutatiua; quæ postulat, vt quantum acceptum est, tantundem restituatur illi, à quo acceptum. Quare quod acceptum est à depositario, commodatario, conductore, custode, administratore, ipsidem, non domino restituendum est, sicuti DD. citati docent. Nam alioquin iniuria ipsis fieret, si iure possessionis, detentionis, custodiæ, aut utilitatis spoliarentur; & damnum, atque lucrum cessans compensari deberet.

Excipe primò: Si eorum, à quibus res aliena accepta est, nihil intesit; quòd non ipsis, sed statim rei domino restituatur, sicuti notauit Rebellus loco cit. sect. 2. Excipe secundò: Si de maligno proposito valde suspecti sint,



sint, id est, probabiliter existimentur rem alienam ablaturi, vel absumpturi, cum domini iniuria; tunc, si fieri possit, sine maiore eum damno siue infamia, potior ratio domini habenda, eique quod suum est, restituendum, sicuti docent Sotus lib. 4. quæst. 3. a. 1. Nauar. c. 17. man. num. 29. & consil. 4. de furtis, edit. 2. Pet. Nau. num. 17. Rebellus sect. 2. num. 4. & 9. Sanchez l. 7. moral. c. 19. num. 110.

- 4 Ex quo rectè inferitur cum Paludano in cit. a. 4. Caiet. in sum. ver. restitutio, c. 4. & 2. 2. quæst. 62. a. 5. super corp. art. Pet. Nau. cit. cap. 2. num. 14. contra Martinum Nauar. c. 17. num. 29. quod bona Ecclesiæ, non Prælati dissipatori; sed potius Capitulo restituenda sint: eo quod ius administratoris non se extendat ad dissipandum. Quare alia ratio est de fructibus beneficiorum, quorum non nuda administratio; sed & dominium, quamuis aliquo modo oneratum, ad Ecclesiasticos beneficiatos pertinet, sicuti dicam lib. seq. tract. 2. c. 3. num. 3.

Deinde, quæ à filio familias, pupillo, furioso, vxore, Religioso accepta sunt ex illis bonis, quorum administratio eis non competit, plerumque restituenda sunt patri, tutori, marito, Prælati, sicuti notat Gabr. in 4. dist. 15. quæst. 2. a. 3. dub. 3. Nam alioquin qui filio soluit sine consensu patris, aut pupillo sine consensu tutoris, Religioso sine consensu Prælati, is probare debet, rem solutam conuersam fuisse in vtilitatem Patris, pupilli, Ecclesiæ: alioquin iterum soluere cogitur, sicuti monet Syl. ver. solutio, q. 4. Angelus §. 8. ex l. pupillus, ff. de actionibus, & tit. ff. ad SC. Macedon. iuncta l. 1. & 2. C. si aduersus creditorem, l. quod si fortè, §. ult. & l. in pupillo, ff. de solutionibus. Denique, quando bona creditoris publicata sunt, & fisco addicta, tunc depositum, & similia debita fisco reddi debent, l. bona fides, in princ. ff. depositi.

- 5 Neque dictis obstat c. in literis, de restit. spoliatorum, ubi dicitur, quod *etiam prædator secundum rigorem iuris restituendus est*: ex quo sequi videtur, non tantum iusto, sed etiam iniusto possessori, puta furi, prædoni, dissipatori, à quo res accepta fuit, eidem reddendam esse. Respondeo. Decisionem eius capituli pertinere ad forum iudiciale; in quo, si quis queratur, se vi deiectum è possessione beneficij, altetiusve rei immobilis: accusatus non auditur, si Actori objiciat, non esse ipsum canonicè institutum, vel ad eum non pertinere rei proprietatem: sed Actor ante omnia restituitur in possessionem, & postea de iure canonicæ institutionis, vel proprietatis agitur, iuxta l. 1. §. qui à me, ff. de vi, & vi armata. Præterea in l. bona fides, §. exempli loco, ff. depositi, hoc æquissimum fore decernitur, ut spolia, quæ fur aut latro deposuit, potius domino restituantur; si ante furem, vel simul cum fure repetat, aut vindicet; sed eo non comparente, potius iniusto deponenti reddenda esse. Verum in conscientie foro, si certum sit, rem iniquè ablatam, & restitutioni obnoxiam esse, opus non est dare furi, aut prædoni: cum etsi ipsi daretur, statim tamen domino suo reddere teneretur: imò nec furidari potest, si periculum exinde domino imminet. Vide Gabr. in 4. d. 15. q. 10. art. 9. Abb. in cit. c. in literis. Syl. ver. restit. 4. q. 3. Mol. tract. 2. to. 3. poster. disp. 741. num. 4. Less. lib. 2. c. 27. num. 15.

Id verò in questione positum est. Qui rem alienam à bonæ fidei possessore, inculpate existimante rem suam esse, accepit, atque certò deprehendit, ad alterum pertinere, vtrum bonæ fidei possessori, an potius domino restituere debeat? Placet mihi distinctio, quam Rebellus affert de restitut. lib. 2. quæst. 11. sect. 2. num. 5. Vel res à bonæ fidei possessore accepta est, interueniente pacto depositi, commodati, pignoris, &c. tunc ipsi potius, quocum iustum pactum intercessit, restituenda est. Interim verò lex charitatis postulabit, ut dominus mo-

neatur, si id ei profuturum putetur, sine grauiore alterius incommodo. Vel res à bonæ fidei possessore alia ratione in manus tertiæ personæ peruenit: tunc domino tanquam verum & potius ius habenti restituenda erit, si absque scandalo, aliòve incommodo fieri possit. Lege etiam Gabr. in 4. distinct. 15. quæst. 2. a. 3. dub. 3. Pet. Nauar. lib. 4. cap. 2. num. 21. Molin. cit. disp. 741 num. 3.

Præterea, aliæ causæ à Doctoribus adferuntur, quibus debitor excusetur, quo minus rem iusto possessori, vel domino, à quo accepta fuit, restituat.

PRIMA excusationis causa: Si restitutio cessura sit 6 in illius, vel alterius personæ, aut Communitatis detrimentum, tunc potest, interdum etiam debet differri restitutio, vel res restituenda tuto loco reponi, sicuti docet S. Thom. 2. 2. quæst. 62. a. 5. ad 1. Caietan. ibid. Maior in 4. distinct. 15. q. 28. §. contra 1. corollarium, Gabr. ibid. q. 2. a. 2. Nau. c. 17. num. 63. Molin. disput. 755. Pet. Nau. lib. 4. cap. 2. num. 31. Less. c. 16. dub. 4. Exemplum est: Si aliquis pecunias tibi mutuo datas repetat ad fornicandum, vel ad bellum iniustum gerendum. Nam priore casu ex lege charitatis teneris differre solutionem, si eam à creditore impetrare possis. Quod si ille constanter solutionem exigat, puro ex iustitia obligatum te esse ad soluendum: sicuti & mulier ad debitum reddendum marito habenti votum castitatis, si eum ab exigendi proposito auertere nequeat, sicuti notauit Sanchez lib. 9. de matrim. disp. 6. num. 6. Pet. Nau. num. 33. contra Less. num. 58. In posteriore verò casu, quo agitur de damno iniuste inferendo tertiæ personæ, nefas est debitum restituere, quantumvis exigenti, præterquam si periculum maioris mali ex negatione solutionis timeatur.

Circa quam doctrinam tria aduertenda sunt: Primum. Cur debitum difficilius reddi possit creditori ab usuro contra iustitiam, quàm contra alias virtutes, v.g. temperantiam; causa est, partim quia obligatio virtutis iustitiæ suapte natura grauior est, quàm aliarum moralium; consequenter oritur inde strictior obligatio impediendi peccata contra iustitiam, quàm contra alias virtutes: partim, quia per peccatum iniustitiæ inferitur damnum alteri innocenti, & inuito; per alia verò peccata, v.g. intemperantiæ, solus peccans, & quidem propria voluntate damnum accipit, sicuti notauit Pet. Nauar. l. c. & Sanchez lib. 1. moral. c. 7. num. 12.

Alterum. Qui sine iusta & excusante causa alteri 7 pecuniam mutuo dat; vel ex contractu debitam reddit ab usuro contra iustitiam, v.g. illaturo bellum iniustum, is secuto inde damno, ad eius compensationem tenetur, saltem in defectum principalis damnicantis, sicuti valde probabiliter docet Sotus lib. 4. de iust. quæst. 7. a. 1. ad 1. Pet. Nauar. lib. 4. cap. 2. num. 36. Sanchez num. 19. Valent. tom. 3. disp. 5. quæst. 21 p. 4. Less. loc. cit. num. 59. Ratio est: quod qui sine iusta causa materiam proximam & necessariam malè operaturo ministrat, indirectè cooperari censeatur; licet neque iubeat, neque suadeat operationem, sicuti constat ex l. si pignore, ff. de furtis: *Qui ferramenta sciens commodauerit ad effringendum ostium, vel armarium: vel scalam sciens commodauerit ad ascendendum, licet nullum eius consilium principaliter interuenierit ad furtum faciendam: furis tamen actione tenetur.* Dixi autem sine iusta causa: Nam alteri peccaturo materiam ministrare sine suasionem, aliave directâ & formali cooperatione, per se atque intrinsecè malum non est; sed ob iustam causam honestari potest; adeò, ut etiam furioso gladium suum repetiti restituere liceat, si ita necesse sit ad proprium graue damnum euitandum, sicuti ex communi notauit Molin. & Sanch. ll. cc. & constat ex iis quæ dicta sunt l. 2. tract. de charitate, c. ult. nu. 4. & seqq.



Tertium. Ceteris paribus facilius permitti potest, vel saltem minor culpa est, si aliquis rem ex iustitia debitam restituat creditori ab usuro, quam si alicui mutuo det vel donet, cum sciat eam ad malum finem usurum esse, sicuti notauit Petrus Nauarrus num. 33. Ratio est: Quia debitor ad soluendum adigitur obligationis necessitate, quæ vim aliquam excusandi habet: Mutuatoris autem, & donatoris officium spontaneum esse solet. Non placet tamen, quod absolute negat Molin. disput. 755. aduersus iustitiam peccare eum, qui depositum apud se gladium restituit domino, volenti occidere iniuste. Cum enim lex depositi depositarium in hoc casu non obliget ad restituendum, censetur materiam homicidij committenti ultro administrare, atque indirecte cooperari.

8 ALTERA liberationis causa: Soluens creditori sui creditoris obligatione liberatur, teste Gloss. Instit. Quibus modis tollitur obligatio, in princ. ver. solutio fiat. Quæ tamen regula in externo foro ferme tunc tantum locum habet, si debitum ex eadem causa proueniat. Exemplum habes: Conduxi domum à Titio, quam is à Caio ante conduxerat: hoc casu pensio à me constituta, est obligata Caio primo locatori, in defectum Titij primi conductoris: quare si soluam Caio, liberatus sum à Titio, iuxta l. vtrum præsentis, ff. de constituta pecunia. Item, si Sempronius à Stichio pecuniam mutuo accepit in meam gratiam, siue vt mihi mutuari possit, cum hoc casu Stichio contra me actio competat, (saltem in defectum Sempronij) si pecunia in rem meam versa fuerit; ideo si Stichio numerem, antequam ei Sempronius numerauit, liberor obligatione, l. si liber homo, ff. de negotiis gestis, innota l. ei qui, C. quod cum eo, qui in aliena potestate est, &c. Vide Barrolium in l. solutum, ff. de pignorat. actione, Syluest. ver. solutio, q. 4. Molin. disp. 743. Similis ratio est, si meus creditor ius debiti generali, vel speciali hypotheca creditori suo obligauit: tunc quia creditoris mei creditor, saltem in defectum illius, à me debitum exigere potest; ideo si soluam, antequam meus creditor ei soluit, liberor, l. nomen, Cod. quæ res pignori obligari possunt.

In foro autem conscientie modus iste soluendi latius se extendere potest. Si enim Titio v. g. ex causa mutui debeam centum aureos; ille autem totidem ex alia causa debeat Caio; possum ego eidem Caio numerare aureos centum, vt cedat, vel vendat mihi ius crediti aduersus Titium debitorem suum: quod ius cum tantidem valeat, quantum ego Titio debeo, videlicet 100. aureos, compensatione vt possum, sicut docet Angelus ver. solutio, §. 13. Med. q. 3. de restitut. causa 5. Lessius c. 16. dub. 5. Petrus Nauar. lib. 4. c. 2. num. 27. Deinde, si creditor liquidum debitum neque via iudicij, neque alia ratione à debitore suo consequi possit, cessante scandalo, occulta compensatione vti potest, tantumdem de bonis eius clanculum accipiendo, quantum debitum valet: itaque etiam ego ipsi ad hoc consequendum cooperari possum, eique soluere id, quod eius debitori debeo: modo interim caueatur, ne idem debitor eiusve hæredes, huius rei ignari, postea iterum soluant, quod ego eius nomine iam solueram. Ita Mol. disp. 743. in fin.

9 TERTIA causa, eaque plenissima liberandi seipso iure à restitutione, siue debiti solutione, est compensatio, id est, debiti & crediti inter se contributio, sicuti definit Modestinus in l. 1. ff. de compensationibus. Ratio est: Quia, vti dicitur in l. 3. ff. eod. *Interest nostra potius non soluere, quam solutum repetere.* Imò compensatio solutionis instar esse censetur, sicuti constat ex l. si debitor, ff. Qui potiores in pignore, vbi dicitur; *Nilil interesse, soluere sine aliquis, an compensauerit, & in l. 76. ff. de verborum significat. Deditse etiam eum intelligendum es-*

*se, qui compensauit.* Porro compensatio præcipue locum habet in rebus, quæ in suo genere functionem recipiunt, vt vnum pro altero solui possit: puta, si vtrumque ex quacunque causa, vel actione liquidò debeantur viginti floreni, aut viginti scaphæ frumenti; vel viginti vini amphoræ eiusdem generis, ac bonitatis, l. si constat, C. de compensationibus. In aliis vero rebus non consistentibus in numero, pondere, vel mensura, tunc solum compensationi locus est, si debita sint eiusdem rationis, & non rei determinatæ, siue in indiuiduo, sed indeterminatæ: Vt si mihi ex causa venditionis debeas tres oues, ego autem vicissim ex simili, vel diuersa causa etiam tibi debeam tres, aut plures oues, possum vt compensatione in tribus. Sin autem debita sint rerum diuersæ rationis; v. g. tu mihi debes centum oues; ego autem tibi debeo 20. florenos: Vel si debita sint rerum eiusdem rationis, sed determinatarum & in indiuiduo; v. g. tu debes mihi Bucephalum; ego vicissim tibi debeo Xanthum: quamuis his calibus compensatio locum non habeat, (quia concessum non est, debitori inuito, vnam speciem pro altera soluere) habet tamen locum retentio rei alteri debitæ, donec is mihi soluat, quod liquidò debet, iuxta l. si non forte, §. si centum, ff. de condict. indebiti, ibi: *agor autem retinobitur, donec debita pecunia soluat.* Vbi Gl. notat: *Si tu mihi aliquid debeas, & res tua sine vitio ad me perueniat, propter debitum retentionem habeo.* Videri potest Abbas in c. bona fides, num. vlt. de deposito. Syl. ver. compensatio, q. 1. Mol. tom. 2. disp. 560. §. habet autem locum.

Quibusdam vero calibus compensatio seu directa & proprie dicta: seu indirecta, quæ dici solet retentio debiti, fieri non potest. Primò: Quod Reipubl. debitum est ratione vectigalis, aut tributi, solui debet, non opposita exceptione alterius à Reipubl. debiti, l. in ea, Cod. de compensation. Secundò: Qui ex furto, rapina, vi illata debitor est, iure compensationis priuatur, l. vlt. iunct. Gl. C. eod. Tertiò: In deposito compensationi locus non est, cit. l. vlt. & c. bona fides, de deposito. Neque in commodato, secundum aliquos, quibus contentit l. vlt. C. de commodato. Sed hæc omnia præcipue ad forum externum spectare videntur.

In conscientie autem foro, si, quod mihi ex quacunque causa liquido debetur, consequi alio modo non possim, tum ius naturæ, ac gentium permittere videtur, vt compensatione, vel saltem retentione alterius cuiusque à me debiti mihi prospicere possim, donec satisfiat: nisi vel scandalum timeatur, vel legitimus Iudex aliud præcipiat, vel denique compensationis beneficio sponte renuntiārim. Ita docet Syluest. ver. compensatio, q. 2. & ver. furtum, q. 13. Nauar. c. 17. num. 112. 115. Lessius lib. 2. cap. 27. dub. 4. num. 16. Sa ver. depositum, num. 4. Rebellus p. 1. lib. 2. qui est de restit. q. 18. Pet. Nauar. lib. 3. c. 1. num. 390. Sin vero nulla necessitate constitutus sim, quia via iudicij, aliòve modo debitum meum recuperare possum, tunc depositum reddere debeo: quando quidem contractus ille maximam fidem postulat, vt Greg. I X. respondit in cit. c. bona fides.

QUARTA, eaque notissima causa liberationis est, si creditor debitum remisit: idque vel expresse, vel tacite; puta si instrumentum debiti lacerauit, l. si chirographum, ff. de probat, vel ante factam solutionem debitori ultro reddidit, censetur id egisse animo condonandi, nisi iudiciis ostendat, per errorem, vel aliam ob causam id factum fuisse, iuxta l. Labeo, ff. de pactis: vbi additur l. seq. non idem esse pignore: quia pignoris restitutio etiam aliam ob causam fieri potest, quam ob debiti liberationem.

Sed quid si apud debitorem reperiatur chirographum, eritne hæc bona præsumptio solutionis factæ? Profecto affirmandum videtur: nisi suspicio esse possit,



chirographum creditori surreptum fuisse: vt quia persona domestica chirographum producit, sibi que redditum affirmat; tunc ei onus probandi incumbit. Quare Bartolus & alij in citat. l. Labeo. Quamobrem monet Gl. in l. postquam, ff. de pactis consultum esse debitori, vt facta solutione debiti, à creditore exigat non tantum chirographi sui restitutionem; sed etiam confessionem factæ solutionis: quia *professio pecunie solutæ maiorem probationem continet, quam si chirographum acceptæ mutuo pecunie redditum fuisset.* l. pecunia, C. de solut. & liberationibus.

Atque hic egimus de causis ex parte creditoris occurrentibus, cur restitutio differri, aut negari possit. De alijs porro causis, quæ ex parte debitoris à restitutione excusare solent, cap. ult. commodius dicam.

## CAP. X.

## Quo tempore, &amp; loco restitutio fieri debeat.

## SUMMARIUM.

- 1 Debitor ex contractu soluere debet tempore, de quo inter partes conuentum est; tamen si creditor tunc non exigat.
- 2 Debitor ex delicto, ob iniustam lesionem, aut rei aliene detentionem, cum primum potest, restituere tenetur.
- 3 Quæ iniuste accepta sunt, sumptibus eius qui accepit ad dominum deferenda sunt, vt is omnino indemnus seruetur.
- 4 Bone fidei possessor satisfacit, si restituat in loco, vbi rem possidet.
- 5 Debitor ex contractu eo loco solui debet, de quo inter partes expresse vel tacite conuentum fuit.
- 6 Si creditor oblatum sibi debitum recipere nolit, consultum est apud Iudicem deponi.

**ASSERTIO I.** Si obligatio restituendi, siue soluendi ex contractu descendat, solutio fieri debet tempore, quo inter partes contrahentes expresse, vel tacite conuentum fuit. Eo transacto, si debitor in mora culpabili existat, iniuriam creditori infert, obligationemque contrahit compensandi damni, quod exinde creditor patitur. Neque ad id necesse est, vt creditor solutionem exigat: quia ipsa dies, siue tempus statutum, intra quod solutio fieri debeat, pro creditore interpellat, l. magnam, C. de contrah. & committ. stipul. Si tamen debitor paratus sit tempore & loco constituto soluere; sed creditor vel absens sit, nullo loco sui procuratore relicto; vel præsens recipere nolit, tunc debitor liber est à præstando ipsi damno postea eueniente, vel pœna conuenta, l. si soluturus, ff. de solut. l. ob signatione, C. eod.

**ASSERTIO II.** Si nullum tempus solutioni debiti ex contractu expresse, aut, tacite constitutum est, tunc debitor non antè in mora culpabili esse censetur, vt de damno teneatur creditori, quam is debitum congruo tempore exegerit. Ita colligitur per sensum contrarium ex cit. l. magnam, & l. traiectione, ff. de action. & obligat. & ex communi docet Mol. to. 2. disp. 564.

**ASSERTIO III.** Si restituendi obligatio proueniat ratione rei, iuste vel iniuste acceptæ, possessæ, destructæ; tum restitutio statim fieri debet, quatenus commodè ac moraliter fieri potest. Ratio est, quia præceptum negatiuum non detinendi rem alienam; item non differendi solutionem debitam, omni tempore obligat. Rectè tamen monet Mol. tr. 2. to. 3. poster. disp. 753. Si quis certum restituendi propositum habeat; sed restitutionem aliquanto tempore (non admodum longo) differat, vel differre cogitet, non esse facile mortalis peccati damnandum, vel sacramentali absolutione priuandum, si ex tali mora nullum omnino damnum cre-

ditori inferatur. Quia licet talis dilatio, vel detentio iniusta sit, iniuria tamen hæc plerumque grauis non censetur, si nullum inde damnum proueniat: quod maxime verum est, si obligatio restituendi ex contractu descendat. Vide etiam Gabr. in 4. d. 15. quæst. 2. art. 3. dub. 6.

**ASSERTIO IV.** Quod restituendum est ratione iniustæ acceptionis, detentionis, id debitor proprijs sumptibus ad eum locum deferre debet, vbi creditor habiturus fuisset, nisi ei res ablata, destructa, vel iniquè detenta esset; deductis tamen expensis, si quas creditor eam seruando, vel deferendo facere debuisset. Ita Caiet. 2. 2. q. 62. a. 5. ad 3. & ver. restit. c. 5. Syl. eod. ver. 4. q. 4. Medina Cod. de restit. q. 2. in quæstio 3. Pet. Nau. lib. 4. cap. 4. n. 2. Mol. to. 3. poster. disp. 752. Less. lib. 2. c. 15. dub. 8. Vasq. de restit. c. 10. dub. 1. Ratio est: Quia restitutio orta ex iniusta damnificatione in integrum fieri debet, ita vt creditor omnino indemnus seruetur.

Excipe: Nisi transferendo in locum domini multo maiores expensas ex proprio facturum sis, quam res restituenda valeat: tum ad id non obligaris, sed potes pauperibus dare; nisi spes sit aliquando fore, vt sine magno sumptu ipsi domino, vel hæredibus eius restitutio fieri possit: hoc enim casu res in tuto interim loco seruari deberet, sicuti notauit S. Th. q. 62. a. 5. ad 3. & videri potest Pet. Nauar. n. 4. Less. n. 50.

**ASSERTIO V.** Si res accepta restituenda sit à bonæ fidei possessore, puta qui eam bona fide emit; satis est eam restituere in loco: vbi possidetur: quod si dominus absens aliò transferri cupiat, suis sumptibus id curare debet: Vel si ob eam causam possessor in domini gratiam aliquid vtiliter expendat, actione negotiorum gestorum repetere poterit. Ita Doctores citati. Ratio verò discriminis inter hanc, & priorem assertionem est: quia si restitutio facienda sit ratione iniustæ acceptionis, integrum damnum, & lucrum cessans compensandum est: Si autem restitutio facienda sit ratione rei acceptæ, bona fide hæcenus possessæ, sola rei possessio transferenda est.

**ASSERTIO VI.** Si debitum ex contractu descendat, solutio eius fieri debet in loco, de quo expresse, vel tacite inter partes conuentum est, sicuti ex communi docet Nau. cit. c. 17. n. 42. Plerumque autem ea videtur esse mens contrahentium, vt solutio fiat in loco domicilij. Sed creditorisne, an debitoris? Prius illud affirmat Rebellus cit. lib. 12. q. 13. c. 2. concl. 3. Posterius Mol. cit. disp. 752. conclus. 2. Ego arbitror, quæstionem hanc simplici responsione definiri non posse; sed spectandam esse tum loci consuetudinem, tum naturam contractus, & varias circumstantias, vt inde, quæ fuerit mens contrahentium, colligi possit, si nihil expresse-  
serunt.

Quod si contractuum naturam spectare velimus; alij sunt, quibus rei dominium non transfertur, vt commodatum depositum: tunc restitutionem fieri conuenit in loco, vbi res tradita fuit. Quod si ex illo loco ablata est, ordinariè transmitti debet ad locum contractus, vel vbi eam dominus habiturus erat, sumptibus eius, qui ablationis causa extitit; considerata tamen etiam conditione contractus, in cuiusnam vtilitatem principaliter institutus fuerit. Si v. g. torquem aureum tibi gratis commodatum aliò transtulisti, tuis sumptibus remittere debes ad locum, vbi tibi traditus est; vel ad locum vbi dominus tempore restitutionis faciendæ habiturus credebatur; cum non oporteat illi officium suum damnosum esse. Sin verò torques, vel equus tibi pro pretio locatus fuit, sufficit restituere in loco contractus: nisi aliter expresse, vel tacite conuentum fuerit, quod restitutio fieri debeat in loco, vbi dominus moraturus est. Multo verò magis, si torques aureus apud te



depositus fuerit; & dominus ex eo loco ad alium, v. g. vbi domicilium habet, transmitti velit, suis sumptibus curare debet. Ita ferme Pet. Nau. & Less. ll. cc. Med. cit. q. 2. in 3. quæsto.

Alij verò contractus sunt, quibus rei traditæ dominium transfertur: & hi vel sunt gratuiti, vt donatio; vel reciproci, vt mutuum, emptio, &c. In gratuitis res danda est in loco, vbi sita erat, cum donatio fieret: & inde sumptibus donatarij transferenda: Eademque ratio est de legato. In reciprocis verò solutio facienda est in loco, vbi res, pro qua solutio fit, v. g. pecunia, vel merx accepta erat. Ratio est: Quia in reciprocis contractibus res vna in alterius locum quasi substituitur, quod tunc perfectè fit, si etiam idem locus acceptionis & restitutionis seruetur, sicuti notarunt Vasq. de restit. c. 9. dub. 2. n. 50. Lessius n. 56. In censu autem reali solutionem pensionis fieri conuenit in loco, vbi res frugifera sita est: In personali autem censu, vbi persona ad pensionem obligata domicilium habet: nisi aliter conuentum sit, vel consuetudo aliud postulet.

His addendum est primò: Si debitor paratus soluere eo loco, quo debet, non reperiatur creditorem, vel alium, qui eius nomine recipiat, ex illo tempore non censetur in mora esse, vt notat Gl. marginal. ad l. oblatione, ff. de solutione. Addendum secundò: Si creditor congruo loco, ac tempore sibi oblatum integrum debitum recipere nolit, consultum est debitori, vt illud obsignatum coram testibus apud Iudicem, vel alium Iudicis auctoritate deponat: talis enim depositio vim habet plenæ liberationis; ita, vt impediatur cursum vsurarum, liberetur à casu periculi fortuiti, soluat pignora, &c. iuxta l. acceptam, C. de vsuris, & cit. l. obsignatione.

## CAP. XI.

## Quo ordine restituendum sit?

## S V M M A R I V M.

- 1 Si debita omnia ob debitoris impotentiam restitui non possint, quæ certa sunt præferenda incertis: Nisi res aliena in specie extet apud iniquum possessorem, ea enim pauperibus restitui debet, si proprio domino non possit.
- 2 Qui accepit facultatem vendendi, non ideo emptori fidem habere potest de pretij solutione.
- 3 Impensa funeris, & Medicorum honoraria ante alia defuncti debita solui debent.
- 4 Creditores hypothecarij præferuntur ijs, qui solam debitoris personam obligatam habent.
- 5 Inter hypothecarios creditores, qui priores hypothecas habent, alijs anteponuntur; exceptis casibus iure expressis.
- 6 Si creditoribus merè personalibus, nullumque iuri prærogatiuum habentibus plenè satisfieri non possit, soluendum est secundum proportionem debitorum; siue ex contractu, siue ex delicto procedant, nulla etiam habita ratione prioritatis, aut posteritatis.
- 7 Si vnus creditorum ante alios, quamuis priuilegiatus, sed nullam hypothecam potius habentes, debitum suum exigat; ei solui potest, antequam bona Iudicii auctoritate occupantur: Idemque dicendum, si vnus creditorum graui inopia prematur.
- 8 Non censetur alienatio, vel solutio facta in fraudem creditorum, si exinde facultates diminute non sint; vel si aliquid comparatum, quod necessarium sit ad conseruationem vite, honoris, status iuste acquisiti.
- 9 Vxor & filij à marito debitis grauato accipere possunt alimenta seu sustentationem necessariam, absque restituenda obligatione: quamuis maritus ob hanc causam familia alenda, noua debita contraxerit.

**Q**uestio hæc solum locum habet, si bona debitoris non omnibus debitis soluendis sufficiant: quoniam tunc ordo seruandus sit? **ASSERTIO I.** Debita certa, id est, quæ propriis creditoribus restitui possunt, præferenda sunt debitis incertis, id est, quæ propriis dominis, aut creditoribus restitui non possunt; sed eorum loco Ecclesiæ, vel pauperibus erogari debent. Ita docet Caiet. ver. restit. c. 8. S. Anton. p. 2. t. 2. c. 7. Med. q. 2. de restit. quæsto 5. Nau. c. 17. n. 47. Pet. Nau. lib. 4. c. fin. Vasq. de restit. c. 11. n. 9. Less. lib. 2. c. 15. dub. 1. & alij communiter: quamuis contrarium senserit Mol. tr. 2. t. 3. poster. disp. vlt. Ratio assertionis est: Quia dominis ac creditoribus certis ex iustitia commutatiua propriè dictum ius competit ad debita sua exigenda; non item pauperibus, vel Ecclesiæ ad postulanda debita incerta: hanc enim ipsis faciendam restitutionem sola lex Ecclesiastica præcipit, quæ iuri illi & obligationi naturali nullum præiudicium adferre censetur.

Excipie cum DD. citatis: Nisi res aliena in specie extet apud iniquum possessorem, tunc si verò domino restitui non possit, pauperibus potius, vel Ecclesiæ tribuenda erit, quam vt ex tali re alijs certis debitis satisfiat. Ratio est: Quia debitor creditoribus suis certis obligatus est tantum ex propriis bonis soluere; non item ex alienis. Si autem aliquis rem certam ab aliquo iniuste raptam detinet, eius dominus non efficitur: quamuis verus dominus ignoretur. Ergo, &c.

**ASSERTIO II.** Quæ res in specie extant, certis dominis debita, puta ex commodato, deposito, locato, furto, &c. Item, si res emptæ apud debitorem in specie extet, nondum soluto pretio, neque de solutione fide habita, iuxta §. venditæ, Instit. de rer. diuis. Et vniuersim, quarum rerum dominium debitori acquisitum non est, ex certis ac proprijs dominis integrè restituendæ sunt: cum reliqui creditores nullum in iis ius habeant, vt sup. à dictum.

Adde, tametsi Minister, vel Procurator à domino acceperit facultatē vendendi, non tamen eo ipso fidem emptori habere possit de pretij solutione: quod clarè iudicatur de Procuratore fisci in l. si Procurator, ff. de iure fisci. Vbi Gl. final. & Bartolus in l. à Diuo Pio, §. sed si emptor, ff. de re iudicata. Abb. c. cum olim, i. num. 5. ff. de offic. Iud. de legati, Syluest. ver. emptio, num. 2. idem docent de curatore Minoris, vel Ecclesiæ: quare tametsi hi emptoris fidē de pretij solutione secuti sint, tamen rei venditæ dominium emptori acquisitum non est: consequenter Ecclesiæ, Fiscus, Minor ius prælationis habebunt, vt vel res in specie extans ipsis restituenda sit, vel pretium ante alios omnes creditores soluendum, sicuti notauit Less. cit. c. 15. dub. 2. Mol. to. 2. dis. 536. §. hac eadem ratione.

Quod verò docet Syl. ver. restit. c. 6. q. 5. Caiet. eod. ver. c. 8. Nau. c. 17. num. 49. Less. l. 2. c. 15. dub. 2. n. 11. Et si dominium rei venditæ, propter fidē solutionis habitam, in emptorem transierit; nihilominus pro pretio nondum soluto obligatam manere; vt etiam hoc casu venditor alijs creditoribus præferendus sit: id fieri non potest nisi per tacitā hypothecam. quæ cum ex nullo iure ostendi possit, frustra asseritur: quare contraria sententia est communis apud Pet. Nauar. lib. 4. c. finali, n. 11. Mol. l. c.

**ASSERTIO III.** Ex bonis ipsius debitoris, si defunctus sit, in primis soluenda sunt impensa funeris, l. penult. ff. de religiosis & sumptibus funerum: & quæ ad confectiōem inuentarij, apertionem testamenti: item Medicorum honoraria, Pharmacopoliij pretia, sicuti colligunt DD. ex l. vlt. §. in computatione, C. de iure deliberandi. Cuius rei ratio est, partim quod eiusmodi debita, ad eò necessaria, non censeantur contracta in fraudem antecedentium creditorum: partim quod alioquin nemo reperiretur, qui iudi-



gentibus talia subministraret, si de solutione certus non esset. Quamobrem quibusdam locis etiam operatorum ad necessarium vsum conductorum mercedes reliquis omnibus debitis, secundum æquitatis rationem, præferri solent. Vide Vasq. de restit. c. 11. dub. 3. n. 83.

4. **ASSERTIO IV.** Creditores hypothecarij, id est, qui non solum personam debitoris, sed etiam rem eius vnam, vel plures obligatas habent, in his præferuntur omnibus creditoribus chirographariis, id est, qui solum personam personali actione sibi obligatam tenent: licet talis obligatio chirographo proprio, aut instrumento publico, vel testibus, vel debitoris confessione, aut alia quauis ratione probari possit. Ita habetur in l. eos, C. qui potiores in pignore, & ex cõmuni tradit Nauar. c. 17. n. 51. Angel. ver. restit. 2. §. 16. Quia, vt Pomponius ait reg. 25. ff. *Plus cautionis in re est, quam in persona.*

5. **ASSERTIO V.** Inter ipsos hypothecarios creditores, in eodem pignore concurrentes, reg. iuris 54. in 6. sumpta ex l. 2. ff. qui potiores in pignore, locum habet: *Qui prior tempore, potior iure.* Ratio est: Quia pactio & obligatio posterior non potest tollere ius alteri antè in re quæsitum. Et nihil refert, sitne pignus siue hypotheca tradita, an solum obligata; item sitne expressa, an tacita; generalis, an specialis, sicuti constat ex l. 2. ff. Qui potiores in pignore.

Neque his obstat l. 2. C. de pignoribus, & hypothecis, vbi dicitur: Quod primus creditor, qui præter hypothecam generalem, etiam speciali sibi prouidit, si ex hac speciali totum debitum consequi non possit, alia bona, creditori secundo obligata, petere non debeat. Huius enim ratio est: Quia dum generali hypothecæ specialem adiunxit, tacite pactus esse videtur, se nolle ad generalem venire, nisi in defectum specialis: quæ ratio cessat in eo, qui generali tantum hypotheca nititur, sicuti rectè ex communi sententia explicant Less. cap. 15. dub. 4. Molin. disput. 536. §. lege secunda, contra Syl. ver. restitutio, 6. q. 5. Couar. 1. resol. cap. 18.

Sunt tamen certi casus, in quibus singulari iuris privilegio creditor hypothecarius posterior antiquiori præfertur: I. Qui pecuniam credidit ad emptionem prædiorum, ædificationem ædium, atque ius pignoris sibi in ijs pactus est, præfertur creditoribus, habentibus anteriorem generalem hypothecam in bonis debitoris, l. 1. ff. In quibus causis pignus, & c. l. licet. C. Qui potiores in pignore. Ratio constitutionis est, quia talis creditor causam pignoris præbuit.

II. Qui ad conseruationem ædium alteri priori creditori specialis hypothecæ nomine obligatarum pecuniarum credidit, illi præfertur, l. interdum, ff. Qui potiores in pignore.

III. Qui pecuniam credidit in conseruationem aliarum rerum, (præter ædes) puta nauis, mercium, & c. atque ius pignoris sibi in ijs constituit, is aliis hypothecariis creditoribus, quamuis priores sint, præfertur, iuxta l. 6. ff. eod. vbi ratio huius, & præcedentis exceptionis affertur, *Quia huius posterioris creditoris pecunia saluam fecit totius pignoris causam*: quandoquidem per eam pignus seruatum fuit. Vide Couar. 1. resol. c. 7. n. 3. Andr. Gaill. lib. 2. obseru. 12. & 25. Mol. to. 2. disp. 438. & disp. 536. §. quando aliquis. Ioachim. Mynfingerunt centur. 1. obseruat. 60.

IV. Bona mariti tacite obligata sunt vxori, eiusque liberis pro dote; adeò, vt aliis creditoribus, etiam prioribus, habentibus tacitam non similiter privilegiatam hypothecam præferantur, l. assiduis C. Qui potiores in pignore, §. fuerat, Instit. de action. Non item habentibus hypothecam priorem expressam, sicuti ex communiore docet Accursius in cit. l. assiduis, Couar. cit. c. 7. n.

1. Andr. Gaill. cit. obseruat. 25. n. 10. Syl. ver. dos, q. 12. Per. Nau. lib. 4. c. fin. n. 52. Mol. cit. disp. 438. contra Ioach. Mynfingerunt cent. 4. obseruat. 13. Ratio autem est: Quia lex non intendit mulieri privilegium dare cum præiudicio ac damno eorum, quibus ex propria conuentione ius acquisitum est; sed eorum tantum, quibus ius hypothecæ legum privilegiis, absque propria eorum pactioe concessum. Vide de eadem questione Abb. in c. ex literis, n. 8. de pignor.

V. Si ex pecunia pupilli res aliqua comparata fuit, in ea tacitam hypothecam acquirit, & iuris prælationem, l. idemque ff. Qui potiores in pignore. Quin & utilis eidem vindictio competit, si tutor proprio nomine ex pecunia pupilli rem aliquam cõparauit, l. 2. ff. quando ex facto tutoris, & c. l. 3. ff. de rebus eorum; qui sub tutela sunt. Quod idem etiam de milite statutum reperitur, si alius suo nomine ex pecunia illius quippiam emit, l. si vt proponis, C. de rei vindict. vbi Gl. notat, idem quoque locum habere, si ex pecunia Ecclesiæ, ab eius administratore res aliqua comparata fuit: Quia Ecclesia in istis æquiparatur Minori, sicuti notauit Abb. in cit. c. ex literis, in fine, arg. c. 1. de integr. restit. vbi dicitur: Quod *Ecclesia iure minoris debet semper illa seruari.*

VI. Si priuatus quispiam generalem accepit hypothecam in bonis alicuius, acquisitis, & acquirendis; & postea similiter fiscus: tunc licet priuatus fisco præferatur in bonis, quæ ante posteriorem fisci obligationem acquisita sunt, iuxta l. vlt. ff. Qui potiores in pignore; contra tamen fiscus præfertur in ijs bonis, quæ debitor post secundam illam obligationem acquisiuit, l. si qui mihi, ff. de iure fisci.

VII. Inter creditores priuatos, quorum vnus priuata scriptura, alter publicis actis, vel instrumento de pignore cauit; præfertur ille, qui publicam hypothecam habet, hoc est, in iudicio coram Iudice datam, vel coram Notario & Testibus factam, l. scripturas, C. qui potiores in pignore. Idque statutum est ob fraudis suspicionem, quæ in priuata scriptura facile interuenire potest. Quare, si omnis suspicio fraudis absit; quia prioritas hypothecæ per priuatam scripturam, aut si sine scriptura constituta fuit, per Testes legitimè probari possit, potior censenda est, quàm posterior hypotheca, quamuis publica: quia in litibus exercendis non minorem fidem merentur depositiones testium, quàm publicum instrumentum, l. in exercendis, C. de fide instrumentorum. Videri potest Gl. in c. 2. de fide instrumentorum, Andr. Gaill. lib. 2. obseruat. 25. n. 10.

**ASSERTIO VI.** Post debita realia & hypotheca-  
ria, si bona debitoris suppetant, soluenda sunt debita merè personalia, siue ex contractu quocunque, (intel-  
lige onerosum) siue ex delicto descendant. Ita Angelus  
ver. restit. 2. §. 16. & 18. Syl. ver. restit. 6. q. 5. in fine,  
Pet. Nauar. cit. c. vlt. n. 40. Vasq. de restit. c. 11. dub. 2.  
Less. cit. c. 15. num. 16. Quia neque iura exprimunt, ne-  
que ratio aliqua conuincit, inter creditores ex contra-  
ctu, aut delicto prærogatiuæ locum esse; cum vtrius-  
que generis debita æqualiter ex iustitia sint: licet aliter  
senserit Caiet. cit. c. 8. Nau. c. 17. n. 53. arbitantes, prius  
esse soluenda debita ex contractu: aliter verò S. Tho.  
opuscul. 37. c. 18. S. Anton. p. 2. tit. 2. c. 7. §. 1. & 2. Medina  
cit. q. 2. dub. 5. prius faciendam esse solutionem debito-  
rum iniuste contractuum.

Sunt tamen aliqui creditores, qui privilegiati dicuntur, quia ex iuris privilegio totum debitum suum postulare possunt, antequam alij creditores chirographarij non privilegiati admittantur. I. Respublica creditrix omnibus chirographariis creditoribus præfertur, ait Paulus 1C. in l. bonis venditis, ff. de priuil. credito-  
rum.

II. Qui pecuniam deposuit apud depositarios &



Republica constitutos, (ita ut depositum transeat in contractum mutui, posteaquam pecunia consumpta est) aliis creditoribus etiam privilegiatis praefertur; nisi usuras receperit, l. si ventri, §. in bonis, ff. de priuil. credit. & l. si hominem, & §. quotiens, ff. de positi. Quod aliqui perinde etiam de aliis rebus depositis, & absumptis accipiunt.

III. Qui ad nauem extruendam, instruendam, emendam, pecuniam creditit, privilegium praelationis habet, l. Qui in nauem, & l. quod quis naus, ff. de priuil. credit. Idque aliqui vniuersim intelligunt, si quis ad quamcunque aliam rem comparandam, reficiendam, &c. creditit. Alij autem existimant esse istud speciale privilegium, fauore navigationis maritimae, Reipubl. valde commodae, concessum; ideoque ad alia non extendendum.

ASSERTIO VII. Si, postquam privilegiatis creditoribus integre satisfactum fuit, adhuc bona aliqua debitoris supersint; reliquis personalibus creditoribus solutio facienda est pro rata, siue secundum proportionem debitorum, nulla habita ratione, vtrum tempore priores, an posteriores sint. Ita sumitur ex l. privilegia, ff. de priuil. creditorum, l. pro debitis, C. de bonis auctorit. Iudicis possidendis, vbi videri potest Baldus, alijque Legistae, & ex l. i. §. ex contrario ff. de separationibus, vbi dicitur, quod licet alicui adijciendo sibi creditore, creditoris sui facere deteriore conditione, & docet S. Anton. p. 2. tit. 2. c. 7. §. 3. Syl. ver. restitutio, 6. q. 5. Nau. c. 17. n. 51. Molin. to. 2. disp. 336. §. quando creditores, Less. c. 15. dub. 6. n. 44. contra Gabr. in 4. d. 15. q. 2. dub. ult. Maiorem ibid. q. ult. Medinam q. 2. dub. 5. Sa ver. restitutio, n. 61. Tolet. lib. 2. c. 25. Syl. in n. tenent. Quamobrem si debitor, qui omnibus soluendis debitis imparem se se nouit, vni creditorum praeter aliis non privilegiato, neque exigenti, neque valde indigenti, ideoque nulla sua urgente necessitate integrum debitum soluat, in fraudem aliorum agere, & iniuriam inferre censetur: nihilominus creditor iure accipere potest, quod sibi offertur: nec restituere tenetur, nisi per fraudem affectus sit, simulando v.g. grauem inopiam; vel si ab inuito extorserit, cum eo loco res essent, ut bonis cedere vellent, sicuti colligitur ex cit. l. pupillus.

Ceterum plures casus sunt, in quibus dissolutiones debitorum a iure non privilegiatorum, etiam de nouo contractuum, censeri haud possunt in fraudem aliorum creditorum factae. Primus. Si vnus creditorum debitum suum exigit, alijs quamuis magis privilegiati sint, tacentibus, solutio illi fieri potest, sed antequam bona debitoris iudicis auctoritate occupantur, iuxta l. quiautem, §. sciendum, ff. quae in fraudem creditorum. Etenim creditor ille vigilando, exigendoque meliorem suam conditionem fecit: nam ius civile vigilantibus scriptum est; ideoque non reuocatur ab eo, quod ante alios creditores accepit, sicuti habetur in l. pupillus, ff. eod. tit. Dummodo tamen creditores alij potiore hypothecam non habeant, sicuti notat Gl. in l. sciimus, §. etsi praefatam, C. de iure deliberandi. Videri potest Nau. c. 17. n. 53. & lib. 3. consil. 4. de solut. edit. 2. Syl. ver. restitutio, 6. quaest. 8. Mol. cit. disp. 336. prope finem.

Alter casus est valde probabilis. Si vnus creditorum personam longe alius pauperior, & in graui necessitate constitutus sit, potest huic totum debitum praeter aliis solui, charitatis lege id permittente, priusquam bona iudicis auctoritate occupentur. Ita S. Thom. opus. 73. c. 8. Syl. ver. restitutio, 6. q. 8. Medina q. 2. dub. 5. dicto 5. Sa ver. restitutio, n. 60. contra Lessium dub. 7. n. 46.

Tertius casus. Si debitis granatus aliqua expendat ad comparationem, aut conseruationem eorum, quae necessaria ipsi sunt ad vitam, honorem, statum iuste ac-

quisitum, nullam iniuriam creditoribus infert. Sicuti enim talia sibi necessaria, antequam bonis cedat, retinere potest, interim dilata restitutione, uti dicam cap. seq. Ita etiam, si non habeat, ex bonis suis comparare non prohibetur, v.g. vestes, pharmaca, cibos ad vxoris & liberorum sustentationem; equos item & famulos ad status conseruationem necessarios. qua de re Vasq. de restit. cap. 11. dub. 3. Nauar. cap. 17. num. 270. Molin. tom. 2. disp. 330.

Quartus casus. Non censetur aliquid alienatum vel solum in fraudem creditorum, si exinde facultates debitoris imminutae non sunt. Exemplum habes primo: Si aere alieno grauatus pro aedibus emptis, & adhuc in eius dominio existentibus iustum pretium soluat, nullum aliis creditoribus damnum infert. Secundo: Si famuli, vel operarij, quibus debita merces soluitur, tantundem commodi in bonis debitoris afferant, sicuti docet Angelus ver. restitutio, 1. §. 21. Nau. c. 17. n. 270. Verum, etiam si famuli, qui bona fide dominis operas suas condixerunt ac praestiterunt, animaduertant, illos ex tanto famulatu impotentes reddi ad satisfaciendum prioribus creditoribus personalibus; debitam tamen sibi mercedem petere, & datam recipere non prohibentur, sicuti ex supra dictis constat, & docet Adrianus in 4. de restit. vbi de usuris, q. ult. Medina de rebus per usuram acquisitis, q. 4. §. vnde forte.

Sed nunquid tales, postquam intellexerunt dominos tantum famulatum sine creditorum suorum damno alere non posse, discedere coguntur? Ita affirmant Adrian. Angelus, Nau. lib. 6. q. 1. a. 3. circa medium. Sed oppositum non improbabiler docuit Molina to. 2. disp. 330. §. iuxta haec. Nam tales famuli neque contra iustitiam peccant, si a dominis rogati ut seruitium praestent, vel in eo perseuerent; mercedem propterea accipiant: contra charitatem, si ita res comparata sit, ut licet ipsi famulatum non praestent, alij tamen non defuturi sint, qui operam suam conduci patiantur.

Ex dictis resoluitur etiam quaestio. Vtrum vxor & liberi, quae a grauato debitis marito; parente acceperunt, restituere debeant tanquam in fraudem creditorum alienata? Respondeo & dico I. Si liberi sumptus sibi non debitos a patre accipiant; puta quia aliunde sustentationem habent, v.g. ex bonis maternis; aut si superfluos sumptus, donationesue capiant, restituere debent creditoribus, si intra tempus legitimum exigant. Eademque ratio est de gratuitis donationibus vxori factis. Vide quae dicam tr. 4. c. 12. q. 2.

Dico II. Si liberi bonis propriis carent, non tenentur restituere sumptus, quos pater ipsis ad studia literarum, vel aliam honestam sustentationem necessarios fecit. Eademque ratio est de sumptibus factis ad vxorem alendam. Ratio est: Quia pater familias ex iustitia obligatur est liberos & vxorem alere: ergo hoc suum debitum accipere possunt ex eius bonis, nullo reali vinculo obstrictis. Neque refert, tamen si pater familias noua debita contrahat, v.g. mutuo pecunias accipiat ad vxorem & liberos alendos, sicuti bene docet Sanchez lib. 9. de matrimo. disp. 4. num. 29. Quia inopia patris familias non liberat eum simpliciter obligatione praestandi alimenta vxori ac liberis; sed solum obligationem eius suspendit pro tempore ac statu durantis impotentiae, ut leg. cap. dicam. Quare, quemadmodum si debitor soluendi impotens, mutuo pecunias accipiat, ut antiquiori creditori satisfaciatur; creditor iste nullam obligationem contrahit ob pecuniam sibi solutam, sicuti constat ex l. cum qui, C. de action. & obligat. quandoquidem ex solutione eius, quod sibi iure debitum erat, locupletior factus non est; ideoque pecunia tanquam in rem ipsius versa condici haud potest: Ita etiam se res habet in praestatione alimentorum, quae vxori ac liberis debita sunt: licet contrarium sentierit



Henric. de Gandano quodlib. 4. q. 27. & alij apud Sanchez. n. 28.

Huic doctrinae consentiens est, quod docet Nau. c. 17. n. 268. Vsq. de restit. cap. 11. dub. 3. Molin. cit. disp. 330. §. de vxore eius, contra Syl. ver. vsura, 8. q. 2. Vxorem non peccare, si ex propriis, vel consanguineorum bonis se alere possit; viuat tamen ex bonis mariti vsurarij, quem scit soluendo sufficientem non esse: quia non minus maritus obligatur ad vxorem alendam, quam ad vsuras restituendas. Si tamen vxor ea in re fraude vtatur, pecunias quas maritus creditoribus solui iussit, ad suam, & familiae sustentationem conuertens, tunc tenebitur in defectum mariti: quando causa extitit, vt creditores debitum suum non consequeretur: Excepto si familia grauius indigeat: huic enim necessitati maritus potius succurrere tenetur, quam creditoribus alijs: quare vxor intercipiendo pecunias nondum creditoribus acquisitas, iure suo vtitur, ac fraudem committere non censetur.

## CAP. XII.

## De restituendi impotentia.

## SUMMARIUM.

- 1 Debitor restituere non cogitur cum grauiore damno sibi, vel alteri inferendo, quam estimari possit commodum restitutionis.
- 2 In pari causa potior est conditio creditoris, quam debitoris; excepta necessitate extrema, in qua melior est conditio possidentis.
- 3 Non tenetur aliquis restitutionem facere cum detrimento fame, aut status iniuste acquisiti; etiamsi debita sint ex delicto, praesertim incerta.
- 4 Qui pauperibus restituere tenetur, potest sibi ipsi applicare, si verè pauper est.
- 5 Circa restitutionem bonorum incertorum ex delicto cum summo Pontifice compositio fieri potest.
- 6 Qui bonis suis cessit, non ideo liber est obligatione restituendi, sed duo commoda habet: I. Vt propter debita in carcere detineri non possit. II. Vt si postea aliquid acquisiuit, non amplius restituere teneatur, quam commodè possit.
- 7 Cessio bonorum locum non habet, si debita ex delicto descendunt.
- 8 Aere alieno grauat, si mendo in seculo debita se soluturum existimet, non potest crednoribus iniuste Religionem ingredi; quamuis eam vouerit.
- 9 Si debitis obstrictus contra creditorum voluntatem Religionem professus est, adhuc obligatus manet; adeo, vt interdum exgredi teneatur; sicut & filius, qui patrem graui inopia pressum, cum innare debuisset, ingrediendo Religionem deseruit.
- 10 Debitor non liberatur obligatione restituendi, quia minus lucrum ipsi cessabit, quam commodum creditori ex restitutione obuenit.
- 11 Qui ex furto, vsuris, &c. debitor est, si ei, cui restituendum esset, tantundem donec, immemor sui debiti, non videtur obligatione liberari.
- 12 Si debitor ex delicto, v.g. furroem restituendam committat Confessario; is verò defraudet, aut fugiat, non liberatur primus debitor.

**D**icendum est. Si debitor vel simpliciter non habeat quod restituat; vel restituere non possit, nisi cum notabiliter grauiore dano sibi, vel suis, vel Reipubl. inferendo, quam estimari debeat commodum ex restitutione creditoris obuentum: tunc negari potest restitutio, vel potius differri, quoad difficultas sine impotentia cesset. Ita ex communi docent Henricus quodlib. 6 q. 24. Gabr. in 4. d. 15. q. 2. art. 2. Syl. ver. restit. 5. q. 3. Nau. c. 17. n. 57. & seqq. Pet. Nau. lib. 4. c. 4. num. 40. Mol. tract. 2. tom. 3. poster. disp. 754. Barthol. Medina in instruct. confessar. lib. 1. cap. 14. §. 34. cap. 7. de restit. Sumitur ex c. si res, 14. q. 6. Pro cuius assertionis pleniori intellectu, aduerte cum

Caier. in sum. ver. restitutio, c. 6. Soto lib. 4. de iust. q. 7. art. 4. Nau. n. 58. Pet. Nau. lib. 4. c. 4. n. 41. Less. c. 16. n. 22. Non ideo solum liberari debitorem à restitutione faciendâ, quod magnam quantitatem debeat, ex cuius solutione ad paupertatem redigendus sit. Sine enim multum, siue parum debeatur, restitui oportet, si nihil aliud excuset: Verum, si restituenti aliud rei propriae damnum grauioris estimationis euenturum sit, tunc in conscientiae foro restituerenon tenetur, donec periculum cesset. Exempla sunt: Primò, Si creditor multum distet, vt plures expensae faciendae sint in re debita ipsi transmittenda, quam debitum valeat. Secundò, Si debitor soluere non possit, nisi domum v.g. vel praedium vendat multo minoris, ideoque longè maiori suo detrimento, quam debitum valeat; tali casu solutio differri potest, vt bene docet Nau. l. c. P. Nau. lib. 2. c. 4. n. 406.

Deinde necessitas non solum extrema, quando, si debitor restituat, fame, v. g. periturus est: sed etiam grauis, quando si restituat, vitam difficulter sustinebit, vel statu suo iuste, & non per rapinas, vsuras, &c. acquisito excidet, facultatem praebet saltem differendi restitutionem, aut paulatim & per partes restituendi. Quod etiam in externo foro obseruari solet circa illustres, aut magnae auctoritatis personas. Ita docent Scotus in 4. d. 15. q. 2. a. 4. S. Anton. p. 2. tit. 2. c. 8. Syl. ver. restitutio, 5. q. 1. & 3. Nau. c. 17. num. 62 in fine, Armilla ver. restitutio, §. 28. P. Nau. lib. 4. c. 4. num. 45. Lessius c. 16. dub. 1. num. 14. licet contrarium senserit Richard. in 4. d. 15. a. 5. q. 4. Medina q. 5. de rebus restituendis. Communis autem doctrina duabus regulis nititur, quarum vnâ supra tradidi: Quod nemo tenetur restituere cum suo notabiliter maiore detrimento, quam sit creditoris commodum. Altera regula est ex Scoto in 4. d. 15. q. 2. a. 4. Gabr. q. 2. a. 2. S. Anton. l. c. Pet. Nau. lib. 4. c. 4. nu. 31. Quotiescumq; dominus sine creditor rationabiliter contentus esse debet, vt restitutio differatur, potest etiam differri, licet ille inuitus sit, argum. c. nequis, 22. q. 2. Cum ergo creditor debitori, constituto in graui necessitate, ex lege charitatis subuenire teneatur; sequitur, quod contentus esse debeat, seu rationabiliter inuitus esse non possit, si debitor ad grauem suam necessitatem subleuandam, restitutionem differat.

Limita nisi creditor in simili graui necessitate constitutus sit, tum restitutio ipsi faciendâ est: quia in pari causa potior est conditio creditoris, quam debitoris, sicuti ex communi tradit Maior in 4. d. 15. q. 28. Nauar. c. 17. num. 59. Pet. Nau. lib. 4. c. 4. num. 53. Multoque magis melior esse debet conditio innocentis, quam nocentis, si ponamus debira ex delicto contracta esse. Excipitur tamen semper necessitas extrema, quippe in qua melior est possidentis seu manu tenentis conditio: licet aliter sensisse videatur Scotus in 4. d. 15. q. 2. a. 4. in resp. ad argum. Gabr. ibid. q. 2. a. 2.

Porrò nihil refert ad excusationem ob impotentiam etsi debita ex delicto, v.g. furtis, rapinis contracta sint; modò status, dignitas, officium, aliudve bonum, cuius iacturam passurus est debitor, iuste ipsi acquisitum fuerit. Exempla sunt: Si dux belli iniquas rapinas possideat, quas si propriis dominis restituat, militia excidere debet, non sine Christianae Reipubl. detrimento, cui utilis est; aut non sine graui iactura proprii status, ac dignitatis, quam militari industria sibi comparauit; vel denique non sine graui familiae dedecore, vxoris ac liberorum querelis, scandalo. Item si fur res furtiuas restituendo se infamaturus sit, in carcerem coniiciendus, puniendus. Qua de re extat regula apud S. Anton. l. c. Caier. cit. c. 6. & 2. q. 62. a. 3. Nap. c. 18. nu. 47. Barthol. Medina cit. lib. 1. c. 14. §. 34. cap. 7. de restit. P. Nau. l. 2. c. 4. n. 403. Cordubâ l. 1. quaest. q. 38. in 2. & 3.



opinioe. *Bonum inferioris ordinis restituendum non est cum detrimento boni superioris in suo genere eque grauis.*

Requitur tamen, vt dixi, statum iuste acquisitum esse. Quare alia ratio est de mercatore v.g. qui ex iniustis lucris laute viuendo statum honoratum sibi comparauit: censetur enim iniuste, & ex alieno. comparasse, sicuti notauit Scotus q. 2. a. 2. Caiet. ver. restitutio, cap. 6. Nau. c. 17. num. 58. Pet. Nau. lib. 4. c. 4. num. 44. Si tamen talis mercator multis debitis grauatus paulatim per partes restituere velit, in commodum etiam ipsorum creditorum, vt interim bona sua augendo pluribus satisfacere possit, damnari haud debet, sicuti notauit etiam Adrianus in 4. vbi de restit. dub. 6.

Porro id recte admonet Mol. cit. disp. 754. num. 3. Si ex solutionis debite dilatione, quamuis iusta, damnum aliquod creditori, vel lucrum cessans eueniat, ipsi omni iure compensandum fore. Quia iniqua esset conditio, si debitor solutionem debiti in suum commodum differre vellet, non suscipiendo in se onus refarciendi iacturam, quæ ex tali solutione creditori eueniet: neq; creditor aliter in dilationem debiti consentire cogitur.

His addendum I. Quod attinet ad debita ex delicto, quæ incerta sunt, debitores facilius propter impotentiam excusari possunt à restitutione pauperibus facienda: eo quod obligatio hæc, secundum probabilem sententiam, ex iure tantum Ecclesiastico proueniat, quod magna cum seueritate non obligat. Quare, quod supra vniuersim dixi, non esse debitorem cogendum ad restitutionem statim, atque integre faciendam, cum detrimento status sui, id maxime locum habet in restitutione bonorum incertorum pauperibus facienda. Quin valde probabiliter docet Petr. Nau. lib. 4. c. 4. num. 50. In hoc casu obligationem restituendi non differri tantum, sed omnino sopiri; adeo, vt tamen si accidat debitorem postea ad pinguiorem fortunam venire, nihil tamen pauperibus restituere teneatur. Idque probatur: Quia debitor, vti ponimus, spectata conditione & qualitate status sui, verè pauper est; aut certè, si totum debitum restituat, pauper futurus est: quod autem debitor bonorum ex delicto pauperibus restituendorum ea sibi ipsi applicare, & pleno dominij iure acquirere possit, si verè pauper est, docent multi Doctores, Scotus in 4. distinct. 15. quæst. 2. a. 2. 4. Gabr. ibid. quæst. 1. a. 2. Maior quæst. 8. conclus. 3. Medin. Cod. de restitut. qu. 3. causa 10. §. esto igitur, Nauar. de re dit. Ecclesiast. quæst. 3. monito 25. & in manuali cap. 17. num. 93. Pet. Nau. lib. 4. cap. 2. num. 53. Molin. tract. 2. tom. 3. poster. disput. 747. num. 1. Cur enim ipse debitor, qui bona incerta veluti quasdam eleemosynas distribuere debet, si & ipse pauper sit, deterioris conditionis sit, quam alij pauperes? sicuti argumentatur etiam S. Thom. 2. 2. q. 32. a. 9. & ibidem Caiet. §. ad hoc dicitur, loquentes de eo, qui distributor eleemosynarum inter pauperes constitutus, quod etiam se ipsum connumerare possit, si verè talis existat.

4 Addendum II. Circa bona incerta ex delicto prouenientia, cum summo Pontifice compositionem fieri posse, vt ista tanquam supremus & vniuersalis iurium & bonorum Ecclesiasticorum curator, ac dispensator, impetrata aliqua parte restitutionis in pias causas facienda, reliquum remittat & condonet. Qua de re Medin. quæst. 3. causa 11. Nauar. cap. 17. man. num. 93. Sa. ver. restitutio, num. 36. Molin. disput. 748. Less. cap. 16. dub. 11. Cuiusmodi etiam compositionem beneficiati petere possunt, cum multum grauatur obligatione restituendi ob canonicas preces longo tempore intermissas. Piè enim ac benignè tale beneficium summus Pontifex largitur, tum ad Ecclesiæ bonum, tum ad salutem restituentium; ne tanto onere pressi vel nihil restituant, vel omnino desperent. Id nota cum Molin. loco cit.

num. 7. Maiore in 4. distinct. 15. quæst. 28. prope finem. De hac compositione ita ratiocinandum esse, sicut de commutatione legatorum, quam facere in causis pijs ad Papam etiam pertinet. Non solet autem eiusmodi commutationem vel compositionem facere cum præiudicio personæ particularis: quamobrem, si appareat postea ad quem, vel quos bona restituenda particulatim pertineant, ipsis restituenda erunt, modo extent, vel possessor ex ijs locupletior factus fuerit.

Restant aliquæ **QVÆSTIONES: PRIMA.** Vtrum cessio bonorum liberet obligatione restituendi? Respondet. Debitor, qui debitis soluendis impar, bonis cedit, id est, creditoribus bona sua relinquit inter se, secundum debitorum qualitatem, ac proportionem diuidenda, non ideo reliquo debito liberatur: quin potius tam in foro externo, quam interno compellipotest ad laborandum & acquirendum vnde soluat, quantum conditio seu status personæ permittit; sicuti constat ex l. 4. ff. de cessione bonorum: & de foro conscientie ex communi restantur Couarru. 2. resolutionum, cap. 1. num. 6. Molin. tract. 2. tom. 3. poster. disput. 758. §. superest, Petr. Nauar. lib. 4. cap. 4. num. 62. Sed duo solum beneficia ex bonorum cessione civili iure consequitur: Primum: Licet alioquin debitor ex contractu, vel quasi contractu, post latam contra ipsum sententiam, & soluendi moram, postulante creditore, in carcerem conijci, & tamdiu detineri possit, donec satisfaciatur, nisi sufficientem cautionem soluendo præstare possit: attamen per bonorum voluntariam cessionem id beneficij consequitur, vt in carcerem mitti non possit, vel missus ex eo liberari debeat, sicuti hæc omnia habentur in l. 1. Cod. Qui bonis cedere possunt, & videri potest Couarru. 2. resolutionum, cap. 1. Molin. tom. 2. disp. 571. Andr. Gaill. lib. 1. obseruat. 26. vbi ait; Ordinariè in causa pecuniaria, seu pro debito civili neminem capi vel incarcerari debere; modò cautionem exhibere possit, & nisi de fuga suspectus sit, vel nisi fisci debitor existat. Vide l. ob æs, C. de obligat. l. nemo, C. de exactor. tributorum, lib. 10.

Alterum beneficium est: Vt debitor, si post bonorum cessionem aliquid acquisierit, non amplius, quam in quantum facere potest, conueniatur, seruatis ei alimentis necessarijs, secundum statum & qualitatem personæ, sicuti constat ex l. 4. & 6. ff. de cessione bonorum. Quamuis autem in conscientie foro ære alieno grauatus, etiam ante cessionem bonorum, vel cum bonis suis cedit, seruare possit ea, quæ ad sustentationem necessaria sunt, spectata conditione status sui iuste acquisiti, sicuti ex supra dictis constat, & docet Syluest. ver. restitut. 7. q. 6. Nau. num. 86. Lessius cap. 16. dub. 3. tamen in foro exteriori non tam benignè agitur cum debitore; sed bonis omnibus cedere cogitur: in alijs verò, quæ postea acquirit, condemnatur quatenus commode facere potest. Vide Abb. in c. Odoardus, num. 8. de solutionib.

Porro certæ causæ, & personæ sunt, quæ etiam sine cessione bonorum, tali privilegio gaudent, vt neque in carcerem ob debita detrudi; neque amplius, quam commodè facere possunt, id est, alimentis necessarijs relictis, condemnentur, de quibus Abb. l. c. Mol. to. 2. disp. 571. in fine. Tales etiam sunt Clerici, clericalibus privilegijs gaudentes, sicuti habetur in cit. c. Odoardus, de solutionibus, & videri potest Couar. 2. resol. c. 1. num. 9. Si tamen Clericus simpliciter recuset se satisfacturum, vel de fuga suspectus sit, tunc à Magistratu suo incarcerari potest, sicuti docet Abb. in c. 1. num. 7. de depol. Mol. cit. disp. 571. §. si Clericus. Alioquin, si sufficiens non est ad soluenda omnia debita, relicto ipsi quantum satis est, vt parca viuat, reliqua eius bona,



annuque redditus creditoribus assignari debent, arg. c. peruenit, de fideiussor.

Illud verò controuersum est: An beneficium hoc, vt debitor post honorum cessionem, Clerici autem etiam sine cessione bonorum, non amplius, quam commodè facere possunt, condemnentur; locum habeat in debitis ex delicto prouenientibus, v.g. furto, rapina, quatenus ciuilitè agitur ad interesse partis priuatae? Affirmant Syluest. Nau. Less. ll. cc. Sed alij DD. communiter negant, Ioan. Faber, & alij in §. vlt. Instit. de actionibus, Couar. cit. c. 1. nu. 8. Abb. in cit. c. Odoardus, num. vlt. Iulius Clarus l. 5. §. practica criminalis, q. 95. num. 5. Pet. Nau. lib. 4. c. 4. num. 58. Mol. tom. 2. disp. 572. §. his ita constitutis. Quia non est credibile iure ciuili beneficium cessionis ijs tribui, qui potius pœnæ seueritatem merentur. Quare in debitis ex delicto locum habet illud, quod sumitur ex l. 1. in fine, ff. de pœnis.

*Qui non habet in are, luat in corpore.*

**QVÆSTIO SECUNDA.** Vtrum ingressus Religionis liberet debitorem restituendi obligatione? Aliqui Doctores absolute affirmant, quod debitis obstrictus, quibus tunc soluendo non est, dimissis bonis, quæ habet, Religionem statim ingredi possit, licet manendo in seculo lucrari, & creditoribus satisfacere posset, tamen ad id non obligari. Ita videtur sensisse S. Thom. 2. 2. q. vlt. a. 6. ad 3. Caiet. ibid. & sequitur Palud. in 4. d. 38. q. 4. a. 3. concl. 3. Angelus ver. religiosus, §. 6. Syl. ver. Religio, 2. q. 4. S. Anton. p. 2. tit. 11. c. 2. §. 1. Probat primò: Propter debita homo liber non obligatur quoad personam suam, sed tantum quoad bona: ergo cedendo bonis, persona debitoris libera manet, vt quemcunque statum amplecti possit. Secundò: Nemo tenetur soluere debitum cum detrimento boni sui longè maioris, vel quod altioris ordinis sit, vt supra etiam dixi num. 1. Sed bonum Religionis longè maius & altioris ordinis est, quam bonum pecuniarum. Ergo debitor pecuniarum non obligatur ad solutionem, si propterea bono Religionis priuandus sit. Tertiò: Quia sic etiam sponsus de futuro, vel præsentè non obstante promissione & obligatione sponsaliorum, Religionem ingredi iure potest: eadem a. videtur esse ratio de alijs debitis seu obligationibus. Addunt S. Anton. 3. p. tit. 16. c. 2. §. 3. Syl. l. c. et si iuramentum integrè soluendi interuenerit, censi tamen tacitè exceptum; nisi Religionem ingressus fuero: quemadmodum & sponsalia iurata eiusmodi tacitam conditionem annexam habent.

Alij verò Doctores sententiam dictam moderantur: Si quis breui tempore in seculo manendo tantum lucraturum se existimet, vt debita sua vel integre, vel secundum magnam partem soluere possit, ad hoc obligari: secus, si longo tempore; tunc enim non obligari ad expectandum, sed statim ingredi posse. Ita Lopez p. 1. instructorij, c. 29. Azor t. 1. lib. 12. c. 1. q. 5. Less. l. 2. c. 16. dub. 8. Sanch. lib. 4. moral. c. 19. num. 8. qui definit, tempus breue quo expectandum sit, esse biennium, si intra illud solutionem fieri posse existimetur.

<sup>6</sup> Tertia sententia est Ioan. Gersonis, in p. 2. operum, opusc. An liceat grauatum debitis, &c. Ioan. Medina C. de restit. qu. 3. causa 8. Mart. Nau. comment. 1. de regular. num. 8. Valentia tom. 3. disp. 5. q. 6. p. 7. Pet. Nauar. lib. 4. c. 4. prope finem, Mol. tom. 3. poster. disp. 757. qui absolute docent; Quod are alieno grauatus, si probabiliter existimet, se in seculo manendo, debita ex contractu aut delicto prouenientia soluturum esse, Religionem ingredi non possit; esto, quod longo tempore expectans omnino se ineptum redditurus sit ad ingrediendum. Hæc sententia videtur mihi vera, & approbata est à Sixto V. & Gregor. XIV. apud Cor. rect. Eman. Sa ver. Religio, num. 1. Probat primò: Cum solutio debitorum sit iuris ac iustitiæ naturalis, ini-

uriam infert, qui absque necessitate voluntariè se impotentem reddit ad soluendum. Atqui talis ingrediendo, ac profitendo impotentem se ad soluenda debita reddit voluntariè & sine necessitate: cum ingressus Religionis in præcepto non sit. Ergo, &c. Secundò: In casu, quo filius naturali iure obligatus est succurrere parenti inopi, vel aliam miseriam passo, (si videlicet ea alio modo subleuari non possit) non licet filio Religionem ingredi, sicuti docet S. Thom. communiter receptus cit. a. 6. in corp. & quodlib. 3. a. 16. Ergo neque debitor Religionem ingredi potest, si in seculo manendo creditoribus satisfacere possit: cum ipse non minus ex iustitia obligatus sit ad soluenda debita, quam filius ad alimenta præstanda patri inopi. Probat tertio: Quia in sacris canonibus prohibetur, c. legem, d. 53. ne grauati rationibus seu obligatione reddendarum rationum ex officio, priusquam se ijs expedierunt, ad religionem recipiantur; non aliam ob causam, quam quia Religionis ingressus aut professio, sicuti & alia vota atque obsequia, Deo grata non sunt, si in alterius iniuriam cedant.

Corollarium primum. Si obstrictus debitis voueat se Religionem ingressurum intra certum tempus, differenda est executio voti, quousque debita soluta sint, sicuti rectè docet Nau. cit. nu. 8. Sanch. nu. 11. Azor cit. q. 5. contra Palud. in 4. d. 38. q. 3. a. 2. S. Anton. p. 2. tit. 11. c. 2. §. 1. Quia votum, sicuti & iuramentum, non debet esse vinculum iniustitiæ, argum. c. quanto, de iureiuran. Et posterior obligatio tollere non potest priorem, argum. c. veniens, &c. intellecto, vbi Doctores communiter, de iureiur. Imò, bene addit Sanchez; Tametsi votum Religionis antecessit, & debita postea contracta sunt, non posse illud executioni mandari, priusquam debita soluta sint; sicuti si post tale votum grauis parentum necessitas superueniat. Nam gratuita promissio, cuiusmodi est votum, definit obligare, si grauis mutatio accadat, vel incidat in casum, in quo incipere non posset.

Corollarium secundum. Si debitis obstrictus, contra creditorum facultatem, Religionem professus sit, adhuc obligatus manet, adeò, vt si in Monasterio vel hæreditate, legato, &c. quippiam acquisierit; vel si salua Ordinis regula, artificio seu manuum non insueto labore aliquid lucrari possit, tali modo creditoribus satisfacere studeat, sicuti docent Innoc. rubr. de obligatis ad ratiocinia, Abb. c. cum I. & A. num. 27. de sent. & re iudic. Medina, Nau. ll. cc. Mol. conclus. 2. Azor cit. q. 5. contra Palud. cit. a. 2. Syl. cit. q. 4. Angelum ver. religiosus, §. 7. Sanch. num. 14. qui negant Religiosum obligari ad laborandum & acquirendum. Ratio huius corollarij est, quam supra dedi: Quia promissio posterior professionis religiosæ, non potest præiudicare naturali obligationi siue debito antea contracto. Vide eundem Sanchez l. 7. moral. c. 31. vbi bene docet; Monasterium, quod in bonis professi sui successit, obligari creditoribus secundum vires bonorum; vel si quid postea Religioso hæreditate, legato, donatione, &c. acquiratur.

Corollarium tertium: Si talis debitor Religionem professus, debita, quæ non exigui momenti sunt, soluere non possit, nisi egrediendo Monasterium cum spe probabili satisfaciendi debitis, per prouisionem v.g. alicuius beneficij, tenetur id facere, si creditores etiam rogati remittere nolint, & scandalum, aliave grauis iactura spiritualis non obstat, sicuti docent Medina cit. causa 8. Molin. cit. conclus. 2. Angles in floribus p. 2. q. Quis à restitutione sit liber, a. 2. diff. 12. contra Petr. Nau. lib. 4. de restit. c. 4. num. 96. Sanch. num. 15. Confirmatur ex doctrina S. Thom. cit. quodlib. 3. a. 16. & 2. 2. q. 101. a. 4. ad 4. Henrici quodlib. 6. q. 19. Si filius, patrem in graui necessitate constitutum derelinquens, Religionem professus fuit: atque illa ratione subuenire non potest, obligatus est ad regrediendum,



ut patri subueniat: Sin verò pater, post filij professionem, in talem necessitatem ex improviso incidit, quamvis egredi possit cum Prælati licentia, religiosum habitum retinens, sicuti ex communi Nauar. lib. 3. consil. 71. & 72. de regul. edit. 2. tamen ad id non obligatur; cum tunc quasi spiritualiter mortuus, & seculi curis expeditis, noua alendi parentes obligatione astringi non debeat; licet contrarium senserit Henricus loco citat. & quodlib. 12. quæst. 23. Excipio tamen necessitatem extremam, in qua filius omnino subuenire deberet, etiam egrediendo Religionem, petita tamen prius, licet non obtenta, licentia: cum etiam extraneo in simili necessitate subuenire secundum charitatis legem oporteret. Vide Nau. c. 14. man. num. 14. & comment. 3. de regul. num. 45. Caiet. cit. a. 4. Syl. ver. religio, 2. q. 7. Less. lib. 2. c. 41. num. 34.

Ad 1. argum. supra propositum resp. Personam ex contractu vel delicto, naturali iure obligari, non quidem in ordine ad se, sed in ordine ad bona sua habita, & habenda. Exempli causa: Si pecuniam mutuo accepisti, contrahis obligationem personalem; non eo quidem tendentem, ut propter debitum, si aliter soluere non possis, in seruitutem rapi, aut vendi possis, vel personaliter seruire cogaris, quod prohibetur in l. nemo, Cod. de exactor. tributorum lib. 10. Sed eo tendentem, ut omni iure tenearis debitum restituere ex bonis tuis, si habeas, vel acquirere possis: secus, si impotentia etiam adsit acquirendi: tunc enim dimissis bonis, quæ habes omnino liber es, saltem si debita ex contractibus propulerint. Quare libenter fateor, si vir nobilis debitis obstrictus alia ratione soluere non possit, quam seruis laboribus, & sibi insuetis laboribus, quod eos subire non teneatur, cum talis nimis seruilis obligatio eiusmodi personæ moraliter impossibilis videatur, ad quam etiam se non obligasse videtur, sicuti bene notat Lopez cit. c. 29.

Exinde discrimen obseruari potest, quod tradit Medina cit. causa 8. ad quintum; Cur professio Religionis facta à mancipio, sine domini sui consensu; vel professio mariti post consummatum matrimonium sine consensu vxoris, ipso iure irrita sit, iuxta cap. nulli, distinct. 54. & cap. placet, cap. quidam intrauit, de conuers. coniugat. at verò professio debitoris facta sine consensu creditorum, quamuis illicita, & iniuriosa, tamen valida sit. Cum enim mancipium suo domino, & coniunx suo coniugi obligati sint secundum propriam personam, ideo se Religionis iterum obligare non possunt. At verò debitor ex contractu vel delicto obligatus non est secundum personam, seu in ordine ad personalia obsequia: quare Religionis se validè obligare potest: quamuis iniuriam inferat, si ea occasione remporentem reddat ad acquirenda bona, quibus satisfacere queat.

8 Ad secundum respondeo. Veram esse maiorem, si loquamur de propriè dicta iactura seu detrimento boni maioris, altioris; non item, si loquamur de lucro, seu commodo cessante. Si enim debitor sis mille florenorum, non propterea liberaris obligatione soluendi, quod facta solutione tibi maius lucrum cessaturum sit; quia mille illis florenis plus, quam alios mille lucrari posses. Atqui debitor, si propter obligationem debiti Religionis ingressum longo tempore differre, vel omnino omittere cogatur, commodum quidem seu lucrum aliquod spirituale negligit: non tamen propriè iacturam salutis, aut spiritualis boni sustinet: cum Religio medium ipsi ad salutem necessarium, aut in præcepto positum non sit. Si tamen casum extraordinarium fingamus, quo aliquis ita comparatus sit, spectato eius ingenio, ac moribus, ut valde difficile, & moraliter impossibile censeatur, eum à peccatis, quibus implicatus est, liberari, nisi relicto seculo Religionem

ingredietur; tunc fateor, talem ingredi posse, posthabita obligatione debitorum: quemadmodum etiam filius, si ita comparatus esset, non teneretur cum tanto suo spirituali periculo in seculo manere, ad subueniendum patri inopi. Quia tamen eiusmodi casus rarus, & non facile præsumendus est; ideo absolute dicimus, neque filium obligatum parenti ad subueniendum eius graui inopiæ; neque debitorem obstrictum creditori, interim Religionem ingredi posse: Sin verò ingredietur, tam filium à parente inope, quam debitorem à creditore suo, implorato Iudicis Ecclesiastici officio, ex Religionis, saltem ante professionem editam, reuocari posse.

Ad tertium respondeo cum Molin. cit. disput. 758. conclus. 4. Ex Ecclesiæ traditione notum esse, quod in sponsalibus tam de præsentem, quam de futuro, licet iurata sint, hæc tacite censeatur inesse conditio: Nisi Religionem ingredi postea placuerit. Quæ quidem conditio in neutrius iniuriam cedit; cum in ea vtrique pars contrahentium æquali iure gaudeat; vterque, inquam, sponsus inuito altero Religionem ingredi possit. At verò eiusmodi conditionem in contractibus subintelligi; *Reddam tibi pecunias mutuo acceptas, nisi Religionem ingredi placuerit*, traditio, aut praxis Ecclesiæ non habet. Neque naturalis æquitas talem conditionem patitur: cum ea in solum commodum debitoris, magnum autem incommodum & grauamen creditoris cedat.

Et debent hæc intelligi non tantum de debitis ex contractu oneroso ac reciproco; sed etiam, si aliquis liberaliter ac gratuito alteri se obligasset, deberet tamdiu Religionis ingressum differre, donec obligationi satisfactum esset, sicuti indicat Molin. cit. conclus. 4. contra Sanchez num. 10. Ratio est: Quia postquam liberalis promissio acceptata est, tribuit ius & actionem promissario: ergo iniuria ei fit, nisi impleatur. Sed excipi debet; Si promittens ita animo comparatus fuerit, ut non intenderit se obligare in eo euentu, si Religionem ingredi vellet: quod etiam in dubio præsumi potest.

QUESTIO TERTIA. Si is, qui ex furto, vsuris, &c. debitor est, ei, cui restituere deberet, tantundem donauit, immemor sui debiti, vtrum obligatione restituendi liber existat? Affirmant aliqui, quos tacito nomine citat Sanchez l. 1. moralium, cap. 13. num. 11. Sed contrarium docet Henricus quodlib. 12. quæst. 20. Lopez lib. 2. de contract. cap. ult. prope finem, Sanchez loc. cit. Less. lib. 2. cap. 37. num. 11. Nam donum gratuitum, & debitum ex iustitia inter se pugnant, sicuti indicat Apostolus ad Roman. 11. *Si autem gratia, iam non ex operibus*, (id est, 9 operum merito) *alioquin gratia iam non est gratia*; sed debiti retributio. Neque refert, quod debitor ex furto, vsuris, &c. si debiti sui memor fuisset, gratis non donasset: quia actualis dispositio voluntatis, non conditionalis in contrahentibus attendenda est.

Hanc sententiam veram arbitror, cum duplici limitatione: I. Nisi fur, vel vsurarius probabiliter sibi persuadeat, quod alter, si rem totam cognitam haberet, debitum exacturus non esset: sed libenter remissurus. II. Nisi obligatio restituendi, puta pauperibus, ex iure tantum Ecclesiastico promanet, iuxta ea, quæ dixi supra: tunc arbitror probabiliter dici posse, elemosynas, quæ cum tali obligatione, quamuis non animo satisfaciendi, factæ sunt: tamen ad eam extinguendam prodesse posse. Exempli causa: Venit Canonicus ad Confessionem, qui toto anno canonicum officium recitare neglexit: & ideo in pias causas 300. aureos restituere deberet: tali obligatione à Confessario illi significata, respondet, se, quauis huius obligationis



immemorem, his ipsis diebus statuam argenteam Ecclesiae alicui donasse, quæ 300. aut amplius aureis æstimetur, puto, quod Confessarius contentus esse possit. Tum quia non desunt Doctores, qui ita sentiunt: tum quia videtur esse virtualis intentio omnium dantium eleemosynas, satisfaciendi per eas omnibus obligationibus, quas suis peccatis aut negligentis contraxerunt: tum denique quia leges Ecclesiasticæ benignè explicari debent.

10 **QVÆSTIO QVARTA.** Si debitor rem restituendam Confessario commisit, ille verò defraudauit, vel aufugit; vtrum cesset obligatio primi debitoris? Suppono, Esse consilium S. Tho. 2. 2. q. 62. a. 6. ad 2. Nau. c. 17. num. 67. Si quis restitutionem debiti sine periculo famæ, &c. facere non possit, vt commoditatem capiat restituendi per hominem fidelem, & secreti obseruantem: ad quam rem peragendam Parochus, vel Confessarius plerumque idoneus videri poterit, qui personam nullam nominatam creditori restituat. Sin verò accidat, præter opinionem, eiusmodi Confessarium defraudare, restitutionemque intermittere, liberaturne debitor?

Hoc casu, respondeo & dico I. Si quod restituendum erat, debitum fuit indeterminatè, seu in genere; v. g. decem floreni ex iniusta emptione aut venditione: tunc debitor non liberatur, sed debet aliorum decem restitutionem facere. Ratio est: Quia res qualibet, si casu pereat, domino suo perit: debitor autem rei debitæ indeterminatæ adhuc dominus est: ergo, etsi sine eius culpa, adeoque casu per malitiam Confessarii pereat, ipsius id damno accidit, sicuti tradit S. Anton. p. 2. tit. 2. c. 4. §. Nau. l. c. & Pet. Nau. lib. 4. c. 5. n. 6. Less. lib. 2. c. 16 n. 65. contra quosdam, quos tacito nomine refert idem Nau. & Less. ea ratione persuasos: quia debitor, qui alio modo restituere non poterat, fecit quod debuerat, ideoque creditor contentus esse tenebatur, vt per talem personam intermediam restitutio ipsi fieret. Sed facilis est responsio: Fecisse debitorem, quod habetenus facere debebat, tamen remanente obligatione,

vt si restitutio efficaciter facta non sit, alius modus restitutionis efficax ineatur. Neque aliter censetur contentus esse creditor; nisi vt si velit debitor restituere per Confessarium, vel aliam personam intermediam, à se speciarim non destinatam, suo id periculo faciat.

Dico II. Si res aliqua in specie debita fuit, sed iuste: quia v. g. inuenta, vel aliàs bona fide possessa: tamen interest debitoris, vt non sciatur, restitutionem ab ipso provenire: tunc planè satisfacit, si Confessario, quem prudenter credit fidelem esse restituendam rem tradat: qui si postea defraudet, debitor omni iure liberatus est. Ita vterque Nauarrus ll. cc. Ratio est: Quia in tali casu neque obligatur ratione rei acceptæ, cum eam non habeat, neque ratione iniustæ acceptionis, seu læsionis, cum ab omni culpa, & iniuria immunis sit: consequenter, si res pereat, domino suo perire debet.

Dico III. Si res in specie debita, per iniustitiam acquisita & abstracta sit, v. g. torques aureus furto ablati, non liberatur debitor, si in tali casu Parochus, vel Confessarius, alioquin fidelis existimatus, defraudet. Ita indicant S. Anton. & Nau. ll. cc. & docet expressè Less. l. c. Eiusdemque sententiæ olim se fuisse fatetur Pet. Nau. sed postea mutasse, eo argumento motum; quia res, si casu omnique seclusa culpa pereat, domino perit: atqui in nostro casu debitor non est dominus rei in specie debitæ; perit autem sine omni eius culpa, per solam malitiam, vel negligentiam Confessarii: Ergo non ipsi perit, sed creditori, videlicet illi, à quo torques ablati sunt. Respondeo. Non censeri rem casu perire, quando eius interitus causa & occasio fuit iniusta ablatio. Sicuti enim, si furi torques aureus ablati fuisset absque vlla culpa eius, deberet is nihilominus domino damnum compensare, quippe cuius causa siue occasio extitit; ita similiter compensare tenetur, si per Confessarii malitiam periit: posito, quod res, si domino iniuste ablata non fuisset, ipsi salua mansisset. Quod totum constat ex principiis restitutionis, à DD. communiter admissis.

## TRACTATUS TERTIVS.

DE

## DELICTIS.



**O**BLIGATIONES iustitiæ aliæ ex contractu nascuntur; aliæ verò ex delicto, auctore Arist. 5 Ethic. cap. 2. Illæ voluntariæ dicuntur, quia libera contrahentium voluntate susceptæ sunt. Hæ autem appellantur inuoluntariæ; & quidem ob duas causas: Primò, quia ille, qui damnum iniuste illatum est, in id minimè consensit. Secundò, Quia neque delinquens in obligationem secundum se consensit; sed potius inuitus eam contrahit. Nam sicuti reatus poenæ, tanquam cuiusque peccati necessariò consequens effectus, quodammodo inuoluntarius est peccanti sic etiam ex delictis, quibus iniquum damnum infertur, damnicans obligationem seu reatum damni compensandi, etsi minimè velit atque optet, tamen iuris naturalis, ac positiui necessitate contrahit.

Cum autem pro inuestitate bonorum, quæ inuito eripi possunt, triplex homini iniquum damnum inferatur; puta, vel in bonis externis fortuna per furtum, rapinam, &c. Vel in bonis externis honoris, ac famæ per detractionem contumeliam, &c. Vel denique in bonis corporis internis per homicidium, mutilationem, raptum, stuprum, adulterium, &c. ideo de obligationibus inde ortis hoc tractatu trifariam nobis agendum est.

### PARS PRIMA.

De obligationibus contractis ex iniusto fortunarum damno.







Verum ex doctrina Sotilib. 5. quæst. 3. art. 3. ad 3. Syluest. ver. furtum, num. 5. Ioan. Medina quæst. 10. C. de restit. ad 2. casum; Arragon. 2. 2. quæst. 66. art. 6. Molina, disp. 685. Pet. Nauar. lib. 3. de restit. cap. 1. num. 35. Sa ver. furtum, n. vlt. Valentia disp. 5. quæst. 10. p. 5. Respondeo & dico I. Rem istam prudentis arbitrio definiendam esse, non solum ex quantitate rei ablata, sed etiam ex circumstantiis personæ cui ablata est. Probatur & explicatur. Furti grauitas pensanda est tum ex damno iniuste illato, tum verò ex voluntate domini inique ferentis rem suam sibi auferri: siquidem furtum aliud non est, quam ablatio rei alienæ, domino eius rationabiliter inuito. Certum autem est, ob eandem pecuniæ quantitatem, furto ablatam, maius damnum accipere, & merito plus angere atque dolere pauperem, quam mediocriter diuitem; & plus hunc, quam valde diuitem. Ergo furti grauitas, siue mortale crimen non ex sola quantitate rei ablata; sed etiam ex circumstantiis personæ, cui aufertur, prudentis arbitrio æstimandum est.

Dico II. Probabiliter tamen ita defini potest; hanc esse notabilem facti quantitatem, ac peccati mortalis materiam, quæ in vnum diem sufficiat ad victum eius hominis, cui furti iniuria fit: Veluti si à mercatore valde diuite fureris duos, vel tres nostrates florenos; à ciue mediocriter diuite duodecim, vel quindecim pazos; ab operario tres, vel quatuor pazos; à mendico pauculos numos, quibus vno die vtrunque se aluisset. Nam etiam domini testimonio Marci 12. Vidua, quæ duo minuta in gazophilacium misit, plus omnibus dedit, quando totum victum suum dedit. Ergo qui illi furto hæc duo minuta abstulisset, non modicum, quippe totum victum ei abstulisset.

Dico III. Duo, vel tres ducati à quocunque auferantur, quamuis rege potentissimo, mortale peccatum constituunt. Hæc est communis assertio apud Sotum Arag. Sa. P. Nau. lib. 2. cc. Ioann. Maiorem in 4. d. 15. q. 25. Angelum, ver. furtum, §. 34. Syl. q. 2. quamuis aliqui, vt Tol. lib. 5. c. 16. minorem summam statuunt. Probari autem debet assertio: Quia hæc est communis hominum persuasio, valorem, qui duos aureos excedit, non esse modicum quod etiam Labeo agnouit apud Vlpian. Iureconsult. in l. si quis adfirmavit, & seq. ff. de dolo. Adeo, vt vix aliquis etiam potentissimus reperitur, qui spectatis omnibus impendiorum oneribus, tantæ pecuniæ iacturam non grauiter ferre censendus sit.

Tria insuper moneo: Vnum est. Mortale peccatum committi posse, etiam rem modicam auferendo, si exinde graue damnum, vel iactura lucri cessantis eueniat: Veluti si à sartore acum fureris, à sutore subulam, à scriba calamus; quem scis aliud instrumentum ad opera sua præstanda plurium dierum spatio acquirere non posse, sicuti inter alios notat Nau. c. 17. n. 2. & 4. Vel si transiens v. g. cum multis per vineam, paucos racemos accipiens, causa sis, vt alij exemplum tuum secuti, ingens damnum inferant, quo casu teneberis sub culpa mortali ad restitutionem illius modici; si spes probabilis sit, alios etiam simul restitutos, damnumue compensaturos esse. quæ de re Mol. disp. 689. Sin verò exemplo tuo tracti non fuerunt, tunc nihilominus charitatis lex obligabit te ad restituendum, si vides te restituentem alios etiam restitutos, & graue damnum proximo retarcendum: quomodo limitari debet doctrina Lessij lib. 2. c. 12. num. 52.

Alterum. Si poenitens confiteatur, modicum quid furatum se esse, interdum à Confessario examinandus erit, an fortè non defuerit animus plura surripiendi, si copia vel occasio fuisset. Quia, vt dicitur c. vlt. 14. q. 6. ex S. Hieron. in epist. ad Titum, cap. 2. Fur non solum in maioribus, sed etiam in minoribus iudicatur. Non enim (in foro conscientie) id quod furto ablatum, sed mensura

randi attenditur. Vide S. Anton. p. 2. tit. 1. c. 14. §. 3. Couar. 1. resol. c. 3. n. 12. Nauar. c. 17. n. 2. Molin. disp. 685. Rebell. l. c. f. 1. Pet. Nauar. cit. c. 3. n. 41.

Tertium. Si quis rem alienam auferat, quamuis modicam, sciat tamen dominum ea valde delectari, aut affici, vt ex eius amissione magnam molestiam captrus sit, peccabit mortaliter non in genere furti, sed potius contra charitatem, sicuti notauit Syl. ver. furtum, q. 2. Nau. in man. c. 17. cit. n. 2. P. Nau. cit. c. 3. n. 46.

QVAESTIO SECVNDA. Quid sentiendum sit de furtis domesticorum, vel amicitia iunctorum? Resp. & dico I. Licet verè furtum sit, si liberi, vel mancipia patrifamilias inuito auferant, sicuti constat ex §. hi qui, Instit. de obligat. ex delicto; tamen actio furti poenalis & famosa aduersus eos non conceditur. Sed neque coniugi aduersus coniugem ob matrimonij honorem, sicut constat ex ff. & C. rerum amotarum. Denique nec contra alios domesticos vel famulos paterfamilias furti actionem instituere potest, si furta modica sint, l. perspicendum 11. §. furta, ff. de poenis Nihilominus, si rem ablatam à domesticis paterfamilias recuperare nequeat, Iudicis officium implorare poterit quo hi ad restitutionem compellantur. Deinde si domesticorum aut famulorum furta immodica sint, vel nimis multiplicata, etiam poena corporali puniri solent, teste Claro lib. 5. sentent. §. furtum, n. 22.

Dico II. Plerumque maior quantitas requiritur ad crimen mortale furti, auferentibus liberis, vxore, mancipijs, amicitia, vel sanguine iunctis; imò etiam famulis, & ancillis, præsertim circa esculenta, & poculenta, quorum curam & dispensationem habent; dummodo ipsimet insumant, & non alijs diuendant. Ratio est, quòd dominus minùs inuitus sit, vt ab his, quam ab extraneo surripiatur. Vel etsi valde inuitus videatur sæpe tamen non tam ratione rei acceptæ, quam ratione modi accipiendi clam, furtim; aut ratione mali finis, ob quem liberi, famuli, vel vxor accipiunt, vt ludant, potitent. Ita præter alios docet Caiet. ver. furtum, §. 2. Et hinc habes. Nau. c. 17. n. 138. Pet. Nau. lib. 3. cap. 1. n. 227. Mol. disp. 686. Less. lib. 2. cap. 12. n. 47. & n. 76. vbi ait; Tamen si filiusfam. patri diuiti duos, vel tres aureos furetur, non semper mortalis peccati damnandum fore. Sed, vt breuiter dicam, prudens Confessarius arbitrari hoc debet, non ex sola quantitate rei ablata; sed etiam ex circumstantiis personæ accipientis, cuiusque cui aufertur.

Id verò explicatione indiget, quod Sanchez lib. 7. moral. cap. 21. n. 31. absolutè negat, furta parua esculentorum commissa à famulis ad proprios vsus, etsi paulatim ad magnam quantitatem perueniat, esse crimen mortale. quod multò magis docet de furtis Religiosorum; cum hi non instar famulorum, sed tanquam filij ex Monasterij bonis alantur. Hæc doctrina vera est, si dominus, vel Prælatus inuitus non sit quoad rem; sed quoad modum accipiendi clam. Secùs dicendum, si re ipsa inuitus est, quia graue damnum etiam per furta modica frequenter repetita domui, aut Monasterio inferri potest, si sint talium rerum, quæ non communiter, aut non tanta copia famulis, vel Religiosis dari solent. Vt si famulus, vel Religiosus quotidie in cellam vinariam clanculum descendat, & duas vini mensuras (apud nos, vbi vinum in pretio est) ebibat, quis neget spatio vnus mensis graue damnum illaturum, & mortaliter peccaturum, non tantum in genere furti; sed etiam contra paupertatis votum, si Religiosus sit? Vide q. seq. & quæ dicam lib. seq. tract. 5. cap. 7. quæst. 2.

Dico III. Si existimetur, patremfam. inuitum fuisse etiam ratione rei ablata secundum se, tenetur restituere ei vxor ex paraphernis; filius verò ex castrensisibus & c. si talia non habeat, post mortem patris adferre debet in diuisionem hæreditatis; si rei ablata



quantitas modica non sit, neque pater eius restitutio-  
nem expresse aut tacite remiserit. Quod si domestici  
sine magna difficultate restituere non possint, precipiat  
illis Confessarius, ut extraordinariis officiis, & obse-  
quiis, quatenus fieri potest, compensare studeant.

**QVÆSTIO TERTIA.** Qui repetitis vicibus mo-  
dicum furatur, an denique mortaliter peccet? Affir-  
mandum est cum Ioan. Maiore in 4. d. 15. q. 25. Medina  
C. de restitut. q. 10. Soto lib. 5. q. 3. a. 3. ad 3. Couar. 1. re-  
sol. c. 3. n. 12. P. Nauar. lib. 3. c. 1. n. 50. Vasq. de restit. c. 9.  
§. 1. dub. ult. & 1. 2. disp. 146. Mol. disp. 688. Valent. disp.  
5. q. 10. p. 5. contra Nau. cap. n. 139. & aliis apud San-  
chez lib. 7. moral. c. 21. n. 5. Probat, & explicatur: Si  
à mercatore non diuite per duos menses quotidie fure-  
ris crucigerum, ultimo die notabile illi damnum inferis,  
ideoque mortaliter peccas. Nam opus, quo iniustum  
notabile damnum proximi completur, mortale est: per  
ablationem autem siue furtum ultimi sexagesimi cruci-  
geri completur notabile damnum mercatoris: (nam  
antè non censebatur graue damnum, nunc autem me-  
rito censetur.) Ergo ultimi crucigeri furtum mortale  
est, non secundum se absolute; sed cum habitudine ad  
furta antecedentia consideratum, sicuti bene explicat  
inter alios Maior cit. loco.

Pro pleniore tamen huius rei intellectu quatuor ani-  
maduertere: Primum. Maiore opus esse quantitate ad  
peccatum mortale constituendum, si modica furta di-  
uersis, ac pluribus contingant, quam si vni & eidem.  
Sint v. g. triginta mercatores, quibus singulis auferas  
pazium, fieri potest, ut mortaliter non delinquas, quia  
nulli eorum graue damnum inferis. Vide Rebllum de  
iustit. p. 1. lib. 3. q. 15. §. n. 43. Sanchez cit. c. 21. q. 2.

Secundum. Si modica furta fiant animo & proposito  
ex eis ditescendi, grauius peccatum est, quam si sine  
huiusmodi proposito fierent. Quare iudica cum mor-  
taliter peccasse, qui alienas vineas circumcursando ra-  
cemorum multitudinem collegit; qui mensuras aut  
pondera falsando, vel de pecuniis abscondendo, duobus  
v. g. aureis defraudauit. Eum verò non ita facile iudica-  
bis mortaliter peccasse, qui hodie à Titio non valde  
diuite duos pazios furatus est, & absumpsit; ac deinceps  
abstinere proposuit: Post tres verò dies nactus occasio-  
nem, iterum duos pazios eidem, vel alteri abstulit: eò-  
que modo sapius, quamuis abstinere proposuerit, vel  
etiam peccatum confessus fuerit, opportunitate tamen  
malæque propensione superatus, ad summam vnus de-  
nique nostratis floreni peruenit. Ratio discriminis est,  
quod in prioribus casibus vnicum sit malignum propo-  
situm, cuius obiectum quia graue est, à culpa mortali  
non excusatur. In posteriore casu autem, non vnicum  
animi propositum manet: reuocatum enim est per pœ-  
nitentiam: quare neque vnum peccatum est, sed plura,  
eaque venialia. Si tamen sapius, etiam post pœnitent-  
iam furando duos pazios ab homine non admodum  
diuite, denique quis perueniat ad damnum valde nota-  
bile, v. g. trium florenorum, mortalem culpam non  
effugiet.

Tertium. Siue ab vno, siue à pluribus fureris, ma-  
iore quantitate opus est ad peccatum mortale, si furta  
modica per maiora temporum intervalla fiant. Quare,  
si famulus sibiinde subtrahendo numum, vel crucige-  
rum, quatuor annorum spatio perueniat ad vnus aurei  
ducati quantitatem, non arbitror mortalis peccati  
damnandam esse. Partim, quod furta tanto temporum  
intervallo repetita non contineant vnus & eundem  
damni habitudinem: partim quod dominus non tam  
iniustus sit, paruas quantitates, præsertim à domesticis,  
per temporum intervalla sibi auferri, quam semel vnā  
magnam. Quod si à pluribus per temporum intervalla,  
abique ditescendi profecto, furta fiant, etiam duo vel tres  
aurei non sufficient ad peccatum mortiferum furti. Le-

ge Molin. disp. 689. Sanchez cit. c. 21. n. 10. Rebllum p.  
1. de iustit. lib. 3. q. 15. l. 4. n. 37.

**Quartum.** Si hodie aliquis à Titio sex crucigeros fu-  
retur, à quo etiam antea sapius furatus erat, sed eidem  
restituit; tunc furtum hoc sex crucigerorum ad furta  
præcedentia ordinem non habet, neque ex illis aggra-  
uatur; sed tantum veniale est, sicuti notauit Molina, &  
Rebllum locis citatis, Less. l. 2. c. 12. dub. 8. Item, si quis  
antè furatus à Titio materiam non notabilem, nunc ite-  
rum tantundem furetur, ita ut materia notabilis fiat: si  
tamen accipiat cum certo proposito, saltem partem ei-  
dem mox restituendi, non videtur mortaliter peccare:  
cum non habeat voluntatem damnum notabile effica-  
citer inferendi. Quod etiam significat P. Nau. lib. 2. c. 3.  
n. 60. Sanchez n. 8. & 9.

**QVÆSTIO QVARTA.** Vtrum sit peccatum ob  
necessitatem aliquid auferre? Resp. & dico I. Qui ex-  
trema, aut pene extrema necessitate coactus, rem alie-  
nam accipit ad vtendum, fruendum, absumendum, fur-  
tum non committit, neque peccat. Ita S. Thom. com-  
muniter receptus 2. 2. q. 66. a. 7. ad 2. Ratio est, quod  
alioquin rerum communium diuisio, iure gentium in-  
troducenda, iniqua foret, nisi ea tacita conditione facta es-  
set, ut tamen in extrema necessitate omnia communia  
essent, id est, cuiuslibet integrum maneret ius naturale, ad  
accipiendum vel vsurpandum ea, quibus extreme indi-  
get: quare S. Th. loco supra cit. ait: *Per talem necessita-  
tem (extremam) efficitur suum id, quod aliquis accipit ad  
sustentandam propriam vitam.* Excipe: Nisi ille à quo au-  
fertur, in pari necessitate constitutus sit. Nam in pari  
causa melior esse debet possidentis conditio. Sin verò  
tu ante acceperas, quam in extremam necessitatem de-  
uenisti, tunc superueniente tali necessitate absumere  
potes, nihil obstante, quod rei pristinus dominus in si-  
mili necessitate positus sit, sicuti docet Tol. lib. de pec-  
catis mortal. c. 39. Less. lib. 2. c. 16. n. 14. vbi addunt;  
Etiam parentes, liberos, quin & fratres, in tali casu do-  
mino, vel creditori præferri posse. Præterea, si nec ego,  
nec dominus in possessione rei tunc sumos, cum ad ne-  
cessitatem extremam deuenimus; licitum est mihi, do-  
minum præueniendo, rem, qua indigeo, capere atque  
absumere, sicuti docet Maior in 4. d. 15. q. 9. §. secundò  
arguitur, licet aliter Scotus ibid. quæst. 2. & Gabr. q. 2.  
art. 2. Ratio nostræ doctrinæ est; Quia in extrema neces-  
sitate omnia communia censentur, ideoque primo oc-  
cupatori cedunt.

Dico II. Qui rem ablata, vel apud se depositam, com-  
modatam, &c. urgente extrema necessitate absumpsit,  
nihil restituere debet, postquam ad meliorem fortunam  
peruenit. Ita significant S. Th. cit. a. 7. ad 2. Richar. in 4.  
d. 37. a. 3. q. 4. cum aiunt, indigentem in tali casu accipe-  
re, quod suum est de iure naturæ: & expresse assertio-  
nem istam docent Angelus ver. furtum, §. 37. Syl. ver.  
furtum, q. 5. & ver. elemosina in fine, Clarus l. 5. sent.  
§. furtum, n. 25. P. Nau. l. 4. c. 4. n. 24. contra Scotum in  
4. d. 15. q. 2. a. 4. resp. ad argum. Adr. in 4. de restit. §. Quia  
dictum est de lucro, Nau. c. 17. n. 61. Couar. reg. pecca-  
tum, p. 2. §. 1. n. 4. Medinam C. de restitut. q. 3. in princ.  
Less. l. 2. c. 16. n. 6. Cum enim rem auferendo non pecca-  
uerit, non tenetur ratione iniustæ acceptionis: & cum  
rem ablata ob necessitatem bona fide, imò tanquam  
dominus eius factus, absumpsit, non tenetur ratione  
rei acceptæ; adeoque ex neutro capite, unde restituen-  
di obligationem oriri præced. tract. dictum est. Qua si-  
mili ratione colligitur; Si quis merces alienas in mare  
abijciat, ne ipsemet pereat, non teneri ad vllam restitue-  
tionem: cum nec iniuriam intulerit, nec rem alienam  
possideat. Qua de re Medina C. de restit. q. 3. in 1. causa,  
§. secundò. Pet. Nau. lib. 3. c. 1. n. 382. Vide etiam l. 1. §.  
cum in eadem, si ad l. Rhodiam de iactu, vbi secundum  
naturalem æquitatem decernitur, iacturam istam ab



omnibus vectoribus præstandam, secundum proportionem æstimationis rerum, quas singuli in naui portant.

Quædam addenda sunt circa ablationem rei in necessitate extrema. Primum: Et si convenit, eum, qui extremam necessitatem patitur, prius postulare, quam auferre; tamen mortaliter non peccat, qui eiusce ordinem prætermittit, modò scandalum absit. Quia non peccatur quoad rem ablatam, sed tantum quoad modum auferendi. Ita notavit Less. c. 12. dub. 12.

Alterum. In casu, quo extremè laboranti nemo dare vult, quiuis alius, si ex proprio subvenire nequit, aliena accipere potest, quibus misero subveniatur, uti docet S. Th. cit. a. 7. ad 3.

Tertium. Eatenus tantum potest miser rem alienam absque peccato & restituendi obligatione absumere, quatenus extremè indiget: Quare, si quis famis necessitate adactus, alienam v.g. vaccam abigat, & fructibus ex ea perceptis, salua rei substantia, vitam suam utcumque sustentare possit; ipsam vaccam absumere ipsi non licet. II. Tamen si diues homini extrema patienti iniuriam inferat, si necessaria neget, cum ipsi naturali iure debeantur: transacta tamen illa necessitate debitum extinguitur, neque restituendi aliqua obligatio permanet. Quemadmodum etiam filius ex naturali iustitia seu pietate obligatur ad parentem inopem alendum, ita ut si alimenta neget, impius & iniustus sit; non tamen restituendi obligationem contrahit: quia eiusmodi debita naturalia ac legalia solum durant, durante necessitate. Si tamen propterea, quod filius patri inopi alimenta negat, aliud pater damnum incurrit; similiterque si propterea, quod filius pauperi extremè indigenti necessaria negavit, pauper mortuus est, secundum rigoem iustitiæ uterque ad compensationem damni obligatur, quippe cuius causæ iniusta exitit. Quod dico, secundum probabilem sententiam, quam doctè tradidit Franc. Sarmientus de re dit. Eccles. p. 3. cap. 4. nu. 3. eamque secutus sum supra lib. 1. tr. 2. c. 3. n. 8. Diuitem contra iustitiam peccare, si pauperi in extrema famis necessitate non subveniat, sed mori sinat. Quia pauper in tali casu habet ius petendi panem, quem diues possidet; & miser ille vel expressè, vel virtualiter postulat; consequenter ei iniuria inferitur, denegando: quia contrauenitur iuri ejus: licet contrarium doceat S. Th. de Charitate disp. 7. f. 6. n. 2.

8 Dico III. Et si non desunt Doctores, ut Angel. ver. furtum §. 37. Syl. q. 5. dicto 2. Nau. c. 17. n. 5. P. Nau. lib. 5. c. 1. n. 37. Sa. ver. furtum, n. 1. Less. c. 12. dub. 12. n. 71. arbitantes, etiam in gravi siue magna necessitate rem alienam accipere concessum esse: Cum enim diues, inquit illi, tali casu ex lege charitatis obligatus sit ad largiendum, immeritò inuitus est, si, eo non largiente, clam auferatur. Contraria tamen sententia communior & probabilior est Adrian. l. c. ver. circa prædicta, Ioan. Maioris in 4. d. 15. q. 9. §. tertio arguitur, Sotil. lib. 5. q. 3. a. 4. Caiet. 2. 2. q. 66. a. 7. Covar. reg. peccatum, p. 2. §. 1. Sauril. 9. clavis reg. c. 14. dub. 7. Valent. t. 3. disp. 5. q. 10. p. 5. Turriani 2. 2. dis. 82. dub. 8. Ratio est, quia constitutus in gravi necessitate non habet ius propria auctoritate rem alienam accipiendi: ergo iniuriam inferit, si accipiat, & dominus merito inuitus est. At verò qui in extrema necessitate versatur, is ius accipiendi habet, rei que ita acceptæ dominum sibi comparat. Ad fundamentum contrariæ sententiæ responderetur; Diuitem non ex lege iustitiæ, sed ex sola charitate obligari adtribuendum pauperi constituto in necessitate gravi: talis autem obligatio non patitur exigendi, vel accipiendi.

+ Moneo tamen primò: Non faciliè mortalis peccati cum dampnandum esse, qui a diuice, præsertim an è rogato, clam auferit, quod ad grauem suam necessitatem necessarium est: partim ob auctoritatem DD. prioris sententiæ; partim quia negari non potest, circumstan-

tiam necessitatis multum de maliciâ furti minuire: cum etiam dominus, cui auferitur, minus inuitus tunc esse possit. Idque significatur in c. si quis, de furtis, & in c. si cut, d. 47. ait S. Ambrosius: Quod de furentium panis sit, quem diues detinet, & Gl. admonet: Licet pauperes actionem directam non habeant ad petenda sibi necessaria; possent tamen eos implorare officium Iudicis Ecclesiastici, ut cogantur diuites ad largiendum, sicuti notauit etiam Abb. in c. 1. n. 7. de empt. Adr. in 4. de restit. q. 1. ad 4. Syl. ver. elemosyna in fine, Nau. de re dit. Ecclesiast. q. 2. mon. 6. vbi generaliter ait: quod naturali æquitate, aut sola charitate obligatus ad faciendum aliquid, Iudicis officio compelli possit.

Moneo secundò. Licet ob necessitatem grauem fas non sit rem alienam auferre; tamen rei iam habitæ restitutionem differre ob similem necessitatem licitum esse videtur, sicuti dixi super. tract. c. ult. n. 1. Quia plus est rem alienam auferre, quam debitum non restituere: cū illud omnino repugnet præcepto negativo; hoc autè aliquid participet de præcepto affirmatiuo. Etenim in præcepto restituendi continetur actus positivus, à quo per moralem impossibilitatē excusamur. Accedit, quod differendo rei debitæ restitutionem, parum adiuuatur creditori: quod enim differtur, id non auferitur.

QVÆSTIO QVINTA. Vtrum creditor debitum suum propria auctoritate sibi vindicare, aut retinere possit? Respondeo, Si debitum certum ac liquidum sit, nec alia ratione, puta extra, vel intra iudicium petendo, moraliter recuperari possit, per se loquendo, illicitum non est, propria auctoritate illud, vel eius æquiuales occultè accipere. Ita Gl. in cit. c. ius gentium, d. 1. S. Th. 2. 2. q. 66. a. 3. ad 3. Abb. in c. si cut, n. 14. & 15. de iure iur. Adr. l. c. Lopez p. 2. instruct. c. 8. Medina C. de restit. qu. 3. causa 12. Nau. in man. c. 17. n. 112. Syl. ver. furtum, q. 13. Mol. disp. 691. Less. lib. 2. cap. 12. dub. 10. & alij communiter.

Explicatur responsio particulatim: Primò, Si debitum incertum sit, propria auctoritate accipi sine iniuria non potest: quia in dubio melior est conditio possidentis. Secundò, Si alio conuenientiore modo, videl. petendo à creditore; vel Iudicis officium implorando, debitum faciliè consequi possis; peccas quidem transgrediendo ordinem à iure constitutum, iuxta l. vn. C. Ne quis in sua causa, & c. furtum tamen, vel iniustitiæ crimen non committis, sicuti notat S. Th. communiter receptus in cit. a. 5. ad 3. Tertio, Per accidens id aliquando illicitum erit, ob periculum scandali, vel propriæ infamie; ne fortè deprehensus, in foro externo fur censearis; aut tanquam rei alienæ violentus inuasor puniaris, sicuti Abb. & S. Th. ll. cc. annotarunt. Deinde, si periculum sit, ne creditor, eiusque hæredes huius rei signari iterum soluant, monendi erunt (si id fieri possit) debito satisfactum esse, vel remitti, sicuti monet S. Anton. p. 2. tit. 1. c. 15. §. 1. Nau. n. 113. Quarto, Compensatio ista fieri debet in eadem specie, vel eodem genere debiti: nec potest pro empto & non tradito Eudophalo accipi Xanthus; aut pro pecunia debita accipi oleum; aut pro debito oleo frumentum. Si autem in eadem specie, vel eodem genere rerum visum consumptibilem compensatio fieri nequeat, in conscientia foro fieri etiam potest in quibuscunque rebus aliis, seruata æqualitate. Exempli causa, si debitos tibi sex florenos recuperare non possis, accipias eiusdem valoris frumenti scapham, vel vini amphoram: Si æquum tibi debitum consequi non possis, accipias pecuniam, quanti ille æstimatur. Ita annotauit P. Nau. l. 3. c. 1. n. 398. Vasq. in moral. de restit. c. 5. §. 1. dub. 8. & videri possunt quæ dixi tract. præced. c. 9. n. 9.

Atque hinc existit solutio questionis frequenter occurrentis: Videlicet, Famulos occultæ compensatione uti posse, si liquidò constet de inæqualitate stipendij, compensatione laborum atque utilitatis, quam dominis suis præstant, sicuti docet Nauar. lib. 3. consil. 1. de locato;

+ Hic est  
hominis  
a J. D. in a. 11.

Et si admi. n. R.uthor uero  
labile, si tamen eue furari  
in graui neceitate, qd  
naturæ est a J. D. in a. 11.



lib. 3. consil. 1. de iniuriis, edit. 2. Lopez p. 2. instruct. cap. 8. Licent. Diez lib. 1. var. qq. q. 8. §. 2. Less. l. c. n. 63. Mol. tr. 2. to. 3. priore disp. 506. & 548. Nam sicuti qui mercem necessitate v.g. coactus, minoris iusto vendidit, in conscientia foro pretij defectum, quem donandi animus non fuit, exigere potest; ita etiam famulus stipendij defectum, si ob necessitatem, ob errorem, vel similem causam, operam suam minoris iusto locauit. Idemque in hoc casu dicendum, si manifestum sit, quod dominus famulis & famulabus, considerato eorum, labore, consuetudine loci, &c. non præbeat victum sufficientem; atque illi alia ratione, videlicet dominum rogando, monendo, quod debitum sibi esset, consequi non possint; occulta aliqua compensatione uti, concessum ipsis esse, sicuti notauit Mol. cit. disp. 506. col. 5. §. illud est obseruandum.

Veruntamen, quod attinet ad famulos, præsertim nobilium personarum, & Principum Officiales, aduertendum insuper est, varias posse esse causas, cur dominus cum famulo minus stipendium paciscatur. I. Quia expressè, vel tacitè promittit, se, obsequio diligenter præstito, remuneraturum, ad maiora promotorum. tunc famulus occulta compensatione uti non potest, quamdiu probabilis spes affulget, dominum promissioni satisfactorum. II. Quia Famulus non totam operam domino impendit, sed interim etiam permittitur artem aliquam addiscere, vel aliud quippiam commodi sibi acquirere, sicuti notauit Nauar. n. 109. Pet. Nau. lib. 3. c. 1. n. 410. III. Quia Dominus famuli opera non multum indigebat; sed rogatus eundem conduxit: Tunc conqueri facile non potest de stipendij exiguitate: nam sicuti merces, ita & operæ ultionæ vilescunt, quæ de re Diez concl. 2. & 3. IV. Quia tamen opera famuli dominus indigebat, multi tamen aderant, qui eandem conditionem libenter acceptassent: & nunc quoque, si officio famulus discederet, plures reperirentur, qui, eodem stipendio siue salario, suscepturi erunt. Neque hoc casu stipendium minus iusto videri debet: quia sicut multitudo vendentium mercis pretium minuit, ita & multitudo operam locantium quantitatem stipendij siue mercedis, sicuti docent Nauar. l. cap. Mol. tom. 1. tract. 2. disput. 83. Vasq. de restit. cap. 5. §. 1. dub. 10. Less. cit. dub. 10. in fine. Interim tamen rectè monet Nauar. in cit. consil. 1. de iniuriis, n. 14. Non ideo semper salarii seu mercedem iustam effici: quia si vnus accipere nolit, alter non deerit, qui accipiat: cum posterioris acceptatio ex mera necessitate, non ex æquitate rei acceptæ prouenire possit.

Pœna simplici furto statuta vna civilis est, vt fur occultus, præter rem ablatam, in duplum; fur manifestus in quadruplum condemnatur, pœnaque hæc, post Iudicis sententiam, domino applicetur, sicut constat ex §. ex maleficiis, Instit. de action. iuncto §. ult. de obligat. ex delicto. Verum hæc actio in duplum, vel quadruplum vix amplius in usu est: Sed rei dominus, eiusque hæredes agere solent aduersus furem, eiusque hæredes conditione furtiua, ad recuperandum non solum rem ipsam, eiusque æstimationem; sed etiam omne damnum, & lucrum cessans. Sin verò res furtiua penes alterum possessorem extet, tunc simplici rei vindicatione repeti potest.

Alter est pœna criminalis, quæ licet ex iure Authent. Vt nulli Iudicum, &c. cap. ult. citra mutilationem, vel mortem, arbitraria esse debeat; pro furto nolumus omnino quodlibet membrum abscindi, aut mori, sed aliter castigari. Lege tamen Carolina ob tertium furto, suspendium decretum est, sicuti videre licet apud Couar. 2. resolut. cap. 9. num. 7. Quod intelligi debet de furtis materia notabilis, quæ ad mortale peccatum sufficiat, teste Mol. tract. 2. tom. 3. po-

ster. disp. 695. §. in regno. Nihilominus iusta esse potest constitutio, vel consuetudo, quæ pro vno simplici etiam furto magnæ quantitatis, pœnam mortis, vel mutilationis decernit, teste Couar. & Mol. ll. cc. Claro 5. sent. §. furtum, num. 8. Multò magis si sit furto sacrilegum, de quo videri potest l. sacrilegij, & l. sacrilegi, ff. ad l. Iuliam peculatus, & l. aut facta, ff. de pœnis, vbi Claudius Saturninus in criminibus puniendis septem consideranda esse admonet, quæ sunt: *causa, persona, locus, tempus, qualitas, quantitas, euentus.* & in fine ait; *Euenit, vt eadem scelera in quibusdam provinciis grauius plectantur, vt in Africa messum incensores; in Mysia vitium; vbi metalla sunt, adulteratores moneta. Euenit quoque, vt aliquorum malefactorum supplicia exacerbentur, quoties nimirum multis personis grassantibus exemplo opus est.*

## CAP. II.

## De Rapina.

## SUMMARIUM.

- 1 Rapina est acceptio rei alienæ per vim.
- 2 Vis iniusta alia publica est, videlicet quæ armis fit: & alia priuata.
- 3 Rapina à furto specie distinguitur.
- 4 Extorquere aliquid per metum iniustum, rapina species est.

**R**apina propriè & strictè accepta definitur ex l. 1. c. 1. de vi bonorum raptorum, & c. pœnale, l. 4. c. 5. *Acceptio rei alienæ, per vim.* In qua definitione nomen rei ita accipi debet, vt personas non comprehendat: Nam raptus mulieris v.g. licet species quædam rapinæ sit; censetur tamen crimen diuersum à rapina, sicut hic pressè accipitur.

Deinde Iureconsulti volunt, rapinem esse tantum rei mobilis, puta pecuniæ, vini, vaccæ, &c. ideoque prædonem distinguere à raptore; quod raptor (quemadmodum & fur) rerum tantum mobilium sit, prædo etiam immobilium, teste Abb. c. 1. de raptor. Syluest. ver. rapina. Verum à Theologis, & in conscientia foro discrimina hæc non ita attenduntur.

Quod additur, *per vim*, distinguit rapinam à furto. Rapina enim hanc specialem malitiam in se continet, quod per eam domino videnti, remque suam seruare volenti violentia, adeoque specialis iniuria atque contemptus infertur.

Vis iniusta alia publica est, & alia priuata. Vis publica dicitur, quæ cum armis, id est, quocumque eorum quæ corpori nocere possunt, palam infertur, l. 1. l. armatos, ff. ad l. Iuliam de vi publica. Vis verò priuata, quæ sine armis, alio modo infertur, l. si quis aliquem, ff. ad l. Iuliam de vi priuata. Porro de vi publica etiam tenetur, qui ex incendio aliquid rapuerit, præter materiam lignorum, & similibus: Qui puerum, vel feminam stuprauerit: Qui hominem dolo malo incluserit, obsederit; qui ve fecerit, quominus sepeliatur: Qui fecerit, quo minus iudicia tuto exerceantur; aut Iudices, vti oportet, iudicent: item publicanus, si nouum vectigal, id est, plus, quam debeatur, nomine tributi exigat; sicuti videre est cit. tit. ff. ad l. Iuliam de vi publica.

Consentiunt ferme Doctores: Rapinam à crimine furto specie distinguere in genere moris, S. Thom. 2. 2. q. 66. a. 4. Caiet. ibid. Sotus lib. 5. de iustit. q. 37. a. 2. Less. cap. 12. dub. 2. licet dubitet Gabr. 4. d. 19. q. 3. a. 1. ante 6. notandum. Probari solet: Vbi est diuersa ratio inuoluntarij, inde oritur diuersa species iniustitiæ: Sed in



furto diuersa ratio inuoluntarij reperitur, quàm in rapina. Ergo furtum & rapina sunt diuersæ species iniustitiæ. Maior ex eo probatur, quod iniustum, siue inuoluntarium in ratione formali obiecti iniustitiæ includatur: siquidem volenti iniuria fieri non potest, sicuti notauit Arist. 5. Ethic. c. 9. Minor declaratur: Nam aliud est inuoluntarium ob ignorantiam, aliud verò est inuoluntarium ob coactionem, teste eod. Arist. 3. Eth. c. 1. Furtum autem fieri solet domino ignorante; rapina autem domino vidente ac vim patiente. Ergo, &c.

Aliter, & ad praxin magis accommodatè explicant Pet. Nau. lib. 3. c. 1. num. 19. Mol. tract. 2. tom. 3. post. disp. 683. Rapina, præter iniustitiam furti, versantem circa bona proximi, continet in se alium iniustitiæ modum siue speciem, versantem, circa proximi honorem. Nam vim alicui inferre in bonis suis, species quædam est realis contumeliæ, vt infra dicam. Quare fieri potest, vt aliquis à persona illustri rem exigam per vim auferens, venialiter tantum delinquat in genere furti; mortaliter autem in genere contumeliæ: Vel contrà, venialiter tantum in genere realis contumeliæ, si violentia notabilis non sit, neque valde repugnans dignitati personæ; mortaliter tamen in genere furti, si res non modica sit. Exemplum habes, si miles, inspiciente agricola, duas vel tres gallinas iniuste rapiat.

Denique ex dictis colligitur; Ad rapinam pertinere, 4 si quis per metum, iniuste incussum, aliquid ab altero extorqueat. Exempla sunt I. Quod latro mortis metu intentato accipit. II. Iniustæ tributorum exactiones, quæ à potentibus fiunt. III. Si publici ministri aliquid sibi postulent, quod rogati, ob metum, recusare non audent. Idque dicitur crimen concussionis, apud Richard. in 4. distinct. 25. a. 3. quæst. 2. in fine, ex S. August. de ver. Domini, sermon. 19. relato in cap. militare, 23. quæst. 1. *Quicumque sibi stipendia publice decreta consequitur, si amplius querit, tanquam calumniator & concussor Joannis sententiâ Luc. 3. condemnatur.* IV. Si alterum cogas ad inæqualem contractum tecum ineundum, arg. l. qui cætu, ff. ad l. Iuliam de vi publica.

## CAP. III.

## De tributis, &amp; vectigalibus, eorumque defraudatione.

## S V M M A R I V M.

- 1 Tributum est pensio, quæ subditis imponitur, Magistratui soluenda, vt dignitatem & onera Reipubl. sustinere possit. Tributum dividitur in ordinarium, & extraordinarium.
- 2 Ad iustitiam tributi, aut vectigalis iura requiruntur: Legitima imponens auctoritas: Causa iusta: Modus impositionis, vt secundum cuiusque facultates fiat.
- 3 Etiam qd rebus, quæ ad necessarium familiæ vsum inuehantur, vectigal status potest, vbi consuetudo obtinuit.
- 4 Tributum directè à subditis exigitur; indirectè verò, & per accidens etiam ab extraneis.
- 5 Si vectigal, aut tributum iustum existimetur, solui debet; etsi Officialis per errorem, vel similem causam non exigat: secus, si putetur iniustum, vel si de eius iustitia non immerito dubitetur.
- 6 Officiales in se exigere tributum, de quo dubitatur an iustum, parere non prohibentur: sed Consiliarij impositionem, vel auctionem tributi suadere non possunt, nisi eius iustitiam affirmatinè cognoscant.
- 7 Officiales cum pauperibus quandoque dissimulare possunt.
- 8 Si Princeps, vel Magistratus populum tributo iniusto grauet, restituendi obligationem contrahit.

**T**ributum, si latè accipiatur, significat omne id, quod Principi, vel Reipub. penditur, ad onera communia sustinenda. Qua acceptione comprehendit etiam vectigal, id est, quod pro rebus in ciuitatem, vel

provinciam inuectis, vel auctis soluitur; aliàs *portorium* appellatur, l. omnibus, Cod. de vectigalibus: A Summistis *gabella* dicitur. Ei valde similis est pensio illa, quæ Principi, vel Magistratui soluitur ex rebus venditis mobilibus, vel immobilibus, & apud Hispanos est decima pars pretij, teste Couarru. reg. peccatum, p. 2. §. 3. num. 1. Antiquitus verò erat pars octaua, sicut colligitur ex l. 2. Cod. de Eunuchis, & l. ex præstatione, C. de vectigalibus. Pedagogium verò dici solet, quod à transeuntibus, vel equitantibus soluitur pro pontis conseruatione, viæ custodia, &c.

At verò tributum, si strictè accipiatur, & quatenus à vectigali, & pedagio distinguitur, est pensio, quæ subditis imponitur, Principi, vel Magistratui soluenda, vt & statum ac dignitatem suam tueri, & communibus necessitatibus ac vtilitatibus prospicere possit. Duplex est tributum: Vnum, quod singulis capitibus siue personis imponitur, non facultatum proportionem, quod sanè constat debere esse exiguum quiddam, & ferme tantum in recognitionem domini imperatum, idque *capitatio* dici solet, l. vnic. Cod. de capitacione ciuium. Alterum est tributum frequentius vlitatum, quod, secundum propriarum facultatum æstimationem, à subditis soluitur. Idque iterum duplex est: Vnum ordinarium, quod certam, & quot annis recurrentem, ex communi lege antiqua, vel noua, præstationem continet. Alterum extraordinarium, quod propter superuenientem causam, siue necessitatem extraordinariè imperatur, & dici solet *collecta*, seu *rallia*. Omitto autem hoc loco dicere de tributis seu pensionibus merè realibus, siue quæ fundis & possessionibus ex pacto censuali, feudali, vel alio simili inhaerent; ideoque à quibusvis earum possessoribus, etsi alioquin non subditis, solui debent, sicuti dicam seq. tractat. 9. cap. 6. num. 4. & 5. Videri potest Suarez lib. 5. de legib. cap. 15.

**Q V A E S T I O P R I M A.** Quæ conditiones necessariò requisitæ sint, vt tributa & vectigalia iusta censeantur? Resp. cum Med. C. de restit. q. 13. Alphons. à Castro lib. 1. de lege pœnali, c. 9. Less. lib. 2. cap. 33. dub. 1. Tres potissimum requiri: Prima est; Vt legitima auctoritate imposita sint, iuxta cap. super quibusdam, de verb. significat. Videlicet, ab Imperatore, Rege, aut alio Magistratu in terris suis superiorem non agnoscante: item ab iis, qui à supremo Principe, vel legitime præscripta consuetudine, potestatem hanc vectigalia, & tributa imponendi consecuti sunt. Porro, qui absque legitima auctoritate in suis terris nouas gabelas imponunt, vel veteres augent; & qui tales exigunt, præter restituendi obligationem, incurrunt excommunicationem Bullæ Cœnæ, quam explicat Nauar. cap. 27. num. 61. & adde c. quanquam, de censibus in 6. Vide etiam Gabr. in 4. d. 15. q. 5. a. 3. Alphons. à Castro lib. 1. de lege pœnali, c. 10. Mol. tract. 2. tom. 3. priore, disp. 666. & Canonistas in cit. c. super quibusdam.

Cor autem vectigalis & tributi impositio inter regalia numerari debeat, iuxta lib. 2. feudor. c. 56. Quæ sint regalia; rationem affert Less. dub. 2. num. 13. Quia Principes, seu Magistratus supremi à subditis accipere debent sumptus necessarios; Proreges verò, Duces, & Gubernatores ab ipsis Principibus, à quibus constituuntur, ac dependent.

Altera conditio est: Iustitia causæ, quæ in primis est Principis sustentatio, consideratū, dignitate, ac meritis eius in Reipubl. Deinde necessitas, vel magna Reipublicæ utilitas, cui alia ratione subueniri non possit. In specie autem numeratas causas tributum imponendi legere potes apud Gabr. in 4. disput. 15. quæst. 5. a. 3. conclus. 3. S. Anton. part. 2. tit. 1. cap. 13. §. 2. Addit verò Cætan. ver. vectigalia iniqua; Necessarium quoque esse, vt vectigalia, & tributa ad eum vsum, videlicet publicum applicentur, cuius causa exiguntur: & si causa



temporaria sit, ea cessante, cesset etiam exactio: quod etiam docet Angelus ver. pedagium, §. 6. Medin. quæst. 13. Cod. de restitut. Caietan. ver. vectigalia, Less. dub. 6. num. 42. Pet. Navar. lib. 3. cap. 1. num. 255. ubi ait: Sialiter fiat, tunc necessitas publica assumitur pro forma; re ipsa vero fraus est, & rapina, pauperumque oppressio. Quod maxime locum habet in vectigalibus, & tributis novis, quorum causa, an, & qualis fuerit, cognoscitur, vel facile coniectari potest.

Sed monendi hic sumus primo: Si tributum in perpetuum impositum fuit, propter obligationem Principi incumbentem, v. g. ut mare à piratis defendat; etiam si aliquamdiu cesset piratarum incurio, nihilominus exigi posse tributum; quia paratus ille esse debet futuro tempore, si maior hostium incurio futurus est, maiores sumptus facere, sicuti notavit Molin. tom. 3. priore, disp. 667.

Secundo monendi sumus: Licet imposito tributo ob causam extraordinariam, ac temporaneam, necessitas expensarum in eo opere cesset; tamen fieri interdum posse, ut loco eius alie æquivalentes necessitates occurrant, ob quas prius illud tributum adhuc durare possit. Quamobrem, ut in hac re æqualitas servietur, non debet etiam Princeps quavis postea occurrente occasione novum tributum imponere, aut consuetum augere; si, quæ prius imposita sunt, sufficere possint ad novas sumptuum faciendorum necessitates, sicuti notat Petr. Nau. lib. 3. c. 1. num. 261. Suar. lib. 5. de legib. c. 15. num. 7. & videri potest Alphons. à Castro lib. 1. de lege penali, cap. 11.

Tertio monet Sylvest. ibid. 4. q. 3. Licet Princeps, vel Magistratus subditis tributum imponere, vel impositum augere non possit, si fiscus ad publica onera sustinenda, & Reipublicæ pericula avertenda sufficiat; non tamen censendum esse sufficere, quando Princeps non potest se defendere, aut publicum bonum procurare, nisi sita se depauperet, ut nihil remaneat, quo iuvare possit, si iterum intra breve tempus ab adversariis invaderetur: maxime si multos insidiatores habeat; tunc enim necessarius est thesaurus, eo quod adversarii id scientes, magis timent, ideoque magis pacifice vivunt. Quæ doctrina vera est, dummodo periculum rationabiliter in futurum timeatur, & non ad tegendam avaritiam prætendatur. Vide etiam, quæ pro defensione Principum, maiora interdum tributa exigentium ad debellandos hæreticos, & infideles, tradit Vasq. in moralibus, tract. de restit. c. 5. §. 3. dub. 1. & cap. 6. §. 3. num. 55.

Denique si tributum, aut vectigal antiquum sit, quod à tempore, cuius initij memoria non extet, sine murmure ac querela populi exactum fuit, præsumptio est pro iustitia causæ ac tituli; adeo, ut tamen si constet, primam imponendi causam postea mutatam fuisse, præsumendum tamen sit, aliam loco eius successisse, v. g. merita singularia Principis, quæ ipsi compensari debeant, sicuti annotavit Syl. ver. gabella, 2. q. 6. Med. cit. q. 13. §. de veteribus, Valentia tom. 3. disp. 5. q. 6. p. 5. in fine, Less. dub. 7. in fine, Mol. tom. 3. priore, disp. 674. Suarez cit. c. 15. num. 8. & sumitur ex c. super quibuldam, de verb. signif. iun. Gl. ver. non extat memoria.

Tertia conditio est: Modus siue forma tributi, ut videlicet exactio seu contributio non nimia sit, sed moderata, iuxta mensuram causæ, seu finis, ob quem contribui debet; atque secundum proportionem facultatum singulorum, ut non alij plus, alij minus grauentur, quam iustum sit. Et quod dico de exactione tributi, similiter intelligi debet de compulsionem civium ad mutuandum Principi, v. g. bellum iustum gesturo, qua de re Maior in 4. d. 15. q. 34.

3 Caietanus in sum. ver. vectigalia, præter dictas tres conditiones, aliam adfert ex parte materiæ, ut non iis

rebus vectigal imponatur, quæ ad usum necessarium familiæ alendæ, aut ruris colendæ; sed quæ negotiationis, vel simili causa invehuntur, aut evehuntur, iuxta l. univ. C. de vectigal. Verum hæc conditio, licet iuri communi conformis sit, & pluribus locis observetur; non tamen adeo necessaria est, ut contrarium iustam ob causam à Principe, seu Magistratu statui, vel consuetudine introduci non possit, sicuti contra Angelum ver. pedagium, §. 3. docet Nau. c. 17. num. 203. Syl. ver. gabella, 3. q. 5. S. Anton. 2. p. tom. 1. c. 13. prope finem, Valent. tom. 3. disp. 5. q. 6. p. 5. in fine, Less. cit. c. 13. dub. 7. Suarez lib. 5. de legibus, cap. 16. num. 3. Mol. tra. 2. tom. 3. priore, disp. 669. Excepto, si pauperes emanant aliqua, quæ præcisè necessaria sunt ad subleuandam suam vel suorum inopiam: tunc naturalis æquitas non permittit, aliquid ab iis exigi, sicuti notat P. Nau. lib. 3. c. 1. num. 236.

QVÆSTIO SECUNDA. A quibus tributa, & vectigalia iuste exigi possint? Respondeo. Directè ferme tantum à subditis. Nam tributum pendere signum subiectionis est, sicuti indicat Apost. ad Rom. 13. Datur enim Principi, siue Magistratui, ut bonum statum Reipublicæ tueri possit, quod eorum interest tantum, qui eiusdem Reipublicæ membra sunt. Veruntamen ab exteris quoque ac non subditis fieri solet exactio vectigalis, seu tributi, plerumque indirectè ac per accidens. Primo: Qui merces in regionem invehunt, coguntur vectigal solvere, quæ tamen exactio secundum effectum in subditos redundat, quibus tantò carius merces postea venduntur, sicuti annotavit Molin. tom. 3. priore, disp. 669. Secundo: Si vectigal, vel similis exactio imposita sit super vino, frumento, aliisque fructibus, & mercibus, quæ in tui regione venduntur, tum etiam extranei, seu alienigenæ (sicuti & Clerici) indirectè grauantur; ut si ibi emere velint, pari cum incolis iurevantur secundum pretium consuetum, sicuti notavit Syl. ver. immunitas, 1. in fine, Mol. loc. cit. Tertio: Exteri, qui merces ex regione evehunt, solvere coguntur gabellam, seu vectigal; partim propter ius mercimonij, seu negotiationis, quod ipsis in aliena terra conceditur: partim propter expensas pontium, viarum, & securitatis præstandæ obligationem, quæ domino loci incombit; sicuti notavit idem Sylvest. ver. gabella 3. num. 18. & 19. Ioach. Myning. cent. 5. observ. 70. Armilla ver. gabella, num. 12. ubi monet, huiusmodi vectigalia oportere esse moderata.

Eapropter docent Doctores communiter, Caiet. ver. vectigalia iniqua, prope finem, Angelus ver. pedagium, §. 6. Syl. ver. gabella, 3. num. 16. Armilla, num. 11. Sa num. 3. Less. cit. c. 33. dub. 2. num. 15. discrimen esse inter collectam, & vectigal seu gabellam: quod collecta subditis tantum indicitur, occurrente aliqua publica necessitate: qua sublata, etiam collecta tolli debet. Gabella autem siue vectigal tam ab exteris, quam à subditis exigi solet: & plerumque ordinariam ac permanentem exactiorem retinet.

Ex quo aliud discrimen nascitur, quod qualibet civitas seu Communitas habens potestatem statuta condendi, possit etiam ob iustam necessitatem, cum consilio & consensu Primorum, collectam suis subditis imponere, non petita speciali licentia ab Imperatore, aut Rege cui subest, sicuti etiam notat Vasq. in moral. de iurisdic. cap. 6. §. 1. num. 6. Non ita verò vectigal de nouo sine Principis auctoritate imponere, aut impositum augere concessum est.

QVÆSTIO TERTIA. Vtrum tributa, & vectigalia in conscientie foro soluenda sint, tamen si non exigantur; & vtrum non solventes ad restitutionem obligentur? Non pauci Doctores utrumque negant, saltem de forensibus, siue extraneis vectigal non solventibus, si non exigatur. Quorum aliqui, inter quos



Rodriguez tom. 2. sum. cap. 74. conclus. 2. eam rationem afferunt, quia alienigenæ facile ignorare possunt vectigalis impositionem. Quod sanè verum est secundum fori externi præsumptionem: quamobrem forensis, non soluens vectigal, si probabilem ignorantiam alleget, eamque iuramento confirmet, non damnatur pœna commissi, seu mercium confiscatione, sicuti ex communi notavit Gaill. lib. 1. obseruat. 48. num. 26. In foro autem pœnitentiæ interioris creditur simplici cuiusque assertioni. Alij aliam rationem adferunt; Quia lex pœnalis non obligat nisi ad pœnam, post iudicis condemnationem. Lex autem vectigalium soluendorum pœnalis est: quia Magistratus intentio esse videtur, ut negotiatores vel vectigal soluant, vel, si non soluisseprehendantur, pœnæ obnoxij sint. Ita sentit Angelus, verbo pedagium, §. 6. Tabiena eodem ver. conclus. 3. Nauar. cap. 23. num. 55. & 60. Beia part. 1. casu 13. in eandemque sententiam inclinatur Sotus lib. 3. q. 6. a. 7. in fine, Tolet. lib. 5. c. 75.

Verum ex communiore doctrina Caiet. ver. vectigalia iniqua, Medin. cit. quæst. 13. Syluest. ver. gabella, 3. num. 21. & 4. quæst. 5. Covarruv. regula peccatum, p. 2. §. 5. num. 1. Castro lib. 1. de lege pœnali c. 9. Pet. Nau. lib. 3. cap. 1. num. 229. Suar. lib. 5. de legib. cap. 18. Vasq. de reitut. cap. 6. §. 3. dub. 2. Molin. tom. 3. priore disput. 674. conclus. 1. Sairi lib. 5. clauis regiæ, cap. 16. num. 30. Less. cit. cap. 33. dub. 8. & aliorum, respondeo & dico I. Si constet, vel probabiliter præsumi debeat, vectigal, seu tributum iustum esse, eius soluendi obligatio incumbit, tamen Officialis per errorem, vel similem causam non exigant. Sumitur ex Apostolo ad Roman. 13. *Reddite omnibus debita: cui tributum, tributum: cui vectigal, vectigal.* Ratio est: Quia vectigalis, & tributorum solutio fundatur in iustitia commutativa, secundum quam Principi, siue Magistratui publica onera compensari debent ab iis, quorum gratia sustinentur: Hoc autem commune est debitis illis, quæ ex commutativa iustitia oriuntur, ut etiam si creditor per obliuionem aut errorem non exigat, nihilominus ei solui debeat.

Dico II. Si vectigal, aut tributum probabiliter existimetur iniquum; ut quia est nouiter impositum, & de eius auctoritate, titulo, aut omnimoda iustitia causa non satis constat: quia fama est & persuasio in populo, quod tributa sub prætextu alicuius necessitatis imposita, in non necessarios vsus conuertantur, vel asseruentur: tunc solutionem subterfugere, aut clandestina compensatione uti, non est illicitum: modò absit scandalum: sed & mendacium, ac periurium, quæ nunquam licita sunt. De hac assertionem vide Syluest. ver. gabella 3. quæst. 3. & 14. Sa eodem ver. num. 6. Caietan. ver. vectigalia, norando 4. Driedo lib. 2. de libert. Christiana, cap. 5. Molina tom. 3. priore, disput. 674. Qui etiam admonent, cum tot condiciones ad iustitiam vectigalis, aut tributum nouiter impositi, vel aucti requirantur, non facile in conscientia foro ad faciendam restitutionem condemnandos esse defraudantes: nisi satis constet de exactionis iustitia, ac necessitate.

Neque id displicet, quod docent idem Syluest. cit. quæst. 3. Caietan. ver. vectigalia §. occurrunt, Molin. cit. disput. 674 §. quando tributa, Less. cit. dub. 6. num. 45. Accidere posse, ut existente publico dubio de iustitia impositi tributum, aut vectigalis, Officialis licet exigant: illi autem, à quibus exactio fit, si sine mendacio possint, licet subterfugiant: Videlicet, si in vulgo sit probabilis, non certa suspicio, exactionem esse iniquam: & re diligenter examinata, non possit agnosci probabilis causa pro Principe, ob quam nouum, vel auctius tributum exigat: tunc enim subditi negare possunt: cum potior hic sit eorum, præsertim bona sua adhuc possidentium, conditio: Officialis autem seu exe-

cutores, si præceptum exigendi commodè declinare non possint, iuste exigunt: quia quamdiu non adest moralis certitudo de iniustitia causæ, præsumere possunt, quod Princeps ita præcipiens causam iustam habeat ipsis incognitam, sicuti in simili dixi de subditis in bello dubio militantibus l. 2. c. 3. c. 12. num. 8. Alia ratio est de Consiliariis, ad quos pertinet de iustitia tributum cognoscere: hi non possunt eius impositionem, vel auctionem suadere, aut Principi proponere, nisi affirmatiue cognoscant tum tributum imponendi potestatem, tum etiam causæ seu iustitiæ probabilitatem, qua de re videri potest Pet. Nau. l. 3. c. 1. num. 267. Vasq. de reitut. cap. 6. §. 3. num. 73.

His quædam addenda sunt ex Sa ver. gabella. Primò: Quod ait num. 8. Si tributum nimis durum sit, soluendum non esse, nisi exigatur. Id tamen limitari debet: Nisi quis soluere possit partem tributum, quatenus, spectata conditione & facultate personæ, atque iustitiæ causæ, iustum videtur, retinendo interim excessum. Vide Suarez lib. 5. de legib. c. 18. num. 7.

Secundò: Quod ait num. 10. Deputatos ad exigendum dissimulare posse cum pauperibus, quando ij non habent, unde soluant. Quod etiam docuit Gloss. in l. omnes pensitare, ver. compelleretur, C. de annonis & tributis, lib. 10. Abb. in c. 2. num. 22. de immunit. Eccles.

Tertio: Quod ait num. 7. ex communi sententia; Principem, seu Magistratum, qui populum nouis tributis absque necessitate grauat, obligari ad restitutionem. Quæ quidem restitutio facile fieri potest, si collecta pecunia in fisco Principis asseruetur: poterunt enim vel tributa ordinaria minui; vel extraordinaria, quæ futuro tempore propter aliquam occurrentem necessitatem exigi possent, omnino intermittere; & pecunia antè collecta ad talem usum applicari. Sin verò pecunia, tributum nomine collecta, à Principe, vel antecessoribus eius consumpta sit, tunc difficile est restitutionem facere; præterquam quod Princeps, præsertim si ipsemet non necessariis tributis populum grauauit, teneatur parcius viuere, quatenus sine dedecore status sui potest. Alioquin verò Princeps à restitutione liberatur: quare si postea accadat Rempublicam in periculum deuenire, vel ipsummet Principem non habere redditus sufficientes ad dignitatem suam tuendam; tunc obligatur populus ad nouam contributionem faciendam in commodum Reipublicæ. Eo tamen pacto, ut si postea cōtingat Principem ad meliorem fortunam reuenire, obligatus sit ad compensationem damni, quippe quod propriâ culpâ subditis suis intulit, sicuti docet Mol. tract. 2. cit. tom. 3. priore, disput. 667. & videri etiam potest S. Anton. p. 2. tit. 1. c. 13. §. 2.

## §. VNICVS.

## De subsidio charitativo.

## SUMMARIUM.

- 9 Episcopi, & similes Prelati à Clero subsidium charitativum petere possunt, ob causam necessitatis, aut magnæ utilitatis publicæ.
- 10 Si Clerici iusta de causa petunt subsidium conferre recusent, compelli possunt etiam sub censurâ excommunicationis.
- 11 Subsidium charitativum est onus adhaerens Clericis in ordine ad Ecclesiasticos redditus: quare soli beneficiarii prestare coguntur.
- 12 Capitula Collegiata & etiam Ecclesiarum Cathedralium, subsidium conferre debent.
- 13 Monasteria Regularium non obligantur ad subsidium Diocesanis Episcopis præstandum: nisi ratione Ecclesiarum, vel Capellarum habentium populum, seu curam plebis.
- 14 Episcopus subsidium charitativum remittere alicui non potest in petuum: sed ut semel, vel iterum non præsteat.



15 Immunitas à præstando subsidio per præscriptionem temporis immemoralis cum bona fide acquiri potest; præsertim si titulus præsumptus, puta fama accepti privilegij exemptionis, comitetur.

**C**um tributo similitudinem magnam gerit subsidium charitativum, quod Episcopi, & similes Prælati occurrente aliqua necessitate à Clericis petere, imò exigere solent. Igitur de eo hîc subijciam.

De charitativo subsidio mentio fit in cap. cum Apostolus, de censibus, §. prohibemus, quod sumptum est ex Lateranensi Concilio: *Sustinemus, pro multis necessitatibus, quæ aliquoties superveniunt, ut si manifesta ac rationabilis causa extiterit, cum charitate moderatum ab eis (subditis) valeant auxilium postulare.* Et in cap. conquerente, de officio Ordinarij, ubi Honorius III. *Non amplius exigas (ab Ecclesiis & Capellis Monasterij) prætermoderatum auxilium, quod iuxta formam Lateranensis Concilij, si manifesta, & rationabilis causa extiterit, cum charitate postulandum; sicuti ab alijs Ecclesijs eiusdem diocesis, pro necessitate temporis.*

9 Ex istis responsis colligitur primò: Quinam charitativum subsidium petendi ius habeant: Videlicet Episcopi, & qui similem Episcopali iurisdictionem, ac diocesin obtinent. qua de re videri potest Barthol. Bellencinus de charitat. subsidio, quæst. 1. & duabus seqq.

Colligitur secundò: Quòd causa petendi debeat esse publicæ necessitatis, aut magnæ utilitatis, eaque manifesta: qualis est v. g. ut gravia onera debitorum solvantur; ut Ecclesia contra hostes defendatur: Item si multis opus sit sumptibus pro Ecclesiæ fabrica, professione ad Concilium. Vide Remig. Gonniij de charitat. subsidio quæst. 5. Bartholom. Bellencin. quæst. 16. Azor tom. 2. lib. 9. cap. 14. quæst. 4. Quod verò Bellencinus ibidem ait: Si Episcopus propria culpa in necessitatem, v. g. gravia debita incidat, non esse illi contribuendum à clero; quia suæ culpæ imputare debeat; id ego intelligo, ut non tam facilè illi contribuatur. Si autè gravis, & manifesta necessitas sit, debent mēbra reliqua Capituli suo nihilominus subuenire, sicuti in simili dixi cap. præcedenti in fine. Porro, si dubium sit inter Episcopum & Clerum de causæ æquitate, recurrendum est ad Superiorem, secundum Gloss. in cit. c. cum Apostolus, ver rationabilis. Vel arbitri partium consensu statuendi, sicuti docet Bellencinus quæst. 17. Azor cit. q. 4.

Colligitur tertio: Subsidium istud charitativum, (ideo sic dictum, quia proficiscitur ex charitatis & unionis vinculo, quod inter Episcopum & Clerum intercedit) peti oportere moderatum; ita ut Ecclesiæ & Clerici non nimis grauentur. Sin verò hoc ipsum ob iustam causam petitum, præstare Clerici recusent, compelli possunt, etiam excommunicationis censura, sicuti colligitur ex iuribus initio citatis, & docet Innocentius in cit. cap. cum Apostolus Bellenc. qu. 15. Gonniij quæst. 8. Azor tom. 2. lib. 11. cap. 14. quæst. 2. Quia in tali casu, aiunt illi; *Si deficit charitas, valere debet potestas.*

Colligitur quartò: Si Ecclesia sita in vna diocesi habeat prædia & redditus suos in altera diocesi, solui debet subsidium charitativum Episcopo eius diocesis, ubi Ecclesia est. Ita sumitur ex cit. cap. conquerente, & tradit Bellenc. qu. 35. Gonniij quæst. 25. & seqq. Quia subsidium charitativum non est onus reale adhærens prædio, qualia solent esse tributa agrorum; sed est onus adhærens personæ in ordine ad prædia, seu redditus Ecclesiasticos.

Colligitur quintò: A quibus subsidium charitativum

postulari possit; Videlicet à Clericis Episcopo subiectis, qui beneficia obtinent. Est enim onus huius subsidij præstandi mixtum, annexum personis in ordine ad beneficia, siue Ecclesias, ex quibus redditus Ecclesiasticos percipiunt, sicuti notavit idem Gonniij quæst. 25. Quare si Clericus in diocesi nullos Ecclesiasticos redditus habeat, etsi bona alia patrimonialia, vel quasi patrimonialia abunde obtineat, nihil contribuere tenetur, teste eodem Gonniij quæst. 40. & 41. Bellenc. qu. 37. num. 23. Si autem beneficium pensionem gravatum est, pensionarius pro rata soluere tenetur; nisi pensio assignata sit libera ab oneribus & contributionibus, sicuti plerumque assignari solet, & Azor loco cit. notavit.

De Capitulis Collegiatis Ecclesiarum secularium, nemò dubitat, quin ad subsidium charitativum teneantur, & colligitur apertè ex extraneis. vas electionis, prope finem, ver. eorūque Capitulis: sed & Canonicos Ecclesiæ Cathedralis, spectato communi iure, ad subsidium Episcopo præstandum obligari, Doctores affirmant communiter, Hostiensis in cap. ut præteritæ, de elect. Barthol. Bellencinus quæst. 27. Remigius de Gonniij quæst. 38. qui allegat etiam Antoninum in cit. c. ut præteritæ: *Quòd hoc potissimum Canonicos Cathedralis tangit, quippe magis Episcopo unitos.*

Quod verò attinet ad Monasteria, & Ecclesias Regularium dicendum est cum eodem Bellenc. q. 29. Gonniij quæst. 20. Ea ad subsidium Episcopo diocesano præstandum, spectato communi iure, non obligari, nisi ratione Ecclesiarum vel Capellarum habentium populum. Ratio est: Quia subsidium charitativum est de le diocesana, secundum Innocent. in cap. 1. de statu Monachorum. Monasteria autem Regularium exempta sunt à lege diocesana Episcopi, tametsi subdita sint legi iurisdictionis, de quo vide Gloss. in cap. dilectus, de offic. Ordinarij. At verò comparatione Ecclesiarum, quibus cura populi incumbit, censetur esse de lege diocesana; ideoque ratione earum contribuere tenentur, sicuti colligitur ex cit. cap. conquerente. Quin imò docent Bellenc. quæst. 29. & 32. Gonniij quæst. 22. Azor quæst. 6. quòd Ecclesiæ Collegiatæ tam seculares, quàm regulares, quamvis alioquin exemptæ sint à iurisdictione Episcopali, nihilominus Episcopo diocesis conferre debeant subsidium charitativum, ratione Ecclesiarum, vel Capellarum habentium populum, siue curam plebis, vel quæ aliquando huic oneri subiectæ, postea Ecclesiæ, vel Monasterij exempto unitæ seu incorporatæ fuerunt: Quia nunquam præsumitur, quòd talis unio facta fuerit cum præiudicio iurium Episcopaliū. Potest tamen Episcopus, adhibito Capituli consilio & consensu, componere cum Monasterijs, alijsve Ecclesijs, de certo aliquo præstando ratione eiusmodi onerum, sicuti annotavit Bellenc. q. 48.

14 Sed utrum Episcopus omnino remittere possit, maior est difficultas. Communior est Doctorum responsio in cap. cum venerabilis, de censibus, Bellenc. quæst. 47. Azor cit. cap. 14. quæst. 7. Quòd in totum remittere non possit: quia talis renuntiatio cederet in detrimentum Ecclesiæ, aliorūque gravamen: nisi Papa ex plenitudine potestatis talem exemptionem confirmet. Potest tamen Episcopus ob iustam causam semel atque iterum remittere: quia tunc proprio tantum commodo renuntiat, quod facere non prohibetur. Quin imò Clericis, qui pauperes sunt, ut vix sufficientem victum & vestitum ex beneficio habeant, secundum æquitatem remittere debet, teste Bellenc. q. 30. Azor quæst. 6.

RESTAT QVÆSTIO. Vtrum contra subsidium charitativum temporis diuturnitate præscribi possit



## DE INIVSTO FORTVNARVM DAMNO.

81

Negant Hostiensis, Abbas, & alij in c. cum Apostolus, de censibus, Bellencinus q. 50. Gonnij q. 28. Azor cit. c. 14. q. 7. Probat I. Quia hoc esset præscribere contra charitatem; quare præscriptio non haberet iustam causam, ac fomentum. II. Quia etiam contra tributa, & similes functiones publicas præscriptio non procedit, sicuti habetur in l. comperit, C. de præscript. xxx. annorum, & docet Gl. communiter recepta in c. cum non liceat, de præscript. III. Quia præscriptio locum non habet in iis quæ meræ facultatis sunt: positum autem est in mero arbitratu Episcopi, vtrum charitativum subsidium exigere velit.

Sed hæ rationes convincere non videntur, si loquamur de præscriptione temporis immemorialis. Ad primum respondetur; Non esse contra charitatem, aut rectæ rationis dictamen, quod particularis aliqua Ecclesia à communibus aliis oneribus eximatur; seu per privilegium summi Pontificis, seu per aliquam compositionem, aut commutationem cum Episcopo factam, vt supra dictum est, quo simili modo Princeps, saltem ob causam, ad bonum publicum pertinentem, aliquos subditos eximere potest à communi tributorum onere; siue per privilegium in remunerationem meritorum, siue per aliquam compositionem, venditionem, sicuti docet Molin. disput. 673. cit. tom. 3. prior. Constat verò, quicquid per privilegium, vel alium concessionis modum obtineri potest, idem etiam per præscriptionem temporis immemorialis: Ergo tanto tempore cum bona fide vsucapi potest immunitas à subsidio charitativo, vel tributo præstando; præsertim si etiam comitetur fama privilegij, alterius concessionis olim factæ. Ex quo patet etiam resp. ad secundum: Licet tempore ordinario contra tributa præscriptio non procedat: posse tamen præscribi immunitatem tempore immemoriali, præsertim cum fama alicuius privilegij, adeoque cum titulo præsumpto. Ad tertium respondeo: Verissimum esse illud dictum; Quod donatio, & omnis gratuita præstatio, aut remissio, quancunque tempore ita continetur, nunquam alteri ius tribuat præscriptionis. Verum, si diuturno tempore præstatio aliqua, vel remissio continuetur, nisi ex circumstantiis appareat, à gratuita voluntate procedere, in dubio præsumitur potius ex obligatione, siue debito proficisci: quia nemo facile sua bona iactare, & indebita effundere censetur, iuxta l. cum de indebito, ff. de probat. Quamobrem si in nostro casu Episcopus ab aliis Ecclesiis subsidium charitativum sæpius exegit; ab una autem per temporis immemorialis spatium nunquam exigere solitus fuit; præsumitur id egisse non ex gratuita voluntate, sed quia propter præcedentem aliquam compositionem, aut privilegium ius exigendi non habuerit. Vide quæ dicta sunt supra tract. 1. c. 8. n. 8.

### CAP. IV.

#### De crimine falsi.

#### SUMMARIVM.

- 1 Ad crimen falsi tria requiruntur: Veritatis immutatio, Dolus operantis, Damnum alterius notabile.
- 2 Crimen falsi variis modis committi potest.
- 3 Non est licitum amisso legitimo instrumento, aliud simile confingere.
- 4 Literas laceratas, & in publicum abiectas quislibet colligere, & legere, earumque notitia in suum commodum uti potest.

1 Crimen falsi est perversio veritatis, cum dolo, & alterius iactura. Triagitur ad hoc crimen requiruntur,

tur, sicut post Hostiensem, notavit Syl. ver. falsarius, n. 1. Gregor. Tholos. lib. 36. Syntag. cap. 1. n. 6. I. est Veritatis immutatio. II. Dolus operantis. III. Vt alteri inde damnum proveniat.

Crimen falsi variis modis committitur, vt videre est in tit. ff. & Cod. Ad l. Corneliam, de falsis. Primum crimen falsi committit, qui monetam publicam adulterat, vel sine legitima auctoritate cudit de quo dicam §. seq.

Secundo, Qui testamentum, codicillum, aliudve instrumentum vel scripturam immutat, supprimit, lacerat, iuxta l. 1. & seqq. l. quid sit, ff. eod. l. 3. Cod. eod. & docent Nau. c. 17. n. 168. Tholos. cap. 5. Mol. tr. 2. r. 3. poster. 700. Clarus lib. 5. sent. §. falsum, n. 16. P. Nau. lib. 3. c. 1. n. 338.

Tertio, Qui alienas literas dolose aperit, ac legit, cum alterius iniuria, vel damno iniusto. Quia de re Gl. in c. cum olim 2. de offic. de legati, Nau. c. penult. d. 6. de poenit. Syl. q. 1. P. Nau. n. 340. Mol. tr. 4. disp. 36. Existimant tamen Innoc. & Abb. n. 4. cit. c. cum olim, Rosella ver. falsitas, n. 5. si quis dolose aperiat literas priuatas, nisi aduersario illius ostendat, non puniri poena falsi; sed alia arbitraria: quia id speciale est in aperiendo testamentum clausum, vt falsi crimine teneatur, l. qui testamentum, ff. eod. Deinde dixi, si literæ dolose aperiuntur: interdum autem iusta est aperiendi causa, etiam inuito eo, ad quem mittuntur: puta si id fiat iure belli, aut iustæ defensionis causa contra inimicum insidias molientem, sicuti notavit Nauar. c. 18. n. 53. Vel si Prælati, paterfamilias, &c. suspicentur aliquid mali patrandi in literis contineri: vel si Religionis statutum, aut consuetudo licentiam aperiendi literas Regulæ Prælati tribuat.

Quarto, Venditores, qui falsis ponderibus, vel mensuris vtuntur, l. penult. ff. ad l. Corneliam de falsis. Vel materiam adulterinam minus utilem mercibus admiscunt: quæ de re Abb. in c. 2. de vendit. Nau. n. 109. Mol. disp. 701.

Quinto, Qui alienum partum alicui supponit, l. 30. ff. eodem.

Sexto, Qui falsum profert testimonium; falsum testimonium in iudicium producit, c. 1. de crimine falsi. Qui Iudicem corrumpit; Aduocatus, qui parti aduersariæ causam prodat, l. 1. ff. eod.

Septimo, Qui signum adulterinum fecerit, vel sculperit, l. 30. ff. eod. Qui alienum chirographum imitatus fuerit, l. quid sit, ff. eod. Et qui rationes, tabulas, vel instrumentum aliquod rasura falsarit, aut signum amouerit, l. 1. ff. eod. Si tamen rasura fiat in loco instrumenti non suspecto, vt veritas nihilominus appareat; non ideo instrumentum vitiatum censetur, c. ex literis, de fide instrumentorum, & videri potest Rosella ver. falsitas, n. 4.

Octauo, Qui proposita edicta dolo malo corrumpit, l. penult. ff. eod. Poena pro crimine falsi olim homini libero decreta erat deportatio in perpetuum, cum confiscatione bonorum, l. 1. §. ult. ff. eod. Hodie autem est arbitraria, teste Claro §. sent. §. falsum, n. 31. Deinde in conscientia foro, (quemadmodum & in externo) resarcienda sunt omnia damna, quæ occasione commissi falsi alteri acciderunt, cuius oppositum non rectè docuit Clarus n. 14. agens de teste falsum testimonium dicente: quod in conscientia foro non tenetur, nisi de falso testimonio, non autem de damno ex illo subsequente. Denique falsificans literas Papales excommunicationem incurrit ipsi Papæ reseruatam, c. ad falsariorum, de crimine falsi & excommun. sexta Bullæ Cænæ Domini.

9 QVÆSTIO PRIMA. Vtrum licitum sit, amissa scriptura de hereditate, nobilitate, debito, &c. similem confingere? Vel conuento de pecunia v.g. mutuo accepta, quam legitimè soluerat, factæ solutionis falsum in-



strumentum producere? Videtur enim id licitum esse: quia nemini ea re iniuria infertur. Respondeo tamen cum Couar. 1. resol. ca. 2. n. 3. Sa ver. falsarius, n. 2. Non esse id licitum. Nam huiusmodi falsationes Reipub. perniciosae esse solent: quamobrem legibus seuerè prohibentur: & eam prohibitio iusta sit, in conscientia obligat. Ad rationem in contrarium dico: Quamuis per huiusmodi falsationem non violetur particularis iustitia, quia nemini ius suum læditur: quamobrem neque restituendi obligatio aliqua contrahitur; peccatur tamen contra veritatis virtutem, & quidem cum Reipublica pernicie, vt dixi.

4. QVAESTIO SECVNDA. Si aliquis literas quas maxime sua interest secretas esse, laceratas in publicum abiciat; alius verò superueniat, & collectis literarum fragmentis, eas legat, vtrum peccet? Cuiusmodi casum testatur Syl. ver. emptio, q. 17. Venetiis accidisse. Mercator acceptas literas ab Oriente de superuentura penuria & caritate aromatum, laceravit, & abiecit. has deinde collegit alius mercator, illumque praeuenit, & copiam aromatum emendo, lucrum praeipuit: quaeritur, vtrum iniuriam illi fecerit? Affirmat Rebell. p. 2. lib. 9. q. 7. n. 9. Sed rectius cum Archidiacono negat loco cit. Syl. Cum enim mercator ille literas laceratas in publicum abiecit, & velut pro derelictis habuit, hoc ipso omnibus fragmentorum illorum potestatem ac vsum fecisse censetur: vt proinde quisque in suum commodum iis vti poterit. Igitur rectè resoluit ibid. Syl. *Siquis literas in publicum locum abiectas legit, solum vt sciat, curiositas est: si vt sibi provideat, commodisque suis studeat, humana, non vitiosa prudentia est.*

Interdum tamen lex charitatis obligat, vt qui ex literis ita in publicum abiectis secretum aliquod cognouit, illud aliis non manifestet, cum damno literas abijcientis. Quin imò reuelans eiusmodi secretum, cuius notitiam etiam iuste acquisiuit, contra iustitiam peccabit, si intelligat, audientes ea notitia vsuros ad damnum iniustum inferendum: quemadmodum si Titio hominem quaerenti ad necem iniustam tu domum ostendas, in qua latitat, homicidij cooperator censeberis, sicuti docet etiam Molina tract. 4. disput. 3.

## CAP. V.

## De monetæ falsatione, ac mutatione.

## SUMMARIUM.

1. Numus publica lege constitutus fuit, vt rerum omnium, quibus indigemus, aestimatio esset.
2. Numus, vt legitimus ac iustus sit, requirit materiam, & pondus metalli, sicuti signum ipsi impressum indicat.
3. Numi seu pecunie valor est aestimatio alia intrinseca ac veluti substantialis est, alia verò extrinseca, & imposititia: quæ, vt vera ac iusta sit, intrinseca correspondere debet.
4. Triæ ad iustitiam cuse monetæ requiruntur: Legitima euidendi auctoritas; materia bonitas, seu integritas; iustum materia pondus, sicuti impressum signum demonstrat.
5. Pecuniarum falsatio pluribus modis contingit.
6. Ius monetam euidendi inter regalia numeratur: quare illud tanquam speciale privilegium Ducibus, Comitibus, Cinitatibus concessum, vendi, vel aliter alienari non potest: quamuis vsus est commoditas ad tempus alteri elocari possit: Eademque ratio est de iure veltigalium.
7. Princeps mutationem monetarum facere non potest, absque consensu Communitatis, vel saltem potioris eius partis: excepto casu publicæ, ac manifeste necessitatis.
8. Ingens incommodum ex monetarum, præsertim intrinseca mutatione, provenire solet: vt, consideratis omnibus, plerumque etiam ipsum Reipub. caput plus inde damni accipiat, quamuis una aliqua ra-

tione in ipsas commodum mutatio cessura videatur.

9. Grauius peccat Princeps, seu Magistratus, si ob commodum suum, & absque publica necessitate, monetarum mutationem introducat.
10. Mutatio pecunie alia intrinseca tantum est; alia tantum extrinseca; alia tum intrinseca, tum extrinseca.
11. Interdum in obligationem venit certa pecunia species; interdum verò pecunia incerta, ac indeterminata. Item species pecunie vel inferitur causa demonstrationis tantum; vel causa aestimationis tantum: vel causa utriusque.
12. Si moneta mutata sit tam intrinseca bonitate, quam extrinseca valore, tum alia pecunie species efficitur, quamuis nomine cum priore moneta conveniat: quare noui numi pro veteribus, qui in obligationem venerunt, solui non debent.
13. Si moneta species certo numero in pactionem vel promissionem deducatur, superueniens earum mutatio extrinseca creditoris commodo, vel incommodo accidit.
14. Qui certam speciem, vel materiam pecunie promittit, aliam, quamvis extrinsece æquivalentem, inuito creditori soluere non potest: nisi promissa pecunia species perierit, aut acquiri nequeat; vel nisi ostendatur, nihil interesse creditoris, num in hac, an altera moneta debitum recipiat.
15. Si nulla facta designatione speciei, aut facta quidem, sed numero incerto, quantitas pecuniaria in obligationem deducatur; & postea extrinseca monetarum mutatio accidat, ea commodo, vel incommodo debitoris accidit: quia tanti pauciores, vel plures numos soluere cogitur.
16. Extrinsece seu imposititiæ valoris mutatio in solutionibus debitorum antiquorum attendenda non est his casibus: I. Si auctio, vel diminutio extrinseca facta est non per legitimam potestatem. II. Si mutatio valoris constituta est publica quidem lege, sed non vti stabiliter ac perpetuo duratura. III. Si notabilis auctio extrinseca monetarum introducta est propter intrinsecam diminutionem seu depravationem aliarum minutorum pecuniarum.
17. Merè extrinseca auctio monetarum legitima est, & stabili nunquam constitui potest, ita vt sit magna ac valde notabilis.
18. Si valor monetarum extrinsecus crescat in manu depositarii, administratoris, aut cuiuscunque possessoris, ordinari tale augmentum non ad ipsum, sed ad dominium pecuniarum spectat.
19. Si mutatio monetarum facta est in bonitate intrinseca, videl. in materia, aut pondere, attendendum est tempus contractus, non solutionis: id est, debita pecuniaria soluenda sunt secundum bonitatem monetarum, habuerunt tempore contractus, non solutionis.
20. Promittens, aut legans pecunias censetur intelligere de talibus, quales videntur tempore dispositionis, aut promissionis.
21. Pro bona moneta mutuo data, non tenetur creditor aliam intrinsece deteriorem recipere.
22. Si intrinseca imminutio monetarum, & consequenter extrinseca auctio aliarum bonarum pecuniarum modica sit, eius mutationis consideratio nulla esse debet: secus, si immodica, & valde notabilis.
23. Qui ante annos XXV. mutuo accepit thalerum Imperialem valentem XVII. parios, non videtur satisfacere, si iam soluat parios XVIII. qui intrinsece multo deteriores sunt.
24. Magnus seu immodicus extrinseca taxationis excessus supra iustum valorem intrinsecum monetarum, tanquam stabiliter duraturus, constitui, aut introduci non potest; nisi dururnitate ac perpetuitate temporis.
25. Si valde enormis, præsertim vt non duratura, monetarum intrinseca depravatio fiat, & quod inde consequens est, bonarum monetarum valor extrinsecus augeatur, extra controuersiam est apud Doctores, in antiquis soluendis debitis spectandum esse intrinsecum valorem monetarum, quem habuerunt tempore contractus, idèque veteres, non novos adulterinos numos soluendos esse.
26. Si imposititiæ valor monetarum enormiter excedens valorem, ac bonitatem intrinsecam, diminuat, & ad normam veritatis redigatur; consequenter etiam bonarum monetarum extrinsecus valor comparatione depravatarum decessat; extra controuersiam est apud Doctores, solutionem debitorum faciendam esse secundum valorem intrinsecum, quem habuerunt tempore contractus, idèque vtiatos florenos v. g. quales dati sunt; non autem novos intrinsece multum meliores soluendos esse.
27. Si nihil specialiter expressum fuit, contractus quilibet censetur institutus secundum naturales condiciones eius. Condiciones contractuum, quæ naturæ insunt, expressione non indigent.
28. Etsi contrahens existimet plus se obligari, quam secundum contractus naturam obligatur: si tamen plus exterius non promittat, error ipsi suus obesse non debet.
29. Creditor curiosus esse non debet, in quam rem seu utilitatem debitoris pecunia ipsi credita vertatur. Non ideo pecunia, vel merè plus aestimari debet, quod illa mutatio, hæc emptio, seu ob eius industriam, seu fortunam, & quamvis extrinsecam causam, utilis futura sit.
30. Lucrum cessans, vel damnum emergens mutuatori refarciendum non est, nisi in pactum expressè, vel tacite deducatur.



*Indices inferiores secundum leges, non secundum æquum & bonum, si-  
cuti ipsis videtur, indicare debent: cum in eis, & æquitatem  
interposita interpretatio soli Principi reservata sit.*

**N**otandum est primò ex Aristotele lib. 5. Eth. cap. 5. & Paulo I.C. in l. 1. ff. de contrah. empr. Quòd numus hominum impositione ac lege propter necessitatem introductus fuit, ut esset rerum omnium, quibus indigemus, certa æstimatione. Electa autem est materia metalli, videl. aurum, argentum, æs, quæ olim rudi & non signata massa appendebantur: postea verò ad subleuandum libræ laborem signabantur, impressa pecudis figura, unde & pecunia dicta fuit, uti videre licet apud Aristotelem l. 1. Polit. cap. 6. Succedentibus verò temporibus, consuetudo obtinuit (quæ & nunc viget) ut ad augendam publicam numi auctoritatem, omnemque fraudis tollendam suspicionem, Principis imagine numus signaretur, uti constat ex l. ult. C. de veter. numis. potest. lib. 11. ubi capitali supplicio afficiendus dicitur, qui *eternales vultus Imperatorum fraudibus duxerit violare*. Et Cassiodorus lib. 7. variatum, c. 32. *Omnino moneta debet integritas quæri, ubi & vultus noster imprimitur, & generalis utilitas inuenitur. Quid enim erit tutum, si in nostra peccetur effigie?* Quin etiam apud Christianos non rarò nomen Domini, aut alicuius Sancti, vel Crucis figura imprimitur, ut sit in testimonium veritatis moneta, secundum materiam, & pondus, ait Nicolaus Oresmius Lexouienſis Episcopus Caroli V. Francorum Regis Præceptor, in lib. de mutat. monetarum, c. 13. to. 8. Bibl. SS. Patrum.

Notandum secundò ex eodem Paulo in cit. l. 1. Quòd pecunia seu numus publica auctoritate cusus, vim vsumque in commutationibus non tantum habet ex substantia materiæ, sed magis etiam ex quantitate æstimationis, lege publica impositæ: Si enim substantiam auri, vel argenti absolute spectes, nondum habet rationem pretij, sed potius mercis: quare ut pretij rationem consequatur, ad res alias æstimandas, emendasque idonei, publicæ æstimationis quantitate indiget: hæc igitur est vltima forma pecuniæ constituens. Veruntamen fundamentum iusti numi est metalli bonitas, & pondus: hæc enim ab impressa publicæ æstimationis figura significantur: cui signo nisi intrinseca materiæ bonitas respondeat, falsus numus erit, uti aperte colligitur ex l. 1. C. de veteris numismatis potestate, lib. 11. ubi Imp. Valentinianus & Valens, Solidos veterum Principum veneratione formatos ita tradi, ac suscipi iubent; *modo debiti ponderis sint, & speciei metalli probæ*. Eademque doctrina satis indicatur in cit. l. 1. ff. de contrah. empr. ibi: *Electa est materia, cuius publica ac perpetua æstimatione difficultatibus permutationum æqualitate quantitatis subueniret*. Atqui nec æqua, nec perpetua, consequenter nec publica lege constituta æstimatione esse posset, nisi ad veritatem numi præcipue requireretur materiæ bonitas, ac iustum pondus, uti dixi in 1. notan. & mox clariùs explicabo.

Notandum est tertio. Quòd intrinsecus valor monetae partim sumitur ex metalli raritate, & naturalibus proprietatibus, v.g. auri, vel argenti puritate, ductilitate, &c. partim verò ex communi hominum apprehensione & affectione. Verum ut numus, seu moneta utilitatem suam habeat, ob quam instituta est, videlicet ad subueniendum necessitatibus commutationum ac commerciorum, spectari debet intrinsecus eius valor non secundum priuam aliquorum, aut vnius alicuius provincie, vel regionis; sed aliarum etiam gentium quibuscum commercium seu negatiatio est, quasi communiter receptam persuasionem, æstimationemue, uti bene annotauit Anton. Faber de variis numariorum debitor. solut. cap. 1. n. 32. & c. 2. l. n. 4. Fingamus enim, in vna provincia thaleri, aut ducati pondus diminui, vel ad-

mixtione deterioris metalli vitari, manente eadem extrinseca, seu per edictum imposita estimatione, ut videl. tantundem valeat, quantum alius ponderosior, aut purior materiæ thalerus, ducatus in aliis non longè distantibus regionibus communiter valere solet; manifestum est, commerciorum facultatem, quin & mutuam societatem, atque ex vna in alteram regionem transeundi facilitatem impeditum iri: ut proinde talis priuata potius, quam publica vnius regionis, aut etiam nationis, numorum æstimatione, diuturna esse non possit, neque publica lege constitui, sed solum edicto aliquo ad tempus propter occurrentem necessitatem.

Notandum quartò. Præter valorem seu æstimationem monetae intrinsecam, alia à Doctoribus assignatur extrinseca, seu imposita, quæ & variari solet hominum, præsertim Magistratus publici, auctoritate. Quæ extrinseca æstimatione accessoria censeretur debet intrinseca, eique correspondere, vel saltem non multum ab ea distare: modica autem diuersitas in considerationem non venit. Sin verò extrinseca æstimatione multum discrepet, iniusta erit, saltem materialiter: quare supra dixi, diuturnam esse non posse, cum sit noxia Reipubl. Nisi quòd propter occurrentem necessitatem ad tempus tolerari queat.

Exinde colligitur primò; Ad iustitiam causæ monetae seu pecuniæ tria omnino requiri, secundum Gl. in c. quantò, ver. patris, de iureiur. Syl. ver. falsarius, q. 7. P. Nau. lib. 3. de restit. c. 1. n. 316. Primum est, legitima cudendi auctoritas, quam etiam signum impressum indicat. Nam monetam cudere ex Regalibus vnum est, uti constat ex lib. 2. Feudorum, c. 56. Quæ sint regalia, & l. 2. C. de falsa moneta, ubi mortis supplicium decernitur iis, qui monetam priuata fusione formârint, tanquam læsæ maiestatis crimine obnoxii. Cum enim numus propter publicam utilitatem ac necessitatem institutus sit, non nisi eius auctoritate prodire debet, qui totius Communitatis curam gerit: nam alioquin innumeræ fraudes & incommoda sequi poterunt: qua de re Oresmius c. 5. & 6. Veruntamen ius cudendi monetam aliis etiam, præter supremum Principem, sicuti & alia regalia, competere solent, seu ex priuilegij concessione, seu ex legitime præscripta consuetudine, uti annotauit Pet. Greg. Thololanus lib. 36. Syntag. cap. 2. n. 25.

Alterum est materiæ bonitas, seu integritas: non quòd numus suapte natura certam materiam requirat; sed ex hypothesi, quatenus aureus numus esse debet, nihil argenti; quatenus argenteus esse debet, nihil æris admixtum habeat.

Tertium est iustum pondus materiæ, sicuti signum numi indicat: quia, ut supra ex Aristot. dictum, tale signum ideo in numis ponitur, ut mensurare opus non sit.

Aduerte tamen hoc loco, quòd ipsa formatio & signi publici impressio valorem numi intrinsecum aliquantulum augeat, sicuti docent Innoc. in cit. c. quantò, Abb. ibid. n. 10. de iureiur. Couar. in collat. veter. numis. c. 7. n. 1. P. Nau. lib. 3. c. 1. n. 331. Ant. Faber cit. c. 1. n. 62. contra Gl. in l. 1. ver. præbet, ff. de contrah. empr. Bartol. in l. 2. §. 1. ff. si certum petetur, ubi aiunt; quòd numus non plus valere debet, quam ipsa rudis massa metalli. Sed quod dixi, communi, eaque iusta consuetudine obseruatur, ut Princeps seu Magistratus deducat in primis æstimationem laboris, ac impendiorum: deinde modicum quippiam pro publico signo, ex quo pecuniæ vim ac dignitatem accipiunt, detrahare iniquum non æstimatur: etsi id non vbique consuetum sit.

Colligitur secundò, quibus modis falsatio, seu falsi crimen circa monetas accidere possit: I. Si quis monetam cudat tali potestate non præditus. Ita significatur in l. 2. & 3. C. de falsa moneta, & docet S. Aug. lib. 2.



contra Parmenianum, c. 13, relatus in c. quod quidam i. q. 1. §. si enim aliqui, Couar. de collat. veterum numismat. cap. 8. n. 3. ver. Is verò. Mol. tr. 2. to. 3. poster. disp. 702. P. Nau. cit. n. 317. Iacob. Menoch. de arbitr. Iudicum qq. casu 316. Nam tale hominis factum falsationem continet, dolum, & iacturam Principis; quippe cuiusius usurpatur, efficiturque, ut eius monetæ non tanto numero expendantur. Quamobrem eiusmodi falsarius etiam ad restitutionem obligatur Principi, vel Monetario eius faciendam: licet contrarium senserit Syl. cit. q. 7. & Nau. c. 17. man. n. 167.

II. Qui falsam monetam eudit; videl. pondere iniquo, vel materia adulterina, sicuti colligitur ex c. quanto, de iureiur. & l. 3. C. de veter. numismat. collat. & docet Syl. cit. ver. falsarius q. 6. Gabr. in 4. d. 15. tota q. 9. Clarus lib. 5. sentent. §. falsum, n. 37. Pet. Nauar. cit. c. 1. n. 311. Mart. Nauar. l. c.

III. Qui de iusto pondere monetæ detrahit abscondendo, redendo, sicuti constat ex l. Quicunque, ff. ad Legem Corneliam de falsis, & ex communi docet Angelus ver. falsarius, §. 8. Syl. q. 8. Sed quid si de monetis illis aliquid detrahatur, quæ iustum pondus excedunt? Respondeo, Si id publica auctoritate à Monetariis fiat, non videtur reprehendi posse; quamvis, si aliqui numi minus iusto contineant, æquum omnino est, ut alij, plus iusto continentes relinquuntur: cum alioquin Communitas damnum passura sit. Sin verò priuatus quispiam de numis plus iusti ponderis habentibus detrahat, ait Syl. falsarium non esse, idemque sentit P. Nau. n. 325. Sed mihi verisimile apparet, talem ut fraudatorem ac falsarium puniri posse: quia monetæ publice priuata auctoritate detrahit, cum damno Communitatis: quod etiam visum fuit Iac. Menochio cit. casu 316. n. 38. Existimat tamen Angel. cit. §. 8. Tales, licet moniti à Confessione abstinere nolint, (quia putant id non esse iniustum, si de monetæ iusto pondere nihil dematur) absolui posse; quod non satis manifestò appareat, eos mortaliter peccare.

Simile dubium est; Vtrum illi contra iustitiam peccent, qui meliores, aut ponderosiores numos seligunt, eosque constant, vel cambiando lucrantur; alios verò expendunt? Eodem modo, sicuti ad prius, respondent Angelus cit. §. 8. & Gabr. in 4. d. 15. q. 9. a. 3. dub. 3. Adr. in 4. de reitut. vbi de usuris, §. Queritur anne licet. Sed mihi alia de his ratio esse videtur: quandoquidem monetam publicam non preuerrunt, aut permutant; sed cum singulorum numorum domini existant, eorum alios arbitrarij suo expendunt, alios verò retinent, constant &c. Nullus autem videtur dolofacere, qui iure suo utitur, regula ff. 55.

IV. Qui adulterinæ materiæ numos, puta stanneos, plumbeos tingunt, seu colorant, ut appareant aurei, argentei, falsi crimen committunt, sicuti colligitur ex l. quicunque, ff. Ad l. Corneliam, de falsis, & docent Abbas in cit. c. quanto, n. 4. Couar. cit. c. 8. n. 5. Sed quid si monetæ publica auctoritate cudantur, admixto v. g. cupro, illudque temporis successu in aliquibus appareat, ut à mercatoribus egrè accipiantur; vtrum grauius peccare censendi sint, qui tales numos argento vino, aut sale madefacto illinunt, ut albiore, purioresque videantur? Non ausus sum tales damnare, si monetæ, ut prius, publicam auctoritatem in eo regno habeant, & per eiusmodi tincturam deteriores non efficiantur.

V. Qui falsas monetas, puta stanneas, aut plumbeas pro argenteis scienter expendunt; nihil obstante, quod ante eam ab alijs decepti fuerint. Ita colligitur ex l. lege Cornelia, ff. eod. & docent Syl. q. 6. Couar. n. 4. Nau. cit. n. 167. Clarus n. 38. Mol. n. 9. Pet. Gregor. Tholos. lib. 36. Sintag. c. 3. Sed et si bona fide, seu ignoranter aliquis expendit, tenetur ad restitutionem ei,

qui læsus fuit, sicuti notat Mol. cit. disp. 702. ad finem Pet. Nauar. lib. 3. c. 1. n. 312. Sed quid dicendum, si quis numum adulterinum, v. g. thalerum stanneum alteri donet, vel det mercatori scienti ac consentienti, quem probabiliter scit eo animo accipere, ut alium decipiat? Respondeo, illum peccare, & puniri posse, argum. cit. l. lege Cornelia: eo quod cooperetur ad multas falsationes inde secuturas. Vide quæ dixi lib. 2. tract. 3. c. vlt. n. 4. ad finem.

QUESTIO PRIMA. Vtrum ius monetam cudendi, alijs donari, vendi, locari possit? Respondeo, & dico I. Supremus Princeps seu Magistratus ius monetam cudendi, sicuti & alia regalia, alijs concedere potest: sed debet in ea re modum seruare secundum ordinationes cuiusque regni: cum in subditorum ac totius Reipub. graue detrimentum cessurum sit, si multi in regno aut prouincia ius monetam cudendi, vectigalia exigendi &c. sibi vendicent.

Dico II. Inferiores Duces ac Magnates, qui v. g. in Imperio ex Imperatoris concessione, cudendæ monetæ priuilegium obtinent, ij non possunt hoc ius alijs concedere, vendere, locare: quandoquidem eiusmodi regalia sunt specialia personarum priuilegia; quæ alienari nequeunt. Interim tamen non prohibetur quicunque Princeps, Dux, Comes habens ius monetam cudendi, vectigalia exigendi &c. vsum & commoditatem alteri in menses, annos elocare; ut ipse artem monetariam exerceat sub nomine ac signo Ducis, Comititis: qui proinde curam adhibere debet, ut Monetarius nec in materia, nec in pondere defraudet: alioquin etiam principalis ad damni restitutionem obligabitur.

QUESTIO SECUNDA. Vtrum Princeps arbitrarij suo, & sine consensu subditorum, monetæ mutationem facere possit: siue intrinsecam, videl. de iusto pondere demendo; aut deteriore materiam admiscendo: siue extrinsecam, videl. si nulla facta mutatione in monetis, decernatur maiore pretio recipiendas esse, quam in se contineant. Communis Doctorum responsio est, requiri populi consensum. Ita aperte colligitur ex c. quanto, de iureiurando & docet S. Th. vel si alius auctor est opusc. de Regimine Principum. lib. 2. c. 13. Nicolaus Oresmius tract. de mutat. monetarum, c. 21. Innoc. Abb. & alij Canonistæ in c. quanto, de iureiur. Syl. ver. falsarius, q. 7. Couar. in collat. veter. numism. c. 7. n. 6. Alber. Brunus tr. de monetis, princ. n. 4. Martinus Garratus Laudensis in tr. de monetis, n. 8. Pet. Nau. lib. 3. c. 1. n. 337. Ratio est: Quia pecuniæ vsum & commoditas publica esse debet: at verò quod omnes tangit, ab omnibus approbari debet, reg. 29. in 6. Accedit, quod per pecuniæ mutationem, puta si intrinsecus valor minuitur, vel extrinsecus augeatur, magnam populo detrimentum inferatur: id autem iniustum est, nisi populus sponte consentiat.

Verum huic doctrinæ duæ limitationes adhiberi solent: Prima est apud Innocentium, & Syl. locis cit. Quod sufficiat consensus maioris partis Magnatum regni: quia in talibus rebus consensus maioris: aut potioris partis alicuius Communitatis, censetur consensus omnium, argum. l. quod maior, ff. ad Municipalem: quandoquidem possibile non est, omnium omnino consensum postulari. Altera. Quod ob evidentem causam seu necessitatem, Princeps pecuniæ mutationem facere possit, etiam non requisito populi consensu. Ita docet Oresmius cit. cap. 21. Couar. cit. c. 7. n. 6. Ioan. Faber Institut. Quibus modis tollitur obligatio, princip. Sed admonent, quod Princeps, cessante necessitate, populo compensare debeat damnum, quod ob pecuniæ mutationem passi sunt. Exempli causa, si ingruentibus hostibus, ad bellum necessarium gerendum pecuniæ defint, duobus modis Princeps succurrere poterit, vel ut publico edicto monetarum omnium valor



valor extrinsecus augeatur: vel ut numi ærei pro argenteis, aut etiam aureis, impresso eodem valoris signo, cudantur, cum implicito pacto crediti; ita videlicet, ut quicumque finito bello tale signum attulerit, ipsi bonus numus argenteus, vel aureus ex eadem Principis officina dandus sit, unde æreus prodierat. Quare tale signum non tam numi, quam archæ, aut telluræ rationem habebit.

Obijcies. Occurrente publica necessitate, ad quam tollendam Principis facultates non sufficiunt, populus contribuere tenetur: ergo ob eandem causam monetæ mutatio à Principe fieri poterit, absque damni compensandi obligatione. Respondeo ex doctrina Oresmij cit. c. 21. Tributum, ut iustum sit, exigi debet secundum facultates subditorum, ut non alij multum, alij verò parum, aut nihil grauentur: & instituendus est modus exactionis, quam fieri potest, cum nullo imo Communitatis detrimento. At verò si monetarum mutationem Princeps instituat, aliqui subditorum ingentem iacturam patiuntur, ij videl. qui ob negotiationem, annuos redditus, &c. recipere coguntur: contra, alij qui pecunias bonas abscondunt, vel auctiore pretio merces distrahunt, damnum nullum, sed ingens ferme lucrum ferunt. Aliaque plurima incommoda ex mutatione monetæ, præsertim secundum intrinsecum valorem, provenire solent, quæ à multis Scriptoribus passim annotata reperies; sed nos hoc tempore in Germania experti sumus.

8 Sunt autem incommoda ista: Primum. Egregia ansa præbatur numulariæ arti, per quam pecunias nunc mutuo accipiendo, nunc commutando, aut conflando, qui vel parum industrij sunt, brevi tempore quam maximè ditescunt, cum aliorum multorum damno, & rei familiaris eversione. Hoc incommodum proponit Oresmius Episc. Lexouienfis, cap. 19.

Secundum. Negotiationes & commercia perturbantur, ac impediuntur. Nam mercatores in transportandis mercibus ex vna regione in alteram, secundum bonas, easque maiores monetas contrahere solent: quæ si in aliena terra, unde merces aduehuntur, minoris æstimantur, tanto plures numerari debent, cum ingenti damno eius regni, aut provincie, in qua est auctior bonarum monetarum æstimatio. Contra verò, merces omnes, & victualia, quæ in tali regno nascuntur, aut venduntur, leui pretio comparantur ab extraneis; quippe quorum bonæ pecuniæ plurimum in hoc regno æstimantur. Cum hæc scripsi in Germania superiore, æstimato thalero Imperiali floren. Rhenanis X. ducato autem XVI. gloriari solebant extranei, nunquam se minore pretio victitasse, & quævis necessaria suis pecuniis comparasse: cum interim incolæ ferme omnes de magna rerum charitate, atque inopia passim quererentur. Videri potest Oresmius cap. 18. sui tract.

Tertium. Si monetæ intrinsecus vitiatæ cudantur, populi adiacentes fenerissimo interdicto, uti par est, eas proseribunt, & à terris suis ablegant. Ex quo fit, ut monetæ bonæ, ob necessarium cum finitimis populis commercium, è regno, aut provincia extrahantur; vitiatæ autem ferme solæ remaneant. Accedit, quod monetæ tales, ob materiæ deterioris, v.g. cupri admixtionem, ponderosiores, ideoque ineptiores sint ad transportandum, & negotiandum. Nam mercator v.g. tria millia ducatorum in crumena sua transferre potest: quorum tamen valorem in materia adulterina & cuprea, duo vel tres equi vix trahere possunt.

Quartum. Magni sumptus fiunt cudendis ac formandis monetis adulterinis. Nam præter Monetarium, aliorumque operariorum, & Officialium stipendia, quin & frequentes fraudes; id quoque incommodum est, quod cuprum, cuius admixtione moneta cuditur,

tunc magno pretio emi debet: postea verò, cum adulterinæ monetæ cudi desierunt, denno vilescit; consequenter ipsæ etiam monetæ, ex tali materia conflata, contemnuntur. Ut taceam per istas conflationes, ac fusiones non parum materiæ bonæ igne absumi; sed longè plus à furibus abripi.

Quintum. Censūs, ac redditus omnes annui tali pecuniarum mutatione perturbantur: ut proinde domini, ac Magnates regni ex prædiis, vectigalibus, censibus emptitiis, integros proventus suos consequi non possint: ex quo graue rei familiaris detrimentum incurrunt, neque status sui dignitatem decenter sustinere queunt. Sed ipsemet etiam Rex, seu Princeps Reipub. contentus esse cogitur, si tributis, aut vectigalis nomine, vitiatæ monetæ soluantur, quales ex eius officina prodeunt. Quamobrem coguntur Magnates subditis suis, iam antè propter pecuniarum mutationem exhaustis, novas exactiones imponere. Sin autem populi facultates exhauriantur, nonne hoc incommodum denique in ipsum Reipub. caput redundare necesse est? Ut facillè appareat, tamen vna parte ex monetarum mutatione Principi, aut Magistratui lucrum provenire censeatur; maius tamen esse damnum, quando exhaustis plurimorum facultatibus, veluti siccatis riuis, denique etiam publicum ararium, quod ex subditorum bonis sustentatur, diminui necesse erit. Vide Oresmium c. 18.

Septimum. Paulatim conflatis, vel à ditioribus absconsis monetis bonis, adulterinæ exosæ manent: ex quo magna rerum ad quotidianum victum necessariorum inopia, & communis fames consequitur: sicuti his temporibus nimis experti sumus, quando rustici, propter monetæ vitium, nullis minis adigi poterant ad frumentum aduehendum, aut vendendum; nisi denique suo arbitratu æstimare concessum ipsis fuerit.

Octauum. Occasio præbatur plurimarum fraudum, atque litium coram iudicio, propter monetæ diuersitatem, in contractibus mutui, emptionis, &c. in frequentibus venditionum retractibus, censuum resignationibus. Exinde autem proveniunt priuatæ contentiones, atque inimicitie, non sine graui offensione diuini Numinis: particulares etiam tristitie eorum, qui grauem bonorum iacturam passi sunt, quando v.g. pro grandi summa veteris ipsis debita monetæ, novam adulterinam decepti receperunt. Ita optimè etiam annotauit idem Oresmius Episcopus cap. 19.

Hæc satis ostendunt, grauissimè peccare Principem, aut Magistratum, si absque iusta necessitate, seu in priuatum suum commodum, monetæ mutationem instituat. Exempla reperies apud Abb. in c. quanto, num. 11. de iureiur. Gabr. in cit. q. 9. a. 3. dub. 1. Maiorem in 4. d. 15. q. 28. corol. 6. Si Princeps bonum monetæ genus reprobet, atque congregatum conflēt, ac postea minus valentem monetam cudi imperet, lucris sui causa. Item si omnem pene aureorum numorum copiam venditione, permutatione attrahat, ut deficiente auro in regno, eius pretium valde crescat: postea magno eo valore monetam cudi iubeat.

Accidit verò interdum, ut publica necessitas, v.g. belli difficilis, ac diu duraturi pecuniæ mutationem exigere videatur: præsertim si etiam hostes tali attentato remedio, pecunias auxerunt. quod his nostris temporibus, Calvinistæ, egregij in omni genere falsarij, primò factitare aggressi sunt, ut ex non magna argenti massa ingentem, admixto cupro, pecuniarum numerum conflarent: quamobrem viri multi prudentes necessarium esse duxerunt, atque Catholicis Principibus persuaserunt, ut defensionis causa, aliquam etiam pecuniarum mutationem fieri curarent.

Id equi sem in tali casu reprehendi haud potest: considerandum tamen erit, quisnam optimus, & tutissimus



succurrendi modus sit; ne alioquin, dum vnum incommodum auertere volumus, aliud maius inferamus. Et plerumque quidem expedire magis arbitror, ut materia metalli intrinsecus non vitiatâ, bonarum monetarum omnium valor imposititiue augeatur: monetæ autem vitiatæ, & adulterinæ seuerissima confiscationis pœna interdiciantur: curandûque, ut executioni sedulo mandetur, & non à malis Officialibus per negligentiam, aut collusionem dissimuletur. Nam hoc modo improborum hominum fraudes, & pleraque alia superius enumerata incommoda vitabuntur; pecuniæ bonæ ac veteres, etiam finito bello, vsum commoditatemque suam retinebunt; aduersariorum verò adulterini numi in dies magis contemnentur; ut vnde commodum sperârunt, inde potius detrimentum accipiant.

**QVÆSTIO TERTIA.** Cuiusnam lucro aut damno accidat monetarum mutatio, creditoris, an debitoris? Videlicet. Si aliquis ex contractu mutui, alteriusve dispositionis, aut promissionis, debitor factus est centum thalerorum Imperialium, cum singuli non plus valerent, quàm *XVIIII. pазios*; tempore autem solutionis thalerorum auctior est valor, ut singuli æstimentur sesqui floreno, seu *XXII. pазiis*, cum dimidio: plûsne, an minus, quàm accepit, an verò tantundem intrinseco, vel extrinseco valore restituere debeat; Eademque difficultas est de diminutione; si contingat v.g. thalerum, qui nunc æstimatur sesqui floreno, deijci ad *XVIII. pазios*, seu florenum vnum cum tribus pазiis, quomodo solutio faciendâ?

**10** Pro solutione huius intricatæ difficultatis, hæc imprimis notanda sunt: Primum. Sicuti duplex est valor pecuniæ, uti supra dixi num. 3. vnus intrinsecus, qui attenditur secundum materiæ qualitatem, & pondus; alter autem valor extrinsecus & imposititiue: Ita duplex pecuniæ mutatio fieri potest; vna secundum intrinsecum eius valorem; vel de iusto pondere detrahendo, vel deteriore materiam admiscendo: altera secundum valorem seu æstimationem extrinsecam, si manente eadem materiæ bonitate, secundum se & intrinsecè spectata, plurius aut minoris fiat. Quibus addi potest tertia mutatio, quæ est simul intrinseca & extrinseca.

**11** Alterum. In obligationem ac debitum pecuniarium interdum venit certa pecuniæ species; interdum autem pecunia incerta, & indeterminata. Exemplum primi: Si alicui mutuos dedi decem thaleros Imperiales, eo pacto, ut etiam in thaleris solutio fiat. Exemplum secundi: Si alicui mutuos dedi decem thaleros, æstimates tunc quindecim florenis argenteis. Nam florenus argenteus Rhenanus apud nos in instrumentis debitorum apponitur, non ut certa species pecuniæ; sed potius ut genus, seu æstimatio ac mensura omnis pecuniæ probæ, ac receptæ.

Tertium. Interdum species pecuniæ, in qua solutio fieri debeat, inseritur causa demonstrationis tantum; interdum causa æstimationis tantum; interdum verò causa vtriusque. Exemplum primi. Si mutuo dans quindecim florenos v.g. in thaleris, paciscatur, ut solutio etiam fiat in thaleris: nihil sollicitus de æstimatione thalerorum, sed eam fortunæ committens. Exemplum secundi. Si decem thaleros mutuo dans paciscatur, ut nec minor, nec maior numerus thalerorum restituendus sit: Idque non propter speciem pecuniæ secundum se: sed propter æstimationem eius variabilem. Vult itaque decem sibi thaleros in specie restitui, vel aliam pecuniam solutionis tempore æquivalentem. Exemplum tertij. Si quis mutuo dedit thaleros, cum pacto, ut totidem omnino thaleri secundum speciem restituantur, sicuti accepti sunt. Hæc ex communi Doctorum sententia.

**12** **ASSERTIO PRIMA.** Si moneta mutata fuit tam

intrinseca bonitate, quàm extrinseco valore seu pretio communi, tunc alia pecuniæ species censetur: quamuis fortasse secundum nomen cum prior e moneta conueniat: quare hoc casu veteres numi soluendi sunt: aut noui, secundum æstimationem veterum. Ita habetur in c. cum Canonicis, de censibus, & ex communi docet Couar. de mutat. monetarum, §. vn. n. 3. Anton. Faber. de variis numariis. debitor. solutionibus, c. 2. n. 29. Carol. Molinæus de vsurar. contract. q. 100. n. 759. Ioan. Faber Instit. Quibus motis tollitur obligatio, princ. Imò in hac assertione Doctores omnes consentiunt. Quia cum noua pecunia veteri, quæ in obligatione existit, non æquiualeat, clarum est, eius vicem in solutione subire non posse. Exemplum. Si hodie promissisti solutum te thalerum Imperialem, censeris intellexisse de thalero, qui nunc in vsu est: quare etsi accidat postea thaleros cudi materiæ deteriores, qui proinde etiam æstimationem minorem habeant, soluere debebis thalerum antiquum, aut saltem secundum æstimationem antiqui.

**ASSERTIO SECUNDA.** Si monetæ species certo numero in pactionem obligationemque deducantur, illarum superueniens mutatio extrinseca creditoris commodo, vel incommodo cedit: quia tot numero species tempore constituto solui debent, quot in pactionem venerunt, si earum extrinsecus valor auctus, siue diminutus sit. Hæc est communis DD. sententia apud Couar. cit. §. vn. concl. 7. Abbat. in cit. c. quanto, n. 15. Mol. c. 2. de iust. disp. 312. concl. 2. ver. Excipe, Rebel. de obligat. iustit. p. 2. lib. 11. q. 15. n. 8. Philarchum de off. sacerdot. tom. 2. lib. 5. c. 6. Anton. Fabrum de variis numariis. debitor. solut. c. 2. Exempla sunt: Si emi à te domum 1000. ducatis, in specie & numero soluendis: vel si mutuo dedi tibi 1000. ducatos, eodem numero ac specie restituendos; ita solui debent, nihil obstante, quod eorum valor extrinsecus auctior fiat. Dummodo pactio iusta fuerit; quia intererat v.g. mutuatoris, qui aureos ad illud tempus auctioris seruasset: vel si æquale periculum fuerat tum accrementi, tum decrementi monetarum, uti docent Syl. ver. vsura, q. 14. & 15. Philarchus, & Rebellus II. cc. & dicam de hac re infra, tract. 4. c. 16. num. 12. Ratio verò assertionis est, quia, vniuersim loquendo, cum certa rei species debetur, illaque ante moram debitoris (quam semper exclusam volumus) auctior, vel diminutior fiat, intrinseco, aut extrinseco valore, commodo vel incommodo creditoris id accidit. Ut si tibi promittam hunc thalerum Imperialem me daturum, tuo commodo cederet, si eius valor augeatur. Eademque ratio est, si dicam: talem thalerum tibi dabo: quia monetæ eiusdem speciei ac formæ ita æquivalent, ut vna alterius vicem semper subire possit.

**14** Sed dubium est: Qui certam speciem, ac numerum monetæ promissit, utrum aliam eiusdem valoris seu æstimationis pecuniam soluendo, liberetur? Communis, & vera Doctorum responsio est negatiua, apud Couar. cit. §. 1. conclus. 1. Anton. Fabrum c. 3. n. 3. Fridericum Martini de iure censuum, c. 5. n. 116. Eademque ratio est, si conuentum sit, ut solutio in auro fiat, non tenetur creditor argenteam monetam, quamuis probam, eiusdemque æstimationis, recipere. Quia contractus ex conuentione legem accipiunt, l. 1. §. si conuenit, ff. de positi, & reg. 23. ff. Et, aliud pro alio inuito creditore solui non potest, iuxta l. 2. §. 1. ff. si certum petetur.

Excipe primò: Si species monetæ promissæ omnino periit, aut reprobata est, tunc alia eiusdem æstimationis solui potest, ac debet, argum. c. olim, de censib. ubi id notat Glor. ult. & Abb. num. 4. Albertus Brunus de monet. part. 2. n. 3. & part. 5. n. 1. Martinus Granatus de monetis, n. 13. Mynsing. cent. 4. obser. 1. n. 6. And. Gaill. l. 2. obseru. 73. num. 7. Carol. Molinæus de vsur.



contract. q. 91. num. 691. Frider. Martini cit. c. 5. num. 119. contra Ioan. Fabrum loco supra cit. existimantem, debitorem hoc casu omnino liberari; quia impossibilis ei sit pecuniæ promissæ solutio. Sed respondetur: In contractibus, præsertim onerosis & reciprocis, ad duo debitorem in tali casu obligari; & ad soluendum pretium pecuniarium certum, vel incertum seu fortunæ commissum; & ad soluendum illud in certa specie monetæ. Quæ duæ obligationes diuiduæ sunt, ita, vt tametsi posterior tanquam accessoria, & minùs principalis impleri nequeat, tamen prior persistat, iuxta iuris reg. 37. *Utile non debet per inutile vitari.*

Locutus sum autem de onerosis contractibus. Sin autem promissio liberalis fuit donandi aliquos talis speciei nummos, ex intentione promittentis pender, vtum ad talem monetæ formam principaliter se obligare voluerit, an verò solùm accessorie; vt talibus numis abolitis, eorum tamen æstimationem soluere velit. Et hoc posterius in dubio præsumendum videtur; excepto, si determinatus numus promissus sit, v. g. hunc aureum, quem ludendo lucratus sum, tibi donabo; eo autem soluendi moram; sine culpa promissoris deperdito, omnino liberabitur promissor.

Excipe secundò: Si ostendi possit, nihil interesse creditoris, in moneta, de qua conuentum, an in alia ipsi solutio fiat. Sumitur ex cit. c. otium, & l. 99. ff. de solut. *Paulus respondit; debitorem non esse cogendum in aliam formam numos accipere, si ex ea re damnum aliquod passurus sit.* Ergo videtur cogendus esse, si nullum damnum patietur. Quod verò Gl. in l. si quis argentum; C. de donat. & Doctores alij apud Couar. cit. §. vn. conclus. 1. de consuetudine testantur, vt debitum vnus monetæ alia quacunque æquiualente, ac proba, modò non minutissima sit, solui possit, id non arbitror intelligendum, si expressa conuentio facta fuit, vt in certa monetæ specie solutio fiat, & creditoris interfit ita fieri. quæ de re videri potest Carol. Molinæus quæst. 92. num. 708. Anton. Faber, cap. 7. num. 11. Sed ea est rationabilis consuetudo, vt, si nihil de specie monetæ conuentum fuit, in qualibet vsitata, & proba fieri possit; modò non magna solutio fiat in minutissimis numis, cum magno numerandi labore.

15 **ASSERTIO TERTIA.** Si nulla facta designatione speciei, aut facta quidem, sed numero incerto, quantitas pecuniaria in obligationem deducatur; ac postea extrinseca monetarum mutatio fiat, ea commodo, vel incommodo debitoris accidit: vt tantò pauciores numos soluere cogatur, quatenus eorum valor auctus est; vel tantò plures, quatenus eorum valor extrinsecus diminutus fuit. Hanc sententiam ex Iureconsultis amplexus est Ioan. Faber tit. Instit. Quibus modis tollitur obligatio. Tholos. cit. c. 2. num. 27. Carol. Molinæus q. 92. Mynsinger cent. 4. obseruat. 1. Couar. cit. §. vn. num. 3. in fine, & conclus. 4. Frider. Martini cit. c. 5. num. 66. & c. 8. num. 59. Ex Theologis verò Sotus lib. 6. de iust. q. 1. a. 2. & q. 12. a. 1. Syl. ver. solutio, q. 2. Per. Nauar. lib. 3. de restit. c. 2. num. 259. Tolet. lib. 2. c. 34. num. 2. Ioan. Medina C. de restit. q. vlt. ver. Ideo fatentur. Rebellus p. 2. lib. 11. q. 15. conclus. vlt. Vincent. Filliucius in moral. qq. tract. 35. num. 490. ver. Quintò. Ludou. Molina tom. 2. disp. 312. conclus. 1. Exemplum, Si centum ducatos tibi mutuo dem, hoc solo pacto, vt tantundem in proba moneta restituas: vel si quantitas debiti in pecunia expressa fuit, non vt in specie, sed vt in mensura, videl. vt centum ducati, valentes eo tempore Rhenanis argenteis 200 florenis, restituantur: vel denique si species monetæ soluendæ adiecta fuit causa demonstrationis tantum, non æstimationis; videlicet quòd solutio debiti in auro, seu in ducatis fieri debeat; non expresso numero specierum, sed fortunæ commissio: his casibus, inquam, auctio, vel diminutio extrinseca

monetæ proderit, vel oberit debitori.

Hæc assertio in primis probatur consuetudine Imperij, secundum quam crescentibus monetis secundum valorem extrinsecum tantum, debita pecuniaria omnia minore monetarum numero soluantur. Quo modo Imperator Ferdinandus I. Anno Domini 1559. in Comitibus Augustæ, florenum aureum Rhenensem octodecim pazziis valentem, sine sui intrinseca immutatione, tribus crucigeris auxit; & potestatem fecit debitoribus, eo valore auctiore debita sua dissoluendi. Secundò probatur ratione. Nam auctio vel diminutio pecuniarum ideo decernitur, vt secundum eam merationes, & solutiones debitorum fiant: ergo si decretum æstimationis iustum est, vt ponimus, seruari potest, ac debet. Aliòquin si debitor vnus v. g. ducati æstimateduobus florenis argenteis, postea eius æstimatione aucta ad duos florenos & duos pazzios, integrum ducatum soluere deberet; amplius ab ipso exigere ur, quam in promissionem, obligationemve deductum fuerat.

Aduerte autem hic primò, Doctores hac assert. allegatos, licet re ipsa consentiant, tamen diuersimodè loqui solitos: Nam alij aiunt, in debitis pecuniariis, quibus species monetæ certo numero soluenda expressa non fuit, attendendum esse ad tempus contractus: alij verò, attendendum esse ad tempus solutionis. Et vtraque pars rectè docet, diuersa habitudine: Siquidem tempus contractus inspiciendum est, vt intelligatur quantitas debiti, seu valor pecuniæ v. g. mutuo datæ, quem illo tempore habuerant: videl. quòd 100. ducati confecerint 200. florenos. At verò tempus solutionis inspiciendum est, vt intelligatur valor pecuniæ, per quam solutio fiet: quia secundum eum pecunia numerari debet. Quam doctrinam leges apud Anton. Fabrum c. 2. num. 36. & seqq. & c. 21. principio.

Aduerte secundò: Eiusdem assertionis doctrinam latè accipiendam esse, vt locum habeat in omni dispositione contractus, sententiæ, statuti pœnalis, vltimæ voluntatis, &c. Est enim generalis, & ex terminis manifesta ratio, attendendum esse hinc quidem, quid, & quantum in promissionem, obligationem, aut quamcunque dispositionem venerit: illinc verò, quid, & quantum in solutione contineatur. Si itaque tempore dispositionis actum fuit de certo numero specierum, vel certo cumulo numerorum, qui v. g. in arca conclusus est: hoc ipsum solui debet, vel saltem alia moneta, solutionis tempore æquiualens. Sin verò tempore dispositionis actum non fuit de certo numero specierum, sed absolute constitutum, vt dentur tot floreni, thaleri æstimateduobus pazziis, crucigerorum: tunc in primis spectandum est, quanta summa; in dispositionem venerit: deinde verò quid solutionis tempore pecuniæ valeant, ad summam debiti conficiendam. Modò nulla debitoris mora interuenerit in soluendo; neque negligentia creditoris in recipiendo: alioquin superueniente mutatione pecuniaria; compensandum erit: illinc, quantum interest creditoris suo tempore solutionem factam non fuisse: hinc verò, quantum interest debitoris pecuniam suo tempore non receptam fuisse. Quæ de re videri potest Couar. cit. §. vn. conclus. 5. Anton. Faber de variis debitis. numat. solut. c. 10. Gaill. lib. 2. obser. 73. num. 9.

Ceterum oppositum nostræ assertionis plerique vtriusque iuris Doctores tenere videntur, cum Bartolo in l. Paulus, ff. de solut. Hostiensis in c. quanto, de iureiur. Ita enim testantur Couar. Molinæus, Frider. Martini locis citatis: eandemque sententiam, tanquam communem, citant, & sequuntur Albertus Brunus de monetis, p. 1. in conclus. partic. 3. & limit. 1. Anton. Faber c. 6. num. 4. Andr. Fachinæus lib. 2. controuer. iuris, c. 9. Tiraquell. lib. 1. de retractu, §. 2. Gloss. 18. Nauar.



cap. 27. man. num. 294. Azor tom. 3. lib. 10. cap. 7. q. 2. Quos Doctores conciliare nititur Rebellus cit. concl. ult. Et mihi etiā incredibile videtur, negare eos voluisse, si iusta, & stabili lege, vel communi populi consensu & approbatione decernatur, ut moneta auctiore, quam antē solebat, valore recipiatur, quominus secundum talem legitimam taxationem, debitorum solutiones fieri possint. Veruntamen hæc ipsa doctrina, adeoque assertio nostra tertia aliquot limitationes, seu declarationes requirit.

26 Prima limitatio est. Si auctio valoris extrinseci monetarum facta est non legitima potestate; sed improba feneratorum & camporum consuetudine, populo reliquo non consentiente, sed improbante: eius ratio in soluendis debitis, præsertim antiquis, nulla habenda est. Quæ est nota, & ab omnibus probata declaratio.

Altera. Si talis auctio lege publica constituta sit, sed non stabili & ut perpetuo duratura. Etenim auctiorem, sicuti & diminutionem valoris extrinseci, publica potestate eo pacto constitutam esse oportere, ut constans & perpetua sit, præter alios docet Covarruv. cit. §. vn. conclus. 6. & colligitur ex l. 1. ff. de contrahend. empt. ubi ait IC. quod pecunia publicam, & perpetuam æstimationem habere debet, ad subueniendum difficultatibus permutationum. Quamobrem si Principis edicto, vel populi consensu statuatur, ut monetarum pretia in duplum aucta sint, quamdiu v. g. necessitas bellica perdurat, nullo modo admittendum erit, ut antiquorum debitorum obligationes secundum auctiorem illum valorem solvantur. Quia neque Principis statutis, neque populi consentientis voluntas fuit, aut esse potuit, ut monetarum mutatio admodum notabilis, & valde discrepans ab intrinseco valore, constituatur, nisi quatenus id necessarium est ad præsens periculum pellendum; non autem cum gravi præiudicio & damno eorum creditorum, quibus veterum obligationum ius quæsitum fuit, uti bene etiam notauit Anton. Faber de var. solut. debitor. pecuniar. c. 4. num. 50. Sicuti etiam non expedit, neque possibile est, valde exorbitantem extrinseci valoris excessum diu in Republ. continuari: cum ea res in maximum eius detrimentum cedat, uti constat ex suprà dictis.

Tertia. Si magna seu notabilis extrinseci valoris auctio proveniat ex intrinseca depravatione monetarum: hoc enim casu receptissima est Doctorum sententia, solutionem antiquorum debitorum faciendam esse secundum intrinsecam bonitatem, ac valorem veteris monete; nihil attendendo ad valoris extrinseci augmentum, quod pecuniæ solutionis tempore habent, uti docent Albertus Brunus cit. p. 1. in conclus. n. 3. ubi ait, id esse indubitatum; Anton. Faber in cit. suo tract. cap. 6. & fusè explicabo infra assert. 6.

17 Hic verò aduertendum esse duxi; Merè extrinsecam auctiorem monetarum iusta & stabili lege nunquam constitui, ut sit magna & notabilis. Si enim moneta, ut ponimus, iusto metallo, ac pondere cussa sunt, non est ratio, cur earum valor multum excreseat, aut decreseat, si in monetis nulla intrinseca depravatio fiat. Accidit quidem, ut quædam moneta, videlicet thaleri, ducati, &c. comparatione minorum intrinsecus non vitiatarum monetarum, maiorem transportandi, negotiandi opportunitatem, utilitatemque habeant; & idcirco supra valorem suum intrinsecum, si is secundum se spectetur, earum commodiorum monetarum valor extrinsecus augeatur: sed eiusmodi auctio exigua est, & valde rationabilis: atque secundum talem auctiorem debitorum, etiam veterum, solutionem fieri posse, dixi in assertione tertia, & arbitror Doctores alios non negaturos. Sin verò, ut præteritis annis in Imperio experti sumus, auctio monetarum grandiorum, puta thaleri, ducati, &c. præcipuè accidat propter depravationem,

seu intrinsecam diminutionem monetarum minutionum; tunc alia quæstio euadit, ad quam paulò post respondebo.

18 ASSERTIO QUARTA. Si valor monetarum extrinsecus crescat in manu depositarii, administratoris, aut cuiuscunque possessoris, ordinariè tale augmentum non ad ipsum, sed ad dominum monetarum pertinet. Ratio est manifesta: Quia id augmentum est quoddam accidens monete: ergo eiusdem esse debet, cuius est moneta: quemadmodum etiam decrementum valoris, si contingeret, ad eundem pertineret. Ex quo resolues; Si ex gazophylacio alicuius Ecclesiæ, Præfecto pecunia tradatur custodienda, eiusque pretium postea augeatur; restituendam esse pecuniam secundum valorem temporis, quo solutio aut restitutio fit.

Excipe primò: Nisi administrator, v. g. templi Præfectus, ius habeat pecunias elocandi in censum: tunc enim ipsemet in censum accipere potest, ut pecuniarum dominium acquirat, cum obligatione restituendi suo tempore capitale, vnà cum annua pecuniaria pensione secundum communem taxationem.

Excipe secundò: Si Depositario, Administratori, aut Officiali, tali lege tradatur pecunia, ut ipse omne periculum etiam casus fortuiti præstare teneatur: tunc contractus videtur transire in mutuum, dominiumque pecuniarum transire in ipsam accipientem: imposita illi obligatione personali, ut eandem quantitatem pecuniarum tempore constituto restituat. Quo casu augmentum, sicuti & decrementum valoris pecuniæ, ad ipsum pertinere videtur.

Porro in Administratoribus Ecclesiarum, Tutoribus, &c. etiam hoc considerandum est: Si illi nollent speratum pecuniarum augmentum ad Ecclesiam, vel pupillum pertinere, deberent plerumque pecunias in censum elocare, vel ad negotiationem dare. Si igitur id non faciant, æquum est, ut augmentum pecuniæ ipsi Ecclesiæ, seu pupillo relinquatur. Quamvis propter periculum casus fortuiti, si id ipsis incumbat, & alio modo non compensetur, partem moderatam augmenti, seu lucri sibi retinere tali casu non prohibentur.

19 ASSERTIO QUINTA. Si mutatio monetarum facta est in bonitate intrinseca, videlicet in materia, aut pondere, attendendum est tempus contractus, non solutionis: id est, debita pecuniaria soluenda sunt secundum bonitatem monetarum, quam habuerant tempore contractus, non solutionis. Hæc est communissima Doctorum sententia Bartoli, & aliorum in l. Paulus, ff. de solut. Abb. & aliorum in c. quando, de iureiur. Covar. cit. §. vn. conclus. 3. Tiraquelli de utroque retractu, lib. 1. §. 2. Gl. 18. Anton. Fabri de variis pecun. debitor. solut. c. 4. n. 10. Filiucij tr. 35. p. 2. n. 49. ver. Secundò si pecunia & aliorum, quorum catalogum attexere necesse non est: quia huius sententiæ singularis oppugnator, Carol. Molinæus in sua analysi, q. 100. de monetarum mutatione, num. 749. ita confitetur: Omnes & veteres, & medij, & recentiores (vno Ioan. Fab. excepto Auth. hoc nisi, C. de solut.) una voce ubique tenuerunt, et tenent semper, ac indistinctè: sine debeatur pecunia in genere abstracto quantitatatis, puta tot librae: siue certa species moneta, puta mille aurei: debere attendi, et exigi bonitatem intrinsecam, quæ erat tempore contractus, siue cuiuscunque dispositionis. Ratio fundamentalis huius receptissimæ doctrinæ peti debet ex natura iustitiæ commutatiuæ. Id enim iustum est, ut in omni debito tantundem, ea specie, genere, & qualitate seu bonitate, solvatur, sicuti in obligationem deductum est: Si autem ante annos decem emisti domum mille florenis argenteis Rhenanis: vel accepisti mutuos mille florenos Rhenanos, debitor factus est talium florenorum: siue in specie, siue in genere, quales tempore contractus in usu erant: ergo etiam si postea noui floreni deteriores eudantur, solutionem facere non potes in



nouis florenis, aut secundum æstimationem novorum; sed veteres, quales promissi, aut secundum æstimationem veterum solvendi sunt. Ita etiam vice versa, si accidat post contractam obligationem florenos meliores, ac ponderosiores cudi, eiusmodi novos solvere non cogaris, sed veteres, quales promissi, aut secundum æstimationem veterum.

- 20 Neque refert, tamen si in dispositione, seu obligatione adiectum non fuerit eius generis, seu intrinseca bonitatis ac qualitatis monetam soluendam esse, qualis eo tempore in usu erat: quia id semper præsumitur, donatorem v.g. promittentem centum florenos; aut testatorem totidem legantem, loqui de moneta, qualis eo tempore usitata: talis igitur pecunia, aut æquivalens eius æstimatione præstanda erit, qualis promissa, donata, legata, uti ostendit præter alios Anton. Faber. cap. 21. sui tractatus.

Id verò manifestius est in contractibus onerosis. Nam mercium v.g. æstimatio fieri solet secundum monetam eo tempore usitatas, ut domus veneat mille florenis, equus centum: si autem emptor in multo deterioribus postea cufis florenis solutionem facere velit, non erit id iustum mercis pretium: quia talibus diminutis florenis domus venditionis tempore constabat non mille, sed fortasse bis mille; non centum, sed ducentis. In mutui item contractu, si dati sunt floreni argentei centum, ac postea cudantur alij floreni multo ære admixto, si in his restitutio fiat, non reddetur tantundem secundum idem genus & qualitatem, sicut natura mutui postulat: siquidem centum floreni ærosi, neque contractus, neque solutionis tempore æquivalent centum florenis argenteis, quales mutuarius accepit. Quare rectè dixit Pomponius in l. 3. ff. de rebus creditis: *si contrahendo quod agitur, pro cæuto habendum est: id autem agi intelligitur, ut eiusdem generis, & eadem bonitate solvatur, qua datum est.*

- Obijciunt. Si novus florenus cufus sit admixto ære, signo tamen & caractere legitima potestate impresso, talis florenus æquivaleret floreno veteri, cuius non species, sed æstimatio indeterminatè promissa fuit: ergo eiusmodi ærosi floreni solutione satisfieret creditori. Respondet. Vel eiusmodi ærosi, seu intrinsecus vitiata moneta cusa, aut in provinciam introducta est, alijs monetarum speciebus non immutatis neque intrinsecè, neque extrinsecè: sicuti factum aliquando est, ut v.g. denariorum, aut crucigerorum quoddam genus intrinsecè deterius, cum alijs melioribus eiusdem taxationis monetis introduceretur, atque etiam reciperetur à mercatoribus; sed tali pacto, ut pretium mercis plerumque augerent: si verò boni ac veteres numi solverentur, pretium minuerent. Hoc casu dico, creditorem, qui bonos argenteos florenos dederat, non obligari ad recipiendum novos deteriores: quales si cum datis comparentur, æqualitatis rationem in ordine ad usum non servabunt. Si enim creditor accipiat mille bonos denarios, quales dederat, comparabit decem vlnas panni: si verò deteriores accipiat, tantum novem comparare sibi poterit: si autem hos cum bonis, quales dederat, permutare seu cambire voluerit, non mille ipsi dabuntur, sed solum nongenti. Videri potest Anton. Faber cap. 4. num. 39.

- Vel simul etiam aliarum monetarum valor immutatus est, quod plerumque fieri solet propter intrinsecam depravationem pecuniarum minutorum. Quia enim crucigeri, ternarii, &c. deteriores cudi iam solent, quam olim cudebantur, ideo horum maximè respectu, bonorum thalerorum valor auctus est valore extrinseco. Hoc casu iterum distinguendum est: Vel enim intrinseca mutatio seu imminutio monetarum, & consequenter extrinseca auctio meliorum monetarum exigua est: tunc fateor, eius mutationis considerationem

non esse; sed solutionem debitorum etiam his monetis fieri posse, secundum præsentem earum valorem, uti docet idem Faber cap. 23. num. 11. Idque probatur ex generali consuetudine: Constat enim, in plerisque Europæ provinciis veteres monetas aureas, & argenteas melioris materiæ, maiorisque ponderis olim fuisse, quam quæ postea in earum locum substitutæ sunt, & tamen censum, ac prædiorum oppigneratorum redemptiones his ipsis aliquantulum leuioribus monetis, absque creditorum querela, fieri solent.

Vel intrinseca mutatio seu imminutio monetarum, & consequenter auctio extrinseca meliorum monetarum magna est, tunc arbitror, creditoris ius tuendum fore, ut in tali moneta antiqui debiti solutionem recipere non teneatur. Exemplum. Anno Domini M. DC. Titius mille thaleros Imperiales mutuo dedit Caio, quorum singuli eo tempore æstimabantur XVIII. paizis, & conficiebat hæc summa argenteos Rhenenses florenos MCC. Postea verò, propter deteriorum monetarum frequentem procusionem, thalerorum bonorum, cuiusmodi accepti erant, valor multum auctus fuit, ut Anno M. DC. XX. vel Anno M. DC. XXV. quod solutio facienda est, quatuor thaleri, licet intrinsecè non meliores, sed potius deteriores cudantur, extrinseca tamen taxatione æquivalent quinque thaleris datis tempore contractus. Hoc casu Caius debitor secundum præsentem monetarum valorem solvere vult thaleros tantum DCCC. Sed Titius creditor questus de inæqualitate solutionis, eam recipere recusat.

Dico, in hoc casu, secundum naturalis iustitiæ æquitatem; gentium, ac Cæsarea iura, pro creditore pronuntiandum fore: & esse hanc communem Doctorum sententiam, fatetur eius oppugnator Carolus Molinæus q. 92. & 100. Ratio sumi debet ex monetæ essentiali constitutione, duas partes complectente, iuxta l. 1. ff. de contrah. empt. quarum prior habet se ut materia ac fundamentum, videl. bonitas, & quantitas materiæ, ad eum usum selectæ: altera se habet ut forma, videl. character seu signum æstimationis materiæ, publica potestate ac stabili lege impressum, uti explicavi supra n. 2. & seqq.

Non disputo hic, utrum horum principalius in numero censi debeat, signum, an subiecta materia. Sufficit, quod utrumque substantialiter requiritur, sicuti forma & materia ad compositum: ut neque informis argenti materia numi rationem habeat; neque numus verus ac legitimus censi possit, cui subiecta materia non respondet, in ordine ad commutationes & commercia peragenda.

Hoc posito, ita argumentari licet: Naturalis ratio iustitiæ, gentium, & Cæsarea iura postulant, ut in omni mutuo tantundem eodem genere, ac bonitate, adeoque æquivalens reddatur ei, quod datum fuit. Dati autem fuerunt ante annos XX. vel XXV. thaleri mille; quibus tempore solutionis DCCC. thaleri non æquivalent, seu eandem bonitatem, æstimationemque istam ac legitimam non habent. Ergo non satisfit creditori restituendo ipsi thaleros octingentos. Maior est certa. Minor probatur. Olim enim valebat thalerus crucigeros LXX. vel LXXII. nunc autem valet crucigeros XC. Atqui nostrates crucigeri XC. secundum veritatem, & substantiam non plus valent, imò minus, quam ante annos XXV. crucigeri LXX. Ergo neque thalerus secundum veritatem plus iam valet; imò verò minus, quam valebat tempore mutationis. Quamobrem neque in ordine ad commutationes melior seu utilior est thalerus, quam erat ante annos XXV. cum certum sit, rerum omnium pretia simul cum pecuniarum mutatione augeri, iisque crescentibus, accrescere.

Dico autem, secundum veritatem thalerum plus iam



non valere quam olim valebat. Nam extrinseca, seu potius *fiat* specie plus valet, videl. XC. crucigeros, cum *alij* tantum valeret LXX. Veruntamen crucigeri, quos nunc utimur, valde immutati secundum intrinsecam bonitatem, verè non æquivalent, neque eisdem formæ aut essentia censerì possunt cum crucigeris antiquis, quales in mutationem venerunt. Neque minuerit illa lege stabili ac diu duratura constitui potest, ut moneta intrinseca bonitate notabiliter vitiata, tamen æqualeat bonæ ac legitimæ; præterquam si omnes nationes, quibuscum nobis commercium est, in eandem notabilem mutationem consentiant; alioquin verò non erit iusta, sed superexcedens; neque Reipub. commoda, sed planè noxia numi taxatio, sicuti constat ex dictis supra num. 2. not. 3. & fusè ostendit Anon. Faber toto suo tractatu, præsertim cap. 1.

Confirmatur doctrina. Est enim communis omnium ferme Doctorum, ideòque quasi preiudicata sententia. Si notabilis intrinseca mutatio pecuniarum fiat, solutionem debitorum faciendam esse secundum æstimationem & valorem pecuniarum, qui erat tempore contractus non solutionis. Hæc autem monetarum mutatio, quæ intra viginti circiter annos accidit, intrinseca, atque notabilis est. Cadunt enim crucigeri, binarii, pазij longè deteriores, quorum quatuor vix æquivalent tribus antiquioribus, quales in mutationis contractum venerunt. Atque earum vitiatarum tantum respectu valor extrinsecus thalerorum, & similium grandiorum monetarum auctus; indies etiam magis augendus, nisi remedium adhibeatur.

Addendam etiam, quòd hæc mutatio, seu depravatio pecuniarum originem, aut approbationem non habet ab illa Imperiali Constitutione: neque à populo communem consensum, sed improba, præsertim fœnerariorum, & campforum negotiatione, per abusum introducta, interim tolerata, donec pecuniarum generalis reformatio in Comitibus fiat. Quæ de re legi possunt, quæ, allegatis pluribus Imperialibus Constitutionibus, & Camera Imperialis iudiciis, doctè in hac ipsa causa congestit Arrig. Felserus IC. Quamobrem hoc loco argumentum sumere non licet ex quarundam provinciarum, & tribunalium consuetudine, quæ facti tantum est, non iuris: cum non habeat legitimam originem, nec populi communem consensum, sed quotidianam querelam. Et quòd in hoc casu quibuscum locis pro creditore non iudicetur, contra debitorem, causa est, non quia id iustum non sit; sed quia ob litium multitudinem ac varietatem non expediat, donec generalis de hac re constitutio fiat: præterquam, quòd Iudicibus Innocentia Molineri, & aliorum paucorum, quamvis contra communem sit, tamen probabilis, & pro praxi iudiciali expediri videri possit. Nos autem, abstrahendo à praxi, quam sicuti nec probamus, ita nec omnino dammare audent, disputamus hæc, quid iustum sit, spectatis legibus Cæsareis, spectata institutione ac fine numi, ut ad negotiationes & commercia utilis existat; spectata denique essentiali constitutione numi, ut character, & exterior æstimatio interno valori respondeat: cum alioquin veritas characteris corrumpat; ideòque stabili lege constitui nequeat, præsertim cum præiudicio creditorum, quibus propter antiquas obligationes ius acquisitum fuit.

Sed queret aliquis: Quanam censerì debeat mutatio pecuniarum valoris modica, cuius considerationem habendam non esse, supra dictum fuit: quæ verò magna, seu immodica, ut obesse non debeat creditori, quominus bonam, qualem ipse dedit, non intrinsecus diminuat, & extrinsecè auctam pecuniam exigere possit? Respondèdo. Magnus seu immodicus extrinsecæ taxationis excessus, supra iustum valorem intrinsecum monetarum, constitui non potest per legem stabilem, & per-

petuò duraturam. Exempli causa; Ante annos XL. cuius fuit thalerus Imperialis iusto valore XVII. pазiorum; non potuisset anno sequente constitui ut valeret pазios XXII. cum dimidio, nisi ad tempus aliquod, propter necessitatem: Alioquin fuisset iniusta lex, seu taxatio numi. Sed mutatio valoris pecuniarum temporis successu paulatim introducitur, ferme propter intrinsecam monetarum, præsertim minorum, aliquam depravationem. Quemadmodum enim omnia alia in hoc mundo paulatim deficiunt, ita & hominum fidelitas, ac mutua charitas; quamobrem, instigante cupiditate, passim iusto deteriores numi cudi, & introduci solent: eorum autem consideratione maiores, ac meliores monetae augentur extrinseco valore, ut thalerus, qui antè valebat pазios XVII. postea valeat XVIII. XIX. XX. Introducto autem, & aliquantulum stabilito augmento extrinseco thaleri, aut ducati; cum tales pecuniæ censeantur esse regula, ac mensura minorum monetarum, consequenter Monetarii eatenus secundum proportionem de bonitate intrinseca minorum diminuunt, quatenus thaleri, vel ducati extrinsecum valorem auctum esse intelligunt. Quia verò maiores monetae semper maiorem aliquam commoditatem habent, & utilitatem ad commercia, ideò ulterius semper earum valor extrinsecus prouehitur, nisi animaduertis, quæ inde proueniunt, incommodis, à supremo Magistratu sublato abusu, Monetarum reformatio instituitur. Hæc, quamvis supra dicta fuerint, tamen repetuisse non piget; quia tota ferme exinde controuersia dependet.

Porro in tali pecuniarum sensim illabente mutatione, ac diminutione, arbitror attendendum esse non tantum, quanta ea sit secundum se, sed etiam quanto tempore introducta, tolerata, & communi vsu recepta. Si enim thalerus Imperialis spatio ducentorum, vel trecentorum annorum quinta sui parte paulatim diminutus esset, ut quatuor thaleri veteres nunc valerent quinque, quorum tamen singuli aliquantulum deteriores essent intrinsecè, quam vnus ex veteribus; talis mutatio tolerabilis censerì deberet, quæ nihil obstaret debitori, quominus secundum præsentem pecuniarum taxationem, antiquum debitum soluere posset. Idque propter observationem tam diuturnam sine populi contradictione stabilitam. Sin verò eadem mutatio, ac diminutio spatio XX. annorum introducta sit, sæpius dixi, immodicam, ac irrationabilem videri; cum neque lege Imperiali constituta, neque legitime temporis diuturnitate præscripta, sed solum toleratâ consuetudine nixa sit.

ASSERTIO SEXTA. Si valde enormis præsertim ut non duratura, monetarum intrinseca depravatio fiat, & quod inde consequens est, bonarum monetarum valor secundum proportionem extrinsecè augeatur; extra controuersiam est, in antiquis debitis soluendis spectandam esse bonitatem, seu intrinsecum valorem monetarum, quem habuerunt tempore contractus: quamobrem veteres, non noui adulterini numi soluendi sunt. Hæc est omnium Doctorum sententia, nullo contradicente: quandoquidem etiam ipse Molinæus, quamvis singularis mutationis pecuniarum defensor; semper tamen requirit, eam publica lege, vel communi consensu populi ita constitutam esse, ut stabilis, ac duratura sit, uti videre licet tota eius q. 100. præsertim n. 764.

Addidi autem in assert. voculam *præsertim*; ut nimirum clarior, & minus dubitata res esset: alioquin verò arbitror impossibile esse, ut valde enormis monetarum mutatio fiat lege iusta & stabiliter duratura, cum enormis æstimationis inæqualitas sit contra naturam institutionem, ac veritatem numi: atque cedat in Communitatis perniciem, commerciorum omnium impedimentum, quorum tamen causa numus introductus est.

Nihilominus hoc nostro tempore non defuerunt ali-



quitum Iureconsulti, tum Theologi, qui naturam, & institutionem numi non satis considerantes, neque rectè distinguentes inter mutationem valoris extrinseci, atque intrinseci; stabilem, ac temporaneam; in tali casu pro debitore contra creditorem pronunciarent. Exemplum. Titius An. Domini M. DC. thaleros Imperiales millemutuos dedit Caio, æstimatos singulos XVIII. pazziis, quæ summa conficiebat florenos argenteos M. CC. Accidit autè, vt anno M. DC. XXII. mense Iunio (quo has monetarias quæstiones scribere cœpi) propter vitiatam materiã monetarũ pene omnium, extrinsecus valor Imperialis thaleri sit in decẽ florenis vitiatis, ac pene cupreis. Aiunt Doctores isti (quod posteritas admirabitur) satisfactorũ debitorem Caium, si soluat thaleros Imperiales tantũ CXX. quia hic numerus eo tempore, conficiebat florenos M. CC. pene cupreos.

Fuit autè hæc ingens monetarũ mutatio propter bellicos tumultus, nimis varia, locorũ, & temporũ consideratione; vt manifestissimè appareret, nulla lege Imperiali stabiliter introductam, diu quietem non posse. Nam quibusdam Imperij prouinciis retinebatur pristina monetarũ integritas, & valor etiam extrinsecus: aliis locis mutabatur plũs, aut minũs: etiã eisdem locis varia mutatio facta. Nam imprimis thalerus Imperialis cõparatione minorum monetarũ nõ immodicè deprauatorum, valebat duos florenos: postea maiore facta deprauatione, tres, quatuor, sex, octo, denique decẽ. Igitur secũdũ istos Doctores, si quis debitum illud antiquum M. CC. florẽ. soluisset An. Domini M. DC. XXI. cũ thalerus valebat floren. quinque, numerare debuisset thaleros CCXL. Sin autem soluisset anno sequente, satis fuisset soluere dimidium, siue CXX. quo nihil improbabilius dici posse videtur.

Persuasiones sunt istæ: I. Numi essentia potissimũ consistit in æstimatione seu taxatione hominum: ergo si eius extrinseca taxatio auctior fiat in qualicunque materia, tantò plus valebit, & inferuire debet ad cõmercia. II. Creditor conqueri non potest, cũ acceptã pecuniam eodẽ valore statim expẽdere possit: seu sua debita dissoluendo, seu merces emẽdo, in census elocãdo, &c. Sin verò in arca reseruet, donec pecuniarum valor decreseat, seu ad pristinum reducat, suẽ id negligentie imputare debet. III. Cũ in dicto mutuo conuentum non fuerit de certo numero specierum restituendo: sed de florenis Rhenensibus in LX. crucigeros singulis æstimatis: ideo satisfat huic obligationi, si restituantur numerus florenorum, aut crucigerorum, qualis tempore solutionis vsitatus est: cũ sit non paucorum Doctorem sententia, tempus contractus inspiciendum esse, vt intelligatur, quantum sit in obligatione, videl. in proposito casu M. CC. floreni: at verò tempus solutionis spectandũ esse, vt intelligatur, quid sit in solutione: siue quid valeat pecunia, quæ tunc soluitur: valet autem eo anno M. DC. XXII. thalerus Imperialis 10. florenos Rhenenses: ergo soluendo CXX. thaleros Imperiales satisfat obligationi promissorum florenorum M. CC.

Sed facilis ad hæc responsio est: Ad I. Falsum esse, quòd omnis pene vis ac potestas pecuniæ in extrinseca imposititia taxatione consistat: vt nihil aut parũ referat, qualis materia subiecta sit. Cudatur ergo numi ænei, ferrei, imò coriacei, impresso illis caractere valoris eodem cum argenteis, & aureis: Eò enim tandem deuenire oportebit, vt hoc absurdũ fateantur. Non inficior, plurimũ positum esse in hominum affectione, quòd tantò plũs aurum æstimant, quàm argentum, tantò plũs argentum, quàm ferrum, aut cuprum: nam quædam gemmæ æstimatione præferuntur auro, quæ tamen naturalibus proprietatibus fortasse superantur. Igitur agant id, & persuadeant hominibus: nõ vnus tantũ prouinciæ, aut regni, sed populis omnibus Europæ, quibuscum commercium nobis est, vt æquẽ afficiantur

erga æs, & tanti illud æstimant, quanti argentum. tunc faciliẽ litem componemus. Sed quia id impossibile est, dicere oportet, fundamentalem substantiam numi in bonitate, accidere materiæ ad id selectæ consistere: quòd fundamento destructo, aut vitiato, corrui vis, potestas, commoditas numi: & character imposititiuus, qui deberet esse norma iustitiæ in conmutationibus seu commercii obseruandæ, falsitatem continet, & deceptionem gignit.

Ad II. dico: Creditorem maximè conqueri posse de læsione: Nam imprimis, cur creditor ac facultate priuandus sit, vt acceptam pecuniam, cuius dominus factus est, in arca seruare non possit, absque periculo grauissimi damni sui? Deinde, numquid creditor solutionem debiti iniquam ideo accipere debet, quia & ipse alium simili modo decipere poterit, vitiatas monetas offerẽdo, perinde ac si bonæ sint? Præterea, Si creditor accepta pecunia vitiata prædiũ emissit, vel in cẽsum nouũ elocasset, aut censum aliquem sibi emptione comparasset: his casibus præter cõscientiæ remorsum, timere debuisset, ne prædiũ per retractũ eodem oblato pretio à cõsanguineis reuocaretur: ne contractus propter læsionẽ longè vltra dimidiũ iusti rescinderetur, beneficio l. 2. C. de rescind. vendit. aut per restitutionem in integrum, si à pupillis, minoribus natu, vel Ecclesiis emptio facta fuit. Falsum item est, mercium pretia, facta monetarũ deprauatione, aucta non fuisse: tametsi enim venditores principio, propter simplicitatem & ignorantiam, in mercibus distrahendis minus attenderint ad intrinsecum monetarum valorem: tamen successu temporis magis ac magis animaduerso vitio monetarum, pretia rerum auxerunt, alij quidem minũs, alij verò plũs, & ferme secũdũ proportionem augmenti extrinseci bonarum monetarum. Exempli causa. Si quis pannos empturus ad tabernam venit, ante omnia quæsiuit prudens mercator, qualem pecuniam numerare vellet, puta thaleros, ducatos: & quonam valore? postea secũdum eius valoris rationem, mercis pretium computauit. Etenim facta extrinseca illa monetarum bonarum auctione, propter deprauationem minorum facultas mercatoribus relicta est vendendi merces suas auctiore iusto valore: quamvis propter simplicitatem aliqui tali facultate non vtiebantur: alij verò ideo minore pretio vendiderũt, quia propter pecuniarum inopiam, emptores alioquin non reperissent. Quemadmodũ etiam, vice versa, cũ primum pecuniarum immensus valor ad mediocritatem redactus erat, edicto promulgatum fuit, vt eadem proportionẽ diminuti valoris, etiam pretium mercium decrederet, iuxta l. 2. C. de veter. numis. collat. Id tamen partim propter hominum auariciam, partim propter Magistratus negligentiam obseruatum non fuit. Quæ omnia præter rei naturam, per accidens euenisse manifestum est.

Ad III. Fateor, conuentum non fuisse de reddendo mutuo in aliqua certa specie ac forma monetarum: sed de solutione faciendã secũdum idem genus, ac qualitatem pecuniæ probæ, cuiusmodi accepta fuerat. Quòd quidem plerumque instrumento debiti inseritur: vt mutuum restituatur *in dem Schrot und Rorn, wie es dargeben vorden*. Fateor etiam, si monete maiores, puta thaleri, ducati in ordine ad minores non notabiliter vitiatas monetas, aliquantulum aucti sint, eorum augmentum deduci posse, iuxta assert. nostram tertiam, & quintam. Verum ista auctio ad propositum casum non pertinet. Oportet enim considerare, quatuor, vel quinque præteritis annis, quibus ob bellicos tumultus, mutationem pecuniarum passi sumus, thalerorum, & ducatorum valorem neque extrinsecum, neque intrinsecum mutatum fuisse: quia toto tempore vnus ducatus æstimabatur circiter XXXV,



argenteis pazziis, seu duobus florenis, & viginti crucigeris: thalerus autem sesqui floreno argenteo, sicut etiam anno M. DC. XVIII. antequam tumultus cœperant, monetæ istæ æstimatæ erant. Tota autem auctio thalerorum, & ducatorum accidit propter intrinsecam depravationem aliarum monetarum: quæ cum in obligationem mutui non venerint, sed monetæ probæ, & in Imperio usitatæ; manifestum est, propter immensam illam auctionem thaleri, ducati, &c. his annis factam, non posse minus solui, quàm si solutio facta esset annis superioribus.

- 26 **ASSERTIO SEPTIMA.** Si impositivus valor monetarum depravatarum, enormiter excedens valorem bonitatis intrinsecæ, diminuitur, & ad normam veritatis redigatur; consequenter etiam bonarum monetarum extrinsecus valor comparatione depravatarum monetarum decreseat; extra omnem controversiam est, solutionem debitorum faciendam esse secundum valorem intrinsecum, quem monetæ habuerunt tempore contractus; ideòque vitiatos florenos v. g. quales datifuerunt; non autem novos: intrinsecè longè meliores restituendos esse. Hæc assertio eadem omnino ratione nititur, quæ antecedit: quia contrariorum eadem est ratio contraria. Sicuti eam pro bonis florenis mutuo datis, creditor non tenetur recipere alios intrinsecò valore enormiter deteriores, quamvis extrinsecum valorem pro aliquo tempore eundem ferant; ita, vice versa, pro vitiatis eiusmodi florenis mutuo acceptis, non tenetur debitor restituere alios intrinsecò valore longè meliores. Neque ullus est Doctorum, qui inter diminutionem, & autionem, servata proportionem, discrimen faciat. Nihilominus placuit assertiones dividere, propter speciales, saltem extrinsecas, casuum difficultates, ut apparebit.

In primis autem referam speciem facti. Anno Domini M. DC. XXII. thalerus Imperialis æstimabatur decem florenis vitiatis, pene cupreis: accidit autem paulò post, sub finem eiusdem anni, ut depravatarum monetarum impositivus valor decreto publico dimidia parte minueretur, ut idem numus, qui hac die valebat florenum, altera valeret medium; & qui hac die valebat medium florenum, altera valeret quindecim crucigeros; quæ est quarta pars floreni Rhenensis. Consequenter thaleri Imperialis impositivus valor dimidia parte diminutus erat, ut valeret tantum quinque florenos, qui tamen intrinsecè tam boni erant, imò iidem cum decem florenis hesternis.

Porro post hanc impositivæ & arbitrarij valoris decrementum, numi adulterini cœperunt magis hominibus esse suspecti, atque exosi; ut nemo reperiretur, qui non mallet habere thalerum Imperialem, quàm quinque eiusmodi vitiatos florenos, qui paulò antè nomine ac statu duplicati floreni gaudebant, sed ob vitium deiectionis erant: quare, ne omnis bonarum monetarum copia, abscondendo, conflando, exportando auferretur, concessum fuit quibusdam locis, ut thalerus Imperialis valeret florenis sex, qui ante paucos menses valebat duodecim. Quam tamen monetarum extrinsecam mutationem aliquæ provincie non receperunt; sed in prioris impositivæ autione thaleri Imperialis secundum florenos decem perstiterunt: donec plurimum Principum Imperij consensu, thalerus Imperialis ad eum reductus est valorem, in quo fuerat Anno Domini M. DC. XVIII. antequam tumultus bellici cœperunt. Quod consultius, & magno Reip. bono factum esse, experimur iam, cum incommoda priora, & mala ingenia, quæ ex depravatione monetarum secuta sunt, paulatim cessant: cessatura adhuc magis, si plena pecuniarum reformatio futura sit. Quomodo enim malum aliter tolli possit, nisi remouendo causam, ex qua provenit? Alioquin verò si pecuniæ vitiata non tollantur omnino, sed

ad mediocritatem redigantur, malum non curatur, sed potius ostenditur vitium monetarum, propter quod rerum pretia semper aucta esse oportebit. Nā quævis res qualis sit, ex resolutione ostenditur. Profectò sicut in aliis rebus mundus decipitur, ut res vanas & inanes, ob speciosum titulum & extrinsecum fulgorem, magni estimet; sed cum ad corruptionem & amissionem declinare incipiunt, tunc earum vanitas & indignitas apparet; ita etiam monetis accidit, ut dum extrinsecum argenti fulgorem, atque impositivum gradem titulum seu nomen floreni simplicis, duplicis gererent, magni fierent, & non modica merce dignæ censerentur: postea verò detritio argenti colore, & apparente interna inanitate, ac publicæ taxationis diminutione, omnino contemni, & tanto magis rerum omnium pretia accrescere ceperunt. Idque omnino non emendabitur, nisi, ut dixi antiquarum monetarum integritas restituatur.

Sequuntur casus: Titius Anno Dñi M. DC. XXII. mutuo dedit Caio unum florenum vitiatum, ac pene cupreum, qui eo tempore æstimabatur LX. crucigeris. Sub finem eiusdem anni solvere vult Caius, reddendo eundem numero florenum, vel alium prorsus similem, & æquivalentem bonitate intrinsecâ, ideòque etiam eodem charactere publico insignitum. Sed Titius creditor vno non contentus, alterum etiam postulat: propterea quod impositivus valor harum monetarum, quamvis intrinsecus nihil immutatarum, dimidia parte descenderit.

Præterea, Sempronius eodem Anno M. DC. XXII. mense Augusto, thalerum Imperialem impositivum & arbitrario valore tunc æstimatum decem florenis, Sergio mutualit. Sequenti anno, cum sublata illa immensa impositiva autione, thalerus iterum valeret sesqui florenum, Sergius restituere vult thalerum in specie, vel eius eo tempore æquivalentem monetam, videl. sesqui floren. Sed Sempronius non contentus vno thalero, decem nostrates florenos exigit: quales nunc iusto ac vero valore efficiunt thaleros Imperiales sex, cum dimidio & 15. crucigeris. Vel si solutio facienda sit in novis vitiatis monetis, exigit pro 10. florenis, quos dederat, alios eiusdem intrinsecæ bonitatis 80. Iste enim numerus monetarum, ex impositivo statu ac nomine floreni denique deiectionum, efficiebat 10. florenos, seu 6. thaleros cum dimidio, & 15. crucigeris. Pro creditorene, an debitore respondendum est?

Iterum dico, miraturam esse posteritatē, quod de hoc dubitatum fuerit, cum manifesta sit debitoris causa, ac iustitia. Nisi omnem prorsus vim & valorem pecuniarum ex voluntaria hominum impositione pendere existimemus, nulla habita ratione proportionis ad intrinsecam bonitatem: id enim fateri coguntur, qui pro creditore responderunt, eandem numero monetam die contractus duplo plus valuisse, quàm valeat sequente die, aut mense; idque ob solam arbitrariam hominum impositionem: & septuplo plus valuisse die contractus, quàm valeat anno sequente, cum solutio facienda est: idque tantum propter hominum quorundam voluntatem, nulla omnino in ipsis monetis mutatione facta.

Non desuerunt tamen Doctores, qui in his ipsis casibus contra debitorem pro creditore responderunt. Persuasiones sunt istæ: I. In contractu conventum non fuisse de certa specie reddenda, v. g. thalero Imperiali; sed de numero florenorum: Ergo reddendos nunc esse decem florenos, uti verba conventionis indicant.

II. Esto in contractu expressum non fuerit, ut tantus florenorum numerus redderetur, etiam si contingeret solutionis tempore, ob decrementum valoris extrinseci, meliores florenos in usu esse; tamen hanc fuisse tum mutuantis, tum accipientis persuasionem, & intentionem: neque enim quisquam, nisi cum hac tacita seu virtuali conditione, suas pecunias elocasset, quippe quæ in magno suo pretio ad mercandū, & lucrandū utiles essent.



III. Pecuniam ex se ipsa exiguum homini vtilitatem prestare; nisi quatenus ad res necessarias comparandas idonea est: at verò vno thalero Imperiali Anno M.DC. XXII. tantundem aliquis frumenti, vini, aliarumque rerum venalium comparare potuit, quantum hoc tempore quatuor thaleris Imperialibus vix comparare potest. Ergo non satisfacit creditori, nisi pro vno thalero plures restituantur.

IV. Debitorem pecunia sibi credita eodem magno valore vsum fuisse, & lucrum cepisse seu mercando, seu incensum elocando, &c. Non autem æquum est, alterum cum alterius iactura locupletari iuxta reg. 49. in 6.

V. Nemini officium suum damnosum esse debet: multi autem ad subleuandas necessitates tum priuatas, tum etiam publicas, pecunias suas rogantibus bona fide ac intentione suppeditarunt, quas alioquin ad alios vsum sibi commodos applicuissent: quare neque æquitatis, neque gratitudinis ratio patitur, ut debitor officio adiutus, lucrum omne sibi retineat, damnum autem in creditorem & auxiliatorem suum rejiciat. Accedit, quod bona pupillorum, & Ecclesiarum Magistratus imperio, ad publicas belli necessitates elocari debuerunt: ergo necesse est eos immunes seruati tum à damno, tum à lucri alioquin prouenientis iactura.

Ad I. respon. Creditori restituendum esse cum numerum florenorum, de quo conuentum est, videl. decem florenos: sed tales, quales ipse dederat: neque enim ratio, aut natura mutui patitur, ut debitor plus restituere cogatur, quam accepit.

27 Ad II. resp. Si inter contrahentes nihil specialiter expressum est, contractus quilibet institutus censetur secundum naturales conditiones eius: hæc autem est natura contractus mutui, ut tantundem secundum genus, & qualitatem restituatur, quantum datum fuit: cum ergo dati sint decem floreni non veri, nec argentei, sed falsi, & cuprei: verba illa in contractu appolita, ut decem floreni, singuli in sexaginta crucigeros æstimati, restituantur, intelligi debent de monetis cupreis, non argenteis. Si aliud in mente habuit creditor, cur non expressit, aut in pactum deduxit? ut deliberare potuisset debitor, vtrum talem conditionem præter naturam contractus recipere; & non tanquam iniquam repudiare deberet. Negandum itaque est, fuisse tacitam seu virtualiter subintellectam conditionem, ut floreni restituerentur, qualescunque tempore solutionis in vsum erunt. Nam istæ conditiones contractuum expressione non indigent, quæ natura insunt: natura autem mutui postulat, ut tantundem eiusdem generis ac qualitatis reddatur: pro auena non triticum, sed auena: sic etiam pro cupreo & vitato floreno, non probus, & argenteus, sed cupreus. Etsi enim hæc duæ monete nōmine impositio conueniant, re ipsa tamen maximè differunt, plus, quam auena pessima à tritico optimo.

18 Sed etsi fingamus, vtrumque tam debitorem, quam creditorem, in ea persuasionem fuisse, quod restitutio fieri deberet monetarum, quales futuræ essent tempore solutionis, non sequitur, propterea obligationem ita soluendi contractam esse. Cum notum sit, internam persuasionem præsertim falsam, & naturæ contractus repugnantem, non sufficere ad obligationem: sed opus esse, ut in pactum externum deducatur. Quod si creditor pecuniæ in pactum deduxisset, solutionem eodem numero florenorum faciendam esse, quamuis accidat, eorum intrinsecum valorem emendari, profecto debitor deliberasset, & prudentiores consulisset, expediretne, tali se fortunæ committere. Sicut scio factum esse, ut homo pecuniosus, ac futurorum prouidus, aliquot millia thalerorum Titio offerret in censum: ea conditione, ut nullam is pecuniariam pensionem spatio quadriennij soluere teneretur: dempta tamen ipsi redimendi facultate: elapso verò quadriennio, censum annuum,

vel si redimere vellet, ipsum capitale soluere cogeretur in pecunia eo tempore currente. Tum Titius veritus, ne tale pactum sibi & hæredibus suis obesset, re eum prudentibus communicata, tanquam iniquum reiecit.

Ad III. resp. Valor ac dignitas pecuniæ desumi quidem potest ex vtilitate seu commoditate ad mercandū, &c. sed ea, quæ per se & suapte institutione inest: non ea, quæ per accidens, ob speciales rerum circumstantias, ad tempus incidit. Pecunia autem secundum propriam institutionem ita apud omnes gentes comparata est, ut quāto plus bonitatis intrinsecæ habere censeretur, tantò magis idonea sit ad mercandum, & necessaria comparanda. Etsi propter extrinsecas circumstantias, adeoque per accidens contingat interdum, minore pecunia plus comparari, quam alio tempore maiore comparari possit: non tamen propterea minor pecunia censetur æquiualeere maiori. Exempli causa: Pestis tempore, pluribus hominibus demortuis, vno thalero tantundem aliquis emere potest, quā aliàs quatuor, aut quinque thaleris: non ideo tamen, qui eo tempore thalerum alteri mutuauit, postea quatuor, vel quinque exigere iure potest.

Ad IV. Resp. Obiectionem non esse iuridicā. Neque enim iura volunt, ut creditor curiosus sit, in quam rem pecunia data vertatur: modò debitor ad soluendū sine omni opposita exceptione paratus existat, argum. l. doli exceptione, ff. de Nouat. & delegat. Nam postquam pecunia mutuo data est, nihil in ea iuris habet creditor, sed in mutuatarij dominium transit, ipsiusque dispositioni, fortunæ, ac industriæ subiaceret. Quemadmodum enim, si pecuniā debitor perdidisset, vel vitiosam mercem mercando damnum tulisset, ipsemet ferre debuisset, neque ideo minus restituere mutuatori: ita, vice versa, si industria, aut fortuna sua lucrum ex pecunia ferat, ad ipsum pertinet, neque ideo plus restituere cogitur, quā accepit. Eademque ratio est in venditione: neque enim ideo merx pluris vendi potest, quia ob singularem industriam, aut fortunam emptoris, ipsi commodissima erit: cur enim aliquis quod suum est, videl. propriā industriā, aut fortunā emere debeat? sed tanti res quælibet venditur, quantum valeat: sic etiam in mutuo tantundem iuste restituitur, quantum acceptum est. Quod vero de iactura sua queritur mutuator, quia poterat ex pecunia sua magnum lucrum mercando capere: respondeo, hoc argumentum vim habere, si ad mutuum adactus fuit: quare non dubito, pupillis, & Ecclesiis, de quibus in ult. obiect. mētio facta, lucri ob talem pecuniarum elocationem cessantis, compensationem faciendam esse. Alioquin vero si sponte mutuauit, vel incensum dedit pecunias, pacisci debuisset de lucri cessantis compensatione: ut alter id sciret, ac dispicere posset, vtrum cum tanta obligatione pecunias recipere vellet. Cum sit communis doctrina, quam explicabo infra tra. 4. c. 16. n. 10. Lucrum cessans, vel damnum emergens mutuatori resciciendum non esse, nisi illud in pactum deducat, vel expressum, vel saltem tacitum, si videl. aliquis negotiari pecuniis soleat, & nūquam aliter mutuari, nisi ea lege, ut lucri abscedentis compensatio fiat. *Qui emit rem aliquam, tantum pro ea iuste dat, quantum valet: non autem quantum ille qui vendit, ex eius carentia damnificatur.* Sic enim etiam se res habet in mutuo, quod secundum iustitiam leges tantum restituendum sit, quantum datum. Si autem mutuator ob causam accidentariam ex mutuatione incommodum capturus est, aliam pactiōem adijcere debet, ut eius compensationem impetret: videl. incommodum istud feram, aut commodo hoc carebo in tuam gratiam, si promiseris tantum.

Ad V. resp. Si creditor iure agere velit, propter mutuarii officium plus illi non deberi, quā mutuauit: *contrarium enim est officio merces, aut quævis exactio retributionis, tanquam ex iustitiæ lege debeatur, iuxta*



l. ff. mandati. Sin verò de gratitudine & æquitatis ratione agatur, fateor, causam creditoris esse valde probabilem: ut proinde, si fieri possit, partes ad amicabilem compositionem adducendæ sint, atque persuadendum debitori, ut considerata hinc quidem commoditate sua, quam ex isto mutuo percepit; illinc verò incommoditate creditoris quam, passurus est, nisi compensatio aliqua fiat; ob pacis & concordie bonum, quod omnibus pecuniis præferri debet, aliquid de iuris sui rigore remittere velit debitor, & gratitudinis, æquitaris, suæque etiam existimationis retinendæ causa, nonnihil creditori concedere: Non ut immensam solutionem faciat, pro vno v.g. thalero restituendo sex, aut septem; sed pro vno duos, vel amplius consideratis rerum circumstantiis.

Veruntamen hoc Iudicibus supremo Principe inferioribus nequaquam permissum est, ut posthabita contractuum natura & conditionibus; posthabito etiam legum ac iustitiæ præscripto, secundum æquum & bonum, prout ipsis videatur, sententiam ferre possint. Quare Constant. Imperator in l. c. de legibus ait: *Inter æquitatem, iusq; interpositam interpretationem nobis solis et oportet, et licet inspicere.* Vbi rubrica: *Iudex non debet recedere à iure scripto propter æquitatem non scriptam, nisi auctoritate Principis, ad quem hoc pertinet, scilicet limitare ius scriptum.* Ratio est manifesta: Quia Iudex in iudicando non potest excedere limites potestatis suæ: At verò Princeps Iudicibus suis committit potestatem secundum leges tum naturales, & omnibus gentibus communes, tum proprias regni iudicare: cum lex sit norma & regula, secundum quam Iudex iudicare debet. Alioquin iacebunt leges tanta sapientia & auctoritate constitutæ, tanta temporum diuturnitate ac usu comprobatæ; præsertim Cæsare, quæ propter æquitatem & iusticiam, ab aliis etiam, Romano Imperio non subditis regnis, in honore & existimatione sunt, & præque in Ecclesiastico foro receptæ: Ipsique adeo Iureconsulti, qui ætatem optimam in legum Cæsarearum studio, magnis expensis, insumpserunt, huius sui laboris, atque scientiæ iustam retributionem non consequuntur; si inspectis extrinsecis causarum circumstantiis, ex æquo & bono, sicuti Iudici videtur, liceat iudicare. Id enim quivis alius, in legum studio non exercitatus, modò ingenij acumine, & naturali prudentia polleat, æquè præstare poterit.

Cæterum non dubito, quin supremus Magistratus in hac controuersia pecuniaria, secundum æquitatis rationem, Imperiali decreto decernere possit, solutiones debitorum tali modo faciendas esse, ut neque debitores immodicum lucrum retineant, neque creditores magnum damnum patiantur. Non enim hic agitur causa vnius, aut paucorum, sed plurimorum contractuentium; ita, ut si solutiones debitorum fiant conspecta intrinseca bonitate monetarum, uti in assert. 7. dictum fuit, creditores omnes damnum caputuri sint; & debitores lucrum; quare id non omnino per accidens censeri potest, quod ita generaliter provenit ex introducta illa monetarum mutatione. Quam cum Imperij Principes partim permiserint, partim propter necessitatis rationem introduxerint; ipsorum amor in subditos suadere videtur, ut incommoda, quæ exinde orta sunt, quo optimo modo fieri potest, tollant; ita ut neutra pars seu creditorum, seu debitorum multum grauetur, aut iuste conqueri possit: idque propter publicum Imperij bonum, pacis & concordie conservandæ studium.

Hæc est mea de monetariis controuersis sententia: quam ideo liberius exposui, quia in omnium omnis conditionis, ac status hominum ore versantur. Et mihi quidem, dum in hoc studio casu conscientie versor, nulla vnquam quaestio toties proposita fuit, sicuti ista:

quodd nimirum alij conscientia cruciarentur, quia nimis magnam pecuniæ summam receperunt, aut nimis exignam reddiderunt: alij verò mærore affligerentur, propter ingens damnum ex iniusta solutione acceptum. Quibus à tribus annis hucusque ea responsa dedi, quæ publicis nunc typis edo, veritatis, atque iustitiæ amore.

## CAP. VI.

## De damno iniuste dato.

## S V M M A R I V M.

1. *Damnificatio duplex est; una lucrosa, & altera non lucrosa.*
2. *Qui, nullo pacto precedente, damnum dedit absque culpa Theologica, in conscientia foro ad nullam restitutionem obligatur: secus est in foro externo, ubi actio datur ex lege Aquilia.*
3. *Ex contractibus etiam in conscientia foro oritur obligatio præstandi culpam merè civilem, secundum ea usque contractus naturam.*
4. *Qui damnum alteri intulit per culpam venialem, quia animo præcipitavit; is, secluso pacto, damnum restituere debet non integrum, sed secundum proportionem culpe.*

**L**Oquimur de damno alteri in bonis externis dato, Lex quo tamen nullum commodum, seu lucrum ad damnificantem peruenit: ut distinguatur à furto, rapina, aliisque defraudationibus. Aliiter dicere potes; duplicem esse damnificationem, lucrosam & non lucrosam: de lucrosa supra dictum est; nunc verò de non lucrosa dicendum.

Damnificatio eiusmodi interdum absque culpa inferitur; vel quia damnificans non est capax culpe; ut si infans, vel furiosus domum incendat, navem submergat: vel quia iusta causa adest damni inferendi; puta cum ob publicam viadictam, vel necessariam defensionem, damnum datur. Item, si domus vicini igne correpta, destruatür etiam ea parte, qua nondum correpta est, quando id necessarium iudicatur ad arcendum ignem, ne latius diffusus, maius damnum inferat, iuxta l. si quis fumo, §. ult. ff. ad l. Aquil. & docet Sa ver. restit. §. 48. Mol. tract. 2. tom. 3. poster. disp. 697. n. 4. In talibus casibus nulla damni refarciendi obligatio contrahitur: Nisi quod Bartolus, & alij secundum æquitatem responderunt in l. 2. §. æquissimum, ff. de l. Rhodia de iactu; Si domus vicina destruatür, ne ignis maius damnum vicinis inferat, ab omnibus communiter præstandum, quorum causa accidit: quia ita etiam de mercium iactu statutum est.

Interdum verò damnum per culpam inferitur; & tunc distinguendum est, utrum culpa merè civilis sit, an verò Theologica, & propriè dictum iniustitiæ peccatum. Qui enim culpa siue negligentia merè civili (siue ea lata sit, siue levis, siue leuissima) damnum dedit, in externo foro per actionem ex l. Aquilia de damno dato, ad integram eius refarcionem compelli potest, sicuti videre est in ff. & Instit. ad l. Aquiliam, & apud Molin. disput. 697. Verum in conscientia foro, ante Iudicis condemnationem, ad nihil obligatus esse videtur, qui absque iniuriæ peccato, per culpam civiliter tantum æstimatam, quodcumque damnum, nullo precedente contractu, intulit. Quæ est sententia Innocent. in cap. sicuti dignum, §. eos, de homicid. Abb. in cap. si egressus, de iniuriis, Syluest. ver. restit. 2. dicto 12. Pet. Nau. lib. 2. de restitut. c. 1. num. 27. Azor to. 3. l. 3. c. 7. Molin. disput. 698. num. 6. Less. l. 2. c. 7. dub. 6. num. 26. contra Angel. ver. culpa, in fine, Couarr. un. in 4. decret. p. 2. c. 6. §. 8. n. 16. Adrian. de restit. cit. §. Vtrum in foro conscientie. Exempla sunt: Si ex ædibus aliquid incòsultò eieceris, effuderis; si canem alligare, candelam ardentem extinguere, furnum claudere oblitus sis; atque exinde damnum alteri evenierit.



Eademque ratio est, si vel mancipium, vel bestia damnum dedit absque domini culpa; ut nihilominus damnum ab ipso compensandum sit, vel mancipium aut animal noxæ dandum. unde & actio noxalis dicta est: vel denique ut nauta, stabularius, vel caupo teneatur de damno dato à domesticis absque villa culpa eius. Tales, inquam, restituendi obligationes non videntur oriri ante Iudicis sententiam, sicut docet Petr. Nauar. lib. 2. cap. 1. num. 35. Molin. disp. 713. Less. l. 2. cap. 9. num. 118. & S. August. epist. 154. ad Publicolam: *Neque enim reus est Christianus, si bos eius aliquem feriendo, vel equus calcem iaciendo aliquem occidat.*

Aut enim obligatio aliqua oriretur ex legum civilium constitutione; aut ex antecedente pacto, expresso, vel tacito. Non primum: quia leges illæ ad ciues cautiore, diligentioresque reddendos institutæ, in eiusmodi damnis commissis respiciunt ad omissionem cautionis vel diligentiae: ac proinde quasi pœnales sunt, quibus hoc commune est, ut ante Iudicis sententiam non obligent: idque in nostro casu vel ex eo manifestum sit, quia post mortem eorum, à quibus, vel in quorum domo damnum illatum est, actio adversus hæredes non tribuitur, nisi lis ante contestata fuerat, sicuti habetur in l. inde Neratius, §. hanc actionem, ff. ad l. Aquil. & §. his autem, Instit. eod. & l. vn. C. de delictis defunctorum.

3 Quod verò ad alterum attinet: Suppono hîc nullum pactum intervenisse: Si enim intervenit, negari non potest damnificantem obligari ex culpa merè civili, ad quam præstandam iuxta cuiusque contractus naturam, se tacitè ac spontè obligavit, v. g. commodatarius ad levissimam etiam culpam, conductor ad leuem, precariò accipiens non nisi ad latam culpam siue dolum. Non enim audiendi sunt Sotus l. 5. de iust. quæst. 7. art. 2. Tolet. lib. 5. cap. 18. Sa ver. culpa, num. 2. ubi aiunt, contrahentem non obligati ad restituendum damnum sua culpa datum, nisi ea mortalis sit. Qua ratione, ut nihil aliud dicam, omne commodandi, aut precariò dandi, &c. officium intercludemus: siquidem nemo facile reperietur, qui commodare v. g. velit, si commodatarius in conscientia obligatus non sit; compensare damnum, quod per eius negligentiam, secluso peccato, eoque mortali, illatum fuerit: idque ex communi notarunt Maior in 4. distinct. 15. quæst. 45. Nauar. cap. 17. num. 184. Couarrua. in epitom. p. 2. cap. 6. §. 6. num. 15. Molin. tom. 2. disput. 295. Quin imò, si pactum siue expressè, siue tacitè secundum legem, aut consuetudinem loci interveniat, ut v. g. nauta, vel caupo teneatur de damno, vel iactura rerum sine vlla sua culpa, accidente per seruos suos: tunc in conscientia etiam foro ante omnem Iudicis condemnationem obligatio orietur. Vide Mol. tom. 3. post. disp. 713. in fine, iuncta disp. 710.

Denique, si damnum per culpam Theologicam, adeoque formaliter iniustum datum sit, omni iure tanquam verum & naturale debitum com-

pensandum erit: quare obligatio hæc, etiam ante litis contestationem, ad hæredes transmittitur, secundum ius canonicum, & naturale, sicuti docet Couar. 3. resolut. cap. 3. num. 7. Molin. tract. 3. disp. 43. Interuenit autem culpa Theologica, & propriè dicta iniuria, si vel ex directo proposito damnum absque iusta causa inferas, vel perspecto inferendi periculo, actione non abstineas, cum posses ac deberes abstinere. Ita intelligi debet cap. ultim. de iniuriis.

Sed dubium est, an, & quatenus damnum, quod culpa siue iniuria solum veniali, ob imperfectam animi considerationem, illatum est, compensare necesse sit? Respondeo cum Molin. tract. 2. 4 tom. 3. poster. disput. 698. num. 7. Damnum in conscientia foro compensandum esse: sed non integrè, verum proportionem culpæ: quamobrem partibus inter se transigendum fore. Prior pars inde colligitur: Quia altera radix, unde restituendi obligatio oritur, est iniusta acceptio, vel læsio: Qui autem per venialem iniuriam damnum infert, is iniuste lædit: Ergo refarcire debet: & quidem, ut arbitrator, sub obligatione culpæ mortalis, si materia restituenda notabilis sit: constat enim mortaliter peccare eum, qui notabilem quantitatem ex iusticia restituere obligatus, sine iusta causa intermittit. Licet contrarium sentiant Petr. Nauar. lib. 2. cap. 1. num. 47. Less. lib. 2. cap. 7. num. 27. ex iniuria non mortali oriri non posse obligationem restituendi sub culpa mortali. Confirmatur prior pars responsionis: Cum enim necesse sit, alterum duorum damnum subire, æquius est illum pati, qui aliquo modo nocens, & moralis causa damni est: quam qui omnino innocens. Posterior pars probatur: Cum enim iniusta damni illatio causa restituendi existat, consequens videtur, secundum quantitatem iniuriæ, tanquam causæ, oportere esse restitutionis effectum.

Interim fateor, probabilem & tutam esse sententiam Pet. Nauar. Soti, Lessij locis cit. damnificantem iniuriâ tantum veniali, ob actus imperfectiorem, secluso omni pacto, ad nullam restitutionem teneri in conscientia foro: propterea quòd damna ex leui eiusmodi inconsideratione, quæ facile intervenit, prouenientia, casui potius, quam culpæ adscribi soleant.

Ad extremum hoc vnicum aduerte ex doctrina eiusdem Molin. disput. 698. num. 3. Sicut is, qui rem alienam accipit, certo proposito restituendi, minus delinquit: ita etiam qui simili proposito compensandi, alicui damnum infert. Imò, si causa subsit, fieri interdum potest, ut nihil omnino peccet: quamuis peccaret, si restituendi propositum non haberet. Quod ideo moneo, ut intelligas, interdum absque culpa damnum inferri, ob præsumptum consensum, vel futuram ratificationem domini: at obligationem restituendi nihilominus contrahi.



## PARS ALTERA.

De obligationibus contractis ex iniusta læsione famæ, &amp; honoris.

## CAP. I.

Quid sit fama, quid honor, laus, gloria?

## S V M M A R I V M.

- 1 Fama hic accipitur pro bona existimatione de alterius excellentia.
- 2 Honor est testificatio alienæ excellentiæ, animo concepta.

1 **F**ama, secundum communem usurpationem, est frequens ac vulgaris de re aliqua sermo: strictius autem accipitur, quatenus spectat ad alicuius laudem, vel vituperationem; ac diuiditur in bonam, & malam famam. Denique strictissime usurpatur solum in bonam partem, ac definitur apud S. Tho. 2. 2. q. 103. a. 1. *Opinio siue existimatio de alterius excellentia.* Et si enim fama, si nominis etymon spectes, sit communis & vulgaris sermo; tamen à Theologis ferme accipitur etiam pro priuata alicuius hominis bona de altero existimatione, ut in progressu patebit, atque notauit Nau. in c. inter verba, 11. q. 3. conclus. 6. n. 5. & videri potest Pet. Gregor. Tholof. lib. 31. Syntag. c. 29.

- 2 Honor definitur ex eod. S. Thom. *Testificatio alienæ excellentiæ animo concepta.* Quæ testificatio erga Deum, & reliquas spirituales substantias fieri etiam potest solo interiore motu cordis; erga homines verò non nisi per signa exteriora verborum, aut factorum.

Honori affinis est laus: Differunt tamen, quia laus in solis verborum signis consistit; honor verò etiam in aliis, ut capitis inclinatione, genu flexione, statuæ positione. Ita notat S. Th. cit. a. 1. ad 3.

Gloria denique est effectus honoris, ac laudis. Nam exinde, quòd de alterius bonitate & excellentia verbis, ac factis testificamur, clarescit eius excellentia in notitia plurimorum. Vnde Gl. ad Rom. 1. definit, quòd gloria sit *claracum laude notitia.*

## CAP. II.

De temerario iudicio, suspitione, dubitatione.

## S V M M A R I V M.

- 1 Iudicium, suspicio, ac dubitatio inter se differunt.
- 2 Dubitatio, suspicio, itemque iudicium aliud est prudens, & aliud imprudens seu temerarium.
- 3 Peccata, quæ subiectiue in intellectu sunt, non committuntur sine consensu voluntatis.
- 4 Suspiciari, vel iudicare de proximo, ubi sufficientia indicia se produnt, neque charitati, neque iustitiæ repugnat.
- 5 Temerè iudicare proximum, est peccatum contra iustitiam, suo pte genere mortale.
- 6 Temerè de proximo suspiciari, vel de eius probitate dubitare, est ex genere suo peccatum tantum veniale.
- 7 Dubia in meliorem partem interpretanda sunt.
- 8 Qui semel malus, semper presumitur esse malus.

1 **N**otandum I. Hæc tria inter se differunt. Nam dubitatio non est assensus, sed veluti suspensio animi. Suspicio autem est assensus debilis, iunctus cum

dubitatione siue formidine oppositi, & parum, vel nihil differt ab opinione, ut mox declarabo. Iudicium denique, quæ & credulitas appellatur, est firma animi sententia siue assensus.

Notandum II. Suspicionis, sicuti & opinionis, quidam veluti gradus distingui solent. Nam alia dicitur suspicio levis, quæ valde debilem assensum, multum verò dubitationis continet. Alia verò suspicio grauis siue vehemens, quæ plus assensus, parum verò dubitationis habet: sæpe appellatur simpliciter opinio, aut *presumptio vehemens*. Alia denique dicitur *violenta & certa suspicio*, in c. literis, de præsumptionibus: quamuis magis propriè diceretur præsumptio violenta; cum excludat quasi omnem dubitationem, moralemque formidinem de opposito; ideòque pertingat ad integram persuasionem seu credulitatem, ex coniecturis seu indiciis haustam. Vide Bartol. in l. admonendi, ff. de iureiur. Abb. in cap. tertio loco, prope finem, de probat. Nauar. in cap. si quis, num. 8. d. 7. de penit.

Notandum III. Dubitatio, itemque suspicio, ac iudicium aliud est prudens, quod nititur sufficientibus indiciis seu coniecturis ad generandam alicui dubitationem de alterius probitate; suspicionem, vel iudicium de improbitate. Aliud verò est temerarium & imprudens, quod sufficientibus indiciis non innititur. Maiora autem iudicia requiruntur ad suspicandum, quam ad dubitandum; & adhuc maiora ad iudicandum, quam ad suspicandum, sicut notauit Medina in instruct. Confes. lib. 1. c. 14. §. 37. Mol. tr. 4. disp. 15. & sumi potest ex doctrina Abb. in c. quanto, de præsumpt. ubi ait: Quòd coniecturæ (iustæ) aliæ sunt, quæ dubitationem mouent; aliæ, quæ suspicionem leuem; aliæ verò, quæ suspicionem grauem seu simpliciter dictam opinionem ac præsumptionem; aliæ denique maiores coniecturæ, quæ præsumptionem violentam, & quasi moralem certitudinem gignunt.

Adde, quòd maiora iudicia requiruntur ad ferendam contra aliquem sententiam in externo publico iudicio, quam interno cuiusque hominis: atque in ipso foro externo maiora iudicia siue probationes exiguntur ad criminis condemnationem, quam civilis causæ definitionem. Quamobrem licet Salomon 3. Reg. c. 3. ex præsumptione prope violenta (quod enim parentes filios amore prosequantur veluti naturæ præsumptio est, ait Ioseph. Mascard. vol. 1. de probat. concl. 10. num. 20.) filium vni mulierum adiudicauit, alteram tamen tantquam nocentem punisse non legitur. quod etiam Abbas notauit c. afferte, de præsumpt. & Molin. tract. 4. disp. 15.

Notandum IV. Licet iudicium, vel suspicio temeraria, sicuti & hæresis, blasphemia, &c. sint peccata subiectiue in intellectu, uti docet S. Thom. 1. 2. q. 74. a. 2. Caietan. ibid. consensus tamen voluntatis necessarius etiam requiritur, ut formalem rationem peccati habeant.

Corollarium primum: Et si intellectus suo pte motu discurrendo ex indiciis seu coniecturis apprehensis, sinistrum de proximo iudicium inferat; similiterque et si motu suo circa res diuinas discurrendo cogitationes hæreticas, aut blasphemias colligat: interim tamen, dum voluntas plena deliberatione non consentit intellectui, non committitur peccatum mortale hæresis, temerarij iudicij: quamuis interdum venialis culpa committatur.



si voluntas in eiusmodi malis cogitationibus expellendis vel intellectui contrarijs obijciendis culpabiliter se negligentem præbeat; aut si post imperfectam animaduersionem deliberationemve imperfectè, ac potius per assuetudinem intellectui iudicanti consentiat, sicuti explicat Mol. tract. 4. disp. 13.

Corollarium secundum: Tentationes peccatorum in intellectu consistentium, v.g. temerarij iudicij, frequentius, quam alia occurrunt: propterea quod intellectus à propositis sibi obiectis naturaliter moueatur; voluntas verò propter assuetudinem, & sympathiam difficilè intellectum impedire, vel aliò applicare possit. Verùm in hominibus Deum timentibus hoc manifestum signum est voluntatis deliberatè non consentientis si eiusmodi iudicia temeraria de proximis, sicuti & cogitationes blasphemias ac infideles oderunt, & procul abesse exoptant.

- 4 Assertio I. Suspiciari, vel iudicare de proximo, vbi sufficientia improbitatis indicia se produnt, secluso affectu odij, externa detractio, &c. nec charitati, nec iustitiæ repugnat. Est communis apud Azor to. 3. lib. 3. c. 11. dub. 3. Ratio est, quia proximus ius existimationis suæ amisit, comparatione eius, cui crimen sufficientibus indicijs cognitum est. Moneo tamen I. Facilè accidere posse, vt decipiamur, existimantes sufficientia adesse suspicandi aut indicandi indicia, vbi non sunt I. Sæpe euenire, vt quamuis certum sit opus ab aliquo profectum (v.g. ebrietatem, blasphemiam) esse ex genere suo mortale; tamen de operantis intentione dubitare debeas, & cohibere iudicium quòd ob varias causas v. g. animi ignorantis, præcipitantis, excusari potuerit à peccati grauitate. De quo S. August. tom. 4. lib. 2. de serm. Domini in monte, c. 18. S. Bern. serm. 40. in Cantic. ad finem. Quamobrem nihil tutius est, quam animum à suspitione, & iudicio de peccatis alienis, extra necessitatis ac vtilitatis rationes, cohibere, & incertis rumoribus in proximi infamiam cedentibus fidem nullam habere.

Veruntamen, si ratio necessitatis vel vtilitatis postulet ad vitandum malum aliquod, tunc prudentiæ & cautionis officium est, vbi indicia semali prodere videntur, expendere, quantum ea probabilitatis habeant; vt, si opus sit, remedium adhiberi possit vel ipsimet delinquenti, vel alteri personæ, aut Communitati, sicut explicat Molin. tract. 4. disput. 14. Less. cap. 29. dub. 4. in fine. Idque maximè in ijs locum habet, qui ratione officij alijs inuigilare, erroresque ipsorum corrigere debent; vt Prælati subditorum, paterfamilias domesticorum, &c. qui proinde veritatis eliciendæ causa interdum suspecto obijcere aut exprobare possunt, quasi tale crimen ad ipso admissum esset; semper tamen cauentes, ne, dum vnum malum impedire conantur, alterius maioris mali causa existant, si videlicet plus iusto in vitam subditorum inquirentes, nimis suspiciosi appareant, ideòque animos suorum alienent, & inquietos reddant: Vt si suspiciones suas, aut etià crimina occulta subditorum alijs extra casus necessitatis aut maioris vtilitatis, aperientes, famam suorum flocci pendere censeantur.

- 5 Assertio II. Temere iudicare proximum est peccatum iustitiæ oppositum, ex genere suo mortale. Ita S. Thom. 2. 2. q. 60. a. 3. & alij cõmuniter. Probatum primò ex Scriptura Matth. 7. Luc. 6. *Nolite iudicare, & non iudicabimini: Nolite condemnare & non condemnabimini.* Nam de temerario iudicio sermonem ibi esse, ex sequentibus colligitur: *Quid autem vides festucam in oculo fratris tui; trabem autem, que in oculo tuo est, non consideras?* Et S. Iacob. cap. 4. cum peccato detractiois coniungit iudicium temerarium, ita inquit: *Nolite detrudere alterutrum fratres: Qui detrabit fratri, aut qui iudicat fratrem suum, detrabit legi, & iudicat legem:* id est, deficit à mandato legis, & iudicio illius proprium iudi-

cium anteponit. Siquidem lex charitatis indicat, ac præcipit proximo non detrahendum, neque temere de ipso iudicandum. Probatum secundò ratione: Nam quisque ius habet ad bonam existimationem sui, siue famam, donec de eo crimen cognoscatur, iuxta illud: *Quisque præsumendus est bonus, donec demonstretur malus.* Ergo iniuriam infert, qui illum in corde suo temere iudicat, & damnat.

Dixi autem esse peccatum mortale, ex genere suo. Ad quod requiritur primò; Vt sit de re graui, id est, tali, vt spectatis circumstantijs personæ &c. is, de quo sinistrè iudicatur, si sciret, tale de se iudicium temere conceptum esse, meritò grauem iniuriam & læsionem existimationis suæ conferret. Secundò requiritur perfectio actus: Consequenter ex duplici capite iudicium temerarium fieri potest peccatum veniale: I. Ob materiæ leuitatem, spectatis circumstantijs personæ, &c. II. Ob actus imperfectionem, seu cum voluntas temerario intellectus iudicio imperfectè consentit, seu cum iudicandi temeritas exigua est, nempe tantis indicijs extantibus, vt parùm ablit, quin prudentis viri definitiuam sententiam mereantur. Vide Lessium lib. 2. cap. 29. dub. 2. Mol. disp. 13. & 16.

Assertio III. Temere de proximo suspicari est ex genere suo peccatum duntaxat veniale. Hæc est sent. S. Thom. cit. a. 3. Caiet. ibid. Gloss. in 1. ad Corinth. cap. 4. Mart. Nau in rubr. de iudicijs, num. 50. Pet. Nau. lib. 2. c. 4. num. 454. Mol. disp. 16. eandemque indicat S. August. tract. 90. in Ioan. *Si suspiciones omnino vitare non possumus, quia homines sumus: iudicia tamen, id est, definitiuas, firmasque sententias continere debemus.* Licet aliter doceant Arragoni Bannes, Salon cit. a. 3. Ratio assertionis est, quia per suspicionem fama parùm læditur, adeòque exiguum nocuum proximo infertur quod sic explicatur: Fama non dicitur subitanea & leuis de altero bona existimatio; sed potius permanens ac veluti habitualis de altero bene existimandi dispositio. Sinistra autem suspicio in genere existimationis adeò imperfecta & imbecilla est, (quippe dubitationem ac formidinem oppositi adiunctam habens) vt suapte natura parùm imminuat ac lædat antea conceptam de proximo veluti habitualement bonam existimationem, siue famam; multò verò minùs contrariam de eodem malè existimandi dispositionem, siue malam famam in animo reponat: Quamobrem ferme accidit, vt qui sinistrè suspicatus erat, postea, cum opus est, facilè suspicionem corrigat, & perinde de proximo bene sentiat; ac si nunquam de eius virtute vacillasset.

Est tamen valde probabile, quod tradit Sotus lib. 3. q. 4. a. 3. Molina tract. 4. disp. 17. n. 10. Less. dub. 3. Barthol. Medin. in instruct. Confessar. lib. 1. c. 14. §. 37. suspicionem de graui scelere, v. g. proditiõis, incestus, leuissimis indicijs, ac magna animi temeritate de persona honesta conceptam, ad mortale peccatum pertinere. Quamuis Caiet. a. 3. & in summa ver. iudicium P. Nau. l. c. existiment, nunquam fieri posse, secluso odio, contemptu, vt sinistra suspicio, animo retenta, mortale peccatum existat: quandoquidem ratio supra adducta, quòd suspicio suapte natura famam proximi tenuiter lædat vniuersim demonstrare videtur. Dixi animo retenta: Sin verò suspicio in effectum externum prodeat: puta, si eam alijs significans, vel in vitam hominis inquirens, famam ipsius laceres; item si ob talem suspicionem, in electione suffragium suspecto negatione euentus, siue damni, mortalem iniuriam inferri posse, nemo ambigit.

Ceterum de temeraria dubitatione constantius id asserti potest; per se loquendo, ad mortale peccatum eam non peruenire, teste Less. n. 25. Consistit autem temeritas dubitandi in eo, si proditis sufficientibus indicijs de alicuius probitate, ob quæ meritò illum boni



& innocentem iudicare debeas; nihilominus positiue de eo dubites, id est, iudices in vtramque partem dubium & incertum esse, bonumne sit, an malus; nocens, an innocens. Quod si talem dubitationem exterius significes, v.g. ob id in mores eius inquiras; potes interdum peccare mortaliter, vt supra de suspitione dixi.

Hoc moneo: Tamen si nulla habeas sufficientia indicia ad dubitandum positiue de alicuius probitate, vel ad suspicandum malum, potes nihilominus, securitatis causa, prudenter & caute rebus tuis, tuorumque profpicere, v.g. pecunias concludere; quod fieri queat, vt ij, quibuscumque versaris, fures sint: filia interdicare, ne cum adolescente loquatur: quod accidere possit, vt ab eo seducatur. Qua de re S. Thom. 2. 2. quæst. 60. art. 4. ad 3.

7. Assertio IV. Quod DD. aiunt cum Glossa ad Roman. 14. ex doctrina S. August. lib. 2. de sermon. Domini in monte cap. 18. *Dubia in meliorem partem interpretanda esse*: non debet accipi affirmatiue; quasi existentibus sufficientibus argumentis ad dubitandum de proximi probitate, nihilominus existimare debeas eum innocentem esse, sicuti rectè monet Caiet. q. 60. a. 4. Mol. disp. 18. Less. cit. dub. 4. Nemo enim obligatur vt errandi periculo se exponat: cum autem existimatio repugnet dubitationi, eo ipso, quod habes sufficientia argumenta dubitandi de alicuius probitate, non sine erroris periculo inclinas intellectum ad alteram partem, quamvis benigniorem. Sed in primis dictum illud accipi debet negatiue: vt quamdiu res dubia est, in deteriorem partem sententia non feratur. Quod etiam in externo foro vsuuenit: nam si Reus de crimine convictus non sit, absoluitur, non affirmando crimen non admisisse, sed de eo demonstratum non fuisse. Quo sensu & axioma illud intelligi debet: *Quamdiu aliquis non demonstratur nocens, censendus est innocens*. Et regula II. in 6. *Cum sunt partium iura obscura, Reo faciendum est potius, quam Actori*.

Secundò accipi illud dictum debet ex hypothesi: videl. æqualibus vtrinq; existentibus indiciis tum pro hominis innocentia, tum nocentia, si iudicium ferre velis, potius inclinandum esse intellectum in partem benigniorem. Ratio est, quam S. Thom. reddit cit. a. 4. ad 1. & Caietan. ibid. explicat: Satiùs est, in dubio frequenter falli bene opinando de proximo, quam male opinando vel semel decipi. Nam ille speculatiui intellectus error, cum circa singularia versatur, exiguum malum censetur: hic autem error practicus est, cum voluntatis malitia, & proximi iniuria coniunctus, idque propter ea, quod in dubio nemo condemnandus, aut possessione famæ spoliandus sit. Eandemque doctrinam reperies apud Richard. in 3. sentent. d. 33. a. 3. quæst. 7. ad 1. Quare etiam Apostolus monet i. ad Corinthios 4. *Noli ante tempus iudicare: quoad usque veniat Dominus, qui illuminabit abscondita tenebrarum*.

8. Quæret hic aliquis. Quomodo intelligenda sit iuris reg. 8. in 6. *Qui semel malus, semper presumitur esse malus*? Resp. Intelligi debere in eodem genere delicti, & quamdiu ex indiciis emendatio colligi non potest. *Qui exercuit actum bonum*, inquit Glossa. ibid. *presumitur bonus, nisi faciat actum contrarium*, (iuxta cap. mandata, de preceptis. & l. non omnes, §. à barbaris, ff. de re milit.) *sed si fecerit actum contrarium, presumitur malus, donec de emendatione appareat*. Ratio regulæ est: Qui enim semel voluntatem deliberate inclinavit in malum peccati, in eodem veluti captus est, donec animum mutet ac corrigat. Quod verò animum mutauerit, hoc non presumitur: sed probari debet, vel indiciis ostendi: quemadmodum si quis semel deprehendatur esse pauper, non presumitur esse diues, donec id probet, seu indiciis demonstret.

Hanc regulam & doctrinam in primis veram censeo,

quatenus agitur de cauendo alieno incommodo: Sic qui fraudulenter tutelam administravit, etsi satisfacere velit, à tutela tanquam suspectus remouendus, nec iterum promouendus est, §. nouissimè, Instit. de suspectis tutoribus. Et marito semel saeuienti non est restituenda vxor, ob saeuitiam disgressa, nisi securitas ei prouideri possit, c. literas. in fine, de restit. spoliat. Et qui semel periturus deprehensus est, iterum non admittitur ad testimonium ferendum, c. testimonium, de testib. Imò hoc speciale est in periuro, vt etiam emendatus non admittatur, cit. c. testimonium.

Deinde, tamen si non agatur de damno vitando; non quidem tunc certum iudicium ferre possumus de perseverantia in peccato; attamen suspicari ac dubitare, quoad emendationis signa videantur. Exempli causa, si quem in deliberato mendacio semel deprehendimus, eius fides in posterum merito suspecta esse solet: Et si scimus aliquem semel fornicatum fuisse, de eius probitate semper dubitamus, donec emendationis aliqua signa prodant. Nam emendatio est quid facti: factum autem in dubio non præsumitur, vt dixi lib. I. tract. I. c. §. n. 30.

## CAP. III.

## De Detractione.

## SUMMARIUM.

1. Detractio famæ iniusta, vel sit directè, vel indirectè.
2. Detractio est peccatum ex genere suo mortale; lenius homicidio, & grauius furto.
3. Detractio sepe est peccatum tantum veniale; vel ob materiam leuitatem, vel ob imperfectionem actus.
4. Detractio alia est formalis, sine ex proposito nocendi, alia verò materialis; Item alia est, per quam crimen falsum alicui imponitur, alia, per quam crimen verum, sed occultum proditur.
5. Crimen alterius occultum manifestare, non semper est illicitum: sed quibusdam casibus concessum: imò est præceptum.
6. Crimen alterius, quod sit etiam in homini prudenti ac gravi sine causa manifestare, videtur esse mortale.
7. Si ita narratur crimen a detractione aliorum, vt credibile sit audientes non credituros, non est periculum peccati mortalis.
8. Crimen in loco, ubi notorium, est notitia facti, aliis ignorantibus manifestari non est illicitum.
9. Crimen in iudicio notorium per Rei confessionem, vel testium depositionem, non idcirco statim enulgare licet.
10. Crimen per Iudicis publicam condemnationem notorium, etiam in alijs locis sine iniuria enulgatur.
11. Infamem de uno crimine, non licet infamare de alijs occultis, etiam si minora sint.
12. Laudata Communitati, v.g. Regularium Ordini detrachere, graue crimen est.
13. Licet detractio erga defunctum minus crimen sit, quam erga viuum, potest tamen illud ad crimen mortale pertingere.
14. Auditor detractoris peccat, si detractiōi consentiat: ad detractiōnem expressè, vel tacitè impellat: detractiōnem, cum facili possit, non impedit.
15. Seipsum sine causa infamare non est peccatum contra iustitiam: sed solius prodigalitatis, idque veniale, per se loquendo.

**D**etractio est alienæ famæ iniusta imminutio. Accidit vel directè, vel indirectè, auctore D. Thom. q. 73. a. 1. ad 3. Directè quadrupliciter: I. Imponere alicui crimen falsum. II. Exaggerare crimen verum, vel falsum. III. Manifestare crimen occultum. IV. Opus rectum sinistrè interpretari.

Indirectè tripliciter: I. Alterius dotes inficiari. II. Eandem eleuare siue extennare. III. Malitiosè reticere: vt, si aliis hominem laudantibus, subijcias: *Ego taceo*; aut frontem contrahas. Addit Adrianus quodlib. II. §. secundò præmitto, & Less. lib. 2. c. II. dub. 2. frigidam & simulatam laudationem: quia, vt apud Gellium legitur l. 19. Attic. *Turpius est exigue atque frigide laudari*,



quàm insectanter et grauius vituperari.

Detraçtio ex genere suo peccatum mortale est contra iustitiam; leuius homicidio, sed grauius furto, teste S. Tho. q. 73. a. 3. Tantò enim peccatum maius est, quantò maiore bono iniuste priuat: Atqui, vt Salomon ait Prou. 22. *Melius est bonum nomen, quam diuitia multa.* Et Eccles. 41. *Curam habe de bono nomine: hoc enim magis permanebit tibi, quàm mille thesauri pretiosi et magni.* Accedit, quòd sæpe per detractionem non solum fama proximi laceratur; sed etiam amicitia & pax inter homines violatur: quod susurronis peccatum dicitur, iuxta illud Ecclesiast. 28. *Susurro & bilinguis maledictus: multos enim turbauit pacem habentes.* de quo S. Anton. p. 2. tit. 8. cap. 5. Quin & interdum per detractionem causa præbetur alterius damni in corpore aut fortunæ bonis inferendi illi, de quo iniquè detrahitur; vt proinde plures species peccatorum in vnum actum concurrere possint, quas necesse sit in confessione explicare, sicuti docet Molin. tr. 4. disp. 25.

Fit tamen peccatum veniale detraçtio primò, ob leuitatem materiæ: quæ tamen non absolutè spectanda est, sed cum ordine ad personam, quæ infamatur. Fieri enim potest: vt defectus alicuius veniales, vel etiam naturales narrando, spectata conditione & statu illius, graue damnum inferas, & mortaliter pecces: veluti, si boni nominis Religiosum mendaciis assuetum esse; virum grauem ac consular em illegitimè natum, Iudæo genere ortum affirmes. Qua de re Nau. c. 18. n. 25. Less. dub. 3. Mol. disp. 33. in fine, Petr. Nau. lib. 2. c. 4. n. 311. Contrà, veniale tantum peccatum erit, non solum si corporis, vel natalium naturales defectus; sed etiam si crimen mortale referas de persona vili, vel ita affecta, vt crimen commissum non magno dedecori sibi ducat: v. g. militem habere concubinam, fuisse ebrium, quod Caiet. aduertit 2. 2. q. 73. a. 2. §. ad hoc dicitur. Maior in 4. d. 19. q. 2. Sotus lib. 4. q. 6. a. 3. circa 4. a. gum. Tolet. lib. 5. c. 64. Præterea leuis plerumque detraçtio censetur, si quis generatim de aliquo affirmet, esse superbum, iracundum, avarum, &c. quia audientes interpretari solent de naturali propensione ad eiu(modi vitia, sicut annotauit S. Anton. p. 2. t. 8. c. 4. Syl. ver. detraçtio, q. 1. Less. n. 18. Interdum tamen tales circumstantiæ esse possunt, vt existimatio hominis, tali de ipso prolato iudicio, grauius lædatur, sicuti bene annotauit Nau. in man. c. 18. n. 24. & alter Nau. cit. c. 4. n. 320.

Secundò, detraçtio fit peccatum veniale ex imperfectione actus, Etenim nisi dicamus, ob mentis, ipsiusque linguæ præcipitationem, sæpius à mortali noxa excusari detractionis malum, totum pene humanum genus periclitabitur: adeò vulgare est hoc vitium, quod Glossa notauit in cap. 24. Prouerb. Siquidem linguæ modicum membrum est, sed volubile, & inquietum, quod nullus hominum domare potest, ait S. Iacob. cap. 3. Veruntamen tantò magis hoc peccatum nobis pertimescendum: lædit enim charitatè pariter ac iustitiam erga proximum, & Communitati maximè noxium est, seminans odia, dissensiones, lites. Quapropter à S. Paulo ad Rom. 1. *detraçtores* iis annumerantur, quos Deus in reprobum sensum tradidit.

Detraçtio diuiditur primò in formalem, ac materialem, ex S. Th. q. 73. a. 2. Anton. p. 2. t. 8. c. 4. §. 1. Pet. Nau. lib. 2. c. 4. n. 105. Formalis est, quæ fit ex intentione alienam famam denigrandi: Materialis, quæ ex animi leuitate fit, sine directo nocendi proposito. Vtraque est propriè peccatum detractionis aduersus iustitiam commutatum, ex genere suo mortale, sicuti rectè docet Nau. c. inter verba, 11. q. 3. concl. 6. n. 7. & 11. quandoquidem ad damnum iniuste inferendum sufficit voluntarium indirectum ac imputatum. Veruntamen est, quòd detraçtio illa materialis seu indirectè voluta, tam perfectum voluntarium non habeat, & frequenter ob

actus imperfectionem à culpa mortali excusetur, sicuti significat S. Th. in cit. a. 3. Quamobrem oportet interdum quærere ex confitente; vtrum odium, nocendive voluntatem gesserit aduersus personam, cui detraxit.

Diuiditur secundò: Detraçtio alia est, per quam crimen falsum alicui affingitur; alia per quam crimen verum occultum de aliquo proditur. Illa ex genere suo grauiorem iniuriam continet, quàm hæc, teste Nauar. c. 18. n. 26. Nam qui pernicioso mendacio famam alicui detrahit, non sola possessione, sed quasi dominio famæ ipsum spoliatur. Qui autem crimen verum occultum prodit, propriè tantum priuat hominem iure possessionis; non etiam dominij: quandoquidem fama per se & secundum veritatem criminoso debita non est, sed per accidens, videl. ob publicam ignorance. Etenim, sicuti probabilis tua ignorantia sæpe efficit, vt alienum equum v. g. iuste possideas, iniuriàmque inferat, qui eum tibi eripit, antequam liquidò constet tuum non esse: ita publica ignorantia tui criminis efficit, vt iuste apud eos possideas bonam existimationem, siue famam; iniuriàmque inferat, qui eam tibi eripit, antequam publicè innotescat, tibi re ipsa debitam non esse, sed solum ob ignorance.

Sed intabit aliquis. Si Titius bona fide possideat equum Caij, similiter ignorantis ad se pertinere, iniuriàm non infero, cum de hac re Caium admoneo. Ergo pari ratione, si alij de Titio criminoso bonam existimationem non sine errore conceperunt, nullam iniuriàm irrogo, cum hunc errorem illis aufero. Resp. negando conseq. Ratio disparitatis est: Quia in priore casu, Caius iniuriàm saltem materialem patitur, quæ cum iuste libero: In posteriore autem casu nullum iniustum damnum patiuntur, quide occulto peccatore bonam opinionem gerunt.

Monet tamen Mol. tr. 4. disp. 26. num. 5. Si quis maiorem opinionem doctrinæ, aut virtutis de Titio conceperit, quàm is mereatur, consideratis externis indicij, quæ in ipso apparent: non esse peccatum, si profectur de eo iudicium verum; videlicet non esse tam doctum, tam probum, quàm existimatur; dummodo absit odium, vel similis affectus prauus. Ratio est: Quia hæc bona existimatio non est externis actibus comparata à Titio, vt ius aliquod ad eam habere censeatur: sed est profecta ex alterius inscitia, seu negligentia attendendi ad eos: qui exterius palàm in Titio defectus apparent. Verum propter periculum errandi secundum proprium iudicium, non expedit hanc doctrinam in praxin deducere, nisi interdum ad scrupulorum melam.

Alterum discrimen est, quòd crimen falsum alicui scienter imponere semper illicitum est, quippe perniciosum mendacium negatio illo Decalogi præcepto, *Non dices falsum testimonium*, per se ac directè prohibitum. Crimen verò occultum alicuius manifestare non semper illicitum est, sed ob aliquas causas licitum.

Quarum prima est, Vt consilium, vel auxilium capias à viro prudente: Sed operam dare debes, vt, quatenus possibile est, cum minimo peccatoris damno id fiat: quamobrem pluribus manifestandum non est, si vnus ad ferendum auxilium sufficiat: nec persona nominanda, nisi necesse sit, sicut monet Lessius cap. 11. dub. 12. Quod etiam Prælati obseruare debent, vt in inquirendis, aut puniendis occultis delictis subditorum non adhibeant plures consiliarios, quàm res postulet.

Secunda, Si opus sit ad impediendum maius damnum communitatis priuatæ personæ, ipsiusue criminosi. Qua de re Adrian. in 4. vbi de restit. bonorum famæ. Sotus lib. 5. quæst. 10. art. 2. Nauar. cap. 18. num. 31. Molin. disp. 24. Less. dub. 9. Exempla habes: Si homo improbus, & non idoneus luuentuti præficiendus sit; vel ad sacros ordines, curam animarum cum multorum dam-



no promouendus: Si Medicus imperitus ad corporis curationem accersendus: Si persona in matrimonium accipienda, unde mali exitus timeantur: in eiusmodi casibus occultus defectus prodi potest, & quandoque prodi debet; sed, quam possibile est, cum minima iactura alienae famae. Quare interdum necesse est, prius secrete monere hominem, ut abstineat, si spes sit obtemperaturum. Similiter, si innocens, ob falsi criminis suspicionem, vita, vel fama periclitetur, tunc eum liberare possis, indicando occultum criminis auctorem, plerumque teneris indicare; admonitum tamen prius, ut sibi caueat, fuga consulat. Sic enim charitas exigit, ut maior ratio habeatur hominis innocentis, quam nocentis, sicuti resoluit Mol. cit. disp. 24. n. 3.

Tertia, Si quis aliquam dignitatem, beneficium, aut officium postulet, ad quod iure inhabilis est; v. g. cathedram Magistris deputatam, qui Magister non est: Dotem, vel eleemosynam pauperibus decretam, qui pauper non est; occulta eius simula tio ac fraus detegi potest, ut iis obueniat, quibus iure debetur, sicuti docet Molina num. 7. & 8. Less. lib. 2. cap. 11. dub. 10. Nam crimen alteri perniciosum prodi potest: si ita necesse sit ad damnum auerendum: qui autem pauperem se simulans, eleemosynas v. g. accipit, is iniuriam & damnum infert. Ergo eius iniquam simulationem, tanquam crimen perniciosum, prode e possum.

Sed statimamus, Titium dotem reliquisse virginialicui dandam: eam Caia sibi obuente petit, quae publice virgo censetur, tu autem illam corruptam esse nosti, tamen liceat tibi occultam eius fornicationem prodere? Respondeo non licere. Ratio est, quia Caia dotem petendo nullam iniuriam infert. Cum enim publice virgo habeatur, in externa pollicia omnibus virginum privilegis gaudet: ut iuxta morem patriam, tertium v. g. capite gestare possit, similiter itaque & dotem quasi virgo petere. Neque alia Titij testatoris mens fuit, quam ut dos daretur puellae, quae publice censetur virgo, & casta; interim non inquirendo in occultam crimina: cum id neque conueniens, neque Reipub. expediens sit. Igitur discrimen obseruandum est inter simulatum pauperem, & simulatam virginem; quod illius simulatio iniusta ac perniciosa sit; haec autem habeat ius simulandi, seu potius dissimulandi suum defectum, quamdiu bonam famam publice retinet. Idemque dicendum, si eleemosyna relicta sit distribuenda inter pauperes bonae & honestae vitae: intelligitur de iis, qui nulli infamia laborant: quae occultum crimen alicuius, qui pauperem se simulans petere, prodi hand posset.

Id vero addendum ex Armilla ver. iniuria n. 3. Sa eod. ver. n. 3. Quotiescunque aliquis ius habet accusandi de crimine occulto, quod probari potest, tum, secluso odio, fas esse accusationem, vel denuntiationem inferre coram iudice competente, eo fine, ut repellatur v. g. adultera a dote, eaque alteri obueniat. Simili ratione potes aliquem repellere a ferendo testimonio: vel competitorum tuum a beneficio, dignitate, &c. ut, eo excludo, tibi obueniat: Vteris enim hac in re iure tuo.

6 Restant aliquae quaestiones: PRIMA. Vtrum mortaliter peccet, qui occultum alterius crimen, sine iusta causa, manifestat vni soli viro prudenti, quem probè scit non euulgaturum? A mortali peccato excusant Caiet. quaest. 73. art. 2. dub. 1. Petr. Nauar. lib. 2. cap. 4. difficult. 10. num. 334. Quia arbitrantur, bonam exitimationem perdere apud vnum hominem, esse modicum nocumentum: si nullum praeterea damnum ex illa deductione timendum sit. Sed rectius docet Sotus lib. 4. q. 6. a. 3. & lib. 5. q. 10. a. 2. conclus. 4. Mol. disp. 29. n. 7. Less. dub. 11. Esse ex genere suo peccatum mortale: & fundamentum contrariae sententiae falsum esse: quia plerique etiam hanc iacturam magni aestimant, si de gravi

scelere infamentur apud vnicum virum prudentem ac grauem. Illud tamen bene monent Lessius dub. 12. P. Nauar. n. 346. Mol. n. 5. Saepe culpato minui ex hoc capite, cum quis solatij capiendi causa, acceptam ab aliquo iniuriam amico, praesertim prudenti: manifestat: quod eam in silentio decoquere, atque cum nemine communicare valde difficile videatur.

QVAESTIO SECVNDA. An, & quatenus peccet, 7 qui occultum alicuius crimen se ab aliis audiuisse narrat, absque propria confirmatione, nocendique proposito? Respondeo & dico I. Si tales circumstantiae concurrant, ut credibile sit, non credituros esse, coram quibus narratur, non est timenda culpa mortalis: quia abest periculum notabilis damni inferendi. Ita Scotus in 4. d. 15. q. 4. a. 1. Nauar. c. 18. n. 36. & 50.

Dico II. Si tales circumstantiae concurrant, ut narratio per se quidem fidem non mereatur: is tamen qui narrat, animaduertat audientes propria animi leuitate credituros esse, vel malam suspensionem concepturos: peccat contra charitatem, non etiam contra iustitiam. Quod contra iustitiam non peccet, docet S. Anton. p. 2. tit. 2. cap. 2. §. 3. Syl. q. 1. in fine, Caiet. cit. a. 2. Less. cit. c. 11. dub. 5. Cum enim audientes non ex pondere narrationis, sed ex animi leuitate fidem adhibeant, (nam qui cito credit lenis est corde, ait Ecclesiast. c. 19.) narranti tanquam causae adscribi non potest: quam obrem neque ad famae restitutionem obligatur. Quod vero contra charitatem peccet, tradit Scotus l. cit. Maior in 4. d. 15. q. 16. conclus. 1. Mol. disp. 30. Less. l. c. Ratio est, quia duplicis mali occasionem praebet: tum quod audientes temere credendo scandalum patientur: tum quod alter famae suae iacturam apud eosdem incurrit.

Dico III. Si eo auctore, iisque circumstantiis crimen narratur, ut narratio suo pre pondere fidem apud audientes mereatur, vel sinistram suspensionem generet, contra iustitiam peccatur, cum restituendi onere. Ita Nauar. c. 18. n. 50. Mol. Less. l. c.

QVAESTIO TERTIA. Vtrum crimen alicubi notorium aliis ignorantibus manifestare liceat? Duplex est notorium: *Juris*, & *facti*, sicut colligitur ex c. vlt. de cohabit. cleric. & mulier. & videri potest Adrianus quodlib. 11 in corp. Notorium facti est, quod ita se plurium hominum conspectui exhibet, ut nulla tergiversatione celari possit, secundum Gl. in c. vestra, eod. tit. Notorium iuris est, de quo aliquis in iudicio condemnatus, vel confessus, vel sufficientibus probationibus convictus est, sicut colligitur ex c. cum olim, de verb. signif. & docet Abb. cit. c. vestra, Syl. ver. notorium, q. 3. Nauar. c. 25. n. 73. Sa ver. manifestum, num. 3. Verum qui de crimine notorie infamatus est, vel extra iudicium confessus, vel in iudicio semiplene convictus, censi non potest notorius v. g. fur, aut usurarius. Qua de re Mol. to. 2. disp. 333.

Nunc respondeo, & dico I. Crimen verum alicubi notorium notitia facti, aliis ex eodem loco siue Communitate manifestare non est peccatum, vel saltem non est mortale. Ita Scotus in 4. d. 15. q. 4. a. 1. Caiet. opusc. 16. responsionum, resp. 9. Syl. ver. deductio q. 1. Nauar. c. 18. n. 26. Mol. tr. 4. disp. 31. & 32. Nam criminofus censetur tunc ipso iure ac possessione famae suae, quando crimen adeo manifestum est, ut moraliter impossibile videatur, quin in aliorum cohabitantium notitiam deueniat. Adde, eandem esse rationem, si crimen notorium sit, non quidem euidentia facti, sed publica praesumptione, suspicionem, infamia, iuxta c. tua nos, de cohabit. cleric. & mulier. Potes enim absque mortali crimine hanc publicam praesumptionem siue infamiam, non maiore tamen certitudine siue asseueratione, aliis ex eodem loco significare: Veluti, si dicas Sacerdotem alere mulierem suspectam, quod multis in vicinia notum est.



Porro quàm multi crimen cognovisse, vel de eo loqui debeant, ut notorium vel famosum censeatur, & idcirco aliis ex eodem Collegio, vicinia, &c. narrari possit, non omnes eodem modo definiunt. Aliqui apud Syl. ver. notorium q. 4. P. Nau. lib. 2. c. 4. n. 292. existimant sufficere, si decem personæ à Communitate cognoverint. Quia decem homines faciunt plebem, secundum Gl. in c. vnio, 10. q. 3. Sed Nau. in man. c. 25. n. 73. & alter Nau. lo. cit. aiunt, necesse esse, ut tota Communitas, vel maior, aut potior pars eius Communitatis, quæ saltem decem personas contineat, crimen intellexerit. Mihi verò placet doctrina Abb. in c. vestra de cohabit. Cleric. & mulierum, n. 16. Mol. disp. 31. Prudentis arbitrio definiendum esse, num eo usque criminis notitia, vel fama diffusa fuerit, ut spectata humana imbecillitate, impossibile sit cohibere, quominus in aliorum cohabitantium cognitionem deueniat. Quare si domus constet octo incolis, sufficiet plerumque quatuor, vel quinque crimen cognovisse, aut de eo loqui, ut domi notorium censeatur: Sin autem viginti habitatores contineat, sufficiet octo cognovisse: si centum inhabitent, quindecim, vel viginti intellexisse satis erit. In oppido, quod quadraginta domos continet, satis est octo, vel decem diuersarum domorum habitatores crimen perspectum habere: si ciuitas quinquies mille habitatores alat, erit satis triginta, vel quadraginta per ciuitatem dispersos de crimine loqui, ut famosum ac notorium censeatur.

Nota, quod dico, *dispersos*. Nam si crimen in domo notorium sit, non ideo aliis ex vicinia manifestari; vel, si in vicinia duntaxat notum, non ideo aliis partibus amplæ ciuitatis, vel locis, in quibus criminofus famam hæcenus illæsam retinet, fas est reuelare. Quæ est communis doctrina Mol. l. cit. 50. lib. 5. q. 10. a. 2. Pet. Nau. num. 291. contra Less. dub. 13. ubi negat, esse hoc peccatum contra iustitiam. quod tamen alij aiunt: cum infamatus in vno tantum loco aliis locis famam suam integram, sine cuiusquam iniuria, possideat. Quamuis verum sit, interdum exiguum damnum inferri, ideoque venialiter tantum peccari, si alioquin infamia criminis ad ea loca breui peruentura existimetur.

Dico II. Crimen falsum, de quo aliquis per iniuriam infamatus est, vterius diffundere, aliis nescientibus narrando, est peccatum contra iustitiam, ex genere suo mortale: quamuis sæpe ignorantia excusat arbitrantem vel crimen esse verè commissum, vel audientes de eo iam intellexisse. Ratio est, quia innocentem infamare per se malum, & semper iniustum est: quo iniuriæ peccato semaculat, non tantum qui primus infamiam infert; sed etiam qui adiumentum adfert, augeat, latius diffundit.

Dico III. Postquam infamatus, per vitæ emendationem, famam suam recuperavit, iniuria ipsi infertur, eam restituendi obligatione, si de præterito, & obliuione obruto crimine denuo sine necessaria causa infametur. Ita P. Nauar. l. c. Tol. lib. 5. cap. 65. concl. 2. Molin. disput. 33. num. 2. contra Less. cit. dub. 13. in fine. Ratio est, quia sicuti malis moribus infamia facti contrahitur, & fama bona amittitur; ita contrariis bonis moribus infamia facti aboletur, & fama bona recuperatur.

Hæcenus dixi de notorio facti. Nunc de notorio iuris dico I. Si crimen per solam Rei confessionem, vel testium depositionem in iudicio notorium sit, non potest sine iniuria euulgari. Ita ex communi Mol. disp. 33. concl. 4. Ratio est, quia tunc solum in ordine ad Iudicem, ut Reum condemnare possit: & nondum in ordine ad populum, publicum crimen censeatur. Quamuis si crimen paulo post publicandum sit, saltem gra-

uis iniuria non erit, criminis infamiam anteuertere: Imò nulla erit, si iustam ob causam id fiat. Qua ratione Christus Dominus peccatum occultum Iudæ, quod statim consummandum fore certo cognorat propheticè prædixit, & manifestauit discipulo dilecto: *Ille est, cui ego intinctum panem porrexero*, Ioan. 13. ut nimirum appareret, non tradi se inscium, aut inuitum: quo ipso prophetico spiritu Petri trinam negationem postea prædixit. Ita hanc rem explicant Sotus relect. de secreto, mem. 1. q. 2. concl. ult. ad 1. argum. Mol. tract. 4. disput. 6. num. 11. Et si aliter S. Thom. 2. 2. quæst. 33. art. 7. ad 2. & Eugenius Papa c. si sacerdos, de offic. Ordinarij.

Dico II. Si crimen (præsertim cuius iuris infamia annexa est) per Iudicis condemnatoriam sententiam publicatum sit, aliis etiam locis sine iniuria euulgari potest. Ita Maior in 4. d. 19. q. 2. in fine, Sotus & Toller. II. cc. Molin. disput. 33. concl. 2. Suarez tom. 5. disput. 48. s. 1. num. 9. Nauar. in man. cap. 18. n. 26. alter Nauar. lib. 2. cap. 4. num. 286. Valent. tom. 3. disput. 5. qu. 17. p. 2. Ratio est, quod sicuti Magistratus in criminis vindictam Reum corporis, & fortunarum bonis; ita & fama spoliandi ius habet: idque re ipsa efficere decernit, quando eum publica sententia coram populo de crimine condemnat. Quæ ratio conuincere quoque videtur contra Sotum lib. 5. quæst. 101. a. 2. Salomonem 2. 2. quæst. 62. art. 2. controu. 18. Pet. Nau. num. 288. Neque contra charitatis legem peccare eum, qui iustæ sententiæ Magistratus se conformatur, & potestate criminis diuulgandi sibi concessa vitur, saltem in locis eidem Reipub. subiectis, vel etiam aliis, ad quæ ex Repub. illa commercia esse solent, sicuti limitat Molin. disp. 33. concl. 2. qui optimè etiam aduertit conclus. 5. Si crimen ea conditione alicubi publicetur ad emendationem, ut tamen eius notitia intra certos limites v. g. Collegij, Monasterij contineatur, iniuriam illatum iri, si aliis qui ex eodem Collegio, vel Monasterio non sunt, manifestetur.

Dico III. Infamem de vno crimine, iuris, aut facti infamiam, non licet de aliis criminibus sine eiusdem, sine diuersi generis infamare: v. g. de fure capitali sententia damnato fas non est prodere occultum adulterium; aut de publico adultero dicere esse furem; aut de muliere, quæ ob commissum adulterium infamis erat, postquam emendata creditur, dicere eam relapsam esse. Ita Hadrian. quodl. 11. diffic. 1. Salon. 2. 2. q. 62. art. 2. controu. 19. Molin. disput. 32. concl. 1. Petr. Nauar. lib. 2. cap. 4. num. 226. Less. dub. 14. licet contrarium significet Palud. in 4. d. 19. q. 4. in fine, & Syl. ver. de tractio q. 1. qui ait; Non esse mortale, de notorio homicida & fure dicere occultum peccatum fornicationis: quia hoc minus est illis. Id tamen fateri oportet, interdum exiguum, aut pene nullum detrimentum famæ inferri; ac proinde grauiter non peccari, si variis, vel repetitis criminibus hæcenus infamem, iterum commissi sceleri infimules. Quod maximè locum habet si crimina eiusdem generis sint: veluti si publicum usurarium, vel meretricem iterum lapsam affirmes: vel etiam si diuersi generis crimina; sed inter se connexa: ut vno admissio, reliqua consequi soleant: veluti si publicum adulterum, ebriosum cum vxore sua rixatum aias.

QUÆSTIO quarta, An, & quatenus peccet, qui crimen occultum refert non nominata persona? Resp. & dico I. Si absit periculum, ut audientes per illam relationem criminis auctorem cognoscant, ordinariè non est saltem graue peccatum.

Dico II. Si explicata personæ qualitate, (v. g. huius ordinis Religiosum, huius Principis viri cognatum, tale facinus patrasse) grauis infamia redundet in



familiam ordinem, Cœnobium, &c. mortale crimen committitur, cum onere restituendi. Ita docet Molin. disput. 27. & P. Nauar. lib. 2. cap. 4. n. 354. Imò tantò grauius peccat, qui bono homini communis detrahit, quantò maius & communius bonum violat. Tamen enim congregatio v.g. Regularium re ipsa non maculatur ex vnus hominis malitia, aut perfidia: sicuti neque Apostolorum collegium ex prodicione Iudæ: maculatur tamen apud homines simplices & imperfectos; quibus id multiplici scandalo esse solet. De quo vide S. August. epist. 137. ad Clerum Hipponens. Quæ ipsa res quemuis Religiosum admonere debet, vt ita se gerat, ac si totius Religionis honor, populi que spirituale incrementum ex ipso pendeat. Quod item de sacerdotum, siue Clericorum secularium ordine ac statu dici potest.

Denique illud hic adijcere placuit ex Pet. Nauar. l. c. Cauendos esse eos, qui Religioni à sede Apostolica approbatæ obloquuntur, eamque impugnant: quia parum abesse videntur, vt de statu Religionis vniuersum malè sentiant, non sine periculo vel suspitione hæresis.

13 **QVÆSTIO** quinta. Vtrum defuncto detrahere mortale peccatum sit? Resp. cum P. Nauar. n. 351. Molin. disput. 28. Qui demortui famæ detrahit, minus damnum infert, proinde minus delinquit, (cæteris paribus) quàm si vivo detrahat: potest tamen etiam in ea re quandoque mortalis iniuria committi. Nam qui mortuus est, quodammodo viuunt in hominum memoria & existimatione, ac veluti possessionem bonæ famæ, & gloriæ retinet: quasi illum per iniuriam spoliatus, damnum inferre censeris, cum restituendi obligatione. Hinc colligunt Sotus cit. q. 10. a. 2. & de secreto mem. 1. q. 2. in fine. Mol. cit. loco. Etiam Historiographos contra iustitiam delinquere, si occulta demortuorum crimina pandant. Quamuis plus illis, quàm aliis hominibus concessum sit, videlicet vt publica crimina, quæ vel obliuione oblitterata sunt, vel intra vnus tantum civitatis aut provincie fines cognita, publicis scriptis ad perpetuam totius posteritatis cognitionem diffundant: partim ad aliorum exemplum, ac terrorem; partim ad rerum gestarum notitiam conseruandam. Vide etiam Valent. t. 3. disp. 5. q. 17. p. 2. Sa ver. infamare, n. 4. §. historici.

14 **QVÆSTIO** sexta. An, & quomodo peccet, qui detractorem audit, ac tolerat? Respondeo ex doctrina S. Thom. 2. 2. quæst. 73. art. 4. Ad. in quodlib. 11. §. secundò, vt clariùs, Maioris in 4. d. 15. q. 15. §. septimò arguitur, Caiet. ver. detractio, Nauar. cap. 18. num. 37. Peccat primò, qui detractorem per consensum oblectatur: quod est peccatum odij ex genere suo mortale, si delectatio de iactura alienæ famæ sit formalis, ac per se: Sin verò per accidens aliquis delectetur, ob narrantis facundiam, rei nouitatem, venialiter tantum delinquit, sicuti notat Molin. disput. 34. num. 2. Less. dub. 4. n. 20.

Secundò peccat, qui ad detrahendum expressè, vel tacitè alterum impellit ac mouet. Quod est peccatum partim contra iustitiam, quatenus iniustæ infamationis causa præbatur; partim contra charitatem, quatenus infamanti occasio peccati siue scandalum obijcitur, argum. c. ille qui, & seq. 22. q. 5. Ob quas causas hætenus numeratas detractoris auditorem mortaliter delinquere, ostendit S. Thom. testimonio Apostoli, qui epist. ad Rom. c. 1. de detractoribus & eiuscemodi peccatoribus subiunxit: *quoniam qui talia agunt, digni sunt morte: & non solum qui ea faciunt, sed etiam qui consentiunt facientibus.* Item S. Bern. lib. 2. de consider. ad Eugenium Papam: *Detrahere, vel detrahentem audire, vtrum horum detestabilius sit, non facile dixerim.* Veruntamen,

si is, qui ex curiositate alienum occultum crimen rogitando elicit, ita comparatus sit, vt nullum, vel exiguum detrimentum exinde criminoso inferatur, probabile est, venialiter tantum peccari, sicuti docet P. Nauar. n. 361. Similiter, si arbitretur detractorem exiguum fore, detractor autem præter opinionem in grauem ac mortiferam infamationem erumpat, sicuti Mol. notauit concl. 1.

Tertiò, Licet auditor neque causam detractiois præbeat, neque in eam per delectationem consentiat; nihilominus contra charitatem peccat, si, cum possit, non impediatur, vel redarguat; siue expressè, siue tacitè, quod fit v.g. discedendo, sermonem auertendo, vultum tristem exhibendo: Nam *Aquila dissipat pluuiam, & facies tristis linguas detrahentium*, ait sapiens Prouerb. 25. Quare etiam Psalmista dixit Psal. 100. *Detrahentem secreto proximo suo hunc persequabar.*

Porro eadem causæ excusantes, quas in materia de correct. fraterna vniuersim attuli, quominus aliquis peccantem corripere debeat, etiam hic locum habent. Vide Sotum lib. 5. q. 10. a. 4. Tol. lib. 5. c. 67. Sa ver. infamare, n. 6.

**QVÆSTIO** septima. An, & quale peccatum sit se ipsum infamare? Resp. & dico I. Seipsum temere infamare non est peccatum iniustitiæ, sed solum prodigalitatis ex genere suo veniale. Ita Sotus de secr. mem. 1. q. 3. & lib. 5. de iust. q. 10. a. 2. Nauar. in man. c. 18. n. 27. Pet. Nau. l. 2. c. 4. n. 120. Mol. tr. 4. disp. 2. & 37. Less. dub. 6. & alij contra Caiet. 2. 2. q. 73. a. 2. & in sum. ver. detractio. Ratio est, quia homo est veluti dominus famæ suæ; quippe quam propriis virtutum actibus comparat: vt proinde nemini iniuriam inferat, etsi eam prodigat, sicut indicat etiam S. Thom. quæst. 73. art. 4. ad 1.

Dico II. Per accidens tamen potest id esse mortale peccatum: I. Si iactes te de crimine mortali, in eo delectando. Contra quod S. David loquitur Psalm. 51. *Quid gloriaris in malitia, qui potens es in iniquitate?* II. Si crimen tuum manifestando, propriam vitam, vel corporis integritatem in periculum absque causa iusta conijcias quæ de re Sotus cit. q. 3. concl. 4. III. Si criminis infamia cum aliorum scandalo, vel graui no-cumento iuncta sit, sicuti indicat S. Thom. l. c. & S. August. de bono viduitatis c. 22. relatus in c. non sunt audiendi, 11. q. 3. *Quisquis à criminibus flagitiorum atque facinorum vitam suam custodit, sibi benefacit: quisquis autem etiam famam in alios misericors est. Nobis enim necessaria est vita nostra, (honestè acta) aliis fama nostra.* Vide S. Thom. quodlib. 10. a. 13. Nauar. c. 18. n. 61. Pet. Nauar. cit. c. 4. n. 123.

Dico III. De occulto crimine se palam accusare, si debito sine ac circumstantiis id fiat, quandoque opus virtutis est humilitatis, iustitiæ, pœnitentiæ, &c. Ita Sotus concl. 5. Nauar. l. c. Mol. l. c. Multò verò magis Christianæ patientiæ insigne est, contumeliam, vel infamiam ab altero iniuste illatam, nihil se defendendo, suscipere ac perferre. Excipe I. Nisi publica persona sis, vel pars talis Communitatis, in cuius detrimentum criminis infamia cellura est. Quæ de re S. August. suprâ, & S. Græg. cap. 9. in Ezech. *Hi, quorum vita in exemplo imitationis est posita debent, si possunt, detrahentium sibi verba comescere.* Excipe II. Nisi lex charitatis postulare videatur, vt detrahentem commonendo ab errore reuoces. In quam sententiam Salomon Prouer. 27. ait: *Responde stulto secundum stultitiam suam, ne sapiens sibi videatur.*



## CAP. IV.

## De Denuntiatione fraterna.

## S V M M A R I V M.

- 1 Duplex est denuntiatio: Vna iudicialis, & altera Evangelica, seu charitativa: cuius species quædam sunt denuntiatio canonica, & regularis.
- 2 Crimen fratris occultum interdum denuntiatur Prelato, quatenus est persona publica; interdum quatenus est persona singularis, ad paternè corripendum idonea.
- 3 Crimina notoria statim ad Prelatum deferri possunt, nulla alia monitione precedente.
- 4 Crimina pernicioſa, non merè præterita, licet occulta sint, plerumque statim Prelato denuntiari possunt: ut caueat, impediatur.
- 5 Si crimen occultum, quod nec tibi, nec alteri perniciosum, sed peccantibus tantum noxium est, per te solus emendare potes: tunc peccas contra ordinem à Christo traditum, si Prelato statim denunties.
- 6 Qui crimen occultum per se emendare non potest, plerumque Prelato tanquam patri ad secretam emendationem denuntiare potius debet, quam alius ignorantibus.
- 7 Crimen occultum, non perniciosum, Prelato tanquam publicæ personæ ad euulgationem denuntiari non potest, nisi secreta monitio, imò & testium iuductio antecesserit: modo tamen profutura putetur.
- 8 Si denuntiatio ob aliquam causam illicita sit, ut pote contra charitatem, vel ordinem à Christo traditum, non debet fieri, etiam si Prelatus iubeat.
- 9 Impedimentum matrimonij occultum, post Ecclesiæ promulgationem, denuntiari debet: etsi denuntians, qui probè cognitum habet, illud plenè probare non possit.
- 10 Interrogatus de occulto impedimento, aut occulta irregularitate debet abstinere à sacramento Matrimonij, Ordinis: vel defectum manifestare.
- 11 In delictis puerorum, vel domesticorum, non ita plerumque obseruandus est ordo correptionis: sed ferme statim ad Ludimagistrum, vel Patrem familias deferri possunt, ut salubriter corripiant.
- 12 Paterfamilias, Ordinis Prelatus, Ludimagister indices constituere possunt, qui subditorum errata obseruent, & ad ipsos deferant.
- 13 Si quæ crimen occultum fratris in externo foro punibile, quod probare, vel iudiciis ostendere potest, iudiciali denuntiatione prodit, antequam secretò monuit, si nihil contra iustitiam peccat: sed interdum contra charitatem.
- 14 Denuntiationes de crimine occulto, non præmissa monitione secreta, olim in Ecclesiastico foro repellabantur: hodieque repelli possunt, si sint contra personas graves in dignitate constitutas.

**C**anonista in c. nouit, de Iudiciis, quatuor genera denuntiationum asserunt: Vna est iudicialis, quæ fit apud Superiorem, tanquam iudicem. Et hæc duplex; Vel criminalis quæ publicam vindictam seu pœnam, boni communis gratia, spectat. Vel civilis, quæ priuatum interessè seu satisfactionem intendit: quare vtræque de crimine merè præterito institui potest. Altera denuntiatio Evangelica seu charitativa, quæ ipsius peccatoris emendationem, ut principale finem spectat; quare de peccato merè præterito & plenè emendato institui non debet.

Tertia denuntiatio canonica, quæ secundum canonum statuta fieri solet ad impediendum, vel auerendum damnum, præsertim spirituale Communitatis, aut priuatæ personæ: puta, si Clericus denuntietur Prelato, ut deponatur ab officio, quia est perniciosus plebi: aut si matrimonij impedimentum denuntietur, ut contractus interdicatur, aut dissoluatur, iuxta c. ad dissoluendum, de desponsat. impuberum, &c. cum inhibitis, de clandest. desponsat.

Quarta denuntiatio regularis, quæ fit in Religione secundum cuiusque Ordinis statuta. Verùm hæc quasi species quædam contenta sub tribus aliis denuntiationibus; ideo tamen distingui solet, quia in regulari denuntiatione non ita strictè ordo iuris seruari debet, ut infra dicam. Sed & canonica denuntiatio non

multum discrepat à denuntiatione fraterna: quamobrem Theologi plerumque duarum tantum denuntiationum meminerunt; Iudicialis, & charitatiuæ seu Evangelicæ, uti videre est apud S. Thom. 2.2. q. 33. a. 1. 3. & 6. Syluest. ver. denuntiatio, in princ. Sotum de seccr. regen. membro 2. q. 5. & lib. 5. de iust. q. 5. a. 1. Ideoque placet in progressu nomine denuntiationis Evangelicæ seu charitatiuæ etiam canonicam, & regularem comprehendere.

Circa charitatiuam denuntiationem notandum est primò: Quod crimen fratris interdum denuntiatur Prelato, ut in secreto corrigat, tanquam singularis persona ad paternè corripendum idonea, sicuti notat S. Thom. q. 33. a. 8. ad 4. Interdum verò denuntiatur crimen Prelato, ut publica persona est; quamuis non principaliter ad vindictam, per quam Communitati satisfiat; (sic enim ad iudicem denuntiationem spectaret) sed ad salutarem correctionem ipsius criminosis: qui si monitione secreta iuuari non potest, publica interdum confusione emendatur: sin minùs, veluti membrum putridum à reliquorum communiōe denique separatur: quo sensu dixit Innoc. III. in cit. c. nouit; Ad officium summi Pontificis pertinere, de quolibet mortali peccato corripere quemlibet Christianum: & si correctionem contempserit, per distractionem Ecclesiasticam (censuratum) coercere. Nam cuius est ordinare homines ad finem, eiusdem etiam cognoscere de mediis, quibus pertineant ad finem: sicuti Medici, inquit Nauar. in c. nouit. notab. 6. num. 14. de iudiciis, cuius est indicare de sanitate corporis, etiam est indicare de iis, quæ conseruant eam, ut corpori applicentur, & de his, quæ impediunt eam, ut tollantur. Quare, cum Ecclesiasticorum Prelatorum proprium munus sit Christianos ordinare ad finem salutis æternæ: ad eosdem etiam pertinebit tum præcipere ea, quibus ut mediis hunc finem assequi debent, tum verò prohibere ac tollere ea, videlicet mortalia peccata, quibus à dicto fine excluduntur.

Notandum secundò: Quod crimen aliud est publicum seu notorium, aliud verò occultum. quale etiam censeri debet, quod tribus, vel quatuor tantum notum est. Præterea quædam crimina per se ac directè noxia sunt Communitati: ut hæresis, proditio, crimen læsæ maiestatis, falsatio monetæ, ponderum, prædandi, latrocinandi consuetudo, falsa subornatio in electionibus, crimen susurronis; vel si quis alia ratione in Communitate fatagat pervertere fratres. Quædam verò sunt particulariter noxia seu ipsis tantum peccantibus, ut sodomia, concubinatus: siue alteri innocenti, ut furtum, adulterium. Vide Gl. in c. 1. de confessis, Richar. in 4. d. 19. a. 3. q. 1.

Tertiò notandus est ordo, quem in correctione peccatoris obseruandus Christus præcepit apud S. Matt. c. 18. Quod qui fratris peccatum cognitum habet, eum primò solus monere debet, non tantum semel, sed iterum, ac tertio, quamdiu, prudentis viri arbitrio, ex eiusmodi secreta correptione emendatio fratris speratur. Sin verò secreta admonitione nihil proficiatur, adhibendus est vnus alius: vel, si is non sufficit, alter, vel tertius testis, præsertim qui crimen iam cognitum habet, uti obseruauit Palud. in 4. d. 19. q. 4. Quod si verò nec tibi, nec adhibitis testibus peccator obedire paratus sit: tum denique Ecclesiæ, seu Prelato tanquam publicæ personæ denuntiari debet. Cum autem hoc Christi præceptum affirmatiuum sit, non obligat semper, sed concurrentibus certis circumstantiis, in quibus videlicet lex naturalis charitatis præcipit, ut fratris famam per denuntiationem seu ostensionem criminis non lædamus, quando nulla necessitas postulat: Qui autem casus sint, in quibus ordo prius secretò peccatorem corripiendi, quam denuntiandi obliget, seqq.



assertionibus ostendam.

**Assertio I.** Si crimen publicum seu notorium sit, ordo illi necessario observandus non est: sed statim ad Ecclesiam, vel Prælatum, ut est caput Ecclesiæ, deferri potest, ad publicam emendationem. Ita ex communi S. Thom. 2. 2. q. 33. a. 7. Angelus ver. denuntiatio, §. 10. Rosella ver. inquisitio, in princ. Syl. ver. correctio, q. 5. Nau. c. 18. num. 31. Et sumitur ex Apost. 1. ad Timoth. 2. *Peccantes coram omnibus argue, ut & ceteri timorem habeant.* Quem locum explicans S. August. ser. 16. de ver. Domini, relatus in c. si peccaverit, 2. q. 1. ait: *Corripienda ipsa sunt coram omnibus, quæ peccantur coram omnibus: Ipsa vero corripienda sunt secretius, quæ peccantur secretius. Distingue tempora, & concordabis scripturas:* Vult dicere, verba illa Apostoli non contradicere ordini correctionis, quem Christus tradidit Matt. 18. Quia Apostolus loquitur de peccatis publicis & notoriis, quibus cum Communitas offendatur, coram eadem Communitate corripienda & emendanda sunt. Christus autem loquitur de peccatis occultis, siue quæ in publicam notitiam non deueniunt; quare neque deducenda sunt, si, sicuti in occulto commissa, ita etiam occultè ac facili modo emendari possint.

**Assertio II.** Crimina, quæ Reipublicæ perniciosa sunt, licet adhuc occulta, si indiciis ostendi possint, ut denunciatori fides aliqua habeatur, statim Prælati denuntiari debent, ut caveat, impediatur. Ita S. Thom. cit. a. 7. aliique communiter. Ratio est: Quia maius est bonum publicum, quod tunc in periculo versatur, quam sit priuatum bonum famæ peccatoris occultæ: ergo fama eius negligi debet, ut bono publico succurratur.

**Excipe primò:** Si certa spes sit priuata monitione peccatum fratris occultum, Reipublicæ perniciosum, impediri ac tolli posse, non debet denuntiari, sicuti notauit S. Thom. in cit. a. 7. Palud. in cit. quæst. 4. Adrianus in 4. vbi de correct. fraterna, §. ostenso, contra 2. Richardi, Nau. cap. 18. man. num. 56. Ratio est: Quia peccator sine causa necessitatis infamaretur contra charitatis legem. Monent verò Nauar. cap. 24. man. num. 14. Sotus de secret. mem. 2. quæst. 4. conclus. 2. Valentia tom. 3. disput. 3. quæst. 8. p. 5. Petrus Nauar. lib. 2. de restitut. cap. 4. num. 186. Rarum esse, ut quis crimen valde perniciosum, v. g. subornatæ proditiōis, tam securre ac certo impedire in occulto possit, quam si Magistratui denuntietur. Idemque sentiendum de peccato hæresis, dummodo formalis sit, siue cum pertinacia iuncta. Sin verò aliquis per ignorantiam in rebus fidei errare censeatur, monendus est prius, non tantum semel, sed sæpius, donec appareat pertinacem esse: ut iam amplius tolerari non debeat, sed Ecclesiæ denuntiari, iuxta præceptum Apost. 1. ad Tit. 3. *Hæreticum hominem, post unam et secundam correptionem, deuota.*

**Excipe II.** Si in aliquo casu sufficere videatur, ut crimen occultum Reipubl. perniciosum generaliter denuntietur; tunc non est exprimenda persona, sicuti notat Nauar. in man. cap. 18. num. 56. ob regulam communiter receptam; Quod seruanda est fama proximi, quotiescunque maior necessitas non vrget eam lacerandi.

**Assertio III.** Crimen occultum, si personæ priuatae perniciosum sit, & alio modo facili emendari, vel impediri non possit, plerumque superiori statim denuntiandum est. Tale crimen est v. g. furtum, homicidium, sollicitatio ad turpia: modò non sit crimen merè præteritum, sed quod perseverat, vel in futurum etiam timeatur. Ita S. Th. quæst. 70. a. 1. ad 2. Syl. ver. correctio, q. 6. Petr. Nauar. lib. 2. cap. 4. num. 189. Sa ver. correctio, num. 5. Ratio est: Quia naturali iure quisque obligatus est ad defendendum innocentem ab iniuria homi-

nis nocentis, etiam posthabito aliquo damno nocentis. Cæterum, si exiguum damnum proximo ex crimine alterius eueniat; maior autem famæ, vel vitæ iactura criminoso ex denuntiatione timeatur: ut si vir magni nominis modicum quippiam furari soleat; si pater familias filium, vel famulum, cognitis eius furtis, iniuste occisurus, vel mutilatus existimetur, dissimulanda res erit, sicuti notauit Gabriel in canon. Missæ, lect. 74. Petrus Nauar. num. 190. Molin. loco cit.

**Assertio IV.** Si occultum crimen cessurum sit in tuum ipsius detrimentum, quod alio modo facili tollerere non possis, quam Superiori denuntiando, non prohiberis id agere, propriæ nimirum defensionis iure; non ex odio, aut vindictæ amore. Ita ex communi Syl. ver. cit. quæst. 6. Adde, tametsi proximum ob id solum infamare non possis, quod ab eo prior iufamatus sis, (esset enim ista illicitæ priuata vindictæ species) si tamen famam tuam, quam ille per improbitatem eripere nititur, alia ratione defendere nequeas, quam eius calumniandi, mentiendi consuetudinem ostendendo, non prohiberis id facere, cum moderamine inculpatæ tutelæ. Quæ ratione docent Sotus l. 5. quæst. 7. a. 3. Lessius lib. 2. cap. 31. dub. 1. si accusatus, vel eius aduocatus testimonium tertiū alia ratione infirmare non possit, quam occultum eorum crimen, puta periurij, vel aliud simile, ob quod iuris infamia incurritur, & a ferendo testimonio aliquis repellitur; non esse illicitum id agere, cum moderamine inculpatæ tutelæ. Quin etiam quandoque non solum fas est famam huiusmodi rationibus contra lædentem tueri, sed etiam aliorum causa necessarium, sicuti indicat S. August. cap. 22. de bono viduit. & docet S. Tho. q. 73. a. 4. ad 1.

**Assertio V.** Qui crimen fratris occultum, Reipublicæ specialiter non perniciosum, ut Sodomiam, concubinatum, simplicem blasphemiam per se solus corrigere, & emendare potest, peccat contra charitatis ordinem à Christo traditum, si Prælati, etiam ut singularis persona est, denuntiet. Hæc assertio sumitur ex verbis Domini Matthæi 18. *Si peccauerit in te frater tuus, vade, & corripe eum inter te, & ipsum solum.* Et docet eam S. Thom. cit. quæst. 33. a. 7. ad 5. vbi ait: Quod Prælati Ordinis obediri non possit, quippe contra præceptum Domini agentis, si præcipiat manifestari sibi crimen occultum; quod nec per infamiam, nec per alia indicia proditum est. Et in quodlib. 1. a. 13. *Si ego scio, quod frater per me corrigetur, tunc non debeo denuntiare Prælati. Si autem videtur, quod hoc melius fiet per Prælatum, & Prælatus sit pius, discretus et spiritalis, non habens rancorem siue odium aduersus illum subditum, tunc licet potest ipsi denuntiare, & tunc non dicit Ecclesia: quia non dicit ei sicuti Prælati, sed sicuti personæ proficienti ad correctionem & emendam proximi.* Ex quibus verbis habemus, quod secundum mentem S. Thom. non potest crimen fratris occultum Prælati, aut cuiunque alteri homini reuelari, si per secretam monitionem æquè corrigi & emendari possit; multo que minus, si iam emendatum est, & recidendi periculum abesse videtur: quia tunc sine necessitate fama fratris læderetur. Eandemque sententiam tenent Henricus Gandauensis quodlibeto 9. qu. 27. Adrianus loco supra cit. ad tertium principale, Paludan. cit. q. 4. Syl. ver. denuntiatio, q. 4. Armilla ver. correctio, n. 5. Nau. cit. n. 14. Sotus de secreto, memb. 2. q. 4. conclus. 2. & Pet. Nau. l. 2. c. 4. num. 237. contra Gabr. lect. 74. in can. Missæ, Richard. cit. d. 19. a. 3. quæst. 1. Angelum verbo denuntiatio, num. 10. Rosell. ver. inquisitio, in princ. Turrianum 2. 2. quæst. 37. art. 7. dub. 4. vbi generatim & indistinctè aiunt, saltem in Religionibus permissum esse crimina occulta fratrum denuntiare Prælati, tanquam patri; etsi secreta monitio non antecesserit,



imò licet peccator iam emendatus sit.

Fateor tamen, in bene institutis Religionibus crimina occulta, si necdum emendata sint, aut si recidua timeantur, frequentius absque præmissa secreta monitione, ad Prælatum, tanquam patrem, deferri posse: tum quia alij ferme non sunt ita idonei ad efficaciter emendandum crimen, tollendâque occasiones iterandi, sicuti annotavit Sanch lib. 6. moral. c. 18. num. 50. tum quia plerumque Prælati talium ordinum sunt viri pij ac prudentes, qui plus admonitione prodesse possunt, quam obesse. Quare S. Thom. ait quodlib. 11. art. 13. Propter diversas condiciones Prælatorum, & subditorum non posse dari generale iudicium: nisi, quod in omnibus semper servanda est charitas, & quod magis expedire videtur: & si hoc aliquis intendat, non peccabit denuntiando.

Deinde argumentatur Suarez de Charitate, disp. 8. sect. 6. num. 12. Vel peccatum Religiosum leue est, tunc infamatio erit lenis, vtilitas verò plerumque maior ex denuntiatione proveniet: præterquam quod talis consuetudo denuntiandi Prælato levia delicta Regularium valde consentanea, & quasi necessaria sit religiosi status conservationi atque augmento. Vel peccatum Religiosum est graue, tunc fieri vix potest, ut non noceat multis propter magnam familiaritatem & communicationem, quæ inter Religiosos eiusdem domus est: sæpe etiam impendit periculum infamæ ipsi religioni: quare tale peccatum denuntiari poterit, tanquam perniciosum, imò sæpe debet denuntiari, præsertim si Prælatus interroget.

Verum etiam in Religionibus accidere potest, ut crimen occultum Ordini specialiter non perniciosum, non liceat Prælato denuntiare; si videl. alius, qui antè crimen cognitum habet, æquè idoneus sit, quàm Prælatus, ad crimen fratris emendandum. Quamvis id rarum esse in Religiosorum congregatione, bene admonet Sanchez lib. 6. moral. c. 18. num. 50.

Præterea, si in aliqua Congregatione socii iure suo cedant, potestatemque ultro faciant delicta & defectus omnes, quæ in ipsis extra sacramentalem Confessionem animadversa fuerint, statim, ex charitatis motivo, ad Prælatum deferendi, cessabit obligatio ordinis corripiendi, quippe qui in peccantis favorem constitutus est: quisque autem iuri & favori suo renuntiare potest. Quæ de re videt Valent. cit. p. 5. casu 5. Turrianum cit. a. 7. dub. 4. Sanchez lo. cit. num. 44. contra Cosmam Philarchum tom. 1. p. 2. lib. 4. c. 14. Id verò hoc loco annotandum, nomine errorum ac defectuum, quæ in aliquo sociorum, ex ipsorummet voluntate ac consensu, Superiori ob maius spirituale bonum, manifestari possunt, ut in Constitutionibus Societatis Iesu habetur; non comprehendi ea, quæ alicui causa consilij, vel auxilij sub secreto aperiuntur, uti habetur in Congregat. gen. 6.

Assertio VI. Si quis se minus sufficientem animaduerat, ut occultum & nondum emendatum peccatum fratris per se solum emendare possit, plerumque non debet aliû, qui crimen antè cognitum non habet, adhibere ad commonitionem fratris; sed statim Superiori manifestare, tanquam patri. Ita contra quosdâ, quos citat, & sequitur Valentia cit. p. 5. tertio controversio, docent Gabr. l. c. Sotus cit. q. 4. ad 2. & expressè S. Th. q. 33. a. 8. vbi ad argum. 4. sumptum ex S. August. reg. 3. Quod peccatum fratris prius Præposito debeat ostendi, quam testibus; respondet: Augustinus intelligit, quod prius dicatur Præposito, quàm testibus: secundum quod Prælatus est quedam singularis persona, quæ magis potest prodesse, quàm alij: non autem, quod dicatur ei tanquam Ecclesiæ, id est sicut in loco Iudicij residenti. Verba autem S. Augustini in epist. 109. ad Monachas, ex qua reg. illa 3. desumpta est, ita se habent: Si oculi penitentiam in aliqua vestrum ad-

verteritis, statim admonete (secreto) ne cæpi progrediantur, sed ex proximo corrigantur. Si autem ex post admonitionem iterum, vel alio quocunque die id ipsum eam facere videritis, iam velitis vulneratam sanandam prodat (in publicum) prius tamen & alteri, vel tercia demonstratam, ut duarum, vel trium (tanquam testium) possit ore convinci, & competenti severitate coerceri. Et paulo post: Sed antequam aliis demonstretur, per quas convincenda est, si negaverit, prius Præpositus debet ostendi, si admonitâ neglexeris corrigi, ne forte possit secretius correpta innotescere ceteris: Si autem negaverit, tunc neganti adhibenda sunt alia, ut iam coram omnibus possit non ab una argui teste, sed à duabus, tribusve convinci. Convieta verò secundum Præposita, vel Presbyteri arbitrium debet emendatorem sustinere vindictam: quod si ferre recusaverit, & si ipsa non abscesserit, de vestra societate projiciatur. Non enim hoc fit crudeliter, sed misericorditer: ne contagione pestifera plurimas perdat. Et hoc, quod dixi de oculo non figendo, etiam in cæteris inveniendis, prohibendis, indicandis, convincendis, vindicandisque peccatis diligenter observetur, cum delectione hominum, & odio vitiorum.

Ex quibus sententia vtriusque S. Doctoris clarè intelligitur. Quod qui occultum fratris delictum aduertit, si per se solum emendare non posse speret, Præposito prius indicet, quàm ut aliis ostendatur: Quia ille, ut spiritualis pater, præsumitur magis idoneus ad fratrem iuvandum, quàm alij. Neque deceat, ut alij in congregatione crimen nondum emendatum norint, aut de eo loquantur; ille autem, ad quem ratione officij pertinet, quique salubrius medelam afferre poterit, ignoret. Debet tamen Prælatus crimen non evulgare, sed in secreto (adhibito etiam, quatenus necesse est, vno, aut altero secreto consultore) corripere, ac emendare: dummodo frater peccatum fateatur, & Prælato præcipienti, ut patri obedire velit. Sin verò neget, tunc adhibendi sunt alij, coram quibus convincatur; & convictus, secundum Prælati arbitrium puniatur.

Ratio huius doctrinæ est, quam tradit S. Th. a. 6. in corp. Ea quæ sunt ad finem, regulari debent, secundum quod exigit ratio finis: cum finis sit mensura mediæ. Atqui finis fraternæ seu charitativæ correptionis, ac denunciationis debet esse emendatio & salus fratris. Ergo correptio, ipsaque denunciatio ita institui debet, ut fratri profit, & quàm fieri potest, minimè obstat. Quare, sicuti Medicus corporalis intermittit ea medicamentorum genera, quibus plus oberit, quàm proderit: iis autem, quæ profutura sperat, quàm fieri potest, cum minima corporis læsione utitur: sic etiam, qui peccatori spiritualiter mederi desiderat, si videat illum per correptionem, vel denunciationem non emendatum iri, sed in deterius lapsum, debet omnino intermittere: sin verò speret emendari posse, talem modum usurpare oportet, qui homini utilis sit, & quatenus possibile, minimè noxius: talis autem est modus, quem supra ex S. August. explicavi. Quapropter neque id obstat debet, quod ex denuntiatione peccatoris fama eius apud Prælatum nonnihil diminuenda sit, si ex secutura paternâ monitione maius spirituale commodum denuntiationi provenitum speratur. Quamvis contrarium docuerit Henricus Gandauensis, quodlib. 9. quæst. 29. Si crimen occultum sit, alteri non perniciosum, quod secreta monitione corrigere nequeas, Domino Deo commendandum esse, & Prælato, aut alteri personæ ignoranti denuntiari non posse.

Assertio VII. Crimen occultum, Reipubl. non perniciosum, communitati, aut Prælato, tanquam publicæ personæ, ad evulgationem denuntiari non potest, nisi secreta admonitio, imò testium: seu aliorum monitorij inductio antecesserit. Hæc assertio sumitur ex præcepto Christi Matth. 18. cuius summa est: Si



peccatum fratris occultum cognoscas, primò corripere eum secretò, remotis arbitris: si nihil proficias, adhibe adhuc vnum, vel alterum, (inter quos etiam esse potest Prælatus, tanquam persona singularis) qui peccatum fratris observent, eumque commoneant: Si nec hos audire velit, dic Ecclesiæ, seu Prælato, quatenus est caput Ecclesiæ: ut publicè peccator convincatur, & ad emendationem compellatur, aut certè tanquam contumax ab Ecclesia repellatur.

Hinc colligitur primò; Duas ob causas post primam monitionem, adhuc vnum, vel alterum tanquam delicti occulti observatores, adhibendum esse: primò, ut crimen, si coram duobus, vel tribus corrigi possit, in publicum non evulgetur: secundò, si omnino evulgandum sit, quia frater aliter corrigi non potest, ut illi alij postea testes esse possint ad publicam convictionem. Quandoquidem Prælatus, contra denuntiatum, si crimen eius probari posse videat, non prohibetur ex officio suo iudicalem processum instituere, sicuti ex communi notat Nau. in rubr. de iudic. num. 95. & videri potest Adrian. l. c. prope finem.

Colligitur secundò: Si crimen sit præteritum, & non iterum committendum, non esse inducendos testes: quia isti adhibendi sunt tanquam observatores criminis, ut postea & ipsi peccatorem corripere, vel saltem de commissio criminis testimonium ferre possint: quæ locum non habent, si crimen occultum iterum committendum non sit, sicuti notavit Adrianus l. c. ante solut. argumentorum.

Colligitur tertio ex doctrina S. August. loco supra cit. iuncta interpretatione S. Th. q. 33. a. 8. ad 4. Prius Prælato, quam aliis quibusdam peccatum occultum revelari posse, quatenus ille est persona singularis; non autem quatenus est persona publica, seu caput Ecclesiæ. Quam doctrinam indicat etiam S. August. cit. serm. 16. de verbis Domini: *Sunt homines ad iterum in domibus suis in secreto peccant: aliquando nobis produntur ab uxoribus suis, plerumque Zelantibus, aliquando maritorum salutem querentibus: Nos non prodimus malum, sed in secreto a quibus. Ubi corrigi malum, ibi moriamur in malum.* Ex quo loco ita argumentari licet: Si crimen occultè commissum in occulto emendari potest: non est propalandum: correctio autem, quæ fit per inductionem vnius, duorum, vel trium, censetur esse occulta: ergo si ea sufficiat ad fratris emendationem, non debet publicè denunciari. Excipi tamen debent defectus leves & non infamantes, qui secundum consuetudinem Religiosorum, etiam publicè denunciari possunt, non præmissa vlla privata monitione: cum ex tali denuntiatione charitativa plus commodi etiam ipsi delinquenti, quam incommodi accidere soleat, uti indicat S. Thom. 2. 7. ad 4. & videri potest Palud. in 4. d. 19. q. 4. §. ad argumentum.

**Assertio VIII.** Cum aliquis occultum proximi peccatum Prælato denunciare potest, ipso interrogante, ac præcipiente, ferme etiam denunciare debet: Contra, cum occultum proximi peccatum denunciare illicitum est, neque accedente Superio is præcepto, licitum efficitur. Ita docet S. Thom. q. 33. a. 7. ad 5. Syl. ver. correctio, q. 7. Nau. in man. c. 17. num. 114. 134. P. Nau. lib. 2. c. 4. num. 215. Sanchez lib. 3. de matrim. disp. 13. alique communiter.

Corollarium I. Denunciare non debes, imò nec licitè potes, crimen occultum interrogante Prælato ad eius emendationem, aut satisfactionem partiæ, si firmiter credas, Reum iam emendasse, aut satisfecisse. Nam tunc cessat finis præcepti, ideòque parcere oportet famæ fratris, sicuti tradit Nau. c. 25. n. 46. Pet. Nau. cit. c. 4. n. 218.

Corollarium II. Denunciare non teneris Prælato interroganti de crimine occulto, si illud incerto tantum

rumore, aut à personis non dignis fide percepti: secus, si à persona, quæ fidem meretur: ea enim examinari potest, ut crimen evitetur, aut emendetur, sicuti docet Nau. l. 5. consil. 3. de hæreticis, num. 1. edit. 2. Sanch. cit. disp. 13. num. 7. Coninck tom. 2. disp. 27. dub. 7. num. 61. Idemque dicendum, si denuntiator de constante fama impedimenti, & secuturo scandalo docere possit, sicuti colligitur ex c. cum in tua, de sponsal.

Corollarium III. Interrogatus à Prælato de crimine alterius occulto, denunciare non debet, neque licitè potest, quamdiu sperat se secreta admonitione illud emendare, aut impedire posse. Ita S. Tho. cit. a. 7. Syl. uel. q. 7. Nau. c. 22. num. 83. Gutierrez lib. 1. canon. qq. c. 11. num. 27. Quia Prælatus non censetur aliter præcipere criminis denuntiationem, nisi observato ordine ac modo, quem secundum ius naturale Christus præscripsit, Matth. 18. Sin verò expressè contra hunc ordinem iubeat crimen aperiri, peccabit tam ipse, quam subditus si ei obediat: quia *obedire oportet Deo magis, quam hominibus*, Act. 5. Excepto, si aliqui in hac re iuri suo sponte renuntiant, sicuti supra dixi assert. 3. in fine.

Corollarium IV. Denuntiationem criminis occulti interrogatus à Prælato intermittere debet, si arbitretur, ex illa maius incommodum, aut scandalum oriturum esse. Ita Nau. cit. n. 83. Gutierrez num. 29. Sanch. num. 4. Nam quod propter charitatem institutum, non debet contra charitatem exerceri: denuntiationes autem ob charitatem introductæ sunt, & à Prælati Ecclesiæ præcipi solitæ: ergo si quis animaduertat, spectatis omnibus, gravius ex denuntiatione, quam ex taciturnitate damnum oriturum esse, non debet denunciare.

Quæ hætenus dicta sunt, Doctores communiter tanquam in speciali exemplo ostendere solent in denuntiatione impedimento matrimonij. Quòd fideles, si cognitione moraliter certa deprehenderint occultum matrimonij impedimentum, v. g. ex crimine incestus, aut binis sponsalibus oriturum, post Ecclesiæ promulgatum præceptum, denunciare teneantur: Excepto, si sperent privata monitione malum emendari posse, aut si putent, ex tali denuntiatione maius aliquod malum, vel scandalum oriturum.

Cum verò hoc loco sermo sit de denuntiatione charitativa & canonica; ideo rectè etiam Doctores annotant, nihil referre, licet denuntians, si persona fide digna sit, crimen aut impedimentum probare non possit: cum non agatur iudicè ad criminis vindictam, sed charitativè ad peccatum & damnum spirituale vitandum. Aperitur enim via Prælato, ut impedimentum ulterius indagare, & matrimonium cum sacramenti irreverentia, & non sine scelere contrahendum, adhibitis admonitionibus ac terroribus, impedire possit. Hinc etiam statutum legimus in cap. præterea 2. c. cum in tua, de sponsal. & cap. super eo, 2. de testibus, ut ad obijciendum impedimentum matrimonio nondum contracto, vnius idonei ac iurati testis depositio sufficiat: etiam si is ipsemet denuntiator sit, sicuti colligitur ex cit. cap. cum in tua, & cap. ad audientiam, eod. tit. cap. iuravit, de probat. & ex communi tradit Abb. in c. 1. num. 6. de consang. & affinit. Sanchez lib. 1. de matrim. disp. 71. num. 4. Imò etiam si propriam turpitudinem alleget: si v. g. sponsi consanguineus dicat, se cum sponsa fornicatum, ideòque illam impeditam esse nubere fratri, vel patrueli suo, sicuti habetur in cit. c. præterea, ubi Abbas tradit: Vbiunque agitur de peccato vitando sine magno incommodo alterius, creditur dicto vnius testis, sine publicatione nominis eius, si ob culpam aliquam timeret prodire in publicum: excepto, si sponsalia iurata fuerint, uti ibidem in textu eius cap. habetur. Vide eundem Abb. in c. 1. num. 5. de eo qui cognovit, &c.

Præterea, cum in tali inquisitione non agatur ad criminis vindictam, sed ad impediendum peccatum, servandum honorè sacramento; sequitur, quòd Prælatus



inquirere debeat de impedimento occulto, cuius aliqua probabilis suspicio, licet non publica infamia sit, sicuti notant Innoc. in c. 1. ibid. Abb. num. 34. de postulat. Prælatorum, ex c. cum nobis, de elect. Et quod interrogatus de occulto suo matrimonij impedimento, vel irregularitate impediens ab ordinis susceptione, teneatur vel abstinere à sacramento, vel manifestare defectum; licet is occultus & infamans sit, sicuti habetur in c. nisi cum pridem, §. personæ, de renuntiatione, c. innotuit, de elect. c. ex penitentibus, d. 50. & docet Abb. cit. c. innotuit, n. 6. & c. continebatur, n. 8. de despons. impub. Syl. ver. ordo, 2. q. 2. Henric. l. 10. cap. 18. n. 2. Sanch. lib. 3. de matrim. disp. 14. Sed limitari debet; Nisi dispensatio super impedimento vel defectu occulto impetrata esset, ac proinde ratio interrogandi ad peccatum vitandum cessaret, necesse non foret confiteri, sicuti etiam docet Innocent. in cap. penult. de corpore viriatis, S. Anton. p. 3. tit. 14. cap. 16. §. 13. Sylvest. cit. q. 2. Si tamen Ordinarius tanquam iudex iuridice interroget, præcedente infamia, & indiciis sufficientibus; interrogatus fateri cogitur: quia dispensatio illa occulta, siue in foro conscientie impetrata, nihil adiuuat in foro externo.

Denique, quod DD. monent; Ad Episcopum pertinere, ut inquirat de matrimonij impedimento, si probabilis eius suspicio; quamvis non publica infamia sit; idem quoque de Parocho intelligi debet, ut colligitur ex c. ult. de clandestina desponsatione. Quod si vel certo, vel probabiliter cognoscat Parochus subesse impedimentum, quamvis occultum, modò non ex sacra confessione cognitum, non potest sponso conungere: sed, si eos priuata monitione à matrimonio contrahendo abstergere non possit, rem ad Episcopum deferre tenetur, sicuti habetur in cit. c. ult. & ex communi docent Palud. in 4. d. 28. q. 2. a. 5. Coninck cit. dub. 7. concl. 2. 3. & 4. Et debent hæc intelligi non tantum de matrimonij impedimento dirimente, sed etiam impediens tantum, sicuti ex communi tradit Sanchez lib. 3. disp. 15.

Restant aliquæ QVÆSTIONES: PRIMA. Quid sentiendum sit de occultis criminibus seu delictis domesticorum, puta filiorum, ac famulorum; utrum patri, vel matrifamilias: item de delictis occultis puero- rum scholasticorum, utrum Ludimagistro denunciari possint ad corrigendum, etiam non præmissa secreta monitione? Respondeo & dico I. Si talium personarum occulta delicta deuia sint, plerumque statim à quocunque, qui ea deprehendit, denunciari possunt, ut salubriter corrigantur. Constat hæc assertio ex praxi. Ratio verò est: Quia ex vna parte talium personarum leuia delicta auctores suos quasi nihil infamant: ex altera verò parte talis denunciandi consuetudo ordinata est tum ad bonum ipsorum denuntiatorum, qui paterna correptione indigent, ut à maioribus vitiis abstrahantur: partim ad vilitatem communem ipsius domus, familie, aut ludiliterarij; ut omnes, qui disciplinæ subiecti sunt, facilius à criminibus contineantur. Confirmatur ex doctrina S. Th. 2. 2. q. 33. a. 7. ad 4. ubi defendit denuntiationes Regularium in suis Capitalis, quia sunt tantum de leuibus, quæ famam non derogant. Quare si in publico Capitulo talia reuelare licitum est ad emendationem, multò magis soli Prælato, patri, &c.

Dico II. Per se loquendo, concessum est patrifamilias delicta domesticorum occulta, etiam graua, quorum punitio ad ipsum spectat, matrifamilias reuelare: Atque vice versa, materfamilias marito, vel simili personæ auctoritatem habenti occulta eiusmodi delicta ad salubrem correptionem, punitiōemve manifestare potest. Ita Caiet. 2. 2. q. 73. a. 2. Mol. tract. 4. disp. 29. Ratio est: Quia paterfamilias, & suo etiam modo materfamilias, ob incumbentem ipsis curam adnauistrandæ

familie, ius habent puniendi talia delicta domesticorum tum liberorum, tum famulorum, & ancillarum: Ergo in iustam punitiōem, & quasi partem pœnæ id decernere possunt, ut delinquentis crimen deferatur ad alium, qui & ipse puniendi potestatem habet. Quare equitas postulat, ut post talem delationem criminis occulti minor pœna delinquenti inferatur. Et quod dixi de marito atque uxore cōparatione domesticorum: similiter dici potest de ludiliterarij præceptore, & superiore Præfecto seu Rectore, quod vnus alteri crimen occultum etiam graue alicuius scholastici reuelare possit, puniendi causa. Interim verò, spectatis circumstantiis personarum, semper curandum est, ut ex tali reuelatione, ac punitiōe plus commodi, quàm incommodi sequatur.

Dico III. Plerumque non peccant domestici, aut extranei, si peccata occulta, etiam graua, denuntient patrifamilias, vel matrifamilias ad salubrem correptionem: Item nec pueri literarij, vel alij, si scholasticorum occulta, quamuis graua, peccata statim deferant ad Præceptorem, aut Præfectum scholæ. Ita docent Caiet. 2. 2. quest. 73. a. 2. Nauar. c. 18. man. cap. 33. Molin. loc. cit. Probatum primò: Quia parentes, & qui loco parentum sunt, Præceptores, ita affecti esse solent, erga suos, ut aptiores quàm alij censeantur ad emendanda delicta sibi commissorum: & quidem sine graui eorum incommodo, aut famæ dispendio. Secundo, Quia paterfamilias, ludimagister, & similes personæ ius habent puniendi suorum crimina ad conseruandam disciplinam domesticam: vel scholasticam: in eaque punitiōe, cum leuis esse soleat, & non multum infamans, sicuti notat Nauar. c. 25. n. 58. non tenentur seruare per omnia iuris processum; Iudici forensi præscriptum: sed ex vehementibus indiciis, seu semiplena probatione, ideòque ex vnus fidelis & oculati indicis denuntiatione procedere possunt ad punitiōem: cum ea cedere soleat partim in cōmodum ipsius Rei: partim in aliorum exemplum, ad domesticam, vel scholasticam disciplinam conseruandam. Ex quo consequens videtur, si ad tuam denuntiationem crimen occultum paterfamilias, vel ludimagister salubriter punire possit, quod ipsi licet denuntiet.

Eademque ferme locum habent in Prælati Ordinum regularium respectu suorum subditorum: siquidem nec ij in punitiōe criminum iuris processum exactè seruare tenentur, sicuti notauit Sotus de secr. mem. 2. q. 5. in princ. Disparitas tamen aliqua est, quod personæ religiose plerumque graues sunt, quibus curæ esse solet, ut famam suam integram apud Prælatum seruent: Ipsæque punitiō, quæ ob crimina graua à Prælati Ordinibus inferri potest, maioris momenti est, quàm sint pœnæ domesticæ, aut scholares: quare maior etiam ad illam, quàm ad has delicti probatio requiri debet.

QVÆSTIO SECUNDA. Verum Prælati Ordinis, Ludimagister, paterfamilias possint constituere indices, qui subditorum errata obseruent, & ad ipsos deferant? Responso est affirmatiua apud Bannes quest. 33. a. 3. dub. 2. concl. 4. Turrianum disp. 39. dub. 5. Ea tamen moderatione, ut Superior attendat ad delatoris ingenium, prudentiam, affectus: caueatque, ne plus credat, quàm spectatis circumstantiis omnibus, ei credere debet.

Secundò, in rebus quæ alicuius momenti sunt, personam ab indice denuntiatam, præsertim si honesta & grauis sit, non facile reprehendat, aut puniat, nisi prius etiam ipsam patienter audiat, si fortè rationem, excusationemque facti sui afferat; cum defensio vnicuique naturali iure debita sit. Quare Maphæus de S. P. N. Fundatore Ignatio lib. 3. vitæ eius, cap. 10. hæc habet: Delatoribus ita vnâ aurem præbere consueuerat, ut semper alteram Reo reseruaret absenti: quoniam etiam accusatoris



ipsis inter dicendum gestus, oculos, vultusque omnes attentè observabat, crebrisque ac minutis interrogationibus veritatis elicienda gratia fatigabat hominem. Totam denique rem, si opus esset, per se, & per idoneos viros indagabat leniter et sine tumultu, cauebat quo omnino, ne quemquam damnaret indicta causa: verum etiam, ut ne quid omnino praeiudicij ad causae cognitionem afferret.

Tertiò, Plerumque cavere debet Superior, ne in dicem aut delatorem suum iubeat observare certam personam, quæ alioquin publicè suspecta non est, ne hominis famam absque necessitatis ratione lædat. Interdum tamen talis causa est, aut periculum mali alicuius, ut qualis qualis diminutio famæ apud hominē prudentem, post habenda sit spiritali bono ipsius delinquentis, & aliorum.

Quartò cauebit plerumque prudens Superior, ne denunciatus denuntiatorem suum agnoscere possit: quare interdum supersedebit correptione, vel opportunius tempus expectabit, dum Reus iterum deprehendatur in simili delicto: nisi rei gravitas, aut periculum postulet, ut malum statim auferatur: hoc casu oportet denuntiatorem quaecunque incommodum suum, quod exinde passurus est, æquo animo ferre, ob rationem mali impediendi, aut boni procurandi.

Ipsè verò denuntiator operam dare debet, ut ex charitate procedat, ipsius tum delinquentis, tum etiam Communitatis spirituale commodum, tanquam finem denuntiationis semper præ oculis habens: Et non referat quæ incerta sunt, tanquam certa & explorata: neque crimina aut defectus exaggeret; sed simpliciter, sicuti accidisse novit: neque dicat consuetudinem aliquem habere, si sciret tantum, atque iterum tale aliquid in homine animadvertit. Hæc ferme Turrianus noster loco cit. & plura legi possunt apud S. Dorotheum ser. 4. qui est de timore Domini, circa medium.

QVÆSTIO TERTIA. Valde controuersa inter Doctores est: Vtrum secreta admonitio antecedere etiam debeat denuntiationem propriè iudicalem, ipsamque accusationem, si fiat de crimine occulto quod tamen ab accusatore probari, vel à denuntiatore indicij ostendi possit? Quam quæstionem S. Th. in 4. d. 19. q. 2. a. 3. quæstion. 1. tanquam suo tempore controuersam proponit, sed propriam sententiam non explicat. At verò Caietanus 2. 2. q. 33. art. 7. Syl. ver. accusatio, q. 3. Pet. Nau. lib. 2. c. 4. num. 231. & 254. Less. lib. 2. c. 30. n. 12. affirmatiuam quæstionis partem amplexi sunt, quæ desumi potest ex c. 2. de accusat. ubi habetur, quod accusatores Episcopi à Primatibus recipiendi non sunt, nisi is, qui accusatur prius charitatiuè conuentus fuerit, ut causam, emendet, isque eam emendare noluerit.

Contrariam verò sententiam, quod iudicalem denuntiationem & accusationem, si crimen probari, vel indicij ostendi possit, secreta monitio antecedere non debeat, docet Palud. loco suprà cit. Adrianus in cit. loco, de corrept. fraterna, §. ad argumenta ante oppositum, Sotus de secr. regen. mem. 2. q. 5. concl. 4. in fine, Nau. in man. c. 18. n. 30. Molin. tr. 4. disp. 32. n. 6. Fundamentum est: Quia in eo differunt denuntiatio charitativa & iudicialis; quod illa spirituale commodum & emendationem peccatoris pro principali fine habeat: quare si is finis faciliore modo obtineri possit per monitionem secretam, frustra fratris fama lædatur per publicam denuntiationem. At verò in iudiciali denuntiatione & accusatione intenditur publica satisfactio & vindicta ad aliorum exemplum. Interest enim Reipubl. ut crimina impunita non maneant: hic autem finis obtineri non potest per secretam monitionem, ut patet.

Antequam per assertiones explicem, quid in hac quæstione sentiam; repeto quod initio huius cap. dixi &

apertè indicat S. Th. cit. d. 19. q. 2. art. 3. Crimen occultum fratri duobus modis Ecclesiæ, seu Prælato tanquam capiti Ecclesiæ denuntiari, seu publicari posse, charitatiuè & iudicialiter. Charitativa denuntiatio & euulgatio fieri solet v. g. in Capitulis Religiosorum; quam iam suprà dixi, fieri non posse de delictis occultis grauib. & infamantibus, si secretiore emendatione æquè emendari posse credatur: idque apertè tradit S. Th. a. 7. ad 4. Si proclamationes, quæ sunt in Capitulis Religiosorum, essent de culpis grauib., de quibus frater infamaretur: esset peccatum contra Domini præceptum, sic illum infamare. Tota igitur restat difficultas de denuntiatione & accusatione iudiciali.

Dico I. Qui crimen occultum fratris, secundum leges punibile, quod probari, vel indicij ostendi potest, iudiciali denuntiatione prodit, antequam secreto monuit, nihil contra iustitiam peccat. Ita Pet. Nauar. lib. 2. c. 3. num. 254. Less. lib. 2. c. 30. dub. 3. Quia homines actibus externis peccando contra leges, offendunt Reipubl. cuius partes sunt, consequenter merentur, ut puniantur à Magistratu, qui est custos legum & vindex malefactorum: dummodo ita peccarint, ut per indicia exterius prodita in notitiam Iudicis per denuntiationem, vel accusationem perueniri possit.

Dico II. Quotiescunque ad promouendum bonum publicum, & aliorum exemplum, necessarium, aut valde vtile fore existimatur, ut peccator de crimine, alioquin occulto, legitimè conuictus publicè puniatur: tunc denuntiari, vel accusari potest, non præmissa monitione secreta, licet crimen merè præteritum & emendatum sit, sicuti docet Syl. cit. q. 3. Pet. Nau. n. 254. Ratio est, quia, ut S. Th. ait in cit. quæstion. 1. ad 2. Bonum multitudinis præferri debet bono vnius. Eademque ratio est; si quis satisfactionem pro iniuria, vel damno sibi illato non æquè ab aduersario consecuturus sit, nisi iuridicè accusetur, accusari potest ad proprium, ius consequendum, spreto incommodo proximi; maxime si illud ex propria culpa sustineat. Non tamen tenetur aliquis his casibus accusare, nisi crimen Reipubl. directè perniciosum sit, uti dicam infra tract. 6. cap. 3. num. 4.

Corollarium. Hoc interest inter denuntiationem iudicalem, & Euangelicam; quod illi locus esse possit, etiam si crimen sit merè præteritum, sed nondum publicè punitum. Charitativa autem, seu Euangelica, sicuti & canonica denuntiatio criminis occulti, locum non habet, nisi etiam impofterum malum criminis committendi, seu in eo persistendi timeatur, sicuti annotauit Palud. cit. q. 4. §. ad argumentum.

Dico III. Sæpe fieri potest, ut aliquis contra charitatis legem, & ordinem à Domino Matth. 18. præscriptum peccet, si proximi peccatum occultum, ipsi tantum peccanti, vel alteri priuatae personæ noxium, denuntiet vel accuset iuridice, non præmissa monitione fraterna; quando per eam emendandus, vel ad satisfactionem inducendus speratur. Ita expressè docet Less. cit. cap. 30. num. 12. & fateri debent Doctores omnes, qui dicunt, secretam monitionem, iuxta Domini præceptum, præmittendam etiam esse denuntiationi, quæ sit Ecclesiæ Prælato, tanquam iudici, inter quos Valentia cit. p. 5. §. tria igitur asserimus, Turrianus cit. dub. 4. §. ad argumenta. Ratio est; Quia ex eiusmodi criminis, v. g. adulterij occulti, publicatione ac punitione non multum commodi accipit Communitas; sed interdum magis offenditur: interim verò fama occulti criminis, præsertim si persona honesta sit, vel in clericali statu constituta, grauitèr læditur: ergo si finis eiusmodi incommodo peccatum emendari possit priuata monitione, non est ad publicam iudicalem denuntiationem, vel accusationem deueniendum.

Corollarium.



Corollarium. Si coniunx adulterium occultè commisit; quo tamen probari possit, facilius permittitur alteri innocenti coniugi accusare civiliter ad instituendum divorcium: quia hoc ius suum per secretam monitionem, vel separationem non ita obtinere potest, sicuti per Iudicis sententiam. At verò famulus, vel famulo in domo, cuius directè nihil interest, contra charitatis legem plerumque peccabit, si cum priuata monitione peccatum occultum emendari posse credat, publicè denuntiet, cum adulterorum infamia, aliorum scandalo, & perturbatione. Quare in tali casu ancilla v.g. sciens, dominam suam occultè adulterari solitam, adulteros prius in secreto monere, & obsecrare debet: quòd si nihil proficiat, etià alios criminis obseruatores, & postea hortatores adhibere; cum cōminatione, nisi desistere velint, hero, vel Iudici denuntiandū fore, vt malū hoc tollatur.

14 Ad extremum hoc annotare libet; Olim, cum peccata graua in populo Christiano, præsertim in clero, non tam frequentia essent, maius, præsertim apud infideles, scandalum accipiebatur ex publicatione; ideoque magis curabatur, vt per secretam monitionem emenderentur: alioquin eā non præmissā, Iudex repellebat accusatorem, aut denuntiatorem, maximè si persona, quæ criminis occulti arguebatur, in Ecclesiastica dignitate constituta esset, sicuti constat ex c. 2. &c. cum dilectus, 2. de accusat. Quæ eadem ratione Iudices, præsertim Ecclesiastici, ex officio non procedebant aduersus eiusmodi criminosos, nisi publica infamia laborarent. quæ omnia satis colliguntur ex S. August. relato in c. si quis peccauerit, 2. q. 1. At verò successu temporis, cum, refrigerante charitate, iniquitas abundaret, & crimina frequentarentur, puta adulteria, furti, &c. ipsa certè frequentatio Reip. valde perniciosa esse cœpit. Quamobrem furtum iam inter publica & excepta crimina numerari solet, de quo proinde Iudices, præsertim seculares, ex quibuscunque delatis indiciis inquirere solent, ac denuntiatores & accusatores admittère: quia ita bonum publicum exigere videtur. Idemque in alio eiusmodi crimine, v.g. blasphemia, adulterio si alicubi valde frequentetur, per consuetudinem; boni communis causa, recipi possit. Veruntamen etiam hodie, præsertim in Ecclesiastico foro, contra graues personas publica infamia non laborantes, iuridicè procedi non debet, nec denuntiationes aut accusationes admitti, si crimen occultum secretò sine læsione famæ, & populi scandalo, emendari posse credatur: Id enim omnino lex charitatis, quin & Domini præceptum, & Ecclesiastica praxis postulare videtur.

## CAP. V.

## De obligatione secreti.

## S V M M A R I V M.

- 1 Qui secretum expressa, vel tacita conuentione sibi commissum reuelat, contra iustitiam peccat, ex genere suo mortaliter.
- 2 Secretum tibi commissum reuelare potes, si necesse sit ad aduertendum damnum Reipublice, persone innocentis, vel tuum ipsius graue periculum.
- 3 Secreta Reip. vel exercitus sape cum vite periculo seruanda sunt.
- 4 Si expresse promissisti, te secretum si transiurus etiam cum vita tue periculo, ad id obligari.
- 5 Qui per vim, aut fraudem secreti cognitionem affectus est, prodere non potest, ad vitandum quatecunque corporis sui periculum, si ex euagatione a quale periculum imminet illi alteri.

**S**ecretum accipitur hoc loco pro re alicui clanculum manifestata, quæ in plurium notitiam nondum peruenit; ideoque notorium quippiam non est. Talis secreti tenendi seu non euulgandi duplex obligatio esse potest, recte Nau. c. 18. n. 52. Prima est ex eo tantum, quia, si proximi secretum reueles, illi damnum illaturus sis, quod sine iusta causa, aut necessitate licitum non est; sed contra legem naturalem de non nocendo proximo in anima, corpore, honore, fama, fortunæ bonis. Altera est ex præcedente pacto, seu promissione seruandi secreti; eaq; vel

expressa, vel tacita seu subintellecta: cum videlicet tali modo & circumstantiâ narratur, vt faciliè apparere debeat tanquam secretum committi. Tertia est ex lege sacramentalis Confessionis, de qua dicam lib. 5. tract. 6. c. 14. Hic autem solum de secunda specie secreti.

**A**ssertio. Qui secretum expressa, aut tacita conuentione reticendi, tibi commissum reuelat, is contra fidelitatem atque iustitiam peccat, non minus, quam si in depositi contractu fidem violet. Sumitur ex c. 11. Prouerb. *Qui ambulat fraudulentè reuelat amici consilium.* & traditur à Soto mem. 1. de secreto tégendo, q. 1. concl. 2. Mol. tr. 4. disp. 5. & 6. Nauar. c. 18. n. 62. aliisque communiter.

Tacita conuentione secreti seruandi obligantur: I. Principum Consiliarij, belli Duces, quibus Reipublicæ, vel exercitus consilia cōmittuntur. II. Medicus, Aduocatus, Obstetrix, quibus auxilij capiendi causa, secreta reuelantur. III. Viri docti, & Iureconsulti, qui talem artem ac rerum peritiam profitentur, vt consilij causa arcana ipsis aperiatur. IV. Verisimiliter etià amici, & propinqui, quibus amicitia, vel propinquitatis iure, capiendi auxilij vel solatiij causa, secreta manifestantur. Vide Nauar. cap. 25. n. 42. Mol. cit. disp. 5.

Iustæ causæ secretum reuelandi sunt hæ: Prima, Si cedat in Reipubl. detrimentum, vel priuatæ personæ iniuriam, sicuti docet S. Thom. q. 70. a. 1. ad 2. S. Anton. p. 3. tit. 17. c. 22. §. 2. Adrianus in 4. vbi de restitut. bonorum famæ, §. pro huius clariore intellectu, & in quodlib. 11. diff. 5. Soto mem. 2. q. 7. concl. 4. Rodriq. to. 2. sum. c. 53. n. 3. Gutier. lib. 1. can. qq. cap. 11. n. 48. Ioach. Mynsinger cent. 2. obseruat. 78. Exemplum: Si Titium à concepto proposito, quod tibi secretò reuelauit, hominem innocentē occidēdi, abducere nequeas: potes, & plerumque etiam debes manifestare. Nam ex ordine charitatis quisque obligatus est ad liberandum innocentem ab iniuria nocentis, etiam cum damno aliquo nocentis, si innocens alia ratione defendi non possit.

Loquor autem de crimine pernicioso, ac pendente in futurum. Si enim crimen omnino transactum sit, non debes illud prodere. Veluti, si Titius homicida lateat, & pro eo innocens Caius in quæstionem adductus, & occidendus sit: non oportet, Caij liberandi gratia, prodere Titium, qui crimen occultum commiserat, sicuti resoluit Molina l. c. Quandoquidem, nec ipsemet Titius, qui secretum tibi commisit, se cum æquali periculo suo prodere tenetur, ad impediendam mortem Caij, cuius causam non præbuit, nisi indirectè ac per accidens, secundū Sotom l. 4. de iust. q. 6. a. 3. Franciscum Suarez de charitate, disp. 8. sect. 6. n. 7. Nau. c. 15. man. n. 17. Si tamen Titius fuga sibi consulere posset, tum deberet, prodito suo facinore, etiam cum famæ aliquali iactura, liberare Caium: sin ille id facere recuset, licebit tibi, eo de fuga monito, reuelare secretum, Caij liberandi gratia.

Secunda, Si secretum cessurum sit in graue nocuumtum eius, qui tibi commiserat. Veluti, si quis occulto impedimento obstrictus à matrimonio reuocari non possit, nisi canonicè denuntietur, licita erit denuntiatio secreti, ob Sacramenti reuerantiam, & ad peccatum euitandum, sicuti docent Nau. c. 18. n. 55. Coninck t. 2. disp. 27. dub. 7. n. 61. Mol. l. c. Sanch. lib. 3. disp. 13. n. 6.

Tertia, Si tu ipse in simile graue discrimen incidēs, nisi commissum tibi secretum reueles. Ratio est, quòd, sicuti alia debita, ita & obligatio secreti cessat, quando sine maximo detrimento propriæ vitæ, aut famæ seruari non potest: quia nemo censendus est, promittendo secretum, etiam ad talem casum obligationem extendere voluisse: sed potius præsumitur quisque ex ordine charitatis propriam incolumitatem alienæ antepone. Exemplum habes: si Titius homicidium à se perpetratum tibi reuelauerit consilij capiendi causa: postea tu ipse, absque Titij culpa, in commissi homicidij suspicionem venias, & capite pericliteris: fas tibi erit, si alia ratione



liberari non possis; Titium occultum homicidam pro-  
dere, sicuti soluit Mol. tr. 4. disp. 37. concl. 5. & seqq.  
Less. lib. 2. c. 11. dub. 8.

Sin autem ex reuelatione secreti periclitetur vita  
 eius, qui commisit; exinde autem, quod secretum ce-  
 latur, gravissimè periclitetur honor, fama vel dignitas  
 eius, cui commissum est; viri prudentis arbitrio, omni-  
 bus spectatis circumstantiis, æstimandum erit, vtrum  
 is, cui secretum concreditum erat, tantam obligatio-  
 nem recipiendi in se suscipere voluerit, aut debuerit,  
 necne. Circumstantiæ autem inter alias spectandæ sunt:  
 I. Innocensne sit, an nocens, qui secretum commisit.  
 II. Vtrum rogatus commisit, an sponte. III. Vtrum  
 in suum duntaxat commodum, an eius etiam, cui con-  
 credit. Quare aduertunt DD. citati; Ministros, &  
 Aduocatos, quibus ob officium secreta committuntur,  
 & ob eam rem salarium à Republ. vel partibus ac-  
 ciipiunt, ærctissima obligatione teneri seruandi secre-  
 tum.

3 Deinde certum esse debet; Secreta Reipub. vel exercitus, quorum reuelatio in magnam perniciem cedit. etiam ob quævis tormenta, vel mortis periculum reuelare nefas esse. Ita Sotus de secreto. regendo mem. 3. q. 4. concl. 6. Nau. c. inter verba, II. q. 3. concl. 6. n. 19. & in manuali c. 18. n. 54. Mol. cit. disp. 37. n. 9. arg. l. omne delictum, ff. de re militari. Ratio est: Quòd salus Reip. tanquam bonum maius atque diuinius anteponendum sit propriæ vitæ. Quare ad hoc ipsum præstandum aliquis obligari potest: est autem maximè præsumendum tali obligatione Reip. secreta Consiliariis v. g. commit-  
ti.

4 Restant duæ quæstiones: PRIMÆ. Si expressè promissisti secretum te seruaturum; etiam cum vitæ discrimine, vtrum tanta obligatione abstringaris, etiam erga quemcunque priuatum? Respondet affirmatiuè Molina cit. disp. 37. n. 10. Cum enim talis promissio obiectum honestum habeat, non apparet ratio, cur seruanda non sit. Fietque iniuria alteri, si non seruetur: quippe qui secretum, quod taceri ( vt supponimus ) sua maximi interest, tibi non commisisset, nisi cum ea, quam dixi, obligatione. Verùm in hac doctrina supponi videtur, licitum esse vitam suam pro altero homine priuato derelinquere. Sin verò sentiamus, Charitatis id legerepugnare, sicut dictum est in lib. 2. c. 3. n. 4. tunc difficile est dicere, quomodo talis promissio reticendi secretum, etiam cum propriæ vitæ discrimine obiectum honestum habeat. Nihilominus defendi potest sententia Molinæ, cum sit probabilis, imò communior Doctorum sententia, pro altero vitam suam ex motiuo charitatis, aut iustitiæ derelinquere, esse opus honestum & laudabile. Quamobrem id promittens, cōformare se tenebitur huic sententiæ; ne alterum probabiliter persuasum grauitèr decipiat, vt in argumento dictum fuit. Cæterum si non agatur de maximo incommodo secretum committentis; tunc certum est, nullam oriri obligationem id seruandi cum vitæ discrimine: quia ex lege caritatis minus damnum suum potius ille sustinere debet, ne innocens in mortis periculum veniat.

5 QVÆSTIO ALTERA. Si quis notitiam secreti per vim, vel fraudem affecutus sit, vtrum ob metum tormentorum, vel mortis periculum revelare possit, quando alteri ex revelatione æquale vitæ discrimen subeundum erit? Less. cit. dub. 3. n. 55. ait, probabiliter affirmari posse. Sed alij rectius negant, inter quos Sotus lib. 5. de iust. q. 10. a. 2. Navar. c. 18. num. 54. Mol. concl. 10. Probatur ex generali principio: Quicumque iniuriam aliquam intulit, is tenetur iniuriam tollere, & non continuare ac propagare: (alioquin, sicut initio peccavit iniuriam inferendo, ita etiam peccabit continuando, & augendo) Ergo etiam in proposito casu, qui secreti cognitionem per iniuriam acquisivit, v. g. literas clausas

fraudulenter aperiendo, is tenetur secretum suppressere; manifestando autem continuabit & augebit iniuriā: sicuti qui rem alienam per iniuriam abstulit, non potest ea uticum domini detrimento: alioquin continuabit iniuriam, & gravius peccabit. Neque refert, quòd in æquali, ut ponimus, discrimine constitutus sit: quia in paricausa melior est conditio iniustè læsi, quàm lædentis: ne is ex propria malitia commodum ferat.

Obijcies. Licet aliquis rem alienam v.g. frumentum per iniuriam acquisierit: si tamen postea ad extremam necessitatem redactus, eo indigeat ad vitam sustentandam, non tenetur restituere creditori, quamvis tunc in simili necessitate versanti. Ergo similiter, licet aliquis secreti cognitionem per iniuriam consecutus sit, aperiendo v.g. literas Titij, si tamen postea tali cognitione omnino indigeat ad vitam suam liberandam, poterit ea uti, quamvis cum æquali discrimine Titij. Resp. negando consequentiam. Nam discrimen est: Quod rerum diuisio ab initio ea conditione instituta fuerit gentium iure, vt in extrema necessitate omnia communia essent: Ergo etsi aliquis contra iustitiam peccauerit rem alienam auferendo, si tamen postea in extremam necessitatem incidat, comparat ius ac dominium rei ita acceptæ, & hætenus possessæ. Qui verò in nostro casu contra iustitiam deliquit literas aperiendo, & secretam cognitionem veluti furando, non apparet, quo iure aut titulo postea acquirat ius ad cognitionem illam prodendam, cum æquali iactura eius, cui iniuriam intulit.

C A P. VI.

## De Contumelia.

SUMMARY.

- 1 Contumelia est iniusta honoris imminutio, scienter facta.  
Iniuria seu contumelia alia atrox est, & alia lenis.
- 2 Contumelia tribus modis accidit: Verbo, scripto, & facto.
- 3 Libello famoso grauis pœna iure decreta est: nisi crimen publicum sit, quod puniri Resp. interfit.
- 4 Irrisio parentum graue peccatum est, quod Deus grauius punit.
- 5 Iniuriarum interdum patimur directe & per nos ipsos, interdum verò indirecte in aliis personis ad nos pertinentibus.
- 6 Iniuriarum duæ lex actio est: Vna civilis ad pœnam applicandam Actori; altera criminalis ad pœnam publicam.
- 7 Actio iniuriarum tollitur merè offendenti, vel offensi, eiusdemque remissione, item præscriptione.
- 8 Sublata actione iniuriarum, manet actio merè civilis ad damni compensationem tendens.

**C**ontumelia (quā Iureconfulti specialiter iniuriam  
Cappellare solent, sicuti constat ex tit. ff. & C. de in-  
iuriis) à cōtemnendo dicta est, teste Vlpiano in l. i. ff. eo-  
dem. Definitur: Iniusta honoris imminutio, scienter fa-  
cta. Requirit enim scientiā, & dolum: cū sit vilipensio  
quædā, sicuti colligitur ex l. j. ff. Ad l. Aquiliā. Quapro-  
pter eius actio famosa, siue infamans est, l. i. l. athletas, §.  
ult. ff. de his qui notantur infamia. In eoque differt ab ac-  
tione l. Aquiliæ de damno dato. Recte tamen monet  
Mol. tr. 4. disp. 18. non requiri ad contumeliā directū ho-  
noris lædendi propositum; sed sufficere etiam virtuale.  
quæ dici solet intentio operis: cū quis scienter ta-  
lem actionem exercet, ex qua alterius honor suapte  
natura diminuitur; vt si virum honestum fuisse percus-  
sus, licet honori eius derogare non intendas. Sin verò  
aliquis absque dolo causam culpabiliter præbeat, vt ho-  
nor alterius apud alios minuatur: puta si quis sciat se in  
ebrietate verba contumeliosa effundere solitum, per  
quæ alter risui aut ludibrio exponatur; atque volunta-  
riè se inebriet, contumeliā propriè non infert: peccat  
nihilominus cōtra iusticiam cōmuniatiuam; quemadmo-



dum & ille, qui culpabiliter se inebriando causam præbet, ut alius in bonis corporis iniuste lædatur.

A detractioe differt contumelia in primis obiecto. Nam detractioe fama læditur; per contumeliam honor, teste S. Thom. q. 73. art. 1. Deinde differunt modo: Quia contumelia, veluti rapina, in manifesto fieri solet contra præsentem; detractio veluti furtum in occulto, & contra absentem. Quanquam id perpetuum non est: Siquidem & absens cum honorari, tum contumelia affici potest, v. g. erectâ statuâ, sicuti Iureconsultus fatetur in l. item apud, ff. de iniuriis. Famam quoque in præsentia denigrari nihil prohibet: ut si coram alicui, pluribus audientibus, occultum vitium obijcias, quo casu in eundem actum tam contumeliæ, quam detractiois peccata concurrunt, sicuti annotavit Nauar. c. 18. man. num. 12. & 18. & c. inter verba, 11. quæst. 3. conclus. 6. n. 4. Molin. tract. 4. disp. 18. n. 4. & disp. 23. n. 1.

Prohibetur contumelia Matth. 5. *Qui autem dixerit (fratri suo) fatue, reus erit gehenna ignis.* Ex quo colligitur, esse hoc peccatum ex genere suo mortale. Quare etiam Apostolus ad Rom. 1. *contumeliosos illis annumerat, quos Deus in reprobam sensum dedit.* Fit autem veniale I. Ob imperfectionem voluntarij. II. Ob imperfectionem obiecti: si contumelia vel in se ipsa levis sit; vel saltem cum habitudine personæ cui inferitur, vel à qua inferitur. Nam eadem contumelia, quæ erga dominum, patrem, virum prudentem mortale peccatum est; erga subditum, fœminam, vel puerum veniale esse potest.

Notanda etiam hîc est doctrina Iustiniani Imperatoris Instit. de iniuriis, §. atrox, ubi ait, quandam iniuriam atrocem censeri, graviusque puniendam, quæ æstimari debeat *vel ex facto, veluti si quis vulneratus sit, vel fustibus casus: vel ex loco, veluti si cui in theatro, vel in foro, vel in conspectu Prætoris iniuria facta sit: vel ex persona, veluti si Magistratus iniuriam passus fuerit; vel si seniori ab humili persona iniuria facta sit; aut parenti, etc. Nonnunquam et locus vulneris atrocem iniuriam facit: veluti si in oculo quis percussus fuerit.* Quæ quadantenus inferuire possunt ad cognoscendum, quanam Clerici percussio, spectatis circumstantiis, atrox censenda sit. Multo magis inferuire hæc poterunt ad intelligendum, quæ sit iniuria atrox donatori illata, ut donatio propterea reuocari possit, iuxta c. ult. iun. Gl. ver. atrox, de donat. & dicam infra tract. seq. c. 12. q. 5.

2. Contumelia seu iniuria tribus modis accidit: verbo, scripto, facto. Contumelia quæ verbo fit, dicitur conuitium, improprium, maledictum, uti videre est in cit. l. Item apud Labeonem, & apud Molin. tract. 4. disput. 20. Accidit, si quis alteri defectum seu moris, seu naturæ per contemptum ac probri loco obijciat: Ut si furem appelleret, gibbosum, cæcum, spurium; si mendacij arguat. Neque refert, verum, an falsum sit, quod ita obijciatur, puta per contemptum, sicuti ex communi docet Abb. c. cum te, n. 26. de re iudicata. Couar. 1. resol. c. 11. n. 6. Verum ioci causa, & ad conuenientem animi recreationem leues alicui defectus obijcere, vrbauitatis est, teste S. Thom. 2. 2. q. 72. a. 2. ad 1. ex Aristot. 4. Ethic. c. 8. Nisi periculum sit alterum contristandi, vel ad iram commouendi, tunc enim charitati repugnabit. Vide Nauar. n. 16. c. 18. Mol. disp. 21. n. 4.

Præterea iustæ obiurgationis ac disciplinæ causa, conuitium inferri potest ab eo, qui corrigendi puniendiue ius habet, sicuti docet S. Thom. l. c. ad 2. & confirmat exemplo Christi, duos discipulos in Emaus euntes, *stultos et tardos corde* appellantis, Lucæ 24. Et S. Pauli *Galatas insensatos*, cap. 3. ad Galat. Quanquam hic obiurgandi

modus raro & non sine necessitate suscipi debet; præsertim à Præceptoribus regularibus, & Ecclesiasticis Prælatibus. *Representatur enim subditis* (inquit Caiet. super cit. art. 2.) *quod non ex Charitate, sed ex passione procedant: suntque deteriores; non suscipientes disciplinam; leuiusque verbera; quam verba contumeliosa suscipiunt.* Vnde Tullius de offic. ait: *Omnis animæ aduersio & castigatio contumelia vacare debet.*

Porro conuitium inferenti licitum non est referre; sicuti nec percutientem percutere, vindictæ causa: secus, si fiat cum moderamine inculpatæ defensionis: id est, ut non plus contra alterum moliaris, quam ad iniuriam arcendam necessarium sit: ut si conuitium iniuste inferenti ad eleuandam fidem hominis, dicere debeas, eum mentiri, vel mendacem esse, sicuti annotauit Abb. in cit. c. cum te, n. 25. Mynsinger cent. 5. obser. 17. Andr. Gaill. lib. 2. obseruat. 100. n. 3.

Contumelia, quæ scripto fit animo infamandi, famosus libellus in iure appellatur: quem non tantum qui composuit, vel edidit; verum etiam qui inuentum non lacerauit, vel igni absumpsit; sed manifestauit, capitali pœna plectitur, l. 5. §. si quis, ff. de iniuriis, & l. 1. C. de famosis libellis: dummodo crimen, quod famoso libello alteri obiectum erat, tali pœna dignum fuerit, sicuti explicat Gomez 3. resol. cap. 6. n. 1. Clarus 5. sent. §. fin. q. 68. n. 25. Molina tr. 4. disp. 39. Vbi monent, huiusmodi pœnam talionis desuetudine ferme abolitam esse; sicuti & lex 12. Tabularum pro reali iniuria, v. g. membro rupto, talionem decernens, desijt, & arbitraria nunc imponitur: quod iniuriæ æstimatio crescat, vel decrescat ex circumstantiis personæ cui facta est, & à qua facta est: item ex loco, ex tempore, & c. sicut habetur in §. pœna autem, & seqq. Instit. de iniuriis, l. Prætor edixit, §. ult. l. sed si vnus, §. quædam iniuriæ, ff. de iniuriis, & l. atrocem, C. eod. Excipit autem non improbabiler Gl. in §. iniuria, ver. fieret, Instit. de iniuriis, eiusmodi pœnis propter contumeliam, aut libellum famosum obnoxium non esse, si aliquis crimen verum obijciat, de quo publice accusare liceat, & quod puniri Reipubl. inter sit. Imò in hoc casu nihil culpæ admitti videtur, si talis rerum status sit in Communitate, ut alius modus publicum scandalum vel detrimentum tollendi non suppetat.

Contumelia facto fit; veluti si quis pulsatus, verberatus, loco conclusus, domusve eius vi introita sit, iuxta l. 5. in princip. ff. cod. Item si alicuius pudicitia attentata, l. sed est quæstionis, & seqq. ff. eod. Si quippiam repræsentatum, quod pudorem, vel honorem alicuius lædat, cit. l. item apud Labeonem, §. generaliter. Quod pertinet irrisio, illusio, & subsannatio: Qualia Christus ab impiis Iudæis passus fuit, sicuti legimus Matth. 26. *Alij autem palmas in faciem eius dederunt dicentes: Propheti & nobis Christe, quis est qui te percussit?* Et cap. 27. *Plectentes coronam de spinis, posuerunt super caput eius, & arundinem in dextra eius: Et genu flexo ante eum, illudebant ei dicentes: Ave Rex Iudæorum.* Quæ ipsa S. Lucas cap. 22. ad blasphemie peccatum refert, *Et alia multa blasphemantes dicebant in eum:* fiebant enim aduersus hominem, qui etiam Deus erat.

Duo hîc obiter annotare libet: Primum. Magnum peccatum esse, si hominem derideas, ob virtutis exercitium: tum quia obiectum graue est, opus bonum ludibrio exponere: tum quia ea ratione homo à studio virtutum ad vitia perducitur: quantopere autem Deus detestetur tales, colligi potest ex 1. Regum. 2. *Erat peccatum puerorum (Heli) grande nimis coram Domino: quia detrahebant homines à sacrificio Domini.*

Secundum. Irrisio, vel subsannatio, quæ sit parentibus, iisue, quos parentum loco obseruare & colere oportet, graue etiam peccatum esse, speciali virtuti pietatis vel obseruantie oppositum. Quare Prouerb.



30. dicitur; *Oculum, qui subannat patrem: et qui despicit parvum matris sui* (inmemor scilicet gratitudinis, quam matri cum dolore parturienti debet) *suffodiant eum corni de torrentibus, et comedant eum filii aquilae*. Vult dicere, dignum talem esse, qui in patibulo suspendatur.

5. Injuriam siue contumeliam vel patimur directe, & per nosmetipsos; vel indirecte, & per consequentiam in iis personis, quæ vel potestati, vel affectui nostro subiectæ sunt; vt liberi, serui, vxor, nurus: quorum iniuria ad nos spectat, sicuti habetur in l. i. ff. de iniuriis. Item iniuria sponsæ ad sponsum, cit. l. item apud Labeonem, §. sponsum, ff. eod. Iniuria Clerici, vel Regularis, ad Prælatum, Ecclesiam, Monasterium pertinet, iuxta c. cum desideres, in fine, de sent. excomm. & l. sed si vnus, §. ait Prætor, ff. de iniuriis, vbi habetur, eum qui alterius iuri subiectus est, iniuriarum agere non posse; nisi ille absens sit, & procuratorem nullum constituerit: tunc sufficit præsumpta licentia agendi. Quæ de re videri potest Sanchez lib. 6. moral. cap. 12. n. 5. qui notat n. 36. cum Prospero Farinacio to. 1. praxis criminal. tit. de accusat. q. 13. n. 26. Si per iniuriam occisus sit pater, aut filius Religiosi; neque ipsi, neque Monasterio competere ius accusandi, aut componendi, seu pacis ineundæ. Nam Monasterio iniuria nulla facta fuit: Religiosus autem in iudicio standi & accusandi nullam personam habere potest; & cum veluti mortuus sit, ad eum iniuria patris, aut filij spectare non censetur. Sin verò iniuria facta fuit ante Religionis ingressum, vel saltem ante edita vota Religionis, tunc ius accusandi, vel pacis componendæ per editam professionem transfertur in Monasterium, si bonorum & iurium acquirendorum capax sit, iuxta Auth. ingressi, C. de SS. Ecclesijs. Quod bene docet Sanchez num. 38. contra Farinacium l. cap. Videri etiam potest Gomez tom. 3. resol. cap. 6. num. 5. Molina tract. 3. disp. 2.

Defuncti quoque cadaveri, funeri, sepulchro imagini, sicuti honor, ita & contumelia irrogari potest, quam actione prosequi ad illius hæredem pertinet, sicuti constat ex cit. l. i. & tit. ff. ac C. de sepulchro violato.

6. Injuriam siue contumeliam directe, vel indirecte passio duplex actio competit, sicut constat ex §. in summa, Instit. de iniuriis. Vna civilis ad pœnam applicandam Actori, quanti is iniuriam æstimauerit: v. g. centum aureos sibi decedere maluisse, quam iniuriam hanc passum fuisse: accedente tamen Iudicis taxatione ac moderatione, ne Actor in litem iurando, ob affectionem, excedat, sicuti habetur in l. in actionibus, ff. de in litem iurando, l. constitutionibus, ff. de iniuriis, §. in summa, Instit. eod. & videri potest Gloss. in l. iniuriarum, 21. ff. eod. Syluest. ver. iniuria, quæst. 7. Clarus, lib. 5. sent. §. iniuria, Angel. Instit. de iniuriis, §. pœna, vbi monet, idem seruandum esse in expensarum postulatione: quia pars litigans exprimit quantitatem expensarum, quam Iudex postea taxat, & deservit incrementum parti, non minus expensum fuisse. Altera vero est actio iniuriarum, ad publicam pœnam iudicis arbitrio deferendam.

Porro circa duplicem, quam dixi, actionem iniuriarum, aliqua aduertenda sunt: Primum iniuriam passus vtram induerit civilem, vel criminalem actionem instituere potest: sed vna earum instituta, altera ipso iure tollitur, iuxta l. quod Senatus consultum, ff. de iniuriis, & notat Gl. §. in summa Instit. eod.

Secundum, Vtraque actio iniuriarum, tam civilis, inquam, quam criminalis, pœnalis est, neque ad hæredes transiit ante litis contestationem, iuxta l. iniuriarum, 11. ff. eod. Quare ab his diuersa est actio merè civilis, ad illati damni compensationem spectans, atque ad hære-

des transiens, de qua mox.

Tertium, Si civilis iniuriarum actione postulatus pœnæ soluendæ idoneus non sit, corporaliter puniendus erit, saltem vbi atrox iniuria illata fuit, iuxta l. si quis iniuriam, iunct. Gl. ff. eod. Quare hoc casu locum habet DD. pronuntiatum: *Qui non habet in ære, luat in corpore*.

Quartum, Si iniuriam passus etiam impotest sibi mali quippiam ab aduersario timeat, implorare potest iudicis officium, quo compellatur ille idoneam cautionem præstare de non offendendo, sicut constat ex l. denuntiamus, C. de his qui ad Ecclesiam, &c. Quandoque Reus securitatis causa interim in carcerem detrudi debet, teste Gomez. n. 16. Mol. tract. 3. disp. 42. in fine.

Actio iniuriarum cum civilis, tum criminalis duobus 7 modis tollitur: Primò, per remissionem seu condonationem; siue ea gratis fiat, siue pacto & transactione, iuxta l. si tibi decem, §. 1. ff. de pactis: Item, siue fiat expresse, siue tacite & per dissimulationem, l. non solum, §. 1. ff. de iureiurand. Puta, si iniuria affectus cum aduersario suo, nulla cogente necessitate, locutus est, eum salutauit, ad conuiuium vocauit, aut vocatus accessit. quæ de re Gomez num. 15. Syluest. ver. iniuria, quæst. 8. Veruntamen interdum Iudex propter bonum publicum ex officio procedere potest contra delinquentem, non obstante remissione partis offensis, quæ de re Clarus lib. 5. sentent. §. fin. quæst. 58. Molin. tract. 3. disp. 46. & 47. Glossa & Doctores §. in summa, Instit. de iniuriis: vbi etiam aiunt; pœnam pro iniuria statuendam hodie esse arbitriam, quæ tamen vsque ad mortem extendi possit, si iniuria nimis atrox, aut circumstantiis aggrauata sit, iuxta l. aut facta, ff. de pœnis, & l. Pedius, §. 1. ff. de incendio, ruina.

Ceterum, qui alteri subditus est, filiusfam. vxor, Religiosus: non potest inuito illo, ad quem iniuria redundat, actionem remittere. Pater verò, reclamante etiam filio, sicuti & Collegium Regularium, reclamante Religioso, cui iniuria facta fuit, condonare non prohibetur. sicuti colligitur ex l. sed si vnus, ff. eodem, & docent Glossa, & Nau. in cap. vulgaris, distinct. 1. de pœnit. Sa ver. iniuria, num. 1. Contra verò, qui in alterius potestate est illo reclamante, iniuriam condonare non potest: sed neque iniuriarum agere, si pater v. g. condonauit: præterquam, si huius persona vilis abiectaque sit, filio autem honesta: tunc filius, inuito etiam patre, iniuriarum actionem instituere non prohibetur, cit. l. sed si vnus, §. ait Prætor.

Secundò aboletur actio iniuriarum per præscriptionem: si intra annum, post illatæ verbalis iniuriæ notitiam, agere is prætermittat, cui agendi ius ac facultas competeat, sicuti constat ex l. si non conuitij, Cod. de iniuriis. Est enim actio iniuriarum Prætoria, quæ annum durat, sicuti notant Doctores in Instit. de perpetuis action. in princ.

Tertio. Actio civilis tendens ad pœnam applicandam parti offensæ, per mortem eius, vel mortem partis offendentis extinguitur: neque transit ad hæredes offensis, vel contra hæredes offendentis, nisi lis antea contestata fuerit, vel per offendentem steterit, quominus contestaretur, sicuti constat ex l. 3. & l. iniuriarum, 13. ff. de iniuriis, l. ex iudiciorum, §. vlt. ff. de accusat. Secus est in actionibus noxalibus, aut ex l. Aquilia de damno compensando: hæ enim transeunt ad hæredes eius, qui damnum passus est, licet litem nondum intentauerit, aut contestatus sit, litem Neratius, §. hanc actionem, ff. ad l. Aquil. & docet Molin. tr. 2. to. 3. poster. disp. 697. num. 34. & tr. 3. disp. 43. num. 15. Actio verò strictè criminalis, mortuo accusatore, vel eo qui offensus est, omnino extinguitur: Sin crimen sit aliquod ex publicis, de quo quilibet accusare potest, tunc qui propinquior vel hæres defuncti est, aliis præfertur, sicuti docet Mol. cit. disp. 43. conclus. 8. & latius disp. 44. & 45.



Interim verò sciendum est : Etsi aliquis iniuriarum egit civiliter, vel criminaliter; vel iniuriam sponte condonavit, ut deinceps agere non liceat : vel si tempus ad agendum elapsum fuit; nihilominus tam ipse, qui iniuriam passus est, quam eius hæredes actionem merè civilem ex l. Aquilia ad illati damni compensationem intra XXX. annorum spatium instituere iure possunt: quia alia est æstimatio damni, & alia contumeliæ. Ita Gloss. & Doctores §. in summa, Instit. de iniuriis, Covarruv. loc. cit. Sylvest. ver. iniuria, quæst. 8. Mynfinger. cent. 4. observat. 10. Molin. tract. 3. disput. 40. & disp. 42. num. 11. Clarus §. sentent. §. fin. quæst. 51. num. 2. argum. l. vnic. C. Quando civilis actio criminali præiudicet, & l. qui nomine, ff. ad l. Cornel. de falsis.

C A P. VII.

De restitutione famæ & honoris.

S V M M A R I V M.

- 1 Qui crimen falsum alicui imposuit, is dictum suum retractare tenetur.  
Iudex, qui sententiam materialiter iniustam se dixisse cognoscit, debet eam retractare.
- 2 Qui crimen alterius verum, sed occultum iniuste prodidit, is conceptam criminis opinionem abolere tenetur, quatenus sine mendacio potest.
- 3 Si quis tamen iniuste ablatum restituere non potest, omnino liberari videtur; ut non debeat pecunia satisfacere, ante iudicis sententiam.
- 4 Si ex infamia alteri à te aspersa aliud damnum ipsi scutum sit, debes integre satisfacere: transitque hæc actio ad hæredes, & contra hæredes.
- 5 Obligatio restituendi famam extinguitur per spontaneam condonationem; vel si infamia homini aspersa penitus deleta est.
- 6 Ex contumelia alicui irrogata non oritur obligatio restituendi, nisi exinde honor, vel fama personæ apud alios lesa fuerit.

**A**ssertio I. Qui crimen falsum alicui scienter imposuit, debet postea apertè retractare apud eos, quibus dixerat, & ad quos criminis infamia peruenit. Ita Doctores communiter, Adrianus in 4. vbi de restitut. bonorum animæ, §. an autem peccet. Maior in 4. distinct. 15. quæst. 16. conclus. 2. Scotus lib. 4. de iust. quæst. 6. a. 3. Navar. cap. 18. num. 45. Interdum tamen alienæ famæ satis consultum est, si infamator postea dicat, se deceptum fuisse, aliter rem comperisse, sicuti notat Pet. Nau. lib. 2. c. 4. num. 375. Less. lib. 2. c. 11. dub. 20. Molin. tract. 3. disp. 41. num. 2.

Assertio II. Simili ferme obligatione retractandi suum dictum astringitur ille, qui probabili errore ductus, adeoque sine peccato, alterum de crimine infamavit, vel apud Superiorem denunciavit. Ita ex communi Molin. tract. 4. disput. 40. num. 3. Vbi exemplum assert de Iudice, qui secundum publicas allegationes & probationes sententiam materialiter iniustam ferens, quamvis sine culpa sua, alterum infamavit; is ex iustitia tenetur sententiam retractare, ut condemnato fama restituatur. Nam quicumque causam posuit, unde postea intelligit alteri damnum iniustum oriturum, is ex iustitia tenetur causam tollere, si facile possit. Quia si causam à se positam non removeat, censetur etiam iniustum effectum velle, quem ex causa illa oriturum prospicit: v. g. si quis bona fide, & sine nocendi proposito alicubi ignem posuerit, postea verò intelligat, exinde domus alienæ deflagrationem ortam, vel orituram esse; ex iustitia obligatus erit ignem tollere, si

possit: alioquin tanquam incendiarius damnabitur. Sic & in proposito casu, qui crimen alicuius falso apud alios narrauit, vel denunciavit, quamvis probabili errore ductus sit, si tamen errorem postea cognoscat, ex iustitia tenetur dictum, vel denuntiationem suam retractare: alioquin iniustus alienæ famæ denigrator censetur. de quo videri etiam potest Pet. Nau. lib. 2. cap. 4. num. 433.

Hoc moneo: Qui bona fide alterum denunciavit, vel infamavit, comperta postea materiali iniuria, non tam strictè obligatur ad restitutionem; quam ille, qui per iniuriam formalem infamavit: hic enim restituere debet cum damno seu detrimento famæ suæ, etiam equali; alter non item, sed quatenus sine notabili suo incommodo potest, sicuti docet Mol. tract. 4. disp. 40. num. 3. Less. dub. 22. num. 117. & c. 30. dub. 7. vbi bene docet; Si quis falsum contra alterum testimonium scienter dixit, ex quo illi mors timeatur, obligari detractorem ad retractandum dictum, etiam cum equali suo mortis periculo: secus, si ex probabiliori ignorantia, aut inadvertentia mortaliter non culpabili.

Assertio III. Qui crimen verum occultum iniuste prodidit, debet conceptam apud audientes criminis opinionem abolere, quatenus potest sine mendacio, dicendo v. g. se malè dixisse, iniuriam intulisse, deceptum fuisse. Cum enim omne peccatum deceptio quædam sit, verè ait deceptum se fuisse, quando hominem iniuste de occulto crimine infamavit, nunc verò penitentia ductus rectius rem considerat & intelligit; interim permittens, ut alij existimare incipiant; crimen commissum non fuisse. Ita S. Thom. 2. 2. quæst. 62. a. 2. ad 2. Scotus in 4. d. 15. q. 4. a. 2. Maior ibid. q. 16. Adrianus in 4. vbi de restitut. bonorum famæ, §. An autem peccet mentiendo, Syl. ver. detractio, q. 4. S. Anton. p. 2. tit. 2. cap. 2. §. 3. Nau. c. 18. num. 45. Pet. Nau. num. 378. Molin. disp. 44. Less. cit. dub. 20. num. 110. Quod si tali loquendi formula, ac proprij dicti retractione non speres, te conceptam infamiam, siue alieni criminis opinionem tollere posse, teneberis infamato aliam æquivalentem famæ compensationem facere: puta eum, quotiescunque se occasio præbet, ob alias eius dotes laudando, honorem eius defendendo, quoad tantum honoris ac famæ ipsi perte accedat, quantum detraxeras. Idque multò magis faciendum, si falsò aliquem infamasti, & famam ipsi ablatam directè restituere non potes. Verùm quam diu potes crimen, de quo alterum iniuste infamasti, in specie retractare, non satisfacis, si, omissa hac restitutione, hominem in aliis virtutum generibus commendes. Quia dum aliquis vno genere vitij, v. g. aduersus iustitiam, vel castitatem infamatus manet, non potest vir bonus ac probus audire, sicuti notavit Pet. Navar. cit. c. 4. num. 370.

Assertio IV. Si quis famam iniuste ablatam nec directè, nec indirectè restituere possit, probabile est eum omnino excusari; neque pecunia compensandum vel satisfaciendum esse, ante Iudicis sententiam. Ita docet Syl. cit. q. 4. Pet. Nau. num. 417. Less. dub. 16. & significat Nau. c. 17. man. num. 90. Ratio est: Quia commutativa iustitia suapte natura nō aliud exigit, quam ut restituatur res ablata, vel quod ei secundum hominū æstimationem æquivaleret: pecunia autem famæ ablata non æquivaleret: quandoquidem inter res venales siue pecunia æstimabiles fama numeranda non est: ergo pro ablata fama non debet restitui pecunia. Confirmatur. Qui impotens est restituendi debitam pecuniam, non obligatur ad redhibendam famam: Ergo neque impotens restituendi famam obligandus est ad reddendam pro ea pecuniam; intellige, ex iustitia cōmutativa. Nam ex vindicativa iustitia Index Reum condemnare potest ad satisfaciendum Actori in pecunia, ut suprā dixi.



Contrariam quidem sententiam, quod tali casu ante Iudicis sententiam compensatio in pecunia fieri debeat, indicat S. Thom. 2. 2. quæst. 62. a. 2. ad 2. & expressè docet Adrianus quodlib. 11. diff. 6. Sotus lib. 4. q. 6. a. 3. circa 4. argum. & de secr. mem. 1. quæst. 2. conclus. 5. Sa ver. infamia, num. 7. Molin. tract. 4. disput. 45. num. 3. ex illo principio: *Qui restituere non potest, quatenus debet, restituere debet quatenus potest*. Sed respondetur, id verum esse duntaxat in rebus æquivalentibus, vel quæ eiusdem ordinis existunt, ut inter se commutationem recipiant: cuiusmodi non sunt pecunia & fama.

4. Assertio V. Si ex infamia, quam alteri iniuste aspersisti, siue falsum crimen narrando, siue occultum prodendo, aliud præterea damnum secutum est: quia ille officio v.g. vel dignitate priuatus fuit; debes integram compensationem facere, boni viri arbitrio. Ita ex communi Nauar. c. 18. num. 45. P. Nauar. num. 373. Molin. disput. 45. Less. dub. 19. contra Sotum lib. 4. de iustit. q. 6. a. 3. circa 4. argum. ubi existimat, eum qui occultum alterius crimen prodendo causa fuit, ut is damnum incurreret, v.g. officium amitteret; non obligari ad integram restitutionem damni: cum id potius crimini alterius tanquam causæ adscribi debeat; euulgatio autem sit solum conditio sine qua non. Sed contrarium iuris rigore verum est: quandoquidem crimen occultum vim non habet damni inferendi; sed eam per euulgationem accipit; ergo euulgator causa damni moraliter existit, sicut, inquit Lessius, si quis ignem occultum cineribus erueret, & straminibus applicaret, is causa inde orti incendij merito diceretur. Idemque sentiendum videtur, si alique iniuste infamando à lucro seu commodo, v.g. officio consequendo impediuisti, quod integram compensationem facere tenearis, quatenus spes lucri, vel officij consequendi prudentis viri arbitrio attimabatur.

Transit autem hæc actio ad hæredes, & contra hæredes: Quia habet ordinem ad bona infamatoris, ex quibus damnum refarciri debet: hæres autem repræsentat personam defuncti, quod attinet ad bona defuncti, in quibus ipsi succedit. In eoque differt hæc obligatio refarciendi damna fortunæ ab altera obligatione restituendi famam vel honorem, præcisè orta ex crimine detractionis, vel contumeliæ: quod talis obligatio pure personalis sit, neque infamatoris personam transgrediatur, sicuti notauit Pet. Nau. n. 426. Less. dub. 12. licet contrarium senserit Adrian. quodlib. 11. diff. 6. lit. c. Mol. tra. 4. disput. 45. n. 3. & dixi cap. præced. in fine.

5. Cause, ob quas cessat obligatio restituendæ famæ, sunt: I. Si infamatus sponte remisit. Verum, si infamia per se redundet in familiam, ordinis Conuentum, &c. condonatio illi nihil præiudicabit. Secus est, si tantum per accidens redundet, id est, alter non alia ratione infametur, quam quod postea criminosi filius, vel frater dici debeat: tunc enim valida erit condonatio.

Qua de re Mol. disp. 46. concl. 5. & disput. 48. concl. 1. Less. dub. 24.

II. Si fama aliis modis recuperata sit, videl. infamati purgatione, vitæ probitate, prudentium virorum testimonio; item si crimen, quod alteri obieceras, obliuione penitus deletum sit: Cessat enim tunc ratio, & velut obiectum restitutionis, sicuti rectè se ipsum corrigens, docuit Nauar. c. 18. n. 43. & alter Nauar. cit. c. 4. num. 372. Angles in 4. p. 2. ubi de restit. famæ, dub. 2. Mol. disp. 40. & 41. in fine, Less. dub. 17.

III. Si ille, quem tu infamasti, vicissim te infamauit, famamque restituere nolit, probabilis est opinio Sotilib. 4. de iust. q. 6. a. 3. concl. 2. ad 4. Tol. lib. 5. c. 70. Less. dub. 25. Mol. disp. 49. Angles l. c. dub. 3. Compensationi locum esse ex generali regula: *quod non cogis in suum alteri reddere, si ille recuset tibi reddere tuum*, sed interea iure compensationis, vel retentionis uti potes. Licet contrarium sentiat Nauar. in man. cap. 18. n. 47. & alter Nauar. n. 395.

6. Quod attinet ad restitutionem honoris læsi per contumeliā; Dico I. Si contumelia priuatim irrogata est, neque in aliorum notitiam culpā tuā peruenit, ad nullam honoris, aut famæ restitutionem obligaris. Ita Mol. tr. 4. disp. 46. Nam pro sola iniuria, secluso damno nulla restitutio faciendā est, ante Iudicis sententiam. Si verò Titium, nemine alio audiente, spurium v.g. per iniuriam appellasti, nullum ei damnum intulisti; nisi quod eum contristāris, à te alienāris. Ergo ad hoc solum obligatus es, ut peccatum coram ipso agnoscendo, veniamque petendo, animum offensum tibi reconcilies, iuxta præceptum Christi Matth. 5. *Si offers munus tuum ad altare, & ibi recordatus fueris, quia frater tuus habet aliquid aduersum te, &c. vade prius reconciliari fratri tuo*.

Dux tamen hæc limitationes adhibendæ sunt: Prima. Sunt aliqui, qui cum contumelia affecti sunt, ægrè ferunt, postea aliquam eius memoriam, vel significationem denuo fieri, maluntque rem totam tacitè dissimulari: tunc, prætermissa veniæ petitione, præstat aliis officiis hominis offensi animum demulcere. Altera. Superiores, cum iniuria aliqua subditos affectunt, ferre non decet humiliter veniam petere; ne dum nimia seruatur humilitas, regendi frangatur auctoritas, sicuti ex regula S. Augustini monet Caiet. q. 72. a. 3. Sed aliis modis offensum sibi conciliare debent consolando, amicè salutando, errorem agnoscendo.

Dico II. Si ex irrogata alicui contumelia honor, vel fama eius, comparatione aliorum, imminuta fuit, teneris ipsi restitutionem facere, coram aliis honorem ac reuerentiam deferendo, eundem commendando, &c. atque hac ratione, illos, quantum in te est, permouendo; ut de homine, iterum, sicuti prius, bene sentiant, & coniectum honorem tribuant. Vide Sotum cit. lib. 4. q. 6. a. 3. concl. 2. ad 5. Lessium dub. 27.



## PARS TERTIA.

De obligationibus contractis ex iniusta læsione corporis.



OMICIDIUM & mutilatio (de quibus hic præcipue agendum erit) vel est sui ipsius; vel alterius: Si alterius, aut publica id auctoritate fit, aut priuata. Si priuata, vel ob necessariam defensionem, vel absque defensionis necessitate: Et tunc rursus vel casu fit, vel voluntate. Atque iterum vel voluntate directa, siue ex proposito; vel indirecta & interpretatiua voluntate. De quibus singulis ordine tractandum est.

## CAP. I.

## De occisione &amp; mutilatione sui ipsius.

## SUMMARIUM.

- 1 Scipsum sine causa necessitatis mutilare, aut castrare, est iniuria aduersus Deum.
- 2 Maioris mali vitandi causa licitum est seipsum mutilare.
- 3 Seipsum occidere nunquam licet; nisi Deus ita iubeat.
- 4 Ad mortem se offerre, & ab alio inferendam permittere, non semper illicitum est.
- 5 Corporis voluntaria castigatio debet esse moderata.
- 6 Martyrium est perfectissima confessio veritatis; quando homo mortem ipsam perferre potius diligit, quam ut fidei veritatem verbo, aut opere derelinquat.
- 7 Opus Martyrij, etsi laudabiliter obiri possit, non tamen semper in præcepto est; sed tantum in casu necessitatis.
- 8 Qui seipsum voluntarie interfecit, in loco sacro sepeliri non debet; nisi ante mortem signa contritionis edidisse constet.

**A**ssertio I. Seipsum mutilare, vel castrare extra casum necessitatis non solum est peccatum contra charitatem sui; sed etiam iniuria contra Deum. Est communis doctrina cum S. August. lib. 1. de ciuit. c. 20. S. Thom. 2. 2. q. 64. a. 5. Ratio est, quod homo membrorum suorum non sit dominus; sed solus Deus eorum conditor, & conseruator. Ergo iniuriam quodammodo Deo infert, qui extra casum necessitatis, & non tradita sibi à Deo potestate, ea abscindit, vel mutilat. Quæ ratio indicatur ean. Apostol. 21. aliàs 22. Si quis seipsum mutilauit, ne sit Clericus: est enim sui homicida, & Dei operis hostis. Vide canon. 1. Concil. Niceni 1. aliòsque plures allegatos in decreto, distinct. 55.

Itaque non immerito Demetrius Alexandrinus Episcopus de Origene conquestus est, qui quamuis, ut ferebatur, seipsum castrarat, nihilominus presbyter ordinatus fuit Cæsareæ Palæstine, apud Eusebium lib. 6. c. 7. 17. S. Epiphani. heresi 64. Eademque querela est S. Athanasij in epist. ad solitariam vitam agentes, de Leontio castrato Episcopo Antiocheno sectæ Arianae: quem ob eandem causam à presbyterij munere antea depositum fuisse, testatur Socrates lib. 2. cap. 11. Sed non tantum apud Leontium seuerissimi supercilij hominem, verum etiam alios plurimos inualuit Eunuchorum heresis, seipsos castrantium, falsæ castimonie zelo, & verba Christi simpliciter nimis, atque ad literam intellegendum, Matth. 18. Si autem manus tua, vel pes tuus scandalizat te, abscinde eam, & proijce abs te. Et cap. 19. Sunt Eunuchi, qui seipsos castrauerunt propter regnum cælorum. Vide S. Epiphani. heresi 58. Baron. An. 230. Lessl. 2. c. 9. n. 14.

**A**ssertio II. Maioris mali vitandi causa licitum est seipsum mutilare: puta, si alioquin ab altero occidendus sis; vel Resp. cladem acceptura, nisi membrum ti-

bi amputes. Ita ex communiore docet Tolet. 5. cap. 6. §. secundò ob maius, Sa ver. homicidium, num. 24. Lessius lib. 2. cap. 9. dub. 14. Petrus Nau. lib. 2. c. 3. num. 98. contra Sotum lib. 5. q. 2. a. 1. conclus. 3. Salonem 1. 2. q. 65. a. 1. controu. 1. Saurum lib. 7. clauis, c. 9. num. 37. Ratio est: Nam licet homo non sit dominus vitæ ac membrorum suorum; est tamen custos & conseruator: secundo autem vnum membrum, ne maius damnum corpori inferatur, vel omnino intereat; prudenter custodit & conseruat vitam & corpus suum: quare talis potestas ipsi à Deo naturæ auctore concessa esse censetur.

Illud addiderim contra Salonem loc. cit. controuers. 2. Peccare parentes, qui filios, quamuis consentientes, ut Ecclesiæ cantu utiles sint, castrare audent: quod hoc non sit medium ad eiusmodi fines necessarium, & sepe cum animæ periculo coniunctum. Idque naturali lumine agnouit Adrianus Imperator, ab Vlpiano allegatus in l. 4. §. ad l. Cornel. de sicariis.

**A**ssertio III. Scriptum interficere, semper illicitum est, & iniuria in Deum; vno casu excepto, si ipse Deus iubeat. Ita S. Thom. 2. 2. quæst. 64. a. 5. Concil. Bracar. 1. can. 34. quod refertur in cap. placuit, 23. quæst. 5. Et latè S. August. lib. 1. de ciuit. à cap. 16. vsque ad 28. & heresi 69. contra Donatistas Circumcelliones, qui sibi vitam eripere, genus quoddam martyrij ducebant. De quibus idem Augustinus epistola 166. lib. 1. contra Gaudentium, c. 28. & de vnitæ Ecclesiæ. cap. 10. 19. & tract. 51. in S. Ioan. sub medium, Optat. Mileuit. lib. 3. contra Donatistas, Concil. Carthaginense I. can. 2. Theod. lib. 4. hæret. fabul. cap. de Donatistis. Ratio est, quam S. August. indicat cit. lib. 1. de ciuit. cap. 20. Etsi enim Deus homini, ob naturæ suæ præstantiam, cum in alias omnes res sub luna positas, tum etiam in bruta animalia plenum dominium tribuisset, sicuti David testatur Psalm. 8. *Omnia subieci sub pedibus eius: ones & boues vniuersas.* (Quapropter ea capere potest, occidere, velsi arbitrato suo, sicuti constat ex cap. 9. Genes. & 1. ad Corinth. num. 10. nisi quod ante diluuium homines carnem non comedis, existimat S. Thom. 1. 2. quæst. 102. a. 6. ad 2. & videri potest Vict. de temperant. num. 3.) vitæ tamen ac mortis humanæ potestatem sibi reseruauit, sicut legimus, Sap. 16. *Tues, Domine, qui vitæ & mortis habes potestatem.* Deuteronom. 32. *Ego occidam, & ego viuere faciam.* Quapropter etiam Iureconsult. in l. liber homo, 11. ff. ad l. Aquiliam dixit, neminem hominem membrorum suorum dominum videri: Etenim sicuti militi non licet sine iussu Imperatoris à sua statione discedere: ita nec licet homini ab hac vita migrare, sine Dei voluntate, vti etiam Cicero docuit in lib. de somnio Scipionis. Vide plura apud Mol. tract. 3. disp. 9. Simancam de Cathol. instit. tit. 18. n. 26. & seqq.

Cor si matur assertio prior: Aut enim innocens est, qui mortem sibi machinatur: aut nocens Innocentem nullo casu ex proposito occidere fas est, prohibete



etiam Deo Exodi 23. *Infontem ac iustum non interficies.* Nocentem verò Iudex interficere debet: Nemo autem sui ipsius Iudex esse potest, aut iustæ sententiæ executor. Ita argumentantur S. Augustinus lib. 1. de ciuit. cap. 19. Maior in 4. distinct. 15. quæst. 20. Petr. Nauar. lib. 2. cap. 3. num. 30. Confirmatur secundo: Nam ad eò hoc alienum est à naturali propensione, vt nullum etiam reliquorum animalium sibi ipsi mortem adferat. Corollariū. Iure optimo David 2. Reg. cap. 1. Amalecitem morte puniuit, qui Saulem, quamuis obnixè rogantem, interfecit. Non enim potuit ille huiusmodi facultatem siue licentiam tribuere.

Cæterum, licet hæc doctrina S. Augustini vera sit, nullo casu seipsum interficere fas esse, nisi Deus ita iubeat; non tamen ad eò conspicua est, quin prudentes quoque effugere possit, si grauior causa inhumanius aliquid persuadeat. Nam Stoici, ob patriæ salutem, se interimere decorum duxerunt: Quare etiam Catonis factum, qui seipsum V. æ occidit, ne Cæsarem Tyrannum victorem aspicere cogeretur, à multis commendatum fuit. Præterea non tantum Lucretiam laudârunt Romani, quod stuprum indignè ferens à Regis Tarquinij filio illarum, mortem sibi consciuerit; sed etiam sanctas quasdam fœminas, Pelagiam, Sophroniam, &c. Christiani: quæ nestuprum per vim paterentur, in flumen se precipitarunt. de quibus S. Ambros. lib. 3. de Virgin. ante medium, Eusebius lib. 8. c. 24. S. August. cit. lib. 1. cap. 26. Cui sententiæ S. Hieronymus quoque adhæsisse videtur, cum in cap. 1. Ionæ, quod refertur cap. 11. 23. quæst. 5. ita scripsit: *In persecutionibus non licet propria perire manu, absq; eo vbi castitas periclitatur; sed percutienti colla submittere*: Nisi cum excusando dicere velis cum Gloss. ibid. Ioan. Maiore in 4. distinct. 15. quæst. 19. Petr. Nau. lib. 2. c. 3. num. 32. v. *culam absq; eo non sumi exclusiue, sed inclusiue; vt sensus sit, etiam vbi castitas periclitatur: quo modo sumitur Cant. 4. Sicut fragmen mali punici generata, absque eo, quod intrinsecus latet.*

S. Augustinus verò has fœminas non tantum à peccato; sed etiam ab errore excusat. *Quid enim, inquit, si hoc fecerunt non humanitus deceptæ, sed diuinitus iussæ? non errantes, sed obedientes: sicut de Samsonē aliud nobis fas non est credere. Cum autem Deus iubet, sequi iubere sine ullis ambagibus inimat, quis obedientiam in crimen vocet?* Quod ipsum de aliis Sanctis dici potest, qui zelo quodam, aut martyrij amore, suam ipsorum mortem operati sunt, sicut de Razia legimus 2. Mach. c. 14. de S. Appollonia apud Euseb. lib. 6. c. 34. quæ seipsam in rogum iniecit, quo & absumpta fuit.

De Samsonē eadem, quæ S. Augustini, sententia fuit D. Tom. quæst. 64. a. 5. Lopez verò p. 1. instruct. cap. 65. in fine, Victor. relect. de homicidio, num. 37. Less. lib. 2. cap. 9. dub. 6. num. 33. pari modo Samsonem, quo Eleazarum 1. Machab. 6. excusari posse censent; non se ipsos peremisse per se, atque ex proposito; sed, dum aliorum iustæ occisioni incumbere, mortem propriam fortiter pertulisse. de quo Couarruias 1. resolut. cap. 2. num. 10. ver. nono. Simili ferme ratione ait Less. cit. dub. 6. in fine, licitum esse, vt horrendam incendij deflagrationem effugas, ex alto loco desilire, quamuis cum certo mortis periculo: non enim intendis te occidere, sed dirum tormentum fuga euadere: Similique ratione excusari posse milites, qui si videant præliouali in hostium potestatem se venturos, nauem iniecto igne in puluerem tormentarium incendunt, sequi in mare abijciunt, vt hostis crudelitatem effugiant.

4 Insuper diligenter obseruandum, aliud esse ad mortem suam actiue concurrere, quod proximè ac directè nunquam licet: Aliud verò, propriam mortem permittere, seu ab altero iniuste inferendam fortiter per-

ferre, aut contra vim iniustam se non defendere: hoc enim sæpelicum: quin interdum in præcepto positum est: videl. pro Fidei, aut Religionis conseruatione: pro Reipub. salute, quippe quæ præferenda est vitæ priuata: sicut etiam in humano corpore quodlibet particulare membrum periculo exponitur, si id necesse sit ad totius corporis conseruationem.

Exindere soluitur primò: Si Tyrannus ciuitatem certò oppressurus sit, nisi innocens aliquis supplicio tradatur, debet ille hosti postulanti vltro se dedere. Quod ipsum Respublica, vel Princeps non minus quam alia virtutum officia præcipere poterit: Si ille postea recuset, nocensiam esse incipit: vt veluti contumax ac rebellis morte affici possit: dummodo spes nulla superfit, quamuis cum multorum sanguine, Reipubl. liberandi. Ita ex communiore docet Lopez p. 1. cap. 60. Petr. Nau. lib. 2. c. 3. num. 121. Mol. disp. 10. Less. cap. 9. dub. 7. num. 39. Valent. t. 3. d. 5. q. 8. p. 2. contra Sotum lib. 5. q. 1. a. 7. Cordubam lib. 1. quæstion. q. 27. in ratione 13. pro 3. opin. Addit Mol. in tali casu malum non esse, si Respub. Tyranno petenti innocentem statim directè tradat, non vt is occidatur, sed vt Respubl. seruetur: cum hæc non sit cooperatio formalis ad homicidium, sed tantum permissio.

Resoluitur secundo: Quod propriam vitam à morbo vel extrinseca violentia plerumque liberare non tenemur per medium valde difficile, & insolitum: v. g. pedum lectione, medicamentis pretiosissimis. Ratio est: Quod præceptum seruandi vitam affirmatiuum sit, non omni tempore, ac modo obligans. Ita Victor relect. de temperantia n. 9. & de homic. n. 32. Maior in 4. d. 35. q. 24. Less. lib. 2. c. 9. dub. 13. n. 96. Petr. Nau. lib. 2. c. 3. n. 88.

Resoluitur tertio: Quod carnem moderatè affligere, vt spiritui subijciatur, non sit illicitum, sed virtutis opus, sicut ex Apostolo colligitur 1. ad Corinth. 9. *Castigo corpus meum, & in seruitutem redigo.* Qua de re Victor. de temper. n. 24. 25. Iacobus Gresserus lib. 1. de discipl. cap. 9. Sed non debet fieri cum notabili vitæ, aut virium detrimento: hæc enim est indiscreta corporis castigatio, quæ et nocuum afferre, et maiora bona impedire solet, vt dicitur in summar. nostrarum constitut. §. 48. & consentit c. non mediocriter, de consecrat. d. 5. & docent Caiet. 2. 2. q. 147. art. 1. Sairus in clau. lib. 7. c. 9. n. 32. Petr. Nau. cit. n. 88. vbi aiunt, peccare mortaliter illum, qui ieiunia, & vigilias continuat, animaduertens iis vitam notabiliter minui.

Resoluitur quarto: An, & quatenus licitum sit, martyrij occasionem præbere, vel oblatam non declinare? Inprimis notandum: Quod non is tantum Christi martyr seu testis est, qui mortem patienter oppetit propter Euangelicæ veritatis verbalem prædicationem, aut confessionem; sed etiam propter opus cuiusque virtutis non omittendum, vel malum peccati non committendum, secundum Euangelicam doctrinam. Si quis, inquam, eligat mortem oppetere potius, quam vt opus faciat secundum Christi doctrinam prohibitum, vel opus intermittat secundum Christi doctrinam præceptum, aut commendatum. Vide quæ dixi hoc libro §. 3. n. 5.

Verum discrimen est inter declinationem mali seu peccati, & inter operationem operis virtutis, vbi explicat Caietanus in cit. a. 5. §. In eodem quoque. Nam id, quod secundum se & intrinsecè malum, atque negatiuo iuris naturalis præcepto prohibitum est, v. g. mentiri, aut veram Fidem negare, nullo casu licitum, & secundum Fidem Christianam concessum est: quare quiuis obligatur mortem potius oppetere, adeoque propriè dictum martyrium subire, quam vt veram Fidem abneget, vel aliud mendacium, aut quoduis peccatum, etiam veniale tantum, committat. At vbi



opera positiua, v. g. Euangelicæ veritatis prædicatio, Sacrificium, ieiunium, à carnibus abstinencia, vt bona honesta, ac laudabilia sint, non tantum talia esse debent ex genere suo; sed etiam secundum omnes debitas circumstantias: vt si vna earum deficiat, non opus virtutis, sed vitiosum existat: quandoquidem bonum ex integra causa; malum autem ex quouis defectu est. Quare apud infideles, aut hæreticos Euangelium prædicare, sacrificare, à carnibus abstinere, &c. cum probabili periculo mortis, ex qua non magnus Ecclesiæ fructus speratur, non prudentiæ, & fortitudinis, alteriusue virtutis, sed potius temeritatis opus est; sed & contra charitatis legem; quando & infidelibus occasio peccandi præbatur, & fideles fructu spirituali, quem hominis illius ministerio percipere possent, priuantur: & ipsemet etiam ex propria temeritate periculum incurrit; ne in Fidei confessione postea deficiat, iuxta illud Eccles. 3. *Qui amat periculum, in illo peribit.* Eapropter S. Petrus Alexandrinus in canonibus de lapsis, tom. 1. Concil. ostendit, Ecclesiæ non expedire, vt quis martyrio se faciat, & absque necessitate offerat. Et in Concil. Eliberino cap. 60. legimus: *Si quis idola fregerit, & ibidem fuerit occisus, quia in Euangelio non est scriptum, neque inuenitur ab Apostolis unquam factum, placuit eum in numerum martyrum non recipi.* Idque etiam docuit S. August. serm. 6. de verbis Domini, cap. 11. ad Idola confringenda Christianis inuolandum non esse, nisi legitima iurisdictione præditi sint erga paganos: vel nisi Deus iubeat, seu Spiritus sanctus impellat. cuius rei exemplum habemus in Eulalia martyre, de qua Prudentius:

*Inque Tyranni oculos sputa iacit:*

*Simulachra dehinc dissipat.*

Videri etiam possunt Nauar. c. 11. man. n. 40. Sanchez lib. 2. moral. c. 34. n. 14. vbi eiusmodi temeritatem inter peccata tentationis numerant. Sed etiam si ipsi infideles Christianum persequantur, vel ad necem quærant, interdum expedit magis fugere, vt diutius viuendo pluribus prodesse possis, secundum verbum Christi Matth. 10. *Cum persequantur vos in ciuitate ista, fugite in aliam:* & prosequitur S. Chrysost. orat. de fuga sua.

7. Quando verò opus, quod ex genere seu obiecto bonum, siue alicuius virtutis est, tale manet spectatis omnibus circumstantiis, considerato etiam hoc ipso mortis periculo, quod aliquis per Euangelij v. g. prædicationem, aut Missæ sacrificium incurrit: tunc pro tali opere mortem patienter oppetere, propter Christianæ fidei confessionem propriè dictum martyrium est. Id verò accidit, si maior honor & gloria Dei, & proximorum spiritualis salus ex publica Fidei confessione, aut quouis alio opere Christiano secutura sit, cui meritò posthabeantur reliqua incommoda, videlicet propria mors; item permissio peccati, quod iniquus homicida committet: quippe cum hoc non sit scandalum datum, sed merè acceptum ex opere omnimodè bono, vt ponimus. Et ita docet S. Thom. cit. q. 124. art. 3. ad 1. Syl. ver. Martyrium, Nau. Sanch. ll. cc. Viguerius cap. 6. Institut. §. 1. ver. 2.

Tametsi verò hoc casu, si, vt Syl. inquit, opportunitas sit augendi gloriam Dei, & ædificandi Ecclesiam, martyrium honestè subiri possit, ideòque in consilio sit; non tamen semper est in præcepto, vt pote affirmatiuo: præsertim, cum opus martyrij valde arduum atque difficile existat. Sub præceptum autem cadit in casu necessitatis, quæ duplex est: Prima, Si idcirco honor Dei, vel spiritualis proximorum salus detrimentum patietur: quòd ob metum mortis, à Fide Catholica prædicanda, sacrificando, carnis abstinencia, &c. publicè abstineas. Secunda, Si ex eo, quòd Fidem v. g. publicè prædices, Sacrificium celebres cum mortis pe-

riculo, maximum diuini honoris, & Catholicæ Religionis augmentum secuturum putetur, vt lex charitatis obligare videatur mortem oppetere pro tanto bono secuturo. Vide S. Bonauent. in 3. d. 30. art. 1. quæst. 2. Valent. t. 3. disp. 1. q. 3. p. 2. dub. 1. Sanchez 2. moral. c. 4. n. 4.

RESTAT QVÆSTIO. Qui seipsum interemisse repertus est, vtrum in loco sacro sepeliri possit? In c. 12. causa 23. q. 5. ex Concil. Bracaren. l. c. 34. ita legimus: *Placuit, vt qui sibi ipsis voluntariè violentiam inferunt mortem, per venenum, præcipitium, suspendium, &c. nulla prorsus pro illis in oblatione commemoratio fiat, neque cum psalmis ad sepulturam eorum cadavera deducantur.* Similia habentur in c. quibus, 13. q. 2. vbi generatim significatur, eos, qui in notorio peccato moriuntur, sacra sepultura indignos esse, de qua re dicam infra tract. seq. cap. 12. quæst. 5.

Rectè tamen obseruat Glossa in cit. c. placuit, ver. voluntariè, eum duntaxat, qui deliberata voluntate seipsum occidit, Ecclesiastica sepultura, & suffragiis priuandum esse; non etiam eum, qui ex furore, amentia. Etenim, sicut aliæ passiones, vt ira, timor, &c. interdum ad eò vehementes sunt, vt animo plenam deliberationem adimant, efficiantque, vt, quod alioquin opus mortale foret, tamen ob defectum deliberationis à gravitate culpæ excusetur, ac veniale vel nullum peccatum fiat: Ita etiam contingere solet, vt vehementissima passio tristitiæ, concurrente atri bile, ita hominis animum & phantasiam occupet, vt rationis vsum eidem adimat, amentiamque conciliet. Quare de re lege, quæ scribit Llamas p. 3. methodi, cap. 2. §. 3.

Veruntamen si constet, quòd aliquis sibi ipsi mortem conscuerit, dubitetur verò, vtrum deliberatò, an ex amentia id factum sit: Ecclesiastica iura significant, & praxis Ecclesiæ obseruat, vt talis sacra sepultura, & publicis suffragiis priuatus sit: partim quia id pertinet ad Ecclesiasticæ regulæ ac disciplinæ seueritatem, & sacri loci reuerentiam: partim, quia sicut in aliis criminibus, ita & in hoc inspicitur factum per se malum: idque censetur voluntariè admissum, & pœna dignum, nisi probatio vel præsumptio contraria adsit: Veluti si vir spectatè probitatis, aut Religionis fuerat, quem nullo modo credibile sit, tale facinus propriæ occisionis, ab inclinatione naturæ, & hominis ratione, præsertim supposita Fide Christiana, ad eò abhorrens, deliberatò admittere in animum induxisse. Item, si ob antecedentem melancholiæ morbum, furori & amentia hominem obnoxium fuisse, viri prudentes testentur. Quòd si autem non constet, vtrum quis seipsum occiderit, an verò ab altero occisus, vel casu aliquo præcipitatus, in tali dubio non est præsumendum delictum, præsertim tam atrox & à natura alienum. Vt si aliquis in puteo mortuus reperiatur, censei non debet se ipsum culpabiliter præcipitasse, nisi magna eius rei indicia seu coniecturæ antecesserint, sicuti tradit Couarruias 2. resolut. cap. 1. numer. 11. Molina tract. 3. disp. 20. prope finem: *Quia non probat hoc esse, quòd quandoque contingit abesse,* aiunt DD. in l. sed natales, Cod. de probat. Non rarò autem accidit, vt aliquis in puteum cadat, non à seipso voluntariè præcipitatus. Ergo, &c.

Denique hoc addo ex sententia Syluestri loc. cit. Etsi aliquis voluntariè sibi mortem conscuisset, si tamen vera signa contritionis dedit, antequam expirauit, in loco sacro sepeliri posse. Veruntamen in foro iudiciali, propter eiusmodi pœnitentiam, necesse non est remittere pœnam legibus decretam, v. g. confiscationis bonorum, si Reus delatus, metu futuræ sententiæ mortem sibi conscuuit; vti videre est in l. 1. & 2. C. de bonis eorum, qui sibi mortem conscuerunt: vbi Anto-



ninus Imperator distinguens inter eos, qui conscientia delati, admissique criminis, metuque futura sententia, manus sibi intulerunt; & eos, qui dolore aliquo corporis, aut radio vite, vel insania vitam finiunt; illorum bona ait à fisco vindicanda esse; horum non item, sed hæredibus relinquenda.

## CAP. II.

## De homicidio, quod publica auctoritate fit.

## S V M M A R I V M.

- 1 Magistratus ius habet occidendi subditos in iustam criminum vindictam:  
Item exponendi eos mortis periculo, quatenus id necessarium videtur ad Reipubl. defendendam.
- 2 Proscriptum per publicam mortis sententiam cuius est populo occidere concessum est.
- 3 Fas non est proscripto se defendere contra iustum aggressorem, eum occidendo, vel mutilando.  
Extra territorium proscriptoris fas non est proscriptum occidere.
- 4 Iniquæ sunt leges civiles, si adiuveros à privato, puta patre, marito, occidi permittant approbatiue; iuste autem, si permittant solum negatiue, quia talem homicidam ob iustum dolorem non puniunt.

**A**ssertio I. Respublica siue Magistratus non habet ius ad arbitrium suum occidendi, aut mortis periculo exponendi suos subditos. Ratio est, quia non competit ipsi dominium in corpora subditorum. Confirmatur. Nam neque domino in seruos suos ius vitæ ac necis competit, ut sine causa, legibus cognita, in eos sentire possit, sicuti rectè iure veteri correcto, definiuit Gaius l. i. ff. de his qui sunt sui, vel alieni iuris. Ergo multò minùs Reipubl. siue Magistratui permissum est in liberos homines tyrannidem exercere. De scuitia autem Dominorum & Magnatum erga subditos coercenda; & quòd post admonitionem, si ab iniusta & insolita oppressione desistere nolint; feudo, vel iurisdictione priuari possint, videri potest Ioachim. Mynsing. cent. 5. obseru. 8. Andr. Gaill. lib. 1. obseruat. 17.

**A**SSERTIO II. Respublica siue Magistratus ius habet subditos suos exponendi mortis periculo, quatenus recta ratio ostendit, necessarium esse ad Reipubl. tuendū: Præterea ius habet eisdem morte puniendi, si eorum delicta (non merè civilia, sed quæ verè, & coram Deo talia sunt) ita mereantur, & Reipubl. bonum efflagitet. Ita S. Thom. 2. 2. 8. q. 64. a. 2. Et contrarius error Vvaldensium fuit apud Castrum ver. occidere, hæc. 1. Probatur primò auctoritate scripturæ, Exod. 22. Si malum feceris, time: non enim sine causa gladium portat, (qui Reipublicæ curam gerit) Dei enim minister est. Secundò ratione: Cùm primò enim homines in vitæ societatem coeunt, naturalis à Deo condita ratio docet, ad eius conseruationem necessarium esse, ut Communitas, vel Princeps, tanquam caput Communitatis, singulos è Reipubl. delinquentes ius puniendi habeat, etiam morte, si ita opus sit. Communitas enim ita se habet ad ciues singulos, sicuti se habet homo quilibet ad membra singula: Atqui homo, licet non sit dominus suorum membrorum, sed custos: si tamen aliquod eorum corpori noxium esse incipiat, secundum rectam rationem illud abscindit ac tollit, permittente Domino Deo, ne totum corpus patiat, aut omnino pereat. Ergo par ratione, qui Reipubl. curam atque custodiam gerit, eos qui eadem Reipubl. noxij esse videntur, è medio iusta ratione tollit. Vide S. Thom. cit. 2. 2.

Corollarium. Quinto illo naturali pariter ac diuino

decalogi præcepto, *Non occides*, solum prohibetur occisio illicita, videlicet hominis innocentis; imò etiam nocentis, sed propria & priuata auctoritate, extra casum necessariæ defensionis, sicuti explicant Caiet. 2. 2. q. 64. a. 2. Victor. relect. de homicidio, n. 11. Pet. Nau. l. 2. de rellit. c. 3. n. 4. Mol. tr. 3. disp. 5. n. 5.

Contra hanc tamen doctrinam arbitratus est Scotus in 4. dist. 15. q. 3. art. 2. Omne homicidium negatiue illo præcepto prohibitum esse: ac proinde maleficos publica auctoritate occidi non posse, nisi ob crimina per Dei dispensationem excepta; v. g. ob blasphemiam, homicidium, &c. non item ob furtum; neque in lege noua ob adulterium, sumpto argumento ex cap. 8. Ioan. *Nemo te condemnauit mulier? Nec ego te condemno.* Quam Scoti sententiam, præter rationem supra adductam, & Doctores apud Victor. relect. de homicidio n. 11. Molin. cit. disp. 5. vel ipsa Christianarum gentium consuetudo satis refutat. Vide, si placet, de hac questione disputantes Henricum Gandauens. quodlib. 11. q. 18. Alphonsum à Castro lib. 1. de lege pœnali, c. 6. Maiorem in 4. d. 15. q. 27.

**Q**UÆSTIO PRIMA. Vtrum bannitum seu proscriptum per publicam mortis sententiam, occidere cuius est populo in conscientia foro permissum sit? Respondetur affirmatiue cum Soto lib. 5. de iust. q. 1. art. 3. Claro lib. 5. sentent. ver. homicidium, n. 54. Syl. Armilla, Sa ver. Bannitus, Beia p. r. casu 43. Lactan. Finellio casu reseruato 4. n. 41. Si tamen hæc condiciones adsint: I. Ut id fiat publicæ iustitiæ zelo; non ex odio, aut priuatæ vindictæ causa. II. Ne fiat pendente appellatione, aut extra territorium proscriptoris, de quo dicam q. seq. III. Excipiendi parentes, liberi, vxor, &c. qui proscriptum alere tenentur: (siquidem ius ciuile naturalia iura non tollit) tantùm abest ut occidere possint; nisi actualis ille Reipubl. hostis existat, sicuti notauit Clarus n. 59.

Nunc probatur responsio. Cùm enim Reipubl. inter sit de malefactoribus, vel hostibus suis pœnam mortis sumere: id autem efficere non possit, postquam Reus aufugit, nisi publicam facultatem omnibus tribuat occidendi malefactorem: poterit quandoque si res exigat, hanc facultatem dare: & consequenter cuius est populo eandem accipere, & exercere. Rectè tamen monet Mol. tr. 3. disp. 7. quòd rarò, & non nisi ob grauem causam eiusmodi sententiam contra proscriptos pronuntiare expedit: cùm ob alia incommoda, tùm quòd ferme Sacramentis destituti in peccatis mortalibus decedant. Vide etiam Pet. Nau. lib. 2. c. 3. n. 218.

Sed nunquid proscriptus se defendere potest, aggressorem suum, si ita opus sit, mutilando, occidendo? Affirmat Clarus n. 71. Quia videtur naturali iure defensionis, quo per Iudicis sententiam spoliari non posse videtur. Sed communis sententia, teste ipso Claro, negat, quam tueretur Azor t. 3. lib. 2. c. 1. q. 11. Sa ver. Bannitus n. 4. Et rectè: Nam si aggressor, velut publicæ iustitiæ minister, ius habet occidendi proscriptum (quod supponimus, & omnes fatentur) consequens est, quòd proscriptus ei iniuriam inferat, & publicæ potestati resistat, si se defendendo aggressorem mutilet, vel occidat. *Non enim est permixta defendendi facultas, ubi offendendi est data libertas*, aiunt DD. in l. 1. C. Quando liceat vnicuique sine iudice se vindicare. Confirmatur. I. Nam alioquin etiam fateri cogemur, licitum esse Reo publicos lictores, vel Carnificem, à quibus ad carcerem, vel supplicium ducitur, propriæ vitæ salvandæ causa occidere. quod nemo vnquam dixit. Confirmatur II. Alioquin fateri cogemur, dari posse bellum ex vtraque parte per se ac formaliter iustum, seclusa ignorantia: quod omnes negant.

His adde, quòd in l. 1. & 2. cit. tit. Cod. facultas vni-



cuique concedatur occidendi eos, qui itinera insidiis aggressionis obsederint: Et milites desertores capiendi; sin autem resistent, etiam occidendi.

QVÆSTIO SECUNDA. Vtrum licitum sit publice proscriptum data, cuius occidendi facultate, ex ta proscriptoris territorium occidere v. g. clam, aut per insidias? Hæc quæstio apud IC. valde controuersa est, vti videre licet apud Clarum lib. 5. sent. ver. homicidium, n. 66. ver. Vltorius quæro. Grassis p. 2. decision. c. 62. n. 57. qui expressè concludit; bannitum seu proscriptum per sententiam iustam, vbique, etiam extra territorium proscribendis, occidi posse. Hoc ipsum docet Prosper Farinacius in pract. criminali, p. 3. q. 103. num. 213. de eo duntaxat, qui ob crimen læsæ Maiestatis proscriptus est. Sed contraria est Theologorum sententia, Syl. ver. homicidium, 1. q. 3. n. 7. Armillæ ver bannitus, n. 1. in fine, Sa eodem ver. n. 1. Azorij p. 3. lib. 2. c. 2. q. 3. Tol. l. 5. c. 6. n. 18. Quod nullus Princeps, seu Magistratus erga vllum malefactorem, aut proscriptum sententiam iustitiæ exercere possit, extra fines territorij sui, nisi vel expressa, vel rationabiliter præsumpta licentia habeatur eius, qui in alieno territorio potestate præditus est. Hæc sententia videtur mihi vera, & sumitur ex l. vlt. ff. de Iurisdictione omnium Iudicum, & c. 2. de Constitut. in 6. vbi notant DD. communiter, quod nullus Iudex, aut Magistratus ius dicere, aut iustitiæ sententiam exequi possit, extra territorium suum. Profecto qui in alieno territorio clam, aut per insidias proscriptum è medio tolleret, tanquam homicida iuste puniri posset, vti Syl. ibidem docet.

QVÆSTIO TERTIA. Vtrum iustæ sint leges civiles, quæ patrius dant occidendi adulterum cum filia, quam pater in potestate habet, vt videre est l. patri, & seqq. ff. ad l. Iul. de adulter. Item marito occidendi adulterum cum vxore deprehensum, si vilis persona sit. Respondeo, & dico I. Tales leges iniquas fore, si id permittant approbatiuè, sicuti constat ex c. inter hæc, 33. q. 2. & docet S. Aug. lib. 2. de adult. coniug. c. 15. S. Thom. in 4. d. 37. q. 2. a. 1. Henr. Gandauensis quodlib. 5. q. 31. Sotus lib. 5. q. 1. a. 3. Couar. in epit. p. 2. c. 7. §. 7. num. 12. Tholos. lib. 36. Syntag. c. 6. Mol. tr. 3. disp. 7. Less. lib. 2. c. 9. dub. 5. contra Clarum n. 50. Ratio est, quia non est singulis concedendum, quod per Magistratum publice potest expediri, reg. 136. ff. Et inauditum ac in auditum ac non condemnatum à priuato occidi, nulla æquitas patitur, sicuti sumitur ex l. 2. ff. ad legem Corn. de sicariis, l. vlt. C. de malef. & mathem. Accedit, quod Christianæ charitatis legi aduersatur, hominem adeò imparatum & impœnitentem subito occidi. Dico II. Eiusmodi leges iniquæ non sunt, si id permittant solum negatiuè, quatenus in tali casu pœnam homicidæ non decernunt, neque actionem contra eum seu civilem, seu criminalem recipiant; idque partim ad absterrendos homines à crimine adulterij; partim ob circumstantiam iniuriæ ac iusti doloris, quem in tali casu temperare difficillimum est, sicuti dicitur in l. si adulterium, §. Imperator, ff. ad l. Iuliam de adult. Qua eadem ratione etiam sacri canones excommunicationis sententiam ab eo remouent, qui in Clericum cum vxore, matre, sorore, vel filia turpiter inuentum manus iniecit violentas, sicut constat ex c. si verò, 1. de sent. excom. Atque ita docet Mol. tr. 3. disp. 99. in princ.

## CAP. III.

## De homicidio ob defensionem.

## SVMMA RIVM.

1. Actualem sui aggressorem occidere volentem, quilibet præuenire & occidere potest, cum moderamine inculpatæ tutelæ.
2. Vir nobilis & militaris, licet si qua declinare possit impetum aggressoris, plerumque tamen non obligatur.
3. Prouocato ad duellum plerumque non est licitum comparere, seu accipere.
4. Non solum pro defensione vitæ, aut honoris; sed etiam facultatum, quæ non modici momenti sunt, & alia ratione liberari non possunt, concessum est aggressorem, vel raptorem mutilare, interficere.
5. Siquis ius habeat aggressorem, vel raptorem defensionis causa occidendi, etiam alijs concessum est vim passio opem ferre. Quin interdum obligatio incumbit; seu ex charitatis; seu ex iustitiæ lege.

**A**sertio I. Actualem aggressorem iniuste occidere volentem, inuasus quilibet præuenire, & occidere etiam in conscientie foro potest; tamen cum moderamine inculpatæ defensionis. Ita S. Thom. q. 64. a. 7. Victor relect. de homic. n. 17. Maior in 4. d. 15. q. 20. circa 4. obiectionem, contra 1. conclus. Sotus lib. 5. de iust. q. 1. a. 8. Couar. in Clem. si furiosus; p. 3. §. vn. Nau. c. 15. n. 2. Clarus §. homicidium, n. 30. Less. lib. 2. c. 9. dub. 8. Pet. Nau. lib. 2. c. 3. n. 332. & 347. Mol. tr. 3. disp. 12. Quamuis aliter de hac re sensisse videatur S. August. lib. 1. de libero arbitrio, c. 5. & epist. 154. ad Publicolam. qui locus refertur c. de audiendis. 23. q. 5. Probatur ex l. sententiam, §. qui cum, ff. ad l. Aquil. c. significasti, 2. de homic. c. si verò, 1. de sent. excommun. quibus dicitur: *Vim vi repellere, omnia iura, omnesque leges permittunt.* Quod & significatur in c. ius naturale, d. 1. & in l. 3. ff. de iust. & iure: *Iure hoc euenit, vt quod quisque ob tutelam corporis sui fecerit, iure fecisse existimetur: vbi perperam glossator Accursius commentatus est, Iure scilicet fori, non celi.* Ratio est: Quia secundum ordinem charitatis, quisque propriam vitam præferre potest alienæ: dummodo agatur de bono priuato tantum, non etiam publico. Nam sicuti fieri potest, vt non tantum liceat, sed etiam debeas te defendere ab aggressore homuncione vili, si tu Reip. valde utilis sis; sic etiam fieri potest, vt tenearis potius mortem innocens perferre, quam interimere aggressorem Regem, Ducem, si ex ipso salus Reipublicæ, aut Religionis Catholicæ plurimum pendeat. Quæ de Sotus l. c. Mol. disp. 14. Sairus lib. 7. c. 10. n. 26.

Existimant autem S. Thom. 2. 2. q. 64. a. 7. & Caiet. ibid. & in sum. ver. homic. Henricus Gandauens. quodlib. 5. q. 31. Illicitum esse, si priuatus in tali casu necessariæ defensionis intendat occisionem aggressoris: quam doctrinam refutat Sotus cit. a. 8. Nauar. c. 15. num. 2. sed fortasse aliud illi non voluerunt, nisi quod priuatus intendere non possit hominis occisionem per se: (quia hoc ad publicam potestatem pertinet) sed solum per accidens, & quatenus præcisè requiritur ad sui tutelam seu defensionem iustam, quæ naturali iure cuiuslibet permittitur: & consequenter se extendit ad tollenda obstacula seu impedimenta. Vide etiam Petr. Nauar. lib. 2. cap. 3. num. 339. Vasq. de restitut. cap. 1. dub. 6.

Porro in quo consistat moderamen inculpatæ tutelæ, *Ein rechtm. effige Normohr*, optimè ait Abbas in c. olim. 1. num. 14. de restit. spoliatorum, boni viri arbitrio relinquendum esse: si videlicet aliquis, considerationis circumstantiis loci, temporis, personarum, & q.



contra aggressorem, vel insidiatorem modo faciliore, benigniore defendere se non posse rationabiliter existimar, quam ita ipsi resistendo, praeueniendo. Vide etiam Alexandr. de Neuo super Abb. in c. significasti 2. de homic. lit. d.

His adde primò: Quod de actuali aggressore dictum est, idem sentiendum de iniusto insidiatore vitæ, cuius insidias si alia ratione effugere non possis, fas erit eum occidendo antevertere, secluso grauiore scandalo, aliòue incommodo, sicuti docet Ioan. Faber tit. Instit. de iure naturali, gentium, & civili, §. ius autem, Molin. tr. 3. disp. 12. Less. cit. dub. 8. num. 44. Nauar. c. 15. num. 3. §. credimus, & alter Nauar. lib. 2. c. 3. num. 351. & 359.

Adde secundò; Non tantum aggressorem, vel insidiatorem vitæ, sed quamuis alium etiam innocentem occidi posse per accidens, si obstaculum vitæ saluandæ alicui præbear; v.g. dormiens in via iacens, qui necessario proculcandus sit à fugientibus hostem, sicut rectè docent Caiet. 2. 2. q. 67. art. 2. ad 1. Corduba lib. 1. quæstion. q. 38. dub. 2. quamuis contradicat Pet. Nau. lib. 2. c. 3. n. 135.

2 ASSERTIO II. Vir nobilis, Miles, &c. etsi fuga declinare possit impetum aggressoris, plerumque tamen non tenetur. Quæ est communis DD. sententia Abb. c. olim, 1. num. 17. de restit. spoliatorum, Maioris loco supra cit. Tiraquelli cap. 20. de nobilit. num. 64. Clari §. homicidium num. 26. & 32. Soti cit. art. 8. dub. ult. Nauar. c. 15. man. num. 4. Arragon. 2. 2. quæst. 64. art. 7. Saini lib. 7. c. 10. dub. 8. Vasq. in moral. de restit. cap. 2. §. 1. dub. 8. Less. loc. cit. licet dubitet Couar. in Clem. si furiosus, p. 3. §. vn. num. 4. Ratio verò est: Quia huiusmodi hominibus fuga plerumque ignominiosa est. Quare aliud sentiendum de ignoto, aut infimæ sortis hominione, qui fugiendo exiguum honoris sui iacturam passurus sit: Item de Religiosis, ac Clericis, quorum laus non in vsu armorum, sed virtutum charitatis, humilitatis, ac patientiæ consistit, sicuti ex cõmuni docet Couar. in cit. §. vn. num. 4. Abbas c. suscepimus, num. 4. de homic. Maior loco cit. Cum verò Doctores apud Couar. & Tiraquel. omnem laicum fugiendi obligatione liberant, loquuntur de foro externo; quamuis ne hîc quidem consentiant.

Illud verò certius est, tam Ecclesiasticum, quam secularem, quem fugere oporteret, si non fugiat, sed aggressori resistat, suiue defendendi causa eundem mutilet, vel occidat, ad damni compensationem neque in externo, neque interno foro obligari. Cuius ratio est, quia aggressori propriè iniuriam non infert: quandoquidem is ultro in tale periculum se confert; & quantum in ipso est, potestatem facit inuaso sui defendendi.

Sed quæstio est. Vtrum prouocatus ad singularem pugnam, seu duellum acceptare possis, ne ignauiæ aut timiditatis notam apud alios incurras? Aliqui affirmant apud Bannes quæst. 64. art. 7. dub. 3. Quia sicut ab hoste fugere, ita etiam prouocanti se non sistere, timiditatis & ignauiæ nota est: quam aliquis à se remouere poterit.

3 Sed contraria sententia est communis Bannes cit. dub. 3. Soti cit. art. 8. dub. ult. Petr. Nauar. lib. 2. cap. 3. num. 286. Rodriq. tom. 1. sum. cap. 73. conclus. 1. Molinæ tract. 3. disp. 17. Lessij cap. 9. dub. 12. num. 84. Sanchez lib. 2. moral. cap. 39. num. 9. Becani 2. 2. cap. 26. quæst. 5. Ordinariè non esse licitum prouocato ad duellum id acceptare: Quia nemo prudentum vitio tibi vertet, quòd legem Dei obserues, hominisque occidendi periculum absque iusta necessitatis causa non adeas: Imprudentium autem & vanorum hominum iudicia in re a seò graui attendenda non sunt. Nam multi etiam ex vulgo imprudenter iudicant, decorum esse de accepta iniuria vindictam sumere propria auctoritate: non ideo tamen id licitum efficitur. Neque simile est de fuga: ea

enim homini nobili, aut militari ignominiosa æstimatur. Sed ad duellum prouocatus aliud medium eligere potest, videlicet vt neque fugiat, neque congregiatur: sed dicat, paratus sum me defendere, quandoque me aggressus fueris: sed ex condicto duellum acceptare non possum: cum id diuinæ legi, & iusto etiam Magistratus præcepto aduersetur.

Dixi autem ordinariè. Nam si in rarissimo casu eo loco res sita sit, vt Miles in exercitu, Vir equestris in aula regia, officio, dignitate, Ducis aut Principis fauore, ob ignauiæ suspicionem, excidere debeat, nisi identidem prouocanti se sistat; non audeo damnare eum, qui meræ defensionis gratia paruerit, iuxta doctrinam Nauar. c. 15. n. 3. & 4.

+ Idemque sentiendum, si ad pugnandum laceffens alterum, crebra conuitia & contumelias adiciat; quales molestia & subeundo de decore aliter liberare se non possit, nisi armis congregiatur. Nam si ob defensionem bonorum hominem mutilare, vel occidere fas est; multo magis, si ita necesse sit ad defendendum honorem, vel auertendam contumeliam: quandoquidem honor pluris valet, quam fortunæ bona: & iniuria personæ maior est, quam fortunarum damnum, vti annotauit Nau. cit. n. 3. & Abb. in cit. c. olim, n. 17. Dummodo spes sit contra iniustum aduersarium præualendi: Alioquin illicitum erit, certo mortis periculo se exponere ad vitandum dedecus, quod non ex hominis delicto, sed ex vulgi sinistra opinione prouenit. Sicuti enim vita maius hominis bonum est, quam honor & fama apud homines; ita & mors maius malum est, quam ignominia, & dedecus, quod ab hominibus alicui, præsertim Christiano, sine eius culpa irrogatur: quia vti gloria quæ apud homines est, non apud Deum, vera gloria censeri non debet: ita & dedecus seu ignominia, quod notauit Pet. Nau. lib. 2. c. 4. num. 17. Quin & verus honor, qui ex virtute nascitur, maius bonum non est, quam vita corporis, per se loquendo: Adeò, vt si quis, retenta virtutis constantia, ignominiam aliquam, vel criminis suspicionem falsò incurrere debeat, potius illam sustinere oporteat, quam vt vita prodigatur, sicuti bene docet Nau. c. inter verba, 11. q. 3. concl. 4. n. 25. vbi ait: Quòd vulgi error est, pro honore moriendum esse.

Denique, licet post acceptum vulnus, alapam, aliàue contumeliam, cessante periculo vterioris plagæ, vel ignominia accipiendæ, aduersarium percutere plerumque nefas sit: quia talis percussio, post illatam & non amplius impendentem violentiam, non defensio, sed vltio censenda est, quam constat priuata auctoritate illicitam esse, iuxta c. significasti, 2. de homic. Vim vi repellere, omnia iura legesque permittunt, &c. non ad summendam vindictam, sed ad iniuriam propulsandam: Tamen si vir strenuus, seu militaris illatum sibi dedecus ex alapa v.g. nulla alia ratione à se remouere possit, quam incontinenti repertuendo, non prohibetur id agere. Nam sicuti furi, vel latroni non tantum resistere licet, ne bona fortunæ iniuste auferantur: sed etiam eundem persequi, vt ablata recuperentur: ita etiam se res habet in defensione honoris, sicuti probabiliter docent Nauar. c. 15. man. num. 4. Victor. relect. de iure belli, num. 5. Pet. Nauar. lib. 2. c. 3. num. 381. vbi rectè id limitat, nisi qui contumeliam intulit, pœnitentia motus satisfactionem offerat, veniam petat, &c. Vide tamen Lessium c. 9. dub. 12. num. 79. & 82. qui bene monet, hanc doctrinam in praxi rarissimè locum habituram: quòd vix accidat, percussione esse medium idoneum atque necessarium ad honorem tuendum: quare etiam in externo foro tales, tamen si mitius puniri solent, qui ob illatam contumeliam percutiunt, vel occidunt, teste Gomez 3. resol. cap. 3. n. 24. Mol. tr. 3. disp. 17.

ASSERTIO III. Non solum pro defensione vitæ, ac honoris, (sicuti ex duabus antecedentibus assertionibus

sonde  
nada  
par  
s. r. m.  
11

+ conde  
nada  
por  
11



bus constat) sed etiam facultatum, quæ non modici momenti sunt, & alia ratione liberari, aut recuperari (v.g. per viam iudicij) non poterunt, permissum est aggressorem, vel raptorem vulnerare, interficere. Ita colligitur ex c. 2. de homic. & c. dilecto, de sent. excom. in 6. & docet S. Anton. p. 3. tit. 4. cap. 3. §. 2. Maior cit. d. 15. quæst. 20. circa 4. obiect. Syluest. ver. bellum, 2. qu. 2. & ver. excommunicatio, 6. §. sciendum est quarto, dicto 9. Caiet. 2. 2. quæst. 64. art. 7. ad 2. Sotus cit. a. 8. Pet. Nauar. lib. 2. cap. 3. num. 397. Couar. p. 3. Clem. si furiosus, §. vn. num. 6. Clarus ver. homicidium, num. 25. Lessius dub. 11. Medina quæst. 4. de restit. in princ. Molin. tract. 3. disput. 16. & 17. contra Abb. & alios quosdam in cit. c. 2. de homic. apud Couar. cit. n. 6.

Extendi debet assertio primò; Vt non tantum in laico locum habeat; sed etiam in clerico, arg. cit. c. dilecto, & c. olim, 1. de restit. spoliatorum: et si contrarium doceat Abbas c. suscepimus, de homic. n. 1. & Glossa causa 23. q. 3. in princ. Secundò, Non tantum si res suas liberare conanti raptor resistat; sed etiam si non resistat, ac fugiat, v. g. in equo quem rapuit, sicuti docent Syl. cit. dicto 9. Mol. cit. loco. Pet. Nau. lib. 2. c. 3. num. 409. contra Couar. cit. §. vn. n. 6. ver. nonò. Ratio est, partim quòd naturæ lex ad propriam sui defensionem contra iniustum inuasorem inclinata, id permittat: partim quòd civiles etiam constitutiones eiusmodi facultatem omnibus tribuant, sicuti constat ex l. 12. tabul. apud IC. in l. 4. ff. ad l. Aquil. Quod & ipsum confirmat Rerum pub. consuetudo, bella cum offensiva, tum defensiva, bonorum fortunæ causâ, vsque ad hominum occisionem mouentium: Nam alioquin scelerum impunitas improbos ad peccandum audentiores redderet.

Neque obstat primò, si quis obijciat, vitæ proximi cum spirituali, tum corporali, secundum ordinem charitatis, posthabenda esse externa fortunæ bona. Respondetur enim, id verum esse, si proximus in morali necessitate constitutus sit; non item, si sponte per malitiam in talem se miseriam conijciat.

Neque obstat secundò, quòd iura significant, furem nocturnum quidem impune occidi, non item diurnum, nisi telo se defendat: sic enim habetur in l. 4. ff. ad l. Aquil. & l. furem, ff. ad l. Corn. de sicariis: Cui consonat lex Exodi cap. 22. & c. si perfodiens, de homic. Respondetur: Neque nocturnum furem, quamuis armatum, semper occidere fas esse: quia, si cum posset eum aliquis apprehendere, maluit occidere, magis est, vt iniuriam fecisse videatur, vti dicitur in l. 5. ff. ad l. Aquil. Contrà, furem diurnum, quamuis inermem, interdum occidere nefas non est: si videlicet apprehendere, atque res tuas ab eo liberare non possis. Verum hoc interest, quòd fur diurnus, si inermis sit, plerumque citra vulnerationem capi, aliâve ratione res ab eo recuperari potest: in fure nocturno autem ferme discerni nequit, occidendine animo, an solum rapiendi accesserit: tunc verò periculi declinandi causa, nisi clamore homines acciri possint, impune occiditur. Atque huius discriminis causa leges citatæ definiunt, magis nocturnum, quàm diurnum furem occidere fas esse, sicuti indicat l. 4. ff. ad l. Aquil. & bene explicant Pet. Nau. lib. 2. c. 3. num. 402. Medina cit. quæst. 4. de restit. circa princ.

5 Assertio IV. Cum quis ius habet defensionis causa aggressorem, vel raptorem mutilare, vel occidere, aliis quoque licitum est vim passio assistere, & auxilium ferre, sicuti ex communi docet S. Anton. l. c. Abb. in c. olim, 1. num. 18. de restit. spoliat. Io. Faber tit. Instit. de iure natur. gent. & civili, §. ius autem, Mol. tract. 3. disp. 18. Less. dub. 13. Quin etiam saepe aliquis ex charitatis lege obligatus est ad auxilium ferendum innocenti con-

tra nocentem, si absque magno suo incommodo possit, sicuti docui lib. præcedente tr. 3. c. 3. num. 5. & tradit Maior cit. loco ante §. obiect. Ex iustitia autem ad id obligantur Principes & Magistratus erga suos subditos, v. g. vt regionem, & vias publicas tutas à latronibus reddant. qua de re Mynsing. cent. 5. obseru. 70. item Vasalli, Milites erga dominos suos; denique ex lege pietatis liberi erga parentes; & è contrario, parentes erga liberos: qua de re Less. cit. dub. 13. Mol. tract. 3. disp. 33. memb. 5. quia it num. 9. Famulos mercede conductos non ad pugnandum; sed ad alia obsequia, si negligent dominum suum defendere, vel à morte liberare, propriè non peccare aduersus iustitiam; sed aduersus charitatem, gratitudinem, moralemque honestatem; ideoque non teneri pœna homicidij, sed alia arbitraria, licet grauiore, quàm si alius quispiam, cum potuisset iniustam occisionem impedire, neglexisset. Sed bene admonet Less. lib. 2. c. 9. num. 94. multos esse famulos conductitios, qui eo tacito pacto conducuntur, vt dominum contra iniquos aggressores defendere teneantur: qui proinde contra iustitiam peccabunt, id negligendo: multòque magis, si intelligentes, necem iniustam domino parari, id reuelare intermittant: quemadmodum etiam eiues obligantur, si proditio nem contra Principem intelligant, indicare, vt impediatur, vt iterum dicam cap. seq. n. 7.

## CAP. IV.

## De homicidio voluntario, &amp; casuali.

## SUMMARIUM.

- 1 Homicidium aliud est casuale, & aliud voluntarium; idque vel directè, vel indirectè. Idem est, si dicas, homicidium vel casu fieri, vel culpa, aut dolo.
- 2 Homicidium in ebrietate interdum omni culpa vacat; interdum verò indit: esse voluntarium est, ideoque culpabile; minus tamen, quàm si directè volitum esset.
- 3 Qui mulieri abortum procurat, si factus animatus fuit, verè homicida; atque irregularis existit.
- 4 Si factus animatus non est, facilius permittitur, propter matris salutem; medicinus eum expellere.
- 5 Suadens, aut mandans homicidium iniustum fieri; crimine & pœnis patris homicidij tenetur. Inter mandantem, & consulentem dispar ratio est.
- 6 Qui homicidium suo nomine patratum postea ratum habet, licet alias iuri pœnas incurrat, non tamen irregularitatem, neque damni refarciendi obligationem.
- 7 Qui hominis necem, cum faciliè posset impedire, negligit, irregularitatem non contrahit; nisi ex iustitia obligatus fuerit ad defendendum.
- 8 Quædam personæ specialiter obligatæ sunt ad impediendam iniustam necem, videlicet Principis, parentis sui.

**H**omicidium, extra casum necessariæ defensionis, à priuato vel casu committitur vel voluntate. Quod vero casu fit, omni culpa vacat. Casu autem fieri dicitur, quod & præter operantis intentionem, & raro ita euenit. Veluti si ædituus, (quamuis interdicti tempore, & non sine peccato) campanam pulsârit, quæ delapsa hominem contriuit, casuale erit & inculpatum homicidium, sicuti habetur in cap. ex literis, 2. de homicidio. Neque enim interest, licitane, an illicita sit operatio, vnde hominis occisio per accidens provenit, teste Caietan 2. 2. quæst. 64. a. 8. Soto lib. 5. quæst. 1. a. 9. vers. Imò verò, Nauar. c. 15. man. num. 6. Less. cap. 9. dub. 15.

Quod voluntate fit homicidium duplex est: Vel enim directè & expressè volitum est, diciturque homicidium ex proposito, ac plenè voluntarium: Cui æquiparari debet primò, quod volitum est in causa admodum propinqua, vnde mors suapte natura consequi solet;



quale est, inquit Nauar. cap. 27. num. 240. ferire punctum circa praeordia, vel caesum circa caput, quamuis sine directo occidendi proposito. Secundò æquiparari debet, si quis ex iustitia teneatur impedire homicidium (v. g. nauta naufragium) & cum facile possit, nullum tamen omnino impediendi conatum adhibeat: Nam hoc casu dolus non omnino abesse censetur.

Vel volitum est homicidium indirectè, & interpretatiuè, interueniente culpa, sed non dolo. Quod duobus modis contingit: I. Si quis euentum homicidij ex iustitiæ lege impedire teneatur, videl. nauta naufragij, atque tantum, quantum posset, ac deberet, non adhibendo conatum, negligat: qua de re Couarruu. Clem. si furiosus, p. 2. §. 2. num. 8. Mol. disp. 33. memb. 5. num. 3. II. Si quis eiusmodi actionem exercent, ex qua hominis occisionem non raro consequi nouit, & ob id actionem intermittere, vel aliter ac maiore cautione instituere deberet; homicidium inde proueniens indirectè atque imperfectè voluntarium censetur; ideoque magis venia dignum, quam si ex proposito factum esset, iuxta l. 1. §. Diuus, ff. ad l. Cornel. de sicariis.

Igitur in homicidio ante omnia Iudex tam in foro interno, quam externo, attendere debet; Casusne, an culpa, an dolo factum sit. Dolus malum occidendi propositum continet: puniturque Cæsareo iure homicidium ex proposito capitis amputatione. Nobiliores tamen mitius puniuntur, & in insulam deportantur, iuxta l. 3. §. ult. ff. eod. & videri potest Couarruu. lib. 2. resolut. cap. 9. Gomez 3. resolut. cap. 3. num. 1. Molina tract. 3. disput. 21. vbi testatur, multorum regnorum consuetudine etiam nobiles ob hoc crimen capite puniri.

Loquor autem de homicidio simplici. Nam qualificatum, cuiusmodi est parricidium (voluntaria inquam cædes ascendens, vel descendens, iuxta l. vn. Cod. de his qui parentes, vel liberos occiderunt) grauius puniri solet. Parricidio annumeratur primò, occisio uxoris, vel mariti, iuxta l. 1. ff. ad l. Pompeiam de parricidis. Secundò, occisio fratris, vel sororis, aliorumque consanguineorum vsque ad quartum gradum, teste Gomez lo. cit. num. 3. quamuis non par pœna imponi soleat; sed pro diuersitate delicti, ex maiore vel minore coniunctione æstimati, sicuti docet Mol. tract. 3. disput. 26.

Præterea aggrauatur voluntarium homicidium ex modo occidendi: I. Si quis ex insidiis hominem occidat, vt cauere sibi non possit: adimitur enim illi ius naturale sui defendendi, de quare l. vltim. Cod. qui accusare non possunt. Huc pertinet, si quis aliquem veneno interficiat, iuxta l. 1. Cod. de malef. & mathem. vbi dicitur: *Plus est hominem extinguere veneno, quam occidere gladio.* II. Si quis ab altero, pretio, vel præmio conductus hominem interficiat: partim quia magis ignoscitur illi, qui ira & inimicitia instigante hominem inuadit, quam qui pecuniæ cupiditate in alterius gratiam, argum. l. Cicero, ff. de pœnis: partim quia inuasus plerumque ad sui defensionem imparatus est contra eum, quem nulla cum ipso antecedente inimicitia, suspectum non habet. Vide Gomez num. 10. Molin. tract. 3. disp. 25.

Qui per culpam, quamuis latissimam (non enim hæc in delictis æquiparatur dolo, sicut constat ex l. in lege Cornelia, 7. ff. ad l. Cornel. de sicariis, & docet Gomez num. 16. Clarus lib. 3. sent. §. fin. q. 84. num. 71. Mol. disp. 21. num. 1.) hominem interimit, non ordinaria homicidij pœna afficiendus; sed Iudicis arbitrio puniendus est secundum proportionem culpæ, iuxta l. 1. §. Diuus, & l. 3. ff. eod. tit. Porro grauitas, aut leuitas culpæ à Iudice æstimari debet secundum quantitatem periculi, ex genere & qualitate facti, personæ, instrumenti, &c. sicuti docet Gomez num. 17. ex cit. §. Diuus, & l.

omne delictum, §. si quis commilitonem, ff. de re militari, & c. sicut dignum, c. significasti, 2. de homicid. Denique quod mero casu homicidium committitur, nullam pœnam meretur; cum extra omnem culpam sit.

**QVÆSTIO PRIMA.** Quid sentiendum de ebrio hominem interficiente? Respondeo & dico I. Qui in ebrietate inuoluntaria, & inculpata hominem occidit, extra omnem culpam, nullaque pœna dignus est. Talis erat ebrietas Noe, nondum agnoscentis vini virtutem, Genes. 9. vbi S. Chrysost. hom. 29. Theodor. q. 69. Et quod de ebrio dixi, eadem ratione dicendum de infante, amente, dormiente; si in tali dispositione eadem faciant, teste Claro §. fin. q. 60. n. 1. Couar. Clem. si furiosus, p. 3. initio, Molin. tr. 3. disp. 38. Andr. Gaill. lib. 2. obseru. 110.

Dico II. Qui voluntariè & non sine culpa se inebriauit, si animi propensionem, & rixandi in ebrietate consuetudinem suam perspectam habens, homicidij periculum suspicatus fuerat, duplicis quidem peccati reus est, videlicet intemperantiæ, & iniustitiæ; vt alicui pœna duplici dignus videri possit, sicuti legimus apud Aristotelem 3. Ethic. cap. 5. Veruntamen commisso in ebrietate homicidio, non ordinaria, sed arbitrariæ pœnæ subiectus est, iuxta l. omne delictum, §. per vinum, ff. de re militari, & docent Clarus, Couarruias, Molin. l. cc. Petrus Nauar. lib. 2. cap. 1. diffic. 8. num. 74. Less. lib. 4. c. 3. dub. 3. num. 26. Ratio est, quia tale homicidium non est ex proposito, siue voluntarium directè; sed indirectè tantum, & in causa sua culpabile. Quare si aliquis cognitam habens propensionem suam, ideo se inebriasset, vt hominem occideret, secuto effectu, tanquam voluntarius homicida, ordinaria pœna afficiendus foret, teste Couar. n. 3. Mol. n. 5.

Dico III. Qui culpate se inebriauit, sed de homicidij periculo nihil suspicatus fuit, quia antea expertus non erat, se in ebrietate ad pugnam inclinatum esse; secuto infelici cædis euentu, non est de crimine homicidij arguendus; aut puniendus. Ita docet Castro lib. 2. de lege pœn. cap. 14. conclus. 1. Gutiérrez lib. 2. can. qq. c. 4. num. 95. Caiet. 2. 2. q. 150. 2. 4. Couar. l. c. num. 4. Molin. num. 8. Less. num. 27. Vbi rectè etiam negant, eiusmodi homicidam irregularem fieri, contra Syl. ver. homicid. 3. q. 4. Probat: Tale homicidium neque est directè voluntarium, vt patet, neque indirectè, & in causa; nam vt aliquid ita voluntarium censeatur, necesse est, effectum vt plurimum, aut frequenter coniunctum esse cum aliqua voluntaria operatione: alioquin non censetur effectus per se, & secundum intentionem virtualem; sed casualis ac per accidens. Atqui hominis occisio nec vt plurimum, nec frequenter, sed valde raro cum ebrietate coniuncta est. Ergo non voluntarium, sed casuale & inculpatum homicidium censi debet. Peccauit quidem ille peccato intemperantiæ quatenus ebrius; sed non contra iustitiam peccato homicidij; vt pote de quo nec cogitauit, nec probabiliter cogitare poterat, aut debebat. Qua eadem prorsus ratione S. August. lib. 22. contra Faustum cap. 44. factum Loth Genes. 19. excusat: *Inebriauerunt enim, & se nescienti misceuerunt: quapropter culpandus est quidem, non quantum ille incestus; sed quantum illa merebatur ebrietas.* refertur causa 15. q. 1. & consentit S. Ambros. lib. de Abraham. c. 6. & refertur c. sanè, ead. q. Orig. hom. 5. in Genes. Hieron. ad Eustoch. de custodia virginis. Hoc fautor, si in aliqua Repub. consuetudo sit ebrios puniendi, ob euentum homicidij in externo foro pœnam augeri posse, iuxta c. aut facta, §. euentus, d. 1. de pœnit. & legi potest Bartolus in l. aut facta; cit. §. euentus, ff. de pœnis.

**QVÆSTIO SECUNDA.** Quid sentiendum de procurante abortum? Respondeo & dico I. Qui maliciose



impedit, ne fœtus humanus concipiatur, aut conceptus animetur, non verè, sed quasi homicidium committit, ac mortaliter peccat. Sumitur ex c. si aliquis, & c. si cut ex literarum, de homicid. iuncto c. quod verò, 32. q. 2. l. Diuus, ff. de extraordin. criminibus; l. Cicero, ff. de pœnis, & docet Nau. c. si quis necandi, d. 1. de pœnit. num. 3. Gomez 3. resol. c. 3. num. 32. Couar. Clem. si furiosus, p. 2. §. 3. num. 1. Mart. Nauar. c. 16. num. 33. Pet. Nauar. lib. 2. c. 3. num. 141. Less. lib. 2. c. 9. dub. 10. Sanch. lib. 9. de matrim. disp. 20. num. 10. vbi ait, nullo sine bono cohonestari posse sumptionem portionis, qua prolis conceptio impediatur. Ratio est, quam Tertull. attigit in Apolog. cap. 3. *Homicidij festinatio est, prohibere nasci. Nec refert, natam quis eripiat animam, an disturbet nascentem: Homo est qui futurus est: nam fructus in semine est.*

3 Dico II. Qui fœtum animatum enecat, verè ac propriè homicida est. Ita colligitur ex cit. c. si cut dignum, vbi id notat Abb. num. 1. Gomez loc. c. Clarus §. final. q. 68. num. 2. Mart. Nau. l. c. Pet. Nau. lib. 2. c. 3. num. 140. Couar. 2. resolut. cap. 20. num. 10. Mol. disp. 27. post Gl. receptam in l. Diuus, ff. de extraordin. criminibus. Quin & parricida est, si parens animato fœtui abortum prociuret, teste S. Cypriano martyre lib. 2. Epist. 8. ad Cornelium Papam, apud Pamelium 44. vbi Novatum parricidij crimine fugillat, quod uxorem, pedis calce incusso, abortire fecit.

Porro plurimum scire interest, vtrum fœtus tempore abortus animatus fuerit, necne. Nam primò, si animatus fuit, irregularitas incurritur: non item si animatus necdum fuerat, sicuti constat ex cit. c. si cut ex literarum, de homic. & cit. c. quod verò. Communiter autem DD. arbitrantur, masculum rationalem animam accipere quadagesimo die à conceptione, fœmellam verò octogesimo, sicut videre est apud Abb. c. si aliquis, in fine, de homicid. Nau. c. 15. num. 14. Finellium casu de abortu, num. 5. Couar. cit. §. 3. num. 1. post. Gloss. in Clement. vn. de summa Trinitate, ver. *simul unitas*, & in proœm. d. 5. verbo *quadraginta*; ducto argumento ex c. 12. Levit. quasi tibi præceptum fuerit, vt quot diebus mater immundum, & anima non informatum fœtum vtero portasset, totidem diebus post partum immunda censeretur: quod tamen non placet Lessio cap. 9. dub. 10 in fine.

4 Secundò, si certum sit, fœtum in vtero nondum animatum esse, facilius permittitur ob matris salutem eum expellere: Idque directa intentione, si fœtus matri mortem allaturus putetur, sicuti docet S. Anton. p. 3. tit. 7. c. 2. §. 2. Syl. ver. medicus, q. 4. Lopez p. 1. in str. c. 3. Couar. p. 2. Clem. §. 3. n. 1. Nau. c. 25. n. 62. Less. & Sanchez ll. cc. contra Pet. Nau. lib. 2. c. 3. diff. 2. n. 40. §. mihi videtur. Quia tali casu fœtus est quodammodo aggressor, seu causa efficiens materni obitus; igitur eum abigere, si nondum animatus est, naturali iure licet. Indirecta verò intentione seu per accidens, fas erit interdum fœtum expellere, si matri grauius ægrotanti v. g. venæ sectio, aut purgatiuum pharmacum necessarium videatur, non sine aliquo abortientis periculo.

Sin autem fœtus animatus existimetur, tunc aliter distinguendum cum Sanchez. n. 13. Quid medicinas, quæ directè ad fœtus occisionem tendunt, puta venenum, dilacerationem, & c. adhibere nunquam licitum est: cum hominem innocentem per se & directè occidere nefas sit. Medicinas autem, quæ per se ac directè ordinatæ sunt an sanitatem matri conferendam, licet per accidens timeatur fœtus occisio, v. g. venæ sectionem, pharmacum ventris purgatiuum adhibere non est illicitum; si certo medicorum iudicio mater cum prole ante eius natiuitatem moritura sit, nisi eiusmodi medicamentum adhibeatur, sicut docent Nau. Sanch. & Less. ll. cc. Petr. Nauar. lib. 2. c. 3. num. 143. Sairus lib. 7. clauis

reg. cap. 12. num. 21. Finell. casu 4. num. 17. Ratio est: Quia innocentem per accidens, & præter intentionem in casu necessitatis occidere, à recta ratione alienum non est: In proposito autem casu occisio maximè per accidens contingit: cum enim fœtus pendeat à vita & salute matris, atque rarissimum sit, fœtum viuum pro-gigni post matris mortem; ideo, si ad procurandam salutem matri medicamentum præbeatur, tendit id secundariò ad salutem fœtus; licet per accidens illi noceat. Confirmatur. Quis enim neget inuadente fera matrem, ipsi licitum fore, imò etiam in præcepto naturali, vt fuga vitam suam certo interitui expositam liberet, si possit, quamuis cum probabilissimo abortus periculo? Veruntamen in casu vnico repugnabit charitatis legi matris vitam medicamento seruare cum probabili periculo necandi fœtus; si, non adhibito tali medicamento, demortua matre, credatur, fœtum viuum in lucem edendum, & baptizandum fore. Cuius ratio est, quia ordo charitatis postulat, vt vita spiritalis animati fœtus præferatur vitæ corporali ipsius matris: quamuis hunc casum vix possibilem esse, testatur Sanchez num. 17.

QVÆSTIO TERTIA. Quid sentiendum de consulente, auxiliante, mandante, iatum habente, non prohibente homicidium? Resp. & dico I. Qui maligno consilio, vel auxilio permouit hominem ad necem sibi, vel alteri inferendam, verè ac propriè homicida est, si euentus sequatur, sicuti constat ex c. si cut dignum, §. Clericos, de homicidio, c. si quis viduam, d. 50. & tradunt Legittæ in l. sepe, ff. de verb. signif. Quod si ille propositum antea conceperat, quem maligno consilio, vel auxilio tuo magis confirmasti, mihi quidem puniendus eris, sicuti colligitur ex cit. c. si cut dignum, §. qui verò, & docet Couar. in Clem. p. 2. §. 2. n. 1. Mol. tract. 3. disp. 33. mem. 2. sed irregularitatem non effugies, teste Mol. mem. 6. n. 6.

Dico II. Qui homicidium fieri mandauit, secuto euentu, propriè homicida est, ordinariis pœnis & censuris subiectus. Ita Gomez 3. resol. cap. 3. n. 39. Finell. casu 4. n. 21. Mol. mem. 3. arg. c. perniciosè, de pœnit. d. 1. & videri potest S. August. in Psal. 63. ver. 2. licet aliter ex Bartolo doceat Nauar. c. 27. n. 51. Duo verò discrimina inter mandantem, & consulentem obseruare licet: Primum. Qui mandatum occidendi datum ante eius executionem expressè, vel tacitè reuocauit, ab irregularitate securus est; dummodo reuocatio ad noticiam mandatarij pernenerit. At verò qui maligno consilio dato, quod v. g. turpe sit vindictam non sumere, alique ad inferendam necem permouit, licet postea reuocarit, tamen irregularitatem incurrit, si persuasus conceptum semel propositum nihilominus executus fuit, sicut ex doctrina innoc. c. ad audientiam, de homic. probabiliter docent Gomez n. 40. & 44. Nau. c. 27. n. 233. Mol. tr. 2. to. 3. poster. disp. 731. Rationem autem huius discriminis assignavi in lib. 1. tr. 5. p. 2. c. 5. num. 7.

Alterum. Si alicui mandaueris, vt hominem occideret, illèque mandatum acceptet, tuoque nomine exequatur, irregularitatem non effugies; licet mandataris, iam ante concepto occidendi proposito, quamuis tu non mandasses, nihilominus hominem occidisset. Sin autem alicui suasisi homicidium, sed consilium tuum nihil ad effectum contulit, quia per seipsum ad occidendum planè determinatus, nihil omnino in proposito suo per te confirmatus fuerat; ab irregularitate immunis eris. Ita ex communi Mol. cit. disp. 33. mem. 2. n. 7. Ratio verò discriminis est: Quia mandatum fit in gratiam mandantis: consilium autem datur in gratiam capientis. Ex quo sequitur, si suadeas Titio occidere, quia tale propositum firmiter conceperat, quod nihil efficias: sin verò eidem mandes, isque mandatum exequatur, efficias, vt iam tuo nomine homicidium fiat,



tibique vt causæ adscribatur.

Dico III. Si affirmanti, tui gratia se hominem necaturum, credas id ab ipso futurum esse, neque contrarias & impediās, cum possis; tacite consentire, ac mandare censeberis, arg. c. constitutis, l. de testibus, l. in delictis, ff. de noxalibus action. l. 3. §. item is, ff. ad l. Cornel. de sicar. l. qui patitur, ff. mandati, & docet Gomez cap. 3. n. 47. & seqq. Mol. t. 2. disp. 550. & tr. 3. disp. 33. mem. 3. Ioan. Faber in §. 1. Instit. de noxal. actionibus. Eademque est ratio, si te rixante v. g. cum Ioanne, amici tui superueniant, & à te non prohibiti, aut repulsi, Ioannem in tuam gratiam occidant. Quare utroque etiam casu irregularis fies, arg. c. Petrus, de homic. vbi id docet Abb. not. 2. Couar. in Clem. p. 2. §. 2. n. 8. casu 4. Henric. lib. 14. c. 13. n. 4. Auila p. 7. disput. 6. §. 3. dub. 5. Nau. cap. 27. n. 231.

6 Dico IV. Qui suo nomine necem patratam postea ratam habet, iuris pœnas homicidis decretas incurrit, v. g. excommunicationis censuram, si Clericus occisus sit, iuxta cap. cum quis, de sent. excom. in 6. iunct. Gl. ver. tuo nomine, & docet Clarus §. sent. §. finali, q. 87. Mol. tr. 2. to. 3. poster. disp. 729. Quia, vt dicitur in reg. 10. in 6. *Ratificationem retro trahi, & mandatio non est dubium aequiparari.* Ad damnorum tamen restitutionem minimè tenebitur eiusmodi mandans, sicuti dixi tract. præced. c. 5. num. 2. dub. 2. Sed neque irregularitatis notam contrahere videtur, sicuti docet Couar. in Clem. p. 2. §. 1. num. 4. Suar. to. 5. disp. 44. sect. 3. n. 24. Auila l. c. sect. 2. dub. 6. Henric. c. 16. n. 2. cum Glof. in c. si quis viduam, d. 50. contra Nauar. c. 27. n. 233. Mol. tr. 3. disp. 33. memb. 4. Ratio verò discriminis, cur is, qui suo nomine patratum homicidium Clerici postea intelligens, ratum habet, excommunicationem incurrit; non item irregularitatis notam, hæc est; Quia excommunicatio genus quoddam pœnæ est, per leges inflictæ ratum habenti homicidium, perinde ac mandanti. Irregularitas verò non tam pœna est, quàm moralis quædam macula, ab eo contrahi solita, qui homicidij causa existit. Similiter rest. tuendi obligatio effectus quidam est inde consequens, quod aliquis causa damni, puta homicidij extitit: At qui nemo per ratificationem homicidij antè commissi causa efficitur: cum ad præteritum non sit potentia. Ergo, &c. Porro, si quis homicidium non suo nomine patratum postea approbet, non censetur ratificare, ita vt ex eo censuram aliquam, vel restituendi obligationem contrahat: Quia *nemo ratificare potest, quod suo nomine gestum non est*, c. cum quis, de sent. excom. in 6.

7 Dico V. Si quis hominis necem, cum faciliè impedire possit, negligat; interest, vtrum ex lege solum charitatis impedire obligatus sit, an etiam ex iustitia, vel quasi iustitia. Nam priore casu homicidium non committitur: siquidem homicidij peccatum virtuti iustitiæ propria aduersatur: Ergo qui contra iustitiam non peccat, homicida censendus non est, consequenter nec irregularis, sicuti docet Nau. c. 24. num. 22. & c. 27. num. 231. Mol. memb. 5. contra Couar. p. 2. Clem. §. 2. num. 7. Quare neque illum irregularem censeo, qui hominis occisionem impedire volentem maligna dissuasiōe ab hoc opere charitatis reuocat: non enim peccat contra iustitiam, sed solum contra charitatem, teste Auila p. 7. disp. 6. sect. 2. dub. 7. conclus. 2. §. ex dictis, et si contrarium doceat Suar. to. 5. disp. 45. sect. 4. n. 3. Id fateor, in externo foro contra talem, qui necem, cum faciliè posset, impedire neglexit, præsumptionem orituram, consensisse vel conspirasse in eadem, sicuti constat ex c. si cut dignum, §. illi etiam, de homic. &c. quantæ, de sent. excom.

8 His adde; Si quis sciens tractatum, vel conspirationem aduersus Principem, non reuelet ad impediendū, capitali pœna plectendum esse, secundum l. quisquis, §. id quod, C. Ad l. Iuliam Maiest. Neque requiri vide-

tur, vt conspiratio iuridicè probari possit: cum satis sit simplici denuntiatione admonere, vt Princeps sibi caueat. Vide Ioach. Mynsing. cent. 5. obseru. 40. & 41. Clarus lib. 5. sent. §. fin. q. 87. n. 2. vbi tamen monet, si quis mali consilij, seu conspirationis particeps non sit, ordinaria mortis pœna affici non solere, ob solam taciturnitatem.

Quod verò attinet ad posteriorem iustitiæ obligationem; si Iudex, Gubernator, &c. innocentem occidit; Medicus, Chirurgus infirmum ex morbo decedere permittant, cum faciliè impedire possent, homicidij rei sunt, atque irregulares, teste Nauar. cap. 24. num. 18. Auila l. c. Henric. lib. 14. cap. 12. n. 7. in comment. lit. d. Mol. cit. memb. 5. Idemque sentiendum videtur de liberis comparatione parentum; & de parentibus comparatione liberorum: cum inter eos non merum vinculum charitatis, sed quasi naturalis iustitiæ obligatio intercedat. Quare si mulier aperiat fornicatio propositum abortum faciendi, prole iam animata: & patet non impediat, si possit, irregularem fieri arbitror, cum Rodriq. t. 1. sum. c. 178. concl. 10. Auila cit. dub. 7. §. sequitur quarto, licet contrarium sentiat Less. lib. 2. c. 9. n. 94.

## CAP. V.

## De Duello.

## S V M M A R I V M.

- 1 Licitum non est Iudici, duellum Reo indicere: sed quandoque licitum est Reo in tali necessitatis casu acceptare.
- 2 Ad liberandam vitam ex certo periculo, quandoque fas est cum iniquo accusatore duellum instituere: seu offerendo, seu oblatum acceptando: noua verò pro defensione honoris ac bonorum fortuna.
- 3 In bello seu offensiuo, seu defensiuo plerumque licitum non est duellum cum hoste instituere: nisi in certis casibus.
- 4 Pœna excommunicationis decreta est contra duello congregientes, & eorumdem paternos, auxiliares, &c.

**D**uellum, græcè *μαρμαχία*, est pugna singularis ex condito. Varias ob causas institui potest: Primò, ad demonstrandam veritatem, & in testimonium innocentiae: quæ ratione inter purgationes vulgares numeratur, & damnatur in c. monomachiam, 2. q. 5. & c. 1. & 2. de purgat. vulgari, & apud S. Th. 2. 2. q. 95. a. 8. ad 3. Causa est, quia medium istud per se valde difficile, atque abhorrens à natura humana, non est etià idoneum ad finem, qui intenditur veritatis eruendæ, aut purgationis inducendæ: quandoquidem sæpe accidit, vt qui innocens est, in duello succumbat.

Dubitatur autem primò: Si iniquus Iudex alicui innocentis mortis supplicium illaturus sit, nisi duello se purget, vtrum oblatum duellum acceptare possit: Negat Syl. ver. duellum, q. 2. Armilla n. 5. Henricus quodl. 5. q. 32. Abulensis in 1. Reg. c. 17. q. vlt. S. Anton. 3. p. tit. 4. c. vlt. §. vlt. Affirmat Angel. ver. duellum, n. 2. Tol. l. 5. c. 6. prope finem, Sanchez lib. 2. moral. cap. 39. n. 4. & alij apud Caiet. 2. 2. q. 95. a. 8. ad 3. Respondendum mihi videtur, id licitum esse cum duabus conditionibus. I. Vt duellum ineatur non causa veritatis, vel innocentiae tanquam certo signo demonstrandæ, sine speciali Dei instinctu: sed ad sui necessariam defensionem. II. Vt is, contra quē duello certandum est, nocens sit, & iniqui Iudicis tanquam minister, vel satellites: ac proinde locum habeat ius naturale defensionis, tanquam contra aggressorem. Sin verò etiam alter innocens sit, non apparet, quo iure duello congregi liceat: Ponamus enī duos in criminis falsam suspicionem venisse, iisque optionem dari, vt vel mortem subeant, vel duello congregiantur: arbitror configere non posse: cum per se



atque intrinsecè malum sit ad innocentis occisionem aggredi.

Dubatur secundò : Vtrum Princeps duobus Reis capitis supplicium commertis mutuum duellum indicare possit? Et num Reis acceptare licitum sit? Ad primam partem quæstionis resp. cum Maior. in 4. d. 15. q. 23. §. quartò argumentor, Paulo Comitolo lib. 6. moral. resp. q. 16. Azor t. 3. lib. 2. c. 3. q. 7. Licet secundum se, & speculatiuè rem æstimando, non videatur id alienum à iure naturali: quòd id aliud non sit, quàm vtrumque Reum in alterutrum iustitiæ ministrum discernere, vt iustam mortis sententiam in ipsum exequatur; ei autem, qui prauenerit, vita condonetur; attamen ob adiunctas circumstantias non vacat periculo scandali: quare neque expediens, neque licitum est. Ad alteram partem resp. cum Azor. iol. c. Postquam Princeps eiusmodi facultatem duello decertandi reis concessit, licitum videri id acceptare; non ex odio, sed tum publicæ iustitiæ zelo, tum propriæ vitæ saluandæ causa.

Altera causa duelli instituendi afferri potest ad litem terminandam. Sed neque hæc causa sufficit: cum id non sit medium idoneum ad hunc finem, sicuti suprà ratiocinatus sum. Sed quæstio est; Si alicui certò, vel probabilissimè cognitum sit, per accusatoris calumniam, iniuste in iudicio se oppressum iri; vtrum liceat ei duellum offerre, vel oblatam acceptare, quando vnico hoc medio periculum mortis, vel grauissimæ infamiæ, aut bonorum amissionis à se auertere posse putat? Difficilis quæstio est, & inter DD. controuersa. Negatiuam partem tenuit Abulensis 1. Reg. cap. 17. q. vlt. Salon 2. 2. q. 64. a. 3. contr. 3. Sed Maior in cit. q. 23. §. sextò arguitur, Nau. c. 11. n. 39. Valent. t. 3. disput. 3. q. 17. p. 1. affirmant, licitum esse ob vitæ defensionem: Idem dicit Caiet. 2. 2. q. 95. a. 8. causa 4. requirit tamen, vt Principis consensus accedat. Nauarrum sequitur Mol. tr. 3. disp. 17. n. 7. At verò Pet. Nau. lib. 2. c. 3. dub. 13. n. 289. Sanchez l. c. n. 7. vniuersim aiunt, licitum esse tam offerre, quàm acceptare duellum, etiam propria auctoritate; & non solum ob defensionem vitæ, sed etiam honoris, ac fortunarum. Deinde addunt, in tali casu præstare calumniatorem clam è medio tollere, quàm duelli periculo se committere.

2. Mihi dicendū videtur: primò: Ad liberandā vitā suā à periculo moraliter certo, licitum est duello congregi tam offerendo, quàm acceptando; præsertim si Principis consensus accedat. Ratio est, quia contra iniquum aggressorem, vel insidiatorem vitæ naturali iure cuius permissa est defensio: Calumniator autem ille iniustam tibi necem machinatur: *non enim interest*, inquit Caiet. *proprie gladio, an alieno, iudicis te impetari*: Vnde etiam Nathan ad David dixit 2. Reg. 12. *Vream percussisti gladio*. Et Iudæi dominum interfecerunt gladio linguæ. *Crucifige, crucifige*, sicuti notat S. August. in Psal. 63. ver. 2. & refertur in c. perniciosè, d. 1. de pœnit. Ergo si aliud medium non suppetat periculum euadendi, poteris te duello defendere. Præsertim, dixi, Principis accedente consensu: Et si enim Princeps malè agat discernendo, vel permittendo tali casu duellum, pœnâsque Trident. Concilij incurrat; innocens tamen duello decertaturus cum Principis consensu, minùs timere debet de scandalo inde orituro, malòque exemplo.

Dicendum secundò: In praxi vix occurret casus, quo licitum sit ob honoris, vel fortunarum defensionem cum calumniatore duello congregi. Ratio est. Nam vel innocentiam tuam demonstrare potes, vel non: Si primum, nulla erit duelli necessitas: Si secundum, etsi duello certes, ac vincas, non ideo criminis suspicionem abolebis; sed nouo etiam homicidij dedecore famam tuam maculabis. Ob bonorum verò de-

fensionem seipsum mortis periculo per duellum exponere, non sine populi scandalo, aliisque Reipub. incommodis; quæ plerumque cum duellis coniuncta sunt, non videtur Christiano homini consentaneum. de qua re vide Maiorem l. c. Becanum c. 26. q. 6.

Dicendum tertio: Practicè vix probari potest, quod docet Sanchez loc. cit. & tanquam probabile defendit Petrus Nauar. lib. 2. cap. 3. num. 359. & 376. fas esse calumniatorem, aut falsum testem clam è medio tollere, ne iniuste noceat in vita, vel externis bonis magni momenti. Probatur: Nam si calumniam passus innocentiam suam ostendere potest, non deerunt alia media se à calumniatore liberandi: Si autem innocentiam demonstrare non potest, res plena scandali, ac pessimi exempli erit, si innotescat hominem de calumnia non conuictum per insidias occisum esse. Accedit, si sententia illa vel scripto, vel ipso facto à viris doctis defendatur, multos facili negotio persuasos, sibi ab Actore iniuriam vel calumniam inferri, ad eundem è medio tollendum clanculum aggressuros, cum maximo Reipub. detrimento. quod notauit Less. lib. 2. c. 9. dub. 8. n. 47.

Tertia causa duelli indicendi est ad vindictam sumendam, quod nunquam licitum est, si sermo sit de priuata vindicta. Sed dubium est, vtrum in bello offensiuo duellum publica auctoritate institui possit: Eademque quæstio locum habet in bello defensiuo. Respondeo: Ordinariè in neutro bello licitum esse duellum cum hoste instituere. Ita Caiet. cit. a. 8. causa 4. Valentia cit. p. 1. Sanchez n. 15. Nam qui iniuriam vindicat, debet esse velut agens comparatione eius, qui puniendus est: Agens autem fortior esse debet patiente, vt penes illum quasi certæ victoriæ spes existat: quod in duello non cernitur: quia vel par vtriusque conditio est, vel multa accidere possunt, vt is, qui videtur esse valentior, succumbat. In bello autem defensiuo naturalia agentia imitari oportet, quæ modo, quàm fieri potest, efficacissimo contrariis suis resistunt. Inefficax verò est modus resistendi per vnum, quippe quem faciliè vinci contingit: efficacior autem modus resistendi coniunctim, atque vnitè. Ergo iniquè communis defensio vni soli committitur.

Quibusdam tamen casibus licitum erit duellum: Primus, si hostis exercitui duellum offerat; idque ab aliquo acceptari ab auertendam ignominiam, animos hostium debilitandos, suorumque confirmandos necessarium videatur. cuius rei exemplum habemus in Davide contra Philistæum 1. Reg. 17. & docet Nauar. c. 15. n. 27. Valent. cit. p. 1. col. penult. §. quamquam.

Secundus. Si ad experiendos, ac debilitandos aduersariorum militum animos, finemque belli, ac victoriam facilius consequendam, opportunum medium Ducui videatur, priuata duella suorum militum contra hostes indicare, sicuti docent Nauar. c. 15. man. n. 27. Sanch. n. 13. Valentia cit. p. 1. Becanus 2. 2. c. 26. q. 1.

Tertius. Si ad Reipubl. bonum, belli exitum, securitatem ab hostibus consequendam, imminente belli conflictu, magis expedire Ducibus videatur, vt totum bellum ad duellum, vel paucorum certamen reuocetur, hostique offeratur, vel ab eo oblatum acceptetur, sicuti docent Nicolaus Lira in cit. c. 17. lib. 1. Regum, Maior in 4. d. 15. q. 23. Caiet. cit. art. 8. causa 5. & in summa verbo duellum, Sa ibid. n. 2. Nau. c. 9. n. 39. Valentia cit. q. 17. p. 1. Toler. lib. 5. c. 6. §. aduertendum, P. Nau. lib. 2. cap. 3. n. 293. Becanus cit. c. 26. q. 4. Sanch. cit. c. 39. n. 16. qui rectè admonet, si huiusmodi duellum communi vtriusque exercitus, vel Ducum consensu instituitur, semper expressum, vel tacitum pactum annexum esse, vt neutrius factionis militi succumbenti à circumstantibus succurri debeat: eamque conditionem ab iis quoque, qui iusto bello decertant, seruandam esse: quandoquidem bonum commune, cui reliqua posthabenda



sunt, ita postulat, ut etiā hosti fides seruetur, maxime in rebus ad bellum pertinentibus, teste S. August. epist. 207. & refertur c. noli, 23. quæst. 1.

Alia verò ratio est de duellis priuatis: hæcenim, si ex utraque pugnantium parte illicita sint, circumstantes ex charitatis lege dirimere tenentur. Si autem ex parte tantum vnus illicitum est duellum, v.g. ex parte iniusti calumniatoris, vel alienæ vitæ insidiatoris (quo casu supra dixi, licitum esse innocenti duello congredi) tunc licet circumstantes calumniatori v.g. succumbenti succurrere non debeant; innocenti tamen debent, si ipsum succumbere contingat: tamen si conditio posita fuisset, ut neutri succurreretur. Nam pactum istud ex parte innocentis, ob necessariam sui defensionem contra calumniatorem vel vitæ insidiatorem pugnantis, iniqua est. Ita docent Maior in 4. d. 15. q. 20. ante 3. obiect. Pet. Nauar. lib. 2. c. 3. n. 289. Sanchez l. c.

4. Pœna excommunicationis latæ sententiæ decreta est in Trident. sess. 25. cap. 19. de reform. cum in locorum dominos, qui duellum illicitum sua auctoritate permittunt, tum in ipsos duello concertantes, eorumque patrinos, auxiliares, spectatores: insuper, ut qui in tali conflictu decesserunt, Ecclesiastica sepultura careant. Loquitur autem Concilium duntaxat de duellis publicis, & cum solemnitate institui solitis.

Postea verò Greg. XIII. motu proprio, *Ad tollendam*, ac denique Clemens VIII. in Bulla quæ incipit, *Illius vices*, apud Saurum to. 1. lib. 3. thesauri, cap. 31. n. 21. Trident. Concilij pœnas etiam ad priuata duella extendit, & Sedi Apostolicæ reseruauit. Ex quo colligunt Delrius lib. 4. diuis. Magic. cap. 4. q. 4. l. 2. n. 26. Sanchez cit. cap. 39. n. 28. ex vi harum Bullarum excommunicationis pœnam ab iis etiam incurrere, qui certo loco, ac tēpore designato, ad pugnam seu certamen singulare, quauis nulla alia solemnitate adhibita, ex conducto accedunt. Verum Germani, alique septentrionales seu ob ignorantiam, seu quia constitutiones illæ secundum hunc sensum promulgatæ, & in vsum deductæ non sunt, à censura excusari videntur.

## C A P. VI.

### De obligatione compensandi damnum ex homicidio, vel mutilatione.

#### S V M M A R I V M.

1. In æstimationem damni, quod iniuste vulnerans resarcire tenetur, in primis veniunt impendia facta in medicos, chirurgos; deinde opera, quibus homo caruit, vel cariturus est.
2. Pro cicatricis deformitate; membri, ipsiusque vitæ iactura nulla compensatio faciendæ est, ante Iudicis condemnationem.
3. Homicida damnum compensare debet, quod exinde prouenit occisi parentibus, liberis, uxori: sed quod familiaribus, & clientibus per accidens prouenit, non videtur ex iustitiæ lege compensandū esse.
4. Creditoribus illatum damnum homicida ex iustitia resarcire debet; quamuis id in praxi non observatur.
5. Ut homicida, vel vulnerans in conscientia obligatus sit ad damni illati compensationem, necesse est, eum aduersus iustitiam deliquisse.

**C**ontra iniquum aggressorem, mutilatorem, occisorem duæ actiones oriuntur, inter quas exactè distinguendum est: Vna ad compensationem illati damni, secundum commutatiuam iustitiæ æqualitatem, cuiusmodi obligatio ex ipsa natura facti, ante Iudicis sententiam nascitur. Veruntamen, si homicidæ pœna mortis à Iudice decernatur, compensatio damnorum exigere non solet; licet in rigore exigi possit: cum damna priuata per publicam punitionem non resarciantur, sicut docet Gomez 3. resol. c. 3. n. 37. Nau. c. 15. n. 25. Less. lib. 2. c. 9. n. 138. Altera est actio cum ciuili, tum criminalis ad

satisfactionem pro iniuria, quæ secundum iustitiam vindicatiuam ab offenso æstinatur, & à Iudice decernitur, pensata qualitate facti, & circumstantiis personarum, iuxta ea quæ supra dixi hoc tract. p. 2. c. 6. n. 6. Nos hic agimus tantū de priore illa obligatione dāni cōpēlandi.

**ASSERTIO I.** In æstimatione damni veniunt in primis mercedes Medicis præstitæ, cæteraque impendia, quæ ob curationem vulnerati facta fuerunt, iuxta c. 1. de iniuriis, & l. qua actione, ff. ad L. Aquil. & l. vlt. ff. de his qui deiecerunt vel effuderunt. Secundò fieri debet æstimatio operatum, quibus homo caruit, aut cariturus est, ob id quod inutilis factus fuit, sicuti dicitur in cit. l. vlt. & tradit Abb. in c. 1. de iniuriis. Adrianus in 4. vbi de restitut. bonorum corporis, §. postquam egi. Veluti si opifex vulneratus est, qui idcirco per temporis interuallum opus suum perficere nequirit, lucrum illi cessans compensari debet. Intelligitur autem lucrum deductis expensis, quas facere oportuisset.

Sed dubitant DD. vtrum deducenda etiam sit æstimatio molestiæ, ac laboris, quem præstando officio, aut opificio subiturus fuisset? Affirmat Maior in 4. d. 15. q. 19. Rebel. p. 1. lib. 3. quæst. 13. Molin. tract. 3. disp. 87. conclus. 1. Alij tamen probabilius negant, ut Socus lib. 4. q. 6. a. 3. circa 3. argum. Couar. 2. resol. c. 10. n. 7. Pet. Nau. l. 4. cap. 1. n. 68. Less. lib. 2. c. 9. dub. 19. Est enim communis DD. sententia, & vulgi persuasio, si alterum iniuste impediueris à labore diurno, lucrum, quod per te ipsi abscedit, integre restituendum, non detracta æstimatione laboris intermissi: tum quia alioquin parum, vel nihil restituendum foret; cum lucrū plerumque labori cōmensuratum sit: tum quia fieri potest, ut ille laborem suum libenter impendisset, neque precio redimere paratus fuisset.

**ASSERTIO II.** Pro cicatricis deformitate, membri, ipsiusque vitæ iactura, secundum se, nulla compensatio faciendæ est, ante Iudicis sententiam. Ita docet Iureconsult. in cit. l. vlt. Gl. in c. 1. de iniuriis, Nau. c. 15. n. 22. Gomez 3. resol. c. 6. n. 12. Pet. Nau. lib. 4. c. 1. n. 80. & seqq. Less. cap. 9. dub. 23. & 25. Valq. in moral. de restit. c. 2. §. 3. dub. 6. Est tamen hæc assertio contra S. Tho. 2. 2. q. 62. a. 2. ad 1. Scotum in 4. d. 15. qu. 3. Hadr. 4. de restit. q. vlt. Sotum lib. 4. de iustit. q. 6. art. 3. Syl. ver. restitut. 3. qu. 2. Azor to. 3. lib. 5. cap. 3. q. 4. Molin. tr. 3. disp. 84. arbitantes, cōpensationem in pecunia faciendam esse. Sed contrā est, quod, ut Iureconsult. ait in l. vlt. & l. 1. §. sed cum homo, ff. de his qui effuderunt, & c. *In homine libero nulla corporis æstimatio fieri potest.* Sensus est, quod vita hominis liberi, membrorumque integritas, & incolumitas alterius generis, altiorisque ordinis sunt, quàm ut in commutationem pro pecunia venire, & quasi venialia fieri possint. Consule, quæ in simili dixi supra p. 2. huius tract. cap. 7. n. 3.

Deinde eadem assertio repugnat Scoto l. c. Gabr. ibid. q. 1. Adriano loco cit. Rebel. p. 1. lib. 3. qu. 14. Molin. tr. 3. disp. 84. n. 11. arbitrantibus, homicidam ex iustitia obligatū esse, ut pro anima defuncti sacrificia, preces, elemosynas Deo offerat. Sed contrā est, quod nemo tenetur damnum resarcire ex bonis diuersi generis, ac ordinis, si in eodem non possit: Quia solum bona eiusdem generis ac ordinis inter se commensurari possunt, secundum proportionem dati & accepti. Sermo enim est de restitutione siue compensatione damni, per iustitiam commutatiuam. Interim nemo negat, quin Iudex in foro externo secundum iustitiam vindicatiuam, multam pecuniariam homicidæ decernere possit, applicandam offenso, eiusque hæredibus. Similiter quoque in foro interno decet Confessarium pro satisfactione sacramentali imponere homicidæ preces, sacrificia, &c. animæ occisi applicanda.

**ASSERTIO III.** Sumptus funebres non veniunt in restitutionem: nisi occasione necis illatæ, v.g. in loco alie-



no, vel extra patriam, maiores fieri oportuerit. Ita ex communi Mol. disp. 83. n. 1. P. Nau. lib. 4. c. 1. n. 73. Azor cit. c. 3. q. 5. Less. dub. 24. contra Nau. c. 15. n. 22.

3 **ASSERTIO IV.** Homicida debet compensare damnū, quod per se provenit liberis, parentibus, uxori, ob conjunctionem, quam gerebant cum persona defuncti, atque inde ortum legale ius petendi ab eo alimentā seu sustentationem: Cuiusmodi ius competit non tantū uxori, ac liberis sed etiam parentibus, si indigeant. Accedit, quod liberi, iisque deficientibus parentes occisi, hæredes necessarij sunt: Quamobrem, si ipsis hæreditas ob iniustæ mortis accelerationem minuat, compensatio illati damni facienda erit, sicuti ex cōmuni docet Abb. c. 1. de iniuriis, Gomez cap. 6. n. 14. Nau. c. 15. n. 24. Mol. tr. 3. disp. 2. & 83. Less. dub. 26. qui rectè id limitant; Nisi percussus percussori omnem restitutionem sponte condonarit: tunc enim hæredes nihil exigere possunt.

**ASSERTIO V.** Damnum, quod familiaribus, vel clientibus per accidens provenit, non videtur esse ex iustitiæ lege ab homicida refarciendum. Ita docet Sotus l. 4. de iust. quæst. 6. a. 3. circa 3. argum. Molin. tr. 3. disp. 83. n. 6. Lopez p. 1. instruct. c. 72. Less. cit. dub. 26. Salon. 2. 2. q. 62. art. 2. controu. 7. contra Pet. Nan. l. 4. c. 1. n. 76. Vasq. in moral. de restit. c. 2. §. 3. dub. 7. Cum enim defunctus ex iustitia nihil debuerit, sed sola liberalitate alimenta præstare decreverit, non fuit ipsis aliquod ius ablatum; sed omnis iniuria tendebat in occisum.

Eademque probabilitate asseritur, non contrahi obligationem cōpensandi damnum alicui tertio, cui per errorem crimen homicidij imputatum fuit: quamvis homicida id præviderit, dummodo per se non intenderit, neque sua aliqua actione, v. g. utendo ense alieno, causam falsæ suspicionis præbuerit, sicuti docet Mol. tr. 3. disp. 86. n. 3. Ratio est, quod evenus ille valde casualis, & per accidens sit, qui proinde homicidæ imputari non debet. Imò Less. dub. 26. putat, etsi homicida expressè intenderat, ut alteri eiusmodi damnum inferretur, si tamen actio illa talis non erat, ex qua ut plurimum effectus sequeretur; non committi peccatum contra iustitiam, cum restituendi obligatione. Sed quod dixi, videtur probabilius: cum actus humani ex intentione speciem accipiant.

4 **ASSERTIO VI.** Creditoribus valde probabile est, illatum damnum ad homicida refarciendum esse. Ita docet Molina tr. 3. disp. 83. n. 8. contra Salonem l. c. controu. 8. Less. dub. 26. & alios. Nā occisus arctiore obligatione iustitiæ tenebatur erga creditores, quā erga parentes, uxorem & filios: cuius rei signū est, quia his alimenta, & hæreditas non præstatur, nisi deducto ære alieno. Ergo si homicida damnū refarcire cogitur, quod uxori, liberis, parentibus occasione iniustæ cædis accidit; multo magis creditoribus, si ob eandem homicidij causam debito suo privati fuerunt, iactura hæc ab homicida compensanda erit, secundum iustitiæ rigorem: Quamvis in praxi id non observatur.

5 **Ad extremum moneo.** Ut homicida ad restitutionem illati damni teneatur, necesse est, eum contra iustitiā deliquisse. Vnde colliges primò, Eum, qui ex condicito in duellum descendit, & vulnus aut mortem alteri infert, ad nullam restitutionem obligari vulnerato, eiusve hæredibus. Ratio est: Quia alter alteri iniuria non afficit: hæc enim non fit volenti ac consentienti, sicuti notavit Mol. tr. 3. disp. 82. Less. dub. 21. Similis ratio videtur de iis, qui ludo periculoso, v. g. hastiludio, congregiuntur: si enim ludi leges seruentur, & aliquis ludentium alterum sine dolo seu formali intentione occidat, non exigitur compensatio, propter pactū remissionis, quod implicite inter ludētes intercedere censetur, sicuti notavit Mol. tr. 3. disp. 37. n. 4. Quod si talis ludus publica auctoritate permissus sit, nulla pœna homicidæ decerni debet: sin autem prohibitus, pœna arbitraria affici poterit.

Colliges secundo: Etsi ille, qui alterum iniuste invadit, illatum damnum refarcire cogatur; non tamen vicissim invasus: quamvis fortè plura vulnera infixerit. Quod limita, nisi moderamen inculpatae tutelæ excesserit, id est, plus contra iniquum aggressorem molitus fuerit, quā ad sui defensionem necessarium erat: Quia cum sufficeret v. g. alapam infligere, brachium amputavit; vel cum sufficeret brachium amputare, omnino occidit. Tunc enim illatum damnū refarcire tenetur: saltem secundum proportionem iniusti excessus, ita ut restitutio damni minuenda sit, sicuti probabiliter opinatur Sotus lib. 4. q. 6. a. 3. ad 3. Syl. verb. restitutio, 3. q. 2. Less. cit. dub. 21. n. 135. Quamvis contraria sententia, integrum damnum restituendum esse, in rigore vera est, quā expressè docet Nau. c. 15. man. n. 27. Vasq. de restit. c. 2. §. 3. dub. 4. Pet. Nau. cit. c. 1. n. 92. Quicunque enim damnum iniuste infert culpā mortali, ad integram restitutionem obligatur: Talis autem excedendo limites iustæ defensionis, damnum amputari brachij iniuste intulit, per culpam, ut ponimus, mortalem: Ergo æquè restituere tenetur, atque si dolosè aggressus fuisset.

Excipe, nisi Iudex in tali casu restitutionem damni condonet, partim in pœnam iniusti aggressoris, vel rixæ auctoris; partim in satisfactionem iniuriæ; quam vulnerans, vel occidens prior acceperat. Imò probabiliter docet Molina cit. disp. 81. n. 10. Eum, qui ob acceptam iniuriam iusto dolore aut ira affectus vulneravit, vel occidit, v. g. maritus deprehensum in adulterio, in cōscientiæ foro posse denegare restitutionem damnorum; donec ad Iudicem causā delatā, cognoscatur, vtrum in pœnam delicti, atque iniuriæ compensationem restitutio ipsi remittenda sit, necne. Idque per modum exceptionis, si debitū exigatur ex eadem causa, ex qua etiam debitori ius agendi competit: secus, si ex diversis causis: ut puta si herus nolit stipendium famulo debitum solvere, quia in domo sua stuprum admisit: audiri non debet, sed solvere cogitur: salvo interim iure postea agendi contra eundem famulum civiliter, aut criminaliter, sicuti ibidem Mol. resolvit.

Tertiò probabiliter colligitur: Eum, qui provocatus ad pugnam accessit, etsi deliquerit vulnerando, ad restitutionem damni non obligari: quia provocans, quantum in se erat, potestatem fecisse censetur inferendi damni. Ita docent Bannes loco suprā cit. Less. cit. dub. 21. assert. 1. Rebel. p. 1. lib. 3. q. 12. Azor tom. 3. lib. 5. c. 3. q. 7. etsi aliter Molina disp. 82.

## C A P. VII.

De irregularitate orta ex homicidio, vel mutilatione, publica auctoritate facta.

## S V M M A R I U M.

- 1 Ad irregularitatem contrahendam, v. g. ob defectum perfectæ lenitatis, non requiritur culpa.
- 2 Necesse tamen est, ut cooperatio ad mortem, vel mutilationem notabilis sit, & non admodum remota.
- 3 Prelati Ecclesiastici absque irregularitatis periculo Remm veluti, incorrigibilem, seculari potestati tradere possunt.
- 4 Si Episcopi, & similes Prelati temporalem etiam iurisdictionem obtinent, leges adversus malefactores condere, Iudices creare, & quos causas criminales committere non prohibentur.
- 5 Quis persona, vel rebus suis, aut suorum, iniuriam passus est, absque irregularitatis periculo, malefactorem Magistratus denunciare, & civiliter contra ipsum agere potest, cum expressa protestatione, quod sanguinis vindictam non intendat.
- 6 Canonis non infingunt notam irregulavitatis propter officium debitum ex lege charitatis, alteriusve virtutis.

**I**n primis observandum est, quod ad irregularitatem ex homicidio, vel mutilatione contrahendam culpa necessariò non requiritur: sed sufficit occidendi, L. iij



vel mutilandi voluntas actualis, aut virtualis; dummodo effectus sequatur, & necessitas non compulerit. Ratio est, quod irregularitas non tam poena sit, quam moralis macula, siue indignitas ad altaris ministerium, ob mansuetudinis defectum, sicut colligitur ex c. suscepimus, de homic. Indecens enim videtur, ut is, qui voluntarie nullaque cogente necessitate, hominis sanguinem fudit, Christi mansuetissimi personam in altari representet, hostiam immaculatam Deo Patri offerens, sicuti notauit Nau. c. 27. n. 218.

ASSERTIO I. Iudex, Assessor, Accusator, Denuntiator, Testis, Tabellio, Quitorquando exprimit confessionem Rei, Qui dicat, scribit, signat, publicat literas pro vindicta sanguinis destinatas, item sententiae Executor, eiusque cooperatores ac Satellitum comitatus, irregularitatem incurrunt ob perfectae lenitatis siue mansuetudinis defectum, qua de re vide c. aliquantos, d. 51. Abb. & DD. in c. sententiam, Ne clerici vel Monachi. S. Anton. 3. p. tit. 28. cap. 2. Henric. lib. 14. c. 12. Auilam p. 7. disp. 5. l. 2. dub. 1. Sa ver. irregularitas ex deformat. licita. Nau. c. 27. n. 212. Adde, irregularem etiam fieri eum, qui criminofum Iudici tradit, si postea iusto supplicio afficiatur, sicuti docet Gl. recepta, iuncto texto, in c. vnum, 23. q. 5. Nau. in c. periculosè d. r. de poenit. ad finem, not. 12.

2 ASSERTIO II. Ut aliquis irregularitatem incurrat, praesertim ex capite defectus perfectae lenitatis, necesse est, ut cooperatio ad mortem, seu mutilationem aliquo modo notabilis sit, & non admodum remota, aut per accidens. Ita DD. in c. tua nos, de homic. Gl. in c. de cetero, eod. tit. Ex quo colligitur primò; Opifices irregulares non esse, qui sui cam aedificant, funes, scalam confecerunt, &c. Sed irregulares fiunt, qui funes ad suspendium deferunt, scalam applicant: hi enim cenentur causa propinqua illi remota.

Colligitur secundò: Si Titio literae missae sint, quibus contineatur, ut malefactorem capi iubeat, easque literas sibi à clerico, vel laico legi iubeat; non videtur lector irregularitatem contrahere, secuta morte malefactoris: cum non sit causa mortis propinqua, & perse; sed valde remota & accidentaria: licet contrarium senserit Abb. in cit. c. sententiam, n. 14.

Colligitur tertio; Irregularem non esse eum, qui impetrat, ne Reus per viam publicam cum suo, & familia maiore dedecore ducatur, sed via breviori, etsi per accidens contingat mortem accelerari. Ita Henric. cit. c. 12. n. 7. Auila l. c. §. octauò.

Colligitur quartò: Meritò Sotum lib. 5. de iust. q. 1. a. 9. §. Hisp. ahabitis, ridere scrupulum alicuius Confessarii, qui Reum ad supplicium comitatus, quod asinum, in quo vehabatur, pupugisset, irregularem se aestimabat, quasi mortem homini accelerasset. Similis ratio est, si Confessarius hortetur Reum, ut in via procedat: nam parum pro nihilo reputatur. Sin verò cooperatio, vel acceleratio mortis notabiliter facta sit, fatentur omnes irregularitatem contrahi. Vide Mol. tr. 3. disp. 74. n. 4.

3 ASSERTIO III. Inquisitores haereticae prauitatis, & Praelati Ecclesiastici, eorumque Officiales irregularitatem non contrahunt, si Reum velut incorrigibilem seculari potestati tradant, posteaquam officio suo in proprio tribunali functi fuerunt. Ratio est: Quia ipsi mortis sententiam nec pronuntiant, nec exequuntur; sed seculari potestati id munus relinquunt: ad quod exequendum ipsos etiam generatim adhortari possunt, absque irregularitatis periculo, sicuti docet Medina in som. lib. 1. cap. 11. §. 10. Henric. lib. 14. cap. 12. n. 5. in comment. lit. O. Auila l. c. §. 2. dub. 2. licet aliter Couar. p. 2. Clement. §. 5. n. 6.

4 Pari ratione Episcopi, & Praelati, qui temporalem etiam iurisdictionem obtinent, etsi propria praesentia au-

thoritatem sententiae sanguinis praestare non debeant; sicuti constat ex c. literis, de excess. Praelat. alioquin irregularitatem incurrunt, sicuti notat ibi Gl. ver. corporalem, & Abb. n. 2. Nihilominus possunt leges poenales contra malefactores ferre, Iudices creare, causarum criminalium cognitionem, etiam in particulari, committere, adiecto mandato, ut iuris ordo seruetur, secundum leges iudicetur. Ita habetur in c. vlt. Ne Clerici vel Monachi, in 6. & docet Gl. in c. literis, ver. nec iudicent. ibid. Abb. n. 12. Ne Clerici vel Monachi, Syl. ver. homic. 3. q. 7. S. Ant. p. 3. tit. 28. c. 2. ante §. 1. Caiet. 2. 2. q. 33. a. 7. Cou. cit. §. 5. n. 8. Mol. tr. 3. disp. 8. n. 2. Auila l. 2. dub. 4. qui bene admonent contra Henric. lib. 14. c. 12. n. 6. lit. N. talem commissionem fieri posse etiam in causa particulari. Sed definitè iubere, seu demandare absque nota irregularitatis non possunt, ut Reus iste mortis, aut mutilationis poena afficiatur, sicuti notat Nau. lib. 5. conf. 16. de homic. edit. 2. Possunt tamen, ut arbitror, sine nota irregularitatis, latam à Iudice sententiam moderari: ut videlicet dicant; Si omnino Reus, propter latam sententiam, morte afficiendus est, non rota, vel igne puniatur, sed poena mitiore. Quia hoc modo non causa mortis aut supplicij existunt, sed potius ut pars supplicij dematur, qui misericordiae non severitatis actus est.

ASSERTIO IV. Si Clericus, vel Iurisperitus etiam in particulari de aliquo Reo interrogatus, utrum liceat, vel deceat eum denuntiare, condemnare, ius generatim explicuit, ac edocuit, nihil in particulari suadendo. vel iubendo, irregularitatem non incurrit: etsi prauidetur, mortis supplicium secuturum: quippe ad quod ille directè non mouit, sed solam rei veritatem aperuit, qua cognita, alter seipsum ad id, quod iustum est, permouit. Ita docet Gl. c. ex literis, ver. consuluit, de excess. Praelat. Mol. tr. 3. disp. 74. cōtra Syl. ver. homic. 1. q. 8. Henric. c. 16. n. 4. Auila dub. 6. qui aiunt, si in particulari immineat periculum hominis deformandi, non posse Clericum de iure consultum, etiam generalem responsionem dare.

Insuper rectè ibidem fatentur Mol. Auila, & Henric. quod & docet Suar. n. 8. Confessario plus etiam permittum esse, videl. ut absolutionis beneficium Iudici deneget, nisi officio satisfacere, ac Reum Reipub. noxium morti adiudicare proponat. Item hortari Reum, ut in iudicio fateatur crimen morte dignum, cum iuridicè interrogatus ad confitendum obligatur, teste Auila dub. 7. Henric. c. 16. n. 4. lit. B. Neque enim credibile est, voluisse Ecclesiam irregularitatis obicem ponere, quominus Iurisperiti, & Confessarii scientia ac munere suo salubriter fungi possent.

ASSERTIO V. Qui vel in persona, vel rebus suis, aut suorum, aut etiam Ecclesiae suae, iniuriam passus est, absque irregularitatis periculo malefactorē Magistratui denuntiare, eundem à se in custodia detentū tradere, atque actionem civilem instituire iure potest, dummodo expressè protestetur, se sanguinis vindictam non postulare: quamuis interim ex qualitate criminis intelligat, fore, ut Iudex ex officio moueatur ad mortis supplicium inferendum. Sumitur ex c. 2. de homic. in 6. & docet Couar. in Clem. p. 2. §. 5. Nau. c. 27. n. 213. Caiet. 2. 2. q. 33. a. 7. Sotus l. 5. de iust. q. 5. a. 1. in fine, Mol. tr. 3. disp. 8. n. 3. Auila p. 7. disp. 5. dub. 9. Suar. to. 5. disp. 47. l. 2. Ratio huius canonicae constitutionis redditur in cit. c. 2. Nā alioquin, si Praelati, aut Clerici propter metū huiusmodi, quia Iudex ad poenā sanguinis posset procedere, de suis malefactoribus taliter conqueri non auderēt, daretur plerisque materia trucidandi eosdē, et eorū bona liberè depradandi. Ex quo etiā sequitur, sicut Ecclesiasticus, sine irregularitatis nota, malefactorem Magistratui cum tali protestatione denuntiare potest: ita etiā posse ad eum finē capere, detinere, & Iudici tradere: quia cui finis permittitur, etiā media ad eū necessaria permittitur, sicuti notauit Couar.



inclem. p. 2. §. 5. n. 3. Mol. tr. 3. disp. 74. n. 11.

Sunt autem diligenter observanda verba, quibus in assertione usus sum: Primò, *In persona, vel rebus suis, aut suorum*, videlicet domesticorum, aut ita coniunctorum, ut iniuria per consequentiam in ipsum consequentem redundare censeatur, iuxta ea quæ dixi hoc tract. p. 2. c. 6. n. 5. & videri potest Mol. tract. 3. disp. 44. n. 11. Verùm, si aliquis in foro seculari denuntiet, vel accuset de iniuria, aut damno alieno, quamvis protestetur, se criminalem vindictam non intendere, irregularitatem tamen incurrit, si mortis, vel mutilationis supplicium, criminis enormitate ita exigente, Iudex inflixerit, sicuti ex communi docet Nau. c. 27. n. 217. §. duodecimo, Cou. n. 4. Auila dub. 11. concl. 2. Mol. n. 8. Suar. n. 11. Ratio est, quia canones speciatim succurrere illis voluerunt, qui iniuriam ad se attinentem iudicio prosequuntur, ut nihil ipsis obesset, etsi ea re occasionem Iudici præbeant mortis, vel mutilationis sententiam decernendi: qualem indulgentiam non concesserunt in causa aliena.

Exinde colligitur cum Couar. cit. p. 2. §. 5. n. 5. Henr. lib. 14. c. 12. n. 9. Mol. tract. 3. disp. 74. n. 10. Suar. disput. 47. §. 3. in fine, Claro lib. 5. sent. §. ult. q. 24. n. 8. Advocatum, ac Testes in causa criminali nihil per protestationem adiuvari, si ex eorum allegationibus Iudex ad pœnam sanguinis Reo inferendam motus fuerit. Ratio est, quia Advocatus, ac Testis non propriam, sed alienam causam prosequuntur. Quæ etiam est, cur Clerici ordinariè compelli non possint ad ferendum testimonium in causa criminali, sicuti ex communi docent Abb. in c. sententiam. n. 13. Ne Clerici vel Monachi, Sot. l. 5. q. 7. a. 1. in fine, Auila dub. 13. Mascard. vol. 3. probat. concl. 1357. n. 62. Quòd id per canones ipsis prohibitum sit, arg. cit. c. sententiam, &c. his à quibus, 23. q. 8.

Secundò dixi, *Qui iniuriam passus est*: Nam si agatur de iniuria inferenda, aut crimine pernicioso pendente in futurum, quod alia ratione emendari non possit, quàm per iudicalem processum; tunc non solum ad cauendum vel auerendum malum proprium, sed etiam alienum Reipub. aut privatae personæ, malefactorem accusare, aut de crimine testificari cuius sine irregularitatis periculo concessum est, sicuti docet Caiet. cit. art. 7. Suarez cit. disput. 47. §. 2. n. 11. Henr. cap. 12. n. 8. Sotus de secr. mem. 2. q. 4. concl. 2. in fine. Ratio est, quia Canones nunquam infligunt irregularitatis notam propter officium debitum ex lege naturali, vel diuino charitatis, alteriusque virtutis. Atqui accusare malefactorem, si ita necesse sit ad defendendum, vel liberandum Rempub. aut innocentem ab impendente graui periculo, opus charitatis est. Ergo, &c.

Quapropter neque hoc casu protestatione aliqua opus erit: quandoquidem opus suapte natura ab irregularitate exemptum est, sicuti rectè docet Mol. to. 1. tr. 2. disp. 109. post. 3. concl. & tr. 3. disp. 8. n. 9. Auila dub. 11. concl. 3. Vide etiam Sa ver. irregularitas ex deformat. licita, n. 4. ubi pari ratione colligit, irregularem non esse, qui infantem ob necessitatem frigidà baptizat, etsi contingat idcirco citius mori: Neque eum, qui causa liberandi bona proximi è manibus furum, clamorem tollit, etsi contingat idcirco fures capi, & à Iudice puniri: Neque eum, qui contra proximi iniustum aggressorem clamorem tollit, etsi hac occasione mors aggressoris sequatur. Quia talis defensio proximi est de iure nature, quod lege positua impediri non debet.

Sed quid si aliquis clamorem tollat, ut fur seu raptor bonorum capiatur, & postea occidatur? Respondeo: Vel agitur de conseruatione, aut recuperatione rerum propriarum, vel alienarum: Si primum, iterum distinguere: Vel enim fur deprehensus, postea Iudici trade-

tur, & occidetur. hoc casu non est periculum irregularitatis: cum ipsemet etiam læsus furem capere, & Iudici tradere potuisset, præmissa potestatione. Vel fur à circumstantibus occiditur; idque periculum præuiderat clamans, licet non ea intentione clamaret, sed ut res suas recuperaret. hoc casu communiter docent Doctores contrahi irregularitatem, Innoc. & Abb. in c. significasti, 2. de homic. Nauar. c. 27. n. 236. Syl. ver. homicidium, 3. q. 7. Suarez disp. 47. §. 2. n. 21. De qua tamen doctrina dubitat Couar. p. 2. Clem. §. 5. n. 3. & Auila p. 7. disput. 5. §. 2. dub. 5. magis inclinatur, in tali casu non contrahi irregularitatem: quòd & mihi placet. Non enim hoc casu incurritur irregularitas tanquam ex homicidio casuali culpabili: cum homo ille clamando, & homines aduocando ad res suas liberandas, nihil peccaret: Neque incurritur irregularitas tanquam ex homicidio inculpato quidem, sed commisso cum mansuetudinis defectu: Cum enim fur à concurrentibus occisus sit, præter, imò contra clamantis intentionem; utpote qui solum res suas recuperare voluit, non est illi occisio tanquam morali causæ adscribenda.

Exinde etiam intelligitur decisio alterius membri, si nimirum agatur de conseruatione rerum alienarum, præsertim non modici momenti, probabiliter dici posse; Clamantem non fieri irregularem, etsi postea contingat furem à circumstantibus occidi, vel Iudici tradi, & supplicio extremo affici, quæ videtur etiam sententia Sa cit. n. 4. Ratio est, tum quia talis homo opus charitatis erga proximum exercuit; ergo non debet idcirco irregularitatis notam contrahere: tum quia, ut ponimus, non ea intentione clamauit, ut fur occideretur, neque ad id vllò modo cooperatus est; sed solum impedire voluit damnum proximi.

Tertiò dixi, *actionem civilem institui posse*, vel ad compensationem illati damni, vel ad pœnam pecuniariam applicandam actori. Nam actionem criminalem de delicto, quod mortem, vel mutilationem mereatur, à Clerico sine peccato, & periculo irregularitatis institui non posse, communis est Doctorum sententia, teste Suar. n. 10. Auila dub. 10. Esto accusator protestetur, cupere se criminis vindictam, citra mortis tamen, vel mutilationis seueritatem. Cum enim Iudex ab Actore postulatus, secundum leges iudicare soleat, ac debeat; consequens est, quòd protestatio illa Actoris accusantis de crimine, morte, vel mutilatione digno, facto contraria sit, adeoque inutilis.

Aliter verò sentiendum, si crimen non esset morte dignum; tunc enim accusare potest, etiam non præmissa protestatione, sicut Mol. notauit, tract. 3. disput. 8. n. 5. Sed etsi in tali casu Iudex vel propria scuitia, ignorantia; vel ob aliam accidentariam causam, moueretur ad mortis, vel mutilationis sententiam Reo inferendam, id tamen accusatori imputari non posset, sicuti idem Mol. docet & Couar. p. 2. §. 5. n. 3. Nau. n. 214. Henr. cap. 12. n. 8. Auila dub. 9. §. secundò notandum, arg. c. postulasti, de homic. & indicat Gl. in c. 2. de homic. in 6.

Quartò dixi, *dummodo expressè protestetur*, &c. Ita enim requiritur in cit. cap. 2. de homic. in 6. Ratio est: Qui enim denuntiat, vel accusat (etiam civiliter) de crimine, quod scit dignum morte, vel mutilatione, is indirecta voluntate censetur esse causa mortis, vel mutilationis; quippe ad quam decernendam Iudex ratione officij sui ut plurimum moueri solet, occasione eiusmodi denuntiationis, vel accusationis. Verùm talis indirecta voluntas, secundum canonum constitutionem, retractari censetur per protestationem illam, eo saltem casu,



quo quis suam, vel suorum iniuriam prosequitur.

Ex quo rectè colligunt Couar. cit. c. 5. n. 2. Henric. c. 11. in fine, Auila dub. 9. contra Nau. n. 226. Syl. ver. homic. 2. q. 8. Quamuis potestatio ficta sit, & accusator animo intendat, vt malefactor per Iudicis officium morte puniatur; nihilominus irregularitatem euitari. Contrà verò aiunt Couar. & Auila ll. cc. irregularitatem incurri, si quis protestationem intermittat, quamuis interiore animo cupiat mortem, vel mutilationem accusato non inferri. Ratio esse videtur, quia accusans de crimine, quod scit esse dignum morte, & ob id Iudicem ex officio motum iri ad mortis pœnam infligendam, is irregularitatem incurrit, siue mortis sententiam directè intendat, siue non; præterquam si peccationes excipiantur: Canones autem excipiunt eum tantum casum, si quis suam, vel suorum iniuriam citili accusatione prosequitur, præmissa potestatione externa, quod sanguinis pœnam non flagitet.

## CAP. VIII.

## De irregularitate ex homicidio contingente in bello offensiuo.

## S V M M A R I V M.

- 1 Qui in bello offensiuo propria manu occidit, vel mutilat, irregularis efficitur.
- 2 Qui bello iusto interfuit, opemque adferunt, si neminem propria manu occiderunt, vel occidunt, irregularitatem non contrahunt. Secus est in bello iniusto, in quo ob unius hominis occisionem, vel mutilationem, omnes, qui auxilium attulerunt, irregulares efficiuntur.

**A**ssertio I. Quicumque in bello offensiuo hominem propriis manibus mutilant, vel occidunt, irregulares efficiuntur. Est omnium DD. sententia, & habetur in c. si quis, d. 51. Sed discrimen hoc aduerte, quod qui in bello iusto hominem mutilat, vel occidit, irregularis fit ex defectu perfectæ lenitatis, sine peccato, si laicus sit. Qui verò in bello iniusto; is alterius generis irregularitatem contrahit, quæ est ex iniusta deformatione, de qua infra cap. 10.

**A**ssertio II. Qui in bello iusto sua præsentia pugnantibus animum addiderunt, aliudve auxilium præstiterunt, si neminem propria manu occiderunt, vel mutilarunt, licet vulnerarint; irregularitatem non incurunt. Ita habetur in c. petitio, de homic. Et debet id censerī speciale noui iuris privilegium, ideo concessum, ne homines metu irregularitatis à bellando absterreantur, sicuti notauit Mol. t. 1. tract. 2. disput. 110. & tract. 3. disp. 73. Auila p. 7. disp. 6. f. 3. dub. 2. & colligitur ex cit. c. si quis, d. 51.

**A**ssertio III. Qui in bello iniusto quaecunque auxilium attulerunt, secuta vel vnus hominis occisione, aut mutilatione, irregularitatem omnes contrahunt. Ita sumitur ex c. sicut dignum, §. vlt. de homicid. & c. quod in dubiis, de pœnis, iunct. Gloss. & ex communi docet Syl. ver. bellum, 3. q. 3. Nauat. c. 27. n. 216. 234. Couar. cit. Clem. p. 2. §. 3. n. 2. Ratio est: Quia cum plures coniuncto consilio, vel auxilio concurrunt ad homicidium, aliudve delictum vel damnum, censentur veluti vna causa moralis, sicuti notant DD. in c. significasti, 2. de homic. Syl. eod. ver. 1.

## CAP. IX.

## De irregularitate ex homicidio ob defensionem.

## S V M M A R I V M.

- 1 Qui ob necessariam corporis sui defensionem occidit, vel mutilat hominem, irregularis non fit.
- 2 Qui ob necessariam Reipubl. vel hominis innocentis defensionem ex obligatione charitatis pugnant, irregularitatem non contrahunt.
- 3 Qui iniquum aggressorem ob famam, aut bonorum defensionem mutilat, vel occidit, irregularis efficitur, propter mansuetudinis defectum.

**A**ssertio I. Qui ob necessariam vitæ, vel corporis sui defensionem hominem mutilat, vel occidit, irregularis non efficitur. Ita habetur in Clem. vn. de homicid. Si furiosus, aut infans, seu dormiens hominem mutilet, vel occidat, nullam ex hoc irregularitatem incurrit. Et idem de illo censemus, qui mortem aliter vitare non valens, suum occidit, vel mutilat inuasorem.

**A**ssertio II. Neque Clericus, neque laicus irregularitatem contrahit, si iniustum Reipubl. vel hominis innocentis inuasorem mutilet, vel occidat, cum ex lege naturali & diuina ad eum modi necessariam defensionem obligatus est. Ita docet Syl. ver. bellum, 3. q. 2. §. adde tu, Couar. p. 3. Clem. §. vn. n. 5. Mol. t. 1. tract. 2. disp. 109. Auila disp. 5. sect. 3. dub. 5. contra Caiet. 2. 2. q. 40. a. 2. Nau. c. 15. n. 2. & c. 27. n. 213. Probatum primò: Irregularitas non incurritur nisi ex homicidio spontaneo: hoc autem, de quo loquimur, non omnino sponte, sed cogente legis necessitate patratum est. Secundò: Irregularitas ex homicidio licito contrahitur propter defectum perfectæ lenitatis seu mansuetudinis: Vbi autem charitas, pietas, vel iustitia per se & simpliciter obligat ad occidendum aggressorem Reipubl. aut hominis innocentis, non potest dici defectus mansuetudinis: ne vnā virtutem cum altera pugnantem fateri cogamur. Dixi autem per se & simpliciter: Quia Iudicem, Carnificem obligat quidem lex iustitiæ ad inferendam mortem noxiis; sed ex hypothesi muneris ab ipsis sponte ac voluntariè assumpti: ideoque hi irregularitatem contrahunt. Tertiò: Non est credibile, mentem Ecclesiæ esse, vt irregularitatis macula homini inferatur, propterea quod legem naturalem seruauit, propriam animam morte spiritali liberauit. Quid enim id aliud esset, quàm auocare homines ab obseruatione præceptorum Dei?

**C**orollarium. Qui in bello merè defensiuo ad liberandam patriam, Ecclesiam à violentia aggressorum ex obligatione charitatis, aut pietatis pugnantes, hostem merè defensionis causa, mutilant, vel occidunt, irregularitatem effugere videntur. Neque obstat c. petitio, de homic. vbi Clericus irregularis iudicatur, si in bello contra inimicos Fidei Catholicæ aliquā interfecit. Nam Clericos, præsertim qui in maioribus ordinibus sunt, plerumq; non conuenit in publico bello defensiuo propria manu pugnare; quia per alios, videl. laicos, vis & iniuria depelli potest, ait Abb. ibid. & docet Syl. ver. homicid. 3. q. 6. secus verò dicendum, si in aliquo casu inuitabilis necessitas sit: quia aliter Ecclesia, vel patria ab iniquis inuasorib. liberari nequeat, sicuti ex communi notauit Abb. l. c. Syl. ver. bellum, 3. q. 2.

**A**ssertio III. Qui iniquum aggressorem mutilat, vel occidit ob defensionem famæ, aut honoris: quia v. g. fugere indecorum esse videtur: Item, qui ob reum defensionem furem interficit, aut deformat, irregularitatem contrahit. Prior pars colligitur ex sensu con-



trario Clem. si furiosus, *Qui mortem aliter vitare non valens, &c.* Ergo si mortem fuga declinare possit, irregularis efficitur, sicuti notat Gl. ibid. Abb. c. olim. 1. de restit. spoliat. n. 18. Syl. ver. excom. 6. q. 9. Nau. lib. 5. conf. 7. n. 4. de homic. edit. 2. Auila disput. 5. l. 3. dub. 2. post. 3. concl. contra Couar. in Clem. p. 3. §. vn. n. 1. & 4. in fin. P. Nau. l. 2. c. 3. n. 418. Suar. disp. 46. l. 1. n. 4. Ratio est, quia ad irregularitatem ex defectu perfectæ lenitatis non requiritur culpa; sed satis est, si sponte ac voluntariè aliquis accesserit ad hominis mutilationem, vel occisionem; cum Christianæ charitati, patientiæ, ac mansuetudini ad Christi imitationem magis conformē esset iniuriam sustinere: excepto casu, si agatur de defensione vitæ. hunc enim canones exceperunt: quod tantò minor in ea cernatur mansuetudinis defectus, quantò maior, & naturæ conformior vitæ defendendæ necessitas.

Qua eadem etiam ratione probari debet altera assertio pars; eamque probationem indicat c. suscepimus, de homic. ibi; *Quoniam expediebat potius post tunicam relinquere pallium, & rerum sustinere iacturam; quam pro conservandis vilibus extraneis rebus tam acriter in alios exardescere.* Et Gl. in c. 2. eod. tit. ait: *Irregularis factus est, quia potius debuit dimittere sua, quam interficere.* Confirmatur: Si alterum ob rerum suarum iustam defensionem occidens irregularitatem non incurrit, sequitur, quod neque ii incurrant, qui vim passum pugnando adiuvant: consequenter dicendum erit, milites, si voluntariè & sine inevitabili obligatione seu necessitate se conferant ad militandum alicui domino in bello defensiuo iusto, irregulares non fieri propria manu occidentes cuius contrarium docetur communiter in c. petitio, de homic.

Quare hanc nostram sententiam tenent Abb. & alij Canonistæ in c. 2. de homic. S. Anton. 3. p. tit. 4. c. 3. §. 2. Armilla ver. irregularitas n. 41. Syl. ver. homic. 2. q. 16. Nau. c. 27. n. 211. 213. & c. 15. n. 4. (ubi addit, id ipsum observare stylum Curie Romanæ, qui ius facit, iuxta c. quàm gravi, de crimine falsi, c. ex literis, de Constit.) Gutierrez lib. 2. canon. qq. c. 6. n. 61. Mol. tr. 3. disput. 72. Henriq. c. 11. n. 3. lit. B. Auila disp. 5. l. 3. dub. 4. alijque Doctores communiter, contra Cour. cit. §. vn. n. 6. in fin. Castro lib. 2. de lege pœnali, c. 14. Suar. disp. 46. l. 2. Pet. Nau. cit. n. 418. Quorum tamen sententia saltem eo casu defendi debet, si famæ, honoris, bonorumve defensio alicui necessaria sit ad vitam suam, vel suorum, vel aliud eximium bonum consequendum; ut vel inevitabilis necessitas appareat, vel consilij, maiorisque virtutis opus esse videatur, occidere, quàm iacturam pati: Ne fateri cogamur, canonica sanctione Clericos à virtutis opere impediri.

## CAP. X.

## De irregularitate ex homicidio voluntario, &amp; casuali.

## S V M M A R I U M.

- 1 Ob homicidium merè fortuitum non incurritur irregularitas: sicut aliquis operam dedit rei licitæ, sine illicita.
- 2 Adulter irregularis efficitur, si occasione adulterij homicidium secutum est: modo ille tale periculum prauiderit.
- 3 Clericus in sacris irregularis efficitur, si exercendo artem chirurgicam, per incisionem, vel aduersionem, quamvis omni adhibita diligentia, hominem occidat, vel mutilet.
- 4 Ad contrahendam irregularitatem ex homicidio induci est voluntario, requiritur culpa mortalis, si qui operam dederat rei licitæ: si vero rei illicitæ, sufficere videtur culpa venialis.
- 5 Si vulneratus vulnere non lethali, tamen mortuus est ob chirurgi perniciam, aut imperitiam, iniquè vulnerans irregularis efficitur.

**R**epetenda sunt ea, quæ suprâ dixi cap. 4. Homicidium vel casu fieri, vel voluntate: Item vel voluntate directâ, vel indirectâ. Quibus addendum, actionem, ob quam homicidium alicui indirectè imputatur, interdum secundum se ac præcisè spectatam, esse honestam; ac licitam: interdum verò illicitam.

Assertio I. Ob homicidium merè casuale ac fortuitum non incurritur irregularitas. Sumitur ex c. lator, c. ex literis, 1. & 2. c. significasti, 1. c. exhibita, de homic. Neq; referre videtur, utrū aliquis dederit operam rei licitæ, an illicitæ: cum etiam comparatione illicitè operantis homicidium fortuitum esse possit, si de tali euentu vel nunquam in mentem venit cogitare, vel, etsi cogitauerit, tamen morali certitudine sibi persuasit, procul abesse periculum, sicuti docent Arrag. 2. 2. q. 64. art. 8. dub. 2. Cordub. lib. 2. questionarij q. 26. Sot. lib. 5. q. 1. a. 9. Auila p. 7. disp. 6. l. 1. dub. 1. Sairus lib. 7. thesauri. c. 5. n. 13. Gutierrez lib. 2. canon. qq. c. 6. n. 156. vbi ait: Non satis esse ad incurrendam irregularitatem, quod opus, ex quo homicidium sequitur, culpabile sit, nisi è iam dirigatur in homicidium, arg. c. quantum, d. 50. Quamvis contrarium sentiant multi Canonistæ, Couar. p. 2. Clem. §. 4. n. 1. & 10. Syl. ver. homicid. 2. reg. 3. quin & S. Tho. 2. 2. q. 64. a. 8. ad 3. Caiet. ibid. arg. c. continebatur, c. dilectus, c. Ioannes, & c. ult. de homic. Quibus tamen iuribus solum habetur, quod is, qui dando operam rei licitæ casuale homicidium fecit, irregularitatem non contrahat: Ex quo per sensum contrarium inferri non potest, quod dans operam rei illicitæ, si hominem casu occidat, irregularis fiat. Cum enim irregularitas non incurratur nisi in casibus iurè expressis, ideo non valet argumentum à sensu contrario ad statuendam irregularitatem. Accedit, in citatis iuribus causam præcipuam afferri, cur operans irregularitatem incurrisse censendus non sit, quia per nullam eius negligentiam, sed merò casu homicidium euenerit: id enim facilius ac manifestius præsumi poterat, si operans rei alioquin licitæ vacabat: quare talis circumstantia, quod rei licitæ opera data fuerat, ad remouendum omne dubium non inutiliter adiecta fuit.

Exinde dubiū resolui potest: Utrū adulter irregularis sit, qui maritū aggressorem necessariæ defensionis causamutilauit, vel occidit? Affirmat S. Anton. p. 3. tit. 5. c. 8 §. 1. Nau. c. 27. n. 238. man. & l. 5. confil. 33. de homic. edit. 2. Gutierrez l. 2. c. 6. n. 43. Mol. tr. 3. disp. 72. n. 5. Negant vniuersim Sotus l. 5. q. 1. a. 9. Henriq. l. 14. c. 10. n. 3. in fine, Auila disp. 3. sect. 5. dub. 3. conclus. 1. Less. l. 2. c. 9. n. 105. Mihi placet distinctio Suarezij disp. 46. sect. 1. n. 12. Si adulter temere, & non sine periculo excitandæ rixæ, ad peccandum cum aliena vxore accessit, irregularē effici: quia indirectè causam præbuit secuti homicidij propter vitæ defensionem. Quemadmodum, si aliquem indignis cōtumeliis laceffens, prouideas fore, ut te gladio inuadat: postea verò eum intraforem, cui defendendi gratia, occidas, irregularis fies: potuisses enim vitare necem, tacendo, & ab iniuria abstinendo; non minùs quàm inuasus à latrone clamando, vel fugiendo: quo casu plerique fatentur, nisi quis clamet, aut fugiat, irregularitatem contrahi, secuta occisione latronis.

Simile dubiū est: Utrū adulter irregularis fiat, si maritus, cognito adulterio, vxorē interficiat? Affirmat Nau. l. c. ex responsione Pij V. Gutierrez l. c. n. 41. Negat vniuersim Castro lib. 2. de lege pœnali, c. 14. Couar. p. 2. Clem. §. 4. n. 9. Auila l. c. conclus. 2. P. Nau. l. 2. c. 3. n. 365. Mihi placet persistere in dist. Suar. quam tradit disp. 45. sect. 6. n. 5. Ut attendatur, num. adulter temere se ingerendo, exposuit adulteram mortis periculo: an verò præter omnem opinionem maritus facinus intellaxerit, & de adultera indignam pœnam sumpserit. Neque obstat, quod Sotus, & Auila obij-



ciunt; Maritum contrarius occidisse vxorem: quare ipsi homicidium tanquam causæ, non adulteræ adscribendum esse. Respondeo enim, ad irregularitatem sæpe sufficere occasionem præbuisse homicidio per alterum iniquè illato; quamuis præter, aut contra directam intentionem eius, qui occasionem præbuit. Veluti si scias, in aliqua silua paratos esse latrones ad occidendos transeuntes, & nihilominus alicui suadeas, vt ingrediatur: Aut si Titium detractione concites aduersus Caium, cum provideas subesse periculum, ne eum occidat: Vel si iubeas aliquem verberari, prohibens ne mutilet, vel occidat; ille verò mandati fines egressus mutilarit, vel occiderit, irregularis fiet, iuxta decisionem c. ult. de homic. in 6. vbi ratio additur: *Cum mandando in culpa fuerit, et hoc euenire posse debuerit cogitare.*

**Assertio II.** Vnicus casus est, quo Clericus irregularis fit secuto homicidio præter intentionem, etsi omnem diligentiam adhibuerit, ne sequeretur: si videlicet opus ea ratione illi illicitum ac prohibitum sit, quod cum homicidij periculo coniunctum esse soleat: quæ ratione Monachis, & quibuscunque Clericis in sacro ordine constitutis specialiter prohibitum est exercitium artis chirurgicæ per incisionem, vel adustionem, iuxta c. sententiam, Ne Clerici, vel Monachi, &c. tuos, de homic. vbi id docet Glos. & Abb. ibid. Couar. cit. §. 4. n. 9. Mol. tract. 3. disp. 75. n. 2. Auila disp. 6. sect. 1. dub. 2. Quia, vt dicitur in reg. 19. in 6. *Non est sine culpa, qui rei, quæ ad eum non pertinet, se miscet.* Excipitur tamen casus necessitatis, in quo ipsum ius naturale id exigat: vt si Chirurgus alius præter Clericum non adsit, qui curationem homini periclitanti adhibeat, sicut docet Mol. tract. 3. disp. 8. n. 11. & fassus in cit. disp. 75. vbi etiam admonet, dictam prohibitionem artis chirurgicæ cum periculo irregularitatis incurrendæ, si mors, vel mutilatio, quamuis sine peccato aduersus quintum præceptum Decalogi, sequatur; extendendam non esse ad Clericos in minoribus ordinibus, licet beneficiati sint: cum canones de iis non exprimant. Interim fatendum, quod Monachis seu Religiosis, ac Clericis omnibus, qui in sacris constituti, vel beneficiati sunt, studium & exercitium artis medicæ ac chirurgicæ prohibitum sit, tanquam alienum ab eorum professione; nisi necessitas, vel pietas excuset. quæ de re Nau. c. 25. num. 110. Sanchez l. 6. moral. c. 14. n. 18. Videri etiam potest compend. privilegiar. Societatis Iesu, ver. Medici.

Sed nunquid similiter sentiendum de Clerico venatore aprorum, cervorum, &c. si omni adhibita diligentia, hominis carnes sequatur? Ita affirmant Caiet. 2. 2. q. 64. a. 8. Nau. c. 27. num. 237. Mol. tract. 3. disput. 77. §. Clerici, Angelus ver. homicidium, 2. §. 13. Sed contrarium est probabilius, quod docet Couar. cit. §. 4. num. 10. ver. quarto, Suar. cit. sect. 6. n. 14. Auila cit. sect. 1. dub. 1. Castro cit. c. 14. Henr. q. c. 15. num. 3. Quia perraro cum venatione coniuncta est hominis occisio: quare neque ob tale periculum; sed ob statum honestatem, Ecclesiasticis personis venatio cum clamore & armis prohibita est.

**Assertio III.** Quicumque iniusti homicidij voluntaria causa existit, directè, vel indirectè, irregularitas tamen contrahitur. Est communis Doctorum sententia, quæ colligitur ex c. sicut dignum, de homic. & aliis iuribus. Et quidem de homicidio directè voluntario siue ex proposito nulla est dubitatio. De homicidio verò non dolo, sed indirectè tantum voluntario, atque culpabili dubium est, quanta culpa ad contrahendam irregularitatem requiratur? Multi venialem culpam sufficere arbitrantur, inter quos Caietan. ver. irregularitas, Armilla eodem num. 14. Molin. tract. 3. disput. 77. neque dissentit Glos. in cap. significasti, 1. de homicid. Abb. cap. quæsitum, de pœnit. Couarr. cit. §. 4. num. 9. Alij autem culpam mortalem requirunt, Sotus lib. 5. de iustit.

quæst. 1. a. 9. Pet. Nau. lib. 2. de restit. c. 1. num. 69. Auila disp. 6. sect. 1. dub. 11. conclus. 3. Henr. q. lib. 14. c. 15. n. 7. in fine.

Arbitror dicendum primò: Si operam quis dedit rei per se honestæ, ac licitæ; sed debitam non adhibuit diligentiam, ne mors accideret: necesse est latam siue mortalem culpam interuenire, vt irregularitas contrahatur. Exempla habes: I. in Iudice Reum torquente, ac præter intentionem directam mutilante, vel occidente, contra l. quæstionis modum, ff. de quæstionibus Reorum, & docet Gomez 3. resol. cap. 13. n. 5. Auila disp. 6. sect. 1. dub. 4.

II. In Iudice, vel custode, Reum ad carcerem damnatum victus tenuitate ita premente, ad audientes vt fame conficiatur, licet præter intentionem illius, sicut docet Abbas cap. cum non ab homine, num. 33. de iudic. Nau. lib. 5. consil. 11. §. sexto, de homic. & consil. vn. de pœnis, edit. 2.

III. In Magistro disciplinæ causâ puerum castigante: sed, moderatione non adhibita, causam mortis, vel mutilationis adferente, contra l. præceptoris, ff. ad l. Aquil. de hoc casu agitur in cap. Presbyterum, in e. audientiam, de homic. Vide Nauar. c. 27. num. 235. Couar. p. 2. §. 4. num. 5. Henr. q. cit. lib. 14. n. 4. in fine, Auila dub. 3. vbi rectè hi aiunt, irregularem fieri, si modum nimis excessit: aliàs non.

IV. In Medico, vel Chirurgo sanare volente, sed interficiente, per imperitiam, vel negligentiam latam, sicuti notat Glos. in c. ad aures, de ætat. & qualitat. ordinandorum, ver. remordeat.

V. In infirmario, qui irregularitatem non incurrit, si dum infirmum charitatis causâ in lecto mouet, vt cibum ministret, vel vt quietius cubet, mortem paululum accelerasse videatur: præterquam si culpa lata interuenit, sicuti docet Syl. ver. homicidium, 2. q. 15. Sotus lib. 5. de iust. q. 1. a. 9. Caiet. 2. 2. q. 64. a. 8. Nauar. c. 27. num. 218. Auila p. 7. disp. 6. sect. 1. dub. 8. Henr. q. cap. 15. n. 5. Mol. tract. 3. disp. 75. num. 3.

VI. In patre, paupertatis causâ prolem in lecto suo collocante, & opprimente, qui casus est in c. quæsitum, de pœnit. & remiss. & videri potest Caiet. 2. 2. quæst. 64. a. 8. circa medium.

VII. In patre familias ferocem canem alente, & incautè ligante. Quæ de re Syl. verbo homicidium, 2. q. 24. Nau. c. 27. num. 227. Auila dub. 7.

Dicendum secundò: Si quis, æm operam dedit rei illicitæ, homicidij, vel mutilationis causa extitit, sufficere videtur culpa venialis ad irregularitatem contrahendam. Exempla habes: I. In Clerico venatore aprorum, vt fororum, si non omnem diligentiam adhibeat, ne hominis occisio, vel mutilatio sequatur, de quo casu supra dictum est.

II. In Clerico impudicè iocante, vel saltante cum muliere grauida, vnde abortus proles animatæ contingit, qui est casus cap. sicut ex literarum, de homic. & videri potest Caietan. cit. a. 8. resp. ad 3. Couarr. cit. §. 4. num. 4. Nauar. cap. 27. num. 236. Fundamentum traditæ doctrinæ est, quod canones passim significant, sicut videre est in cit. cap. ad audientiam, & seqq. de homic. & notat Syluest. ver. homicidium, 2. in princip. Gutierrez lib. 2. canon. qq. cap. 6. num. 143. Caietan. cit. quæst. 64. a. 8. facilius incurri irregularitatem, cum quis rei illicitæ operam dat, si exinde homicidium sequatur, quam si licitam operationem exerceat. Respondent tamen ad id Henr. q. c. 15. num. 2. Auila cit. disp. 6. sect. 1. dub. 11. conclus. 3. discrimen hoc, vtum homicidium secutum sit ex operatione secundum se licita, an illicita: pertinere tantum ad forum externum, in quo præsumptio fieri solet contra eum, qui rei illicitæ operam dedit, non sine lata eius culpa homicidium accidisse: præsumptio autem cedit veritati. Quam doctrinam fateor esse probabilem,



bilem, ideoque in praxi tutam, ut in conscientia foro nemo ob delictum, nisi mortale sit, se irregularem censere debeat.

§ RESTAT QVAESTIO. Quid censendum sit eo casu, cum aliquis, accepto vulnere non lethali, mortuus tamen est accidentibus aliis causis? Respondeo & dico I. Si vulneratus vulnere aliquo non lethali, mortuus est, quia nemo aderat, qui curationem adhiberet; iniuste vulnerans irregularis efficitur, & perinde atque alius homicida ad damni compensationem obligatur. Est communis apud Sotum lib. 5. de iust. quaest. 1. a. 9. Nau. c. 27. num. 223. ver. octauo. Auilam p. 7. disput. 6. sect. 1. dub. 5. Nam hoc casu solum vulnus causa physica mortis existit. Eademque ratio erit, si occasione vulneris alius morbus accessit, mortem inferens. Nam *causa causa censetur etiam causa causati*. Et tradit id Couar. p. 2. Clem. §. 2. num. 9. arg. c. Presbyterum, & c. ad audientiam de homic. qui tamen admonet, homicidam hoc casu mitius ferre, quam poena ordinaria, puniri solitum.

Ceterum, si vulneratus vulnere non lethali semel conualuit, & postea in morbum recidit, quo extinctus est, censebitur non causa siue occasione vulneris mortuus; & vulnerans ab irregularitate, aliisque obligationibus homicidij immunis erit, sicuti constat ex l. qui occidit, §. ult. ff. ad l. Aquil. & c. 2. de homic. & docet Abb. in cit. c. Presbyterum, num. 3. Couar. cit. §. 2. num. 9. in fine, Auila cit. sect. 1. dub. 5. conclus. 2. Mol. tract. 3. disp. 32. num. 2. Vbi rectè monent; Medicorum iudicio, nec non Iudicis arbitrio, considerantis circumstantias, relinqui, num percussio occasionem morbi praeberit; adeoque tam vulnus, quam morbus accedens mortis causa extiterint, ita ut irregularitas contrahatur, an morbus planè per accidens, atque extrinsecus acciderit, hominemque extinxerit, quo casu irregularitatem euitari dixi.

Dico II. Si vulneratus vulnere non lethali, mortuus tamen est Medici, aut Chirurghi imperitia, seu negligentia, vel propria incuria, vulnerans tenetur tantum de vulnere; non item de homicidio, quod attinet ad poenam, & obligationem resarciendi damni. Ita habetur in l. qui occidit, §. ult. & videri potest Couarru. cit. num. 9. Molin. cit. num. 2. Alexander de Nevo apud Abb. super cap. 2. de Clerico percussore, Clarus lib. 5. sentent. §. homicidium, num. 42. Less. lib. 2. cap. 9. dub. 15. Andr. Gaill. lib. 2. obseruat. 111.

Dico III. Nihilominus talis in hoc casu irregularitatem contrahere videtur. Ita docet Anton. 3. p. tit. 28. cap. 2. princip. Nauar. num. 223. Molin. l. c. Gutierrez lib. 2. cap. 6. num. 93. Auila cit. dub. 5. conclus. 2. Henriquez lib. 14. c. 14. num. 4. contra Sotum cit. l. 5. quaest. 1. a. 9. Syluest. ver. homicidium, 2. quaest. 22. Less. cit. c. 9. num. 102. Nam qui per actionem suam culpabilem, periculosam, & iniuriosam homicidij occasionem praebet, eo secuto, irregularis fit, argum. cap. significasti, 2. extra, & c. ult. de homic. in 6. Atqui vulnerans in nostro casu per culpabilem, periculosam, & iniuriosam actionem, occasionem praebet secutae mortis. Nisi enim vulnus illatum fuisset, mors non accidisset: quare non sola Medici, aut vulnerati negligentia; sed simul etiam ipsa vulneratio mortis causa exitit. Ergo, &c.

Rectè tamen monent Auila, Henriquez, si vulnus leue fuisset, quod exigua cura sanari potuisset, tunc vulneranti nullo modo, sed solum medicamento, atque extrinsecæ causæ mortem adscribi. Deinde licet aliquis vulnus lethale ab aliquo acceperit, si tamen postea alia de causa, v. g. bombardæ explosione occisus fuisset; ita ut vulnus prius acceptum nihil omnino contulerit ad mortem, neque villo modo illam accelerarit, in tali casu cum, qui lethaliter antè vulnerauerat, irregularitatem non incurrere, valde probabile est, &

annotauit Molina tract. 3. disput. 33. memb. 6. num. 4.

## CAP. XI.

## De irregularitate ex mutilatione.

## SUMMARIUM.

- 1 Mutilasse is solum dicitur, qui alicui membrum abscedit.
- 2 Qui alteri aurem, nasum, aut digitum vnum ex maioribus amputauit, videtur irregularitatem incurrere.
- 3 Qui sibi ipsi digitum per iniquitatem abscedit, haud dubie irregularis est.

**H**omicidium, & mutilatio in iure æquiparantur, quod attinet ad irregularitatem incurrendam, sicuti constat ex cap. 1. de Clericis pugnantis in duello, c. ult. de homicid. in 6. & Clem. vn. eodem tit. iuncta Gloss. ver. mutilat. Quare & nos hactenus promiscue egimus de irregularitate orta cum ex homicidio, tum ex mutilatione.

Solum hic superest explicandum, quid propriè sit mutilatio. Respondeo: Mutilasse dicitur non omnis, qui vulnerauit, sanguinem fudit, vel membrum inutile reddidit, sicuti notauit Caietan. 2. 2. quaest. 65. a. 1. Nauar. cap. 27. num. 223. Suarez disput. 44. sect. 2. num. 6. & 11. Molin. tract. 3. disput. 68. contra Abb. c. cum illorum, num. 8. de sent. excommunicat. Syluest. ver. homicidium, 3. quaest. 3. Sed is solum mutilasse dicitur, qui membrum alicui abscedit, sicut colligitur ex c. sicut vgeri, l. q. i. c. Clericis, Qui Clerici, vel Monachi, c. In Archiepiscopatu, de raptoribus.

Hoc ex communi sententia posito, restat adhuc difficultas, quid intelligendum sit nomine membri; cuius abscissio irregularitatem inducat. Nam Bartolus l. 2. ff. de publ. iudic. Abb. in c. Ego N. num. 2. de iureiurand. Syluest. loco supra cit. Nauar. num. 206. Couar. p. 3. Clem. in princ. num. 8. Mol. tract. 3. disput. 69. Auila p. 7. disput. 5. sect. 1. arbitrantur, nomen membri strictè accipiendum esse, ut aliud non sit, quam organum, siue corporis pars principalis, peculiarem in corpore functionem obtinens; ut manus tangendi, pes ambulandi, oculus videndi, & c. ducto argum. ex l. idem O filius, ff. de adil. edict. Aristot. 10. Ethic. c. 5. & Apost. 1. ad Corinth. 12. *In vno corpore multa membra habemus: omnia autem membra non eundem actum habent.* Ex quo inferunt, irregularem non esse, qui aurium, vel narium cartilaginem, aut qui vnum, vel alterum digitum alicui abscedit. Nam autis, vel nasi cartilago, inquiunt, etsi sensorio adiumentum adferat, sentiendi tamen actionem minimè exercet: igitur nec membrum, siue corporis organum censi debet. Neque digitus membrum est, sed pars membri, siue membrum membri: cum propriam operationem non habeat, sed manui in operatione inferuiat, & instrumenti loco sit.

Hæc opinio probabilis est, & ob Doctorum auctoritatem in praxi tutam. Suspicio tamen, contrariam sententiam canonibus conformiorem esse; quam tradunt Caietanus, Sotus ll. cc. Suarez num. 7. irregularem fieri, qui alteri aurem, aut nasum, vel qui digitum amputat, præsertim vnum ex maioribus: (nam de minoribus ipsemet Suarez dubitat num. 9.) Fundamentum est, quia canones nusquam meminerunt huius physice potius, quam moralis definitionis membri; sed mutilationem appellare videntur, quamlibet partis organice abscissionem, ob quam corpus humanum notabiliter sua integritate priuatur, atque imperfectum seu mutilum redditur.



3 Illud verò certius esse debet, qui sibi ipsi digitum, aliamve corporis partem per iniquitatem abscidit, irregularem fieri: quod in ea re maior criminis deformitas appareat, sicuti constat ex c. Qui partem, d. 55. & c. significauit, de corpore vitiatis, & videri potest Nauar. num. 198. Suarez disput. 51. sect. 2. num. 6. Mol. tract. 3. disput. 7. num. 17. ubi monet, eandem irregularitatem incurri, licet factum occultum sit: cuius contrarium senserunt Hostiensis, & alij apud Nau. l. c. Couar. in Clem. si furiosus, p. 1. init. num. 6.

## CAP. XII.

## De dispensatione super irregularitate ex homicidio &amp; mutilatione.

## SUMMARIUM.

- 1 Cum homicida voluntario, quamvis occultus sit, nemo præter Papam dispensare potest.
- 2 Probabile est, Episcopum dispensare posse in irregularitate ex mutilatione illicita, si occulta sit; item in homicidio facto causa defensionis, cum excessu moderationis: & in homicidio indirecte voluntario.
- 3 Cum homicida indirecte voluntario, quamvis notorio, dispensare Episcopus potest ad ordines minores accipiendos.
- 4 Nomine homicidij indispensabilis intelligitur tantum homicidium directe voluntarium, idque iniustum.
- 5 Episcopus per facultatem in Tridentino concessam, dispensare non potest super irregularitate ob lenitatis defectum.
- 6 Irregularitas non ligat cum graui periculo vite, aut fame.

**N**otandum est primò; A Tridentino Concilio Episcopis priuilegium concessum esse sess. 24. c. 6. reform. dispensandi super omni irregularitate proueniente ex delicto occulto, ea excepta, quæ oritur ex homicidio voluntario. Dico autem, id esse priuilegium: quia alioquin Episcopi dispensare non possunt in lege Pontificia, seu Ecclesiæ vniuersalis.

Notandum secundò; Ab eod. Tridentino Concilio sess. 14. c. 7. de reform. statutum esse, ut qui sua voluntate homicidium perpetraverit, etsi crimen occultum fuerit, nullo tempore ad sacros ordines promoueri possit, neque illi aliqua Ecclesiastica beneficia, etiam si curam non habeant animarum, conferri liceat: sed omni ordine, ac beneficio, & officio Ecclesiastico perpetuò careat. Sin verò non ex proposito, sed casu, vel vim vi repellendo, ut quis se à morte defenderet, defensionis tamen modum excedens, homicidium commissum sit, iure quodammodo dispensatio debetur.

- 1 Assertio I. Cum voluntario homicida, quamvis occultus sit, nemo dispensat, præter Sum. Pontificem. Hæc est communis apud Nau. n. 194. ex cit. sess. 24. c. 6. Vide quæ dixi lib. 1. tr. 5. p. 5. c. 9. n. 4.
- 2 Assertio II. Probabile est, Episcopum dispensare posse in irregularitate ex illicita mutilatione, si occulta sit. Ita Rodriq. tom. 1. sum. c. 181. conclus. 1. Sa ver. irregularitas ex deformat. illicita, num. 7. Auila p. 7. disp. 6. sect. 5. dub. 4. contra Médin. lib. 1. sum. c. 11. num. 12. Henriq. c. 9. num. 3. lit. Z. Sanchez 1. moral. c. 10. num. 49. Ratio est: Quia Concilium tantum excipit homicidium: mutilatio autem non est homicidium: quare hæc exceptio firmat regulam in aliis. Accedit, quod exceptiones, siue restrictiones facultatis ordinariæ (cuiusmodi est ista Episcoporum dispensandi super omni irregularitate ex crimine occulto) non sunt extendendæ ultra verborum proprietatem, sicuti notauit Finellius casu 3. n. 26. Tametsi verò homicidium & mutilatio in iure equiparantur, quod attinet ad causas incurrendi irregularitatis; non tamen semper, quod attinet ad cetera.

Assertio III. Episcopus dispensare potest in homici-

dio occulto, causâ defensionis facto, sed excedendo moderationem inculpatae tutelæ. Ita Nau. cap. 27. num. 240. & consil. 36. de homic. edit. 2. Henriq. c. 19. num. 3. Auila dub. 5. Ratio est, quia tale homicidium non censetur simplicitet voluntarium esse.

Assertio IV. Probabile est, Episcopum dispensare posse cum homicida occulto, qui tamen hominis necem directè non intenderat, sed solùm indirectè, & in causa. Exempla habes: Si quis mulierem grauidam incautè percussit, & abortum procreauit: Si quis tegulam improvidè è tecto deiiciens, hominem occidat. Si quis alterum iniquè verberari mandauit, prohibens ne occideretur; mandatarius verò fines mandati egressus, omnino occidit, iuxta cap. ult. de homicid. in 6. Idque notauit Nau. cit. num. 240. & lib. 5. consil. 27. de homicid. edit. 2. Si quis ad rixam provocatus, percutiendi tantum animo accessit: postea verò, ne ab auctore rixæ occideretur, occidit. Nam eiusmodi homicidia, cum non sint ex proposito directo ac formali, non sunt simpliciter ac perfectè voluntaria; sed veluti mixta ex voluntario & casuali, secundum doctrinam S. Thom. 2. 2. q. 64. a. 8. Nau. cit. c. 27. n. 219. Quare eiusmodi homicidia occulta indispensabilia non esse, docet idem Nau. cit. n. 240. Suarez disp. 44. s. 1. n. 4. Henriq. lib. 14. c. 19. n. 2. Auila disp. 6. s. 5. dub. 5. contra Molin. tr. 3. disp. 3. §. illud admonuerim, qui putat, omne homicidium, quamvis directè volitum non sit: imò etiam nolitum, si tamen proueniat ex opere, cum quo frequenter coniuncta est hominis cædes, inter homicidia voluntaria, idè quæ indispensabilia numerandum esse. quod etiam sentire videtur Couar. p. 2. Clem. initio, n. 1. Azor to. 3. lib. 2. c. 14. post Caiet. in cit. q. 64. a. 8. Et rectè quidem docent hi Doctores, eiusmodi homicidium non esse casuale: fateri tamen etiam debent, non esse simpliciter, ac perfectè voluntarium: sed secundum quid, indirectè & in sua causa: Ut proinde probabile sit, sub exceptione homicidij voluntarij à Tridentino non fuisse comprehensum.

Eadem responsio inferuire etiam poterit Parochis, qui secundum consuetudinem diocesium, ab homicidio voluntario, tanquam Episcopis reservato, absolueri non possunt: attamen in cōscientiæ foro cōfidenti homicidium credere possunt asserenti, non habuisse propositum occidendi, sed solùm v. g. rixandi: postea verò necessitate compulsus occidisse, ne ipsemet occideretur: cuiusmodi peccatum non debet reservatum censeri: præsertim si occultum sit: Sin verò notorium, conuenit plerumque, ut examini Episcopi relinquatur.

ASSERTIO V. Probabile est, quod docet Auila in fine disp. 6. contra Henriq. c. 19. n. 3. Licet is, qui ex commiserationis affectu infirmum vertit, ut liberet eum angustiis mortis, grauius peccet, & irregularis fiat, accelerando mortem: tamen cum eo dispensari posse ab Episcopo, aut Priuilegiato. Quia per homicidium voluntarium indispensabile intelligi videtur, quod animo crudeli, vel inimico sit.

ASSERTIO VI. Etsi Episcopus cum homicida voluntario occulto dispensare non potest ad ordines minores seu accipiendos, seu exercendos: neque ad beneficium simplex: cum id in Trident. clarè prohibitum sit, illis verbis: *Omni ordine, ac beneficio careat*, & notauit Nau. n. 240. Lopez p. 2. instruct. c. 93. Sairus lib. 7. thesauri, cap. 7. num. 14. Auila disp. 6. s. 5. dub. 3. contra Sa ver. irregularitas ex deformat. illicita, n. 7. Henriq. lib. 13. c. 57. n. 1. & lib. 14. c. 19. n. 1. tamen in homicidio casuali mixto, siue indirectè voluntario, quamvis notorium sit, dispensare Episcopus potest, saltem ad ordines minores, & beneficium simplex, non curatum, sicuti docent DD. in c. 2. de clericis pugnans, in duello, Syl. ver. homic. 3. q. 8. Nau. cit. n. 240. Sairus n. 20. Henriq. lib. 14. c. 19. n. 2. Auila cit. s. 5.



dub. 2. ex cit. c. 2. & c. ad audientiam, de homic. Quæ iura per Trident. Concilium nullatenus mutata sunt, quod attinet ad homicidium indirectè voluntarium. Addit verò Nauar. cit. n. 240. in fine, quem Auila sequitur, Episcopum dispensare etiam posse cum eiusmodi homicida, ad retinendum beneficium curatum antea obtentum.

4 ASSERTIO VII. Qui habent priuilegium dispensandi super omni irregularitate, excepto homicidio, bigamia, &c. ij dispensare possunt in irregularitatibus prouenientibus ex homicidio indirectè, vel imperfectè voluntario; & in eo, quod factum est causa defensionis cum excessu moderaminis, sicuti constat ex ijs, quæ præcedent. assertionibus probabiliter dicta sunt, & videri potest Caiet. 2. 2. q. 64. a. 8. in fine. Item in irregularitate proueniente ex homicidio iusto ob defectum perfectæ lenitatis in Milite, Iudice, Accusatore, ad Aduocato, Teste, sicuti docet Caiet. in sum. ver. irregularitas, Armilla eod. ver. n. 13. Henr. c. 17. n. 5. lit. R. & cap. 19. n. 4. lit. f. Auila f. 5. dub. 1. Rodriq. to. 1. regul. qq. q. 24. a. 8. Ratio est: Quia nomine homicidij indispensabilis, id est, super cuius irregularitate dispensationem Papa in omnibus priuilegij sibi reseruare solet, intelligitur solum homicidium voluntarium iniustum. Dico iniustum: Nam etsi Clericus contra canones in bello iusto pugnasset, & propria manu occidisset, posset cum eo dispensare is, qui habet priuilegium dispensandi super omni irregularitate, excepto homicidio, bigamia, &c. sicuti docent Rodriq. & Auila l. cc. Quamquam, si facultas dispensandi Regularibus concessa tantum sit pro foro conscientie, ea non facile vti debent, si factum notorium sit: quandoquidem in externo foro Episcopi talem dispensationem admittere non coguntur. Vide etiam quæ Nauar. tradit lib. 5. consil. 39. de homic. edit. 2.

5 ASSERTIO VIII. Episcopus, ex vi facultatis concessæ à Trident. concilio sess. 24. cap. 6. dispensandi super omni irregularitate proueniente ex delicto occulto, non potest dispensare cum milite, Iudice, Accusatore, & similibus irregularitatibus absque delicto contractis, ob lenitatis defectum. Ita ex communi Nauar. c. 27. n. 194. & cit. consil. 39. de homic. edit. 2. Henr. c. 19. n. 4. lit. L. Auila cit. dub. 1. §. ex dictis, Rodriq. in summa p. 1. cap. 174. consil. 3. contra Couar. in Clem. p. 2. §. 3. in fine. Ratio est manifestat: Quia talis irregularitas non prouenit ex delicto.

6 RESTAT QVÆSTIO. Quid agendum sit Sacerdoti, qui occultum homicidium commisit; sed nisi Missam celebret, in suspicionem sceleris veniet cum vitæ periculo, vel graui dispendio famæ? Respondeo. In primis operam dare debet, vt, quam fieri potest, citissimè à Sum. Pontif. dispensationem super irregularitate petat: Interim verò post petactam pœnitentiam, celebrare poterit, quoties absoluta necessitas postulabit ad vitandam infamiam, aliudue graue periculum. Ita docet Nauar. c. 27. n. 239. Castro lib. 2. de lege pœn. c. 15. Gutierrez lib. 1. canon. qq. c. 13. n. 21. Mol. tr. 3. disp. 79. Quia lex naturalis, & diuina, inquit Nauarrus, de defendenda propria fama, præstat legi humane de abstinendo à sacro in irregularitate. Eademque est ratio de alijs irregularitatibus, & excommunicatione; licet contrarium doceat Couar. c. alma p. 1. §. 2. num. 11. in fine Adde, si in tali casu non sit facilis recursus ad Papam, Episcopum dispensare posse, vt in susceptis ordinibus ministrare liceat, teste Syluest. ver. dispensatio, num. 15. Henr. c. 19. num. 1. & 2. Auila p. 7. disput. 6. f. 5. dub. 3. conclus. 1. Quamuis tunc Episcopus non simpliciter tollat irregularitatem; sed solum eius effectum suspensioni similem; vt nimirum celebrare liceat, interim culpa & defectus occultus manet, & donec à Papa dispensatio impetratur.

## CAP. XIII.

## De Stupro.

## S V M M A R I V M.

- 1 Stuprum non continet speciem peccati à simplici fornicatione distinctam, si absit dolus, vis.
- 2 Stuprator virginis, libere consentientis, ad nullam damni restitutionem in conscientia foro obligatur.
- 3 Stuprator puellæ per vim, debet eam dotare, aut in uxorem ducere.
- 4 Si puella occultè stuprata, nullum aliud damnum passa fuit, non videtur ille qui stuprauit, ad aliquam damni compensationem in conscientia foro obligandus.

Stuprum interdum accipitur latè pro omni specie luxuriæ, siue cum masculo, siue cum fœmina, eaque vel coniugata, vel vidua, vel virgine, sicuti constat ex l. stuprum, ff. ad L. Iuliam de adulteriis, & notauit S. Tho. 2. 2. q. 154. a. 6. ad 2. Interdum accipitur strictè ac propriè, vt idem sit, quod fornicatio cum virgine: quæ ratione Gratianus ait in c. lex, 36. q. 1. Stuprum propriè virginum est illicita defloratio.

Stuprum ita propriè acceptum diuiditur in illud, quod per violentiam infertur; & in illud, quod volenti ac consentienti: idque vel plena libertate; vel accedente fraude, metu.

ASSERTIO I. Probabilis est sententia, stuprum non continere speciem peccati à simplici fornicatione distinctam, si absit dolus, violentia, aut metus iniusta incussio: quæ obrem circumstantiam virginitatis violatæ in Confessione necessariò explicandam non esse. Ita docet Scotus in 4. d. 18. quæst. 2. art. 4. Pet. Nauar. lib. 2. cap. 3. num. 33. Valq. 1. 2. disp. 112. cap. 2. & in moral. de restit. cap. 3. §. 1. dub. 1. Sanch. lib. 7. de matrim. disput. 14. Less. lib. 2. cap. 10. dub. 1. Suar. to. 4. disp. 22. f. 4. n. 6. contra S. Thom. in 4. d. 41. q. vn. a. 4. quæstion. 2. & 2. 2. q. 154. a. 6. Caiet. ibid. & in sum. ver. stuprum, S. Anton. p. 2. tit. 5. §. 1. Syl. & Armillam ver. stuprum, Nauar. c. 16. n. 3. Tolet. lib. 3. cap. 18. Azor tom. 3. lib. 5. c. 5. q. 1. Valent. 3. disp. 9. q. 3. p. 3. Probatur: Cum enim stuprum siue fornicatio cum virgine modo naturali concubitus fiat, præterquam quod extra legitimum matrimonium, non potest habere intra genus intemperantiæ, & luxuriæ aliam deformitatis speciem, quàm eam, quæ est simplicis fornicationis.

Sed neque speciem peccati iniustitiæ continet: Aut enim iniuria virgini inferretur; aut parentibus eius, sub quorum cura ac potestate existit. Non primum: quia nulla est iniuria, quæ in volentem fiat, l. 1. §. vlt. q. de iniuriis. Statuimus autem puellam libere consentientem in stuprum. Ergo, &c. Neque Secundum: Nam puella libertatem habet in membra, ac corpus suum: quo vel nunquam vti potest ad carnalem generationem, vel vti modo legitimo nuptiarum & coniugij, vel etiam abuti per modum illegitimæ fornicationis: vt quamuis tunc contra temperantiam peccet, nemini tamen iniuriam faciat; quia vtitur iure ac facultate sua: quemadmodum si intemperatè comedat ex horto; vel immoderatè bibat ex dolio, cuius liberum vsum habet. Consequenter neque stuprator parentibus iniuriam infert, quando particeps est huius voluntarij abusus, siue socius intemperantiæ criminis. Alia verò ratio est, si filia volens, patre inuito, domo abducatur, aut venundetur: tunc enim iniuria patri infertur, vtpote cuius ius, ac potestas patris violatur, idèoque ei actio iniuriarum proprio, non filie consentientis nomine, competit, iuxta cit. §. vlt. q. de ad.



Id fateor, peccare puellam contra pietatem parentibus debitam, si in stuprum consentiat cum illorum dedecore coniunctum: quemadmodum & stuprator interdum contra charitatis legem. Verum hæc per accidens sunt, & non solum in stupro virginis, sed etiam viduæ sub parentum cura constitutæ locum habere possunt.

- 2 Corollarium. Stuprator virginis consentientis, si nullum dolum, vim, aut iniusti metus incussione adhibuit, nullam, vel ipsi, vel parentibus eius restitutionem damni in conscientia foro facere teneretur, sicut præter citatos docet Syl. ver. luxuria, q. 5. Sotus 4. de iust. q. 7. a. 1. circa 2. argum. Mol. tr. 3. disp. 106. n. 2. Rebel. p. 1. lib. 3. q. 8. contra Medinam in instruct. lib. 1. c. 14. n. 18. in fine: Ratio est, quia neutri iniuriam intulit. Deinde, etsi intulisset iniuriam patri, non tamen damnum: quia damnum corporis filia volenti illatum non redundat in patrem: eo quod filia non sit possessio patris; sed liberum sui corporis usum habeat, ut supra dixi, & notavit Molina n. 2.

Neque obstat, etsi pater idcirco, quod filia ob stuprum infamata erat, maiorem dotem dederit, ut honesto matrimonio locaretur. Nam id pater sponte sua fecit: Siquidem filia libera voluntate in stuprum consentiens, suscepit in se periculum infamiae, atque iacturam siue detrimentum matrimonij. quo damno si eam pater liberare velit, data ampliore dote, neque ipsamet filia, si propria bona habeat, liberalitatem hanc patri, vel fratribus extraordinaria modo compensare cogitur; multo minus stuprator, qui huius damni causa exitit, interueniente libera voluntate filia, sicut resoluit Mol. cit. n. 2. & Sanchez n. 11.

Excipe primò: Si, cum facinus occultum esset, stuprator puellam non sine iniuria infamavit: tenetur damnum inde secutum filia, & parenti eius refarcire, sicut ibid. docet Molina. Secundo: Si Iudex in externo foro, secutus sententiam valde probabilem, quod iniuria inferatur parentibus, quorum filia etiam volens constituitur, stupratorem condemnat ad pœnam illis solvendam, obtemperari debet.

- 3 ASSERTIO II. Qui stuprum virgini, alterius puellæ per vim infert, contra iustitiam etiam peccat, & omne damnum, quod inde provenit tam ipsi, quam parentibus eius, in conscientia foro restituere cogitur. Idemque dicendum, si eam per fraudem induxit, v. g. falsis pollicitationibus, vel per precum importunitatem, coniunctis minis. Videri potest Nauar. c. 16. n. 17. Ordinariæ autem compensatio damnorum ita facienda est, ut vel stuprator puellam in uxorem ducat, si ipsa velit: vel tantam illi dotem offerat, ut æquè honestas nuptias sortiat, ac si corrupta non fuisset. Et cū in alternatiuis debitoris sit electio, si malit tali modo dotare, non tenetur eam in uxorem ducere, ante Iudicis sententiam: etiam si ipsa, & parentes cupiant: præterquam, si eam sub pollicitatione matrimonij vera, vel ficta, ad stupri consensum induxit. Ita docet Mol. cit. disp. 106. Azor l. c. q. 2. Julius Clarus §. stuprum, n. 3. Less. lib. 2. c. 10. dub. 2. Vasq. de restit. c. 3. §. 2. dub. 1. Gutierrez lib. 1. canon. qq. c. 37. n. 7. & seqq.

Neque obstat c. 1. de adulterio, desumptum ex c. 22. Exodi: Si seduxerit quis virginem nondum desponsatam, dormieritque cum ea, dotabit eam, & habebit eam uxorem. Si vero pater virginis dare noluerit, reddet pecuniam iuxta modum dotis, quam virginis accipere consueverunt. Nam lex ista pœnalis est, non obligans ante Iudicis sententiam, teste Nauar. c. 16. n. 16. Pet. Nau. n. 440. Claro & Azorio ll. cc. Mol. disp. 104. n. 16. Imò neque in externo foro (præsertim civili: Nam de stupro cognoscere, si Reus sit laicus, ad forum seculare pertinere debet) cogi solet stuprator ad matrimonium, si illud non promiserat: sed ad alterutrum eorum, quæ dicta sunt.

ASSERTIO III. Si puella ob illatum stuprum per vim, fraudem, &c. nullum aliud damnum passa fuit, quia facinus occultum mansit, & æquè honestum virum sortita fuit, probabile est, ad nullam restitutionem obligari stupratorem, ante Iudicis sententiam. Ita docet Nauar. c. 16. n. 17. & 19. Corduba lib. 1. qq. q. 13. dicto 4. Pet. Nauar. cit. c. 3. n. 451. Vasq. cit. §. 2. dub. 3. Less. lib. 2. c. 10. dub. 2. Azor. cit. c. 5. q. 3. diff. 10. contra Mol. disp. 106. n. 6. Rebel. l. c. q. 9. Nam pro iniuria, secluso damno, nulla restitutio fieri debet, teste ipso Molina cad. disp. n. 2. Puella autem nullum damnum passa est, ut supponimus. Quod enim obiciunt de claustris virginis violatione: damnum istud reparabile non est, neque pecunia æstimabile.

## CAP. XIV.

## De Adulterio.

## SUMMARIUM.

- 1 Adultera plerumque non tenetur manifestare prolem esse spuriam, quæ publicè legitima censetur.
- 2 Si adulter sibi persuadeat, vel meritis persuadere debeat, prolem ex se genitam esse, debet compensare damnum patri putativo, & liberis legitimis, quatenus id fieri potest.
- 3 In dubio, utrum proles ex adulterio genita sit, adulter obligandus videtur ad restitutionem, saltem secundum dubij proportionem.
- 4 Fas est filios illegitimè natos interdum exponere, si ita necesse sit ad gravem infamiam vitandam.

QUESTIO PRIMA. Vtrum adultera, enixa prolem spuriam, quæ publicè existimatur legitima, teneatur facinus manifestare, ad aduertendū damnum mariti, & legitimorum liberorum? Respondeo, ordinariè non esse ad hoc obligatam. Colligitur ex c. officij, de pœnit. & remiss. vbi id notat Innoc. Scotus in 4. d. 15. q. 2. sub finem, ibid. Gabr. q. 2. a. 2. casu 2. S. Anton. p. 2. tit. 2. c. 7. §. 4. Caiet. to. 1. opusc. 31. resp. 14. Nauar. c. 16. n. 43. Couar. reg. peccatum, p. 1. n. 4. Pet. Nauar. lib. 2. c. 4. n. 408. & lib. 3. cap. 1. n. 115. Vasq. tr. de testam. c. 5. n. 3. Lactant. Finellius casu reservato 10. n. 17. Ellet enim hæc obligatio valde difficilis, parum utilis, plus noxia. Nam adultera tristiciam atque odium mariti sui excitaret: deinde infamaret seipsam, & adulterum, ipsamque prolem, quæ publicè censetur legitima: Atqui communiter Doctores aiunt, restitutionem bonorum fortunæ ordinariè faciendam non esse cum detrimento altioris boni, videlicet famæ, uti videre est apud Nauar. in man. c. 17. n. 89. & seqq.

Accedit, quod filius & filia, qui hæcenus fuerunt in possessione legitimæ natiuitatis, matri asserenti ex adulterio conceptos esse, fidem habere non tenentur, nisi liquidis seu indubiis probationibus id ostendat, puta quia tempore conceptionis maritus absens fuit, sicut docet Gl. in cit. c. officij, ver. deneganda, Abb. c. per tuas, n. 5. de probat. & in c. transmissæ, n. 4. Qui filij sint legitimi, Richar. in 4. d. 15. a. 5. q. 4. ad 9. Castro lib. 2. de lege pœnali, cap. 11. Sa ver. adulterium, n. 2. Tol. lib. 5. c. 11. Less. lib. 2. c. 10. dub. 7. n. 51. argum. l. quia semper ff. de in ius vocando. vbi dicitur, quod mater semper certa est: pater vero iuris præsumptione est is, quem nuptiæ demonstrant.

Idque locum etiam habet, licet mulier circa id tempus, quo proles concepta putatur, in adultèrio deprehensa fuerit: cum enim possit esse filius veri, utque, potius præsumendum, mariti esse, quam adulteri, ait Abb. in cit. c. transmissæ, & Andreas Gail. lib. 2. obseruat. 97. num. 9. Molina de iusticia tract. 3. disput. 101. dummodo hoc casu graues coniecturæ, in contrarium non sint: ut si maritus sterilis



credebatur; ideoque neque ipse, nec familia, aut vicina filium pro legitimo agnuit. Qua de re Mol. tr. 3. disp. 102.

Debet tamen adultera operam dare, ut marito, legitimisque liberis; quatenus fieri potest, illatum damnum compensetur, arg. cit. c. officij. Vt puta rem familiarem diligentius administrando; de cultu corporis sui & sumptibus detrahendo; si habeat bona propria, plus liberis legitimis, quam spurio, relinquendo. qua de re Maior in 4. d. 15. q. 17. Mol. tr. 3. disp. 102. Vasq. l. c. n. 1. 4. Sin verò talibus modis damnum compensari non possit, debet spurio suadere, ut renunciens hereditati vel in totum, vel secundum partem, statum Ecclesiasticum, vel religiosum amplectatur, si idoneus sit, teste Adriano in 4. de restitut. q. 1. ad 5. in fine, Maiore in 4. d. 15. q. 17. Abb. in c. veniens, in fine, de eo qui duxit in matrimonium. Sylvest. ver. adulterium, q. 1. Mol. cit. disp. 102. n. 11. ubi aiunt, quod mulier teneatur per se, vel per aliam idoneam personam secretò significare spurio natalium defectum, si speret id fieri posse bono successu, & sine alio maiore suo, aut filij secuturo no-cumento.

Sed existimo, in praxi raro eiusmodi obligationem adulteræ imponendam fore, si res alioquin occulta sit, & sufficientibus indiciis ostendi non possit: cum secundum communiorum Doctorum sententiam, in hoc casu, filius matris, quamvis iurata testimonio fidem habere non teneatur, sicuti bene annotavit Gabr. loco cit. Neque verum esse arbitror, quod docet Mol. in fine disp. 101. Vasq. n. 21. Si mater (considerata probitate eius, atque dilectione, qua filium prosequi solet) fide digna appareat, spurium in conscientia obligatum esse, ut hereditate abstineat. Sed contra id est, quod iure gentium, boni communis causa, introductum esse videtur, ad multas hominum astutorum fraudes vitandas, ut nemo unius, quamvis minimè suspecti hominis, testimonio credere teneatur in suum præiudicium, iuxta Gl. in l. Titio fundus, ff. de cōdit. Et in simili docet Nau. c. 22. n. 82. quod coniunx non teneatur credere uni testi, quamvis iurato, amico, dicenti subesse impedimentum matrimonij dirimens, nisi id demonstret. Atque alioquin Iudex in foro externo iniustus foret, si dicta causa ad ipsum delata, hereditatem filio adiudicaret, quam is tamen in conscientia foro retinere non posset.

Quod verò ulterius ait Mol. tr. 3. disp. 102. concl. 2. Quotiescunque ex eo, quod filius spurio pro legitimo habetur, maiora, vel æqualia damna aliis secutura sunt, quam sit damnum infamiae, quod adulteræ & filio proveniet, si eius defectus natalium palam ostendatur, mulierem obligari ad reuelandum, id verum est, si fama mulieris, ipsiusque filij antè læsa fuit; ut si magna suspicio concepta erat, filium ex adulterio genitum esse. Sin verò mulier, ipsæque filius integram famam servet, ordinariè non erit mater obliganda ad reuelationem, cum tanto suæ famæ detrimento, aliisque incommodis, sicuti ex communi testantur Caiet. t. 1. opusc. 31. resp. 14. Navar. c. inter verba, 11. quæst. 3. conclus. 4. num. 19. Sed in raro casu, ut si agatur v. g. de successione in Regno, Ducatu: & filius spurio sit hæreticus, vel pessimis moribus præditus, à quo Respub. graue no-cumentum acceptura videatur; legitimus autem filius, cui re ipsa hæreditas debetur, Reipub. utilis futurus speretur; tunc adultera, posthabito famæ suæ, imò etiam vitæ dispendio, rem palam significare debet, si spes sit illegitimi successionem tali ratione impediri posse, sicuti notavit Less. cit. c. 10. dub. 7. n. 54.

2. QVÆSTIO SECUNDA. Ad quid adulter obligatus sit? Respondeo: Si adulter ex assertionem adulteræ, aliisque sufficientibus argumentis sibi persuadeat, vel persuadere debeat, prolem ex se genitam esse, in conscientia foro restitutionem facere tenetur, in primis

patri putatio, qui spurio alimenta præstitit; vel sine ipsius dotem largitus est: Deinde compensare debet damnum reliquis liberis legitimis, quod per obtrusi illegitimi successionem patiuntur. Ita ex communi docet Navar. n. 48. Less. dub. 6. Molin. disp. 103. n. 3. contra Sotum lib. 4. de iusticia quæst. 7. art. 2. Ratio est: Quia adulter eiusce damni causa moralis exitit, quando huiusmodi iniustam actionem exercuit, ex qua suapte natura prolis generatio consequi solet, ut plurimum coniuncta cum damno mariti, & legitimorum eius liberorum. Interim verum est, sæpenumero adulterum excusari vel in totum, vel ex parte à restitutione, siue quod damnum ab adultera compensatum fuit, vel compensatum in creditur; siue quod restitutio fieri non potest absque periculo vitæ, graui dispendio famæ, &c.

Sed quid, si adulter in utramque partem probabiliter dubius sit, utrum proles à se genita sit, necne? In hoc casu ad nullam restitutionem adulterum obligant Sotus l. c. Navar. num. 49. Less. num. 19. Quia nemo teneatur soluere, & re sua se spoliare, priusquam ostendatur debitor. Hæc sententia probabilis est: sed probabilior videtur esse doctrina Molinæ cit. disp. 103. In conscientia foro damnum resarciendum esse pro dubij quantitate. Cum enim dubium est, uter duorum pater sit alius cuius prolis, profectò æquitas non patitur, ut vnus eorum omnia ipsi alimenta præstare teneatur, alter verò omnino immunis sit: sed oportet eos contribuere secundum proportionem probabilitatis, quod etiam in externo foro, si causa eo deferatur, observari conuenit.

Confirmatur. Nam si constet delictum admissum fuisse, præsumptio esse solet contra nocentem, seu delinquentem; ut ipsi probatio incumbat, exinde nullum damnum provenisse eorum, quæ suapte natura consequi solent, sicuti videre est apud Sanchez lib. 2. de matrim. quæst. 41. num. 16. & lib. 1. moral. cap. 10. num. 44. Cuius ratio est: Quia in dubia causa potius fauendum est innocenti, quam nocenti. Itaque non bona argumentatio est, quam aliqui faciunt: Filius in dubio legitimus se reputare potest: ergo etiam adulter ita præsumere. Nam innocentia, & fauor filij omni iure id meretur, ut legitimus censeatur, donec demonstretur illegitimus; cum hætenus fuerit in possessione filiationis. At verò adulterum constat causam iniustam fuisse, ut maritus alimenta præbeat filio, tanquam certo & indubitato, qui tamen re ipsa dubius est: quod damnum pretio æstimabile marito compensari debet.

Quare responderetur ad fundamentum sententiæ oppositæ: licet dubium & incertum sit, utrum proles sit adulteri: tamen in tali dubio certum videri, obligationem alendi ipsi incumbere: cum alioquin damnum iniustū inferatur marito, quippe qui filium dubiū perinde alere cogitur, ac si indubius existat: adeoque periculum subit pretio æstimabile, ne alienam prolem tanquam propriam pascat.

QVÆSTIO TERTIA, his annexa esse potest, quid 4 sentiendum de liberis, plerumque illegitimis, qui in loco publico exponuntur? Respondeo ex doctrina Molinæ disp. 104. n. 4. & dico I. Licitum est interdum filios illegitimos, præsertim spurios, exponere, quando ita necesse est ad occultandum crimen, & grauem vitandam infamiam: adhibita tamen cautione, ne proles frigore, &c. moriatur. Consultum etiam est, ut proles prius baptizetur, apposita ei schedula de baptismo testantē.

Dico II. Vix potest accidere casus, ut prolem exponere liceat, propter parentum inopiam, quia eam alere non possint. Nam inter homines, qui prolem suscepturi sperantur ad alendum ex misericordia, reperientur etiam aliqui, qui parentibus subsidium præstabunt ad alimoniam prolis.



Dico III. Si orphanotrophion, in quo proles spuria suscipitur, diues non sit, tunc pater, & in eius defectum mater, si diuites sint, compensationem aliquam Orphanotrophio facere tenentur, quatenus sine periculo suæ famæ possint. Sin verò diues sit orphanotrophion, tum præsumptio esse potest, fundatum esse pro omnibus expositis ob causam iustam, absque compensatio-

nis obligatione.

Dico IV. Si parentes absque sui infamatione possint, tenentur nihilominus curam aliquam filij expositi habere; eique, postquam ex infantia excessit, sustentationem ministrare, si indigeat; sicuti deberent, si expositus non fuisset: quamvis per accidens, ne in suspitionem veniant, ferme excusari solent.

# TRACTATUS QVARTVS.

DE

## PACTIS ET CONTRACTIBVS.

### CAP. I.

#### Quid sit pactum.

#### S V M M A R I V M.

- 1 Pactum est duorum, vel plurium consensus in idem.
- 2 Effectus pacti est obligatio, cui ex altera parte respondet actio, seu ius petendi.
- 3 Promissio, nisi acceptata sit, obligationem nullam parit; exceptis casibus, qui iure exprimuntur.
- 4 Non permittitur, ut quis pro altero pacisci seu stipulari possit, nisi sit persona subiecta, puta filius pro patre; seruus pro domino: Regularis pro Prelato, aut Monasterio.
- 5 Si donator misso nuntio ad donandum, antequam donatio acceptetur, à viuis excedat, exquirat ius acceptandi, & res donationi destinata ad heredes donatoris spectat.
- 6 Gratia alia est facta, & alia facienda.

**P**actum à pace dictum esse, ait Isidorus relatus in c. pactum, de verb. signif. quia per pacta pax fieri so-  
leat. Consentit Gl. in l. i. ff. de pactis.

- 1 Definitur pactum in cit. l. i. *Duorum, vel plurium in idem placitum & consensus*. Et in l. 3. ff. de pollicitat. *Pactum est duorum consensus atque conuentio, videlicet ad aliquid dandum, faciendum, vel non faciendum. Sicuti enim conuenire dicuntur, qui ex diuersis locis in unum locum colliguntur & veniunt, ita & qui ex diuersis animi motibus in unum consentiunt*; ait Iureconsult. in l. i. ff. de pactis.
- 2 Effectus, ac veluti proprietas cuiusque pacti est naturalis obligatio, iuxta regulam 84. ff. *Is naturâ debet, quem in regnum dare oportet, cuius fidem secuti sumus*. Et in cit. l. i. *Quid enim tam congruum fidei humana, quam ea, que inter eos placuerunt, seruare?* Definitur autem obligatio Instit. de obligat. princ. *Iuris vinculum, quo necessitate astringimur alicuius rei soluende, vel faciende*. Porro obligationi ac debito ex altera paciscentium parte correspondet petitio, & actio; id est, *in persequendi, quod sibi debetur*, Instit. de actionib. in princip.
- 3 Corollarium I. Cum pactum duorum placitum siue conuentio sit, externo signo declarata; consequens inde est, quòd nuda promissio, siue pollicitatio, nisi acceptata sit, ac veluti formata alterius partis indicato consensu, rationem pacti non habeat; nullamque ne naturalem quidem, siue in conscientie foro, obligationem, actionemque pariat, sicuti præter alios docet Sotus lib. 3. de iustit. q. 5. a. 3. Iulius Clarus ver. donatio, q. 12. n. 3. Gomez lib. 2. resol. c. 9. n. 2. Couar. reg. quamuis pactum, p. 2. §. 4. n. 25.

Quapropter hoc discrimen est inter votum siue promissionem Deo factam, & promissionem homini factam; quòd illa, licet interno tantum animo concepta

sit, à Deo cordium inspectore cognoscitur, & acceptatur: Hæc verò, nisi externo signo prodita, & promissario indicata sit, ab eo nec cognosci, nec acceptari potest. *Nam homo videt ea, quæ parenti; Dominus autem intuetur cor*, 1. Reg. 16. Vide S. Thom. 2. 2. q. 88. a. 1. in corp.

Præterea necesse est, ut dum promissio offertur, alterius acceptatio sequatur, plerumque incontinenti: Si enim dum spondes pro merce dare decem aureos, mercator taceat, & ad alia negotia vos conferatis; postea verò dicat ille se contentum esse, potes tu interim consensum reuocasse; nisi copiam ad tempus deliberandi gratuito ipsi concesseris.

Necesse item est, ut acceptatio fiat de eodem, eodemque modo sicuti promissio offertur, uti constat ex l. 1. §. si quis simpliciter, & l. ult. ff. de verb. obligat. & §. præterea, §. si de alia, Instit. de inutil. stipulat. quibus locis habetur, quòd diuersitas interrogationis ac responsionis stipulationem vitiat. Si tamen plura promissione offerantur in sensu diuiso: & vnum eorum acceptetur, valet in eo stipulatio: v. g. *Stichum & Pamphilum dare spondes? Dabo tibi Stichum*, l. inter stipulantem, §. si stipulante, ff. eod. Quòd si verò Stichum mihi dari cupiam: tu verò Stichum, & Pamphilum promittas, valet promissio Stichi: quia utilis stipulatio per inutilem non vitatur, cit. l. 1. §. sed si mihi. Sed & Pamphili promissio valebit, si incontinenti mihi placuerit. Similitérque in pecuniis: si stipulanti mihi decem, tu viginti respondeas, non est contracta obligatio, nisi in decem: præterquam si promissionem aliorum decem illico acceptes. Vide Gl. & DD. in cit. l. 1. & cit. §. præterea, vbi Ioan. Faber Instit. de inutilib. stipul. Gomez l. 2. resol. c. 9. Mol. to. 2. disp. 27.

Porrò id specialiter constitutum est, ut si quis ciuitati, vel Reipub. pollicitus fuit ob causam, puta propter incendium, vel terræ motum, vel aliquam ruinam, quæ Reipub. contigit: vel ex gratitudine, ob honorem sibi decretum, aut decernendum; statim obligetur ex pollicitatione, antequam acceptetur seu in pactum transeat: ut ad talem pollicitationem ille cogi possit, saltem in externo foro per Iudicis sententiam, iuxta l. 1. 3. 4. ff. de pollicitat. Ratio reddi debet: Quia Princeps generali lege, propter bonum publicum lata, talem pollicitanti obligationem imponere potuit, ac voluit. Necesse tamen est, ut pollicens ex sua parte promissionem externam fecerit, & non solum dandi propositum manifestaret, sicuti colligitur ex cit. l. 3. vbi dicitur, quòd *solius offerentis promissum tanquam debitum exigi possit*.

Dubium verò est, utrum similitér modo pollicitatio, aut donatio facta Ecclesiæ, vel ad piam causam, ante acceptationem valeat, ut per penitentiam reuocari non possit? Affirmat Molina to. 2. de iust. disp. 263. §. dubium, cum Felino c. 1. de pactis. Negant verò Iulius



Clarus lib. 4. sentent. §. donatio, q. 12. n. 6. Couar. i. res. sol. c. 14. n. 16. Sanch. lib. 4. moral. c. 41. n. 7. Less. lib. 2. c. 18. dub. 6. n. 38. cum Gl. in l. illud, ver. alia causa, C. de sacrosan. Ecclesiis. Quæ controuersia ex alia quæstione dependet; Vtrum, spectato solo iure naturali, & secluso positio, promissio seu pollicitatio facta absenti, ante eius acceptationem, promissorem obliget, vt in conscientia foro teneatur promissionem indicare promissario, num eam acceptare velit. quod arbitratur Molina cit. loco; consequenter affirmat, donationem factam ad pias causas ante omnem acceptationem validam esse: eò quod dispositio iuris ciuile, requirentis acceptationem ad valorem pollicitationis, causis piis nihil præiudicare possit, ante Sum. Pontificis approbationem.

Sed Sotus, Gomez, Lessius locis citatis, Sanchez lib. 1. de matrim. disp. 7. num. 24. & alij plerique contrarium sentiunt, omnem promissionem suapte natura respectiuam esse, cuius proinde vis & obligatio ex alterius partis consensu, tanquam à forma sua, dependeat. Iuxta quam probabiliorem sententiam dicendum est, pollicitationem factam Ecclesiæ, ante acceptationem eius nomine factam, reuocari posse: quod hæc sit natura pollicitationis, neque aliud iure speciali positio in Ecclesiarum fauorem statutum reperiatur.

Excipe: Nisi eiusmodi pollicitatio in fauorem Ecclesiæ, vel cuiuscunque alterius concepta, sit etiam iuramento firmata, sicuti DD. docent apud Sanch. cit. disp. 7. quæst. 3. Quia iuramentum seruandum est, quotiescunque sine dispendio salutis seruari potest, c. si verò, de iureiur. Quamuis enim hoc casu pollicitationem obliget vi pacti ex iustitia, quod bene probat Sanchez cit. loco; negari tamen non potest, quin obliget ex virtute religionis, si animus iurantis fuit, pollicitationem non reuocaturum, donec absenti, in cuius gratiam facta fuit, intimetur ad acceptandum. Et ita docet Ioan. Faber Instit. de iur. stipulat. §. si quis alij, num. 8.

Corollarium II. Vnusquisque pacificendo, seipsum, non alterum obligare; sibi, non alteri acquirere potest. Prior pars habetur in l. 11. ff. de obligat. & action. *Quæcunque gerimus, cum ex nostro contractu originem trahunt, nisi ex nostra persona obligationis initium sumamus, inane actum nostrum efficiunt.* Quamobrem certi iuris est, factum alienum promitti non posse, l. inter stipulantes, in princip. & l. stipulatio ista, in princip. ff. de verb. obligat. Posterior verò pars habetur in cit. l. stipulatio ista, §. alteri stipulari nemo potest; & ratio additur, quia inueniuntur eiusmodi obligationes, vt unusquisque sibi acquirat, quod sua interest.

Excipitur autem in cit. §. alteri, & §. si quis alij, Instit. de iur. stipulat. quod qui alterius iuri subiecti, siue sub alterius potestate constituti sunt, pro illo stipulari, promissoremque illi obligare possunt, videlicet seruus pro domino suo, filiusfam. pro patre; Regularis pro Prælato, vel Monasterio. Ratio est: Quia propter arctam coniunctionem, quodammodo eadem personæ censentur cum ijs, pro quibus stipulantur, seu obligationem acquirunt. Idemque plerique docent de publico Tabellione, stipulante & acceptante pro altero in publica scriptura promissionem, etiam extra iudicium; nam si in iudicio fiat ad Iudicis præscriptum, nemo dubitat. Vide c. quæquam, de testib. in 6. Abb. in proœm. lib. 2. decret. num. 22. Couar. rubr. de testam. p. 3. num. 18. & 20. Clarus ver. donatio, q. 13. Mol. to. 2. disp. 264. Sanch. cit. disp. 7. num. 11. Andr. Fachin. l. 8. controuers. iuris, cap. 91.

Interim tamen positum est in arbitrio domini, patris, Capituli, &c. posteaquam intellexerunt, promissionem suo nomine acceptatam esse, eandem vel ratam habere, vel respuere: quare interim pactum, seu contractus, si reciprocus est, puta mutui, commodati, claudicat; si

Religiosus nomine Monasterij contrahens, mandatum non habuerat.

Denique qui aliorum administratores sunt, puta tutor pro pupillo; curator pro minore, prodigo, amente: Parochus seu Rector pro Ecclesia, causis piis, vel rebus ad conscientiam pertinentibus stipulari possunt, cit. c. quæquam, & l. eum qui, §. ult. ff. de constituta pecunia. Vide etiam Sanchez cit. disput. 7. num. 6. & 10.

Corollarium III. Quotiescunque promissio, vel donatio acceptata est vel ab ipso donatario præsentem: aut absente per epistolam, nuntium ad id specialiter destinatum: vel denique eo ignorante, ab alia persona, cui pro altero stipulari concessum est: atque re non tradita, donator è viuis excessit: postea hæredes eius donationem reuocare hæud possunt: cum neque ipse donator, cui hæredes succedunt, eiusque personam repræsentant, talem reuocandi potestatem habuissent.

Sed quæstio est, si nulla omnino acceptatio antecessit, sed donator consensu suo in epistola, vel coram nuntio, expresso, interea dum nuntius, vel epistola ad absentem eius rei omnino ignarum destinatur, donator è viuis excedat: vtrum res nihilominus donatario tradi, & ab eo acceptari possit: an potius ad hæredes spectare debeat? Pro donatario, quod ad ipsum res destinata pertineat, stant Sanchez lib. 1. de matrim. disp. 6. num. 5. eumque secutus Less. lib. 2. c. 18. dub. 6. num. 45. Probant primò: Quia donatio hæc ex parte donantis valida & perfecta est: licet ab eo reuocabilis, sicuti colligitur ex l. nec ambigi, C. de donat. Secundò: Si gratia expedita sit ex parte concedentis, licet is moriatur antequam ad executionem processum est, tamen executor nihilominus exequi debet: Donatio autem est genus quoddam gratiæ: Ergo si nuntius destinetur non cum mandato donandi, (aiunt illi) sed vt merus executor, & traditor rei donatæ, id etiam post donantis mortem exequi poterit. Tertiò: Si in hoc ipso casu donatarius moriatur antequam donationem acceptet, hæredes illius acceptare possunt: quod signum est, donatarium, cui ipsi succedunt, ius in re donata acquisiuisse, etiam ante acceptationem.

Sed contraria sententia est communis, & vera, sicuti colligitur ex ijs, quæ tradit Couar. p. 3. rubr. de testam. num. 20. & lib. 1. resolut. c. 14. num. 13. Gomez 2. resolut. c. 4. num. 3. Mol. tom. 2. disp. 263. & disp. 264. §. iuxta hæcenus, & habetur in l. 2. ff. de donat. Sed si quis donaturus mihi pecuniam, dederit alicui, vt ad me perferret: & ante mortuus erit, quàm ad me perferat, non fieri pecuniam domini mei, constat. Quod verum est, ait Gloss. ver. domini, quàmuis mihi dictam pecuniam postea iradat: consentit l. absenti, ff. eodem. Secundò probatur ratione: Nam vel donatarius in hoc casu haberet ius acceptandi donationem ex vi pacti seu donationis, vel ex vi mandati. Primum dici non potest: Quia omne pactum requirit duorum consensum in idem: ante mortem autem donatoris donatarius neque per se, neque per alium consensit, aut acceptauit: per mortem autem extinguitur consensus donantis, argum. cap. si gratiose, de rescript. in 6. Ergo vtriusque consensus in pacti obligationem concurrere nunquam potuerunt. Neque secundum dici potest: Quia mandatum extinguitur morte mandantis, si executioni nondum dari cœpit, iuxta l. mandatum, C. mandati, & præterea, Instit. eod. Et confirmabitur hæc sententia ex refutatione argumentorum.

Ad I. respondeo. Hæc duo inter se pugnare, donationem ex parte donantis validam & perfectam esse, atque ab eodem reuocari posse: In dicta autem l. Nec ambigi, aliud non habetur, quàm donationes etiam inter absentes validas esse. quod intelligitur, posteaquam absens de donatione certior factus est, & quidè per personam



ad id destinatum. Si enim aliquis dicat, *hanc rem Caio donatam volo*; & Titius id forte audiens Caio referat; non sufficit ad donationem, donec nuntius destinatus perveniat, cum quo tanquam instrumento donantis, pactum per mutuum consensum impleatur. Quare ipse Sanchez recte docet lib. 1. disp. 7. num. 33. & lib. 3. disp. 37. num. 7. Non satis esse ad pactum perficiendum, si posterior paciscentium, intellecto prioris consensu ex epistola, vel nuntio, coram aliis consensum exprimat; sed opus esse, ut consensum seu acceptationem intimet ipsi paciscenti, vel saltem nuntio eius tanquam instrumento ad id destinato: cum alioquin consensus duorum sensibilibiter non uniantur. Sed neque in casu nostro consensus duorum uniantur, si antequam nuntius destinatus pervenit, donator mortuus est: cum enim principalis consentire tunc non possit; neque nuntius potest, ut instrumentum. Hæredes autem donatoris ideo non obligantur ad donandum; quia non succedunt, nisi in contractis iuribus, & obligationibus: donator autem ante mortem nullam obligationem contraxerat. Ergo, &c.

6 Ad secundum resp. Id specialiter decretum fuisse in provisionibus beneficiorum, dispensationibus, & eiusmodi gratiis, quæ ex debito officio Ecclesiasticæ potestatis procedunt; ut ea ex parte conferentis valida & irrevocabilia censeantur; licet alteri ius & dominium non ante acquiratur, quam re intellecta consensum præbeat. quod etiam habetur in c. si tibi absenti, de præb. in 6. Vbi Gl. marginalis notavit, ut collatio beneficii absenti fiat, non esse necessariam personam intermediam; secus autem esse in pactis & contractibus; imò verò in omnibus merè gratuitis concessionibus, donationibus, aut gratiis, quæ ad absentem diriguntur, ut notavit Sanch. lib. 3. disp. 37. num. 4. Excepto, si iura ob specialem causæ favorem aliud statuerunt, uti dixi lib. 1. tract. 4. c. 23. num. 9.

Quare hoc loco diligenter notandum est: Tamen si in Ecclesiasticis beneficiis, dispensationibus, &c. distinguere oporteat inter gratiam factam ab ipso statim principali; & faciendam à Commisariò: quod illa ab executore executioni mandanda sit, etiam post mortem principalis concedentis: non item gratia facienda conferri potest, si res adhuc integra sit, sicuti habetur in c. si cui, de præb. in 6. & ex communi docet Sanch. lib. 8. disp. 28. num. 48. & 64. Hæc tamen distinctio locum habere non potest in donationibus, aliisve pactis: cum pactum perfici nequeat absque alterius acceptatione: quare nuntius in nostro casu nunquam est executor donationis factæ; sed semper faciendæ ex voluntate domini, ideoque propriè dictus mandatarius.

Ad tertium resp. Antecedens non esse verum, nisi in casu, quo publicus Tabellio, vel alius, cui pro altero stipulari concessum est, v. g. servus pro domino suo: Procurator seu Syndicus pro Principe, vel civitate sua, rem donatam acceptat: & de hoc loquuntur Couar. & Molina ll. cc.

Nihilominus in praxi permetterem donatario, ut etiam post mortem donatoris, rem sibi transmissam à nuntio reciperet, & servaret, donec ab eo hæredes repeterant. Ratio est. Quia cum nuntius rem tradendo, cum alter eam accipiendo, sequuntur voluntatem defuncti, quæ tanquam merè liberalitatis latè ac benignè explicari debet: ut quandoque res ad eum, cui destinatur, pervenerit, eam accipere & sibi retinere possit. Nihil autem tam naturale est, quam voluntatem cuiusque rem suam in alterum transferri volentis ratam haberi, §. traditionem, Instit. de rer. div. Quamvis autem iura civilia aliter statuerint, non videntur tamen naturale exequendi facultatem in hoc casu irritam facere: sed solum civiliter cassare, & hæredibus ius rescissionis concedere, sicut in simili dixi lib. 1. tr.

4. c. 17. n. 4. de legatis in testamento minus solemniter relictis.

Porro ex tradita doctrina infert Molin. cit. disput. 263. §. iuxta hætenus dicta: Si nuntius destinatus à donatore rem iniuste detinens, vel absumens, suo tempore non tradat donatario, atque interea moriatur donator: ad duplicem restitutionem nuntium obligari: unam hæredibus faciendam: quia mandatum morte mandantis expiravit: alteram verò donatario: quia nuntius iniusta causa fuit, cur ille donatam rem non acquisierit. Ego fateor, hanc posteriorem partem simpliciter veram esse: ad priorem autem restitutionem nuntium non obligarem, ante Iudicis condemnationem.

## CAP. II.

## De Pacto nudo, &amp; vestito.

## SUMMARIVM.

1. Pactum aliud est nudum, quod in civili foro actionem non parit, licet pariat exceptionem: aliud vero est pactum vestitum, seu confirmatum, ex quo civilis actio nascitur.
2. Pacta seu conventiones sex modis confirmantur, ut ex iis civilis obligatio, & actio oriatur.
3. Si pactum simplex in tum fuit cum expressione causæ, in foro canonico actio ex illo institui potest.

**H**æc est præcipua divisio pacti in nudum, & vestitum, quam tradunt Doctores in c. 1. vbi Abb. num. 4. de pactis. Neque discrepat divisio, quam affert Vlpianus in l. iurisperitum, ff. de pactis: Pacta, siue conventiones quedam actiones pariunt, quedam exceptiones. Dicitur enim simplex conventio, siue nudum pactum, cuius naturalis vis, & obligatio civili iure confirmata non est, ita ut in foro externo actionem pariat: sed tantum exceptionem, sicuti constat ex cit. l. iurisperitum, §. sed cum, & videri de hoc potest Ioan. Faber tit. Instit. de obligation. §. nunc transeamus.

Explicatur: Si alicui volenti, & acceptanti nudè ac simpliciter promissisti, mutuo te daturum, aut commodaturum: dicitur nuda conventio, cuius naturalem, siue in conscientie foro ortam obligationem ius civile minimè quidem tollit, multò minus rei de qua conventum, solutionem, executionemve prohibet, aut retractat: tamen ad vitandam civilium actionum & litium multitudinem, eiusmodi simplices conventiones non confirmat, id est, non vult, ut Iudex ad earum executionem debitorem compellat. Nihilominus exceptionis beneficium contra Actorem, ex simplici pacto siue conventionem obligatum tribuit.

Exemplum. Titius ex vendito debet tibi aureos 100. soluendos in die S. Georgij: tu autem eidem promissisti mutuo daturum aureos 100. hoc casu petentem te coram Iudice debitos 100. Titius exceptione promissi mutui repellere potest. Idque ob remanentem obligationem naturalem, quæ iure civili non penitus extincta est, sed aliquos effectus retinet: quorum I. iam dictus est, quia tribuit ius excipiendi, & compensationem utendi. II. Si solum fuerit, quod naturali iure debetur, non conceditur repetitio. III. Pro naturali eiusmodi debito efficaciter obligatur fideiussor: potestque pro eo pignus retineri. Quæ in progressu magis patebunt.

Pactum vestitum, siue civili iure confirmatum dicitur, quod civilem etiam actionem parit: v. g. exempto competit emptori actio adversus venditorem ad mercedem sibi tradendam, numerato pretio. quæ actio instituta, & causa cognita, Iudex compellit venditorem,



secundum iustam petitionem actoris.

2 Sex autem modis facta siue conventiones civili iure confirmantur, vt ex iis actio oriatur, secundum Gl. receptam Instit. Quibus modis re contrahitur obligatio, & in cit. l. iuriscientium, §. quin imò. Primò enim pacta quædam specifica natura ac nomine suo perfecta, & quasi vestita sunt, vt emptio, venditio, locatio, conductio, societas, commodatum, depositum, & ceteri similes contractus; videlicet mandatum, mutuum, pignus, cit. l. iuriscientium, in princ. iunct. Gl. ver. similes.

Secundò vestiuntur, & confirmantur pacta interveniendi rei data ob causam, quod accidere solet in contractibus innominatis, v.g. convenisti tu & Titius, vt dares ei decem oves, pro vno bone: vterque civili iure (non item naturali, ac canonico) altero etiam invito, resiliere potestis ante rei traditionem. Postquam verò promissas oves Titio tradidisti, competit tibi aduersus eundem actio civilis; siue ea quæ dicitur *condictio seu repetitio dari ob causam, causa non secuta*: siue ea quæ dicitur *actio in factum*, seu *prescriptis verbis*, per quam compellitur contrahens ad præstandum id, de quo conventum est, videlicet dandum bouem, vel quantum tua interest, bouem datum non esse: & est in optione actoris, vtram harum actionum instituere malit, sicuti habetur in l. naturalis, §. & siquidem, & §. seq. ff. de præscriptis verbis, l. quoniam, C. cod. Verum in foro conscientie, atque canonum, dum alter contrahens paratus est ex sua etiam parte sine culpabili mora implere, penitentia seu reuocationi locus non est, sed contractus perfici debet, sicuti docet Mol. disp. 258. §. Nihilominus.

Tertiò vestitur, & confirmatur pactum adiectione ad aliud pactum iure civili firmum, iuxta cit. l. iuriscientium, §. quin imò. Veluti, si ædes Titio vendidisti, atque incontinenti seu non ex intervallo pactum adiectionis, vt inquilinum te recipiat; pactio ista, quæ per se & seorsim spectata, nuda & informis foret, adiectione ad venditionem confirmatur: quare Titium actione ex vendito ad vtrumque compellere potes; & vt pretium pro ædibus numeret, & in eas inquilinum te recipiat.

Quo eodem modo ex pignoris promissione obligatio & actio civilis oritur, propter coherentiam cum contractu, cui accedit: nisi dicere malis, id esse speciale privilegium pignoris, vt simplex eius promissio per se actionem pariat. l. si tibi, §. de pignore, ff. de pactis. Quemadmodum etiam dos simpliciter promissa actionem hodie parit, vt mox dicam.

Quartò confirmantur pacta per stipulationem, quæ Romano more interrogatione, ac responsione mutua perficiebatur: v.g. *Promittis decem oves pro bone daturum?* *Promitto.* Vnde & verborum obligatio dicta fuit, cit. ff. & Instit. de verborum obligatione, l. 1. §. verbis, ff. de actionib. & obligat. l. omnes, C. de contrahen. & commit. stipulat. Hodie verò promissiones & pacta ferme confirmari solent vel publico tabellionis instrumento, vel etiam simplici scriptura, manu promissoris subscripta, aut obsignata.

Quintò confirmantur pacta legis auxilio, sicuti notat Gl. in cit. l. iuriscientium, §. sed cum, ver. igitur. Nam iure nouo C. de donat. l. si quis argentum, ex simplici donatione, posteaquam acceptata est, actio conceditur ad rei ita promissæ traditionem. Item ex simplici dotis promissione acceptata, l. vn. C. de rei uxoriæ actione, in princip. l. ad exactionem, C. de dotis promiss. Præterea, si quis, quod alius naturali iure debet, (siue etiam civiliter debeat, siue non) se soluturum constituit, obligatur civili iure, l. 1. ff. de constituta pecunia, & §. de constituta, Instit. de actionib.

Vide Gl. ibid. ver. nulla.

Sextò confirmatur pactum iuramento, vt etiam civili iure actionem pariat, secundum probabilior sententiam Couar. c. quamvis pactum, p. 1. §. 2. & p. 2. §. 4. num. vlt. Mol. tom. 2. disp. 256. contra Bartol. in l. iuriscientium, §. quin imò, ff. de pactis, & confirmabitur ex iis, quæ infra dicam c. 9. assert. 3. in fine, & lib. seq. tract. 3. cap. 8.

RESTAT QVÆSTIO. Vtrum ex nudo pacto actio oriatur; ipectato iure canonico? secundum quod procedi solet in terris Ecclesiæ Romanæ subiectis: item in toto Christiano orbe, quod attinet ad causas, quæ vel ratione materiæ, vel personarum, ad Ecclesiasticum tribunal pertinent.

Responderi debet cum Abb. in c. si cautio, de fide instrumentorum, Syl. ver. pactum, q. 3. Couar. cit. §. 4. n. 24. Less. lib. 2. c. 17. dub. 6. Mol. disp. 257. In canonico foro actionem tribui ex nudo pacto, si initum est cum expressione causæ; secus, si nulla causa expressa sit, neque ab actore ostendi possit. Explico: Si manu Titij scriptum reperiatur, vel testibus probari possit, aut ipsemet Titius confiteatur, se promississe daturum tibi centum, seu ex mera liberalitate, seu propter præstita obsequia, vel titulo & pactione mutui v.g. compellitur fidem seruare. Sin verò nihil aliud coram Iudice ostendi possit, quàm Titium simpliciter promississe daturum tibi centum, tunc Titius excipere potest, se promississe quidem; sed sub conditione, vel causa pendente in futurum, v.g. si ipsi obsequia præstiteris, quæ præstita tamen nondum fuerunt: eiusque contrarium probandi onus in te actorem reiciet. Nam neque civili iure ex stipulatu actio conceditur contra promissorem, nisi constet, vel probata fuerit causa promissionis, sicut constat ex l. 2. §. circa primam speciem, ff. de doli mali & metus exceptione, iuncta Gloss. ver. sine causa. Ius autem canonicum ita tribuit actionem ex pacto nudo, sicut ius civile ex stipulatu: eò quòd in canonico foro non attendatur ad verborum solemnitatem; sed rei, de qua agitur, veritatem, ac contrahentium voluntatem.

Illud porro addendum; Licet actio, quæ ex nudo pacto secundum ius canonicum datur, tantum locum habeat in causis, quæ vel ratione personarum, vel ratione materiæ ad Ecclesiæ tribunal ipectant; tamen in quibuscunque pactis obligantibus in conscientia locum habere potest denuntiatio canonica, vt ad tollendum peccatum, Ecclesiæ Prælatus cogat promittentem promissis stare, iuxta cap. nouit, de iudiciis: idque notauit Mol. cit. disput. 257. ex Felino in cap. 1. de pactis.

### C A P. III.

## Quid sit contractus, & quoruplex.

### S V M M A R I V M.

- 1 Pactum aliud est gratuitum, & aliud onerosum seu reciprocum.
- 2 Contractuum alij solo consensu, alij verbo, alij scriptura, alij re perficiuntur.
- 3 Iterum diuiditur contractus in nominatum, & innominatum.
- 4 Alia diuisio est, quod inter contractus alij bone fidei dicuntur; & alij stricti iuris.

Contractus tum latè, tum strictè accipitur. Si latè accipiat, idem est quod pactum. Pactum verò aliud est gratuitum, quod ex vna tantum paciscentium parte obligationem parit: cuiusmodi est promissio stipulata, vel nudè acceptata, secundum ius natu-



rale, & canonicum, dandi, vel faciendi in gratiam alterius, sine reciproca obligatione. Imò donatio simplex, etsi nec solemnī stipulatione, nec traditione, sed sola liberali voluntate declarata sit, etiam civili foro actionem, & tradendi necessitatem parit, l. si argentum, §. ult. ff. de donat. & §. alia autem, Institut. cod. Aliud verò est gratuitum pactum, per quod ex vna tantum parte non quidem obligatio in futurum oritur, attamen ius aliquod confertur, vel extinguitur. Huc pertinet in primis acceptilatio, per quam debitum à creditore debitori gratis remittitur, & quasi acceptum habetur. Secundo spectat huc donatio ea, quæ à traditione incipit, & rei dominium in alterum gratis, & sine ulla obligatione transfert. Vide Molin. tom. 2. disput. 252. Syluest. ver. contractus, quæst. 1. Aliud denique est pactum reciprocum, siue onerosum, quod ex utraque paciscentium parte obligationem parit; & idem omnino est, quod contractus strictè acceptus, qui à Græcis *συνάλλαγμα* dicitur, & definitur in l. Labeo, ff. de verb. signif. *Utro citroque obligatio.*

- 2 Iterum pactum (puta vestitum) seu contractus latè acceptus, diuiditur in eum, qui solo consensu, & qui verbis, & qui scriptura, & qui re siue traditione perficitur, Institut. de obligationibus, §. ultimo. Contractus, qui solo consensu inuicem explicato perficiuntur, sunt emptio ac venditio, locatio & conductio, societas, & mandatum: quibus annumerari possunt iure nouo civili donatio; item ex iuris priuilegio pignus & hypotheca; denique sponsalia, ac matrimonium. Cum primum enim v. g. emptor ac venditor de merce ac pretio conuenerunt, ratus est contractus; ut actio & obligatio iure civili utrinque oriatur. Et possunt hi contractus etiam inter absentes per epistolam, vel nuntium celebrari, uti habetur tit. Institut. de obligationibus ex consensu.

Inter contractus qui verbis perficiuntur, primum locum tenet stipulatio, siue obligatio verborum: alterum acceptilatio, per quam ex stipulatione orta obligatio, contraria verborum interrogatione, ac responsione tollitur: v. g. *Quod ego tibi stipulatus promisi, habesne acceptum, perinde ac si solutum esset? Acceptum habeo.* Igitur acceptilatio est imaginaria quedam solutio, §. item, Institut. Quibus modis tollitur obligatio. Hæc tamen ad iuris civilis subtilitatem pertinent: naturali autem, & canonico iure non attenditur ad cuiusmodi verborum solemnitate, ut supra dixi.

Scripturæ contractus perficiuntur vel ipsorum contrahentium voluntate, si nolint v. g. emptionem, stipulationem, aliūve contractum antè scriptum esse, quàm instrumentum ob eam causam editum, & subscriptum sit, sicuti constat ex l. contractus, Cod. de fide instrumentorum. Vel ex iuris seu civilis, seu canonici dispositione ad formam ac veluti substantiam alicuius contractus scripturam requirentis: v. g. ad donationem 500. solidos excedentem; item ad emphyteusim, præsertim Ecclesiasticam, sicuti ex communi obseruat Clarus lib. 4. recept. sentent. §. emphyteusis, quæst. 4. Aliàs verò sæpe instrumentum conficitur non ad substantiam; sed eius probationem.

Re, siue traditione perficiuntur contractus, qui ipso nomine suo donationem, vel actionem significant, sicuti Bartolus docet in l. iuriscientium, ff. de pactis, & in rubr. C. de rerum permutat. Tales sunt mutuatio, commodatio, depositum, permutatio, & omnis innominatus contractus. Est autem civili iure discrimen inter contractus qui solo consensu, & contractus qui traditione perficiuntur: quod emptor v. g. cum primum consensit pro merce se traditurum certum pretium, cuiuslem quoque obligationem contrahat, neque per penitentiam recedere possit. Quanquam adhuc magis

consummatur & perficitur contractus mercis traditione, utpote per quam dominium eius transfertur, & ius in rem acquiritur. Qui verò promisit se mutuo daturum v. g. aut permutaturum, civili iure non obligatur, sed per penitentiam recedere potest: secus tamen est secundum ius naturale, & canonicum, ut præced. cap. dictum est.

Præterea diuiditur contractus in nominatum, & innominatum. Contractus nominatus est, qui in nomine generali actionis non stat: sed transit in proprium & specificum nomen contractus: *Ut emptio ac venditio, locatio, conductio, societas, commodatum, depositum: quin & mandatum, mutuum, pignus, & hypotheca, iuxta cit. l. iuriscientium, iunct. Gl. ver. similes: quibus adde l. feudum, emphyteusim, sponsalia, & matrimonium. II. Si nomen contractus latè accipias, annumerationem, gratuitam stipulationem, & acceptilationem.*

Contractus innominatus est, qui proprio ac specifico nomine carens, in generali vocabulo *συνάλλαγμα* siue commutationis persistit. Eius quatuor sunt species, de quibus in l. naturalis, ff. de præscriptis verbis: I. est, *Do ut des:* v. g. do tibi aurum, ut des mihi argentum. Do tibi equum, ut des mihi pannum. quæ species interdum nomen permutationis sibi proprium vendicat, sicut videre est in §. actionum, Institut. de actionibus. II. *Do ut facias,* v. g. do tibi pannum, ut colas mihi agrum. Do tibi frumentum, ut desistas à lite: nam sub faciendo comprehenditur etiam non faciendum. III. *Facio ut des,* v. g. colo tibi agrum, ut des mihi pannum. IV. *Facio ut facias,* v. g. colo tibi agrum, ut vehas mihi frumentum.

His omnibus innominatis contractibus seu commutationibus id commune est, quod per penitentiam recedere possit pars contrahens, etiam si ex sua parte contractum impleuerit, si ex altera parte impletum non sit, l. si pecuniam, ff. de conditione ob causam. Exempli causa: Dedi pecuniam tibi, ut Romam ires; iure civili repetere possum pecuniam, antequam iussit: nisi tua intersit non reuocari, quia te ad iter parando aliquid expendisti, aut lucrum omisisti: tunc enim te indemnem seruare debeo, l. si pecuniam, ff. de condict. causa data, &c. At verò in contractu nominato non est locus penitentiae & reuocationi: sed qui ex sua parte impleuit, agere debet, ut etiam pars altera impleat; nisi placeat, contractum mutuo consensu dissoluere, & l. in ciuile, Cod. de rei vindicat.

Denique diuiditur contractus latè acceptus in eos 4 qui bonæ fidei sunt, & qui stricti iuris. Sumitur autem hic bona fides, non ut opponitur dolo ac fraudi (nam hoc sensu omnes contractus bonæ fidei esse debent) sed ut idem sit, quod benigna interpretatio secundum æquum & bonum. Ius verò strictum hic accipitur, non prout opponitur equitati siue epikeiæ; atque verborum prolationi tenaciter adheret, etiam contra mentem & intentionem proferentis. Nam hoc sensu nullus contractus stricti iuris esse debet: cum enim verba substituantur ut signa & nuntia mentis, contra rationem est, ad verba potius, quàm intentionem contrahentium attendere. Dicuntur igitur contractus bonæ fidei comparatiue ad eos, qui iuris stricti appellantur; quod in illis maiorem potestatem habeat Iudex arbitrari quod æquum & iustum est, etiam si contrahentium verbis expressum non fuerat. In his autem. Iudex magis ad id, quod expressè dictum, conuentumque fuit, attendere; & non ultra iudicium protendere debet. Breuius dici potest: Contractus, qui bonæ fidei dicuntur, latiore interpretationem secundum æquitatem recipere; qui verò stricti iuris appellantur, strictioris interpretationis esse oportere. Vide de hac re Interpretes in §. actio-



num, Institut. de actionibus, Gloss. in cap. cum venerabilis, ver. bonæ fidei, Abb. ibid. num. 20. Couarruu. in reg. possessor, p. 2. §. 6. num. 4. Rebellum p. 2. lib. 1. de contractibus, quæst. 2. sect. 1. Felicianum de Solis lib. 1. de censib. c. 3.

Contractus bonæ fidei sunt emptio, venditio, locatio, conductio, negotiorum gestorum, mandatum, depositum, societas, & cæteri qui numerantur §. actionum, Institut. de actionibus. Reliqui autem omnes, qui eo loco non numerantur, contractus sunt stricti iuris; ut plerique innominati contractus, item mutuum, census, emphyteusis, gratuita item stipulatio, aut donatio, iuxta l. 99. ff. de verb. obligat. *Quicquid astringende obligationis est, id nisi palam verbis exprimat, omissum intelligendum est: ac ferè semper secundum promissorem interpretatur.* Idque etiam in votis, & legatis ad pias causas locum habere, putat Couarruu. c. indicante, de testam. num. 5. Sanchez lib. 4. moralium, c. 15. in fine, Rebellus in fine cit. sect. 1. argum. c. ex parte, de censibus, ibi: *cum huiusmodi vota gratuita fuerint ab initio, benignius sunt à viris Ecclesiasticis exigenda.* Cui consonat l. semper in stipulationibus, ff. de regulis iuris. Quamvis Abbas in cit. c. ex parte, & alij apud Couar. l. c. ob fauorem causæ piæ contrarium doceant, arg. l. Titia, §. Scia, ff. de auro & argento legato. Vide quæ dicam tract. seq. c. 11. num. 4.

Id verò certum est, quòd Principis donatio, siue beneficium, si nemini præiudicet, & communi iuri non refragetur, latissimè interpretandum sit, sicuti constat ex l. 3. ff. de constit. Principum, l. Princeps, ff. de verborum signif. c. cum dilecti, de donationibus. Idque ob liberalitatem, & munificentiam, quæ de Principe præsumitur.

## CAP. IV.

## De qualitatibus contractuum.

## SYMMARIUM.

1. Quod purè & simpliciter promissum est, confestim peti debet; quod verò in diem certum, id solui non debet, antequam ille dies transactus sit.
2. Dies incertus interdum promissioni adiicitur causæ obligationis suspendende: interdum verò causæ solutionis differende.
3. Conditio de præsentie, vel præterito, si vera est, confirmat promissionis obligationem: si falsa est, statim infirmat.
4. Conditio de futuro impossibili, reddit contractum seu promissionem irritam.
5. Conditio de futuro possibili & honesta promissioni adiecta, eius obligationem suspendit.  
Pactum conditionale, mortuo paciscente ad heredes transmittitur, sed non legatum, mortuo legatario.
6. Modus promissioni adiectus, licet eam non suspendat, tamen promissioni vicissim obligationem affert, quæ non impleta, interdum reuocari potest, quod sub tali modo datum est.
7. Donatio facta Ecclesie sub conditione suspendente, eà non impleta, corrumpit: sed donatio facta sub modo, eo non impleto, reuocari non potest: nisi id expressum sit.
8. Prelatus Ecclesie nocere potest in iure acquirendo: non in iure quaesito.  
Quod promissum est meretrici ob fornicationem: vel sicario ob eadem faciendam, patrato opere, ex iustitia debitum est.
9. Pro eo, quod iam ante ex iustitia debitum, pretium seu merces accipi non potest, nisi quid amplius, vel modo exactiore præstetur, quam obligatio incumbit.
10. Iudices, atque Officiales munera accipientes, licet frequenter peccent, acceptorum tamen dominum comparant: modo liberati ob obligationem sunt, non verò ad iniustam vexationem redimendam.
11. Pro opere, debito ex sola charitatis lege, si pretio estimabile sit, pretium exigere potest: si non licitè, saltem validè.
12. Promissio facta alieni nullam obligationem parit.

**P**actum, seu contractus, omnisque promissio, alia pura est; alia in diem, certum aut incertum; alia sub modo; alia sub causa: Item alia rei possibilis: alia impossibilis. alia rei, aut facti proprii; & alia alieni. De qui-

bus singulis dicendum est.

**Assertio I.** Quod purè ac simpliciter, nulla adiecta conditione, tempore, promissum est, confestim peti potest, l. eum qui Kalendis, §. quotiens, ff. de verb. obligat. & §. omnis stipulatio, Institut. eod. & reg. 14. ff. de reg. iur. *In omnibus obligationibus, in quibus dies non ponitur, præsentie die debetur.* Monet tamen Gl. in cit. §. omnis stipulatio, quod dicitur *confestim*, non excludere breuem aliquorum dierum moram, quæ viri boni, vel Iudicis arbitrio concedi debet debitori, ut commodè soluere possit, iuxta l. quod dicimus, ff. de solution. Deinde expectare plerique poterit debitor, donec promissarius seu creditor exigat, si nullum solutioni tempus, aut conditio appositæ erat, secundum Gloss. in l. debitores præsenties, ver. conueniendi, C. de pignorib. & notat Sanch. l. 1. disp. 28. Quod sponsus ad nuptias non obligatur, nisi alter petat: si enim taceat, censetur esse contentus mora: modò tamen faciliè petere possit: secus, si ob metum, etiam reuerentialem, aut obtinendi desperationem, vel propter obliuionem, promissarius petere omittat.

**Assertio II.** Si promissio facta est in diem certum, causæ solutionis differendæ, v. g. ad Kalendas, ad festum Paschæ (qua loquendi forma proximæ Kalendæ, & proximæ Paschæ festiuitas intelligi debet, sicuti habetur in cit. l. eum qui Kalendis) statim oritur obligatio, & actio, quæ & ad hæredes transit: tamen si creditor ante eum diem petat, exceptione repelli potest. Videl. cedere, ff. de ver. signif. & cit. §. omnis stipulatio. Quod si promissio facta erat ad certum diem, mensem, annum, non cogitur promissor soluere ante finem diei, mensis, anni, cit. §. quotiens & l. qui hoc anno, ff. de verbor. obligat. Quia adiectio diei, alteriùsue temporis, in fauorem debitoris facta est, non stipulatoris, l. cum tempus, ff. de regulis iuris. Sin verò annua quantitas, v. g. decem annui eleemosynæ, vel alimentorum nomine promissi sint, videtur solutio faciendæ in principio anni: quia ita de legatis annuis decretum est in l. 1. C. Quando dies legati cedit, & docet ibid. Gl. Accursij ver. ab initio, & §. at si ita, Institut. de ver. obligat.

**Assertio III.** Si promissio facta est in diem incertum, censetur conditionalis: idèoque obligationem, actionemque suspendit, iuxta ea, quæ dicam assert. 6. Exempli causa: Cum naues ex India appulerint, dabo tibi centum: Cum hæres meus morietur, tradantur Titio centum. Perinde est ac si dicatur, Si naues ex India appellant: Si hæres meus ante Titium moriatur. Ita habetur in l. stipulatio ista, §. inter incertâ, ff. de verb. obligat. l. si dies appositâ, ff. Quando dies legator. cedat, & l. 1. §. dies autem, ff. de condit. & demonstrationibus, & aliis iuribus, quæ citat Gomez l. 2. resol. c. 11. n. 21. Molinatio. l. tr. 2. disp. 205. & to. 2. disp. 284.

Intelligenda autem ita assertio est, ut incertum sit diem extitutum esse: Nam si certum sit diem, futurum, licet incertum, quando; ut si dicatur: Promitto, me Reipub. daturum, cum pater meus morietur. Aut, Volo, ut Titio, cum morietur, centum dentur ab hærede meo; non censetur dies, vel tempus appositum causæ obligationis suspendendæ: sed solutionis & executionis differendæ: quapropter tale legatū ad hæredes transmittitur. Ita habetur in l. si cum hæres, & l. si dies appositâ, ff. quando dies legator. cedet, & expressè in l. hæres meus, ff. de condit. & demonstrat. *Hæres meus, cum morietur Titius, centum ei dato; primum legatum est. Quia non conditio, sed mora suspenditur: non potest enim conditio non existere.* Vide Gl. in l. vn. C. ut actiones ab hæredibus, & contra hæredes incipiant.

Deinde limitari debet eadem tertia assertio: Nisi dies incertus promissioni adiectus fuerit in gratiam solius promissarii, legatarii: Veluti, si famulo propter obsequia promittas 400. aureos, dando ei, eum



matrimonium contraxerit; ne fortasse antè acceptos malè absumat; isque ante matrimonium moriatur, aut Religionem ingrediatur; transmittitur actio ad hæredes, vel Monasterium, sicuti notauit Mol. cit. disp. 206. §. si tamen dies, Rebellus p. 2. de obligat. instit. lib. 18. q. 13. & videri potest Abb. in c. nos quidem, de testam. Medina q. 24. de restitut. §. inde etiam est.

3 ASSERTIO IV. Condicio de præsentē, vel præterito, v.g. Promitto medaturum, si pater meus viuit; si mater mea mortua est; promissionis obligationem, & actionem non suspendit; sed statim confirmat, si vera est; infirmat autem, si falsa est: licet à pasciscentibus ignoretur. Ita habetur in l. cum ad præsens, ff. si certum petatur, & §. conditiones, Instit. de verborum obligat. Idemque sentiendum, si condicio de futuro necessaria sit: v.g. promitto medaturum si moriar, vel si futuris Kalendis sol oriatur, l. si pupillus, §. qui sub conditione, ff. de notatione. Nisi appareat, intentionem loquentis fuisse, tali loquendi forma tempus & diem definire, ante quem peti non debeat; ut sensus sit, dabo tibi cum moriar, vel cum futuris Kalendis sol oriatur.

4 ASSERTIO V. Condicio de futuro impossibilis secundum naturam, aut secundum mores, reddit contractum vel promissionem irritam. Ita habetur in impossibilis, ff. de verbor. obligat. Instit. de inutilibus stipulat. §. 1. & §. si impossibilis. Et reg. 145. ff. vbi dicitur: *impossibile nullum est obligatio*. Vide quæ dicam lib. 5. tract. 10. p. 2. cap. 7. número 10.

5 ASSERTIO VI. Condicio de futuro honesta, & possibilis parit obligationem suspensam, quæ etiam ad promissoris hæredes transmittitur: cuius obligationis ea vis est, quod licet promissor ante euentum conditionis, rem promissam tradere non teneatur; euentum tamen expectare debeat, atque interim promissionem renocare non possit, sicut constat ex cit. l. cedere diem, ff. de verb. obligat. & §. sub conditione, §. ex conditionali, Instit. de verb. obligationibus. Postea verò si condicio eueniat, purificatur promissio & obligatio, iuxta l. potior, ff. Quipotiores in pignore: Si non eueniat, penitus expirat vis promissionis.

Nota autem hic primò, discrimen esse inter legatum & contractum: quod legatum sub conditione, si ea pendente legatarius moriatur, penitus expirat, & ad hæredem non transmittitur, sicuti habetur in l. 4. §. & l. huiusmodi, ff. quando dies legatorum cedat, & l. vn. §. si autem aliquid, C. de caducis tollendis: Contractus autem conditionalis ad hæredes sub eadem conditione transmittitur, ut supra dictum. Rationem discriminis affert Gl. §. ex conditionali, Instit. de verb. obligat. Quia in contractu, vel stipulatione interuenit factum stipulantis, seu contrahentis, volentis sibi, & hæredibus suis prospicere, arg. l. si pactum, ff. de probat. *Plerumque tam hæredibus nostris, quam nobismetipsis cauemus.* In legato autem & fideicommissis nullum factum legatarij, aut fideicommissarij interuenit. Plerique tamen Doctores in l. si decem, §. cum petiero, ff. de verb. obligat. Gomez lib. 2. c. 11. n. 36. excipiunt conditionem potestatiuam, id est, quæ à sola voluntate promissarij pendet: v.g. Dabo tibi centum, si capitolium ascenderis: si seruum manumiseris: si enim talis conditio ab ipso met stipulatore impleta non sit, aiunt, ab hæredibus impleri non posse, ideòque promissionem in morte stipulatoris siue promissarij expirare, quibus repugnant Couar. in practicis qq. c. 39. num. 2. Mol. cit. disp. 285.

Nota secundò, discrimen esse inter promissionem vel legatum sub conditione, & promissionem vel legatum in diem certum. Nam quod in diem certum promissum, vel legatum fuit, purè ac simpliciter debetur: quapropter si ante definitum diem soluatur, eius repetitio non conceditur, l. fideiussor quamuis, ff. mandati,

& notauit Gomez n. 23. Mol. disp. 284. Quod verò sub conditione, vel in diem incertum promissum, vel legatum fuit, eius debitum suspensum manet: quare si ante conditionis euentum per errorem iuris, aut facti soluantur, repetitio conceditur, l. sub conditione, l. qui promissit, ff. de condict. indebiti.

ASSERTIO VII. Modus promissioni, contractui, vel legato adiectus: puta promitto, dono, lego tibi centum, ut Romam eas, ut sepulchrum mihi ædifices: non suspendit promissionem, donationem, legatumue: donatario tamen, vel legatario vicissim imponit gravamen siue obligationem aliquid præstandi. Ita colligitur ex tit. C. de donationib. quæ sub modo, & docet Gl. recepta in c. verum, ver. conditione, de condition. appositis, ibid. Abb. n. 2. Rebell. p. 2. lib. 1. 8. q. 13. Mol. to. 1. tr. 2. disp. 208. Ratio est: Quia donatio, vel legatum sub modo, suum esse substantiale habet absolutum, quodammodo independenter ab accessorio modo seu gravamine. Ex quo sequitur primò: Quod promissum, legatumue sub modo statim peti potest, etiam nondum impleto modo: quamuis legatarius satisfacere debet de eo implendo, l. quibus diebus, §. Thermus, ff. de condition. & demonstrationibus. Sequitur secundò: Quod tametsi promissarius, vel legatarius modum necdum impleuerit: ius tamen omne suum ad hæredem transmittit: qui etiam modum implere potest, ac debet, l. à testatore, iun. Gl. ver. condicio, ff. eod. Similiter, si legatarius ante cautionem, quam præstare debuisset, è vita excesserit, hæres eius, si eandem cautionem præstet, in possessionem mittendus erit: Et hæc dicta sunt pro intellectu assertionis, quoad priorem partem.

Quod ad posteriorem partem attinet: Vt modus, seu gravamen promissioni accessorium censetur, ideòque à promissario implendum, requiritur primò, modum incontinenti, veluti vnica pactio, donationi, alterius dispositioni adiectum fuisse. Si enim omnino perfecta, seu simpliciter facta fuerat donatio, modum aut conditionem non amplius recipit, donatario inuito, l. perfecta, C. de donat. quæ sub modo. Secundò requiritur, adiectum modum possibilem esse: si enim impossibilis sit iure, aut facto; v.g. Dono tibi ea lege, ut à Religione Catholica deficias, aut in hæresi perseueres: Vt cælum digito tangas; perinde valet promissio, donatio, vel legatum, ac si talis modus adiectus non esset: sicuti ex communi docet Molina disp. 208. §. modus impossibilis. Ratio est: Quia modus promissioni, vel dispositioni est veluti accessoria pactio seu obligatio; qua corrumpente propter sui impotentiam, non etiam corrumpit pactio principalis: cum principale non pendeat à suo accessorio.

Quæstio autem est. Si modus possibilis ac honestus à donatario, vel legatario non seruetur, vtrum donatio, vel legatum corruat, aut reuocari possit? Resp. ex doctrina Abb. cit. c. verum, de condit. appositis, num. 3. Molinæ cit. disp. 208. Inuestigandam esse mentem donantis, legantis: partim ex verbis, quibus usus est, partim ex circumstantiis, vtrum modus ab eo adiectus fuerit, tanquam causa finalis ac principalis, quæ in euentu resolui debeat in conditionem sine qua non: puta, lego tibi centum, ea lege, ut monumentum mihi ædifices: alioquin legatum retinere non possis. An verò non fuerit causa finalis ac principalis donandi, legandique: quamuis interim donator, vel legator, occasione ista, aliquam etiam obligationem imponere intenderit: tunc reuocari non potest donatio, vel legatum: sed compelli debet donatarius, vel legatarius admodum seruandum: vel præstandam æstimationem eius, quod interest modum non seruari.

Id verò peculiariter fauore causæ piæ statutum est in c. verum, de condition. appositis: Vt donatio facta Ecclesiæ sub modo, eo non seruato, reuocari non debeat:



debeat, nisi in donatione expressum fuerit. Quia in dubio præsumatur donatio principaliter facta propter Deum, & pro remedio peccatorum, ait. Abb. loco supra cit.

Cæterum, etsi expressum fuerit, vt, si modus non seruetur, (v.g. si fundus Ecclesiæ donatus, & alienari prohibitus alienetur) reuocetur facta donatio; non nocebit tamen Ecclesiæ, si solus Prælati sine Capituli consensu modum donationis transgrediatur. Alia ratio est, si donatio facta fuerit sub conditione suspendente, eamque Prælati, qui res Ecclesiæ administrat, non adimpleat; corrumpitur tunc donatio. Causa discriminis est, quia Prælati Ecclesiæ nocere potest in iure acquirendo; non item in iure acquisito, secundum Gl. in c. vlt. 16. quæst. 6. Atqui res donata sub conditione, ante eius euentum, non acquiritur donatario; sed donata sub modo statim acquiritur, antequam modus impleatur, vt supra dictum. Et ita resoluit Abbas loco cit. & in c. verum, n. 28. de foro compet.

Exemplum habes, Titius promissit Ecclesiæ se donaturum centum aureos, si pro suis maioribus anniuersariis celebretur; sed Pastor Ecclesiæ postea recusat conditionem implere, promissor liberatur obligatione. Sin verò ius foundationis legato, aut donatione Titij acquisitum est Ecclesiæ, cum modo & obligatione, vt anniuersarius dies celebretur; fundatio reuocari non potest, ob non impletum postea modum; sed agi debet ad eius impletionem. Tum quia administratores Ecclesiæ obesse non possunt in iure iam acquisito: tum quia res semel Ecclesiæ acquisita, quasi sacra facta est, & in speciali dominio Christi constituta: ideoque reuocari non potest, vt Innoc. notauit in c. verum, de foro compet.

Illud etiam obiter notandum cum Abb. in cit. c. verum, num. 4. de condit. appositis, Licet donator, vel testator conditionem aut grauamen apposuerit, vt res alienari non posset; non censi tamen prohibitam alienationem in casu necessitatis, v.g. ad redemptionem captiuorum, si alia bona non superant, & ius naturale charitatis, & c. talem alienationem postulet.

**ASSERTIO VIII.** Promissio rei impossibilis siue secundum naturam, siue secundum mores, ipso iure irrita est. Nam *nemo potest ad impossibile obligari*, reg. in 6. Et, *in malis promissis fidem non expedit obseruari*, reg. 69. eod. Fieri enim non potest, vt aliquis ex iustitiæ virtute obligetur ad id, quod vel nullo modo, vel saltem non sine peccato præstari potest. Quare Ildorius relatus in c. 5. causæ 22. q. 4. *In malis promissis rescindit fidem: In turpi voto muta decretum*. Cuius ratio adiungitur, *Quia impia est promissio, qua scelere adimpletur*. Sed etsi promissioni rei malæ iuramentum accesserit, non est obligatorum contra bonos mores præstitum iuramentum, reg. 58. in 6. Neque iuramentum potest esse vinculum iniquitatis, c. quanto, de iuramento. Exempli causa: Si iuratus promissit puellæ quippiam daturum, vt turpiter agat, nulla oritur obligatio: & quod ob eam causam nondum impletam, à puella acceptum est, naturali iure, siue in conscientiæ foro restitui debet danti.

Veruntamen, posteaquam puella non sine peccato, corporis sui copiam fecit; non tantum, quod ob eam causam datur, accipere, & retinere potest; sed etiam quod veluti pretium promissum & nondum datum, omni iure exigere, sicuti constat ex l. 4. §. sed & quod, ff. de condit. ob turpem causam, & docet S. Thom. 2. 2. q. 62. a. 5. ad 2. Abb. in c. quia plerique, n. 14. de immunit. Eccles. Adrian. in 4. vbi de restit. §. oritur alia quæstio, vtrum mereretur. Caiet. 2. 2. q. 32. a. 7. Sotus lib. 4. q. 7. a. 1. ad 2. Couar. reg. peccatum, p. 2. §. 2. n. 1. Syl. ver. restitutio, 2. §. sed quod dictum, Pet. Nauar. lib. 4. c. 2. n. 114. Rebel. cit. lib. 18. q. 1. num. 9. Vasq. in moralib. c. 7. dub. 1. & seqq. contra Ioannem Medinam C. de restitut. q. 20. Nau. in man. c. 17. n.

38. 41. Item promissit sicario daturum decem aureos, si hominem occiderit, nulla nascetur obligatio, nisi posteaquam ille facinus non sine labore ac periculo suo, in tui gratiam patravit; tunc enim, spectato iure naturali, teneris soluere; vel si soluisti, repetere non potes: propterea quod molestia & periculum ab illo in tuam gratiam susceptum, pretio æstimabile sit, sicuti docent Nau. c. 17. n. 31. Couar. cit. §. 2. n. 4. & 5. Sauer. restitutio, n. 9. & 18. P. Nauar. lib. 4. de restit. c. 2. n. 130. Less. lib. 2. c. 18. n. 18. contra Sotum l. c. ante solut. tertij, Cordub. lib. 1. quæstionarij, q. 32. & alios apud Couar. existimantes, eum qui promissit quippiam pro opere patrando legibus prohibito, ac puniri solito, v.g. homicidio; secuto opere, non obligari ad implendum promissum.

Præterea, si cum Iudice pactus fueris, vt non sine periculo suo, in tui gratiam suscepto, iniquam sententiam ferat, eâ latâ, probabilis est opinio Nauar. c. 17. n. 39. Rebel. loco cit. Tolet. lib. 5. c. 21. in fine, Rodriq. in sum. p. 2. c. 40. concl. 2. Molina to. 1. tr. 2. disp. 94. §. contraria sententia, Less. lib. 2. c. 14. dub. 8. n. 52. Obligationem saltem naturalem exinde oriri; vt quod ob eam causam à Iudice acceptum fuit, restitutioni obnoxium non sit in conscientiæ foro: quamuis contrarium doceant Adrianus in 4. vbi de restit. §. restat inquirere, an extorta, Sotus cit. a. 1. S. Anton. p. 2. tit. 2. c. 5. §. 1. Lopez p. i. instruct. cap. 106. Sairus in clau. lib. 10. tract. 5. cap. 3. num. 12. & alij, quibus fauere videtur S. August. epist. 54. ad Macedonium.

Denique si cum aliquo pactus sis, pecuniâ promissâ, ne te accuset de crimine patrando, qui iure te accusare potest, turpis quidem est pactio; sed posteaquam crimen patratum fuit, vtrinque obligatio oritur, & pretium acceptum ante Iudicis sententiam restituendum non est: Siquidem ius accusandi, quo ille se priuat, pretio æstimabile est. Ita Sanchez lib. 4. de matrim. disp. 9. n. 10. Quamuis non pauci Doctores contrarium responderent, propter regulam traditam à Palud. in 4. d. 15. q. 2. a. 4. Medina cit. q. 20. Syl. ver. restitutio, 2. §. 1. Soto cit. a. 1. Si turpitudine versetur tam ex parte dantis, quam ex parte accipientis, (sicuti in propriis casibus videre est) restitutionem rei acceptæ faciendam esse fisco, vel Ecclesiæ, aut pauperibus. Sed regula ista locum tantum habet in externo foro, in quo pacta de patrando crimine contra iustitiam; aut si patretur, non accusando, seuerè prohibentur, ac puniuntur; ideoque eiusmodi sceleratorum hominum actiones non admittuntur, iuxta l. 3. ff. de condit. ob turpem causam, & l. generaliter, & seqq. ff. de verb. obligat. l. in hæredem, ff. de calumniator. vbi dicitur; Eiusmodi datum ob turpem causam etiam ab hærede auferri. Quæ in conscientia locum non habent ante Iudicis condemnationem.

**ASSERTIO IX.** Nulla oritur obligatio, neque domini translatio, si aliquid tanquam pretium promissum, datumue fuerit eius rei gratia, ad quam præstendam promissarius iam antè ex iustitia obligatus est: veluti si latroni aliquid dederis, ne te, vel alterum iniquè occidat; vel Iudici, iustum salarium habenti, vt iustam sententiam ferat, causæ executionem iniquè ne differat. Ita docet ex communi S. Anton. & Adrianus ll. cc. Couar. reg. peccatum, p. 2. §. 3. n. 1. Nau. c. 17. man. n. 96. Sairus l. c. dub. 2. Mol. to. 1. tr. 2. disp. 93. Valentia t. 3. disp. 5. quæst. 6. p. 5. §. 2. quæst. 4. Less. dub. 9. n. 63. Pet. Nau. lib. 4. c. 2. n. 94. Rebel. p. 2. lib. 10. q. 20. & sumitur ex l. 1. & 2. ff. de condit. ob turpem causam. Ratio est: Quia hoc casu Iudex v. g. nullum accipiendi, vel datum retinendi titulum siue ius habet. Neque enim habet ex pacto gratuito: quis suppono, non esse tibi animum donandi; sed tanquam pretium dandi. Non item ex pacto oneroso: Onerosi



enim pacti ea natura & conditio est, quod utrinque obligationem pariat: Atqui nulla noua obligatio imponitur ei, qui iam ante ex iustitia obligatus est facere, vel intermittere aliquid: adeoque contrarium agendo, presentem iniuriam infert. Quapropter dici solet, *Operis iustitia non posse fieri venalis*: id est, quod alicui iam ante ex iustitia debitum est, non posse eidem constituto pretio vendi.

Quædam hoc loco notanda: Primò, Si Titius mecum paciscatur, seu fœdus ineat, quod imposterum nullam mihi, vel amico meo iniuriam inferre velit, certum est, illum ex tali promissione voluntariam iustitiæ obligationem contrahere, ita ut perfidus censeatur, si non impleat. Exinde autem videtur consequens, quod in compensationem susceptæ obligationis pecuniam illi, aliudue pretio æstimabile promittere possim; adeò, ut spectato iure naturali, eiusce mercedis solutio valida existat, & à Titio res data retineri possit. Quamquam, si Titius promissum exigat, per exceptionem defendere me licet: cum etiam datum iuxta legum decreta condicere seu repetere possim, l. 2. ff. de condict. ob turpem causam: ne videlicet aliquis commodum inde ferat, ex quo pœnam meretur.

Secundò notandum est: Si Iudex, Tabellio, Advocatus, Medicus, artium Professor, &c. à Rep. conducti sint absque stipendio sufficiente; quamuis hoc casu ex iustitia obligentur ad præstandam operam partibus litigantibus, contrahentibus, ægris, &c. non tamen gratis: sed mercedem exigere iure possunt. Eademque ratio est de piscatore v. g. qui naufrago ex charitatis lege succurrere debet; sed interim laboris sui pretium omni iure exigit.

Deinde, licet Iudex, Tabellio, &c. sufficiens salarium habeant, nihilominus cessante scandalo, & prohibitione legis positivæ, accipere aliquid possunt, tanquam pretium laboris ac diligentiae extraordinariæ, ad quam adhibendam alioquin non obligantur: veluti si Iudex augendo laborem, alicuius causam, sine aliorum damno velocius expediat: Si artium Professor nihil in publica prælectione prætermittens, priuato & extraordinario labore aliquos erudiat: quo modo limitari debet doctrina Nau. c. 25. n. 58. Item, si famulus expeditionem causæ apud dominum diligenter, ac frequenter urgeat. Cautè tamen tali licentia utendum esse, monet Molina to. 1. tr. 2. disp. 88. Atque cauendum, ne talia cum alterius iniusto damno coniuncta sint: Ut si Minister publicus, propter oblatum sibi munus, vnius causam citius expediat, posthabitis alijs, qui diutius expectant, & ante alios expediri deberent.

Sed ponamus, plures adesse, qui æquali iure gaudeant; ut in Iudicis arbitrio positum sit, quem citi præponat: peccabitne Iudex, si vnius causam ante alios expediat, ex pacto oblato muneris? Res ista periculo non vacat: spectato tamen naturali iure, non audeo hominem damnare: quia ea in re alijs iniuriam non infert: in gratiam verò Titij remuneratoris suscipit novam obligationem, ante alios expediendi causam ipsius, quæ obligatio pretio æstimabilis videtur.

10 Præterea, licet Iudices à partibus contendentibus munera liberalia accipientes, non raro graviter peccent, seu scandali causa seu ob periculum iustitiam pervertendi, convenienter illi Exod. 23. *Nec accipies munera, quæ etiam excæcant prudentes, & subvertunt verba iustorum.* Acceptorum tamen dominium comparant, naturali iure spectato: tametsi nihil in fauorem partis donantis, sed secundum merita causæ etiam contra donatorem iudicent. Sed esto donanti propositum fuerit muneribus conciliare animum Iudicis, ut sibi litis victoriam adiudicet, fuit tamen hæc tantum causa impulsiva donandi, non continens conditionem sine qua non, uti dicam cap. seq. n. 3. & 4.

Quineti lex positiva acceptionem munerum pro-

hibeat, non tamen accipiens ante Iudicis sententiã ad restitutionem obligandus videtur; præterquam si lex exprimat, ut non tantum illicita, sed etiam inualida acceptio sit: sicuti expressum est de delegato Papæ in c. statutum, §. si quid, de rescriptis in 6. Et de Ecclesiarum visitatoribus c. 2. de censib. in 6. Excipiuntur tamen esculenta & poculenta moderata, quæ merali liberalitate offeruntur, cit. c. statutum, §. insuper, &c. Felicis, de censib. in 6. Vide Syluestrum ver. Iudex, r. q. 8. Rebell. p. 2. lib. 18. q. vlt. Molinam disp. 85. Ioach. Mynsinger. cent. 2. obseruat. 75.

Sin verò Iudex, aliudue Officialis, quæ iusta sunt, neget, v. g. instrumento sigillum apponere, nisi donum ipsi offeratur; iniusta hæc erit extorsio, ex qua restituendi obligatio nascitur, si Officialis publicum stipendium habens, neque iure, neque permissa consuetudine aliquid ut debitum sibi exigere possit, quæ de re Gabr. in 4. d. 15. q. 6. a. 3. dub. 5. Deinde si iudici, vel alteri Officiali munus offeratur causa redimendæ vexationis, ne causam nimis diu protrahat, aut ne parti aduersariæ iniuste faueat; tale acceptum restitutioni obnoxium videtur: cum non merè liberaliter datum sit, sed ex metu & admixto inuoluntario: quamquam etiã hoc casu interdum præsumi potest, eum qui munus obtulit, restituendi obligationem remittere, sicuti notauit Rebell. lib. 18. q. vlt. n. 5.

Illud porro in quæstione est, utrum ob aliarum virtutum, v. g. Charitatis, Religionis opera, ad quæ præstanda aliquis simpliciter obligatus est, pretium accipi possit? Negant Salon 2. 2. q. 62. a. 5. controu. 3. concl. 4. Ioan. Medina C. de restit. q. 25. concl. 2. Sairus loco supra cit. n. 23. Mol. disp. 93. concl. 2. Less. lib. 2. c. 14. dub. 9. n. 69. cum Nau. c. 17. n. 34. ubi ait, consequentiam hanc regulariter validam esse: Iste tenetur opus gratis facere, i. tametsi ei nihil detur: ergo pretium accipere nõ potest. Contrariũ spectato iure naturali affirmant Valentia cit. q. 4. Vasq. de rest. cap. 7. dub. 5. n. 45.

Sed arbitror distinguendum esse: Vel enim opus pretio æstimabile non est; ut Missæ auditio, Baptismus; & tunc simoniacum esse videtur, illud agere quasi ex obligatione pro re temporali data, vel promissa, quæ de re dicam lib. 4. tr. vlt. c. vlt. §. 2. n. 7. Vel opus secundum se pretio æstimabile est; tunc etsi ex charitate alicui debitum sit, probabiliter dicitur, si non licitè, saltem validè pretium accipi posse, sine restituendi obligatione: v. g. si cum paupere, cui in grauissima necessitate constituto, gratis etiam succurrere ex charitate debebas, pactum reciprocum in eas; videtur id subsistere. Cum enim ex sola charitate obligatus sis, paciscendo suscipis novam, auctioremque obligationem iustitiæ, quæ pretio compensabilis est; si non licitè hoc casu, saltem validè. Deinde verò, cum tale pretium accipiendo pro opere, quod gratis præstare debebas, contra charitatem solum peccaris; non videris ad restituendum obligatus: quia radix seu obligatio restituendi ex violatione iustitiæ, non charitatis oritur, sicuti notauit Mo. l. c. §. maius dubium, Rebell. cit. lib. 18. q. 21. Eaque resolutio multò magis locum habet, si ab altero non paupere pretium pactus sis, vel acceperis, in compensationem operis, quod alioquin ex charitate alicui indigenti præstare tenebaris: suscepisti enim tali pactone novam iustitiæ obligationem, moderato pretio æstimabilem, ut dixi.

Ceterum, si tibi non veluti pretium boni operis detur, sed liberaliter donetur sub conditione, causa, modo; v. g. depositum alicui personæ reddas, ut ab homicidio abstineas, ut Christianus, vel Religiosus fias, Missam audias: valebit pactum, & quod ita promissum est, exigi ac retineri potest in conscientiarum foro. Quia sicuti precibus, aut minis; ita & promissis, ac muneribus fas est inducere homines ad opera bona virtutum atque abducere à peccatis. Vide Med. q. 27. de rebus ob



causam honestam acceptis, Cod. de restitut.

Denique ex his inferitur doctrina Vasq. cit. c. 7. n. 49. Licet valeat pactum dandi Titio decem sub conditione, si debitum ex iustitia restituat personæ tertiæ, non autem valet pactum sub conditione, si restituat debitum tibi ipsi promissori. Ratio discriminis est; Quia in priore casu Titius accipit iure donationis gratuitæ: In posteriore autem casu, si videlicet opus, pro quo aliquid datur, cedat in commodum dantis, censetur datio fieri per modum commutationis: quæ tamen commutatio nulla est, si Titius alioquin debitor sit ex iustitia; ideoque nihil tibi vicissim tradat, quod secluso tali reciproco pacto, non debeat, vt supra dictum.

12 ASSERTIO X. Promissio facti alieni inutilis est. Ita habetur in l. quæcunque gerimus, ff. de action. & obligat. l. stipulatio ista, ff. de verb. obligat. & institut. de inutilibus stipulationibus: Si quis alium daturum, facturumue quid promiserit, non obligabitur: veluti, si spondeat Titium quinque aureos daturum. Quod si effecturum se, vt Titius daret, sponderit, obligatur: quia tunc proprium factum manifestò promittit, ait Gl. ibid. Sed etsi id promissor facti alieni non exprimat, tamen in dubio præsumendum esse in foro canonico, promittere eum voluisse curaturum se, vt ab altero fiat, ex communi docet Couar. c. quamvis pactum, p. 2. §. 5. n. 1. & 2. Mol. to. 2. disp. 268. §. quod ad secundum, Sanch. lib. 1. de matrim. disp. 24. n. 8. Quia alioquin inutilis esset promissio. Idque etiam civili iure locum habet, si iuramentum promissioni adiectum sit, teste Gl. & Doctoribus citatis: quia præsumendum non est, promissorem periculi periculo se committere voluisse, factum alienum temere promittendo. Alios præterea casus numerant Gl. Sanchez ll. cc. in quibus alieni facti promissio obligationem parit, civili iure.

## CAP. V.

## De contractibus ob errorem, aut dolum initis.

## SUMMARIUM.

1. Error circa rei substantiam, omnem contractum naturali iure irritum reddit.
2. Error circa obiecti qualitatem; licet dolo alterius contrahentis proveniat: si tamen concomitans tantum sit, non reddit contractum infirmum, aut infirmandum.
3. Error circa obiecti qualitatem, non proveniens ex dolo contrahentis, etsi sit causa operis, non infirmat contractum; præterquam si intentio conditionalis sit, non aliter promittendi, aut contrahendi, nisi existente tali circumstantia.
4. Defectus cause principalis tribuit donatori ius repetendi; non item defectus cause impulsivæ tantum.
5. Contractus alij facilius, alij difficilius solvi possunt.
6. Si error, vel dolum dantis causam contrahendi, proveniat ab altera parte contrahente, non sine iniuria; valet quidem contractus propter consensum absolutum, tamen rescindi potest.

**S**upponendum. Quod error vel versatur circa rei substantiam; vel circa qualitatem, & tunc vel est error antecedens, qui dedit causam contrahendi; vel tantum error concomitans. Similiter dolum (sive is ab altero contrahente, sive à tertia persona proveniat) interdum est antecedens, sive causa contractus: quando, nisi dolum intervenisset, non contraxisses. Interdum verò est tantum concomitans, sive incidens in contractum: quando nihilominus contraxisses, tamen si deceptus non fuisses.

1. ASSERTIO I. Error circa rei substantiam, sive obiectum substantiale, omnem contractum ipso naturali iure irritum reddit. Veluti, si emas vitrum pro gemma,

acetum pro vino, aurichalcum pro auro, stannum pro argento. Item si liberaliter dones, aut beneficium aliquod conferas Petro, quem putas esse Ioannem, donatio irrita est. Ita omnes. Quia errantis nullus est consensus, l. 9. C. de iuris & facti ignorantia. Sine consensu autem non consistit contractus, quippe à libera voluntate pendens. Quare donatarius in tali casu obligatur ad restituendam rem sibi datam; & venditor ad restituendum pretium, recepta merce sua.

Oportet autem rei substantiam non spectare absolute, sed in ordine ad voluntarium actum seu contractum; vt illud dicatur obiectum substantiale, circa quod voluntarius actus per se, non per accidens versatur. Quæ ratione colligis, quod persona, cui aliquid donatur, plerumque pertinet ad obiectum substantiale donationis, per quam voluntatis liberalitas erga certum hominem exercetur. Non item plerumque pertinet ad obiectum substantiale emptionis: cum ferme nihil intersit ementis, num ab hæc, an ab alia persona emat: neque intersit vendentis, siue huius, siue alteri vendat. Quod si verò aliquis explicitè, vel implicitè intendat donare, aut eleemosynam dare homini presenti, quicumque sit; aut emere rem præsentem, quæcunque sit; tali casu error circa rem, vel personam accidentaliter tantum censeri debet.

ASSERTIO II. Error circa obiecti qualitatem, seu circumstantiam, quamvis dolo alterius contrahentis ingeneratus, si tamen concomitans tantum sit, non reddit contractum infirmum, aut infirmandum. Est communis assertio. Cum enim error iste non auferat consensum substantialem, ideo naturali iure validum contractum relinquit: & cum non existat causa contractus, ideo non est ratio, cur remoto errore, siue acquisita scientia veritatis, contractus infirmari debeat. Exemplum. Si emisti vinum Austriacum, persuasus esse Rhenanum, quod tamen emisisses, etsi non ignorasses. Interim verò decepto aduersus decipientem actio competit, vt soluat quanti interest, dolum adhibitum non fuisse. Videri potest Medina C. de restit. q. 33. Sotus lib. 6. q. 3. 2. 2. Molin. to. 2. disp. 352. concl. 4. Sanchez lib. 1. de matrim. disp. 64. n. 6. & disp. 65. n. 2. Lessius l. 2. c. 17. dub. 5. n. 28. Becanus r. 2. opusc. de fide hæreticis servanda, c. 3. assert. 2. & quæ infra dicam cap. 17. n. 8.

ASSERTIO III. Etsi error circa qualitatem det causam contractui, si tamen non proveniat ex dolo eius, qui tecum paciscitur; sed vel propria persuasione, vel tertiæ personæ malicia decipiaris, validus est contractus tam gratuitus, quam onerosus. Ita Bartolus in l. & eleganter, ff. de dolo; Gl. in c. cum dilecti, de emptione & vendit. ibid. Abb. n. 6. & 7. Couar. reg. possessor, p. 2. §. 6. n. 6. Less. l. c. n. 3. Becanus assert. 3. Cum enim error non sit circa obiecti substantiam, permanet consensus substantialis, quo contractus perficitur. Quamobrem qui ex tali contractu rem aliquam à te consecutus est, non tenetur ad eius restitutionem; cum nullam tibi iniuriam intulerit. Si tamen à tertia persona deceptus fuisti, competit tibi aduersus eam actio de dolo, cit. & eleganter, §. 1.

Verum assertio hæc limitari debet; Quod error circa qualitatem vitiat promissionem, aut contractum, si intentio actus, aut virtute conditionalis est non promittendi, aut contrahendi, nisi existente tali qualitate, aut circumstantia. Ita Valentia r. 3. disp. 5. q. 20. p. 4. concl. 4. Sanch. lib. 10. de matrim. disp. 9. n. 13. & lib. 4. moral. c. 2. n. 6. eademque videtur sententia Conradi de contract. q. 57. Censeri autem debet intentio virtute conditionalis primò; Si rem aliquam non simpliciter promittere, vel in contractum deducere voluisti, sed vt affectam tali circumstantia, quam falsò inesse existimabas: tunc enim qualitas siue circumstantia ad obiectum promissionis siue contractus intrinsecè pertinet. Exemplum



momenti esse. Cum autem secundum ius canonicum, & conscientiam, inter contractus bonæ fidei, ac stricti iuris, nullum in hac re discrimen sit, ideo dicere cogimur, omnes omnino contractus, quibus dolus malus à contrahente adhibitus causam præbuit, inuitos esse. Probant secundò ratione: Naturalis æquitas non patitur, ut aliquis per iniuriam ius & actionem consequatur, arg. c. 1. de eo qui duxit, & c. ibi, *ne lucrum de dolo suo reportet*. Ergo dolo nulla actio competit, neque ius ullum ex contractu acquiritur; licet ipse vicissim obligatus maneat ad seruandum contractum, si deceptus velit.

Ad primum respondetur ex doctrina Gl. in cit. §. 1. Instit. de exception. & aliorum in c. cum dilecti, num. 6. de empt. Contractus bonæ fidei ipso iure (intellige civili, sicut explicat Couarru. l. c.) irritos, seu nullius momenti esse, non secundum suam substantiam; sed secundum effectum, quia Iudicis auctoritate rescindi debent, facta etiam restitutione fructuum, (iuxta c. 2. de his quæ vi) & concessa vtili vindicatione rei contra quemuis possessorem; perinde ac si ea semper in dominio decepti permanisset, & contractus ab initio irriti fuissent. Quod iure Prætorio, canonico, & naturali in omnibus etiam stricti iuris contractibus locum habet. Vide Less. cit. c. 17. dub. 6. num. 39.

Ad alterum respondetur; Deceptorem ius & actionem consequi non ex iniuria; sed ex mutuo, eoque absoluto & substantiali consensu. Ex iniuria autem potius obligationem acquirit, ut contractum rescindi patiatur, si deceptus petat, & exceptione aduersus deceptorem se defendat. Imò tametsi non excipiat, quia dolum commissum ignorat, nihilominus in conscientia obligatus est deceptor integrum damnum resarcire, quod ob eam causam deceptus incurrit: nū præsumere possit, eum talem restitutionem remittere, sicut supra etiam dixi de elemosyna per fraudem & simulationem acquisita: quæ licet ob iniuriam, restitutioni obnoxia sit, tamen interdum præsumi potest, eam remitti. Idemque dicendum de acquisitis per ementita seu uicia à Magnatibus.

Illud verò ad extremum annotare libet; Multum referre, utrum ipse contrahens dolo induxerit alterum ad contractum, an verò is à tertia persona inductus fuerit. Si enim ipse contrahens induxit, omnia detrimenta, quæ ex eiusmodi contractu alteri acciderunt, præstare debet: quandoquidem eorum iniusta causa fuit, sicuti habetur in l. Iulianus, ff. de action. empti. Interdum verò, si contractus necdum omnino consummatus est, v. g. instituto contracta venditionis, res nondum tradita; tenetur deceptor abstinere à consummatione: quia sicuti iniuriam facit contractum incipiendo per dolum, ita eundem consummando. Idemque videre est in sponsalibus: si enim dolo ac mendaciis puellam induxisti ad promittendum, debes abstinere à matrimonio, vel dolum seu simulationem aperire: alioquin iniuriam ceptam non auferis, sed continuas & auges. Sin verò, sine tua culpa, alter contrahens deceptus est: tunc ordinariè potes petere ab eo executionem contractus: quamuis is ius excipiendi habeat in sponsaliorum contractu, suapte natura magnam libertatem requirente. Si tamen defectus occultus in sponso grauis ac perniciosus sponsæ esset, ut morbus gallicus, lepra, epilepsia, & c. tunc sponsæ indicandus foret, vel à matrimonio abstinendum: cum alioquin grauis & iniusta perniciēs ei inferatur à sponso; sicuti, si quis mercem, dissimulato occulto pernicioso vitio, vendat, v. g. ligna cariosa, quæ ædificio, ad quod emuntur, certam ruinam allatura sint. Quæ de re vide Coninck tom. 2. disput. 23. dub. 12.

## CAP. VI.

## De contractibus ob metum initis.

## SVM MARIVM.

- 1 Promissiones & contractus initi ex metu, proueniente ab intrinseco, omni iure valent.
- 2 Promissiones & contractus directè extorti per metum grauem, prouenientem ab extrinseco, licet valeant iure naturali, & ferme etiam iure positivo; tamen pro arbitrio metum passi, rescindi possunt.
- 3 Matrimonium, & sponsalia; Item Religionis professio, & votum profrendi, vel Religionem ingrediendi, per metum grauem infirmantur, positum iuris constitutione. Vtrum alia vota simplicia per metum grauem ipso iure infirmantur, non satis constat.
- 4 Metus levis iniuste incussus, & qui dici solet reuerentialis, si efficiat inuoluntarium mixtum, sufficientem causam præbet in foro conscientie, atque etiam implorato Iudicis officio rescindendi contractus, qui solubiles sunt.
- 5 Idemque sententium de importunitate precum, si efficiant inuoluntarium mixtum voluntarium.

**S**uppositis ijs, quæ de metu & coactione dixi lib. 1. Tract. 2. cap. 6. sit prima assertio: Promissiones & contractus initi ex metu proueniente ab intrinseco, omni iure validi ac firmi sunt. Ita ex communi Medina de rebus restituendis, q. 3. causa 2. Sanch. lib. 4. de matrim. disp. 9. num. 7. Mol. tom. 2. disp. 267. Mart. Becanus 1. tract. 1. c. 2. Exempli causa: Si puellam in matrimonium ducere, aut Religionem profiteri sponte eligas, ut mortis tibi decretum supplicium effugas: aut si castitatem Deo voucas; elemosynā pauperi promittas, ut naufragio, vel alio malo iuste, vel iniuste, aut fortuito tibi impendente, per Dei auxiliū libereris. Eademque ratio est, si alius tibi iustum metum incutiat, ad extorquendam donationem, aliūve contractum, quin & matrimonium, ac Religionis professionem, sicuti docet Nau. c. 17. num. 15. man. & lib. 1. consil. 8. de his quæ vi, edit. 2. Sanch. lib. 4. disp. 13. num. 3. Mol. cit. disp. 267. Becanus cit. c. 2. conclus. 1. Sic qui sponsalia contraxit metu excommunicationis, compellitur ad ineundum matrimonium, c. ex literis, 2. de sponsalib. Et qui virginem violauit, compellitur eam dotare, vel ducere, iuxta c. 1. de adulteriis: Monachus item ob crimen simoniæ compelli potest ad ingrediendum, & consequenter profitendum Ordinem strictiorem, c. de regularibus, de simonia. Et qui aliquid promittit, ne accusetur de crimine ab eo, à quo iuste accusari posset, obligatur promissione, alterumque vicissim sibi obligat. quæ de re Nau. Sanch. ll. cc. Rodriq. to. 1. summa, c. 206. n. 11. Ratio horum est; Nam qui ob metum contrahit, aut promittit, is habet absolutum & simpliciter dictum consensum: ergo obligatur. Nec refert, quod habeat adiunctum inuoluntarium conditionatum; nollem, nisi malum timerem. Condicio enim nihil ponit in esse: sed reliquit absolutam electionem boni minoris, ob vitandum malum maius. Vide de hac re S. August. epist. 48. ante medium. Deinde, cum metus iste dans causam contractui, omni iniuria careat: non est ratio, cur contractus postea rescindi possit, aut debeat.

Assertio II. Promissiones & contractus directè extorti per metum grauem, ab extrinseca persona prouenientem, non sine iniuria, validi quidem sunt iure naturali, & ferme etiam iure positivo: tamen pro arbitrio metum passi, rescindi possunt. Hæc est sententia Gl. in c. Abbas, de ijs quæ vi, ver. coactus, ibid. Panormitani, & aliorum, qui dicunt, quod *renunciatio beneficii per metum facta valet: licet peti possit restituito in integrum, actione quod metus causa*. Item Gl. in c. vn. ver. vacuamus,



ebd. tit. in 6. Syl. ver. metus, q. 8. Gabr. in 4. d. 15. q. 4. in fine, Nau. lib. 1. consil. 4. de iis quæ vi, edit. 2. Ion. Fabri Instit. de obligat. §. nunc transeamus, ver. quæritur unde, Feliciani de Solis lib. 1. de censib. c. 1. n. 12. Vasq. 1. 2. disp. 27. c. 3. n. 18. Suar. t. 2. de relig. lib. 1. de voto, c. 7. & lib. 6. de voto, c. 27. n. 17. Coninck t. 2. disp. 28. dub. 1. n. 1. Becani ll. cc. & aliorum, quos citat, & sequitur Sanch. lib. 4. de matr. disp. 8. n. 4. Atque aperte traditur in l. dolo, C. de inutil. stipulat. l. ult. C. de his quæ vi, Instit. de exception. princ. & in l. si mulier, §. ult. ff. Quod metus causa: Si metu coactus ady hereditatem, puto me heredem effici: quia quamuis, si liberum esset, noluissem: tamen coactus volui. Sed per Praetorem restituendus sum, vi abstinendi mihi potestas tribuitur. Similiter in l. si medicus, ff. de variis & extraordin. cognit. dicitur: Restituendum esse eum, qui tempore infirmitatis à medico compulsus est ad venditionem celebrandam: ne alioquin ipsi ob malam curationem periculum inferretur. Debet autem assertio hæc eodem modo probari, & explicari, sicuti in cap. præcedente assertio quarta: Quia doli mali, & metus iniusti eadem ratio est: quando quidem neuter tollit voluntarium simpliciter & absolute: sed vterque iniuriam continet.

Hoc tamen peculiare est in metum grauem passo, quod huic per Iudicis officium succurratur, & in integrum restituatur: etiam si à tertia persona metus incusus sit, sine iniuria alterius contrahentis, sicuti constat ex c. 1. 3. & 4. De his quæ vi, & l. si cum exceptione, ff. quod metus causa, vbi dicitur: In hac actione non queritur, virum is, qui conuenitur, an alius metum fecit: sufficit enim docere metum sibi illatum, vel vim. Rectè tamen admonet Less. lib. 2. c. 17. n. 39. In conscientia foro non esse ad restitutionem aut rescissionem contractus eum obligandum, qui bona fide contraxit cum metum passo: priusquam is actionem intentet, quæ ex iurispositiui beneficio ipsi competit: ea autem actione intentata, in externo foro contra quemvis rei per metum grauem alienatæ possessorem à Iudice restituendus erit: quia res metu iniusto extorta, veluti vitio quodam affecta ad alteram personam transferri censetur, sicuti notauit Sanch. lib. 4. disp. 9. n. 6.

Aduersus secundam assertionem arbitratu Azor t. 3. lib. 6. c. 7. Rebell. lib. 1. de contract. q. 5. concl. 1. Lopez p. 2. instruct. c. 27. q. 2. promissiones & contractus gratuitos à quacunque persona metu extortos, ipso naturali iure irritos esse: quia gratuito ac liberali quàm maximè aduersari videtur, quod per vim ac metum extortum est. Sed respondetur: Gratuitum non aduersari metui, sed debito & obligationi reciproca. Gratuita enim & liberalis promissio ac datio dicitur, quæ non ex debito, ac sine reciproca obligatione sponte fit. Metus autem neque spontaneum aufert: neque in onerosum aut reciprocum contractum transire facit. Ergo metus contractui gratuito absolute non repugnat.

Cæterum id rectè obseruat Vasq. in fine cit. disp. 27. Valentia to. 3. disp. 6. q. 7. p. 4. §. politico igitur, in resp. ad 2. Si metu adactus ad pecuniã, g. dandã, non habeat animũ donandi, sed tantum redimendi vexationem: tunc non transferri vllum ius, seu dominium: quia deest accipiendi titulus. Verum id perpetuum non est: sed fieri etiam potest, vt metum passus verè animum donandi habeat, sicuti & alium contractum celebrandi.

Contra eandem assertionem secundam existimant Sotus lib. 8. de iust. q. 1. a. 7. ad 3. Rebell. cit. q. 5. concl. 3. Mol. t. 2. disp. 326. ad 2. argum. Etiam ex contractibus onerosis, quibus metus ab altero contrahentium iniustus illatus causam præbuit, nullam obligationem nasci ex parte metum passi: neque ius aut dominium inferentimetum acquiri. Probant tum auctoritate Iureconsulti in l. metum, §. licet, ff. quod metus causa, vbi dicitur: metum passo actionem in rem dandam existimamus:

quia res in bonis eius est. Tum ratione: Nam æquitas naturalis non patitur, vt aliquis per iniuriam ius acquirat: quare S. Th. 2. 2. q. 88. a. 7. ad 3. ait: Qui vim intulit, hoc meretur, vt ei promissio non seruetur.

Ad I. rectè ibi respondet Glossa ver. in bonis: Id accidere Prætorij iuris fictione, quod vtilem rei vindicationem concedendo, integrè restituit vim passum, perinde ac si ab initio contractus irritus fuisset, arg. reg. 15. ff. iunct. Gl. Qui actionem habet ad rem recuperandam, ipsam rem habere videtur. Et l. nemo, ff. de in integrum restit. Nemo videtur re exclusus, quem Prætor in integrum se restituendum pollicetur. Quare retinet dominium fictũ, vt Gl. ibidem notauit. Vide quæ præced. cap. de dolo dixi, & Sanch. cit. disp. 8. n. 11. ad 1.

Ad II. respondetur sicuti cap. præced. Obligationem, & actionem oriri non ex iniuria; sed ex mutuo contrahentium consensu. Ex iniuria autem potius infirmatur ius & effectus obligationis, actionisque: tum quia vim iniustam passo actio tribuitur ad rescissionem contractus, si traditione consummatus est; vel exceptio, si consummatus non est: tum quia is, qui iniuriam intulit, ex iustitia obligatur, vt læsum in integrum restituat, sicuti bene notat Less. lib. 2. c. 17. n. 44.

In eadem assertionem secunda dixi, contractus ferme etiam positio iure secundum substantiam subsistere. Aliqui enim hinc excipiendi sunt, vt notat Gl. c. 2. de iis, quæ vi, ver. coactos. Inprimis matrimonium, quod metu graui & iniusto extortum, Ecclesiastico iure irritum est, c. cum locum, c. veniens, 2. de sponsal. Cur autem Ecclesia infirmat matrimonium ex tali metu, non itè ex errore, aut dolo celebratũ, arbitror hanc esse causam præcipuã: Nã qui errore accidentali ad contrahendum inducitur, plerumq; habet substantiale internũ consensum se obligandi: Qui verò metu directè incusso compellitur, is sæpe non habet animum verè contrahendi, sed quæ obligandi; sed tantum simulatè, ad redimendã vexationem. Ne igitur valor matrimoniorum in dubium reuocari posset, expediebat certas de ea re leges ferre.

Secundo, sponsalia simili metu directè extorta Ecclesiastico etiã iure irrita sunt, secundum probabiliorẽ sententiã apud Sanchez l. 4. disp. 19. arg. c. ex literis, de desponsat. impub. ex quo tamen nihil ostendi potest: quandoquidẽ puella in eo casu omnino inuita ac nolens à parentibus desponsata fuerat, vt Gl. Abb. & alij ibid. notarunt. Quare Henric. lib. 11. c. 9. n. 6. lit. h. Less. c. 17. n. 37. Coninck t. 2. disp. 25. dub. 1. n. 7. contrariũ docent, sponsalia, sicuti & alios contractus, ipso iure non infirmari propter metum: (cum nullũ tale ius extet) quãuis rescindi possint, per metum exceptionẽ, vel Iudicis sententiã. Sed responderi potest ex doctrina Rodriq. t. 1. sum. c. 231. concl. 4. & c. 244. concl. 4. Quãuis sponsalia ob grauem metum celebrata, per se ac directè non reperiuntur in iure Ecclesiastico cassata; cassari tamen indirectè & per consequentiã, eo ipso quod matrimoniũ tali metu celebratũ ipso iure irritũ pronuntiat. Siquidẽ fieri nõ potest, vt aliquis promissione sua obligetur ad actũ seu contractum inualidũ: Matrimonium autem inualidè contrahitur à persona graui metu compulsa: Ergo sponsalia siue promissio matrimonij talem personam non obligant.

Dices: Seposito tali metu, posse matrimonium validè celebrari. Respondeo: Possẽ quidem celebrari, sed ad id contrahendum nullam obligationem oriri.

Tertiò: Professio Religionis facta ex metu graui & iniuste incusso nullius roboris est, ob Ecclesiastici iuris dispositionem in cap. 1. de iis, quæ vi, & docent Doctores omnes. Non item si metus levis, v. g. solum reuerentialis sit, sicuti colligitur ex c. ult. Qui Clerici, vel vouentes, vbi id notat Gloss. ver. regio metu, & Abb. num. 7. Quod imperium Regis, vel parentum non sufficit ad infirmandum votum: nisi accedat maior coactio. Vide quæ dicam lib. 5. tract. ult. p. 2. c. 5. n. 2.



Dubitant verò Doctores, utrum votum simplex, graui & iniusto metu à quacunque persona iniuste extortum, iure ipso naturali, an tantum Ecclesiastico irritum existat: Priorem partem defendit Sotus lib. 7. de iust. quæst. 2. a. 1. ad 2. & idem videntur sentire Glossa & Abbas in cap. 2. num. 11. De iis quæ vi. Probant: Quia promissio non obligat promissario non acceptante: Vota autem & sacrificia coacta Deo accepta non sunt: Ergo, &c. Sed contraria sententia est vera, & communis. Nam metus consensum absolutè voluntarium non aufert. Quare negari debet, talia vota Deo grata & accepta non esse: dummodo adsit internus animus verè se obligandi Deo per votum. Confirmatur. Iuramentum metu graui extortum, ob honorem diuini numinis seruandum est, nisi eius relaxatio impetretur, iuxta c. debitorum, c. si verò, de iureiur. Ergo etiam votum. Nam observatio voti non minùs spectat ad reuerentiam Dei, quàm observatio iuramenti, sicuti argumentatur Suar. lib. 1. de voto, c. 7. n. 14. Imò non desunt DD. vt Syl. ver. metus, q. 8. Suar. cit. lib. 1. c. 8. existimantes, neque Ecclesiastico iure votum simplex infirmari: quia nulum tale ius extat; ideòque dispensatione opus esse, quæ tamen facilè confertur, quando plena libertas defuit in voti conceptione. Excipit verò Suar. c. 8. n. 10. votum simplex Religionis, quod ipso iure ob metum grauem irritum est; non minùs, quàm religiosa professio, sicuti suprà de sponsalibus argumentatus sum. Nam *accessorium naturam sequi congruit principalis*, reg. 42. in 6.

Alios actus, qui ex metu directè & iniuste incasso, ipso iure infirmantur, vide apud Gl. in cit. c. 2. de iis quæ vi. Syl. l. c. Azorium to. 3. lib. 6. c. 7. & speciatim de resignatione beneficii metu extorta, Nau. in c. accepta, de restitut. spoliatorum, oppos. 5.

4. Assertio III. Quæ metu leui directè & iniuste incusso extorta sunt, æquè in foro conscientie & secundum legem naturæ obnoxia sunt rescissioni ac restitutioni, sicuti suprà dictum est de metu graui extortis. Est communior sententia DD. Syl. ver. restitutio 2. dicto 7. Nau. c. 17. n. 15. vbi ait: *Quoad forum conscientie idem esse censetur, num quis iniusto (leui graui) metu consentiat; vel eo minore, dummodo coram Deo fuerit causa principalis consensus*. Idem docet in lib. 1. consil. 5. de elect. n. 3. edit. 2. & tenet Couar. reg. peccatum, p. 2. §. 3. n. 7. Mol. to 2. disp. 267. Less. cit. c. 17. dub. 6. n. 46. Lopez p. 1. instruct. c. 96. §. Cæterum in foro conscientie, Sanchez lib. 4. disp. 9. n. 4. Nam ratio, cur metus grauis efficiat actum siue contractum, cuius principalis causa extitit, rescissioni obnoxium, hæc sola est, quia iniuriam in se continet, ac vim directè intentatam ad extorquendum contrahentis consensum, secundum quid inuoluntarium. Ergo si idem accadat in metu leui, aderit quoque sufficiens ratio rescindendi contractum, & restituendi contrahentem. Quod verò in foro ex e. no leuem metum passo actio non conceditur; id fit ob multitudinem litium vitandam; quemadmodum ob eandem causam decepto infra dimidium iusti actio denegatur. Adde, etiam in foro externo leuem metum passo Iudicis officio subueniri, si probetur, vel præsumi possit, effecisse consensum mixtum cum inuoluntario, sicuti docet Gl. in c. cum dilectus, ver. metum mortis, de iis quæ vi. ibid. Abb. n. 9. Sanchez cit. disp. 9. n. 5. Mol. cit. disp. 267. in fine, & colligitur ex l. non est ve. isuriale, §. vlt. ff. cod. tit.

Porro circa 3. assertionem aduerte; Eam locum non habere in matrimonio, & professione Religionis: quippe quæ absoluto consensu semel validè constituta, dissolui amplius non debet. Et si verò ius posituum Ecclesiasticum utrumque matrimonium tam carnale, quàm spirituale ex metu directè & iniuste incusso statim ab initio nullius roboris esse decernat, semper tamen mentionem facit metus grauis & cadentis in virum constantem: quare constitutio hæc extendi non potest ad me-

tum leuem, & non cadentem in constantem virum. quod clarè etiam indicatur in c. 1. & penult. de iis quæ vi, &c. quamuis contrarium, quod ad conscientie forum attingit, docuerit Nau. lib. 1. consil. 5. n. 4. de iis quæ vi, & probabile censeat Less. n. 47. Sanchez cod. lib. 4. disp. 17. n. 4.

ASSERTIO IV. Metus quoque, qui dicitur reuerentialis, si efficiat consensum secundum quid inuoluntarium, sufficientem causam præbet in conscientie foro, aut Iudicis implorato officio, rescindendi acta, vel contractus, qui solubiles sunt. Quæ est communis doctrina Syl. ver. metus, q. vlt. & ver. restitutio, 2. dicto 7. Nau. c. 17. n. 30. & lib. 1. consil. 8. de renunt. n. 6. edit. 2. Mol. cit. disp. 267. Pet. Nau. lib. 2. c. 3. n. 444. Rebel. p. 2. lib. 1. de contract. q. 5. n. 13. Sanchez cit. disp. 9. n. 11. Less. cit. dub. 6. n. 48. arg. l. vlt. C. de iis quæ vi, & l. 1. §. quæ onerandæ, ff. quarum rerum actio non datur.

Tunc autem metus reuerentialis censi debet efficere inuoluntarium secundum quid, siue (vt alij loquuntur) inuoluntarium mixtum; si ideo aliquis consentiat in rem aliquam, à qua eius voluntas alioquin (id est, seposito metu) abhorret, quia nimirum voluntati, precibus, aut iussui domini, Prælati parentis, tutoris, vel similis personæ auctoritatem vel potestatem habentis, contradicere non audet.

Exempla sunt: I. Si Caia sponsalia celebret cum Titio, ideo solum quia ob naturalem verecundiam, patri, tutori, vel ipsi Titio cum auctoritate petenti, contradicere non est ausa; eo casu resilire poterit. Qua de re Nau. lib. 1. consil. 10. de iis quæ vi, edit. 2. Sanchez cit. disp. 9. n. 12. Beia p. 4. casu 23. II. Si filia, causa metus reuerentialis, efficientis inuoluntarium mixtum, (sicuti explicari) renuntiet hereditati paternæ, contenta dote, retractari potest renuntiatio, sicuti docet Lopez lib. 3. de contract. cap. vlt. Rodriq. r. 1. sum. cap. 132. concl. 2. Sanchez l. c. n. 13. III. Si vxor, aut filij simili metu reuerentiali inducti, promiserunt soluere debita patris, mariti, ne morituum molestia afficiant; possunt opponere metus exceptionem, teste Gl. in cit. §. quæ onerandæ, ver. metu solo, Lopez p. 1. instruct. c. 96. §. ceterum, Sanchez n. 16. Ioan. Baptista Conrado p. 1. casuum, q. 114. Gutierrez lib. 1. canon. qq. c. 37. n. 16. IV. Si creditor desperans, integrum debitum suum, propter debitoris iniquitatem, se consecuturum esse, partem ei debiti remittat, debitor in conscientia non est tutus, sicuti ex communi docent Syl. ver. restitutio, 7. q. 2. Nauar. c. 17. n. 75. Sanchez cit. disp. 9. n. 17. Ratio est: Quia huiusmodi metus reuerentialis efficiens inuoluntarium mixtum, licet non semper grauis sit, sed plerumque leuis (quod æstimandum tum ex qualitate & auctoritate personæ rogantis, iubentis; tum ex qualitate, infirmitate, ac verecundia personæ, cui iubetur) semper tamen iniuriam aliquam continet. Loquimur enim de actibus & contractibus, in quibus alicuius proprii arbitrij ac libertatis competit consentiendi, vel contradicendi: cui iuri repugnat dominus, pater, tutor, &c. si sua auctoritate verecundi hominis voluntatem coarctet, vt contradicere ille non audeat, cum alioquin contradiceret.

ASSERTIO V. Simili modo ac ratione, vt de metu reuerentiali dictum est, etiam precum importunitas efficiens inuoluntarium admixtum voluntario, facultatem præbet rescindendi actum vel contractum. Cum nimirum aliquis vehementer instans rogando, molestiam infert; non sine aliqua iniuria, à qua vt se liberet rogatus, denique consentit in rem, à qua alioquin eius voluntas abhorret. Ita Syl. ver. restitutio, 2. dicto 9. Lopez p. 1. instruct. cap. 96. §. at quamuis, Sanchez lib. 4. disput. 10. & alij mox citandi. Exempla sunt: I. Si moriturus importunitate precum, efficiente mixtum inuoluntarium,



hæredem instituat, vel legatum alicui relinquat, institutio cassari poterit, teste Anton p. 3. tit. 10. cap. 1. §. 2. ad finem Gutierrez cit. cap. 37. n. 20. Sánchez loc. cit. Molin. to. 1. tr. 2. disp. 135. §. si tamen preces: qui tamen rectè aduertit, plerumque accidere, vt tamen testator precum importunitate, vel metu reuerentiæ adactus aliquem instituat, nihilominus velit suam hanc dispositionem validam esse. quo casu institutus, etsi peccarit contra charitatem, & iustitiam, testatori molestiam, violentiamve aliquam inferendo; rem tamen sibi relictam secundum defuncti voluntatem accipere, & retinere poterit, donec per Iudicis sententiam testamentum rescindatur. Quam Molinæ doctrinam immeritò refutat Sanchez num. 4. Nam hoc ipsum etiam in donationibus, quæ magnam quoque animi libertatem requirere censentur, videre est; vt licet aliquis magna precum importunitate ab amico v. g. donum aliquod extorserit, nemo tamen eum ad restitutionem obliget ante Iudicis sententiam; si præsumi possit, voluntatem dantis fuisse, vt res data accipientis fieret. Talis enim consensus sufficit ad dominij translationem.

II. Qui precum importunitate virginem ad stuprum traxit, cogi potest, vt illatum ei damnum resarciat, teste Corduba lib. 1. questionarij, q. 13. Nauar. c. 16. num. 17. Henr. lib. 11. cap. 9. num. 5. Gutierrez cit. c. 37. num. 19. Abulen. in c. 22. Exod. q. 12. Lopez p. 1. c. 76. §. ceterum, si talis virgo, Sanchez disp. 10. num. 5. Per Nauar. lib. 2. c. 3. num. 444. Qui tamen rectè notat, solis precibus, quamuis assidue sint, sicuti & blanditiis, muneribus non efficiatur mixtè inuoluntarium; quin potius augeri voluntarium. Nisi in super accedat rogantis & instantis importunitas ac molestia, præsertim hominis auctoritate, vel potestate aliqua præditi; vt earatione puellæ metus iniiciatur, sicuti aduertit etiam Mol. l. c. & Sanchez cit. disp. 10. n. 2. & 5.

III. Qui importunitate precum efficiente inuoluntarium mixtum ad ludendum tractus fuit, non tenetur soluere, secundum S. Th. 2. 2. q. 12. a. 7. ad 2. Couar. reg. peccatum, p. 2. §. 4. num. 7. Gutierrez num. 18. Syl. ver. ludus, q. 11. Rebellum q. 5. n. 15. Si tamen lucranti in hoc casu solutum fuerit, existimant Molin. to. 2. disput. 516. Sanch. cit. disp. 10. num. 10. non obligari ad eum ad restituendum lucrum ante Iudicis sententiam: quia specialis natura contractus ludi requirit, vt par ludentium sit conditio seu ius lucrandi: quare, cum is, qui precum importunitate, aut etiam minis & conuitiis ad ludendum traxit, repetere non potuisset, si ludendo perdidisset; consequens videtur, quod neque is qui inductus fuit, repetere possit, quod perdidit.

Hæc sententia probabilis est: Sed contraria magis placet, quæ est communis apud Lessium lib. 2. cap. 26. dub. 2. Rebell. p. 2. lib. 12. q. 3. num. 8. Qui enim alterum per iniuriam ad ludendum coegit, causa iniusta secuti damni exitit: ergo illud resarcire tenetur: sicuti, si quis vi alterum coegerit, vt cum tertia persona luderet; accidat verò coactum ludendo perdere, ac damnum pati, vtique illud resarcire debet, qui vi adegit. Ad fundamentum contrariæ sententiæ resp. Licet per se & ordinariè in ludo par ludentium conditio esse debeat, & ius lucrandi; non tamen si iniuria ex altera parte interueniat: quia iniuria tollit æqualitatem, & constituit inæqualitatem. Quemadmodum etiam in aliis contractibus, v. g. emptione ac venditione vterque contrahentium æqualiter obligari debet, & contractu stare; nisi iniuria, v. g. iniusta coactio interuenierit: tunc enim vni, non etiam alteri parti tribuitur facultas rescindendi contractum, quatenus id in suum commodum cedere potest.

IV. Si Religiosus diuturna sollicitatione, querelis, murmure aliquid impetret à Prælato, ideo solum per-

mittente, vt hominis molesta importunitate se liberet, quam alia ratione difficulter repellere potest: non est tutus in conscientia, sed paupertatis violator: quia hæc non est licentia, sed violentia, vt docet Sanchez cit. disp. 10. n. 9. & lib. 7. moral. c. 19. n. 16. Rodriq. to. 3. Regul. q. 29. a. 12. corol. 2. Secus est, si Prælatus importunitatem facile repellere queat: tunc enim metus cense-ri non potest principalis causa concessionis. Porro quod de metu hic dicitur, similiter dicendum de dolo, si subditus fingat causas, ob quas illi concedatur: vel taceat aliquid intrinsecè ad rem pertinens, quod si exprimeretur, Prælatus licentiam non daret: cense-ri non potest iuste impetrata licentia, ad eum modum sicuti de dispensatione dixi lib. 1. tract. 4. cap. 22. num. 19. & videri potest Sanchez cit. c. 18. n. 17.

## CAP. VII.

Si res post contractum pereat, vel  
deterior fiat, cuius damno  
id accidat?

## S V M M A R I V M.

- 1 Contractum alij instituntur in gratiam vnius contrahentium, alij in gratiam vtriusque.
- 2 Refert, utrum res, quæ in contractum venit, casu pereat, culpa, an dolo.
- 3 Si res certa sine in specie debita casu pereat, creditoris damnum est.
- 4 Si res indeterminatè sine in genere debeat, etsi vnum, vel alterum eius generis pereat, non tamen liberatur debitor.
- 5 Si contractus institutus fuit in gratiam solius accipientis, omnis etiam leuissima culpa præstanda venit: si in gratiam solius dantis, doli, non trem culpa ciuilis: si denique in gratiam vtriusque, culpa lata & levis præstari debet.
- 6 Confessarius obligatur ex culpa lata, vel dolo: sed magis penitenti, quam tertie persone.
- 7 Si in domo commodatarij, depositarij, &c. incendium ortum fuerit, iuste agunt, si quæ pretiosiora sunt, seu propria, seu aliena, eripiendo præferant. Sin verò aliena propriis preferendo iacturam passus sit depositarius, vel conductor, compensationem damni exigere potest: non ita verò commodatarius.

**S**upponendum est primò ex doctrina Abb. in c. vn. de commodato: Contractum alij sunt, qui instituntur in gratiam vnius tantum contrahentium: vel dantis, vt videre est in deposito, si nulla merces interueniat: vel accipientis, vt videre est in donatione, commodato, precario. Alij verò instituntur in gratiam vtriusque contrahentium, vt venditio, locatio, societas, pignus, dos, &c. Vide l. contractus, ff. de reg. iuris.

Supponendum secundò ex communi doctrina Barto-  
li in l. quod Nerua, ff. de positi, Abb. in c. vn. num. 13. de deposito, Adriani in 4. vbi de restit. §. vtrum in foro animæ tenetur, Syl. ver. culpa, num. 1. Nauar. c. 17. num. 178. Mol. to. 2. disp. 293. Plurimum refert, vtrum res, quæ in contractum venit, casu pereat, an culpa, an dolo debitoris. Casus est rei inopinatè euentus, qui neque à diligentissimo caueri potest, aut debet, iuxta c. Ioannes, de homic. Culpa est discessus ab eo, quod bonum ac debitum est, hominisque diligentia præstari potest.

Diuiditur culpa in latam, leuem, ac leuissimam. Culpa lata siue crassa est omissio eius diligentia, quam passim omnes homines eiusdem conditionis, professionis, ætatis, &c. adhibere solent. Culpa levis est omissio eius diligentia, quam prudens quisque ac solers eiusdè professionis, ætatis, &c. adhibere consuevit. Culpa leuissima



est omisso exacta diligentia, quam non nisi experientissimi eiusdem ætatis, artis, professionis, homines adhibere solent. Exemplum habes apud Syl. n. 2. Navar. c. 17. n. 177. Mol. cit. disp. 293. Si librum tibi commodatum in publico foro relinquant, indeque subripiatur, censeberis amisisse per latam culpam. Sin autem in conclavi domus tuæ, ostio non clauso, reliquisti, censeberis amisisse per culpam leuem. Sidenique reliquisti in conclavi clauso, sed non obserato, quia manu non tentasti, utrum fera inducta esset; censeberis amisisse per culpam leuissimam. Aliud exemplum leges apud Ioan. Fabrum Instit. Quibus modis re contrahitur obligatio, §. item is cui.

Quædam insuper aduerte: I. Sermonem non esse de culpa Theologica, quod est peccatum contra mores, & legem Dei; sed de culpa ciuili, siue iuridica, quod est peccatum contra artem, industriam; sæpe inuoluntarium, & coram Deo excusatum, sicut bene præter alios annotauit Adrian. cit. loco. Veluti si ex naturali obliuione librum tibi commodatum in publico foro reliquisti; culpam ciuilem commisisti, quamuis coram Deo nihil peccaris.

II. Interdum etiam fortuitus casus imputatur, & præstandus est v. g. à commodatario, conductore, si culpa antecessit ad casum fortuitum ordinata, siue eius causa existens: ut si contra conuentionem rem aliò abduxit.

III. Frequens hoc est, ut secundum iuris ciuilis præsumptionem, aliquid culpâ euenisse dicatur, cum tamen fieri potuerit, ut omnis culpa etiam ciuilis abesset. Exempli causa in l. cum duobus, §. damna, ff. pro socio habetur; Si quid furto ablatum fuerit, à socio præstandum fore, quippe qui custodiam diligentem adhibere debebat. Quis autem neget, fieri posse, ut diligentem custodiam socius adhibeat, & res nihilominus à callido fure subripiatur? quo casu præsumptio cedere debet veritati.

IV. Ut ex culpa iuridica alteri obligeris, necesse est, te verè causam fuisse illati damni. Quare si librum publico foro relictum, nullus abstulit; vel tamen aliquis abstulit, si tamen nihilominus id euenisset, licet à te diligenter custoditus fuisset: quia paulò post incurfione hostium v. g. omnia bona ciuium reclusis arcis direpta fuerunt, non obligaris ad resarciendum damnum commodanti.

Denique dolus malus est omnis calliditas, fallacia, machinatio ad circumueniendum, fallendum, decipiendum alterum adhibita, sicuti Labeo definit in l. 1. §. dolum malum, ff. de dolo malo. Differt autem dolus à culpa: quia dolus committitur cum formali proposito nocendi; culpa non item.

3 ASSERTIO I. Si res certa, siue in specie ex aliquo contractu debita, puta hic equus, hæc onis, casu pereat, aut deterior fiat, creditoris damnum est, arg. l. quod te, iun. Gl. ff. si certum petetur, & apertius in l. id quod, ff. de periculo & commodo rei venditæ, l. ult. C. eod. & Instit. de empt. ac vendit. ibi: *Cum autem emptio & venditio contracta est (quod effici diximus, simul ac de pretio conueneris) periculum rei venditæ statim ad emptorem pertinet: tamen adhuc eares emptori tradita non sit.*

Hinc collige; Regulam illam, quæ asserti solet ex l. pignus, ff. de pignorat. actione; *Si res casu pereat, domino suo perit*, vniuersim veram non esse; sed in ijs tantum contractibus locum habere, quibus rei dominium non transfertur, videlicet in deposito, commodato, pignore, iuxta l. quæ fortuitis, C. de pignoratitia actione, & l. argentum, ff. commodati: *Argentum commodatum, si tam idoneo seruo meo tradidissim ad te perferendum, ut non debueris quis estimare futurum, ut à quibusdam malis hominibus deciperetur; tuum, non meum detrimentum erit, si id mali homines interceptissent.* Consentit c. vn. de com-

modato.

Cæterum tota hæc assertio & doctrina patitur aliquas exceptiones, quas videre potes apud Abb. in cit. c. vn. I. Nisi aliter conuentum sit, ut v. g. commodatarius etiam fortuitum casum præstare debeat, iuxta cit. c. vn. Vel si venditor periculum rei venditæ in se suscepit, iuxta §. quod si fugerit, Instit. de empt. & vendit. Nam contractus legem ex conuentione accipiunt, l. 1. §. si conuenit, ff. depositi.

II. Nisi debitor in mora soluendi fuerat, ideoque res periit, ipsemet damnum præstare cogitur, quod si neque, ff. de peric. & commodo rei venditæ, l. quod te, ff. si certum petetur, & c. vn. de commodato, c. 2. de deposito. Nam *mora sua nihil nocet*, reg. 25. in 6. Quod tamen intelligi debet primò, dummodo mora culpabilis sit; secus si legitime impeditus debitor fuit, quominus tempore constituto solueret, sicuti ex communi docet Mynfinger cent. 6. obser. 36. Couar. c. quamuis patet, p. 2. §. 5. n. 4. Rebel. p. 2. lib. 8. q. 7. concl. 4. & colligitur ex cit. l. quod te mihi. Adde, tamen si pœna conuentionalis adiecta fuerit, nisi ad tempus præfixum solueretur, liberari debitorem à pœna, si culpa caruit, teste Couar. n. 5. Mol. to. 2. disp. 317. prope finem, arg. reg. 66. in 6. *Cum non stat per eum, ad quem pertinet, quominus conditio impleatur, haberi debet perinde ac si impleta fuisset.* Secundo intelligi debet exceptio, dummodo ob mortem debitoris damnum euenierit: secus, si nihilominus euenisset, v. g. equus commodatus periisset, tamen si statuto tempore remissus fuisset: tunc in conscientia foro nulla restitutio fieri debet. Quia æquum non est, ut creditor cum aliena iactura lucretur, ait Syl. ver. mora, q. 4. & docent Nau. cap. 17. man. n. 80. Armilla ver. commodatum n. 7. Sa ver. mora, in fine, contra Gl. in c. 7. de deposito, verbo de culpa, & alteram Gl. Instit. de empt. & vendit. §. cum autem.

ASSERTIO II. Si res incerta, & indeterminata in aliquo genere debeat, etsi vnum vel alterum eius generis casu pereat, non ideo liberatur debitor. Quia *genus perire non potest*, arg. l. incendium, C. si certum petetur. Exempli causa: Si equum aliquem dare debeas, aut bouem, licet plures tibi equi, aut boves pereant, non tamen liberaris: quia potes alium dare. Ita etiam se res habet in mutuo, sicuti traditur in Instit. Quibus modis re contrahitur obligatio, §. item is: *Qui mutuum accepit, si quolibet fortuito casu amisit, quod accepit, veluti incendio, ruina, naufragio, aut latronum hostiumue incursu, nihilominus obligatus manet.*

Corollarium. Si mutuarius, aut venditor census pecuniam debitam per fidelem (uti existimabatur) ac diligentem nuntium creditori transmittat, atque ille in via fugiat, aut spoliatur, debitoris detrimentum est, sicuti colligitur ex c. significante, de pignorib. & ex communi docet Abb. in cit. c. vn. de commodato, n. 8. Gomez to. 2. resol. c. 7. n. 3. Nau. c. 17. n. 185. & alter Navar. lib. 4. c. 5. Limita. Nisi creditor famulum, aliumue nuntium ipsemet designauerit, aut destinauerit non tantum ad debitorem monendum, sed etiam debitum recipiendum, aut transferendum: tum periculum in se suscipere censetur, ideoque ipsius damno infortunium accidet, sicuti constat ex l. si mei causa, ff. depositi, & videri potest Gomez l. c. Vasq. in moral. de restit. c. 2. §. 2. dub. 9. Molin. to. 2. disp. 296. dub. 2. Loquimur autem hic solum de debitis iustè contractis: At verò de debitis iniustè contractis per furtum, vsuram, & c. quid sentiendum sit, constat ex tract. 2. huius libri, c. 12. n. 10.

ASSERTIO III. Si contractus celebratus fuit in gratiam solius accipientis, omnem culpam, etiam leuissimam, præstare is debet, v. g. commodatarius, sicuti habetur in l. si ut certò, §. nunc videndum, ff. commodati, c. vn. de commodato, & notant ibid. Gl. & Abb.



id tamen intelligi debet, si gratis commodatum sit: nam ubi merces interuenit, transit in locationem, vel contractum innominatum, ait Gl. ibid. Ab hac vero assertionem excipi debet precarium, de quo infra c. 14.

**ASSERTIO IV.** Si contractus celebratus fuit in gratiam solius dantis, sicuti accidit in deposito; solus dolus, non item culpa civilis præstanda venit. Ita habetur expressè in l. contractus, ff. de regul. iuris, & l. si sine, ff. de positi, iun. Gl. Accursij, & Instit. Quibus modis re contrahitur obligatio, §. præterea. Quod verò in l. 1. C. de positi dicitur, à depositario dolum & latam culpam præstandam esse, id pertinet ad præsumptionem fori externi: nam lata culpa dolus præsumitur, sicuti notauit Gl. in c. 2. de deposito, ver. de culpa, Armilla ver. depositum, n. 2. & 8. Rebell. p. 2. lib. 16. q. vn. de deposito, & colligitur ex l. quod Nerua, ff. de positi. Adde, tamen si dolus propriè dictu absit, si tamen depositarius culpa seu negligentia Theologica crassa sine mortali rem depositam destruat, vel amittat, in conscientia obligari ad damnum resarciendum, quippe cuius causa, virtualiter voluntaria, extitit.

Et quod dixi de depositario, idem quoque locum habet in Medico, Confessario; si ille corpori: hanc animæ gratis medeantur: tenebuntur enim tantum de dolo. Gratis dico. Sicuti enim depositarius, si mercedem accipiat, culpam etiam leuem præstare debet, iuxta c. 2. de deposito: quia transit contractus in locationem. Ita etiam de alijs plerisque ex officio obligatis sentiendum, puta de Medico, Iudice, si mercedem aliudue commodum accipiant, obligari eos ex quasi contractu ad restitutionem damni euidentis per negligentiam seu culpam eorum etiam leuem, sicuti docet Pet. Nau. lib. 3. c. 3. n. 5. Quamquam probabiliter dici potest, id accipiendum esse de culpa non merè civili, sed Theologica: nunquam enim Medicus v. g. vel Iudex acceptando officium obligare ita se vult, vt in conscientia teneatur resarcire damnum, quod ex humani ingenij infirmitate, aut naturali obliuione præter omnem eius voluntatem euenerit. Alia verò ratio est de Tutore, Curatore, quippe qui ob legum constitutionem in gratiam Minorum factam, quasi ex contractu obligantur, vt culpam etiam, seu negligentiam leuem præstare teneantur, non minus, quam voluntarij negotiorum gestores, iuxta l. Tut. ori, ff. de negot. gestis.

6 His adde: Licetis, qui non in suum commodum, sed alterius tantum gratiam officium exercet puta Iudicis, Medici, Confessarij, ordinariè non teneatur nisi de lata culpa; excipi tamen debet, nisi seipsum aliquis eiusmodi muneri, puta corporis, vel animæ curationi, sponte & sine necessitate ingerat, & præ alijs solertem ac peritum iactet; tunc censetur ad damnum præstandum se obligare, quod per imperitiam, vel culpam eius etiam leuem euenerit, etsi nullam mercedem, aut stipendium accipiat. Censetur enim causa damni, quod (vt supponimus) alter non incurrisset, nisi ita illectus fuisset. Ita habetur in cit. c. 2. & docet Syl. ver. culpa, q. 4. & alij communiter.

De Confessario autem hoc vninerim monere volo, probabiliter dici posse, eum nunquam obligari ad compensationem damni, quod per ipsius negligentiam, secluso delicto seu iniuria mortali, alteri tertie personæ illatum fuit: puta si neglexerit imperare restitutionem alicui iure faciendam. Cuius ratio est, quia cum alijs personis, in ordine ad eam debita temporalia consequenda, nulla ipsi nec expressa, nec tacita conuentio intercedit: Ergo non tenetur nisi ex delicto: delictum autem, seclusa omni conuentione, non obligat ad restitutionem, nisi sit mortale, iuxta probabilem sententiam, quam attuli supra hoc lib. tr. 3. p. 1. cap. 6. num. 4. Atque ita docent Sa ver. restitutio, num. 2. Valent. r. 3. disp. 5. q. 6. p. 3. contr. 3. Suar. 3. p. 10. 4. disp.

32. l. 6. n. 9. contra Petr. Nauar. lib. 3. c. 4. n. 125. vbi ait; Confessarium curatum obligari etiam ex culpa leui, citatque Rosellam ver. restitutio, 2. num. 5. Angelum ver. eod. vlt. n. 5. Nau. c. 17. n. 22. qui tamen culpæ levis non meminerunt: Imò Rosella, & Nauar. expressè loquuntur de culpa crassa & affectata, ac rationem suæ doctrinæ dant; quia dum per crassam negligentiam intermitit restitutionem imperare, est causa damni.

Sed rectius hoc loco distinguitur: Si enim Confessarius scienter, aut per ignorantiam crassam dicat, debitori restitutionem faciendam non esse; tunc in illius defectum obligatur; cum posituè concurrat ad damnum iniustum. Sin verò negatiuè se habeat, solumque intermitat imperare restitutionem; tunc probabiliter dicitur contra Angelum & Nauar. non contrahere obligationem restituendi: cum non peccet aduersus iustitiam, sed solum aduersus charitatis legem. Siquidem hoc discrimen est inter causas posituè concurrentes ad damnum iniustum mandando, consulendo, & concurrentes negatiuè tantum; quod illæ per solum voluntarium & efficacem concursum sint causæ morales damni: negatiuæ autem non ob solam voluntariam ratiocinationem censentur esse causa damni; sed requiruntur, vt ex iustitia obligatæ sint ad significandum, impediendum, sicut dixi supra tr. 2. c. 5. n. 7. & 8.

**ASSERTIO V.** Si contractus in vtriusque contrahentium utilitatem cedat, sicuti accidit in emptione ac venditione, locatione & conductione, societate, pignore, dote, & c. præstanda est culpa lata, & levis. Ita habetur in supra cit. §. nunc videndum, & cit. l. contractus, & docet Abb. in c. 2. n. 3. de deposito, Gomez cit. c. 7. in fine, Nau. c. 17. n. 181. 184. Lessius lib. 2. c. 7. dub. 8. alijque communiter.

**RESTAT QVÆSTIO.** Si in domo commodatarij, depositarij, & c. incendium oriat, propriisne, an alienis rebus commodatis, depositis prospicere, debeant, si vtrisque non possint? Respondeo & dico I. Ratio in primis dictat, vt tali casu quæ præciosiora sunt, seu propria, seu aliena, præ alijs periculo eripiantur, sicuti annotauit Abb. in cit. c. 2. num. 2.

II. Si aliena præciosiora præferendo, propriorum iacturam fecerunt depositarius, conductor, caupo, compensationem damni proprii iure exigunt. Cum enim in pari causa quisque præferre possit propria alienis, utiliter domini negotium gesserant, quando in eius gratiam, posthabitis proprijs, res magis pretiosas incendio liberarunt. Nulli autem officium suum damnosum esse debet.

III. Non idem dicendum videtur de commodatario: Nam quisque vir prudens, ac diligens, quæ pretiosiora sunt, anteponebat minus pretiosis: Commodatarius autem, secundum naturam huius contractus, tacitè se obligat ad exactam rei commodatæ custodiam, qualem quisque prudentissimus paterfamilias suis rebus adhibet, l. in rebus, ff. commodati. Accedit, quod æquitas non patitur, vt is qui commodauit, damnum sustineat occasione eius contractus, qui in gratiam solius commodatarij institutus erat; ipsemet verò commodatarius à damno immunis sit. Quæ est communis sententia Syl. ver. commodatum, q. 12. Armilla n. 11. Molina to. 2. disp. 296. Lessij lib. 2. c. 27. dub. 6. n. 28.

IV. Si commodatarius eripiendo propria, quæ magis pretiosa sunt, deserat aliena sibi commodata, restituere nihil debet, teste Gl. in l. si vt certò, §. quod verò, ff. commodati, Syl. Armilla ll. cc. Abb. c. 1. de commodato, Azor to. 3. lib. 7. de commodato, c. 7. q. 6. etsi contrarium doceat Mol. l. c. Ratio est: Quod hoc casu commodatarius ab omni culpa immunis sit: cum hoc idem diligentissimi cuiusque officium, & consilium esset pretiosa præferendi vilibus.

V. Etsi Gl. citata idem sentire videtur, si res com-



modatæ & propriæ & qualis pretij sint; contraria tamen sententia communis est, & colligitur ex cit. §. quod verò. Nam in pari alioquin causa, magis conuenit commodatarium, in cuius solius gratiam contractus institutus fuit, ex fortuito casu damnum sustinere.

## CAP. VIII.

Utrum filiusfamilias contractus instituere possit.

## SUMMARIUM.

1. Filij familias quadruplex est peculium; Castrense, quasi castrense, aduentitium, & profectitium.
2. Licet per filij clericatum, nem per professionem seu filij, seu patris in Religione, solvatur patria potestas, tamen bona aduentitia manent in priore statu penes patrem, vel eo proficiente, penes monasterium.
3. Certi casus sunt, quibus aduentitiorum bonorum usus fructus non ad patrem, sed ad filium spectat.
4. Filius familias impubes, ne patre quidem auctore, vltro ex contractu civiliter obligatur.
5. Filius fam. pubes ex omni contractu, etiam sine patris auctoritate, tam civiliter, quam naturaliter obligatur.
6. Lucra filij familias, quæ ex artificio eius proveniunt, inter aduentitia bona numerantur; sed lucra ex bonis paternis inter bona profectitia.
7. Pater prohibere non potest, quominus filius familias ex domo paterna discedat, artu discenda causa.
8. Patria potestas in filium septem ferme modis soluitur.

**H**Atenus egimus ferme vniuersim de natura & proprietatibus contractuum. Nunc autem de personis dicendum, de quibus dubium esse potest, utrum, & quo modo contrahere eis liceat: Et primò de filio familias.

Notandum est primò: Filij familias dicuntur, non solum filius, & filia, sed etiam qui ex illis nati sunt nepotes, ac neptes, &c. quamdiu sub patris, vel aui paterni potestate existunt, licet maiores natu sint, siue annum ætatis xxv. exceßerint. Ita habetur Instit. de patria potestate, §. vlt. Quinam autem effectus sint patriæ potestatis, videbis in Gl. §. ius autem eod. tit.

Notandum est secundò: Quadruplex est peculium filij familias: Castrense, quasi castrense, aduentitium, & profectitium, de quibus vide Gabr. in 4. d. 15. q. 3. a. 3. dub. 2. propr. §. Syl. ver. peculium, l. Nau. cap. 17. n. 141. Lessium lib. 2. cap. 4. dub. 3. In castrensi peculio numerantur ea omnia, quæ occasione militiæ à filio familias acquiruntur, l. Castrense, ff. de castrensi peculio, l. 1. C. de castrensi peculio, lib. 12. Eiusmodi sunt militum stipendia, hostium spolia, Ducis, vel commilitonum dona, aut legata occasione militiæ; itē bona mobilia, quæ à patribus, vel cognatis filio familias profecturo, aut profecto in militiam donata sunt. Et nota hñc, inter milites numerari ministros omnes, qui exercitum comitantur, qualescunque munus obeant, l. vlt. C. de Castrensi peculio, l. 12. & l. vn. §. item nanarchos, ff. de bonorum possess. ex testamento militis. Sed & prædarios milites accenser, qui castris alicuius, quamvis pace constituta, custodiam gerunt, testis est Molin. to. 1. tr. 2. disp. 130. Præterea ad castrense peculium spectare censentur, quæcunque milites palatini, id est, qui Principem in aula siue palatio sequuntur, vel proprio labore, ac parsimonia; aut Principum donatione acquisierunt, l. vn. C. de Castrensi palatinorum peculio.

In peculio quasi castrensi numeratur primò, Quod ex publico munere, seu officio, puta Doctoris, Iudicis, Advocati, Tabellionis, Medici, &c. acquiratur, l. cum antiquis, C. de inoffic. testam. Neque opus esse videtur, ut publicum salarium habeant: sufficit, si ex munere aut scientia publica acquirant, ut docet Pet. Nauar. lib. 3. c. 1. n. 68. contra Syl. ver. peculium, l. q. 1. Secundò, Quæ à Principe, vel Augusta alicui donata sunt, l. cum multa, C. de bonis, quæ liberis, &c. Tertiò, Bona Clericorum ex

clericali titulo, vel beneficio acquisita, iuxta l. sacrosanctæ, C. de Episc. & Clericis. Imò, (ut dicitur in Authent. Presbyteros, eod. tit.) *res quolibet modo in clericatu venientes, in potestate sua habent* Clerici, ad similitudinem castrensi peculiorum. Consentit c. quianos, de testam. vbi Abbas n. 5. ait; Quicquid in aliis filiis aduentitium bonum esset, in clerico filio familias censeretur castrense, aut quasi castrense, ut de eo liberè disponente possit.

Id vero, spectato communi iure, intelligi debet de iis tantum bonis, quæ post clericatum, vel post Religionis professionem, non verò quæ antea acquisita sunt: horum enim vsum fructum pater retinet vsque ad mortem suam, adeò quidem, ut licet ipsemet pater professionem edat, vltus fructus interim dum pater viuit, ad Monasterium pertinere debeat. Ratio est: Quia licet per filij clericatum, (intellige si clericaliis privilegiis gaudere incipiat) item per professionem seu filij, seu patris in Religione approbata, solvatur patria potestas; tamen ex hac liberatione solum sequitur, ut bona filio deinceps aduentitia, administrationi & vtilitati patris subiecta non sint; non autem, ut vltus fructus bonorum antè penes patrem existentium, cesset, exceptis casibus iure expressis: ut si filius patria potestate egrediatur propter afflictionem dignitatis, vel per emancipationem, quo tamen posteriore casu dimidium vltus-fructus patri relinquitur. Ita de vltus fructu filij familias præter alios docent Nauar. in c. non dicatis, seu to. 2. Regul. num. 38. & 55. Molina to. 1. tr. 2. disp. 9. & 138. ver. dicendum est, Azor. t. 1. lib. 12. c. 8. q. 2. & to. 2. lib. 1. c. 23. q. 9. Sanchez lib. 7. moral. c. 13. n. 26. & seqq. Vasq. de testam. c. 4. contra Couar. c. 2. de testam. n. 9. Fachinæum lib. 6. controu. iuris, cap. 12. vbi aiunt; post patris professionem vltus fructus bonorum aduentitiorum ad filium pertinere; non ad Monasterium. Et Abb. in c. præsentia, n. 56. de probat. ait; Filio faciente professionem, vltus fructus bonorum à patre auferri, & liberè dispositioni filij relinqui, ut pleno iure Monasterio assignare possit: quorum tamen sententia vera est spectata consuetudine quorundam locorum: sicut etiam consuetudine obtentum est, ut post contractum matrimonium à filio, aut filia, potestas patria adeò solvatur, ut omnium bonorum administrationi & vltus fructus ad filium, vel filiam à patre transferatur. Vide Molin. to. 1. tr. 2. disp. 229.

Aduentitia bona sunt, quæ præter castrensia, & quasi castrensia, filio familias obueniunt, non à patre, neque intuitu patris, sed vel ex propria industria, vel liberali alicuius donatione, legato: matris, vel aui materni hereditate, &c.

Denique profectitia bona dicuntur, quæ cum nec castrensia, nec quasi castrensia sint: vel ex bonis patris profecta, vel patris intuitu filio familias donata sunt.

Inter hæc quatuor bonorum genera hoc discrimen est, quòd in castrensi: & quasi castrensi peculio nihil omnino iuris pater habet, sed ipse filius plenum dominium, liberamque administrationem, sicuti constat ex tit. ff. & C. de castrensi peculio, l. vlt. C. de inoffic. testamento. Aduentitiorum autem bonorum sola proprietas ad filium spectat: vltus fructus ad patrem, l. cum oportet, C. de bonis, quæ liberis, &c. §. sancitum, Instit. per quas personas nobis acquiruntur.

Non potest tamen pater bona filij famil. immobilia absque Iudicis decreto alienare, uti constat ex l. non solum, l. ob æs alienum, C. de prædiis Minorum: multò minus bona immobili filij emancipati, si pater curator existat, l. cum emancipatis, C. de prædiis Minorum. Facilius tamen patri, quam tutóri, permittitur alienatio bonorum immobilium, absque Iudicis auctoritate, videl. propter necessitatem, ad æs alienum dissoluendum, iuxta l. vlt. §. si autem æs, C. de bonis, quæ liberis, &c. Idque partim propter affectionem patris erga filium, partim quia ipsius etiam patris interest, venditionem vlti-



lem esse filio, præsertim in potestate eius constituto, quippe ex cuius bonis pater usufructum habet. Vide si potest Tiraquellus l. si vnquam, in præfat. num. 28. C. de reuoc. donat. Couar. i. resol. c. 8. num. 5. Mynsing. cent. 6. obseruat. 61. post Azonem in summa C. de bonis, quæ liberis, &c.

His adde, quod filius ne consentiente quidem patre, de bonis aduentitiis testari possit, præterquam ad pias causas, iuxta c. licet, de sepultur. in 6. quamquam cum patris consensu mortis causâ donare non prohibetur, etiam ad causas prophanas, l. tam is, ff. de mortis causa donation.

3 Sunt tamen aliquot casus, in quibus aduentitiorum usufructus non ad patrem: sed ad filium spectat: videlicet, si usufructus bonorum aduentitiorum filio à patre remissus est: si pater vnâ cum filio successit in hæreditate fratris: si pater sine causa iusta diuortium instituit: si filius hæreditatem adiit, legatum, vel donum accepit patre contradicente: si usufructus nudus, seu à proprietate seiuñctus filiofam. à quocunque donatus est: denique si aliquid donatum, aut relictum fuit, ea lege, vt usufructus ad ipsum, & non ad patrem pertineat. quam tamen conditionem mater, vel auia legitimæ filio, aut nepoti debitæ adicere non potest, sicuti docet Andr. Fachinæus lib. 5. controu. cap. 21. ex Auth. Vt liceat matri & auia, in princip. contra Gl. ibid. ver. participium. Vide etiam Auth. de hæredibus ab intestato, c. 2. §. si verò, l. cum oportet, cum Authenticis, & l. vlt. C. de bonis, quæ liberis, Syl. ver. peculium, i. q. 3. Mol. to. i. tract. 2. disp. 8.

Denique bona profectitia, id est, quæ ex rebus patris, vel occasione patris à filio acquiruntur, ad patrem pleno iure spectant, §. sancitum, Instit. per quas personas, &c.

4 Assertio I. Filius familias impubes, ne patre quidem auctore, ex contractu, quamuis circa castrensia bona instituto, ciuilitè obligatur, sicuti constat ex §. pupillus, Instit. de inutilibus stipulat. Obligatur tamen naturaliter, si pubertati proximus sit, sicuti de pupillo dicam cap. seq. assert. 4.

Porro, cur pupillus auctore tutore etiam ciuilitè obligetur, non item filius impubes auctore patre, rationem dat Gl. in cit. §. pupillus, ver. patre: Quia pupillus tutorem sibi obligatum habet, si malè auctoritatem præstet; non item filius patrem, sicuti colligitur ex l. cum oportet, §. sub hac tamen, ver. Non autem hypothecam, Cod. de bonis, quæ liberis, &c. Vide Sanch. lib. 6. de matrim. disp. 39. num. 2. Mol. to. i. tr. 2. disp. 230. & to. 2. disp. 261.

5 Assertio II. Filius familias pubes, ex omni contractu, etiam sine patris auctoritate, tam ciuilitè, quam naturaliter obligatur. Ita habetur in §. inutilis, Instit. de inutil. stipulat. & l. 3. ff. de actionibus & obligation. Filius familias ex omnibus causis tanquam pater familias obligatur: & ob id agi cum eo tanquam cum patre familias potest. Quia patria potestas instituta est ad personæ correctionem, non ad bonorum eius curationem. Sed limitari debet assertio: Nisi contractus vel alienatio cedat in præiudicium patris: quamobrem filius sine expresso, aut tacito patris consensu, alienare non potest bona profectitia; imò neque aduentitia, quorum usufructus & administratio ad patrem spectat. Et si enim alioquin proprietarius, inuito etiam fructuario, proprietatem alienare non prohibeatur; filio familias tamen concessum non est bona aduentitia in seio, vel inuito patre distrahere, vel obligare, iuxta l. vltimam, §. filius, C. de bonis, quæ liberis, &c.

Addendum verò est, filium familias etiam ex delicto vel damno dato, per seipsum obligationem contrahere, non autem parentem, si culpa eius non interuenit,

sicuti habetur §. vlt. Instit. de noxalib. action. & docet Syl. ver. restitutio 2. dicto 16. Less. lib. 2. c. 9. dub. 17. num. 121.

Q V A E S T I O P R I M A. Quæ filius familias in domo paterna lucratur; ad ipsūmne, an ad patrem pertineant? Respondeo & dico I. Lucra ex operis artificialibus pro- uenientia, si filius sit v. g. faber, fistulator, musicus, inter aduentitia bona numerantur: quæ proinde post patris mortem præcipua habere debet. Eapropter filius operam suam patri locare, ab eoque salariū exigere iure potest; deductis tamen expensis, quas pater eo alendo facit: Quandoquidem pater filium alere non tenetur propria bona aduentitia, vel castrensia habentem, sicuti colligitur ex l. si quis à liberis, ff. de liber. agnosc. Et hæc est communis Doctorum sententia apud Rebel. p. 2. lib. 1. de contract. quæst. 8. sect. 3. conclus. 2. Nau. c. 17. num. 14. Gabr. in 4. d. 15. quæst. 3. a. 3. dub. 2. prop. 5. Sanchez l. c. num. 5. Diaz in pract. qq. q. 8. §. 2. Mol. tom. 1. tract. 2. disp. 234. & sumitur ex l. penult. ff. de obsequiis, ibi; Pietatem liberi parentibus, non operas debent. Aduerte tamen, si filius opificis v. g. operam suam patri præster, nullo seu expressè, seu tacitè petito salario; quod censetur id patri remittere, pietatis & gratitudinis causâ: vt si postea à patre, eodem mortuo, à fratribus repetere velit, audiendus non sit. Quæ simili ratione docet Sanch. lib. 9. disp. 5. n. 7. Si vir uxorem alar, antequam ei dos debita soluta sit, non posse repetere alimenta; quippe quæ affectu maritali condonasse præsumitur.

Dico II. Si filius familias ex bonis paternis nomine ac voluntate patris lucretur, v. g. filius cauponis, mercatoris; neque consuetudo, neque iura permittere videntur, vt exinde salarium, vel partem lucri exigat. Ita docet Gl. in l. cum oportet, Cod. de bonis, quæ liberis, &c. ver. ex eius substantia, Syl. ver. peculium, i. q. 12. P. Nau. lib. 3. c. 1. n. 76. Diaz, & Medina ll. cc. Nam iura indistinctè ajunt, quæ ex re siue substantia patris proueniunt, ipsi patri acquiri, Instit. per quas personas nobis acquiruntur, §. 1. & cit. l. cum oportet. Neque facile reperietur filius, qui ob eiusmodi paternorum bonorum administrationem, salarium à patre petere audeat; vel, si petat, non illico à patre repellatur; eo quod ex gratitudine erga patrem, dum in eius domo degit, tanquam ad obsequiales operas, obligatus esse videatur.

Contrarium tamen non improbabiler, post Bartolum, docent Angelus ver. peculium, n. 11. Nauar. c. 17. n. 144. Lopez p. 2. instruct. c. 21. Less. lib. 2. c. 12. n. 81. Cum enim lucrū non tantum ex bonis patris, sed etiam ex filij industria proueniat; ideo partim inter profectitia, partim verò inter aduentitia bona numerandum esse videtur. Ex quo inferunt; Si solus pater lucrum accipiat, nullamque eius partem filio quasi societatis iure relinquat; tunc tantundem salarij ipsi dare obligatum esse, quantum extraneo alicui deberet, saltem si filius exigat. Sin autem ob merum reuerentialem petere non audeat, vel probè sciat, si petat, se repulsam laturum esse; consequenter ajunt, filium clam à patre accipere posse. Quæ sententia ad id saltem Confessario inservire poterit, vt cum eiusmodi filiofam. mitius agat; & non facile ad restitutionem obliget, nisi ultra æstimationem laboris ac industriæ suæ acceperit.

Porro id certum est, atque omnes fatentur; si filios ex re patris non frugifera suo periculo negotietur, ita vt propositum habeat & rem ipsam, quam seu clam, seu mutuo accepit; & damnum, si quod patri inde euenerit, plenè restituendi; tunc lucrum omne ad filium pertinere, tanquam aduentitium peculium.

Q V A E S T I O S E C U N D A. Vtrum pater filium fami-



prohibere possit, quomaius ex domo paterna discedēs, artem aliquam addiscat, operam suam alicui locet, vel quoduis honestum vitæ genus amplectatur? Responso est negatiua, ex communi sententia apud Rebellū, Sanchez II. cc. Nam alioquin homo liber seruilis conditionis efficeretur, si à patre in domo paterna, veluti carcere quodam, perpetuo detineri posset. Limita: Nisi pater inops sit, sibi que alendo non sufficiens; tunc filius naturali lege pietatis operam ipsi suam præstare tenebitur.

8 **QVÆSTIO TERTIA.** Quibus modis filiusfam. patris potestate liberetur, sui que iuris efficiatur? Respon. Septem ferme modis: I. Per mortem naturalem patris-familias, Instit. Quibus modis ius patriæ potestatis soluitur, in princip.

II. Per eiusdem mortem civilem, videlicet deportationem in insulam, ob maleficio, Instit. eod. §. cum autem is.

III. Per lapsum patris in hæresin, etiam ante condemnationem, ubi ius commune viget, c. 2. de hæreticis, in 6. Quamobrem v. usufructus, quem habuerat in bonis filij, per lapsum illius in hæresin amittitur, & cum proprietate filij consolidatur, sicuti docent Jacob. Minancain Cath. instit. cap. 9. num. 81. Molin. tom. 1. tract. 2. disp. 9. §. ab hac regula, Lessius lib. 2. cap. 3. dub. 5. in fine.

IV. Per emancipationem filij coram Iudice factam, §. præterea, Instit. eod. & l. vlt. Cod. de emancip. liberorum. Quibusdam verò locis, cum primum liberi coniugio locati sunt, emancipati, sui que iuris esse censentur.

V. Per electionem filij ad patritiam, vel consularem dignitatem, l. vlt. Cod. de decurionibus, lib. 10. & l. vlt. Cod. de Consulibus, lib. 12. & §. filiusfamilias, Instit. Quibus modis ius, &c.

VI. Per electionem filij in Episcopum, c. per venerabilem, Qui filij sint legitimi. Adde & Cardinalatum, atque professionem, siue statum Religiosum, ex communi DD. sententia.

VII. Per adoptionem filijfamilias factam non ab extraneo, sed ab auctore paterno, aut materno, l. cum in adoptiuis, §. si verò, C. de adoptionibus.

Denique si ab hostibus pater captus sit, pender ius filiorum: Nam si ex captiuitate postea redierit, postliminio recuperat pristina iura erga liberos, perinde ac si semper eos in potestate sua habuisset. Sin autem ibi decesserit pater, tunc liberi à principio captiuitatis paternæ sui iuris fuisse censentur, §. si ab hostibus, Instit. eodem. Lege, si placet, commentatores super cit. tit. Instit. Molin. tom. 1. tract. 2. disput. 229. Rebell. cit. q. 8. sect. 6.

## CAP. IX.

Utrum pupillus, & Minor XXV. annis contrahere possint?

## S V M M A R I V M.

- 1 Pupillus, postquam ex patris potestate excessit, tutorem accipere cogitur; sed curator puberi non datur si inuitus sit.
- 2 Inter tutorem, ac curatorem plures differentia sunt.
- 3 Triplex est tutela; testamentaria, legitima, & datina.
- 4 Clerici cogi non possunt ad suscipiendam tutelam, nisi personarum miserabilium: sed à Religiosis omnino alienum est tutela munus.
- 5 Pupillus, aut Minor contrahens cum consensu tutoris, aut curatoris sui, tam civiliter, quam naturaliter obligatur.
- 6 Pupillus, utique & Minor curatorem habens, si contrahant sine tutoris, aut curatoris auctoritate, civiliter non obligantur.
- 7 Obligatur tamen pupillus sine tutoris auctoritate, obligatione naturali, quæ sufficiens sit ad transferendum dominium; si nihil excipiat, repetatur.
- 8 Quibusdam casibus neque naturalis obligatio in contractu pupilli

subsistit.

9 Obligationis naturalis non vnica, sed plures effectus sunt.

10 Quod pupillus, vel minor XXV. annis curatorem habens ludenda perdidit, soluere non tenetur, nisi iurauerit: sin ratem solutus, ab altero reuocari potest, donec repetatur.

11 Si pupillus, vel Minor, quod indebitè soluit, aliter recuperare non possit, per compensationem aliquam prospicere sibi poterit.

**N**otandum est: Pupillus (id est, puer, siue puella impubes) postquam ex patris potestate, per mortem eius, excessit, cogitur habere tutorem: cuius præcipuum munus est personam pupilli tueri, vt piè ac honestè educetur, inst. uatur. Deinde verò eiusdem bona administrare, tali cura, qualem diligens paterfamilias propriis bonis adhibere solet: quod posterius similiter de curatore dicendum, l. à tutoribus, ff. de administr. tutorum. Porro impuberes masculi censentur, vsque ad completum ætatis annum XIV. puellæ vsque ad completum XII.

Differt autem tutor à curatore: I. Quod tutor vsque ad tempus pubertatis datur; ideòque præcipuè ad personam pupilli tuendam; secundariò autem ad bona eius administranda: secuta autem pubertate, tutela finitur, §. 1. Instit. Quibus modis tutela finitur. Si tamen tutor rationes tutelæ non offerat, nec pubes factus contradicat, officium administrationis retinet, secundum Imperij consuetudinem apud Andr. Gaill. lib. 2. obseruat. 96. Curator autem pueris ac puellis puberibus datur, vsque ad annum ætatis XXV. (quo tempore Minores appellantur) potissimum, vt bonis eorum præsit, seu administrator existat.

II. Tutor impuberi etiam inuito dandus est, l. 2. ff. de tutelis, l. nec non, ff. de tutorib. & curatorib. Sed curator puberi non datur, si inuitus sit, §. item inuiti, Instit. de Curator. Si tamen pubes curatorem suscepit, seu in eum consensit, tunc cogitur esse sub illo, vsque ad ætatem legitimam completorum annorum XXV. sicuti docet Mol. tom. 1. tract. 2. disp. 220. Similiter si à patre testamento puberi datus est curator, à Iudice confirmari debet, §. 1. Instit. de Curator. Præterea minor natus in iudicio, seu vt Actor, seu vt Reus, sine tutore, aut curatore non admittitur, cit. §. item inuiti, l. 1. & 2. C. Qui legit. person. in iudic. Exceptis tamen causis spiritualibus; puta Ecclesiastici beneficij, matrimonij, & his annexorum, in quibus pubes, XXV. annis minor, per se, vel per Procuratorem agere, & conueniri non prohibetur, c. vlt. de iudiciis, in 6. Denique furiosis ac prodigis, licet maiores XXV. annis sint, sicuti & mente captis, surdis simul ac mutis, & qui perpetuo morbo laborant; quia rebus suis ipsi præesse non possunt, curatores dandi sunt, iuxta §. furiosi, Instit. eodem.

Tutor (sicuti & curator) cum primum Iudicis auctoritate interueniente, bonorum administrationem suscepit, inuentarium conficere debet, iuxta l. tutor, qui re. pectorum, ff. de administr. tutor. vbi id docent DD. & Mynsinger cent. 6. obser. 39. Deinde operam dare debet, vt ex bonis immobilibus fructus proueniant; pecunia quoque in annuos reditus conuertatur: alioquin restituere cogetur, quod ab eo non sine culpa neglectum fuit. Quæ de re Syl. ver. tutela, q. 4. & 6. Rebell. p. 2. lib. 17. q. vn. de officio tutoris, & curatoris. Mol. tom. 1. tract. 2. disp. 224. Vt verò omnem à se fraudis ac negligentia suspicionem tutor amoueatur, consultum ipsi erit, propinquorum etiam consilio in bonorum administratione uti, sicuti notauit Syl. q. 5. Adde, quod pro hac sua cura seu administratione salarium accipere tutor interdicitur, præterquam si ei à Iudice constitutum sit, l. à tutoribus, §. vlt. ff. de administrat. tutorum, & docet Gl. in l. in eos, ff. de tutelis. Cæterum, si pauperes pupilli sint, vt bona vix ad sustentationem eorum sufficiant; tunc charitatis lex non permittet aliquid per Iudicis auctoritatem adimi.

Triplex est tutela, secundum Gl. Instit. de tutelis, §. 3



permissum est; Testamentaria, legitima, & dativa. Qui in testamento à patre tutores dati sunt, ij reliquis præferuntur. Adde, quod non tantum pater, sed quilibet etiam extraneus, si impuberem heredem instituit, tutorem ei dare potest, qui tamen cum inquisitione confirmari debet, l. si patronus, & l. seq. ff. de confirmat. tut. & curat. Sin verò testamento nullus tutor assignatus est, accersendi sunt tutores legitimi, qui olim, secundum 12. tabularum leges, censebantur proximi agnati, id est, per virilis sexus cognationem coniuncti; exclusis alijs consanguineis, vti habetur in l. 1. C. de legitima tutela. Nunc verò, sublato discrimine inter agnatos, & reliquos cognatos, quod attinet ad hæreditarias successiones, & tutelas; æquo iure omnes admittuntur, si idonei sint, Auth. de hæred. ab intestato, §. ex his, collat. 9. & habetur post cit. l. 1. Cod. *Sicut hæreditas, agnatione non inspecta, proximis deferitur, sic & tutela onus comitatur emolumentum, si masculi & perfectæ sint ætatis, (videl. XXV. annis maiores, l. ult. C. eod. nisi Minor testamento datus sit tutor, tunc tutela, alio interim subrogato, illi reservatur, donec ad ætatem legitimam peruenierit, §. furiosus, Instit. Qui testam. tutores, &c.) & nulla lege prohibeantur suscipere. Quod si plures sint eiusdem gradus, & ad tutelam vocantur; inebemus communiter apud Iudicem convenientibus, unum, vel plures eligi; & cum, vel eos administrare: vt magis idoneos, vel idoneis committatur tutela, periculo tutela omnibus imminente, qui ad tutelam vocantur: & substantijs eorum Minoribus iacite subiacentibus pro huiusmodi gubernatione.*

Porrò iure nouo Cod. Quando mulier tutelæ officio, &c. Matræ & auix paternæ ante omnes agnatos, aut cognatos ius tutelæ permittitur, si recipere velit. Repellitur tamen primò: Si ad secundas nuptias transeat. Secundò; Si luxuriosam vitam ducat, secundum Gloss. in Authen. matræ & auix, Cod. eodem tit. Abb. cap. ex parte, 2. de appellat. Syluest. ver. tutela, quæst. 10. Sa. ver. curator, num. 3. Molin. tom. 1. tract. 2. disp. 220. Natarrus c. 25. man. num. 67. & colligitur ex l. ult. Cod. eodem. Ob eandemque causas matræ negari potest educatio pupilli, quæ alioquin ei ante alios debetur, l. 1. C. vbi pupilli educari debent.

Denique si neque testamento tutor datus sit; neque legitimus aliquis idoneus adsit, à Iudice tutor pupillo dandus est. Hæc tamen locum non habent, si mortuo patre, supersit auus ex linea virili: qui demortuum in potestate habuerat, & consequenter etiam ab eo relictos liberos: vt proinde alio ipsis tutore opus non sit; cum in aui potestate ac gubernatione permaneant, vti constat ex l. 1. tit. Instit. 13. de tutelis, in princ. & §. permissum. Videri potest Nau. lib. 3. consil. ult. n. 10. de conuers. infidelium, edit. 2.

Tutores, & curatores etiam iniuri esse coguntur, l. 1. ff. de administrat. tutorum. Quia est vnum ex publicis muneribus, à quibus lex neminem immunem esse vult, tit. C. de decurion. lib. 10. Verum iuste causæ allegatione apud Magistratum, onus tutelæ declinare concessum est, vti videre licet tit. Instit. de excusat. tutorum vel curatorum, & tit. ff. eod. titulo.

Veruntamen Clerici, ad suscipiendam tutelam cogi nequaquam debent: præterquam personarum miserabilium, si alia personæ idoneæ non reperiantur, iuxta c. ult. d. 86. & c. 1. d. 88. Deinde si Clerici velint legitimam, tanquam proximi cognati, tutelam suscipere, non prohibetur, vti colligitur ex cit. c. ult. d. 86. Quod verò Syluest. ver. tutela, q. 3. hæc eadem ad Religiosos transfert, vt & ipsi in his casibus cum Prælati licentia tutelam suscipere possint, id non rectè dictum videtur: cum tutelæ munus à religiosa professione nimis alienum sit. Nam tutor, seu curator ex mala administratione obligatur pupillo, aut Minori: imò antequam administrationem

suscipiat, cauere seu satisfacere cogitur per fideiussores, aut pignora; nisi testamento nominatus, vel à Iudice cum inquisitione datus sit, ideoque hoc ipso vt idoneus electus, sicuti habetur Instit. de excusat. tutor. vel curat. §. sed hoc non est. At verò Religiosi neque talem cautionem facile præstare, neque vllam pro tutelæ administratione obligationem contrahere possunt, cum bona nulla habeant, vti bene notauit Sanch. lib. 6. moral. c. 14. n. 26. Atque in iuribus supra citatis nihil dicitur de Religiosis: quin imò in Authen. de SS. Episcopis, §. Deo autem amabilis, tutelæ officium illis omnino inter dictum legimus.

Assertio I. Pupillus, multoq; magis minor XXV. annis, cū consensu & auctoritate tutoris, vel curatoris contrahens, obligatur tam ciuilitè, quàm naturaliter. Ita habetur in l. impuberes, ff. de auctorit. & consensu tutorum, iunct. Gl. ver. obligantur, & aliis iuribus apud Sanchez l. 6. de matrim. disp. 38. num. 5. Intelligi autem debet assertio de pupillo pubertati proximo; ita vt rationis discretionem, quæ ad contractum naturalis, ac gentium iure sufficiat, acquisiuisse censeatur. quod secundum iuris præsumptionem accidit post exactum annum decimum cum dimidio, si masculus sit; vel nonum cum dimidio si femella, §. pupillus, Instit. de inutil. stipulat. iunct. Gloss. ver. infantia proximus. Ante eam verò ætatem solus tutor contractus celebrare debet: ipsemet verò pupillus ex proprio consensu non obligatur. Vide Molin. cit. disput. 224. §. vt ad Minbrum. Ioannem Fabrum tit. Instit. de auctoritate tutorum, §. 1. Deinde excipienda est alienatio bonorum immobilium, & pretiosorum mobilium, quæ seruando seruati possunt: hæc enim pupillis, & adolescentibus, etiam interueniente curatoris auctoritate, interdicta est, nisi Iudicis insuper decretum accedat, l. lex, 4. Cod. de administratione tutorum, l. vltim. Cod. quando decrero opus non est, & l. non solum, l. si Minor, Cod. de prædijs Minorum, l. clarum, Cod. de auctorit. præstanda. Et quod dico de alienatione, intelligi etiam debet de hypothecæ aut seruitutis in re immobili, aut mobilis pretiosæ constitutione: item de transactione, si cum alienationis periculo iuncta sit.

Assertio II. Pubes, qui curatorem non habet, etiam si minor sit XXV. annis, obligatur tam ciuilitè, quàm naturaliter: potest tamen petere restitutionem in integrum, si ex contractu læsus sit. Ita habetur in l. 3. iunct. Gloss. Cod. de in integrum restitut. & docent omnes. Sed intelligi debet de alienatione eorum bonorum, videlicet mobilium, quam cum curatoris consensu facere potest; vt ipsi etiam talis alienandi facultas concessa sit, si curatorem non habeat: in alijs verò alienationibus Minorum Iudicis decretum requiritur, vt supra dictum.

Assertio III. Pupillus, & minor XXV. annis, curatorem habens, sine auctoritate eius non obligatur ex contractu ciuilitè. Ita habetur in §. admonendi, Instit. Quibus alienare licet, & tit. ff. & Instit. de auctorit. tutorum, & l. 3. C. de in integrum restitut. & aliis iuribus. Interim tamen alterum ætate maiorem, quocum contrahit, ciuilitè etiam ex contractu obligat, l. obligari, ff. de auctoritate & consensu tutorum, §. pupillus, Instit. de inutilibus obligat. & cit. §. nunc admonendi, & Instit. de auctoritate tutorum, princip. Si quid dari sibi stipulentur pupilli, non est necessaria tutoris auctoritas: quod si alij promittant, necessaria est. Namq; placuit, meliorem quidem suam conditionem licere eis facere, etiam sine tutoris auctoritate: deteriores verò non aliter, quàm cum tutoris auctoritate. Exempli causa: Celebrato emptionis contractu, licet venditor pupillum, qui sine tutoris consensu emit, inuitum compellere non possit ad pretium numerandum; ipse tamen pupillus, si contractu stare velit, ciuili actione coge-



re potest venditorem ad tradendam sibi mercem pro constituto pretio, l. si id, ff. de rescindenda venditione. Quapropter ait Gloss. cit. tit. Instit. de auctoritate tutorum, *contractus claudicat quandoque*: videlicet ex parte pupilli. Ita enim habetur in l. Iulianus, prope finem, ff. de actionibus empti: *Si quis à pupillo sine tutoris auctoritate emerit, ex uno latere constat contractus; nam qui emit, obligatus est pupillo, pupillum sibi non obligat.*

Ceterum dicta assertio limitari debet primò: Quòd pupillus sine tutoris auctoritate obligetur ex contractu, quatenus inde locupletior factus est, iuxta l. pupillus, §. pupillus, ff. de auctoritate tutorum, l. ult. Cod. de usucapione pro emptore. Nam *locupletari non debet aliquis cum alterius iactura*, regul. 48. in 6. Exempli causa; Si venditor pupillo mercem tradidit, non accepto pretio, repetet mercem suam: Sin verò merx amissa, vel absque dolo absumpta sit, non plus in civili foro solvere compellitur pupillus, quàm exinde ditior factus est. Eademque ratio est, si pupillo, vel minori XXV. annis curatorem habenti, mutuo datum sit.

Secundò; Si res tradita pupillo dolo eius periit, datur contra eum actio civilis, qua solvere compellitur, l. 1. §. an in pupillum, ff. de positi, l. 3. §. pupillus, iunct. Gl. ff. de negot. gestis. Si tamen infantia proximus sit, dolus in eonon præsumitur, arg. l. quod infans, ff. de rei vindicat.

Tertiò: Minor Religionem professurus omnia bona sua absque tutoris auctoritate alienare, seu cuicumque velit donare potest, sine beneficio restitutionis in integrum: censetur enim mori, teste Abb. c. in præsentia, de probat. Sylvest. Armilla, Sa ver. Minor, num. 2. Quin imò in donatione aut renuntiatione bonorum intuitu Religionis ingrediendæ, aut profitendæ nulla omnino iuris civilis solemnitas requiritur, iuxta §. illud quoque, Authen. de Monachis, &c. de his, in fine, de sepulturis: *Liberum est eis tunc, si ad religiosa loca se transtulerint, vel transferre velint, bona sua non solum Religiosis, sed etiam quibusque privatis conferre personis.* Vide Sanch. lib. 7. moralium, c. 6. num. 19. & quæ dicam infra tractatu seq. cap. 7. Pari quoque ratione Religiosi Mendicantes, quibus bona immobilia possidere non licet, ea sibi donata vendere possunt, nulla iuris solemnitate interveniente, teste Sa ver. alienatio, num. ult.

Quartò: Si Minor contractum absque curatoris auctoritate celebratum iuramento confirmavit, civili etiam foro obligatus est, Authent. sacramenta puberum, C. si adversus venditionem, &c. Eaque constitutio locum etiam habet in alienatione rerum immobilium, sicuti apertè colligitur ex l. 1. C. eod. tit. & docet Gomez 2. resol. c. 14. num. 18. Sanch. lib. 6. disp. 38. n. 13. Couar. c. quamvis pactum, p. 3. §. 4. num. 6. Loquor autem de pubere tantum: Nam pupillus non videtur ex iuramento civiliter obligari, vt suo loco dicam.

7 Assertio IV. Licet pupillus, & minor XXV. annis sine tutoris auctoritate contrahens non obligetur civiliter, vt dictum est; obligatur tamen naturaliter, siue in foro conscientia. Ita contra quosdam ex communione retradunt Gomez 2. resolut. cap. 14. Sanchez cit. disp. 38. num. 21. Less. lib. 2. c. 17. num. 61. Mol. cit. disp. 224. Rebell. p. 2. lib. 1. de contract. q. 8. sect. 2. Lopez p. 1. instruct. c. 124. quæst. 3. Ratio est: Nam obligatio naturalis oritur ex consensu, l. Stichum, §. naturalis, ff. de solution. Sed pupillus (si pubertati proximus sit) & minor XXV. annis sufficientem consensum habent, sicuti colligitur ex §. pupillus, Instit. de inutil. stipulat. Ergo naturaliter obligantur ex contractu. Neque leges civiles obligationem hanc naturalem omnino infirmant, licet in externo foro actionem adversus pupillum

denegarent. Quod probatur primò ex l. si pupillus, ff. ad l. Falcidiam, l. si eius, iunct. Gl. ver. reddiderit, ff. Ad Trebellianum, & l. 1. ff. de novationibus, quibus locis expressè habetur, pupillum sine tutoris auctoritate contrahentem naturaliter obligari. Secundò: Deficiente obligatione principali, non valet accessoria, iuxta reg. 138. ff. Si autem ad contractum pupilli, sine tutoris consensu celebratum, fideiussor accedat, is etiam civiliter obligatur sicuti constat ex l. ult. §. si verò, ff. de iureiur. & l. si pupillus, ff. de receptis, qui arbitrium, &c. Ergo signum est, principalem obligationem pupilli aliquo modo subsistere, videlicet naturaliter. Confirmatur ex l. naturaliter, ff. de condict. indebiti, vbi ratio redditur, cur fideiussor pro seruo acceptus teneatur; quia servus naturaliter obligatur. Idemque docet Nauar. comment. 2. de Regul. num. 42. de promissione Religiosi, antequam à Prælati contradictione cassetur, fideiussionem efficacem accedere posse. Qua de re dicam infra c. 29. num. 2.

Sed limitari debet assertio I. Nisi pupillus infantia 8 proximus sit; tunc enim neque naturaliter obligabitur: sic conciliari possunt l. pupillus, ff. de actionibus & obligat. & l. quod pupillus, ff. de condict. indebiti, quibus locis negatur, pupillum naturaliter obligari. Cum enim pupillus, qui infantia proximus est, vix vllum intellectum habeat, & non multum à furioso distet, (sicut dicitur in supra cit. §. pupillus) ideo iura civilia eius contractui resistunt, omnemque obligationem tollunt. Vide Gl. in cit. l. pupillus, & l. 1. ff. de novat. & reg. 149.

Quamquam etiam alio modo iura civilia conciliari possunt, quorum alia aiunt, pupillum sine tutoris auctoritate contrahentem naturaliter obligari; alia hoc ipsum negant: quòd hæc loquantur de obligatione naturali omnino efficaci; illa autem de naturali obligatione, atque inde orta actione aliquo modo inefficaci: quippe quæ per exceptionem, ex beneficio legis civilis non compellentis pupillum ad solutionem, contra petentem opponi potest, vt neque in conscientia foro solvere cogatur, nisi quatenus locupletior factus est.

Limita secundò: Si pupillus cum ipsomet tutore contrahat, neque naturaliter obligabitur: quia leges eiusmodi contractui resistunt, sicuti colligitur ex l. pupillus, ff. de auctoritate tutorum, l. non licet, Cod. de contrahend. empt. & docet Gloss. in l. pupillus, 149. ff. de regulis iuris, & alia Gloss. in l. naturaliter, ff. de condict. indebiti, Molin. cit. disput. 224. §. quamvis autem, Sanchez num. 24. Si tamen plures tutores sint, obligari pupillus tutori potest, auctore altero tutore, sicuti habetur in cit. l. pupillus, ff. de auctor. tutorum.

Limita tertiò: Si pupillus, vel Minor absque Iudicis decreto, quamvis auctore tutore, promittat, vel alienet bona immobilia, aut mobilia, quæ servando servari possunt, ne naturaliter quidem obligatus esse videtur: quia iura civilia resistunt, sicuti colligitur ex l. 7. n. 15. Cod. de prædiis, & aliis rebus Minorum, & docet Rebell. cit. quæst. 8. sect. 2. num. 24. Less. lib. 2. c. 17. dub. 7. n. 56. §. vbi non, Sanchez num. 26. ex Bartolo in l. 1. ff. de Novat.

Ceterum, pro huius tertia limitationis, & aliorum 9 quæ hac quarta assertione dicta fuerunt, pleniore intellectu diligenter observandum est; Obligationis naturalis non vnicum, sed plures effectus esse: Primus, isque præcipuus est, quòd creditorius tribuat accipiendi, ac retinendi, si, quod naturaliter ipsi debitum est, nulla opposita exceptione solvatur, l. naturales, ff. de action. & obligat. iunct. Gloss. vbi dicitur, quod naturaliter debitum est, si solvatur, repeti non posse. II. In obligatione naturali accedere potest fideiussor, iuxta l. 1. & l. stipulatus, ff. de fideiussoribus. Item pignus, l.



naturaliter, ff. de condict. indebiti. III. Naturalis obligatio impedit soluti debiti repetitionem, iuxta cit. l. naturaliter, iunct. Bartolo ibid. IV. Naturalis obligatio, licet in foro externo actionem non tribuat, tribuit tamen ius exceptionis & compensationis, sicuti colligitur ex l. iurilgentium, §. sed cum ff. de pactis, & habetur expresse in l. etiam quod naturaliter, ff. de compensat. Inter hos naturalis obligationis effectus, primus maximè necessarius & inseparabilis est; adeò, ut ubi is deest, naturalis obligatio nullo modo consistere possit: sicuti videre est in contractu cum infante, aut furioso; in quo contrahenti nullum omnino ius accipiendi, aut retinendi acquiritur: cum enim desit consensus, nulla omnino obligatio contrahitur.

Quod attinet ad alterum effectum, non est incredibile, cum dispositione legum separari posse, persistente interim aliquo modo obligatione naturali. Quis enim credat, prodigum, cui bonis interdictum est, non magis ex promissione, aut contractu obligari, quam furiosum, qui consensum non habet? Et tamen in promissione prodigi fideiussorem interuenire non posse, dicitur in l. is cui bonis, ff. de verb. obligat. Eademque ratione neque in alienatione bonorum Ecclesiæ, vel Minorum, facta sine debita solemnitate, fideiussor in externo foro obligationem aliquam contrahit: cum leges eiusmodi alienationi resistent. Attamen in hac alienatione, si omni alioquin fraude careat, naturalem non omnino sublatam esse, constat ex iis, quæ dixi tractatu de legibus, in fine cap. 16. & consentit Lessius lib. 2. cap. 17. dub. 7. his verbis: *Res est valde perplexa apud Iurifconsultos: & probabile est, quando contrahentes sunt habiles, (quod dicit propter matrimonij contractum, sicuti explicat infra c. 19. num. 33.) & adest utrinque plenus consensus, contractum inducere obligationem naturalem, etiam si solemnitas iuris non seruetur.* Vide Abb. cap. 1. de in integrum restitut. & cap. quia plerique, de immunit. Eccles. Syluest. ver. alienatio, q. 13. Et confirmatur ex ipso Iureconsultorum assertis. Est enim doctrina Bartoli in l. si quis pro eo, ff. de fideiussorib. quam refert, & probat Sanchez cit. disp. 38. n. 21. §. quarto: Si promissio, vel contractus iuramento confirmetur, signum esse, naturalem saltem ex eo obligationem oriri: Atqui alienationem immobilium bonorum à Minore absque decreto factam iuramento confirmari, constat ex l. 1. & Authent. Sacramenta, C. si aduersus venditionem; & fateatur Sanchez n. 13. ergo fateri etiam cogitur, naturalem inde obligationem contrahi, quod tamen negat n. 26.

Quamobrem pro conciliatione respondere oportet: Cum naturalis obligationis effectus plures sint, quorum vnus interdum promissioni, vel contractui inest, alter verò ex legum dispositione non inest; idè secundum variorum effectuum considerationem modò affirmari, quòd ex promissione vel contractu naturalis obligatio oriatur; modò autem negari.

Tertius naturalis obligationis effectus ferme etiam in civili foro tollitur, quando pupillus, aut Minor absque tutoris, vel curatoris sui consensu alicui se obligauit. Nam pupillus, si, quod naturaliter ita debebat, soluit, solum repetere potest: similiter etiam pubes minor xxv. annis, si curatorem habet, l. interdum, ff. de condict. indebiti. Ex quo colligitur, posse etiam alia ratione conciliari, quod alicubi scriptum reperitur, pupillum sine tutore contrahentem neque naturaliter obligari, considerato videlicet vno effectu naturalis obligationis, sicuti videre est in l. 41. ff. de condict. indebiti. *Quod pupillus sine tutoris auctoritate si pulsanti promiserit, soluerit, eius repetitio est: quia nec natura debet: quasi diceret, naturalem obligationem pupilli non eo se extendere, ut soluti repetitionem impediat.*

Ex eodemque fonte arbitror explicari posse, quod dicitur Instit. Quibus alienare licet, §. nunc admonen-

di, & §. ult. Si pupillus, sine tutoris auctoritate pecuniam debitam soluerit, non fieri eam accipientis, & in l. 11. & 15. C. de prædiis Minorum: Si Minor prædium sine Iudicis decreto distrahat, non transferri eius dominium. Verum enim id est secundum effectum: quia translatum vindicari & repeti potest à quocunque possessore. Nam, ut dicitur reg. 150. ff. *Quod enuncitur, in bonis non est*: id est, perinde se habet, ac si in bonis non fuisset. Neque aliter intelligo responsionem Molinae cit. disput. 224. prope finem, Sanch. cit. disp. 38. resp. ad 2. cum aiunt, tamen si creditor habeat ius rei sibi à pupillo naturaliter debitam accipiendi, ac retinendi; non tamen acquirere eius dominium, eò quòd restituere eandem debeat, si reperatur. Fateor enim, spectato hoc vno dominij effectu, creditorem dominum non fieri: ac secundum alium effectum, puta ius retinendi, si non repetatur, negari non potest eum dominum effici.

Quod denique ad quartum effectum attinet; Licet pupilli debitor, cui vicissim à pupillo aliquid debetur, ex contractu sine tutoris consensu instituto, compensatione uti possit, si pupillus id fieri permittat, & legis civilis beneficio se non defendat, iuxta l. 3. §. pupillus, ff. de negotiis gestis. Attamen si pupillus, legis beneficium opponat, ius compensandi cadit, sicuti ibid. notat Gl. & Mol. cit. disp. 224. §. quod ad reliqua. Cum enim pupillus in foro externo audiatur, si, postquam debitum soluit, repetere velit, multò magis audiendus est, si debiti, quod nondum soluit, compensationem impedire cupiat. Eademque intelligi debent de Minore, qui curatorem habens, absque eius auctoritate contrahit.

Ad extremum colligamus ea, quæ suprà dictis consentanea ad praxin obseruauerunt Molina, & Sanchez circa ludum, vel alium contractum à pupillo, aut minore xxv. annis; sine tutoris, vel curatoris auctoritate institutum: I. Quod pupillus, vel Minor ludendo perdidit, aut alio contractu promissit, soluere non tenetur; sed exceptione beneficij legis civilis defendere se potest: quia tamen si soluisset, repetere posset, seu conditione indebiti, seu in integrum restitutione. *Qui autem ad agendum admittitur, est multò magis ad excipiendum admittendus*, reg. 71. in 6. ex reg. 156. ff. *Cui damus actionem, eidem et exceptionem competere multò magis quis dixerit.* Quid enim opus est inani circulo, ut soluat quis, quod ipsi restituendum erit? Excipe, ut suprà, nisi Minor se soluturum iurauerit.

II. Si pupillus, vel Minor creditori soluit, potest ista conscientia rem retinere, donec ab eo repetatur per beneficium legis civilis, talem repetitionem concedentis. Ratio est: Quia pupillus, & Minor curatorem habens saltem naturaliter obligantur, ut suprà dictum: ac verò legis civilis beneficium ipsis non prodest, si eo non utantur, siue quia uti nolunt, siue quia ignorant.

III. Si pupillus, Minor, eorum uen nomine tutor, & curator indebitè solum repetere velint, sed propter alterius contradictionem, vel Iudicis negligentiam, recuperare non possint, compensationem aliquam seu palam, seu occultè facere non prohibetur. Ratio est, quia alter iniuriam infert non restituendo, si repetatur. Quo sensu recipienda est doctrina S. Thom. 2. 2. quæst. 33. art. 7. ad 2. S. Anton. p. 2. tit. 1. cap. 23. §. 3. princ. Med. Cod. de restitut. quæst. 22. ver. ut igitur in summa, Angles in florib. p. 2. de restitut. ex ludo, a. vn. dub. 1. propos. 2. cum aiunt, lucrantem à Minore summam notabilem ad restitutionem obligari. Idque sumitur ex l. si curatorem, C. de in integrum restitut. *Minor curatorem habens non absimilis ei est, cui à Praetore, curatore dato, bonis interdictum est.* Sin autem Minor curatorem non habens, ludendo, vel aliter contrahendo notabiliter læsus fuit, tamen sine dolo, aut iniuria alte-



rius contrahentis; hoc casu, si in integrum restitutionem apud Iudicē facile cōsequi non possit, non ideo ipsi cōcessū est cōpensatione aliqua vti: quia cōtractus omni in re subsistit, donec à Iudice rescindatur: ergo antequā per restitutionem in integrum rescissio impetratur, iniuria alteri fieri, si ipsi res, aut ius suum auferatur. Et hoc sensu rectē docuerunt Sanchez cit. lib. 6. de matrim. disp. 38. n. 32. Less. lib. 2. c. 17. dub. 9. n. 68. contra Lopez p. 1. instruct. c. 124. §. Sin autem talis.

## CAP. X.

## De alienatione bonorum Ecclesiasticorum.

## S V M M A R I V M.

- 1 Bona Ecclesiastica immobilia, & mobilia pretiosa, quæ seruari possunt, absque iusta causa, certaque solemnitate alienari prohibentur.
- 2 Nomine alienationis prohibita in hac materia Ecclesiæ fauorabili, comprehenditur etiam locatio in tempus longum, census perpetui, pignoris, vel hypothecæ specialis constitutio.
- 3 Cause, ob quas Ecclesiasticorum bonorum alienatio fieri possit, sunt: Necessitas, Maior utilitas, Pietas, Incommoditas.
- 4 Solemnitas ad alienationem requisita in his consistit: Vt præcedat tractatus cum Capitulo. Vt accedat consensus Capituli: Vt interueniat auctoritas Prælati, cui Ecclesiæ subest.
- 5 Beneficiarius prædia Ecclesiastica, quorum reditus in propriam utilitatem percipit, ad tempus longum, sed non ultra vitam suam, locare potest, non adhibito consensu Superioris.
- 6 Prælati, sine consensu Capituli, Ecclesiæ præiudicare non potest in iuribus quæsiis; sed in acquirendis.
- 7 Non satis constat, utrum Prælati sine consensu Capituli renunciare possit hereditati, vel legato rei immobilis, aut mobilis pretiosa.
- 8 Quædam licet alienari valide non possint, tamen usucapi possunt.
- 9 Iuramentum non alienandi duobus modis concipi potest.
- 10 Prælati, qui iurauit se bona Ecclesiæ non alienaturum Papæ inconsulto; prohibetur etiam locare ad tempus longum.
- 11 Papæ non potest pro arbitratu, & sine iusta causa, res Ecclesiæ alienare.
- 12 Contra eos qui illegitimè Ecclesiastica bona alienant, pænæ canonice decreta sunt.

**B**ona Ecclesiarum, quæ immobilia sunt, vel mobilia pretiosa, & seruando seruari possunt, alienari prohibentur; præterquam ob iustam causam, & interueniente certa solemnitate. Ita habetur in c. nulli de rebus Ecclesiæ alienandis, vel non. & extrauag. ambitiosa, eod. titulo, post l. iubemus, 2. C. de sacrosanctis Ecclesijs, & Authenticam de non alienandis, coll. 2. Atque extenditur hæc prohibitio alienationis etiam ad loca pia, v.g. xenodochia, si Episcopi auctoritate constituta sint, sicuti habetur in c. hoc ius porrectum, 10. q. 2. & notat Abbas in c. nulli, n. vlt. de rebus Ecclesiæ non alien. Siquidem Ecclesiæ, & loca pia in eiusmodi æquiparantur, arg. c. requisisti, §. secus autem, de testam.

2 Et si verò alienationis nomen, si strictè & propriè accipiatur, non nisi venditionem, permutationem, donationem, & similes contractus comprehendat, quibus directum rei traditur dominium transfertur, iuxta l. 1. C. de fundo dotali, & l. alienatum, ff. de verb. significat. tamen in materia hac Ecclesiæ, & priuilegiatis personis fauorabili, accipi debet latè, vt comprehendat etiam feudum, emphyteusim, & locationem in longum tempus, quibus rei vsusfructus siue dominium vtile transfertur: multò magis contractum censualem, per quem dominium seu directum, seu vtile in alterum transfertur, constituta pensione annua, qua de re Guilelmus Redoanus de rebus Ecclesiæ non alienandis, cap. 27. Sed & perpetui, ac vitalitij census, quibus annui Ecclesiæ reditus, vel pars aliqua eorum constituto pretio

venditur, alienationis prohibita nomine comprehenditur: quia iura, & reditus annui inter bona immobilia numerantur, quorum alienatio Ecclesijs ac natu minoribus prohibita est, sicuti docet idem Redoanus de rebus Ecclesiæ non alienandis, rubr. 13. & rubr. 16. Andreas Gaill. lib. 2. obseruat. 10. qui tamen notat num. quibusdam Germaniæ locis receptum esse, vt reditus redimibiles; etiam super immobilia bona constituti, inter bona mobilia numerentur.

Præterea nomine alienationis in materia ista Ecclesijs fauorabili comprehenditur quæuis constitutio pignoris, aut hypothecæ specialis, non item generalis, vt colligitur ex cit. c. nulli, vbi id docet Abb. num. 3. Redoanus cap. 6. Molina disput. 466. Quia per generalem hypothecam non tantum iuris in rem, cum periculo eam alienandi transfertur, quàm per specialem. Sin verò loqui velimus de alienatione prohibita in materia odiosa, non debet comprehendere hypotheca, aut pignus, nisi sit constitutum pro tanta quantitate, vt non sit spes facilis redemptionis, ideòque probabili alienationis periculo exponatur: quia prohibito aliquo actu, censetur prohibitum omne illud, per quod peruenitur ad actum, vt docet idem Redoanus num. 2. & 11. Et cum tali declaratione accipi debet rubrica Saliceti in l. vlt. Cod. de rebus alienis non alienandis: Si res prohibetur alienari, non solum prohibetur dominij (directi) translatio; sed pignores obligatio, & vsusfructus, & seruutium constitutio.

Deinde si res aliqua ab antiquo in feudum, vel emphyteusim concedi solita erat, poterit etiam deinceps sine alia solemnitate à Prælato concedi, si Ecclesiæ expedire videatur, sicuti expressè habetur in cit. extrauag. ambitiosa à Paulo II. edita. Et rationem dat Abb. in c. vt super, num. 11. de rebus Ecclesiæ alien. Quia hæc non est noua alienatio; sed potius executio ordinationis antiquæ.

Ex hoc infert Gl. communiter recepta in c. prohibemus, de decimis, Couarruias 1. resolut. cap. 17. numer. 5. §. præter hæc; Decimas, quæ ante Lateranense Concilium laicis dabantur, si postea ad Ecclesiam reuertantur, posse iterum concedi, a gum. cap. 2. de feudis, vbi Gl. & DD. licet repugnet Andreas Fachinus lib. 7. controuersuris, cap. 72. Vide etiam Iulium Clarum §. Emphyteusis, quæst. 28. num. 7. §. etsi dicas, vbi testatur, multis locis consuetudinem esse, vt fundi Ecclesiastici sine iuris solemnitatibus in emphyteusim licitè, ac valè tradantur.

Mobilia pretiosa, quæ seruando non corrumpuntur, sunt v.g. vasa aurea, argentea, gemmæ, item integer grex ouium, caprarum, ex quo Ecclesiæ reditus annuos accipere consuevit. Quæ autem seruando seruari non possunt, & sine iuris solemnitate rectè alienantur, sunt ferme ea, quæ vsu absumuntur, vel breui tempore inuetra sunt; vt fructus, pecudes, pleræque vestes, item pecunia vsui quotidiano deseruiens. Quæ de re Syluest. ver. alienatio, quæst. 7. Denique iura & actiones eodem discrimine censentur, quo res ipsæ, ad quas tendunt: vt si sint rerum immobilium, vel mobilium pretiosarum, alienari nequeant: Sin verò aliarum rerum immobilium, v. g. debita pecuniaria, absque solemnitate vendi possint, sicuti tradit Syl. q. 9.

Causæ iustæ, ob quas rerum Ecclesiasticarum alienatio fieri possit, quatuor numerantur in glossa summaria causæ 12. q. 2. quam sequitur Abb. in cit. c. nulli, n. 3. Syl. ver. alienatio, q. 1. Couar. 2. resolut. c. 17. n. 2. Nauar. comment. de alienat. rerum Ecclesiasticarum, notab. 3. Mol. disp. 468. & alij communiter: Prima est, Necessitas, puta si debita urgeant, quibus alia ratione satisfieri non possit. Altera est, Maior utilitas, puta vt res alia Ecclesiæ utilior comparatur: quæ duæ causæ adferuntur in



Authent. hoc ius, C. de sacrosanctis Ecclesiis. Tertia est, Pietas, puta pro redemptione innocentium captiuorum, vel alia graui pauperum necessitate subleuanda: ob quam causam etiam vasa sacra frangere, & pretium erogare (si alia non suppetant) quandoque concessum est, exemplo S. Ambrosij sub tyranno Maximo. quod factum laudauit S. August. apud Posidonium in vita eius c. 24. Vide c. aurum, & c. Sanctorum, 12. q. 2. ipsumque Ambrosium lib. 2. Offic. c. 28. Exemplo item Acacij, Episcopi Auidæ, apud Socratem lib. 7. cap. 21. & Cæsarij Episcopi Arelatensis apud Surium 27. die Augusti. Nam (vt dicitur in l. sancimus, C. de sacrosanctis Ecclesiis) *absurdum non est animas hominum quibuscuq; vasis, vel vestimentis preferri*. Quarta causa est, Incommoditas, puta si res alienanda plus incommoditatis, quam commoditatis Ecclesiæ afferat: quia v.g. multum distat, argum. c. terrulas, 12. quæst. 2.

4 Posita vnâ ex his causis, solemnitas ad alienationem requisita in his consistit: I. Est, Vt præcedat tractatus cum Capitulo; id est, discutiatur, num expediat rem alienari, necne, iuxta c. sine distinctione, 12. q. 2. & c. 1. de rebus Ecclesiæ non alienandis, in 6.

I. Vt accedat etiam consensus Capituli, iuxta c. 1. c. tua, & totum tit. de his quæ fiunt à Prælati sine consensu Capituli. Sufficit tamen, si maior pars Capitularium, qui tunc præsentibus sunt, consentiat, sicuti ex communi docet Molina cit. disp. 468. §. tertio dictum est. Cæterum, etsi Capitulum ante alienationem non consenserit, vel etiam contradixerit, potest tamen eandem postea ratam habere, & alterum contrahentem ad contractus obseruationem compellere: quare *favore Ecclesiæ contractus interim claudicat*, inquit Abbas in cit. cap. 1. & colligitur ex c. cum nos, de his quæ fiunt à Prælati, & c.

III. Vt interueniat auctoritas Prælati, id est, consensus eius, qui ex munere publico Ecclesiæ præest, puta Episcopi, Abbatis exempti, Generalis Ordinis, iuxta c. 1. De his quæ fiunt à Prælati, & c. Quod si Abbas Episcopo subiectus sit, etiam Episcopi consensus requiratur: idemque sentiendum de quouis inferioris Ecclesiæ Rectore, qui si Collegium siue Capitulum Clericorum non habeat, sufficit ad alienationem ipsius consensus, cum Episcopi auctoritate, teste Abbate in cit. c. 1. Sin verò Ecclesiæ inferiori Rectore careat, constituendus est ei administrator, priusquam Episcopus alienatione faciendæ auctoritatem præbere possit, uti habetur in c. 1. de rebus Ecclesiæ alien. vel non, in 6. & notat Abb. in cap. 1. Ne sede vacante, & c. n. 7.

Porro sciendum hic est, non requiri consensum expressum; sed sufficere tacitum, qui fit cum scientia, & patientia eius quod agitur: talémque consensum, atque alias extrinsecè requisitas solemnitates interuenisse, præsumi debet ex diuturnitate temporis, præsertim immemorialis, etsi in instrumento nulla earum mentio reperitur. quod singulariter notandum ex Petr. Anchirano consil. 139. docent Felinus in c. sicut, n. 30. & n. 33. §. contrarium, de re iudicata, Ioseph. Mascard. volum. 1. de probat. concl. 75. 108. & 417.

IV. Requisitum: Vt fiat subscriptio à Capitularibus, iuxta c. tua, de his quæ fiunt à Prælati, & c. idque saltem in alienatione propriè dicta, per quam rei dominium transfertur. Quamquam neque in hac vbique id consuetudo obseruat, teste Abb. cit. c. 1. Ar. milla ver. alienatio, n. 6. qui ait, satis esse, si subscriptio manu Notarij fiat.

Quod si rei Ecclesiæ alienatio contra iuris terminos facta sit, ipso facto irrita censetur, iuxta c. si quis, de rebus Ecclesiæ alien. vel non. Et non tantum Capitulum, siue Ecclesia, sed ipsemet quoq; Ecclesiæ prælatus rem à se malè alienatâ repetere potest, allegans propriâ

turpitudinem; teste Abb. cit. c. si quis, Nau. lib. 1. consil. 20. de rescriptis, edit. 2. Quia licet ordinariè non liceat contrahere facto proprio, & allegare propriam turpitudinem; exipitur tamen, nisi id fiat ob causam necessariam ad animæ salutem; vel nomine Ecclesiæ, aut Reipubl. Is autem, cui alienatio facta fuit, rem ipsam cum omnibus fructibus, in foro externo restituere compellitur, iuxta cit. l. iubemus, C. de sacrosanctis Ecclesiis, & c. non liceat, 12. q. 2. Poterit tamen tunc emptor v.g. contra Prælatus malè alienantem agere ad recuperandum pretium; si bona fide, & sine dolo emit: imò & ab ipsamet Ecclesia repetere, quatenus locupletor inde facta fuit. Qua de re vide Abb. in cit. c. si quis, ad finem, Syl. q. 14. Denique si rei Ecclesiæ alienatio facta sit in casu licito, & cū præscripta solemnitate, tunc valida quidem est: attamen si exinde Ecclesia enormiter læsa reperiatur, competit ei beneficium restitutionis in integrum, de quo dicam cap. seq. & videri potest Abb. in c. fraternitatem, n. 5. de donat. Vide quæ in simili de pupillo & Minore contrahente docui cap. præced. in fine.

Cæterum his, quæ hætenus dicta sunt, irritam esse alienationem rei Ecclesiæ, factam sine iusta causa, aut sine certa solemnitate; quædam declarationes siue limitationes adhiberi debent: I. Si Ecclesiæ Rector, Parochus, Canonicus, aliûsue beneficiatus habeat ius ex prædiis Ecclesiasticis percipiendi redditus in propriam vtilitatem; & non tanquam administrator in vtilitatem fratrum, aut Ecclesiæ fabricam; tum nihil obstat, quominus ea sine solemnitate ad longum tempus, vel ad vitam suam locare possit. Cùm enim talis locatio morte locantis expiret, nullum exinde periculum Ecclesiæ, vel successori imminet, sicuti singulariter annotauit Abb. in cap. 1. de his quæ fiunt à Prælati, & c. & in c. veniens, n. 1. de transact. vbi ait, quod *Rector Ecclesiæ siue Curatus potest contrahere super rebus Ecclesiæ, sine auctoritate Superioris, ita vt contractus valeat tempore vite suæ*. Accedit alia ratio, quod in locatione eiusmodi iuris beneficiarij ad tempus longum non transfertur dominium vtile beneficij, sed sola commoditas siue ius percipiendi redditus nomine ipsius beneficiarij, dum is viuit, sicuti annotauit Molin. cit. disp. 466. §. in tertio autem euentu. Sin verò Abbas, vel quouis alius Administrator Ecclesiæ prædium locet, non expirat locatio morte locantis, sicuti notauit Couar. 2. resol. cap. 15. n. 6. Molin. cit. disp. 466. Syl. ver. Simonia, q. 14. Quamobrem interdictum ei est, ne ad longum tempus, videl. ad decennium, vel amplius locet. Imò Paulus II. in extrauag. ambitiosa decreuit, vt locatio etiam ultra triennium inualida, & canonicis pœnis obnoxia esset: quam tamen constitutionem pluribus locis receptam non esse, monet Caiet. ver. excommunicatio, cap. 75. Nauar. cap. 27. num. 149. Tolet. lib. 5. cap. 91.

II. Prælati, sine dicta solemnitate, alienare possunt res Ecclesiæ modicas, & parum viles; tametsi immobiles sint, arg. c. terrulas, 12. q. 2. & docet Mol. disp. 468. §. licet prædicta, Sa ver alienatio, n. 7. aliique communiter.

III. Licet Prælatus, absque Capituli consensu, aliisque solemnitatibus Ecclesiæ obesse, ac præiudicare non possit in bonis, aut iuribus acquisitis, vt supra dictum; nihilominus solus Prælatus, sine consensu Capituli, & solemnitate, obesse ac præiudicare Ecclesiæ potest in bonis ac iuribus acquirendis, iisque validè renuntiare; sicuti notat Gl. recepta c. vlt. 16. q. 6. & Legist. in supra cit. l. iubemus, Abbas & Canonistæ in c. tua, de his quæ fiunt à Prælati, Syl. ver. alienatio, n. 18. Nam aliud est nocere, aliud vero est non prodesse, arg. l. si sponsus, §. si maritus heres, ff. de donation. inter virum & uxorem. Quapropter Prælatus validè repudiat donationem



Ecclesiæ suæ oblatam; & Abbas, cum Nōuitium suscipit, validè renuntiat hæreditati, quæ post eius professionem & mortem patris v.g. Monasterio obuentura esset, vti docet Sanchez lib. 7. moral. c. 6. n. 4. Veruntamen his casibus Prælatus Ecclesiæ obligatus manet, si officio administrationis suæ malè functus, illius utilitati non prospexit, iuxta c. 2. causa 12. q. 4. & docet Abb. in c. 1. n. 9. de in integr. restitut. Syl. l. c. Less. lib. 2. c. 24. dub. 10. n. 65. Sanch. lib. 6. disp. 4. n. 15. Quia Prælatus habet se ad Ecclesiam tanquam tutor seu curator, secundum Gl. in c. auditis, ver. iure minoris, de in integrum restitut.

Vide etiam Nauar. conf. 2. de Regul. n. 32. vbi similem regulam tradit de Regularibus; Quod Monachus Monasterio prodesse potest, non tamen obesse in iure quæsit; puta si rem sibi testamento legatam absque Prælati sui licentia acceptet; peccat quidem, sed acceptatio valet, & legatum Monasterio acquiritur, secundum Abb. in c. cum ad Monasterium, n. 1. de statu Monachor. Sin autem legatum absque consensu repudiaret, non valeret repudiatio. At verò in iure quærendo non tantum prodesse potest; sed etiam obesse, videlicet si donationem sibi faciendam respuat.

Præterea licet Prælatus absque Capituli consensu obesse non possit alienando res Ecclesiasticas; potest tamen obesse in iudicialibus, sinendo aduersus Ecclesiam ferri sententiam; item in vsucapionibus, sinendo res Ecclesiæ ab altero tēporis diuturnitate vsucapi. Quamuis in vtroque casu apparentis læsionis restitutio in integrum intra quadriennium conceditur, sicuti docet Abb. in c. 1. n. 9. de præscript.

7 QVÆSTIO PRIMA. Vtrum Prælatus sine consensu Capituli renūtiare possit hæreditati, vel legato rei immobilis, aut mobilis pretiosa? Ita affirmant Abb. in cit. c. tua, n. 8. Menochius de arbitr. Iudicium qq. lib. 2. casu 171. n. 52. Sanchez cit. disp. 4. n. 12. propterea quod hæc non sit alienatio, sed potius non acquisitio. Contrarium docet Mol. disp. 468. §. dubium est, & alij apud Sanchez. Quia licet ante hæreditatem aditam ius in re siue dominium Ecclesiæ acquisitum non sit, est tamen acquisitum ius ad rem. cui iuri Prælatus sine Capituli consensu renūtiare non posse videtur: cum eiusmodi iuris abdicatio alienationis specis censeri debeat in causa Ecclesiæ fauorabili, sicuti etiam de pupillo statuitur in l. magis puto, §. si pupillus, ff. de rebus eorum qui sub tutela, &c. quod fundum legatum repudiare pupillus sine tutoris auctoritate non potest. In alijs verò prohibitorijs edictis certum est, nomine alienationis non comprehendere repudiationem legati, aut hæreditatis, sicuti constat ex l. si sponsus, ff. de donat. inter virum & uxorem, vbi permittitur marito repudiatio hæreditatis, aut legati, vt uxori obueniat: & in l. qui autem, ff. quæ in fraudem creditorum, vbi repudiatio legati, vel hæreditatis non censetur alienatio facta in fraudem creditorum. Puto igitur, hanc quæstionem valde dubiam esse. Quod si amplecti velimus primam probabilem, & cōmuniorem opinionem; dicendum tamen est, Ecclesiæ in hoc casu competere beneficium restitutionis in integrum, ratione lucri cessantis, propter negligentiam, & malam administrationem Prælati, sicut ex communi docet Sanchez n. 15. vbi bene ait; In optione Ecclesiæ tunc esse agere contra Prælatum, vel petere in integrum restitutionem.

8 QVÆSTIO SECUNDA. Vtrum, quæ alienari iure prohibentur, vsucapi tamen possint? Respondeo cum Abb. in c. cum non liceat, n. 7. de præscript. Vel alienatio simpliciter prohibetur fauore ipsius rei; tunc tacite etiam vsucapio impeditur; quæ ratione dum fundus dotalis sub mariti administratione est, & vxor agere prohibetur, vsucapio inchoari non potest, l. si fundum, ff. de fundo dotali, l. in rebus, C. de iure dotium. Simi-

literque, dum bona filij aduentitia penes patrem sunt, & filius pro eis agere impeditus est, vsucapio incipere nequit, l. 1. C. de annali exceptione, & notauit Abb. in c. 2. n. 11. de præscript. Dico incipere non posse: Si enim antè cœpta vsucapio rei, postea in statu perueniat, quo vsucapi non potest, v.g. marito in dotem tradatur; vsucapio interim suspenditur, ac veluti dormit, vt supra explicauit tr. 1. c. 7. n. 19. Vel alienatio rerum non est simpliciter prohibita, sed potius limitata, vt fiat cum certa forma ac solemnitate; prout videre est in rebus Ecclesiæ, & Minorum: atque has vsucapi interdum nihil obstat, sicuti annotauit Gl. in l. vlt. C. In quibus causis restitutio non est necessaria, vbi ait: *Quedam etsi alienari validè non possunt, (puta sine certa solemnitate) tamen vsucapi posse.*

QVÆSTIO TERTIA. Si Prælatus in ordinatione 9 sui Papæ iurauerit, se bona Ecclesiæ non alienaturum, quouique eiusmodi iuramentum se extendat? Respondeo cum Abb. in c. vt super, de rebus Ecclesiæ alienan. Syl. ver. alienatio, q. 16. Iuramentum hoc duobus modis formari potest: Vel simpliciter non alienaturum; vel non alienaturum inconsulto Papa. Primo modo, intelligitur iuramentum de alienatione illicita, vt perinde sit, ac si Prælatus iurasset, se bona Ecclesiæ non alienaturum sine iusta causa, & præter iuris formam. Secundo modo, extenditur etiam ad alienationem alioquin licitam, & iure concessam, sicuti fusè ostendit Nauar. in cit. loco, & colligitur ex verbis *Possessiones ad mensam meam pertinentes non vendam, neque donabo, neque impignerabo, neque de nouo infundabo, vel aliquo modo alienabo, etiam cum consensu Capituli Ecclesiæ meæ; inconsulto Romano Pontifice.* Excipitur tamen casus magnæ necessitatis, quæ tantam dilationem non patiatur, vt Papa, alijsue Superior prius consuli possit. Et hoc nota, inquit Syluester q. 17. *quia facit pro exemptis habentibus Superiorem in locis remotissimis.*

Porro, tamen si Couar. 2. resol. c. 16. n. 2. arbitretur, 10 Prælatum, qui iurauit, se non alienaturum inconsulto Papa, posse nihilominus sine periurij periculo prædium Ecclesiasticum locare ad longum tempus, Papa non requisito; eò quod iuramentum stricti iuris atque interpretationis esse debeat, arg. c. penult. de iureiurando. Contrarium tamen est probabilius, quod docet Mol. disp. 466. §. ex dictis, Abb. c. intellecto, n. 9. de iureiurando. Nam iuramentum simpliciter prolatum intelligi debet secundum materiam subiectam, & secundum iuris dispositionem, ait Syl. l. c. Atqui alienationis nomen in materia subiecta locationem quoque ad longum tempus ex iuris dispositione comprehendit, sicuti constat ex c. ad audientiam, de rebus Eccles. non alien.

Hoc tamen rectè infertur: Prælatum, qui iurauit, se non alienaturum inconsulto Papa, posse nihilominus alienare res modicas, aut Ecclesiæ parum viles, teste Abb. in cit. c. vt super, n. 15. Quia tales res in hac materia non censentur comprehensæ nomine alienationis, solemnitate aliquam, vel consensum postulantis.

Atque hæc dicta intellige, considerata const. c. nulli, aliorumque iurum antiquorum. Interim nouum negotium facessit Constitutio extrauagans Pauli II. *Ambisiosa*, in qua sub pœna excommunicationis, &c. omnis bonorum Ecclesiasticorum immobilium, ac mobilium pretiosorum alienatio prohibetur, adeò stricta acceptione, vt etiam locationem & conductionem ultra triennium comprehendat; atque ita simpliciter & absolute, vt niti consulto prius, ac facultatem concedente summo Pontifice, nulla talis alienatio fieri queat; & aliter facta irrita existat. Ita enim hanc extrauagant. intellexerunt Guil. Redoanus de rebus Ecclesiæ non alienandis, rubr. 8. n. 50. Less. lib. 2. c. 24. n. 64. Cæterum testantur Syl. ver. excommunicatio 7. n. 83. Nau. lib. 3. con-



filio. eod. tit. edit. 2. & c. 27. man. n. 149. Couar. 2. resolut. c. 16. n. 6. extrauag. istam pluribus locis secundum hunc rigorem receptam non esse. Id vero intelligo, quoad pœnas siue censuras; & quoad locationem ultra triennium. Alioquin verò ab Episcopis, & aliis Prælatiis, qui à Papa confirmantur, iuramentum exigi solet, non alienaturos Papam consulto.

11 **QVÆSTIO QVARTA.** Quid de summo Pontifice sentiendum, vtrum bona Ecclesiæ arbitrato suo alienare possit? Respondeo cum Navar. comment. de spoliis clericorum, §. 2. & 3. Licet Papa canonici iuris solemnitatibus, absolute loquendo, astrictus non sit, sicuti alij Prælati; tamen & ipse naturali, ac diuino iure prohibetur alienationes inutiles efficere: cum bonorum Ecclesiæ non dominus, sed summus administrator à Christo constitutus sit, non ad dissipandum, sed ad dispensandum. Quare ita distinguit Nav. cit. §. 3. n. 8. in c. 1. §. 15. n. 4. Quod alia alienatio rerum Ecclesiasticarum facta à Papa est iusta, & valida: quæ videlicet rationabili causa nititur: alia est valida, & non iusta, si absque rationabili causa res vnius Ecclesiæ in aliam Ecclesiam, aliūve pium vsum transferatur: alia denique neque iusta, neque valida, si res Ecclesiæ sine rationabili causa in vsum profanos alienentur, v.g. laicis sine iusta causa donentur.

12 Denique, quod attinet ad pœnas canonicas, videri potest c. 2. de rebus Ecclesiæ non alienandis, vbi variæ suspensiones ponuntur aduersus clericos, qui immobilia bona aut iura Ecclesiarum laicis, sine consensu Capituli, & licentia Papæ, subiiciunt: & contractus talis ipso iure irritus pronuntiatur. Et Clem. 1. eod. tit. vbi censura suspensionis ab officio ipso iure lata est in Religiosum, qui Monasterio, Prioratu, Ecclesiæ, aut cuius administrationi præsidens, eiusdem iura, redditus, aut possessiones alicui ad vitam eius, aut ad certum tempus concedit: nisi necessitas, vel utilitas exposcat, & Conuentus, vel, si Conuentu caret, proprii Prælati consensus accedat.

## CAP. XI.

## De in integrum restitutione Minorum, Ecclesiæ, &amp;c.

## S V M M A R I V M.

- 1 Beneficium restitutionis in integrum competit minoribus XXV. annis, si ex quocunque contractu, aut quasi contractu læsi sunt. Restitutio in integrum conceditur, si aliud remedium suppetat contractum reuocandi.
- 2 Minor, itemque Ecclesia non tantum in damno emergente: sed etiam in lucro cessante restituuntur. Facilius tamen conceditur restitutio propter damnum, quam propter lucrum cessans.
- 3 Ecclesia iure Minoris fungitur in restitutionis beneficio.
- 4 Quadriennium continuum hodie conceditur ad petendam in integrum restitutionem. Si Minor contractum iuramento firmauerit, non conceditur ei restitutio: scilicet dicendum de Prælato Ecclesiæ.
- 5 Respublica etiam Minorum iure gaudet, adeoque auxilium restitutionis implorare potest.
- 6 Etiam maiores natu interdum restituuntur: sed hæc restitutio differt ab ea, quæ fit Minori, Ecclesiæ, Reipublicæ.
- 7 Refuso contractu emptionis ac venditionis, qui iusto pretio celebratus erat, fructus interim percepti ad emptorem spectare debent.

**R**estituere, (inquit Gl. in c. auditis, de in integrum restitut.) est, reducere aliquem in eum statum, in quo erat ante læsionem. Nam Prætor hominibus in contractu, vel alia sua actione læsis, aut deceptis, naturali æquitate motus, cognita causâ, subuenit, restituendo eos in integrum, l. 1. ff. de in integrum restituti-

tione. Conceditur autem beneficium istud restitutionis, si nulla alia actio competere possit: nam si aliquis communi auxilio, & merito iure ciuili munus sit, non debet ei tribui extraordinarium Prætoris auxilium, l. in causâ, 2. ff. de minoribus xxv. annis. & notat Gl. in c. 1. & c. constitutus, ff. de in integrum restitut. Verum, si læsio spectatis circumstantiis secundum boni viri arbitrium modica sit, tunc extraordinarium istud auxilium tribuere non conuenit, sicuti constat ex l. scio, ff. de in integrum restitut. & c. penult. de rebus Ecclesiæ alienandis, vel non, iun. Gl. ver. enorme, & docet Abb. in c. 1. n. 2. de in integrum restit. Hinc dici solet, quod minima non curat Prætor. Vide Cou. 1. reso. c. 3. n. 11.

Beneficium restitutionis in primis conceditur omnibus ætate minoribus, id est, qui annos xxv. ætatis non compleuerunt, si ex contractu, aut quasi contractu, (quamuis institutus sit cum patris, vel tutoris consensu, imò etiam Iudicis decreto interveniente) læsi sint, sicuti constat & l. 1. & toto tit. ff. de minoribus. Ratio affertur in cit. l. 1. Cum inter omnes constet, fragile esse atque infirmum huiusmodi aratum consilium, & multis captionibus suppositum. Excipe I. Si Minor, antequam cum curatoris sui, aut Iudicis requisita auctoritate contraxit, veniam ætatis impetrauit, tanquam ætate maior reputatur, ideoque restitutionis beneficium priuatur. Vide l. 1. C. de iis qui veniam ætatis. Excipe II. Si maior factus, id est, post exactum xxv. ætatis annum, ratificet ea, quæ in minore ætate gesta sunt, restitutionis petenda beneficium amittit, l. 1. C. si maior factus ratum habuerit. Quod si autem impubes absque tutoris auctoritate, vel pubes minor xxv. annis sine consensu curatoris sui contraxit, vel vterque sine Iudicis decreto rem immobilem, aut mobilem pretiosam, quæ seruari potuerat, alienauit; locus non est beneficio restitutionis: eò quod contractus ipso iure irritus, ideoque Iudicis officio rescindendus sit, l. in causâ, 2. ff. de minoribus, l. 3. C. de in integrum restit. l. 2. C. de prædils minorum, & notat Gloss. in c. 1. de in integrum restit. ver. redire, Mol. tom. 2. disp. 573. §. dictum est.

Exempla restitutionis sunt: I. Si Minor ex contractu emptionis, aut venditionis debita cum solemnitate instituto læsus fuit, quia vendidit rem minoris iusto; vel emit iusto plus, quamuis infra dimidium pretij iusti: restituendus erit, pretium contractus ad æqualitatem reducendo. Sin autem læsus fuit, quia non expediebat eam rem vendi, aut emi; rescindetur contractus Prætoris officio, & dabitur ei actio aduersus quemvis rei venditæ possessorem, iuxta l. in causâ, 1. §. interdum, ff. de minoribus, & docet Abb. in cap. constitutus, num. ult. de restit. in integrum, Gomez 2. resol. c. 14. num. 7. Less. lib. 2. c. 17. dab. 9. num. 63. Mol. to. 2. disp. 573. §. vtrum autem.

II. Si Minor rem alicuius momenti donauit, quamuis cum tutoris, seu curatoris consensu, censetur læsus, & restitutionem petere potest; nisi ob rationabilem causam donarit, puta iustæ remunerationis causa: vel si consuetas sponsalicias donationes, nuptiarum gratia, fecit. Tunc enim prætextu ætatis non restituitur, iuxta l. 1. C. si aduersus donationem.

III. Si Minor ob negligentiam tutoris, curatoris, vel procuratoris non producentis v.g. in iudicio probationes necessarias, læsus fuit, competit illi beneficium restitutionis in integrum, sicut constat ex l. etiâ, ff. si tutor, vel curator, &c. Idemque locum habet in Ecclesia, quippe quæ iure minoris fungitur. idque colligitur ex c. 2. de in integ. restit. vbi id notat Gl. ver. restituimus, in fine, Abb. num. 19. vbi aiunt, in tali casu optionem dari Minori, vel Ecclesiæ, agere contra tutorem, procuratorem, ad interesse; aut petere restitutionem in integrum. Cum



tamen maior natus, si v.g. acta iudicii ob procuratoris negligentiam rescindi, aut renouari petat, ordinariè non audiat; sed sibi imputare debeat, quod negligentem procuratorem constituerit; quare hoc casu contra ipsum duntaxat procuratorem actio mandati competet: Si tamen is soluendo non sit, restitutionis beneficium causâ cognitâ concedetur, l. cum mandato, ff. de Minor. & notat Gl. in c. 2. ver. restituimus, de in integ. restit. Gaill. lib. 1. obseruat. 45.

- 2 IV. Si Minor, quamuis auctore tutore, vel curatore, hæreditatem minus lucrosam adiit, vel legatum, aut hæreditatem sibi vtilem repudiavit, restitui debet, l. ait Prætor, §. non solum, 2. ff. de Minoribus. Ex quo, & seq. §. habetur; Minorem non tantum in damno, sed etiam in lucro cessante restituendum esse: Quod etiam in restitutione Ecclesiæ locum habet, teste Gloss. in c. auditis, de in integ. restit. Abb. c. constitutus, n. 5. eod.

Ex multorum tamen sententia notat Molin. tom. 2. disp. 573. §. illud verò, Restitutionem eius læsionis, quæ in damno emergente consistit, magis privilegiatam esse, pleniusque fieri, quam si læsio in lucro cessante consistat: Tunc enim restitutio non conceditur, nisi res (v. g. hæreditas repudiata) adhuc integra sit; secus, si distracta à substituto. Idemque sentiendum, si beneficium Ecclesiasticum à Minore repudiatum alteri collatum fuerit: Sin verò alteri collatio nondum facta, interdum restitui potest, si ipsi, & Ecclesiæ vtile fore videatur, secundum Gl. in c. ex parte, ver. quamuis minor, ibid. Abb. num. 16. de restit. spoliator. Deinde, si Ecclesia de lucro cessante agat aduersus alteram Ecclesiam, cui lucrum illud acquisitum iam est, præferetur illa altera Ecclesia, tanquam in possessione existens, & certans de iure acquisito non perdendo, sicuti notauit Sanchez lib. 6. disp. 4. n. 15. Nam Ecclesia contra Ecclesiam, quippe pariter privilegiatam, non restituitur, si ex tali restitutione altera Ecclesia pariter, aut magis lædenda sit, per ea quæ docet Abb. in cit. c. auditis, n. 8.

Verum in delictis Minor non restituitur, si dolo commissum sunt; secus, si per culpam, l. i. C. si aduersus delictum: Etenim malorum mores infirmitas animi non excusat. Non censetur autem dolo commissum, si ætate infans sit, aut proximus infantie, teste Claro lib. 5. sent. §. fin. quæst. 60. num. 4. Deinde si Minor crimen in iudicio confessus fuerit, cum sola indicia, aut semiple-na probatio adesset, aduersus propriam confessionem, veluti læsus, in integ. restitui debet, sicuti docet Mynfinger cent. 3. obseruat. 81. Mol. tract. 3. disp. 36. num. 3.

- 3 Secundò conceditur restitutionis beneficium Ecclesiæ, sicuti constat ex tit. decret. de in integ. restit. extra, & in 6. Nam *Ecclesiæ iure Minoris fungitur*, c. auditis, eod. tit. Nomine autem Ecclesiæ omnia pia loca comprehenduntur, iuxta l. omnia, Cod. de sacrosanctis Ecclesiis, & notauit Abb. in c. 1. num. 15. de restit. in integ. Si verò personæ Ecclesiasticæ in propriis bonis, aut iuribus lædantur, non competit eis restitutionis beneficium: quia cessat tunc communis fauor Ecclesiæ, ait Abb. in cit. loco. Deinde, si alienatio bonorum Ecclesiæ immobilium, aut pretiosorum mobilium sine iusta causa, aut requisita solemnitate instituta sit, locus etiam non est restitutioni: cum alienatio ipso iure positio irrita, ideòque Iudicis officio rescindenda sit, sicuti ex suprâ dictis constat, & videri potest Gl. in cit. c. 1.

- 4 Porro cum hodie continuum quadriennij spatium concedatur ad petendam restitutionem ex quacunque causa, iuxta l. ult. Cod. de temporibus in integ. restitutionis; quadriennium istud in restitutione Minorum inchoatur ab ætate legitima, siue exacto XXV.

ætatis anno, sicuti dixi hoc lib. tract. 1. cap. 8. num. 21. In restitutione verò Ecclesiæ, &c. incipit à tempore factæ læsionis, sicuti constat ex c. 1. de restit. in integ. in 6. Excipe, nisi iusta causa postulare videatur, vt etiam post elapsum quadriennij tempus, Ecclesiæ, vel Reipubl. restitutio concedatur, sicuti notauit Gl. in c. 1. hoc tit. in 6. & Abb. c. tum ex literis, num. 10. & seqq. extra, eod. Mol. to. 2. disp. 574.

Tales causæ sunt: I. Si læsio valde enormis sit, secundum viri boni arbitrium, teste Gl. & Abb. in c. 1. de in integ. restit. num. 2. Couar. 1. resol. cap. 3. num. 11. Less. cap. 17. num. 66.

II. Si inculcata ignorantia, aliudve iustum impedimentum obstitit, quominus intra quadriennium restitutio peteretur: quia legitimè impedito non currit tempus iure definitum, arg. c. 1. & 2. eodem tit. in 6. vbi dicitur; si Ecclesia spatio quadriennij beneficium restitutionis petere negligenter omittat, postea admittendam non esse. Ex quo collige, si læsio principio non apparuit, postea verò emergat, tēpus quadriennij inchoandum esse à tempore læsionis apparentis. Deinde colligit Gl. in cit. c. 1. in 6. quod quadriennium non currit durante vita Prælati, qui malè administravit, fuitque causæ læsionis: sed eius successor poterit petere restitutionem post mortem prædecessoris intra quatuor annos. Nam delictum personæ debet in detrimentum Ecclesiæ redundare, reg. 76. in 6.

Exinde aliud discrimen colligitur inter restitutionem Minoris, & Ecclesiæ: Si enim Minor pubes contractum à se celebratum spontaneo iuramento firmaverit, rescissionem postea, vel restitutionem petere non potest, iuxta Authenticam, sacramenta puberum, C. si aduersus venditionem, &c. Sin autem Prælati iurauerint, se contractum seruaturum; non ideo Ecclesiæ præiudicat, quominus restitutionis beneficio frui possit, sicuti notauit Gl. in c. 1. de restit. in integ. in 6. ver. contractum, Abb. c. 1. n. 16.

Tertio loco *Respublica Minorum etiam iure gaudet*, & ideòque auxilium restitutionis implorare potest, l. 4. Cod. Quibus ex causis Maiores, &c. Idque extendi potest primò, ad Principem, tanquam caput Reipubl. Quædere Tholos. lib. 3. de Rep. c. 8. Secundò, ad vniuersitatem studiosorum: cum in ea non pauci minores XXV. annis reperiantur, ait Abb. in c. 1. num. 15. de restit. in integ. & videri potest Mol. disp. 574. Less. num. 67. Tertio, ad vicos communitatem habentes, vt perinde ac ciuitates beneficium restitutionis in integ. petere possint, teste Gaill. lib. 2. obseruat. 62. arg. l. 1. §. si hæres iustus, §. vicis, ff. de legat. 1.

Adde I. Quod interdum ob iustam causam etiam post quadriennium, numeratum à tempore læsionis, beneficium restitutionis in integ. Reipubl. competere possit, sicuti suprâ de restitutione Ecclesiæ dictum fuit. Ratio est, quia fauor publicus, quæ causa est restituenti Communitatem, semper manet. Quare alia ratio est de Minoribus, qui ob ætatis imbecillitatem restituuntur; ideòque, postquam maiores facti sunt, non amplius eis subuenitur, quam intra quadriennium: nisi vel militiam interim exerceant, vel Reipubl. causâ absentes sint, aut alio legitimo impedimento detenti, ob quod Prætor etiam natus maioribus subueniendum esse, causâ cognitâ, decernet, iuxta tit. ff. & Cod. Ex quibus causis maiores XXV. annis in integ. restituuntur, & tradit Abb. c. ex literis, num. 11. de in integ. restit. & in c. tum ex literis, num. 12. eodem tit. vbi discrimen affert inter restitutionem, quæ fit Minori, Ecclesiæ, vel Reipubl. & eam, quæ fit maiori natus; quod ad illam sufficit interuenisse læsionem grauem: Minori enim læso propter ætatis imbecillitatem, secundum quandam æquitatem Iudicis officio succurritur; Ecclesiæ autē ac Reipubl. propter publicum fauorem. Ad restituendum au-



tem maiorem natu, præter lesionem, requiritur causa iusta, ob quam Iudex, præsertim supremus, æquum esse arbitretur succurrere, iuxta l. i. Ex quibus causis maiores, &c. Videl. si læsus aliquis fuerit, per id tempus, quo Reipub. causa aberat, vel cum in vinculis, seruitute, hostiūve potestate esset: aut si qua alia iusta causa videbitur in integrum restituēdi, spectata æquitatis ratione. Vt si aliquis enormiter læsus sit, propter ignorantem iuris valde obsecuri aut dobi: quade re regula tradi potest. Si vnus certet de lucro capiēdo, alter vero de damno vitando, error iuris obsecuri excusationem tribuet, vt læso per in integrum restitutionem succurratur.

Adde II. Quod Ordinarius ex officio suo Ecclesiæ grauiter læsa succurrere debeat, per restitutionem in integrum, etsi nemo sit qui petat, sicuti notat Abb. in cap. cum venissent, num. 9. de institut. Quemadmodum & Iudex Minori grauiter læso; idque ratione vtilitatis publicæ: at verò restitutio natu maioris potius conceditur ad instantiam partis, quam ex Iudicis officio, sicuti docet idem Abb. in cit. c. ex literis, n. 11.

Ad extremum, si contractus v. g. venditionis celebratus ab Ecclesia, Republica, Minore, &c. per in integrum restitutionem rescinditur; ante omnia pretium emptori restituendum erit, vnā cum melioramentis. Alioquin vtitur iure retentionis, donec ipsi satisfactum sit, teste Abb. c. i. de in integr. restit. num. 3. Id verò valde probabile est, quod docet Mol. disp. 375. Less. dub. 10. num. 70. fructus interea bona fide perceptos, ad emptorem, tanquam dominum, iure pertinere, neque rescisso venditionis contractu restituendos esse, si res iusto pretio vendita fuerat. Tunc enim Ecclesia, vel Minor læsus non fuit ratione perceptorū fructuum; (cum acceptum pretium ad lucrum capiēdum adhiberi etiam potuerit) sed tantum ratione rei venditæ et si aliter cum aliis pluribus doceat Couar. cit. c. 3. num. 1.

## CAP. XII.

## De Donatione.

## S V M M A R I V M.

- 1 Propositum, promissio gratuita, & donatio inter se differunt. Promissio interdum ex sola fidelitate: interdum vero ex iustitia obligat promittentem.
- 2 Donatio vna verbalis est, & altera realis.
- 3 Item a iustitia est donatio inter viuos, & a iustitia causa.
- 4 Donatio mortis causa partim cum pactu conuenit: partim vero cum voluntatis.
- 5 In dubio potius præsumitur donatio facta inter viuos: quam causa mortis. Expedit donatario, vt res donata ipsi statim tradatur, & donationi facta testes adhibeantur.
- 6 Pauperes, elemosinas, alique donationes arbitrari suo facere non potest ex bonis dotalibus, aliisque, quorum administratio ad maritum spectat.
- 7 Filiusfam. ex bonis suis castrensibus, etiam inuito patre, donare potest, non item ex bonis aduentitijs, multo minus ex profectis.
- 8 Minores natu donationes, & sumptus moderatos facere non prohibentur: quamuis curatores inuicti sint.
- 9 Religiosi donare non potest: nisi administrationem aliquam habeant: vel licentiam à Prælo suo.
- 10 Si alius persona habens administrationem bonorum, prohibitum sit donare, talis prohibitiō non censetur prohibita donatio remuneratoria.
- 11 Donatio simplex coniugi facta à coniuge, non statim firma & irrenouabilis est: sed morte donantis confirmatur. Quibusdam tamē casibus statim valida donatio à coniuge facta coniugi.
- 12 Similiter donatio simplex facta filio similis à patre, ante mortem reuocari potest.
- 13 Donatio à patre facta filio emancipato: item donatio filio sub potestate constituto facta ob causam, post mortem patris conferenda est.

14 Que pater filio donauit ad militiam, ad studia, ad decentem sustentationem, vel beneficij remunerandis causa, ea conferenda non sunt.

Pater filium propria sufficientia bona habentem alere non cogitur.

15 Donatio facta ultra solidos 500. iure Cæsareo non subsistit: exceptis quibusdam casibus.

16 Donatio omnium bonorum tum presentium, tum futurorum irrita est: nisi facta sit Ecclesiæ, vel pauperibus.

17 Donatio legitime perfecta per magnam donatarij ingratitudinem reuocari potest.

18 Donatio liberis inofficiosa reuocari potest, licet iuramento confirmata fuerit.

19 Iusta causa reuocandi donationem magna partis bonorum, est inopinata susceptio prolis.

20 Equitas interdum postulat, vt donationem Ecclesiæ factam Prelatus ob hanc causam remittat.

21 Renuntiatio hereditatis nondum adita, quamuis delata, natiuitate liberorum non reuocatur.

**D**Einceps in specie agendum erit de nominatis contractibus, & in primis de donatione.

Ante omnia notandum, quod hæc tria inter se differunt: Simplex propositum, promissio gratuita, atque donatio. Simplex propositum seu deliberata voluntas dandi aliquid, vel agendi in alterius gratiam, obligationem non parit, sicuti constat ex c. literarum, de voto, vbi id notauit Abb. num. 2. ex doctrina S. Thom. 2. 2. q. 88. a. 1. Promissio gratuita includit in se propositum dandi, vel agendi, teste S. Thom. in corp. cit. a. 1. Addit verò deliberatam voluntatem alicui denuntiata, se gratis obligandi ad præstandum quippiam, si ipsi acceptum sit: v. g. promitto me donaturum, mutuaturum.

Duplex est promissio: vna improprie dicta; cum intentio dicentis, se facturum aliquid in alterius hominis gratiam, solum est ad obligandum se ex virtute fidelitatis, aut veracitatis, secundum quam in dictis constantes, veraces, ac fideles esse debemus: cuiusmodi constantia atque fidelitatis obligatio ex genere suo, atque per se loquendo, leuis est, & solum sub peccato veniali, sicuti docet Caiet. 2. 2. q. 113. a. 1. Mol. tom. 2. disp. 262. quamuis per accidens ratione euenturi damni possit esse grauis: Vt si alicui dicas, te pecunias ei mutuaturum ad frumentum emendum, & postea dictis non stes; fieri potest, vt exinde damnum incurrat, cuius tu causa existis.

Altera verò est promissio proprie dicta, cum intentio promittentis est ex iustitia se obligare, ita vt alteri promissionem acceptanti ius & actio tanquam verè debitum promissum exigendi, saltem in conscientia foro acquiratur: & talis promissio ex genere suo obligat sub peccato mortali. Quamuis rectè monet Lud. Lopez lib. 2. de contract. c. vlt. §. at verò, Sanchez lib. 1. de matrim. disp. 5. num. 24. Less. lib. 2. c. 18. dub. 8. num. 56. longè maiorem materiam requiri ad mortalem iniuriam in violatione promissionis homini factæ, quam requiratur in furto: quia malitia furti consistit in inferendo damno, quod homines magis iniquo animo ferunt; violatio autem gratuitæ promissionis consistit in lucro alteri non afferendo, quod minus homines æstimare solent.

Porro in dubio, an qui assenerauit, se in alterius gratiam aliquid facturum esse, habuerit animum verè promittendi, atque ex iustitia se erga hominem obligandi; tum ex verbis colligi debet, tum ex adiunctis circumstantiis: si v. g. chirographum, vel testes adhibiti sunt: vel manus stipulatio intercessit. Denique notat Caiet. cit. q. 88. a. 1. promissionem, vt à simplici proposito distinguitur, non tantum significari posse actu signato obligare me ad id; sed etiam actu exercito, *Faciā id*. Quamuis hoc ipsum verbum *faciā* æquiuocum est: quia significare etiam potest solum faciendi propositum, vel rem in effectu futuram esse. Quare nihil certi ex hoc verbo colligi potest, nisi ponatur cum condicionali: *Faciā, si & tu hoc feceris*: *Intrabo Religionem, o Deus, si*



*valetudinem mihi restitueris* : tunc videtur esse potius promissio, vel votum (obligans ex genere suo sub mortali) quam mera denuntiatio propositi, aut euentus.

Donatio dicta est, quasi doni datio, teste Iureconsulto in l. senatus, ff. de mortis causa donationibus. Donum autem est datum gratuitum, id est, quod neque ex iustitia debitum est, neque alteri vicissim aliquam obligationem siue debitum ex iustitia imponit. Interim tamen donationi non repugnat debitum siue obligatio gratitudinis. Hinc enim existit donatio ea, quæ dicitur remuneratoria : quamvis ea non nihil recedat à proprietatibus donationis, uti inter alios annotarunt Clarus lib. 4. sent. ver. donatio, q. 3. Andr. Fachinæus lib. 3. controu. iuris, c. 82. ex l. Attilius, alias Aquilius, ff. de donat. iunct. Gloss. ver. non meram, & l. 1. ff. de donationibus.

2 Duplex est donatio, sicuti præter alios notauit Less. lib. 2. cap. 18. dub. 2. Vna verbalis & imperfecta : Vt si dicam, *donotibi equum meum*, vel *donatus sit tibi equus meus*, qui tamen absens est. Cuiusmodi donatio, licet rei donatæ dominium non transferat (lege ita disponente, ut non solus consensus cum titulo; sed traditio quoque ad acquirenda rerum dominia requiratur) parit tamen obligationem, & actionem personalem, etiam externo civili foro, ut supra dictum cap. 2. Altera est donatio realis, & perfecta, in qua res, quæ donatur, etiam traditur, ut statim accipientis fiat.

3 Iterum diuiditur donatio, quod alia est inter viuos, quæ nomen donationis magis propriè & absolutè sibi vendicat; cum is, qui donat, manu habere illum, cui donat, quam se, sicuti constat ex cit. l. senatus. Altera verò est mortis causa donatio, cum quis habere se manu, quam eum cui donat; magisque eum cui donat, quam heredem suum, l. 1. ff. de mortis causa donationibus.

4 Conuenit mortis causâ facta donatio partim cum pactis & contractibus, videlicet secundum formam, siue modum constitutionis suæ: Opus enim est, ut donatarius donationem mortis causa sibi factam, acceptet per se, vel per alium, cui pro altero stipulari iure concessum est, l. inter mortis, ff. eodem. Si enim nemine acceptante, donatio mortis causa fiat in testamento, vel codicillo, ceteri debet legatum, iuxta l. si donatio, Cod. de donat. Partim verò, videlicet secundum effectus, conuenit cum vltimis voluntatibus, præsertim legato, sicut habetur in §. 1. Instit. de donat. Nam in donatione causa mortis, perinde ac in legato, locum habet Falcidia, l. cum pater, §. eorum, ff. de legat. 2. l. si mortis, l. penult. Cod. ad l. Falcidiam. Item ius accrescendi, si duobus causa mortis donatum fuit, perinde ut in legatis, l. vn. §. vbi autem, & §. hæc autem omnia, Cod. de caduc. legatis. Præterea in donatione causa mortis, utrum eius capax sit donatarius; sicuti & in legato, utrum eius capax sit legatarius; attenditur secundum tempus mortis, non autem factæ dispositionis, iuxta l. in mortis, ff. de mortis causa donat. Quin & ipsius mortis causa donantis, sicuti & legantis in codicillo, capacitas tempore mortis consideratur, sicuti colligitur ex l. 1. §. sed si filiusfam. iunct. Gl. ff. de legatis, 3. Adde, quod eo ipso mortis tempore dominium rei donatæ sine vlla traditione donatario acquiri censetur, l. 1. & 2. ff. de Publiciana. Denique sicuti omnis alia vltima voluntas; ita & donatio ob mortis causam facta, ante donantis mortem omnino firma non est; quominus per donatoris pœnitentiam, vel ob donatarii præuenientem mortem reuocari possit, sicuti constat ex l. mortis causa, 16. l. si mortis causa, 29. l. qui mortis, 30. l. Senatus, 35. in fine, l. 32. ff. eod. cuius verba sunt: *Non videtur perfecta donatio mortis causâ facta, antequam mors donatoris insequatur*. Vide Clarum lib. 4. sent. §. donatio, q. 5. Gomez 2. resol. c. 4. n. 16. & 19. Couar. in rubr. de testam. p. 3. num. 27. & seqq. Mol. to. 2. disput. 288.

Differt tamen mortis causa donatio à legato, quod legatum à testamento pendeat tanquam accessorium à principali. quare infirmato testamento corruit etiam legatum: stante autem testamento, legatum ab hærede præstandum est non antè, quam is hæreditatem adiit. Sed donatio causa mortis à testamento, & hæreditatis additione prorsus independens, ipsa donantis morte perficitur & confirmatur, sicuti docet Gl. recepta in l. legatum, §. penult. ff. de his quibus ut indignis, & c. ad eod. quidem, ut si res mortis causa donata donatario à donatore tradita fuerat, eius dominium plenè & irrenocabiliter ipsi tunc acquiritur, ut nulla actione opus sit: cum ante mortem donantis acquisitum quidem ipsi dominium esset, quamvis reuocabile, l. si mortis causa, vbi Gloss. ff. eodem, & alia Gloss. l. sed interim, ff. de donat. inter virum & uxorem, vbi notatur, aliam rationem esse in donatione inter coniuges facta. Sin verò res mortis causa donata sit verbis tantum, sed non tradita; tunc donatario post mortem donantis actio in rem veluti domino competit aduersus hæredem, vel iacentis hæreditatis curatorem, aut alium quemcunque possessorem, sicuti constat ex l. 1. & 2. ff. de Publiciana in rem actione, iun. Gl. & docet Gomez num. 17. Couar. in rubr. de testam. p. 3. num. 24. Mol. §. Quod etiam ad secundam.

Id verò specialiter statutum est in l. vlt. C. de donat. causa mortis: Vt ad solemnitatem & valorem donationis causa mortis quinque testes requirantur. quod intellige, si donator talis persona sit, quæ testamentum factura septem testium numerum adhibere debeat, & quinque ad codicillum, sicuti notat Molina loco cit. §. dictum est. Ideo autem ad valorem huius donationis, perinde ac ad vltimas voluntates, tantus testium numerus requiritur: quia in ea causa defuncti agitur, qui cum seipsum defendere non possit, faciliè esset dolos ac fraudes componere.

Donatio mortis causa duobus modis fieri potest, sicuti constat ex l. 2. & cit. l. senatus, §. mortis causa, ff. eodem. Primò, ob timorem periculi tunc imminentis, adeoque sub conditione expressa, vel tacitè intellecta, si ex hoc periculo morbi, aut periculosa nauigationis, & c. mors secuta fuerit: tunc tali periculo cessante, statim reuocata censetur donatio, iuxta l. 1. & l. si mortis, 29. iunct. Gloss. ad l. 3. ff. eodem tit. & videri potest Gomez cit. cap. 4. num. 19. Secundò fieri solet donatio in euentum mortis donatoris absolutè: si videlicet donationis tempore nullum propinquum periculum mortis timeatur; vel etsi timeatur, non tamen illud sit causa finalis donandi, sed tantum impulsiva. Quamvis etiam hoc casu donatio reuocari potest, licet traditione completa sit; si vel donatarius ante donatorem moriatur; vel eo etiam viuentem, per solam pœnitentiam donatoris; ita ut non tantum res ipsa donata, sed etiam fructus tum percipiendi ex re, tum percepti, vel percipientium æstimatione repetantur, l. cum quis, ff. de conditione causa data, causa non secuta, & l. videamus, §. Idemque est si mortis causa, ff. de vsuris.

Porrò licet donator donationi mortis causa factæ conditiones præter eius naturam adijcere possit, v.g. ut donatio non repetatur, sed ad hæredes donatarii transeat, si is ante donatorem moriatur, iuxta l. si alienam, §. Marcellus, iunct. Gloss. ver. omnimodo, ff. de donat. mortis causa. Tamen si tali pacto mortis causa donetur, ut donatio nunquam reuocari possit: causa moriendi ceteri debet tantum impulsiva, & non propriè finalis: idèoque donatio inter viuos & absolutè facta: ut proinde inter coniuges subsistere non possit, neque ex tali donatione Falcidia detrahenda sit, sicuti habetur in l. vbi, ff. eod. & docet Clarus §. donatio q. 4. Mol. disp. 287.

Sed & vniuersim loquendo, in dubio potius præsumendam esse donationem inter viuos, quam mortis causa



causa factam, tradit Gl. recepta in l. ult. C. de donation. causa mortis, ver. indigere. Et ad contrarij probationem non satis est, si hæres ostendat donatorem infirmum fuisse, vel in mortis periculo constitutum, cum donaret; sed ostendi debet, donationem in mortis tempus collatam, seu dependentem à morte donatoris factam esse: idque vel verbis expressis, vel saltem præsumptiue, quia mortis mentionem in dispositione fecit. qua dere Nau. lib. 3. consil. 4. num. 9. de donat. edit. 2. Syluest. ver. donatio, 4. q. 3. Clarus lib. 4. sent. §. donatio, q. 4. num. 4. Mol. tom. 2. disp. 287. ad finem. Addit verò Nauar. Licet donator infirmus aliam conditionem apponat, tamen non dependentem à morte ipsius, v.g. donatæ tibi sint ædes meæ, nisi intra mensem reuocauero; censendam fore donationem inter viuos, quæ elapso tempore, & non facta reuocatione, simpliciter purificatur.

Ex dictis colligitur, multum referre ad donationem tum inter viuos, tum mortis causa adiuuandam, si res donata donatario statim tradatur, ita vt accipientis fiat. Expedit etiam, vt donationi testes adhibeantur; quamuis cum discrimine: Nam ad donationem mortis causa quinarium testium numerus per se requiritur, tanquam ad actus valorem, saltem secundum considerationem legis ciuilibus, iuxta ea, quæ dixi lib. 1. tractatu 4. cap. 16. num. 5. At verò ad donationem inter viuos testes duo, aliudve probationis genus requiritur per accidens, ne res donata in externo foro ab hæredibus euinci possit. Verum in conscientia foro tutus est donatarius, quamuis nulla probatione munitus, si sciat, aut credat defunctum animum donandi habuisse.

Nunc omissa donatione mortis causa, de donatione inter viuos est, **QVÆSTIO PRIMA:** Quinam, & ex quibus bonis donare possint? præcipue autem dubitatur de vxore, filiofamilias, pupillo, Minore, Ecclesiæ Prælato, & similibus personis, quæ vel bona propria non habent, vel etsi habeant, eorum tamen administratio penes alterum est.

Quod ad vxorem attinet, respondeo & dico: Vxor eleemosynas, aliisque donationes arbitrato suo facere potest de bonis paraphernis, id est, quæ præter dotem marito allatam, sibi reueruauit, vt eorum administratio penes ipsam maneat: Non item de dote, aliisque familiaribus bonis, quorum administratio ad maritum spectat, si ne licentia eius expressa, vel præsumpta donare potest. Ita S. Thom. 2. 2. q. 32. a. 8. ad 2. Abb. in c. si quis, num. 4. de furtis, Gabr. in 4. d. 15. q. 3. a. 3. dub. 2. Nau. c. 17. man. num. 153. aliisque communiter.

Posterior tamen pars assertionis limitanda est primò: Nisi bonorum illorum administratio vxori relinquatur, quia maritus absens est, vel prodigus, aut mente captus, sicuti docet Palud. in 4. d. 15. q. 3. a. 6. conclus. 2. Gabr. l. c. Nau. in man. c. 17. n. 154. Mol. to. 2. disp. 274. in fine, Vasq. tract. de eleemosyna, c. 4. n. 3. Pet. Nat. lib. 3. c. 1. n. 86. Less. lib. 2. c. 12. dub. 14. Lopez p. 2. instr. c. 24. §. sed adhuc.

Secundò: Nisi opum abundantia, vel pauperum grauis necessitas, aliave iusta causa postulet, vt eleemosynæ, aliæve donationes, præsertim remuneratoriæ fiant: maritus autem ob auariciam, vel imprudentiam intermitat, pro eo vxor facere potest, exemplo Abigail 1. Regum 25. & docet Palud. Gabr. vterque Nauar. Molina, Vasq. Lopez ll. cc. Angelus ver. eleemosyna, §. 7. Syl. num. 8. Armilla num. 7. Tolet. de peccatis mortalibus, seu lib. 8. instr. sacerdot. cap. 29. Theodorus Peltanus de bonis operibus, lib. 1. de eleemosyna, c. 7.

Tertio: Probabilis est sententia Medina C. de eleemosyna q. 4. De quibus bonis, &c. §. ex dictis. Lopez p. 2. instr. cap. 24. §. potest etiam, Less. cit. dub. 14. num. 85. Molina disput. 274. §. equidem, contra D. Anton. p. 2. tit. 1. cap. 19. §. 1. Nauar. cit. num. 153. Quod vxor, etiam inuito marito, facere possit moderatas eleemosy-

nas, aliæve donationes, maximè remuneratorias, spectata qualitate status sui, & quantitate allatæ dotis: præsertim si bona in coniugio acquisita secundum morem regionis, aut pactum dotale, communia sin. Ratio est, quod vxor non sit mariti ancilla, vel famula, sed socia, & domesticæ administrationis particeps, ac quasi compar: vt proinde maritus ea in re inuitus merito esse non possit. Quia tamen ipsa marito, tanquam familiaris capiti, subiecta esse debet, ideo non potest eleemosynas, aliæve donationes superfluas arbitrato suo, & contra mariti voluntatem largiri, sicuti in assertionem dixi.

Addunt Molina, Medina, Less. ll. cc. Petr. Nauar. nu. 88. Iniuriam marito non fieri, si absolutas donationes, aliæve sumptus, quos in largiores eleemosynas, sui ornatum, vel honestam recreationem vxor facere potuisset, propria parsimonia collectos, in pauperem v.g. consanguineum, vel nutricem suam, quamuis ipso inuito, conferat. Deinde, si vxoris parentes, aut filij ex priore matrimonio geniti misere victitent, & maritus eis succurrere nolit: potest vxor, etiam eo inuito, ex dote sua, vel communibus lucris necessarium ac debitum ipsis subsidium afferre: dummodo, cum ad partitionem ventum fuerit, hæc in partem suam referat, sicuti docet Pet. Nau. lib. 3. c. 1. num. 159. Caueat tamen Confessarius, ne in eiusmodi rebus maiorem, quam par est, fæminis licentiam tribuat: sed moneat eas potius, vt virorum suorum voluntati se accomodent, quatenus iuste possunt. Lege Molinam cit. disp. 275. §. nonnulla tamen.

Maior verò facultas marito, tanquam bonorum administratori, concessa est ex communibus lucris, (vbi matrimonium cum societate bonorum institui solet) suo præ arbitrato, faciendi eleemosynas, & sumptus etiam superfluos, absque restituendi obligatione: si dos, & alia bona propria vxori salua maneant, sicuti ex Lupo in rubrica de donat. inter virum & vxorem docet Nau. num. 155. Lopez l. c. §. secundò dicitur. qui tamen rectè excipit, nisi superflue donationes frequentes, vel magna bonorum communium profusio ac dilapidatio in manifestam iniuriam vxoris cedant, non sine præsumpta fraude. Tunc enim maritus, eiusve hæredes ad restitutionem vxori obligantur: vel ipsa quoque per occultam compensationem sibi, liberisque suis providere non prohibetur, si scandalum absit. quod etiam docent, Nauar. in man. c. 17. n. 154. Pet. Nau. lib. 3. c. 1. n. 114. Less. l. c. num. 87. Mol. §. media tamen. Quod multò etiam magis dicendum, si vxoris dos periclitari incipiat.

Quod ad filiumfam. attinet, respondeo & dico I. De bonis suis castrensibus, vel quasi castrensibus, etiam inuito patre, ad libitum donare potest: cum plena eorum administratio ipsi competat. Adde, probabile esse, quod filiusfam. de ijs bonis aduentitijs, quorum vsusfructus ad patrem non spectat; donare possit tum inter viuos, tum mortis causa, sine patris consensu, sicuti videre est apud Andr. Fachin. lib. 5. controu. c. 25.

Dico II. Si ex bonis suis aduentitijs, quorum administratio & vsusfructus penes patrem est, contra eiusdem voluntatem donet, vel ludendo, aliave ratione alienet, supra dictum fuit cap. 8. n. 5. donationem infirmam, quippe à patre reuocabilem esse: quamuis interim filiusfamil. personaliter ex contractu obligatus maneat, ita vt si res à patre reuocetur, filius de euictione teneatur, sicuti monet etiam Less. lib. 2. c. 26. n. 35. Verum tamen si alienatione bonorum aduentitiorum, contra patris voluntatem facta, damnum patri non sine iniuria aliqua inferatur, quandoquidem vsusfructus commodo priuatur, raro tamen præsumendum est patrem tam seuerum in filium existere, vt eius damni compensationem sibi fieri postulet, sicuti notat Mol. t. 2. disp. 277. & 319. Quare neque is in conscientia restituere obligatus est, cui aliquid ex bonis aduentitijs à filiofamilias contra patris voluntatem donatione, ludo, vel alia causa traditum est: nisi pater



repetat; vel constet illum velle, vt restitatur.

Dico III. Donatio facta à filiofam. de bonis profectiis absque patris expresso, aut tacito consensu, omni iure irrita est. Rectè tamen docet Sotus lib. 4. de iust. q. 5. a. 2. Nauar. cit. c. 17. n. 157. Mol. tom. 1. tract. 2. disp. 242. Si parens filio in Academia, aut Principis aula versanti sumptus mittat, censendum esse indulgere ei aliquid, v. g. ex centum aureis, quinque ad eleemosynas, aliàsue donationes faciendas, & honestas animi recreationes, quas alij eiusdem status & conditionis exercere solent.

Addit Molina primò: Nihil contra iustitiam peccatum, etsi hanc ipsam pecuniam, quam secundum præsumptam patris voluntatem, in honestas recreationes, vel donationes expendere potuisset, malè absumat, v. g. meretricibus donet: eò quod pater tunc inuitus non sit quoad rem insumptam, sed quoad insumendi modum.

Addit secundò: Etsi filius plus iusto contra patris voluntatem expenderit non sine iniuria; sæpe tamen præsumendum non esse, quod parens restitutionem fieri postulet: nisi magnus impendiorum excessus in notabile reliquorum liberorum grauamen cedat: vel aliæ coniecturæ certò, vel probabiliter persuadeant, talem esse patris voluntatem. Hoc enim casu vera est sententia Bartoli in Authen. Quod locum, C. de collationibus, Syl. ver. peculium, 2. q. 9. Nau. n. 164. Quæ filius in Academia in ludos, aliòsue vanos vsus insumpsit, mortuo patre in partem hæreditatis legitimam numeranda esse. Tunc autem excessus notabilis æstimari debet, ideòque ad hæreditatis diuisionem necessariò conferendus; cum prudentis viri arbitrio sumptus superant alimenta, quantumuis largiora, quæ pater vni filio præ aliis liberis condonare iure potest. Vide Lopez p. 2. c. 21. Sa ver. hæreditas, n. 45.

Tertiò addi potest: Si pater filio, versanti v. g. in studio literarum, certam pecuniæ summam, tanquam competentia alimenta, definiat: quicquid deinde propria parsimonia ex victu, aut vestitu sibi ipsi subtrahit, arbitratu suo donare, vel alia ratione alienare potest, sine restituendi obligatione: nisi constet aliam esse patris voluntatem. Vide Lessium lib. 2. c. 12. dub. 13. n. 77.

8 Quod attinet ad natu Minores, ij, præsertim si puberes sint, inuitis etiam tutoribus, vel curatoribus, facere possunt eleemosynas, & alias donationes, ac sumptus moderatos, secundum statum, & facultates suas, sicuti ex communi testatur Molin. tom. 2. disp. 277. Sed etsi modum in ea re excesserunt, contra tutorum, vel curatorum voluntatem, peccant quidem, (quamuis raro mortaliter, per se loquendo) & tutores repetere possunt, quæ donata, aut inutiliter expensa sunt: si tamen non repetantur, nihil restitui debet, sicuti supra dictum cap. 9. n. 7. Adde, ipsos etiam tutores ac curatores ex bonis pupillorum, atque Minorum præ facultate patrimonij, & dignitate natalium eorum, eleemosynas & donationes remuneratorias facere non prohiberi, sicuti colligitur ex l. cum plures, §. cum tutor ff. de administr. tutorum, & docet Medina q. 4. de eleemosyna, §. 7. Sa, eod. n. 15. Mol. l. c.

9 Quod ad Religiosos attinet, illi in quadruplici differentia sunt. Quidam enim extra Monasterium viuunt, cum libera ipsis permessa bonorum, seu reddituum administratione, v. g. Religiosi beneficiarij, qui de redditibus Ecclesiasticis æque, vt seculares beneficiati, inter viuos disponere, ideòque etiam eleemosynas arbitratu suo, licet inuito Prælato Ordinis, facere possunt, sine voti paupertatis violatione.

Quidam verò sunt Prælati Ordinum, ij ex bonis Monasterij, quorum administrationem habent, eleemosynas, & donationes remuneratorias, aliàsque decente causa subnixas facere possunt, & sæpe debent: tamen secundum facultates Monasterij, vel Conuentus, Ordinis, vel Ecclesiæ, cui præsunt, constitutionem, aut con-

suetudinem. Sin verò Monasterij, vel Ecclesiæ bona superfuis & illegitis donationibus dissipent, v. g. dando consanguineis suis, inualida est alienatio, & restitutioni obnoxia, vti docet Abulensis in cap. 6. Matth. q. 37. Nauar. in comment. 2. de Regul. n. 12. Molina to. 2. disp. 276. & videri potest Sanchez lib. 7. moral. cap. 19. quæst. 1.

Duo hoc loco obseruanda sunt: Primum ex Abbate in rubr. de donationibus, &c. per tuas, n. 2. eod. tit. Syluest. ver. donatio, 1. q. 3. Molina disp. 292. Si alicui personæ, cui bonorum administratio competit, prohibitum sit donare: ea prohibitione non censentur comprehensæ donationes remuneratoriæ: modò sint commensuratae meritis, seu obsequiis: siquidem talis donatio, cum sit compensatio beneficij antecedentis, recedit à proprietate donationis.

Exinde citati D D. colligunt, Prælatum Ecclesiæ, 10 qui sine Capituli consensu, &c. bona Ecclesiæ alienare prohibetur, posse tamen sine eiusmodi iure requisitis solemnitatibus, facere competentes donationes, remunerandi causa, argum. c. si quos, 12. q. 2. Adeò quidem, vt Ecclesiæ, vel Minor restitutionem in integrum petere nequeat, ob donationem remuneratoriæ, vel aliam similem, quæ honestè intermitteri non potuit, vti colligitur ex supra cit. §. cum tutor, & docet Gomez to. 2. resol. c. 14. n. 1. Molina to. 2. disp. 573. §. Si minor. Rectè tamen obseruat ex communi Clarus §. donatio, q. 3. n. 2. Non satis esse in externo foro, vt is, cui alioquin donare prohibitum est, v. g. Ecclesiæ Prælatum, aliòsue administrator bonorum, in instrumento donationis asserat, ob merita donatum fuisse: nisi etiam ostendatur, re ipsa interuenisse merita, digna tali donatione.

Alterum ex Medina C. de pœnit. tract. 5. de eleemosyna, q. 4. ver. Pro Capitulo, Arrag. 2. 2. q. 32. a. 8. ver. Sed dubitabit aliquis: Si Ecclesiæ seu regularis, seu secularis Prælatum ex bonis Capituli, seu conuentus eleemosynam, aliàmue donationem facturus, eiusdem Capituli consensum requirere debeat, spectata quantitate rei donandæ, ipsiusque Ecclesiæ ordinatione, &c. eo casu distinguendum est, vtrum bona, quæ in eleemosynas, vel alias largitiones distribuenda, sint communia collegialiter, ita vt singuli à Communitate non habeant ius ad certam bonorum portionem: tunc sufficit consensus maioris partis Capituli, iuxta c. cum in cunctis, De his, quæ fiunt à maiore parte Capituli. An verò bona sint communia particulariter, quorum certa portio singulis debita est, neque ad communem massam aliquid pertinet, quod non inter singulos seu æqualiter, seu proportionaliter distribuatur. & tunc requiritur consensus omnium, iuxta c. cum omnes, de constit. iun. Gl. ibid. & reg. 29. in 6. Quod omnes tangit, debet ab omnibus approbari.

Tertiò sunt Religiosi, qui Prælati non sunt, attamen bonorum Monasterij administrationem sibi commissam habent, vti sunt Procuratores, & Oeconomi. Hi eleemosynas, aliàsue donationes, aut alienationes facere possunt, secundum limites suæ commissionis, seu secundum legitimam suorum Superiorum voluntatem expressam, aut rationabiliter præsumptam: si amplius aliquid expendant, aduersus paupertatis votum peccabunt. Qua de re videri potest S. Th. 2. 2. q. 32. a. 8. Mendoza in quodlib. Theolog. q. 8. concl. 1. Tabiena ver. eleemosyna, q. 8. n. 9. Rodriq. to. 2. regular. qq. q. 57. a. 2. & to. 3. q. 29. a. 10. concl. 1. Sanchez lib. 7. moral. cap. 19. n. 92. & 93. Debent igitur attendere Administratores, partim quantam ipsis potestatem Superior seu immediatus, seu medius expressè commiserit: partim verò quid Ordinis constitutio, vel consuetudo permittat: siquidem Superior committens officium procuratoris, eo ipso censetur committere potestatem faciendi ea, quæ communiter Procuratores alij eiusdem Ordinis absque reprehensione facere solent.

Denique sunt Religiosi, qui sub obedientia Prælato-



rum Viuentes, nullam bonorum administrationem habent: ij nullas omnino eleemosynas, aliasue donationes facere possunt, sine licentia Prælati, iuxta c. cum ad Monasterium, de statu Monachorum, & c. non dicatis, 12. q. 2. Excepto vnico casu necessitatis extremæ, si pauper fame moriturus sit, nisi ipsi ex bonis Monasterij subueniantur, vt docet S. Th. cit. a. 8. ad 1. Tunc enim licet decens sit licentiam subueniendi à Prælato petere: tamen si is contradicat, nihilominus subueniri debet.

Alij verò casus sunt, quibus facilis præsumptio fieri potest Superiorem contentum esse, vt eleemosyna detur: Primus: Si pauper graui necessitate prematur, & Superior adiri non possit, vt docet Angelus ver. eleemosyna, §. 6. Syl. ibid. q. 5. dicto 2. Tabiena q. 8. n. 9. Secundus: Si Religiosus cum legitima licentia extra Monasterium degat v. g. in peregrinatione, aut studio literarum: potest tunc eleemosynas moderatas, aliasque remunerationes donationes facere, quales alij eiusdem Ordinis & conditionis Religiosi solent, vt bene docet Azor tom. 2. lib. 12. c. 10. q. 3. Tertius: Si Religioso seu extra, claustrum commoranti certa quantitas ad sustentationem assignata sit, eo pacto, vt suo damno, & commodo eam expendat, quod parciùs viuendo reliquum ipsi fuerit, ex præsumpta Superiorum voluntate in eleemosynas expendere potest, vt docet Nauar. consil. 3. de statu Monachorum, num. 46. edit. 2. Valentiano. 3. disp. 10. p. 3. corol. 5. Rodriq. to 3. q. 29. a. 10. concl. 3. Sanchez lib. 7. moral. c. 19. n. 100. Molina to. 2. disp. 276. ver. Religiosus in Conuentu.

**QVÆSTIO SECUNDA.** Quibus personis donari possit: Peculiariter verò dubitatur de donatione facta coniugi, & liberis. Quod ad priorem donationem attinet, respondendo & dico: Donatio simplex & merè liberalis facta coniugi à coniuge, nō statim firma est: sed ad arbitriū donantis reuocari potest, iuxta l. 3. princ. & §. sciendum, l. sed interim, ff. de donationibus inter virum & vxorem, & c. ult. extra eod. *Maiores nostri, inquit Antoninus Augustus in cit. l. 3. inter virum & vxorem donationes prohibuerunt: amorem honestum solis animis estimantes, famam etiam coniunctorum consulentes, ne concordia pretio conciliari videretur.*

Veruntamen donatio inter coniuges facta, morte donantis confirmatur, si neque expressè, neque tacitè, v. g. facto diuortio, reuocata fuerat, sicuti constat ex cit. legibus, & l. res vxoris, l. donationes quas parentes, C. de donat. inter virum & vxorem. Sed requiritur, vt rei donatæ traditio antecesserit, sicuti habetur in l. Papinianus, ff. eod. tit. iun. Gl. margin. & docent DD. ferè communiter apud Clarum ver. donatio, q. 9. Nicol. Euerhard. to. 1. consil. 19. n. 26. Sanchez lib. 6. de matrim. disp. 14. nu. 6. Molin. to. 2. disp. 289. §. illud obserua. Accedit itaque hæc donatio quadantenus ad naturam vltimæ voluntatis: adeò, vt & Falcidia ex ea detrahi possit, iuxta l. cum hic status, ff. eod. tit. l. in donationibus, G. ad l. Falcidiam: magis tamen retinet naturam & proprietatem pacti, donationis: quomobrem neque testium solemnitate ad sui valorem requirit: deinde retro trahitur ad diem factæ donationis, vel potiùs traditionis, quod attinet ad fructus rei lucrandos, iuxta l. cum pater, §. pater filix, ff. de legatis, 2. l. si mortis, 40. ff. de mortis causa donat. & cit. l. donationes quas parentes, iun. Gl. ver. referatur. Denique morte aliarum donationum Iudicis consensum hæc donatio requirit, si 500. solidos excedat, iuxta cit. l. donationes quas parentes. Vbi tamen exceptio habetur, nisi donationem excedentem coniunx mortis tempore expressè confirmet, valituram vt legatum, quod insinuatione apud Iudicem non indiget: habentque hæc eadem locum in donatione patris erg. filium. Plura vide apud Sanchez lib. 6. disp. 1. & 14.

Porro dicta assertio extendi debet primò, vt locum etiam habeat in donatione facta inter sponsas, cum conditione à nuptiis pendente, id est, vt rei donatæ dominium

non antè acquiratur, quàm nuptiæ secutæ sint, sicuti habetur in l. cum hic status, §. si sponsus, ff. de donat. inter virum & vxorem, & l. quod sponsæ, C. de dona. ante nuptias. Ratio est: Nam sicuti institutio, vel donatio facta inhabili in tempus, quo habilis erit, valida est: sic è contrario facta habili in tempus, quo habilis non erit, inualida est, sicuti notant DD. in l. in tempus, ff. de hæredibus instituendis. Valet tamen donatio simpliciter facta sponse ante nuptias, et si eadem die nuptiæ secutæ sint, l. inter eos, ff. de donat. inter virum & vxorem.

Extenditur secundò, ad venditionem coniugi factam, minore pretio, quàm alioquin merx valeat. Licet enim talis venditio statim valida sit: (modò principale propositum fuerat non donandi, sed vendendi, quamuis pretio minore: Si enim principale propositum sit donandi, inter coniuges nullius momenti esset talis venditio, l. si quis donationis, ff. de contrah. emptione (attamen remissio siue condonatio partis pretij suspensa est vsque ad mortem donantis, ita vt interea per pœnitundinem reuocari possit, l. si sponsus, §. circa venditionem, ff. de donat. inter virum & vxorem. Ex quo colligit Tiraquellus in l. si vnquam, ver. donatione largitus, n. 3. & 4. c. de reuoc. donat. Sánchez lib. 6. disp. 1. concl. 6. Eiusmodi partialis pretij remissionem, licet 500. solidos excedat, insinuatione apud Iudicem non indigere: quia in contractibus principale propositum inspicendum est, arg. l. rogasti, ff. de rebus creditis. Coniugi autem, vt pono, animus fuit venditionis contractum instituere, qui nullam insinuationem requirit.

Eadem verò assertio limitari debet primò, Quòd donatio inter coniuges Principes illico valet: quia Imperiales contractus legis vim obtinent, l. penult. C. donat. inter virum & vxorem.

Secundò, Valida est donatio inter coniuges, ex qua donans non redditur pauperior, iuxta l. si sponsus, ff. eod. & colligitur ex cit. c. ult. vbi id notat Abb. n. 8. Veluti si maritus hereditatem vel legatū repudiet, vt vxori substitutæ, vel ab intestato succedenti obueniat, sicuti habetur in cit. l. si sponsus, §. si maritus hæres. Aut si, quod maritus prodigus certò prodigere decreuerat, vxori donet. Num verò vxor in fauorem mariti renuntiare possit medietati lucrorum seu acquiritorum, seu acquirendorum, diuersæ sunt DD. sententiæ apud Sanchez lib. 6. disp. 5.

Tertio, Valet donatio inter coniuges, ex qua donatarius nō sit ditior, et si donator pauperior fiat: veluti si Maritus vxori locum sepulturæ donet: non enim locupletior fit vxor in ea re, quam Religionē dicauit, cit. l. si sponsus, §. concessa. Item si coniunx coniugi donet ea lege, vt res donata nō maneat penes donatariū, sed alteri donetur, l. profectitia, §. si quis certam, ff. de iure dotium. Aut si donatio fiat ad refectionem ædium incendio cōsumptarum, sicuti habetur l. quod si vir, ff. de donat. inter virum & vxorem. Denique reuocari non poterit donatio, postquam cōiunx donatarius rem donatam inutiliter expendit: cum locupletior factus nō sit, sicuti docet Gl. in cit. c. ult. Abb. ibid. n. 8. Sanch. disp. 3. n. 3. ex l. quod autem, §. si maritus, ff. de donat. inter virum & vxorem.

Quartò, si vxor marito donet causa honoris, vel dignitatis adipiscendæ, l. 40. & seqq. ff. eod. tit.

Quintò, Si vir vxori dotem promissam remittat, iuxta l. si cōstante, C. de donationibus ante nuptias. Vel si vxorem dotet causa remunerationis, puta quia iuuenicula seni, nobilis ignobili nupsit. Alioquin verò non est cōcessum, vt vir vxori post nuptias, vel in tempus nuptiarum dotem constituat, l. si quis vxori, ff. de donat. Quia hæc dotis constitutio species donationis est, l. ult. §. si à focero, ff. Quæ infraudem creditorum, &c. Vxor autem constante matrimonio non prohibetur dotem marito constituere, vel antè constitutam augere; cum hæc non sit donatio mera, neque omnino dominij translatiua. Vide Sanchez lib. 6. disp. 7.

Sextò, Si coniunx in ædibus coniugis gratis habitare permittatur; vel eius seruis, aut vestimentis vsus fue-



rit, valet donatio, l. si vir vxoris, ff. de donat. inter virum & vxorem.

Denique quævis donatio facta inter coniuges iuramento confirmatur, secundum communio rem sententiam Couar. 1. resol. c. 17. n. 4. Gomez 2. resol. cap. 14. n. 26. Rodriq. in sum. cap. 92. n. 2. Sanchez disp. 11. n. 2. Mol. to. 2. disp. 289.

Illud quoque obseruandum, quod in assertionem dixi, simplicem ac merè liberalem donationem inter coniuges ante donantis mortem ratam non esse. Aliter verò sentiendum de donatione remuneratoria, sicuti colligitur ex l. quod autem, §. si vir, ff. de donat. inter virum & vxorem; eò quod talis non sit propriè, & simpliciter dicta donatio, sed quasi compensatio, seu debiti retributio. Et ita ex communi docent Abb. in c. cum in Ecclesiæ n. 4. de simon. Mol. disp. 289. §. tertius, Syl. ver. donatio, 2. q. 1. Sanchez n. 11. & 14. Tiraquel. lo. suprà cit. n. 108. vbi exemplum adferunt, si vxor nobilis marito ægrotanti vilia, aut valde diuturna obsequia præstiterit.

12 Quod ad alteram donationem attinet, simili modo explicandum est, quod donatio patris simpliciter ac purè facta filio sub potestate eius constituto, firma statim non sit; sed reuocari possit: Si tamen res donata filio à Patre tradita fuerit, & nunquam reuocata, morte patris confirmabitur, perinde, ac si ab initio valida fuisset, sicuti constat ex l. 2. iun. Gl. ver. adminiculo, C. de inofficiosis donationib. & l. donationes quas parentes, C. de donat. inter virum & vxorem, & docet Nau. c. 17. n. 145. Gomez 2. resol. c. 4. in fine. Couar. c. Raynaldus, de testamentis, §. 2. n. 12. Molin. to. 1. tr. 2. disp. 243. & to. 2. disp. 291. Clarus §. donatio, q. 8. Adde, quod donatio etiam per emancipationem filij confirmatur, si res ei tradita fuit, vel quomodocunque in possessione eius, cum voluntate patris, tunc exitit, l. 2. C. si quis alteri vel sibi, & l. siue emancipatis, C. eod.

Nota autem primò; Quod dixi, *simpliciter ac purè*: Nam quæ ob causam sit donatio, statim valet: puta si pater filio donet in beneficij remunerationem, ad nuptias, aut filia in dotem; item ad Religionis ingressum, captiuitatis redemptionem, ad militiam, ad sacros ordines. Qua de re Clarus loco cit. Couar. in c. Raynaldus, de testam. §. 2. n. 15. Syl. ver. donatio, 2. q. 7. Nau. n. 145. Mol. to. 1. tr. 2. disp. 238. & to. 2. disp. 291. Less. lib. 2. c. 18. dub. 12. Valet etiam donatio patris erga filium in potestate constitutum, si iuramento confirmetur: vel si filio donetur vsusfructus bonorum aduentitiorum, l. cum oportet, §. si autem, C. de bonis quæ liberis. Denique ait Syl. l. c. Nau. c. 17. n. 147. ex Azone, eisdem ferme casibus, quibus donatio inter virum & vxorem valida est, consistere inter patrem & filium in potestate constitutum.

Nota secundo; Quod dixi, *Filio sub potestate constituto*: Nam donatio facta filio emancipato, valida est, iuxta cit. l. 2. C. de inoffic. donationibus, l. cum de bonis, C. de donat. Multo que magis constat donatio, quæ liberis fit à matre, auia, aut auo materno, teste Gomez cit. c. 4. in fine, Molin. cit. disp. 291. Lessio n. 90.

13 **QUESTIO TERTIA.** An quæ à patre liberis donata sunt, eo mortuo, ad diuisionem hæreditatis conferenda sint? Resp. & dico I. Simplex donatio facta filio emancipato conferenda est, l. vt liberis, C. de Collationibus, & ex communi docet Molin. to. 1. tr. 2. disp. 243. Andr. Fachinazus t. 2. controu. iuris, lib. 5. c. 81.

Dico II. Simplex donatio facta liberis in potestate patris constitutis, post eius mortem conferenda non est: Quia censetur à patre, vt præcipuum, filio relictum, arg. l. penult. C. de Collat. vbi id docet Gl. communiter recepta, Cou. cit. §. 2. n. 13. Præterquam, si pater, cum ius renocandi donatione haberet, voluerit, vt conferretur. Vel nisi frater, aut soror talem collatio-

nem petat; eò quod & ipsi donationem seu simplicem, seu ob causam, v. g. propter nuptias, vel dotem, conferre teneantur: vt nimirum inæqualitas euitetur, iuxta cit. l. penult. iun. Gl. §. imposuerit.

Dico III. Donatio facta ob causam, puta propter nuptias, vel in dotem, post mortem parentis, vel aui donatoris conferenda est, iuxta cit. l. vt liberis, & l. penult. C. eod. Nisi donans expresserit, velle se vt filius, vel filia hanc partem præcipuam haberet; tamen sine diminutione legitimæ aliis liberis debita, iuxta Authent. ex testamento, C. eod. Idemque iudicium esse debet de donatione facta filijs, vel nepotibus ad Religionis ingressum; vel in patrimonij titulum ad sacros ordines suscipiendos: Per hæc enim stabilem sibi statum comparant; non minùs, quàm per dotem, vel donationem ad nuptias, sicuti notat Couar. cit. c. Raynaldus, §. 2. n. 14. Mol. to. 1. tr. 2. disp. 237. & seq. Vasq. de testam. c. 7. num. 145. & 163.

Quæ verò filiosam, à parentibus ad militiam, vel 14 Principis palatium donantur, ea inter castrensia bona numerantur, ideòque non conferuntur, l. 3. §. sed si in castra, ff. de donat. inter virum & vxorem. Libri autem, qui à patre filio ad studia literarum empti ac traditi sunt, inter bona quasi castrensia censentur; saltem posteaquam Doctor creatus, vel ad publicum officium aut dignitatem habilis effectus est, teste Nau. n. 159. Mol. disp. 239. Vasq. de testam. c. 7. n. 153. Claro q. 8.

Donatio verò remuneratoria, cum sit quodammodo debita filio ob eius merita, inter bona aduentitia meritis numeratur: vt proinde post mortem patris conferenda non sit, secundum communem Doctorum sententiam, quam explicat Couar. c. cum in officijs, n. 11. de testam. Nau. c. 17. n. 147. Mol. to. 1. tract. 2. disp. 244. & to. 2. disp. 292. Constat enim ex l. vlt. C. de collat. aduentitia bona non conferri, sicuti neque castrensia, vel quasi castrensia.

Neque conferenda sunt, quæ pater filio ad studia literarum mittit, l. quæ pater, ff. familia herciscundæ: Aut quæ ipsi donauit, seu liberè pro ipso expendit ad instituendam peregrinationem, redimendam captiuitatem, soluendam multam ex delicto contractam: sicuti colligitur ex l. liber captus, C. de captiuis. Item quæ pater largitus est ad publicos ludos, aliàm recreationem honestam, item ad artem discendam, ad conuiuium doctorale, ad primitias, comparandum sibi beneficium, dignitatem. qua de re Syl. ver. peculium, 2. q. 12. & 14. Nauar. n. 165. Mol. disp. 240. & 291. Sa ver. hæreditas, n. 43. Vasq. cit. c. 7. n. 147. Ratio est: Quia hæc omnia aliquo modo pertinent ad decentem sustentationem, & alimenta, quæ pater filio debet: & vni quidem filiorum copiosius (spectata facultate, alijsque circumstantijs) subministrare potest, quàm reliquis liberis: adeò, vt non solum illi condonare ac remittere permittam sit; sed neque in eam partem numerare cogatur, de qua liberè ante mortem disponere potest. Qua de re Molin. disp. 242. Nau. n. 160. Sin verò pater expressit, vt quæ filio propria bona non habenti, v. g. causa studiorum transmissit, in eumulum hæreditatis conferrentur, vel in portione legitima numerarentur; deducenda nihilominus erunt necessaria alimenta, quæ ipsi etiam in domo paterna degenti, naturali iure debita sunt. qua de re Bartolus in cit. l. Nescenius, ff. de negot. gestis, Abb. in c. vn. de Infantibus, & c.

Locutus sum autem in casu, quo pater filio sponte, ac liberaliter ob causam donat: secus enim est, si aliquo modo coactus donet, vt quia ludo, alijsque illicitis actionibus debita contraxit, ea pater in dubio censetur inpendisse animo repetendi, seu in hæreditariam portionem computandi, sicuti docet Bartolus cit. loco. Nau. lib. 5. consil. 5. n. 6. de iniurijs, edit. 2. & in man. c. 17. n. 164. vbi monet; Filium, qui acceptam pecu-



niam à patre ad libros emendos inutiliter consumpsit, obligari ad restituendum, vel conferendum post mortem. Quod intelligo cum Mol. disp. 242. in fine; si spectatis circumstantias personarum magna pecuniarum profusio sit, vt præsumi debeat, patrem remittere non voluisse.

Deinde locutus sum in casu, quo filius propria bona non habet: Si enim pater penes se habeat bona filij aduentitia, vel castrensia, nihilque exprimat, censetur ex iis filio suppeditare ad studia literarum, &c. iuxta cit. l. Nescimus & l. ult. ff. de petit. heredit. Quia pater filio propria bona habenti ne alimenta quidem præstare cogitur. Quamobrem respondit Nau. lib. 2. consil. 4. de iureiur. edit. 2. Si pater, vel mater pro filio expensas fecit animo repetendi, & non donandi, quas postea ex bonis eiusdem filij animo cõpensandi debiti repetat; quod in redditione rationum iuramento affirmare possit, se nihil ex his filij retinere.

15 **QVÆSTIO QVARTA.** In qua quantitate donari possit? Resp. & dico l. Casareo iure l. penult. & ult. C. de donat. & §. aliæ autem, Instit. eod. donatio excedens 500. solidos (quæ summa hodie ad 700. vel secundum quosdam ad 800. aureos Italicos excurrit, vt videre est apud Clarum lib. 4. ver. donatio, q. 15. n. 1. Rebel. p. 2. lib. 18. q. 6. n. 3. Nicol. Eucard. t. 1. consil. 19. n. 32.) nisi insinuatio, siue Iudicis auctoritas accedat, inualida existit; duntaxat quo ad excessum: nam *utile non debet per inutile vitari, quando vili ab inutile separari potest*, sicuti habetur in l. sancimus, iun. Gl. ver. superfluum, Cod. de donat. Ratio constitutionis est: Quia non expedit Reipublicæ, vt ciues facultate donandi ad paupertatem redigantur. Neque tamen requiritur iudicialis cognitio causæ, aut decretum, sed sola Iudicis præsentia & consensus, vt ex communi docet Clarus cit. q. 15.

Excipiendum tamen est I. Quod valet donatio in quacunque quantitate, & sine insinuatione facta Ecclesiæ, vel ad causam piam. Quia leges civiles Cod. de sacrosanctis Ecclesiis, l. illud. & C. de donation. l. sancimus, §. aliæ, Ecclesiasticis causis nullum præiudicium afferre possunt, sicuti ex communi notauit Clarus q. 17. n. 1. Rebell. q. 7. Less. lib. 2. c. 18. n. 102. Mol. to. 2. disp. 279.

II. Similiter valet donatio facta à Principe, vel Principi à privato, l. sancimus C. de donationibus. Veruntamen donationes immodicæ, quæ cum Reip. detrimento factæ videntur à Principe, ab ipso, vel successore eius renocari possunt, teste Greg. Tholos. lib. 3. de Rep. c. 3. n. 1. & seqq.

III. Donatio, quæ fit militibus à belli Duce ex bonis propriis mobilibus, vel hostium spoliis, l. penult. C. eod.

IV. Donatio, quæ fit ob causam, puta ad militiam, ad nuptias, ad captiuitatis redemptionem, & diu, quæ incendio vel ruina destructæ sunt, reparationem, iuxta cit. l. penult.

V. Donatio remuneratoria beneficiorum, obsequiorum, sicuti colligitur ex l. si pater, §. si quis, ff. de donation. & docet Clarus q. 16. n. 6. Mol. to. 2. disp. 279. Et simile est, si duo reciprocè donationes faciant in magna quantitate, quod insinuatione opus non sit, sicuti docet Baldus in l. sancimus, C. de donation. Illud verò supra etiam monui, ad probandam donationem remuneratoriam necesse esse, vt in instrumento donationis speciatim exprimat præstitum obsequium, aut meritum, tali remuneratione dignum; et si non ex iusticia, tamen ex congrua æquitate. Sin autem generalis tantum mentio obsequiorum fiat, ea nihil adiuuat, nisi à donatario probata fuerit, sicuti docet Abb. rubr. de donat. Clarus, q. 8. n. 3. Mynsing. cent. 4. obser. 75. & 88. arg. l. Attilius, aliàs Aquilius, ff. de donat.

V I. Si pater filio remittat vsumfructum bonorum aduentitiorum, sicuti ex communi docet Gomez cit. c. 4. n. 10. Rebel. cit. q. 6. concl. 4.

Adde ex Lopez p. 2. instruct. c. 27. Less. cit. cap. 18. n. 99. donationem vltra 500. solidos sine insinuatione factam, in foro conscientie valere, & dominij translatiuam esse; donec à donatore reuocetur, aut per Iudicis sententiam rescindatur. Quod si donans iurauit, se non repetiturum, iuramenti obligatione adstringitur, etiam in externo foro, sicuti ex communi docet Clarus q. 18. Syl. q. 6. Sa ver. donatio, n. 1.

Dubitari verò potest, si donationes alicui per temporum interualla factæ quingentorum solidorum summam excedant, vtum infirmari possint? Ita affirmat Abb. c. Apostolica, n. 5. de donat. quod id in fraudem legis actum videatur. Sed non arbitror hoc semper verum: cum ex diuersis occasionibus donationes inter se verè disparatæ eidem fieri possint; & lex illa restringens libertatem disponendi de propriis; tanquam odiosa, extendenda non sit.

Dico II. Donatio omnium bonorum tam præsentium, quàm futurorum; tam mobilium, quàm immobilium, irrita est, iuxta l. stipulatio hoc modo concepta, ff. de verbor. obligat. Ratio est: Quia liberam testandi facultatem aufert, quod iure civili indecens, ac Reipub. noxium existimatur. Quare si hæc ratio cesset, donatio valebit: veluti si bona tantum præsentia dones; vel si solam bonorum proprietatem, reseruato tibi vsumfructu, qui tamen excedat quantitatem alimentorum, quatenus absolute necessaria sunt ad vitæ sustentationem; vel si omnium omnino bonorum donationem facias mortis causa, reseruata tibi facultate donationem reuocandi, qua de re lege Clarus q. 19. Couar. 3. resol. c. 12. n. 3. Molin. to. 2. disp. 280. Andreæ Fachinæ lib. 6. controuers. 89. Adde, omnium bonorum absolutam donationem Ecclesiæ, vel pauperibus factam, consistere, sicuti ex communi docet Abb. c. in præsentia, n. 2. de probat. Couar. p. 2. rubr. de testam. n. 13. Clarus, q. 20. Rebel. q. 7. Less. c. 18. dab. 13. num. 95. Mol. disp. 280. Nam ius civile pietatis officia impedire & restringere non potest: Cum etiam Christi consiliū sit Matth. 19. *Vade, & vende omnia quæ habes, & da pauperibus.* Quapropter rectè docent Cou. n. 12. Mol. cit. disp. 280. Less. n. 96. contra Clarum cit. q. 20. donationem omnium bonorum validam esse, si iuramento confirmetur. Nam adimere sibi facultatem testandi per donationem bonorum omnium, seruatis solum alimentis necessarijs, per se malum, siue peccatum non est; sed potest esse opus bonum: alioquin ab Ecclesiâ talis donatio non acceptaretur; ergo poterit confirmari iuramento, sicuti latius dicam lib. seq. tr. 3. c. 6. assert. 5. exemplo 6.

**QVÆSTIO QVINTA.** Vtrum donatio semel perfecta renocari possit? Responso est negatiua, quæ sumitur ex l. ult. C. de renocandis donation. *Generaliter sancimus, omnes donationes lege confectas, firmas, illibatasque manere.* Sed excipiuntur aliquæ causæ, ob quas donatio simplex, quamuis traditione perfecta sit, reuocari potest: Prima est ingratitudo donatorij, cuius quinque species numerantur in cit. l. ult. Videlicet, si manus impias (non sine mortali culpa) in donatorem inferat: Si atrocem iniuriam siue contumeliam in eum effundat: Si graue damnum bonis eius per iniuriam adferat: Si vitæ eius infidias struat: Si modum siue conventionē donationi appositam implere noluerit. Quibus Gl. ibid. Clarus q. 21. n. 3. Gomez cit. c. 4. n. 14. Syl. ver. donatio 1. q. 13. Less. dub. 14. n. 104. cum Abb. c. ult. de donationibus, sextam adiungunt: Si donatarius magnæ quantitatis inopia pressum donatorem subleuare nolit. quam tamen causam reiecit Gl. in l. condemnatione, ff. de reg. iuris, Mol. p. iij



disp. 281. quia repugnat cit. l. vlt. ibi: *Ex his tantummodo causis, si fuerint in iudiciis dilucidis argumentis cognitione approbata, donationes euertere concedimus.* Et cum lex ista pœnalis sit, non debet extendi ad casus similes.

Porro donatio nihilominus ob quinque illas causas reuocari poterit, tamen si iuramento confirmata sit. Nam iuramentum fortitur conditionem actus, cui adiungitur: Donatio autem ex iuris dispositione hanc tacitam conditionem habet, nisi donatarius ingratus fuerit; vel nisi donatori liberis orbato proles postea nascatur. Verumptamen, si donator huic ipsi licentiæ reuocandi donationem propter futuram ingratitudinem, iuramento renuntiet, valet renuntiatio. Quia omne iuramentum seruandum est, quod sine peccato & dispendio salutis seruari potest, c. quemadmodum, de iureiurando. Quamuis rectè dicat Molin. cit. disput. 281. tale iuramentum à potestate cum Ecclesiastica, tum civili relaxari posse, in pœnam donatarij ingrati.

Non potest autem hæc querimonia contra ingratum institui ab hæredibus donatoris, sicuti habetur in cit. l. vlt. & cit. c. vlt. de donat. vbi Gloss. ver. successores, & alia Gl. in cit. l. vlt. ver. instituere, monet, hoc ius reuocandi donationem personale esse, neque transire ad successores. Sed neque ab ipso donatore contra hæredes donatarij ingrati actio moueri potest: cum sit vna ex iis, quæ ex delicto descendunt, atque ad hæredes delinquentis non transeunt; nisi lis cum delincente contestata fuerit: tunc quatenus ad hæredes peruenit, repeti potest, iuxta l. vii. Cod. ex delictis defunctorum, & c. Accedit, quod donator iniuriam passus, si tacuit, eam condonasse censetur: qua simili ratione aiunt Glossæ citatæ, neque filio auferendum esse feudum propter gratitudinem patris, si patri quæstio mota non fuerat. Verum, si donator commissam ingratitudinem ignorauerit, vel conqueri cum vellet, impeditus, aut morte præuentus fuerit, nihilominus donationem reuocari posse, notarunt Abb. in cit. c. vlt. n. 7. Syl. ver. donatio, l. q. 18. Less. n. 107.

Illud porro rectè admonet Clarus q. 21. n. 5. contra Abb. in c. verum, n. 3. de condit. appositis: Donationem Ecclesiæ factam reuocari non posse propter ingratitudinem Prælati, ipsiusque Capituli: quia censetur facta non intuitu personarum; sed ex pietate erga Deum.

- 18 Altera causa donationem reuocandi est, si liberis inofficiosa sit, paternorum bonorum legitimam, id est, lege debitam portionem ipsis adimens, vel minuens, iuxta l. i. & seqq. C. de inofficiosis donationibus. Plerumque tamen inofficiosa donatio, per querelam apud Iudicem institutam, reuocatur solum quatenus modum excedit, & legitimam portionem diminuit, sicuti constat ex l. si mater, C. eod. & docet Abb. in c. vlt. n. 5. de donat. Couar. i. resol. c. 19. n. 12. Mol. tom. 2. disput. 283. Clarus q. 24. Neque refert, etsi parens donator donationem iuramento confirmaret: cum enim beneficium reuocandæ donationis in fauorem liberorum introductum sit, non potest patris iuramento tolli, aut ei validè renuntiari, sicuti docet Tiraquel. in l. si vnquam, C. de reuoc. donation. in præfat. n. 90. Clarus cit. q. 24. n. 3. Andr. Gaill. lib. 1. obseruat. 40. n. 11. vbi generalem regulam tradit: Quod iniuri non in suum tantum, sed etiam alterius fauorem constituto, nemo plenè renuntiare potest.

Illud porro rectè notant ibidem Clarus, & Nauar. c. 26. man. n. 39. tamen si parentes gratuitis donationibus liberorum legitimas minuerere non possint; possent tamen donationibus remuneratoriis, & contractibus onerosis; præsertim sine fraude alterius contrahentis, aut donatarij institutis.

Hoc adde cum Mol. in fine cit. disp. 283. Non solum descendentibus liberis; sed etiam ascendentibus paren-

tibus ius competere instituendi querelam contra inofficiosa donationem liberorum suorum. Nam querela inofficiosa donationis introducta fuit ad similitudinem querelæ inofficiosi testamenti, l. vlt. C. de inoff. donat. Hanc autem non minùs ascendentibus, quàm descendentibus competere certum est ex l. nam etsi, ff. de inofficioso testamento.

Tertia causa reuocandi donationem partis notabilis, 19 quamuis infra dimidium bonorum est, ob inopinatam susceptionem proles, l. si vnquam, C. de reuocandis donationibus. Est enim pia & iusta iuris præsumptio, donatorem liberis orbem donationem magnam fecisse cum virtuali seu tacita conditione, nisi liberi nascerentur; quia nemo censetur alienos posteritati suæ præferre velle. Cæterum plerique DD. arbitrantur, Clarus q. 22. num. 2. Tiraquel. in cit. l. si vnquam, in præfat. num. 63. Andr. Fachin. lib. 3. controuers. c. 84. Mol. disp. 282. §. quoniam lex; Si constet, donatorem de futura liberorum natiuitate cogitantem, nihilominus donasse; vel priuilegio dictæ l. si vnquam, expressè renuntiasse; non posse deinde donationem reuocari; nisi quatenus liberis inofficiosa est, id est, vsque ad legitimam, quæ ipsis à patre auferri nequit. Vide de hac re Mynsingerum cent. 5. obser. 64.

Similiter, si Ecclesiæ, vel ad aliam piam causam donatum sit, reuocari non potest ultra legitimam liberorum. Etenim si in filium donatio facta fuit, & postea aliis natis inofficiosa appareat, reuocatur tantum vsque ad legitimam, l. si totas, & l. si mater, C. de inoffic. donationibus. Causa autem Ecclesiæ non minùs fauorabilis est, quàm filiorum, sicuti colligitur ex Authent. si qua mulier, C. de SS. Ecclesijs. Accedit, quod Ecclesia donatori instar filij esse censetur, sicut docent DD. apud Clarum q. 22. num. 2. Couar. i. resol. c. 19. post num. 5.

Interim tamen expedit ad populi ædificationem, vt 20 quod Ecclesiæ, vel Monasterio antenatos liberos donatum est, susceptis iis, totum restituatur, sicuti monet Clarus ibid. Mol. to. 2. disp. 282. Less. c. 18. dub. 14. num. 109. cum Gl. in c. si quis irascitur, l. 3. q. 2. & egregiè annotauit S. Augustin. serm. 49. de diuersis, cap. 4. *Quam laudabile factum S. Aurely Carthaginensis Episcopi? Quidam enim, cum filios non haberet, nec speraret res suas omnes (revento sibi usufructu) donauit Ecclesiæ. Nati sunt ei filij, nec opinanti. Reddidit Episcopus ea quæ donauerat. In potestate habebat Episcopus non reddere (præter legitimam) sed iure fori, non poli.* Non quod ex iustitia totum reddere teneretur, sed vel ex charitate; vel certe ex æquitate & maiore honestate. Vide Gl. in c. vlt. 17. q. 4. Ioan. Molanum tract. de testam. piis, cap. 61.

Ad extremum duo addo: Primum. Quod Anton. Gomez 2. resol. c. 4. num. 12. Less. cit. loco arbitrantur, pari ratione etiam donationem factam ascendenti patri, matri, auo, auæ reuocari tantum vsque ad legitimam, nouiter susceptæ proli debitam: id nullo iure probari potest. quare contrarium tenendum cum Molina cit. §. dubium vltius est, in fine.

Alterum. Quod de reuocatione donationis dictum est, eam reuocari, si legitimam bonorum liberis debitam diminuat: aut si donatori præter opinionem proles postea nascatur: accipi debet de donatione bonorum ac iurium acquiritorum, non verò acquirendorum. Quamobrem renuntiatio hereditatis non 21 dum adita, siue ea delata sit, siue tantum sperata, natiuitate liberorum non reuocatur, vt ex communione docent Tiraquell. C. si vnquam, de reuoc. donat. ver. donatione largitus, num. 180. Molina tom. 3. priore, disp. 579. num. 23. Sanchez lib. 7. moral. c. 7. num. 51. Quia lex illa civilis, cum exorbitans sit, de donatione



femel facta reuocanda, strictè interpretanda est de donatione propriè dicta, quæ est iuris acquisiti. Quamobrem etiam donatio inter coniuges, iure ciuili prohibita, ad eiusmodi renuntiationem hæreditatis nondum aditæ, adeoque nec acquisitæ, extendi non debet.

## CAP. XIII.

## De dote, paraphernis, donatione propter nuptias, &amp; sponsalitia largitate.

## S V M M A R I V M.

- 1 Dos marito datur ad onera matrimonij sustinenda.
- 2 Maritus dotis dominium non habet, sed plenam administrationem, & fructus eius.
- 3 Duplex est dos; profectitia, & aduentitia.
- 4 Pater debet filiam dotare, tamen si propria aduentitia bona habeat.
- 5 Mater, imò etiam frater, si diues sit, in defectum aliorum, filia, aut sorori inopi dotem dare debet.
- 6 Dos profectitia soluto matrimonio reuertitur ad dantem, qui est pater, aut auus, filiam in potestate habens: sed dos aduentitia manet mulieri, eiusve proximo heredi.
- 7 Maritus dotem aduentitiam lucratur propter adulterium vxoris.
- 8 Si dos apud maritum periclitari incipiat, vxor sibi consulere poterit. Vxor habet tacitam hypothecam in bonis mariti, donec ei dos restituatur.
- 9 Bonorum paraphernalium administratio marito non competit, nisi ita conuentum fuerit.
- 10 Donatio propter nuptias ad similitudinem dotis constituitur.
- 11 Sponsæ à sponso interdum arrha constituitur; vel sponsalitia largitas confertur.

**D**OS, quatenus à patre v.g. filia offertur, ex lucratio titulo prouenit: sed comparatione mariti, cui dos datur, fortitur rationem contractus reciproci, uti mox dicam, & videri potest, Gloss. in cap. salubriter, verb. onera, de v. furis, & rubr. legis vlt. Cod. de iure dotium. Dos definitur ex Azone: *Quod ab vxore, vel alio eius nomine marito datur, ad onera matrimonij sustinenda;* puta alendam vxorem, liberos, familiam. Hæc enim cura marito incumbit.

Corollarium I. Dos sine matrimonio esse, aut intelligi non potest, iuxta l. 3. ff. eod. Quare promissio, quin & traditio dotis, tacitam conditionem habet, si nuptiæ secutæ fuerint, l. stipulationem, ff. eodem: soluto item, aut separato matrimonio, maritus dotem restituere cogitur, sicuti habetur in cap. 1. & 2. vbi videri potest Gloss. verbo, tantum, de donation. inter virum & vxorem.

2 Corollarium II. Maritus traditæ sibi dotis fructus lucratur, quamdiu matrimonium consistit, iuxta l. 7. ff. eodem. *Dotis fructum ad maritum pertinere debere, æquitas suggerit: cum enim ipse onera matrimonij subeat, æquum est, eum etiam fructus percipere.* Præterea, licet maritus res dotales absque necessitatis casu alienare non possit; cum neque earum dominus propriè existat, l. in rebus, Cod. de iure dotium, l. quamvis, ff. eodem. Imò iure nouo Cod. l. vnic. §. & cum lex, de rei vxoriæ actione, & Institut. Quibus alienare licet in princip. neque cum vxoris consensu bonum immobile, siue dotalem fundum alienare, vel hypothecæ subijcere concessum; sed contractus irritus censetur. Verùm administrationem dotium bonorum adeo plenam maritus habet, ut ea à quouis possessore reali etiam actione vindicare; & de iis in iudicio contendere iure possit, iuxta l. doce ancillam, Cod. de rei vindicat. atque ob eam causam, iuris quadam fictione, dominus rerum dotialium censetur, sicuti videre est in l. si prædium, Cod. eodem

titulo.

Duobus verò casibus dominium dotis plenè ad maritum transit, cum obligatione tantundem soluto matrimonio restituendi: I. Si dos consistat in pecunia, vel aliis rebus vsu absumptilibus: tunc enim quasi mutui contractus interuenit, ut soluto matrimonio tantundem eiusdem generis, & qualitatis restituatur, iuxta l. res in dotem, ff. de iure dotium. II. Si res dotales, vsu non consumptibiles, marito æstimatæ tradantur; non eo solo animo, ut sciatur earum valor, si fortè perditæ vel diminutæ fuerint culpa mariti; sed ut æstimatio efficiat venditionem, sicuti notauit Gloss. in l. si inter, C. eod. ver. æstimatæ, Mol. disp. 426. §. quando res. Quare his duobus casibus periculum rerum dotialium ad maritum spectat: cum alioquin ad vxorem tanquam dominam pertineat, siue res meliores, siue deteriores fiant, aut omnino pereant; tamen sine dolo & culpa (etiam leui) ipsius mariti, sicuti constat ex l. plerumque, ff. eod. iuncta l. penul. & vlt. ff. soluto matrimonio quemadmodum dos petatur, & l. vlt. C. de pactis conuentis, iun. Gl. ver. dolum.

Duplex est dos: Vna profectitia, quæ à patre, aliòve per virilem sexum ascendente, filiamque in potestate sua habente, profectæ est, l. profectitia, ff. de iure dotium, iun. l. vn. Cod. de rei vxoriæ actione. Maximè autem proprium officium est patris liberos elocare, & dotare: secundum facultates suas, & liberorum numerum, nec non filia, & mariti dignitatem, denique loci consuetudinem: ad quod proinde Iudicis officio compelli potest, iuxta l. qui liberos, 19. ff. de ritu nuptiarum, & l. vlt. C. de dotis promissione, §. neque enim.

Idque extendi debet primò, ut verum sit, etsi filia, cum patris consensu nubens, propria aduentitia bona habeat, sicuti constat ex cit. l. vlt. & docet Gl. ibid. ver. intelligi, Molina tom. disput. 424. Sanchez lib. 4. de matrimon. disput. 26. num. 5. aliique communiter apud Couarruiam in epit. p. 2. cap. 3. §. 8. num. 9. aduersus Bartolum in l. mulier, §. cum proponeretur, ff. ad Trebellian. Ex quo inferitur in cit. l. vlt. Si pater penes se habens bona aduentitia, vel v. g. materna liberorum, dotem filia, vel donationem propter nuptias filio constituerit, nihil exprimens vtrum ex matris, an propriis bonis, existimandum esse ex proprijs constituiffe. Contrarium verò præsumendum, si alius quispiam bonorum administrator dotem constituat: imò tametsi auus paternus sit; cum neque iste nepotes suos ex propriis dotare cogatur, si aliquid bona habeant, v. g. ex hæreditate patris, aut matris.

Secundo extendi debet, ut verum sit, etsi filia cum patris consensu in matrimonium collocata sit, nulla facta dotis mentione: nihilominus eam dare cogitur, secundum Gl. in l. obligamur, ver. lege obligamur, ff. de action. & obligat. & videri potest Sanchez loc. cit. num. 3. & lib. 1. disput. 60. Nam tacitè intelligitur sponso dos promissa: eò quòd pater non solum obligatus sit ad prouidendum filia maritum; sed etiam ad dandam ei dotem, sicuti habetur in cit. l. qui liberos. Nam mulier indotata facilè contemnitur: & Rei publ. interest dotes mulieribus dari, & conseruari: quamobrem causa dotis maximè fauorabilis est, sicuti constat ex l. 1. ff. soluto matrimonio. Eademque ratione si mulier diues, non facta expressione dotis, ducta sit, tacitè censetur eius bona, vel saltem pars bonorum, pro conditione & dignitate viri, in dotem constituta: quæ si non solvatur, iustam causam maritus habet alimenta vxori negandi, uti docet idem Sanchez lib. 9. disp. 5. concl. 2. Andr. Gaill. lib. 2. obser. 95. n. 10.

Tertiò: Licet filia inconsulto, aut inuito patre nu-



ferit viro digno, communior & vera sententia est, nihilominus dotem à patre deberi, sicuti videre est apud Couarruiam cit. §. 8. num. 8. Andr. Gaill. cit. obseruat. 95. num. 10. Sanchez cit. disput. 26. quæst. 1. Ratio est: Quia pater hoc casu ægrè ferre non potest matrimonium secundum se, cum vtiliter contractum fuerit: licet ægrè ferre possit, quod attinet ad modum, quia ipso inconsulto contractum fuit.

Id verò limitari debet primò: Nisi municipalibus constitutionibus aliter decretum sit. Secundò limitant non improbabilius Couarrui. num. 9. Gutierrez lib. 2. pract. quæstion. quæst. 1. numero 5. Nisi filia ex propriis aduentitiis bonis satis dotata sit: quod durum esse videatur, patrem compellere ad filiam non indigentem dotandam, quæ sine eius licentia nupsit: dummodò culpa filiae intercesserit; quia vel patrem nunquam consuluit, vel eius salubriori consilio non obtemperauit, iuxta ea, quæ dicam lib. 5. tract. ult. p. 1. c. 1. num. 15. Sin autem filia ( præsertim minor XXV. annis, vel antequam pater in culpabili mora eam elocandi fuit ) absque eiusdem licentia nupsit viro indigno moribus, aut genere; vt exinde in patrem, & familiam dedecus aliquod redundet, tunc cogi non potest pater ad plenè dotandum; sed solum ad alimenta necessaria præstanda, quæ pater liberis suis indigentibus, etiam ingratis & immorigeris, naturali iure debet. teste Couar. l. c. num. 7. Sanchez num. 19. Rodriq. to. 1. sum. c. 14. num. 4. arg. c. cum haberet, de eo qui duxit, & c. l. si quis à liberis, §. si vel parens, ff. de liberis agnoscendis. Quare ad Iudicem pertinebit arbitrari, considerata indignitate mariti, & inobedientia filiae, vtrum delictum eius, dotis subtractionem mereatur.

Quartò extenditur: Quòd pater etiam obligatus sit dotem constituere filiae Monasterium ingredienti, sicuti ex communi docet Sanch. num. 7. Quia causa Religionis fauorabilior etiam ex matrimonio carnali, iuxta Authent. de sanctiss. Episcopis, §. sed & hoc, collat. 9.

Porro dotis quantitas constituenda est secundum loci consuetudinem, dignitatem filiae, facultates dotantis patris: quæ tamen considerandæ sunt deducto ære alieno; adeò, vt dos post patris mortem restituenda sit, quatenus eam pater ære alieno grauatus, sine creditorum, vel aliorum liberorum præiudicio dare non poterat, sicut docet Nau. cap. 17. num. 271. Mol. to. 2. disp. 330. in fine. Videri etiam potest Palud. in 4. d. 15. quæst. 2. art. 5. in fine. Atque hæc de dote à patre profecta.

5. Mater autem non cogitur pro filia dotem dare, nisi ex magna & probabili causa. Neque pater de bonis vxoris sue iniuste ullam dandi habet facultatem. Sunt verbal. l. 14. C. de iure dotium. Magna & probabilis causa intelligi debet, si filia & pater inopes sint, mater autem diues: tunc mater sicut alere tenetur filiam, ita & dotare, teste Mol. tom. 2. disp. 424. post princip. Petro Greg. Tholos. lib. 9. syntag. c. 18. num. 6. Nam dos succedit loco alimentorum, ait Syl. ver. dos, q. 5. Confirmatur ex eo, quòd mater obligata est liberis legitimam relinquere: dos autem, sicuti & donatio propter nuptias, in legitima computatur, conferenda post mortem matris, alteriusve ascendantis, sicuti constat ex l. quoniam, C. de inoffic. testam.

Quin & frater in defectum ascendentium, si diues sit, sorori inopi dotem dare cogitur, saltem quæ sit instar necessariorum alimentorum, teste Syl. Tholos. ll. cc. Sa ver. dos, num. 1. Angelo ver. dos, §. 5. post Gl. in l. qui filium, ff. vbi pupillus educari debeat, & altera Gl. in l. 1. §. sed nonnullos, ver. præstiterit, ff. de tutela, & rationibus distrahendis, vbi ait; In personas necessarias non dici liberalisatem, sed debitum, arg. l. tutor, §.

aliud est, & l. plures, §. cum tutor, vbi id notant DD. ff. de administratione & periculo tutorum, & Abbas Panorm. in c. peruenit, de arbitris, num. 1. vbi addit, quòd Clericus etiam de redditibus Ecclesiasticis sororem inopem dotare, sicuti & alere possit: cum causa dotis non minùs fauorabilis sit, quàm alimentorum. Idemque docent Angel. & Syl. locis cit.

Altera est dos aduentitia, quam vel vxor ex propriis bonis adfert, vel extraneus aliquis eidem confert. Extraneum autem intelligimus omnem, citra parentem, per virilem sexum ascendentem, ex in potestate dotandam personam habentem, dicitur in l. vn. §. accedit, C. de rei vxoria actione. Discrimen est inter vtramque dotem, quòd profectitia, soluto matrimonio, nisi aliud conuentum fuerit, reuertitur ad dantem, qui est parens per virilem sexum ascendens, & filiam in potestate habens. Habetur in l. dos à patre, C. soluto matrimonio, l. si ab hostibus, ff. eod. & l. 6. ff. de iure dotium. Iure succursum est patri, vt filia amissa, solati loco cederet, si redderetur ei dos ab ipso profecta: ne & filia amissa, & pecunia damnum sentiret.

Sed etsi matrimonium soluat per mortem mariti, dos in potestatem patris reuertitur, sicuti & ipsa filia: cui deinde iterum nubenti eandem dotem nihil immutatum dare cogitur: nisi fortè substantia patris fortuita aliqua clade decrescat, tunc enim amplius secundo marito in dotem præstare non cogitur, quàm facultates eius patiuntur, sicuti habetur in Auth. sed quamuis, l. vn. C. de rei vxoria actione.

Dubium verò est: Si filia moriatur superstitibus liberis, vtrum nihilominus dos ad parentem dotantem reuertatur; an verò liberis relinqui debeat, eorumque patri quoad vsumfructum? Respondeo cum Andr. Fachinæo p. 1. controuer. iuris, lib. 3. controu. 71. Rebello p. 2. de oblig. iust. lib. 5. quæst. 3. de contractibus. Si filia mortua fuit in potestate patris constituta, haud dubiè dos profectitia patri reddenda est: quia licet liberi siue descendentes, excluso ascendente auctore suo, succedant in reliquis defuncti parentis, filij familias, bonis; puta castrensibus, & aduentitiis; non tamen in profectitiis: hæc enim ad eum reuerti debent, à quo profecta sunt, sicuti constat ex Authent. de hæredibus ab intestato, §. 1. iunct. Gloss. ver. parentibus. Sin autem filia emancipata fuerit, non reuertitur dos ad patrem dotantem: cum destinata esse profectitia, & filiae pleno iure acquisita sit: de qua proinde tanquam mater familias testari; vel ab intestato decedens, liberis suis relinquere potuit, sicuti colligitur ex suprà cit. l. vn. §. videamus.

Ex hoc inferitur, quibus locis statuto vel consuetudine receptum est, vt liberi vtriusque sexus, posteaquam in matrimonium locati sunt, emancipati siue patria potestate soluti censcantur; dotem vel donationem propter nuptias, soluto matrimonio, non reuerti ad patrem dotantem: censetur enim aduentitia, quæ in eo maximè differt à dote profectitia, quòd soluto matrimonio non redditur dotanti; nisi aliter conuentum sit; sed manet mulieri, eiusve proximis hæredibus, sicuti constat ex l. vltima, Cod. de iure dotium, & suprà cit. l. vnic. §. accedit, vbi dicitur, quod nisi expressim extraneus sibi dotem reddi pactus fuerit, donasse magis mulieri, quàm sibi aliquod inservasse videatur.

Duobus autem casibus maritus dotem aduentitiam lucratur, soluto matrimonio per mortem vxoris. I. Si pactum intercessit de dote lucranda: nam contractus ex conuentione legem accipiunt: & nominatum contractui dotali specialia pacta adijci posse, & frequentissimè solere, constat ex cit. l. vnic. Cod. de rei vxoria act. §. illud etiam, & ex tit. ff. de pactis dotalibus, tit. Cod. de pactis conuentis tam super dote, & c. l. 1. Si vxor inte-



stata decedat, deficientibus liberis, & propinquis, iuxta l. vn. Cod. vnde vir & vxor. Qui duo casus vicissim locum habent in lucranda donatione propter nuptias, mortuo marito. Vide Angelum ver. dos, §. 13. Syl. eod. ver. q. 17.

7. Constante autem matrimonio, maritus dotem aduentitiam lucratur ob adulterium vxoris: si mi. iter vxor donationem propter nuptias ob adulterium mariti; nisi inter se reconciliati fuerint, cap. plerumque, de donat. inter virum & vxorem, & l. consensu, §. si verò causam, Cod. de repudiis. Quod tamen intelligi debet post Iudicis sententiam: est enim pœna, sicuti ex communi docent Sa ver. diuortium, num. penult. Sanch. lib. 10. de matrim. disp. 8. num. 13. Vbi tamen rectè ait; Maritum, si certus sit de adulterio vxoris, in conscientie foro posse retinere dotem, defendendo se contra vxorem repentem, per exceptionem. Quia cui competit actio, eidem multò magis exceptio competere debet, reg. 71. in 6. Id tamen operatur Iudicis sententia, vt maritus dotem irrevocabiliter lucretur; adeò, vt quamvis post latam sententiam & ipse fornicatus fuerit, dotem tamen semel sibi acquisitam restituere non teneatur. Porro, si adultera liberos habeat, ad ipsos dotis proprietates pertinebit, post mortem matris, sicuti docet Syl. q. 15. Sanchez num. 12.

Præter alia dotis privilegia, quæ recenset Syluest. quæst. 12. hæc duo præcipua sunt: Primum. Si maritus ad inopiam vergat, vt dos apud eum periclitari incipiat, neque alia cautio sufficere videatur, ab vxore repeti poterit; vt vel ipsamet, si industria sit, aut alius eam administret, vel tuto aliquo loco, puta apud mercatorem collocetur; quò, dotis substantia interim salua permanente, ex fructibus eius familia sustentari possit, l. si constante, ff. soluto matrimonio, l. vbi adhuc, Cod. de iure dotium, Authent. de æqualitate dotis, §. illud quoque, cap. per vestras, de donat. inter virum & vxorem, ibid. Abb. num. 12. Syluest. quæst. 16. Molina disput. 429. Rebell. quæst. 12. sect. 1. Andr. Gaill. lib. 2. obseruat. 83. Imò, cessante scandalo, ipsamet vxor clare marito dotem subtrahere non prohibetur; ita tamen, vt otiosa non maneat, sed exposita lucrum afferat, quod ad familiam alendam applicetur, sicuti Mol. annotauit.

Sin verò maritus dotem, vel partem eius, aut matrimonij communia lucra prodigè absumpsit, vxori damnum iniunctum illatum censeri debet: ad cuius compensationem maritus, eiusque hæredes obligantur, sicuti docet Per. Nauar. lib. 3. cap. 1. num. 114. Less. lib. 2. c. 12. num. 87. contra Nau. in man. c. 17. num. 155. qui contrarium docuit de communibus lucris. Addit Less. non prohiberi vxorem, si ita opus esse videatur, occulta compensatione vt aliquid de mariti bonis subtrahendo: modò caueat, ne soluto matrimonio, propter ignorantiam factæ compensationis, dotis restitutio vxori, vel hæredibus eius denuo fiat.

8. Alterum privilegium. Vxor habet tacitam hypothecam in omnibus bonis mariti, donec sibi restituatur dos, l. in rebus, Cod. de iure dotium, cap. ex literis, de pignoribus, vbi Gloss. ait, & sequitur Syluest. quæst. 12. pari ratione bona Episcopi, alteriusve Prælati oppignorata esse Ecclesiæ pro administratione bonorum. Et præfertur vxor in repetenda dote omnibus alijs personis creditoribus etiam tempore prioribus, tacitam quoque hypothecam habentibus, iuxta l. affiduis, Cod. Qui potiores in pignote, &c. & cit. l. vbi adhuc, cit. l. in rebus. Imò etiam habentibus hypothecas expressas, sed posteriores; id est, post dotis constitutionem appositas, sicuti docet Couarenuias 1. resolut. cap. 7. n. 1. Syluest. cit. quæst. 12. Petrus Nauar. lib. 4. cap. vlt. num. 20. & videri potest Glossam cit. l. affiduis, ver. licet antero-

ris. Vide quæ dixi suprâ tractatu 2. cap. 11. assert. 5. casu 4.

Ad extremum nota; quòd exceptionem dotis non numeratæ soluto matrimonio, vel facto diuortio inter coniuges, maritus apponere potest intra annum, si matrimonium ultra biennium non durauit; alioquin intra tres menses, si amplius biennium; dummodo non integro decennio, hoc enim casu exceptio nullo modo admittitur, ad eum finem, vt onus probandi rejiciatur in eum, qui dotem promisit, sicuti habetur in l. vlt. iunct. Auth. C. de dote cauta, non numerata. Atque hæc de dote.

Parapherna dicuntur reliqua omnia bona vxoris, præter dotem: in quorum administratione, & fructibus maritus vxore nolente nequaquam se immiscere debet: quamvis bonum, seu consilium sit mulieri, quæ se ipsa marito committit, res etiam eiusdem pati arbitrio gubernari, l. hac lege, C. de pactis conuentis. Tunc verò si administratio paraphernorum marito commissæ fuerit, pro iis quoque tacitam in bonis mariti vxor hypothecam habet, sicuti colligitur ex cit. l. vbi adhuc, iunct. Gloss. ver. suppositas, Cod. de iure dotium, & ex l. vlt. C. de pactis conuentis. Quamvis hypotheca pro paraphernis non sit ita privilegiata, sicuti pro dote, secundum Gl. in l. si ego, ver. sed condici, ff. de iure dotium, Couar. 1. resolut. c. 7. num. 1. & c. quamvis pactum, p. 2. §. 2. n. 21. Syl. ver. paraphernum, q. 2. Mynsinger cent. 5. obser. 4. Mol. to. 2. disp. 430.

Donatio propter nuptias, græcè *ἀνιδωτή* dicitur, quæ si dotis compensatio, germanicè *ein Segensvöden*. Est enim donatio, quam vir, alijsve eius nomine sponsæ ducendæ facit, in compensationem, vel potius securitatem dotis. Cum enim donatio ista soluto matrimonio ad maritum redeat, sicuti dos ad vxorem, iuxta cap. vlt. de donat. inter virum & vxorem, & l. si liberis, Cod. de donat. ante nuptias; nisi pacto speciali aliud prouisum fuerit, l. vnic. §. illo, Cod. de rei vxoriæ actione; constante autem matrimonio administratio tam dotis, quam donationis propter nuptias pariter ad maritum spectet, sicuti colligitur ex cit. l. vbi adhuc, iunct. Gloss. ver. sustentationem, & ex communi docet Syluest. ver. donatio, 3. quæst. 3. Ideo præcipua hæc est donationis propter nuptias utilitas, vt mulieri securior dos maneat, si maritus bona possideat, quæ illi pro dote specialiter obligata sint, cit. l. vbi adhuc, & notat Abb. in cap. peruenit, num. 9. de emptione ac vendit. & in c. vlt. n. 12. de donat. inter virum & vxorem.

Accedit, quòd donatio propter nuptias ad modum & similitudinem dotis constituta intelligatur: ita, vt sicut vir dotem lucratur ob adulterium vxoris; ita etiam mulier donationem propter nuptias ob adulterium mariti. Deinde, si pactum intercessit de dote lucranda post mortem vxoris, intelligitur etiam interpositum de lucranda donatione propter nuptias post mortem mariti, sicuti constat ex cit. cap. vlt. & l. ex morte, Cod. de pactis conuentis. Eandemque ob causam statutum est in Authent. æqualitas, & subsequente l. lege Leonis, Cod. eodem tit. vt in dote & donatione propter nuptias æqualitas seruetur, non tantum in præuenturis lucris, sed etiam in vtriusque præstatione & constitutione: id est, vt quanta dos marito constituitur, tanta vicissim donatio propter nuptias vxori decernatur. Quod tamen hodie plerumque non obseruari, notant Gloss. in cit. Authent. Abb. in cap. vlt. num. 12. de donat. inter virum & vxorem; Nicolaus Euerardus tom. 1. consil. 40. num. 47. cum fieri soleat; vt sæpe vel nulla constituatur donatio propter nuptias; vel non æqualis dote, sed minor, aut maior, vel sub alia forma.

Quibusdam locis constituitur sponsæ à sponso arrha, it



id est, donatio facta in remunerationem dotis, virginitatis, nobilitatis: germanicè *ein Morgengab*. Quæ post mortem mariti, pleno iure vnâ cum dote vxori exhibenda est: sin autem contingat eam ante maritum decedere, ius habet de tali donatione, sicuti de dote aduentitia, arbitrato suo disponendi, vel hæredibus ab intestato relinquendi. Qua de re Couarruias in epit. p. 2. cap. 3. §. 7. num. 12. Molin. disput. 431. Sanchez lib. 6. de matrimon. disput. 27.

Denique sponsalitia largitas dicitur, quam vnus sponsus alteri sponso facit, causa, & quasi conitione secuturi matrimonij. Quare si matrimonium ratum & carne consummatum postea consequatur, plenè confirmatur donatio, argum. l. si. à sponso, Cod. de donat. ante nuptias, & docet Molin. to. 2. disput. 290. Sanchez lib. 6. disput. 19. Si autem matrimonium, eiusve consummatio non sequatur, tunc inspicendum, vtrum id culpa donantis, vel donatarij acciderit. Si enim alteruter sponsus, vel is, in cuius potestate constitutus est, causam non contrahendi matrimonij præbuit, restituere cogitur, quod ipsi nuptiarum causa donatum fuerat: si quid verò ipse donarat, repetere non potest, l. cum veterum, Cod. de donationibus ante nuptias. Sin autem neutrius sponsoꝝ culpa; sed v. g. alterius morte, aut Religionis professione matrimonium impeditum fuerit; tunc iura Cæsarea discrimen faciunt inter sponsum & sponsam; quòd donatio facta sponso omnino restituenda sit; donatio verò facta sponsæ, restituenda tantum secundum partem dimidiam, si osculum, vel carnalis copula post donationem interuenit: alioquin tota, si nihil tale accidit. Ita habetur in cit. l. si à sponso. Quæ leges Cæsareæ, cum iniustæ non sint, ideo, vbi vigent, etiam in conscientia foro obseruandas esse, admonet Sanchez disput. 18. conclus. vlt.

Ad extremum nota: Quòd quicquid mulier, quæ, susceptis ex priore matrimonio filiis, ad secundas nuptias transijt, à priore marito sponsaliorum iure, donatione, aut vltima voluntate acquisierat; vt si vni filiorum prioris matrimonij hæreditario iure successerat; id totum moriens relinquere debet liberis, qui ex priore matrimonio superstites sunt, l. fæminæ, Cod. de secundis nuptijs. Similiterque ex altero matrimonio suscepti liberi sponsalicias largitates, vel dotis lucra, quæ à suis parentibus prouenerunt, sibi præcipua habere debent, l. cum aliis, l. generaliter, Cod. eodem. Vide quæ dicam lib. 5. tractat. vlt. p. 3. cap. 6. quæst. 3.

## CAP. XIV.

## De Commodato &amp; precario.

## S V M M A R I V M.

- 1 Commodatum est rei alicuius ad solum usum gratuita concessio.
- 2 Commodatarius etiam leuissimam culpam præstare debet, si in eius solius gratiam commodatum fuit.
- 3 Res commodata ante tempus reuocari non potest; nisi præter opinionem graue aliquid eveniat.
- 4 Precarium est, quod precibus petenti utendum conceditur, quamdiu is, qui concessit, patitur.
- 5 In precario non præstatur culpa, nisi lata sit, quæ dolo æquiparatur.
- 6 Precarij contractus, de quo lib. 3. decret. tit. de precarij, non ita reuocari potest, sicuti alia precario concessa.

**C**ommodatum est rei alicuius ad solum usum gratuita concessio. Dicitur alicuius rei, siue ea immobilis sit, v. g. domus, stabulum; siue mobilis, præsertim quæ vsu non consumitur; licet minuat, seu atteratur, vt equus, vestis, &c. Nam quæ vsu statim absu-

muntur, vt pecunia, vinum, commodari non possunt, nisi fortè ad pompam & ostentationem, l. 3. §. vlt. ff. commodati. Adde ex l. 1. §. 1. ff. eod. Eum, cui rei alienæ vsus, vel habitatio competit, posse etiam alteri commodare.

*Ad solum usum*: In quo commodatum inprimis differt à pignore, & deposito, quorum vsus non conceditur: nam si creditor pignore, vel depositarius re deposita domino inuito vtatur, furtum committit, §. furtum autem, Instit. de obligationibus quæ ex delicto nascuntur. Deinde differt commodatum à mutuo, vt pote in quo rei datæ dominium transfertur; in comodato verò solus vsus, dominio ac possessione penes commodantem remanente, l. rei commodatæ, ff. commodati. Ex quo aliud discrimen oritur, quòd incommodato res eadem numero, non deterior per culpam reddita, restituenda sit: in mutuo res eadem, vel similis, secundum genus & qualitatem, vt infra dicam, & habetur in §. item is, Instit. Quibus modis re contrahitur obligatio.

*Gratuita concessio*: In quo differt à locatione. Nam, vt dicitur in cit. §. item is, *commodata res tunc propriè intelligitur, si nulla mercede accepta, vel constituta, utenda data est: alioquin mercede interueniente locatus vsus rei videtur: gratuitum enim commodatum esse debet.* Nec refert, etsi res commodata vsu deterior fiat, v. g. vestis atteratur: si enim sine vlla negligentia aut culpa commodatarij accidat, commodantis damno sit: quippe qui in hoc tacitè consensisse censetur, nisi aliter pactus fuerit, l. cum qui, ff. commodati, & notauit Abb. in c. vlt. num. 3. de pignoribus.

In rebus commodatis talis diligentia præstanda est, 2 qualem quisque diligentissimus paterfamilias suis rebus adhibet, l. in rebus, ff. eodem. Quare etsi per culpam leuissimam perierint, aut deteriores redditæ fuerint, commodatarius damnum præstare debet; quando in ipsius solius gratiam commodatum fuit. Quòd si aliquis sua duntaxat causa commodauerit, v. g. sponsæ suæ, vel vxori, quò honestius culta ad se deduceretur; vel si Prætor ludos edens scenicis commodauerit, dolo tantum, & culpa lata, (quæ dolo æquiparatur, vbi de obligationibus ex contractu agitur) à commodatariis præstanda erit, l. si vt certo loco, §. interdum, ff. eodem. Denique si gratia vtriusque commodatum sit, veluti si communem amicum ad cœnam inuitauerimus, tuque eius rei curam susceperis, & ego tibi argentum commodauerim; culpa tibi præstanda erit non tantum lata, sed etiam leuis, sicuti in rebus pignori datis, & dotalibus, cit. l. in rebus, ver. hæc ita duntaxat, & docet Nauarrus cap. 17. num. 184.

Vocatur autem hæc actio commodati directa, per quam qui commodauit, post tempus transactum, rem commodatam repetit, eiusve æstimationem, si perijt, aut deterior facta est, culpa commodatarij; non casu. Nisi commodatarius in culpabili restituendi mora fuisset; vel ad alium locum, aut vsu rem commodatam, præterquam conuentum fuerat, & contra domini voluntatem, adhibuisset, eaque causa siue occasione res amissa, vel destructa fuisset, casus etiam fortuitus præstandus erit, quippe cui culpa causam præbuit. Ita habetur in cit. §. item is. & in c. vn. de commodat. & tradit. Nau. c. 17. n. 183.

Quòd si res aliqua indiuidua, v. g. plaustrum, iumentum duobus commodata fuit; & vnus dolo, vel culpa perijt, aut deterior facta est, ille solus damnum præstare cogetur. Sin autem neuter culpa caruit, vterque in solidum obligatur: Sed si alter totum præstiterit, ab altero dimidiam partem repetere poterit, vti habetur in l. & vt certo loco, §. si duobus, ff. eod. Idemque



in locato locum habet, atque in deposito, iuxta l. 1. §. si apud duos, ff. depositi. Sin autem duo obligationem contrahunt non ex culpa, sed ex pacto, quia v. g. casum etiam fortuitum rei commodatæ, locatæ, vel depositæ in se susceperunt; singuli tantum pro parte tenentur; nisi expressè conuentum fuerit, vt in solidum teneantur, sicuti sentire videtur Gl. in cit. §. si apud duos, ver. peruenietur, & videri potest Mol. to. 2. disp. 297. in fine.

Interdum verò ipsemet commodatarius contrariam commodati actionem aduersus commodantem instituere potest: vt puta ad recipiendas impensas maiores & extraordinarias, quas fecit circa rem commodatam, v. g. in curationem equi. Modica verò impendia, sicuti & cibariorum, ad commodatarium pertinent, cit. l. in rebus, §. possunt. Præterea si ex re commodata commodatarius damnum accepit, non sine dolo, vel crassa culpa commodantis; vt puta, quia sciens vasa vitiosa commodauit, & vinum, vel oleum infusum corruptum, effusumue est, cit. l. in rebus, §. item qui sciens. Denique, si is qui commodauit, ante tempus præscriptum, vsumue finitum intempestiue repetat, iniuriam infert: *Adiuuari quippe nos, non decipi beneficio oportet*, dicitur in l. in commodato, §. sicut, ff. eod. & consentit. c. vn. de commodato. Et si enim liberæ voluntatis & officij, non necessitatis sit commodare, beneficiumque tribuere; postquam tamen commodatum est, quod principio beneficij ac meræ voluntatis fuerat, conuertitur in obligationem, ciuilemque actionem, iuxta cit. §. sicut. Et confirmatur ex iuris reg. 33. in 6. *Mutare consilium quis non potest in alterius detrimentum.*

Valde tamen probabiliter excipiunt Angelus ver. commodatum, §. 4. Syl. eod. q. 4. Mol. disp. 294. Less. lib. 2. c. 27. n. 18. contra Nau. c. 17. n. 182. Nisi præter opinionem accidat, vt commodans maius, vel æquale detrimentum passurus sit; nisi rem commodatam ante tempus, vel vsum finitum reuocet. Ad hunc enim inopinatum euentum non censetur se obligare voluisse, qui gratis commodauit: quandoquidem quisque præsumitur ex re sua magis sibi ipsi, quam alteri prospicere velle. Neque refert, quod donator reuocare non possit donationem traditione perfectam, idè quia re donata præter opinionem valde indigere incipiat. Est enim dispar ratio: quia in donatione transfertur omne ius domini in donatarium; non item in commodato, locato, in quibus ius domini commodans, vel locans sibi reseruat, sicuti rectè notantur Mol. & Less. ll. cc. arg. l. ædem. C. de locato, de qua infra dicam c. 23. n. 9.

Precarium ferme conuenit cum commodato, iuxta l. 1. ff. de precario. Imò tota definitio commodati, supra à nobis tradita, in precarium etiam cadit. Si tamen strictè, & vt iura solent, de commodato, & precario loquendum sit; in eo præcipuè differunt; quod commodatio fiat ad certum tempus, vel certum vsum; ita, vt ante res commodata à domino repeti non possit; eo autem finito, restituenda sit, licet non repetatur: *Nam dies statuta pro domino interpellat*, l. magnam. C. de contrah. stipul. c. vlt. de locato.

Precarium definitur ab Vlpiano in cit. l. 1. *Quod precibus petenti vtendum conceditur, quamdiu is, qui concessit, patitur, id est, non reuocauerit.* Et paulò post: *Qui precario concedit, si dat, quasi tunc recepturus, cum sibi libuerit precarium soluere.* Est enim natura æquum (dicitur in l. seq.) tamdiu te liberalitate mea vti, quamdiu ego velim: & vt possim reuocare, cum mutauero voluntatem. Dummodo non statim reuocetur, sine cogente necessitate, ne frustra & illusoriè concessum fuerit: quia etiam à precario fraus & dolus abesse debet; ne beneficium alicui præstitum ipsi damnosum existat, sicut notat Abb. in

c. vlt. n. 13. de precario.

Atque hæc causa est, cur in precario dolus tantum; non etiam culpa (nisi lata, quæ dolo æquiparatur l. 1. §. ideo, ff. si mensor falsum modum dixerit, & l. quod Nerva, ff. depositi) præstanda veniat. Cum enim, qui precario dederat, non ex obligatione, sed mera voluntate, rem hucusque habere alterum patiat, non censetur eum rectè obligare velle, l. 2. & l. quæsitum, ver. illud adnotatur, ff. eod.

Precarium non solum in rebus corporalibus, tam mobilibus, quam immobilibus; sed etiam in iuribus constitui potest: veluti, si me precario rogaueris, vt per fundum meum ire, agere, vel in aream meam stillicidium mittere tibi liceat, l. 2. in fine, & l. 3. ff. eod.

Soluitur & reuocatur precarium I. Expressa concedentis voluntate. II. Voluntate tacita; videl. si rem, quam alicui precario dedisti, postea vendas, dones. Si tamen emptor, vel donatarius non statim rem ad se reuocet, censetur & ipse precario eam concedere, cit. l. quæsitum, ver. illud tamen, & c. vlt. de precariis. III. Soluitur precarium morte eius, cui concessum fuit; & non transit ad hæredes: cum sit veluti gratia personalis, l. cum precario, ff. eod. & cit. c. vlt. Non tamen finitur morte eius, qui concessit; sed transit ad eius hæredem, vel successorem, sicuti eisdem locis dicitur. Id tamen intelligendum est, si absolutè alicui quippiam concessum; vel gratia facta fuerit, hæc enim durat, quamdiu à concedente, eiusue hærede aut successore non reuocatur. Secus se res habet, si alicui concessum fuerit ad beneplacitum concedentis, vel dum is voluerit. Eo enim mortuo, cessat beneplacitum ac voluntas: idè quod concessio seu precarium expirat; vt fusiùs dixi lib. 1. tract. 4. cap. 23. n. 17. & videri potest Abb. in cit. c. vlt. n. 5. de precariis, Couar. 3. resol. c. 15. Mol. tom. 2. disp. 298.

Denique ad intelligendum hunc ipsum tit. decret. de 6 precariis, nota cum Gl. in cit. c. vlt. ver. præcaria: Precarium contractum esse, per quem aliquid vtendum conceditur in perpetuum, vel ad tempus, pro annua pensione, aut gratis ob remunerationem beneficiorum, & c. idque ante tempus reuocari non potest: præterquam si à Prælato Ecclesiæ irrationabiliter concessio facta fuerit: tunc successor eius reuocare poterit, vt habetur in c. 2. de precariis.

## CAP. XV.

## De mutuo.

## SUMMARIUM.

- 1 Mutuum consistit in rebus quæ sub eodem genere functionem recipiunt, videlicet quæ in numero, pondere, aut mensura consistunt.
- 2 In mutuo rei data dominium transfertur; non item in commodato.
- 3 Filiusfamil. pecunias mutuo accipiendo iure Cæsareo non obligatur, ob SC. Macedonianum.
- 4 Certi casus sunt, in quibus huic Senatusconsulto locus non est.
- 5 Probabilis est, etiam in conscientie foro exceptionem Senatusconsulti poni posse: modo mutuator in culpa aliqua fuerit, vt pæna locum esse queat.
- 6 Si administrator, vel curator alicuius personæ, aut loci pecuniam mutuo accepit, mutuator ostendere debet, pecunias in utilitatem eius personæ, aut loci versam fuisse.
- 7 Si constiterit, aut ostendatur, Administratorem, vel alium quemuis mandatarium habuisse plenam facultatem mutuo accipiendi, probari non debet, in utilitatem illius versum fuisse, pro quo acceperat.
- 8 Qui spe mutui accipiendi chirographum dedit, intra biennium opponere potest exceptionem non numeratæ pecuniæ.

**M**utuum dictum fuit, quia ita à me tibi datur, vt ex meo tuum fiat, Instit. Quibus modis re



contrahitur obligatio, in principio, & l. 2. ff. de rebus creditis.

Definiri solet ex eisdem iuribus: Mutuum est *traditio rei in suo genere functionem recipientis, ut statim accipientis fiat, & postea tantundem eiusdem generis, ac qualitatis restituatur*. In suo genere functionem recipere dicuntur, quæ sub eodem genere adeo similia sunt, ut in commutationibus, vel solutionibus alterum alterius vice fungi, siue pro altero substitui iure possint: illa nimirum, quæ in numero, pondere, aut mensura consistunt: videl. in pecunia numerata, vino, oleo, frumento, auro, argento, &c. quas res aut numerando, aut metiendo, aut appendendo damus: ut accipientis fiant, & vel eadem omnino, vel aliz eiusdem naturæ ac qualitatis reddantur.

Quod dicitur *eiusdem qualitatis*, idem est, ac bonitatis: non enim licet debitori rem deteriore, quæ ex eodem genere sit, reddere: veluti vinum nouum pro veteri, l. 3. ff. de rebus creditis. Deinde intelligendum est de eadem qualitate, seu bonitate rei *intrinsicæ*, non extrinseco valore, qui pro temporum varietate variari potest: ita ut si frumenti scapham accepi mutuo, satisfaciam si tempore constituto simile frumentum eadem quantitate restituam: etsi eius valor imminutus sit, si cuti ex communi docent Abb. & Alexander de Neuo, & alij in c. ult. de vsuris.

Differt igitur mutuum à commodatò, precario, locato: v. g. si aurum, vel argentum ad pompam alicui commodaueris, pretio locaueris: quod in his rei datæ dominium penes dantem maneat, ideoque eadem numero res reddenda sit: Sin autem casu perierit, vel decrementum aut accrementum valoris acceperit, commodantis, vel locantis commodò pariter, ac damno accidat. Contrà verò res euenit in mutuo, sicuti habetur in l. 2. ff. de rebus creditis, §. item is, Instit. Quibus modis re contrahitur obligatio.

A permutatione verò, ipsaque emptione differt mutuum: quod in illa non idem, sed aliud rei genus recipiamus: ut pro vino pecuniam, vel oleum, sicuti conuenit: nem in his aliud pro alio inuito creditore solui non potest, cit. l. 2. §. mutui: v. g. si ex vendito debeas equum, non satisfacis dando duos boues, quamuis eiusdem æstimationis sint.

Si mutuo reddendo certum tempus præscriptum fuerit, & mutuarius in mora culpabili extiterit, tam in externo, quam conscientie foro omne damnum, & lucrum cessans mutuanti compensare debet, sicuti colligitur ex l. numis, ff. de in litem iurando, & docet Rebel. p. 2. lib. 8. q. 1. f. r. Mok. to. 2. disp. 299. §. si certus terminus. Sin autem nullo definito tempore, mutuatum fuit, solutio fieri debet, cum primum mutuator postulauerit: dummodo non statim postulet, absque cogente necessitate, sicuti super. cap. de precario dictum fuit.

Illud peculiariter constitutum est tit. ff. & C. Ad S. C. Macedonianum, ut licet alioquin filiusfamilias pubes, etiam sine patris consensu, ex omni contractu obligationem, etiam civilem & efficacem, contrahat, ut supra dictum est: tamen ex mutuo accepto efficaciter conueniri non possit, etiam post mortem parentis eius, in cuius potestate fuerat: sed perpetua exceptione Senatusconsulti tutus sit non solum ipsemet filius: sed etiam pater eius, si peculium filij possideat, l. penult. C. eod. Imò etiam fideiussores, nisi donandi animo intercesserint, sicuti habetur in l. sed si, §. non solum, ff. eod. Atque hoc Senatusconsul. etiam ad filiasfam. pertinet, iuxta cit. l. sed si, §. hoc Senatusconsultum.

Si tamen filius, aut filia, eiusue fideiussor, non opposita exceptione, re ipsa soluant, solutum repetere non possunt: quia naturalis obligatio manet, ait Paulus Iureconsul. in lib. 10. ff. eod. Quamuis, ut optimè ibi Gl. annotauit, hæc non sit sufficiens ratio: nam etiam

in muliere fideiubente naturalis obligatio durat: (sicuti & in pupillo, ac Minore) & tamen, si soluerit, conceditur ei conditio, seu repetitio veluti iure civili indebitè soluti, uti constat ex l. debitor, ff. ad S. C. Velleianum. Causa itaque, cur filiofamilias, eiusque fideiussoribus repetitio debiti soluti non concedatur, ea dari debet: quia hoc S. C. non principaliter ob fauorem personæ, sed magis in odium feneratorum introductum fuit, uti egregiè Vlpian. annotauit in l. sed si, §. ult. ff. ad S. C. Macedonianum: *Quia hi demum non repetunt solutum, qui ob pœnam creditorum actione liberantur, non quoniam exonerare eos lex voluit*: secuti mulierem, pupillum, Minorem. Quare etiam id consequens est, quod mulier renuntiare possit beneficio S. C. Velleiani, quippe quod in eius gratiam constitutum fuit: at verò filiusfam. exceptioni renuntiare nequeat: quia non ipsius causa, sed in odium creditoris introducta fuit, l. tamen, ff. eodem iunct. Gl.

Cæterum non dubito, si ex pecunia mutuo accepta filiusfamilias, aut pater eius ditior factus est, eatenus naturali iure ad restitutionem obligatos esse. Etsi aliud secundum civile forum significetur in cit. l. sed si, §. hoc Senatusconsultum, iun. Gl. ver. an extent.

Appellatur autem hoc Senatusconsultum Macedonianum: quia occasione feneratoris Macedonis latum fuit, qui filiisfamilias pecunias numerare solebat, reddendas post mortem patrum: unde illi ansam ceperunt patribus suis mortem machinandi: quod hæreditate parentum potiti, haberent, unde se ære alieno liberarent, sicuti habetur in l. 1. ff. eod. Cum autem verba Senatusconsulti dumtaxat ad pecuniam numeratam referantur: extendi non debent ad res alias mutuo datas: puta frumentum, vinum, oleum: nisi fraus Senatusconsulti adhibita fuisset, ut eiusmodi distractis fructibus pecunia proueniret, l. item si, §. mutui, ff. eod. Sed neque ad emptionem, aut alium contractum Senatusconsult. extenditur: licet in mutuum desierit: Puta, si filiusfam. equum à mercatore emit pecunia non numerata, sed in confessionem mutui, seu crediti deducta: præterquam si in fraudem Senatusconsulti id factum: cum principalis intentio esset non vendendi, sed mutuandi, cit. l. 3. ff. eod.

Alij quoque casus sunt, quibus Senatusconsultum locum non habet: I. Si filiusfamilias, cum pecuniam mutuo accepit, peculium castrense, vel quasi castrense habeat: Siquidem in eo quasi paterfamilias censetur, l. 2. ff. eod. Idemque dicendum videtur, si peculij aduentitij vsumfructum, & administrationem, cum patris consensu habeat.

II. Si filiusfamilias miles sit, cum pecuniam accipit, l. ult. C. eod.

III. Si filiusfamilias sui iuris esse publicè videatur, quando mutuum pecuniam accipit: vel patremfamilias se esse dicat; eiusque affirmationi iusta ratione mutuator credat, iuxta l. 3. & penult. ff. eod. & l. 1. & 2. Cod. eod.

IV. Si filiusfam. pro altero sui iuris existente, & mutuum accipiente, fideiussit, tenebitur: nisi id factum fuerat in fraudem Senatusconsulti, l. item si filiusfam. §. r. ff. eod.

V. Si filius mutuum acceperit iussu patris, aut cum consensu eiusdem saltem tacito: quia sciuit, & non contradixit: aut si pater postea contractum approbauerit, seu verbis, seu facto: quia v. g. partem debiti soluit. Ita habetur in cit. l. item si, §. ult. & l. tamen si, ff. eod. & l. ult. C. eod.

VI. Si filiofamilias legationis, vel studiorum causa alibi degenti, pecunia credita fuerit ad necessarios sumptus, quos ipsi patris pietas recusare non potest. Secus est, si ultra eam quantitatem mutuatum fuerit, quam pater ministrare solebat, cit. l. item si, §. proinde, ver.



de, ver. quod dicitur, & l. Macedoniani, C. eod. Pari etiam ratione Monasterium soluere cogitur pecuniam, quæ Religioso suo studiorum, aliæ iusta causa absentis ad sumptus necessarios mutuò data fuit, teste Abb. c. quod quibusdam, de fideiussoribus, Mol. disp. 301. Imò ex his absolutè infertur cum Innoc. in c. quia plerique, de immunit. Ecclesiæ, Gomez 1. resol. cap. 6. n. 2. Quotiescunque pecunia credita versa est in sumptus filio, aut Religioso necessariis, quos proinde ei pater, vel Prælati præstare debuerat, à patre, Monasterio, & c. obligationem contrahi.

VII. Si pecunia, quam filius mutuò accepit, in rem patris versa fuit: tunc enim non sibi, sed patri accepit, cit. l. item si, §. proinde.

VIII. Si pater, aliùsue filium familias negotiationi suæ præposuit, tunc enim præsumitur facultatem dare mutuandi; nisi id prohibuerit seu expressè, seu tacitè, cit. l. item si, §. interdum. Vide Gomez loco cit.

RESTAT QVÆSTIO. Vtrum filius familias etiam in conscientia foro exceptione Senatusconsulti Macedoniani defendere se possit aduersus creditorem, creditam pecuniam repetentem, postquam ea consumpta est, & filius inde locupletior redditus non est? Negat Couar. c. quamuis pactum, p. 2. §. 3. n. 6. Fachin. lib. 2. controu. c. 62. Rebellus. l. c. 1. 2. Eò quòd Senatusconsulti propositum tantum sit in externo civili foro actionem, petitionemque denegare; sed nequaquam naturalem obligationem infringere, argum. l. sed si, & seq. ff. eod.

5 Verum contraria sententia est communis Innocentij cit. c. quia plerique, Gomez cit. c. 6. n. 2. Less. lib. 2. c. 20. dub. 2. n. 8. Mol. cit. disp. 301. §. habet verò locum, Sanchez lib. 7. mor. cap. 31. n. 22. Certum enim est, quòd lex civilis potuerit tum ob odium, ac pœnam fœneratorum; tum etiam ob Reipub. commodum ita statuere; ut tam extra iudicium, quàm in iudicio, adeoque in utroque foro exceptio creditoribus opponi queat, ad filij familias liberationem. Voluisse autem id statuere, colligitur ex cit. l. sed si, §. sed etsi, iun. l. tamen si ff. eod. ubi absolutè dicitur, filium familias perpetua exceptione tutum esse contra creditorem; adeò, ut etsi non opposita exceptione à Iudice condemnatus sit, nihilominus Senatusconsulti exceptione uti liceat: quod vel falsum, vel iniquum foret, nisi etiam in apimæ iudicio exceptio illum tutum redderet. Debent autem hæc intelligi, dummodo mutuator siue fœnerator in aliqua culpa fuerit, ut pœnæ locus aliquis esse possit, sicuti singulariter notauit Abb. in cit. c. quia plerique n. 26. Secus, si mutuando nihil contra legem peccauit, ut puta, si probabiliter credidit patrem familias esse, vel si mutuauit ad sumptus necessarios, ut pater rationabiliter contentus esse debuerit, sicuti supra dictum. Ad Conarruiæ objectionem respondetur: Mentem Iureconsulti in ea lege fuisse, rationem discriminis afferre; cur pupillus v. g. si quod civiliter indebitum erat, soluit, repetere possit: non item filius familias. Quòd enim pupillus ex contractu sine tutoris consensu efficaciter non obligetur, id ob fauorem ætatis constitutum est; quòd autem filius familias sine patris sui consensu efficaciter non obligetur ex contractu mutui, id potiùs ob pœnam & odium creditorum decretum fuit: *Odia autem restringi, & fauorem ampliari decet*, sicuti Gl. ibidem notauit. Interim non nego, quin filius familias, sicuti & pupillus, ex contractu naturaliter obligatus maneat; sed uterque ea ex parte ineffaciter, quia exceptione legis civilis actio repelli potest, non tantum in externo, sed etiam in animæ iudicio, ubi leges Cæsares in vigore sunt.

Porro, etsi filius fam. exceptioni S. C. Macedoniani simplici promissione renuntiare non possit; cum non in ipsius fauorem, sed potiùs parentum & Reipub. constituta fuerit, si tamen iuramento promissionem confir-

met, obligabitur filius ad soluendum: cum omne iuramentum seruari debeat, si possit sine dispendio salutis, c. quemadmodum, de iureiurando. Et ita docent Couar. Less. ll. cc. contra Abb. in c. cum contingat, n. 22. casu septimo, de iureiurando. Neque facilè huius iuramenti relaxatio conferri potest, nisi in pœnam creditoris, fraudè aliqua vtentis: vel nisi in aliqua prouincia ad quietem Reipub. admodum utile esse videatur, ab eiusmodi mutuis omnino abstinere, sicut notauit Couar. in fine dicti n. 6.

Præterea tam civili, quàm canonico iure specialiter 6 constitutum est, ut si aliquis administrator siue curator personæ, aut loci fauorabilis, videlicet pupilli, Minoris, Ecclesiæ, Hospitalis, Ciuitatis, eius nomine mutuum accepisset, creditori probandi onus incumbat, pecuniam creditam curatori in vtilitatem pupilli, Ecclesiæ, ciuitatis, & c. conuersam fuisse. Ita enim in Ecclesiarum & piorum locorum fauorem statutum est, Auth. hoc ius porrectum, C. de SS. Ecclesiis, relata in causa 10. q. 2. & annotauit Abb. super cap. 1. de deposito, n. 9. Ratio constitutionis est: Cum enim administratores valde prouisi esse soleant ad pecunias mutuò accipendas, ne ea res in fauorabilem personarum, vel locorum detrimentum cedat, iure ita prouisum fuit.

Quod attinet ad ciuitatem, si eius administrator, siue Rector mutuum accepit, non aliter Ciuitatem obligari, nisi creditor ostenderit in vtilitatem Ciuitatis pecunias conuersas fuisse, habetur expressè in cit. l. Ciuitas, ff. de rebus creditis, iun. l. 1. C. de solutionibus & liberationibus, lib. 11. Additur tamen in dicta l. Ciuitas, etsi id probatum non fuerit, nihilominus ad solutionem obligari ipsammet ciuitatis Rectorem, cui pecunia credita fuit: quod etiam in aliis supra dictis curatoribus, vel administratoribus locum habet, teste Less. lib. 2. cap. 20. dub. 2. n. 16. Molin. to. 2. disp. 300. in principio.

Si tamen cum auctoritate, vel consensu Concilij siue 7 Senatus ciuici pecunia mutuò accepta fuerit; non opus est creditorem probare, in eiusdem ciuitatis commodum conuersam fuisse; tamen si fortasse ad mutui solutionem bona ciuitatis immobilia alienare necessarium sit: quippe cum senatus ciuicus illorum alienationem, etiam sine euidente vtilitate, facere non prohibeatur. Ita ex Bartolo in cit. l. Ciuitas, docet Molina cit. disput. 300. §. hæc autem ratio, Arius Pinellus, l. 2. Cod. de rescind. vendit. p. 2. c. 4. n. 69.

Quod verò attinet ad mutuū datum Ecclesiæ, interueniente auctoritate Prælati, (vel etiam Capituli, ubi eius consensus necessariò adhibendus) distinguendum est cum Abb. in c. quod quibusdam, numero 4. de fideiuss. Vtrum ad eius solutionem necesse sit bona Ecclesiæ immobilia, vel mobilia pretiosa alienare, necne. Nam in primo euentu necesse erit creditorem probare, pecuniam mutuò datam in Ecclesiæ vtilitatem conuersam fuisse: eò quòd talia Ecclesiæ bona sine euidente vtilitate, aut necessitate alienari non possint. In posteriore autem euentu opus non est tali probatione: quia Prælati Ecclesiæ liberam habet administrationem honorum mobilium, quæ pretiosa non sunt.

Hæc doctrina sumitur ex cit. c. quod quibusdam, in quo dicitur: Si Religiosus absque consensu Prælati, & maioris partis Capituli, pecuniam mutuò acceperit, non obligari Monasterium: nisi constet in vtilitatem eius conuersam fuisse: tunc enim inquit Gloss. agitur *actio de in rem verso*. Hinc autem ducto argumento ex sensu contrariio, colligunt DD. si Religiosus cum consensu ac licentia requisita, pecuniam mutuò acceperit, demonstrandum non esse, eam in vtilitatem Ecclesiæ, siue Monasterij versam fuisse.



ergo multo magis ita dicendum est, si ipse Prælati, cui plena fructuum administratio competit, mutuo acceperit.

Cæterum observa, si Prælati qui mutuum acceperat, mortuus sit, cum creditor ab Ecclesia repetit, saltem hoc eum ostendere necessarium esse, quod Ecclesia pecunia indigerit, adeoque prudenter ac recte egerit Prælati antecessor, pecuniam nomine Ecclesiæ mutuo accipiendo, sicuti colligitur ex c. i. de solutionibus, ubi dicitur: Quod Prælati debita antecessoris solvere tenetur, quæ pro necessitate Ecclesiæ contracta sunt. Vbi Gl. ait: Successor ad id tenetur, quod prædecessor facere debuit.

Quod denique ad Minorem, & pupillum attinet, ij similiter solvere non tenentur, quæ ipsorum nomine à tutore, vel curatore mutuo accepta sunt; nisi mutuator ostenderit, in eorundem utilitatem pecuniam profectam fuisse, sicuti habetur in l. 3. C. Quando ex facto tutoris, vel curatoris Minores agere, vel conveniri possint. Alioquin verò duntaxat contra tutorem, vel curatorem actio personalis institui poterit. Videri potest Arius Pinellus l. 2. C. de rescind. vendit. p. 3. c. i. n. 31.

Ad extremum sciendum est ex l. in contractibus, & toto tit. Cod. de non numerata pecunia, & Instit. de literarum obligat. Eum, qui spe pecuniæ, alteriusve rei mutuo danda, propriæ confessionis chirographum creditori dedit, intra biennij spatium opponere posse exceptionem non numeratæ pecuniæ; eo fine, ut in creditorem, actorem onus probandi rejiciat, pecuniam, &c. à se numeratam fuisse: qui si in probatione deficiat, absolvetur mutuarius conventus. Ratio est, quia desiderans rem aliquam sibi mutuo dari, fiducia huius beneficii consequendi, facile inducitur ad anticipandam confessionem accepti, quod nondum acceptum est.

Similis porro exceptio intra triginta tantum dies creditoribus convenit in quocunque debito, si opponant, spe eius recipiendi se instrumentum confessionis, seu apocham maturius tradidisse, l. in contractibus, §. super cæteris, C. de non numerata pecunia. Cautio verò est ad excludendas eiusmodi exceptiones, si Tabellio in publico instrumento scribat, in præsentia sui & testium pecuniam, vel aliud simile numeratum fuisse, sicuti monent Molina tom. 2. disput. 302. Abb. c. cum P. num. 11. de fide instrument.

## CAP. XVI.

## De Vsurâ.

## SYMMARIUM.

- 1 Vsurâ est lucrum ex mutuo: quare ubi mutuum non reperitur, usurâ locus non est.
- 2 Lucrum usurarium est, quicquid temporale ac pretio æstimabile ultra sortem mutuo datam accipitur, quasi ratione mutui ex iustitia debitum sit.
- 3 Vsurâ non est, nolle mutuari alteri v. g. pecuniam, nisi is vicissim mutuo det frumentum. Sed usurâ est, dare, alicui mutuo, obligatione ipsi imposta, ut & ipse futuro tempore mutuari, aliudve officium prestare debeat.
- 4 Vsurarius non est, qui ob speratam remunerationem mutuo dat; alias non daturus, nisi id speraret. Sed obligationem remunerandi in pactum iustitiæ propter mutuum deduci non potest.
- 5 Vsurâ alia est realis, & alia mentalis: Item alia aperta, & alia pallescens: cuius plura exempla afferuntur.
- 6 Omnis usurâ illicita est non solum Eccllesiastica: sed etiam civilis, ac naturalis.
- 7 Vsurarius non comparat dominium rerum per usuram acceptarum.
- 8 Mutuo aij iustitiam adijci possunt, quibus ultra sortem aliquid accipere licitum sit: videlicet lucrum cessans, damni emergentis, pænæ conventionalis, &c.
- 9 Etiam ob periculum probabile sortis amittende, aliquid iuste exigere potest.

- 10 Necessarium est, ut lucrum cessans, damnum emergens, vel sortis periculum in pactum delucatur, expresse, aut tacite.
- 11 Mons, qui in Italia dicitur Pietatis, ab usurâ iniquitate defenditur.
- 12 Pænâ alia legalis est, alia conventionalis, & alia iudicialis. Pænâ iudicialis benigniorem interpretationem habet, quàm conventionalis.
- 13 Simulans nauigaturo, periculum sortis in se suscipiat, ratione huius gravaminis, aliqui accipere in consensu foro non prohibetur.
- 14 Nona interpretatio e. nauiganti, de usuris.
- 14 Licitum est mutuari frumentum in autumno, ut restituatur tempore verni; si æquale dubium sit, plusve, an minus tunc valiturum sit: secus, si quasi certum sit, eius pretium auctius fore: nisi in hoc casu ratio lucri cessantis excuset.
- 15 Si mutuum certum sit, valorem monetæ extrinsecum secundum se auctum iri, non est licitum in censu redimibili pacisci, ut pretium emptionis eadem monetæ specie restituatur.
- 16 Si mercator mercem, quam pretio summo vendidit, postea pretio minore redimat, interitum ab usurâ excusari potest.
- 17 Contractus antichristeos secundum se illicitus, accessorij titulis coonestari potest.
- 18 Venditio cum pacto redemptionis licita est: & potest pretium emptionis minus, vel augeri, propter obligationem impositam redimendi, aut renuendi.
- 19 Maritus, donec ei dos solvatur, fructus ex pignoro sine sortis diminutione percipere potest.
- 20 Proprietarius ex oppignerato sibi secunda, vel emphyteusi fructus absque sortis exoneratione percipit.
- 21 Pænâ usurarij canonico, & civili iure decreta sunt.

Vsurâ latinis idem est, quod usus; sicuti cultura idem quod cultus. quo sensu Cicero in Verrem dixit: Cur piratis lucis usuram tam diuturnam dedisti? Et videri potest Gregor. Tholosanus lib. 22. Syntag. cap. 22. Felician. de Solis lib. 1. de censib. cap. 5. princ. Sæpe tamen accipitur pro commodo siue fructu, ex rei usu proveniente: Terra, inquit idem Cicero lib. de senectute, nunquam sine usura reddit, quod accipit. Denique accommodatione vulgari sumitur usura, & definitur, Lucrum ex mutuo. Alias fœnus dicitur, græcè τόκος: quod sit fœtus, siue genitura pecuniæ, alteriusve rei mutuo data. Sed partus infelix, ac spurius; cum tales res suapte natura parere non debeant. Vide S. Basilium in psal. 14.

Pro intellectu descriptionis usuræ, quod sit lucrum ex mutuo, adverte primò; Mutuum esse unicam veluti sedem usuræ, sicuti colligitur ex congestis à Gratiano causa 14. quæst. 3. & doctrina S. Thom. 2. 2. quæst. 78. & tradit S. Antoninus p. 2. tit. 1. ca. 7. §. 8. Nauarrus comment. de usuris, num. 4. aliique communiter. Quare, ubi mutuum seu expressum, seu tacitum & virtuale non est, ibi usura locum non habet.

Secundò nomine lucri intelligi debet quicquid temporale, ac pretio æstimabile ultra sortem mutuo datam accipitur, quasi ratione mutui ex iustitia debitum sit. Quæ doctrina sumitur ex cit. causa 14. q. 3. ubi ex Ambrosio lib. de Tobia cap. 14. refertur: Quodcumque sorti accedis, usura est. Et ex Concil. Agathensi, usura est, ubi amplius requiritur, quàm quod datur.

Porro diligenter examinanda sunt verba singula, quibus utitur in descriptione lucri usurarij: I. Quicquid temporale. Si enim paciscaris, ut ultra sortem restituendam pro te oretur, sacrificetur, &c. non est usura, sed potius simonia: quia commodum seu beneficium mutationis temporale confertur, quasi in compensationem pro re spirituali.

II. Et pretio æstimabile. Nam si ultra sortem intendas consequi mutuatarij benevolentiam, amicitiam, non committis usuram: tum quia amicitia ac benevolentia pretio æstimabilis non censetur, quando gratis ac voluntariè, non ex iustitiæ obligatione exhibetur. Attamen munus à lingua, & munus ab obsequio (ut videlicet mutuatarius obligatus sit ad obsequium, vel honorem externum mutuatori præstandum, vel laudem apud alios & commendationem impertiendam) pretio æstimabilia censentur, ideoque



materia vsuræ: si in pactum deducantur, quod ultra sortem præstari debeant. Quia licet fateamur, famam, & honorem pretio secundum se æstimabilia non esse; obligatio tamen & onus laudandi, honorandi, obsequendi pretio æstimantur: quamobrem nihil frequentius est, quam ut pro eiusmodi opere, & obligatione operis mercedes seu salaria constituentur.

Quamobrem rectè colligunt Conradus de contract. quæst. 37. Pet. Nauarrus lib. 3. cap. 2. num. 386. Molin. tom. 2. disput. 307. Vsuram esse, si alicui mutuo des cum pacto, ut remittat tibi obligationem restituendi ipsi famam, quam antè iniuste læseras: quippe cum talis obligatio tibi onerosa & molesta sit, idèoque eius condonatio pretio æstimabilis.

Simili ratione vsura est, si alicui mutues, cum pacto, ut mutuatarius actione iniuriarum, quam iuste intentare potest, abstinere obligatus sit: quippe cum hoc ius ipsius pretio æstimabile sit, sicuti docet Angelus ver. vsura, 1. §. 3. Medina de rebus per vsuram acquisitis, quæst. 1. §. lucrum, Molina cit. disp. 307. contra Sotum lib. 6. quæst. 1. art. 2. paulò post princ. Nauarrum cap. 17. num. 238. ea ratione motos: Quia satisfactio pro illata iniuria non debetur ante sententiam Iudicis: ergo nihil remittitur pretio æstimabile. Sed respondetur: Non remitti quidem ipsam satisfactionem, quippe quæ nondum debita est; sed remitti ius exigendi satisfactionem à Iudice. quod ius mutuatario læso iam competit. Fateri tamen debemus, rarò in eiusmodi casu vsuram timendam esse: quia plerumque præsumi potest, mutuatarium, si homo liberalis sit, propter præstitum sibi mutationis beneficium, dictas obligationes seu debita gratis remittere ac condonare.

Exinde aliæ quæstiones solvuntur: Videlicet: An vsura sit alicui mutuarè pecuniam, cum pacto, ut is vicissim mutuo det v.g. frumentum, vel ad molendinum mutuatoris frumenta deferat? Aut mutuarè viro principi pecunias, cum pacto, ut is officium vacans mutuatori conferat, aut prædium suum vendat, in emphyteusim det: Vel mutuarè literarum studio ea conditione, ut mutuatoris potius, quam alterius Professoris lectiones audiat? Ad hæc neganter respondent Adrian. de restit. vbi de vsura, Angelus verb. vsura 1. §. 5. Ioan. Maior in 4. d. 15. quæst. 29. Nam vsura non est, nisi mutuator aliquid lucri ultra sortem datam accipiat: Mutuans autem in dictis casibus ultra datam sortem nihil accipit, aut lucratur. Quia tamen si ipsi vicissim mutuandum sit frumentum, tantundem tamen restituere cogetur. Similiter nec molitori, aut officiali, aut prædij emptori, vel conductori seu emphyteutæ aliquid accrescit; posito quod pactum, cuius celebrandi conditio adiecta est, secundum se iustum & æquum sit, ut opera exhibita à molitore, officiali, colono, &c. respndeat stipendio, mercedi, pensioni. Denique neque lans, fama, aut gratia, quæ Professori ex discipulorum multitudine accrescit, pretio æstimabilis est, ut lucrum aliquod ex mutuo censi possit.

Contrarium verò in his quæstionibus docent alij DD. plerique, Caiet. 2. 2. q. 78. a. 2. ad 2. & in sum. ver. vsura, cap. lucrum vsurarium, casu 7. & seqq. Gabr. in 4. d. 15. q. 11. a. 3. dub. 8. Abb. in c. ult. num. 17. de vsuris, Sotus l. 6. q. 1. a. 2. S. Anton. p. 2. tit. 1. c. 7. §. 8. Nau. c. 17. nu. 220. & 223. Syl. ver. vsura, 1. q. 7. Medin. de rebus per vsuram acquisitis, q. 4. Mol. to. 2. disp. 309.

Pro concordia vtriusque sententiæ respondeo, & dico I. Vsuram non est, nolle mutuarè alteri pecunias v. g. nisi is etiam beneficium aliquod præstet, v. g. frumentum mutuo det, vacans seculare officium conferat; vel nisi simul alium contractum v. g. venditionis, locationis pretio seu pensione iusta celebret. Ita sentiunt Adrianus, Angelus, & Maior l. cc. Pet. Nau. lib. 3. c. 2. num. 24. & sumitur ex S. Thom. 2. 2. q. 78. a. 2. ad 4. Less. lib. 2. c.

20. dub. 8. Mol. tom. 2. disp. 308. §. dubium est. Requiritur tamen, ut sit mera conditio cum qua, & sine qua non mutuandi: non autem propriè in pactum deducatur, cum obligatione iustitiæ mutuatario imponenda ad vicissim mutuandum, vendendum. Quod fiet, si dicatur homini: Si vis à me obtinere pecunias mutuas, oportet te quoque mutuarè frumentum: vel iusto pretio vendere, aut locare mihi prædium: aliàs nihil obtinebis. Vel: Volo tibi mutuo dare pecunias: sed oportet te gratum esse ob beneficium, & scholas meas frequentare, vel ad molendinum meum frumenta adferre, merces ex mea taberna pretio iusto emere, aut vacans officium mihi conferre: non quidem ut ex iustitia ad talia mihi præstanda ratione mutui accepti, vel accipiendi obligatus sis, (id enim apertè vsurarium esset) sed in tuo arbitrio sit talia præstare: tamen si non præstes, mutuum non accipies, vel acceptum illico repetetur. Quamvis eiusmodi pactiones periculo vsurariæ intentionis non carent.

Dico II. Vsuram est alicui mutuarè cum pacto, ut mutuatarius ex iustitia obligatus sit vicissim mutuo dare, officium aliquod conferre, molendinum, scholas, tabernam mutuatoris frequentare, prædium quamvis iusto pretio, aut pensione vendere, elocare. Ita expressè S. Thom. cit. a. 4. ad 2. Caietan. in sum. ver. vsura, Sotus cit. a. 2. Nau. cit. num. 20. Mol. disp. 308. & 309. Ratio est: Quia ultra sortem suo tempore reddendam, mutuatario onus seu grauenon imponitur, quod pretio æstimabile est. Quamobrem mutuator in tali casu ad aliud non tenetur, quam ut mutuatarium imposito grauenone liberet, nolitque eum civiliter obligatum esse, sed in eius libera voluntate positum, ex gratitudinis affectu tale ipsi beneficium præstare. Sin verò grauenon executioni mandatum fuerit, restitutio facienda erit ipsi grauato, quatenus eius interest; nisi talem restitutionem remittere censeatur.

Porro rectè Mol. cit. disp. 309. contra Sotum cit. a. 2. ante medium, contractum istum defendit; Si mercator indigenti dicat: Nolo tibi pecunias mutuarè: sed conduco tuas operas ad futuram messem, mercede pecuniaria nunc anticipata: cum verè contractus iste mutui non sit, sed conductionis & locationis. Quemadmodum, si rustico pecuniis indigenti nolim mutuarè: sed pretio anticipato emam ab eo triticum, tradendum post futuram messem: venditionis, non mutui contractus censi debet.

Dico III. Nihil prohibet, quominus contractui mutui in futurum instituendo accidentaria grauenona vicissim adijciantur: modò ea vtrique æqualia sint. Ita docet Less. cit. c. 20. num. 61. Mol. disp. 308. colum. 3. v. g. Obligo me ad mutuandum tibi pecunias, si vicissim te obliges ad mutuandum mihi frumentum, emendum à me merces. Et si enim pro actu mutuandi non liceat talem pretio æstimabilem obligationem ultra sortem exigere: licitum tamen id est pro suscepta mutuandi obligatione: cum & ipsa non minùs pretio æstimabilis sit. Simile quiddam est, si mutuatarius indigeat pecuniis Augustæ: sed mutuator malit solutionem sibi fieri Monachij: tunc obligare se potest ad mutuandum pecunias Augustæ in gratiam mutuatoris, ut is vicissim se obliget ad restituendum Monachij in gratiam mutuatoris: modò obligatio vtrique æqualis sit. Accedit, quod contractus iste potius videatur esse iustæ permutationis seu cambij localis, quam mutui, sicuti Molin. annotauit, disp. 310. §. quod attinet ad quartum.

III. Particula, seu conditio lucri vsurarij erat, ut acceptum sit ratione mutui. Si enim alicui pecunias ad pompam concedas, postulato pretio, vsura non committitur: quia non accipis ratione mutui, sed ratione locari, sicuti notauit S. Thom. 2. 2. quæst. 78. a. 1. ad 6. IIII. Quasi ex iustitia debitum. Nam si speres, vel 4



*et si p<sup>ro</sup> p<sup>ro</sup> p<sup>ro</sup>  
 imnata  
 est a f.  
 d. imm. it.*

teriam roges mutuatarium, ut memor præstiti beneficii, ex spontanea gratitudine remunerare velit; vel etiam eiusmodi gratuitum donum accipias, usurarius non es, iuxta doctrinam S. Thom. in corp. a. 2. Nec refert, etsi principaliter mutues propter remunerationem, ita ut nisi sperares donum gratuitum te accepturum, mutuo non dares: quemadmodum etiam Clericus saepe non seruaret Episcopo, nisi speraret ab eo beneficium Ecclesiasticum se assecuturum. Ita docent Sotus lib. 6. quæst. 1. a. 2. Petr. Nauar. lib. 3. cap. 2. num. 197. Mol. disp. 305. Less. c. 20. n. 37. contra Henric. Gandauen s. quodlib. 6. q. 26. Gabr. in 4. d. 15. q. 11. a. 1. Syluest. ver. vsura, in princ. Medin. Cod. de restit. q. 1. Couar. 1. resol. c. ult. num. 4. Adrian. in 4. de restit. vbi de vsura, dub. 7. Nauar. comment. de vsur. notab. 10. qui oppositum docent, argum. cap. consuluit, de vsuris. Ad quod respondetur; Ibi sermonem esse de eo, qui mutuo dat cum intentione, (licet in pactum non deducta) aliquid supra sortem recipiendi, tanquam ex iustitia debitum ratione mutui: talis enim censeretur debet usurarius mentalis, obligatus etiam ad restitutionem rei datæ: Excepto, si consideratis circumstantiis præsumi possit, mutuatarium gratis & liberaliter dedisse, & non ut debitum. Sic enim potuit, & voluit transfere dominium; esto mutuans vsuraria intentione acceperit. quod bene docet Petr. Nauar. num. 216. iuncto num. 230. *Ex qualitate rei datæ, ex signis amicitie, ex paupertate vel copia, ex iactura vel lucro dantis, ex eo demum, quod virtus gratitudinis possit, erit à prudente Confessore donatio coniicienda.* Similia habet Adrianus in 4. de restit. vbi de bello, in 5. dub. Mol. disp. 305. Less. num. 45.

Sed quæstio est; Vtrum vsura sit, si mutuator in pactum deducat, ut mutuatarium obligatus sit vicissim beneficium prestare, v. g. futuro tempore etiam mutuari, merces à mutuatore emere, non ex obligatione iustitiæ; (id enim supra refutatum est) sed solius gratitudinis & naturalis æquitatis? Negant Angelus verbo vsura, 1. §. 4. Couarru. 1. resolut. cap. ult. num. 4. Less. cit. cap. 20. dub. 8. num. 56. vbi aiunt; Non esse vsuram, si mutuator in pactum deducat faciendam remunerationem seu *dydopos*, modò tali pactione nulla noua obligatio mutuatario imponatur. Sed respondeo, hanc doctrinam ambiguum sensum habere. Vera enim est, si nihil aliud velint citati Doctores, quàm quòd mutuator inter mutuum mentionem facere possit, seu admonere mutuatarium de beneficio vicissim præstando; nullam interim nouam obligationem iustitiæ ei adferre intendens. Quamuis enim hoc casu, si mutuator mentionem faciat de aliquo ultra sortem præstando, aut dando, periculum & præsumptio sit vsurariæ intentionis; re ipsa tamen abesse potest, ut animus sit dandi, & accipiendi tanquam liberale donum, in compensationem præstiti beneficii mutationis, sicuti notat Caietan. cit. quæst. 78. a. 1. Molin. disput. 305. §. dicendum est. Falsa autem, & secum ipsa pugnans doctrina est, si intelligatur, quòd mutui contractui aliud pactum sine vsuræ vitio adijci possit: videlicet ut mutuatarium obligatus sit non quidem ex iustitia, sed gratitudinis virtute, certum beneficium vicissim præstare mutuanti. Nam in primis, licet mutuatarium ex mutatione beneficium accipiat, tamen gratitudinis virtus plerumque eum determinat ad non obligat ad certum aliquod officij genus vicissim præstandum; sed qualecunque ipsi placuerit: quare, si certum officij aut beneficii genus in pactionem deducatur, noua obligatio imponitur, sicuti bene notauit Medina de rebus per vsuram acquisitis, quæst. 1. Deinde, etsi ponamus, tales in aliquo casu adesse circumstantias, ut mutuatarium ex gratitudine, vel saltem morali honestate obligatus censetur tale officium seu beneficium præstare; tamen non rectè dicitur, illud in pactum deduci posse. Quia pactum omne, si propriè loquen-

dum sit, iustitiæ obligationem adfert: atque ad id, quod pacto promissum est, quisque compelli potest. Ergo pactum repugnat gratitiæ ac liberali remunerationi. Quæ est doctrina S. Thom. 2. 2. qu. 78. a. 2. ad 2. vbi debitum ex pacto vocat debitum ex iustitia; Gl. in Clem. 1. de vsuris, ver. onera, Abb. cum sua additione in c. consuluit, in fine, de vsuris, Gabr. in 4. d. 15. q. 11. a. 3. dub. 1. Rebell. p. 2. lib. 8. de vsuris, q. 4. & sumitur ex l. rem legatam, ff. de alimentis legatis: *Nemo in necessitatibus liberalis existit.* Vbi Gl. ait: *Qui dat aliquid ex necessitate, non dicitur donare.*

Contrarium quidem docuit Adrianus in 4. de restit. vbi de vsura, §. sed contra; Si mutuatarium ex gratitudine obligetur ad aliquid dandum, vel præstandum, posse id in pactum deduci, per quod strictius, videlicet ex iustitia, obligari incipiat. Quæ doctrina refutari debet: quandoquidem strictior illa obligatio, adeoque nouum grauamen, quod mutuatarium imponitur, pretio æstimabile est. Illud tamen fateor, si mutuatarium ultro promissionem faciat: v. g. Si mutuo mihi des 100. aureos, ecce *dydopos* istud tibi do, vel daturus sum; non fore te usurarium, si spe accipiendi mutuo des, alioquin non mutuaturus, modò appareat, animum mutuatarij esse donandi seu liberaliter dandi; non veluti ex reciproca obligatione pro mutuo. Deinde certum esse debet, si mutuatarium liberali animo promissionem fecit, acceptante mutuatore: exinde obligationem iustitiæ illum contrahere, non vi mutui, sed gratuiti pacti.

His explicatis, quæ ad vsuræ definitionem pertinere videbantur, diuiditur vsura primò, in realem ac mentalem: Realis est, in qua lucrum ex mutuo in pactum deducitur seu expressè, seu tacitè. Mentalis est, si mutuans in pactum non deducat: speret tamen atque intendat lucrum non gratuito offerendum, sed quasi ratione mutui debitum sit. Vide de hac diuisione Nauar. comment. de vsuris, num. 12.

Secundò diuiditur vsura in apertam, & palliatam. Aperta est, quæ in mutuo formali atque expresso fundatur: videlicet, do tibi mutuo 100. flor. ut post annum reddas mihi 105. Palliata vsura committitur in contractu mutui non formali & expressi, sed alterius contractus nomine ac specie, veluti pallio, occultati. Exemplum habes primò in mercatore, qui ob dilatam solutionem pretij, carius mercem distrahit, v. g. florenis 100. cum valeat tantum 95. Non enim is aliud agit, quàm quòd 95. florenos, qui velut iustum pretium statim soluendi essent, emptori mutuo det, ea lege, ut eos post annum reddat cum auctario, quod reprobatur in cap. in ciuitate, c. consuluit, de vsuris. Nisi, ut postea dicam, mercatoris interfit, seu ratione lucri cessantis, seu ratione damni incurrendi, solutionem pretij non differri; neque lateat emptorem, ob solutionis dilationem, mercem carius vendi.

Alterum exemplum habes in emptore, qui ob anticipatam pretij solutionem minoris emit, quàm res empta valeat. Ita colligitur ex c. nauiganti, de vsuris, vbi id notat Gl. ver. verosimiliter dubitatur, Abb. num. 6. S. Thom. 2. 2. quæst. 78. a. 2. ad 7. Adrianus in 4. de restit. §. occurrit insuper. Binsfel. in cit. cap. in ciuitate, quæst. 3. & 4. Si tamen ob aliam causam, quia videlicet existimatur verno tempore mercem minoris valituram esse, minus pretium solvatur mense Augusto, nulla vsura committitur: v. g. si lignorum plautum, quod nunc valet quatuor florenis, tradendum tibi post sex menses, emas tribus cum dimidio: quia fieri posse existimatur, ut illo tempore adhuc minus valiturum sit: quamuis accidere possit, ut etiam plus valeat: quia vterque contractuum æquali periculo subijcitur, argum. cit. c. nauiganti.

*condenada*



Tertium exemplum. Si deponas apud alterum pecuniam, data ipsi facultate vtendi, eo pacto, vt propterea obligatus sit pretium aliquod soluere. In veritate enim talis contractus non est depositi, sed mutui, sicut constat ex l. certi, §. vlt. & l. seq. ff. de rebus credit. Nam in deposito rei dominium manet penes deponentem: sed cum datur ius vtendi seu potius absumendi pecuniam, transfertur ius dominij; consequenter fit mutuum, & quidem vsurarium, quando ex eo pretium exigitur, vel recipitur, sicut docet Nauar. lib. 3. consil. 1. n. 6. iuncto consil. 4. num. 2. de deposito, edit. 2. & in man. c. 17. num. 181. vbi hanc regulam tradit: Omnis depositio rei consistentis in numero, pondere, vel mensura, concessa facultate vtendi, & adiecto pacto aliquid propterea soluendi deponenti, iniusta est. Simile est, si constituam aliquem Procuratorem reddituum meorum, finito anno mihi soluendorum, data facultate, vt interim acceptis pecuniis Procurator lucrari possit; sed propterea aliquod pretium pro hoc iure mihi soluere cogatur, sicuti tradit Nau. consil. 2. eod. tit. Nisi animus sit societatis contractum cum tali Procuratore instituere, qua de re infra cap. 20.

Nunc verò dicendum; Omnem vsuram tam mentalem, quam realem; tam palliatam, quam apertam illicitam & prohibitam esse, non solum canonico iure Clem. vn. & lib. 5. ac 6. decretal. de vsuris; sed etiam diuino pariter, ac naturali, sicuti constat ex c. 22. Exodi, c. 18. Ezech. c. 28. Prouerb. & Ps. 14. *Qui pecuniam dedit ad vsuram.* Psal. 54. *Vsura et dolus.* Lucæ 6. *Mutuum date nihil inde sperantes.* Quæ verba licet in primis consilium contineant, quatenus suadent, vt mutuo detur; præcipiunt tamen, vt posteaquam mutuo datum fuit, nihil amplius exigatur, quam mutuatum est: quemadmodum & verba Psal. 75. explicanda sunt: *Donete & reddite Domino.* Eandemque veritatem naturali lumine agnouit Arist. 4. Eth. c. 1. & 1. Polit. c. 7.

Ratione probatur: Quia iniustitia commutativa non permittit, vt pars contrahens plus reddere cogatur, quam accepit: Ponimus autem, mutuatarium accepisse tantum 100. florenos: ergo tantundem, & non plus ex contractu mutui restituere cogitur. Neque refert, quod mutuatarius data sibi pecunia vti, atque lucrari possit: quandoquidem ius vtendi, sicuti & lucrum pertinet ad dominum, qui pecuniam suam adhibet ad liticrandum: mutuatarius autem statim efficitur dominus pecuniæ ipsi mutuo datæ. Ergo ad eum vsus & commoditas, itemque lucrum, quod ex re sua percepit, spectare debet; sicuti bene inter alios annotauit Scorus in 4. d. 15. q. 2. a. 2. Ioan. Gerson. p. 2. operum, opusc. de contractib. consider. 15. Maior in 4. d. 15. q. 29. Gabr. q. 11. a. Non ita verò se res habet in re locata, vel societati tradita; quippe cuius dominium, ideòque etiam periculum pariter ac commodum, penes dantem manet: quamobrem pro eius vsu, & commoditate tanquam ad se pertinente aliquid accipere potest, sicuti notauit S. Thom. cit. q. 78. a. 2. ad 5. Richardus in 4. d. 15. q. 5. Confirmatur: Pecunia, vinum, frumentum, & aliæ eiuscemodi res, in quibus mutuum consistit, in seipsis steriles & non fructiferæ sunt: Ergo iniquum est, pro earum vsu, aut fructu alteri concessio quippiam exigere; quemadmodum in locatione, aut emphyteusi exigipoteat. Probatur antecedens: Res fructifera dicitur, ex qua petmanente vsu, commoditas, vel fructus percipi ac separari potest; veluti ex domo inhabitandi commoditas, ex agro frumentum, ex vacca lac, caseus, vitulus. Atque pecunia, vinum, frumentum, & c. ipso vsu absumuntur, seu vsus earum est abusus, id est, absumptio. l. Hoc SC. in fine, ff. de usufructu rerum, quæ vsu absumuntur. Ergo non sunt res fructiferæ, neque earum vsus à dominio separatus æstimari, aut in commutationem venire potest, sicuti edocet S. Thom. in corp. a. 1.

cit. quæst. 78. & bene explicant Abb. in rubr. de vsuris, Gabriel loc. cit. Pet. Nauar. lib. 3. c. 2. num. 180. Mol. to. 2. disp. 304.

Corollarium I. Vsurarius non comparat dominium rei per vsuram acceptæ. Nam deest titulus, siue iusta causa accipiendi: absque titulo autem rerum dominia non acquiruntur. Quæ est communior DD. sententia Gl. in c. transmissa, ver. licitè, de decimis, S. Th. q. 78. a. 3. Caiet. ibid. & to. 3. opusc. tract. de vsuris, q. 1. Alex. Halens. p. 3. q. 66. memb. 4. Richard. in 4. d. 15. a. 3. q. 6. Maioris ibid. q. 38. Gabr. q. 11. a. 1. in fine. Angeli ver. vsura, 2. §. 18. Syl. eod. ver. q. 1. conclus. 1. Couar. 3. resol. c. 3. Soti lib. 6. de iust. q. 1. a. 4. Binsfeld. c. cum tu, de vsuris, q. 1. conclus. 1. Pet. Nau. lib. 3. c. 2. n. 388. Molin. to. 2. disp. 326. Less. c. 20. dub. 18. contra Abb. & alios Canonistas in cit. c. cum tu, Nau. c. 17. man. n. 269. Palud. in 4. d. 15. q. 2. a. 5. Adrian. in 4. de restitut. vbi de vsura, §. sed hæc opinio. Excipiendum verò est, nisi pecunia v. g. vsuraria cum aliis iuste acquisitis permixta sit, vt discerni non possit, iuxta l. si alieni, ff. de solutionibus, & docent Less. l. c. n. 156. Molin. cit. disp. 326. qui tamen rectè monet, dum pecunia vsuraria in aceruo permixta manet, competere mutuatario realem actionem; qua petat sibi ex illo aceruo ante alios creditores restitutionem fieri.

Corollarium II. Christiani Principes Iudæis subditis suis possunt, ac debent prohibere vsuras, quæ naturali ac diuina Decalogi lege interdictæ sunt; etsi id consuetudine non vbique obseruari, annotauit Clarus lib. 5. sentent. §. vsura, n. 7. Etenim, quod permissio vsurarium, si approbatio non sit, maioris mali vitandi causâ interdum licita esse possit, docet etiam Less. lib. 2. c. 20. n. 179. Mortaliter tamen aduersus iustitiæ legem peccabit Magistratus, si vsuræ licentiam det cum obligatione seu pacto magni tributi soluendi; quippe cum propterea vsurarij vsuras augere, & pauperes magis opprimere cogantur, sicuti Less. l. c. annotauit, & Mol. disput. 304. in fine. Præterea in Clem. vn. de vsuris habetur excommunicatio latæ sententiæ contra Iudices, qui ad vsuratum solutionem compellunt, aut impediunt quominus solutæ repetantur, vel restituantur. Et in cap. 1. de vsuris in 6. excommunicatio, & aliæ censuræ latæ sententiæ repetiuntur contra personas Ecclesiasticas, si vsurarios alienigenas in suis terris habitare permittant.

Contra traditam doctrinam obijcitur primò illud Deuteronom. 23. *Non feneraberis fratri tuo ad vsuram, & c. sed alieno.* Respondet S. Thom. cit. a. 1. ad 2. Vsuram erga extraneos, tanquam minus malum Iudæis permisisse fuisse, vt à maiore malo fratribus fenerandi arcerentur. Aliter respondet S. Ambrosius lib. de Tobia, c. 15. & refertur c. vlt. 14. q. 4. *Cui meritò inferuntur arma, huic merito auferuntur vsura. Quem bello vincere non potes, ab hoc vsuram exige, quem non sit crimen occidere. Sine ferro dimicat, qui vsuras flagitat. Sine gladio se de hoste vlciscitur, qui fuerit vsurarius executor inimici: Ergo vbi ius belli, ibi etiam ius vsuræ.* Vide Conradum de contract. quæst. 24. Greg. Tholos. lib. 22. syntag. c. 3. num. 21. Mol. disp. 304. Adrianum in cap. de restitut. §. Quia tactum est, Gabr. in 4. d. 15. q. 1. a. 1. Felicianum de Solis lib. 1. de censib. c. 5. n. 16.

Obijcitur II. Cæsareis legibus vsuras approbari. Respondetur: Si leges Cæsareæ alicubi lucratorias vsuras statuunt, canonico iure correctas esse, sicuti constat ex Clem. vn. de vsuris.

Obijcitur III. Laborem mutuatoris in numeranda pecunia pretio æstimabilem esse. Respondetur: Ordinariè laborem istum non esse alicuius momenti: si tamen notabilis sit, pretium exigiposse, non veluti ex mutuo: sed tanquam ex opera mutuatario locata, sicuti notauit Maior in 4. distinct. 15. quæst. 1. casu 14. Nau. c. 17. nu. 209.



Obijcies IV. Qui mutuo v.g. pecunia dedit, habet ius eas repetendi cum voluerit; modò non statim repetat, ita ut officium mutuandi frustraneum fuerit: Si ergo se obliget, quòd intra anni spatium v.g. mutuum repetiturus non sit, poterit pro tali obligatione sua pretium accipere. Respondeo cum Molina disput. 308. Verum esse antecedens; sed negandam consequentiam. Qui enim mutuo dat ad definitum tempus, non inducit ullam super se obligationem; sed beneficium mutui ad certum tempus extendit: sicuti neque ille ullam super se obligationem inducit, qui rem suam alteri donat, ac tradit. Nam etiam in mutui datione dominium rei datæ in mutuatarium transfertur: & post perfectum contractum mutui, omnis obligatio ipsi soli incumbit suo tempore restituendi quantum acceperat. Alia verò ratio est de relocata, cuius dominium, cum penes locantem maneat, ideo pro eius usu & commoditate, quæ conductori permittitur, aliqua pensio exigere iure potest.

Interim verò fateri debemus, obligationem, quam quis in se suscipit in alterius gratiam, quòd paratus esse debeat ad mutuandum ipsi, pretio æstimabilem esse: eaque ratione defenditur praxis quorundam locorum, secundum quam numularij seu à Repub. seu ab ipsis mutuatariis mercedem accipiunt pro eiusmodi obligatione mutuandi pecunias quibuscunque petentibus, debitamque restituendi cautionem præstantibus, sicuti docet Sotus lib. 6. q. 1. a. 2. Mol. to. 2. disp. 308. §. ex decisione.

8 Porro, licet hæc hactenus ostensum sit, vsuram, id est, lucrum ex mutuo expresso aut virtuali acceptum, illicitum & restitutioni obnoxium esse; attamen alij iusti tituli contractui mutui adiungi possunt, quibus aliquid ultra sortem, seu rem mutuo datam rectè accipitur. Primus titulus est ex parte mutuatoris, si eius verè interfit non mutuari. Id autem interesse duplex est; Vnum dicitur lucri cessantis, si videlicet mutuatori propterea quòd mutuo daturus est, lucrum abscedet: veluti si mercator ex 1000. quos mutuo tibi dat, æstimatis omnibus, lucraturus sit 80. hos ipsos à te stipulari potest, ut suo tempore vnà cum sorte ipsi restituas, secundum receptam doctrinam Gloss. in cap. conquestus, ver. de feudo, de vsur. Adrian. in 4. de restit. vbi de vsuris, §. quia factum est, Contradi de contract. quæst. 30. Maior. dist. 15. quæst. 30. Ioan. Medin. Cod. de restit. q. 38. causa 2. Caietan. cit. quæst. 78. a. 2. ad 1. obiect. Nauar. c. 17. man. num. 211. & comment. de vsur. num. 40. Pet. Nauar. lib. 3. cap. 2. num. 288. Valent. to. 3. disp. 5. q. 20. p. 2. conclus. 3. Less. lib. 2. c. 20. num. 80. Molin. to. 2. disp. 316. contra Innocent. & quosdam alios Canonistas in cap. vlt. de vsuris, Durandum in 3. distinct. 37. q. 2. ad 1. quibus, tametsi dubius, assentitur Sotus lib. 6. quæst. 1. a. 3. conclus. 4. Probatur autem ex eo, quia spes lucri, qua se privat mutuator in gratiam mutuatarij, pretio æstimabilis est: ergo eius compensatio in pactum deduci potest. Idemque habet locum in emptionis contractu, puta si mercem mercator in aliam regionem, vbi plurius valet, delaturus fuisset, nisi hoc loco emere cupienti venderet; potest hanc sui lucri sperati compensationem expetere, sicuti notat Abbas in cap. vlt. de vsuris. Necesse tamen est, ut in æstimatione lucri sperati non solum expensæ deducantur; sed etiam incertitudinis periculum: quia lucrum in spe minus valet, quàm in re; & tantò quidem minus, quantò incertior spes est.

Addunt verò Molin. cit. disput. 316. Less. num. 87. Tamen si mercator alias pecunias in arca seruet, si tamen has negotiationi non destinaret, sed solum illas, quas postea mutuo dat; posse aliquid exigere ratione lucri cessantis, quippe quod verè ipsi ratione mutui cessat. Quin imò ait Lessius; Et si mercator pecunias absolutè

non destinaret negotiationi, tamen voluisset negotiationi exponere; sed ideo abstinit, quia sciuit multos mutuo petitorios; probabiliter dici, quod compensationem lucri cessantis postulare possit: cum re vera in gratiam mutuatariorum lucro aliquo sperato abstinerit; cauendum tamen esse, ne vsura palliata interueniat.

Cæterum pro sola carentia pecuniæ, seu mera obligatione non repetendi, v.g. ad annum, nihil accipi potest: quandoquidem carentia illa pecuniæ ad tempus aliquod, est intrinseca & essentialis mutuo: ergo sicut pro mutuo nihil accipi potest sine vitio vsuræ; ita neque pro carentia, seu obligatione non repetendi ante tempus, quamvis productius: quia id aliud non est, quàm mutuum prorogatum, seu extensio beneficij gratuiti ad maius seu longius tempus, ut supra dictum.

Alterum interesse damni emergentis: quod duplex est: Vel enim est damnum intrinsecum, quod in ipsa re mutuo data inest: ut si tempore veris mutuo des frumentum, restituendum autumnò, cum minoris valebit. Vel est damnum extrinsecum, seu aliunde proueniens: ut si pecuniam, quam mutuo das, destinaueris ad emendum frumentum tempore abundantie: postea verò pretio maiore emere cogaris: eiusmodi damni tui compensationem meritò in stipulationem deducis. Quæ est doctrina S. Th. q. 78. a. 2. ad 1. communiter recepta, contra Scotum in 4. d. 15. q. 2. a. 3.

Sed & probabile periculum damni, cui mutuator, aut venditor se exponit, si homini non industrio, & pluribus debitis obstricto mutuo det, aut vendat, æstimari, & idcirco, interueniente pacto, aliquid exigere potest: quia quivis prudens mallet decem florenos v.g. donare, quàm ceterum tali homini credere, aut mutuo dare. Quæ est sententia Maioris in 4. distinct. 15. quæst. 31. casu 15. Medinæ de restit. quæst. 38. §. ad tertiam causam, Petr. Nauar. lib. 3. cap. 2. num. 110. & 343. Valent. to. 3. disput. 5. quæst. 20. p. 2. conclus. 4. Molin. to. 2. disp. 356. Less. lib. 2. cap. 20. dub. 13. contra Sotum lib. 6. de iust. quæst. 4. a. 1. ad 1. Nauar. cap. 23. num. 81. Accidit enim contractus innominatus suapte natura iustus: Subijciam me periculo in tui gratiam (modò id probabile sit, & non vano timore conceptum) si dederis mihi decem florenos. Quia ratione Nauar. lib. 3. consil. 23. de vsur. edit. 2. rectè defendit pactum, quo aliquis mercatori in Siciliam nauiganti dedit centum aureos, ita ut si naus periret, nihil omnino recipiat: sin verò rediret salua, centum & viginti quinque consequatur. Vide eundem Nauarrum consil. 29. num. 4. eodem tit. vbi defendit similes contractus; Do tibi centum, ea lege, ut si presbyter factus fueris, vel post sex annos vixeris, des mihi duplum; sin minùs, nihil accepturus sim: dummodo periculum, ne intra id temporis spatium moriatur, vel à presbyteratu reiiciatur, tantæ æstimationis meritò censeretur possit. Confirmatur ex eo, quod etiam fideiussor pacisci potest, ut ipsi aliquid à debitore debeat, non solum pro onere siue obligatione, quòd in eius gratia suscipit; sed multò etiam magis pro periculo, quod interdum subest, damni incurrendi, teste ipso Nauar. cap. 17. num. 285. Couarrua. 3. resolut. cap. 2. num. 6. Caietan. cit. a. 2. ad 4. Pet. Nauar. lib. 3. cap. 2. n. 247. Binsfeld. in cap. nauiganti, de vsuris, quæst. 3. & constat ex hoc iure, §. Labeo scribit, ff. de donat.

Ex his intelligitur primò; Discrimen inter vsuram lucratoriam, id est, quæ merum lucrum continet, omnique iure prohibita est, ut mox dicam: & vsuram compensatoriam, id est, per quam damnum, vel lucrum cessans compensatur, iuxta l. socium, ff. pro socio, vbi dicitur; Socium, qui reddendo pecuniam moram adhibuit, vsuras quoque præstare debere: sed non quasi vsuras, (proprie dictas & lucratorias) sed quòd socij intersit, moram cum non adhibuisse. Et l. vsuras, Cod. de vsuris; Co-



*gitur emptor, qui in solutionis mora est, vsuras in super sol-  
uere venditori.*

10 Secundo intelligitur; Necessarium esse, vt luerum cessans, vel damnum emergens, vel fortis periculum in pactum deducatur expresse, aut tacite; fiatque contractus innominatus: In tuam gratiam desistam ab hoc lucro; vel damnum hoc, aut periculum subibo, vt des mihi decem. Ad eum modum, quo opifex v. g. si ob tuam gratiam ac petitionem tecum lusus, vel spatia- turus sit, pacisci potest, vt des illi pecuniam, quam, nisi tibi obsecundaret, interim lucraturus esset. Sin autem mutuator nihil in pactum deduxit, tamen postea ex mutuatione damnum incurrerit sine culpa mutuatarij, nullam compensationem postulare poterit.

11 Tertio exinde cohonestatur, qui in Italia dicitur *Mons pietatis*. Videlicet ærarium publicè constitutum, ad mutuandum indigentibus, ea lege, vt pro mutuo ipsis dato pignus relinquere cogantur, & intra tempus definitum recepto pignore, pecuniã mutuo datam restituere; insuper vero exiguum aliquid adijcere pro Ministrorum sustentatione, & publica obligatione: Sin autem intra tempus definitum solutio facta non sit, pignus distrahi possit; vt, detracta sorte, exiguoque illo adiecto, quod reliquum est mutuatario restitatur. Idque approbatum est à Leone X. in Concilio Lateranensi, sess. 10. apud Nau. in comment. de vsuris, notab. 20. Rebell. cit. lib. 8. quæst. 13. Molin. disput. 325. Less. lib. 2. cap. 20. dub. 23.

Non absimilis negotiatio est, quam in Germania nostra quibusdam locis vsitatam audio. Cuius maiore anni parte pecunias paratas habere debet, ex quibus indigentibus opificibus, præsertim textoribus, mutuum dare possit, relicto ipsi in securitatem solutionis pignore, v. g. tela. Cum autem recepto pignore solutio facienda est, post annum medium, in singulos florenos mutuo datos auctarium adijciendum est, v. g. vnus pæzius. Considerandum enim est; auctarium istud non accipi ratione mutui; sed ratione obligationis, oneris ac curæ, quam ciuis ille ob gratiam textorum in se suscipit, vt toto ferme anno pecunias pro illis in promptu habeat, quocunque tempore in domum suam aduentantes intromittat, pecunias numeret, &c. quæ obligatio pretio æstimabilis est. Deinde addi potest, lucrandi illam rationem defendi posse titulo societatis, cum annexo pacto assicurationis, de quo dicam infra cap. 20. num. 2. Etenim textores pecuniis à Titio acceptis negotiantur, quando materiam tempore opportuno cõmunt ad telas texendas; atque inde lucrum reportant, cuius aliquantulam partem ciuis ille iure deposcit; quando quidem ad hoc lucrum pecuniæ ipsius non parum contulerunt.

Moneo tamen, talem numulariam negotiationem instituendam non esse, nisi cum auctoritate & approbatione Magistratus: ad quem pertinet examinare, vtum ea ipsis opificibus utilis sit: quia alioquin textores v. g. nisi hyemis tempore, quo fila in minore pretio sunt, ad emendum pecunias habeant, otiosi debebunt, & ad paupertatem adigi. Curandum etiam à Magistratu, vt auctarium, quod ciui penditur, non immoderatum sit: sed tale, vt neutra contrahentium pars iuste conquæri possit.

Quarto resoluitur: Si quis pecunias sub vsuræ obligatione mutuas acceperit, quibus etiam deinceps in suum commodum vsurus fuisset, posse eum cum mutuum petente pacisci: Dabo tibi mutuos mille aureos, priuando me commodum, quod alioquin ex ijs percipere volebam, vt in eius compensationem tu tenearis pro me vsuras creditori meo soluere. Sin vero nullum, aut exiguum commodum ex pecunia mutuo accepta caputurum se putet, idèoque pœniteat eum mutuo sub vsuris accepisse: tunc nefas est, tali pacto alteri mutua-

re: cum grauamen illud re vera non imponatur mutuatario in compensationem lucris, aut commodi cessantis: sed potius ratione mutui, quod vsurarium esse constat. Et ita notauit Mol. disp. 314.

Alter iustus titulus vltra sortem accipiendi est ex parte mutuatarij: si pœna conuentionalis adiecta sit, quam is soluere cogatur, nisi ad tempus præscriptum mutuum restituerit. Neque opus tunc esse videtur, vt creditor exigit: sed dies statuta pro homine interpellat: *Cum ea, quæ quis promissit, ipse in memoria sua seruare, non ab alijs sibi manifestari debeat pœcere*, sicuti habetur in l. magnam, Cod. de contrahenda stipul. Multò minùs requiritur Iudicis sententia: cum ex mutua conuentione ac pacto debeatur, sicuti docet Syluest. ver. pœna, num. 14. Couarruu. in epit. p. 2. cap. 6. §. 8. num. 14. licet contrarium probabile censeat Less. cap. 20. num. 136. Vide etiam Rebellum q. 9. Petr. Nauar. lib. 3. c. 2. num. 335. Mol. disp. 317.

Quo loco notandum est ex cit. Doctõribus: Quod 12 triplex pœna sit: vna legalis, quæ lege decernitur, propter crimen seu culpam: Altera iudicialis, quàm in particulari causa Iudex imperat: Tertia conuentionalis, quæ partium contrahentium consensu statuitur, soluenda ab eo, qui à contractu recesserit, vel in mora culpabili fuerit restituendi debiti, iuxta l. si pacto, C. de pactis, c. significante, de pignoribus. Inter quæ pœnarum genera discrimen hoc est, quodd strictioris interpretationis sit pœna legalis, quam conuentionalis, & iudicialis. sicuti notat Bartolus & alij Doctores in l. cum stipulatus, ff. de verb. oblig. Sanch. lib. 4. moral. cap. 22. n. 25. Nam si lex pœnalis lata fuerit, quodd ad certum temporis terminum aliquid peractum esse debeat, alioquin pœna contrahatur: v. g. Nisi Parochus intra annum sacerdotio initiatu sit, eius parochiale beneficium vacare oportet, c. licet canon, de elect. in 6. talis pœna antè non incurritur, quàm tempus anni integre elapsum est, c. commissi, eod. in 6. Ac verò pœna conuentionalis, sicut & iudicialis, constituta, nisi ad certum tempus aliquid perfectum fuerit: statim committitur, quando tantum temporis, non sine culpabili mora, elapsum est, vt in residuo perfici non posse certum sit, sicuti constat ex cit. l. cum stipulatus, & docet Gl. in l. in illa stipulatione, ff. eod. vbi rectè monet: Licet hoc casu ante diem aduenerit, quodd etiam notat Gl. margin. in c. commissi, de elect. & sumitur ex l. hoc iure, l. si ita stipulatus essem, ff. eod. Quare in effectu discrimen hoc est inter pœnam statutam ab homine, & pœnam legis: quodd, si ante lapsum temporis, quando iam certum est, opus perfici non posse, terminus prorogatur, non contrahitur pœna legalis, sed pœna conuentionalis permanet, quippe quæ ante prorogationem temporis incurta est, sicuti colligitur ex cit. l. cum stipulatus, & docent DD. ferè communiter. Quare mitius agitur cum lege, quàm cum homine, secundum Gl. in l. Celsus, ff. de recept. arbitr.

Addit Sanch. n. 26. Idem sentiendum de voto pœnali, quippe cuius obligatio quasi cõuentionalis est, & ab homine prouenit. Quamobrem, si aliquis votum edidit v. g. Religionis ingrediendæ, nisi intra certum tempus, puta biennium, templi ædificationem perfecit, vel Hierosolymam voti causa peruenerit: postea verò, culpabili mora interposita, cum impossibile esset in residuo biennij votum exequi, temporis prorogationem, vel dispensationem à Sum. Pontifice impetrauit: non idèa etiam adiecta, & iam contracta pœna sublata centeri debet, si eius mentio specialis facta non sit.

Tertius titulus aliquid vltra sortem accipiendi est pacti accessorijs: Si v. g. pecuniam mutuas auream, vt restitatur in moneta area vel minuta: accedit mutuo contractus cambi, iuxta cuius taxam consuetam amplius, quàm datum est, accipere licet, sicuti docet



Navar. lib. 3. consil. 2. de empt. edit. 2.

13. **QVÆSTIO PRIMA.** Vtrum contractus iste vsurarius sit; Si Mercatori ad nundinas nauiganti pecuniam mutuò das, adiecto pacto, vt fortuitus eius casus ad repertineat, atque in eius rei compensationem aliquid tibi ultra sortem soluatur? Respondent Doctores communiter apud Navar. c. 17. man. n. 284. Binsfeld. in c. nauiganti, de vsuris, q. 1. Henricum Canisium de vsuris, cap. 4. n. 5, Couar. 3. resol. c. 2. n. 5, Mol. disp. 318. Rebellum l. c. q. 4. Si tali conditione mutuò dedisti, vt mutuarius, propter mutuandi officium ipsi præstitum, obligatus sit ad accessorium illum assécurationis contractum celebrandum, vsuram commisisti, perinde ac si aliam obligationem pretio æstimabilem eidem imposuisses, v. g. vt obligatus sit à te merces emere: talis enim obligatio siue onus, quod ratione mutui iniicitur mutuuario, pretio æstimabile est, & consequenter materia vsuræ, sicuti bene explicat Pet. Navar. lib. 3. c. 2. n. 404. Angelus ver. vsura, §. 38. quamuis contrarium sentiat Adrian. in 4. de restit. §. occurrunt circa prius.

Sin autem mutuarius, vtrumque contractum plena libertate, nullòque inuoluntario admixto, tecum celebravit; nihil prohibet, quominus aliquid ultra sortem accipias, non ratione mutui, sed ratione contractus accidentaliter mutuo adiecti, qui dicitur assécurationis.

Quare cit. c. ult. de vsuris; *Nauiganti, vel eunti ad nundinas certam mutuans pecunie quantitatem, pro eo quòd suscepit in se periculum, recepturus aliquid ultra sortem, vsurarius est censendus.* aiunt Doctores plerique, explicandum esse secundum priorem, non posteriorem contrahendi modum. Alia est responsio Adriani, & Navar. riloc. cit. intelligendum esse duntaxat secundum præsumptionem fori externi; vt propter periculum vsurariæ intentionis, talis contrahendi modus vsurarius censetur: eò quòd facile sit in auctario ultra sortem petendo, non solum periculum, sed etiam mutui dati beneficium attendere: quod ciuili iure permissum erat, tit. ff. & Cod. de Nautico fœnore, sed canonico correctum, qua de re videri potest Molina cit. disp. 318.

Sed mihi magis placet suspicio Bernartij de utilitate legendæ historiæ, lib. 2. in princip. In textum illius c. ult. de vsuris, mendum irrepsisse, omissione vocalæ, *NON*. vti clarè colligitur ex connexionem sequentium verborum: *Ille quoque, qui dat decem solidos, vt alio tempore totidem sibi grani, vini, vel olei mensura reddantur: qua licet tunc plus valeant, vtrum plus, vel minus solutionis tempore fuerint valitura, verisimiliter dubitatur; non debet ex hoc vsurarius reputari.* Si iste **QVOQUE** vsurarius reputari non debet: ergo nec prior. Alioquin non collectiuam, sed aduersatiuam particulam Pontifex ponere debuisset.

14. **QVÆSTIO SECUNDA.** Vtrum vsura sit tempore autumnii mutuò dare frumentum, calege, vt vere restitatur? Vel vendere frumentum in autumnio, eo pacto, vt pretium soluatur, quanti illud valiturum erit tempore veris? Respondeo ex Greg. IX. in cit. cap. nauiganti, §. ille quoque, iunct. Gl. & Abb. n. 6. Adriano loco supra cit. Gabr. in 4. d. 15. q. 11. a. 1. Couar. 2. resol. c. 3. n. 6. Canisio cap. 3. de vsuris, Molin. to. 2. disp. 255 Less. lib. 2. cap. 20. n. 145. & c. 21. num. 28. Pet. Navar. lib. 3. cap. 2. n. 280. & dico I. Si dubium sit, plurisne, an minoris frumentum verno tempore valiturum sit, quàm in autumnio valet; rectè ita venditur, aut mutuò datur. Quia vterque contrahentium æquali fortunæ sponte se subiicit: & cum dominus frumenti obligatus non sit ad mutuandum aut vendendum, potest non aliter mutuari, aut vendere velle, nisi cum dicta conditione iusta. Simile quiddam est: Si quis vere emat frumentum pretio tunc corrente, & solutione anticipata, vt frumen-

tum soluatur in autumnio; modò æquale dubium sit de pretio ad illud tempus augendo, aut minuendo. Sin verò longè probabilis sit, pretium frumenti auctum iri, vsurarius erit contractus emere pretio tunc corrente, vt tradatur in autumnio. Sed esto postea contingat, vt pretium non augeatur, id casui adscribi debet: atque nihilominus contractus iniquitas, & restituendi obligatio semel contracta permanet, sicuti in simili notauit Adrian. loc. cit. Quod si autem tali pacto pecuniæ solutio anticipetur, vt pretium constituendum sit secundum valorem, quem merx habitura erit tempore faciendæ traditionis, tunc nullum periculum vsuræ est: cum anticipatio ista in solius venditoris commodum cedat, sicuti notauit Mol. disp. 309.

Dico II. Si valde probabile, aut quasi certum sit, pretium frumenti ad vernum tempus auctum iri, vsuram palliatam committit mutuator, aut venditor: quia supra id quod dedit, onus æstimabile imponit alteri contrahenti, videlicet quòd restituere debeat frumenti scapham, vel pretium eius, tempore quo plus valitura est. Accedit, quòd post peractam venditionem periculum mercis ad emptorem spectat: ergo ad eundem quoque mercis incrementum spectare debet; si videl. contingat eius pretium postea augeri. Atque ita docent Medina de restit. q. 38. causa 5. Cou. 2. resol. c. 3. n. 6. Less. lib. 2. c. 21. n. 52. et si aliter Caiet. q. 78 a. 2. ad 7.

Excipe: Nisi inter sit venditoris, aut mutuatoris non vendidisse, aut mutuò dedisse: quia ipsemet frumentum seruaturus erat in vernum tempus, quo plus distrahere posset. Quamquam etiam tunc deducenda est æstimatione custodiæ, laboris, ac periculi, quod venditor, vel mutuator seruando frumento subire deberet. Vide Couar. l. c. Binsfeld. cit. c. in ciuitate, q. 3. Mol. disp. 355. §. licet tempore, vbi rectè annotat; Vsurarium esse, si venditor sub prætextu lucri cessantis paciscatur, vt frumenti pretium ipsi soluatur secundum valorem maximum, quem habiturum erit à die celebrati contractus vsque ad tempus vernum. Etenim, si ponamus, venditorem vsque ad illud ipsum tempus seruaturum fuisse frumentum; frustra obligationem imponit emptori, vt quocunque etiam intermedio tempore plus valeat, tale illi pretium soluendum sit.

Deinde limitari debet: Si mutuò dans frumentum non obliget mutuarium, vt certo tempore reddat, quo plus valiturum putatur; sed cum ipsi placuerit, vel cum mutuator exegerit: tum nihil contra iustitiam peccabit mutuator, et si frumentum in eadem quantitate repetat, aut recipiat tempore, quo plus valet: quare in hoc casu sibi imputare mutuarius debet, quòd non citius restituerit: quandoquidem etiam vice versa, si mutuator sibi non eauit, aut citius non repetiuit, mutuarius restituere poterit tempore, quo frumenti pretium imminutum est. Ita docent Sotus lib. 6. q. 1. a. 2. Navar. cap. 17. n. 219. Binsfeld. c. in ciuitate, de vsuris, q. 5. Molin. to. 2. disp. 311. Tol. lib. 5. cap. 34. contra Less. lib. 2. cap. 20. n. 154. Rebel. p. 2. lib. 8. q. 8. n. 7. Medina de restit. q. ult. §. ex dictis sequitur. Ratio peti debet ex natura mutui, quæ est, vt quod mutuò datur, eadem mensura, genere, & bonitate intrinseca restitatur: quare in contractu isto æqualitas inter datum & acceptum non attenditur secundum pretium seu valorem extrinsecum, nisi id exprimatur, & alius contractus quasi venditionis aut permutationis alicuius instituatur: Do tibi nunc 20. modios frumenti pretij auctioris, vt in autumnio restituas modios 30. pretij (vti probabilissimè existimatur) diminutionis: est enim perinde ac si duo cadi vini veteris permutarentur cum tribus cadis vini noui.

Confirmatur ex praxi: Quia nihil frequentius est, quàm ita dare mutuò frumentum, vinum, oleum, &c.



vt tantundem recipiatur, etsi mutans credat pretium tempore restitutionis auctius fore. Alia verò ratio est de pecunia, quippe cuius essentia plurimum pendet ab extrinseca æstimatione: adeò quidem, vt alia quasi pecunia censeatur, si eius valor extrinsecus crescat, vel decrescat. Quare si quis mutuum dederat 100. thaleros, eorumque postea valor merè extrinsecus secundum se augeatur, non tenetur thaleros totidem, sed pauciores restituere; nisi mutuator propter lucrum cessans sibi cauerat, sicut bene notat Tol. cit. loco, & dixi supra tract. 3. c. 5. n. 15.

Neque illud illicitum erit, si frumentum v. g. vendatur, vel mutuum detur, cum pacto, vt restituatur secundum valorem medium, quem ad tempus vsque verum v. g. habiturum erit: quia tunc æquale vtriusque contrahentium periculum est, sicuti notat Nau. c. 17. man. n. 239. Similis ratio est de pecunia: Qui enim mutuum dat in certa specie, v. g. ducatos mille, pacisci potest, vt restituantur ipsi post annum, secundum valorem, quem tunc, vel quocunque alio designato tempore habituri sunt, posito quòd vsque ad illud tempus seruare decreuerat. Non potest tamen pacisci, vt restituantur illi post annum, secundum valorem maximum, quem interea temporis ducati habebunt. Cum enim valor & accrescere, & decrescere possit; hominisque prudentiæ punctum valoris maximi per illud tempus certò attingi non possit; liquidò apparet, securitati mutuatoris consuli, omnèque periculum in mutuatarium conijci, non sine vsuræ vitio. Qua de re vide Maiorem in 4. d. 15. q. 32.

15 **QVÆSTIO TERTIA.** Vtrum similiter in censu redimibili, si mille florenis in auro emas quinquaginta flor. annuos, licitum sit apponere pactum, vt redemptio fiat in eadem specie monetæ, videlicet ducatorum, vel quanti solutionis tempore ducati valebunt? Hanc quæstionem proponit Less. lib. 2. cap. 22. dub. 8. & respondet; In quibusdam saltem euentibus id licitum esse: I. Si certum erat, æstimationem monetæ non esse mutandam. II. Si vtrunque par erat dubium, num esset augenda, an minuenda. III. Si certum erat, æstimationem monetæ augendam: sed emptor statuerat, pecuniam suam seruare: tunc enim ratione damni, quod patitur, pecuniam illam tunc exponendo, potest tale pactum apponere. Primum, & secundum responsum nullam difficultatem habet; at verò tertium: Nam, vt ipse Lessius postea n. 50. argumentatur; Iniquitas committitur, si in censu emptio venditori supra naturam contractus, & loci consuetudinem, aliquod nouum onus pretio æstimabile imponatur, eique non compensetur. Id autem accidit in proposito: Cum enim iustum pretium census redimibilis apud nos censeantur 20. floreni in vnum, & 1000. in 50. secundum valorem, quem data pecunia habebat tempore contractus; magnum profectò onus venditori imponitur, si tempore redemptionis reddere debeat pretium census non secundum valorem, quem habebat tempore contractus; sed secundum eum valorem, quem certò, vel probabilissimè habebit auctiorem: idque onus nullo modo venditori compensatur.

Neque verò prætextus ille lucri cessantis probabilitatem habet; quin imò contradictionem inuoluere videtur. Cum enim emptor census, ratione eius contractus, ex 1000. florenis accipiat annuos 50 non potest dicere, tantum sibi lucrum decedere, cò quòd monetam auri in specie seruaturus fuisset, donec eius valor cresceret: Si enim seruasset, 50. annuos lucratus non fuisset. Igitur necesse est, vt vel. 0. annuos ex censu dimittat; (neque enim negò, contractum mutui honestissimè institui posse, cum pacto, vt pecunia in eadem moneta specie restituatur) vel valoris incrementum non exigat.

Nota autem, quòd hæc responsio locum habet, si

valor extrinsecus monetarum, v. g. thalerorum in censum elocatorum, secundum se augeatur: Sin verò per accidens tantum augeatur, propter intrinsecam diminutionem minorum monetarum, tunc fateor, tale pactum iustum, & naturæ contractus censualis conforme esse. Quandoquidem in redemptione census idem seu æquivalens pretium emptori redhiberi debet: si autem thaleris mille, qui contractus tempore conficiebant MCC. florenos Rhenenses; emisti annuos florenos 60. Postea autem propter deprauationem minorum monetarum, thalerus earum comparatione crescat, vt valeat florenos sesqui, aut duos; non satisfaciet restituendo thaleros DCCC. aut DC. quia tale pretium in veritate non æquiualeat acceptis thaleris mille; sed solum externa nominis impositione, quatenus totidem florenos Rhenenses continere dicuntur, sed longe alios ac deteriores.

**QVÆSTIO QVARTA.** Vtrum vsura sit? si mutuum pecuniam petenti dicam: Non do tibi mutuum, sed pecunia ista emo à te vaccam, quam tibi locatam volo pro annua pensione. Respondeo cum Maiore in 4. d. 15. q. 46. casu secundo; Si is, qui mutuum petit, vaccam nullam habet, neque mox habiturus est, tunc vsuram esse sub fictæ venditionis, ac locationis nomine palliatam: Sin verò ille re vere vaccam habeat, non esse vsuram: modò seruetur natura contractus locationis, quæ esse solet, vt periculum vaccæ incumbat locatori.

**QVÆSTIO QVINTA.** An vsura sit: Si mercator, 16 credita pecunia, vendat pannum summo pretio, v. g. aureis centum & octo: vt statim eundem pannum numerata pecunia redimat pretio infimo, videlicet aureis centum; Vsurarium contractum esse ait Gabr. in 4. d. 15. q. 11. a. 3. dub. 3. Sed placet mihi responsio Angeli ver. vsura, l. n. 60. Nau. c. 23. n. 91. Vsuram quidem præsumendam esse: quia sub specie venditionis ac redemptionis, re ipsa aliud non agi videtur, quàm quòd homini indigenti centum aurei credantur, siue mutuum dentur, cum pacto, vt postea restituantur centum & octo. Si tamen mercator bona fide, & sine vsuraria intentione pannum vendidisset pretio summo, videlicet 108. constituens in emptoris libertate reuendendi cui vellet: emptor autem rogaret mercatorem, vt ipsemet pretio minore, videlicet aureis centum redimeret, ab iniquitate & vsura immunis censeretur potest. quod etiam docet Pet. Nau. l. 3. c. 2. n. 17. Less. c. 21. n. 130. Etenim constat ex supra dictis: Multum referre, vtrum mutuatarius cum mutuante alterum redemptionis contractum liberè in suum, vel vtriusque commodum instituat: an verò cum inuoluntario mixto, quia cogitur à mutuatore, propter mutuum ipsi datum.

Veruntamen etiam huius grauaminis alius iustus titulus esse potest. Exempli causa: Si mercator ex mille aureis quotannis centum lucraturus putetur, deductis impendiis: fus est pacisci cum mutuatario: Dabo tibi mutuum duo millia aureorum: modò paratus sis, suo tempore compensare lucrum mihi exinde cessans: vel, si malis, loco huius compensationis emas nunc à me pannos pretio auctiore: modò hoc onus tali modo emendi compensationi faciendæ æquale sit.

**QVÆSTIO SEXTA.** Vtrum contractus, qui dicitur *dvilexphor*, germanicè *Ein Ofandeschaff*, vsurarius sit? Videlicet, vt creditor fructus ex pignore lucratur, donec debitum ipsi restitutum sit? Responso est affirmatiua, cum Caiet. 1. 2. quæst. 78. art. 2. Soto lib. 6. quæst. 1. a. 2. & aliis Theologis, contra Alciatum lib. 2. dispunct. cap. 3. & alios apud Mynsingerum cent. 6. obser. 71. Andr. Gaill. lib. 2. obser. 3. Sumitur ex cap. 1. c. 2. & c. conquectus, de vsuris, vbi dicitur, fructus rei oppigneratæ computandos esse in sortem, deductis expensis. Ratio est, quia alioquin creditor ultra pecuniam, quam credi-



dit, aliquid lucrabitur causa solius mutui: quæ usura est. Ceterum, alij iusti tituli interuenire possunt fructus ex pignore sine diminutione sortis lucrandi. Primus est apud Binsfeldium cap. 1. de usuris, q. 2. concl. 1. Maiorem in 4. d. 15. q. 33. Contradum q. 33. de contractibus, concl. 7. Si fructus ex pignore vel hypotheca percepti, non superent quantitatem pensionis, quæ iure census, super eadem hypotheca secundum morem patriæ constituti, exigi potest, cum pacto redhibitionis, &c. Exemplum est: Si Princeps aureis 10000. indigeat, quos nobilis pecuniosus gratis mutare non vult: ut euitetur usura, oppignerari ei potest oppidum, adiecto contractu censuali, per quem ex oppidi redditibus 500. annuos percipiat, donec fors restituatur.

Secundus ex communi doctrina apud Caiet. 2. 2. q. 78. 2. 2. ad 6. Sotum cit. 2. 2. ad finem. Si creditor fundum, qui pignori destinatus erat, certo pretio emat, cum pacto reuendendi. Tunc enim pignoris naturam, realēque obligationem amittit, & possessori tanquam vero domino fructificat, eiusdemque periculo perit. Nam licitam esse venditionem cum pacto redemptionis appposito, constat ex l. 2. C. de pactis inter empt. & vendit.

Interdum etiam nihil obstat, quominus maiore pretio redimatur, quam venditum fuerat: videlicet si postea res pluris valitura putetur: ut si in autumnno vendatur scapha frumenti tribus florenis, cum pacto, ut in vere reuendatur florenis quatuor: Vel si pactum redimendi in gratiam venditoris, cum onere emptoris, adijciatur: puta si Princeps ciuitatem viro nobili vendat aureis 10000. adiecta conditione, ut ipsi liberum sit, si voluerit redimere, sed pretio maiore, v. g. aureis 10300. Cum enim obligatio, quam emptor reuendendi ad petitionem primi venditoris contrahit, onus quoddam sit pretio æstimabile, in partem pretij rectè computatur: quandoquidem onus pacto adiectum, est quasi pars pretij, l. fundi pretium, ff. de contrah. emptione. Igitur propter onus istud emptori in gratiam venditoris impositum, minus pretium decerni potest, quam alioquin res valeat; adiuncto pacto, ut in redemptione pretio consueto veneat, sicuti docet Abb. c. in aliquibus, n. 2. de decimis, Medina, q. vlt. de usur. Couar. 3. resol. c. 9. Nau. c. 17. n. 248. & lib. 3. consil. 7. de empt. edit. 2. Binsfeld. c. in ciuitate, de usuris, q. 7. Canis, c. 5. de usur. n. 30. Per. Nau. lib. 3. c. 2. n. 97. Mol. to. 2. disp. 375. & seq.

Eodemque recidet, si prima venditio communi seu consueto pretio fiat, cum pacto, ut futuro tempore redimi possit, sed pretio maiore, quam tunc res valitura putetur; idque propter onus, quod emptori imponitur, ut de re empti suo arbitratu disponere non possit, sed venditoris voluntati subiectus esse debeat.

Interim semper cauendum est, ne sub eiusmodi contrahendi formulis animus usurarius lateat. quod ex circumstantiis interdum merito præsumitur: ut si pretium venditionis nimis diminutum sit, iuxta c. ad nostram, de empt. & vendit. Quamuis neque in hoc casu pretij nimis diminuti, si verè fuit animus vendendi, cum pacto redimendi, usurarius contractus interuenit; sed potius iniusta & inæqualis venditio. quæ proinde ad æqualitatem reducenda est, soluendo venditori defectum pretij iusti in prima venditione decreti, vñ cum compensatione damni, vel lucri propterea cessantis, quod pretium ab initio iustum non fuerit, sicuti docet Mol. in fine disp. 375. Less. lib. 2. c. 21. n. 119.

18 Sed & simili ratione in venditione apponi potest pactum reuendendi ad arbitrium emptoris; v. g. vendo tibi prædium, tali pacto, ut si tibi venditio displicuerit, reuendere mihi possis. Secundum quam formam contrahendi æquitas postulat, ut primæ venditionis pre-

tium maius sit, quam alioquin esse deberet, propter grauamen venditori impositum reuendendi ad arbitrium primi emptoris. Fructus tamen temporis intermedij, si vera emptio cum pacto reuendendi intercessit, ad emptorem spectare debent, tanquam dominum.

Quamobrem merito in c. illo vos, de pignor. usurarius contractus præsumitur, in quo emptus est fundus, cum pacto, ut maiore pretio ad arbitrium emptoris redimatur, fructibus in partem pretij computatis: quandoquidem duo in illo pacto continebantur, aliena à natura talis contractus; videlicet, ut & pretium maius esset redemptionis, quam primæ emptionis; & ut fructus inter emptionem & redemptionem percepti ad venditorem pertinerent. Præsumebatur igitur fuisse mutuum usurarium cum traditione pignoris, cuius fructus in sortem computari consueuerunt: præsertim cum emptor solitus etiam fuerit usuras exercere. Vide Gl. ibi, ver. percepti, Less. c. 21. n. 119.

Tertius titulus. Maritus, donec dos ei promissa soluitur, fructus ex pignore, sine sortis imminutione, iure percipit; ut nimirum interea habeat, vnde onera matrimonij sustinere possit, c. salubriter, de usuris, vbi Abb. in princip. Nau. comment. de usuris, notab. 21. Mol. to. 2. disp. 321. Less. lib. 2. c. 20. dub. 16. n. 141. Binsfeld. cit. c. salubriter, q. vn. Cum enim fructus & commoditas dotis marito debeatur in compensationem onerum, quæ ipsi incumbunt familiam alendi; iniquitas foret, si vno, vel altero anno talem obligationem sustinere deberet, nullumque ex dote promissa fructum percipere posset; nisi alio id ei modo compensaretur. Quare licitum etiam est pactum, ut interim dum dos soluitur à promissore, certa pecuniæ quantitas quot annis numeretur, in compensationem onerum, quæ interea maritus sustinere cogitur. Quin & vicissim iustum est, si facto diuortio, dos, ex qua se alere deberet vxor, eidem non soluatur; ut interim alimenta competentia ipsi à marito præstentur: idque ex natura pacti dotalis, multum etiam adiuvante consuetudine, & iuris, præsertim canonici, dispositione, sicuti Nauar. l. c. notauit.

Quartus. Proprietarius ex fendo, vel emphyteusi sibi oppignerata fructus, absque sortis exoneratione percipit, iuxta c. 1. de feudis, c. conquestus, de usuris. Ratio afferri debet, quia tali pacto seu conditione contractus isti seu primitus, seu per diuturnam consuetudinem constituti sunt, ut si res feudalis, aut emphyteutica oppignerata sit domino directo, ipsi fructificare debeat. Congruentia autem est, partim quia indecens esse videtur, rem penes dominum directum existentem alteri fructificare: partim quia interea dominus fructuario pensionem remittere tenetur. Vide Abb. aliosque Canonistas in cit. c. conquestus, Maiorem in 4. d. 15. q. 31. casu 1. Gabr. q. 11. a. 2. concl. 4. casu 2. Syl. ver. feudum, q. 29. & 30. Mol. to. 2. disp. 323. Less. cit. c. 20. n. 41.

21 QVAESTIO SEPTIMA. Quanam pœnæ usurariis iure decretæ sint? Respondeo. Pœnæ usurarij notorij, iuris, aut facti notitiæ, hæ sunt: I. Ipso iure est infamis, l. improbum fœnus, C. Ex quibus causis infamia irrogatur. Et ob eam causam, si clericus sit, ad Ecclesiastica officia, & beneficia inhabilis, adeoque irregularis, iuxta c. infames, 3. q. 7. c. si quis oblitus, 14. q. 4. c. inter dilectos, de excessibus Prælatorum, c. 1. c. præterea, de usuris, vbi tamen monet Gl. ver. suspendas communiter approbata, Episcopum post pœnitentiam & satisfactionem dispensare posse. Qua de re vide Molinam disp. 334. §. clericus.

II. Admittendus non est ad communionem altaris, id est, sumptionem sacræ Eucharistiæ: neque eius oblationes accipiendæ sunt: neque Ecclesiasticæ sepultura



tradi debet, c. quia in omnibus, de vsuris, vbi in fine adiungitur: *Qui autem oblationes acceperit, vel Christiana tradiderit sepulture, reddere compellatur: & donec ad arbitrium Episcopi satisfaciatur, ab officij sui maneant executione suspensus.* Verum Lessius c. 20. dub. 22. n. 188. & Suarez t. 5. de censur. disp. 31. f. 1. in fine notant; Post ex-  
tenuag. *Admitanda*, Vsurarium publicum vitandum non esse, etiam in sacris, antequam denunciatus sit. Vide etiam Palud. in 4. d. 15. q. 2. a. 6.

III. Testamentum, & quæuis alia voluntas vsurarij manifesti ipso iure irrita est; nisi ante mortem restitu-  
erit, quæ per vsuras acquisita sunt, vel de eorum resti-  
tutione idoneam cautionem, (per pignora videlicet, aut fideiussores) dederit, c. quamquam, de vsuris, in 6. Vide Syl. ver. vsura, 9. q. 4. & 7. Couar. 3. resol. c. 3. Mol. l. c. 9. circa prædicta.

## CAP. XVII.

## De emptione ac venditione.

## SUMMARIUM.

- 1 Contractus emptionis ac venditionis, cuso numo seu pecunia, de nouo introductus est: cum antea rei alia inter se permutari solent.
- 2 Contractus iste, quæ pretium interuenit, emptio; quæ verò merx, venditio dicitur.

1 **C**ontractus emptionis, ac venditionis mutuo con-  
sensu dandi mercem pro pretio substantialiter  
constituitur: quare etiam inter absentes per nuntium,  
vel literas vtrinque datas institui potest, iuxta l. 1. ff. de  
contrah. emptio. in fine. Vtraque tamen parte tendit ad  
traditionem, & consequenter ad dominij translationem;  
hinc mercis, illinc pretij: licet per accidens impediri  
possit; si v. g. merx, quæ pro pretio traditur, venditoris  
non sit, vt infra patebit.

Origo huius contractus à rerum permutationibus  
cepit: nam olim, cum non erat numus; neque aliud  
merx, & aliud pretium vocabatur, vnusquisque secun-  
dum necessitatem temporum, ac rerum, vtilia inutili-  
bus permutabat: quandoquidem plerumque euenit, vt  
quod vni superest, alteri desit: v. g. qui vino abundat  
& panno indiget, is vinum cum panno permutare po-  
test. Sed quia non semper, nec facile concurrebat, vt  
cum tu haberes, quod ego desiderarem, inuicem habe-  
rem quod tu accipere velles; insuper etiam rerum per-  
mutandarum non æqualis esset valor: nam si vaccat v.  
g. commutanda sit cum equo, pluris æstimatur equus,  
quàm vacca: Ideo electa est materia, cuius publica ac  
perpetua æstimatio difficultatibus permutationum æ-  
qualitate quantitatis subueniret, sicuti habetur in cir.  
l. 1. & docuit Aristot. lib. 1. Polit. c. 6. Diciturque numus  
quod non vnum, quia publica lege æstimationis suæ quan-  
tatem consecutus est. Item pretium, quia aliarum  
omnium rerum siue mercium, quæ in commutationem  
venire possunt, publica mensura, seu æstimatio existit,  
teste Arist. 5. Ethic. c. 5. denique pecunia, eò quod pri-  
mum æs pecudis nota signari solebat, teste Plinio lib.  
33. c. 3.

2 Igitur in hoc contractu, quæ emptio dicitur, pecunia  
siue pretium; quæ verò venditio dicitur, merx, id est, ali-  
quid pecunia æstimabile interuenit: Sic enim latè acci-  
pi merx debet, vt sit correlatiuum pretij. Nam si no-  
men mercis strictè ac propriè accipias, pro sola re mo-  
bili, sicut Iureconsultus accepit l. merx, ff. de verbor.  
significatione, non comprehendit omnem venditionis  
materiam: siquidem etiam res immobiles emi, ac ven-  
di possunt, vt fundus, & soli superficies; item iura ac  
debita: seruitus quoque venditione contrahi potest: vt

si tibi vendam ius per agrum meum eundi.

Quæres. Quid si pro merce, v. g. pro gladio, partim  
pretium numeretur seu pecunia, partim alia res, v. g. ca-  
seus; censeturne emptio, an permutatio? Respondet  
Abb. in c. ad quæstiones, n. 4. de rerum permutat. Si  
data pecunia valore superet, emptio censeri debet: sin  
altera res superet, potius permutatio erit. Quod si qua-  
si æqualis valoris sint, attendenda est mens contrahen-  
tium, arg. regulæ 34. Semper in stipulationib. ff. de reg.  
iuris. Plura vide apud Gomez 2. resol. c. 2. n. 10. Arium  
Pinellum p. 2. c. 2. in l. 2. Cod. de rescind. vendit.

## §. I.

## De pretio rerum venalium.

## SUMMARIUM.

- 3 Duplex est rerum venalium pretium: vnum legitimum, & alterum naturale.
  - 4 Tempore sterilitatis non potest solis agricolis pretium frumenti taxari; aliis mercibus non taxatis.
  - 5 In pretio emptionis, ac venditionis, quod liceat contrahentibus se cir-  
cumuenire, l. c. dictum est.
  - 6 In externo foro contrahentibus non succurritur, nisi ultra dimidium  
iusti lesi fuerint. Sed in conscientie foro omnis notabilis contrahen-  
tium lesio ad æqualitatem reducenda est.
  - 7 Pari modo sicuti in decepto venditore, ita etiam in decepto emptore di-  
midium iusti æstimandum est.
  - 8 Restititio contractus emptionis ac venditionis propter lesionem immodi-  
cam, fructus temporis intermedij, ad emptorem, tanquam domi-  
num, spectare æquum est.
  - 9 Iustum mercis pretium est, quod loci consuetudo approbat, secundum  
communem hominum æstimationem.
  - 10 Variæ causæ sunt, ob quas rerum venalium pretia augeri, vel minui  
solent.
- Nemo suum commodum emere cogitur.

**D**uplex est rerum venalium pretium, auctore Ari-  
stot. 5. Ethic. cap. 7. Vnum legitimum, id est, pu-  
blica lege taxatum, ad cuius taxationis obseruationem  
venditores omnes obligantur, vt sine iniustitiæ peccato  
excedere eam non possint: præterquam si manifestè in-  
iusta sit; veluti si pistioribus taxetur pondus panis non  
secundum proportionem valoris tritici: Aut si lex iu-  
beat, vt frumentum superueniente sterilitate eodem  
pretio vendatur, quo antè vendebatur, cum esset fru-  
menti copia. Nam vbi notabilis circumstantiarum, vn-  
de mercium æstimatio pendet, mutatio accidit, pretium  
quoque à Magistratu mutari conuenit, teste Medina  
Cod. de restitut. q. 36. Nauar. cap. 23. n. 88. Less. cap.  
21. dub. 2 in fine, Molinato. 2. disp. 353. §. obserua si pre-  
tium, & tota & disp. 264.

Exinde dubium solui potest: Vtrum Magistratus ius  
habeat, post magnam agrorum sterilitatem, pretium  
frumenti taxandi vendentibus agricolis? Respondetur.  
Quamuis Magistratui potestas competat ob bonum  
Reipub. & ad reprimendam hominum auaritiam taxan-  
di rerum pretia; debet tamen id facere intra limites æ-  
quitatis, atque iustitiæ: alioquin lex iniusta erit, &  
nullam obligationem pariens. Si igitur Magistratus  
pretium frumenti taxare velit, debet id facere confide-  
ratis circumstantiis abundantie, aut sterilitatis; nec non  
sumptuum, ac laboris, quem agricolæ agris colendis  
impenderunt; & secundum ea iustum frumenti pretium  
æstimare: alioquin iniustam lesionem agricolæ pateren-  
tur. Accedit, quod ferme euenire soleat, vt sterilitatis  
tempore aliarum quoque mercium, & rerum ad vi-  
um necessarium pretium decrescere soleat: quare ini-  
quo damno agricolæ afficiuntur, si ipsi omnia magno  
pretio coemere cogantur, proprias autem merces, vi-  
del. frumentum, & similia, vili pretio, perinde ac si  
talis sterilitas non ellet, distrahere. Neq; obstat, si qui



obiiciat, taxationem frumenti tempore sterilitatis fieri in commodum Reipub. præsertim pauperum, cui posthabendum sit priuatorum agricolarum damnum. Respondeo enim, Si Respub. præsertim pauperes, tempore sterilitatis miseriam patiantur, æquitatem non permittere, vt vnum solum hominum genus, videl. vendentes agricolæ inopiam subleuare debeant: sed ab omnibus, secundum proportionem facultatum, contribuendum esse ad communem inopiam subleuandam, Vide Mol. tom. 2. disp. 346. Med. q. 31. de restitut.

Alterum est pretium naturale, quod, seclusa legis definitione, ex ipsarum mercium natura sumitur: non tamen consideratione absoluta, sed cum habitudine ad humanum vsum, affectionem, voluptatem. Sic enim v. g. panem pluris æstimamus, quàm mures aut publices: ob maiorem illius vtilitatem, non naturæ præstantiam. Et gemma plerumque carius emitur, quàm equus aut bos, ob affectionem, voluptatem, sicuti notauit S. August. lib. 11. de ciuit. Dei, c. 16. Gabr. in 4. d. 15. q. 10. regula 1. Conradus de contract. q. 56. supposit. 2. Couar. 2. resol. c. 3. n. 4.

Discrimen est inter hæc duo rerum pretia: quod pretium legitimum in indivisibili consistit, secundum legis taxationem. Naturale autem siue vulgare pretium latitudinem habet: quia plurimum pendet ab hominum æstimatione & affectu: siquidem varij homines de rebus variè iudicant, iisque afficiuntur: vt proinde, quod alij censent valere nouem florenis, alij æstiment decem, alij vndecim. Quare triplex pretium à Doctoribus statuitur; supremum, mediocre, infimum: quam latitudinem siue limites pretij iusti dum venditores non excedunt, à peccato iniustitiæ immunes sunt; licet aliis summo, aliis mediocri, aliis infimo pretio vendant, sicuti rectè docet Scotus in 4. d. 15. q. 2. a. 2. Maior ibid. q. 40. Gabr. reg. 4. Nauar. c. 23. man. n. 79. Caiet. 2. q. 77. a. 1. in fine, Binsfeld. c. in ciuitate, de v. furis, q. 1. Pet. Nau. l. 3. c. 2. n. 8. Quamobrem etiam emptoribus concessum est licitari, siue pretium offerre; sed intra latitudinem iusti.

Id fortasse Pomponius Iureconsultus voluit, cum dixit in l. in causæ, 2. §. Pomponius, ff. de minoribus: *In pretio emptionis & venditionis naturaliter licere contrahentibus se circumuenire*. Siquidem id verum est, ait Couar. 2. resol. c. 3. n. 2. Nau. c. qualitas, n. 45. d. 5. de pœnit. modo ea deceptio intra latitudinem iusti pretij contingat. Nisi malis dicere cum Ario Pinello in cit. l. 2. p. 1. in fine, Medina q. 3. de restit. Mol. to. 2. disp. 351. mentem Iureconsulti fuisse; Quod omnium gentium iure liceat, id est, impunitum maneat, si in contractu emptionis ac venditionis pretij iusti limites excedantur; modò excessus non nimis magnus ac notabilis sit.

Verùm in conscientiæ foro omnis venditio, in qua iusti pretij latitudo exceditur; & omnis emptio, in qua iusti pretij quantitas non attingitur, iniquitatem continet, ideoque per restitutionem ad æqualitatem reducenda est, nisi liberalis datio, vel remissio eius, qui deceptus fuit, saltem præsumpta, accesserit, sicuti docet S. August. lib. 13. de Trinit. c. 3. S. Tho. 2. 2. q. 77. a. 1. ad 1. Henricus Gandauens. quodl. 3. q. 18. Maior in 4. d. 15. quest. 40 §. octauo requiritur, Gabr. quest. 10. a. 2. conclus. 2. S. Anton. p. tit. 1. cap. 15. §. 3. Nauar. in cap. nouit, notab. 6. num. 42. de iudiciis, & in man. cap. 23. num. 84. &c. qualitas, cit. d. 5. & colligitur ex Apost. ad Thes. sal. 4.

Dixi autem; Nisi libera remissio, &c. Vbi in primis aduertunt Scotus in 4. d. 15. q. 2. a. 2. ibid. Gabr. q. 10. a. 1. In dubio potius esse existimandum, quod contrahentes inuicem remittere & condonare velint, si in contractu inæqualitas modica, & non admodum notabilis accidat. Sin verò notabilis inæqualitas, præsumendam non

esse donationem, tradit Couar. 2. resol. c. 4. n. 8. Pet. Nau. lib. 3. c. 2. n. 44. Less. c. 21. n. 37. Nisi ex circumstantiis de liberali donatione coniectura sumi possit: vt si emptor cognatus sit venditoris, & aliàs benefacere solitus. Non displicet tamen, quod Nau. annotauit in cit. c. nouit, notab. 6. n. 61. & Mol. to. 2. disp. 351. Si contrahentes sciant iustum mercis valorem, atque sine cogente necessitate, nulla item vi, aut fraude interueniente, supra, aut infra iusti pretij limites contractum emptionis & venditionis celebrent, donationem præsumendam esse: idemque sentiendum de locatione, aliisque contractibus onerosis. Nam vniuersim, si quis sciens se non debere, aliquid soluat, donare censetur: quare tanquam indebitum repetere non potest, iuxta l. indebitum, C. de empt. & vendit.

At verò in foro externo cum ciuili, tum canonico, venditori, ob litium multitudinem vitandam, non succurritur, nisi supra dimidium iusti pretij deceptus fuerit, id est, neque dimidiam iusti pretij partem acceperit: v. g. si merx, cuius iustum pretium venditionis tempore minimum erat 10. aureorum, vendita sit minus quinque aureis: competit venditori actio aduersus emptorem, vt vel rescisso contractu mercem restituat, pretiumque suum recipiat, vel iusti pretij defectum suppleat, sicuti habetur in l. 2. C. de rescind. vendit. & cap. cum dilecti, de empt. & vendit. Tamen autem beneficium istud rescindendæ venditionis, ob deceptionem ultra dimidium iusti, soli venditori expresso iure concessum reperiatur: tamen per æquiparationem etiam ad emptorem spectare, vt & is similiter reititendus sit, si ultra dimidium iusti deceptus sit, ex communi docet Arius Pinellus p. 1. cit. l. 2. cap. 2. in princip.

Non modica autem controuerfia est: Quomodo dimidium iusti in emptore decepto computandum sit? Communis DD. sententia Accursij in cit. l. 2. & aliorum apud Couar. lib. 2. resol. cap. 3. num. 8. Mol. to. 2. disput. 349. affirmat: Eodem modo, sicuti in decepto venditore, ita etiam in emptore dimidium spectandum esse, cum ordine ad iustitiam pretij; Vt si merx summum valuit 12. aureis, & emptor soluit supra 18. contractus rescindendus sit: vel excessus pretij iusti emptori restituendus.

Contra hanc tamen sententiam sentit Abb. in c. cum dilecti, n. 2. de empt. Cuiacius lib. 16. obseru. c. 18. Arius Pinellus l. c. Mynfinger cent. 4. obseruat. 73. Fachin. p. 1. lib. 2. controu. c. 16. Emptorem restituendum non esse, nisi duplo plus soluerit, quàm soluere debuerat: v. g. supra aureos 20. si iustum mercis pretium fuit 10. Probant: Quia sicut in venditore enormis læsio, cui lex succurrit, illa demum censetur, si nec dimidiam partem eius, quod accipere debebat, (puta iusti pretij) consecutus est: ita vicissim in emptore enormis læsio ea censeri debet, si nec dimidiam partem eius, quod accipere debebat, (puta mercis æstimate) consecutus fuit. Quod breuius, & clariùs ita proponi potest: Tunc solum læso succurritur, si plus, quàm duplum dedit: minus autem, quàm dimidium accepit. Id autem in venditore accidit, si mercem valentem 10. aureis, vendat infra 5. In emptore autem, si mercem valentem 10. emat plus, quàm viginti aureis. Ergo, &c.

Ego arbitror, neutram sententiam erroris condemnari posse, quominus secundum illam in foro exteri procedere liceat. Aduerto enim in foro externo ad duo Iudicem attendere posse: Primb ad quantitatem læsionis siue damni, quod alter contrahentium passus est: Secundò, ad publicam iudiciorum quietem, & declinandam litium multitudinem. Quod ad primum attinet, negari non potest, si merx valeat v. g. 10. aureis, æqualem læsionem siue damnum fore emptoris, si emat 16. quale damnum esset venditoris, si vendidisset quatuor: idque non tantum absolute, quia vtrinque læsio



læsio siue damnum est sex aureorum; sed etiam cum ordine ad contractum reciprocum. Nam sicuti sex aurei, in quibus venditoris læsio consistit; superant partem dimidiam pretij iusti: ita vicissim sex aurei in quibus emptoris læsio consistit, superant dimidiam partem mercis: quando ut ponimus, merx 10. aureis æstimatur. Accedit ad confirmationem communis sententiae; Minus decens esse, quod iura maiorem læsionem permittant in emptore, quam in venditore: cum contrahentium æqualis debeat esse conditio, & quidem arithmetica, siue absoluta æqualitas. At verò secundum posteriorem sententiam duplo plus lædi potest emptor, quam venditor: Si enim merx valeat 10. aureos, venditor restituitur, si læsio eius superet quinque aureos: emptor autem non restituitur, nisi læsio eius superet 10. aureos. Atque hæc pro communi sententia, quæ & mihi magis placet.

Quod verò ad alterum attinet; Ex vtraque parte venditoris, ac emptoris ferme æqualis accidet litium multitudo, si læsionem notabilem siue enormem definiamus, secundum proportionem non arithmetica & absolutam; sed geometricam siue respectiuam, sicuti posterior sententia definit: videlicet, læsionem enormem ex parte venditoris esse, si infra dimidium pretij iusti accipit; ex parte autem emptoris esse, si ultra duplum iusti pretij dedit. Secundum priorem verò sententiam sapius continget læsio ex parte emptoris, quam venditoris: Citiùs enim alicui persuadebitur, ut det 16. numos pro 10. emendo: quam accipiat 4. pro 10. vendendo. Eò quòd hæc maior & apparentior improporatio sit: quæ fortasse causa est, cur posterior sententia in Camera Imperiali approbata fuerit, ut Mynfingerus testis est.

His quædam addenda sunt: Primum. Si contractus emptionis ac venditionis, propter apparentem læsionem immodicam, postea rescindatur, fructus temporis intermedij ad emptorem, tanquam dominum spectant; sicuti & periculum rei ad eundem pertinebit. Quæ est communior sententia Gomez 2. resolut. c. 2. num. 24. Arii Pinelli in cit. l. 2. p. 2. cap. 4. Gutierrez 2. pract. quæstion. quæst. 134. Molin. tom. 2. disp. 349. Less. lib. 2. cap. 21. dub. 15. Sa ver. emptio, num. 2. contra Couarruiam 2. resolut. c. 3. num. 9. Alia verò ratio est, si venditio rescindatur propter pactum adiectionis in diem; id est, si intra certum temporis spatium alius maius pretium obtulerit, res inempta sit, l. 1. ff. de in diem additione. Vel si venditio rescindatur ob adiectum pactum commissorium; Videlicet, si intra certum temporis spatium pretium solutum non sit, res inempta esto, l. 2. & seqq. ff. de lege commissor. Rescissa enim postea venditione, secundum venditoris arbitrium, fructus temporis intermedij ad eundem venditorem spectare debent, l. item quod, l. Imperator, ff. de in diem addit. l. lege fundo, ff. de lege commissoria, & videri potest Mol. disp. 377. & seq. Ratio est: Quia rescisso contractu propter eiusmodi pactum, perinde est, ac si emptio & venditio nulla interuenisset; adeò ut dominium mercis absque vlla traditione ad venditorem transeat: cui proinde vendicandi ius competit aduersus quemcunque possessorum, l. si quis hoc ff. de rei vendicat. l. commissoria, Cod. de pactis inter emptorem, &c. & docet Couar. 3. resolut. c. 8. Non ita verò se res habet, si contractus rescindendus sit propter appositum pactum redemptionis: ex eiusmodi enim actio non realis, sed solùm personalis aduersus primum emptorem competere videtur, sicuti docet Molin. disp. 373. & seqq. Gall. lib. 2. obser. 16. arg. l. 2. Cod. de pactis inter emptorem, contra Paulum Castrensem apud Couarruiam. cit. cap. 8. nu. 3. Deinde fructus, qui ante diem redemptionis percepti sunt, ad emptorem spectant, tanquam dominum: sed postea percipiendi ad venditorem, iuxta l. 2. C. de pactis inter

empt. & vendit. saltem secundum ratam partem anni, sicuti interpretantur Couar. 1. resolut. c. 15. n. 6. Mol. tom. 2. disput. 374. Andr. Fachin. lib. 2. controu. c. 14.

Alterum. Quod de contractu emptionis ac venditionis dictum fuit, idem etiam, secundum proportionem, in aliis onerosis contractibus, puta permutatione, locatione, emphyteusi, &c. locum habet, ut in externo foro propter inæqualitatem actio non concedatur, nisi læsis ultra dimidium iusti, sicuti notat Gl. & DD. in l. maioribus, C. communia vtriusque iudicij, Abb. cap. cum causa, num. 8. de empt. Fachinæus p. 1. controu. iuris lib. 2. c. 22. Arius Pinellus in cit. l. 2. p. 1. c. 3. & 4.

Tertium. Licet iure etiam canonico deceptis infra dimidium denegetur actio iudicialis, conceditur tamen eis denuntiatio Euangelica, per quam deceptores de iniquo damno refarciendo frustra admoniti, tandem Ecclesiastico Prælato deuuntiantur; ut ad id, quod sub peccato mortali præstare debent, compellantur, sicuti colligitur ex c. nouit. de iudic.

Nunc reuertentes ad pretium naturale siue arbitrium, plurimum refert, ut intelligamus, unde eius iustitia desumenda sit. Quæ quidem in re audiendus non est Scotus in 4. distinct. 15. quæst. 2. a. 2. §. sequitur de commutatione, Maior ibid. quæst. 4. cum dicunt, Mercatori, ut iustum suarum mercium pretium reperiat, ubi lex non taxauit, æstimandos esse in particulari omnes sumptus, quos fecit, damna quæ passus est, illis emendis, aduehendis, seruandis, &c. Insuper aliquid adiiciendum, tanquam stipendium laboris & industria. Verum hac ratione non mercator, seu mercium suarum venditor, ac dominus; sed potius institor; siue operæ locator describitur. Deinde sequitur, quod infortunatior mercator est, si v. g. naus submersa fuit, domus in qua merces seruabantur, conflagrauit; eò pluris merces suas distrahere posse. quod falsum est: Quia res domino suo perit: venditor autem mercium dominus est. Igitur sicut fortunatus mercium aduētus cōmodo eius accidit, ita & infortunium ad eundem spectare debet.

Quare aliter dicendum cum Soto lib. 6. de iust. q. 2. a. 3. Conrado q. 56. de contractibus, Medina quæst. 31. de restitut. Couar. 2. resolut. c. 3. n. 4. Petr. Nau. lib. 3. de restit. c. 2. n. 25. Mol. disput. 348. Iustum mercis pretium esse, quod loci consuetudo approbat, secundum communem hominum æstimationem, ex abundantia, vel penuria illius, ordinaria acquirendi facilitate aut difficultate, utilitate vel vsu, aliisque circumstantiis. Hinc colligunt Doctores communiter S. Th. 2. 2. q. 77. a. 3. ad 4. Maior in 4. d. 15. q. 41. §. secundo, Petr. Nau. lib. 3. c. 2. n. 67. Mol. disp. 354. Less. lib. 2. c. 21. dub. 5. aduersus Ciceronem lib. 3. Officiorum, Medinam q. 35. Conradum q. 62. & 63. de contractibus, eum nihil contra iustitiam peccare, qui frumentum v. g. pretio consueto vendit, conscius breui tempore superuenturam frumenti copiam, aut anni fertilitatem, vel hostium incursionem; si hæc causa minuendi pretij publicè ignorentur. Nam rerum pretia non ex priuata vnius, vel alterius hominis noticia aut affectione, sed, ut dictum est, ex communi ciuium æstimatione ac sensu accipienda sunt, iuxta l. pretia, ff. Ad l. Falcidiam. Addit Molina disp. 354. neque contra Charitatis virtutem talem peccaturum: vititur enim iure suo, vendendi merces pretio iusto currente. Quo simili iure uti potest, qui pro affecuratione mercium, aut pecuniæ, pretium consuetum exigit; licet priuatim cognoscat, v. g. ex amici literis, non esse tantum navigationis periculum, quantum vulgo existimatur, quia v. g. mare iam à piratis securum est; sicuti docet Less. c. 28. n. 27.

Simili iure uti poterit, qui intellexit locationum pretia minuenda ob aulæ v. g. recessum, sicuti docet Petr. Nau. n. 81. Less. cap. 21. n. 44. contra Medin. loco



cit. Valent. to 3. disp. 5. q. 20. p. 4. ad 4. Item, qui intellexit Magistratum decreuisse frumenti pretium taxare, certum genus monetæ interdiceret, sicuti docet Couar. reg. peccatum, p. 2. §. 4. n. 6. Pet. Nau. & Less. locis proximè cit. contra Medinam l. c. Arium Pinellum l. 2. C. de rescind. vendit. p. 3. n. 22. Mol. disp. 354. Id tamen fateor, Magistratum, & Assessores iniuste acturos, si eiusmodi decretum, quod ciuibus omnibus æqualiter promulgatum esse conuenit, alicui antè prodant, vel ipsimet eius scientia vtantur, cum reliquorum damno. Diuersa autem ratio est de aliis, qui non sunt ex Magistratu, aut concilio: Nam quibus nulla officij obligatione incumbit impedire, ne ciues occasione publicorum decretorum damnum aliquod patiantur, ij nulla lege institutæ, aut charitatis prohiberi videntur, quominus priuata notitia eiusmodi decreti mox promulgandi vtantur.

Denique ex his defendi potest Quæstor ille, ad quem dominus suus scripsit, iussitque, vt mille frumenti scaphas mox diuenderet; ile probè sciens frumenti pretium breui tempore auctum iri, tanquam venditarum mille scapharum pretium, iuxta eius temporis taxationem misit, videlicet 5000. florenos. Post vnam verò, vel alteram hedomadem, cum frumenti pretium integro floreno in scaphas singulas auctum esset, mille scaphas ex domini sui horreo extractas vendidit, & 1000. floren. lucrum sibi retinuit. Siquidem antea pretio corrente frumentum, quod vendendum erat, ipse emerat, postea verò tanquam suum effectum cariùs distrahxit.

10 Communes porro causas, ob quas rerum pretia augeri, vel minui solent, numerant Gabr. in 4. d. 15. q. 10. in corollariis, Rebellus lib. 9. de contractibus, q. 1. sect. 7. Mol. disp. 347. & seq. Less. cap. 21. dub. 4. I. Penuria mercium, multitudo emptorum, paucitas vendentium auget rerum pretia: Contrà verò, mercium abundantia, emptorum paucitas, vendentium multitudo pretia minuit. Quapropter in transitu viri Principis cum nagno comitatu rerum pretia accrescere solent: In fine autem nundinarum, dilapsis emptoribus, merces viliumuntur; item pestis tempore, & post partam ab hostibus victoriam.

I I. Pecuniæ abundantia efficit, vt rerum pretia crescant; eiusdem inopia, vt decrescant.

I I I. Est modus vendendi: nam merces, quæ sub hasta venduntur, vel in foro scrutario minoris æstimari solent, quàm quæ in propria officina quærentur, & rogantur. Item quæ per partes, ea cariùs distrahuntur, ob maiorem molestiam, minùsque lucrum; quàm quæ in magna quantitate venduntur. Simili ratione ait Less. cap. 21. dub. 6. num. 56. Merces, quæ communiter data fide solutionis ad certum tempus vendi solent, ob talem vendendi modum, pluris venire possunt; tum quia talis venditio excitat copiam, & feruorem emptorū, ex quo pretia augentur: tum quia plerumque Mercatoribus incommodum est tanto tempore solutionem expectare: quæ ratio licet in aliquo interdum cesseret, id per accidens censetur, manente interim communi pretio eiusmodi mercium. Sed & è contrario, ait idem Less. dub. 7. num. 61. Modus vendendi communiter solutione anticipata facit pretium decrescere; quia inducit raritatem emptorum, & multitudinem venditorum. quod etiam docet Molin. disp. 360.

I V. Est singularis affectio aut commoditas, quam venditor ex re vendita habuit, eaque in gratiam emptoris se spoliatur. Debet tamen venditor huius specialis sui incommodi compensationem in pactum deducere: alioquin decipiet emptorem ignorantem, sicuti bene monet Less. num. 27. At verò è contrario specialis commoditas, quam emptor ex re emptæ, seu ob fortunam, seu ob industriam suam, percipere potest, non auget

pretium mercis: quia nemo suam commoditatem emere cogitur, secundum doctrinam S. Tho. q. 77. a. 1. Nau. c. 23. n. 83. Less. c. 21. num. 30.

V. Si emptori commodum non sit emere, sed à venditore rogetur, ob hanc circumstantiam aliquantulum minuitur pretium mercis: sicuti & pretium locationis, si conductori commodum non sit conducere. quæ est doctrina Nau. c. 23. n. 84. Sotilib. 6. q. 3. a. 1. Mol. to. 2. disp. 351.

Exinde tamen nequaquam inferas, quòd præcisè ob necessitatem venditoris, quia rem vendere cogitur, pretium imminuere, vel ob necessitatem emptoris, quia rem emere cogitur, pretium augere licitum sit, nisi liberalis donatio interueniat, quæ tamen in necessitatis casu facilè præsumi non debet. Ita Molin. l. c. & Henricus Gandau. quodlib. 14. q. 14.

## §. II.

## De re vendita, siue merce.

## S V M M A R I V M.

- 11 In dubio censetur venditor suum habere emptori de pretij solutione, ideoque mercis dominium transferre.
- 12 Res in specie emptæ, si etiam ante traditionem absque venditoris culpa pereat, emptoris damnum est: secus, si res indeterminatè, seu in genere emptæ fuit.
- 13 Venditio interdum fit ad numerum, vel mensuram; interdum ad corpus.
- 14 Venditor mercis vitium occultum significare tenetur: alioquin rescindi potest contractus, si dolus causam contrahendi dedit.
- 15 Si merx vitiosa aliqualem usum habet ad eum finem, ob quem emitur, interdum necesse non est vitium occultum manifestare: plerumque tamen de pretio aliquid ob hanc causam remittendum erit.
- 16 Actio quanto minoris, in conscientia foro etiam ultra annispatium durat, ad petendum pretium iustum.
- 17 Peracta venditione partium consensu, fructus omnes pendentes, tum maturi, tum immaturi, ad emptorem spectare debent.
- 18 Peracta venditione, etiam fructus producendi, seu postea exorti ad emptorem spectare debent; etsi pretium solutum non sit.
- 19 Vsure pretij non soluti exigi possunt, si compensatoria sint: secus, si lucratorie.
- 20 Si venditio ita fiat, vt periculum rei vendita, interim donec pretium solatur, ad venditorem pertineat, tunc fructuum assumptionem exigere poterit.

**H**actenus dixi de pretio emptionis ac venditionis: sequitur, vt de merce, siue re vendita, eiusque fructibus agamus.

Assertio I. Dominium mercis, quamuis tradita, (ob peculiarem huius contractus naturam, gentium, ac ciuili iure constitutam) emptori non antè acquiritur, quàm is pretium soluerit, vel cautione pignoris aut fideiussoris satisfecerit, vel venditor alia ratione emptoris fidem secutus fuerit. Ita habetur in §. vendita, Instit. de rerum diuisione. Ratio esse videtur: Quia dum contractus ex parte emptoris nondum completus est, mercedem venditor rem venditam sibi realiter obligatam tenet, in pretij soluendi securitatem. Notat verò Gl. quod in dubio censetur venditor, dum rem venditam emptori tradit, ipsi fidem habere de pretij solutione: ideoque dominium mercis transferre.

Assertio II. Si res emptæ, tanquàm certum indiuiduum, vel determinatum corpus, puta, integer grex ouium, vini dolium, ligni plaustrum, siue aceruus: item hic equus, hæc vacca, ante traditionem sine culpa, vel mora culpabili venditoris pereat, emptoris damno id accidit, §. cum autem, iunct. Gloss. Instit. de empt. & vendit. l. quod saepe, §. si res, ff. de contrahenda empr. l. necessarid, ff. de peric. & commodo rei vendita, l. 1. & seqq. Cod. eodem. Sin autem venditio facta fuerit rei indeterminatæ; tunc refert, vtum omnino absolutè & sine vlla determinatione facta sit, an verò cū ordine ad determina-



tum corpus, vel multitudinem rerum: videlicet si quis emat ex dolio tres vini urnas, ex grege decem oves indeterminatè. Nam in priore casu, quæcunque v. g. oves depereant, nunquam liberabitur venditor, quamdiu alias oves præstare potest. In posteriore autem casu, si totum vini dolium, vel totus ouium grex pereat, contractus dissolvitur, & datum pretium emptori restitui debet.

13 Præterea si venditio facta est ad futuram mensurationem, aut numerationem; quia v. g. in singulas vini amphoras, vel in singulos frumenti modios, certum pretium statutum fuit; periculum ad venditorem spectare debet, donec mensuratum, vel numeratum sit: eo quod venditio antea non omnino absoluta & perfecta censetur; sed quasi sub conditione facta, si dimensio, numeratio, vel ponderatio accesserit. Ita habetur in cit. l. quod sæpe, §. in his, iuncto ver. sed et si ex doliario, & l. 2. Cod. de peric. & commodo rei venditæ. Quod si vinum, mel, ouium grex, vel simile quippiam non ad numerum, mensuram; sed ad corpus, id est, totum simul venditum fuerit; neque actum, vt degustaretur, eius periculum emptor præstare debet. Sed si expressè, vel tacitè actum, vt degustaretur antequam omnino rata siue perfecta venditio esset, periculum ad venditorem spectat. Ita habetur in l. 1. & l. si quis vina, §. si auersione, ff. de periculo & commodo rei venditæ. Verum, si certus terminus mensurationi, aut gustationi præfixus fuerit, vel si venditor coram testibus emptorem monuerit, vt intra certum temporis spatium ad mensurandum, aut gustandum accederet, post culpabilem moram emptoris, periculum ad ipsum spectabit, iuxta cit. l. 2. & l. si quis vina, §. ult. & l. si per emptorem, ff. cod.

Porro venditio ad corpus facta tunc censeri debet, si venditio à corpore cœpit, licet postea addita sit quantitas illius: v. g. vendo tibi dolium vini, quod continet sex amphoras. Quamuis si error in expressa quantitate postea detegatur, qui causam præbuerat, cur maius vel minus pretium constitutum esset, naturalis æquitas postulat, vt pretij inæqualitas corrigatur, sicuti monet Molin. disput. 367. Sin autem venditio cœpit à certa mensura, aut quantitate, v. g. vendo tibi sex amphoras ex hoc dolio, vel decem iugera ex hoc agro, censetur venditio ad mensuram: Idemque dicendum, si venditio à corpore incipiat; tamen pretium non vnicum exprimitur, sed pro vnaquaque mensura: v. g. vendo tibi hoc vini dolium, vnamquamque eius amphoram tribus florenis. Quamquam discrimen hoc est, quod secundum posteriorem contrahendi formam, omnes rei partes seu mensuræ venditæ censeantur; secundum priorem verò formam tantum tot partes seu mensuræ, quot expressæ erant. Vt si ita facta sit venditio: *Ex hoc dolio vendo tibi decem amphoras, vnamquamque tribus florenis*; quod supra decem amphoras in dolio reliquum erit, non censetur venditum. Sin verò ita facta est: *Vendo tibi hoc vini dolium, continens quinquaginta amphoras, vnamquamque tribus florenis*: tamen si plures postea reperiantur, omnes ita venditæ censentur, l. qui fundum, 40. §. qui agrum, ff. de contrah. empt. Et videri potest Couar. in pract. qq. c. 3. n. 5. & seqq. & Legist. in l. si seruum, §. si modus agri, ff. de actionibus empti.

14 Assertio III. Si merx occulto vitio laboret, v. g. pannus adustus sit, ouis morboſa, tignum vitiosum; eiusque rei venditor conscius fuerit, censebitur dolo egisse. Sumitur ex l. 1. Cod. de ædilit. action. & docet S. Th. 2. 2. quæst. 77. a. 2. & 3. S. Ambros. lib. 1. de officiis: *In contrahentibus vitia eorum, que veniunt, prodi inveniuntur: ac nisi intimaueris venditor, quamuis in ius emptoris transferint, doli actione euacuantur.* Quod intellige, si dolus dedit causam contrahendi: quia si emptor rei defectum co-

gnouisset, eam empturus non fuisset. Tunc enim agere potest ad rescissionem contractus, siue ad restituendum pretium, redhibita merce venditori: Insuper, vt omnia detrimenta, (etiam lucri cessantis) quæ ex emptione traxit, ipsi præstentur, iuxta l. Iulianus, ff. de actionibus empti, l. si vina, 2. ver. planè, ff. de periculo & commodo rei venditæ. Ratio est: Quia ad officium venditoris pertinere videtur, mercis naturam & qualitates, sicuti & seruitutes, atque onera, manifestare, quatenus id scire emptoris interest.

Ceterum de vitio per se manifesto emptorem monere necesse non est, sicuti constat ex l. ea quæ, ff. de contrah. empt. l. 1. §. si intelligatur, ff. de ædilit. edict. Idque etiam secundum forum conscientie; modò res pretio iusto vendatur, docet S. Th. q. 77. a. 3. in corp. Sotus lib. 6. q. 3. a. 2. concl. 6. Syl. ver. emptio. q. 19. Nau. c. 23. n. 89. Sa ver. venditio, n. 21. Mol. disp. 353. concl. 7. Nam sibi ipsi emptor imputare debet, si rem vitiosam sciens emit, vel cum scire posset, ac deberet. Veruntamen, si venditor intelligat, emptorem inuincibili ignorantia vitij, alioquin manifesti, laborare, etiam tunc eum admonere tenebitur, sicuti docet Maior in 4. d. 15. q. 40. §. tertio arguitur, Mol. l. c. Pet. Nau. lib. 3. de restit. c. 2. n. 54. & indicat Abb. in c. iniustum. n. ult. de rerum permut.

Sin verò dolus, siue dissimulatio vitij occulti causam emendi non præbuit; quia nihilominus emisit emptor, licet minore pretio; tum non comperit actio ad contractus rescissionem; sed ad restituendam partem pretij, quando minoris res emptæ fuisset, si vitium ignoratum non esset, sicuti constat ex l. Iulianus, §. sed si venditor, ff. de actionibus empti, l. 1. ff. de ædilit. edicto: & videri potest Gl. in l. quod venditor, ff. de dolo, Gl. in cap. cum dilecti, ver. de deceptione, de empt. & vendit. Arius Pinellus in l. 2. Cod. de rescind. vendit. p. 2. c. 2. n. 12.

Deinde, si merx vitiosa aliqualem vsum habeat ad eum finem, cuius gratia emitur, nullumque aliud damnum emptori euenturum sit; tunc necesse non est vitium, etiam occultum, manifestare; v. g. quod calcei ex debili corio facti sint: etiam si probè sciat venditor, emptorem, si vitium cognitum haberet, empturum non fuisse, sicut constat ex l. 1. §. proinde, & seqq. l. ob quæ vitia, & seqq. ff. de ædilit. edicto, & docent S. Th. quod lib. 2. a. 10. Sotus cit. a. 2. conclus. 5. Angel. ver. emptio, §. 8. Maior & Sall. cc. Mol. conclus. 7. §. media, Pet. Nau. n. 59. Nam alioquin magnum fortunæ discrimen mercatores subire debebunt, quādo non nisi meliores merces distrahare poterunt: ipsimet autem omnis generis ac qualitatis emere solent. Debet tamen plerumque mercator in hoc casu mercem minoris vendere, ob eius vitium. Quod singulariter notandum est equorum venditoribus: licet secundum municipales constitutiones, non nisi certa vitia, *die Dauptmangel*, edicere teneantur; si tamen equus venalis alio quocunque vitio laboret, ob quod minùs utilis existat, necessariò remittendum esse de ipsius pretio: alioquin in conscientie foro iniustitia committitur, cum restituendi onere, propter inæqualitatem rei datæ, & rei acceptæ.

Similiratione mercatores iniustitiæ statim damnari non possunt, si mercialienam substantiam, puta tritico secale: vino aquam, ceræ picem admisceant: modò exinde emptoribus nullum damnum inferatur, & merx proportionem pretij, quo venditur, satis idonea sit ad consuetum vsum, qua de re Angelus cit. §. 8. Syl. cit. q. 19. dicto secundo, Gabr. in 4. d. 15. q. 10. a. 3. dub. 1. Conrad. q. 54. & 55. Mol. cit. disp. 353. in fine, Less. c. 21. dub. 11. Lopez p. 2. instruct. c. 42.

Addit Less. num. 83. cum Lopez cit. loco, si admixtio materie secundum se deterioris, eo artificio & industria fiat, vt merx non sit minùs bona, & idonea ad vsum, quàm sine tali admixtione, posse tunc consueti pretio



vendi, & lucrum maius reportari; quippe quod industria esse censetur, & sine damno emptorum percipitur. *Cur enim*, inquit Lessius, *rem suam quis non possit ad eum statum deducere, in quo sunt res aliorum mercatorum, & tum eam vendere eodem pretio, quo illi?* Hæc vera sunt secundum se, ac speculatiue: sed quia hypothesi, quæ ponitur, in praxi rarissima est, ut res per admixtionem materiæ vilioris, deterior non fiat ad aliquem usum, cuius gratia emitur: quamobrem nullus emptor contentus erit tanto pretio emere, ac si merx pura & sincera esset; ideo plerumque iniusta fraus committitur: consequenter talis ars mercatoribus approbanda, aut permittenda facile non est, nisi idcirco pretium minuere velint, vel pondus auctius dare ementibus. Profecto etiam in externo foro tales ut falsarii puniri solent.

In specie autem de Oenopolis ita sentiendum est: I. Si vino aquam admisceant, præsertim in quantitate immodica, plerumque damnum inferunt, & peccant: quia vinum aqua dilutum facilius acefcit, & tamdiu non conseruatur, sicuti docet Rebel. de contract. lib. 9. q. 10.

II. Qui vino valde præstanti aquam infundit ea quantitate, ut admixtio aliter non obsit, quam quod tenuius fiat, is plerumque non peccat: Sed necesse est, ut de pretio secundum proportionem admixtionis remittat. Si enim auriga vendat 10. urnas, quibus una urna aquæ admixta est, is non nisi 9. vini urnas vendit; unam verò aquæ. Neque dicas, vinum meracissimum admixtione aquæ modicæ fieri suauius, & quandoque melius: Respondeo enim, hanc artem admiscendi cuius obuiam, & notam esse etiam emptori: quare ea res fieri non potest sine emptoris damno.

Limita cum Rebello l. c. Si ad vini meliorem concoctionem siue confectionem utile sit modicum aquæ infundere; non erit necesse ideo de pretio remittere. Simile est, si venditor iustum vini pretium non possit consequi, nisi aquam infundat; (modò nullum aliud damnum emptoribus accidat) quod accidere potest primò; Si emptores abhorreant à vino ob nimiam eius meracitatem, ut nisi aqua aliquantulum temperetur, eius præstantia & valor non appareat emptoribus. Secundò, Si pretium vini à Magistratu iniuste taxetur, ut ænopolæ damnum pati debeant, nisi aquam admisceant. Qua ratione etiam pittores v. g. excusantur, si panem minoris ponderis conficiant, quia alioquin iustum pretium secundum Magistratus taxationem consequi non possunt, sicuti notauit. Rebel. l. c.

Denique si venditor quoque probabiliter mercis occultum vitium ignorauit, non tenetur præstare damna, quæ exinde emptor accepit, puta quia pecus morbosum gregem infecit, ædes tigni vitio corruerunt, &c. Insuper venditio valida est: sed competit emptori actio quantò minoris emisisset, si idita esse sciuisset, l. Iulianus, in princ. ff. de actionibus empti, & docet S. Th. cit. a. 2. Abb. in cit. c. iniustum, n. 2. & in c. quia plerique, n. 30. de immunit. Ecclesiæ, Couar. reg. possessor. p. 2. §. 11. n. 5. ver. septimò, Medina de rellit. q. 34. Syl. Nau. ll. cc. Mol. concl. 3.

16 Hoc nota, licet actio ista *Quantò minoris*, in foro exteriore, duntaxat intra anni spatium post diem scientiæ, ab emptore institui possit; illa autem, quæ dicitur redhibitoria, tendens ad rescissionem contractus, solum intra anni dimidium, sicuti constat ex l. sciendum tamen, §. vlt. l. si tamen, §. nocebit, & l. cum sex menses, ff. de ædil. edicto, & l. 2. C. de ædil. actionibus. at tamen in conscientie foro, etiam post transactum illud tempus, venditor obligatus manet ad pretium, & damna restituenda, si dolus causam emendi præbuit; vel saltem ad pretium minuendum, si dolus causam non præbuit emendi mercem vitiosam, sicuti notauit Couar. l. c. Mol. disp. 353. concl. 2.

Assertio IV. Peracta venditione partium consensu, si nihil aliud conuentum fuerit, fructus omnes pendentes, tam maturi, quam immaturi ad emptorem spectant. Ita habetur in l. Iulianus, §. si fructibus, & §. si quid seruo, ff. de actionib. empti, l. fructus, l. post perfectum, C. eod. & ex communi docet Couar. 1. resol. c. 15. n. 2. Anton. Gomez 2. resol. c. 2. n. 11. Mol. disp. 368. concl. vlt. Ratio est: Quia fructus pendentes censentur pars fundi, l. fructus, ff. de rei venditione. Ergo emptor fundo censetur etiam empti fructus in eo pendentes. Pendentes dico: nam si ante venditionem perfectam percepti sint, ad venditorem spectant, uti habetur in l. 2. §. fructus, Cod. eod. His simili ratione addendum, quod vendito equo, censetur etiam vendita necessaria ornamenta, puta ephippium & frænum, sicuti colligitur ex l. ædiles, 2. §. vendendi, ff. de ædil. edicto. Vendita domo, etiam seræ, clauis, & similia (*vtas negligassit*) emptori cedunt, de quibus l. fundi, ff. de actionibus empti.

Corollarium I. Ager, & vinea pluris æstimantur ante messem, vel vindemiam, quam posteaquam fructus collecti sunt, sicuti notauit Molina cit. disp. in princ.

Corollarium II. Si vinea v. g. emptæ sit ante vindemiam; traditio autem facta postea cum fructus à venditore percepti sunt; detrahendum est de pretio constituto, quanti fructus, tempore contractus pendentes æstimabantur, sicut notauit idem Molina in fine eiusdem disput.

Corollarium III. Si domus vendatur, quæ alteri locata est, pensio pertinet ad venditorem, proportionem temporis elapsi usque ad celebrationem contractus: quæ autem ratione temporis consequentis debetur pensio, emptori tribuenda est, sicut notat Gl. in cit. l. Iulianus §. si fructibus, ver. ei cedent. Pensiones verò ex re frugifera, puta agro, vinea, diuidendæ sunt secundum rationem, ac proportionem fructuum, quatenus ij vel ad venditorem, vel ad emptorem iure spectarent, si fundus elocatus non esset, sicuti docet Couar. 1. resol. c. 15. n. 3. & 4. Mol. cit. disp. 368. §. tradit verò. Cuius ratio est, quia pensio soluitur ratione fructuum: ergo iure illi debetur, cui aliàs fructus rei venditæ deberentur.

Hactenus de fructibus dictum est, venditionis tempore enatis, & extantibus; de aliis autem, qui post venditionem nascuntur, maior difficultas est. Nam Iureconsulti in l. Iulianus, §. ex vendito, ff. de actionibus empti, l. vlt. ff. de periculo, & commodo rei venditæ, & l. curabit, C. de actionibus empti, definiunt; Eiusmodi fructus, etiam post rei venditæ traditionem, ad venditorem spectare, donec pretium ab emptore solutum sit; vel ob præstitam cautionem, aliâque rationem venditor emptoris fidem secutus sit. Ratio huius constitutionis est, quia inter contrahentes debet esse æqualitas, neque vnus eorum tenetur implere contractum, nisi alter vicissim impleat, iuxta l. bona fides, ff. de actionibus empti. Emptor autem, ut supponimus, contractum nondum impleuit, neque præstitit, quod ex parte sua debebat, dominium, usum, & commoditatem pretij (quatenus hominis industriae subiaceret) in venditorem transferendo. Ergo neque venditor dominium, usum, & commoditatem rei venditæ emptori cedere tenetur: sed eousque sibi retinere potest, donec emptor ipsi de pretio satisfaciât: vel si usum fructum in emptorem antè transtulit, huius ipsius rei compensationem iure exiger. Ita hanc civilem constitutionem explicant, & defendunt Legistæ in dictam l. curabit, Ioannes Bapt. Lupus tract. de usuris, §. 7. Couar. 3. resol. cap. 4. Angelus ver. emptio, n. 5. Binsfeldius. c. in ciuitate, q. 6. de usuris. Ioach. Mynsing. cent. 4. obser. 53. Mol. to. 1. disp. 368. Sa ver. venditio, n. 12. Confirmatur ab aliquibus hoc argumento: Res quæuis domino suo fructificat: Venditor autem rei venditæ dominus



manet, quod pretium illi solutum, vel pro soluto habitum sit, sicuti supra dictum est. Ergo interim res vendita ipsi fructificare debet.

Ex prioriautem fundamento colligit Couar. cit. cap. 4. corol. 5. & post eum Mol. l. c. Binsfeld. conclus. 7. Iustum esse hunc contractum: Si venditor rei venditæ dominium in emptorem transferat per traditionem adiecto pacto, ut dum moram traxerit soluendi pretium, vel partem pretij, restituat æstimationem perceptorum fructuum, secundum proportionem pretij non persoluti, deductis tamen expensis. Cum enim fructus, quamdiu pretium non persolvitur, ad venditorem spectare debeant, ideo iuste de eorum restitutione pacisci potest.

18 Contraria tamen sententia, leges has civiles ita intellectas, esse iniquas, & usurarias, est vera, & communior apud Theologos Syl. ver. usura, 2. q. 11. Rosellam eodem ver. 1. §. 47. Armillam ver. usura, n. 15. Pet. Nau. lib. 3. c. 2. n. 148. Lopez lib. 1. de contract. c. 36. ad 1. Lessium lib. 2. c. 21. dub. 13. n. 109. Rebellum lib. 9. de contract. q. 16. §. 1. Probatur, contraria constituto fundamento; Videlicet post venditionem absoluto partium consensu peractam, fructus omnes, etiam producendos, iure emptionis ad emptorem pertinere. Nam fructus naturaliter consequuntur substantiam rei fructigeræ; siue, ut aliis verbis dicam, naturaliter insunt in substantia & potentia rei fructigeræ. Ergo cum emptor iusto pretio rei fructigeræ substantiam emit, simul etiam emit ius atque potentiam fructuum. Confirmatur: Equum est, ut ad eundem spectet commodum, fructus, & accessio rei, ad quem eiusdem periculum spectat: Periculum autem rei in specie venditæ, licet nondum traditæ, ad emptorem pertinet; ut si absque venditoris culpa pereat, vel deterior fiat, nihilominus integrum pretium emptor soluere cogatur, ut supra dictum fuit. Ergo etiam rei venditæ commodum, fructus, & accessionem ad emptorem spectare oportet.

19 Corollarium. Cum venditor ab emptore rei venditæ fructus percipiente, usuras non soluti pretij exigit, distinguendum est: Vel sunt compensatorie lucri cessantis; quia v.g. venditor pecunias negotiationi exposuisset, si tempestivè solutio facta fuisset. tunc omnes Doctores consentiunt, esse hunc iustum exigendi titulum: Sicut etiam è contratio, cum per venditorem stat, quo minus rem venditam tradat, omnis utilitas emptoris in æstimationem venit, l. si sterilis, ff. de actionibus empti. Quod verò ibidem dicitur, & habetur etiam in l. vlt. ff. de peric. & com. rei venditæ: Cum interesse petitur propter moram tradendi pretium, vel tradendi mercem, haberi tantum rationem interesse intrinseci, non item extrinseci: puta si emptor, vel venditor negotiator fuit; & iste quidem soluto pretio mercati, & ex mercibus lucrum capere; ille verò mercem tempestivè traditam diuendere, & lucrum capere potuisset, id aliqui volunt (inter quos Accursius ad cit. l. si sterilis, §. cum per venditorem, ver. æstimandum) nouo iure Cod. de sententiis, quæ pro eo quod interest proferantur, correctum esse. Certè in conscientie foro probabilius est, omne interesse tam extrinsecum, quam intrinsecum præstandum esse, ob culpabilem moram emptoris, aut venditoris, sicuti docet Rebellus loco supra cit. conclus. 3. in fine; Lessius lib. 2. cap. 21. dub. 13. num. 102. contra Molin. cit. disput. 368. conclus. 4. prope finem: Et probatur ex generali regula Doctorum; quod quicunque moralis causa alicui damni existit, illud resarcire tenetur.

Vel usuræ, quas venditor ab emptore ob dilatam pretij solutionem exigit, lucrativæ sunt, sicuti aperte indicat Vlpianus in cit. l. Julianus, §. ex vendito: Cum re vendita emptor fruatur, aequissimum est, cum usuras pretij dependere. Sensus est, quod, sicuti post venditionem mutuo

consensu perfectam, utilitas rei venditæ ad emptorem spectat; ita etiam utilitas, siue usura pecuniæ venditori præstanda sit. Et has usuras supra dixi iniquas esse, tam diuino, quam canonico iure prohibitas.

Quare respondetur ad primum fundamentum contrariæ sententiæ; Discrimen manifestum esse inter mercem fructiferam, v.g. agrum, & pecuniæ pretium; quod ager per se, & suapte natura fructus & utilitatem proferat, quæ in æstimationem venire possunt: Pecunia autem secundum se sterilis sit, neque ullam utilitatem & fructum progignat, nisi interueniente industria negotiantis. Quare si venditor eam negotiaturus non fuisset, ut supponimus, non potest usuras exigere: Sed etsi emptor, ea pecunia, quam venditori soluere debuisset, suo nomine negotiatus sit, & lucrum cepit, ad ipsummet & negotiatorem spectare equum est, sicuti & damnum, si inde aliquod accepisset.

Ad secundum fundamentum respondetur; sicuti regula illa, *Res quævis domino suo perit*, vniuersim vera non est, uti cernere licet in re donata, legata, vendita, nondumque tradita; Ita neque illa regula vniuersim vera est, *Res quævis domino suo fructificat*; sed potius ita dicere oportet: Res quævis ei perit, eique fructificat, cui in specie (siue, ut Dialectici loquuntur, in indiuiduo) debita est.

Denique verò diligenter hic notandum est; si venditor ita contractum celebrat, ut periculum rei venditæ, ante pretij solutionem, ad ipsummet pertineat: tunc fructuum æstimationem iure exacturum. Quod accidet primò: si venditio celebrata fuerit non absolutè, sed sub conditione, ut non antè rata esset, quam pretium constitutum numeraretur. Nam hoc casu tum periculum, tum commodum, & fructus rei venditæ ad venditorem spectant, donec pretium numeratum sit, sicuti notauit P. Nau. lib. 3. c. 2. n. 156.

Secundò: Si venditio fundifecta fuerit, adiecto pacto, ut emptor pro pretio, vel parte pretij non soluta, annuam pensionem soluat, ratione census super eodem fundo constituti, sicut docet Binsfeldius loc. cit. post octauam conclus. contra Nauarrum lib. 3. consil. 14. de empt. & vendit. edit. 2.

Tertiò: Si contractus ita instituitur: Vineæ, aut ager, quem pretio constituto emendum offero, interea, donec pretium solueris, pro pensione annua conductus sit, periculo interitus ad me pertinente, sicut ex communi docet Azor t. 3. lib. 8. cap. 13. Nauarrus cap. 17. num. 248. Molin. t. 2. disput. 367. qui aiunt, institui etiam posse emptionem fundi, cum pacto redimendi ad arbitrium venditoris: ita ut dum non redimitur, ipsi locus sit pro pensione annua: dummodo periculum rei venditæ emptori, tanquam domino: non venditori incumbat: quia alioquin esset usuraria mutuatatio cum hypotheca: licet tegmine venditionis, & locationis contractuum tegatur.

Iste autem contractus omnino dammandus esse videtur: Vendo, tradoque tibi vineam, agrum, ea lege, ut pretium apud te sit in deposito, quoad æqualis bonitatis vinea mihi emenda offeratur: interea soluas mihi annuam pensionem, proportionem perceptorum fructuum. Tamen si enim hunc contractum approbet Molin. cit. disput. 368. ante 4. conclus. rectius tamen ab aliis improbat, Lessius cit. dub. 13. Azor loc. cit. Rebellon. 15. Ratio patet ex dictis: Cum enim pensio à venditore exigere non possit ratione fructuum, quippe qui emptionis iure ad emptorem spectant; sequitur, eam exigere ob dilatam pretij solutionem, quod usurarium esse constat ex c. in ciuitate, c. consuluit, de usuris.



## §. III.

De venditione rei alienæ, eiusque  
euictione.

## S V M M A R I V M.

- 21 *Venditor emptori obligatus est de mercis euictione. Si res aliena emptori ignoranti vendita fuerit, valet contractus, & dominium pretij venditori acquiritur.*  
 22 *Si fur alienis numis negotietur, lucrum ipsi acquiritur.*  
 23 *Qui a fure emente pecunias furtivas bona fide accepit, easque cum proprijs commiscuit, ad nullam restitutionem domino pecuniarum obligatur.*  
 24 *Bona fidei emptor, si postea intelligat rem furtivam esse, domino suo restituere debet, non furi.*  
 25 *Qui rem furtivam, quam a fure emit, alteri bona fide vendit, postea comparanti domino, restituere nihil debet: secus, si res furtiva illi donata erat.*  
 26 *Licetum est res furtivas modico pretio redimere, ea intentione, ut dominis suis restituantur.*  
 27 *Qui scit rem alienam esse, vendere eam non debet: si vero dubitat, post diligentem inquisitionem, vendere eam non prohibetur, monito prius emptore de periculo euictionis.*

21 **V**enditor ex ipsius contractus natura emptori obligatus est de mercis euictione, sicuti constat ex l. 1. l. venditor, & toto tit. ff. de euict. l. non dubitatur, & toto tit. C. eod. Sensus est: Si aliquis rem emptam ab emptore, actione reali intentata, euincat & auferat; quia videlicet demonstrat se eius esse dominum, aut sibi obligatam esse; tunc venditor emptori pretium restituere cogitur: Insuper quanti eius interest rem euictam non esse; dummodo tempore contractus ignoraret emptor rem alienam esse; & lite ipsi postea mota, denuntiaret venditori, ut se defendat. Ita habetur in l. si controuersia, l. si cum quaestio, l. si fundum C. eod. c. ult. de empt. & vendit. idque etiam in alijs contractibus onerosis locum habet, v.g. in permutatione, secundum l. si permutationis, C. de euictionibus, & l. 1. C. de rerum permutatione. Item in hereditatis diuisione, l. si familiae, C. familiae heriscundæ. Vel si quid in dotem promissum, ac datum sit, l. 1. C. de iure dotium. Vel si debitor creditori aliquid in solutum, id est, pro debiti solutione dederat, quod postea euincatur, l. libera, C. de sententijs & interlocutionibus, l. si prædium, C. de euiction. Debet autem emptor v.g. denuntiare venditori litem motam esse, ut veniat, eamque prosequatur, l. emptor. C. de euict. Vide plura apud Gomez 2. resol. c. 2. n. 39. & sequent. Mol. disp. 380.

Est autem nihilominus validus contractus, si res aliena emptori ignoranti vendita fuerit, sicuti constat ex l. rem alienam, ff. de contrah. empt. Et quamvis tunc rei venditæ dominium non transferatur in emptorem, sicuti constat ex l. traditio, ff. de acquir. rerum dominio; pretium tamen acquiritur venditori, l. ex empto, ff. de actionib. empti. & l. si in emptione, §. item si, ff. de contrah. empt. Tamen si malæ fidei venditor, ac fur sit, sicuti constat ex l. qui vas, §. ult. ff. de furtis: *Nummus, qui redactus est ex re furtiva, non est furtivus*: consequenter, si fur pretio illo ex venditione rei furtivæ accepto emat postea v.g. panem, tam pistor comparabit dominium pecuniæ, quam fur dominium panis, sicuti rectè infert Mol. disp. 327. & consentit doctrina S. Thom. 2. 2. q. 78. a. 3. ad 3. quod bona immobilia, emptæ pecuniâ usurariâ emptori usurario acquiruntur. Cum verò ibi addit, obligata nihilominus esse, sicuti & alia bona usurarij, pro restitutione usuratum; id propriè intelligi non debet; quasi hypothecaria, aut simili reali obligatione deuincta sint; cum id nullo iure ostendi possit, si-

## IIII. CAP. XVII. §. III.

cut contra Gl. in c. tua, de usuris, & alios Canonistas antiquos ex communiore doctrina ostendit Abbas n. 3. Molin. tom. 2. disput. 329. sed intelligi debet quoad effectum: quia bona usurarij vendi debent, ut ex eorum pretio restitutio fiat, sicuti ipsemet S. Thom. explicat.

Obijcies. Videri aliquam inæqualitatem, si emptor rei alienæ dominium non acquirat, & tamen pretij dominium in venditorem transferat. Respon. non esse inæqualitatem: quandoquidem pro eo, quod rei alienæ venditor pretij dominium acquirit, ipse vicissim emptori de euictione obligatus manet, ut supra dictum, & significatur in citata l. ex empto: *Si dominus fuit venditor, facit & emptorem dominum: si non fuit, euictionis nomine venditor obligatur.*

Porro simili ratione, qui alienis numis aliquid mercatur, mercis dominium acquirit, sicut habetur expresse in l. 1. & l. penult. C. Si quis alteri, vel sibi, &c. l. si ex ea pecunia, si C. de rei vindicat. Traditi tamen nummi venditori non acquiruntur: sed emptor de eorum euictione tenebitur. Excipe. Quod venditor alienorum numerorum dominium comparat, si cum proprijs ita miscuerit, ut discerni non possint, sicuti habetur in l. si alieni, ff. de solut. & annotauit Syl. ver. emptio. q. 22. Medina q. 10. de rescit. §. notanter, Pet. Nauar. lib. 4. c. 1. n. 6.

Exinde varij casus resolvuntur: I. Si fur, vel similis iniustus possessor, alienis pecunijs negotietur ac lucretur, totum lucrum ad ipsum pertinet: cum non sit fructus pecuniæ, quippe secundum se sterilis, & infructiferæ: sed solius industriæ. Ipse autem fur personaliter obligatus manet, tum ei a quo abstulit, ad damnum omne, ac lucrum cessans resarciendum; tum etiam creditoribus, aut campforibus, si pecuniæ ab ipsis euincantur. Hæc est communis doctrina S. Thom. 2. 2. quaest. 78. a. 3. Adr. de restit. vbi de usura, in 3. dub. Rich. in 4. d. 15. a. 5. q. 6. Couar. 3. resol. c. 3. n. 6. Mol. tom. 2. disp. 327. concl. 2. & dixi supra tr. 2. c. 3. n. 3.

Casus II. Aliquis ludendo falsis aleis pecunijs lucratus est, earumque partem aliquam socio suo donauit; quamvis scienti, tamen non cooperanti ad fraudem committendam: rectè dici potest, socium ad nullam restitutionem obligari, si lusor ille pecunias ludo iniquo acceptas cum proprijs miscuerat. Ita docet Ioan. Medina loco cit. Quid autem dicendum sit, si donator tali donatione impotens fiat ad restituendum, dicam infra hoc cap. n. 29. ver. porro.

Casus III. Fur quidam aureis 100. furtivis equum à Sempronio emit, bona fide vendente, statimque au fugit: postea comparat dominus, & pretium repetit à Sempronio, nunquid restituere ei debet? Respondetur, Restitui debere, si centum aurei furtivi in specie extant: si autem consumpti sunt, vel cum proprijs numis Sempronij commixti, ita ut discerni non possint, ad nullam restitutionem obligatur Sempronius: Non enim ratione iniustæ acceptionis, vel absorptionis; cum bona fide egerit, ut ponimus: Neque ratione rei acceptæ, possessæ, cum alienos numos non possideat, posteaquam eos vel consumpsit, vel cum proprijs miscendo, eorum dominium acquisiuit: neque etiam inde locupletior factus sit: quandoquidem pretio iusto equum vendiderat. Ita docet Medina q. 10. de restit. Sanch. lib. 2. moral. c. 23. n. 15. Pet. Nau. lib. 3. c. 4. d. 216. & lib. 4. c. 1. n. 7. Saitus lib. 10. clavis regie, tr. 2. c. 7. n. 13. Vasquez de restit. c. 9. §. 2. dub. ult.

Contrarium tamen docuit Lessius c. 20. dub. 1. n. 157. argum. l. Marcellus, §. Pomponius, ff. de rei vendic. & §. si plurorum, Instit. de rerum diuis. quibus loca habetur, si duorum dominorum materiæ confusæ fuerint, ita ut discerni, vel separari nequeant, utrique vindicationem pro parte sua competere. Sed respondet deo cum



Gl. in cit. l. si alieni; Esse peculiariter statutum de nummis alienis, ut eorum dominium acquiratur commixtione cum propriis eiusdem generis: præsertim si bona fide commixti sint. Ratio esse videtur, quia nummi siue pecuniæ ex propria institutione transeunt de manu vnius possessoris ad manum alterius: quare nemo ferme securus foret, vtrum suarum pecuniarum dominium haberet, & non aliqua furtiua, adeoque alienæ essent, nisi iura statuissent, ut earum dominium per commixtionem cum aliis acquireretur; atque actio tunc personalis contra furem duntaxat competere. Quod etiam confirmatur ex l. singularia, ff. de rebus creditis, vbi dicitur, singularia quædam circa pecuniam recepta esse.

24 Casus IV. Titius à fure bona fide emit equum, quem postea intelligit esse Caij: sed ita res comparata est, ut vel Titius iacturam prætij facere debeat, si equum restituat Caio (ponimus enim furem statim aufugiturum esse) vel Caius iacturam equi, si Titius, rescisso contractu, pretium à fure repetat, reddito ipsi equo. Respondet, & dico I. cum Maiore in 4. d. 15. q. 26. prope finem, Medina q. 10. de restitut. Soto lib. 4. de iust. q. 7. a. 2. Cou. reg. peccatum, p. 3. in princ. n. 3. Bart. Medinalib. 1. instruct. c. 14. §. 30. Mol. tr. 2. to. 3. poster. disp. 722. Azor t. 3. lib. 4. c. 2. Magis videri, quod contractus iure rescindi non possit; sed domino res sua restituenda sit. Statuamus enim hoc casu dominum coram adefse, & rem suam vindicare, quod iure potest, sicut constat ex l. mater, l. aduersus, C. de rei vindicat. profecto iniuriam infert Titius, si furi, & non repetenti domino restituat: Perinde autem esse videtur, siue dominus rem suam repetat, siue ob facti ignorantiam non repetat: quia ignorantia ius ipsi suum non adimit. Deinde ponamus, Titium rem alienam publico loco inuentam secum tulisse, quam postea intelligat esse Caij: compareat postea debitor Titij, dicatque, se debito non satisfacturum, sed aufugiturum, nisi rem Caij restituat in eum locum, vbi inuenerat; ut videlicet ipsemet auferre possit: hoc in casu nemo dicet Titium rem inuentam reponere posse, proprii damni vitandi causa; cooperaretur enim furto, & Caio rei domino damnum actione inferret. Eadem verò est ratio in proposito illo casu, ut animaduertenti patebit.

Interim verò habet emptor actionem contra furem de rei euictione, quam si ob illius improbitatem vtiliter persequi non potest, incurrit, vel infortunio suo adscribat, & non in alterius damnum retorqueat.

Dico II. Cum sententia contraria, tradita à Gabr. in 4. d. 15. q. 3. a. 3. dub. 5. Syl. ver. restit. 3. q. 7. Nauar. c. 17. num. 9. man. P. Nauar. lib. 3. cap. 2. num. 196. Vasq. de restit. c. 9. §. 2. dub. 2. Sairo lib. 10. tract. 2. c. 2. n. 16. Less. lib. 2. c. 14. dub. 3. Licitum esse in hoc casu à fure pretium repetere, restituto ipsi equo, ob Doctorum auctoritatem, probabilis sit, ideo qui eam bona fide secutus fuit, in conscientia foro obligandus non est ad restitutionem domino faciendam: cum neque ratione rei acceptæ teneatur (quia rem furtiuam non possidet, neque inde locupletior factus est) neque ratione iniustæ acceptionis; cum probabili Doctorum sententiæ se conformarit.

Dico III. Cum Molinal. c. Hoc certius est, si fur sua sponte restituto pretio, mercem furtiuam recipiat, emptorem permittere posse, proprii incommodi declinandi causa.

25 Casus V. Titius equum, quem à fure emerat, bona fide vendidit Sempronio: nunc verò Caius comparat, demonstrans se equi dominum esse. Resp. cum Syl. ver. restit. 3. q. 7. Med. cit. q. 10. concl. 2. Nau. c. 17. u. 8. Rebel. lib. 9. q. 18. l. 1. Sanch lib. 2. moral. c. 23. u. 18. Lopez p. 1. instruct. c. 95. contra Sotum, & Azor h. cc. Pet. Nau. lib.

3. c. 4. n. 206. Sairum cit. c. 2. dub. 1. n. 11. Titium in hoc casu ad nullam restitutionem Caio obligari: sed soli Sempronio ad pretium restituendum, si Caius ab eo equum euincat. Prior pars probatur: Quia per illam rei alienæ venditionem pretij sibi dati ius atque dominium acquisiuit: neque exinde locupletior factus est; cum equum pretio iusto vendiderit.

Ceterum si Titius equum furtiuum ex titulo lucrativo donationis accepit, & postea alteri vendidit, obligatus est ad restituendum pretium Caio, equi domino, si is equum iure vindicationis ab emptore recuperare nequeat, sicuti docet Nau. l. c. Couar. reg. peccatum, p. 3. n. 3. Less. cit. cap. 14. dub. 1. n. 5. Eademque ratio est secundum multos DD. apud Nau. c. 17. n. 8. Sanchez n. 28. Less. cit. c. 21. n. 134. Si Titius rem alienam à fure bona fide emptam maiore deinde pretio iusto vendidit, quod teneatur restituere domino, quatenus locupletior factus est, argum. l. si. & rem, ff. de petit. hæred. Sed contrarium rectius docet Mol. tr. 2. tom. 3. poster. disp. 721. propterea quod illud maioris venditionis lucrum fortunæ, aut industriæ esse censetur. Ad legem cit. resp. cum Gl. ibid. ver. quia potest; Id esse speciale in distractione hæreditatis, seu iuris vniuersalis, ut pretium succedat loco rei: secus autem se res habet in particularibus contractibus, sicuti docent DD. in l. mater, C. de rei vindicat. Posterior pars supra datæ respons. ex dictis constat, quia venditor emptori se obligat ad periculum euictionis præstandum. Vide Rebellum p. 1. lib. 2. q. 3.

Porro, qui sciens rem alienam vel furtiuam emit, malæ fidei possessor sit, ac veluti particeps furti, teste S. Thom. 2. 2. q. 62. a. 7. Medina q. 10. de restit. Couar. l. c. n. 2. Neque excusat, etsi empturus intelligat, rem furtiuam in domini sui potestatem nunquam reuenturam esse. Nam etiam tunc emere nefas est, animo si biretendi: Fas tamen est, modico pretio redimere, ut vel ipsi domino, vel si id fieri non possit, pro eius salute pauperibus restituatur; detracto inde pretio, ob rem domini vtiliter gestam, sicuti docet Maior cit. d. 15. q. 26. ad finem, Caiet. to. 1. opusc. tract. 31. resp. vlt. Rebel. lib. 9. q. 18. l. 1. Syl. ver. restit. 3. q. 7. Couar. reg. peccatum, p. 3. princip. n. 5. Vasquez de restit. c. 9. §. 2. dub. vlt. in fine. Quin etiam concessum est, res sacras iusto pretio emere à raptoribus, ut eodem pretio recuperato, Ecclesiis restituantur, sicuti notant DD. cc.

Præterea, qui rem alienam seu furtiuam emit, & postea scienter alteri vendit, is etiam rei domino iniuriam infert, eidemque pretium, vel potius, quod ipse interest, restituere tenetur; si ille ab emptore rem suam recuperare non possit, sicuti ex communi docet Less. lib. 2. c. 21. dub. 17. n. 135. Quod si tamen venditor rem alienam non potuit domino suo restituere, & per venditionem non reddidit eam recuperatu difficiliorem, non videtur domino ad restitutionem obligari; nisi quatenus ex venditione factus est ditior. Quia neque tenetur ratione rei acceptæ; cum nihil possideat, quod ad dominum pertinet: Neque ratione iniustæ acceptionis; cum ipse domino eam non eripuerit; neque causa, sit cur ipsi restitui non possit.

Hac ratione, subiicit Lessius, multi in Anglia, & Hollandia, qui bona Ecclesiastica immobilia, ab aliis emptis, alijs postea vendiderunt, excusari possunt à restitutione; Per hanc enim venditionem nihil damni Ecclesiæ, cui illa bona hoc statu rerum restitui non possunt, intulerunt. Si tamen ex fructibus, aut venditione facti sunt locupletiores, eatenus tenentur, quia fructus sunt Ecclesiæ, hoc ipso, quod in re Ecclesiæ nascuntur. Et paulo post: Neque etiam hi tenentur emptoribus, qui ab ipsis ea bona emerunt: quia etsi contractus fuerit irritus, & consequenter non fuerit translatus dominus in pretij: tamen quia venditor illud volente emptore accepit, & retinet: atque emptor nolles dissolvere contractum, & restituere emptum, non tenetur illi.



*venditor pretium restituere, sed potest retinere loco rei vendita.* Hæc Lessius non improbabiler: Modò interim fateatur primò, malè agere venditorem, cum rem Ecclesiæ v.g. vendit, ad quam nullum ius habet: secundò, talem venditorem obligatum esse ad fructus Ecclesiæ restituendos, quos futuro tempore percipere, & Ecclesiæ restituere debuisset, nisi rem alienasset; si ea alienatione causam dedit, cur Ecclesia à nouo iniquo possessore recipere non possit.

Quòd si verò aliquis, post sufficientem inquisitionem, dubitet, num res à se bona fide possessa, aliena sit, & restitutioni obnoxia; iure vendere potest, admonito tamen emptore, de euictionis periculo: & iste iure emere potest, paratus tamen restituere, si dominus euicerit. Sin autem res interea absumpta fuerit, neuter plus restituere cogitur, quàm inde locupletior factus est, sicut docet Medina cit. q. 10. §. dico secundò, Couar. reg. peccatum. p. 3. in princ. n. 4. Mol. disp. 721.

## §. IV.

## De merce duobus in solidum venditâ.

## S V M M A R I V M.

28. Si res duobus vendita, uni quamuis posteriori tradita sit, dominium huic acquiritur. Sed excipiuntur Ecclesiæ, & ciuitates: quibus per solam conventionem, absque traditione, dominium rei comparatur.

29. Quæ in fraudem alienata sunt titulo gratuito, à venditoribus intra annum repeti possunt, et si donatarius fraudis ignarus fuit: Sin vero titulo oneroso, rescindi non potest, si alienatio facta fuerat ignorant.

30. Si donatarius probe sciat, donationem fieri cum iniusto damno creditorum, videtur in conscientia obligatus ad restituendum, tamen si non repetatur.

28. **S**I res duobus diuerso tempore in solidum vendita fuit, & neutri tradita; prior emptor præfertur posteriori, secundum iuris reg. 54. in 6. *Qui prior est tempore, potior est iure.* Si autem alteri, licet posteriori, per traditionem & pretij solutionem dominium acquisitum sit, præferendus est priori emptori, sicut habetur in l. quotiens, C. de rei vindicatione: & obligabitur tunc venditor priori emptori ad interesse, l. qui tibi, C. de hæredit. vel act. vendita, l. qui ancillam, C. de action. empti.

Habetque hæc regula etiam locum in aliis conventionibus; puta in permutatione, donatione, ut donatarius v.g. cui res tradita, adeoque dominium comparatum est, priori donatario, cui tradita non fuit, præferatur. Imò aliqui de locationis quoque contractu ita sentiunt, quòd posterior conductor, cui res tradita est, iure detentionis defendere se possit contra priorem conductorem, sicuti videre est apud Couar. 2. resol. c. 19. n. 8.

Verum dicta regula aliquas exceptiones patitur: I. Si res primò Ecclesiæ, vel ciuitati vendita fuerit, sed non tradita, postea alteri alicui vendita & tradita; præferenda est Ecclesia, vel ciuitas, sicuti ex communi docet idem Couar. n. 2. Less. c. 21. dub. 19. Mol. to. 2. disp. 369. Ratio est: Quia Ecclesiæ, loca pia, & ciuitas priuilegium habent, ut ipsis per legatum, donationem, venditionem mutuo consensu perfectam, dominium absque rei traditione acquiritur, l. ult. C. de sacrosanctis Ecclesiis. Dubitant verò DD. an idem sentiendum de donatione, aut venditione facta à Principe? Plerique affirmant apud Couar. cit. c. 19. n. 3. Mol. to. 1. tr. 2. disp. 3. Sed alij apud eundem Couar. probabilius negant: cum tale priuilegium seu exceptio à communi iure, nusquam repèriatur. Id fateor, semper præsumendum esse, præ-

sertim in donationibus factis à Principe, contra priorem concessionem absolutam; eas obtentas fuisse per obreptionem, aut propter obliuionem Principis; adeoque priorem donationem præferendam esse, sicuti docet Gaill. lib. 2. obseruat. 55.

II. Si primo emptori res vendita in contractus securitatem nomine hypothecæ subiecta, adeoque ius in re acquisitum fuerit, præferendus erit posteriori emptori, etiam si huic traditio facta sit, teste Couar. n. 7. Mol. disp. 369. obseruando sexto, & colligunt ex l. si creditor, §. ult. ff. de distractione pignorum.

III. Si posterior emptor, cui res tradita fuit, quique 29 pretium soluit, antecedentis venditionis conscius erat, tunc primus emptor ab ipso, tanquam rem in fraudem suam alienatam, intra annum à die scientiæ numerandum, reuocare & euincere potest, sicuti docet Baldus in Rubr. Cod. quæ in fraudem creditorum, Couar. cit. c. 19. n. 5. Mol. to. 2. disp. 328. prope finem, & disp. 369. obser. septima. Lessius n. 142. Quòd si res vni vendita, postea alteri ex titulo lucratiuo donationis, &c. quamuis ignorant, & bona fide accipienti, tradita sit, nihilo minus ab eo intra annum euinci poterit, tanquam in fraudem suam alienata; modò res extet: nam si consumpta fuit, non ampliùs obligatur donatarius, quàm inde locupletior factus est, sicuti colligitur ex l. qui autem, §. simili modo, ff. quæ in fraudem, &c. & l. penult. C. eod. & docent Lessius, Mol. ll. cc.

Cæterum si primus emptor, in cuius fraudem posterior alienatio facta fuit, intra annum rem alienatam non repetat; tunc is, cui alienatio, siue gratuita, siue onerosa: siue scienti, siue ignorant facta fuit, neque in externo, neque in conscientiæ foro restitutionem facere cogitur: Non enim ratione rei acceptæ, siue possessæ: quippe cuius dominium ipsi acquisitum est. Neque ratione iniustæ acceptionis: quia nihil contra iustitiam peccauit, accipiendo rem in se liberam, nullique obligatam. Licet enim venditor, vel donator personaliter obligatus fuerit, ideoque alienando contra iustitiam peccauerit: hoc tamen eius peccatum, vel permittere potuit v.g. donatarius, sui commodi causa: vel si impedire debuisset, duntaxat contra legem charitatis peccauit: nisi idem donatarius, vel emptor posterior induxerit alterum ad alienandum, cū iniuria & damno prioris emptoris, tunc sanè ad restitutionem damni, cuius actiua causa extitit, in conscientiæ foro obligatur. Quæ est doctrina Mol. cit. disp. 328. §. verum aduersus, iuncta disp. 396. Lessij cap. 21. dub. 19. n. 142.

Porro sciendum est, hæc vniuersè locum etiam habere in alienatione facta in fraudem creditorum ab eo, qui soluendis debitis impar est. Nam si res in fraudem creditorum alienata sit titulo oneroso v.g. venditionis, vel dotis comparatione generi: refert, utrum ignorant facta sit, an scienti fraudem. Primo casu rescindi à creditoribus non potest: altero casu potest, etiam non restituto pretio emptori, secundum l. si debitor, l. si à debitore, ff. quæ in fraudem creditorum factæ sunt. Sin autem alienatio facta fuit titulo gratuito v.g. donationis, vel dotis comparatione filiar: tunc à creditoribus res donata reuocari potest, tametsi fraudis ignarus fuerit is, cui alienatio facta est, cit. l. qui autem, §. simili modo dicimus, & l. ignoti, C. de reuocandis iis, quæ in fraudem creditorum alienata sunt. Intelligo tamen hanc reuocationem, quatenus res donata extat, vel donatarius ex ea locupletior factus est.

Veruntamen nisi creditores intra annum, quo repetendi potestas est, repetant, securus est donatarius, emptor, secundum externum forum, sicuti constat ex l. 1. & l. ait Prætor, ff. eod. l. ignoti, quæ est penult. C. eod. Sed nunquid etiam in conscientiæ foro tutus est, licet sciens donationem in fraudem creditorum fieri, eam acceptari? Ita affirmant Pet. Nauar. lib. 3. c. 4. n. 218. Mol. cit.



disp. 28. Less. lib. 2. c. 20. dub. 19. n. 168. Probat, quia donatarius, vel emptor, si res intra tempus legibus prescriptum non repetatur, neque ratione rei acceptę obligatur ad restituendum, neque ratione iniustę acceptio- nis. Prius inde patet, quia acquisiuit dominium rei do- natę, emptę, l. si sciens, ff. de contrah. empr. quando- quidem in bonis eius fuerat, qui donauit, vendidit: Esto enim is debitis soluendis impar, pecunias mutuas acceperit, vel merces creditę emerit, verę tamen com- parauit earum dominium, personaliter solum obliga- tus creditoribus, quibuscum contraxerat: consequen- ter idem rerum dominium in alium voluntate sua sal- tem validę transferre potuit. Posteriũs inde, quia licet donatio v. g. per quam donans impotentiũs sit ad debi- ta soluenda, cedat in damnum creditorum, non sine ali- qua donantis iniuria: tamen donatarius id, ob suum commodum, quamuis sciens permittere potest; modõ ad donationem sibi faciendam non incitet precibus, sua- sione, sed vltro sibi faciendam acceptet.

50 Hęc sententia probabilis, & in praxi tuta videtur: quamuis contraria communior, Palud. in 4. d. 15. q. 2. a. 5. ad finē, S. Anton. p. 2. tit. 1. cap. 12. §. 18. Caiet. in opusc. de usuris, q. 4. Nau. c. 17. n. 271. Cordubę lib. 1. qq. q. 39. p. 3. dicto 3. quorum doctrina mihi magis placet: saltem eo casu, cū accipiens ex titulo lucratiuo seu donatio- ne probę scit, alienationem fieri cum iniusto damno creditorum. Quandoquidem ad talem alienationem cooperatur contentiendo, seu acceptando: quare licet suadendo non impellat, ideõque non sit causa efficiens quoad principium seu propositum, est tamen eius cau- sa efficiens quoad executionem.

## §. V.

Quę res vendi possint, vel non possint,  
vel vendi debeant.

## S V M M A R I V M.

- 31 Res sacra, homo liber (extra necessitatis casum) item publicum forum, theatrum vendi non possunt.
- 32 Ea quę in spe sunt, ut lacra; item iura & actiones rectę venduntur. Debitum, quod difficilem solutionem habet, tantõ minus valet.
- 33 Probabile est, quod ius, seu chirographum ad accipiendum sequente anno centum, minore nunc pretio emi possit, puta nonaginta.
- 34 Nemo iniustus rem suam vendere cogitur; exceptis casibus publice necessitatis, aut publicis fauoribus.

31 **A**SSERTIO I. Quę non sunt humani iuris, vel non in alterius commercio, vt res sacra, vel reli- giosa, homo liber, item publicum forum, theatrum, &c. vendi non possunt, Instit. de inutil. stipul. §. 1. & §. vlt. de empr. & vendit. Excipe primõ: Quod pater filium, vel filiam, in sua potestate constitutam, cogente grauissi- ma necessitate, vendere possit, l. 1. & 2. Cod. de patri- bus qui filios suos distraxerunt, & colligitur ex cap. 21. Exodi. Si tamen pater postea ad meliorem fortunam re- ueniat, cogitur filium redimere, sicuti ex multorum sententia docet Conar. 3. resol. c. 14. n. 4. Mol. t. 1. tract. 2. disp. 33. tit. 3. Quin & seipsum aliquis in necessitate vendere non prohibetur. cuius rei exemplum habemus in S. Paulino, postea Episcopo Nolę, qui pro filio cu- iusdam viduę redimendo seipsum seruituti subiecit. Ratio est: Quia homo, vt famę & honoris sui, ita & proprię libertatis dominus est; quam proinde ob cau- sam iustam licitę alteri tradere potest, teste Nau. c. 17. man. n. 88. Condiciones verõ ad hominis liberi venun- dationem Casareo iure requisitas, vide in Gl. §. penult. ver. maior, Instit. de iure personarum, S. Anton. p. 3. tit. 3. §. 5. Syl. ver. seruitus, q. 3. Mol. in cit. loco.

Excipe secundõ: Quod res sacra, quę ratione mate- rię pretio æstimabiles sunt, vt vasa aurea, argentea, sa- cra vestes, &c. vendi possunt, vel oppignerari ob cap- tiuorum redemptionem, vel ad soluenda debita, si alia mobilia bona non suppetant: sed alienatio fieri debet alteri Ecclesię, si integra sint: si verõ conflata, aut pro- fanata, etiam laico, sicuti habetur in l. sancimus, 18. iunct. Authent. præterea, C. de SS. Ecclesiis. Vide quę suprà dixi eod. tract. c. 10. n. 3.

Assertio II. Non tantũ ea, quę proprię in nostro 32 commercio atque dominio sunt, vendi possunt; sed etiam quę in quasi dominio. Puta quę in spe sunt, veluti ancillę partus futurus, foetura gregis, iactus retis, vnus diei venatio, fructus agrorum, lucrum vnus an- ni ex negotiatione proventurum, secundũ Iurecon- sult. in l. nec emptio, ff. de contrah. empr. & l. interdum, ff. de verb. obligat. Item iura nostra, seu actiones vendi possunt, etiam inuito eo, aduersus quem actio compe- tit, l. nomina, l. venditor actionis, ff. de hæreditate, vel actione vendita, l. nominis, Cod. eodem.

Excipitur: Quod actio cedi, aut vendi non possit po- tentiori ratione officij, seu potestatis exercendę in de- bitorem. Nam talis cessio irrita est, & creditor iure agendi priuatur, l. 2. cum interpretatione Baldi & Sali- ceti, C. ne actio potentioribus, &c. Quod si potentiori ratione alterius qualitatıs cedatur, aut vendatur, non erit locus huic constitutioni, præterquam si appareat, vel ostendi possit, actionem translatam esse ea intentio- ne, vt alter potentiorẽ aduersarium habeat, à quõ fa- cilius vinci possit. Ita colligitur ex cit. l. 2. & docet Mo- lin. tom. 2. disp. 340. §. vtrum autem.

Id verõ in quæstione positum est: Vtrum ius certum, ac liquidum futuro tempore petendi centum v. g. au- reos, tantidem valeat atque centum aurei præsentēs, an verõ pretio minore rectę emi possit? Respondent Abb. cap. in ciuitate, num. 7. de usuris, Caietan. ver. usura, in fine, Armilla eod. ver. num. 50. Nauar. c. 17. num. 231. To- let. lib. 5. cap. 31. Sa. ver. debitum, num. 21. Cardinalis Bel- larmin. & alij apud Less. cap. 21. dub. 8. Ius, seu chirogra- phum creditoris ad accipiendum futuro anno centum aureos, iustę emi pretio minore, v. g. nonaginta, seclu- so omni periculo, lucro cessante, &c. Unde inferunt Nauar. Tolet. Sa, etiam ipsum debitorem tale debi- tum minoris redimere posse; vt hodie v. g. soluat nona- ginta aureos, pro eo, quod post annum soluere deberet centum.

Contrariam sententiam docent Angelus verbo usu- ra. §. 63. & 64. Gabr. in 4. distinct. 15. quæst. 11. a. 3. dub. 4. Sotus lib. 6. quæst. 4. a. 1. ad 3. Petr. Nanar. lib. 3. cap. 2. num. 162. Lopez de contract. lib. 1. cap. 3. Medina quæst. 38. de restitut. §. ceterũ, Molin. disp. 361. Less. loc. cit. Valentia tom. 3. disp. 5. quæst. 10. p. 2. Nam alioquin si tibi mutudẽ centum aureos acquisito iure & actio- ne, vt post annum eodẽ mihi restituas; nisi dicamus, esse æqualitatem inter præsentēs centum tibi datos, & ius mihi acquisitum; consequens est, quod iustę pacisci possim, vt præter centum mutudẽ datos, post annum co- garis mihi restituere auctarium: quę manifesta usura est. Deinde, si à me mutudẽ dari petiveris aureos cen- tum, possem tibi dicere: Nolo mutuari; sed emam à te actionem, siue ius exigendi centum aureos. quod ius cū minoris valeat, quàm centum præsentēs, ideo nu- merabo tantum aureos nonaginta, vel nonaginta quin- que, quę palliata usura est.

Hęc posterior sententia vt communior, ita & secu- 33 rior est. quamuis prior non omnino improbabilis, tum ob Doctorum auctoritatem; tum verõ, quia, vt in re- rum aliarum, ita etiam eiusmodi chirographorum, seu debitorum pretium iustum pender ex communi homi- num æstimatione: constat autem, quando talia iura, seu chirographa debitorum, instar mercis, venalia expo-



nuntur, minoris communiter aestimari, quam præsentes pecunias: Ergo iuste ita emi possunt. Confirmatur: Si defunctus grauauit heredem, vt per annos decem Titio pensionem annuam soluat centum aureorum; talis census testamento constitutus, si redimendus sit, profecto non aestimabitur mille, sed minoris, v.g. octingentis: & tamen non esset licitum mutuo alicui dare aureos octingentos ea conditione, vt spatio decem annorum soluantur mille, sicuti bene aduertit Less. lib. 2. dub. 4. num. 32. vbi rationem reddit: Quia cum ius aliquod, per modum mercis, venale exponitur, per accidens, ratione circumstantiarum, aliam aestimationem accipit, quam ex sua natura, præcisè spectata, haberet.

Id porro fateri nos oportet cum Molina loc. cit. Si creditor partem debiti liberaliter remittat, & condonet, vt debitorem ad anticipandam solutionem alliciat; remissionem hanc acceptari posse, secluso vsurario affectu: quia debiti spontanea remissio solutioni æquiparatur, secundum Gloss. in reg. 4. in 6.

Deinde extra controuersiam esse debet, debitum non liquidum, sed dubium, & incertum tantò minoris emi posse. Eademque ratione debitum alienum, quod iunctum est cum periculo, aut difficultate assequendi, minore pretio rectè emitur: Similiter ob cessans lucrum, seu commoditatem præsents pecuniæ, qua se priuat emptor chirographi, sicuti docet Less. dub. 8. num. 73.

Secundò quæri solet; Si aliquis sua industria, fauore apud Principem, eiusve Officiales, alienum debitum facile consequi possit; quod alter, cui debetur, v.g. miles difficile impetrabit, vtrum ab eo minore pretio emere fas sit? Respondeo cum Molin. loco citato. Less. cap. 21. dub. 9. Nihil iniustitiæ in hac re inesse. Quia cuiusque rei pretium accipi debet ex communi opinione, non priuata alicuius industria: atqui debitum istud, attento communi rerum statu, difficile acqulitu aestimatur, ideòque minoris valet; nihil obstante priuata alicuius industria, vel fortuna. Quin & ipsosmet Officiales, seu Quæstores eiusmodi debita emere posse, tradit Lessus dub. 9. in fine; modò difficultas solutionis non ex ipsorum culpa, sed aliunde proueniat; scandalum quoque, ac specialis prohibitio cesset. Quamuis fatendum sit, eiusmodi negotiationem periculo non vacare in Officialibus.

34 Assertio III. Nemo inuitus cogitur rem suam vendere, sicuti constat ex l. inuitum, Cod. de contrahenda emptione, & aliis iuribus, quæ Gloss. ibidem congerit. Excipiuntur tamen certi casus, quibus aliquis ad vendendum pretio iusto à Magistratu cogi potest, quos referunt Anton. Gomez tom. 2. resolut. cap. 2. num. 51. Couaruu. 3. resolut. cap. 14. Molin. tom. 2. disput. 341. Primus; Si publica sit necessitas, siue inopia v.g. frumenti, aliorumve victualium ad quotidianum vsum, tunc cogi possunt ciues ad vendendum, iusto à Magistratu taxato pretio, argum. l. 1. §. cura carnis, ff. de officio Præf. urbis, & docet Abbas cap. 1. de empt. num. 6. Syluest. ver. emptio, quæst. 5. Qua simili ratione ciues à Magistratu cogi possunt, vt necessaria coëmant ad communem inopiam euitandam. His adde primò; Et si communis inopia cesset, nihilominus venditoribus, qui res ad victum necessarias exponunt, à Magistratu pretium taxari posse, intra quod vendere debeant: non ita verò, si res non necessariæ venales exponantur, vti sunt gemmæ, vestes pretiosæ, &c. de quare videri potest Abbas in cap. 1. de emptione ac venditione. Adde secundò; In casu communis inopiæ eos, qui frumento, & similibus rebus abundant, cogi posse, vt tolis ciuibz seu indigenis vendant, non exteris, si vtriusque non sufficiat: quòd maior in necessitate propriorum ciuium, quam exteriorum ratio habenda sit.

Præterea, vt emptores non plus coëmant, quam ad familiæ suæ sustentationem indigent, sicuti notat Gomez cit. c. 2. n. 51. Cuiusmodi legibus iustis, latis in commodum Communis, etiam Ecclesiasticæ personæ se conformare debent.

Alter casus est: Ob publicum fauorem; videlicet si fundus personæ priuatae necessarius sit ad constructionem vel ampliationem ciuitatis, viæ publicæ, Principis palatii, templi, Monasterij, Collegij, Hospitalis, argum. l. si locus, §. vltim. ff. Quemadmodum seruitus amittatur. Simili ratione ex communi Doctorum sententia docent Couaruu. num. 8. Molin. tractatu 2. tom. 3. poster. disp. 709. licet cuilibet communi iure concessum sit, in fundo suo ædificare, & ædificium altius tollere, ac fenestras in eo aperire; tamen priuatum publicæ auctoritate prohiberi posse, ne ædes suas altius tollat, vel fenestras in muro suo aperiat, si exinde videri possint personæ religiosæ intra proprias ædes habitantes; dummodo ex tali seruitute altius non tollendi, fenestram non aperiendi, &c. non magnum incommodum ille capturus sit; vel, si quod est, iusta illi compensatio damni, aut lucri cessantis præstetur. Artium quoque Professores cogere possunt fabrum v.g. ferrarium, vt ex officina sua migret, si publicis lectionibus, quarum publicus fauor censetur, molestiam & impedimentum creet. His adde, quòd ex causa aliqua etiam priuatus quispiam, implorato Iudicis officio, impedire poterit; ne alter vtatur iure suo, quod a loquin illi competeret: v.g. ne vicinus ædificium suum altius tollat: si ex tali ædificatione nullum, aut valde exiguum commodum, oblato etiam pretio compensabile, secuturum sit: alteri autem magnum præiudicium, seu incommodum: quia in talicatu ille potius facere censeretur ad æmulationem, grauamen. Qua de re vide Andr. Gaill. lib. 2. obs. 69.

Testantur etiam Couar. ibidem. Mol. tom. 2. disput. 341. Tamen si priuata ædes simpliciter necessariæ non sint ad ampliationem v.g. Monasterij: tamen valde utiles ad plurimum Religiosorum, vel Clericorum habitationem cum bono publico iunctam: communem esse DD. opinionem, etiam tunc ad vendendum subditos cogi posse, præsertim à supremo Magistratu, siue Principe. Quamquam ipse Couar. communem sententiam in dubium vocat, eamque saltem tunc veram esse fateatur, si ex tali venditione nullum, aut paruum detrimentum priuato inferatur.

III. Casus. Si dominus alicuius loci nimia sequitia vtatur in subditos suos, & monitus non desistat, à superiore Magistratu compelli potest ad vendendum dominium, vel omnino iurisdictione priuari, arg. l. vnic. C. si quacunque præditus potestate, &c. §. vlt. Instit. de his qui sunt sui, vel alieni iuris, &c. literas, de restitut. spoliatorum, in quo habetur, ob nimiam sequitiam viri, diuortium instituendum esse, si mulieri sufficiente securitate cauere non possit. Vide de hac re Ioach. Mynsing. cent. 5. obser. 8.

IV. Casus. Si duo cõmunem seruum habeant, quorum alter velit eum manumittere, cogitur etiam alter partem suam vendere, libertatis fauore, si adsit qui redimere velit, sicuti habetur in l. 1. Cod. de communi seruo manumittendo. Vnde inferunt DD. apud Gomez l. c. Si aliquis in loco communi Ecclesiam ædificare velit, socium ad partem suam iusto pretio vendendam cogi posse, religionis fauore.



## §. VI.

## De Retraetu Gentilitio.

## S V M M A R I V M.

- 33 Retraetus gentilitius est ius, proximo venditoris consanguineo concessum, factam venditionem ad se reuocandi, eodem oblato pretio, alijsque quibusdam obseruatis.
- 36 Insistit retrahendi iurisdictionem realem, ut aduersus quemcunque possessorem institui possit.

35 **R**etraetus gentilitius dicitur ius alicuius gentis, aut ciuitatis, statuto, vel consuetudine concessum proximo venditoris consanguineo, intra certum tempus rescindendi, & ad se reuocandi venditionem rei immobilis, eodem oblato pretio, quo illa ab extraneo, vel remotiore consanguineo empti fuerat. Huius iuris mentio fit in l. dudum, C. de contrah. empt. & c. constitutus, de restitut. in integrum, eiusdemque aliquod vestigium extat cap. 25. Leuit. & c. 32. Hierem. Ratio esse solet: Ne possessiones paternæ, atque auitæ ad alienas manus deueniant: quod satis lugubre esse, dicitur in l. lex quæ tutores, §. & tolerabilibus, C. de administrat. tutorum. Vide Pet. Greg. Tholosanum lib. 26. syntag. in fine, Tiraquel. de viroque retractu, in præfat. Andream Gaill. lib. 2. obseruat. 19. Mynfingerum cent. 3. obser. 51.

Sunt autem aliqua annotanda: Primum. Nomen venditionis (cuius retractus proximo venditoris consanguineo, multorum regnorum constitutione, aut consuetudine permittitur) extendi non debet ad alias alienationes, puta donationem, legatum: Neque ad permutationem, sicuti ex communi docet Tholosanus cit. lib. 26. c. 12. Multoque minus ad locationem, emphyteusim, aliamve contractum, quo vtile tantum dominium transfertur, directo penes alienantem permanente, sicuti restatur Couar. 3. resol. c. 11. num. 3. & 4. Tiraquel. lib. 1. de retractu, §. 33. Gloss. vnic.

Secundum. Si consanguinei, post legitimam eis factam denunciationem, & requisitionem, iusto pretio emere nolint, post duorum mensium spatium alteri vendi potest, sicuti ex communi docet Gaill. n. 8. Sin autem irrequisito proximo consanguineo, venditio facta fuerit, ius habet ille retrahendi intra annum, & diem, communi iure, sicuti docent & colligunt DD. ex lib. 2. Feudorum, Si de feudo defuncti fuerit controuersa inter dominum, & agnatos vasalli, §. Titius filios. Currit autem annus ille, post venditionem perfectam, etiam contra ignorantem: quamuis iusta, & probabilis ignorantia causam restituendi in integrum præbere possit, teste Gaill. cit. obseru. 19. in fine.

Tertium. Si proximus consanguineus, cui ius retractus competebat, decedat morte seu naturali, seu ciuili, v.g. Religionis professione, ius retrahendi non transit ad eius heredem, aut Monasterium: cum sit priuilegium illius personale, quod cum persona extinguitur, & ad heredem non transit, sicuti notauit Mol. c. 2. disp. 370. §. dubium est.

Quartum. Proximus consanguineus, qui venditionem iure propinquitatis retrahere, siue ad se reuocare vult, hæc præstare debet: In primis pretium offerre illud ipsum, quod extraneus vel remotior dedit, aut dare paratus est; modo nihil in fraudem committatur, cit. cap. constitutus. Qua etiam ratione emphyteutæ meliorationes suas vendente, dominus iure prælationis uti non potest, nisi quod alter obtulerit pretium, ipse quoque dare paratus sit, l. vlt. Cod. de iure emphyteutico, cap. potuit, de locato, & docet Petr. Gregor. Tholosan. cap.

22. Deinde præstare debet omnes expensas, quas prior emptor, ratione contractus, facere coactus fuit, sicuti tradit Tiraquel. de retract. conuent. §. 7. Gloss. 1. num. 5. Tholosanus c. 21. Gaill. l. c. num. 10. vbi addit, optimam cautelam esse, vt volens uti beneficio retractus, quamprimum denuntiet emptori, ne illos in re vendita sumptus faciat: quia retractui subiecta sit. Sed priusquam id denuntietur, fructus, qui post perfectam venditionem a priore emptore percepti sunt, ad eundem iure spectare tanquam dominum, non est improbabile, & docet Tholosanus cap. 21. num. 6. Ioan. Faber in §. actionum, verb. & ista faciunt, Instit. de actionibus, contra Gutierrez l. 2. pract. quæstion. qu. 158. Mol. c. 2. disp. 371.

Quintum. Condicio hæc, quæ datur ex lege ad retrahendum, imitatur actionem realem; quia prosequitur rem ipsam aduersus quemuis possessorem, ita vt si res tertio donata, vel vendita fuerit, ab eo reuocari possit; oblato pretio, quod primus emptor soluerat: quamobrem censetur actio hæc personalis in rem scripta, sicuti ex probabiliore docet Tholosanus c. 20. Gaill. n. 6.

Vltimum. Necesse est, vt proximus agnatus sibi retrahat, non in vtilitatem alterius, & in fraudem emptoris, vel aliorum consanguineorum, quibus post ipsum, ius retrahendi competit. Nam ius retractus alteri extraneo vendi, vel cedi non potest, sicuti docet Tholosan. cap. 18. Gaill. num. 10. Si tamen alius nemo supersit ex consanguineis qui retrahere possit, aut velit extraneo vendere, aut cedere permissum esse, ait Tholosan. ibid. num. 2. dummodo id regionis consuetudo, vel lex municipalis permittat: nam ius istud retractus non tam iure communi, quam particularibus regionum consuetudinibus, aut constitutionibus municipalibus regitur.

## §. VII.

## De Negotiatione, &amp; Monopoliis.

## S V M M A R I V M.

- 37 Negotiatio dicitur, cum merces ex proposito emuntur, vt postea carius distrahantur, lucri causa.
- 38 Negotiatio per se mala non est: quamuis saepe per accidens peccati causa existat.
- 39 Negotiatio proprie dicta, videl. si res empta, non immutata, postea carius vendantur, personis Ecclesiasticis sub mortali peccato prohibita est: excepto tamen necessitatis casu, si alio modo vitam sustentare nequeant.
- 40 Improprie dicta negotiatio, quæ est rerum in melius mutatarum, exceptu quibusdam casibus, prohibita etiam est Clericis, ac Religiosis, licet non tam severe: quare ex tali etiam negotiatione tributum, & vestigial Magistratus soluere debent, sicuti alij negotiatores.
- 41 Qui coemptione v.g. frumenti, inoriam & caritatem inducunt, videntur peccare contra iustitiam.
- 42 Monopolia illicita sunt: nisi ob iustam causam, publica auctoritate permittantur.
- 43 Mercatores contra iustitiam peccare videntur, si inter se conueniant, vt non nisi summo pretio aliquod mercis genus diuendant.

**N**egotiatio dicitur, cum merces eo animo emuntur, vt carius postea distrahantur, lucri capiendi causa. Verum, si per accidens fiat, vt quod ad proprium vsum emptum est, postea offeratur occasio vendendi carius, non censetur esse negotiatio, sicuti annotauit S. Tho. 2. 2. q. 77. a. 7. ad 2. Cum id potius spectet ad economicam gubernationem, quæ etiam in personis Ecclesiasticis commendatur, secundum Apost. 1. ad Timoth. 3. & 5.

Licet negotiatio per se mala non sit, tum quia mercium pretij latitudo quædam est; vt proinde eadē merx, intra iustitiæ limites, minoris emi, ac postea pluris vendi possit: tum quia mercium pretia pro temporum ac



locorum varietate mutantur; Per accidens tamen, ob hominum cupiditatem ac malitiam, sæpe salutis periculum affert: partim quia animum temporalibus curis implicitum à rebus cœlestibus avocat, partim quia mendaciis, ac fraudibus occasionem ministrat. qua de re Gabr. in 4. distinct. 15. quæst. 10. Eapropter Clericis in sacris ordinibus constitutis, atque Religiosis seuerè interdicta est negotiatio, cap. consequens; cap. fornicari, distinct. 88. cap. vltim. de vita & honestate Clericorum, Clement. 1. §. aduersus, eodem tit. & toto tit. Ne Clerici, vel Monachi secularibus negotiis se immisceant.

39 Cum autem negotiatio duplex sit; Vna propriè dicta, in qua res empta, puta vinum, frumentum, &c. non mutata, carius postea venduntur, quæstus gratia; negotiationem hanc Clericis, ac Religiosis sub mortali peccato prohibitam esse, Doctores non dubitant; præterquam si eos ratio necessitatis à culpa excuset, quando alio modo vitam sustentare non possunt, sicuti notauit Gloss. in cap. negotiationem, distinct. 88. Nauarrus lib. 3. consil. 3. num. 3. de vita & honestate Clericorum, edit. 2. Quamobrem admonet Gloss. in cap. dilecti, de decimis, verbo conduxistis; Si Monasterio propria prædia ad alendos fratres non sufficiant, fas esse conducere aliena, & inde perceptos fructus vel absumere, vel etiam vendere: quare in hoc casu etiam à tributo ex eiusmodi lucris, aut fructibus seculari Principi præstandis Clerici, ac Religiosi liberi esse debent. qua de re Molin. tom. 1. tractatu 2. disput. 242. §. tertio obseruandum.

40 Altera est negotiatio impropriè dicta, in qua res empta, postea mutata, ac melior effecta, venditur: veluti si ex lana empta panni conficiantur, & vendantur, vel ex hordeo cereuisia: si empti porci, aut boues saginentur; empti equi educantur, ac vendantur, quæstus faciendi causa. Et huiusmodi quoque negotiationes Clericis, ac Religiosis, tanquam minùs decentes eorum statum, prohibitæ sunt: quamobrem ex ea tributum, aut vectigal non minùs, quàm alij negotiatores, pendere coguntur.

Excipitur tamen, si empta pecora, & in propriis prædiis nutrita vendant; vel ex propriis agrorum fructibus confectam cereuisiam, ex propriis vineis expressum vinum diendant: hæc enim ipsis licita sunt. Quamuis non deceat, neque concessum sit, vt in propria domo, vel Monasterio tabernam constituent, sicuti notauit Rebellus p. 2. de contractibus, lib. 18. quæst. vlt. sect. 2. Locare item Clerici possunt prædia, & iumenta sua; sed non idcirco emere iumenta, vt ea locent aliis pro pensione: quia id genus negotiationis est, teste Molin. cir. disput. 242. conclus. 5. Deinde concessum eisdem est, materiam aliquam emptam, & proprio opificio, siue manu labore elaboratam, postea diuendere, exemplo Apostoliartem scenofactoriam, consuendis pellibus, exercentis, Actor. 18. Et Monachorum veterum retia, ac corbes textentium, atque vendentium. Vide cap. nunquam, de consecrat. distinct. 5. ex S. Hieron. Epist. ad Rusticum, & cap. 1. d. 91. ex Pelagio Papa, c. Clericus, ead. d.

Præterea si Clerici, vel Religiosi etiam negotiationem primi generis ac propriè dictam, non per seipsos, sed per alterum exercent; tradendo v. g. pecunias laico, vel societatem cum illo ineundo, vt is solus negotietur; lucrum verò, vel pars lucri ad Ecclesiasticos pertineat, non poterunt saltem grauis peccati condemnari, sicuti docet Med. q. 30. de restitut. Tamen si neque hunc ipsum negotiandi modum per alium, Ecclesiastico statui satis convenientem esse, nisi debitis circumstantiis (puta necessitate rei familiaris, aut consuetudine regionis) cohonestetur, monet Mol. l. c. ante 2. conclusionem.

Porrò negotiatores omnes, si copiam rerum ad com-

munem vsum necessarium de industria cœmendando, inducant inopiam & caritatem, Reipublicæ perniciosi sunt; ideòque legibus ac pœnis coerceri possunt: cogendo etiam ipsos in annonæ caritate merces suas viliori pretio diuendere. de quo vide Doctores in l. annonam, ff. de extraord. criminibus, Petr. Nau. lib. 3. cap. 2. num. 89. Communiter verò & respectu omnium venditorum, non est licitum Magistratui taxare v. g. triticum infra latitudinem pretij iusti, considerata anni sterilitate, aliisque circumstantiis. Tamen si eiusmodi taxatio utilis futura sit ad communem ciuium, præsertim pauperum, inopiam subleuandam: æquitas tamen postulat, vt omnes, præsertim diuites, secundum proportionem facultatum suarum, eius causâ contribuant, & non vnum solum genus hominum, v. g. simplicium & innocentium agricolarum, frumenti taxatione grauentur: quippe qui tempore caritatis omnes merces plerumque magno pretio emere cogentur; pretium autem iustum, habita ratione laboris sui, & fructuum inopiæ, ex mercibus sui consequi non poterunt. Vide plura de hac re apud Molin. disp. 364.

Illud verò controuersum est, vtrum dicti caritatis inductores coemptione frumenti, &c. etiam contra iustitiam peccent, ideòque ad restitutionem obligentur? Negant probabiliter Mol. disp. 345. Lessius cap. 21. dub. 20. nu. 151. Vtuntur enim iure suo (inquiunt) emendo tempore abundantie, pretio iusto; & postea iterum vendendo, cum pretium in communi foro auctum est.

Sed contraria sententia probabilior est, quam docet Angelus ver. negotiatio, in fine, Syluest. ver. emptio, qu. 10. in fine, Maior in 4. dist. 15. q. 41. arg. 4. Medin. q. 36. de restitut. quæ incipit. Quia paucis, prope finem. Nau. in man. cap. 23. n. 91. Petr. Nau. lib. 3. c. 2. n. 83. Nam rerum communium diuisio, negotiationes, & commercia gentium iure introducta, non vsque adeò permilla sunt, vel permitti potuerunt, vt his etiam in Reipublicæ detrimentum, & communem inopiam inuehendam abuti fas & iustum esset: quamobrem non solum Cæsareo, sed omnium gentium iure, eiusmodi monopolium per mercium coemptionem, & collectionem, causa inducendæ caritatis, seuerè prohibetur, tãquam quod iuri primæno ac naturali, secundum quod omnia hominibus cõmuniter à Deo creata, & donata sunt, quã maximè aduersatur.

Monopolium est, cum vnus, vel plures à Republica consequuntur, vt ipsi soli genus aliquod mercium ad vitam necessarium, pretio, quo ipsis lubitum est, vendant. quod seuerè prohibetur in l. vnica. Cod. de Monopoliis. Interdum tamen ob mercatorum inopiam, vel aliquorum industriam, monopola, publica auctoritate, rectè constituuntur; puta vt nemini, præter Titium, alicuius generis merces adferre, vendere; item libros eudere, distrahere concessum sit. Debet autem tunc Magistratus monopolæ pretium taxare; præsertim in mercibus necessariis. Nam in his, quæ ad luxum, & voluptatem instituta sunt, facilius permittitur præstantibus artificibus arbitraria æstimatio: quandoquidem nemo ab illis emere cogitur. qua de re Nauar. cap. 23. num. 92. Lessius cap. 21. dub. 20. num. 149. Sa ver. venditio, num. 14. Molin. disput. 348. in fine.

Eadem l. vn. prohibetur, ne mercatores illicitis conuentionibus conirent, vel paciscantur, vt merces non minoris, quàm inter se conuenerunt, vendantur; v. g. non infra summum pretium iustum. Quo casu dubitant Doctores, vtrum mercatores ita paciscendo contra naturalem iustitiam peccent, ideòque ad restitutionem obligentur? Negant non improbabiler Pet. Nauar. lib. 3. c. 2. num. 85. Molin. & Less. locis cit. Nam hoc ipso inquiunt, quod iusto pretio, quamuis summo, vendunt, nihil iniuriæ inferunt.

Contraria tamen sententia magis placet, quæ est 41 Soci



Soti lib. 6. quæst. 2. a. 3. Conradi de contractib. quæst. 51. prope finem, Rebelli p. 2. lib. 9. quæst. 7. num. 6. Emptoribus enim non solum Cæsareis, sed omnium gentium legibus, si rerum pretia taxata non sint, concessum est licitari, ne semper summo pretio emere cogantur. Hoc autem iure eos spoliare mercatores, illicita & legibus interdicta illa conuentione: ergo iniustum damnum ipsis inferunt.

Ad fundamentum contrariæ sententiæ respondetur; Licet pretio summo vendere, per se iniustum non sit, conuentionem tamen inter mercatores, ut non nisi summo pretio vendatur, iniustam ac perniciosam esse.

Eademque ratio est, si emptores inter se paciscantur, ne quisquam emat supra pretium infimum; quamuis secundum se iustum: nam & hæc pactio in magnum detrimentum mercatorum cedit. Quamuis eam quoque ab iniustitia excusent Pet. Nau. & alij supra citati.

Ex quo etiam colligitur, defendi non posse, quod Pet. Nau. visum fuit, cod. c. 2. n. 18. venditorem non peccare contra iustitiam, neque ad restitutionem obligari, si emptor empturus v. g. sex panni vlnas, conueniat cum venditore in pretio mercis infimo, v. g. ut vlna veneat 24. argenteis; venditor autem cupiens recipere pretium summum, quod est 26. argenteorum, metiendo decipiat, & tantum det quinque vlnas cum dimidia. Nam contractus mutuo consensu perficitur: Emptor autem nullo modo consentit in pretium summum; sed in infimum: Ego non valet emptio, quoad excessum ultra pretium infimum.

## CAP. XVIII.

## De Censibus.

## SUMMARIUM.

- 1 Censui realis tam perpetuus, quam temporalis etiam vitalitius, ab omnibus approbatur.
- 2 Duplex est census, unus reservatiuus, & alter consignatiuus.
- 3 Censui consignatiuus diuiditur in realem, ac personalem: In fructuarium, & pecuniarium: In perpetuum, ac temporalem: In redimibilem, & irredimibilem.
- 4 Pereunte re, super qua census locatus est, etiam census corrumpitur.
- 5 Censui realis, quamuis institutus sit cum pacto redimendi, ex parte emptoris, quam venditoris, probabiliter defenditur.
- 6 Aequum est, ut in censu utrinque redimibilis manus pretium solvatur, quam in censu redimibili ex parte solius venditoris.
- 7 Censui personalis tam irredimibilis, quam redimibilis ex parte solius venditoris, suapte natura licitus est.
- 8 Censui item personalis ex utraque parte redimibilis ab iniustitia probabiliter defenditur: tamen periculo usurarie intentionis non caret.
- 9 Censui institui potest data facultate redimendi ad certum tempus, vel non ante tempus designatum.
- 10 Censui utrinque redimibilis, adiecto etiam pacto assicurationis, absolute loquendo damnarius non potest; quamuis periculo usurarie intentionis non vacet.
- 11 Contractus societas cum pacto assicurationis licitus est.
- 12 Contractus in aliqua regione etiam à viris doctis, & honestis celebrari solitus, non est iniustus facit damnandus.
- 13 Inter hypothecam, & censualem rei obligationem discrimen est.
- 14 Usura est, si census cum pacto assicurationis constituitur, vel constituitur cum persona nullus reditus habente.

**C**ensus, secundum primariam acceptionem, est estimatio bonorum, ex quibus Magistratui tributum, in signum subiectionis, solui debet, sicuti constat ex l. forma, ff. de censibus, & Cod. eodem tit. lib. 11. & videri potest Couarrua. 3. resol. c. 7. Postea verò translatum est nomen census ad ipsum tributum siue pensionem significandam, uti apparet cap. 22. Math. Licet census dare Cæsari? & lib. 2. Cod. sine censu, vel reliquis, & c. Videri potest Felicianus de Solistract. de censibus in proæmio, num. 6. Denique apud Canonistas signifi-

carius contractui aliquo constitutum, pensiones siue redditus annuos ex re aliqua percipiendi.

Secundum hanc postremam acceptionem duplex census est: Unus reservatiuus; cum quis fundum pleno domini iure in alterum transfert, reservata sibi annua pensione ex eodem fundo, iuxta l. ult. C. de rerum permutatione. Qua etiam ratione Ioseph Gen. 47. prædia, quæ commutatione cum tritico, pleno iure Pharaoni cōparauerat, postea Aegyptiis restituit, annua in iis pensione constituta: exceptis prædiis Sacerdotum. Alter est census consignatiuus: cum quis contractu donationis, venditionis, vel permutationis alteri constituit, ac designat ius ex re sua (id est censum designantis) redditus annuos percipiendi: ut cum Princeps alicui cōstituit ius ex vectigali suo, aut Camerae suæ redditibus annuas pecunias accipiendi. Verum hoc loco solum agemus de censu consignatiuo, qui emptione constituitur, utpote frequentissimo: qua acceptione census est veluti species quædam emptionis, ac venditionis: v. g. florenis 100. à te emo ius percipiendi in annos singulos ex agro tuo frumenti scapham; vel eius valorem, videlicet 5. florenos.

Census ita acceptus diuiditur primò in realem, ac personalem. Realis census est, qui fundatur super certa re vna, vel pluribus ex quibus persio soluenda sit, v. g. super domo tua, agro, vinea. Quare comitatur rem, ad quemcunque possessorem perueniat, quasi seruitus, siue realis obligatio pensionis soluendæ, donec census redimatur. Personalis census est, qui fundatur super certa persona, obligante se ad annuam pensionem, sine ordine ad certam aliquam rem, ex qua pensio soluenda sit: nisi quodd interdum ad debiti securitatem certus fundus hypothecæ subijcitur.

Secundò diuiditur census in fructuarium, ex quo fructus debentur, videlicet vinum, frumentum, & c. & pecuniariū, ex quo pecunia debetur. Cū enim pecunia rerum omnium venalium cōmunis æstimatio, ac valor sit; ideo non minus in ea, quā in fructibus census etiā realis constitui potest. Veluti si centum florenis etiam quinque annuos ex agro tuo, vel pecoribus tuis pēdendos. Vterque verò census subdiuiditur in certum, & incertum: Certus census est, in quo certa pensio designatur, v. g. frumenti scapha, quinque floreni. Incertus census est, in quo pars aliquota designatur, v. g. tertia pars fructuum, aut pro eis pecunia.

Tertiò diuiditur census in perpetuū, ac temporalem. Perpetuus subdiuiditur in redimibilem, & irredimibilem. Redimibilis iterū duplex est: vel enim ex parte solius venditoris, cui liceat, restituto pretio, censum redimere: vel etiā ex parte emptoris, cui liceat resignato censu pretiū repetere: & vocari tunc solet census utrinque redimibilis. Irredimibilis verò census est, cui nullum redimendi pactum adijcitur.

Census temporalis subdiuiditur in eum, qui certo annorum numero definitur, v. g. annis decē, viginti: & in censum vitalitiū, qui ad vitā eientis, vel vendētis censum, alteriū siue personę cōstituitur: v. g. transfero in te 1000. aureos, ut obligatus sit, quādiu viuis, vel quādiu ego vivo, vel pater meus vivit, 100. aureos annuos numerare. De quo Binsfeld. q. 11. Nihil autē obstat, quominus etiā censui temporali pactum redimendi adijciatur. De his censuum diuisionibus videri possunt Conradus Sūmerhart de contract. q. 72. & seqq. Ioan. Medina C. de rebus per vsuram acquisit. q. 11. & 12. Soti lib. 6. de iust. q. 5. a. 1. Conar. 3. resol. c. 7. Mol. to 2. disp. 381. & seqq. Petrus Binsfeld. c. in ciuitate, q. 9. & seqq. de vsuris. Felicianus de Solis lib. 1. de censib. c. 4 n. 15.

**A S S E R T I O I.** Censui realis tam pecuniarius, quam fructuarius: & tam perpetuus, quam temporalis, etiam vitalitius, eo pretio emptus, quod vel lex taxauit, vel loci consuetudo approbat, iustus ac licitus est.



Ita DD. omnes auctoritate extrauagantis Martini V. & Calixti III. de emptione ac venditione: item Bullæ Pij V. editæ Anno Domini 1568. cuius initium, *Cum unus*, apud Nauar. comment. de vsuris, n. 84. Probatur: Cens-  
sus realis est veluti pars quædam vsusfructus; quippe ius  
percipiendi partem fructuum, siue annuorum reddituum,  
emptione comparatum: ad eundem modum, quo etiam  
donatione, vel legato alicui constitui potest ius perci-  
piendi ex domo, vinea, agro donantis, legantis, redi-  
tus annuos in perpetuum, ad vitam, vel ad aliquot  
annos.

Neque obstat, quod summa pensionum, temporis  
progressu soluendarum, pretij quantitatem superet.  
Nam in censu non emuntur pensiones, vt bene explicat  
Ioannes Maior in 4. d. 15. quæst. 42. Felicianus de Solis  
lib. 1. de censibus, cap. 7. numero 3. Sed ius percipiendi  
futuras pensiones: quod ius communi hominum iudicio  
minoris æstimari solet, quàm si pensiones omnes præ-  
sentes essent: Eò quod multa accidere possint, vt fructus  
vel non nascantur, vel non soluantur. Eodémque reci-  
dit, si dicas, pensiones emi, quatenus sunt in poten-  
tia, atque spe: minùs autem æstimatur aliquid in spe,  
quàm in re.

- 4 Accedit, communem esse Doctorum sententiam,  
quæ apertè colligitur ex cit. PP. extrauagantibus pericu-  
lum rei, super qua census locatus est, incumbere empto-  
ri, vt si absque domini culpa res pereat, totus census cor-  
ruat: Sin autem ob sterilitatem, aliàmue causam, non  
tantos fructus proferat, vt integræ pensioni sufficiant, sa-  
tis esse partem pendere: nisi antecedentium, aut subse-  
quentium annorum fertilitas compenset, Ideòque con-  
sultum est, censum super fundo vno, vel pluribus opulen-  
tis atque securis collocare. Ratio huius communis do-  
ctrinæ est, quam Lessius dat cap. 22. dub. 5. Quia pereun-  
te re, perit eius dominium cum directum, tum vile siue  
vsusfructus. Census autem realis est quasi vsusfructus,  
vel portio eius, emptione comparata: licet aliter sentiat  
Couar. 3. resol. c. 7. n. 5. §. primum.

- 5 **ASSERTIO II.** Licitus est census realis cum pacto  
redimendi ex parte venditoris, & probabiliter etiam, qui  
vtrinque redimibilis est. Prior pars est Doctorum com-  
munis, auctoritate extrauagantium citatorum. Et proba-  
tur ratione: Nam aliæ omnes venditiones sub conditio-  
ne redemptionis, præsertim ad arbitrium venditoris (quo  
casu nulla suspicio vel præsumptio vsuræ esse potest) lici-  
ta est, sicuti colligitur ex l. 2. Cod. de pactis inter empto-  
rem & venditorem, & cap. 25. Lenit. & videri potest Io-  
annes Gerson p. 2. operum, opusc. de contract. confid. 5.  
& seqq. Ergo etiam venditio census cum eiusmodi pacto  
licita est.

Posterior pars est Gabr. in 4. d. 15. quæst. 12. art. 2. con-  
clus. 4. Medinæ quæst. 15. de rebus per vsuram acquisitis,  
§. quæ de pacto, Conradi de contract. quæst. 84. post 4.  
conclus. corol. 1. Valentiz t. 3. disput. 5. quæst. 22. p. 6.  
Lessij lib. 2. cap. 22. dub. 10. contra Sorum loc. cit. art. 3.  
conclus. 1. Couarruias 3. resolut. cap. 9. num. 4. Cani-  
ssum tract. de censibus, in fine, Binsfeld. c. in ciuitate,  
quæst. 12. conclus. 10. Rebel. p. 2. lib. 10. de censib. quæst.  
vlt. qui censum vtrinque redimibilem, tanquam vsura-  
rium, reprobant. Sed non rectè: Nam vbicunque serua-  
tur natura emptionis ac venditionis, neque transit con-  
tractus in mutuum, ibi vsura non interuenit: sed in hoc  
casu seruatür natura emptionis ac venditionis: Cum enim  
aliis emptionibus apponi possit pactum redimendi ad ar-  
bitrium vtriusque, sicuti fatetur ipsemet Couarruias  
num. 3. Molin. tom. 2. disput. 377. prope finem: cur non  
etiam in emptione census? Item, si in emptione census  
apponi potest pactum redimendi ad arbitrium vendito-  
ris, vt omnes fatentur, cur non item ad arbitrium empto-  
ris, salua natura census? Non transit autem contractus in  
mutuum: Quia mutuum omni casu à debitore repeti po-

test: in reali autem vtrinque redimibili censu (nisi aliud  
pactum adijciatur) pretium siue fors repeti non potest: si  
res, super qua census fundatus est, casu pereat.

Duo addo: Primum. Equum esse, vt maius pretium  
soluatur in censu vtrinque redimibili, quàm in censu re-  
dimibili ex parte solius venditoris. Quare, cum in his Ger-  
manicæ prouinciis ferme consuetudo sit, vt reditus vnus  
annui ematur 20. & 5. annui emantur 100. cum pacto re-  
dimendi reciproco: atque eiusmodi conuentione neque  
emptor, neque venditor se grauari conuerantur, sequi-  
tur introduci posse, vt reditus vnus annui ematur tantum  
17. & annui sex emantur tantum 100. cum pacto redi-  
mendi ad arbitrium solius venditoris. Causa est, quod  
obligatio isthæc, quæ emptori incumbit, reuendendi ad  
arbitrium venditoris, pretio æstimabilis sit: ideòque in  
partem pretij rectè computetur, sicuti notarunt Medin.  
Valent. Less. ll. cc. Conradus cit. q. 84. concl. 1. & 2.

Alterum. Quia sub censu vtrinque redimibili vsuraria  
intentio facillè latere potest, ideò modus iste contrahendi  
periculo non vacat, neque facillè suadendus: tamen tole-  
randus est, testibus ijsdem DD. Quapropter non solum  
in Pontificijs Martini V. & Calixti III. constitutioni-  
bus; sed etiam in Carolina Augustæ edita in Comitijs  
Anno Domini 1548. vsurarius contractus iudicatur, si  
census redimendi facultas emptori permittatur. Verùm  
id intelligi debet secundum præsumptionem fortis externi:  
præterquam, quod dictæ constitutiones, quatenus ea pro-  
hibent, quæ iuri naturali alioquin non aduersantur, plu-  
ribus locis receptæ non sunt. Quæ de re vide Nauar. com-  
ment. de vsuris, n. 106. & seqq.

**ASSERTIO III.** Probabile est, censum persona-  
lem tam irredimibilem, quàm redimibilem ex parte so-  
lius venditoris, inspectata rei natura, licitum esse. Ita  
Abb. c. in ciuitate, num. 7. de vsuris, Ioannes Gerson t. 2.  
operum, opusc. de contractib. in 3. parte. Maior in 4. d.  
15. quæst. 42. & 43. Gabr. ibid. quæst. 12. art. 1. conclus.  
1. Sorus 6. de iust. q. 5. art. 1. Conrad. de contractib. q.  
74. & 83. Couarruias 3. resol. cap. 7. num. 5. Medin. de  
rebus per vsuram acquisitis, q. 11 & 15. Binsfeld. loc. cit.  
q. 10. conclus. 1. Felicianus de Solis lib. 1. de censib. cap. 8.  
Gaill. lib. 2. obser. 7. Less. cap. 22. dub. 4. contra Innoc.  
Hostiensem, & alios c. in ciuitate, de vsuris, Nauar. com-  
ment. de vsur. num. 81. S. Anton. p. 2. tit. 1. cap. 8. §. 10.  
Angelum ver. vsura. 1. §. 78. Molin. tom. 2. disput. 386.  
& seq. Probatur: Census personalis est ius percipiendi  
reditus annuos, ex alicuius personæ lucris, emptione  
comparatum. Atqui in primis nemo negat, super perso-  
na industria constitui posse obligationem soluendi par-  
tem aliquam lucrorum annuorum: Nam ita decimæ per-  
sonales constituuntur, c. Apostolicæ, c. pastoralis, de de-  
cimis, & c. decimæ, 16. quæst. 1. Item tributa, quæ Ma-  
gistratui penduntur, sicuti constat ex lib. 2. Esdræ cap. 10.  
Sæpe etiam testator grauât heredem suum, ad pensionem  
annuam alteri personæ soluendam, l. si legatum, §. vlt. ff.  
de annuis legatis. Nihil autem obstat, quominus talis  
obligatio emi possit, perinde ac alia iura, debita, & ser-  
uitutes.

Neque dici potest, in tali censu personalis emptione  
virtuale mutuum, ideòque vsuram palliatam interueni-  
re. Qui enim mutuum dat, is datam sortem repetere po-  
test: Emptor autem census personalis irredimibilis, vel  
redimibilis tantum ad arbitrium venditoris, datam sor-  
tem repetere non potest. Neque alia inæqualitas, siue  
iniquitas ostendi potest: Quod enim obijciunt, empto-  
rem vnus annui 20. florenorum pretio, elapsis annis 21.  
plus recepturum esse, quàm dederat, id nihil refert: quia  
in censu non emuntur pecuniariæ pensiones: siquidem  
pecunia emi non potest: Sed emitur ius percipiendi pen-  
siones, quod ius communi hominum ætimatione minùs  
valet: Siquidem nemo est, qui viginti præsentis non plu-  
ris æstimet, quàm ius percipiendi annum vnum spatio



annorum viginti: partim ob periculum non recipiendæ solutionis, quod raro tot annorum decursu abesse solet: præsertim instituto censu personali, in quo (quatenus est ex vi & natura huius contractus) pensiones annuæ soluendæ amplius non sunt, si, cessante industria personæ, nullianam redditus proueniant ex opificio, aut negotiatione, super qua census locatus est, partim ob lucrum, vel commodum cessans: Quia nemo ferme est, qui non pluris pecuniam facit, ex qua utilitatem ipsamet capere potest, quam ex qua utilitatem alij hæredes sui capuri sunt, post multorum annorum decursum. Lege Lessium cap. 22. dub. 4.

Confirmatur I. De æquivalentibus idem iudicium esse debet, l. ult. ff. Mandati. Est autem iusta pactio donationis sub modo, per quam dono alteri irrevocabiliter 100. aureos, ea lege, ut in singulos annos, dum vivo, 10. mihi alimenti loco vicissim donare obligatus sit: nihil obstante, quod accidere possit, ut ultra decem annos vivens, plus recipiam, quam dederim, sicuti docet Nauar. l. 3. c. onfil. 1. de donat. edit. 2. & tamen in hoc contractu idem fit, quod in censu personali vitalitio.

Confirmatur II. Censui realis in amplissimo fundo locatus, æquæ, vel magis securus est de pensionibus futuro tempore recipiendis, quam qui super industria, & lucris personæ locatus est. Ergo, si in reali censu nihil obstat, pensiones futuro tempore percipiendas pretij quantitatem superare, neque in personali censu id ob stare debet.

8 **ASSERTIO IV.** Censui personalis utrinque redimibilis super persona industria locatus probabiliter defenditur, attamen periculo usurariæ intentionis non caret. Ita contra communem, docent DD. seq. assert. citandi. Probatur: Si enim aliis emptionibus pactum adijci potest, non solum ad voluntatem venditoris redimendi, sed etiam ad voluntatem emptoris reuendendi: ut paria utriusque contrahentium iura sint: cur non etiam in emptione census personalis? Deinde statuamus, iustum pretium census irredimibilis ex parte emptoris esse 100. pro annuis 6. poterit tunc propter obligationem, quæ venditori imponitur, ut ad voluntatem emptoris redimere cogatur, augeri pretium, vel minui pensio: ut v. g. pro centum soluantur annui 5.

Neque dici potest, contractum transire in mutuum. Nam mutuum cuius personæ dari, & omni casu repeti potest. Censui autem iste personalis ex utraque parte redimibilis, tanquam fundamentum requirit personæ industriam, lucrandaque facultatem: quo sublato fundamento, puta si mercator, vel opifex sine culpa sua nullum pluribus annis lucrum capiat, vel opificio, negotiatione spoliatur: corrumpitur census personalis, neque pensiones exigi possunt: nisi alio adiecto contractu fulciatur, de quo mox.

9 Sed prius id aduertendum, posse etiam censum redimibilem institui non absolute, sed ad certum tempus, v. g. decennium: ita, ut intra tale tempus redimere liceat, postea non liceat, sicuti docet Gabr. cit. q. 1. a. 2. conclus. 4. Sotus lib. 6. q. 5. a. 3. contra Couar. 3. resol. c. 8. n. 7. Quin etiam hoc modo, ut intra decennium v. g. redimere non liceat, postea verò licitum sit, sicuti contra Couar. n. 8. & alios ab ipso citatos, docent Med. cit. q. 15. §. aduerte tamen, Felicianus de Solis lib. 1. de censib. c. 7. n. 11. Less. cit. c. 22. dub. 9. qui rectè admonent, quantò magis venditori ardeatur facultas ad arbitrium suum redimendi, tantò maius venditionis pretium esse oportere.

10 **ASSERTIO V.** Censui utrinque redimibilis (præsertim realis) etiam adiuncto pacto assicurationis, probabiliter defenditur, ac toleratur, etsi periculo usurariæ intentionis non caret. Ita docet Med. cit. q. 15. in fine, Valentia l. c. 6. vbi ait, idem visum fuisse doctissimis Romanis Theologis Anno Domini 1581. & secuti sunt

Less. lib. 2. cap. 22. dub. 10. & 11. Ioan. Malderus 2. 2. de iust. tr. 5. c. 5. dub. 11. alijque recentiores. Probatur assertio primò: Aliis contractibus, puta commodato, deposito, mutuo, quorum natura alioquin postulat, ut periculum rei pertineat ad commodantem, deponentem, mutuatarium: pactum adijci potest, ut contra eueniat, & rei periculum rei commodatæ ad commodatarium spectet, c. vn. de commodato. Periculum rei depositæ ad depositarium, l. 1. ff. depositi. Periculum item rei mutuo datæ ad mutuantem, sicuti supra dixi cap. 15. q. 1. Ergo etiam contractui censuali ex utraque parte redimibili, tam personali, quam reali, pactum istud, quod dicitur assicurationis, adijci potest: puta si res, super qua census fundatus est, secundum totum, vel secundum partem intereat, non damno emptoris, sed venditoris id accadat: ideòque venditor nihilominus obligatus sit censum, restituta sorte, redimere: vel super alia refrugifera, aut quampiam negotiatione constituere: Modò obligatio hæc venditori compensetur, pretium census augendo: vel quod eodem redit, minorem pensionem designando.

Probatur secundò: De æquivalentibus idem iudicium esse debet, l. ult. ff. mandati. Sed hi duo contractus re ipsa, & secundum effectum æquivalentes sunt: quorum vnus societatis est; si mercatori des centum aureos, eo pacto, ut is, instituta negotiatione, siue lucrum ex pecunia capiat, siue damnum patiat, annuos quinque tibi soluere obligatus sit: insuper etiam ipsam sortem restituere, cum vel tibi, vel ipsi mercatori societatis contractum dissolvere placuerit. Alter verò est contractus noster censuali, quo centum aureis v. g. emis ab agricola, mercatore, caupone, opifice, ius percipiendi quinque annuos ex ipsius redditibus vel lucris: eo pacto, ut quauis accadat, nullum lucrum, nullòque redditus annuos ab eo percipi, nihilominus annuatim pendere tibi cogatur; ipsam quoque sortem restituere, cum vel tibi, vel illi censum redimere libuerit. Prior autem ille societatis contractus, tali forma celebratus, defenditur ab Hostiensii in sum. tit. de usuris, §. an. aliquid, Nau. cap. 17. man. n. 255. & comment. de usuris, notat. 14. Ioan. Maiore in 4. d. 15. quæst. 49. Couar. 3. resol. c. 2. n. 4. Binsfeld. in c. nauiganti, de usuris, q. 8. Mol. disp. 417. Barthol. Medina in instruct. confess. lib. 1. cap. 14. §. 27. Angles in floribus, p. 2. de contractu societ. diffic. 2. Pet. Nauar. lib. 3. cap. 2. n. 442. Lessio c. 25. dub. 3. Valent. q. 24. p. 2. argum. c. per vestras, de donat. inter virum & uxorem. Ergo posterior quoque contractus censuali, dicta forma institutus, iure defendi potest.

Instabit aliquis: Discrimen hoc esse, quod in priore societatis contractu dominium sortis non transferatur in mercatorem: sicuti in posteriore censuali contractu transfertur: ex quo sequitur, sub priore contractu non posse latere mutuum, sicuti sub posteriore. Respondeo: Quando contractus societatis ita instituitur, ut negotiator omne periculum pecuniæ collatæ in se recipere debeat, eandemque non determinatè, sed secundum æquivalentem restituere obligatus sit: profectò apparet, dominium sortis, seu pecuniæ translatam fuisse re ipsa, & secundum effectum.

12 Probatur tertio: Contractus, qui in aliqua regione celebrari solitus est, præsertim à viris doctis, & honestis: licet dubij, & obscuri iuris sit, atque usuræ speciem quandam præ se ferre videatur, non tamen ideo iniustus, & usurarius censeri debet, sicuti docet Bartolus in l. quis sit fugitiuus, §. apud Labeonem, ff. de ædil. edict. Tiraq. lib. 2. de utroque retractu, §. ult. n. 127. Nauar. lib. 5. de usur. consil. 4. edit. 2. Binsfeld. cit. c. nauiganti, q. 10. concl. 3. Passim autem in Germania nostra à viris etiam probis, & doctis, instituitur census iste utrinque redimibilis, cum pacto assicurationis. Ergo cessare debet præsumptio usuræ.

Confirmatur. Neutra pars contrahentium de damno



queritur; imò vtrique ex tali contractu commodum se capere fatetur. quod nobis argumento esse debet, contractum licitum esse. Sicuti è contrario, si altera pars plerumque pauperior reddatur ex aliquo contrahendi modo, signum est, contractum iniquum esse, sicuti annotauit Maior in 4. d. 15. q. 46. paulò post principium.

Denique plures audiui, quiadeò contractum illum germanicum in his regionibus inualuisse testantur, vt sine maxima negotiationum & commerciorum iactura tolli non posse videatur. Ergo non est causa, cur contractum iniquitatis damnemus.

Duo addenda sunt: Primum. Cur in assertione addiderim, *preferim realis*; causa est, quia à contractu personali vtrunque redimibili cum pacto assicurationis, multi viri docti magis abhorrent; quòd maiorem vsuræ similitudinem gerere videatur. Siquidem in eo perinde, ac in mutuo, persona immediate obligatur: in reali autem censu obligatio rei inhæret, atque inde in personam tendit. Quòd quamuis in praxi non improbem, rem ipsam tamen attentius considerans, parum inter vtrumque contractum interesse arbitror. Nam pactum assicurationis, ita conceptum, vt, tametsi res pereat in censu reali, nihilominus persona, vnà cum hæredibus eius, obligata sit, facit censum virtute personalem esse, adeoque quasi mixtum ex reali, ac personali, vtriusque comoda participat, sicuti notauit Lessius dub. 11. Quamobrem non tantum actionem realem tribuit erga rem; sed etiam, pereunte re, erga personam. Quare nemo est, qui non emere malit censum realem fundatum super vno, vel pluribus amplissimis prædiis, quam censum merè personalem.

13 Imò tametsi census personalis hypotheca subnixus sit, tamen amplius quid habet census realis: Quia onus censuale per se ac directè transit ad quemuis rei, super qua census locatus est, emptorem, legatarium, aliumue possessorem, qui proinde actione confessaria statim conueniri potest. Sin verò hypotheca ad securitatem census annexa alienetur, tertius ille possessor non nisi in defectum principalis debitoris, si videlicet excussis eius bonis soluendo non sit, per actionem hypothecariam, seu quasi Seruianam conueniri potest, l. hæc si debitor, Cod. de pignor. Idque discrimen annotauit Mol. to. 2. disp. 383.

Alterum ex Lessio cap. 20. num. 106. & cap. 22. num. 62. Valent. disput. 5. quæst. 25. p. 2. Licet homines rudes & indocti minus intelligant, cur vltra sortem, suo arbitrio repetendam, pensiones annuas recipere possint; eo ipso tamen ab vsura & iniquitate excusari, quòd aliorum proborum, & doctorum virorum exemplum secuti, nihil titulo illicito, vel vsurario; sed modo, quo fieri potest, iustitissimo accipere proponunt: *Taciti enim, & expressè eadem virtus est.* Deinde, licet valde consultum sit, vt in censuali contractu certæ verborum formulæ à doctis approbatæ vsurpentur; si tamen simplices & indocti, eiusmodi contractum germanicum instituentes, vtantur verbo mutuandi, *leihen*, aut *leihen*, non tamen idcirco de vsura condemnandi sunt, sicut bene annotauit Maior in 4. d. 15. quæst. 33. Siquidem in cognoscenda specie contractus magis attendendum est ad pacta in illo apposita, quam ad nuda verba, ait Abb. in c. constitutus, num. 22. de relig. domibus, & in c. illo, de pignor. Adde, quòd apud Germanos vocabulum *leihen* valde generale sit, cum omnem ferme concessionem significet.

14 ASSERTIO VI. Vsura est, si census realis, vel personalis, iuncto pacto assicurationis, constituitur, vel continetur cum persona non habente redditus annuos, siue ex fundo, siue ex propria industria. Ita omnes. Eadem queratio est, si contractus societatis cum eodem assicurationis pacto instituitur cum eo, qui negotiari non

solet, teste Nauarro cap. 17. numer. 258. Binsfeldio cit. c. nauiganti, quæst. 8. conclus. 5. Probatur: Tunc enim re ipsa aliud non fit, quam quòd mutuum datur, cum pacto, vt præter sortem, annum auctarium solvatur: licet hoc ipsum sub nomine emptionis, siue census, vel societatis, tanquã pallio occultetur. Plus autem valet quòd re ipsa agitur, quam quòd simulatè concipitur, argument. l. cum ea, Cod. de transact. Confirmatur. Si enim censualem contractum sine vilo rerum ac personarum discrimine defendamus, vno veluti falsis ictu omnis vsura præcisa erit: quam tamen iura cum diuina, tum humana seuerè prohibent, mutuandique officium gratuitum esse decernunt.

Igitur in eo essentialiter differt censualis iste Germanicus contractus à mutuo vsurario; quòd ille certum fundamentum requirat, in quo fundatus sit: cum sit ius percipiendi redditus annuos ex alicuius fundo, negotiatione, opificio, &c. certo pretio comparatum: eòque fundamento penitus ruente (puta si venditor census eius hæredes nullos annuos redditus habere incipiant) contractus censualis nullum amplius locum habere potest, quamuis, ob adiectum assicurationis pactum, fors repeti queat. Contractus mutui verò cum quacunque persona rectè instituitur, vt etiam ad hæredes, & hæredum hæredes transmittatur obligatio, sine vilo ordine ad requisitum aliquod fundamentum. Sin autem vltra sortem mutuum datam aliquid accipitur, secluso alio titulo, id vsurarium est.

Ad extremum quæres. Quòd pretium iustum census censi debet? Respondeo, quòd vel lex, aut consuetudo, vel in certo casu iusta Principis voluntas taxauit: Sin verò taxatum non fuerit, quòd æquitas dicat, secundum conditiones contractus, & vtriusque contrahentis grauamina, aliisque circumstantias. Quòd si pretij iusti limites excedantur, peccatum erit aduersus iustitiam; non tamen vsura. Ita Couar. 3. resol. c. 9. n. 6.

## CAP. XIX.

## De Cambio.

## SUMMARIUM.

- 1 Cambium, seu permutatio pecuniarum inter se, est contractus secundum se licitus.
- 2 Cambium aliud est, quòd minus dicitur, & aliud locale.
- 3 Plures tituli sunt, cur campfor in cambio minuto plus accipere possit, quam dedit.
- 4 Pecunia duplicem usum habet; vnum principalem, vt tanquam pretium rerum emptionibus seruiat; alterum secundarium, vt vnum pecunie genus cum altero commutetur. In commutatione pecuniarum seruari debet æqualitas inter datum & acceptum; quare iniquissima cambia fuerunt, quæ annis superioribus in Germania exercebantur.
- 5 Si famulus pecuniam domini sui proprio nomine cambiando lucratur, lucrum sibi acquirit; licet de damno teneatur, si quòd contra domini voluntatem cambiando inferat.
- 6 Instituti sunt in cambio locali aliquid plus accipiendi, quam datum fuit.
- 7 Tabellarius conductus à Titio vs Augustam est, si postea etiam ab alio rei signato conducatur, vt idem iter in grati sui conficiat, damnum facile non potest, nisi ab vtroque integram mercedem accipiat.
- 8 Merx multum distans à loco, in quo venditur, tanto minoris aestimari solet.
- 9 Auctarium cambij, quòd à mercatoribus secundum temporis expectandi proportionem exigitur, probabiliter defendi potest.
- 10 Cambia secra dicuntur, quibus nullus iustus lucrandi titulus subest.

Cambium est permutatio pecuniarum pro pecunia. Differt à mutuo, quòd contractus mutui



vnica pecuniæ traditione perficitur, quæ reddi debet post temporis interuallum, vel eadem, vel alia eiusdem generis, ac bonitatis. Cambium autem, cum sit species quædam permutationis, *do ut des*, non ante omnino perfectum censetur, quam vtrinque pecuniarum traditio facta sit. Deinde cambium semper fit ob aliquam diuersitatem pecuniarum vltro, citroque dandarum; siue per se, siue per accidens ratione loci, &c. cuius diuersitatis in mutuo non habetur ratio.

Interim verò in cambiis alij etiam interueniunt contractus, atque tituli, quibus lucrum capere possitis, à quo petitur, vt pecuniam permutet; quique *campfor* dici solet; alter verò, ad cuius petitionem pecunia commutatur, *campfarius*, sicuti videre est apud Couar. de collat. vet. numism. c. 7. n. 4. Conradum q. 99. suppos. 2. de contractibus, Mol. disp. 398.

Quamuis autem ars ista numularia, in pecuniarum permutatione consistens, valde quæstiosa, & non secundum naturam sit, auctore Aristot. lib. 1. Polit. cap. 6. quandoquidem pecunia, propter necessitatem introducta primùm est ad res alias emptione comparandas: postea verò ipsarum inter se pecuniarum permutationes instituta, potissimum quæstus, seu lucri pecuniarij causa, cuius augendi infinita hominum cupiditas est. Nihilominus negotiatio ista permutandi pecunias secundum se iniusta non est, & propter varias causas infra explicandas, Reipublicæ utilis esse potest, vti edocet S. Thom. 2. 2. q. 77. a. 4. in corp. iuncta interpret. Caietani, Conradus cit. quæst. 99. conclus. 3. Medin. Cod. de rebus per vsuram acquisitis, quæst. 5. §. Quibus præmissis. Sotus lib. 6. q. 8. a. 1. Couar. cit. cap. 7. num. 4. Syuest. ver. vsura, 4. q. 1. Quod si immoderata lucri cupido coniuncta sit, ea ad peccatum auaritiæ spectat: ex qua secluso dolo & iniquitate, nulla restituendi obligatio nascitur; licet campfor sæpius cambiando ingens lucrum industria sua ceperit. Monendi tamen sunt eiusmodi homines in sacra Confessione, vt hac ditescendi arte moderatè, & sine Communitatis detrimento vtantur; & partem lucri sui in elemosynas pauperum distribuant. quod interdum à Confessario loco penitentis imperari potest.

Duplex est cambium; Vnum, in quo pecunia vnus formæ, aut materiæ permutatur cum pecunia alterius formæ, aut materiæ; puta maior cum minore, vetus cum noua, patria cum externa, aurea cum argentea, argentea cum cuprea. Vocari solet cambium *minutum*; quia in eo frequenter pecuniæ grandiores cum minutioribus commutantur. Item cambium *manuale*; quia de manu ad manum eodem loco, ac tempore perfici solet.

Alterum verò cambium est, quod dicitur *locale*, in quo pecunia præsens commutatur cum pecunia distante in alio loco. Dicitur etiam solet cambium *per literas*; quia plerumque literæ dantur, quibus mandatur correspondenti, vt in illo altero loco pecuniam soluat. Porro cambium istud locale duobus modis institui potest: Primò, Si campfor præsentem pecuniam prius accipiat, vt postea in loco distante per se, vel per suum correspondentem restituat. Secundò, Si campfor pecuniam præsentem prius numeret, vt postea in loco distante per se, vel per suum correspondentem recipiat.

Quamuis autem nemo dubitet, quin eiusmodi commutationes pecuniarum, si secundum æqualem valorem fiant, in se iustæ sint; quia tamen campfor non æqualem, sed minorem pecuniæ valorem dare, quam accipere, adeoque lucrum capere solet; idcirco examinandum est, quinam in vno quoque cambiorum genere iusti tituli, seu causæ lucrandi esse possint.

Quod attinet ad cambium minutum, Primus titulus accipiendi plus, quam dandi, est locatio operæ, &

obsequij, quod campfor præstat congregando omnis generis pecunias, quæ permutari debeant; expectando, & paratum se præbendo ad easdem commutandas, secundum campfariorum voluntatem: Cuius rei gratia & seipsum, & sæpe plures famulos alere cogitur: idcirco huius impensi laboris, & obsequiorum iustam compensationem iure exigit; præsertim, si ad tale officium exercendum publicâ Magistratus auctoritate constitutus sit. Quæ de re Maior in 4. d. 15. quæst. 37. Nauartus cap. 17. man. num. 288. & auctor consil. 31. apud Nauarum de vsur. notab. 3. edit. 2. Medin. de rebus per vsuram acquisitis, quæst. 5. Couarruias in opuscul. de collat. veterum numismatum, c. 7. n. 4. Mol. to. 2. disp. 399. Less. lib. 2. c. 23. dub. 2.

Alter titulus est lucri, vel commodi cessantis: Nam sæpe accidit, vt vnum genus monetæ plures, easque pretio æstimabiles commoditates habeat, quam altera. Inprimis enim monetæ grandiores, vt ducati, thaleri maiorem numerandi, transferendi commoditatem habent, quam monetæ minores, vt crucigeri, numi. Secundò, moneta antiqua frequenter purioris materiæ, & maioris etiam ponderis est, quam moneta noua eiusdem taxationis: quo casu æquum est, vt antiquæ monetæ valor supra primam sui ætimationem accrescat, sicuti notauit Molina disp. 4. or. 9. dicendum deinde. Tertio, Monetæ aureæ, & argenteæ, quæ in aliis etiam locis, præsertim confinibus, vsitate sunt, maiorem commoditatem, negotiandique opportunitatem habent, quam illæ, quæ in confinibus regni; vel omnino non accipiuntur, vel minore valore. Quarto, Si præstantiores monetæ, ducati, thaleri, &c. ex prouincia, vbi cudentur, passim in alias prouincias, vbi earum maior valor est, extrahantur: merito pluris fiunt, quam aliæ minores monetæ: tum ob magnam, quam illæ habent, opportunitatem cambij localis: tum etiam quia magna tunc potest esse præsumptio, earum monetarum valorem breui tempore auctum iri, sicuti notauit Medina q. 7. de rebus per vsuram acquisitis.

Id verò in quæstione est: Si nihil tua inter sit, huiusne, an alterius speciei pecunias habeas: quia tuasque, commodiores censeris solent, in alium locum non transferres, sed statim communi valore expendere debebis, nisi permutes: vt cum in ea commutatione seu cambio aliquid supra taxationem accipere licitum sit? Negat Medina de rebus per vsuram acquisitis, q. 7. eademque videtur sententia Caiet. opuscul. de cambiis, c. 1. Si enim iusta est, vt suppono, Principis taxatio, vt thalerus v. g. valeat centum crucigeros, sequitur, in commutatione thaleri cum pecuniis minutioribus (per se loquendo, & secluso extrinseco interesse damni emergentis, vel lucri cessantis) amplius, quam centum crucigeros iuste non accipi.

Sed contraria sententia communior est, & verà, quam indicat Auctor apud S. Thom. de regimine Principum, lib. 2. c. 14. & clarè docet Sotus lib. 6. p. 9. a. vn. Nau. c. 17. num. 288. Sa ver. cambium, n. 2. Tol. lib. 5. cap. 51. Less. c. 23. dub. 2. Ratio est: Quia pecuniæ duplicem vsus, commoditatemque habent, vnum principalem, vt intersuient rerum aliarum emptionibus, debitorumque solutiõibus: atque ad hunc tantum finem à Magistratu taxationem acceperunt: alium verò vsus pecuniæ habent secundarium: vt vnum monetæ genus cum alio genere permutetur: inter quæ si aliqua rationabilis diuersitas commoditatis appareat, nihil obstat, quominus à legali taxatione recedatur: modo nulla falsitas aut fraus interueniat: & auctarium, quod supra taxationem accipitur, iustum sit: videlicet quod lege, aut consuetudine loci taxatum, vel si taxatum non est, quod spectatis omnibus circumstantiis, æquum appareat, sicuti docent Sotus, Nau. Tol. ll. cc. vbi consequenter aiunt, contra Caiet. cit. a. 1. Eiusmodi cambiendi, lucræ-



dique industriam, cum suapte natura iusta sit, non tantum iis licitam esse, qui Reipublicæ auctoritate constituti sunt, sed etiam aliis quibuscunque, præterquam si Magistratus prohibeat: quamvis etiam hoc casu contractus cambij subsistat; nullaque restituendi obligatio sequitur, si, seclufa prohibitione, titulus seu causa auctarij accipiendi non defuit, sicuti docet Molin. tom. 2. disput. 399. §. illud admonuerim, & disput. 405. in fine. Less. cit. dub. 2. n. 17. contra Sotum cit. a. vn. in fine.

Quare neque id certum est, quod ibidem Sotus ait, esse peccatum mortale, contra iustam Magistratus prohibitionem cambia exercere. Quandoquidem eiusmodi leges prohibentes cambia, quæ suapte natura iusta sunt, sub pœna v. g. confiscationis bonorū, videri possunt merè pœnales, siue obligantes tantum ad soluendam pœnam, si quis in cambiando deprehendatur. Talium enim multarum solutione compensandum videtur damnum, quod alioquin Principi, seu Magistratui ex frequentibus non necessariis cambiis provenire potest. Quare non illico damnare hominem peccati mortalis, si cambium contra legis prohibitionem exerceat; præsertim cum conciuibus, aut provincialibus: Sin autem cum exteris instituat talis modo, ut bonæ pecuniæ extrahantur, & deteriores recipiantur; cedere id potest in graue Reipublicæ detrimentum: ut proinde non desit facultas Magistratui, tales negotiationes cum exteris prohibere per legem obligantem non tantum sub pœna, sed etiam sub culpa, iuxta ea quæ dixi l. i. tract. 4. c. 14.

Loquor autem tantum de cambiis, quæ ex obiecto iusta sunt, seu in quibus æqualitas seruetur inter datum & acceptum: Non item de iniquissimis cambiis, quæ præteritis annis multi in Germania exercuerunt, occasionem fraudis accipientes ex diuersitate veterum, & nouarum monetarum. Pro denario v. g. veteri argenteo, veluti beneficium alteri præstantes, dederunt duos, vel tres eiusdem extrinsecus inscriptæ taxationis denarios, septuplo deteriores secundum intrinsecum valorem: postea acceptum argenteum denarium cum vitiatis cupreis denuo commutando, pro vno septem receperunt: quos iterum cum argenteis permutantes, & argenteos deinde cum cupreis, breui temporis spatio ex non magna pecunia ingentem numerorum copiam collegerunt, & ex pauperibus repente diuites facti sunt, per iniquitatem, & cum Reip. detrimento.

Alia quæstio est: Si famulus grandiores pecunias, quas ad mercatores, aliosque creditores deferre debuerat, cum aliis minoribus monetis permutando, lucrum acquirat, vtrum peccet, & ad restitutionem obligetur? In hac q. aliqua supponere debemus: I. Quod dominus creditoribus non teneatur pecunias grandiores in specie soluere; sed satisfaciatur etiam per solutionem minorum monetarum æqualis taxationis. II. Quod famulus non plus à mercatoribus, aliisve creditoribus in utilitatem domini sui consequi possit, seu grandiores, seu minores pecunias ipsis soluat. III. Quod famulus neque expressum, neque præsumptum mandatum habeat pecuniis negotiandi, seu lucrandi; ideoque proprio nomine, ac periculo cambium instituat.

His suppositis resp. ex doctrina Mol. to. 2. disp. 402. Less. lib. 2. c. 23. dub. 2. prope fin. & dico I. Famulum ad nullam restitutionem teneri ipsi domino; neque comparatione eius grauius peccare. Prior pars probatur: Quia si commodatarius, depositarius (imò etiam vsurarius, fur, vel similis iniquus possessor) ex alienis pecuniis negotiando aliquid lucretur, lucrum sibi ipsi, non pecuniarum domino acquirit; quamvis interim teneatur ad damnum refarciendum, si quod exinde domino accidat, sicuti expressè docet S. Tho. 2. 2. q. 78. a. 3. Syl. ver. vsura, 6. q. 2. Med. de rebus per vsuram acquisitis, q.

4. ad 4. Couar. 3. resol. c. 3. n. 6. Ratio est: Quia quod ex pecunia (aliisque rebus similib. quæ vsu absumuntur, & frugiferæ non sunt) acquiritur, id non est lucrum, siue fructus rei, sed potius industriæ; quare non rei domino debetur, sed negotianti, siue industriam applicanti. Altera pars inde probatur: Quia licet famulus peccet, & aliqualem iniuriam domino inferat, si contra eius voluntatem pecunias expendat, iisque lucretur, re ipsa tamen nullum illi damnum infert: quia, ut suppono, eius debita æquæ à famulo soluantur: quapropter neque magna, aut mortalis hæc iniuria censenda erit.

Aduerto tamen, hæc quidem vera esse, si talis pecuniarum permutatio semel, aut iterum à famulo fiat absque domini sui detrimento. Sin verò Officialis aliquis consuetudinem habeat pro monetis grandioribus, melioribusque, alias minores, ac deteriores substituendi, & expendendi lucri sui gratia; non potest hæc res non in graue domini damnum cedere: tum quia sæpe continget, ut merces maiore pretio emi debeant, propter odium minorum monetarum: tum quia turpe est, ex alicuius Magnatis domo, aut Principis Camera semper provenire monetas minores, deteriores: quæ etiam res absterre solet negotiatores, ut ægrè suas merces pro talibus pecuniis vendant. Quare rectè agunt Magnates, si eiusmodi pecuniarum permutationem Officialibus seuerè prohibeant, ac puniant: quia si talis licentia hominibus suorum commodorum audissimis, in vno, aut altero casu permittatur, statim eam ad multos inconcessos extendent. Accedit, quod contrectare alienam pecuniam, eiusque vsu, domino prohibente, sibi vendicare, furti species quædam censeatur: quod crimen tanquam noxium Reipubl. grauius puniri solet.

Dico II. Si dominus velit omnino, ut pecuniæ in eadem illa specie auri creditoribus obueniant; tum peccat famulus, & iniuriam infert creditoribus, si eas contra ipsorum voluntatem negotiando, vel cambiando commutet cum aliis minoribus: Et grauius quidem peccat, si creditoribus exinde lucrum cesset: quia ipsimet simili ratione cambi, vel commodæ mercationis lucrati fuissent, si pecunias aureas accepissent: quod proinde damnum, siue lucrum cessans famulus compensare tenetur. Ratio est clara: Quia hoc casu creditores ius habent, secundum domini, siue debitoris voluntatem ac mandatum, exigendi à famulo pecunias grandiores in specie: quas, si ille non ita soluat, iniuriam ipsis infert, & consequenter damnum, vel lucrum ea de causa cessans compensare eisdem tenetur, sicuti docet Mol. to. 2. disp. 402. concl. 2. Quod si verò hoc casu creditoribus nullum ea de causa lucrum decessit, quia pecunias aureas non maiore pretio, quam minores expensuri fuissent; tunc ad nullam ipsis restitutionem faciendam obligatur famulus; neque censendus erit grauius peccasse, per se loquendo, cum nemini damnum graue intulerit, teste Mol. conclus. 3.

Dico III. Si dominus, qui pecunias mittit, putatur contentus, aut non ægrè laturus, quod famulus talem rationem cambiendi & lucrandi instituat, tunc nihil peccat famulus, & ad nullam restitutionem creditoribus tenetur, tamen si illa pecuniarum commutatio contra ipsorum voluntatem accidat, & causa sit lucris ipsis cessantis. Ratio est: Quia creditoribus ante traditionem nullum ius in pecuniis acquisitum fuit. Alia ratio est, si famulus, aut quilibet alius mandatarius ab ipso creditore destinetur, ut eius nomine pecunias recipiat; tunc hoc ipso, quod tali mandato pecunia traditur, mandanti creditore ius ad illam acquiritur; ideoque ei iniuria fit, si pecuniæ à famulo permutentur, cum damno, aut cessante lucro ipsius mandantis: quod proinde ipsi compensari debet.

Quod attinet ad primam speciem cambi localis, in



quo campfor præsentem pecuniam prius accipit, vt alibi restituat, sed cum detractioe, & lucro suo: v.g. Monachij accipit à campfario 100. thaleros, datis eidem literis, vt Romæ à suo Correspondente accipiat tantum  
 690. Eiusmodi rationem cambij cum iusto & consueto campforis lucro siue auctario, communiter defendunt DD. Caiet. tr. de cambiis, c. 1. & 6. Nau. cit. c. 17. n. 289. & in comment. de vsuris, c. vlt. n. 21. Conrad. de contract. q. 99. concl. 4. Sotus lib. 6. de iust. q. 10. a. 1. Mol. disp. 403. Less. dub. 3. Causa autem plus accipiendi, quã postea dandi, est accessorius contractus locatæ operæ ad pecuniam formaliter, aut virtualiter transferendam ad locum, quo campfarius vult. Si enim Monachio Romam vsque 100. thaleros transferre debeas, laborem ac periculum subiturus es, & expensas factururus: quo onere te liberat campfor, cum in se recipit numeraturum tibi Romæ thaleros 100. hoc autem obsequium pretio estimabile est. Quamobrem, quod longius distat locus, ad quem cambium instituitur, & quod periculosior via, eò maius auctarium exigi potest. Neque refert, tametsi campfor nullum inde onus, sed magis fortasse commodum ferat: si nimirum thaleros 100. quos à te Monachij accipit, Romam nunquam transmissurus est; sed Monachij, instituta noua ratione cambij, alteriusve generis negotiatione, iterum lucraturus: Nam id totum ad campforis industriam pertinet. Perinde ac si nuntius mercede conductus ad mille aureos Romam transferendos, postea aliquem reperiat, qui Romæ aureos 1000. certissimò numeraturus est, non minus locationis mercedem accipere potest, quam si re vera transtulisset, teste Less. lib. 2. c. 23. dub. 3.

Præterea, si nuntium conduxisti, vt equum Augustam duceret, licet ei commodissimum sit Augustam proficisci negotiorum causa, ob quæ alioquin, etiam conducto equo, profecturus fuisset; is nihilominus pro locata opera pretium accipere potest, spectato iustitiæ rigore, sicut docet Molin. disp. 405. §. simili modo, Less. dub. 3. & 4. Esto, quod si nuntij commoditatem illam cognitam habuisses, non tali, sed alio modo cum illo pactus fuisses.

Item, si aliquis, v.g. studiorum causa, Augusta Romam profecturus, tradat pecuniam Mercatori Augustano cognato suo, eumque roget, vt pecuniam hanc alicui alteri det ad cambium; quod eam deinde Romæ cum lucro seu auctario recipere possit, is nihil iniquum committere videtur, sicuti docet idem Molin. contra Medinam quæst. 9. de rebus per vsuram acquisitis, §. potest etiam. Ratio horum est: Quia obsequium, quod nuntius ille, vel mercator alteri præstat, reuera dignum est tali stipendio, seu auctario: Per accidens verò est, quod ipsemet nuntius, vel mercator ex huiusmodi contractu maius commodum capturus est: quandoquidem per id nihil decedit alteri personæ, qua cum contractus institutus fuit, sicuti rectè etiam notauit Caietan. cap. 6. de cambiis, §. si autem. Illud tamen notant plerique, quod commoditas illa virtualis traiectionis, quæ, vt explicatum est, frequenter accidit etiam cum lucro campforum, multum diminuat consuetum pretium, siue auctarium cambij localis.

7 Ex dictis non improbabiler ab iniustitia defendi poterit praxis quorundam nuntiorum, qui ab vno mercede conducti ad literas deferendas, postea, re dissimulata, ab altero se iterum ad eundem locum conduci sinunt, mercede integra postulata. Quia obligatio illa, & obsequium, quod secundo conductori præstatur ad literas v.g. deferendas, absolute loquendo, tanta mercede dignum; & per accidens esse, atque ad industriam seu fortunam nuntij spectare videtur, quod alioquin tale iter in suum, vel alterius commodum conficere debeat; præsertim cum ea re secundo conductori nullum damnum inferatur; quippe, qui, vt ponimus, proprium

nuntium cõstituere, eique similem mercedem dare debuisset. Simile est, si auriga iusta mercede accepta, aliquē Monachio Augustæ vexit: postea reuersurus Monachium tantundem mercedis ab altero accipit, ac si nullam redeundi necessitatem haberet. Id enim ad industriam eius ac fortunam spectare videtur. Arcendi tamen sunt homines ab eiusmodi lucris immodicis. Si autem abstinere nolint, interdum ob eam, quam dixi, rationem, à peccato mortali excusari posse videntur.

Alteram speciem cambij localis, in quo campfor prius dat pecuniam in loco præsentem, vt postea cum auctario recipiat in loco distante, communiter etiam defendunt Doctores Caiet. c. 6. de cambiis, Medina q. 8. & 9. de rebus per vsuram acquisitis, Sotus q. 10. a. 1. Conradus q. 99. conclus. 4. §. secundò. Nau. c. 17. n. 289. & seqq. Mol. disp. 404. Less. c. 23. dub. 4. Ratio est similis: Si enim Titius pecunias Roma Monachium transferre debeat, laborem, & pericula subibit, expensas faciet: quod onere eum liberat campfor, cum ipsi pecunias Monachij numerat; recepturus Romæ per se, vel correspondentem suum: in cuius obsequij compensationem iure aliquam mercedem, siue stipendium exigit.

Ex quo colligit Mol. cit. disp. 404. §. ex dictis intelligetur, cum Caiet. cit. c. 6. Nau. cit. n. 299. Si res vendenda existat in loco distante, ad quem venditor sine expensis, periculo, damno suo, neque accedere, neque rem ipsam aut pretium venditionis transportare possit: tunc tantò minbris æstimari, minbreque pretio ab altero emi posse: tametsi is deinde in loco, vbi res sita est, sine villo suo incommodo vel labore, pluris eam distracturus sit: nam id per accidens est respectu venditoris, totumque ad fortunam, vel industriam emptoris pertinet. Accedit, quod iustitia pretij in emptionibus, cõductionibus, &c. non ex priuata alicuius commoditate: sed ex communi hominum æstimatione, ac sensu accipienda sit, vt supra dictum fuit.

Simile quiddam in cambio accidit, ob diuersitatem valoris monetæ in diuersis locis: nam ducatorum v.g. plerumque maior est valor in Germania, cum ordine ad pecunias minutiores, quàm sit valor ducatorum in Italia, & Hispania: quamobrem censerì non debet cābium iniustum; si mercator in Germania pauciores ducatos numeret, recepturus deinde plures in Italia: esto eos deinde per se, vel Factorem suum, eo ipso valore, quo in Germania æstimantur, distrahat: instituto v.g. contractu mutui, cambij, vel emptionis cum aliquo in Germaniam profecturo: hoc enim spectat ad campforis illius industriam. Qua tamen in re in primis considerare oportet, quomodo valor thalerorum, ducatorum secundum extrinsecam æstimationem in vno loco auctior sit: An propter intrinsecam deteriorationem monetarum minutiorum. Tunc augmenti illius in cambiis nulla ratio habenda erit: cum illud non sit per se, sed omnino per accidens. Thalerus, inquam, secundum se & in veritate plus non valet, siue dicas, eum continere centum quinquaginta pазios arosos, siue dicas, continere septendecim, aut octodecim pазios argenteos, qui æquivalent, imò meliores sunt quàm 150. arosi: An verò valor extrinsecus thalerorum, ducatorum auctior sit sine intrinseca mutatione minutiorum monetarum: tunc eius augmenti maior ratio haberi potest: ita tamen, vt etiam attendatur ad accidentalem seu fortuitum monetarum valorẽ, de quo Less. in cit. dub. 4. Fieri enim plerumque solet, vt quantò monetæ grandiores maiorem taxationem habent in ordine ad monetas minutiores, tantò magis rerum omnium venalium pretia augeantur: vt proinde, ob hanc difficultatem res comparandi, de monetarum vtilitate non nihil decedat, sicuti annotauit Mol. to. disp. 407. vbi contra Nau. c. 17. num. 295. probabiliter defendit praxin mercatorum vbique consuetissimam, exercentium inter se cambia, aliisque negotia-



tionem per monetas grandiores secundum eundem numerum, vel idem pondus: do tibi hinc centum ducatos, mille thaleros; vel unam marcham argenti, aut auri, ut tanto numero, vel pondere alibi restituas, nihil attendendo ad diversum extrinsecum valorem: tum quia is valde instabilis, & incertus est, cuius proinde in frequentissimis commerciis ratio haberi non potest: tum quia auctio illa monetarum comparatione numerorum minutorum, si non omnino, saltem ex parte aliis incommodis minuitur: sicuti & vice versa, decretio monetarum comparatione numerorum minutorum, si non omnino, saltem ex parte aliis commodis compensatur: quia ubi pecuniae minorem taxationem habent, ferme etiam rerum pretia tolerabilia esse solent.

Restat quaestio. Vtrum cambium cum auctario propter expectandi temporis moram ab iniustitia excusari possit; videlicet praxis illa mercatorum, qui proficiscentibus ad nundinas v.g. Francofurtenses, pecunias ad cambium dant, tanto maiore cum incremento Francofurti recipiendas, quanto longiore temporis intervallo nundinae distant; ita ut si vno tantum mense ante nundinas pecuniam campario numerent, duos v.g. grossos, vel crucigeros in singulos florenos lucrentur; si duobus mensibus ante numerent, tres lucrentur; si tribus, quatuor lucrentur, & sic deinceps. Pro parte quaestionis negativa stat Sol. lib. 6. q. 10. a. 2. Caiet. in opusc. de cambiis, c. 6. Quia mercatores isti ob solam dilationem solutionis pretium cambij augere videntur, quod usurarium esse constat ex c. consuluit, c. in ciuitate, de usuris.

9 Nihilominus praxin hanc ab usura & iniquitate defendunt Mol. disp. 404. Less. dub. 6. Et primo quidem ratione maioris lucri cessantis, quod diutius pecuniae solutio differtur, sicuti notauit Nau. l. cit. & Med. de rebus per usuram acquisitis, q. 8. Siquidem vnicum quasi instrumentum, quo mercatores negotiari, ac lucrari solent, est pecunia. Verum titulus iste augendi pretij accidentarius est, & interdum abesse potest; si nimirum campfor pecuniam in cambium datam vel non exposuisset negotiationi, vel non tantum ex ea lucratus fuisset. Secundo itaque dicta cambiendi ratio defendi potest ex ipsa contractus natura secundum se, ex doctrina Nau. c. 17. n. 291. Mol. disp. 406. Less. cit. dub. 4. n. 38. Tamen si monetarum valor publica lege taxatus sit, taxationem tamen istam solum intelligi in ordine ad commutationes & commercia eiusdem loci; non item in ordine ad alia loca, ad quae commutationes & commercia in pecuniis instituuntur. Quandoquidem valor pecuniae in variis locis varius esse solet, non tantum formalis ac indiuisibilis in genere monetae, secundum taxationem legis, vel consuetudinis; sed etiam valor pecuniae materialis, ac diuisibilis in genere mercis secundum varias locorum circumstantias. Nam ubi maior est pecuniae inopia, vel maior negotiandi ac lucrandi opportunitas, ibi pecunia pluris aestimatur; quam ubi maior est pecuniae copia, vel minor negotiandi, ac lucrandi opportunitas. Quamobrem mercatores pecuniam in vno loco considerare solent ut mercem; in altero vero loco ut pretium; & 100. v.g. florenis Antuerpiae numeratis (ubi, & quando ob dictas circumstantias pluris aestimatur) emunt 102. vel 103. florenos numerandos Francofurti, vel Agultae, ubi, & quando pecuniae minoris aestimantur. Porro sicuti in aliis emptionibus ac venditionibus accidit, ut pretia rerum augeantur, si multi emptores confluant, qui mercibus valde indigeant ad maiorem suam commoditatem; ita etiam accidit in cambio considerato per modum emptionis: Quod longius enim nundinae distat, ideoque plus temporis campforij habituri sunt ad negotiandum, & lucrandum; eo plures ad sunt, qui cambium postulent, ob maiorem suam utilitatem: quandoquidem (ut recte Lessius notauit dub. 6. n. 56.) vnum

cambium plurium mensium ad solutionem concessorum, virtute aequidat pluribus cambiis vnus mensis ad solutionem concessi.

Ergo merito ob has causas & circumstantias tanto magis commune cambij pretium & incrementum augetur, quanto maius temporis intervallum a nundinis est, in quibus cambij solutio fieri debet, Accedit, quod cum rerum pretia arbitraria plurimum pendeant ex communi hominum cuiusque loci aestimatione, ac consuetudine, non facile cambiorum pretia & auctaria inter mercatores consueti, iniustitiae damnanda sint; licet sepe penumero periculo usurae non vacent: ideo potius dissuadenda quaedam cambia, quam omnino damnanda, sicuti notauit Medina cit. q. 8. in fine, Sa ver. cambium, n. 7. Mol. disp. 410. §. cum ut dictum est. Less. cit. dub. 6. num. 57.

Ad extremum explicanda est alia diuisio cambij, in reale, & fictum. Realia cambia sunt ea, quae hactenus, quatenus fieri potest, tanquam iusta defendimus. Sicca vero cambia dicuntur, quibus nullus titulus, siue causa inest lucri, seu auctarij capiendi; cum verè sint contractus mutui, falsa specie, ac veluti larua fictitij cambij, aut emptionis, efformati. Exemplum est, Si mercator alicui pecunias numeret Augusta, ut postea restituantur. Antuerpiae, cum incremento consueti in cambiis ad eiusmodi loca; tamen si sciat, accipientem nullas habere pecunias, neque correspondentem Antuerpiae: ideoque credat pecuniam eodem loco restitutum iri, quo accepta erat. Tunc enim verum mutuum cum usurario auctario accidit: qua de re vide Bullam Pij V. apud Nau. n. 300. Si tamen mercator cambium tali modo petenti bona fide dedit, existimans in altero loco soluturum esse: poterit eum compellere, ut contractum illum innominatum, quem ipse mercator ex sua parte impleuit, vicissim etiam impleat, deferendo suis sumptibus pecuniam cum incremento ad locum destinatum: vel soluendo mercatori quanti eius interest, contractum illum impletum non fuisse, secundum ea quae dixi supra cap. 2. n. 2. & tradit Mol. disp. 404. §. dubium est.

## CAP. XX.

## De Contractu Societatis.

## SUMMARIUM.

- 1 Societas est conuentio plurium ad commune lucrum, & damnum, proportionem rerum contributarum.
- 2 Societas institui potest cum pacto asecurationis, ita ut vni soli periculum incumbat; modo ei hoc grauamen compensetur. Vide n. 4.
- 3 Societas interdum tali modo instituitur, ut vnus sociorum pecunias v.g. alter laborem & industriam conferat.
- 4 Societas in pecoribus variè institui potest.
- 5 Impendia, quae socius occasione societatis fecit, à reliquis secundum proportionem rependi debent.
- 6 Socius ratione societatis conuentus, non amplius obligatur, quam commode facere potest, habita ratione ne egeat.
- 7 Societatis contractus pluribus modis soluitur.

Contractus societatis est conuentio inter aliquos contribuendi ad commune lucrum, & damnum, secundum proportionem rerum contributarum. Dicitur conuentio: Quia societas numeratur inter contractus, qui solo consensu perficiuntur, sicuti constat ex §. vn. Instit. de obligationib. ex consensu, l. 4. ff. pro socio, & ex communi tradit Gomez t. 2. res. c. 5. n. 1. Mol. disp. 411. Less. c. 25. dub. 1. Ipsa autem contributio pertinet ad executionem, & perfectam consummationem contractus: in qua contributione id peculiare est, quod si fors à sociis contributa fuerit eo animo, ut esset omnibus communis: hoc ipso dominium atque possessio sortis, iuris quadam fictione, singulis pro parte sua acquiritur: tamen in ma-



nus singulorum traditione realinon peruenit, sicuti habetur in l. 1. & seqq. ff. eod. Idemque censendum de iis, quæ socij nomine communi negotiando ex sorte acquirunt, & lucrantur; secus, si socius negotietur tanquam propriam causam agens. quomodo intelligenda est l. si quis societatem, ff. pro socio, interprete Couar. 3. resol. c. 19. n. 1. Mol. cit. disp. 411. §. eorum verò.

*Ad commune lucrum*, per quod distinguitur contractus à locatione & conductu in qua pecora v. g. alteri traduntur ad custodiam in pascuis, aut pecunia ad negotiandum; ita, ut fructus aut lucrum commune non sit, sed solius tradentis, atque conducentis alterius operam, pro qua certum illi stipendium promittitur.

Verum, quia sæpe Mercatores, alique domini suis institoribus vel conductitiis famulis promittere solent partem aliquotam lucris, v. g. quintam, sextam; ut ea ratione illorum industriæ & lucrandi desiderium augeant; quæstio est, utrum talis conuentio ad societatem magis, an locationem accedat? Respondetur cum Nau. c. 17. man. n. 252. Mol. cit. disp. 411. Less. dub. 2. in princ. Si aliquota pars lucris sperati assignetur famulo stipendij, siue mercedis loco, esse potius contractum locationis, & conductionis. quod eo etiam indicio colligi potest, quia plerumque domini nolunt famulos suos in contractus societatem adsciscere; sed solum ut conductitios habere.

Notat autem Mol. stipendium istud conductionis plerumque minus assignari ( quantum videl. opera & industria famuli absolute meretur ) quam si verè esset socius negotiationis; tunc enim lucrari deberet secundum proportionem operæ suæ ad lucrum influentis, ut mox explicabitur.

Additur in definitione, & *damnum*. Equum enim est, ut sicuti lucrum ex societate proueniens sociis commune, ita & damnum sit, secundum iuris reg. 55. in 6. *Qui sentit commodum, sentire debet & onus; & contra; & habetur in §. illud expeditum*, Instit. de societate, in l. cum duob. §. damna, in fin. ff. pro soc. & l. si non fuerint, §. Aristo. ff. eod. ubi leonina societas illa appellatur, in qua vnus quidè lucrum duntaxat, alter vero damnum sentiat. Est enim obseruandum cum S. Th. 2. 2. q. 78. a. 2. ad 5. discrimen hoc esse inter contractum mutui, & contractum societatis; quod in illo fors data alienetur, & transferatur pleno dominij iure in mutuatarium; cuius proinde solius periculum ac damnum est, si casu pereat; idèoque etiam commodum ac lucrum, quod per adhibitam industriam prouenit. In societate autem, qui sortem confert, non omnino eam à se alienat; sed sicuti periculum & damnum ad ipsum spectat, si casu, vel leuissima culpa sociorum pereat; ita & commodum siue lucrum, ex ea per appositam industriam proueniens, ad eundem aliqua ex parte spectare, æquum est.

Quamuis autem hæc vera sint, spectata natura huius contractus secundum se præcisè: interim tamen nihil obstat, quin adiectis alijs pactis, aliter cum socio negotiaturus cõuenire possis: ut, datis illi 1000. v. g. florenis, ipse in se sortis huius periculum suscipiat, & ex lucro sperato, quomodocunque res eueniat, soluat annuos 50. vel 60. donec societas rescindatur. In qua cõuentione (quæ supra c. 18. n. 11. ex cõmuni approbauit, contra Abb. in c. per vestras, n. 8. de donat. inter virum & uxorem, Caiet. t. 1. opusc. ult. resp. 11. Gomez cit. c. 5. n. 5. Armil. ver. societ. n. 6.) si rectè aduertimus, tres contractus reperimus: quorum primus ac principalis est *societatis*. Alter, isque accessorius est *assurance*: Ponamus enim spè esse, quod industrius mercator ex flor. 1000. à te collatis quot annis lucraturus sit 300. cuius lucris dimidium iure societatis tibi debeatur, vnà cū sorte. Sed quia ad te quoque eiusdè sortis periculum spectare deberet, idèoque cõuenis cū mercatore, ut periculum istud in se suscipiat: in cuius oneris cõpensatione, relinquis ei maiore partem lucris sperati; ut videl. duæ partes lucris ad mercatorem, tertia ad te perti-

neat. Tertius, isque accessorius contractus est *uenditionis*: Quia enim spes lucris huius incerta est, idèoque partem hæc tertiæ lucris sperati, 100. inquam flor. in spe, vendis eidem mercatori pro 50. vel 60. annuis certis, & in re. Nam spè lucris capiendi non minùs, quàm retis iactum, iusto pretio vendi posse, nemo dubitat. Vide Nau. cõment. de vsuris, notab. 14. & Ioan. Maiorem in 4. d. 15. q. 47. & 48.

Sequitur in definitione, *secundum proportionem rerum contributarum*: id est, ut quanto plus aliquis ad societatem contulit, tanto plus lucris accipiat; similiter autem & damnum, iuxta cit. §. Instit. illud expeditum, & l. si non fuerint, iunct. Gl. ff. eodem. Quamuis autè is ordinarius, & maximè naturalis modus sit contractum societatis instituendi, ut eadem sit lucris, & damni accipiendi proportio, potest tamen etiam aliter institui: Videlicet cum adiectione pacti, ut qui æqualiter cum altero cõtribuit, duas partes lucris accipiat; sed periculum solus subeat: Vel ita, ut qui plus altero contribuit, lucrum æquale percipiat: sed periculum vel omne, vel maiorem partem eius in socium reijciat. Etenim quocunque modo pactum varietur, modò prudentis viri arbitrio æqualitas inter partes constituatur, id seruari debet, sicuti colligitur ex cit. l. si non fuerint, & docet Mol. disp. 415.

Porro duobus modis societas iniri solet; Primò, si omnes socij conferant sortem siue capitale æqualiter; vel inæqualiter, l. societas, §. societas, ff. eodem. Secundo, si vnus conferat sortem; alter laborem & industriam. Nam sæpe fieri solet, ut labor ac industria negotiatoris tantundem, vel plus ad lucrandum conferat, quàm alterius pecunia, sicuti habetur in cit. l. si non fuerint: *Plerumque tanta est industria socij, ut plus societati conferat, quàm pecunia: si solus ille nauiget, solus peregrinetur, periculum subeat solus*. Et consentit §. de illa, Instit. de societ.

Tunc autem quæstio est, utrum, dissoluta societate, non tantum lucrum, sed ipsa etiam fors inter socios diuidenda sit? Variè de hac re loquuntur Doctores, in l. 1. C. pro socio, & apud Caiet. 2. 2. q. 78. a. 2. ad 5. & in summa ver. societas, Sotum lib. 6. q. 6. a. 1. Nau. c. 17. n. 252. Couar. 3. resol. c. 2. n. 2. Lessium c. 25. dub. 2. Respondeo autem ex doctrina Maioris in 4. d. 15. q. 47. Per. Nau. l. 3. c. 2. n. 447. Mol. disp. 416. Prudentis viri arbitrio æstimandū est, quanti consideratis omnibus circumstantiis valere debeant, tam hinc collata fors, quàm illinc collata industria. In collata sorte in primis æstimari debet periculum cui subiacet, ne fortè in negotiatione pereat; deinde quod sit veluti instrumentum lucris capiendi: idèoque, ut si ad negotiandum exponatur alicui mercatori, quamuis assecurata sorte, vnum in 20. 16. 12. recipi possit. Ex altera verò parte collatæ industriæ in primis considerandum est, quàm ea sit ad lucrandum præstās: quod labor omnis, & industria, atque æstimatio periculi corporalis aliter compensanda non sit: quod is, qui operam apponit, præstare debeat damna, quæ eius culpa, etiam leui, euentura sunt: hoc enim non exiguum eius onus quasi in partem rei collatæ numerari debet.

Ex his igitur prudētis viri arbitrio coniiciendū erit, utrum hinc collata industria & onera negotiatis, illinc collata sorti, eiusque periculo, & sperato lucro æquiualeant absolute: an verò solum respectiue in ordine ad lucrandum. Exemplū primi: Si Titius tibi negotiaturus contulerit mille aureos, periculumque sortis æstimeretur centum aureis: speratum autem lucrum itidem æstimari debeatur centum aureis: tunc vnuerum contulisse quodammodo censetur mille ducentos aureos. Ponamus autè mercatorem tam industriū esse, ut speret, se mille aureis lucraturum alia duo, aut tria millia aureorum: idèoque, ut si propriis pecuniis negotiaretur, spè lucris ex negotiatione reportandi, cū plena assecuratione dāni, & expensarum non venderet mille aureis: fieri tunc potest, ut iustum pactum societatis sit, quo statuitur, ut finita societate, tum capitale, tum lucrum æqualiter diuidatur inter appo-



nentem sortem, & apponentem operas.

Exemplum secundi: Si ex parte Titij conferentis mille aureos, periculum sortis, & luctum spectatum ex pecunia, quatenus negotiationi subest, æstimentur ducentis, vt dixi: Ex parte verò negotiatoris industria tanta sit, vt speret selucraturum sexcentos aureos: ita vt si propriis pecuniis negotiaretur, spem lucri ex negotiatione reportandi, cum plena assecuratione damni, & expensarum, non venderet minùs, quàm trecentis, aut ducentis aureis: tunc dissoluta societate, fors integra restituenda est collatori: lucrum verò inter vtrumque diuidendum, vel æqualiter, vel secundum aliam proportionem rerum contributarum: hinc sortis cum æstimatione periculo, & spe lucri: illinc verò industria, cum æstimatione annexis oneribus. Atque hic posterior societatis modus, secundum quem totum capitale conferenti restituitur, communiter frequentatus est.

4 Similem contrahendi varietatem cernere est in societate pecorum: quæ interdum ita instituitur, vt tam pecora ipsa, quæ alteri pascenda, & nutrienda traduntur: quàm emolumenta, & fructus: ipsaque detrimenta ac damna vtrique danti, inquam, & accipienti, communia sint: Interdum verò ita, vt pecorum dominium, ideoque etiam periculum, siue casus fortuitus spectet ad solum dantem: emolumenta autem fructuum ad vtrumque. Interdum verò ita, vt pecora inprimis æstimata tradantur, eorumque pretium vel ex fructibus, vel ex venditione pecorum inprimis extrahat dans: reliqua verò emolumenta ipsi cum recipiente communia sint: quem modum contrahendi aliqui improbant apud Syl. ver. Societas. 2. q. 9. concl. 2. S. Anton. p. 2. tit. 1. c. 7. §. 39. Sed defenditur ab ipso Antonino, Nau. c. 17. n. 261. Binsfeld. c. nauiganti, de vsur. q. 9. Mol. to. 2. disp. 420. duplici cum limitatione: I. est, vt pastor non nimis grauetur: sed tanta pars fructuum relinquatur, quanta ipsi meritò, ac iustè debita est, considerata eius cura, industria, expensis: necnon natura contractus societatis, (siquidem plus illi debetur, quàm si esset merus conductitius famulus) ac loci denique consuetudine. II. Vt pastor, seu rusticus non nisi dolum, & culpam præstare teneatur: non item casum fortuitum. Quia res, si casu pereat, domino suo perit: dominus autem pecorum manet is, qui ea pascenda dedit: quandoquidem ea suo etiam tempore repetere poterit. Ergo, si ea sine culpa, aut dolo rustici moriantur, ipsius domini damno accidet, ad quem proinde pertinebit alia capita in locum demortuorum substituere.

Vtèrius autem quæri potest: Vtrum dicto societatis contractui etiam assecurationis pactum iustè adijci possit: vt tamen hoc onus pastori compensetur, minorem ab ipso fructuum portionem exigendo, quàm alioquin, secluso tali pacto, exigi posset: v. g. Do tibi certum numerum gregis pascendum, v. g. 10. vaccas, ea lege, vt tibi incumbat etiam pro casu pereuntibus capita substituere, atque annuam pensionem soluas modicam, v. g. quinque, sex, aut decem vitulos.

Huiusmodi contractum, tanquam illicitum & usurarium, damnat S. Anton. loc. cit. Conradus de contractib. q. 91. Bartol. Medina lib. 1. instruct. c. 14. §. 27. Nam perinde est, inquiunt, atque mutuas dare pecunias, ea lege, vt, salua sorte suo tempore restituenda, insuper aliquod luctum acquiratur danti. Sed placet mihi sententia contraria, quæ est Maioris in 4. d. 15. q. 46. casu 4. Less. lib. 2. c. 25. dub. 3. in fine, Pet. Nau. lib. 3. c. 2. n. 473. Mol. disp. 503. talem contractum vt licitum defendentium, per se loquendo. Nam usuram hic non interuenire certum est: Etenim usura vnica sedes est mutuum: hic autem contractus non est mutui: quia mutuum consistit in rebus, quæ vsu absumuntur, ideoque frugifera non sunt: In hoc autem contractu datur res frugifera, ideoque pars fructuum ex ea iustè exigitur, societatis iure. Deinde in

mutuo transfertur rei datæ dominium: In illo autem, contractu non transfertur dominium pecorum: cum pastor teneatur pecora seruare, & non possit suo arbitratu absumere, alienare: sicuti si earum dominus esset. Denique nec ob eam rationem contractus iniquus est: quia periculum capitalis non ad dantem, sicuti natura contractus societatis præcisè spectati postulat, sed ad rusticum seu pastorem pertinere debeat: Nam tale onus adiectæ assecurationis iustè compensari illi potest, minorem partem fructuum exigendo: dummodo, spectatis omnibus circumstantiis, totus contractus ita instituat, vt pastor non nimis grauetur. Imò audio, in quibusdam locis Germaniæ ex dicto societatis contractu, vtrumque tant dominum, quàm rusticum, magnum emolumentum capere solere: si videlicet in loco frugifero, tuto, salubri, vbi raro pestis ingruit, nec periculum est ab hostibus, latronibus, &c. dominus det rustico vaccas iuuenças, easque post aliquot annos recipiat pro familia sua alenda, & in earum locum alias iuuenças substituat: nihilque aliud à rustico exigit, quàm in singulas vaccas, vnum quot annis vitulum: atque vt periculum casus fortuiti, qui tamen propter circumstantias, vt dixi, raro contingit, ipsi pastori incumbat.

Veruntamen bene admonet Maior cit. loco, hunc contrahendi modum iniquum, & palliatè vsurarium præsumi. Si Titius tibi tradat 100. vaccas æstimatas, tali pacto, vt liceat tibi eas distrahere, absumere arbitratu tuo: post triennium verò, quomodo locumque interim res eueniat, similes vaccas, earumque æstimationem reddere cogaris: atque interea quot annis pensionem ipsi solvere: cum hoc sit virtuale mutuum. Quia perinde est, ac si Titius tibi vaccas venderet, & precium numerandum crederet, seu mutuo dare ad triennium, interim pensionem seu lucrum ex credito accipiens.

Nunc dicendum est de damnis, & impendiis, quæ ab aliquo sociorum facta sunt propter societatem, v. g. in mercibus aduehendis, custodiendis: vt puta, quæ in itinere victus causa expendit, aut si in latrones incidit, propriamque pecuniam perdidit (debet enim, si opus sit, ad res custodiendas pecuniam etiam propriam expendere, teste Mol. disp. 418. §. quando aliquis, Less. cap. 16. n. 36.) Item si socius vulneratus fuit, & aliquid in Medicos expensum est: reliqui socij partem competentem contribuere debent, si talia causa societatis, & sine dolo, aut culpa, etiam leui, socij illius acciderunt, sicuti habetur in l. cum duobus, §. damna, & §. si quis ex sociis, ff. eod. & videri potest Petr. Nauarrus lib. 3. cap. 2. numer. 466. vbi ait, etiam elemosynas, quas socius in itinere moderatas fecit, communiter ab omnibus præstandas fore.

Sed dubitatur primò: Vtrum integra itineris impendia ex communibus bonis societatis accipienda sint: an detractis iis, quæ socius domi suæ manens impendisset? Posterius hoc docet Syl. ver. Societas, 1. q. 12. Angelus n. 12. Sed Nauar. cap. 17. n. 283. Mol. disp. 418. Less. c. 25. dub. 4. magis accommodatè ad iura, & praxin, contrarium edocent, integra impendia communiter à sociis præstanda esse, argum. cit. §. si quis ex sociis, ver. viatica autem.

Dubitatur secundò: Si impendia, ad mercium v. g. conseruationem necessaria ex communibus bonis societatis non suppetant, an lex iustitiæ postulet, vt socius negotiator ex propriis bonis veluti mutuo det, postea suo tempore à sociis recepturus? Affirmant rectè Molin. cit. disp. 418. §. quando aliquis, Less. numer. 36. Ratio est: Quia alioquin merces non sine culpa socij perijisse censentur, si eas vel mutuo petitis, vel ex propria substantia suppeditatis sumptibus, conseruare potuisset.

Porro circaea, quæ hætenus dicta sunt, duo obseruanda occurrunt: Primum. Quod ab initio inter socios



iusta pactione conuentum fuit, id omnino feruari oportet: Si nihil expresse conuentum, quod loci consuetudo approbat: Nam *contractus ex consuetudine loci interpretationem accipiunt*, l. si fundus, ff. de euictionibus.

6 Alterum. Societatis hoc priuilegium est, vt, si vnus socius ab aliis conueniatur ob ea, quæ ratione societatis debet, non condemnatur amplius, quam commodè facere potest, ita vt non egeat, sicuti habetur in l. verum, ff. pro socio, vbi & ratio affertur: quia societas ius quoddammodo fraternitatis in se habet. Ceterum priuilegium istud limitari debet primò: Nisi dolo aliquis egerit, quominus integrè satisfacere possit: *nec enim aquum est dolum suum quemquam releuare*, dicitur in l. cit. §. tempus autem. Secundò: Socius cauere debet de satisfaciendo integrè, si ad meliorem fortunam venerit, cit. l. verum, §. id quod facere. Tertiò: Cum æstimatur, quantum socius facere possit, ne egeat, non est deducendum æ alienum, quod à socio debetur. Et si, inquam, socius pluribus creditoribus paris conditionis, ac iuris obligatus sit; si tamen socij, instituta actione societatis, præoccupent, & debiti condemnationem, executionemque petant, aliis tacentibus, integrè ipsis soluitur, sicuti constat ex cit. §. id quod, iuncta l. sunt qui, & l. inter eos, cum Gl. ver. occupantis, ff. de rei iudicata, vbi vniuersim dicitur: Si aliquis conueniendus, aut condemnandus sit in id, quod facere potest; accipiendum id esse non deducto ære alieno: Exceptio solo donatore, qui si rem donatam necdum tradidit, in quantum facere potest, deducto ære alieno, condemnatur. Cum enim ex mera liberalitate factus sit debitor, ideo benignius cum ipso agitur, quam cum aliis debitorib. cit. l. inter eos, §. is quoque.

Denique id moneo; Quod dii, qui gaudent priuilegio, vt non totum, quod habent ipsis à creditore extorqueatur, sed in quantum facere possunt, habita ratione, ne egeant (sicuti dicitur l. in condemnatione, ff. de reg. iuris) tali exceptione se tueri possint etiam post sententiam, quæ in rem iudicatam transiit, ante ipsius executionem: Nam exceptio, iuxta latam sententiam non impugnatur, aut destruit, sed solum ad eius moderationem tendit, ea opponi etiam potest in illius executione, l. Nefennius, §. vlt. ff. de rei iudicata, & videri potest Mol. disp. 4. 13.

7 Societatis contractus soluitur his modis: I. Cessante negotio, aut pereunte re, in qua societas fundatur, l. verum, §. actione, ff. pro socio. Potest tamen etiam societas bonorum absolutè contrahi: quo tamen casu, nisi exprimitur, vt sit omnium bonorum, non censentur comprehendenda lucra ex vltimis voluntatibus, l. coiri, & seqq. ff. pro socio.

II. Elapso tempore, ad quod societas inita fuit: si tamen socij in communione persistant, videntur tacitè approbare societatem, donec alter renuntiet. Ita colligitur ex l. actione, §. item si, ff. eod. III. Morte vnus sociorum soluitur societas, etsi plures alij socij superstitessint, nisi cautum sit, vt vno decedente inter alios societas permaneat, cit. l. actione, §. morte. Veruntamen dum mors socij ignoratur, valent quæ interim societatis iure aguntur, cit. §. morte, ver. Item si alicuius. Ad heredem autem adeò societas non transit, vt neque ab initio pacisci possimus, quod hæres etiam succedat in societate, l. adeò, ff. eod. Quod statutum videtur propter lites vitandas, quas bonorum communio plerumque parit, l. cum pater, §. dulcissimis fratribus, ff. de legatis, 2.

III. Soluitur societas renuntiatione seu expressa, seu tacita; ita vt vnus etiam renuntiare possit, modò sine dolo id agat, cit. l. actione, §. diximus.

IV. Publicatione aut cessione bonorum vnus ex sociis, cit. l. actione, §. publicatione, & §. soluitur, Instit. de societate.

## CAP. XXI.

## De Ludo &amp; sponsonibus.

## SUMMARIUM.

- 1 Ludus alearum, licet suapte natura licitus contractus sit, tamen per accidens adiuncta mala habet; ideoque humana lege prohibitus est, præsertim Clericis.
- 2 Si Clerici char'is ludant propter recreationem, & sine scandalo, excusari interdum possunt à peccato.
- 3 Qui credito ludit, ac perdidit, soluere non tenetur, spectato iure communis Cæsareo.
- 4 In sponsonibus, qui propria persuasione, sine alterius dolo, decipitur, si bi ipsi imputare debet.
- 5 Qui propria bona non habet, vt ad lucrandum, ita & ad perdendum in ludo inhabilis est: videl. Religiosus, aut filius fam. ex bonis profectus à patre.
- 6 Filius, aut Religiosus vna pecunie depositione plus lucrari non potest, quam perdere; sed plurius actibus potest.
- 7 Olla fortune contractus licitus est; & renocari potest ad emptionem, ac venditionem.

**L**udus chartarum, alearum secundum se, & seclusa humana lege, contractus licitus est, in quo partium consensu vtrique deponitur, vel spondetur pecunia, aliudue pretib. æstimabile, certis legibus ex fortuna, vel industria pendentibus, sicuti ex communi docent Med. de restit. q. 21. Sotus lib. 4. de iust. q. 5. a. 2. Maior in 4. d. 15. q. 14. vbi regulam tradit: *Omnes ludi, quibus prudentes reputati in Rep. videntur; & ex quibus non constat in ultra mala sequi, sed sunt causa solary; possunt sine peccato exerceri.* Quia ait Mol. to. 2. disp. 516. in fine, & colligitur ex S. Th. 2. 2. q. 168. a. 2. Si ludus debito modo instituitur, duarum virtutum, iustitiæ, & eutrapeliæ opus esse; præterquam quod ad vitandum otium, & quæ inde consequuntur peccata, utilis esse possit. Neque obstat, tametsi ludens potius lucrum, quam animi oblectationem intendat; dummodo fraus, & dolus absit; & cupiditas, lucri immoderata non sit, ne ad auaritiæ spectet: in quo casu peccatum veniale committitur. Ita docet Caiet. cit. q. 168. a. 2. in summa ver. ludus, Sotus c. l. Med. q. 22. Beia p. 1. casu 61. Rebell. p. 2. lib. 12. q. 1. contra Gabr. in 4. dub. 15. q. 13. a. 2. concl. 3. vbi ait, esse peccatum mortale ludere principaliter intentione lucrandi aliquid notabile; & contra Abb. in c. penult. n. 12. de vita & honestate Clericorum, vbi ait; tale lucrum restitutioni obnoxium esse. Vide S. Thom. 2. 2. q. 32. a. 7. ad 2.

Veruntamen ob plurima mala & incommoda, quæ per ab vsum ludi ex hominum cupiditate ac malitia oriuntur, alearum ludus Clericis prohibitus est can. 41. Apostolorum, qui refertur d. 35. *Episcopus, aut Presbyter, aut Diaconus alea, vel ebrietati deseruiens, aut desinat, aut deponatur.* Et c. Clerici 2. de vita & honestate Clericorum, sumpto ex generali Concilio Lateranensi. *Ad aleas, et taxillos non ludant, nec huiusmodi ludis intersint.* Qui canones renouati sunt in Concil. Trident. sess. 22. c. 1. de refor. Quamobrem Doctores apud Nauar. c. 20. man. n. 9. ex canonicis illis grauib. pœnis colligunt; esse mortale peccatum, si Clericus magnam quantitatem aleæ lusu deponat. Sed bene monet Less. lib. 2. c. 26. dub. 1. Rebellus p. 2. lib. 12. q. 1. n. 10. Clericos (præsertim hoc tempore, quo de antiquorum canonum rigore per desuetudinem derogatum videtur) non esse mortalis peccati damnandos; nisi frequenter, aut publicè cum scandalo populi ludant, sicuti notauit etiam Gl. c. 1. d. 35. Syl. ver. ludus, q. 2. dicto §. & colligitur ex c. inter dilectos, de excessibus Prælatorum, vbi collatio beneficij facta Clerico, publico aleatori, irrita decernitur: *cum personis vilibus & indignis portu dignitatis patere non debeant.* Qui tamen beneficij legitimè obtinuit, si publicus aleator esse incipiat, prius



moneri debet, quàm deponatur, iuxta c. 1. d. 13. Quia multa impediunt promouendum, quæ non deiciunt promotum, ait Gl. c. penult. de vita & honestate Clericorum, ver. ad aleas.

- 2 Sin verò Clerici priuatim, & sine scandalo, ex bonis patrimonialibus; aut etiam ex beneficiorum suorum redditibus, sed in quantitate modica, spectato statu suo, & reddituum copia, chartis v. g. ludant, sine aliorum officiorum suorum neglectu: tunc distinguendum est, vtrum lex seu consuetudo diœcesis tales fortunæ ludos conuenienter sacris canonibus prohibeat: hoc enim casu peccant Clerici, saltem venialiter: An verò lex Diœcesana ipsis non prohibeat, & consuetudo loci permittat, ac quodammodo cohonestet: tunc si raro & moderatè ludant propter recreationem, à peccato excusari possunt. Porro Religiosos adhuc magis alearum, vel chartarum ludus dedecet, quàm seculares Clericos.

Idem ludus alearum (quo nomine omnis ille intelligi debet, qui magis fortuna, quàm arte & industria ludentium regitur) ciuili iure omnibus prohibetur in l. alearum, C. de religiosis & sumptibus funerum. Insuper decernitur, vt, qui ludendo perdidit, soluere non cogatur; & si soluerit, ius repetendi habeat. Cum autem lex ista pœnalis sit, in ludi odium lata: ideo naturali obligatione soluendi perdentem non liberat: qui, si nihil excipiens, soluat, dominium pecuniæ solutæ in lucrantem transfert, neque postea occulta compensatione, sed solum Iudicis implorata sententia, sibi succurrere potest, sicuti docent Maior in 4. d. 15. q. 13. Sotus lib. 4. q. 5. a. 2. Medina q. 22. de restit. Castro lib. 2. de lege pœnali, c. 2. corol. 3. Molin. disp. 514. Less. cit. c. 26. dub. 3. neque repugnare videtur Adrianus in 4. de rest. vbi de ludo, §. sed oritur ex his dubium.

- 3 Quæstio autem est de eo, qui non pecunia exposita, sed data ipsi fide solutionis, lusit, ac perdidit: an postea exceptionem legis alearum opponere possit, quominus in conscientia foro soluere cogatur? Affirmant Adrianus l. c. Couar. reg. peccatum, p. 2. §. 4. n. 8. Nauar. c. 20. n. 17. Sotus cit. a. 2. Molin. disp. 515. Less. c. 26. dub. 4. Tol. lib. 5. c. 27. Probant ex l. inuitus, ff. de reg. iuris: Cui damus actionem, eidem & exceptionem competere multò magis quis dixerit. Ei autem, qui ludo perdidit ac soluit, datur actio ad repetendum. Ergò multò magis eidem competit exceptio, antequam soluat. Quid enim opus sit soluere, si, posteaquam solueris, repetendi coram Iudice ius habeas? Quæ sententia secundum iuris rigorem vera esse videtur. Id verò certius est, eum, qui iurauit se soluturum, vel solutum non repetiturum, iuramenti obligatione constringi.

Contrarium tamen docet Medina cit. q. 22. de restit. resp. ad 6. rationem, corollar. 2. Castro loco suprâ cit. Azor to. 3. lib. 5. c. 24. q. 7. Valentia t. 3. disp. 5. q. 6. p. 5. §. 2. q. 8. quorum sententia amplectenda est, saltem iis prouinciis, quibus vel non recepta, vel abolita constitutione illa Cæsarea, in externo foro non conceditur actio ad recuperandum id, quod ludo alearum, vel chartarum per se licito perditum, & solutum fuit: nisi valde magnæ quantitatis sit, vt in graue detrimentum proprii status, ac familiæ cedat: quo casu vel partes inter se transigere debeant, vel Iudicis æquitatem implorare.

Porro aduertunt DD. communiter, Nau. cit. n. 17. Mol. disp. 517. Azor cit. lib. 5. c. 25. q. 4. Eman. Rodríguez p. 1. sum. c. 189. concl. 6. Si tanta alicui sit ludendi pericia, vt quasi certus sit se lucraturum, iniquum effici ludi contractum: Propterea quòd error præbeat causam perdendi: quia si alter inæqualitatem cognitam haberet, periculo se non committeret. Quare aliter sentiendum, si qui ludi imperitior est, inæqualitatem cognitam habens, expressè, vel tacitè consentiat, sicut cit. locis notant Rodríguez, Mol. Less. dub. 5. Lopez 2. p. instr. c. 35. Eademque ratio esse videtur, si ita animo compara-

tus sit, vt, tametsi inæqualitatem cognosceret, nihilominus in ludum consentiret: tum enim virtualiter inæqualitatem remittit, ac condonat.

Sed nunquid idem in sponsonibus locum habet: si tu apertè profitearis, rem, super qua sponso fit, perfectissimam tibi esse: atque alter nihilominus errore inductus, tecum contendere, atque deponere velit, an hoc casu ipsum spondentem tibi obligare potes? Negat Mol. disp. 508. & 517. Nam error, inquit, efficit inuoluntarium mixtum, quod repugnat liberali, & gratuita donationi, seu remissioni. Sed contrarium est verum, quod docet Nauar. c. 20. n. 18. Med. C. de restit. q. 22. §. vlt. atque indicat Tol. lib. 5. c. 27. Nam error circa qualitatem, cui causam non præbet alterius contrahentis dolus, neque gratuitam, neque onerosam promissionem vitiat: cum absolutum consensus non auferat, vt suprâ dixi hoc tract. c. 5. n. 3. Perinde ac si aliquis tibi stipulatus promittat donaturum se 10. aureos, si riuum, vel fontem transilias, existimans id omnino fieri non posse: profectò obligationem contrahet, si tu conditionem impleueris.

Colligunt secundò Maior l. c. Nau. c. 20. n. 12. Mol. disp. 519. 520. Less. cit. dub. 5. Eos, quia propria bona non habent, quæ ludo perdere, & alienare possint, ad lucrandum quoque inhabiles esse. Ex quorum numero primò est Religiosus, sub Prælati obedientia viuens: Secundò filiusfamilias, quialitur bonis à patre profectis, v. g. in Academia. Si tamen pater filio, vel Prælatus Religioso permittat, vt aliquam pecuniæ summam in ludos honestos insumere possit, tunc & ipse ab aliis lucrandi facultatem nanciscitur. Quinimo docent Nau. in sum. c. 20. n. 12. Valentia to. 3. disp. 5. q. 6. p. 5. q. 8. ver. Tertiò obseruandum, Mol. to. 2. disp. 520. Sanch. lib. 7. moral. c. 19. n. 79. Non solum filiosfamil. sed etiam Religiosos, si ille à patre, hic à Monasterio in Academia, vel alio loco sustentetur, ex præsumpta voluntate sustentantium, concessum videri, vt ex centum aureis annuis quatuor vel quinque in honestos ludos recreationis causa insumat: nisi pater, vel Prælatus expressè prohibeat: aut Ordinis regula, vel recepta consuetudo talem pro pecuniâ ludendi modum omnino interdicat. Deinde si in alias recreationes tantam pecuniam filius, vel Religiosus insumpserit, non poterit deinde ludendo perdere: cum reliqui sumptus ad vsus necessarios transmissi censi debeant: nisi ob circumstantias, maiorem de patris liberalitate præsumptionem facere liceat. Prælatus autem licentiam dare non potest magnam pecuniæ quantitatem immoderatis ludis, aliisue recreationibus insumendi. Quare qui ab eiusmodi personis lucratur, quatenus ipsis ludendo perdere concessum non est, ad restitutionem obligantur. quæ de re videri potest Sanch. n. 80.

Id verò dubitatur: Vtrum filius, vel Religiosus, qui non potest ultra certam pecuniæ summam ludendo perdere: possit tamen maiorem lucrari, absque restituendi obligatione? Respondeo, & dico: Vno depositionis lactu non potest filius, vel Religiosus plus ab altero lucrari, quàm perdere: ideòque restituere tenetur excessum, nisi ei expressè, vel tacitè condonetur. At verò successiue pluribus iactibus nihil obstat, quominus magnam pecuniæ summam lucretur. Ita docent Barthol. Medina lib. 1. instr. Confessar. c. 14. §. 28. Azor cit. c. 25. q. 6. Mol. to. 2. disp. 519. Valentia lo. cit. notab. 3. Sanchez n. 83. qui tamen discrimen indicat inter filiumfam. & Religiosum, quòd ille præsumere faciliè possit, patrem contentum esse, vt, quancunque pecuniæ summam ludendo acquisiuit, iterum aliis vicibus ad lulum deponat: at verò Religiosus talem præsumptionem facere nequit. Quia pecunia, quam Religiosus ludendo lucratur, Monasterio parita est: non potest autem Prælatus licentiam dare, vt bona Monasterij in magna quantitate alienentur sine necessitate, aut vtilitate. Quare licet Religiosus, dum

idem



idem ludus moraliter continuatur, omnem pecuniam, quam lucratus erat, deponere possit: postquam verò à ludo omnino cessatum fuit, non potest nisi tantam, quantum Prælatus rationabiliter illi, spectatis circumstantiis, permittit.

Contra hanc responsionem Nauar. c. 20. man. n. 12. Tolet. lib. 5. sum. c. 27. n. 8. Armilla ver. ludus, n. 8. & alij, absolutè docent; Filiumfam. vel Religiosum plus ab altero lucrari posse, quam perdere: quia contractus potest claudicare, id est, obligatorius esse ex parte vnius, non item alterius; vti patet in contractu emptionis instituto cum pupillo, §. pupillus, Instit. de inutil. stipulat. aut cum Ecclesia, sine Prælati consensu, c. si qua de rebus, 12. q. 2. Sed contrarium est verum, quod docent Sotus lib. 4. de iustit. q. 5. a. 2. Syl. ver. ludus, q. 17. dicto 3. Angelus ibid. §. 3. San. 6. Couar. reg. peccatum, p. 2. §. 4. n. 4. Sanchez n. 86. Quia vt claudicatio illa contractus locum habeat, opus est, alterum saltem naturaliter obligari, ita vt per traditionem rei promissæ dominium transferatur, si nihil excipiat, aut repetatur: sin verò altera pars nullo modo obligetur, tum constat nullum esse contractum reciprocum; cum is vltro citròque obligatorius sit. Atqui filiusfam. ex bonis patris, & Religiosus ex bonis Monasterij adeò ludendo supra quantitatem ipsis concessam perdere nequeunt, vt ex contractu ludi nulla obligatio oriatur, & dominium in lucrantem non transferatur: ergo neque lucrari possunt. Alia ratio est de pupillo, & Minore ludentibus sine consensu tutorum; illi enim licet ludendo perdere nequeant, quominus contra lucrantem excipere; aut per reidatæ conditionem, seu repetitionem, extra, aut intra iudicium, solum recuperare possint; tamen lucrari honesto ludo non impediuntur: cum naturalis in ipsis quoque obligatio subsistat, sicuti dixi supra hoc tract. c. 9. n. 7. & in fine. Interim verò peccabit minor natu, si ad ludendum accesserit animo lucrum capiendi; sin autem perdidit, non soluepdi, aut solum repetendi: Imò propter commissum dolum, in tali casu ad restitutionem lucri obligatus erit.

De vxore, & marito, quatenus eis ludere, & ludendo perdere concessum sit, colligi potest ex iis, quæ dixi supra cap. 12. n. 6. & 7. Lucrum, quod dolo & fraude à ludente acquisitum est, restitutioni obnoxium esse, constat; excepto quòd colludentibus concessum sit se mutuo decipere, secundum cuiusque ludi leges, vel consuetudinem. Exempli causa, si certus de ludi victoria re dissimulata, sponsonem augeat; vel quasi meliorem ludi conditionem habens, aucta sponsonem colludentem deterreat: Qua de re Couar. p. 2. reg. peccatum §. 4. n. 5. Mol. cit. disp. 517.

Ad extremum annotare libet, ludi quoddam genus esse, quod apud nos ollam fortunæ vocant, *Ein gluckshafen*, in quam coniectis schedulis, partim inanibus, partim verò continentibus fortunæ dona, tum pretiosa, tum exigua, cuius permittitur facultas extrahendi tot schedas, quot v.g. denarios numerarit. Quæ res secundum se licita est; modò iusta taxatio rerum in olla contentarum facta sit, & aliæ omnes fraudes remoueantur. Videtur autem mihi, eiusmodi contractum etiam ad emptionem reuocari posse: quandoquidem confideratis rebus, quæ in schedulis continentur, sex v.g. crucigeri iustum pretium æstimantur, quo ematurus extrahendi vnam schedam, cum spe aliquid seu multum, seu parum consequendi.

## CAP. XXII.

## De Contractu Locationis &amp; conductionis.

## S V M M A R I V M.

- 1 Locatio est contractus, quo rei alteri vtenda, vel fruenda conceditur, certa pensione constituta.
- 2 Conductor rem sibi locatam alteri locare non prohibetur.
- 3 Si impedimentum accidet ex parte rei conductæ, liberatur conductor à soluenda pensione, secundum proportionem temporis, quo vt; frui non potuit: Sin verò ex parte conductoris impedimentum incidit, non ita liberatio contingit.
- 4 Expensas in rem conductam, quæ duraturæ sunt, item tributa & onera publica prestare, ad locatorem seu dominum spectat.
- 5 Conductor, custos, &c. ostendere debent, rem sibi commissam perijisse, & quidem sine culpa.
- 6 Incendium culpa inhabitantium accidisse, in dubio presumitur.
- 7 Propter modicum infortunium nihil colono de pensione remittitur: sed ceteris, si magna, & plus, quam tolerabilis clades facta est.
- 8 Si pluribus annis, ob cæli clementiam, vberiores fructus ex fundo proueniant, colono emphyteutico pensio augeri potest: sicuti & vice versa diminui pensionem conuenit, ob eadem immodicam.
- 9 Locator conductorem, durante tempore conductionis, expellere non potest, nisi in casibus iure expressis.
- 10 Successor vniuersalis, non item particularis, locationis contractu stare tenetur.

**I**N hoc tractatu de contractibus eum ordinem secutus sum; vt in primis agerem de gratuitis contractibus, deinde de reciprocis seu onerosis; & hætenus quidem ferme de iis, quibus dominium rei traditione transfertur: deinceps autem de iis contractibus dicendum, quibus dominium, saltem directum, non transfertur; & ante omnia de locatione & conductione.

Locatio est contractus, quo quis rem aliquam alteri vtendam, vel fruendam concedit, certo pretio, sine mercede constituta. Et dicitur is, qui concedit, *locator*; qui suscipit, *conductor*. Nomine rei in definitione intelligitur tam res mobilis, vt equus ad equitandum, vacca ad fructum capiendum, bos ad arandum; item opera hominis, v.g. fabri, pictoris; quam res immobilis, vt domus ad inhabitandum; ager, vinea ad fructus percipiendos, saltem infra decennium: nam si ad longum tempus, videlicet decennium, vel vltra concessio fiat, efficitur contractus emphyteuticus, de quo cap. seq.

Dicitur in definitione, *vtendam, vel fruendam*: Quia interdum solus vsus conductori conceditur, sicuti videre est in domo, equo locato: interdum verò etiam fructus, vt videre est in locata vacca, capra, fundo.

Constituto pretio, sine mercede, & quidem in pecunia numerata. Nam si alia merces statuatur, non erit propriè contractus locationis: sed innominatus, v.g. do tibi equum ad vsu, vt des mihi frumenti scapham, iuxta l. naturalis, §. ac cum do, iun. Gl. ver. si res, ff. de præscript. verbis. Quamuis etiam talis contractus locationi assimilatur, vt dispositum de vno censeatur etiam dispositum de altero; sicuti notant Doctores in l. 1. §. si quis seruum, ff. de positi, Gomez 2. resol. c. 3. n. 3. Mol. disp. 486. Vide Instit. de locat. & conductione, principio, & §. præterea, iun. Gl. Porro rectè annotauit Gabr. in 4. d. 15. q. 10. a. 3. dub. 6. 3. Anton. p. 2. tit. 1. c. 17. §. 8. Nau. c. 17. man. n. 108. Mercede pecuniaria conductum cogi non posse, vt pro ea res alias, quamuis æquivalentes, accipiat, v.g. cibos, pannos. Quia sicuti debitor cogi non potest pro vna specie aliam soluere: ita nec debitor alio modo soluere non possit.

Hinc etiam est, quòd locatio, & conductione magnam cum emptione, & venditione affinitatem habeat: eisdemque iuris regulis consistat, iuxta cit. tit. Instit. princ.



& §. adeo, & l. 2. ff. locati. Differunt tamen primò: Quia emptio ac venditio tendit ad domini translationem; locatio solùm ad vsus vel fructus concessionem, l. non solet, ff. locati, & l. cum manu lata, §. ult. ff. de contrah. empt. *Nemo potest videri eam rem vendidisse, de cuius dominio id agitur, ne ad emptorem transeat: sed hoc aut locatio est, aut aliud genus contractus.* Secundò: Quia si res vendita ante traditionem sine culpa venditoris pereat, emptor nihilominus pretium soluere debet: Sin autem res locata ante traditionem intereat, contractus penitus dissolvitur, & conductor liberatur, l. item queritur, ff. locati, & l. 1. in fine, C. de iure emphyteutico, & docet Gomez l. c. n. 1.

2. **QVAESTIO PRIMA.** Vtrum conductor rem sibi locatam alteri locare possit? Respondeo, ita affirmandum esse, ex l. si cui, ff. locati, l. nemo C. de locato: *Nemo prohibetur rem, quam conduxit, fruendam aliis locare, si nihil aliud conuenit.* Debet tamen primus conductor locare rem æquè idoneo, ad eundemque vsus: tunc autem secundus conductor actione personali obligatur ad soluendam pensionem non primo, sed secundo locatori; quippe quocum contraxit: quamuis interim fructus in prædio nati; item res conductoris sciente locatore in prædium rusticum, vel etiam eo ignorante in prædium urbanum illata, tacitè pro pensione obligatae sint, l. si in lege, §. 1. ff. locati, l. certi iuris, C. de locato & conducto. Quam proinde pensionem, si secundus conductor primo locatori soluerit, penitus liberatur, l. solutum, §. solutam iun. Gl. ff. de pignoratitia actione, & docet Gomez n. 12. Vide Mol. disp. 489. Anton. Negusantium de pignorib. p. 2. mem. 4. n. 182.

3. **QVAESTIO SECUNDA.** Si impedimentum accidit, quominus conductor re conducta uti frui possit, vtrum pensione liberetur? Respondeo, & dico I. Si impedimentum accidit ex parte rei conductæ, vtputa quia domus ruinam minatur, nocturnis spectris infestatur, ob periculum pestis, aut belli tutam habitationem non prestat, liberatur conductor à soluenda pensione, pro tempore, quo inhabitare, vel alia re conducta uti, si ui non potest: quamquam, quod attinet ad impedimentum pestis, non vbique ita receptum est. Atque ita docet Nau. c. 17. n. 187. Gomez n. 3. Mol. disp. 493. Less. c. 24. dub. 2. Couar. in pract. qq. q. 30. n. 3. & habetur in cit. l. item queritur, §. exercitus, & l. habitatores, in fine ff. eodem, vbi dicitur: *Si causa iusta fuisset, cur periculum timeret (conductor) quamuis periculum verè non fuisset, tamen non debere mercedem.*

Dux autem assertionis limitationes sunt: I. Quòd cessante impedimento, conductor, eiusve hæredes, contractum conductionis cōtinuare coguntur, si facile possint, & res adhuc integra sit: quod de re Couar. cit. n. 3. Mol. cit. disp. 493. §. vtrum autem. II. Interdum ob circumstantias, aut consuetudinem contrahentium aliud agi videtur, vt videlicet pensio, v. g. naulum nauigantium in mari, nihilominus debeat, et si impedimentum, v. g. naufragium, vel piratarum incurfus incidat. quod de re idem Mol. to. 2. disp. 502.

Dico II. Si res aliena bona alicuius fidei locata, postea euicta sit, debet locator petere à domino rei, vt conductorem, eadem pensione uti, frui, sinat: si nolit, tenetur conductori aliam rem non minùs commodam v. g. domum ad inhabitandum prestare, si possit: alioquin de pensione remittere cogitur, l. si quis domum, iun. l. si fundus, ff. eod. Vide Gomez n. 2. vbi addit, idè esse in fideiussores, ac pignore; quòd satis fiat præstando æquè idoneum, l. qui autem, §. 1. ff. de cōstitutis pecunia. Sin verò culpa, vel dolo locatoris, res locata euicta fuerit, aliudve impedimentum acciderit, quominus conductor ea uti, frui potuerit; ille omnino prestare cogitur, quanti huius interest, sicuti habetur in cit. l. fundus. Vide Syl. ver. locatio, q. 12.

Dico III. Si impedimentum ex parte conductoris incidit, quominus re conducta uti, aut frui possit; v. g. si quis operas conduxerit, quibus, mutato consilio, uti nolit, mercedem nihilominus soluere cogitur, sicuti constat ex l. qui operas, ff. eodem, & tradit Gl. l. ex conducto, §. item cum quidam, ver. personis, ff. eod. Syl. cit. q. 12. Nau. n. 197. Mol. & Less. ll. cc. Si tamen conductus operam suam alteri in idem tempus locauit, vel locaturus est, tantundem de pretio detrahendum, quantum à posteriore conductore acceptum erat, sicuti bene docet Less. n. 9.

**QVAESTIO TERTIA.** Ad quem pertineat expensas in rem conductam facere, v. g. vt villa, stabulum, putens, domus facta, recta conseruentur? Respondeo, & dico; Ad locatorem pertinere. Ita ex communi docet Gomez n. 20. Mol. disp. 496. & habetur in l. sed addes, §. si inquilinus, l. dominus, l. colonus, ff. eodem. Atque in hoc differre colonum ab usufructuario, & emphyteuta, monet Gl. cit. l. ex conducto, in princip. ver. reficitur.

Corollarium I. Si conductor in rem conductam necessarias, vel utiles expensas fecerit, potest eas de pensione detrahere, vel finita locatione à locatore repetere, sicuti habetur expressè in cit. l. dominus, & cit. l. colonus, vbi additur, etiam eum, qui propter pensionem non solutam eijcitur, expensas viliter factas repetere posse: in quo differt colonus siue conductor ab emphyteuta, vt infra dicam. Monet autem Mol. in fine disput. 496. Interim dum expensæ à locatore non soluuntur, rem conductam à conductore retineri posse.

Corollarium II. Ad locatorem, non conductorem pertinet, tributà, & onera publica prestare, quæ ratione domus, aut fundi locati debentur, sicuti constat ex tit. ff. de via publica, & si quid in ea factum dicatur: *Construat vias publicas unusquisque secundum propriam domum: & aque ductus purget, qui sub diuo sunt: & construat ita, vt non prohibeatur vehiculum transire. Quicumque autem mercede habitant, si non construat dominus, ipsi construentes computent dispendium in mercedem.*

Limitari autem debet dicta assertio: Nisi de expensis faciendis aliter inter contrahentes conuentum sit. Secundo: Nisi consuetudine loci aliud receptum sit: id enim seruari debet. Vtrumque horum colligitur ex l. circa locationes, C. locati. Tertiò: Expensas non duraturas, quæ quotannis pro fructuum collectione fieri debent, arando, seminando, metendo, à conductore, siue colono præstandas esse, nemo dubitat, & constat ex l. lumpus, ff. de rei vindicat. Vide Fachin. p. 1. lib. 1. controu. c. 35.

**QVAESTIO QUARTA.** Si res perit apud conductorem, vel deterior reddita est, vter damnum prestare debeat, locator, an conductor? Respondeo, cum Gl. Instit. de locat. & conductione, §. penult. aliisque Doctoribus cōmuniter: Dolum & culpam, tum latam, tum leuem à conductore præstandam esse: non item culpam leuissimam, multò minùs casum fortuitum, sicuti constat ex l. si vt certa, §. nunc videndum, ff. commodati. Excipe primò: Nisi aliter conuentum sit: quominus tamen conductor, aliùve contrahens de dolo teneatur, conueniri non potest: quia id bonis moribus repugnat, l. si vnus, §. illud, ff. de pactis, l. pacta quæ, C. eodem. Excipe secundò: Quòd consuetudo interpretatur, vt si valde pretiosa locata sint: v. g. vasa aurea, argentea, conductor culpam etiam leuissimam prestare teneatur, vt notauit Maior in 4. d. 15. q. 45. §. tertiò arguitur. Ratio est, partim quia talia suapte natura exactissimam seruandi diligentiam postulant: partim quia nemo ea, nisi cum tali conditione, locare vellet. Excipe tertiò: Nisi conductor culpa sua causam casui fortuito præbuit: vt quia in mora restituendi fuit, aut si in locatione v. g. conuenit: *Ignem ne habeto, & habuis: tenebitur, etiam si fortuitus*



*casus admittit incendium, quia non debuit ignem habere, l. videamus, §. in hoc, ff. locati.*

Dubium autem est: Si nesciatur, casusne, an culpa, vel dolo conductoris, aut custodis, res perierit, cui onus probandi incumbat? Respondent communiter Doctores in l. si quis argentariis, prope finem, ff. de edendo. Ioseph Mascardus vol. i. de probat. conclus. 272. Gomez cit. c. 3. n. 22. Molina disp. 494. §. qui rem. Conductorem, custodem, &c. obligari ad vtrumque ostendendum; & quod res perierit, v. g. pecus mortuum vel abactum sit; & quod sine culpa sua. Ratio est, partim quod ea quæ facti sunt, puta rem perijisse, furto ablatam esse, non creduntur, nisi ostendantur; partim quod talis obligatio conductori, custodi, aliisque officialibus, præsertim publicis, ex natura contractus veluti gentium iure imponitur, vt ostendant rem sibi commendatam absque culpa ipsorum perijisse. Quod limita primò: Nisi graues coniecturæ siue indicia pro hominis innocentia adsint; tunc Iudex, considerata qualitate personæ, interdum iuramentum in probationis supplementum deferre, vel partibus compositionem suadere poterit. Limita secundò: Nisi consuetum sit, eiusmodi res perire, & quidem sine culpa conductoris, custodis; tunc præsumptio stat pro ipso; vel saltem, delato ei iuramento, liberatur. Qua de re vide Gomez loco cit.

His affine dubium est: Vtrum in dubio præsumatur incendium ortum culpa conductoris? Respondetur ex communi Doctorum sententia apud Ioseph. Mascardum, volum. i. concl. 467. n. 8. Menoch. de arbitrat. qq. casu 390. n. 4. Ioach. Mynsing. cent. 6. obser. 88. Conductorem absolendum esse, nisi locator culpam ostendat. Tamen si enim incendium inhabitantium plerumque culpa accidat, vt proinde in dubio contra illos præsumptio existat, l. 3. §. cognoscit, ff. de officio Præfecti vigili; non tamen semper patrisfamilias; sed sepe numero famulorum culpâ, quam paterfamilias præstare non cogitur, sicuti constat ex l. si vendita, ff. de periculo & commodo rei venditæ, atque notauit Menoch. loco cit. Andr. Gaill. lib. 2. pract. obseruat. c. 21. Id fateor, ad commodatarium, qui ædes alienas gratis inhabitat, idcircoque leuissimam etiam culpam, quæ facile præsumitur, præstare debet, incendij damnum pertinere, nisi præter omnem culpam suam fortuito casu accidisse, ostendat.

QVAESTIO QUINTA. Vtrum ob anni sterilitatem, hostium incursionem, aliūve fortuitum casum, de pensione remittendum sit? Respondeo & dico I. Ob damnum, siue infortunium, modicum nihil de pensione colono remittitur. Ratio est: Quia si colonus ob vnus, vel alterius anni fertilitatem maius commodum capiat, nihil ipsi auferitur, neque pensio augetur: Ergo etiam modicum damnum æquo animo ferre debet, sicuti habetur in l. si merces, §. vis maior, ff. locati.

Dico II. Si colonus magna, & plus, quam tolerabili clade affectus est, ex cæli iniuria, aliave vi extrinseca, sine culpa sua, remittendum est de pensione. Ita habetur cit. §. vis maior, & l. ex conducto, §. si vis tempestatem, ff. eodem, l. licet Cod. de locato, cap. propter sterilitatem, extra, eod. Illam autem cladem Doctores immodicam æstimaunt, si deducto semine, aliisque impendiis, ne dimidium quidem soluendæ pensionis superfit: tunc enim eo oblato, reliquum remittendum est. Ita Couar. in pract. qq. c. 30. n. 1. Pinellus l. 2. Cod. de rescind. vendit. p. i. c. 3. num. 23. Rebellus p. 2. de contract. l. 14. q. 7. Less. lib. 2. c. 24. dub. 3. Quamuis aliter Abb. in cit. c. propter, num. 13. Tunc immodicam læsionem censeri, si colonus vix recolligat tertiam partem soliti. Et aliter Bartolus in cit. §. si vis maior, Nau. num. 138. Si vix duæ tertiæ colligantur: vt si ager plerumque ferebat quindecim modios tritici; hoc verò anno vix decem protu-

lit, aiunt, hanc immodicam coloni cladem videri. Fortasse autem rectius dicitur apud Gaill. lib. 2. obser. 23. n. 1. vt vicinorum communis opinio attendatur, num immodica clades coloni, alteriusve conductoris censi debeat, necne.

Excipe primò: Nisi conuentum sit, vt ob casum fortuitum, nihil conductori de pensione remittatur, vti habetur in l. si quis domum, §. Iulianus, ff. eodem. Quamuis neque tunc casus insolitus, & extraordinarius comprehensus censetur, nisi id exprimatur, sicuti ex communi docet Gomez num. 19. Molin. disp. 495. arg. l. fistulas, §. frumenta, ff. de contrah. emptione, vbi DD. communiter, & Bartol. in l. sed etsi quis, §. quæsitum, ff. si quis caution. quibus tamen contradicit Pinellus cit. c. 3. n. 27.

Excipe secundò: Nisi antecedentium, vel etiam consequentium annorum fertilitate damnum compensetur, cit. l. ex conducto, §. Papinianus, & cit. c. propter sterilitatem.

Excipe tertio, cum Gloss. & Abb. in cit. c. propter, Nau. in c. 17. man. n. 190. Colonos partiarios (id est, qui aliquotam fructuum partem videri debet v. g. tertiam, aut quartam) ob anni sterilitatem nihil de pensione remittitur. Ratio est: Quia, vti dicitur in cit. §. vis maior; *Partiarius colonus, quasi societas iure, & damnum & lucrum cum domino fundi partitur.*

Adiciamus hic etiam, quid in hac re de emphyteuta sentiendum sit: Primò, si pensio, quam is soluere cogitur, comparatione fructuum, quos capit, modica sit, & solum ad recognitionem dominij, non liberatur; nisi emphyteuticus fundus omnino pereat. Ita habetur l. 1. C. de iure emphyteutico, & §. adeò, Instit. de locatione & conductione: vel nisi in hostium potestatem deuenierit, sine spe brevi tempore recuperandi, arg. l. cum vnus, §. vlt. ff. de rebus auctoritate Iudicis possidendis, vbi dicitur: *Si pradium inundatum sit, aut propter latronum potentiam non possit possideri recte dicitur, non esse quod possideatur.* & ita docet Abb. in c. potuit, num. vlt. de locato, Clarus lib. 4. recept. §. emphyteusis, q. 8. n. 8. Nau. num. 187. Fachinæus p. i. l. 1. controu. c. 90. Andr. Gaill. cit. obseruat. 23. num. 23.

Secundò: Si magna pensio soluenda sit ab emphyteuta, non tam in recognitionem dominij, quam fructuum, quos capit, vel capere potest, compensationem; æquitas postulat, vt remissio aliqua fiat, sicuti docet Iulius Clarus & Gaill. lib. 2. Gomez cit. c. 3. n. 18. Less. dub. 8. Rebell. q. 8. Ratio est: Quia hoc casu emphyteuticus colonus parum à conductitio differt. Vide Syl. ver. Emphyteusis, q. 1.

Porrò vicissim æquitas postulat, & consuetudo seruatur, vt pensio augeatur, si fructus longè vberiores ex fundo aliquot annis protineant, sicuti notauit Gl. in cit. §. vis maior, ibidem Bartolus, Abb. in c. propter, in fine, de locato, Gomez cit. num. 18 qui tamen id limitant, nisi fructuum abundantia ob coloni industriam proueniat, tum pensio augeri non debet; ne diligentia illi sua damno sit: sed si ob cæli clementiam, aut fortuitum casum, rerumve mutationem, augmentum accidat. Vt si quis conduxerat molendinum, ac postea alia vicina imperu aquarum destruantur, augendam esse pensionem, aiunt DD. citati.

QVAESTIO SEXTA. Vtrum locator conductorem arbitrio suo expellere, vel rem locatam alteri locare possit? Respondeo & dico I. Non posse durante tempore conductionis, sed post. Ita habetur l. ne cui, Cod. de locato, & l. eodem, C. eod. vbi quatuor causæ adferuntur, ob quas ante tempus conductorem inuitum expellere liceat: I. Si integram pensionem tempore statuto non soluat. II. Si casus improvisus incidat, ob quem domus v. g. locata vñbus domini necessaria sit. III. Si rem locatam reficere necesse sit. IV. Si conductor in re locata male



versetur. quo casu etiam damnum à conductore præstandum est. Consentit his c. propter, §. verum, de locato, ubi id tradit Abb. num. 6. Nau. cap. 17. num. 193. Mol. disp. 499. Nisi quiddam Pontifex eo loco biennium designet, quo si pensio soluta non fuerit, conductor expelli possit: id tamen Gl. ibid. & Nau. cit. num. 193. intelligunt, si ad tempus non breue, sed saltem ad quinque, vel sex annos res locata sit. Sed melius ait Mol. l. c. spectato communi iure, non esse certum tempus designatum; sed id solum spectari, utrum conductor pensionem debitam contumaciter soluere intermittat. id verò secundum iura satis præsumitur, si conductor biennio integro pensionem soluere neglexerit. qui videtur esse sensus l. quæro, §. inter locatorem, & l. cum domini, ff. locati.

10 Dico II. Neque locatoris, successor vniuersalis, siue hæres, ante expletum tempus, conductorem expellere potest, §. vlt. Instit. de locato, l. viam, C. eod. Ratio est: Quia eadem cum defuncto persona censetur.

Dico III. Successor particularis, puta emptor, donatarius, legatarius, non tenetur stare contra actum locationis; similiter neque conductor. Habetur in l. qui fundum, ff. locati, & in l. emptorem, C. de locato. Quod etiam locum habet, etsi solus ususfructus alteri venditus, donatus, vel emphyteutico contractu concessus sit, sicuti docet Gomez n. 9. ex l. arboribus, §. i. ff. de usufructu. Potest enim utrinque contractus rescindi.

Limitari autem debet assertio primò, ut locum non habeat, si pactio interuenit inter locatorem, & conductorem, ne res locata durante locationis tempore alienetur, constituta ipsi, in eius rei securitatem, hypothecâ, siue generali omnium bonorum, siue speciali eiusdem rei locatæ, iuxta l. si creditor, §. vlt. ff. de distract. pignorum. Secundò, si ea lege emptio v. g. facta sit, ut emptor conductorem ante tempus finitum non expellat, uti habetur in cit. l. emptorem, C. de locato: Tunc enim conductor retentione rei conductæ, per viam exceptionis se contra emptorem defendere potest: vel certè emptor conductori præstare tenebitur damnum, seu quod interest eius, ante tempus expelli, quod alioquin locator, eiusve hæredes ipsi præstare deberent. Ita Gl. in cit. l. emptorem, ver. emit. Tertiò, si locatio fundi facta sit ad tempus longum, videlicet ad decennium, ad vitam; ut proinde transeat in contractum emphyteuticum, quo dominium utile transfertur, non potest colonus à successore particulari expelli. Ratio discriminis est, quia colonus emphyteuticus ius reale utile in fundo obtinet, l. i. §. quod autem ait Prætor, ff. de superficiebus: colonus autem merè conductitius solum personam locatoris sibi obligatam habet. Vide Gomez l. c. Mol. to. 2. disp. 490.

## CAP. XXIII.

## De Emphyteusi.

## SUMMARIVM.

- 1 Emphyteusis concedi solent, ut prædia magis fecunda reddantur.
- 2 In emphyteusi ius domini vilius transfertur; in eoque à locatione distinguitur.
- 3 In dubio, nam sit contractus censualis, an emphyteuticus, præsumitur talis, qualis in eo loco vltior est.
- 4 Laudemium ad substantiam emphyteutici contractus necessariò non requiritur.
- 5 Emphyteusis alia est Ecclesiastica, & alia laica, seu communis.
- 6 Ad emphyteuticum contractum scriptura requiritur.
- 7 Emphyteuta domino exigenti instrumentum seu titulum emphyteuseos, ipsaque prædia emphyteutica, & fines eorum, exhibere cogitur.
- 8 Impendia, quæ ad fundi conseruationem, & fructuum collectionem spectant, emphyteuta præstare debet.

- 8 Si emphyteuta tribus annis continuis in emphyteusistica: duobus verò annis in Ecclesiastica, pensionem integram non soluat, ipso iure cadit in penam commissi; exceptis quibusdam casibus.
- 9 Emphyteuta, si domino non requisito rem emphyteuticam alienet, per venditionem, & c. ipso iure eâ priuatur.
- 10 Potest tamen emphyteuta fundum oppignerare, ad vitam suam locare, censum, vel seruitutem in illo, etiam irrequisito domino, constituere.
- 11 Titulo lucratiuo non prohibetur emphyteuta fundum emphyteuticum in alterum transferre, salvo tamen iure proprietarii.
- 12 Emphyteusis alia est simpliciter hereditaria, alia mixta hereditaria, alia simpliciter ex pacto & providentia.
- 13 Emphyteusis alicui absolute concessa pro se, & filiis suis, etiam famulas comprehendit.
- 14 Emphyteusis, etsi absolute hereditaria sit, tamen in personam potentiores transferri non potest.
- 15 Si emphyteuta Religionem profiteatur, quæ capax sit immobilium bonorum, transit emphyteusis ad Monasterium.
- 16 Pater vniuersorum donare, vel prælegare potest emphyteusim, si hereditaria sit: sin verò ex pacto & providentia, non potest in præiudicium aliorum liberorum; nisi sit emphyteusis nona, siue primitus acquisita.
- 17 Si tempus iuris emphyteutici ad hominis vitam, ad duas, vel tres generationes concessi finitum sit, non tenetur dominus, secundum iuris rigorem, agnatum proximum; quantumvis idoneus sit, inuoluntate.
- 18 Laudemium ex venditione feudi emphyteutici usufructuario, non proprietario debetur: v. g. parvi, non filia ex bonis aduentitijs eius.

**E**MPHYTEUSIS græcè, latinè dicitur insitio, siue plantatio. Nam olim terræ incultæ, ac minus fructiferæ dari solebant in emphyteusim; id est, ut plantatione, ac cultu meliores, vtilioresque redderentur; vtili tantum domino, siue usufructu in emphyteutam, siue colonum translato; ea lege, ut pensionem annuam siue fructuariam, siue pecuniariam soluere cogeretur, in recognitionem domini directi, penes eum manentis, qui prædium ad emphyteusim concessit.

Porrò, licet contractus emphyteuseos eo fine initio institutus fuerit, ut terræ infæcundæ fecundarentur, sicuti dixi; postea tamen usus obtinuit, ut etiam fecundæ in emphyteusim darentur; siue in perpetuum, siue ad vnam, vel plures generationes; siue ad vitam hominis, qui sanus, & robustus est; siue ad longum tempus, id est, ad decennium, vel vltra, (ut videre est in Clement. 1. de rebus Ecclesiæ non alien.) plerumque non modicâ, sed magnâ, & iustâ, comparatione percipiendorum fructuum, pensione constituta.

Ex his intelligitur definitio contractus emphyteutici, quam tradit Mol. disput. 445. Contractus, quo res immobilis, quoad dominium utile, alteri conceditur, pro reali pensione statutis temporibus domino proprietatis, eam ob causam, soluenda. Quamvis autem emphyteuticus contractus quibusdam aliis valde affinis sit, videlicet locationi, censui resignatio, & fendo, sicuti notauit Iul. Clarus lib. 4. sentent. ver. emphyteusis, q. 1. Per voculam tamen *dominium* distinguitur à locatione, quæ ad modicum tempus instituta, nullum ius reale in conductorem transfert, sicuti superiore cap. dictum est. Vide l. i. Zenonis Imper. C. de iure emphyt. & Instit. de locat. §. adeo.

Additâ verò voculâ *utile* distinguitur emphyteusis à censu reservatio, in quo non tantum dominium rei utile: sed plenum ac perfectum in censualiitatem transfertur, reservato censu, siue annua pensione soluenda: non ita tamen, ut si pensio siue census biennio, vel triennio soluta non sit, res cadat in commissum, sicuti accidit in emphyteusi; quippe per quam ius non ita absolute translato esse censetur: sed sub conditione, si tale quid præstitum fuerit, sicuti notat Gl. in c. constitutus, ver. iuxta ratam, ibid. Abb. n. 21. Syl. ver. emphyteusis, n. 3.

Exinde colligit Clarus loco cit. Si dubitetur, celebratæne sit contractus emphyteuticus, an censualis, seu, si ex verbis instrumenti colligi non possit, utrum pensio annua solvatur iure emphyteutico, an iure census: potius præsumendam esse perpetuam emphyteusim,



quàm censualem contractum, præsertim si concessio ab Ecclesia facta fuit. Ratio est, quia contractus emphyteuticus minùs cedit in præiudicium concedentis, quàm censualis. Contrarium verò docuit Conar. 3. resol. c. 7. n. 1. Mascard. vol. 1. concl. 281. & alij perique; eò quòd in dubio, quod minimum est, sequi oporteat: contractus autem censualis minorem obligationem possessori imponit, quàm emphyteuticus. Sed rectius dicitur, quòd communiter inspiciendus sit mos regionis: ut in dubio talis reputetur contractus, qui in eo loco frequentari solet, sicuti habetur in l. semper in stipulat. ff. de reg. iuris, & notat Mol. to. 2. disp. 382.

Pro praxi quadam aduerte circa hoc dubium: I. Si in instrumento factæ concessionis, posita reperiatur vox venditionis, censeretur debet contractus censualis: quia emphyteuticus contractus venditionis non est, sed potius elocationis. II. Et si in instrumento nulla mentio laudemij facta sit, seu expressè, seu implicite (videl. ut rusticus teneatur ad omnia onera, quæ emphyteutis communiter imponi solent) atque à tempore immemoriali nullum laudemium petiit, aut datum fuerit: tamen, si aliæ coniecturæ desint, consequens non est, fundum censualem esse, & non emphyteuticum: quandoquidem ad substantiam contractus emphyteutici laudemium non requiritur: eùm is variis modis, siue pactionibus institui possit, uti constat ex l. 2. & 3. Cod. de iure emphyteutico. III. Si in instrumento, laudemij mentio facta reperiatur, quod tamen constet, longissimo tempore exactum non fuisse, tum multo magis censeretur debet contractus emphyteuticus: adeò, ut à nouo successore in eius inuestitura laudemium exigi possit, non obstante præscriptione, quippe quæ tantum se extendit ad præstationes præteritas, præterquam si ipso facto, aut expressa protestatione fundus temporis diuturnitate tanquam liber à laudemij solutione possessus fuerit, sicut explicauit lib. 1. tract. 1. c. 8. n. 9.

Duplex est emphyteusis: Vna Ecclesiastica, cuius dominium directum ad Ecclesiam spectat: ideòque de eius constitutione secundum ius canonicum iudicandum est. Veruntamen, si Ecclesiastica emphyteusis colono laico concessa sit, iudicandum erit de ea, quod attinet ad dominium utile, secundum leges seculares: ut exinde tributa laicus, tanquam de re ad se pertinente, Principi suo seculari pendere cogatur, sicuti docet Less. cap. 24. dub. 8. num. 44. Molin. disput. 446. licet contrarium sentiat Andreas Fachin. p. 1. lib. 1. controuers. cap. 91. ex Bartolol. priuata, Cod. de excusat. munerum, lib. 10. Alija verò emphyteusis, quæ Ecclesiastica non est, laica siue communis dicitur.

Conditiones, quæ emphyteutico contractui communi iure insunt, (omissis iis, quæ vel locorum consuetudine receptæ, vel contrahentium pactionibus adiectæ sunt, à quibus quàm minimè in hoc contractu recedendum est, cum sit stricti iuris, l. 1. & seqq. Cod. de iure emphyteutico) hæc ferme sunt: Prima. Ad substantiam & valorem contractus emphyteutici requiritur scriptura, siue instrumentum scriptum, sicuti Doctores communiter docent, Clarus quæst. 4. Gomez cap. 3. n. 16. Mascardus conclus. 602. n. 2. Fachinaus c. 84. Molin. disp. 447. & colligitur ex l. 1. C. de iure emphyteut. ibi, *pactionibus scriptura interueniente habetur*. Idque multo certius esse debet de Ecclesiastica emphyteusi, quippe ad quam expressè scriptura requiritur in cit. Auth. de rebus Ecclesiæ non alienandis. Sin autem is, qui se emphyteutam asserit, instrumentum exhibere non possit: quia amissum est: tenebitur testes producere, qui affirmant contractum emphyteuticum, inter tales personas celebratum, scriptoque instrumento confirmatum fuisse. Quòd si eius rei plenam probationem per testes facere nequeat, petere debet à iudice, ut in defectum probationis iuramentum sibi deferatur. quæ de re Mas-

cardus cit. conclus. 602. num. 14. Mol. disput. 449. Vbi notant, quòd emphyteuta, domino exigenti exhibere cogatur non tantum instrumentum & titulum suæ emphyteuseos: sed etiam prædia emphyteutica, eorumque fines: nam alioquin contra illum præsumptio fiet, & omnia eius prædia emphyteutica censebuntur. Videri etiam potest Fridericus Martini de iure censuum, cap. 8. n. 249. & seqq.

Sed excipi debet: Nisi emphyteuta præscriptionis iure se defendere possit, ostendens, se 30. annorum spatio, si emphyteusis laica sit, vel 40. si sit Ecclesiastica, fuisse in pacifica possessione rei emphyteuticæ: & tanquam emphyteutam pensionem uniformem domino persoluisse: tunc alia probatione per scripturam, testes, &c. ad titulum emphyteuseos ostendendum opus non erit, sicuti docet ex communi Mascardus conclus. 603. Nicol. Euerli. vol. 2. consil. 33. Mol. disp. 449. arg. lib. 2. Feudorum, tit. 26. Si de feudo defuncti contentio sit inter dominum, & agnatos, ubi habetur: *Si quis per triginta annos rem aliquam, ut feudum possedit, & seruitium domino exhibuit: quamuis de ea re non sit inuestitus, præscriptione tamen triginta annorum se tueri potest*. Inò multi sunt apud Mascardum, & Mol. cit. II. qui saltè in emphyteusi communi, longi temporis, videl. 10. annorum spatio pensionem domino soluisse ad præscribendum satis esse arbitrantur. Cùm enim ad solutionem pensionis utraque pars concurrat, facilius iura præsumunt, pactum ac titulum antecessisse, arg. l. cùm de in rem verso, ff. de vltis.

Alterà conditio: Emphyteuta debet fundum sibi concessum proprio labore & industria colere, atque cauere, ne deterior efficiatur, si v. g. arbores frugifera excidantur, villa diruatur. Insuper ad ipsum pertinet omnia impendia præstare, quæ ad fundi conseruationem, & fructuum collectionem spectant: puta ut domus, horreum, aggeres, fossæ, sepes, putei conseruentur, ac reficiantur, l. sed cùm, ff. de usufructu. Si tamen domus, horrea, putei, &c. absque culpa emphyteutæ, omnino collapsa sint, ad fundi dominum pertinet ea restaurare. Ratio est: quòd substantia fundi ad dominum pertineat, ius autem fructuum ad emphyteutam: Igitur merito hic impendia facit, quæ ad fructuum perceptionem spectant: rei autem substantia domini damno patitur. quæ de re vide Clarum §. emphyteusis, q. 8. n. 8. Mol. disp. 454. Quamobrem si emphyteuta domos, vel stabula denouo ædificet, aut aliud quippiam præstet, ad quod iure contractus non tenetur, finita emphyteusi absque culpa, aut crimine suo, melioramenta, eorumve æstimationem reperere potest, sicuti colligitur ex l. Papinianus, aliàs incipit *disortio*, §. impendi, ff. soluto matrimonio. I. ad eumquem, C. de usufructu, & docet Gl. in l. sed si quid, ver. refigere, ff. de usufructu, & videri potest Arius Pinellus l. 2. C. de rescind. vendit. p. 2. c. 3. num. 10. Andr. Fachin. p. 1. lib. 1. c. 92. Iulius Clarus lib. 4. sentent. §. emphyteusis, q. 45. Contra verò, si per emphyteutæ negligentiam, fundus in seipso deterior factus sit, ut minoris valeat, priuari potest iure emphyteuseos, & usufructus fundi cum proprietate consolidari, secundum Auth. qui rem, C. de sacrosanctis Ecclesiis, & ex communi docet Tiraquellus in l. si vnquam, ver. omnia, num. 31. Cod. de reuocat. donat. Mynsing. cent. 6. obseruat. 86. vbi ait, ad hoc, ut emphyteuta, & quilibet fundi conductor, ob eius deteriorationem, iure expelli possit, tria necessaria esse: I. Ut deterioratio notabilis sit, quod iudicis arbitrio relinquitur. II. Ut ea deterioratio ipsius fundi sit absolutè, & non tantum in ordine ad perceptionem fructuum ad tempus, quòd colonus fructuosus est. III. Ut colonus in dolo sit, vel culpa lata, aut leui.

Tertio conditio: Emphyteuta, in recognitionem



dominii directi, penes proprietarium manentis: atque in compensationem dominijs vtilis sibi concessi, solvere debet annum redditum siue pensionem, sicuti habetur in §. adeo, Instit. de locatione. Sin autem tribus annis continuis in emphyteusi laica, siue priuata: vel duobus continuis annis in Ecclesiastica, integram pensionem, siue canonem non soluat, ipso iure in pœnam commissi cadit, vt dominus eum expellere possit, quamuis de solutione interpellatus non fuerit, l. 2. Cod. de iure emphyteutico, cit. Auth. Qui rem, &c. potuit, de locato, & videri potest Clarus ver. emphyteusis, quæst. 8. num. 4. Mol. to. 2. disp. 453. §. mains dubium.

Sed limitandum est primò: Nisi dominus debitor sit emphyteuta, vt compensationi locus esse possit, teste Molin. disput. 453. §. illud obseruandum, Nauar. cap. 17. num. 192. argum. cap. 2. de deposito. Secundò: Si emphyteuta pensionem offerat, & per dominum stet, quominus recipiatur. quod de re Gloss. in l. 2. ver. secundum legem, Cod. de iure emphyteutico, Clarus cit. quæst. 8. num. 20. Tertiò: Si ob ignorantiam, vel aliam iustam causam pensio non soluatur: quia videlicet hæres nesciuit rem emphyteuticam esse: nam vbi culpa non est, neque pœna commissi locum habet. Ita secundum æquitatis rationem Gl. proximè citata.

Quartò limitari debet: Quod emphyteuta, ob negligentiam, vel moram non soluendi canonem, pœnam commissi, seu priuationem iuris: vtilitatisque non prius incidat, quam dominus voluntatem exequendi pœnam declaret, sicuti colligitur ex cit. l. 2. & docet Syluest. quæst. 2. Clarus quæst. 9. Mynsinger. cent. 3. obseruat. 65. & cent. 6. obseruat. 83. Molin. disput. 453. Tiraque. l. si vnquam, ver. reuertatur, Cod. de reuoc. donat. Quod si dominus omiserit voluntatem suam declarare, cum facile ei licuisset: non potest deinde ius successor caducitatis pœnam exequi, sicuti docet Baldus in l. ult. Cod. de reuoc. donat. Sed neque contra hæredem vassalli, aut emphyteuta condemnatio per sententiam fieri potest, si contra delinquentem scienter intermissa fuerat, sicuti notauit Mynsinger. cent. 3. obseruat. 97. Id verò probabilius est, ad pœnam caducitatis incurrendam non requiri Iudicis sententiam: sed satis esse, si dominus voluntatem suam declaret: modò manifestum sit, quod emphyteuta canonis solutionem per biennium, aut triennium culpabiliter intermiserit. Ita sumitur ex cit. l. 2. iunct. Gloss. ver. licere eum à prædijs repellere, & docet Mynsinger cent. 3. obseruat. 65. & cent. 6. obseruat. 83. Fachin. cap. 93. contra Sa ver. Emphyteusis, num. 1. Quin & hoc probabile est, posse dominum in hoc casu etiam propria auctoritate rem emphyteuticam occupare, & emphyteutam renitentem eijcere, sicuti ex plurium sententia docet Mynsinger cit. obseruat. 65. Neque dissentit Gloss. in cit. l. 2. ver. secundum legem, & Gl. in cap. potuit, ver. expelli, de locato, ibidem Abb. num. 13. cum tantum dicant, contrarium esse tutius, propter scandalum: Ergo si id absit, licebit, per se loquendo, expellere emphyteutam; sicuti & alium colonum conductitium, si pactis non stet de canone soluendo.

Quintò: In emphyteusi Ecclesiastica, si post elapsum biennium, mox (id est, intra decem dies, secundum communem doctrinam) oblati pensionibus, emphyteuta moram purget, liberatur pœna commissi iuxta cit. cap. potuit. Idemque in priuata emphyteusi, secundum æquitatis rationem, seruandum esse, monet Clarus q. 8. in fine. Vide Fachin. c. 98.

Sextò: Si dominus ab emphyteuta, posteaquam is ex quacunque alia causa caducitatis siue commissi pœna se dignum reddidit, insequentis temporis pensiones recepit, præsumitur ius reuocandæ ab ipso emphyteuseos condonare. Quemadmodum etiam dominus, si à vassallo suo post incursum pœnam caducitatis, sine pro-

testatione iuris sui, solita seruitia recipiat, censetur pœnam remittere, teste Claro §. feudum, q. 42. n. 10. & q. 63.

Sublimitandum verò id est: Nisi Prælatus sit, qui eiusmodi rebus Ecclesiæ præiudicare, & pœnam caducitatis remittere nequit, vt docet Gloss. communiter recepta in cit. cap. potuit, ver. expelli. Clarus q. 10. num. 3. contra Abb. in cit. c. potuit, num. 15. Verum, si pensiones temporis præteriti, id est, quæ ante incursum caducitatem debitæ erant, petantur, vel accipiantur, pœna caducitatis ideo remissa non censetur, saltem in Ecclesiastica emphyteusi, sicuti constat ex Auth. Qui rem, C. de SS. Ecclesiis. Aliter autem se rem habere in emphyteusi priuata docent Clarus cit. q. 10. n. 1. Fachin. c. 99. Quoloco notandum, quod Ecclesia expellens emphyteutam post incursum caducitatem, tamen nihil protestetur, nihilominus exigere possit pensiones præteritas nondum solutas, iuxta cit. Auth. Qui rem. Sed in priuata emphyteusi dominus emphyteutam expellens, si de iure illo suo nihil protestetur, censetur ei renunciare, seu remittere pensiones, vti Clarus docet, cit. loco.

Quarta conditio: Non licet emphyteuta, domino irrequisito, fundum emphyteuticum alienare per venditionem: alioquin ipso iure cadit in pœnam commissi, & iure emphyteuseos, vna cum meliorationibus, spoliatur, si alienatio traditione perfecta sit, cit. cap. potuit, & l. 3. Cod. de iure emphyteutico. Eapropter duorum mensium spatium domino concedi debet; partim ad deliberandum, an ipsemet, oblato eodem pretio, ius emphyteuticum, & meliorationes emere malit: partim ad explorandum, vtrum emptor, vel alius nouus successor colendo fundo emphyteutico idoneus sit: vt eum deinde in possessionem emphyteuseos suscipiat, accepto, pro inuestitura sine renouatione, laudemio: quod tamen partem quinquagesimam pretij, siue æstimationis emphyteuseos non superet, spectato communi iure, cit. l. 3. per consuetudinem verò plurium locorum pars vicesima accipitur. Ante hoc verò bimestre tempus, si possessio fundi ab emphyteuta emptori tradatur, pœna commissi locum habet.

Porrò limitandum id est primò ex cit. l. 3. Nisi dominus in inuestitura, aut concessione emphyteuseos, clausulam apposuerit: quod illius alienatio fieri possit: vel si concesserit alicui emphyteusim pro se aliis quibus ipse dederit: interpretanda est clausula talis cōcessionis, vt domini consensus non requiratur: cum alioquin clausula illa specialis ultra ius commune nihil operaretur, sicuti notauit Clarus q. 13. Vide eundem §. Feudum, q. 31.

Limitandum est secundò: Si dominus à nouo emphyteuta, cui alienatio facta est, quamuis sine consensu suo, in fundi possessionem missio, pensionem accipiat, censetur in alienationem consentire, & pœnam commissi remittere.

Dixi autem rem emphyteuticam alienari statim non posse per venditionem: nam de permutatione aliter sentiunt Syl. verb. Emphyteusis, q. 17. Clarus §. emphyteusis, q. 17. Quamuis valde probabile est, quod tradit. Mol. tom. 2. disp. 461. Si re emphyteutica permuetur cum eiusmodi rebus, puta olea, frumento, vino, quas similiter etiam proprietarius soluere possit: de tali permutatione dominum admonendum fore: vtrum ipsemet eam acceptare malit: alioquin caducitatis pœnam locum habituram esse. Idemque dicendum videtur, si emphyteuta domino irrequisito fundum emphyteuticum alteri pro annua pensione emphyteusim concedat, aut in longum tempus elocet: qui contractus dici solet subemphyteuticus, atque domini consensum requirit: cum sit species alienationis, sicuti docet Syl. ver. emphyteusis, quæst. 14. Clarus quæst. 20. & seqq. Mol. disp. 461.



Interim verò non obstat, quò minus emphyteuta, etiam domino irrequisito, rem emphyteuticam alteri nomine hypothecæ obligare, ius census, aliãve seruitutem ad vitam concedentis constituere possit, & ad tempus breue locare: quin etiam ad tempus longum, dummodo locatio non fiat ipsius rei emphyteuticæ simpliciter, sed solum commoditatis ex ea percipiendæ, nomine ipsiusmet emphyteutæ, dum viuit, sicuti docet Mol. cit. disp. 461. §. maius dubium.

Denique titulo lucratiuo legati, donationis dotis, non prohibetur emphyteuta fundum emphyteuticum, saluo per omnia iure domini seu proprietarij, in aliam etiam extraneam, personam, domino irrequisito, transferre: modò non statim ab ipso emphyteuta in possessionem mittatur, sed domino significetur, vt donarium idoneum ad emphyteusim agnoscat, & inuestiat, accepto ab ipsa laudemio, si extranea persona sit. Videri potest Gl. in cit. l. 3. quæ est vitæ. C. de iure emphyteut. ver. vendere, Abb. c. vlt. n. 8. de locato. Clarus q. 15. Syl. q. 16. & 17. & ver. dos, q. 8. Mol. disp. 461. Less. c. 24. dub. §. n. 54. Vide etiam addit. ad Clarum q. 15. vbi ait: Si emphyteuta alia bona habeat, non posse dare fundum emphyteuticum in dotem, domino irrequisito: Sed etsi in dotem det eo casu, quo dare potest, durare tantum ad vitam donantis: imò etiam dotatæ.

REMANENT QVÆSTIONES. PRIMA. Quinam sint successores in emphyteusi tum laica, tum Ecclesiastica. Hæc quæstio non mouetur de emphyteusi, quæ ad certos annos, videl. 10. vel 20. conceditur: vel quæ ad solam vitam emphyteutæ: constat enim eo tempore transacto, ad dominum, eiusque hæredes emphyteusim reuerti. Sed præter temporalem istam emphyteusim, notandum est ex Claro §. emphyteusis, q. 16. & 28. Molina to. 2. disp. 472. Quod emphyteusis alia est simpliciter hæreditaria, id est, concessa cum facultate transferendi ad quoscunque hæredes, etiam extraneos: quæ proinde emphyteusis liberè alienari potest, requisito domini consensu: vel etiam non requisito, si ex inuestitura appareat, concessam fuisse cum libera alienandi facultate, vti docet idem Clarus q. 13. n. 7. Alia est mixtè hæreditaria, quæ concessa est pro filiis, seu descendentes, iisque hæredibus. quo casu filius succedere in emphyteusi non potest, nisi etiam in hæreditate ascendens succedat. Alia denique est emphyteusis simpliciter ex pacto & prouidentia, quæ data est pro filiis seu descendentes, vel absolutè, vel in certas generationes. Et ad hanc non requiritur, vt filius sit hæres: cum possit etiam repudiata hæreditate paterna, succedere in emphyteusi: quippe quam non iure hæreditatis, sed ex pacto & prouidentia, seu prima eius institutione accipit.

Nunc respondeo, & dico I. Si emphyteusis absolute alicui concedatur, *Do tibi hunc fundum in emphyteusim*, nulla facta expressione hæredum, aut successorum: censi debet ex pacto & prouidentia. Quam esse communem sententiam, testatur Molina disp. 437. princ. Ratio esse debet, quia emphyteuses, sicuti & feuda, communiter ita concedi solent. Quare etiam vice versa, si alicubi consuetum sit, vt emphyteuses concedantur cum facultate transferendi ad quoscunque hæredes, etiam extraneos, tunc censi debent simpliciter hæreditariæ, si dicta formâ absolute alicui data fuerint.

Dico II. Si emphyteusis alicui concessa sit pro se, & filiis suis, possunt enim feminae succedere. Itado-cent Couar. 2. resol. c. 18. n. 1. Clarus q. 32. n. 2. Andr. Fachin. p. 3. lib. 8. c. 97. Mol. disp. 474. ver. Vtrum, contra multos Legistas. Ratio est: Quia nomen filiorum etiam filias comprehendit, l. quisquis, ff. de verbor. signif. Cum igitur feminae capaces sint emphyteuseos, perinde ac masculi, iuxta Authen. de non alienan. §. Emphyteusis: ideo nomine filiorum expres-

so in emphyteutico instrumento, etiam feminae, comprehendendi debent. Verum consuetudine receptum esse, ait Clarus cit. q. 32. n. 3. vt non admittantur feminae, nisi deficientibus masculis.

Dico III. Si emphyteusis alicui concessa sit pro se, & hæredibus suis, aut successoribus suis, censi debet hæreditaria, vt ad extraneos quoque transire possit. Quæ est communis sententia apud Clarum q. 28. ver. tertius est casus, Molinam disp. 469. ver. Est verò, & disp. 472. ver. Quod si emphyteusis. Quia nomine hæredum, aut successorum etiam extranei comprehenduntur. Addunt tamen Doctores, hanc assertionem locum tantum habere in emphyteusi laica: at verò in Ecclesiastica nomine hæredum tantum comprehendendi descendentes: non item extraneos. Quod tamen sola consuetudine niti debet: si videlicet alicubi Ecclesiasticæ emphyteuses aliter concedi non soleant, nisi pro deficientibus: vt nomine hæredum non intelligantur nisi descendentes. Sin verò consuetum fuerit, vt Ecclesiasticæ emphyteuses in perpetuum, & pro quibuscunque hæredibus concedantur: vel si emphyteusis non de nouo detur, sed antiquitus ita data, & nondum Ecclesiæ incorporata sit: tali casu etiam ad extraneos hæredes deuolui poterit emphyteusis Ecclesiastica. Quandoquidem canonico iure talis concessio nullibi restricta, aut prohibita reperitur. Authentica autem Iustin. Imperatoris de alienatione & emphyteusi, §. Emphyteuses, vbi præcipitur, vt emphyteuses non concedantur, nisi in personam quæ acceperit, & duos hæredes seu descendentes, ad propositum non facit: tum quia in ea Authent. sermo tantum est de Ecclesia Constantinopolitana, & aliis quibusdam locis eiusdem Urbis: tum quia Authent. illa, cum de rebus Ecclesiasticis speciatim disponat, ab Ecclesia non acceptatur, iuxta c. Ecclesia S. Mariæ, de Constit. Sin verò Authent. illa aliquibus locis per consuetudinem firmata sit: secundum eam procedi potest, non vi Imperatoris constitutionis, sed propter consuetudinem diuturnam, quæ vim legis habet, vbi lex deficit, c. vlt. de consuet.

Dico IV. Etsi emphyteusis hæreditaria sit, seu concessa pro quibuscunque hæredibus aut successoribus, non potest tamen transferri in personam potentiorē, magisque priuilegiatam: cuiusmodi est v. g. Ecclesia, vel Ciuitas. Ita colligitur ex l. vlt. C. de iure emphyteut. iun. Gl. ver. vetari. & esse communem, testatur Clarus q. 22. Molina disp. 459. ver. quartum. Ratio est: Quia proprietarij conditio deterior reddetur tali alienatione: quandoquidem rariùs laudemium consequetur, & difficilijus ad ipsum emphyteusis reuersura est.

Corollarium. Cum bona alicuius ob crimen confiscantur, licet fiscus etiam succedat in emphyteusi, si hæreditaria sit, vt ad quoscunque etiam extraneos deuolui possit, argum. l. iura libetorum, ff. de iure patronatus: tamen cogi poterit fiscus, vt intra annum alteri vendat emphyteusim. quæ de re Molina lo. cit. & Syl. ver. emphyteusis, q. 20. vbi ait cum Speculatore, quod Ecclesiæ, vel Monasterio talis emphyteusis legari possit, vel cum hæreditate relinqui, ita tamen, vt intra annum vendere debeat. Testatur tamen Molina disp. 481. concl. 2. Si bona alicuius ob crimen confiscantur, consuetudine receptum esse, vt emphyteuses & feuda Ecclesiastica statim ad Ecclesiam reuertantur, quæ consuetudo aperte approbata videtur in c. felix, §. si qua verò, de hæret. in 6.

QVÆSTIO SECVNDA. Si emphyteuta Religio-nem profiteatur, ad quem emphyteusis spectare debeat? Respondeo, & dico I. Si emphyteuta profiteatur Religio-nem, quæ capax non est stabilitum bonorū ac credituum, vti est Ordo Minorum de obseruantia, Capucinorum, & Societas Iesu: emphyteusis pertinet ad legitimos hæredes, aut successores, videlicet si hæreditaria est, ad proximum



con sanguineum, si Religiosus ante professionem nihil disposuit: sin vero sit emphyteusis ex pacto & providentia, pertinet ad eos, qui secundum investituram vocantur: si nullus talis adit, reuertitur ad proprietarium. Ita docent Molina disp. 482. paulo post princ. Sanchez lib. 7. moral. cap. 15. n. 52. Ratio est: Quia professio talis Religiosi mortu naturali æquiparatur, uti dicam tract. seq. c. 3. n. 3.

15 Dico II. Si emphyteuta profiteatur Religionem capacem bonorum immobilium, arbitror distinguendum esse, utrum sit emphyteusis hereditaria, necne. Si hereditaria est, transit quidem ad Religionem, seu Monasterium: sed debet emphyteusis, (saltem post mortem Professi) vendere: quia alioquin omnem spem proprietarius amitteret laudemium accipiendi. Et ita intelligi debent Molina to. 1. tit. 2. disp. 140. ver. eandem regulam, & t. 2. disp. 482. ver. Si vero. Chaldas de renouat. emphyteusis, q. 19. n. 7. Less. lib. 2. cap. 41. dub. 10. n. 84. Sin vero hereditas sit ex pacto & providentia, tunc commoditas seu utilitas emphyteusis, interim dum Religiosus viuit, ad Monasterium spectat: post vitam autem illius succedit, qui ex investitura vocatur: alioquin ad dominum reuertitur emphyteusis. Ita docet idem Molina cit. disp. 482. Sanchez cit. c. 15. n. 59. Ratio est: Quia cum persona omnia iura eius in Monasterium transeunt, si capax sit: adeoque etiam emphyteusis, & ususfructus quilibet: item ius patronatus, si ad Professum pertinebat non iure Collegij, sed iure singulari, uti docent Gl. & DD. in c. beneficiu, ver. conferendum, de regular. in 6. Rodriq. to. 2. regular. q. 122. a. 2. Sanchez lib. 7. moral. c. 14. n. 1. & seqq.

Quin imò etsi in investitura expressum sit, ut emphyteusis non transferatur in Ecclesiam, vel alium potentiorum, non impeditur ista translatio emphyteuseos in Monasterium: tum quia non est alienatio propriæ: cum Monasterium possideat & fruatur loco Professi, veluti vnam cum eo personam faciens: tum quia prohibitio alienationis intelligenda est de voluntaria alienatione, non autem de ea, quæ ex legis dispositione necessariò fit: qualis est ista, ut omnia bona Professi in Monasterium transeant. Quæ est communis doctrina Canonistarum c. in præsentia, de probat. nominatim Abbatis n. 73. ubi vniuersim aiunt, si quid alicui datum, vel donatum sit ea lege. ut non liceat alienare: illo Religionem proficiente, transire ad Monasterium: quia hæc est alienatio legis, & accessoria ad personam ingredientis, inquit Abbas: & infra n. 75. bene monet: Monasterium succedere in bonis Professi non iure hereditario, sed iure naturalis acquisitionis. de quo dicam infra tract. seq. c. 5. n. 4. Bene tamen limitat Syl. ver. hereditas, l. q. 7. dicto 4. Sanchez cit. lib. 7. c. 15. n. 69. Nisi intentio alienatæ sine suo frustraretur, si res illa ad Monasterium perpetuò & irrevocabiliter deveniat: tunc restituenda erit post Monachi vitam.

16 QVAESTIO TERTIA. Vtrum pater vni filiorum emphyteuticum bonum donare, vel prælegare possit? Respondeo & dico I. Si emphyteusis simpliciter hereditaria sit, siue concessa alicui pro se, & hæredibus quibuscunque; vel pro se, & quibuscunque dederit: tunc possessor emphyteuseos vni liberorum in dotem dare, aut prælegare non prohibetur: modò id fiat sine diminutione portionis legitimæ, aliis libetis debita. Ita ex communi docet Clarus ver. emphyteusis, quæst. 16. Quia eiusmodi bona censentur potius libera, seu allodialia, quam emphyteutica.

Dico II. Si emphyteusis noua est, seu primitus acquisita possessori quamuis cum pacto & providentia, potest vni filiorum prælegari, accedente consensu domini. Ita ex probabiliore idem Clarus, contra Molinam disp. 478. Couar. 2. resol. c. 18. n. 2. Ratio est: Quia pater stipulando pro se, & filiis suis, censetur stipu-

latus cum dependentia liberorum à sua persona, ita ut nullum ius habeant ante mortem ipsius: consequenter cum domino aliam formam contractus instituere potest, antequam ius acquiratur descenditibus. Hoc tamen discrimen est inter emphyteusis, quæ simpliciter ex providentia est, & emphyteusis mixtam, quod hæc prælegari non possit cum diminutione legitimæ aliorum liberorum: at verò emphyteusis ex providentia simpliciter, non veniat in computationem bonorum hereditariorum.

Dico III. Si emphyteusis est antiqua, possessor, ne quidem cum domini consensu, vni liberorum prælegando, aliis præiudicare potest. Hæc est communis: Quia post mortem primi acquirentis ius descenditibus acquisitum est, ex vi primæ investituræ. Si tamen emphyteusis sit hereditaria mixta, id est, concessa alicui pro se, & filiis suis hæredibus, tunc dispositionem patris testatoris filij amplecti debent, si hæredes esse velint: quia hæres factus defuncti contradicere non potest, legem à matre, C. de rei vindicat. & docet Couar. 2. resol. c. 18. n. 2. concl. 4. Molina cit. disp. 478. concl. 3.

QVAESTIO QUARTA. Si emphyteusis, ad duas v. g. aut tres generationes concessa, iis finitis, ad dominum reuertatur: utrum is obligatus sit vltimi emphyteutæ agnato potius, quam alteri, emphyteusis concedere? Affirmantem partem tenent Bartol. in l. 1. § per mittitur, ff. de aqua quotidiana, & æstiva, & alij multi, quos citat & sequitur Clarus ver. emphyteusis, q. 43. Guill. lib. 2. obser. 143. quæ tamen sententia aliter probari non potest, quam auctoritate Bartoli, & recepta in pluribus locis consuetudine. Nam de iure contraria sententia vera videtur, quam docent Mol. com. 2. disp. 484. Andr. Fachin. lib. 1. controu. iuris, c. 100. Neque enim contrahens ex contractu plus obligatur, quam inter partes conuentum fuit: si igitur emphyteuticus contractus ita institutus est, ut ultra tres generationes durare non debeat, non amplius obligatus erit, qui emphyteusis concessit. Fateor tamen, secundum æquitatem, non facillè repellendum esse filium emphyteutæ, si ad emphyteusis idoneus, & emphyteusis alicui concedenda sit: alioquin multi coloni ad mendicitatem redigendi forent, non sine Reipubl. detrimento.

QVAESTIO QUINTA. Si fundus emphyteuticus vendatur, utrum laudemium debeat proprietario, an verò usufructuario, quando usufructus à proprietate seiunctus est? uti videre licet in patre, ad quem pertinet usufructus bonorum aduentitiorum filijfamilias. Respondeo cum Syl. ver. emphyteusis q. 22. & communis doctrina. Laudemium dandum esse usufructuario, v. g. patri, aut ei, cui usufructus talis fundi legatus est. Quia omne emolumentum proveniens ex re fructuaria, debetur usufructuario, l. item si fundi, ff. de usufructu.

QVAESTIO QUINTA. Si fundus emphyteuticus ad dominum reuertatur, utrum is meliorationum estimationem emphyteutæ solvere cogatur? Respondeo, & dico I. Si emphyteuta fundo emphyteutico priuatus est ob canonem non solum, meliorationes à domino repetere non potest. Ita habetur expressè in l. 2. Cod. de iure emphyteutico.

Dico II. Si emphyteuta absque culpa sua fundum emphyteuticum auarit, ut quia tempus finitum est, ad quod ei emphyteusis concessa erat; repetere potest meliorationes eas tantum, ad quas ratione contractus emphyteutici non tenebatur; puta si nouum ædificium extruxerit, uti habetur in lib. 2. feudorum, tit. 28. Hic finitur lex, §. ad hoc, ver. si vasallus, iun. Gl. ver. aliquod ædificium fecerit. Sin verò meliorationes fecit emphyteuta, ad quas ratione emphyteutici contractus tenebatur, eis repetere haud potest, sicuti indicat Gl. citata, & bene docet Andr. Fachinus lib. 1. controuers. iuris,



cap. 92. Nam emphyteuta ex natura contractus emphyteutici fundum sibi concessum conseruare, ac meliorem reddere debet. Eademque quaestio eodem modo de feudo resolui debet, per ea, quae docet Clarus lib. 4. sentent. ver. feudum, q. 88.

## CAP. XXIV.

## De Feudo.

## SUMMARIUM.

1. Feudum veluti donatio ac beneficium quoddam est, ob quod fidelitas, & personale obsequium, a vasallo exigitur.
2. Feudum cum emphyteusi in plerisque conuenit.
3. Feudum magis etiam, quam emphyteusis, alienari prohibitum est.
4. Duplex est feudum: nouum, & antiquum: Item aliud est hereditarium, aliud gentilium, seu ex pacto & prouidentia.
5. De feudo nouo vasallus cum domini consensu disponere potest, etiam non requisita voluntate agnatorum.
6. De feudo proprie hereditario vasallus suo iure arbitrari disponere potest.
7. De feudo antiquo ex pacto & prouidentia, vasallus disponere non potest sine renuntiatione agnatorum.
8. Bona feudalia ex pacto & prouidentia, sicuti & emphyteutica, omni-  
no separata sunt ab hereditariis seu allodialibus.
9. Feudum in quibusdam differt ab emphyteusi.
10. In feudo communi iure feminae non succedunt: neque Clerici in sacris  
constituti; multo minus Monachi, & similes Religiosi.
11. Illegitimi quoque, quamuis per Principis rescriptum legitimati, a  
feudis excluduntur; nisi expresse ad ea habiles facti sint.
12. Feudum a vasallo auferitur ob crimen ingratitude erga dominum  
suum.

**F**eudum alij a *federe* dictum esse arbitrantur: alij a *fide* seu fidelitate, quam vasallus domino praestare debet, sicuti habetur lib. 2. feudorum, per quos fiat inuestitura, in fine. Definitur ex lib. 2. feud. tit. 23. In quibus causis feudum amittatur. Concessio, seu donatio rei immobilis (puta regni, prouinciæ, ciuitatis, pagi, arcis, agri, &c.) secundum utile dominium, pro fidelitate & obsequio personali, quod vasallus domino exhibere debet. Quia tamen definitione non comprehenditur feudum emptitium, seu quod pretio comparatum est; cum neque proprie feudum sit, sicuti testatur Clarus q. 16.

2. In plerisque conuenit feudum cum emphyteusi: Primo: Quia utrumque constituitur in re immobili. Secundo: Sicuti in emphyteusi, ita & in feudo ususfructus transfertur in vasallum, manente proprietate penes dominum sicuti habetur lib. 2. feudorum, In quibus causis feudum amittatur, prope finem. Tertio: Vasallus, sicuti & emphyteuta, a domino inuestiri, siue in possessionem mitti debet; vel verè & corporaliter ipsum introducendo, ut acquirat ius in rem; vel per iuris fictionem, tradendo ei anulum, ense, ut acquirat ius ad possessionem rei propria auctoritate capiendam, sicuti colligitur ex lib. 2. feudorum, tit. 26. Si de feudo defuncti contentio sit inter dominum & agnatos vasalli, §. si facta, & docet Clarus §. feudum, q. 26. Quarto: Vasallus sine domini consensu feudum alienare non potest: alioquin cadit in commissum post alienati feudi traditionem, & alienatio irrita est, sicuti habetur lib. 2. tit. 52. De prohibita feudi alienatione per Fridericum, c. Imperialem, & docet Clarus q. 31. Syl. ver. feudum, q. 18.

Quin imò magis etiam prohibita est vasallo alienatio feudi, quam emphyteutæ alienatio emphyteutæ: Siquidem vasallo concessum non est, absque domini consensu, quouis titulo oneroso, vel gratuito donationis, dotis filia data, &c. feudum alienare, aut in emphyteusim dare, aut oppignerare, sicut constat ex cit. constit. Friderici, & docet Gl. ibid. Syl. q. 21. Ioach. Mynsing. sent. 4. obser. 86. Clarus q. 31. 35. 36. Qui tamen in fine

cit. q. 33. notat, consuetudinem permittere, ut liceat vasallo, domino non requisito, pascua, & terras in cultas in tempus etiam longum locare, seu in emphyteusim dare, seruitutem in re feudali constituere, fructus & commoditatem rei feudalis alienare; imò etiam alium sibi vasallum subinfeudare, teste Gl. communiter recepta in c. quæ in Ecclesiarum, ver. alienandi feudum, de constit. Claro q. 32. Mynsingero cent. 1. obseruat. 62. Quæ omnia tamen sine domini præiudicio fieri debent: adeò, ut si feudum aliqua de causa ad dominum reuertatur, mox seruitus illa, vel ius conductoris, &c. extinguatur. Nam *dissoluto iure dantis: dissoluitur etiam ius accipientis*, l. lex vetigalis, ff. de pignoribus. Vide tit. 9. lib. 2. feudorum. Item fieri debet subinfeudatio sine præiudicio hæredum, vel agnatorum, si sit feudum antiquum, vel paternum: quare eiusmodi concessio feudi ultra vitam concedentis fieri non potest, sicuti notat Mynsing. cit. loco. Denique vasallus feudum sibi acquisitum omnino refutare, siue à se abdicare non prohibetur; ut illi obueniat, cui de iure debet, videlicet filio, aut alteri proximo agnato suo; vel ipsimet domino, si feudum nouum sit. Nam refutatio, alienationis nomine non comprehenditur, sicuti docet Mynsing. cent. 6. obser. 23.

Ex dictis quaestio soluitur: Vtrum vasallus, cum domini consensu, ubi is requiritur, de feudo disponere possit, in præiudicium liberorum, vel agnatorum? Pro resolutione notandum; Duplex esse feudum; nouum, & antiquum. Feudum nouum dicitur, quod primò alicui acquisitum est, beneficio solius conferentis. Feudum antiquum est, quod ab ascendente, iure agnationis, ad alterum transmissum fuit.

Iterum diuiditur feudum in hereditarium, *Erbleben*, & Gentilium, siue ex pacto & prouidentia, *Stamleben*. Feudum hereditarium proprie illud dicitur, quod alicui simpliciter concessum est, pro se, & quibuscunque hæredibus. Feudum ex pacto, & prouidentia dicitur, quod concessum est alicui pro se, & filiis suis: aut, quod idem est, pro se & liberis suis. Nam appellatione liberorum in materia feudali veniunt tantum masculi: quippe qui soli, iure ordinario, feudi capaces sunt: neque censentur comprehensæ feminae, nisi specialis earum mentio fiat, sicuti habetur in lib. 2. tit. 8. de successione feudi, in fine. Sed et si feudum speciali pacto concessum alicui sit pro se, & hæredibus suis masculis, & feminis; hæ tamen ad feudum non admittuntur, nisi in defectum masculorum, sicuti constat ex c. 1. §. filia, & §. quin etiam Episc. vel Abb. de success. feudi, & docet Mynsing. cent. 5. obser. 74.

His positis dico primò: De feudo nouo vasallus, cum domini consensu, tam inter viuos, quam per ultimam voluntatem disponere potest, etiam non requisito consensu filij primogeniti, aut alterius proximi agnati, qui alioquin secundum formam inuestituræ in feudo successurus esset. Ita ex communi docet Clarus quaest. 40. & 41. Andreas Gaill. lib. 2. obseruat. 49. Mynsing. cent. 4. obser. 84. in fine. Ratio est: Cum enim in hoc feudo descendibus, vel agnatis nondum ius acquisitum fuerit, ideo primus acquirens de eo, tanquam de re sua, cum domini consensu, pro arbitratu disponere potest. Excipe primò: Nisi feudum nouum concessum sit speciali favore alicuius filij, in inuestitura nominati: tunc enim non potest ius successionis ipsi adimi. Et simile est, si alicui feudum concessum sit adiuncto speciali favore fratris, qui ipsi defuncto in feudo succedat. Excipe secundò: Nisi feudum nouum alicui concessum fuerit, ut esset instar antiqui, auti, proauiti, &c. tunc alienari non potest cum præiudicio filiorum, aut collateralium, qui ab eodem illo communi stipite, patre, auo, proauo descendunt, sicuti docet Andreas Gaill. lib. 2. pract. obseruat. 50. Mynsing. cent. 4. obseruat. 84.

Dico II. De feudo simpliciter, & proprie hereditario



tam nouo, quam antiquo, vassallus arbitratus suo inter viuos, & per ultimam voluntatem, neque requisito domini, aut proximorum agnatorum consensu, perinde ac de bonis propriis disponere potest. Ita ex communi docet Clarus q. 41. Gaill. l. 2. obseruat. 154. Ratio est: Quia tale feudum, ratione primæ inuestituræ, ad quoscunque etiam extraneos deuolui potest, reseruata domino directo fidelitate, à feudi successore præstanda.

7 Dico III. De feudo antiquo, quod cum pacto & prouidentia ad hæredes, sine liberos descendentes, concessum fuit (sicuti feuda plerumque concedi solent) non potest vassallus, etiam cum domini consensu, disponere, nisi insuper renuntiatio proximi agnati accedat. Ita ex omnium sententia docent Ioach. Mynsing. cent. 4. obser. 85. Clarus cit. quæst. 41. Andreas Gaill. lib. 2. obseruat. 49. & constat ex lib. 2. feudor. tit. 39. De alienat. paterni feudi. Ratio est: Quia agnatis ex pacto & prouidentia primi tum conferentis, tum acquirentis, ius acquisitum est; cui pactum, vel dispositio posterior obesse non debet. Nam primordium, siue originem cuiusque contractus inspiciendum esse, dicitur in l. vn. Cod. de imponenda lucratiua descriptione, lib. 10. in. Gloss. ver. primordium. Interim tamen non prohibetur vassallus de fructibus percipiendis ex feudo disponere, quoad vitam suam.

8 Corollarium I. Bona feudalia ex pacto & prouidentia, sicuti & emphyteutica, non veniunt in confiscatione bonorum; propter generalem regulam, apud Iulium Clarum lib. 5. sent. §. fin. q. 78. n. 7. Quod in fiscum transeunt omnia bona delinquentis, quæ ad extraneos deuolui possunt: quæ autem ad extraneos deferri nequeunt, ea neque confiscari possunt.

Corollarium II. Bona eiusmodi feudalia (loquor de feudo antiquo ex pacto & prouidentia) omnino separata sunt ab hæreditariis: quam obrem filio in legitimam suam computari nequeunt. Deinde proximus agnatus etiam repudiata hæreditate in eiusmodi feudo succedere potest: quia in feudo antiquo ex prouidentia primo acquirenti iure agnationis, non iure hæreditatis succeditur, sicuti docent DD. in lib. 1. tit. 8. de success. feudi. Clarus q. 9. & 76. Ioach. Mynsing. cent. 3. obseruat. 67. & cent. 4. obser. 2. Couar. 1. resol. c. 18. n. 4. Eademque ratio est de emphyteusi, si alicui concessa sit pro se, & filiis suis, non exprimendo, quod debeant esse hæredes, sicuti notat idem Couar. cit. c. 18. concl. 5. Syl. ver. emphyteusis, q. 19. Gaill. cit. obser. 154. n. 17. Quin imò, tamen si filius, vel agnatus hæreditatem defuncti adiit, beneficio tamen inuentarij consequitur, ut ultra vires hæreditatis creditoribus non obligetur; & feudum nihilominus retinere possit, quippe quod ab hæreditate, ut dixi, separatum est: & à defuncto in præiudicium agnatorum alienari, aut obligari non potuit. Neque enim in generali bonorum obligatione, aut hypotheca veniunt bona feudalia, sicut copiose docet Andr. Gaill. l. 2. obser. 154. Excipiuntur tamen fructus eius anni, quo vassallus moritur: hi enim creditoribus debentur: sicuti etiam viuente vassallo debitore, in causam iudicati executio in fructibus fieri potest: salua semper manente substantia, & iure feudi. Quod idem etiam in Ecclesiastico beneficio debitoris clerici locum habet. quæ de re Andreas Gaill. l. 1. obser. 117. Vide quæ dicam lib. seq. tr. 2. c. 3. n. 10.

Corollarium III. Qui iuramento renuntiavit hæreditati paternæ, is nihilominus in feudo patri succedere potest: secus, si omnibus bonis paternis renuntiavit, sicuti docet Mynsing. cent. 6. obser. 66.

Denique conuenit feudum cum emphyteusi, quod illo finito, sine dolo & culpa vassalli, meliorationes ad ipsum spectent: quare pati debet dominus, ut ea tollatur, nisi pretium vel æstimationem soluere malit, sicuti ha-

betur lib. 2. feud. tit. 28. & docet Clarus lib. 4. sent. §. feudum, q. 88.

Porro ab emphyteusi feudum differt primò: In Emphyteusi annuatilis pensio soluitur; in feudo autem plerumque personalis tantum obligatio est honorem, ac reuerentiam domino præstandi, cum adiuuandi, defendendi contra omnes, modo licito. De quo vide lib. 2. feudor. tit. 6. & 7. de forma fidelitatis, Syl. ver. feudum, q. 12. Clarus q. 21. Eapropter, feudum magis ad naturam donationis ac beneficii accedit; emphyteusis verò ad naturam locationis, & contractus onerosi.

Secundò: Vassallus non tantum qui primò inuestitur, dictæ fidelitatis iuramentum domino suo præstare debet; sed etiam filius, aliùve successor, intra annum & diem, inuestituræ renouationem, præstito iuramento, petere cogitur; nisi iusta causa excuset: quia iustè impedito tempus lege constitutum non currit. quæ de re videri potest Ioach. Mynsing. cent. 6. obser. 9. Iterum verò, si dominus moriatur, vassallus, intra diem & annum, ab hærede, aliòve successore illius, inuestituram petere, & fidelitatem iurare cogitur: alioquin feudo priuatur; saltem per Iudicis sententiam. Habetur in l. 2. feudor. c. 24. Quæ fuit prima causa amittendi feudi, & apud Clarum q. 49. In quibusdam etiam feudis consuetudo obtinet, ut vassallus in recognitionem domini directi, realem pensionem præstet; non tantum cum nouus vassallus inuestitur, *im anfall*; sed etiam cum mortuo domino, alius eidem succedit, *im verrenfall*. In quo discrepat ab emphyteuta, qui laudemium semel tantum, cum inuestitur, pendere cogitur.

Tertiò: In emphyteusi etiam fœminæ succedere possunt, communi iure, & consuetudine. In feudo autem succedunt descendentes masculi tantum, ut supra dictum. Deficiente verò linea descendente, succedunt agnati laterales, non tantum vsque ad gradum septimum; sed in infinitum, sicuti colligitur ex lib. 2. feud. tit. 50. De natura successionis feudi, & tanquam probabilius docet Clarus, quæst. 79. Gaill. lib. 2. obseruat. 150. Ratio est, quia in feudo non succedunt agnati tanquam collaterales defuncti; sed potius tanquam descendentes in linea recta à primo acquirente, communi ipsorum stipite. Quare regula feudalis est, quod *ultimus agnatus primi acquirentis successor est, etiam si feudum per mille manus transferit*.

Quartò: Emphyteuseos capaces etiam sunt Clerici, & loco Monachi Monasterium; ita tamen ut paulò post vendatur; vel prouideatur domino de laudemij solutione, ne domini directi conditio per translationem in Monasterium deterior fiat. quæ de re egi cap. præced. q. 2. Clarus §. emphyteusis, q. 22. Syl. q. 20. Less. lib. 2. c. 41. dub. 10. p. 84. Feudia autem dictæ personæ capaces non sunt, sicuti habetur lib. 2. feud. tit. 26. Si de feudo defuncti contentio fiat inter dominum, & agnatos vassalli. *Qui clericus efficitur, aut votum religionis assumit, hoc ipso feudum amittit*. Cuius rei ratio affertur eod. lib. 2. tit. 21. *Eò quod desit esse miles seculi, qui factus est miles Christi: nec beneficium pertinet ad eum, qui non potest gerere officium*. Sed limitari debet primò: Nisi sint Clerici tantum in minoribus ordinibus constituti, non beneficiati: nam hos perinde ac laicos, ad feudum habiles esse, ex communi testatur Clarus q. 78. Secundò: Si feudum ex prima institutione, & voluntate conferentis, Ecclesiasticæ dignitati annexum sit, iuxta lib. 2. feud. tit. 40. De capitulis Conradi, §. ult. & c. ex transmissa, c. verum, de foro compet. quomodo Germaniæ nostræ Episcopi, Abbates, aliæque Ecclesiasticæ personæ passim feuda maiora, & Imperialia, annexa dignitati suæ, possident, sicuti notauit Fachin. lib. 7. controu. c. 35. in fine. Tertiò: Si feudum Francum



seu liberum sit ab obsequio; aut secundum aliquos, si conditio feudi, lociue consuetudo permittat, ut obsequium, quod ratione feudi debetur, per aliam personam præstari possit: Item si tale feudum sit, ex quo seruitium non personale, sed reale; puta pensio pecuniaria præstanda est. Tunc enim cessat ratio, quæ affertur lib. 2. tit. 36. An mutus, vel alias imperfectus, &c. Cur clericus, fœminæ, & similes personæ feudum retinere non possint, quia seruire non valent. & ita docet Nau. com. 2. de Regul. n. 55. Fachin. lo. cit. Sanchez lib. 7. moral. c. 15. q. 3. Mynsing. cent. 5. obser. 48. Veruntamen in quibus pensio realis penditur non propriè feuda sunt, sed multum ad naturam emphyteuseos accedunt, teste Syluest. ver. feudum, quæst. 8.

11 Quinto: A successionem feudi excluduntur filij naturales, & illegitimi omnes, quamuis per Principis rescriptum legitimati sint; nisi expressa mentio fiat, quod etiam feudi capaces esse debeant. Legitimati tamen per subsequens matrimonium admittuntur. quæ de re Clarus q. 82. & Doctores in lib. 2. feudorum, cap. 26. §. naturales filij. At verò in emphyteusi etiam naturales liberi succedere possunt; nisi sit Ecclesiastica, à qua illegitimi omnes excluduntur, teste Claro ver. emphyteusis, q. 30. 31. Sa eod. ver. num. 4. Mol. disp. 47 §. quem lege.

12 Denique beneficium feudi à vasallo aufertur ob magnæ ingratitudinis causam: cuiusmodi plures speciales in libris feudorum enumerantur; videlicet, si mortuo domino vasallus, intra annum & diem, heredem, vel successorem illius non adierit, ut fidelitatem polliceatur, & inuestituram petat: similiter, si hæres, vel successor vasalli intra idem tempus, dominum, causa inuestituræ petendæ, non accesserit per se, vel per procuratorem si vasallus dominum suum, quem ad prælium euntem comitatus erat, in acie periclitantem dimiserit: si intellecto, domino suo insidias parari, eum de hac re certiores non fecerit, vel si contra dominum inimicis eius se sociauerit: item si delator domini sui extiterit, & graue dispendium eum sustinere fecerit: si eum per vim aggressus fuerit, impias manus in eum, aliæque graues iniurias intulerit, aut vitæ eius insidiatus sit. Si vxori, filix, nurui, sorori, in domo sui domini adhuc manenti se immiscuerit, si feudum, vel feudi partem, cuiusue aliquam conditionem falsè inficiatus fuerit. Denique iustissima causa feudi amittendi est si obsequia, siue seruitia, ob quæ beneficium ei datum fuit, præstare recusauerit: Nisi fortè ideo non seruiert, quia non potuerit: tunc enim feudum non amittit. Habentur hæc lib. 1. feudor. tit. 5. & lib. 2. feud. tit. 24. & 26. Quod verò ad feudi priuationem Iudicis sententia requiratur, ex communi docet Clarus q. 62.

Porro, utrum feudum amissum culpa vasalli, domino, an agnatis deferatur, habetur in cit. tit. 24. §. denique. Si vasallus in a in dominum peccauerit, ut feudum amittere debeat (puta propter ingratitudinem) non ad proximos, sed ad dominum reuertatur; ut hanc saltem habeat suæ iniuriæ ultionem: Si verò non in dominum, sed alias grauius deliquerit; sicuti ille, qui fratrem suum interfecit, vel aliud graue crimen, quod parricidij appellatione continetur, commiserit (eo modo, sicuti dicitur in tit. 36. lib. 2. feudor.) feudum amittit: & non ad dominum, sed ad proximos agnatos (non filium, iuxta tit. 31. eod. lib. 2.) pertinet; si beneficium fuerit paternum, id est, patri primitus acquisitum feudum: tunc enim delictum patris nocet filio in feudo perdendo: secus est, si feudum à genere ultioris descendit; tunc enim priuato patre, propter delictum, v. g. fratricidij, filius delinquentis succedit in feudo, exclusis collateralibus, sicuti docet Abb. in c. 2. n. 9. de feudis: quamuis in his non vna DD. omnium opinio sit, sicuti videre licet apud Clarum q. 66. n. 3.

Quod si inter vasallum, vel agnatos eius, & dominum controuersia sit super feudo, iudicare debent Patres curiæ. Exceptis casibus; quos videre licet apud Mynsing. cent. 6. obser. 19. Sin verò inter vasallos ipsos super feudo, aut re feudali controuersia existat, dominus est iudex competens, hæc habentur in lib. 2. tit. 55. de prohibita feudi alienatione per Fridericum, & videri potest Clarus cit. quæst. 66.

## C A P. XXV.

## De Deposito.

## S V M M A R I V M.

- 1 In deposito dolo, non culpa, nisi quæ secundum presumptionem dolo equiparatur; præstanda venit.
- 2 Contractus depositi magnam fidem requirit.
- 3 Depositarius absque consensu domini, expresso, aut tacito, re deposita vti prohibetur.
- 4 Casareo iure prohibitum est, ne pecunie publicæ titulo mutui, alteriusve contractus exponantur. Fortasse tamen Officialis à culpa mortali excusari potest, si in aliquo casu certum sit, nec magistratus, nec subditis ullum ea re damnum inferri, aut lucrum decedere.
- 5 Depositarij possunt esse omnes, qui iudicij discretionem habent.
- 6 Ecclesia, vel Monasterium non tenetur, si depositum dolo, aut culpa lata Clerici, vel Religiosi amissa fuerit: nisi Capitulum consenserit in depositi susceptionem.
- 7 Sequester species quedam depositi est; eaque duplex, voluntaria, ac necessaria.

**D**epositum est, quod custodiendum alicui datum est: dictum ex eo, quod ponitur. Propositio autem de augeat depositum, ut ostendat totum fidei eius commissum, quod ad custodiam rei pertinet: Sunt verba Vlpian. in l. 1. ff. de positi.

Depositarius de dolo tantum tenetur, l. 1. §. si quis seruum, ff. eod. Non autem de culpa civili, nisi crassa sit, ut secundum præsumptionem dolo æquiparetur. videlicet, si in rebus suis curandis diligens, in deposito negligens sit, l. quod Nerva, ff. eod. c. 2. extra, eod. Porro de dolo adeò tenetur depositarius, ut conueniri non possit, ne dolo præstetur: quia talis cõuentio contra bonam fidem, bonosque mores existens, peccandi licentiam tribuit, sicuti habetur in cit. l. 1. §. si conuenit, & seq. Cæterum, postquam dolo admissus fuit, rectè conueniri poterit, ne quicquam exigatur. Præterea in tribus casibus de culpa tenetur depositarius: I. Si ita conuentum sit: nam contractus ex conuentione legem accipiunt. II. Si aliquis deposito seipsum obtulit: quia maiorem præ aliis custodiendi curam promittere videtur. III. Si is, apud quem res deponitur, mercedem accipiat; siue pro cura & custodia, siue quod rem elaborare debeat, v. g. sartor vestem sarciendo, aurifex aurum elaborando: transit enim tunc contractus in locationem, sicuti habetur in l. 1. §. si vestimenta, ff. de positi. Vide c. 2. de deposito, Abbas ibidem, Angelum ver. depositum, §. 4. Gabr. in 4. d. 15. q. 10. dub. 9. His adde, si depositarius in culpabili mora restituendi fuerit: & res postea, quamuis casu fortuito, pereat, alioquin non peritura, si suo tempore restituta fuisset; depositario imputandum esse, iuxta cit. c. 2. de deposito.

Illud verò pecuniatiter statutum est in tit. ff. Nautæ, caupones, &c. ad arcendas improborum hominum fraudes; ut caupo, nauta, & stabularius de damno, qualicumque eorum culpa, etiam leuissima, in rebus custodiæ suæ commissis eueniente, teneantur: nisi prædixerint, ut unusquisque deponentium res suas ipsemet custodiat, se damnum non præstaturos: tunc enim non tenebuntur, nisi de dolo. Existimant tamen non improbabiler Syl. ver. Nauta, q. 1. Sa ver. stabularius, n. 3. Rebel. p. 2. l. 14. n. 11. ante Iudicis sententiam, non obligari eius.



modi homines in conscientie foro ad culpam leuissimam præstandam. Cum enim contractus in utriusque commodum cedat, quando mercedem aliquam accipiunt; satis esse videtur, si culpam leuem præstare cogantur: quare quod leges exactiorem diligentiam ab eis exigant, id vel in fraudis præsumptione fundatur; vel pœnale & odiosum est eiusmodi hominibus; ideoque ante Iudicis sententiam non obligat.

Quædam addenda sunt: Primum. Ut res, apud quem res deponitur, obligationem contrahat, necesse est, ut eius curam siue custodiam suscipiat conventionione vel expressa; vel saltem tacita: nam cum aliquis ratione officij, vel conditionis suæ rerum depositarum custodiam proficitur; ut caupo, nauta, stabularius, sufficit, eo vidente, ac tacente, res in domum eius deponi, sicuti præter alios docet Mol. disp. 527. Rebellus, & Sall. cc. vbi rectè etiam notant, si cista v.g. deposita fuerit, & qui deposuit, queratur, aliquid ex ea amissum esse, ipsi incumbere obligationem probandi, talem rem in cista fuisse.

2 Secundum. In contractu depositi adeò fides seruanda est, ut etiam furi, vel prædoni, rem furtivam, apud re depositam, repetenti, restituere debeas, sicuti habetur cit. l. 1. §. si prædo. Excipe: Nisi dominus vnà cum fure repetat, sicuti docet Gl. in c. 2. de deposito, ver. contra. Vel si furi, sine domini detrimento, restitui non possit; tunc æquitas postulat, ut domino potius restitatur, quippe maius ius habenti, sicuti habetur in l. bona fides, ff. eodem. Vide quæ dixi hoc libro tract. 2. c. 9. num. 5.

3 Tertium. Si depositarius re deposita sine expressa, vel præsumpta domini licentia utatur, eamve alienet, furtum committere censetur, sicuti habetur l. 3. Cod. eod. Instit. de obligationibus, quæ ex delicto nascuntur, §. furtum. Sin verò dominus pecuniam numeratam, non clausam, nec obfignatam, alterius custodiæ committat, censetur ipsi mutuo dare, potestatemque facere alienandi, eam negotiandi, arg. l. si sacculum, ff. depositi; ut proinde ex eo tempore, quo mutui, aut quasi mutui contractus interuenisse censetur, id dominum, ideoque etiam periculum rei ad depositarium spectet. Idemque dicendum videtur de aliis rebus vsu consumptibilibus, v.g. frumento, oleo, ut saltem grauis peccati condemnandus non sit depositarius, si ea alienet; modò certus sit, se tantundem eiusdem generis, ac bonitatis præstò habiturum, cum dominus repetuerit: tunc enim alienatio in nullum eius damnum, sed potius commodum cedit: quandoquidem, si res deposita apud depositarium manens, casu, vel sine dolo eius perisset, depositantis id damno accidisset, sicuti notauit Molin. disput. 524. Less. dub. 3. n. 8.

4 Sed quid in hoc casu sentiendum de Thesaurariis, Camerariis, Telonariis, Eleemosynariis Principum, vel Communitatum? Respondeo & dico I. Iure Cæsareo prohibitum est; ne pecuniæ publicæ titulo mutui, alteriusve contractus exponantur, vel accipiantur. Ita habetur in l. 1. Cod. de his, qui ex publicis rationibus, & c. lib. 10. & l. 1. & 2. Cod. de his quæ ex publica collat. eodem lib. Pendet tamèn id ex voluntate Magistratus, qui si expressè, vel tacitè consentiat, ut pecuniæ ab Officialibus ad lucrum exponantur; idque quasi in partem stipendij computetur, nulla culpa timenda est, dummodo id fiat sine damno subditorum, aliorumve, quibus statim temporibus pecuniæ distribuendæ erunt. Et ita docet Syluest. ver. restitutio, 3. q. 5. dicto 9. Nau. c. 23. num. 24. Rebellus p. 2. lib. 16. vbi de deposito, q. vn. num. 20.

Dico II. Tametsi Magistratus prohibeat (sicuti & communi Cæsareo iure prohibitum esse dixi) ne frumentum ex horreo sine eius iussu extrahatur; ne pecuniæ publicæ in mutuum, censum, cambium, & c. aliis tradantur; si tamen certum sit, neque ipsam Magi-

stratum, neque alios vllum exinde damnum accepturos; quia tam industrius est Officialis, ut constitutis temporibus frumenta, aut pecunias æquè bonas in proptu habeat; probabile est, non posse culpæ mortalis damnari. Ita significant S. Anton. p. 2. tit. 1. cap. 15. §. 5. Syluest. & Nauar. ll. cc. & expressè docet Rebellus loco citato. Si enim esset peccatum mortale, id foret aduersus iustitiam: gravitas autem peccati contra iustitiam æstimatur ex damno, quod in proposito aut nullo, aut exiguum est.

Dico III. Certum esse debet, quod in tali casu lucrum ex negotiatione, cambio, censu, & c. non ad Magistratum, sed ad Officialem ipsum pertineat; modò is proprio nomine, ac periculo pecuniæ exposuerit. Ita habetur in l. idemque, §. si mandauero, ff. mandati, & docent Anton. Syluest. Rebell. ll. cc. Molin. tom. 2. disput. 402. conclus. 1. Quia hoc lucrum non est rei, siue pecuniæ, sed industriæ, quam Officialis adhibet, sicuti constat ex iis, quæ dixi supra cap. 19. num. 5.

Alia verò ratio est, si Officialis expressum, vel tacitum mandatum habeat, pecunias ad cambium, censum, societatem exponendi: Quin etiam si dominus nihil de lucro acquirendo mandauit; si tamen Procurator, aliufve Officialis pecuniam cum domini periculo exposuit, æquum est, ut eiusdem etiam lucrum sit, cuius & damnum foret, sicuti habetur in cit. §. si mandauero, & l. ex mandato, ff. eod.

Alia item ratio est, si domino propter Officialis negotiationem, sine consensu eius factam, lucrum cesseret, vel damnum emergat: id enim integre refarciendum est. Et verò, cum plerumque negotiationes eiusmodi ab Officialibus in Principis aut Communitatis damnum cedant, ideo quibusdam locis, si deprehendantur, grauius puniri, & officio amoueri solent. Nos autem solum hic dicimus, si certum sit in aliquo casu nullum omnino damnum domino euenturum, & scandalum cesseret, Officialem negotiantem in conscientie foro à mortali culpa excusari probabiliter posse.

Depositum suscipere, seu depositarij esse possunt omnes, qui iudicium rationis habent, tum mas, tum fœmina, l. Publia, ff. depositi. Cæterum si pupillus sine tutoris auctoritate depositum suscepit, licet res repeti seu vindicari possit; si tamen periit, non amplius obligatur pupillus, quàm inde locupletior factus est; præterquam si, cum pubertati proximus esset, dolum commisit, l. 1. §. an in pupillum, ff. depositi.

Quod etiam Clericus depositarius esse possit, habetur in cap. 1. de deposito. Idemque de Religioso sentiendum: quamvis is malè faciat, inquit Molina tom. 2. disput. 525. si sine consensu Prælati, saltem rationabiliter præsumpto, munus depositarij suscipiat. Veruntamen Ecclesia, aut Monasterium nequaquam tenebitur, si res deposita etiam dolo beneficiati, aut Religiosi periit, vel absumpta fuit: nisi quatenus in utilitatem Ecclesiæ, vel Monasterij aliquid versum fuerit, cit. cap. 1. Quod etiam dicendum est, si res deposita fuit apud Prælatum: quia delictum personæ non debet redundare in detrimentum Ecclesiæ regul. 76. in 6. & obseruauit Less. lib. 2. cap. 27. num. 12. Sin verò ipsa Ecclesia, seu Monasterium depositum suscepit, videlicet Prælatus cum consensu Capituli, tunc obligabitur sicuti alij depositarij, ut colligitur ex cit. cap. 1. Nisi quod restitutionem in integrum petere possit, non quidem si dolo rem destruxit, aut perdidit: sed per culpam latam, si ea secundum iuris præsumptionem dolo æquiparata, & ita contra Ecclesiam, vel Monasterium sententia lata, vel executio facta sit. quomodo intelligo Sanchez lib. 6. moral. cap. 14. num. 36. Cum autem in Societate Iesu Rectores, & Præpositi locorum negotia non peragant cum Capituli consensu; ideo prohibitum illis est, ne deposita, præsertim pecuniaria, suscipiant, regula Præ-



Præpositi Domus professæ 69. & regula Rectoris 64.

7. Depositi species quædam est sequestrum. Nam sequester dicitur, apud quem plures eandem rem, de qua controuersia est, deposuerunt, l. sequester, ff. de verborum significat. & consentit l. propriè, ff. de depositi. Definuitur autem hoc loco sequestratio voluntaria, seu quæ partium consensu fit: cuius ea natura est, ut dum apud sequestrum res deposita manet, nisi aliter conuentum fuerit, neuter possidere censeatur; quia ei postea à sequestro tradenda erit, qui post causæ cognitionem superasse censebitur, l. licet, §. rei depositæ, ff. de depositi, & notat Glossa in cap. i. de sequestrat. possess. ver. sequestrari. Ex eoque colligit Abb. in cap. exhibita, num. 15. de iudiciis; si ius patronatus sequestratum sit, interim præsentationem admittendam non esse: sicuti neque fractus ex re sequestrata permittuntur parti litiganti; cum victori reservari debeant. Sin verò pars vna commoda possessionum habuerat, ea per sequestrationem amittere non debet, ut notauit Baldus in cit. cap. i. Præter hanc porro alia est sequestratio necessaria, quæ à Iudice fieri potest certis casibus, quos numerat Glossa, vn. C. de prohib. sequestrat. videl. si periculum sit, ne res pereat, per fugam, per absumptionem, per dilapidationem: item si maritus ad inopiam vergat, ipsius bona pro dote sequestrari possunt, l. si cum dotem, §. si verò, ff. solutro matrim.

## CAP. XXVI.

## De Mandato, Procuratore, Syndico.

## SUMMARIUM.

1. Mandatum gratuitum esse debet: sin autem merces interueniat, in locationem transit.
2. Fines mandati diligenter seruandi sunt.  
Qui iussit mercem suam decem v. g. aureis vendi, si voluisse censetur, ut, si fieri possit, etiam pluris vendideretur.
3. Nemini officium suum damnosum esse debet.
4. Rei turpis nullum est mandatum.
5. Mandatum generale non extendit se ad ea, quæ speciale mandatum exigunt.
6. Mandatum expirat I. Per reuocationem, si res integra sit. II. Per renuntiationem, si ea tempestiue fiat. III. Per mortem mandantis, re integra. IV. Per mortem mandatarij.
7. Procurator alius est generalis, & alius specialis: item alius est procurator ad lites, & alius ad negotia.
8. Procurator ad lites differt ab aduocato.
9. Procurator nemo esse cogitur: sed a iudicatus ad defendendas personas miserabiles à Iudice compelli potest.
10. Irritum est pactum, quod vocant de quota litis obtente, soluenda aduocata.
11. Clericus in sacris, & beneficiatus in causa civili, si aliena sit, procurator, vel aduocatus esse non potest: potest autem esse aduocatus in causis Ecclesiasticis, vel coram Iudice Ecclesiastico.
12. Religiosis munus aduocati omnino prohibetur, præterquam in causis sui Monasterij.
13. Syndicus dicitur procurator alicuius Communis.
14. Procurator, vel mandatarius interdum sibi ipsi actionem, obligationemque accipit: interdum verò domino suo, seu principali.

1. Mandatum est officium, ab eo qui gratis suscepit, exequendum, sicuti definit Accursius in annot. ad principium tit. ff. Mandati. Nam, ut dicitur in l. i. ff. eod. Mandatum, nisi gratuitum, nullum est: nam originem ex officio, & amicitia trahit: contrarium autem est officio merces: quare interueniente pecunia ad locationem, & conductionem potius spectat. Est enim hoc commune omni contractui, ut si conditio addatur contra naturam eius, faciat eum transire in aliam speciem, quatenus id possibile est, ait Abb. in c. vn. n. 10. de commodato. Et si ve-

ro, si purum mandatum fuerit, nec expressa, nec tacita facta promissione mercedis aut salarij mandans post præstitum officium ex gratitudine obligatus maneat ad remunerandum; tamen id strictè debitum non est: quare neque occulta compensationi in hoc casu locus esse potest, ut notat Mol. disp. 548. Veruntamen Procuratori, sicuti & Aduocato, quos constat laborem suum gratis non præstare, si certum salarium constitutum non fuit, ad Iudicis officium pertinebit salarium iustum designare. quæ de re Gl. in l. salarium, ff. mandati, & l. i. C. eod.

Inter mandantem, & mandatarium conuentio interuenire debet, saltem tacita: nam si videas in tui gratiam, aliquid à me fieri, v. g. fideiuberi; neque prohibeas, tacitè mandare censearis, sicuti habetur in l. si remunerandi, §. passus sim, ff. eod. Ex hac conuentione obligatio reciproca oritur; videlicet ex parte mandatum fideliter, & integre exequatur: alioquin existimationis ac famæ periculum sustinebit, si de dolo convictus & damnatus fuerit, iuxta l. in re mandata, C. eod. iunct. Gl. ver. existimationis. Ex culpa verò, nisi lata, obligari non videtur, si mandati executio gratis fiat, sicuti docet Gl. in cit. l. in re mandata, verb. exacto, & colligitur ex l. si procuratorem, §. dolo, ff. eodem, & l. contractus, ff. de regulis iuris.

Contrà verò, mandans ratum habere debet, quod nomine eius à mandatario gestum est: præterquam si fines mandati excessit, non seruando modum & formam mandati, quæ speciatim præscripta ipsi fuerat: nam gesta contra, vel præter formam mandati, irrita sunt, sicuti habetur in l. diligenter fines mandati custodiendi sunt, ff. eod. l. cum mandati, C. eod. & docet Syluest. ver. mandatum, q. 7. Abb. in c. vlt. §. is autem, n. 6. de offic. deleg. Exempli causa: Si à me iussus equum vendere aureis 100. vendidisti 90. aut iussus emere 100. emitte 110. non cogor venditionem ratam habere. Sin autem plures à te res vendita fuerit; vel minoris emptæ, quam mandaueram; non censeberis fines mandati transgressus: quandoquidem qui mandauerat, centum aureis sibi equum emit; aut centum aureis vendi: is mandasse intelligitur, ut, si fieri possit, etiam minoris emeretur, vel plures venderetur: iuxta §. is qui, Instit. de mandato, & l. diligenter, ff. mandati. Quapropter, nisi dominus contentus esse videatur, ut mandatarius vel famulus sibi retineat illud, quantò minoris emptum, vel quantò plures venditum ab ipso fuerit; dominio restituendum erit.

Præterea, mandans mandatarium indemnem seruare debet: ut omnes expensas, quas ille fecit, restituat, iuxta cap. cum pro causa, de Procuratoribus: Quin etiam fortuitum damnum, quod occasione mandati passus est, ut si ab hostibus spoliatus fuit: eidem refarcire debet: ne ipsi officium suum damno sit, sicuti docet Syluest. quæst. 6. Molin. disput. 549. Et si contrarium dicat Abbas in cap. cum pro causa, de Procurat. propter l. inter causas, §. non omnia, ff. mandati. quitamen §. procedit secundum ius strictum: non secundum æquitatem, quæ & obseruari debet. Excipe: Nisi merces, vel salarium interueniat: quamobrem famuli, & milites stipendiarij, si quid in professione ad locum destinatum fortè amittant, puta pecuniam, ensen: à dominis exigere non possunt, sicuti rectè docet idem Abb. c. sicut, n. 17. de iureiur.

Denique, ut obligatio & actio mandati oritur, debet esse de re honesta, licita: nam rei turpis nullum mandatum est, l. si remunerandi, §. si passus, ff. mandati, & §. illud quoque, Instit. eodem. Cum talis ob delictum potius poenam mereatur. Notant tamen Gomez 3. resolut. cap. 3. num. 42. Molin. tract. 3. disput. 33. memb. 3. num. 8. in externo foro à poena excusari personas alte-



rius potestati subditas, si eius mandato leuia delicta commiserint, v.g. furtum exiguum. Secus autem esse in delictis grauib, v.g. furto notabili, aut homicidio: quamuis & in his interdum mitior pœna mandatario decernitur, si spectatis personarum circumstantiis, propter metum aliqualis obediendi necessitas fuerat.

5 Mandatum aliud generale est, & aliud speciale. Qui generale mandatum habet alicuius negotia exequendi, quidquid egerit, id dominus ratum habere cogitur: nam mandatum generale ad omnia (præterquam ad illicita) perinde se extendit, sicut speciale ad quædam, ait Syluest. ver. mandatum, quæst. 2. iis exceptis, quæ speciale mandatum exigunt: qualia sunt facere alienationem, transactionem, oppignerationem, aduersario iuramentum deferre: talia enim generali demanatione comprehensa non censentur, sicuti habetur cap. 4. & 5. de Procurat. in 6. Quæ tamen exceptio iterum limitatur, nisi generale mandatum fiat cum potestate plena, ac libera: nam tale mandatum æquiparatur speciali; præterquam quod donari non possit, nisi id exprimatur, sicuti docent Legistæ l. Procurator, §. si generaliter, ff. de Procurator. Garcias de beneficiis p. 5. cap. 8. num. 72. Abb. in cap. petitio, num. 2. de Procurator. Molina tom. 1. tractat. 2. disput. 30. §. de Procuratore. Andr. Gaill. lib. 2. obseruat. 73. vbi ait; Syndicos & administratores ciuitatum alienare, & transigere posse; quia generale mandatum cum libera à lege habent.

Huc etiam spectat doctrina Bartoli in l. Lucius, ff. de fideiussor. Quod literæ credentia, in quibus generatim continetur; vt offerenti eas plena fides habeatur, non obligent scribentem: secus verò, si fides literis habenda magis specificata sit; v.g. *latori huic plenè à me informato habebis omnem fidem: vel fidem ei habebis in omnibus, meo periculo.*

6 Mandatum expirat primò: Si à mandante reuocatur, re integra, id est, negotio nondum cœpto, vti habetur in §. rectè, Institut. de mandato, vbi Gloss. ait verb. item si adhuc; Tunc rem integram censer, cum nondum cœpit mandatarij interesse, argum. l. si Procuratorem, §. mandati, ff. mandati. Sin verò negotium cœptum fuerit, atque interfit mandatarij, vt ad finem perducatur, reuocari non potest à mandante, nisi paratus sit restituere, quod illius interest. Addit verò Abbas in cap. ex parte, 33. num. 12. de rescript. Si mandatarius, vel procurator habuit mandatum contrahendi cum certa persona, reuocationem significandam esse contrahenti: secus, si mandatum habuit indifferenter. tunc enim satis est reuocationem significari mandatario seu procuratori: qui verò postea cum eo contrahit, ipsum solum obligatum habebit.

Secundò; Si mandatarius, dum res adhuc integra est, tempestiuè renuntiet, vt res per alium expediri possit, sicuti habetur in cit. tit. Institut. de mandato: *Mandatum suscipere cuilibet liberum est: susceptum autem consummandum est; aut quamprimum renuntiandum: nam, nisi ita renuntietur, vt integra causa mandatori reseruetur eandem rem explicandi, nihilominus mandari actio locum habet: nisi iusta causa intercesserit, aut non renuntiandi, aut intempestiuè renuntiandi.* Consentit l. si mandauero, §. vlt. ff. eod.

Tertiò; Mandatum plerumque expirat morte mandantis, si res adhuc integra sit, cit. §. rectè, & l. mandatum, Cod. mandati. Dixi plerumque; quia aliqui casus excipiuntur; videlicet si tibi mandatum fuerat, vt puellæ dotem traderes, exequi debes, etiam post mortem mandantis, ob specialem dotis fauorem, sicuti colligitur ex l. si ego, ff. de iure dotium. Item in l. si pater, ff. de manumissis vindicta, decernitur, mandatum de libertate danda mandatoris morte non expirare. Quare idem

quoque de mandato ad pias causas existimandum esse, ex communi docet Couar. 3. resolut. cap. 14. num. 16. Molin. tom. 2. disput. 263, vbi rectè resoluit; Sialiquis pecuniam v.g. Eleemosynario dedisset pauperibus tradendam, morte mandantis non expirare mandatum: quare pauperibus, non hæredi pecuniam debitam fore. Nam spectato solo iure naturali, & seclusa subtilitate iuris ciuilib, tacitam mandati reuocationem inuehentis per mortem mandantis; dicendum potius est, mandatum executioni mandandum esse secundum voluntatem defuncti, in qua ipse vsque ad mortem perseuerauit: cum nihil tam naturali æquitati conueniat, quam voluntatem domini rem suam in alium transferre volentis, ratam haberi, §. traditionem, Instit. de rerum diuis. & hæredem facto, ac voluntati defuncti non repugnare: Ergo ita seruandum erit in causis piis, vt pote Ecclesiasticis, quibus ciuilib constitutio nihil præiudicij afferre potest.

Præterea, si mandatarius, ignorata morte, vel reuocatione mandantis, mandatum bona fide executus fuerit, competit ei nihilominus actio mandati: ne iusta & probabilis ignorantia ipsi damnum adferat, sicuti dicitur §. item si adhuc, Instit. eod.

Denique finitur mandatum morte mandatarij, præsertim si res integra sit, cit. §. item si adhuc. Interdum verò, etiam si negotium cœptum fuerit, reuocabitur mandatum, si personæ industria specialiter electa erat.

Procurator est, inquit Vlpianus in l. 1. ff. de Procuratoribus, *qui aliena negotia mandata domini administrat.* Et infra: *Vsus autem procuratoris per quam necessarius est: vt qui rebus suis ipsi superesse vel nolunt, vel non possunt; per alios possint, vel agere, vel conueniri.* Ex quo apparet, quod procuratoris officium species quædam mandati sit.

Est autem alius procurator specialis ad vnâ, vel 7. plures res speciatim datus; alius verò generalis, sicuti docent Doctores in l. procurator cui ff. mandati. Quamobrem procurator, sicuti & quouis alius mandatarius, aut delegatus, literas, & formam sui mandati, vel commissionis exhibere cogitur; neque eius potestas se ulterius extendere censetur, quam in literis expressum est, sicuti colligitur ex cap. cum olim, i. vbi Abbas num. 4. de offic. delegat. & cap. coram, num. 5. eodem tit. Persona tamen coniuncta sine mandato admittitur ad agendum pro altero; modò caueat alterum ratum habiturum, l. sed & hæ, ff. de procurat. l. maritus, Cod. eodem, vbi dicitur, maritum cum tali satisfactione admitti ad defendendum res vxoris, etiam ipsius curæ non traditas. qua de re vide Bartol. ibidem, & Abb. in c. constitutis, n. 5. extra eod.

Procurator alius ad lites, siue iudicia constituitur; alius ad alia negotia tractanda. Inter quos aliqua discrimina sunt. Primum. Licet procurator ad negotia post XVII. ætatis annum rectè constitutatur; ad iudicia tamen nisi maior XXV. annis, deputari non potest, c. qui generaliter §. licet, eodem in 6. vbi Glossæ additio rationem affert, cur minor ætas, videlicet XVII. annorum completorum, ad postulandum, seu munus Aduocati sufficiat, iuxta l. 1. ff. de postulando: quia procurator actione mandati tenetur, & condemnatur: non item Aduocatus, vt mox iterum dicam. Quæ ipsa etiam causa est, cur Minor XXV. annis in iudicio litare non possit, seu vt Actor, seu vt Reus, absque tutore, aut curatore l. 1. & 2. Cod. Qui legit. personam, &c. Neque filiusfam. absque patris assensu, c. vlt. §. vlt. de Iudiciis, vbi Gloss. casus exceptos numerat; videl. si agat contra patrem, de toro violato, &c.

Alterum. Procurator ad negotia datus alium substituere potest: nisi id ei prohibitum sit; vel nisi specialis negotij grauitas permittere non videatur, l. si procuratorem, §. si quis mandauerit, iuncta, Gloss. ff. manda-



ti, & docent Doctores in §. mandatum, i. Instit. eodem. Procuratori verò ad iudicia alia substituere concessum non est; nisi id in mandato contineatur; vel postquam lis ab eo contestata fuit; vel nisi in rem suam, id est, propriam utilitatem, datus fuerit; quia titulo donationis cessat ipsi actio. Ita habetur in cap. 1. §. licet, eodem in 6.

Tertium. Procurator ad iudicia de culpa etiam leui, imò, secundum quosdam, de leuissima quoque tenetur: quia exactam rei gerendæ peritiā præ se ferre censetur, l. in procuratore, Cod. mandati. At verò procurator ad negotia, sicuti & alij mandatarij, plerumque tantum tenentur de culpa lata; nisi negotij qualitas exactam diligentiam requirat.

8 Differt autem procurator ad lites, ab aduocato: quia cum procuratore contrahitur, & mandati actio in eum competit: quandoquidem litem alterius, plerumque absentis nomine, prosequendam sponte suscepit. Aduocatus verò obligatione mandati non constringitur: sed clienti in iudicio præsentī, & pro se etiam agentī, aut aduersario respondentī, patrocinium aliquod ac defensionem præstat. Vide Syluest. verb. Procurator. Mynsing. Instit. de his per quos agere possumus, §. procurator, & l. 1. post princ. ff. de postulando.

9 Hinc existit, quod sicuti nemo inuitus contrahere; ita etiam nemo officium procuratoris suscipere cogitur, l. inuitus, Cod. de Procuratoribus. Sed aduocatus, vt certæ personæ, quæ se ipsam satis defendere non potest, patrocinium suscipiat, à Iudice compelli potest, l. 1. §. ait Prætor, i. ff. de postulando; & officio aduocationis priuari, si, iusta excusationis causa non allata, pro altero postulare renuat, sicuti constat ex l. prouidendum, Cod. eodem, & notat Gloss. in cit. l. inuitus, Andreas Gaill. lib. 1. obseruat, 43. num. 3. Ioachim. Mynsinger. cent. 4. obseruat. 32. Abb. in cap. 1. num. 5. de officio Iudicis, Armilla verb. Aduocatus, num. 10. Vterque tamen, tam procurator, quam aduocatus, salarium iuste accipit; nisi pauperes clientes sint, in graui, aut extrema necessitate constituti, qui ex misericordie lege gratis defendi debeant, ideoque ad talem defensionem aduocatus Iudicis officio cogi potest, vt docet Gabr. in 4. d. 15. q. 6. a. 3. dub. 4. Abb. l. c. Syl. ver. aduocatus, q. 18. Sotus lib. 5. q. 8. a. 1. Less. lib. 2. c. 31. dub. 7.

10 Porro irritum est pactum, quod dicitur *de quota litis*; id est, vt certa pars eius, quod ex lite prouenturum est, procuratori cedat, l. 7. ff. mandati, l. si qui, Cod. de postulando, l. litem, Cod. de Procuratoribus. Vtrum autem valeat pactum non expressè de quota litis obtentæ; sed vt certa aliqua quantitas detur in casu victoriæ: v. g. si domus, de qua litigatur, valeat 150. ducatos, vt aduocato dentur 50. videri potest Gloss. in l. sumptus, ff. de pactis, Nauar. lib. 1. consil. 4. de pactis, edit. 2. & in man. cap. 25. numero 30. vbi ait, sine peccato conueniri posse, vt certa quantitas iusta pro labore soluatur, siue victoria litis obtineatur, siue non; imò & de certo præmio præter iustum stipendium dando, si victoria proueniat; modo id moderatum sit, & lege speciali non prohibitum.

11 Clericus in sacris, vel beneficiatus coram Iudice seculari in causis secularibus non potest esse procurator, vel aduocatus; nisi causam suam, vel suorum, vel Ecclesiæ, aut personarum miserabilium suscipiat, sicuti habetur in cap. 1. de postulando, & explicat ibi Abb. num. 1. Innocent. num. 1. vn. de obligatis ad ratiocinia. Syluest. verb. aduocatus, quæst. 2. Armilla, numero 5. vbi notant per sensum contrarium, dictos Clericos non prohiberi, quominus in causis Ecclesiasticis possint esse aduocati coram Iudice seculari, si videlicet coram eo persona Ecclesiastica, vel res ad Ecclesiam pertinens defendenda sit. Verùm coram Iudice Ecclesiastico in

omnibus causis Clerici aduocati esse possunt; nisi sint Sacerdotes: his enim postulare non permittitur; exceptis quatuor illis casibus; videlicet in propria causa: vel suorum sibi coniunctorum: vel Ecclesiæ, vel personarum miserabilium, cap. cum Sacerdotes, eodem titulo; vbi additur, si Clericus contra Ecclesiam, à qua beneficium obtinet, pro extraneo procurator, vel aduocatus esse præsumat, tanquam Ecclesiæ ingratus, beneficio illo spoliandum esse. Hinc vniuersim ait Abbas ibidem: Quod exercens officium aduocati, vel procuratoris aduersus eum, à quo beneficium accepit, v. g. vassallus contra dominum, vitium ingratitudinis incurrat.

Denique Religiosis, etsi regulares canonici sint, minus aduocati, & procuratoris omnino prohibetur: præterquam in causa sui Monasterij, iubente Prælato, iuxta Clement. Religiosus, de Procurator. cap. ex parte; de postulan. & docet Abbas in cit. cap. 1. num. 3. de officio Iudicis. Adde, si Religiosus à Monasterio absens sit, posse eum cum voluntate Prælati præsumpta in iudicio agere, argum. l. si longius, §. filiusfamil. ff. de Iudic. Debet tamen agere nomine non suo, sed Monasterij, sicuti docet Nauar. comment. 2. de regular. num. 29. Vide eundem num. 64.

Procuratori consimilis est *Syndicus*: Differunt tamen, quia procurator instituitur à proprio domino, iuxta l. 1. ff. de Procurator. Syndicus verò (qui latine defensor dicitur) ab vniuersitate, eiusve administratore, v. g. Episcopo, Capitulo, Monasterij Prælato, sicuti videre est in cap. petitio, de Procurat. & cap. vnic. de Syndico. Quamquam canones hoc vocabulorum discrimen non semper obseruant, & Syndicum aliquando etiam procuratorem appellant, sicuti notauit Gloss. in cap. Quia, de Procurat. Abbas in cap. vnic. de Syndico, num. 2. vbi etiam monet, constitutum ab vniuersitate ad vnā tantum causam, Actorem appellari potius, quam Syndicum, sicuti colligitur ex l. item eorum, §. actor, ff. de Procurat.

RESTAT QVAESTIO. Vtrum procurator, vel mandatarius, cum iussu alterius contrahit, v. g. equum conducit, actionem & obligationem sibi ipsi: an verò mandanti acquirat? Respondeo ex doctrina Molin. to. 2. disput. 551. Mandatarius in contractu, aliòve negotio tripliciter se habere potest: Primò, vt merus internuntius domini, seu principalis, cuius nomine contrahit tanquam instrumentum: Talis est v. g. famulus, qui à domino missus equum eius nomine conduxit: Item procurator, siue legatus à Rege missus ad matrimonium contrahendum: ad prolem ex Baptismo suscipiendam. Atque hi sibi ipsis nullum ius vel obligationem acquirunt: sed tantum domino, siue principali.

Secundò, vt mandatarius ipsemet agat, contrahat, obligationesque & actiones sibi acquirat: quas deinde mandanti cedere debeat. Quamobrem in l. 1. Cod. de sententiis & interlocutionibus omnium Iudicum, statuitur, vt si procurator mandato domini absentis, in iudicio causam egit: non dominus, sed procurator condemnatur: quod tamen non semper obseruari, admonet Gl. ibidem, & alia Gl. in c. suscitata, ver. Monasterium, de in integrum restitutione, Ioach. Mynsing. cent. 6. obser. 11. Executio tamen sententiæ ordinariè fit in bonis domini: non procuratoris: nisi is in rem suam datus sit: vel mandatum se habere mentitus fuerit: vel, cum nullum defensor mandatum proferre posset, satisfecerit, dominum rem ratam habiturum, l. Plautius, ff. de Procurat. iun. §. Sin autem, Instit. de satisfactis.

Tertiò, si aliquis mandatum quidem ab altero habeat contrahendi, v. g. merces emendi: contractum tamen, nullo exposito mandato, veluti suo nomine



celebret. Talis non solum ius & obligationem sibi ipsi acquirit, sed etiam executio sententiae in eiusdem bonis fieri solet: licet postea actione mandati hoc ipsum repetere possit à mandante.

## CAP. XXVII.

## De actione ex iussu, &amp; de in rem verso.

## S V M M A R I V M.

1. *Contrahens cum eo qui in alterius potestate est, interdum aduersum alterum actionem acquirit, seu ex iussu, seu de in rem verso.*
2. *Actio exercitatoria, & institoria ex iussu, saltem ipso facto interueniente, oriuntur abent.*
3. *Inter mandatum & iussum hoc interstet, quod iussum necessitatem imponit, sed mandatum liberè suscipitur.*
4. *Monasterium non obligatur ex contractu, aut delicto Religiosi, nisi in certis casibus.*
5. *Non censetur aliquid in rem meam versum, nisi quatenus exinde locupletior factus sum.*
6. *Si famulus vinum numerata pecunia domino emere iussus, impetrata fide de solutione, pecuniam intercipit, contra dominum neque ex iussu, neque de in rem eius verso, actio competere potest.*
7. *Actio quod iussu, seu exercitatoria, institoria, commodior est, quam actio de in rem verso.*

**C**ontrahens cum eo, qui in alterius potestate est, quandoque actiones acquirit aduersus dominum, siue cum qui illum in potestate habet, sicuti videre est in tit. Cod. & Instit. Quod cum eo, qui in aliena potestate. Quae actiones ad duo praecipue capita reuocari posse videntur; videlicet *Ex iussu*; & *De in rem verso*. Vel enim qui in potestate positus est, voluntate & iussu domini, patris, Praelati, &c. contrahit; vel sine eius iussu. Si ex iussu; interdum est iussus directus, & expressus: quo casu haud dubie competit actio ex iussu aduersus dominum, Patrem, Praelatum, in solidum, quatenus iussit, siue intra fines ac formam iussionis, l. 3. ff. Quod iussu. Nam quodammodo cum eo contractum censetur, qui iussit, l. 1. ff. eod. Neque interest, utrum specialiter in vno contractu iussum sit; an verò generaliter; *Quod voles, cum seruo meo negotium gere, periculo meo*: videtur enim ad omnia iussisse, quae lex permittit, sicuti supra de mandato dictum fuit.

Interdum verò interuenit iussus interpretatiuus; puta si postea ratum habeatur, quod filius, vel seruus gesserat, cit. l. 1. §. si ratum: Item iussus tacitus; ut si quis sciat, seruum, vel filium suo nomine contrahere, neque prohibeat: cum enim in delicto sciens, & patiens pro consentiente, & tacite iubente habeatur, iuxta l. 1. ff. de noxalib. actionib. multò magis in contractu. Quare his quoque casibus actio ex iussu competit.

**2** Atque huc etiam spectant actiones exercitatoria, & institoria: si quis videl. maritimae, vel terrestri negotiationi alium praeposuit: censetur ratum habere velle, quidquid ille in tali negotio gesserit: dummodo fines & formam consuetam negotij non excedat. Imò latius id extendi solet, ut cuiusque negotio, officio, vel ministerio aliquid alterum praeposuerit, actio utilis, atque similis institoriae competit aduersus praeponentem, tanquam ex iussu generali. Quia praepositio veluti iussus quidam est: cum nihil referat, verbo, an ipso facto voluntatem aliquis declaret, iuxta l. pro herede, ff. de petit. heredit. iun. Gl. ver. quàm animi, vbi ait: *per factum probatur voluntas*.

Hoc verò discrimen notari debet, quòd si seruus, vel similis persona, quae ex necessitate parere debet, praeposita fuerit, oriatur actio velut ex iussu: sin vero alia libera persona, oriatur actio potius ex mandato. Inter mandatum enim, & iussum hoc interest, quòd iussum

necessitatem imponat: mandatum autem libera voluntate suscipiatur, l. 1. iun. Gl. ver. quemadmodum, ff. quod iussu. Ex quo & illud consequitur, ut qui cum mandatario contraxit, contra ipsum quoque directam actionem instituere possit; & similiter aduersus institutorem, vel negotiationi praepositum, si homo liber est, & non in potestate positus: quare in electione contrahentis erit, utrum malit institutorem, &c. an eum, qui praeposuit, conuenire, l. 1. §. est autem, ff. de exercit. actione.

Quod ad alteram actionem, *De in rem verso*, attinet: Si personae in potestate alicuius positae, sine iussu eius expresso, & tacito contraxerunt: tunc absolute loquendo non obligatur Praelatus v.g. ex contractu Religiosi: pater ex contractu filij: dominus ex contractu serui, aut famuli: sed solum quatenus in rem eius aliquid versum esse, demonstrari potest. quae de re videri potest Innoc. in c. olim, §. item notandum, de piuil. Angelus ver. Monasterium, §. 1. Gabr. in 4. d. 15. quaest. 8. a. 3. dub. 10. Sanchez lib. 7. moral. c. 31. n. 9. vbi docent, Monasterium non obligari ex contractu, aut delicto Religiosi: exceptis casibus: I. Si Religiosus, communicato consilio cum Praelato & Capitulo, delictum commisit: quia delictum Praelati & Capituli nocet Ecclesiae, uti docet Gl. in reg. delictum, 76. in 6. argum. c. 2. de Ordine cognit.

**I I.** Si Religiosus administrationi praepositus aliquid egit, aut contraxit, secundum limites commissionis, & officij. Enimvero neque ex ipsius Praelati contractu Monasterium obligatur, si limites suae administrationis excedat: ut si pecunias mutuo accipiat ad res vanas, aut turpes. Sin verò accipiat ad subleuandam Monasterij necessitatem: sed postea murato consilio male expendat, obligabitur Monasterium, sicuti docet Sanchez l. c. n. 13. & videri possunt, quae dixi hoc tract. cap. 15. n. 7.

**I I I.** Si Religiosus in Academia, vel alibi cum licentia Praelati degens, sumptus faciat, vel pecunias mutuo accipiat, secundum quantitatem illi destinatam: quia ita etiam de filiofam. statutum est, l. sed Iulianus, §. proinde si accepit, ff. Ad Macedonianum, & videri potest Sanchez lib. 7. moral. cap. 31. num. 15.

**I V.** Si quid versum sit in rem, seu vtilitatem Monasterij. Quid autem sit in rem alicuius versum esse, latè explicatur in l. 3. ff. de in rem verso. Summa est: Si quid vel domino vtiliter comparatum, vel in quoscunque sumptus necessarios, aut vtilis domino expensum fuerit, censeri debet in rem domini versum: ut si triticum pro familia alenda comparatum: si domini debita dissoluta: Non item si ad meram voluptatem aliquid pro domino impensum: nisi dominus in id ipsum cōsensit: si tamen causa voluptatis, seu ad solum ornatum comparati sumptus, sine incommodo domini, non mandatis eos fieri, separari possint, id ipsum dominus pati debet, l. 3. §. sed si mutua, ff. de in rem verso.

Porro, non nudè ac simpliciter considerandum est, utrum res in substantiam domini versa sit: sed spectatis etiam impendiis: quia vtilitas & lucrum non spectatur, nisi impendijs deductis. Quare si seruus mutuum pecuniam accepit, & domino dedit pro eo, ut manumitteretur: pecunia non censetur in rem, siue vtilitatem domini vera: nisi quatenus excessit pretium iustum manumissionis: idè quod quatenus dominus ex pecunia locupletior redditus est, sicuti habetur in l. 2. & 3. ff. eod. tit.

Ex quo resolui potest casus: Titius famulo suo pecuniam numerauit, qua vinum emeret pro familia: sed famulus retenta pecunia, contra domini voluntatem, vinum habita fide de pretio, loco domini accepit, & ad alendam familiam inuexit: postea verò



cum pecunia aufugit: Quæritur, vtrum vini venditor actionem contra dominum instituere possit? Respondeo, non posse agere de *in rem verso*: cum dominus ex vino in familiam suam inuecto ditior factus non fuerit; quandoquidem pro eo pretium æquivalens soluit: idque habetur in l. 2. ff. de in rem verso, ex qua DD. ibi regulam tradunt; Non dici versum in rem seu utilitatem alterius, quando is tantum erogat, quantum accepit. Et in l. 3. ff. eod. affertur similis casus; Seruus mutuum pecuniam accepit, & domino tradidit, pro eo, vt ab ipso libertatem consequeretur: Respondet Iureconsultus, pecuniam non censi in rem domini versam; nisi quatenus iustum pretium manumissionis fortasse excessit. Ratio verò est; Quia utilitas seu lucrum non censetur, nisi deductis impendiis. Neque refert, quod famulus vinum ab œnopola acceperit, quali in rem domini versurus: Non enim idcirco dominus tenetur: cum *æquum non sit, vt vel credulitas creditoris domino ob sit, vel calliditas serui noceat. quare curiosus creditor esse debet, quò vertatur: quæ sunt verbal.* l. 3. §. sed si sic, ff. de in rem verso.

Sed neque hoc casu agi potest ex iussu: Quia dominus non iussit, neq; consensit, vt obligatio mutui, siue crediti contraheretur; sed vt pecunia præsentem emeretur. Constat autem, mandatum non extendi vltra comprehensa in eo: qua ratione ait Abb. in c. cum olim, l. n. 4. de offic. delegati. Quod constitutus ad recipiendam pecuniam, nihil præiudicat domino, si confiteatur pecuniam se recepisse: quandoquidem non ad constituendum constitutus esse intelligitur; sed tantum ad recipiendum. Confirmatur primò: Si œnopola sciisset, quale iussum famulus de emendo vino habuisset, & nihilominus ei pecuniâ creditâ vendidisset, dominum nequaquam ex iussu obligatum habere potuisset: Ergo neque habere potest, cum ignorauit: quia ignorantia non facit maiorem iussum interuenisse. Confirmatur secundò: Cum hic alteruter vel œnopola, vel dominus damnum pati debeat; potius ille sustinet, qui in culpa aliqua est, quam qui extra omnem culpam. Atqui dominus extra omnem culpam est; cum opera famuli usus fuerit, de quo, vt ponimus, nihil fraudis suspicari debebat: œnopola autem non est extra culpam nimie credulitatis: cum nihil in praxi, vel in iure receptius sit, quam vt si quis iussum siue mandatum alterius alleget, eius rei aliquod testimonium ostendere debeat: alioquin mille fraudibus occasio aperitur, si mercatores famulis quibuscumque aliquid tanquam ex iussu domini, mutuo, vel creditâ pecuniâ accipientibus, credere securè possint, non ostenso ipsis mandato: idque tum à naturali iure, tum à bene constitutâ Reipublicæ moribus alienum esse existimo.

Alia quidem ratio esset, si dominus œconomum seu procuratorem domus constituisset generalem, cuius omnes negotiationes & contractus ad familiæ sustentationem ratas haberet. Quamuis etiam hoc casu attendendum erit, num mandatarii ius formam mādati obferuet, eiusque fines non egrēdiatur, iuxta l. 1. §. non autem, & §. si igitur, & §. si plures, ff. de exercitatoria: Etenim in quocumque mandato generaliter dato, semper præsumitur mandatum id, quod est de consuetudine mandantis; ait Nicolaus Euehardus tom. 2. consil. 6. num. 64. ex l. vniuersorum, ff. de pignorat. actione.

His duo addi debent: I. Quod de seruis suprâ dictum est, id ferme hodie locum etiam habet in hominibus liberis famulatui alicuius addictis: quippe qui vicem seruorum aliquo modo referunt, sicut ex Oledendorpio notauit Ioachimus Myrsingerus Instit. Quod cum eo, qui in aliena potestate, §. præterea, ver. deque eo quod in rem. II. Qui actionem habet, quod

*iussu, vel exercitatoriam, institoriam, potest quidem etiam agere de in rem verso; sed stultè faciet, si, omiffa actione, per quam mox totum à domino, propter voluntatem & iussum eius, consequi posset; adigat se ad difficultatem probandi, rem creditam in utilitatem domini versam fuisse; eo pacto, vt non plus iudicio consequi queat, quàm quatenus ostensum fuerit, reuera in utilitatem domini versum fuisse, §. cæterum, Instit. eod.*

## CAP. XXVIII.

## De negotiorum Gestore.

## S V M M A R I V M.

- 1 Qui absentis negotia gerenda utiliter suscepit, is actionem negotiorum acquirit.
- 2 Inuentor rei alienæ, nihil à domino ratione inuentionis exigere potest; sed solam compensationem laboris, & expensarum, si quas fecit, rem ad dominum deferendo.
- 3 Qui ex pietate, aut mera liberalitate in alterum expensas fecit, non potest deinde, mutata voluntate, repetere. Dominus simul egrotanti non cogitur præstare salarium; neque expensas maiores; sed tantum simplicem victum.
- 4 Salarium constitutum repeti non potest ab heredibus aduocati mortui.
- 5 Mater, & aua in dubio censentur filio præstare alimenta non animo repetendi; sed materno affectu. Alia verò ratio est de vitrico.

Qui absque mandato domini, absentis negotium utiliter gerit, is actionem contra illum, quamuis ignorantem, acquirit, qua compellitur rem gestam ratam habere: item expensas necessarias atque utiles, damnum quoque, & lucrum cessans præstare; deniq; etiam laboris aliquam compensationem facere, sicuti constat ex l. 2. & toto tit. ff. de negotiis gestis. Idque utilitatis causa receptum est, dicitur in §. 1. Instit. de obligationibus, quæ ex quasi contractu nascuntur, ne absentium deferrentur negotia, quæ sanè nemo curaturus esset, si de eo, quod quis impendisset, nullam habiturus esset actionem. Et competit hæc actio negotiorum gestorum tametsi negotij euentus infelix fuerit, dummodo negotij gestor prudenter & utiliter egerit, l. sed an, §. is autem, ff. de negot. gestis. Exemplum: Si equum Titij, de manu furis, aut militis, tanquam illius negotium gesturus, exiguo pretio redimas; sed dum equum ad dominum reducis, fortuito casu pereat, nihilominus pretium, & expensæ tibi restituendæ sunt, sicuti colligitur ex l. 2. ff. eod. & annotauit Barthol. Medina. lib. 1. instruct. c. 14. §. 30. reg. 4.

Sed vice versa, negotiorum gestor administrationis rationem domino reddere cogitur; & si quid eius culpa, etiam leui, neglectum est, resarcire. Nisi negotium desertum fuerat, à nullo alio suscipiendum, tunc suscipiens non tenetur, nisi de dolo, ac culpa lata, l. 3. §. interdum, iun. Gl. ff. de negot. gestis. E contrario verò negotiorum gestor interdum exactissimam diligentiam adhibere, adeoque culpam etiam leuissimam præstare debet; si videlicet alius negotium diligentius administraturus fuisset, l. si pupilli, §. videamus, ff. eod. & expressius in §. 1. iun. Gl. ver. ad exactissimam, Instit. de obligat. quæ ex quasi contractu. De casu autem fortuito negotiorum gestor ordinariè non tenetur; exceptis tamen casibus: Primò, Si dominus illum admonuit, ne sua negotia gerere aggrediretur; nisi tali conditione velit, vt casum etiam fortuitum præstare teneatur, l. negotium, iun. Gl. C. de negot. gestis. Secundò, Si negotiorum gestor sua culpa causam præbuit, vt res fortuito casu v. g. incendij periret, quæ alioquin non periisset, iuxta l. siue, ff. eod. Tertiò, Si quis nomine absentis nouum, & insolitum negotium, quod videlicet ille nunquam agere consueuerat, aggressus sit,



v.g. negotiationem ineundo, casum fortuitum præstare debet, l. si negotia, ff. eod. Vide Gl. ibidem. ver. sit. solutus. Molin. to. 2. disp. 553. & seq.

Ex dictis colligitur primò; Quòd fideiussor, si pro principali debitum soluit, habeat contra eum actionem ex mandato, si fideiubere iussus fuit; actionem verò negotiorum gestorum, si ad fideiubendum sponte accessit, l. sed videamus, ff. de negot. gestis.

2 Colligitur secundò: Licet rei alienæ inuentor, inuentionis mercedem, tanquam iure sibi debitam, exigere non possit, sicut docet Rebell. lib. 17. q. de negot. gestis, n. 15. & colligitur ex l. falsus, §. Qui alienum, ff. de furtis, n. 15. *Qui alienum quid iacens lucri faciendi causa sustulit, furti obstringitur.* Nihilominus si rem inuentam ad dominum pertulit, laboris huius compensationem iuste exiget: Quia licet rem inuentam domino suo restituere ex iustitia obligatus sit, iuxta c. si quid inuenisti, 14. q. 5. non tamen tenetur deferendi laborem, & expensas ipsemet gratis præstare, sicuti notauit etiam Couar. reg. peccatum, p. 2. §. 3. n. 3.

3 His addo: Si aliquis ex pietate, vel mera liberalitate in alterum expensas fecit, non posse postea, mutato animo, actione negotiorum gestorum eas repetere, sicuti colligitur ex l. 1. & l. si alimenta, C. de negotiis gestis. Verbi gratia: Quæ in curationem famuli domi tuæ agrotantis liberali affectione semel impendisti, de constituta mercede postea detrahare iure non potes. Aliud verò dicendū, si à principio testatus sis, vel ex indiciis colligere possit, non habuisse te animū donandi, sed repetendi. Si quidem dominus ex lege iustitiæ non cogitur famulo agrotanti, & non præstanti ea, ad quæ cōductus est, præbere expensas maiores, v.g. in medicos, & chirurgos; sed tantū tenues, & alimenta: multò minùs salarium eidem pro eo tēpore præstare debet, sicuti colligitur ex l. si vno, §. itē cum iun. Gl. ver. personis, ff. locati, & docet Syl. ver. familia, q. 2. Ibid. Armilla, Sa. ver. conductor, n. 5. Couar. 3. resol. c. 13. n. 8. Diez lib. 1. pract. qq. q. 8. §. 2. cōcl. 10. Mol. disp. 554. prope finem. Præterquam, si loci consuetudine receptum sit, ut dominus famulo propter infirmitatem nihil de annua mercede detrahare possit.

4 Neq; his obstat l. 1. §. Diuus, ff. de variis & extradi nariis cognitionibus, vbi dicitur, salarium constitutum repeti non posse ab hæredibus aduocati mortui; quia per eum non staterat, quominus causam ageret. Nam, ut ibidem notat Gl. ver. repeti, & Couar. cit. n. 8. speciali id priuilegio, ac favore publici utilissimi muneris statutum est; & locum etiam habere in professore scientiarum, ubi legitimum impedimentum non docente, affirmat Andr. Gaill. lib. 1. obseruat. 44. n. 13. & Gl. cit. Nisi vel pactum, vel consuetudo aliud requirat.

5 Mater, & avia, præbentes alimenta filio, vel nepoti, si nihil protestentur, neque contrarium ex constantiis colligi possit, censentur ex pietate & affectu materno, non repetendi animo præstitisse, sicuti habetur in l. Nefennius, ff. de negot. gestis, l. alimenta, C. eod. Alia verò ratio est, si circa alias res liberorum expensas fecerint. Porro circumstantiæ, atq; indicia, vnde colligi debeant, etiam alimenta data illis fuisse animo repetendi, sunt hæc: I. Si liberi propriis bonis abundent, & maiores in ipsos sumptus facti sint, quàm matris & avia facultates ferre videantur. II. Si bona liberorum penes se habeant; tunc enim ex illis suppeditare censebuntur. Vitricus autem priuigno in dubio non præsumitur alimenta præstare gratis; sed animo repetendi, si priuignus bona propria habeat, sicuti colligitur ex l. si paterno, C. de negot. gestis. Quare ad priuignum pertinebit probare, alimenta præstita fuisse paterno affectu, sicuti docet Gl. ibid. ver. repetiturus, Rebellus loco cit. n. 6. Molin. cit. disp. 554. prope finem, vbi monet, in tali dubio vitricum à Iudice cogi posse, ut iurer, se alimenta præstitisse animo repetendi. Cæterum si priuignus in ser-

uitio vitrici extitit, alimenta ab ipso repeti non poterunt, sicuti notauit Gl. cit. ver. repetiturus.

## CAP. XXIX.

## De Fideiussoribus.

## SUMMARIUM.

- 1 Obligatio fideiussoria est, ideoq; supponit aliam obligationem, saltem naturalem.
- 2 Qui pro Religioso fideiubet, censetur ad id se obligare, quòd Prælatus, & Capitulum rem ratam habebunt.
- 3 Fideiussor intensius obligari potest, quàm principalis; non autem extensius.
- 4 Fideiussores alij in iudicio accipiuntur; alij extra iudicium. Deinde alij simpliciter dicti fideiussores sunt; alij verò indemnitati.
- 5 Si mulier fideiussit, SC. Velleiano defenditur, quominus obligationem contraxerit. Quis tutus est exceptione fauorabili, repetere potest, quod per errorem soluit.
- 6 Consuetudo obtinet, ut mulier SC. Velleiano renuntiare queat: quamquam de hoc, spectato iure communi, dubitari potest, si instrumentum non intercedat.
- 7 Clericus in damnum proprium fideiubere potest; sed non in præiudicium Ecclesie suæ: multò minùs Religiosis fideiubere confesum est.
- 8 Si plures fideiussores sint, omnes ad soluendum idonei, non nisi secundum portionem obligantur.
- 9 Certe casus sunt, quibus fideiussor obligatione liberatur.

**F**IDEIUSSOR est, qui de alterius obligatione, interposita propriæ fidei & obligationis cautione, securitatem præstat, sicuti colligitur ex Instit. de Fideiussoribus, initio, & l. græcè, ff. eod. l. vbi au. e. n. §. qui verò à Titio, ff. de verbor. obligat. vbi etiam nominis etymologia redditur: dictus enim est fideiussor, quia fide sua esse iubet, quod ab altero debetur.

Corollarium I. Obligatio fideiussoris accessoria est alteri obligationi, & sine ea cōsistere non potest. Sufficit tamen, si saltē naturalis obligatio supponatur; adeò ut hoc casu fideiussor etiam ciuilitè compellit possit, v.g. pro seruo, vel minore fideiubens, Instit. de fideiussor. §. & l. naturaliter, ff. de condict. in ab. n. l. Marcellus, ff. de fideiussor. Sin autem is, cuius promissioni fideiussor accedit, nec ciuilitè, nec naturaliter obligetur, nulla etiam in fideiussore, oriri obligatio potest, l. qui contra, & l. fideiussor, princip. ff. eod. ut si lex contractui omnino resistat, v.g. venditioni rei sacræ, l. cum lex, ff. eod.

Aliud exemplum affert Abb. in c. ex rescripto, n. 1. de iureiur. Si quis fideiubeat pro Religioso contrahente sine auctoritate & cōsensu Prælati, ac Monasterij: cum Religiosus in eo statu sit, ut propria auctoritate nihil vel sibi, vel alteri acquirere possit, ideoque omni iure incapax sit obligationis ex contractu; quamuis contrarius sentiat Less. lib. 2. c. 28. n. 6. Sanch. lib. 7. moral. c. 31. n. 37. Id tamen fateri oportet cum Mol. to. 1. tr. 2. disp. 140. ver. Potius distinguerem: Si quis pro Religioso contrahente fideiubeat, existimandum esse, fideiussorem ad id se obligare, quòd Prælatus & Capitulum rem ratam habebit. Deinde nemo negat, quin ex delictis, v.g. furto, aut damno dato obligationem Religiosus contrahat; quatenus is satisfacere potest: ideoque tali obligatione fideiussor validè accedet. Denique pro fideiussore fideiussorem accipi, nequaquam dubium est, cit. l. græcè, in fine. Imò id frequens est, ut fideiussori à debitore principali alius fideiussor constituatur, qui priorem indemnem seruet.

Corollarium II. Licet fideiussor intensius, seu efficacius obligari possit, quàm principalis; ut videlicet etiam ciuilitè obligetur, sicuti dictum est: Non tamen obligari potest extensius, ita ut ad plus obligetur, sicuti habetur in §. fideiussores, instit. eod. & in cit. l. græcè,



vbi dicitur; Quod fideiussor obligari non potest in causam duriorē; quamvis possit in leuiorē. v. g. in minorem summam. Præterea si debitor principalis sub conditione obligatus fuerit, tum fideiussor purē obligari nequit: Quia non potest esse plus in accessione, quā in re principali. Vide Gomez 2. resol. c. 13. n. 2. Mol. to. 2. disp. 541.

Corollarium III. Si principalis debito suo liberetur, vt quia ei condonatum est; simul etiam extinguitur obligatio fideiussoris, sicuti ex communi docet Pet. Nau. lib. 3. c. 4. num. 157. Nam ruente principali, ruit etiam accessorium.

4. Duplex est fideiussorum genus: Alij enim in iudicio accipiuntur; & alij extra iudicium. Fideiussor in iudicio est, qui se obligat, quod reus seu criminis, seu debiti sistetur in iudicio criminali, aut ciuili; & interdum quod iudicatum fuerit, solum iuri, sicuti constat ex l. græcæ, §. & post litem, ff. de fideiuss. & videri potest Clarus in pract. criminali, §. fin. q. 46. Mol. disp. 347. Addendum verò est ex l. Diuus, ff. de custodia, & exhibitione reorū, si crimen graue, præsertim notorium sit, pro quo corporalis pœna imponenda est, reum non dimitti; sin autem crimen graue non sit, in vinula coniiciendus non est, qui paratus est dare fideiussores, & cit. l. Diuus, & docent Canonistæ super rubr. de Fideiussor.

Præterea fideiussorum aliqui simpliciter fidem suam interponunt, in id quod principalis debet. Alij verò qui *indemnitas* dicuntur, non obligant se simpliciter, sed quāto minus creditor à debitore suo consequatur. Atque hi antè conueniri non possunt, quā facta discussione principalis debitoris, sicuti docent DD. in l. vlt. ff. de rebus creditis. Fideiussores autem primi generis & simpliciter dicti conueniri quidem possunt; sed opponere eis licet exceptionem ordinis; vt videl. prius discussio fiat bonorum debitoris principalis, si præsens sit; in eius verò defectum, se postea soluere paratos esse, iuxta Authent. Præsentē, Cod. de Fideiussoribus. Idēque etiam locum habet in actione hypothecaria, quæ contra tertium possessorem ad reuocationem hypothecæ institui non potest, nisi prius excusso debitore, Authent. hoc si debitor, Cod. de pignorib. iun. Gl. & Authent. sed hodie, C. de action. & obligat.

Excipe primò: nisi fideiussor renuntiārit beneficio dictæ Authenticæ, quippe quod in eius tantum fauorem introductum fuit, sicuti docent Gl. & DD. ibid. item Gl. in c. peruenit, ver. non solventibus, & Abb. num. 8. de fideiuss. Gomez 2. resol. cap. 13. n. 14. Gaill. lib. 2. obseruat. 27. n. 21. argum. l. quod fauore, C. de legibus, l. penult. Cod. de pactis.

Secundò: Nisi notorium sit, principalem debitorem soluendo non esse; quia frustra fieret discussio. Quare statim tunc actio contra fideiussorem, vel pignoris possessorem institui potest, sicuti docet Baldus post Gl. receptam in l. decem, ver. excussum, ff. de verb. obligat. Gomez l. c. & alij DD. in cit. l. vlt. ff. de rebus creditis. Tertiò: Si debitor conueniri, eiusue bona excuti non possint, quia nimis potens, atque iniurius; est quia aliò migravit, &c. Quæ de re vide Authent. de fideiuss. & mandator. Gomez cit. num. 14. Molin. disput. 545. Less. cap. 28. numer. 9. Vel tamen si debitor bona præsentia habeat, non possint tamen ea venundari; quia nemo est, qui emat. quo casu creditor diu expectare non cogitur; sed contra fideiussorem agere potest, teste Gomez l. c.

Quartò: Si consuetudine, vel statuto aliter receptum sit; v. g. vt post moram principalis, etiam non facta bonorum illius excussione, statim fideiussor conueniri queat. quæ de re Andr. Gaill. cit. obser. 27. num. 29. & seqq.

5 Ordinariè quicumque principaliter obligari, idem etiam fideiussor esse potest, l. 3. ff. cod. tit. Excipitur

mulier, quæ si fideiusserit, opponere potest exceptionem Senatusconsulti Velleiani, quominus soluere cogatur, sicuti habetur in cit. l. 3. iun. Gl. ver. mulierem, & toto tit. C. Ad Senatuscons. Velleianum. Et habet etiam id locum in conscientia foro; quippe quod, ob sexus fragilitatem, boni publici causa, introductum est, sicuti ex communi testatur Gomez num. 16. Abb. c. quia plerique n. 27. de immunitat. Ecclesiæ, Less. c. 28. n. 15. Mol. disp. 540. Si tamen mulier per errorem soluit, creditor interim retinere potest: quia tam naturaliter, quā ciuilitur obligata erat. Verum, cum exceptio, quæ mulieri ex Velleiano Senatusconsulto competit, perpetua & fauorabilis sit; ideo quocunque errore solutum condicere, atque repetere potest, sicuti habetur in l. qui exceptionem, ff. de condict. indebiti, vbi DD. regulam tradunt; Quod tutus exceptione perpetua ac fauorabili, quocunque errore soluat, repetere potest; non item si exceptio odiosa sit, vt in S. C. Macedoniano.

Præterea in l. antiquæ, §. vlt. C. Ad Senatuscons. Velleianum statuit Iustin. Imperator, vt fideiussio mulieris ipso iure nulla esset, nullāque obligationem pareret, nisi publico instrumento cum testium subscriptione confirmata sit: præterquam, si pretium pro fideiussione accepit; tunc enim efficaciter obligatur mulier, sublato omni Senatusconsulti auxilio. Cuius ratio est: Quia non ex leuitate, aut naturali fragilitate; sed pro præmio consequendo intercessisse creditur.

Denique verò multi DD. sentiunt, cum Gl. in l. vlt. ff. & C. ad Velleianum, & praxis ferme ita obtinet; quod mulier, publico instrumento se obligans, exceptioni Senatuscons. Velleiani validè renuntiet; modò ex certa cognitione, v. g. à notario antè satis instructa, id faciat. Quæ de re Gaill. lib. 2. obser. 77. Andr. Fachinæus lib. 2. controu. cap. 59. Licet contrarium doceat Couar. c. quamvis pactum, p. 2. §. 3. n. 8. Gomez n. 17. Mol. disp. 540. Less. cit. c. 28. n. 16. Quod mulier, spectato iure communi, beneficio Velleiano extra iudicium validè non renuntiet, nisi ius super iuramentum, cum plena privilegij sui cognitione, accedat. Quia eadem facilitate, quæ ad fideiubendum, etiam ad renuntiandum Velleiano adduci posset; sicuti ob eandem rationem minor natu beneficio restitutionis in integrum repuntiare nequit, sicuti notauit Abb. in c. si diligenti, n. 9. de foro compet. quāuis maior factus renuntiare possit.

Clericus, licet fideiubere non possit in præiudicium Ecclesiæ, potest tamen in damnum proprium: ita enim consuetudine obseruatur. Quamquam etiam tunc ex fideiussione non tenetur, nisi quatenus commode soluere potest, ita vt non egeat, iuxta c. Odoardus, de solut. Vide Petr. Nau. lib. 4. c. 3. n. 173. & seqq. Less. cit. c. 28. n. 18. Gomez n. 18. Si autem Monachus, absque licentiā prælati, & maioris partis Capituli fideiusserit, vel mutuum acceperit, Monasterium tali fideiussione non obligari, nisi quatenus in eius vtilitatem versum est, rescripsit Innoc. III. in c. quod quibusdam, de fideiussor. & videri potest Syl. ver. fideiussor, q. 3. & 4. Angelus n. 7. Sanchez lib. 6. moral. cap. 14 n. 38. Molinato. 2. disp. 540. vers. Religiosus. Veruntamen in re modica Prælati fideiubere potest absque Capituli consensu expresso: cum de eiusmodi rebus disponendi tacitum habere censeatur Capituli consensum. Similiter in Societate Iesu, in qua Capitulum non congregatur, Rector, vel Præpositus loci fideiubere potest; vt docent Molina & Sanchez II. cc. sed non expedit, neque concessum videtur in re alicuius momenti.

Porro si plures fideiussores pro eodem debito intercesserint, singuli in solidum obligantur. Si tamen omnes ad soluendum idonei sunt, competit eis exceptio, ex epistola Hadriani Imperatoris (si huic fauori suo



non renuntiârunt) vt obligatio in portiones diuidatur. Ceterum si alij soluendo non sint, cogitur etiam vnus, qui soluendo est, totum præstare: vel, etiâ si alij soluendo sint, si tamen vnus, non opposita exceptione, integrum soluit, repetendi ius non habet; cogere tamen creditorem potest, vt actionem sibi contra reliquos fideiussores cedat, per quam eos compellat, vt singuli solutionis portionem refundant. Ita habetur §. si plures, Instit. de fideiussoribus. l. non rectè, C. eodem, l. vt fideiussor, ff. eod. Vide etiam l. si dubitet, §. ita demum, ff. de fideiuss. iun. Gl.

Præterea, si fideiussor pro principali debitore debitum soluit, cogere potest creditorem, vt cedat sibi omnem actionem cum personalem, tum hypothecariam, quam contra eundem debitorem habet, iuxta l. 2. C. eod. Præterquam, quod actione mandati agere possit aduersus principalem, vt omne damnum, & interesse, quod ratione fideiussionis incurrit, ipsi compensetur; quia nemini officium suum damnosum esse debet, sicuti habetur in c. peruenit, de fideiussor. & sumitur ex l. si seruus communis, §. quod verò, ff. de furtis, & docet Syl. ver. fideiussor, q. 12. P. Nau. lib. 3. c. 4. n. 162.

Ad extremum dicendum est, quod fideiussor, etiam ante Iudicis sententiam, in conscientia obligatus sit debitum soluere, in defectum principalis, sicuti rectè contra quosdam docet Petr. Nau. lib. 3. c. 4. n. 150. Quia, vt supra dictum, fideiubere aliud non est, quam fidem suam interponere de alieni debiti solutione, siue alienam obligationem in suam fidem interpositam, & acceptatam seruare naturali iure obligatus est. Quatuor tamen potissimum casus sunt, quibus fideiussor liberationem fideiussionis suæ iure petere potest, quos Gl. numerat in §. si quid, Instit. eod. tit. l. Si ita conuentum fuerit, vt elapso certo tempore, vel cum fideiussor id peteret, fideiussione liberaretur, l. si pro ea, C. mandati. II. Si debitor principalis bona sua dilapidare incipiat, vt periculum fideiussori imminet, cit. l. si pro ea, & l. Lucius, iun. Gl. ff. eod. Idemque videtur esse, si debitor in longinquas regiones discessurus sit, secundum Abb. in c. vlt. de fideiussor. III. Si fideiussor longo tempore in obligatione manserit, quod Iudicis arbitrio ex circumstantiis æstimandum erit. Ita habetur in cit. l. Lucius, iun. Gl. IV. Si fideiussor ad soluendum condemnatus sit statim, antequam soluat, agere potest aduersus debitorem principalem, vt ipsum liberet, & indemnem seruet, sicuti habetur in citat. iuribus, & l. fideiussor pro venditore, ff. eod. & c. vlt. de fideiuss. vbi Gl. ver. si diu, Abb. c. constitutus, n. 2. eod. tit. Syl. ver. fideiussor, q. 15. Gomez n. 10. Mol. disp. 546.

## CAP. XXX.

## De pignore &amp; Hypotheca.

## SUMMARIUM.

1. Nomen pignus ferme rebus mobilibus; hypotheca immobilibus tribuitur.
2. Hypotheca, seu pignus diuiditur in Prætorium, conuentionale, & legitimum.
3. Pignus, seu hypotheca alia generalis est, & alia specialis: Item alia est expressa; & alia tacita, siue legis dispositione introducta: eiusque varij modi sunt.
4. Quæ res vendi, & etiam oppignorari possunt: quæ autem vendi prohibita sunt, ea ferme etiam oppignorari non possunt.
5. Pignus creditor alteri oppignorare non prohibetur.
6. Pæna legis commissorie in pignoribus reprobatur.
7. Fructus ex pignore perceptos in partem sortis exoneranda computare debet.
8. Debitor, rem, quam uni oppignorauit, alteri vendere non prohibetur: emptori tamen de evulsionem tenetur.
9. Oppignoratio fundo, vel alia re frugifera, etiam fructus oppignorati censentur.

**P**IGNUS, si latè accipiat, est res quæuis alteri obligata in securitatem debiti; vt si aliter satisfactum

non fuerit, inde satisfieri possit. Similiter hypotheca, si latè accipiat, dicitur quæuis res obligationi subiecta pro cautione debiti. Quapropter Marcianus dixit in l. res hypothecæ, ff. de pignoribus & hypothecis: *Inter pignus, & hypothecam nominis tantum sonus differt.*

Sin verò strictè accipiantur, differunt, sicuti præter alios annotauit Abb. in c. cum aliquibus, num. 5. de sent. & re iudic. Nam pignoris appellatione, ea propriè res continetur, quæ simul etiam creditori traditur, maxime si mobilis sit, l. si rem alienam, §. propriè, ff. de pignorat. act. iun. §. Item Seruiana, Instit. de action. & l. plebs, §. pignus, ff. de verb. signif. vbi iureconsult. existimat, pignus à pugno dictum esse, quia res, quæ pignori datur, manu tradatur. Quæ verò res nuda conuentione tenetur, propriè hypothecæ nomine appellatur: descenditque pignus ex gentium iure, hypotheca verò ex iure Prætorio, sicuti notat Gloss. marginalis in l. 1. ff. de pignorat. actione, & constat ex l. si tibi, §. de pignore, ff. de pactis. Vide Greg. Tholos. l. 23. syntagm. cap. 5. Placet tamen deinceps pignus & hypothecam pro synonymis vsurpare.

Triplici ex causa pignoris obligatio nascitur: vel ex Prætoris iurisdictione, quod dicitur pignus *Prætorium*: vel ex partium conuentione, quod dicitur pignus *conuentionale*: vel ex iuris constitutione, quod dicitur pignus *legitimum*.

Prætorium pignus subdiuiditur in iudiciale; & quod propriè Prætorium dicitur. Iudiciale pignus est, quod in executionem sententiæ Iudicis auctoritate constituitur; mittendo creditorem in possessionem bonorum debitoris, posteaquam is in soluendo contumax extitit. Quæ de re est tit. C. Si in causa iudicati pignus captum sit, & tit. C. de executione rei iudicatæ, & l. à Diuo Pio, §. in venditione, ff. de rei iudicata. Prætorium verò pignus est, quod ante latam sententiam, à Magistratu constituitur, mittendo actorem in possessionem vel retentionem bonorum, quatenus ipsi cautum sit: puta si Reus in iudicium vocatus non compareat, quæ de re est tit. lib. 2. decretal. De eo qui mittitur in possessionem bonorum, rei seruandæ causa, & c. contingit, de dolo & contumacia; item l. non est mirum, ff. de pignorat. act. & tit. ff. Quibus ex causis in possessionem eatur, vbi in l. r. plures causæ pignoris Prætorij recensentur. Vide Greg. Tholos. lib. 23. c. 6.

Conuentionale pignus est, quod partes contrahentes expressè constituunt siue rei interuentu, siue solo consensu: in quo differt hoc pignus à prætorio, quippe quod ante rei possessionem, vel apprehensionem nunquam acquiritur, sicut constat ex cit. l. non est mirum, iun. Gl. ver. fuerit in possessionem.

Non prohibetur autem qui rem in pignus seu hypothecam accepit, alteri oppignorare, sicuti habetur in l. 1. C. si pignus pignus pignori datum est, & docent Anton. Negusanus p. 2. de pignoribus, memb. 3. num. 19. Syl. ver. pignus, q. 8. vbi aiunt; Quod pignus pignori dari potest in infinitum: quia quilibet ius sibi acquisitum in alterum transferre potest; ita tamen, vt si prioris creditoris ius per solutionem ipsi factam extinctum fuerit, etiam posterioris extinguatur: quia extincto iure concedentis extinguatur etiam ius accipientis. Enimvero qui pignus acceperat, cum primum debitum integrè solutum, aut eo nomine satisfactum est, restituere illud debet; & quidem tale, quale erat tempore traditionis; non dolo, aut culpa lata, vel leui deterius factum: alioquin tenebitur creditor actione pignoratitia, l. quamdiu, C. de distract. pignorum, l. creditor, 2. C. de pignorat. act.

Duplex est pignus, siue hypotheca conuentionalis: Vna generalis, quæ ad omnia bona se extendit, non solum præsentia, sed etiam futura, l. 1. l. & quæ nondum, ff. de pignorat. Quod verum est, licet debitor, verba illa, tam



ia, tam presentium, quam futurorum, non adiecerit; sed absolute posuerit; fide, & periculo rerum mearum. Ita habetur in l. ult. C. Quæ res pignori obligari possunt. Cæterum in generali eiusmodi hypotheca non censetur ea comprehensa, quæ nemo prudens in specie facile obligaret; ut sunt quotidiana vestis, & supellex, item Doctorum libri, artificum instrumenta; mancipiorum necessaria ministeria; demum quæ ad affectionem debitoris spectant, l. obligatione generali, ff. de pignorib. Particularis verò hypotheca est vnius, vel plurium rerum in specie obligatio.

Legitimum pignus siue hypotheca est, quæ neque Iudicis præcepto, neque partium conventionem; sed legis dispositione constituitur: quam obrem etiam tacita hypotheca vocari solet; & similiter distingui debet in universalem omnium bonorum, & specialem certorum.

Legitimam, siue tacitam hypothecam habet fiscus in bonis cuiuscunque debitoris sui, siue ex contractu, l. 2. C. in quibus causis pignus, & c. l. 3. & 4. C. de priuil. fisci, siue pro censibus & tributis præstandis, l. 1. C. eod. & l. 1. C. si propter publicas pensitationes venditio facta fuerit. Nomine autem fisci intelligitur publicum ærarium Principis, vel Imperij.

Secundò, Bona omnia tutoris, vel curatoris tacite obligata sunt pupillo, vel Minori pro administratione, l. pro officio, C. de administ. tutorum. Quod Gl. & Abb. c. ex literis, de pignoribus, etiam ad Ecclesias, & hospitalia transfert, ut & ipsa administratorum suorum bona obligata habeant, pro administratione. Quia Ecclesia iure Minorum fungitur, c. auditis, de integritate restit.

Tertiò, Liberi habent tacitam hypothecam in bonis patris, pro administratione bonorum aduentitiorum, sicuti videre est in tribus ultimis ll. C. de bonis quæ liberis.

Quartò, Maritus habet tacitam hypothecam in bonis vxoris pro dote promissa sibi præstanda; vicissim vxor tacitam hypothecam habet in bonis mariti pro restitutione dotis, iuxta l. vii §. & ut plenius, C. de rei vxoris actione, §. fuerat, Instit. de action. Adde, quòd vxor, mortuo marito, bonis eius in domo relictis iure retentionis insistere possit; donec ei dos restituatur: cum ob familiaritatem, coniunctionemque cum marito, domum, & quæ in ea existunt, veluti manu sua teneat, sicuti post alios annotauit Mynsing. cent. 6. obser. 82.

Quintò, Res empta ex pecunia pupilli tacite hypothecata ipsi est, ita ut quoad pretium recuperandum, anteposatur aliis creditoribus, etiam anteriorem expressam hypothecam habentibus, l. idemque, ff. Qui potiores in pignore, iunct. Gl. ver. res fuerit.

Sextò, Quæ a conductore in vrbani prædij inducuntur, vel illata sunt, tacite hypothecæ loco obligata censentur pro pensione, & damno rei, l. 2. & 4. ff. in quibus causis pignus, vel hypotheca tacite contrahatur, l. si non inducunt, C. eod. l. certius iuris, C. de locato & conducto. In rusticis verò prædiis contra obseruatur, ait Nerat. in cit. l. 4. id est, ut illata, vel inuecta domino obligata non sint: quia satis prospectum esse videtur in fructibus, quos tacite sibi pro pensione obligatos habet, iuxta l. in prædiis, ff. ex quibus causis, & c. Quamuis Gl. in cit. l. 4. & plerique DD. in cit. l. certius iuris, existiment, etiam illata in rusticum prædium, ut ibi maneat, obligata esse, si dominus sciuerit: Ait enim Imper. Certius iuris est, ea que voluntate dominorum coloni in fundum conductum induxerint, pignoris iure dominis prædiorum teneri. Nisi malis cum Gl. margin. interpretari voluntate dominorum, id est, pacto. Illud tamen negari non potest, quòd quæ inquilinus in domum inuexit, interim à domino retineri possint, donec ei pensio debita solvatur, ob generalem regulam vsu receptam apud Andr. Gaill. lib. 2. obser. 12. n. 5. Si res debitoris sine vitio perueniat ad cre-

ditorem, & subsit causa retinendæ rei coherens, interint retineri posse; v. g. vestem à sartore, ob non solutâ mercedem. Plura vide in cit. tit. ff. in quibus causis pignus, vel hypotheca constituitur, & apud Ant. Negusan. de pignor. p. 2. mēb. 4. Vasq. eod. tr. c. 3. §. 1. Angel. & Syl. ver. pignus, q. 1. Mol. disp. 497. & 336. Tolos. l. 23. syntag. c. 8.

Quæcunque res emi, vendique possunt, ea etiam pignori obligari, l. sed & quod, ff. de pignorib. Quapropter debita, ideoque instrumentum donationis, venditionis, & c. item vsusfructus, emphyteusis (tamen sine præiudicio proprietarij) ac similia iura hypothecæ subijci possunt. Sed & vice versa, quæ res absolute & propter se ipsas vendi prohibentur, earum etiam oppignatio prohibita censetur, sicuti habetur in l. ult. iun. Gl. C. de reb. alienis non alienandis. Tum quia species quædam alienationis latè sumptæ est oppignatio; quippe per quâ ius in re alteri acquiritur, sicuti constat ex cit. l. ult. quâ obrem in materia fauorabili alienationis nomine etiam oppignatio comprehendi solet: tum quia oppignatio est veluti via & dispositio ad venditionem: siquidem creditori datur pignus, ut postquam debitor est in mora soluendi, illud vendere, & ex eo sibi satisfacere liceat, sicuti constat ex tit. ff. de distract. pignorum. Quare homo liber, res sacra & religiosa, publicum forum, & c. sicuti vendi non possunt, ita neque oppignerari, l. 1. §. eam rem, ff. Quæ res pignori dari, & c. l. sancimus, r. C. de SS. Ecclesiis, l. si monumento, C. Quæ res pignori obligari possunt, & c. r. de pignoribus.

Porro sicut res sacra, ratione materiæ, in casu necessitatis quandoque vendi; ita multò magis pignori dari possunt. Præterea, licet res sacra, ut Ecclesie, sepulchra; ius patronatus, & c. per se vendi, vel oppignerari non debeant; per accidens tamen transeunt cum loco vendito, vel oppignerato, cui annexæ sunt, sicuti colligitur ex c. ex literis, de iure patronatus. Cæterum, sicuti fructus, & comoditas pignoris nō ad creditore, sed ad debitore tantum dominum pertinet; ita & vsus iuris patronatus, siue præsentatio, donec locus pignori subiectus vendatur, ad eundem pertinere debet, sicuti notauit Mol. disp. 330.

Denique & creditor pignus sibi datum alteri dare potest: & durat secunda oppignatio, donec extingatur prima, sicuti constat ex l. 1. C. si pignus pignori datum sit: Nā resolutio iure dantis, resolutur etiā ius accipientis. Secundus tamē creditor exigere potest à debitore, ut vel debitum sibi statim soluat, vel aliud equè bonum pignus tradat, l. cum debitore, iunct. Gl. fin. ff. de pigner. act.

Pactum legis commissoriæ, in eo consistens, ut, si debitum v. g. ex mutuo ad certum tempus solutum non sit, pignus creditoris existat, vel eidem venditum, in feudum, aut in solutum datum sit; tam civili, quàm canonico iure reprobatur, tit. C. de pactis pignorum & l. commissoria, c. significante, de pignorib. Iustum tamen est pactum, ut si ad certum diem solutio facta non fuerit, pignus creditori, iusto tunc pretio secundum boni viri arbitrium æstimando, vendi debeat, sicuti habetur in l. si fundus, §. ult. ff. de pignorib. & docet Gl. in l. 1. C. de pactis pignorum, Abb. in cit. c. significante, n. 6. Nau. c. 27. n. 203. Nā eiusmodi obligatio debitori imponitur, partim in pœnam iustam propter dilatam solutionem; partim ob interesse creditoris, ut is indemnis seruetur.

Deinde apponi potest pactum, ut, si debitor in mora soluendi existat, v. g. si pensio, seu census biennio solutus non fuerit, pignus, vel hypothecam statim distrahere liceat: atque inde accepto debito, quod reliquum est, debitori restituatur, iuxta l. si conuenit, ff. de pigner. act. & videri potest Conrad. de contract. q. 84. Binsfeld. c. ni ciuitate, q. 12. concl. 5. Sin autem nihil contentum de pignore distrahendo, nihilominus distrahi potest biennio post moram, & interpellationem debitoris, l. ult. C. de iure dominij. Sed etsi conuētum fuerit, ut pignus distrahere non liceat, posteaquam tamen ter denuntiatum



est debitori, ut soluat; bienniumque interim elapsum est, pignus distrahere concessum est, uti habetur in cit. l. si conuenit, & docet Gloss. ibid. Syl. ver. pignus, q. 10. Nau. num. 205. Veruntamen si creditor pignus distrahat, non poterit ipsemet emere, ne quidem per interpositam personam, sicuti habetur in l. & qui, C. de distract. pignorum.

Denique si pœna conuenientialis mediocris, & sine usurarum fraude, adiecta sit, soluenda à debitore, nisi ad certum diem satisfecerit; ea etiam in conscientie foro solui debet, si à creditore exigatur, posteaquam debitor in notabili, eaque culpabili mora fuerit, sicuti docet Palud. in 4. d. 27. q. 1. a. 2. Per. Nauat. lib. 2. c. 3. num. 236. Less. lib. 2. c. 20. dub. 15. contra Nau. c. 23. num. 67. Lopez lib. 1. de contract. c. 31. Sanchez lib. 1. de matrim. disp. 37. qui aiunt, pœnam conuenientalem ante Iudicis sententiam non deberi. Quare de re dixi suprà c. 16. n. 12.

7 Fructus, quos creditor ex pignore percepit, vel dolo, aut culpa sua percipere neglexit, computari debent in rationem exonerandæ sortis, vel expensarum, quas fecit circa pignus, sicuti habetur in l. 1. 2. & ult. Cod. de pigner. act. videri potest Abb. cum Alexandr. de Neuo in c. 1. de furtis, Nau. c. 17. n. 216. Ratio est: Quia debitor manet dominus pignoris, ideo tam usus, quam fructus, vel æstimatio eorum eidem debetur. Vide Innoc. III. in c. cum contra, de pignor. Abb. ibidem. Molin. disp. 535. & quæ dixi suprà c. 15. q. 4. Porro, si creditor necessariorum atque vtilium, moderatarum tamen, expensarum compensationem in fructibus non percepit, eas contraria hypothecaria actione repetere potest: & interim, donec soluuntur, pignus retinere, l. si necessarias, ff. de pigner. act. l. creditor, 2. Cod. eod. l. in summa, Cod. de pignor.

8 Debitor non prohibetur rem nomine hypothecæ seu generalis, seu specialis alicui obligatam vendere, vel alio modo alienare, sicuti constat ex l. si conuenit, §. si fundus, ff. de pigner. act. l. si debitor, C. de distract. pignorum: tenetur tamen ei, cui pignoris alienatio facta est, de euictione, sicuti colligitur ex cit. l. si debitor, & l. si prædium, C. de euictione. Refert autem, utrum pignus sciente, & consentiente creditore alienetur; an eo ignorante, aut inuito: Primo enim casu, nisi protestetur, ut ius pignoris saluum sibi maneat, censetur remittere, uti habetur in l. 2. C. de remiss. pignoris. Posteriore verò casu res transit cum onere ad quemcunque possessorem, à quo & vindicari potest, in defectum venditoris; si, inquam, prius excussis bonis eius, fideiusoribusque, impar soluendo reperitur, sicuti habetur in Auth. de fideiusorib. §. sed neque, Auth. sed hodie, C. de action. & obligat. Auth. hoc si debitor, C. de pignoribus.

Qua simili ratione, si res particularis vni oppignerata, postea alteri oppigneretur, cum tamen ad vtriusque debiti securitatem non sufficiat; refert, utrum id factum fuerit sciente priore creditore, atque ignorante posteriore; tunc prior ille iure suo cedere videbitur, sicuti notat Mol. disp. 532. Sin autem in scio priore creditore, manet illi saluum ius pristinum; sed posterior, si nesciuit, rem ante oppigneratam esse, agere potest aduersus debitorem suum hypothecaria actione, ut rem aliam sufficientem in pignoris locum substituât, l. tutor, §. 1. & l. si quis in pignore, §. ult. ff. de pigner. act. Adde quod in hoc casu etiam actio de crimine stellionatus, ob calliditatem debitoris intentari possit, sicuti habetur in citatis iuribus, & l. 3. ff. de crimine stellionatus, l. 1. 2. & ult. C. eod. Dictum autem stellionatus, seu callide simulationis crimen à stellione, varij coloris animalis.

Quod si aliquis rem non suam, sed alienam in pignus dedit, dominus eam vindicare potest; nisi sciens pignori datam esse, id ratum habuerit, l. 2. & ult. C. si aliena res pignori data fuerit, & l. si fundus, §. 1. ff. de pignor. Sin

autem pignus à domino vindiceretur, is, qui bona fide acceperat, agere potest contra debitorem contraria pigneratitia actione, ut rem æquè bonam sibi in pignus det, l. quæ prædium, C. eod. & l. rem alienam, ff. de pigner. act. vbi additur: Si res aliena in pignus data, postea efficiatur eius, qui dedit, ex eo tempore, ut verum pignus subiectum manere creditori: Quare nihil obstat, quominus aliquis hypothecæ aut pignori subijciat rem, cuius dominium se acquisiturum sperat, sicuti notauit Mol. disp. 529. arg. cit. l. si fundus, §. aliena, ff. de pignor. *Alienares vtiliter potest obligari sub conditione, si debitoris facta fuerit.*

Denique addendum, si ager, vel quævis alia res fructifera oppignerata est, etiam fructus oppigneratos censeri; ita ut licet postea ager vendatur, & fructus ab emptore aut conductore percipiantur, hypothecæ nomine obligati maneant, l. quamuis, C. in quibus causis pignus, &c. Quin etiam fructus, qui post elocationem, aut venditionem sati & enati, oppignerati manent, dum solo cohærentes sunt: quia censentur pars fundi, ideoque eandem hypothecæ obligationem sustinent; & possunt à creditore vindicari, deductis expensis, l. si fundus, §. in vindicatione, ff. de pignor. Postquam verò à fundo separati, seu percepti sunt, desinunt esse oppignerati; nisi ab hærede percipiantur, ad quem res oppignerata hæreditario iure peruenit, l. Paulus, §. si mancipia, ff. de pignor. & videri potest Mol. tom. 2. disp. 529. Less. l. 2. c. 28. num. 43.

## CAP. XXXI.

## De Transactione.

## SUMMARIVM.

- 1 Transactio est de re dubia, & controuersa non gratuita pactio.
- 2 Quin transactio bona fide facta immodicè læsus est, rescissionem eius petere non potest.
- 3 Qui alienare rem prohibentur, neque circa eam transigere, aut compromittere possunt.
- 4 Procurator sine mandato speciali transigere non potest, sicut nec alienare.
- 5 Transigere in crimine publico, cuius pena sanguinis imponi solet, prohibitum non est. In aliis verò criminibus, cum accusatore transigens pro confesso habetur, excepto crimine falsi.
- 6 Non valet transactio sine Iudice facta de relictis in testamento, nisi inspectis verbis testatorum.
- 7 Si transactio circa vnam, vel plures res particulatim fiat, non extenditur ad alias, eiusdem causa controuersia contentas, nisi conueniat.
- 8 Transactio generatim, seu indefinitè facta ad omnia particularia se extendere censetur, saltem ea, de quibus tractatus præcesserat.
- 9 Iudex in causa valde dubia transactionem partibus suadere debet, sed ad eam compellere non potest: exceptis quibusdam casibus.
- 10 Si diuisio hære sita v. g. inter fratres instituenda sit, ad maiorem natu pertinet ex aquo diuidere, ad minorem eligere.

**T**ransactio est de re dubia, & controuersa, non gratuita pactio. Ita sumitur ex l. 1. ff. de transactionibus, iun. l. transactio, C. eod. & docet Abb. in rubr. de transactionibus, Syl. ver. transactio, princ. Mol. t. 2. disp. 556. Dicitur de re dubia: Si enim pars transigens sciatur, ius sibi nullum in re competere; tum in conscientie foro, tum etiam in externo transactio irrita est, vel saltè doli mali exceptione rescindenda, sicuti constat ex l. in summa, ff. de condict. indebiti, l. sub prætextu, i. C. de transaction. & docet Gl. in c. super eo, ver. dato, de transact. Abbas ibidem, in fine. Sin verò post transactionem bona fide factam, instrumenta, ac probationes reperiantur, viciari, aut rescindi non potest, cit. l. sub prætextu.

Utrum autem immodicè læsus, postea restituendus sit, beneficio l. 2. Cod. de rescind. vendit. in vtramque partem disputant DD. apud Arium Pinellum in cit. l. 2. p. 1. cap. 4. num. 12. & seqq. Mihi autem certa videtur pars negatiua: Quia sicuti in ludo, ita & in



transactione paciscentes incerto eventui se sponte, atque reciproce committunt: ergo de latione conqueri non possunt, argum. l. Lucius, §. ult. ff. Ad SC. Trebellianum, vbi id notavit Gloss. ver. posse. Necessarium est ad iustitiam transactionis, vt seruetur æqualitas inter paciscentes; ita, vt parti tantum detur pro remissione iuris sui dubij seu controuersi, quanti illud prudentis viri arbitrio valet, alioquin, si notabilis inæqualitas sit, vel si in externo foro lationem supra dimidium iusti accidisse probari possit, hoc casu concedendum esse videtur remedium rescindendi venditionem, aut reparandam lationem, secundum doctrinam Bartoli in cit. l. 2. argum. l. si superstiti, Cod. de dolo malo. Quamuis id ferme in praxi receptum non est, teste Gaill. lib. 2. obseruat. 70. Nisi latio accidat enormissima, seu nimis excedens dimidium iusti, ita vt dolum interuenisse, præsumi possit, vti videre est apud Mynsingerum cent. 6. obseruat. 91.

*Et recontrouersa:* Siue quia lis in iudicio iam mota est; siue quia controuersia seu dubium inter partes ortum, vt in iudicij disceptationem venire possit, transactioni locus est, l. 2. C. de transact. Porro transactio inter partes sine metu, ac dolo celebrata, parit exceptionem litis finitæ; perinde ac si res in iudicio decisa sit, sicut colligunt Doctores ex l. si super, l. fratris, C. eod. & habetur expressè in l. non minorem, Cod. eod. *Non minorem transactionem, quam rerum iudicatarum auctoritatem esse.* At verò postlatam à Iudice sententiâ, frustra transigitur; nisi vel appellacionis, vel in integrum restitutionis remedium (si Minor, vel Ecclesia notabiliter læsa sit) adhuc supersit, l. post rem, ff. eod. l. si causa, C. eod. l. eleganter, §. quid ergo, ff. de conditione indebiti, vbi Vlpian. ait; tunc solum transactionem de re iudicata nullius momenti esse, *cum de sententia indubitata, que nullo remedio attentari, seu infirmari potest, transigitur.* Quo casu, ne iuramento quidem transactionem confirmari, ita, vt ex ea ius alteri parti acquiratur, rectè docet Molin. cit. disp. 556. §. vtrum autem.

*Non gratuita pactio.* Quia vt dicitur in l. 38. *Transactio nullo dato, vel retento, seu promisso minime procedit:* quare DD. ibi notant, quod transactio sit contractus reciprocus, isque innominatus (nisi stipulatione & acceptatione firmetur) v.g. do tibi centum aureos, vt lite abstinas, & ius omne, quod in re litigiosa prætendis, mihi cedas. In eoque differt à compositione amicabili, per quam pars debiti gratis remittitur, sicuti habetur in c. super eo, de transactionibus.

Suadetur autem transigenti in l. pacto, & seq. ff. eod. vt pœna transactioni adijciatur, si ab ea recessum fuerit: tunc verò is, qui recessit, pœnam soluere cogitur; & si ea non sufficit, quanti interest alterius, transactionem seruata non esse, l. prædia, ff. de actionibus empti. Sin verò transactioni, alterique pacti appositâ pœnâ, insuper conuentum fuerit, quod nihilominus pactum seruari debeat, tunc contraveniens ad vtrumque compelli potest, & vt pœnam soluat, & vt pactum impleat, l. qui fidem, ff. de transact. l. cum proponas, C. eod. Idemque locum habet, si transactio, cui pœna appositâ erat, iuramento confirmata sit, l. si quis maior, C. eod.

**QVAESTIO PRIMA.** Quæ personæ transigere non possint? Respondeo: Quia alienare rem prohibentur, ij neque circa eam transigere, aut compromittere possunt. Exempli causa, hæres fideicommissi grauatus; Tutor item sine Iudicis decreto, sicuti alienare bona immobilia prohibetur, ita etiam transigere, l. non solum, C. de prædijs Minorum. Et similiter vasallus in feudo ex prouidentia sine consensu domini, & agnatorum transigere, aut compromittere non potest. quæ de re Clarus ver. feudum, q. 38. 39. Mol. disp. 557. Transactio item in bonis Ecclesiasticis immobilibus, aut mobilibus pretiosis, quæ seruari possunt, si fiat sine debita solemnita-

te, irrita est non minus, quam alienatio, argum. c. contingit, vbi id notat Abb. n. 3. de transact. & c. cum tempore, de arbitris, in quo habetur; Quod Prælatus exemptus non possit in præiudicium exemptionis Ecclesiæ suæ compromittere. Et Procurator Principis, alteriusve personæ, sicut alienare rem non potest, ita neque super ea transigere, sine mandato speciali, l. transactionis, C. eod. l. nulli, C. eod. l. mandato, C. de Procuratorib. Præterquam si in aliqua causa, libera ipsi administratio relicta sit, l. Procurator cui, C. de Procuratoribus, c. qui ad agendum, eod. in 6. Deinde, si Prælatus, tutor, aut quilibet administrator ita transactionem peragat, vt non sit periculum rei alienandæ, sed potius acquirendæ; ideò, quæ Ecclesiæ aut domini conditionem meliorem efficiendi, subsistere transactionem, docent DD. in l. Præses, C. de transactionibus, Gl. & Bartol. in citata l. nulli, Abb. in cit. c. contingit, n. 3. Mol. disp. 557. §. secundus est, vbi generalem & communiter receptam doctrinam tradit: Transactionem valere, si ita fiat, vt res apud eum permaneat, qui illam alienare non potest: & causa litis finiendæ v. g. pecunia offeratur. quod idem docet Clarus de transactione super feudo, §. feudum, q. 38.

Denique excipitur casus necessitatis, in quo bona alioquin vinculata, seu alienari prohibita, per transactionem, aut compositionem in alium deriuari possunt, præsertim Principis accedente consensu: Vt si id necessarium esse iudicatur ad diuturnas lites finiendas, scandala impedienda. Etenim si prohibeatur res aliqua alienari, intelligi solet de alienatione voluntaria, non item necessaria. Ita ex communi Molina cit. disp. 557. §. Tertius est.

**QVAESTIO SECUNDA.** Super quibus rebus transactio, vel compromissum fieri non possit? Respondeo: Primò, Super re spirituali transactio, sicuti & omnis pactio reciproca, irrita & simoniaca censetur, si fiat dato, vel accepto aliquo temporali, c. super eo, c. præterea, 1. & 2. de transact. & videri potest Syl. ver. transactio, & quæ dicam lib. seq. tract. 10. c. ult. §. n. 34. & 35.

Secundò, Circa accusationem de crimine quatenus transigere liceat, habemus decisionem l. 18. C. de transact. *Transigere, vel pacisci de crimine capitali* (id est, cui pœna sanguinis decreta est) *excepto adulterio, prohibitum non est.* Rationem dant DD. ex l. i. ff. de bonis eorum, qui ante sententiam, & c. Ignoscendum Principes censuerunt ei, qui sanguinem suum qualiter qualiter redemptum voluit, videlicet dando aduersario pecuniam, vt accusatione abstintat, secundum Gl. ver. qualiter qualiter. Excipitur autem adulterium communiter, l. 2. C. Ad Iuliam de adulteriis. Idque propter dedecoris notam, quæ coniugi innocenti, eiusque consanguineis ex tali transactione aspergi potest. Sequitur in cit. l. transigere: *In aliis autem publicis criminibus, quæ sanguinis pœnam non ingerunt, transigere non licet, citra falsi accusationem.* Vbi in primis nota, excipi accusationem de falsi crimine, circa quod transactio valida est, l. si ex falsis, C. eod. Quia licet pœnam sanguinis non ingerat, tamen condemnato grauem infamiam irrogat; à qua se liberare Reus omnimodè desiderat, quam rationem ex communi dat Clarus lib. 5. sent. §. fin. q. 58. num. 18. Veruntamen praxis Iudicum obtinet, vt licet accusatio de crimine per transactionem abolita sit; Iudex tamen vel alio accusante, vel ex proprio officio per inquisitionem, instituto nouo iudicio, procedere non prohibeatur, sicuti testatur Clarus §. fin. q. 58. n. 3.

In aliis verò publicis criminibus, quibus pœna sanguinis irroganda non venit, si Reus, aliquo dato, cum aduersario transigat, habetur pro confessio, l. ult. ff. de præuicatoribus, l. athletas, §. ult. ff. de his qui notantur infamia, ibi: *Quoniam intelligitur confiteri crimen, qui paciscitur.* Quare ordinaria criminis eius pœna



affici potest; nisi sufficienter probet, se innocentem esse, & pecuniam v.g. dedisse duntaxat ad vexationem redimendam, l. serui, Cod. Adl. Iuliam de adulter. l. si ab eo, ff. de calumniatoribus, & docet Gloss. in l. ult. ver. habetur, C. de prauaricatione, Molin. tract. 3. disput. 46. conclus. 3. Deinde, si accusatus gratuito pactus sit cum aduersario, licet pactio talis in publicis criminibus sanguinis poenam non irrogantibus irrita existat, ne crimina talia impunita permaneant, sicuti ex communi tradit Clarus cit. q. 58. n. 19. tamen paciscens non ideo pro conuicto, aut confesso habetur, neque infamis efficitur, sicuti colligitur ex l. in fisci, & notat Mol. cit. conclus. 3. §. dubium est.

Sed quid sentiendum de priuatis criminibus, quibus poena sanguinis non irrogatur? Respondet Gl. in cit. l. transigere, ver. publicis, Gomez 3. resol. c. 3. n. 54. Clarus cit. q. 58. n. 16. Andr. Fachin. lib. 1. contr. c. 9. Mol. l. c. Si de tali crimine, puta iniuriarum, criminaliter agatur, transactio irrita est, & accusatus transigens pro confesso habetur; non minus, quam in transactione de crimine publico. Sin verò agatur civiliter ad poenam applicandam parti læsæ, transactio, sicuti & gratuita pactio, valet.

6 Tertiò, non valet transactio sine Iudice facta super relictis in testamento, vel codicillo, nisi inspectis, cognitisque verbis testatoris, l. 1. §. ratio, ff. Quomodo testamentum aperiantur, l. non est ferendus, ff. de transact.

Quartò, transactio in super alimentis in futurum debitis ex vltima voluntate, si sine Iudicis auctoritate fiat, irrita est; nisi ita fiat, vt per eam conditio alimentarij melior fiat, l. hi qui, §. eam transactionem, ff. de transact. l. de alimento, C. eod. vbi dicitur, de alimentis secundum tempus præteritum transigi posse; non autem de alimentis, quæ in futurum debentur. Quia ex futuris alimentis vita hominis, cui testator prospectum esse voluit, dependet. Si tamen transactio iuramento confirmetur, videtur obligationem parere, ob iurifiurandi religionem, sicuti ex probabiliore Couar. c. quamuis pactum, p. 2. §. 6. num. 12.

7 QVÆSTIO TERTIA. Quam amplè transactio interpretanda sit? Respondeo, & dico I. Si transactio fiat circa rem vnā, aut plures particulatim, extendi non debet ad res alias in eiusdem causæ controuersia contentas; præterquam si dependentes, & connexæ sint. Ita habetur l. si vnus, §. ante omnia, ff. de pactis, iunct. Gl. ver. noceat. Similiterque dicendum, si transactio facta sit super petitione rei non absolutè, aut vniuersim; sed ex tali genere actionis intentatæ, aut intentandæ; nihil obstat, quominus ex aliis causis ac titulis res eadem in iudicio peti possit, sicuti ex communi docet Abb. in c. 1. de transact. in fine, arg. l. si ita quis, §. ult. ff. de verb. obligat.

8 Dico II. Si transactio fiat generaliter, seu indefinitè (indefinita enim enuntiatio æquiualeat vniuersali, sicuti Abb. testatur in cit. c. 1. num. 6. ex l. ult. ff. de vino, tritico, & oleo legato, c. vt circa, de elect. in 6.) extendit se ad omnia particularia contenta, etsi ea in specie cognita sint, l. tres fratres, ff. de pactis, l. sub prætextu, 2. Cod. de transact. Quia satis est, ea confusè siue in genere cognita, adeoque comprehensa fuisse, si excepta non sint.

Limitatur primò: Nisi transactio facta sit super relictis ex vltima voluntate, sicut dixi quæst. præced. Secundò: Nisi dolo alicuius transigentium res aliquæ occultatæ sint, cit. l. tres fratres, ff. de pactis, l. qui cum, §. qui per fallaciam, ff. de transactionibus. Terriò: Licet transactio verbis generalibus, aut indefinitis concepta videatur, restringitur tamen ad rem: seu causam, de qua inter partes actum erat, l. si de certa, Cod. eodem, cit. l. qui cum, §. transactio, & docet Gloss. in c. 1. ver.

sit vacuum, Abb. num. 6. de transact.

Imò generatim dici debet; Quòd in omni dispositione, etiam iuris stricti, clausula generalis refertur tantum ad specificata, siue de quibus tractatus præcessit. Exempli causa: Orta controuersia inter defuncti matrem, atque vxorem, ob relictam hereditatem tractabatur de debitis illius ex variis contractibus, postea per transactionem vxor in se suscepit omnia defuncti debita. Explicanda ista clausula est, quòd vxor satisfacere velit omnibus creditoribus, tum iis, qui sua debita iam petierunt, tum iis, qui postea comparituri sunt, licet modò ignorentur. Non tamen extendenda est clausula illa ad debita ex vltima voluntate: v. g. si defunctus annuarius fieri statuisset, vxor ex vi transactionis ad illum expediendum se obligasse censenda non est, cum de tali genere obligationis actum non fuerit.

Ad extremum tria moneo: Primum. Valde consultum esse Christianis, vt ortâ inter eos aliqua controuersia, transactioni, vel amicabili compositioni, aut arbitrium iudicio causam committant potius, quam vt iudiciaria lite longo tempore se fatigent, qua de re videri potest Ioan. Molanus tract. de testam. piis, c. 74. & 75.

Alterum. Quòd Iudex ordinarius in causa valde dubia transactionem suadere, eamque ex partium consensu factam exequi debet: Ordinariè tamen cogere non potest partes ad compositionem, vel transactionem; sed iis poscentibus, ius dicere, siue sententiam pronuntiare debet, sicuti docet Gloss. communiter recepta in l. 1. §. & post, ff. de operis noui nunciat. Abb. cap. cum inter R. num. 9. de elect. & cap. si quando, n. 3. de offic. Iudicis delegati. Quòd limitatur primò: Nisi sit Iudex supremus, qui in causa illa liberam disponendi facultatem obtineat, puta Papa in Ecclesiasticis beneficiis, sicuti notauit Abb. in c. cum pridem, num. 5. de pactis. Secundò: Si partes diu litigauerunt, quia causa valde dubia est, vt difficile sit eam decidere: hoc casu Iudex, præsertim supremus, ad transactionem partes compellere potest, vti docet idem Abb. c. cit. c. cum inter, num. 9. eodemque modo intelligi potest Gloss. c. per venerabilem, ver. fauere, de elect. Quin & Episcopus in causa beneficii, gratia litis finiendæ, aut pacis retinendæ, transactionem, seu compositionem, interdum discernere poterit: v. g. vt vini parti beneficium cedatur, alteri verò pensio designetur, vel litis expensæ præstentur: licet ipsæmet partes absque Ordinarij auctoritate eiusmodi pactum constituere non possint, propter periculum simoniæ, sicuti annotauit idem Abb. in cit. c. cum pridem, n. 8.

Tertium. Si hæreditas, v. g. quam pater in testamento non diuisit, inter fratres post mortem illius diuidenda sit, ad conuentionem tollendam, generali consuetudine receptum esse, testatur Gail. lib. 2. obser. 16. n. 14. vt maior natu arbitrato suo ex æquo diuidat; minor autem eligat idque sumitur ex c. 1. de Paroch. & S. August. lib. 16. de ciuit. c. 20. vbi differens de diuisione terræ inter Abram, & Loth Gen. 13. Hinc fortassis effecta est, inquit, inter homines pacifica consuetudo, vt quando terrenorum aliquid patiendum est, maior diuidat, minor elligat. Vbi verò talis consuetudo recepta non est, ad Iudicem pertinet, diuisionem iustam instituere, §. si familiæ, Inst. de offic. Iud. & interdum rem sorte transigere, l. si quæ sunt, ff. Familiæ heriscundæ.



## TRACTATVS QVINTVS.

D E

TESTAMENTO, ALIISQVE  
VLTIMIS VOLVNTATIBVS.

## CAP. I.

Quid sit Testamentum &  
quotuplex.

## SVMMARIVM.

- 1 Testamentum definitur voluntatis nostræ iusta sententia, de eo, quod quis post mortem fieri velit.
- 2 Testamentum inter vltimas voluntates principatum tenet.
- 3 Duplex est testamentum, vnum in scriptis, & alterum nuncupatiuum.
- 4 Pactum de successione irritum est.
- 5 Pactum successionis in propria hereditate fauore militum & cause pie explicatur, vt sit iusta vltima voluntatis, quæ ante mortem non confirmatur.

**T**estamentum ex eo appellatur, inquit Iustinianus in Instit. de testam. ordinandis, quod testatio mentis sit. Nam sicuti ornamentum ab ornando; calceamentum à calciando; ita & testamentum à testando dicitur: sed allusionis pariter, vt & declarationis maioris causa, addidit ille voculam mentis: quemadmodum etiam Paulus in l. senatus, ff. de donat. mortis causa ait; *Donatio dicta est à dono, quasi doni datio.*

Græcè dicitur Διαθήκη, id est dispositio: sumitur enim nomen generis pro specie: siquidem vtraque illa dictio tam græca, quam latina non solum vltimam morientium testationem, sed etiam viuientium pacta & pollicitationes comprehendit. Ex quo factum est, vt cum in scriptura sacra secundum hæbraicam lectionem, est כְּרִיתָ, id est fœdus, siue pactum; septuaginta interpretes, & Apostoli verterint Διαθήκην; iterum nomen generis loco speciei sumentes: ac denique latinus interpret transiit testamētum; diuino haud dubiè consilio, id quod fœdera, & dispositiones, quas Deus in fœderis cum hominibus pepigit, potissimum cum sanguine & morte acciderunt, vt testamenti similitudinem gererent, sicuti indicat Apost. ad Hebr. 9. S. Ambros. de Cain & Abel, cap. 7. Testamentum dicitur, quo defertur bonorum hereditas. Merito & testamentum dicitur, & diuinum: cum ea, quæ verè bona sunt, attestatione mandatorum cœli & iurum conferuntur. Et testamentum dicitur, quoniam sanctum, quine dedicatum est: vetus in typo, nouum in veritate. Quo, testamento diuine gratiæ pignus tenemus: quia sic Deus dilectis hunc mundum. Vide Couar. p. 1. rubr. de testam. n. 1. & 21. Ioan. Lorin. super cap. 3. Act. n. 25. post Lactantium a lib. 4. de diuin. instit. c. 20.

Testamentum, inquit Vlpian. in l. 1. ff. de testamentis, est voluntatis nostræ iusta sententia de eo, quod quis post mortem suam fieri velit. In qua definitione generis loco ponitur, sententia iusta voluntatis, id est, dispositio legitima, siue iuri congrua, voluntatis nostræ interpret: Secundum quod conuenit testamentum cum pactis & contractibus inter viuos. Quare additur loco differentia, de eo, quod quis post mortem suam fieri velit. Nam testamentum, & quæuis vltima voluntas refertur in tem-

pus mortis, in quo vim & robur suum accipit, testantè Apost. ad Hebr. 9. *Vbi testamentum est, mors intercedat testatoris necesse est. Testamentum enim in mortuis confirmatum est: alioquin nondum valet, dum viuit qui testatus est.*

Sed difficultatem mouet Doctoribus, quòd hæc testamenti definitio etiam reliquis vltimis voluntatibus, puta codicillo, legato, &c. conuenire videatur: cum & illæ iustæ dispositiones sint eorum, quæ post mortem fieri debeant. Respondetur; In analogis, quæ attributionis dicuntur, quorum vnum plenam & perfectam rationem definiti participat; alia verò imperfectè, & accessoriè; consultissimum esse defini id; quod principale est: ex quo reliqua faciliè intelligi possunt. Atqui inter vltimas voluntates seu dispositiones, primum ac perfectissimum est testamentum; quippe in quo vniuersalis hæres, defuncti personam representans, instituitur, in quem bona omnia, iura & actiones transire debeant; ita vt hæredis institutio sit caput testamenti, atque sine ea testamentum nullum esse possit, §. ante hæredes. Instit. de legatis, l. iubemus, §. quod si non fuerit obseruatum, C. de testam. & docet Gl. in c. cum tibi, de testam. Reliquæ autem vltimæ dispositiones, hæredis institutionem non requirentes, imperfectæ, atque diminutæ sunt, vt infra apparebit. Idque Bartolus in cit. l. 1. arbitratur Vlpianum indicasse, cum dixit, testamentum esse sententiam, iustam, id est, perfectam: quia perfecta non est, nisi hæres bonorum vniuersalis instituatur: quod propriè & directè solum fit in testamento, spectato iure ordinario, & secluso speciali privilegio; quod v. g. militibus datum est, vt etiam codicillo hæredem directè instituere possint, l. militis, ff. de re militari. Quòd si hæc Bartoli interpretatio alicui non satisfacit; tum dicat; Testamentum dici iustam sententiam, id est, solemnem, seu iuris solemnitatibus nixam; quæ si ad amissum non obseruentur, testamentum irritum redditur. Quæ explicatio sumitur ex rubr. & l. 1. ff. de iniur. sto, rupto, & irrito facto testamento.

Duplex est testamentum: Vnum in scriptis, siue clausum, quod testator sua ipsius, vel alterius cuiuscunque manu conscriptum; septem testibus masculis, puberibus, liberis, ad id rogatis seu vocatis, omnibus simul præsentibus, ipsūque testatorem videntibus, offert: profitendo esse suum testamentum: insuper ipsemet, si sciat, ac possit, sua manu coram testibus testamento subscribit; vel alius pro eo octauus testis, siue subscriptor adhibitus. Postea testes omnes septem testamentum vno, eodēque continuato tempore subscribere, & proprio, vel alieno sigillo consignare debent: imò omnes vno sigillo vti non prohibentur. Ita habetur in l. hac consulissima, C. de testam. iuncto §. sed cum paulatim, & seqq. Instit. eod. Additur verò in l. cum antiquitus, C. eod. Si quis sua manu totum testamentum, vel codicillum confecit, idque specialiter in scriptura expressit, tunc opus non fore eiusdem, vel alterius pro eo, subscriptione.

Alterum est testamentum nuncupatiuum, quod minorem solemnitatem requirit; ac solum, vt septem



testes (quales supra descripsimus) simul vocati sint, qui audiant & intelligant testatoris voluntatem, coram eis, scripto, vel voce articulata prolata, cit. l. hac consultiſſima, §. per nuncupationem, l. iubemus, iun. l. quoniam indignum, Cod. eod. Quamquam hodie nuncupatio talis coram testibus à Notario publico in scripturam redigi plerumque solet; non ad actus substantiam seruandam, sed ad meliorem eius comprobationem, & securitatem: quia fieri potest, vt testes interim decedant, vel inhabiles reddantur, quominus coram Iudice defuncti voluntatem declarare queant. quorum defectum publicum Tabellionis instrumentum abundè supplet; vt in iustificatione nulla apud Iudicem opus sit, sicuti docent DD. in l. 2. C. quemadmodum testamenta aperiantur. Couar. c. cum esses, n. 2. de testam.

Addendum his est, alios quoque præter eos, quos supra dixi, à testium numero tam in clauso, quam nuncupatio testamento repelli, de quibus sit mentio in §. testes, §. pater, & seq. Instit. eod. Videlicet furdus, mutus, vt & cæcus; item furiosus, prodigus, iure infamis, atque ad testamentum inhabilis; & qui in testatoris potestate est; pater quoque, & qui in patris potestate est, in filij tam testamento non rectè testis adhibetur; neq; hæres ipse, aut qui in potestate hæredis est; aut pater qui eundem hæredem in potestate habet; neque fratres in eiusdem patris potestate existentes: sed in testamento extranei, tales testes esse possunt. Legatarij quoque non prohibentur esse testes in eo testamento, in quo ipsis aliquid relictum est; sicuti & qui tutor liberis à patre nominatus est, l. Qui testamento, ff. Qui testamentum facere possunt: quia tales non censentur esse testes in causa propria, cum de testamenti factione principaliter testentur. Qua simili ratione decernitur in l. distantibus, C. de testam. quod distanti testamentum aliquid legari possit; quamuis Tabellioni, seu scribendi testamentum nihil relinqui possit, C. de his qui sibi in testam. ascribunt. Denique Religiosi testimonium à testamentis non repellitur, secundum communem DD. sent. apud Clarum lib. 3. sentent. §. testamentum, q. 55. n. 7. licet peccet, si absque Prælati licentia officium testis suscipiat.

In §. sed cum aliquis, Instit. eod. ita habetur: *Cum aliquis ex testibus, testamenti quidem faciendi tempore liber existimabatur, postea, autem seruus apparuit; Hadrianus, Senerus item, et Antoninus rescripserunt, subuenire se ex sua liberalitate testamento, vt sic habeatur firmum, ac si, vt oportebat, factum esset.* Quam constitutionem Doctores communiter, ob eandem æquitatis rationem, ad similes quoque testium defectus publicè ignoratos, producere solent: veluti si impubes, aut instabilis adhibitus erat, qui vulgò pubes, aut testabilis iure credebatur; nihil obstante, quod vnus, aut alter, & fortasse ipsemet testator defectum non ignorarint. Ratio est: Quia error communis impedimenti latentis ius confert, sicuti latius dixi lib. 1. tr. 4. c. 22. n. 9. Vide Mynſing. & alios commentatores super cit. §. Instit. & præced. §. testes, vbi Angelus regulam tradit, *Quod quicumque testis in iudicio esse prohibetur, neque ad testamentum admitti potest, sed non ita se res habet vice versa.*

**QUESTIO PRIMA.** Vtrum valeat testamentum, si Tabellione, vel alio quopiam coram testibus interrogante testatorem, num hanc personam, v. g. Caium auunculum suum, hæredem instituere velit, testator verbo expresso annuat? Affirmant Gl. & DD. communiter in l. iubemus, C. de testam. Abb. & alij in c. cum tibi, eod. tit. ibidem Couar. n. 5. Mol. cit. disp. 127. Quamquam eiusmodi testamenta sæpe infringi solent, allegando, testatorem tunc non satis compotem mentis fuisse, aut morte oppressum, vel ob aliquam importunitatem suggestioni contradicere non ausum. Vide Iul. Clarum q. 37.

**QUESTIO SECUNDA.** An valeat testamentum, si testator hæredis institutionem, & legata coram septem testibus non exprimat; sed solum mentionem faciat scripturæ, aut schedulæ, quam tali personæ v. g. Confessario suo tradiderat, in qua voluntatem suam contineri asseueret? Affirmant DD. communiter apud Clarum lib. 3. receptar. q. 4. & q. 36. Couar. cit. c. cum tibi, n. 6. Molina lo. cit. Dummodo postea satis constet, schedulam quæ exhibetur, esse eam ipsam, de qua testator locutus fuit.

**QUESTIO TERTIA.** Vtrum pactum de futura successione valeat? Responſio est negatiua. Quia ius hæreditatis futura pacto acquiri, vel auferri nequit, l. hæreditas, iun. Gl. ver. interpositum, C. de pactis, conuentis, c. quamuis, iun. Gl. ver. improbet, de pactis, in 6. & l. licet, C. de pactis, vbi dicitur: *Pactum inter priuatos scriptum, vt is qui supervixerit, alterius rebus potitur, ne donationis quidem mortis causa gesta speciem efficaciter ostendere.* Excipe primò, Quod in ead. l. licet, militibus privilegium concessum sit, vt si de hæreditate propria paciscantur, pactum hoc, quod suapte natura irreuocabile, ideòque irritum est, quia testandi facultatem auferens; benignè explicetur tanquam donatio facta mortis causa, ita vt ante mortem reuocari semper possit.

Excipe secundò, Quod pactum successionis in hæreditate propria, fauore piæ causæ subsistit, tamen per modum ultimæ voluntatis, seu donationis mortis causa factæ, sicuti de milite dictum fuit. quæ est communior sententia Doctorum, quos citat, & sequitur Sanchez lib. 7. moral. c. 2. n. 51. contra Baldum l. 1. C. de SS. Ecclesiis, & alios apud Tiraquel. privilegio 105. piæ causæ. Nam istas solemnitates, quæ supra ius gentium & naturale, ciuili iure introductæ sunt, vt videlicet hæreditas certa forma aut dispositione conferatur, in causis piis locum non habere, certum est. Volo dicere; si aliquis velit sua bona post mortem suam Ecclesiæ, vel pauperibus obuenire, quomodocunque disponat, vel paciscatur, validam esse dispositionem, ita tamen, vt ante mortem reuocare possit.

Tertiò excipiunt aliqui: Valere eiusmodi pactiōem etiam inter priuatos quoslibet, si instituta sit non in vniuersitate bonorum, sed certa hæreditatis parte: quia hoc casu testandi facultas non adimitur. Sed non videtur admittenda hæc exceptio: Nam propria ratio, cur hæreditas pacto dari non possit, ea est: quia ciuili iure certæ formulæ introductæ sunt, quibus dispositio bonorum in mortem disponentis relata, fieri possit, quæ sunt testamentum, codicillus, fideicommissum, legatū, causa mortis donatio: tale autem non est pactum, quippe suapte natura irreuocabile: nisi quod secundum militum, & causæ piæ privilegia, potius voluntas disponentis sequenda sit, vt valeat dispositio modo meliore, quo valere potest. quam doctrinam bene tradit Andr. Fachin. lib. 5. controu. cap. 84.

Quartò excipiunt aliqui apud eundem Fachinum cap. 86. valere eiusmodi pactum inter priuatos, si fiat de futura hæreditatis successione reciproca. Quæ exceptio minimè admittenda est, cum apertè repugnet lex cit. licet. Attamen validæ censi debent eiusmodi dispositiones, si fiant per modum donationis morte confirmandæ. idque inter coniuges receptum esse in Germania, testatur Mynſinger cent. 2. obseru. 33. eodèmq; modo intelligendi sunt Andr. Gaill. lib. 2. obseruat. 126. Nicolaus Euerardus tom. 2. consil. 21.

Illud quoque fateri oportet, & colligitur ex l. captatorias, ff. de hæred. instituend. nihil obſtare, quominus duo mutua affectione se hæredes instituatur. Quod inter coniuges frequenter vsurpatum est, vt etiam in eadem membrana se mutuo hæredes scribant. Quo tamen casu duo censentur esse testamenta; vt proinde vtriusq; nomine subscriptionis, & sigilla apponi debeant, atque



verique integrum sit suam voluntatem, seu testamentum postea mutare, sicuti docet Mynsing. cent. 1. obser. 8. Gaill. lib. 2. obser. 117. Mol. disp. 152.

## CAP. II.

## De Testamentis Priuilegiatis.

## SVMMARIVM.

- 1 Legata ad piam causam censentur, quæ præcipue, ac directè facta sunt ob Dei, aut Sanctorum honorem, vel animæ spirituales salutem.
- 2 In testamentis & legatis ad causas pias nulla civilis solemnitas requiritur.
- 3 Seu nutu, seu quocunque signo ad piam causam quippiam relinquatur, valida est dispositio.
- 4 Vnus testis sufficiens non est ad probationem, cum alterius præiudicio.
- 5 Nulla testium probatione opus est, quando de veritate constat.
- 6 Testamentum inchoatum, sed non perfectum, valet dumtaxat quoad legata pia.
- 7 Testamentum alterius arbitrio commissum valet pie cause fauore.
- 8 Captatoria institutio irrita est.
- 9 Legata ad causam piam ab hereditatis aditione non dependent, sicuti legata profana.
- 10 Testamentum ad pias causas valet etiam quoad legata profana accessorie inserta.
- 11 Testamentum non solemne inter liberos valet.
- 12 Licet extrinseca testamenti imperfectio, ob legalium solemnitatum defectum, non vitiet testamentum inter liberos, secus tamen dicendum de imperfectioe intrinseca, videl. si testator voluntatem non plenè declarauit.  
Testamentum nutu conditum inter liberos non valet; licet valeat, si ita ad pias causas conditum fuerit.
- 13 In testamento scripto inter liberos condito maior solemnitas requiritur, quam in nuncupatio.
- 14 Testamentum, quod miles in bellica expeditione sine iuris solemnitate condidit, firmum est, etiam post missionem, si ille intra annum moriatur.
- 15 Testamentum coram Principe, oblato libello, conditum; vel coram Iudice publico insinuatum, aliam testium, &c. solemnitatem non requirit.
- 16 Hominihus rusticis sufficiunt quinque testes, si plures in loco ubi testamentum condere volunt, haberi nequeunt.
- 17 Equum est, ut si in loco, v.g. pestis tempore, plures testes aduocari non possint, duorum presentia ad valorem testamenti sufficiat: licet spectato iuri rigore aliud dicendum sit.
- 18 In terris summo Pontifici subiectis valet testamentum coram Parocho, & duobus, vel tribus aliis testibus conditum.

**T**estamenta priuilegiata voco, in quibus vel nulla omnino iuris civilis solemnitas requiritur; vel non tam plena & perfecta, sicuti in aliis. Ex horum numero primum locum obtinent testamenta, itemque legata ad causas pias; id est, quæ præcipue ac directè facta sunt ob Dei, aut Sanctorum honorem, vel animæ spirituales salutem; puta quæ Ecclesiis, aliis pie locis, vel in captiuorum redemptionem, in pauperum, vel Religiosorum, quamuis consanguineorum, sustentationem, in satisfactionem pro peccatis, in mortuorum suffragia, &c. relictæ sunt, quæ de re Abb. in rubr. de testam. n. 9. & c. relatum 1. n. 7. Bart. in l. si quis Titio, ff. de legat. 2. Nau. in Apol. de redit. Eccl. q. 1. mon. 26. Syl. ver. legat. 4. q. 1. & 2. Mol. disp. 134. Paulus Comitulus respons. moral. lib. 7. q. 4. n. 3. & fusè Tiraquell. in præfatione tract. de priuilegiis piæ causæ. Porro si Episcopo, vel alij Ecclesiastico Prælato aliquid relictum fuerit, in dubio censeretur intuitu Ecclesiæ legatum: nisi propinquus sit, qui reliquit, ut præsumptio sit, intuitu personæ relictum fuisse. Ita habetur in c. reliquisti, de testam.

**E**st autem hoc proprium insigne testamenti ad pias causas, quòd in eo nulla omnino civilis legis, aut consuetudinis solemnitas requiritur; sed solum naturalis, diuino, ac gentium omnium iure subsistat, sicuti docent Bart. alique DD. in l. 1. c. de sacro sanct. Ecclesiis, Abbas, & alij incit. c. relatum, 1. de testam. Clarus q. 6. Ti-

raq. de priuileg. piæ causæ, priuileg. 3. & 164. Nicol. Eucr. t. 1. consil. 27. & 28. & alij omnes. Ratio est: Quia iura secularia causis Ecclesiasticis, siue ad supernaturalem hominis finem, spiritualesque salutem directè spectantibus, nullum præiudicium afferre possunt, nisi à Sum. Pontifice approbata & recepta sint, iuxta c. Ecclesia, de Constit. Atqui solemnitates testamentorum civilium iure introductas circa pias & Ecclesiasticas causas, receptas non esse, constat ex cit. c. relatum 1. de testam. & fatentur DD. communiter.

**Corollarium I.** Et si civilium iure hæredis declaratio nutu facta, irrita sit, l. iubemus, C. de testamentis; non item legatum, sicuti constat ex l. nutu, ff. de legat. 3. & ex communi docet Cou. c. cum tibi, de testam. n. 4. & 5. Tamen quod attinet ad causas pias, tam in testamento, quam in legato sufficit quocunque signo externo voluntatem defuncti declaratam esse: quia iure naturali ac gentium plus non requiritur. Imò etiam qui natura mutus pariter ac surdus est, voluntatem suam vltimam ad causas pias, quomodocunque potest, manifestare non prohibetur, sicuti docet Abb. in rubr. de testam. n. 9. Clarus §. testamentum, seu lib. 3. receptarum sententiarum, q. 6. n. 7. & significat. Gl. in cit. c. cum tibi.

**Corollarium II.** Validum est testamentum, & quæcunque vltima voluntas ad causas pias manu testatoris scripta, etsi nullus testis adhibitus fuerit; modò sufficienter constet, esse testatoris scripturam, sicuti docet Tiraq. priuileg. 4. Quia, ut rectè idem ait priuileg. 2. & Couar. c. relatum, 1. de testam. n. 12. Mol. disp. 134. Less. lib. 2. c. 19. dub. 2. Interuentus testium non requiritur ad substantiam, siue solemnitatem talis testamenti: licet sæpe duo, vel tres testes requirantur ad probationem, si aliud probationis genus haberi non possit. qui ipse casus est cit. c. relatum, in quo Alex. III. Pontifex ludicibus mandat, quatenus si causata sit (super relictis Ecclesiæ) ad eorum examen deducta sit, eam non secundum leges, sed secundum decretorum statuta tradent, tribus, aut duobus legitimis testibus requisitis: quoniam scriptum est Deut. 17. In ore duorum, vel trium testium stet omne verbum. Et in c. licet vniuersis, de testibus dicitur: Licet quedam sint causæ, quæ plures, quam duos exigant testes, nulla tamen est causa, quæ vnius testimonio, quamuis legitimo, terminetur. Similia habentur in c. veniens, 10. c. cum à nobis, eod. tit. Valde enim expediebat bono communi, ad impediendas hominum callidorum fraudes, certam regulam statuere, quæ proinde omnium gentium consensu recepta est; ut neque in iudiciali, neque in conscientie foro quisquam cum suo, vel alterius præiudicio, stare teneatur solo dicto, siue asseueratione vnius, quantumvis probatissimi, & omni exceptione maioris testis; sed minimum duorum contestatione opus sit: qui alioquin plurimæ fraudes & iniuriæ contingerent. Quare dici solet; Vnus testis, nullus testis, ut videre licet apud Nau. lib. 5. consil. 3. n. 2. de accusat.

Cæterum si hæredi certò constet, voluntatem testatoris fuisse, ut aliquid in piam causam expendatur; esto in foro externo nequaquam id probari possit, tamen in conscientie foro satisfacere obligatus est. Non enim tunc probatione opus, quando de veritate constat; estque hæc magna aliquorum, etiam Aduocatorum, deceptio; qui existimant, debitorē obligatione soluendi liberum esse, quia de eo debitum demonstrari non possit.

Exinde resoluitur casus, Parochus quidam, post mortem parochiani sui, producit schedam, continentem legata quædam ad pias causas, quam hominem illum, antequam decederet, scripsisse, vel dictasse asseuerat, debetne pro vltima legitima voluntate haberi? Respondeo, & dico I. Si manus testatoris agnoscitur, vel duobus testibus probari potest, pia eius voluntas executioni mandanda est.

Dico II. Si ipsemet Parochus legata annotauit, non creditur illi sine alio teste: quare monedi sunt Parochi,



aliique Confessarij, vt vltimas eiusmodi dispositiones ad causas pias non excipiant, nisi aduocatis duobus testibus, masculis, aut foeminis. Quamquam etiam vnus cum Parocho sufficere poterit; licet legatum sit pro Ecclesia sua, quādoquidem Rector, aliūque beneficiatus, aut Religiosus non prohibetur esse testis in causa Ecclesiae suae.

Dico III. Si testator in testamento, vel coram testibus voluntatem suam declarauit, quod velit quādam ad pias causas erogari, sicuti v. g. Confessario suo mandauerat: hoc casu Confessarius audiri debet, & secundū eius relationē executio fieri; modō talia indicia afferat, vt, spectatis circumstantiis, verisimile esse possit, defunctū ea ipsi mandasse, sicuti docent Couar. c. cum tibi, n. 23. de testam. Nau. lib. 3. consil. 16. de testam. edit. 2.

- 6 Corollarium III. Si moriturus cepit facere testamentum, vel codicillū, & morte praeventus non absoluit; licet secundū alia irritū sit, l. si is qui, ff. Qui testamenta facere possunt; valet tamē quoad relicta pia, quae in sua illa imperfecta dispositione iam exprefferat. Tamen si enim voluntatē suā mutare potuerit testator, cum tamē re ipsa nullā mutationem significārit, naturali pariter, ac canonico iure firma manere debet; sicuti docet Bartol. l. in testamēto, ff. de fideicomis. Abb. in c. 1. & penult. de success. ab intestato, Tiraquel. priuil. 7. Couar. c. relatū, 1. n. 14. Vasq. tr. de testam. c. 2. n. 27. Mol. cit. disp. 134. contra Clarumq. 7. n. 4. Fachin. lib. 4. controu. cap. 3.

- 7 Corollar. IV. Validū est testamentum ad pias causas, etsi alterius arbitrio cōmittatur; itēq; legatum ad pias causas, etsi in liberam alterius voluntatē conferatur: v. g. *Instituō heredes bonorū meorū pauperes, quos Titius elegerit. Vel, lego centū aureos alicui puella in dotem, si Titius, aut si haeres meus voluerit*, quae est communis DD. sententia in c. cum tibi, de testam. Iul. Clar. q. 6. n. 5. Tiraq. priuil. 64. Less. l. 2. c. 19. dub. 2. in fine, Mol. disp. 134. in fine, & disp. 157. §. legatum.

Adde secundū quosdā, si testator ita dixerit: *Committō omnia bona mea arbitrio vel dispositioni Titij*, tunc Titij heredem nudum, ac solo nomine censerit; atq; obligatū esse totā hereditatē in causas pias distribuere, quae videtur esse decisio cit. c. cum tibi, interprete Innoc. & Abb. cit. n. 4. & consentit Clarus l. c. Cou. n. 13. Ait enim Innoc. III. *Qui extremā voluntatē in alterius dispositionem committit, non videtur decedere intestatus*, quia, vt in rubrica dicitur, talis videtur testatus ad pias causas.

- 8 Hęc autem omnia aliter se habent in dispositione ad causas profanas: irrita enim est institutio heredis, collata in arbitrium, vel liberā voluntatē tertij, l. illa institutio, l. si quis Sempronij, ff. de hered. instituendis: quēadmodū etiā legatū in alterius arbitrio positū, irritū est, l. captatoriae, ff. de legatis, 1. videri potest Mol. to. 1. tr. 2. disp. 137. Cou. cit. c. cum tibi, n. 13. & 17. vbi contendit; Captatoriā voluntatē non appellari eam omnē, quae in alterius arbitrio ponitur: talis enim dispositio non omnimodē reprobata est; cum valeat saltē in nullis testamento, secundū Gl. marginalē in l. captatorias, C. de testam. militis; itē in libertatis cōstitutione, l. fidei cōmissaria, 46. ff. de fideicom. libertatibus: Sed eas captatorias voluntates censendas esse, quae sunt cū conditione aptata ad alterius animū captandū: v. g. *Instituē heredē Sempronij, si & ipse me, vel fratrem meum instituerit*. Item: *Qua ex parte Titius me heredem instituerit; ex ea parte mihi heres esto*: Nam talis institutio neq; valet vi testamenti, alteriūque vltimē voluntatis, etiā si miles ita disposuisset, l. captatorias, C. de testam. militis. Quia bonis moribus aduersatur eiusmodi conditio aptata ad aduersionem appositā, posteaquam ab altero institutus est, voluntatem suam mutare poterit: cum vltima voluntas (vti dici solet) ambulatoria sit vsque ad vltimum vitae spiritum, & antē firma non censeatur.

- 9 Corollarium V. Legata ad pias causas praestanda sunt,

etiam si hereditas adita non fuerit: quia heres antē mortuus est, vel hereditatem repudiavit. Ita ex cōmuni sententia docet Abb. c. relatū, 1. de testam. n. 6. Couar. in c. Reynaldus, §. 3. n. 23. & seqq. Tiraq. priuil. 33. contra Andr. Fachin. lib. 6. controu. c. 82. Quod enim legata peti non possint, hereditate non adita, est solemnitas ciuili iure introducta, l. eam, quam, C. de fideicommiss. quae ad causas pias se non extendit.

His porro addendū est ex communiore DD. sententia<sup>10</sup> apud Couar. c. relatū, 1. n. 2. Mol. disp. 134. Tiraquel. priuil. 80. Testamentum, alioquin minūs solemne, quod ob piam causam conditū est, valere non tantū quoad relicta pias, sed etiam legata non pia, secundariō inserta. Ratio est: Quia subsistente principali, conuenit etiam subsistere accessorium. Et cum alioquin legata, si irrita forent, causae piae tanquam heredi institutae accrescerēt; aequitas non permittit, vt idem testamentum, cuius iure ac valore se causa pia defendit, in eiusdem fauorem oppugnetur, & infirmetur, contra illud Pretoris edictū, *Quod quisq; iuris in alium statuerit, vt ipse eodem iure utatur*. Contrā verō, etsi testamentum, vel quouis alia voluntas minūs solemnis, quoad alia infirma sit, tamen firma est, quod attinet ad relicta piis causis, iuxta c. relatū, 1. de testam. Quia, vt saepe dictum, infirmitas vltimae voluntatis, ob defectum ciuiliū solemnitatū, ad causas pias non pertinet.

Alterum locum inter testamenta privilegiata tener,<sup>11</sup> quod à patre, matre, alioque vtriusque sexus ascendente inter liberos conditum est: ratum enim censerit debet, licet imperfectum, & iuris solemnitate destitutum sit, sicuti statuit Constantinus Imper. in l. vlt. Cod. famil. herciscundae: *Seu epistola parentis esse memoretur, siue quocūq; alio modo scriptura quibuscūq; verbis & indicis inueniantur relicta*. Et infra: *Defuncti (parentis) dispositio custodiatur, etiam si solemnitate legum fuerit destituta*, Et postea Theodosius Imp. in l. hac consultiissima, C. de testam. *Ex imperfecto autem testamento voluntatem tenere defuncti, nisi inter solos liberos à parentibus vtriusque sexus habeatur, non volumus*.

Sed obseruandū est primò; Duplicem esse testamenti<sup>12</sup> imperfectionē: Vna est quasi extrinseca, consistens in defectu solemnitatū legalium: puta si septem testes, iūq; rogati ac masculi simul collecti desiderentur: & talis imperfectio nihil officit testamento inter liberos, sicuti ex communi docet Iulius Clarusq. 8. Mol. disp. 128. Andr. Fachin. to. 2. lib. 4. controu. cap. 1. & 2. Nicol. Euerard. volum. 1. consil. 27. Andr. Gaill. lib. 2. obser. 112. & 116. Qui addunt primò; Id locum habere, tametsi pater liberos suos, inaequalibus portionibus instituerit, hereditatemue diuiserit: nam talis inaequalis diuisio habet vim praetigatorum, sicuti colligitur ex l. si cognatione, iun. Gl. ver. voluntatem, C. Famil. herciscundae. Accedit, quod alioquin priuilegium illud vix illum effectum haberet, si ex testamēto imperfecto liberi non aliter succedere possent, quā ab intestato: licet contrarium doceat Couar. in c. Raynutius, §. 1. n. 3. Addunt secūdò; locum etiam habere erga liberos, Principis scripto, multoq; magis subsequente matrimonio legitimatos, teste Claroq. 12. Fachin. c. 3. Imò etiam erga naturales, si Mater, non illustis persona, testetur: quia cōparatione matris, filij naturales quasi legitimi habentur, §. nouissimè, Instit. ad S. C. Orphit. vbi Gl. ver. hereditatem, Andr. Gaill. cit. disp. 112. n. 20. Ratio autem, cur legalis solemnitas in testamento inter liberos non requiratur, afferri solet: partim quia liberorum, quibus naturali iure hereditas debetur, per se magnus fauor est: partim quia, ob mutuam charitatem, cessare inter eos debet omnis suspicio fraudis: ad quam cauendam iuris solemnitates ad testamenta alioquin requiruntur.

Alia verò est imperfectio testamenti magis intrinseca, consistens in eo, quod voluntas testatoris non



fuerit plenè ac perfectè declarata, vt quia cœpit testamentum scribere, vel voce nuncupare hæc edem: sed ad finem non perduxit. Et tale testamentum inter liberos non subsistere, quia non tam factum, quàm cœptum censerì debeat, docent DD. communiter, Iul. Clar. q. 9. Mol. cit. disp. 120. §. illud est obseruandum. Fachin. cap. 4. Eademque ratio est, si testator vnum ex liberis in testamento præterijt; vel si solo nutu voluntatem suam inter liberos testandi, vel bona sua diuidendi significauit, vt ex communi docet Mol. ibid. Clarus q. 8. vbi ait: *Et sic vides, non valere absolue argumentum à testamento ad pias causas, ad testamentum inter liberos. Nam testamentum ad pias causas nutu conditum ualeat: secus autem in testamento condito inter liberos.*

13. Secundò obseruandum: Ne fraus aliqua circa testamentum minùs solemne inter liberos scriptum contingere possit: statuisse Iustinianum Imp. in Authent. de testam. imperfectis, vt tale testamentum validum non esset, nisi & tempus conditi testamenti, & nomina filiorum, & portiones, in quibus instituti essent, manu ipsius parentis in testamento scripto exprimerentur: vel, si aliud testamentum scripserat, subscriptio parentis, aut ipsorum filiorum accessisset. Cum autem in dicta Authentica Iustiniani nulla testium mentio fiat: ideo standum est iure antiquo, vt in testamento inter liberos scripto nulla testium solemnitas requiratur: dummodo testatoris manus cognoscatur: & alia, quæ in dicta Authent. requiruntur, obseruata sint. Vide Clarum cit. §. testamentum, q. 14. Andr. Gaill. lib. 2. obseruat. 112. n. 7. vbi ait: *Quòd schedula reperta in cistula patris, continens diuisionem bonorum inter filios, si dem faciat, & seruanda sit, si manu patris scripta, vel subscripta fuerat.*

Loquimur de testamento scripto: nam circa nuncupatium nihil Iustinianus innouauit: quare validum censerì debet, si coram duobus testibus masculis, vel fœminis, &c. factum fuisse constet, sicuti docet Gl. in dicta Authent. ver. derelinquant, Clarus q. 14. Mol. cit. disp. 128. aliique communiter.

Tertiò obseruandum: Testamentum tali modo scriptum manu testatoris, vel ipsorum liberorum, valere etiam quoad legata, fideicommissa, libertates, &c. extraneis relicta, sicuti expressè habetur in Authent. Quod sine, C. de testam. In nuncupatio uero testamento standum est suprà cit. constitutione Constantini, vt *si in eiusmodi imperfecta voluntate, liberis alia sit extranea mixta persona, quantum ad illam duntaxat, pro nullo habeatur, ac liberis accrescat.* Quod tamen de testamento ad pias causas condito nullo iure statutum reperimus, vt suprà notauimus.

Porro de testamento descendentiū erga ascendentes, nullum priuilegium in iure reperitur: quare neque afferendum, sicuti notat Clarus ver. testam. q. 12. nu. 6. Mol. cit. disp. 128. Gaill. cit. obser. 112. n. 26.

14. Tertium locum tenet testamentum à milite conditum, dum in bellica expeditione versatur. Neque enim is legitimū testium numerum adhibere: neque aliam solemnitate obseruare debet: sed quocunque modo voluntatem ultimam declararit; voce, aut scripto: ea rata existit, tametsi aliquid tantum in vagina, aut clypeo literis sanguine suo rutilantibus annotauerit, aut in puluere inscripserit gladio, sub ipso tempore, quo in praelio uitæ sortem derelinquit: modò id per duos testes, etiam non rogatos, probari possit, sicuti habetur in l. milites, iunct. Gl. ver. sub ipso tempore, C. de testam. militari, & colligitur ex l. Lucius, ff. eod. si tamen extra dictam necessitatem, miles in castris testetur, requiritur conuocatio, & rogatio duorum testium, vt testatoris voluntatem audiant, teste Glof. cit. Claro q. 58. Mol. lin. disp. 129. Andr. Gaill. lib. 2. obser. 118. ex l. Diuus, ff. eod. Porro, quod in expeditione, vel castris non communi iure testamentum miles fecerit, post missionem intra annum tantum valebit, §. sed hæc tamen, Instit. de mi-

litari testamento. Et videntur hæc etiam hodie obseruanda esse, si bellum contra Imperij hostes sit.

Adde ex l. vn. ff. de bonorum possessione ex testamento militis: omnes omnino, licet milites non sint, si tamen in hostili loco deprehendantur, & illic decedant, eodem militari priuilegio gaudere, vt quomodo velint, aut possint, tam in mari, quàm terra, testari ipsis concessum sit. Idque docet Gl. & Bartol. in l. scriuarios, C. eod. Clarus q. 15. n. 5. Mol. disp. 129.

Quartum locum tenet testamentum coram supremo Principe factum, oblato ei libello, in quo vltima voluntas descripta sit: hæc enim rata haberi debet, absque vlla etiam solemnitate testium, &c. tametsi Princeps nihil rescripserit: dummodo non constet, testatorem suam voluntatem postea mutasse. Ita habetur l. omnium, C. de testam. iunct. Gl. & videri potest Clarus q. 56. num. 7. Sin verò libellus Principi oblatus non fuerit, sed voce hæres nuncupatus: vel oblatus libellus non amplius reperiatur: tunc duobus saltem testibus opus est ad probandum, defuncti voluntatem Principi, oblati precibus, voce, vel scripto insinuatam fuisse, iuxta cit. l. omnium, in fine, atque ex communi docet Clarus 56. Mascardus conclus. 1352. num. 47. His addit Ioach. Mynsing. cent. 6. obser. 29. Fachin. lib. 6. controuerf. cap. 86. Quocunque modo constet, testamentum, aliamve voluntatem ultimam coram Iudice insinuatam fuisse, nullam testium solemnitate requiri: quia acta iudicij habent vim testium, seu suppleunt testium solemnitate. Idque apertè significatur in cit. l. omnium.

Quintò, hominibus rusticis concessum est in l. vlt. C. de testam. vt si ruri testentur, siue in locis vbi plures testes, quàm quinque haberi non possunt, sufficiat iste numerus tam in testamento scripto, quàm nuncupatio. Denique si in tali loco literati non reperiuntur, subscriptione testium opus non est: secus, si inueniri possint. Quin imò si vnus tantum, vel duo fuerint literati, debent hi pro aliis ignorantibus, præsentibus tamen, & testatoris voluntatem agnoscentibus, subscribere.

Hinc quæstio orta est inter DD. Vtrum similiter testamentum validum sit pestis tempore conditum, cum minore testium numero, si septem adhiberi non possint? Tres sunt de hac re sententiæ: Prima est aliquorum, quos citat Iul. Clarus q. 56. num. 3. Mascardus tom. 3. de probat. conclus. 1352. num. 22. In tali casu satis esse, si duo testes interueniant fidei faciendæ causâ: quam sententiam defendit Paulus Comitulus lib. 7. respons. moral. q. 1. conclus. 2. Eò quòd lex non obliget illos, qui eam seruare non possunt. Verùm hæc ratio locum habere non videtur in eiusmodi legibus infirmantibus, quippe quarum vis, quod attinet ad effectum infirmationis, erga eos quoque se extendit, qui iniuincibili ignorantia, aut alio iusto impedimento detinentur. Neque enim negari potest, quin Principi potestas competat, contractibus, & testamentis, communi lege lata, substantialem formam, & modum præscribendi: ob publicum bonum, posthabito particulari quorundam incommodo: Atqui voluisse Imperatorem, vt testium numerus, &c. ad cuiuscunque testamenti substantiam pertineat, constat tum ex aliis iuribus, tum ex l. casus, C. de testam. & cit. l. vlt. vbi dicitur: Si inter homines rusticos, quinque testes non interueniant, licet tot eo loco haberi non possint, nihilominus irritum esse testamentum.

Altera est sententia Baldi, & aliorum in cit. l. vlt. quam sequitur Sa ver. testamentum, n. 12. & probabilem censet Clarus cit. q. 56. Sufficere testes quinque, si plures haberi non possint, v. g. pestis tempore. Quæ tamen sententia facillè refellitur: vel enim nititur iuris priuilegio, & tale nullum extat: imò contrarium indicatur in cit. l. 8. *Casus maioris ac noni contingentis ratione aduersus timorem cõtra-*



gionis, quæ testes deterret, licet aliquid de iure laxatum est, non tamen prorsus reliqua testamentorum solemnitas perempta: Testes enim huiusmodi morbo oppressos eo tempore iungi ac sociari remissum est, non etiam conveniendi numeri eorum observatio sublata. Vel nititur necessitatis ratione, cui lex posita non sit; & tunc neque quinque testes requiruntur: sed incidimus in priorem sententiam, quæ tamén à plerisque reiicitur, teste Claro & Molin. ll. cc.

Tertia, & communior opinio est aliorum DD. quos citat Clarus & Mascardus, & sequitur Mol. disp. 127. §. de iure communi, Andr. Fachin. t. 2. controu. lib. 5. c. 92. septem testes etiam pestis tempore, ad testamenti substantiam requiri; licet necesse non sit, eos simul congregari, ad testamenti publicationem, vel subscriptionem; sed sufficiat singulos separatim rogari, & adhiberi. Quæ postrema sententia, inspecto iuris rigore, vera esse videtur: tamen æquitatis ratio postulat, ut eo tempore, vel loco, quo testes, vel notarius nullo modo haberi possint, ultimæ voluntates absque iuris solemnitatibus factæ, validæ nihilominus pronuntientur, si de defuncti declarata voluntate liquidò constet: quod significavit Bartolus in l. vn. ff. de bonorum possess. ex testam. militis. Et ob eandem æquitatis rationem in Camera Imperiali receptum esse, ut testamentum coram duobus, vel tribus testibus, (inter quos Confessarius unus esse potest) peste valde grassante conditum valeat, testis est Ioach. Mynsing. cent. 1. observ. 96. Andr. Gaill. lib. 2. observ. 118. n. 18. Siquidem testamenti fautor magnus est, arg. l. si pars. ff. de inoffic. testamento. Videri etiam potest Ioan. Molanus tract. de testam. piis, c. 83.

Denique observandum, quæ hæcenus de solemnitate ad testamentum requisita, dicta sunt, solum habere locum secundum ius commune Cæsareum, seclis specialibus locorum consuetudinibus, statutis, & aliorum regnorum legibus. Nam Venetiis v. g. & Viennæ in Austria, duos testes ad testamentum sufficere, affirmant. Deinde, quod Alexander III. Hostiensis Episcopo rescripsit in c. cum esses, de testam. *Testamenta que Parochiani coram Presbytero suo, & tribus, vel duabus aliis idoneis personis sicerint, firma esse debere;* de terris tantummodo, quæ temporali Summi Pontificis dominio subiectæ sunt, communiter DD. interpretantur, sicuti videre est apud Couar, ibidem n. 12. Clarum q. 57. Mascardum l. c. n. 17. Mol. disp. 133. Vbi addunt, in eisdem terris quatuor testes, absque Parocho, sufficere; eò quòd duo testes suppleant vicem unius Parochi.

## CAP. III.

Quis de bonis suis testari possit, vel non possit; & an testandi aliqua obligatio incumbat?

## SUMMARIUM.

- 1 Omnibus hominibus libera est de bonis suis testandi facultas, nisi iure prohibeantur.
- 2 Positivo iure testari prohibentur, Surdus simul & mutus à natura; Prodigus, Servus; Usurarius manifestus; Filiusfam. de bonis adventitiis; Impubes; Captivus apud hostes: Ad mortem damnatus; Religionem professus.
- 3 Professio religiosa non rumpit testamentum antea factum, sed potius confirmat.
- 4 Religiosus, cui peculium concessum fuit, cum Prælati consensu, causa mortis donare potest.
- 5 Summus Pontifex Religioso licentiam dare potest testandi ad causas pias, non ad profanas.
- 6 Novitii Religionum nullo iure testari prohibentur, Religiosi Societatis IESU, qui simplicia, non formata, vota habent, de bonis suis mortis causa disponere possunt valide, sed non licite.

- 7 Si Novitius de bonis suis nihil disponens, professionem edat, succedit Monasterium: si tamen descendentes, vel ascendentes habeat, ipsi portio legitima statim conferenda debetur.
- 8 Pater Religionem professus divisionem bonorum inter liberos, commutato etiam Monasterio bonorum capaci, instituere potest: sed tutorem filiis dare nequit.
- 9 Filius habens ascendentes, inter eos disponere potest ante professionem: & pater habens descendentes, inter eos disponere potest tum ante, tum post professionem: sed uterque tantum de bonis acquisitis ante editam professionem.
- 10 Nemo, per se loquendo, obligatur ad testamentum condendum, sed interdum per accidens.

**A**d prius quæsitum respondeo: Omnibus hominibus libera est de bonis suis ante mortem disponendi facultas, nisi vel naturali, vel positivo iure prohibeantur. Ratio affertur in l. i. C. de SS. Ecclesiis: *Nihil est, quod magis hominibus debeatur, quam ut suprema voluntatis (postquam iam aliud velle non possunt) liber sit stylus; et licitum, quod iterum non redit, arbitrium.*

Naturali iure testari verantur, qui rationis usu carent, ut infantes, furiosi, amentes. Ratum tamen est horum testamentum, quod eo tempore, quo furor eorum intermissus est, seu per lucida intervalla condiderunt; licet postea in furorem reciderint, §. furiosi, Instit. Quibus non est permittum testamentum, l. furiosum, C. Qui testamenta facere possunt.

Positivo iure testari prohibentur; I. Surdus simul & mutus à natura, l. discretis, C. eod. §. Item surdus, Instit. eod. Imò etiam qui casu, vel aduersa valetudine talis factus est, si literas nesciat; civili iure testari prohibetur, sine licentia Principis, cit. l. discretis, & §. Item prodigus, Instit. eod. Qui autem utroque oculo seu à natiuitate, seu quocunque casu privatus est, testari quidem potest, nuncupatiue; sed pluribus observatis solemnitatibus, quæ prescribuntur in l. hac consultissima, C. Qui testam. facere possunt.

II. Prodigus, cui bonorum administratio interdicta est: sed quod antè fecerat testamentum, quàm interdictio bonorum ei facta fuit, ratum manet, §. item prodigus, Instit. eod.

III. Servus siue mancipium, sicuti constat ex l. filius famil. ff. de testam. & cap. illud, 13. q. 2. vbi tamen Gloss. admonet, multorum locorum consuetudine receptum esse, ut servus peculium suum liberis relinquere possit.

IV. Usurarius manifestus, nisi prius satisfecerit, vel idoneam cautionem præstiterit, c. quamquam, §. ult. de usuris in 6. Vbi Gloss. ult. existimat, hanc prohibitionem ad omnem voluntatem ultimam extendendam esse: cui repugnat Couarruu. rubr. de testam. pag. 3. num. 13.

V. Filiusfamilias, licet, si pubes sit, de bonis castrensibus vel quasi castrensibus liberè testari possit, l. ult. Cod. Qui testamentum facere possunt: non tamen de adventitiis bonis; quamvis pater consentiat, l. qui in potestate, ff. de testam. Instit. Quibus non est permittum, in principio, & cap. licet, de Regul. in 6. Ratio est: Quia testamentum ex libero, non alieno consensu perfici debet. Sed excipitur primò; Quòd filiusfam. patre consentiente de bonis adventitiis ad pias causas testari potest, c. licet, de sepultur. in 6. Vide Abb. rubr. de testam. num. 10. Excipitur secundò; Quòd filiosfam. Clerico de adventitiis, perinde ac de castrensibus, liberè testari concessum est in Auth. Presbyteros, C. de Episc. & Clericis, & ex communi docet Abbas c. quia nos, de testam. nu. 5. & c. in præsentia, n. 56. de probat. Mol. disp. 138. Idemque de bonis Religionem ingredientium sentientium, teste Syl. ver. legatù, 2. q. 1. At verò donare mortis causa ex bonis adventitiis non prohibetur filiusfam. si patris consensus & auctoritas accedat, l. filiusfam. ff. de donat. Ex quo sequi videtur, quòd ipsimet patri donatio fieri non possit; cum nemo in propria causa auctoritatem præstare queat: quare opus est Iudicis auctori-



tate, sicuti notat Clarus l. 4. selet. §. donatio, q. 6. nu. 7. Porro si filiusfamilias cum patris consensu testamentum condens, apponat clausulam, ut valeat saltem per modum alterius vltimæ voluntatis, sicuti valere potest; obtinebit per modum donationis causa mortis; modò is, cui aliquid relinquitur, presens sit, ut expressè, vel tacite donatum acceptet, sicuti Clarus ib. notat. n. 9. Quia verba dispositionis latè interpretanda sunt, ita ut actus valeat, præsertim in vltima voluntate, quippe cuius magnus fauor esse debet, l. si pars, ff. de inoff. testam. Videri potest Baldus, & alij DD. in l. senium, C. Qui testamenta facere possunt.

V I. Impubes, ob iudicii immaturitatem, quæ plerumque cum tenera ætate coniuncta est, l. si frater, C. Qui testam. facere possunt, §. præterea, Instit. eod. & colligitur ex cit. c. licet.

V II. Qui ut captiuus, vel obses apud hostes detinetur, interim testari non potest, l. eius qui, & l. obsides, ff. eod. Sed quod antè fecerat testamentum, iure postliminii conualescit, si ad suos redierit: quin, tamen si in statu captiuitatis à vita discedat, validum erit testamentum antè confectum, ex Cornelia lege; vbi habetur §. vlt. Instit. Quibus non est permissum facere testam. cit. l. obsides, & l. lege Cornelia, ff. de testam. & qui testamenta facere possunt.

V III. Damnatus ad mortem naturalem, aut civilem testari non potest, uti docent DD. in l. qui vltimo supplicio, ff. de pœnis, Abb. in rubr. de testam. n. 4. nisi consuetudine aliter obseruetur. de qua testatur Clarus q. 21. propterea quò publicatio bonorum, de qua tit. ff. de bonis damnatorum, ferme sublata sit. Verùm spectato communi iure, non solum testamentum, sed quæuis etiam alia voluntas, quamuis ante crimen commissum condita sit, per sententiam condemnatoriam infirmatur, l. eius, §. 1. ff. de testam. & l. si aliquis, ff. de donation. mortis causa. Nisi quòd donatio facta coniugante crimine commissum, etiam subsecuta sententia condemnatoria subsistat, l. res, C. de donat. inter virum & vxorem: præterquam si commissum sit læsæ maiestatis crimen, ob quod memoria Rei damnanda est, l. cum hic status, §. cum maritus, 2. ff. de donat. inter virum & vxorem. His adde, quòd neque donatio inter viuos facta post condemnationem de crimine capitali constitat per Cæsareo iure, l. post contractum, ff. de donation. Sin autem ante condemnationem donatio facta fuerit, quamuis post crimen commissum, vim suam obtinet; nisi crimen sit, ob quod bona ipso iure fisco commissæ sunt, uti docent DD. in cit. l. post contractum. Vide Gl. in cit. l. res.

I X. Religionem professus testari non potest: tum quia sui iuris non est; neque velle aut nolle habet, c. non dicatis, 12. q. 1. tum quia rerum dominium non habet, neque habere potest, Authent. Ingressi, C. de sacrosanct. Ecclesiis. Si tamen aliquis ante Religionis ingressum, vel Nouitiatu tempore testamentum condidit, per subsequentem professionem, tanquam mortem spirituales, non rumpitur; sed confirmatur, adeò ut reuocari deinde non possit. Qua de re Nau. comment. 2. de Regul. nu. 44. §. 1. 53. Abb. c. in præsentia, num. 52. de probat. Clarus §. testam. q. 28. Less. lib. 2. c. 41. dub. 10. Fachin. tom. 2. lib. 6. c. 15. Sanch. 7. moral. c. 11. Monasterium tamen interim bonis eius fruetur, donec moriatur; dummodò capax sit dominij bonorum in communi: Sin verò incapax, ut Religio Minorum, tunc bona statim deuoluuntur ad heredem institutum, adeoque tali casu mors civilis & naturalis æquiparantur, sicuti docet Abb. l. c. n. 30. Sanch. de matrim. l. 6. disp. 17. n. 9. Mol. cit. disp. 140.

Sed dubitatur primò, Vtrum Religiosus, licet testamentum, vel codicillum facere prohibeatur, tamen mortis causa donare possit, cum Prælatus regularis licen-

tia? Respondeo, & dico I. Certum esse debet, si Religiosus, cui peculium, vel quædam vtensilia concessa erant, de iis faciat dispositionem non obligatoriam, sed deprecatoriam, ut huic Ecclesiæ, vel huic personæ relinquantur; quòd Prælatus auctoritate approbati & confirmari possit. Ita Nau. comment. 2. de Regular. num. 22. Rodriq. to. 3. Regul. q. 69. a. 2. & 3. Ratio est; Quia si res modica sit, ut Prælatus licentiam dare possit donandi inter viuos, cur non etiam causa mortis?

\* Dico II. Valde probabile est, quòd Religiosus de eiusmodi peculio, cum Prælatus licentia, etiam mortis causa donando disponere possit. Ita docet Sanchez lib. 7. moral. c. 8. n. 11. contra Nau. comment. 2. de regular. n. 43. & in man. c. 27. n. 270. Grassi p. 1. decis. c. 5. n. 58. Rodriq. tom. 2. regul. quæst. 47. a. 2. Nam argumentum, quo Doctores isti nituntur: *Religiosus, cum Prælatus licentia, testari non potest: Ergo nec mortis causa donare:* firmum non est, si prohibitio non ex iure naturali, sed positio proueniat. Exempli causa: Filiusfamilias, qui ne patre quidem consentiente testamentum facere potest, tamen mortis causa donare, cum patris consensu, permittitur, l. tam is, ff. de mortis causa donationibus. Siquidem testamentum plus iuris ac legitimæ facultatis postulat; donatio verò mortis causa ad naturam dispositionis inter viuos plurimum accedit, uti dixi super. tract. c. 12. n. 4. Neque apparet ratio, cur Religioso Prælatus licentiam dare possit aliquid absolutè donandi; & non etiam in tempus mortis, ita ut ea eueniente donatio effectum habere incipiat.

Arbitror tamen, quòd Prælatus, licet donandi seu disponendi in tempus mortis licentiam dederit, datam tamen ante mortem Religiosi reuocare possit. Neque enim ea reuocatione infert iniuriam donatario; cum illi nullum adhuc ius acquisitum sit; sed vltimæ voluntatis dispositio vsque ad vltimum vitæ spiritum reuocabilis existat. Neque ipsi Religioso iniuria fit, cum Prælatus dando licentiam aliquid agendi, non censetur addicare ius hoc ipsum ei prohibendi, seu aliter decernendi: quandoquidem Religiosus per obedientiæ votum, voluntatem suam omnimodè Superiori subdidit, uti etiam dicam tractatu seq. cap. 7. quæst. 1.

Dubitatur secundò, Vtrum saltem Summus Pontifex possit, & soleat Religiosis testandi de bonis suis licentiam dare? Ad I. respondeo. Haud dubiè talem licentiam concedi posse, ex communi Doctorum sententia apud Sanchez lib. 7. moralium, cap. 8. nu. 45. Sicuti enim Summus Pontifex Religioso licentiam dare potest de quibusdam bonis inter viuos disponendi, aut donandi: ita etiam causa mortis. Verùm talis concessa licentia intelligi debet primò, de bonis quæ Religiosus de facto possidet, seu quorum administratio nem habet, non verò de bonis, quæ Monasterio, vel alteri personæ iam erant acquisita per ipsius professionem, uti notauit idem Sanchez num. 55. Quia priuilegium Principis intelligi debet sine præiudicio tertij. Secundò, Ut liceat testari ad pias tantum causas: quin imò cum bona, de quibus Religiosus testaturus est, ad Ecclesiam alioquin spectent, non potest Summus Pontifex aliter disponendi licentiam dare, nisi ad causam piam, vel saltem quæ quomodocunque ad utilitatem Monasterij, aut Ecclesiæ spectet; ut v. g. relinquantur personæ, quamuis diuiti, tamen de Monasterio bene merita, vel ad captandam eius beneuolentiam, patrocinium.

Ad II. Respondeo. Hanc testandi facultatem seu iure, seu consuetudine concessam esse Religiosis Ordinum militarium: & frequenter à Summo Pontifice concedi solitam aliis Religiosis, si extra claustrum Ecclesiasticum beneficium, præsertim Episcopatum, vel Cardinalatū obtineant: vel si alia occasione extra clau-



strum vivant, & alantur bonis sua industria, aut labore comparatis, nihil à Monasterio recipientes, neque illi tribuentes. Regularibus verò intra claustrum viventibus testandi licentia raro à Summo Pontifice conceditur; nisi tales sint, quibus secundum consuetudinem loci, certa portio in alimenta & vestes tribuatur: ita ut residuum feruent: sin autem aliquid desit, aliunde sibi conquirant. Videri potest Molina to. 1. tract. 2. disp. 141. ver. Ibidem, Sanchez lib. 7. moral. c. 8. nu. 60. post Nauar. comment. 2. de Regul. nu. 58. vbi quadruplices Religiosos distinguit.

6 Porro Nouitiis Religionum de bonis suis testari, nulla etiam Superioris petita licentia, simpliciter concessum est, Authent. nunc autem, Cod. de Episcopis & Clericis, cap. si qua mulier, 19. quæst. 3. Quia sui adhuc iuris, & bonorum domini sunt, libera exeundi potestate præditi. Quod etiam in Nouitiis Ordinis Minorum, atque Societatis Iesv locum habere, ostendit Sanchez lib. 7. moralium, cap. 3. num. 5. Imò etiam post vota simplicia Societatis Iesv conditum testamentum absque Superioris licentia, quamvis Constitutionibus & voto paupertatis repugnet, tamen validum fore, docet idem Sanchez cap. 8. num. 25. contra Molinam tom. 1. tract. 2. disput. 139. ver. Illi qui tempore. Quia Religiosi Societatis Iesv ante editam professionem, aut vota formata, retinent dominium bonorum ac iurium: impeditum quidem voto paupertatis, quominus licet seu inter viuos, seu mortis causa disponere possint, absque Superiorum licentia: non tamen impeditum aliqua lege aut Constitutione canonica, per quam dispositio irrita reddatur: si loquamur de dispositione vltimæ voluntatis. An verò donatio seu renunciatio inter viuos facta à Societatis nostræ Religioso, sine Superiorum permisso, Trident. Constitut. infirmata sit, dicam infra cap. 7. nu. 11.

7 Quod si autem Nouitius morte naturali decedat intestatus, succedunt in bonis eius proximi consanguinei, teste Abb. cit. cap. in præsentia, num. 68. Nauar. cit. comment. 2. de Regular. num. 49. Molina cit. disput. 140. & alij communiter, contra Clarum lib. 3. receptar. §. testamentum, quæst. 28. num. 6. Sin spiritali professione intestatus moriatur, succedit Monasterium, si capax est successionis. Sed si Professus descendentes habeat, his portio legitima debetur, Authent. si qua mulier, Cod. de sacrosanctis Ecclesiis. Potest tamen, si velit, seu ante, seu post professionem, bona sua inter liberos diuidere: ita tamen, ut Monasterio virilem etiam partem tribuat: siquidem Monasterium hoc casu veluti pro filio & hærede suo reputatur, ut docet Abbas in cap. cum simus, de Regular. & habetur in cit. Authent. vbi Gloss. ver. connumerata, vbi ait: Monasterio tantum relinquendum esse, quantum vni filiorum, cui plus datur, si inæqualis diuisio sit: quod etiam tradit Sanchez lib. 7. moral. cap. 9. nu. 26.

8 His quædam addenda sunt: I. Licet pater professus diuisionem bonorum inter liberos instituere possit ex iuris etiam canonici permissione, per quam Authent. illa approbata, & recepta fuit: non potest tamen tutorem liberis dare, cum eos in potestate iam non habeat: quare datiuo eiusmodi tutore præferendus esset legitimus, si idoneus sit: sin verò talis non adsit, Iudex ex æquitate approbare deberet tutorem à patre assignatum, ut docet Sanchez nu. 37.

II. Quæ de liberis dicta sunt, similiter de aliis descendentes intelligi debent: quia *liberorum appellatione nepotes, ac pronepotes, ceterique, qui ex his descendunt, comprehenduntur*, l. liberorum, ff. de verborum significat.

III. Quamvis Doctores dissentiant, vtrum legi-

tima portio statim à tempore professionis filiis debeatur, communior tamen & probabilior est sententia affirmans, quam sequitur Molina cit. disput. 140. ver. An verò statim, Azor tom. 1. lib. 12. cap. 8. quæst. 7. Lessius lib. 2. cap. 41. num. 83. Sanchez cit. lib. 7. cap. 10. num. 3. qui monet num. 6. Hanc doctrinam locum non habere in Religiosis Societatis Iesv, qui post edita vota simplicia, retinent dominium bonorum, donec de eis disponant, vel professionem, aut vota formata edant, uti habetur p. 4. Constitut. cap. 4. in declarat. lit. E. & in Bulla Gregor. XIII. Ascendente. Sin verò aliquis contrariam sententiam sequatur, quod legitima filiis tradenda non sit ante mortem patris professi: necessario tamen dicere debet, Monasterium suscipere in se obligationem patris ad alimenta præbenda filiis tum legitimis, tum illegitimis, uti ex communi docet Gutierrez lib. 2. canon. quæst. cap. 1. num. 90. & bene explicat Sanchez nu. 8.

I V. Quæ dicta sunt de legitima portione descendentes debita, simili modo locum habent in ascendentes, si filius eorum profiteatur: cum haud deceat, parentes ob filij ingressum, aut professionem Religionis, legitima sua priuari. Veruntamen si filius inter ascendentes disponere velit, id ante professionem facere debebit: postea enim non poterit: quia Authent. illa si mulier, cum exorbitans sit, seu correctoria iuris communis, extendi non debet ultra casum expressum, sicuti ex probabiliore tradit Sanchez cit. cap. 10. num. 20.

V. Quod filius habens ascendentes, inter eos de bonis suis disponere possit ante professionem, & pater habens descendentes, inter eos disponere possit ante, & post professionem, intelligi debet de bonis acquisitis ante professionem. Quæ enim postea acquisita, ad Monasterium pleno iure pertinent, uti notauit Nauar. comment. 2. de Regular. num. 56. Sanchez lib. 7. cap. 9. num. 22. vbi colligit, si aliquis hæres, vel legatarius institutus fuerat ante professionem: sed hæreditas delata fuit, aut legatum cessit post professionem, acquiri Monasterio: Secus verò esse, si hæreditas iure sanguinis ab intestato Monacho proveniat: portionem tunc legitimam ascendentes, vel descendentes dandam fore: propterea quod veluti ante professionem bona acquisita censeantur: cum ratione sanguinis, quod immutabile ius est, deferantur: & non tanquam Monacho, sed tanquam cognato: quare hoc casu hæredes necessarij, ratione eiusdem cognationis, participare debent. Quæ verò Moniali in dotem data sunt, ea Monasterio per professionem illius irrevocabiliter acquiruntur, ut docet Sanch. n. 23.

Quartò dubitatur: An Religiosus, & alij supra numerata personæ, aded de bonis testari prohibeantur, ut neque ad causam piam testamentum, vel codicillum facere possint? Respondeo, cum Abb. rubr. de testam. Ita omnino prohiberi, spectato etiam canonico iure. Excipe, quod mutus & surdus natus, aut quocunque alio signo ad causas pias disponere possit, uti dictum est cap. præced. nu. 3.

AD ALTERAM QUESTIONEM hoc cap. propositam, breuiter respondeo. Nemo, ne in conscientia quidem foro per se obligatus est ad testamentum condendum: sed interdum per accidens, ne alioquin lites, aliæve incommoda oriantur. Recta item ratio, aliorumque exempla suadent, ut homines Christiani, proportionem facultatum suarum, ad pias causas aliquid relinquunt, pro anima sua: ad quod etiam adhortandi sunt, sicuti infra dicam cap. 5. quæst. 3. dicto 3. & 5. videri potest Molina to. 1. tract. 2. disp. 135.



## CAP. IV.

## De Reuocatione Testamenti.

## S V M M A R I V M.

- 1 Testamentum reuocatur, & cassatur, vel per factum testatoris contrarium, vel per aliud testamentum validum.
- 2 Prius testamentum legitimum per alterum minus solemnne non rumpitur, nisi in casibus exceptis, aut privilegiatis.
- 3 Prius testamentum continens clausulam derogatoriam posterioris, non censetur reuocatum; nisi in posteriore testamento illius clausula mentio fiat.

**C**ertum est, testamentum, & quamuis vltimam voluntatem legitimè conditam testatoris arbitrari mutari posse, addendo, demendo, corrigendo, penitus cassando. Quod Apostolus significat ad Hebr. 9. & Vlpian. l. 4. ff. de adim. legat. cum ait: *Ambulatoria enim est voluntas defuncti usque ad vitæ supremum exitum.*

**D**uobus modis testamentum à testatore reuocari & cassari potest; Primò, Per factum contrarium; puta si scriptum testamentum jaceret, hæredis nomen deleat; vel sigilla, aliamve eius substantialem partem, aut solemnitate de industria auferat, l. si vnus de septem, l. nostrum, Cod. de testamentis, & videri potest Clarus quæst. 93. Molina disput. 153. Secundò, Per alterum testamentum validè ac legitimè conditum, in quo hæres aliquis institutus sit; tamen si postea accidat, cum hæreditatem non adire, prius testamentum irritum manet, sicuti habetur expressè in §. posteriore, Instit. Quibus modis testamentum infirmetur, & docet Couar. in rubr. de testam. p. 2. n. 21. Clarus q. 96. Mol. l. c.

**R**equiritur autem, vt dixi, alterum testamentum validum esse, vt secundum illud saltem potuerit adiri hæreditas: Sin verò posterius imperfectum, seu minus solemnne fuerit, primum non reuocatur: siquidem civili iure ita decretum est, vt testamentum legitimè conditum non sola voluntate (quamuis voce coram pluribus testibus expressa) rumpatur; sed alia noua & legitima hæredis institutione opus sit, sicuti colligitur ex §. ex eo, Instit. Quibus modis, & c. l. hac consultiissima, §. si quis autem, C. de testam. & ex communi docet Clarus q. 91. & 96. Excipe I. Nisi testator, post conditum testamentum lapso decennio, illud coram tribus saltem testibus reuocet, l. sancimus, C. eod. & explicat Gl. ibid.

**E**xcipe II. Si testator coram septem testibus dicat se reuocare prius testamentum; quia velit decedere intestatus: siquidem in tali voluntate continetur tacita hæredum ab intestato succedentium nuncupatio & institutio, sicuti ex communi notauit Clarus q. 92. Couar. p. 2. rubr. n. 80. conclus. 6. & alij plerique ex l. 1. §. si hæres, ff. si tabulæ testamenti nullæ extabunt.

**E**xcipe III. Si in priore testamento hæres extraneus institutus fuit, reuocatur per posteriorem voluntatem minus solemnem, in qua instituti sunt qui ab intestato venire possunt; dummodo quinque testes adhibeantur, l. hæc consultiissima, §. si quis autem, Cod. de testam. vbi videri potest Gloss. ver. sancimus. Id verò sublimitari debet; Nisi in priore, causa pia instituta fuerit: talis enim institutio non reuocatur, nisi per subsequens testamentum solemnne testante Abb. p. 1. consil. 11. præsumpt. 2. Tiraquel. priuileg. 53.

**E**xcipe IV. Si testator hæredem à se institutum hæreditate indignum declaret; quamuis nulla expressa causa, adimitur ei hæreditas, & applicatur fisco, l. hæreditas, Cod. Quibus vt indignis hæreditates auferuntur.

**E**xcipe V. Testamentum primum solemnne reuoca-

tur posteriore minus solemnne, si ad eius valorem maior solemnitas non requiratur; puta testamentum ad pias causas, inter liberos factum, vel militare, iuxta l. 2. ff. de iniusto, rupto, & irritato facto testamento, & docet præter alios Nicol. Euer. to. 1. consil. 27. n. 22. Abb. l. Clarus q. 98.

**H**oc verò specialiter statutum est in Authent. hoc inter, Cod. de testam. vt testamentum inter liberos conditum reuocatum non censetur, nisi testator altero solemnne testamento facto, insuper adiecerit, se nolle prius testamentum validum esse. Quod limitari debet primò; Nisi in posteriore etiam testamento liberi hæredes instituti sint, secundum Gloss. in Authen. de testam. imperfectis, c. 3. ver. perfecta, Clarus q. 98. Tiraquel. priuileg. 54. Secundò; Nisi in posteriore testamento causa pia instituta sit: quia tunc nulla iuris civilis solemnitas requiritur, sed sufficit constare de iusta testatoris voluntate, sicuti docent Abb. & Tiraquel. l. cc. & dixi supra c. 2.

**A**d extremum aliqua addenda: Primum. Si duo proferantur testamenta eodem die confecta, ex collatione vnus ad alterum coniiciendum erit, vtrum eò u prius conditum sit; alioquin vtrumque propter incertitudinem cassabitur, secundum Gloss. in l. vlt. ver. missus est, C. de edict. Diui Adriani toll. Clarus quæst. vlt. Excepto, si in altero pia causa scripta reperiatur, sicuti limitat Tiraquel. de priuileg. piæ causæ 35. vel hæres ab intestato succedens, sicuti limitat Glossator Clari.

**A**lterum. Si testator in priore testamento protestetur; si quippiam postea mutauerit, aliudve testamentum condiderit, nolle se id valiturum; standum est priore voluntate, ac dispositione; præterquam si in posteriore testamento addatur clausula derogatoria, seu reuocatoria prioris: quia, vt dicitur, l. si quis in principio, ff. de legatis, 3. *Nemo eam sibi legem potest dicere, vt à priore voluntate recedere non liceat.* Verum non sufficere videtur hoc casu, si testator dicat reuocare se testamentum prius conditum: quia censetur esse immemor prioris clausulæ, quæ si in mentem illi veniret, non reuocaret testamentum: quare necesse est, vt ipsamet clausula derogatoria prioris testamenti reuocetur; idque vel verbis specialibus, non obstante clausula derogatoria prioris testamenti, vel saltem generalibus, vt non valeat prius testamentum, quibuscumque verbis derogatoriis conditum fuerit. Ita colligitur ex cit. l. si quis in principio, & ex communi docet Couar. p. 2. rubr. n. 59. Fachin. lib. 4. controu. c. 92. Ioan. Molan. de testam. piis, c. 49. contra Bartolum cit. l. si quis in principio.

## CAP. V.

## De Hæredibus instituendis.

## S V M M A R I V M.

- 1 Tum singuli homines; tum etiam Communitates heredes institui possunt, nisi lege prohibeantur.
- 2 Religiosi professi Ordinum; quibus permissum est bona immobilia in communi possidere, heredes institui possunt: succedit autem eorum nomine Monasterium.
- 3 Collegia & Domus Societatis Iesu ratione alicuius Professi, aut vord formata habentis succedere non possunt suis ex testamento, siue ab intestato.
- 4 Monasteria Ordinis Minorum, & Cappucinorum capacia non sunt vltius hereditatis: imò nec ecclesiæ eorum; secundum probabilior sententiam. At verò Societati Iesu Collegia, & Domus hereditates accipere possunt; modo non deferantur contemplatione suorum Professorum, &c.
- 5 Legata sicuti & alia donata, contemplatione suorum Professorum, Societati Iesu accipere non prohibetur.
- 6 Per professionem Religiosi omnia eius bona si iura, excepta legitima portione descendens, vel ascendens debita, in Monasterium transiunt, si bonorum immobilium capacia sit.



- 7 Monasterium ratione sui Monachi hereditatem delatam adire potest, etiam ipso invito, vel ante aditionem mortuo.
- 8 Religiosus ad Episcopatum translatus hereditaria successionis capax est; sed bonorum administrationem tantum habet, non dominium.
- 9 Hæres institutus vel est universalis, siue ex asse, vel particularis.
- 10 Hæredes ex testamento alij sunt necessarii, videl. descendentes, & ascendentes, quibus saltem portio legitima debetur, quæ est triens hereditatis; (si plures, quàm quatuor liberi, semis) alij verò hæredes non necessarii sunt.
- 11 Si alicui descendenti, aut ascendenti portio legitima non relinquatur, competet ei actio, vel ad petendum complementum, si aliquid relictum fuerat; vel ad rescindendum testamentum, tanquam ipso iure nullum, si nihil iure institutionis relictum, neque causa idonea ex hereditationis inserta & probata.
- 12 Etiam ob posthumi præteritionem, vel exhereditationem testamentum rumpitur.
- 13 Peccant parentes, si sine iusta causa successionis inequalitatem inter liberos constituent.
- 14 Liberi naturales respectu patris non sunt hæredes necessarii; at verò matris respectu sunt.
- 15 Frater & soror testatoris, si præteriti sint, testamentum tunc solum infirmare possunt, si persona infamis instituta fuerit.
- 16 Ius natura postulare videtur, ut pater filiis testamento relinquat, quatenus ad vitæ sustentationem indigent, etiam ultra legitimam ciuili iure debitam. Et ferme eadem ratio est de liberis comparatione parentum indigentium.
- 17 Consultum est morituris, etiam si liberos habeant, partem bonorum ad pias causas relinquere, pro salute anime.
- 18 Consultum est bonasua in pauperes distribuere in vitæ decursu, quàm ad mortis tempus differre.
- 19 Expedit testamentum condere, non circa mortis agonem, sed dum ratio & sensus vigent.
- 20 Plerumque non expedit, ut Confessarii præsertim Religiosi, confessioni testamenti interfint, aut in particulari suadeant, quibus relinquere debeat.

**Q**uestio Prima. Quinam hæredes institui possint? Respondeo, & dico I. Omnes homines, non tantum singuli atque priuati (etiam si amentes sint, surdi, muti, prodigi, serui) sed etiam Communitates, & Collegia hæredes institui possunt; nisi specialiter prohibeantur. Sumitur ex l. i. C. de SS. Ecclesiis. Prohibetur autem primò, ne hostium ciuitates hæredes instituantur, l. omnium, ff. ad S. C. Trebellianum.

Secundò, Ne Iudæorum communitas instituat, l. i. Cod. de Iudæis.

Tertiò, Ne Collegium instituat, quod publica auctoritate erectum non est, l. Collegia, §. in summa, ff. de illicitis collegiis. I. Collegium, C. de hæredibus instituendis. Excipiuntur tamen ea Collegia seu Confraternitates, quæ pietatis causa institutæ sunt, etiam sine auctoritate Superioris, sicuti habetur in l. i. ff. eod. vbi id notat Gl. recepta ver. illicita collegia. Nauar. consil. 3. de foro compet. edit. 2. vbi rectè monet, tales Fraternitates, ex personis laicis sociatas simpliciter quidem subesse Magistratui seculari; secundum quid verò, videlicet quoad actus Ecclesiasticos, subesse Episcopo; qui proinde eis præcipere potest modum seruandum in processionibus, aut comitanda SS. Eucharistia ad egrotos; & si redditus annuos habeant, administrationum rationem ab eis exigere, secundum Trident. sess. 22. de reformat. c. 8.

Quartò, hæres institui non potest deportatus, vel ad illa damnatus, l. 3. ff. De his, quæ pro non scriptis habentur, & l. i. C. de hæred. instituendis.

Quintò, Hæreticus, & apostata communi iure hæredes heri nequeunt, l. Manichæos, & l. vult. C. de hæreticis, l. 3. C. de Apostatis. Vide etiam Auth. credentes, C. de hæret. & c. excommunicamus, §. credentes extrà, eod.

Sextò, Spurius, siue natus ex coitu damnato & punibili, omnis successionis in bonis tam paternis, quàm maternis incapax est, sicuti constat ex Authen. licet, in fine, C. de natur. liberis, Auth. Quibus modis naturales, & c. §. vlt. Auth. ex complexu, C. de incestis, nupt. Instit. ad S. C. Orificianum, §. nouissimè, vbi Gl. ver. admitti, & docet Couar. in epit. p. 2. c. 8. §. 5. n. 3. & 4. Clarus q. 31. Mol. disp. 167. Atque etiam vice versa parentes in bo-

nis spurij succedere prohibentur, Auth. Quibus modis, & c. §. de nepotibus. Auius tamen, deficiente prole legitima, spurium hæredem instituere potest; non tamen intuitu patris, sicuti docent DD. communiter apud Couar. cit. §. 5. n. 19. Clarus q. 32. Gaill. lib. 2. obser. 88. n. 15. Ab aliis item non ascendentes nihil prohibet, quominus spurij hæredes instituantur, vel ab intestato succedant fratribus, aliisque consanguineis vterinis, l. 2. & 4. ff. vnde cognati. Si autem vterini non sint, sed ex diuersis matribus geniti, non censentur habere cognationem inter se, & cum aliis cognatis patris, quod attinet ad bonorum successionem: idq; etiam in naturalibus, imò & legitimatis locum habet, sicuti constat ex cit. Authen. Quibus modis naturales, §. filiū verò, collat. 7. & docet Gl. in cit. l. 2. ff. vnde cognati, §. nascitur.

Septimò, Occisor testatoris, saltem per Iudicis sententiam, hæreditate priuari debet, ut fisco deferatur, sicuti docet Clarus, §. homicidium, n. 22. Addit. Nauar. li. 4. consil. 1. de donat. inter virum & uxorem, edit. 2. ex l. cum ratio, §. vlt. ff. de bonis damnatorum.

Octauò, Aliqui in iure propter commissum crimen intestabiles dicuntur, v. g. qui Cardinalem Ecclesiæ Romanæ persequuntur, c. felix, de pœnis in 6. quod intelligitur post Iudicis sententiam.

Porro, si testamentum deficiat, eò quòd hæres qui solus institutus fuit, incapax est, legata ex eo non debentur; nisi pia sint, sicuti constat ex dictis suprà c. 2. & notat Mol. disp. 154. in fine. Sin verò alius cum illo hæres capax institutus fuit, eidem accrescit portio alterius; neque deuoluitur ad hæredes ab intestato; propterea quòd iura non permittant aliquem ex parte testatum, & ex parte intestatum decedere.

Dico II. Religiosi professi Ordinum eorum tantum, quibus permissum est bona immobilia in communi possidere, hæredes institui, atque ab intestato succedere possunt, vti colligitur ex Clem. exini, ver. quia igitur, de verbor. signif. & ex communi docent Clarus q. 19. Nauar. comment. 2. de Regular. n. 50. Sanchez lib. 7. moral. c. 12. & cap. 25. Tales autem iure nouo Trident. sess. 25. c. 3. de Regularibus, sunt omnes Ordines, etià Mendicantes, præter Minores de obseruantia, & Cappucinos. Excepta etiam Societate Iesu, quæ priuilegium illud seu concessionem Trident. bona immobilia & redditus possidendi non acceperat, sed in suæ paupertatis professione secundum constitutiones permansit; vti declarat Sanch. lib. 6. c. 18. n. 7. & seqq. Ratio autem huius regulæ, cur Ordines qui bona immobilia, ac redditus stabiles possidere non possunt, incapaces sint successionis hereditariæ ratione Professorū suorū, hæc esse videtur; quia hoc ipsum magnum & stabile quoddam ius esse videtur, succedendi bonis omnibus Professorum suorum; nec non in omnibus hereditatibus, quæ siue ex testamento, siue ab intestato deferuntur: quare hoc ius successionis cōpetere non debet iis Ordinibus, qui etià in cōmuni bona ac iura immobilia possidere nequeunt.

Porro tametsi Collegiis, ac domibus probationis in Societate Iesu bona immobilia & redditus annuos possidere concessum sit, non possunt tamen ratione alicuius Professi, aut vota formata habentis, succedere in hæreditate quacunque, vti habetur p. 6. constit. c. 2. §. 12. Non solum particulares Professi, & Coadiutores formati hereditaria successionis non erunt capaces: verum nec Dominus, nec ecclesia, nec Collegia, eorum ratione. Sic enim, omnibus libris ac controuersis præcis, charitas cum omnibus ad Dei gloriam melius conseruabitur. Et debent hæc verba intelligi de vtraque successionem, videl. quæ est ab intestato, & quæ est ex testamento: quia cum lex seu constitutio nihil distinguat, nec nos distinguere debemus. Et ita aperte docet Sanchez lib. 7. c. 27. n. 16. 24. & satis indicat Molina to. 1. tr. 2. disp. 139. ver. Tam professi, iun. cta disp. seq.



4 Quare nota, inter ordinem Minorum, ac Societatem Iesu discrimen esse, quod in Ordine Minorum, & Capucinatorum non solum Professi singuli hæredes institui non possunt, sed neque eorum Monasteria; adeo, vt talis institutio omnino irrita sit. Imò probabilius est, neque ecclesiam Fratrum Minorum hæredem institui posse sicuti ex communiore docet Sanchez lib. 7. moral. c. 25. n. 14. contra Rodriq. to. 2. Regul. q. 78. a. 5. qui ait, Ecclesie Romanæ hæreditatem hoc casu acquiri posse. Sed contra est, quod Ecclesie Romanæ non acquiruntur nisi ea, quorum ipsa Communitas Minorum, aut eorum ecclesia capax esse potest: cum igitur ipsi, eorumque ecclesie secundum se incapaces sint omnis hæreditariæ successionis (alioqui ipsorum ecclesie succedere etiam possent in bonis suorum Profitentium) sequitur, quod hereditas Ecclesie Romanæ non deferatur; sed hæredibus ab intestato.

Deinde probabilius est, Fratribus Minoribus ne eo quidem pacto hæreditatem deferri posse, vt eam vendant, & in necessarios vsus pretium venditionis expendant, vt docet idem Sanchez n. 11. contra Rodriq. n. 4. Nam etiam hoc casu ius hæreditatis, cum omnibus annexis oneribus, ipsis acquireretur, cuius tamen incapaces redditi sunt, cit. Clem. exiui. Alia verò ratio est, si alius instituatur hæres, cum onere vt hæreditatem vendat, & pretium in Fratrum necessitates conuertat: siquidem hoc casu non ipsi Fratres, sed institutus ius hæreditatis cum annexis oneribus suscipit.

At verò Societas Iesu, etiam Domus professe simpliciter hæredes institui, atque hæreditates adire possunt, ita tamen, vt, si in hæreditate Domui professe relicta contineantur bona immobilia, quæ eorum vsui, ac habitationi non inferuiant, ea vendi debeant, cum aliàs possidere nequeant, p. 6. Constitut. c. 2. §. 5. & docet Sanchez lib. 7. c. 27. n. 15. Molin. to. 1. tr. 2. disp. 195. ver. A regula.

Obijciat aliquis: Si Societas Iesu, etiam Domus eius professa, hæres institui potest; sequi videtur, quod eadem Societas, aut Domus professa succedere possit contemplatione sui Professi, aut Coadiutoris formati, si ab aliquo hæres institutus fuerit. Confirmatur ex eo, quod extra controuersiam est, Societatis Iesu Professis, & Coadiutoribus formatis legata relinqui posse, ita vt ea acquirantur Domui professe, aut Collegio, in quo habitant. Ergo simili modo hæreditas relinqui poterit; cum ea sæpe minoris momenti sit, quam amplum legatum. Ad obiectionem, respondetur, negando conseq. Quia in omni religioso Ordine strictior paupertas est quoad personas particulares, quam quoad Communitatem. Quare licet Domus, & Collegia Societatis Iesu capacia sint hæreditatis; tamen personæ particulares, post professionem, vel vota formata, adeo incapaces redditæ sunt, vt neque earum contemplatione Collegia, aut Domus succedere possint. Ratio afferri potest I. Quia, vt supra dictum, hoc valde magnum & quodammodo stabile ius esset Societatis Iesu, succedendi ratione suorum in hæreditatibus; quod iure, ob maiorem paupertatis perfectionem, se priuare voluit. II. Quia hæreditates particularibus personis, etiam ex testamento, ferme deferri solent ratione cognationis, aut affinitatis specialis. Si enim ob Dei honorem tanquam pauperibus conferenda sit, Collegio, seu Communitati relinquatur.

5 Ad Confirmationem obiectionis dico, maximum esse discrimen inter hæreditatem, ac legatum; tum quia hæreditas longè maius continet ius atque dominium, quam legatum: tum quia cum hæreditate transcant onera & obligationes variæ, cum quibus plerumque lites & actiones iudiciales coniunctæ esse solent. At verò legatum, cum sit rei particularis, habet se instar elemosinæ, seu rei donatæ; ideoque sicuti donata Religiosus

quilibet cum consensu Prælati accipere, & sic Ordini, Monasterio, aut Collegio acquirere potest, absque sua, vel Monasterij obligatione, ita etiam legatum. Quæ ipsa causa est, cur Patres Ordinis Minorum, & Capucini, licet hæreditatis omnino incapaces existant; tamen legatum capere possint, seu illud relinquatur Communitati, seu alicui in particulari; modò non in tantâ quantitate, vt videatur esse in fraudem, id est, hæreditatem, vel partem hæreditatis relinqui sub nomine legati, vt habetur in cit. Clem. exiui, de verbor. signif. §. Cupientes, & explicat Sanchez lib. 7. c. 26. n. 10. & 11.

Veruntamen si Professus Societatis Iesu, vel vota formata habens, instituatur hæres intuitu ipsius Societatis, ita vt principaliter ipsa Societas, seu Collegium, aut Domus professa instituta videatur, dicendum est, institutionem valere, sicuti in simili docet Sanchez lib. 7. c. 13. n. 61. Id verò in dubio præsumendum est, si testator sciuit, Professum per se institui validè non posse: quia interpretari oportet dispositionem, potius vt valeat, quam vt pereat, argum. l. vlt. C. de usufructu.

Redeo nunc ad partem assertionis affirmantem, videlicet Ordines omnes, eorumque Professos, quibus permixtum est bona immobilia in communi possidere, hæreditariæ successionis capaces esse, iuxta l. vlt. §. Hoc etiam, C. de Episc. & Cleric. Vbi aliqua aduertenda: Primum. Ipsa professione, veluti morte quadam Monachi seu Religiosi, omnia eius bona ac iura in Monasterium transeunt, excepta portione legitima hæredibus necessariis debita, Authen. de Monachis, §. illud quoque, Authen. Si qua mulier, C. de SS. Ecclesiis, & Auth. Ingressi, eod. tit. *Ingressi Monasteria, ipso ingressu, id est, eo ipso, quod Monachi sunt, vt Glossa interpretatur, se, suæque dedicant Deo.* Quæ approbata reperies à Gregor. I. lib. 7. indict. 2. epist. 7. ad Ianuar. Caralitani Episcopum, & refertur in c. quia ingredientibus, 19. q. 3. Quia ita decet, vt qui se Deo, ac Monasterio dedicat, non solum personam suam, sed omnia etiâ bona simul offerat: vt plena sit oblatio ac sacrificium.

Alterum. Quicquid deinde Professus seu labore suo, seu aliorum donatione, aut legitima successionem hæreditatis, vel ex cuiuscunque testamentaria successionem acquirit, id non tam ipsi, quippe qui dominij rerum in particulari incapax est, sed potius Monasterio acquiritur; ita vt omnis actio, quæ Religioso, si professus non esset, competere, à Monasterio nomina illius exerceri possit. Quæ est communis DD. sententia, sumpta ex cit. Authen. Si qua mulier. & Authen. de SS. Episcopis, §. si Monachus, & l. vlt. §. huius autem, C. de Episc. & Clericis, c. Abbates, 18. q. 2.

Tertium. Bona & iura, quæ Monachus tempore professionis habet, vel si quæ postea acquirit, ipso facto sine alia apprehensione transeunt in Monasterium, quoad dominium ac possessionem. Ita notauit Gl. cõmuniter recepta c. si qua mulier, ver. non extantibus, causa 19. q. 3. Quia bona transeunt in Monasterium accessorie, seu per consequentiam eo ipso, quod persona in Monasterium transfertur, argument. cit. Authen. de Monachis, §. illud quoque, ibi, *Ingredientem namque simul sequuntur omnino res.* Quæ simili ratione in l. si adoptaues, ff. de precario, decretum est, interprete Gl. marginali; Quod dominium ac possessio omnium bonorum illius qui adrogatur, in adrogantem transeant, sine vlla apprehensione, quam doctrinam bene explicat Abbas in c. in præsentia, n. 74. de probat. Ceterum si post professionem Monacho hereditates, legata, aut donationes deferantur, haud dubiè ad eorum acquirendam possessionem requireretur apprehensio seu ipsius Monachi, cum licentia Prælati: seu Monasterij per Procuratorem v. g. suum, aut Syndicum.



7 Illud verò controuersum est, vtrum ad acquirendam hereditatem Monacho, necessaria sit ipsius aditio; an verò Monasterium, eo etiam ignorante, vel inuito, adire possit? Et responderi debet contra Legistas, ex communi sententia Canonistarum in c. in praesentia, vbi Innoc. Hostiensis, & Abbas n. 75. Couar. c. 1. de testam. n. 1. & sequitur Sa ver. Religio, n. 27. Mol. to. 1. tr. 2. disp. 140. ver. Non solum bona, Rodriq. to. 2. regular. q. 77. a. 1. Sanch. lib. 7. moral. c. 12. q. vlt. Hereditatem proximè deferri Monasterio, vt adire eam possit, etiam inuito Monacho, aut ignorante; Monachus autem adire nequeat, nisi ex Praelati, aut Monasterij mandato. Ratio est: Quia Religiosi professi, propter paupertatis votum solemne, incapaces sunt sibi acquirendi; sed omnia eorum iura ad Monasterium transgunt. Quapropter licet Religiosus, in eo quod Monasterio acquirit, seruo comparetur; quia tum rei proprietatem, tum vsumfructum, ideoque plenum rei dominium Monasterio acquirit; attamen quoad modum acquirendi filiofamilias potius comparatur, de quo in l. vlt. C. de bonis quæ liberis; & c. habetur, recusante eo hereditatem, patrem nihilominus adire posse, ad acquirendum sibi vsumfructum.

Sed etsi Religionem professus post deuolutam, nondumque aditam hereditatem mortuus fuerit; vel ad aliud Monasterium translatus, nihilominus Monasterium illud, in quo Monachus tempore deuolutæ hereditatis, vel legati extitit, eandem adire potest, sicuti docet Couar. in c. 1. de testam. n. 31. Mol. cit. disp. 140. §. quando Religiosus, Less. lib. 2. c. 41. dub. 11. Ratio est, quam supra dedi, quia talia iura Monasterio, ratione Professui sui, immediatè acquisita sunt; idque colligitur ex Auth. Ingressi, iun. Auth. Si qua mulier, C. de SS. Ecclesiis.

8 Sed quid de Religioso ad episcopatum translato, vtrum hereditariæ successionis capax sit? Respondeo, capacem esse; quamuis fuerit Ordinis Mendicantium; ita tamen, vt bonorum sola administratio ipsi acquiratur; dominium verò Ecclesiæ, cui præest. Vide Gl. in c. vn. 18. q. 1. Syl. ver. religio. 4. q. 10. Less. lib. 2. c. 40. n. 113.

9 QVAESTIO SECUNDA. Quæ sit diuisio siue varietas hæredum? Respondeo primò: Hæres alius est ex testamento; alius ab intestato. Ille vel est vniuersalis, siue ex asse: vel particularis: & tunc vel in parte hereditatis aliquota, v.g. triente, quadrante: vel in re certa ac determinata. Hereditas enim plerumque diuiditur in duodecim vncias, quæ assis appellatione continentur. Habent autem & partes hereditatis singulæ propria nomina: videlicet, *Vncia: sextans*, id est, duæ vnciæ: *quadrans*, id est tres vnciæ: *triens*, id est, quatuor vnciæ: *quincunx*, id est, quinque vnciæ: *semis*, siue *semissis*, id est, sex vnciæ: *sextunx*, id est, septem vnciæ: *bes*, id est, octo vnciæ: *dodrans*, id est, nouem vnciæ: *dextans*, id est, decem vnciæ: *deunx*, id est, vndecim vnciæ. §. hereditas, Instit. de hæredib. instituendis.

Qui ex parte aliquota hæres instituitur, onera hereditatis proportionem partis suæ sustinere cogitur: non item qui in certa aliqua re institutus est: talis enim potius legatarij loco habetur: ideoque iura, actiones, & debita defuncti ad eum non pertinent, sed ad hæredem propriè dictum, qui & defuncti personam, tam quoad iura, quam speciales obligationes, ac debita repræsentare debet. Ita habetur in l. quotiens, C. de hæred. instituendis. Si autem nullus alius hæres, præter particularem, instituendus sit: tunc hereditas reliqua illi, quamuis in certa tantum re verbis directis instituto, accrescere debet. Quod ipsum etiam locum habet, si reliqui instituti ante testatorem mortui sint, vel postea hereditatem repudient, sicuti constat ex l. 1. §. si ex fundo, ff. de hæred. instit. & docet Gomez to. 1. resol. c. 10. num. 8.

& 13. Mol. disp. 135. Vasqu. 2. tr. de testament. c. 4. d. b. 8. Cuius rei ratio est: Quia, vt dicitur reg. 7. ff. *Ius nostrum non patitur eundem in pagano*, (excipitur enim testamentum militare, l. si miles vnum, & l. si miles ita, §. & quia, ff. de testament. milit.) & testato, et intestato decessisse.

Præterea, hæres ex testamento alius est necessarius: alius non necessarius. Necessarius dicitur, quem testator in portione legitima instituere cogitur; nisi iustam exheredandi causam habeat: ex illis quæ numerantur in Authent. Vt cum de appellatione cognoscitur, cap. 3. & 4. & apud Conarruiam in c. Raynuius, princ. de testament. Mol. disp. 176. Hæres autem non necessarius appellatur, quem testator instituere non cogitur.

Hæredes necessarij imprimis sunt descendentes: his autem deficientibus ascendentes. Legitima portio deficientium nouo iure est triens hereditatis, si non plures, quam quatuor liberi masculi, vel fœminæ existant: semis autem, si plures, quam quatuor, sicuti habetur in Authen. de triente & semisse, & Authent. nouissima, Cod. de inofficioso testamento. Atque in numero hoc liberorum constituendus etiam est, qui omnino renuntiavit hereditati: non item, qui exheredatus, aut ob Religionis professionem incapax factus est, vt docet Gaill. lib. 2. obseruat. 121. num. 17. & 18. Neque potest portioni legitimæ onus seu grauamen aliquod apponi, sicuti habetur in l. quoniam, Cod. de inoff. testament. Idque verum est, tametsi filius consentiat cum præiudicio suorum descendendum: quippe quibus in legitima illa portione noceri non potuit, sicuti notat Vasquez de testament. cap. 6. n. 89. secus est, si filius descendentes non habeat: tunc enim iuri suæ legitimæ renuntiare poterit, teste Claro, q. 43. num. 3. Anton. Gomez tom. 1. resol. c. 11. n. 31. Couar. c. Reynaldus, §. 2. n. 2. Sin autem vnus ex liberis defunctus nepotes reliquit, ij patris sui personam repræsentantes, in eiusdem portionem succedunt: ideoque cum reliquis liberis testatoris non in capita, sed in stirpes ad hereditatem admittuntur, sicuti habetur in §. filius, Instit. de hæredib. ab intestato.

Verum quod dixi de legitima portione liberis omnibus debita, locum tantum habet in bonis priuatis: non item in regnis, ducatibus, & comitatibus Magnatum: talia enim bona in plerisque prouinciis ad primogenitum spectant: eoque mortuo, quamuis adhuc viuentem patre, ad nepotem masculum deuoluuntur: secluso filio secundò genito, aliisque masculis: dummodo iis sustentatio sufficiens, pro conseruanda dignitate status, & familiæ suæ, assignetur, sicuti docent DD. in cap. licet, vbi Innocentius & Abb. num. 9 & 10. de voto. Deinde legitima portio intelligitur ex bonis, quæ sunt de substantia patris: non item ex bonis feudalibus, quæ dicuntur ex pacto & prouidentia, secundum gratiam & liberalitatem concedentis, sicuti docet Andr. Fachin. lib. 4. controu. cap. 23.

Ascendentium item legitima portio est triens hereditatis, qui deficientibus descendentibus testatoris, debita est parenti vni, vel vtrique superstici: Sin autem neuter parentis superstit, in locum patris succedunt auus, & auia paterna: in locum matris auus, & auia materna, sicuti expressius leges in Authent. de hæredibus ab intestato, §. consequens autem, & seq. Et necesse est, legitimam portionem hæredibus necessariis relinquere titulo honorabili institutionis, atque sine vilo appposito grauamine, modo, conditione: alioquin pro non apposis habentur, sicuti constat ex cit. loc. quoniam, & videri potest Authent. Vt cum de appellat. cognoscitur, §. aliud quoque iun. §. Et hæc quidem de parentum.

Porro, si alicui seu descendenti, seu ascendenti por-



tio legitimo iure institutionis, siue hæreditario non relinquitur: refert vtrum in aliqua minore, quàm legitima portione tanquam hæres instituat (non adiecta legitima ingratitudinis causa) an verò in nulla. Si primum, competit actio ei ad petendum complementum legitimæ, l. omnimodò, Cod. eod. & Authent. Vt cum de appellat. cognoscitur, §. hæc autem disposuimus: duratque ea actio 30. annis, sicuti ex communi sententia docet Gomez 1. resolut. cap. 11. num. 23. Molin. disput. 177. Si autem omnino prætereatur, seu nihil iure institutionis relinquitur: iterum distingue, vtrum legitima prætereundi, vel exhæredandi causa apponatur, necne. Si causa legitima non affertur, testamentum ipso iure nullum est, quod attinet ad hæredis institutionem: nam cætera, videlicet legata, fideicommissa, tutorum dationes, nihilominus subsistunt, iuxta Authent. ex causa, Cod. de liber. præter. Si verò causa legitima exhæredationis testamento inserta fuerit, sed ab hærede instituto probari non possit: tunc competit hæredi necessario quærela in officio testamenti, per quam euacuabit testamentum, quod attinet ad hæredis extranei institutionem, sicuti habentur hæc omnia in cit. Authent. vt cum de appellat. cognoscitur, §. aliud quoque, & §. siue igitur omnes.

Est autem hoc discrimen, quòd si testamentum ipso iure nullum sit, tunc hæredi iniuste præterito, triginta annorum spatio ius agendi, siue testamentum nullum dicendi relinquitur, sicuti docet Gl. recepta in l. licet, ver. longi, Cod. de iure deliberandi. Sin autem per quærelam impugnare siue rescindere contendit, intra quinquennium id agere debet, l. si quis filium, iur. l. scimus, §. illud præterea, Cod. de inoff. testam. & ex communi docet Clarus q. 40. n. 5. Mol. disp. 175.

12 His quædam addenda sunt: Primum. Etiam ob posthumi præteritionem, vel exhæredationem, testamentum rumpitur, si illè viuus & perfectus nascatur, licet statim moriatur, l. posthumo nato, Cod. de bonorum posses. contra tabulas, §. posthumi, Instit. de exhæredat. liberorum. Quod intelligi debet, si moriatur post testatorem: nam si præteritus prius, quàm testator moriatur, tum prætoriam æquitatem conualescit testamentum, l. posthumus, ff. de iniusto rupto, &c. Vide Gomez cit. cap. 11. n. 4. Clarus, q. 45. Mol. disp. 175. §. posthumus.

13 Alterum. Licet secundum ius ciuile parentes liberis singulis non nisi certam portionem relinquere cogantur: idèque vni plus, quàm alteri conferre possint: peccant tamen plerumque, si siue iusta causa, & ex inordinato affectu inter liberos (quorum natura communis est) successione inæqualitatem constituent: v. g. quia ex diuersis matrimoniis nati sunt, quorum vnâ matrem magis, quàm alteram testator dilexit. Huc etiam pertinet inuectio Saluiani lib. 3. ad Ecclesiam. *Qui à parentibus filij offeruntur Deo, omnibus filiis postponuntur: indigni iudicantur hæreditate, qui digni fuerant consecratione: ac per hoc vna tantum re parentibus viles sunt, quia cæperint Deo esse pretiosi. Ex quo intelligi potest, quòd nullus pene apud homines vilior est, quàm Deus: cuius vtiq; sit despectio, ut eos præcipue parentes filios spernant, qui ad Deum cæperint peruenire. Et infra: Sunt ex parentibus multi, qui æquales filiis suis faciant portiones: nisi quòd vna tantum eos conditione discernunt, quòd in iis partibus, quæ religiosis videntur adscribi, vsum iubent ad eos, proprietatem ad alios pertinere. At verò hoc multò est peius, & infidelius: tolerabilioris quippe impietatis esse videtur, cum proprietatem aliquem filiis minus relinquere, quàm proprietatem iis rerum penitus auferre. Vsum enim subiungit, eis dedit, ut esset, quo ipsi viuerent: proprietatem iis tulit, ut quod Deo relinquerent, non haberent.*

Iustæ autem causæ inæqualitatis inter liberos constituendæ sunt: si inter eos aliqui de testatore, domesticis obsequiis, alij siue officiis, magis meriti fuerint: si qui plus

indigere videantur, quia bonis aduentitiis carent: si adhuc pusilli, magno sumptu in studiis educari debeant: denique si secundum gentis consuetudinem prius geniti aliis, aut masculi fœminis in successione præferantur.

Tertium. Liberos naturales, nisi legitimati sint, non tenetur pater hæredes instituere, sicuti ex communi docet Clarus q. 42. n. 4. iun. q. 84. Quanquam, si liberis careat, non prohibetur eosdem instituere, vel quomodo libet bona sua ipsis donare, legare: modò patentes, si super sint, legitimam portionem non priuentur, Auth. licet, C. de naturalibus liberis. Sin autem testator liberos legitimos habeat, non plus, quàm vnâ hæreditatis vnciam naturalibus liberis, eorundemque matri relinquere poterit, cit. Authent. Quibus modis naturales efficiantur sui, & l. 2. cum adiuncta Auth. C. de naturalibus liberis. Locutus sum autem de patre: nam matri filij naturales æquali iure cum legitimis tam ex testamento, quàm intestato succedunt, vbi ius commune Cæsareum obseruatur, l. si qua illustis, C. Ad S. C. Orficiatum. Vide plura apud Couar. in epit. p. 2. c. 8. §. 4. Mol. to. 1. tr. 2. disp. 166.

Quartum. Frater, vel soror testatoris, quamuis vtrinque coniuncti, non possunt testamentum infirmare, eò quòd præteriti, seu hæredes instituti non sint: excepto casu, si persona infamis, iuris, aut facti infamiâ, instituta fuit, & ipsis nihil titulo institutionis relictum: hoc enim casu fratres, & sorores agere possunt quærela in officio testamenti; nisi vterini tantum sint, aut & ipsi infames, vel de ingratitudine erga defunctum notati, l. fratres, Cod. de inoffic. testam. & videri potest Clarus q. 50. Molin. disp. 159.

QVÆSTIO TERTIA. Quid homini deliberanti de hæredibus suorum bonorum instituendis, aut legatis relinquendis in conscientia foro suaderi debeat? Responden & dico I. Si testator liberos habeat, ius naturæ postulare videtur, ut ipsis necessaria ad victum, & honestam sustentationem relinquat: etiam vltra legitimam ciuili iure debitam. Ita docet Ioannes Molanus lib. de pijs testament. c. 11. & probatur auctoritate S. Augusti notentis ab Ecclesia suscipi legata, quæ necessitati liberorum parentes in testamento subtraxerant: præterquam si liberi maturiorem ætatem consecuti, sponte consentiant, ut videre est serm. eius 49. de diuersis; tom. 10. Et apud S. Gregor. lib. 7. Epist. 32. indict. 2. *Melius est, inquit, in dubijs non distinctionem sequi, sed ad benignas partes inflecti; dum ex parua rei cessione Ecclesia non grauatur, & orphano, atque pauperi misericorditer subuenitur.*

Dico II. Similiter liberi ex hac vita decessuri, parentibus suis, si ad victum, vel statum suum indigent, etiam supra ciuilem legitimam relinquere debent: Sin verò indigentes non sint, satius est, sola ipsis legitima relictâ, reliquum in magis indigentes, pauperes, aliæque causas pias distribuere. Addit verò Molanus cap. 19. Et si testator diues proprios descendentes habeat, quibus bona sua relinquit: decens tamen esse, ob honorem, & reuerentiam parentibus debitam, ut eorum etiam in testamento memor, quippiam legat ingratitudinis signum.

Dico III. Quamuis testator numerosam prolem habeat, expedit tamen plerumque, ad piam causam legando Christum Dominum filiis coheredem instituere. Quia id non solum animæ testatoris, sed ipsis quoque liberis expedit: vt hac veluti erga Christum commendatione, ipsorum tutor, & contra omnes insidias protector esse velit, sicuti S. annotauit Cyprianus in lib. de opere & eleemosynis, c. 7. S. Chrysost. hom. 51. ad pop. Antiochenum, & videri possunt de hoc argumento S. Hieronym. epist. 150. ad Hedibiam, q. 1. S. Basil. hom. 7. in diuites auaros, prope finem. S. August. expos. in Psal. 38. in illa verba: *Thesaurizat, & ignorat: cui congregabit.* Et in Psal. 48. in illa verba: *Relinquent alienis diuitias suas.* Saluianus Massiliensis Episcopus lib. 3. ad Ecclesiam Catholicam. Dixi autem plerumque id expedire: Si enim bona libetis



ad sustentationem honestam omnino necessaria videantur, ea legatis minuenda non esse, constat ex l. asfert. Non debet tamen hæc liberorum necessitas testatori cordato, atque in Deum confidenti maior apparere, quàm re ipsa sit: quominus saltem aliquam partem, secundum prudentis viri arbitrium, pauperibus pro anima sua relinquat; nisi clarum sit, filiis omnia necessaria fore.

Dico IV. Quamuis secundum civiles leges, testator uxori suæ, item fratribus, & sororibus suis relinquere nihil cogatur, tamen ius naturæ postulare videtur, ut illis, si indigentes sint, partem aliquam bonorum relinquat. Ita docet idem Molanus c. 20. & 22. ex S. August. qui, ut Possidonius testatur in vita eius cap. 24. hæreditates Ecclesiæ relictas, reddidit non solum testatoris parentibus, liberis; sed etiam affinis, id est, valde coniunctis personis, si quando æquum & iustum videbat, ab ijs potius possideri. Confirmatur exinde, quia tum cõiunx coniugi, quocum est veluti vna caro; tum frater fratri, aut sorori inopi alimenta necessaria ministrare cogitur, sicuti dixi tract. præced. cap. 13. n. 5. Ergo etiam dicellurus relinquere debet: modò tali legato seu relicto digni sint.

Dico V. Si fratres, sorores, aliique cognati indigentes non sint, expedit propriam animam hæredem bonorum instituere, seu bona pauperibus, aliisque piis causis applicare. Ratio est: Quia testator descendantibus, & ascendentibus orbatus, aliis cognatis in hoc casu nihil debet: cum interim ex lege charitatis, & misericordiæ obligatus sit pauperibus, quin & propriæ animæ suæ, ut à peccatis redimatur: nam *redemptio animæ viri, diuina eius*. Prouerb. 13. quem locum ad hoc propositum allegat S. August. hom. 19. inter 50. Neque refert, quod vxor, cognati, & amici, si nihil ipsis relinquatur, querelas ac murmura sparsuri putentur: hæc enim interdum negligi possunt, quando nullam iustam conquerendi causam habent: interdum verò à testatore caueri consultum est, si eiusmodi personæ sanguine, amicitia, aut obsequiis coniunctæ legatis honorentur; hæreditate ipsa, ut dixi, pauperibus, aliisque causis piis relictæ, in animæ salutem.

18 Dico VI. Expedit magis diuitibus, ut bona, quibus abundant, tempore vitæ suæ in pauperes, & alias causas pias erogent, quàm ut testamento relinquunt, post mortem tuam distribuenda. Ita notauit Saluianus cit. lib. 3. in princip. Gabr. in can. Missæ, lect. 58. Ioan. Faber. Instit. de legatis, §. peculium. Ratio est, partim quia elemosynæ, quæ à viuente erogantur, maioris meriti & satisfactionis sunt apud Deum, quàm si in tempus mortis differantur: quando homo dat, quia retinere diutius non potest, sicuti S. Lucia ad matrem Eutychiæ dixisse narratur in histor. eius XIII. die Decembris: *Non satis Deo charus est, qui illi hoc dat, quod secum ferre non potest; si vis Deo gratum esse, hoc illi da, quo adhuc viuis potes*: partim quia hæredes & testamentarij sæpe non integre, atque fideliter relicta pia exequuntur.

19 Dico VII. Si de bonis suis testari homines velint, præsertim ad causas pias; monendi sunt, ut ne in mortis agonem differant, sed id facere aggrediantur, antequam mortis periculum timetur, dum sensus & ratio vigent, ut quietius, meliore consilio, & maiore apud Deum merito perficiant, tempore quo in gratia Dei, præmissa etiam sacra Confessione ac Communione, constitutos se esse existimant. qua de re Ioan. Molanus c. 47. & 48. Gabr. in canonem Missæ, lect. 58.

20 Ad extremum moneo, ut Confessarij, præsertim Religiosi, maiore spiritu, libertate, & fructu hominum animas iuuare possint, consultum non esse, ut confessioni testamentorum ipsi intersint, aut testatori in particulari suadeant, quibus hæreditas, vel legata relinquere debeant, præsertim propriis Ecclesiis, aut Conuenti-

bus: sed expedit ferme in genere tantum pias dispositiones commendare; nisi testator consilium petens dirigendus sit, ipsique explicandum, quidnam, consideratis omnibus, honestius, ad animæ eius salutem utilius, Deoque gratius existimetur. Ad quam rem accommodari potest, quod legimus apud S. Lucam c. 12. ubi rogante quodam; *Magister, dic fratri meo, ut diuidat mecum hereditatem*, respondit Christus: *Homo, quis me constituit iudicem, vel diuisorem inter vos? Dixitque ad illos, videte, & caute ab omni auaritia*. Et quæ scripsit S. Ambros. lib. 3. de offic. cap. 9. *In supremo fine vitæ positos suum habere iudicium, ut libere testentur quod sentiunt, qui postea non sint emendaturi: cum honestum non sit compendia aliis vel debita, vel parata auertere: cum sacerdotis, vel ministri sit prodesse, si fieri possit omnibus, obesse nemini*. Et paulò post: *In causis pecuniariis interuenire non est sacerdotis, in quibus non potest fieri, quin frequenter ledatur alter, qui vincitur, quoniam intercessoris beneficio se victum arbitratur*. Et subiungit: *In causa autem pecunie odia quarere, insipientia est*. Videri etiam potest Ioannes Polanchus de methodo iuuandi mortuos, cap. 3.

## CAP. VI.

## De Hæredibus ab intestato venientibus.

## SUMMARIUM.

- 1 Liberi legitimi ante omnes alios, succedunt parenti ab intestato; & in demortuorum locum nepotes.
- 2 Deficientibus descendantibus veniunt pater & mater defuncti, & in eorum locum aut, & auia.
- 3 Fratres & sorores ex utraque parte coniuncti præferuntur ijs, qui ex vna tantum parte coniuncti sunt.
- 4 Liberi duorum fratrum in capita, non in stirpes succedunt.
- 5 Deficientibus consanguineis intra 10 gradus, succedit vxor; ea etiam deficiente, fiscus.
- 6 Heres suus dominum hereditatis etiam ante eius aditionem acquirit.
- 7 Quis ere alieno gravatus hæreditatem sibi delatam repudiat, non censetur id agere in fraudem creditorum: sed in conscientia foro videtur aduersus iustitiam delinquere, si alioquin soluendo impotens sit.
- 8 Hæres hereditatem acceptando omnia in se debita & onera realia defuncti transfert; prædatus tamen beneficio inuentarij consuecendi, & Falcidiæ detrahendæ.

Nullo condito testamento; aut condito quidem, sed illegitimè, aut postea rupto, aut irrito facto, succedunt hæredes ab intestato: ante omnes legitimi liberi, tum mares, tum fœminæ, æqualibus portionibus: in quorum mortuorum locum, adeoque in stirpes succedunt eorundem nepotes, sicuti habetur in Nouel. Iustiniani 118. collat. 9. c. 1.

Deficientibus autem descendantibus, veniunt pater & mater defuncti, si superstites sint; in defectum verò, ac locum eorundem succedunt aui, & auia: ad eum modum, quo præced. c. de legitima ascendentibus debita dictum fuit.

Si tamen defunctus bona seu à patre, seu à matre profecta, reliquerit, in illis auium paternum; in his maternum præferri, docet Bartol. l. post dotem, Cod. soluto matrimonio, & c. cui tamen aliqui repugnant, apud Minsing. cent. 6. obser. 55. Couar. in epist. de success. ab intestato, n. 3. Quod si vnà cum patre, aut matre; vel his deficientibus, vnà cum aui, vel auia adsint fratres, aut sorores ex utraque parte coniuncti; succedunt ipsi equaliter, siue in capita, iuxta Auth. defuncto, C. ad S. C. Tertullianum, & cit. Nouel. 118. de hæred. ab intestato, c. 2.

Tertiò, si neque descendantes, neque ascendentes hæredes adsint, succedunt fratres, & sorores, qui ex utraque parte defuncto coniuncti sunt, æquis portionibus; & excludunt eos, qui ex solo patre, vel sola matre



iuncti sunt, cit. Auth. 118. c. 3. & Auth. Itaque, C. communia de successione. Quod si vnus ex fratribus, vel sororibus vtrunque coniunctis mortuus liberos reliquerit, succedunt hi, loco parentis sui, cum patris non in capita, sed in stirpes, sicuti habetur in cit. c. 3. §. si autem defuncto, iunct. Gl. ver. fratres. Si tamen fratres, & sorores vtrunque coniuncti omnes mortui sint, tunc eorum liberi (exclusis patris ex vna parte coniunctis, Auth. cessante, C. de legit. hered.) non in stirpes, sed in capita; adeoque æquis portionibus succedere debent, secundum Carolinam constitutionem An. 1529. Spiræ in Comitibus editam. Ratio est: Quia duorum fratrum filij non parentum suorum loco; sed propriæ coniunctionis iure in hereditate succedunt: cum ergo æqualiter coniuncti sint, æquales etiam in hereditatis portione esse debent: licet contrarium senserit Glossator Accursius, eumque secutus Con- tius in cit. Nouel. 118.

Quartò, Deficientibus tam fratribus, & sororibus vtrunque coniunctis, quàm eorum legitimis liberis: tum demum veniunt fratres & sorores ex vna tantum parte coniuncti: sed hoc discrimine, vt qui ex parte patris coniuncti sunt, succedant in bonis à patre prouenientibus: & qui ex parte matris coniuncti sunt, in bonis à matre prouenientibus: In reliquis verò bonis æqualiter omnes, vt docet Gl. in cit. Auth. itaque, C. communia de successione.

Quintò, Si etiam fratres, ac sorores, eorumque filij deficiant, successio deuoluitur ad propinquiores collaterales, vsque ad gradum decimum, ciuili computatione: & fit talis successio in capita, nulla habita ratione, vtrum ex vtraque, an ex vna tantum parte coniuncti sint. Ita habetur in cit. Authent. de heredibus ab intestato, cap. 3. §. si verò neque fratres, & Authent. post fratres, C. de legitimis heredibus. Plura vide apud Couar. in epitome de successione ab intestato, Mol. di. p. 164. & seqq.

Sextò, Deficientibus heredibus in linea transversali vsque ad 10. gradum, succedit coniunx defuncti: nisi inter eos fuerit diuortium, l. vn. ff. & C. vnde vir, & vxor. Quod si vxor marito sine dote nupsit, ei præmortuo, & consanguineo heredes qualescunque relinquenti, succedit vxor, si inops sit, in quarta bonorum parte: tali adhibita moderatione, vt si liberi ex defuncto superstites sint, solus vsus fructus ad ipsam, dum viuit, pertineat; deinde, si plures, quàm tres liberi adsint, ipsa cum eisdem in capita succedat. Ita habetur in Auth. de exhib. reis, §. quoniam verò, Auth. præterea, C. vnde vir, & vxor, & Auth. vt liceat matri & auix, &c. §. quia verò legem. Et similis ratio est, si vxor locuples præmoriatur, relicto marito inope.

Septimò, Si neque consanguinei, neque coniunx extant, tunc fiscus secularis succedit in omnibus bonis laici ab intestato defuncti: Ecclesiasticus autem in bonis Clerici, l. vn. C. vnde vir & vxor, l. vacantia, C. de bonis vacantibus, lib. 10.

His adde, quòd mulier, quæ susceptis ex priore matrimonio liberis ad secundas nuptias transiit, quidquid à priore marito quacunque donatione aut testamento acquisiuit, eiusdem matrimonij liberis seruare & relinquere debeat, omni alienatione penitus interdicta, l. femina, C. de secundis nuptiis. Similiter & maritus, si quæ bona à priore vxore ad ipsum deuenerant, postea ad secundas nuptias transiens, seruare ea debet liberis prioris matrimonij, l. generaliter. Quid. eod. Sin verò vir, aut mulier post mortem coniugis sui ad secundas nuptias non transeat, licentiam habet bona, quæ à coniuge suo profectas, arbitrato suo alienandi ac consumendi: si tamen non alienauerit, liberi ea sibi vendicare possunt, tametsi hereditatem patris, aut matris adierint, Auth. heres, iunct. §. seq. & Auth. vxore mortua, C. eod.

Ad extremum addenda est ea heredum distinctio:

quòd alius sit hæres suus, alius non suus. Suus hæres dicitur proximus descendens, in potestate defuncti mortis tempore existens: cui etiam annumerari debent posthumi, legitimati per subsequens matrimonium, vel per oblationem ad curiam, vt habetur Instit. de heredit. quæ ab intestato, §. intestatorum, & seqq. Habet autem hæres suus id priuilegium speciale, quòd prorsus vna persona cum defuncto censetur, quòd ad bonorum successionem attinet; adeò quidem, vt eorum dominium, antequam hereditatem adeat, sibi comparet: & si è viuis interim excedat, ad quoscunque hæredes non minùs, quàm alia bona ac iura sua transmittat. Cuiusmodi priuilegium competit etiam filio, qui Religionem professus, vel Episcopus creatus est; nihil obstante, quòd patria idcirco potestate egrediatur, sicuti videre est apud Gomez lib. 1. resol. c. 9. n. 11. Mol. disp. 179. Quamuis interim nihil obstat, quominus filius, si hereditati se non immisceat, eam repudiare possit, perinde ac si ab initio acquisita ipsi non fuerit, vt docet Gomez n. 22. Mol. disp. 180. Sanchez lib. 6. de matrim. disp. 4. n. 8. in fine.

Hæres non suus (quales omnes alij hæredes dicuntur) hereditatis dominium non antè acquirit, quàm eam adeat, id est, voluntariè acceptet, profitendo se hæredem esse velle, §. ult. Instit. de heredum qualitate. Tametsi res ad hereditatem pertinentes nondum apprehenderit, adeoque earum possessionem non acquisiuerit, sicuti expresse habetur in l. cum hæredes, ff. de acquirenda posses. Datæque ei anni spatium, posteaquam hereditatem sibi delatam cognouit, ad deliberandum, vtrum eam adire velit, necne: & vsque ad complementum eiusdem anni, potestatem adeundi ad hæredes transmittit, si interea cum è viuis excedere contingat, l. cum in antiquioribus, C. de iure deliberandi, & ex communi docet Gomez cit. c. 9. nu. 51.

Atque adeò in hæredis libera potestate est hereditatem acceptare, vel non: vt si repudiet, nullam omnino obligationem contrahat: quare habetur in l. qui autem, ff. quæ in fraudem creditorum: Si quis debitis obstrictus, hereditatem, vel legatum sibi delatum repudiet, vt ea heredibus ab intestato proueniant, non censeri aliquid in fraudem creditorum alienatum: quia non fraudantur creditores, cum quid non acquiritur à debitore: sed cum quid de bonis diminuitur, reg. 176. ff. Nihilominus talis in conscientia foro iniuriam mortalem creditoribus facere, ideòque ad damni compensationem obligari videtur, teste Mol. tom. 2. disp. 435. Sanchez lib. 6. de matrim. disp. 4. num. 9. Propterea quòd debitor ex iustitia obligatus sit, quemuis facili sibi possibilem modum adhibere lucrandi bona, v. g. artificio, quo creditoribus suis satisfacere possit. Qui enim obligatur aliquid facere, videlicet soluere creditori, debet etiam adhibere medium necessarium ad solutionem faciendam.

At verò postquam hæres siue ex testamento, siue ab intestato succedens, hereditatem adiit, seu acceptauit, non solum omnia commoda & iura defuncti in se transfert: sed simul etiam reales obligationes, ac debita. Interim tamen duo priuilegia habet: Primum, quòd si intra 30. dies, posteaquam hereditatem ad se delatam cognouit, inuentarium conficere cœperit, & intra alios 60. dies compleuerit, omnino securus existat, vt defuncti creditoribus supra vires hereditatis soluere obligatus non sit, l. ult. §. sin autem dubius, C. de iure deliberandi. Cuiusmodi priuilegium Ecclesiæ etiam competit (non minùs, quàm fisco) si hæres instituta sit licet inuentarium non conficiat, sicuti cum Bartol. in l. 1. C. de sacrosanct. Eccl. docet Abbas in c. 1. n. 4. de testam. contra Couar. c. 1. de testam. nu. 17. Imò multi censent, Abb. in c. 1. n. 4. de solut. & c. Raynaldus, n. 14. de testam. Syl. ver. vsura, 6. q. 10. Sanch. lib. 4. mor. c. 15. n. 37. Valq.



de testam. c. 9. num. 87. idem in foro conscientie de quavis priuata persona sentiendum esse, quod supra vires hereditatis nunquam teneatur: quia ius civile fundatur in fraudis presumptione, quæ est contra heredem, si inuentarium non confecerit: præsumptio autem cedit veritati, c. tua, de vsuris, in fine. quamuis contrarium, quod attinet ad creditorum debita, sentiat Couar. c. 1. de testam. n. 20. Molin. tom. 1. tract. 2. disput. 217. conclus. 1.

Alterum priuilegium. Quod deductis expensis funeris, itemque solutis debitis, &c. saltem quartam partem restantis hereditatis obtinere debeat hæres vnus, vel plures: si eam non habeat, de legatis detrahere possit, beneficio legis Falcidie, tit. ff. & Cod. Ad legem Falcidiam. diciturque hæc Falcidie detractio, à Falcidio Consule, huius legis auctore.

## CAP. VII.

## De renuntiationibus hereditatum.

## SUMMARIUM.

- 1 Renuntiatio hereditatis futura nullius roboris est, nisi iuramento firmata sit; vel nisi quis in ipsa actione testamenti liberè in sui præteritionem consentiat.
- 2 Renuntiationes strictæ interpretationis esse debent.
- 3 Omne pactum, vel donatio de alterius viuentis hereditate irrita est; nisi fiat in fauorem alicuius Communitatis, v. g. Conuentus regularis; vel si ob necessitatem, quia secundum Ordinis Constitutiones de omnibus iuribus acquisitis, & acquirendis aliquis disponere debet.
- 4 Renuntiatio, vel obligatio, quamuis iurata, irrita est, quæ fit ab ingredientibus Religionem, nisi fiat cum requisita forma in Trident. sess. 25. c. 16. de Regul.
- 5 Tridentina hæc constitutio locum non habet in renuntiationibus, aliisve dispositionibus, quibus, absolute loquendo, nulla obligatio imponitur renuntianti, aut disponenti.
- 6 Renuntiatio beneficij Ecclesiastici ante duos menses professioni proximis fieri non potest: in Societate autem IESV non vacant beneficia Nouitiorum durante biennio probationis: eo autem expleto, statim resignari debent.
- 7 Tridentina Constitutio irritas reddens renuntiationes, locum etiam habet in ijs, quæ fiunt ante ingressum, seu assumptionem habitus religiosi, tamen causa ingrediendi. Quamuis sententia opposita etiam probabilis sit.
- 8 Irrita est renuntiatio, aut donatio bonorum acquiritorum, tametsi facta sit sub conditione regressus, seu recuperationis, si professio non sequatur.
- 9 Renuntiationes à Candidatis Societatis IESV factæ cum conditione regressus, omnino repugnant Constitutionibus eiusdem Societatis.
- 10 Si renuntiatio, vel donatio bonorum post primum annum Nouitatus, vel post edita vota simplicia in Societate IESV, facta fuerit in fauorem Collegij eiusdem Societatis, & postea contingat eum, qui renuntiabat, dimitti, nihil ipsi restituendum est.
- 11 Locum etiam habere videtur hæc Constitutio, si Societatis nostre Candidati donationes, vel renuntiationes bonorum faciant aliter, quam eiusdem Societatis constitutiones requirunt.
- 12 Hereditas alia delata est, & alia adita.
- 13 Potest aliquis donare, saltem ad pias causas, hereditatem, si quæcunque illi ante mortem obuenerit.
- 14 Professurus in Religione Mendicantium pacisci potest cum patre, ut veluti in premium renuntiationis paterna hereditas, aliquid det ad piam causam; quam ipse filius designat.
- 15 Non potest aliquis donare hereditatem obuenturam post mortem suam, aut Religionis professionem.

**Q**UÆSTIO PRIMA. An, & quatenus iure subsistat, si hæres necessarius iuri successionis, seu hereditati futuræ renuntiet? siue id fiat, quod nihil omnino accipere velit; siue quod parte bonorum, v. g. dote, aut donatione propter nuptias contentus esse velit. Respondeo: Eiusmodi renuntiatio si nuda sit, & iuramento non firmata, nullius roboris existit. Ita habetur in l. qui superstitis, ff. de acquir. hered. l. ult. ff. de suis, & legit.

hered. l. si quando, §. illud, C. de inoffic. testam. l. pactum dotali, Cod. de collationib. & videri potest Couar. in c. quamuis pactum, p. 3. princ. Molina tract. 2. tom. 3. priore, disp. 579. num. 11. Nam ita iure civili, propter bonum publicum, statutum est, ut hereditas pactis nec dari, nec auferri possit, vti docent DD. in l. hereditas. C. de pactis conuentis, Gl. in cit. l. si quando ve. r. grauari.

Sed exceptiones aliquæ sunt: Prima. Si quis in ipso actu testandi renuntiet iuri successionis suæ; vel post conditum testamentum, in quo præteritus est, præteritionem approbet, valida est renuntiatio, vti colligitur ex l. non putauit, §. si quis sua manu, ff. de bonorum possessione contra tabulas, & ex communi docet Gomez 1. resol. c. 11. num. 14. Molin. tom. 1. tract. 2. d. 175. ver. Dixi in euentibus, Couar. c. Raynaldus, de testam. §. 2. num. 2.

Secunda. Si hæres necessarius, puta filius, viuentem adhuc patre, integram portionem accepit, quæ ipsi iure debetur, reliquæ hereditati validè renuntiat, secundum Bartolum in addit. Gloss. ad cit. l. si quando, §. illud, Abb. volum. 2. consil. 116. Clarum ver. testam. quæst. 44. Verum si bona patris postea incrementum capiant, poterit filius, non obstante renuntiatione illa nuda ac simplici, petere legitimam portionem augmenti eius, tempore mortis apparentis, vti notauit Couar. cit. c. quamuis, p. 3. §. 1. num. 3. Mol. cit. to. 3. d. 579. n. 12.

Tertia. Si filius v. g. cum iuramento renuntiavit hereditati, vel parti eius, valida est renuntiatio, vti habetur expressè in cap. quamuis pactum, de pactis in 6. vbi etiam ratio adiungitur; cum non vergat in æterna salutis dispendium, nec redundet in alterius detrimentum, supple iniustum. Quod ideo addo, quia nihil obstat, quominus renuntiatio cedat in detrimentum eorum, qui ipsi filio, v. g. nisi renuntiasset, successuri essent: quandoquidem his nullum ius hereditatis competit, nisi dependenter à persona filij: consequenter si filius seu pacto, seu delicto priuetur iure hereditatis, nulla idcirco iniuria inferitur alijs. Quamobrem nepotes non possunt succedere aui, si pater eorum hereditati iuratus renuntiavit; esto ante auium mortuus fuerit, sicutum Anton. Gomez rectè docet Molina cit. disput. 579. num. 4. contra Vasq. tract. de testam. c. 6. §. 2. dub. 2. num. 16. Couar. cit. cap. quamuis, p. 3. §. 2. num. 4. Azor. tom. 2. lib. 2. c. 28. quæst. 13. Deinde si filius hereditati sibi deferendæ, v. g. maternæ, cum iuramento renuntiavit, eo ipso pater vsufructu priuatur bonorum maternorum, quæ filio, nisi renuntiasset, successionis iure deberentur, quæ de re idem Couar. num. 3. resp. ad 2. Molina num. 18.

Alioquin verò renuntiatio, cum odiosa, & contra ius commune sit, strictæ interpretationis esse debet, ut non extendatur ultra terminos, secundum verborum proprietatem, aut communem renuntiandi consuetudinem expressos. Quare non obstat, quominus filius, qui successionis patris tam ex testamento, quam ab intestato renuntiavit, ab eodem patre, mutata voluntate, institui possit, vti docet ex communi Molina num. 23. Sanchez l. 7. moral. c. 7. num. 10. Quia quicquid fauori suo renuntiare, & obligationem etiam iuramento firmatam remittere potest; tametsi renuntiatio in fauorem alterius, v. g. fratris facta sit. Secundò non obstat in hoc ipso casu, quo renuntiatio in fauorem alterius, puta fratris facta est, quominus eo mortuo ante patrem, is qui renuntiavit, in paterna hereditate succedere possit, imò ex testamento instituendus sit: quandoquidem causa renuntiationis cessauit, sicuti latè Couarrunias cit. p. 3. §. 3. num. 4. Molina cit. disput. 579. num. 19. Tertiò non obstat renuntiatio, quominus filius v. g. succedere possit fratri suo ex testamento, vel ab intestato, si



ad eum hereditas prius deuoluta erat, teste Couarru. cit. §. 3. num. 2. Molina num. 20. Sanchez l. 7. moralium, c. 7. num. 6. Quartò non obstat, quominus succedere possit in iis bonis, quæ pater ad secundas nuptias transiens liberis ex priore matrimonio susceptis relinquere cogitur, vti docent Couar. cit. §. 3. num. 1. Mol. num. 21. Gaill. lib. 2. obser. 98. num. 10. Sanchez num. 7. Quia in his filius non succedit iure sanguinis, cui renuntiavit; sed propter ciuiles constitutiones, ac fauores. Qua simili ratione renuntiatio hereditatis non extenditur ad bona feudalia, quippe quæ non iure hereditario, sed ex pacto & providentia deferuntur, teste eodem Couar. n. 9. Mol. n. 22. Sanch. n. 8. Azorq. 12. Denique non extenditur ad necessaria alimenta, quippe quæ naturali iure debentur, idque sumitur ex c. cum quidam, §. vlt. de iure iur. l. de alimentis, C. de transact. & docet ex communi Molina n. 13. Sanchez num. 5. Gaill. l. 2. obser. 147. num. 14. qui id extendit ad necessariam dotem, quippe quæ succedit loco alimentorum.

**QVÆSTIO SECUNDA.** Vtrum valeat pactum, aut quævis obligatio circa hereditatem viuentis alteri cedendam? Vt si Titius hereditatem, quam sperat à Sempronio, seu ab intestato, seu ex testamento sibi obtenturam, promittat aut obliget Caio. Respondetur, 3. Omne eiusmodi pactum, donatione, vel hypothecam circa hereditatem alterius personæ viuentis, ipso iure irritam esse. Ita habetur in l. vlt. C. de pactis, quia huiusmodi pactioes odiosa esse videntur, & plena tristissimi et periculosi euentus: Idque propter insidias, quæ parantur eius vitæ, super cuius bonis paciscuntur, ait Gl. ibid.

Limita primò; Nisi consensus eius, de cuius hereditate agitur, accedat; isque vsque ad mortem in ea voluntate perseueret; tunc morte confirmabitur pactum, vti habetur in cit. l. vlt. Quod si ille, v. g. pater, diuidentibus inter se seu paciscentibus de paterna hereditate, iurauerit, se consensum non reuocaturum; per iurum quidem fiet reuocando; sed reuocatio consensus valida erit, vti constat ex ijs, quæ dicam lib. seq. tract. 3. c. 8. num. 5. Quare etiam paciscentes fratres, licet inter se iurati, omni obligatione liberabuntur; quia eorum pactio, cum addito iuramento, fuit facta dependentè à patris consensu, ambulatorio vsque ad vltimum vitæ spiritum: siquidem alio modo pacisci non poterant. Atque ita ex communi docet Molina cit. disp. 579. num. 40. Sanchez lib. 7. moral. c. 2. num. 18.

Limita secundò; Nisi renuntiatio, vel pactum quodlibet fiat circa hereditatem personæ incertæ: vt si quis Titio donet hereditatem quamlibet, quæ ipsi intra annum, vel dum victurus est, obtulerit. Ita sumitur ex l. 3. §. de illo, ff. pro socio, vbi approbatur hæc conventio societatis: Si qua iusta hereditas alterutri obtulerit, communis sit: vbi Gloss. monet, intelligendum esse de hereditate incerti hominis. Idemque ex communi Doctorum sententia docent Sanchez cit. c. 2. num. 31. Molina tract. 2. disp. 412. & 579. num. 38. Ratio verò est; Quia si persona certa non sit, de cuius hereditate conuenitur, non ita captanda mortis periculum timeri potest. Hinc sequitur, licet hereditas à certo homine obtentura hypotheca subijci non possit, tamen in generali omnium tum præsentium, tum futurorum bonorum obligatione, venire etiam hereditates, sicuti annotauit Sanchez num. 5.

Limita tertio; Quod renuntiatio, vel pactum circa hereditatem personæ certæ, fieri possit in fauorem Communitatis, seu Collegij: vt si quis Conuentui religioso donet obtenturam sibi hereditatem patris, vel cognati sui; valida est donatio, seu renuntiatio, quamuis non requisito consensu eius, de cuius hereditate agitur. Ita cum Corneo in l. vlt. C. de pactis, fallentia 2. & alijs, docet Sanchez cit. c. 2. n. 55. Nam hoc casu cessat ratio

cit. l. vlt. ne ansa accipiatur machinandi insidias vitæ alienæ. Quod enim Collegio datur, cum singulorum non sit, quasi nemini datur, ait Gl. in c. cum venisset, ver. tenebat, de restit. spoliatorum. arg. l. sed si hac, §. Qui manumittitur, ff. de in ius vocando. Et naturale vitium est, negligi quod communiter possidetur, l. 2. C. Quando, & quibus quarta pars, lib. 10. Et si verò de omni Communitate dici possit, cessare in ea periculum insidiarum, seu votum captandæ mortis alienæ; magis tamen in Ecclesia, seu clericorum Conuentu, de quibus nihil sinistrum facile suspicari licet, secundum Gl. in c. absit, ver. sinistrum, 11. q. 3. & maximè in Conuentu Religiosorum, qui cum propria propter Christum reliquerint, non censentur iniuste inhiare alienis. Confirmatur: Tametsi ad similitudinem ciuiliū legum, canonico iure statutum sit c. 2. de concess. præben. ne beneficium alicui tribuatur, vel promittatur, viuenti adhuc priore beneficiato; Ne desiderare quis mortem proximi videatur, in cuius locum & beneficium se credit successurum: Attamen in c. consultationibus, de donat. permittitur, vt cum auctoritate Episcopi, Ecclesiæ, viuente adhuc Rectore, atque in possessione permanente, locis religiosis concedi possint: quod singulariter annotauit Gl. cit. in c. cum venisset, ibid. Abbas n. 10. de restit. spoliatorum.

Limita quartò: Si aliquis ante ingressum, vel professionem in Religione, vi accidit in Societate Iesv, disponere debeat in causas pias de omnibus bonis & iuribus suis tum acquisitis tum acquirendis, sine vlla spe ea recuperandi, vti habetur in Const. Societatis p. 3. c. 1. §. 7. cum declarat. lit. F. & in exam. generali c. 4. n. 1. cōsequenter etiā disponere potest renuntiando hereditatibus seu in genere, seu in specie: non tantum in fauorem alicuius Ecclesiæ, aut loci pij: sed etiam in fauorem certæ personæ pauperis: modò renuntiatio vel donatio fiat intuitu pietatis, vti explicat Sanchez cit. c. 2. num. 54. & seqq. Probatur primò: Quia certum est, quod supremus Princeps derogare possit l. vlt. C. de pactis, & statuere, vt pacta futuræ successionis valeant, non requisito consensu eius, de cuius hereditate agitur: cum id iuri naturali, aut bonis moribus naturalibus simpliciter non repugnet, sed tantum spectata præsumptione legum ciuiliū, quæ variatis circumstantiis facile tolli potest. Atqui summi Pontifices approbârunt Constitutiones Societatis Iesv, quibus præcipitur ante ingressum, vel post ingressum fieri renuntiationem omnium bonorum & iurium, etiam speratorū, in fauorem Communitatis piæ, aut personæ particularis pauperis: idque ad consequendam Christi amore perfectam paupertatem, abdicata omni spe bonorum temporalium. Ergo talis renuntiatio ob publicum Religionis commodum introducta, & Ecclesiastica auctoritate, vsque approbata, vim suam habere debet. Probatur secundò: Pactum de hereditate tertie personæ viuentis validum est, quando non per se ac principaliter fit, sed per consequentiam, seu propter necessitatem alterius contractus, arg. l. si quis seruum, vbi id notat Gl. ver. restitutum iri, Bartolus & alij, ff. de actionibus empti. At verò in nostro casu renuntiatio hereditatis speratæ, accessorie fit, & propter necessitatem; quia ad perfectam paupertatem consequendam secundum constitutiones Societatis Iesv exigitur abdicatio & renuntiatio omnium iurium, sine vlla spe aliquid consequendi: in tali autem abdicatione veluti pars quædam continetur renuntiatio hereditatis. Ergo ea valida est.

**QVÆSTIO TERTIA.** Quousque se extendat constitutio Trident. irritam reddens quamcumque renuntiationem, quæ sit causa Religionis ingrediendæ, aut profitendæ? Verba sunt ista sess. 25. c. 16. de Regul. Nulla quoque renuntiatio, aut obligatio antea (id est, ante expletum probationis annū) facta, etiam cum iuramento,



vel in fauorem cuiuscunque causæ pie, valeat: nisi cum licentia Episcopi, sine eius Vicarij, fiat intra duos menses proximos ante professionem: ac non alias intelligatur effectum sortiri, nisi secuta professione: aliter verò facta, etiamsi cum huius fauore expressa renuntiatione, sit irrita, & nullius effectus.

5 Respondeo & dico I. Constitutio hæc intelligi debet de iis tantum renuntiationibus, aut donationibus, quæ obligationem inducunt renuntianti, donanti, &c. non item de testamentis, codicillis, aut donationibus causa mortis: hæc enim omni iure firma manent, si facta fuerint ante professionem, vti ex communi docent Sanchez lib. 7. c. 5. num. 13. Rodriq. tom. 2. regul. q. 47. a. 10. Molin. tom. 1. tract. 2. disp. 139. ver. Ambiget fortasse: Quia ratio constitutionis Tridentinæ est; ne Nouitijs aliqua persistendi, & profitendi Religionem necessitas incumbat, si videant se beneficiis, aut hereditatibus, alijsve bonis per renuntiationem spoliatos: hæc autem ratio cessat in vltimis voluntatibus, quippe quæ usque ad professionem reuocabiles sunt. Quare valet adhuc hodie testamentum à Nouitio conditum; neque rumpitur secuta professione, tamen si Monasterium in eo præteritum fuerit.

Neque obstat, quod aliqui obijciunt, rumpi testamentum agnatione posthumi præteriti, l. 1. & 3. ff. de iniusto, rupto, irrito facto testam. Monasterium autem loco filij censetur, Authen. Nisi rogati, Cod. ad SC. Trebellian. Responderetur enim, Monasterium loco filij censeri iis tantum casibus, qui iure expressi sunt. Videri potest Couarruu. cap. 2. de testam. num. 8. Nauar. comment. 2. de Regular. nu. 51. Molina cit. disput. 139. vbi monet: Ijs, qui ad Societatem nostram suscipiendi sunt, consultum non esse ante ingressum, testamentum condere, aut mortis causa donare: quandoquidem in ingressu sub obedientiam, promittere debebunt, se post primum annum probationis, vel postea cum per Superiorem iniunctum ipsis fuerit, bona sua relicturos & distributuros, si ante ingressum à se non abdicarant. Ex quo etiam sequitur, contra hanc promissionem suam facturum Nouitium Societatis, si tempore probationis infirmum Superiore testamentum, vel aliam dispositionem vltimam, seu relatum in tempus mortis suæ condere audeat: quare hoc ipso Societate se indignum indicaret, nisi testamentum statim reuocare vellet.

Dico II. Constitutione Tridentina non prohibentur obligationes, seu contractus reciproci, quibus mutuo aliquid datur, & recipitur, puta emptionis, permutationis, locationis. Ita ex communi Sanchez lib. 7. c. 5. n. 32. Idemque puto dicendum de contractu mutui: cum & in eo tantumdem recipiatur, quantum datum est.

Dico III. Eo decreto Tridentino non comprehenditur donatio modica, quæ Monasterio, vel certæ personæ in ingressu Nouitiatus fit; quia cessat ratio prohibitionis, *Ne hac occasione Nouitius discedere nequeat, quod totam, vel maiorem partem substantiæ suæ Monasterium possideat, nec facile, si discesserit, recuperare possit.* Multo minus parentes Nouitij quæcunque donationem Monasterio facere prohibentur; modò ea fiat absolute, non autem vt in legitimam portionem filij computetur. sic enim Nouitius, & non ipsi parentes Monasterio donare censentur qua de re Sanchez nu. 23.

6 Dico IV. Tridentino illo decreto comprehenditur renuntiatio beneficij Ecclesiastici; quæ ante duos menses proximos professioni fieri non potest. Ita Maiolus lib. 3. de irregul. c. 6. n. 2. Rodriq. to. 1. regul. q. 37. a. 2. Sanchez cit. c. 5. num. 37. Nam etiam beneficij renuntiatio est amissio magni iuris, ob quam libertas à Religione egrediendi impeditur. Porro intra duos menses professioni proximos, liberum esse renuntiare beneficio in manibus Ordinarij, inde probatur, contra Rodriq. loc. cit. Quia iure antiquo renuntiare Nouitius poterat

toto Nouitiatus tempore, iuxta c. beneficium, de Regular. in 6. Beneficium illius, qui Religionem ingreditur, non est infra probationis annum alicui conferendum; sed interim eidem beneficio per alium deferri debet, assignata congrua de illius prouentibus portione. Atqui intra duos menses professioni proximos nihil in Trid. Concilio circa renuntiationes immutatum esse, ex textu colligitur; modò consensus & auctoritas Episcopi interueniat.

Neque obstat, quod obijcit Rodriq. Renuntiationem secundum canones absolutam esse oportere, & non sub conditione regressus: talis autem renuntiatio intra duos menses fieri non posset, nisi sub conditione secuturæ professionis; alioquin beneficium resignanti restituendum esset, vti patet ex textu constit. Trident. Respondetur enim, has condiciones, quæ secundum iuris præscriptum insunt, rectè apponi posse in quacunque dispositione, etiam beneficij resignatione: cum etiamsi non apponerentur, tamen tacite intelligerentur. Non debet tamen Prælatus alteri conferre beneficium, donec professio sequatur; quia si antè contulisset, & professio secuta non esset, restituendum foret resignanti, vti bene docet Sanchez nu. 39. Fructus autem à die admittæ resignationis percepti pertinent ad beneficium: & seruantur successori, si nouus substituatur: sin verò Nouitius egressus beneficium recuperet, ad ipsum pertinere debent.

His duo adde: I. Fructus interim perceptos ex beneficio, deducta congrua portione quæ Vicario danda est, secuta professione Nouitij beneficiarij, ad Monasterium, tanquam hæredem, seu vniuersalem eius successorem pertinere, dummodo eiusmodi successionis capax sit. II. Si Nouitiatus ob iustam causam prorogetur, interim beneficium non vacat, neque alteri conferri potest: sicuti & vice versa, si ex Pontificis dispensatione tempus probationis remittatur, statim secuta professione beneficium vacat, & conferri potest. Quando enim in cit. c. beneficium dicitur, quod beneficium infra probationis annum conferri non debeat, id secundum hypothesein intelligitur, si, vt ordinariè fit, Nouitiatus annum duret. Ex quo rectè colligit Sanchez cit. lib. 7. c. 4. nu. 7. In Societate Iesu toto biennio probationis beneficia Nouitiorum non vacare, nec conferri posse: quia cum ex iuris concessione prorogatur tempus probationis, censetur quoque prorogari seu differri tempus vacationis beneficij. Attamen finito biennio probationis, priusquam vota simplicia edantur, beneficia Ecclesiastica resignanda esse, decretum est in Congregat. 5. generali Societatis Iesu, can. 5.

Dico V. Probabile est, mentem Concil. Trident. 7 fuisse, irritas reddere etiam eas iuratas renuntiationes, ac obligationes, quæ fiunt ante ingressum seu assumptionem habitus religiosi, tamen intuitu sex causæ saltem impulsu ingrediendi. qualis intentio in dubio præsumitur, si non multo tempore ante ingressum factæ sint. Ita docent Nauar. consil. 82. de regular. edit. 2. Rodriq. to. 2. regul. q. 47. a. 8. Molina to. 1. tr. 2. disp. 139. Sa ver. Religio, n. 5. Less. lib. 2. c. 41. n. 40. contra Menochium de arbitrar. Iudicium qq. centur. 5. casu 436. Vasq. de testam. c. 6. §. 2. dub. 12. Sanchez cit. lib. 7. cap. 5. num. 4. Probari debet, partim quia Concilium absolute loquitur de renuntiationibus, quæ fiunt ante duos menses professionem antecedentes, non exprimendo tempus nouitiatus: ergo ad illud Constitutio restringenda non est: partim quia alioquin Concilium intendens tueri libertatem Nouitiorum ad egrediendum, si Ordo accommodatus non videatur, finem suum non assequeretur, si ante ingressum renuntiationes bonorum fieri possent, intuitu seu causæ ingrediendi. Quare ita etiam declararunt Cardinales apud Marzyllam eodem cap. 16. ver. renuntiationes. Si donatio, vel renuntiatio facta fuerit intuitu Religionis in-



*grediende, tunc tanquam facta in fraudem huius canonis, videtur subesse eius dispositioni.*

Fateor tamen, contrariam sententiam esse etiam probabilem, quod intentio Concilij Trident. fuerit solum infirmare renuntiationes, & obligationes, quæ sunt post ingressum ad probationem: ita enim ex contextu, & connexion cap. 16. cum 15. colligitur, vti bene notauit Menochius loc. cit. Quare in conscientia tutus erit, qui donationem ante ingressum accepit, seu sit Monasterium, seu alius quispiam: donec per Iudicis sententiam rescindatur. Puto enim, quod Episcopus, re ad ipsum delata, rescindere posset donationem, si ante ingressum facta videatur in fraudem canonis Tridentini: idque ad tuendam intentionem & finem, quem Trident. Concilium spectabat.

8 Dico VI. Secundum Trident. Constitutionem irrita quoque est donatio, seu renuntiatio bonorum, quæ facta est sub conditione expressa, aut tacita secuturæ professionis: ita vt ea non secuta, donatio Corruat. Ita docet Nauar. lib. 3. consil. 82. de Regular. Sanch. lib. 7. moral. c. 5. num. 17. contra Mol. tom. 1. tr. 2. disput. 149. §. Quod ad Ecclesiam, Manochium num. 6. & 7. Nam Concilium vniuersim decernit, vt nulla renuntiatio, aut obligatio censeatur valida, nisi fiat intra duos menses proximos professioni, cum licentia Episcopi. Neque destratio, cur Concilium etiam talem conditionatam donationem, renuntiationemue comprehendere voluerit, si fiat ante tempus, aut sine solemnitate legitima: quia donantes seu renuntiantes ægrè contristant donatarios, præsertim sanguine iunctos, vt eos de possessione bonorum semel cæpta deiciant: cum id plerumque non sine querela & indignatione eorum fiat. Sin verò Monasterium talem donationem acceperit, ægrè adducetur ad restituendum, sed omnes modos adhibebit, quibus Nouitius ad proficendum inducatur.

Pro pleniore autem intellectu annotandum hoc loco est: Donationem ante, vel post ingressum Nouitius tribus modis fieri posse, seu Monasterio, seu alteri personæ, aut Collegio. Primò, Sine vilo respectu ad ingressum: ita vt perinde donatio fieret, etsi donator Religionem non ingrederetur. Et talis donatio omni iure valida est: sed non præsumitur tali modo fieri, si sit quantitatis notabilis, vti videre licet apud Sanchez cit. lib. 7. c. 1. nu. 6. Secundò, Fieri potest donatio seu renuntiatio intuitu ingressus, ita vt ea causa sit impulsiva tantum, quia ingrediens, aut ingressus absolute vult donare: quamuis non veller, nisi Religionem ingrederetur. Et hæc donatio omnium sententiâ irrita est, si fiat post ingressum sine solemnitate: & probabiliter etiam irrita est, si fiat ante ingressum, iuxta dicta præced. asserit. Tertiò, Fieri potest donatio, aut renuntiatio propter ingressum, tanquam causam finalem & principalem: ita vt professione non secuta, repeti queat tanquam datum ob causam, causâ non secutâ. Et talis etiam donatio facta post ingressum irrita omnino censi debet, nisi intra duos menses professionem antecedentes, cum Episcopi licentia confirmetur. Sin verò talis donatio, vel renuntiatio fiat ante ingressum, non est improbabile, validam esse; donec ab Episcopo rescindatur, si in fraudem canonis Trident. facta videatur, iuxta dicta præced. sect.

9 Aduerte autem hic obiter: Quod eiusmodi renuntiatio, aut donatio bonorum conditionata, reseruat iure recuperandi, siue fiat ante, siue post ingressum, omnino repugnat Constitutionibus Societati Iesv, cap. 4. exam. generalis, nu. 1. & 2. vbi præcipitur, quod ingressuri Societatem, antequam in domo aliqua, vel Collegio sub obedientia viuere incipiant, secundum consilium Christi Matth. 19. Si vis perfectus esse, vade, vende quæ habes, & da pauperibus, & sequere me: omnia bona temporalia dispensare debeat, iuxta

propriam deuotionem, & à se omnem fiduciam submouendo eadem vilo tempore recuperandi. Sin verò ob iustas causas eiusmodi distributio, seu dispensatio statim non fiat: promittat, se promptè relicturum omnia, sicuti dictum fuit, post vnum ab ingressu absolutum annum, quandocunque per Superiorem iniunctum ei fuerit.

Accedit etiam alia ratio, cur donationes, aut renuntiationes conditionatæ ab ingredientibus Societatem Iesv nequaquam fieri debeant: quia in ea professio, vel votorum formatorum emissio pluribus plerumque annis post Nouitium, & vota simplicia differuntur: quod si verò accidat post decem, vel duodecim v. g. annos ex Societate dimitti eum, qui bona sua sub conditione recuperandi donauerat, quam difficile, & non sine querela, etiam contra ipsam Societatem dimittentem, recuperare poterit?

Corollarium. Si donatio, aut renuntiatio bonorum post primum Nouitium annum: vel (vt communiter iam fieri solet) post edita vota simplicia, fiat in fauorem Societatis, seu Collegij, aut domus alicuius: atque accidat postea eum qui renuntiârat, ex Societate dimitti: nihil ei restituendum est. Ita colligitur ex Constit. p. 2. c. 3. §. 5. in fine, & declarauit P. N. Generalis bonæ memoriæ Claudius Aquauina, Anno 1584. apud Sanch. cit. lib. 7. c. 1. n. 34. eandemque doctrinam leges apud Molinam cit. disp. 139. ver. Nouitij ante ingressum. Ratio est: Quia renuntians, seu donans bona sua Societati, censeatur id facere secundum Constitutiones eiusdem Societatis Iesu: at verò Constitutiones exigunt donationem fieri absolute & irrevocabiler, seu sine vlla spe recuperandi: quod omnis tentatio ad seculum redeundi, ob amorem rerum temporalium, præclusa sit, vti colligitur ex cit. c. 4. exam. general. princ. & p. 3. constit. c. 1. §. 7.

Bene etiam admonet Molina cit. loco: Cum Constitutiones Societatis Iesv de eiusmodi renuntiationibus faciendis ad commune Ecclesiæ, ac Religionis bonum, finemque supernaturalem spectent, atque à sede Apostolica approbatæ sint: nihil omnino ob stare, quod donans seu renuntians vigesimum quintum ætatis annum necdum attigerit: vel quod donatio fuerit omnium bonorum, per quam ablata facultas testandi, &c. cum civilium legum constitutiones in eiusmodi causis, ac personis nihil præiudicare debeant.

Limitari tamen debet corollarium primò: Quod prudentiæ, æquitatis, & ædificationis: interdum etiam misericordiæ, ac charitatis lex postulet, vt eiusmodi homini, qui Societati donationem fecerat, aliquid ex ea restituatur, si dimittendus sit, vti significatur in 2. p. constit. c. 3. §. in declarat. lit. b. Secundò, Si donatio facta in fauorem Societatis Iesu fuit omnium bonorum, vel maioris partis, atque ex Societate egressurus aliunde sustentationem habiturus non sit, Societas donataria iure gratitudinis obligatur ad præstanda illi alimenta necessaria, quamdiu indigebit: alioquin donatio reuocari posset, iuxta ea, quæ dixi hoc lib. tract. præced. c. 12. n. 17. & in specie notauit Sanchez cit. c. 1. n. 39.

Dico VII. Si donatio, extra Ordinem Societatis Iesu, à Nouitio cum requisita forma iuris facta fuerit, sed professio secuta non sit: quia Nouitius prius vita excessurus est, non solum potest is de re donata arbitrato suo ante mortem disponere: sed etiam si nihil disposuerit, ea ad cogensanguineos ab intestato deuoluitur, vti docet Rodriq. cit. q. 47. a. 12. relata Cardinalium respons. Si Nouitius ante professionem moriatur, donatio non illi cui facta est, sed succedentibus ex testamento, vel ab intestato pertineat. Probatur: Quia Concil. generalib. verbis ait, quod nulla renuntiatio, aut obligatio aliâs intelligitur effectum suum sortiri, nisi secuta professione. Et potest sufficiens ratio assignari, cur Concilium etiâ huiusmodi renuntiationis, aut donationis professionem non secuta irritare voluerit, vt videl. Nouitius



moriturus pro salute animæ suæ liberius disponere posset. Aliter autem sentiendum esse de donatione facta ab alumnis Societatis Iesu ante professionem, vel vota formata eorum, constat ex præced. assert.

Dico VIII. Certum esse debet, quod renuntiationes, aut donationes, quæ seu ante ingressum, seu post ingressum in Societatem Iesu fiunt, secundum eiusdem constitutiones, validæ sint; non obstante Trident. Constitut. cit. sess. 25. de Regular. c. 16. quandoquidem hæc exceptio in favorem Societatis expressis verbis adiecta legitur: *Per hæc tamen, id est, supra dicta, sancta Synodus non intendit aliquid innouare, aut prohibere, quin Religio Clericorum Societatis Iesu, iuxta pium eorum institutum, à sancta sede Apostolica approbatum, Domino, & eius Ecclesia inferuire possint.* Absolutè igitur valida est donatio, aut renuntiatio bonorum ac iurium facta ante ingressum in quacunque causam piam, secundum devotionem & arbitrium ipsius donatoris; quia id iubetur seu suadetur in exam. gener. c. 4. princ. Valet item donatio, aut renuntiatio, quæ post primum annum probationis, vel post edita vota simplicia, volente Superiore, fit in causas pias; vel si in consanguineos donatio conferenda videatur, accedente consilio & iudicio vnus, aut plurium virorum prudentium, iuxta Constitut. p. 3. c. 1. in declarat. lit. g. & in exam. generali c. 4. n. 2.

11 Dico IX. Si post ingressum sub obedientiam Societatis Iesus, donationes, vel renuntiationes bonorum fiant non secundum Constitutiones nostras; videlicet ante finitum primum probationis annum; vel postea sine voluntate Superioris, aut in consanguineos sine iudicio vnus, vel plurium virorum prudentium, &c. videntur esse irritæ, propter Trident. Constitutionem. Nam ordo connexionis inter caput 15. & 16. sess. 25. de Regular. postulat, vt, sicuti quæ in priore capite dicta sunt, videlicet irritam esse professionem factam ante annos XVI. ætatis completos; ita etiam quæ in subsequ. cap. 16. dicuntur, ad omnem Religionem, etiam Societatis Iesu, pertineant, quatenus eius instituto non repugnant. Ita enim intelligo dictum §. *per hæc tamen sancta Synodus.* Nempe non fuisse mentem Concilij, per antecedentia decreta, quamvis generalibus verbis concepta, aliquid imponere Societati Iesu, quod eius peculiaribus Constitutionibus aduersaretur. Vbi hæc limitatio, seu exceptio firmat regulam in aliis; si nimirum Societati Iesu contraria non sint, in ea quoque locum habitura esse. Atqui Societatis nostræ Constitutiones improbant donationes, aut renuntiationes illas, quæ primo probationis anno fiunt; aut postea sine Superioris consensu, &c. Ergo non solum illicitæ, sed etiam irritæ censi debent. Confirmatur. Tridentinum Concilium, adiecta illa limitatione volebat favorem & gratiam facere Societati Iesu, propter peculiare eius Constitutiones: quod autem ob gratiam alicuius conceditur, non est in eius dispendium retorquendum, reg. 6. in 6. Cederet autem in incommodum Societatis Iesu, si donationes, ac renuntiationes factæ contra Constitutiones validæ forent; cum tamen Societas, quatenus potest, eas impedire, ac tollere velit. Contrarium tamen huius assert. docuit Sanchez cit. c. 5. n. 10.

His adde, si verum sit, quod supra hac q. dicto 3. tanquam probabile asserui, renuntiationes à Candidatis factas ante ingressum intuitu ingrediendi Religionem, pro irritis habendas esse; idem quoque dici posse de Candidatis Societatis Iesu; si ante ingressum renuntiationes faciant non absolutè, sed sub conditione recipiendi: quippe quas Constitutionibus Societatis Iesu quam maximè repugnare, supra monui. Imò fortasse, etiam si absolutè donationes faciant in causas profanas: quia etiam has renuntiationes non approbârunt Constitutiones; sed permiserunt, cum impedire non possent, antequam Candidati sub obedientiam venirent,

vti videre licet p. 3. Cõstit. c. 1. in declarat. lit. G. Quamuis contrarium docuerit Less. lib. 2. c. 41. n. 41. validas esse renuntiationes Candidatorum Societatis Iesu ante ingressum, etiam si in causas profanas fiant. Et fateor, id esse valde probabile; si sermo sit de renuntiationibus factis absolutè; non autè sub cõditione regressus, quas Societas improbat, vt Candidatos aliter suscipere non velit, nisi omnem spem bonorū temporalium vel ante ingressum abdicârint, vel postea suo tempore, tanquam spiritualis perfectionis sectatores, abdicaturi sint.

QVÆSTIO QVARTA. Titius Ordinem Mendicantium ingressurus, ante professionem omnia bona sua, etiam hæreditates, si quæ illi obuenerint, vel deinceps ante professionem obuenturæ sint, pauperibus donauit, vel Collegio Societatis Iesu, antequam professionem, vel vota formata ederet; accidit autem, vt ante tempus huius dispositionis, vel saltem ante professionem frater Titij absens in bello moreretur absque liberis, nullo testamento condito: eius verò mors ignorabatur ante editam professionem ab eodem Titio; quæritur, vtrum pauperes, vel Collegium, cui donatio facta fuit, hæreditatem delatam petere, aut accipere possit. Pro resolutione huius quæstionis notandum, 14 quod hæreditas alia dicitur delata, & alia adita. Hæreditas delata est ipsa morte eius, in cuius bonis succedendum ex testamento, vel ab intestato: tunc autem statim hæres comparat ius ad rem, seu actionem petendi hæreditatem; attamen cum potestate deliberandi, adeoque etiam repudiandi hæreditatem delatam, si sibi eam non expedire censeat. Adita autem hæreditas dicitur, cum primum in eam hæres consensum dedit, tum verò statim etiam ius in re, ipsūque dominium rerum hæreditariarum, ante earum apprehensionem, acquirit, vti explicat Molina t. 1. tr. 2. disp. 174. ver. quod ad posteriorem.

Hoc posito, pro parte quæst. negante videtur esse 1. quoniam, C. de iure deliberandi, vbi habetur; Si quis ignorans mortis sororis suæ, adeoque non adita eius hæreditate, è viuis excedat, non transmittere hæreditatem ad hæreses suos. Nihilominus pars affirmans 13 videtur vera: Primò, Quia Constitutio illa civilis à Gentilibus subtilitate quadam introducta fuit ob hanc rationem; quia hæreditas, quæ olim ante inuentarij beneficium valde incommoda esse poterat, deferretur cum conditione deliberandi, num eam adire expediat, necne: si ergo hæres delatam sibi hæreditatem ignorauit, consequenter de ea adeunda non deliberauit, neque in aditionem consensit, ius hæreditatis illius post mortem transmittere non potest: quandoquidem voluntas adeundi personalis est, quæ ad hæreses non transmittitur. Verùm hæc ratio cessat in casu donationis factæ, in qua donator expressè declarat, voluntatem suam esse donandi omne ius sibi commodum, etiam hæreditatis, si quæ delata sit, vel deferenda ante mortem naturalem, vel spiritualement. Nam hoc ipso declarat, quod eiusmodi hæreditatem non repudiare velit, ob quam solam repudiandi facultatem civilis illa subtilitas de non transmittenda hæreditate ignorata, excogitata est.

Secundò, quia subtilitates civiles, aduersus ius gentium & naturale (si præcisè spectentur) introductæ, non habent locum in causis piis: sicuti neque solemnitates testamentorum, in quibus, quod attinet ad causas pias, procedi debet secundum ius gentium, naturale, ac canonicum. Cum civiles Magistratus potestatem suam ad causas pias, & Ecclesiasticas extendere non possint; ideoque eorum statuta in eiusmodi causis non obligent, nisi iure canonico recepta, atque approbata reperiantur. Certum autem est, spectato iure naturali, gentium, & canonico, validam esse donationem hanc: Si quæ hæreditas mihi commoda obuenerit, volo, vt



ea pertineat ad pauperes, vel ad hoc Monasterium; ita ut meo ipsis transcripto iure accipere possint. Quid enim magis naturale est, quam ut quisquam de bonis & iuribus suis, quomodocunque quæsit, aut delatis, sicuti ipsi placet, statuere possit, præsertim ad Dei honorem, & anime suæ salutem?

Tertio, Quia constitutio illa civilis locum tantum habet secundum ius strictum, non secundum humanitatem, & æquitatem, sicuti aperte habetur in l. Pannorius, ff. de acquir. hæred. vbi dicitur; Hæredem hæredis cum ignorantia delatæ hæreditatis decedentis, secundum æquitatem restituendum esse. Quamvis magis in causa pia, & in foro Ecclesiastico secundum naturalem æquitatem, & non secundum stricti iuris civilis subtilitatem procedere oportebit. Ceterum, si Titius seu de paterna, seu de alterius sibi obuentura hæreditate disponat in fauorem seu causæ piæ, seu alterius personæ, & ante delatam sibi hæreditatem, seu ante mortem patris v.g. vita decedat, aut in Religione professionem edat; tunc constat, renuntiationem, seu donationem expirare, vti seq. q. dicam.

14 QVÆSTIO QVARTA. An, & quatenus professurus in Religione Mendicantium hæreditati paternæ, vel maternæ, renuntiare possit, cum pacto, ut aliquid detur in piam causam, v.g. Ecclesiam, vel Collegium Clericorum regularium, aut secularium? Respondeo, & dico I. Si pater sponte, ac liberaliter promittat, se talem donationem facturum post filij professionem, dubium non est, eum obligari: cum promissio hæc obiectum honestum, ac pium habeat. Quin imò ante professionem, vel ante vota formata in Societate Iesu, nihil prohibet veluti pactum iniri cum patre, ut filius renuntiet hæreditati paternæ, vel maternæ; parens autem veluti in premium huius renuntiationis, ipsi parenti, & liberis eius commodum, aliquam pecuniæ summam applicet pio loco, aut Conuentui, quem filius designat. Cum enim renuntiatio hæreditatis ex necessitate quadam fiat, & adiectio pacti nihil incommodi, obligationisque filio afferat, sed solum patri; non est credibile, talem dispositionem à Tridentino Concilio inhibitam fuisse: quare neque Episcopi, aut Vicarij eius licentia opus erit. Quin imò testatur vniuersum Rodriq. to. 2. casuum, c. 7. n. 1. in aliquibus Religionibus non esse in usu, ut petatur licentia ab Episcopo, si facienda sit donatio, vel renuntiatio bonorum à Nouitio. Quod maxime intelligendum puto, si renuntiationes ex necessitate fieri debeant, propter Ordinis Constitutiones, vid. apud Mendicantes.

15 Dico II. Si filius ante professionem, vel ante vota formata in Societate Iesu, renuntiet hæreditati paternæ, aut maternæ, in fauorem eiusdem Societatis, aut alterius cuiuscunque; patre, vel matre inscia, & non consentiente; atque accidat filium ante mortem parentis, cuius speratam hæreditatem donat, professionem, vel vota formata edere, donatio seu renuntiatio omnino corrumpitur, ut nihil omnino debeatur ei, in cuius fauorem facta fuit. Ita docet Sanch. l. 7. c. 9. n. 25. Ratio est manifesta: Quia nemo plus iuris in alterum transferre potest, quam sibi competere dignoscatur, reg. 79. in 6. Sed filius modò nullum ius habet ad hæreditatem patris, matris, aut cuiuscunque; alterius personæ; cum *viuentis non sit hæreditas*, argum. l. qui superstitis, ff. de acquir. hæred. postea verò, cum professionem, aut in Societate Iesu vota publica formata edit, omnino incapax redditur hæreditatis capiendæ, cum instar mortui censeatur, sicuti explicat Molina supra cit. disp. 139. ver. Tam professi. Quare perinde est, ac si aliquis cum Caio paciscatur, ut, si ipse ante patrem suum moriatur, Caius loco mortui ius hæreditatis acquirat.

Veruntamen si pater mortuus fuerit, relicto bonorum suorum usufructu uxori, dum ea viuunt; Titius au-

tem horum filius, in Religione Mendicantium profiteri velit, non prohibetur de parte hæreditatis suæ paternæ disponere, eam v.g. Ecclesiæ, aut Conuentui, vel cuiunque alteri donando. Quia quisque disponere potest de iure sibi iam acquisito, dū disponendi ius habet: at verò hæreditas paterna huic homini iam acquisita est secundum proprietatem, seu dominium directum; cum matri solus usufructus cōpetat: ergo de proprietate hac, ante professionem suam, disponere potest, alteri cuiunque donando; ita tamen, ut non plus iuris in donatariū transferat, quam ipse habuerat, ideòque eadem onera donatarius sentire debeat, quæ donans patiebatur; ut, dum mater viuunt, nullam commoditatem percipere possit; deinde, si accidat donator è viuis excedere ante matrem, hæreditas reliquis eius fratribus, aut proximis consanguineis accrescere debeat. Idemque eadem ratione sentiendum de bonis aduentitijs filij Religionem professuri, quorum usufructus ad patrem spectat, vti dixi præced. tract. c. 8. n. 2.

## CAP. VIII.

## De Codicillis.

## SUMMARIUM.

- 1 Codicillus est veluti imperfectum testamentum.
- 2 Codicillos duos, aut plures quis facere potest: sed non duo testamentum condere, ita ut ambo valeant.
- 3 Codicillus fieri potest, & sine testamento, & cum testamento, ita ut ex testamento pendeat, tanquam accessorium à principali.
- 4 Clausula codicillaris testamentis adijci solet; si non valeat dispositio, ut testamentum solemne, valere debeat tanquam codicillus, eiusque clausula sine expresse, sine virtualiter adiectæ plures effectus sunt.
- 5 Codicillus fieri potest vel in scriptis, vel nuncupatiue.

Codicillus hæc dicitur, quasi parvus codex, siue scriptura, ultimam aliquam voluntatem continens, absque hæredis directæ institutione. Est igitur quasi imperfectum quoddam testamentum; idque ob duas causas: I. Quia testamenti solemnitates non requirit: præterquam quod quinque testes, licet non rogati, ac sceminæ sint, in codicillo exiguntur, l. ult. C. de codicillis, iunc. Gl. ver. quinque testes. II. Quia codicillo hæreditas neque dari, neque adimi potest: quin potius codicillus fundatur super hæredis institutione, vel ab intestato venientis successionem, cui proinde in codicillo aliquid alteri dandum, vel aliud exequendum commendatur, l. quod per manus, ff. de iure codicilli, l. hæreditatem, C. de Codicillis. Inferuiunt igitur codicilli præcipue ad fideicommissa, & legata relinquenda: item ad testamentum declarandum, immutandum, ei addendum.

Corollarium I. Codicillos etiam plures quis facere potest; modò inter se contrarij non sint: alioquin prior à posteriore censebitur esse reuocatus, l. Diui, §. Codicillos & plures, ff. eod. l. cum proponatis, C. eodem. Duo autem testamenta simul consistere non possunt; sed semper posterius, quod iure factum est, priori derogat: quamuis nemo ex illo hæres extiterit: quia institutus noluit, vel viuo testatore decessit. quo casu hæres proximi ab intestato vocatur, §. posteriore, Instit. Quibus modis testam. infir.

Corollarium II. Codicilli fieri possunt tam ab eo, qui intestatus: quam qui testatus decedit: & ad hoc non solum post factum testamentum, sed etiam ante testamentum, & cum ipso testamento, §. non tantum, Instit. de Codic. l. conficiuntur, ff. eod. Et verò nisi codicillus expresse reuocetur, potius confirmatus censeatur testamento, antè vel post facto: siquidem vires codicilli ex testamento pendent, tanquam accessorij ex princi-



pali, cit. §. non tantum. Si vero testamentum nullum factum sit, tum quasi testamenti loco est codicillus, obligans heredem ab intestato venientem, etiam posthumum. l. ab intestato, ff. eod. Si tamen defunctus vna cum codicillo testamentum condiderit, natiuitate posthumi preteriti sicuti rumpitur testamentum: ita & codicillus: siquidem cadente principali, cadit etiam accessorium seu dependens, iuxta l. i. C. eod.

4. Corollarium III. Si testator affirmans, propositum sibi esse condere testamentum, non adhibeat solemnitatem necessariam ad testamentum, sed tantum ad codicillum, tunc distingue, vtrum simul adiungat clausulam codicillarem; seu expressè: *Si hac dispositio mea non valet vi testamenti, volo vi valeat vi codicilli*. Seu tacitè ac virtute: *Si hac dispositio non valet vi testamentum, valeat eo modo, quo valere potest*: tali casu censebitur esse codicillus; modò solemnitates requisitas ad codicillum habeat, l. i. ff. eod. l. vlt. §. illud quoque, C. eod. atque testator ad testamenti factionem habilis sit, l. Diui, §. Codicillos, ff. de iure codicillorum. An verò nullà talis clausula adiecta sit; tunc attendere oportet, vtrum præsumptio seu certa, seu valde verisimilis capi possit, defuncti voluntatem fuisse codicillum tantum condere; licet ob imperitiam testamentum appellaret: (magis enim mentem testatoris, quam verba, quibus usus est, spectare conuenit, l. Titius, §. Lucius, ff. de liber. & posthumis, & docet Gl. in l. tale pactum, ff. de pactis) vel et si testamentum condere intenderit, simul tamen etiam vi codicilli valere voluerit. Quod præsumitur primò: Si testator iuramento siue à se præstito, siue ab hærede præstando, confirmauit, vt seruentur omnia, quæ in testamento continentur, iuxta l. cum patet, §. filias matrem, ff. de legat. 2. & explicat Mol. disp. 132. Cou. c. Raynaldus, de testam. §. 3. n. 16. vbi ait, iuramentum hunc effectum habere, vt actus, qui eo modo quo fit, non valet, valeat meliore modo, quo potest. Secundò: Si is, cui testator prouidit, sit filius vel alia persona valde dilecta: nam vehemens amor facit præsumptionem clausule codicillaris, sicuti notatur in l. in testamento, iun. Gl. ver. debuiffe, ff. de fideicom. libertat. & apud Iul. Clarum q. 8. in addit. n. 8.

Sin autem testamento minùs solemniter cõdito clausula codicillaris neque adiecta sit, neque ob coniecturas pro adiecta haberi possit, eo casu dispositio neque vt testamentum, neque vt codicillus consistit; etiam si omnia ad codicillum alioquin requisita adsint, sicuti constat ex l. i. ff. eod. & cit. l. vlt. C. eod.

Porro effectus codicillaris clausulæ seu expressè, seu tacitè intellectæ, non exigui sunt: I. Ex testamento minùs solemniter, et si heredis institutio omnino irrita sit, tamen hæres ab intestato soluere cogitur legata, propter adiectam illam clausulam, vti constat ex l. si iure non subsistit, C. de testam. manumiss. II. Si testator carens heredibus necessariis, in testamento minùs solemniter instituat extraneum, virtute eiusdem clausulæ institutio directæ vertitur in fideicommissariam, & proximi heredes ab intestato censentur grauati restituere extraneo hereditatem, l. ex ea scriptura, §. ex his verbis, ff. Qui testam. facere possunt. & l. vlt. C. de Codicillis: detracta solum Trebellianicâ, quæ est quarta pars hereditatis. III. Si testator herede necessario scienter præterito, vel iniuste exheredato, in testamento minùs solemniter instituat extraneum, virtute illius clausulæ formaliter, vel virtualiter adiectæ, cõsetur heres necessarius grauatus, vt detracta portione legitima, reliquam hereditatem restituat instituto, teste Mol. disp. 132.

5. Ad extremum aduerte; Codicillos ad similitudinem testamentorum bifariam fieri posse: primùm in scriptis, adhibitis quinque testibus, qui se subscribant; quamuis sigilla eorum non requirantur. Deinde sine scriptis, per nuncupationem, declarata vltima voluntate corâ quin-

que testibus; tamen si ea postea in scripturam redigatur: id enim ad testamentum & codicillum nuncupationum nihil interest. Illud porro discrimen est inter heredis institutionem & legatum; quod testator heredem proprio ore, saltem ad interrogationem alterius, proferre debet, l. iubemus, C. de testam. At verò legatum nutu relinqui potest, si moriturus morbo impeditus articulatè loqui non possit, l. nutu, ff. de legatis, 3. & docet Couar. c. cum tibi, n. 4. de testam.

## CAP. IX.

## De substitutione, &amp; fideicommissio.

## S V M M A R I V M.

- 1 Substitutio alia directa est, & alia indirecta.
- 2 Heres fideicommissio grauatus, quænam Trebellianicam deducere potest: nisi fideicommissum sit respectu cause pie. Si privilegium concurrat cum priuilegio, infirmato utroque, firuari debet ius commune.
- 3 Præter substitutiones quatuor videlicet vulgarem, pupillarem, exem. plarem, fideicommissariam; sunt alia dua mixte.
- 4 In donatione quoque inter viuos veluti fideicommissum interuenire potest.
- 5 Imperitia Notarij obscure, vel imperitè loquentis non vitiat dispositionem.
- 6 Confessio partis omne genus probationum excedit.
- 7 Heres fideicommissio grauatus, si sine liberis decesserit, profitendo Religionem, hereditatem acquirit Monasterio; nisi aliud expresserit.

**S**ubstituere est in locum heredis vnus alterum statuere: quod dupliciter fieri potest; directè, ac indirectè. Directa substitutio est, in qua sine ministerio instituti, hereditas sub conditione deferretur substituto. Exempli causa. Instituo heredem Titium: si is hæres non fuerit, vel quia noluerit: vel quia non potuerit (morte v. g. præuentus) esto hæres Sempronius. Item, si testator impuberem in sua potestate constitutum, & post mortem suam in alterius potestatem non casurum, heredem instituat: eique alium substituatur, sub conditione, si ante annos pubertatis, cum ipsemet testamentum facere prohibetur, decedat, sicuti habetur tit. ff. de vulg. & pupillari substit. & Instit. de pupillari substit. Vide Couar. in c. Raynucius, §. 5. Gomez 1. resol. c. 3. & 4. Mol. disp. 184.

Ad exemplum pupillaris substitutionis alia substitutio introducta est, quæ sit liberis amentibus, surdis simul & mutis: eò quod & hi testamentum facere nequeant. Adde, non solum patrem, sed etiam matrem exemplariter substituere posse: sed debet substitui aliquis ex heredibus necessariis, puta liberis filij amentis, & c. si extent: vel iis deficientibus, parens: imò etiã fratres, & sorores, vel aliquis eorum in hac substitutione cæteris præferendus est, l. humanitatis, C. de Impub. & alijs substit. §. qua ratione, Instit. de pupil. substit. & videri potest Gomez 1. resol. c. 6. Con. in c. Raynucius, §. 6. Mol. disp. 185. Hæc tamen in pupillari substitutione locum non habent: siquidem neque mater, neque auus maternus filio impuberi substituere potest: cum eum in potestate sua non habeat. Deinde non prohibetur pater, vel auus paternus, qui impuberem in potestate habet, omnino præterita matre, substituere illi quem voluerit extraneum, l. precibus, C. de impuber. & alijs substit. l. Papinianus, §. sed nec impuberis, ff. de inoffic. testam. & c. 1. §. vlt. de testam. in 6. Ratio est, quia per hæc substitutionem, substitutus non tã filio impuberi, quam eius patri succedere cõsetur, l. patris & filij, ff. de vulgari & pupillari substitutione. Pater autem non cogitur vxorẽ suam, siue matrẽ impuberis heredem instituere: Quare si filius post mortem patris ante pubertatem decedat, excluditur mater à successione, etiam secundum legitimam.



Quia licet filius testamento suo matrem portione iure natura debita priuare non possit; pater tamen in testamento, quod filio impuberi facit, id potest, cit. §. vlt. & in l. Papi-  
nianus, ff. de officio testam. Sed nec impuberis filij mater inofficiosum testamentum dicit: quia pater ei hoc fecit. Et intelligendum id est quoad omnia bona filij impuberis; quamuis ex materna linea acquisita sint, sicut colligitur ex l. sed si plures, §. ad substitutos, ff. de vulgari & pupillari substit. Eademque in foro conscientiae locum habere, modò mater alimenta necessaria habeat, ex communiore docet Mol. disp. 184. §. his ita constitutis.

Indirecta substitutio, quæ & fideicommissaria dicitur, ea est, in qua hæreditas substituto defertur ministro hæredis, quia testatore grauatus est, vel absolute; vel sub conditione, nisi tale aliquid fecerit; ut hæreditatem vel totam, vel partem eius aliquotam alteri restituat, qui idcirco fideicommissarius appellari solet. Hæres tamen fideicommissio grauatus, post aditam hæreditatem, quartam partem eius, in qua institutus fuit, sibi retinere potest: quæ pars Trebellianica dicitur, à SC. Trebelliano, sicut videre est tit. ff. & C. ad SC. Trebellian. Instit. de fideicom. hæreditatibus, §. sed quia stipulationes, &c. Raynaldus, c. Raynutius, de testam. vbi dicitur, quòd filius grauatus hæreditatem restituere, supra legitimam, quæ grauari non potuit, quartam Trebellianicam detrachere possit. Cæterum testator prohibere poterit, ne Trebellianica à fideicommissio detrachatur; non minùs, quàm ut Falcidia à legatis, iuxta Auth. sed cum testator, C. ad l. Falcidiam: Siquidem Falcidia & Trebellianica æquiparantur. Ita contra Gl. in cit. Auth. sed cum testator ex communi docet Gomez lib. 1. c. 5. num. 11. Couar. c. Raynaldus, §. 3. num. 9. Syl. ver. legitima, q. 12. Clar. q. 62. Deinde non potest detractio fieri à fideicommissis; sicut neque à legatis ad pias causas, iuxta Auth. similiter, C. ad l. Falcid. & Auth. de Ecclesiasticis titulis, §. si autem hæres, & ex communi tradit Couar. c. Raynal. §. 3. de testam. num. 13. Syl. ver. legatum, 4. §. 6. Mol. disp. 213. §. secundus, Less. lib. 2. q. 19. dub. 7.

Excipe, nisi tam hæres institutus, quàm fideicommissarius, aut legatarius sit pia causa, tunc locus erit detractio, teste Abb. c. in præsentia, de probat. num. 37. Quando enim priuilegium concurret cum priuilegio, tunc cassato utroque, seruatur ius commune. Eademque ratione, si alicui hæredi instituto, substitutio facta sit sub conditione, si is sine liberis decesserit; institutus autem Religionem profiteatur; succedit Monasterium, excluso substituto, si is sit priuata persona; secùs, si Ecclesia, vel causa pia, sicuti notant DD. in cit. c. in præsentia, vbi Abb. num. 36. cum Gl. ver. qui Monasterium instituit, ex Auth. Nisi rogati, C. ad SC. Trebellianum.

Potò si hæres institutus hæreditatem adire recuset, tunc omnia eius iura & actiones ad fideicommissarium transferre cogitur; nullo nec damno, nec commodo apud hæredem remanente, sicuti dicitur in cit. §. sed quia stipulationes. Legata etiam ad pias causas, tamen si nemo hæreditatem adit, Iudicis officio impiorato, acquiri poterunt, sicuti Couar. notauit, c. Raynaldus, §. 3. n. 27.

Præter has, quas hætenus numeravi substitutiones quatuor; quarum prima erat vulgaris, altera pupillaris, tertia exemplaris, quarta fideicommissaria; sunt aliæ duæ, exque mixtæ; quia plures in se substitutiones continent: Prima est, quoad personas, quæ dicitur reciproca, siue breuiloqua, in qua plures hæredes instituti sibi inuicem substituuntur: v. g. *Instituo Caium, et Titium hæredes meos, eosq; inuicem substituo.* Adde, non tantùm directas substitutiones, vulgares, pupillares, exemplares reciproce fieri posse; sed etiam fideicommissarias;

idq; vel expressè in testamento, v. g. *Instituo hæredes Caium, & Titium, et alterutri ex his prius decessenti alterum substituo:* vel virtute, in codicillo continente substitutionem directam pro fideicommissaria, secundum Gl. communiter receptam Instit. de vulgar. substit. ver. in testam. Less. l. 2. c. 19. dub. 7. n. 86. 92. Vide etiam Abb. in c. Raynutius, n. 14. & seq. Couar. ibid. §. 7. & 8. de testam.

Altera substitutio mixta substitutiones plures in se continet secundum tempora & ætates; atque vocari solet compendiosa: puta, si pater, aliùve descendens ita testamentum concipiat: *Instituo filium meum hæredem ei, quandoquæ ex vita decesserit, substituo Titium* tunc si filius hæres patris non extiterit, admittitur substitutus ex vulgari: Sin verò hæres extiterit, sed intra pubertatis annos decesserit, admittitur Titius ex pupillari: Si autem post pubertatem decesserit, succeditur ei ex fideicommissaria, detracta tamen non solum legitima, sed & Trebellianica, iuxta cit. c. Raynaldus, de testam. Si denique & mente captus filius sit, succedet ei Titius ex exemplari. Vide Gomez 1. resol. c. 7. Couar. cit. c. Raynaldus, §. 9. Less. l. 2. c. 19. dub. 7. n. 90.

His adde, etiam in ratione pacti inter vivos quasi fideicommissum interuenire posse; si quis rem alteri donet, ea lege, ut post transactum tēpus, vel eueniente aliqua conditione, alteri tradat: quo casu res vinculata dicitur, quia alienari à possessore non potest: ipse tamen donator, si res adhuc integra est, & tertius ille, in cuius fauorem fideicommissaria dispositio facta fuit, adiectum grauamen reuocare non prohibentur, sicuti respondet Clarus l. 4. receptat. ver. donatio, q. 13. n. 4.

Frequentissima autem sunt eiusmodi fideicommissa, si bona vinculata per vltimam voluntatem relinquuntur, ut in subiecto casu videre est. Titius testamentum cōdidit, in quo Caium filium hæredem instituit; sed apposuit verba testamento, quibus videri potuit dictum Caium fideicommissio grauare, quominus bona immobilia alienare posset; sed ad proximū agnatum transmittere deberet. Verum, quia verba ambigua erant, ut Iureconsulti iudicarent, si ad forū externum res deferretur, absolutum iri, & nunquam cōpellendum ad seruandum eiusmodi fideicommissum; hac ille fiducia fretus, bona immobilia vendidit. Nunc verò conscientia vrgetur; quia ob certas, vel saltem probabiles, valde cōiecturas existimat, testatorem voluisse bonorum alienationem prohibere, & verborum obscuritatem culpa Notarij irrepsisse.

Respondeo, & dico I. Si Caius moralem certitudinem habet, quòd pater Titius voluerit illum fideicommissio grauare verbis illis testamenti, quæ vitio Notarij ambigüe posita sunt, in conscientia obligatus est ad faciendam compensationem damni, quod proximis agnatis venditione illa, à testatore prohibita, illatum est. Si enim Caius ad obseruandum fideicommissum non obligaretur, id vna harum duarum rationum fieret, vel quod voluntas testatoris, significata verbis tam ambiguis, non esset solemnis, ideòque iure non subsisteret: vel quòd in civili foro nunquam Caius condemnaretur ad eiusmodi fideicommissum, tam obscure inserti, obseruationem. Sed neutra harum rationum satisfacit: non prima, quia inauditum est apud Doctores, vltimam voluntatem ideo reijci tanquam minùs solemnem, quia verba obscura, aut ambigua continet: sed si ambiguitas sit in verbis, ad coniecturas, quibus verisimile; sit, quid testator voluerit, recurrendum esse, constat ex l. Titius, §. Lucius, ff. de liberis & posthumis, l. cum res ff. de legatis, 1. & docet Gl. l. tale pactum, ff. de pactis; maximè verò in materia fideicommissorum: ad verisimilem disponētis mentem, qualibuscunque verbis expressam, attendendum esse, ex communi docet Nicol. Euerhar, vol. 1. consil. 4. n. 87. Idque maximè locū ha-



bere debet, si existimeretur, verborum obscuritatem culpa Notarij irrepsisse, præter testatoris intentionem. Nam imperitiæ Notarij ineptiæ, vel obscure loquentis non vitare dispositionem defuncti, constat ex l. 2. C. de errore Aduocatorum, & l. errore, C. de testam. & docet idem Euerhard t. 2. consil. 21. n. 22.

Neque altera ratio satisfacit: Nam Caius in foro externo absolueretur ob defectum probationis: quia ex verbis tam ambiguus non satis elici potest voluntas testatoris: in dubio autem fideicommissum non præsumitur. In nostro autem casu nulla probatione opus est, quando Caius ipse fatetur, talem fuisse defuncti voluntatem: confessio autem partis omnes coniecturas, omnique genus probationum superat, l. cum te, ff. de iureiur. Quamobrem etiam in externo foro, si verba testamenti ambigua sint, sed intentio testatoris duobus saltem testibus probari possit ex verbis extra testamentum à testatore prolatis: multoque magis, si hæres certis coniecturis persuasus fateatur, testatorem voluisse instituere fideicommissum, haud dubiè contra eum pronuntiabitur, sicuti ex Bart. l. 1. ff. de vulg. & pupil. substit. docet Euerhard. vol. 1. consil. 53.

Dico I I. Si Caius certus non sit, sed dubitet de testatoris voluntate, & rediligenter examinata certam cognitionem acquirere nequeat, tam in externo, quam interno conscientiae foro liber pronuntiari debet. Ratio est: Tum quia fideicommissum, cum sit noua aliqua dispositio, per quam hæres grauatur: non præsumi, sed probari debet: Tum quia hæres, præsertim suus, siue filius, est bonorum defuncti possessor: in dubia autem causa melior est conditio possidentis.

7 **RESTAT QVAESTIO.** De vero intellectu cit. c. in præsentia, de probat. quod sumptum est ex Authent. Sed & hoc, de SS. Episcopis: Si hæres fideicommissum grauatus sit, videlicet ut hæreditatem alteri restituat sub conditione expressa, aut tacita, si sine liberis decesserit: accidat autem, grauatum Religionem profiteri: quod hoc casu, excluso instituto, Monasterio hæreditas deferenda sit. Nota autem quod dixi, *aut tacita*: Si enim aliquis ascendentium, descendentem suum grauet, ut hæreditatem seu totam, seu partem alteri restituat: ea tacita conditione ita disposuisse censetur, si descendens sine liberis decesserit, l. si auus, ff. de condit. & demonstrat. l. cum acutissimi, C. de Fideicom. l. generaliter, §. cum autem, C. de Instit. & substit.

Nunc respondeo, & dico I. Ratio huius Auth. Constitutionis, iure canonico approbatæ, non est ea, quod Monasterium instar filij censi debeat. Quod enim Monasterium loco filij habendum sit, est fictio quædam iuris, exorbitans à veritate naturali: ergo extendenda non est ultra casus iure expressos, uti præter alios notauit Gutierrez lib. 1. canon. c. 32. nu. 56. Sanchez lib. 7. moral. cap. 16. n. 5. & alij apud eundem. At verò Monasterium hoc casu loco filij habendum esse, non exprimitur in Auth. illa, sed contrarium: si enim grauatus professionem edat, non dicitur defecisse conditionem, si sine liberis decesserit, sed pro non scripta habendam esse. Cur ita? quia fauore matrimonij præsumendum est, testatorem ad hunc casum conditionem extendere noluisse: sed si in mentem ei venisset, hunc casum excepturum fuisse: cum credibile sit, non minus causam piam Monasterij, quam liberos dilexisse. Ita docet Couar. 1. resol. c. 19. n. 11. Mol. to. 1. tract. 2. disp. 19. ver. Quando quis.

Dico I I. Si testator expressit voluntatem suam, vel ea manifestis coniecturis colligi potest, ut Monasterio, in quo grauatus proficetur, præferatur substitutus in fideicommissio, ea voluntas rata esse debet. Hæc est communior sententia, quam defendit Couar. l. cit. Nauar. lib. 3. consil. 13. de testam. Mol. cit. disp. 190. ver. Hæc verò, Rodriq. to. 2. regul. q. 77. a. 4. Gutierrez cit. c. 32. n. 19. Sanchez cit. c. 16. num. 12. Ratio est: Quia Constitutio

illa, ut Monasterium, si capax sit successionis, excludat substitutum in fideicommissio, fundatur in præsumptione supra dicta: cessat autem præsumptio, cum contraria veritas apparet. Confirmatur hæc doctrina ex fideicommissis familiarum relictis, ita ut semper apud familiam maneat, ad conseruandum splendorem eius; quæ si ita instituta sint, ut ad primogenitum spectent; eo verè sine hærede masculino decedente, ad agnatum proximum itidem maiorem natu deuoluuntur. Siquidem eiusmodi primogenia, ac fideicommissa non transeunt ad Monasterium: quia id repugnaret eorum naturæ, cum ad conseruationem familiarum instituta sint. quæ de re videri potest Mol. to. 3. priore, disp. 623. Sanchez cit. c. 16. n. 44. Couar. cit. c. 19. n. 11. Gutierrez n. 30.

Dico I I I. Et si constet, vel præsumi debeat, testatoris voluntatem fuisse, ut substitutus in fideicommissio excludat Monasterium: nihilominus eo frui poterit Monasterium, dum professus viuit. Ita docet Molin. t. 1. tract. 2. disp. 190. ver. in quocunque, & cit. disp. 623. ver. Quod ad Religiosos, Sanchez cit. c. 16. n. 10. Couar. 1. resol. c. 19. nu. 7. Ratio est: Quia Monasterium, si bonorum immobilium in communi capax sit, succedit in omnia bona, ac iura professi, Auth. Ingressi, Cod. de SS. Ecclesiis. Professus autem habebat ius fruendi fideicommissio per tēpus vitæ suæ, eo grauamine, ut si sine liberis decederet, substituto restitueret: Ergo tamdiu etiam Monasterium loco eius retinere ac frui potest. Sin verò Monasterium, in quo professio sit, capax non est successionis, tunc edita professione fideicommissum statim deuoluitur ad substitutum, & non ad hæredes seu proximos consanguineos professi, uti docet Gutierrez n. 25. Azor to. 1. lib. 12. c. 8. q. 6. in fine. Sanchez cit. c. 16. n. 16.

Excipe: Nisi euident ad sit coniectura, noluisse testatorem, ut fideicommissum ad Monasterium deueniat, si grauatus in eo profiteatur: sed statim deueniat ad substitutum. Potuit enim testator de bonis suis arbitrari suo disponere: imò iustam ita disponendi causam habuisse, v. g. ut in familia diuitiarum decus, potentia, ac testatoris memoria conseruetur. Quamobrem pluribus allegatis Doctoribus, docet Sanchez cit. c. 16. num. 19. Azor cit. c. 8. q. 5. in fine, si in fideicommissio instituendo testator agnationis, nominisque sui rationem habuisse visus fuerit, ut si primogenium seu maiusculum instituerit, Monasterium omnino excludi: quandoquidem in Monasterio, seu quod idem est, in professio Monasterium, non potest familiarum & agnationis splendor, secundum institutoris intentionem, conseruari. Voluit enim testator, ut fideicommissio bona penes familiam semper manerent: post professionem autem si Monasterium succederet, non manerent bona penes familiam, sed penes Monasterium, dum professus viuit.

Confirmatur. Nam simili ratione, et si obligatus hæreditatem restituere, relegatur, eiusque bona publicentur, fiscus in fideicommissio succedit, dum ille naturaliter viuit, l. Statius, §. Cornelio, ff. de iure fisci: Excipitur tamen, si testator prohibuit, ne bona fideicommissi extra familiam manerent, secundum doctrinam Bartoli in l. Imperator, ff. de fideicommiss. libertat. Ergo idem dicendum de successionem Monasterij: nam sicuti Monasterium succedit in omnia bona Professus ita fiscus in omnia bona decessoris, ait Sanchez num. 19. Est tamen hæc doctrina contra Molinam t. 3. priore, disp. 623. ubi ait, Monasterium succedere in Maioratu, si iurisdictionem annexam non habeat, atque retinere interim, dum professus viuit: quamuis dubius sit in hac sententia, n. 5. ver. Tertio, & ver. Quarto. Siquidem, ut ipse ait, si maioratum quemcunque ad perpetuam familiarum conseruationem ac splendorem instituens, interrogatus fuisset, utrum vellet ad Monasterium deuenire, interim dum filius, aut nepos eius primogenitus in Monasterio viueret, utique negaret: cum id fini institutionis repugnet.



## CAP. X.

## De legatis, &amp; fideicommissis particularibus.

## S V M M A R I V M.

- 1 Legatum, seu fideicommissum particulare, est donatio quedam à defuncto relicta, & ab herede prestanda.
- 2 Qui testari, & etiam legare, & qui heredes institui, & etiam legata relinquere possunt.
- 3 Licet Fratres Minores heredes institui nequeant; tamen legata per modum elemosine eisdem relinquere possunt: modò id non fiat in magna quantitate, ut velut hereditas sub legati nomine dari videatur.
- 4 Fratribus Minoribus nec habitatio seiuncta ab eorum Monasterio; nec redditus annuus perpetuus, vel ad tempus longum pro victu, ac vestitu eorum, legari potest.
- 5 Rem immobilem Fratribus Minoribus absolute legari nihil prohibet: cum eam vendere possint, & debeant. Nisi hortus legatus sit ad Fratrum recreationem, vel quotidiana olera decerpenda necessarius; eum enim possidere possunt.
- 6 Domus professæ Societatis IESV cum hereditas, tum legata relinquere possunt; ita tamen, ut, si in iis bona stabilia continentur vsui domus non opportuna, ea vendi debeant.
- 7 Res non tantum testatoris propria, sed etiam aliene legari potest; modò non sit ipsius legatarii.
- 8 Si debitor creditor legauerit, censetur reliquisse in compensationem debiti, si ex iuris necessitate debebat; secus, si ex voluntario contractu.
- 9 Debita plerumque non possunt testamento relinquere, præterquam si iusta causa, vel necessitas excuset, quominus ipsemet debitor, dum in viuis est, satisfacere queat.
- 10 Legata interdum purè sunt; interdum in diem; interdum sub conditione.
- 11 Condicio in futurum alia est potestativa, & alia mixta: utrique autem hoc commune est, ut, si ante impleram conditionem legatarius moriatur, ad heredes non transmittatur, si intuitu persone relicta fuerat.
- 12 Legatum, vel hereditas relicta sub conditione nuptiarum, non debetur, nisi nuptiæ sequantur: si tamen persona, cui relicta, Religionem ingrediatur, videtur ei dandum, secundum benignam interpretationem voluntatis testatoris.
- 13 Iusta censetur esse conditio legato, vel heredi institutioni adiecta, si cum certa persona matrimonium contractum fuerit.
- 14 Condicio legato, vel heredi institutioni adiecta, si matrimonium non contrahatur, tanquam bonis moribus repugnans reijciatur: nisi vidua sit, cui ita relinquitur; vel nisi conditio adiecta sit, favore status religiosi, aut sacerdotalis.
- 15 Si coniunx coniugi promiserat, se post mortem eius alteras nuptias non contracturum, obligatur promissione, sed plerumque non sub peccato mortali; nisi iurauerit, vel nisi liberorum multum inter sit, nuptias alias non contrahi.

**L**EGATVM definitur Instit. de legatis, §. 1. Donatio quadam, à defuncto relicta, et ab herede prestanda. Nomen donationis accipitur latè, pro quacunque datione gratuita. Additur quadam: quam particulam necessariò ita intelligere debemus, ut idem sit, quod rei alicuius particularis, quæ hereditatis rationem non habeat: nam alioquin tota definitio conueniet fideicommissis vniuersalibus, quæ tamen diuersam à legatis naturam obtinent. Per tertiam voculam à defuncto relicta, distinguitur legatum primò, à donatione inter viuos, quippe quæ in vita donantis robur suum & firmitatem accipit: Secundò, à donatione mortis causa, quippe quæ non ab herede necessariò prestanda est; sed plerumque ab ipso donante traditur, dominiùmque transferitur: tamen si ante mortem illius non confirmetur, sed reuocari possit. Quare si res alicui legata, postea eidem à testatore tradatur; tunc legati naturam amittere, & in mortis causâ donationem transire videtur; nisi testator, rem antea legatam, mutata voluntate, postea tanquam inter viuos absolute donarit. Ita docet Molina disput. 193. in fine. Denique additur et ab herede prestanda, per quam particulam præcipue distinguitur

legatum ab hæredis directâ institutione: siquidem hereditas non ab alio quodam, sed ab ipso testatore immediatè accipitur.

Porro definitio ita explicata conuenit etiam fideicommissis particulari: quod hodie absurdum videri non debet, quando legata omnia particularibus fideicommissis ex æquata sunt, l. r. iunct. Gl. ff. de legat. 1. & Instit. eod. tit. §. sed non vsq. Neque inter se differunt, nisi verborum formâ: cum enim ea ad ipsum legatarium diriguntur, v. g. *Lego Titio centum*; dicitur legatum strictè: cum verò ad hæredem, vel legatarium relatis verbis, rogantur, ut talem rem dent alteri tertio, dicitur fideicommissum particulare.

**QVÆSTIO PRIMÆ.** Quis legare possit? Respondeo, Omnis, & solus ille, qui testari potest. Nam legatum non relinquitur, nisi in testamento, vel codicillo: Codicillum autem nemo facere potest, nisi qui & testari, l. Diui, §. Codicillos, ff. de iure codicillorum.

**QVÆSTIO SECVNDA.** Quibus legari possit? Respondeo; Ordinariè iis solum legari potest, qui & hæredes institui possunt, §. legari, Instit. de legatis. Dixi autem ordinariè: quia excipitur primò; Si ijs, qui hæredes institui non possunt, puta spuriiis, habitatio & alimenta competentia; item dos, quæ succedit loco alimentorum, relinquuntur, l. is cui, ff. de alimentis & cibariis legatis; modò id non fiat in fraudem, sed quatenus indigent. Ita Syl. ver. legatum, 2. q. 2. Mol. tom. 1. tract. 2. disp. 195. §. spuriiis.

Excipitur secundò; Licet Fratres Minores de obseruantia, & Cappucini, eorumq; Monasteria, aut Ecclesiæ hæredes institui non possint, ut supra dictum cap. 5. num. 4. tamen legata ipsis relinquere queunt per modum piæ donationis seu elemosynæ, iuxta c. exiit, §. ad hæc quia Fratribus, de verbor. signif. in 6. & extrauag. 1. ver. Porro ut circa sepulturam, de priuileg.

Sed limitari debet I. Nisi legatum tantæ quantitatis sit, ut videatur relinquere in fraudem; siue sub nomine ac forma legati hereditas dari, Clement. exiit, §. cupientes, de verborum signif. & videri potest Rodriquez tom. 2. regular. quæst. 126. a. 1. Sanchez lib. 7. moralium, cap. 26. num. 11. vbi aiunt, ex legatis tantum accipi posse pro sustentatione Minorum; quantum spectata personarum, temporum, ac locorum qualitate, aliisque circumstantiis, ministri & custodes arbitrati fuerint, necessarium esse inopiæ subleuandæ; ita ut amplius non exigatur, aut recipiatur, donec noua necessitas appareat. Qua simili ratione ait Syluest. ver. legatum, 2. quæst. 3. dicto 1. non repugnare mendicitati Minorum, si seruent victualia, cum timetur fore, ut alio tempore haberi nequeant. Et Sanchez cit. cap. 26. num. 14. Non repugnare paupertati Minorum, si recipiant triticum, vel similes res supra necessitatem; eo pacto, ut per Syndicum commutentur, vel vendantur pro rebus necessariis.

Limitari debet II. Nisi Fratribus Minoribus legetur domus seu habitatio, seiuncta ab eorum Monasterio: talem enim possidere non possunt, c. 1. §. confirmatos, de religiosis domibus, in 6. & c. vn. de excess. Prælator. in 6. Veteres tamen domos instaurare & extendere possunt, si indigeant, ad eumque vsum domum contiguam sibi legatam acceptare, ut explicat Sanchez n. 22.

Limitatur III. Nisi Fratribus Minoribus pro eorum victu, & vestitu legetur annuus redditus perpetuus, vel longum tempus: eius enim incapaces omnino sunt Clem. exiit, §. Cumque annui redditus, de verbor. signif. Dixi autem primò, pro eorum victu & vestitu, ita videlicet ut tali legato paupertas & mendicitas eorum tolleretur. Interim verò nihil obstat, annuos redditus ipsis legari, pro luminibus aut ornamentis Ecclesiæ, pro vino vel frumento ad quotidianum Sacrificium necessario, ut ex communidocet Rodriq. tom. 2. regular. quæst.



126. a. 5. Sa ver. Religio, nu. 57. Sanchez cit. c. 26. nu. 41. Item si legatum annuum sit pro coemendis libris studio literarum necessariis, sicuti docet Abbas cit. consil. 63. n. 2. in fine, Sanchez nu. 46.

Secundò dixi: Non posse legari redditum annuum perpetuum, vel ad tempus longum, id est, decennium, vel ultra. Quia ad minus tempus legari potest: cum veluti vnum legatum censeatur, cuius solutio ita diuisa sit, vt per eam mendicitas non tollatur, sicuti obseruat Syluest. ver. legatum, 2. quæst. 3. dictor. & videri potest Rosella ver. legare, num. 21. Sanchez num. 36. & 39. Qui addit cum Abb. p. 2. consil. 63. num. 6. legatum annuum relictum Monacho ad vitam eius non censi perpetuum, cuius incapax sit Monasterium Ordinis Minorum: cum vita hominis incerta sit. Arbitror tamen, tutius esse huiusmodi legato abstinere: præsertim si Monachus sanus ac valens corpore sit: cum ius annuatim recipiendi tota hominis vita pluris aestimari soleat, quam ius percipiendi ad decennium. Illud quoque verisimilius est, quòd anniuersaria perpetua, quibus hæredes grauantur ad eleemosynam præbendam Fratibus, repugnent eorum paupertati, sicuti docet Nauar. l. 3. consil. 8. nu. 3. de testam. Sanchez nu. 44. Cum re vera hic sit redditus annuus pro eorum victu, & vestitu, quo paupertas seu mendicitas aliquo modo tollitur: quamuis contrarium sentiat Rodriq. cit. q. 126. a. 4.

Limitari debet I V. Nisi legato rei seu mobilis, seu immobilis adijciatur modus, qui repugnet eorum professioni, vt colligitur ex c. exijt, §. adhuc quia Fratibus, de verbor. signif. in 6. Puta si legetur eis vinea, vt ipsi eam retineant, excolant, & fructus pro vino quotidiano colligant, aut aliis locent: item si legetur pecunia, vt ex ea Fratibus vestes duplices ac superfluas comparentur. Sin verò absolutè legata sit v. g. vinea, vel alius fundus, valet legatum: cum illud vendi possit, ac debeat, & ex pretio necessitati Fratrum subueniri, cit. §. Adhuc. Deinde si hortus legatus sit ad Fratrum recreationem necessarius, vel ad quotidiana olera decerpenda, valet vtique legatum: cum tales hortos possidere queant, ita tamen, vt alteri non locent, nec fructus diuendant, cit. Clement. exiui, §. licet verò. Denique si pecunia legata sit pro vestitu Fratrum; & vestimentis tunc non indigeant, valet legatum, idque in alias necessitates eorundem conuertendum erit, vt docet Sanchez n. 24.

Quod attinet ad domos professas Societatis Iesu, cum ea dominium in communi habere possint, non solum rerum mobilium, sed etiam immobilium quarundam, quæ videlicet ad habitationem, vsum, aut recreationem opportuna sunt: non autem eo modo, vt redditus quicunque vini, olei, tritici percipiantur: sed neque fructus modici, v. g. olera, poma, vix ad comedendum aliis vendere liceat: neque hortus pro pecunia, aut alia pensione elocari, p. 6. Constit. cap. 2. §. 5. Hinc sequitur primò: Quòd Domui professæ cum hæreditas, tum etiam legatum relinqui possit: ita tamen, vt, si in hæreditate, vel legato bona stabilia contineantur, non necessaria, nec opportuna vsui Domus professæ, ea vendi debeant: quamuis nihil obstat, tempore non longo retinere, donec se occasio vendendi offerat; vel opportunitas aptandæ habitationis ad vsum Domus professæ, vt annotauit Sanchez cit. cap. 27. nu. 22.

Secundò sequitur: Si Domui professæ hæreditas, vel legatum relictum sit, adiecto modo, qui eius Constitutionibus contrarius sit, dispositionem irritam censi: puta si census aliquis, vel quæcunque res immobilis non necessariæ ad vsum legetur ea conditione, vt ipsi met retineant, & non diuendant. Sin verò annuus redditus seu Domui professæ, seu Ecclesiæ eius relictus fuerit, non est irrita dispositio: quia licet Domus professæ nullam ex tali dispositione actionem, aut ius civile ac-

quirat, cum redditus annuos seu domui seu Ecclesiæ applicandos possidere aut administrare nequaquam possit, iuxta Constit. p. 6. c. 2. §. 2. 5. & 6. tamen hæres in conscientia obligatus est ad annua eiusmodi subsidia; propterea quòd Societas non prohibeatur ea recipere, si offerantur, secundum testatoris voluntatem, sed tantum, ne per iuris actionem exigit: vel ad eiusmodi perpetuas eleemosynas Domui, vel Ecclesiæ suæ relinquendas quemquam inducat, vt bene ostendit idem Sanchez nu. 6.

QVÆSTIO TERTIA. Quæ res legari possint? 7 Respondeo & dico I. Non solum, quæ sunt propriæ testatoris, etiam potentia, aut spe: item iura & actiones: sed etiam res alienæ legari possunt: ita vt hæres cogatur eas redimere, & præstare: vel si redimere non possit, æstimationem dare, §. non solum, Instit. eodem, l. cum alienam, Cod. de legatis. Idemque dicendum, si res pignoris nomine alteri obligata, legata sit: debet enim hæres eam luere, & legatario liberam dare, §. sed etsi, Instit. eod.

Sed intelligi hæc debent, si defunctus sciebat rem alienam, vel obligatam esse: secus, si ignorabat. Nisi etiam hoc casu tales sint circumstantiæ: puta quia personæ coniunctæ, aut valde dilectæ legauit: vt præsumi possit, quòd tamen si sciisset alienam esse, vel alteri obligatam, nihilominus eam legasset, sicuti explicat Syluest. verb. legatum, 3. quæst. 2. Molin. disput. 196. Vasquez de testamentis, cap. 8. num. 64. Secundò excipitur: Nisi res aliqua legata sit, quæ ipsiusmet hæredis est: hæc enim præstari debet, licet testator existimauerit non ad hæredem, sed ad se spectare, l. vnum ex familia, §. si rem, ff. de legat. 2. Quia testator rem hæredis legare potest vt propriam, ait Gloss. cit. §. si rem tuam, ver. faciliores, Abb. in c. solius, num. 4. de testam.

Dico II. Si rem legatarij aliquis ei legauerit, inutile est legatum: quia quod proprium est ipsius, amplius eius fieri non potest, §. sed si rem, Instit. eodem. Adde ex §. ex contrario, Instit. eod. inutile quoque legatum esse, si debitor creditori suo leget, v. g. 100. aureos, quos antea ei debebat. Nam legatum oportet esse gratuitum: id autem gratis non datur, quod iam antè debitum est.

Quo loco duplex dubium exoritur: Primum. Si debitor creditori suo aliquid testamento, vel codicillo relinquat, nihil exprimens, vtrum in dubio censendus sit reliquisse ad exonerationem, seu compensationem debiti? Doctores communiter distinguunt cum Bartolo l. si cum dotem, §. si pater, ff. soluto matrimonio, Abb. cap. officij, num. 4. de testam. Vel enim est debitor ex voluntario contractu: vel ex necessitate iuris: Primo casu, non censetur esse legatum animo compensandi, arg. l. vn. §. sciendum, C. de rei uxoria actione: vbi habetur, si maritus uxori in testamento aliquid relinquens, non addiderit, velle eam pro dote id accipere, præsumendū est voluisse, illam vtrumque, id est, legatum & dotem consequi. Posteriore autem casu censetur in dubio legatum esse animo compensandi, argum. cit. l. si cum dotem, vbi habetur: si pater sine consensu filiarum dotem soluto matrimonio exegerit: & postea testamento eidem relinquat, censendum esse id fecisse animo compensandi. Quod similiter sentiendum est de aliis debitis necessariis, præsertim iniuste contractis: quæ aliquis sub titulo & colore legati honestius se restituere posse putat. Vide etiam Couar. in cit. c. officij, num. 2. de testam. Syl. ver. legatum, 3. q. 12. Nicol. Euerhardum vol. 2. consil. 28. nu. 113. Mascardum vol. 1. conclus. 96. Andr. Fachinæum lib. 5. contr. iuris, c. 33.

Alterum dubium: Vtrum Confessarius contentus esse possit, si debitor creditoribus suis testamento relinquere velit, quæ ipsis debet, v. g. ex causa furti, alte-



9 *ritusve iniustæ læsionis?* Respondent Doctores omnes negatiuè: nisi causa aliqua adsit, quæ excuset, quominus restitutio statim fieri debeat: sed eousque differri possit. Ita Sorus lib. 4. de iust. quæst. 7. a. 4. Syluest. ver. restit. §. q. 7. Nauar. c. 17. num. 68. Pet. Nauar. lib. 4. c. 4. num. 72. Angles in flor. q. de restit. a. 2. diffic. 4. Tol. lib. 5. c. 24. §. oportet. Sairus lib. 10. clauis regiae, tract. 5. cap. 3. dub. 9. Rodriq. p. 2. sum. cap. 44. conclus. 7. Adde ex eorundem doctrina: Etsi debitor morti vicinus sit, absolucundum non esse, si, quod ipsemet sine scandalo, læsione famæ, &c. restituere potest, testamento relinquere velit, vt ab hærede restituatur: tum quia talis non videtur habere syncerum animum ac propositum restituendi, si superuixerit: tum quia testamenta, & consequenter legata sæpe infirmari, aut quæ in illis relicta sunt, supprimi solent. Vide S. Anton. p. 2. tit. 2. c. 1. §. 25. deceptione quarta, & septima.

Cæterum, si appareat moriturum syncerè agere, & ideo restitutionem hæredi committere, quia putat ab eo commodius faciendam fore: insuper periculum non sit, ne testamentum, vel legatum euertatur: quia v. g. bona incerta pauperibus, vel loco pio elargienda sunt: cuiusmodi legata ad pias causas à testamenti solemnitatibus pendere non solent: denique si hæres, & executores testamenti sint viri boni, ac fideles: talibus circumstantiis concurrentibus, prudens Confessarius interdum permittere poterit infirmo, vt debita in testamento relinquatur. quodere vide vtrumque Nau. II. cc.

10 *QVÆSTIO QVARTA. Quibus modis legata relinqui possint?* Respondeo, Legata interdum relinquuntur simpliciter, non adiecta conditione, die, &c. cuiusmodi legatis id proprium est, vt transmittantur ad hæredes legatarij, licet is ante aditam hæreditatem decedat, tamen post mortem testatoris, l. si post, ff. Quando dies legati, lit. §. cum igitur, & §. in nouissimo, C. de caducis tollendis. Nihilominus eiusmodi legata peti non possunt, priusquam hæreditas adita sit: adeò quidem, vt si nemo ex scriptis hæredibus adierit, legata vnà cum testamento corruant, neque ab hæredibus ab intestato præstanda sint, iuxta l. si nemo, ff. de testam. tutela. Nisi sint legata pia: vel nisi subsistant virtute clausulæ codicillaris, vt supra dictum. At verò statim vt hæreditas adita est, legatarij rerum in specie legatarum dominium acquirunt: vnà cum fructibus, etiam iis, qui ante hæreditatis aditionem post mortem testatoris percepti erant: quæ est communior sententia apud Gomez lib. 1. resol. c. 12. 12. no. 5. & 22. Mol. disp. 194. arg. l. à Titio, ff. de furtis, iunct. Gl. vbi ait, quòd secundum iuris fictionem, res legata recta via à legante ad legatarium transit.

Interdum verò legata relinquuntur in diem; idque dupliciter: vel enim in diem certum, v. g. lego Titio centum, danda ipsi proximis Kalendis Ianuarijs. Et hæc etiam legatis puris annumerantur: quare, licet ante præfixum diem peti non possint: ius tamen petendi, & actio transmittitur adhæredes legatarij, si post mortem testatoris, ante illum diem decedat: etsi hæreditas tunc nondum adita fuerit, sicut habetur in cit. §. cum igitur, & l. si dies, ff. quando dies legatorum cedat, & docet Syl. ver. legatum, l. q. 1. Mol. disp. 181. §. his ita constitutis, & disp. 295. §. quando dies certus. Vel legata relinquuntur in diem incertum, v. g. Lego Titio centum aureos, cum ad pubertatem venerit ipsi dandos, vel cum uxorem duxerit, cum naues ex India appulerint, & talis adiectio diei incerta, si fiat in commodum hæredis, & non solius legatarij, habet vim conditionis pendens in futurum: vt proinde eiusmodi legata ad heredes legatarij transmittantur, si is ante diei euentum è viujs excedat. Ita habetur in cit. l. si dies apposit.

Denique relinquuntur interdum legata sub conditio-

ne, præsertim in futurum pendente, vt & euenire possit, & non possit: nam hæc sola propriè dicta conditio est, suspendens legatum, aliàmue dispositionem: v. g. *Lego Titio centum, si Caiam uxorem duxerit.* Diuiditur in *potestariam*: cuius euentus, moraliter loquendo, ex sola voluntate eius dependet, cui imponitur: v. g. *Lego Titio centum, si seruum suum manumiserit.* *Causalem*, cuius euentus minimè dependet ex voluntate eius, cui aliquid relinquitur: v. g. *Si naues ex India appulerint.* Et *mixtam*, cuius euentus partim ex parte eius, cui imponitur: partim etiam aliunde dependet: v. g. *Lego Titio centum, si Caiam uxorem duxerit.* Quibus omnibus conditionibus hoc commune est, vt, si aliquid ita legatum sit, ad hæredes non transmittatur; neque legatario cedat, antequam conditio impleatur: adeò, vt si prius legatarius è vita discedat, omnino legatum expiret, sicuti constat ex l. vn. §. si autem aliquid sub conditione, C. de caducis tollendis. Modò relictum fuerit principaliter intuitu personæ: secus, si intuitu animæ, seu piæ causæ, vel intuitu dignitatis. Id verò ex circumstantiis diiudicandum erit: an qui dotem v. g. reliquit Titie puellæ pauperi, principaliter id egerit causa pietatis: vt proinde illà mortuà antequam legatum assequeretur, alteri puellæ maritandæ assignanda sit: an verò testator principaliter motus fuerit fauore talis personæ: quia v. g. diu ipsi seruierat tunc enim expirabit legatum, vti docet Abb. in c. no: quidem, de testament. n. vlt. Syl. ver. legatum, l. quæst. 10. Item an is qui legauit, v. g. Episcopo mille, id egerit intuitu seu fauore personæ: quia erat eius propinquus: tunc enim eo mortuo, antequam dies legati cedat, expirat legatum: si autem dies iam cesserat, transmittitur ad eius hæredes. An verò legatum sit intuitu seu fauore Ecclesiæ: tunc enim mortuo vno Episcopo, successor ei debetur. Qua de re scribit Syluester verbo Legatum, 2. quæstione 5. Ludouicus Miranda tomo 1. manualis Prælatorum, q. 32. art. 7. Quo loco rectè resoluit: Si legato relicto pro Monasterio in certo loco ædificando, ibi ædificari non possit: alio loco ædificandum esse, cum consensu Episcopi, & executoris testamenti.

Illud porro interest inter conditionem potestariam, & inter causalem, ac mixtam: quòd illa non nisi post mortem testatoris à legatario expleri debet: has verò satis est impleri post conditum testamentum, seu viuente, seu mortuo testatore, sicuti constat ex l. 2. ff. de condit. & demonstrat. atque ex communi docet Gomez l. resol. c. 12. n. 61. & 68. Mol. disp. 206.

Speciatim autem quæri potest de hæreditate, vel legato relicto sub conditione matrimonij contrahendi, vel non contrahendi. Qua de re dico primò: Hæreditas, vel legatum relictum sub conditione nuptiarum, ita & non aliter debetur, quàm si matrimonium contrahatur: cum sit iusta & honesta conditio. Cæterum, si is, cui relictum fuit, Religionem ingrediatur, illud ipsum consequi debet: ob benignam iuris interpretationem, seu præsumptionem, si testatori, vel donatori in mentem venisset de Religione, cogitare, nihilominus legatarum, donatarum fuisse, iuxta Auth. Nisi rogati, C. ad S. C. Trebellian. Verum, si nulla personam nominata, testator disposuit, vt puellis in matrimonium collocandis, tanta pecunia detur: præsumitur intellexisse de nuptiis propriè dictis, seu carnalibus, vti ex communiore docet Sanchez de matrim. lib. 1. disput. 33. numero 32. Si tamen expresse testator, vt legatum v. g. Titie obueniat, si nupserit, & Religionem ingressa non fuerit: verisimilius est, standum esse voluntate testatoris: quippe quæ bono etiam fine concepta esse potuit, non ea intentione, vt à Religionis ingressu retraheret: sed quia pro liberorum educatione, & familiaris sustentatione bona temporalia magis necessaria esse testator existimauit. Eademque ratione, si legata sint ali-







Resp. plerumque tantum venialiter; si iuramentum non accessit, de quo vide Sanchez lib. 7. disp. 88. n. 37. Ratio est, quia præsumentum est, noluisse se obligare ex iustitia; sed tantum ex virtute fidelitatis obligantis sub veniali, de quo vide Sa ver. promissio, n. 2. Sed et si ponamus, voluisse se ex iustitia obligare; quia erat reciproca promissio inter virum ac mulierem non transfundi ad secundas nuptias post mortem alterius; excusari tamen potest à peccato mortali ob leuitatem materiam: quia exiguum damnum censetur; quod coniugi mortuo per id inferitur; nisi forte liberi ex ipso superstitibus sint, quibus graue damnum ex tali matrimonio accideret: quo ipso casu, si promissio iuramento confirmata est, eius relaxatio facile & sine causa fieri non debet. Sin autem defunctus uxorem suam non simpliciter obligare voluit ad viduitatem; sed sub conditione, si legato potiri velit, tunc non solum in externo: sed etiam conscientiam foro alterutrum debet præstare vxor relicta; vel abstinere à nuptiis; vel si ad secundas nuptias transire velit, carere legato; aut si illud iam accepit, restituere, sicut constat ex Auth. cui relictum, C. de indicta viduitate, & docent DD. communiter apud Sanchez lib. 1. disp. 34. lib. 7. disp. 91. n. 5.

## CAP. XI.

## De executione testamenti, aliarumque vltimarum voluntatum.

## S V M M A R I V M.

- 1 Si nullus à testatore executor nominatus est, ad heredem executio spectat: nisi quod in quibusdam casibus executio ad Episcopum spectat, communi iure.
- 2 Qui executor à testatore nominatus est, non cogitur hoc munus suscipere: sed priuandus est commodo, quod ex dispositione testatoris ipsi prouenturum esset.
- 3 Fratres Minores de obseruantia executores testamentorum esse non possunt; alij vero Religiosi non nisi cum licentia Prælati. Sed in Societate Iesu requiritur ad hoc dispensatio Præpositi generalis.
- 4 Facultate, quam Ordinarius Prælati subdito dare potest, etiam ipsemet uti non prohibetur.
- 5 Si Religiosus contra canonum decreta executor testamentarius sit, acta eius valent.
- 6 Clericus, vel Religiosus testamenti executor, legatum inter pauperes, vel ad causas pias distribuendum, Monasterio, vel Ecclesie sue applicare potest.
- 7 Non videtur executor sibi ipsi applicare posse legatum pauperibus relictum; tamen si ipsemet pauper sit.
- 8 Legata ad causas pias ob incertitudinem loci, ecclesia &c. caduca non sunt: sed plerumque pauperiori ecclesie, xenodochio, &c. danda erunt.
- 9 Si indeterminata legata sit res à natura terminos non habens, sed ex arte, industria hominis; sufficit dare, quod in eo genere pretij minimi est: nisi coniectura sumi possit, aliud testatorem voluisse. Idque etiam in legatis suis locum habere, improbabile non est.
- 10 Legata pia, si ad usum à testatore destinatum applicari nequeant, ad alium pium usum adhiberi debent.
- 11 Legata ad alium usum, contra, aut præter defuncti voluntatem applicari non possunt, nisi per dispensationem summi Principis ex iusta causa. Interdum tamen ad Episcopum, atque heredem, vel executores pertinet interpretari, non alienum fore à voluntate defuncti, si mutatio fiat.
- 12 Hæres, alique executores, si negligant, aut longo tempore differant soluere legata, præsertim pia, grauiter peccare censendi sunt.
- 13 Heredem, vel executorem negligentem, si laicus sit; vterque index, Ecclesiasticus, & secularis, compellere potest ad exequendas vltimas voluntates defunctorum.
- 14 Legatarius post aditam hereditatem rei sibi legata dominus efficitur.
- 15 Si nemo sit, qui legata, præsertim pia, exigat, aut exigere possit, ad iudicem pertinet heredem compellere, ut soluat.

**QVÆSTIO PRIMA.** Quisnam possit, vel debeat esse executor testamentorum? Respondeo, & dico I. Si nullus testamenti executor à testatore nominatus est, ad hæredes executio pertinet, etiam quod attinet ad legata pia, sicut colligitur ex c. nos quidem, &c. si hæredes, de testam. Excipiuntur tamen legata pro redemptione captiuorum, & alimentis siue eleemosynis pauperum; horum enim executio ad Episcopum, tanquam patrem pauperum, & miserabilium personarum, si nullus alius executor relictus est, spectare debet, secundum Authent. de Eccles. tit. §. si quis pro redemptione, & l. nulli, C. de Episc. & docet Abb. in cit. c. nos quidem. n. 4. Couar. n. 11. Mol. disp. 247. Spectanda tamen hac in re est cuiusque loci consuetudo.

**Dico II.** Executores testamenti à testatore constitui possunt vnus, vel plures; siue ex hæredibus, siue ex aliis: & non tantum masculi, sed etiam feminae, sicut colligitur ex cit. c. nos quidem, & l. à filio, ff. de alimentis legatis. Et non tantum laici, sed etiam Clerici, ac Religiosi, c. tua nobis, c. Ioannes, de testamentis: quandoquidem executio iustæ voluntatis defuncti inter pia opera numerari solet.

**Dico II.** Is, cui à testatore munus executoris seu ad alias, seu profanas causas, demandatum est, suscipere illud non cogitur; sed postquam semel suscepit, secundum eiusdem defuncti voluntatem exequi compellitur. Colligitur ex cit. c. Ioannes, & docet ibid. Gl. ver. mandatū susceptū, Abb. n. 3. Porro si executori aliquid in præmiū, ac veluti sub conditione, ac modo obeundi muneris relictū fuerit, ipso iure amittit, si munus suscipere recuset. Sin autem ipsemet hæres, vel legatarius oneratus sit iussu testatoris exequi: tunc nisi obediat, priuandus est à Iudice omni cōmodo, quod ex testamento ipsi prouenturū esset, vti habetur in Auth. de hæredibus & Falcidia, §. his igitur à nobis. Auth. hoc amplius, C. de fideicommissis, &c. licet de voto, vbi hæres nolens exequi votū, cuius executio ipsi à patre iniuncta fuerat, hæreditate paterna priuandus dicitur. Eademque ratione, si is, cui aliquid à defuncto legatum, ab eodemque tutor testamentarius liberorum nominatus est, tutelam suscipere recuset; commodo seu legato, quod alioquin ex testamento capturus esset, priuandum fore, ex communi docet Mynsing. cent. 6. obser. 87.

**QVÆSTIO SECUNDA.** Vtrum Religiosi testamentorum executores esse possint? Respondeo, & dico I. Fratres Minores de obseruantia munus executoris testamentarii omnino prohibitū est, vt neque eorum Prælati dispensare, seu licentiā dare possint; Clement. Exiui, §. proinde cum vir, de verbor. signif. vbi tamen adiungitur, quod in exequendis testamentis consilium dare eorū statui non obstat: cum ex hoc ipsis circa bona temporalia nulla iurisdictio, siue actio in iudicio, siue dispensatio tribuatur. Ex quo recte inferunt Angelus ver. executor, n. vlt. Couar. c. tua, n. 1. de testam. Rodriq. t. 3. Regul. q. 70. art. 2. Sanchez. lib. 6. moral. c. 11. q. 2. n. 32. Si testator præceperit executoribus, vt aliquod legatum, v. g. inter pauperes distribuunt; cum consilio vel electione Fratrum Minorum; quod executores ex quadam morali æquitate consilium requirere, & electionem sequi debent: si Prælati, seu Guardianus licentiā det operi huic promouendo, quod secundum se piū est, & nullā ferme occupationē, distractionemq; adferens. At verò ex necessitate sequi non tenentur executores directionem Fratrum: alioquin ipsi potius executores foret quoad effectū, alique eorū ministri, & subordinati: quod fieret in fraudē canonis, vti bene docet Syl. ver. testā. 2. q. 2. dicto 7. & sequitur Molina t. 1. tr. 2. disp. 237. ver. Illud est obseruandum. Quamobrē si testator conditionē apposuit, vt, nisi consiliū Fratrum executores petant, vel sequantur, irrita sit executio: hoc casu corrumpit ipso iure nominatio executoris, quippe facta sub forma iure prohibita, & impossibili reputata.

**Dico II.** Alij Religiosi testamentorum executores esse non possunt, seu ad alias, seu ad profanas causas, nisi cum licentia Prælati; qui in exemptis Ordinibus est regularis Prælati Monasterij; in non exemptis Episcopus. Constat ex c. 2. de testam. in 6. Clement. vn. eod. tit. In Religione autem Societatis Iesu hanc licen-



tiam solus Generalis Prepositus ob casum necessitatis dispensatione concedere potest, uti habetur p. 6. Constit. c. 3. §. 7. in declarat. lit. D.

- 4 Veruntamen ipsimet Ordinum Prælati executores testamentorum esse non prohibentur, ob generalem regulam Syl. lo. cit. Rodriq. cit. q. 70. a. 1. Sanchez num. 5. §. Religiosus tamen: Quod facultatibus, quas Prælati Monasterij subditis concedere potest, eisdem ipsimet uti non prohibetur, nisi à superiore ipsi interdictum, vel aliud statuto Ordinis decretum sit. Deinde si Regularis extra obedientiam actualem viuat, seculari Ecclesiæ addictus, executor testamenti esse poterit: cum esset in eo ratio prohibitionis, teste Gl. in cit. c. 2. ver. Religiosus, Sanchez n. 4.

Porro si Religiosi claustrales testamenti executores fuerint, rationem reddere debent locorum Ordinariis: à quibus etiam puniri poterunt, si in executionis officio deliquisse reperiuntur: quamvis alioquin à iurisdictione illorum exempti sint. Ita habetur in cit. Clement. vn. de testam.

- 5 Dubitant verò Doctores primò: Si Religiosus quicumque contra canonum prohibitionem, testamenti, aut cuiuscunque ultimæ voluntatis executor sit, utrum gesta eius valeant, si exceptio defectus potestatis in iudicio ipsi non obijciatur? Et probabilior est responsio: Quod valeant gesta: cum adsit, spectato iure naturali, sufficiens voluntas testatoris, & executoris: neque canones infirmant, quamvis prohibeant, sicut bene docet Sanch. nu. 44. argu. l. filius §. veterani, ff. de Procurat. ubi habetur: Tamen miles procurator in iudicio esse non possit, si tamen non repellatur, acta eius valere: licet contrarium sentiant. Syl. Couar. Molina, ll. supra cit.

- 6 Dubitatur secundò: Vtrum Religiosus testamenti executor legatum inter pauperes, aut causas pias distribuendum Monasterio suo applicare possit? Eademque ratio est de Clerico beneficiato, comparatione Ecclesiæ suæ. Responsio est affirmatiua, apud Syl. ver. testamentum, 2. q. 2. dicto 5. Rosel. ver. restitutio, 15. num. 8. Sanchez lib. 6. c. 11. num. 59. Quia nulla ratio afferri potest, cur non liceat æquè Monasterio indigenti, quàm alteri causæ applicare: nisi quia in causa propria executionis auctoritatem præberet. Sed hæc ratio non obstat: quia causa Monasterij distincta est à causa, seu persona Professi: sicuti & causa Ecclesiæ cuiuscunque distincta est à causa beneficiati. Quare eadem ratione quilibet executor iussus pauperibus dare, potest tribuere contangueis suis verè indigentibus, etiam propriis filiis, quamvis illegitimis, aut spuris: quia euident est distinctio inter dantem ac recipientem, uti docent Gl. & Rosella ll. cc. Sanchez n. 52. & 55.

- 7 Quod autem sibi ipsi executor eleemosynam applicare non possit, si testator notam habuit ipsius paupertatem, videntur supponere plerique Doctores; propterea, quod testator, si sciisset eum capacem esse legati, expressè ei aliquid reliquisset, & non tali modo capiendi potestatem fecisset. Qua simili ratione docent DD. apud Sanchez nu. 55. quod is, cui potestas commissæ est eligendi successorem primogenituræ, seipsum eligere non possit. Sin verò testator ignorauit paupertatem executoris, vel ea postea superuenit, hoc casu non minùs sibi ipsi, quàm aliis pauperibus, ex legato inter pauperes distribuendo applicare poterit, secundum præsumptam voluntatem domini. quo casu vera est sententia S. Thom. 2. 2. q. 32. a. 9. ad 3. iun. Caiet.

QVÆSTIO TERTIA. Quomodo relicta incerta executioni mandanda sint? Respondeo & dico I. Si incertitudo sit ex parte personæ, v. g. legatarij; quia duo eodem nomine appellantur; neque ex coniecturis colligi possit, de quo testator locutus fuerit; civili iure corrumpit legatum, l. si fuerit, l. si quis pluribus, ff. de rebus dubiis, l. duo sunt Titij, ff. de testam. tutela, Quam-

uis Mol. disput. 197. existimet, in conscientia fore legatum hoc casu inter vtrumque secundum proportionem dubij, diuidendum fore: quia æquitas naturalis sic exigat. Responderi tamen potest, etsi ita sentiendum sit, spectato iure naturali præcisè; tamen civilibus legibus contrarium statutum fuisse, boni publici causa; tum ad litium occasionem auferendam; tum ad excitandum studium testantium, ut voluntates suas clarè, non ambigè expriment; si sciant, alioquin irritas, & inefficaces fore.

Excipienda autem sunt legata ad pias causas, quæ ob incertitudinem loci, Ecclesiæ, &c. caduca non fiunt, sicuti habetur in Auth. de Ecclesiasticis titulis, cap. 6. Si quis in nomine magni Dei, & Saluatoris nostri Jesu Christi hereditatem, aut legatum reliquerit, in eadem Ecclesiâ loci illius, in quo testator domicilium habuerit, accipere, &c. Si quis autem unum Sanctorum heredem scripserit, aut legatum ei reliquerit, & non specialiter nominauerit locum, in quo est venerabilis domus, inueniantur autem in eodem loco, aut ciuitate plura oratoria eiusdem Sancti, illi magis domui, que pauperior est, præbeatur. Si autem non est in ciuitate basilica nominati Sancti inueniatur autem in territorio eius, illi detur: Si autem neque in territorio eius reperitur eiusmodi domus: tunc ecclesia ciuitatis (siue Parochiæ) in qua testator domicilium habuerit, præbeatur.

Simili modo, si aliquid absolutè & sine expressione loci pauperibus, vel ecclesiæ ædificandæ legatum fuit, executionem fieri oportet in loco: ubi testator domicilium habuit, l. si quis ad declinandam, C. de Episc. & Clericis. Nisi sit extraneus, ut domicilium eius ignoretur, vel multum distet: tum dabitur pauperibus loci, ubi mortuus est, arbitrio Episcopi eiusdem loci, si defunctus alium executorem non designauit, sicuti habetur in l. nulli, C. de Episc. & Clericis, & in cit. §. si quis autem pro redemptione captiuorum, & tradit Mol. t. 1. tr. 2. disp. 157.

Deinde statuitur in cit. illo §. Si quis in nomine, & notat Gl. in c. indicante, de testam. Si in aliquo testamento, vel legato dubium sit, ex duobus locis pijs, utri conferendum; seu propter incertitudinem verborum, seu propter hereditatis insufficientiam, tunc locum pauperiorem, & magis indigentem præferri oportere. quod etiam notauit Lud. Miranda in man. t. 1. q. 32. a. 8. ubi ait: Monasteria Monialium, quippe quæ plerumque indigentiores sunt, præferenda esse Monasteriis virorum.

Præterea, si quippiam absolutè ac generatim relictum pro pauperum alimentis, videtur esse in arbitrio executorum: vel, si nulli executores constituti sunt, in arbitrio Episcopi, distribuere in eos, qui verè pauperes sunt, sicuti colligitur ex cit. Authent. si quis autem, & docet ibi Gl. marginalis ex Bartolo. Bene etiam admonet Palud. in 4. d. 15. q. 3. a. 7. concl. 4. Nominè pauperum tales intelligendo esse, qui victum incertum habent ex eleemosynis fidelium: non autem ea Xenodochia, vel Religiosorum Monasteria, quæ ex fidelium eleemosynis collectum annuum sufficientem victum obtinent. Hæc tamen omnia, quæ dicta sunt, intelligi debent, nisi coniecturæ adsint, ex quibus probabiliter cognosci possit, quanam fuerit determinatè voluntas testatoris: hæc enim in primis attendenda est, sicuti notat Abb. c. nos quidem, de testam. num. 13. & c. 4. num. 4. Couar. ibidem num. 2. Mol. t. 1. tr. 2. disp. 197. prope finem.

Dico II. Si incertitudo sit ex parte rei, refert, utrum ea certis fines æterminos à natura habeat: ut puta si legatus sit bos, equus. An verò terminum ac finem non habeat à natura: sed ex arte & humana industria, ut domus, vestis, scutella. Priore casu, danda est vna ex membris, l. legatus generaliter, ff. de legatis, l. 1. Vbi Gloss. ver. pessimus addit, distinguendum esse in tali casu: utrum



eiusmodi rerum genus sit in patrimonio testatoris: tunc electionem pertinere ad legatarium: dummodo non eligat meliorem, iuxta §. si generaliter, iuncta Gloss. ver. electio legatarij, Institut. de legatis. Et facta semel electione, non potest deinde mutato animo aliam rem eligere, l. serui electione, in princ. ff. de legat. 1. Sin vero non sit in patrimonio testatoris, pertinet electio ad hæredem: quia res aliena non potest optari, aut vindicari, ait Abb. in c. indicante, num. 5. de testament. Posteriore autem casu electio pertinet etiam ad hæredem, qui rem in eo genere quamuis minimam dando liberatur, l. legato, l. si ita scriptum, in fine, ff. eod. Idemque sentiendum de rebus legatis in numero, pondere, vel mensura constitutibus: nam sufficit, quod in eo genere ac quantitate minimum est, tribuere, l. 3. ff. de tritico, vino, & oleo legato. Dummodo non recedatur à verborum proprietate, aut consuetudo vsu: multoque minus à testatoris voluntate, si ea ex coniecturis colligi possit, sicuti habetur expressè in l. numis, ff. de legatis, 3. *Numis in distinctione legatis, receptum est, ut exigua legata videantur, si neque ex consuetudine patrisfamilias, neque ex regione, unde fuerit, neque ex contextu testamenti possit apparere.*

Excipiunt autem DD. communiter ab hac assertionem legatum ad piam causam, quod si indeterminatè factum sit, nec appareat, quale testator intellexerit, præstandum esse quod in tali genere melius est. Ita enim docet Bart. in l. Titia, §. Scia, ff. de auro & argento legato Abb. c. indicante, de testam. nu. 6. & in c. ex parte, n. 4. de censibus, Couar. in cit. c. indicante, nu. 5. Contrarium tamen non improbabilius cum Baldo & alijs apud Couar. l. c. respondent Molina disput. 198. Sanchez lib. 4. moral. c. 13. n. 8. & c. 15. nu. vlt. Etiam in legatis pijs indeterminatè factis sufficere præstare rem, quæ in eo genere minimi pretij est. Nam in dubio melior est conditio domini possidentis, qui proinde nullo iure soluere cogitur, nisi ostendatur debitor. Atqui, si res aliqua indeterminatè legata sit ad causam, seu piam, seu profanam: tunc hæres post aditam hæreditatem, omnium rerum defuncti dominus, & possessor existit: Ergo soluere non tenetur legatum, nisi secundum eum valorem, quo certè, vel probabiliter constat, à defuncto obligatum fuisse. Accedit, quod ipsemet testator, si quippiam Ecclesiæ promiserit, in dubio satisfaci præstando rem in eo genere minorem, iuxta cit. c. ex parte, de censibus: Ergo similiter hæres, personam defuncti representans. Illud tamen valde probabile est, quod idem Ab. tradit in cit. c. ex parte, nu. 5. Licet civili iure vitietur promissio, vel legatum ob nimiam generalitatem: ut si quis promississet triticum, quia dando modicam quantitatem liberaretur, l. triticum, ff. de verb. obligat. Tamen secundum æquitatem canonicam, si appareat, voluntatem promissoris, vel testatoris fuisse obligationem aliquam inducendi, vir bonus in causis pijs arbitrari debet, quid, spectatis circumstantiis, dandi m sit.

**QVÆSTIO QVARTA.** Vtrum voluntates defunctorum, præsertim circa relicta ad causas pias, ab executore, vel Episcopo in alium pium vsum interdum commutari possint: Respondeo, & dico I. Si legata pia ad cum vsum pium, quem testator voluit, nequeant applicari, nõ ideo caduca fiunt: quia principalis intentio fuerat in salutem animæ, ad honorem Dei relinquendi: quare arbitrio Episcopi, & executorum ad aliam piam causam applicanda sunt: ita tamen, ut quatenus fieri potest, defuncti voluntas impleatur. Habetur in c. nos quidem, de testam. & notat ibi Couar. n. 12. Abb. n. 6. vbi admonet: *Si pecunia relicta à testatore ad monasterium construendum, non sufficeret, debet conuertere in alium pium vsum: sed unum semper nota, quod ista conuersio non potest fieri per solum hæredem: nec per solum Episcopum: sed per vtrumque.* Excepto, si hæres, vel alius executor in tali casu Episcopo sine iusta causa consentire recuset: tunc eo etiam inuito, Episcopus propositum suum exequi poterit, sicuti colligitur

ex cit. c. nos quidem, & cum Felino docet Rochus de Curte de iure patronatus, in 6. definitionis verbum, nu. 32. Couar. cit. c. nos quidem, num. 3. Præterea, si cuiuspiam pauperi, vel Religioso relictum fuerit, non in fauorem eius personæ, sed in salutem animæ, seu tanquam ob piam causam (quod in dubio præsumitur) tunc et si personæ illi dati non possit, ad alium pium vsum conuertere debet, sicuti docet Abb. in cit. c. nos quidem, num. 14. Mol. disput. 294. argum. l. legatum, ff. de usufructu legato.

Dico II. Si voluntas defuncti iuste & honestè impleri potest, non est concessum executoribus, vel Episcopo eam in aliud opus, quantumuis melius videatur, commutare, sicut constat ex c. conquestus, de foro competente, c. quia nos, de testam. & c. 4. causa 13. q. 2. ex S. Gregor. 1. lib. 3. epist. 9. refertur, quod *ultima voluntas defuncti modis omnibus seruari debet.* Et in Clem. quia contingit, de religiof. domibus: *Cum ea, quæ ad certum vsum largitione sunt destinata fidelium, ad illum debeant, non ad alium, salua sedis Apostolica auctoritate, conuertere.* Consentit Trident. Concil. sess. 22. c. 6. de reformat. vbi inprimis supponitur, commutationes vltimarum voluntatum non nisi ex iusta, & necessaria causa fieri oportere à sede Apostolica: Additur verò, si eiusmodi commutationum executio Episcopis à sede Apostolica delegetur, quod talem executionem prius facere non debeant, quàm summarie & extraiudicialiter cognouerint, nihil in precibus summo Pontifici oblati, subreptionis incurrisse: qui est verus sensus dicti cap. 6. apud Lud. Molinam t. 1. tr. 2. de iustitia, disput. 249. col. 3. Eaque simili ratione in ciuili iure prohibitum est, l. 1. & 4. ff. de administratione rerum ad ciuitates pertinentium: Ne res ciuitati, vel municipio legata in aliam rem, quàm defunctus voluerit, citra Principis auctoritatem, conuertatur. Merito autem excipitur Principis suprema potestas: quippe cum is toti Reipublicæ præpositus, quæ ad eius commodum spectant, providere debeat: ac proinde ob eandem causam, si in relictis Ecclesiæ modus aliquis, vel conditio adiecta fuerit, quæ congruere non videatur: ea tanquam inutilis adiectio sum. Pontificis auctoritate declarari potest, sicuti docet Driedo lib. 2. de libert. Christiana, c. 4.

Excipiendum tamen arbitror, nisi causa aliqua vel de nouo incidens, vel ignorata à testatore subsit, quam si testator præuidisset vel cognouisset, aliter disposuisset: & nunc quoque, si viueret, contentus esset legatum pium in alium vsum, quàm destinarat, conuertere: quod secundum epikeiam inter pretari ad Episcopum, & hæredem, aliòsque executores pertinet: v. g. si testator leget Ecclesiæ pecuniam ad vasa sacra conficienda: & Ecclesia illa non indigeat vasis sacris, sed potius casulis. Qua etiam ratione defendi potest, quod docet Couar. in c. tua, num. 12. de testam. *Auctoritate Episcopi posse pecuniam à testatore in certum vsum pium, non ita necessarium, destinaram, expendi in alium item pium vsum magis Christiane Reipub. ac Religionis necessarium, cui necessitati aliunde subueniri nequeat absque magna difficultate.* Et Sa ver. testamentum, num. 33. *Potest Episcopus, cum consensu executorum, conuertere in maiorem publicam necessitatem, quod in minorem erat relictum: item quod non potest commode fieri, in aliud conuertere.* Hæc enim intelligenda esse arbitror, non de propriè dicta dispensatione: quippe circa supremas voluntates ad summum Principem spectat: sed de interpretatione secundum epikeiam, quod in tali casu commutatio legati non fiat contra voluntatem defuncti. Ponamus enim v. g. testatorem alicui Ecclesiæ legasse aureos 100. quia indigebat ornamentis, vel restauratione: postea verò non indigeat, quia ab alio interim dotata est: hoc casu poterit Episcopus, cum hæredis, vel executorum consensu, pecuniam conuertere in alium similem pium



pium vsum, qui magis necessarius videbitur.

Porrò in aliis legatis ad causam profanam, & priuatam facilius commutatio fieri potest, consentiente non tantum hærede, sed etiam legatario, quippe qui iuri ac favori suo renunciare potest. Vide Syl. ver. legatum, 2. q. 11. & 13. Ioan. Molanum tract. de testam. piis, c. 72.

- QVÆSTIO QVARTA.** Intra quod tempus hæres, aliique executores defuncti voluntatem exequi debeant: & quis eos ad executionem compellere possit?
12. Respondeo, & dico I. Hæres, aliique executores, post hæreditatem aditam, & inventarium confectum, statim tenentur soluere legata, & alia exequi, quæ defunctus præceperat: nisi iusto impedimento excusentur. Ita habetur in c. si hæredes, de testam. vbi Abb. n. 5. Couar. n. 4. Mol. disp. 251. §. dubium item est, Syl. ver. testamentum, 2. q. 6. & 9. Pet. Nau. lib. 3. de restit. c. 4. n. 165. Causam autem iustam differendi aliquamdiu executionem legati pij commemorat S. Th. quodlib. 6. a. 14. Vt res defuncti maiore pretio vendi, & ampliores eleemosynæ in pauperes secundum defuncti voluntatem distribui possint: secus, si longo tempore expectandum sit, & non multò maior pecunia prouentura existimetur. Rectè enim notant Syl. & Pet. Nau. hæredem, atque executores, si diu differant solutionem legatorum, grauiter peccare non tantum aduersus eos, quibus relicta sunt: sed etiam interdum aduersus defunctum, si tardè, vel non integre præstentur legata pia, & eleemosynæ relicta in remedium animæ, per sacrificia, orationes, aliæque fidelium suffragia: quin & ipsamet executio legati pij, puta actualis largitio eleemosynæ, non parum momenti habet ad satisfaciendum pro peccatis defuncti, cuius nomine ac voluntate fit: qua de re S. Th. quodlib. 9. a. 13. & Gabr. in can. Missæ lect. 58.

13. Dico II. Spectato iure communi Iudex tam Ecclesiasticus, quam secularis compellere potest hæredem, vel executorem laicum ad exequendas vltimas voluntates, si negligat: quare officium huius iurisdictionis est mixti fori, daturque locus præuentioni, sicuti notauit Abb. in cit. c. si hæredes, num. 3. & in repet. c. cum esses, n. 32. de testam. quibus locis specialiter ostendit, ad Iudicem Ecclesiasticum hoc spectare etiam in relictis ad causas profanas. Nam Iudex Ecclesiasticus subuenire debet personis miserabilibus, & destitutis omni auxilio, c. super quibusdam, de verb. signif. Sed defunctus omni auxilio destitutus, & idcirco miserabilis persona censetur: cum causam ipsamet suam agere non possit. Ergo, &c.

Pœnas autem negligentibus executoribus iure statutas legere potes apud Abb. & Couarruu. in cit. cap. nos quidem, & cap. si hæredes, Syl. ver. testam. 2. q. 6. & 8. Molin. dispu. 251. Videlicet, vt si intra medium annum, à die publicationis testamenti numerandum, cessante legitimo impedimento legata pia exequi neglexerint, postea eadem soluere cogantur cum omnibus fructibus & emolumentis, quæ à die mortis testatoris percipi poterant, iuxta cit. cap. si hæredes, Authent. de Ecclesiast. titulis, §. si autem legatum. Insuper, si bina etiam monitio ab Episcopo facta accesserit, priuentur omnibus commodis in testamento sibi relictis, vt habetur in cit. Auth. §. si quis autem pro redemptione. Sin autem hæres perperam neget legatum fuisse ad pias causas, & in ea negatione perseueret vsque ad sententiam, condemnandus est in duplum, §. item mixta, Instit. de action. iuncto Abb. in cit. c. si hæredes, n. 5.

Denique si hæredes, aut alij constituti executores legatorum, aliorumve relictorum, seu ad pias, seu ad profanas causas, intra annum post monitionem à Iudice seu Ecclesiastico, seu seculari factam, exequi intermiserint, omni commodo (excepta sola legitima, si hæredes necessarii sint) ex testamento ipsis proueniente priuantur, iuxta Auth. hoc amplius, C. de legat. & fidei-

commiss. & Authent. de hæredib. & Falcidia, §. si quis autem. Non obligat tamen hæc pœna in conscientia ante Iudicis condemnationem, vt annotauit Couar. in cit. cap. si hæredes, num. 9. contra Gl. in cit. §. si quis autem, ver. auferri.

Dico III. Legatarius cum primum hæreditas adita est, instituere potest actionem non tantum personalem ex testamento aduersus hæredem, sed etiam realem vindicationis; quippe cum ex eo tempore rei in specie legata dominus existat; & perinde quidem secundum iuris fictionem, ac si statim post mortem testatoris recta via ad ipsum rei legata dominium transisset, l. à Titio hærede, ff. de furtis, iunct. Gloss. verbo, recta via, & l. si tibi homo, §. cum seruus, ff. de legatis 1. Adde, hypothecariam quoque actionem, in securitatem ac subsidium, legatario competere in omnes res hæreditatis, & aduersus quemcunque earum possessorem, sicuti habetur in l. 1. C. communia de legatis, & docet Abb. c. si hæredes, n. 2. de testam. Gomez 1. resol. c. 12. n. 7. & 8. Mol. to. 1. tract. 2. disp. 3. Idque verum esse admonent de personali, & hypothecaria, seu quasi Seruiana actione, siue res legata sit in specie, puta *hic equus*: siue in genere, *aliquis equus, tot mensura tritici*.

Quod si nemo adsit qui petat, vel petere possit legata, præsertim ad causas pias, Iudex tam Ecclesiasticus, quam secularis ex officio hæredem compellet ad solutionem, sicuti colligitur ex c. nos quidem, de testam. vbi Abb. num. 5. notat; Et si fratres Minores agere non possint in iudicio ad solutionem legatorum; cum pro nulla re temporali iudicio experiri ipsis liceat, c. exijt, §. cæterum cum in eadem, de verb. signif. in 6. ad Iudicem tamen ex officio suo pertinere, vt hæredem ad eiusmodi legata Fratribus soluenda adigat: quàm obrem interdum Syndicus constituitur, qui nomine Ecclesiæ Romanæ petat; deinde ipsamet ciuitas, eiusve Syndicus ad præstandum legatum tanquam pauperibus, compellere potest, argum. l. ciuitatibus, ff. de legatis, 1. Denique etiam ipsimet Fratres extra iudicium admonere Iudicem non prohibentur, vt officij sui memor ad talia soluenda legata hæredem cogat, teste Rodriq. t. 2. regul. q. 126. a. 4. in fine, Sanchez lib. 7. moralium, c. 26. num. 62. Atque similitudine, si Domui professæ Societatis Iesu, illiusve ecclesiæ eleemosyna annua perpetua, vel ad tempus longum relinquatur; licet eiusmodi redditus in iudicio exigendi, vel administrandi potestatem Societas non habeat: tamen Iudex tum Ecclesiasticus, tum civilis, ex officio compellere deberet hæredem ad soluendum; atque ciuitas, eiusve Syndicus, aut quiuis è populo agere posset, vt ea soluantur, tanquam quæ pauperibus relicta sunt, ait Sanchez cit. lib. 7. cap. 27. num. 10.

Dico IV. Executores quoque agere possunt in iudicio ad legata pia implenda, tum aduersus hæredem, tum etiam aduersus alios bonorum hæreditatis possessores, modo suprà dicto. Ita ex l. nulli, l. si quis ad declinandam, C. de Episc. & Clericis, docet Abb. c. Ioannes, de testam. n. 4. Couar. n. 5. Syl. ver. testamentum, 2. q. 5. dicto 2. Mol. disp. 148. §. quod ad vltimum. Ad alia verò non pia legata consequenda, qui meri executores testamenti sunt, nullam actionem instituere possunt; sed solum Iudicis officium contra hæredem negligentem implorare debent, sicuti constat ex l. Lucius, §. Mænia, ff. ad S. C. Trebellian. l. hæreditas, ff. de petit. hæred. & docet Abb. in cit. c. Ioannes, n. 4. aliique suprà citati.



## CAP. XII.

## De sepultura, &amp; Portione canonica.

## S V M M A R I V M.

1. *Locus sepulture Ecclesiastica est ecclesia, & cœmeterium.*
2. *Incumbit preceptum misericordie sepeliendi fidelium corpora, si nemo alius adsit, qui sepeliat.*
3. *Ius sepulture communi iure competit ecclesiis parochialibus; ex privilegio etiam aliis.*
4. *Religiosis, & Clericis sauerè prohibitum est, ne quemquam ad vouendum, aut inrandum inducant, ut potius in ipsorum ecclesia sepulturam eligat.*
5. *Puberes, qui liberum arbitrium habent, sepulturam extra parochiam eligere possunt.*
6. *Religiosi ius sepulture eligende non habent, nisi à Monasteriis, vel Collegiis multum disitis decedant: Nouitij autem sepulturam eligere arbitratu suo possunt.*
7. *Prelati Ordinum, qui Superiorem Ordinis sui nullum habent, sepulturam etiam extra Monasterium deligere possunt.*
8. *Qui nulla electa sepultura decessit, sepeliendus est in propria Parochia, nisi sepulchrum Maiorum habeat.*
9. *Famuli Religiosorum intra Monasterium, vel Collegium morientes in illorum ecclesiis sepeliri possunt.*
10. *Omnes fideles in loco sacro sepeliendi sunt, nisi constet decessisse impœnitentes; vel nisi ob canonicam pœnam, aut censuram prohibeantur.*
11. *Catechumeni in loco sacro non sepeliendi sunt.*
12. *Omnis peccator mortalis ac notorius sepulturâ sacra prohibetur, si eum absque pœnitentia decessisse præsumi possit.*
13. *Duplex est portio canonica: Vna episcopali, & altera parochiali: utraque per legitime consuetudinis præscriptionem aboleri potest.*

**QVÆSTIO PRIMÆ.** Quisnam sit locus sepulture sacre & Ecclesiasticæ. Respondeo, inprimis Ecclesia. Nam vt Greg. I. ait lib. 4. Dial. c. 5. relatus in c. 17. causa 13. q. 2. *Cum gratia peccata non depriment, hoc prodest mortuis, si in ecclesia sepeliantur, quod eorum proximi, quoties ad eadem sacra loca veniunt, suorum, quorum sepulchra afficiunt, recordantur, & pro eis Domino precantur.* Et S. Aug. in l. de cura pro mortuis agenda, c. ult. *Non estimemus ad mortuos, pro quibus curam gerimus, peruenire, nisi quod pro eis, siue altaris, siue orationum, siue elemosynarum sacrificiis solemniter supplicamus.* Et infra: *Quod vero quisque ad memoriam Martyrum sepelitur, hoc tantum mihi videtur prodesse defuncto, ut commendans eum etiam Martyrum patrocinio, affectus pro illo supplicationis augeatur.* Refertur in c. 19. ead. q.

Deinde cœmeterium, quod dictum est quasi dormitorium, in quo fidelium corpora sepeliuntur, & plerumque est locus annexus ac vicinus ecclesiæ consecrata, auctoritate Episcopi ad sepulturam deputatus, sicut docet Gloss. communiter recepta c. in Ecclesiastico, 11. q. 2. ver. si terram, Abb. in cap. abolendæ, de sepulturis, ubi notant: Cœmeterium canonico iure sacrum fieri, non eò quod corpus mortui illatum est: sed quod Episcopi auctoritate ad fidelium sepulturam deputatum. de qua re vide quæ dicam lib. 5. tract. 5. c. 5. n. 1. Admonet autem Syl. ver. sepultura, q. 1. cœmeterium constitui etiam posse, aliquantulum remotum ab Ecclesia propter fœtorem: præsertim pro eorum corporibus, qui pestem oriuntur.

Denique notant Bannes 2. 2. q. 32. a. 2. concl. 3. Valent. to. 3. dif. 3. q. 9. p. 2. Sa ver. sepultura, prope finem: *Mortale peccatum esse, si quis fidelium corpora sepelire negligat, cum nullus alius adest, qui id officium præstet: quia opera charitatis ac misericordie in casu eiusmodi necessitatis obligatoria sunt, sicuti constat ex lib. 2. tractatu 3. cap. 6.*

**QVÆSTIO SECUNDÆ.** Quibus ius sepulture competat? Respondet Abb. c. certificari, de sepulturis, n. 8. Syl. q. 3. *Communi iure conuenite solum Ecclesiis quæ habent populum, siue Parochialibus: nam vt sa-*

cramenta, verbi Dei prædicatio: ita & sepulture officium fidelibus præstare, ad eorundem Pastores pertinet, vt colligitur ex Clem. dudum, §. verum, de sepulturis. At verò privilegio Papæ ius sepeliendi fideles, concessum est etiam Religiosis, inprimis Ordinis Prædicatorum, & Minorum, vt videre est in cit. Clem. dudum: deinde verò etiam aliis. Atque item Episcopum, ex causa, cum consensu Capituli, ius sepeliendi alicui Ecclesiæ non Parochiali concedere posse, affirmat ibidem Abb. n. 9. Mol. disp. 214.

His duo adde: Primum. Religiosi, qui liberam à Papa sepeliendi potestatem habent, si cum Episcopo, vel Parocho paciscantur de non sepeliendis Parochianis, valet pactum: quandoquidem privilegio suo renuntiare possunt, c. 1. de pactis, in 6. Neque opus est adhiberi consensum Generalis, aut Provincialis Ordinis; sed sufficit immediatum Prælatum, puta Priorem, Guardianum vñ cum Capitulo consentire, c. 3. de pactis, in 6.

Secundum: In c. 1. de sepulturis, in 6. Religiosis, & Clericis prohibetur, ne aliquem ad vouendum, vel iurandum inducant, vt apud eorum potius Ecclesiam sepulturam eligat, vel iam electam vterius non immutet, idque sub quadruplici pœna: I. Excommunicationis, ipso iure incurrendæ, & Papæ reservatæ, sicuti videre est in Clem. cupientes, de pœnis, in fine. II. Vt electio talis sepulture irrita sit, & corpus defuncti in ea Ecclesia sepeliri debeat; vbi, non electa sepultura, sepeliendum fuisset. III. Si Religiosi, vel Clerici nihilominus sepelire præsumpserint, ad restitutionem sepulcorum corporum, si petantur; & omnium, quæ sepulture occasione acceperunt, obligati existant, sicuti etiam habetur in c. ex parte, c. cum liberum, de sepult. IV. Si dictam restitutionem intra decem dies facere recuset, tandiu eorum Ecclesiæ, & cœmeteria Ecclesiastico interdicto subiaceant, donec illam adimpleant. Quam Bonif. VIII. constitutionem explicat Rodriq. t. 3. regul. qq. q. 58. a. 7. Præcipue autem meminisse oportet, quod delictum vnius non debeat in aliorum, vel Ecclesiæ detrimentum redundare, sicuti etiam Suar. notauit de censur. disp. 37. sect. 1. n. 26.

**QVÆSTIO TERTIA.** An, & quis sepulturam extra suam parochiam eligere sibi possit? Respondetur; Omnes puberes, tam masculi, quam fœminæ, qui liberum arbitrium habent, sepulturam eligere possunt, iuxta c. 1. de sepult. & c. licet, eod. in 6. in quo habetur, etiam filiumfam. si pubes sit, absque patris consensu libertate gaudere sepulturam deligendi: impuberi autem à patre deligi posse, si consuetudo loci permittat; alioquin cum maioribus suis, vel in parochiali Ecclesia sepeliendum esse. Quin etiam matrem, deficiente patre, filio impuberi sepulturam eligere, plerique affirmant, Armilla ver. sepultura, num. 8. Sa n. ult. Molina cit. disp. 214.

Religiosi quoque, cum velle & nolle non habeant, neque sepulturæ sibi deligendæ libertate gaudent; præterquam si à propriis Monasteriis adeò remoti sint, vt ad ea defunctorum corpora commodè portari non possint. Ita habetur in c. ult. de sepult. in 6. iunct. Gl. fin. & docet Abb. in c. nimis, n. 2. de excess. Prælator. Nau. comment. 2. de Regular. n. 43. Syl. ver. sepultura, q. 6. Armilla num. 6. Quod si in tali loco, qui à Monasterio nimis remotus est, Religiosus moriatur non electa sepultura, in Ecclesia parochiali sepeliendus erit; nisi vicinum sit Monasterium sui Ordinis, vt bene monet Sanchez lib. 6. moral. c. 14. n. 4. contra Gl. in cit. c. ult. Et tenetur Monasterium expensas præstare pro sepultura Religiosi, argum. l. si quis sepulchrū, ff. de Religiosis & sumptibus funerū; vbi Prætor ait: *Quod funus causa sumptus factus erit, eius recuperandi nomine in eum, ad quem ea res pertinet, iudicium dabo.* Atqui ad Monasterium pertinet Religiosos è vita decedentes tumulare; quin



& Nouitios, si proprium patrimonium non habent. Veruntamen Nouitij sepulturæ deligendæ libertate gaudent, cum Religiosi nondum sint.

7 Porro etiam Ordinum Prælati, si Superiorem in Monasterio non habeant, sepulturam eligere possunt, secundum doctrinam Rosellæ verb. sepultura, 2. num. 2. Rodriq. tom. 3. regul. quæst. 30. a. 1. Sed dubium est, vtrum Ordinis Prælatus deligere sepulturam possit extra Monasterium suum? Respondeo posse, si Superiorem in Ordine non habeat; licet subditus sit Papæ, vt Generalis præpositus; vel Episcopo, vt Abbas non exemptus. Ita enim docent Abb. in c. de vxore, num. 5. de sepult. Syluest. ver. sepultura, quæst. 6. Armilla, num. 6. Rosella, 2. num. 2. Rodriq. tom. 3. regul. quæst. 60. a. 1. Si autem Superiorem in Ordine habeat, vt Guardianus, vel Prouincialis liberam eligendæ sepulturæ facultatem non obtinet; cum Doctores id non affirmant, neque Ordinum consuetudo id permittere videatur; licet contrarium significet Sanchez cit. c. 14. num. 7.

8 **QVÆSTIO QVARTA.** Si quis nullâ electâ sepulturâ decedat, vbi sepeliendus sit? Respondeo ex Petro de Perusio tract. de canonica portione, Abb. c. 1. de sepult. Syl. q. 8. Mol. cit. disp. 214. & dico I. Si quis habeat sepulchrum Maiorum, in eo sepeliendus est, sicuti habetur in c. 1. de sepult. Quod si verò alicuius auus, alique ascendentes in vno sepulchro; pater in alio iaceat, distinguit Abb. num. 5. Vtrum pater tale sepulchrum diuersum à Maioribus suis spõte sibi delegerit; an verò præter voluntatem suam eò delatus fuerit: primo casu ait, filium sepeliendum in sepulchro patris; altero casu in sepulchro auorum, siue maiorum suorum, & sequitur Mol. l. c. §. si quis è vita. Adde, etiam filios naturales cum patre sepeliendos esse; nisi is in dignitate constitutus sit, spurius autem cum matre, nisi ea illustris sit, sicuti ex communi docet Syl. cit. q. 8. dicto 4. Sa ver. sepultura, num. 1.

Dico II. Si quis non habeat sepulchrum Maiorum, vel in eo commodè sepeliri non possit, sepeliendus est in propria parochia, vbi domicilium habuit, sacramenta percepit, diuinisq; officiis interfuit. Ita omnes, & colligitur ex cap. 2. & 3. de sepult. in 6. Eademque ratio est de scholaribus, & similibus personis quasi domicilium habentibus, teste Abb. cit. c. 1. de sepult. num. 4. Peregrinos verò, si ad propriam parochiam deferri non possint; alij aiunt sepeliendos esse in Ecclesia Cathedrali; alij in parochiali eius loci, vbi defuncti sunt: quare Syl. & Mol. ll. cc. consuetudinem in ea re seruandam esse, admonent.

Dico III. Vxor si sepulturam non elegit, cum marito sepelienda est; nisi alia loci consuetudo sit. Quod si plures maritos habuit successiuè, cum vltimo, cuius domicilium retinet, & honorem, tumulanda est, c. is qui, §. vlt. de sepult. in 6. Vide Syl. cit. q. 8. dicto 5. Abb. in cit. c. de vxore, n. 7.

Dico IV. Nouitius Religionis, si è vita excedat, siue in Monasterio, siue extra, v. g. in domo parentum, vbi cum licentia Prælati, seruato habitu religioso, iusta de causa moratus fuit; in Monasterio sepeliri debet, sine obligatione soluendi portionem canonicam Parocho. Ita ex communi Rodriq. t. 1. regul. qq. q. 39. a. 4. Ratio est; Quia Nouitij gaudent iuribus, & priuilegiis Ordinis sui.

9 Dico V. Famuli domestici Religiosorum Mendicantium in eorum Ecclesijs, vel cæmeterijs, etiam Parocho inuito, sepeliri possunt, si intra septa Monasterij, Collegij, aut Residentiæ moriantur; ex priuilegio Papæ, vt videre est apud Rodriq. t. 2. q. 67. a. 1. Molin. cit. disp. 214. §. In nostra Societate, & in compend. priuileg. Societatis Iesu, v. famil. §. 1.

**QVÆSTIO QVINTA** Quibus sepultura sacra concedenda, vel deneganda sit. Respondeo ex c. nullus,

iunct. Gl. causa 13. q. 2. & c. Ecclesiam, 2. de consecrat. d. 1. Omnes fideles, seu baptizati in loco sacro sepeliendi sunt, nisi constet eos in excommunicatione, aut interdicto; vel in statu mortali seu impenitentes decessisse: vel nisi lege canonica, aut consuetudine ob crimen aliquod sepultura spoliarentur. Quare etiam ad mortem damnati, si pœnitentes excesserunt, in loco sacro sepeliri possunt, sicuti ex communi tradit Abb. c. ex parte, n. 4. de sepult. Quamuis interdum in criminis pœnam, & ob aliorum exemplum, sacra etiam sepultura priuantur. Qua de re Couar. 2. resol. c. 13. n. 11. Deinde ob nulla debita, corpus defuncti sepultura prohiberi potest: neque licet creditoribus vllam actionem, vel molestiam exhibere hæredi, aut executori, nonem diebus post obitum defuncti, l. cum sit, iunctis Authenticis, C. de sepul. violato, & videri potest Couar. cit. c. 13. n. 10.

Sepeliendi in sacro loco non sunt: I. Hæretici, etiam si eorum hæresis primùm post mortem propalata sit, iuxta cap. sanè profertur, 24. quæst. 1. Neque pagani, & Iudæi, cit. c. ecclesiam. Quibus annumerantur infantes, morientes ante Baptismum. Si tamen prolem in ventre matris mortuam esse certum sit, vnà cum ea defuncta sepeliri debet: quia fœtus est pars matris, l. 1. §. & ex rescripto, ff. de inspiciendo ventre, Gloss. in cap. si quidquid, distinct. 4. de consecrat. Si dubitetur, an mortua sit proles, scindi debet mater, postquam mortua est: non autem dum viuit, cum periculo mortis illi adferendæ, sicut ex communi docet Syluest. quæst. 10. Armilla num. 21. Sed & catechumeni Ecclesiastica sepultura carere debent: quamuis pro eis oret Ecclesia, si credentes decesserunt, vt ex communi docet Palud. in 4. d. 4. q. 3. a. 1. q. 3. & consentit S. Ambrosius de obitu Valentiniani.

II. Sepeliendi in loco sacro non sunt: Qui seipsum occidit, c. placuit, 23. q. 5. Qui semel in anno proprio Sacerdoti confiteri, & Eucharistiæ sacramentum in Paschate sumere notoriè intermisit, iuxta c. omnis, de pœnitent. & remiss. dummodo tamen huius intermissionis nulla probabilis causa excusationis, seu impedimenti afferri possit: Item vsurarius manifestus, c. quia, de vsuris, c. quamquam, eod. in 6. Manifestus raptor siue violator ecclesiæ, c. 2. de raptor. Præterea religiosus manifestus proprietarius, c. super quodam, de statu Monach. Si tamen hi, quos numeravi, ante mortem ecclesiæ conciliati sunt: vel si eos signum pœnitentiæ edidisse, saltem vnus hominis testimonio probari potest, in loco sacro sepeliri debent, sicuti ex communi Syl. q. 9. dicto 7. Vsurarius tamen non antè sepeliendus est, quàm vsurarum restitutio facta, vel de facienda cautio data fuerit, cit. c. quamquam. Vide de hoc Palud. in 4. q. 15. q. 2. a. 6.

III. Sepeliendi in sacro loco non sunt: Qui in torneamenti, id est, hastiludijs, ex quibus probabile mortis periculum impendet, occubuit: tamen si ante mortem pœnitentiam, & viaticum acceperit, c. 1. & 2. de torneamenti. Idemque sentiendum de ijs, qui in duello succumbunt, secundum Trident. sess. 25. c. 19. de reformatione.

Quartò, Omnis peccator mortalis, ac notorius sacra sepultura prohibetur, si eum absq; pœnitentia decessisse præsumi debeat, c. quibus, & seqq. 13. q. 2. & docet Gl. in c. quia, de vsuris, Abb. in c. ex parte, 1. in fine, de sepult. & c. fures, de furtis, Palud. in 4. d. 18. q. 8. a. 1. §. quantum ad 4. conclus. 5. Syl. ver. sepultura, cit. quæst. 9. dicto 7. Sa num. 3. Vt si aliquis in ipso facinore, quod nullo modo excusari potest à mortali, occisus deprehendatur, non præsumitur contritus decessisse, sicuti notant Doctores nominatim Abb. in cit. c. fures: quia mutatio animi est quid facti, quod non præsumitur: sed ostendi debet. Si tamen talis post crimen patratum, qualem-



cunque signum pietatis edidit, vt si in ecclesia orasse visus est; puto eum in loco sacro sepeliendum fore; si non sit inter criminosos specialiter exceptos: in illis enim certior coniectura requiri solet antecedentis pœnitentiæ de crimine secundum canones damnato.

Porro si aliquis horum contra sacros canones in loco sacro sepultus fuerit, licet exhumari debeat, si ossa eius ab aliorum fidelium corporibus discerni possint, iuxta cap. sacris, de sepult. & cap. ecclesiam, 1. & 2. distinct. 4. de consec. Ecclesia tamen reconcilianda non est; nisi in ea sepultus fuerit excommunicatus denunciatus, vel infidelis: quo casu etiam parietes radi debent, cap. ecclesiam, 2. distinct. 1. de consecrat. & docet Syluest. verb. sepultura, quæst. 9. dicto 12.

Similiter, si alicuius corpus in aliqua ecclesia, ad quam iure non pertinebat, sepultum fuit; exhumari & restitui debet, cum omnibus oblationibus, si petantur, c. ex parte, 1. & c. seq. de sepulturis.

His adde, quod in Clement. Eos, de sepulchris, excommunicati sunt, qui tempore interdicti extra casus concessos; vel nominatim interdictos, aut excommunicatos non toleratos, aut usurarios manifestos scienter in loco sacro sepelire præsumunt.

13 Denique, quod attinet ad portionem canonicam, ea duplex est; Vna episcopalis, quæ est certa portio debita Episcopo ex legatis & funeralibus oblationibus, quæ facta sunt ecclesiis, vel aliis piis locis, intra diœcesim eius sitis, licet alioquin exempta sint, sicut docent DD. in c. requisisti, de testam. Syl. ver. canonica portio, q. 3. Rodriq. t. 1. reg. qq. q. 41. Mol. disp. 215. Quæ portio alicubi est tertia; alicubi quarta; alicubi dimidia. Pluribus autem locis omnino per contrariam consuetudinem abolita est. Vide Abb. in c. certificari, de sepult. n. 4. & c.

vt. de testam. Syl. q. 4. vbi numerant eam, ex quibus portio episcopalis detrahi non debet; videlicet ex relictis ad ecclesiæ fabricam, ornamenta, luminaria, annuaria, vel aliud quippiam faciendum in Dei cultum.

Altera est portio parochialis, quæ ecclesiæ parochiali, in qua aliquis de iure sepeliendus fuisset, debetur ex legatis & oblationibus funeris, factis ecclesiæ illi, in qua sepultura electa est; licet ea alioquin exempta sit, c. 1. & toto ferme tit. de sepulturis, Clem. dudum, eod. Et hæc portio similiter est varia, pro varietate diœcesum; eamque consuetudine omnino aboleri posse, testatur Abb. in cit. c. requisisti, n. 18. Syl. q. 1. Mol. l. c. §. dubium est, Rodriq. t. 1. reg. qq. q. 39. a. 2. Quapropter Trident. syn. sess. 25. c. 13. de reform. licet renocet priuilegia concessa Monasteriis, Hospitalibus, aliisque locis piis, ne quartam funeralium Cathedrali, aut parochiali ecclesiæ soluere cogantur; præcipiatque, vt à quibus 40. annis antecedentibus solita esset persolui, ab eisdem etiam deinceps eodem modo soluatur; tacite tamen hoc ipso significat, non fuisse propositum Concilio, locis ijs, aut Monasteriis, quæ quadraginta integris annis (tanto enim tempore contra Ecclesiam præscribitur) legitimæ præscriptionis immunitatem consecuta fuerunt, ius acquisitum auferre, sicut explicat l. cit. Rodriq. Quare aliqui Religiosorum Ordines, vt Cisterciensium, nullam portionem præstant; quia non solum ab annis 40. sed etiam tempore immemoriali nullam præstare soliti sunt: Alij verò nihil de legatis, alijsve donatis ad Sacrificia, candelas, &c. sed solum portionem aliquam de his, quæ ipso die sepulturæ cum funere oblata fuerunt, sicut docet Rodriq. cit. l. 2. §. Sa ver. sepultura, n. 10. Est igitur in hac re spectanda consuetudo, legitime præscripta.





# TRACTATUS SEXTVS, DE IUDICIIS.

## CAP. I. DE IUDICIO. SUMMARIUM.

1. Iudicium diuiditur in Ecclesiasticum, & seculare; in petitorium & possessorium; in ordinarium, & extraordinarium seu summarium, denique in criminale, ac civile.
2. Quod Clericus actor coram seculari iudice in eodem iudicio reconueniri possit, canonico iure receptum non videtur.
3. In causa Ecclesiastica laicum una cum Clerico arbiter constitui potest: sed non iudex.
4. Si utraque actio, civilis & criminalis, ad penam seu vindictam tendit, una intentata, altera tollitur, secus, si ad diuersa tendunt.



**I**UDICIUM à iure dicendo appellatum est; quia in eo per sententiam cum auctoritate profertur, quod iustum est, seu iuri consonum, cap. forus, de verborum signif. l. nemo, Cod. de sentent. & interlocut. omnium iudicum. Quare

& persona, quæ iurisdictioni præest, Iudex appellatur, quasi ius dicens, cit. c. forus.

1. Iudicij variæ diuisiones sunt: Vna sumitur à diuersitate iudicantium; quod aliud sit iudicium *Ecclesiasticum*, & aliud *seculare*. Ecclesiasticum, seu ad Ecclesiasticum Iudicem pertinens iudicium est, si contentio sit de rebus seu causis Ecclesiasticis; puta de matrimonio, beneficiis, decimis, &c. vel si sit circa personas Ecclesiasticas: hæ enim coram suo, id est, Ecclesiastico Iudice ordinariè conueniri debent; etiam si actor laicus sit; quia *Actor forum Rei sequitur*, c. si Clericus, c. cum sit, de foro compet. & l. 2. C. de iurisdic. omnium iudicum.

Præterea secundum Glos. à pluribus receptam in c. 1. ver. super suis, de mutuis petitionibus; Clericus actor coram seculari Iudice in causis civilibus eodem iudicio reconueniri potest, quam Gl. secutus est Less. lib. 2. ca. 29. dub. 6. n. 52. propter generalem regulam: Quod actor eligens Iudicem pro se, debet eundem recipere contra se, per modum reconuentionis; non tantum in eodem negotio, sed etiam diuerso, sicuti habetur in l. penult. C. de sent. & interlocut. Veruntamen Abb. c. at si Clerici, n. 20. de iudiciis, & alij apud D. Martham p. 4. de iurisdic. cent. 2. casu 107. n. 2. melius sentire videntur, regulam istam de reconueniendis Clericis coram Iudice seculari, canonico iure receptam non esse.

Seculare autem, seu ad secularem Iudicem pertinens iudicium est, si contentio sit de re non Ecclesiastica, sed seculari; & inter laicos, vel saltem si Reus laicus sit.

Illud porro discrimen notandum est; Quod licet in causis secularibus nihil obstat Clericos iudices constitui; imò olim valde vsitatum fuit, vt tales causæ ab Episcopis iudicarentur, vti etiam dixi lib. 1. tract. 5. p. 5. c. 8. num. 6. & ostendit Baron. Anno Christi 398. n. 63.

maximè si essent miserabilium personarum, vt idem annotauit Anno 401. n. 60. In causis tamen Ecclesiasticis laicus iudex esse non debet, sicuti constat ex Concil. Chalcedon. sess. 2. Quia laici spiritualia tractare non debent, c. 2. de Iudiciis. Idque ampliari debet secundum Abb. in c. contingit, de arbitr. num. 4. quod laicus, neque adiuncto sibi Clerico, in causa spirituali iudex esse possit sine auctoritate Papæ, sicuti colligitur ex c. Mesana, de elect. Secus tamen est in compromisso, in quo laicus vnà cum Clerico super causa spirituali, auctoritate Episcopi, constitui non prohibetur, iuxta ca. per tuas, de arbitr. Quia arbitrari de re spirituali non est ita actus spiritualis, sicuti est iudicare. Possunt tamen laici in causis Ecclesiasticis esse consiliarij, syndici, & actores; cum hi non agant auctoritatiuè, aut tanquam proprio iure, vti notauit Abb. in cit. c. 2. n. 9.

Altera diuisio sumitur ex diuersitate materiæ; Quod aliud est iudicium *petitorium*, in quo de rei proprietate, aliove iure agitur: Aliud verò iudicium *possessorium*, in quo de sola rei possessione, vel quasi possessione contenditur. Quamuis autem consultius sit Actori, vt prius experiatur, num iudicio possessorio possessionem nancisci possit, propter possessionis commoda, sicuti dixi hoc libro tract. 1. de iustit. c. 7. num. 5. nihil tamen prohibet, quominus in eodem libello vel narratione idem iudicium cumulari possit, sicuti constat ex c. 3. & seqq. de causa possess. Quin imò tamen prius petitorio actum fuerit, non prohibetur Actor, ante conclusionem causæ, vel etiam post conclusionem, si iusta causa sublit, alterum iudicium super possessorio inchoare, ostendendo per violentiam se à possessione eiectum, sicuti habetur in c. pastoralis, eod. tit. & l. naturaliter, §. 1. ff. de acquirenda possess.

Tertia diuisio sumitur ex diuersitate formæ; Quod aliud est iudicium ordinarium & solemne, in quo iuris ordo, ac forma obseruatur; videlicet vt Reo in ius citato, libellus siue intentio Actoris in scripto edatur; deinde litis contestatio fiat, iuramentum calumniæ præstetur (si id petatur) postea probationes proferantur; denique sententia à Iudice in scripto proferatur: qui ordo iudicij si non seruetur, eius acta irrita sunt, sicuti habetur in l. prolatam, C. de sententiis & interlocut. omnium iudicum, cap. in causis, de sent. & re iudicata. Aliud verò est iudicium *extraordinarium*, seu *summarium*, in quo simpliciter de plano, sine solemnibus strepitu ac figura iudicij, sola facti veritate inspecta, proceditur, iuxta Clem. dispendiosam, de iudiciis, l. nec quicquam, §. de plano, ff. de offic. Proconsulis, & videri potest Petr. Greg. Tholosanus lib. 47. Syntag. ca. 9. n. 6. & seqq. Henr. Canisius lib. 4. instit. iuris canonici, tit. 1. de iudicio ordinario, & extraordinario. In omni tamen iudicio Reus conuentus citari debet, data ei copia se defendendi: alioquin processus iudicij irritus est; excepto, si causa notoria sit, & clarum, nullam parti absenti defensionem competere posse, sicuti ex communi docet Abb. in c.



in c. bona, l. n. 5. de elect. Quod si legitime citatus neque per se, neque per procuratorem compareat, cum comparere possit, contra eum recte proceditur usque ad sententiam definitivam, sicuti notant DD. in l. Papinianus, ff. de minoribus. Abb. in rubrica, Qui matrimonium accusare possunt, n. 3.

Quarta diuisio sumitur ex diuersitate finis; Quod aliud est iudicium civile, in quo Actor suum, vel alterius commodum priuatum prosequitur; siue causa ex contractu, siue ex delicto descendat: Aliud verò iudicium criminale, in quo agitur in causa criminis ad vindictam, seu poenam publicam: siue ea corporalis sit, siue pecuniaria applicanda fisco: aut publici officij priuatio, &c. Pro cuius pleniore intellectu, notandum est primò ex Iulio Claro in pract. §. fin. q. 1. ver. Ego tamen: Quod crimina, quæ à Magistratu puniri solent, alia contra publicam tantum iustitiam sunt, siue offensione particularis personæ: uti sunt hæresis, simonia, blasphemia, &c. ex quibus vna tantum actio, vel potius accusatio descendit, quæ fit ad publicam vindictam. Alia verò sunt crimina, quibus non tantum offenditur publica iustitia, sed etiam persona particularis; uti sunt homicidium, incendium, furtum, iniuria siue contumelia. Ex quibus duplex actio oritur: vna criminalis ad publicam vindictam: & altera civilis ad damnum refarciendum, vel poenam applicandam parti offensæ. Ita habetur in l. vn. C. Quando civilis actio criminali præiudicat.

4 Notandum secundò, cum Gl. in cit. l. vn. ver. re familiari, Andrea Gaill. lib. 1. obseruat. 60. n. 5. & obseruat. 65. n. 1. Si vtraque actio tam civilis, quam criminalis ad vindictam comparata sit, v.g. propter illatam contumeliam: tunc in arbitrio Actoris est, vtrâ experiri malit: verum vnâ intentatâ, altera tollitur, sicuti constat ex l. Prætor edixit, §. si dicatur, ff. de iniurijs, & dixi hoc libro tr. 3. de iustit. p. 2. c. 6. n. 6. Sin verò actio civilis & criminalis ex causa furti, vis illatæ, &c. ad diuersa tendant: illa ad recuperationem rei familiaris: hæc ad vindictam publicam, vna per aliam non tollitur, sicuti constat ex l. 2. ff. de vi bonorum raptorum, & cit. l. vn. Illud verò vñtatiſſimum esse monet Iulius Clarus q. 2. n. 2. vt eodem libello vtraque actio proponatur: principaliter quidem, vt Reus secundum iuris formam de crimine homicidij, furti puniatur; secundariò verò, & incidenter, vt ad illatum damnum, & expensas restituendas condemnatur.

Notandum tertio: Præter actionem criminalem, & civilem, esse aliam quasi mixtam, seu de vtraque participantem; vt cum agitur coram Iudice Ecclesiastico ad separationem tori, ob causam adulterij, sicuti habetur in c. tuæ, de Procurat. Aliqui verò non incongruè diuidunt actionem in merè criminalem, quæ ad vindictam publicam tendit: & in merè civilem, per quam petitur, quod ex commutativa iustitia naturali iure, etiam ante Iudicis sententiam, debitum est: puta ex mutuo, empto, furto, incendio, rapina. Ac denique in mixtam, quæ est actio civilis iniuriarum, descendens ex iustitia vindicativa: cuius proinde debitum non obligat ante Iudicis sententiam: & hæc est actio, quam supra dixi, cumulari non posse cum criminali: scilicet verò dicendum de actione merè civili, quamuis ex crimine orta sit. Vide alias diuisionum formas apud Nau. rubr. de iudicijs n. 17.

## CAP. II.

## DE IUDICE.

## SUMMARIUM.

- 1 Index alius est ordinarius; & alius delegatus.  
Arbiter nemo constitui potest ante annum ætatis X. neque iudex ante eam ætatem delegari, nisi à Principe; vel si partes consentiant.
- 2 In causis civilibus Index non procedit, nisi postulat; in criminalibus verò etiam ex officio, seu per viam inquisitionis.
- 3 Triplex est inquisitio; Generalis, Specialis, & Mixta.
- 4 Sola fama non probat; sed criminis indicium Iudici præbet, maxime si à viris honestis ortum habuit.  
Indices, præsertim seculares, sæpe procedunt contra criminisum nulla precedente infamia, ex alijs indicijs criminis.
- 5 Indicia alia leuia sunt, alia grauiora, alia denique quæ violentam præsumptionem, ac moralem certitudinem pariunt.  
Præsumptio alia hominis est, & alia iuris; & hæc interdum iuris ac de iure.
- 6 Indicia, secundum iudicis prudentis arbitrium, interdum maiora, & interdum leuiora requiruntur; pro varietate causarum.
- 7 In causis notorijs ac indubitatjs non semper requiritur iuris processus.
- 8 In causis civilibus, & minoribus criminalibus semper Index sententiam ferre debet secundum publicas allegaciones, si eas falsitatis arguere non possit. At verò in criminalibus, quibus poena mortis, vel membrorum mutilatio imponenda est, Index non potest secundum publicas probationes hominem condemnare, quæ prius non notitiâ innocentem sit.
- 9 Sententia iuste lata ordinariè non retractatur propter instrumenta postea reperia: secus, si iniuste, seu contra leges lata fuit.
- 10 Si Index dolo, vel magna imperitiâ sententiam iniustam tulit, litem suam facere censetur, & de damno tenetur.
- 11 Nemo in causa propria Index esse potest; exceptis tamen quibusdam casibus.
- 12 Orto dubio, num causa ad hoc forum pertineat, potest id Index cognoscere, & postea causa principis alius processum adori.

**P**ERSONÆ, quæ in iudicijs interueniunt, alia sunt principales; videlicet, Index, Actor, & Reus, uti habetur in c. forus, de verb. signif. Alia verò accessoria, vt Testes, Procurator vel Aduocatus, Assessor, Tabellio.

Iudex est persona publica, ad id constituta, vt secundum legis præscriptum, vel loci consuetudinem, populo ius dicat, sicuti colligitur ex cit. c. forus. Et est alius Index ordinarius, qui tanquam ex officio vniuersitati causarum præest; siue proprio iure suo, si supremus Index; siue ex Principis beneficio, si subordinatus. Alius verò est Index delegatus; cui vices suas ordinarius commisit; seu ad vniuersitatem causarum, seu ad causam specialem terminandam, sicuti habetur in l. solet, & seq. ff. de iurisdic. omnium iudicum. Porro, qui merè delegatus est, alteri causam subdelegare non potest, nisi sit delegatus Principis summi, sicuti habetur in c. pastoralis, de offic. Iudicis delegati, c. cum causam, §. vlt. de appellat. & l. à iudice, C. de iudicijs, & dicam plenius in lib. 5. tr. 6. c. 10. assert.

3. Eo etiam differunt, quòd pubes in quacunque ætate à Principe Index tam ordinarius, quam delegatus constitui possit: non item ab alio inferiore delegari, nisi vicesimum ætatis annum compleuerit: præterquam si partes scienter consentiant in eum, qui annum saltem decimum octauum transcendit, c. cum vicesimum, de officio iudicis delegati, l. quidam consulebat, de sent. & re iudicata. Arbiter verò, ne quidem ex partium consensu, constitui potest, nisi annum ætatis vicesimum exegerit, l. cum lege, ff. de arbitris. Denique verò ad officia, quibus Reipublicæ administratio continetur, adhiberi nemo deberet ante vicesimum quintum annum, saltem inchoatum, uti habetur in l. ad Rempublicam, ff. de muneribus, & honoribus, & notauit Gl. in cit. c. cum vicesimum, Abb. ibid. n. 4.

Iudex in causis civilibus procedere non solet, nisi postulatus: quin & tunc operam dare debet, vt, si fieri possit, partes ad concordiam reuocentur, sicuti colligitur ex



c. i. de mutuis petitionibus: cum ad officium eius perineat *lites diminueret*, l. quidam, ff. de rebus creditis. In criminalibus autem causis duobus modis Iudex procedere potest: vel ad petitionem partis, seu instantiam accusatoris, de quo dicam cap. seq. vel ex officio per viam inquisitionis, sicuti docet Clarus lib. 5. sent. 8. fin. q. 3. Less. lib. 2. c. 29. dub. 12. n. 105. Quod verò aliqui addunt tertium modum procedendi per denunciationem non videtur differre à secundo: cum denunciator aliud non agat, quam Iudici indicia aperire, quibus ex officio ad inquirendum moueatur, teste eod. Claro. q. 7. n. 1.

3 Triplex est inquisitio, quam Iudex, vel Prælatus facere solet. Vna omnino generalis, cum neque persona, neque crimine expresso, generatim inquiritur; vtrum in Communitate sit aliquis criminofus, vel legum transgressor: cuiusmodi inquisitione Visitatores vti solent, quamuis nulla præcedat hominis infamia, vel commissi criminis indicium, sicuti colligitur ex c. Romana, de censib. in 6. c. 1. de offic. ordinarij, vbi id notat Abb. n. 5. Sotus de secr. tegen. ment. 2. quæst. 6. concl. 2. Prosper Farinacius in practica criminali, quæst. 1. num. 10. Nauarrus in rubr. de iudicijs, numero 53. & consil. 1. de offic. ordinarij, edit. 2. Less. lib. 2. c. 29. dub. 13. Subditi verò interrogati non debent denunciare crimina occulta, sicuti constat ex c. qualiter & quando, 1. de accusat. Imò neque licet denunciare possunt, si talia sint, quæ iuridicè probari non posse videantur; consequenter neque puniri tunc enim denuntiatio criminis tantum tenderet ad iniustam infamationem. Loquor autem de denuntiatione, quæ Iudici fit in ordine ad publicam vindictam; & non de denuntiatione charitativa, quæ fit Prælato tanquam patri ad Reum emendandum, vel aliud impendens malum auertendum: de hac enim dixi hoc lib. tract. 3. de iustit. p. 2. c. 4.

Altera est inquisitio mixta, eaque duplex: I. cum generatim quæritur de crimine: speciatim verò de persona: *Vtrum Titius seruet statuta?* Cuiusmodi inquisitio fieri non debet ad puniendum, nisi infamia, vel indicia criminis præcedant. Quia meritò aliquis ægrè fert in vitam suam quasi malefactoris inquiri, dum famam integram seruat. Secus verò dicendum, si inquisitio fiat propter Prælaturam, vel ordines alicui conferendos, vel ut matrimonium impediatur, sicuti annotauit Abb. in c. 1. n. 6. de offic. Ordinarij, & c. qualiter, 2. n. 11. de accusat. II. Cum quæritur generatim de persona, speciatim verò de crimine, quod commissum esse constat: v. g. *Quis huius homicidij auctor sit?* Circa quam inquisitionem aduerte: licet Iudex de commissio crimine, v. g. furti, cuius notitiam, vel indicia accepit, generatim quærere possit, quis illud fecerit, sicuti bene explicat Farinacius q. 1. Interrogati tamen denunciare non debent reum occultum: cum Iudex ius non habeat de illo inquirendi, nisi de eo infamia, vel sufficientia indicia præcedant, sicuti notauit Syl. ver. correctio, 1. q. 8. & ver. inquisitio, l. n. 7. Armilla eodem ver. num. 10. Pet. Nau. lib. 2. c. 4. n. 167. Less. lib. 2. c. 30. dub. 6. n. 47. Si tamen aliquis in hoc casu criminis generatim notorij auctorem occultum sciat, & putet suum testimonium sufficiens fore, vt Iudex moueri possit ex officio ad Reum capiendum, quin & torquendum; tunc denunciare non prohibetur, boni publici causa, teste Azor. to. 3. lib. 13. c. 16. in fine. Less. lib. 2. c. 30. n. 48.

Tertia est inquisitio specialis, in qua tam persona, quam crimen exprimitur; v. g. *vtrum Titius homicidij auctor sit?* Ad quam inquisitionem instituendam quam maximè requiritur, vt antecedit infamia personæ, de qua inquiritur, sicuti habetur c. inquisitionis, in c. qualiter & quando, 2. de accusat. Aded quidem, vt tamen Iudex crimen hominis oculis suis deprehenderit, non possit contra eum procedere, nisi prius informationem acceperit de iudicijs, infamia, sicuti docet Clarus q. 8.

num. 5. Couar. 1. resol. c. 1. Fr. Arretinus in pract. crimin. p. 1. c. 15. Less. lib. 2. c. 29. dub. 11. Pet. Nauar. lib. 2. c. 3. num. 180. Ratio horum est: Quia æquitas postulat, vt in omni iudicio, præter Iudicem, duæ partes adsint: vna Rei, altera Actoris, seu accusatoris. Neque idem potest esse Iudex, & accusator, vti habetur in c. multi, 2. q. 1. cum alioquin iudicia publica saepe peruerterentur, si ex notitia Iudicis priuata contra Reum procedere liceret: quamobrem Actorum 25. S. Paulus dixit: *Non est Romanis consuetudo damnare aliquem hominem, priusquam is, qui accusatur, presentes habeat accusatores, locumque defendendi accipiat*: quæ verba in hanc rem allegat S. Th. 2. 2. q. 67. a. 3. & videri etiam potest Nauar. in rubr. de iudicijs, n. 53. 79.

Quamobrem si Iudex ad punienda crimina ex officio procedat, boni publici causa: tunc accusatoris vicem supplere debet publica infamia, quæ & *clamorosa populi insinuatio* dicitur, sicuti notauit S. Thom. cit. a. 3. ad 2. Nau. n. 82. Quare in hoc casu Iudex ante omnia iuridicam informationem coram Notario, &c. capere debet de infamia; atque etiam inuestigare, à quibus personis criminis infamia profecta fuerit. Si enim cognoscat ab improbis hominibus ortum habuisse, minùs curanda est, sicuti constat ex c. qualiter, 2. iun. Gl. ver. maleuolis, de accusat. & videri potest Iacob. Simancha de Cath. instit. tit. 55. n. 7. Mynsinger cent. 5. obser. 46. Nau. in lib. 5. consil. 76. n. 4. de Simon, edit. 2. & c. mensuram, §. non tibi dico, d. 1. de pœn. n. 20. Caiet. 2. 2. q. 69. a. 1. vbi ait: *Quod infamia vocatur non frequens vox discolorum, sed frequens vox talis, vt apud probos & prouidos viros reddatur persona de criminatione suspecta.*

Ceterum sola fama crimen sufficienter non probat, sicuti monet Gl. in cit. c. qualiter, ver. & famam: quia dictum vnus facile sequitur multitudo nimis credula, ac prona in malum, c. cum in iuuentute, iun. Gl. ver. sequitur, de purgat. canonica; sed indicium tantum criminis Iudici præbet, ob quod vltiorem processum, v. g. Rei citationem, custodiam instituere possit, donec veritas cognoscatur. Quamquam præter infamiam, etiam alia indicia prodi possunt, ex quibus Iudices, præsertim seculares (boni publici causa, ne crimina si impunita maneant, maiorem etiam alijs licentiam tribuant) moueri solent ad vltiorem specialem inquisitionem ac processum, v. g. denuntiatio Officialis, aut alterius non suspectæ personæ (esto, quod illa peccarit crimen occultum denunciando, sicuti docet Nau. rubr. de iudic. n. 87. Less. dub. 15. n. 125.) item hominis fuga, extrajudicialis confessio criminis. Atque ita docet S. Thom. quæst. 69. a. 2. in corp. Caiet. ibid. Sotus de secr. tegen. mem. 2. q. 6. concl. 1. dub. 3. Clarus q. 3. 7. 20. 21. Sa. ver. Iudex, de modo procedendi, Azor. t. 3. lib. 13. c. 18. dub. 1. contra Nauarr. c. 18. man. num. 38. & lib. 5. consil. 4. & 5. de accusat. edit. 2. quibus locis reprehendit Iudices, qui specialiter inquirunt, & procedunt contra aliquem non laborantem criminis merè præteriti seu transacti infamia: licet alia de eo indicia adsint, vel etiam testes idonei, per quos crimen (denuntiante v. g. Officiali) probare possit. Cuius sententia, spectato communi iure canonico, valde probabilis est, argum. c. qualiter, 2. & c. inquisitionis, §. tertia; de accusat. quamuis consuetudine; præsertim fori ciuili, non obseruetur, sicuti videre est apud Pet. Nau. lib. 2. c. 4. n. 61. Clarum II. cc. & q. 21. n. 2. vbi ait, quod vnus testimonium facit indicium Iudici ad inquirendum, seu speciales informationes capiendum contra aliquem.

Porro hæc aliqua aduertenda sunt: I. Indicia seu coniecturæ alia sunt, quæ dubitationem mouent; alia verò quæ suspicionem seu opinionem leuem; alia denique quæ suspicionem grauem, quæ & præsumptio dicitur seu credulitas; eaque interdum vehemens est, ac violenta, vt moralem propè certitudinem gignat, sicuti docet Abb.



in e. quosdam, de præsumpt. Deinde præsumptio alia est hominis, & alia iuris: Hominis præsumptio est, quam vir prudens, puta Iudex, ex apparentibus coniecturis, tanquam signis veritatis, concipit. Iuris verò præsumptio, quæ ex iuris auctoritate ac decreto provenit: talis est v. g. si quis inter Christianos natus & educatus sit, quod pro baptizato haberi debeat, iuxta c. ult. de Presbytero non baptizato. Atque inter eiusmodi præsumptiones quædam sunt iuris ac de iure (vt aiunt) quarum hæc conditio est, vt contra eas, ob ipsam iuris dispositionem, admitti non debeat probatio in contrarium, iuxta l. antiquæ, C. ad S. C. Velleianum, & c. is cui fidem, de sponsal. Quamuis etiam in his, si de contraria veritate aperte constet, præsumptioni nullus locus esse potest, sicuti colligitur ex c. quia verisimile, de præsumpt. Cum sit verissima & generalis regula, quod præsumptio cedit veritati.

I. Ex vna parte tantò maiora indicia ad inquirendum de persona requiruntur, quantò ea dignior est: præsertim si Ecclesiastica dignitate fulgeat, sicuti constat ex causa 2. q. 5. & causa 3. q. 7. & cit. c. qualiter 2. vbi dicitur, quod Prælati quasi signum sunt ad sagittam positi: quia non possunt omnibus placere: cum ex officio teneantur arguere, & frequenter odium multorum incurrunt, & insidias patiuntur. Videri potest Nau. lib. 4. consil. 3. de accusa. in fine. Maiora item indicia requiruntur, quò maius crimen est, & maior hominis infamatio timenda, si de eo inquiretur. Ex altera verò parte, tantò leuiora indicia ad inquirendum sufficiunt, quantò perniciosius Reipublicæ crimen est: præsertim si malum ex eo etiam in futurum timeatur: v. g. publica latrocinia; hæresis, proditio: quæ ideo etiam excepta dicuntur, quòd in eorum inquisitione, & c. ordinarium iuris processum obseruare necesse non sit. Quare si accidat has duas rationes inter se pugnare: puta si crimen ingens ac perniciosum sit, de quo grauis persona suspecta est: magna tunc Iudicis prudentia opus, vt intelligat, vtra earum præponderare debeat.

III. Leuiora indicia, si cætera paria sint, sufficere possunt ad vltiorem informationem capiendam: & interdum Reum citandum, arrestandum, incarcerandum, de qua re videri potest Ioach. Mynsing. cent. 5. obser. 69. Grauiora verò requiruntur ad Reum de crimine iudicialiter examinandum, torquendum: vrgentissima demum, & quæ apertam præsumptionem faciant, interdum sufficient ad ferendam sententiam definitiuam in causis ciuilibus: quin etiam in criminalibus, saltem ad pœnam extraordinariam inferendam: imò etiam quandoq; ordinariam, in criminibus suapte natura occultis, vt plenior probatio haberi nõ possit, arg. c. maritis, vbi id notat Abb. n. 1. de adulterijs, Mol. tr. 4. disp. 15. n. 13. Quamobrè Hadrianus Imperator in l. 3. §. eiusdem, ff. de testibus, rectè dixit: Non posse simpliciter definiri, quæ ad probationem sufficiant: sed Iudicem ex animi sui sententia æstimare oportere, quid credat, aut quid non satis probatum opinetur, sicuti notauit etiam Abb. in c. tertio, in fine, de probat. Semper tamen meminerit Iudex, si videat crimen probari non posse, vt maturè desistat, ne frustra famam hominis laceret, sicuti notat Less. c. 29. n. 141.

IV. Licet indicia interdum seorsim sumpta non sufficiant, tamen iuncta cum alijs, quibus adiuvantur, sufficere possunt ad inducendam v. g. probationem semiplenam. Contra verò, licet indicia, quæ vocantur indubitata seu præsumptiones violente, interdum per se sufficere possint ad sententiam definitiuam & condemnatoriam, præsertim in crimine suapte natura occulto, vt videtur apud Promperum Farinacium in practica, q. 86. n. 33. considerata tamen cum alijs contrarijs indicijs, aut præsumptionibus, quibus illa debilitantur, & quasi enervantur, sufficere non debent. Exemplum habes in proximis consanguineis nudis eodem lecto repertis: quandoquidem in his nihil sciri criminis existimari fœdus naturale permittit, l. cum qui, C. de Episcop. & Clericis.

QUESTIO PRIMA. Vtrum Iudex secundum acta & probationes publicas sententiam ferre debeat, et si ipse priuatim veritatem contrariam perspectam habeat: Respondeo, & dico I. Iudex non potest absoluerè innocentem, quãdiu is secundum publicas probationes nocens apparet: neque potest Reum condemnare, antequam vel per legitimas probationes conuictus, vel sponte in iudicio confessus sit: quamuis Iudex priuata notitia sciat nocentem esse. Ita S. Th. q. 67. a. 2. Caiet. ibid. Couar. 1. resol. c. 1. Nau. c. 25. n. 9. & alij communiter, ex l. illicitas, §. veritas, ff. de offic. Præsidis, & c. iudicet, 3. q. 7. vbi ex S. Ambrosio serm. 20. in Psal. refertur: *Bonus Iudex nihil ex arbitrio suo facit, & domesticæ proposito voluntatis sed iuxta leges, et iura pronunciat.* Etenim gentium iure iudicandi potestas tali conditione Magistratibus collata est, vt eanon nisi secundum publicas allegationes vtantur: siquidem id maxime Reipublicæ interest, ne alioquin, prætextu priuatæ notitiæ, publica iudicia ab improbis peruertantur, vt supra etiam dictum n. 3.

Sed excipe primò, quòd in notorijs ordo iuris plerumque non requiritur: sic enim fures, & latrones in flagranti crimine deprehensi sine alio processu iudiciali, è vestigio interdum suspendi solent, sicuti etiam notauit Less. lib. 2. c. 29. n. 100. Excipe secundo, quòd docet idem Less. n. 96. & 100. Couar. cit. c. 1. n. 7. in fine, Gutierrez lib. 2. can. qq. c. 29. n. 17. supremo Principilicium esse in aliquo casu è medio tollere criminofum, cuius crimen, præsertim atrox, indubitatè scit commissum esse, vel plene probari posse: licet ob aliquam causam publicè probatum non fuerit. Quod multò magis dicendum est, si malum à criminofum in futurum quoque timeatur. Expedi tamen, vt Princeps ad impediendam populi querimoniam, ipsi, exposita causa sufficientis scientiæ suæ, satisfaciatur.

Dico II. In causis ciuilibus, ac minoribus criminalibus, quibus de pecuniaria multa agitur, debet Iudex denique sententiam ferre, & accusatum condemnare secundum publicas allegatas & probatas, quem ipse priuatim scit innocentem esse, si eius innocentiam demonstrare non possit. Hæc est communis doctrina. Cum enim Reipubl. concessum sit, ex graui causa disponere de bonis subditorum, ea ab vno ad alterum transferendo, sicuti dixi hoc libro tr. 1. de iust. c. 8. n. 4. Profectò talis potestas in hoc etiam casu iudicibus concessa est: quandoquidem plurimum Reipublicæ interest, vt secundum publicas allegationes iudicia terminentur. Quamquam Sotus lib. 3. de iust. q. 4. a. 5. Arrag. 2. 2. q. 60. a. 5. Less. lib. 2. c. 29. dub. 10. n. 84. §. tertio, & c. 31. dub. 4. non improbabiler dicunt, condemnatum per sententiam ita materialiter iniustam, re ipsa, & in conscientia non priuari priorum bonorum dominio: ideoque ius habere, ea recipiendi à possessore, si scandalum absit: quòd non videatur esse mens Reipublicæ per sententiam, quæ falsis probationibus nititur, aliquem rerum suarum dominio priuare: sic enim absque necessitate calumniarioribus faueret. Quare bene concludit Sotus: Quod sententia iniusta (materialiter) ius nec aufert, nec confert: ideoque si is, cui solutio facta est, eius hæredes postea errorem intelligant, tenebuntur in conscientia restituere. Quandoquidem sententia Iudicis in falsa præsumptione fundata erat: præsumptio autem cedit veritati.

Dico III. Nullo casu Iudici concessum videtur, vt hominem secundum publicas allegationes & probationes conuictum, morti adiudicet, si eius innocentiam priuatim perspectam habeat. Hæc assertio est cõtra cõmunem sententiam apud Couar. 1. resol. c. 1. sed traditur ab Adriano quodlibeto 6. a. 3. Lirano in c. 23. Exodi, Angelo ver. iudicare, n. 7. Abb. in c. super questionum §. quia verò, de offic. deleg. Rosella ver. Iudex, n. 16. Sa n. 13. Less. cit. dub. 10. Petr. Nauar. lib. 2. c. 3. n. 161. Nam hominem innoxium per se, ac directè occidere (nisi Deus ita iubeat) per se,



& intrinsecè malum est, sicuti fornicari. Quare sicuti Iudex matrimonium, quod secundum publica allegata validum apparet, ipse verò inuvalidum esse scit, nullo modo suadere potest; ne dicam præcipere homini, ut coniugi putatio carnaliter adhæreat: cum hæc sit copula intrinsecè mala, cuius potestatem Ecclesia nemini vult, aut potest facere: Ita pari ratione Communitas, vel gentium iura neque volunt, neque possunt Iudici dare potestatem, ut hominem, quem certò innocentem esse scit, morti adiudicet. Verum quidem est, quòd Ecclesia, & quævis Communitas velit Iudicem in publicis iudicijs, etiam grauioribus seu criminalibus, procedere secundum publicas allegationes; sed ex præsumptione, quòd ea veræ sint: si autem contrarium Iudici manifestum est, non potest esse locus præsumptioni.

Ob eandem rationem neque iustitiæ Minister, siue Carnifex mortis sententiam exequi potest in Reum condemnatum, quem certò scit innocentem esse. Ex quo tamen minimè inferas, quòd ipsi etiam innocenti, secundum publicas allegationes condemnato, fas sit suæ defensionis causa, publicæ potestati resistere: cum id sine scandalo fieri non possit, si eius innocentia publicè perspecta non est. Qua de re vidèri potest Couarruias lib. 1. resol. c. 2. num. 13. Less. c. 31. dub. 4. in fine, Suarez lib. 5. de legibus, c. 10. n. 3.

QVÆSTIO SECUNDA. An sententia seu in civili, seu in criminali causa, lata per errorem facti, postea rescindi debeat? Respondeo & dico I. Si comperiat, ob falsas allegationes testium, vel instrumentorum productiones, sententiam latam esse; condemnatus, sententia rescissa, in integrum restituendus est, iuxta l. Diuus, ff. de re iudic. & l. 1. seqq. C. Si ex falsis instrumentis, &c.

9 Dico II. Si post latam sententiam, quæ in rem iudicatam transijt, noua instrumenta, vel testimonia reperiantur: ordinariè fieri non potest restitutio contra sententiam, sicuti constat ex l. Imperatores, ff. de re iudic. attamen ad Principem recurrere licebit, qui, inspectis circumstantijs causæ, iubere potest, ut ea iterum in iudicium deducatur: & si manifestò constiterit, sententiam ob ignorantiam facti latam fuisse, ea per restitutionem in integrum rescindatur, sicuti docet Molina tom. 2. disput. 568. Dixi autem ordinariè fieri non posse restitutionem contra sententiam. Excipitur enim si causa publica sit, v. g. ad fiscum spectans: concedi tum solet reuissio ac restitutio propter noua instrumenta reperta, iuxta cit. l. Imperatores, vbi Gl. communiter recepta ait, idem sentiendum esse, si causa ad minorem natu, vel Ecclesiam spectet.

10 QVÆSTIO TERTIA. Si Iudex ob imperitiam malè & contra leges publicas sententiam tulit, ad quid obligatus sit? Respondeo, & dico I. Si per dolum, v. g. pecunia corruptus, iniquam sententiam tulit, tenetur omne damnum parti læsæ refarcire, l. filiusfam. ff. de iudicijs, & amissa dignitate, efficitur infamis, l. ult. C. de pœna Iudicis, qui malè iudicauit. vbi videri etiam potest Auth. nouo iure.

Dico II. Si Iudex sine dolo per imperitiam malè iudicauit, ex quasi delicto tenetur parti læsæ ad aliquam compensationem damnorum, sicuti vir prudens, inspecta qualitate causæ, diiudicans arbitratus fuerit: quare litem suam Iudex imperitè iudicando facere dicitur, id est, damnum partis læsæ in se transferre, Institut. de obligat. ex quasi delicto, princip. l. ex maleficijs, §. si Iudex, ff. de action. & obligat. l. ult. ff. de varijs & extraord. cognit. Et habent hæc etiam locum in arbitrio: quia arbitria ad formam iudiciorum redacta sunt, l. 1. ff. de arbitris: item in Tabellione malè confidente instrumenta: aut testium allegationes perperam excipiente: quia imperitia culpa annumeratur, reg. 174.

ff. in ijs maximè personis, quæ acceptando officium, se eius peritas esse hoc ipso profitentur.

Dico III. Si Iudex alioquin non imperitus, sed ad tale munus idoneus, eam, quam moraliter debet, diligentiam adhibeat: sed nihilominus ex humana fragilitate & obliuione inter iudicandum erret, in foro conscientia non tenetur restitutionem facere ex proprijs: quandoquidem iniuriam formalem non intulit: neque, ut ponimus, aliquid commodi ex tali sententia à parte læsæ accepit: idèoque ex neutro capite restituendi, videlicet nec ratione rei acceptæ, nec ratione iniustæ acceptionis, læsionisue obligatus est.

Dico IV. Quia tamen Iudex causa fuit, ut damnum saltem materialiter iniustum parti inferretur, debet sententiam retractare, & reuocare, si sine graui suo incommodo possit, suadendo v. g. parti læsæ, ut causæ reuisionem postulet: quin & ipsemet Iudex, si ordinarius sit, sententiam suam, quam contra leges tulit, tanquam irritam reuocare potest, arg. l. si Præses, C. quomodo, & quando Iudex, &c. & l. si accusatoribus, C. de accusat. iuncta Gl. ver. eandem, Abb. in c. fraternitatis, n. 18. de frigidis, vbi singulariter notandum ait: Licet sententia iniuste lata, nisi ab ea appelletur, trāseat in rem iudicatam, ei que pro quo iudicatum fuit, acquiratur actio in factum, iuxta l. cum prolatis, ff. de re iudicata: fallere tamen, si sententia ipso iure sit nulla, videlicet manifestè contra leges lata, sicuti constat ex l. si cum iuter, C. quando prouocare non est necesse. Vide etiam Innoc. in c. r. de re iudicata, eundem, & Abb. c. qualiter, n. 6. de accus.

QVÆSTIO QVARTA: Vtrum aliquis in propria causa iudex esse possit? Responsio est negatiua, ex l. vni C. ne quis in sua causa iudicet. Ratio est: Quia Iudex debet esse medius, ac veluti diremptor inter partes contendentes, uti habetur in c. 1. iuncta Gl. causa 4. q. 4. Excipitur primò, Nisi sit Princeps, seu Iudex supremus comparatione subditorum suorum, qui, nisi aliud constitutionibus regni receptum sit, cum Consiliarijs suis agnoscere, ac definire litem potest, uti colligitur ex l. vii. C. si quis Imperatori maledixerit, in fin. l. proximè, ff. de his quæ in testamento delentur. Ratio exceptionis est: tum propter plenitudinem potestatis, secundum quam à subdito cogi non potest, ut alterius arbitrio se subijciat: tum quia præsumitur, à supremo Principe seu Magistratu, tanquam fonte legum, ac iustitiæ, atque optimis Consiliarijs cincto, nihil nisi iustum erga subditos promanare posse.

Excipitur secundò. Nisi causa notoria sit, quòd Iudex ratione publici officij iniuriam passus fuerit: quo casu potest Reum sine alio iuris processu incontinenti punire, ut iurisdictio sua, & publica potestas defensa permaneat, sicuti resoluit Andr. Gaill. lib. 1. obseruat. 39. exemplum afferens de eo, qui literas iniuriarum plenas ad senatum quandam scripserat, ob quod facinus à senatu rectè in carcerem conjici, atque puniri potuit.

Excipitur tertio. Quòd Prælatus Iudex esse potest in causa Ecclesiæ suæ, sicuti docet Gloss. communiter recepta in c. si erga, ver. priuatur, 2. q. 7. Abb. in c. ad audientiam, n. 8. de appellat.

Excipitur quarto. Quòd Iudex à parte requisitus, si dubitetur, an cognoscendi, iudicandique potestatem habeat, id ipsum ante omnia discernere potest, l. si quis ex aliena, ff. de iudicijs, vbi dicitur. Quòd Prætoris est astimare, an sua sit iurisdictio. Et in l. 2. ff. si quis in ius vocatus: Ex quacunque causa ad Prætorum, vel alios qui iurisditioni præsumunt, in ius vocatus venire debet, ut hoc ipsum sciatur, an iurisdictio eius sit. Intelligitur autem id, si rationabile dubium esse possit: secus, si omnibus notorium existat, aliquem à iurisditione citantis exemptum esse: hoc enim casu citatus comparere non tenetur, v. g. Clericus à Iudice



laico citatus, sicuti docet Gl. recepta in c. veniens, ver. propter contumaciam, de accusat. Videri potest Innoc. in c. praterea, de dilationibus, Abb. in c. ex parte, de rescriptis, D. Martha de iurisdic. p. 2. c. 4.

12 Porro hinc vniuersim inferri potest; Dictum illud, Quod nemo in propria causa iudex esse debet; intelligendum esse, ne directè id fiat in propriam vtilitatem sententiam ferendo, sicuti notat Gl. in cit. l. si quis ex aliena, ver. aestimare: Interim verò permissum est Iudici ordinario, suborto dubio, vtrum causa aliqua, quæ ad ipsum defertur, suæ iurisdictioni subiecta sit, id ipsum cognoscere: eoque dubio affirmatiuè resolutò, ad causæ principalis determinationem procedere, arg. c. ad Apostolicam, de Simon. vbi Abb. notat n. 3. Quod Episcopus non tantum sibi vendicat iurisdictionem compellendi laicos ad obseruandas consuetudines Ecclesiarum laudabiles: sed etiam orto dubio, num consuetudo laudabilis existat, id ipsum determinare possit: quia in eiusmodi casibus non nisi indirectè iudicat in causa propria, quatenus id necessarium est, vt ordinario suo iudicandi officio satisfaciatur.

Aliud exemplum: Episcopus in sui electione, proposita sibi capitulatione, intra alia iurare debuit Capitulo, quòd in tali rerum genere nihil immutare velit. Post confirmationem diæcesani ius sibi ab ipso pronunciari postulant: Episcopus autem antè edito iuramento impediri videtur, quominus in tali causa procedere possit. Arbitror, hoc casum non impediri Episcopum, quominus, cum consilio prudentum, cognoscat de viribus iuramenti præstiti, aut quousque se illud extendere debeat, vt deinde appareat, vtrum in causa principali ad instantiam partis progrediendi ius habeat, necne. Alioquin enim Episcopus in consistorio suo ad gubernandam diæcesin sufficiens sibi non foret, si ortà controuersia circa fundamentum suæ iurisdictionis, illam dirimere non posset.

Veruntamen si Iudex à parte contendente tanquam suspectus recusetur, iustitiam huius recusationis cognoscere non potest; sed causam superlegendum ipsi erit: quia exceptio suspicionis (nisi notoriè friuola sit) sicuti Iudicem inhabilem reddit, quominus cognoscere possit super principali: ita, & multò magis, super incidente: cum per talem exceptionem ad indignationem prouocetur, sicuti notat Abb. c. requiris, n. 12. de appellat. Gaill. lib. obier. 34. n. 6.

## CAP. III.

## De Actore &amp; Accusatore.

## S V M M A R I V M.

- 1 Qui in civilibus actor, in criminalibus accusator dici solet.
- 2 Citatio Rei est funtamentum omnis iudicii; nisi notorium sit, nullam ei defensionem competere posse.
- 3 Libellus Actoris syllogismum iuridicum continere debet.
- 4 Actor, itemque Reus in iudicio contumaciter non comparens, parti la se ad expensas, & damnare rescindenda condemnandus est.
- 5 Litis contestatio fundamentum est iudicii ordinarii.
- 6 Accusatori onus probandi incumbit; non item denunciatori.
- 7 Inter denunciationem charitativam, & denunciationem iudicalem multiplex discrimen est.
- 8 De crimine pernicioso, si alia ratione impediri non possit, accusare, vel denunciare quisque obligatus est.
- 9 Iudex ad se delatam accusationem ordinariè admittere cogitur.

1 QVI in civilibus causis actor dicitur, l. qui prior, ff. de iudicijs, is in criminalibus accusator, ff. de accusat. & inscript. Quod ad Actorem attinet; Cum Iudex officium suum ei non impertiatur, nisi imploratus; ideo si Actor aduersarium ad certum tempus citari faciens, ipse met tempore constituto non compareat, instare potest

Reus praesens, vt Iudex causa cognita illum ad expensas condemnet, quas Reus citatus in comparando facere debuit, sicuti habetur in l. eum quem, ff. de iudicijs. Et videtur id etiam locum habere in accusatore; quin & in Reo, si peremptoriè citatus contumaciter non compareat, quòd ad expensas Actoris condemnari debeat, c. ex literis, de dolo & contumacia. Sed & omnia alia emergentia damna seu Actor, seu Reus contumax parti aduersaria prestare cogitur, l. sancimus, C. de iudicijs. Neque ad alteram citationem deuenire oportet, nisi contumax sufficienter caucat in iudicio sisti, c. 1. in fine, de dolo & contumacia. Denique si Reus ad trinam & peremptoriam citationem nec per se, nec per procuratorem compareat, nulla legitima causa impeditus, per Iudicem missio fieri potest in bona eius; alioquin excommunicatio inferri, sicuti constat ex c. tua, vt lite non contestata, & c. & docet Gl. in c. 2. ver. rationabili causa, de procurat. Sin verò Actor contumaciter non compareat, Reo praesente testes recipi, & ad definitiuam sententiam procedi posse, etiam lite nondum contestatà, dicitur in c. causam quæ, iunct. Gl. ver. ad domum, de dolo & contumacia, & Abb. ibid. num. 15. vbi aiunt, quòd Actoris contumacia intolerabilior est, quàm Rei. Vide c. quoniam, eod. tit.

Porro citatio, per quam Reo praesenti copia datur se defendendi & ad obiecta respondendi, adeò necessaria est naturali, ac gentium iure, vt sine ea processus iudicij, & lata sententia irrita censetur; excepto, si notorium sit, nullam Reo defensionem competere posse, sicuti ex communi tradit Abb. c. dilecti, n. 6. de iudic. Nauar. lib. 2. consil. 5. n. 3. de appellat. edit. 2. & in man. c. 25. n. 10. Per. Nau. li. 2. c. 3. n. 192. vbi aiunt, si certum sit, Reum de atroci crimine iuridicè conuinci posse, nulla illi legitima exceptione, aut defensione competente, at verò ad evitandum graue malum, iuridico processu necessario superlegendum esse existimetur: tunc absque eo, ad condemnatoriam sententiam, eiusque executionem procedere interdum Principi concessum esse. Vide etiam Mynsing. cent. 2. obseru. 91. Gaill. lib. 1. obseruat. 48. & seq.

Ad Actorem etiam pertinet; postquam Reus citatus comparuit, libellum intentionis suæ ante omnia Iudici offerre: & per Iudicem ipsi Reo, vt is deliberare possit, cederene, an litigare malit, Auth. offeratur, C. de litis contestat. l. 3. C. de edendo, & c. 1. de libelli oblatione, vbi Gl. ver. libellum reclamationis. Quòd si actione personali agatur, causa obligationis in libello exprimenda erit: v. g. peto centum ex mutuo, ex vendito. Sin actione reali, dominium necessario inferendum est libello: v. g. peto hanc rem, quia mea est, sicuti ex communi docet Andr. Gaill. lib. 1. obseru. 61. Quare dicunt aliqui, quòd libellus Actoris syllogismum iuridicum continere debeat, cuius propositio sit principium iuris; assumptio verò facti speciem, conclusio petitionem contineat: v. g. Emptor rei obligatus est ad soluendum pretium, tradita ipsi merce: Titius à me emit equum, quem eidem tradidi, vel tradere paratus sum: Ergo peto, vt Titius emptor equi mihi pretium soluat. In quo proposito Actor probare debet suum intentum, videlicet quòd equus à Titio emptus, ipsique traditus sit: quia affirmanti probatio incumbit, l. 2. ff. de probationibus. Sin verò Reus contra intentionem Actoris excipiat, dicendo v. g. sibi pretium equi postea donatum fuisse; tum onus probandi in ipsum Reum reijcitur, l. in exceptionibus, ff. de probat. vbi Gl. ait: sicuti Actor intentionem suam, ita Reus exceptionem probare debet.

Posteaquam verò Iudex libellum Actoris Aduersario, siue Reo conuento porrexit, nisi is cedere malit, ad litis contestationem venit; cum hæc sit basis siue fundamentum iudicij ordinarij, sicuti constat ex tit. decretal. Vt lite non contestata, non procedatur ad testium receptionem, vel sententiam definitiuam,



& notat ibi Gloss. cap. i. ver. ad definitiuam. Fit autem litis contestatio per petitionem Actoris in iudicio, & Aduersarij responsionem, animo confligendi, c. dudum, §. licet, de elect. & c. i. de litis contestatione. Ex quo apparet, idcirco appellari litis contestationem; quod Actor ius sibi esse testetur; Aduersarius autem contrarium contestetur. In summario autem siue extraordinario iudicio contestatio litis non requiritur.

Alius porro est libellus, qui *infamationis*, seu famosis appellatur in cap. inquisitionis, §. tertiae, de accusat. Si quis per schedulam publico, aut priuato loco positam, vel affixam, Iudicem moneat, vt de tali crimine inquirat, non adscripto suo denuntiatoris nomine; licet alia indicia, vel etiam testes inferantur. Ex eiusmodi schedula Iudici procedendum non esse, habetur in cit. §. tertiae; imò talis infamator plerumque puniendus est, sicuti colligitur ex cap. quidam, §. quæst. 1. & l. vnic. Cod. de famosis libellis. Monet tamen Molina tract. 4. disput. 35. post oblatam eiusmodi schedulam seu libellum, Iudicem ex officio procedere posse, ac debere in duobus casibus: I. est; Si infamia publica criminis antecessit. II. Si crimen perniciosum sit in futurum; tunc occultè, & cautè inquisitionem, aliàque facere debet.

4 **QVÆSTIO PRIMA.** Qua ratione Actor in criminalibus, seu accusator, differat à denuntiatore? Respondeo; In eo potissimum, quòd accusatori incumbat onus probandi criminis: qua in probatione si deficiat, & calumniator appareat, pœna plectitur talionis, id est, tali, qualem alteri per calumniam inferre intenderat, iuxta l. ult. Cod. de accusat. & inscript. l. ult. Cod. de calumniator. l. ab Imperatore, ff. de prauaricatoribus, & docet S. Thom. 2. 2. quæst. 68. a. 4. Quamquam pœna talionis, sicuti & inscriptio accusatoris, hodie vix in vfu est; sed arbitraria imponi solet, si Iudici appareat, illum calumniandi animo, non probabili errore ductum, ad accusandum accessisse, iuxta l. 1. ff. ad Turpillianum: & ita docet Pet. Gregor. Tholosanus lib. 31. syntagm. cap. 10. Couarrui. 2. resolut. c. 9. num. 1. atque colligitur ex cap. super his, de accusat. Denuntiatori autem onus probandi criminis non incumbit, sed solum aperiendi indicia, quibus Iudex ex officio moueri possit ad vltiorem inquisitionem, qua de re Clarus lib. 5. sent. §. fin. q. 7.

5 Notum autem est ex ijs, quæ dixi hoc lib. tract. 3. de iust. p. 2. cap. 4. Duas esse denunciationes: Vnam charitatiuam, (sub qua etiam canonicam, & regularem comprehendo) & alteram iudicialem, quæ sola huc spectat. Inter has autem denunciationes multiplex discrimen est: I. Quòd finis charitatiuæ denunciationis sit, emendatio fratris, vel vt tertiæ personæ, aut bono Communitatis provideatur: quamobrem hæc denunciatio ex motiuo virtutis charitatis procedere debet. At verò finis iudicialis denunciationis est, vt satisfiat Communitati læsa: tendit enim in quandam iniuriam Communitatis, si eius membra delinquant: quare hæc denunciatio per se, ac directè procedit ex motiuo iustitiæ vindicatiuæ.

II. Etsi denunciatus charitatiuè crimen nec probare, nec indicijs sufficientibus ostendere possit, quia solus vidit, audiuit, tamen denunciare potest Prælato, si existimet fidem ipsi aliquam habendam fore. At verò iudicialiter frustra denuntiaret, cum Prælatus sine infamia, & sine indicijs criminis, ad eius punitionem procedere non possit, vt paulò antè dixi.

III. Qui iudicialiter denunciat, nomen suum (communi iure) inscribere debet, & postea vocatus coram Iudice comparere ad publicam testimonij depositionem, Reique conuictionem: Qui autem charitatiuè denunciat, nomen suum inscribere non debet: imò Prælatus deferentem manifestare nullo modo potest, nisi

necessitas postulet ad finem correctionis obtinendum; tunc enim deferens consensum dare tenetur, aut, si dare nolit, ipso etiam inuito, reuelari poterit.

IV. In denunciatione charitatiua Prælatus non debet crimen occultum, atque graue alijs manifestare, si solus id emendare possit: secus, si solus non possit, tum manifestare debet alteri personæ, quæ idonea sit ad remedium adhibendum, (tamen si delati Superior sit) sin vnus non sufficiat, duobus, vel pluribus, quatenus necesse esse videtur ad criminis emendationem, vel vt tertiæ personæ, aut bono communi prouisum sit. At verò denunciatio iudicialis eò directè tendit, vt Reus per testes conuictus, aut confessus, in publicam notitiam deueniat.

Porro licet Prælatus crimen occultum sibi charitatiuè denunciatum non euulgare, sed secretum tenere debeat: nihilominus eius notitia in gubernatione vti potest, quatenus licet sine secreti violatione, & citra denunciati infamiam: videlicet inuigilando homini, in alium locum mittendo, sub aliqua probabili ratione ab officio remouendo.

**QVÆSTIO SECUNDA.** Vtrum aliquis ad accusandum obligetur? Respondeo ex doctrina S. Thomæ quæst. 68. a. 1. Syluest. ver. accusatio, quæst. 2. & dico l. De crimine pernitioso, cuius damnum alia ratione impediri nequit, accusare aliquis obligatus est, licet plerumque sufficiat denunciare iuridicè, vel canonicè. Plerumque dico: Interdum verò contingere potest, vt bono communi, vel personæ particulari non satis provideatur, nisi contra Reum processus iudicialis instituat: hoc casu obligatus erit subditus ad denunciationem iudicialem, vt Reus per testes, aut indicia conuincatur, & malum emendetur. Dummodo denuntiator existimet, se effecturum, vt fides ipsi habeatur: cum alioquin frustra laboraret, & suspicioni calumniæ se obijceret.

Dico II. De alijs criminibus non perniciosis in futurum nemo accusare obligatus est, sicuti constat ex l. vn. C. vt nemo inuitus agat, &c. Imò quod attinet ad crimina priuata: præstat vt læsus iniuriam condonet, sicuti notat Sotus memb. 2. quæst. 5. conclus. 2.

Porro quilibet in iudicio accusator esse potest, nisi iure prohibeatur, secundum Gloss. in rubr. Cod. Qui accusare non possunt. Quæ autem personæ ab accusando repellantur, vide in Gl. ibid. & apud Clarum cit. §. fin. q. 14. & 15. Iacob. Nouellum tract. de defensionibus, c. 2.

7 **QVÆSTIO TERTIA.** Vtrum Iudex ad se delatam accusationem admittere teneatur? Responso est affirmatiua: Quia ad Iudicis officium pertinet, vt iustitiam administret partibus postulantibus, seu proprijs, seu publici boni causa. Excipe: Nisi bonum publicum postulare videatur, vt à iudicio processu, & condemnatione absterneatur: puta quia Reus Reipublicæ valde utilis est: vel si ex accusatione, aut condemnatione grauis tumultus populi timeatur: tali casu Iudex accusationem ab initio repellere debet: vel si iam inchoata causa est, eam suspendere, & ad superiorem Iudicem transmittere: ad quem denique pertinebit, si ita Reipublicæ expedire videatur, accusationis causam omnino abolere, sicuti docet S. Thom. 2. 2. quæst. 68. a. 3. ad vlt. Caiet. eod. a. §. sed occurrit hoc dubium, Sotus memb. 2. q. 5. conclus. 5. in fine, Less. lib. 2. c. 30. dub. 3. Si tamen agatur de iniuriâ, vel damno partis læsæ, curandum est, vt ipsi etiam hoc casu, quatenus fieri potest, satisfiat.



## CAP. IV.

## De Probationibus.

## SUMMARIUM.

- 1 Probationes in causa civili varie sunt: videl. per testes, per instrumenta, aut libros antiquos; per famam indicia.
- 2 Instrumentorum duplex genus est; publicum & priuatum.
- 3 Duo testes ad plenam probationem ordinariè requiruntur, & sufficiunt.
- Laicorum testimonium contra Clericum in causa criminali plerumque admitti non debet, tanquam sufficiens ad probationem plenam.
- 4 Testes debent esse omni exceptione maiores: multi enim iure repelluntur: qui tamen plerique admittuntur, si crimina excepta sint.
- 5 Testes in iudicio debent esse iurati; & de eodem facto singulari contestari.
- 6 In quibusdam causis non iudicialibus, nec alteri preiudicantibus, sufficit testimonium hominis unius.
- 7 Unus testis, omni exceptione maior, ordinariè in iudiciali foro efficit probationem semiplenam.
- 8 Testis à competente Iudice legitime interrogatus veritatem fateri obligatus est.
- 6 Certi tamen casus sunt, quibus aliquis interrogatus de crimine testificari non tenetur.
- 10 Parentes contra liberos; & liberi contra parentes, in testimonium non vocantur, exceptis criminibus valde atrocibus, si alij Testes haberi non possunt.

**P**OST litis contestationem, & iuramentum de calumniis, si id exactum fuerit, ad probationes devenitur, quæ in causa civili variae sunt; videlicet per Testes, l. 3. ff. de Testibus, per instrumenta, aut libros antiquos, c. cum causam, & c. ult. de probat. c. cum Ioannes, de fide instrumentorum; ubi dicitur, quod instrumentorum fides, & depositiones Testium in libris exercendis eandem vim obtinent. Item per famam, indicia seu praesumptiones, iuxta cit. c. cum causam. Quod si eiusmodi probationibus Actor causam suam probabiliorem reddere non possit, Reus (etsi nihil praestiterit) obtinebit, c. ult. §. sanè, de iureiur. Neque cogi potest Reus, ut propria instrumenta Actori edat, c. 1. de probat. l. 1. & 4. C. de edendo: cum nimis graue futurum sit, si quis contra se producere debeat ea, quibus ab aduersario oppugnetur, l. nimis graue, Cod. de Testib. secus, si sint instrumenta communia: ad ea enim edenda Iudex, petente parte, alteram cogere debet, c. G. perpetuus, de fide instrumentorum. Item si certum sit, nec alter neget, se emphyteutam esse, cogi potest à domino, ut instrumenta emphyteuseos edat, sicuti dixi supra hoc lib. tract. 4. c. 24. num. 6.

**P**ORRO instrumentorum duplex genus est; publicum, & priuatum. Instrumentum, siue scriptura publica dicitur, quæ per publicam manum, videlicet Tabellionis, legitime confecta est, c. 2. de fide instrumentorum. Verum & acta iudicij apud Iudicem conscripta à duobus Testibus, qui publice Notarij fidem supplere possunt, publicam fidem merentur, uti habetur in c. quoniam, de probat. Imò consuetudo passim obtinuit, ut protocola, à Notario, vel simili persona in publicis actibus scripta, sine alia oblatione, vel subscriptione, fidem faciant; si nulla fraudis suspicio subesse possit, & non agatur de rebus magni momenti. Idemque sentiendum de libris censualibus, & similibus antiquis scripturis, sicuti colligitur ex c. ad audientiam, de praescriptis; ubi id notat Abb. num. 11. & in c. cum causam, de probat. Mynsing. cent. 6. obser. 26.

Scriptura verò priuata dicitur, quæ à priuato homine, nulla publica auctoritate confecta est; cuius ea conditio, ut si sola sit, ac Testium subscriptione, &c. non

munita, contra auctorem suum probet; non item pro ipso, iuxta l. rationes, ac l. exemplo, ff. de probat. quibus habetur, quod ex scriptura propria creditoris non ostenditur debitum. Notat tamen Abb. in c. postulationem, num. 30. de postul. Prælat. Equum esse, ut rationibus mercatorum, saltem in minoribus debitis, fides habeatur etiam pro ipsis; sicuti creditur contra ipsos. Quia alioquin officium ipsis à publico Magistratu creditum, cum tacito mandato, ut codicem rationum conficiant, eis damnosum foret, Opus tamen est Iudicis arbitrio, utrum fraus subesse possit.

In causa criminali maiorem notitiam, eamque publicam seu iudicalem Iudex habere debet, ut Reum condemnare possit. Duobus autem modis crimen in iudicio notorium redditur: Videlicet, si reus illud in iudicio confessus sit; vel si de crimine conuictus: eaque conuictio plerumque fit per Testes. Præter hos tamen est extraordinarius modus veniendi ad condemnationem; si Iudex praesentibus pluribus (id est tribus, vel quatuor, ait Less. c. 30. dub. 4. num. 23.) crimine in flagranti crimine deprehendit: quia de manifesta, & nota pluribus causa non sunt querendi testes, cap. de manifesta, 2. quæst. 1.

De Testibus est, **QVÆSTIO PRIMA.** Quot Testes ad probationem requirantur? Respondeo: In omni causa Ecclesiastica, & seculari, civili & criminali, ad plenam probationem contra alterum, præter Actorem, vel Accusatorem, requiruntur, & sufficiunt duo Testes, si idonei sint, & omni exceptione maiores, sicuti constat ex c. licet, de Testib. l. iurifurandi, C. cod. l. ubi numerus, ff. eod. Et consentit lex vetus Deut. 17. & 19. quam ut gentium consuetudine confirmatam, imò & naturali iuri valde consentaneam, allegauit Christus Matth. 18. In ore duorum vel trium testium stet omne verbum. Ratio est: Quia plerumque periculum subest, ne unus homo peruerri possit: sed non tam facile duo peruertuntur, saltem ut per omnia conformiter loquantur, & falsitas se non prodatur, uti videre est in duobus senibus cap. 13. Danielis, & videri potest Simanca de Cath. institut. tit. 64. n. 32. Pet. Nau. lib. 2. c. 3. num. 199.

His adde, etiam ad condemnandum Sacerdotem, vel Episcopum duos idoneos Testes sufficere, si non de iure; propter c. præsul, 2. q. 5. saltem de consuetudine, sicuti notauit Gratianus in c. 1. ead. q. 2. Clarus in §. fin. quæst. 66. Prosper Farinacius quæst. 63. num. 235. & 244. Less. cit. dub. 4. num. 27. Laicorum tamen testimonium contra Clericum in criminalibus communiter non admittitur, ut sufficiens ad probationem plenam, sicuti constat ex c. de cætero, de Testibus: quia laici solent esse infesti Clericis. Præterquam si crimen exceptum sit, sicuti ibi notat Gl. ver. suam; vel etiam in subsidium, quando crimem aliter probari non potest: ut si in villa commissum sit coram solis laicis, quæ est doctrina Abb. cit. cap. de cætero, num. 3. quam sequitur Prosper Farinacius quæst. 61. num. 107. & alij. Debet autem, ut supra etiam dixi, Testis esse distinctus ab Accusatore, imò etiam denuntiatore: quamuis in quibusdam causis, ut quibus agitur de peccato impediendo; v.g. ne matrimonium cum impedimento contrahatur; denuntiator etiam in Testem admittitur, sicuti notauit Abb. cap. iurauit, num. 2. de probat. Iosephus Mascardus volum. 1. conclus. 26. n. 7. Prosper Farinac. q. 60. n. 72. arg. c. in omni negotio, de testib. & attestat. Item in causis leuibus, & non infamantibus creditur denuntiatoribus Officialibus, sine alio Teste, uti docet Mascardus n. 9. Farinac. n. 74. Less. cit. dub. 4. num. 32.

**QVÆSTIO SECUNDA.** Qui, & quales Testes ad 4 testificandum admittantur? Respondeo & dico I. Quilibet potest esse testis, nisi iure prohibeatur, sicuti notat Syluest. ver. Testis, q. 1. Farinac. q. 53. nu. 1. & colligitur ex l. 1. ff. de testib. Imprimis verò prohibetur inimicus eius, aduersus quem testimonium fertur, l. 3. ff. de Testibus.



Imò in criminibus, etiam exceptis, vt hæresi, leſa Maieſtatis crimine, &c. in quibus alioquin inhabiles admittuntur, inimicus repellitur; dummodo inimicitia grauis ſit ſecundùm Iudicis arbitrium, ſicuti conſtat ex cap. per tuas, 1. de ſimonia, & docet clarus §. ſin. q. 24. n. 5. Binsfeld. de conſeſſ. maleficiorum, memb. 2. conſeſſ. 6. corol. 6. §. dices, Gomez 3. reſol. c. 12. n. 14. Farinac. q. 53. n. 5. Leſſ. c. 30. dub. 5. n. 37.

Secundò, repelluntur conſanguinei, & affines eius, pro quo testimonium dandum eſt, ſicuti colligitur ex cit. l. 3. & cap. ſimiliter, §. q. 5. c. abſens, 2. cauſa 3. q. 9. Verùm in ciuilibus cauſis, ſi non ardua, & multùm præiudicantes ſint, tales perſonæ admittuntur, teſte Maſcard. conſeſſ. 68. n. 10. Farinac. q. 53. num. 24.

Tertiò, Domestici eius, qui Teſtes producere debet, in cauſis cùm ciuilibus, tum criminalibus repelluntur, iuxta l. Teſtes, ff. de Teſtibus, l. 1. §. ad quæſtionem, ff. de quæſtionibus, l. etiam, C. de teſtibus, c. ſi Teſtes, 4. q. 3. Domestici autem alicuius dicuntur non tantum vxor, filij, & ſerui; ſed & liberti, famuli conductitij, & alij familiares; ſaltem ſi eis aliquo modo imperare poſſumus, iuxta l. reſpiciendi, ff. de pœnis & docet Abb. c. in literis, num. 5. de Teſtibus. Veruntamen in ſubſidium, ſi veritas aliter haberi non poſſit, domeſtici Teſtes etiam admittuntur, v. g. in cauſa adulterij, ſicuti docent DD. communiter l. conſenſu, C. de repudijs, Farinacius q. 55. num. 35.

Quartò repelluntur infames infamia iuris, ſicuti conſtat ex c. licet ex quadam, c. testimonium, de Teſtibus. Nam testimonium in iudicio ferre, numeratur inter actus legitimos, à quibus infames arcantur. Sed neque infames infamia facti ad teſtificandum in cauſa criminali, aut ardua ordinariè recipiuntur, vt videre eſt apud Couar. in pract. qq. c. 18. num. 1. ſed interdum in defectum, ſi aliter veritas cognosci non poſſit; vt quia crimen ſuapte natura occultum, vel etiam in occulto loco commiſſum eſt, ſicuti docet Clarus q. 24. num. 13. Farinac. quæſt. 56. num. 56. Binsfeld. de conſeſſ. malef. memb. 2. conſeſſ. 6. §. 5. Leſſ. dub. 5. num. 30. Attamen eiufmodi infamis perſonæ testimonium nullam fidem meretur ſine tormentis, ſicuti habetur in l. ob carmen, ff. de Teſtib. quamuis id non vbique obſeruari, teſtatur Binsfeld. memb. 2. conſeſſ. 5. Porro in cauſa ciuili non ardua infamia facti laborans admittitur; quamuis minor fides habeatur.

Quintò, Perſona vilis, & inops, ſi de ea, Iudicis arbitrio, ſuſpicio ſit, quòd pecunia corrumpi potuerit; ſecus ſi honeſta, & bonæ famæ, ſicuti ex communi docet Abb. c. ſi qui teſtium, in fine, de teſtibus, Syl. ver. teſtis q. 1. Leſſ. num. 39. Farinac. q. 57. n. 1. ex l. 3. ff. de Teſtibus.

Sextò, Pagani, Iudæi, & à Fide apoſtata contra Chriſtianum teſtificari non permittuntur, c. non poteſt, & ſeqq. 2. q. 7. *Qui enim diuina teſtimonia non ſequuntur, pondus humani teſtimonij perdididerunt*, vt ex S. Aug. reſertur in c. ipſa pietas, 23. q. 4.

Septimò, Socius criminis ad teſtificandum adhibendus non eſt, ſicuti conſtat ex l. vlt. C. de accuſat. l. quoniam, C. de Teſtibus, c. veniens, 1. de Teſtibus, c. 1. de conſeſſis, vbi id docet Abb. & Gomez lib. 3. reſol. c. 12. n. 16. Leſſ. n. 39. In criminibus tamen exceptis, & talibus, quæ ſine ſocio admitti non poſſunt, criminali examinari poteſt de ſocijs; eiufque teſtimonium fidem facit, ſicuti alterius hominis vilis, infamis, aut ſuſpecti.

Octauò, Mulier ſecundùm forum canonicum, in teſtem produci non poteſt in cauſa criminali, c. mulierem, 33. q. 5. & c. forus, de verbor. ſignificat. iunct. Gl. ſecus verò eſt in foro ciuili, ſicuti conſtat ex l. ex eo, ff. de Teſtibus, & ex communi docet Abb. c. quoniam, n. 2. de Teſtibus, Gomez cit. c. 12. n. 13. Farinac. q. 59. n. 17. Leſſ. cit. dub. 5. n. 36. Clarus q. 24. n. 4.

Nonò, minor xx. annis in criminalibus repellitur à

teſtimonio, l. in teſtimonium, ff. de Teſtibus. In ciuilibus autem admittitur, ſi pubes ſit; non item impubes, iuxta l. 3. ff. de teſtibus, §. lege Iulia, & docent Sylueſt. Gomez, Leſſ. ll. cc. Farinac. quæſt. 58. num. 1. & 20. Dein de in crimine excepto, & valde pernicioſo deſcriptio puberis ætate minoris aliquod iudicium facere poterit, ſicuti docet Binsfeld. de conſeſſ. malef. memb. 2. conſeſſ. 6. in fine.

Decimò, in cauſa propria nemo admittitur teſtis, l. nullus, ff. de teſtibus. Propria autem cauſa ea cenſeri debet, cuius emolumentum, vel damnum ad aliquem ſuo nomine pertinet, l. 1. §. in propria cauſa, ff. Quando appellandum ſit. Quapropter Prælati, & Clerici in cauſa Eccleſiæ non prohibentur eſſe teſtes, iuxta c. inſuper, de teſtib. & c. tertio loco, de probat. vbi id notat Abb. nu. 2. quia non cenſentur moueri proprio commodo. Debet autem Iudex ex officio Teſtes prohibitos repellere. Interdum tamen Teſtes, præſertim in cauſis ciuilibus, minus idonei reputantur; quia contra eos Reus excipere poteſt; videl. quòd ſint familiares, ſeu domeſtici Actoris: Sin verò Reus non excipiat, nihil obſtat, quin eorum teſtimonium Iudex admittat, ſicuti notat Abb. in c. bonæ, n. 9. de poſtul. Prælat. Deinde idem Abb. in c. tertio loco, n. 5. monet, quòd *propter defectum Teſtium ſurgentem ex naturæ rei, admittuntur Teſtes alioquin minus idonei*.

Dico II. Teſtes debent eſſe iurati; alioquin ijs non creditur in præiudicium alterius, cap. de teſtibus, c. tuis, c. nuper, de Teſtib. & atteſtat. l. iurifiurandi, C. eod. niſi ille cuius intereſt, iuramentum ſponte remittat, iuxta c. tuis quæſtionibus, iunct. Gloſ. ver. remittatur, de Teſtibus: Et debent Teſtes deponere de ſenſu; videlicet ſe viſiſſe Titium occidentem, audiuiſſe blaſphemantem. Si enim dep. ant de auditu, ideòque non de ipſo crimine, ſed de fama criminis, aliòve indicio; licet duo, plureſve ſint, non oſtendunt facinus commiſſum eſſe, ſed ſolùm indicium eius aſſerunt; quod interdum ſufficit ad probationem ſemiplenam, iuxta doctrinam Bart. in l. vlt. ff. de quæſtion. Nau. c. quis aliquando, §. non tibi dico, n. 22. d. 1. de pœnit. Ac demum teſtari debent de eodem facto ſpeciali, vt ſint conteſtes: Quare ſi vnus de vno furto teſteretur, alius de alio; vel vnus teſtetur ſe ex ore Titij audiuiſſe vnam proſitionem hæreticam, alius aliam, non efficiunt plenam criminis probationem, quæ ſufficiat ad condemnandum pœna ordinaria, ſicuti docet Caiet. 2. 2. q. 70. a. 2. Maſcard. vol. 2. conſeſſ. 856. n. 13. Ioach. Myning. cent. 2. obſeruat. 100. Arnald. Albertin. tr. de cognof. aſſert. Cath. q. 34. n. 6. Simanca de Cathol. inſtit. tit. 51. n. 3. Clarus q. 53. n. 19. Leſſ. lib. 2. c. 30. dub. 4. n. 33. contra Gomez lib. 3. reſol. c. 12. n. 12. Zanchin. Vgolinum tr. de hæreticis, c. 13. n. 6. & alios apud Ioan. Royas tr. de hæret. aſſert. 6. n. 139. qui dicunt; Teſtes ſingulares deponentes de diuerſis actibus ſpecificis, videl. de diuerſis proſitionibus hæreticis, probare crimen hæreſis in genere. Quæ doctrina falſa videtur: Cùm enim per eiufmodi Teſtes ſingulares crimen hæreſis v. g. in ſpecie plenè non probetur; ſequitur neque etiam in genere ſatis probari: cùm genus exiſtere non poſſit, niſi in ſpecie.

Illud etiam non pauci arbitrantur, inter quos Simancha, & Leſſ. ll. cc. Si teſtes deponant de eadem proſitione hæretica, quamuis diuerſo loco, ac tempore audita, efficere probationem plenam, quod diſplicet Farinac. q. 64. n. 216. & alijs apud Maſcardum n. 20. cùm reuera non ſint conteſtes deponentes de eodem facto; ideòque faciliùs accidere poſſit, vt vterque decipiat, ac mentiatur.

Interim verum eſt, quòd Teſtes ſingulares deponentes de actibus diuerſis, diuerſo tempore commiſſis, etſi non probationem perfectam, magnam tamen præſumptionem contra Reum, & pluſquam ſemiplenam



probationem efficiunt, quæ sufficiat ad torturam; imò interdum ad pœnam extraordinariam inferendam, sicuti Clarus loc. cit. annotauit, & videri potest Caiet. cit. q. 70. a. 2. Mynsing. cent. 3. obseruat. 76. Francisc. Brunus de iudicijs, & tortur. p. 1. q. 2. n. 6. Farinac. q. 37. num. 34. Atque hæc in causis criminalibus, in quibus exactiores probationes requiruntur: In ciuilibus autem causis fa-  
teor, Testes deponentes de pluribus factis particularibus ad vnum finem tendentibus, sufficere posse: vt si in controuersia de possessione iuris decimandi, vnus Testis deponat de tritico, alius de hordeo, viso à se decimari: qua de re Gaill. lib. 2. obser. 66. Quin & in criminali causa, si Testes plures testentur de diuersis iudicijs, ad eundem omnino effectum tendentibus; v.g. aliqui iurati deponant de viso egressu è domo occisi, alij de fuga, alij de fama publica; interdum efficere poterunt probationem plenam, seu talem, per quam animus Iudicis plene informetur, sicuti notat Mynsing. obseru. 106. & colligitur ex l. 3. ff. de Testibus.

**QVÆSTIO TERTIA.** Quantam fidem mereatur testimonium hominis vnus? Respondeo & dico I. Dictum vnus Testis idonei sæpe dat iustam & probabilem causam credendi, sicut indicat Gl. in l. Titio fundus, ff. de condit. & demonstrat. Nau. lib. 1. consil. 1. n. 2. de Testibus & attestat. vbi ait, si vnus idoneus Testis dicat, 40. annis beneficium sine personali residentia pacifice obtentum fuisse, quod nouus beneficiatus via præscriptionis se tutum in conscientia credere possit; modo fama, vel testimonia contraria non adsint: Et in manuali c. 22. num. 82. Licet dictum vnus fide digni sufficiat, vt iuste aliquis credere possit, iuxta Gloss. in cit. l. Titio; non tamen assert necessitatem credendi: ad id enim requiruntur duo Testes, cap. cum à nobis, de Testibus.

**Dico II.** In quibusdam causis non iudicialibus, nec præiudicantibus personæ tertiæ; vt cum quæritur, an infans baptizatus sit, Ecclesia consecrata, &c. sufficit testimonium vnus, sicuti dicam lib. 5. tract. 2. c. 5. Item in ijs causis, quibus agitur de impediendo peccato; modo ius parti acquisitum non sit; puta in denuntiatione impedimenti matrimonij, iuxta cap. præterea, 2. de sponsal. Similiter in denuntiatione inhabilitatis ad ordines, & beneficia Ecclesiastica, admittitur testimonium vnus sin verò matrimonium contractum, vel electio, aut collatio beneficii facta fuerit, tunc ad rescindendum, vel irritum declarandum opus est plena probatione per duos saltem Testes, arg. c. super his, de accusat. & notat Nau. lib. 5. consil. 22. ad 4. quæst. de Simon. edit. 2.

**Dico III.** Vnus Testis de visu, qui sit omni exceptione maior ordinariè in externo iudicali foro facit tantum probationem semiplenam, quæ tamen etiam in criminalibus sufficiat ad torturam, sicuti docet Gl. in l. si quis, ver. conuictus, C. ad l. Iuliam Maiest. Clarus q. 22. Mynsing. cent. 6. obser. 97. Loquor autem de Teste, qui deponat de ipso crimine: secus, si de indicio criminis, quantumvis propinquo: talis enim depositio efficit probationem semiplenam solius indicij, seu signi; non autem commissi criminis: nisi plures Testes singulares de diuersis iudicijs, iisque propinquis testentur, nam quæ non profunt singula, iuncta iuuant: veluti si vnus deponat, vidisse se Titium sanguine aspersum, enseni manu tenentem; alter vidisse se eundem ex loco delicti abeuntem, ex vrbe profugientem, sicuti præter alios docent M. Anto. Plancus, de iudicijs & tort. n. 368. Arnaldus Albertinus de cognoscendis assert. hæreticis, q. 25. n. 20. Prosper Farinac. q. 86. n. 72.

**Dico IV.** Testis, qui minus alioquin idoneus est, si ad testificandum adhibeatur; vel in subsidium, quia alij Testes haberi non possunt; vel ad auerendum malum in criminibus perniciosus & exceptis non facit probationem semiplenam, sed solum indicium, quod iunctum cum alijs iudicijs, sufficere possit ad torturam, sicuti ex com-

muni docet Less. dub. 5. n. 40. Clarus q. 22. n. 3.

**QVÆSTIO QVARTA.** Vtrum Testis à competente Iudice legitime interrogatus, teneatur veritatem sibi cognitam edicere, & de crimine testari? Responso est affirmatiua, communiter recepta recepta, cum S. Tho. 2. 2. q. 70. a. 1. Gal. in 4. d. 15. q. 6. a. 2. conclus. 7. & constat ex tit. lib. 2. decret. de Testibus cogendis. Nam iusto Superioris præcepto parendum est: suppono autem Iudicem iuste siue iuridice exigere testimonium: si videlicet hominis infamia, iusta accusatio, vel denunciatio criminis, semiplena probatio, vel alia indicia sufficientia ad Testes examinandos antecesserint, sicuti ex communi tradit Less. cap. 30. dub. 6.

His adde primò, Si Testis legitime examinatus tergiversari, variare, & veritatem per malitiam celare velle videatur, interdum etiam torqueri posse, sicuti ex communi docet clarus q. 25. Prosper Farinac. q. 66. n. 96. & seqq. Adde secundo, Si Testis, quamuis per errorem, obliuionem, &c. falsum deposuerit, debere suum dictum reuocare ante latam sententiam, si speret se prodesse posse, saltem ad hoc, vt non sit Testis integer, seu omni exceptione maior, iuxta c. præterea, de Testib. cog. & docet Nau. c. 25. n. 40.

Sunt verò alicui casus, quibus aliquis interrogatus de crimine testari, vel denunciare non tenetur: Primus, & notissimus est, si nouit ex Confessione sacramentali.

II. Si crimen occultum est, ita vt nulla publica de eo indicia adsint: quamuis fortè duobus, vel tribus cognitum fuerit: hoc casu non tenetur aliquis de eo testificari, nisi crimen perniciosum sit. videri potest Pet. Nau. lib. 2. c. 4. n. 219.

III. Si quis accepit sub sigillo secreti, vt consilium, vel remedium adhiberet misero delinquenti, puta medico, obstetrix aduocatus, vir doctus, aut valde amicus. Ita docet Nau. c. 25. n. 46. Per Nau. lib. 2. c. 4. n. 222. Corduba lib. 1. questionarij, q. 43. dub. 2. Mol. tr. 4. disp. 5. n. 3. Less. cit. dub. 6. n. 42. & 45.

Quæ sententia certa est, si Iudex iuridicè interrogans, nesciat, notitiam cum pacto iusti secreti acceptam esse: tunc enim non præsumitur obligare velle ad reuelandum nisi agatur de malo in futurum impediendo. Cum alioquin miseris hominibus omne iustū solamen, consilium, aut remedium intercluderetur. Sin verò Iudex sciens, vel suspicans, secretum commissum esse, v. g. medico, vel obstetrici, legitime inquirat, quia præcessit criminis infamia, vel semiplena probatio: tum arbitratu Abb. in c. intimaui, n. 3. de Testib. Sotus de secr. teg. mem. 2. q. 7. concl. 4. veritatem aperiendam esse: quia priuata pactio secreti seruandi, quamuis iuramento firmata sit, non potest iuri Magistratus præiudicare. Quæ doctrina vera quidem est, si ponamus, crimen occultum ex alio capite cognitum esse: vt si socius criminis, vel casu aliquis interueniens promissionem iuratam fecerit, se nullo casu reuelaturum: non potuit tali promissione præiudicare Iudici, quominus ipso iuridicè interrogante manifestare teneatur, sicuti rectè notat Mol. disp. 5. n. 8. Sin verò notitia criminis merè præteriti, in futurum non perniciosi, profecta est ab ipsomet criminoso, cum pacto ac veluti onere reticendi: ex eiusmodi conuentione nullum Magistratui, vel Reipubl. damnum seu præiudicium inferitur: cum, si pactum reticendi expressum, vel tacitum non intercessisset, talis criminis notitia accepta non fuisset: quare cum pactum in se iustum, & de iure naturali sit: probabilius est, Iudicem non posse eius reuelationem homini imperare. Vide Molin. cit. disp. 5. n. 3. vbi ait: Idem sentiendum esse, si is, cui sub secreto commissum est, persona tertiæ reuelat, quamuis iniuste, & nullo interposito pacto: quia sicuti alter reuelator iniuriam intulit rem secretam prodendo, ita tertius ille iniuriam auget, & extenderet vltèrius rem detegendo.

IV. Si quis notitiam delicti, alteriusue secreti per



iniuriam acceperit, v. g. literas aperiendo, vel hominem per vim cogendo ad reuelandum: tunc ne Iudici quidem interroganti prodere iuste potest. Cum non minus ex delicto, quam ex voluntario pacto obligatio iustitiæ contrahatur, ad damnum alicui datum non extendendum, sed potius, quatenus fieri potest, refarciendum, sicuti docet Mol. cit. disp. 5. n. 5.

V. Si scias factum Titij, de quo interrogaris, à peccato & pœna alienum esse: vt si ex ignorantia hominem pro fera occidit, si rem alienam abstulit gratia compensandi: vel grauissima necessitate adactus, sicuti notauit Nau. c. 17. n. 115. & Pet. Nau. n. 226. Nam interrogatio Iudicis procedit ex præsumptione commissæ culpæ: secundum quam iudicis intentionem recte negas, factum Titij tibi cognitum esse: sicuti & ipse Titius eodem sensu negare potest, etiam iuratus, sicuti ex communi docet Less. c. 31. dub. 3. n. 14. & dicam lib. seq. tract. 3. cap. 14. n. 8.

VI. Si ex testificatione tibi, vel tuis notabile damnum impendeat, non teneris testari: nisi crimen Reipublicæ perniciosum sit, & alia ratione impediri non possit. quæ de re Nau. c. 25. n. 50. Less. c. 30. dub. 6. n. 50.

VII. Parentes contra liberos: & liberi contra parentes in testimonium nec cogi, nec admitti possunt, l. 5. C. de Testibus: Exceptis criminibus atrocissimis, vt hæresis, læsæ Maiestatis, veneficiorum, &c. si alij Testes haberi non possint, sicuti docent Nau. c. 25. n. 50. Binsfeldius de confess. malefic. mem. 2. princ. Clarus q. 24. n. 22. Farinac. q. 54. n. 171. Nec frater contra fratrem, gener aduersus focerum, au focer aduersus generum ordinariè cogi possunt ad testificandum, sicuti constat ex l. lege Iulia, ff. de testibus. Sed in criminibus exceptis, & interdum in subsidium, tales personæ ad dicendum testimonium adigi poterunt.

VIII. Personæ exemptæ, aut privilegiatæ non coguntur esse testes, v. g. Clerici coram Iudice seculari, l. inuiti, ff. de testib. c. si testes, §. item lege Iulia, 4. q. 3. Volentes tamen admittuntur, sicuti docet Gl. cit. l. inuiti, ver. non licet. Deinde in aliorum Testium, ac probationum defectum etiam dictæ personæ testificari debent: Clerici tamen coram suo Ecclesiastico Iudice, vel eo consentiente coram seculari. Quæ de re Gl. in c. quamquam, ver. coram se, 14. q. 2. Gaill. lib. 1. obser. 100. n. 16.

## CAP. V.

## De Reo.

## S V M M A R I V M.

- 1 Reus alius est civilis debiti, & alius Reus criminis.
- 2 Reus à competente Iudice legitime interrogatus in iudicio, veritatem edicere obligatus est.
- 3 Confessarius Reum, qui convinci non potest, non nimis urgere debet ad confitendum crimen morte vel mutilatione dignum. Reus post latam à Iudice sententiam non tenetur fateri crimen, quod ante falsò negarat.
- 4 Reus à Iudice contra iuris ordinem examinatus, non tenetur crimen fateri: idemque dicendum, si rationabiliter dubitet.
- 5 Iudex Reum infamatum, vel conuictum de uno crimine, non debet examinare de alijs criminibus, quæ neque suapte natura, neque indicis connexa sunt.
- 6 Si indicia v. g. ad capturam Rei sufficientia non fuerint, totius etiam reliquus processus iudicij corrumpitur.
- 7 Si Reus crimen ultro confiteatur, eius indicia des, de eo sine alijs testimonijs puniri potest.
- 8 Iudex Reum de crimine confessum non potest interrogare de socijs, nulla indiciorum suspitione aut infamia laborantibus: nisi sit crimen exceptum, vel perniciosum in futurum.
- 9 Tortura non adhibetur, nisi in criminibus grauib, si adsint indicia graui, sed non sufficientia ad probationem plenam.
- 10 Reus semel tortus, iterum torquendus non est, nisi nouum iudicium accedat.

- 11 Iudex non debet ita torquere Reum, vt moraliter ei impossibile sit, crimen non confiteri.
- 12 Cetera personæ sunt, quæ torquere non licet.
- 13 Si reus confessionem per mendacium, simulationem, dolumve iudicis extoriam postea retractet, non potest ex illa condemnari.
- 14 Salsus conuictus duobus modis dari potest: I. in forma iuris communis l. 1. in forma iuris specialis.
- 15 Reus ordinariè puniri debet in loco, vbi deliquit: verum secundum Germanicæ consuetudinem necessariò mittendus non est ad locum delicti.
- 16 Iudex domicilij potentior esse solet, quam Iudex originis.

SICUT causa alia civilis est; alia criminalis: ita & Reus alius est civilis debiti, alius verò Reus criminis, vel saltem vt talis in iudicium vocatur. De Reo in criminalibus est.

QVÆSTIO PRIMA. Vtrum à competente Iudice interrogatus, commissum à se crimen fateri obligatus sit: Respondeo, & dico I. Si Iudex legitime, & secundum iuris ordinem interroget, præcipiatque sibi veritatem edici, obligatur Reus in conscientia. Hæc est communis sententia, quam docet S. Tho. q. 69. a. 1. Gabr. in 4. d. 15. q. 6. a. 2. ibid. Maior q. 18. Nau. c. 25. n. 35. Sa ver. iudicialis actus, de Reo, n. 1. Quia iustum Superioris præceptum obligat: vt super. cap. q. 4. argumentatus sum. Confirmatur I. Si Reus non teneretur veritatem fateri, tunc Iudex malè ageret ipsum ad id cogendo per iuramentum, ac torturam. Confirmatur II. Alioquin pleraque iudicia eluderentur, cum magno Reipubl. detrimento: quandoquidem Reus criminaliter condemnari non potest: nisi vel crimen confessus, vel de eo apertissimis documentis conuictus sit, l. ult. C. de probat. cuiusmodi tamen probatio sæpe haberi non potest.

Contrariam tamen sententiam, tanquam probabilem, defendunt Pet. Nau. lib. 2. c. 4. n. 142. Less. c. 31. dub. 3. Reum non esse obligatum confiteri crimen, quod morte, vel mutilatione dignum est: si intelligat, illud plenè probari non posse, idèoque nisi ipsemet se prodar, liberandum se fore. Fundamentum huius sententiæ est, quod leges & præcepta humana ordinariè non obligent cum discrimine mortis, aut mutilationis: ob naturalem propensionem seruandæ propriæ vitæ, & corporis integritatis. Deinde si nemo cogendus est sibi sanguine iunctum denuntiare, aut prodere, l. 4. ff. de testib. l. 5. Cod. eod. cur. ad seipsum prodendum aliquis cogi possit, ita vt sibi mortis, vel mutilationis causa existat?

Huius sententiæ censuram alijs committo: Id solum aduerto, eā Confessario inferuire posse, vt Reum ita persuasum, ad confitendum crimen in tali casu non multum vergeat: sed absoluat, sicut notauit Sa ver. iudicialis actus, de Reo n. 6. Sotus lib. 6. q. 5. a. 2. col. penult. Sequitur enim Reus sententiam non omnino improbabilem, vel saltem talem, quam Doctores aliqui probabilem iudicant, & hætenus de falsitate apertè conuicta non est.

Illud porrò extra controuersiam est, post latam à Iudice sententiam seu condemnatoriam, seu absolutoriam, desinere in Reo obligationem confitendi criminis, quod antea, quamuis iniuste, negarat: quia finito iudicio, finitur etiam obligatio Rei.

Dico II. Reus non secundum iuris ordinem examinatus de crimine, videlicet cuius nec infamia laborat, neque eius expressa indicia, aut semiplena probatio extant, non tenetur illud fateri: sed amphibologia aliqua celare potest. Ita S. Th. q. 69. art. 2. Scotus in 4. d. 15. q. 4. a. 3. Maior q. 18. Gabr. q. 6. art. 2. conclus. 6. Ex quo sequitur, quod Iudex Reo aperire debeat causæ statum, Testes de infamia, aliæque contra eum indicia: vt illi appareat, num iuridicè procedat, & ius habeat ipsum de crimine examinandi, sicuti notat Caiet. quæst. 69. art. 1. in secundo casu, notab. 3. Nauar. c. menturam: §. non tibi dico, d. 1. de pœnit. & in rubr. de iudic. num. 59. Clarus quæst. 64. num. 23. Neque obstat, etsi Reus dissimulans voci-



tatem, quia non legitime examinatur, intelligat exinde Iudici, Accusatori, aut Denuntiatori notam calumniae aspersum iri: Nam *nullus videtur dolo facere, qui iure suo* reg. 55. ff. Sensus est: Si quis ius habet aliquid agendi, non debet illi imputari damnum, quod ex actione eius per accidens euenit. Atqui in proposito casu quisque ius habet celandi suum crimen occultum, de quo ille legitime accusatur, vel interrogatur: Ergo potest illud celare, nihil obstante, quod exinde alter calumniae, vel mendacij suspicionem incurrat.

Veruntamen lex charitatis postulat, ut, qui crimen suum negat, vel celat; quatenus possibile est, denuntiantis famae consulat; dicendo v.g. eum probabili ratione deceptum, male ab alijs informatum, persuasum fuisse. Quae resolutio non tantum in iudicio, sed etiam in familiari consuetudine locum habere potest. Veluti, si Titio amico aliquam rem secreto commiseris, quam publice ignorari tua interfit; postea vero Titius arcanum non sine iniuria alijs narret, ac patefaciat: poteris rem totam dissimulare, vel amphibologico sensu negare, nihil obstante, quod Titius in mendacij suspicionem veniet. Hoc enim incommodi sibi ipsi Titius imputare debet, non tibi, qui iure tuo celandi occulti facti usus es. Ita Pet. Nau. lib. 2. c. 4. n. 348. Less. lib. 2. c. 31. dub. 2. Vide quae dicam lib. seq. tr. 3. c. 13. n. 10.

Ceterum tamen si Reus crimen suum occultum prodere non teneatur, si tamen ad sustinendam iustam criminis vindictam ultro prodere velit, opus virtutis exercebit, per se loquendo, sicuti docet Pet. Nau. lib. 2. c. 4. n. 134. Less. lib. 2. c. 11. n. 36.

Dico III. Si reus rationabiliter dubius sit, vtrum Iudex secundum iuris ordinem interroget; non tenetur commissum crimen fateri. Ita Caiet. cit. q. 69. a. 1. Sotus de secr. mem. 3. q. 2. conclus. 2. Sa de Reo, num. 11. Less. c. 31. dub. 3. num. 10. contra Palud. in 4. d. 19. q. 4. in fine. Nam licet in dubio plerumque pro Superiore praesumi debeat, non tamen in hoc speciali casu, cum praecipuum grauissimum est, quod proinde subditus in dubio, num iustum sit, necne, suscipere non tenetur, sed magis pro libertate & incolumitate sua praesumere potest. Alia videtur esse ratio de Teste, quippe cum non agatur de proprio eius periculo: quamquam non est improbabile, quod docet Sotus l. c. interdum in tali dubio sequendum esse Testi quod tutius videtur: veluti si Iudex inquirat de commissio homicidio; maius tunc periculum subest iniusti supplicij inferendi, si Iudex ius inquirendi non habeat; quam aestimari debeat commodum, quod ex criminis punitione proueniet, si ius inquirendi habeat.

QUESTIO SECUNDA. Quousque se extendat Iudicis potestas ad examinandum Reum, contra quem indicia criminis prodita sunt? Resp. & dico I. Iudex Reum infamatum, vel etiam conuictum de vno crimine, non potest examinare de alijs criminibus, quae nec suapte natura, nec indicij connexa sunt: v.g. deprehensus in furto non debet examinari de homicidio; nisi in loco, vbi furatus est, homo occisus fuerit. Ita contra Palud. in 4. d. 19. q. 4. in fine, Syl. ver. inquisitio, l. q. 3. dicto 4. ex communi docet Adrianus quodlib. 11. diff. 2. Caiet. 2. 2. q. 69. art. 1. Sotus lib. 5. de iust. q. 6. a. 2. Nau. in rubr. de indic. n. 62. Pet. Nau. lib. 2. c. 4. n. 170. arg. c. inquisitionis, de accusat. §. tertia. Idque locum etiam habet in criminibus eiusdem generis non connexis: v.g. conuictus de vno homicidio, examinari non debet, num alias etiam hominem occiderit, si de hoc nulla indicia habeantur. Ratio est: Quia Iudex non potest inquirere de crimine, nisi sit aliquo modo ei tanquam publicae personae cognitum: Non ideo autem, quia vnum crimen hominis cognouit, alia etiam praesumptione quadam colligere potest; si connexa non sint seu antecedenter, seu consequenter, uti notauit Nauar. in cit. rubr. num. 64.

Non ignoro, aliam esse in hac re Iudicum secularium consuetudinem, praesertim in crimine furti: Nam deprehensum in vno, mox sine vlla dubitatione examinant de alijs alibi commissis furtis, quorum nulla indicia habent. Sed id non est secundum iura, sicuti fateretur Clarus q. 64. n. 45. Binsfeld. de confess. malef. mem. 2. in princip. Excepto, si quis infamatus sit de crimine, sapius commissio: ut famosus latro, famosus fur; talis enim in vno furto, aut latrocinio deprehensus, illudue confessus, de alijs similibus interrogari poterit, sicuti notauit Pet. Nau. cit. c. 4. n. 171.

His duo adde: Primum. Non posse Iudicem ex ijs indicij, quae contra iuris ordinem affectus fuit, ulterius procedere, v.g. ad torturam; neque ex testimoniis, vel Rei confessione, quam iniuste extorsit, ad condemnationem: sed omnia acta irrita censi debent. Quemadmodum nec captura, si iniusta est, & non sufficientibus indicij nixa fuit, iustificatur per subsequentem legitimam probationem, aut confessionem: cum ordo processus iudicij peruersus sit. Et ita docent Gl. & DD. in l. penult. ff. de quaest. Binsfeld. mem. 2. concl. 7. dub. 1. §. tertio, Clarus q. 55. n. 13. Ambros. de Vignate tract. de haeresi, q. 14. n. 162. Mynsing. cent. 3. obser. 80. Delrius lib. 5. §. 11. vbi aiunt, quod confessio extorta sine sufficientibus indicij, est nulla; etsi millies fuerit ratificata. Addit tamen Less. c. 29. dub. 18. n. 175, quod in tali casu supremus Iudex, qui non consensit in iniuriam, ex tali noticia moueri possit ad nouum processum instituendum; perinde ac si alius priuatus criminis occulti confessionem non sine iniuria extorsisset.

Alterum. Si Reus ultro non adactus, nec obligatus crimen suum, vel alterius coram proprio Iudice confiteatur, puniri potest: cum per talem confessionem crimen publicum fiat, sicuti notant DD. c. at si clerici, de Iudic. Nau. in rubr. eiusdem tit. n. 87. Quanquam etiam hoc casu oporteat Iudicem indicia siue vestigia criminis indagare, si illud sit facti permanentis: v.g. si Reus dicat, hominem se occidisse, cadauer exhumari, & inspicere debet, sicuti docet Clarus ead. q. 55. n. 11. Mynsing. cent. 3. obseruat. 81. vbi ait; Quod spontanea delicti confessio non sufficit ad condemnandum aliquem poena capitali, nisi aliunde etiam constet, delictum commissum fuisse.

Dico II. Iudex Reum confessum interrogare non potest de socijs criminis, nulla indiciorum suspicionem, aut infamia laborantibus. Ita habetur expresse in l. ult. C. de accusationibus, *Nemo super proprio crimine confitentem de conscientia scrutetur aliena*; idque vtroque iure receptum esse, dicitur in c. i. de confessis, & docet ibid. Abb. n. 4. Henricus quodlib. 9. q. 25. Gomez 3. resol. c. 12. n. 16. Clarus q. 21. n. 7. Binsfeld. mem. 2. Nau. c. 18. n. 59. man. & Pet. Nau. cit. c. 4. n. 173. Delrius lib. 5. disquis. sec. 3. Sotus mem. 2. q. 6. concl. 4. Limitanda vero est assertio I. nisi crimen tale sit, quod necessarium, & suapte natura socium requirit, ut sodomia; vel saltem communiter sine socio non committitur: tunc Iudex confessum, vel conuictum interrogare potest de socijs, sicuti docet Gomez 3. resol. c. 12. n. 16. Less. lib. 2. c. 29. n. 162. Si tamen socius criminis omnino occultus sit, neque indicij aut testimonijs alijs conuinci posse videatur, non tenetur Reus confictus de illo testari; imò neque iure potest, secundum Pet. Nauar. lib. 2. c. 4. num. 173.

II. Nisi crimen exceptum sit, videlicet in publicam perniciem tendens, ut haeresis proditio, falsatio monetae, veneficium, latrocinium, de quibus Binsfeld. cit. mem. 2. in princip. quin etiam furtum, licet non de iure, tamen per consuetudinem, sicuti notant Sotus, & Binsfeld. l. cc.

III. Nisi crimen committendum sit in priuata personae perniciem; ut si aliqui coniurauerunt in hominis necem. Verum quia Reus persona vilis, & infamis est; ideo eius confessio, seu testificatio non efficit probationem semper



plena: nisi insuper aliud indicium, vel alterius Rei in tortura consensus accedat; tunc erit hæc sufficiens præsumptio ad capiendum, examinandum, torquendum socium, sicuti notauit Clarus q. 21. n. 8. & q. 22. n. 3. Less. c. 29. dub. 17. n. 161. Præterquam quod fœminis ob sexus fragilitatem non æquè, ac masculis, fides habenda sit; ac proinde trium, vel quatuor consentiens denuntiatio requiratur, vt alius tanquam criminis socius capi & torqueri possit, teste Binsfeld. mem. 2. concl. 6. prob. 5. & videri potest Mascard. de probat. vol. 1. concl. 462. n. 27. Gomez 3. resol. c. 12. n. 18. Quod etiam in praxi obseruatur in processu super crimine veneficij.

9 **QVÆSTIO TERTIA.** An, & quibus casibus Reo suspecto tortura adhiberi possit? Respon. & dico I. In criminibus grauib; ad probationis subsidium, Reo tortura adhiberi potest. Ita habetur in l. 1. ff. l. 1. & toto tit. C. de quæstionibus. Quia alioquin passim scelera grauißima, cum magno Reipubl. detrimento, impune patrari possent ab hominibus callidis, atque audacibus; modò operam darent, vt Testes idonei, aliæque sufficientia criminis documenta remouerentur. Dixi autem, torturam adhiberi posse in delictis grauib; quæ videlicet pœnam corporalem, vel triremium merentur; non item in ijs, quæ pœnam pecuniariam, exilij, &c. sicuti ex communi notat Clarus q. 64. n. 4. Gomez 3. resol. c. 13. n. 2. Less. lib. 2. c. 29. dub. 17. n. 151. Nam tortura ad eliciendam criminis confessionem instituta, non debet esse tanta, vel maior pœna, quàm sit illa, quæ in eiusdem criminis condemnationem inferretur: quamobrem à tortura iniquè alicui delata appellari posse, notat Abb. in c. 1. n. 2. de confessis. Secundò dixi, torturam esse in subsidium probationis: quapropter adhiberi non debet, si Reus legitimè conuictus fuerit; vt de crimine condemnari possit, sicuti colligitur ex l. Diuus, ff. de quæstion. l. quotiens, C. eod. Nisi quod quibusdam locis consuetudo est, vt id fiat ad impediendam maliciosam appellationem, si Reus per Testes plenè conuictus criminis super confiteatur, sicuti Notat Clarus n. 7. Nanar. cit. c. 18. n. 59. Less. n. 152.

Dico II. ad torquendum Reum non quoduis indicium sufficit; sed debet esse graue, quod legitimè, videlicet per duos Testes, probatum, commissi criminis suspicionem, ac veluti præsumptionem Iudici pariat. Ita Antonius de Canario tr. de quæstionib; & torment. mem. 2. Prosper Farinacius in practica criminali, q. 37. n. 3. & 13. Simancæ de Cath. instit. tit. 65. n. 15. & sumitur ex l. 1. princ. ff. de quæstionibus. In specie autem indicia sufficientia ad torturam numerantur à Gomez lib. 3. c. 13. n. 7. & seqq. Claro q. 21. num. 13. & seqq. Less. cit. dub. 17. n. 153. Delrio lib. 5. disquis. magic. f. 3. Videlicet, vnus Testis omni exceptione maior, confessio Rei extra iudicium, fama publica cum alterius indicij adminiculo: nam fama, si sola sit, non probat, sed solum habet se instat accusatoris mouentis Iudicem ad vltiorem informationem capiendam. Alia indicia prætermitto, quia denique committitur res Iudicis prudentis arbitrio, considerata qualitate causæ, personæ, &c. sicuti rectè dixit Clarus q. 64. n. 13. Anton. de Canario cit. mem. 2. n. 8. Franc. Brunus de indicij & quæst. p. 1. q. 3. n. 1. Binsfeld. mem. 2. post 5. concl. Delrius l. c.

10 Dico III. Reus semel competenter tortus; secundum indiciorum grauitatem, iterum torqueri non debet. Quia per torturam toleratam infirmata censetur prius habita indicia: secus est, si nouum criminis indicium postea superueniat, sicuti colligitur ex l. vnus, §. Reus, ff. de quæstion. & notat Gl. marginalis in l. repeti, ff. eod. Ioan. Maior in 4. d. 15. q. 22. dub. 5. Anton. de Canario tract. de quæstion. & tormentis, mem. 6. Ioan. Royas tr. de hæret. assert. 31. n. 298. Gomez c. 13. n. 25. in fine, Less. c. 29. dub. 17. n. 168. Item si Reus crimen, quod in tortura confessus erat, postmodò, cum deposito tor-

mentorum metu in loco iudicij ad ratificationem confessionis suæ denuo interrogatur, illud reuocet, rursus tortura subijci potest, sicuti ex communi docet Clarus q. 21. n. 36. & q. 64. n. 43. Ratio est: Quia retractati confessionis factæ in tortura infirmat torturam; vt perinde sit, ac si nulla præcèsserit; interim indicij seu præsumptionibus prioribus in suo vigore permanentibus. Cæterum, si tertio ita tortus & confessus tertio retractet, denuo non torquendus, sed plerumque absolendus est, sicuti ex communi docent Farinac. q. 31. n. 99. Gomez l. c. n. 27. Delrius lib. 5. f. 9. Less. cit. n. 168. §. aduertetamen, Clarus cit. n. 36. in fine. Si tamen commissi criminis indicia grauißima adsint, vt vehementem præsumptionem pariant, crimen à Reo malitiosè atque obstinatè negari; tunc sapius Iudices, quamuis nullo nouo accedente indicio, torturam adhibere solent.

Illud etiam iudices meminisse debent, quod licet tantò grauiora tormenta Reo inferri possint, quantò maiora contra eum indicia habentur; ordinariè tamen, & nisi grauißima indicia criminis adsint, cauere debent, ne talia tormenta sint, vt moraliter loquendo impossibile sit ea sufferre; ideòque cogant Reum ad confitendum. Cum enim talis confessio quodammodo inuoluntaria censeatur, non potest in iudicio æstimari: ideòque condemnatio sequetur non propter confessionem; sed propter indicia, quæ vt ponimus, sufficientia non sunt ad condemnationem, sicuti præter alios annotauit Anton. de Canario de quæstion. & tormentis, mem. 5. n. 20. Neque enim refert, quod extorta eiusmodi confessio altero die coram iudice & notario ratificari debet; cum enim sciat Reus, similia tormenta sibi inferenda esse, nisi in confessione persistat, non potest ratificatio omnino libera censeretur.

Dico IV. Quædam personæ torqueri non debent; 11 vel ob earum imbecillitatem, videlicet impuberes, l. 1. §. impuberes, ff. ad SC. Syllanianum: quamuis terreri, & virgis castigari possint. Item senes decrepiti, l. si quis in graui, §. ignoscitur, ff. eod. quamquam etiam hi terreri possunt, ostendendo locum tormentorum, &c. Mulier prægnans, ob periculum abortus; cuius tortura differenda, donec vires ex puerperio confirmata sint. Vel ob priuilegium, videlicet vir nobilis, seu ordinis equestris, qui in magna dignitate constitutus est, vt Doctores, & Consiliarij Principum, eorūque liberi: quos omnes ne leuiter quidem torqueri, seu terreri licitum est; præterquam in criminibus exceptis, videlicet hæresis, proditiōnis, læsæ Mæstatis, veneficiorum, sicuti videre est apud Clarum q. 64. n. 19. Gomez c. 13. n. 3. Delrium lib. 5. f. 9. Guid. à Suza, de indicij & tortura, prope finem, Paulum Grillandum de quæstionibus & tortura, q. 6. Binsfeld. de confess. malef. concl. 6. & habetur in l. et si excepta, C. de malef. & mathem. iunct. Gl. ver. demonstrantur.

**QVÆSTIO QVARTA.** Vtrum rata esse debeat confessio Rei, quam Iudex per fictam immunitatis promissionem, aliamue simulationem extorsit? Respondeo, & dico I. Si Reus, intellecta fraude, confessionem non retractet, sed vltro in ea persistat, sciens etiam ius sibi reuocandi competere, secundum talem confessionem damnari potest. Hæc est communis, Couar. 1. resol. c. 2. n. 16. Clari §. fin. q. 55. Menochij de arbitrat. 99. casus 367. Binsfeld. de confess. malef. mem. 2. concl. 7. dub. 3. Delrij lib. 5. disquis. magic. f. 10. conclus. 2. & 3.

Dico II. Si Reus confessionem per mendacium, si- 13 mulationem, dolumue Iudicij extortam, postea retractet; non potest ex ea condemnari. Ita docent Couar. Clarus Menochius, Binsfeld. II. cc. Andr. Fachinaus lib. 9. controuers. c. 61. contra Cinum in l. præfenti, C. de his qui ad ecclesiam confugiunt, Felinum in c. asserte, de his qui ad ecclesiam confugiunt, Felinum in c. asserte, de præsumpt. Si enim examinatio Iudicis iusta & legitima non est, neque confessio rata & iuridica censeretur:



debet: atqui examinatio Iudicis facta per mendacium, simulationem, dolum, iusta & legitima non est: cum Iudicius non competat tali modo confessionem expiscandi. Ergo, &c.

Quare facile soluitur contrariæ sententiæ fundamentum: Iudicem promissione immunitatis, seu fictæ, seu ex animo facta, non potuisse legibus, & Reipublicæ præiudicare. Respondetur enim cum Couar. id dictum verum esse, quatenus de commissio crimine recto iuris tramite constat; non autem quatenus modo illegitimo cognitum est: eiusmodi non iuridicæ cognitionis si nulla ratio habeatur, nihil iuri publico adimitur.

Non desunt tamen, qui Iudici callidas æquiuocationes ad circumueniendum Reum permittunt, eumque dolum bonum appellant, uti videre est apud Delrium cit. loco. Exempla sunt: Iudex promittit Reo, si crimen aperte fateatur, se ipsi de publico, vel suo, quoad viuat, alimenta necessaria præbiturum; insuper nouam domum extrui curaturum; intelligens ligneam fascium, straminumque congeriem, in qua v. g. Saga confessa comburenda sit. Vel promittit Iudex, si Reus crimen fateatur, gratiam se facturum; subintelligendo Reipublicæ, in cuius commodum cedit, si noxij morte puniantur: Vel si crimen Reus fateatur, spondet id profuturum ipsi ad vitam; subintelligendo futuram, post mortem.

Hæc mihi non placent: Primò, quia eiusmodi locutiones, ac promissiones per circumstantias loci, temporis, ac personarum satis determinantur ad significandum eum sensum, quem Reus format; contra Iudicis mentem, ac sententiam: ut proinde non æquiuocationes; sed simulationes, ac mendacia existant, uti dicam lib. seq. tract. 3. c. 13. num. 6. Secundo: Quia Reus, postea re comperta, iustum ac probabilem errorem allegare, prioremque confessionem retractare poterit: dicendo, se crimen confessum fuisse, non omnino sponte, neque quoddam verè illud commiserit; sed quia confessionem utilissimam sibi fore arbitratus fuerit; quippe per quam tum molestiis & vexationibus Iudicis liberandus; tum verò etiam gratiam & munera consecuturus esset. Denique, si eiusmodi callidæ, vel potius fictæ promissiones tolerantur in iudicio, ubi nihil nisi sanctum, iustum, ac sincerum cerni debet; cur non etiam tolerantur in mutuis hominum commerciis, ac pactis? quàm autem id noxium Reipublicæ futurum sit, ut nulla inter homines fides amplius constare possit, quis tam cæcus est, ut non perspiciat?

14 **QVÆSTIO QVINTA.** Quam immunitatem Reo tribuat *Saluus conductus*, siue publica fides, & securitas eundi ad certum locum, & redeundi? Respondeo ex doctrina Ioachim. Mynsing. lib. 1. obseruat. 82. Becano 2. cap. 16. quæst. 6. Saluum conductum duobus modis dari posse; Primò in forma iuris communis; ut Reus contra omnem violentiam, seu vim iniustam defendatur, salua tamen iustitia seu iuris executione, quæ non obstante saluo illo conducto fieri possit. Quomodo Patres Concilij Constantiensis Hieronymo Pragensi saluum conductum dedisse, legimus sess. 6. Secundò, in forma iuris specialis, seu cum derogatione iuris communis; ut quando promittitur securitas contra omnem vim, etiam alioquin iustam, saltem in illa causa, de qua agitur, præstandam. Quomodo Patres Concilij Trident. Germanis omnibus, etiam hæreticis, saluum conductum promississe legimus, post sess. 15. Vide plura de saluo conductu apud Gregor. de Magalottis, to. II. tract. iuris, p. 1. col. 231. Prosperum Farinacium in pract. criminali, quæst. 29.

15 **QVÆSTIO SEXTA.** Reus criminis, à quo Iudice iudicandus, & puniendus sit? Est enim alius Iudex originis, aut domicilij; alius Iudex delicti, sicuti constat ex iis quæ dixi lib. 1. tr. 4. cap. 12. num. 7. Respondeo: Reus comprehensus ordinariè puniri potest, ac debet

in loco, ubi deliquit. Ita habetur in l. si cui, §. penult. ff. de accusat. Authen. ut nulli Iudicum, §. si quis verò comprehensorum, & ex communi docent Couaruias in pract. qq. cap. 11. numero 3. Clarus §. practica criminalis, quæst. 38. num. 19.

Corollarium. Si Reus hîc delinquens, aliò fugiat, & capiatur, remitti debet ad Iudicem delicti: quod intellige, si vterque Iudex sit sub eodem principatu. Tunc enim vnus Iudex alterum iuuare debet, ne crimina in regno impunita maneant, maiorque peccantibus licentia fiat. Sin verò Iudices sint sub diuersis Principibus, tunc Iudex loci, in quo Reus versatur, cogi non potest ad Reum capiendum, aut captum transmittendum: Igitur Reus securè ibi morabitur, nisi Iudex loci rogatus à Iudice, delicti, vltro eius petitioni annuere velit, sicuti videre licet apud Clarum nu. 20. Couar. num. 9.

Dixi autem in assertione *ordinariè*: quia limitationes aliquæ sunt: I. Quòd aliter obseruatur secundum Germaniæ consuetudinem, ab Imperatore permissam, & tacitè approbatam, apud Andr. Gaill. lib. 1. de pace publica, cap. 16. n. 30. ut nulla remissio ad Iudicem delicti fiat; sed in loco captiuitatis Reus iudicium sortiatur, & pœnis afficiatur, ob delicta alibi in Imperio commissa: præterquam, si Iudex captiuitatis, ob ius amicitie & vicinitatis, sponte Reum remittere velit ad Iudicem delicti, aut domicilij.

II. Quibusdam regionibus in praxi obseruatur doctrina Bartoli in l. si dominum, ff. de furtis; ut si fur cum rebus substractis, & aliò delatis deprehendatur, inibi capi, & puniri possit: Quia rem furtiuam detinens continè delinquere censetur. de quo vide Clarum n. 16.

III. Si Reus, qui alibi deliquit, postea reperiatur, & capiatur in loco originis, aut domicilij, ibidem iudicari, & puniri potest, sicuti colligitur ex l. i. C. ubi de crimine agi oportet, & videri potest Couar. cit. c. 11. n. 6. Farinac. lib. 1. ut. de inquisit. q. 7. n. 19. & 24. Andr. Fachin. lib. 9. controuerf. iuris, cap. 20. & 21. Bene autem monet Andr. Gaill. lib. 2. obseruat. 36. n. 6. & seqq. Discrimen esse, saltem considerata Germaniæ consuetudine, inter Iudicem solius originis, & Iudicem domicilij: quòd 16 potentius est ius domicilij, quàm ius originis, ideoque Iudex domicilij etiam in absentes ciues, seu incolas iurisdictionem obtineat, eosque citare possit. At verò Iudex originis iurisdictionem non habet in originarios, qui alibi domicilium obtinent: nisi dum in loco suæ originis commorantur: in quo æquiparatur Iudici delicti, & Iudici contractus: siquidem neque hi iurisdictionem habent in Reum, nisi inibi reperiatur, c. 1. §. contrahentes, iun. Gl. magna, de foro compet. in 6.

## §. Vnicus.

## DE SAGIS.

## SVMMARIVM.

- 17 Plures femine, quàm viri veneficiis obstrictæ sunt.
- 18 Sagæ ad veram penitentiam convertere difficile; sed non impossibile est.
- 19 Confessarius agendo cum sagis à Iudice captis, aut condemnatis, magna prudentia uti debet.
- 20 Sagæ tenentur eiusdem criminis reas, quas nouerunt, Iudici prodere.
- 21 Si testis, aut denunciator testimonium suum renocet, probabilem erroris sui rationem afferens, audiri debet.
- 22 Iudex plerumque æstimare non debet reuocationem denuntiationis, post latam sententiam condemnatoriam denunciantis; etsi is moris proximus renocet.
- 23 Confessarius frustra plerumque laborabit, si post Sagæ supplicium Iudici significet, eam reuocasse denuntiationes.
- 24 Qui sibi crimen morte dignum falso affinxit, retractare tenetur, si spes sit mortis supplicium ea ratione effugiturum, quamquam opposita sententia ob auctoritatem Doctorum, in praxi probabilis est.



- 25 *Etsi Confessarius ex sacramentali Confessione colligat, mulierem metu tormentorum confessam, re ipsa innocentem esse, tamen iudicem de ea re monere non expedit.*
- 26 *Index mulieres de maleficio suspectas capere, & torquere debet secundum indiciorum gravitatem.*
- 27 *In criminibus exceptis, etsi Reus confessus non sit, damnari potest propter multiplicatas denuntiationes personarum infamium; modo sint testes eiusdem criminis particularis.*
- 28 *Consuetudo apud Christianos est, ut Reus ad ignem damnatus non lenta morte crucietur, nisi impenitentes decedant.*
- 29 *Crimina morte extinguuntur, nisi excepta sint, ut hæresis, veneficij, &c.*
- 30 *Saga in carcere prius mortua, quam crimen confessa, vel de eo convicta sit, si nihil aliud obstat, in loco sacro sepeliri debet.*
- 31 *Quæ de crimine convictæ non fuerunt, nec confesse, non debent post mortem publica sententia infamari.*
- 32 *Sacra Eucharistia, & sacra sepultura Sagis negari non potest, si iudicio adhuc pendente, in carcere decedant.*
- 33 *Sacra Eucharistia ad Sagas, & alias eiusmodi personas cum minore sollemnitate deferenda est.*

**QVÆSTIO PRIMA.** Cur plures fœminæ, quam viri cum Diabolo paciscantur, & maleficia dicant? Respondeo: Quia mulieres, ob defectum iudicij, & experientia, citius credunt, & facilius decipiuntur, quam viri: sunt magis curiosæ, & rerum novarum appetentes; ad libidinem & luxum proniores; magis item pusillanimes, atque infirmæ, ut animi mœstitiam, aut rancorem agrè nimis ferentes, facilius quodvis, quantumvis impium Dæmonis solatium, auxiliūque admittant. Ita Binsfeld. in rubr. C. de Maleficiis & Mathematicis. notab. 8. Iacob. Simanca de Cath. instit. tit. 37. num. 3. Paulus Grillandus tract. de sortilegiis, quæst. 7. num. 31.

**QVÆSTIO SECUNDA.** Quomodo Confessarius cum Sagis vltro ad sacram Confessionem accedentibus se gerere debeat? Respondeo: Simul et ad confessionem veniens, ob aliqua indicia, vel asserta eius Confessario de maleficiis suspecta sit; proponat illi ex vna parte periculum animæ, in quo versatur, nisi rite confiteatur; ex altera verò parte obligationem maximam sigilli sacramentalis, ut mors potius Confessario perferenda sit, quam peccatum quodecunque pœnitentis directè, vel indirectè significare ei liceat: ideòque quæ coram Confessario tanquam Dei Vicario peccata facta fuerit, secretissima fore, perinde ac si nulli hominum dicta essent. Quod si Confessarij exhortatione permota confiteatur, se sagam esse; plurimum expedit, ut diligenter, & exactè exquirat quo tempore, qua occasione in tale crimen lapsa fuerit: cum enim mulieres tales in dictis suis inconstantes esse soleant, enarratis circumstantiis convinci deinde poterunt, ut quod semel dilucidè confessæ fuerant, retractare facili non possint. Postea examinet confessam de modo, & qualitate superstitionis; vitium ex animo Fidei Christianæ renuntiavit; Diabolum adoravit; Falsa de Deo, & æternitate senserit: an rebus sacris abusa sit? hominibus nocumentum intulerit in bonis fortunæ, aut corpore: num etiam læserit personas valde coniunctas, ut maritum, parentes, liberos; item an viros Principes, Clericos, Religiosos: idque propter censuram excommunicationis, &c. Vtrum alios seduxerit, & an hi in tali crimine persistant: quia tenetur illos ad viam veritatis reducere; aut si conuerti nolint, Magistratui deferre, sicuti docet Martinus Delrius lib. 6. disquisit. Magic. sect. 3. §. quoad interrogatoria. Quatamen denuntiandi obligatione non astringetur, si exinde probabile periculum imminet, in suspicionem, atque capturam veniendi.

Sed quia difficile, quamvis non impossibile, est, è potestate Diaboli eripere eos, quos sibi deuinxit inito pacto, magnam operam Confessarius adhibere debet: I. Ut agnosceret incipiant hostis infestissimi mendacia, fraudes, & falsa promissa. II. Ut abiurato diabolo, fidè, ac spem in Deum concipiant, qui peccatores omnes ad se inuitat, & reuerti volentes recipit: Eximenda enim

ipsis est persuasio, quam multæ habere solent, propter pactum initum, à Dæmone liberati non posse. qua de re Barth. Spineus de strigibus, q. 32. III. Frequentes preces, ut litanie Sanctorum, & variæ Collectæ; quæ si vel ab ipso pœnitente, vel alio coram ipso, spiritu fidei feruente recitentur, maximam vim habent ad Diabolum repellendum. IV. Crucis signum, sacræ imagines, & reliquæ Sanctorum, aqua, agni Dei, & similia benedicta, de quibus Less. lib. 2. c. 44. num. 5. V. Frequens peccatorum confessio, facta apud eundem Confessarium, statum hominis cognitum habentis; ut congruas interrogationes formare, & apta remedia præscribere possit. VI. Fidei Catholica sæpius repetita professio, frequens recitatio symboli Apostolici.

**QVÆSTIO TERTIA.** Quomodo Confessarius se gerere debeat cum Sagis à Iudice captis, vel condemnatis? Respondeo: De hac re tenenda esse, quæ sequuntur: I. Consultum non est, ut Sagæ captæ ante iudiciale examen ad sacram Confessionem admittantur: quia spe liberationis consequendæ, innocentiam tunc suam prædicare solent; & vix adigi possunt, ut crimen confiteantur, dum timent sibi à delatione. Quamobrem consuetudo in plerisque tribunalibus viget, non admittendi Confessarium ad Reos, priusquam omni examine expedito, noxij iudicati sint. Quamvis, nisi consuetudo prohibeat, nihil obesse videtur, quominus Confessarius prudens, etiam ante iudiciale examen, Sagas, aliosve Reos suspectos accedat, ad contritionem de peccatis suis disponat; ad patientiam, & obedientiam Magistratui debitam seridè cohortetur.

II. Cauere debet, ne coram Reo reprehendat, aut in dubium reuocet modum procedendi, aut sententiam Iudicis: igitur querimonia, præsertim à fœminis plerumque mendacibus, de iniuria ipsis facta admittendæ haud sunt: cum officium Confessarij non sit talia iudicare; sed Reos ad veram pœnitentiam disponere, ad patientiam, & mortem, si ita opus sit, fortiter perferendam hortari, eorundemque Confessiones audire.

III. Expedit, Confessarium vtcunque cognita habere, quæ in iudicio acta fuerunt; quæ indicia, & probationes deprehensæ, quæ mira acciderunt per aquam benedictam, agnos Dei, &c. ut si postea per inconstantiam suam coram Confessario crimen negent, refelli possint, atque conuinci, addita exhortatione, ut in vitæ suæ termino syncerè agant coram Deo, eiusque ministro Sacerdote, neque linant se à Dæmone decipi, atque ad æternas pœnas deduci. Ita enim fiet, ut si Sagæ virum prudentem, ac grauem nanciscantur, qui non facile earum excusationibus & querelis moueatur, denique ad cor redeant, atque ad Deum conuertantur.

IV. Si Saga Confessario fateatur crimen, statim illam examinet de modis & circumstantiis, de quibus dixi quæst. præced. §. Quod si Confessarij. Postea cohortetur, & disponat illam ad veram pœnitentiam, proposita magna Dei misericordia: per quam id iam confecta sit, ut facili ex faucibus Dæmonum eripi possit; alioquin æternum cum ipsis arsura: animetur ad fortiter subeundum supplicia corporis breui tempore duratura; quibus satisfacere poterit pro peccatis suis, atque diu duraturas alterius vitæ pœnas redimere. Sin autem Saga in iudicio confessa, apud Confessarium constanter dicat se innocentem esse, & tormentorum metu confessionem exortam: si eam verum dicere, consideratis circumstantiis, arbitretur: (præsertim cum in foro interno confessionis credendum sit Reo, si cuti dicenti contra se, ita & dicenti pro se) hoc casu consolari eam potest: etiam Martyres passos fuisse immeritos: pœnam hanc fore illi ad meritum, atque vberem satisfactionem aliorum peccatorum suorum: Interim verò scire debeat, Deum non decipi, ideòque caueat, ne si innocentem se faciat contra scientiam,



& voluntatem DEI, cum Diabolo perpetuum luat.

20 V. Sagam de crimine suo confessam examinet Confessarius, utrum consortes, siue eiusdem criminis reas, quas nouit, Iudici prodiderit: quia ad id obligatur; ut perniciose flagitia à Magistratu impediri, atque extirpari possint. Sin verò Saga constanter asseueret, se per inuidiam, aut ob tormentorum metum innocentes denuntiasse, vrgere eam debet Confessarius, exposita grauissima obligatione, ut falsam denuntiationem coram Iudice reuocet; etiamsi timeat, quòd ob variationem & inconstantiam noua tormenta sustinere cogetur, sicuti constat ex doctrina Pet. Nauar. lib. 2. cap. 3. num. 251. Modò spes aliqua sit, Iudicem eiusmodi reuocationi, contra priorem iuratam iudicalem depositionem, fidem aliquam habiturum. Ordinariè enim Iudices stare solent confessione, aut denuntiatione criminis semel iudicialiter facta, licet reuocatio eius postea interiecto temporis intervallo fiat, sicuti docet Abb. in c. sicut, num. 1. de testib. Couar. 2. resol. c. 73. Iacob. Menoch. de arbitr. Iudicum quæstion. casu 108. Binsfeld. memb. 2. conclus. 5. §. hæc quæstio; excepto, si deponens de crimine, postea errorem suum alleget, eius probabilem rationem afferens, sicuti docet Abb. c. præterea, num. 4. de testib. cogendis, Couar. n. 8. Menoch. nu. 7. Deinde rectè admonet Delrius lib. 5. l. 5. in fine, post Couar. cit. n. 8. Si ex manifestis indiciis appareat testem, aut denuntiatorem, non ex leuitate & perturbatione animi; non prece, aut suasionem testimonium suum corrigere, aut reuocare, etiam in crimine hæresis, & maleficij à Iudice audiendum esse: quæ tota doctrina colligi potest ex cit. cap. sicut.

Dubitant autem Doctores, utrum Iudex attendere, & æstimare debeat reuocationem denuntiationis, post latam sententiam condemnatoriam denuntiantis, quando is supplicio proximus ait, innocentem personam esse, quam in iudicio falsò denuntiatur? Pro parte affirmatiua quæstionis est; Quòd instante morte nemo salutis sue immemor censetur, sicuti docent Doctores in l. ult. Cod. ad l. Iuliam repetundarum. Ergo magna presumptio est, reuocationem veram esse, per quam proinde elidatur denuntiatio.

22 Sed negatiuam partem tenent Binsfeld. de confess. malefic. memb. 2. conclus. 5. §. Videtur quòd elidat. Martinus Delrius lib. 5. disquisit. magic. sect. 5. num. 5. & alij communiter. Quia denuntiatio in tormentis facta, ac postea coram Iudice, & Notario ratificata, præsumptionem veritatis inducit. Ergo non eliditur per subsequenter reuocationem extra iudicalem, & non solemnem. Ad rationem in oppositum respondetur; Denuntiationem, aut reuocationem hominis morituri (præsertim si animo perturbato sit, sicuti plerumque esse solent, qui ad supplicium ducuntur) non efficere præsumptionem certam, sicuti colligitur ex l. si quis in graui, §. 1. ff. ad S. C. Syllanianum, ubi dicitur; Quòd vulnerato non creditur, si mox decessurus dicat, se à Titio percussum fuisse; nisi id aliter probari possit.

23 Nihilominus, si Saga constanter Confessario ingerrat, quòd personam innocentem denuntiari; permittere illi, imò suadere poterit, ut publicè coram populo retractet: tum quia tali reuocatione conscientiam criminis commissi pacatiorem reddet; tum quia negari non potest, talem reuocationem apertè coram Deo teste factam à morituro, aliquatenus debilitare priorem denuntiationem; ut si alia etiam indicia commissæ antea falsitatis accedant, contra denuntiatam personam procedi non debeat.

Ex dictis porrò colligitur; Quòd Confessarius operam suam frustra locabit, imò querimoniam, aut scandali occasionem præbebit, si post mulieris supplicium significet Iudici, eam in extremis reuocasse denuntiationes: cum Iudices eiusmodi reuocationem non acceptent, plus

fidei habentes iudiciali antea legitimæ factæ denuntiationi, quippe per quam quodammodo ius ipsis quasi-tum est; quàm extraiudiciali, eique non probatæ reuocationi.

His adde, quòd Confessarius sigillum sacramentale violaret, si non accepta prius licentia, aut non declarata voluntate penitentis, Iudici, vel alteri cuiunque significaret innocentiam personæ denuntiatæ; eo ipso significans iniuriam personæ denuntiantis. Quare si in aliquo casu Confessarius arbitretur, consultum fore, ut Iudicem de hac re admoneat, quia alia etiam indicia innocentiam habentur; roget mulierem, extra confessionem sibi dicat, ut hoc ipsum Iudici significare deinde possit; quippe, qui persuasum sibi habere debet, Confessarium nihil omnino eorum quæ in confessione sacramentali accepit, siue pro Reo, siue contra Reum sint, iudicare.

QVÆSTIO QVARTA. Si fœmina coram Confessario constanter neget, se Sagam esse, dicatque metu grauium tormentorum se maleficij crimen sibi in iudicio affinxisse, quid agendum? Respondeo, & dico I. Si talis persona alia peccata sua rectè confiteri, ideòque syncerè agere videatur, à Confessario absolui debet.

Dico II. Confessarius deinde hortari debet mulierem, ut considerato dedecore, quod sibi, ac familiæ suæ inferet, nec non mortis malo; cuius sibi ipsi causa existit, confessionem suam coram Iudice constanter retractet: dummodo spes aliqua sit, quòd Iudex ante sententiam latam Reum retractare volentem auditus, aut fidem aliquam habiturus sit. Multi enim Iudices stare solent confessione semel iudicialiter extrametum tormentorum facta, aut confirmata; nisi probabilissima argumenta commissæ falsitatis appareant: Tunc autem inanis & frustranea erit reuocatio, quæ nihil profutura putatur, sicut bene monet Iacob. Simanca de Cathol. instit. tit. 13. num. 28.

Dico III. Si mulier, vel quicumque alius Reus, qui falsa confessione crimen sibi imposuit, ob quod mortis supplicio afficiendus erit, persuaderi sibi non sinat, ut retractet: quia timet, grauissima, quanta antea se passum tormenta recordatur, iterum inferenda fore; ideòque mori mauult, quàm ea sustinere; hunc Confessarius denique vrgere non debet, ad retractationem cum talium tormentorum periculo: quia Reus conformare se potest sententiæ probabili Doctorum negantium, in hoc casu obligationem retractandi sub peccato mortali incumbere: hi sunt Angelus vër. detractio, §. 7. Sotus lib. 5. q. 10. a. 2. Toler. lib. 5. cap. 66. Less. lib. 2. c. 11. dub. 7. assert. 5. Sa ver. infamare. Quamquam contraria sententia speculatiuè vera mihi videtur, quæ est Couar. 1. resol. c. 2. n. 8. Nau. c. 18. n. 29. Mol. tract. 4. disp. 37. conclus. 15. Qui enim causam suæ mortis posuit, tenetur eam tollere, si possit; alioquin sui ipsius occisor erit: Sed Reus, qui sibi crimen falsò affinxit, ob quod morte puniendus est, is causam suæ occisionis posuit: Ergo tenetur eam tollere, retractando crimen falsò sibi impositum. Minor est clara: Maior declaratur simili: Si enim aliquis ignem posuit, ex quo intelligit oriturum esse incendium, nisi extinguat ignem, si possit; tanquam incendiarius damnabitur. Confirmatur: Si enim is, qui crimen falsò affinxit alteri, ob quod supplicio extremo afficietur, omnium sententiâ, homicida est; cur non etiam, qui sibi affinxit? cum neque suæ, neque alienæ vitæ dominus existat.

QVÆSTIO QVINTA. Si Confessarius ex sacramentali confessione prospicere se arbitretur, mulierem crimen metu tormentorum confessam, re vera innocentem esse, utrum Iudicem, tanquam internuntius, & aduocatus hominis confessi, de eare monere debeat? Respondeo: Id consultum non esse. I. Quia, ut suprà dictum, Iudex huic retractationi extraiudiciali fidem nul-



iam habebit, post publicam Rei confessionem, aut conuictionem. II. Quia si sciatur, Confessarium intercedere pro Reis, quos ipse innocentes esse ex sacramentali confessione suspicatur; alij verò nocentes exinde occasionem accipient, facinora sua Confessarium callidè celandi, non sine graui sacrilegio, & animarum suarum perniciè. III. Quia si Confessarius plures Sagas, vel alios supplicij Reos audire solitus, de vnus, non item aliorum innocentia contestetur; hoc ipso aliorum nocentiam tacitè confirmare videtur, sicuti in simili dicam lib. 5. tract. 6. c. 14. ver. Quintò.

26. **QVÆSTIO SEXTA.** Quodnam sit Iudicis officium in processu contra maleficas? Respondeo I. Vt nulla capiatur, & ad iudicarium processum trahatur, nisi adsit verisimile criminis commissi indicium; & non sola delatio personarum infamium; siue sola infamia ab hominibus vilibus, & improbis orta, siue probabili causa, aut coniectura, sicuti videre est apud Farinac. lib. 1. tit. 5. q. 47. II. Vt secundum numerum delationum, & grauitatem indiciorum, deueniat ad torturam; neque seuerius, aut saepius Reum torqueat, quàm indicia exigant. Dicunt tamen Doctores, quòd in crimine hæresis (cui propter grauitatem, crimen maleficij æquiparatur, teste Binsfeld. memb. 2. conclus. 5. §. hæc quæstio, Delrio lib. 5. sect. 5. prope finem) Iudices prouiores esse soleant ad torturam; cum sit crimen valde perniciosum, suapte natura occultum, ac plena probatione plerumq; destitutum, arg. l. Diuus, ff. de quæstion. & ex communi testatur Ioannes Royas tract. de hæret. assert. 31. n. 296. Addunt aliqui, dicta crimina adeò detestabilia, & perniciose esse, vt quamuis interdum accidat quibusdam prauis ex denuntiantium malitia iniuriam fieri, potius id permittendum sit; quàm vt bonum publicum per Magistratus dissimulationem periclitetur. Arbitror tamen dicendum esse, etiam in hoc crimine maleficij, ad instituendum processum specialem contra personam quamcunque, grauius indicia requiri; grauiora autem, si persona sit magni nominis, familiæ, aut dignitatis. Ad torturam verò suspecto inferendam generalis regula est, ex l. 1. ff. de quæstionibus: Quòd talia indicia opus sint, quibus animus Iudicis planè inclinetur ad existimandum, hominem noxium esse: vt iam nihil aliud deesse videatur, quàm ipsius Rei confessio, sicuti bene explicat Mart. Delrius lib. 5. disquis. Magic. sect. 3. §. ad assumendas.

Controuersia autem inter Doctores est; Vtrum Reus de maleficio condemnari possit mortis pœna, propter multiplicatas personarum infamium denuntiationes, etsi ipsemet crimen confessus non sit? Affirmant Binsfeld. de confess. malefic. memb. 2. conclus. 7. Gomez 3. resolut. c. 12. num. 18. & alij plerique, contra Prosperum Farinacium quæst. 43. num. 39. 62. Martinum Delrium lib. 5. sect. 5. Ratio est: Quia licet depositio seu testimonium personæ infamis minus ponderis habeat, tamen indicium aliquod facit; tantòque maius, quantò plurium infamium personarum depositiones concurrunt & consentiunt. Ergo fieri potest, tot personas, v.g. duodecim, aut quindecim Sagas de proprio crimine confessas, aliam vt sociam perseueranter denuntiare, vt exinde oriatur indicium moraliter certum seu indubitatum, quod plena probationi in criminibus exceptis, suapte natura occultis, æquivalere debet.

Hæc sententia vera est, per se loquendo, & secundum eam in praxi procedendum est in hæresis crimine. Verum quod attinet ad crimen sagarum seu maleficarum, alia difficultas non modica se offert. Nam, vt testimonia, seu depositiones plurium ad condemnationem hominis non confessi sufficiant, debent ij esse testes, id est, testificari de eodem facto particulari, sicuti supra ex communi docui. Atqui existimo, vix vnquam accidere, vt decem, aut duodecim Sage in eandem perso-

nam denuntiando consentientes, de eodem particulari facto contestentur. Aut enim confessæ, & de sociis interrogatæ id solùm dicunt, Titiam quoque maleficam esse: cuiusmodi tamen denuntiationes, nisi particularium factorum indiciis specificentur, nihil aliud generare possunt, quàm infamiam commissi criminis; quæ si sola sit, parùm probat. Accedit hoc loco, quòd maleficæ interrogatæ de sociis interdum aliquas prodant; non quia eas verè tales esse sciunt, sed quia propter eandem in hoc genere infamiam, vel antecedentem capturam, tales esse suspicantur. Sin verò vltèrius examinatæ specialia facta denuntient, vix accidet: vt multæ in eodem particulari consentiant; sed vna dicet, se ante tres annos; altera se ante duos annos Titiam in conuentu Sagarum, ac Dæmonum vidisse; tertia, se eandem sociam habuisse in creanda tempestate; quarta se sociam habuisse in alio magiæ genere. Cuiusmodi denuntiationes infamium personarum, quantumuis multiplicatas, si solæ sint, & non aliis grauioribus indiciis, aut testimoniis confirmatæ, arbitror ad condemnatoriam sententiam haud sufficere.

**QVÆSTIO SEPTIMA.** Vtrum condemnati ad ignem vini comburendi, an prius strangulandi sint: Resp. ex doctrina Couar. 2. resol. c. 10. num. 9. Iulij Clari §. fin. q. 99. num. 7. Binsfeld. cir. memb. 2. conclus. 7. dub. 4. & dico I. Si lex ob criminis atrocitatem iubeat Reum igne comburi, intelligitur, vt viuus comburatur: Consequenter Iudex id legis præscriptum exequi debet; nisi sit supremus, qui in lege dispensare possit; vel nisi ob circumstantias, epikeia dicter, legis rigorem in casu particulari mitigandum esse: qua de re vide Prosp. Farinac. in pract. criminali q. 17. n. 5.

Dico II. Consuetudo apud Christianos viget, vt Rei ad ignem damnati non lenta morte, absque omni subsidio, crucientur; ne in desperationem, aliudve graue peccatum incidant, atque impœnitentes decedant: sed quibusdam locis pectori illorum puluis tormentarius appenditur, cuius concussione extinguantur. Excipe: Nisi impœnitentes, & in crimine pertinaces perseuerent hæretici, aut malefici; tum vini, absque subsidio, non immeritò cremantur: cum cesset ratio; cur pœna legibus decreta mitigari debeat.

**QVÆSTIO OCTAUA.** An, & quatenus Sage, si in carcere moriantur, de crimine infamari, aut damnari possint? Respondeo, & dico I. Licet ordinariè crimina, eorumque pœnæ morte extinguantur, sicuti habetur l. 1. & 2. C. si Reus, vel Accusator mortuus sit, & l. Lucius, ff. de iure fisci; tamen id locum non habet in criminibus exceptis, cuiusmodi est v. g. crimen desertæ militiæ, l. desertorum, C. de re militari, lib. 12. Crimen læsæ Maiestatis, l. vlt. C. ad l. Iuliam Maiest. Crimen hæresis, l. Manichæos, Cod. de hæreticis. Crimen apostasiæ, l. hi qui, Cod. de apostatis. Crimen veneficij, seu maleficij, quippe quod secundum praxin forensi, hæresi æquiparatur. In eiusmodi, inquam, Reus conuictus, aut antea confessus, etiam post mortem damnari, aut bona eius confiscari possunt, sicuti docet Gl. in cit. l. 1. C. si Reus, vel Accusator, Gomez 3. resolut. c. 1. n. 8. Clarus cit. §. fin. q. 51. n. 13. Martinus Delrius lib. 5. sect. 19. Quamobrem quibusdam locis consuetudo est, vt tali casu Sage, si in carcere, post iuridicam criminis confessionem, aut conuictionem, mortuæ sint; publico loco crementur. Idemque in aliis grauissimis criminibus puta hæresis, læsæ Maiestatis, sodomix, latrocinij factitari solitum esse, vt cadaver hominis in tali crimine notoriè deprehenso, conuicti, aut confessi, post eius mortem cremetur, aut furca suspendatur, testis est Gomez cit. c. 1. n. 81. Clarus n. 15.

Dico II. Si Sage in carcere moriatur, antequam crimen confessæ, vel de eo conuicta est (nisi aliud obster) in sacro loco sepeliri debet: tantùm abest, vt corpus eius



cremari, aut memoria seu fama eius publicè damnari possit. Ita ex communi Delrius loc. cit. Excipe I. Nisi Reus in carcere sibi ipsi mortem consciverit, tunc corpus eius igne comburi, vel furca suspendi iure potest: cum censeatur crimen, tali pœna (vt ponimus) dignum, ipso facto confiteri, sicut docet Gomez cit. c. 1. num. 79. Couarruu. 2. resolut. c. 2. Delrius cit. c. 19. & videri potest Menoch. de arbitr. qq. casu 285. Sed etsi Saga v. g. sibi ipsi necem adferens, ante mortem de crimine doceat, confiteatur, imò & Eucharistia sacramentum accipiat, nihilominus Iudex tribunalis sui consuetudinem sequi potest, vt eius, tanquam de crimine suo confessæ, cadauer cremetur, memoria damnetur, bona confiscentur: cum pœnitentia illa sacramentalis foro externo nihil præiudicij adferre soleat.

Excipe II. Iudex permittens corpus sepulturæ tradi, tamen protestari poterit, quòd litem contra maleficum cœptam prosequi velit, citatis ad defensionem ijs quorum interest, sicuti & in hæresis crimine seruatur, teste Delrio l. c. Verùm hoc ius agendi contra defunctum, quinquennij tantum spatio durat, secundum civile ius, sicuti colligitur ex l. si quis defunctum, Cod. de apostatis, & docet Gloss. recepta in l. Manichæos, Cod. de hæreticis, ver. subire, Clarus q. 51. num. 14. Gomez n. 81. In foro autem canonico quid obseruandum sit, videre est in c. 2. de præscript. in 6.

Corollarium. Reprehendenda est praxis quorundam Iudicum, qui in promulgata sententia Sagæ ad mortem damnatæ, aliam extra, aut intra carcerem defunctam interdum nominant; quòd v. g. fuerit sociæ, aut magistra artis magicæ: cum tamen de hoc crimine conuicta non fuerit, nec confessæ. Quare iniquum esse videtur, talem publicam sententiam veluti damnatam, infamare. Si tamen vehementissima, & quasi indubitata indicia habeantur, vt si quinque, aut sex Sagæ cum debitis circumstantiis ac coniecturis, constanter asseuerarent de aliquâ defuncta, quòd fuisset magistra in hoc genere magicæ; tolerari potest consuetudo, vt in promulgatione nominetur, si de hoc crimine iam antè publicè infamata fuerit.

QVÆSTIO NONA. An S. Eucharistia Sagis in carcerem morituris ministrari debeat? Non loquor de ijs, quæ ad supplicium mortis ducendæ sunt, quibus (sicuti & alijs Reis damnatis) sacrum viaticum si pœnitentes, & confessæ sint, negari non posse, dicam lib. 5. tract. 4. c. 6. num. 8. & videri potest Binsfeld. memb. 2. conclus. 7. dubius 5. Ad propositam autem quæstionem respondeo, & dico I. Si mulier de veneficiis valde suspecta, crimen non confiteatur (siue torta sit, siue non torta propter corporis infirmitatem, fœtum in vtero, &c.) sacra Eucharistia priuari non potest; si petat, & sacramentaliter confessæ sit. Est communis, & probatur ex regula canonica: Cui sacramentum reconciliationis seu pœnitentiæ datur, neque viaticum negandum est. Atque extendi debet assertio I. vt locum etiam habeat, etsi mulier crimen in tortura confessæ sit; sed postea in publico iudicio reuocârît: quia confessio in tortura, nisi postea ratificetur, non censeatur esse alicuius momenti. II. Etsi mulier coram Iudice, & Notario extra torturam crimen confessæ sit, postea tamen reuocârît, allatis indicijis falsitatis, ob quæ Iudex, propter variationem & inconstantiam, ad noua tormenta deuenerit; si ea mulier constanter pertulit, censeatur expurgasse priorem confessionem. Quare si postea in dicta retractatione, seu contestatione innocentia perseveret, non debet in mortis periculo constituta sacramentis priuari. Neque his obstat, in quibusdam tribunalibus consuetudinem esse, vt confessio semel facta non nisi per tres torturas purgetur: nam, vt taceam, hanc praxin in conformem non esse, quia tortura expurgat antecedentes criminis præsumptiones, sicuti ex communi Farinacius q. 4. n.

26. & q. 40. n. 2. Delrius lib. 5. f. 9. §. cæterum: saltem illa extendi non debet ad sacramentorum subtractionem. Etenim sacramenta morituro negari non possunt, nisi constet, eum esse in statu peccati mortalis: de tali autem muliere, quæ crimen semel confessæ, postea retractauit, non constat esse in statu mortalis peccati, videlicet falsæ, & pertinacis reuocationis. Alioquin enim Iudex non debuisset eam torturæ subijcere: cum tortura adhibenda sit tantum in causa dubia ad cognoscendam veritatem.

Dico II. Etsi mulier de crimine confessæ, vel secundum præsumptionem fori externi conuicta sit; si tamen coram Confessario, post seriam admonitionem, constanter neget, fides ei habenda est in foro conscientia; ideòque à peccatis absoluenda, & sacro viatico ante diem supplicij munienda est, sicuti constat ex ijs, quæ supra dixi q. 3. Data opera dixi, *Coram Confessario*, videl. in secreto: si enim post Confessionem sacramentalem palàm dixit, se innocentem esse; Communio illi neganda est, propter scandalum: quia publicè præsumitur mendax, pertinax, atque impœnitens.

His quædam addenda sunt: Primum. Quod dixi de sacro viatico, non esse denegandum mulieribus, si iudicio adhuc pendente in carcere decessuræ putentur; idem ferme sentiendum de sacra sepultura, non esse negandam decedentibus, si de crimine, neque sufficienter conuictæ, neque confessæ fuerint. Ratio est: Quia consuetudo illa denegandi sepulturam maleficis, alijsve Reis, licet ante mortem sacramentis muniti fuerint; locum tantum habet in damnatis, vel quorum memoria etiam post mortem damnari potest: horum autem, qui crimen nec confessi, neque de eo sufficienter conuicti sunt, memoria damnari non potest. Ergo non debent sacra sepultura priuari. Cæterum, si contra mulierem, crimen maleficij confiteri recusantem, vehementissima atque indubitata indicia adsint, improbari non potest praxis, vt ipsi mortuæ, propter violentam præsumptionem criminis, sacra sepultura denegetur. Quamquam eiusmodi homini sacramentaliter confessæ sacrum viaticum negare non oportet: quia indicia illa & præsumptiones fori externi transferri non debent ad internum conscientia examen, quod Iudici spirituali, seu Confessario committitur.

Alterum. Si sacra Eucharistia ad Sagas, & alias eiusmodi personas infames deferenda sit, cum minore id solemnitate fieri conuenit; ideòque pulsus campanæ per plateas, & magnus comitatus omitti potest. Neque tamen etiam omnino clam S. Eucharistia deferenda est; perinde, ac si id indecens sit, ideòque nemo scire debeat. Simili ratione dicendum in casibus, quibus Sagæ, vel similes Rei in carcere decedentes, vel ultimo supplicio affecti sacra sepulturæ tradi possunt; non esse id agendum magna cum solemnitate, & cum publicis exequijs; neque tamen etiam omnino clanculum atque furtiuè; sed cum cæremonijs saltem præcipuis, & quasi substantialibus, quæ in Rituali præscriptæ sunt. Interim pietatis opus exercent sanguine iuncti, & amici, si pro condemnatis, & supplicio affectis priuatim orent, sacrificia offerant, vel offerri curent; modò non constet, aut vehemens præsumptio sit, impœnitentes decessisse.

## CAP. VI.

## De appellatione.

## SUMMARIUM.

- 1 Appellatio tanquam remedium innocentia, non ad defensionem iniquitatis institutum est.
- 2 Ab arbitris appellari non potest, si partium consensu electi fuerint; neque à summo Principe.
- 3 Duplex est appellatio; iudicialis, & extrajudicialis.
- 4 Appellatio intra decem dies à lata sententia, vel alio gravamine fieri debet.



- 5 Appellatio si rationabili causa nititur, producit effectum tum suspensum, tum deuolutiuum.
- 6 Littere appellationis, quæ vulgò apostoli dicuntur, vel sunt dimissoriae, vel refutatoriae, vel reuerentiales.
- 7 Tempus totum exercenda, ac finienda appellationis annus est: si causa impeditur incidit, biennium.
- 8 Iniuste appellans, ad expensas litis & alia damna Adversario resarcienda obligatur.
- 9 Index suspectus canonico iure recusari potest; ac peti, ut arbitri partium consensu statuatur.
- 10 Regularibus denegatur appellatio, nisi manifestum sit, eos à praelatis suis grauari.

**A**ppellatio est prouocatio à sententia, vel alio Superioris grauamine ad alium maiorem Iudicem, seu Magistratum, sicuti colligitur ex c. placuit, 2. quæst. 6. Quod remedium ad iustam defensionem, & vt præsidium innocentiae institutum est; non ad defensionem iniquitatis, c. cum speciali, §. porro, de appellat. Quare si causa vel ipsius appellantis antecedente confessione, vel alio quouis modo notoria sit, appellationi deferendum non est, cit. c. porro. Item, si contra absentem ob veram contumaciam sententia lata sit, appellans ab ea non auditur, iuxta l. 1. Cod. Quorum appellationes non recipiuntur.

2 His adde primò; Ab arbitris appellari non posse, si partium consensu delecti fuerunt, sicuti habetur in l. 1. C. de arbitris, & docet S. Th. 2. 2. q. 69. a. 3. ad 2. Secundò, A summo Principe appellari non posse: cum is Superiorem non habeat, ad quem prouocetur, iuxta l. 1. ff. A quibus appellari non licet. Eademque ratio est, si à summo Principe alicui causa delegata sit, remota appellatione, cit. l. 1. §. ult. & c. super, de offic. iudicis delegati, c. pastoralis, de appellat. Inferior autem, siue Superiorem recognoscens, quamuis sit legatus Papæ, non potest causam committere, appellatione remota, aut alium iuris ordinem immutare, sicuti docet Abb. in c. 1. de re scriptis, n. 1. Denique in eadem causa non nisi bis appellare concessum est; tertio autem appellans non auditur, l. vn. C. Ne liceat in vna causa, & c. c. directæ, c. sua, de appellationibus.

3 Duplex est appellatio; Vna iudicialis, altera extra iudicialis, vti notauit Gl. summaria communiter recepta super tit. de appellat. Appellatio iudicialis de his instituitur, quæ circa iudicium accidunt: quamuis ciuili iure non nisi à sententia definitiua appellari possit; non item ab interlocutoria, l. ante, C. Quorum appellationes, & c. præterquam si eius grauamen per appellationem à definitiua reparari non possit: quam regulam hodie approbatam reperies in Trident. sess. 13. c. 1. de reform. & sess. 24. c. 10. de reform. Extra iudicialis appellatio est, quæ extra iudicium interponitur, ob aliud quodcunque grauamen illatum, vel inferendum. Vt si beneficium alteri collatum sit in meum præiudicium, c. concertatione, de appellat. in 6. Item ne electio, collatio beneficij, & c. indebitè fiat, c. considerauimus, c. cum nobis, de elect. Vel vt postulatio alicuius ad Prælaturam, propter bonum publicum admittatur, vel aliqua dispensatio concedatur, cuius petendæ iusta causa subest, idèoque indebitè denegatur; possum querelam ad Superiorem eius, qui iniuste negat, deferre, iuxta doctrinam Abb. in cap. bonæ, 1. num. 14. de postul. Prælat. & c. pastoralis, eod. tit. n. 17. Sanchez lib. 3. disp. 10. q. 3.

4 Vtrique appellationi tum iudiciali, tum extra iudiciali hoc commune est; quòd intra decem dierum spatium, à lata sententia vel alio grauamine, fieri debeat, iuxta Authen. hodie, Cod. de appellat. c. ad consultationem, de sent. & re iudicata, c. concertationi, de appellat. in 6. & docet S. Thom. 2. 2. quæst. 69. art. 3. ad 3. Quamuis à grauamine extra iudiciali, cum id in rem iudicatam non transeat, grauatus etiam post decendium audiatur, si per modum querelæ (tanquam remedium iuris communis & ordinarij) Superiorem adeat, eius

officium implorando, sicuti habetur in cit. c. concertationi, §. sed si, & notat. Abb. in c. cum sit Romana, num. 22. & c. bonæ, num. 10. differ. decimatertia, de Appellat. Sed sententia in iudicio lata, si intra decem dies per appellationem suspensa non fuit, transit in rem iudicatam, id est, facit auctoritatem rei iudicatæ, & tribuit ius plenum parti litiganti, nisi de iniquitate sententiæ certò constet, sicuti habetur in c. cum inter, vbi id notat. Abb. num. 7. de sent. & re iudicata; & consentit regula 207. ff. Res iudicata pro veritate accipitur. Quod maximè intelligendum esse, inquit Abb. in c. cum dilectus n. 5. de elect. in ordine ad Adversarium, qui intra tale tempus non appellando censetur sententiæ acquiescisse. Interim verò Superior ex officio inquirere potest, si ex obseruatione sententiæ imminet peccatum parti, pro qua iudicatum fuit: vt si alicui videatur beneficium Ecclesiasticum non canonice adiudicatum; idèoque iniuste illud possidere. Imò in matrimonio carnali semper audiri debet coniunx, si à sententia pro valore matrimonij lata velit appellare, & ostendere eius impedimentum; vel si appellet à sententia diuortij quoad vinculum, ostendendo, nullum impedimentum fuisse; cum in his casibus agatur de vitando peccato, sicuti notauit Abb. in c. 1. de concess. præb. & colligitur ex c. lator, & c. consanguinei, de sentent. & re iudic. vbi DD. aiunt, quod sententia in causa matrimoniali etiam post decendium non transit in rem iudicatam. Excipiuntur etiam causæ publicæ, seu ad Rem publicam attinentes, in quibus tota sententia ob noua instrumenta postea reperta, ex causa retractari potest, l. Imperatores, ff. de re iudicata.

Vtrique etiam tum iudiciali, tum extra iudiciali appellationi commune est, vt, si rationabili causa nitatur, ordinariè producat effectum suspensiuum, & deuolutiuum. Quamquam effectus suspensiuus præcipuè locum habet in appellatione iudiciali; præsertim quæ est à sententia definitiua: illa enim omnino suspendit iurisdictionem Iudicis, quoad illam causam, c. si à Iudice, eod. in 6. Et pendente appellatione nihil omnino innovari, nec sententia executioni mandari debet, l. vn. ff. Nihil nouari appellat. interposita, c. non solum, de appellat. in 6. In appellatione autem extra iudiciali tum demum reuocantur & rescinduntur acta, seu attentata post eam, si veritas causæ à Iudice appellationis cognita fuerit, iuxta cit. c. non solum, & c. Romana, §. cum autem, & seqq. eod. in 6. & tradit Abb. in cit. c. consulti, n. 2. n. ult. & cit. c. bonæ, eod. tit. & c. considerauimus, n. 1. de elect.

Deuolutiuus autem effectus in eo consistit, quòd Iudex, ad quem appellatur, priorem Iudicem inhibere, & ad se deuolutam causam ipse cognoscere, ac definire possit, c. si à Iudice, c. non solum, de appellat. in 6. Interdum tamen appellatio suspensiuum effectum non operatur; vt cum appellatur à sententia excommunicationis, vel similis censuræ, quæ executionem rei iudicatæ secum trahit, si absolute alicui inflicta fuit, c. pastoralis, §. verum, de appellat. & explicat Abb. ibid. num. 16. Operatur tamen effectum deuolutiuum, vt Iudex recipiens appellationem, seu querelam, causam & iustitiam inflictæ excommunicationis cognoscat, iuxta Gl. in cit. §. verum, ver. cum executionem. Abb. in c. consanguin. num. 9. de sentent. & re iudicata. Præterquam, quòd declaratoria sententia, per quam Iudex aliquem pronuntiat in excommunicationem incidisse, per appellationem etiam suspendi solet, sicuti docet Nau. consil. 6. num. 2. de sent. excom. edit. 2.

Porro intra triginta dies, numerandos à die latæ sententiæ, (si intra decendium appellatum fuerat) litteræ, quæ vulgò apostoli dicuntur, instantè petende sunt à Iudice à quo appellatur, ad eum qui de appellatione cogniturus est: alioquin qui appellauit, censetur appel-



lationi renuntiasse, spectato iure communi, c. ab eo, de appellat. in 6. Clem. quamvis rigor, eod. tit. l. iudicibus, C. eod. Harum literarum tres species affert Abb. in c. bonæ, num. 9. de appellat. Gl. in c. i. eod. tit. in 6. vel enim sunt *dimissoria*, quibus Iudex appellationi defert, & causam ad Superiorem ablegat; vel *refutatoria*, quibus appellationi non defert, sed iniquam asserit: vel *reuerentiales*, quibus defert quidem, sed non tam ob meritum causæ, quam ob reuerentiam Superioris, ad quem appellatur. Sed & in appellatione extraiudiciali, instituta ob grauamen illatum vel inferendum, *apostoli* peti solent, si sit, qui eos dare possit; aliàs non, sicuti notat Gl. in c. i. de appellat. in 6. ver. vel extra, Abb. in cit. c. bonæ, num. 8. differ. 4. Adde, si quis in præsentia Iudicis appellare non possit, concessum esse appellare coram Notario, vel duobus viris honestis; qui Tabellionis vicem supplent, sicuti ex communi docet Abb. Clem. si à iudicibus, n. 4. de appellat. Sa ver. actus iudicialis, de appellat. n. vlt.

7 Tempus verò totum exercendæ, & finiendæ appellationis, annus est: si causa impeditenti incidit, biennium: inter quod tempus appellans curare debet, vt causa apud Iudicem appellationis terminetur; alioquin sententia prioris Iudicis (si appellatio iudicialis fuit) transibit in rem iudicatam, iuxta Authent. ei qui, Cod. de tempor. & reparationibus, c. cum sit Romana, de appellat. Clem. sicut, eod. tit.

His aliqua addenda: I. Si appellans intermittat suam appellationem prosequi, nihilominus Iudex, ad quem causa deuolu a est, in ea procedere potest; sicuti notat Abb. in c. ex parte, 12. de rescript. quia nemo debet cum alterius præiudicio consilium mutare.

8 II. Qui iniuste appellat, videlicet vt tempus exequendæ sententiæ differat, omni iure obligatur ad expensas litis, & alia damna Aduersario illata; imò propter illam calumniam etiam puniri potest, vt docet Abb. in c. 2. n. 1. & c. de priore, n. 7. de appellat. Sed & peccat Sutione nititur, ac manifestò frivola, & iniusta est, sicuti notauit idem Abb. in c. de priore, num. 2. de appellat. Quare etiam pars aduersa instare poterit, vt Iudex, ad quem à sententia definitiua appellatum fuit, eam prosequatur;

quando id ipsius interest, videlicet ad maiorem confirmationem causæ suæ, sicuti notauit Abb. in c. accepta, n. 4. de appellat. Alioquin verò, si Rei conuenti nihil interesse videatur, sufficit consensus Actoris, vt causa ad Iudicem, à cuius v. g. interlocutoria appellatum fuit, remitti possit, sicuti notat. Gl. & DD. communiter in cit. c. accepta.

III. Secundum ius canonicum, Iudex, si parti litiganti suspectus sit, v. g. quia Aduersarij consanguineus est, recusari potest; & tunc arbitri communi consensu statuendi sunt, qui causam recusandi, an iusta sit, necne, cognoscant; & si iusta causa suspicionis ac recusationis videatur, tunc cognitio ad Superiorem Iudicem ableganda, vel cum consensu recusatoris alteri committenda est, sicuti habetur in c. cum speciali, de appellat.

IV. Cum appellatione similitudinem gerit, querela simplex, quæ ad Superiorem interdum deferitur ob denegatam iustitiam ab inferiore Iudice debitè requisito; modò causa cæpta non sit; alioquin, si in eius processu iustitia denegetur, vel causa nimis protrahatur, appellationi locus erit, vt notauit Andr. Gaill. lib. 1. obseruat. 27. n. 3. Porro, quòd Iudex negligens litem suam faciat, & ad damna parti læsæ illata condemnari debeat; imò & ab officio remoueri possit, si magna eius negligentia sit, docet idem Gaill. num. 7. & dixi supra hoc tract. c. 2. num. 10.

V. Quæ de appellatione extra, & intra iudicium, ac Iudicis suspecti recusatione dicta sunt, locum etiam habent in causis Regularium; modò manifestum sit, eos grauari, seu iniuriam pati, c. licet, de offic. Ordinarij, c. de Priore, de appellat. Alioquin verò denegatur appellatio Religiosis; ne eius prætextu à Prælatorum suorum obedientia, quam voto promiserunt, se facile subducant, iuxta c. ad nostram, c. irreprehensibilis, c. cum speciali, de appellat. & videri potest Sanchez lib. 6. moral. c. 8. q. vlt.

Atque hæc de Iudiciis, & tota materia iuris, ac iustitiæ ad laudem Dei omnipotentis, Beatiss. Virginis Mariæ, SS. Apostolorum Petri, & Pauli, S. Ignatij fundatoris, ac parentis Societatis Iesv, aliorumque Sanctorum scripta sunt, Amen.









A 067/128




UNIVERSIDAD DE SEVILLA



600149890

i 23772104











卷一百二十八



+ colorchecker classic



+  
calibrite

mm